


Kupia



Kupia: Kupia New Testament (New Testament)

Kupia

Kupia: Kupia New Testament (New Testament)

copyright © 2018 Wycliffe Bible Translators, Inc.

Language: Kupia

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files dated 6 May 2025
7ccb2690-4432-5e86-88c1-f8ee976f30f4

Contents

మత్తయి	1
మార్కు	65
లూకా	107
యోహాను	186
బారికుల్ కమెంట్	238
రోమా	301
1 కొరింధి	333
2 కొరింధి	360
గలతీ	378
ఎఫెసీ	389
పిలిప్పీ	400
కొలొస్సీ	407
1 డెస్సలొనీ	414
2 డెస్సలొనీ	421
1 తిమోతి	425
2 తిమోతి	434
తీతు	440
పిలేమోను	444
ఎబ్రీయుల్	446
యాకోబు	470
1 పేతురు	478
2 పేతురు	487
1 యోహాను	492
2 యోహాను	500
3 యోహాను	501
యూదా	502
ప్రకటన	505

మత్తయి సుబుమ్ కబుర్

మత్తయి రెగిడ్డి సుబుమ్ కబుర్

యేసుక్రీస్తుచి వంసుమ్ వర్స తెన్ రెగిడ్డిసి
(లూకా 3:23-38)

1 అబ్రాహామ్ చి సెకుమ్ తె జెర్మిలో దావీదు రానొచి వంసుమ్ తె యేసుక్రీస్తు జా జెర్మిలన్. జోచి వంసుమ్ ఇసి జలి.

2 అబ్రాహామ్ ఇస్సాకుక పాయిలన్. ఇస్సాకు యాకోబుక పాయిలన్. యాకోబు యూదాక చి జోచి అన్సూసీక బాపుడ్డివొక పాయిలన్.

3 యూదా తామారు మెలి తేర్పి తెన్ పెరెసుక చి జెరహాక పాయిలన్.

4 పెరెసు ఎస్రొముక పాయిలన్. ఎస్రొము అరాముక పాయిలన్. అరాము అమ్మినాదాబుక పాయిలన్.

5 అమ్మినాదాబు నయస్సొనుక పాయిలన్. నయస్సొను సల్తొనుక పాయిలన్. సల్తొను రాహాబు మెలి తేర్పి తెన్ బోయజుక పాయిలన్. బోయజు రూతు మెలి తేర్పి తెన్ ఓబేదుక పాయిలన్. ఓబేదు యెస్సయిక పాయిలన్.

6 యెస్సయి దావీదు రానొక పాయిలన్. ఈజో దావీదు రానొ ఊరియా మెలో ఎక్సిలోచి తేర్పి తెన్ సాలోమోనుక పాయిలన్.

7 సాలోమోను రెహాబాముక పాయిలన్. రెహాబాము అబీయాక పాయిలన్. అబీయా ఆసాక పాయిలన్.

8 ఆసా యెహోసాపాతుక పాయిలన్. యెహోసాపాతు యెహోరాముక పాయిలన్. యెహోరాము ఉజ్జయోక పాయిలన్.

9 ఉజ్జయో యోతాముక పాయిలన్. యోతాము ఆహాజుక పాయిలన్. ఆహాజు హిజ్కయోక పాయిలన్.

10 హిజ్కయో మనస్సేక పాయిలన్. మనస్సే ఆమోనుక పాయిలన్. ఆమోను యోసీయాక పాయిలన్.

11 పడ్డో యూదుల్ క బబులోను దేసిమి విరోదుమ్ సుదల్ దెర గెలి కాలుమ్, యోసీయా యెకోన్యాక చి జోచి బాపుడ్డివొక పాయిలన్.

12 యూదుల్ క బబులోను దేసిమిచి విరోదుమ్ సుదల్ దెర గెలి పడ్డో, యెకోన్యా నయల్లియేలుక పాయిలన్. నయల్లియేలు జెరుబ్బాబెలుక పాయిలన్.

13 జెరుబ్బాబెలు అబీహూదుక పాయిలన్. అబీహూదు ఎల్త్యాకిముక పాయిలన్. ఎల్త్యాకిము అజోరుక పాయిలన్.

14 అజోరు సాదోకుక పాయిలన్. సాదోకు ఆకిముక పాయిలన్. ఆకిము ఎలీహూదుక పాయిలన్.

15 ఎలీహూదు ఎలీయాజరుక పాయిలన్. ఎలీయాజరు మత్తానుక పాయిలన్. మత్తాను యాకోబుక పాయిలన్.

16 యాకోబు మరియచొ మున్సుసి జలో యోసేపుక పాయిలన్. మరియచి పెట్టి క్రీస్తు మెంతో యేసు జెర్మిలన్.

17 ఇసి, అబ్రాహామ్ తెంతో మొదోల్ కెర, దావీదు రానొ ఎదక, వర్స తెన్ మొత్తుమ్ చొష్ట తరుమ్లు జల. అన్నె, దావీదు రానొ తెంతో మొదోల్ కెర, యూదుల్ క బబులోను దేసిమి విరోదుమ్ సుదల్ కడ నిలి ఎద చొష్ట తరుమ్లు జల. బబులోను తె గెలి తెంతో అన్నె మొదోల్ కెర, క్రీస్తు ఎద కి చొష్ట తరుమ్లు జల.

యేసుక్రీస్తు జెర్మిలిసి
(లూకా 2:1-7)

18 *యేసుక్రీస్తు జెర్మిలిసి కిసి జలి మెలె, మరియుచ అయ్యునిసి, “అమ్చి బోదక తుక దెమ్చి” మెన యోసేవుక సంగిలి వడ్డె, జేవ్ దొగుల నే బెదితె అగ్గె, దేముడుచి[†] సుద్ది తిలి ఆత్మ తెన్ మరియు అంగి జలి.

19 మరియుచో మున్నుసి జంక తిలో యోసేవు, జా దస్సి జా అస్సి మెన నూన కెర, జో పున్నీమ్ జలోసా మాన్సుచి రిసా, వడ్డె మాన్సులచి మొక్కె జాక లాజ్ కెరుక నెన కెర, గగ్గోల్ నే జతె లుంకవ జాక ముల దెంక మెల ఉచర్లన్.

20 జో ఇసి కెరుక మెన ఉచర్తె తతికయ్, ప్రబుచో దూత ఎక్కిలో సివ్వు తెన్ జోక డిన కెర, “దావీదు రానొచి సెకుమ్చో ఓ యోసేవు, తుచి తెర్పి జతి మరియుక ఆననుక తుయి బి నాయ్. దేముడుచి సుద్ది తిలి ఆత్మనిక్కిక జా అంగి జా అస్సి.

21 జాచి పెట్టి ఏక్ పుత్తుసి జెర్మెదె. జోయ్యి జోచ ప్రజల్క జోవయించ పాపల్ తెంతో రచ్చించువ కెరెదె. జాచి రిసా, జోక ‘యేసు’ మెన నావ్ తి” మెన జో దూత సంగిలన్.

22 ఈంజ ఎత్కి కిచ్చొక జర్గు జలి మెలె, దేముడు జోచ[‡] కబుర్లు సంగిలోసాచి అత్తి సంగిలి కోడు నెరవెర్చువ జంకయ్ ఇసి జలి.

23 “ఈందె, విడ్డి బోద అంగి జయెదె, చి జాచి పెట్టి ఏక్ పుత్తుసి జెర్మెదె. జోక ‘ఇమ్మానుయేలు’ మెన నావ్ తిస్సె,”

జా నావ్చి అర్దుమ్ కిచ్చొ మెలె, దేముడు అమ్క తోడ్ తయెదె’.

24 జలె, యోసేవు నిజ తా ఉట్ట కెర, ప్రబుచో దూత జోక సంగిలి రితి, జోచి తేర్చిక ఆనన్లన్.

25 దస్సి, జాచి పుత్తుసి నే జెర్మితె ఎదక, జాచి తెన్ బెద నిజె నాయ్, జో జెర్మితికయ్, యోసేవు జోక ‘యేసు’ మెన నావ్ తిలన్.

2

తూర్పు దేసిమ్చ పండితుల్ యేసుక చజ బక్తి కెర్లెసి

1 హేరోదు రానో జా యూదయ ప్రదేసిమ్చి ఏలువ కెర్తె తిలి పొది, జా ప్రదేసిమ్చి బేత్లెహేమ్ పట్టుమ్తె యేసు జెర్మిలి పిమ్మట్, ఈందె, తూర్పు దేసిమ్చ పండితుల్ సగుమ్జిన్ యెరూసలేమ్ మెలి వెల్లి పట్టుమ్తె జా కెర,

2 “యూదుల్చో* రానో జంక జెర్మిలోసా కేనె అస్సె? తూర్పు పక్క జోచి సుక్కొక దెకిలమ్, చి జోక బక్తి కెరుక జా అస్సుమ్” మెన ప్రజల్క సంగితె తిల.

3 హేరోదు రానో ఈంజ కోడు నూన కెర, జో కి, జో తెన్ యెరూసలేమ్ పట్టుమ్చ ఎత్కిజిన్ కి ‘అన్నెక్ష్టో రానో జంక ఉచరెదె’ మెన బియె కెర, వంబ్ర జా.

4 దేముడు నిసాన యూదుల్చ వెల్లెల వూజర్లుక చి మోసే తెన్ దేముడు దిలి ఆగ్గుల్ సికడ్డన ఎత్కిజిన్క, బుకారా కెర, “క్రీస్తు కేనె జెర్మిక్ అస్సె?” మెన పుసిలన్.

5 జేవ్, “ఈంజ యూదయ ప్రదేసిమ్చి బేత్లెహేమ్ పట్టుమ్తె జెర్మెదె.

6 ‘ఓ యూదయ ప్రదేసిమ్చి బేత్లెహేమ్ పట్టుమ్, తుయి యూదయ ప్రదేసిమ్తె తిలి దాక్ పట్టుమ్ నెంజిన్.

కిచ్చొక మెలె, ఇస్రాయేలులు మెల అంచ ప్రజల్క ఏలువ కెర్లెసా తుచితె జెర్మెదె’

* 1:18 1:18 ‘ప్రబు’ మెన రెగిడ్డె, ‘ఎత్కిక ఏలువ కెర్లెసా’ మెలి అర్దుమ్ తయెదె. యెహోవ అబ్బొన్క కి యేసు వూత్తుక కి ‘ప్రబు’ మెనుల.

† 1:18 1:18 అప్పె తెంతో జోవయించ ‘దేముడు’ మెన రెగుడుమెదె. ఒగ్గర పూర్ణమ్ తెంతో జోక ‘యెహోవ’ మెన నావ్ తయెదె, గని యేసుచి జివితమ్చి రిసా రెగిడ్డె ఈంజ పుస్తకమ్చ సాచులు బుల్లె తిల పొదులె, ‘యూదుల్’ మెన జో పూర్ణమ్ నిసాన ప్రజల్ జోచి నావ్ దెర్పి నాయ్. ‘యెహోవ’ మెలి నావ్చి అర్దుమ్ కిచ్చొ మెలె, ‘ఎత్కి జెర్మిలోసా, ఎత్కి జివ్ దెతోసా, కెయెక తెయెక తతోసా’.

‡ 1:22 1:22 ‘జోచ కబుర్లు సంగిలన్’ మెలె, పూర్ణమ్ తెంతో కక్క ప్రబు నిసాన, జోచ కబుర్లు మాన్సుల్క జేవ్ సంగితి రిసా, జోచి ఆత్మనిక్కి జోవయించ దెయెదె. * 2:2 2:2 ‘యూదుల్’ మెలె, ‘అంచయ్ మాన్సుల్ జతు, ఎత్కి అంకయ్ జోకర్లు’ మెన ప్రబు పూర్ణమ్ నిసాన ప్రజల్. ముక్కిమ్క ఇస్రాయేలు దేసిమ్ జివుల. యూదుల్తె, జా ఇస్రాయేలు దేసిమ్, యేసు మాన్సు జా జెర్మిన్, జా బుల్లె తిలన్. † 2:4 2:4 ‘క్రీస్తు’ మెలె, దేముడు జీవడ్డె దొర్పు జలో రచ్చించువ కెర్లెసా.

దేముడుచ కబుర్లు సంగిలో పూర్ణమచొ ఎక్కిలోచి అత్తి రెగ్గ అన్న” మెన జబాబ్ దిల.

7 తెదొడి హేరోదు రానొ తూర్పు దేసిమి తెంతో అయిల పండితుల్ క గుట్టు తెన్ బుకారా కెర, జేవ్ దెకిలి సుక్కి కెయ దీసిలి గే నూన కెర,

8 “తుమ్ గెచ్చ, జోబోద కెనె అన్న గే సరిగా చజ దెక జా, అన్నె జా కెర, అంక సంగ. ఆవ్ కి గెచ్చ, జోక బక్తి కెరిందె” మెన మోసిమ్ తెన్ సంగ, జేక బేత్తెహేమ్ పట్టుమ్ తె తెద్రయిలన్.

9 జేవ్ పండితుల్ జో రానొచ కొడొ నూన కెర, బార్ జా గెతె తతికయ్, ఈందె, తూర్పు దేసిమి జేవ్ దెకిలి సుక్కి జేవ్ చి కంట అగ్గె ఇండ గెతె తా, జో బోద తిలో గేరిచి ఉప్పిరి టీవో జలి.

10 జా సుక్కి టీవో జలిసి దెక కెర, ఒగ్గర్ సర్నంతోనుమ్ జా,

11 జా గెరి పెన, మరియ అయ్యన్ తెన్ తిలో జో బోదక దెక, నెర్పు సేడ జోక జోకర, జోవయించ పెట్టెల్ ఉగ్గ కెర, బజార్, దూపుమ్, చెంగిలి వానిన తేలు, దనచ, బవుమానుమ్ క దిల.

12 బక్తి కెర్లి పిమ్మట్, “హేరోదు రానొతె అన్నె గెచ్చ నాయ్” మెన, సిమ్మతె దేముడు జేవ్ క జాగర్న సంగితికయ్, జేవ్ వేర వాటు జోవయించి దేసిమి బుల, ఉట్ట గెల.

యోసేపుక ఐగుప్తు వెయిలు దేసిమి తెద్రయిలిసి

13 జేవ్ తూర్పు దేసిమ్ చ ఉట్ట గెలి పిమ్మట్, ప్రబుచొ దూత ఎక్కిలో సిమ్మ తెన్ యోసేపుక డీన కెర, “హేరోదు ఈంజో బోదక మార గెలుక ఉచర్తయ్. జాచి రిసా, తుయి ఉట్ట, ఈంజో బోదక చి అయ్యన్ క కడ దెరన, ఐగుప్తు దేసిమి ఉట్ట గే. ఆవ్ తుక అన్నె సంగితి ఎద ఒత్త తా” మెన యోసేపుక జో దూత సంగితికయ్,

14 జో ఉట్ట కెర, అందరె బోదక చి అయ్యన్ క కడ దెరన, ఐగుప్తు దేసిమి ఉట్ట గెచ్చ,

15 హేరోదు రానొ మొర గెతి ఎదక ఒత్త తా గెల. దేముడుచ కబుర్లు సంగిలో పూర్ణమచొచి అత్తి సంగిలి కొడొ నెరవెర్చుప జంకయ్ ఇసి జగ్గు జలి.

“ఐగుప్తు దేసిమి తెంతో అచొ పుత్తుక బుకార్లయ్.” మెన సంగిలిసి.

16 తెదొడి, ‘జా దీసి జా తిల పండితుల్ అంక మోసిమ్ కెర్ల’ మెన హేరోదు రానొ జాన కెర, ఒగ్గర్ కోపుమ్ ఆనన, యేసుక మారుక మెన, కెయ జెర్మ తయెదె గే జేవ్ పండితుల్ అగ్గె సంగిల కొడొక ఉచర, బేత్తెహేమ్ తె, వడ్డె జా పట్టుమ్ చి సుట్టునంతచ గావ్వొ ఎత్తితె, దొన్ని వెర్నల్ తెంతో మొదొల్ కెర, తొక్కి వయసుచ మున్నుబోదల్ ఎత్తిక మొరవ గెలన్.

17 ఇన్నెతెన్ కి యిర్షియా మెలో పూర్ణమచొచి అత్తి దేముడు సంగిలి కొడు నెరవెర్చుప జలి.

18 “రామా మెలి పట్టుమ్ చి ఎది దూరి తెంతో, ఒగ్గర్ ఏడుకుడు జతిసి, దుకుమ్ జతిసి, నూన్ల.

జేవ్ చ బోదల్ మొర గెలి రిసా,
రాహాయి ఏడ ఏడ సెంతుమ్ జయ్యె నాయ్.”

యోసేపు సొంత దేసిమి అన్నె ఉట్ట అయిలిసి

19 హేరోదు రానొ మొర గెలి వడ్డె, ఈందె, ప్రబుచొ దూత ఐగుప్తు దేసిమి యోసేపుక సిమ్మ తెన్ అన్నె డీన కెర,

20 “తుయి ఉట్ట, బోదకచి అయ్యన్ క కడ దెరన, తుమ్ చి ఇస్రాయేలు దేసిమి అన్నె ఉట్ట గెచ్చ. బోదక మార గెలుక ఉచర్లొసా మొర గెలన్” మెన సంగితికయ్,

21 జో ఉట్ట కెర, బోదకచి అయ్యన్ క కడ దెరన, ఇస్రాయేలు దేసిమి అన్నె ఉట్ట అయిల.

22 జలె, హేరోదు రానొ మొర గెలి రిసా, అప్పె జా యూదయ ప్రదేసిమి జోవో పుత్తుసి అర్కెలాయు ఏలుప కెర్తయ్ మెన నూన కెర, యోసేపు ఒత్త గెచ్చుక బియఁ కెర, అన్నెక్ సిమ్మ తెన్ ప్రబుచి అన్నెక్ కబుర్ నూన కెర,

23 గెలిలయ ప్రాంతుమ్ తె ఉట్ట గెచ్చ. నజరేతు గవ్వొ జా కెర, ఒత్త జతె తిల. ఒత్త జలిన్ తెన్,

“యేసుక ‘నజరేయుడు’ మెనుక జయెదె”

మెన పూర్ణమ దేముడుచ కబుర్లు సంగిలనచి అత్తి జో సంగిలిసి కొడు నెరవెర్చుప జంకయ్ ఇసి జగ్గు జలి.

3

యోహాను బాప్తిసుమ్ మెంతి ఉపదెసిమ్ దెతె తిలిసి
(మార్కు 1:1-8; లూకా 3:1-9,15-17; యోహా 1:19-28)

1 జా దీసల్తె, బాప్తిసుమ్ దెతో యోహాను మెలోసా బార్ జా,

2 “దేముడుచి రాజుమ్ పాసి జా అస్సె. జాకయ్ తుమ్చి పాపల్చి రిసా దుకుమ్ జా ఒప్పున, పాపుమ్బుద్ది ముల దాన” మెన యూదయ ప్రదేసిమ్చి బయిలె బుల బుల సాట్ట కెర్తె తిలన్.

3 జోచ కబుర్లు సంగిలో యెసయా పూర్ణుమ్చోచి అత్తి ఈంజో యోహానుచి రిసాయి దేముడు సంగిలి కోడు ఇన్నెతెన్ నెరవెర్చువ జలి.

“ఎక్కిలో అంచో బారికి రితో జా, అంచో అవాడ్ రితో జా.

ప్రబు జెతికయ్ వాటు తిన్నగ కెర్లి రితి,

తుమ్ ఎత్తిజిన్ బుద్ది జా మెన,

బయిలె ప్రదేసిమి తా కేక్ గల సాట్టు కెరెదె.”

4 ఈంజో యోహాను ఒంటచ రోమల్క పాలల్ గలన, చామ్క కెర్లి పట్టు నెడిమి బందన తయెదె. చిట్టల్చి ఒండెడ్ తేల్ జో కయెదె.

5 జా దీసల్తె, యెరూసలేమ్ పట్టుమతెచ మాన్సుల్ కి, జా ఒంటి యూదయ ప్రదేసిమ్చ మాన్సుల్ కి, ఒంటి యోర్దాను మెంతి గాడు పాసిచ మాన్సుల్ కి, యోహానుతె జా కెర,

6 జేవ్ కెర్ల పాపల్ దుకుమ్ తెన్ ఒప్పున ఎదార్దుమ్ సంగ, యోర్దాను గడ్డె జోచి అత్తి బాప్తిసుమ్ నజన్తె తిల.

పరిసయ్యుల్క యోహాను గోల కెర్లిసి

7 *పరిసయ్యుల్క కి, †సద్దాకయ్యులుక కి, ఒగ్గరజిన్ జా బాప్తిసుమ్ నజనుక జెతిసి యోహాను దెక కెర, “అయివోచి రితి విస్సుమ్ పెట్టి తిలన, తుమ్! దేముడు కెర్లి సిచ్చ పిట్టనుక ఉచరుక మెన తుమ్క సికడ్లసా కొస్సె?”

8 తుమ్ కెర్ల పాపల్ ముల దా, చెంగిల్ బుద్దితె ఇండ, ఆత్మచి పంటో దెర.

9 పిమ్మట్, ‘అబ్రాహామ్ అమ్క అబ్బో జయెదె, చి రిసా దేముడు తెన్ బెద అస్సుమ్’ మెన తుమ్క తూమ్ ఉచరన, సొంత గవురుమ్ సంగనుక నాయ్. కిచ్చొక మెలె, ఇన్నెచ పత్రల్ తెన్ కి దేముడు అబ్రాహామ్చి రిసా బోదల్క జెర్చువుక తెరె, మెన తుమ్క ఆవ్ సంగితసి.

10 ఈందె, అప్పె కి ప్రబు కురాడు వాండి కెర, రూకుక బుంది కండితి రితి, కురాడు దెర టీవో జా అస్సె. జలె, చెంగిల్ పంటో నే దెర్టో, ఎత్తి రూకుక కండ కెర ఆగితె గలుల” మెన, జేవ్క యోహాను సంగిలన్.

11 తెదెడి, ప్రజెల్క యోహాను “తుమ్ కెర్ల పాపల్చి రిసా తుమ్ దుకుమ్ జా ముల దెతి గుర్తుకయ్ ఆవ్ తుమ్క ఇసి పానితె బాప్తిసుమ్ దెతసి. గని, అంచి పడ్డో అన్నెక్లో అప్పె జెతయ్. జో అంచి కంట వెల్లో, జోక అదికారుమ్ ఒగ్గరి. జోచ జోడ్లి వయుక జలెకు, ఆవ్ విలువ నాయ్. జో, †దేముడుచి సుద్ది తిలి ఆత్మ తెన్ చి ఆగి తెన్ తుమ్క బాప్తిసుమ్ దెయెదె.

12 జోచి పూన్తి సూపు జోచి అత్తి అస్సె, చి జోచి కెల్లి సుబ్రుమ్ కెర, జోక కామ్క జెతికయ్ గోదుమ్ పంటో గుడ్డె కెర్ కొట్టుతె కుడవనెదె, చి కో విజవుక నెతిర్లి ఆగితె పోటు గల, డయ గెలెదె” మెన సంగిలన్.

యేసు బాప్తిసుమ్ నజన్సిసి
(మార్కు 1:9-11; లూకా 3:21-22)

* 3:7 3:7 పరిసయ్యుల్ చి సద్దాకయ్యులు యూదుల్క ముక్కిమ్చ వెర్లిల మాన్సుల్ జవుల. ఎత్తిక వెర్లిల పూజర్లు తెన్ యూదుల్చి వెల్లి నలతె వెసుల. జేవ్ దీసల్తె ముక్కిమ్క జెచ్చె, వాసి తెన్ దేముడు దిలి అగ్గల్ సికడ్ల తెన్, దేముడుచి నిదానుమ్ ప్రజెల్క సికడుక.
† 3:7 3:7 సద్దాకయ్యులు మెలి జేవ్ దూతల్ అస్సె మెన నంపజతి నాయ్. మొర గెలన ఉటుల మెన నంపజతి నాయ్. జేవ్ కి యూదుల్ ముక్కిమ్చ ఎక్కి జటు. జేవ్ పరిసయ్యుల్ తెన్ బెద ఎదివాట్ నుటు యేసుప్రజుక పరిచ్చ కెర్ల. ‡ 3:11 3:11 ‘దేముడుచి సుద్ది తిలి ఆత్మ’ మెలి, యోహాచ దేముడు అబ్బోచిచి కి యేసు దేముడు పుత్తుచిచి కి జయెదె.

13 జా నమయుమి, ఈంజ బాప్తిసుమ్ నజనుక మెన యేసు గలిలయ ప్రాంతుమ్ తెంతో ఉట్టు జా కెర, యోర్దాను గడ్డె యోహానుతె అయ్లన్.

14 యోహాను జోక దెక కెర, “అవ్ తుచి అత్తి బాప్తిసుమ్ నజనుక అస్సె. తుయి కిచ్చొక అంచితె బాప్తిసుమ్ నజనుక జెతసి? బెదె నాయ్” మెన యేసుక సంగితికయ్,

15 యేసు “అల్లె, అప్పెచి మట్టుక ఇసి జర్గు జవున్. దేముడుచి నీతి ఎత్తి, ఇసి నెరవెర్చువ కెరుక అమ్క చెంగిలి” మెన యేసు జబాబ్ దెతికయ్, యోహాను జోక బాప్తిసుమ్ దిలో.

16 యేసు ఈంజ బాప్తిసుమ్ నజన్లి బేగి, గడ్డె తెంతో బార్ జతికయ్, ఆదె, పరలోకుమ్ ఉగ్గి జలి, చి దేముడుచి నుద్ది తిలి అత్తు పార్వు పిట్టచి రితి జా ఉత్త జా కెర, యేసుచి ఉప్పిరి వెసిలిన్ జో దెకిలో.

17 “ఈందె, ఈంజొయ్ అంచొ ప్రేమ తిలో పూత్తు. ఇనాచి రిసా అంక సర్దనంతోసుమ్” మెన, ఇసి పరలోకుమ్ తెంతో సంగిలిన్చి అవాడ్ అయ్లి.

4

యేసుక సయ్తాన్చి అత్తి పరిచ్చ జలిసి

(మార్కు 1:12-13; లూకా 4:1-13)

1 తెదొడి సయ్తాన్చి అత్తి జోచి పరిచ్చ కెరవనుక దేముడుచి నుద్ది తిలి అత్తు, జోక కో నెంజిలి డొంగై కడ నిల్.

2 జలె, దొన్ని విస్సా పొదులు, దొన్ని విస్సా అందర్లు యేసు చువ్వె తతికయ్, జోక చూ కెర్తికయ్,

3 పావుమ కెరవుక ఉచర సయ్తాన్ జోతె జా కెర, “తుయి దేముడుచొ పుత్తుసి జలె, ఈంజెవ్ పత్తల్ పోడియె జతి రితి సంగు” మెలన్.

4 తెదొడి యేసు,

“ ‘ఎక్కి పోడియె తెన్ నాయ్, గని దేముడుచి చోడి తెంతో జతి ఎత్తి, కోడు తెన్ మాన్సుల్ జింక అస్సె’ మెన దేముడుచి కోడుతె రెగ్గ అస్సె” మెలన్.

5 తెదొడి సయ్తాన్ యేసుక దేముడుచి గుడి తిలి యెరూసలేమ్ పట్టుమ్తె కడ నా కెర, జా దేముడుచి గుడితెచి వెళ్ళొచ్చుచి ఉప్పిరి జోక టీవో కెర,

6 “తుయి దేముడుచొ పుత్తుసి జలె, ఎట్టోతో డేవు.

‘తుక ప్రమాదుమ్ నే జతి రితి, జోచ దూతల్ క దేముడు ఆడ్ర దా తెద్రయెదె’,

‘తుచ చట్టో పత్తె నే లయతి రితి, జేవ్ దూతల్ జోవయిం చ అత్తి చంపొ కెర, తుక ఉక్కులనుల,’

మెన దేముడుచి కోడుతె రెగ్గ అస్సె” మెన యేసుక సంగిలన్.

7 సయ్తాన్ దస్సి సంగితికయ్, యేసు జోక

“ ‘ప్రబు జలొ తుమ్చొ దేముడుక

పరిచ్చ కెరుక నాయ్’

మెన అన్నెక్ టాన్తె రెగ్గ అస్సె” మెన సయ్తాన్క సంగిలన్.

8 పడ్డె అస్సె, ఒగ్గర్ డోక్ తిలి ఏక డొంగుర్ ఉప్పిరి సయ్తాన్ యేసుక కడ నా కెర, ఈంజ లోకుమ్ చ రాజిమ్లు ఎత్తి, జేవ్చి విలువ ఎత్తి, జోక దెకవ కెర,

9 “తుయి నెర్చు నీడ అంక జొకరెగిస, ఈంజ ఎత్తి, తుక దెయిందె” మెన యేసుక సంగిలన్.

10 యేసు జోక, “సయ్తాన్, తుయి ఉట్ట గో. కిచ్చొక మెలె,

‘ప్రబు జలొ తుమ్చొ దేముడుకయ్ జొకర,

జో ఎక్కిలోచి సేవ తుమ్ కెరుక అస్సె’

మెన రెగ్గ అస్సె.” మెన సంగిలన్.

11 తెదొడి సయ్తాన్ జోక ముల దా ఉట్ట గెలన్, చి ఈందె దేముడుచ దూతల్ జా కెర, యేసుక సావైచన కెర, నుక్కుమ్ కెర్ల.

యేసు గలిలయ ప్రాంతుమ్తె బన జలిసి

(మార్కు 1:14-15; లూకా 4:14-15)

12 ఒత్త తెంతో 'బాప్తిసుమ్ దెతో యోహానుక జేలి కెర జేల్తె గల అస్తి' మెన యేసు నూన కెర, ఉత్తర పక్క గలిలయ ప్రాంతుమ్తె బుల ఉట్ట గెచ్చ కెర,

13 ఒత్తచి నజరేతు మెలి జో వడ్డిలి గావ్ తెంతో ముల దా కెర, జెబులూను చి నప్తాలి మెల పూర్ణులచ నవ్వొ దిలి ప్రాంతుమ్తెచి సముద్రుమ్చి పాసిచి కపెర్నహూమ్ మెంతి పట్టుమ్తె ఉట్ట జా జితె తిలన్.

14 దేముడుచ కబుర్లు సంగిలో యెసయా పూర్ణుమ్చెచి అత్తి జో సంగిలి కోడు ఇసి నెరవెర్చువ జలి.

15 "జెబులూను ప్రదేసిమి, నప్తాలి ప్రదేసిమి,
యోర్దాను గాడు ఒత్తల్తో తిలి వెల్లి సముద్రుమ్చి పక్క,
పూర్ణుమ్ యూదుల్ నెంజిలన జితె తిలి
గలిలయ ప్రాంతుమ్తె తిల ప్రెజల్

16 అగ్గె అందర్బుద్ది తెన్ తిలె కి, అప్పె వెల్లి ఉజిడి దెక అస్తి.

జేవ్ పాపుమ్ తెన్ మొర గెల రిత జా తిలె కి,
జోవయింక రాత్ పాయిలి రితి జా,
పరలోకుమ్చి ఉజిడి జోవయింక డీస అస్సి"
మెన సంగిలి కోడు.

17 జా దీసి తెంతో, జా ప్రాంతుమ్చ ప్రెజల్క యేసు బోదన కెర్లసి కిచ్చొ మెలె, "పరలోకుమ్చి రాజిమ్ ఇన్నె పాచ జా అస్సి. జాచి రిసా, తుమ్చ పాపల్చి రిసా దుకుమ్ జా, పాపుమ్బుద్ది ముల దాస" మెన బోదన కెర్లె తిలొ.

**యేసు తొలితోచ సిస్సుల్క బుకార్లసి
(మార్కు 1:16-20; లూకా 5:1-11)**

18 యేసు జా గలిలయ సముద్రుమ్చి గట్టుతె ఇండితె తా, 'పేతురు' మెన ఆసిమ్ నావ్ తిలొ సీమోను, చి జోవో అంద్రెయ మెలొ బావొసి దొగులక దెకిలన్. జేవ్ దొగుల సముద్రుమ్తె వల గల్తె తిల. జేవ్ జాలర్లు.

19 జలె, జోవయింక దెక కెర, "జలె, తుమ్ అంచి పట్టి జా, చి మాన్సుల్ అంక నంపజతి రిసా తుమ్ జోవయింక అంచితె కడ అన్త జాలర్లు జతి రితి, తుమ్క ఆవ్ కెరిందె" మెన సంగిలన్.

20 ఇసి సంగ బుకార్లి బేగి, జేవ్ జోవయించ వలల్ ముల దా కెర, జోచి పట్టి గెచ్చ, జో తెన్ బులుక దెర్ల.

21 ఒత్త తెంతో ఇదిల్ దూరి గెచ్చ, యాకోబుచి యోహాను మెల అన్నె దొగుల అన్నొబావొక యేసు దెక జేవ్క బుకార్లన్. జేవ్ దొగుల జెబెదయి మెలొ అబ్బొసి తెన్ జోవయించి దోసితె వెన తా, జోవయించ వలల్ చెంగిల్ కెర్లె తిల.

22 యేసు బుకార్లి బేగి, జోవయించొ అబ్బొన్క చి దోసెక ముల దా కెర, జోచి సిస్సుల్ జతి రితి జోచి పట్టి గెల.

యేసు మాన్సుల్క చెంగిల్ కెర్లసి

23 యేసు జా ఒండి గలిలయ ప్రాంతుమ్తె బుల బుల, యూదుల్చ ఒత్తచ నబ గెరలె గెచ్చ గెచ్చ, "పరలోకుమ్చి రాజిమ్ ఇత్తల్ పాచ జా అస్సి" మెన సుబుమ్ కబుర్ సంగ, ప్రెజల్క, కిచ్చొ జబ్బు తిలె కి, జబ్బులు బాదల్ ఎత్తి గెచ్చయలన్.

24 ఒండి సిరియ దేసిమ్చ ఎత్తిజిన్ జోచి రిసా నూస్, చి రగరగాల్చ జబ్బుల్ తిలనక, జొర్డొల్ నొప్పుల్ తిలనక, బూతల్ దెర్లనక, మోర్నల్క, చి అత్తో చట్టొ కదుల్ కెరుక నెతిర్లనక, ఇనచ ఎత్తిక యేసుతె కడ అన్తికయ్, జోవయింక చెంగిల్ కెర్లన్.

25 ఈంజ ఎత్తిచి రిసా, గలిలయ ప్రాంతుమ్ తెంతో, దెకపొలి ప్రాంతుమ్ తెంతో, యెరూసలేమ్ పట్టుమ్ తెంతో, యూదయ ప్రదేసిమ్ తెంతో, పడ్డొక యోర్దాను గాడు ఒత్తల్తో తెంతో, ఒగ్గర్జిన్ మాన్సుల్ జట్టు తెన్ జోచి పట్టి గెల.

5

యేసు మెట్టయ్ ఉపీర్ కెర్ల బోదన

(లూకా 6:20-23)

1 యేసు జేవ్ ఒగ్గర్జిన్ పట్టి అయలనక దెక కెర, ఏక్ మెట్టయ్ వెగ వెసితికయ్, జోచ సిన్పుల్ జోతె జెతికయ్

2 జో చోడి పుటవ జేవ్ ఎత్తిజిన్క బోదన కెరుక దెర్లన్.

3 “అమ్ ఆత్తె ఎద్దర్ తొక్కిచ నుదల్ మెన కో చిననుల గే, జోవయింక చెంగిలి. కిచ్చొక మెలె, దన మాన్సుల్కయ్ పరలోకుమచి రాజిమతె వాట తయెదె.

4 “దుకుమ్ సేడ్డనక చెంగిలి, కిచ్చొక మెలె, దేముడు జోవయింక బురియవెదె.

5 “సొంత గవురుమ్ నే ఉచరంతనక చెంగిలి. కిచ్చొక మెలె, *జేవ్ ఈంజ బూలోకుమతె ఏలువ కెరుల.

6 “చూ తాన్ గెతె ఎదక మాన్సుల్ కీసి అన్సిమక పితిన్క ఆస జవుల గే, దస్సి, పున్సిమ్ ఇండుక కో ఎక్కి ఆస జవుల గే, జోవయింక చెంగిలి. కిచ్చొక మెలె, దేముడు జోవయింక పున్సిమ్ దా సర్దనంతోసుమ్ కెరెదె.

7 “మాన్సుల్క కన్యారుమ్ దెకితనక చెంగిలి. కిచ్చొక మెలె, దేముడు జోవయింక కన్యారుమ్ దెకెదె.

8 “పెట్టి నుద్ది తతనక చెంగిలి. కిచ్చొక మెలె, జేవ్ దేముడుక దెకుల.

9 “కోపుమ్ జలనక కో సేంతుమ్ కెర్లన జవుల గే, జోవయింక చెంగిలి. కిచ్చొక మెలె, దేముడుచ పుత్తర్లులు, మెన జోవయింక నంగుక జయెదె.”

10 “సత్తిమ్ ఇండితి రిసా కో అన్సె మాన్సుల్చి అత్తి అల్లరలు సిప్పులు సేడుల గే, జోవయింక చెంగిలి. కిచ్చొక మెలె, దన మాన్సుల్కయ్ పరలోకుమచి రాజిమతె వాట తయెదె.”

11 “తుమ్ అంచ మాన్సుల్ జలి రిసా తుమ్క మాన్సుల్ ఆరిక దూసుప కెర్లెగిన, అల్లర్ కెర్లెగిన, ఎత్తి రగల్ అబద్దుమ్ నంగెలిగిన, తుమ్క చెంగిలి.

12 జేవ్ దస్సి కెర్లె కి, సర్దనంతోసుమ్ తెన్ తా. కిచ్చొక మెలె, పరలోకుమతె తుమ్క వెల్లి బవుమానుమ్ దొర్లు జయెదె. పూర్లుమ్ కి, దేముడుచ కబుర్లు నంగెల మాన్సుల్ కి జేవ్ దన అల్లర్ కెర్లె.”

లోన్క చి ఉజిడిక టాలి

(మార్కు 9:50; 4:21; లూకా 14:34-35; 8:16)

13 “తుమ్ ఈంజ లోకుమ్క లోన్చి రితి జన్సె. గని జాగర్ల తెన్ తా, లోన్చి కారు గెలెగిన, జా లోన్ కీసి అన్నె కారు జయెదె? అన్నె కిచ్చొక కి కామ్క నే జయె. ఎత్తి వెంట గెలుక జయెదె. దస్సి వెంట గెలెగిన, మాన్సుల్ నుడుక జయెదె.”

14 “తుమ్ ఈంజ లోకుమ్క ఉజిడి జా అస్సన్. ఏక్ పట్టుమ్ మెట్టచి ఉప్పిరి తిలెగిన, జా పట్టుమ్క లుంకడుక నెంజె.

15 దస్సి, మాన్సుల్ దీవు లంబడ తిలెగిన, జా దీవుక నాడి గల్ల డంకితి నాయ్, గని దీవు కంబుమ్తె టేవుల, చి జా గెరి తిలన ఎత్తిక జా ఉజిడి కామ్క జయెదె.

16 తుమ్చి తెన్ కి దస్సి తంక అస్సె. తుమ్ చెంగెల్ బుద్ది ఇండితిసి మాన్సుల్ దెక, పరలోకుమ్ తిలో అబ్బొది జలో దేముడుక గవురుమ్ దెతు మెన, తుమ్చి పెట్టి తిలి ఉజిడి మాన్సుల్చి ముక్కె లగితి రితి తుమ్ ఇండ.”

పూర్లుమ్ దిల ఆగ్గుల్చి రిసా యేసు నంగెలి బోదన

17 “మోసే పూర్లుమ్చొచి అత్తి దేముడు రెగ్గయల ఆగ్గుల్ జలెకు, పూర్లుల్చి అత్తి నంగెల దేముడుచ కబుర్లు జలెకు, పెట గెలుక ఆవ్ అయలయ్ మెన తుమ్ ఉచర నాయ్. జా ఎత్తి నెరవెర్లువ కెరుకయ్ ఆవ్ అయలయ్, గని పెట గెలుక మెన తుమ్ ఉచర నాయ్.

18 కిచ్చొక మెలె, తుమ్క ఆవ్ కిచ్చొ కచితుమ్ నంగితసి మెలె, ఆగాసుమ్ బుయి పాడ్ జా గెతె ఎదక, మోసే పూర్లుమ్చొచి అత్తి రెగిడ్డిసి దేముడుచ †ఆగ్గుల్చి కొడొ పూర్తి నెరవెర్లువ జతె ఎదక, జేవ్తె ఎక్కి

* 5:5:5 ‘అకర్క’ మెలె, ఈంజ లోకుమ్ నొవర్ జతి రితి ప్రబు మార్కువ కెర్లె పొదిక. † 5:18 5:18 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయలి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగెచి పావ్ పుస్తకుమతె రెగ్గయ్ జా అస్సె. ఈంజ దెకవుక మెన కుపియ బాసతె నొయ ప్రమానుమతె మోసే పూర్లుమ్చొచి అత్తి రెగిడ్డి దేముడుచ ఆగ్గుల్ మెన రగ్గవ అస్సె.

కోడు కి ఎక్కి కామ కి పిట్ట నాయ్.

19 జాచి రిసా, ఈంజ అగ్గుల్ రితి కెర్తినక కో విలువ దెకితి నాయ్ గే, చి విలువ నే దెకితి రితి అన్నె మాన్సుల్క సికడుల గే, పరలోకుమచి రాజిమతె జో దాకు జవుల. గని కో జేవ్ కొడో రితి నిదానుమ్ కెర, దస్సి నిదానుమ్ కెరుక అన్నె మాన్సుల్క సికడుల గే, జెవ్వి పరలోకుమచి రాజిమతె గవురుమ్ జవుల.

20 తుమ్క అవ్ కిచ్చొ మెంతసి మెలె, మోసే తెన్ దేముడు దిలి అగ్గుల్ సికడ్డన చి పరినయుల్, కెర్తి కంట తుమ్ పున్నిమ్ ఇండెలికయ్ నెంజిలె, తుమ్ కచితుమ్ పరలోకుమచి రాజిమతె బెదున్ నాయ్.”

నీతిచి రిసా యేసు సంగిలి బోదన

21 ‘నరు అత్య కెర నాయ్. నరు అత్య కో కెర్తె, సిచ్చ జంక అస్సె’ మెన పూర్గుమచక సంగిలిసి తుమ్ సూన్తను.

22 అవ్, జలె, తుమ్క అన్నె కిచ్చొ సంగితసి మెలె, కక్క జలెకు కో జలెకు కోపుమ్ జలె, జో కోపుమ్ జలె సిచ్చ జతి తప్పు కెర అస్సె, కో జలెకు అన్నెక్లక నిస్కారుమ్ సంగిలె, వెల్లి సబచి అత్తిచి సిచ్చ జతి తప్పు కెర అస్సె, కో జలెకు అన్నెక్లక ‘తుయు గడ్డు’ మెలి ఎదిలి కోడు సంగిలె, వెల్లి ఆగిచి గొయిచి సిచ్చ జతి తప్పు కెర అస్సె.

23 జలె, తుమ్చితె కో గే కిచ్చొగె అర్పితుమ్ దెంక మొదొల్ కెర తిలె జవున్, ఈంజో మాన్సు కిచ్చొగె కెర్తినచి రిసా అన్నెక్ల ఇనాచి ఉప్పరి కోపుమ్ తెన్ అస్సె మెన ఈంజో ఏదన్న కెర్తెగిన,

24 ఈంజో అర్పితుమ్ దెతిసి బలి దెతి టాన్తె నే దెతె, పాసి ముల దా కెర, తొలితో గెచ్చ, జో అన్నెక్ల తెన్ సేంతుమ్ కెరన, అన్నె జా కెర, ఇన్నెచి అర్పితుమ్ ఈంజో దెవును.

25 “తుమ్చితె ఎక్కిలోక కో గే నేరిమ్ వయడ తిలెగిన, తుమ్ బెద గెతె తా తీర్పు కెర్తి గెరి నే పావితె అగ్గె, జో నేరిమ్ వయడ్డె మాన్సు తెన్, నేరిమ్ జలొసా బేగి సేంతుమ్ జంక అస్సె. నెంజిలె నేరిమ్ వయడ్డెసా తుమ్క తీర్పు కెర్తొసాతె సార్ప కెర్తె, జో తీర్పు కెర్తొసా తుమ్క జమాన్సుచి అత్తి సార్ప కెర్తె, జో జమాన్సు తుమ్క జేలేతె గల దెయెదె.

26 దస్సి, తుమ్క అవ్ కిచ్చొ కచితుమ్ సంగితసి మెలె, తుమ్చితె కో సిచ్చ జవుల గే, ఆకరిచి కాసు ఎద కి పూర్తి తీర్పువ కెర్తె ఎదక, తుమ్క ములుక నెంజె.”

లంజెచి రిసాచి తీర్పు

27 “పడ్డె ‘తుమ్ లంజెకమె కెర నాయ్’ మెన సంగిలి కోడు తుమ్ అగ్గె తెంతొ సూన అస్సెన్.

28 గని అవ్ తుమ్క సంగితిసి కిచ్చొ మెలె, ఏక తేరబోదక దస్సి దెకుక కి కో దెకెదె గే, ఎక్కి దెకిలి రిసా, జోచి మెన్సుతె జా తెన్ లంజె కెర అస్సె.”

29 “జలె, తుమ్చితె కచి గే ఉజల్ అంకి జవున్ జోక పాపుమ్ కెరవ తిలెగిన, పాపుమ్ నే కెర్తి రిసా, జో జా అంకి కడ వెంట గెలి రితి జవున్. జోవయించ ఆగేతె తత్తన ఎత్తి తెన్ ఒండొయి మాన్సు వెల్లి ఆగి గొయేతె గలి జతి కంట, జోచి ఆగేతె తత్తన ఎక్కి జవున్ పిట్ట గెలి రితి జలె, జోక చెంగిలి.

30 దస్సి, తుమ్చితె ఎక్కిలోచొ ఉజల్ అతు జవున్ జోక పాపుమ్ కెరవ తిలెగిన, జా దీసి తెంతొ అన్నె దస్సి పాపుమ్ నే కెర్తి రిసా, జో అతు కండ గెలి రితి జా, జోచి తెంతొ వెంట గెలి రితి జవున్. కిచ్చొక మెలె, జోచ ఆగేతె తిల వాటల్ ఎత్తి తెన్ ఒండొయి మాన్సు వెల్లి ఆగి గొయేతె గలి జతి కంట, జోచ ఆగేతె తత్తన ఎక్కి అతు పిట్ట గెలి రితి జలె, జోక చెంగిలి.”

పెండ్లి జా ములవులి జలనచి రిసాచి తీర్పు

31 ‘కో జలెకు జోచి తేర్పిక ముల దెయెదె గే, జో జాక ముల దెంక మెన ఏక కార్గుమ్ రెగ్గె దెంక అస్సె’ మెన పూర్గుమ్ తెంతొ సంగిలి కోడు అస్సె.

32 గని అవ్ తుమ్క కిచ్చొ మెన సంగితిసి మెలె, జా తేర్పి లంజె బెలిన్క పిట్టవ, కో జలెకు తేర్పిక ముల దెయెదె గే, జోయ్యి జాక లంజె కెర్తయ్. అన్నె, మున్సున్ ముల దిలి తేరబోదక పెండ్లి జతోసా కో జలెకు, లంజె జతయ్.

అప్పిడ్డినచి రిసాచి తీర్పు

(మత్త 19:9; మార్కు 10:11-12; లూకా 16:18)

33 “అన్నె, ‘అరిక అప్పుడుక నాయ్, గని కిచ్చొ జవున్ కెర్తి రిసా కో గే ప్రమానుమ్ తిలిగిన, †ప్రబుక సత్తిమ్ కెర్తి రిసా జో మాన్సు జో సంగిలిసి జర్గు కెరుక అస్సె’ మెన పూర్గుల్క సంగిలి కోడు తుమ్ నూన అస్సున్.

34 గని అడ్ తుమ్క సంగితిసి కిచ్చొ మెలె, ఎద్దరె ఒట్టు గలన్క నాయ్. ‘పరలోకుమ్ సాచి’ మెన జవున్ ఒట్టు గల నాయ్. కిచ్చొక మెలె, జా †ఎత్తి అదికారుమ్ తిలో దేముడుచి సిజాననుమ్.

35 ‘బుయ్చి సాచి’ మెన జవున్, ఒట్టు గలన్క నాయ్. కిచ్చొక మెలె, జా దేముడు సుడితి పొద్దొ. అన్నె, ‘యెరూసలేమ్ పట్టుమ్ సాచి’ మెన జవున్, ఒట్టు గలన్క నాయ్. కిచ్చొక మెలె, *జా పరలోకుమ్చొ రానొ జలో దేముడుచి గుడిక నిసాన్ల పట్టుమ్.

36 అన్నె, ‘బోడిచి ఒటు జవున్’ మెననుక నాయ్. కిచ్చొక మెలె, ఎక్కిసెండి వాడో కి నీడి జతి రితి జలెకు, చొక్కిల్ జతి రితి జలెకు మార్పుప కెరుక తుమ్ నెతుర్పు.

37 జలె, తుమ్ ‘ఎ ఎ’ మెనుక అస్సె మెలెగిన, ‘ఎ ఎ’ మెన. తుమ్ ‘నాయ్’ మెనుక అస్సె మెలెగిన, ఎక్కి ‘నాయ్’ మెన. ఇన్నెక జీనీతిన సయ్తాన్ తెంతోయ్ జతయ్.”

అల్లర్ కెర్తినచి రిసాచి తీర్పు
(లూకా 6:29-30)

38 ‘ఏక్ మాన్సుచి అంకి జవున్ అన్నెక్కో కోపుమ్క కడ్డెగిన, జో కడ్డెసాచి అంకి కి జో అంకి గెలో మాన్సు గెచ్చు కడుక అస్సె. అన్నె, ఏక్ మాన్సుచొ దాంతు అన్నెక్కో పెట బగయ్లెగిన, ఈంజో కి జోచి దాంతు పెట బగవ గెలుక అస్సె’ మెన పూర్గుమ్ సంగిలి కోడు తుమ్ నూన అస్సున్.

39 జలె, అడ్ తుమ్క కిచ్చొ సంగితిసి మెలె, తుమ్క అల్లర్ కెర్తొసాక తుమ్ అల్లర్ కెర్పు నాయ్. మూర్పుడు జవున్ తుమ్చితె ఎక్కిలోక ఉజల్ గలి జవున్ వెట్టిగిన, దెబ్బ కయ్లొనా తుక్కె తా, జోచి డెబ్బి గలి కి జో అన్నెక్కో అన్నె వెటితి రితి, జోచి వక్క పన్నవుక అస్సె.

40 “అన్నె దన్నె, తుమ్చితె ఎక్కిలోక కో జలెకు తీర్పు కెర్తి గేరతెకడన, ఇనెతె సొక్క నజిలె, ఈంజో ఇనాచి కోటు కి దా గెల్పు.

41 కో జలెకు తుమ్చితె ఎక్కిలోక ‘ఏక్ మయిలు దూరి బెద జె’ మెన బలవంతుమ్ కెర్తెగిన, జో తెన్ ఈంజో దొన్నె మయిలు దూరి బెద గెస్సు.

42 కో జలెకు తుమ్చితె ఎక్కిలోక కిచ్చొ జవున్ నజిలె, దెంక. అన్నె, కో జలెకు తుమ్చితె ఎక్కిలోకె బదుల్ నజిలె, తుక నే దెయింద్ మెనుక నాయ్, దెంకయ్.”

విరోదుమ్ సుదల్క ప్రేమ కెర్తినచి రిసాచి తీర్పు
(లూకా 6:27-28,32-36)

43 “అన్నె, ‘తుమ్చి తెన్ బెదితనక ప్రేమ కెర’ మెన, ‘తుమ్క విరోదుమ్ జలనచి ఉప్పిరి విరోదుమ్ తెన్ తా’ మెన సంగిలిసి నూన అస్సున్.

44 గని అడ్ తుమ్క సంగితిసి కిచ్చొ మెలె, తుమ్క విరోదుమ్ జలనక ప్రేమ కెర. తుమ్క అల్లర్ కెర్తనచి రిసా ‘చెంగిల్ జతు’ మెన ప్రార్దన కెర్తె తా.

45 తుమ్ ఇని కెర్తెగిన, తుమ్చొ పరలోకుమ్తె తిలో దేముడు జలో అజ్బొనచ పుత్తర్లు జలదు మెన డీసెదె. కిచ్చొక మెలె, గార్ సుదల్క కి చెంగిల్ సుదల్క కి రోజాక జో పొద్దు బార్ కెర్తయ్. సత్తిమ్ ఇండితనచి రిసా కి, పాపుమ్ ఇండితనచి రిసా కి పాని పెటయ్తయ్.

46 ఎక్కి తుమ్క ప్రేమ కెర్తనకయ్ తుమ్ ప్రేమ కెర్తెగిన, తుమ్క కిచ్చొ పున్నిమ్ జా? †సిస్టు నజితన కి దస్సి కెరుల.

‡ 5:33 5:33 ‘ప్రబు’ మెలె కి, ‘దేముడు’ మెలె కి, ‘పరలోకుమ్చొ రానొ జలో ప్రబు’ మెలె కి, ఎక్కిలోచి రిసా సంగితయ్. జేవ్ తిన్ని ఎక్కిలోక తిన్ని నవ్వొ జయెదె. § 5:34 5:34 ‘ప్రబు’ మెలె కి, ‘దేముడు’ మెలె కి, ‘పరలోకుమ్చొ రానొ జలో ప్రబు’ మెలె కి, ఎక్కిలోచి రిసా సంగితయ్. జేవ్ తిన్ని ఎక్కిలోక తిన్ని నవ్వొ జయెదె. * 5:35 5:35 ‘ప్రబు’ మెలె కి, ‘ఎత్తి అదికారుమ్ తిలో దేముడు’ మెలె కి, ‘పరలోకుమ్చొ రానొ జలో ప్రబు’ మెలె కి, ఎక్కిలోచి రిసా సంగితయ్. జేవ్ తిన్ని ఎక్కిలోక తిన్ని నవ్వొ జయెదె. † 5:46 5:46 ‘సిస్టు’ మెలె, జా దేనీమక ఆక్రమించుచు కెర్తి రోమ దేనీమచి ప్రబుతుమ్చి వాట డబ్బుల్. జా ప్రబుతుమ్చి నాన్ తెన్ పన్ను నజితనక యాదుల్ నిస్కారుమ్ దెకుల.

47 ఎక్కి, తుమ్చ సొంత మాన్సుల్క ముద్దు కెర్తె, గని వేర మాన్సుల్క నాయ్ మెలె, మాములుమ్ మాన్సుల్ కెర్తెనిచి కంట జా కిచ్చో జిస్సిని! దేముడుక నేన్ల మాన్సులె దస్సి కెరుల.

48 తుమ్, జలె, సూన. పరలోకుమ్ తిలో అబ్బొసి జలో దేముడు కిసి ప్రేమక పూర్తి అస్సె గే, తుమ్ కి దస్సి ప్రేమక పూర్తి జా తంక అస్సె.”

6

దర్ముమ్ కిచ్చో బుద్ది తెన్ దెంక గే సికడ్డిసి

(లూకా 11:2-4)

1 “మాన్సులెచి మొక్కె గవురుమ్ ఆనన్తి రితి తుమ్చ నీతికము కెర నాయ్. మాన్సులెచి గవురుమ్ ఆనన్తి రిసా కెర తిరిగెన, తుమ్చో పరలోకుమ్ తిలో దేముడు జలో అబ్బొద్తె బవుమానుమ్ తుమ్క దొర్కు జయె నాయ్.

2 జాచి రిసా, తుమ్ దర్ముమ్ దెంక జలె, నప్పిర్ బజయ్లి రితి జా మాన్సులెచి మొక్కె గవురుమ్ జతి రిసా దాన నాయ్. కిచ్చొక మెలె, మాన్సుల్ గవురుమ్ దెతి రిసా ఉప్రమెస్సుచో మాన్సుల్ నబ గెరలె జవున్, వీదులె జవున్, దస్సి, ఎత్కిజిన్ దెకితి రితి, నప్పిర్ బజవ కెర దెతతి. దస్సి గవురుమ్ ఆనన్తనచి రిసా ఆవ్ తుమ్క కిచ్చొ కచితుమ్ సంగితసి మెలె, జేవ్ ఈంజయి లోకుమ్తె జోవయించి బవుమానుమ్ నజన గెల అస్సి.”

3 “తుమ్, జలె, దర్ముమ్ దెతె పొది, తుమ్చి దర్ముమ్ గుట్టు తెన్ తతి రితి, తుమ్చో ఉజెల్ ఆతు తెన్ దర్ముమ్ దిలె, తుమ్చో డెబ్బొ ఆతుక నేన్తె నే జాన్తి రితి దాన.

4 దస్సి తుమ్ దిలదు మెలె, అన్నెకోయ్ నేన్లె కి, తుమ్చో దేముడు అబ్బొసి దెక, తుమ్క బవుమానుమ్ దెయెదె.”

ప్రార్థన కెరుక సికడ్డిసి

(లూకా 11:1-4)

5 “పడ్డె, తుమ్ ప్రార్థన కెర్తి పొది, ఉప్రమెస్సుచో మాన్సుల్చ రిత జా నాయ్. దస మాన్సుల్ సొంత గవురుమ్ ఆనన్తి రితి, మాన్సుల్ దెకుత్ మెన, నబ గెరలె, వీదులె బీచో జా ప్రార్థన కెరుక ఓజ జా అస్సి. తుమ్క కచితుమ్ కిచ్చొ సంగితసి మెలె, జేవ్ జోవయించి బవుమానుమ్ నజన గెల అస్సి.

6 దస్సి తుమ్ ప్రార్థన కెరుక జలె, మాన్సుల్ నే దెకితి రితి, గని తుమ్చి గదితె పెన, కెర్తి డంకన, నే డీసయ్ జతో తుమ్చో దేముడు అబ్బొసిక ప్రార్థన కెర. మాన్సుల్ నే దెకితిసి కి జో అబ్బొసి జలో దేముడు దెకితయ్, తుమ్ ప్రార్థన కెర్తెసి జో జానన, తుమ్క బవుమానుమ్ దెయెదె.

7 పడ్డె, తుమ్ ప్రార్థన కెర్తి పొది, దేముడుక నేన్ల మాన్సుల్ కెర్తి రితి పోన. మెలె, కామ్క నెంజిత కొణెచి ఉప్పిరి కొణె లట్టబా నాయ్. కిచ్చొక మెలె, దేముడుక నేన్ల మాన్సుల్ కిచ్చొ ఉచర్తతి మెలె, ‘ఒగ్గర్ ఒగ్గర్ కొణె’ సంగిలె దేముడు అమ్చ ప్రార్థనల్ మెన్నెదె’ మెన ఆరిక ఉచర్తతి.

8 తుమ్ జోవయించి రితి జా నాయ్. తుమ్ దేముడు అబ్బొసితె నే నజితె అగ్గె, తుమ్క కిచ్చొ కామ్క జెయెదె గే జో జానె.”

9 “జాకయ్, తుమ్ ఇసి ప్రార్థన కెర.

ఓ పరలోకుమ్ తిలో అమ్చో దేముడు జలో అబ్బొ,

తుచి నావ్ గవురుమ్ జవున్.

10 తుచి రాజిమ్ అమ్చి తెన్ జెవును.

తుచి ఇస్సుమ్ రితి పరలోకుమ్తె కిసి కెర్తతి గే,

ఈంజ లోకుమ్తె కి అమ్ కెరుక మెన, అమ్క దయ కెర సికడు.

11 అమ్క సరివుచువ జతి అన్నిమ్ అమ్క రోజుక దె.

12 పడ్డె, అమ్క తప్పు కెర్ల మాన్సుల్క

అమ్ కెర్తి చెమించువ కెర అస్సుమ్ గే,

అమ్ కెర్ల తప్పుల్ తుయి అమ్క చెమించువ కెరు.

13 పడ్డో, అమ్ పాపుమ్ నే కెర్తి రితి, సయ్తాన్ కెరయ్తిసి తెంతో అమ్క పిట్టపు, అన్నె, సయ్తాన్ కెర్త అల్లర్ తెంతో కి అమ్క పిట్టపు.”

14 “కిచ్చొక మెలె, కో కో తుమ్క తప్పి కెర తిలెగిన, తుమ్ జోవయింక చెమించుప కెర్లెగిన, తుమ్చో పరలోకుమ్ తిలో దేముడు జలో అబ్బొ తుమ్క చెమించుప కెరెదె.

15 గని మాన్సుల్ తుమ్క కెర్త తప్పిల్ తుమ్ నే చెమించుప కెర్లెగిన, తుమ్చో అబ్బొ జలో దేముడు తుమ్క చెమించుప కెరె నాయ్.”

చువ్వె తతినచి రిసా సంగిలిసి

16 “పడ్డొక, తుమ్ చువ్వె తంక జలె, ఏడ్డి రితి మొకోమ్ తెన్ తా నాయ్. ఉప్రమెన్సుచో మాన్సుల్, జలె, ‘చువ్వె అన్సుమ్’ మెన, ‘అమ్క నీతి మెన మాన్సుల్ గవురుమ్ సంగుతు’ మెన, మొకోమ్ వెట్కారుమ్ తెయార్ కెరన తవుల. తుమ్క అవ్ కిచ్చొ కచితుమ్ సంగితసి మెలె, దస్సి కెర్త మాన్సుల్ జోవయించి బవుమానుమ్ నజన గెల అస్సి.

17 తుమ్, జలె, తుమ్ చువ్వె తతె పొది, మాన్సుల్ నేన్ది రితి, తుమ్చి బోడి తేలు గాంసన, ఓడన, తుమ్చి మొకోమ్ దోవన, సర్త తెన్ తా.

18 మాన్సుల్ నే దెకిలెకి, తుమ్చో అబ్బొసి జలో దేముడు దెక కెర, తుమ్క బవుమానుమ్ దెయెదె.

19 “బూలోకుమతెచి దనుమ్ తుమ్క తూమ్ కుడవనక నాయ్. ఈంజ లోకుమచి దనుమ్ కుడవనలెగిన, రుస్సి కా గెలెదె, నెంజలె కిచ్చొ కా గెలెదె, నెంజలె చ్చొర్ల గెరి బోలొ కెర చోర నెవుల.

20 తుమ్, జలె, రుస్సి కిచ్చొ నే కతి లోకుమతె, చ్చొర్ల నే పెసితి లోకుమతె, మెలె పరలోకుమతె, ఒత్తచి దనుమ్ కుడవన కెరన.

21 తుమ్ కేన్ లోకుమతె దనుమ్ కుడవన తస్సె గే, ఒత్త తిలినచి రిసా తుమ్చి పెట్టి ఉచర్తె తస్సె.

22 “ఆగ్రుక దీవు అంకివో. జాచి రిసా, తుమ్చ అంకివో టేంట తిలెగిన, తుమ్చి ఒండి ఆగ్ ఉజెడె తెన్ తయెదె.

23 తుమ్చ అంకివో మయల జా తిలెగిన, తుమ్చి ఆగ్ ఎత్తి అమన్ రితి అందర్ జా తయెదె. దస్సి, తుమ్చి పెట్టి తిలి బుద్ది అందర్చి తిలెగిన, కెర్తి అందర్ జయెదె!

24 “ఎక్కిలో గొత్తి నుదొ కో జలెకు దొగుల ఎజొమాన్సుచి సేవ ఎక్కి దడి కెరుక నెత్తె. ఎక్కిలోక విరోదుమ్ కెర, అన్నెక్లొక ప్రేమ కెరెదె. నెంజలె ఎక్కిలోక నిదానుమ్ దెక, అన్నెక్లొక నిస్కారుమ్ దెకెదె. జలె, దేముడుక చి ఈంజ లోకుమచి దనుమ్క ఎక్కి దడి సేవ కెరుక నెతుర్పు.

25 జాకయ్, అవ్ తుమ్క కిచ్చొ మెంతసి మెలె, ‘కిచ్చొ కమదె గే కిచ్చొ పిమదె గే కిచ్చొ గలనుమదె గే కిసి జా జిమదె’ మెన, తుమ్చి మెన్సుతె చింత గలన నాయ్. అన్సిమచి కంట అత్తె విలువ, గెద. పాలలచి కంట ఆగ్ విలువ, గెద.

26 “అగానుమచ పిట్టలచి రిసా ఉచర. జేవ్ పిట్టల ఉంపితి నాయ్. ఉంప లాయితి నాయ్. లాయ కొట్టుతె ఆన కుడవంతి నాయ్. జలెకి, తుమ్చో పరలోకుమ్ తిలో అబ్బొ జలో దేముడు జోవయింక పొస్తయ్. తుమ్, జలె, జోవయించి కంట విలువ నెంజును గే?

27 పడ్డొ, తుమ్చితె కో కెర్తి చింత గలనలెకి, జోచి బత్తుక కొల్లక ఏక అత్తెక జవున్ ఒగ్గర్ కెరనుక తెరె గే? నెత్తె.

28 “పాలలచి రిసాచి చింత గలనుక కిచ్చొక? డెంగ్రిచ పుల్లో కిసి వడ్డితతి గే ఉచరన. జేవ్ కామ్ కెర్తి నాయ్, పాలల్ వీంతి నాయ్.

29 జలెకి, ఎదివాల్ సాహ్యురుమ్ కలుగు జలో సాలోమాను మెలో పూర్లుమచో రాసొ కి ఈంజేవ్ పుల్లోచి రితి సూటి కెరనుక నేన్లొ.

30 తుమ్ తొక్కి నముకుమ్ తిలన, ఏక కోడు ఉచరన. ఆజి తా కెర కలిక డయ్ దెతి చివ్వర్క దేముడు ఎదిలి సూటి కెర్తయ్ జలె, తుమ్క అన్నె ఒగ్గర్ చెంగిల్ గలంతిసి దొర్కు కెర నాయ్ గే? దొర్కు కెరెదె.

31 “జాకయ్, ‘కిచ్చొ కమదె గే, కిచ్చొ పిమదె గే, కిచ్చొ గలనుమదె’ మెన చింత గలన ఉచర నాయ్.

32 దేముడుక నేన్లొ మాన్సుల్ కి ఇనిచి ఎత్తిక ఉచరంతె తవుల, అన్నె, ఇన సామన్లు తుమ్క కి దొర్కు జతతి మెన; తుమ్చో పరలోకుమ్ తిలో అబ్బొసి జలో దేముడు జానె.

33 తుమ్, కిచ్చొ కెరుక అన్నె మెలె, తొలితో దేముడుచి రాజిమ్ జోచి పున్నిమ్ చజ, జో సికడ్డి బుద్ది ఇండుక అస జా తా. తుమ్ ఇసి జలదు మెలె, తెదొడి ఎత్తి, తుమ్క దొర్కు, జవుల.

34 జాకయ్, 'కలిక కిసి జా జిమ్దె?' మెన తుమ్ చింత గలన ఉచర నాయ్. కలికచి రిసా నమ్మందుమ్ జతిసి కలిక దొర్కు, జయెదె. కేన్ దీసిచి బాద జయి దీసిక సాలు."

7

తీర్పు కెర్రి బుద్దిచి రిసా సంగిలిసి

(లూకా 6:37-38,41-42)

1 "తుమ్ ఎక్కిలోక ఎక్కిలో కుస్సిదుమ్ తెన్ తీర్పు ఉచర నాయ్, చి ఎత్తి, అదికారుమ్ తిలో దేముడు తుమ్క తీర్పు కెర సిచ్చొ కెరుక నాయ్.

2 కిచ్చొక మెలె, తుమ్ అన్నె మాన్పుల్క కిసి తీర్పు దెకితె గే, దేముడు తుమ్కయ్ కి దస్సి దెకెదె. తుమ్ అన్నె మాన్పుల్చి రిసా *కట్టడ్డి కొల్ల రితి దేముడు తుమ్క కి జయ్య కొల్ల తెన్ కట్టడెదె.

3 "తుమ్చితె ఎక్కిలోచి అంకితె ఏక దూలుమ్ బెర తిలెగిన, బావొచి అంకితె ఇదిలిదిల్ తొక్కు సేడ తిలెగిన, అంకితె దూలుమ్ తిలోసా కిచ్చొక జోచి బావొచి అంకితె తిలి ఇదిలిదిల్ తొక్కు, దెకితసి, గని సొంత అంకితెచి దూలుమ్ దెకిన్ నాయ్?

4 నెంజెలె, తుచి అంకితెచి తొక్కు, కడిందె" మెన చిల్ప అంకితె తిలోసా కిసి తుచొ బావొక సంగుక జయెదె!

5 తుమ్ ఉప్రమెన్పుచొ, తొలితో తుచి సొంత అంకితెచి చిల్ప కడను, చి తుచొ బావొచి అంకితెచి తొక్కు, కడితి రితి బేంట దెకితె.

6 "సుద్ది తిలిసి సూనర్లుక దాన నాయ్. అండ్రుల్చి చట్టె ముత్యల్ గల దాన నాయ్. అండ్రుల్క దిలె, విలువ నే దెకితె సుడ కెర, పస్ల కెర, తుమ్క చిర గెలుల.

7 "నజ తుమ్క దెయెదె. ఎక్కి మెన్పు తెన్ చజలె, దొర్కు, జయెదె. కెప్పితె పెట్టె, తుమ్క కెప్పె ఉగిడిందె.

8 కో సంగెలె, జోక దొర్కు, జయెదె, చి చజలె, దొర్కు, జయెదె, చి జోచి కెప్పితె పెట్టె, జోచి రిసా ఉగ్గి జయెదె.

9 "తుమ్చి తెన్ కేన్ మాన్పు జలెకు జోచొ పుత్తుసి పొడి నజెలె, జోక పత్తురు దెయెదె గే? నాయ్.

10 జో పుత్తుసి మొస్సా నజెలె అయి దెయెదె గే? నాయ్.

11 జలె, తుమ్ మాన్పుల్ పాపుమ్ సుదల్ జలెకి, తుమ్చ బోదల్క చెంగెల్ వస్తువల్ దెంక జాన్పు. జలె, పరలోకుమ్ తిలో అబ్బొన్ జలో దేముడుతె కో చెంగెలె వరల్ నజెలె, మాన్పుల్ దెతి కంట జో అన్నె ఒగ్గర్ చెంగెల్ వరల్ దెయెదె!

12 "మాన్పుల్ తుమ్క కిసి కెరుక మెన తుమ్ ఇస్తుమ్ జస్తె గే, తూమ్ కి జోవయింక దస్సి కెర. కిచ్చొక మెలె, మోసి పూర్గుమ్చొచి అత్తి దేముడు రెగ్గయలె ఆగ్గుల్, అన్నె పూర్గుల్చి అత్తి సంగెలె దేముడుచ కబుర్లు ఎత్తి, తె కంజ కొడు బెదితయ్.

పరలోకుమ్ పెసితి గుమ్ముమ్చి రిసా సంగిలి బోదన

(లూకా 13:24)

13 "వెల్లో నాసినుమ్తె గెతి వాట్ సుల్లు, జా వాట్ పెసితి గుమ్ముమ్ రూందు. జా వాట్ ఒగ్గర్ జిన్ గెతతి. తూమ్, మాత్తుమ్, ఇర్కు, వాట్చి గుమ్ముమ్ పెన.

14 కిచ్చొక మెలె, పరలోకుమ్తె బెదితి వాట్చి గుమ్ముమ్ ఇర్కు, అన్నె, జా వాట్ సుల్లు నాయ్, చి ఒత్త పాచితన ఒగ్గర్ తొక్కిజిన్ జవుల.

15 "దేముడు తెంతొ కబుర్ ఆన్తోసా ఆవ్" మెన అబద్దుమ్క సంగితన సగుమ్జిన్ జెవుల, ఉప్రమెన్పుచ జేవ్. దన మాన్పుల్చి రిసా తుమ్ జాగర్ల తెన్ తా. చెంగెల్ మాన్పుల్ రితి, జేవ్ మెండల్చ రోమల్ గలన డీసయ్ జవుల, గని జోవయించి పెట్టి తెడి డుల్కోవ రితి కుస్సిదుమ్ తిలన.

16 జోవయించ కమెచి పలితుమ్ దెకిలె, జోవయించి బుద్ది తుమ్ చినితె. కంట చెట్లె ద్రాచ వండ్లు కోడుక జయెదె గే? లన్వన్ రూకి తెన్ †అంజూరుమ్ వండ్లు కోడుక జయెదె గే? నెంజె.

* 7:2 7:2 మీన్ని † 7:16 7:16 'అంజూరుమ్ వండ్లు' మెలె, బొడ్డ వండ్లు రిత జవుల.

17 ఎత్తి చెంగిలో రూకీత చెంగిలి పండ్లు దెరుల, గని కామక నెంజిత రూకీత కామక నెంజిత పండ్లు దెరుల.

18 చెంగిల్ రూకీత కామక నెంజితి రగుమ్ పండ్లు దెర్తి నాయ్. కామక నెంజిత రూకీత చెంగిల్ పండ్లు దెర్తి నాయ్,

19 అన్నె, చెంగిల పండ్లు నే దెర్తి ఎత్తి రూకుక కండ కెర, ఆగితె గలుల.

20 తుమ్చితె జెతనచి పలితుమ్ దెకిలె, జోవయించి రగుమ్ చినితె.

21 “ప్రబు, ప్రబు!” మెన, అంక సంగితన ఎత్తిజిన్ పరలోకుమ్చి రాజిమతె పెసితి నాయ్. గని పరలోకుమ్ తిలో అంచో అబ్బొ జలో దేముడు సికడ్డి కోడు రితి కెర్తనయ్ ఒత్త గెచ్చుల.

22 ఈంజ లోకుమ్చ ఎత్తిక వెల్లి తిర్పు కెర్తి దీసిక, అంక ఒగ్గర్జిన్ మాన్సుల్, ‘ప్రబు, ప్రబు’, తుచి నావ్ తెన్ తూయి సంగిల కబుర్లు సంగిలమ్, నాయ్ గె? తుచి నావ్ తెన్ బూతల్ గట్టక ఉదడ్లమ్, నాయ్ గె? తుచి నావ్ దెర ఒగ్గర్ ఒగ్గర్ అద్దుతుమ్ కమె కెర్తమ్, నాయ్ గె?” మెన సంగుల.

23 జలె “ఆవ్, తుమ్క అగ్గె తెంతో నేని. తుమ్ గార్ కమె కెర్తన, అంచి తెంతో దూరి ఉట్ట గెచ్చు” మెన జోవయింక సంగెదె.

సాప్రయ్ బందిలో గేరుచి ఇస్కతె బందిలో గేరుచి రిసాచి టాలి

(లూకా 6:47-49)

24 “అంచ కొడొ నూన అంచి కోడు రితి ఇండుల గే కీన జవుల, జో బుద్ది తిలోసా కిచ్చొ కెర్లొ మెలె, జోచో గేరు రెంగ్చివి ఉప్పిరి బందిలో.

25 బందితికయ్, పాని పెట్టి, వర్దల్ జలి, చి గట్టిజ వాదు జో గేరుచి సుట్టునంత కెర్లె కి, జా గేర్చి పునాది రెంగ్చివి ఉప్పిరి తిలి రిసా, కెర్ది వాదు పాని కెర్లె కి, సేడె నాయ్.

26 “జలె, కో అంచ కొడొ నూన కి నే కెరుల గే, జేవ్ కీని జవుల మెలె, బుద్ది నెంజిలో ఎక్కిలోచి రితి జవుల. జో బుద్ది నెంజిలోసా కిచ్చొ కెర్లొ మెలె, జోచో గేరు ఇస్కచి ఉప్పిరి బందిలో.

27 జో గేరు ఇస్కచి ఉప్పిరి బంద తతికయ్, పాని పెట్టి, వర్దల్ అయ్యలి చి గట్టిజ వాదు జో గేరుచి సుట్టునంత కెర్లె, చి జా గేరు సేడ గెలో. జా గేరు ఎద్దరె సేడయ్ గెలో!” మెన యేసు సంగిలన్.

28 యేసు ఈంజేవ్ కొడొ సంగ కేడయ్లి వడ్డె, జనాబ్ ఎత్తి జో కెర్తి బోడనచి రిసా ఆవారిమ్ జలె.

29 కిచ్చొక మెలె, జేవ్చ మోసి తెన్ దేముడు దిలి ఆగ్గల్ సికడ్డన కెర్తి రితి నాయ్, గని దేముడు దిలి అదికారుమ్ తెన్ జో సాస్టుమ్ బోడన కెర్తి తిలన్.

8

వెల్లి రోగిక యేసు చెంగిల్ కెర్తిసి

(మార్కు 1:40-45; లూకా 5:12-16)

1 జేవ్ జా మెట్ట తెంతో ఉత్త జెతె తిలె, ఒగ్గర్ ఒగ్గర్జిన్ జనాబ్ జోచి పట్టి అయ్యల.

2 జేవ్ ఎత్తిజిన్ దస్సి ఉత్తిర్త తతికయ్, వెల్లి రోగి ఎక్కిలో యేసుక దస్సుల్ జా, నెర్ను సేడ జోకర, “ప్రబు తుక ఇస్టుమ్ జలె, తుయి అంక చెంగిల్ కెర సుద్ది కెరుక తెర్ని” మెన సంగిలన్.

3 యేసు ఆతు చంప కెర జోక చడ, “అంక ఇస్టుమి. చెంగిల్ జా సుద్ది జా” మెన సంగిలి బేగి, జోచి వెల్లి జబ్బు గెతికయ్, చెంగిల్ జా సుద్ది జలన్.

4 యేసు జోక “పట్టి కక్క కిచ్చొ సంగు నాయ్. గని, దేముడుచి గుడితె గెచ్చు, తుచి ఆగ్ గుద్ది జలి మెన, ఒత్త పూజరిక దెకవు, చి తుయి సుద్ది జలిసి ఒత్త తిల మాన్సుల్క రుజ్జు జతి రితి, మోసే పూర్లమ్ సంగిలి కాసుక దేసు” మెన సంగ, అన్నె ఉట్ట గెలన్.

పుంజెకజిన్ జమాస్సుక వెల్లిచొ గొత్తి సుదొక యేసు చెంగిల్ కెర్తిసి

(లూకా 7:1-10; యోహా 4:43-54)

5 యేసు కవెర్చుహూమ్ పట్టుమతె అన్నె పావెతికయ్, రోమ్ దేసిమ్చొ పుంజెకజిన్ జమాస్సుక వెల్లి ఎక్కిలో జా కెర,

6 యేసుక “బాబు, అంచో గొత్తి నాడు కదుల్ జంక నెత్త కెర ఒగ్గర్ బాద జా గెరి ఎంగ్ల తత్తయ్” మెన బతిమాల్య జా సంగిలన్

7 యేసు జోక “ఆవ్ జెయిందె, చి జోక చెంగిల్ కెరిందె” మెన సంగిలన్.

8 గని జో పుంజెకజీన్ జమాన్సుక వెల్లో మాన్సు జోక, “ప్రబు, తుయి అంచి గెరి జెంక మెలె, ఆవ్ విలువ నాయ్. తుయి ఇన్నె తెంతో ఎక్కి నెలవ్ కోడు దిలది మెలె, అంచో గొత్తి నాడు చెంగిల్ జయెదె.

9 ఆవ్ కి అదికారుమ్క బితోసా. అంచి తెడి జమాన్సు అన్సి, ఆవ్ ఎక్కిలోక ‘గో’ మెలె, గెచ్చెదె. అన్సిక్కోక ‘జె’ మెలె, జెయెదె. అంచో గొత్తిమాన్సుక ‘ఈంజ కామ్, జా కామ్ కెరు’ మెలె కెరెదె” మెన సంగిలన్.

10 యేసు ఈంజో సంగిలిసి సూన సర్ల జా, పట్టి జెతె తిలసక దెక, జోవయంక, “తుమ్క ఆవ్ కిచ్చో కచితుమ్ సంగితసి మెలె, అమ్చ ఇస్రాయేలుల్తె ఆవ్ కక్క కి ఎదిలి నముకుమ్ తిలసక అప్పె ఎదక కి దెకుక నాయ్.

11 తుమ్క కిచ్చో మెంతసి మెలె, తూర్పు దేసిమ్లు తెంతో, పడమర దేసిమ్లు తెంతో కి యూదుల్ నెంజెల ఒగ్గర్జిన్ మాన్సుల్ జా కెర, అమ్చ యూదుల్చ పూర్లమ్చ అబ్రాహామ్, ఇస్సాకు చి యాకోబు తెన్ పరలోకుమ్తె ఎక్కితె అన్సిమ్ కవుల.

12 గని, అమ్చి రాజుమ్చి రిసా తుమ్క నిసాన అన్సి మెన, అమ్చ యూదుల్క దేముడు సంగ తిలి కి, ఈంజేవ్ అమ్చ యూదుల్తె ఒగ్గర్జిన్ అందర్చి ఉప్పిరి అందర్తె బయలి గలి జవుల. ఒత్త మాన్సుల్ ఏడ్తె తవుల, దంతో చప్పిల్తె తవుల.” మెన సంగ కెర,

13 యేసు జో పుంజెకజీన్ జమాన్సుక వెల్లోక “సరె, గో. తుయి నంపజలి రితి తుక జర్లు జవున్” మెన సంగిలన్. సంగిలి బేగి, జో మాన్సుచో గొత్తి నాడు చెంగిల్ జలన్.

పేతురుచి అత్తన్క యేసు చెంగిల్ కెరిసి

(మార్కు 1:29-34; లూకా 4:38-41)

14 పడ్తె, యేసు పేతురు మెలె జోచో సిస్సుడుచి గెరి గెచ్చ కెర, పేతురుచి అత్తన్ జొట్టో సేడ ఎంగ్ల అన్సి మెన దెక కెర,

15 జాచి అతు దెరికయ్, జా జొట్టో గలి, చి జా ఉట్ట కెర, యేసుక మరియాద ఎత్తి కెరుక దెరి.

16 సాంజ్ జతికయ్, ఒగ్గర్జిన్ బూతుమ్ దెర్లసక ఒత్త తిల వైజల్ యేసుతె కడ ఆన్తికయ్, జేవ్ బూతల్ ఎక్కిక్ “ఉట్ట గో” మెన ఎక్కి కోడు తెన్ యేసు ఉదడ గెలన్. కిచ్చో కిచ్చో జబ్బుల్ తిలసక కి చెంగిల్ కెర్లన్.

17 “జొయ్యి అమ్చ బాదల్ జబ్బుల్ దెర గెచ్చయ్లో” మెన దేముడుచ కబుర్లు సంగిలో యెనయా పూర్లమ్చోచి అత్తి జో సంగిలి కోడు నెరవెర్లువ జంకయ్ మెన ఇసి జలి.

యేసు తెన్ బుల్లన ఎక్కి మెన్సు నిదాసుమ్ తంక మెన సంగిలిసి

(లూకా 9:57-62)

18 సుట్టుసంత ఒగ్గర్ ఒగ్గర్జిన్ బెర తిలిసి యేసు దెక, కెర, “సముద్రమ్ ఒత్తల్తో గెచ్చుమ్” మెన సిస్సుల్క సంగిలన్.

19 జలె, మోసి తెన్ దేముడు దిలి అగ్గల్ సికణ్ణోసా ఎక్కిలో యేసుతె జా కెర, “గురుబాబు, తుయి కేనే గెలి కి, ఆవ్ కి తుచి తెన్ బెద జెయిందె” మెన సంగిలన్.

20 యేసు జోక “నక్కల్క పార్లు, ఆగాసుమ్చ పిట్టల్క గూడలు, గని ఆవ్ *మాన్సు జా జెర్యన్ అయ్లోసాక బోడి వంపా కెర్రి టాన్ నాయ్” మెన సంగితికయ్,

21 సిస్సుల్తె అన్సిక్కో యేసుక “ప్రబు, ఆవ్ తుచి తెన్ నే జెతె అగ్గె, గెచ్చ కెర, అంచో అబ్బొ మొర గెతె ఎదక జోక పోన కెర, జో మొర్లె జోక రోవ గెలుక మెన, అంక నెలవ్ దె” మెన సంగిలన్. చి యేసు జోక దెక,

22 “మొర్లన జోవయంచ సాంత మొర్లనక రోవ గెల్లు, గని తూయి బేగి అంచి పట్టి బులుక జె.” మెన జో సిస్సుడుక సంగిలన్.

* **8:20 8:20** ‘మాన్సు జా జెర్యన్ అయ్లోసా’ మెన బయ్బిల్తె రెర్ల తిలి, జాచి అర్దుమ్ కిచ్చో మెలె, ‘ఎత్తి అదికారుమ్ తిలి’ దేముడు తెర్లయ్లో క్రిస్ట రచ్చయ్చువ కెర్రిసా’. యేసు ఈంజ లోకుమ్తె బుల్లె తిలి పొది, బయ్బిల్చి పార్లి ప్రమాసుమ్ ఒగ్గర్ సదు కెర్ల పడితుల్ జా అర్దుమ్ కెరసుల, గని మాములుమ్ మాన్సుల్ నేనీతి.

యేసు దోనితె గెతె వాదుపానిక సేంతుమ్ కెర్రిసి

(మార్కు 4:35-41; లూకా 8:22-25)

23 తెదొడి యేసు దోనితె వెగెతికయ్, జోచ సిస్సుల్ జోచి పట్టి వెగిల.

24 జేవ్ సగుమ్ దూరి ఇండయ్తికయ్, సముద్రుమ్తె వాదు కెర్రికయ్, వెల్లెల కెర్రిల్ జా దోనితె డేవితె తిల, గని యేసు నిజ తిలన్.

25 జేవ్ సిస్సుల్ జోతె గెచ్చ, ఉట్టవ కెర, “ప్రబు మొర గెతనుమ్. అమ్క రచ్చించుప కెరు!” మెన సంగితికయ్,

26 యేసు ఉట్ట కెర, జోవయింక “ఇదిల్ నముకుమ్చ, తుమ్, కిచ్చొక బితను?” మెన జోవయింక సంగ కెర, వాదుక సముద్రుమ్క గట్టిజ ఆత్త దిలన్. వాదు కెర్రిలు ముల దిలి, చి ఎత్తి, అన్నె సేంతుమ్ జలి రిసా,

27 సిస్సుల్, “ఈంజో కీసా మాన్సు, చి వాదు కి సముద్రుమ్ కి ఇన్నెచి కోడక వంపా జత్తయ్!” మెన ఆచారిమ్ జల.

బూతల్ దెర్ల దొగులక యేసు చెంగిల్ కెర్రిసి

(మార్కు 5:1-20; లూకా 8:26-39)

28 జో సముద్రుమ్ జిన కెర, †గదరేసులుచి ప్రాంతుమ్తె పావెతికయ్, బూతల్ దెర్లన దొగుల మెన్నె తెంతో బార్ జా కెర, యేసుక దస్సుల్ జల. జేవ్ దొగులచి ఎదివాట్ కోపుమ్చి రిసా, కో కి జా వాట్ గెచ్చుక దయిరిమ్ నాయ్.

29 యేసు జా వాట్ జెతికయ్, “ఈందె, దేముడుచొ పుత్తుసి, అమ్చి తెన్ తుక కిచ్చొ? అమ్ సిచ్చ జతి పొది నే జెతె అగ్గె అమ్క అల్లర్ కెరుక ఇన్నె అయ్లది గే?” మెన కేకుల్ గలిల.

30 జలె, జోవయించి ఇదిల్ ఒత్తల్క ఒగ్గర్ అండ్రుల్ తిలి మంద కతె తతికయ్,

31 జేవ్ బూతల్ యేసుక “తుయ అమ్క ఇన్నె తెంతో ఉదడ్డిగెని, అండ్రుల్ తిలి జా మందతె అమ్క తెద్రవ్” మెన, యేసుక బతిమాల్పు జా సంగిల.

32 జో జోవయింక “గెచ్చ!” మెన సంగితికయ్, జేవ్ బూతల్ బార్ జా, జేవ్ మాన్సుల్క ముల దా, అండ్రుల్చి పెట్టి పెన గెల, చి జా మందచ అండ్రులు ఎత్తి వెరి జా, జా వెల్లి గాటిక నిగ ఉత్త, సముద్రుమ్తె సేడ మొర గెల.

33 దస్సు జర్లు జతికయ్, మంద రకితన బమ్మ జా, జా పట్టుమ్తె నిగ గెచ్చ, బూతల్ దెర్లనక జర్లు జలిసి ఎత్తి, కిచ్చొ నే పిట్టి, పట్టుమ్చక సంగిల.

34 జాచి రిసా, పట్టుమ్చ ఎత్తి జిన్ యేసు తెన్ దస్సుల్ జంక మెన బార్ జా, దెక కెర, “అమ్చి దేసిమ్ తెంతో ముల దా ఉట్ట గే!” మెన బతిమాల్పు జా, జోక బమ్మ తెన్ సంగిల.

9

ఉట్టుక నెత్తిర్లొ మాన్సుక యేసు చెంగిల్ కెర్రిసి

(మార్కు 2:1-12; లూకా 5:17-26)

1 ఒత్త తెంతో, యేసు దోనితె వెగ కెర, జా సముద్రుమ్ జిన కెర, జోచి సొంత పట్టుమ్తె పావెతికయ్,

2 ఒత్త తిల మాన్సుల్ వాతుమ్ జొర్లొ తెన్ తిలొసా, ఉట్టుక నెత్తిర్లొ అంతుర్లొతె ఎంగ్గ తిలొసా ఎక్కిలోక జోతె కడ ఆన్ల. యేసు జేవ్ కడ ఆన్లనచి నముకుమ్ దెక కెర, జో ఉట్టుక నెత్తిర్లొసాక దెక, “ఓ పూత్తు, తుయ దయిరిమ్ జా. తుచి పాపల్ చెమించుప జా అస్తి” మెన జోక సంగిలన్.

3 జలె, ఒత్త తిల మోసే తెన్ దేముడు దిలి ఆగ్గుల్ సికడ్డన సగుమ్ జిన్ ‘యేసు దేముడు తెన్ సమ్మందుమ్ సంగితయ్. జా వెల్లి పాపుమ్’ మెన బమ్మ జా, లట్టబన్ల.

4 యేసు జోవయించి మెన్నెతె తిలిసి చిన కెర, “తుమ్చి పెట్టి కిచ్చొక కుస్సిదుమ్ ఉచ్చర్లు?”

5 ‘తుచి పాపల్ చెమించుప జా అస్తి’ మెనుక సుల్లు గే, ‘ఉట్ట ఇండు’ మెనుక సుల్లు గే?

6 జలె, 'మాన్సు జా జెర్నన్ అయ్లయ్ అంక అప్పె ఈంజ లోకుమేతె తిలి కి, మాన్సులచి పాపల్ చెమించువ కెర్రి అదికారుమ్ అన్యె' మెన తుమ్క రుజ్జు దెకయిందె" మెన, జో ఉట్టుక నెతిర్లో మాన్సుక అన్యె దెక, యేసు జోక, "తుయి ఉట్ట కెర, తుచి అతుర్నో వయన గెరి గో" మెన సంగితికయ్,

7 జో మాన్సు ఉట్ట కెర, గెరి గెలన్.

8 ఇసి బర్గు జతికయ్, ప్రెజల్ దెక కెర, బియ: గెచ్చ, మాన్సుచి అత్తి జో ఇసి అదికారుమ్ దిలిన్చి రిసా, దేముడుక గవురుమ్ కెల.

యేసు మత్తయిక బుకార్లన్
(మార్కు 2:13-17; లూకా 5:27-32)

9 యేసు ఒత్త తెంతో ఇదిల్ దూరి ఇండ గెచ్చ, జా పట్టుమ్చి సిస్సు కడన్తి గెరిచి వాల్ గెచ్చ కెర, ఒత్త మెన తిలో మత్తయి మెలో సిస్సు నజితోసాక దెక, "అంచి పట్టి జా అంచో సిస్సుడు జా" మెన జోక సంగిలన్, చి జో ఉట్ట కెర, యేసుచి పట్టి గెలన్.

10 జో మత్తయి మెలోసాచి గెరి అన్యెమ్ కంక మెన యేసు గెచ్చ మెన తతికయ్, జా దేసిమ్చ నెస్కారుమ్ దెకిల సిస్సు నజితన కి, చి నీతి నే కెరంత 'పాపుమ్ కెర్లన' మెన ఒత్తచ యూదుల్ నిస్కారుమ్ దెకిలన బగ్గర్జన్ జోతె జా కెర, జో తెన్ సిస్సుల్ తెన్ వెసిల.

11 జేవ్ ఇన్యె బెద వెసిలిసి దెక కెర, పరినయ్యుల్ మెంత పండితుల్ యేసుచ సిస్సుల్తె జా కెర, జోవయింక "తుమ్చో గురు సిస్సు నజితన తెన్ పాపుమ్ కెర్లన తెన్ కిచ్చొక వెన అన్యెమ్ కతయ్?" మెన పుసిల.

12 జేవ్ దస్సి సంగిలిసి యేసు సూన కెర, "జబ్బు తెన్ అన్యెమ్ మెన చినన్లన డాక్టర్ అవ్సురుమ్, గని జబ్బు నెంజలసక డాక్టర్ అవ్సురుమ్ నాయ్."

13 జలె,

"తుమ్ కిచ్చొ కెర్రిసి అంచి ఆన మెలె, బలి దెతిసి నాయ్, గని మాన్సుల్క కన్కారుమ్ దెకితిసి మెలి కోడెచి అర్దుమ్ కిచ్చొ జయెదె గే, తుమ్ గెచ్చ సిక్క. 'అమ్ పాపుమ్ కెర్లన' మెన చినంతనకయ్ బుకార్క అవ్ అయలయ్, గని అమ్ పున్యెమ్ తిలస మెన ఉచరంతనక బుకార్క నాయ్." మెన యేసు సంగిలన్.

14 తెదోడి బాప్తిసుమ్ దెతె తిలో యోహానుచ సిస్సుల్ యేసుతె జా కెర "పరినయ్యుల్ కి అమ్ కి చువ్వె తంక అలవాట్, గని తుచ సిస్సుల్ చువ్వె తతి నాయ్. కిచ్చొక?" మెన, యేసుక పుసిల.

15 ఇసి పుసితికయ్, యేసు జోవయింక, "కేన్ పెండ్లితె, జోవయించి నెడిమి పెండ్లిఉబేడే తిలె పొది, పెండ్లి విందుతె బుకార్లన ముసుర్గు తవుల గె? నాయ్. బెదె నాయ్. జలె, పెండ్లిఉబేడేచి పచ్చైన జలనచి నెడమె తెంతో జోక దెర వేరతె కడ నిలె, జేవ్ పొదుల్క జోచ మాన్సుల్ ఏడ ఏడ చువ్వె తవుల.

16 "జలెకు, పొర్ని పాలుమ్ చిరి జా తిలిగిన, మాసికచి రిసా నే కేడయేలి నే కేడ్డె నోచి బట్ట గండ కో జాన్ల మాన్సుల్ గల్లి నాయ్. దస్సిచి పొర్నిచితె గల తిలిగిన, జో పాలుమ్ కేడ్డె, జా మాసిక కడెదే. మాన్సు జా పాలుమ్ గలన్లె, అప్పు జలి పొర్ని బట్ట నోచి బట్టచి మాసిక బెదయేలి కుటు సొడి చిరి జయెదె, చి అగ్గెచి కంట వెల్లి బోరో జయెదె.

17 పడ్డె, జలె, ఒత్త నోచి ద్రాచ రస్సుమ్ పొర్నిచి కాయ తెన్ కో సుచితి నాయ్. జా కాయ పొర్ని జలి రిసా, దస్సితె నోచి రస్సుమ్ సుచితిగిన, జా కాయ పులుక నెతిరి రిసా, జా రస్సుమ్ పొంగుప జలె, జా కాయ పుట్టెదె. పుట్టిలె, జా రస్సుమ్ సూయె జయెదె, చి కాయ కి పాడె జా గెచ్చెదె. జాచి రిసా, నోచి ద్రాచ రస్సుమ్ నోచి కాయల్తె సువుల. దస్సి, జా రస్సుమ్ కి జా కాయ కి పాడె నే జన్స, చెంగిల్ తయెదె" మెన, జోక పరిచ్చ కెర్ల మాన్సుల్క యేసు సంగిలన్.

బార వెర్నల్ బాద తెన్ తిలి తేరబోదక యేసు చెంగిల్ కెర్రిసి
(మార్కు 5:21-43; లూకా 8:40-56)

18 ఒత్త జా తిల మాన్సుల్క యేసు ఈంజేవ్ కోడె సంగితె తతికయ్, ఒత్తచి సబ గెర్చో అదికారి ఎక్కిలో జా కెర, యేసుక దస్సుల్ జా, సెర్గు సేడ జోకర, "అంచి దూ అప్పె మొర గెచ్చ అన్యె. తుయి, జలె, అమ్తె జా కెర జాక చడిలిగిన, అన్యె జయెదె" మెలన్.

19 జో దన్ను మెంతికయ్, యేసు ఉట్ట కెర జోచి పట్టి గెలన్. జోచ సిన్సుల్ కి బెద గెల.

20-21 జేవ్ వట్ట గెతె తతికయ్, బార వెర్చల్ తెంతో లోయి గెతి బాద తెన్ తిలి ఏక్ తేరబోద యేసుచి పట్టి జా, పాద కెర, “ఆవ్ ఎక్కి జోచో పాలుమ్ జవున్ చడిలెగిన, చెంగిల్ జయిందె” మెన, జాక జయ్యి ఉచరన, జోచో పాలుమ్చి కొంగు చడిలి.

22 జా చడితికయ్, యేసు పడ్డో పన్న జాక దెక, “ఓ దూ, దయిరిమ్ తెన్ తా. అంచి ఉప్పిరిచి తుచి నముకుమ్ తుక చెంగిల్ కెర్లె.” మెన సంగిలన్. జా బేగి చెంగిల్ జలి.

23 తెదొడి యేసు జో అదికారొచో గెరి పావ కెర, నాడి మొర్లి రిసా మూరి పుజితన, చి బెర తిల ఏడుకుడు జతన ఒగ్గర్ గొడబ జతిసి దెక కెర,

24 “తుమ్ గెచ్చ. ఈంజ నాడి మొర గెచ్చా నాయ్. నిజ అన్య” మెన జోవయింక సంగితికయ్, జోక ఆసిల.

25 జలె, జనాబ్ ఎత్తిక బార్ కెరవడ కెర, యేసు తెడి గెచ్చ, జా నాడిచో అతు దెర్లి బేగి, జిమ్ జా ఉట్టి.

26 ఈంజ కామ్చి రిసా జా ప్రాంతుమ్ ఎత్తితె పావెలి.

దొగుల గుడ్డి మాన్సుల్ క యేసు చెంగిల్ కెర్లిసి

27 యేసు బార్ జా కెర, ఒత్త తెంతో గెరి గెతె తతికయ్, దొగుల గుడ్డి మాన్సుల్ జోచి పట్టి జా, “దావీదు రానొచి నెకుమ్తె జెర్మిలో రచ్చింఛువ కెర్లొసా, అమ్చి ఉప్పిరి కన్కారుమ్ తియ, అమ్క చెంగిల్ కెరు!” మెన కేకుల్ గెత్తె తిల.

28 యేసు గెరి గెచ్చ పెసిలి పడ్డో, జేవ్ గుడ్డి మాన్సుల్ ఒత్త జోతె అయ్ల. జెతికయ్, యేసు జోవయింక “తుమ్ ఉచర్లిసి అంక ‘కెరుక తెరె’ మెన తుమ్ నంపజతను గే?” మెన జోవయింక పునితికయ్, జేవ్, “ప్రబు, అమ్ నంపజతనుమ్” మెన జోక సంగిల.

29 యేసు జోవయింక అంకివొ తె చద కెర, “ఆవ్ తుక ‘చెంగిల్ కెరుక తెరె’ మెన తుమ్ నంపజలిసి రిసాయి తుమ్క జర్లు జవున్!” మెన, సంగిలన్.

30 సంగిలి బేగి, జోవయింక అంకివొ డిసిల. పిమ్మట్, యేసు జోవయింక “ఈంజ కామ్ కో కి నేన్తె రితి దెకన, తుమ్ దొగుల తుక్లె తా” మెన గట్టిజ సంగిలన్.

31 గని, జేవ్ ఉట్ట గెచ్చ, జా ఒండి గలిలయ ప్రాంతుమ్తె జోచి గవురుమ్ సంగితె తిల.

గుల్లో కెర్లొ బూతుమ్క యేసు ఉదడ గెలిసి

32 యేసు సిన్సుల్ తెన్ బార్ జా కెర, అన్నె బులుక గెతె తతికయ్, బూతుమ్ దెర్లొ గుల్లో సుదొ ఎక్కిలోక జోతె కో గే కడ ఆన్ల.

33 యేసు జో బూతుమ్క ఉదడ గెలి బేగి, జో గుల్లో సుదొ లట్టబన్లొ. ఒత్త బెర తిల జనాబ్ ఆచారిమ్ జా, “అమ్చ ఇస్రాయేలులతె ఇనిచి జర్లు జలిసి కెయ్య దెకుమ్ నాయ్. ఆజి జర్లు జలి!” మెన లట్టబన్ల.

34 గని పరిసయ్యుల్ కిచ్చొ మెల మెలె, * “బూతల్క రానొ జలిసొచి నాన్ తెన్ ఈంజో బూతల్క ఉదడయ్” మెన అరుగురు జా, గోసక సంగిల.

35 యేసు జా గలిలయ ప్రాంతుమ్ ఒండిచ పట్టలె గెవ్విలె బుల బుల, జోవయింఛ నబ గెరలె గెచ్చ, పరలోకుమ్చి రాజిమ్ పాసి జా అయ్లిన్చి రిసొచి సుబుమ్ కబర్ సంగ, ఎత్తి రగల్చ జబ్బులు నొప్పులు గెచ్చవ, మాన్సుల్క చెంగిల్ కెర్లె తిలన్.

36 దన్ను బులై పొది, ఒగ్గర్ జనాబ్ జోతె అయ్ల జేవ్ మాన్సుల్క దెక దెక, జేవ్ గొవుడు నెంజిల మెండల్ రిత మాల్జ్ జా సైమల్ తెన్ తిలిసి దెక, జోవయించి ఉప్పిరి కన్కారుమ్ జా,

37 “గట్టిజ వంటో పిక లాయితి నమయుమ్ జా అన్య.

38 జాచి రిసా, ‘ఈంజ వంటో లాయితి రితి, ఈంజ వంటోక ఎజొమాని జలొ ప్రబు లాయిత మాన్సుల్క తెద్రవును’ మెన, తుమ్ జోక ప్రార్దన కెర” మెన యేసు సిన్సుల్క సంగిలన్.

* 9:34 9:34 ‘బూతల్క రానొ జలిసొ’ మెలె, నయ్తాన్.

10

బారజన్ సిస్సులక యేసు అదికారుమ్ దిలిసి

(మార్కు 3:13-19; 6:7-13; లూకా 6:12-16; 9:1-6)

1 తెదొడి యేసు జోప బారజన్ సిస్సులక పాసి బుకారా కెర, బూతల్ గట్టక ఉదడ గెలుక మెన, రగరగాల్చ బజ్బులు బాదల్ జల మాన్సులక చెంగిల్ కెరుక మెన, జోపయింక అదికారుమ్ దిలన్.

2 జేవ్ బారజన్ యేసుచ, బారికుల్చ నవ్వొ కిచ్చొ కిచ్చొ మెలె, తొలితో పేతురు మెన అన్నెక్ నావ్ తిలో సీమోను, చి జోచొ బావొసి అంద్రెయ. ఒత్త తెంతో, జెబెదయిచొ పుత్తుసి యాకోబు, చి యాకోబుచొ బావొసి యోహాను.

3 ఒత్త తెంతో, పిలిప్ చి బర్థొలోమయి, తోమా చి మత్తయి మెలో సిస్టు నజీతోసా. ఒత్త తెంతో, అల్పయిచొ పుత్తుసి యాకోబు, చి తద్దుయి మెలోసా.

4 ఒత్త తెంతో, కనానుచొ సీమోను మెలో అన్నెక్టొ, చి వడ్డొ యేసుక దెర తిలో ఇస్కరియోతు మెలి గవ్వొచొ యూదా.

5 యేసు జేవ్ బారజన్క అదికారుమ్ దా కెర బులుక తెద్రయేలి పొది, కిచ్చొ సెలవ్ దిలన్ మెలె, “యూదుల్ నెంజిలనతె అప్పొ గెచ్చుక పోన, చి నమరయ ప్రదేసిమ్చ పట్టులె పెన నాయ్.

6 జలె, పిట్ట గెల గొవుడు నెంజిలి మంద రితి జా తిల ఇస్రాయేలుల్తె తుమ్చ సొంత మాన్సుల్తె తుమ్ చి గెచ్చు.

7 తుమ్ గెచ్చు, చి ‘పరలోకుమ్చి రాజిమ్ పాసి జా అన్నె’ మెన బోదన కెర.

8 జబ్బు మాన్సులక చెంగిల్ కెర. మొర గెలనక జివ్ కెర. వెల్లి జబ్బుల్ తిలనక చెంగిల్ కెర సుద్ది కెర, చి బూతల్క ఉదడ గెల. అవ్ దెతిసి ఆరి తుమ్క దొర్కు జలి. మాన్సులక ఆరి తుమ్ దాన.

9 “తుమ్ బుల్తె పొది, బజార్ గే వెండి గే రాగిచ కాసుల్ గే, కిచ్చొ రగుమ్ డబ్బుల్ జలికు దెరన బార్ జా నాయ్.

10 దస్సి, నెంచె జలికు, దొన్సి సొక్కల్ జలికు, జోడ్డు జలికు, టిక్నొ డంట్ జలికు దెరన బార్ జా నాయ్. తుమ్ కచి రిసా కామ్ కెర్లె గే, తుమ్ కెర్లె కామ్చి రిసా జో దెతి అన్సిమ్ తుమ్ నజనుక నాయమ్.

11 “అన్నె, తుమ్ కేన్ పట్టుమ్తె జలికు గవ్వొ జలికు పెసెతె పొది, ఒత్త తగువ జలిసా కో గి జానన, చి తుమ్ ఒత్త తెంతో ఉట్ట గెతె ఎదక జోచితె తా.

12 జోచి గెరి తుమ్ పెసెతె పొది, జా గేర్చక, తుమ్క సేంతుమ్ తవుసు మెన చెంగిల్ నంగ.

13 జా గేర్ సేంతుమ్క తగువ జతిన్ జలి, తుమ్ అన్లి సేంతుమ్ జోవయింక జర్లు జా, తవుసు. జా గేర్చ సేంతుమ్క నే తగువ జతిన్ జలి, తుమ్ అన్లి సేంతుమ్ జోవయింక నే తతె తుమ్క అన్నె బుల జెయెదె.

14 కో జలికు తుమ్క మరియాద నే కెర్లెగిన, తుమ్ అన్లి కబుర్ నే సూన్లెగిన, జో గేరు జలికు, జా గావ్ జలికు ముల దా, తుమ్ ఉట్ట గెతె పొది, జా గుర్తుక, తుమ్చ చట్టొ జా టాన్తెచి లంబిలి దూడి వంష్ట గెల, చి ఉట్ట గెచ్చు.

15 ఈజ లోకుమ్చక వెల్లి తీర్పు కెర్లె దీసి అయేలె, సాదొమ చి గెమొరా మెల పూర్గుమ్ కుడ్డె నాననుమ్ జల పట్టుల్చి గత్తిచి కంట, తుమ్క మరియాద నే కెర్లె కేన్ గవ్వొచచి గత్తి ఒగ్గర్ సిచ్చుచి జయెదె, మెన నిజామి తుమ్క అవ్ నంగితసి.

16 “ఈందె, డొర్కొచచి నెడమె మెండల్క తెద్రయేలి రితి, దస్సి, తుమ్క మాన్సుల్తె అవ్ తెద్రయేతసి. జాచి రిసా, అయిచొ కెర్లె తెలివి అన్సి గే, తుమ్ కి తెద్ది తెలివి జా తా. గని, దస్సి తెలివి జలికి, పార్సు పిట్టల్చి రితి, తేట మెన్సు తిల సుదల్ జా తా.

17 కోవుమ్ జత మాన్సుల్చి రిసా జాగర్ల తెన్ తా. జేవ్ తుమ్క తీర్పు కెర్లె నబల్తె సార్చు కెర, జోవయింక నబ గెరెల తుమ్క కొర్లల్ తెన్ పెటుల.

18 తెదొడక అంచి రిసా జేవ్ మాన్సుల్ తుమ్క దెర అదికారుల్తె, రాసల్తె ఒగ్గడ నెవుల. చి జోవయింక మొక్కె కి, వేర దేసిమ్లు తెంతో అయేల అమ్చ యూదుల్ నెంజిలనచి మొక్కె కి తుమ్ అంచి రిసా సాచి నంగితె.

19 మాన్యుల్ తుమ్క దస్సి సార్పు కెరై పొదిక, కీసి లట్టబుక గే, కిచ్చి సంగుక గే, ఉచర చింత గలన నాయ్. కిచ్చొక మెలె, తుమ్ జోవయింక కిచ్చి సంగుక గే, తెదొడకయ్ దేముడుచి సుద్ది తిలి ఆత్మ తుమ్క దెయెదె.

20 మెలె, తుమ్చో అబ్బొసి జలో దేముడుచి సుద్ది తిలి ఆత్మ తుమ్చి పెట్టి తా కెరె, జోయ్యి లట్టబెదె. తుమ్ ఉచర లట్టబ్బు నాయ్.

21 “జా పొదిక, అన్యోన్క బావొసి జలెకు, పుత్తున్క అబ్బొసి జలెకు, మొర్తి సిచ్చతె సార్పు దెవుల. అన్యె, పుత్తుర్పులె అయ్యన్ అబ్బొసిచి ఉప్పిరి విరోదుమ్ జా, జోవయింక మొరవుల.

22 అంచి నావ్చి రిసా ఒగ్గర్ ఒగ్గర్జిన్ తుమ్క విరోదుమ్ జవుల. ఈంజేవ్ అల్లర్ పూర్తి జతె ఎదక కో అంక నిదానుమ్ తా ఒర్పువ జవుల గే, రచ్చిండువ జవుల.

23 మాన్యుల్ ఏక పట్టుమ్తె తుమ్క అల్లర్ కెరై, అన్యెక్ పట్టుమ్తె ఉట్ట నిగ. కిచ్చొక మెలె, తుమ్క ఆవ్ కిచ్చి సంగితసి మెలె, ఆవ్ మాన్యు జా జెర్కున్ అయ్లోసా అన్యె జతె ఎదక, అమ్చ ఇస్రాయేలులచ పట్టల్ ఎత్తితె తుమ్ బుల కేడవుక నెతుర్పు.

24 “జోచో గురుచి కంట సిన్పుడు వెల్లో నెంజె. దస్సి కి, జోచో ఎజోమాన్చి కంట గొత్తి మాన్యు వెల్లో నెంజె.

25 సిన్పుడు జోచో గురుచో రితో, గొత్తి మాన్యు జోచో ఎజోమాన్చో రితో జలె, సరి జతయ్. దస్సి, ఆవ్ గెర్చో ఎజోమాన్క* ‘బయెల్లిబూల్’ మెన కోవుమ్ జల మాన్యుల్ సంగ అన్యె జలె, తుమ్ అంచి గెర్చ ఎత్తిక కి కచితుమ్ దస్సి దూసువ కెరుల.

కక్క బింక గే నే బింక గే యేసు సంగిలిసి

(లూకా 12:2-7)

26 “జలె, జేవ్ అల్లర్ కెరైక తుమ్ బియఁ నాయ్. డంక తిలిసి కిచ్చి జలెకి కెయఁక తెయఁక నే డీస్సె తయె నాయ్, లుంకణ్ణిసి కిచ్చి జలెకి కెయఁక తెయఁక ఎత్తిక నే జాన్తి రితి తయె నాయ్. ఆకర్క డీసెదె, ఆకర్క జాన్క జయెదె.

27 ఆవ్ గుట్టు తెన్ తుమ్క సంగితిసి తామ్ ఎదార్దుమ్ సంగ. కంగ్దుమ్ తుమ్క ఆవ్ సంగితిసి తామ్ మేడల్చ ఒర్పెలె తెంతో సాట్పు కెరె.

28 తుమ్చి ఆఁగుక మారుక తెర్లక తుమ్ బియఁ నాయ్. కిచ్చొక మెలె, తుమ్క మార్చె కి, తుమ్చి ఆత్మక మారుక నెతిర్తి. గని ఆత్మక కి ఆఁగుక మార్చె వెల్లి ఆగి గొయ్తె గల దా, నాసెనుమ్ కెరుక తెర్లొసొకయ్ తుమ్ బియఁ.

29 “ఈంజ దేసిమ్చ మాన్యుల్ దొస్సి గెర్పిట్టల్ ఎక్కి, కాసుక వికుల. జలెకి, తుమ్చో అబ్బొసి జలో దేముడుచి నెలవ నెంజెలె, దస పిట్టల్తె ఎక్కి కి బుయ్యె సేడె నాయ్.

30 తుమ్చి బోడిచ సెండి వాడల్ ఎత్తి మొత్తుమ్ కెత్తి అన్యె గే జోయ్యి జానె.

31 జాచి రిసా, తుమ్ బియఁ నాయ్. తుమ్ పిట్టల్చి కంట ఒగ్గర్ విలువ అస్సాన్.

32 “కో అంక నంపజా, మాన్యుల్చి మొక్కె ఒప్పునుల గే, జోక అమ్చ మాన్యుల్ ఈంజేవ్ మెన, పరలోకుమ్ తిలో అబ్బొసి జలో దేముడుచి మొక్కె అవ్వి సాచి సంగిందె.

33 గని, మాన్యుల్చి మొక్కె కో అంచి రిసా ‘జోచో నెంజ’ మెనుల గే, దస్సి పరలోకుమ్ తిలో అబ్బొసి జలో దేముడుచి మొక్కె జోక ‘అమ్చ నెంజితి’ మెన సంగిందె.

34 “ ‘జో బూలోకుమ్తె అయ్లిసి మాన్యుల్తె ఎక్కి సెంతుమ్ కెరెదె’ మెన తుమ్ అంక ఉచర నాయ్. సెంతుమ్ నాయ్, గని జట్టి కెరయ్తి రితి అయ్లయ్.

35 కీసి మెలె, ఆవ్ అయ్లి రిసా, జోచో అబ్బొన్క పుత్తుసి, జాచి అయ్యన్క దువిసి, జాచి అత్తన్క నూసుసి విరోదుమ్ జవుల.

36 దస్సి, ఏక మాన్యుచి కుటుంబుమ్చయ్ జోక విరోదుమ్ సుదల్ జవుల.

37 “అబ్బొన్క జలెకు, అయ్యన్క జలెకు అంచి కంట కో ఒగ్గర్ ప్రేమ కెరుల గే, దస్సి మెనసుక అంక తగువ జలన నెంజితి. పుత్తున్క జలెకు, దువిన్క జలెకు అంచి కంట కో ప్రేమ కెరుల గే, దస్సి మెనసుక అంక తగువ జలన నెంజితి.

* 10:25 10:25 ‘బయెల్లిబూల్’ మెలె, నయ్తాన్, బాతల్క రానో జలోనా.

38 అంచి రితి జోవయించి సొంత నిలువ వయన్ని రితి జా, కో అంచి పట్టి జెతి నాయ్, దస్సి మెననుక అంక విలువ జలన నెంజితి.

39 కో జోచి సొంత ప్రానుమ్ రచ్చించువ కెరనుక చజాల గే, జోచి ప్రానుమ్ పాడ్ జా గెచ్చెదె. గని అంచి రిసా కో జోచి ప్రానుమ్ దెతి రితి ఎక్కి నిదానుమ్ ఇండుల గే, జోచి ప్రానుమ్ రచ్చించువ జా జోక దొర్కు జయెదె.

40 “తుమ్క కో మరియాద కెరుల గే, జేవ్ తుమ్క మరియాద కెర్లసి, అంకయి మరియాద కెర్లసి జతయ్. అన్యె, అంకయి కో మరియాద కెరుల గే, జేవ్ దస్సి కెర్లసి అంక తెద్రయ్లోసాక కి మరియాద కెర్లసి జతయ్.

41 జలె, ‘దేముడు సంగిలి కబుర్ అన్తోసా, ఈంజో’ మెన కో దన మాన్సుల్క మరియాద దెకుల గే, జోవయింక కి ప్రబుచి కబుర్ సంగిలోసాక దెతి రితి బవుమానుమ్ దొర్కు జయెదె. పడ్డో, ‘ప్రబుచి నీతి తెన్ తిలోసా, ఈంజో’ మెన చిన, కో దసా మాన్సుక మరియాద కెరుల గే, జోక కి నీతి తిలోసాక దెతి రితి బవుమానుమ్ దొర్కు జయెదె.

42 పడ్డో, ‘యేసుచ సిస్సుల్’ మెన కో ఈంజేవ్ గపురుమ్ నెంజిల నంపజలనతె ఎక్కిలోక కి ఎక్కి బుక్కెక్ పాని కి పియడుల గే, జోవయింక కి బవుమానుమ్ దొర్కు జయెదె, మెన నిజామి సంగితసి” మెన సిస్సుల్క యేసు సంగిలన్.

11

1 యేసు జోచ బారజన్ సిస్సుల్క బోదన కెర్లసి కేడ్లి పడ్డో, జా గలిలయ ప్రాంతుమ్చ పట్టల్తె బోదన కెరుక మెన బార్ జలన్.

జేల్తె తిలో యోహాను యేసుక తెద్రయ్లి కబుర్

(లూకా 7:18-35)

2 బాప్తిసుమ్ దెతో యోహానుక హేరోదు రానో జేల్తె గల తిలో. జలె, క్రీస్తు కెర్ల కముచి రిసా యోహాను జేల్తె నూన కెర, జోచ సిస్సుల్ తెన్ యేసుక కిచ్చో కబుర్ తెద్రయ్లన్ మెలె, “దేముడు తెద్రయిందె మెలో రచ్చించువ కెర్లొసా నిజామి తుయి గే, అమ్ అన్నెక్లొక రకుక గే?

3 మెన వుస” మెన సంగ తెద్రయ్లో.

4 యేసు యోహానుచ సిస్సుల్క, దెక కెర నూన కెర, “తుమ్ గెచ్చ, చి దెకిలిసి నూన్లసి ఎత్తి యోహానుక సంగ.

5 గుడ్డి జా తిల మాన్సుల్ దెకితతి, సొట్ట జా తిల మాన్సుల్ ఇండితతి, వెల్లి రోగుమ్ సేడ తిలన చెంగిల్ జా నుద్ది జతతి, బోయ్రో జా తిల మాన్సుల్ నూన్తతి, మొర గెలన జీవ్ జతతి, నుబుమ్ కబుర్ బీద మాన్సుల్క నూనయ్తసి.

6 జలె, “కో జలెకు అంచి రిసా అన్మానుమ్ నెంతె తవుల గే, జోక చెంగిలి” మెన యేసు సంగ తెద్రయ్లన్.

యోహానుచి రిసా యేసు సంగిలిసి

7 యోహానుచ సిస్సుల్ ఉట్ట గెత తతికయ్, ఒత్త తిల ప్రెజల్క యోహానుచి రిసా యేసు ఇసి మెన సంగుక దెర్లన్. “తుమ్ కిచ్చో దెకుక జా బయిలె గెచ్చ తిలదు? వాదుతె చివ్వర్ వెల్లి జతిసి దెకుక గెచ్చ తిలదు గే?

8 నాయ్ మెలె, కిచ్చో వేరచి దెకుక గెలదు? సామ్నార్లు గలంత పాలల్ గలల్లో మాన్సుక దెకుక గెలదు గే? ఈందె, దస్సు పాలల్ గలంతన రానల్చి గెరలె తవుల.

9 జలె, కిచ్చో దెకుక గెలదు? దేముడు తెద్రయ్లి కబుర్ సంగిలోసా ఎక్కిలోక దెకుక గెలదు గే? నిజామి. గని, జో ప్రబుచ మాములుమ్ కబుర్లు సంగితనచి కంట యోహాను ముక్కిమ్చో జయెదె,” మెన తుమ్క ఆవ్ సంగితసి.

10 “ఈందె, అంచి కబుర్ సంగిలోసా జతి రితి ఎక్కిలోక తుచి పురె తెద్రయ్తసి. తుచి కంట అగ్గె గెచ్చ, తుయి జెతిసి సొట్ట కెరెదె”

మెన రెగ్గె కోడ్ అన్యె, జా కోడు యోహానుచి రిసాయి ‘అంచి కబుర్ సంగిలోసా’ మెన కచి రిసా సంగితయ్.

11 జాచి రిసా, తెర్లిమున్ను లట్టబ్బి రిసా జెర్లిలనతె బాప్తిసుమ్ దిలో యోహానుచి కంట వెల్లిచో కోయి నాయ్ మెన ఆవ్ కచితుమ్ తుమ్క సంగితసి. జలెకి, పరలోకుమ్చి రాజిమ్తె బెదితనతె, కో ఎత్తిచి కంట దాక్ జవుల గే, జో యోహానుచి కంట వెల్లిల జవుల.

12 “బాప్తిసుమ్ దిలో యోహానుచ దీసల్ తెంతో మొదోల్ కెర, పరలోకుమ్చి రాజిమ్ వెలయలి రితి జెతె అస్సె, చి మాన్సుల్ బమ్మ తెన్ జేవ్తె బెదితతి.

13 యోహాను ఎదక దేముడుచ కబుర్లు సంగిలన, మోసా పూర్గుమ్చొచి అత్తి దేముడు రెద్దయల * అగ్గుల్చి కొడె ఎత్తి, పరలోకుమ్చి రాజిమ్ జెతిన్చి రిసా సంగితయ్. జేవ్ ఎత్తిజిన్చి ఆకరతె యోహాను అయ్లో.

14 అంచి కబుర్ పూర్గుమ్ సంగిలో ఏలీయా రితోసా ఎక్కిలోక తెద్దయిందె” మెన ప్రబు అగ్గె సంగ తిలో. జలె, తుమ్ నంప కెర్తె గే నాయ్ గే, గని జో తెద్దయి జలీసా యోహాను.

15 సూన్త కండ్లొ తిలన సూన.

అన్యాయ్ జతనచి రిసా యేసు గోల కెర్లిసి

16 “జలె, ఈంజ ఉగుమ్చ మాన్సుల్చి బుద్దిక కిచ్చొ టాలి జయెదె? వీదులె వెన కెల్ల బోదల్చ రిత జతతి, జేవ్ బోదల్ జోవయింతెన్ బెద కెల్ల బోదల్ బుకార కెర,

17 తుమ్క ‘నచ్చతు’ మెన బమ్మి పుంగిలెకి నచ్చును నాయ్. అమ్ ఏడ్లెకి, తుమ్ బెద ఏడ్లు నాయ్, మెన దన బోదల్ కిసి సంగుల గే, దస్సి ఆవ్ చి యోహాను కిచ్చొ కెర్తె కి, తుమ్ మెన్సున్ నాయ్.

18 కిచ్చొక ఆవ్ ఇసి టాలి కెర్తెసి మెలె, యోహాను చువ్వె తన్న తతోసాచి రిసా, ‘జోక బాతుమ్ దెర అస్సె’ మెన సంగితె తిల.

19 ఆవ్, జలె, మాన్సు జా జెర్లున్ అయ్లోసా, మాములుమ్ కతె పితె తతిన్చి రిసా కిచ్చొ మెంతతి మెలె, ‘అదె, కయ్లో మత్తాలొ ఈంజో. సిస్సు నజీతన తెన్ పాపుమ్ కెర్లన తెన్ బెదితొసా’ మెన అంక నిస్కారుమ్ సంగితతి. గని ఎక్కిలోచి వెట్టి చెంగిల్ తెంతో చి బుద్ది తిలె, జోచ కమెచి పలితుమ్తె రుజ్జు జయెదె” మెన యేసు సంగిలన్.

పట్టుల్క యేసు గట్టిజ గోల కెర్లిసి

(లూకా 10:13-15)

20 యేసు జా గలిలయ ప్రాంతమ్తెచ నగుమ్ పట్టుల్తె ఒగ్గర్ ఒగ్గర్ అద్దుతుమ్ కమె కెర్లన్. ఈంజేవ్ కమె జోచి అదికారుమ్క రుజ్జు దెకయ్లెకి, ఒత్త తిల మాన్సుల్ జేవ్ కెర్ల పావల్చి రిసా దుకుమ్ జతి నాయ్, ములితి నాయ్. జాచి రిసా, యేసు ఇసి మెన జోవయింక గోల కెరుక దెర్లన్:

21 “అయ్యె! కొరాజీనా పట్టుమ్తెచ చి బేత్నయిదా పట్టుమ్తెచ, తుమ్చి సిచ్చు పిట్టె నాయ్! తుమ్చి నెడిమి కెర్ల కమె అమ్చె యూదుల్ నెంజిల తూరు చి సిదోసు మెల పట్టుల్తె ఆవ్ కెర్లయ్ జలె, జేవ్ పట్టుల్చ మాన్సుల్ అగ్గయి జేవ్ కెర్ల పావల్క దుకుమ్ జా, ములిత. జేవ్ కెర్ల పావల్చి దుకుమ్చి రుజ్జుక బస్తల్ బందన సార్ గాంసంత.

22 పూర్గుమ్ జేవ్ తూరు పట్టుమ్చ కి సిదోసు పట్టుమ్చ కి ఒగ్గర్ పాపుమ్ కెర్లె తిలె కి, ఈంజ లోకుమ్చ ఎత్తిజిన్క వెల్లి తీర్పు కెర్లె జా దీసిక, తూమ్ జతి సిచ్చు జేవ్ పట్టుల్ జతి సిచ్చుచి కంట ఒగ్గరి జయెదె, మెన తుమ్క ఆవ్ కచితుమ్ సంగితసి.

23 “పడ్డె, తుమ్ కవెర్లహూమ్ పట్టుమ్తెచ, తుమ్ పరలోకుమ్తె ఉక్కిల్ జస్సె గే? నాయ్. తుమ్ మెర్లగన రకితి టాన్తె ఉత్త గెతె. కిచ్చొక మెలె, తుమ్చితె ఇన వెల్లి కమె అమ్చె యూదుల్ నెంజిలి సాదోమ పట్టుమ్తె పూర్గుమ్ కెర తత్తయ్ జలె, ఒత్త తిలన నంపజత, చి జా పట్టుమ్ నాసెనుమ్ నే జెతె, ఆజి ఎద తత్తి.

* **11:13 11:13** తెలుగు బైబిల్తె ధర్మశాస్త్రమ్ మెలె, మోసాచి అత్తి దేముడు రెద్దయలి అగ్గుల్ మెన అమ్ జానుమ్. ఈంజ కొడె ఎత్తి, బైబిల్తె అగేచి పావ్ వుస్సుకుమ్తె రెద్దయ్ జా అస్సె. ఈంజ దెకపుక మెన కుపెయ బాన్తె నొయ ప్రమానుమ్తె మోసా పూర్గుమ్చొచి అత్తి రెగిడ్డి దేముడుచ అగ్గుల్ మెన రెద్దయ అస్సె.

24 సాదోమ వట్టుమచ మాన్యుల్ ఒగ్గర్ పాపుమ్ కెరై తిల కి, ఈంజ లోకుమచ మాన్యుల్ క వెల్లి తీర్పు కెరై దీనిక, తూమ్ జతి సిచ్చ జా పట్టుమచ జతి సిచ్చచి కంఠ ఒగ్గరి జయెదె, మెన ఆవ్ తుమ్ క సంగితసి." మెన యేసు సంగిలన్.

25 తెదొడి యేసు కిచ్చొ సంగిలన్ మెలె, "పరలోకుమ్ కి బూలోకుమ్ కి అదికారుమ్ తిలో ఓ అబ్బొ, 'జానుమ్' మెన జేవ్ క జెచ్చొ గవురుమ్ ఉచరంతనక చి ఒగ్గర్ నదు కెర్లనక ఈంజ జర్లు జతినె ఎత్తిచి అర్దుమ్ లుంకడ, బాలబోదల్ జల రిత గవురుమ్ నెంజిలనక అర్దుమ్ దెకవ అస్సిని మెన తుక జోబర, మెన అంచి సర్ల జతసి.

26 తుచి దయ తెన్ ఇని కెర్లది" మెన ప్రార్లన కెర్లన్. దస్సి ప్రార్లన కెర, అన్నె ఇసి మెన సంగిలో.

27 "అంచొ అబ్బొ ఎత్తి అంచి అత్తి సార్పు కెర దా అస్సె. అన్నె అబ్బొ ఎత్తిలోయ ఆవ్ పుత్తనక సరిగా జానె అన్నె కో కి నేన్ తి. పడ్డె, ఆవ్ పుత్తసి అంక పిట్టవ కో కి అబ్బొక నేన్ తి చి అన్నె కక్క ఆవ్ అబ్బొక దెకపుక మెన నిసాన్ దె గె, జో కి జానెదె.

28 "సైమల్ బాదల్ చ జాడ్లు వయ టక్క తిలన ఎత్తిజన్ అంచితె జా, చి తుమ్ చి జాడు ఆవ్ వయలి రితి జా, తుమ్ క పుండయెదె.

29 అంచి తెన్ లంకె జా, చి అంచితె బుద్ది సిక్క. కిచ్చొక మెలె, ఆవ్ గవురుమ్ నే ఉచరంతె, పెట్టి అమ్మంకుమ్ తెన్ అస్సి, చి తుమ్ చ అత్మలతె పుండితె.

30 కిచ్చొక మెలె, ఆవ్ గల్తి పుండు సుల్లు అస్సె, ఆవ్ వయడ్డి జాడు సుల్కున అస్సె" మెన యేసు సంగిలన్.

12

బక్తి కెరై దీని రిసా యేసు సంగిలినె
(మార్కు 2:23-28; లూకా 6:1-5)

1 జా పొదులె, *నెలవ కడన్లి దీన్ తె, యేసుచి సిన్యుల్, వంటో పికిలి బుయె వాట్ గెతె తిల. జలె, యేసుచ సిన్యుల్ చూ కెర్తికయ్. జా వాట్ సాడిచి పికిలి వంటోచ ఎన్యుల దొన్ని కోడ కంక దెర్ల.

2 జలె, పరినయ్యుల్ నగుమ్ జన్, జేవ్ సిన్యుల్ కెర్తినె దెక కెర, "అదె, †బక్తి కెరై నెలవ కడన్లి దీని కెరుక నాయిమ్ నెంజిలినె తుచ సిన్యుల్ కెర్తతి" మెన యేసుక గోల కెర్తికయ్,

3 జో జోవయంక ఇని మెలన్: "పూర్లుమ్ తిలో దావీదు రానొ, జోక చి జో తెన్ తిలనక చూ కెర్తికయ్, జో కెర్తినె చి రిసా తుమ్ సదు కెర్పు నాయ్ గె?

4 కిచ్చొ కెర్తినె మెలె, దేముడుచి గుడితె జో పెసిలన్, చి ఒత్త తిల పూజర్లు అర్పితుమ్ దిల పోడియొ కయ్ల. జేవ్ పోడియొ పూజర్లు కంక జయెదె, గని అన్నె కో కంక జయె నాయ్. జో కి, జో తెన్ తిలన కి జా కంక నాయిమ్ నెంజిలె కి జేవ్ కయ్ల.

5 పడ్డె, ఎత్తి. బక్తి కెరై నెలవ కడన్లి దీని, దేముడుచ పూజర్లు దేముడుచి గుడితె నీవ కెర్తతి. జా నీవక 'కామ్. సుద్ది దీని పిట్టవ గార్ కెర్తతి మెన ఉచరుక జయెదె జలెకి, పాపుమ్ నెంజె' మెన మోసె పూర్లుమ్ చొచి అత్తి రెగిడ్డి దేముడుచ †అగ్గులతె తిలినె సదు కెర్పు నాయ్ గె?

6 జలె, ఆవ్ తుమ్ క సంగిలినె కిచ్చొ మెలె, దేముడుచి గుడిచి కంఠ వెల్లో సుదొ ఇన్నె అస్సె.

7 'తుమ్ కిచ్చొ కెర్తినె అంక ఆన మెలె, బలి దెతినె నాయ్, గని మాన్యుల్ క కన్యారుమ్ దెకితినె'

* 12:1 12:1 ఎత్తి సెన్యుర్ యాదుల్ క బక్తి కెరై నెలవ కడ దీని జయెదె. జా దీని జోవయంక నబ గెరె గెచ్చ, దేముడుచ కొడె సూన కెర, ఎత్తి అదికారుమ్ తిలో దేముడుక బక్తి కెరల. జోక 'యెహోవ' మెన నాన్ తయెదె. జా దీని 'కిచ్చొ కామ్ కెర నాయ్' మెన జో ఎత్తి అదికారుమ్ తిలో దేముడు సంగిలినెక యాదుల్ చ వెల్లెల మాన్యుల్ ప్రైజల్ క జాడు వయడ్డి రితి కెర కామ్ నే కెర్తినె చి రిసా ఒగ్గర్ అగ్గుల్ అచ్చె ఉచర అస్సి. ఇన్నె, దొన్ని ఎన్యుల కోడ్లినె 'కామ్' మెన నింద కెర్తతి. † 12:2 12:2 ఎత్తి అదికారుమ్ తిలో దేముడు ఒగ్గర్ పూర్లుమ్ పొది సంగిలి రితి, యాదుల్ ముక్కిమ్ క సిన్యుర్ దీని నబతె గెచ్చ బోదన సూన బక్తి కెరల, చి కిచ్చొ కామ్ కెర్త నాయ్. కామ్ నే కెర్తె అగ్గుల్ ప్రైజల్ నే పిట్టయె రితి, జోవయంక వెల్లెల మాన్యుల్, కన్యారుమ్ వచ్చె, ప్రబు సంగిలి కంఠ అన్నె ఒగ్గర్ ముద్దు కెర్తతి. ‡ 12:5 12:5 తెలుగు బైబిల్ తె ధర్మశాస్త్రమ్ మెలె, మోసెచి అత్తి దేముడు రర్వులె అగ్గుల్ మెన అమ్ జానుమ్. ఈంజ కొడె ఎత్తి బైబిల్ తె అగెచి పావ్ పున్కుమ్ తె రెర్లయ్ జా అస్సె. ఈంజ దెకపుక మెన కుపియ బానెతె నొయి ప్రమానుమ్ తె మోసె పూర్లుమ్ చొచి అత్తి రెగిడ్డి దేముడుచ అగ్గుల్ మెన రర్లవ అస్సె.

మొన తెదొడి సంగిలి కోడు తుమ్ అర్దుమ్ కెరంతదు జలె, పాపుమ్ నే కెర్ల ఈంజేవ్ సిస్సుల్క 'పాపుమ్ కెర్ల' మొన, నింద కెర్లదు నాయ్.

8 సెలవ్ కడన్లి దీసిని ఉప్పిరి అవ్ మాన్సు జా జెర్యున్ అయ్లోసాక అదికారుమ్ అస్సె." మొన, జేవ్ పరిసయ్యుల్క యేసు సంగిలన్.

అతు లంబిలోసాక యేసు చెంగిల్ కెర్లిసి
(మార్కు 3:1-6; లూకా 6:6-11)

9 యేసు ఒత్త తెంతో గెచ్చ, జా కపెర్నూహమ్ పట్టుమ్తెచి సబ గెరి పెసిలో.

10 ఒదె, అతు లంబ గెలోసా ఎక్కిలో ఒత్త తిలన్. జేవ్ పండితుల్, కి, జో బాద తిలో మాన్సు అస్సె మొన దెక కెర, యేసుక నేరిమ్ వయడుక ఉచర, "సెలవ్ కడన్లి దీసి ఏక బాద తిలో మాన్సుక చెంగిల్ కెరుక నాయిమ్ గే, నాయ్?" మొన జోక పుసిల.

11 జో జోవయింక, "తుమ్చితె కేన్ మాన్సుక జలెకు ఎక్కి మెండ జవున్ తిలిగిన, జా మెండ బక్తి కెర్లి సెలవ్ కడన్లి దీసి ఏక గొయత సేడ తిలిగిన, జో ఎజోమాని జాక జా గొయ తెంతో కడె నాయ్ గె?"

12 జలె, మెండచి కంట మాన్సు ఒగ్గర్ విలువ. జాకయ్, సెలవ్ కడన్లి దీసి కి మాన్సుక చెంగిల్ కెరుక నాయిమి" మొన జబాబ్ దా,

13 యేసు జో అతు లంబిలోసాక దెక, "తుచి అతు చంపా కెరు" మెలన్. జో మాన్సు అతు చంపా కెర్లన్, చి ఈంజో అతు బేగి అన్వెక్ చెంగిల్ తిలి అతుచి రితి చెంగిల్ జలి.

14 గని యేసు దస్సి కెర్తికయ్, పరిసయ్యుల్ కిచ్చొ కెర్ల మెలె, బార్ జా కెర, యేసుక కీసి మారుక గే కుట్ర ఉచరన లట్టబన్.

15 జేవ్ పరిసయ్యుల్ ఉచర్లిసి యేసు జానెచి రిసా, ఒత్త తెంతో ఉట్ట గెలన్. ఒగ్గర్ ఒగ్గర్జెన్ జనాబ్ జోచి పట్టి గెల, చి జోవయింతె జోర్టో తిలస ఎత్తిజెన్క జో చెంగిల్ కెర,

16 "అంచి రిసా తుమ్ కేనె తెర్లె ఒత్త సంగ నాయ్" మొన, జేవ్ ప్రైజల్క ఆడ్ర దిలన్.

17 ఈంజ ఎత్తి కిచ్చొక జర్లు జలి మెలె, దేముడుచ కబుర్లు సంగిలో యెసయా పూర్లుమ్చొచి అత్తి సంగిలి కోడ్ నెరవెర్లువ జతి రిసాయి.

18 "ఈంజో, అవ్ నిసాన్ల అంచొ సేవ కెర్లొసా, ఈంజో అవ్ ప్రేమ కెర్లొసా, చి రిసా అంక పూర్లి సర్లసంతోసుమ్. ఇనాచి పట్టి అంచి అత్తు తియిందె, చి 'యూదుల్ నెంజల మాన్సుల్ కి రచ్చించువ జంక జయెదె' మొన సూసవెదె.

19 ఈంజో పోటి జయె నాయ్. గగ్గల్ జయె నాయ్, అస్సె, గపురుమ్ ఆనన్తి రితి వీదులె గట్టిజ లట్టబ జోచి అనాడ్ సూసయె నాయ్.

20 జలె, ఆకర్ దీసిక సత్తిమ్ తెన్ ఎత్తిక పరిచ్చ కెర తీర్పు కెర, సిచ్చల్ గే బవుమానల్ గే దెతి ఎద, కామ్క నెంజలి పీరి గండక జో మోడ కెర వెంట గెల్లి నాయ్. సరిపుచువ జతి ఉజిడి నే దెతి వత్తి జో నే విజవ దెవుల.

21 పడ్డి, ఇనాచి నావ్చి తెడి యూదుల్ నెంజలన దయిరిమ్ జా ఆస జవుల"

మొన, దేముడు సంగిలి కోడు నెరవెర్లువ జలి.

యేసుక పండితుల్ దూసుప కెర్లిసి
(మార్కు 3:20-30; లూకా 11:14-23; 12:10)

22 తెదొడి బూతుమ్ దెర్లి రిసా గుడ్డి జా గుల్లో జా తిలో మాన్సుక ఒత్త తిల మాన్సుల్ యేసుతె కడ ఆన్తికయ్, యేసు జోక చెంగిల్ కెర్లన్. జో మాన్సు లట్టబుక దెర్లి చి అంకివో డీసిల.

23 ఇస్సె జలి రిసా, ప్రైజల్ ఎత్తి ఆచారిమ్ జా, "ఈంజో యేసు కొన్నె? దావీదు రానెచి సెకుమ్తె జెర్యుక తిలో రచ్చించువ కెర్లొసా ఈంజో ఏక వేల జయెదె గే?" మొన లట్టబ్క దెర్ల.

24 పరిసయ్యుల్, జా కోడు సూస కోపుమ్ జా. "బూతల్క రానె జలో బయెల్లిబూల్చి నావ్ తెన్ ఈంజో బూతల్క ఉదడ్యయ్" మొన గోసక సంగిల.

25 గని జేవ్ ఉచర్లిసి యేసుక జానెచి రిసా, ఇసి మెలన్. "కేన్ జవున్ రాజిమ్తెచ మాన్సుల్, జోవయింక జెచ్చి విరోదుమ్ జా వర్ల వర్ల జా యుద్దుమ్ కెరన్లె, జా రాజిమ్ పాడ్ జా గెచ్చెదె. కేన్ పట్టుమ్ జవున్ కేన్

గేరు జవున్ మాన్సుల్ వర్చ వర్చ జా జోవయింక జెవ్వి విరోదుమ్ కెరనై, జా వట్టుమ్ జవున్, గేరు జవున్ టీవో జయె నాయ్.

26 దస్సి, నయ్తాన్చక సయ్తాన్ ఏక్ వేల ఉదడ గెలిగిన, జోవయింక జొయ్యి యుద్దుమ్ కెర్తయ్, జోవయింక జొయ్యి యుద్దుమ్ కెర్తె, జోచి రాజిమ్ కీసి జా టీవో జయెదె?

27 ఆవ్ ఏక్ వేల బయ్తెబూలచి నావ్ తెన్ బూతల్క ఉదడగెగిన, తుమ్చ సిస్సుల్ కచి నావ్ తెన్ ఉదడతి? బూతల్క ఉదడ తుమ్చయ్ సిస్సుల్ అంచి రిసా తుమ్క తీర్పు సంగతు!

28 దేముడుచి సుద్ది తిలి ఆత్మసెక్కిక ఆవ్ బూతల్క ఉదడ గెల్తసి జలె కచితుమ్ దేముడుచి రాజిమ్ తుమ్తె అప్పె పావ జా అస్సె.

29 “అన్యెక్ టాలి ఉచర, కిచ్చొ మెలె, కేన్ జవున్ బలుమ్ సుదొచి గెరి పెన జోచి అస్సి దెర గెచ్చుక చోరు ఉచరగెగిన, తోలితో జో చోరు జో బలుమ్ సుదొక నే బంద తిలిగిన, చోరుక నెత్తె. జో బలుమ్ సుదొక తోలితో బందిలిగిన, గెరిచి సామన్ జో చోర గెలుక జయెదె” మెన సంగిలన్.

30 దస్సి సంగ, యేసు అస్సె, “కో అంచి పచ్చెన జయె నాయ్ గే, అంక విరోదుమ్ జా అస్సె, చి అంచి రాజిమ్తె జేవ్ బెదిత్ రితి కో అంచి తెన్ మాన్సుల్క ఆనె నాయ్ గే అంచి మందక చెదుర్చు కెర్తయ్.

31 “జలె, ఆవ్ తుమ్క సంగితిసి కిచ్చొ మెలె, ఎక్కిక పిట్టవ మాన్సుల్ కెర్త పాపల్ దూసెనల్ ఎత్తి జోవయింక చెమించువ కెరుక జయెదె. గని, దేముడుచి సుద్ది తిలి ఆత్మక దూసువ కెర్తసి చెమించువ జయె నాయ్.

32 కో గడియ బమ్మ జా ఆవ్ మాన్సు జా జెర్చున్ అయ్లోసాచి రిసా అన్యానుమ్ కోడ్ లట్టబెదె గే, జోవయింక చెమించువ కెరుక జయెదె. గని దేముడుచి సుద్ది తిలి ఆత్మక కో దూసువ కెరల గే, ఈంజ ఉగుమ్తె కి జా ఉగుమ్క కి చెమించువ జతి నాయ్.

33 “రూకచి పండ్లు చెంగిల్చి జలె, జా రూకుక చెంగిల్ మెన ఒప్పున. రూకచి పండ్లు గర్చె జలె, జా రూకుక గర్చె మెన ఒప్పున. రూకచి పండ్లు దెకిలిగిన, జా రూకుక చెంగిల్ గే, గర్చె గి చినుక జయెదె.

34 పెట్టి అయివొచి రితి విస్సుమ్ తిల మాన్సుల్, తుమ్. తుమ్చి పెట్టి విస్సుమ్ తిలి రిసా తుమ్ కీసి చెంగిల్చి లట్టబుక జయెదె! పెట్టితె తిలి బుద్దిచి కొల్లి చోడి లట్టబెదె.

35 చెంగిల్ మాన్సు జోచి చెంగిల్ బుద్ది బెర్చుచి కొల్లి చెంగిల్చి బార్ కెరెదె. గర్చె మాన్సు జోచి పెట్టిచి విస్సుమ్చి బెర్చుచి కొల్లి విస్సుమ్ బార్ కెరెదె.

36 ఆవ్ తుమ్క సంగితిసి కిచ్చొ మెలె, ఈంజ లోకుమ్చ ఎత్తిక వెల్లి తీర్చు కెర్తె దీసిక మాన్సుల్ లట్టబ్లి ఎత్తి కామ్క నెంజిలి కోడుచి రిసా నేరిమ్ వయుల.

37 తుమ్చ కొణొ తుమ్చి పెట్టి తిలిన్క సాచి జలి రిసా నీతి సుదో గే, నెంజిలి పాపుమ్ సుదో గే బార్ కెరెదె.” మెలన్.

**జేవ్ యూదుల్ అన్యానుమ్ జలిన్చి రిసాచి తీర్పు
(మార్కు 8:11-12; లూకా 11:29-32)**

38 తెదొడి పరిసయ్యల్చి చి మోసి తెన్ దేముడు దిలి ఆగ్గల్ సికడ్డన సగుమ్జిన్ యేసుక, “గురుబాబు, దేముడుచి అదికారుమ్ తుక అస్సె మెన రుజ్జు దెకయ్తి వెల్లి కామ్ ఏక్ అప్పె కెరు. దెకుమ్దె” మెన యేసుక సంగిల.

39 గని, జో జోవయింక కిచ్చొ జబాబ్ దిలన్ మెలె, “ప్రబుక నిదానుమ్ నెంజి లంజెబుద్ది పాపుమ్బుద్ది జల తుమ్ ఈంజ కాలుమ్చ మాన్సుల్, రుజ్జు దెకయ్త కమొక కోరవ జతసు. అంచి అదికారుమ్ దెకయ్తి రిసా ఎక్కి పిట్టవ, కేన్ వేర కామ్ కెర దెంక నెంజె. జా రుజ్జుచి కామ్ కీసిచి జయెదె మెలె, దేముడుచి కబుర్లు పూర్గుమ్ సంగిలో యోనాక జర్గు జలిన్చి రితి జయెదె.

40 మెలె, యోనా కీసి తిర్తతి అందరి మెద్దెనె సముద్దుమ్చి వెల్లి మొస్సాచి పెట్టి తిలన్ గి, దస్సి, మాన్సు జా జెర్చున్ అయ్లయ్ ఆవ్ తిన్ని అందర్లు తిన్ని మెద్దెనె బుయె తెడి తయిందె.

41 అస్సె, ఈంజ లోకుమ్ ఎత్తిక వెల్లి పరిచ్చ కెర్తె దీసిక, తుమ్ ఈంజ కాలుమ్చ అన్యానుమ్ జల యూదుల్ కి, యోనా బోదన కెర్ల నీనెవె పట్టుమ్చ ప్రజల్ కి, బెద టీవో జా, జేవ్ తుమ్క ‘గర్చ’ మెన

రుజ్జు దెకవుల. కిచ్చొక మెలె, జా పట్టుమీచ మాన్సుల్ యోనా కెర్రి బోదన నూన కెర, జేవ్ కెర్ల పాపల్చి రిసా దుకుమ్ జా, సంపజా, బుద్ది జల. ఈందె, యోనాచి కంట వెళ్లో తుమ్చి నెడిమి అస్సె.

42 పడ్డొ, వెల్లి తీర్పు కెర్రి జా దీసిక, దచ్చన దేసిమ్చి పూర్ణమ్ తిలి రాని ఎక్కి ఈంజ కాలుమ్చ మాన్సుల్ తెన్ టీచొ జా, తుమ్క 'గర్గు' మెన రుజ్జు దెకయెదె. కిచ్చొక మెలె, పూర్ణమ్ జా రాని 'సాలోమోను రానొ సంగితి బుద్దిచి కోడు నూనింద' మెన, ఒగ్గర్ ఒగ్గర్ దూరి తెంతో అయ్యలి. గని, ఈందె, సాలోమోనుచి కంట వెళ్లో నుదొ తుమ్చి నెడిమి అస్సె.

43 "ఏక్ మాన్సుక బూతుమ్ దెర తిలెగిన, జా బూతుమ్ జో మాన్సుచి తెంతో ముల దా తత్తిచి రిసా టాన్ చజన, బయిలె గెచ్చు బుల్లె తయెదె, గని, టాన్ నే దొర్కు జలి రిసా,

44 జో ఉచరన, ఆవ్ ముల దిలో గెరి అన్నె గెచ్చిందె మెన, జా గేర్ విడి అస్సె మెన, జా గేర్చొ మాన్సు వడ్డవ కెర నుబ్రుమ్ కెర అస్సె మెన దెక కెర,

45 అన్నె గెచ్చు, జాచి కంట గర్గు సత్తు బూతల్క పట్టి కడ ఆనెదె, చి జేవ్ ఎత్తి. జో మాన్సుచి తెడి పెన కెర, ఒత్తయ్ బన జవుల. జాచి రిసా, జో మాన్సుక అగ్గెచి కంట, ఆకర్క ఒగ్గర్ అల్లర్ తయెదె. గర్పు బుద్దిచి ఈంజ కాలుమ్చ మాన్సుల్ తెన్ దస్సి జయెదె." మెన, యేసు బోదన కెర్లన్.

46 యేసు ప్రెజల్క అన్నె బోదన కెర్రి తతికయ్, ఈందె, జోచి అయ్యసి బావుడ్డివొ జా కెర, 'జో తెన్ లట్టబుమ్చె' మెన వీదె టీచొ జా తిల.

47 క్రితెవొడి ఎక్కిలో "ఈందె, తుచి అయ్యది తుచ బావుడ్డివొ తుచి తెన్ లట్టబుక మెన వీదె టీచె అస్సి" మెన యేసుక సంగిలన్.

48 జోక సంగిలో మాన్సుక యేసు "కొన్సి అంక అయ్య, కొన్సి అంక బావుడ్డు జవుల గే జాన్సు గే?" మెన సంగ,

49 జోచి సిన్సుల్ తిలి పక్క ఆతు చంప కెర, "ఈందె, అంచి అయ్య, అంచ బావుడ్డు.

50 కిచ్చొక మెలె, పరలోకుమ్ తిలో అంచొ దేముడు అబ్బొ సంగిలి రితి కో కెరుల గే, జెవ్వి అంచ బావుడ్డు, అంచ బేనివొ, అంచి అయ్య" మెన సంగిలన్.

13

బీ ఉంపిలిన్క టాలి

(మార్కు 4:1-9; లూకా 8:4-8)

1 జా దీసి, యేసు గెరి తెంతో బార్ జా, నముద్రుమ్చి ఒడ్డుతె గెచ్చు, వెసిలన్.

2 ఒగ్గర్ ఒగ్గర్జన్ జనాబ్ జోతె జా కెర, నుట్టునంత బెర ^{*}వెలవెలి జలి రిసా, జో ఏక్ దోనితె వెగ వెసిలన్. అన్నె బెర తిల మాన్సుల్ ఎత్తి.జన్ నముద్రుమ్చి ఒడ్డుతె టీచొ జా తతికయ్,

3 యేసు జోవయింక దెక దెక, బోదన కెర్రి రిసా ఒగ్గర్ టాలివొ సంగుక దెర్లన్. "ఈందె, ఉంపితోసా ఎక్కిలో బీ ఉంపుక బార్ జలన్.

4 జో ఉంపితె తతికయ్, నగుమ్ బీ బయిలె వాట్ పక్క సెడ్డికయ్, పిట్టల్ ఉత్త జా, జా బీ కా గెల.

5 అన్నె నగుమ్ బీ ఒగ్గర్ మత్తి నెంజలి వత్తురు బుయ్యె సెడ్లన్. ఉప్పిరి ఇదిలిదిల్ మత్తి తిలి రిసా, ఒత్త సెడ్డి బీ బేగి గజ్జల్ జలి

6 ఒప్పణ్ లయితికయ్, మొక్కల్ డడ్డ గెల. చి చెర్రో బుయి తెడి పెన వడ్డుక నెత్తి రిసా, జేవ్ మొక్కల్ నుకా గెచ్చు, మొర గెల.

7 అన్నె నగుమ్ బీ కంట మొక్కల్ తిలిన్తె సెడ గజ్జల్ జా మొక్కల్ జల. గని ఒత్త తిల కంట మొక్కల్ వడ్డ కెర, ఒత్త సెడ్డి బీచ మొక్కల్క వెల గెల్లికయ్, జేవ్ మొక్కల్ పలితుమ్ దెర్రి నాయ్.

8 గని అన్నె నగుమ్ బీ చెంగిల్ బుయ్యె సెడ కెర, కేన్ మొక్క పుంజెక్ వంతుల్, [†]అరవయ్ వంతుల్, ముప్పుయ్ వంతుల్, పలితుమ్ దిల.

9 నూన్త కంట్టొ తిలస, నూన" మెన సంగిలన్.

§ 12:47 12:47 గ్రీకు బాస తెన్ ఈంజ మత్తి తిలితో రెగిడ్ల నగుమ్ వున్తకల్తె 47 కోడు తయె నాయ్.

* 13:2 13:2 వెలవులి

† 13:8 13:8 తిని విస్సా

10 పడ్డా యేసుచు సిస్సుల్ జోతె జా కెర, “తుయి కిచ్చొక టాలివో నంగయ్ ప్రజల్క బోదన కెర్తసి?” మెన జోక పుసిల.

11 యేసు జోవయింక, “పరలోకుమ్చి రాజిమ్చి రిసాచి గుట్టుల్ జానన్క తుమ్క సెలవ్ దా అస్సె. గని జోవయింక జా సెలవ్ నాయ్. ‡

12 కిచ్చొక మెలె, తిలోసాక అన్నె దెంక జయెదె, చి జోక ఒగ్గర్ కలుగు జయెదె. గని, నెంజిలోసా జలె, జోక తిలిసి కి జోతె తెంతో కడ నెంక జయెదె.

13 జేవ్ ప్రజల్ దెక నే దెకిలి రెతి, సూన నే సూన్లి రెతి, అర్దుమ్ కెరంతి నాయ్. ఇనిచి రిసా ఆవ్ టాలివో కెరయ్ జోవయింక బోదన కెర్తసి.

14 జేవ్ నంప నే జతిన్చి రిసా యెసయాచి అత్తి పూర్ణుమ్ దేముడు సంగిల్ కోడ్ కచితుమ్ నెరవెర్చుప జతయ్.

తుమ్ నిజుమ్ సొంత సూన్లి కి, కచితుమ్ కెయెక అర్దుమ్ కెరన్చు నాయ్, నిజుమ్ సొంత దెకిలెకి, కచితుమ్ అర్దుమ్ చినున్ నాయ్.

15 కిచ్చొక మెలె, ఈంజ ప్రజల్చి పెట్టి బోడు బంద అస్సె, ఇనాచి కంగ్గల్ దిమ్మల్ డంకి జలి రెతి జా అస్సె. ఇనయింక అంకివో డంకన్లి రెతి జా అస్సి. నెంజిలె, ఇనయింక అంకివో దెక చినిత, ఇనయింక కంగ్గల్ సూన సూనిత, చి ఇనాచి పెట్టి అర్దుమ్ కెరంత, చి ఆవ్ ఇన్నెక చెంగిల్ కెర్తి రెతి పసుల కెర అంచితె జెత”.

మెన జేవ్చి రిసా సంగిలి కోడు.

16 “జలె, తుమ్ నంపజలనవ అంకివో డిస్తతిచి రిసా తుమ్క చెంగిలి. తుమ్క అర్దుమ్ సూన్త కంగ్గల్ అస్సిచి రిసా తుమ్క చెంగిలి.

17 పూర్ణుమ్చక చి కంట తుమ్క ఒగ్గర్ చెంగిలి మెన కచితుమ్ తుమ్క ఆవ్ సంగితసి. కిచ్చొక మెలె, పూర్ణుమ్ దేముడుచ కబుర్లు సంగిలన ఒగ్గర్జిన్, సత్తిమ్ ఇండిలన ఒగ్గర్జిన్, తుమ్ దెకిలిసి దెకుక జేవ్ కోర్ప జలెకి, దెకుక నెతిర్ల. తుమ్ సూన్తిసి సూనుక జేవ్ కోర్ప జలెకి, సూనుక నెతిర్ల. జా అవ్కాసుమ్ జోవయింక దొర్చు జయె నాయ్.

ఉంపిలి బీచి టాలిచి అర్దుమ్ యేసు సంగిలిన్
(మార్కు 4:13-20; లూకా 8:11-15)

18 “ఉంపితోసాచి రిసా సంగిలి టాలి తుమ్ అర్దుమ్ కెరన.
19 కో జలెకు పరలోకుమ్చి రాజిమ్చి రిసాచి బోదన సూన అర్దుమ్ నే కెర్తెన్, నయ్తాన్ జా కెర, జో మాన్చుచి పెట్టి ఉంపిలి జా బోదన ఉర్త కెర దెర గెచ్చెదె. వట్టిచి ఉంపిలి బీ ఈంజ జయెదె.

20 పత్తల్ బుయ్యె ఉంపిలిసి, కో జలెకు చి బోదన సూన్లి బేగి, సర్ద జా నంపజతసి మెనెదె,
21 గని జోచి సొంత పెట్టి నుబుమ్ కబుర్చ చెర్రో నెంజిలి రిసా, జో జలి రెతి జా గడియ టీవో జా తిలె కి, నుబుమ్ కబుర్ జో నంపజలిన్చి రిసా కిచ్చొ జవున్ బాద సేడ్లె జలెకు, నెంజిలి విరోదుమ్ జలన జోక అల్లర్ కెర్తె జలెకు, జో మాన్చు బమ్మ జా, బే బేగి నముకుమ్ ముల దెయెదె.

22 కంట దుబ్బుల్ తిలి బుయ్యె ఉంపిలి బీ, కో జలెకు, చి బోదన సూన్లి కి, ఈంజయ్ లోకుమ్తె తిలిసి ఎత్తిక ఉంచెర్తె తా. కిసి జా జియిందె? మెన చింత గలనెదె జలెకు, సామ్సూరుమ్ జంక ఆన జయెదె జలెకు, దస్సి, జా ఆన జవున్, జా చింత జవున్, జా బోదనక వెలగెలి రెతి జతయ్చి రిసా జా బోదన జోతె పలితుమ్ దెరె నాయ్.

23 గని, చెంగిలి బుయ్యె ఉంపిలి బీ, చి బోదన సూన కో అర్దుమ్ కెరనెదె గే, జో మెలె, చెంగిలి బుయ్యె ఉంపిలి బీతె కేన్ గిడ్డ పుంజిక్ వంతుల్, అరవయ్ వంతుల్, ముప్పుయ్ వంతుల్ కిసి పలితుమ్ దెరుల గే, దస్సి, సూన అర్దుమ్ కెరంతో మాన్చు తమ్మన కిపలితుమ్ దెరెదె” మెన యేసు బోదన కెర్తెన్.

చెంగిల మొక్కల్క చి వెర్రి మొక్కల్క టాలి

‡ 13:11 13:11 12 ఇన్నెచి అర్దుమ్ కిచ్చొ మెలె, ‘నంపజా అర్దుమ్ తిలనకయ్ అన్నె అర్దుమ్ సికడుక జయెదె...గని నంప నెంజి అర్దుమ్ నెంజిలనక తిలి అర్దుమ్ కి జోవయింత తెంతో కడ నెంక జయెదె’. § 13:23 13:23 ‘అత్తిపలితుమ్ దెరెదె’ మెలె, దసా మాన్చు ప్రబుచి బుద్ధి ఉండెదె, చి అన్నె మాన్చుల్ దెక, జేవ్ కి ప్రబుచి రాజిమ్తె దెరుక ఇస్టుమ్ జా, నుబుమ్ కబుర్ సూన నంపజా దెరుల.

24 యేసు ప్రజలకే సంగిలి అన్నైక్ టాలి ఇసి జలి. “పరలోకుమచి రాజిమ్ తెన్ కిసి మెలె, జోచి వెడయ్ చెంగిల్ గోదుమచి బీ ఉంపిలినచి ఏక్ మాన్సు రితి జతయ్.

25 మాన్సుల్ నిజ గెల తతికయ్, జో ఉంపిలోసాచో విరోదుమచో జా కెర, జా చెంగిల్ బీ ఉంప తిలినతె వెర్రి గిడ్డల్ ఉంప దా, ఉట్ట గెలన్.

26 చెంగిల్ బీచ మొక్కల్ ఉట్ట వడ్డ ఎన్నులు దెర్లి పొది, జేవ్ వెర్రి మొక్కల్ కి డీసిల.

27 జో ఉంపిలో ఎజోమానితె జోచ గొత్తి సుదల్ జా కెర, ‘బాబు, తుయి తుచి వెడయ్తె చెంగిలి బీ ఉంపిలది. జలె కిసి ఒత్త వెర్రి మొక్కల్ కి ఉట్ట అస్తి?’ మెన పునితికయ్,

28 జో జేవ్క, ‘ఈంజ కో గే విరోదుమచో కెర్రి కామ్ జయెద’ మెన సంగిలన్. జోచ గొత్తి సుదల్ జోక, ‘దస్సి జలె, అమ్ వెడయ్ గెచ్చు జేవ్ వెర్రి మొక్కల్ కడ గెలుక తుక ఇస్సుమ్ గే?’ మెన పునిల.

29 దస్సి జో, ‘పోస. జేవ్ వెర్రి మొక్కల్ అప్పె కడ్లగిన, ఏక్ వేల జోవయింతెన్ ఎక్కె దడి గోదుమచ మొక్కల్ కి బెదవ కడితె. అప్పె పోస.

30 లాయితి కాలుమ్ ఎద దొన్నె కి బెద వడ్డతు. లాయితె పొదిక, వెర్రి మొక్కల్ తోలితో కడ కెర, డయ గెల్లి రిసా కట్టల్ బందిలి పడ్డొక, గోదుమ్ లాయ కెర అంచి కొట్టుతె అన’ మెన లాయితనక సంగిందె. మెన జో ఎజోమాని సంగిలన్” మెన యేసు సంగిలన్.

సార్సు గిడ్డక టాలి

(మార్కు 4:30-34; లూకా 13:18-21)

31 యేసు జోవయింక అన్నైక్ టాలి సంగిలన్. “పరలోకుమచి రాజిమ్ ఏక్ మాన్సు జోచి పట్టయ్ ఉంపిలి సార్సుగిడ్డచి రితి జతయ్.

32 గిడ్డల్ ఎత్తిచి కంబ జా గిడ్డ ఇదిలిసి డీసిలెకి, జా మొక్క వడ్డిలి మెలె, రోనతె గల్లి మొక్కల్ ఎత్తిచి కంబ వెల్లో జా, రూకు జయెద, చి ఆగాసుమ్చ పిట్టల్ జా కెర, జో చెట్టచ కొవ్వల్తె గూడల్ బందుల” మెన సంగిలన్.

33 యేసు జోవయింక అన్నైక్ టాలి సంగిలన్. “పరలోకుమచి రాజిమ్ తెన్ కిసి మెలె, అన్నెమ్ కెర్రి పీట్ ఎత్తి పొంగుప జా పులితి రిసా, ఏక్ తేర్బోద ఏక్ తీనడి పీట్తె గలిలి పులయ్తి పీట్చి రితి జతయ్. ఇదిలిదిల్ గలిలెకి, జా కలొయ్లి సామన్ ఎదివాట్ పుల కెర ఒగ్గర్ జయెద” మెన, యేసు సంగిలన్.

34 ప్రజలకే సంగిలి బోదన ఎత్తి టాలివో తెన్ యేసు సంగితె తిలన్. టాలివో నెంతె జేవ్ ప్రజలకే జో కిచ్చొ సంగె నాయ్.

35 ఇసి, దేముడు జోచ కబుర్లు సంగిలో ఎక్కిలోచి అత్తి రెగిడ్డి కోడ్ నెరవెర్చుప జలి.

“టాలివో సంగ ఆవ్ అంచి చోండి పట్టయిందె, చి బూలోకుమ్ జెర్మన్ జలి మొదోల్ తెంతో లుంకడ్డిసి సంగిమ్దె” మెన రెగిడ్డి కోడు.

బట్టి ఉంపిల వెర్రి గిడ్డల్చి టాలిక అర్దుమ్ సంగిలిసి

36 తెదొడ్ యేసు ప్రజలచి జనాబ్క ముల దా, గెరి గెలన్. జోచ సిన్సుల్ జోతె జా కెర, “బట్టిచ వెర్రి మొక్కల్చి రిసా సంగిలి టాలి అమ్క అర్దుమ్ సంగు” మెన పునితికయ్,

37 జో జోవయింక ఇసి మెలన్. “చెంగిల్ బీ ఉంపితోసా కొన్సో మెలె, ఆవ్ మాన్సు జా జెర్మన్ అయ్లోసా.

38 బాటి కిచ్చొ మెలె, ఈంజ లోకుమ్. చెంగిల్ బీ కిచ్చొ మెలె, పరలోకుమచి రాజిమ్చ బోదల్ జల మాన్సుల్. వెర్రి మొక్కల్ కిచ్చొ మెలె, సయ్తాన్చ బోదల్ జల మాన్సుల్.

39 జా వెర్రి బీ ఉంపితోసా కొన్సో మెలె, సయ్తాన్. వంటో లాయితి పొది కెయ్క మెలె, ఈంజ ఉగుమ్ పూర్తి జతి ఆకర్ దీసి. లాయితన కొన్సో మెలె, దేముడుచి దూతల్.

40 “వెర్రి మొక్కల్కే కిసి కుడవ ఆగితె గలుక జయెదె గే, దన, ఈంజ ఉగుమ్ పూర్తి జతి పొదిక, దస్సి సిచ్చ తయెదె.

41 జా పొదిక, ఆవ్ మాన్సు జా జెర్కున్ అయ్లోసా అంచ దేముడుచి దూతల్క తెద్రయిందె, చి పాపుమ్ కెరయ్తి వెట్కారుమచి ఎత్కిక కి, పాపుమ్ ఇండితన ఎత్కిక కి, ఈంజ లోకుమ్ తెంతో కడ కెర, ఎక్కితె కుడవ కెర,

42 జేవ్ దేముడుచి దూతల్ జోవయింక వెల్లి ఆగి గొయ్తె గల దెవుల. ఒత్త గలి జలన ఏడుల, దంతో చప్పిల్లై తవుల.

43 తెదొడక, పొద్దుచి ఉజడి కెద్ది జతయ్ గే, దస్సి, అంక నంపజా పున్నిమ్ జలన జోవయించో దేముడు అప్పొన్చి రాజిమ్తె ఉజడి జవుల. నూన్త కంగ్గొ తిలన నూన.

లుంకణ్ణి దనుమచి టాలి

44 “పడ్డో, పరలోకుమచి రాజిమ్క కిచ్చొ టాలి కెరుక జయెదె మెలె, ఏక వెడయ్తె లుంకణ్ణ తిలి దనుమచి రితి జయెదె. ఎక్కిలో జా దనుమ్ చజ కెర, అన్నె లుంకణ్ణ కెర, జా దొర్కు జలి మెన, సంతోసుమ్ తెన్ గెచ్చు, జోక కలుగు జలిసి ఎత్కి విక గెల కెర, జా దనుమ్ రోచిలి వెడ గెనెదె.

చెంగిలి ముత్యల్క చజ గెల్లొసాచి టాలి

45 “అన్నె, పరలోకుమచి రాజిమ్తె బెదితిసి చెంగిలి ముత్యల్ గెన్తో సాపుక రెర్లిన్చి రితి జతయ్.

46 జో ఒగ్గర్ విలువచి ముత్యల్ ఏక చజ కెర, గెచ్చు, జోక కలుగు జలిసి ఎత్కి విక గెల కెర, జా ముత్యల్ గెనెదె.

సముద్రుమ్తె గల్లి వలచి టాలి

47 “అన్నె, పరలోకుమ్ రాజిమ్తె బెదయ్తిసి కీసి మెలె, సముద్రుమ్తె గలిలి రగరగాల్చ మొస్సు దెర్తి వలచి రితి జతయ్.

48 జా బెరిలె పొది మాన్సుల్ జేక ఒడ్డుతె కడ కెర, వెన కెర, చెంగిలచ త్రిత్తె బెరవ కెర, గర్పు బయిలె వెంట గెలుల.

49 దస్సి, ఈంజ ఉగుమ్ పూర్తి జతి ఆకర్ దీసిక అమ్చ దేముడుచి దూతల్ జా కెర, నంపజా పున్నిమ్ జలనక ఏకతె, నంపనెంజిల్ రిసా గార్ జలనక వేరతె కుడవ తా,

50 జేవ్ నంపనెంజిలనక వెల్లి ఆగి గొయ్తె గల దెవుల. ఒత్త గలి జలన ఏడుల, దంతో చప్పిల్లై తవుల.

51 “ఈంజ ఎత్కిచి అర్దుమ్ కెరల్లదు గే నాయ్?” మెన యేసు జేవ్ సిస్సుల్క పుసిలన్, చి “అమ్క అర్దుమ్” మెల.

52 జేవ్ దస్సి సంగతికయ్, యేసు జోవయింక “జలె, కేన్ జలెకు మోసి తెన్ దేముడు దిలి ఆగ్గుల్ సికణ్ణొసా, పరలోకుమచి రాజిమ్చి నుబుమ్ కబుర్ కామ్తె బెదితి రిసా కో సిస్సుల్ జా జవుల గే, జో ఏక గెర్చొ ఎజొమాని కీసి జోచి దనదాస్యమ్ తెంతో నొవ పొర్ను సామన్లు వెంట వాడిక కెరెదె గే, దస్సి అస్సె.”

యేసు సొంత మాన్సుల్ జోచి అదికారుమ్ నే చినిలిసి

(మార్కు 6:1-6; లూకా 4:16-30)

53 యేసు ఈంజేవ్ టాలివొ సంగ కేడయ్లి పడ్డో, ఒత్త తెంతో బార్ జా ఉట్ట గెచ్చు,

54 జోచి సొంత గవ్వి పాచ కెర, జోవయింక నబ గెరలె బోదన కెరుక దెర్లొ. జో కెర్లొ బోదన నూన ఆచారిమ్ జా, “ఈంజ గ్యానుమచి, ఈంజొ కెర్లొ కమెచి కెర్లొ నెక్కి ఇన్నెక కేన్ తెంతో అయ్లి?”

55 ఈంజొ మాములుమ్, ఈంజ గవ్విచొ దారచ కామ్ కెర్లొసాచొ పుత్తసి గెద? ఇన్నెచి అయ్యగిచి నావ్ మరియ గెద? అన్నె, యాకోబు, సీమోసు అన్నె యూదా జోచ బాపుడ్లివొ జవుల గెద?

56 ఇన్నెచ బేస్సివొ ఎత్కిజిన్ అమ్చి తెన్ అస్తి గెద? దస్సి జలె, ఇన్నెక ఈంజ గ్యానుమ్ ఎత్కి కేన్ తెంతో అయ్లి?” మెన లట్టబల్ల,

57 యేసుచి రిసా అన్యానుమ్ జా గెల. జేవ్ దస్సి జతికయ్, యేసు జోవయింక, “కేన్ జవున్ మాన్సు దేముడుచి కబుర్ అన్తోసా జలె, జోచి సొంత దేసిమ్చ మాన్సుల్ సొంత గెర్చ మాన్సుల్ జోక గవురుమ్ దెకిత్ నాయ్” మెన జోవయించి అన్యానుమచి రిసా సంగిలన్.

58 జలె, జా గవ్విచ మాన్సుల్చి అన్యానుమచి రిసా, యేసు ఒత్త వెల్లొ కమె ఒగ్గర్ కెరె నాయ్.

14

హేరోదు రానో యేసుచి రిసా బిలిసి
(మార్కు 6:14-29; లూకా 9:7-9)

1 జా నమయుమతె, హేరోదు మెలో జా గలిలయ ప్రాంతుమ్చో అదికారి, యేసు కెర్త కమొచి రిసా నూన త్తా,

2 బియఁ కెర, జోచి గొత్తి సుదల్క బుకారా కెర, జోవయింక, “ఈంజో యేసు, జో బాప్తిసుమ్ దెతె తిలో యోహాను మొర గెచ్చ అన్నె జియ అన్నె. జాచి రిసా, ఇన వెల్లో కమొ కెరుక జోక సెక్తి అన్నె” మెన ఉచర సంగిలన్.

3-4 కిచ్చొక జో అదికారి దస్సి బియఁ కెర ఉచర్లన్ మెలె, జోచో పిలిప్ మెలో అన్నెచి హేరోదియ మెలి తేర్చిక హేరోదు నెతికయ, యోహాను జోక “తుయి జాక తియనుక నాయమ్ నాయమ్” మెన సంగితె తిలి రిసా, జో అదికారి యోహానుక దెర, బండవడ, జేల్తె గల తిలన్.

5 జోక మారుక ఉచర్లె కి, దేముడుచి కబురీ సంగిలోసా, మెన ప్రెజల్ యోహానుక ఉచర్లె రిసా, జోవయింక బియఁ కెర, మారుక వాయిద కెర తిలన్.

6 జలె, హేరోదుచి జెర్మన్ పండుగు దీసి అయెలె, జోచి హేరోదియ మెలి తేర్చిచి దువిసి విందుతె బుకారా తిలసచి నెడిమి నచితికయ, హేరోదు రానో మెన్సిలన్, చి

7 జో ఒట్టు గలన, “తుయి కిచ్చొ నజిలి కి దెయిందె.” మెన జాక సంగిలన్.

8 జా నాడిచి అయ్యసి సంగితికయ, బెర్ల మాన్సుల్చి మొక్కె జా దువిసి, “బాప్తిసుమ్ దెతో యోహానుచి బోడి, గండ కెరవ పలెరుమ్తె గల, అంక ఇత్తల్ ఆన దె” మెన రానొక సంగిలి.

9 ఈంజ కోడు నూన దుకుమ్ జలెకి, హేరోదు జేవ్ బుకార్ల మాన్సుల్చి మొక్కె ఒట్టు గల తిలి రిసా, జా సంగిలిసి దెంక మెన ఒప్పున తిలో, చి

10 జమాన్లుక తెద్రవ కెర, “జేల్తె యోహానుచి బోడి కండ కెర దా” మెలో.

11 జో జమాను, దస్సి కెర, యోహానుచి బోడి పలెరుమ్తె గల ఆన నాడిక దెతికయ, జా నాడి అయ్యన్క నా దిలి.

12 యోహానుచ సిస్సుల్ జో మొర్లిన్చి నూన కెర, జా కెర, పీనుమ్ ఉక్కుల దెర గెచ్చ రోవ గెల, అన్నె యేసుతె జా కెర, జోక సంగిల.

పాచ్ వెయిల్జిన్ మాన్సుల్క యేసు అన్నిమ్ దిలిసి
(మార్కు 6:30-44; లూకా 9:10-17; యోహా 6:1-14)

13 యోహానుక జర్లు జలిసి యేసు నూన కెర, దోనితె వెగ కెర, మాన్సుల్ నెంజిలి టాన్తె గెచ్చుక మెన సముద్రుమ్ జీన, ఉట్ట గెలన్. యేసు ములిలి ఏక్ తిల జనాబ్ ‘జో ఒత్తల్తో గెతయ్’ మెన నూన కెర, పట్టల్తె గచ్చెలి తెంతో బారీ జా, ఇండ కెర, జోచి పట్టి గెల.

14 యేసు జా ఒడ్డుతె పాచ్ కెర, ఒత్త బెర తిల పట్టి అయెలె ప్రెజల్ ఎత్తిక దెక కెర, జోవయించి ఉప్పిరి కన్యారుమ్ జా, జోవయింతె జబ్బుల్ తిల మాన్సుల్ ఎత్తిక చెంగిల్ కెర్లన్.

15 సాంజ్ జతికయ, యేసుచ సిస్సుల్ జోతె జా కెర, “ఈంజ డొంగుర దేసిమ్ గెద, పొద్దు గెలి రిసా, అన్నిమ్ సామన్ గెనన్తి రిసా, ఈంజేవ్ ప్రెజల్క గచ్చెలి తెద్రవ” మెన సంగిల.

16 యేసు జోవయింక, “జేవ్ గెచ్చుక నాయ్. తుమి జోవయింక కిచ్చొ జవున అన్నిమ్ దాన” మెన సంగిలన్.

17 జేవ్ సిస్సుల్ జోక, “అమచితె పాచ్ పోడియొ, చి దొన్ని మొస్స పిట్టవ, అన్నె కిచ్చొ నాయ్” మెన, యేసుక సంగిల.

18 యేసు, “దస్సి జలె, జా తిలి సామన్ అంచితె ఆన దా” మెన, సిస్సుల్క సంగ కెర,

19 ప్రెజల్క దెక, “తుమ్ ఎత్తిజన్ వెన” మెన సంగ, జా చివ్వర్చిచి బుయ్యె వెనడ కెర, జేవ్ పాచ్ పోడియొ చి దొన్ని మొస్స దెరన, ఆగానుమ్ పక్క దెక, “ఈంజ అన్నిమ్ తుయి దిలది” మెన దేముడు అబ్బొన్క జోకర కెర, జేవ్ పోడియొ మోడ కెర, జోచ సిస్సుల్క దెతికయ, జేవ్ సిస్సుల్ ప్రెజల్క వంట దిల.

20 జేవ్ బెర తిల ప్రజల్ ఎత్తిజిన్ పేట్ బెర్దు కయల. కయలి పడ్డో, సేనిల గండల్ బార గంవల్తె బెర్దు సిస్సుల్ గుడ్డిల.

21 తేర్బోదల్ బాలబోదల్క ముల్తై, అన్నిమ్ కత్తన పాసి పాసి పాచ్ వెయిల్జిన్ మున్సుబోదల్ జల.

యేసు సముద్రుమ్చి ఉప్పిరి ఇండిలిసి
(మార్కు 6:45-52; యోహా 6:16-21)

22 జా ఎత్తి జర్గు జలి పడ్డో, “ప్రజల్క అవ్వొ తెద్రయిందె. తూమ్ దోనితె వెగ, అంచి కంట అగ్గె ఒత్తల్తోచి గట్టుతె గెచ్చు” మెన, సిస్సుల్క యేసు బలవంతుమ్ కెర్లొ.

23 పడ్డో, జో జేవ్ ప్రజల్క తెద్రవ దా కెర, ప్రార్దన కెర్తి రిసా, మెట్టయ్ ఎక్కిలోయి వెగ గెలన్.

సాంజ్ జతికయ్, యేసు ఎక్కిలోయి ఒత్త తిలన్.

24 సిస్సుల్ తిలి జా దోని మాతుమ్, ఒడ్డు తెంతో దూరి గెతికయ్, వాదు కెర పెలయ్తె తతికయ్, కెర్లల్ జా దోనితె పెట్టి జస్తై తిల.

25 అందరి, పాసి పాసి కుకుడో వాంసెనె, యేసు జా సముద్రుమ్చి ఉప్పిరి ఇండ జా, జేవ్ సిస్సుల్ తిలిన్తె జెతె తిలన్.

26 జో సముద్రుమ్చి ఉప్పిరి ఇండిలిసి జోచ సిస్సుల్ దెక కెర, బమ్య జా బియ: గెచ్చు, “డుంబో!” మెన బియ: కెర కేకుల్ గల్లికయ్,

27 యేసు బేగి, “దయిరిమ్ ఆనన. బియ: నాయ్. ఆవ్వొ జెతసి” మెన సంగిలన్.

28 యేసు “ఆవ్వొ జెతసి” మెన సంగితికయ్, పేతురు జోక కేక్ గల, “ప్రబూ, తుయి జెల, ఆవ్ కి పానిచి ఉప్పిరి ఇండ తుచితె జెతి రితి అంక సెలవ్ దే” మెన సంగిలన్

29 యేసు జోక “జే!” మెంతికయ్, పేతురు దోని తెంతో ఉత్త కెర, యేసుతె గెతి రిసా పానిచి ఉప్పిరి ఇండ కెర, నగుమ్ దూరి గెలన్.

30 గని, వాదుక దెక కెర, బియ: కెర, డుంబ గెచ్చె తా, “ప్రబూ, ప్రబూ, అంక రచ్చించువ కెరు!” మెన, కేక్ గలన్.

31 యేసు బేగి ఆతు చంప కెర, పేతురుచి ఆతు దెరన, “తోక్కి నముకుమ్చో, తుయి కిచ్చొక అన్మానుమ్ జలది?” మెన పేతురుక సంగిలన్.

32 తెదొడి, జేవ్ దొగుల దోనితె వెగెల, చి వాదు ముల దిలి.

33 దస్సి జర్గు జలి రిసా, దోనితె తిలన యేసుక జోకర, “తుయి నిజమి దేముడుచొ పుత్తుసి” నేన, జోచి గవురుమ్ చిన సంగిల.

గెన్నేసరెతు మెలి టాన్తె మాన్సుల్క యేసు చెంగిల్ కెర్లిసి
(మార్కు 6:53-56)

34 జేవ్ యేసు ఒత్తల్తోచి గట్టుతె పాచ కెర, గెన్నేసరెతు మెలి టాన్తె ఉత్తిర్ల.

35 ఒత్తచ ప్రజల్ యేసుక చిన కెర, సుట్టువట్టు గవ్వొలె కబుర్లు తెద్రవ, జబ్బుల్ తిలన ఎత్తిజిన్క జోతె కడ ఆనయ్తికయ్,

36 యేసుచొ పాలుమ్చి అంచు జలెకు జేవ్ చడుక మెన బతిమాల్య జా సెలవ్ నజన్తె తిల, చి జోచొ పాలుమ్చి అంచు చడిలన ఎత్తిజిన్ చెంగిల్ జల.

15

అత్తో నే దొవన్తె కయ్లిసిచి రిసా పరిసయ్యుల్ యేసుక సంగిల
(మార్కు 7:1-23)

1 జా పొది, యెరూసలేమ్ పట్టుమ్ తెంతో పరిసయ్యుల్ చి మోసి తెన్ దేముడు దిలి ఆగ్గుల్ సికడ్తన యేసుతె బెద జా కెర,

2 “తుచ సిస్సుల్ అత్తో నే దొవన్తె అన్నిమ్ కతతి. జేవ్ కిచ్చొక ఇసి పాపుమ్ కెర పూర్గుమ్చ వెల్లెల మాన్సుల్ సికయ్లి రితి కెర్తి నాయ్?” మెన సంగిల.

3 యేసు జోవయింక, “తూమ్ తుమ్చ పూర్గుమ్చ అవ్వొ ఉచర్లిసి కెర్తి ఆసక, కిచ్చొక పాపుమ్ కెర దేముడుచి ఆగ్గు రితి కెర్చు నాయ్?”

4 కిచ్చో అగ్గుచి రిసా అవ్ సంగితసి మెలె, అయ్యద్ అబ్బొద్ క చెంగిల్ దెక గప్పురుమ్ కెర”

మెన సంగిలి కోడు. అన్నెక్ కిచ్చో మెలె, “అబ్బొన్ క జలెకు అయ్యన్ క జలెకు కో దూసుప కెరుల గే, నే పిట్టె మురుచ్చుచి సిచ్చ దెంకయ్” మెన సంగిలి కోడు.

5 తూమ్, మాత్రమ్, కిచ్చో మెంతసు మెలె, తుమ్ అవ్వి ఉచర్లి కోడు. కిచ్చో కోడు మెలె, ‘అంచితె తుమ్ క కిచ్చో కలుగు జతి గే, జయ్యి అవ్చో దేముడుక దెంక సంగ అస్సి మెన కో అయ్యన్ క అబ్బొన్ క సంగుల గే, జేవ్ దస్సి సంగిలన అయ్యన్ క జలెకు, అబ్బొన్ క జలెకు, అన్నె తోడు దెంక నాయ్, మెన, తుమ్ సంగితసు.

6 జలె, తుమ్ దస్సి మెన తుమ్ చ పూర్ణుమ్ చక అవ్వి ఉచర్లిసి కెరుక ముక్కిమ్ మెలి రితి, ‘దేముడుక అదికారుమ్ నాయ్’ మెలి రితి జా, జో సంగిలి అగ్గు మూర్చుప కెర అస్సున్.

7 “తుమ్ ఉప్రమెన్నుచో! యెసయా పూర్ణుమ్ చోచి అత్తి దేముడు సంగిలి కోడు తుమ్ చితె నిజమి నెరవెర్చుప జతయ్.

8 ఈంజ ప్రెజల్ అంక జేవ్ చి ఒటో తెన్ గప్పురుమ్ కెర్ రిత కొడో సంగిలే కి, జోవయిం చి పేట్ అంక దూరి అస్సి.

9 మాస్సుల్ అవ్వి ఉచర్లి కొడోక ‘దేముడు సంగిలన’ మెన, ప్రెజల్ క సికడ, అంక ఆరిక జోకర్తతి. మెన తుమ్ చి రిసాచి కోడు” మెన, యేసు జేవ్ వెల్లెల మాస్సుల్ క సంగిలన్.

మాస్సుక గార్ కెర్లిసి కిచ్చో జయెదె గే యేసు సంగిలిసి

10 యేసు జేవ్ క దస్సి సంగ కెర, పాసి తిల ప్రెజల్ క బుకారా కెర, జోవయింక ఇసి మెన బోదన కెర్లన్. “తుమ్ నూన అర్దుమ్ కెరన.

11 మాస్సుక గార్ కెర్లిసి కిచ్చో మెలె, చోడి తెడి తెంతో గెతిసి నెంజె, గని చోడి తెంతో బార్ జతిసి. జయ్యి మాస్సుక గార్ కెర్లిసి” మెన సంగిలన్.

12 యేసు దస్సి సంగిలి పిమ్మట్, జోవ్ సిస్సుల్ జోతె జా కెర, “పరిసయ్యల్ జా కోడు నూన కోపుమ్ జల మెన జాన్సి గె?” మెన, యేసుక పుసిల.

13 జలె జో, “వెరి రూకుక కీసి ఉట్టువుల గే, దస్సి, పరలోకుమ్ తిలో అంచో దేముడు అబ్బొ జోక కామక నెంజితో ఎత్తి మాస్సుక ఉట్టుయలి రితి గెచ్చుప కెర గెలెదె.

14 జాకయ్, జేవ్ సంగితిసచి రిసా తుమ్ చింత గలన నాయ్. జేవ్ నంప నెంజె ఆత్మ గుడ్డి జా, మాస్సుల్ క వాట్ దెకడుక ఉచర్లిసి. గని గుడ్డి నుదో గుడ్డి నుదల్ క వాట్ దెకయలెగిన, జో కి ఈంజో కి గొయితె సేడుల.” మెలన్.

15 జలె, పేతురు యేసుక, “జా టాలిచి అర్దుమ్ అమ్ క సంగు” మెన సంగిలన్, చి

16 యేసు జోవయింక, “అప్పె ఎద తూమ్ కి అర్దుమ్ నెంతె అస్సున్ గే?”

17 ఈందె, చోడి గలంతిసి కిచ్చో జలెకి పెట్టి గెచ్చు కెర, కామక నెంజెలెగిన, బార్ జా గెచ్చెదె, మెన తుమ్ క అర్దుమ్ నాయ్ గె?

18 మాస్సుచి చోడి తెంతో బార్ జతి ఎత్తి కోడు, మాత్రమ్, జోవయిం చి పెట్టితె జెర్చు కెర బార్ జతయ్. జా కోడు లట్టట్లో మాస్సుక జయ్యి గార్ కెరెదె,

19 కిచ్చోక మెలె, గర్చ ఉడ్డెస్సుమ్ లు, నరు అత్త్యల్, లంజెకమె, చోరు కమె, అబద్దుమ్ సాచి, మాస్సుల్ క దూసుప కెర్లిసి, దనచ ఎత్తి, మాస్సుచి పెట్టి తెంతో జెయెదె.

20 దనచయ్ మాస్సుక గార్ కెరుల, గని అత్తో నే దోవనతె కతిసి మాస్సుక గార్ కెర నాయ్” మెన యేసు బోదన కెర్లన్.

వేర దేసిమ్ చి తేర్ బోదచి దువిన క యేసు చెంగిల్ కెర్లిసి

21 యేసు ఒత్తె తెంతో బార్ జా ఉట్ట గెచ్చు, తూరు పట్టుమ్ చి సీదోను పట్టుమ్ చి ప్రాంతుమ్ తె గెతికయ్,

22 ఈయన, జా ప్రాంతముచే కనానుచి సెకుమచి తేరబోద ఎక్కి బార్ జా, జోక దస్సుల్ జా కెర, “ప్రబుబ, దేముడు తెద్రయలో, దావీదు రాసొచి సెకుమతె జెర్మిలో, క్రీస్తు జలో రచ్చించుచు కెర్సొనా తుయి. అంచి ఉప్పిరి దయ తీ. అంచి దూక బూతుమ్ దెర అస్సె, చి ఒగ్గర్ సైమ జతయమ్” మెన యేసుక కేకుల్ గలిలి.

23 గని యేసు తుక్లె తా, జాక ఎక్కి కోడు కి జబాబ్ సంగి నాయ్. తెదోడి, జోచ సిస్సుల్ జోతె జా కెర, “ఈంజ అమచి పట్టి జా జా, కేకుల్ గలితయ్, ఇన్నెక తెద్రవ దేసు” మెన, యేసుక బతిమాల్ప జా సంగిల.

24 యేసు, “గొవుడు నెంజిల మెండల్ రిత జా అమచి ఇస్రాయేలుచు ప్రెజల్తెయి అంక అబ్బొ తెద్రయలన్, గని వేర మాస్సుల్తె నాయ్” మెలన్.

25 యేసు దస్సి మెలె కి, జా తేరబోద అస్సె పాసి జా కెర, సెర్ను సేడ జోకర, “ప్రబు, అంక తోడు కెరు” మెన సంగిలి.

26 యేసు జాక దెక, “*బోదలచి అన్నిమ్ గుడ్ల కెర, నూనకూనర్లుక గల దెంక చెంగిల్ నాయ్” మెన సంగిలన్.

27 జా కిచ్చొ మెలి మెలె, “నిజుమి, ప్రబు, గని నూనకూనర్లు కి జోవయింఱొ ఎజోమానిచి బల్ల తెంతొ సేడ్డి ఉస్టొ వెంట కవుల” మెన, సంగిలి.

28 జా తేరబోద దస్సి జబాబ్ దెతికయ్, యేసు జాక, “అమ్మ, తుయి గట్టిజ నంపజతసి. తుయి కోర్ప జలిసి తుక జర్లు జప్పన్” మెన, జాక వరుమ్ దిలన్. చి బేగి జాచి దువిసి చెంగిల్ జలి.

29 యేసు ఒత్త తెంతొ ఉట్ట గెచ్చు, గలిలయచి సముద్రుమతెచి ఒడ్డుతెచి వట్టి గెచ్చు, ఏక్ మెట్టుయ్ వెగ వెసితికయ్,

30 ఒగ్గర్ ఒగ్గర్జిన్ జనాబ్ మాస్సుల్ జోతె సొట్ట జలనక, అత్తో చట్టొ నెంజిలనక, గుడ్డి జలనక, గుల్ల జలనక, అస్సె వేర బాదల్ తిలన ఎత్తిక, కడ ఆన, జోచి పాసి వెనయ్తికయ్, యేసు జేక చెంగిల్ కెర్లన్.

31 గుల్ల మాస్సుల్ లట్టల్లిసి, అత్తో చట్టొ నెంజిలన చెంగిల్ జలిసి, సొట్ట మాస్సుల్ ఇండిలిసి, గుడ్డి మాస్సుల్ దెకిలిసి ఒత్త తిల మాస్సుల్ దెక కెర, ఆచారిమ్ జా, ఇస్రాయేల్ ప్రెజల్తె దేముడుక గవురుమ్ కెర్ల.

చెత్తర్ వెయిల్ జిన్క యేసు అన్నిమ్ దిలిసి

32 జేవ్ జనాబ్ ఎత్తిజిన్ యేసు తెన్ జా మెట్టుయ్ త్రిరతి తతికయ్, జోచి సిస్సుల్క యేసు పాసి బుకారా కెర, “ఈంజేవ్ ప్రెజల్ త్రిరతి అంచితె అస్సి. జోవయింక అన్నిమ్ కిచ్చొ కి నాయ్, చి జోవయించి ఉప్పిర్ ఆవ్ కన్యూరుమ్ జతసి. జేవ్ నే కతె ఉట్ట గెలెగిన, వట్టి మొకొమ్ గుంజ్ర సేడుక జయెదె, చి రిసా జోవయింక చువ్వె తెద్రవుక అంక ఇస్టుమ్ నాయ్” మెన సంగిలన్.

33 సిస్సుల్ ఆచారిమ్ జా, జోవయింక “ఎతివాట్జిన్ మాస్సుల్క అన్నిమ్ దెంక మెలె, జోవయింక సరిపుచుచు జతి అన్నిమ్ ఈంజ బయలె అమక కేనే దొర్కు జవుల?” మెన సంగిల, చి

34 యేసు జోవయింక, “జలె, తుమ్చితె కెత్తి పోడియొ అస్సి?” మెన పుసిలన్, చి జేవ్ సిస్సుల్ చజన కెర, “అమ్చితె సత్తు పోడియొ, చి ఇదుర్ల మొస్సు దొన్ని అస్సి” మెన సంగితికయ్,

35 యేసు ప్రెజల్ ఎత్తిక “వెన” మెన సంగ కెర,

36 జేవ్ సత్తు పోడియొచి జేవ్ మొస్సు నజన, అత్తి దెరన, ‘తుయి దా దయ కెర్లదె’ మెలి రితి దేముడు అబ్బొన్క ఉచర, పోడియొ మోడ కెర, జోచి సిస్సుల్క వంట దెతికయ్, జేవ్ సిస్సుల్ ప్రెజల్క జా ఎత్తి. వంట దిల.

37 జేవ్ ప్రెజల్ ఎత్తిజిన్ పేట్ బెర్లు కయ్లె వడ్డె, సెంసిల గండల్ సత్తు గంపల్తె సిస్సుల్ గుడ్ల బెరయ్ల.

38 తేరబోదల్ బాలబోదల్క ముల్లె, చెత్తర్ వెయిల్జిన్ మున్సుబోదల్ కయ్లె.

39 పడ్డె, జేవ్ బెర తిల జనాబ్క తెద్రవ దా కెర, దొనితె వెగ, యేసుచి సిస్సుల్ మగదాన్ మెంతి ప్రాంతముతె ఉట్ట గెల.

* 15:26 15:26 ఎత్తి అదికాయమ్ తిలో దేముడుచ ‘బోదల్’ రిత జల యూదుల్చి రిసా సంగితయ్.

16

యూదుల్చి వెళ్లి నబత యేసుక పరిచ్ఛ కెర్రిసి
(మార్కు 8:11-13; లూకా 12:54-56)

1 తెదొడి, పరిసయుల్చి చి సద్దాకయుల్చి యేసుతె పావ కెర, జోక పరిచ్ఛ కెర్రి రిసా, “అన్లె, తుక పరలోకుమ్చి అదికారుమ్ అస్సె మెన అమ్ చినితి రిసా, అమ్చి మొక్క వెల్లి కామ్ ఏక్ కెరు” మెన, మోసిమ్క జోక సంగిల.

2 యేసు జోవయింక ఏక్ టాలి సంగిలన్. “సాంజ్ జతి పొది అగాసుమ్తె మబ్బు నెంజ పొద్దు బగుక ఎరన లగితయ్ మెన దెకిలెగిన, ‘కలిక చెంగిల్ కెరెదె’ మెన తుమ్ చినితను.

3 పడ్డొ, పెందలె ఒగ్గర్ మబ్బు కెర్రిగిన, ‘వెల్లి’ పాని వెటెదె’ మెన చినితను గెద? జలె అగాసుమ్ కిసి తిలె కిసి కెరెదె గే తుమ్ చినితను, గని అప్పె జర్గు జత కమొచి అర్దుమ్ చినుక నెతుర్చు.

4 ప్రబుక నిదాసుమ్ నెంజ లంజెబుద్ది పాపుమ్బుద్ది జల తుమ్ ఈంజ కాలుమ్చ మూన్సుల్, రుజ్జు దెకయ్త కమొక కోరప జతను. అంచి అదికారుమ్ దెకయ్తి రిసా, ఎక్కి ముల కేన్ వేర కామ్ కెర దెంక నెంజె. దేముడుచ కబుర్లు పూర్గుమ్ సంగిలో యోనాక జర్గు జలిన్చి రితి జయెదె.”

పండితుల్చి రిసా యేసు సిస్సుల్క జాగర్త సంగిలిసి
(మార్కు 8:14-21)

5 పడ్డొ యేసు సిస్సుల్ తెన్ గాడు ఒత్తల్తో జిన ఒడ్డుతె పావ కెర, “పోడియొ గట్ర అనుక పచ్చ గెలమ్” మెన సిస్సుల్ ఏద కెర్రికయ్,

6 యేసు జోవయింక టాలి సంగిత రితి ఇసి మెలన్. “తుమ్ దెకన. పరిసయుల్చి సద్దాకయుల్చి చి పులయ్తి పిట్చి రిసా తుమ్ జాగర్త తెన్ తా” మెన, జోవయింక సంగిలన్.

7 జేవ్ ఎక్కిలో తెన్ ఎక్కిలో “కిప్పొ పోడియొ రిసా సంగితయ్? అమ్ పోడియొ నే అన్లె రిసాయి ఇస్సె మెలన్.” మెన బమ్మ జా లట్టబన్.

8 యేసు, మాత్తుమ్, జేవ్ ఉచర్రిసి జాన కెర, “తోక్కి నముకుమ్చ, తుమ్. తుమ్చితె పోడియొ నెంజలిన్చి రిసా కిచ్చొక ఉచరన లట్టబంతను?

9 తుమ్ అప్పొక అర్దుమ్ కెరన్చు నాయ్ గె? పావ్ పోడియొ పావ్ వెయిల్ జిన్క వంటిత్తయ్, కెత్తి గంపల్తె సెంసిలిసి బెరయ్లదు గె?

10 సత్తు పోడియొ చెత్తర్ వెయిల్ జిన్క వంటిత్తయ్, కెత్తి గంపల్తె సెంసిలిసి బెరయ్లదు గె? తుమ్ ఏద కెర్చు నాయ్ గె?

11 జలె, ఆవ్ మాములుమ్ అన్నిమ్చి రిసా తుమ్క సంగుక నాయ్, మెన కిచ్చొక అర్దుమ్ కెరన్చు నాయ్? పరిసయుల్చి, సద్దాకయుల్చి చి పులయ్తి పిట్చి రితి బోదనచి రిసా జాగర్త తెన్ తా” మెన యేసు అన్లె సంగిలన్.

12 తెదొడి ‘మాములుమ్ పులయ్తి పిట్చి రిసా నాయ్, గని సద్దాకయుల్చి చి పరిసయుల్చి సికడ్డిసిచి రిసా అమ్క జాగర్త సంగితయ్’ మెన సిస్సుల్ అర్దుమ్ కెరన్.

మాన్సుల్ అంక కో మెన ఉచర్తతి గే?

(మార్కు 8:27-30; లూకా 9:18-21)

13 యేసు సిస్సుల్ తెన్ ఇండె గెచ్చు కైసరియ్ పిలిప్పిచి ప్రాంతుమ్తె పావ అయ్లె పొది, “మాన్సు జా జెర్చున్ అయ్లయ్ అంక, కో మెన ప్రెజల్ సంగితతి?” మెన పుసిల. జేవ్ సిస్సుల్ జోక,

14 “సగుమ్జిన్ తుక ‘బాప్టిసుమ్ దెతె తిలో యోహాను’ మెంతతి. సగుమ్జిన్ తుక ‘దేముడుచ కబుర్లు సంగిలో ఏలియా జయెదె’ మెంతతి. అన్లె సగుమ్జిన్, యిర్మీయా, నెంజిలె ప్రబుచ కబుర్లు సంగిలో అన్లెక్కో జయెదె.” మెన, సిస్సుల్ సంగిల.

15 యేసు జోవయింక, “జలె, తుమ్ అంక కో మెన ఉచర్తను?” మెన పుసిత్తయ్,

16 “తుమ్ ఎక్కిలో జివ్ తిలో దేముడుచొ పుత్తుసి. జో తెద్దయ్లో క్రీస్తు మెలో రచ్చించుప కెర్టొసా తుమ్” మెన, సిమోను వేతురు ఒప్పున సంగిలన్.

17 యేసు జోక, “ఓ సీమోను, యోహాను మెలోసాచొ వుత్తుసి, తుక చెంగిలి. కిచ్చొక మెలె, ఈంజ కోడు తుక కో మాన్సు సికయేలిసి నెంజె, గని పరలోకుమ్ తిలో అంచొ అబ్బొయి జలో దేముడు తుచి ఆత్మతె ఇని మెన సికడ అస్సె.

18 అన్నె, తుక ఆవ్ కిచ్చొ మెంతసి మెలె, తుక ‘పేతురు’ మెన నావ్ తియ అస్సి. ‘వెల్లో పత్తుర్’ మెలి అర్దుమ్ తెన్. ఈంజ రంగ్లి పత్తురతె అంచి సంగుమ్ బందిందె, చి మొర్పు ఆన్త సెక్తివొ కి జేవ్చి ఉప్పిరి జీసుక నెత్తిర్తి.

19 పరలోకుమచి తాలుఘు వాడిక కెరుక మెలి రితి, తుక అదికారుమ్ దెతసి. మెలె, బూలోకుమ్తె కిచ్చొచి రిసా ‘పోని’ మెనిస్తె గే, పరలోకుమ్తె ‘పోని’ మెనుమ్దె. అన్నె, కిచ్చొచి రిసా నెలవ్ దెస్తె గే, పరలోకుమచి నెలవ్ దెమ్దె” మెన, యేసు పేతురుక అదికారుమ్ దిలన్.

20 తెదొడి, “ఆవ్, ‘ఎత్తి అదికారుమ్ తిలో దేముడు తెద్రయేలో క్రిస్తు రచ్చించుప కెర్తొసా జెయెదె’ మెన కక్క నంగ నాయ్” మెన, యేసు సిస్సుల్క గట్టిజ సంగిలన్.

యేసు సైమల్ నేడ మొర గెచ్చు అన్నె జీవ్ జా ఉట్టిందె
(మార్కు 8:31-9:1; లూకా 9:22-27)

21 జా దీసి తెంతొ, “ఆవ్ యెరూసలేమ్ పట్టుమ్తె గెచ్చు కెర, వెల్లి నబ కెర్తె వెల్లెల మాన్సుల్, పూజర్లు చి మోసే తెన్ దేముడు దిలి అగ్గుల్ సికడనతె, చి అత్తి ఒగ్గర్ సైమల్ నేడ మొరుక అస్సె. గని, తిర్రతక అన్నె జీవ్ జా ఉట్టిందె” మెన యేసు జోచ సిస్సుల్క సంగుక దెర్తన్.

22 తెదొడి, పేతురు జోక పక్కయ్ కడ నా కెర, “ప్రబు, దేముడుచి దయక తుక జా పిట్టవును! దస్సిచి తుక కెయ్యక కి జర్లు జవున్ నాయ్” మెన, యేసుక గోల కెర్తన్.

23 పేతురు దస్సి సంగితికయ్, యేసు ప్లస్ కెర, జోక దెక, “నయ్తాన్, అంచి పణ్ణొ గో! అంచి తిలి కామ్క తుయి అడ్డు అస్సిన్. దేముడుచి పచ్చెనచి బుద్ది ఉచర్లది నాయ్, గని మాన్సుల్ ఉచర్తి రగుమ్ ఉచర్లది” మెన, పేతురుక సంగిలన్.

నంపజలన నిదానుమ్ తెన్ అంచి పట్టి బులుక అస్సె

24 యేసు పేతురుక దస్సి సంగ కెర, సిస్సుల్ ఎత్తిక, “కో నంపజా, అంచి పట్టి బులుక ఉచరుల గే, జోచి సొంత ఇన్సుమ్ ఎత్తి ముల దా, జోచి సొంత సిలువ వయస్లి రితి జా, అంచి పట్టి బులుక అస్సె.

25 కిచ్చొక మెలె, జోచి సొంత ప్రానుమ్ రచ్చించుప కెరన తంక, కో కోర్ప జవుల గే, జోచి ప్రానుమ్ పాడ్ జా గెచ్చెదె. గని, అంచి రిసా కో జోచి ప్రానుమ్ దెతి రితి ఎక్కి మెన్సు నిదానుమ్ ఇండుల గే, జోచి ప్రానుమ్ రచ్చించుప జా జోక దొర్పు జయెదె.

26 ఈంజ లోకుమ్తె తిలిసి ఎత్తి కేన్ మాన్సు జవున్ కలుగు కెరన, జోచి సొంత ప్రానుమ్ పాడ్ కెరన్లెగిన, జోక కిచ్చొ లాబుమ్? కిచ్చొ లాబుమ్ నాయ్. అన్నె, కేన్ మాన్సుచి ఆత్మ పాడ్ జలిగిన, జోచి ప్రానుమ్ దేముడు తెన్ అన్నె బెదవంతి రితి కిచ్చొ దిలి సరిపుచుప జయెదె గే?

27 “కిచ్చొక ఈంజ ఎత్తి ఆవ్ సంగితసి మెలె, పణ్ణొక ఆవ్ మాన్సు జా జెర్మున్ అయ్లోసా, అంచ దూతల్ తెన్, కచితుమ్ అంచొ అబ్బొసి జలో దేముడుచి పరలోకుమచి ఉజిడి తెన్, అన్నె జెంక అస్సె. ఎత్తి మాన్సు ఇండిలి కొల్లి జోక సిచ్చు గే బవుమానుమ్ గే దెయిందె.

28 అన్నె, తుమ్క ఆవ్ కిచ్చొ కచితుమ్ సంగితసి మెలె, ఇన్నె టీవో జా తిలనతె సగుమ్జెన్ నే మొర్తె అగ్గె, ఆవ్ మాన్సు జా జెర్మున్ అయ్లోసా అంచి రాజిమ్చి అదికారుమ్ తెన్ డీస్తిసి దెకుల” మెన యేసు సంగిలన్.

17

సిస్సుల్చి మొక్కె యేసు పరలోకుమచి ఉజిడి జా మార్పుప జలిసి
(మార్కు 9:2-13; లూకా 9:28-36)

1 అన్నె సొవ్వు దీసల్ గెలి పణ్ణొ, యేసు పేతురుక, యాకోబుక చి యాకోబుచొ బావొన్ జలో యోహానుక పట్టి కడ దెరన, డోంక తిలి ఏక మెట్టయ్ వెగ కెర,

2 జోవయింది మొక్క జోచి రూపుమ్ మార్పుమ్ జా, జోచి మొక్కొమ్ పొద్దు రితి తల్కును ఉజ్జడ్ జలి, చి జోచ పాలల్ ఉజ్జడ్ రితి చోక్ డీసిల.

3 పడ్డొ, ఈందె, పూర్ణుమ్చ దేముడుచి కబుర్లు సంగిత మోసి చి ఏలీయా దొగుల యేసు తెన్ లట్టబై తా. జేవ్ తీగ్గ సిస్సుల్ క డీసన్ సేడ్డ.

4 జేవ్ దొగుల పూర్ణుమ్చ యేసు తెన్ లట్టబై తతికయ్, పేతురు యేసుక, “ప్రబు, అమ్ ఇన్నె తంక చెంగిలి. తుక ఇస్టుమ్ తిలె, ఏక్ తుక, ఏక్ మోసీక, ఏక్ ఏలీయాక, మొత్తుమ్ తిన్ని కుడియల్ బందిందె” మెన సంగిలన్.

5 పేతురు దస్సు సంగితె తతికయ్, ఈందె, ఉజ్జడ్ తిలి ఏక్ మబ్బు జోవయింక డంకి జలన్, చి “ఈందె, ఈంజొ అంచొ ప్రేమ తిలో సొంత పుత్తు. ఇన్నెచి రిసొ అంక ఒగ్గర్ సర్దసంతోనుమ్. ఇన్నెచి కోడు తుమ్ నూన” మెన, జా మబ్బు తెంతొ అవాడ్ సంగిలినీ నూన్ల.

6 సిస్సుల్ ఈంజ కొడు నూన పుడ్డొ సేడ ఒగ్గర్ బియఁ గెల.

7 గని యేసు జోవయింది పాసి జా కెర, జోవయింక చడ, “ఉట్ట. బియఁ నాయ్” మెన సంగిలన్.

8 జేవ్ సిస్సుల్ అంకివో ఉగుడ దెకిలె, యేసు ఎక్కిలోయి డీసిలన్, అన్నె కక్క దెకిత్ నాయ్.

మొర గెల అన్నె జీవ్ జతినచి రిసొ యేసు అన్నె సంగిలినీ

9 యేసుచి సిస్సుల్ జా మెట్టయ్ తెంతొ ఉత్త జెతె తతికయ్, “అవ్ మాన్సు జా జెర్మన్ అయ్లోసొ మొర గెచ్చు అన్నె జీవ్ జతె ఎద, ఈంజ తుమ్క డీసిలినచి రిసొ తుమ్ కక్క సంగ నాయ్” మెన యేసు జోవయింక సంగిలన్.

10 తెదొడి జోచ సిస్సుల్, “క్రీస్తు మెలో రచ్చించుప కెర్తొసొ నే జెతె అగ్గె ఏలీయా పూర్ణుమ్చొ జెంక అన్నె, మెన మోసి తెన్ దేముడు దిలి అగ్గెల్ సీకడ్డన కిచ్చొక సంగితతి?” మెన, యేసుక పుసీల.

11 జో జోవయింక, “ ఏలీయా పూర్ణుమ్చొ జా కెర ఎత్తి తెయారొ కెరుక అన్నె” మెన పూర్ణుమ్ దేముడు సంగిలి కోడు నిజమి,

12 గని తుమ్క అవ్ కిచ్చొ మెంతసి మెలె, ఈంజొ ఏలీయా అగ్గెయి అయ్లన్. అయ్లె కి, జేవ్ జోక చినితి నాయ్, చి జోవయింక ఇస్టుమ్ అయ్లి రితి జేవ్ జోక కెర్ల. అవ్ మాన్సు జా జెర్మన్ అయ్లోసొ కి జోవయింతె దస సైమల్ సేడిందె” మెన యేసు సంగిలన్.

13 జో బాప్టిసుమ్ దెతె తిలో యోహానుచి రిసొయి ఏలీయా పూర్ణుమ్చొ రిత్సొ మెన యేసు సంగిలన్, మెన సిస్సుల్ అర్దుమ్ కెరన్ల.

మార్పు సేడ్డె తిలో బూతుమ్ దెర్లొ నాడుక యేసు చెంగిల్ కెర్రిసి

(మార్కు 9:14-29; లూకా 9:37-43)

14 యేసుచి సిస్సుల్ జా మెట్టయ్ తెంతొ ఉత్త జా కెర, ఒత్త బెర్లి జనాబ్తె పా:చితికయ్, ఎక్కిలో యేసుతె జా కెర, సెర్ను సేడ జోకర,

15 “బాబు, అంచొ పుత్తుచి ఉప్పిరి కన్కారుమ్ తీ. జో మార్పు జబ్బు తెన్ ఒగ్గర్ బాద సేడ్డె తత్తయ్. జో కెయఁక తెయఁక ఆగితె నెంజిలె గడ్డె సేడుక అన్నె.

16 తుచ సిస్సుల్తె జోక కడ అన్యయ్, గని జోక చెంగిల్ కెరుక జేవ్ నెత్తిర్” మెన సంగిలన్.

17 యేసు, “నముకుమ్ నెంజిలి వెర్రి బుద్దిచి కాలుమ్చ, తుమ్. తుమ్చి తెన్ అవ్ కెత్తి దీసల్ తంక? కెత్తి దీసల్ తుమ్క అవ్ ఓర్పువ జంక? అల్లె, జో నాడుక అంచితె కడ ఆన” మెన, సంగిలన్.

18 జో నాడుక కడ అన్తికయ్, యేసు జోక దెర్లి బూతుమ్క గేల కెర్రికయ్, జా బూతుమ్ జోక ముల దా, ఉట్ట గెలన్. గెలి వెంటన, జో నాడు చెంగిల్ జలన్.

19 పడ్డొ, అన్నె కో నెంతె, యేసుచ సిస్సుల్ జోతె జా కెర, “అమ్ కిచ్చొక జా బూతుమ్క ఉదడుక నెత్తిర్దుమ్?” మెన పుసీల,

20 చి యేసు జోవయింక, “తుమ్ తొక్కి నంపతిలి రిసొ, తుమ్క సొర్కుగిడ్డచి ఎదిలి నముకుమ్ తిలెగిన, ఈంజ మెట్టక జవున్ దెక ‘ఇన్నె తెంతొ ముల దా, ఒత్తల్తో గో’ మెలె బేగి గెచ్చెదె. తుమ్ కిచ్చొ నంపజలెకి, జయ్యి జెయిమ్ జయెదె, మెన తుమ్క అవ్ కచితుమ్ సంగితసి

21 * గని ఎక్కి చువ్వె జా ప్రార్థన కెర్తెకయ్ ఇనిచిక ఉదడుక జయెదె.", మెన యేసు సంగిలన్.

22 పడ్డె, జేవ్ గలిలయ ప్రాంతుమతె బెద బుల్లె తతికయ్. యేసు సిస్సుల్క దెక, "ఆవ్ మాన్సు జా జెర్మన్ అయ్లోసాక మాన్సుల్చి అత్తి విరోదుమ్ సుదల్ దెర దెవుల,

23 చి అంక జేవ్ మారుల. మార్లె కి, తిర్రతక అన్నె జివ్ జా ఉట్టిందె" మెన, యేసు అన్నె సంగిలి రిసా, సిస్సుల్ ఒగ్గర్ దుకుమ్ జల.

దెంక తిలి పన్నుచి రిసా యేసు సంగిలిసి
(మార్కు 9:30-32; లూకా 9:43-45)

24 యేసు కపెర్నహూమ్ పట్టుమతె పావెలి పొది, దేముడుచి గుడితె దెతి చెత్తర్ వెండ్లుచి † పన్ను నజీతన పేతురుతె జా కెర, "తుమ్క బోదన కెర్తొసా ఈంజ చెత్తర్ వెండ్లుచి పన్ను దెయెదె గే నాయ్?" మెన పుసిల, చి "దెయెదె" మెలన్.

25 జో పేతురు గెరి జా కెర, నే లట్టబై అగ్గె, యేసు జా సంగతి జాన్సి రిసా, "ఓ సీమోను, తుయి కిచ్చొ ఉచర్తసి? ఈంజ లోకుమచ రాసలు కవితె పన్ను నజుల? సాంతె పుత్తర్పుల్తె గే, వేర మాన్సుల్తె గె?" మెన పుసిలన్,

26 చి పేతురు "వేర మాన్సుల్తె" మెంతికయ్, యేసు, "దస్సి జలి, పుత్తర్పుల్తె సంగుక నాయ్.

27 గని, దేముడుచి గుడిక ఈంజ పన్ను నజీతనక అన్మానుమ్ నే కెర్తి రిసా, తుయి సముద్రుమతె గెచ్చు, గాలుమ్ గలు. తోలితో దెర్ను సిడ్డె మొస్సాక దెర, జో మొస్సాచి చోడి చిర దెకితె, ఒత్త వీక అట్టు వెండ్లుచి విలువచి కాసు డీసెదె. జా దెర జా కెర, తుచి రిసా కి అంచి రిసా కి జోవయింక దేసు" మెన, యేసు పేతురుక సంగిలన్.

18

పరలోకుమతె కో వెల్లో జయెదె గే
(మార్కు 9:33-37; లూకా 9:46-48)

1 జా పొదుల్తె, యేసుచ సిస్సుల్ జోతె జా కెర, "పరలోకుమచి రాజిమతె కో వెల్లో జయెదె?" మెన పుసితికయ్,

2 జో వీక బాలబోదక జోచి పాసి బుకారా కెర, జోవయించి నెడిమి టీవో కెర,

3 ఇని మెలన్. "తుమ్క ఆవ్ కిచ్చొ కచితుమ్ సంగితసి మెలె, తుమ్ బుద్ది మార్పుప కెరన బాలబోదల్ రిత గవురుమ్ నే ఉచరంతి రితి జలెకయ్, పరలోకుమచి రాజిమతె బెదుక తెరితె, జయె నాయ్.

4 జాకయ్, ఈంజో బోదచి రితి కో డాక కెరన తయెదె గే, జియ్యి పరలోకుమచి రాజిమతె వెల్లో జయెదె.

5 అన్నె * ఇన బాలబోదల్తె ఎక్కిలోక జలెకు, కో † అంచి నావ్ తెన్ మరియాద కెరుల గే, అంకయి మరియాద కెర్తి రితి జవుల.

6 గని అంక నంపజల ఇన బాలబోదల్ జల రితనతె ఎక్కిలోక కి, కి † పాపుమ్ కెరవుల గే, జోవయించి టోట్రయ్ తిర్ప్పలి రితె వెల్లో పత్తురు ఒడోవ దా, జోక సముద్రుమతె బుడ్డవ గెలుక చెంగిలి.

7 "అయ్యో! † పాపుమ్ కెరయ్తినచి రిసా ఈంజ లోకుమక కస్టుమ్! * పాపుమ్ కెరయ్తినచి కచితుమ్ జెయెదె, గని కచి అత్తి దన అల్లర్ల జవుల గే,

8 అయ్యో! జాచి రిసా, తుమ్చితె ఎక్కిలోచో అతు జలెకు, చాటు జలెకు, జోక † పాపుమ్ కెరవ తిలిగిన, జోచి అతు జవున్, జోచి చాటు జవున్, కండ గెల వెంబ గెలి రితి జవున్. కిచ్చొక మెలె, దొన్ని అత్తో

* 17:21 17:21 గ్రీకు బాస తెన్ ఈంజ మత్తెలి తోలితో రెగెడ్ల పుస్తకల్తె 21 కోడు తయె నాయ్. † 17:24 17:24 'పన్ను' మెలె, సిస్సుచి రితి జయెదె. ఈంజ పన్ను జలి, విస్సాక వెర్పుల్చి జలి తెంతో ఎత్తి యూదుడు వెర్సాక వెర్సాక దేముడుచి గుడిచి రిసా చెత్తర్ వెండ్లు దెంక తిలిసి. * 18:5 18:5 ఇన బాలబోదల్తె మెలె, బాలబోదల్తయ్ ఇని మెనుక జయెదె, నెంజలి నంపజా బాలబోదల్ రిత జా డాక కెర్తెనక కి ఇని మెనుక జయెదె. దొన్ని అర్థల్ కి కెరనుక జయెదె. † 18:5 18:5 నెంజలి 5. మెత్తుమ్: అన్నె జో అంక నంపజలి రిసా, ఇన బాలబోదల్తె ఎక్కిలోక జలికు కో మరియాద కెరెదె గే, అంకయ్ మరియాద కెర్తి రితి జయెదె. † 18:6 18:6 నెంజలి జోవయించి మెనుకమ్ పిట్టవుల గే, † 18:7 18:7 నెంజలి, 'సముకుమ్ పిట్టయ్తినచి రిసా'. * 18:7 18:7 నెంజలి 'సముకుమ్ పిట్టయ్తినచి'. † 18:8 18:8 పాపుమ్...రిసా, నెంజలి 'సముకుమ్ పిట్టయ్తినచి రితి జలిగిన, జా దీసి తెంతో అన్నె దస్సి నే జతి రిసా' అట్టమ్ కి గ్రీకు బాస తెన్ ఈంజ తోలితో రెగెడ్ల తెన్ బెదెదె.

దొన్ని చట్టో తెన్ కెయింక నే విజితి ఆగితె గలి జతి కంట, ఆతు బలికు, చాటు బలికు నెంజ పరలోకుమ్చి రాజిమ్తె బిదుక తుమ్క చెంగిలి.

9 అన్నె, తుమ్చితె ఎక్కిలోచి అంకి జవున్ తుమ్క పాపుమ్ కెరవ తిలిగిన, అన్నె జా అంకి జోతె తెంతో కడ వెంబ గలి రితి జవున్. కిచ్చొక మెలి, దొన్ని అంకివో తెన్ వెల్లి ఆగి గొయ్తె గలి జతి కంట, ఎక్కి అంకి తెన్ పరలోకుమ్చి రాజిమ్తె బిదుక తుమ్క చెంగిలి.

నంపజతనక దేముడు విలువ దెకితిసి

10 “ఈంజేవ్ బాలబోదల్ రితనతె ఎక్కిలోక కి సిస్కారుమ్ నే దెకితి రితి దెకన. కిచ్చొక మెలి, ఇన్నెక రకిత దూతల్ కెయింక తెయింక పరలోకుమ్ తిలో అబ్బొచి మొకొమ్ దెకితె తవుల మెన ఆవ్ తుమ్క కచిత్తుమ్ సంగితసి.

11 కిచ్చొక మెలి, ఆవ్ మాన్సు జా జెర్బున్ అయ్లోసా కిచ్చొక అయ్లయ్, మెలి, జోవయించి ఆత్మక నెన గెల మాన్సుల్క రచ్చింఛువ కెరుక అయ్లయ్.

నెన గెలి మెండపిల్లచి రిసాచి టాలి

12 “అల్లె, తుమ్ కిచ్చొ ఉచర్తను? ఏక మాన్సుక వుంజెక్ మెండల్ తిలి, జోవయింతె ఎక్కి పిట్ట తిలిగిన, ఏక తకు వుంజెక్ మెండల్క ఒత్త డొంగై ముల దా కెర, జా పిట్ట గెచ్చు తిలి మెండక చజుక గెచ్చె నాయ్ గె?

13 అన్నె జేవ్ కెయి నే నానిల ఏక తకు వుంజెక్ మెండల్చి రిసా సంతోసుమ్ జతి కంట, ఈంజ* నాన గెలి మెండక చజలి, డీసిలి, జో గొవుడు ఒగ్గర్ సర్దసంతోసుమ్ జయెదె మెన, తుమ్క కచిత్తుమ్ ఆవ్ సంగితసి.

14 దన్నె కి, ఈంజేవ్ బోదల్ ఎక్కిలో కి నాసినుమ్తె గెచ్చుక పరలోకుమ్ తిలో అబ్బొసక ఇస్తుమ్ నాయ్.

15 “తుమ్చితె బావో ఎక్కిలోక అన్నెజ్జో పాపుమ్ కెర తిలిగిన, జో జా పాపుమ్ నే కెర్లొసా పాపుమ్ కెర్లొసాతె గెచ్చు కెర, అన్నెకో నెంతె, జో కెర్లొ పాపుమ్ జోకయ్ సంగుక అన్నె. జో పాపుమ్ కెర్లొసా జా కోడు నూన్లెగిన, నిజుమి, పాపుమ్ కెర్లొయ్ మెన, ఒప్పున సంగిలిగిన, జోక అన్నె బెదవన తన్నె.

16 గని, జో నే నూన్లెగిన, జా తగుచి రిసా తుమ్ లట్టబ్బిన్చి రిసా దొగుల తీగ్ల సాచి జతి రితి, అన్నెజ్జోక గే అన్నె దొగులక గే కడన, జో పాపుమ్ కెర్లొసాతె గెచ్చు, సంగ.

17 జో తీగ్లచి కోడు నే నూన్లెగిన, అంక నంపజలన మొత్తుమ్ బెద సబ కెర్లొసెతె జా తగు నూనవ. జో జా సంగుమ్ సబ కెర్లొసెచి కోడు కి నే నూన్లెగిన, జోక తుమ్చితె నే బెదవంతె, బార్ కెర, దన్నె, యూదుల్ నెంజలనక కి సిస్తు నజితనక కి యూదుల్ కీసి బెదవంతి నాయ్ గే, దన్నె దెక సిచ్చు కెర.

18 తుమ్ నంపజలన బెద ఈంజ లోకుమ్తె సబ కెర కిచ్చొ రుజ్జు సంగితె గే, జాకయ్ పరలోకుమ్ తిలి అమ్చి అదికారుమ్ దెతసుమ్, మెన నిజుమి తుమ్క ఆవ్ సంగితసి.

19 “పడ్డో, తుమ్క అన్నె కిచ్చొ మెంతసి మెలి, ఈంజ లోకుమ్తె తుమ్చితెకో కో, ఎక్కి దొగులయి జలికి, మెన్సుతె ఎక్కి రితి ఉచర్త, కిచ్చొచి రిసా ప్రార్దన కెర్లొ గే, పరలోకుమ్ తిలో అంచో అబ్బొ తుమ్చి రిసా జాక జర్లు కెరెదె.

20 కిచ్చొక మెలి, దొగుల తీగ్ల అంచి నావ్ తెన్ కేనె ఎక్కితె తవుల గే, ఒత్త జోవయించి నెడిమి ఆవ్ తయిందె” మెన, యేసు సంగిలన్.

మాన్సుల్క కెత్తి సుట్లు చెమించువ కెరుక గే

21 తెదొడి పేతురు పుర్లె జా కెర, యేసుక, “ప్రబు, కేన్ జవున్ బావో అంక కెత్తి సుట్లు పాపుమ్ కెర్లొసి, ఆవ్ జోక చెమించువ కెరుక? సత్తు సుట్లు ఎద గే?” మెన, పుసిలన్.

22 యేసు జోక, “సత్తు సుట్లు నాయ్. తిని విసా సత్త సుట్లు ఎదక.” మెలన్.

ఎక్కిలోక ఎక్కిలో చెమించువ కెర

* 18:9 18:9 పాపుమ్...రిసా, నెంజలి ‘నముకుమ్ పిట్టయ్తి రితి జలిగిన, జో దీసి తెంతో అన్నెదన్నె నే జతి రిసా’ చి అర్దుమ్ కి గ్రీకు బాన తెన్ ఈంజ తొలితొ రెగిడ్లన్ తెన్ బెదెదె. § 18:11 18:11 గ్రీకు బాన తెన్ ఈంజ ఎత్తి తొలితొ రెగిడ్లన్ నగుమ్ వున్కలత్ 11 నంబర్చి కోడు తయ్ నాయ్. * 18:13 18:13 పిట గెలి

23 “పరలోకుమచి రాజమీత బెదితన ఎక్కిలోక ఎక్కిలో చెమించుప కెర్తినచి రిసా కిచ్చొ టాలి సంగుక జయెదె మెలె, జోచ గొత్తి సుదల్ దెంక తిలి డబ్బుల్ ఏక్ రానొ నజనుక దెర్తె.

24 నజనుక దెర్తి పొది, ఈందె, జోక దెస్సు వెయి వెండ్లు దెంక తిలో ఎక్కిలోక బుకార్తెకయ్, జమాన్లు జోక జో రానొతె కడ ఆన్ల.

25 జా రునుమ్ తీర్పుప కెరుక మెన జో మాన్సుతె కిచ్చొ నెంజలి రిసా, జోచొ ఎజోమాని, ‘జోక కి జోచి తేర్తిక కి, జోచ బోదల్క కి, జోక కలుగు జలిసి ఎత్తి కి ఏక గెల కెర, రునుమ్ తీర్పుప కెరవడ’ మెన, జమాన్లుక సంగిలన్.

26 జలె, రునుమ్ జలో జో గొత్తి సుదొ సెర్పు నేడ, జోకర, బాబు, అంచి ఉప్పిరి దయ తియ, దొరత్ రక్క. జా రునుమ్ ఎత్తి ఆవ్ తీర్పుప కెరిందె” మెన, బతిమాల్పా జా సంగితికయ్,

27 జో రానొ జోచి ఉప్పిరి కన్యారుమ్ జా, జోక ముల కెర, జోచి రునుమ్ చెమించుప కెర్తన్.

28 “గని, జో దస్సు బార్ జా కెర, జోచి జతచ గొత్తి మాన్సుల్తె ఎక్కిలో జోక దొన్ పుంజొ †వెండ్లు దెంక తిలోసాక దస్సుల్ జా, జోచి పీకతె దెర, ‘తుయి అంక దెంక తిలిసి అంక దె’ మెన సంగిలన్.

29 జోచి జతచొ జో గొత్తి సుదొ సెర్పు నేడ, జోకర జోకర, ‘అంచి ఉప్పిరి దయ తియ దొరత్ రక్క. తుక దా గెలిందె’ మెన, బతిమాల్పా జా సంగిలే కి,

30 జో నే ఒప్పన్తె, జో అన్నెక్కో దెంక తిలిసి దా గెల్తె ఎద జోక జేల్తె గలయ్లన్.

31 “తెదొడి, ఈంజొ కన్యారుమ్ నే దెకిలో గొత్తి సుదొచి ఒత్తచ గొత్తి సుదల్ జా జర్గు జలిసి దెక కెర, ఒగ్గర్ బాద నేడ, జర్గు జలిసి ఎత్తి జోచొ ఎజోమానిక సంగిల.

32 తెదొడి, జో ఎజోమాని, జో కన్యారుమ్ నెంజలి గొత్తి సుదొక బుకారా కెర, జోక, ‘తుయి, గర్చె గొత్తి సుదొ, తుయి అంక బతిమాల్పా జా జోకర్లది, చి తుచి ఎదివాల్ తిలి రునుమ్ పెట గెలయ్.

33 ఆవ్ తుక చెమించుప కెర్తి రితి, తుయి తుచొ జతచొ గొత్తి సుదొక చెమించుప కెరుక తిలి నాయ్ గె?” మెన, జోక సంగ కెర,

34 జో గొత్తి సుదొ రునుమ్ జలిసి ఎత్తి దెతె ఎద, సిచ్చల్ కెర్తనతె జో జేలి తంక మెన జోచొ ఎజోమాని సార్పు కెర దిలన్.

35 “జలె, తుమీతె కో తుమచొ బాచొ జలో అన్నెక్కోక పెట్టి ఎత్తి చెమించుప నే కెర్తె, పరలోకుమ్ తిలో అంచొ అబ్బొ కచితుమ్ జో మాన్సుక సిచ్చ దెయెదె” మెన యేసు బుద్ది సంగిలన్.

19

1 యేసు ఈంజేవ్ కొణొ సంగ కేడయ్లి వడ్డొ, గలిలయ ప్రాంతుమ్ తెంతొ ముల దా, యూదయ ప్రదేసిమ్తెచి యోర్దాను గాడు ఒత్తల్తొ పక్క ఉట్ట అయెలన్.

2 ఒగ్గర్జెన్ జనాబ్ జోచి పట్టి జెతికయ్, జోవయించ జబ్బులు ఒత్త చెంగిల్ కెర్తన్.

వెండ్లి జలన ముల ములి జతిన్చి రిసా యేసు సంగిలిసి

3 పరిసయ్యుల్ నగుమ్జెన్ యేసుక పరిచ్చ కెర, తెర్తి నింద కెరుక మెన, జోతె అయ్ల, అన్నె, “కేన్చి రిసా జలెకు మున్సుబోద జోచి తేర్తిక ములుక నాయిమ్ గె?” మెన, పుసిల, చి యేసు జోవయింక,

4 “ఈంజ లోకుమ్ జెర్తయ్లి పొది తెంతొ, మున్సుబోద తేర్బోద మెన, జెర్తిలోసా జేక జెర్తయ్లిలో.

5 ఇసికయ మున్సుబోద అయ్యెన్అబ్బొన్క ముల దా, జోచి తేర్తి తెన్ బెద తంక అన్నె, అన్నె జేవ్ దొగుల ఎక్కి ఆగ్ జా తవుల మెన జెర్తయ్లిలోసా సంగిలన్

మెన నదు కెర్పు నాయ్ గె?

6 జలె, జేవ్ దొగుల ఎక్కి జీవ్ జా అస్తి. జాచి రిసా, దేముడు వెండ్లితె కక్క జత కెరవ తయెదె గే, కేన్ మాన్సు ములవుక జయె నాయ్.” మెన యేసు సంగిలన్.

7 జేవ్ పరిసయ్యుల్ యేసుక “జలె, ‘ముల దెతి వున్తుకుమ్ రెగ్గ దిలిగిన ముల దెంక జయెదె’ మెన మోసే పూర్గుమ్చొ కిచ్చొక ఆడ్ర దిలన్?” మెన, సంగిల.

8 యేసు జోవయింక, “తుమ్ రాడ్ జీవ్చ మాన్సుల్చి రిసా ‘తుమ్చ తేర్దివొక ముల దెంక జయెదె’ మెన మోసి సెలవ్ దిలన్, గని మాన్సుల్క జెర్మయేలి కెర్లి మొదోల్ తెంతో దస్సి తయె నాయ్.

9 ఆవ్ కిచ్చొ మెన తుమ్క సంగితసి మెలె, జా లంజె జలి రిసా ప్లిట్ట, కో జలెకు జోచి తేర్దిక ముల దా అన్యెక్లిక పెండ్లి జయెదె గే, లంజె వంసుమ్చో జతయ్, మెన గట్టిజ సంగితసి” మెన, జోవయింక సంగిలన్.

పెండ్లి నే జతినచి రిసా సిన్సుల్ ఉచర పుసిలిసి

10 ఈంజ కోడు సూన కెర, యేసుచ సిన్సుల్ జోక “తెర్దిమున్ను చి నెడిమి ఇసి తిలెగిన, పెండ్లి నే జలెగిన చెంగిల్.” మెన యేసుక సంగిల,

11 చి యేసు జోవయింక, “దేముడు జా సెక్తి దిలెకయ్, నెంజెలె కో కి జా కోడు ఓర్పుప జంక నెత్తిర్తి.

12 ఈందె, జెర్మన్ తెంతో గొడ్డు జలన తవుల, మాన్సుల్ సగుమ్జెన్క గొడ్డు జతి రితి కెర్ల, వడ్డె పరలోకుమ్చి రాజమ్చి సేవ ఎక్కి మెన్ను తెన్ కెర్లి రిసా, సగుమ్జెన్ కి గొడ్డు రితి జా తవుల. జలె, తుమ్ ఉచర్లి రితి తంక కో తెరుల గే, దస్సి తత్తు.” మెన సంగిలన్.

యేసు బాలబోదల్క చడ వరుమ్ దిలిసి

13 వడ్డె, యేసు జోవయింక చడ ప్రార్థన కెరుక మెన, సగుమ్జెన్ జోవయించ బాలబోదల్క జోతె కడ ఆన్ల.

14 జలె, జేవ్ బోదల్క కడ ఆన్ల మాన్సుల్క యేసుచ సిన్సుల్ “పోస” మెన గోల కెర్ల. గని, యేసు, “జోవయింక అడ్డు కెర నాయ్. బోదల్ అంచితె జెతు. కిచ్చొక మెలె, పరలోకుమ్చి రాజమ్ ఇన సుదల్చియి” మెన, సిన్సుల్క సంగిలన్.

15 జేవ్ బోదల్క బోడి చడ కెర ఒత్త తెంతో ఉట్ట గెలన్.

**పరలోకుమ్చి రాజమ్తె కిసి బెదుక గే యేసు సంగిలిసి
(మార్కు 10:17-31; లూకా 18:18-30)**

16 వడ్డె, ఈందె, ఉబెడో ఎక్కిలో యేసుతె జా కెర, “గురుబాబు, జోబర. ఆవ్ పరలోకుమ్చి రాజమ్తె కెయెక తెయెక జతి వాట అంక దొర్కు జంక మెలె, ఆవ్ కిచ్చొ చెంగిల్ కామ్ కెర్లె జయెదె?” మెన పుసిలన్.

17 యేసు జోక, “కేన్ చెంగిల్చి మెన కిచ్చొక అంక తుయి పుసితసి? చెంగిల్ తిలోసా ఎక్కిలోయి. అన్నె కోయి నాయ్. పరలోకుమ్తె జతి వాట కావలె మెలె, దేముడుచ ఆగ్గల్ రితి కెర్లె తా” మెన సంగిలన్.

18 జో ఉబెడో, “కేన్ కేన్ ఆగ్గల్ రితి కెరుక?” మెన యేసుక పుసిలన్, చి యేసు,
“నరు అత్య కెరు నాయ్,

లంజెకమొ కెరు నాయ్,

కిచ్చొ చోరు నాయ్,

అబద్దుమ్ సాచి సంగు నాయ్,

19 అయ్యుద్అబ్బొద్క గవురుమ్ దెకితె తా,

అన్నె, తుక్క తుయి కిసి ప్రేమ కెరంతసి గే దస్సి, వేర సుదల్క కి ప్రేమ కెర్లె తా”

మెన సంగిలన్.

20 జో మాన్సు యేసుక, “ఇనచ ఎత్తి ఆవ్ నిదానుమ్ కెర దెకన్తసి. గని కిచ్చొగి ప్లిట్ట అన్నె మెన అంక అజ్జ. అన్నె కిచ్చొ ప్లిట్ట అన్నె?” మెన పుసిలన్, చి యేసు జోక, “తుయి పూర్తి జంక ఆన తిలెగిన, గో, చి

21 తుచి అన్నె ఎత్తి విక కెర, బీద సుదల్క దేను, చి పరలోకుమ్తె తుక అన్తి కలుగు జెయెదె. అన్నె, అంచి తెన్ బెద, అంచి పట్టి జే!” మెలన్.

22 గని, జో ఉబెడో ఒగ్గల్ సామ్నారుమ్చి రిసా, యేసు దస్సి సంగితికయ్, దుకుమ్ జా మొకోమ్ ఇదిలిసి కెర ఉట్ట గెలన్.

సామ్నార్లు పరలోకుమ్చి రాజమ్తె బెదుక కస్టుమ్

23 తెదొడి యేసు జోచి సిన్సుల్క, “ఆవ్ తుమ్క కిచ్చొ కచితుమ్ సంగితసి మెలె, సామ్నార్లు పరలోకుమ్చి రాజమ్తె బెదుక కస్టుమ్.

24 అన్నె, దన సొమ్ముల్లు దేముడుచి జా రాజిమతె బెదితి కంట, నూజిబొరో వాట్ ఒంటి గెచ్చుక నుల్లు, మెన తుమ్మక అవ్ సంగితసి” మెన సంగిలన్.

25 సిస్సుల్ ఈంజ కోడు నూన కెర, ఆచారిమ్ జా, “దస్సి జలె, కో రచ్చించువ జంక జయెదె?” మెన, సంగితికయ్,

26 యేసు జోవయింక దెక, “మాస్సుల్ కెర్క నెత్తిర్లిసి, గని ఎత్తి, జర్లు కెరుక కి దేముడుక సెక్తి అస్సె.” మెన సంగిలన్.

27 పేతురు, “ఈందె, అవ్ ఎత్తి ముల దా తుచి పట్టి బులితసుమ్, చి రిసా అమ్కయి కిచ్చొ దొర్కు జయెదె?” మెన పుసిలన్.

28 యేసు జోవయింక ఇసి మెలన్, “తుమ్మక అవ్ కిచ్చొ కచితుమ్ సంగితసి మెలె, ఈంజ లోకుమ్క నొవర్ చెంగిల్ కెర్తె పొదిక, అవ్ మాస్సు జా జెర్మున్ అయిలోసా ఎత్తిక ఏలువ కెర్తి రిసా, అంచి పరలోకుమచి ఉజిడిచి సింగాసనుమతె వెసితె పొదిక, అంక నంపజా తుమ్ బారజిన్, బార సిజాసనల్తె వెస, ఇస్రాయేలుల్వ బార సెకుమలుచక అంచి తెడి తుమ్ తీర్పు కెర్తె.

29 అన్నె, అంచి నావ్చి రిసా గెరల్ జలెకు, అన్నెబావోక జలెకు, బయిబేసిక జలెకు, అబ్బొన్క జలెకు, అయ్యున్క జలెకు, బోదల్క జలెకు, బుయి జలెకు, జో ముల తయెదె గే, జోక దసచ పుంజెక వంతుల్ దొర్కు జయెదె, అన్నె, పరలోకుమతె గెచ్చు కెయెడ తెయెడ చెంగిల్ తా జివుల.

30 ఈంజ అగ్గె జల మాస్సుల్ ఒగ్గర్జిన్ వడ్డె జవుల, వడ్డె జలన అగ్గె జవుల.”

20

ద్రాచ తోటచొ ఎజొమానిచి దయచి రిసా టాలి

1 “పరలోకుమచి రాజిమతె మాస్సుల్క బెదయతోసాచి దయ కిసి మెలె, ఎజొమాని ఎక్కిలోచి దయచి రితి జయెదె. జో జోచి ద్రాచ తోటతె కామ్ కెరవుక మెన, కూలి మాస్సుల్క బుకార్తి రిసా, పెందలి బారొ జా కెర,

2 ఏక్ దీసిచి కామ్క ఏక్ ఒండి మెద్దెన్చి కూలి *డబ్బుల్ దెయిందె” మెన, జేవ్ కూలి మాస్సుల్చి మొక్కె ఒప్పున సంగ తా, ద్రాచ తోటతె జేవ్ కామ్ కెర్తి రిసా జోవయింక తెద్రయల్.

3 “పిమ్మట్, పాసి పాసి నొప్పు గంటల్క, జో ఎజొమాని, సంతవిది గెచ్చు కెర, కామ్ నెంజ ఆరి టీవో జా తిలన్క సగుమ్జిన్ ఒత్త తిలిసి దెక కెర,

4 తూమ్ కి అంచి ద్రాచ తోటతె గెచ్చు, కామ్ కెర, చి నరిపుచువ జతి కూలి డబ్బుల్ తుమ్క దెయిందె” మెన, జోవయింక సంగితికయ్, జేవ్ జోచి కామ్తె గెల.

5 అన్నె, పాసి పాసి బార గంటల్ మెద్దెనె కి, తిన్ని గంటల్క కి, జా వీదె జో ఎజొమాని గెచ్చు కెర, అన్నె దస్సి కెర్లన్.

6 “ఒత్త తెంతో, పాచ్ గంటల్ నంజె, జా వీదె అన్నె గెచ్చు కెర, అన్నె సగుమ్జిన్ దస్సి ఒత్త టీవో జా తతికయ్, తుమ్ ఒండి మెద్దెనె కిచ్చొక దస్సి, కామ్ నే కెర్తె కిచ్చొక టీవో జా అస్సున్?” మెన పుసితికయ్,

7 జేవ్, “కో అమ్క కూలి కెరయ్తి నాయ్” మెన సంగిల. సంగితికయ్, జో ఎజొమాని, “జలె, తూమ్ కి అంచి ద్రాచ తోటతె గెచ్చు కామ్ కెర” మెన, జోవయింక కి తెద్రయెలన్.

8 “సాంజ్ జతికయ్, జో ద్రాచ తోటచొ ఎజొమాని జోచొ గెర్చి డబ్బుల్ దెకితో మాస్సుక, ‘జేవ్ కూలి కెర్లనక బుకారా కెర, వడ్డె అయిలనక తెంతో తోలితో అయిలనక ఎద, ఎత్తిక అవ్ సంగిలి కూలి డబ్బుల్ దేసు’ మెన, జోక సంగిలన్.

9 జాచి రిసా, పాచ్ గంటల్ నంజె జా కెర గడియయ్ కామ్ కెర్లనక కి, ఒండి మెద్దెన్చి ఎదిలి కూలి డబ్బుల్ దిలన్.

10 జేవ్ అల్లిమ్ అయిలనక తెద్దిలి దిలి రిసా, జేవ్ అగ్గె అయిలన, ‘అమ్క ఒగ్గర్ దెయెదె’ మెన ఉచర్ల. ఎత్తిజిన్క ఎక్కి రితి ఒండి మెద్దెన్చి కూలి డబ్బుల్ దొర్కు జలి.

11 జాచి రిసా, జేవ్ అగ్గె అయిలన జా కూలి డబ్బుల్ నజన, ‘పెందలి తెంతో సాంజ్ ఎద ఒప్పడక కెద్ది స్రెమ జా, అమ్ కామ్ కెర్లమ్.

* 20:2 20:2 ఏక్ దీసిచి కామ్క కూలి ఏక్ దేనారము ఇస్రాయేలు దేసిమచ దా అస్సి

12 జేవ్ ఎక్కి గంట కెర్నక అమ్చి తెన్ సమానుమ్ దిలది' మెన గోస లట్టబ, ఎజోమానిక సంగిల.

13 ఈజో ఎజోమాని జోవయంతె ఎక్కిలోక, 'నేస్తమ్†, ఆవ్ తుమ్క అన్యాయమ్ కెరుక నాయ్. తుయి ఏక ఒండి మెద్దెన్చి కూలి డబ్బుల్ నజనుక ఒప్పున్దది.

14 అల్లె, తుయి ఒప్పున్సిని సజన గో' మెన సంగ కెర, పడ్డో అయ్లో ఎక్కిలోక దెకవ, జో తోలితో అయ్లోసాక అన్యై, 'తుక దిలి రితి, ఈజో పడ్డో అయ్లోసాక కి దెంక అంక ఇస్తుమ్ జలి.

15 అంచి సొంత ఆస్తి అంచి ఇస్తుమ్ అయ్లి రితి వంట దెంక నెంజి గే? అంచి సర్క జోవయంక దర్ముమ్ తెన్ దిలి రిసా తుమ్క గోస గే?' మెన, జో ఎజోమాని సంగిలో మెన యేసు సంగ కెర,

16 అన్యై, జలె, తోలితో బెదిలన పడ్డో బెదిలన జవుల. పడ్డో బెదిలన తోలితో బెదిలన జవుల", మెన సంగిలన్.

**యేసు మొర అన్యై జంక తిలిన్చి రిసా అన్నెక్ సుట్టు సంగిలిసి
(మార్కు 10:32-34; లూకా 18:31-34)**

17 యేసు యెరూసలేమ్ పట్టుమ్తె గెచ్చుక మెన బారో జా, ఇండ గెతె తిలి పొది, వట్టి గెతనతె తెంతో జోచ బారజిన్ సిస్సుల్క పాసి బుకారాన, ఇసి మెలన్.

18 "ఈంది, యెరూసలేమ్తె గెతనుమ్. ఒత్త కిచ్చో జయెది మెలె, ఆవ్ మాన్సు జా జెర్మున్ అయ్లోసాక, మాన్సు దెర్లె, వెల్లెల మాన్సుల్ పూజర్తుతె చి మోసి తెన్ దేముడు దిలి అగ్గుల్ సికడ్డనతె దెర్ము సేడింది, చి జేవ్ అంక మొర్చి సిచ్చ వయడ కెర,

19 అంక కొంకడ్డి రిసా, అంక కొర్డల్ తెన్ పెటితి రిసా, అంక సిలువతె టీవో కెర మార్చి రిసా, అమ్చ యూదుల్ నెంజిల అదికారుల్చి అత్తి అంక సార్చు కెర దెవుల. గని త్తిర్తక అన్యై జివ్ జా ఉట్టింది" మెన సంగిలన్.

అయ్యసి జాచి దొగుల పుత్తర్పులుచి రిసా కోర్వం జలి

20 తెదొడి యేసుచ సిస్సుల్ జల జెబెదయిచ దొగుల పుత్తర్పుల్చి అయ్యసి, జేవ్ పుత్తర్పుల్ తెన్ యేసుతె జా కెర, సెర్పు సేడ జోకర, "ఏక వరుమ్ దే" మెన, సంగితికయ్,

21 యేసు జాక, "తుయి కిచ్చో కోర్వం జతసి?" మెన పుసిలన్, చి ఈంజ, "తుచి రాజిమ్తె అంచ పుత్తర్పు దొగుల, తుచి ఉజెతో పక్క ఎక్కిలో, డెబ్లి పక్క ఎక్కిలో వెన తతి రితి ఆత్త దేను" మెన సంగిలి.

22 చి యేసు, "తుమ్ కిచ్చో పునితను గే, తుమ్ నేన్సు. అంచి గిన్నతె బెద పితి రితి, ఆవ్ సేడుక తిలి దుకుమ్తె బెదుక ఒర్పువ జంక తెర్పు గే?" మెన సంగితికయ్, జేవ్ "అమ్ తెరుమ్దే" మెలె.

23 దస్సి జబాబ్ దెతికయ్, యేసు, "ఆవ్ పితి గిన్నచి తుమ్ పిస్తె, గని అంచి ఉజెతో పక్క ఎక్కిలో, అంచి డెబ్లి పక్క అన్యై తుమ్ వెసుక మెన సెలవ్ దెంక అంచి అత్తి నాయ్. పరలోకుమ్ తిలో అంచో దేముడు అబ్బో కక్క కక్క, సెలవ్ దా తయెది గే, జెవ్వి ఒత్త వెసుల." మెలన్.

24 తెదొడి, జేవ్ దొగుల బాపుడ్లు ఎత్తిచి కంట వెల్లెల మాన్సుల్ జంక ఉచర్లెన్చి రిసా సేంసిల దెన్సుజిన్ సిస్సుల్ జా ఎత్తి, నూన కెర, జోవయించి ఉప్పిరి ఒగ్గర్ కోపుమ్ జల.

సిస్సుల్ ఎక్కిలోక ఎక్కిలో కిసి దెకుక గే యేసు సంగిలిసి

25 తెదొడి యేసు జేవ్ బారజిన్ సిస్సుల్క జోతె బుకారా కెర, "యూదుల్ నెంజిల అదికారుల్ జోవయించి తెడి తిల వెల్లెల మాన్సుల్, సొంత గవురుమ్ ఉచరన, ప్రెజల్క జాడ్లు వయడ్లి రితి, జోవయింక పోటి తెన్ ఏలవ కెర్తతి మెన తుమ్ జాన్సు.

26 గని తుమ్చితె దస్సి తంక జయె నాయ్. తుమ్చితె కో వెల్లో జంక ఉచరెది గే, జొయ్యి తుమ్చో సేవ కెర్తెసా రిత్తి జా తంక.

27 తుమ్చితె కో ముక్కిమ్ జంక ఉచరెది గే, జో తుమ్చో గెతిమాన్సు రిత్తి జా తంక.

28 దస్సి, ఆవ్ మాన్సు జా జెర్మున్ అయ్లోసా కి మాన్సుల్చి అత్తి సేవ కెరవడనుక నాయ్, గని మాన్సుల్క ఆవ్ సేవ కెరుకయ్ అయ్లయ్. మెలె, ఒగ్గర్జిన్ మాన్సుల్క సయ్తాన్చి రాజిమ్ తెంతో నెతోవ

† 20:13 20:13 మింత

గెల్లి రిసాయి మొర అంది ప్రానుమ్ దెంక అన్నెచి రిసా ఈంజ లోకుమతె అయలయ్” మెన సిస్సుల్క యేసు సంగిలన్.

దొగుల గుడ్డి జలసక యేసు చెంగిల్ కెర్లిసి
(మార్కు 10:46-52; లూకా 18:35-43)

²⁹ పడ్డె, యేసుచి సిస్సుల్ యెరికో పట్టుమ్ తెంతో బార్ జా, యెరూసలేమ్ పట్టుమ్తె గెతె తిలి పొది, ఒగ్గరజిన్ ప్రెజల్ జోచి పట్టి గెతె తిల.

³⁰ జలె, ఈందె, వాట్ సొడి దొగుల గుడ్డి మాన్సుల్ వెన తిల. యేసు జా వాట్ జెతయ్ మెన నూన తా, “ఓ యేసుప్రబు, దావీదు రానొచి సెకుమ్తె జెర్మిలో రచ్చించుప కెర్తొసా, అమ్చి ఉప్పిరి కన్యారుమ్ తియ, చెంగిల్ కెరు!” మెన, బతిమాల్పా జా కేక్ గల.

³¹ తిల జనాబ్, జలె, “తుక్కె తా” మెన గోల కెర్లె కి, జేవ్ గుడ్డి మాన్సుల్ అన్నె, “ప్రబు, దావీదు రానొచి సెకుమ్తె జెర్మిలో రచ్చించుప కెర్తొసా, అమ్చి ఉప్పిరి కన్యారుమ్ తియ చెంగిల్ కెరు!” మెన, అగ్గెచి కంట గట్టిజ కేకుల్ గల్లికయ్,

³² యేసు బీవో కెర, జోవయింక బుకారా కెర, “అవ్ తుమ్క కిచ్చొ కెరుక మెన తుమ్ ఉచర్తసు?” మెన పుసిలన్.

³³ జేవ్ జోక, “అమ్చ అంకివొ దెకితి రితి కెరు” మెన సంగిల.

³⁴ జేవ్చి ఉప్పిరి యేసు కన్యారుమ్ జా, జోవయింక అంకివొ చడిలన్. చడిలి బేగి, జోవయింక అంకివొ టంట డీసిల, చి జేవ్ జోచి పట్టి గెల.

21

యేసు యెరూసలేమ్ పట్టుమ్తె గెచ్చు పావెలిసి
(మార్కు 11:1-11; లూకా 19:28-38; యోహా 12:12-19)

¹ పడ్డె, యేసు ఇసి ఇండ జా యెరూసలేమ్ పట్టుమ్చి పాసి జా కెర, * ఒలీవ మెలి మెట్టచి పాసి తిలి బేత్తుగే మెలి గచ్చె అయలి పొది, జోచ సిస్సుల్తె దొగులక,

² “తుమ్చి మొక్కె తిలి గచ్చె గెచ్చ వెన, చి బేగి, ఒత్త బండ తిలి ఏక్ గాడ్చె, జాచి తెన్ తిలి ఏక్ గాడ్డె పిల్ల తుమ్క డీసుల. జోవయింక యిప కెర, అంచితె ఉదడ ఆన.

³ కో జలెకు తుమ్క కిచ్చొ జలెకు సంగిలెగిన, ‘ఇన్నెతెన్ ప్రబుక కామ్ అస్సె’ మెన సంగ. సంగిలె, బేగి జో మాన్సు జేవ్ గాడ్డెల్క తెర్తయెదె” మెన సంగిలన్.

⁴ పూర్గుమ్ దేముడు జోచి కబుర్ సంగిలో అత్తి సంగిలి కోడు నెరవెర్చుప జంక మెన, ఈంజ జర్గు జలి.

⁵ “తుమ్చొ సేంతుమ్ తిలో రానొ గాడ్డె పిల్లతె వెగ జెతయ్, మెన దేముడు నిసాన † సీయోసు పట్టుమ్తెచ ప్రెజల్క సాట్టు కెర” మెన, రెగిడ్డి కోడు.

⁶ జలె, జేవ్ దొగుల సిస్సుల్ గెచ్చ, యేసు జోవయింక సంగిలి రితి కెర,

⁷ జా గాడ్డెక చి, జాచొ పిల్లక ఉదడ ఆన, జోచి సిస్సుల్ జోవయింక దుప్పట్లు జా పిల్లచి ఉప్పిర్ గల్లికయ్, యేసు వెగ వెసిలన్.

⁸ అన్నె, ఒత్త బెర్త జనాబ్తె ఒగ్గరజిన్ జోవయింక దుప్పట్లు వట్టె అంతిర్ల. అన్నె నగుమ్జిన్ రూక్చ మట్టల్ రొడ్డల్ కండ కెర వట్టె అంతిర్ల.

* 21:1 21:1 ఒత్త ఒలీవ వండ్లు రూకుల్ తప్పల చి ఇసి నావ్ తయెదె. † 21:5 21:5 ‘సీయోసు’ మెలె, యెరూసలేమ్ పట్టుమ్క అస్సెక్ నావ్ జయెదె.

9 అంత్ర కెర, జోవయింది పురైతో గెతె తిలస కి పడ్డో గెతె తిలస కి, “దావీదు రానొచి నెకుమ్తె జెర్మిలో అమ్చో †రచ్చించువ కెర్లొసాక †జోబర, జోబర! దేముడు ప్రబుచి నావ్ తెన్ జెతోసాక ఓనన్ను, ఓనన్ను! ఎత్తిచి కంబ ఉప్పిరేచి టాన్తె తిలోసాక ఓనన్ను!” మెన, కేకుల్ గల్తె తిల.

10 జలె, యేసు యెరూసలేమ్తె పావితకయ్, పట్టుమ్చ ఎత్మొజిన్ “ఈంజో కో?” మెన, బమ్మ జెతికయ్.

11 ఒత్త జో తెన్ అయ్లె ప్రజెల్ కిచ్చి మెల మెలె, “దేముడుచి కబుర్ అన్తో, గలిలయ ప్రాంతుమ్చి నజరేతు గెప్పిచో, యేసు ఈంజో” మెన సంగిల.

దేముడుచి గుడితె సామన్లు వికితన గట్టక యేసు ఉదడ్డిసి
(మార్కు 11:15-19; లూకా 19:45-48; యోహా 2:13-22)

12 తెదొడి యేసు *దేముడుచి గుడితె పెన కెర, ఒత్త, సామన్లు వికితన, గెంతన ఎత్మొజిన్క ఉదడ కెర, డబ్బుల్ పల్లయ్తనచ, బల్లల్ చి పార్వ పిట్టల్ వికితనచ, బల్లల్ సేడవ దా.

13 “ †అంచి గేరు ప్రార్దన కెర్తి గేరు జా అస్సె. దస్సి తవున్’ మెన రెద్ద అస్సె, గని తుమ్ కిసి కెర అస్సెన్ మెలె, ఈంజ దేముడుచి గేరుక, చోర్లు జెతో రితో గేరు జతి రితి తుమ్ మార్కుప కెర అస్సెన్” మెన సంగిలన్.

14 తెదొడి, గుడ్డి మాన్సల్, సొట్ట మాన్సల్ దేముడుచి గుడితె యేసుతె అయ్ల, చి జోవయింక చెంగిల్ కెర్లన్.

15 గని, వెల్లెల పూజ్లు, మోసే తెన్ దేముడు దిలి ఆగ్నల్ సికడ్డన కి, యేసు కెర్ల కెమె దెక, పడ్డో, “దావీదు రానొచి నెకుమ్తె జెర్మిలో అమ్చో రచ్చించువ కెర్లొసా, తుక జెయ్యి, జెయ్యి!” మెన, దేముడుచి గుడితె బోదల్ యేసుక కేకుల్ గల్తె తిలిసి దెక, కోవుమ్ జల.

16 కోవుమ్ జా యేసుక, “ఈంజేవ్ సంగిలిసి తుయి నూన్తసి గె?” మెన పుసిల, చి యేసు జోవయింక, “నూన్తసి. ఈందె, బాలబోదల్చి కొవ్న బోదల్చి చోడివాట్ గవురుమ్ అనల్లది”

మెన దేముడుచి కొడెతె రెగిడ్డి కోడు తుమ్ కెయ్యి నదు కెర్పు నాయ్ గె? మెన, జేవ్ వెల్లెల మాన్సల్క సంగ కెర,

17 జోవయింక ముల దా కెర, జా పట్టుమ్తె తెంతో బార్ జా, బేతనియ గెప్పి గెచ్చ, ఒత్త నిద్ర తిలన్.

పండ్లు నే దెర్లొ రూకుక జర్లు జలిసి
(మార్కు 11:12-14,20-24)

18 అన్నెక్ దీసి పెందలె, యేసు యెరూసలేమ్ పట్టుమ్తె అన్నె జెతె తతికయ్, జోక చూ కెర్లన్.

19 తెదొడి వాట్ సొడి తిలో ఏక్ †అంజూరుమ్ రూకుక దెక కెర, రూకిచి పాసి గెలె, జా రూక్తె †అక్కుడ్లు పిట్టవ అన్నె కిచ్చి కి నాయ్. జాకయ్, జో రూకుక దెక, “అప్పె తెంతో తుచితె కెయ్యింక కి కాయల్ దెర్లు నాయ్” మెన సంగిలన్, చి జా రూకు బేగి నుక్క గెలి.

ప్రార్దన కెర్తినచి రిసా యేసు బోదన కెర్తిన

20 యేసుచ సెస్సల్ జా జర్లు జలిసి దెక బమ్మ జా, “ఈంజ రూకు కిసి జా బేగి నుక్క గెలి గె?” మెన లట్టబంతికయ్,

21 యేసు, “తుమ్క అవ్ కిచ్చి కచితుమ్ సంగితసి మెలె, తుమ్ నంపజా ఎదిలి అన్మానుమ్ కి నే జతె నంపజలెగెన, ఈంజో చెట్టోక జర్లు జలి రితి తుమ్ కి వెల్లో కెమె కెర్తె. గని అన్నె, ఈంజ మొట్టక జలెకు

† 21:9 21:9 ‘రచ్చించువ కెర్లొసా’ మెన జేవ్ సంగిల, ఈంజ లోకుమ్చి రగుమ్చి రాజిమ్క ఏలువ కెర జోవయింక ఆక్రమించువ కెర్లన తెంతో జోవయింక ఈంజ లోకుమ్చి బాదల్ తెంతో రచ్చించువ కెరెదె మెన జేవ్ ప్రజెల్ ఒగ్గరెజిన్ ఉప్పచ. జోచి రాజిమ్ ముక్కిమ్క అత్తు రగుమ్చి జయెదె మెన అర్థుమ్ కెరంతె నాయ్. § 21:9 21:9 జోవయింది బాన తెన్ ‘జోబర, జోబర!’ మెలి అర్థుమ్ తెన్ ‘ఓనన్ను!’ మెన కేక్ గల్తె తిల. * 21:12 21:12 అర్థుతుమ్ దిత పిట్టల్ గట్ట గెనుక జలె, జోవయింక ఆక్రమించువ కెర్లి రోమ్ దేసిమ్చి ప్రజుతుమ్చి డబ్బుల్ దిలి నెంజె. జేక, జోవయింది డబ్బుల్ పల్లన, దేముడుచి గుడితె కామ్క జెతికయ్ రగుమ్ డబ్బుల్కయ్ పిట్టల్ గట్ట గెనుక, నెంజెలె డబ్బుల్ కి దేముడుచి గుడిక దెంక జయెదె. † 21:19 21:19 అంజూరుమ్ రూక్చి కాయల్ బొడ్డ పండ్లు రిత జప్పల. ‡ 21:19 21:19 రూకు చెంగిలొచె జలె, అక్సల్ దెర్లె పాది పండ్లు కి దెర తంక.

దెక, ఉట్టి, జా, నముద్దుమేతె గలి జా మెన సంగిలెగిన, దస్సి జర్గు జయెదె మెన తుమ్క నిజుమి ఆవ్ సంగితసి.

22 మెలె, తుమ్ ప్రార్దన కెర్తె పొది కిచ్చొ నజీతె గే, జా దొర్కు జలి మెన నంపజలెగిన, తుమ్ నజీలిసి నే పిట్టె తుమ్క దొర్కు జయెదె." మెన, యేసు సంగిలన్.

**వెల్లెల మాన్సుల్ యేసుక అన్నె పరిచ్చ కెర్ల
(మార్కు 11:27-33; లూకా 20:1-8)**

23 యేసు దేముడుచి గుడితె పావ కెర బోదన కెర్తె తతికయ్, వెల్లెల పూజర్లు చి అన్నె వెల్లెల మాన్సుల్ జోతె జా కెర, "తుయి కెర్తె కమె కెరుక, తుయి ఇన్నె బోదన కెరుక తుక కిచ్చొ అదికారుమ్ అస్సె? కొన్నె తుక అదికారుమ్ దిలన్?" మెన జోక పుసిల.

24 యేసు జోవయింక, "ఆవ్ కి తుమ్కయ్ ఏక్ కోడు పుసిందె. ఈంజ కోడుక తుమ్ జబాబ్ సంగిలెగిన, ఆవ్ కిచ్చొ అదికారుమ్క ఇసి కెర్తెసి గే, తుమ్క సంగిందె.

25 యోహాను బాప్తిసుమ్ దెతె తిలిన్చి అదికారుమ్ కేనె తెంతో చి? పరలోకుమ్ తెంతో చి గే, మాన్సు తెంతో చి గే?" మెన పుసిలన్. జలె, జేవ్ వెల్లెల మాన్సుల్ ఎక్కిలో తెన్ ఎక్కిలో బమ్మ తెన్ లట్టబన, 'పరలోకుమ్ తెంతో చి' మెన అమ్ సంగిలెగిన, ఈంజో 'దస్సి జలె, తుమ్ కిచ్చొక జోక నంప కెర్చు నాయ్?' మెన అమ్క సంగెదె.

26 గని, 'మాన్సు తెంతో చి' మెన అమ్ సంగిలెగిన, జనాబ్ కిచ్చొ మెనుల గే బితసుమ్. కిచ్చొక మెలె, యోహానుక 'దేముడుచి కబుర్ సంగిలోసా జయెదె' మెన ఎత్తిజన్ నంపజతతి మెన వెల్లెల మాన్సుల్ జోవయింక జెప్పొ ఉచరన, "అమ్ నేనుమ్" మెన జబాబ్ సంగిలె.

27 జేవ్ వెల్లెల మాన్సుల్ దస్సి సంగితికయ్, యేసు "జలె, కిచ్చొ అదికారుమ్తె ఆవ్ ఈంజేవ్ కమె ఆవ్ కెర్తెసి గే, తుమ్క సంగి నాయ్" మెన సంగిలన్.

దొగుల పుత్తర్లుచి రిసా సంగిలి టాలి

28 ఒత్తె తెంతో వెల్లెల మాన్సుల్క యేసు అన్నె ఇసి మెలన్. "ఏక్ టాలి ఉచర. ఏక్ మాన్సుక దొగుల పుత్తర్లు తిల. అబ్బిసి జో వెల్లొ పుత్తున్క 'ఓ పూత్తు, తుయి ఆజి గెచ్చ, అమ్చి ద్రాచ తోటతె కామ్ కెరు మెన' మెలన్.

29 జో పుత్తుసి 'నెసి' మెన జబాబ్ సంగిలో, గని వడ్డె తప్పు ఒప్పున దుకుమ్ జా బుద్ది ఆననా, జా కామ్తె గెలన్.

30 వడ్డె జో అబ్బిసి అన్నెక్ పుత్తున్తె జా కెర, తోలితోచొక సంగిలి రితి, ఇన్నెక కి సంగిలన్, చి 'గెచ్చిందె, బ' మెలన్. గని గెచ్చె నాయ్.

31 "జలె, ఈంజేవ్ దొగులతె కో అబ్బిన్చి కోడు రితి కెర్తెసా జయెదె?" మెన, యేసు జేవ్ వెల్లెల మాన్సుల్క పుసితికయ్, జేవ్ "తోలితోచొ" మెన సంగితికయ్, యేసు జోవయింక, "తుమ్క ఆవ్ కిచ్చొ కచితుమ్ సంగితసి మెలె, ఈంజ దేసిమ్చ తుమ్ నిస్కారుమ్ దెకిత సిస్సు నజీతన కి లంజె కముచ తేరబోదల్ కి తుమ్చి కంట సుల్ల తెన్ దేముడుచి రాజుమ్తె బెదుల.

32 కిచ్చొక మెలె, యోహాను సత్తిమ్ వాట్ ఇండ, సత్తిమ్ వాట్ దెకయ్తి రిసా తుమ్చితె అయ్లె కి, తుమ్ జోక నంపజసు నాయ్. గని, సిస్సు నజీతన కి లంజె కముచ కి జోక నంపజలె. జలె, జేవ్ నంపజా చెంగిల్ జలిసి తుమ్ దెకిలెకి, తుమ్ కెర్తె పాపల్క పిసారుమ్ జసు నాయ్, చి యోహానుచి కోడు నంపజసు నాయ్." మెన రుజ్జు సంగిలన్.

**ద్రాచ తోటచొ గుత్త మాన్సుల్చి టాలి
(మార్కు 12:1-12; లూకా 20:9-19)**

33 పిమ్మట్ యేసు, "అన్నెక్ టాలి సంగిందె. నూన, ఏక్ ఎజొమాని తిలన్. జో ద్రాచ తోట రోవడ కెర, జా తోట నుట్టునంత కోట గలవ కెర, ఒత్తె ద్రాచ రస్సుమ్ కడవనుక వెల్లొ పత్తురో కూనవ కెర, తోట రకితి గోపురుమ్ బందవ కెర, రకితనక నిసాన, జోవయింక జా తోట గుత్త దా కెర, వేర దేసిమ్ ఉట్ట గెలన్.

34 "పండ్లుచి పంటొ లాయ్తి నమయ్యమ్ జెతికయ్, జోచి వాట నజన్తి రిసా, తోట రకితనతె జోచ గెత్తి నుదల్క, జో ఎజొమాని తెర్తయ్లో."

35 గుత్త నజీలన, ఒత్త రక తిలన జో ఎజొమానిచ గొతి మాన్సుల్తె ఎక్కిలోక దెర పెట్ల, అన్నెక్కోక మార గెల, అన్నెక్కోక పత్తల్ గెల పెట్ల.

36 జేవ్ రకితన దస్సి కెర్తెయ్, జో ఎజొమాని అగ్గెచి కంట ఒగ్గరజన్ వేర గొత్తి సుదల్క తెద్రయ్లన్, గని జేవ్ తోట రకితన ఇన్నెయింక కి దస్సి అల్లర్ కెర్ల.

37 “పడ్డె, జో ఎజొమాని కిచ్చి కెర్లన్ మెలె, ‘అంచొ పూత్తుక తెద్రయ్లెగిన, జోక మరియాద దెకుల, కిచ్చొగ’ మెన, పుత్తున్క జేవ్ గర్చ రకితనతె తెద్రయ్లన్.

38 జేవ్ జో ఎజొమానిచొ పుత్తున్క దెక కెర, ‘ఇన్నెకయి అబ్బొన్చి దనుమ్ కలుగు జయెదె, అల్లె, ఇన్నెక మార కెర, ఇన్నెక జెతి దనుమ్ అమ్క కడనుమ.’ మెన ఉచర,

39 జోక దెర కెర, ద్రాచ తోట తెంతో బార్ కెర మార్ల.

40 జలె, జా తోటచొ ఎజొమాని అయెలె, గుత్త నజీలన, జేవ్ రకితనక కిచ్చొ కెరెదె?” మెన యేసు పుసెలన్.

41 జో ఎజొమాని, “జేవ్ గార్చ సుదల్క మార, పంటో లాయితె పొదిక జోచి వాట జోక నిదాసుమ్ తెన్ దెతు మెన, వేర మాన్సుల్క నిసాన, జోపయింకయి జా తోట రకుక గుత్త దెయెదె” మెన జబాబ్ దిల.

42 జలె, యేసు జోపయింక, “దేముడుచి కొడెతె రెగిడ్డిసి కెయ సదు కెర్చు నాయ్ గే?

‘గేర బందిత సుదల్ కామ్క నే జయె మెన పక్కయ్ పెలవ దిలి పత్తుర్ మెన ఉచర్లె కి, జోయ్యి పత్తురు బోడిపత్తురు జయెదె. ప్రబుయి సొంతయ్ ఇని జర్లు కెర్లె. జో ఇని కెర్లె రిసా, అమ్ దెకిలె ఆచారిమ్ జతయి!’

మెన రెగిడ్డి కోడు.

43 దేముడుచి రాజిమ్క దెకితి కామ్ తుమ్చితె తెంతో కడ కెర, జోచి రాజిమ్ తెన్ బెదితి పలితుమ్ దెర్ల పైజల్చి అత్తి దెయెదె మెన తుమ్క కచితుమ్ సంగితసి.

44 8: “పడ్డె, ఈజొ ముక్కిమ్ జలొ పత్తుర్చి ఉప్పిరి కో సేడుల, బద్దల్ జా గెచ్చుల, గని కచి ఉప్పిరి పత్తురు సెడెదె గే, జోక బీడవ గెలెదె” మెన యేసు సంగిలన్.

వెల్లెల మాన్సుల్ యేసుక దెరుక కోర్ప జలిసి

45 వెల్లెల పూజర్లు చి పరిసయ్యుల్ జో సంగిల టాలివొ నూన కెర, “అమ్చి రిసాయి సంగితయ్” మెన అర్దుమ్ కెరన,

46 యేసుక దెరుక మెన ఉచర్ల. గని జనాబ్ జోక దేముడు తెద్రయ్లొ కబుర్ సంగితొనా మెన ఉచర్లె రిసా, జోపయింక బియె కెర, జా పొది జోక దెరుక ముల దిల.

22

పెండ్లి విందు దిలో ఎక్కిలో రానొచి టాలి

(లూకా 14:15-24)

1 అన్నెక్ టాలి కెర, యేసు జేవ్ కోపుమ్ జల వెల్లెల మాన్సుల్క ఇని సంగిలన్

2 “పరలోకుమ్చి రాజిమ్తె బెదుక బుకార్లెసి కిసి మెలె, జోచొ పుత్తున్చి రిసా పెండ్లి విందు దిలో ఎక్కిలో రానొ కెర్లెన్చి రితి జయెదె.

3 జా పెండ్లి విందుతె బుకార్లెనక కడ ఆన్తి రిసా, జో రానొ జోచ గొత్తి సుదల్క తెద్రయ్లన్. గని, జేవ్ బుకార్లెన జెంక నెసిల.

4 జాకయ్, జో రానొ, ‘ఈందె, అంచి విందు తెయార్ కెర అస్సి. బెయిలల్క, బేడు జల సొమ్ముల్క కండ అస్సి. ఎత్తి తెయార్ కెర అస్సి. విందు కంక జా’ మెన బుకార్లెనక అన్నె నంగ’ మెన, వేర గొత్తి సుదల్క జో రానొ అన్నె నంగ తెద్రయ్లన్.

5 జేవ్ బుకార్లెన జో మాన్సు బుకార్లెనక మరియాద నే దెకితె, జోపయింతె ఎక్కిలో జోచి బుయింతె గెలొ, అన్నెక్కో జోచి బియ్యార్తె ఉట్ట గెలొ.

6 అన్న, సేన్ల సుదల్, జో రానొచ కబుర్ గెల గొత్తి సుదల్క దెర కెర, జోక నిస్సారుమ్ కెర, మార గెల.

7 జాచి రిసా, జో రానొ కోపుమ్ జా, జోచ జమాన్లుక తెద్రవ దా, జేవ్ అత్య కెర్లసక మొర్ది సిచ్చ దిలో, చి జోవయింది పట్టుమ్క ఆగి లంబడ డయవణ్ణో.

8 “తెదొడి జో రానొ గొత్తి సుదల్ ఇసి మెన సంగిలన్. ‘పెండ్లి విందు తెయార్ కెర అన్ని, గని బుకార్లన ఈంజ విందుతె జెంక తగువ జలన్ నెంజి.

9 జాచి రిసా, వీదుల్తె గెచ్చ కెర, తుమ్క డిస్తన ఎత్తిక పెండ్లి విందుతె జా మెన, తుమ్ బుకారా.’ మెన, జోచ గొత్తి సుదల్క జో రానొ తెద్రయలన్.

10 జేవ్ గొత్తి సుదల్ వీదుల్తె గెచ్చ కెర, ఒత్త డీసిల మాన్సుల్ ఎత్తిక విందుతె బుకారా అన్ల, చి జా పెండ్లి బడ్డెతె బెర్ల.

11 “పణ్ణో జో రానొ, ‘పెండ్లి బడ్డెతె వెసిలసక దెకిన్దె’ మెన, జా పెండ్లి బడ్డెచి తెడి జా కెర, ఒత్త పెండ్లి పాలల్ నే గలణ్ణో ఎక్కిలోక దెక కెర,

12 ‘ఓ *నేస్తమ్, తుయి పెండ్లి పాలల్ నెంజితె ఇన్నె కీసి అయ్లది?’ మెన, జో రానొ సంగితికయ్, జో మాన్సు బియఁ గెచ్చ, తుక్కె తిలన్.

13 తెదొడి రానొ, ‘ఇన్నెక చణ్ణో అత్తో బంద కెర, ఇన్నెక బయిలె అందర్చి కంట అందర్తె గల దాస. ఒత్త గెతన ఏడ ఏడ, దంతో చప్పిలై తవుల’ మెన, జోచ గొత్తి సుదల్క రానొ సంగిలన్.

14 పరలోకుమచి రాజిమతె బెదుక బుకార్లన ఒగ్గర్జిన్ గని నిసాన జలన తొక్కిజిన్ జవుల.” మెన సంగిలన్.

యేసుక కొడెతె అడ్డవుక మెన మాన్సుల్క జోతె తెద్రయ్లిసి

(మార్కు 12:13-17; లూకా 20:20-26)

15 తెదొడి పరిసయ్యుల్, కొడెతె యేసుక అడ్డవుక మెన,

16 హేరోదు పచ్చెన జతన తెన్ పరిసయ్యుల్ జోచ సొంత సిస్సుల్క కి యేసుతె తెద్రయ్తికయ్, జేవ్ యేసుక, “గురుబాబు, తుయి సత్తిమచొ మెన జానుమ్. మొకమాటుమ్ నే దెకితె, వెల్లెల మాన్సుల్ కిచ్చొ ఉచరుల గే నీ బితె, దేముడు దెకయ్లి వాట్చి రిసా సత్తిమ్ తెన్ బోదన కెర్చి మెన జానుమ్” మెన, పులయ్లి తితి సంగ, అన్న,

17 “జలె, రోమ్ దేసిమచొ కైసర్ రానొక అమ్ సిస్టు దెంక నాయిమ్ గే నాయ్ గే? తాయి కీసి ఉచర్చి? తుయి అమ్క సంగు” మెన, పరిసయ్యుల్ తెద్రయ్లన యేసుక పుసిల.

18 గని యేసు జోవయింది పెట్టిచి విస్సుమ్ జాన, “ఉప్రమెన్సుచొ మాన్సుల్, తుమ్. అంక కిచ్చొక పరిచ్చ కెర్లసు?

19 అల్లె, జా సిస్టు దెతి డబ్బుల్చి కాసు ఏక్ అంక దెకవ” మెన, జోవయింక సంగితికయ్, జేవ్ జోక ఏక్ వెండి కాసు దెకయ్ల.

20 యేసు “ఈందె, ఇన్నె కచి పోలిక, కచి నావ్ డిస్తయ్?” మెన జోవయింక పుసిలన్,

21 చి జేవ్, “కైసర్ రానొచి” మెంతికయ్, యేసు జోవయింక, “కైసర్క దెతిసి కైసర్క, దేముడుక దెతిసి దేముడుకయ్ దెంక అన్న” మెన, జోవయింక సంగిలన్.

22 జోచి కోడు నూన ఆచారిమ్ జా, జేవ్ వెల్లెల మాన్సుల్ తెద్రయ్ల మాన్సుల్ యేసుక ముల దా, ఉట్ట గెల.

సద్దాకయ్యులు యేసుక పరిచ్చ కెరుక అయ్లిసి

(మార్కు 12:18-27; లూకా 20:27-40)

23 “మొర గెలిగిన అన్నె జీవ్ జంక నెంజె, అన్నెక్ లోకుమతె గెచ్చుక నెంజె’ మెన ప్రెజల్క సికయ్త సద్దాకయ్యులు జా దీసి యేసుతె జా కెర,

24 “ఓ గురుబాబు,

* 22:12 22:12 మింత † 22:17 22:17 జా సిస్టు మెలె, రోమ్ దేసిమచి ప్రబుతుమచి సిస్టు.

ఎక్కిలో బోదల్ నెంజితె మొర గెలిగిన, జోచో బావోసి జో అన్నోసిచి తేర్చిక పెండ్లి జా, జోచో అన్నోసిచి నావ్ తెన్ బోదల్ పాయ దెంక అస్సె,
మెన, మోసే పూర్ణమచ సంగిలన్.

25 జలె, అమచి తెన్ సత్తుజన్ బావుడ్డు తిల. వెల్లో పెండ్లి జా మొర గెలన్. ఇన్నెక బోదల్ నెంజిలి రిసా, ఇన్నెచి వట్టి జెర్మిలో బావోసిక ఈంజ తేర్చి పెండ్లి కెరన్.

26 తొల్గుర్ తెంతో కర్పడచో ఎద, వర్ప తెన్ వెల్లోచి తేర్చిక దస్సి పెండ్లి జర్గు కెరన మొర గెల.

27 ఎత్తి మొర గెలి వడ్డి, ఈంజ తేరబోద కి మొర గెలి.

28 జలె, మొర గెలన అన్నె జివ్ జతె పొదిక, ఈంజేవ్ సత్తుజింతె కక్క ఈంజ తేర్చి జా తయెదె? ఈంజేవ్ సత్తుజన్ వర్ప తెన్ ఇన్నెక పెండ్లి జా తిల గెద?" మెన యేసుక పుసిల.

29 గని, యేసు జేవ్క, "తుమ్ దేముడుచి కొడె నేన అస్సున్. కిచ్చొక మెల, దేముడుచి కొడెతె రెగ్గయలి తుమ్ సదు కెర్తె కి, ఒత్త తిలిసి అద్దమ్ కెరన్పు నాయ్, చి జో దేముడు కెరయత కమొ దెకిలెకి, జోచి అదికారుమ్, సెక్కి, కెర్తి గే చినున్ నాయ్.

30 మెలె, మొర గెచ్చ అన్నె జివ్ జతెనతె, పెండ్లిచో నే జతె, మాస్సుల్ దూతలచి రితి దస్సి తవుల.

31 వడ్డి, 'మొర గెలన అన్నె జితి నాయ్' మెన ఉచర, తుమ్ అన్యూనుమ్ తెన్ అస్సున్. జలె, దేముడు తుమ్క సొంత సంగిలిసి సదు కెర్పు నాయ్ గె? మొర జిచ్చ జా ఉట్టితి రిసా, 'అవ్ అబ్రాహామ్క, ఇస్సాకుక చి యాకోబుక దేముడుయి',

మెన, దేముడు సంగిలి కోడు.

32 జలె, జేవ్ పూర్ణల్ మొర తిలి కి, జోవయింక జో దేముడు జా తా కామ్క జెతయ్ జలె, అన్నెక్ లోకుమ్తె గెచ్చ జివ్వి అస్సి మెన రుజ్జు జతయ్. రితి మొర గెలనక నాయ్, గని జివ్ తిలనకయ్ జో దేముడు." మెన, యేసు జేవ్ సద్దూకయ్యుల్క సంగిలన్.

33 ప్రెజల్, జలె, జో బోదన కెర్లిసిచి రిసా నూన కెర, ఆచారిమ్ జల.

**పరిసయ్యుల్ యేసుక అన్నె పరిచ్చ కెర్లిసి
(మార్కు 12:28-34; లూకా 10:25-28)**

34 'యేసు సద్దూకయ్యులు చి చోండి ముడ్డొ కెర దిలో' మెన పరిసయ్యుల్ నూన కెర, యేసుతె బెద అయ్ల,

35 చి జోవయింతె మోసే తెన్ దేముడు దిలి ఆగ్గుల్ సికడ్డొసా ఎక్కిలో యేసుక పరిచ్చ కెరుక మెన, ఏక్ కోడు పుసిలన్.

36 "గురుబాబు, ఒండి మోసే పూర్ణమచోచి అత్తి దేముడు దిలి *ఆగ్గుల్ తెన్ కేన్ ఆగ్గు తొలితోచి ముక్కిమ్చి?"

37 యేసు జోక,

"తుమ్చో ప్రబు జలో దేముడుక తుమ్చి ఒండి ఏపెట్టి తెన్, తుమ్చి ఒండి ఆత్మ తెన్, ఒండి మెస్సు తెన్ ఎక్కి ప్రేమ కెర్తె తంక.

38 ఎత్తి ఆగ్గుల్తె ఈంజ తొలితో చి, ముక్కిమ్చి.

39 అస్సె, 'తుమ్క తుమ్చి కెర్తి ప్రేమ కెరంతను గే, తుచి వక్క నుదొక కి తెర్తి ప్రేమ కెర్తె తంక' మెన, అన్నెక్ ఆగ్గు ముక్కిమ్.

40 మోసే పూర్ణమచోచి అత్తి దేముడు రెగ్గయల ఆగ్గుల్ ఎత్తిక కి, దేముడుచ కబుర్లు సంగిలన సంగుల ఎత్తి కోడు కి, ఈంజేవ్ దొస్సి ఆగ్గుల్ ఆదారుమ్ జా అస్సి" మెన, యేసు సంగిలన్.

41 పరిసయ్యుల్ ఎత్తి యేసుచి సుట్టనంత బెర తతికయ్, యేసు జోవయింక ఏక్ కోడ్ పుసిలన్.

42 "రచ్చించువ కెర్టొసా జతొ క్రిస్తుచి రిసా తుమ్ కిచ్చొ మెన ఉచర్చన? జో కచ్చొ పుత్తుసి జయెదె?" మెన పుసితికయ్, జేవ్ జోక, "దావిదు రానొచో పుత్తుసి, జోవయించి సెకుమ్చో" మెలన్.

† 22:36 22:36 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయలి ఆగ్గుల్ మెన అమ్ జానుమ్. ఈంజ కొడె ఎత్తి బైబిల్తె అగేచి పావ్ పుస్తకమ్తె రెగ్గయ్ జా అస్సె. ఈంజ దెకప్పక మెన కుమయ్ బాసతె నొయి ప్రమానుమ్తె మోసే పూర్ణమచోచి అత్తి రెగ్గి దేముడుచ ఆగ్గుల్ మెన రగ్గవ అస్సె. § 22:37 22:37 షేట్ తెన్

43 జేవ్ దస్సి సంగితికయ్, యేసు జోవయింక, “దస్సి జలె, క్రీస్తు దావీదుక పుత్తుసి జలెగిన, దేముడుచి సుద్ది తిలి ఆత్మ సికయ్తికయ్, దావీదు రాన్ కిచ్చొక క్రీస్తుక ‘ప్రబు’ మెన సంగిలన్. కిచ్చొ కోడుతె దస్సి సంగిలన్ మెలె;

44 ‘తువ విరోదుమ్ సుదల్క తుయి సుదితి రితి ఆవ్ కెరై ఎద, అంచి ఉజెతో వక్రయ్ తుయి పెన తా’ మెన, ప్రబు అంచొ ప్రబుక సంగిలన్.”

45 దస్సి దావీదు రాన్ క్రీస్తుక ‘ప్రబు’ మెన సంగితయ్ జలె, జో క్రీస్తు కీసి జా జోక పుత్తుసి జయెదె? ఉచర మెన యేసు జేవ్ వెల్లెల మాన్సుల్క సంగితికయ్,

46 కో కి అన్నెక్ కోడ్ సంగుక నెత్తిర్ల. అన్నె, జా దీసి తెంతో, జోవయింతె కో కి యేసుక ఎక్కి కోడు కి పుసుక దయిరిమ్ తిలె నాయ్.

23

ప్రెజల్క సిస్సుల్క యేసు జాగర్ల సంగిలిసి
(మార్కు 12:38-40; లూకా 11:37-52; 20:45-47)

1 తెదొడి యేసు జా దేముడుచి గుడితె బెర్ల ప్రెజల్క కి జోవ సిస్సుల్క కి ఇసి మెలన్.

2 “మోసి తెన్ దేముడు దిలి ఆగ్గుల్ సికడ్డన చి పరిసయ్యుల్ మోసి పూర్గుమ్చొచి పీటతె వెసిలి రితి జా ప్రెజల్క మోసి తెన్ దేముడు దిలి ఆగ్గుల్ సికడ్డక అదికారుమ్ అన్నె.

3 జాకయ్, జేవ్ తుమ్క సికయ్తిసి ఎత్తి, కెర, గని, జోవయించ కమె రితి తుమ్ కెర నాయ్. జేవ్, ఇసి కెర, దస్సి కెర, మెన సంగితిసి జేవ్ సొంత కెర్తి నాయ్.

4 పిమ్మట్, కూలి మాన్సుల్క సాపుకర్లు కీసి కంది వయితి జాడు వయడుల గే, దస్సి ఈంజేవ్ వెల్లెల మాన్సుల్, ఒగ్గర్ ఆగ్గుల్ రితి కెరుక అస్సె మెన, ప్రెజల్క జాడు వయడ్డి రితి కెర్తి. గని, జేవ్ వయడ్డ జాడ్డు రిత కమె సుల్కన కెర్తి రిసా జేవ్చి కిడి ఊంటి కి నే తెన్ జవున్ కదుల్వ కెర్తి నాయ్, ప్రెజల్క కన్నారుమ్ జతి నాయ్.

5 జోవయించ కమె కిచ్చొ బుద్ది తెన్ కెర్తి మెలె, అమ్ కెరంతి పున్మిమ్ మాన్సుల్ మెన్సుతు మెన, దేముడుచ ఆగ్గుల్ రెగ్ల రచ్చల్ రిత బంద, రూందు వెల్లొ కెర, నిర్దె బందంతతి, చి జోవయించ పాలల్చ జల్పల్ దీగు కెర్తి.

6 పడ్డొ, విందుల్తె ముక్కిమ్ టాన్సుక కోర్వ జతతి. అన్నె, జోవయించ సబ గెరలె కి ముక్కిమ్చ వెసిత పీటల్ కడన్తతి.

7 పడ్డొ సంతపిదులె, మాన్సుల్ ఎత్తి, అమ్క జోకర్లు మెన కోర్వ జతతి. పడ్డొ, మాన్సుల్ జోక ‘గురుబాబు’ మెన జోకరుక కి కోర్వ జతతి” మెన యేసు సంగిలన్.

యేసు సంగిలి బోదన

8 “తూమ్, జలె, తుమ్తె కక్క, ‘గురుబాబు’ మెన నాయ్. తుమ్క ఎక్కిలోయి తుమ్చొ గురుబాబు రితో జా అన్నె, చి తుమ్ ఎత్తిజన్ ఎక్కి జతి రిత బావుడ్డు జా అన్నెన్.

9 అన్నె, ఈంజ లోకుమ్తెచ కక్క కి ‘దేముడు జలొ అబ్బొ’ మెలి రితి నావ్ తియ నాయ్. కిచ్చొక మెలె, ఎక్కిలోయి తుమ్చొ అబ్బొసి జలొ దేముడు, పరలోకుమ్తె తిలొసా.

10 అన్నె, తుమ్తె కక్క ‘గురు’ మెనుక పొన. కిచ్చొక మెలె, తుమ్క క్రీస్తు ఎక్కిలోయి గురు జా అన్నె.

11 అన్నె, తుమ్చితె కో వెల్లొ జయెదె గే, జో తుమ్క గొత్తి సుదొ జా సేవ కెర్లు.

12 కో జోవయింక జెచ్చొ గవురుమ్ కెరంతి రితి జవుల గే, జేవ్ దాక్ జవుల, చి కో జోవయింక జెచ్చొ దాక కెరనుల గే, వెల్లెల్ జవుల” మెన యేసు సంగిలన్.

పరిసయ్యుల్క యేసు సంగిలి తీర్పు

13 పడ్డొ వెల్లెల మాన్సుల్క యేసు ఇసి మెన తీర్పు సంగిలన్. “అయ్యె! ఉప్రమెన్సుచొ పరిసయ్యుల్ చి మోసి తెన్ దేముడు దిలి ఆగ్గుల్ సికడ్డన, నాసెనుమ్ జస్సె! కిచ్చొక మెలె, మాన్సుల్చి మొక్కి తుమ్ పరలోకుమ్చి కెచ్చొ దొకితన. కిచ్చొక మెలె, తుమ్ జా రాజిమ్తె సొంత బెదున్ నాయ్, చి బెదుక ఇష్టుమ్ జలన బెదుక తుమ్ ఒప్పున్ నాయ్.

14 *అయ్యో! తుమ్ మోసి తెన్ దేముడు దిలి అగ్గుల్ సికడ్డన, పరిసయ్యుల్, నాసెనుమ్ జన్సె! తుమ్ రండెల్ మాన్సుల్ గరల్ విక కయ్లెకి, 'మాన్సుల్ అమ్చి బుద్ది చినుతు నాయ్' మెన మాన్సుల్చి మొక్కె దిగిల ప్రార్దనల్ కెర్తసు. జాకయ్ తుమ్చి పావుమ్ ఒగ్గర్, చి వెల్లె సిచ్చ జన్సె.

15 "అయ్యో! ఉప్రమెన్సుచొ పరిసయ్యుల్, మోసి తెన్ దేముడు దిలి అగ్గుల్ సికడ్డన, నాసెనుమ్ జన్సె! తుమ్ కక్క జలెకు తుమ్చి మొత్తుమ్తె బెదవంతి రిసా, సముద్దుమ్ బుయి దెకజెతసు, చి జో తుమ్చి తె బెదిలో మెలె, జోవయింది బుద్ది తుమ్చి బుద్దిచి కంట దొన్నె వాటల్ గార్ జతి రితి కెర్తసు, చి వెల్లె ఆగి గొయ్తె తుమ్ గెతె జలె, జో అన్నె దస్సి సిచ్చ జంక విలువ జయెదె.

16 "అయ్యో! తుమ్ గుడ్డి రిత జా, 'మాన్సుల్క చెంగిల్ వాట్ దెకడుమ్దె' మెన తుమ్క తుమ్ ఉపర్లె కి, చెంగిల్ వాట్ పిట్టయ్తన, తుమ్ నాసెనుమ్ జన్సె. తుమ్ సికడ్డిసి ఏక్ కిచ్చొ మెలె, ఎక్కిలో 'దేముడుచి గుడి తోడు' మెన ఒట్టు గలన్లె కిచ్చొ నెంజె, గని 'దేముడుచి గుడితె తిలి బజరి తోడు' మెన ఒట్టు గలన్లె, జో గలిలి ఒట్టు నెరవెర్పువ కెరనుక అస్సె మెన తుమ్ సంగితసు.

17 తుమ్ బుద్ది నెంజల గుడ్డి జల మాన్సుల్. దొన్నె తె కేన్ ముక్కిమ్? బజరి గే, బజర్క చెంగిల్ కెర్తి దేముడుచి గుడి గే?

18 "అన్నె, 'బలి దెతి టాన్ సాచి' మెన ఎక్కిలో ఒట్టు గలన్లె కిచ్చొ నెంజె, గని 'జాచి ఉప్పిరి తిలి అర్పితుమ్ సాచి' మెన ఒట్టు గలన్లె, జో మాన్సు గలిలి జా ఒట్టు నెరవెర్పువ కెరనుక అస్సె" తుమ్ మెంతసు.

19 తుమ్ గుడ్డి జల రిత మాన్సుల్, దొన్నె తె కేన్ ముక్కిమ్? అర్పితుమ్ గే, అర్పితుమ్క నుద్ది కెర్తి బలి దెతి టాన్ గే?

20 జలె, బలి దెతి టాన్ తోడు మెన కో ఒట్టు గలన తవుల గే, 'జేవచి ఉప్పిరి తిలిసి ఎత్తి సాచి' మెన ఒట్టు గలన్లె రితి జతయ్.

21 వడ్డి, 'ఈంజ దేముడుచి గుడి సాచి' మెన కో ఒట్టు గలన తవుల గే, దేముడు సాచి మెన ఒట్టు గలన్లె రితి జతయ్. జో ఒత్త జతయ్చి రిసా.

22 అన్నె, 'పరలోకుమ్ తోడు' మెన కో ఒట్టు గలన తవుల గే, 'దేముడుచి సిజాసనుమ్ తోడు' మెలి రితి జా, 'ఒత్త వెసెసా తోడు' మెలి రితి ఒట్టు గలన్లె రితి జతయ్.

23 "అయ్యో! ఉప్రమెన్సుచొ, మోసి తెన్ దేముడు దిలి అగ్గుల్ సికడ్డన చి పరిసయ్యుల్, తుమ్ నాసెనుమ్ జన్సె! తుమ్ పొచెర్ డొ రొడ్డెతె, చెరమల్లితె, జిల్లకరతె, దస్సుచతె దెస్సు వంతుల్ కెర, ఏక్ వంతు దేముడుక దెతసు, గని మోసి తెన్ దేముడు దిలి అగ్గుల్ తెచ ముక్కిమ్ జల నెలవ కొడొ పచ్చ అస్సును. కిచ్చొ కిచ్చొ నెలవ కొడొ రితి కెరుక ముల అస్సున మెలె, సత్తిమ్ తెన్ రుజ్జు కెర తీర్పు కెర్తిసి, కన్యారుమ్ జతిసి, చి దేముడుచి ఉప్పిరి నిదానుమ్ నముకుమ్ తితిసి. జోవయింది వంతు దస్సు వస్సువల్క దెంక తప్పు నాయ్, గని అన్నె ముక్కిమ్ జల నెలవ కొడొ రితి తుమ్ కెర్తరు జలె, తుమ్క చెంగిల్ తత్తి

24 గుడ్డి జల రిత వాట్ దెకయ్తన, తుమ్. పితిన్తె డోమ తిలి జాక వెంట గెల, ఒంటి తిలి కి నాయ్ మెన జాక గిడ్డి రితి జతసు.

25 "అయ్యో! ఉప్రమెన్సుచొ, మోసి తెన్ దేముడు దిలి అగ్గుల్ సికడ్డన చి పరిసయ్యుల్, నాసెనుమ్ జన్సె! గలన్లు గిన్నెలు ఉప్పిరి పక్క మంజితి రితి, చెంగిల్ వేసిమ్ గలంతి రితి జతసు, గని తుమ్చి వేట్ తెడి పక్క చొరు బుద్దిచి ఆన బెర అస్సె.

26 తుమ్ గుడ్డి రిత పరిసయ్యుల్, గలన చి గిన్నె తెడి సుబ్రుమ్ కెరుక కిసి ముక్కిమ్ తయెదె గే, దస్సి, తుమ్చి బుద్ది చెంగిల్ జలెగిన, నిజామి పున్నెమ్ రితి చెంగిల్ జంక జయెదె.

27 "అయ్యో! ఉప్రమెన్సుచొ, మోసి తెన్ దేముడు దిలి అగ్గుల్ సికడ్డన, పరిసయ్యుల్, తుమ్ నాసెనుమ్ జన్సె! తుమ్ చున్నుమ్ సరోయ్లి మెన్నుచి రితి అస్సెన. ఉప్పిరి చొక్కిల్ సూటి డిస్తయ్, గని తెడి మొర గెల మాన్సుల్చ అడ్డొ, కువ గెలి ముక్కల్ తయెదె.

* 23:14 23:14 గ్రీకు బాస తెన్ ఈంజ మత్తెలి రెగిడ్డ నగుమ్ పున్కల్తె 14 నంబర్చి కోడు తయె నాయ్.

28 దస్సి, తుమ్మక దెకిత మాన్సుల్క నీతిసుదల్చ రిత డీస్తసు, గని తుమ్చి ఆత్మ తెడి ఉప్రమెన్సు, మూర్కుమ్ బుద్ధి బెర అస్సె.

29 “అయ్యెం! ఉప్రమెన్సుచొ, మోసీ తెన్ దేముడు దిలి ఆగ్గుల్ సికడ్డన చి పరిసయ్యుల్, తుమ్ నాసెనుమ్ జన్సె! దేముడుచ కబుర్లు సంగిలసక తుమ్చ పూర్ణమచ మార్లి రిసా తుమ్క లాజుచి రిసా, జేవ్ నీతిసుదల్చి రిసా తుమ్ మెన్సున్లు బందవ, నూటి కెరవ,

30 ఆమ్ అమ్చ పూర్ణమచ తిల దీసలె జితమ్ జలె, దేముడుచి కబుర్ అన్లసక మార్లిన్తె ఆమ్ బెదితమ్ నాయ్” మెనన, నీతి సంగిత్రసు, తుమ్.

31 దస్సి మెనన, దేముడుచి కబుర్ అన్లసక మార్లసచ పుత్తర్లులు జా అన్సుమ్ మెన, తుమ్చి ఉప్పిరి తుమ్ సొచి లట్టబంతసు.

32 తుమ్చ పూర్ణమచ మొదొల్ తెంతొ కెర్లిసి తుమ్ పూర్లి నెరవెర్లుప కెర, జలె.

33 “పెట్టి అయిచి విన్సుమ్చ, తుమ్. విన్సుమ్చ అయిచొచి జట్టచ, వెల్లి ఆగి గొయ్తెచి సిచ్చ తుమ్ కీసి పిట్టవన్తె? పిట్టవనుక నెతుర్లు.

34 జాచి రిసా, దేముడుచి కబుర్ ఆన్తనక కి, బుద్ధి సుదల్చ కి, అంచి సుబుమ్ కబుర్ సికడ్డనక కి తుమ్చితె తెద్రయిందె. గని జోవయింతె సగుమ్జినక మార్కె, నిలవల్తె గలుల. అన్నె సగుమ్జినక తుమ్చ సబ గెరలె కొర్డల్ తెన్ పెట కెర, అల్లర్ కెర, ఏక్ పట్టుమ్ తెంతొ అన్నెక్ పట్టుమ్ ఎద, ఉదడ గెల్తె త్తె.

35 తుమ్ దస్సి కెర్లసుచి రిసా, మాన్సుల్చి అత్తి మొర గెల నీతిసుదల్ ఎత్తిజినచి లోయిచి పాపుమ్ తుమ్క లయెదె. నీతి జలో హేబెలుక మార్లి తెంతొ మొదొల్ కెర, దేముడుచి గుడిచి నెడిమి బలి దెతి టాన్ సొడి తుమ్చ అబ్బుదింసి మార్లి బరకీయచొ పుత్తన్ మెలో జెకర్కాచి లోయి ఎద,

36 జా పాపుమ్ ఎత్తి, ఈంజ కాలుమ్చ మాన్సుల్క లయెదె మెన, తుమ్క అవ్ కచితుమ్ సంగిత్రసి.

37 “ఓ యెరూసలేమ్చ, అమ్చి యెరూసలేమ్చ మాన్సుల్! అమ్ తెద్రయల కబుర్ అన్లసక, బోదన కెర్లసక పత్రల్ గల మార్లసు. కిచ్చొ ప్రమాదుమ్ నే లయితి రితి కుకిడి జాచి పిల్లల్క జాచి రెప్పల్ తెడి కీసి ముద్దొ కెరన తయెదె గే, అవ్ తుమ్క కెత్తిగే నుట్టు ముద్దొ కెరంతి రితి తుమ్క చెంగిల్ కెర్లయ్, గని తుమ్ నెసెలదు.

38 ఈందె, తుమ్చి గేర్ కో నెంజతె రితి తుమ్క తూమి ముల దెస్సె.

39 అప్పె తెంతొ మొదొల్ కెర, ప్రబచి నావ్ తెన్ జెతోసాక ‘జెయ్యె, జెయ్యె!’ మెన తుమ్ సంగుక దెర్తె ఎదక తుమ్ అంక దెకుక నెతుర్లు మెన, కచితుమ్ సంగిత్రసి” మెన, యేసు సంగిలన్.

24

దేవులమ్ పాడ్ జంక తిలిన్చి రిసా యేసు సంగిలిసి
(మార్కు 13:1-31; లూకా 21:5-33)

1 తెదొడి యేసు దేముడుచి గుడి తెంతొ బార్ జా ఉట్ట గెతె తతికయ్, జోచ సిన్సుల్, ‘ఈంజ దేముడుచి గుడి కెద్ది నూటి కెర అస్సి!’ మెన జోక దెకవుక అయ్ల.

2 జాచి రిసా యేసు జోవయింక, “ఈంజ ఎత్తి తుమ్ దెకితను, గని, తుమ్క అవ్ కిచ్చొ కచితుమ్ సంగిత్రసి మెలె, వత్తుర్చి ఉప్పిర్ పత్తుర్ దొత్తల్ అప్పె తిలె కి, ఎక్కి జలెకు నే టీచొ నే జతి దీసి జెయెదె” మెన, సంగిలన్.

3 పిమ్మట్, యేసు దేముడుచి గుడిచి మొక్కె తిలి ఒలివ మెట్టయ్ గెచ్చ వెసెతికయ్, అన్నె కో నెంతె సిన్సుల్ జోతె జా కెర, “తుయి సంగిలిసి కెయ్క జర్లు జయెదె? పిమ్మట్, తుయి ఈంజ లోకుమ్తె అన్నె జెతిసి కి, ఈంజ ఉగుమ్ మార్లసు జతిసి కి పాసి జెతయ్ మెన, అమ్ కీసి చినుక జయెదె?” మెన పుసెల.

4 జలె యేసు జోవయింక ఇసి మెలన్. “కో జలెకు తుమ్క మోసిమ్ నే కెర్లి రితి, తుమ్ జాగర్ల దెకన.

5 కిచ్చొక మెలె, ఒగ్గర్జిన మాన్సుల్, ‘అంచి నావ్ తెన్ జా కెర అచ్చొ క్రిస్తొ’ మెన సంగుక జలెకు, ఒగ్గర్జినక మోసిమ్ కెర, వేర బుద్ధి సికడల.*

* 24:5 24:5 కెయ్క మెలె, యేసు పరలోకుమ్తె వెగ గెచ్చ అన్నె నే జెతె అగ్గె.

6 పిమ్మట, 'యుద్ధము జతయ్' మొన జలెకు, 'యుద్ధము జెయెదె' మొన జలెకు, తుమ్ సూనతె. గని, బమ్మ నెంతె తా. ఇనచ ఎత్తి జర్గు జంక అస్సె, గని ఈంజ ఉగుమ్ తెద్ది బేగి పూర్తి జయె నాయ్.

7 పిమ్మట, దేసిమచి ఉప్పిర్ దేసిమ, రాజిమచి ఉప్పిర్ రాజిమ యుద్ధముక టీవో జవుల. అస్సె, వేర వేర దేసిమలుతె కరులు కి బూకంపల్ కి జర్గు జవుల.

8 అంచి రాజిమ ఏలుచ కెర్తి ఉగుమ్క జెర్మయతి అగ్గె జెతి నల్ల నొప్పుల్ రితి జా, ఇనచ మొదోల్ జవుల.

9 "దస్సి జర్గు జతి పొదిక, ప్రజల్ తుమ్క సైమల్ కెర్తి రిసా అదికాయల్తె సార్పు కెర మొరవుల. అంచి నావచి రిసా, దేసిమలు ఎత్తితె తుమ్క విరోదుమ్ కెరుల.

10 దస్సి జర్గు జతిన్చి రిసా, ఒగ్గర్జిన్ బమ్మ జా అంక ముల దా, ఎక్కిలోక ఎక్కిలో మోసిమ్ కెర అదికాయల్చి అత్తి దెరప దెవుల, చి ఎక్కిలోక ఎక్కిలో విరోదుమ్ జవుల.

11 "జేవ్ దీసల్క, ఒగ్గర్జిన్ మాన్సుల్ 'దేముడుచి కబుర్ సంగితోసా అవ్' మొనన, తుమ్చితె జా కెర, వేర బుద్ది సికడ, ఒగ్గర్జిన్క అంక ములప దెవుల.

12 అస్సె, 'పావుమ్ కెర్తిసి ఒగ్గర్ జా గెతయ్' మొన, ఒగ్గర్జిన్తె ఎక్కిలోక ఎక్కిలో ప్రేమ కెర్తిసి పిట్ట గెచ్చెదె.

13 దస్సి జలెకి, ఆకర్ ఎద నముకుమ్ తెన్ తా, కో ఓర్పువ జవుల గే, జెవ్వె రచ్చించువ జవుల.

14 " 'ఒండి లోకుమ్చ ప్రజల్ ఈంజ సాచి సూన తత్తు' మొన, ఈంజ లోకుమ్ ఎత్తిక వరలోకుమ్చి రాజిమచి రిసాచి ఈంజ అంచి సుబుమ్ కబుర్ సూనయింది. ఎత్తితె సూనయలెకయ్ ఆకర్ దీసి జెయెదె" మొన యేసు సంగిలన్.

యెరూసలేమ్ పట్టుమ్ పాడ్ జంక తిలిన్చి రిసా యేసు సంగిలిసి

15 "జాకయ్, †పిమ్మటక, 'జర్గు జయెదె' మొన దానియేలు పూర్గుమ్చోచి అత్తి రెగ్గయిల్ కోడు తిలిసి, మెలె, దేముడుక విరోదుమ్ జా జోక బల్ దూసుప కెర నానిసుమ్ కెర్తి దేముడుచి గుడితె టీవో జంక, తుమ్ దెకితె, ఇన్చిచి అర్దుమ్ కిచ్చి మెలె, ఈంజ నదు కెర్తన తుమ్ చెంగిల్ ఉచరన, జలె, జా గుర్తు తుమ్ దెకితె,

16 యూదయ ప్రదేసిమతెచ మాన్సుల్ చట్కున డెంగ్రెలె ఉట్ట నిగుతు.

17 జా జర్గు జతిసి తుమ్ దెకితె, కేన్ మిద్దెచి ఉప్పిర్ తిలో నుదె, ఉత్త కెర, జోచి గెరి తెంతో కిచ్చి జలెకు వెంట నెంక ఉత్త జెంక నాయ్.

18 వెడయ్ తిలో నుదె, కామచి రిసా కడ్ల జోచ సొక్కల్ జవున్ వెంట నెంక ప్స జెంక నాయ్.

19 "అయ్యో! జేవ్ దీసల్క వయ తిల తేరబోదల్, బోదల్ వడ్డివో ఉట్ట నిగుక నెత్త ఒగ్గర్ సైమల్ జవుల.

20 'చల్లి పొది జవున్, ‡నెలవ్ కడ్ల దీసి జవున్ అమ్క ఈంజ ఉట్ట నిగితి సైమ జెవున్ నాయ్' మొన, తుమ్ ప్రార్తన కెర.

21 కిచ్చొక మెలె, లోకుమ్ జెర్మన్ జలి తెంతో అప్పె ఎదక, దస్సి సైమ కెయ్యుక కి కలుగు జయె నాయ్, చి తెద్ది సైమ కెయ్యుక కి అస్సె జయె నాయ్.

22 జాచి రిసా, తొక్కి దీసల్క దన సైమల్ జతి రితి ప్రమె సెలవ్ దెతో నాయ్ జలె, కో కి రచ్చించువ జంక నెత్త. గని, నంవజతి రిసా రచ్చనక నిసాన జలన పాడ్ నే జతి రిసాయి, జేవ్ సైమల్ తొక్కి దీసల్ తతి సెలవ్ అస్సె.

యేసు అస్సె జెతిసి కీసి తయెదె గే జొయ్యి సంగిలిసి

23 "జా కాలుమ్క, 'ఈందె, క్రీస్తు!', 'ఓదె క్రీస్తు' మొన కో జలెకు తుమ్క సంగిలెగిన, తుమ్ నంప కెర నాయ్.

† 24:15 24:15 యేసు జెర్మ డబ్బయ్-70-వెర్షల్ గెలి వడ్డె ఈంజ నస్తుమ్ జర్గు జలి. మెలె, యేసు వరలోకుమతె గెచ్చ అస్సె విస్కక్ నత్తు-27-వెర్షల్ గెలికయ్. ‡ 24:20 24:20 ఎత్తి సెన్గర్ యూదుల్క బక్తి కెర్తి సెలవ్ కడ దీసి జయెదె. జా దీసి జోవయంప నబ గెరెల గెచ్చ, దేముడుచి కోణో నూన కెర, ఎత్తి అదికాయమ్ తిలో దేముడుక బక్తి కెరుల. జోక 'యెహోష' మొన నాన్ తయెదె. జా దీసి 'కిచ్చొ కామ కెర నాయ్' మొన జో ఎత్తి అదికాయమ్ తిలో దేముడుక సంగిలిన్క యూదుల్చ వల్లెల మాన్సుల్ ప్రజల్క జాడు వయడ్లి రితి కెర కామ నే కెర్తిచి రిసా ఒగ్గర్ ఆగ్రల్ అవ్వి ఉచర అస్సె. ఇస్సె, దొస్సి ఎన్ములు కోణ్ణిన్క 'కామ' మొన నింద కెర్తితి.

24 కిచ్చొక మెలె, అబద్ధుమచ జా కెర, 'ఆవ్ క్రీస్తు' మెనన జలెకు 'ఆవ్ దేముడుచి కబుర్ ఆన్ తొసా' మెనన జలెకు, రచ్చునక సొనాన్లనక మోసిమ్ కెర జోవయించి నముకుమ్ పిట్టవుక మెన ఉచర, వెల్లెల మాయకమొ కెరుల.

25 ఈందె, ఈంజ నే జతె అగ్గె తుమ్క ఆవ్ సంగితసి.

26 జాకయ్, కో జలెకు, 'ఈందె, క్రీస్తు జా బయిలె అస్సె' మెన సంగిలె జప్పన్, తుమ్ ఒత్త గెచ్చ నాయ్. నెంజిలె, 'ఈందె, గేర్ తెడి మూలయి పెన అస్సె' మెన సంగిలె జప్పన్, నంప కెర నాయ్.

27 కిచ్చొక మెలె, బిజిలి తూర్పు పక్క మొల్క, పడమర పక్క గెతె ఎదక కీసి ఉజిడి జతయ్ గే, దస్సి కి ఆవ్ మాన్సు జా జెర్మన్ అయ్లోసా అన్నె జెతె పొదిక, దస్సి, కేన్ పక్క కి డీసిందె.

28 పీనుమ్ కేనె తయెదె గే, ఒత్త గిర్దుల్ బెరుల.

29 "ఆవ్ సంగిలి జా వెల్లి సైమచి దీనల్ కేడ్డె, బేగి పొద్దు అందర్ జయెదె. జోస్ కి ఉజిడి దెయె నాయ్. ఆగాసుమ్ తెంతో నుక్కల్ గెసురుల, ఆగాసుమ్తె ఎత్తి అద్దర్ జయెదె.

30 తెదొడక ఆవ్ మాన్సు జా జెర్మన్ అయ్లోసా జెతిన్క గుర్తు ఆగాసుమ్తె డీసిందె. సొస్టుమ్ డీసిందె, చి ఆవ్ మాన్సు జా జెర్మన్ అయ్లోసా ఆగాసుమ్చ మబ్బుల్తె ఉత్త, అంచి అదికారుమ్ అంచి పరలోకుమ్చి ఉజిడి తెన్ జెతిసి బూలోకుమ్ తిలి ఎత్తి ప్రెజల్చ మాన్సుల్ ఎత్తిజన్ దెక, జేవ్ కెర్ల పాపల్చి రిసా దుకుమ్ కెరనుల.

31 తెదొడక సప్పిర్ గట్టిజ బజవ, అంచ దూతల్క తెద్రయిందె, చి చెత్తర్ పక్కల్ తెంతో ఆవ్ నిసాన అంక నంపజల మాన్సుల్క జేవ్ ఎక్కితె కుడవుల.

32 "అంజూరుమ్ రూకుక టాలె కెర అర్దుమ్ కెరన. మెలె, దసా రూక్చ కొమ్మల్ కొవ్వి జా వలొయ్లె, 'వేసెగు అప్పె పాచ జయెదె' మెన, తుమ్ చినితె.

33 దస్సి, ఆవ్ సంగిలె గుర్తుల్ తుమ్ దెకిలె, జా గుమ్ముమె పాచిల్ రితి జా అన్నె జెతికయ్ నమయుమ్ పాసి జా అన్నె మెన తుమ్ జాన్తె.

34 ఆవ్ సంగిలె సైమల్, గుర్తుల్ పూర్తి జలెకయ్ ఈంజ ఉగుమ్ అంతుమ్ జయెదె మెన తుమ్క ఆవ్ కచితుమ్ సంగితసి.

35 జలె, ఆగాసుమ్ బుయి నాసెనుమ్ జా గెచ్చుల, గని అంచ కొడొ ఎద్దె పిట్టితి నాయ్.

కో నేన్లి పొదిక అన్నె జెయిందె మెన యేసు సంగిలిసి

36 "జలె, కేన్ దీసిక ఈంజ లోకుమ్తె అన్నె జెయిందె గే, జా దీన్, జా గడియ కెయెక జెయెదె గే, మెన దేముడు అబ్బొక పిట్టవ కేన్ మాన్సు జలెకు, పరలోకుమ్చ దూతల్ జలెకు, దేముడు అబ్బొచొ పుత్తుసి జలెకు, కోయి నేనుమ్.

37 నోవహు పూర్ణుమచొ తిలి పొది ఎత్తి కిసి తిలి గే, దస్సి ఆవ్ మాన్సు జా జెర్మన్ అయ్లోసా అన్నె జెతె పొదిక దస్సి తయెదె.

38 మెలె, నోవహు తిలి పొది, దేముడు సంగిలే కి, జా దీనల్తె తిల మాన్సుల్ నంప కెర్ల నాయ్, చి జా వర్లల్చి పాని పెటుక దెర్లి పొది కి, నోవహుచి కుటుంబుమ్ వెల్లి ఒడతె పెన కెప్పె డంకిలి ఎద, అన్నె కో కితె తా, పితె తా, వెండ్లివొ కెర్లె తా, కిచ్చొ నే జతి రితి బుల్లె తిల.

39 జా వర్లల్ పాని గెడ్డువ జతిసి నిజుమ్ జర్లు జంక తిలి మెన నంప నే కెరంతికయ్, జా జర్లు జతికయ్, జేవ్ ఎత్తిజన్క బూరుమ్ గుడ్డ నిలి, చి డుజ గెల. దస్సి, ఆవ్ మాన్సు జా జెర్మన్ అయ్లోసా అన్నె ఉత్త జెతిసి తెన్ కి, ఒగ్గర్జన్ మాన్సుల్ అంక నే నూన్తె, జోవయంక ఇస్టుమ్ అయ్లి రితి కెర్లె తవుల, చి తెదొడక నాసెనుమ్ జాఁ గెచ్చుల.

40 "జా కాలుమ్క, దొగుల బట్టి తిలి, ఎక్కిలోక ముల దా, అన్నెక్కోక కడ నెవుల.

41 దొగుల తేర్బోదల్ తిర్వేల్ తెన్ రొడ్డె తిలె, ఎక్కిక ముల దా, అన్నెక్కిక కడ నెవుల.

42 "జలె, కేన్ నమయుమ్క తుమ్చొ ప్రబు ఆవ్ అన్నె జెయిందె గే, తుమ్ నేన్సు. జాచి రిసా, తుమ్ తెలివి తా, అంక రకితె తా.

43 గన ఏక టాలి అర్దుమ్ కెరన. 'కేన్ సమయుమ్క చోరు జెయెదె గే, గేర్చో ఎజోమాని కో జలెకు జాన్తో జలె, జో జా సమయుమ్క చెద్దొయి తా, రకితె తా, జోచో గెరి చోరు నే పెసితి రితి దెకన్తో' మెలి కోడుక తుమ్ అర్దుమ్ కెరన.

44 మెలె, తుమ్ నే ఉచర్చి సమయుమ్క ఆవ్ మాన్సు జా జెర్మున్ అయ్లోసా అన్నె జెయింది. జాచి రిసా, తుమ్ తెయార్ జా, తెలివి తెన్ రకితె తా.

45 "జలె, ప్రయాసుమ్ గెచ్చుక మెన ఎజోమాని బార్ జంక జలె, జోచ గేర్చక దెక సమయుమ్క అన్నిమ్ దెంక మెన జో నిసాన్లొ బుద్ది తిలో నిదాసుమ్చో గొత్తి సుదో కో జవుల?

46 జో ఎజోమాని అన్నె ఉట్ట అయ్లె, జో గొత్తి సుదో జో ఎజోమాని తియార్లొ కామ్ కెర్తె తిలె, జోక చెంగిలి.

47 దస్సి నిదాసుమ్ కెర్తె తిలో మెలె, జో ఎజోమాని అయ్లె, జోచి అస్తి ఎత్తిచి ఉప్పిరి జో గొత్తి సుదోక అదికారుమ్ దెయెదె, తుమ్క ఆవ్ కిచ్చొ కచితుమ్ సంగితసి.

48 "జో గొత్తి సుదో గార్ సుదో జలె, 'ఎజోమాని అల్నిమ్ కెర్తయ్' మెన ఉచర,

49 జోచి తెన్ తిలె గొత్తి సుదల్క పెటుక ముదోల్ కెర, సూర్ పిత మాన్సుల్ తెన్ బెద, జేవ్ కతిసి పితిన్తె బెద దస్సె అలవాట్లు సికెదె.

50 'ఎజోమాని ఆజె జెయె నాయ్' మెన గొత్తి సుదో ఉచర, నే రకితె దీసిక గడియక జో ఎజోమాని ఉట్ట అయ్లె,

51 జోక మొర్తి సిచ్చు తియడ కెర, ఉప్రమెన్సుచ మాన్సుల్ సిచ్చు జతిన్తె గలెదె. ఒత్త గతన సిచ్చుక ఏడ్తె తవుల, దంతో చప్పిల్తె తవుల.

25

తెలివి తా ఆవ్ అన్నె జెతిన్క రకితె తా

1 "పరలోకుమ్చి రాజిమ్చి ఉజెడి తెన్ ఆవ్ అన్నె జెతిన్క రకితిసి కిసి జయెదె మెలె, పెండ్లి ఉబేడోక దస్సుల్ జంక మెన, దెస్సుజిన్ ఉబెడివో దివ్వో దెరన బార్ జలిన్చి రితి జయెదె.

2 జోవయింతె బుద్ది నెంజిలన పాచేజిన్, చి బుద్ది తిలన పాచేజిన్ తిల.

3 బుద్ది నెంజిలన జోవయించ దివ్వో దెరన, తేల్ నే దెర్తె గెల.

4 గని బుద్ది తిలన, మాత్రుమ్, జోవయించ దివ్వో కి, అన్నె సుచితి తేల్ కి దెరన గెల.

5 "పెండ్లిఉబేడో అల్నిమ్ కెర్తయ్, జేవ్ దెస్సుజిన్ గూన్క జుమ నిజల.

6 సాక్కుక, ఈందె, పెండ్లిఉబేడో జెతయ్. జోక దస్సుల్ జంక బార్ జా" మెన, బారికి కేకుల్ గల్లికయ్,

7 జేవ్ దెస్సుజిన్ ఉబెడివో ఎత్తిజిన్ సూన కెర, ఉట్ట, జోవయించ దివ్వోచ వాటివో చెంగిల్ కెరన,

8 జోవయింతె జేవ్ పాచేజిన్ బుద్ది నెంజిలన, అమ్చ దివ్వో విజ గెతతి. తుమ్చి తేల్ సగుమ్ అమ్క దా మెన, బుద్ది తిల తెయార్ జలనక సంగిలి

9 జేవ్ తెలివి జా తిలన అమ్తె తిలిసి అమ్క తుమ్క పాచె నాయ్. సాపుకర్లుతె తుమ్ గెచ్చు, తుమ్చి రిసా గెనన మెన సంగిలి.

10 "జలె, సమయుమ్క బుద్ది నెంజిలన తేల్ గెనుక గెతె తతికయ్, పెండ్లిఉబేడో పాచ అయ్లన్, చి తెయార్ జా తిలన జోవయింతెన్ బెద పెండ్లి గెరి పెన, విందుతె వెసిల. తెదోడి, విందు దెతొసా కెప్పి ఉంక దిలో.

11 ఉంక దిలి పిమ్మట్, బుద్ది నెంజిల ఉబెడివో ఒత్త జా కెర, 'బాబు, బాబు, అమ్క కెప్పి ఉగుడ దే' మెన సంగిల.

12 జో ఎజోమాని జోవయింక, 'ఆవ్ తుమ్క నేని మెన తుమ్క నిజిమ్ ఆవ్ సంగితసి' మెన సంగెదె.

13 జలె, ఆవ్ ఉట్ట గెలె, కేన్ దీసిక కేన్ గంటక అన్నె జెయింది గే, తుమ్ నేన్సు, చి రిసా తెలివి తా రకితె తా.

తలాంతుల్ దొర్కు కెరన్ల తీగ్గచి టాలి

(లూకా 19:11-27)

14 "ఏక్ మాన్సు ప్రయాసుమ్ గెచ్చుక తిలి రిసా, జోచ గొత్తి సుదల్క బుకారా కెర, 'చెంగిల్ రకుతు' మెన జోచి అస్తి ఎత్తి జోవయించి అత్తి సార్చు కెర దిలన్.

15 ఎక్కిలోక పాంచ్ తాలంతుల్, ఎక్కిలోక దొన్ని తాలంతుల్, ఎక్కిలోక ఎక్కి *తాలంతు, దస్సి. కక్క జేవ్ వాడిక కెర్రి సెక్కిది ఎదిలి వంట దా కెర, బార్ జా, ఉట్ట గెలన్.

16 జలె, జేవ్ గొత్తిమాన్సుల్తె పాంచ్ తాలంతుల్ కడన్లొసా గెచ్చ, జేవ్ తెన్ బియ్యార్ కెర, అన్నె పాంచ్ తాలంతుల్ లాబుమ్ కెరన బెదయ్లన్.

17 దస్సి, దొన్ని తాలంతుల్ కడన్లొసా అన్నె దొన్ని తాలంతుల్ లాబుమ్ కెరన బెదయ్లన్.

18 జలె, ఏక తాలంతు కడన్లొసా గెచ్చ, బుయి కూన కెర, జోవొ ఎజోమాని దిలి దనుమ్ లుంకడ దిలన్.

19 “ఒగ్గర్ దీనల్ గెలి పిమ్మట్, జేవ్ గొత్తి సుదల్చొ ఎజోమాని అన్నె జా కెర, జోవయింక దిలి జోచి డబ్బుల్ లెక్క కెర నజనుక మెన, జోవయింక బుక్కొ.

20 తెదొడి, పాంచ్ తాలంతుల్ కడన్లొసా పుర్రి జా కెర, బాబు తుయి పాంచ్ తాలంతుల్ అంక దిలది, చి ఈంధె, ఆవ్ అన్నె పాంచ్ తాలంతుల్ బెదయ్లయ్” మెన, జా డబ్బుల్ ఎత్తి, ఆన దెకయ్లన్.

21 జలె, జా ఎజోమాని జోక, “తుయి నిదానుమ్ తిలో చెంగిలో గొత్తి సుదొ, ఈంజ ఇదిల్ తుక దిలయ్, గని తుచొ ఎజోమానిది రిసా నిదానుమ్ తెన్ లాబుమ్ కెర్లది చి రిసా, ఇన్నెది కంట ఒగ్గర్ ఆస్తిచి ఉప్పిరి తుక అదికారుమ్ దెయిందె. తుచొ ఎజోమానిది సంతోసుమ్తె తుయి బెదు” మెన జోక సంగిలన్.

22 “దస్సి, దొన్ని తాలంతుల్ కడన్లొసా కి పుర్రి జా కెర, ‘బాబు, తుయి అంక దొన్ని తాలంతుల్ దిలది, చి ఈంధె ఆవ్ దొన్ని తాలంతుల్ లాబుమ్ బెదయ్లయ్” మెన సంగితకయ్,

23 జోచొ ఎజోమాని, ‘నిదానుమ్ తిలో చెంగిలో గొత్తి సుదొ, తుయి. ఈంజ ఇదిల్ తెన్ అంచి కామ్ నిదానుమ్ కెర్లది. అప్పు ఒగ్గర్చి ఉప్పిరి కి తుక అదికారుమ్ దెయిందె. తుచొ ఎజోమానిచి సంతోసుమ్తె తుయి బెదు” మెన జోక సంగిలన్.

24 “పిమ్మట్, ఎక్కి తాలంతు కడన్లొసా జా కెర, బాబు, తుయి ‘కన్యారుమ్ నెంజిలోసా’ మెన, ‘తుయి నే ఉంపిలి పంటొ, లాయితోసా’ మెన, ‘తుయి నే పూన్సి కుడవంతొసా’ మెన, ఆవ్ జాని.

25 జాచి రిసా, ఆవ్ తుక బియ్యం కెర, తుయి దిలి తాలంతు జాగర్ల తెన్ బుయ్యె రోవ దిలయ్, చి జెతికయ్, ఉట్టవ ఆన్లయ్. ఈంధె, కడను” మెన సంగిలన్.

26 గని, జోచొ ఎజోమాని జోక, “గర్చొచొ బద్దుకుమ్చొ గొత్తి సుదొ తుయి. ఆవ్ నే ఉంపిలిన్తె లాయితోసా మెన, నే పూన్సి కుడవంతొసా మెన తుయి జాన్లది?

27 జలె అంచి డబ్బుల్ కేన్ జవున సావుకారితె తుయి దా తత్తది జలె, ఆవ్ అయిలె అంచి డబ్బుల్ వడ్డి తెన్ నజన్తయ్” మెన, జో గొత్తి సుదొక గేల కెర,

28 జా తాలంతు జో గొత్తి సుదొ తెంతొ నజన, దెస్సు తాలంతుల్ తిలోసాక దేను.

29 ఇదిల్ జవున్ తిలోసాక అన్నె దెంక జయెదె, గని నెంజిలోసాతె తెంతొ జోక తిలిసి కి కడ గెలుక జయెదె.

30 జో కామ్క నెంజిలో గొత్తి సుదొక అందర్చి కంట రితి అందర్తె బయిలె గల దాన. ఒత్త గెలన జా సిచ్చక ఏడ ఏడ, దంతొ చప్పిల్తె తవుల మెన, ఎజోమాని ఆత్త దిలన్.

మెండల్ అన్నె గొర్లెల్

31 “ఆవ్ మాన్సు జా జెర్చున్ అయ్లోసా, అంచ దేముడుచి దూతల్ తెన్ పరలోకుమ్చి ఉజడి తెన్ అన్నె జెతె పొదిక, అంచి ఒత్తచి ఉజడిచి సింగాసనుమ్తె వెనిందె.

32 మంద రకితోసా, మంద ఎత్తి, ఎక్కితె కుడవన, కీసి మెండల్ తెంతొ గొర్లెల్క వేర కెరెదె గే, తెదొడక ఆవ్ అన్నె జెతె పొదిక దేసిమ్లు ఎత్తితెవ పైజల్ ఎత్తిజిన్క అంచి మొక్కె కుడవన కెర, నంపజలన తెంతొ నంపనెంజలనక వేర కెరెదె.

33 అంచి ఉజెతో పక్క మెండల్ రిత నంపజలనక, డెబ్బి పక్క గొర్లెల్ రిత నంపనెంజలనక టీవొ కెరెదె.

34 “ఒత్త తెంతొ, ఆవ్ పరలోకుమ్చొ రానొ, అంచి ఉజెతో పక్క తిలనక కిచ్చొ మెనిందె మెలె, అంచొ అబ్బొ రచ్చన వరుమ్ దిలన, తూమ్. బూలోకుమ్ జెర్చయ్లి పొది తెంతొ తుమ్చి రిసా తెయార్ కెర్రి రాజెమ్తె తుమ్చి వాట తూమ్ నజన.

35 కిచ్చొక మెలె, అంక చూ కెర్రికయ్, తుమ్ అంక అన్నిమ్ దిలదు, అంక తాన్ కెర్రికయ్, తుమ్ పాని దిలదు. వేర దేసిమ్చొ జా తిలయ్, గని అంక తుమ్చితె బెదవన్లదు.

* 25:15 25:15 తాలంతు మెలి బజర కాసు. దేనార కాసు మెలి ఎక్కి దీనిక కూలి. ఎక్కి తాలంతు, 6000 దేనార.

36 అంక సరిపుచువ జత పాలల్ నెంజితికయ్, అంక పాలల్ దిలదు. జొర్జొ తెన్ తతికయ్, అంక దెకుక అయ్లదు. జేల్తె తతికయ్, ఒత్త అంక దయిరిమ్ కెరుక అయ్లదు” మెన, సంగిందె.

37 “జా కోడు నూన్లె, పున్నిమ్ మెన జో తీర్పు సంగిలస కిచ్చొ మెనుల మెలె, ప్రబు, తుయి కెయ్యు చూ జలిసి దెకిలమ్ చి అన్నిమ్ దిలమ్? తుక కెయ్యు తాన్ కెర్లిసి దెకిలమ్ చి పాని దిలమ్?

38 తుయి కెయ్యు వేర దేసిమ్ తెంతొ అయ్లిసి దెకిలమ్ చి అమ్చి తెన్ బెదవన్లమ్? కెయ్యు తుక పాలల్ నెంజిలిసి దెకిలమ్ చి పాలల్ దిలమ్?

39 తుక జొర్జొ తిలిసి, తుయి జేల్తె తిలిసి కెయ్యు దెకిలమ్, చి దయిరిమ్ కెరుక గెలమ్? కెయ్యు నాయ్, కిచ్చొగె” మెన సంగుల, జేవ్, పున్నిమ్ జలస.

40 జేవ్ దన్ను సంగిలె, రానొ జోవయింక కిచ్చొ మెనిందె మెలె, తుమ్క అవ్ కిచ్చొ కచితుమ్ సంగితసి మెలె, అంచ బాపుడ్లు జల ఈంజేవ్ అంచ మాన్సుల్క తుమ్ మరియాద కెర్లిసి, అంక కి మరియాద కెర్లి రితి జలి మెనిందె.

41 “పడ్డొ, జా దీసిక అంచి డెబ్లి పక్క, తిలసక కిచ్చొ మెనిందె మెలె, గర్పు, తూమ్, గెచ్చు! నయ్తానుక చి జోచ దూతల్క గల్లి రిసా తెయార కెర్లి నే విజతి అగితె తుమ్ సేడ!

42 కిచ్చొక మెలె, అంక చూ కెర్లి పొది తుమ్ అంక అన్నిమ్ దిలదు నాయ్. అంక తాన్ కెర్లికయ్, పాని దిలదు నాయ్.

43 వేర దేసిమ్చొ అవ్ అయ్లె కి, అంక తుమ్ బెదవన్ను నాయ్. సరిపుచువ జత పాలల్ నెంజిలి పొది, అంక తుమ్ పాలల్ దిలదు నాయ్. జబ్బు తెన్ తిలె కి, జేల్తె తిలె కి, తుమ్ అంక దెకుక అయ్లదు నాయ్, మెన అంచి డెబ్లి పక్క, తిలసక సంగిందె.

44 తెదొడక జేవ్ కి ఇసి మెన జబాబ్ దెవుల. ప్రబు, తుక చూ కెర్లికయ్, తాన్ కెర్లికయ్, తుయి వేర దేసిమ్చొ జెతికయ్, పాలల్ నెంతె తతికయ్, జొర్జొ తెన్ తతికయ్, జేల్తె తతికయ్, అమ్ తుక తోడు కెరుక నాయ్ గె? మెన సంగుల.

45 జోవయింక అవ్ కిచ్చొ జబాబ్ దెయిందె మెలె, తుమ్క అవ్ కిచ్చొ కచితుమ్ సంగితసి మెలె, అంచ మాన్సుల్తె కక్క కి తుమ్ ఇసి నే కెర్లిసి, అంక కి నే కెర్లి రితి జలి, మెన జోవయింక సంగుమ్దె,

46 చి కెయ్క తెయ్క సిచ్చు జతినతె గిచ్చుల, గని పున్నిమ్ జలస కెయ్క తెయ్క పరలోకుమ్తె జంక గెచ్చుల.” మెన సిన్సుల్క యేను సంగిలన్.

26

అంక విరోదుమ్ సుదల్ దెర్లి సమయుమ్ పాసి జా అస్సె
(మార్కు 14:1-2; లూకా 22:1-2; యోహా 11:45-53)

1 యేసు సిన్సుల్క ఈంజేవ్ కొడొ ఎత్తి సంగ కేడయ్లి పిమ్మట్ బర్గు జలిసి కిచ్చొ మెలె, జో జోచ సిన్సుల్క,

2 “దొరతి గెలె, *పస్సా పండుగు జెయెదె మెన తుమ్ జాన్సు. జా పొదిక, అవ్ మాన్సు జా జెర్మున్ అయ్లోసాక సిలువతె టీవో కెర మార్లి రిసా, అంక దెర దెయెదె” మెన యేను సంగిలన్.

3 జా సమయుమి, వెల్లెల పూజర్లు కి వెల్లెల మాన్సుల్తె అన్సె నగుమ్జిన్ కి, కయప మెంతొ ఎత్తిక వెల్లొ పూజరిచి గేర్తె బెద జా కెర,

4 కీసిగె లుంకచోరు యేసుక దెర, మారుక మెన, బెద ఉచర్ల, గని,

5 “పండుగు పొది పొని, నెంజిలె పండుగక బెర అయ్లె ప్రెజల్ కుమ్మత్ తెన్ గగ్గొల్ జా అమ్క బలె అల్లర్ కెరుల” మెన సంగితె తిలె.

* 26:2 26:2 పూర్ణమ్ పొది యూదుల్ బగుచ్చు దేసిమ్ తా గొతిమాన్సుల్ జలిసి తెంతొ ప్రబు రచ్చించువ కెర్లిసి ఏద కెర్లి పండుగు, ఈంజ. ముక్కిమ్క కిచ్చొ ఏద కెరుల మెలె, ‘అమ్చె యూదుల్క విడ్డల్ కెర్లు’ మెన బగుచ్చు దేసిమ్చె కుటుంబల్ ఎత్తిచ తొల్గర్ జల మున్నుబోదక దూత మార్గితె యూదుల్చె తొల్గర్ బోదల్ నే మొర్లి రితి ప్రబు జోనయింక పిట్టయ్లిసి ఏద కెరుక. తెదొడి, పూర్ణమ్చి జా రాతి కీన్ గెరి యూదుల్ తిలె గే, జా గెరచె దార్బంధర్తె అర్పితుమ్ జలో ఏక మెండపిల్లచి లోయి దెరవుల, చి దూత దెకిలె, జా గెరచొ తొల్గర్ బోదక మారె నాయ్. నిర్ణమకాడుమ్ 12:21-30.

తేరబోద వాసన తేల్ యేసుచి బోడి నువిలిసి
(మార్కు 14:3-9; యోహా 12:1-8)

6 జలె, యేసు బేతనయి గవ్వి గెచ్చ కెర, సీమోను మెలో వెల్లి రోగి జా తిలో ఎక్కిలోచొ గెరి తిలి పొది,
7 ఏక తేరబోద, ఒగ్గర్ చెంగిలి విలువచి వాసన తేల్చి బుడ్డి దెరన, జోతె అయిలె. అన్యె, జో అన్నిమ్ కంక వెన తతికయ్, జోచి బోడి ఉప్పిరి నుచిలి.

8 సిస్సుల్ దెక కెర, కోపుమ్ జా, “ఈంజ నస్తుమ్ కిచ్చొక?”

9 ఈంజ తేల్ ఒగ్గర్ కరీద్క వికిలెగన, బీద మాన్సుల్క దర్ముమ్ దెంక జతి” మెన సంగిల.

10 యేసు జా కోడు జాన్లి రిసా, “ఈంజ తేరబోద అంక కెర్లిసి చెంగిల్ వెల్లి కామ్. తుమ్ కిచ్చొక ఇన్నెక ఉస్సుర్ కెరుక?”

11 బీద మాన్సుల్ కెయెంక కి తుమ్చి తెన్ తవుల, గని ఆవ్ కెయెంక తెయెంక తుమ్చి తెన్ ఈంజ లోకుమ్తె ఇని తయె నాయ్.

12 ఈంజ తేరబోద ఈంజ వాసన తేల్ అంచి ఆగ్తె నువ కిచ్చొ గుర్తు కెర్తయ్ మెలె, ఆవ్ నే మొరై అగ్గె, అంక నే రోవితె అగ్గె, అంచి ఆగ్ తెయార్ కెర్లి గుర్తు కెర్తయ్.

13 తుమ్క ఆవ్ కిచ్చొ నిజామి సంగితసి మెలె, ఒండి లోకుమ్తె కేనె ఈంజ అంచి నుబుమ్ కబుర్ బోదన కెరుల గే, ఒత్తయ్ ఈంజ అప్పె కెర్లిసి సంగ, ఇన్నెచి రిసా ఉచరవడుల” మెన యేసు సంగిలన్.

యాదా యేసుక దెర దెంక ఉచర వెల్లిల పూజర్లుతె గెచ్చ సంగిలిసి
(మార్కు 14:10-11; లూకా 22:3-6)

14 తెదొడి, బారజిన సిస్సుల్తె తిలో ఇస్కరియోతు గవ్విచొ యాదా, వెల్లిల పూజర్లుతె గెచ్చ కెర,

15 “ఆవ్ యేసుక తుమ్క దెర దిలెగన, తుమ్ అంక కిచ్చొ దెస్తె?” మెన పుసిలన్. జేవ్ జోక ముప్పయ్ వెండి బిల్లల్ దిల.

16 జా గడియ తెంతో యాదా యేసుక దెర దెంక మెన సమయుమ్ చజితె తిలన్.

యేసు సిస్సుల్ తెన్ పస్కా వండుగు కెర్తతి
(మార్కు 14:12-21; లూకా 22:7-14,21-23; యోహా 13:21-30)

17 నే పులయెల పొడియె కతి వండుగ్క తోలితో చి దీసి, సిస్సుల్ యేసుతె జా కెర, “తుయి †పస్కా అన్నిమ్ కెర్లి రిసా, అమ్ కేన్ టాన్ తెయార్ కెరుక?” మెన, జోక పుసిల.

18 చి యేసు జేవ్క, “యెరూసలేమ్తె తిలో పలాన్ నుదొతె తుమ్ గెచ్చ కెర, ‘అంచి సమయుమ్ పాచ జా అన్యె. అంచ సిస్సుల్ తెన్ తుచి గెరి వండుగు కెరిందె’ మెన, ప్రబు తుక సంగ మెన అమ్క తెద్రయ్లో” మెలన్.

19 యేసు జోవయంక, సంగిలి రితి జేవ్ సిస్సుల్ కెర, పస్కా అన్నిమ్క దొర్కు జలిసి తెయార్ కెర్ల.

20 సాంజ్ జతికయ్, యేసు జేవ్ బారజిన సిస్సుల్ తెన్ అన్నిమ్ కంక వెసిల.

21 జేవ్ అన్నిమ్ కత్తె తతికయ్, యేసు జేవ్క, “తుమ్క ఆవ్ కిచ్చొ కచితుమ్ సంగితసి మెలె, తుమ్చితె ఎక్కిలో అంక విరోదుమ్ నుదలచి అత్తి సార్ప కెర దెయెదె” మెలన్.

22 దస్సి మెంతికయ్, జేవ్ ఒగ్గర్ దుకుమ్ తెన్ ఎత్తి మాన్సు, “ప్రబు, ఆవ్ గే?” మెన పుసిల,

23 చి యేసు కిచ్చొ జబాబ్ దిలన్ మెలె, “అంచి తెన్ పలెరుమ్తె కో అతు గల పొడి గండ బుడ్డవ తయెదె గే, జొయ్యి అంక దెర, సార్ప కెర దెయెదె.

24 “ఆవ్ మాన్సు జా జెర్మన్ అయ్లోసాచి రిసా రెగిడ్లి రితి ఆవ్ ఉట్ట గెచ్చిందె. గని, అయ్యెగ్! ఆవ్ మాన్సు జా జెర్మన్ అయ్లోసాక, కేన్ మాన్సు దెర విరోదుమ్ నుదలచి అత్తి సార్ప కెర దెయెదె గే, జో మాన్సు జతి సిచ్చచి రిసా, జో నే జెర్మ తిలె జోక చెంగిల్ తత్తి” మెన, యేసు సంగిలన్.

25 జోక దెర దెతో యాదా “గురుబాబు, ఆవ్ గే?” మెన సంగితికయ్, యేసు జోక, “తుయి జా సంగిలి” మెన సంగిలన్.

† 26:17 26:17 ‘పస్కా వండుగు’ మెలె, యాదుల్ ఒగ్గర్ పూర్ము బగుప్తు దేసిని మెచ్చ గొతిమాన్సుల్ జా ఒగ్గర్ సైమన్ సీడ్త తతికయ్ మోసి పూర్ముచొచి అత్తి ప్రబు జోవయంక విడ్డల్ కెర బార్ కెర్లన్. జా రచ్చన నే పవ్చితె రితి ఎత్తి వెర్చి పస్కా వండుగు కెర్తతి.

26 యేసు, సిస్సుల్, జా పస్కా, అన్నిమ్ కెర్తె తా, యేసు పోడియో దెరన, “దయ కెర్లదె” మెలి రితి †దేముడు అబ్బొన్ క జొకర కెర, జా పోడియో మోడ, సిస్సుల్ క వంట దా, జోవయింక, “తుమ్ ఈంజ కడన కా. అంచి అగెక ఈంజ గుర్తు జయెదె” మెన కెర,

27 ఏక్ గిన్నుచి ద్రాచ రస్సుమ్ దెర, దేముడు అబ్బొన్ క అన్నె ఉచర, సిస్సుల్ క దా కెర, “ఇన్నెచి రస్సుమ్ పియ.

28 కిచ్చొక మెలె, ఈంజ రస్సుమ్ కిచ్చొ గుర్తుచి మెలె, ఒగ్గరజిన్ మాస్సుల్చి పాపుమ్ గెచ్చయతి రిసా అంచి లోయి నూయి జంక అస్సె మెన నోచి ప్రమానుమ్.

29 అంచో అబ్బొచి రాజిమ్తె తుమ్చి తెన్ ఇసి ఆవ్ ద్రాచ రస్సుమ్ నోవర్ పితి ఎద, ఇసిచి అన్నె పియ నాయ్ మెన తుమ్క సంగితసి” మెన, సంగిలన్.

30 తెదొడి, జేవ్ దేముడుక గనుమ్ గాయ కెర, బార్ జా కెర, ఒలీవ మెట్టయ్ ఉట్ట గెల.

31 తెదొడి యేసు జోవయింక, “ఆజ రాతిక, తుమ్ ఎత్రిజిన్ అంచి రిసా బమ్మజా అంక ములితె. కిచ్చొక మెలె,

మెండల్ రకితోసాక మొరయందె, చి జోచ మెండల్ ఎత్రిజిన్ చెదర్తు జా గెచ్చుల

మెన దేముడు రెగ్గయ్లి కోడు నెరవెర్పువ జంక అస్సె.

32 గని, ఆవ్ అన్నె జీవ్ జా ఉట్టి పిమ్మట్, తుమ్చి కంట అగ్గె గలిలయ ప్రాంతుమ్తె గెచ్చిందె” మెన, ప్రమానుమ్ కెర్లన్.

33 జాకయ్ పేతురు, “తుచి రిసా ఎత్రిజిన్ బమ్మజా తుక ములిలెకి, ఆవ్ తుక కెయంక ములి నాయ్” మెన సంగిలన్.

34 యేసు జోక, “తుక ఆవ్ కిచ్చొ నిజుచి కచితుమ్ సంగితసి మెలె, ఆజ రాతిక, కుకుడో నే వాసితె అగ్గె, ‘జోక నేని’ మెన అంచి రిసా తివ్వెరి తుయి సంగితె” మెన, సంగిలన్.

35 పేతురు జోక అస్సె, “ఆవ్ తుచి తెన్ మొరుక అస్సె మెలె కి, ఆవ్ తుక ‘నేని’ మెన, కెయ్యక కి సంగి నాయ్” మెన సంగిలన్, చి సిస్సుల్ ఎత్రిజిన్ కి దస్సి మెల.

గెత్తేమనే మెంతి తోటతె యేసు దుకుమ్ సేడ ఏడ్డిసి

36 తెదొడి యేసు సిస్సుల్ తెన్ గెత్తేమనే మెంతి తోటతె గెచ్చ కెర, జో “ఆవ్ ఒత్తల్తో గెచ్చ ప్రార్దన కెర జెతి ఎద, తుమ్ ఇన్నె వెన తా” మెన సంగ కెర,

37 ఎక్కి పేతురుక చి జెబెదయచ దొగుల పుత్తర్పుల్ జత యాకోబుక చి యోహానుక పట్టి కడన, ఇదిల్ దూరి గెచ్చ కెర, దుకుమ్ దా, మెస్సుతె ఒగ్గర్ బాద సేడుక దెర్లొ.

38 తెదొడి, “అంచి పెట్టి తిలి దుకుమ్ రిసా మొర గెచ్చుక జయెదె. తుమ్ ఇన్నె తా, అంచి తెన్ చెదొయి తా” మెన, సంగ కెర,

39 సగుమ్ దూరి గెచ్చ కెర, సెర్పు సేడ, దేముడు అబ్బొన్ క ఇసి మెన ప్రార్దన కెర్లన్. “ఓ బ, జతి లెక జలె, ఈంజ గిన్నుచి ఆవ్ నే పితి రితి అంక పిట్టవు, గని అంచి ఇస్టుమ్ పోని. తుచి ఇస్టుమ్ జర్గు జవున్” మెన, ప్రార్దన కెర, ఉట్ట కెర,

40 జేవ్ సిస్సుల్తె అన్నె ఉట్ట జా, జేవ్ నిజ అస్సి మెన దెక కెర, పేతురుక, “జలె, ఎక్కి గడియ జలెకు అంచి తెన్ తుయి రకితె తంక నెతిర్లదె గే?

41 జత అల్లర్తె తుయి పాపుమ్ నే కెర్తె రితి జాగర్త తా ప్రార్దన కెర్తె తా. ‘అత్మ నిదానుమ్ అస్సె’ మెన ఉచరన్లెకి, అగేక నెక్తి నాయ్” మెన యేసు సంగ కెర,

42 అస్సెక్ నుట్టు ఇదిల్ దూరి ఉట్ట గెచ్చ కెర, “ఓ బ, ఈంజ సైమచి గిన్ను ఆవ్ పిలెకయ గెచ్చెదె జలె, తుచి ఇస్టుమ్ జర్గు జవున్” మెన ప్రార్దన కెర,

43 అన్నె ఉట్ట అయ్లె, జేవ్ సిస్సుల్ గూన్ క నెత్త కెర అన్నె నిజ అస్సి మెన దెక కెర,

44 జోక అన్నె ముల దా, ఉట్ట గెచ్చ, అస్సెక్ నుట్టు తెదొడచ కొడె ప్రార్దన కెర్లన్.

† 26:26 26:26 ‘దేముడు అబ్బొసి’ మెన కేన్ నుట్టు రెగ్గ తిలె, దేముడుచి రిసా సంగితయె.

45 తెదొడి యేసు జోచ సిస్సులతె అన్నె ఉట్ట జా, జోవయింక, “అప్పకయ్ సెలవ్ కడన, నే రకితె నిజ అస్సున్ గే? ఈందె, నమయుమ్ జయి గెలి. ఆవ్ మాన్సు జా జెర్మున్ అయ్లోసా పాపుమ్ కెర్తనచి అత్తి దెర్పు సేడిందె.

46 జొమ్మ, గెచ్చుము! ఈందె, అంక దెర దెతోసా పాసి జా అన్నె” మెన, సిస్సులక సంగిలన్.

యూదా చి జనాబ్ యేసుక దెరుక అయ్లెసి
(మార్కు 14:43-50; లూకా 22:47-53; యోహా 18:3-12)

47 యేసు లట్టబై తతికయ్, బారజన్ సిస్సులతె జో అగ్గె తిలో యూదా పావ అయ్లన. జో తెన్ కి ఒగ్గరజన్ జనాబ్ కత్తుల్ డండల్ దెరన యూదుల్చ వెల్లెల పూజర్లు చి అన్నె వెల్లెల మాన్సులతె యూదా తెన్ అయ్ల.

48 జెలె, ఈంజ నే జతె అగ్గె, “ఆవ్ కక్క చుంబిందె గే, జొయ్యి యేసు. జోకయి దెరన” మెన యేసుక దెర దెతో యూదా జేవ్ జనాబ్క గుర్పు సంగ తిలన్.

49 జాచి రిసా, జో యేసుతె బేగి జా కెర, “గురుబాబు, జోబర!” మెన సంగ, జోక చుంబిలన్.

50 యేసు జోక దెక, “ఓ నేస్తము, తుయి కిచ్చొ కెరుక అయ్లది గే, జయి కెరు” మెన, జోక సంగిలన్. జేవ్ అయ్లన పాసిక జా, యేసుక దెర్ల.

51 జెలె, యేసు తెన్ తిలోసా ఎక్కిలో, ఆతు చంపా కెర, కత్తి కడన, ఎత్తిక వెల్లో పూజరిచొ గొత్తి సుదొక పెట, జోచొ కండ్లొ సిందె గెలన్.

52 యేసు జోక, “తుచి కత్తి తియ దేసు. కత్తివొ తెన్ యుద్దుమ్ కెర్తన కత్తి తెన్ మొరుల.

53 అల్లె, ఈంజ నమయుమ్ ఆవ్ అంచొ అబ్బొక ప్రార్దన కెరుక నెతిరి మెన ఉచర్తసి గే? నెంజెలె, ప్రార్దన కెర్లెగి, జో డబ్బయ్ వెయలు దూతల్క బేగి తోడ్ తెద్రవుక నెత్తె మెన తుయి ఉచర్తసి గే?

54 గని, దస్సి కెర్లెగి, అంక ఈంజ ఎత్తి జర్లు జంక అన్నె మెన దేముడుచి కొడెతె రెగిడ్డిసి కిసి నెరవెర్పుప జయెదె!” మెన జో సిస్సుడుక సంగిలన్.

55 తెదొడి, జయి గడియయ్, యేసు జనాబ్క, “ఆవ్ కిచ్చొ చొర్లయ్ చి కత్తులు డండల్ దెరన అంక దెరుక తుమ్ అయ్లదు గే? ఆవ్ రోజుక దేముడుచి గుడితె పెన బోదన కెర్లె కి, అంక జా పొది దెర్పు నాయ్.

56 జెలె, దేముడుచి కబుర్లు రెగిడ్డనచి అత్తి రెగిడ్డ కొడె నెరవెర్పుప జతి రిసాయి ఈంజ ఎత్తి జర్లు జలి” మెన, యేసు సంగితికయ్, సిస్సుల్ ఎత్తి బియం కెర, జోక ముల దా, ఉట్ట నిగిల.

ఎత్తిక వెల్లో పూజరిచి మొక్కె యేసుక బీవడ్డ
(మార్కు 14:53-65; లూకా 22:54-55,63-71; యోహా 18:13-14,19-24)

57 ఒత్త తెంతో, యేసుక జేవ్ విరోదుమ్ సుదల్ దెర కెర, కయప మెలో ఎత్తిక వెల్లో పూజరితె జోక కడ నెతికయ్, ఒత్త దేముడు మోసి తెన్ దిలి ఆగ్గుల్ సికడ్డన చి అన్నె వెల్లెల మాన్సుల్ బెర తిల.

58 పేతురు, మాత్తుమ్, దూరి దూరి యేసుచి పట్టి జా జా, జో ఎత్తిక వెల్లో పూజరిచి వీది పావ కెర, వీది పెన కెర, ఆకరక కిచ్చొ జర్లు జయెదె గే దెకుక మెన, జమాన్లు తెన్ వెసెలన్.

59 వెల్లెల పూజర్లు చి అన్నె వెల్లి నబ కెర్తన ఎత్తిజన్ యేసుక మారుక కోర్ప జా, జోక నేరిమ్ వయడ్డి సాచి చజితె తిల.

60 గని అబద్దుమ్ సాచి సంగితన ఒగ్గరజన్ పురె జలెకి, సరి జతి సాచి దొర్కు జయె నాయ్. గని, ఆకరక, దొగుల పురె జా కెర,

61 “ఈంజొ మాన్సు ‘దేముడుచి గుడి ఆవ్ సేడవ గెల కెర, తిర్తెత్క అన్నె బందిందె’ మెన సంగిలో” మెన సంగిల.

62 జేవ్ దస్సి సంగితికయ్, ఎత్తిక వెల్లో పూజరి బీవొ జా, యేసుక దెక, “ఈంజేవ్ సంగిలిన్క కిచ్చొ జబాబ్ దెంక నెతిర్చి గే? ఈంజేవ్ తుక కిచ్చొ నేరిమ్ వయడ్డతి?” మెన, పుసితికయ్ కి

63 యేసు తుకై తిలన్. జాకయ్, ఎత్తిక వెల్లో పూజరి జోక అన్నె, “తుయి దేముడుచొ క్కీస్తు జలి పుత్తుసి జస్తె జలి, ‘జేవ్ తిలో దేముడు తోడు’ మెన, జోచి నావ్ తెన్ అమచి మొక్కె ఒప్పన సంగు” మెల,

64 యేసు జోక, “తుయి సంగిలి రితి. గని తుమ్మక అవ్ కిచ్చొ మెంతసి మెలె, ఆకర్కక ఎత్తి, నెక్తి అదికారుమ్ తిలోసాచి ఉజెతో పక్క అవ్ మాన్సు జా జెర్కున్ అయ్లోసా వెన తతిసి కి, అగాసుమ్చి మబ్బుతె, అవ్ పరలోకుమ్ తెంతో అన్నె ఉత్త జెతిసి కి తుమ్ దెకితె” మెన, సంగిలన్.

65 జో ఎత్తిక వెల్లో పూజరి, కోపుమ్క జో గలన్సి దిగిల్ చొక్క చిరన గెల కెర, “అయ్యో! ‘దేముడుక సమానుమ్ జతసి’ ఈంజో సంగుక ప్రబుచి విలువ కడ వెల్లి పాపుమ్ కెర్తయ్. అమ్క అన్నె సాచుల్ అక్కర్ నాయ్. ఈందె, దేముడుక ఈంజో సమ్మందుమ్ సంగన్సిసి. తుమ్ అప్పె సొంత నూన్లదు ఈంజయి సరి జతయ్.

66 తుమ్ కిచ్చొ రుజ్జు సంగితె?” మెన సబ కెర్తనక పుసితికయ్, జేవ్, “ఈంజో మొర్తి సిచ్చుచి ఎదిలి తప్పు కెర అన్నె” మెన సంగ,

67 యేసుచి మొక్కె తుంక్త దా, జోక కుందిల. అన్నె, సగుమ్జిన్ జోక పెట కెర,

68 “క్రీస్తు, తుక కో పెట్ల గే తుయ్ క్రీస్తు గడ, అమ్క సంగు!” మెన కొంకడ్ల.

పేతురు యేసుక “జోక నేని” మెన సంగిలిసి
(మార్కు 14:66-72; లూకా 22:56-62; యోహా 18:15-18,25-27)

69 ఈంజ మదెనె, పేతురు వీది వెన తతికయ్, ఒత్తచి తేర్బోద గొత్తి సుది ఎక్కి జోతె జా కెర, “తుయి కి గలిలయ ప్రాంతుమ్చొ యేసు తెన్ తిలది” మెన, జోక సంగిలి.

70 జా దస్సి మెన సంగితికయ్, పేతురు, “తుయి సంగిలిసి అంక అర్దుమ్ జయి నాయ్” మెన, ఎత్తిజిన్చి మొక్కె, యేసుక నేన్సి రితి సంగిలన్.

71 పేతురు అన్నె వీదిచి గుమ్ముమ్ పక్క గెతికయ్, అన్నెక్కి తేర్బోద గొత్తి సుది జోక దెక కెర, “ఈంజో కి నజరేతు గెప్పెచొ యేసు తెన్ తిలొ” మెన, ఒత్త టీద తిలనక సంగిలి.

72 జలె పేతురు ఒట్టు గలన, “జో మాన్సుక అవ్ నేని” మెన సంగిలన్.

73 గడియ గెలి పిమ్మట్, ఒత్త టీవో జా తిలన పేతురుతె జా కెర, “నిజమి, తుయి జోచ సిస్సుల్తె ఎక్కిలో. తుయి లట్లబ్బె చినుక ఒత్తయ్” మెన, సంగిల.

74 జేవ్ దస్సి సంగితికయ్, పేతురు, “జో మాన్సుక అవ్ నేని” మెన సవెన గల కెరన ఒట్టు గలనుక దెల్లొ, చి బేగి కుకుడో వానిలన్.

75 జాచి రిసా, “కుకుడో నే వాన్తె అగ్గి, ‘జోక నేని’ మెన, తుయి తివ్వెరి అంచి రిసా సంగితె” మెన యేసు అగ్గి సంగిలిసి ఏదన్ల కెర, పేతురు బార్ జా ఎదివాట్ దుకుమ్ జా ఏడ గెలన్.

27

యేసుక అదికారి జలో పొంతి పిలాతుతె నజీలిసి
(మార్కు 15:1; లూకా 23:1-2; యోహా 18:28-32; బారి కమ్మొ 1:18-19)

1 రాత్ పాయితికయ్, వెల్లెల పూజర్లు చి యూదుల్చ అన్నె వెల్లెల మాన్సుల్తె ఎత్తిజిన్ సబ కెర, యేసుక మారుక మెన తీర్పు కెర,

2 జోక బంద కడన, * అదికారి జలో పిలాతుతె సార్ప దిల.

3 తెడిడి, యేసుక దెర దిలొ యూదా, “యేసుక నేరిమ్ వయడ అన్సి, చి మారుల” మెన దెక కెర, “పాపుమ్ కెర్తయ్” మెన దుకుమ్ జా బమ్మ జా, జేవ్ ముప్పుయ్ వెండి బిల్లల్ జేవ్ వెల్లెల పూజర్లుతె చి అన్నె వెల్లెల మాన్సుల్తె అన్నె ఆన కెర,

4 “కేన్ తప్పు నే కెర్లొ నీతి తిలోసాక అవ్ దెర దా అవ్ పాపుమ్ కెర్తయ్” మెన సంగిలన్. గని జేవ్ వెల్లెల మాన్సుల్ కిచ్చొ మెల మెలె, “జాకయ్ అమ్క కిచ్చొ? అమ్చి పూచి నెంజె. తుయి దెకన్” మెన, సంగితికయ్,

5 జో యూదా జేవ్ వెండి బిల్లల్ దేముడుచి గుడితె గల దా, గెచ్చ, ఉరి గలన, మొర గెలో.

* 27:2 27:2 రోమ్ దేసిమ్చి ప్రబుతుమ్ జా దేసిమ్ ఆక్రమించువ కెర ఏలువ కెర్త తతికయ్, జా రోమ్ దేసిమ్చి ప్రబుతుమ్చి నాన్ తెన్ పిలాతు అదికారి జా అన్నె.

6 యూదా దస్సి కెర్తికయ్, వెల్లెల పూజర్లు జా డబ్బుల్ వెంట కెర, కిచ్చొ మెలె, “ఈంజ ఎక్కిలోచి లోయి సువిలి పాపుమ్ డబ్బుల్. జాచి రిసా, దేముడుచి గుడిచి డబ్బుల్ పెటెతె ఈంజ డబ్బుల్ గలుక జయె నాయ్” మెన

7 లట్టబన, ఉచరన, ‘యూదుల్ నెంజిల వేర దేసిమ్చ మాన్సుల్క ఒత్త రోవ గెలుక జయెదె’ మెన, కుమ్మరో ఎక్కిలోచి బాటి జా డబ్బుల్క గెనిల.

8 జాచి రిసా, ఆజి ఎద, జా బాటిక† ‘ఎక్కిలోచి లోయి సువిలి పాపుమ్చి డబ్బుల్క గెన్సి బాటి’ మెంతతి.

9 ఇసి జర్లు జలిసి తెన్, దేముడుచి కబుర్ సంగిలో యిర్మీయాచి అత్తి రెగిడ్డి కోడు నెరవెర్పువ జలి.

“ప్రబు సంగిలి రితి, ఇసాయేలులు సగుమ్జిన్, ఎక్కిలోక గెనుక మెన ఒప్పన్సి సొమ్ముక, మెలె ముప్పయ్ వెండె బిల్లల్క,

10 కుమ్మరోచి వెడ ఏక్ గెనిల,” మెన రెగిడ్డి కోడు.

అధికారి యేసుక పరిచ్చ కెర్తిసి

11 యూదుల్చ వెల్లెల మాన్సుల్ యేసుక జో పిలాతు మెలో అధికారిచి మొక్కెటివో జలో, చి జో అధికారి యేసుక “యూదుల్చో రానో తుయి గె?” మెన పుసితికయ్, యేసు “తుయి సంగిలి రితి,” మెన జబాబ్ మెలన్.

12 గని వెల్లెల పూజర్లు చి అన్నె వెల్లెల మాన్సుల్ జోచి ఉప్పిరి నేరిమ్ వయడ్డికయ్, జో జబాబ్ కిచ్చొ కి సంగి నాయ్.

13 జాకయ్, పిలాతు యేసుక అన్నె, “తుచి ఉప్పిరి ఈంజేవ్ కెత్తి నేరిమ్లు వయడ్డితి గే, తుయి నూన్సి నాయ్ గే?” మెన జోక సంగిలే కి.

14 జేవ్ మాన్సుల్ సంగిల నేరిమ్లుతె ఎక్కిక కి యేసు జబాబ్ సంగి నాయ్, చి అధికారి ఎదివాల్ ఆచారిమ్ జలన్.

15 జలె, జా పండుగు పొది, ప్రజల్ కోర్వ జలో కేన్ జలెకు జేలి జలోసాక ముల దెంక జో అధికారిక అలవాట్ జా అన్నె.

16 జా కాలూమ్, జలె, బరబ్బు మెలో ఎత్తిజిన్ జాన్లో ఒగ్గర్ మూర్కూమ్ తిలో జేలి జలో ఎక్కిలో అధికారిచి జేల్తె తిలన్.

17 జలె, ప్రజల్ బెర తతికయ్, పిలాతు జోవయింక “ఆవ్ కక్క ముల దెంక మెన తుమ్ కోర్వ జతసు? బరబ్బుక గే, క్రీస్తు మెంతో యేసుక గే?” మెన జోవయింక పుసిలన్.

18 జో అధికారి కిచ్చొక ఇసి జేవ్ ప్రజల్ నిసానుక సెలవ్ దిలో మెలె, యూదుల్చ వెల్లెల మాన్సుల్ ఎక్కి గోసచి రిసా యేసుక తీర్పు కెర్తి టాన్తె ఆన అస్తి మెన జానె.

19 పిమ్మల్, రుజ్జు కెర్తి పొది వెసితి పీటతె, జో అధికారి తెదొడి వెసితికయ్, జోచి తేర్పి ఏక్ గొత్తి సుదిచి అత్తి, జో తెన్ కబుర్ తెద్రయ్లి. “జో సీతి తిల మాన్సుక జేవ్ యూదుల్ కెర్తిన్తె తుయి జోలిక గో నాయ్. ఆజి ఆవ్ జోచి రిసా సిప్పొ దెక అల్లర్ జలయ్” మెన, అధికారి జలో మున్సున్తె కబుర్ తెద్రయ్లి.

20 గని, వెల్లెల పూజర్లు చి అన్నె వెల్లెల మాన్సుల్ కిచ్చొ కెర్ల మెలె, “ ‘బరబ్బుక ముల దేసు! మెన సంగ’ మెన ప్రజల్క సికడ్డె తిల.

21 జలె, అధికారి జనాబ్క అన్నె కిచ్చొ పుసిలన్ మెలె, “దొగులతె ఆవ్ కక్క ముల దెంక?” మెన పుసిలన్, చి జేవ్ “బరబ్బుకయ్” మెన కేక్ గల్లికయ్,

22 పిలాతు “దస్సి జలె, క్రీస్తు మెంతో యేసుక ఆవ్ కిచ్చొ కెరుక?” మెన పుసిలన్. జేవ్ జనాబ్ ఎత్తిజిని, “సిలువతె గల, మొర్తి సిచ్చ కెరు!” మెన సంగిల.

23 జేవ్ జనాబ్ దస్సి జతికయ్, జో అధికారి “కిచ్చొక? ఈంజో కిచ్చొ నేరిమ్ కెర అన్నె?” మెన పుసిలన్, గని, “సిలువతె గల, మొర్తి సిచ్చ కెరు!” మెన గట్టిజ కేకుల్ గలిల.

24 జలె, ‘కెర్తి సంగిలి కి కామ్క నెంజె, గని ప్రజల్ అన్నె గగ్గోల్ జతతి, చి ఒగ్గర్ అల్లర్ కెరుల. యేసుచి రిసా పూచి సేడుక అంక కిచ్చొ లాబుమ్ నాయ్’ మెన పిలాతు దెక కెర, పాని నజన, ప్రజల్చి మొక్కె అత్తో

† 27:8 27:8 నెంజిలి ‘లోయిచి బాటి’.

దోషన, “ఈంజో నీతి మాన్యుక మార్చినచి రిసా తుమి దెకన్. జోచి లోయి అంచి పూచి నాయ్” మెన ప్రజల్చి మొచ్చె నంగిలన్.

25 జో అదికారి దస్సి సంగితికయ్, ప్రజల్ ఎత్తి, “జోచి లోయిచి పూచి, అమ్చి ఉప్పిర్ చి అమ్చ బోదల్చి ఉప్పిర్ తప్పన్.” మెన ఒప్పన, కేకుల్ గలిల.

26 తెదొడి, జేవ్ కోరప జలి రితి, పిలాతు బరబ్బుక ముల కెర, యేసుక కొర్దల్ తెన్ పెటవడ, ‘జోక సిలువతె గల్లు, జలె’ మెన జోవయింక జమాన్లుతె సార్చు దిలన్.

జమాన్లు యేసుక కొంకడ్డిసి
(మార్కు 15:16-20; యోహా 19:2-3)

27 తెదొడి, అదికారితెచ జేవ్ జమాన్లు యేసుక అదికారి గేర్చి తెడిచి గదితె కడ నా కెర, జమాన్లు ఎత్తిక ఒత్త అనవ కెర,

28 యేసుచ సొంత పాలల్ కడ గెల కెర, ఏక్ ఎరన రగుమ్చి పాలమ్ యేసుక గల దా,

29 కంటక ఏక్ కిరిటుమ్ గంచ కెర, యేసుచి బోడితె గల దా కెర, ఏక్ డండో జోచి ఉజల్ అత్తి దెరవ కెర, జోకర జోచి పురైతో సర్పు నీడ, “యూదుల్చొ రానొ, తుక జెయ్యి!” మెన జోక కొకడ్డ.

30 పిమ్మట్, జోచి ఉప్పిరి తుంక, జా డండో కడ కెర జా తెన్ జోక బోడితె పెట పెట,

31 జోక దస్సి దూసువ కెర్లి పడ్డొ, జోక గల తిలి ఎరన పాలమ్ కడ కెర, జోచ సొంత పాలల్ జోక అన్నె గల దా కెర, సిలువతె గల్లి రిసా జోక కడ నిల.

యేసుక సిలువతె టీవడ్డిసి
(మార్కు 15:21-32; లూకా 23:26-39; యోహా 19:17-19)

32 యేసుక సిలువతె గల్లి రిసా, జేవ్ ఎత్తిజన్ గెతె తతికయ్, కురేనియు దేసిమ్చొ సీమోను మెలో ఎక్కిలోక డిస్సికయ్, యేసుక గల్లి సిలువ వయతి రిసా జోక బలవంతుమ్ కెర్ల.

33 గొల్లొతా మెంతి టాన్తె, మెలె గిడ్డి పోలికచి ఏక్ మెట్టయ్, పావ కెర,

34 నొప్పి తొక్కి కెర్లి ఓస్సు బెదయ్లి ద్రాచ రస్సుమ్ యేసుక జమాన్లు దా కెర, “పి” మెన సంగితికయ్, జో జా చక దెక, పియె నాయ్.

35 పిమ్మట్, సిలువతె గల టీవడ కెర, “జోచ పాలల్ వంటును” మెన చీట్లు గల, వంటన్.

36 తెదొడి జోక రకుక మెన ఒత్త వెసిల.

37 అన్నె, “ఈంజో యేసు, యూదుల్చొ రానొ” మెన, జోచి ఉప్పిరి నేరిమ్ రెగిడ్డి కిదారుగండ ఏక్ జోచి బోడిచి ఉప్పిరి ఒడొవ దిల.

38 యేసుచి ఉజెతో వక్క ఎక్కిలోక, డెల్లి వక్క ఎక్కిలోక, దొగుల చోర్లుక కి ఎక్సెక్ సిలువల్తె గల టీవడ్డ.

39 జా వాటు గెతె తిల మాన్సుల్ యేసుక ఆన, ఆన బోడి దున్నవ,

40 “దేముడుచి గుడి నీడవ తిర్రతేక అన్నె బందితోసొ తుయి జలె, తుక తూయి రచ్చించువ కెరను. తుయి దేముడుచొ పుత్తసి జలె, జా సిలువ తెంతో ఉత్త” మెన జోక దూసువ కెర్ల.

41 వెల్లెల పూజర్లు, మోసా తెన్ దేముడు దిలి ఆగ్గుల్ సికడ్డన, చి అన్నె వెల్లెల మాన్సుల్ కి, జోక దూసువ కెర్లి రితి,

42 కిచ్చొ మెన కొంకడ్డ మెలె, “ఈంజో వేర సుదల్క రచ్చించువ కెర్లె కి, జోక జొయ్యి రచ్చించువ కెరనుక నెత్తె. ఈంజో ఇస్రాయేలు ప్రజల్చొ రానొ జలె, అన్నె సిలువతె తెంతో ఉత్తను, చి జోక నంవజమ్దె.

43 జో దేముడుచి ఉప్పిరి నంవజా అన్నె బెర్లె. ఆవ్ ఎత్తి అదికారుమ్ తిలో దేముడుచొ పుత్తసి, మెలన్ గెద? జలె, దేముడుక ఇస్టుమ్ తిలె, ఈంజో నే మొర్లి రితి ఇన్నెక రచ్చించువ కెర్చు!” మెన, ఆన ఆన, దూసువ కెర్ల.

44 యేసు తెన్ బెదవ సిలువల్తె టీవడ్డ దొగు చోర్లు కి, జోక దస్సి దూసువ కెర్ల.

† 27:32 27:32 సిలువ కిసి తయెదె మెలె, ఏక్ టీవేతి చి ఏక్ అడ్డుమ్ జతి దొన్నె డండల్ బెదవుల. జా సిచ్చ జతో మాన్యుక జా సిలువతె ఎగ్గవ కెర, జోచ అత్తొ చట్టొ చంపొ కెరవ, అత్తొచట్టొతె మేకుల్ పెట సిలువ బుయ్యొ టీవ రొవ కెర దస్సి ములుల. జో సిచ్చ జతోనొ దస్సి ఒడొయ్ జా మెరెదె. రోమ్ దేసిమ్చి అలవాట్ తెన్ చి సిచ్చ జా. § 27:37 27:37 యూదుల్క కొకడ్డి రిసా పిలాతు అదికారి జా దార్ గండ రెగ్లె తిలన్. యోహాను 19:19.

యేసు మొర్రిసి

(మార్కు 15:33-41; లూకా 23:44-49; యోహా 19:28-30)

45 జలె, బార గంటల్ మెద్దెసి తెంతో మొదోల్ కెర, తిన్ని గంటల్ ఎద, జా ఒండి దేసిమి అందర్ డంక తిలి.

46 జలె, పాసి పాసి తిన్ని గంటల్క, యేసు, “ఏలీ, ఏలీ, లామా నబక్తానీ” మెన నంగ, గట్టిజ బర్న దిలన్. జా కోడుక కిచ్చొ అర్దుమ్ మెలె, ‘అంచో దేముడు ప్రబు, అంచో దేముడు ప్రబు, అంక కిచ్చొక ఆతు ముల దిలది?’

47 “జలె, ఒత్త టీవో జా తిలనతె నగుమ్జిన్ జా కోడు నూన కెర, ‘ఈంజో ఏలీయా పూర్గుమ్చొక బుకార్దుయ్, కిచ్చొగే’ ” మెల.

48 బేగి జోవయింతె ఎక్కిలో నిగ గెచ్చ, బూంజా రితిసి వెంట, అమ్డి ద్రాచ రస్సుమ్తె బుడ్డవ కెర, ఏక్ రివ్యతె బంద, చంప కెర, యేసుక ‘పి’ మెన దిలన్.

49 గసి పాసి తిలన, “పోసి. ఏలీయా జోక రచ్చింపవ కెరుక ఉత్తెద గే, నాయ గే, దెకుమ” మెన కొంకడ్ల.

50 తెదొడి, యేసు అన్నె గట్టిజ కేక్ గల కెర, ప్రాసుమ్ ముల దిలన్.

51 యేసు మొర గెలి గడియయ్ దేముడుచి గుడితె ఒడొవ తిలి తెర, * ఉప్పిర తెంతో ఎట్టో ఎదక చిరి జా దొన్ని గండల్ జలి. బుయి అర్దుర్ జలి. రంగ్విపత్తల్ పుట్ట గెల.

52 అన్నె, మెస్సస్లు ఉగ్గి జతికయ్, ఒగ్గర్జిన్ నిజ తిల దేముడుచొ నుదల్ మొర్లన మెస్సస్తె జీవ్ జా; ఉట్ల.

53 యేసు జీవ్ జా ఉట్టి వడ్డె, మెస్సస్లు తెంతో బార్ జా, దేముడుచి గుడి తిలి యెరూసలేమ్ పట్టుమ్తె గెచ్చ కెర, ఒగ్గర్జిన్క డీసిల.

54 జలె, యేసుక రక తిల జమాన్సు, జోవయించొ పుంజెక్జిన్ జమాన్సుక వెల్లో తెన్, బూకంపుమ్ కెర్లె పొది జర్గు జలిసి ఎత్తి దెక కెర, బల్ బియఁ కెర, “నిజామి, ఈంజో దేముడుక పుత్తుసి జా తిలి” మెన నంగిల.

55 యేసుక నవ్రెవన కెర్లె రిసా, గలిలయ ప్రాంతుమ్ తెంతో జోచి పట్టి జా తిల తేర్బోదల్ ఒగ్గర్జిన్ కి జో మొర్లి పొది ఒత్త తిల.

56 జోవయింతె కో కో తిల మెలె, మగ్గలేనీ పట్టుమ్చి మరియ మెలిసి, వడ్డె యాకోబుక చి యోసేపుక అయ్యసి జలి † మరియ, వడ్డె జెబెదయిచ పుత్తర్పుల్చి అయ్యసి.

యేసుచి పీనుమ్ వెంట గెలిసి

(మార్కు 15:42-47; లూకా 23:50-56; యోహా 19:38-42)

57 సాంజ్ జతికయ్, యేసుక నంపజా సిస్సుడు రితో జలో యోసేపు మెలో అరిమతయ్ గవ్వెచొ సామ్సారి ఎక్కిలో జా కెర,

58 పిలాతు అదికారితె గెచ్చ కెర, “యేసుచి పీనుమ్ అంక దే” మెన నంగితికయ్, జో అదికారి జోక దాన మెన ఆడ్ల దిలన్.

59 జలె, యోసేపు జా పీనుమ్ ఉత్తవ జాక నోవి విలువచి బట్ట పంగ్రవ కెర,

60 జోచి రిసా నోవర్ కెరవ తిలి రంగ్వి పత్తుర్చి డొల్మి కెర్లె మెస్సస్తె నా కెర, తెడి రోవ దిలన్, చి గుమ్ముమె వెల్లో పత్తురు వెలవ దా డంక గెల కెర, ఉట్ల గెలన్.

61 తెదొడి మగ్గలేనీ పట్టుమ్చి మరియ చి జా అన్నెక్ ‡ మరియ ఒత్త మెస్సస్చి మొక్కె వెన తిల.

మెస్సస్క డిట్టుమ్ బంద కెర తిలిసి

62 అన్నెక్ దీసి, మెలె పండుగచి బోగి దీసిక అన్నెక్ దీసి, వెల్లెల పూజర్లు చి పరినయ్యుల్ పిలాతు అదికారితె బెద జా కెర,

63 జోక, “బాబు, జో మోసిమ్ కెర్లెసా జీవ్ తిలి పొది, మొర్లె త్రిప్తక ఆవ్ అన్నె జీవ్ జా ఉట్టిందె మెలిసి ఏదన్ల కెర్లెనుమ్.

* 27:51 27:51 ఎక్కి ఎత్తిక వెల్లో పూజరి వెర్లక ఎక్కి నుట్టు వెన అర్చితుమ్ దెతి గదిక అర్దు కెర్లె తెర, ఈంజ. † 27:56 27:56 ఈంజ మరియ యేసుచి అయ్యసి జయెదె; మత్తయి 13:55. ‡ 27:61 27:61 యేసుచి అయ్యసి జయెదె.

64 జాకారుమ్, తిర్రత్ ఎద మెస్సునక చెంగిల్ బందు కెరవడడు, నెంజలె జోచ సిస్సుల్ జా కెర, జోక ఉక్కుల నా కెర, యేసు జీవ్ జా మెస్సె తెంతో బార్ జలో మెన, ప్రెజల్క సికడుల, చి అగ్గెచి మోసిమ్ చి కంటు ఆకర్చిచి మోసిమ్ ఒగ్గర్ జయెదె” మెన, యూదుల్చ జేవ్ వెల్లెల మాన్సుల్ అదికారిక సంగిల.

65 పిలాతు “జమాన్సుక కడన రకవడ, చి తుమ్ గెచ్చ కెర, తుమ్ తెర్లి ఎదిలి డిట్టుమ్ బందు కెరవడ” మెన, జేవ్క సంగిలన్.

66 జేవ్ గెచ్చ కెర, రకితసక టీచడ కెర, జోక అడ్డు కెర్తె పత్తురు డిట్టుమ్ రెచ కెర, ముద్ద గల దా, మెస్సునక కో లుంకచోరు నే ఉగిడ్డి రితి కెర్ల.

28

యేసు జీవ్ జా ఉట్ట అస్సె

(మార్కు 16:1-8; లూకా 24:1-12; యోహా 20:1-10)

1 *నెలవ్ కడన్లి దీసి జీన గెలి పడ్డె, నెలవ్ కడన్లి దీసి రాత్ పాయితె తతికయ్, మర్దలేనే పట్టుమ్ చి మరియ కి, జా అన్యెక్ మరియ కి, జా మెస్సున్ దెకుక గెల.

2 ఒత్త పావెలి, ఈందె, దేముడుచి దూత ఎక్కిలో పరలోకుమ్ తెంతో ఉత్తిర్తికయ్, ఒగ్గర్ బూకంపుమ్ జర్లు జలి, చి జో దూత జో అడ్డు తిలో పత్తురు ఒస్సుల్ కెర, పత్తుర్చి ఉప్పిరి వెసిలన్.

3 జోక దెకిలె, ఉజడ తిలి రితి డీసిలో, జోచ పాలల్ మంచుచి ఎదిలి చొక్కిల డీసిల.

4 జోక బియఁ కెర, ఒత్త రక తిల జమాన్సు మొర గెల రిత జల.

5 గని, జో దేముడుచి దూత జేవ్ దొగుల తేర్బోదల్క దెక, జేవ్క, “తుమ్ బియఁ నాయ్. సిలువతె జేవ్ టీచడ్డె యేసుక తుమ్ చజతసు మెన ఆవ్ జాని.

6 జో ఇన్సె నాయ్. జో సంగిలి రితి, జీవ్ జా ఉట్ట అస్సె. ఈందె, తుమ్ జా కెర, జో తిలి టాన్ దెక కెర,

7 బే బేగి గెచ్చ, చి జోచ సిస్సుల్క ఇసి మెన సంగ. యేసుప్రబు మొర గెచ్చ తా, జీవ్ జా ఉట్ట అస్సె, చి ఈందె, జో తుమ్ చి కంటు అగ్గె గలిలయతె గెతయ్. తుమ్ ఒత్త జోక దెకితె, మెన జోవయింక సంగ దాన.” మెన జేవ్ తేర్బోదల్క జో దూత సంగిలన్.

8 జాచి రిసా, జేవ్ దొగుల బి తెన్, సర్ద తెన్, మెస్సె తెంతో బార్ జా, యేసుచ సిస్సుల్తె గెచ్చ జా కబుర్ బేగి సంగుక మెన, ఉట్ట నిగిల.

9 జేవ్ దొగుల తేర్బోదల్ యేసుచ సిస్సుల్తె గెచ్చుక నిగితె తతికయ్, యేసు జోవయింక వట్ట దస్సుల్ జా, “వెంగిల్ అస్సున్ గే?” మెన సంగిలన్, చి జేవ్ జోచి పాసి జా కెర, జోచ చట్ట దెరన జోకర్తికయ్,

10 యేసు జోవయింక, “బియఁ నాయ్. అంచ సిస్సుల్తె గెచ్చ జోవయింక కిచ్చి మెన సంగ దాన మెలె, గలిలయతె గెచ్చ. ఒత్త అంక దెకితె మెన యేసు తుమ్క సంగ తెద్రయలన్, మెన సంగ దాన” మెన యేసు సంగిలన్.

11 జేవ్ దొగుల తేర్బోదల్ యేసుచ సిస్సుల్తె గెతె తతికయ్, జా మెస్సె రక తిల జమాన్సు సగుమ్ జీన్ యెరూసలేమ్తె గెచ్చ కెర, మెస్సె జర్లు జలిసి ఎత్తి వెల్లెల పూజర్లుక సంగిల.

12 జాకారుమ్ జేవ్ పూజర్లు, అన్సె వెల్లెల మాన్సుల్ తెన్ సబ కెర, లట్టబన, జేవ్ జమాన్సుక లంచుమ్ దా కెర,

13 జోవయింక ఇసి మెన సికడ్డ. “ప్రెజల్క తుమ్ ఇసి మెన: ‘జోవయింక సిస్సుల్ అందరె జా కెర, అమ్ నిజ తతికయ్, జోక ఉక్కుల నిల’ మెన సంగ.

14 ఈంజ ఎత్తి, అదికారిక నేన్తె జెలిగిన, తుమ్ కిచ్చి సిచ్చ నే జతి రితి అమ్ జోక నెంతుమ్ కెరుమ్దే” మెన, యూదుల్చ వెల్లెల మాన్సుల్ పూచి నేడ్డ.

* 28:1 28:1 ఎత్తి, సిస్యర్ యూదుల్క బక్తి కెర్లె నెలవ్ కడ దీసి జయెదె. జా దీసి జోవయింక సబ గెరతె గెచ్చ, దేముడుచి కొణ్ సూన కెర, ఎత్తి, అదికారుమ్ తిలో దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చి కామ్ కెర నాయ్’ మెన జో ఎత్తి, అదికారుమ్ తిలో దేముడు సంగిలినక యూదుల్చ వెల్లెల మాన్సుల్ ప్రెజల్క జాడు వయడ్లి రితి కెర కామ్ నే కెర్చినది రిసా ఒగ్గర్ ఆగ్నల్ అయ్యె ఉచర అస్సి. ఇన్సె, దొస్సి ఎస్సులు కోట్లినక కామ్ మెన నింద కెర్తెతి.

15 జేవ్ వెల్లెల మాన్సుల్ దస్సి సంగితికయ్, జేవ్ జమాన్లు జా లంచుమ్ కడ నా కెర, జోవయింక సంగిలి రితి కెర్ల. ఆజి ఎద కి జా అబద్దుమ్ యూదుల్ నూన నంప కెర్తతి.

యేసు సిస్సుల్ తెన్ అన్నె దస్సుల్ జలిసి కామ్ తియార్లిసి

16 ఎగరజన్ సిస్సుల్ గలిలయతెచి యేసు సంగిలి మెట్టతె ఉట్ట గెల.

17 గెచ్చ, జోక దెక కెర, సెర్ను సేడ జోక జోకర్ల. గని సగుమ్జన్ అన్మానుమ్ జల.

18 తెదోడి, యేసు జోవయించి పాసి జా కెర, “పరలోకుమతె, బూలోకుమతె ఎత్తి అదికారుమ్ అంక దొర్కు జా అన్నె.

19 జాచి రిసా తుమ్ దేసిమ్లు ఎత్తితె గెచ్చ కెర, మాన్సుల్ ఎత్తితెచ ప్రెజల్తె అంక నంపజా సిస్సుల్ జతి రితి కెర, అబ్బోసి జలో దేముడుచి, దేముడు పుత్తున్చి, దేముడుచి నుద్ది తిలి ఆత్మచి నావ్ తెన్, జోవయింక బాప్తిసుమ్ దాస.

20 అన్నె, ఆవ్ తుమ్క కిచ్చొ కిచ్చొ సంగ బోదన కెర అస్సి గే, జా ఎత్తి. జేవ్ నంపజతసక కి సంగ బోదన కెర. ఈందె, ఉగుమ్ పూర్తి జతె ఎదక కి, కెయెక తెయెక తుమ్చి తెన్ ఆవ్ తోడ్ అస్సి” మెన యేసు సిస్సుల్క సంగిలన్.

మార్కు సుబుమ్ కబుర్

మార్కు రెగిడ్డి సుబుమ్ కబుర్

క్రీస్తు రచ్చించువ కెర్తొసా జెతినచి రిసా యోహాను సాట్టు కెర్తొసి
(మత్త 3:1-12; లూకా 3:1-9,15-17; యోహా 1:19-28)

1 *దేముడుచొ పుత్తుసి జలో యేసుక్రీస్తుచి† సుబుమ్ కబుర్ ఇసి మొదొల్ జతయ్.

2 †దేముడుచ కబుర్ సంగిలో యెసయా పూర్ణుమచొచి అత్తి దేముడు రెగిడ్డి రితి జర్గు జలి.

“ఈందె, తుక వాట్ తెయార్ కెరయ్తి రితి, అంచొ బారికి జతో ఎక్కిలోక తుచి కంట అగ్గె తెద్రయిందె”

మెన,

3 అన్నె,

“ఎక్కిలో అంచొ బారికి రితో జా, అంచి అవాడ్ రితో జా, ‘ప్రబుకయ్ వాట్ చెంగిల్ కెరు. జోక వాట్ తిన్నగ కెర్తి రితి తుమ్ ఎత్తిజిన బుద్ది ఆసనా’ మెన, బయిలె ప్రదేసిమి తా కేక్ గల సాట్టు కెరెదె”

మెన, రెగిడ్డి కోడు.

4 ఈంజేమ్ కొడొ కీసి నెరవెర్చువ జల మెలె, బాప్తిసుమ్ దెతో యోహాను మెలోసా బయిలె బార్ జా బులుక దెర కెర, “తుమ్చి పావల్చి రిసా తుమ్ పెట్టి దుకుమ్ జా, పావుమ్ ముల్లి బుద్ది జా, దేముడు తుమ్చి పావుమ్ చెమించువ కెర్తి గుర్తుక, తుమ్ బాప్తిసుమ్ నజన.” మెన సాట్టు కెర్తి తిలన్.

5 యోహాను ఇసి కెర్తి తతికయ్, యూదయ్ మెలి జా ప్రదేసిమ్చ ప్రజల్ ఒగ్గర్ ఒగ్గర్జిన జా ప్రదేసిమ్చి నీయెరూసలేమ్ మెలి వెల్లి పట్టుమ్చ ప్రజల్ ఒగ్గర్ ఒగ్గర్జిన, జోతె జా బయిలె జా కెర, జేమ్ కెర్ల పావల్చి రిసా పెట్టి దుకుమ్ జా, ఎదార్దుమ్ తెన్ ఒప్పున సంగ కెర, యోర్దాను మెంతి ఒత్తచి గడ్డె, జోచి అత్తి బాప్తిసుమ్ నజనతె తిల.

6 యోహాను కీసా తిలో మెలె, ఒంటచ రోమల్చ పాలల్ గలన, చామ్ తెన్ కెర్తి వట్టు కెరంట బందన, డొంగెచి ఒండాల తేల్, చిట్టల్ కతోసా.

7 కిచ్చి మెన యోహాను బోదన కెర్తి తిలన్ మెలె, “అంచి పట్టి అన్నెళ్లొ జెతయ్, అంచి కంట జోక అదికారుమ్ ఒగ్గరి. ఆన్ వంపొ జా జోచ చట్టతెచ జోట్టుతెచ వాలివొ యిప్పుక జలెకు అంక విలువ నాయ్.

8 ఆన్ జలె, పానితె తుమ్క బాప్తిసుమ్ దెతసి, గని అప్పె జెతోసా జలె, దేముడుచి నుద్ది తిలి ఆత్తుతె తుమ్క బాప్తిసుమ్ దెయెదె” మెన సాట్టు కెర్తి తిలన్.

యేసు బాప్తిసుమ్ నజస్సిసి

9 తెదొడి ఏక్ దీసి, యేసు గలిలయ ప్రాంతుమ్తెచి నజరేతు గవ్వె తెంతో ఉట్ట జా కెర, ఒత్త యోర్దాను గడ్డె యోహానుచి అత్తి బాప్తిసుమ్ నజస్సొ.

10 యేసు పాని తెంతో బార్ జలి బేగి యోహాను కిచ్చి దెకిలన్ మెలె, వరలోకుమ్ ఉర్ది జలి, చి దేముడుచి నుద్ది తిలి ఆత్తు, పార్వు పిట్టచి రితి జా, ఉత్త జా యేసుచి ఉప్పిరి టీవొ జలి.

11 అన్నె, “తుయి అంచొ ప్రేమి తిలో పూత్తు. తుచి రిసా అంక సర్లసంతోసుమ్” మెన వరలోకుమ్ తెంతో సంగిలినచి అవాడ్ అయ్లి.

* 1:11:1 అప్పె తెంతో జోక ‘దేముడు’ మెన రెగుడుమ్దె. † 1:11:1 ‘సుబుమ్ కబుర్’ మెలె ఎత్తి అదికారుమ్ తిలో దేముడు దొర్పు కెర్తి రచ్చనచి కోడు. అమ్చ పావల్ జో చెమించువ కెర్తొసి రిసాచి కబుర్. యేసుయ దొర్పు జలో రచ్చించువ కెర్తొసా జలిన్చి కబుర్. జో అర్పితుమ్ జా పావల్ గెచ్చయ్లి రిసా నంపజల మాన్సుల్ వరలోకుమ్చి రాజిమతె బెదితి అవ్కాసుమ్ దొర్పు జలిన్చి కబుర్. ‡ 1:2 1:2 ‘జోచ కబుర్లు సంగిలన్’ మెలె, పూర్ణుమ్ తెంతో కచ్చె ఎత్తి అదికారుమ్ తిలో దేముడు ప్రబు నిసాన, జోచ కబుర్లు మాన్సుల్క జేమ్ సంగితి రిసా, జోచి అత్తుక్కి జోవయింక దెయెదె. § 1:5 1:5 యెరూసలేమ్ పట్టుమ్ యూదుల్క ఒగ్గర్ ముక్కిమ్ జయెదె. కిచ్చి మెలె, ఒత్త దేముడుచి గుడి తయెదె. ఒండి బూలోకుమ్క ఎక్కి ఒత్తయ్ జోవయించి దేముడుచి గుడి తయెదె.

నయతానచి అత్తి యేసు వరిచ్చ జా జిన్నిసి
(మత్త 4:1-17; లూకా 4:1-15)

12 దస్సి జలి బేగి, కో నెంజలి బయలె యేసు గెతి రితి, దేముడుచి సుద్ది తిలి అత్తు జోక వెలవ నిలన్.

13 యేసు ఒత్త దొన్ని విసా దీసల్ తతికయ్, నయతాన్ జోక పాపుమ్ కెరవుక ఉచర్లన్. ఒత్త రితయ్ జంతువుల్ తిల. దేముడుచి దూతల్ జా కెర, యేసుక సావైచన కెర, సుక్కుమ్ కెర్.

14 జా పొది, బాప్తిసుమ్ దెతె తిలో యోహాను జేలి జలో. జో యోహాను జేలి జలి పిమ్మల్, యేసు, దేముడు జలో అబ్బొనిచి సుబుమ్ కబుర్ బోదన కెర కెర, బుల బుల, గలిలయ ప్రాంతుమ్తె అన్నె ఉట్ట అయ్లన్.

15 “దేముడుచి రాజిమ్ ఈంజ లోకుమ్తె జెతిన్క రకితి కాలుమ్ పూర్తి జా అస్సె. దేముడుచి రాజిమ్ పాసి జా అస్సె. జాచి రిసా, తుమ్ కెర్ల పావల్చి రిసా పెట్టి దుకుమ్ జా. పాపుమ్ ముల్లి బుద్ది జా, సుబుమ్ కబుర్ నూన నంపజా” మెన బోదన కెర్ల తిలన్.

చెత్తరజన్ సిస్సుల్క యేసు నిసాన బుకార్లసి

16 యేసు జా గలిలయ ప్రాంతుమ్చి సముద్దుమ్చి గట్టుతె ఇండితె తా, సీమోనుక చి అంద్రెయ మెలో సీమోనుచో బావొన్క దెకిలన్. జేవ్ దొగుల గడ్డె వల గల్లె తిల. జేవ్ మొస్స దెర్లన్.

17 జలె, యేసు జోవయింక దెక, “తుమ్ అంచి పట్టి జా, చి మాస్సుల్ అంక నంపజతి రిసా, జోవయింక తుమ్ అంచితె కడ అన్తి రితి తుమ్క సికడిందె” మెన సంగిలన్.

18 ఇసి సంగ బుకార్ల బేగి, జేవ్, జోవయింప వలల్ ముల దా కెర, జోచి పట్టి గెచ్చ, జో తెన్ బులుక దెర్ల.

19 ఒత్త తెంతో అన్నె ఇదిల్ దూరి గెచ్చ కెర, జెబెదయ మెలో ఎక్కిలోచ దొగుల పుత్తర్సుల్క యేసు దెకిలన్. వెల్లొచి నావ్ యాకోబు, బావొచి నావ్ యోహాను. జేవ్ దొగుల జోవయింప దోనితె వెన తా, చిరి జల వలల్ చెంగిల్ కెర్లె తిల.

20 జోవయింక దెకిల్ బేగి, యేసు జోవయింక బుకార్లన్. జెబెదయ మెలో జోవయించో అబ్బొన్క, జోవయింతె కూలి కెర్లనక కి దోనితె ముల దా, జేవ్ దొగుల బావుడ్లు జోచి సిస్సుల్ జతి రితి యేసుచి పట్టి గెల.

బూతుమ్ దెర్లొ మాస్సుక యేసు చెంగిల్ కెర్లసి

(లూకా 4:31-37)

21 జలె, యేసు, జేవ్ సిస్సుల్ తెన్ కపెర్నహూమ్ పట్టుమ్తె బెద గెల. అన్నెక్ †నెలవ్ కడన్లి దీసి, దేముడుక బక్తి కెర్లె యూదుల్చి ఒత్తచి నబ గెరి గెచ్చ, తెడి వెన కెర, యేసు బోదన కెరుక దెర్లన్.

22 మోసె తెన్ దేముడు దిలి ఆగ్గుల్ సికడ్డన కెర్లె రితి నాయ్, గని దేముడు దిలి అదికారుమ్ తెన్ యేసు సాస్టుమ్ బోదన కెర్లన్, చి ఒత్త తిల మాస్సుల్ బల్ అచారిమ్ జల.

23 తెదొడి జేవ్ తిలి నబగెరి బూతుమ్ దెర్లొ ఎక్కిలో డీసిలో.

24 జో జలె “ఓ నబరెతు గెచ్చొచో యేసుప్రబు, అమ్చి తెన్ తుక కిచ్చొ కామ్? అమ్క పాడ్ కెరుక జా అస్సిన్ గే? తుయి కొన్నొ గే జాని. దేముడుచి †సుద్ది తిలోసా, తుయి.” మెన కేక గలో.

25 యేసు, జలె, “తుళ్లె తా ఇన్నెక ముల దా గో!” మెన జో మాస్సుక దెర్లొ బూతుమ్క గోల కెర్లన్.

26 బూతుమ్ జో మాస్సుక అద్దుర్ కెర దా, గట్టిజ ఒర్నవడ కెర, జోక ముల దిలో.

27 జర్సు జలిసి ఎత్తిజన్ దెక అచారిమ్ జా, “అబ్బొరెయ్య! ఈంజ కెర్లె అదికారుమ్ తిలి బోదన. నొవె రగమ్. బూతల్క కి అదికారుమ్ తెన్ ఈంజో ‘గో!’ మెన సంగిలె, జా నూన, ఈంజో సంగిల్ రితి ఉట్ట గెతతి!” మెన బమ్మ తెన్ ఎక్కిలోక ఎక్కిలో సంగన్.

* 1:15 1:15 మత్తయి మెలో యేసుచ నెస్సుడు రెగిడ్లి రితి, వరలోకుమ్చి రాజిమ్ యేసు తెన్ పాసి జా అయ్లొన్చి కబుర్, ఈంజ. మత్తయి 3:2,3. † 1:21 1:21 ఎత్తి నెస్సుర్ యూదుల్క బక్తి కెర్లె నెలవ్ కడ దీసి జెయదె. జా దీసి జోవయింప నబ గెరెల గెచ్చ, దేముడుచి కొడె నూన కెర, ఎత్తి అదికారుమ్ తిలో దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలో దేముడు సంగిలన్క యూదుల్చ వెల్లెల మాస్సుల్ ప్రెజెల్క జాడు వయడ్లి రితి కెర కామ్ నే కెర్లెచి రిసా ఒగ్గల్ అగ్గల్ అయ్యె ఉచర అస్సి. ఇస్సె, దొన్ని ఎన్నులు కోడ్లిన్క ‘కామ్’ మెన నింద కెర్లె. † 1:24 1:24 దేముడు తెద్రయలో క్రిస్సు, రచ్చింపవ కెర్లెసా

28 జా దీని తెంతో, జా ఒండి గలిలయ ప్రాంతమేతె, కేనె ఒత్త, యేసుచి రిసా ఎత్తిజన్ నూన్ల.

29 బూతుమ్ దెర్లొసాక చెంగిల్ కెర్లె బేగి, నబ గెరి తెంతో బార్ జా ముల కెర, యాకోబు చి యోహాను తెన్ యేసు బెద గెచ్చ, సీమోను చి అందెయ చి గెరి గెల.

30 జలె, గెరి వెసిలె, సీమోనుచి అత్తన్ జొర్జొ సేడ నిజ అస్సె. దస్సి అస్సె మెన దెక కెర, సిస్సుల్ యేసుక సంగిల.

31 యేసు జాచి పాసి జా కెర, ఆతు దెర ఉట్టయ్తెకయ్, జొర్జొ జాక ముల దిలి, చి చెంగిల్ జలి, జా మంతిరి గెరి తిలసక సవెచన ఎత్తి కెర్లె.

ఒగ్గర్జన్ బాద తిలసక యేసు చెంగిల్ కెర్లెసి

32 జా దీని సాంజ్ జతికయ్, ఒగ్గర్ ఒగ్గర్జన్ జబ్బుల్ తిలసక కి, బూతుమ్ దెర్లొసక కి యేసుతె ప్రెజల్ కడ ఆన్ల.

33 జా పట్టుమ్చ ప్రెజల్ ఎత్తిజన్ జా గెర్చి వీదె బెర జా, గుమ్ముమె టీవో జా తిల.

34 జోవయింతె రగరగాల్చ జబ్బుల్ తిల మాన్సుల్క యేసు చెంగిల్ కెర్లెన్, ఒగ్గర్ బూతల్క ఉడడ గెలన్. గని జో కొన్స గే బూతల్ చినిలి రిసా, జా గుట్టు బార్ కెర్తు నాయ్ మెన, జేవ్ బూతల్ లట్టబుక సెలవ్ నే దిలో.

35 అన్యెక్ దీని, రాతి నే పాయితె ఒగ్గర్ అందర్ తత్తయి, యేసు ఉట్ట కెర బార్ జా, కో నెంజలి టాన్తె గెచ్చ, ప్రార్లన కెరుక దెర్లెన్.

36 ప్రార్లన కెర్లె తతికయ్, సీమోను, జో తెన్ తిలస కి, యేసుచి పట్టి జా చజన,

37 జోతె పావ కెర, “ఇన్యెచ మాన్సుల్ ఎత్తిజన్ తుక చజతతి” మెన యేసుక సంగితికయ్,

38 జో, “జోమ్మ, ఈంజ ప్రాంతమేతెచ అన్సె గవ్వెలె గెచ్చుమ, ఆవ్ ఒత్త కి బోదన కెర్లి రిసా. జాకయ్ బార్ జలయ్!” మెన యేసు సంగిలన్.

39 జలె, జా గలిలయ ప్రాంతమే ఎత్తితె బుల బుల, ఒత్తచ యూదుల్చ నబ గెరలె బోదన కెర్లె తిలన్, చి మాన్సుల్క దెర్లొ బూతల్క ఉడడ గెర్లె తిలన్.

వెల్లి రోగిక యేసు చెంగిల్ కెర్లెసి

(మత్త 8:1-4; లూకా 5:12-16)

40 జా పొది, వెల్లి రోగి ఎక్కిలో యేసుతె జా కెర, నెర్నూ సేడ, “తుక ఇస్టుమ్ తిలె, తుయి అంక చెంగిల్ కెర నుద్ది కెరుక తెర్లి.” మెన బతిమాల్పా జా జొకర్లికయ్,

41 యేసు కన్యారుమ్ జా, ఆతు చంప కెర, జోక చడ, “అంక ఇస్టుమి. తుయి చెంగిల్ జా నుద్ది జా” మెన సంగిలన్.

42 వెల్లి రోగుమ్ బేగి జో మాన్సుక ముల దిలి, చి చెంగిల్ జా నుద్ది జలన్.

43-44 తెదొడి యేసు జోక, “జర్లు జలిసిచి రిసా కక్క, నంగు నాయ్, గని దేముడుచి గుడితె గెచ్చ, ఒత్త సేవ కెర్లె పూజితె గెచ్చ, తుయి చెంగిల్ జలిసి జోక దెకవ, తుయి చెంగిల్ జానీ నుద్ది జలిసి ఎత్తిజన్క రుజ్జు దెకయ్తి రితి, మోసి పూర్గుమ్చొ సంగిలి కానుక దేసు” మెన యేసు ఆత్ర దా జొక సంగిలన్.

45 గని, “కేనె ఒత్త నంగు నాయ్” మెన యేసు సంగ తిలె కి, జో మాన్సు బార్ జా ఉట్ట గెచ్చ కేనె ఒత్త సంగుక దెర్లెన్. జర్లు జలిసి జో దస్సి ఎత్తిజన్క నూనయ్తికయ్, “కేన్ పట్టుమ్తె ఇస్టుమ్ అయిలి రితి ఎదార్లమ్ పెసుక నెంజె” మెన, యేసు జా బయిలె తాఁ గెలో. ఒత్త జా బయిలె తతికయ్, చెత్తర్ దిక్కుల్ తెంతో కి, ప్రెజల్ జోతె బెర గెతె తిల.

§ 1:43-44 1:43-44 వెల్లి రోగిచి వెల్లి రోగుమ్ గెలి, ‘నుద్ది జలన్’ మెన తెదొడెచ యూదుల్ సంగితె తిల. కిచ్చక మెలి, ఏక మాన్సుక వెల్లి రోగుమ్ తిల, ‘జో గవ్వె తంక గార్’ మెలి రితి, ‘జోచి జబ్బు డేవ్ అమకయ్ దెరెద’ మెలి రితి బియ: కెర గవ్వె తెంతో ఉడడల. దేముడుచి దయచి రిసా వెల్లి రోగుమ్ పూర్తి గెలి, ‘నుద్ది జల’ మెన గవ్వె అన్సె పెనడుల.

2

ఉట్టుక నెత్తిర్లో రోగిక యేసు చెంగిల్ కెర్లన్
(మత్త 9:1-8; లూకా 5:17-26)

1 సగుమ్ దీసల్ గెలి పడ్డె, యేసు కపెర్నూహామ్ పట్టుమ్తె అన్నె బుల జెతికయ్, జో 'గెరి అస్స' మెన నూన కెర,

2 ఒగ్గర్ ఒగ్గర్జిన్ జనాబ్ జోతె బెర అయ్ల. బెర అయ్లి రిసా, జోచి గదితె కి, గుమ్ముమె కి, అన్నె కక్కటాన్ నాయ్.

జలె, యేసు జనాబ్ క దేముడుచి* బోదన కెరై తతికయ్,

3 వాతుమ్ జొర్లో తెన్ తిలోసా ఉట్టుక నెత్తిర్లో మాన్సు ఎక్కిలోక, చెత్తర్జిన్ యేసు తిలిన్తె కడ అన్ల. జో మాన్సుక కడ అన్లనతె తిల చెత్తర్జిన్ జోక జోచి అంతుర్నొ తెన్ వయ్ ఆన తిల.

4 జలె, జో రోగిక యేసుతె పాసి కడ ఆనుక చజిలె కి, బెర్ల జనాబ్చి రిసా నెత్తిర్. జోచి పాసి జెంక నెత్తిర్లి రిసా, జో తిలి గదిచి ఉప్పిర్ ఒర్నెచి వెల్లె బొరో కెర, జో ఎంగ్ల తిలి అంతుర్నొ తెన్ జో రోగిక జా బొరో వాట్ ఉత్తవ దా, యేసుచి పాసిక పాచడ్ల.

5 జలె, 'కడ ఆన ఉత్తవ తిల జేవ్ మాన్సుల్ నంప తెన్ అస్తి' మెన యేసు రుజ్జు దెక కెర, ఉట్టుక నెత్తిర్లో జో రోగిక దెక, "ఓ వూత్తు, తుచి పాపల్ చెమించువ జా అస్తి" మెన సంగిలన్.

6 జలె, మోసె తెన్ దేముడు దిలి ఆగ్నల్ సికడ్డన సగుమ్జిన్ ఒత్త వెన అస్తి. యేసు సంగిలిసి జేవ్ నూన కెర బమ్మ జా,

7 "ఈంజొ మాన్సు కీసా జా లట్టబ్తయ్! ఇసి లట్టబ దేముడుచి విలువ కడ పాపుమ్ కెర్లయ్! దేముడు ఎక్కిలోక పిట్టవ, కో కి పాపల్ చెమించువ కెరుక నెత్తిర్!" మెన, జోవయించి వెట్టి ఉచరన్ల.

8 జోవయించి వెట్టి తిలి అన్యూనుమ్ యేసు జోచి అత్తతె బేగి చిన కెర, "తుమ్చి వెట్టి కిచ్చొక దస్సి అన్యూనుమ్ తియంతన?"

9 ఉట్టుక నెత్తిర్లో ఈంజొ మాన్సుక 'తుచి పాపల్ చెమించువ జా అస్తి' మెన సంగుక సుల్లు గే, 'ఉట్టు, తుచి అంతుర్నొ వయన ఇండు' మెనుక సుల్లు గే?

10 జలె, †మాన్సు జా జెర్నన్ అయ్లయ్ అంక, ఈంజయ్ లోకుమ్తె కి పాపల్ చెమించువ కెర్లి అదికారుమ్ అస్సి మెన రుజ్జు దెకయిందె, మెన జేవ్క సంగ కెర, ఉట్టుక నెత్తిర్లో జో మాన్సుక అన్నె దెక కెర.

11 'అల్లె, తుయ ఉట్ట, తుచి అంతుర్నొ వయన ఇండ గెరి గో, మెన తుక ఆవ్ సంగితసి!' " మెన యేసు సంగిలన్.

12 బేగి, జో మాన్సు ఉట్ట కెర, జోచి అంతుర్నొ ఉక్కుల వయన, జేవ్ ఎత్తిజిన్చి మొక్కె ఇండుక దెర, బార్ జా కెర, ఉట్ట గెలన్. ఇసి జర్లు జలి రిసా, ఒత్త బెర తిలన ఎత్తిజిన్ ఆచారిమ్ జా, "ఇన కమె అమ్ కెయ్యు దెకుక నాయ్. ఆజి దెకిలమ్" మెన, దేముడుక గవరుమ్ సంగిల.

లేవీ మెలో సిస్టు నజీతోసాక యేసు బుకార్లిసి
(మత్త 9:9-13; లూకా 5:27-32)

13 యేసు అన్నె బార్ జా, ‡సముద్రుమ్చి జా గాడుచి ఒడ్డుతెచి వాట్ గెలన్. ఒత్త ఒగ్గర్జిన్ జనాబ్ జోతె బెర జెతికయ్, జోవయింక బోదన కెరుక దెర్లన్. బోదన కెర కెర,

* 2:2 2:2 ఇన్లెక్ 'సుబుమ్ కబుర్' కి మెనుక జయెదె. † 2:10 2:10 'మాన్సు జా జెర్నన్ అయ్లొసా' మెన పొర్ని ప్రమానుమ్తె రెగిడ్డె తెంతో జా కోడు కచి రిసా నావ్ తయెదె మెలె ఎత్తి అదికారుమ్ తిలో దేముడు 'తెర్లయిందె' మెన సంగ తిలో 'క్రీస్తు' మెలో దొర్లు జలె రచ్చించువ కెర్లొసాక ఈంజ అన్లెక్ నావ్ తయెదె; జా నావ్చి అర్దుమ్ వండితుల్ కెరెన్లెకి, యేసుక 'జొయ్య' మెన ఒప్పనుక నెన ఒగ్గర్ అల్లెర కెరుల. ‡ 2:13 2:13 ఇత్తల్ జా గాడు సముద్రుమ్చి రితి రూదు తయెదె.

14 అన్నె ఇదీల్ దూరి గెలె, ⁵ సిస్టు నజీతి గెరి ఒత్త వట్టె అస్సె. జా గెరితె అల్పాయి మెలో ఎక్కిలోచో లేవీ మెలో పుత్తుసి ఎక్కిలో వెన అస్సె. యేసు జోక దెక కెరె, “అంచి పట్టి జా, అంచో సిస్సుడు జా” మెన జోక బుకార్లన్. బుకార్లి బేగి, జో ఉట్ట, యేసుచి పట్టి గెలన్.

15 జలె, లేవీయింతె యేసు అన్నిమ్ కంక గెలన్. జోతె అన్నిమ్ కంక మెన యేసు సిస్సుల్ తెన్ వెన తతికయ్, జో తెన్ జా దేసిమ్చ నస్కారుమ్ కెర్ల ఒగ్గరజిన్ బెద వెన తిల. కొన్న మెలె, సిస్టు నజీతన కి, నీతి రితి నే కెర్తన కి నగుమ్జిన్, దన మాస్సుల్ ఒగ్గరజిన్ యేసుచి పట్టి గెచ్చ ఒత్త తిల.

16 జలె, *పరిసయ్యుల్ తెన్ బెదిత మోసే తెన్ దేముడు దిలి ఆగ్గుల్ సికడ్డన నగుమ్జిన్ తిల. ‘సిస్టు నజీతన తెన్, నీతి నెంజిలన తెన్ యేసు వెన కతయ్’ మెన జేవ్ మోసే తెన్ దేముడు దిలి ఆగ్గుల్ సికడ్డన దెక కెరె, “సిస్టు నజీతన తెన్, పాపుమ్ సుదల్ తెన్ ఈజో కిచ్చొక కతయ్?” మెన యేసుచి సిస్సుల్క పుసీల.

17 జేవ్ వెల్లెల మాస్సుల్ పుసీలిసి నూన కెరె, యేసు జోవయింక దెక, “జబ్బు తెన్ అస్సుమ్ మెన చిన్లనక డాక్టర్ అవ్నరుమ్, గని జబ్బు నెంజిలనక డాక్టర్ అవ్నరుమ్ నాయ్. జలె, పాపుమ్ సుదల్ ఆమ్ మెన చిన్తనకయ్ బుకార్క ఆవ్ అయలయ్, గని ఆమ్ పున్నిమ్ సుదల్ మెన ఉచరంతనక బుకార్క నాయ్” మెన యేసు సంగిలన్.

చువ్వె తతిన్చి రిసా ప్రెజల్ యేసుక పుసీలిసి
(మత్త 9:14-17; లూకా 5:33-39)

18 బాప్తిసుమ్ దెతె తిలో యోహానుచి సిస్సుల్ కి, పరిసయ్యుల్ కి చువ్వె తతికయ్, ప్రెజల్ నగుమ్జిన్ యేసుతె జా కెరె, “యోహానుచి సిస్సుల్, పరిసయ్యుల్చి సిస్సుల్, చువ్వె తంక అలవాట్, గని తుచి సిస్సుల్ చువ్వె తత్తి నాయ్. కిచ్చొక?” మెన జోక పుసీల.

19 ఇసి పుసీతికయ్, యేసు జోవయింక, “కేన్ పెండ్లితె, జోవయించి నెడిమి పెండ్లిఉబేడో తిలె పొది పెండ్లి విందుతె బుకార్లన చువ్వె తవుల గే? నాయ్! జలె, పెండ్లిఉబేడో జోవయించి నెడిమి తతి ఎదిలి నెంపుక జేవ్ చువ్వె తంక బెదె నాయ్. నర్ల తెన్ తవుల.

20 జలె, పెండ్లిఉబేడోచి పచ్చెన జలనచి నెడిమి తెంతో జోక దెర వేరతె కడ నిలె, జేవ్ మాస్సుల్ ఏడ ఏడ చువ్వె తవుల.

21 “అన్నె, పొర్ని పాలుమ్ చిరి జా తిలెగిన, మాసికచి రిసా నే కేడయ్లి నే కేడ్డె నోవి గండ కో జాన్లల మాస్సుల్ గల్లి నాయ్. ఏక్ వేల, దస్సె, తొలితొ నే కేడ్డె నే కేడయ్తె గల తిలెగిన, జా ఒండి పాలుమ్ కేడ్డె, జా మాసిక కడెదే. మాస్సు జా పాలుమ్ గలనై, అప్పు, జలి పొర్ని బట్ట నోవి బట్టచి మాసిక బెదయ్లి కుటు సాడి చిరి జయెదె, చి అగ్గెచి కంట వెల్లి బోరో జయెదె.

22 “పిమ్మట్, పొర్నిచి కాయ్ తెన్ ఒత్త నోవి ద్రాచ రస్సుమ్ సువితి నాయ్. కిచ్చొక మెలె, జా కాయ్ పొర్ని జలి రిసా, జాచితె నోవి ద్రాచ రస్సుమ్ సువిలెగిన, జా పులుక నెతిరి రిసా, జా రస్సుమ్ పొంగుచ జలె పొది జా కాయ్ పుట్టెదె, జా రస్సుమ్ సూయె జయెదె. దస్సె, కాయ్, రస్సుమ్, దొన్ని కి పాడె జా గెచ్చుల. జాకయ్, నోవి ద్రాచ రస్సుమ్క నోవి కయల్ అవ్నరుమ్.” మెన జోక పుసీతి మాస్సుల్క యేసు సంగిలన్.

పండితుల్ యేసుక గోల కెర్లిసి
(మత్త 12:1-8; లూకా 6:1-5)

§ 2:14 2:14 ‘సిస్టు’ మెలె, జా దేసిమ్క ఆక్రమించువ కెర్లి రోమ్ దేసిమ్చి వాట డబ్బుల్. జా ప్రబతుమ్చి నావ్ తెన్ సిస్టు నజీతనక యూదల్ నిస్కారుమ్ దెకుల; వేర ప్రబతుమ్చి నావ్ తెన్ జా డబ్బుల్ నజీతతిచి రిసా కి, జేవ్ కెర్ల మోసిమ్లచి రిసా కి. * 2:16 పరిసయ్యుల్, మోసి తెన్ దేముడు దిలి ఆగ్గుల్ సికడ్డన, నర్హాకయ్యులె యూదుల్క ముక్కిమ్చ వెల్లెల మాస్సుల్ జవుల. ఎత్తిక వెల్లెల చూజ్ల తెన్ యూదుల్చి వెల్లి నబతె వెనుల. జేవ్ పొదులె ముక్కిమ్క జెచ్చె ఎత్తి అదికారుమ్ తిలో దేముడుచి నిదాసుమ్ ప్రెజల్క సికడుక.

23 జా పొదులె, †ఏక్ సెలవ్ కడన్లె దీసి, యేసుచి సిస్సుల్ పంటో పికిలి బుయి వాట్ గెతె తిల. వాట్ సాడి పికిలి పంటోచ ఎన్నులు దొన్సి జోచ సిస్సుల్ కోడ కయల.

24 జేవ్ సిస్సుల్ ఎన్నులు కోడ్లెసి, జలె, పరినయ్యల్ సగుమ్జిన దెక కెర, ‘జేవ్ దస్సి కెర్లెసి కామ్ కెర్లె రితి జతయ్’ మెన, “ఈందె, సెలవ్ కడన్లె దీసి కెరుక నాయిమ్ నెంజిలిసి కిచ్చొక తుచ సిస్సుల్ కెర్లెతి?” మెన యేసుక గోల కెర్లె.

25 యేసు జోవయింక, “*దావీదు పూర్లుమ్చో జో తెన్ తిలన, చూ కెర్లెకయ్ కిచ్చొ కెర్లె గే తుమ్ కెయ నదు కెర్లు నాయ్ గే?

26 మెలె, అబ్బొతారు మెలోసా ఎత్తిక వెల్లో పూజరి జా తిలి కాలుమ్, దేముడుచి గుడి తెడి దావీదు పెన కెర, దేముడుచి గుడిచ పూజర్లు దేముడుక అర్పితుమ్ దిల పోడియె వెంటన, పూజర్లు కంక జయెదె గని అన్యె కో కి కంక నెంజె మెన జాన్లె కి, జో తెన్ తిలనక వంట దా, జోవయితెన్ కయల!” మెన జేవ్ పరినయ్యల్క యేసు సంగిలన్. జోవయింక అన్యె.

27 “సెలవ్ కడన్లె దీసి మాన్సుల్క ఒగ్గర్ ఏలుప కెర్తు మెన నాయ్, గని మాన్సుల్క ‘చెంగిల్ తత్తు’ మెనయ్ దేముడు సెలవ్ కడన్లె దీసి దిలన్.

28 జలె, సెలవ్ కడన్లె దీసిచి ఉప్పిరి ఆవ్ మాన్సు జా జెర్కున్ అయ్లోసాక అదికారుమ్ అన్యె” మెన పరినయ్యల్క యేసు జబాబ్ దిలన్.

3

అతు లంబ గెలో మాన్సుక యేసు చెంగిల్ కెర్లెసి (మత్త 12:9-14; లూకా 6:6-11)

1 తెదొడి జా కపెర్నహూమ్ పట్టుమ్తె యూదుల్చి నబ గెరి యేసు అన్యె గెచ్చ, పెన, కిచ్చొ దెకిలన్ మెలె, అతు లంబ గెలోసా ఎక్కిలో ఒత్త అన్యె.

2 జలె, ‘బక్కి కెర్లె సెలవ్ కడన్లె దీసి యేసు జో మాన్సుక చెంగిల్ కెరెదె గే నాయ్ గే’ మెన దెకుక మెన, వెల్లెల మాన్సుల్ రకితె అన్యె. ‘జోక చెంగిల్ కెర్లెగిన, సెలవ్ కడన్లె దీసి కామ్ కెర్లె రితి జయెదె, చి యేసుక నేరిమ్ వయడుక జయెదె’ మెన ఉచర అన్యె.

3 జేవ్ వెల్లెల మాన్సుల్ దస్సి రకితె తతికయ్, యేసు జో అతు లంబిలోసాక దెక, “ఇత్తల్ జే!” మెన సంగ కెర,

4 జేవ్ వెల్లెల మాన్సుల్క దెక, “*సెలవ్ కడన్లె దీసి ఎక్కిలోక చెంగిల్ కెరుక నాయిమ్ గే, గాం కెరుక నాయిమ్ గే? జోచి ప్రానుమ్ రచ్చించువ కెరుక గే, జోక మార గెలుక చెంగిల్ కి?” మెన జోవయింక పుసిలన్. గని జేవ్ తుక్కె తిల.

5 జోవయించి మెన్సుతె ఇదిల్ కన్యూర్మ్ కి జతి నాయ్, చి రిసా యేసు దుకుమ్ జా, కోప్పమ్ తెన్ ఒత్త తిలనక దెక కెర, జో మాన్సుక అన్యె దెక, “తుచో అతు చంపొ కెరు” మెన జోక సంగితికయ్, జో అతు చంపొ కెర్లెన్, చి జా అతు చెంగిల్ జలి.

6 యేసు కెర్లెసి దెక కెర, పరినయ్యల్ బార్ జా, హేరోదు పచ్చెన జతన తెన్ నబ కెర, “జోక కీసి మారుమ?” మెన కుట్ర ఉచర్లె.

ఒగ్గర్జిన మాన్సుల్ యేసుతె జా కెర బెర తిలిసి

† 2:23 2:23 ఎత్తి సెన్సర్ల యూదుల్క బక్కి కెర్లె సెలవ్ కడ దీసి జయెదె. జా దీసి జోవయించ నబ గెరెలె గెచ్చ, దేముడుచి కొడె సూన కెర, ఎత్తి అదికారుమ్ తిలో దేముడుక బక్కి కెరల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలో దేముడు సంగిలిన్క యూదుల్చ వెల్లెల మాన్సుల్ ప్రజల్క జాడు వయడ్లి రితి కెర కామ్ నే కెర్లెచి రిసా ఒగ్గర్ అగ్గల్ అయ్యె ఉచర అన్యె. ఇన్యె దొన్సి ఎన్నులు కోడ్లెన్క ‘కామ్’ మెన నింద కెర్లెతి. † 2:25 2:25 దావీదు ఒగ్గర్ పూర్లుమ్ యూదుల్క రాసో జా తిలన్.

యేసు జోచి సెకుమ్తె జెర్లెలన్. అబ్బొహమ్ తెన్, అన్యె దొగ్గుల తీగ్గ తెన్, దావిడుక ‘ముక్కిమ్చో పూర్లుమ్చో’ మెనుల. * 3:4 3:4 ఎత్తి సెన్సర్ల యూదుల్క బక్కి కెర్లె సెలవ్ కడ దీసి జయెదె. జా దీసి జోవయించ నబ గెరెలె గెచ్చ, దేముడుచి కొడె సూన కెర, ఎత్తి అదికారుమ్ తిలో దేముడుక బక్కి కెరల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలో దేముడు సంగిలిన్క యూదుల్చ వెల్లెల మాన్సుల్ ప్రజల్క జాడు వయడ్లి రితి కెర కామ్ నే కెర్లెచి రిసా ఒగ్గర్ అగ్గల్ అయ్యె ఉచర అన్యె. ఇన్యె దొన్సి ఎన్నులు కోడ్లెన్క ‘కామ్’ మెన నింద కెర్లెతి.

7 యేసు బారీ జా కెర, జోవ సిస్సుల్ తెన్ జా గలిలయ ప్రాంతుమ్చి సముద్రమ్ గాడుచి ఒడ్డుతె గెలన్. ఒత్తవ ప్రెజల్ ఒగ్గరజన్ జనాబ్ జోచి వట్టి గెల. పిమ్మట్, జో కెర్ల కమెచి రిసా సూన తా, యూదయ ప్రదేసిమ్ తెంతో,

8 యెరూసలేమ్ పట్టుమ్ తెంతో, ఇదుమయ ప్రాంతుమ్ తెంతో, యోర్దాను గాడు ఒత్తల్తో తెంతో, పడ్డో సిదోనుచి తూరు మెల వట్టల్చి ప్రాంతుమ్ తెంతో, దూరదూరిచ మాన్సుల్ ఒగ్గర ఒగ్గరజన్ జనాబ్ జా కెర, ఒత్త యేసుతె జా బెర్ల.

9 జలె, “ఈంది, ప్రెజల్ వెలవెలి జతతి. ఇసి జలె, దస్సి ప్రమాదుమ్ నే జతి రిసా, దోని ఏక్ క సంగ తా” మెన, సిస్సుల్ క సంగెలన్.

10 కిచ్చోక మెల ప్రెజల్తె ఒగ్గర ఒగ్గరజన్ చ జోర్లొల్ గట్టక యేసు గెచ్చయతికయ్, “జోక చడిలె జలెకు చెంగెల్ జమదె” మెన, అన్నె జబ్బు తిలస ఎత్తిజన్, జోక చడుక మెన వెలవెలి జత తిల.

11 పిమ్మట్ జా పొది అన్నె కిచ్చో జర్గు జత తిలి మెలె, బూతల్ యేసుక దెకిలె, జేవ్ దెర్లక సెర్చు సేడవ దా, “దేముడుచో పుత్తుసి, తుయి” మెన జేవ్ దెర్లనచి చోడివాచో బూతల్ యేసుచి రిసా కేకుల్ గల్తె తిల.

12 గని, “అవ్ కొన్నె గే తుమ్ కక్క కి సంగుక నాయ్” మెన బూతల్ క యేసు ఆడ్ర దిలన్.

బారజన్ సిస్సుల్ క యేసు అదికారుమ్ దిలిసి

13 తెదొడి యేసు ఏక్ మెట్టయ్ వెగ గెచ్చ, జో ఇస్టుమ్ జల మాన్సుల్ క బుకార్లన్, చి జోతె అయల.

14-15 యేసు బారజన్ బారికుల్ క నిసాన, “తుమ్ అంచి తెన్ తత్తి రిసా తుమ్ క అవ్ నిసాన అస్సి. పడ్డో, అంచి నావ్ తెన్ తుమ్ బోదన కెర్తి రిసా, అంచి నావ్ తెన్ బూతల్ క తుమ్ ఉదడ్డి రిసా తుమ్ క అవ్ తెద్రయ్ తసి” మెన, జోవయింక అదికారుమ్ దిలన్.

16 జో నిసాన అదికారుమ్ దిల బారజన్ కొన్నె మెలె, ఎక్కిలో సీమోసు మెలోసా, జోక ‘పేతురు’ మెన యేసు పడ్డో ఆసిమ్ నావ్ తిలన్.

17 జెబెదయి మెలో ఎక్కిలోచ దొగుల పుత్తర్లులు, మెలె, యాకోబు చి యోహాను మెలో బావోసి. ‘ఉర్బుల్ జల మాన్సుల్’ మెలి అద్దుమ్ తెన్ ‘బోయనేర్గెస్’ మెన జేవ్ దొగులక యేసు ఆసిమ్ నావ్ దిలన్.

18 పిమ్మట్, అన్నె కొన్నె మెలె, అంద్రెయ, పిలిప్, బర్తోలోమయి, మత్తయి, తోమా. పడ్డో అల్పయి మెలో ఎక్కిలోచో యాకోబు మెలో పుత్తుసి, పడ్డో తద్దయి, †కనానుచో జలో సీమాను మెలో అన్నెక్కో.

19 అన్నె కొన్నె మెలె, ఇస్సరియోతు మెలి గవ్వెచో యూదా మెలోసా. జో పడ్డో విరోదుమ్ సుదల్చి అత్తి యేసుక దెర దిలోసా. తెదొడి యేసు కవెర్నహూమ్ గెరి గెలన్.

20 యేసు గెరి గెతికయ్, ఒగ్గరజన్ జనాబ్ జోతె అన్నె బెర్ల. జేవ్ ఒత్త బెర్లి రిసా, అన్నిమ్ కంక కి యేసుక నెలవ్ నాయ్.

21 దస్సి యేసు జోచి బోదన జోవ కమె కెరుక ఆన జా ఎద్గెరె పుండె నాయ్ చి రిసా “వెర్రి జా తయెదె” మెన మాన్సుల్ సంగెత్ తిలిసి సూన కెర, జోక దెర, గెరి కడ నెంక మెన, జోచి కుటుంబుమ్ చ బారీ జల.

పండితుల్ యేసుక నింద కెర దూసుప కెర్తిసి

22 జా మదెనె, యెరూసలేమ్ పట్టుమ్ తెంతో జా తిల, మోసి తెన్ దేముడు దిలి ఆగ్గుల్ సేకడ్డన, యేసు ఉత్తిర్లిన్ తె అయల. జా కెర, యేసుచి రిసా “ ‘బయెల్లెబూల్’ మెలో జో వెల్లో బూతుమ్ జోక దెర అస్సె”, “బూతల్ క రీరాస్ జలోచి నావ్ తెన్ ఈంజో బూతల్ క ఉదడ్డయ్” మెన సంగెత్ తిల.

23 జలె, యేసు జోవయింక పాసి బుకారా కెర టాలివో కెర ఇసి మెలన్. “సయ్తాన్ కిసి జా జోక జోయ్యి ఉదడెది! బెదె నాయ్!

24 మెలె, కేన్ ఇప్పన్ రాజిమచ ప్రెజల్ జలెకు విరోదుమ్ కెరన వర్చ వర్చ జా జోవయింక జెవ్వె యుద్దుమ్ కెరన్లె, జా రాజిమ్ బీవో జంక నెత్త నానినుమ్ జా గెచ్చెదె.

† 3:18 3:18 ‘కనానుడు జలో సీమాను’ మెన రెర్ల అస్సె. సొత దేనిమ్ ఏలవ కెరంత ఆన తిల ఒత్తవ మాన్సుల్ క ‘కనానులు’ మెన ఆసిమ్ నావ్ తయెదె, బెర్లి. ‡ 3:21 3:21 జోచి నజరేతు గవ్వె తెంతో బారీ జల. యేసు కవెర్నహూమ్ పట్టుమ్ తె తిలన్. § 3:22 3:22 ‘బూతల్ క రాస్ జలోసా’ మెలె, సయ్తాన్.

25 పడ్డా, కేన్ గెర్చవ జలెకు జోవయింక జెవ్వి విరోదుమ్ కెరన్లె, వర్చ వర్చ జా గెచ్చుల, చి కట్టు పిట్టవన పాడ జా గెచ్చుల.

26 జలె, దస్సి, నయ్తాన్ జోక జోయ్యి విరోదుమ్ జలి రితి జా జోచ సొంత సేవ కెర్తనక ఉదడుక బెదె నాయ్. జో దస్సి జోక జోయ్యి విరోదుమ్ జలెగిన, జోచి రాజిమ్ టీవో జయె నాయ్, నాసెనుమ్ జా గెచ్చెదె.

27 “గని, కేన్ గెర్చవ్ ఎజోమాని బలమ్ నుదో జలె, జోకయ్ తొలితొ బందిలెకయ్, జోచి గెరి పెన జోచి సామన్ చోరుక జయెదె. గని జోక తొలితొ బంద తిలె, జోచి గెర్చి ఎత్తి చోర గెలుక జయెదె.

28 “ముక్కిమ్క తుమ్క ఆవ్ గట్టిజ సంగితసి. కిచ్చొ మెలె, ఎక్కిక పిట్టవ, మాన్సుల్ కెర్త పాపల్ దూసెనల్ ఎత్తి జోవయింక చెమించువ కెరుక జయెదె.

29 గని, దేముడుచి నుద్ది తిలి అత్తుక కో దూసువ కెరుల గే, జెవ్వి కెయ్యక కి చెమించువ జతి నాయ్. జోవయించి పాపుమ్ కెయ్యక తెయ్యక తయెదె, చి నాసెనుమ్తె గెచ్చుల” మెన జేవ్ క యేసు సంగిలన్.

30 కిచ్చొక మెలె, యేసుచి నుద్ది తిలి అత్తు జలెకి, ‘జోక నయ్తాన్చి అత్తు అన్న’ మెలి రితి, “జోక బాతుమ్ దెర అన్న” మెన జేవ్ దూసువ కెర తిల.

కొన్న యేసుక కుటుంబుమ్ జవుల గే జోయ్యి సంగిలిసి
(మత్త 12:46-50; లూకా 8:19-21)

31 తెదోడి, యేసుచి అయ్యసి, బావుడ్లులు, జో తిలిన్తె పావ కెర, వీదె టీవో జా కెర, “అమ్ జా అన్నుమ్. బార్ జవున్” మెన సంగ తెర్తయల.

32 జలె, యేసుచి నుట్టునంత ఒగ్గరజిన్ జనాబ్ వెన తిల. జేవ్ జలె, జోక “ఈందె, అయ్యది చి తుచ బావుడ్లు జా కెర, వీదె టీవో జా కెర తుక బుకార్తతి” మెన సంగ దిల.

33 యేసు జోక కిచ్చొ జబాబ్ దిలన్ మెలె, “కొన్న అంక అయ్య బావుడ్లు జవుల గే జాన్ను గె?” మెన సంగ,

34 జోచి నుట్టునంత వెన తిల వైజల్ క దెక, జోవయింక దెకవ, “ఈందె, అంచి అయ్య, అంచ బావుడ్లు!

35 దేముడుచి ఇస్టుమ్ రితి కో కెరుల గే, జెవ్వి అంక బావో, బేని, అయ్య జవుల” మెన సికడ్లన్.

4

టాలివో సంగ యేసు బోదన కెర్తన్
(మత్త 13:1-9; లూకా 8:4-8)

1 యేసు సముద్రుమ్ గాడుచి ఒడ్డుతె అన్నె గెచ్చు కెర, అన్నె బోదన కెరుక దెర్లన్, గని ఒగ్గరజిన్ జనాబ్ జోచి నుట్టునంత బెర వెలవెలి జతె తిలి రిసా, యేసు ఏక్ దోనితె వెగ వెన, ఒడ్డు తెంతో ఇదిల్ దూరి గెలన్. బెర తిల మాన్సుల్ ఎత్తి జిన్ జా ఒడ్డుతె టీవో జా తిల.

2 యేసు జోవయింక కిచ్చొ కిచ్చొ సికడ్డి రిసా, ఒగ్గర టాలివో సంగ బోదన కెరుక దెర్లన్.

బుయ్యె ఉంపిలి బీక టాలి

జో జోవయింక బోదన కెరుక,

3 “ఈందె, తుమ్ నూస! ఉంపితోసా ఎక్కిలో, బీ ఉంపుక బార్ జలన్.

4 జో ఉంపితె తతికయ్, సగుమ్ బీ బయిలె వాట్ పక్కయ్ సెడ్డికయ్, పిట్టల్ ఉత్త జా కా గెల.

5 అన్నె సగుమ్ బీ ఒగ్గర మత్తి నెంజిలి వత్తురు బుయ్యె సెడ్లన్. ఉప్పిరి ఇదిలిదిల్ మత్తి తిలి రిసా, ఒత్త సెడ్డి బీ బేగి గజల్ జలి.

6 బేగి గజల్ జలె కి, ఒప్పడ లయితికయ్, వత్తలె మొక్కల్ డడ్డ గెల, చి చెర్రె బుయి తెడి పెన వడ్డుక నెత్తిలి రిసా, జేవ్ మొక్కల్ నుకా గెచ్చు ముర గెల.

7 అన్నె సగుమ్ బీ కంఠ దుబ్బుల్ తిలిన్తె సేడ గజల్ జా మొక్కల్ జలన్. గని ఒత్త తిల కంఠ మొక్కల్ వడ్డ కెర ఒత్త సెడ్డి బీచ మొక్కల్ కెలె గెల్లికయ్, జా బీచ మొక్కల్ ఎన్నులు నే దెరై కిచ్చొ పలితుమ్ దెయె నాయ్.

8 గని, అన్నె సగుమ్ బీ చెంగిలి బుయ్యో సేడ కెర, చెంగిల్ వడ్డ చెంగిల్ పంటో పిక, విస్సెక్ దెస్సు వంతుల్, తిని విస్సా వంతుల్, వుంజెక్ వంతుల్, పలితుమ్ దిలి.”

9 అన్నె, “సూన్త కంట్ట తిలన సూన!” మెన యేసు సంగిలన్.

10 బెర తిల మాన్సుల్ ఉట్ట గెతికయ్, యేసు తెన్ బెదిల మాన్సుల్ సగుమ్జిన్ జోవ బారజిన్ సిస్సుల్ తెన్ బీచి రిసాచి టాలిచి అర్దుమ్చి రిసా పునిల.

11 చి, జో జోవయింక, “దేముడుచి రాజిమ్చి రిసాచి గుట్టు జలిసి జానస్తు మెన తుమ్క నెలవ దా అస్సె, గని అమ్చి తెన్ నే బెదిలనక ఎత్తి టాలివో తెన్ని సంగుక అస్సె.

12 కిచ్చొక మెలె, పూర్దుమ్ రెగిడ్డి రితి,

* అవ్ కెర్ల కమె కచితుమ్ దెకుత్ గని అర్దుమ్ చినుత్ నాయ్. అవ్ సంగిలి బోదన కచితుమ్ సూనుల, గని అర్దుమ్ కెరంతు నాయ్. నెంజెలె అర్దుమ్ కెరన్లెగిన బుద్ది మార్కుప జా అంచి తెన్ పన్ల చెమించుప జత, మెన రెగ్ల అస్సె.” మెన సంగిలన్.

ఉంపిలి బీచి టాలిచి అర్దుమ్ యేసు సంగిలిసి

13 తెదోడి యేసు జోవయింక అన్నె, “ఈంజ టాలిచి అర్దుమ్ కెరస్సు నాయ్ గె? దస్సి జలె, అన్నె టాలివోచి అర్దుమ్ కిసి కెరంతె!

14 ఈందె, ఉంపితోసా బీ ఉంపిలి రితి, అవ్ బోదన సూనయ్తసి.

15 వట్టి ఉంపిలి బీక జర్లు జలిసి, జలె, ఈంజ బోదన సగుమ్జిన్ సూన్లెచి రితి జతయ్. వట్టి ఉంపిలి బీక పిట్టి కీసి జా కెర కా గెల గే, దస్సి, సగుమ్జిన్ మాన్సుల్ ఈంజ బోదన సూన్లె బేగి, నయ్తాన్ జా కెర, జోవయింక పెట్టి తెంతో ఉర్లిలి రితి కెర వచ్చు వడ్డయ్.

16 “పత్తురు బుయ్యో ఉంపిలి బీక జర్లు జలిసి, జలె, అన్నె సగుమ్జిన్ మాన్సుల్చి బోదన సూన జతినిచి రితి జతయ్. మెలె, జా బీ బేగి గజ్జల్ జలి రితి జా, జేవ్ మాన్సుల్ సుబుమ్ కబుర్ సూన్లె బేగి, నర్ల జా, ‘నంపజతనుమ్’ మెనుల.

17 గని జోవయింక సొంత పెట్టి సుబుమ్ కబుర్చ చెర్లె నెంజిలి రిసా, గడియ జలి రితి డీసిలెకి, చి రిసా కిచ్చొ జవున్ బాద సేడ్లె జలెకు, నెంజిలె వేర మాన్సుల్ జాచి రిసా జోవయింక అల్లర్ కెర్లె జలెకు, జేవ్ మాన్సుల్ బచ్చు జా, బీ బేగి నమకుమ్ ముల దెవుల.

18 “అన్నె సగుమ్జిన్ మాన్సుల్, చి బోదన సూన, కంట దుబ్బల్ తిలినతె ఉంపిలి బీ రితి జతయ్. మెలె, చి బోదన జేవ్ సూన్లె కి,

19 ఈంజయ్ లోకుమ్తె తిలిసి ఎత్తిక ఉచరై తా, ‘కిసి జా జిమ్దె’ మెన చింత గలనుల, సొమ్మారుమ్ జంక ఆన జవుల, దస్సి, జా ఆన జవున్, జా చింత జవున్, జోవయింక పెట్టి పెన తా, జా బోదనక పెలగెలి రితి జయెదె, చి రిసా, జా బోదన జోవయింతె పలితుమ్ దెయ్ నాయ్.

20 “అన్నె సగుమ్జిన్ మాన్సుల్ బోదన సూన, చెంగిల్ బుయ్యో ఉంపిలి బీ రితి జతయ్. మెలె, చెంగిలి బుయ్యో ఉంపిలి బీతె విస్సెక్ దెస్సు వంతుల్, తిని విసా వంతుల్, వుంజెక్ వంతుల్ కిసి పలితుమ్ దెవుల గే, దస్సి, జేవ్ మాన్సుల్ కి బోదన సూన, నంపజా గెచ్చ, †పలితుమ్ దెవుల” మెన బోదన కెర్లన్.

దీవు లగితిన్క టాలి (లూకా 8:16-18)

21 సిస్సుల్క యేసు అన్నె సంగిలిసి కిచ్చొ మెలె, “దీవు దీవుకంబుమ్చి ఉప్పిరి తివుల గని ఆరి నాడిచి తెడి జవున్, మంచుమ్చి తెడి జవున్ తింకయ్ మెన కేన్ గెరెచ మాన్సుల్ దీవు అనుల గె? నాయ్. ‘కామ్క జెవున్’ మెన దీవుకంబుమ్చి ఉప్పిరి తివుల.

* 4:12 4:12 నెంజిలె “జోవయింక పాపుమ్ చెమించువ జతి రితి వసుల అంచితె జితు నాయ్ మెన, తుమ్ కచితుమ్ దెకతను గని అర్దుమ్ చినుతు నాయ్, అవ్ సంగిలి బోదన కచితుమ్ సూన్తు, గని అర్దుమ్ కెరంతు నాయ్”. † 4:20 4:20 ‘అత్తుపలితుమ్ దెరుల’ మెలె, దన మాన్సుల్ ప్రబుచి బుద్ది ఇండుల, చి అన్నె మాన్సుల్ దెక, జేవ్ కి ప్రబుచి రాజిమ్తె బెదుక ఇస్సుమ్ జా, సుబుమ్ కబుర్ సూన నంపజా బెదుల.

22 జలె, డీసున్ మెనయ్ కిచ్చొ జవున్ లుంకడ తవుల. ఆకర్క బార్ కెర్ది రిసాయి కిచ్చొ జవున్ గుట్టు లుంకడ తవుల.

23 సూన్తన కండ్లి కక్క తిలె, సరిగా సూన్సు!”

24 అన్నె జోవయింక, “తుమ్ కిచ్చొ సూన్తె గే, సరిగా అర్దుమ్ కెరన దెకన. †తుమ్ కేన్ కొల్త తెన్ కట్టడె గె, జయి కొల్త తెన్ అన్నె తుమ్కయ్ కి కట్టడ దెవుల. తుమ్క అన్నెయ్ మీన దెయిందె.

25 తిలోసాక అన్నె దెంక జయెదె, గని నెంజిలోసాక జలె, జోవయింక తిలిసి కి జోతె తెంతో కడ నెంక జయెదె” మెన యేసు సంగిలన్.

బీ గజ్జల్ జా వడ్డితిచి టాలి

26 యేసు సిస్సుల్క అన్నెక్ టాలి సంగిలన్. “ఎక్కిలో బుయ్యె బీ గల్లి రితి అన్నె. జా బీ కిసి జయెదె గే, దేముడుచి రాజిమ్ పూర్తి జతిన్ తెన్ కి దస్సి.

27 జలె, జో మాన్సు జోచి బట్టి బీ గల తా, జో అలవాట్ బజి రితి, రోజుక అందరి నిజ, పెందలె ఉట్ట, మాములుమ్ జతె తయెదె. మదెనె, జా బీ గజ్జల్ జా వడ్డుక దెరెదె. కిసి వడ్డితయ్ గే జో మాన్సు నెనె.

28 గని జా బీ బుయ్యె తా, దస్సి జేవ్చి ఇస్టుమ్క మెలి రితి జయె గజ్జల్ జా వడ్డ, తోలితో మొక్క, వడ్డె ఎన్నులు, వడ్డె పికిలి పంట్ దెయెదె.

29 జలె, పంట్ పికిలి పొది, ‘లాయితి సమయమ్ జా అన్నె’ మెన చీన, జో మాన్సు బార్ జా లాయెదె” మెన సిస్సుల్క యేసు సంగిలన్.

సార్సు గిడ్డ రూకు జా గెతిన్చి టాలి

(మత్త 13:31-32,34-35; లూకా 13:18-19)

30 జో అన్నె ఇసి మెలన్, “దేముడుచి రాజిమ్ కిసి జతయ్ గే తుమ్ అర్దుమ్ కెరంతి రిసా కిచ్చొ టాలి ఉచరుమ్?

31 ఇసి జయెదె, బుయ్యె ఉంపిలి సార్సు గిడ్డక జర్గు జతిన్చి రితి జయెదె. మెలె, జా గిడ్డ ఈంజి లోకుమ్చ గిడ్డల్ ఎత్కిచి కంట ఇదిలిసి తిలె కి, ఉంపిలె, గజ్జల్ జా వడ్డిలి మెలె,

32 రోన్తె గల్లి మొక్కల్ ఎత్కిచి కంట వెల్లో జా, జా మొక్కచ కొమ్మల్ వడ్డిలె, జా రూక్చ కొమ్మల్చి నిడతె అగాసుమ్చ పిట్టల్ జోవయింక గూడల్ బంద చెంగిల్ తంక జయెదె” మెన యేసు బోదన కెర్లన్.

33 ఒగ్గర్ టాలివో సంగయ్ యేసు ప్రజల్క సుబుమ్ కబుర్ బోదన కెర్లన్, జేవ్ సూసుక అర్దుమ్ కెరనుక తెరితి రితి.

34 టాలివో నెంతె జోవయింక సికడ్డె నాయ్. గని ప్రజల్ నెంజిలి పొది, జోవ సొంత సిస్సుల్కయ్ అర్దుమ్ ఎత్కి సికడ్డె తిలన్.

35 జా దీసి సాంజ్ జతికయ్, “సముద్రమ్ జిని ఒత్తల్తో గెచ్చుమ్,” మెన సిస్సుల్క యేసు సంగిలన్.

36 బెర తిల జనాబ్క సిస్సుల్ ముల దా కెర, యేసు అగ్గె తెంతో వెన తిలి దోన్తె వెగ కెర, జోవయింతెన్ గాడు ఒత్తల్తో గెచ్చుక మెన దోని జిన్వుక దెర్ల. అన్నె సగుమ్ దోనివో కి జో తిలి దోన్ తెన్ తిల.

37 జలె, యేసు దోన్తె గెతె తతికయ్, వాదు ఒగ్గర్ కెర్తికయ్, కెర్లల్ దోన్తె పెట్టి జా డేవెత్ తిలి రిసా, దోన్తె పాని బెరితె తిలి.

38 ఇసి జతె తిలె కి, యేసు దోన్తెచి వడ్డిచి బల్లయ్ నిజ తిలన్. నిజ తతికయ్, సిస్సుల్ బమ్మ జా, గురుబాబు, అమ్ మొర్లె తుక బాద నాయ్ గే? మెన కేక్ గల, జోక ఉట్టయల.

39 జో ఉట్ట, వాదుక గేల కెర, “సేంతుమ్ జా తుక్లె తా” మెన సముద్రమ్క సంగితికయ్, వాదు ముల దిలి, చి ఎత్కి అన్నె సేంతుమ్ జా గెలి.

ఇసి సేంతుమ్ జతికయ్,

40 జేవ్ సిస్సుల్క యేసు, “కిచ్చొక బితసు? అంచి రిసా తుమ్క ఇదిల్ కి నముకుమ్ నాయ్ గే?” మెన సంగితికయ్,

† 4:24 4:24 ఇచ్చెది అర్దుమ్ కిచ్చొ మెలె, ‘తుమ్ అర్దుమ్ కెరంతి కొల్త తుమ్క అన్నె సికడుక జయెదె. అన్నెయ్ సికడిందె 25 అర్దుమ్ తిలోసాక అన్నె సికడుక జయెదె, గని అర్దుమ్ నెంజిలసక తిలి అర్దుమ్ జోవయింతె తెంతో కడ నెంక జయెదె’.

41 జేవ్ ఎత్తిజిన్ బియఁ గెచ్చు, ఎక్కిలోక ఎక్కిలో “ఈంజో కొన్నో జయెదె? వాదు సముద్రుమ్ కి ఇన్నెచి కోడె రితి కెర్తతి!” మెన ఆవారిమ్ జా లట్టబనుక దెర్ల.

5

బూతల్ దెర్లొసాక యేసు చెంగిల్ కెర్తిసి
(మత్త 8:28-34; లూకా 8:26-39)

1 యేసు జీచ సిస్సుల్ తెన్ సముద్రుమ్ జిన కెర, ఒత్త తిలి *గెరాసీనులచి ప్రాంతుమ్తె పావెల.

2 యేసు దోని తెంతో ఉత్తిర్లి బేగి, బూతుమ్ దెర్లొ మాన్సు ఎక్కిలో మెస్సెల తెంతో బార్ జా, జోక దస్సుల్ జలో.

3 జో మాన్సు మెస్సెల జెతె తిలో. జోక బూతల్ దెర్లి రిసా, గొల్సుల్ తెన్ కి జోక కో అన్నె బందుక నెత్తిర్ల.

4 ఒగ్గర్ దప్పులు జీచ అత్తో చట్టోక గొల్సుల్ తెన్ మాన్సుల్ అగ్గ బంద తిల, గని కెత్తి సుట్టు జప్పన్, కెద్ది డిట్టుమ్ బంద తిల కి, అత్తోచ గొల్సుల్ కుట్టప్పక, చట్టోచ గొల్సుల్ గండల్ కెరుక, దస్సి జెతె తిలో. జోక అన్నె ముద్దో కెరుక కో కి నెత్తిర్ల.

5 జో రాతి మెద్దెన మెస్సెల డెంగ్రల బుల బుల, కెద్దిడి తెదోడి ఒర్న, జోక జోయ్యి పత్రల్ తెన్ పెటన, బాద కెరంతె తిలన్.

6 జలె, జో దూరి తెంతో యేసుక దెక, నిగ జా, సెర్ను సేడ యేసుక జోకర,

7 “ఓ యేసుబ్రబు, ఎత్తిచి ఉప్పిరి తిలో దేముడుచో వుత్తని, తుయి. అంచి తెన్ తుక కిచ్చో కామ్? అంక అల్లర్ నే కెర్తి రితి దేముడుచి నావ్ తెన్ ఒట్టు గలను.” మెన గట్టిజ కేకుల్ గలుక దెర్లొ.

8 కిచ్చోక దస్సి జలో మెలె, “ఓ బూతుమ్, ఈంజో మాన్సు తెంతో బార్ జా ముల దేసు!” మెన యేసు సంగ తిలో.

9 జలె, యేసు జో బూతుమ్క అన్నె, “తుచి నావ్ కిచ్చో?” మెన పుసిలన్, చి జో యేసుక “అంచి నావ్ ‘సయన్సుయ్’. ఎత్తివాట్ జన్ బూతల్ అస్సుమ్” మెన సంగ,

10 “అమ్క ఈంజ దేసిమ్ తెంతో ఉదడ గెలు నాయ్.” మెన జో బూతుమ్ యేసుక బతిమాల్పా జా సంగిలన్.

11 జలె, జా మెట్టయ్ వెల్లి మంద అండ్రులు కతె తిల.

12 చి “ఆదె, జేవ్ అండ్రుల్క అమ్ దెర్లి రితి సెలవ్ దా, అమ్క జోవయింతె తెద్రవు” మెన యేసుక జేవ్ బూతల్ బతిమాల్పా జా సంగిల.

13 దస్సి జతికయ్, యేసు సెలవ్ దిలన్. సెలవ్ దెతికయ్, జేవ్ బూతల్ బార్ జా జో మాన్సుక ముల దా, జేవ్ అండ్రుల్చి పెట్టి పెసిల, చి జేవ్ పాసి పాసి దొన్ని వెయిలు బోడియె అండ్రులు బమ్మ జా, ఒత్తచి గాటిక నిగ ఉత్త గెచ్చు, గడ్డె సేడ డుజ మొర గెల.

14 జేవ్ అండ్రుల్ దస్సి జతికయి, మంద రకితన బమ్మ జా ఉట్ట నిగ, పట్టుమ్తె, ఒండి ప్రాంతుమ్తె నూనయ్ల, చి జర్గు జలిసి దెకుక మెన, ప్రెజల్ ఎత్తి బార్ జలె.

15 జేవ్ ప్రెజల్ ఎత్తి యేసుతె జా, ఒగ్గర్ బూతల్ దెర తిలో జో వెర్రి జా తిలోసా అప్పె చెంగిల్ బుద్ది జా పాలల్ గలన ఒత్త వెన తిలిసి దెక, బియఁ గెల.

16 జో చెంగిల్ జలిసి జర్గు జలి పొది సొంత డెక తిల మాన్సుల్, జలె, జో బూతల్ దెర వెర్రి జా తిలోసాక చి జేవ్ అండ్రుల్క జర్గు జలిసి ఎత్తి పిమ్మట్ అయ్లనక జేవ్ సాచి సంగిల.

17 ఒత్తచ మాన్సుల్ ఎత్తిజిన్ “అమ్చి ప్రాంతుమ్ ముల దా ఉట్ట గో” మెన యేసుక బతిమాల్పా జా సంగిల.

18 వణ్ణో యేసు, సిస్సుల్, ఉట్ట గెచ్చుక మెన దోనితె తతికయ్, బూతల్ అగ్గె దెర తిలో జో మాన్సు వట్టి జా, “ఆవ్ కి తుమ్చి తెన్ బెద జెంక అంక సెలవ్ దే.” మెన బతిమాల్పా జా సంగిలన్.

* 5:15:1 గెరాసీనులుక ‘గదరేసులు’ కి సగుమ్తె రెగ్గ తప్పల. మత్తయి 8:28తె ‘గదరేసులు’ మెన రెగ్గ అస్సి.

19 గని యేసు దస్సి సెలవ్ నే దెతె, జోక, “పోసి, తుయి గెరి గెచ్చ తుచ సొంత మాన్సుల్క, †ప్రబు తుక కన్యారుమ్ దెక చెంగిల్ కెర ఎదివాల్ దయ కెర్లిసి సంగు” మెన సంగిలన్.

20 జో మాన్సు యేసుక ముల దా ఉట్ట గెచ్చ, యేసు జోక ఎదివాలు దయ కెర్లిన్చి రిసా దెకపాలి మెలి జా ప్రాంతుమ్తెచ పట్టల్ ఎత్తితె నూనపుక దెర్లో. జా నూనయ్తెకయ్, ఎత్తిజిన్ ఆచారిమ్ జల.

యాయారు మెలో అదికారి యేసుచి తోడు నజీలిసి
(పుత్ర 9:18-26; లూకా 8:40-56)

21 యేసు అన్నె దోనితె వెగ గాడు అన్నె జీన్తెకయ్, జోచి సుట్టునంత ఎదివాల్జిన్ జనాబ్ బెర అయల. జో జా ఒడ్డుతె ఉత్త తతికయ్,

22 యూదుల్చి ఒత్తచి నబ గెరిచి అదికారి జలో యాయారు మెలోసా జా కెర, యేసుక దెక కెర, జోచి చట్టె సిర్పు నేడ,

23 “అంచి నాడి జొర్లో నేడ, జియెద గే, నాయ్ గే, దస్సి జా అస్సె. తుయి, అమ్తె జా కెర జాక చడిలెగిన, జా చెంగిల్ జా అన్నె జియెదె.” మెన బతిమాల్సా జా జో సంగితికయ్,

24 యేసు జో తెన్ బెద గెలన్. జేవ్ వట్టె గెతె తతికయ్, ఒగ్గర్ ఒగ్గర్జిన్ జనాబ్ యేసుచి పట్టి జా జోచి సుట్టునంత తా వెలపులి జతె తిల.

25 జలె, బార వెర్పుల్ తెంతో లోయి గెతి బాద తిలి తేర్బోద ఎక్కి జా జనాబ్తె అస్సె.

26 జా సైమచి రిసా చెంగిల్ కెరంతి రిసా, ఎక్కిలోచి పిమ్మట్ అన్నెక్కో గురుతె వర్పు తెన్ గెచ్చ గెచ్చ, జాక తిలి దనుమ్ ఎత్తి విక కెరవన తిలి. దస్సి కెర కెర జలెకి, జా బాద తెన్ నే చెంగిల్ జతె, ఒగ్గర్ జతె తిలి.

27 జలె, యేసుచి రిసా నూన తా, “అవ్ జోచ పాలుమ్ జవున్ చడిలె చెంగిల్ జయిందె” మెన ఉచర,

28 యేసుచి సుట్టునంత తిలి జనాబ్చి తెడి పెన, యేసుచి పట్టె పాసి పాచ కెర, జోవో పాలుమ్క చడిలి.

29 చడిలి బేగి లోయి గెతిసి బందు జలి, చి బాద గెచ్చ జేవ్ చెంగిల్ జలి మెన చినన్సి.

30 యేసు మాత్తమ్, జోచి సెక్కి కో గే, చెంగిల్ జా అన్నె మెన చినిలి బేగి, జా జనాబ్చి నెడిమి టీవో జా పట్టె పస్స, “అంచి పాలుమ్ చడిలోసా కో?” మెన సంగిలన్.

31 జోచ సిస్సుల్ జోక, “తుచి ఉప్పిరి మాన్సుల్ వెలవెలి జలెకి, ‘అంక చడిలోసా కో?’ మెన కిచ్చొక పుసితసి?” మెన సంగిల.

32 జలె, కో చడిలన్ గే జానన్క మెన, యేసు అన్నె పస్స దెకితికయ్,

33 జా తేర్బోద జాక జర్గు జలిసి జాన, బియఁ కెర, అడ్డుర్ జా, యేసుచి పుర్రెతో సిర్పు నేడ, జర్గు జలిసి ఎత్తి సత్తిమ్ తెన్ జోక సంగిలి.

34 యేసు జాక, “ఒ పుత్తరి, అంచి ఉప్పిరి తుయి నముకుమ్ తిలి రిసా తుయి చెంగిల్ జా అస్సిసి. సేంతుమ్ తెన్ గెచ్చ, చెంగిల్ జా, చెంగిల్ తా” మెన సంగిలన్.

35 జా తేర్బోదక యేసు దస్సి సంగితె తిలి పొది, దుచిన్చి రిసా యేసుతె జా తిలో అదికారిచి గెర్చ సగుమ్జిన్ జా కెర, జో అదికారిక “తుచి నాడి మొర గెచ్చ అస్సె. ఈంజో గురుబాబుక బుకార్లె లాబుమ్ నాయ్. గురుబాబుక జా బాద పోసి” మెన జోక సంగిల.

36 జలె, జేవ్ సంగిలిసి నూన నే నూన్చి రితి జా, యేసు నబగేర్చో జో అదికారిక దెక, “జేవ్ సంగిలిన్క కాతర్ నే కెర్తె, బి నాయ్. నంపజా దయిరిమ్ తెన్ తా” మెన జోక సంగిలన్.

37 ఒత్త తెంతో వేతురు, యాకోబు, యాకోబుచో బావోసి యోహానుక పిట్టవ, జోచి పట్టి అన్నె కో జెంక సెలవ్ నే దా కెర,

38 యేసు, జేవ్ తెన్ జో అదికారిచి గెరి పాచ కెర, ఒత్త తిలన ఏడుకుడు జా గోల జతిసి దెకిలన్.

39 జో గెరి పెన, ఒత్త తిలనక దెక, “తుమ్ గోల జా ఏడ్డను కిచ్చొక? ఈంజ బోద మొర గెచ్చె నాయ్ నిజ అస్సె.” మెన యేసు సంగిలన్.

40 దస్సి సంగితికయ్, జేవ్, జోక అసిల. గని యేసు జేవ్ ఎత్తిజిన్క బార్ కెర దా, నాడిచ అయ్యనాబ్బిన్క కి, జో తెన్ అయల సిస్సుల్క కి కడ ఆన, జా నాడి తిలిన్తె గెచ్చ,

† 5:19 5:19 ‘ప్రబు’ మెలి కిచ్చొ అర్దుమ్ మెలి, ‘ఎత్తిక ఏలువ కెర్లిసా, ఎత్తిక వెళ్లొ జలోసా’. జా నాన్ యెహోష దేముడు అబ్బిన్క కి సంగుల, యేసు దేముడు పుత్తన్క కి సంగుల.

- 41 జా నాడిచి అతు దెర, జాక “అవ్ నంగిలయ్, నాడి, ఉట్టు!” మెలి అర్దుమ్ తెన్ * “తలీతా కుమి” మెన సంగిలన్.
- 42 సంగిల్ బేగి, జా నాడి ఉట్టు కెర, ఇండుక దెర్లి. ఒత్త తిలస ఎత్తిజిన్ ఆచారిమ్ జా బలె ఉచర్ల.
- 43 పడ్డా, జర్గు జలిన్చి రిసా కక్క, సంగుక జయె నాయ్ మెన జాగర్ల సంగ, “నాడిక కిచ్చొ జవున్ అన్సిమ్ దాన” మెన, జా గేరచక యేసు సంగిలన్.

6

నజరేతు గవ్వెయ్ మాన్సుల్ యేసుక నే నంపజలిసి
(మత్త 13:53-58; లూకా 4:16-30)

- 1 యేసు ఒత్త తెంతో ముల దా కెర, నజరేతు మెలి జోచి సొంత గవ్వె ఉట్టు జెతికయ్, జోచ సిన్సుల్ జోచి పట్టి అయ్యెల.
- 2 బర్తి కెర్రి సెలవ్ కడన్సి * దీసి, ఒత్తచి సబ గెరి గెచ్చ, యేసు బోదన కెరుక దెర్లన్. జో సంగిలి బోదన నూన, ఒగ్గరజిన్ మాన్సుల్ ఆచారిమ్ జా, “ఇసి బోదన ఇన్నెక కేనె తెంతో అయిలి? ఇన్నెక దిలి గ్యానుమ్ కీసిచి? కెర్రి అందుమ్చ వెల్లెల కమె ఇన్నెచి అత్తి జర్గు జతతి!
- 3 గని ఈజో దారచ కామ్ కెర్రిసా జయెదె, మరియచొ పుత్తుసి గెద? యాకోబుక, యోసేక, యూదాక, సీమోనుక అన్నెసి జయెదె గెద? ఇన్నెచ బేన్సివో ఇన్నె అమ్చి తెన్ అస్తి గెద?” మెన యేసుచి రిసా అన్యానుమ్ జా నంప కెర్రి నాయ్.
- 4 జేవ్ దస్సి అన్యానుమ్ జతికయ్, “కేన్ జవున్ మాన్సు దేముడుచి కబుర్ ఆన్తోసా జలె, జోచి సొంత దేసిమ్చ మాన్సుల్, సొంత గెరచ మాన్సుల్ జోక గవురుమ్ దెకిత్ నాయ్” మెన యేసు, జోపయిచి అన్యానుమ్చి రిసా సంగిలన్.
- 5 ఒత్తచ మాన్సులేచి అన్యానుమ్చి రిసా, జలె, ఒత్త యేసు కేన్ వెల్లొ కమె కెరుక బెదిలన్ నాయ్. ఎక్కి సగుమ్జిన్ జబ్బు తిల మాన్సుల్చ బోడి చడ చెంగిల్ కెర్లన్.
- 6 జా పలాన్చ మాన్సులేచి అన్యానుమ్చి రిసా ఆచారిమ్ జా, విసారుమ్ జలన్. గని, జా ప్రాంతుమ్చ గవ్వెలె బుల బుల బోదన కెర్రి తిలన్.

సిన్సుల్క దొగుల దొగులక తెర్తయ్యెలిసి
(మత్త 10:1,5-15; లూకా 9:1-6)

- 7 ఒత్త తెంతో, జేవ్ బారజన్ సిన్సుల్క యేసు పాసి బుకారా కెర, జేవ్ దొగుల దొగులక గవ్వెలె బులక మెన తెర్తవుక దెర్లన్. తెర్తయ్యెలి పొది, బూతల్క జేవ్ ఉదడ్డి రితి జోపయింక అదికారుమ్ దిలన్.
- 8 తెదోడి కిచ్చొ ఆడ్ర దిలన్ మెలె, “ప్రయానుమ్చి రిసా టెక్కి డండ్ పిట్టవ, పోడి జలెకు, నెంచె జలెకు, కెరంటెచి బెట్టుచి జేబితె డబ్బుల్ జలెకు దెరన నాయ్.
- 9 జోట్ట గలన, గని దొన్ని సొక్కల్ పోన. ఎక్కి సరి జతయ్” మెన సంగ.
- 10 అన్నె, “తుమ్ కేనె జలెకు పావెలె పొది, కేన్ గెరచ తుమ్క టాన్ దెవుల గే, జా గావ్ తెంతో ఉట్టు గెతె ఎదక జయ్యె గెరి బన జా తా.
- 11 గని, కేన్ టాన్తె జలెకు తుమ్క మరియాద కెర్రి నాయ్ గే, తుమ్చి కబుర్ సూనుక ఎద్గెర్ ఇన్సుమ్ జతి నాయ్ గే, తుమ్ ఒత్త తెంతో ఉట్టు గెచ్చ. ఉట్టు గెతె పొది, ‘జేవ్ దస్సి జలి రిసా, జేవ్ దేముడుచ నెంజితి’ మెలి రితి గుర్తుక తుమ్చ చట్టిచి దూడి వండ్ల గెలన” మెన యేసు సంగిలన్.
- 12 యేసు దస్సి అదికారుమ్ దా బులక తెర్తయ్యెతికయ్, జేవ్ సిన్సుల్ దొగుల, దొగుల బార జా, “తుమ్ కెర్ల పావలేచి రిసా పెట్టి దుకుమ్ జా పావుమ్ ముల్చి బుద్ది జా” మెన బోదన కెర బుల్తె తిల.

* 5:41 5:41 మాములుమ్ ప్రజల్ లట్టల్ అరముయ్ బాన తెన్ చి కోడు, ఈజ. * 6:2 6:2 ఎత్తి నెన్సర్ యూదుల్క బర్తి కెర్రి సెలవ్ కడ దీసి జయెదె. జా దీసి జోపయింప సబ గెరలె గెచ్చ, దేముడుచి కొడో నూన కెర, ఎత్తి అదికారుమ్ తిలో దేముడుక బర్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలో దేముడు సంగిలిన్క యూదుల్చ వెల్లెల మాన్సుల్ ప్రజల్క జాడు వయడ్లి రితి కెర కామ్ నే కెర్రిచి రిసా ఒగ్గర్ ఆగ్గల్ అవ్వె ఉచర అస్సి. ఇన్నె, దొన్ని ఎన్సులు కొడ్డిన్క ‘కామ్’ మెన నెంచె కెర్లతె.

13 పక్షి, మాన్యుల్ క దెర్ల ఒగ్గర్ బూతల్ క ఉదడ గెల, చి ఒగ్గర్ జన్ జబ్బుల్ తిలసక బోడి తేల్ నువ దా యేసుచి నావ్ తెన్ జోవయంక చెంగిల్ కెర్ల.

హేరోదు రానో యేసుచి రిసా ఉచర్లసి
(మత్త 14:1-12; లూకా 9:7-9)

14 యేసుచ కమెచి రిసా హేరోదు మెలో జా గలిలయ ప్రాంతుమ్ క ఏలువ కెర్లొ రానో కి నూన్లొ. జా ఒండి దేసిమి యేసుచి రిసా ఎత్తిజన్ నూన తిల. నగుమ్ జన్ జోక “బాప్తిసుమ్ దెతో యోహాను అన్నె జీవ్ జా అన్నె, కిచ్చొగె, చి ఇన వెల్లొ కమె కెర్లి సెక్తి జోచి పెట్టి అన్నె” మెంతె తిల.

15 అన్నె నగుమ్ జన్, “ఏలీయా పూర్లుమ్ చొ జా తయెదె” మెంతె తిల. అన్నె నగుమ్ జన్, “దేముడుచ కబ్బుర్లు పూర్లుమ్ సంగిలో ఎక్కిలో రితో జయెదె. దసాచొ జా తయెదె” మెంతె తిల.

16 హేరోదు, మాత్రుమ్, నూన, కిచ్చొ ఉచర్లన్ మెలె, “అచ్ బోడి గండ కెరవ తిలో యోహాను జా తయెదె. అన్నె జీవ్ జా అన్నె, కిచ్చొగె” మెన బియఁ గెలో.

బాప్తిసుమ్ దెతె తిలో యోహానుక హేరోదు మార తిలిసి

17 హేరోదు రానో కిచ్చొక దస్సి బిలన్ మెలె, జోచొ పిలివ్ మెలో బావొసిచి హేరోదియ మెలి తేర్లిక ఆనన హేరోదు జాక వెండ్లి జా తిలో.

18 దస్సి, అన్నెజొచి తేర్లిక వెండ్లి జతికయ్, యోహాను హేరోదుక “తుచొ బావొదిసి తేర్లిక తుయి తియనుక నాయిమ్ నాయి” మెన సంగితె తిలన్. జాక, హేరోదు యోహానుక జేలి కెరవ, జేలితె గల బండవడ తిలన్.

19 జేలితె గల తతికయ్, యోహానుచి ఉప్పిరి హేరోదియ కుస్సిదుమ్ తా, జోక మారుక ఆన జా అన్నె. గని నెత్తె. కిచ్చొక మెలె,

20 యోహాను, దేముడుచ సత్తిమ్ నుదొ, నీతి నుదొ, మెన హేరోదు జాన కెర, జోక కిచ్చొ ప్రమాదుమ్ నే జతి రితి రకవ అన్నె. అన్నె, యోహాను సంగితి తీర్చుక హేరోదు బాద సెడ్లె కి, రోజుక సంతోసుమ్ తెన్ జోచి బోదన్ నూనతె తిలన్.

21 జలె, జా మదెనె జా తేర్ బోద యోహానుక కిచ్చొ కెరుక నెత్తికై కి, ఆకర్ క జోక మొరవుక అవ్ కానుమ్ అయ్ లి. హేరోదుచి జెర్కున్ పండుగు దీసి జెతికయ్, జోచ మంత్రివొక, వెల్లెల మాన్యుల్ క, చి గలిలయ ప్రాంతుమ్ చ వెల్లెల మాన్యుల్ ఎత్తిజన్ క వెల్లి విందుతె రానో బుకార్లొ.

22 జా విందు కెర్లి పొది, హేరోదియ మెలి జా తేర్ బోదచి దువిసి విందుతె బుకార్లనచి నెడిమి జా నచిలి. హేరోదు, బుకార్లన, ఎత్తిజన్ జా నచిలిసి మెన్న గెల, చి హేరోదు జా నాడిక, “కిచ్చొ ఇష్టుమ్ జస్తె గే అంక సంగు చి జయ్యి దెయిందె” మెన అన్నె,

23 “తుయి కిచ్చొ నజీలె కి, అంచి రాజిమ్ తె ఏక్ అర వాట నజీలె కి, జయ్యి దెయిందె” మెన ఒట్టు గలన్లన్.

24 జలె, జా నాడి బార్ జా, అయ్యున్ తె గెచ్చు, “అచ్ కిచ్చొ నజుక?” మెన పునీతికయ్, అయ్యుని, “బాప్తిసుమ్ దెతో యోహానుచి బోడి అంక దే మెన సంగు” మెన దువిన్ క సంగిలి.

25 సంగిలి బేగి, జా నాడి హేరోదుతె నిగ జా, “బాప్తిసుమ్ దెతో యోహానుచి బోడి ఏక్ పలెరుమ్ తె అంక దే” మెన సంగిలి.

26 నాడి ఇసి సంగితికయ్, జో రానో బలే దుకుమ్ జలెకి, జో గలన తిలి ఒట్టుచి రిసా, విందుతె బుకార్లనచి మొక్కె జాక సంగిలిసి పిట్టవుక నెన కెర,

27 బేగి, “జోచి బోడి ఆను” మెన జమాను ఎక్కిలోకె తెద్రయ్ లన్. జో జమాను గెచ్చు, జేలితె యోహానుచి బోడి గండ కెర్ల,

28 పల్లెరుమ్ తె ఆన, జా నాడిక దెతికయ్, జా నాడి అయ్యున్ క నా దిలి.

29 జలె, యోహానుచ సిస్సుల్ నూన కెర, జా కెర, పీనుమ్ నజన ఉక్కుల నా, మెన్నె రోవిల.

బారజన్ సిస్సుల్ యేసుతె అన్నె ఉట్ట అయ్ లిసి
(మత్త 14:13-21; లూకా 9:10-17; యోహా 6:1-14)

30 యేసు తెద్రయల జోప బారజిన్ సిస్సుల్ బోదన కెర కెర మాస్సుల్ క చెంగిల్ కెర కెర, జోతె అన్నె బుల జా, జేవ్ కెర తిలిసి, బోదన కెర తిలిసి ఎత్తి జోక సంగిల.

31 జలె, ఒగ్గర్ ఒగ్గర్జిన్ మాస్సుల్ జోపయింతె జెంక గెచ్చుక జతె తిలి రిసా, అన్నిమ్ కంక కి వుండితి సమయుమ్ దొర్కు నెంజితికయ్, యేసు సిస్సుల్ క “జొమ్మ, తుమ్ గడియ వుండితి రిసా, కేనెగె, మాస్సుల్ నెంజిలి టాన్తె బెద గెచ్చుమ్” మెన సంగిలన్.

32 జేవ్ బార్ జా దోనితె వెగ, అన్నె కోయి నెంజిలి టాన్తె గెచ్చుక బార్ జల.

33 గని, జేవ్ బార్ జా ఉట్ట గెలిసి ఒగ్గర్జిన్ దెక, జోపయింక చిన, వేర వేర పట్టెల గెవ్విలె తెంతో బార్ జా నిగ, నిగ జోపయించి తొల్లతో జేవ్ గెతె తిలిన్తె పావెల.

పావ్ వెయిల్ జిన్ మాస్సుల్ క యేసు అన్నిమ్ దిలిసి

34 యేసు జా ఒడ్డుతె పావ, దోనితె తెంతో ఉత్త, ఒగ్గర్ ఒగ్గర్జిన్ జనాబ్ బెర అయిలిసి దెక, ‘గొప్పడు నెంజిల మెండల్ కిసి జా కేనె తెర్లె ఒత్తలి ఉట్ట గెతె తవుల గె దస్సి, ఈంజేవ్ ప్రెజల్ అస్తి’ మెన యేసు కన్యారుమ్ జా, ఈంజ ఎత్తి బోదన జోపయింక సికడుక దెర్లన్.

35 సాంజ్ జంక దెర్తికయ్, యేసుచ సిస్సుల్ జోతె జా కెర, “ఈంజ డొంగుర దేసిమ్. పొద్దు ఒగ్గర్ జలి, తొక్కి అస్సె.

36 ఈంజేవ్ ప్రెజల్ ఎత్తి ఈంజ వల్లల్చ గెవ్విలె గెచ్చ, కిచ్చో జవున్ అన్నిమ్ గెనన్తి రిసా ఇన్నెక తెద్రవు.” మెన సంగిల.

37 ఇసి సంగితికయ్, యేసు సిస్సుల్ క కిచ్చో జబాబ్ దిలన్ మెలె, “తుమ్ జోపయింక కిచ్చో జవున్ అన్నిమ్ దాన”. ఇసి యేసు సంగితికయ్, జేవ్ జోక, “జోపయింక అన్నిమ్ దెంక మెన †దొన్ వుంజో వెండ్లుచ పోడియె గెనుక ఆమ్ గెచ్చుక గె?” మెంతికయ్,

38 యేసు జోపయింక, “తుమ్తె కెత్తి పోడియె అస్తి గె, గెచ్చ దెక” మెలన్, చి జేవ్ గెచ్చ దెక జా కెర, “పావ్ పోడియె చి దొన్ని మొస్సు అస్తి” మెన జోక సంగిల.

39 జో, జేవ్ జనాబ్ క దెక, జోపయింక “తుమ్ ఎత్తిజిన్ వర్సవర్సల్ తెన్ బుయ్యె వెన” మెన జా చివ్వర్ బుయ్యె వెనడ్లన్.

40 జాకయ్ జేవ్ ఎక్కెక్ వర్సల్తె పుంజెక్ జిన్, యాబయ్ జిన్ వెసితికయ్,

41 యేసు జేవ్ పావ్ పోడియె దొన్ని మొస్సు దెర, ఆగాసుమ్ పక్క దెక, ‘ఈంజ తూయి దిలది’ మెన దేముడు జలో అబ్బొన్ క జోకర కెర, జేవ్ పోడియె మోడ కెర, “ఎత్తిజిన్ క వంట దాన” మెన సిస్సుల్ చి అత్తి సార్స కెర దా, జేవ్ దొన్ని మొస్సుక కి ఎత్తిజిన్ క వంట దిలన్.

42 జేవ్ జనాబ్ ఎత్తిజిన్ పేట్ బెర్లు కతికయ్,

43 సింసిల పోడి గండలు, మొస్సు గండలు బార గంపల్తె సిస్సుల్ గుడ్డ బెరయ్ల.

44 జా దీసి పోడియె కయ్లన, పావ్ వెయిల్ జిన్ †ముస్సుబోదల్ జల.

యేసు పానిచి ఉప్పిరి ఇండిలిసి వాదుక సేంతుమ్ కెర్లిసి

(మత్త 14:22-33; యోహా 6:16-21)

45 తెదొడి బేగి, యేసు ప్రెజల్ క నే తెద్రయ్తె తొలితో, “తుమ్ దోని వెగ అంచి కంట తొలితో గాడు జిన్, బేత్తుయిదా గెవ్వి గెచ్చ” మెన సిస్సుల్ క తెద్రవ దా,

46 జేవ్ ప్రెజల్ తె సిలవ్ నజన తెద్రవ దా, ప్రార్లన కెర్లి రిసా యేసు డొంగె వెగిలన్.

47 ఒగ్గర్ సాంజ్ జతికయ్, సిస్సుల్ తిలి జా దోని సముద్రమ్ రితి జా గాడుచి మదెనె పావ తతికయ్, యేసు ఎక్కెలో గట్టుతె తా,

48 కిచ్చో దెకిలో మెలె, దోనిక వాదు వెలయ్తె తిలి రిసా, దోని ఇండవుక సిస్సుల్ కస్టుమ్ జతె అస్తి.

జలె, అందరె, పాసి పాసి కుకుడో వాసెనె, యేసు జా సముద్రమ్ చి ఉప్పిరి ఇండ జా, సిస్సుల్ చి పాసి పావ అయ్లో. జోపయింక జిన్తె ఉట్ట గెచ్చుక మెనన్లొ.

† 6:37 6:37 నెంజిలి, దొన్ వుంజోజిన్ మాస్సుల్ క ఏక దీనిచి కూలి డబ్బుల్ దెతి ఎదిలి డబ్బుల్. † 6:44 6:44 తేరబోదల్ బాలబోదల్ కి తిల, గని మత్తయి 14:21 తె రిగ్గి రితి, తేరబోదల్ బాలబోదల్ క ఒత్త లెక్క కెర్లి నాయ్.

49 గని, పానిచి ఉప్పిరి జో ఇండ గెతిసి సిస్సుల్ దెక, “డుంబో, కిచ్చొగి” మెన ఉచర బమ్మ జా ఒర్పిల.

50 జేవ్ ఎత్తిజన్ జోక దెక దస్సి పంబ్ర జలి బేగి, జో, “దయిరిమ్ జా. అవ్వి, తుమ్ బియఁ నాయ్” మెన జోవయింక సంగ

51 దోనితె జోవయించి నెడిమి వెగితికయ్, వాదు ముల దిలి. జాచి రిసా జేవ్క జెవ్వి ఆచారిమ్ జా ఒగ్గర్ బమ్మ జల.

52 గని పొడియొక యేసు జగ్గు కెర్లిసి అర్దుమ్ నే కెరన తిలి రిసా, జో కొన్నెగి, జోచి పెట్టి బేడు బందిల్ జోచి సెక్తి అదికారుమ్ కెనెచి గే అర్దుమ్ నే కెరంతె, బలే ఆచారిమ్ తెన్ తిల.

అన్నె ఒగ్గర్జన్క యేసు చెంగిల్ కెర్లిసి

(మత్త 14:34-36)

53 జేవ్ దోనితె గాడు జిన గెన్నేసరెతు ప్రాంతుమ్తె పాచ దోని ఒడ్డుతె బంద కెర

54 దోని తెంతో ఉత్తిర్లి బేగి, ఒత్త తిల మాన్సుల్ జోక చిన కెర,

55 జబ్బు తిల మాన్సుల్ జా ఒండి పలానెతె కేనె తిలె ఒత్త గెచ్చు, జేవ్ నిజ తిలి అంతుర్నొ తెన్ ఉక్కుల కెర యేసు కేనె అస్సె గే నూనై, ఒత్తయ్ వయ ఆనెతె తిల.

56 జా ప్రాంతుమ్చ పట్టలె గెవ్విలె బయాలె, కేన్ జలెకు టానెతె జో అయ్లో గే, బాద తిలనక కడ ఆన, సంతపీదులె జలెకు ఎంగ్లవ దా, యేసుచో పాలుమ్చి అంచు జలెకు జేవ్ చడుక మెన బతిమాల్పా జా సెలవ్ నజనెతె తిల. కో జలెకు చడిల గే, జేవ్ చెంగిల్ జల.

7

అలవాట్లు చి రిసా వెల్లెల మాన్సుల్క యేసు సంగిలి తీర్పు

(మత్త 15:1-20)

1 * యెరూసలేమ్ పట్టుమ్ తెంతో సగుమ్జిన, మోసె తెన్ దేముడు దిలి ఆగ్గుల్ సికడ్డన కి పరిసయ్యుల్ సగుమ్జినచి ఒత్త జా తా, యేసుతె బెద జా కెర,

2 జోచి సిస్సుల్తె సగుమ్జన్ గర్చ అత్తో తెన్, మెలె నే దొవనెతె, అన్నిమ్ కెర్లిసి దెక కెర, బమ్మ జల.

3 కిచ్చొక మెలె, పరిసయ్యుల్ కి † యూదుల్ ఎత్తిజన్ కి ‡ పూర్గుమ్చ వెల్లెల మాన్సుల్ సికయ్లిసి కెరుకయ్” మెన, గుర్చు అత్తో దొవనెకయ్ కవుల, నెంజెలె నాయ్.

4 అన్నె, సంతయ్ తెంతో గెరి అయ్లె, “నే దొవనె గారు” మెన, † పాని చింపనెకయి కవుల, నెంజెలె నాయ్. దస్సి, గిన్నుల, గేడివో, కంచు సామన్, ఈంజ జా ఎత్తి కెయఁక దొవుక గే, కీసి దొవుక గే, కిచ్చొ కిచ్చొ అలవాట్లు రితి కెరుక పూర్గుమ్చ జోవయింప వెల్లెల మాన్సుల్ సికడ అస్సి.

5 జాచి రిసా, జేవ్ పరిసయ్యుల్ చి మోసె తెన్ దేముడు దిలి ఆగ్గుల్ సికడ్డన యేసుక, “తుచ సిస్సుల్ కిచ్చొక వెల్లెల మాన్సుల్ సంగిలి రితి ఇండుక ముల దా, గర్చ అత్తో తెన్ అన్నిమ్ కతతి?” మెన పునిల.

6 జలె, యేసు జోవయింక, “తుమ్ ఉప్రమెన్సుచొచి రిసా యెసయా పూర్గుమ్చొచి అత్తి దేముడు సంగిలి కోడు సత్తిమ్.

ఈంజ ప్రెజల్ అంక గవురుమ్ కెర్ల రిత కొడె సంగిలే కి, జోవయించి పెట్టి అంక దూరి అస్సి.

7 మాన్సుల్ అవ్వి ఉచర్ల కొడెక ‘దేముడు సంగిలస’ మెన ప్రెజల్క సికడ, అంక ఆరిక జోకర్తతి”

మెన తుమ్చి రిసాచి కోడు.

8 “తుమ్, దేముడు దిలి ఆగ్గు ముల దా, మాన్సు అవ్వి ఉచర్లిసి ఎక్కి మెన్సు నిదాసుమ్ కెర్తను” మెన జేవ్ వెల్లెల మాన్సుల్క యేసు సంగ,

9 జోవయింక అన్నె, “తుమ్చ పూర్గుమ్చ అవ్వి సికయ్లె అలవాట్లు నిదాసుమ్ కెర్లి రిసా దేముడుచి ఆగ్గు రితి ఇండుక ముల అస్సన్. కీన మాన్సుల్, తూమ్!

10 తుమ్ ములిలి కేన్ ఆగ్గుచి రిసా ఆవ్ అప్పె సంగితసి మెలె,

* 7:1 7:1 ఎత్తి అదికారుమ్ తిలో దేముడుచి గుడి తిలి పట్టుమ్, జా. † 7:3 7:3 ‘అంచయ్ ప్రెజల్ జతు’ మెన ఎత్తి అదికారుమ్ తిలో దేముడు పూర్గుమ్ నిసాన్ల ప్రెజల్. ‡ 7:4 7:4 నెంజెలె, సంతయ్ తెంతో అనీలి సామన్ దొబెలెకయ్ కవుల.

తుమ్చ అయ్యద్ అబ్బొద్క చెంగిల్ దెక, గవురుమ్ కెర”

మెన, పిమ్మట్,

“అయ్యన్క జలెకు, అబ్బొన్క జలెకు, కో దూసువ కెరుల గే, కచితుమ్ జోక మొర్నుచి సిచ్చ దెంక”

మెన మోసేచి అత్తి రెగిడ్డి కోడు అన్సె.

11 “గని, తుమ్ జలె ఇన్నె మెంతసు, అంచితె తుమ్క కిచ్చొ కలుగు జతి గే, జయ్యి ‘కొర్పాను’ మెలె ‘ప్రబుక దెంక ఒప్పున అన్సె’, మెన కో పుత్తుసి అయ్యన్ అబ్బొన్క సంగిలెగిన,

12 ‘జా దీసి తెంతో, జో మాన్సుచి పూచి నాయ్’ తుమ్ సంగిల్ రితి జా, జో అయ్యన్ అబ్బొన్క దెంక తిలి సాయిమ్ జో మాన్సు దెంక తుమ్ ఒప్పున్ నాయ్.

13 తుమ్ దస్సి జా, తుమ్చ పూర్ణుమ్చ అయ్యె ఉచర్త అలవాట్లు ప్రెజల్ కెర్త మెన, ‘దేముడు సంగిలి కోడుక అదికారుమ్ నాయ్’ మెన సికడ్డి రితి జా, తుమ్ దేముడుచి కోడు మార్పువ కెర్లి రితి కెర్తను. అన్నె దన్ను మాయల్ ఒగ్గర్ కెర్తను.” మెన, జేవ్ వెల్లెల మాన్సుల్క యేసు గోల కెర్తన్.

మాన్సుక గార్ కెర్లిసి కిచ్చొ జయెదె గే యేసు సంగిలిసి

14 తెదొడి యేసు ప్రెజల్క అన్నె పాసి బుకారా కెర, జోవయింక ఇన్సె మెలన్. ఆవ్ సంగితి కోడు తుమ్ ఎత్తిజన్ ఏక్ కోడు సూన అర్దుమ్ కెరన.

15 బయిలె తెంతో మాన్సుచి వేట్ తెడి కిచ్చొ వస్తువ పెసిలె, జయ్యి జో మాన్సుక గార్ కెరుక నెత్తె. గని, మాన్సుచి పెట్టి తిలి బుద్ది గార్ జలె, జయ్యి జో మాన్సుక గార్ కెరెదె.

16 క్రిస్మాన్త కండ్లొ కక్క తిలె, సరిగా సూన్సు!

17 జేవ్ ప్రెజల్క ముల దా గెరి గెచ్చు తెడి పెసిలి పొది, జోచ సిస్సుల్ ఈంజు టాలిచి రిసా పుసిల.

18 యేసు జోవయింక, “తుమ్ కి అర్దుమ్ నెంతె అస్సున్ గే? మాన్సు కయ్లె, బయిలె తెంతో జో మాన్సుచి పెట్టి కిచ్చొ పెన తయెదె గే, జో మాన్సుక గార్ కెరుక నెత్తె మెన అర్దుమ్ కెరన్సు నాయ్?”

19 ఈందె, జోచి పేట్ వాట్ గెచ్చు, అన్నె బార్ జయెదె. జోచి పెట్టితె పెన నాయ్! జాకయ్, జోక గార్ కెరె నాయ్” మెన సంగిలన్. ఇసి మెన యేసు సంగిలిన్చి అర్దుమ్ కిచ్చొ మెలె, “కిచ్చొక కి కంక గారు మెనుక నెంజె. కిచ్చొ కి కంక జయెదె” మెన నెలవ్ సంగిల్ రితి జతయ్.

20 తెదొడి యేసు సిస్సుల్క “మాన్సుచి పెట్టితె మొదొల్ జా, కిచ్చొ కిచ్చొ బార్ జయెదె, జయ్యి జోక గార్ కెరెదె.

21 మెలె, గర్పు ఉద్దుసుమ్లు, లంజెబుద్ది, చోరు బుద్ది, అత్త్య కెర్లి బుద్ది, లంజెకమొ,

22 అన్నె మాన్సుల్చి అస్సిక ఆన జతిసి, పాపుమ్ ఇండితి ఆన, మోసిమ్బుద్ది, గోనలు, మాన్సుల్క దూసువ కెర్లిసి, గవురుమ్ ఉచరంతిసి, కామక నెంజిత కొడొ, దనచ ఎత్తి, మాన్సుచి తెడి జోచి పెట్టితె మొదొల్ జతతి.

23 గర్పు బుద్దుల్ ఎత్తి. మాన్సుచి పేట్ తెడి మొదొల్ జా బార్ జతతి. దనచయ్ మాన్సుక గార్ కెర్తతి” మెన అన్నె సంగిలన్.

తేర్బోదచి దువిన్క యేసు చెంగిల్ కెర్లిసి

(మత్త 15:21-28)

24 యేసు ఒత్త తెంతో బార్ జా, తూరు చి సీదోను మెల వట్టుల్చి ప్రాంతుమ్తె ఉట్టు గెచ్చు, ఏక్ గెరి గెలన్. జో ఒత్త తిలి రితి కో కి సూనుక జో నెసిలె కి, జో తిలిసి లుంకడుక నెత్తిర్.

25 చి బేగి, బూతుమ్ దెర్లి ఇదిలిన దువిసి తిలి ఏక్ తేర్బోద, యేసుచి రిసా సూన కెర, జోతె జా కెర, జోచి చట్టె నెర్ను సేడ్డి.

26 జా తేర్బోద కేనెచి మెలె, జా *నిరియ దేసిమ్చి జా పెనికయ ప్రాంతుమ్తె జెర్పిలి, గ్రీకు మెలి వేర దేసిమ్చి మాన్సు. జలె, జా తేర్బోద యేసుతె జా కెర, “అంచి దూక దెర్లి బూతుమ్క ఉడడ గెల్తె గె?” మెన యేసుక బతిమాల్పా జా సంగితికయ్,

§ 7:16 7:16 గ్రీకు జాన తెన్ ఈంజ మత్తెలి తోలితో రెగ్గె సగుమ్ పుస్తకల్తె 16 నంబర్చి కోడు తయె నాయ్. * 7:26 7:26 నెంజెలె ‘సురోపెనికయ ప్రదేసిమ్చి మాన్సు’ మెనుల.

27 జో జాక, † “సొంత బోదల్ తొలితొ కతు. బోదల్చి వంత అన్నిమ్ గుడ్డ కెర, నూనకూనర్లు కతి రితి గల దెంక చెంగిల్ నాయ్” మెన సంగిలన్.

28 జా జోక, “నిజామి, ప్రబు, గని నూనకూనర్లు కి అన్నిమ్ కెర్లి బల్లచి ఎట్టొ రక తా, బోదల్ సేడయ్లి ఉన్టొ కవుల” మెన సంగిలి.

29 ఇసి సంగితికయ్, తెదొడి యేసు జాక, “ఈంజ తుయి సంగిలి తుచి నముకుమ్చి రిసొ, సేంతుమ్ తెన్ గో. బూతుమ్ తుచి దువిదీక ముల దా గెచ్చ అస్సె” మెన సంగిలన్.

30 ఇసి సంగితికయ్, జా తేరిబోద గెరి గెచ్చ కిచ్చొ దెకిలి మెలె, బూతుమ్ ముల దా గెలి రిసొ, జా నాడి మంచుమ్తె నిజ తిలిసి.

తొత్తో జలో బోయ్లొక యేసు చెంగిల్ కెర్లిసి

31 ఒత్త తెంతొ యేసు తూరు ప్రాంతుమ్ ముల దా సీదోను ప్రాంతుమ్ వాట్ గెచ్చ, దెకపొలి ప్రాంతుమ్ వాట్ కి గెచ్చ. గలిలయ ప్రాంతుమ్చి నముద్దుమ్ రితి గాడు పక్క అస్సె ఉట్ట అయ్లన్.

32 ఉట్ట జెతికయ్, బోయ్లొ తిలొ తొత్తో మాన్సు ఎక్కిలొక మాన్సుల్ యేసుతె కడ ఆన, “ఇన్సెక చడ చెంగిల్ కెర్తె గే?” మెన యేసుక బతిమాల్పా జా పుసిల.

33 జలె, ప్రెజల్తె తెంతొ యేసు జోక ఎక్కిలొక పక్క కడన, జో మాన్సుచ కంట్టె ఏక్ ఏక్ ఊంటివొ గల దా తుంక, జో తొత్తోచి జేబు చడ జోచి సొంత లాడు దెరవ దా,

34 ఆగాసుమ్ పక్క దెక, కన్యారుమ్ తెన్ పెట్టి ఏడ్డి రితి జా, ‘ఉగ్గి జా’ మెలి అర్దుమ్ తెన్, ఒత్తచి బాస తెన్ “ఎప్పొతా” మెన సంగ యేసు సంగిలన్.

35 యేసు దస్సి సంగితికయ్, జో బోయ్లొచ కంట్టె ఉగ్గి జలి చి చెంగిల్ జలన్, చి జేబు బులుక దెర్తికయ్, సొస్టుమ్ లట్టబుక దెర్లన్.

36 తెదొడి, “కక్క సంగ నాయ్” మెన ఒత్త తిల మాన్సుల్క యేసు సంగిలన్. గని “సంగుక పోస” మెన జో కెత్తి సుట్లు సంగిల్ కి, జేవ్ అన్సె ఒగ్గర్ జా కేన్ తెన్ సంగితె తిల.

37 జగ్గు జలిన్చి రిసొ ఎదివాట్ ఆచారిమ్ జా, యేసుచి రిసొ “ఈంజొ కిచ్చొ కెర్తె కి జెయిమ్ జతయ్. బోయ్లొ మాన్సుల్ నూన్తి రితి కెరుక జానె, తొత్త మాన్సుల్ సొస్టుమ్ లట్టబ్బి రితి కెరుక జానె. ఎత్తి చెంగిల్ కెర అస్సె” మెన ఎత్తిజన్ సంగితె తిల.

8

చెత్తర్ వెయిల్ జన్క యేసు అన్నిమ్ దిలిసి (మత్త 15:32-39)

1 జేవ్ దీసలె అన్సెక్ సుట్టు ఒగ్గర్జన్ జనాబ్ యేసుతె బెర తతికయ్, జోవయింక కతిసి కిచ్చొ నెంజలి రిసొ, యేసు జేచ సిన్సుల్క పాసి బుకారా, జోవయింక

2 “ప్రెజల్ అప్పెక తిర్తితి ఎద అంచ తెన్ అస్తి. జోవయింక కతిసి కిచ్చొ కి నాయ్ చి రిసొ జోవయించి ఉప్పిరి ఆవ్ కన్యారుమ్ జా అస్సి.

3 జోవయింక చువ్వెచి పెట్టి గెరి తెర్తయ్లెగిన, వట్టె ఏక్ వేల మొకొమ్ గుంజ్ర సేడుల. జోవయింతె సగుమ్జన్ దూర్ తెంతొ జా అస్తి.” మెన సంగిలన్.

4 జేవ్ సిన్సుల్ ఆచారిమ్ జా, “ఈంజ బయిలు దేసిమి ఎతివాట్జన్ మాన్సుల్క అన్నిమ్ దొర్కు కెరుక కీసి?” మెన అన్యూమ్ జా సంగిల.

5 ఇసి సంగితికయ్, యేసు జోవయింక “తుమ్తె కెత్తి పోడియె అస్తి?” మెన పుసిలన్, చి “సత్తు” మెన జబాబ్ దిల.

6 జలె, యేసు జా జనాబ్క “బుయ్యె వెన” మెన ఆత్ర దా, జేవ్ సత్తు పోడియె దెర, “తుయి దా దయ కెర్లది” మెన దేముడు అబ్సొన్క ఉచర, జేవ్ పోడియె మోడ కెర, “ప్రెజల్క వంట దాస” మెన సిన్సుల్క దెతికయ్, ప్రెజల్క వంట దిల.

† 7:27 7:27 దేముడు దెతి వరుమ్క ‘అన్నిమ్’ మెన టాలి కెర

7 దొన్ని ఇదుద్ద మొస్సు కి తతికయ్, యేసు దేముడు అబ్నిస్క అన్నె దస్సి జోకర, “ఈంజేవ్ మొస్సు కి వంట దాస” మెన అడ్డ దెతికయ్, సిస్సుల్ ప్రైజల్క వంట దిల.

8 ఎత్తిజన్ పేట్ బెర్తు కతికయ్, సేంసిల గండలు సిస్సుల్ గుడ్డిల, చి నత్తు గంపల్తె బెర్ల.

9 అన్నీమ్ కత్తన్ కెత్తిజన్ జల మెలె, పాసి పాసి చెత్తర్ వెయిల్జన్ జల.

10 జలె, యేసు ప్రైజల్క గెరి తెద్రవ దా, సిస్సుల్ తెన్ బేగి దోనితె వెగ, దల్మనూతా ప్రాంతుమ్తె ఉట్ట గెల.

పరిసయ్యుల్ యేసుక అన్నె పరిచ్చ కెర్లిసి

11 యేసు ఇసి ఒత్త తిలి పొది, పరిసయ్యుల్ సగుమ్జిన్ జా కెర, యేసు తెన్ జట్టి జతి రితి జా, జోక “తువి అదికారుమ్ పరలోకుమ్ తెంతో చి జలె, అమ్క రుజ్జు దెకయితి రిసా కిచ్చి జవున్ వెల్లి కామ్ కెరు.” చెంగిల రితి జోక పరిచ్చ కెర్ల.

12 యేసు, జలె, జోచి మెన్సుతె ఒగ్గర్ దుకుమ్ జా ఏడ్లి రితి జా, “తుమ్ ఈంజ కాలుమ్చ మాన్సుల్ కిచ్చొక అంచి రిసా రుజ్జు దెకయ్త కమొక ఆన జతను? అవ్ తుమ్క కిచ్చొ కచితుమ్ సంగితసి మెలె, తుమ్ అన్నానుమ్ జల ఈంజ కాలుమ్చ మాన్సుల్క తుమ్ ఉచర్లి సాచి కామ్ ఎక్కి కి కెర దెంక నెంజె.” మెన జేవ్ వెల్లెల మాన్సుల్క సంగ కెర,

13 జోవయింక ముల దా, సిస్సుల్ తెన్ దోని అన్నె వెగ, గాడు జిన ఒత్తల్తో గెచ్చుక మెన బార్ జల.

పండితుల్ సికయ్తి బుద్ధిచి రిసా యేసు జాగర్ల సంగిలిసి

(మత్త 16:5-12)

14 దోనితె ఎక్కి పొడి తిలి, గని అన్నె పొడియొ అనుక సిస్సుల్ పచ్చ తిల.

15 జలె, యేసు జోవయింక కిచ్చొ సంగిలన్ మెలె, “తుమ్ దెకన. పరిసయ్యుల్ చి రానొ జలో హేరోదుచి పులయ్తి పీట్చి రగుమ్చి రిసా తుమ్ జాగర్ల తెన్ తా” మెన సంగిలన్.

16 ఇసి సంగితికయ్, జేవ్ ఎక్కిలోక ఎక్కిలో “అమ్క పొడి నాయ్. కిచ్చొక ఇసి మెన అమ్క సంగితయ్?” మెన లట్టబంత తెల.

17 యేసు జేవ్ ఉచర్లిసి జానెచి రిసా, జో “ ‘అమ్క పొడియొ నాయ్’ మెన కిచ్చొక లట్టబంతను? తుమ్ అప్పెక అర్దుమ్ కెరన్ను నాయ్ గే? తుమ్క పట్టి బేడు బంద అస్సి గే, చి అర్దుమ్ కెరనుక ఇస్సుమ్ జసు నాయ్ గే?”

18 తుమ్క అంకివో తిలి కి దెకున్ నాయ్ గె? తుమ్క కంగ్గల్ తిలె కి సూన్సు నాయ్ గే? అప్పె రితి జర్గు జలిసి కి ఏదస్ట కెర్ను నాయ్ గే?

19 జేవ్ పావ్ వెయిల్జన్ మాన్సుల్క ఆవ్ పావ్ పొడియొ మోడ వట్టి దీసి, కెత్తి గంపల్తె సేంసిల గండల్ గుడ్డ బెరయ్లదు?” మెన సంగితికయ్, జేవ్ “బార గంపల్తె” మెన జబాబ్ దిల.

20 “అన్నె, జేవ్ చెత్తర్ వెయిల్జన్ మాన్సుల్ తిలిన్తె జేవ్ సత్తు పొడియొ మోడ వట్టి దీసి, కెత్తి గంపల్తె సేంసిల గండల్ గుడ్డ బెరయ్లదు?” మెన సంగితికయ్, జేవ్ “సత్తు గంపల్తె” మెన జబాబ్ దిల.

21 జాకయ్ జో జోవయింక “జలె, అప్పెక కి తుమ్ అర్దుమ్ కెరన్ను నాయ్ గే?” మెన యేసు సంగిలన్.

గుడ్డి మాన్సుక యేసు చెంగిల్ కెర్లిసి

22 తెవోడి యేసు, సిస్సుల్, బేత్తుయిదా గవ్వెచి ఒడ్డుతె దోనితె పావ్ ఉత్తిర్ల. గుడ్డి మాన్సు ఎక్కిలోక ఒత్తవ మాన్సుల్ సగుమ్జిన్ యేసుతె కడ ఆన, “దయ కెర, ఇన్నెక చడ చెంగిల్ కెరు” మెన బతిమాల్య జా సంగిల.

23 జలె, యేసు జో గుడ్డి మాన్సుచి అతు దెర, జా గవ్వె తెంతో ఇదిల్ దూరి కడ నా కెర, జోచ అంకివోతె తుంక, చడ, “తుక కిచ్చొ జలెకు డీస్యయ్ గే?” మెన పుసిలన్, చి

24 జో మాన్సు, “మాన్సుల్క దెకతసి, గని జేవ్ రూకుల్ ఇండితి రితి డీస్యతి” మెన సంగిలన్.

25 జలె, జో మాన్సుచ అంకివోతె యేసు అన్నె చడితికయ్, జో చెంగిల్ దెక, ఎత్తి సొస్సుమ్ దెకీలో.

26 ఇసి చెంగిల్ జతికయ్, యేసు జోక, “తుయి గవ్వె అన్నె నే పెసితె కి తుచి సొంత గెరి ఉట్ట గే” మెన తెద్రవ దిలన్.

ఈంజొయి 'క్రీస్తు' మెలో జెంక తిలో రచ్చించువ కెర్తొసొ
(మత్త 16:13-20; లూకా 9:18-21)

27 ఒత్త తొతో యేసు, జోచ సిస్సుల్ తెన్ కైసరియ పిలిప్పి మెలి ప్రాంతుమ్చ గెవ్విలె ఇండ గెతె తత్తికయ్, "కొన్సొ మెన పైజెల్ అంక సంగితతి?" మెన సిస్సుల్క పుసిలన్.

28 జేవ్ జోక "బాప్తిసుమ్ దెతో యోహాను జా తయెదె మెన సగుమ్జెన్ తుక సంగితతి. అన్నె సగుమ్జెన్ తుక 'ఏలీయా' పూర్తుమ్చొ జా తయెదె" మెంతతి. అన్నె సగుమ్జెన్, 'దేముడుచి కబుర్ పూర్తుమ్ సంగిలో' అన్నెజొ జా తయెదె" మెన తుక సంగితతి" మెన సిస్సుల్ సంగిలన్.

29 ఇని సంగితకయ్, జో జేవ్క, "తుమ్, జెలె, కొన్సొ మెన అంక సంగితను?" మెన పుసిలన్. జెలె, పేతురు, "తెద్రయందె మెన దేముడు సంగ తిలో *క్రీస్తు' మెలో రచ్చించువ కెర్తొసొ, తుయి" మెన ఒప్పున సంగిలన్.

30 పేతురు ఇని మెన ఒప్పునతికయ్, యేసు జోక, "అంచి రిసా తుమ్ చినిలిసి కక్క నంగ నాయ్" మెన జాగర్త సంగిలన్.

జో మొర అన్నె జేవ్ జంక తిలిన్చి రిసా యేసు సంగిలిసి
(మత్త 16:21-28; లూకా 9:22-27)

31+ "అవ్ మాన్సు జా జెర్మన్ అయ్లోసొ ఒగ్గర్ సైమల్ సేడ, వెల్లెల మాన్సుల్చి అత్తి, వెల్లెల పూజర్తుచి అత్తి, మోసి తెన్ దేముడు దిలి ఆగ్గల్ సికడ్డనచి అత్తి, మొరుక అస్సె. గని తిర్తతి గెలె, అన్నె జేవ్ జా ఉట్టుక అస్సె" మెన యేసు జోచ సిస్సుల్క బోదన కెరుక దెర్తన్.

32 జో ఈంజ కొడ్ ఒండిజెన్క స్థాస్థుమ్ సంగిలన్. దస్సి సంగితకయ్, పేతురు జోక ఏక వక్యుయ్ కడ నా కెర, "దస్సి నంగు నాయ్. తుక దస్సిచి పొని!" మెన పేతురు జోక గోలె కెరుక దెర్తన్.

33 పేతురు ఇని సంగితకయ్, యేసు వన్ల, సిస్సుల్క దెక, పేతురుక, "నయ్తాన్, అంచి వడ్డొ గో! తుయి దేముడుచి వచ్చెనచి బుద్ది ఉచర్లదె నాయ్, గని మాన్సుల్ ఉచర్చి రితి ఉచర్చది" మెన యేసు గోలె కెర్తన్.

34 తెదొడి జోచ సిస్సుల్క, పైజెల్చి జనాబ్క, జోచి పాసి బుకారా కెర, యేసు జోవయింక, "కో నంపజా అంచి వట్టి బులుక ఉచరుల గే, జోచి సొంత ఇస్టుమ్ కెరుక ముల దా, జోచి సొంత *సిలువ వయన అంచి వట్టి బులుక అస్సె.

35 కిచ్చొక మెలె, జోచి సొంత ప్రానుమ్ రచ్చించువ కెరనుక కో కోర్వ జవుల గే, జోచి ప్రానుమ్ గెచ్చవొనెదె. గని అంచి రిసా, అంచి నుబుమ్ కబుర్ నూనయ్తి రిసా, కో జోచి ప్రానుమ్ దెతి రితి ఎక్కి మెన్సు నిదానుమ్ ఇండుల గే, జోచి ప్రానుమ్ రచ్చించువ జెయెదె.

36 మెలె, ఈంజ లోకుమ్తె తిలిసి ఎత్తి కేన్ మాన్సు జవున్ కలుగు కెరన జోచి ప్రానుమ్ గెచ్చవొన్లెగిన, జోక కిచ్చొ లాబుమ్? కిచ్చొ లాబుమ్ నాయ్.

37 మెలె, జో మాన్సుచి అత్తొ గెచ్చవొన్లెగిన, జోచి ప్రానుమ్ దేముడు తెన్ అన్నె బెదయ్తి రితి కేన్ మాన్సు కిచ్చొ దిలె సరిపుచువ జెయెదె గే?

38 మెలె, గర్చ కమ్మ కెర్చి ఈంజ పాపుమ్చి లంజెచి ఉగుమ్తెచి బుద్ది కెరన, అంచి సత్తిమ్ జవున్, అంచ కొడొచి సత్తిమ్ జవున్, కో లాజె జా నే ఒప్పునతె తవుల గే, అవ్ మాన్సు జా జెర్మన్ అయ్లోసొ పరలోకుమ్తె గెచ్చొ అబ్బొసి జెలో దేముడుచి పరలోకుమ్చి ఉజెడెచి గవురుమ్ తెన్ సుద్ది తిల దూతల్

* 8:29 8:29 ఒగ్గర్ పూర్తుమ్ తొతో "పాపుమ్ గెచ్చయ్తో దొర్కు జెలో రచ్చించువ కెర్తొసొక తెద్రయందె" మెన ఎత్తి అదికారుమ్ తిలో దేముడు సంగ రెగ్గవ తిలన్. క్రీస్తు మెలి ఈంజ అర్దుమ్ తయెదె. † 8:31 8:31 'మాన్సు జా జెర్మన్ అయ్లోసొ' మెన బయ్బిల్తె రెగ్గ తిలె, జేవ్చి అర్దుమ్ కిచ్చొ మెలె, 'తెద్రయందె' మెన ఎత్తి అదికారుమ్ తిలో దేముడు దెద్రయలో క్రీస్తు రచ్చించువ కెర్తొసొ. యేసు 'అవ్ మాన్సు జా జెర్మన్ అయ్లోసొ' మెన సంగిలె, బయ్బిల్చి పొర్చి ప్రమానుమ్ నదు కెర్ల పండితుల్ జా అర్దుమ్ కెరనుల, గని యేసుక 'జొయ్య' మెన ఒప్పునుక నెన కెర. జోవయింక ఒగ్గర్ అల్లర్ కెరుల. ఒగ్గర్ నదు నే కెర్ల పైజెల్, సిస్సుల్, జా అర్దుమ్ ఇదెల్ అల్పిమ్ కెరనుల. ‡ 8:34 8:34 'సిలువ' మెన కిచ్చొక సంగితయ్ మెలె, యేసుక విలోదుమ్ నుదల్ కిసి మారుల మెలె, జోక 'సిలువ' మెలిన్తె అత్తిలె చట్టిలె మెకుల్ పెట బీచడ మెర్చి రితి ములుల. జోక జా సిలువతె నే బీచడై అగ్గె, యేసుచి సొంత సిలువ జోక మార్చినతె జో గడియ సొంత వయుక నెత్తిగ్గె; యోహాను 19:17. వడ్డొ సిమాను మెలో ఎక్కిలో వయితి రితి తియాగ్గ; మార్కు 15:21. సిలువ మెలె, ఏక డేడిక అన్నెక డేడి రితి డండె అర్దుమ్ కెర బుయ్యె రోవ బీచడుల.

తెన్ బెద ఈంజ లోకుమ్తె అన్నె జెతి దీనిక, జేవ్ మాన్సుల్క 'అంచ' మెన ఒప్పన్తి రితి అమచి తెన్ బెదవనుక అంక లాజు తయెదె." మెన సిన్సుల్క ప్రజల్క యేసు సంగిలన్.

9

1 జో ఇసి సంగ, "దేముడుచి రాజిమ్ అదికారుమ్ తెన్ జా అస్సె మెన, ఇన్నె బీవో జా తిల సుదల్తె సగుమ్జెని నే మొర్తె అగ్గె దెకుల మెన తుమ్క ఆవ్ కచితుమ్ సంగితసి" మెన సిన్సుల్క ప్రజల్క యేసు సంగిలన్.

యేసు గడియ పరలోకుమ్చి ఉజడి జలిసి
(మత్త 17:1-13; లూకా 9:28-36)

2 సావ్వు దీసల్ గెలి పిమ్బుల్, యేసు పేతురుక యాకోబుక, యోహానుక, అన్నె కో నెంజలి డోంక తిలి మెట్టయ్ కడ నిలన్. మెట్టయ్ వెగితికయ్, జేవ్చి మొక్కె యేసుచి రూపుమ్ మార్పువ జలి.

3 జోచ పాలల్ కీసి జల మెలె, ఈంజ లోకుమ్తె కేన్ సారీ కేన్ సబ్బు తెద్ది చోక్ కెరుక నెత్తిర్ది రితి, ఉజడిడ్ జా చోక్ జల.

4 తెదొడి, పూర్ణుమ్చ దేముడుచి కబుర్లు సంగిత మోసి చి ఏలీయా దొంగల యేసు తెన్ లట్టబై తా, జేవ్ సిన్సుల్క డీసన్ సేడ్ల.

5-6 ఇసి జతికయ్, జేవ్ సిన్సుల్ బలే బియఁ గెతికయ్, తెదొడి పేతురు, కిచ్చొ మెనుక గే నేన గెచ్చు, యేసుక "గురుబాబు, అమ్ ఇన్నె తంక చెంగిలి. తుక ఏక్, మోసేక ఏక్, ఏలీయాక ఏక్, మొత్తుమ్ తిన్ని కుడియల్ ఇన్నె బందుక అమ్క నెలవ్ దే" మెన సంగిలన్.

7 సంగిత తతికయ్, తెదొడి మబ్బు ఏక్ ఉత్త్ర జా, జోచయింక డంకిలన్, అన్నె, "ఈంజొయి అంచొ పుత్తు, అంచొ ప్రేమ తిలో పుత్తు. ఇన్నెచి కోడు తుమ్ నూన" మెన, మబ్బు తెంతో అవాడ్ సంగిలిసి నూన్ల. ఇసి జలి బేగి,

8 సిన్సుల్ సుట్టునంత అంకి గలెకి, యేసుక పిట్టవ జో తెన్ అన్నెకో కి డీస్తి నాయ్.

9 జేవ్ జా మెట్టయ్ తెంతో ఉత్త్ర జెతె తతికయ్, "ఆవ్ మాన్సు జా జెర్మన్ అయ్లోసా మొర గెచ్చు అన్నె జీవ్ జా ఉట్టితి ఎద, తుమ్ అప్పె ఇన్నె దెకిలిసి కక్క కి సంగ నాయ్" మెన సిన్సుల్క యేసు సంగిలన్.

10 ఇసి సంగితికయ్, జగ్గు జలిన్చి రిసా తుక్కె తా గెల, గసి "మొర గెచ్చు అన్నె జితిన్చి రిసా సంగిత కోడుక కిచ్చొ అర్దుమ్?" మెన ఉచరంతె తిల.

11 తెదొడి జోక కిచ్చొ పుసీల మెలె, "రచ్చించువ కెర్తొసా జతో క్రిస్తుచి అగ్గె ఏలీయా పూర్ణుమ్చొ జెంక అస్సె, మెన మోసి తెన్ దేముడు దిలి ఆగ్గుల్ సీకడ్డన కిచ్చొక సంగితతి?" మెన పుసీల.

12 యేసు జోచయింక, "ఎత్కి తెయారీ కెర్తి రిసా *ఏలీయా తొలితో జెంక అస్సె మెలి కోడు నత్తిమ్. జా ఏక్, రచ్చించువ కెర్తొసా, ఆవ్ మాన్సు జా జెర్మిలె ఒగ్గర్ స్రెమల్ సేడుక అస్సె మెన, మాన్సుల్ జోక నిస్కారుమ్ దెకుల" మెన రెగెడ్డిసి కిచ్చొచి రిసా గే తుమ్ ఉచర.

13 అన్నె, జలి ఆవ్ తుమ్చి తెన్ సంగితసి కిచ్చొ మెలె, జో ఏలీయా తొలితో జా తిలన్ మెన ఆవ్ తుమ్క కచితుమ్ సంగితసి. జో జా తిలో, అన్నె జిచి రిసా రెగెడ్డి కోడు కి నెరవెర్పువ జలి.

"జేవ్చి ఇస్టుమ్ అయ్లి రితి మాన్సుల్ జోక కెల మెన రెగెడ్డి కోడు" మెన యేసు సంగిలన్.

సిన్సుల్ ఏక్ బూతుమ్క ఉదడుక నెత్తిర్దిసి
(మత్త 17:14-20; లూకా 9:37-43)

* 9:12 9:12 మత్తయి 17:13 తె దెకిలి, 'ఏలీయా రిత్సా' మెన బాప్తిసుమ్ దెతె తిలో యోహానుచి రిసా సంగిలన్ మెన రుజ్జు జతయ్.

14 యేసు, జేవ్ సిన్సుల్, మెట్టక ఎట్టో తా గెల సిన్సుల్తె పాచ కెర, జోవయింఱొ సుట్టునంత ఒగ్గర్జిన్ జనాబ్ బెర అస్తి, చి మోసి తెన్ దేముడు దిలి ఆగ్గుల్ సికడ్డన జోవయింతెన్ గగ్గల్ జతె అస్తి మెన యేసు ఇసి దెకిలో.

15 జలె, జేవ్ జనాబ్ యేసుక దెకిల్ బేగి, ఒగ్గర్ ఆచారిమ్ జా, జోతె నిగ జా జోకర్ల.

16 యేసు, జలె, “జోవయింతెన్ కిచ్చొవి రిసా లట్టబ్బను?” మెన పుసిలన్.

17 జనాబ్తె తిలో ఎక్కిలో, “గురుబాబు, గుల్లో కెర్తి బూతుమ్ దెర్లొ అంచొ పుత్తుక తుచితె కడ అన్యం.

18 జా బూతుమ్ జోక కెనె దెరెదె గి, ఒత్త సిడవ దెయెదె. నేడయెలె, ఈంజొ పొగుర్లు బారె కెరవన, దంతొ చప్ల, మోర్చ సేడుక. ‘జా బూతుమ్క ఉడడ దాన’ మెన తుచ సిన్సుల్క బతిమాల్చా జా సంగిలె కి, జేవ్ నెత్తిర్ల.” మెన జో నాడుచొ అబ్బొసి సంగిలన్.

19 తెదొడి యేసు కిచ్చొ జబాబ్ దిలన్ మెలె, “నముకుమ్ నెంజిలి కాలుమచ, తుమ్! తుమ్చి తెన్ ఆవ్ కెత్తి దీనల్ తంక? కెత్తి దీనల్ తుమ్చి బుద్ది ఆవ్ ఒరుప జంక? జో నాడుక అంచితె కడ ఆన” మెన సంగితికయ్,

20 నాడుక యేసుతె అన్య. అన్తికయ్, జా బూతుమ్ యేసుక దెకిలి బేగి, జో నాడుక పొర్లు కెరవ గెల్లికయ్, నాడు బుయ్యె సేడ ఎంగ్ల జా పొగుర్లు కెరవన, పొర్లువ జతె తిలన్.

21 దస్సి జతె తతికయ్, “ఇన్నెక కెత్తి దీనల్ తెంతొ ఈంజ బాద అన్య?” మెన యేసు నాడుచొ అబ్బొన్క పుసిలన్, చి జో “బాల తతె తెంతొ. బాల తతె తెంతొ దస్సి జా జా,

22 ఇన్నెక నాననుమ్ కెర్తి రిసా ఒగ్గర్ ఒగ్గర్ సుట్టు ఆగితె పానితె సేడయెలి. తుయి కిచ్చొ జలెకు కెరుక తెర్లెగిన, అమ్చి ఉప్పిరి కన్యారుమ్ తియె అమ్క తోడ్ కెరు!” మెన సంగ జోకర్తికయ్,

23 తెదొడి యేసు జోక, “తుయి తెర్లెగిన” మెంతసి అంక, కిచ్చొక? కో అంక నంపజిలోసాక, జోక ఎత్తి జెయిమ్ జయెదె!” మెన సంగిలన్.

24 బేగి నాడుచొ అబ్బొసి, “ఆవ్ నంపజతసి. అంచి నముకుమ్ తొక్కి చి జలె, ఒగ్గర్ జతి రితి అంక తోడు తా!” మెన ఏడ కెకె గలన్.

25 తెదొడి ఒగ్గర్జిన్ జనాబ్ ఎక్కితె బెద పాసి నిగ జెతతి మెన యేసు దెక కెర, “ఒ గుల్లో కెర్తి బోయ్రో కెర్తి బూతుమ్. తుయి ఇన్నెక ముల దా, కెయ్యెక కి ఇన్నెక అన్నె దెరు నాయ్ మెన ఆవ్ తుక ఆడ్ర దెతసి,” మెన జా బూతుమ్క యేసు గోల కెర్తికయ్,

26 బూతుమ్ గట్టిజ కేకె గల, నాడుక గట్టిజ పొర్లు కెరవ బారె జా ముల దిలన్, చి నాడు మొర గెలి రితి జలి. “మొర గెలో” మెన ఒగ్గర్జిన్ సంగిలె,

27 గని యేసు నాడుక ఆతు దెర ఉట్టయ్తికయ్, జో చెంగిల్ జా టీవో జలన్.

28 జలె, యేసు గెరి గెచ్చ తెడి పెసితికయ్, జోచ సిన్సుల్, “అమ్ కిచ్చొక జా బూతుమ్క ఉడడుక నెత్తిర్లమ్?” మెన కో వేర మాన్సుల్ నే నూనతి రితి యేసుక పుసిలె.

29 పుసితికయ్, జో “ప్రార్దన కెర్లెకయ్ ఇసిచి ఉడడుక జయెదె, నెంజిలి నాయ్” మెన సంగిలన్.

మొర గెచ్చ అన్నె జిమ్ జా ఉట్టిందె మెన యేసు సంగిలిసి

(మత్త 17:22-23; లూకా 9:43-45)

30 యేసు, సిన్సుల్, ఒత్త తెంతొ బారె జా గలిలయ ప్రాంతుమ్ వాట్ గెల. ‘అమ్ ఇన్నె తిలిసి ప్రెజల్ నేన్తు’ మెన గుట్టు తెన్ గెతె తిలె.

31 కిచ్చొక మెలె, యేసు జోచ సిన్సుల్క బోదన కెర్తె తిలో. “అవ్ మాన్సు జా జెర్మన్ అయ్లోసాక మాన్సులెచి అత్తి దెర దెవుల, చి అంక మార గెలుల. జేవ్ అంక మార గెలి కి, తిర్తతక అన్నె జిమ్ జా ఉట్టిందె” మెలన్.

32 గని జో సంగిలిసి అర్దుమ్ నే కెరన్లెకి, పుసుక బియె కెర, తుక్లె తిలె.

33 తెదొడి యేసు, సిన్సుల్, కపెర్నహూమ్ పట్టుమ్తె పాచ గెరి గెచ్చ తెడి పెసిలి పొది, యేసు జోవయింక “చట్టె ఎక్కిలో తెన్ ఎక్కిలో కిచ్చొవి రిసా వాదెన జతె తిలదు?” మెన పుసిలన్.

† 9:29 9:29 ఈంజ మత్తెలి గ్రీకు బాన తెన్ తొలితొ రెగ్గ పుస్తకల్తె “చువ్వె తా ప్రార్దన కెర్లెకయ్...” మెన రెగ్ల అన్యె.

34 జేవ్ తుక్కె తిల. కిచ్చొక మెలె, “అమ్చితె కొన్నొ వెల్లో జయదె?” మెన జేవ్ వట్టె లట్టబన తిల.

35 తెదొడి యేసు వెన, జేవ్ బారజినీక పాసి బుకారా కెర, జోవయింక, “కొన్నొ జలెకు వెల్లో జంక ఉవరెదె గే, జో గవురుమ్ నే ఉవరంత తా, ఎత్తిప్పి కంట దాక్ కెరన, ఎత్తిజినీక సేవ కెర్తొసా జంక అన్న” మెన సంగ,

36 ఏక్ బాలబోడల్ దెర, జోవయించి నెడమె టీవో కెర, ఉక్కుల, జోవయింక అన్న,

37 † “ఇన బాలబోడల్తె ఎక్కిలోక జలెకు కో అంచి నావ్ తెన్ మరియాద కెరుల గే అంకయ్ మరియాద కెర్లి రితి జవుల. అన్నె, అంకయ్ కో మరియాద కెర తవుల గే, ఎక్కి, అంకయ్ నాయ్, గని అంక తెద్రయ్లోసాకయ్ మరియాద కెర్లి రితి జవుల” మెన యేసు బోదన కెర్లన్.

38 తెదొడి యోహాను మెలో సిస్సుడు యేసుక కిచ్చొ మెన సంగిలన్ మెలె, “గురుబాబు, ఎక్కిలో తుచి నావ్ తెన్ బూతల్క ఉదడ్లిసి దెకిలమ్. జో అమ్చి పట్టి జెతోసా నెంజెచి రిసా జోక అడ్డు కెర్లమ్” మెన సంగిలన్.

39 జలె యేసు, “జోక అడ్డు కెర నాయ్. కిచ్చొక మెలె, కో జలెకు అంచి నావ్ తెన్ ఏక్ వెల్లి కామ్ కెరెదె గే, జా జర్లు జలి తెంతో అంచి రిసా విరోదుమ్ లట్టబుక నెత్తె.

40 అమ్చి కామ్చి ఉప్పిరి విరోదుమ్ నెంజెలోసా అమ్చి పచ్చెన జెతోసా జయెదె.

41 “అవ్ క్రీస్తు జలొసా తెన్ తుమ్ బెదిలి రిసా, కో జలెకు తుమ్క బుక్కెక్ పాసి జలెకు దెయెదె గే, జో దన్న కెర్లి రిసా కచితుమ్ జోక బవుమానుమ్ పిట్టె నాయ్, మెన తుమ్క అవ్ కచితుమ్ సంగితసి.

42 “గని అంక సంబజల ఇన బాలబోడల్ రిత జలనతె ఎక్కిలోక కి, కో కీపాపుమ్ కెరవుల గే, జోక జెతికయ్ సిచ్చుచి కంట, జోక టొట్రయ్ తిర్వేలి రితో వెల్లో పత్తురు ఒడోవ దా, నముద్రుమ్తె బుడ్డవన్నయ్ జోక చెంగిలి.

43 తుమ్చితె ఎక్కిలోచొ అతు జలెకు జోక * పాపుమ్ కెరవ తిలెగిన, జో అతు జో కండన గెలి రితి జవున్. కిచ్చొక మెలె, దొన్ని అత్తో తెన్ తా వెల్లి అగి గొయ్తె, కెయ్క నే విజయతి అగితె, గలి జతి కంట, పాపుమ్ కెరయ్తొ అతు జలెకు నెంజిలి రితి జా పరలోకుమ్తె బెదుక చెంగిలి.

44-45 † దన్నె, తుమ్చితె ఎక్కిలోచొ చాటు జలెకు జోక * పాపుమ్ కెరవ తిలెగిన, జో చాటు కండన గెలి రితి జవున్. కిచ్చొక మెలె, దొన్ని చట్టో తెన్ తిలి రితి తా వెల్లి అగి గొయ్తె గలి జతి కంట, పాపుమ్ కెరయ్తి చాటు జలెకు నెంజిలి రితి జా పరలోకుమ్తె బెదుక చెంగిలి.

46-47 † తుమ్తె ఎక్కిలోచి అంకి జలెకు జోక * పాపుమ్ కెరవ తిలెగిన, జా అంకి కడ వెంట గెలి రితి జవున్. కిచ్చొక మెలె, దొన్ని అంకివో తెన్ తిలి రితి తా వెల్లి అగి గొయ్తె గలి జతి కంట, ఎక్కి అంకి తెన్ జలి రితి జా దేముడుచి రాజెమ్తె బెదుక చెంగిలి.

48 వెల్లి అగి గొయ్తె కివ్నొ మొర్తి నాయ్, చి జా అగి విజె నాయ్.

49 “ ‘సుద్ది జవున్’ మెన బలి దెతి ఎత్తితె లోన్ దెరవుక అన్న. దన్నె, లోన్క, అగిక మెలి రితి, ఎత్తి మాన్సుక సుద్ది నిదానుమ్ కెరుక అన్న.

50 “లోన్ చెంగిలిచి. గని జా లోన్చి కారు గెచ్చు చవుయ్ జలెగిన, జా అన్నెక్ సుట్టు కీసి కెర కారు కెరుక జయెదె! నెంజె. తూమ్, జలె, తుమ్చి పెట్టి లోన్ దెర్లి రితి జా, చి ఎక్కిలో తెన్ ఎక్కిలో సేంతుమ్ తెన్ తా” మెన సిస్సుల్క యేసు బోదన కెర్లన్.

† 9:37 9:37 నెంజెలి “జో అంక సంబజలి రిసా ఇన బాలబోడల్తె ఎక్కిలోక జలెకు కో మరియాద కెరెదె గే, అంకయ్ మరియాద కెర్లి రితి జయెదె.” § 9:42 9:42 నెంజెలి “జోవయించి నముకుమ్ పిట్టవుల గే...” * 9:43 9:43 పాపుమ్...రిసా నెంజెలి, నముకుమ్ పిట్టయ్తి రితి జలెగిన, జా దీసి తెంతో అన్న దన్నె నే జతి రిసాచి అర్దుమ్ కి గ్రీకు బాన తెన్ ఈంజ తొలితో రెగిడ్లిన్ తెన్ బెదెదె. † 9:44-45

9:44-45 గ్రీకు బాన తెన్ ఈంజ మత్తెలి తొలితో రెగిడ్లి సగమ్ పున్కల్తె 44 నంబర్లవ కొడో తతి నాయ్. గని తిలె, 44 చి 46వ కొడు 48 నంబర్చి కొడుచి రితి జవుల. † 9:44-45 9:44-45 పాపుమ్...రిసా నెంజెలి, నముకుమ్ పిట్టయ్తి రితి జలెగిన, జా దీసి తెంతో అన్న దన్నె నే జతి రిసాచి అర్దుమ్ కి గ్రీకు బాన తెన్ ఈంజ తొలితో రెగిడ్లిన్ తెన్ బెదెదె. § 9:46-47 9:46-47 గ్రీకు బాన తెన్ ఈంజ మత్తెలి తొలితో రెగిడ్లి సగమ్ పున్కల్తె 44 నంబర్లవ కొడో తతి నాయ్. గని తిలె, 44 చి 46వ కొడు 48 నంబర్చి కొడుచి రితి జవుల.

* 9:46-47 9:46-47 పాపుమ్...రిసా నెంజెలి, నముకుమ్ పిట్టయ్తి రితి జలెగిన, జా దీసి తెంతో అన్న దన్నె నే జతి రిసాచి అర్దుమ్ కి గ్రీకు బాన తెన్ ఈంజ తొలితో రెగిడ్లిన్ తెన్ బెదెదె.

10

యేసు తిరీమ్ తిరీమ్ యెరూసలేమ్ గెచ్చుక మొదోల్ కెర్లిసి

(మత్త 19:1-12)

1 యేసు కపెర్నూహూమ్ పట్టుమ్ తెంతో ముల దా యూదయ ప్రదేసిమ్ వాల్ గెచ్చు, యోర్దాను గాడు ఒత్తల్తో ఉట్టు గెలన్. ఒత్త తతికయ్, ఒగ్గరజన్ జనాబ్ అన్నె జోతె బెర జెతికయ్, జో అలవాట్ జలి రితి జోవయింక బోదన కెరుక దెర్లన్.

పెండ్లి జలన ముల ములి జతినచి రిసా యేసు సంగిలి

(మత్త 19:1-12)

2 జా పొది, పరిసయ్యుల్ సగుమ్జన్ జోక పరిచ్చ కెర తెర్లె నింద కెరుక మెన, జోతె జా కెర, “మున్నుబోద జోచి తేర్నిక ములుక నాయిమ్ గె?” మెన పుసిల.

3 యేసు “మోసే పూర్లుమ్చో తుమ్క కిచ్చొ ఆత్త దిలన్?” మెన పుసిలన్.

4 ఈంజి ఇసి సంగితికయ్, జేవ్ “ముల దెతి కాగుమ్ రెర్ల దిలెగిన ముల దెంక జయెదె మెన మోసే పూర్లుమ్చో నెలవ్ దిలన్” మెన జబాబ్ దిల.

5 జలి, యేసు జోవయింక, “తుమ్ రాడ్ జీవచ మాన్నుల్చి రిసా మోసే జా ఆగ్గు రెగిడ్లన్.

6 గని లోకుమ్ జెర్లయ్లి మొదోల్ పొది తెంతో ‘మున్నుబోద తేరబోద’ మెన దేముడు దొన్నె రగల్ జర్లు కెర్లె”

మెన, అన్నె

7 “జాకయ్ మున్నుబోద అయ్యున్అబ్బొన్క ముల దా జోచి తేర్ని తెన్ బెద తంక అస్సె.

8 అన్నె జేవ్ దొగుల ఎక్కి ఆగ్ జా తప్పల

మెన దేముడు రెర్లయ్లి కోడు అస్సె. జాచి రిసా, పెండ్లి జలి తెంతో జేవ్ దొగుల నెంజితి. ఎక్కి ఆగ్ జా అస్సె.

9 జాకయ్, దేముడు పెండ్లితె కక్క జట్టు కెరవ తయెదె గే, కేన్ మాన్ను ములవుక జయె నాయిమ్” మెన జేవ్క సంగిలన్.

10 యేసు, సిస్సుల్, జేవ్ బన జతి గెరి గెచ్చు తెడి పెసిలి పడ్డె, ఈంజి కోడుచి రిసా సిస్సుల్ అన్నె పుసిల.

11 యేసు సిస్సుల్క, “కో జలెకు జోచి తేర్నిక ముల దా అన్నెక్షిక పెండ్లి కెరనెదె గే, జో లంజె వంసుమ్చో జా తేర్నిక లంజె కెర్లయ్,

12 అన్నె, మున్నున్క తేర్ని ముల దా అన్నెక్షిక పెండ్లి కెరన్లెగిన, జయ్యి లంజె జతయ్” మెన సంగిలన్.

బాలబోదల్క యేసు చడ చెంగిల్ కెర్లిసి

(మత్త 19:13-15; లూకా 18:15-17)

13 ఒత్త తిలి పొది, ‘అమ్చ బోదల్క చడ చెంగిల్ జవున్’ మెన, సగుమ్జన్ జోవయింక యేసుచి పాసి కడ ఆన్తికయ్, సిస్సుల్, ‘పోస’ మెన కడ ఆన్లసక గోల కెర్లె.

14 గని జేవ్ గోల కెర్లిసి యేసు దెక, బాద సేడ, “బోదల్ అంచితె జెతు. జోవయింక అడ్డు కెర నాయి. దేముడుచి రాజిమ్ ఇన బాలబోదల్ జల సుదల్చియి.

15 తుమ్క ఆవ్ కిచ్చొ కచితుమ్ సంగితసి మెలె, గవురుమ్ నే ఉచరంతె బాలబోదల్చి రితిచి నముకుమ్ తెన్ దేముడుచి రాజిమ్తె బెదితి రితి నజన్లకయ్, పరలోకుమ్తె గెచ్చుక జయెదె. ఇసి నే జలిగిన, కో కి ఒత్త బెదుక జయె నాయిమ్” మెన సంగ

16 జేవ్ బోదల్క ఉక్కుల దెర, జోవయింక ఎక్కెక్లక బోడి చడ, ‘చెంగిల్ తత్తు’ మెన యేసు సంగిలన్.

పరలోకుమ్చి రాజిమ్తె కీసి బెదుక గే

(మత్త 19:16-30; లూకా 18:18-30)

17 యేసు అన్నె బార్ జా వట్టె గెతె తతికయ్, ఉబెడో ఎక్కిలో నిగ జా, యేసుచి పుర్రెతో నెర్లు నేడ జోకర, “చెంగిల్ తిలో గురుబాబు, పరలోకుమ్చి రాజిమ్తె కెయ్క తెయ్క జితి వాట, అంక దొర్లు జంక మెలె, ఆవ్ కిచ్చొ కెర్లె జయెదె?” మెన పుసిలన్.

18 పునీతికయ్, యేసు, “చెంగిల్ తిలొసా మెన అంక కిచ్చొక సంగిలది? దేముడు ఎక్కిలొయ్ చెంగిలొసా, గని అన్నె కో కి చెంగిలన నెంజితి.

19 జో దిల ఆగ్గుల్ మెలె, తుయి జాన్సి.

‘నరు అత్య కెరుక జయె నాయ్,
లంజెకము కెరుక జయె నాయ్,
చోరుక జయె నాయ్,
అబద్దుమ సాచి సంగుక జయె నాయ్,

మోసిమ్ కెరుక జయె నాయ్,
అయ్యుద్ అబ్బొద్ క గవురుమ్ దెకితె తంక అస్సె’
దనచయ్” మెన జోక యేసు సంగిలన్.

20 జో మాన్సు, “గురుబాబు, బాల తెంతో ఈంజేవ్ ఆగ్గుల్ రితి నిదానుమ్ కెర దెకన్ తసి” మెన జబాబ్ దిలన్.

21 యేసు జోక దెక కన్యారుమ్ జా, “తుక ఎక్కి పిట్ట గెచ్చు అస్సె. తుయి గెచ్చు, తుచి అస్తి ఎత్తి, విక గెల కెర, బీద సుదల్ క దేను. దస్సి కెర్లెగిన, పరలోకుమ్ తె తుక అస్తి కలుగు జెయెదె. అస్సె, అంచి తెన్ బెద, అంచి పట్టి జే!” మెన యేసు సంగిలన్.

22 జలె, జో ఉబెడొక ఒగ్గర్ సామ్నారుమ్ చి రిసా, దుకుమ్ జా మొకొమ్ ఇదిలిసి కెర ఉట్ట గెలన్.

సామ్నార్లు పరలోకుమ్ తె బెదుక కస్టుమ్

23 జో సామ్నారుమ్ చొ ఉట్ట గెతికయ్, యేసు పస్ల సిస్సుల్ క దెక జోవయంక, “సామ్నార్లు దేముడుచి రాజిమ్ తె బెదుక జలె, కస్టెనె జలెకయ్ జయెదె” మెన సంగిలన్.

24 జోవ ఈంజేవ్ కొడొక సిస్సుల్ ఎదివాట్ ఆచారిమ్ జుతికయ్, జోవయంక అస్సె, “ఓ పుత్తర్లు, * ఈంజ లోకుమ్ తెచి అస్తిక నముకుమ్ తిల సుదల్ దేముడుచి రాజిమ్ తె బెదుక కెడ్డి కస్టుమ్!

25 ఇసా సామ్నారి దేముడుచి రాజిమ్ తె బెదితి కంట, సూజబొలో వాట్ ఒంటె గిచ్చుక సుల్లు!” మెన సంగిలన్.

26 జేవ్ ఎదివాట్ ఆచారిమ్ జా, “దస్సి జలె, కో రచ్చించుప జంక జయెదె?” మెన జోక పుసిల.

27 యేసు జోవయంక దెక, “మాన్సు ఈంజ కెర్కు నెత్తిల్లిసి, గని దేముడు జా ఎత్తి జల్లు కెరుక తెరె.” మెన సంగిలన్.

28 జలె, పేతురు జోక, “ఈందె, ఆమ్ ఎత్తి ముల దా తుచి పట్టి బులితనుమ్” మెన సంగుక దెర్లన్.

29 జలె యేసు జోవయంక, “తుమ్ క ఆవ్ కిచ్చొ కచితుమ్ సంగితసి మెలె, అంచి రిసా, అంచి నుబుమ్ కబుర్ చి రిసా, గేరు జలెకు, అన్యోబావొక జలెకు, † బయిబేనిక జలెకు, అయ్యున్ అబ్బొన్ క జలెకు, బోదల్ క జలెకు, బుయి జలెకు, కో ముల తవుల గే,

30 అప్పె ఈంజ లోకుమ్ తె కి, జోవయంక గెరలు, అన్యోబావొ, బుయిబేని, అయ్యునిసి, బోదల్, బుయి, దనచ ఎత్తి జోవయంక దొర్కు జయెదె. అస్సె, జెతి కాలుమ్ తె, కెయడ తెయడ పరలోకుమ్ తె జెతి వాట జోవయంక దొర్కు జయెదె.

31 గని తుమ్ జాగర్ల ఉచరన. అప్పె అగ్గె జలన ఒగ్గర్ జిన్ పడ్డె జవుల. అప్పె పడ్డె జలన ఒగ్గర్ జిన్ అగ్గె జవుల” మెన యేసు సంగిలన్.

మొర గెచ్చు అస్సె జీవ్ జా ఉట్టిందె మెన యేసు సంగిలిసి

(మత్త 17:22-23; లూకా 9:43-45)

32 యేసు, సిస్సుల్, యెరూసలేమ్ పట్టుమ్ తె గెతి రిసా పట్ట గెతె తతికయ్, యేసు దయిరిమ్ తెన్ జోవయించి అగ్గెతో ఇంటిలిసి సిస్సుల్ దెక, బలె బమ్మ జల. జోచి పడ్డె గెతె తిలనక కి బలె బిడ్డి దెర గెలి. జలె, యేసు సిస్సుల్ క అస్సె పాసి కెరన, జోక జల్లు జంక తిలన్ చి రిసా జోవయంక అస్సె సంగుక దెర,

* 10:24 10:24 గ్రీకు బాస తెన్ ఈంజ మత్తెలి తొలితో రిగ్లె నగుమ్ పుస్తకల్ తె ఈంజ...సుదల్ చి కొడొ తతి నాయ్. † 10:29 10:29 అప్పెబేనిక

33 “ఈంది నూన, అమ్ యెరూసలేమ్తె గెతనుమ్. ఒత్త గెలమ్ మెలె, ఆవ్ మాన్సు జా జెర్మున్ అయ్లోసాక వెల్లెల వూజర్గుతె, మోసి తెన్ దేముడు దిలి అగ్గల్ సికడ్డనతె దెర దెవుల, చి జేవ్ వెల్లెల మాన్సుల్ అంక మొర్తి సిచ్చ వయడ దా, యూదుల్ నెంజల అదికారుల్తె అంక సార్చ కెర దెవుల.

34 దస్సి కెర్తె, జేవ్ అంక కొండక, తుంక దా. కొర్తల్ తెన్ పెట కెర, అంక మారుల. మార్తె కి, తిర్రతక అన్నె జీవ్ జా ఉట్టిందె” మెన యేసు సిస్సుల్క అన్నె సంగిలన్.

దొగుల సిస్సుల్ వెల్లో జంక కోర్ప జలిసి
(మత్త 20:20-28)

35 తెదొడి యాకోబు, యోహాను మెల జెబెదయి మెలోసాచ దొగుల పుత్తర్పుల్ పుర్రెతో జా, యేసుక “గురుబాబు, కిచ్చొ అమ్ నజుమమ్దె గె అమ్క దెంక.” మెన సంగిల.

36 ఇసి సంగితికయ్ యేసు “ఆవ్ తుమ్క కిచ్చొ జర్గు కెరుక మెన తుమ్ కోర్ప జతను?” మెన పుసితికయ్,

37 జేవ్ జోక, “తుచి పరలోకుమ్చి ఉజిడచి రాజిమ్తె తుయి ఏలువ కెర్తె పొదిక అమ్ దొగుల, తుచి ఉజెతో పక్క ఎక్కిలో, తుచి డెబ్లి పక్క ఎక్కిలో వెసితి రితి అమ్క సెలవ్ దే” మెన సంగిల.

38 యేసు జెలె, జోవయింక, “తుమ్ కిచ్చొ పుసితను గే తుమ్ నేన్సు. అల్లె, అంచి గిన్నతె బెద పిలి రితి, ఆవ్ సేడుక తిలి దుకుమ్తె బెదుక ఓర్పువ జంక జలెకు, అంచి తెన్ అంచి బాప్తిసుమ్ నజన్లి రితి జా, ఆవ్ సేడుక తిలి సైమతె బెదుక జలెకు తెరితె గే?” మెన జేవ్ దొగులక సంగితికయ్,

39 జేవ్ ‘తెరుమ్’ మెన సంగిల. దస్సి సంగితికయ్, యేసు జోవయింక, “ఆవ్ పితి గిన్న దుకుమ్ తుమ్ పిస్తె. ఆవ్ సైమల్ నేడ్డి బాప్తిసుమ్ తూమ్ కి నజన్తె,

40 గని అంచి ఉజెతో పక్క ఎక్కిలో, అంచి డెబ్లి పక్క ఎక్కిలో వెసుక మెన సెలవ్ దెంక అంచి అత్తి నాయ్. పరలోకుమ్ తిలో అంచొ దేముడు అబ్బొ కక్క కక్క సెలవ్ దా తయెదె గే, జెవ్వి ఒత్త వెసుల.” మెన జబాబ్ దిలన్.

41 జెలె, యాకోబు యోహాను ఎత్కిచి కంట వెల్లో జంక ఉచర్లిసిచి రిసా సేంసెల దెన్నుజిన్ సిస్సుల్ నూన కెర, జోవయించి ఉప్పిరి కోపుమ్ జంక దెర్ల.

సిస్సుల్ ఎక్కిలోక ఎక్కిలో కిసి దెకుక గే యేసు సంగిలిసి

42 తెదొడి యేసు జేవ్ బారజిన్ సిస్సుల్క జోతె బుకారా కెర, “యూదుల్ నెంజల వేర అదికారుల్ అన్నె జోవయించి తెడి తిల వెల్లెల మాన్సుల్ సొంత గవురుమ్ ఉచరన, ప్రజల్క జాడ్లు వయడ్లి రితి జోవయింక పోటి తెన్ ఏలువ కెర్తె మెన తుమ్ జాన్సు.

43 గని తుమ్చి తెన్ దస్సి తంక జయి నాయ్. తుమ్చితె కో వెల్లో జంక ఉచరెదె గే, జొయ్యి తుమ్చొ సేవ కెర్తెసా జా తంక.

44 తుమ్చితె కో ముక్కిమ్ జంక ఉచరెదె గే, జో ఎత్కిజిన్క గొతిమాన్సు జా తంక.

45 కిచ్చొక మెలె, ఆవ్ మాన్సు జా జెర్మున్ అయ్లోసా కి మాన్సుల్చి అత్తి సేవ కెరవన్ను జెయ్యి నాయ్, గని మాన్సుల్క ఆవ్ సేవ కెరుకయ్ అయ్లయ్. మెలె, ఒగ్గర్జిన్ మాన్సుల్క నయ్తాన్చి రాజిమ్ తెంతో అన్నె గెననతి రిసాయి మొర అంచి ప్రానుమ్ దెంక అన్నెచి రిసా ఈంజ లోకుమ్తె అయ్లయ్” మెన సిస్సుల్క యేసు సంగిలన్.

గుడ్డి జలో బర్తిమయింక యేసు చెంగిల్ కెర్లిసి
(మత్త 20:29-34; లూకా 18:35-43)

46 ఒత్త తెంతో యేసు సిస్సుల్ వట్టె గెచ్చు గెచ్చు యెరికో పట్టుమ్తె జా కెర, సిస్సుల్ తెన్ కి, ఒగ్గర్ ఒగ్గర్జిన్ జనాబ్ తెన్ కి ఒత్త తెంతో బార్ జెత తతికయ్, తిమయిచొ పుత్తుసి, బర్తిమయి బిచ్చిమ్ నజితో గుడ్డి జలోసా, వాట్ సొడి పెన అన్నె.

47 ఒత్త వెన తా, “జెతోసా నజరేతు గవ్విచొ యేసు” మెన జో నూన కెర, “ఓ యేసుప్రబు, దాపీదు రానొచి నెకుమ్తె జెర్మిలో రచ్చించువ కెర్తెసా, అంచి ఉప్పిరి కన్యారుమ్ తియ, అంక చెంగిల్ కెరు!” మెన కేక్ గలన్.

48 జలె, పాసి తిలస ఒగ్గర్జిన్ “తుక్తె తా” మెన గోల కెర్తె కి, జో గుడ్డి మాన్సు అన్నె, “దావీదుది సెకుమ్తె జెర్మిలో రచ్చించువ కెర్తెనా, అంచి ఉప్పిరి కన్కారుమ్ తియ, అంక చెంగిల్ కెరు!” మెన అగ్గెచి కంట గట్టిజ కేకుల్ గలో.

49 ఇసి జతికయ్, యేసు టీవో జా కెర, “జోక ఇత్తల్తో బుకారా” మెన సిస్సుల్క సంగిలన్. జేవ్, జలె, “అల్లె, దయిరిమ్ జా ఉట్టు! యేసు తుక బుకార్తయ్” మెన జో గుడ్డి మాన్సుక బుకార్తెకయ్,

50 జో చట్టును ఉట్ట జోచి దుప్పటి పక్కయ్ వెంట గల, యేసుతె అయ్లో.

51 యేసుతె జతికయ్, “అవ్ తుక కిచ్చొ కెరుక మెన తుయి కోరప జతసి?” మెన పుసితికయ్, జో గుడ్డి మాన్సు, “గురుబాబు. అవ్ దెకిత్ రితి కెరు.” మెన సంగిలో.

52 జలె, యేసు జోక “గో, అంచి ఉప్పిరిచి తుచి నముకుమ్ తుక చెంగిల్ కెర అన్నె.” మెన సంగిలన్. బేగి, జో మాన్సుచ అంకివో డీసిల, చి జో యేసుచి పట్టి వట్టె గలో.

11

యేసు యెరూసలేమ్ పట్టుమ్క ఉట్ట అయ్లిసి

(మత్త 21:1-11; లూకా 19:28-40; యోహా 12:12-19)

1 యేసు సిస్సుల్ తెన్ వట్టె గెచ్చ గెచ్చ, యెరూసలేమ్ పట్టుమ్క పాసి అయ్లి పొది, బేత్సేగి బేతనియ మెంత గాచిలెచి పాసిచి * ఒలీవ మెట్టుయ్ పాచిలి పొది, యేసు జోచ సిస్సుల్తె దొగులక బుకారా,

2 “తుమ్చి మొక్కె తిలి గచ్చె గెచ్చ పెస, చి బేగి బంద తిలి గాడ్డె పిల్ల ఏక డీసిదె. జాచి ఉప్పిరి కేన్ మాన్సు కెయ్ కి వెసుక నేతయ్. జాక యివ కెర ఉదడ ఆన.

3 కొన్నో జలెకు తుమ్ కిచ్చొక దస్సి కెర్తెను?” మెన సంగిలెగిన, “ఇన్నెతెన్ ప్రబుక కామ్ అన్నె. కామ్ జలి బేగి ఇత్తల్తో అన్నె బే బేగి తెద్రయెదె, మెన నంగ” మెన సిస్సుల్క యేసు నంగ, తెద్రయెలన్.

4 జలె, జో సంగిలిసత జేవ్ గెతికయ్, ఏక వీదె ఏక గుమ్ముమె బంద తిలి ఏక గాడ్డె పిల్ల జోవయింక డీసిలి.

5 జేవ్ జాక యిపెత తతికయ్, జా వీదె టీవో జా తిల మాన్సుల్, “తుమ్ కిచ్చొక జా గాడ్డె పిల్లక యిపెతను?” మెన జోవయింక పుసిల.

6 జేవ్ పుసితికయ్, యేసు సంగిలి రితి సిస్సుల్ సంగిల. జేవ్ మాన్సుల్, “దస్సి జలె, దెర గెచ్చ!” మెన నెలవ్ దిల.

7 సిస్సుల్ జా గాడ్డె పిల్లక యేసుతె ఉదడ ఆన, జోవయించ దుప్పట్టు గట్ట గాడ్డెచి ఉప్పిరి గలిల, చి యేసు వెగ వెసిలన్.

8 పిమ్మట్ ఒగ్గర్జిన్ మాన్సుల్ జోవయించ దుప్పట్టు గట్ట వటి వటి అంతిర్ల. అన్నె నగుమ్జిన్ వాట్ సాడిచ బట్టిలి తిల చెట్లె కండిల రొడ్డల్ మట్టల్ ఆన, వట్టె అంతిర్ల.

9 దస్సి అంత్ర అంత్ర, పుర్తెతో గతన వడ్డె గతన “జోబర, జోబర!” మెలి అర్దుమ్ తెన్ “ఓనన్న, ఓనన్న!” మెన, “దేముడు ప్రబుచి నావ్ తెన్ జెతోసాక ఓనన్న!

10 అవ్చో దావీదు పూర్గమచో తెన్ మొదోల్ జలి † రాజిమ్ ముక్కిమ్ జా అన్నె బారో జతినక జోబర! ఎత్తిచి కంట ఉప్పిరిచి టాన్తె తెలోసాక ఓనన్న!” మెన కేకుల్ గల్తె తిల.

11 జలె, యేసు యెరూసలేమ్తె పాచ, దేముడుచి గుడితె గెచ్చ, పెస, సుట్టునంత అంకి గల, ఎత్తి దెక, సాంజ్ జలి రిసా అన్నె బారో జా, బారజిన్ సిస్సుల్ తెన్ బేతనియ గచ్చె అన్నె ఉట్ట గెల.

అంజూరుమ్ రూకుక యేసు సాపెన గల కెర్లిసి

(మత్త 21:18-19)

12 అన్నెక్ దీసి, జేవ్ బేతనియ గచ్చె తెంతో యెరూసలేమ్తె అన్నె గెత తత్తికయ్, యేసుక చూ కెర్లి.

* 11:1 11:1 ‘ఒలీవ చెట్లె’ మెలి, జా దేసిమ్క ముక్కిమ్ జలి ఏక రగుమ్ వండ్లు. దస్సి కంక జయెదె, నెంజెలి తెల్ పేడుక జయెదె. జేవ్ రూకుల్క ఈంజ మెట్టక నావ్ తియ అన్నె. † 11:10 యేసుచి రాజిమ్క ‘ఈంజ లోకుమ్చి రగుమ్చి’ మెన పైజల్ ఉచర్త తిల. ఈంజ లోకుమ్చి జోవయించ బాదల్ తెంతో, జోవయింక ఆక్రమించువ కెర్తెన తెంతో రచ్చించువ కెరెదె మెన ఉచర్త తిల, గసి జోవయించి రాజిమ్ జోవయించి రచ్చన ముక్కిమ్క అత్త రగుమ్చి మెన నేనెతి.

13 జల అక్షల్ తిలి ఏక్ †అంజూరుమ్ రూకుక దెకిలన్. జలె, జో రూక్తె పండ్లు దెర అస్సి గే నాయ్ గే మెన దెకుక గెలో. అక్కుడలి గని అన్నె కిచ్చోయ్ నాయ్. కిచ్చొక మెలె, జా రూక్తె జా కాలుమ్ పండ్లు దెర్రి నాయ్.

14 యేసు జలె, జో రూకుక, “అప్పె తెంతో తుచి తెంతో కో కి పండ్లు కతు నాయ్” మెన రూకుక సంగిలన్. జో సంగిలినీ జోచ సిస్సుల్ నూన్ల.

దేముడుచి గుడితె గెచ్చు వికితనక గోల కెర్రిసి
(మత్త 21:12-17; లూకా 19:45-48; యోహా 2:13-22)

15 తెడిడి జేవ్ యెరూసలేమ్తె పావ కెర, యేసు దేముడుచి గుడితె పెన, దేముడుచి గుడితి తెడి కిచ్చొ వికితనక గెంతనక దెక, జోవయింక ఉదడుక దెర, కిడబ్బుల్ పల్లయతనచ బల్లల్, అర్చితుమ్ దెత పార్చు పిట్టల్ వికితనచ బల్లల్ నేడవ దా,

16 కో కి, కిచ్చొ కి దేవులుమ్ వాటు వయ నెంక కి ఒప్పె నాయ్.

17 దస్సి కెర తా,

“ దేసిమ్లు ఎత్కివ మూస్సుల్ అంచితె జెతి రితి, అంచి గేరు ప్రార్దన కెర్రి గేరు జా, దస్సే తవున్.’
మెన దేముడుచి కొణ్ణె రెగ్గవ అస్సి. తూమ్ జలె, జాక చోర్లు జెతో గేరు జతి రితి ఈంజి దేముడుచి గుడిక మార్చుప కెర అస్సున్” మెన సంగిలన్.

18 వెల్లెల పూజర్లు, మోసే తెన్ దేముడు దిలి ఆగ్గుల్ సికడ్డన నూన కెర, పిమ్మట్ జొయ్యి కెర్రి బోదనక నర్ల తెన్ నూన ప్రెజల్ ఎత్కిజన్ ఆచారిమ్ జతతి మెన దెక, జో యేసు వెల్లో జయెదె మెన బియె కెర, “జోక కిసి మారుమ” మెన కుట్ల ఉచరన్ల.

19 సాంజ్ జతికయ్, యేసు పట్టుమ్ తెంతో అన్నె బార్ జలో.

20 పెందలి, యేసు సిస్సుల్ అన్నె యెరూసలేమ్తె గెతె తతికయ్, వట్టె జో అంజూరుమ్ పండ్లు రూకుక దెకిలి, చెర్రి తెంతో మొదోల్ జా ఒండి సుకా గెచ్చు అస్సి.

21 సుకాగెలిన్ దెక, జో రూకుక యేసు సంగిలి కోడు ఏదన్ల కెర, పేతురు, “గురుబాబు, ఆదె! తుయి సాపెన దిలో రూకు సుకా గెచ్చు అస్సి” మెన సంగిలన్.

22 యేసు సిస్సుల్ దెక కిచ్చొ సంగిలన్ మెలె, “దేముడుచి ఉప్పిరి తుమ్ నముకుమ్ తియన.

23 తుమ్క ఆవ్ కిచ్చొ కచితుమ్ సంగితసి మెలె, ఈంజ మెట్లక జవున్ దెక, ‘ఓ మెట్ల, ఉట్టి జా సముద్రుమ్తె గలి జా’, మెన వెట్టితె కిచ్చొ అన్యూనుమ్ నెంతె తా, పూర్తి సంజా నెరెరచ్చువ జయెదె మెన, కొన్సో జలెకు సంగెదె గే, జయ్యి జోచి రిసా ప్రబు జర్లు కెరెదె మెన తుమ్క ఆవ్ కచితుమ్ సంగితసి.

24 జాకయ్ తుమ్క ఆవ్ కిచ్చొ మెంతసి మెలె, ప్రార్దన కెర్రి పొది తుమ్ కిచ్చొ సంగిలే కి, ‘జా అమ్క దొర్చు జలి’ మెన తుమ్ సంజా, చి కచితుమ్ తుమ్క దొర్చు జయెదె.

25 గని ప్రార్దన కెర్రి పొది తుమ్క కిచ్చొ బుద్ది తంక మెలె, తుమ్తె ఎక్కిలో అన్నెకోక కిచ్చొ జవున్ అల్లర్ కెర తిలెగిన, అల్లర్ కెర్రిసాక, జో అల్లర్ నేట్టెసా చెమించువ కెరుక అస్సి. తుమ్ దస్సి ఎక్కిలోక ఎక్కిలో చెమించువ కెర్రి, పరలోకుమ్ తిలో తుమ్చో అబ్బొ జలో దేముడు తుమ్క చెమించువ కెరెదె.

26 *తుమ్ అన్నెకో మాస్సుల్క చెమించువ నే కెర్రిగిన, దస్సి పరలోకుమ్ తిలో అబ్బొ జలో దేముడు తుమ్క చెమించువ కెరె నాయ్” మెన యేసు సికడ్డన్.

యేసుక అన్నె పరిచ్చు కెర్రిసి
(మత్త 21:23-27; లూకా 20:1-8)

† 11:13 11:13 బొడ్డ పండ్లు రిత పండ్లు దసా రూక్తె దెరుల. రూకు మాములుమ్ చెంగిలేచి జలె, అక్షల్ దెర్రి పొది పండ్లు కి దెర తంక.

§ 11:15 11:15 అర్చితుమ్ దెత పిట్టల్ గల్ల గెనుక జలె, జోవయింక ఆక్రమించువ కెర్రి లోమ్ దేసిమ్చి ప్రబుతుమ్చి డబ్బుల్ దిలి నెంజె. జేక, జోవయింక డబ్బుల్ పల్లవన, దేముడుచి గుడితె కామ్క జెతికయ్ రగుమ్ డబ్బుల్కయ్ పిట్టల్ గల్ల గెనుక, నెంజెలి దేముడుచి గుడిక డబ్బుల్ దెంక. డబ్బుల్ పల్లయతన నాయుమ్ నెంజెలి ఏదిలి లాముమ్ కి కెరెనుల.

* 11:26 11:26 గ్రీకు బాన తెన్ ఈంజ మత్తెలి రెగిడ్ల సగుమ్ వున్కల్తె 26 నంబర్ కోడు తయె నాయ్.

27 జలె, యెరూసలేమ్తె అన్నె పావెలి. యేసు దేముడుచి గుడితె అన్నె గెచ్చు ఒత్త బుల్లె తతికయ్, వెల్లెల వూజర్లు, మోసి తెన్ దేముడు దిలి ఆగ్గుల్ సికడ్తన, అన్నె సగుమ్జన్ వెల్లెల మాన్సుల్ కీ, జోతె జా కెర,

28 “తుయి కెర్ల కమె కెరుక, తుయి బోదన కెరుక తుక కిచ్చొ అదికారుమ్ అన్నె? కొన్నొ తుక అదికారుమ్ దిలన్?” మెన జోక పుసిల.

29 జాకయ్ యేసు జోవయింక, “ఆవ్ కి తుమ్క ఏక్ కోడ్ పుసిందె. తుమ్ చెంగిల్ జబాబ్ సంగిలె, ఆవ్ కిచ్చొ అదికారుమ్క ఇసి కెర్లసి గే, ఆవ్ కి తుమ్క సంగిందె.

30 జలె, యోహాను బాప్తిసుమ్ దెతె తిలిసిచి అదికారుమ్ కేనె తెంతొ చి? పరలోకుమ్ తెంతొ చి గే, మాన్సు తెంతొ చి గే, తుమ్ సంగ” మెన వెల్లెల మాన్సుల్క యేసు పుసిలన్.

31 దస్సి పుసితికయ్, జేవ్ వెల్లెల మాన్సుల్ కీసి జల మెలె, ఎక్కిలో తెన్ ఎక్కిలో బమ్ము తెన్ లట్టబన, ఇసి మెంతె తిల, “పరలోకుమ్ తెంతొ చి” మెన అమ్ సంగిలెగిన, దస్సి జలె, తుమ్ కిచ్చొక జోక నంప కెర్పు నాయ్?” మెన అమ్క సంగిందె.

32 “మాన్సు తెంతొ చి” మెన సంగుక నెంజె” మెన ఉచర్లన. కిచ్చొక మెలె, ‘యోహాను నిజమి దేముడుచి కబుర్ అన్లొసా’ మెన ప్రెజల్ ఎత్తిజిన్ నంపజా అన్సి మెన జేవ్ వెల్లెల మాన్సుల్ ప్రెజల్క బితె తిల.

33 జాచి రిసా “నేనుమ్” మెన జబాబ్ సంగిలె. జేవ్ దస్సి సంగితికయ్, యేసు జోవయింక “దస్సి జలె, కేన్ అదికారుమ్క ఆవ్ అంప కమె కెర్లసి గే, ఆవ్ తుమ్క సంగి నాయ్” మెన సంగ ముద్దొ కెర్లన్.

12

ద్రాచతోటచి రిసా యేసు సంగిలి టాలి
(మత్త 21:33-46; లూకా 20:9-19)

1 తెదొడి యేసు వెల్లెల మాన్సుల్క దస్సి సంగ, జోవయింక టాలివొ సంగ అన్నె బోదన కెరుక దెర్లన్. తెదొడి కిచ్చొ టాలి ఏక్ సంగిలన్ మెలె, ఇసి జతలయ్; “ఏక్ మాన్సు ద్రాచ తోట రోవడ కెర, జాచి సుట్టునంత కోట గలవడ కెర, ద్రాచ రన్సుమ్ కడ గన్నె వెల్లొ పత్తుర్ కూనవ కెర, తోట రకితి మాటు రితిసి బందవ కెర, రకితసక నిసాన, జోవయింక జా తోట గుత్త దా, వేరతె ఉట్టు గెలన్.

2 “పంబొ పికిలి పొది, జేవ్ గుత్త నజీలసతె జా తోటచి పంబొ ఏక్ వాట నజ ఆన్తి రిసా, గొత్తి సుదొ ఎక్కిలోక ఎజొమాని తెద్రయలన్. జో ఒత్త పావెతికయ్,

3 గుత్త నజీల జేవ్ రకిత మాన్సుల్ జో గొత్తి సుదొక దెర, పెట, కిచ్చొ నే దెతె ఉదడ్ల.

4 ఒత్త తెంతొ, అన్నెక్లొ గొత్తి సుదొక జో ఎజొమాని తెద్రయలన్, గని జేవ్ రకితస జోచి బోడి పెట కెర దా, మరియాద నెంతె జోక ఉదడ గెల.

5 పిమ్మల్ అన్నెక్లొక ఎజొమాని తెద్రయతికయ్, జేవ్ రకితస జోక మార గెల. అన్నె ఒగ్గర్జిన్క తెద్రయతికయ్, జోవయింతె సగుమ్జిన్క పెట గెల, సగుమ్జిన్క మార గెల.

6 “జలె, జో ఎజొమానిక అన్నెక్లొ తిలన్, కొన్నొ మెలె, సొంత ప్రేమ తిలొ పుత్తుసి. ‘అంచొ పుత్తుక మరియాద దెకుల, కిచ్చొగె’ మెన, ఆకర్క జోకయ్ తెద్రయలన్.

7 గని జేవ్ గుత్త నజీలస ‘ఇన్నెకయ్ అబ్బొచి దనుమ్ కలుగు జయెదె. అల్లె, ఇన్నెక మారుమ్, చి ఇన్నెక కలుగు జతి వాట అమ్కయ్ దొర్కు జయెదె’ మెన జోవయింక జెచ్చొ లట్టబన్ల.

8 జేవ్ ఎజొమానిచొ పుత్తున్క దెర కెర, మార కెర, పినుమ్ జా ద్రాచ తోట తెంతొ బార్ కెర వెంబ గెల.

9 జలె, దస్సి కెర్లె రిసా, జా తోటచొ ఎజొమాని కిచ్చొ కెరెదె మెలె, జో జా కెర, జేవ్ గుత్త నజీలసక నాసానుమ్ కెర, జా తోట వేర మాన్సుల్క గుత్త దెయెదె.

10 “అల్లె, ఆవ్ అప్పె తుమ్క సంగితిచి రిసా, దేముడుచి కొడెతె రెగిడ్లిసి తుమ్ కెయ్యె నదు కెర్పు నాయ్ గె?

‘కామ్క నెంజె’ మెన ఉచర, గేర్ బందిలన పిటయల పత్తురు, బోడిపత్తురు జలన్.

11 ప్రబు సొంతయ్ ఇసి జర్గు కెర్లె. జో ఇసి కెర్లె రిసా, అమ్ దెకిలె ఆచారిమ్ జతయ్!”

మెన జేవ్ కోపుమ్ జల వెల్లెల మాన్సుల్ క యేసు సంగిలన్.

12 “అమ్ ది రిసాయి యేసు సంగితయ్” మెన వెల్లెల మాన్సుల్ చినన కోపుమ్ జా, జోక దెరుక ఉచర్ల, గని ప్రెజల్ కోపుమ్ జా అల్లర్ కెరుల మెన, జోవయింక బియె కెర, జోక ముల దా ఉట్టు గెల.

వెల్లెల మాన్సుల్ యేసుక పరిచ్చ కెరయ్ లిసి

(మత్త 22:15-22; లూకా 20:20-26)

13 ‘యేసుక కొడెతె అడ్డవ నేరిమ్ వయడుమ్’ మెన, సగుమ్ జిన్ పరిసయ్యుల్ కి కి హేరోదు పచ్చెన జతన సగుమ్ జిన్ కి, జేవ్ కోపుమ్ జల వెల్లెల మాన్సుల్ తెద్రయ్ తికయ్,

14 జేవ్ యేసుతె జా కెర, “గురుబాబు, తుయి సత్తిమ్ చొ మెన జానుమ్. తుయి మొకమాటుమ్ నే దెకితె, వెల్లెల మాన్సుల్ కిచ్చొ ఉచరుల మెన నే బితె, దేముడు దెకయ్ లి వాల్ చి రిసా సత్తిమ్ తెన్ బోదన కెర్చి మెన అమ్ జానుమ్” మెన పులయ్ తి రితి సంగ, అన్చె, “రోమ్ దేసిమ్ చి ప్రబుతుమ్ చొ కైసర్ రానొక అమ్ ‘సిస్తు దెంక నాయిమ్ గే, నాయ్ గె? అమ్ జా సిస్తు దెంక గే పోని గే? సంగు” మెన యేసుక సంగిల.

15 ఇని సంగితికయ్, యేసు జోవయింక ఉప్రమెన్సు జాన, “అంక కిచ్చొక పరిచ్చ కెర్చు? డబ్బుల్ కాసు ఏక అంచితె ఆన దెకవ” మెన సంగితికయ్, ఆన్చ.

16 జేవ్ జో తెన్ జా కాసు ఆన్ లి పొది, జా కాసు దెకవ, “ఇన్చె కచి పోలిక, కచి నావ్ డీన్చయ్?” మెన జోవయింక పునిలన్, చి జేవ్ జోక, “కైసర్ రానొచి” మెన సంగిల.

17 యేసు జోవయింక, “కైసర్ క దెతిసి కైసర్ క, దేముడుక దెతిసి దేముడుకయ్ దెంక అన్చె” మెన, జోవయింక జబాబ్ దిలన్. దస్సి జబాబ్ దెతికయ్, వెల్లెల మాన్సుల్ తెద్రయ్ ల మాన్సుల్ ఆచారిమ్ జల.

సద్దూకయ్యుల్ యేసుక పరిచ్చ కెర్చిసి

(మత్త 22:23-33; లూకా 20:27-40)

18 తెదెడి, ‘మొర గెలెగిన అన్చె జివ్ జంక నెంజె, అన్చెక్ లోకుమ్ తె గెచ్చుక నెంజె’ మెన ప్రెజల్ కి సికయ్ త సద్దూకయ్యులు సగుమ్ జిన్ యేసుతె జా కెర,

19 “గురుబాబు, ఈంధె, ‘ఎక్కిలొచి అన్చె బోదల్ నెంతె మొర గెలె, తేర్చిక ఎక్కిల్ క ముల దా గెలెగిన, జోచొ బావొని అన్చె చి తేర్చిక ఆనన, అన్చె చి నావ్ తెన్ బోదల్ పాయిక అన్చె’ మెన మోసే పూర్ణుమ్ చొ అమ్ యూదుల్ చి రిసా రెగిణ్ణె గెద?

20 జలె సత్తుజిన్ బాపుడ్లు తిల. జోవయింతె తొల్చర్ తెర్చి ఆనన, బోదల్ నెంతె మొర గెలన్.

21 ఒత్త తెంతె, జో మాన్సుచి పట్టి జెర్చిలొసా జా తేర్ బోదక ఆనన, జో కి బోదల్ నెంతె మొర గెలన్. జోచి పట్టి జెర్చిలొసా కి దస్సి కెరన దస్సి జలన్.

22 జేవ్ సత్తుజిన్ బాపుడ్లు ఎత్తిజిన్ వర్చ తెన్ దస్సి కెరన మొర గెల. జేవ్ ఎత్తిజిన్ మొర గెతికయ్, జా తేర్ బోద కి మొర గెలి.

23 జలె, మొర గెలన అన్చె జివ్ జతి పొదిక, జోవయింతె కక్క తేర్చి జా తయెదె? జేవ్ సత్తుజిన్ వర్చ తెన్ జా తెన్ పెండ్లి జల గెద?” మెన యేసుక పునిల.

24 ఇని జతికయ్, యేసు జోవయింక, “తుమ్ పొరపాల్ జా గెతను. కిచ్చొక గే తుమ్ ఉచర. మెలె, దేముడు పూర్ణుమ్ రెగ్గయ్ లిసి సదు కెర్లె కి, ఒత్త తిలిసి అర్దుమ్ కెరన్చు నాయ్, చి జో కెరయ్ త కమె దెకిలెకి, జోచి నెక్కి అదికారుమ్ చినున్ నాయ్.

25 మెలె, మొర గెచ్చె అన్చె జివ్ జతిన్ తె పెండ్లిచొ నే జతె, పరలోకుమ్ తె మాన్సుల్ దూతల్ చి రితి దస్సి తప్పల.

26 పడ్డె, ‘మొర గెలన అన్చె జివ్ నాయ్’ మెన ఉచర, తుమ్ అన్చానుమ్ తెన్ అన్చెన్. గని జా నుట్టు, పూర్ణుమ్, రూకు తెడి జా అగి లగితె తిలిన్ చి రిసా రెగిణ్ణె తె ఆవ్ అబ్రాహామ్ క, ఇస్సాకుక చి యాకోబుక దేముడుయి, మెన దేముడుచి కోడు మోసే రెగిణ్ణె పుస్తకుమ్ తె సదు కెర్చు నాయ్ గె?

* 12:14 12:14 ఇన్చె ‘సిస్తు’ మెలె, జా ఏలువ కెర్లె ప్రబుతుమ్ చి సిస్తు.

27 జలె, జేవ్ మొర్త పూర్ణులక మోసేచి కాలుమ్ ఎద కి జోవయింక జో దేముడు తా కామ్క అయ్లిన తెన్ జేవ్ అన్యైక్ లోకుమతె గచ్చ జివ్వి అస్తి మెన రుజ్జు జతయ్, రితి మొర గెలనక నాయ్, గని జీవ్ తిలనకయ్ జో దేముడు. తుమ్ ఎదివాల్ పొరపాల్ జా అస్సున్” మెన జేవ్ సద్దూకయ్యులక యేసు సంగిలన్.

వెల్లి ఆగ్గుచి రిసా యేసుక పుసిలిసి
(మత్త 22:34-40; లూకా 10:25-28)

28 ఈంజ కోడుచి రిసా జేవ్ సద్దూకయ్యుల్ తెన్ పరిసయ్యుల్ గగ్గోల్ జంక దెర్ల. ఇసి జతికయ్, మోసి తెన్ దేముడు దిలి ఆగ్గుల్ సికడ్డాసా ఎక్కిలో నూన, జోవయించి నెడిమి జా కెర, జేవ్ వెల్లెల మాన్సుల్చ పరిచ్చులక యేసు చెంగిల్ జబాబుల్ దెతయ్ మెన దెక, జోక, “ఆగ్గుల్ ఎత్తితె ముక్కిమ్చి కేన్?” మెన పుసిలన్.

29 యేసు జోక, “ముక్కిమ్చి ఇసి జతయ్;

‘ఓ అమ్చ ఇస్రాయేలులు, నూన, ప్రబు జలో అమ్చో దేముడు ఎక్కిలో. జో ఎక్కిలోయి అదికారుమ్ తిలో దేముడు. అన్నె కోయి నాయ్’

మెన, అన్నె;

30 ‘తుచో ప్రబు జలో దేముడుక తుమ్చి ఒండి పెట్టి తెన్, తుమ్చి ఒండి ఆత్మ తెన్, తుమ్చి ఒండి మెన్సు తెన్, తుమ్చి ఒండి బుద్ది తెన్, తుమ్చి సిక్కి ఎత్తి తెన్ ప్రేమ కెర్తె తంక.’

మెన మోసేచి అత్తి రెగిడ్డి దేముడుచ ఆగ్గుల్తె ముక్కిమ్.

31 పడ్డో,

‘తుమ్క తుమి కెద్ది ప్రేమ కెరంతసు గే, పక్కయ్చక కి తెద్ది ప్రేమ కెర్తె తంక’

మెన అన్యైక్ ఆగ్గు కి ముక్కిమ్ అస్సు. ఈంజేవ్ దొన్ని ఆగ్గుల్చి కంట కేన్ ఆగ్గు కి జినె నాయ్” మెన జోక యేసు సంగిలన్.

32 జలె, జో మోసే తెన్ దేముడు దిలి ఆగ్గుల్ సికడ్డాసా యేసుక “నిజుమి, గురుబాబు. ‘జో ఎక్కిలోయి’ మెన, ‘అదికారుమ్ తిలో దేముడు అన్నె కోయి నాయ్’ మెన తుయి సత్తిమ్ సంగిలది.

33 అన్నె, ‘ఒండి పెట్టి తెన్, తుమ్చి ఒండి బుద్ది తెన్, తుమ్చి ఎత్తి సెక్కి తెన్ జోక ప్రేమ కెరుక’ మెన, అన్నె ‘తుమ్క తుమి కెద్ది ప్రేమ కెరంతసుమ్ గే, పక్కయ్చక తెద్ది ప్రేమ కెర్తె తంక ముక్కిమ్’ మెన తుయి అన్నె మాన్సుల్క సంగిలిసి సత్తిమ్. బలి గట్ట ఎత్తిచి కంట ఈంజేవ్ దొన్ని ఆగ్గుల్ రితి కెరుక చిలవ” మెన మోసే తెన్ దేముడు దిలి ఆగ్గుల్ సికడ్డాసా ఒప్పున యేసుక జబాబ్ దిలన్.

34 ‘ఇసి సంగ బుద్ది తెన్ జబాబ్ దిలో’ మెన యేసు దెక, జోక “దేముడుచి రాజేమ్క తుయి దూరి నాయ్” మెన సంగిలన్. జలె, యేసు బల్ బుద్ది తెన్ ప్రస్సల్ ఎత్తిక బులవ సంగితికయ్, మోసే తెన్ దేముడు దిలి ఆగ్గుల్ సికడ్డాసాక, జో జా కోడు సంగిలి తెంతో, కో కి కేన్ కోడుక కి యేసుక పుసుక దయిరిమ్ కెర్తె నాయ్.

క్రీస్తు దావీదు పూర్ణుమ్చొక ప్రబు కి పుత్తున్ కి
(మత్త 22:41-46; లూకా 20:41-44)

35 యేసు దేముడుచి గుడితె అన్నె బోదన కెర్తె తత్తికయ్, “రచ్చించువ కెర్తెసా జలో క్రీస్తు దావీదు రానోచి సెకుమతె జెర్మ జోక పుత్తుని జయెదె మెన మోసే తెన్ దేముడు దిలి ఆగ్గుల్ సికడ్డన్ కిసి సంగుక జతయ్?

36 మెలె, దేముడుచి సుద్ది తిలి ఆత్మ దావీదుచి పెట్టి సికయ్తికయ్

తుచ విరోదుమ్ సుదల్క తుయి సుఁదితి రితి ఆవ్ కెర్తె ఎద, అంచి ఉజెతో పక్కయ్ తుయి వెన తా, మెన ప్రబు అంచో ప్రబుక సంగిలన్.

మెన దావీదు రానో సొంత సంగిలన్.

37 దస్సి దావీదు రానో క్రీస్తుక ‘ప్రబు’ మెన సంగతయ్ జలె, జో క్రీస్తు కిసి జా జోక పుత్తుని జయెదె? ఉచర” మెన ఒత్త తిలనక యేసు సంగిలన్. జలె, ప్రెజల్చి ఒగ్గర్జన్ జనాబ్ సర్ల తెన్ జోచ కొడ్డె సూన్తె తిల.

38 యేసు అన్నె బోదన కెర్తె తిలి పొది ఇసి మెలన్. “దిగెల సూటిచ పాలల్ గలంత గపురుమ్ ఉచరంత మోసే తెన్ దేముడు దిలి ఆగ్గుల్ సికడ్డన్చి రిసా తుమ్ జాగర్ల తెన్ తా. జేవ్ సంతవీదులె టీచ, మాన్సుల్ ఎత్తి అమ్క జొకర్లు మెన కోర్వ జతతి.

39 సబ గెరలె ముక్కిమచ టాస్లుతె, విందుల్తె ముక్కిమచ టాస్లుతె వెసుక కోర్వ జతతి.

40 జేవ్ మోసిమలు కెర రండెల్ మాస్సుల్చ గెరల్ విక కతతి, అస్సె ఉప్రమెస్సుక దిగిల ప్రార్దనల్ కెర్తతి. దస్సి, జోవయిచి పాపుమ ఒగ్గెరి, చి వెల్లి సిచ్చ నేడుల” మెన జేవ్చి రిసా యేసు సంగిలన్.

బీద సుద్ది జాక కలుగు జలిసి ఎత్తి దేముడుక దిలిసి (లూకా 21:1-4)

41 తెదొడి యేసు దేముడుచి గుడితె తతి, దేముడుచి కామ్క కాసుక దెతి డబ్బుల్ వెట్టెల్చి మొక్కె వెసిలన్. ఒత్త వెన, బెర అయెల మాస్సుల్ ఒత్త డబ్బుల్ గల దెతిసి దెకితె తిల్.

జలె, ఒగ్గెరిజిన్ సొమ్మార్లు ఒగ్గెరి డబ్బుల్ జేవ్ వెట్టెల్తె గల్తె తతికయ్,

42 ఎద్దెరె నెంజిలి రండెల్ మాస్సు ఎక్కి జా కెర, దొస్సి ఇదుల రాగి కాసుల్ వెటెతె గలిలి.

43 గల్తికయ్, యేసు జోచ సిస్సుల్క పాసి బుకారాన, “ఈంధె, జేవ్ సొమ్మార్లు ఎత్తిజిన్ మొత్తుమ్ దిలిన్చి కంట ఈంజ ఎద్దెరె నెంజిలి రండెల్ మాస్సు ఒగ్గెరి దా అస్సె” మెన కచితుమ్ సంగితసి.

44 కిచ్చొక మెలె, జోవయిచి ఎదివోవ్ సొమ్మారుమ్ తెంతో నేసిలిసి జా దా అస్సి. ఇస్సెక, కిచ్చొ నెంజిలె కి, కలుగు జలిసి ఎత్తి దా గెల అస్సె” మెన సిస్సుల్క బుద్ది దెకయ్ల్.

13

దేముడుచి గుడి నాసినుమ్ జయెదె మెన యేసు సంగిలిసి (మత్త 24:1-44; లూకా 21:5-33)

1 ఒత్త తెంతో, యేసు దేముడుచి గుడి తెంతో బార్ జతె తతికయ్, జోచ సిస్సుల్తె ఎక్కిల్, “ఈంధె, గురుబాబు, ఈంజ దేముడుచి గుడి బందిల పత్రల్, కెద్ది బమ్మ జతి రితి అస్సె!” మెన దెకయ్లన్.

2 దస్సి మెన దెకయ్తికయ్, యేసు జోవయింక “ఈంజేవ్ ఎత్తి దెకితసు, గని అప్పె పత్తెర్చి ఉప్పిర్ పత్తురు దొత్తల్ తిలె కి, ఎక్కి జలెకు నే బీవో నే జతె, గలి జతి దీసి జెయెదె” మెన జబాబ్ దిలన్.

3 తెదొడి దేముడుచి గుడిచి మొక్కె తిలి ఒలివ మెట్టయ్ యేసు గెచ్చ వెసిలన్, చి పేతురు యాకోబు యోహానుచి అంద్రెయె మెల సిస్సుల్ జోతె జా కెర, అస్సె కో నెంతె,

4 “గురుబాబు, తుయి సంగిలిసి కెయెక జర్లు జయెదె గే అమ్క సంగు. ఈంజ నెరవెర్చువ జతి పొది అయెలి మెలె, అమ్ చినితి రిసా కిచ్చొ గుర్తు తయెదె?” మెన యేసుక పుసిల.

5 జో జోవయింక “కొస్సె జలెకు తుమ్క అంచి రిసా మోసిమ్ నే కెర్తి రితి తుమ్ జాగర్త దెకన.

6 కిచ్చొక మెలె, ఒగ్గెరిజిన్ మాస్సుల్ క్రీస్తుచి నావ్ తెన్ జా అస్సి, మెన సంగుక జలెకు, ‘అవ్ క్రీస్తు’ మెన సంగుక జలెకు, ఒగ్గెరిజిన్క మోసిమ్ కెర, వేర బుద్ది సికడుల.

7 అస్సె, ‘యుద్దుమ్ జతయ్’ మెన జలెకు, ‘యుద్దుమ్ జయెదె’ మెన జలెకు తుమ్ సూన్తె. గని బమ్మ నెంతె తా. ఇనచ ఎత్తి జర్లు జంక అస్సె. గని ఈంజ ఉగుమ్ ఒగ్గెరి బే బేగి పూర్తి జయె నాయ్.

8 అస్సె, దేసిమ్చి ఉప్పిరి దేసిమ్, రాజిమ్చి ఉప్పిరి రాజిమ్ యుద్దుమ్క బీవో జవుల. వేర వేరతె బూకంపల్, కరువుల్ జర్లు జవుల. గని ఈంజ ఎత్తి అంచి రాజిమ్ ఏలువ కెర్తి ఉగుమ్ జెర్మయ్త నొప్పుల్ రిత జా, ఇనచ ఎక్కి మొదొల్ జవుల.

9 “తుమ్ మాత్తుమ్, జాగర్త దెకన. కిచ్చొక మెలె, జా పొదిక మాస్సుల్ తుమ్క తీర్పు కెర్త సబల్తె సార్లు దెవుల. అమ్చ యూదుల్చ సబ గెరలె తుమ్క వెట గెలుల. జేవ్ దస్సి విరోదుమ్ కెర్తె, అంచి నావ్చి రిసా, అంచి రిసా సాచి సంగితి రిసా, అదికార్లుచి మొక్కె రాసల్చి మొక్కె తుమ్ బీవో జస్సె.

10 గని తొలితొ, ఉగుమ్ నే మార్పువ జతె, అగ్గె, ఒండి లోకుమ్చ కేన్ దేసిమ్చ ప్రజెల్క కి సుబుమ్ కబుర్ సూనపుక అస్సె. సూనయ్లెకయ్, ఈంజ ఉగుమ్చి ఆకర్ దీసి జెయెదె.

11 “జలె, తుమ్క మాస్సుల్ నేరిమ్ వయడ అదికారుల్తె సార్లు దెతి పొదిక, ‘కిచ్చొ సంగుక గే?’ మెన తుమ్ చింత గలన నాయ్. తుమ్ సంగుక మెన జయ్యి గడియయ్ దేముడుచి సుద్ది తిలి ఆత్మ కిచ్చొ దెయెదె గే, జయ్యి సంగ. కిచ్చొక మెలె, తుమి లట్టబ్బు నాయ్. దేముడుచి సుద్ది తిలి ఆత్మయ్ లట్టబెదె. తుమ్క తుమి సంగున్ నాయ్.

12 “జా పౌదిక అన్నె కిచ్చొ బాద తయెదె మెలె, అన్నొనక బావొని జలెకు, పుత్తునక అబ్బొసి జలెకు, మొర్రి సిచ్చతె సార్పు దెవుల. అన్నె, అయ్యున అబ్బొనక పుత్తర్లు సగుమ్ జిన్ విరోదుమ్ జా, జోవయింక మొరవుల.

13 అన్నె, తుమ్ అంచి నావ్ తెన్ బులితె తత్తెది రిసా ఎతివాల్ జిన్ తుమ్ క విరోదుమ్ జవుల. గని ఇన అల్లర్ జలెకి, ఆకర్ ఎద కో నముకుమ్ తెన్ తా ఓర్పువ జవుల గే జెచ్చొ రచ్చించువ జవుల” మెన యేసు నంగిలన్.

యెరూసలేమ్ పట్టుమ్ పాడ్ జంక తిలిన్చి రిసా యేసు నంగిలిసి

14 “జలె, *పిమ్మట్, దేముడుక విరోదుమ్ జా జోక బలే దూసువ కెర నాసినుమ్ కెర్కె ఏక్, దేముడుచి గుడితె టీవో నే జతి టానతె టీవో జంక తుమ్ దెకిలె, ఇన్నెచి అర్దుమ్ కిచ్చొ మెలె, ఈంజ నదు కెర్తన తుమ్ చెంగిల్ ఉచరన. జా గుర్తు తుమ్ దెకిలె, ఈంజ యూదయ ప్రదేసిమ్ తెచ మాన్సుల్ చట్కున డొంగ్రెల్ ఉట్ట నిగుతు!

15 జా పౌదిక కేన్ మిద్దెచి ఉప్పిరి కో తవుల గే, ఉత్త కెర, జోచి గెరి తెంతొ కిచ్చొ జలెకు వస్తువ వెంట నెంక జవున్ గెరి పెనుక జయె నాయ్.

16 వెడయ గట్ల కో తవుల గే, కామ్చి రిసా కట్ల జోచ పాలల్ జవున్ వెంట నెంక పస్ల జెంక నాయ్.

17 అయ్యొ! జేవ్ దీనల్ క వయ తిల తేరబోదల్, బోదల్ వడ్డివో, ఉట్ట నిగుక నెత్త ఒగ్గర్ సైమల్ జవుల!

18 “ ఈంజ ఎత్తి చల్లి పొది జర్లు జవున్ నాయ్” మెన తుమ్ ప్రార్దన కెర.

19 కిచ్చొక మెలె, లోకుమ్ జెర్మయిల్ తెంతొ అప్పె ఎద కలుగు జల సైమల్ చి ఒగ్గర్ సైమల్ జేవ్ దీనల్ క ఎత్తివాల్ తయెది. జలి మెలె, ఒత్త తెంతొ అన్నె కెయెఁక కి తెద్ది సైమ తయె నాయ్.

20 జాచి రిసా, జేవ్ అల్లర్ జత దీనల్ తొక్కి జతి రితి ప్రబు సెలవ్ దెతో నాయ్ జలె, కో కి మాన్సుల్ రచ్చించువ జంక నెత్తిరి తా. గని నంపజతి రిసా రచ్చనక సిసాన జల మాన్సుల్ పాడ్ నే జతి రిసాయి, ‘జేవ్ సైమల్ తొక్కి దీనల్ తత్తు’ మెన ప్రబు సెలవ్ దా అన్నె.

21 అన్నె తెదొడ్క, ‘ఈందె క్రీస్తు!’, ‘ఓదె క్రీస్తు! మెన కో జలెకు తుమ్ క సంగిలె, జా నంప కెర నాయ్.

22 కిచ్చొక మెలె, అబద్దుమ్ చ జా కెర, ‘ఆవ్ క్రీస్తు’ మెనన జలెకు, ‘ఆవ్ దేముడుచి కబుర్ ఆన్ తొసా’ మెనన జలెకు, రచ్చనక సిసాన జలనక మోసిమ్ కెర జోవయించి నముకుమ్ పిట్టవుక మెన ఉచరన, వెల్లొ మాయకమొ కెరుల.

23 అల్లె, చెంగిల్ దెకన. ఈంజ ఎత్తి, నే జతె అగ్గెయ్ తుమ్ క ఆవ్ సంగితసి.

24 “జేవ్ దీనల్ క, ఆవ్ సంగిల జేవ్ సైమల్ పూర్తి జలె పిమ్మట్ క, పొద్దు అందర్ జయెదె, జోసు కి ఉజడి దెయె నాయ్.

25 ఆగాసుమ్ తెంతొ సుక్కుల్ గెసురుల, చి ఆగాసుమతె ఎత్తి అద్దర్ జయెదె.

26 తెదొడ్క ఎదివాట్ అదికారుమ్ తెన్, వరలోకుమ్చి ఉజడి తెన్, ఆవ్ మాన్సు జా జెర్మన్ అయ్ లొసా మబ్బుల్ తె వరలోకుమ్ తెంతొ ఉత్త జెయెందె. ఆవ్ దన్సి ఉత్త జెతిసి లోకుమ్ ఎత్తి దెకుల.

27 తెదొడ్క అంచ దూతల్ క తెద్రయిందె, చి జేవ్, చెత్తర్ దిక్కుల్ తెంతొ, లోకుమ్చి ఏక్ పక్క తెంతొ, అన్నెక్ పక్క ఎద, కేన్ దేసిమ్ చక నే పిట్టి, రచ్చనక ఆవ్ సిసాన్ల మాన్సుల్ క అనవ, ఎక్కితె కుడవనిందె.

అంజూరుమ్ రూకుక టాలి

28 “అంజూరుమ్ రూకుక టాలి కెర అర్దుమ్ కెరన. మెలె, దసా రూకవ కొమ్మల్ కొవ్ని జా పలోయ్ లె ‘వేసెక్ అప్పె పాచ జెయెదె’ మెన తుమ్ చినితె.

29 దన్సి, ఆవ్ సంగిల గుర్తుల్ జర్లు జతిసి తుమ్ దెకిలె, జా గుమ్ముమె పావిల్ రితి జా, అన్నె జెతికయ్ సమయమ్ పాసి జా అన్నె మెన తుమ్ జాన్ తె.

30 ఆవ్ సంగిల సైమల్ గుర్తుల్ పూర్తి జలెకయ్ ఈంజ ఉగుమ్ అంతుమ్ జయెదె మెన తుమ్ క ఆవ్ కచి తుమ్ సంగితసి.

31 జలె, ఆగాసుమ్ బుయి నాసినుమ్ జా గెచ్చుల, గని అంచ కొణొ ఎద్దర్ పిట్టి తి నాయ్.

* 13:14 13:14 యేసు జెర్మ డబ్బయ్; 70; వెర్సల్ గెలి వడ్డి ఈంజ నస్తుమ్ జర్లు జలి. మెలె యేసు వరలోకుమ్ తె గెచ్చ అన్నె చిన్కె నత్తు; 27; వెర్సల్ గెతికయ్.

32 “జలె, కేన్ దీనిక ఈంజ లోకుమ్తె అన్నె జెయిందె గే, జా దీనిక కేన్ గడియక జెయిందె గే, దేముడు జలె అబ్బొక పిట్టవ కేన్ మాన్సు జలెకు, వరలోకుమ్చ దూతల్ జలెకు, దేముడు అబ్బొచొ పుత్తుని జలెకు, కోయి నేనుమ్.

33 జాకయ్, జాగర్త తెన్ తా, తెలివి తా, ప్రార్దన కెర్తె తా. జా కాలమ్ కెయక జెయిందె గే నేన్సు.

34 ఆవ్ అప్పె దేముడు జలె అబ్బొతె గతిసి, ఈంజ లోకుమ్తె అన్నె జెతిసి కీసి మెలె, ప్రయానుమ్ గెతొ మాన్సు కెర్తెన్చి రితి జయెదె. జో మాన్సు గెచ్చుక బార్ జతి పొది, జోక కలుగు జతిసి జోచ గొత్తి నుదల్క రకితి రితి జోవయింక అదికారుమ్ దా, జోవయింక ఎక్కిలోక కమె దా, గుమ్ముమ్ రకితోసా ఎక్కిలోక రకవ, ఉట్ట గెచ్చెదె. అంచి తెన్ కి దస్సి.

35 “జలె, తుమ్ జాగర్త తెన్ రకితె తా. కిచ్చొక మెలె, గేర్చొ ఎజోమాని కెర్తె రితి ఆవ్ ఉట్ట గెలె, సంజెక జెయిందె గే, సొక్కుక జెయిందె గే, కుకుడొ వానినె జెయిందె గే, వెందలె జెయిందె గే, కెర్టొడక జెయిందె గే, తుమ్ నేన్సు.

36 తెలివి తా రకితె తా. నెంజలె, తుమ్ నే రకితె నిజల్ రితి బదుకుమ్ జా తిలె పొది ఆవ్ అయెలె, దెకిలె, తుమ్ కీసి జస్సె!

37 తుమ్కయ్ మెన నాయ్, ఎత్తిజన్ మాన్సుల్క ఆవ్ కిచ్చొ జాగర్త సంగితసి మెలె, ఈంజ లోకుమ్తె ఆవ్ అన్నె జెతిన్క తెలివి తెన్ రకితె తా” మెన సిన్సుల్క యేసు ఈంజ బోదన ఎత్తి సంగిలన్.

14

యేసుక మారుక మెన వెల్లెల మాన్సుల్ కుట్ట కెర్తెసి

(మత్త 26:1-5; లూకా 22:1-2; యోహా 11:45-53)

1 దొరతి గెలి పిమ్మట్ *వస్కా పండుగు, జలె నే పులయెల పొడియె కతి పండుగు, నే జెతె అగ్గె, వెల్లెల పూజర్లు చి మోసే తెన్ దేముడు దిలి అగ్గల్ సికడ్డన కుట్ట ఉచర ఉచర, “కీసి కెర జలెకు గుట్టు తెన్ యేసుక అప్పయి దెర మారుమ్” మెన ఆన తెన్ తిల.

2 గని, “పండుగు పొది పోని, కిచ్చొక మెలె పండుగక బెర అయెల పైజెల్ కుమ్మట్ తెన్ గగ్గల్ జా అమ్క బలె అల్లర్ కెరుల.”

3 యేసు బేతనియ గెవ్వి గెచ్చు, సీమోసు మెలె వెల్లి రోగుమ్ జా తిలో ఎక్కిలోచి గెరి తా, అన్నిమ్ కంక వెన తతికయ్, ఏక తేరబోద బగ్గర్ విలువచి వానినె తేలుచి బుడ్డి దెరన జా, జా బుడ్డి పుట్టవ కెర యేసుచి బోడి ఉప్పిరి సువిలి.

4 ఒత్త తిలన నగుమ్జెన్ కోపుమ్ జా “ఈంజ తేల్ ఇసి పాడ్ కెరుక కిచ్చొక?

5 ఈంజ తేల్ సొప్పు పుంజో వెండ్లుచి కంట అన్నె ఉబ్బుల్క వికుక జతి, చి బీద సుదల్క దర్ముమ్ దెంక జతి” మెన లట్టబన, జా తేరబోదక గోల కెర్తె.

6 జలె యేసు, “ఇన్నెక గోల కెర నాయ్. కిచ్చొక ఇన్నెక ఉన్సుర్ కెర్తెను? అంచి రిసా ఈంజ కెర్తెసి వెల్లి కామ్.

7 బీద సుదల్ కెయక కి తుమ్చి తెన్ తవుల చి రిసా తుమ్క కెయక ఇన్సుమ్ అయెలె, జోవయింక దర్ముమ్ దెంక జయెదె. గని ఆవ్ కెయక తెయక తుమ్చి తెన్ ఈంజ లోకుమ్తె ఇసి తయె నాయ్.

8 ఇన్నెచి అత్తి తిలిసి నర్తక ఈంజ కెర అన్నె. ఆవ్ నే మొర్తె అగ్గె, అంక నే రోచితె అగ్గె, అంచి ఆగ్గె తెయార్ కెర్తి గుర్తు రితి కెర అంక ఈంజ తేల్ బోడి నువ దా అన్నె.

9 అన్నె ఆవ్ తుమ్క కిచ్చొ నిజమి సంగితసి మెలె, ఒండి లోకుమ్తె కేసె అంచి రిసా సుబుమ్ కబుర్ బోదన కెరుల గే ఒత్తయ్ ఈంజ అప్పె కెర్తెసి సంగ, ఇన్నెచి రిసా ఉచరవడుల” మెన యేసు సంగిలన్.

* 14:1 14:1 పూర్వమ్ పొది యూదుల్ ఐగుప్తు దేసిమి తా గొతిమాన్సుల్ జలిన్ తెంతొ ప్రబు రచ్చింబువ కెర్తెసి ఏద కెర్తె పండుగు, ఈంజ. ముక్కిమ్క కిచ్చొ ఏద కెరుల మెలె, ‘అమ్చ యూదుల్క విడ్డల్ కెర్తె’ మెన ఐగుప్తు దేసిమ్చ కుటుంబల్ ఎత్తివ తొల్లూర్ జల మున్సుబోదల్క తవ మార్గిన్తె యూదుల్చ తొల్లూర్ బోదల్ నే మొర్తి రితి ప్రబు జోవయింక పిట్టయిలిసి ఏద కెరుక. తెదొడి, పూర్వుమ్చి జా రాతి కేన్ గెరి యూదుల్ తిల గే, జా గేరచ దార్బంధల్తె అర్పితుమ్ జలె ఏక మెండపిల్లచి లియి దెరవుల, చి దూత దెకిలె, జా గేర్చొ తొల్లూర్ బోదక మారె నాయ్.

యూదా మెలో సిస్సుడు యేసుకు దెర దెంక ఒప్పన్లినీ
(మత్త 26:14-16; లూకా 22:3-6)

10 యేసుకు బారజిన సిస్సుల్తె ఎక్కిలో ఇస్కరియోతు గవ్వెచో యూదా మెలోసా, తెదొడి జో, యేసుకు దెర వెల్లెల పూజర్లది అత్తి దెంక ఉచర, జోవయింతె గెచ్చ, సంగిలన్.

11 జేవ్ నూన నర్ల జా, “తుక డబ్బుల్ దెమ్దె” మెన ఒప్పన్తికయ్, యేసుకు కీసి కెర కెయెక దెర దెంక గే, యూదా వాల్ చజితె తిలో.

12 నే పులయెల పొడియెు కతి పండుగది మొదొల్ కెర్తి దీసి, మెలె, ‘పస్కా’ మెన మెండపిల్లక ఆర్పితుమ్ దా †జోచి లోయి నువెతి దీసి, సిస్సుల్ యేసుకు “తుయి పస్కా అన్నిమ్ కెర్తి రిసా అమ్ కేన్ టాన్ తెయార్ కెర్కు?” మెన జోక వునిల.

13 జో సిస్సుల్తె దొగులక పాసి బుకారా, “తుమ్ †పట్టుమ్తె గెచ్చ, చి పట్టుమ్ తెడి పెసిలదు మెలె, పాసి వయితోసా ఎక్కిలో తుమ్క దస్సుల్ జయెదె. జోచి పట్టి గెచ్చ,

14 చి కేన్ గెరి జో పెనెదె గే, జా గేర్చో ఎజొమానిక తుమ్ కిచ్చో మెన మెలె, ‘అంచ సిస్సుల్ తెన్ ఆవ్ పస్కా అన్నిమ్ కతి గది కేన్?’ మెన అమ్చో గురుబాబు పునితయ్ మెన సంగ, చి

15 తెయార్ కెర్తి వెల్లి అంతస్సు గది ఏక్ తుమ్క దెకయెదె. ఒత్తయ్ అమ్చి రిసా పస్కా అన్నిమ్ తెయార్ కెర తా” మెన యేసు సంగిలన్.

16 జేవ్ సిస్సుల్ బార్ జా పట్టుమ్తె గెచ్చ, జో సంగిలి రితి ఎత్కి జర్లు జా అస్సు మెన దెక, జా పస్కా అన్నిమ్క దొర్కు జలిసి తెయార్ కెర్ల.

17 సాంజ్ జతికయ్, యేసు జేవ్ బారజిన సిస్సుల్ తెన్ జా గదితె జా కెర,

18 జేవ్ వెన అన్నిమ్ కెర్తి తతికయ్, యేసు “తుమ్క ఆవ్ కిచ్చొ కచితుమ్ సంగితసి మెలె, తుమ్ అంచి తెన్ కతనతె ఎక్కిలో అంక దెర విరోదుమ్ నుదల్చి అత్తి సార్లు కెర దెయెదె” మెన సంగిలన్.

19 ఇసి సంగితికయ్, జేవ్ దుకుమ్ జా, “ఆవ్ గె?” మెన ఎక్కిలోచి పట్టి ఎక్కిలో ఎత్కిజిన సంగుక దెర్ల.

20 జలె, జో జోవయింక, “తుమ్ బారజినతె ఎక్కిలో దస్సి కెరెదె. అంచి తెన్ ఆతు తప్పలయ్ పొడి బెద బుడ్డయతో ఎక్కిలో.

21 ఆవ్ మాన్సు జా జెర్తిలోసాచి రిసా రెగిడ్లి లెక్క ఉట్ట గెచ్చెదె. గని, అయ్యె! ఆవ్ మాన్సు జా జెర్తిలోసాక కేన్ మాన్సు దెర విరోదుమ్ నుదల్చి అత్తి సార్లు కెర దెయెదె గే, జో మాన్సు జతి సిచ్చచి రిసా జో నే జెర్లు తిలె జోక చెంగిల్ తత్తి!” మెన సంగిలన్.

22 యేసు, సిస్సుల్ జా పస్కా అన్నిమ్ కెర్తి తా, యేసు పొడియె దెరన “దయ కెర్లది” మెలి రితి ఏదేముడు అబ్సొన్క జోబర సంగ కెర, జా పొడియె మోడ, సిస్సుల్క పంట దా, జోవయింక “తుమ్ కంజ కడన కా. అంచి ఆగేక కంజ గుర్లు జయెదె” మెన కెర,

23 ఏక్ గిన్నచి ద్రాచ రస్సుమ్ దెర, దేముడు అబ్సొన్క అన్నె ఉచర, సిస్సుల్క దెతికయ్, జేవ్ ఎత్కిజిన జా గలన్చి ద్రాచ రస్సుమ్ వర్ల తెన్ పిల.

24 తెదొడి యేసు “కంజ రస్సుమ్ కిచ్చొచి గుర్లు మెలె, ఒగ్గర్జిన మాన్సుల్చి పాపుమ్ గెచ్చయెతి రిసా అంచి లోయి నూయె జంక అస్సు మెన అంచి నోచి ప్రమానుమ్.

25 తుమ్క ఆవ్ కిచ్చొ నిజచి సంగితసి మెలె, అబ్సొని జలో దేముడుచి రాజిమ్తె ఆవ్ నోవర్ పితె ఎద, ఇసి ద్రాచ రస్సుమ్ పియె నాయ్” మెన సిస్సుల్క సంగిలన్.

బమ్మ జా అంక ములితె మెన సంగిలిసి

26 తెదొడి జేవ్ దేముడుక గనుమ్ గాయ కెర బార్ జా, ఒలీవ మెట్టయ్ ఉట్ట గెల.

27 యేసు జోవయింక, “తుమ్ ఎత్కిజిన బమ్మ జా అంక ములితె. కిచ్చొక మెలె, మెండల్ రకితోసాక ఆవ్ మెరయిందె, చి జోచ మెండల్ ఎత్కిజిన చెదుర్ల జా గెచ్చుల,

† 14:12 14:12 యేసు కి కంజ పస్కా పండుగ పొడి మాన్సుల్చి పాపుమ్ గెచ్చయెతె అర్పితుమ్ జా జోవయించి లోయె నుచ దెయెదె.

‡ 14:13 14:13 మెలె యెరూసలేమ్ పట్టుమ్. § 14:22 14:22 ‘దేముడు అబ్సొన్’ మెన కేన్ నుట్టు రెర్ల తిలె, ఎత్కి అదికారుమ్ తిలో దేముడుచి రిసా సంగితయ్.

మెన దేముడు కోడుత రెగ్గయ్యలిసి నెరవెర్చుప జంక అస్సె.

28 గని ఆవ్ అన్నె జీవ్ జా ఉట్టి పిమ్మట్క, తుమ్చి కంట అగ్గె గలిలయ ప్రాంతుమ్తె గెచ్చిందె” మెన ప్రమానుమ్ కెర్లన్.

29 యేసు ఇసి సంగితికయ్, పేతురు జోక “ఎత్తిజిన్ తుక ములిలెకి, ఆవ్ తుక ములి నాయ్” మెన సంగిలన్.

30 జలె యేసు జోక, “తుక ఆవ్ కిచ్చొ నిజుమి కచితుమ్ సంగితసి మెలె, అజి రాతిక, కుకుడొ తివ్వెరి నే వాసితె అగ్గె, ‘జోక నేని’ మెన అంచి రిసొ తుయి తివ్వెరి సంగితె” మెన సంగిలన్.

31 దస్సి సంగిలే కి, పేతురు బమ్మ తెన్ “ఆవ్ తుచి తెన్ మొరుక అస్సె మెలె కి, ఆవ్ తుక ‘నేని’ మెన కెయ్యక కి సంగి నాయ్” మెన పేతురు గట్టిజ సంగిలన్. జేవ్ సిస్సుల్ ఎత్తిజిన్ దస్సి సంగిల.

గెత్తేమనే తోటతె

(మత్త 26:36-46; లూకా 22:39-46)

32 ఒత్త తెంతో యేసు సిస్సుల్ గెత్తేమనే మెంతి తోటతె గెచ్చ, జో “ఆవ్ ఒత్తల్తో గెచ్చ ప్రార్దన కెర జెతి ఎది ఎద తుమ్ ఇన్నె వెన తా” మెన జేవ్ సిస్సుల్క సంగ,

33 ఎక్కి పేతురుక, యాకోబుక చి యోహానుక వట్టి కడన ఇదిల్ దూరి గెచ్చ తా, దుకుమ్ జా మెన్నుతె ఒగ్గెర బాద సేడుక దెల్లొ. దస్సి బాద సేడ,

34 “అంచి పెట్టి తిలి దుకుమ్క మొర గెచ్చుక జయెదె. తుమ్ ఇన్నె తెలివి తెన్ రకితె తా” మెన సంగ,

35 సగుమ్ దూరి గెచ్చ కెర, సెర్పు సేడ, దేముడు అబ్బొనక ఇసి మెన ప్రార్దన కెర్లన్. “ఓ బ, తుక జంక తిలెగిన, ఈంజ దుకుమ్ జతి గడియ నెంజిలె, జతి లెక జలె అంక పిట్టపు” మెన అన్నె,

36 “ఓ బ, ఎత్తి తుచి అత్తి అస్సె. ఈంజ గిన్నుచి ఆవ్ నే పితి రితి అంక పిట్టపు. గని అంచి ఇస్టుమ్ పొని. తుచి ఇస్టుమ్ జర్గు జవున్” మెన ప్రార్దన కెర,

37 జేవ్ సిస్సుల్తె ఉట్టు జా, జేవ్ నిజ అస్సి మెన దెక కెర, పేతురుక, “ఓ సీమోసు, తుయి నిజ అస్సిన్ గే? ఎక్కి గడియ జవున్ రకితె తంక నెత్తిర్చది గే?

38 జెత అల్లెరతె తుయి పాపుమ్ నే కెర్రి రితి జాగర్త తెన్ తా, ప్రార్దన కెరె తా. ‘అత్తు నిదానుమ్ అస్సె’ మెన ఉచరనైకి, ఆగేక సెక్తి నాయ్,” మెన పేతురుక యేసు సంగిలన్.

39 అన్నెక్ సుట్టు ఇదిల్ దూరి ఉట్టు గెచ్చ కెర, తోలితో ప్రార్దన కెర్ల కొడొ, అన్నెక్ సుట్టు ప్రార్దన కెర్లొ.

40 దస్సి ప్రార్దన కెర, అన్నె బుల జా, జేవ్ సిస్సుల్ గూన్క నెత్త కెర నిజ అస్సి మెన దెకిలన్. దెకితికయ్, జేవ్ లాజ్ జా, జోక కిచ్చొ సంగుక గే నేన గెల.

41 అన్నెక్ సుట్టు కి యేసు దస్సి గెచ్చ అన్నె జా, మొత్తుమ్ తివ్వెరి జేవ్ నిజిలిసి దెక, “అప్పెకయ్ సెలవ్ కడన నే రకితె నిజ అస్సున్ గే? సాలు. ఈందె సమయమ్ జా గెలి గే. ఆవ్ మాన్సు జా జెర్మున్ అయ్లోసొ పాపుమ్ కెర్లనచి అత్తి దెర్పు సేడిందె.

42 జొమ్మొ, గెచ్చుమ! ఓదె, అంక దెర దెతోసొ పాసి జా అస్సె” మెన జోవయంక సంగిలన్.

యూదా చి జనాబ్ యేసుక దెరుక అయ్లిసి

43 యేసు దస్సి లట్టబై తతికయ్, జోచ బారజిన్ సిస్సుల్తె అగ్గె బెద తిలొ యూదా పావ అయ్లో. వెల్లెల పూజర్లు, మోసి తెన్ దేముడు దిలి ఆగ్గుల్ సికడ్తనచి అన్నె వెల్లెల మాన్సుల్ తెద్రయల జనాబ్ కి, కత్తులు డండల్ దెరన, యూదా తెన్ అయ్ల.

44 జలె ఈంజ నే జతె అగ్గె, “కక్క ఆవ్ చుంబిందె గే, జొయ్యి యేసు. జోకయ్ దెరన కో నే పిట్టయ్తి రితి చెంగిల్ రక కడన” మెన యేసుక దెర దెతో యూదా జేవ్ జనాబ్క గుర్తు సంగ తిలన్.

45 జో అయ్లి బేగి, యేసుతె జా కెర, “గురుబాబు” మెన సంగ చుంబితికయ్,

46 జేవ్ బెద అయ్లన యేసుక దెర్ల.

47 జలె, ఒత్త టీవొ జా తిలొ ఎక్కిలొ కత్తి కడన, ఎత్తిక వెల్లొ పూజరిచొ గొత్తి సుదొక పెట జోచొ కంగ్గొ కండ గెలన్.

48 తెదొడి జోక దెర్లనక యేసు, “అవ్ కిచ్చొగి చోర్లయ్ గే, చి తుమ్ కత్తులు డండల్ దెరన అంక దెరుక తుమ్ అయలదు గే?

49 అవ్ రోజుక తుమ్చి తెన్ దేముడుచి గుడితె తా బోదన కెర్లె కి, జా పొది అంక దెర్పు నాయ్. జలె, దేముడుచి కొడొతె రెగిడ్డిసి ఎత్తి జర్గు జవున్!” మెన సంగిలన్.

50 జలె, సిస్సుల్ ఎత్తిజిన్ బమ్మ జా, జోక ముల దా ఉట్ల నిగిలన్.

51 జలె, పట్టి బందన తిలో ఏక ఉబెడె యేసుచి పట్టి గెతె తిలన్ యేసుక కడ నెత మాన్సుల్తె సగుమ్జిన్ జో ఉబెడొక దెర్ల.

52 గని, జో జా పట్టి సేడవ దా డుమ్డయ్ ఉట్ల నిగిలన్.

ఎత్తిక వెల్లో పూజరిచి మొక్కె యేసుక పరిచ్చు కెర్లిసి

53 * యేసుక ఎత్తిక వెల్లో పూజరితె కడ నిల. ఒత్త కడ నెతికయ్, వెల్లెల పూజర్లు, మోసి తెన్ దేముడు దిలి ఆగ్గుల్ సికడ్డన, వెల్లెల మాన్సుల్ ఎత్తిజిన్ ఒత్త బెర తిల.

54 పేతురు, జలె, దూరి దూరి తా యేసుచి పట్టి జా జా, జో ఎత్తిక వెల్లో పూజరిచి వీదె పెన, ఆగితె తపితి రిసా జమాన్సు తెన్ వెన తిలో.

55 వెల్లెల పూజర్లు చి అన్నె వెల్లెలో నబ కెర్లన ఎత్తిజిన్ యేసుక మార గెలుక మెన జోక నేరిమ్ వయడ్డి సాచిక చజెతె తిల, గని సరి జతి సాచి దొర్పు జయె నాయ్.

56 మెలె, ఒగ్గర్జిన్ జోచి ఉప్పిరి అబర్దుమ్ సాచి సంగిలే కి కచి, కచి సాచి ఎక్కి రితి జయె నాయ్.

57-58 తెదొడి, సగుమ్జిన్ టీవో జా, “మాన్సు బందిలి ఈంజ దేముడుచి గుడి సేడవ కెర తిర్తతకయ్ మాన్సు నే బందిలి ఏక దేముడుచి గుడి బందిందె, మెన ఈంజో సంగిలిసి నూన్లమ్” మెన అబర్దుమ్ సంగిల.

59 గని జేవ్ సంగిలి సాచి కి సరిగా బెదె నాయ్.

60 తెదొడి, ఒత్త తిల మాన్సుల్చి నెడమె ఎత్తిక వెల్లో పూజరి టీవో జా కెర, యేసుక “ఈంజేవ్ సంగితిన్క కిచ్చొ జబాబ్ దెంక నెతిర్చి గే? ఈంజేవ్ తుక కిచ్చొ నేరిమ్ వయడ్డతి?” మెన పుసిలన్.

61 గని యేసు తుక్లె తా, కిచ్చొ జబాబ్ కి సంగి నాయ్. యేసు తుక్లె తతికయ్, ఎత్తిక వెల్లో పూజరి జోక అన్నె “పరలోకుమ్ తిలో అమ్చో దేముడు ప్రబుచో పుత్తున్ జలో క్రీస్తు తూయి గే?” మెన యేసుక పుసితికయ్,

62 జో “అచ్చె. అన్నె, ఆకర్క, ఎత్తి సెక్తి అదికారుమ్ తిలోసాచి ఉజెతో పక్కయ్ అవ్ మాన్సు జా జెర్పున్ అయలోసా వెన తపిసి కి, ఆగానుమ్చ మబ్బుల్ తెన్ అవ్ పరలోకుమ్ తెంతో అన్నె ఉత్త జెతిసి కి తుమ్ దెకితె” మెన సంగిలన్.

63 ఇసి సంగితికయ్, జో ఎత్తిక వెల్లో పూజరి కోపుమ్ జా, జో గలన్లి దిగిల్ సాక్క చిదర గెల కెర, “అన్నె సాచి సంగితన అమ్క అక్కర్ నాయ్.

64 దేముడుక అవ్ నమ్మందుమ్ జతసి మెన ఈంజో సంగ ప్రబుచి విలువ కడ వెల్లె పాపుమ్ కెర్లిసి తుమ్ ఎత్తిజిన్ సొంత నూన్లదు, తుమ్ కిచ్చొ తీర్పు సంగితె?” మెన సబ కెర్లనక పుసితికయ్, “మొర్తి సిచ్చుచి తప్పు కెర అన్నె” మెన జేవ్ ఎత్తిజిన్ తీర్పు సంగిల.

65 తెదొడి జోవయంతె సగుమ్జిన్ యేసుక తుంకుర్క దెర, నిస్కారుమ్ కెర్లె. అన్నె, జోచి మొక్కె పాలుమ్ డంక దా జోక పెట, “తుక కో పెట్ల గే, తుయ్ క్రీస్తు గే సంగు!” మెన కొంకడ్ల. అన్నె, జమాన్సు జోక ఎత్తివాబ్ దెబ్బుల్ పెట గెల.

**“జోక నేని” మెన యేసుచి రిసా పేతురు సంగిలిసి
(మత్త 26:69-75; లూకా 22:56-62; యోహా 18:15-18,25-27)**

66 పేతురు ఎట్టోతో వీదె తతికయ్, జో ఎత్తిక వెల్లో పూజరితెచి తేరబోద గొత్తి నుది ఎక్కిల్ జా కెర,

67 పేతురు ఆగితె తపిత్ తిలిసి దెక కెర, “తుయి కి నజరేతు గచ్చెవో యేసు తెన్ తిలది, గెద” మెలి.

* **14:53 14:53** ‘ఎత్తిక వెల్లో పూజరి’ మెలి, వెల్లెల పూజర్లు మొత్తమ్తె ఎక్కిల్ ముక్కిమ్చో పూజరి జయెదె. తెదొడి కయవ మెలోసా ఎత్తిక వెల్లో పూజరి జా తిలో.

68 ఇని మెన సంగితికయ్, “నాయ్, గెద. తుయి సంగితిసి కిచ్చొ గే, ఆవ్ నేని. అంక అర్దుమ జయె నాయ్” మెన సంగ, జా వీదెచి ఒత్తల్తోచి గుమ్ముమె ఉట్టు గెలన్.

69 గని జా గొతిమాన్సు జోక ఒత్త అన్నె దెక, “ఈంజో కి జోచి సిన్సులతె ఎక్కిలో” మెన ఒత్త టీవో జల సుదల్క సంగితికయ్,

70 పేతురు అన్నె, “ఆవ్ నెంజి” మెన సంగిలన్. అన్నె గడియ గెతికయ్, ఒత్త తిలస పేతురుక దెక, “తుయి, నిజామి జోతె తిలోసా. తుయి కి గలిలయ ప్రాంతుమెతెచో మాన్సు గెద?” మెన సంగిల.

71 జాకయ్ పేతురు, “తుమ్ సంగిలో మాన్సుక ఆవ్ నేని” మెన సామెన గల కెరన ఒట్టు గలనుక దెర్తికయ్,

72 బేగి కుకుడో వాసిలన్. జలె ఇన్నెతెన్ దోవ్వెర్ జలి, చి “కుకుడో తివ్వెర్ నే వాసితె అగ్గె, తుయి అంక ‘నేని’ మెన తివ్వెర్ సంగితె” మెన యేసు అగ్గె సంగిలిసి ఏదన్సు కెర, పేతురు ఎదివాట్ దుకుమ్ జా ఏడ గెలన్.

15

పిలాతు యేసుక పరిచ్ఛ కెర్లిసి
(పుత్త 27:1-2, 11-14; లూకా 23:1-5; యోహా 18:28-38)

1 రాత్ పయతికయ్, వెల్లెల పూజర్లు, వెల్లెల మాన్సుల్, మోసి తెన్ దేముడు దిలి ఆగ్గుల్ సికడ్డన, వెల్లెల సబ కెర్త సుదల్ ఎత్తిజిన్ బెద వెన, యేసుక కిచ్చొ కెరుక గే ఉచర, జోక బంద కడన, * అదికారి జలో పిలాతు మెలోసాతె సార్చు దిల.

2 పిలాతు యేసుక దెక, “తుయి గే యూదుల్చో రానో?” మెన పుసిలన్, చి యేసు “తుయి సంగిలి రితి” మెన జబాబ్ దిలన్.

3 తెదోడి వెల్లెల పూజర్లు యేసుక ఒగ్గర్ నేరిమ్లు వయడ్లికయ్,

4 పిలాతు మెలో జో అదికారి జోక అన్నె, “తుయి జోవయింక కిచ్చొ జబాబ్ దెసి నాయ్ గే? ఈందె, తుక కెత్తి నేరిమ్లు వయడ్లితి గే నూసు”, మెన సంగిలన్.

5 గని యేసు అన్నె కిచ్చొ జబాబ్ దిలో నాయ్, చి రిసా పిలాతు ఒగ్గర్ ఆచారిమ్ జలో.

6 జలె, జా పండుగు పొది, ప్రెజెల్ కోర్ప జలో కేన్ జలెక జేలి జలోసాక ముల దెంక పిలాతుక అలవాట్ జా అన్నె.

7 జలె, ప్రబతుమ్క విరోదుమ్ జా అదికారుల్క విత్తేకుమ్ కెర అత్య కెర్ల మాన్సుల్ సగుమ్జెన్ జా పొది జేలతె తిల. జోవయింతె బరబ్బు మెలో ఎక్కిలో తిలో.

8 జలె, ఒత్త తిల జనాబ్ పిలాతుచి పాసి బెర జా కెర, “తుయి ఈంజ పండుగక అలవాట్ జలి రితి అమ్క కెరు!” మెన బలవంతుమ్ కెర్ల.

9 జాకయ్ జో పిలాతు జోవయింక “తుమ్ యూదుల్చో †రానో జలోసాక తుమ్క ఆవ్ ముల దెంక తుమ్చి అస గే?” మెన పుసిలన్.

10 కిచ్చొక మెలె, ఎక్కి గోసకయ్ వెల్లెల పూజర్లు యేసుక జో తెన్ అన అస్తి మెన జో జానె.

11 గని, “ యేసుక పొని. బరబ్బుక ములు!” మెన సంగ” మెన వెల్లెల పూజర్లు జేవ్ బెర తిల జనాబ్క సికయ్తె తిల.

12 తెదోడి పిలాతు జేవ్క అన్నె, “దస్సి జలె, తుమ్ యూదుల్చో రానో మెలోసాక ఆవ్ కిచ్చొ కెరుక?” మెన పుసిలన్,

13 చి జేవ్ జనాబ్ “జోక సిలువతె గల మొర్తి సిచ్చ కెరు!” మెన ఒర్చిల.

14 జేవ్ ఇని జతికయ్, పిలాతు అన్నె, “కిచ్చొక? కిచ్చొ నేరిమ్ కెర అన్నె?” మెన పుసిలన్. గని జేవ్, అగ్గెచి కంబ ఒగ్గర్ విన్సుమ్ తెన్ “సిలువతె గల మొర్తి సిచ్చ కెరు!” మెన గట్టిజ కేకుల్ గలిల.

15 జాకయ్ పిలాతు, ప్రెజెల్క ముర్తి కెరుక మెన, జేవ్ సంగిలో బరబ్బుక ముల కెర, యేసుక కొర్దల్ తెన్ పెటవడ, ‘జోక సిలువతె గల్లు, జలె’ మెన సార్చు దిలన్.

* 15:1 15:1 రోమ్ దేనిమచి ప్రబతుమ్ జా దేనిమ్ ఆక్రమించువ కెర ఏలువ కెర్త తతికయ్, జా రోమ్ దేనిమచి ప్రబతుమ్చి నావ్ తెన్సి పిలాతు అదికారి జా అన్నె. † 15:9 15:9 యేసుక ‘యూదుల్చో రానో’ మెన సంగిలి, వెల్లెల పూజర్లు కోవుమ్ జవుల మెన జోవయింక కెంకడ్లి రిసా దస్సి మెలన్.

జమాన్లు యేసుక కొకడ్డిసి

16 తెదొడి అదికారితెవ జమాన్లు సుదల్ యేసుక ‘స్త్రోతియమ్’ మెంతి అదికారి గేర్చి తెడిచి గదితె కడ నా కెర, నయన్యుమ్ ఎత్తిజినక ఒత్త బుకారా కెర,

17 † ఊద రంగుచొ ఏక్ పాలుమ్ జోక గల దా, కంటక ఏక్ కిరీటుమ్ గంచ కెర, జోచి బోడితె గల దా కెర,

18 యూదుల్చొ రానొ, తుక జెయ్యి, జెయ్యి! మెన కొకడ కొకడ జోకర,

19 ఏక్ డండ తెన్ జోక బోడి పెట, జోక తుంక కెర, నెర్పు నేడ జోకర కొకడ్డ.

20 దస్సి దూసుప కెర్తి పిమ్మట్, జోక గల తిలి ఊద రంగుచొ పాలుమ్ కడ గెల కెర, జోచొ సొంత పాలుమ్ జోక అన్నె గల కెర, జోక సిలువతె గలుక మెన కడ నిల.

యేసుక సిలువతె టీవడ మార్గిసి

(మత్త 27:32-44; లూకా 23:26-39; యోహా 19:17-19)

21 వట్ట గెతె తతికయ్, కురేనియు దేసిమ్చొ సీమాను మెలో ఎక్కిలో పాసిచి బయలె తెంతో జా, ఒత్త పావెలన. జో, అలెక్కంత్తు రూపు మెల దొగులక అబ్బొసి జయెదె. జలె, జోకయ్ “యేసుచి సిలువ తుయ వయ” మెన జమాన్లు సుదల్ బలవంతుమ్ కెర్త.

22 జలె, యేసుక గొల్లొతా మెలి మెట్టయ్ కడ నిల. ‘గొల్లొతా’ మెలె, ‘గిడ్డి పొలికచి టాన్’. జలె, జోక ఒత్త కడ నా కెర,

23 నొప్పి తొక్కి కెర్తి ఓన్లు బెదయలి ద్రావ రస్సుమ్ యేసుక నయన్యుమ్ సుదల్ “పి” మెన దిలెకి, పియ నాయ్.

24 తెదొడ్ జోక ఏక్ వీసిలువతె గల టీవడ సిలువక బుయ్యె రోవ కెర, “జోచ పాలల్ వంటనుమ” మెన చిటి గల వంటన్.

25 జోక సిలువతె గలిలి సమయుమ్ కెర్తి జలి మెలె, పెందలె నొప్పు గంటల్ జలి.

26 “* యూదుల్చొ రానొ, ఈంజొ” మెన జోచి నేరిమ్ రెగిడ్డి దార్చిగండ యేసుచి బోడిచి ఉప్పిరి సిలువతె ఒడొవ దిల.

27 అన్నె, ఉజెతో పక్క ఎక్కిలోక, డెబ్రి పక్క ఎక్కిలోక, దొగుల చొర్లుక ఎక్కిల్ సిలువల్తె గలిల.

28 † జెవ్ తెన్ దేముడు పూర్ణమ్ రెగ్గయలి ఏక్ కోడు నెరవెర్పువ జలి.

“జో పాపుమ్ నెంజలిసా జలెకి, నేరిమ్ వయడ, జోక ‘పాపుమ్ కెర్లొసా’ మెన పాపుమ్ కెర్లన్ తెన్ బెదవ సిచ్చ కెర్ల.”

సిలువతె తతికయ్ జోక మాన్సుల్ కొకడ్డిసి

29 జా వాట్ గెతె తిల మాన్సుల్ యేసుక ఆన, ఆన బోడి దున్నెవ, “దేవులుమ్ నేడవ తిర్తతక అన్నె బందితొసా, తుయి.

30 జలె, తుక తూయి రచ్చించువ కెరన, జా సిలువ తెంతో ఉత్త!” మెన జోక కొకడ దూసువ కెర్ల.

31 దస్సి, వెల్లెల పూజర్లు, మోసి తెన్ దేముడు దిలి ఆగ్గుల్ సికడ్డన తెన్ బెద జా, ఎక్కిలో తెన్ ఎక్కిలో ఆన, ఆన “ఈంజొ వేర సుదల్క రచ్చించువ కెర్లన్, గని జోక జొయ్యి రచ్చించువ కెరనుక నెత్తె.

32 ఆమ్ దెక నంప కెర్తి రిసా, ఈంజొ క్రీస్తు, ఇస్రాయేలు ప్రెజెల్చొ రానొ జలె, సిలువ తెంతో ఉత్త జెవును!” మెన యేసుక దూసువ కెర్ల.

జో తెన్ బెదవ సిలువల్తె గలిల దొగుల చొర్లు కి జోక దూసువ కెర్ల.

యేసు మొర గెలిసి

(మత్త 27:45-56; లూకా 23:44-49; యోహా 19:28-30)

33 బార గంటల్ మెద్దెన్ జలి తెంతో, మొదొల్ కెర తిన్నె గంటల్ ఎద జా ఒండి దేసిమ్ అందర్ డంక తిలి.

† 15:17 15:17 ఎరన చి నీలిమ్ రంగుల్ బెదయలి, ఊద రంగు జయెదె. § 15:24 15:24 ‘సిలువ’ కిసి తయెదె మెలె, ఏక్ టీవ్తి చి ఏక్ అడ్డమ్ జతి దొన్నె డండల్ బెదవుల. సిచ్చ జతో మాన్సుక జా సిలువతె ఎంగ్లవ కెర, జోచ అత్తొ చట్టొ చంపా కెరవ, అత్తొచట్టొ మేకుల్ పెట సిలువ బుయ్యె టీవ రోవ కెర దస్సి ములుల. జో సిచ్చ జతోసా దస్సి ఒడొయ్ జా మొరెదె. రోమ్ దేసిమ్చి అలవాట్ తెన్ చి సిచ్చ, జా.

* 15:26 15:26 రోమ్ దేసిమ్చి నావ్ తెన్ ఏలువ కెర్లొ ఏలాతు ఈంజ దార్ గండ రెగ్గ తిలన; యూదుల్క కొకడ్డి రితి. యోహాను 19:19.

† 15:28 15:28 గ్రీకు బాన తెన్ ఈంజ మత్తెలి రెగిడ్డ సగుమ్ పుస్తకల్తె 28 నంబర్చి విడు తయె నాయ్.

34 జలె, తిన్ని గంటల్క యేసు, “ఏలీ, ఏలీ, లామా నబ్కానీ” మెన అరమయ్ బాస తెన్ “అంచో దేముడు ప్రబు, అంచో దేముడు ప్రబు, అంక కిచ్చొక ఆతు ముల దా అస్సినీ?” మెన గట్టిజ ఒర్న దిలన్.

35 జలె, ఒత్త టీవో జా తిలసతె నగుమ్జిన్ జా కోడు నూన కెర, “ఆదె, ఏలీయా పూర్గుమ్చొక బుకార్తయ్, కిచ్చొగె” మెల.

36 జోవయింతె ఎక్కిలో నిగ గెచ్చు, బూంజు రితి తిలి ఏక వస్తువ వెంటు, అమ్డి ద్రాచ రస్సుమతె బుడ్డవ కెర, ఏక రివ్వతె బంద, చాంప కెర, జోక “పి” మెన దా, “అల్లె, ఇన్నెక సిలువ తెంతో ఉత్తవుక మెన ఏలీయా తోడ జా ఉత్త జెయెదె గే, నాయ్ గే దెకుమ!” మెన కొంకడ్డన్.

37 జలె, యేసు గట్టిజ కేక గల దా, ప్రానుమ్ ముల దిలన్.

38 మొర గెలి గడియయ్, దేముడుచి గుడితె ఒడొవ తిలి †తెర, ఉప్పిర్ తెంతో ఎట్టో ఎద చిరి జా దొన్ని గండల్ జా గెలి.

39 తెడొడి, యేసుక మొక్కె రక తిలో పుంజెక్జిన్ జమాన్సుక వెల్లో యేసుక మొర గెలో మెన దెక కెర, “నిజుమి, ఈంజొ మాన్సు దేముడుచొ పుత్తుసి జా తిలో” మెన నంగిలన్.

40 యేసు మొర్లి పొది, నగుమ్జిన్ తేర్బోదల్ దూరి తెంతో దెకితె తిల. జోవయింతె నగుమ్జిన్ కొన్న మెలె, మగ్గలేనే పట్టుమ్చి మరియ మెలి ఎక్కి, దకిలో జలొ యాకోబు అన్నె యోసే మెల ఉబెడల్చి కిమరియ మెలి అయ్యసి, పడ్డొ సలోమే మెలి ఎక్కి తిల.

41 యేసు తిలి ప్రాంతుమ్తె బుల్తె తిలి పొది, ఈంజేవ్ త్రిగ్గ జోవయించి పట్టి గెచ్చు సవైచన కెర్తె తిల. యేసు యెరూసలేమ్తె ఉట్ట అయేలి పొది అన్నె ఒగ్గరజిన్ తేర్బోదల్ కి జా తిల. జో మొర్లి పొది, జేవ్ కి సిలువ తిలిన్తె రకితె తిల.

యేసుచి పీనుమ్ వెంటు గెలిసి

(మత్త 27:57-61; లూకా 23:50-56; యోహా 19:38-42)

42 యూదుల్క బక్తి కెర్తి సెలవ్ కడన్ల దీసి జయెదె, జలె జా దీసి సెలవ్ కడన్ల దీన్క అగ్గెచి దీసి.

43 జలె సాంజ్ జలి పొది, యూదులేచి వెల్లి సబతె బెదితో ‘చెంగిలో మాన్సు’ మెన ఎత్తిజిన్ జాన్తో, అరిమతయ్ గవ్వెచొ యోసేపు, దయిరిమ్ కెరన, పిలాతుతె గెచ్చు, “యేసుచి పీనుమ్ జోక దా” మెన వెంటు గెల్లి రిసా నజీలో. జో యోసేపు, ‘దేముడుచి రాజిమ్ ఈంజ లోకుమ్తె ఏలుప కెర్తె కాలుమ్ కెయెక జెయెదె.’ మెన, నిదానుమ్ తెన్ రకితె తిలో.

44 జలె, పిలాతు “జో తెద్ది బేగి మొర గెలన్ గె?” మెన అన్యానుమ్ జా, పుంజెక్జిన్ జమాన్సుక వెల్లోక బుకారా, “నిజుమి జో తెద్ది బేగి మొర గెచ్చు అన్నె గే?” మెన పుసిలన్.

45 “నిజుమి మొర గెచ్చు అన్నె” మెన జో పుంజెక్జిన్ జమాన్సుక వెల్లోచి అత్తి నూన, యోసేపు పీనుమ్ వెంటు గెలుక మెన పిలాతు సెలవ్ దిలన్.

46 జాకయ్, జో ఏలువచి బట్ట ఆన, యేసుచి పీనుమ్ సిలువ తెంతో ఉత్తవ దా, జో పాలుమ్ వంగ్రవ దా, రంగ్ని వత్తుర్ డెల్లి కెరయేలి బోరోచి మెన్సున్తె ఎంగ్రవ దా, జా బోరోచి గుమ్ముమె వెల్లో వత్తురు ఒన్కువ కెర డంకిలన్.

47 కేనే ఎంగ్రవ దా వెంటు గల గే, మగ్గలేనే పట్టుమ్చి మరియ మెలిసి కి, యోసే మెలోసాచి *మరియ మెలి అయ్యసి కి దెకిల.

16

యేసు జివ్ జా ఉట్ట అన్నె

(మత్త 28:1-8; లూకా 24:1-12; యోహా 20:1-10)

1 సెలవ్ కడన్ల దీసి కేడ గెలి రాతి, మగ్గలేనే పట్టుమ్చి మరియ, యాకోబుచి అయ్యసి మరియ, నలోమే తెన్, యేసుక గాంసుక మెన, చెంగిల్ వాసిన తేల్ గెనన్ల, చి

† 15:38 15:38 ఎక్కి ఎత్తిక వెల్లో పూజురి వెర్చెక్క ఎక్కి సుట్టు పెన అర్చితుమ్ దెతి గదిక అడ్డు కెర్తె తెర, ఈంజ. § 15:40 15:40 ఈంజ మరియ యేసుచి అయ్యసి జయెదె; మార్కు 6:3. * 15:47 15:47 ఈంజ మరియ యేసుచి అయ్యసి జయెదె; మార్కు 6:3.

- 2 జా* అయితర దీసి ఒగ్గర పెందలె ఉట్ట, బార్ జా, పొద్దు బార్ జలి నమయుమి జా మెన్సు పావ,
- 3 “మెన్సు డంపిల్ వత్తుర అమచి రిసా కో ఒన్కువ దెవుల గె?” మెన ఎక్కి తెన్ ఎక్కి† లట్టబై తిల.
- 4 ఇసి లట్టబ లట్టబ, ఉప్పిరి దెక, పత్తురు ఒన్కు జా అస్సె మెన దెకిల. జో పత్తుర ఒగ్గర వెల్లోచొ.
- 5 తెదొడి, మెన్సు గెచ్చు పెన, కిచ్చొ దెకిల మెలె, జా మెన్సు తెడిచి ఉజెతొ పక్క, చొక్కెల పాలల్ గలన తిలో ఉబెడొ రితొ దేముడుచి దూత వెన అస్సె. జోక దెక, ఆచారిమ్ జా వంబ్ర జల.
- 6 జేవ్ ఇసి జతికయ్, జో దేముడుచి దూత జోవయింక “పంబ్ర జా నాయ్. సిలువతె గల మొర తిలో నజరేతు గెప్పొచొ యేసుక తుమ్ చజితను. జో జీవ్ జా ఉట్ట అస్సె. జో ఇన్నె నాయ్. ఈందె జోక ఎంగ్డవ తిలి టాన్క అంకి గల.”
- 7 అస్సె, సిస్సుల్క, పేతురుక “తుమ్చి కంట అగ్గెతో, యేసు గలెలయతె ఉట్ట గెతయ్. తుమ్క జో అగ్గె సంగిలి రితి, జోక ఒత్త దెకితె మెన తుమ్ గెచ్చు సంగ” మెన దూత సంగిలన్.
- 8 జేవ్ తేరబొదల్ బమ్మ తెన్ మెన్సు తెంతొ బార్ జా, సిస్సుల్క జా కబుర్ సంగుక ఉట్ట నిగ గెల. గట్టిజ ఆచారిమ్ జా, అద్దుర జా గెచ్చు తిల, చి బియె: కెర, సిస్సుల్క పిట్టవ, కక్క కి కిచ్చొ సంగితి నాయ్.

మగ్గల పట్టుమ్చి మరియక యేసు డీసిలిసి

- 9 యేసు ‡ అయితర దీసి జీవ్ జా ఉట్ట, జా దీసి పెందలె మగ్గల పట్టుమ్చి మరియక తొలితో డీసిలన్. ఒగ్గర అగ్గె, జాచిక దెర్ల బూతల్క యేసు ఉడడ గెల తిలన్. జా తేరబొద ఈంజయి.
- 10 జలె, యేసు జాక డీస్తికయ్, జా జో తెన్ బుల్లె తిల సిస్సుల్క జివ్వి అస్సె మెన నేన కెర దుకుమ్ జా ఏడ్తె అస్సి, మెన జా జాన కెర, జా మాన్సు జోవయింతె గెచ్చు కెర, “జీవ్ జా అస్సె. ఆవ్ సొంత దెక అస్సి” మెన సొచి సంగిలి.
- 11 గని జో జీవ్ జలిసి జా దెకిలిసి నూన్లె కి, తెదొడి నంప కెర్తి నాయ్.
- 12 ఒత్త తెంతొ, బయిలుచి వట్టె దొగుల సిస్సుల్ ఇండ గెతె తతికయ్, యేసు, జోచి పొలిక ఇదిల్ వేర మార్పువ జా తా, జోవయింక డీసిలన్.
- 13 తెదొడి జేవ్ దొగుల అన్నె బుల గెచ్చు, అన్నె సిస్సుల్క సంగిల. గని జేవ్ అన్నె సిస్సుల్ తెదొడి నంప కెర్తి నాయ్.

ఎగరజన్ సిస్సుల్క యేసు డీసిలిసి (మత్త 28:16-20; లూకా 24:36-49; యోహా 20:19-23; బారి కమ్మొ 1:6-8)

- 14 జాచి పిమ్మట్, ఎగరజన్ సిస్సుల్ అన్నిమ్ కంక వెన తిలి పొది, యేసు జోవయింక డీసిలన్, చి గోల కెర్లన్. జో జీవ్ జలి పిమ్మట్ జోక దెక తిలన, జోక సొచి సంగ తిలి కి, జేవ్ రాడ్ జీవ్ తెన్ తిలి రితి అన్మానుమ్ జా నంప నే కెర్లి రిసా గోల కెర్లన్.
- 15 తెదొడి యేసు సిస్సుల్క, “తుమ్ దేసిమిలు ఎత్తితె గెచ్చు, లోకుమ్చ ఎత్తిక అంచి రిసా సుబుమ్ కబుర్ బొదన కెర.
- 16 కో నంపజయి గెచ్చులచి బాప్తిసుమ్ నజనుల గే, జేవ్ రచ్చొంచువ జవుల. గని కో నంప నే జవుల గే, మొర గెలె, సిచ్చతె గెచ్చుల.
- 17 “అంక నంపజతన తెన్ అంచి అదికారుమ్ అస్సె మెన కీన గుర్తులు తయెదె మెలె, అంచి నావ్ తెన్ బూతల్క ఉడడ గెలుల, జేవ్ అగ్గె నే సికిల బాసల్ తెన్ లట్టబుల,
- 18 అయివొక ఉక్త దెర్లె జవున్, మొర్తిసి పిల్లె జవున్, జోవయింక ప్రమాదుమ్ జయి నాయ్. అస్సె, జొర్జొ జబ్బుల్ తెన్ తిల మాన్సుల్క అంచి నావ్ తెన్ బొడి చడిలె, వెంగిల్ జవుల.”
- 19 ప్రబు జలొ యేసు, జలె, సిస్సుల్ తెన్ లట్టబ బొదన కెర కేడయేలి ఇదిల్ పట్టి, జోవయించి మొక్కె ఆగానుమతె వెగ, పరలోకుమతె దేముడు అబ్బొన్చి ఉజెతో పక్కయ్ వెసిలన్.

* 16:2 16:2 సత్తు పొదుల్తె అగేచి దీసి † 16:3 16:3 ఎక్కిల్ తెన్ ఎక్కిల్ ‡ 16:9 16:9 సత్తు పొదుల్తె అగేచి దీసి

20 అన్నా, జో సంగిలి రితి, సిస్సుల్ కేనె ఒత్త గెచ్చ బోదన కెరై తతికయ్, ప్రబు జోవయింక తోడ్ తా జేవ్ సిస్సుల్చి అత్తి వెల్లో కమొ కెరవ కెరవ, జేవ్ సంగిలి చి సత్తిమక రుజ్జు దెకయ్లన్.

§ 16:20 16:20 మార్కుచి అత్తి రెగిడ్లి ఈంజ పుస్తకుమతె, ఈంజ అద్యయిమ్చి నొప్పు నంబర్ తెంతొచ కొడొ ముల, ఆకర్చి కోడు కొట్టు జవున్ మెలి రితి ఇదిలిసి కోడు కెయగె గలిల. గని దూతల్చి అత్తి సంగిలి కబుర్ ఎత్తి పేతురుక చి జోవయింతెన్ తిల సిస్సుల్క జేవ్ తేర్బోదల్ సంగిల. ఒత్త తెంతొ, నుబుమ్ కబుర్ నూనయ్తి రిసా యేసు జేవ్ సిస్సుల్క చెత్తర్ దిక్కుల్తె తెద్రవ దిలన్. యేసు తెన్ రచ్చున వాల్ దొర్పు జలి, చి పరలోకుమచి రాజిమతె బెద కెయక తెయక ఒత్త చెంగిల్ తంక జయెదె చి నుబుమ్ కబుర్, గెద. జా నుబుమ్ కబుర్ పరలోకుమచి సత్తిమ్ తెన్ అస్సె. కో పాడ్ కెరుక నెత్తిర్, తెద్దిలి.

లూకా సుబుమ్ కబుర్ లూకా రెగిడ్లి సుబుమ్ కబుర్

1 యేసుక్రీస్తు ఈంజ లోకుమ్తె అయ్లినీ, జో ఇన్నె తిలి పొది అమ్చితె ఎత్తి. జర్గు కెర్ల కము ఎత్తి, మొదోల్ తెంతో * సగుమ్జిన, సొంత దెక సాచుల్ జా, జా ఎత్తిచి రిసాచి సుబుమ్ కబుర్ నూనయ్త సేవ కెర్తన జల.

2 జలె, జో యేసుక్రీస్తు అయ్లినీ తెన్ † నెరవెర్చువ జలిసి ఎత్తిచి రిసా జేవ్ సాచుల్ అమ్క జాన కెర అస్తి, అమ్చి అత్తి జా సుబుమ్ కబుర్ దా అస్తి, చి యేసు తెన్ జర్గు జలిసి ఎత్తిచి మత్తెలితెచ దెదవ ఒగ్గరజిన రెగ్ల అస్తి.

3-4 జలె, ఓ వెల్లో దెయొపిలా, ఈంజ ఎత్తి. నూన ఆవ్ సరిగా వరిచ్చు కెర అస్తి, చి తుక 'జో నూన్లినచి రిసా సత్తిమ్ చినున్' మెనయ్, తుచి రిసా ఈంజ ఎత్తి. వర్గు తెన్ ఆవ్ రెగుడుక అంక చెంగిల్ డీస్తయ్, చి ఇన్నె రెగ్లితసి.

క్రీస్తు రిసా సాట్టు కెర్తె యోహాను జెర్నెదె

5 హేరోదు రాసో ‡ యూదుల్చి ఒండి దేసిమి ఏలువ కెర్తె తిలి పొది, § దేముడుచి గుడితె జోచి సేవ కెర్తె పూజరి జలో జెకర్యా మెలో ఎక్కిలో తిలన్. పూజర్లుతెచో అబీయా పూర్ణుమ్చోచి * తెగచో జో. జోచి తేర్చి, † అహారోసు పూర్ణుమ్చో జలో యూదుల్చో తోలితోచో ఎత్తిక వెల్లో పూజరిచి సెకుమ్తెచి తేరబోద జా తిలి. జాచి నావ్ ఎలీనబెతు.

6 జేవ్ దొగుతెర దేముడుచి కోడు తెన్ సత్తిమ్ ఇండితె తిల. నే పిట్టయ్తె నెంతె దేముడు దిల ఆగ్గుల్ ఎత్తి తెన్ నాయిమ్ ఇండితె తిల.

7 గని ఎలీనబెతు గొడ్డు జా తిలి రిసా జోవయింక బోదల్ నాయ్. జేవ్ ఒగ్గర వెర్చుల్ వయసుచ వంత్తొ మంతిరి జా తిల.

8 జెకర్యా తిలి తెగచ పూజర్లు దేముడుచి గుడితె సేవ కెర్తె కాలమ్ జా తిలి, చి జెకర్యా దేముడుచి జా సేవ కెర్తె తిలి పొది,

9 దేముడుచ పూజర్లుతె కీసి కెర్తె తిలి గే, దస్సి జొయ్యి జో ప్రబు జలో దేముడుచి గుడితెచి దూపుమ్ డయ్యక మెన చీట్లు గల్క జోచి నావ్ ‡ సిడ్డి.

10 దూపుమ్ డయలి పొది ప్రెజల్ ఒండిజీన్ దేముడుచి గుడిచి కోటచి తెడి బయిలె ప్రార్దన కెర్తె తిల.

11 తెదొడి దేముడు ప్రబుచో దూత ఎక్కిలో జా దూపుమ్ డయతి టాన్చి ఉజెతో పక్క టీద డీసిలన్.

12 జెకర్యా జో దూతక దెక కెర బేగి బమ్మ జా బియె గెలన్,

13 గని దూత జోక, "జెకర్యా, తుయి బి నాయ్. తుయి కెర్తె ప్రార్దన దేముడు నూన అస్సె. చి తేర్చి ఎలీనబెతు తుక పుత్తు పాయ దెయెదె. జోక 'యోహాను' మెన నావ్ తిస్సె.

14 జో బోద జెర్మిలె తుయి సర్దనంతోసుమ్ జస్సె. అన్నె ఒగ్గరజినీ కి జా సర్ద జవుల.

15 పడ్డొ, ప్రబుచి కామ్ కెర్తనతె జోక 'వెల్లో' మెన ప్రబు దెకెదె. అంబడ్డి ద్రాచ రన్నుమ్ కి, కిచ్చొ మచ్చితి సూరు కి

* 1:1 1:1 జోచ బారజన్ బారికుల్ చి అన్నె ఒగ్గరజన్. † 1:2 1:2 'నెరవెర్చువ జలిసి' మెలి కోడు కిచ్చొక ఒత్తె అస్సె మెలె. పూర్ణుమ్ తెంతో 'దొర్లు జలో రచ్చొనుచువ కెర్తెనా జతో క్రీస్తుక తుమ్తె తెర్తయిందె, ఇసి దస్సి కెరెదె' మెన ఎత్తి. అదికారుమ్ తిలో దేముడు నంగ తిలన్, చి దేముడుచి కోడొతె రెగ్ల తిలన్. చి యేసు అయ్లినీ, బులిసి, మెర్లినీ, అన్నె జలిసి చి వరలోకుమ్తె అన్నె వెగ గెలిసి తెన్ జా ఎత్తి. నెరవెర్చువ జలి. ‡ 1:5 1:5 నెంజలి 'ఒండి యూదయ దేసిమి' మెనుక దెయెదె, రోమ్ దేసిమిచి ప్రబుతుమ్చి నావ్ తెన్ జో హేరోదు ఏలువ కెర్తె తిలన్. 4:44 చి ఎట్టొ కోడు దెక. § 1:5 1:5 ఎత్తి. అదికారుమ్ తిలో దేముడుక ఈంజ లోకుమ్తె ఎత్తి. దేముడుచి గుడి తయెదె. కేన మెలి; యెరూసలేమ్తె, యూదుల్చి వెల్లి వట్టుమ్తె. యెరూసలేమ్ యూదయ ప్రదేసిమి తిలి. * 1:5 1:5 పూర్ణుమ్ జా అలవాట్ దిలి తెంతో, యూదుల్చ పూజర్లుతె చిన్నకె చెత్తరజన్ తిల. జోవయింతె ఏక జట్టుచో వెల్లో మాన్సు అబీయా. † 1:5 1:5 అహారోసు మాన్ పూర్ణుమ్చో అస్సె. ‡ 1:9 1:9 కేన్ పూజరిచి జిచితుమ్తె ఎత్తి. సుట్టుచి సేవతె జో జా దూపుమ్ డయ్యక దెయెదె. జేక జా నమయమ్ జెకర్యా ఒగ్గర ముక్కిమ్చి.

జో పియె నాయ్. చి జో దేముడుచి సుద్ది తిలి ఆత్మ
 జోచి పెట్టి బెర తయెదె; అయ్యునచి పెట్టి జో తిలి మొదోల్ తెంతో కి.
 16 ప్రబు జలో జో జోక దేముడుక జేవ్ అన్నె సత్తిమ్ కెరుక దెర్తి రితి
 జో యోహాను ఒగ్గరజన్ ఇస్రాయేలుల్క దేముడుచి పక్క పన్నయెదె,
 17 చి ఏలీయా పూర్ణుమ్చొక తిలి ఆత్మనెక్కి,
 ప్రబుచ కబుర్లు సంగితి ఆత్మనెక్కి, యోహానుచి పెట్టి తయెదె చి, ప్రబుచి పురె జో గెచ్చెదె.
 పురె గెచ్చు

అబ్బుదింసి జోపయించ బోదల్క అన్నె చెంగిల్ దెకిత్ రితి
 జోపయింక పసులవెదె, అన్నె
 బుద్ది సుదల్చి గ్యూనుమ్ జేవ్ నూన్తి రితి
 దేముడుచి నీతి కోడు తెన్
 అగ్గె నెనిలసక పసులవ దెయెదె.
 కిచ్చొక మెలె, ప్రబుచి సేవ జేవ్ కెర్తి రితి మాన్సుల్క తెయార్ కెర్తి రిసాయి”
 మెన దూత జెకర్యాక సంగిలన్.

18 గని, “ఈంజ కోడుచి సత్తిమ్క అంక కిచ్చొ రుజ్జు? ఆవ్ మంత్రో మాన్సు, చి అంచి తెర్ని ఒగ్గర్
 వెర్చుల్చి మంతిరి” మెన జెకర్యా అన్యూనుమ్ సంగిలన్.

19 దూత జోక కిచ్చొ జబాబ్ దిలన్ మెలె, “ఎత్తి అదికారుమ్ తిలో దేముడుచి పురెత్తో టీవ్తో జోచి
 సేవ కెర్తెనా ఆవ్. అంచి నావ్ గబ్రియేలు. తుక ఈంజ కోడు ఆవ్ సంగుక మెన, తుక ఈంజ సర్వది కబుర్
 అనుక మెన, దేముడు అంక తెర్తయేలో.”

20 ఈందె, నూను, ఆవ్ సంగిల కొడో తుయి నంప కెర్తది నాయ్ చి రిసా, జా ఎత్తి జర్లు జతి ఎద తుయి
 గుల్లో జా తన్నె. జేవ్ కొడో కచితుమ్ దేముడు దిలి కాలుమ్కయ్ ఎత్తి జర్లు జయెదె” మెన దూత జబాబ్
 దిలన్.

21 జలె, మదెని, జెకర్యా అన్నె బార్ జతీన్క పైజల్ రకితె తిల. దేవులుమ్తె జో ఆల్నిమ్ తా గెలి రిసా
 ఆచారిమ్ జలె.

22 జలె, జో బార్ జలె, జోపయింతెన్ లట్టుబుక నెత్తిర్లి రిసా, ‘దేముడుచి గుడితె కిచ్చొ జవున్ డీసన్
 సేడ్డిన్ దెకిలన్’ మెన చినిల, అన్నె, గుల్లో జా తా అత్తో తెన్ జోపయింక సయనల్ కెర్తన్.

23 అన్నె, జోచి సేవచ దీసల్ బెర జోచి సేవ కెర కేడవ కెర, గెరి ఉట్టు గెలన్.

24 సగుమ్ దీసల్ గెలి పడ్డె, జోచి తేర్ని ఎలీనబెతు అంగి జలి, అన్నె పావ్ జొన్నొ ఎద లుంకిల్ రితి జా
 గెరి తా: గెలి.

25 “ఆవ్ మంతిరి జా అయేలి పొది ప్రబు అంక చెంగిల్ దెక చెంగిల్ వరుమ్ దా అన్నె. అంక ‘గొడ్డు జా
 అన్నె’ మెన మాన్సుల్ అగ్గె ఆన్తె తిల, గని అప్పె అంగి జా అన్నెచి మరియోద అయేలి. దేముడుచి దయక
 అంక మరియోద దిలో. అంచి అవమానుమ్ కడ గెలో.” మెన ఎలీనబెతు సర్వ తెన్ తిలి.

యేసుచి జెర్చున్ రిసా దూత మరియక సంగిలిసి

26 ఎలీనబెతు అంగి జా సావ్యు జొన్నొ జతికయ్, దేముడు జో గబ్రియేలు మెలో దూతక గలిలయ
 ప్రాంతుమ్చి నజరేతు మెలి గవ్వొ కబుర్ తెర్తయలన్.

27 యూదుల్చొ * దావీదు పూర్ణుమ్చొచి సెకుమ్చొ యోసేపు మెలో ఎక్కిలోక పెండ్లి కెరుక మెన
 అయ్యునిసి సంగ తిలి విడ్డి బోదతె తెర్తయలన్. జా విడ్డి బోదచి నావ్ మరియ.

28 జలె, జో దూత జాతె జా కెర, “ఓ మరియ, తుక జోబర, తుయి సంతోసుమ్ జా. ఎత్తి అదికారుమ్
 తిలో దేముడు తుక చెంగిల్ దెక అన్నె. తుక చెంగిల్ వరుమ్ దెతయ్. జో తుక తోడు అన్నె” మెన సంగిలన్.

29 గని జా నాడి ఈంజ కోడు నూన బలె ఆచారిమ్ జా ఇదిల్ బాద సేడ కిచ్చొ కెరుక గే నేన కెర, “ఈంజ
 కోడుచి అర్దుమ్ కిచ్చొ?” మెన ఉచరన బియ: గెలి.

§ 1:23 1:23 సత్తర్క చి సేవ, బెర్తి, కెర తయెదె. * 1:27 1:27 పూర్ణుమ్ పొది జేవ్ యూదుల్క దావీదు ముక్కిమ్చొ రానొ జా తిలన్.

30 “మరియ, తుయి బి నాయ్. కిచ్చొక మెలె, ఎత్తి అదికారుమ్ తిలో దేముడు తుక దయ దెక అస్సె.

31 ఈందె, నూను, తుయి అంగి జస్తె. పుత్తు పాయితె, చి జో బోదక ‘యేసు’ మెన నాన్ తిస్తె.

32 జో ముక్కిమ్ జయెదె, చి
‘ఎత్తిచి ఉప్పిరి తిలోసాచొ పుత్తుసి’ మెన

జోచి రిసా సంగుల. అస్సె,
దావీదు రాసొచి నెకుమతె జెర్పెదె,
చి జో ఒగ్గర్ పూర్ము తిలో ముచ్చొతాతోన్ జలో రిసా †దావీదుచి
సింగాసనుమతె జో వెసయెదె
జోచి రాజమక జో ఏలువ కెర్తి రితి
ప్రబు జలో దేముడు దెయెదె.

33 †యాకోబు పూర్ముచొచి సేకుమచచి ఉప్పిరి జో
కెయెక తెయెక ఏలువ కెరెదె.
జోచి రాజమ కెయెక కి అంతుమ్ జయె నాయ్”
మెన మరియక జో దూత సంగిలన్.

34 దూత దస్సి సంగితికయ్, మరియ జోక, “ఈంజ కిసి అంక జర్గు జయెదె? ఆవ్ మున్నక నే గెలి
మాస్సు, గెద” మెన సంగిలన్.

35 దూత జాక,
దేముడుచి సుద్ది తిలి ఆత్మసెక్తి
తుచి పెట్టి జెయెదె.
జో ఎత్తిచి ఉప్పిరి తిలోసాచి ఆత్మసెక్తి
తుచి సుట్టునంత జోచి నీడ సెక్తి డంక తయెదె.

జాచి రిసా, తుచి పెట్టి జెర్కుక తిలో బోదక
“పూర్తి దేముడుచి సుద్ది తిలోసా,
జోచొ సొంత పుత్తుసి”
మెనుల.

36 అస్సె, “ఈందె, అన్నెక్ కోడు కి నూను. తుమచి సీమాస్సు జతి ఎలీసబెతు కి మంతిరి జలి పొది అంగి
జా అస్సె, చి పుత్తు పాయెదె. జా అగ్గె గొడ్డు జా తిలిసి అంగి జా అప్పె సొప్పు జొన్నొ జా అస్సె.

37 జలె, *కిచ్చొచి రిసా కి ‘జో జర్గు కెరుక నెత్తె’ మెన అమచొ దేముడుచి రిసా సంగుక నెంజె, గెద. జో ఎత్తి
తెరె” మెన దూత సంగిలన్. సంగితికయ్,

38 మరియ, “ఆవ్, ప్రబుచి సేవ కెర్తొ నుది, తుయి సంగిలిసి అంక జర్గు జవున్” మెన సంగిలి చి దూత
జాచి తెంతో బార్ జా ఉట్టె గెలన్.

మరియ ఎలీసబెతుకె గోత్ గెలిసి

39 జలె, ఒగ్గర్ దీసల్ నే గెతె అగ్గె ఏక్ దీసి, మరియ బార్ జా, బే బేగి గెచ్చు యూదయ ప్రదేసిమచి డొంగుర్
దేసిమ్ పక్కచి ఏక్ గెవ్వి పావెలన్.

40 జెకర్యాచి గెరి గెచ్చు ఎలీసబెతుక దస్సుల్ జా జొకర్లన్.

41 మరియ జొకర్లె కోడు ఎలీసబెతు నూన్ల బేగి, జాచి పెట్టి తిలో బోద డేవెలన్. తెదొడి జాచి పెట్టి
దేముడుచి సుద్ది తిలి ఆత్మ బెర్తికయ్,

42 జా ఆత్మసెక్తిక కిచ్చొ మెన గట్టిజ అవాడ్ తెన్ ఎలీసబెతు కేక్ గెలిలన్ మెలె,

† 1:32 1:32 యూదులేక ఒగ్గర్ పూర్ము సొంత రానల్ తిల, చి జేవ్ రానల్తె దావీదు ముక్కిమ్చొ జలో. “తుచి నెకుమతె దొర్కు
జలో రచ్చొంపవ కెర్తొసాక జెర్పెయెందె” మెన జో దావీదుక దేముడు సంగ తిలన్. దావీదుచి నెకుమతె జో జెర్పె ఏలువ కెరుక తిలిన్చి రిసా
‘మాములుమ్ ఈంజయ్ లోకుమచి అప్పెచి రగుమచి రాజమతె ఏలువ కెరెదె’ మెన యూదుల్ ఉచర్తె తిల, గని ఆత్మయ రగుమచి రాజమచి
అర్దుమ్ ఇన్నె ముక్కిమ్ తయెదె. ఆకర్కయ్, దేముడు ఈంజ లోకుమక మార్పువ కెర్తి పర్తికయ్, జోచి రాజమ దీసెదె. † 1:33 1:33
యాకోబు పూర్ముచొచి యేసు జెర్పెలి వంసుమచొ జయెదె జోక ‘ఇస్రాయేలు’ మెన అన్నెక్ నాన్ తయెదె, చి జోచి నెకుమచక ‘ఇస్రాయేలుల’
మెన కి యూదుల్ సంగుల. § 1:36 1:36 అప్పసి జయెదె గే, అత్తన్ జయెదె గే, పావన్ జయెదె గే, కిచ్చొ జయెదె గే నేసితి. * 1:37
1:37 నెంజెలి, జో సంగిలి కోడుక ‘జో జర్గు కెరుక నెత్తె’

“తేరీబోదల్ ఎత్తిచి కంట
 దేముడు తుకయ్ దీవెన దిలన్ అస్సె, చి
 తుచి పెట్టి జెర్తితో బోద చెంగిల్దో!
 43 అంచో ప్రబుక పాయితి అయ్యసి అంచితె జెంక
 దేముడు కిచ్చొక వరుమ్ దా అస్సె?
 44 ఈందె,
 తుయి జోకర్లి కోడు అంచి కంగల్ నూన్లి బేగి
 అంచి పెట్టి తిలో బోద సర్దక
 అంచి పేట్ తెడి డేవిలన్.
 45 ఒహో, దేముడు
 జాక సంగ తెద్రయలి కోడుక
 ‘నిజామి జర్లు జయెదె’ మెన
 సంప కెర్లి తేరీబోదక చెంగిలి!”
 మెన ఎలిసబెతు కేక్ గల్లికయ్,
 46 మరియ జా ఇసి మెలి.

దేముడుచి గవురుమ్ మరియ గాయిలిసి
 అంచి జీవు ప్రబు జలో దేముడుచి గవురుమ్ కెర్తసి.
 47 అంచో రచ్చించుప కెర్తొసా జలో దేముడు జర్లు కెర్లిన్చి రిసా
 అంచి అత్తతె సర్ద జతసి.
 48 ఆవ్ జోచి సేప కెర్తొ సుది ఒగ్గర్ దాకు జలెకి,
 అంక జో చెంగిల్ దెక అస్సె.
 మెలె, ఈందె, “జాక చెంగిలి” మెన
 అప్పె తెంతో యుగల్చి ఉప్పిరి యుగల్చ మాస్సుల్
 అంచి రిసా దీవెన పాయిలిసి మెన సంగుల.
 49 ఒండి సెక్తి తిలో దేముడు జోచి దయక
 అంక గొప్పు కామ్ కెర అస్సె,
 జోచి నావ్ పరలోకుమ్చి సుద్ది తిలిసి.
 జో సుద్ది తిలిన్క జోచి నావ్ కెద్ది గవురుమ్ కెరుక జయెదె!
 50 యుగుమ్చి ఉప్పిరి యుగుమ్చ జోక బిత మాస్సుల్క
 జో కన్యారుమ్ దెకితె తయెదె.
 51 †జో అప్పె జర్లు కెర్లిన్ తెన్ కచితుమ్
 జోచి అతుచి ఒగ్గర్ సెక్తి కమొ కెర కెర,
 జోచి సెక్తి దెకవ అస్సె.
 వెల్లో మెనన్లసచి పెట్టిచ ఆలోసుమ్లు పాడ్ కెర,
 జోవయింక చెదుర్లు కెర అస్సె,
 52 ఏలువ కెర్తనక జోవయించ సిజాసనల్ తెంతో
 సేడవ గెల కెర,
 ఏలువ నెంజిల రిత మాస్సుల్క
 జో విలువ దా అస్సె.
 53 చూ జలసక చెంగిల్ అన్నిమ్ దొర్కు కెర అస్సె, చి
 సామ్మార్లుక కిచ్చొ నే దెతె
 రితి తెద్రవ దా అస్సె.

† 1:51 1:51 51-53 ఈజేవ్ కొడొ ముక్కిమ్క జర్లు జంక తిలిన్చి రిసాచ కొడొ జవుల, గని జా ఎత్తిక ‘కచితుమ్ జర్లు జయెదె’ మెలి ఎత్తి అదికారుమ్ తిలో దేముడు జోచి సెక్తిక దిలి దయిరిమ్కయ్ జా ఎత్తిక అప్పె కి జర్లు జలి రితి సంగితయ్.

54-55 అమచ పూర్ణులక, ముక్కిమక అబ్రాహామ్ పూర్ణుమ్చొక,
 “తుక, చి యుగుమ్చి ఉప్పిరి యుగుమ్చ తుచి సంతానుమ్ జతనక
 తోడు తయిందె” మెన
 జో ప్రమానుమ్ సంగిలన్, గెద,
 జలె, జా రచ్చనచి రిసాచి ప్రమానుమ్చి
 జోవయించి కన్కారుమ్ నే పచ్చితె.

56 మరియు ఎలినబెతు తెన్ తిన్ని జోన్నొ తా కెర గెరి అన్నె ఉట్ట గెలి.

57 జలె, ఎలినబెతుచి కంట్లు పావ అయ్లి, చి మున్నుబోద జెర్మిలన్.

58 జెర్మితికయ్, దేముడు జాచి ఉప్పిరి కన్కారుమ్ జా అన్నె మెన, జేవచి గేర పాసిచ గెరల్చ
 మాన్సుల్చి జేవచ అన్నెబావో చి బందుగులు ఎత్తిజన్ నూన కెర, జేవ తెన్ ఒగ్గర స్త్రసంతోనుమ్ జలె.

59 జలె, బోద జెర్మ అట్టు పొదుల్ జతికయ్, యూదుడు కెర్తి సున్నుతి జో బోదక కెరుక చి, జోక నావ్ తింక
 మెన ఎత్తిజన్ బెద అయిల. ‘జెకర్యా’ మెన అబ్బోనచి నావ్ జో బోదక తిల.

60 గని అయ్యసి కిచ్చొ మెలి మెలి, “పోన. జోక † ‘యోహాను’ మెన నావ్ తింక అన్నె” మెలన్.

61 దస్సి మెంతికయ్, “జేవ్ తుమ్చ మాన్సుల్తె కక్కయ్ జా నావ్ నాయ్. జా నావ్ కిసి తితె!” మెన
 ఒత్త బెర్తస సంగ కెర.

62 “బోదక కిచ్చొ నావ్ తింక?” మెలి రితి అబ్బోనక సయన్ కెర్.

63 రెగిడ్డి ఏక బల్ల జో నజన, “జోచి నావ్ యోహాను” మెన జా బల్లయ్ రెగ్గ దెతికయ్, జేవ్ ఎత్తిజన్
 ఆచారిమ్ జలె.

64 జా నావ్ జెకర్యా రెగ్గ దెకయ్లి బేగి, జోక చోడి పుట్టి చి జిబు బులిలి, లట్టుబుక దెర తోలితో దేముడుచి
 గప్పురుమ్ సంగిలన్.

65 జలె, జా జర్గు జలిన్చి ఎత్తిచి రిసా జా పల్లెల్చ మాన్సుల్ ఎత్తిజన్ బియ్యం గెల, చి జర్గు జలిన్చి ఎత్తిచి
 రిసా, జా యూదయ ప్రదేసిమ్చి డొంగుర దేసిమ్చ మాన్సుల్ గాచ్చొ ఎత్తితె లట్టుబై తిల.

66 అన్నె, జర్గు జలిన్చి రిసాచ కొడొ సూన్లన ఎత్తిజన్ మెన్ను చెంగిల్ ఉచర, ‘జో నాడు దేముడుచి
 అత్తి అన్నె. జోయ్యి జోక తోడు’ మెన చిన కెర, “ఈంజో బోద వడ్డిలె కిచ్చొ కామ్ కెరెదె, కిసాచొ జయెదె?”
 మెన ఉచరై తిల.

67 జలె, యోహానుక నావ్ తిలి గడియ దేముడుచి సుద్ది తిలి అత్తి జెకర్యాచి పెట్టి బెర, దేముడు దెతి
 రచ్చన తెదోడి తెంతో ఎత్తి జర్గు జంక దెరుక తిలిన్చి రిసా చోడి పుట్టవ జెకర్యా ఇసి మెలన్;

68 “ప్రబు జలో అమచ ఇస్రాయేలులచొ

దేముడుక జోబర!

కిచ్చొక మెలి,

జోవయ్ ప్రెజల్ జల అమచ ఇస్రాయేలులక

అన్నె గెనన రచ్చించువ కెర్తి రిసా

జో ఉత్త జా అన్నె.

69 జోచొ సేవ కెర్తొసా జలో దావీదు పూర్ణుమ్చొచి సెకుమ్తె

సెక్తి తిలో రచ్చించువ కెర్తొసాక జో జెర్మవ అన్నె;

† 1:60 1:60 యోహాను మెలి నావ్చి అర్దుమ్ కిచ్చొ మెలి, ‘ఎత్తి అదికారుమ్ తిలో దేముడు ప్రబు దయ కెర్తొసా జయెదె’ మెలి అర్దుమ్
 తయెదె. § 1:68 1:68 ఎత్తి అదికారుమ్ తిలో దేముడు కక్క డబ్బుల్ గల్ల దెంక నాయ్, గని కేన్ జవున్ మాన్సు గొతిమాన్సు జా తిలి,
 కో జవున్ డబ్బుల్ దా, జో గొతిమాన్సుక విడ్డల్ కెరప్పక జయెదె. దస్సి, ‘ఎత్తి అదికారుమ్ తిలో దేముడు రచ్చించువ కెర్తొసాక తెర్తవ అమక
 అమచ బాదల్ తెంతో, అమక ఆక్రమించువ కెర్తవ తెంతో విడ్డల్ కెరెదె’ మెన యూదుల్ ఆన జా నంవ తెన్ అన్నె. ‘క్రీస్తు జలో రచ్చించువ
 కెర్తొసాక తెర్తయిందె’ మెన ఎత్తి అదికారుమ్ తిలో దేముడు నిజమి పూర్ణుమ్ తెంతో ప్రమానుమ్ సంగ తిలో, గని ‘జా రచ్చన ముక్కిమక
 అమ్ కెర్తొ పావలచి సిచ్చ తెంతో చి రచ్చన’ మెన అర్దుమ్ కెరంతి నాయ్. ఆకర్కయ్, ఉగుమ్ జో మార్పువ కెర్తి పొదికయ్, గర్చి ఎత్తి బాదల్
 ఎత్తి పూర్తి గెచ్చవ గెల కెర, నొవ ఆగానుమ్ నొవ బూలోకుమ్ జతి రితి ఎత్తి అదికారుమ్ తిలో దేముడు మార్పువ కెరెదె. జలె, పాపుమ్
 గెచ్చయ్తి రిసా, ఆకర్క గర్చి ఎత్తి బాదల్ ఎత్తి గెచ్చయ్తి రిసా, ఎత్తి అదికారుమ్ తిలో దేముడు దిలిసి కిచ్చొ మెలి, యేను అర్చితుమ్
 జలిన్ తెన్ చి జో సువడ్డి లోయి. జో అన్నె గెనంతిసి, జలె, ఈంజ ఎత్తిక టాలి జయెదె.

అమ్మక రచ్చించుప కెర్ను మెన.

70 దస్సి కెరిందె, మెన

దేముడుచ కబుర్లు సంగిల పూర్గుల్చి చోడి పుట్టవ
సంగిలన్, గెడ.

71 అమ్మక విరోదుమ్ జల మాన్సుల్ తెంతో

అమ్మక విరోదుమ్ కెర్తస ఎత్తిజిన్చి అత్తి తెంతో

అమ్మక రచ్చించుప కెరుక మెన

జో సంగ అస్సె.

72-73 ఒగ్గర్ అగ్గచ అమ్చ పూర్గుల్క ప్రమానుమ్ సంగిలి కోడు

జర్గు కెరుకయ్ మెన,

జేవ్ పూర్గుల్తె అమ్చో అబ్రాహామ్ పూర్గుమ్చొక ఒట్టు గలన

దేముడు సంగిలి నిజామ్ కోడు

నే పచ్చితె జర్గు కెరుకయ్ మెన

జో ఒప్పున అస్సె, జర్గు కెరెదె!

74-75 ప్రమానుమ్ జర్గు కెర్తినె అమ్మక జో కిచ్చి గుర్తు దెతయ్ మెలె.

అమ్మక విరోదుమ్ సుదల్ జలనచి అత్తి తెంతో అమ్ ములవుక జలె,

బయిమ్ నెంతె పూర్తి జోచయ్ జా జో దెతి సుద్ది సత్తిమ్ ఇండ

అమ్చి జీవితమ్ పూర్తి జోచి సేవ అమ్ కెర్తె తంక

వాటు జెయెదె.

76 తుయి, పుత్త, తుయి వడ్డిలె

తుకయ్ కిచ్చి మెనుల మెలె,

ఎత్తిచి కంట వెల్లో తిలోసాచి కబుర్ సంగితోసా జో

మెన సంగుల. కిచ్చొక మెలె,

ప్రబు జెతికయ్ జోక వాటు తెయార్ కెరవుక

తుయి జోచి పుర్రెతో బుల్తె తస్సె;

77 జోచ ప్రెజల్క జో ప్రబు రచ్చన దెతిన్చి కోడు

జాన కెర, కేన్ రచ్చన మెలె,

జోచ పాపల్ చెమించుప కెర్తెసి.

78 దేముడుచి పెట్టిచి కన్యారుమ్చి

జోచి దయచి రిసాచి రచ్చన. ఈంజ రచ్చనచి రిసా,

పరలోకుమ్ తెంతో ఉజిడి అమ్చి ఉప్పిరి లగిలి,

నొవి దీసి అయ్లి రితి అమ్మక ఉజిడి దెయెదె.

79 అందరతె వెసిల, మొర్నుచి నీడతె వెసిల రిత మాన్సుల్క

దొర్కు జలి ఉజిడి దెతి రిసాయి.

జో దెతి రచ్చనచి సేంతుమ్ వాటు అమ్ ఇండితి రితి

అమ్మక వాటు దెకయ్తి రిసాయి

అమ్చో దేముడు ఈంజ ఉజిడి అమ్చి ఉప్పిరి దెకయెదె.”

మెన జెకర్నా దేముడుచి సుద్ది తిలి ఆత్మ తెన్ చోడి పుట్టవ సంగిలన్.

80 జలె, జో బోద యోహాను వడ్డ ఆత్మక డిట్టుమ్ జలన్ అస్సె, జోచ ఇస్రాయేలుల్తె జో బార్ జా, జోక

దిలి కామ్ మొదోల్ కెరుక మెన దేముడు సంగిలి కాలుమ్ ఎద జో బయిలు దేసిమి తా గెలన్.

2

యేసు జెర్మిలిసి
(మత్త 1:18-25)

1 జేవ్ పొదులె, ఔగుస్తు మెలో *కైసర్ రాస్ రోమ్ దేసిమ్ తెంతో ఒగ్గర్ దేసిమ్లు ఏలువ కర్తె తిలి పొది, “ఒండి లోకుమ్తె కెత్తిజన్ పైజల్ జవుల గే తుమ్ లెక్క కెర రెగుడ” మెన మాన్సుల్క ఆడ్ర దిలన్.

2 జేవ్ పొదులె కురేనియు మెలోసా సిరియ దేసిమి అదికారి జా తిలి పొది జా పైజల్ లెక్క కర్లె. ఇన పైజల్ లెక్కల్ రెగుడుక ఈంజ తొలితో చి.

3 జలె, పైజల్ ఎత్తి కేనెచ మాన్సుల్ ఒత్త జేవ్చ సొంత టాన్సుతె జేవ్చ నవ్వొ రెగ్గవనుక గెల.

4 దన్సి, యోసేపు దావీదు పూర్ణుమచొచి వంసుమచొ జోచి తెగచొ మాన్సుచి రిసా, గలిలయ ప్రాంతుమ్చి జో జెతె తిలి నజరేతు గవ్వొ తెంతో బార్ జా, యూదయ ప్రదేసిమ్చి బేత్తెహేమ్ మెంతి గవ్వొ ఉట్ట గెలన్.

5 తేర్వి జతి మరియ తెన్ పైజల్ లెక్కతె ఒత్త జోవయించ నవ్వొ రెగ్గవనుక మెన గెల. జా జలె, అంగి జా తిలి.

6 జలె, జేవ్ ఒత్త తిలి పొది జాచి కంట్లు పావ అయ్లి, చి

7 తొల్పర్ మున్సుబోద లడెన్ జలన్. జోక పాలల్ గుడియవ, జేవ్ తిలి సొమ్ముల్ సాడె తిలి సొమ్ముల్ దొప్పొ పితి దోనెతె పెటెత నిజవ తిల. ఒత్తయం కిచ్చొక మెలె, జా గవ్వొ జేవ్ తంక, కేనె టాన్ విడి నాయ్.

గొప్పడ్లుక దూతల్ డీస యేసు జెర్మలిన్చి రిసా సంగిలీసి

8 జలె, జా రాతి జా గావ్క పాసి, మెండల్ రకిత గొప్పడ్లు సగుమ్జన్ బయిలె మెండల్ రకితె తిల.

9 రకితె తిలె, దేముడుచొ, దూత ఎక్కిలో జోవయంక డీసిలన్, చి జో ప్రబుచి పరలోకుమ్చి ఉజిడి జోవయించి సుట్టునంత లగిలి, చి ఒగ్గర్ బియఁ గెల.

10 తెదొడి దూత జోవయంక, “తుమ్ బియఁ నాయ్. తుమ్క చెంగిల్ కబుర్ అన్తసి. పైజల్ ఎత్తిక ఒగ్గర్ నర్లనంతోసుమ్ అన్తి కబుర్, ఈంజ.

11 ఆజి దావీదు పూర్ణుమచొచి గవ్వొ తుమ్చొ రచ్చించువ కర్తొసా జెర్మ అస్సె. కొన్సొ మెలె, †క్రీస్తు జలో ప్రబుయి.

12 జోక తుమ్ చినితి రిసా తుమ్క కిచ్చొ గుర్తు దెతసి మెలె, జో బోదక పాలల్ గుడియవ తా జోక ఏక్ సొమ్ముల్ సాడె తిలి సొమ్ముల్ దొప్పొ పితి దోనెతె నిజవ తవుల” మెన దూత కబుర్ సంగిలన్.

13 సంగిలి బేగి, పరలోకుమ్ తెంతో ఒగ్గర్జన్ దూతల్ ఉత్త జా కిచ్చొ మెన దేముడుచి గవురుమ్ గాయిల మెలె,

14 “పరలోకుమ్తె దేముడుక జోబర!
చి బూలోకుమ్తె జో దయ దెకిత మాన్సుల్తె
జో దెతి సేంతుమ్ ఏలువ కెర్ప!”
మెన గనుమ్ గాయిల.

15 జలె, దూతల్ జా గనుమ్ గాయ ఉట్ట గెల. చి మెండల్ రకిత జేవ్ గొప్పడ్లు “బేత్తెహేమ్తె గెచ్చుము, చి ‘జర్లు జలి’ మెన దేముడు అమ్క జానయ్లిసి దెకుమ. జొమ్మ!” మెన ఎక్కిలోక ఎక్కిలో సంగన్.

16 గవ్వొ బే బేగి నిగ గెచ్చ, మరియక, యోసేపుక, చి సాడెచి సొమ్ముల్ దొప్పొ పితి దోనెతె నిజ తిలో బోదక చజ దెకిల.

17 జా రుజ్జు దెకిల్ రిసా, జో బోదచి రిసా దూత జేవ్క జానయ్లి కోడు ఎత్తి కక్క కక్క,

18 జేవ్ గొప్పడ్లు సంగిలీసి నూన్ల ఎత్తిజన్ ఆచారిమ్ జా గెల.

19 మరియ మాత్రుమ్ ఈంజేవ్ కొడె ఎత్తి జాచి పెట్టితె తియఁ జోచి అర్దుమ్ కిచ్చొ జయెదె గే ఉచర్తె తిలి.

20 జలె, మెండల్ రకితక దూత నూనయ్లిసి చి జేవ్ సాడె దెకిలిసి ఎక్కి రితి బెదిలి రిసా దేముడుక జోకర, గవురుమ్ గాయ గాయ, జేవ్ రకిత మెండల్తె అన్నె ఉట్ట గెల.

యేసుక నావ్ తిలిసి

* 2:12:1 ‘కైసర్’ మెలె, గ్రీకు భాస తెన్ బెదితయ్. నెంజలె ‘సిజరు’ కి మెనుల. ‘సిజరు’ మెలె, ఇంగ్లీస్ తెన్ బెదితయ్. తెలుగు తెన్ ‘వెల్ల’ రావో మెన అస్సి. † 2:11 2:11 ‘క్రీస్తు’ మెలె ‘తద్రయిందె’ మెన ఎత్తి అదికారుమ్ తిలో దేముడు ప్రమానుమ్ సంగి తిలో రచ్చించువ కర్తొసా.

21 బోధ జెర్మ అట్టు పొదుల్ జతికయ్, జోక యూదుడు కెర్ల సున్నతి కెర దిల, చి జోక * 'యేసు' మెన నావ్ తిల. అయ్యసి అంగి నే జతె అగ్గ 'యేసు' మెన నావ్ తిత్తు మెన దూతచి అత్తి దేముడు ఈంజ నావ్ దా తిలన్.

యేసుక దేముడుచి గుడితె కడ నిలిసి

22 మోసే పూర్ణమచొచి అత్తి రెగిడ్డి దేముడుచి ఆగ్గుల్ రితి మరియక అన్నె సుద్ది కెర్ల కామచి కిడిసి అయ్లి పొది, జా కామక మెన అన్నె యేసుక దేముడుచి టాన్తె జోవయించి పుర్రె టీవడుక మెన యోసిపు జోక యెరూసలేమతె దేముడుచి గుడితె కడ నిలన్.

23 కిచ్చొక మెలె, మోసే పూర్ణమచొచి అత్తి దేముడు రెగ్గయల * ఆగ్గుల్చి రిసా,

“తోల్పూర్ బోధ పుత్తు జలె, జోక ‘ప్రబుకయ్ † అర్చితుమ్ దిలోసా’ మెనుక అన్నె”
మెన రెగిడ్డి కోడు.

24 జలె, మోసే పూర్ణమచొచి అత్తి దేముడు రెగ్గయల ఆగ్గుల్తె రెగ్గయలి రితి,
“పూజచిది అత్తి దొన్నె వన్నె, పిట్టల్ జలెకు, దొన్నె పార్వ పిట్ట పిట్టల్ జలెకు దెంక”

మెన రెగిడ్డిసి జర్గు కెరుక మెన, అయ్యసక సుద్ది కెర్ల రుజ్జుక దసచ దెంక జేవ్ దేముడుచి గుడితె గెల.

25 జలె, జా కాలమ్ యెరూసలేమతె ఏక మాన్సు తిలన్. జోచి నావ్ సుమెయోను. జో మాన్సు సత్తిమ్ ఇండితోసా. దేముడుక నిదానుమ్ బక్కి కెర్లొసా. ‘అమ్చ ఇస్రాయేలుల్చొ రచ్చించుప కెర్లొసా కెయ్:క జెయెదె గె,’ మెన జో దెకితె తిలన్. దేముడుచి సుద్ది తిలి అత్తు జో తెన్ తిలి.

26 “దేముడుచొ క్రిస్తుక తుయి దెకిలెకయ్ మొర గెతె” మెన జో దేముడుచి సుద్ది తిలి అత్తు జో సుమెయోనుక సూనచ తిలన్.

27 జలె, ‘క్రిస్తు రచ్చించుప కెర్లొసా జా అన్నె’ మెన జో జొన్లి రితి, జయ్యి దీసి జో సుమెయోను దేముడుచి గుడితె గెతి రితి దేముడుచి సుద్ది తిలి అత్తు జోక వెలచ నెతికయ్, ఒత్త గెలన్. ‘తోల్పూర్ బోధ’ మెన మోసే పూర్ణమచొచి అత్తి దేముడు రెగ్గయల ఆగ్గుల్తె రెగిడ్డి రితి యేసుచి రిసా కెరుక మెనయ్, జోక అయ్యసి:సి దేముడుచి గుడి తెడి పొయ్ ఆన్తికయ్,

28 జో సుమెయోను జోక దెర పొయ్ దేముడుచి గవురుమ్ సంగ ఇసి మెన జోబర కెర్లన్:

29 “ఓ ప్రబువ, ఆవ్ తుచొ గొత్తి నుదొ, అప్పె సేంతుమ్ తెన్ మొర గెతి

సెలవ్ తుయి దెతసి,
తుయి అంక సంగిలీసి ఎత్తి. జర్గు కెర అస్సిన్,

30 తుయి తెద్రయ్లో రచ్చించుప కెర్లొసాక దెక అన్నె.

31 ఈంజ లోకుమ్ ఎత్తి, చ ప్రజల్ దెకితె రితి

ఈంజ రచ్చన తుయి తెయార్ కెర్లది.

32 యూదుల్ నెంజలన సత్తిమ్ ఇండితి రితి

ఈంజో రచ్చించుప కెర్లొసాచి ఉజడి వాల్ దెకయెదె, చి

తుచయ్ ప్రజల్ జల అమ్చ ఇస్రాయేలుల్చొ జోవయించి ఉజడి

‡ అన్నె గవురుమ్ ఆనెదె.”

మెన, సుమెయోను దేముడుచి సుద్ది తిలి అత్తుసెక్కి చోడి పుట్టవ సంగిలన్.

33 జలె, యేసుచి రిసా సంగిలీచి రిసా అయ్యసి † అబ్బొన్ ఆచారిమ్ జా గెల.

34 తెడిడి “దేముడుచి దయ తుమ్చి ఉప్పిరి తప్పన్” మెన సుమెయోను జేవ్క దీవెన సంగిలన్, చి దేముడుచి సుద్ది తిలి అత్తు తెన్ యేసుచి అయ్యసి మరియక జో సుమెయోను అన్నె ఇసి మెలన్.

‡ 2:21 2:21 జా నావ్చి అర్థమ్ కిచ్చొ మెలె. యెహోవ రచ్చించుప కెర్లొసా జా అన్నె. ‘యెహోవ’ మెలె, ఎత్తి, అదికారుమ్ తిలో దేముడుచి నావ్. § 2:22 2:22 బోధ జెర్మ దొన్నె విసా పొదుల్ జలె జా సుద్ది కామక దేముడుచి గుడితె గెచ్చుల. * 2:23 2:23 తెలుగు క్రైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయలి ఆగ్గుల్ మెన అమ్ జానుమ్. ఈంజ కొజొ ఎత్తి, బైబిల్తె అగెచి పావ్ పుస్తకుమతె రెగ్గయ్ జా అన్నె. ఈంజ దెకక మెన కుమియ బాసతె నొయ ప్రమానుమతె మోసే పూర్ణమచొచి అత్తి రెగిడ్డి దేముడుచి ఆగ్గుల్ మెన రగ్గవ అన్నె.

† 2:23 2:23 తోల్పూర్ పుత్తుక ‘దేముడుక దిలోసా. అమ్ అన్నె గెనసుక మెనయ్, బోధచ అయ్యసి:సి దేముడుచి గుడితె ఇదిల్ డబ్బుల్ దెవుల. ‡ 2:32 2:32 నెంజలె, ‘తుచి ఉజడి అన్నె సొన్ముమ్ దెకయెదె’. § 2:33 2:33 యోసిపు నిజమి అబ్బొసి నెంజ. ఎత్తి, అదికారుమ్ తిలో దేముడు సొంక అబ్బొసి జయెదె, గని మరియ యోసిపుక పెండ్లి జా అన్నె చి దన్నె మెన్తయ్.

“ఈంది, ఈంజో బోదచి రిసా అమ్చ ఇస్రాయేలుల్తె ఒగ్గర్జిన్ నంపజా రచ్చించుప జవుల. గని ఒగ్గర్జిన్ అన్యానుమ్ జా పాడ జవుల, దేముడుచి గుర్తుక ఈంజో టీవ్దె, చి ఇన్నెచి ఉప్పిరి ఒగ్గర్జిన్ విరోదుమ్ లట్టబుల, 35 ఒగ్గర్జిన్చి పెట్టిచి బుద్దిక ‘కినిచి గే’ చినుక జయెదె. ఈంజ ఎత్కిచి రిసాయి జో ఈంజ లోకుమ్తె జా అస్సె, తుచి పెట్టి ఏక్ కండా బూసి జయెదె తుక దుకుమ్ జయెదె,” మెన సుమెయోను మరియక సంగిలన్.

అన్నా మెలి మంతిరి కి యేసుచి రిసా ఒత్త సర్ల లట్టబ్బిసి

36 జలె, దేముడుచ కబుర్లు సంగితి ‘అన్నా’ మెలి మంతిరి దేముడుచి గుడితె తిలి. జా ఆసేరు పూర్ణుమ్చోచి తెగచి మాన్సు. పనూయేలు మెలోసాచి దువినీ జయెదె. జా ఒగ్గర్ వెర్పుల్ వయసుచి మంతిరి. జా బాల తతె పెండ్లి జా సత్తు వెర్పుల్ మున్సున్ తెన్ తిలన్,

37 చి రండాలి జా అప్పె చెత్తర్ చిన్నా చెత్తర్ వెర్పుల్ జా తా, దేవులుమ్ నే ముల్తె, చువ్వె తా, రాతి మెద్దెన్ ప్రార్దన్ కెర్తె తా బక్తి కెర్తె తయెదె.

38 తెదోడి జయ్యి గడియయ్ మరియయింసితె జా కెర, యేసుచి రిసా దేముడుక “ఇన్నెక తెద్రవ తుయి దయ కెర్తెది” మెన ప్రార్దన్ కెర్తెన్. అన్నె తెదోడి *‘రచ్చించుప కెర్తొసా కెయెక జా కెర యెరూసలేమ్క విడ్డల్ కెరెదె’ మెన రకిత మాన్సుల్ ఎత్కిజిన్క “ఈంజోయి జో” మెన యేసుచి రిసా సంగిలి.

39 మోసా పూర్ణుమ్చోచి అత్తి దేముడు రెగ్గయల ఆగ్గుల్తె రెగ్గయలిన్తెచ జేవ్ కెరుక తిల కమె ఎత్కి కెర కేడవ కెర, గలిలయ ప్రాంతుమ్చి జోవయించి సాంత గావ్ జలి నజరేతు గవ్వె మరియయింసె అన్నె ఉట్ట గెల.

40 జో బోద వడ్డ డిట్టుమ్ జలొ, ఒగ్గర్ బుద్ది సుదో జలొ, దేముడుచి దయ జోచి ఉప్పిర్ తిలి.

యేసు యెరూసలేమ్తె పండుగక గెలిసి

41 యేసుచ అయ్యసింసి వెర్పు వెర్పు †పస్కా వండుగక యెరూసలేమ్ పట్టుమ్తె దేముడుచి గుడితె గెచ్చుక అలవాట్.

42 జలె, యేసుక బార వెర్పుల్ జా తిలి పొచి జోవయించి అలవాట్క పండుగక ఒత్త గెల.

43 జలె, పండుగు కేడ జేవ్ గెరి గెచ్చుక బార్ జలె, యేసు యెరూసలేమ్తె తా గెలన్, గని అయ్యసింసి నేన్తి.

44 ‘యేసు అమ్చి తెన్ జెతన తెన్ అస్సె’ మెన ఉచర తా, ఏక్ ఒండి మెద్దెన్చి ఎదిలి ప్రయానుమ్ గెలి వడ్డె, జోవయించ మాన్సుల్తె చి గోతుసుదల్తె చజిల.

45 గని డీని నాయ్, చి జోక చజన చజన యెరూసలేమ్తె అన్నె గెల.

46 ‡ఒత్త పాచిలె, అన్నెక్ దీని యేసు దేముడుచి గుడితె ఒత్త పండితుల్చి నెడిమి మెన తిలొ డీనిలన్. జో జేవ్చ కొడె నూన, జేవ్క ప్రస్సల్ కి పునితె తిలన్.

* **2:38 2:38** యూదుల్ మాములుమ్ ఈంజ లోకుమ్చ బాదల్ తెంతో చి రచ్చనక రకితె తిలి, చి ఆకరక జయ ఎత్కి కి మార్పున జయెదె, గని అప్పెచి మట్టుకచి రచ్చనక ‘అత్తుయ రగుమ్’ మెన నేన కెర, యేసుక ‘ఈంజ లోకుమ్తె ఎదార్లుమ్ ఏలుప కెరె నాయ్’ మెన, జోవయింక ‘జోయ్య దొర్పు జలొ రచ్చించుప కెర్తొసా’ మెన జోవయింతె ఒగ్గర్జిన్ చినితి నాయ్. ‘యెరూసలేమ్’ మెలి, ఇన్నె యూదుల్ ఎత్కిచి రిసాచి టాలి జయెదె. జా మదెన, రోమ్ దేనిమ్చి ప్రబుతుమ్ జోవయింక ఏలుప కెర్తె తిల, చి ‘జా బాద తెంతో కి రచ్చంచుప కెర్తొసా అమ్క విడ్డల్ కెరెదె’ మెలి రితి ఉచర్తె తిల. † **2:41 2:41** ‘పస్కా వండుగు’ మెలి, పూర్ణుమ్ యూదుల్ బగుప్తు (బగుప్తు) దేనిమి గెతిమాన్సుల్ జా విడ్డల్ జా దేనిమ్ తెంతో బార్ జా సాంత దేనిమి అయ్యలిసి ఏద కెర్తె పండుగు. ‡ **2:46 2:46** నెజెలి, ‘తిద్రకె గెతికం, డీనిలన్.’ ఇని మెన ఒగ్గర్జిన్ ఉచర్తె: జేవ్ అయ్యసింసి దేముడుచి గుడి తెంతో బార్ జా ప్రయానుమ్ గెలిసి ఏక్ దీని దెర్లి, దేముడుచి గుడితె జేవ్ అన్నె గెచ్చుక చి అన్నెక్ దీనిచి ప్రయానుమ్ తెన్ దొరకె జలి, చి అన్నెక్ దీని డీనిలన్.

47 ఒత్త తిలన ఎత్తిజిన యేసుచ కొడె, చి జోచ ప్రస్నల్ నూన, జోచి బుద్ది గ్యానుమచి రిసా పండితుల్ క జో దెత జబాబుల్ చి రిసా బలే ఆచారిమ్ జతె తిల.

48 జలె, దస్సి జతె తతికయ్, అయ్యసిసి జోక దెక, జేవ్ కి బలే ఆచారిమ్ జల, చి అయ్యసిసి జోక కిచ్చొ పునిలి మెలె “కిచ్చొక, పుత్త, అమ్క ఇసి అల్లర్ కెర్లది? ఈందె, అబ్బొది ఆవ్ గొప్పు దుకుమ్ నేడ ఒండి చజితె తిలమ్” మెన సంగిలన్.

49 యేసు జేవ్ కిచ్చొ సంగిలన్ మెలె, “అంచి రిసా కిచ్చొక చజాక? ఆవ్ అంచొ అబ్బొచి గెరి తంక మెన తుమ్ నేస్సు గె?” మెలన్.

50 జలె, జో సంగిలి కోడు జేవ్ క అర్దుమ్ జయె నాయ్.

51 జలె, జోపయింతెన్ యేసు నజరేతు గవ్వె అన్నె ఉట్ట గెలన్. చి జోపయింతెన్ జయె జేవ్ సంగిల్ కోడు రితి ఇండితె తిలొ. అయ్యసి, జలె, దేముడుచి గుడితె జో సంగిలిసి పెట్టి తియన, ఒత్త జల్లు జలిసి ఎత్కిచి రిసా జాచి పెట్టి ఉచర్తె తిలి.

52 జలె, యేసు ఆగేక కి వుద్దిక కి వడ్డిలన్, చి మాస్సుల్ జోక మెన్నితె తిల, చి దేముడుచి దయ జోచి ఉప్పీర్ తిలి.

3

దేముడు దెతి రచ్చనక యోహాను సాట్ట కెర్లిసి

(మత్త 3:1-12; మార్కు 1:1-8; యోహా 1:19-28)

1 తిబెరియ మెలో కైసర్ రానో పనర వెర్సుల్ రోమ్ పట్టుమ్ తెంతొ ఒగ్గర్ దేసిమ్లు ఏలుప కెర్తె తిలి పొది, జోపయించి తెడి పొంతి పిలాతు యూదయ ప్రదేసిమి అదికారి జా తా, హేరోదు మెలోసా గలిలయ ప్రాతుమ్తె అదికారి జా తా, జోచొ బావొసి పిలివ్ ఇతూరయ అన్నె త్రకోనీతి మెల ప్రాతుమ్లుతె అదికారి జా తా, లుసానియ అబిలేనీ ప్రాతుమ్తె అదికారి జా తా,

2 అన్నా మెలోసా ఎత్కిక వెల్లో పూజరి జా తా, దూజాంబొన్ జలో కయప తెడిడి ఎత్కిక వెల్లో పూజరి జా తిలి పొది, జెకర్నాచొ పుత్తుసి యోహాను బయిలు దేసిమి * బుల్తె తిలి పొది, దేముడుచి జో సంగుక తిలి కబుర్ జోక అయ్లి.

3 జలె, జోచి కబుర్ జో సంగుక దేముడు తియార్తికయ్, “తుమ్చి పాపల్చి రిసా తుమ్ దుకుమ్ జా, అమ్చొ దేముడు తుమ్చి పాపుమ్ చెమించుప కెర్తె గుర్తుక తుమ్ బాప్తిసుమ్ నజన” మెన యోర్దాను గాడు పాసి ఒండి బుల బుల సాట్ట కెర్తె తిలన్.

4 దేముడుచ కబుర్లు సంగిలో యెనయాచ కోడు రెగిడ్లి పుస్తకుమ్తె రెగిడ్లి రితి; “ఎక్కిలో అంచొ బారికి జా, అంచి అవాడ్ రితొ జా, ప్రబు జెతికయ్ వాటు తిన్నగ కెర్లి రితి తుమ్ ఎత్తిజిన బుద్ది జా మెన, బయిలె ప్రదేసిమి తా కేక్ గల సాట్ట కెరెదె.

5 ఎత్కి డొంగుర్, ఎత్కి మెట్ట, ఎత్కి లోయ సదూనుమ్ జవుల, వంకుడ వట్టొ తిన్నగ జవుల, చి గర్కు తిల వట్టొ మిన్న జవుల,

6 దేముడు మాస్సుల్ కిసి రచ్చించుప కెరెదె గె ఎత్తిజిన దెకుల.” మెన రెగిడ్లి కోడు.

బాప్తిసుమ్క అయ్లనక యోహాను గోల కెర బుద్ది సంగిలిసి

7 జలె, జోచి అత్తి బాప్తిసుమ్ నజనుక మెన బార్ జల ఒగ్గర్ జిన జనాబ్ క దెక కెర, యోహాను జోపయింక ఇసి మెలన్: “అయివొచి రితి విస్సుమ్ పెట్టి తిలన, తుమ్! దేముడు కెర్తి సిచ్చు పిట్టవనక ఉచరుక మెన తుమ్క సికణ్ణొసా కొస్సె?”

8 తుమ్ కెర్తె పాపల్ ముల దా, చెంగిల్ బుద్ది ఇండ, ఆత్మపలితుమ్ దెర. పడ్డొ, ‘అబ్రాహామ్ అమ్క అబ్బొ జయెదె చి రిసా, దేముడు తెన్ బెదె అస్సుమ్’ మెన తుమ్క తూమ్ ఉచరన సొంత గవురుమ్ సంగుక నాయ్. కిచ్చొక మెలె, దేముడుక ఇన్నెచ పత్రల్ తెన్ అబ్రాహామ్చి రిసా బోదల్ క జెర్దువుక తెరె, మెన తుమ్క ఆవ్ సంగితసి.

* 3:2 3:2 1:80 డెక.

9 ఈందె, అప్పె ప్రబు కురాడు వాండి కెర, రూకుక బుంది కండుక, కుర్చి దెర టీవ అస్సె, జలె, చెంగిల్ పలితుమ్ నే దెర్చె ఎత్తి, రూకుక కండ కెర ఆగితె గలుల,” మెన యోహాను జాగర్త బుద్ది సంగిలన్.

10 జో ఇసి సంగితికయ్, “దస్సి జలె, అమ్ కిచ్చె కెరుక గే అమ్క సంగు” మెన జనాబ్ పుసిల,

11 జో జోవయింక కిచ్చె జబాబ్ దిలన్ మెలె, “కక్క దొన్ని సొక్కల్ తవుల గే, ఎద్దరె సొక్క నెంజిలోసొక ఏక్ దెంక. కక్క అన్నిమ్ తిలె, జో అన్నిమ్ నెంజిలోసొక అన్నిమ్ దెంక.” మెలన్.

12 జలె, బాప్తిసుమ్ నజనుక మెన సిస్తు నజిత సుంకర్లు కి యోహానుతె అయ్ల, చి “గురుబాబు, అమ్ కిచ్చె కెరుక?” మెన పుసిల.

13 జో జోవయింక, “తుమ్ కెర్చె సిస్తు నజుక నాయిమ్ తయెదె గే, తెద్దిలి నజ. అన్నె ఒగ్గర్ నజ నాయ్” మెలన్.

14 “అమ్, జలె, కిచ్చె కెరుక?” మెన సయ్న్యుమ్ సుదల్ పుసిలె, యోహాను జోవయింక, “బియడ జవున్, ఆరిచ నిందల్ కెర జవున్, కచి అస్తి దొర్చు కెరన నాయ్. దస్సి కెర్చె వోర్చి రితి జయెదె. జా పొన, గని తుమ్చి నాయిమ్ తెన్ చి జీతుమ్ నజన, ‘సాలు’ మెన సర్ల తెన్ జయ,” మెన యోహాను సంగిలన్.

క్రీస్తుచి రిసా యోహాను బోదన కెర్తసి

15 ‘జెతో క్రీస్తు జా తయెదె’ మెన ప్రజలె ఎత్తి, అజ్జ కెరన, యోహానుచి రిసా “ఈంజో ఏక్ వేల క్రీస్తు జా తయెదె” మెన పెట్టి ఉచరంతె తతికయ్,

16 జో ఇసి మెన జబాబ్ దిలన్. “అడె పానితె తుమ్క బాప్తిసుమ్ దెతసి, గని అంచి కంబ అదికారుమ్ తిలోసా జెతయ్. జోచ చట్టోతెచ జోడ్తుచ వాలివో యిప్పుక జెలెకు అంక విలువ నాయ్. జో, జలె, దేముడుచి సుద్ది తిలి ఆత్మ తెన్, †ఆగి తెన్ తుమ్క బాప్తిసుమ్ దెయెదె.

17 జోచి పూనితి నూపు జోచి అత్తి అస్సె. జోచి కెల్చి సుబ్బుమ్ కెర జోక కామ్క జెతి పంటో గుడ్డ కెర కొట్టుతె కుడచ, కో విజవుక నెత్తిర్చి ఆగితె పోటు గల డయ గెలెదె,” మెన యోహాను సంగిలన్.

18 ఒగ్గర్ దన దయిరిమ్ కొడో సంగిత జాగర్త సంగిత కొడో తెన్ ప్రజల్క దేముడు దెతి రచ్చునచి రిసా యోహాను సుబుమ్ కబుర్ బోదన కెర్తన్.

19 గలిలయ ప్రాంతుమ్చో అదికారి జలో హేరోదు, జలె, బావొనచి తేర్చి హేరోదియక ఆనన తిలన్, చి అన్నె కిచ్చె కిచ్చె గర్చు కమె ఒగ్గర్ కెర్చె తిలన్. జాచి రిసా యోహాను జోవయింక గోల కెర్చె తిలన్, చి రిసా

20 అన్నెక్ పాపుమ్ కి కెర్తన్. కిచ్చె మెలె, యోహానుక జేలి కెర జేలెతె గలిలన్.

యేసు బాప్తిసుమ్ నజన్చిసి

21 జా నే జతె అగ్గె, జలె, ప్రజలె ఎత్తి, జన్ బాప్తిసుమ్ నజన్తికయ్, యేసు కి బాప్తిసుమ్ నజన ప్రార్దన కెర్చె తతికయ్, పరలోకుమ్ ఉగ్గి జలి.

22 దేముడుచి సుద్ది తిలి ఆత్మ పార్చు పిట్టచి రితి ఉత్ర జా, జోచి ఉప్పిరి టీవిచి, చి “తుయ అంచో ప్రేము తిలో పుత్తు. తుచి రిసా అంక సర్లసంతోసుమ్” మెన, పరలోకుమ్ తెంతో అవాడ అయ్లి.

యేసుచి వంసుమ్ వర్చ తెన్ రెగిణ్చిసి

23 యేసు సేవ మొదోల్ కెర్చె పొది, జోచి వయసు పాసి పాసి ముప్పుయ్ వెర్చుల్ జా తిలి. ‡యేసుక యోసేపుచో పుత్తుని మెంతె తిల.

యోసేపు హేలీచో పుత్తుని,

24 హేలీ మత్తతుచో పుత్తుని,

మత్తతీయ లేవీచో పుత్తుని, లేవీ మెల్చీచో పుత్తుని,

మెల్చీ యన్నుచో పుత్తుని, యన్ను యోసేపుచో పుత్తుని,

25 యోసేపు మత్తతీయచో పుత్తుని, మత్తతీయ

† 3:16 3:16 బారికల్ 2:3-4 దెక. అన్నె అన్నె కిచ్చె అర్దుమ్ తయెదె మెలె, ఆగిక బజార్ గట్ట సుబ్బుమ్ కెరుక జయెదె, నెంజిలె, ఆగితె అర్చితుమ్ దెతిసి సుబ్బుమ్ జయెదె. దస్సి, ఆగిచి బాప్తిసుమ్ మాన్చుచి ఆత్మక ఎత్తి, అదికారుమ్ తిలో దేముడు సుబ్బుమ్ కెర్చినక టాలి గుర్చు జయెదె. ‡ 3:23 3:23 గని ఎత్తి, అదికారుమ్ తిలో దేముడుచి పరలోకుమ్చి సుద్ది ఆత్మకయ్ మరియ యేసుక అగి జా తిలి, గెద.; 1:26-38.

ఆమోసుచో పుత్తుని, ఆమోను నాహాముచో పుత్తుని,
 నాహాము ఎస్సీచో పుత్తుని, ఎస్సి నగ్గయిచో పుత్తుని,
 26 నగ్గయి మయతుచో పుత్తుని, మయతు మత్తతీయచో పుత్తుని,
 మత్తతీయ సిమియచో పుత్తుని, సిమియ యోశేకుచో పుత్తుని,
 యోశేకు యోదాచో పుత్తుని,
 27 యోదా యోహన్నుచో పుత్తుని,
 యోహన్ను రేసాచో పుత్తుని, రేసా జెరుబ్బాబెలుచో పుత్తుని,
 జెరుబ్బాబెలు సయల్తీయెలుచో పుత్తుని, సయల్తీయెలు నేరిచో
 పుత్తుని,
 28 నేరి మెల్కీచో పుత్తుని, మెల్కీ అద్దిచో పుత్తుని,
 అద్ది కోసాముచో పుత్తుని, కోసాము ఎల్మాదాముచో పుత్తుని,
 ఎల్మాదాము ఏరుచో పుత్తుని,
 29 ఏరు యెహోసువచో పుత్తుని,
 యెహోసువ ఎలీయెజెరుచో పుత్తుని, ఎలీయెజెరు యోరీముచో
 పుత్తుని, యోరీము మత్తతుచో పుత్తుని, మత్తతు లేవీచో పుత్తుని,
 30 లేవీ సిమ్యానుచో పుత్తుని, సిమ్యాను యూదాచో పుత్తుని,
 యూదా యోసేపుచో పుత్తుని, యోసేపు యోనాముచో పుత్తుని,
 యోనాము ఎల్యాకీముచో పుత్తుని,
 31 ఎల్యాకీము మెలెయాచో
 పుత్తుని, మెలెయా మెన్నుచో పుత్తుని, మెన్ను మత్తతాచో పుత్తుని,
 మత్తతా నాతానుచో పుత్తుని, నాతాను దావీదుచో పుత్తుని,
 32 దావీదు యెస్సయిచో పుత్తుని, యెస్సయి ఓబేదుచో పుత్తుని,
 ఓబేదు బోయజుచో పుత్తుని, బోయజు సల్మానుచో పుత్తుని,
 సల్మాను నయస్సానుచో పుత్తుని,
 33 నయస్సాను
 అమ్మినాదాబుచో పుత్తుని, అమ్మినాదాబు అరాముచో పుత్తుని,
 కీఆరాము ఎస్సోనుచో పుత్తుని,
 ఎస్సోము పెరెసుచో పుత్తుని, పెరెసు యూదాచో పుత్తుని,
 34 యూదా యాకోబుచో పుత్తుని, యాకోబు ఇస్సాకుచో పుత్తుని,
 ఇస్సాకు అబ్రాహామ్చో పుత్తుని, అబ్రాహామ్ తెరహాచో పుత్తుని,
 తెరహా నాహోరుచో పుత్తుని,
 35 నాహోరు సెరూగుచో పుత్తుని,
 సెరూగు రయాచో పుత్తుని, రయా పెలెగుచో పుత్తుని,
 పెలెగు హెబెరు పుత్తుని, హెబెరు షేలహు పుత్తుని,
 36 షేలహు
 కేయినానుచో పుత్తుని, కేయినాను అర్నక్షదుచో పుత్తుని,
 అర్నక్షదు సేముచో పుత్తుని, సేము నోవహుచో పుత్తుని,
 నోవహు లెమెకుచో పుత్తుని,
 37 లెమెకు మెతూసెలచో పుత్తుని,
 మెతూసెల హానోకుచో పుత్తుని, హానోకు యెరెదుచో పుత్తుని,
 యెరెదు మహాలలేలుచో పుత్తుని, మహాలలేలు కేయినానుచో
 పుత్తుని,

§ 3:33 3:33 నెంజెలి, అరాముచి కోడు సగుమ్ పుస్తకల్తె తయె నాయ్.

38 కేయినాను ఎనోఘచో పుత్తుని,
 ఎనోఘ నేతుచో పుత్తుని, నేతు ఆదాముచో పుత్తుని,
 ఆదాము దేముడుచో *పుత్తుని.

4

సయతాన్ యేసుక పరిచ్చ కెర్లిసి
 (మత్త 4:1-11; మార్కు 1:12-13)

1 దేముడుచి నుద్ది తిలి ఆత్మ యేసుచి పెట్టి బెర తా, జో యోర్దాను గాడు పక్క ముల దా, జా ఆత్మ జోక వలవ నెతికయ, ఒత్తల్తోచి బయిలు దేసిమి గెచ్చ, ఒత్త బుల్కె తిలన్.

2 జా డొగుర్ దేసిమి దొన్ని విస్సా దీసల్ తిలన్క సయతాన్ జోక పాపుమ్ కెరవుక మెన ఉచర, జా దొన్ని విసా దీసల్ అల్లర్ కెర్తె తిలన్. జేవ్ దొన్ని విసా పొదుల్ గెతికయ, యేసుక చూ కెర్లె.

3 తెదొడి సయతాన్ యేసుతె జా కెర జోక, “తుయి దేముడుచో పుత్తుని జలె, ఈంజో పత్తురు పోడియొ జతి రితి నంగు” మెలన్.

4 యేసు జోక ఇసి నంగిలన్,
 “*మాములుమ్ పోడిచి సెక్కి తెన్ మాన్సుల్ జతి నాయ్. †దేముడుచి కొడతె రెగ్గ అస్సె.”
 మెలన్.

5 తెదొడి సయతాన్ యేసుక ఒగ్గర్ డోకుతె కడ నా కెర, ఎక్కి నిమ్ముమ్కయ్ జోక ఒండి లోకుమ్చ రాజిమ్లు దెకవ కెర,

6 “ఈంజ ఎత్కిచి ఉప్పిరి ఏలువ కెర్తి అదికారుమ్, ఈంజేవ్ రాజిమ్లు ఎత్కితె తిలిన్చి గవురుమ్ తుక దెయిందె. ఈంజ ఎత్కి అంచె అత్తి అస్సె, కక్క దెయిందె గే అంచె ఇస్టుమ్.

7 జాక, తుయి అంక జోకర్లెగిన, తుకయ్ దెయిందె” మెన సయతాన్ నంగిలన్.

8 దస్సి నంగితికయ, యేసు ఇసి మెన జబాబ్ దిలన్,
 “ప్రబు జలో తుమ్చో దేముడుకయ్ తుమ్ జోకర. జో ఎక్కిలోచి సేవ తుమ్ కెరుక అస్సె.
 మెన ఏదేముడుచి కొడతె రెగ్గ అస్సె.”

9 తెదొడి సయతాన్ యేసుక యెరూసలేమ్ పట్టుమ్తె కడ నా కెర, దేముడుచి గుడిచి వెన్గొవుచి ఉప్పిరి జోక టీవడ కెర, ఇసి మెలన్,
 “తుయి దేముడుచో పుత్తుని జలె, ఎట్టోతో డేవు.

10 కిచ్చొక మెలె,
 తుయి ప్రమాదుమ్ నే జతి రితి
 జోచ దూతల్క దేముడు ఆడ్ర దా తెద్రయెదె

11 తుచ చట్టో పత్తె నే లయతి రితి జేవ్ దూతల్
 జోవయంచ అత్తో చంపొ కెర తుక ఉక్కులనుల,
 మెన *దేముడుచి కొడతె రెగ్గ అస్సె” మెన సయతాన్ నంగిలన్.

12 యేసు జోక,
 “ప్రబు జలో తుమ్చో దేముడుక పరిచ్చ కెరుక నాయ్
 మెన †దేముడుచి కొడతె నంగ అస్సె” మెన యేసు జబాబ్ దిలన్.

13 జలె, సయతాన్ జేవ్ అల్లర్ కెర్తె, పరిచ్చ కెర్తె కొడతె నంగ కేడవ కెర, ‘అస్సె కెయెక గే అవ్కానుమ్ అయ్లె, అస్సె దస్సి అల్లర్ కెరిందె’ మెనయ్ ఉచర, ఉట్ట గెలన్.

యేసు తొల్లితో గలిలయతె బోదన కెర్లిసి
 (మత్త 4:12-17; మార్కు 1:14-15)

* 3:38 3:38 మెలె, మాన్సుల్ ఎత్కితె జోకయ్ దేముడు తొలితో తెర్చయ్లన్. * 4:4 4:4 మత్తయి 4:4 దెక. † 4:4 4:4 ఎత్కి అదికారుమ్ తిలో దేముడుచి కోడు రితి ఇండితిసి. ‡ 4:4 4:4 ద్వితీయోపదేశ కాండుమ్ 8:3. § 4:8 4:8 ద్వితీయోపదేశ కాండుమ్ 6:13. * 4:11 4:11 కీర్తనలు 91:11, 12. † 4:12 4:12 ద్వితీయోపదేశ కాండుమ్ 6:16.

14 జలె, అబ్బొన్చి జోచి దేముడుచి సుద్ది తిలి ఆత్మ వెలవ నెతికయ్ యేసు జో వడ్డిలి గలిలయ ప్రాంతుమ్తె అన్నె గెలన్, చి జా ప్రాంతుమ్ ఎత్తితెచ సుట్టునంతచ గవ్వెలై జోచి రిసా ఎత్తిజన్ నూన్ల.

15 అన్నె, జా ప్రాంతుమ్చ యూదుల్చ సబ గెరల్ ఎత్తితె బోదన కెరై తిలన్, చి ఎత్తిజన్ జోచి గవురుమ్ సంగితె తిల.

16 జో బాల తతె తెంతో వడ్డిలి ఒత్తచి నజరేతు గవ్వె యేసు అయలన్, అన్నె, *నెలవ్ కడన్ల దీసి యూదుల్చి సబ గెరలై గెలన్. రోజుక నెలవ్ కడ దీసి దస్సి సబగెరి గెచ్చుక జోక అలవాట్. జలె, జయ్యి దీసి ఒత్తచి సబగెరి గెచ్చు కెర, దేముడుచి కొడో నదు కెరుక మెన టీచెలన్.

17 జలె, దేముడుచ కబుర్లు సంగిలో యెసయా పుస్తకుమ్తెచి కొడో నదు కెర్పు మెన జోచి అత్తి దిల, చి జా ఉగ్గ కెర, నదు కెర నూనయలన్.

18 “దేముడుచి సుద్ది తిలి ఆత్మ అంచి పెట్టి అన్నె.
బీద సుదల్క సుబుమ్ కబుర్ ఆవ్ నూనయ్ తి రిసా
జో జోవయించి అత్తునక్తి అంచి బోడి సువ దా
అదికారుమ్ దా అన్నె.

జేలి జలన విడ్డల్ జతిసి
ఆవ్ సాట్టు కెర్తి రితి, వడ్డో
గుడ్డి జలన అన్నె దెకితీన్చి రిసా
ఆవ్ సాట్టు కెర్తి రితి,

అన్నె మాన్పుల్ నిస్కారుమ్ కెర్త మాన్పుల్చ బాదల్
ఆవ్ పిట్టవ దన బాదల్ తెంతో విడ్డల్ కెర్తి రిసా,

19 ‘ఎత్తి అదికారుమ్ తిలో దేముడు ప్రబు
జోచి దయ మాన్పుల్క దెకయెదె’ మెన
ఆవ్ సాట్టు కెర్తి రిసాయి
జో అంక తెర్తవ అన్నె”

మెన దేముడుచ కబుర్లు సంగిలో యెసయాచి అత్తి రెగిడ్డి కోడు యేసు నదు కెర నూనవ కెర,

20 జా పుస్తకుమ్ డంచ కెర, జా సబగెరీచో సేవ కెర్తొనక అన్నె దా కెర, అన్నె వెసిలన్. జా సబగెరి తిలన ఎత్తిజన్ జోక చెంగిల్ దెకితె తిల.

21 తెదోడి జోవయింక, “దేముడుచి కొడోతెచ ఆవ్ అప్పె తుమ్క నూనయల కొడో ఆజి ఎత్తి జర్లు జంక దెర అన్సి” మెన సంగిలన్.

22 తెదోడి, “చెంగిలో మాన్పు, ఈంజో సంగిల కొడో నిజుమి సత్తిమచ” మెన జేవ్ ఆచారిమ్ సంగ తా,
“గని ఈంజో యోసేపుచో పుత్తుసి, నెంజె గె?” మెన అన్నె ఇదిల్ అన్యానుమ్ జా సంగిల.

23 జలె, యేసు జోవయించి బుద్ది జాన కెర, జోవయింక అన్నె, “డాక్టర్, తుకయ్ తూయి చెంగిల్ కెరను”
మెంతె అంక, అన్నె ^S“కపెర్నహూమ్ పట్టుమ్తె ఇన దన వెల్లెల కమె కెర్లన్ మెన తుచి రిసా నూన అన్నుమ్. ఇన్నె కి తుచి సొంత దేసిమి దన కమె కెరు మెన అంక సంగితె, కిచ్చొగె?”

24 అన్నె, “తుమ్క ఆవ్ కిచ్చొ కచితుమ్ సంగితీసి మెలె, దేముడుచ కబుర్లు సంగితో కేన్ మాన్పుక కి జోచి సొంత దేసిమచ మాన్పుల్ ఇస్టుమ్ జతి నాయి” మెలన్.

25 గని తుమ్క ఆవ్ కిచ్చొ మెంతసి మెలె, ఏలీయా పూర్ణుమ్చో తిలి పొది, తిన్ని వెర్పుల్ నర పూర్తి కిచ్చొ పాని పెటె నాయి. చి ఒండి దేసిమి ఒగ్గర్ కరు జా గెలి. జలె, అమ్చ ఇస్రాయేలుల్ అమ్ యూదుల్ మెత్తుమ్తె జా పొది ఒగ్గర్జిన్ రండెలిచో తిల.

‡ **4:16 4:16** యూదుల్చ అలవాట్ తెన్, సత్తరెక్క, సత్తు దీసల్ కిచ్చొ కామ్ నే కెరై దేముడుక జొక్క దీన్. నెలవ్ కడన్ల దీసి-తెలుగు. ఎత్తి సెన్సర్ యూదుల్చ బక్తి కెర్తి నెలవ్ కడ దీసి జయెదె. జా దీసి జోవయించ సబ గెరలై గెచ్చు, దేముడుచి కొడో నూన కెర, ఎత్తి అదికారుమ్ తిలో దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయి’ మెన జో ఎత్తి అదికారుమ్ తిలో దేముడు సంగిలినక యూదుల్చ వెల్లెల మాన్పుల్ ప్రజల్క జాడు వయడ్డి రితి కెర కామ్ నే కెర్తినచి రిసా ఒగ్గర్ అగ్గల్ అవ్వె ఉచర అన్సి. ఇన్నె దొన్నె ఎన్నలు కోట్లినక ‘కామ్’ మెన నింద కెరతి. **§ 4:23 4:23** కపెర్నహూమ్ పట్టుమ్ కి జోవయించి దేసిమచ పట్టుమ్, దస్సి లట్టతతి.

26 గని జేవ్ మొత్తమ్ జన్ తె ఎక్కితె కి దేముడు ఏలీయాక తోడు తెద్రయె నాయ్. సీదోసు ప్రాంతుమ్ చి సారెపతు గవ్వెచ్చి * రండెలి ఎక్కితె జోక తోడు తెద్రయ్ లో.

27 పడ్డో, దేముడుచ కబుర్లు సంగిలో ఎలిషాచి కాలుమ్ అమ్చ ప † ఇప్రాయేలులతె వెల్లి రోగుమ్ దెర్ల మాన్సుల్ ఒగ్గర్ జన్ తిల. జలె, జోవయింతె కో కి చెంగిల్ జతి నాయ్. గని సిరియ దేసిమ్చో అమ్చో యూదుడు నెంజిలో ‡ నయమానుయి చెంగిల్ జలో; యేసు సంగిలన్.

28 జలె, యూదుల్క నాయ్, గని వేర్ దేసిమ్చక దేముడు చెంగిల్ కెరయ్ లిన్ చి రిసా యేసు సంగిలిసి నూన కెర, జా నబ గెరితె తిల యూదుల్ ఎత్తిజిన్ క ఒగ్గర్ కోప్పుమ్ అయ్ లి.

29 జేవ్ ఉట్ట జా, యేసుక పట్టుమ్ తెంతో ఉదడ కెర, జోవయిం చి పట్టుమ్ టీవెలి మెట్టచి కొసా ఎద ఉదడ; ' ఒత్త తెంతో గలి జప్పన్' మెన సీడయ్ తి రిసా,

30 గని యేసు ప్రమాదుమ్ నే జతె జోవయిం చి నెడిమి తెంతో బార్ జా జో గెచ్చుక ఉచర్లె వాట్ క గెలన్.

కపెర్నహూమ్ పట్టుమ్ చి నబగేరిత యేసు
(మార్కు 1:21-28)

31 తెదొడి జా గలిలయ ప్రాంతుమ్ చి కపెర్నహూమ్ పట్టుమ్ తె యేసు ఉట్ట గెచ్చ, సెలవ్ కడన్లి దీసి మెన, నబగేరి గెచ్చ జా పట్టుమ్ చి యూదుల్క బోదన కెర్లన్.

32 దేముడు దిలి అదికారుమ్ కొల్లి బోదన కెరె తతికయ్, జూబ్ ఆచారిమ్ జలె.

33 జలె, జేవ్ తిలి నబ గెరి బూతుమ్ దెర్లొ ఎక్కిలో తిలో. జో జలె, గట్టిజ అవాడ్ కెరన కిచ్చి మెన కేక గలన్ మెలె,

34 "ఓ నబరెతు గవ్వెచ్చో యేసుప్రబు, అమ్ చి తెన్ తుక కిచ్చో? అమ్ క పాడ్ కెరుక జా అస్సిన్ గె? తుయి కొన్సొ గే ఆవ్ జాని. తుయి దేముడుచి కీసుద్ది తిలోసా తుయి, అమ్ క ములు" మెన కేక గల సంగిలో.

35 యేసు, జలె, "తుక్కె తా ఇన్నెక ముల దా గో!" మెన జో మాన్సుక దెర్లి బూతుమ్ గోల కెర్లన్. గోల కెర్లికయ్, ఎత్తిజిన్ చి నెడిమి బూతుమ్ జో మాన్సుక సేడవ దా, జోక ప్రమాదుమ్ నే కెరె జోతె తెంతో బార్ జలన్.

36 జర్ల జలిసి ఎత్తిజిన్ దెక ఎక్కిలోక ఎక్కిలో, "ఇన్నెచి కోడు కిచ్చి అదికారుమ్ చి? బూతల్ క గో! మెన ఆడ్ర దెతయ్, చి జేవ్ బార్ జా గెతతి" మెన ఆచారిమ్ జా సంగిల.

37 జా దీసి తెంతో ఒండి ప్రాంతుమ్ తె జో కెర్ల కమెచి రిసా జాన్ల.

పేతురుచి అత్తన్ క యేసు చెంగిల్ కెర్లిసి
(మత్త 8:14-17; మార్కు 1:29-34)

38 జలె, యేసు ఉట్ట నబ గెరి తెంతో బార్ జా సీమోసుచి గెరి గెలన్. జలె, సీమోసుచి అత్తన్ క జోర్లొ తా ఆగ్ ఒగ్గర్ తాత్ తతికయ్, జాక "చెంగిల్ కెరు" మెన జేవ్ బతిమాలూ జా సంగిల, చి

39 యేసు జాచి పాసి టీవ్ జోర్లొక గోల కెర్లికయ్, జోర్లొ చట్టున గెలి, చి బేగి జా ఉట్ట కెర, జేవ్ క నవ్రెచన కెర్లి.

40 జా నంజె పొద్దు గెతె తతికయ్, కచ మాన్సుల్ క కిచ్చి కిచ్చి జోర్లొల్ తిల గే, యేసుతె జోవయిం క కడ ఆన్ల, చి జోవయింతె ఎత్తి మాన్సుక చడ, చెంగిల్ కెర్లన్.

41 అన్నె, ఒగ్గర్ జన్ మాన్సుల్ తెంతో బూతల్ బార్ జా, "తుయి, దేముడుచో పుత్తుసి." మెన కేక గల. గని జేవ్ బూతల్ క యేసు గోల కెర్లన్, అన్నె జేవ్ లట్టబుక సెలవ్ దెయె నాయ్. కిచ్చొక మెలె, జోక * 'క్రీస్తుయి' మెన జేవ్ జాన్లి రిసా.

యేసు కపెర్నహూమ్ పట్టుమ్ ములిలిసి
(మార్కు 1:35-39)

* 4:26 4:26 జా రండెల్ మాన్సుక కతిసి నెంజికయ్, ఏలీయా ప్రార్లన కెర్లొ, చి నరిపుచువ జతిసి ఒత్త తెంతో జేక దెర్లొ. జతె తిలి, చి పుత్తుసి మెర్లికయ్, ఏలీయా ప్రార్లన కెర్లికయ్, జలెన్. 1 రాన్ ల పున్సుకుమ్ 17 అద్యయిమ్. † 4:27 4:27 మెలె 'యూదుల్తె'.

‡ 4:27 4:27 రాన్ ల దొన్చి పున్సుకుమ్ 5 అద్యయిమ్. § 4:34 4:34 దేముడు తెద్రయ్ లొ క్రీస్తు, రచ్చింనువ కెర్లొసా * 4:41 4:41 'క్రీస్తు' మెలె, 'దెర్లొ జలె' రచ్చింనువ కెర్లొసాక తెద్రయిం దె మెన ఎత్తి అదికారుమ్ తిలో దేముడు పూర్ణమ్ తెంతో సంగి తిలోసా.

42 రాత్ పాయితికయ్, యేసు బార్ జా కోయి నెంజిలి టాన్తె గెలన్, గని ప్రెజల్ జోక చజన జోతె అయ్ల, చి “అమ్క ముల దా గో నాయ్” మెన జో ఉట్ట గెచ్చుక అడ్డు కెర్ల దెకిల.

43 జో జోవయింక, “దేముడుచి †రాజిమ్చి రిసాచి ‡సుబుమ్ కబుర్ ఆవ్ అన్నె తిల పట్నాలతె కి సూనపుక అస్సె. ఈంజయి కామ్కయ్ దేముడు అంక తెద్రవ అస్సె.” మెన జబాబ్ దిలన్.

44 జలె, †యూదయ దేసిమ్చ వబ గెరలె బుల బుల యేసు బోదన కెర్తె తిలన్.

5

యేసు ప్రెజల్క బోదన కెర్తెసి

(మత్త 4:18-22; మార్కు 1:16-20)

1 జలె ఏక్ దీసి కిచ్చొ జలి మెలె, యేసు *గెన్నెసరెతు మెంతి గాడు పాసి టీచ తతికయ్, దేముడు దిలి †కోడు సూసుక జోవయింక ఇమ్మమ్ అయ్లి రిసా, ప్రెజల్ బెర జా జోచి ఉప్పిరి డంకి జలె.

2 జలె, గాడు సాడి దొన్ని దోనివొ తిలిసి యేసు దెకిలన్. జాలర్లు జోవయింక జేవ్ దోనివొ తెంతో ఉత్త్రజాత జోవయింక వలల్ దోవితె తిలె.

3 జేవ్ దోనివొతె ఏక్ సీమోసు మెలోసాచి, జో సీమోసుచి దోనితె యేసు వెగ కెర, జోక “ఒడ్డు తెంతో దోని ఇదిల్ వెలవ దేసు” మెన సంగిలన్, చి వెలవ దెతికయ్, యేసు వెన కెర, దోని తెంతో ప్రెజల్క బోదన కెరుక మెదోల్ కెర్తెన్.

సీమోనీసి ఒగ్గర్ మొస్సు దెర్తి రితి యేసు కెర్లె వెల్లె కామ్

4 యేసు బోదన కెర కేడయ్లి వడ్డె, “దీగు తిలిన్తె తుమ్చ వలల్ గల చి మొస్సు దెర్తె” మెన సీమోనుక సంగిలన్.

5 దస్సి సంగితికయ్, “గురుబాబు, ఒండి నరాతాతి వలల్ గల తిలమ్, గని కిచ్చొ దెరుమ్ నాయ్. గని తుయి సంగిలె, అమ్చ వలల్ గలుమ్దె” మెన సంగ

6 గలిల, చి ఒగ్గర్ మొస్సు వలతె సెడ్డికయ్, వలల్ కుట్టిత్ రితి జలె.

7 అన్నెక్ దోనితె తిల జోవయింక గోతునుదల్క “తుమ్ తోడు జా” మెన నయన్ కెర్లె. జేవ్ తోడు అయ్ల, చి జేవ్ దొన్ని దోనివొ బెర్తు బెరయ్ల, చి దోనివొ బుడ్డుక దెర్లె.

8 జల్లు జలిసి జో సీమోసు పేతురు దెక కెర, యేసుచి చట్టె నెర్ను నేడ, “ప్రబువ, అంక ముల దా ఉట్ట గో, ఆవ్ పాపుమ్ సుదో” మెన సంగిలన్.

9 కిచ్చొక మెలె, జేవ్ దెర్ల మొస్సుచి కోట్టె ఎదివాట్ మెన దెక కెర, జో కి, జో తెన్ తిలన ఎత్తిజన్ కి ఒగ్గర్ ఆచారిమ్ జలె.

10 దస్సి సీమోసు మొస్సు దెర్తె జట్టుచ జెబెదయిచ పుత్తర్లు యాకోబు చి యోహాను కి, జో తెన్ ఆచారిమ్ జలె. యేసు, జలె, “తుమ్ బియె నాయ్. అప్పె తెంతో, మాస్సల్ అంక నంపజతి రితి జోవయింక కడ ఆన్త జాలర్లు తుమ్ జస్సె” మెన సీమోనుక సంగిలన్,

11 జలె, దోనివొ ఒడ్డుత ఒగ్గడ ఆన కెర, ఎత్తి ముల దా, యేసుచ సిస్సల్ జంక జోచి పట్టి గెచ్చ, జో తెన్ బులుక దెర్లె.

† 4:43 4:43 ‘ఎత్తి ఆదికారుమ్ తిలో దేముడుచి రాజిమ్’ మెలె, ‘పరలోకుమ్’ ఏక్ అర్దుమ్, గని అన్నె కిచ్చొ మెలె, జో పరలోకుమ్ తెంతో ఏలువ కెర్తెసి. జో ఏలువ కెర్తెసి మెలె, ఉగుమ్ మార్కువ జలితయ్ ఎదార్దుమ్ ఈంజ లోకుమ్తె ఏలువ కెరెదె, గని ముదెకి 1. జోక నంపజలె మార్కువలె పట్టి ఏలువ కెర్తయ్, చి 2. జోచి నెక్తి ఈంజ లోకుమ్తె కామ్ కెర్తయ్. ‡ 4:43 4:43 ‘ఎత్తి ఆదికారుమ్ తిలో దేముడుచి రాజిమ్చి రిసాచి మెలె, జోచి రాజిమ్ పావ జా ఆయ్లిన్చి కబుర్, మత్తయి 12:28, మార్కు 1:15, వడ్డె జో పావల్ చెమెంచువ కెర్తెన్చి కబుర్, యేసుయ దొర్లు జలో రప్పింపవ కెర్తెసా జలిన్చి కబుర్, వడ్డె పరలోకుమ్తె గెతి అవ్కాసుమ్ జో దొర్లు కెర్లె రచ్చునచి రిసాచి కబుర్.

§ 4:44 4:44 ఇన్నె ‘యూదయ దేసిమ్’ మెలె, యూదులచి ఒండి దేసిమ్. మెలె యూదయ ప్రదేసిమ్ కి, సమరయ ప్రదేసిమ్ కి, గలిలయ ప్రాంతమ్ కి మొత్తమ్ బెదయ్లిన్కయ్. జా మొత్తమ్ బెదయ్లిన్కయ్ ‘యూదయ దేసిమ్’ మెన ఇన్నె సంగితయ్ మెన సగముజన్ ఉచర్తె. మత్తయి 4:23-25 దెక, చి మార్కు 1:39, 3:7-10 * 5:1 5:1 ఈంజ గాడుక మత్తయి చి మార్కు రెగిడ్డిన్తె ‘గలిలయ ప్రాంతమ్చి గాడు’ మెంతి. † 5:1 5:1 నెంజిలె ‘సుబుమ్ కబుర్’; మార్కు 1:14. నెంజిలె ‘యేసుచి బోదన’; మత్తయి 4:7.

వెల్లి రోగుమ్ తిలొసాక యేసు చెంగిల్ కెర్తిసి

(మత్త 8:1-4; మార్కు 1:40-45)

12 యేసు ఏక గవ్వె తిలి పొది, వెల్లి రోగుమ్ బెర్తు తిలొ ఎక్కిలొ ఒత్త అయ్లొ, అన్నె, యేసుక దెక నెర్పు సేడ, “ప్రబు, తుక ఇష్టుమ్ తిలె, †తుయి అంక చెంగిల్ కెర సుద్ది కెరుక తెర్సి” మెన బతిమాల్పు జా సంగిలన్.

13 దస్సి సంగితికయ్, యేసు అతు చంపొ కెర జోక చడ, “తుయి చెంగిల్ జంక, అంక ఇష్టుమి. తుచి వెల్లి రోగుమ్ గెచ్చు సుద్ది జా” మెన సంగిలన్, చి బేగి జోచి వెల్లి రోగుమ్ గెలి.

14 యేసు జోక కిచ్చొ ఆత్త దిలన్ మెలె, “కక్క, నంగు నాయ్, గని దేముడుచి గుడితె గెచ్చు, ఒత్త సేవ కెర్తొ పూజరితె గెచ్చు, తుచి అగ్గె చెంగిల్ జలిసి జోక దెకవ, మోసే పూర్ణమ్ సంగిలి రితి, తుయి చెంగిల్ సుద్ది జలిసి ఎత్తిజినక రుజ్జు దెకయ్ తి రితి, ఒత్త కానుక దేసు.”

15 “కక్క, నంగు నాయ్” మెన జో మాన్సుక యేసు సంగ తిలె కి, అగ్గెచి కంట అప్పె అన్నె ఒగ్గర్జిన్ యేసుచి రిసా †సూన్లు, చి ఒగ్గర్జిన్ “యేసుచి బోదన సూనుమె” మెన, “అమ్చ జొర్జొల్ గెచ్చువెదె” మెన బెర జెతె తిలె.

16 గని ఎక్కెక్ సుట్టు యేసు కో నెంజలి టాన్తె గెచ్చు * ప్రార్దన కెరెదె.

ఉట్టుక నెతిర్లొ రోగిక చెంగిల్ కెర్తిసి

(మత్త 9:1-8; మార్కు 2:1-12)

17 ఏక దీసి యేసు బోదన కెర్తె తతికయ్, పరిసయ్యుల్ చి మోసి తెన్ దేముడు దిలి అగ్గుల్ సికడ్డన పాసి వెన తిలె. ఈంజేవ్ గలిలయ ప్రాంతమవ చి యూదయ ప్రదేసిమచి గావ్వొ ఎత్తి తెంతొ చి యెరూసలేమ్ పట్టుమ్ తెంతొ జా తిలె. అన్నె, మాన్సుల్చ జొర్జొల్ బాదల్ జో గెచ్చువుక మెన యేసు దేముడుచి సెక్తి తెన్ తిలొ.

18 జలె, కిచ్చొ జర్గు జలి మెలె, ఓదె, వాతుమ్ జొర్జొ తెన్ తిలొసొ ఉట్టుక నెతిర్లొ మాన్సు ఎక్కిలొక అన్నె మాన్సుల్ అంతుర్నొ తెన్ వయ అన, యేసుతె అన కెర జోచి చట్ట తియ దెంక మెన వాళ్ చజలె.

19 గని జనాబ్ ఒగ్గర్జిన్ బెర తిలి రిసా యేసు తిలి గెరి పెనుక వాళ్ నాయ్ మెన, ఒర్పె వెగ కెర, జో తిలి గదిచి ఉప్పొర్ ఒర్పెచి వెల్లి బొరో కెర, జా బొరో వాళ్ వైజల్చి నెడిమి యేసుచి పుర్తొక జో మాన్సుక అంతుర్నొ తెన్ ఉత్తవ దిలె.

20 జలె, జేవ్ కడ అన్ మాన్సుల్చి జో ఉట్టుక నెతిర్లొ మాన్సుచి నముకుమ్ యేసు దెక కెర, “నేస్సము, తుచి పాపల్ చెమించువ జా అస్సి” మెన జో ఉట్టుక నెతిర్లొ మాన్సుక సంగిలన్.

21 జో దస్సి సంగితికయ్, మోసి తెన్ దేముడు దిలి అగ్గుల్ సికడ్డన చి పరిసయ్యుల్ బమ్మ జా, “ఈంజొ మాన్సు కొన్సొ? ఇని లట్టబ దేముడుచి విలువ కడ పాపుమ్ కెర్తయ్. దేముడుక పిట్టవ కో కి పాపల్ చెమించువ కెరుక నెతిర్తి!” మెన ఎక్కిలొ తెన్ ఎక్కిలొ లట్టబన్.

22 జలె, జేవ్ అన్యూనుమ్ జా లట్టబంతె తిలిసి యేసు పూర్తి జాన కెర, జోవయింక కిచ్చొ జబాబ్ దిలన్ మెలె, “తుమచి పెట్టి కిచ్చొక దస్సి అన్యూనుమ్ తియంతసు?”

23 †తుచి పాపల్ చెమించువ జా అస్సి” మెనుక సుల్లు గే, ‘ఉట్ట ఇండు’ మెనుక సుల్లు గే తుమ్ ఉచర.

24 జలె, †మాన్సు జా జెర్మన్ అయ్లయ్ అంక, ఈంజయి లోకుమెతె కి పాపల్ చెమించువ కెర్తి అదికారుమ్ అన్నె మెన రుజ్జు దెకయిందె, మెన జేవ్క సంగ కెర, ఉట్టుక నెతిర్లొ జో మాన్సుక అన్నె దెక

† 5:12 5:12 జా దేసిమి వెల్లి రోచి వెల్లి రోగుమ్ గెలి, సుద్ది జలన్ మెన తెదొడెచ యూదుల్ సంగితి తెలె. కిచ్చొక మెలె, ఏక మాన్సుక వెల్లి రోగుమ్ తిలె, “జో గవ్వె తంక గారు” మెలి రితి “జోచి జబ్బు దేవ అమ్కయ్ దెరె” మెలి రితి బియ కెర, గవ్వె తెంతొ ఉడదలె. దేముడుచి దయచి రిసా వెల్లి రోగుమ్ పూర్తి గెలి, “అన్నె సుద్ది జల” మెన గవ్వె అన్నె పెనడలె. 17:14చి ఎట్టెచి కోడు కి దెక. § 5:15 5:15

జొయ్యి మాన్సు సూనయ్తె తిలొ. మార్కు 1:45. * 5:16 5:16 దేముడు అబ్బొనచి ఇష్టుమ్ సూనుక మెన, జోచి నెక్తిక అన్నె నెక్తి జంక మెన. † 5:24 5:24 మాన్సు జా జెర్మన్ అయ్లొసొ” మెన బయ్బిల్తె రెగ్గ తిలె, జేవ్చి అర్దుమ్ కిచ్చొ మెలె, ఎత్తి అదికారుమ్ తిలొ దేముడు తెద్రయ్లొ క్రీస్తు రచ్చించువ కెర్తొసొ. పూర్ణమ్ పొది క్రీస్తు రచ్చించువ కెర్తొసొక తెద్రవుక జో సంగ తిలొ, చి సగుమెతె జయి టాలిక జోవయింక ‘మాన్సు జా జెర్మన్ అయ్లొసొ” మెన పూర్ణమ్ తెంతొ రెగ్గ అన్నె. దానియేలు 7:13 దెక.

కెర, అల్లె, తుయి ఉట్ట, తుచి అంతుల్సొ వయన ఇండ గెరి గో మెన తుక ఆవ్ నంగితసి!" మెన యేసు నంగిలన్.

25 బేగి జో మాన్సు, జో ఎంగ్ల తిలిసి ఉక్కుల వయన, దేముడుచి గపురుమ్ సంగ, సంగ గెరి ఉట్ట గెలన్.

26 దస్సి జర్లు జతికయ్, ఒగ్గర్ ఆచారిమ్ జేవ్ ఎత్తిజిన్క దెర్లి, చి "అజి బల్ ఆచారిమ్చి కామ్ దెకిలమ్" మెన దేముడుక గపురుమ్ కెర్ల, చి జోచి సెక్కిచి ఉప్పిర్చి బయిమ్ జోవయించి వట్టి బెర్లి.

లేవీ మెలోసొక యేసు బుకార్లసి
(మత్త 9:9-13; మార్కు 2:13-17)

27 ఇన్సెచి వడ్డి, యేసు బార్ జా ఒత్త తెంతో గెచ్చ, సిన్సు నజితో సుంకరో ఎక్కిలోక దెకిలో. జోచి నావ్ †లేవీ. జో సిన్సు నజిత టాన్తె వెన తిలన్, చి "అంచి పట్టి జా అంచొ సిన్సుడు తుయి జా" మెన యేసు జోక బుకార్లన్.

28 బుకార్లకయ్, సుంకరో జలో జో లేవీ, ఉట్ట జోచి కామ్ ఎత్తి ముల దా, యేసుచి పట్టి ఉట్ట గెలన్.

29 లేవీ యేసుక గెరి కడ ఆన కెర, జోక వెల్లి విందు దిలన్. సిన్సు నజితన చి వేర మాన్సుల్ ఒగ్గర్జెన్ జోవయింతెన్ అన్నిమ్ కంక వెసిల.

30 జలె, పరిసయ్యుల్ చి జోవయింతెన్ బెదిత మోసి తెన్ దేముడు దిలి అగ్గుల్ సికడ్డన జా దెక కెర, "సిన్సు నజితన తెన్ *పాపుమ్ కెర్ల సుదల్ తెన్ తుమ్ కిచ్చొక వెన అన్నిమ్ కత్తను?" మెన యేసుచి సిన్సుల్క గోల కెర్ల.

31 దస్సి జతికయ్, యేసు జేవ్క కిచ్చొ నంగిలన్ మెలె, "జబ్బు తెన్ అన్సుమ్ మెన చినన్లన డాక్టర్ అవ్సరుమ్, గని జబ్బు నెంజలనక డాక్టర్ అవ్సరుమ్ నాయ్.

32 జలె, 'పాపుమ్ కెర్లొసా అమ్' మెన చినంతనక 'జోవయించి పాపుమ్చి రిసా దుకుమ్ జా ముల దెతు', మెన జోవయింకయ్ బుకారుక మెన అయ్లయ్ గని 'పాపుమ్ కెర్లొసా నెంజమ్, అమ్క వున్నిమ్' మెన ఉచరంతనక బుకారుక నాయ్" మెన జోవయింక యేసు నంగిలన్.

చువ్వె తతిన్చి రిసా యేసుక పుసిలిసి
(మత్త 9:14-17; మార్కు 2:18-22)

33 జలె, సగుమ్జెన్ మాన్సుల్ యేసుక, "యోహోనుచ సిన్సుల్ చువ్వె తా ప్రార్లన కెరుక అలవాట్. పరిసయ్యుల్చి సిన్సుల్ కి దస్సి కెరుల, గని తుచయ్ సిన్సుల్ కంక పింక జతతి" మెన అన్మానుమ్ తెన్ పుసిల.

34 యేసు జోవయింక ఇసి నంగిలన్. "కేన్ పెండ్లితె, జోవయించి నెడిమి పెండ్లిఉబేడో తిలె పొది పెండ్లి విందుక బుకార్లన చువ్వె తతి రితి కెరుక జయెదె గె?

35 జలె, పెండ్లిఉబేడచి వచ్చెన జలనచి నెడిమి తెంతో జోక †దెర వేరతె కడ నిలె, జేవ్ దీసల్క జోచ మాన్సుల్ ఏడ ఏడ చువ్వె తవుల" మెలన్.

36 యేసు జోవయింక అన్యెక్ టాలి కి నంగిలన్. కిచ్చొ మెలె, "నోవి పాలుమ్ తెంతో గండ చిర పొర్ని పాలుమ్తె మాసిక గల్లి నాయ్. దస్సి కెర్లె, జా నోవి పాలుమ్ చిరి జా తయెదె, చి జా గండ పొర్ని పాలుమ్ తెన్ బెది నాయ్.

37 పట్టొ జలె, ఒత్త నోవి ద్రాచ రన్సుమ్ పొర్నిచి కాయ తెన్ కో సువితి నాయ్. కిచ్చొక మెలె, జా కాయ పొర్ని జలి రిసా దస్సితె నోవి ద్రాచ రన్సుమ్ సువిలిగిన, జా కాయ పులక నెత్తెచి రిసా జా రన్సుమ్ పొంగువ జలె పొది జా కాయ పుట్టెదె. పుట్టెలె, జా రన్సుమ్ సూయె జయెదె, చి కాయ కి పోడే జా గెచ్చెదె.

‡ 5:27 5:25 మార్కుతె కి జోక 'లేవీ' మెన రెగ్ల అన్సు. జోచి అన్యెక్ నావ్ 'మత్తయి'; మత్తయి 10:3. § 5:30 5:30 సిన్సు నజితనక, అన్సె యూదుల్ నిస్కారుమ్ దెకితె తిలె. కిచ్చొక మెలె, జోవయింక ఆక్రమించువ కెర్ల రోమ్ దెనిమ్చి ప్రబుతుమ్చి సేవ కెర్లె తిలె, వడ్డి సిన్సుచి దాన్సుల్ నజితె పొది, నాయ్చి కంక అన్సె నజితె తిలె. తెదోడేచ యూదుల్ 'అమ్క సితి, చి వేర జాతిపోక నాయ్' మెనలె. రోమ్ దెనిమ్చి వచ్చెన యూదుల్ నెంజతి, చి సిన్సు నజిత సుంకర్ల యూదుల్ నెంజలనచి సేవ కెర్లె తిలె. జాకయ్ యూదుల్ జోవయింక నిస్కారుమ్ దెకితె తిలె. * 5:30 5:30 'పాపుమ్ సుదల్' మెన కిచ్చొక నంగిల మెలె, జేవ్ పండితుల్ సికడ్డి నీతి నే కెరంతనక దస్సి నిస్కారుమ్ దెకుల. జోవయింతె సగుమ్జెన్ నిజయి ఎత్తి అదికారుమ్ తిలో దేముడు 'పాపుమ్' మెంత కమ్మక అలవాట్ జా తవుల, గని సగుమ్జెన్ ఎక్కి వండితుల్చి కోడు పిట్టియతతి. † 5:35 5:35 'పెండ్లిఉబేడో' మెన జోవయించి రిసా జోయ్యె టాలి నంగితయ్. జోవయింక వడ్డిక విరోదుమ్ సుదల్ దెర మారుల, గెద.

38 నోవి ద్రాచ రస్సుమ్ నోవి కాయల్తె నువుక అన్సు.

39 అన్సె, తోలితో పొర్ని ద్రాచ రస్సుమ్ పియ తిలె, నోవి ద్రాచ రస్సుమ్క కోరవ జతి నాయ్. కిచ్చొక మెలె, 'నోవిచి కంట పొర్నిచి చెంగిలి' మెనుల" మెన యేసు టాలి నంగ బోదన కెర్తన్.

6

విస్రాంతి దీసి సిస్సుల్ కెర్తన్చి రిసా పండితుల్ గోల కెర్లిసి

(మత్త 12:1-8; మార్కు 2:23-28)

1 ఏక్ సెలవ్ కడన్లి దీసి, *యేసు జోవ సిస్సుల్ తెన్ పంటో పికిలి బుయి వాట్ గెతె తా, వాట్ సాడి తిల ఎన్నులె దొన్ని జోవయింబ సిస్సుల్ కోడ అత్తో తెన్ రెగ్ల చొచ్చు జేడవ కతె తిల.

2 జలె, పరిసయ్యుల్ సగుమ్జన్ పాసి తా యేసుచ సిస్సుల్ కెర్లిసి దెక కెర, "జేవ్ దస్సి కెర్లిసి 'కామ్ కెర్లి రితి జతయ్' మెన, ఈందె, సెలవ్ కడన్లి దీసి కెరుక నాయిమ్ నెంజిలిసి తుమ్ కిచ్చొక కెర్తను?" మెన జోవయింబ గోల కెర్ల.

3 జలె యేసు జేవ్క కిచ్చొ జబాబ్ దిలన్ మెలె, "పూర్గుమ్ తిలో దావీదు రాసో, జోక, చి జో తెన్ తిలనక కి చూ కెర్లికయ్, జాచి రిసా కిచ్చొ కెర్ల గే, కెయె తుమ్ నదు కెర్చు నాయ్ గే?

4 కిచ్చొ కెర్లిసి మెలె, దావీదు దేముడుచి గుడితె పెన కెర, ఒత్త తిల పూజర్లు దేముడుక అర్పితుమ్ దిల పోడియె వెంటన, జేవ్ పోడియె పూజర్లుయి కంక జయెదె గని అన్సు కో కంక జయె నాయ్ మెన జాన్లె కి, జేవ్ పోడియె వంట దా, దావీదు కి జో తెన్ తిలన కి నాయిమ్ నెంతె కి కయెల." మెలన్.

5 తెదోడి జోవయింబ అన్సె, "సెలవ్ కడన్లి దీసిచి ఉప్పిరి †ఆవ్ మాన్సు జా జెర్మన్ అయ్లోసాక అదికారుమ్ అన్సె" మెన జేవ్ పరిసయ్యుల్క సంగిలన్.

అతు లంబ గెలో మాన్సుక యేసు చెంగిల్ కెర్లిసి

(మత్త 12:9-14; మార్కు 3:1-6)

6 అన్సెక్ సెలవ్ కడన్లి దీసి యేసు జా వట్సుమ్తెచి యూదుల్చి నబ గెరి గెచ్చు పెన బోదన కెర్తె తతికయ్, ఒత్త ఉజిల్ అతు లంబ గెలో మాన్సు ఎక్కిలో తిలో.

7 జలె, మోసే తెన్ దేముడు దిలి అగ్గుల్ సికడ్డన చి పరిసయ్యుల్ యేసుక చెంగిల్ దెకితె తిల. కిచ్చొక మెలె, "సెలవ్ కడన్లి దీసి యేసు జో మాన్సుక చెంగిల్ కెరెదె గే నాయ్ గే" మెన దెకుక మెన, రకితె అన్సి. "జోక చెంగిల్ కెర్లిగిన, సెలవ్ కడన్లి దీసి కామ్ కెర్లి రితి జయెదె, చి యేసుక నేరిమ్ వయడుక జయెదె" మెన ఉచర అన్సి.

8 గని జేవ్చి మెన్సుతె ఉచర్లిసి యేసుక ఎర్కె, చి అతు లంబ గెలో జో మాన్సుక కిచ్చొ మెలో మెలె, "ఇత్తల్ జా ఎత్తిజన్ దెకిత్ రితి నెడిమి టీచ." మెలన్, చి జో ఉట్ట ఒత్త టీచిలన్.

9 తెదోడి యేసు జేవ్క, "సెలవ్ కడన్లి దీసి ఎక్కిలోక చెంగిల్ కెరుక గే కస్టుమ్ కెరుక నాయిమ్? జోవయింబి ప్రానుమ్ రచ్చింబువ కెరుక గే పాడ్ కెరుక నాయిమ్?" మెన సంగిలన్.

10 నుట్టునంత అంకి గల జోవయింతె ఎత్తి మాన్సుక చెంగిల్ దెక కెర, అతు లంబ గెలో మాన్సుక దెక, "తువో అతు చంపొ కెరు" మెన సంగిలన్, చి యేసు సంగిల్ రితి జో మాన్సు కెర్లికయ్, జోచో అతు చెంగిల్ జలి.

11 పరిసయ్యుల్ చి మోసే తెన్ దేముడు దిలి అగ్గుల్ సికడ్డన జర్లు జలిసి దెకిలె, జోవయింబ ఒగ్గర్ కోవుమ్ అయ్లి, చి "యేసుక కీసి ‡కెరుమ?" మెన ఎక్కిలో తెన్ ఎక్కిలో లట్టబన్ల.

* 6:1 6:1 యూదుల్చి అలవాట్ తెన్, సత్తరెక్కి సత్త దీసల్ కిచ్చొ కామ్ నే కెర్తె దేముడుక జోకర్లి దీసి. విస్రాంతి దీసి-తెలుగు. ఎత్తి నెన్యర్ యూదుల్క బక్తి కెర్లి సెలవ్ కడ దీసి జయెదె. జా దీసి జోవయింబ నబ గెరెలె గెచ్చు, దేముడుచి కొడో నూన కెర, ఎత్తి అదికారుమ్ తిలో దేముడుక బక్తి కెరెల. జోక 'యెహోవ' మెన నావ్ తయెదె. జా దీసి 'కిచ్చొ కామ్ కెర నాయ్' మెన జో ఎత్తి అదికారుమ్ తిలో దేముడు సంగిలిక యూదుల్చ వెర్లిల మాన్సుల్ ప్రజల్క జాడు వయ్లి రితి కెర కామ్ నే కెర్తన్చి రిసా ఒగ్గర్ అగ్గుల్ అవ్వు ఉచర అన్సి. ఇన్సె, దొన్ని ఎన్నులె కోడ్డినక 'కామ్' మెన నింద కెర్తె. † 6:5 6:5 5:24చి ఎట్టెచి కోడు దెక. ‡ 6:11 6:11 నెంజిల 'మారుమ'. మార్కు 3:6, చి మత్తయి 12:14 దెక.

యేసు బారజినీ సిస్సుల్క నిసాన్సి
(మత్త 10:1-4; మార్కు 3:13-19)

12 జలె, కిచ్చొ జలి మెలె, జేవ్ పొదులె ఏక్ దీసి, ప్రార్దన కెరుక మెన యేసు బార్ జా డొగ్రె గెలన్. జో ఒండి సరారాతి ఒత్త ప్రార్దన కెర్తె తిలో.

13 జలె, రాత్ పాయితికయ్, యేసు జోవయించ సిస్సుల్క బుకారా కెర, జోవయింత బారజినీక నిసాన, ఈంజేవ్ బారజినీక 'సిబారికుల్' మెన నావ్ తిలన్.

14 జేవ్ కో కో మెలె, ఎక్కిలో సిమోసు మెలోసా. జోక 'పేతురు' మెన యేసు అన్యెక్ నావ్ తిలన్. పడ్డె పేతురుచో బావోసి అంద్రెయ. ఒత్త తెంతో యాకోబు చి యోహాను. ఒత్త తెంతో పిలిప్ చి బర్దొలోమయి.

15 పడ్డె * మత్తయి చి తోవూ. ఒత్త తెంతో అల్పయిచో పుత్తుసి యాకోబు, పడ్డె † నాంత దేసిమ్ ఏలువ కెరంత ఆస తిలో సిమోసు మెలో అన్యెక్కో,

16 యాకోబుచో పుత్తుసి యూదా. పడ్డె ఇస్కరియోతు మెలి గెవ్విచో యూదా మెలోసా. ఈంజో యూదా పడ్డె యేసుక దెర విరోడుమ్ సుదల్చి అత్తి దిలో.

యేసు బోదన కెర కక్క, చెంగిల్ కెర్తిసి
(మత్త 4:23-25; 5:1-12)

17 జలె, యేసు జో నిసాన్ బారజినీ తెన్ డొగ్రె తెంతో ఉత్త జా, సదూనుమ్ తిలి ఏక్ టాంతె టీవెలి. చి జోచ అన్యె సిస్సుల్ జో తెన్ తిల, చి † ఒండి యూదయ దేసిమ్చ మాన్సుల్, యెరూసలేమ్ పట్టుమ్చ మాన్సుల్, వెల్లి నముద్దుమ్చి పాసి తిల తూరు చి సీదోను పట్టల్చ మాన్సుల్ ఒగ్గరిజినీ ఒత్త తిల. ఈంజేవ్ జోచి బోద సూసుక చి "అమ్చ జొర్డొల్ గెచ్చవెదె" మెన జా తిల.

18 యేసు బూతల్ ఉదడ, బూతల్ దెర్ల మాన్సుల్క చెంగిల్ కెర్తె.

19 ప్రైజల్ ఎత్తి యేసుక చడుక మెన అత్తో చంపొ కెర్తె తిల. కిచ్చొక మెలె, జోక చడిలె, జోతె తెంతో నెక్తి జెయెదె, చి జా నెక్తిచి రిసా చెంగిల్ జవుల. జోక చడ్డన ఎత్తిజినీ దన్సి చెంగిల్ జల.

కిన బుద్దుల్చ మాన్సుల్క చెంగిల్ తయెది

20 యేసు జోచ సిస్సుల్ జల మాన్సుల్క చెంగిల్ దెక ఇసి మెన సంగిలన్.

"బీద సుదల్ తుమ్క చెంగిలి. కిచ్చొక మెలె,

దేముడుచి రాజిమ్తె తుమ్క సివాట తయెది.

21 తుమ్ అప్పె చూ జలనక చెంగిలి. కిచ్చొక మెలె, పడ్డొక

తుమ్క సరిపుచువ జతిసి దొర్కు జయెదె.

తుమ్ అప్పె ఏడ్డనక చెంగిలి. కిచ్చొక మెలె,

పడ్డొక సర్దక ఆన్డె.

22 "పడ్డె, * ఆవ్ మాన్సు జా జెర్మన్ అయ్లోసొక తుమ్ నంప కెర్తి రిసా మాన్సుల్ తుమ్క విరోడుమ్ దెకిలె, తుమ్క అమ్చి తెన్ బెదుత్ నాయ్ మెన సంగిలె, తుమ్క దూసువ కెర్తె. పడ్డె జోవయింక నంపజా గార్ జల, చి జోవయించి నావ్ కి సంగుక నెంజె, మెన తుమ్చి రిసా మాన్సుల్ సంగిలె, తుమ్క చెంగిలి.

23 దన్సి జర్గు జతి దీసిక సర్ద సంతోసుమ్క తుమ్ నచ్చు. కిచ్చొక మెలె, ఈందె, పరలోకుమ్తె తుమ్క వెల్లి బువుమానుమ్ దొర్కు జయెదె. తుమ్కయ్ మాన్సుల్ కీస అల్లర్ కెరుల గే అగ్గెయ్ దేముడుచ కబుర్లు సంగిలనక కి, జేవ్క అబ్బుదింసి దనయ్ అల్లర్ కెర్తె." మెన యేసు సంగిలన్.

ఆకర్క కక్క, నస్తుమ్ తయెది గే యేసు సంగిలిసి
తెదోడి యేసు అన్యె,

§ 6:13 6:13 నెంజెలె 'ఆవ్ తెర్తయలన'. గ్రీకు మెలి ఈంజ ఎత్తి తొలితొ రెగిడ్డి బాస తెన్ 'తెర్తయలన' మెలి అర్దుమ్ తయెది. * 6:15 6:15 జోవయించి అన్యెక్ నావ్ 'పేవె' గెద. 5:27 దెక. † 6:15 6:15 రోమ్ దేసిమ్చి ప్రబుతుమ్ తెదోడి జోవయింక ఏలువ కెర్తె తిలన్, గెద. ‡ 6:17 6:17 ఇన్యె 'ఒండి యూదయ దేసిమ్' మెలె, ఏక్ వేల యూదుల్చి ఒండి దేసిమ్క సంగితయ్. మెలె, గలిలయ ప్రాంతుమ్, నమరయ ప్రదేసిమ్, చి యూదయ ప్రదేసిమ్ మొత్తుమ్ బెదయ్లిసి. § 6:20 6:20 లూకా 22:29, 30 దెక. * 6:22 6:22 5:24 చి ఎత్తిచి కోడు దెక.

24 “అబ్బువోమ్ము! తుమ్ అప్పె సొమ్మారుమ్ తిలసక కెడ్డి నస్తుమ్ జెయెదె!
కిచ్చొక మెలె, ఈంజయ్ లోకుమ్చి రగుమ్చి నుక్కుమ్ పూర్తి దొర్కు కెరన అస్సున్

ఈంజయ్ లోకుమ్తె.
25 అబ్బువోమ్ము, తుమ్ అప్పె ఈంజ లోకుమ్తె వెణ్ణి బెరవన్లన,
తుమ్ కెడ్డి నస్తుమ్ జస్తె!

తెదొడక చూ జస్తె.
అబ్బువోమ్ము, తుమ్ అప్పె ఈంజ లోకుమ్తె ఆచ్చన,
తుమ్ కెడ్డి నస్తుమ్ జస్తె!
తెదొడక ఏడ్డె, ఏడుకుడు జస్తె.

26 అబ్బువోమ్ము,
ఈంజేవ్ చెంగిల మాన్సుల్ మెన తుమ్చి రిసా ఎత్తిజిన్ సంగిలె,
తుమ్క కెడ్డి సంతోసుమ్ జెయెదె! కిచ్చొక మెలె,
తుమ్క ఈంజేవ్ కిసి అప్పె దస్సి సంగితతి గే,
దేముడుచ కబుర్లు సంగితసుమ్
మెన అబద్ధుమ్క సంగిల పూర్తులక
ఇనయించ అబ్బుదింసి దస్సి కెర,”
మెన సంగిలన్.

విరోదుమ్ సుదల్క ప్రేమ కెర్తినచి రిసాచి తీర్పు
(మత్త 5:38-48; 7:12)

27 ఒత్త తెంతో యేసు అన్నె, “తుమ్ సూన్తనక ఆవ్ కిచ్చొ మెంతసి మెలె, తుమ్చ విరోదుమ్ సుదల్క తుమ్ ప్రేమ కెర్తె తా, చి తుమ్క విరోదుమ్ కెర్తనక చెంగిల్ దెకితె తా.

28 తుమ్క సాపెనల్ దెతనక, దేముడు జోవయింక చెంగిల్ దెకున్.” మెన తుమ్ ఇష్టుమ్ జా, చి తుమ్క దూసువ కెర్తనచి రిసా ‘చెంగిల్ తత్తు’ మెన తుమ్ ప్రార్థన కెర.

29 తుమ్చితె ఎక్కిలోక జవున్ కో జలెకు అన్నెక్లొ గలి పెట్టెగిన, దెబ్బ కయ్లోసా తుక్లె తా, జోచి అన్నెక్ గలి కి జో అన్నెక్లొ వెటతి రితి, జోచి పక్క పనులవున్. అన్నె, తుమ్చితె ఎక్కిలోచి కోటు జవున్ కో జలెకు అన్నెక్లొ దెరన గెలె, జోచి సొక్క కి ఈంజో అన్నెక్లొ దెర గెతి రితి జో అడ్డు కెర్పు నాయ్.

30 తుమ్చితెకో జలెకి కిచ్చొ జవున్ నజిలె, దెంక. అన్నె, తుమ్చితెవో కేన్ జవున్ మాన్సుచి సామన్ అన్నెక్లొ దెర గెలె, జో సంతోసుమ్ జలొసా “అంచి వస్తువ అంక దె” మెన జోచి సామన్ అన్నె నజన్సు నాయ్.

31 మాన్సుల్ తుమ్క కిసి కెరుక మెన తుమ్ ఇష్టుమ్ జస్తె గే, తామ్ కి జోవయింక దస్సి చెంగిల్ కెర.

32 “ఎక్కి తుమ్క ప్రేమ కెర్తనకయ్ తుమ్ ప్రేమ కెర్తెగిన, అన్నె మాన్సుల్క నాయ్ మెలె, తుమ్క కిచ్చొ పున్నిమ్ జా? పాపుమ్ సుదల్ కి జోవయింక ప్రేమ కెర్తనక ప్రేమ కెరుల.

33 తుమ్కయ్ చెంగిల్ దెకితనకయ్ చెంగిల్ కెర్తనక, అన్నె వేర మాన్సుల్క నాయ్ మెలె, జయి తుమ్క కిచ్చొ పున్నిమ్? పాపుమ్ సుదల్ కి దస్సి కెరుల, గెద.

34 తుమ్క పూర్తి అన్నె దెంక నెక్కి తిలసకయ్ తుమ్ కిచ్చొ జవున్ తోడు దెలె, అన్నె మాన్సుల్క నాయ్ మెలె, జయి తుమ్క కిచ్చొ పున్నిమ్? తెద్దిలె అన్నె నజితి రితి పాపుమ్ సుదల్ కి ఒప్పన పాపుమ్ సుదల్క తోడు దెవుల.

35 “తామ్, జలె, తుమ్చ విరోదుమ్ సుదల్క ప్రేమ కెర, చి ఎత్తిజిన్క చెంగిల్ దెక, చి కిచ్చొ అన్నె దొర్కు కెరనుక ఆన నే జతె, మాన్సుల్క తోడు దాన. తుమ్ ఇసి బుద్ది ఇండెలె, తుమ్క వెల్లి బప్పమానుమ్ దొర్కు జయెదె, చి ‘ఎత్తిచి ఉప్పిరి తిలొ’ దేముడుచ పుత్తర్లు ఈంజేవ్’ మెన తుమ్చి రిసా రుణ్ణు జెయెదె. కిచ్చొక మెలె, ఎక్కి జోచి దయ ఒప్పనతనకయ్ మెన నాయ్, గని అన్నె జో కెర్లి దయ నే ఒప్పన్లనక కి, ఏక్ జోవయింకయ్ జెచ్చొ దెకన్తనక కి, జో ఎత్తి అదికారుమ్ తిలొ దేముడు సొంత దయ దెకితయ్.

36 జో పరలోకుమ్ తిలో అబ్బొసి జలో దేముడు మాన్సుల్క కీసి కెద్ది కన్కారుమ్ దెకితయ్ గే, తుమ్ కి అన్నె మాన్సుల్క కన్కారుమ్ దెక.

మాన్సుల్క తీర్పు కెర్తిది రిసా సంగిలిసి
(మత్త 7:1-5)

37 “అన్నె మాన్సుల్క కున్సిదుమ్చ తీర్పుల్ తుమ్ ఉచర నాయ్, చి దేముడు తుమ్కయ్ తీర్పు కెర సిచ్చ కెరుక నాయ్. అన్నె మాన్సుల్క నేరిమ్మల వయడ నాయ్ చి, దేముడు తుమ్కయ్ నేరిమ్ వయడుక నాయ్. అన్నె మాన్సుల్క చెమించుప కెర చి, దేముడు తుమ్కయ్ చెమించుప కెరెదె.

38 అన్నె మాన్సుల్క తోడు దాన చి, దేముడు తుమ్కయ్ తోడు దెయెదె. కీసి దెయెదె మెలె, చెంగిల్ మీన, గట్టిజ పెల, దున్నోవ, పూర్తి బెరవయ్, తుమ్చి ఒట్టి నువ దెయెదె. తూమ్ అన్నె మాన్సుల్క కీసి మీన తన్నె గే, ఎత్తి అదికారుమ్ తిలో దేముడు తుమ్కయ్ దస్సి మీన దెయెదె.” మెన యేసు ఒత్త బెర తిలసక సంగిలన్.

39 తెదొడి యేసు ఈంజ టాలి సంగిలో. కిచ్చొ మెలె, “కేన్ జవున్ గుడ్డి నుదొ అన్నెక్కో గుడ్డి నుదొక వాల్ దెకవుక నెత్తె, గెద! వాల్ దెకవుక దెర్లె, జేవ్ దొగుల కి కేన్ జవున్ గొయిత సీడుల.

40 సిన్సుడు జోచొ గురుచి కంల వెల్లొ నెంజె, గని జో గురుచి లెక పూర్తి సికిలో సిన్సుడు, జోచొ గురుచొ రిత్తొ జా తయెదె.

41 “తుమ్చితె ఎక్కిలోచి అంకితె ఏక్ చిల్ప బెర తిలెగిన, బావొచి అంకితె ఇదిలిదిల్ తొక్కు సేడ తిలెగిన, అంకితె చిల్ప తిలోసా కిచ్చొక జోచి బావొచి అంకితె తిలి ఇదిలిదిల్ తొక్కు దెకితసి, గని సొంత అంకితెచి చిల్పక ‘అస్సె’ మెన దెకిన్ నాయ్?

42 నెంజెలి, అంకితె చిల్ప తిలోసా కో జెలెకు, జోచి సొంత అంకితెచి చిల్ప నే దెకిలె, బావొ, తుచి అంకితెచి తొక్కు కడిందె మెన తుచొ బావొక తుయి కీసి సంగుక జయెదె! తుయి ఉప్రమెన్సుచొ, తొలితొ తుచి సొంత అంకితెచి చిల్ప కడను, చి తెదొడెకయ్ తుచొ బావొచి అంకితెచి తొక్కు కడితి రితి బేంబ దెకితె.

చెంగిలో రూకు మెన చి గర్బొ రూకు మెన టాలి

43 “కేన్ చెంగిలో రూకు జలెకు గర్బొ పండ్లు దెరె నాయ్, చి గర్బొ రూకు చెంగిల్ పండ్లు దెరె నాయ్.

44 రూకుక చెంగిలోచొ గే గర్బొ గే చినుక జలె, జో దెర్ల పండ్లుక దెకిలె డీసెదె. కంల రూక్తె† అంజూరుమ్ పండ్లు కోడుక నెంజె, దుబ్బొలతె ద్రాచ పండ్లు కోడుక నెంజె, గెద!

45 చెంగిలో మాన్సు జోపయింబి పెట్టిచి చెంగిల్ బుద్ది బెర్తుచి కెద్ది చెంగిల్ బుద్దిచ కొడొ లట్టబెదె. గర్బొ మాన్సు, జలె, జోచి పెట్టిచి విన్సుమచి బెర్తుచి గర్బొ కొడొ లట్టబెదె. జోచి పెట్టి కేన్ రగుమ్చి బెర్తు జా తిలె, జయ్యి జోపయింబి చోడి లట్టబెదె.

చెంగిల్ పునాదితె బందిలో గేరుక టాలి
(మత్త 7:24-27)

46 “ ‘ప్రబు, ప్రబు’ మెన అంక కిచ్చొక సంగితసు? అంక దస్సి సంగితసు, గని అంబి కోడు రితి ఇండున్ నాయ్.

47 కో అంబితె ‡జా కెర అంచ కొడొ నూన అంబి కోడు రితి ఇండుల గే కీన జవుల గే ఏక్ టాలితె సంగిందె.

48 దసా మాన్సు కీసా జయెదె మెలె, గేరు బందిలో ఏక్ మాన్సు దీగుక గొయి కూన కెర, రెంగ్గిచి ఉప్పిరి పునాది గల కెర జా పునాదిచి ఉప్పిరి గేరు బందిలో. జలె, పాని గట్టిజ పెల, బూరుమ్ జా జో గేరుచ కుడ్డిలె జా బూరుమ్ కెర్లల్ జా గట్టిజ లయితె తిలె కి, జా గేరు చెంగిల్ డిట్టుమచి పునాదితె తిలి రిసా, ఎదిలి కి కదుల్ జయె నాయ్.

49 గని అంబి కోడు నూన్లె కి కీ కెర్తి నాయ్ గే కీసి జవుల మెలె, జో మాన్సు పునాది నే కెర్తె, రితి మత్తిచి ఉప్పిరి గేరు బందిలో, చి పాని పెల బూరుమ్ జా అయ్లె, గేరుచి కుడ్డి బూరుమ్ కెర్లల్ జా అయ్లె బేగి జా గేరు సీడ్లి, చి జా గేరు పూర్తి నాసెనుమ్ జా గెలి” మెన యేసు బోదన కెర్లన్.

† 6:44 6:44 అంజూరుమ్ పండ్లు బొడ్డ పండ్లు రిత జవుల ‡ 6:47 6:47 మెలె, ‘కో అంక నంప కెర...’

7

*పుంజెకజీన్ జమాన్లుక వెల్లోచొ గొత్తి సుదొక యేసు చెంగిల్ కెర్లిసి
(మత్త 8:5-13; యోహా 4:43-54)

1 ఈంజేవ్ కొడో ఎత్తి ప్రజల్ నూనతి రితి సంగ కేడయలి వడ్డె, యేసు కమెర్పహూమ్ పట్టుమ్తె అన్నె గెచ్చ వెసిలన్.

2 జలె, ఒత్త రోమ్ దేసిమ్చి పుంజెకజీన్ జమాన్లుక వెల్లో ఎక్కిలో తిలో. జోక ఒగ్గర్ ప్రేమ తిలో గొత్తి సుదొ ఎక్కిలో తిలన్. జో గొత్తి సుదొ గట్టిజ జొర్ణో సేడ మొర్తి రితి జా తిలన్.

3 జలె, జో పుంజెకజీన్ జమాన్లుక వెల్లో యేసుచి రిసా సూన కెర, యూదుల్చ వెల్లెల మాన్సుల్తె సగుమ్జిన్క యేసుతె తెద్రయలన్; యేసుక “జెవున్ చి అంచొ గొత్తి సుదొక చెంగిల్ కెర్లు” మెనయ్ జోవయిచి అత్తి కబుర్ తెద్రయలన్.

4-5 జలె, జేవ్ వెల్లెల మాన్సుల్ యేసుతె జాక కెర, “జో పుంజెకజీన్ జమాన్లుక వెల్లోచొ గొత్తి సుదొక తుయి చెంగిల్ కెరుక జో తగువ జలోసా. కిచ్చొక మెలె, అమ్ యూదుల్చ ప్రజల్క జో ప్రేమయ్ అన్నె, చి అమ్చి సబగేర్ జొయ్యి బందిలో” మెన, యేసుక బతిమాల్పా జా సంగిల.

6 జలె, యేసు జోవయింతెన్ బార్ జా గెలాచి. జో గెరి నే పావెతె అగ్గె ఇదిల్ దూరి తిలి పొది, జో పుంజెకజీన్ జమాన్లుక వెల్లో మాన్సు, జోచ మితర్పుల్ సగుమ్జిన్క యేసుతె కబుర్ తెద్రయలన్. కిచ్చొ మెలె, “ప్రబు, అమ్చి రిసా తుయి అన్నె అల్లర్ నేడు నాయ్. తుయి అంచి గెరి జెంక మెలె, ఆవ్ తగువ జలోసా నెంజి.

7 అంక విలువ నాయ్ చి రిసా తుచితె సొంత జా దస్సుల్ జంక నిసాని నాయ్. గని ఒత్త తెంతో కి తుయి నెలవ్ కోడు సంగిలె, అంచొ గొత్తి సుదొ చెంగిల్ జయెదె.

8 ఆవ్ కీసి జాని మెలె, ఆవ్ కి అదికారుమ్క బితోసా, అంచి తెడి జమాన్లు అన్సి. ఆవ్ ఎక్కిలోక ‘గో మెలె, గెచ్చెదె. అన్నెక్లొక ‘జె’ మెలె, జెయెదె. అంచొ గొత్తిమాన్సుక ‘ఈంజ కామ్, జా కామ్ కెరు’ మెలె, కెరెదె” మెన. జో పుంజెకజీన్ జమాన్లుక వెల్లో జేవ్ వెల్లెల మాన్సుల్చి అత్తి సంగ తెద్రయలన్.

9 జలె, ఈంజ కోడు సూన కెర, జో పుంజెకజీన్ జమాన్లుక వెల్లో చి నముకుమ్చి రిసా యేసు ఆచారిమ్ జలన్. అన్నె జోచి పట్టి జెతె ప్రజల్చి పక్క పసుల జోవయంక, “తుమ్క ఆవ్ కిచ్చొ మెంతని మెలె, అమ్చ ఇనాయేలుల్తె ఎదిలి నముకుమ్ తిలసక అప్పె ఎద కి ఆవ్ దెకుక నాయ్” మెన సంగిలన్.

10 తెదొడి, కబుర్ అయిలన జో పుంజెకజీన్ జమాన్లుక వెల్లోచొ గెరి అన్నె కిచ్చొ దెకిల మెలె, జో గొత్తి సుదొ చెంగిల్ జా చెంగిల్ తిలిసి.

రండెల్ మాన్సు ఎక్కిలోచొ మొర గెలో పుత్తున్క యేసు చెంగిల్ కెర్లిసి

11 ఒత్త తెంతో అన్నె కిచ్చొ జగ్గు జలి మెలె, యేసు నాయూన మెలి పట్టుమ్తె గెచ్చుక మెన బార్ జలన్, చి జోవయించ సిస్సుల్ చి ఒగ్గర్జిన్ ప్రజల్ జోవయింతెన్ గెల.

12 జా పట్టుమ్చి కోటచి గుమ్ముమ్ పాసి పావెలె, ఈందె, ఒత్త మాన్సుల్ ఏక్ పీనుమ్ జా గుమ్ముమ్ వాట్ బయలె వయ నెతె తిల. జా పీనుమ్ కచి మెలె, రండెల్ మాన్సు ఎక్కిలోచి ఎక్కిలో పుత్తుసి. జా పట్టుమ్చ ఒగ్గర్జిన్ మాన్సుల్ జా రండెలి తెన్ ఒత్త తిల.

13 జలె, ప్రబు జా రండెలిక దెక జాచి ఉప్పిరి కన్యారుమ్ జలో, చి “ఏడు నాయ్, అమ్మ” మెన సంగ కెర,

14 పీనుమ్క పాసి జా, పీనుమ్ వయిలి కట్టి చడిలన్, చి ఒత్త జేవ్ వయ నెతె తిలన టీవెల. తెదొడి “నాడు, ఉట్టు మెన తుక ఆవ్ సంగితసి” మెన సంగిలన్.

15 జలె, జో మొర్ణొ † ఉబెడో జివ్ జా వెన కెర లట్టుబుక మొదొల్ కెర్లన్, చి యేసు అయ్యన్క బుకారా కెర, “ఈందె, తుచొ పుత్తుది” మెన జోక జాచి అత్తి అన్నె దిలో.

* 7: 7:1 పుంజెకజీన్ చి ఉప్పిరి అదికారి జా తిలోసా † 7:15 7:15 జోవయిచి వయసు విస్కక చెత్తర్ వెర్బుల్క తకు నాయ్, దొన్నె విసా వెర్బుల్క ఒగ్గర్ నాయ్ దెర్తి.

16 ఇని జర్గు జతికయ్, ఒత్త తిల జనాబ్ ఎత్కిజిన్ బియర, యేనుచి రిసా “అమ్చి నెడిమి దేముడుచ కబుర్లు సంగితో గొప్పు కమె కెర్తొసా బార్ జా అస్సె. వెల్లోచొ, ఈంజి” మెన, అస్సె “ఎత్కి అదికారుమ్ తిలో దేముడు అమ్తె ఉత్త జా అస్సె” మెన, దేముడుచి గవురుమ్ సంగితె తిల.

17 ఒత్త తెంతో, జా దీని యేను జర్గు కెర్తొనచి రిసా †యూదుల్ జతి ఒండి దేసిమి, చి సుట్టునంతచ ఎత్కి గవ్వెలె ఎత్కిజిన్ సూన్.

బాప్తిసుమ్ దెతె తిలో యోహాను యేనుతె కబుర్ తెద్రయలీసి (మత్త 11:2-19)

18 జలె, బాప్తిసుమ్ దెతె తిలో యోహానుచ సిస్సుల్ జోతె గెచ్చ, యేను జర్గు కెర్తొ కమె జోక సంగిల.

19 యోహాను, జోచ సిస్సుల్తె దొగులక బుకారా కెర, “దేముడు తెద్రవుక సంగ తిలో రచ్చించుచ కెర్తొసా నిజమి తుయి గే, అమ్ అస్సెక్లొక రకుక గె? తుమ్ పున” మెన కబుర్ తెద్రయలన్.

20 జలె, జేవ్ మాస్సుల్ యేనుతె జా: కెర, “దేముడు తెద్రవుక సంగ తిలో రచ్చించుచ కెర్తొసా నిజమి తుయి గే, అమ్ అస్సెక్లొక రకుక గె?” మెన సంగ మెన “బాప్తిసుమ్ కిదెతో యోహాను అమ్క తుచితె తెద్రవ అస్సె.” మెన జా కబుర్ సంగిల.

21 జలె, జయ్యి గడియయ్ ఒగ్గర్జిన్ జబ్బుల్ బాదల్ తిలసక చి బూతల్ దెర్లసక యేను చెంగిల్ కెర్లన్, చి ఒగ్గర్జిన్ గుడ్డి జలసక చెంగిల్ కెర్లన్.

22 తెడిడి యేను జేవ్ కబుర్ అయలసక కిచ్చొ జబాబ్ దిలన్ మెలె, “తుమ్ యోహానుతె గెచ్చ కెర, తుమ్ దెకిలిసి, నూన్సి ఎత్కి జోక సంగ. గుడ్డి జా తిల మాస్సుల్ దెకితతి, సొట్ట జా తిల మాస్సుల్ ఇండితతి, వెల్లి రోగుమ్ సిడ తిలస చెంగిల్ జతతి, బోయరల్ జా తిల మాస్సుల్ సూన్తతి, మొర గెలస జీవ్ జతతి, చి సుబుమ్ కబుర్ బీద మాస్సుల్క ఆవ్ సూనయ్తసి.

23 జలె, కో జలెకు అంచి రిసా అన్మానుమ్ నెంతె తవుల గే, జోవయింక చెంగిలి.” మెన యేను యోహానుచ సిస్సుల్క సంగిలన్.

యోహానుచి రిసా ప్రజల్క యేను సంగిలిసి

24 యోహాను కబుర్ తెద్రవ తిలస ఉట్ట గెలి బేగి, జో యోహానుచి రిసా ఒత్త తిల ప్రజల్క యేను ఇని మెన సంగుక దెర్లన్. “జేవ్ పొదులె తుమ్ కిచ్చొ దెకుక జా బయలె గెచ్చ తిలదు? వాడుతె చివ్వర్ పెల్లి జతిసి దెకుక గెచ్చ తిలదు గె?

25 నాయ్ మెలె, కిచ్చొ వేరచి దెకుక గెలదు? సొమ్నార్లు గలంత పాలల్ గలన్లొ మాస్సుక దెకుక గెలదు గె? ఈందె, చెంగిల పాలల్ గలంత సుక్కుమ్ తెన్ జితస రాసల్చ మేడల్తె తవుల.

26 జలె, కిచ్చొ దెకుక గెలదు? దేముడు తెద్రయలి కబుర్ సంగితో ఎత్కిలోక దెకుక గెలదు గె? నిజామి, గని జో ప్రబుచ మాములుమ్ కబుర్లు సంగితసచి కంట యోహాను అస్సె ముక్కిమ్చొ జయెదె మెన, తుమ్క ఆవ్ సంగితసి.

27 కిచ్చొక మెలె,

ఈందె, అంచి కబుర్ సంగితో బారికి జతి రితి ఎత్కిలోక తుచి పురై తెద్రయతసి.

తుచి కంట అగ్గె గెచ్చ, తుయి జెతిసి సొట్టు కెరెదె

మెన రెగిడ్డి కోడు అస్సె. జా కోడుతె ‘అంచి కబుర్ సంగితోసా’ మెన ఈంజ యోహానుచి రిసాయి రెగ్గి జా అస్సె.

28 తుమ్క ఆవ్ కిచ్చొ మెంతసి మెలె, తేర్బోదల్క జెర్పిలసతె, యోహానుచి కంట వెల్లోచొ కోయి నాయ్. జలెకి, దేముడుచి రాజమ్తె కో ఎత్కిచి కంట దాక్ జవుల గే, జో యోహానుచి కంట వెల్లో జవుల” మెన యేను ప్రజల్క సంగిలన్.

† 7:17 7:17 నెంజెతి ‘ఒండి యూదయ దేసిమి’. § 7:20 7:20 గని జా మదెనె యోహాను జేతె తిలన్. మత్తయి 11:2 దెక.

29 జలె, ఈంజ కోడు మాములుమ్ ప్రజల్ ఎత్తిచి సిస్టు నజీత నుంకర్లు నూన కెర, “ఎత్తి అదికారుమ్ తిలో దేముడుచ తీర్పుల్ సత్తిమచ” మెన ఒప్పున్. జేవ్, అగ్గ యోహానుచి అత్తి బాప్తిసుమ్ నజన తిల.

30 గని పరిసయ్యుల్ చి మోసే తెన్ దేముడు దిలి అగ్గుల్ సికడ్డోసా సికడ్డన జోచి అత్తి బాప్తిసుమ్ నజీత నాయ్. యోహానుచి అత్తి బాప్తిసుమ్ జేవ్ నజుక నెసిలిన్ తెన్ జోచయించి రిసాచి దేముడుచి *ఇస్టుమ్ జేవ్ నెసిలిన్చి రుజ్జు దెకవ తిల. అప్పె కి యేసుచి కోడు నెసిల.

అన్మానుమ్ జతనచి రిసా యేసు గోల కెర్లసి

31 యేసు అన్నె, “ఈంజ ఉగుమ్చ మాన్సుల్చి బుద్దిక కిచ్చో టాలి సంగుక జయెదె? జేవ్ కిసి జతతి?

32 వీదుల వెన కెల్ల బోదల్చ రిత జతతి. జేవ్ బోదల్ ఎక్కిలోచి ఉప్పిలి ఎక్కిలో అన్మానుమ్ జా, తుమ్క ‘నచ్చుత్’ మెన బిచ్చి పుంగిలెకి నచ్చున్ నాయ్.

అమ్ ఏడ్డెకి, తుమ్ బెద ఏడ్డు నాయ్”

మెన దన బోదల్ కిసి సంగుల గే, దస్సి అవ్ చి యోహాను కిచ్చో కెర్లె కి, తుమ్ మెన్సున్ నాయ్.

33 కిచ్చోక అవ్ ఇని టాలి కెర్లసి మెలె, బాప్తిసుమ్ దెతె తిలో యోహాను కిచ్చో అన్నిమ్ నే కతె చువ్వె తతోసా, కిచ్చో ద్రాచ రస్సుమ్ గట్ల సీ పితె తన్న తతోసా తుమ్తె అయ్లో, చి జోచి రిసా “జోక బూతుమ్ దెర అస్సె.” మెంతసు.

34 అవ్ జలె, †మాన్సు జా జెర్కున్ అయ్లోసా, మాములుమ్ కతె పితె తతినచి రిసా తుమ్ కిచ్చో మెంతసు మెలె, “ అవె, కయ్లో మత్వాలో ఈంజో. సిస్టు నజీత నుంకర్లు తెన్ పాపుమ్ సుదల్ తెన్ బెదితోసా” మెన, అంచి రిసా సంగితసు.

35 ‡గని కచి కచి పెట్టి దేముడుచి బుద్ది తిలె, జేవ్ ఎత్తిజినచ కమచి వలితుమ్తె రుజ్జు జయెదె” మెన యేసు సంగిలన్.

పరిసయ్యుడుచి గెరి యేసు అన్నిమ్ కంక గెతికయ్

36 పరిసయ్యుడు జలె ఎక్కిలో యేసుక అన్నిమ్క బుకార్లన్, చి జో పరిసయ్యుడుచి గెరి గెచ్చు. జా దేసిమ్చ సామ్నార్లుచ గెరలె అన్నిమ్క కిసి ఒర్లు జా బల్లయ్ కవుల గే, దస్సి, అన్నిమ్ కతన ఎత్తిజిన తెన్ యేసు కి ఒర్లు జలన్.

37 జలె, ఈందె, లంజె జితె తిలి జా పట్టుమ్చి తేరబోద ఎక్కి యేసుక ‘జో పరిసయ్యుడుచి గెరి అన్నిమ్ కంక గెచ్చు అస్సె’ మెన నూన కెర, ఏక బుడ్డితె †అత్తర్ తేల్ దెరన అయ్లో.

38 యేసుచి పడ్డె జోచ చట్టోక పాసి టీవ వంపా జా ఏడుక దెర్లి, చి జాచి అఱును నువి జతికయ్ యేసుచ చట్టో తిమిలచి, జాచి నెండి తెన్ జా తేరబోద జోచ చట్టో వుంచ, జోక చుంబ కెర, జా అత్తర్ తేలు గాసిలి.

39 జలె, యేసుక బుకారా తిలో పరిసయ్యుడు జా ఎత్తి దెక కిచ్చో ఉచర్లన్ మెలె, “ఈంజో నిజమి ఎత్తి అదికారుమ్ తిలో దేముడుచ కబల్లు సంగితోసా జలె, జోక చడితి తేరబోద కొన్ని జయెదె, కిసిచి జయెదె గే జాన్తో. ఇన్నెక ‘పాపుమ్ సుది’ మెన జాన్తో.”

40 జలె, జో ఉచర్లసి జాన కెర, యేసు జోక కిచ్చో జబాబ్ దిలన్ మెలె, “ఓ సీమోను, తుక ఏక కోడు సంగిందె” మెన సంగిలన్, చి “కిచ్చో, గురుబాబు? సంగు” మెన సీమోను సంగిలన్.

41 సంగతికయ్, యేసు ఏక టాలి సంగిలన్. “ఏక సావుకారితె దొగుల రునుమ్ జా తిల. జేవ్ దొగులతె ఎక్కిలో పావ్ వుంజో* పొదుల్చి కూలిచి ఎదిలి డబ్బుల్క బాకి జా అస్సె, అన్నెక్లో యాబయ్ పొదుల్చి కూలిచి ఎదిలిక బాకి జా అస్సె.

* 7:30 7:30 మెలె, “క్రిస్టు రచ్చించువ కెర్లెసా జితయెచి రిసా తుమ్ కెర్ల పావల్క దుకుమ్ జా ఒప్పున ముల దా బుద్ది జా, చి జా గుర్తుక బాప్తిసుమ్ నజన” మెనయ్ యోహాను బోదన కెర కెర బాప్తిసుమ్ దెతె తిలన్. పరిసయ్యుల్ గట్ల దస్సి దాక కెరన బుద్ది జంక నెసిల. ఎత్తి అదికారుమ్ తిలో దేముడు తెర్లయ్లో రచ్చించువ కెర్లెసాక నంప కెరుక నెసిల. † 7:34 7:34 దేముడుచి కొడతె అస్సె పూర్లుమ్ రెగిడ్లినతె ‘మాన్సు జా జెర్కున్ అయ్లోసా’ మెన సంగిలె, ‘తెర్లయెదె’ మెన ఎత్తి అదికారుమ్ తిలో దేముడు సంగిలో రచ్చించువ కెర్లెసా మెలె అర్లుమ్ తయెదె. దానియేలు 7:13 దెక. ‡ 7:35 7:35 నెజలె, ఎత్తి అదికారుమ్ తిలో దేముడుచి బుద్ది కచి కచి పెట్టి తిలె, జా బుద్ది అస్సె మాన్సుల్చె దెకిలె, జాక బో దిలి బుద్ది మెన ఒప్పునల. మత్తయి 11:19చి కోడు దెక. § 7:37 7:37 పిరీమీచి చెంగిల్ వానెన తేలు, జా.

* 7:41 7:41 ఎక్కి దేనారము ఎక్కి పొదుల్చి కూలి

42 జేవ్ జోవయింది రునుమ్ కుట్టువక నెత్తిర్లి రిసా, సావుకరి దొగులచి రునుమ్కి ముల దా చెమించువ కెర్లన్. జలె, తుయి సంగు, ఈంజేవ్ దొగులతె కేన్ మాన్సు జో సావుకరిక ఒగ్గర్ ప్రేమ జయెదె?” మెన యేసు జో సీమోనుక పరిచ్చ కెర్లన్, చి

43 జో కిచ్చొ జబాబ్ దిలన్ మెలె, “ఒగ్గర్ బాకి జా తిలొసా, కిచ్చొగె” మెలన్, చి “తుయి సరిగా ఉచర్లది” మెన యేసు జోక సంగ కెర,

44 జా తేర్బోదచి పక్క పనుల సీమోనుక అన్నె ఇసి మెలన్: “ఈంజ తేర్బోదక దెకితసి గె? జలె, ఆవ్ తుచి గెరి అయ్యలయ్, గని ఆవ్ చట్టో దోవతి రిసా తూయి పాని దెసి నాయ్. ఈంజ, జలె, ఇన్నెచి ఆనుసో తెన్ అంచ చట్టో దోవ అన్నె, చి ఇన్నెచి నెండి తెన్ పుంచ అన్నె.

45 తూయి అంక చుంబిన్ నాయ్, గని ఆవ్ ఈంజ గెరి అయ్యలి తెంతో ఈంజ అంచ చట్టో చుంబుక దెర ములె నాయ్.

46 అంచి బోడి తూయి తేల్ కి నువిన్ నాయ్. గని ఈంజ అంచ చట్టలె అత్తర్ తేలు గాన దా అన్నె.

47 జాచి రిసా తుక ఆవ్ కిచ్చొ మెంతసి మెలె, ఇన్నెచ పాపల్ ఒగ్గర్ జా తిలె కి, చెమించువ జా అన్నె. ఈంజ చెమించువ జలెన్క కిచ్చొ రుజ్జు మెలె, ఇన్నెచి ఒగ్గర్ ప్రేమయ్ జా రుజ్జు దెకయ్తయ్. గని కక్క తొక్కి పాపుమ్ చెమించువ జా తయెదె గే, జోచి పెట్టి తొక్కి ప్రేమ తయెదె” మెన యేసు జో పరిసయ్యుడుక సంగ కెర,

48 జా తేర్బోదక, “తుచ పాపల్ చెమించువ జా అన్నె” మెలన్.

49 జో దస్సి మెంతికయ్, జోవయింతెన్ అన్నెమ్ కెరై తిలన జోవయింది పేట్ తెడి కిచ్చొ మెల మెలె, “ఈంజో పాపల్ చెమించువ కెరైయ్ జలె, ఈంజో కొన్నో?” మెన పేట్ తెడి ఉచరన్నె.

50 జలె, “తుయి అంచి ఉప్పిరి తుచి నముకుమ్ తిలి రిసా రచ్చించువ జా అన్నెసి. నెంతుమ్ తెన్ గో.” మెన యేసు జా తేర్బోదక సంగిలన్.

8

యేసు తెన్ బుల సగుమ్జిన్ కెరై సావైచన

1 ఈంజ ఎత్తి జుర్లు జా ఒగ్గర్ దీసల్ నే గెతె అగ్గె, యేసు బార్ జా పట్టలె గెవ్విలె బుల బుల, దేముడుచి *రాజమ్చి రిసాచి చినుబుమ్ కబుర్ బోదన కెరై తిలొ. జో తెన్ జోవ బారజిన్ సిస్సుల్ బుల్లె తిల.

2 అన్నె కొన్న మెలె, యేసు అగ్గె సగుమ్జిన్ జబ్బుల్ తిల తెర్బోదల్చ జబ్బుల్ గెచ్చువ చెంగిల్ కెరై తిలన్, సగుమ్జిన్ తేర్బోదల్చ బూతల్ దెర్లెకయ్ ఉదడ జోవయింక కి చెంగిల్ కెరై తిలన్. జేవ్ తెర్బోదల్చె సగుమ్జిన్, జలె, యేసు తెన్ సిస్సుల్ తెన్ బుల్లె తిల. జోవయింతె ఎక్కి కొన్ని మెలె, మగ్గల పట్టుమ్చి మరియ, జాక దెర్లె నత్తు బూతల్చ యేసు ఉదడ తిలన్.

3 అన్నె కొన్న మెలె, హోరోదు రానొచి గేర్క దెకితో కూజా మెలొసాచి తేర్చి యోహాన్ను, పడ్డో నూనన్ను చి అన్నె ఒగ్గర్జిన్, జోవయింక తిలి సొంత డబ్బుల్చ యేసుక చి సిస్సుల్చ సావైచన కెరై తిల.

ఉంపిలి బీక టాలె

4 ఒగ్గర్జిన్ జనాబ్ కుప్పల్ కుప్పల్ బెర జా, పట్టల్ ఎత్తి గావ్వొ ఎత్తి తెంతో యేసుతె అయ్యలి. జో ఏక్ టాలె జోవయింక సంగిలన్.

5 “ఏక్కిలొ జోచి బీ ఉంపుక బార్ జలన్. ఉంపితె తతికయ్, సగుమ్ బీ బయిలె వట్టె సెడ్లన్, చి వట్టె జెతన గెతన జా బీ నుదిల, చి పిట్టల్ జేవ్ దాన్ వెంట కా గెల.

6 అన్నె సగుమ్ బీ వత్తురు బుయ్యెగ్గె సెడ్లన్ చి, తెడి సాల్చ నాయ్ చి రిసా గజ్జల్ జలెకి, డడ్డ మొర గెల.

* 8:1 8:1 ‘ఎత్తి అదికారుమ్ తిలొ దేముడుచి రాజిమ్’ మెలె, ‘పరలోకుమ్’ ఏక్ అర్థమ్, గని అన్నె కిచ్చొ మెలె, జో పరలోకుమ్ తెంతో ఏలువ కెరైన్. జో ఏలువ కెరైన్ మెలె, ఉగ్రమ్ మార్పువ జలికయ్ ఎదార్థమ్ ఈంజ లోకుమ్తె ఏలువ కెరై, గని మదెన్ కి 1. జోవయింక నంపజల మాన్సుల్చి పెట్టి జో ఏలువ కెరైయ్, చి 2. జోవయింది ఆత్మన్కై ఈంజ లోకుమ్తె కామ్ కెరైయ్. † 8:18:1 ‘ఎత్తి అదికారుమ్ తిలొ దేముడుచి రాజిమ్చి రిసాచి సుబుమ్ కబుర్’ మెలె, జోవయింది రాజిమ్ పాచ జా అయ్యలిన్చి కబుర్, మత్తయి 12:28, మార్కు 1:15, పడ్డో జో పాపల్ చెమించువ కెరైన్చి కబుర్, యేసుయి దొర్లు జలొ రచ్చించువ కెరైసా జలిన్చి కబుర్, పడ్డో పరలోకుమ్తె గెతి అవ్కారుమ్ జో దొర్లు కెరై రచ్చనచి రిసాచి కబుర్.

7 అన్నె సగుమ్ బీ కంట దుబ్బుల్తె సీడ్ల చి, కంట దుబ్బుల్ తెన్ వడ్డితికయ్, కంట మొక్కల్ ఈంజేవ్ మొక్కల్క పెల గెల్లికయ్, ఈంజేవ్ మొక్కల్ పలితుమ్ దెర్రి నాయ్.

8 అన్నె సగుమ్ బీ చెంగిల్ బుయ్యె సీడ్లన్ చి, వడ్డవంటో పికిలె, పుంజెక్ వంతుల్ పలితుమ్ దిలి” మెన సంగ యేసు అన్నె, “సూన్త కంగ్గొ తిలస సూన!” మెన కేక్ గలన్.

9 జలె, వేర మాన్సుల్ ఉట్ట గెతికయ్, “ఈంజ టాలిచి అర్దుమ్ కిచ్చొ?” మెన యేసుక సిస్సుల్ పుసిల చి,

10 జోవయింక, “దేముడుచి రాజిమ్చి రిసాచ గుట్టుల్ జాన్సుప మెన, అంచ సిస్సుల్ జతి తుమ్క సెలవ్ దా అన్నె, గని వేర మాన్సుల్చి రిసాయి టాలివొ తెన్ సంగితసి. కిచ్చొక మెలె, పూర్దుమ్ దేముడుచి కొడెతె †రెగిడ్డి రితి.

తుమ్ దెకుతసు, గని అర్దుమ్ చినుతు నాయ్,

అవ్ సంగితి బోదన సూన్తు, గని అర్దుమ్ కెరంతు నాయ్.” §

ఉంపిలి బీచి టాలిచి అర్దుమ్ యేసు సంగిలిసి

11 “జలె, జా టాలిచి అర్దుమ్ సంగిందె. తుమ్ సూన, బీ మెలె, దేముడు దిలి *కోడు.

12 వట్టె సీడ్ల గిడ్డల్చి అర్దుమ్ కిచ్చొ మెలె, సగుమ్జిన్చి బోదన సూన అన్నె, గని నయ్తాన్ జా కెర, జోవయింపి పెట్టి తెంతో జా బోదన ఉర్ల కెర, పచ్చుడ్డయ్; ‘నంపజా †రచ్చించుప జతు నాయ్’ మెన.

13 పత్తురు బుయ్యె సీడ్లి బీ జలె, సగుమ్జిన్ సుబుమ్ కబుర్ నూన్సి పొది నర్లనంతోసుమ్ తెన్ సూన్తతి గని, జోవయింపి పెట్టి సుబుమ్ కబుర్చ చెర్రో నెంజిలి రిసా గడియ నంపజలి రితి జలెకి, జోవయింపి నముకుమ్ పిట్టయ్తి రితి కిచ్చొ జవున్ అల్లర్ అయ్లె, నముకుమ్ ముల దెతతి.

14 జలె, కంట దుబ్బుల్తె సీడ్లి బీ కిచ్చొ మెలె, సగుమ్జిన్ సూన్తతి గని, జేవ్ జోవయింపి వట్టి గెతె తా, ఈంజ లోకుమ్చి జివితుమ్చ బాదల్, సామ్సారుమ్, సుక్కుమ్ జోవయింక పెల్లితయ్ చి, జోవయింపి వంటో పికె నాయ్.

15 జలె, చెంగిల్ బుయ్యె ఉంపిలిన్ కిచ్చొ మెలె, సగుమ్జిన్ సుబుమ్ కబుర్ చెంగిల్ నిదానుమ్ పేట్ తెన్ సూన, దెరన, జా కోడ్ రితి నిదానుమ్ ఇండ బాదల్ ఓర్చుప జా అత్తుపలితుమ్ దెరుల.

దీవు లగితిన్క టాలి కెర యేసు సంగిలి బోదన (మార్కు 4:21-25)

16 “ఏక్ దీవు లంబడ తిలె, జా దీవుక ఆరి లంబడ్డి రితి నాడిచి తెడి జవున్ కో డంకితి నాయ్, మంచుమ్చి తెడి జవున్ కో లుంకడ్డి నాయ్. జా దీవుకంబుమ్చి ఉప్పిరి తివుల; ‘ఒత్త తిలె, గెరి జెత ఎత్తిజిన్క, జా ఉజిడి కామ్క జెవున్’ మెనయ్.

17 లుంకాడ తిలిసి ఎత్తి పడ్డొక డీనెదె, అప్పె గుట్టు తిలిసి ఎత్తి జాన్తి రితి జా బార్ జయెదె.

18 “జలె, తుమ్ కీసి సూన్తె గే జాగర్ల దెకన. కిచ్చొక మెలె, తిలోసొక ‡ అన్నె దెంక జయెదె, గని నెంజిలోసా జలె, ‘అంక అన్నె’ మెన జో ఉచరంతిసి కి జోతె తెంతో కడ నెంక జయెదె” మెన యేసు సంగిలన్.

“దేముడు దిలి కోడు నంపజా కో ఇండుల గే జెచ్చి అంచ కుటుంబుమ్”
(మత్త 12:46-50; మార్కు 3:31-35)

‡ 8:10 8:10 యెనయా 6:9. § 8:10 8:10 మత్తయి 13:13, 15 దెక. జేవ్ మాన్సుల్ దెకిలెకి నూన్సి కి జోవయింక ఇస్టుమ్ నాయ్; జోవయింపి పెట్టి బేడు బందెల్ రితి, చి “జోవయింక ఇస్టుమ్ నెంజిలె, కిచ్చొక జోవయింక రితి సంగుక?” మెలి రితి సంగితయ్. * 8:11 8:11 నెంజిలె ‘సుబుమ్ కబుర్’; మార్కు 1:14. నెంజిలె ‘యేసుచి బోదన’; మత్తయి 4:17. † 8:12 8:12 మెలె, నయ్తాన్ తెంతో, పావుమ్ తెంతో. ‡ 8:18 8:18 ఈంజ టాలిచి అర్దుమ్ కిచ్చొ మెలె, అంచితె సిక కో బుద్ది దెరసుల గే, జోవయింక అన్నె ఒగ్గెరి సికడిందె. గని నూన్సి కి కో బుద్ది ఆనన్ నాయ్ గే, చి అర్దుమ్ కెరన అన్నె మెన జో ఉచర్లె కి, జోవయింక కామ్క నెంజి మెన, జా కి జోతె తెంతో కడ నెంక జయెదె.

19 ఏక దీని యేసుచి అయ్యుని జోవయింద కి బావుడ్నివో జోతె అయిల, గని యేసు తిలి గదితె ఒగ్గరజన్ జనాబ్ బెర తిలి రిసా, జోతె పాచుక నెత్తిర.

20 జలె, "తుచి అయ్యుది, తుచ బావుడ్నివో తుక దెకుక మెన జా కెర, వీదె టీచ అన్సి" మెన కో గే యేసుక సంగిలన్.

21 గని జో జోవయింక, "అంచి అయ్యు, అంచ బావుడ్లు కో జవుల మెలె, దేముడుచి కోడు సూన జయ్యి రితి కెర్తనయ్" మెన సంగిలన్.

దోనితె గెతికయ్ ఒగ్గర్ వాదు కెర్తల్ కెర్లిన్క యేసు సేతుమ్ కెర్లిసి (మత్త 8:23-27; మార్కు 4:35-41)

22 ఏక దీని యేసు జోచ బారజన్ సిస్సుల్ తెన్ దోనితె వెగ కెర, "గాడు ఒత్తల్తో గెచ్చుమ, జోమ్మ" మెన సంగిలన్, చి జీసుక దెర్.

23 జలె, నెడిమి గడ్డె పావెలె యేసు నిజ గెలన్. తెదొడి వాదు పాని గట్టిజ కెర, జేవ్ తిలి పక్క ఉడ్డ అయిలి చి, కెర్తల్క దోనితె ఒగ్గర్ పాని బెర్లికయ్, ప్రమాదుమ్ జతి.

24 జేవ్, యేసుక పాసి జా "ప్రబు, ప్రబు, అమ్ మెర గెచ్చుమ్దే!" మెన సిస్సుల్ కేక్ గల ఉట్టయ్తికయ్, జో ఉట్ట వాదుక చి కెర్తల్క గోల కెర్తన్, చి వాదు ముల దిల, చి ఎత్తి అన్నె సేతుమ్ జా గెలి.

25 తెదొడి యేసు జోవయింక, "తుమ్చి నముకుమ్ కేతె?" మెలన్, చి బియె గెచ్చ, ఆచారిమ్ జా, ఎక్కిలోక ఎక్కిలో కిచ్చి మెల మెలె, "ఈంజో కొన్సో జయెదె, చి వాదుక పానిక ఆడ్రల్ దిలె ఇన్నెచి కోడుక లొంగువ జా కెర్తతి?" మెన జేవ్ ఆచారిమ్ జలె.

బూతల్ దెర్లి మాన్సుక యేసు చెంగిల్ కెర్లిసి (మత్త 8:28-34; మార్కు 5:1-20)

26 జలె, యేసు సిస్సుల్ తెన్ గాడు జిన గలిలయచి మొక్కెచి గాడు ఒత్తల్తోచి గెరాసీసుల్చి ప్రాంతుమ్తె పాచెలె.

27 యేసు దోని తెంతో ఉత్త కెర ఒడ్డుతె టీవెతికయ్, జా గెచ్చెవో ఎక్కిలో జోవయింక దసస్సుల్ జలన్. జో మాన్సుక బూతల్ దెర తిలె. ఒగ్గర్ దీసల్ జలి జో కిచ్చి పాలల్ గలనె నాయ్, చి కేనె జితె తిలన్ మెలె, గెరి నాయ్, గని మెస్సున్తె.

28-29 జో బూతుమ్ జో మాన్సుక ఒగ్గర్ సుట్టు దెర తిలన్, చి అగ్గె గెచ్చెవో జోక చట్టె అత్తిలి గొల్పుల్ బంద రకితె తిలె, గని జేవ్ గొల్పుల్ కుట్టవనెదె, చి జో బూతుమ్ జోక బయిలు టాన్తె వెలవ నెయెదె. జలె, బూతుమ్ దెర్లి జో మాన్సు అప్పె యేసుక దెక కెర, కేక్ గల జోచి చట్టె సెర్పు సేడ్లన్, చి "ఓ బూతుమ్, ఈంజో మాన్సుచి తెంతో బార్ జా తుయి ఉట్ట గో!" మెన యేసు ఆడ్ర దిలన్. జో మాన్సు గట్టిజ అవాడ్ కెరన, "ఓ యేసుప్రబు, ఎత్తిచి ఉప్పిరి తిలో దేముడుచో పుత్తుసి తుయి, అంచి తెన్ తుక కిచ్చి కామ్? అంచి ఉప్పిరి దయ తియి అంక అల్లర్ కెరు నాయ్!" మెన కేక్ గలన్.

30 తెదొడి, "తుచి నాన్ కిచ్చి?" మెన యేసు బూతుమ్క పుసిలన్, చి "ఎతివాట్జిన్" మెలన్. కిచ్చిక మెలె, ఒగ్గరజన్ బూతల్ జోక దెర తిలె.

31 "జా వెల్లి గొయ్యతె అమ్క తెద్రవు నాయ్" మెన యేసుక బతిమాల్పా జా సంగిలె.

32 జలె, జా మెట్టయ్ వెల్లి మంద అండ్రుల్ కతె తిలె, చి "అండ్రుల్చి తెన్ అమ్ పెసిత్ రితి అమ్క సెలవ్ దె." మెన యేసుక జేవ్ బూతల్ బతిమాల్పా జా సంగితికయ్, జో సెలవ్ దిలన్.

33 తెదొడి జో మాన్సుచి తెంతో బూతల్ బార్ జా ముల దా, అండ్రుల్ తెన్ పెసిలె, చి జా అండ్రుల్ మంద మొత్తుమ్ ఒత్తచి గాటిక నిగ ఉత్త గెచ్చ, గడ్డె సీడ డుజ మెర గెలె.

§ 8:19 8:19 మెలె ఎత్తి అదికారమ్ తిలో దేముడుచి సుద్ది తిలి అత్తన్తిక మరయ యేసుక అంగి జా పాయిలికి, పడ్డె మాములుమ్ మున్సున్ జలో యాసిపు తెన్ అన్నె బోదల్ పాయి తిలి. * 8:24 8:24 నెంజెలి 'బాబు, బాబు'. † 8:30 8:30 నెంజెలి, 'జమాన్లుచ ఎత్తయ్జన్'. ‡ 8:31 8:31 డీసయిన్ 9:1, 20:3 దెక. ఆగి గొయి తెన్ బెదితి మాజు నెంజెలి గొయి, జా.

34 జా అండ్రుల్ మంద రకితన జగ్గు జలిసి దెక కెర, బమ్మ జా నిగ గెచ్చ, ఒండి పట్టుమతెచి సుట్టునంతచ గెచ్చొ ఎత్తితె నూనయల.

35 తెదొడి జగ్గు జలిన్చి రుజ్జు సొంత దెకుక మెన ప్రెజల్ ఎత్తి బార్ జల, చి యేసుతె జా కెర కిచ్చొ దెకిల మెలె, బూతల్ ముల దిలో మాన్సు యేసుచి చట్టె వెన అస్సె. పాలల్ గలన తా అప్పె వెర్రి నెంతె మాములుమ్ చెంగిల్ బుద్ది తెన్ అస్సె, మెన దెక కెర, బియ: గెల.

36 అన్నె, జగ్గు జలి పొది దెక తిల మాన్సుల్, జలె, బూతల్ దెర తిలో మాన్సుక యేసు కిసి చెంగిల్ కెర్లొ గే జేవ్ పడ్డె అయలనక సంగిల.

37 తెదొడి జేవ్ గెరాసీనుల్చి ప్రాంతుమ్ ఎత్తిచ మాన్సుల్ ఎత్తిజిన్ “అమ్చి దేసిమ్ తుయి ముల దా ఉట్ట గో” మెన యేసుక బతిమాల్పా జా సంగిల. కిచ్చొక మెలె, జోవయింక ఒగ్గర్ బయిమ్ దెర తిలి. జాకయ్ యేసు దోనితె వెగ ఉట్ట గెలన్.

38 బూతల్ ముల దిలో మాన్సు, జో నే గెతె “అవ్ కి తుచి తెన్ బెద జెంక అంక సెలవ్ దె” మెన బతిమాల్పా జా సంగిలన్. గని యేసు జోక,

39 “తుచి గెరి గో చి, దేముడు తుక చెంగిల్ కెర ఎదివాట్ దయ కెర్లిసి ఒత్త సంగు” మెన యేసు తెద్రవ దిలన్ చి, జో ఉట్ట గెచ్చ, యేసు జోక ఎదివాట్ దయ కెర్లిన్చి రిసా జా ఒండి పట్టుమతె నూనయలన్.

యాయారు మెలో అదికారి యేసుచి తోడు నజీలిసి

40 యేసు గాడు అన్నె జిన్ గట్టుతె పావితీకయ్, జో అన్నె జెతిన్క రక తిల చి రిసా ప్రెజల్ ఒగ్గర్జిన్ జోక దస్సుల్ జల.

41 జలె, యాయారు మెలో ఎక్కిలో ఒత్త అయ్లో. జో యూదుల్చి నబగేర్చొ అదికారి జయెదె. జో యేసుచి చట్టె నెర్పు సేడ్జన్, అన్నె “అమ్చి గెరి జె” మెన యేసుక బతిమాల్పా జా సంగిలన్.

42 కిచ్చొక మెలె, జాక బార వెర్పుల్ వయసుచి ఎక్కి దుచిసి, మొరెదె గే జయెదె గి, దస్సి జా తిలి.

జలె, యేసు జో అదికారి తెన్ గెల, చి వట్టె ఒగ్గర్జిన్ ప్రెజల్ జోచి సుట్టునంత తా వెలవులి జతె తిల.

43 జలె, బార వెర్పుల్ తెంతో లోయి గతి బాద తిలి తేర్బోద ఎక్కి ఒత్త తిలి. కో కి జాచి బాద గెచ్చవుక నెత్త గెచ్చ తిల.

44 జా, జలె, యేసుచి పడ్డె జా పాసి జా, జోచి పాలుమ్చి కొంగు చడిలి చి, బేగి జా లోయి గెతిసి బండు జా గెలి.

45 దస్సి జతికయ్, “కో అంక చడిలన్?” మెన యేసు పుసిలన్ చి, పేతురు యేసుక “గురుబాబు, జనాబ్ ఎత్తి తుచి సుట్టునంత బెర వెలవులి జతెతిచి లయడ్ జతెతి, గెద” మెలన్,

46 “గని అంక చడుక మెన, కో గి అంక చడిలన్. అంచి తెంతో అత్తొనెక్కి బార్ జా గెచ్చ అస్సె.” మెన యేసు సంగిలన్.

47 జలె, జా కెర్లిసి గుట్టు తయె నాయ్, మెన జా తేర్బోద చిన కెర, అద్దుర్ జా యేసుచి చట్టె నెర్పు సేడ్జన్, అన్నె “ అంచి బాద గెన్సు” మెన తుక చడిలయ్ చి, చడిల్ బేగి చెంగిల్ జలయ్” మెన ఎత్తిజిన్ ప్రెజల్చి మొక్కె ఒప్పన్.

48 ఒప్పన్తికయ్, యేసు జాక, “పుత్త, అంచి ఉప్పిరి తుయి నముకుమ్ తిలి రిసా, తుయి కీచెంగిల్ జా అస్సిసి. సేంతుమ్ తెన్ గో” మెలన్.

49 జా తేర్బోదక యేసు దస్సి సంగితె తిలి పొది, దువిన్చి రిసా యేసుతె జా తిలో అదికారిచి గెర్చ నగుమ్జిన్ జా కెర, జో అదికారిక “తుచి నాడి మొర గెచ్చ అస్సె. ఈంజొ గురుబాబుక బుకార్లా లాబుమ్ నాయ్. జోక జా బాద పోసి” మెన సంగిల.

50 యేసు ఈంజ కొడు నూన, “జేవ్ సంగిలిన్క కాతర్ నే కెర్తె, తుయి బి నాయ్. నంపజా దయిరిమ్ తెన్ తా చి, తుచి నాడి చెంగిల్ జయెదె.” మెలన్.

51 జలె, యాయారుచి గెరి పావితె, పేతురుక యోహానుక చి యాకోబుక, చి నాడిచి అయ్యోన్అబ్బిన్క పిట్టవ, అన్నె కోయి జో తెన్ జా నాడి తిలిన్తె గెచ్చుక యేసు ఒప్పె నాయ్.

§ 8:48 8:48 నెంజిలె ‘రచ్చించువ జా అస్సిసి’.

52 నాడి మొర గెలి రిసా ఎత్కిజన్ ఏడుకుడు జతె తిల, గని “తుమ్ ఏడ నాయ్. ఈంజ మొర గెచ్చె నాయ్. జా నిజ అస్సె.” మెన సంగిలన్.

53 జాకాయ్ జా నాడి ‘నిజమి మొర గెచ్చె అస్సె’ మెన జాన కెర, జోక జేవ్ ఆన గెల.

54 గని జో, జా నాడి తిలీన్తె గెచ్చె కెర, జాచి ఆతు దెర, “నాడి, ఉట్టు!” మెలన్.

55 జాచి జీవ్, జాచి పెట్టి అస్సె అయ్లిచి, బేగి ఉట్టి. తెదొడి “ఇన్నెక తుమ్ కిచ్చొ జలెకు కవడ” మెన యేసు సంగిలన్.

56 జా నాడిచ అయ్యోనిసి బలే ఆచారిమ్ జల, గని “జర్గు జలిసి కక్క సంగ నాయ్” మెన యేసు ఆడ్ర దిలన్.

9

బారజన్ సిస్సుల్క యేసు అదికారుమ్ దా బులుక తెద్రయ్లిసి
(మత్త 10:5-15; మార్కు 6:7-13)

1 వడ్డె, యేసు జోచ బారజన్ సిస్సుల్క ఎక్కితె బుకారా కెర, ఎత్కి రగల్ బూతల్క జేవ్ ఉదడ్డి రిసా, జబ్బుల్ జేవ్ గెచ్చయ్తి రిసా జోవయింక సెక్తి అస్సె అదికారుమ్ దిలన్.

2 అస్సె, “దేముడుచి *రాజిమ్ పావ జా అయ్లిన్చి రిసా తుమ్ బోదన కెర చి, మాస్సుల్చ జబ్బుల్ గెచ్చవ” మెన తెద్రయ్లిన్.

3 తెద్రయ్తె పొది ఇసి మెలన్: “ప్రయానుమ్చి రిసా కిచ్చొ దెరన గెచ్చ నాయ్. టిక్సి ఉండో జలెకు, సెంచె జలెకు, అన్నిమ్ జలెకు, డబ్బుల్ జలెకు, దొన్ని సొక్కల్ జలెకు దెరన గెచ్చ నాయ్.

4 వడ్డె కేన్ గెర్చ తుమ్క టాన్ దెవుల గే, తుమ్ జా గావ్ జవున్ ముల్తె ఎదక, జయ్యి గెరి బన జా తా.

5 అస్సె, కేన్ పట్టుమ్తె జవున్ తుమ్క †మరియాద కెర్తి నాయ్ గే, జా పట్టుమ్ తెంతో బార్ జతె పొది ‘జేవ్ దస్సి జలి రిసా దేముడుచ ‡నెంజితి’ మెన గుర్తుక తుమ్చ చట్టచి దూడి పండ్చన గెల” మెన యేసు సంగిలన్.

6 తెదొడి జేవ్ బారజన్ సిస్సుల్ బార్ జా గావ్స్సె ఎత్కితె బుల బుల, చి రిసా బోదన కెర్తె తా, మాస్సుల్చ జబ్బుల్ గెచ్చయ్తె తిల.

హేరోదు అదికారి చి ప్రెజల్ సగుమ్జిన్ యేసుచి రిసా ఉచర్లిసి
(మత్త 14:1-12; మార్కు 6:14-29)

7 జా పొది, గలిలయ ప్రాంతుమ్తె ఏలుప కెర్తొ అదికారి హేరోదు, యేసు జర్గు కెర్ల కమె ఎత్కిచి రిసా సూన్లి రిసా, కిచ్చొ ఉచరుక నేన కెర బాద సేడ్డె. కిచ్చొక మెలె, యేసుక “యోహాను మొర తా అస్సె జివ్ జా అస్సె” మెన సగుమ్జిన్ సంగితె తిల,

8 గని అస్సె సగుమ్జిన్ “పూర్లుమ్ దేముడుచ కబుర్లు సంగిలో †ఏలీయా అస్సె జా అస్సె” మెల, చి అస్సె సగుమ్జిన్ “పూర్లుమ్ దేముడుచి కబుర్లు సంగిలో అస్సెక్కో మొర, అస్సె జివ్ జా అస్సె జా అస్సె” మెన ఉచర్తె తిల.

9 జా ఎత్కి సూన కెర, హేరోదు, “యోహానుక *బోడి గండల్ కెర గెలయ్, గని ఈంజేవ్ కమె కెర్తొసాచి రిసా అవ్ ఒగ్గర్ సూనతసి. ఈంజొ కొస్సొ జయెదె?” మెన, యేసు తెన్ దస్సుల్ జంక మెన వాటు చజితె తిలొ.

యేసుచ బారజన్ బారికుల్ అస్సె ఉట్ట అయ్లిసి
(మత్త 14:13-21; మార్కు 6:30-44; యోహా 6:1-14)

* 9:2 9:2 మత్తయి 10:7. యేసు అయ్లిన్ తెన్ జా రాజిమ్ పావ జా అస్సె మెనుక జయెదె. ఈంజ మదినె డీసె నాయ్, గని జోవయింక నంబల మాస్సుల్చి పెట్టి జో ఏలుప కెర్తయ్, చి అస్సె కి ఈంజ లోకుమ్తె జోవయించి అత్తెన్కి కామ్ కెర్తయ్. ఉగుమ్ మార్పువ జలె, జోవయించి రాజిమ్ పూర్తి డీసెదె. † 9:5 9:5 నెంజితి ‘బెదవంతి నాయ్’. ‡ 9:5 9:5 నెంజితి, ‘జోవయించి కోఫుమ్ జోవయించి ఉప్పిరి అస్సె’ § 9:8 9:8 ఏలీయా పూర్లుమ్చొ మొర నాయ్, గని ఎత్కి అదికారుమ్ తిలొ దేముడు జోవయింక దస్సె పరలోకుమ్తె కడ నిలన్. రానల్ దొన్నిచి పుస్తకుమ్ 2:11. * 9:9 9:9 మత్తయి 14:10, మార్కు 6:27, 28.

10 యేసుచ బారజన్ †బారికుల్, జలె, జేవ్ బులుక మెన జో తెద్రయ్లిన్ తెంతో అన్నె ఉట్ట జా, జేవ్ జర్లు కెర్లెసి ఎత్తి జోక సంగిల చి, జో వేరతె జోవయింతెన్ గడియ తతి రితి, బేత్తుయిదా మెంతి గవ్వి జోవయింక కడ నిలన్.

పాచ్ వెయిల్ జన్ మాస్సుల్ క యేసు అన్నిమ్ దిలిసి

11 జలె, జోవయింక ‘ఒత్త బేత్తుయిదాతె గెతయ్’ మెన యేసుచి రిసా ప్రజెల్ జనాబ్ నూన కెర, జోచి పట్టి గెల. జోతె పాచ్ వెయిల్ కయ్, జో జోవయింక పాసి కెరన్లన్ చి, దేముడుచి †రాజిమ్ చి రిసా జోవయింక బోదన కెర, జోవయింతె జోర్లెల్, బాదల్ తిలసక చెంగిల్ కెర్లెన్.

12 జలె, పొద్దు గెచ్చుక దెర్లి చి, యేసుచ బారజన్ సిసిస్సుల్ జోతె జా కెర, “ఈంజేవ్ జనాబ్ అన్నిమ్ దొర్లు కెరంతి రితి, నిద్ర తతి రిసా ఇన్నెక నుట్టునంతచ గవ్విలె తెద్రవు బయిలు దేసిమి అన్నుమ్, గెద. ఇన్నె కిచ్చోయ్ దొర్లు జయె నాయ్” మెల,

13 గని జో జోవయింక, “తుమి జోవయింక కిచ్చో జవున్ అన్నిమ్ దాస” మెలన్. దస్సి మెంతికయ్, జేవ్ “అమచితె ఎత్తి పాచ్ పోడియె చి దొన్ని మొస్సు అస్సి. నెంజెలె, అమె గెచ్చు ఈంజేవ్ ఎత్తి జిన్ క అన్నిమ్ గెన అనుక గె?” మెల.

14 జా జనాబ్ తెచ మున్నుబోదల్ కెత్తి జిన్ జవుల మెలె, పాచ్ వెయిల్ జన్. గని యేసు సిస్సుల్ క “యాబయ్ జిన్ క ఏక దవుని, యాబయ్ జిన్ క అన్నెక దవుని, దస్సి దవుని దవునిచో తెన్ జేవ్ ఎత్తి జిన్ క వెనడ” మెన సంగిలన్.

15 జేవ్ దస్సి కెర ప్రజెల్ ఎత్తి జిన్ క వెనడ.

16 తెదెడి యేసు జేవ్ పాచ్ పోడియె చి దొన్ని మొస్సు దెర, ఆగానుమ్ పక్క దెక, ‘ఈంజె తూయి దిలది’ మెన దేముడు అబ్బొన్ క జోబర సంగ కెర, జేవ్ పోడియె మోడ కెర, “ఎత్తి జిన్ క వంట దాస” మెన సిస్సుల్ చి అత్తి సార్లు కెర దిలన్.

17 జేవ్ ఎత్తి జిన్ క పేట్ బెర్తు కయల చి, సెంసిల పోడియె గండల్ మొస్సు గండల్ బార గంపల్ తె బెర్తు జలె.

యేసుక ‘క్రీస్తు’ మెలో జెంక తిలో రచ్చించుప కెర్లెసా (మత్త 16:13-19; మార్కు 8:27-29)

18 ఏక నుట్టు, యేసు ఎత్తిలోయి ప్రార్లు కెర్లె తిలన్, గని జోచ బారజన్ సిస్సుల్ క ఒత్తయ్ తిల, చి “కొన్నె మెన ప్రజెల్ అంక సంగితతి?” మెన యేసు సిస్సుల్ క పుసిలన్.

19 పుసితికయ్, “బాప్తిసుమ్ దెతె తిలో యోహాను” మెన సగుమ్ జిన్ తుక సంగితతి. అన్నె సగుమ్ జిన్ తుక “దేముడుచి కబుర్లు సంగిలో ఏలీయా జా తయెదె” మెంతతి చి, అన్నె సగుమ్ జిన్ “దేముడుచి కబుర్లు సంగిలో అన్నెక్లో పూర్లుమ్ చో జివ్ జా అమచితె జా అస్సె,” మెంతతి మెల.

20 జేవ్ దస్సి మెంతికయ్, యేసు “తుమ్, జలె, కొన్నె మెన అంక సంగితను?” మెన జోవయింక పుసిలన్ చి, “ తెద్రయిందె” మెన దేముడు సంగ తిలో క్రీస్తు మెలో రచ్చించుప కెర్లెసా తుయ” మెన పేతురు జబాబ్ దిలన్.

21 గని “జా కోడు అన్నె కక్క కి సంగ నాయ్” మెన జోవయింక యేసు కచితుమ్ తెన్ ఆడ్ర దిలన్.

22 అన్నె జో, “అచ్ మాస్సు జా జెర్మన్ అయ్లోసా ఒగ్గర్ సైమల్ నీడుక అస్సె. †వెల్లెల నుదల్, వెల్లెల పూజర్లు చి, మోసి తెన్ దేముడు దిలి ఆగ్గల్ సికడ్డన అంక ‘జివున్ నాయ్’ మెనుక అస్సె చి, అచ్ మొరుక అస్సె. గని తిర్తతక అచ్ అన్నె జివ్ జా ఉట్టుక అస్సె” మెన యేసు సంగిలన్.

దేముడుచి రాజిమ్ (మత్త 16:21-28; మార్కు 8:30-9:1)

† 9:10 9:10 లూకా 6:13-16 దెక. సగుమ్ తె ‘బారజన్ సిస్సుల్’ మెన అస్సె. జేవ్ ఈంజేవ్ ఎత్తి. తెలుగు-అబ్బొస్సులు † 9:11 9:11 4:43చి ఎట్టెచి కోడు, చి 9:2 దెక. † 9:12 9:12 నెంజెలె ‘బారికుల్’. * 9:22 9:22 5:24చి ఎట్టెచి కోడు దెక. † 9:22 9:22 వెల్లెల మాస్సుల్, వెల్లెల పూజర్లు చి మోసి తెన్ దేముడు దిలి ఆగ్గల్ సికడ్డన మొత్తుము యూదుల్ చి వెల్లెల నెబ వెసితున జవుల. వెల్లెల మాస్సుల్ తె వరినయ్యల్ చి సద్దాకయ్యుల్ కి తవుల.

23 తెదొడి ఎత్తిజినక యేసు, “కో అంక సంజా అంచి పట్టి బులుక ఉచరుల గే, జోచి సొంత ఇస్తుమ్ కెరుక ముల దా, రోజుక జోచి సొంత సిలువ వయన అంచి పట్టి బులుక అన్న.

24 కిచ్చొక మెలె, జోచి సొంత ప్రానుమ్ రచ్చించువ కెరనుక కో కోర్ప జవుల గే, జోచి ప్రానుమ్ పాడ్ జా గెచ్చెదె. గని అంచి రిసా కో జోచి ప్రానుమ్ దెతి రితి ఎక్కి మెన్ను నిదానుమ్ ఇండుల గే, జోచి ప్రానుమ్ రచ్చించువ జయెదె.

25 మెలె, ఈంజ లోకుమ్తె తిలిసి ఎత్తి కేన మాన్ను జవున కలుగు కెరన జోచి ప్రానుమ్ పాడ్ కెరనైగిన, జేవక సిచ్చు జలిగిన, జోక కిచ్చొ లాబుమ్? కిచ్చొ లాబుమ్ నాయ్.

26 కో జలెకు అంచి రిసాచి అంచ కొడెచి రిసా లాజ్ జా సత్తిమ్ నే ఒప్పునుల గే, ఆవ్ మాన్ను జా జెర్మున్ అయ్లోసా పరలోకుమ్ గెచ్చు అంచి అన్నె అబ్బొసి జిలో దేముడుచి దూతల్చి పరలోకుమ్చి ఉజిడ్చి గవురుమ్ తెన్ ఈంజ లోకుమ్తె అన్నె ఉత్త జెతి దీసిక, జేవ్ మాన్యుల్క ‘అంచ’ మెన ఒప్పునతి రితి అంచి తెన్ బెదవనుక అంక లాజ్ తయెదె.

27 గని తుమ్క ఆవ్ కిచ్చొ కచితుమ్ సంగితసి మెలె, ఇన్నె టీవ తిలన సగుమ్జిన నే మొరై అగ్గె దేముడుచి కిరాజిమ్ దెకుల” మెన యేసు సంగిలన్.

తీర్గ సిస్సుల్చి మొక్కి యేసు గడియ పరలోకుమ్చి ఉజిడి జలిసి
(మత్త 17:1-8; మార్కు 9:2-8)

28 జలె, యేసు ఈంజేవ్ కొడె సంగ పాసి పాసి అట్టు దీనల్ గెతికయ్, ప్రార్దన కెరుక మెన, పేతురుక యోహానుక చి యాకోబుక వట్ట కడ దెరన, యేసు డోక్ తిలి మెట్టుయ్ గెచ్చు వెగిల.

29 యేసు ప్రార్దన కెరై తతికయ్, జోచి *మొకోమ్ మార్పువ జలన్ చి, జోవ పాలల్ చొక్కిల జా దగదగాల్న మెర్పువ జల.

30 అన్నె, ఈందె, దొగుల మున్నుబోదల్ డీస యేసు తెన్ లట్టబ్బ. కొన్ను మెలె, పూర్ణుమ్చ దేముడుచి కబుర్లు సంగిత మోసే అన్నె ఏలీయా తిల.

31 జేవ్ పరలోకుమ్చి ఉజిడ్ తెన్ డీసిల చి, కిచ్చొచి రిసా లట్టబై తిల మెలె, దేముడుచి కోడు తెన్ రెగిడ్డి రితి యేసు †మొరుక తిలిన్చి రిసా, జో మొర్చిసి ‡ఉట్ట గెతిసి యెరూసలేమ్తె జర్గు జంక తిలిన్చి రిసా.

32 పేతురు చి జోవయింతెన్ తిల దొగుల గూనక నిజ తిల గని, అన్నె చెర్చొయ జలె. యేసు పరలోకుమ్చి ఉజిడి జలిసి చి, జో తెన్ జేవ్ దొగుల పూర్ణుమ్చ టీవెలిసి దెకిల.

33 జలె, జేవ్ పూర్ణుమ్చ యేసుక ములుక దెర్లె పొది పేతురు యేసుక “గురుబాబు, అమ్ ఇన్నె తతిసి చెంగిలి. తుక ఏక్, మోసేక ఏక్, ఏలీయాక ఏక్ మొత్తుమ్ తిన్ని కుడియల్ బండుమ్దె” మెలన్, గని జో కిచ్చొ సంగితయ్ గే నేనె.

34 జలె, జో ఇసి సంగితె తతికయ్, మబ్బు ఏక్ ఉత్త జా జోవయంక డంకిలన్ చి, డంకి జతికయ్, సిస్సుల్ బియె గెల.

35 మబ్బు తెంతో “ఈంజో అంచొ వుత్తు, అవ్ కీనిసాన్లసా. ఇన్నెచి కోడు తుమ్ సూన” మెన జా మబ్బు తెంతో అవాడ్ సంగిలిసి సూన్.

36 జలె, జా కోడు సంగ కేడయ్లి బేగి, యేసు ఎక్కిలోయ జేవ్ తీర్గ సిస్సుల్ తెన్ తిలో. జలె, జర్గు జలిన్చి రిసా సిస్సుల్ తుర్తె జా, జేవ్ పొదులె కక్క కి జేవ్ దెకిలిన్చి రిసా ఎక్కి కోడు కి సంగితి నాయ్.

మార్కు సేడ్తె తిలో బూతుమ్ దెర్లొ నాడుక యేసు చెంగిల్ కెర్చిసి
(మత్త 17:14-18; మార్కు 9:14-27)

‡ 9:23 9:23 ‘సిలువ’ మెన కిచ్చొక సంగితయ్ మెలె, యేసుక చిరోదుమ్ సుదల్ కిసి మారుల మెలె, జోవయంక ‘సిలువ’ మెలిన్తె అత్తిలె చట్టెలె మేకుల్ పెట టీవడ మొర్చి రితి ములుల. జోవయంక జా సిలువతె నే టీవడ్తె అగ్గె, వట్ట గెతె తిలి పొది, జోవయంచి సొంత సిలువ జోవయంక మొర్చిన్తె యేసు గడియ సొంత వయంక తియార్ల; యోహాను 19:17. పట్టె సిమాను మెలో ఎక్కిలో వయతి రితి తియార్ల; మార్కు 15:21. సిలువ మెలె, డేడిక అన్నెక డేడి రితి డండో అడ్డుమ్ కెర బుయ్యె రోవ టీవడదుల. § 9:27 9:27 మత్తయ 16:28, చి మార్కు 9:21 దెక. * 9:29 9:29 మత్తయ 17:2. † 9:31 9:31 ఈంజ లోకుమ్చ మన్సుల్చ పాపల్ వయన గెచ్చయ్తి రిసా. ‡ 9:31

9:31 మొర్చె, అన్నె జేవ్ జా, పరలోకుమ్తె కి ఉట్ట గచ్చెదె. § 9:35 9:35 నెంజెలె, ఈంజ మత్తెలి రెగిడ్డ తోలెతోవ సగుమ్ పున్కల్తె ‘ఆవ్ ప్రేమ తిలోసా’ మెన రెర్లె అన్నె.

37 అన్నెకే దీని, జేవ్ మెట్టయ్ తెంతో ఉత్త జెతికయ్. ఒగ్గరజన్ జనాబ్ యేసుక దన్నుల్ జల.

38 ఈందె, జేవ్ జనాబ్తెచో మాన్సు కేక గలో. “గురుబాబు, అంక ఎక్కిలో పుత్తు. జోక దెకు, మెన తుక ఆవ్ బతిమాల్పు జతసి!

39 ఈందె, ఏక బూతుమ్ జోక దెరుక అలవాబ్ అన్నె చి, కెయ దెల్లె, ఈంజో కేక గలన ఒద్దెచి, బూతుమ్ జోక పార్లుప కెరెచి, చోండివాల్ ఈంజో పొగుర్లు బార్ కెరవంతయ్ చి, ఇన్నెక ఒగ్గర అల్లర కెర పూర్తి అల్పు కెర కన్ననె ముల ఉట్ట గెతయ్.

40 అన్నె బూతుమ్క ఉదడ దాన మెన తుచ సిన్నుల్క బతిమాల్పు జా సంగితె తిలయ్, గని జేవ్ నెత్తిర్ల” మెన జో మాన్సు యేసుక సంగిలన్.

41 సంగితికయ్, యేసు కిచ్చొ జబాబ్ దిలన్ మెలె, “నముకుమ్ నెంజిలి వెరె బుద్దిచి కాలుమ్చ, తుమ్. తుమ్చి తెన్ ఆవ్ కెత్తి దీనల్ తంక? కెత్తి దీనల్ తుమ్క ఆవ్ ఒర్లుప జంక? అల్లె, జో నాడుక అంచితె కడ ఆను!” మెన సంగిలన్.

42 జలె, జో నాడు పాసి జెతె తతికయ్, బూతుమ్ జోక పార్లు కెరవ గిజ్జిగిజ్జల్ కెరయ్లన్. గని యేసు జో బూతుమ్క గోల కెర్లన్ చి, జో నాడుక చెంగిల్ కెర, అబ్బొన్చి అత్తి జోక అన్నె సార్లు కెర్లన్,

43 “దేముడు అమ్చొ కెద్ది నెక్తి అదికారుమ్చొ!” మెన ఎత్తిజన్ జోచి ఆచారిమ్ సంగితె తిల చి, యేసు జర్లు కెర్లన్చి రిసా ఎత్తిజన్ జోచి ఆచారిమ్ సంగితె తతికయ్, యేసు జోచ బారజన్ సిన్నుల్క,

44 “ఆవ్ అప్పె సంగితిసి తుమ్ చెంగిల్ నూన. మెలె, ఆవ్ మాన్సు జా జెర్మన్ అయ్లోసాక విరోదుమ్ సుదల్ అన్నె మాన్సుల్చి అత్తి సార్లు కెర దెంక అన్నె” మెన సంగిలన్.

45 గని జా కోడుచి అర్దుమ్ జోవయింక జయె నాయ్. జేవ్ జా అర్దుమ్ నే కెరంతి రితి ఎత్తి అదికారుమ్ తిలో దేముడు లుంకడ్లన్ చి, యేసుక పుసుక బియఁ తుక్కె తిల.

“అమ్చితె కో వెల్లో జయెదె?”

(మత్త 18:1-5; మార్కు 9:33-37)

46 జలె, “అమ్చితె కో వెల్లో ముక్కిమ్ జయెదె?” మెన సిన్నుల్ లట్టబన ఇదెలి గగ్గోల్ జల.

47 గని జోవయించి పెట్టి ఉచ్చెర్లసి యేసు చిన కెర, ఏక బాలబోదక దెర, జోచి పక్క టీవడ,

48 జోవయింక ఇసి మెలన్. “*ఈంజో బాలబోదక జప్పన్ అంచి నావ్ తెన్ కో జలెకు మరియాద కెరెదె గే, అంకయ్ మరియాద కెర్లె రితి జయెదె. అన్నె, కో జలెకు అంకయ్ మరియాద కెరెచి గే, అంక తెద్రయ్లో దేముడు అబ్బొక కి మరియాద కెర్లె రితి జయెదె. తుమ్ ఎత్తిజన్తె కో దాకు కెరనెదె గే, జోయ్యె వెల్లో జయెదె” మెన జోవయింక సంగిలన్.

బూతల్క ఉదడ్లొ ఎక్కిలోచి రిసా సిన్నుల్ ఆచారిమ్ జలిసి

(మార్కు 9:38-40)

49 తెదొడి యోహాను మెలో సిన్నుడు యేసుక కిచ్చొ మెన సంగిలన్ మెలె, “గురుబాబు, ఎక్కిలో తుచి నావ్ తెన్ బూతల్క ఉదడ్లెసి దెకిలమ్. జో అమ్చి తెన్ తుచి పట్టి గెతోసా నెంజిచి రిసా జోక ఆటంకుమ్ కెర్లమ్” మెన సంగిలన్.

50 గని యేసు జోవయింక, “జోక ఆటంకుమ్ కెర నాయ్. కిచ్చొక మెలె, కో తుమ్చి కామ్చి ఉప్పిరి విరోదుమ్ కెరె నాయ్ గే, తుమ్చి పచ్చిన జతోసా జయెదె” మెన యేసు సంగిలన్.

సమరయ వ్రదేసిమ్చి ఏక గవ్విచ మాన్సుల్ యేసుక టాన్ నే దిలిసి

51 ఒత్త తెంతో కిచ్చొ జర్లు జలి మెలె, యేసు మొర్తి పరలోకుమ్తె అన్నె గెతి సమయమ్ పాసి జా అయ్లి పొది, ‘యెరూసలేమ్తె అన్నె ఉట్ట గెచ్చుక అన్నె’ మెన జాన కెర బార్ జలన్, అన్నె వట్టి గెతె తా,

52 ‘అంక టాన్ తెయార్ కెర్లె’ మెన, సగుమ్జిన్క యేసు పురె కబుర్ తెద్రయ్లన్. దస్సి మెన జేవ్ గెచ్చు, సమరయ సుదల్చి ఏక గవ్వి గెల.

* 9:48 9:48 మార్కు 9:37 దెక.

53 గని జా గవ్వెచ ప్రజల్ యేసుక టాన్ దెంక నెసిల. కిచ్చొక మెలె,† యెరూసలేమెతె గెచ్చుక జోచి ఉద్దెసుమ్.

54 †జా గవ్వెచ దస్సి బుద్ది తెన్ అస్తి మెన యేసుచ సిస్సుల్ యాకోబు చి యోహాను దెక కెర, కిచ్చొ మెల మెలె, “ప్రబుచ, ఇన్సెక డయ గెలి రితి ఆగాసుమ్ తెంతో ఆగి ఆనవుమ్ గె?” మెన పుసిల.

55 గని యేసు పసుల జోవయింక †గోల కెర్తన్.

56 జోచి సిస్సుల్ తెన్ తోడ అయల తేరబోదల్ తెన్ వట్టె గెచ్చు, అన్నెక్ గవ్వె గెల.

యేసు తెన్ బుల్లన ఎక్కి మెన్సు తెన్ తంక మెన సంగిలిసి (మత్త 8:19-22)

57 యేసు సిస్సులీసి తెన్ వట్టె గెతె తతికయ్, ఏక్ మాన్సు యేసుతె జా: కెర, “తుయి కేనె గెలె కి, అవ్ కి తుచి తెన్ బెద జెయిందె” మెన యేసుక సంగిలన చి,

58 యేసు జోక, “నక్కల్కె పార్లు, ఆగాసుమ్చ పిట్టల్క గూడలు, గని అవ్ మాన్సు జా జెర్మున్ అయ్లోసాక బోడి వంపా కెర్తి టాన్ నాయ్” మెన జబాబ్ దిలన్.

59 అన్నెక్కొక, “అంచి వట్టె జె” మెలన్, గని “ప్రబు, అవ్ తుచి తెన్ నే జెతె అగ్గె గెచ్చు కెర, అంచో అబ్బొ మొర గెతె ఎదక జోక పోసు కెర, జో మొర్తె జోక రోవ గెలుక మెన, అంక సెలవ్ దె” మెన సంగిలన్.

60 యేసు జోక కిచ్చొ సంగిలన్ మెలె కి, “మొర్తన జోవయింక సొంత మొర్తనక రోవ గెల్తు, గని తుయి కిచ్చొ కెరుక అస్సె మెలె, ‘దేముడుచి రాజిమ్ పావ జా అస్సె’ మెన, తుయి గెచ్చు, జా రాజిమ్చి రిసాచి సుబుమ్ కబుర్ బోదన కెరు” మెన ఆడ్త దిలన్.

61 ఒత్తె తెంతో అన్నెక్కొ “తుచి వట్టె జెయిందె, ప్రబు. గని తోలితో అవ్ గెరి గెచ్చు, గెర్చ మాన్సుల్క అవ్ సంగ జెతి రితి సెలవ్ దె” మెన యేసుక సంగిలన్.

62 జోక యేసు, “కో జలెకు నాజెల్ దెర కే:సుక మొదోల్ కెర వట్టె దెకితె తిలె, జో మాన్సు దేముడుచి రాజిమ్చి కామ్క నెంజె” మెన జబాబ్ దిలన్.

10

డబ్బుయజిన మాన్సుల్ దొగుల దొగులక యేసు తెద్రయలిసి

1 ఇన్నెచి పడ్డో యేసు అన్నె *డబ్బుయజిన మాన్సుల్క నిసాన, జేవ్ దొగుల దొగుల బార్ జా, జో గెచ్చుక తిలి ఎత్తి. పట్టుమ్, ఎత్తి టాన్తె జేవ్ పుర్తి గెచ్చుక మెన జోవయింక తెద్రయలన్.

2 తెద్రయలి పొది జోవయింక, “గట్టిజ వంటో పిక †లాయితి కాలుమ్ జా అస్సె. వంటో బలేగ ఒగ్గర్ అస్సె. గని పికిల్ వంటో లాయ్ ఆనతి రిసా దస్సి ఆనత మాన్సుల్ తోక్కిజిన అస్సి. జాకయ్, ఈంజ వంటో లాయితనక బార్ కెర తెద్రవు” మెన ఈంజ వంటో పికడ్డో ఎజిమానిక తుమ్ ప్రార్దన కెర.

3 అల్లె, బార్ జా గెచ్చు. ఈందె, నక్కల్చి నెడిమి మెండె పిల్లల్క తెద్రయలి రితి తుమ్క అవ్ తెద్రయతసి.

4 డబ్బుల్ సెంచె జవున్, జోడ్లు జవున్ దెరన గెచ్చు నాయ్, అన్నె వట్టె నమయమ్ పాడ కెర్తి రితి కచి తెన్ లట్టా నాయ్.

5 అన్నె, కేన్ గెరి తుమ్ గెతె గే బేగి, “ఈంజ గేరుచి ఉప్పిరి దేముడుచి సేంతుమ్ తవున్!” మెన తుమ్ సంగ.

6 జా గెరితె సేంతుమ్చో మాన్సు తిలె, తుమ్ సంగిలి సేంతుమ్ జోవయింక ఉప్పిరి తయెదె. గని దసా మాన్సు నెంజెలె, తుమ్ అన్లి సేంతుమ్ ఒత్తె నే తయెదె, పసుల తుమ్చితె అన్నె బుల జెయెదె.

† 9:53 9:53 యెరూసలేమెతె యేసు గెలె కిచ్చొక జేవ్ నమరయ్ సుదల్ కోవుమ్ జతతి మెలె, “ఎత్తి అదికారమ్ తిల్ దేముడుక బక్తి కెరుక మెలె, ఎత్తి అమ్చి యెరూసలేమెచి దేముడుచి గుడితె నత్తిమ్ బక్తి కెరుక జయెదె” మెన యాదుల్ సంగతతి, అన్నె నమరయ్ సుదల్క సిస్సారుమ్ ఉచర్తతి, చి రిసా జా కోవుమ్క యెరూసలేమెతె గెతనక మరియాద దెతి నాయ్. † 9:55 9:55 ఈంజ మత్తెలి తోలితో రెగిడ్ల నగుమ్ పువ్వల్తె ఇసి అస్సె: గెల కెర, తుమ్చి బుద్ది కేనె తెంతో చి గే నేస్సు. కిచ్చొక మెలె, అవ్ మాన్సు జా జెర్మున్ అయ్లోసా కిచ్చొక అయ్లయ మెలె, మాన్సుల్చ జివితమ్క పాడ కెరుక నాయ్, గని జోవయింక రచ్చింపన కెరుకయ్ అయ్లయ మెలన్. * 10:1 10:1 నగుమ్తె ‘డబ్బుయదొస్సిజిన’ మెన రెగ్గె అస్సె. † 10:2 10:2 యోహాను 4:35-38 దెక. † 10:2 10:2 మాన్సుల్ సుబుమ్ కబుర్ నూన అంక నంపజా దేముడుచి రాజిమ్తె బెదితి కాలుమ్ జా అస్సె.

7 జలె, కేన్ సేంతుమ్ గెర్ ద తుమ్క టాన్ దిలె జయ్యి గెరి తా, వేరచితె ఉట్ట గెచ్చ నాయ్. అన్నె, తుమ్ ఒత్త తిలె పొది, జేవ్ దెతిసి కతె పితె తా జా గెరి తా, కిచ్చొక మెలె కామ్ కెర్తొసా జోచి జీతుమ్ నజనుక నాయిమ్. గేర్ గేర్ బులె నాయ్.

8 తుమ్ కేన్ పట్టుమ్ గెలె కి, జేవ్ తుమ్క మరియాద కెర, జేవ్ తుమ్క కిచ్చొ దిలెకి జా కా.

9 అన్నె, జా పట్టుమ్చ జోర్జొల్ జబ్బుల్ తిలె మాన్సుల్క చెంగిల్ కెర చి, “దేముడుది రాజిమ్ తుమ్క పాసి జా అన్నె.” మెన జోవయింక బోదన కెర.

10 గని కేన్ పట్టుమ్ తుమ్క కిచ్చొ మరియాద కెర్తొ నాయ్ గే, జా పట్టుమ్చ వీదులె తుమ్ గెచ్చ, ఇసి మెన సంగ.

11 “అమ్చ చట్టెలె లంబిలి తుమ్చి పట్టుమ్చి దూడి కి తుమ్చి బుద్దిచి ఉప్పిరి సాచి తతి రితి పండ్ల దా ఉట్ట గెత్తుమ్. గని కిచ్చొ కోడు తుమ్ ఉచరన మెలె, దేముడుది రాజిమ్ పాసి జా అన్నె మెన తుమ్ సాచి సంగ.

12 తుమ్క ఆవ్ కిచ్చొ మెంతసి మెలె, ఈంజె లోకుమ్చ మాన్సుల్క వెల్లి తీర్పు కెర్తొ దీసి అయిలె, సాదొమ్ మెలి పూర్గుమ్ కుడ్డె సీనాసెనుమ్ జలి పట్టుమ్చి గత్తిచి కంట, తుమ్క మరియాద నే కెర్తొ కేన్ పట్టుమ్చచి ఉప్పిర్ ఒగ్గర్ సిచ్చ జయెదె” మెన యేసు సంగిలన్.

తిన్ని పట్టల్క యేసు గట్టిజ గోల కెర్తొసి (మత్త 11:20-24)

13 “అయ్యో! కొరాజీనా పట్టుమ్చ చి బేత్సయిదా పట్టుమ్చ, తుమ్చి సిచ్చ కెర్తొ! తుమ్చి నెడిమి ఆవ్ కెర్తొ కమె అమ్చ యూదుల్ నెంజలె తూరు చి సీదోసు మెలె పట్టలె ఆవ్ కెర్తయ్ జలె, జేవ్ పట్టల్చ మాన్సుల్, జేవ్ కెర్తొ పావల్క రిసా అగ్గెయ్ దుకుమ్ జా ములిత, జేవ్ కెర్తొ పావల్చి రిసాచి దుకుమ్క బస్తల్ బందన, సార్ గాంసన వెన తా జేవ్ జోవయింబి పాపుమ్క దుకుమ్ జలినిచి రుజ్జుల్ దెకయత.

14 గని పూర్గుమ్ జేవ్ తూరు పట్టుమ్చ కి సీదోసు పట్టుమ్చ కి ఒగ్గర్ పాపుమ్ కెర్తొ తిలె కి, ఈంజె లోకుమ్చ ఎత్తిజన్క వెల్లి తీర్పు కెర్తొ జా దీసి తుమ్క జతి సిచ్చ జేవ్ పట్టల్ జతి సిచ్చచి కంట ఒగ్గరి జయెదె.

15 పడ్డె తూమ్, కవెర్షూమ్ పట్టుమ్చ మాన్సుల్, తుమ్ *పరలోకుమ్తె ఉక్కిల్ జస్సె గె? నాయ్, గెద, తుమ్ ‘వెల్లి ఆగి గోయతె ఉత్త గతె” మెన యేసు సంగిలన్.

16 తెదెడి యేసు జోచ సిన్సుల్క, “తుమ్చి కోడు కో నూసుల గే, అమ్చి కోడు నూస్లి రితి జయెదె. తుమ్కయ్ కో మరియాద కెర్తొ నాయ్ గే, అంకయ్ కి మరియాద నే కెర్తొ రితి జయెదె. కో అంకయ్ మరియాద కెర్తొ నాయ్ గే, అంక తెర్తయ్లో దేముడు అబ్బొక కి మరియాద నే కెర్తొ రితి జతయ్” మెన సంగిలన్.

యేసు గవ్వెలె అగ్గె తెర్తయ్లె డబ్బయ్జిన్ ఉట్ట అయ్లెసి

17 యేసు అగ్గె గవ్వెలె తెర్తయ్లె †డబ్బయ్జిన్ జోవయింబి కామ్ కెర కేడవన, సర్తసంతోసుమ్ తెన్ యేసుతె అన్నె ఉట్ట జా కెర, “ప్రబు, గెచ్చ మెన బూతల్క తుచి నావ్ తెన్ ఉదల్లె, అమ్చి కోడు జేవ్ కి నూన ఉట్ట గెతతి” మెన జోవయింబి సర్త సంగిల.

18 యేసు జోవయింక, “నయ్తాన్ పరలోకుమ్ తెంతొ, జోచి టాన్ తెంతొ బిజలి మొల్కలి రితి. డీన సేడ గెలిసి ఆవ్ దెకిలయ్.

19 ఈందె, తుమ్క కెర్తొ అదికారుమ్ దా అన్నె మెలె, తుమ్ అయివొక, పొట్టల్క నుదిలె జప్సన్ తుమ్ కిచ్చొ ప్రమాదుమ్ జను నాయ్, నయ్తాన్చి సెక్తి తిలన ఎత్కిచి ఉప్పిరి తుమ్ ప్రమాదుమ్ నెంతె జీన్తె. తెద్ది సెక్తి అదికారుమ్ తుమ్క దా అన్నె.

§ 10:12 10:12 సాదొమ్ పట్టుమ్ పూర్గుమ్ కిసి నాసెనుమ్ జలి మెలె, ఎత్తి అదికారుమ్ తిలో దేముడు జా పట్టుమ్చి ఉప్పిరి ఆగి నుచ దెలన్. అదికారుమ్ 13:12, 18:20-19:29. * 10:15 10:15 నెంజలె ‘ఉప్పిర్ గెచ్చ గప్పరుమ్ జస్సె గె? నాయ్, గెద, ఎట్టో గిచ్చ నిస్కారుమ్-జస్సె’ మెలి అర్దుమ్ కి ఉచరక జయెదె. కవెర్షూమ్ పట్టుమ్చ మాన్సుల్ ‘అమ్ యూదుల్ జమ్దెచి రిసా అమ్ చెంగిల్ జమెదె. తూరు చి సీదోసుచ మాన్సుల్ యూదుల్ నెంజలిచి రిసా గార్ జవుల’ మెన ఉచరల. † 10:15 10:15 నెంజలె ‘వెల్లి ఆగి గోయతె’. ‡ 10:17 10:17 నెంజలె ‘డబ్బయ్చిన్’.

20 గని ముక్కిమక తుమ్ కిచ్చొది రిసా సర్లసంతోసుమ్ తంక మెలె, బూతల్ గట్ల తుమ్క బియఁ ఉట్ట గెతినచి రిసా నాయ్, గని 'ఇన్నె జెవుల' మెన తుమ్చ నవ్వొ పరలోకుమతె రెగిడ్డినచి రిసాయి తుమ్ సర్లసంతోసుమ్ జా" మెన యేసు జోవయింక సంగిలన్.

దేముడు అబ్బొనచి రిసా సిస్సుల్క సంగిలినీ
(మత్త 11:25-27; 13:16-17)

21 జయ్యి గడియయ్ దేముడుచి నుద్ది తిలి ఆత్మసెక్కిక యేసు ఒగ్గర్ సర్లసంతోసుమ్ జా దేముడు అబ్బొనక కిచ్చొ మెన ప్రార్లన కెర్లన్ మెలె, "పరలోకుమక కి బూలోకుమక కి అదికారుమ్ తిలి ఓ బ, 'జానుమ్' మెన జోవయింక జెవ్వి గవురుమ్ ఉచరంతనక చి ఒగ్గర్ సదు కెర్లనక ఈంజ జల్ల జతినీ ఎత్తిచి అర్లుమ్ లుంకడ, బాలబోదల్ జల రిత గవురుమ్ నెంజలనక అర్లుమ్ దెకవ అస్సిని మెన తుక జోబర, మెన అంచి సర్ల ఆవ్ సంగితనీ. తుచి దరుతె ఇని కెర్లది, గెద" మెన ప్రార్లన కెర్లన్.

22 "అంచొ అబ్బొ ఎత్తి అంచి అత్తి సార్ప కెర దా అన్నె. అన్నె, ఆవ్ పుత్తుని కొన్నొ జయిందె గే అబ్బొ ఎక్కిలోయ్ జానె, చి అబ్బొ కొన్నొ జయిందె గే, ఎక్కి ఆవ్ పుత్తుని జాని, చి అన్నె కక్క జోవయింక దెకయిందె గే, జెవ్వి జాన్తి" మెన సంగిలన్.

23 తెదొడి యేసు జోవ బారజన్ సిస్సుల్ తిలి పక్క పసుల ఎక్కి జోవయింకయ్, "తుమ్ దెకితినీ దెకిత మాన్సుల్క చెంగిలి!

24 తుమ్క ఆవ్ కిచ్చొ మెంతనీ మెలె, పూర్లుమ్చక చి కంట తుమ్క ఒగ్గర్ చెంగిలి. కిచ్చొక మెలె, పూర్లుమ్ దేముడుచ కబుర్లు సంగిలన ఒగ్గర్జన్, రానల్ ఒగ్గర్జన్ తుమ్ దెకితినీ దెకుక జేవ్ కోర్ప జలెకి, దెకుక నెత్తిర్. తామ్ నూనెతినీ నూనుక జేవ్ కోర్ప జలెకి, నూనుక నెత్తిర్. జా అవ్కాసుమ్ జోవయింక దొర్పు జయె నాయ్" మెన యేసు సిస్సుల్క సంగిలన్.

ప్రేమబుద్ధి తిలో నమరయ నుదొచి రిసా సంగిలి టాలి

25 ఏక సుట్టు యూదుల్చి మోసి తెన్ దేముడు దిలి ఆగ్గుల్ సెకడ్డాసా ఎక్కిలో టీవ కెర, యేసుక పరిచ్చ కెరుక ఉచర ఇని పునీలన్. "గురుబాబు, పరలోకుమచి రాజిమ్తె ఆవ్ బెద కెయెడ తెయెడ జితి వాల్ అంక దొర్పు జంక మెలె, ఆవ్ కిచ్చొ కెర్లె జయెదె?" మెన పునీలన్.

26 జో దస్సి పునీతికయ్, యేసు జోక, "మోసి పూర్లుమ్చొచి అత్తి దేముడు రెగ్గయల 5 ఆగ్గుల్తె కిచ్చొ మెన రెగ్గ అన్నె? ఒత్త కిచ్చొ సంగితయ్?" మెన పునీలన్.

27 జో యేసుక కిచ్చొ జబాబ్ దిలన్ మెలె,

*"తుమ్చొ ప్రబు జలో దేముడుక

తుచి ఎత్తి పెట్టి తెన్, తుచి ఎత్తి మెన్సు తెన్,

తుచి ఎత్తి సెక్కి ఎత్తి తెన్,

తుచి ఎత్తి బుద్ది తెన్ నిదానుమ్ ఎక్కి ప్రేమ కెర్తె తంక. అన్నె,

తుమ్క తుమి కెద్ది ప్రేమ కెరంతను గే,

తుచి పక్కయ్చక కి తెద్ది ప్రేమ కెర్తె తంక"

నేన దేముడు మోసిచి అత్తి దిలి ఆగ్గుల్చి కోడు సంగిలన్.

28 జో దస్సి జబాబ్ దెతికయ్, యేసు జోక "తుయి సరిగా జబాబ్ దిలది. తుయి సంగిల్ రితి కెర్తె తిలి, పరలోకుమతె తుయి బెద కెయెడ తెయెడ జితి వాట తుక దొర్పు జయెదె" మెలన్.

29 జో మాన్సు, జలె, జో అన్నె నగుమ్జన్క చెంగిల్ నే దెకితినీక, 'తప్పు నెంజె' మెన రుజ్జు దెకుక ఉచర, "జలె, అన్నె మాన్సుల్క మెలె, కక్క?" మెన పునీలన్.

§ 10:26 10:26 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రగ్గయలి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగిచి పావ్ పుస్తకుమతె రెగ్గయ్ జా అన్నె. ఈంజ దెకవుక మెన కుమియ బాసతె నొయ ప్రమానుమతె మోసి పూర్లుమ్చొచి అత్తి రెగిడ్డి దేముడుచ ఆగ్గుల్ మెన రగ్గవ అన్నె. * 10:27 10:27 ద్వితియాపదేశ కాండుము 6:5 చి లేవీయకాండుమ్ 19:18.

30 పునితికయ్, యేసు ఏక టాలి సంగ జబాబ్ దిలన్. ఇసి మెన; “అమ్చొ యూదుడు ఎక్కిలో యెరూసలేమ్ తెంతో యెరికో పట్టుమతె గెచ్చుక మెన వట్టె గెతె తిలన్, చి చోర్లుచి అత్తి దెర్పు సేడ్డనక, జేవ్ జోవ పాలల్ కడ కెర జోక పెట గెల కెర, జోక ఇదిలిదిల్ జీవ తతె, జో మొర్రి రితి ముల దా ఉట్టు గెల.

31 “జలె, కీసి గే పూజరి ఎక్కిలో జయి వాట్ అయలన్, అన్నె, జో మాన్సుక దెక పాసి నే గెతె వాట్చి బత్తలతో పక్క ఉట్టు గెలన్.

32 దస్సి, దేముడుచి గుడితెచి సేవ కెర్తొ †లేవీయుడు ఎక్కిలో కి జా టాన్తె అయలె, జో కి దెక కెర, వాట్చి బత్తలతోచి పక్క ఉట్టు గెలన్.

33 “గని ‡సమరయ సుదొ ఎక్కిలో జా వట్టె ప్రయానుమ్ గెతె తా, జో మాన్సు సేడ తిలిన్తె అయలన్, అన్నె జోక దెక కెర, యూదుల్ నిస్కారుమ్ దెకితో ఈంజొ సమరయ సుదొ, జో సేడ తిలో యూదుడుచి ఉప్పిరి కన్కారుమ్ జా,

34 పాసి గెచ్చ దెబ్బల్ లయలిన్తె తేలు చి ద్రాచ రస్సుమ్ ‘ఓస్సు’ మెన సువ దా, కట్టు బందిలన్ చి, ఇన్నెచి సొంత గాడ్చె ఉప్పిరి వెగడ దా, ఏక అద్దె గెరితె న కెర, జోవయింక దొర్పు జలి సొవైచన కెర్తన్.

35 అన్నెక్ దీసి, దొర్త చి కూలిచి ఎదిలి డబ్బుల్ జేబితె తెంతో వెంట కెర, జా అద్దె గెరిచొ సొచ్చుకరిక దా, ఈంజొ మాన్సుక చెంగిల్ దెకితె తా, ఇన్నెచి రిసా అన్నె కిచ్చొ కర్పు సేడ్డె గే, ఆవ్ అన్నె అయలి పొది తుక దెందె మెన ఈంజొ సమరయ సుదొ బప్పన్.

36 “జలె, చోర్లుతె దెర్పు సేడ్డె జో అన్నెక్కోక ఈంజేవ్ తిగ్గతె కేన్ మాన్సు ప్రేమ కెర్లొసా జలొ? కిచ్చొ ఉచర్తసి? సంగు” మెన జోక యేసు పరిచ్చ కెర్తన్.

37 “జోక కన్కారుమ్ దెకిలోసా” మెన జబాబ్ దిలన్చి, రిసా యేసు జోవయింక, “తుయి గో, చి అన్నె మాన్సుల్క దస్సి ప్రేమ కన్కారుమ్ దెకితె తా” మెన సంగిలన్.

మార్త మరియచి గెరి యేసు గోతె గెలిసి

38 జలె, యేసు అన్నె సిస్సుల్ వట్టె గెతె తతికయ్, ఏక గవ్వె పాచ అయలక, మార్త మెలి తేరబోద జోవయింక మరియాద కెరుక మెన గెరి బుకార్తన్.

39 జాక మరియ మెలి బేస్సి తిలి. జా, జలె, ప్రబుచి చట్ట వెన జో సంగితె తిలి బోదన సూన్తె తిలి.

40 మార్త, †గెరిచి కామ్ కెరుక మెన బమ్మ జతె తిలి, అన్నె, యేసుతె గెచ్చ కెర, “ప్రబు, ఆవ్ ఎక్కిలో ఈంజ కామ్ కెర్రి రితి అంచి బేసి బద్దుకుమ్ జా ములితయ్ మెన దెకిన్ నాయ్ గె? జా అంక తోడు కెర్పు. సంగు” మెలన్.

41 గని ప్రబు జేవ్క కిచ్చొ జబాబ్ దిలన్ మెలె, “మార్త, మార్త, తుయి ఒగ్గర్ కమె తియన బమ్మ జా పంబ్ర జతసి.

42 ఎత్తి కమెతె ఎక్కి ముక్కిమచి సుబుమ్ కబుర్ సూన్తి జయ్యి వాట మరియ నజన అన్నె, జా జాచి తెంతో కడుక జెయె నాయ్.” మెన జాక సంగిలన్.

11

ప్రార్తన కెర్తెన్చి రిసా యేసు బోదన కెర్తెసి

(మత్త 6:9-15)

1 ఏక దీసి కిచ్చొ జర్లు జలి మెలె, యేసు ఏక టాన్తె ప్రార్తన కెర్తె తిలన్, అన్నె, ప్రార్తన కెర కేడయలె, జోచ సిస్సుల్తె ఎక్కిలో జోక “ప్రబు, బాప్తిసుమ్ దెతె తిలో యోహాను జోచ సిస్సుల్క ప్రార్తన కెరుక సికడ్లి రితి, అమ్క కి ప్రార్తన కెరుక తుయి సికడ.” మెన సంగిలన్.

2 దస్సి సంగితికయ్, యేసు జోవయింక ఇసి మెలన్. “తుమ్ ప్రార్తన కెర్తె పొది ఇసి మెన;

* ఓ బ, తుచి నావ్ గవురుమ్ జవున్.

తుచి రాజిమ్ అమ్చితె జెవున్.

† 10:32 10:32 మెలె, లేవీ పూర్ణమచొచి నకుమచొ.

‡ 10:33 10:33 సమరయ సుదల్క యూదుల్ నిస్కారుమ్ దెకితె.

§ 10:40 10:40 నెంజెలి, ‘అస్సిమ్ తెయార్ కెరుక మెన’.

* 11:2 11:2 నెంజెలి ‘ఓ పరలోకుమ్ తిలో అమ్చొ దేముడు అబ్బొ’.

3 సరిపుచుప జతి అన్నిమ్ అమ్క రోజాక దొర్కు కెర దె.
 4 వడ్డె, అమ్క పాపుమ్ కెర్త మాన్సుల్క ఆమ్ †చెమించుప కెర్తనుమ్,
 చి ఆమ్ కెర్త పాపల్ తుయి అమ్క చెమించుప కెరు.
 అమ్ పాపుమ్ నే కెర్తి రితి,
 సయతాన్ పాపుమ్ కెరయ్తిన తెంతో
 దయ కెర అమ్క పిట్టపు,
 మెన తూమ్ ప్రార్తన కెర” మెన యేసు సిస్సుల్క సికడ్డన్.

లాజ్ నెంతె పునీతో మింతు
(మత్త 7:7-11)

5 తెదొడి జోవయింక అన్నె, “తుమ్తె కో జలెకు ఎక్కిలో మితుసి జలె, అందరి సొక్కుక మింతుసిచి గెరి గెచ్చు, ఓ నెస్తము, అంక తిన్ని పోడియె బదుల్ దె.

6 అంచో అన్నెక్కో మిత దూరి ప్రయానుమ్ జా అన్నె చి, జోక అన్నిమ్ దెతిసి అమ్తె కిచ్చొ కి నాయ్”.

7 పోడియె సంగుక గెలి గేర్చో ఎజోమాని, జలె, గేర్ తెడి తెంతో “అంక ఇసి అల్లర్ కెరుక పోసి. కెప్పె డంక అన్ని చి, ఆవ్ అంచ బోదల్ నిజ అన్నుమ్. అప్పె ఉట్ట దెంక నెతిరి” మెనెదె,

8 జలె, తుమ్క ఆవ్ కిచ్చొ మెంతసి మెలె, జో జోక మింతున్ జయెదె చి రిసా నాయ్; మింతున్ జలెకి నెనె, గెద; గని జో లాజ్ నెంతె పునీతె తత్తయ్చి రిసా, జో ఉట్ట కెర జోక దొర్కు జలిసి ఎత్తి దెయెదె.

9 జాకయ్ తుమ్క ఆవ్ కిచ్చొ మెంతసి మెలె, దొర్కు జలిసి ఎత్తి, దేముడుతె తుమ్ సంగితె తా, తుమ్క దెయెదె. ఎక్కి మెన్ను తెన్ చజలె దొర్కు జయెదె. కెప్పెతె ఉంక్రయ్తె తిలె, తుమ్క కెప్పె ఉగ్గ దెయెదె.

10 కో నజీలె, జోక దొర్కు జయెదె, చజలెసొక, దొర్కు జయెదె. కెప్పెతె కో ఉంక్రయ్లె, జోచి రిసా ఉగ్గ దెయెదె.

11 తుమ్తె సగుమ్జినక బోదల్, తుమ్తె కేన్ జవున్ మాన్సుచొ పుత్తుసి †“మొస్సా రోన్ దె” మెలె, అబ్బొసి అయి దెయెదె గె? నాయ్, గెద.

12 నెంజలె “అండో దె” మెలె, పొట్టె దెయెదె గె? నాయ్, గెద.

13 జలె, తుమ్ మాన్సుల్ పాపుమ్ సుదల్ తిలె కి తుమ్చ బోదల్క చెంగిల్చి దెంక జాన్సు జలె, పరలోకుమ్ తిలో దేముడు అబ్బొతె కో జోచి సుద్ది తిలె ఆత్తుక నజీలె దెయె నాయ్ గె? కచితుమ్ దెయెదె.

14 ఏక్ సుట్టు యేసు గుల్లో కెర్తొ ఏక్ బూతుమ్క ఉదడ్డె తిలె. జో బూతుమ్ జో మాన్సుక ముల దిలె, జో మాన్సు లట్టబుక మొదోల్ కెర్తొ, చి దెకిల వైజల్ ఒగ్గర్ ఆచారిమ్ జలె.

15 గని జోవయింతె సగుమ్జిన కిపండితుల్ సూన కెర కిచ్చొ మెల మెలె, “బూతల్క రానో జలె * బయెల్లెబూల్చి నావ్ తెన్ ఈంజో బూతల్క ఉదడ్డయ్” మెన సంగిల.

16 అన్నె సగుమ్జిన, జోక పరిచ్చు కెరుమ మెన ఉచర, “తుచి నెక్కి పరలోకుమ్చి అదికారుమ్చి తిలె, జా రుజ్జు దెకయ్తె కిచ్చొ జవున్ వెల్లి కామ్ అమ్చి మొక్కె కెరు” మెన సంగిల.

17 గని యేసు జోవయించి మెన్నుతె తిలిసి జాని చి, జోవయింక, “కేన్ జవున్ రాజిమ్తెచ మాన్సుల్ జోవయింక జెచ్చొ విరోదుమ్ జా వర్చు వర్చు జా యుద్దుమ్ కెరనై, జా రాజిమ్ పాడె జా గెచ్చెదె, అన్నె, †కేన్ గేరు జవున్ మాన్సుల్ వర్చు వర్చు జా జోవయింక జెచ్చొ విరోదుమ్ కెరనై, జా గేరు జవున్ సిడెదె.

18 దన్నె, సయతాన్ సయతాన్చి ఉప్పిరి జోయ్యు యుద్దుమ్ కెర్తొ, జోచి రాజిమ్ కిసి టీవెదె, టీచుక నెత్తె మెలె, అంక బయెల్లెబూల్ జోవయింక సాయిమ్ తతికయ్ బూతల్క ఉదడ్డయ్” మెన తుమ్ సంగితసు.

19 జలె, ఏక్ కోడు తుమ్ ఉచర. ఆవ్ ఏక్ వేల బయెల్లెబూల్చి నావ్ తెన్ బూతల్క ఉదడ్డెగిన, తుమ్చయ్ సిస్సుల్ కచి నావ్ తెన్ ఉదడ్డెతి? బూతల్క ఉదడ్డె తుమ్చయ్ సిస్సుల్ అంచి రిసా తుమ్క తీర్చు సంగుతు!

† 11:4 11:4 మెలె, జేవ్ అమ్క పాపుమ్ నే కెర్తి రితి అమ్ దెకితనుమ్. † 11:11 11:11 నెంజలె ఈంజ తొలితో రెగిడ్డ సగుమ్ పున్కతె అన్నె కిచ్చొ దెద తిలె మెలె, “పోడియె దె” మెలె, అబ్బొసి పత్తురు దెయెదె గె? నెంజలె “మొస్సా రోన్...”... § 11:15 11:15 వత్తుయె 12:24, మార్కు 3:22. * 11:15 11:15 మెలె, సయతాన్. † 11:17 11:17 వత్తుయె 12:25, మార్కు 3:25.

20 గని దేముడుచి అతుక మెలి కోడు జోచి సైక్రికయ్ అవ్ బూతల్క ఉడడ గెల్తని జలె, కచితుమ్ దేముడుచి రాజిమ్ తుమ్తె అప్పె పావ జా అస్సె.

21 కేన్ జవున్ బలుమ్ నుదె, జోచ అయ్దల్ ఎత్తి దెరన జోచి సొంత గేరు రకితె తిలె, కో నే దెర గెతి రితి జోచ అస్తుల్ చెంగిల్ తవుల.

22 గని జోచి కంట ఒగ్గర్ కీసక్తి తిలోసా అయ్లె, జోక పెట జీన్లె, జో మాన్సు నంప కెర్ల అయ్దల్ ఈంజో అన్సె సైక్తి తిలోసా వెంట గెల కెర, జోచ అస్తుల్ దెర గెచ్చు జోచ మితర్పుల్ తెన్ వాటల్ కెరన వంటుల.

23 “జలె, కో అంచి వచ్చెన జయె నాయ్ గే, అంక విరోదుమ్ జా అస్సె, చి అంచి రాజిమ్తె జేవ్ బెదితి రితి కో అంచి తెన్ మాన్సుల్క అంచితె ఆనె నాయ్ గే, అంచి మండక చెదుర్పు కెర్తయ్.” మెన యేసు సంగిలన్.

బూతుమ్ ముల దిలి గెరి అన్సె ఒగ్గర్ బూతల్ ఉట్ట జా బన జతినచి టాలి (మత్త 12:43-45)

24 తెదొడి యేసు అన్సెక్ కోడు సంగిలో, “ఏక్ మాన్సుక బూతుమ్ దెర తిలెగిన, జో బూతుమ్ జో మాన్సుచి తెంతో ముల దా తత్తిచి రిసా టాన్ చజన బయిలె గెచ్చు బుల్తె తయెదె, గని టాన్ నే దొర్కు జలి రిసా, ఉచరన, అవ్ ముల దిలో గెరి అన్సె గెచ్చిందె మెన

25 జో గెరి అయ్లె, జో గెరెచో మాన్సు వడ్డవ కెర సుబ్రుమ్ కెర అస్సె మెన దెక కెర

26 గెచ్చు, అన్సె జాచి కంట గర్పు నత్తు బూతల్క వట్టి కడ ఆనెది చి, జేవ్ ఎత్తి జో మాన్సుతె మెన కెర, ఒత్తయ్ బన జవుల. జాచి రిసా, పట్టో జో మాన్సుక అగ్గెచి కంట ఒగ్గర్ అల్లర్ జయెదె” మెన యేసు సంగిలన్.

కక్క ఒగ్గర్ చెంగిల్ గే యేసు సంగిలిసి

27 యేసు ఈంజ కోడు సంగితికయ్, కిచ్చొ జర్గు జలి మెలె, ఒత్త బెర తిల జనాబ్తె ఏక్ తేరబోద “తుక పాయిలి దూదు పియడ్లి అయాద్క ఒగ్గర్ చెంగిలి!” మెన కేక్ గలిలి.

28 జలె, యేసు కిచ్చొ జబాబ్ దిలన్ మెలె, “నాయ్, గెద. కక్క ఒగ్గర్ చెంగిల్ మెలె, దేముడుచి కోడు నూన, జయ్యి కోడ్ రితి ఇండితనకయ్” మెలన్.

జేవ్ యూదుల్చి అన్మానుమ్ బుద్దిచి రిసా సంగిలిసి (మత్త 12:38-42; మార్కు 8:12)

29 అన్సె ఒగ్గర్జన్ ప్రెజల్ బెర జెతె తతికయ్, యేసు ఇని మెన బోదన కెరుక దెర్లన్. “ఈంజ కాలుమ్చ మాన్సుల్ ఒగ్గర్ పావుమ్చ. అంచి అదికారుమ్క రుజ్జు దెకయ్త వెల్లెల కమొక కోరెప జతను, గని అంచి అదికారుమ్ దెకయ్తి రిసా ఎక్కిక పిట్టవ, కేన్ వేర కామ్ కెర దెంక నెంజె. కేన్ మెలె, దేముడుచ కబుర్లు సంగిలో యోనా పూర్గుమ్చొక జర్గు జలిసి జా వెల్లి కామ్ టాలి జయెదె.

30* యోనా పూర్గుమ్చొ తిర్పతి వెల్లో మొస్సొచి పెట్టి తా బార్ జలిసి నినెవె పట్టుమ్చ మాన్సుల్క ఏక్ రుజ్జు జలి, గెద. దస్సి, మాన్సు జా జెర్పున్ అయ్లయ్ అంక †జర్గు జతిసి దొర్కు జలి రుజ్జు జయెదె.

31 “జలె, ఈంజ లోకుమ్చ మాన్సుల్క వెల్లి తీర్పు కెర్తి దీసిక, తుమ్ ఈంజ కాలుమ్చ అన్మానుమ్ జల యూదుల్ కి, యోనా బోదన కెర్ల నినెవె పట్టుమ్చ ప్రెజల్ కి, బెద టీచితె. జేవ్ తుమ్క ‘గర్పు’ మెన రుజ్జు దెకవుల. కిచ్చొక మెలె, జా దేసిమ్చ మాన్సుల్ యోనా కెర్లి బోదన నూన కెర, జేవ్ కెర్ల పావల్చి రిసా దుకుమ్ జా, మెన్సు మార్పువ, నంపజా బుద్ది జల గని తూమ్ నాయ్. ఈందె, యోహానుచి కంట వెల్లో తుమ్చి నెడిమి †అస్సె.

32 వడ్డొ, వెల్లి తీర్పు కెర్తి జా దీసిక, కీసబా మెలి దచ్చెన దేసిమ్చి పూర్గుమ్ తిలి రాని ఎక్కి, ఈంజ కాలుమ్చ మాన్సుల్ తెన్ టీచ, తుమ్క ‘గర్పు’ మెన రుజ్జు దెకయెదె. కిచ్చొక మెలె, పూర్గుమ్ జా రాని

† 11:21 11:21 నయ్తానుక టాలి జయెదె. § 11:22 11:22 యేసుక్రీస్తుక టాలి జయెదె. * 11:30 11:30 యోనా 1-4 అధ్యాయ్. † 11:30 11:30 మెలె, యేసు మొర తిర్పతక అన్సె జివ్ జా ఉట్టితినె. లూకా 23, 24 అధ్యాయ్. † 11:31 11:31 సొంతచి రిసా సంగితయ్. § 11:32 11:32 సొంతచి రిసా సంగితయ్.

‘సాలోమోను రానొ సంగితి బుద్ధి నూనిందె’ మెన, ఒగ్గర్ ఒగ్గర్ దూరి తెంతో అయ్యిలి. గని, ఈందె, సాలోమోనుచి కంట వెళ్లొ తుమ్చి నెడిమి * అస్సె.

మాన్సుచి పేట్ తెడి చెంగిల్ ఉజడి కావలె మెలిసి

33 “కేన్ జవున్ మాన్సు ఏక్ దీవు లంబడ తిలె, జా దీవుక ఆరి లంబడ్లి రితి గెర్చి మజ్గెరెతె క్కాన్సి గొయితె జవున్ తితి నాయ్, నాడిచి తెడి జవున్ డంకితి నాయ్, గని గెరి జెతె ఎత్కిజిన్క జా ఉజడి దెతి రిసా దీవుకంబుమచి ఉప్పిరి తివుల.

34 “తుమ్చి ఆఁగుక తుమ్చ అంకివొ దీవు జలె, తుమ్చ అంకివొ †బేంట తిలె, తుమ్చి ఒండి ఆఁగ ఉజడి తెన్ తయెదె. గని తుమ్చ అంకివొ మయల జా తిలె, తుమ్చి ఆఁగి ఎత్కి. ఆమన్ రితి అందర్ తెన్ తయెదె.

35 జాకయ్, తుమ్చి పెట్టి తిలి ఉజడి అందర్ నే జతి రితి జాగర్త తెన్ తా.

36 జలె, తుమ్చి ఒండి ఆఁగి కేన్ పక్క కి అందర్ నెంజితె రితి ఉజడి బెర తిలె, దీవుచి ఉజడి కీసి తుమ్క ఉజడి దెకయెదె గే, దస్సి, తుమ్చి పెట్టిచి ఉజడి సాస్టుమ్ డీసెదె” మెన యేసు సంగిలన్.

పరిసయ్యుల్క చి దేముడుచి కొడొ సికడ్డనక యేసు తీర్పు సంగిలిసి (మత్త 23:1-36; మార్కు 12:38-40; లూకా 20:45-47)

37 యేసు జా బోదన సంగ కేడయ్తకయ్, పరిసయ్యుడు ఎక్కిలో యేసుక జోచి గెరి అన్నిమ్ కా జె మెన బుకార్లన్, చి యేసు జో తెన్ గెరి గెచ్చు అన్నిమ్ కంక వెన్లన్.

38 జలె, యేసు అత్తో నే దొవన్తె అన్నిమ్ కతయ్ మెన దెక కెర జో ఆచారిమ్ జలొ.

39 యేసుప్రబు జోక, “తుమ్ పరిసయ్యుల్ గలన్లు గిన్నలు ఉప్పిర్ పక్క దోవ, తుమ్చి ఆఁగుచి ఉప్పిరి దొవన్తెను, గని గలను గిన్న తెడి ముర్రి. తా గెలి రితి, తుమ్చి పేట్ తెడి కిచ్చొ అస్సె మెలె, ఆస బుద్ధి పాపుమ్బుద్ది బెర అస్సె.

40 తుమ్ బుద్ధి నెంజిలన, ఉప్పిరి తిలిసి జెర్మయ్లో దేముడు, తెడి తిలిసి కి జెర్మయ్లోసా నెంజె గె? కెర్లొ, గెద!

41 జలె, తెడి తిలిసి దర్ముమ్క దాస, చి ఈందె, తుమ్క ఎత్కి. సుద్ది జయెదె.

42 “అయ్యొ తుమ్ పరిసయ్యుల్, తుమ్క సిచ్చు పిట్టె నాయ్! కిచ్చొక మెలె, తుమ్ పాచ్చెన్ రొడ్డెతె చెరమల్లితె దసచ ఎత్కితె దెన్ను వంతుల్ కెర, ఏక్ వంతు ఎత్కి. అదికారుమ్ తిలొ దేముడుక దెతను. గని మాన్సుల్చి ఉప్పిరి సత్తిమ్ తీర్పు కెరుక చి, దేముడుక ప్రేమ కెరుక తుమ్ పచ్చితను. జలె, కిచ్చొ కిచ్చొ వచ్చువల్తె దెన్ను వాటల్ కెర ఏక్ వాట జోవయింక దెంక తప్పు నెంజె, గని ముక్కిమ్క సత్తిమ్ తీర్పు కెర్తె తత్తదు జలె, దేముడుక ప్రేమ కెర్తె తత్తదు జలె, తుమ్క చెంగిల్ తత్తి!

43 “అయ్యొ, తుమ్ పరిసయ్యుల్, తుమ్క సిచ్చు పిట్టె నాయ్! కిచ్చొక మెలె, నబ గెరిచ ముక్కిమ్ టాన్లుతె వెసుక కోర్వ జతను, సంతపిదులె ఎత్కిజిన్ అమ్క జోకర్తు మెన కోర్వ జతను.

44 అయ్యొ, తుమ్క సిచ్చు పిట్టె నాయ్! తుమ్ కీసి జతను మెలె, బయలె తతా నే డీన్ల మెన్నుల్ రితె అస్సన్. ‘మెన్నుల్’ మెన నేన కెర, మాన్సుల్ ఒత్త సుఁదితతి” మెన యేసు టాలి కెర సంగిలన్.

45 తెదెడి, మోసే తెన్ దేముడు దిలి ఆగ్గుల్ సికడ్డెసా ఎక్కిలో యేసుక, “గురుబాబు, తుయి ఇసి సంగిలె, †అమ్క కి మరియాద కడ్డసి” మెలన్.

46 యేసు జోక కిచ్చొ జబాబ్ దిలన్ మెలె, “తుమ్ మోసే తెన్ దేముడు దిలి ఆగ్గుల్ సికడ్డన, అయ్యొ! తుమ్క కి సిచ్చు పిట్టె నాయ్! కిచ్చొక మెలె, కూలి మాన్సుల్క సాచ్చుకర్లు కీసి కంది వయితి జాడు వయడుల గే, దస్సి తూమ్, ఒగ్గర్ ఆడ రితి కెరుక అస్సె మెన, ప్రెజల్క జాడు వయడ్లి రితి కెర్తను. గని తుమ్ వయడ్ల

* 11:32 11:32 సానల్ మెలిల్ పున్నకుమ్ 10 అర్థయిమ్. † 11:34 11:34 ‘బేంట అంకివొ’ మెలె, ఎత్కి అదికారుమ్ తిలొ దేముడు తెన్ యేసు తెన్ బెద జోవయింబి బుద్ధి దెరన జయ్యొ బుద్ధిక సత్తిమ్ ఇండితిసి. ‘మయల అంకివొ’ మెలె, నయ్తాన్ తెన్ బెదిలిసి; జోవయింబి పొరపాట్ బుద్ధి, పాపుమ్బుద్ది దెరన పాపుమ్ ఇండితె తా గార్ జతిసి. ‡ 11:45 11:45 కిచ్చొక మెలె, మోసే తెన్ దేముడు దిలి ఆగ్గుల్ సికడ్డన పరిసయ్యుల్ తెన్ బెదితన జులె.

జాడ్లు రిత ఆడ్ర నుల్కన కెర్ది రిసా తుమ్ ది కిడి ఊంటి కి నే చంపొ కెర్ది రితి, జేవ్ ప్రెజల్ క కన్నార్దుమ్ జను నాయ్.

47 అయ్యో, తుమ్ ది సిచ్చ పిట్ట నాయ్! కిచ్చొక మెలె, తుమ్ చ పూర్ణమ్ దేముడు చ కబుర్లు సంగిలనక మార్త, చి జా టాన్ క జోవయింది రిసా కి దెంగిల మెస్సున్లు తుమ్ బందయ్ తను.

48 దస్సి, జోవయింది పాపుమె తుమ్ బెదిలిన్ ది రిసా తుమ్ ది ఉప్పిరి జోవయింది ఉప్పిరి సాచుల్ జతను. కిచ్చొక మెలె, జేవ్ జోవయింక మార్త, చి తుమ్ జోవయింక మెస్సున్లు బందయ్ తను.

49 జాకయ్ దేముడు చి గ్యూనుమ్ సంగిలిసి కిచ్చొ మెలె, అంచ కబుర్లు సంగితన సగుమ్ జిన్ క, అంచ బారికుల్ జతన సగుమ్ జిన్ క, జా కాలుమ్ క అమ్ చ యూదుల్ తెద్రయిందె, చి జా కాలుమ్ క అమ్ చ యూదుల్ జోవయింతె సగుమ్ జిన్ క మారుల, సగుమ్ జిన్ క వేర సిచ్చల్ అల్లర్ కెరుల” మెన అస్సె.

50 దస్సి, బూలోకుమ్ జెర్మయిలి తెంతో అప్పె ఎద అబ్బుదిసి తూమ్ దేముడు చ కబుర్లు సంగిలనచి లోయి సువిలి పాపుమ్ తుమ్ ఈంజయ్ కాలుమ్ చ వయితె. కెయ తెంతో నూయె జలిసి మెలె,

51 *హేబెలు అన్నెసి అత్త కెర్ది తెంతో మొదోల్ కెర, †దేముడు చి గుడిచి నెడిమి బలి దెతి స్తంబుమ్ సొడి మాస్సల్ మాల్లో జెకర్కాచి లోయి సువిలి ఎదచి లోయి. నిజామి తుమ్ క ఆవ్ కచి తుమ్ సంగితసి, జేవ్ ఎత్తిజిన్ చి లోయి సువిలి పాపుమ్ చి సిచ్చ ఈంజయ్ కాలుమ్ చ క లయెదె.

52 “అయ్యో, తుమ్ మోసి తెన్ దేముడు దిలి ఆగ్గుల్ సికడ్డన, తుమ్ క సిచ్చ పిట్ట నాయ్! కిచ్చొక మెలె, దేముడు రెగిడ్డిన్ తెచి బుద్ది గ్యూనుమ్ చి †గేరుచి తాలల్ కడి తుమ్ దెర గెచ్చు లుంకాడ అస్సున్. తూమ్ కి ఒత్త వచ్చు నాయ్, చి ఒత్త వెసక గెల అన్నె మాస్సల్ కి ఆడ్ర కెర, ఒత్త వెసడ్చు నాయ్” మెన యేను సంగిలన్.

53 యేను ఒత్త తెంతో ఉట్ట గెతికయ్, మోసి తెన్ దేముడు దిలి ఆగ్గుల్ సికడ్డన చి పరిసయ్యుల్ జోచి ఉప్పిరి ఒగ్గర్ కుస్సిదుమ్ జా, కిచ్చొ కిచ్చొచి రిసా జోవయింక పున లట్టబడ పరిచ్చ కెర్ది రితి జతె తిల.

54 ‘ఏక వేల జో కిచ్చొ జప్పన్ సంగిలె జోక దెరుక జయెదె’ మెన, రకితె తిల.

12

మాయబుద్దిచి రిసా యేను సంగిలిసి

1 తెదొడి * ఒగ్గర్ ఒగ్గర్ జిన్ మాస్సల్ యేనుతె బెర జా ఎక్కిలోక ఎక్కిలో నుడ నుది జతె తతికయ్, యేను తోలితో జోచ సిస్సల్ తెన్ లట్టబక దెర, “పరిసయ్యుల్ జేవ్ సొంత సికడ్డి బుద్ది ఇండితి నాయ్. పోడియె కెర్ది పీటతె కీసి జా పోడియె కెర్దిసి ఎత్తిక పులయెదె గే, దస్సి పరిసయ్యుల్ చి జా మాయబుద్ది దెకిలె, అన్నె మాస్సల్ కి దస్సి మాయబుద్ది సికుక జయెదె. జాకయ్ తుమ్ జాగర్ దకన.

2 డంకి జలిసి కిచ్చొ జలెకి కెయఁక తెయఁక నే డీస్తి తయె నాయ్. లుంకడ్డిసి కిచ్చొ జలెకి కెయఁక తెయఁక ఎత్తిక నే జాన్ తి రితి జెయె నాయ్. ఆకర్ క డీసిదె, ఆకర్ క జానువ జయెదె.

3 అందర్ తె తుమ్ కిచ్చొ సంగ తస్తి గే, ఉజిడతె నూనయ్ జయెదె, చి అన్నె కోయె నెంతె కెప్పివో డంకన కిచ్చొ కచి కండయె సంగ తస్తి గే, మేడల్ చ ఒర్చెల్ తెంతో సాట్ట జయెదె.

కక్క బింక గే నే బింక గే యేను సంగిలిసి

(మత్త 10:28-31)

4 “జాకయ్, గోతుసుదల్, తుమ్ క ఆవ్ కిచ్చొ మెంతసి మెలె, తుమ్ చి ఆఁగుక మారుక తెరితనక తుమ్ బియె నాయ్. జేవ్ చి పడ్డె తుమ్ క అన్నె కిచ్చొ అల్లర్ కెరుక నెతిర్ది

§ 11:47 11:47 మత్తయి 23:29-30. * 11:51 11:51 అదికాండుమ్ 4:8. † 11:51 11:51 2 దిన: పుస్తకమ్ 24:20-22. యేను నే జెతి అత్తి ఎత్తి. అదికారుమ్ తిలో దేముడు చ కబుర్లు సంగిలో ఆకర్ చొ మాస్సు ఈంజో జెకర్కా మెలోసా. ‡ 11:52 11:52

మత్తయి రెగిడ్డిన్ తె, మత్తయి 23:13 తె కిచ్చొ అస్సె మెలె, “మాస్సల్ చి మొత్తి తుమ్ పరలోకుమ్ చి కెప్పివో డంకితను....”. * 12:1 12:1 నెంజెలి, జా అర్దుమ్ క ‘లచ్చజిన్ మాస్సల్’ మెన రెగ్గ అస్సె.

5 నాయ్, గని తుమ్ కక్క బింక గే తుమ్క సంగితసి. కక్క మెలె, మాన్సుచి అఱగుక మార్చి పడ్డో జోవయింక వెల్లి ఆగి గొయతె గల దెతి అదికారుమ్ తిలో దేముడుకయ్ తుమ్ బియఁ. తుమ్ జోకయ్ బియఁ మెన తుమ్క అవ్ సంగితసి.

6 “ఈంజ దేసిమచ మాన్సుల్ పావ్ గెరిపిట్టల్ దొన్ని కాసుక వికుల, గెద. జలె, దసచక ‘విలువ’ మెన మాన్సుల్ నే దెతికి, దేముడు జోవయింతె ఎక్కిక కి పన్నె నాయ్.

7 దేముడు తుమ్చి ఉప్పిరి కెద్ది ప్రేమ అస్సె మెలె, తుమ్చి బోడిచ నెండి వాడల్ ఎత్తి మొత్తుమ్ కెత్తి అస్సి గే, జోయ్యు జానె. జాచి రిసా తుమ్ బియఁ నాయ్. తుమ్ పిట్టల్చి కంట బగ్గరి విలువ అస్సున్.

యేసుక సంపజలెగిన, మాన్సుల్చి మొక్కె ఒప్పున సంగుక అస్సె
(మత్త 10:32-33; 12:32; 10:19-20)

8 “జలె, తుమ్క అవ్ కిచ్చొ మెంతసి మెలె, కో అంక సంపజా యేసుక్రీస్తుకయ్ అవ్ సంపజా అస్సి, మెన మాన్సుల్చి మొక్కె ఒప్పునుల గే, అంచయ్ మాన్సుల్, మెన, పరలోకుమతె దేముడుచ దూతల్చి మొక్కె అవ్ మాన్సు జా జెర్మున్ అయ్లోసాచి ఒప్పునిందె.

9 గని, మాన్సుచి మొక్కె కో అంచి రిసా జోచొ నెంజి మెనుల గే, దస్సి, ఒత్త దూతల్చి మొక్కె జోవయించి రిసా ‘అంచ నెంజితి’ మెన అవ్ సంగిందె.

10 “అన్నె, కో గడియ బమ్మ జా కెర అవ్ మాన్సు జా జెర్మున్ అయ్లోసాచి రిసా అన్మానుమ్ కోడు లట్టబుల గే, జోవయింతె ఎత్తి, మాన్సుచి జా పాపుమ్ చెమించువ కెరుక జయెదె. గని, దేముడుచి సుద్ది తిలి ఆత్మక కో దూసువ కెరుల గే, జోవయింతె కచి పాపుమ్ చెమించువ జయె నాయ్.

11 “అన్నె కిచ్చొ మెలె, తుమ్చి ఉప్పిరి కోపుమ్ జల యూదుల్ తుమ్క నిందల్ కెర జోవయించ సబ గెరల్ నెంజిలె అదికార్చిచి మొక్కె, నెంజిలె రాసల్చి మొక్కె పరిచ్చ కెరుల, గని తుమ్ కీసి రుజ్జు నజనుక గే, కిచ్చొ జబాబ్ దెంక గే, తుమ్ కిచ్చొ సంగుక గే, తుమ్ బియఁ నాయ్.

12 కిచ్చొక మెలె, తుమ్ కిచ్చొ సంగుక గే తెదొడక, జయి గడియయ్ పరలోకుమచొ దేముడుచి సుద్ది తిలి ఆత్మ తుమ్క సికడెదె” మెన యేసు సంగిలన్.

సామ్నారుమ్ జతి ఆసక జెతిన్చి రిసా యేసు సంగిలిసి

13 తెదొడి ప్రెజల్తె ఎక్కిలో యేసుక ఇసి మెలన్: “ప్రబు, అమచి అస్తితెచి అంచి వాట దెవున్ మెన అంచొ అస్సొక సంగు” మెలన్.

14 యేసు, జలె, జోక, “ఓ మాన్సు, జోక చి తుక నెడిమి తీర్పు దెతోసా అవ్ జతి రెతి, జోచి తుచి అస్తి వంటితి రెతి, దస్సి కెరిందె మెన కో అంక టీచ అస్సి?”

15 జనాబ్క అన్నె, “తుమ్ సూన. సామ్నారుమ్ దొర్కు కెరంతి అస నే జతి రెతి తుమ్ జాగర్త తెన్ తా. మాన్సుక కెద్ది సామ్నారుమ్ తిలె కి, †జోవయించి ఆత్మక జియడ్డిసి నెంజి, జా” మెలన్.

బుద్ది నెంజిలో సామ్నారిచి టాలి

16 తెదొడి జనాబ్క యేసు ఏక టాలి సంగిలన్. కిచ్చొ మెలె, “సామ్నారి ఎక్కిలో తిలన్. జోచి బుఁయింతె చెంగిల్ పంటొ పికడ్లన్.

17 గట్టిజ పంటొ పికత్కయ్ కిచ్చొ ఉచర్లన్ మెలె, ‘అంచి దాను సుపుక టాన్ దెరె నాయ్. కీన్ కెరుక?’ మెన ఉచర, అస్సె,

18 ఒపహొ, జాని. దాన్ కోట్టు తియంత గెరల్ సేడవ కెర, అన్నె వెల్లెల్చ బందయిందె, చి ఒత్తయ్ అంచ దాన్ చి అంచి సామన్ ఎత్తి తియనిందె.

19 అన్నె, కిచ్చొ మెననిందె మెలె, తుయి అద్దుస్తుమ్చొ! కెత్తిగే వెర్సుల్ తుక కామ్క జెతిసి తుక సామ్నారుమ్ అస్సె. సుక్కుమ్ తెన్ తా, చి ఇస్తుమ్ అయ్లి రెతి కా పీయ సద్ద కెరంతె తా జి మెననిందె మెలన్.

† 12:15 12:15 నెంజిలె, ‘జో బగ్గర్ దీసల్ జతి రెతి సెలవ దెతిసి నెంజి’. నెంజిలె ‘జోవయింక జియడ్డిసి నెంజి, జోవయించి జితితుమ్క నిజుమ్ ముక్కిమ్ తిలిసి నెంజి’.

20 గని దేముడు జో మాన్సుక, 'తుయి బుద్ది నెంజిలో వెర్రి నుదొ, తువి. జివు ఆజి రాతికయ్ కడ నెంక జెవుల. జయి అంచి ఆత్త. తుకయ్ తుయి కుడవన్సిని తెదొడక కచి జయెదె?' మెలన్.

21 జలె, కో ఈంజ లోకుమచి అన్సి కుడవన సొమ్మారుమ్ కెరనుల చి దేముడుక వచ్చు జో దెతి ఆత్తు సొమ్మారుమ్ జోక తయె నాయ్ గే, జోచి గత్తి ఈంజ టాలిచొ మాన్సుచి గత్తి ఎక్కి." మెన యేను నంగిలన్.

'కీసి జా జిమదె?'
(మత్త 6:25-34; 6:19-21)

22 "జాకయ్, అవ్ తుమ్క కిచ్చొ మెంతసి మెలె, 'కిచ్చొ కమదె గే, కిచ్చొ గలనుమదె గే, కీసి జా జిమదె' మెన తుమ్చి మెన్సుతె చింత గలన నాయ్.

23 కిచ్చొక మెలె, అన్నిమ్చి కంటు మాన్సుచి †ఆత్తు ముక్కిమ్ గెద, పాలల్చి కంటు అగ్గి విలువ గెద?

24 కాడల్చి రిసా తుమ్ ఉచర. జేవ్ ఉంపితి నాయ్, పంటొ లాయ్తి నాయ్, చి జోవయింక కొట్టు నాయ్ కొట్టు గెరల్ నాయ్ జలెకి, దేముడు జోవయింక అన్నిమ్ దెతయ్. జలె, పిట్టల్చి కంటు తుమ్ ఒగ్గర్ విలువ అస్సన్ గెద? కచితుమ్ తుమ్క దొర్కు జలిసి జో దొర్కు కెరెదె.

25 పడ్డొ, తుమ్చితె కో కెడ్డె చింత గలన్లెకి, †జోచి బత్తుక కొల్లక అత్తెక్ జవున్ ఒగ్గర్ కెరనుక తెరె గే? నెత్తె.

26 దస్సు ఇన ఇదుద్ద కమె జర్కు కెరుక నెతుర్కు జలె, అన్నె తిల కమె జర్కు కెరుక కిచ్చొక బమ్మ జతను?

27 "డెంగైచ పుల్లొ కీసి వడ్డితతి గే, తుమ్ ఉచర. జేవ్ కామ్ కెర్తి నాయ్, పాలల్ వీంతి నాయ్. జలెకి, ఎదిపాల్ సొమ్మారుమ్ కలుగు జలొ పూర్ముచొ రానొ సాలొమోను కి ఈంజేవ్ పుల్లొచి రితి నూటి కెరనుక నెట్లొ.

28 తుమ్ తొక్కి నముకుమ్ తిలన, ఏక కోడు ఉచర. ఆజి బట్టి వడ్డితి, గని కలిక డయ దెతి వెర్రి చివ్వర్క దేముడు ఎదిలి నూటి కెర్తయ్, జలె, కచితుమ్ తుమ్ మాన్సుల్క అన్నె చెంగిల్ గలంతిని దొర్కు కెరెదె.

29 అన్నె, 'అన్నిమ్ కీసి దొర్కు జయెదె, పితిసి కీసి దొర్కు జయెదె?' మెన తుమ్ బమ్మబుద్ది తెన్ తా నాయ్.

30 కిచ్చొక మెలె, ఈంజ లోకుమచ ఎత్తి, మాన్సుల్ ఇన వస్తువల్ దొర్కు కెరనుక ఆన జతతి. ఇన సొమ్మారు తుమ్క కి దొర్కు జతతి మెన తుమ్క అబ్బొది జతొ దేముడు జానె.

31 తూమ్, కిచ్చొ కెరుక అస్సె మెలె, *జోచి రాజిమతె బెద, జోక గవురుమ్ కెర్తి బుద్ది ఇండుక ఆన జా, చి దొర్కు జల ఈంజేవ్ అన్నె వస్తువల్ కి తుమ్క జో దొర్కు కెరెదె.

పరలోకుమతెచి ఆత్తు సొమ్మారుమ్క ఆన జతిన్చి కోడు

32 "అంచి ఇదిలిసి మంద జల అంక నంపజలన, తుమ్ బియ్య నాయ్. కిచ్చొక మెలె, †జోచి రాజిమతె తుమ్ బెద జో తెన్ ఏలువ కెర్తి రితి అంచొ అబ్బొసి జలొ దేముడుచి ఉద్దెనుమ్.

33 తుమ్చ అస్టల్ విక గెల కెర, బీద నుదల్క జా డబ్బుల్క తుమ్ దర్కుమ్ దాన. పరలోకుమతెచి పొర్కు నే జతి రగుమ్ పాడ నే జతి రగుమ్ నెంచల్ కోడు దొర్కు కెరన తా. జేవ్ నెంచల్కె కిచ్చొ తంక మెలె, పాడ నే జతి, కేన్ చొరు జా దనుమ్క పాసి గెచ్చుక నెత్తిర్చి, చి కేన్ కీచ్చు జాక కంక నెత్తిర్చి.

34 తుమ్ కేన్ లోకుమతె దనుమ్ సంపాదన కెరన తస్సె గే, ఒత్త తిలిన్చి రిసా తుమ్చి పెట్టి ఉచర్తె తస్సె.

యేను అన్నె ఉత్త జెతిన్క తెయార్ జా
(మత్త 24:42-51)

35-36 "పెండ్లి విందు తెంతొ బుల జెతొ కేన్ ఎజొమాని గెరి అన్నె జెతిన్క జోచ సేవ కెర్తన జోచ పాలల్ చెంగిల్ కుంచన దీవు లంబడ తా, జో అయ్లె కెచ్చితె ఉంక్రయ్లె కెచ్చె ఉగ్గ దెంక మెన, రకితె తవుల, గెద. తుమ్, జలె, దస్సి తెయార్ జా తా.

† 12:23 12:23 నెంజిల 'జివు'. § 12:25 12:25 నెంజిల, 'జోవయింక దిల దీనల్చి కంటు జోవయింక ఇస్సుమ్క అన్నె దీనల్ జంక జయెదె గే?' * 12:31 12:31 నెంజిల 'జోచి రాజిమ ఈంజ లోకుమతె ఎద్దార్ముమ్ బార్ జతిన్క ఆన జాచి జోక గవురుమ్ కెర్తి బుద్ది ఇండ'. † 12:32 12:32 లూకా 22:29-30, డీనయ్లిసి 5:10, 20:4, 6 చి తిమోతిక రెగిడ్డి దొన్సి నంబర్ ఉత్తమ్ 2:12 దెక.

37 అవ్ ఎజొమాని అన్నె ఉట్ట అయ్యలె, అంచ నేవ కెర్తన రితనతె కో చెదొయ్ తా రకితె తిలె, జోవయింకయ్ చెంగిలి. తుమ్క కిచ్చొ కచితుమ్ మెంతసి మెలె, అవ్ అంచి పాలుమ్ కుంచన జోవయింక అన్నిమ్క వెనడ దా, జోవయించి రిసా జొగుడ దెయిందె.

38 అన్నె ఆల్మిమ్ అయ్యలె రితి సొక్కుక నెంజిలె కుకుడో వాంసెనె అయ్యలె, తెద్ది గడియ గెలి కి కో దస్సి చెద్దొయ్ తా రకితె తవుల గే, జోవయింక చెంగిలి!

39 “గని ఏక్ టాలి తుమ్ చెంగిల్ అర్దుమ్ కెరన. కిచ్చొ మెలె, కేన్ సమయుమ్క చోరు జెయెదె మెన గెర్చో ఎజొమాని కో జలెకు జాన్తో జలె, †జో చెదొయి తత్తో, అన్నె చోరు జోచి గెరి పెసితి అవ్కానుమ్ తతి రితి గేర్ ములితో నాయ్.

40 జలె, తుమ్ తెయోర్ జా తా రకితె తంక అన్నె, కిచ్చొక మెలె, తుమ్ నే ఉచర్లి సమయుమ్క అవ్ మాన్సు జా జెర్మన్ అయ్యలొసా అన్నె జెయిందె” మెన యేసు సంగిలన్.

41 తెదొడి పేతురు “ప్రబు, ఈంజ టాలి కి అమ్కయ్ సంగితసి, గే ఎత్తిజిన్చి రిసా గె?” మెన యేసుక పున్లన్.

42 యేసుప్రబు జోక, “ప్రయానుమ్ గెచ్చుక మెన ఎజొమాని బార్ జంక జలె, జోచ గేర్చక దెక సమయుమ్క అన్నిమ్ దెంక మెన జో నిసాన నిదానుమ్చో గొత్తి సుదొ కో జవులె?

43 జో ఎజొమాని అన్నె ఉట్ట అయ్యలె, జో గొత్తి సుదొ జో ఎజొమాని తియార్లి కామ్ కెర్తె తిలె, గొత్తి సుదొక చెంగిలి.

44 దస్సి నిదానుమ్ కెర తయెదె మెలె, తుమ్క అవ్ కిచ్చొ కచితుమ్ మెంతసి మెలె, జో ఎజొమాని అయ్యలె, జోచి అస్సి ఎత్తిచి ఉప్పిరి జో చెంగిల్ రకిలో గొత్తి సుదొక అదికారుమ్ దెయెదె.

45 గని జో గొత్తి సుదొ ఏక్ వేల ఎజొమాని అల్మిమ్ కెర్తయ్ మెన ఉచర, జోచి జత జలె అన్నె మున్సుబొద గొత్తి సుదల్క జలెకి, తేర్బోద గొత్తి సుదల్క జలెకి, పెటుక చి కంక పింక సూరు పియ మచ్చుక దెర్లె,

46 ‘ఎజొమాని ఆజె జెయె నాయ్’ మెన గొత్తి సుదొ ఉచర నే రకితె దీన్క, గడియక జో ఎజొమాని ఉట్ట జెయెదె చి, జోక *మొర్చి సిచ్చు తియడ కెర, జోక †నంప నెంజిలన సిచ్చు జతినతె జో గలెదె.

47 “జో కిచ్చొ కామ్ కెరుక మెన జోచో ఎజొమాని తియార్ అన్నె గే కేన్ గొత్తి సుదొ జానె గని జోచో ఎజొమానిచి ఇస్టుమ్ జర్గు కెరె నాయ్ అన్నె జా జర్గు కెరుక తెయోర్ కి జెయె నాయ్ గే, జోవయింక ఎజొమాని గట్టిజ పెటయెదె.

48 జోచో ఎజొమానిచి ఇస్టుమ్ కిచ్చొ జయెదె గే నేన కెర, పెట్టి సిచ్చుచి ఎదిలి తప్పు కేన్ గొత్తి సుదొ కెరెదె గే, జోక ఎజొమాని తొక్కి పెటయెదె. కక్క దేముడు ఒగ్గర్ బుద్ది గే, నెక్కి గే, అస్సి గే, కిచ్చొ గే దా తయెదె గే, జో మాన్సు నిదానుమ్ తెన్ జా వాడిక కెర ప్రబుచి నేవ కెరుక అన్నె, చి అమ్క ‘దస్సి నిదానుమ్ కెర్ల గే, నాయ్ గె’ జో ప్రబు దెకెదె. దస్సి, కచి అత్తి జో ఒగ్గర్ సొర్పు కెర తయెదె గే, జో మాన్సు అన్నె లాబుమ్ తెన్ అన్నె దెంక అన్నె.

యేసు అయ్యలొసి ఎక్కి సేంతుమ్ కెరయ్తెసి నెంజె (మత్త 10:34-36)

49 “బూలోకుమ్చి ఉప్పిరి ఆగి సువుక అయ్యలయ్, చి జా ఆగి అప్పె లంబ తత్తి జలె అవ్ ‘చెంగిల్’ మెన్తయ్.

50 ఏక్ మాన్సు మాములుమ్ పానిచి బాప్తిసుమ్ నజనుక జలె, కిసి పానితె డుజుక తయెదె గే, దస్సి అవ్ స్రెమల్తె డుజు మొరుక అన్నె, చి జా పూర్తి జర్గు జతె ఎదక అంచి పెట్టి కెద్ది బాద సిడ్డసి!

51 “జలె, అంక ‘జో బూలోకుమ్తె అయ్యలొసి మాన్సుల్తె ఎక్కి సేంతుమ్ కెరెదె’ మెన తుమ్ ఉచర్తసు గె? అవ్ అయ్యలొసి సేంతుమ్ దెయె నాయ్, గని అవ్ అయ్యలె రిసా మాన్సుల్ జట్టు జవులె.

52 మెలె, అప్పె తెంతో ఎక్కి గెరి పావ్జిన్ తిలె, జట్టు జవులె. దొగుల ఏక్ జట్టు జా, తీగ్ల ఏక్ జట్టు జా, దొగులచి ఉప్పిరి తీగ్ల విరోదుమ్ జవులె. నెంజిలె, తీగ్లచి ఉప్పిరి దొగుల విరోదుమ్ జవులె.

‡ 12:39 12:39 ఈంజ మత్తలి తొలితో రెగ్లడ నగుమ్ పుస్తకల్తె ‘జో చెద్దొయి తత్తో, అన్నె’ చి కోడు తయె నాయ్. § 12:41 12:41 ఏక్ వేల సిన్సుల్కయ్ పేతురు ఉచర్తయ్. * 12:46 12:46 నెంజిలె టాలి క ‘కండ గెలెదె’. † 12:46 12:46 నెంజిలె ‘నిదానుమ్ నెంజిలనక’.

53 దస్సి, పుత్రునిచి ఉప్పిరి అబ్బొసి విరోదుమ్ జయెదె, అబ్బొన్చి ఉప్పిరి పుత్రుని విరోదుమ్ జయెదె, దువినచి ఉప్పిరి అయ్యసి చి, అయ్యస్చి ఉప్పిరి దువిన విరోదుమ్ జవుల, చి నూనునచి ఉప్పిరి అత్తన్, చి అత్తన్చి ఉప్పిరి నూనుసి విరోదుమ్ జవుల” మెన యేసు సంగిలన్.

కాలుమ్ కీసిచి గే చినితినచి రిసాచి కోడు
(మత్త 16:2-3)

54 యేసు ప్రజల్క, “పడమర పక్క పాని దెతి మబ్బు అయెలె, ‘పాని పెటెదె’, మెన తుమ్ జేగి సంగితసు గెద, కచితుమ్ జర్గు జతయె.

55 పడ్డె దచ్చెన పక్క తెంతో వాడు వీర్తి, ‘అజి గట్టిజ వేడి కెరెదె’ మెన చినితె చి, దస్సి జర్గు జయెదె గెద?

56 తుమ్ ఉప్రమెన్సుచో మాన్సుల్! తుమ్ చినితినక ‘నేనుమ్’ మెంతసు. బుయిక చి ఆగాముక దెకిలె కీసి కెరెదె గే చినితసు జలె, ఈంజ కాలుమతె జర్గు జతిన దెకిలె ఈంజ కాలుమక కీసిచి గే చినుక నెతుర్చు గె? చినుక తెరితసు, గెద” మెన సంగిలన్.

నేరిమ్ వయడ్తొసా తెన్ నేరిమ్ జలొసా సేంతుమ్ కెరెంతినచి టాలి
(మత్త 5:25-26)

57 యేసు అన్నె కిచ్చొ బుద్ది జోవయింక ఉచరయెలన్ మెలె, “తుమ్ కిచ్చొ కెర్లె చెంగిల్ తయెదె గే, కిచ్చొక చినున్ నాయ్?

58 తుచి తగు నూనితొ తీర్పు కెర్లెన్తె గెచ్చుక మెన తుక నేరిమ్ వయడ్తొసాచి తుయి నేరిమ్ జలొసా వట్టి గెతె తిలె పొది, జోవయింతెన్ తుయి సేంతుమ్ జంక దెకను. నెంజిలె, తీర్పు కెర్లెసాతె తుక ఒర్లోడె తిలె, తుచి తగు నూనై, తీర్పు కెర్లెసా తుక జమాన్లుచి అత్తి సార్చు కెరె దెయెదె, చి జమాన్లు తుక జేల్తె గలె దెయెదె.

59 † అదే తుమ్క కిచ్చొ మెంతసి మెలె, తుయి తుచి సిచ్చుచి ఆకర్ కాసు ఎదె కి తుయి పూర్తి తీర్పుప కెర్లె ఎదెక, తుక ములుక నెంజె.”

13

సగుమ్జిన్ ప్రమాదుమ్ జా మొర్లిన్చి రిసా సంగిలిసి

1 యేసు జేవ్ కొణ్డె సంగిలి సమయిమ్ తిలస సగుమ్జిన్ జోక, సగుమ్జిన్ గలిలయిల్ మొర్లిన్చి రిసా సంగిల. “జేవ్ *గలిలయిల్ యెరూసలేమ్తె దేముడుక బలి దెతె తతికయ్, పిలాతు అదికారి జోవయింక †కండయెలన్, చి జేవ్ అర్చితుమ్ దిలిన్తె జోవయించి లొయె కలొయ్ జలి” మెన సంగిల.

2 యేసు జోవయింక కిచ్చొ జబాబ్ దిలన్ మెలె, “ఈంజేవ్ గలిలయిల్ ఇసి మొర గెలి రిసా, తిల గలిలయిల్చి కంట ఒగ్గర్ పాపుమ్చ జవుల మెన ఉచర్తసు గె?

3 నాయ్, దస్సి నాయ్, మెన తుమ్క అదే సంగితసి. గని తుమ్క కిచ్చొ అదే సంగితసి మెలె, తుమి పాపుమ్ ఇండుక ముల దెంకయ్, నెంజిలె తూమ్ కి ఇసి మొర గెతె.

4 “నెంజిలె, అమ్చి యెరూసలేమ్తె సిలొయము పక్కచి గొప్పురుమ్ సిడ గెలి పొది జాచి తెడి తిలె అట్టర జన్ మాన్సుల్ తెడి తా మొర్లిన్క ఉచర్లె, అన్నె యెరూసలేమ్తె తిలె మాన్సుల్చి కంట, జేవ్ అన్నె పాపుమ్చ జా తిలె మెన తుమ్ ఉచర్తసు గె?

5 దస్సి నాయ్ మెన అదే సంగితసి గని, తుమ్క ముక్కిమ్క అదే కిచ్చొ సంగితసి మెలె, తుమి పాపుమ్ ఇండుక ముల దెంకయ్, నెంజిలె తూమ్ కి ఇసి మొర గెతె” మెన యేసు సంగిలన్.

పలితుమ్ నే దిలి అంజూరుమ్ రూకచి టాలి

‡ 12:59 12:59 ఈంజ కోడుచి అర్దుమ్ కిచ్చొ మెలె, 59. తుమ్క అదే కిచ్చొ మెంతసి మెలె, తుమిచి పాపుమ్చి రిసా తుమ్క నేరిమ్ వయడ్తొ ఎత్తి అదికారుమ్ తిలొ దేముడు తెన్ తుమిచి తె కొ మదినె సేంతుమ్ జను నాయ్ గే, ఈంజ లొకుమ్చ మాన్సుల్క పరిచ్చు కెరె తీర్పు కెర్లె పొదిక, సిచ్చు జన్, చి జా సిచ్చుచి రునుమ్చి ఆకర్చి కాసు ఎదె కి పూర్తి తీర్పుప కెర్లె ఎదెక మెలి కోడు, తుక ములుక నెంజె. జా తీర్పుప కెరెక నెతుర్చుచి రిసా జా సిచ్చు కుట్టె నాయ్. కీసి సేంతుమ్ జంక మెలె, అమ్చి పాపుమ్ బుప్తన యేసుక సంజా పాపుమ్బుద్ది ముల జేచి ఇస్టుమ్ కెరెక దెక. * 13:1 13:1 గలిలయిల్ మెలె, గలిలయ ప్రాంతమ్చ యూదుల్. † 13:1 13:1 గలిలయిల్తె సగుమ్జిన్, ఔర్లె, జోవయింక ఆక్రమించుం కెర్లె లోమ్ దేసిమ్చి ప్రబుతుమ్క ఉదకు ఉచర కిచ్చొ కిచ్చొ అల్లర కెర్లె తిలె. ఏక వేల ఈంజేవ్ మాన్సుల్క ‘అమ్చి ప్రబుతుమ్క అల్లర దెతె’ మెన ఉచరయె పిలాతు కండయెలన్.

6 తొవ్వడి యేసు ఈంజ టాలి సంగిలన్: “ఎక్కిలోక ఏక్ అంజూరుమ్ రూకు అస్సె. తిన్ని వెర్చుల్ జలి జో రూకు జోచి ద్రాచ తోటత రోవ అస్సె. జలె, జో ఎజోమాని ‘జా రూకతె వండ్లు అస్తి కిచ్చొగె. దొన్ని కోడిందె’ మెన రూకతె అయిలె, ఎక్కి పండు కి నాయ్.

7 తొవ్వడి జా తోటక దెకితో గొత్తి సుదొక ఎజోమాని, ఈందె, వండ్లు చజ కోడుక మెన తిన్ని వెర్చుల్ జలి అవ్ జెతసి, గని కేన్ వండు కి దెరె నాయ్. ఈంజో రూకు కండ గెలు. ఆరి ఈంజ టాన్క పాడ్ కెర్తయ్” మెలన్.

8 జో ఎజోమాని దస్సి సంగితికయ్, జా తోట రకితోసా, “బాబు, ఏనుమ్ జవున్ దెకుమ. రూకుక మత్తి వెగవ కెర, సొవును సువ దెకిన్దె,

9 పోరుమ్క వండ్లు దెర్లె రూకు తవున్, నే దెర్లె, కండ గెలుమ” మెలన్.

సొగ టీవ్క నెత్తి తేర్బోదక విస్తాంతి దీసి యేసు చెంగిల్ కెర్లిసి

10 జలె, ఏక్ సెలవ్ కడన్లి దీసి, యేసు సబగేరి బోదన కెర్లె తతికయ్,

11 బూతుమ్ చి రిసాచి జబ్బు తిలి తేర్బోద ఒత్త తిలన్. జా తేర్బోదక జా జబ్బు జా అట్టర వెర్చుల్ జా తిలి. జా కుబ్బి జా, వంపా జా ఎద్దరె టీవ్క నెత్తె.

12 జలె, యేసు జాక దెక కెర, “పాసి జె” మెన జాక బుకారా కెర, “అమ్మ, తుచి జబ్బు తెంతో చెంగిల్ జా అస్సిన్” మెన సంగ,

13 జేవ్క చడిల్ బేగి సొగ జా టీవెలన్, అన్నె దేముడుచి గవరుమ్ సంగిలన్.

14 గని సెలవ్ కడన్లి దీసి జా తేర్బోదక చెంగిల్ కెర్లి రిసా జేవ్ యూదుల్చి జో సబగేర్చొ అదికారి కోవుమ్ జా, ప్రెజల్క, “సత్తరెక్క మాన్యుల్ కామ్ కెర్లి రిసా సొవ్వు పొదుల్ అస్తి. తుమ్క జోర్లెల్ గట్ట తిలె, సెలవ్ కడన్లి దీన్ నాయ్, గని తిల సొవ్వు పొదుల్తె జా” మెన సంగిలన్.

15 దస్సి సంగితికయ్, యేసు జోవయింక కిచ్చొ జబాబ్ దిలన్ మెలె, “తుమ్ ఉప్రమెన్చువ, సెలవ్ దీన్ కామ్ కెరుక నెంజె మెంతసు, గని సెలవ్ కడన్లి దీసి కి తుమ్చ బెయిలల్ కి గొడ్డెల్ కి కిచ్చొ సొమ్ముల్ జలెకి యివ జేవ్ పాసి పింక మెన గడ్డె ఉడడ నెను నాయ్ గె? దస్సి కెర్తసు, గెద.

16 జలె, ఈంజ తేర్బోద, అమ్ యూదుల్చి అబ్రాహామ్చి సెకుమ్చి తేర్బోదక సయ్తాన్ బంద, అట్టర వెర్చుల్ జా అస్సె. జలె, తుమ్చ సొమ్ముల్క సెలవ్ కడన్లి దీసి యివుక జతయ్ జలె, సెలవ్ కడన్లి దీసి జలెకి ఈంజ తేర్బోదక బందిలీన్ తెంతో ఇన్నెక యివ, ఏడ్డెల్ కెరుక అన్నె ముక్కిమ్ నాయ్ గె?” మెన యేసు సంగితికయ్,

17 జోక ‘తప్పు కెర్తయ్’ మెన ఉచర్లస ఎత్తిజిన్ ‘అమ్చి తప్పు’ మెన లాజ్ జల చి, జోచి అత్తి జర్గు జల వెల్లెల కమ్మె ఎత్తిచి రిసా ప్రెజల్ ఎత్తి, సర్లసంతోసుమ్ జా గెల.

దేముడుచి రాజిమ్క చి సొర్చు గిడ్డక సంగిలి టాలి (మత్త 13:31-33; మార్కు 4:30-32)

18 జో జర్గు కెర్లిన్క ప్రెజల్ దస్సి సర్లసంతోసుమ్ జతికయ్, యేసు, “దేముడుచి రాజిమ్ కిసి జతయ్ గే ఉచరుమ. జాక కిచ్చొ టాలి ఉచరుమ?

19 ఈందె, సొర్చు గిడ్డక జలిన్చి రితి జతయ్. ఏక్ మాన్సు సొర్చు గిడ్డ అన, జోచి వట్టయ్ రోవెలన్, చి మొక్క వడ్డ రూకు జా గెలన్, చి జేవ్చ కొమ్ముల్తె పిట్టల్ గూడల్ బంద జలె” మెన కిటాలి బెదవ సంగిలన్.

వులయ్తి పీట్చి రిసాచి టాలి (మత్త 7:13-14, 21-23)

‡ 13:7 13:7 యేసు తిన్ని వెర్చుల్ బుల బుల బోదన కెర్లె తిలన్, జోర్లె బాదల్ తిల మాన్యుల్క చెంగిల్ కెర్లి తిలన్, గని ఒగ్గర్ బుద్ది వలితుమ్ జేవ్ ప్రెజల్తె నే దెర్లె రితి తిలి, చి “తుమ్చి బుద్ది నే మార్చువ జలె, తుమ్చి పొవుమ్ నే ములిలె, చెంగిల్ బుద్దివంబో నే దెర్లె, తుమ్చి సిచ్చ వయతె” మెన ఈంజ టాలి తెన్ జాగర్ల సంగితయ్. § 13:19 13:19 ఈంజ టాలిచి అర్దుమ్ కిచ్చొ మెలె, ఎత్తి అదికారుమ్ తిలి దేముడుచి రాజిమ్ మెదొల్తె తోక్తిజిన్ మాన్యుల్ తిలక, జా రాజిమ్ వడ్డెదె, చి అకర్క ఒగ్గర్జిన్ జేవెత బెద తవుల, చి పిట్టల్ రూకతె గూడల్ బందిలీన్ అమ్ ఉచర్లె, జా రాజిమ్తె బెదిల మాన్యుల్క జా రాజిమ్ నీడ, చెంగిల్ తతి టాన్, దిలి రితి జయెదె.

20 ఒత్త తొత్తో యేసు అన్నెక్ కోడు పున *కిచ్చొ టాలి సంగిలన్ మెలె, “దేముడుచి రాజిమ్ కిచ్చొ అన్నెక్ టాలి ఉచరుమ?

21 ‘పోడియొ కెర్లె పీట్ ఎత్తి పొంగుప జా పులున్’ మెన, ఏక్ తేర్ బోద తీనడి పీట్ తె పులయతి పీట్ గలిలి. గల జా పాకుమ్ పులితి రితి తియ దిలి, చి జా పులయతి పీట్ ఇదిలిదిల్ బలెకి. జా కలోయలి పాకుమ్ తిరిమ్ తిరిమ్ పుల, ఒగ్గర్ జా గలి” మెన సంగిలన్.

పరలోకుమతె పెసితి గుమ్ముమ్ చి రిసాచి బోదన

22 జేవ్ పొదులె యేసు †యెరూసలేమ్ తె గెచ్చుక మెన ప్రయానుమ్ గెతె తిలన్. జెలి, వట్టె అన్నె ఒగ్గర్ పట్టలె గెచ్చిలె గెలన్.

23 జేవ్ పొదులె కో గే జోక్ కిచ్చొ మెన పుసిలన్ మెలె, “ప్రబు, పాపుమ్ తెంతో రచ్చించుప జా పరలోకుమతె గెతన తొక్కిజన్ జవుల గె?” మెన పుసిలన్, చి యేసు ఒత్త తిలనక,

24 “పరలోకుమచి గుమ్ముమ్ ఇర్కు జయెది. జా ఇర్కు గుమ్ముమె తుమ్ పెసితి రితి †దొర్కు జలిసి కెరసుక దెకన. కిచ్చొక మెలె, జా గుమ్ముమె పెసుక మెన ఒగ్గర్ జన్ ఉచర్లె కి, జోవయింతె ఒగ్గర్ జన్ నెత్తిర్తి.”

25 “పరలోకుమక ‘గేరు’ మెనుము. జో గేర్చొ ఎజోమాని ఉట్ట తెదొడక కెప్టి డంక దెయెది, చి తెదొడక తుమ్ జా కెప్టి ఇత్తలెతో బయలె టీచ ఉంకవుక దెర, ‘ప్రబువ, అమక కెప్టి ఉగ్గ దె’ మెంతె, చి జో తుమ్ కిచ్చొ జబాబ్ దెయెది మెలె, ‘తుమ్ కేనె తెంతోచ గే నేని’ మెనెది. †

26 తెదొడక తుమ్ కిచ్చొ మెంతె మెలె, ‘తుచి తెనె బెద అన్నిమ్ కయలమ్ పిలమ్, చి అమ్చి వీదులె తుయి బోదన కెర్లెది’ మెంతె,

27 గని జో తుమ్ కిచ్చొ మెనెది మెలె, ‘నాయ్, తుమ్ కేనె తెంతో జెతసు గే నేని. తుమ్ కచితుమ్ నేని. తుమ్ గార్ కము కెర్లెసా అంచి తెంతో దూరి ఉట్ట గెచ్చు’ మెనెది.

28 జెలి, అమ్చ పూర్లులె అబ్రాహామ్, ఇస్సాకు, యాకోబు తెనె దేముడుచ కబుర్లు సంగిల పూర్లుమ్ చ జోచి రాజిమతె పరలోకుమతె తిలిసి తుమ్ తెదొడక దెకితె, గని తుమి ఒత్త పెసుక నెలవ తయె నాయ్ చి రిసా ఏడుకుడు జెన్తి, దంతో చప్పనెతె తన్నె.

29 తుమ్ నంప నెంజిలన ఒత్త పెసున్ నాయ్, గని తూర్పు పక్క తెంతో, పడమర పక్క తెంతో, ఉత్తర పక్క తెంతో చి దచ్చెన పక్క తెంతో యూదుల్ నెంజిల ఒగ్గర్ జన్ మాన్సుల్ జా కెర, దేముడుచి పరలోకుమచి రాజిమతె వెన, జో తెనె అన్నిమ్ కవుల.

30 అన్నె, అప్పె పడ్డె జలన జా అగ్గె జవుల, చి అగ్గె జలన *పడ్డె జవుల” మెన యేసు సంగిలన్.

యేసుక పరిసయ్యుల్ బియడ ఉడడుక ఉచర్లిసి
(మత్త 23:37-39)

31 జయి గడియయ్ పరిసయ్యుల్ సగుమ్ జిన్ యేసుతె జా: కెర జోక్ కిచ్చొ మెల మెలె, “తుయి కేనె గె వేరతె గే. హేరోయ అదికారి తుక మారుక ఉచర్లయ” మెల.

32 జేవ్ దస్సి మెంతియ, యేసు జోవయింక, “తుమ్ గెచ్చు, జో †నక్కొ రితో మాన్సుక కిచ్చొ మెన మెలె, ‘ఈదె, ఆజి చి కలిక ఆవ్ బూతలక ఉడడ్డసి చి, జబ్బుల్ తిల మాన్సుల్ క చెంగిల్ కెర్లెని చి, పేర్ క అంచి కామ్ పూర్తి జయెది.

* **13:20 13:20** ఈంజ టాలితె దొస్సి ఉచరుక జయెది. తొలితో తొక్కిజన్ జా రాజిమతె తిలి కి, పడ్డె తిరిమ్ తిరిమ్ ఒగ్గర్ జన్ జా రాజిమతె బెదితసి ఉచరుక జయెది. పడ్డె జా ట్టు కిని జా కలోయలి పీట్టుచి రూపుమ్ జేవ్చి వానిన గత్తుక మార్పువ కెరెదె గే, దస్సి ఎత్తి అదికారుమ్ తిలో దేముడుచి రాజిమ ఒగ్గర్ జన్ మాన్సుల్ కెరెదె, చి జోవయింబి బుద్దిక మార్పువ కెర చెంగిల్ కెరెదె. † **13:22 13:22** 9:51, 53 దెక. ‡ **13:24 13:24** బారికుల్ 4:12, 16:31, యోహాను 3:15, 16 చి లూకా 10:25-28. § **13:25 13:25** జానె. జేవ్ యూదుల్ జవుల చి “అమ్కయ్ రచ్చన దొర్కు జయెది. అమి పరలోకుమతె గెచ్చుమ్దె” మెన జేవ్ ఉచర్లె కి జేవ్ నంపనెంజిలి రిసా దస్సి సంగితయ్. * **13:30 13:30** జా కాలమక అగ్గెచ బూలోకుమ్ గెచ్చవ గెల కెర, ఎత్తి అదికారుమ్ తిలో దేముడు నెచె బూలోకుమ్ జర్లు కెరెదె, చి రచ్చించుప జల పరలోకుమచి రాజిమతె బెదిల జోవయింబి జల మాన్సుల్ తెనె జయెది, డీసయిలిసి 21:1-8, చి జోవయింతెనె బెద విలువ కెరెల, లూకా 22:29-30. † **13:32 13:32** ‘నక్కొ రితో మాన్సు’ మెలె, జోక తెల్లియ మోసిమ్ కెర్లె ఉద్దెనుమ్లు తవుల. పడ్డె యూదుల్ తెనె ఇదిల్ దకిలి రితి సిస్టారుమ్ జలో మాన్సుక దస్సి మెనుల. జెతె. జో హేరోయ అదికారి జయెది, గని జోచి బుద్దికయ్ యేసు దస్సి సంగితయ్.

33 జలెకి, ఆజ కలికచి వేరక ఆవ్ అంచి ప్రయానుమ్ గెచ్చ గెచ్చ యెరూసలేముతె పాచ్చుక అన్నె. మెలి, దేముడుచ కబుర్లు సంగితో మాన్సు యెరూసలేముక వేర టాన్తె మొరుక బెదె నాయ్' మెన జోక తుమ్ సంగ' మెన పరిసయ్యుల్క యేసు సంగిలన్.

34 తెదొడి యేసు కీసి జలన్ మెలి, "ఓ యెరూసలేముచ, అవుచి యెరూసలేముచ మాన్సుల్! అమ్ తెద్రయల కబుర్ అన్సక చి బోదస కెల్లసక వత్తల్ గల మార్త్రు! కిచ్చొ ప్రమాదుమ్ తుమ్క నే లయితి రితి కుడి జాచ పిల్లల్క రెప్పల్ తెడి కీసి ముద్దొ కెరస తయెదె గే, దస్సి, ఆవ్ తుమ్క కెత్తిగే నుట్లు ముద్దొ కెరంతి రితి తుమ్క చెంగిల్ కెర్తయ్, గని తుమ్ నెసిలదు.

35 ఈందె, తుమ్చి గేర్ కో నెంజితె రితి తుమ్క తూమి ముల దెస్సె. అన్నె అప్పె తెంతో మొదొల్ కెర †'ప్రబుచి నావ్ తెన్ జెతోసాక జెయ్యి! జెయ్యి!' మెన తుమ్ కేక గల్లి దీసి ఎద అంక అన్నె దెకున్ నాయ్ మెన తుమ్క ఆవ్ కచితుమ్ సంగితన్." మెన యేసు సంగిలన్.

14

విస్రాంతి దీసి అత్తో చట్టో పుల తిలో మాన్సుక యేసు చెంగిల్ కెర్లిసి

1-2 అన్నె కిచ్చొ జర్లు జలి మెలి, సెలవ్ *కడ దీసి, అన్నిమ్క మెన యేసు పరిసయ్యుల్చో అదికారి ఎక్కిలోచి గెరి గెచ్చ తతికయ్, అత్తో చట్టో పుల తిలో మాన్సు ఎక్కిలో యేసుచి మొక్కె తిలన్, చి "యేసు కిచ్చొ కెరెదె గే దెకుమ" మెన ఒత్త తిల మోసే తెన్ దేముడు దిలి ఆగ్గుల్ సికడ్డన చి పరిసయ్యుల్ చెంగిల్ దికితె తిల.

3 జలె, జేవ్ పరిసయ్యుల్చి మోసే తెన్ దేముడు దిలి ఆగ్గుల్ సికడ్డనచి మెన్సుతె తిలి జోవయించి ఉప్పిరిచి కున్నెదుమ్ యేసు జాన కెర, జోవయంక, "సెలవ్ కడన్లి దీసి జబ్బు తిలసక చెంగిల్ కెరుక అమ్చి మోసేచి అత్తి దేముడు దిలి ఆగ్గుల్ తెన్ బెదితయ్ గే నాయ్? గె? తుమ్ సంగ" మెన పుసిలో.

4 గని జేవ్ ఎత్తిజన్ తుక్తె తిల. తెదొడి జో అత్తో చట్టో పుల తిలో మాన్సుక యేసు పాసి బుకారా కెర జోక చెంగిల్ కెర "గో" మెలన్.

5 తెదొడి యేసు జేవ్ పండితుల్క అన్నె కిచ్చొ పుసిలన్ మెలి, "తుమ్చి తెన్ ఎక్కిలోక పుత్తున్ జలెకు, బెయిలు జలెకు తిలె, జో పుత్తున్ జలెకు బెయిలు జలెకు సెలవ్ కడన్లి దీసి కుండితె సేడ తిలె, జయ్యి దీసి, సెలవ్ కడన్లి దీసి జలెకి, బేగి జోక జా కుండితె తెంతో కడె నాయ్ గె? కడెదె, గెద" మెలన్.

6 'జో సంగిలిన్ సత్తిమ్' మెన జేవ్ కిచ్చొ జబాబ్ దెంక నెత్తిర్.

గవురుమ్ నే ఉచరంతిచి రిసాచి కోడు

7 జలె, జా అన్నిమ్క జో పరిసయ్యుడు బుకార్లసతె సగుమ్జన్ వెసుక మెన గవురుమ్చ టాన్లు నిసాన, యేసు జోవయంక ఇని మెన ఏక టాలి సంగిలన్.

8 "కో జలెకు తుమ్చితె కక్క జలెకు పెండ్లి విందుతె బుకార్లెగిన, విందుతె అయ్లోసా తుయి గవురుమ్చి టాన్తె వెసు నాయ్, నెంజిలి తుచి కంట వెల్లో మాన్సుక జో బుకారా తిలె,

9 జో వెల్లో మాన్సు అయ్లె, తుక చి జోక బుకార్లెసా తుచితె జా: కెర 'ఈంజో మాన్సుక జా టాన్ దేసు', మెన సంగిలి, తుయి లాజె జా ఎత్తిచి కంట తొక్కి. గవురుమ్చి టాన్తె తుయి తిరిమ్ గెచ్చ వెసిస్సె.

10 తుక కో జలెకు బుకార్లె, ఎత్తిచి కంట తొక్కి. గవురుమ్చి సాడిచి టాన్తె గెచ్చ వెసు, చి తుక బుకార్లెసా అయ్లె తుక 'మిత, అన్నె చెంగిల్తె వెసు', మెన సంగిలిగిన, జా విందుక తుచి తెన్ వెస తిల ఎత్తిజన్చి మొక్కె తుయి గవురుమ్ జస్సె.

11 కిచ్చొక మెలి, కో జోవయంక జోయ్యి గవురుమ్ కెరనెదె గే, దేముడు జోవయంక దాకె కెరెదె, గని కో జోవయంక జోయ్యి దాకె కెరనెదె గే, దేముడు జోవయంక వెల్లో కెరెదె" మెన యేసు సంగిలన్.

† 13:35 13:35 ఈంజె కోడు ఎత్తి అదికారుమ్ తిలో దేముడు తెద్రయ్తో రచ్చించువ కెర్లెసాక సంగితి కోడు. * 14:1-2 14:1-2 యూదుల్చి అలవాట్ తెన్, సత్తెరక్క సత్తు దీసల్ కిచ్చొ కామ్ నే కెర్లె దేముడుక జొకర్లె దీసి. విస్రాంతి దీసి-తెలుగు. ఎత్తి సెన్వర్లె యూదుల్క బక్తి కెర్లె సెలవ్ కడ దీసి జయెదె. జా దీసి జోవయంక సబ గెరెల్ గెచ్చ, దేముడుచి కొడె సూన కెర, ఎత్తి అదికారుమ్ తిలో దేముడుక బక్తి కెరెల. జోక 'యెహోష' మెన నావ్ తయెదె. జా దీసి 'కిచ్చొ కామ్ కెర నాయ్' మెన జో ఎత్తి అదికారుమ్ తిలో దేముడు సంగిలిన్క యూదుల్చ వెల్లెల మాన్సుల్ ప్రజల్క జాడు వయ్యె రితి కెర కామ్ నే కెర్లెచి రిసా ఒగ్గర్ ఆగ్గుల్ అవిష్ట ఉచర అస్సి. ఇన్నె, దొన్నె ఎన్నులు కోడ్లన్క 'కామ్' మెన నింద కెర్తతి.

విందులతే ముక్కిమక కక్క బుకారుక గే యేసు సంగిలిసి

12 తెదడి జా అన్నిమక బుకార్లో పరిసయ్యుడుక యేసు, “తుయి మెద్దెంచి జవున్ సంజెచి జవున్ అన్నిమక మాన్సులక బుకారుక ఉదరై, ముక్కిమక మితర్దులక జవున్, బావొదిసిక జవున్, తుమ్చ బందుగులక జవున్, నెంజెలి అన్నె సాహ్సార్దుక జవున్ బుకారా నాయ్. కిచ్చొక మెలె, †జేవ్ జోవయింద అన్నిమతె తుమ్క అన్నె బుకారుక జోవయింక నెక్తి అన్నె, చి తుమ్క జేవ్ బుకార్లె, ఈంజయ్ లోకుమ్తె తుమ్చి బవుమానుమ్ సంగుక తన్నె.

13 తుమ్ †అన్నిమక మాన్సులక బుకారుక మెలె, కక్క బుకారా మెలె, బీద సుదలక, మొండివో మాన్సులక, సొట్ట మాన్సులక, గుడ్డి మాన్సులక, చి

14 జేవ్ తుమ్క అన్నె బుకారుక నెతిరతనచి రిసా తుమ్క చెంగిల్ జయెదె. కిచ్చొక మెలె, సత్తిమ్ ఇండిలన అన్నె జీవ్ జా ఉట్టితి పొదిక తుమ్క ఎత్తి అదికారుమ్ తిలో దేముడు బవుమానుమ్ దెయెదె” మెన యేసు సంగిలన్.

వెల్లి విందుచి టాలి

(మత్త 22:1-10)

15 జా అన్నిమక యేసు తెన్ వెన తిలో మాన్సు ఎక్కిలో జోచి జా కోడు సూన కెర, “దేముడుచి రాజిమతె, కోజో తెన్ బెద అన్నిమ్ కవుల గే, జోక ఒగ్గర్ చెంగిలి!” మెలన్.

16 యేసు టాలిక కిచ్చొ మెలన్ మెలె, “ఏక్ మాన్సు వెల్లి విందు తెయార కెర, ఒగ్గర్జిన్క బుకార్లన్.

17 జలె, విందు వంటితి సమయమ్ జా అయ్లి పొది, ‘తుమ్ జా, విందు తెయార జా అన్నె’ మెన బుకార్ల సుదలక సంగు మెన ఎజోమాని జోచొ గొత్తి సుదొక తెద్రయ్లన్.

18 గని జేవ్ బుకార్లన ఎత్తిజన్ ఎక్కి బుద్ది జా, జోవయింతె ఎత్తి మాన్సు జెంక నెతిరి మెల. జోవయింతె తొలితోచ జో ఎజోమాని తెద్రయ్లో గొత్తి సుదొక, ‘అవ్ బుయి గెన అన్నె, చి జా దెకుక మెన గెచ్చుక అన్నె. దయ కెర, అవ్ నే జెతిసి చెమించుప కెరు’ మెలన్.

19 పట్టె అన్నెజొ, ‘అవ్ పావ్ జతల్ బెయిలల్ గెన అన్నె చి, జేవ్ చెంగిల్ కామ్ కెరుల గె నాయ్ మెన దెకుక గెతసి. దయ కెర, అవ్ నే జెతిసి చెమించుప కెరు’ మెలన్.

20 పట్టె అన్నెజొ, ‘అవ్ అప్పె వెండ్డి జలయ్ చి, జాకయ్ అవ్ జెంక నెతిరి’ మెలన్.

21 “జాకయ్ జో గొత్తి సుదొ ఎజోమానితె అన్నె ఉట్ట జా కెర, జేవ్ మాన్సుల్ సంగిలిసి ఎత్తి జో ఎజోమానిక సంగిలన్, చి జో ఎజోమాని ఒగ్గర్ కోప్పమ్ జా, జోచొ గొత్తి సుదొక, ‘తుయి బేగి గో, చి వట్టుమ్చ విదులె వట్టెలె కో బీద సుదల్, మొండివో మాన్సుల్, గుడ్డి మాన్సుల్చి సొట్ట మాన్సుల్ తవుల గే, జోవయింక అంచి విందుతె కడ ఆను’ మెన సంగిలన్.

22 సంగితికయ్, జో దస్సి గెచ్చ దస్సి కెర, అన్నె జా కెర ఎజోమానిక బాబు, తుయి సంగిల్ రితి కెర అన్నె, గని విందుతె అన్నె టాన్ అన్నె, మెలన్,

23 జో గొత్తి సుదొక ఎజోమాని అన్నె, జలె, పట్టుమ్ ఒత్తల్తోచి బయిలె తుయి గెచ్చ ఒత్తచ వట్టెలె కో తిలె, ఏడెల్చి తెడి కో బిచ్చిమ్ నజితన జవున్ వెన తిలె, జేవ్ ఎత్తిజిన్క బలవంతుమ్ కెర కడ ఆను. అంచొ గేరు సీబెరుకయ్ మెలన్.

24 జలె, తుమ్క అవ్ కిచ్చొ మెంతసి మెలె, జేవ్ తొలితో బుకార్లనచ రిత జల మాన్సుల్తె కో కి *అంచి విందు కంక అవ్ నెలవ్ దెయె నాయ్.” మెన యేసు సంగిలన్.

యేసు సిన్సుడు జంక కో ఉదరై, చెంగిల్ ఉచరుక

(మత్త 10:37-38)

† 14:12 14:12 అన్నెక అర్దుమ్ కి ఇన్నె ఉచరుక జయెదె. కిచ్చొ మెలె, తుమ్క అన్నె బుకారుక నెక్తి తిలనక బుకార్ల గని నెంజెలి మాన్సుల్క నాయ్ మెలెగన, జా కిచ్చొ ఒగ్గర్ ప్రేమ్? మత్తయి 5:46, 6:2-4, 16-18 దెక. † 14:13 14:13 నెంజెలి ‘విందుతె’. § 14:23 14:23 నెంజెలి బెరుక. 24. తుక అవ్ కిచ్చొ మెంతసి మెలె, జేవ్ అవ్ తొలితో బుకార్ల మాన్సుల్తె కో కి అంచి విందు కంక అవ్ నెలవ్ దెయి నాయ్ మెన జో ఎజోమాని సంగిల్ మెన యేసు టాలి సంగిలన్. * 14:24 14:24 యేసు దెతి విందు కిచ్చొ మెలె, పరలోకుమ్తెచి విందు మెలి రితి మెలె, పరలోకుమ్తె గెచ్చ కెయక తెయక ఎత్తి అదికారుమ్ తిలో దేముడు తెన్ యేసు తెన్ జెతిసి.

25 జల, యేసు యెరూసలేమ్‌తె గెతి రిసా వట్టె గెతె తతికయ్, ఒగ్గరజన్ జనాబ్ జో తెన్ బెద గెతె తిల. తతికయ్, యేసు పసుల జోవయింక,

26 “అంచో సిస్సుడు జంక మెన కో అంచితె జెయెదె గే, అంక ప్రేమ కెర్తి కంట అబ్బొన్క, అయ్యున్క, తేర్చిక, జోవయింక బోదల్క, అన్నసీంక, అప్పసీంక చి జోకయ్ తొక్కి ప్రేమ నే కెర్తె. నెంజె.

27 జోచి సొంత †సిలువ వయన, కో అంచి పట్టి జెయె నాయ్ గే, జో, అంచో సిస్సుడు జంక నెత్తె.

28 “తుమ్చితె కో జలెకు ఉప్పిర్ గేర్ బందుక ఉచర తిల, జా పూర్తి బందితి రిసా డబ్బుల్ సరిపుచుప జయెదె గే నాయ్ గే దెకుక మెన, లెక్క కెరుక మెన వెనెది.

29 జో తొల్లెతొ జా లెక్క నే కెర్తె జా ఉప్పిర్ గేర్చి పునాది గలిలె పడ్డొ డబ్బుల్ సరిపుచుప నే జతినచి రుజ్జు పడ్డొ దెక పూర్తి బందుక నెత్త ముల దిలె, దెకితన ఎత్తిజిన్ జోక ఆఁసుల.

30 ‘ఈంజొ మాన్సు ఉప్పిర్ గేర్ బందుక మొదోల్ కెర్తొ, గని పూర్తి బందుక నెత్’ మెన ఆఁసుల. ‡

31 “అన్నె, ఏక్ రానో అన్నెక్లొ రానోచి ఉప్పిరి యుద్దుమ్ కెరుక ఉచర్తయ్. ఈంజొ రానోక దెన్ను వెయిల్ జిన్ సయ్స్యమ్ సుదల్ తిల, గని జో అన్నెక్లొ రానోక విస్సుక్ వెయిల్ జిన్ సయ్స్యమ్ సుదల్ తిల, ఈంజొ తొక్కి సయ్స్యమ్ తిలొసా తొలితొ వెన, ‘జో అన్నెక్లొచి ఉప్పిరి జీనుక సెక్తి అన్న గే, నాయ్ గే’ మెన ఉచరెది.

32 ‘జీనుక సెక్తి నాయ్’ మెన డీసిలె, ఈంజెమ్ జోక దూరి తా పాసి నే జతె అగ్గి, ‘అమ్ కట్టు జమ. తుమ్క అమ్ కిచ్చొ దెంక గే తుమ్ సంగ’ మెన ఈంజొ రానో జో అన్నెక్లొ రానోక కబుర్ త్రెయెది. §

33 “దస్సి, తుమ్చితె కో జోక తిలిసి ఎత్తి ములె నాయ్ గే, అంచో సిస్సుడు జంక నెత్తె” మెన యేసు సంగిలన్.

కామక నెంజిలి లోన్చి కోడు
(మత్త 5:13; మార్కు 9:50)

34 “లోన్ చెంగిల్ అన్న, గని లోన్చి కారు గెలిగన, జా లోన్ కీసి అన్నె కారు జయెదె? జయె నాయ్. అన్నె

35 జా కారు గెలి లోన్క ‘ఎరు’ మెన బుఁయ్యె సువుక కి కామక నెంజె. ఆరి వెంట గెలుక జయెదె. సూన్త కండ్లొ కక్క తిలె, సూన్తు!”

15

నెన గెలి మెండప్పిలచి టాలి
(మత్త 18:12-14)

1 ఏక్ సుట్టు *సిస్త్రి నజిత సుంకర్లు చి ‘పాపుమ్ సుదల్’ మెన యూదుల్ నిస్కారుమ్ దెకిత అన్నె ఒగ్గరజన్ యేసుచి బోదన సూసుక మెన పాసి జెతె తిల, చి

2 పరిసయ్యుల్ చి మోసి తెన్ దేముడు దిలె అగ్గుల్ సికడ్డన దెక కెర, “ఈంజొ మాన్సు పాపుమ్ సుదల్ బెదవన జోవయింతెన్ అన్నిమ్ కతయ్” మెల.

3 జాకయ్ జోవయింక ఈంజ టాలి యేసు సంగిలన్. ఇసి జతయ్:

4 “తుమ్తె, మెనుమ, ఎక్కిలోక పుంజెక్ మెండల్ తిలె, చి జోవయింతె ఏక్ నెన తిలె, జేవ్ తిలి బయిలె తిల ఏక్ తకు పుంజెక్ మెండల్క ములె దా కెర, జో నెన తిలొ మెండప్పిల చజనుక గెచ్చెది.

5 గెచ్చు చజ, డీసిల్ బేగి సర్దసంతోసుమ్ జా కందిగోడొ కెరన

6 గెరి దెరన జెయెదె, అన్నె, గోతుసుదల్క చి పాసి గెరల్చ మూన్సుల్క బుకారా కెర, ‘అంచి సంతోసుమ్తె తుమ్ బెద. కిచ్చొక మెలె, నెన తిలి అంచి మెండప్పిల అన్నె దొర్కు జా అన్న’ మెనెది.

7 దస్సి తుమ్క అవ్ కిచ్చొ మెంతసి మెలె, తుమ్చి తెన్ పుంజెక్ మెండల్తె ఏక్ నెన తిలె, జా ఏక్ అన్నె దొర్కు జలె కీసి సర్దసంతోసుమ్ జస్సె గే, దస్సి, పుంజెక్ జిన్ మూన్సుల్తె ఏక్ తకు పుంజెక్ జిన్ ‘పాపుమ్

† 14:27 14:27 లూకా 9:23 దెక, అన్నె జా 9:23 కోడుచి ఎట్టొచి కోడు దెక. ‡ 14:30 14:30 ఈంజ టాలిచి అర్దుమ్ కిచ్చొ మెలె, ‘అంచో సిస్సుడు జంక ఉచర్తె, ఆకర్ ఎద అంచి కామ్ కెర కెడవుక తుమ్క సెక్తి అన్న గే నాయ్ గే తుమ్ చెంగిల్ ఉచర’ మెన యేసు సంగితయ్.

§ 14:32 14:32 ఈంజ టాలిచి అర్దుమ్ కిచ్చొ మెలె, ‘అంక దొర్కు జలి సేవ నే కెర్తె ఓడువ జస్సె గే నాయ్ గే తుమ్ చెంగిల్ ఉచర’ మెన యేసు సంగిల్ రితి జతయ్. * 15:1 15:1 ‘సిస్త్రి సంగిత సుంకర్లు’ చి ‘పాపుమ్ సుదల్’ మెలిన్చి అర్దుమ్క 5:30చి ఎట్టొచి జాచి కచ కొడొ దెక.

నుదల్ నెంజుమ్' మెన ఉచరన్నస తిలె, గని అన్నెళ్ల జో కెర్ల పాపల్ చినన దుకుమ్ జా పాపుమ్ ముల దిలె, జేవ్ ఏక్ తకు పుంజెక్జిన్చి రిసాచి కంట జోవయించి పాపుమ్ ముల మార్పువ జలోసాచి రిసా వరలోకుమ్తె ఒగ్గర్ సర్దసంతోసుమ్ జవుల.

నెన గెలి వెండి కాసుచి టాలి

8 "అన్నెక్ టాలి ఉచరుమ. ఏక్ తేరబోదక దెస్సు †వెండి కాసుల్ తిలె, జోవయితె ఏక్ సేడ గెలె, జా కిచ్చొ కెరెదె? దీవు లంబడ, గేరు వడ్డవ, జా డీస్టె ఎదక సరిగా చజెదె, గెద!

9 జలె, జా డీసిలె, బేగి జేవ్చ గోతుసుదల్క చి జేవ్చి గేర్క పాసి తిలె గెరల్చ మాస్సుల్క బుకారా కెర, 'అంచి సంతోసుమ్తె తుమ్ బెద. కిచ్చొక మెలె, నెన తిలి అంచి వెండి కాసు అన్నె డీస అస్స' మెనెదె.

10 దస్సి, తుమ్క ఆవ్ కిచ్చొ మెంతసి మెలె, కో జలెకు ఎక్కిలో కి జో కెర్ల పాపల్ చినన దుకుమ్ జా పాపుమ్బుద్ది ముల దిలె, వరలోకుమ్తె దేముడుచ దూతల్ సర్దసంతోసుమ్ జవుల" మెన యేసు సంగిలన్.

నెన గెలో పుత్తున్చి రిసాచి టాలి

11 తెదొడి యేసు అన్నె, "ఏక్ మాన్సుక దొగుల పుత్తర్లు తిలె.

12 జేవ్ పుత్తర్లుతె దకిలో పుత్తుసి అబ్బొన్క ఇసి మెన సంగిలో. 'ఓ బ, తుచి అస్తితె అంక జెతి వాట అప్పె దె' మెలన్. జలె, జో అబ్బొసి జోచి అస్తిక దొన్ని వాటల్ కెర, జేవ్ దొగుల ఎక్కిక్ల జెత వాటల్ జోవయింక వంట దిలన్.

13 "జలె, ఒగ్గర్ దీసల్ నే గెతె అగ్గె, జో దకిలో పుత్తుసి జోచి వాట సామస్సు ఎత్తి కి †బెదవన కెర, ఏక్ దూరి దేసిమి గెచ్చుక మెన బార్ జలన్. జా దూరి దేసిమి గెచ్చు తా, ఈంజో కిచ్చొ కెర్లన్? బుద్ది నెంజిల కమొతె జోక దిలిసి ఎత్తి పాడె కెర గెలన్.

14 జా పూర్తి కేడ్డికయ, జా దేసిమె వెల్లి గార్ జా గెలి, చి జింక అల్లర్ జలన్.

15 జింక అల్లర్ జా, జా దేసిమెచో మాస్సు ఎక్కిలోతె కామ్ నజనుక గెలో, చి 'అంచ అండ్రుల్ కతిన్తె గెచ్చు జేవ్క రక్కు' మెన కామ్ దిలన్, చి యూదుల్ తెన్ జా కామ్ నిస్కారుమచి జలెకి, కెర్లన్. ‡

16 జలె చూ బమ్మక జో ఉబెడో కిసి జలో మెలె, జేవ్ అండ్రుల్ *కతిసి జో కి సర్ద తెన్ కతె, గని జోక కో దెతి నాయ్.

17 "దస్సి, జోక కొవ్చి నాయ్, తోడు నాయ్ చి రిసా సగుమ్ దీసల్ గెతికయ, జోక బుద్ది అయిలె, చి కిచ్చొ మెన ఉచరన్నస మెలె, 'అబ్బొవ గొతిమాస్సుల్క సరిపుచువ జతి అన్నిమ్ అస్స, గని ఆవ్ పుత్తుసి ఇస్స చుక మొర గెతసి. ఈంజ అల్లర్ ఆవ్ కిచ్చొక సేడుక?

18 అబ్బొతె గెచ్చిందె, చి ఓ బ, దేముడుక అన్నె తుక విరోదుమ్ జలి రితి, ఆవ్ పాపుమ్ కెర అస్సి.'

19 'అంచొ పుత్తు' మెన తుయి అంక సంగుక జలె, అంక విలువ నాయ్, గని అంక 'అంచొ గొతిమాస్సు' మెన తుయి అంక తియన కామ్ దె' మెన సంగిందె మెన జో ఉబెడో ఉచరన్,

20 ఉట్ట, అబ్బొన్తె అన్నె గెచ్చుక బార్ జలో. జలె, అబ్బొన్చో గేరుక అన్నె దూరి తిలి పొది, అబ్బొసి జోవయింక దెక కెర, జో బుద్ది నెంజ తిలో గని అప్పె ఇదిల్ బుద్ది జలో పుత్తున్చి ఉప్పిరి కన్కారుమ్ జా నిగ జా కెర, జోక అమ్డ చుంబిలన్.

21 "తెదొడి జో పుత్తుసి జోక 'ఓ బ, దేముడుచి ఉప్పిరి, అన్నె తుచి ఉప్పిరి విరోదుమ్ జలి రితి, ఆవ్ పాపుమ్ కెర అస్సి. అంచొ పుత్తు మెన తుయి అంక సంగుక అంక విలువ నాయ్,' మెలన్.

22 గని అబ్బొసి జోవయించ గొత్తి నుదల్క బుకారా కెర, 'అమ్చ పాలల్ ఎత్తితె చెంగిల్చి బే బేగి ఆన ఇన్నెక గల దాన, చి ఇన్నెచి ఊంటితె ఉంగారుమ్ చి చట్టలె జోట్ల గల దాన.

23 దస్సి కెర్లదు మెలె, అమ్ బల్పువ జలో పోతుపిల్ల తుమ్ ఆన కండ, చి ఈంజో గెలి ఉట్ట అయిలె సర్దక విందు కెరుచు.

† 15:8 15:8 జా దేసిమి ఏక్ వెండి కాసు కెర్ల విలువ జయెదె మెలె, ఏక్ దీసిచి కూలిచి ఎదిలి డబ్బుల్. ‡ 15:13 15:13 నెంజిలె 'ఏక కెర, డబ్బుల్ దెరన్,....' § 15:15 15:15 యూదుల్ అండ్రు ముక్కల్ కతి నాయ్. * 15:16 15:16 ఏక్ రగుమ్ రూకచ కాయల్, చెర్లె, అండ్రుల్క ఒత్తచ కవడుల.

24 కిచ్చొక మెలె, ఈంజో అంచో పుత్తు మొర గెచ్చు అన్నె జియ అన్నె. నెన తిలో, చి అన్నె దొర్కు జలో మెన అబ్బొసి సంగిలో, అన్నె, ఎత్తి, తెయార్ జతికయ్, సర్ల కెరనుక దెర్ల.

25 “జలె, ఈంజో గెరి ఉట్టు అయ్లో ఉబెడోచో అన్నొసి జోవయించి బయియతె కామ్ కెర్తె తిలో, చి గెరి అన్నె ఉట్టు జెతె తిలి పొది పాసి అయ్లె, బాజె నచితి అవాడ సూన్లన్.

26 నూన కెర, గొత్తి సుదో ఎక్కిలోక బుకారా కెర, ‘కిచ్చొక బజయితతి, సర్ల కెరంతతి?’ మెన పుసిలన్,

27 చి గొత్తి సుదో జోక, ‘బావోది గెరి అయ్లన్ చి జో జీవ్ తా గెరి ఉట్టు జా అస్సచి రిసా అబ్బొది బేడు తిలో పోతుపిల్ల కండయలన్.’

28 “జలె, జో మాన్సుచో ఈంజో వెల్లో పుత్తునక కోపుమ్ అయ్లి, చి గెరి పెనుక కి జోక ఇస్టుమ్ నాయ్. జాకయ్ అబ్బొసి బార్ జా, తెడి జె మెన బతిమాల్లు జా సంగిలన్, గని

29 అబ్బొనక జో, ‘ఈందె, ఎత్తి వెర్నల్ తుచి సేవ కెర్లయ్, తుయి సంగిలిసి నిదానుమ్ కెర, కెయ్య కి పిట్టవి నాయ్. జలెకి, అంచ గోతుసుదల్ తెన్ ఆవ్ సర్ల తెన్ విందు కెరంతి రితి కెయ్య కి ఏక్ ఇదిలిసి గొర్లె కి దెస్సి నాయ్.

30 గని సానివో తెన్ బెద తుచి †ఆస్తి పాడ కెర్లొ ఈంజో పుత్తుది గెరి జెతికయ్, తుయి బేడు తిలో పోతు కండయలది! కిచ్చొ సత్తిమ్, జా!’ మెన జో వెల్లో పుత్తుసి సంగిలన్, చి

31 అబ్బొసి జోక, ‘ఓ పుత్త, తుయి కెయ్లక కి అంచి తెన్ అస్సిసి, చి అంచి ఆస్తి ఎత్తి తుచి.

32 జలెకి, ఈంజో తుచో బావోది మొర గెచ్చు అన్నె జీవ్ జలన్. నెన తిలన్, గని అన్నె దొర్కు జలోచి రిసా ఇసి విందు దా సర్ల కెరనుక చెంగిలి’ మెన సంగిలన్, మెన సిస్టు సంగిత సుంకర్లక చి ‘పాపుమ్ సుదల్’ మెన అన్నె మాన్సుల్ నిన్నారుమ్ సంగిలన్ జోవయింక నంచ కెర్లెచి రిసా యేసు వండితుల్క టాలి సంగ జేవ్ వండితుల్చి తప్పుచి రిసా ఉచరయలన్.”

16

తెల్వి తిల గొత్తి సుదొచి టాలి

1 తెదొడి యేసు జోవ సిస్సుల్క, “సామాగ్రి ఎక్కిలో తిలన్. జోచి గెరిచి కామ్ ఎత్తి దెకుక చి జోచి ఆస్తి ఎత్తి దెకుక జోతె ఏక్ మాన్సు తిలో. జలె, ‘తుచి ఆస్తి దెకితోసా జా ఆస్తి పాడ కెర్తయ్’ మెన జో ఎజోమానిక కబుర్ అయ్లి.

2 జో జోచి ఆస్తి దెకితోసాక బుకారా కెర, ‘తుచి రిసా ఆవ్ సూన్లిసి కిచ్చొక? అప్పె తెంతో తుక ఇన్నె కామ్ నాయ్. తుచి అత్తి ఆవ్ సార్ల కెర్లెనక కిచ్చొ కెర అస్సిన్ గే కక్క కెర్ది దా అస్సిన్ గే లెక్కల్ కెర రెగుడ అంక దెకపు’ మెన ఎజోమాని సంగిలో.

3 “జలె, ఎజోమానిచి ఆస్తి దెకితో ఈంజో మాన్సు కిచ్చొ తెలివి ఉచరన్లన్ మెలె, అంచో ఎజోమాని అంక కడ గెలెది జలె, ఆవ్ కిచ్చొ కెర్లె జయెదె? కూలి కామ్ కెరుక అంక సత్తు నాయ్, అవ్ నెతిరి. బిచ్చిమ్ నజుక లాజు, మెన ఉచర అస్సి.

4 ఎజోమాని అంక కడ గెలె పొది మాన్సుల్ అంక సినేతుమ్ జా తా జోవయించ గెరలె బుకార్లె బాద తయె నాయ్ మెన ఉచరన కెర,

5 ఎక్కిలోకచి వర్లె అన్నెక్కిలోక వర్లె తెన్ జోచో ఎజోమానితె రునుమ్ జలె ఎత్తిజిన్క బుకారా కెర, తొలితోచొక అంచో ఎజోమానిక తుయి కెర్ది బాకి జా అస్సిసి? మెన పుసిలన్.

6 జో రునుమ్ జలెసా చెత్తర్ వెయిల్ కాయల్ తేలు మెలన్, చి ఈంజో జలె తుచి బాకి నజ తిలి పున్కుమ్ బేగి చజన వెన ‘దొన్ని వెయిలు’ మెన రెగుడు మెలన్.

7 “తెదొడి ఎజోమానిచో గేర్ దెకితోసా అన్నెక్లొక బుకారా కెర, ‘తుయి కెర్ది బాకి జా అస్సిన్’, మెన పుసిలన్, చి జో ‘వెయి నాడివో గోదుమ్’ మెంతికయ్, ‘దస్సి జలె, తుచి బాకి కాగ్దుమ్ వెంబ అట్టు పుంజో’ మెన రెగ్గున మెలన్.

† 15:30 15:30 నెంజెలె ‘డబ్బుల్’.

8 “జలె, జోవి అస్సిక దెకితో జో అబద్దుమ్ కెర్లో మాన్సుచి తెలివి దెక, తెలివి కామ్ కెర్లది మెన జో ఎజోమాని సంగిలో. ఈందె, దేముడుచి ఉజిడ్ బుద్ది జలనచి కంట ఈంజ లోకుమ్చి బుద్ది తిలన జోవయించి ఈంజ కాలుమ్చ మాన్సుల్ తెన్ బల్ తెలివి దెకనతతి.

9 “జలె, తుమ్క ఆఁవ్ కిచ్చో మెంతసి? * ఈంజ లోకుమ్చి దనుమ్ తెన్ తుమ్క నేస్తమ్ కెరన, చి జా డబ్బుల్ కేడ్లె పరలోకుమ్తె ఎల్లకాలుమ్ జయఁతస్తితె తుమ్క † బెదవనుల. ‡

10 ఈందె, కో జలెకు ఇదిలిన్ కామ్తె నిదానుమ్ కెరెదె గే, వెల్లి కామ్తె కి నిదానుమ్ కెరెదె. గని కో జలెకు ఇదిలిన్ కామ్తె అబద్దుమ్ కెరెదె గే, వెల్లి కామ్తె కి అబద్దుమ్మి కెరెదె.

11 జాకయ్, మాములుమ్ ఈంజ లోకుమ్చి డబ్బుల్ వాడిక కెర్లెన్తె తుమ్ నిదానుమ్ నే కెర తిలెగిన, పరలోకుమ్చి దనుమ్ తెన్ తుమ్ కామ్ కెర్లె రితి దేముడు కిసి తుమ్చి అత్తి జా సార్పు కెర దెయెదె! తుమ్క జో కిసి నంప కెరుక జయెదె!

12 అన్నె, జోవయించి అస్సిక తుమ్ దెకుక మెన అన్నెజ్జో తుమ్చి అత్తి సార్పు కెర తిలె, గని తుమ్ జా అస్సిక నిదానుమ్ నే కెర్లె, తుమ్క జెతికయ్ తుమ్చి సొంత అస్సి కో తుమ్క దెవల! దిలె, పాడ్ కెరుల మెనుల.

13 కేన్ గొతిమాన్సు ఎక్కె దడి దొగుల ఎజోమాన్సుచి సేవ కెరుక నెత్తె. కిచ్చొక మెలె, ఎక్కిలోక విరోదుమ్ కెర, అన్నెజ్జోక ప్రేమ కెరెదె, నెంజిలె జో అన్నెజ్జోక నిదానుమ్ కెర, తొలితొవక నిస్సారుమ్ దెకెదె. జలె, దేముడుక చి ఈంజ లోకుమ్చి దనుమ్క ఎక్కె దడి సేవ కెరుక నెతుర్పు” మెన యేసు జోచ సిన్సుల్క సంగిలన్.

యేసు సంగిల దొన్ని కొడె
(మత్త 11:12-13)

14 ఈంజ లోకుమ్చి దనుమ్చి రిసా యేసు తెదొడి సిన్సుల్క సంగిలిన పరినయ్యుల్ నూన కెర జోక కొంకడ్ల. కిచ్చొక మెలె దేముడుచి సేవ కెర్లనుమ్ మెననై కి, డబ్బుల్క జోవయంక ఒగ్గర్ ప్రేమ.

15 యేసు జోవయంక, “మాన్సుల్చి మొక్కె పున్సుమ్ తిలి రితి డీనుక ఆన జతన తుమి. గని తుమ్చి పెట్టి కిచ్చొ బుద్ది అన్నె గే దేముడు జానె. జలె, ఈంజ లోకుమ్చ మాన్సుల్ కిచ్చొవి రిసా ‘ముక్కిమ్చి’ మెనుల గే, దస్సెచిక దేముడు వెట్టారుమ్చి మెనెదె.

16 “బాప్తిసుమ్ దెతె తిలో యోహాను బార్ జలి ఎదక మోసాని పూర్ణుమ్చొవి అత్తి దేముడు రెగ్గయల ఆగ్గుల్, అన్నె పూర్ణుల్చి అత్తి సంగిల దేముడుచ కబుర్లు రెగిడ్డిని ముక్కిమ్ జా తిల. గని యోహాను అయ్లి తెంతో, దేముడుచి రాజిమ్ పాఁచ జా అయ్లిన్చి రిసాచి, నుబుమ్ కబుర్ నూనయ జతయ, జో నూనయ్లో, ఆఁవ్ నూనయ్తసి, చి పాఁచ జా అయ్లి ఈంజ రాజిమ్తె బెదితన ఎత్కిజన్ బెదుక మెన బమ్మ జతతి.

17 మోసాని పూర్ణుమ్చొవి అత్తి దేముడు రెగ్గయల ఆగ్గుల్చి ఎక్కి అచ్చుమ్చి విలువ గెచ్చె నాయ్, జెతె కేన్ అచ్చుమ్ కామ్క నెంజితి రితి జతి కంట, పరలోకుమ్ బూలోకుమ్ కేడ గెచ్చుక నుల్లు.

18 “కో జలెకు జో జోవి తేర్నిక ముల దా అన్నెక్కిక పెండ్లి కెరనై, లంజె వంసుమ్చొ జతయ, చి జాకయ్ పెండ్లి ముల దిలి కేన్ తేరబోదక కో పెండ్లి జయెదె గే, జో కి లంజె వంసుమ్చొ జతయ.

లాజర్ మెలో బీద నుదొ చి సామ్సారుమ్ తిలోన్చి రిసా టాలె

19 “సామ్సారి ఎక్కిలో తిలన్. జో రోజుక చెంగిల చెంగిల సామ్సార్లు గలంతె ఊద రంగుచ ఒగ్గర్ కరిదీవ పాలల్ గలనెదె, చి రోజుక ఇస్టుమ్ అయ్లి సర్ల కెరన నుక్కుమ్ తెన్ జతె తిలో.

* **16:9 16:9** ఎజోమాని మెలె, ఎత్కి అదికారుమ్ తిలో దేముడుక టాలె జతయ. † **16:9 16:9** నెంజిలె, ఎజోమాని, మెలె ఎత్కి అదికారుమ్ తిలో దేముడు బెదవనెదె. ‡ **16:9 16:9** నెంజిలె గ్రీకు తెన్ చి ఈంజ 9 నంబర్ కోడు తొలితొ రెగిడ్డిన్చి అచ్చుమ్ కిచ్చొ మెన అన్నె సంగుమ్జన్ ఉచర్లతి మెలె, 9. జలె, తుమ్క ఆఁవ్ కిచ్చొ మెంతసి మెలె, ఈంజ లోకుమ్చి డబ్బుల్ పాపుమ్చి జలెకి, తుమ్ బుద్ది తెన్ ఎత్కి అదికారుమ్ తిలో దేముడుచి సేవ కెర్లె రితి జా డబ్బుల్ వాడిక కెరన నేస్తమ్ కెరన, చి జా కేడ్లె తుమ్ మొర గెలె, పరలోకుమ్తె తుమ్క బెదవనుల నెంజిలె ఎత్కి అదికారుమ్ తిలో దేముడు బెదవనెదె. గ్రీకు జాన తెన్ తిలిని కిసి జతయ మెలె, ‘పాపుమ్చి డబ్బుల్క నేస్తమ్ కెరన, చి జా డబ్బుల్ కేడ్లె, పరలోకుమ్తె తుమ్క బెదవనుల. గని ఉప్పిరి జా మత్తెలి రెగిడ్డినతె రెగిడ్లి రితి అచ్చుమ్ అన్నె సంగితయ’ మెన ఉచర్లనుమ్.

20 జలె, జో సామ్సారొచి మేడచి గుమ్ముమె లాజర్ మెలో బీద సుదొ ఎంగ్గ తయెదె. జోచి అఱ్ఱె బెర్తు గావ్వో తిల.

21 జో సామ్సారొ అన్నిమ కెర్తి బల్లయ్ తెంతో సేడ్డ చింబొ గిడ్డల్ జో బీద సుదొక దొర్కు జలె, సర్ల తెన్ కతో, తెద్ది మాలజ్ జా తెద్ది చూ జా తిలొ, అన్నె సూనర్లు జోచ గావ్వో లేంవిత్త తిల.

22 “జలె, ఏక్ దీసి జో బీద మాన్సు మొర గెలో, చి పరలోకుమతె అబ్రాహామ్ పూర్గుడు తెన్ తతి రితి దూతల్ జో బీద జలొ లాజర్ క వయ కడ నిల. జలె, జో సామ్సారొ కి మొర గెలన్, చి జోక మాన్సుల్ రోవ గెల.

23 అన్నె జో వెల్లి అగ్ లగితి గొయితె ఒగ్గర్ సిచ్చల్ జతె తా, ఉప్పిరి దెకిలె, దూరిక అబ్రాహామ్ చి జోచి పాసి వెన తిలొ లాజర్ క దెకిలన్.

24 దెక కెర, ‘ఓ అమ్చొ అబ్రాహామ్ తాతో, అంచి ఉప్పిరి కన్యారుమ్ తీ, చి జోచి ఊంటి పానితె బుడ్డవ అంచి జిబుతె ఇదిల్ లయడ తిమడ్డి రిసా జో లాజర్ క అంచితె తెర్తవు. ఈంజ అగి అంక ఒగ్గర్ నొప్పి దెతయెచి రిసా’ మెన సామ్సారొ బతిమాల్పా జా సంగిలన్.

25 గని అబ్రాహామ్ జోక, ‘పుత్త, తుయి బూలోకుమతె జతె తిలి పొది ³తుక ఇస్సమ్ అయిలిసి దొర్కు కెరన సుక్కుమ్ తెన్ జతె తిలది. గని లాజర్ క స్టల్ సేడ్డె తిలన్. గని అప్పె జో ఇన్నె సుక్కుమ్ జా అస్సె, చి తుయి ఒత్త సిచ్చల్ సేడ్డె తత్తసి.

26 అన్నె కిచ్చొ మెలె, తుమ్క అమ్క మదెనె వెల్లి గొయి అడ్డు అస్సె. ఏక్ వేల ఇన్నె తెంతో సగుమ్జన్ ఒత్త గెచ్చుక ఉచర్లె అడ్డు తవును. నెతుర్చు’ చి ‘ఒత్త తిలన్ కో కి ఇన్నె డేవ జెతు నాయ్ మెన జా గొయి అడ్డు అస్సె’ మెన

27 అబ్రాహామ్ సంగితికయ్, సామ్సారొ అన్నె, దస్సి జలె, తాతో, అంచి ఏక్ మనని సంగిమెదె. దయ కెర, అంచొ అబ్బొచి గెరి జో లాజర్ క తెర్తవు.

28 అంక పాచేజన్ బావుడ్లు అస్సి, చి జేవ్ కి ఈంజ సిచ్చ జతి లోకుమతె నే ఉత్త, సేడ్డి రితి జోవయింక బుద్ది సికడ్డు మెలన్.

29 గని అబ్రాహామ్ జోక అన్నె, ‘మోసేచి అత్తి రెగిడ్డి దేముడుచి అగ్గల్, అన్నె దేముడుచ కబుర్లు సంగిల పూర్గుల్ రెగిడ్డి పుస్తకల్ ఎత్తి జోవయింక అస్సె. ఒత్త తిలిసి సరిగా సూనతు, చి జేవ్ బుద్ది జంక జయెదె’ మెన అబ్రాహామ్ సంగిలన్.

30 గని జో అన్నె అబ్రాహామ్ తెన్, ‘నాయ్, ఒత్త తిలిసి సూన్లె కి కెర్తి నాయ్, గని మొర గెలోసా కో జలెకు జేవ్తె గెచ్చు బుద్ది సంగిలె, జేవ్ కెర్ల పావల్ చినన దుకుమ్ జా పాపుమ్ బుద్ది ముల మార్చువ జవుల’ మెలన్.

31 చి ఆకర్క అబ్రాహామ్ జోక కిచ్చొ జబాబ్ దిలన్ మెలె, ‘మోసేచి అత్తి దేముడుచి అగ్గల్ రెగిడ్డి కొడొ కి, దేముడుచ కబుర్లు సంగిల పూర్గుల్ రెగిడ్డి కొడొ సూన నంప నే కెర్లె, కో జవున్ మొర్లొ మాన్సు అన్నె జీవ్ జా ఉట్టికి నంప కెర్తి నాయ్.’ ”, మెన పరిసయ్యుల్క యేసు సంగిలన్.

17

పాపుమ్ కెరయ్ తిసిచి రిసాచి కోడు
(మత్త 18:6-7, 21-22; మార్కు 9:42)

1 తెదొడి యేసు జోవయించ సిస్సుల్క, “* పాపుమ్ కెరయ్ త అల్లర్ క చితుమ్ జయెదె, గని కచి అత్తి దన అల్లర్ జెవుల మెలె, అయ్యె, జోవయింక సిచ్చ పిట్టె నాయ్!

2 అంక నంపజల ఇన బాలబోదల్ జలసతె ఎక్కిలోక కి, కో † పాపుమ్ కెరయెదె గే, జోచి టొట్టయ్ తిర్వేలి పత్తరు. ఒడొవ దా జోవయింక సముద్దుమతె బుడ్డవ గెలుక చెంగిలి.

3 తూమ్ జాగర్ల తా. తుమ్చితె కో గే మెనుమ. తువో కేన్ జవున్ బావొ పాపుమ్ కెర్లెగిన, జోవయింక బుద్ది నంగు, చి జోవయింక తప్పుక దుకుమ్ జా బుద్ది జలెగిన, జోవయింక చెమించువ కెరు.

§ 16:25 16:25 నెంజెలె ‘తుచి వాట పూర్లె.’ * 17:1 17:1 నెంజెలె, ‘నముకుమ్ పిట్టయ్ త...’ † 17:2 17:2 నెంజెలె, ‘జోవయింక నముకుమ్ పిట్టయెదె గె...’

4 అన్నె, రోజుక సత్తు సుట్టు కి తుక పావుమ్ కెర జేవ్ సత్తు సుట్టు తుచి పక్క పనుల 'అంచి తప్పు. చెమించుప కెరు' మెన జో సంగిలెగిన, తుయి జోక చెమించుప కెరుక అన్నె" మెన యేసు జోచ సిస్సుల్క బుద్ది సంగిలన్.

నముకుమ్చి రిసాచి కోడు

5 తెదొడి యేసుచ జేవ్ బారజన్ †బారికుల్ యేసుప్రబుక కిచ్చొ మెలన్ మెలె, "అమ్క అన్నె ఒగ్గర్ నముకుమ్ దె" మెల చి,

6 యేసు జోవయింక, "సార్సుగిడ్చి ఎదిలి నముకుమ్ తుమ్క తిలె, ఈంజొ కిమారోడు రూకుక 'ఉట్టి జా సముద్దుమెత గెచ్చు రోవి జా' మెలె, తుమ్ సంగిలె, జా కోడు నూన్లె జా దస్సి జయెదె."

సేవ నిదానుమ్ కెరుక తిలిన్చి కోడు

7 "తుమ్చితె ఎక్కిలోక గొత్తి సుదొ తయెదె మెనుమ, చి జో గొత్తి సుదొ కేసొత్తో జవున్, మెండల్ రక తా జవున్ గెరి అన్నె అయ్యెల, 'తుయి బేగి గెచ్చు అన్నిమ్ కెరు' మెన ఎజొమాని సంగెదె గె?

8 నాయ్, గెద. 'తోలితో అంచి రిసా అన్నిమ్ తెయారొ కెర తుచొ పాలమ్ కుంచన అంక జొగుడ దె, చి ఆవ్ అన్నిమ్ కెర పాని పిలి వడ్డ తుయి కా, పి' మెన ఎజొమాని సంగెదె.

9 అన్నె, జో గొత్తి సుదొ జోక దిలి కామ్ కెర జోచి పూచి తిలిసి కెర్లి రిసా జో ఎజొమాని జోక 'తుయి దయె కెర్లదె' మెనెదె గె? నాయ్, గెద.

10 జలె, తుమ్చి పూచి తెన్ కి దస్సి, దేముడు తుమ్క సంగిలిసి ఎత్తి కెర తుమ్చి పూచి కెర తిలె, తుమ్ కిచ్చొ మెన మెలె, 'అమ్ రితయ్ గొత్తి సుదల్. అమ్ గవురుమ్క విలువ నాయ్. అమ్క పూచి తిలిసి కెర అన్నెమ్. తెద్దిలి' మెన తుమ్" మెన యేసు సిస్సుల్క సంగిలన్.

వెల్లి రోగుమ్ దెర్ల దెస్సుజన్క యేసు చెంగిల్ కెర్లిసి

11 ఒత్త తంతో అన్నె కిచ్చొ జర్గు జలి మెలె, యేసు యెరూసలేమ్ పట్టుమెత గెచ్చుక మెన సమరయ ప్రదేసిమ్క చి గలిలయ ప్రాంతుమ్క మదెనె గతి వట్టె గెతె తా,

12 ఏక్ గావ్క పాని అయ్యెల, వెల్లి రోగుమ్ దెర్ల దెస్సుజన్ మాస్సుల్ జోక దస్సుల్ జంక మెన అయ్యెల, అన్నె, ఇదిల్ దూరి తా

13 కేక్ గల. కిచ్చొ మెన కేక్ గల మెలె, "యేసుప్రబు, బాబు, అమ్చి ఉప్పిరి కన్కారుమ్ తీ" మెన కేక్ గల.

14 జలె, యేసు జోవయింక దెక కెర "దేముడుచి గుడితె తుమ్ గెచ్చు, ఒత్తచ *పూజర్లుతె దెకవన" మెన సంగిలన్, చి ఒత్త యెరూసలేమ్తె గెచ్చుక మెన వట్టె గెలె కిచ్చొ జర్గు జలి మెలె, జోవయింబి అగ్ చెంగిల్ జా సుద్ది జలె.

15 జలె, జోవయింతె ఎక్కిలో జో చెంగిల్ జలిసి దెకన, గట్టిజ అవాడ్ కెరన దేముడుచి గవురుమ్ సంగ సంగ, యేసు తిలిన్తె ఉట్ట అయ్యెలన్.

16 ఉట్ట జా, "అంక రచ్చించుప కెర దయ కెర్లది" మెన యేసుక జోచి సర్ల సంగ యేసుచి చట్టె నర్ను సేట్టె. జో మాస్సు †సమరయ సుదొ.

17 జలె, యేసు తెదొడి, "దెస్సుజన్క చెంగిల్ కెర్లయ్, గెద. జేవ్ అన్నెక్ నొప్పుజన్ కేతె?

18 ఈంజొ యూదుడు నెంజిలోసొక పిట్టవ, జేవ్ అమ్చి యూదుల్తె అన్నె కో జోవయింబి సర్ల సంగుక జెతి నాయ్ గె?" మెన పున కెర,

19 జో చెంగిల్ జిలోసొక అన్నె, "తుయి ఉట్ట, గెరి గో. అంచి ఉప్పిరి తుయి నముకుమ్ తిలి రిసా †చెంగిల్ జా అస్సిన్" మెన యేసు జో మాస్సుక సంగిలన్.

† 17:5 17:5 6:13 దెక. జోవయింబి బారజన్ సిస్సుల్ బారజన్ బారికుల్ ఎక్కి. § 17:6 17:6 ఏక్ రోగుమ్ వండ్ల దెరెదె. * 17:14 17:14 యూదుల్ తెన్ వెల్లి రోగుమ్ ఏక్ మాస్సుక ముల తిలె, జో మాస్సుక 'చెంగిల్, సుద్ది జలి' మెన రుజ్జు సంగుక ఎక్కి పూజర్లుకయ్ అదికారుమ్, 5:12చి ఎట్టొచి కోడు దెక. † 17:16 17:16 సమరయ సుదల్తె యూదుల్ సిస్కారుమ్ దెకల, గని జేవ్ యూదుల్ ఇన్నె బుద్ది ఉచర్లి నాయ్. ఎక్కి సమరయ సుదొ బుద్ది ఉచర్లి. ‡ 17:19 17:19 నెంజెలి 'రచ్చించుప జా అస్సిన్'.

దేముడుచి రాజిమ్చి రిసాచ కొడొ
(మత్త 24:23-28,37-41)

20 జలె, "దేముడుచి రాజిమ్ కెయెక జెయెదె?" మెన సగుమ్జిన పరిసయ్యుల్ యేసుక పుసీల చి, జో, "దేముడుచి రాజిమ్ డీస్సిసి నెంజె. కెయెక గే డీస జెయెదె మెన నాయ్.

21 'ఈంధె, ఇన్నె అస్సె' జలెకు, 'ఓదె, ఒత్త అస్సె' జలెకు మెనుక బెదె నాయ్. కిచ్చొ మెలె, దేముడుచి రాజిమ్ అప్పయి కి కీతుమ్చి నెడిమి అస్సె" మెన సంగిలన్.

యేసు ఎదార్దుమ్ ఏలుప కెరుక మెన అన్నె జెతిన్చి రిసాచి కోడొ

22 జోవ సొంత సిస్సుల్క యేసు, ఆవ్ మాన్సు జా జెర్మున్ అయ్లోసొక "ఏక్ దీసి గడియ జవున్ డీసున్" మెన తుమ్ ఒగ్గర్ ఆస జత దీసల్ జెవుల, గని జా మదెనె అంక దెకుక నెతుర్పు.

23 అన్నె, "ఓదె, ఒత్త అస్సె. ఓదె, ఒత్తయ్ అస్సె" మెన సగుమ్జిన తుమ్క సంగుల, గని జోవయింబి పట్టి తుమ్ గెచ్చ నాయ్.

24 కిచ్చొక మెలె, బిజిలి మొల్కొలె, కీసి ఆగానుమ్ పూర్తి ఏక్ పక్క తెంతో అన్నెక పక్క ఎద ఉజడి దెయెదె, దస్సి, ఆవ్ మాన్సు జా జెర్మున్ అయ్లోసొ *ఏలుప కెరుక మెన ఉత్త జెతి దీసిక కేన్ పక్క కి డీసిందె.

25 గని జా నే జతె అగ్గె తోలితో ఆవ్ ఒగ్గర్ బాదల్ నైమల్ నేడుక అస్సె, ఈంజ కాలుమ్చ †మాన్సుల్ అంక "అమ్క నాయ్. మొర్పు!" మెనుక అస్సె.

26 నోవహు పూర్గుమ్చొచి కాలుమ్ మాన్సుల్ కీన్ జతె తిల గే, దస్సి, ఆవ్ మాన్సు జా జెర్మున్ అయ్లోసొ అన్నె నే జెతె అగ్గెచి మదెనె ఆవ్ జెతె ఎదక మాన్సుల్ దస్సి జతె తవుల.

27 మెలె, 'జోవయింబి పాపుమ్చి రిసాచి సిచ్చక' మెన ఎత్తి అదికారుమ్ తిలో దేముడు వెల్లి వర్లచి పాని గెడ్డుప కెరయ్లి గడియ ఎద, నోవహు జోచి కుటుంబుమ్ తెన్ జా వెల్లి ఓడతె పెన కెప్పి డంకిల్ ఎద, నే నంప కెర్తె మాన్సుల్ కతె తా, పితె తా, పెండ్లివొ కెర్తె తా, పెండ్లివొ జతె తా జతె తిల, చి ‡జేవ్ ఎత్తిజిన్క వర్లచి పాని గీడ గెలి.

28 పడ్డె లోతు పూర్గుమ్చొచి కాలుమ్ కి జో జతె తిలి సాదొమ పట్టుమ్చ దస్సి జతె తిల. ప్రెజల్ కతె తా, పితె తా, బియ్యారి కెర్తె తా, పంటొ పికయ్తె తా, గెరల్ బందితె తిల.

29 గని కీలోతు జా సాదొమ పట్టుమ్ తెంతో బార్ జా ముల దిలి దీసి, ఎత్తి అదికారుమ్ తిలో దేముడు పరలోకుమ్ తెంతో జా పట్టుమ్చి ఉప్పిరి ఆగిచి ఎడ్డి రితి ఇంగుడు నువ దిలన్, చి జా పట్టుమ్చ ఎత్తిజిన్ మొర గెల.

30 అన్నె, ఆవ్ మాన్సు జా జెర్మున్ అయ్లోసొ ఏలుప కెరుక మెన అన్నె ఉత్త జా డీస్సి దీసి జెతి ఎద దస్సి మాన్సుల్ అంక నే ఉవరై, బుద్ది నే ఉవరై ఇస్టుమ్ అయ్లి రితి జతె తవుల, చి తెదొడెక *తిర్పు జా సిచ్చ జవుల.

31 "జా దీసిక జోచి గేరుచి ఒర్పొ కో తవుల గే, జోచి సామన్ గెరి తిలె కి, జా వెంటు నెంక మెన ఉత్తుతు నాయ్, అన్నె కో జోచి బట్టి జవున్ తిలె, కిచ్చొ వెంటుక పనుల్తు నాయ్, † గని బే బేగి ఉట్ట గెతు.

32 లోతుచి తేర్చి జా సాదొమ పట్టుమ్క ఇదిల్ ఇస్టుమ్ జా జొక దెకుక మెన పసుల లోన్చి ‡పత్తురు మర్లు జా గెలి, గెద. జలె, జొక దస్సి జర్పు జలిసి తుమ్ పచ్చ నాయ్.

33 కిచ్చొక మెలె, సొంత ప్రాసుమ్ రచ్చొంచుప కెరసుక కో ఉవరుల గే, జోవయింబి ప్రాసుమ్ పాడ్ జా గెచ్చెదె, గని దేముడు దిలి వాటు ఎక్కి సత్తిమ్ ఇండుక మెన జోవయింబి ప్రాసుమ్ కో దెవుల గే, జోవయింబి ప్రాసుమ్ రచ్చొంచుప జయెదె.

§ 17:21 17:21 కిచ్చొక దస్సి మెన్తయ్ మెలె, జో యేసు అయ్లిన్ తెన్ జా రాజిమ్ అయ్లి, చి ఎత్తి అదికారుమ్ తిలో దేముడుచి సుద్ది తిలి ఆత్మ జోవయింబి అత్తి, అన్నె జోవయింబి సిస్సుల్చి అత్తి జా రాజిమ్చి రచ్చొంచుప కెర్తె కామ్ జో కెర్తయ్. 'తుమ్చి నెడిమి అస్సె' మెలి కోడుక సగుమ్జిన 'తుమ్చి పెట్టి అస్సె' మెన రెగ్గ అస్సి, గని నంపతిలనచి పెట్టి జా రాజిమ్ తయెదె, గని నంపంజలనచి పెట్టి నాయ్. జేవ్ పరిసయ్యుల్త ఒగ్గర్జిన యేసుక నంప కెర్తె నాయ్. * 17:24 17:24 లూకా 1:32-33, డీసయ్లిసి 5:10, చి 20:4-6

డెక. † 17:25 17:25 లూకా 9:22 డెక. ‡ 17:27 17:27 ఆదికారుమ్ 7 అద్యయ్. § 17:29 17:29 ఆదికారుమ్ 18:16-19:29. * 17:30 17:30 లూకా 212:34-36 డెక. † 17:31 17:31 మత్తయ 24:15-18. ‡ 17:32 17:32 ఆదికారుమ్ 19:26.

34 “జా రాతిక దొగుల ఎక్కితె నిజ తిలె, ఎక్కిలోక ముల దా, అన్నెక్కిక కడ నెవుల.

35 దస్సి, దొగుల తేరబోదల్ రోడ్డె తిలె ఎక్కిక ముల దా, అన్నెక్కిక కడ నెవుల,

36 ³అన్నె, దొగుల మున్నుబోదల్ బట్టి తిలె, ఎక్కిలోక ముల దా, అన్నెక్కిక కడ నెవుల” మెన యేసు సంగిలన్.

37 దస్సి సంగితకయ్, “కేనె కడ నెవుల, ప్రబు?” మెన సిస్సుల్ పుసిల, చి జోవయింక, “పినుమ్ కేనె తయెదె గే, ఒత్త గిడ్డుల్ బెరుల.” మెన సంగిలన్.

18

తీర్పు కెర్తి టానతె తోడు సంగితో ఎక్కిలోచి టాలి

1 తెదొడి యేసు జేవ్ సిస్సుల్ క ఈంజ టాలి సంగిలన్. కిచ్చొక మెలె, * జో తీర్పు కెర ఏలుప కెరుక మెన అన్నె జెతె ఎదకచి మదెనె జేవ్ బడ్డుకుమ్ గే అన్మానుమ్ గే నే జతె ప్రార్దన కెర్తె తంక మెన జోవయింక సికడ్డి రిసా సంగిలన్.

2 ఇసి జతయ్ “ఏక్ పట్టుమ్తె తీర్పు కెర్తి టానతె తీర్పు దెతోసా ఎక్కిలో తిలో. జో అన్నె మాన్సుల్ క బియె నాయ్, దేముడుక బియె నాయ్.

3 పడ్డె, జయి పట్టుమ్తె రండెల్ మాన్సు ఎక్కి తిలి. ఈంజ జలె, రోజుక జో తీర్పు దెతోసాతె గెచ్చ కెర, ‘విరోదుమ్ నుదో ఎక్కిలో అంచి ఉప్పిరి దావ దా అస్సె. అంచి సంగిలీన్ సూన్లె జో మాన్సు సంగిలి నిందక ఆరిచి మెన రుజ్జు దెకయ్ తిన్తె అంక తోడు తా’ మెన పునీతె తిలన్.

4 ఒగ్గర్ దీనల్ జో ఒప్పనె నాయ్, గని పడ్డె కిచ్చొ బుద్ది జోక అయ్లొ మెలె, ఆవ్ దేముడుక బితోసా, మాన్సుక బితోసా నెంజి, గని

5 ఈంజ రండెలి అంక అల్లర్ దా పుసుక ములి నాయ్ చి రిసా, జాచి సంగిలీన్ సూన్ తిన్తె తోడు సంగిమ్ దె. నెంజెలి, జా రోజుక జెతె తతిన్క అంక పూర్తి అల్పు కెరెదె మెలన్” మెన యేసుప్రబు టాలి సంగిలన్.

6 కిచ్చొ అర్దుమ్ సంగిలన్ మెలె, “ఆదె, జో బుద్ది నెంజెలో తీర్పు దెతోసా కీన్ సంగిలో!

7 జలె, రాతి మెద్దెనె జాక జాచి బాదల్ కన్వల్ సంగిత జో నిసాన్ల జోచయ్ జల మాన్సుల్ చ ప్రార్దనల్ దేముడు సూనె నాయ్ గె? జోవయింక తోడు జెయె నాయ్ గె? కచితుమ్ సూనెదె, తోడు జెయెదె. అన్నె జా తోడు జెంక ఆల్సిమ్ కెరెదె గె? నాయ్ గెద.

8 బే బేగి తోడు జెయెదె. గని, జాగర్, ఆవ్ మాన్సు జా జెర్మన్ అయ్లొసా ఈంజ లోకుమ్తె అన్నె ఉత్త జెతి పొదిక మాన్సుల్ ‘నిదానుమ్ నముకుమ్ తవుల గే నాయ్ గె?’ మెన యేసు సంగిలన్.

పరిసయ్యుడుచి సుంకరోచి రిసా సంగిలి టాలి

9 పడ్డె ‘అమ్క పున్నిమ్’ మెనన అన్నె మాన్సుల్ క నిస్కారుమ్ ఉచర్ల మాన్సుల్ క ‘సూన్తు’ మెన యేసు అన్నెక్కి టాలి సంగిలన్.

10 “ప్రార్దన కెరుక మెన దొగు మాన్సుల్ అమ్చి దేముడుచి గుడితె గెల. జోవయింతె ఎక్కిలో పరిసయ్యుడు, ఎక్కిలో సిస్టు నజెతి సుంకరో.

11 జలె, పరిసయ్యుడు పురైతో టీద, జోచి పెట్టి ఉచరన ఇసి ప్రార్దన కెరన్, ‘ఓ అమ్చో దేముడు, ఆవ్ జేవ్ అన్నె మాన్సుల్ చి రితి నెంజెలి రిసా తుక అంచి నర్ల ఆవ్ సంగితసి. జేవ్, జలె, మాన్సుల్ క బియెడ, జోవయింక ఆస్తి దొర్కు కెరంతతి, కిచ్చొ కిచ్చొ నాయ్ నెంజెల కమ్మె కెర్తెతి, లంజెమ్మె కెర్తెతి, చి నగుమ్ జెన్ కి జో ఒత్తలొత్తొవొ సిస్టు నజెతోసాచి రితి జతతి.

12 గని అవ్ సత్తరెక్క తివ్వెరి చువ్వె తత్తసి, చి అంక దొర్కు జతిన్ ఎత్తితె దెస్సు వాటల్తె ఏక్ వాట తుక దెతసి’ మెన దేముడుక ప్రార్దన కెర్తన్.

§ 17:36 17:36 ఈంజ మత్తిలె తొలితె రెగిడ్ల నగుమ్ పుస్తకల్తె 36 నంబర్ చి కోడు తయె నాయ్. * 18:1 18:1 లూకా 21:5-36.

† 18:8 18:8 నెంజెలి, ‘నిదానుమ్ ప్రార్దన కెర్తి నముకుమ్ తెన్ తవుల గే నాయ్ గె?’

13 “గని, జో నిస్తు నజితోసా, ఇదిల్ దూరి టీవ తా, మాములుమ్ జేవ్ యూదుల్ కెర్తి రితి నే కెర్తె, ఉప్పిరి నే దెకితె, లాజుక మొకొమ్ లుంకడ గుండెతె పెటన ‘ఓ దేముడు, ఆవ్ పాపుమ్చో మాన్సు. అంచి ఉప్పిరి కన్యారుమ్ జా అంచ పాపల్ చెమించుప కెరు!’ మెన ప్రార్దన కెర్తెన్.

14 జలె, జేవ్ దొగులతె కక్క ‘సత్తిమ్ జలె’ మెన దేముడు దెకిలన్? జో గవురుమ్ ఉచరన్సొక, నాయ్, గని పాపుమ్ ఒప్పున్సొ ఈంజో సుంకరోకయ్, మెన తుమ్క ఆవ్ సంగితన్. జోచి పాపుమ్ చెమించుప జా గెరి ఉట్ట గెలన్. కిచ్చొక మెలె, కో జోక జొయ్యి గవురుమ్ కెరనెదె గే, జోక దేముడు దాక కెరెదె, గని కో జోక జొయ్యి దాక కెరనెదె గే జోక దేముడు వెల్లో కెరెదె” మెన సంగిలన్.

బాలబోదల్ క యేసు చడ వరుమ్ దిలిసి
(మత్త 19:13-15; మార్కు 10:13-16)

15 జలె, జా దీసి ‘యేసు జోవయింక చడ చెంగిల్ వరుమ్ దెవుసు’ మెన, సగుమ్జన్ ప్రెజల్ జోవయింక బాలబోదల్ క జోతె కడ ఆవ్తె తిల. గని జేవ్ జెతె తిలిసి యేసుచ సిన్సుల్ దెక కెర, జేవ్ బోదల్ కడ అన్స మాన్సుల్ క “పోన” మెన గోల కెర్తె.

16 గని యేసు జా దెక కెర, జోవయింక పాసి బుకారా కెర, “బోదల్ అంచితె జెతు. జోవయింక ఆటంకుమ్ కెర నాయ్. కిచ్చొక మెలె, దేముడుచి రాజిమ్ ఇన బాలబోదల్ జల సుదల్చియి.

17 తుమ్క ఆవ్ కిచ్చొ కచితుమ్ సంగితన్ మెలె, మాన్సు గవురుమ్ నే ఉచరంతె బాలబోదల్చి రితిచి నముకుమ్ తెన్ దేముడుచి రాజిమ్తె బెదితి వరుమ్ నజన్లెకయ్, పరలోకుమ్తె గెచ్చుక జయెదె” మెన యేసు సంగిలన్.

సామ్సారుమ్ తిలో ఉబెడో ఎక్కిలో దేముడుచి రాజిమ్చి రిసా యేసుక పుసితికయ్
(మత్త 19:16-30; మార్కు 10:17-31)

18 యూదుల్చో అదికారి ఎక్కిలో యేసుతె జా కెర, “చెంగిల్ తిలో గురుబాబు, పరలోకుమ్చి రాజిమ్తె ఆవ్ కెయక తెయక జతి వాట అంక దొర్కు జంక మెలె, ఆవ్ కిచ్చొ కామ్ కెర్తె జయెదె?” మెన పుసిలన్.

19 పుసితికయ్ యేసు, “ ‘చెంగిల్ తిలోసా’ మెన అంక కిచ్చొక సంగిలది? చెంగిలోసా దేముడు ఎక్కిలోయి, గని అన్నె కో కి చెంగిలోన నెంజితి.

20 జో దిల ఆగ్గుల్ మెలె తుయి జాన్సి.
లంజెకమె కెరుక జయె నాయ్,
సరు అత్య కెరుక జయె నాయ్,
చోరుక జయె నాయ్,
అబద్దుమ్ సాచి సంగుక జయె నాయ్,
అయ్యుద్అబ్బొద్క గవురుమ్ దెకితె తంక అన్నె.

దనచయ్” మెన జోక యేసు సంగిలన్.
21 సంగితికయ్ జో మాన్సు, “బాల తతె తెంతో ఈంజేవ్ ఆగ్గుల్ రితి ఆవ్ నిదానుమ్ కెర దెకన్తన్” మెన జబాబ్ దిలన్.

22 జా కోడు సూన కెర యేసు, జోక, “అప్పక తుక ఎక్కి పిట్ట అన్నె. తుచి అస్తి ఎత్తి తుయి విక కెర, జా వికిలి డబ్బుల్ బీద సుదల్చ దేసు, దస్సి కెర్గెగి న పరలోకుమ్తె తుక అస్తి కలుగు జయెదె. అన్నె అంచి తెన్ బెద అంచి పట్టి జె!” మెన సంగిలన్.

23 గని ఈంజ కోడు సూన కెర, జోక ఒగ్గర్ సామ్సారుమ్ తిలిచి రిసా జో మాన్సు ఒగ్గర్ విసారుమ్ జలో.

24 తెదొడి, జో మాన్సు దస్సి విసారుమ్ జలిసి దెక కెర యేసు, “సామ్సార్లు దేముడుచి రాజిమ్తె గెచ్చుక జలె, కెర్తి గే కస్తుమ్ జలెకయ్ జయెదె.

25 కిచ్చొక మెలె, ఇన సామ్సార్లు దేముడుచి రాజిమ్తె బెదితి కంట, సూజబోలో వాట్ ఒంటె గెచ్చుక సుల్లు!” మెన సంగిలన్.

26 జలె, జా కోడు సూన్సన “దస్సి జలె, కో *రచ్చించుప జంక జయెదె?” మెన బమ్మ జలె.

27 గని యేసు, “మాన్సు కెర్క నెత్తిర్లిసి కి, దేముడు జర్గు కెరుక తెరె” మెలన్.

‡ 18:26 18:26 మెలె, పాపుమ్ తెంతో రచ్చించుప జంక, చి ఎత్తి అదికారుమ్ తిలో దేముడుచి రాజిమ్తె బెదుక.

28 తెదొడి యేసుచ బారజిన్ బారికుల్తె తిలో పేతురు మెలో సిస్సుడు “ఈందె, అమ్చ గెరల్ ఎత్తి, ముల దా అమ్ తుచి పట్టి బులితనుమ్” మెలన్.

29 యేసు జేవ్ బారికుల్త, నిజుమి, అన్నె తుమ్క అవ్ కిచ్చొ కచితుమ్ మెంతసి మెలె, దేముడుచి రాజిమచి కామ్ కెర్తి రిసా గేరు జలెకు, తేర్నిక జలెకు, అన్నెబావొక జలెకు, అయ్యన్అబ్బొన్క జలెకు, బోదల్త జలెకు కో ముల తవుల గే,

30 అప్పె ఈంజ లోకుమ్తె ఈంజ కాలమ్తె కి జోక దనచ అన్నె ఒగ్గర్ వంతుల్ రితి దొర్కు జయెదె, అన్నె, జెతి కాలమ్తె, కెయడ తెయడ పరలోకుమ్తె జతి వాట జోక దొర్కు జయెదె.

జో మొరుక తిలిన్చి రిసా యేసు అన్నెక్ సుట్టు సంగిలిసి

31 తెదొడి జేవ్ యెరూసలేమ్తె గెతె తిలి వట్టి యేసు జోచ బారజిన్ సిస్సుల్త పక్క కడన ఇసి మెలన్. “ఈందె, అమ్ యెరూసలేమ్తె గెతనుమ్, చి అవ్ మాన్సు జా జెర్మన్ అయ్లోసాచి రిసా దేముడుచ కబుర్లు సంగిలన రెగిడ్డిసి ఎత్తి కచితుమ్ పూర్తి జర్గు జయెదె.

32 కిచ్చొక మెలె, యూదుల్ నెంజలనచి అత్తి అంక సార్ప కెర దెవుల, చి అంక కొంకడుల, అంచి మరియాద కడుల, చి అంక తుంక దెవుల.

33 అంక కొర్డల్ తెన్ పెటుల, చి అంక మారుల, తిర్తక అన్నె జీవ్ జా ఉట్టిందె” మెలన్.

34 గని ఇన్నెచి కిచ్చొ అర్దుమ్ కి కెరంతి నాయ్. జా అర్దుమ్ లుంకిల్ రితి తిలి, చి జో కిచ్చొచి రిసా సంగిలో గే నేస్త.

గుడ్డి జలో మాన్సుక యేసు చెంగిల్ కెర్తిసి (మత్త 20:29-34; మార్కు 10:46-52)

35 యెరూసలేమ్తె గెచ్చుక మెన యేసు వట్టి గెతె తా యెరికో పట్టుమ్క పాసి అయ్లి పొది, గుడ్డి జలో మాన్సు ఎక్కిలో వాట్ సాడి వెన తా, బిచ్చిమ్ నజితె తిలో.

36 ఒగ్గర్జిన్ మాన్సుల్ జా వాట్ గెతె తిలిన్చి అవాడ్ నూన కెర, “కిచ్చొక ఒగ్గర్ జనాబ్ ఈంజ వాట్ గెతెతి?” మెన పుసిలన్.

37 పుసిలె, జేవ్ “నజరేతు గువ్వెచొ యేసు ఈంజ వాట్ గెతయ్” మెన జోక సంగిల,

38 చి నూన, జో “ఓ యేసుప్రబు, దావీదు రానోచి నెకుమ్తె జెర్మిలో రచ్చించుప కెర్తొసా, అంచి ఉప్పిరి కన్యారుమ్ తియ, అంచ చెంగిల్ కెరు!” మెన కేక్ గలన్.

39 తెదొడి పుర్రెతో ఇండితె తిలన సగుమిజిన్ జో గుడ్డి మాన్సుక “తుక్కె తా” మెన గోల కెర్ల, గని జో అన్నె, “దావీదు రానోచి నెకుమ్తె జెర్మిలో రచ్చించుప కెర్తొసా, అంచి ఉప్పిరి కన్యారుమ్ తియ చెంగిల్ కెరు!” మెన అగ్గెచి కంట గట్టిజ కేకుల్ గలో.

40 ఇసి జతికయ్, యేసు బీవ కెర, “జోక ఇత్తల్ కడ ఆన” మెన ఆడ్ర దిలన్, చి జోక జోచితె కడ ఆన్లన పాసి జెతికయ్,

41 “అవ్ తుక కిచ్చొ కెరుక మెన తుయి కోర్వ జతసి?” మెన పుసితికయ్, జో గుడ్డి మాన్సు, “ప్రబు, అవ్ దెకిత్ రితి కెరు” మెలన్.

42 యేసు జోక, “ఈందె తుచ అంకివొ డీస్తు. అంచి ఉప్పిరి తుయి నముకుమ్ తిలి రిసా తుయి కి చెంగిల్ జా అస్సిసి” మెన సంగితికయ్,

43 బేగి జో మాన్సుచ అంకివొ డీసిల చి, దేముడుచి గవురుమ్ సంగ యేసుచి పట్టి గెలన్. అన్నె, ప్రజెల్ ఈంజ ఎత్తి దెక తా, జేవ్ కి దేముడుచి గవురుమ్ సంగిల.

19

జక్యయ్య మెలో సిస్టు నజితో సుంకరో

1 జలె, యేసు యెరికో పట్టుమ్ వెన జా పట్టుమ్ వాట్ గెచ్చ ముల్లి పొది,

2 ఒత్త జక్కయ్య మెలో మాన్సు తిలన్. జో సిస్తు నజీత సుంకర్లుచో అదికారి, చి జో ఒగ్గర్ సొమ్నూరుమ్ తిలో.

3 జలె, 'యేసు కీసాచోగ దెకిందె' మెన ఇస్టుమ్ జలన్, గని జో పాట్టి మాన్సు, చి యేసుచి సుట్టునంత బెర్ల జనాబ్ అడ్డు జా అస్తి.

4 జాకయ్ జో కిస్యో కెర్లన్ మెలె, యేసు జా వాట్ గెచ్చెదె, చి జో పురెతో నిగ గెచ్చు, ఏక్ బొడ్డ రూక్తె వెగిలన్.

5 జలె, యేసు ఒత్త పాచ కెర, ఉప్పిరి రూక్తె దెక, "జక్కయ్య, బే బేగి ఉత్తు. ఆజి ఆవ్ తుచి గెరి తంక అస్సె" మెలన్.

6 దస్సి మెంతికయ్, జక్కయ్య బమ్మ తెన్ జా రూక్తె తెంతో ఉత్త జా, నర్ద తెన్ యేసుక గెరి కడన, మరియాద ఎత్తి కెర్లన్.

7 ఇని జర్గు జలిసి దెక కెర ప్రెజల్ ఎత్తి కునుమ్కనుమ్ లట్టల్ల. "పావుమ్ సుదొచి గెరి జో గోత్ గెచ్చుక కిచ్చొక్?" మెల.

8 జలె, యేసు ఒత్త తిలి పొది, జక్కయ్య పురె జా టీచ ప్రబుక కిచ్చొ కోడు సంగిలన్ మెలె, "ఈందె, ప్రబు, అంచి అస్తితెచి ఏక్ వంతు బీద సుదల్త దా గెలిందె. అస్సె, డబ్బుల్త ఆవ్ కక్క మోసిమ్ కెర తిలె, జోవయింక ఆవ్ మోసిమ్ కెర నజీలి కంట అస్సె అస్సె చెత్తర్ వాటల్ జోవయింక అస్సె దెయిందె" మెన బచ్చన్.

9 దస్సి జతికయ్, యేసు జోక, "దేముడు పాపల్ చెమించుప కెర్తి రచ్చన ఆజి ఈంజ గెరి పాచ అస్సె. పావుమ్ ఇండితె తిలె కి ఈంజో కి *అబ్రాహామ్ చి నెకుమ్చో, గెద.

10 మెలె, ఆత్తుక నెన గెలనకయ్ చజన జోవయించ పాపల్ తెంతో రచ్చించుప కెరుక మెనయ్ ఆవ్ మాన్సు జా జెర్మన్ అయ్లోసా ఈంజ లోకుమ్తె అయ్లయ్".

బజర్చ కాసుల్చి టాలి
(మత్త 25:14-30)

11 యేసు సంగిలి కోడు ప్రెజల్ సూనతె తిలి పొది, యెరూసలేమ్ క పాసి జెతె తిల, చి ప్రెజల్ జేవ్చి పెట్టి కిచ్చొ మెన ఉచర్తె తిల మెలె, "యేసు అమ్చి యెరూసలేమ్ పట్టుమ్తె పాచెలి, దేముడుచి రాజమ్ ఎదార్దుమ్ ఏలుప కెరుక మొదొల్ జయెదె." మెన ఉచర్తె తిల.

12 జాకయ్ యేసు జోవయింక ఏక్ టాలి సంగిలన్. "వెల్లో మాన్సు ఎక్కిలో తిలో. ఈంజ దేసిమ్క రాసో జంక మెన, రానల్త టీచడ్డిసా తిలి దూరి దేసిమి ఉట్ట గెచ్చ జెంక మెన, ఈంజో బార్ జలో".

13 గని, నే గెతె అగ్గె, జోచ దెస్సుజన్ గొత్తి సుదల్త బుకారా కెర, జోవయింక ఎక్సెక్ట్ ఎక్సెక్ట్ 'బజర్చ కాసుల్ దా కెర, 'ఆవ్ జెతె ఎదక ఇస్సెతెన్ బియ్యారి కెర్తె తా' మెలన్.

14 గని జోవయించ ప్రెజల్ జోక ఒగ్గర్ విరోదుమ్ జా అస్తి, చి 'ఈంజో మాన్సు అమ్చి ఉప్పిరి ఏలుప కెరుక మెలె, అమ్క ఎధర్త ఇస్టుమ్ నాయ్', మెన జో మాన్సుచి పట్టి కబుర్ తెద్రయ్లన్.

15 "గని, జో మాన్సు రాసో జా బుల అయ్లన్, చి జో డబ్బుల్ దా తిల గొత్తి సుదల్ బియ్యారి కెర కెద్ది లాబుమ్ కెర అస్తి సూసుక మెన జేవ్చె బుకార్లన్.

16 తొలితోవ జా కెర, రాసెచి పురెతో టీచెలిన్ అస్సె, 'బాబు, తుయి దిలి బజార్ కాసుక అస్సె దెస్సు బజార్ కాసుల్ లాబుమ్ దొర్కు జా అస్సె' మెలన్, చి

17 'బొల్లొయ్ కెర్లది, తుయి చెంగిలో గొత్తి సుదొ. †ఇదిలిసి కామ్ దెతికయ్ తుయి నిదానుమ్ కెర్లది, చి తుయి దెస్సు పట్టల్చి ఉప్పిరి ఏలుప కెరుక మెన తుక ఆవ్ అదికారుమ్ దెతన్' మెన రాసో సంగిలన్.

18 తెదొడి అస్సెక్లొ గొత్తి సుదొ అయ్లో, అస్సె, 'బాబు, తుయి దిలి బజార్ కాసుక అస్సె పాచ బజార్ కాసుల్ లాబుమ్ దొర్కు జా అస్సె' మెలన్, చి

* 19:9 19:9 యూదుల్త అబ్రాహామ్ ముక్కిమ్చో పూర్ణుమ్చో జా తిలో. † 19:13 19:13 ఏక్ బజార్ కాసుచి విలువ కెద్ది మెలె, పుంజెక్ పొదుల్చి కూలి డబ్బుల్చి ఎదిలి. ‡ 19:17 19:17 లూకా 16:10 దెక.

19 'బొల్లోయ్ కెర్చది, తుయి చెంగిలో గొత్తి సుదో, పావ్ పట్టల్చి ఉప్పిరి ఏలువ కెరుక మెన తుక ఆవ్ అదికారుమ్ దెతసి' మెన రానొ నంగిలన్.

20 "తెదొడి అన్నెళ్ల గొత్తి సుదో అయ్లో అన్నె, 'బాబు, ఉంద, తుచి బజారొ కాసు. ఇన్నెక మూటో బంద తియి దిలయ్'.

21 కిచ్చొక మెలె, తుయి 'కన్యారుమ్ నెంజిలోసా' మెన బిలయ్. తుయి కామ్ నే కెర్లెసి నజన్తసి, తుయి నే ఉంపిలిసి లాయితసి మెలన్.

22 జలె, జోక జో రానొ కిచ్చొ జబాబ్ దిలన్ మెలె, 'తుయి గర్చొ గొత్తి సుదో! తుయి సొంత నంగిలిసి తుకయ్ నేరిమ్ వయ్డయ్. అంక కన్యారుమ్ నెంజిలోసా, సొంత కామ్ నే కెర్లెసి నజిలోసా, సొంత నే ఉంపిలిసి లాయితోసా' మెన తుయి జాన్సి.

23 జలె, 'అంచి డబ్బుల్ కిచ్చొక సాపుకర్తె జవున్ తిసి నాయ్? సాపుకర్తె జవున్ తితిద జలె, ఆవ్ బుల అయ్లో పొది నర్చ తెన్ వడ్డ నజన్తయ్' మెన జో గర్చొ గొత్తి సుదొక సంగ కెర,

24 పాసి టీచ మెలె వూస్తుల్క, జా బజారొ కాసు జోతె నజన, దెస్సు బజారొ కాసుల్ తిలో జో అన్నెళ్ల గొత్తి సుదొక దాస, మెలన్.

25 జో దస్సి మెంతికయ్, జేవ్ తిల గొత్తి సుదల్ గోన జా, గని బాబు, జోక దెస్సు బజారొ కాసుల్ అస్సి! జోక అన్నె కాసుల్ కిచ్చొక దెంక! మెలె.

26 గని జో రానొ కిచ్చొ నంగిలన్ మెలె, 'తుమ్క కిచ్చొ మెంతసి మెలె, సీకక్క తిలె, జోక అన్నె దెంక జయెదె. కక్క నెంజిలె, జోక తిలిసి కి జోతె తెంతో అన్నె కడ గెలుక జయెదె.

27 జలె, అంక అమ్చి ఉప్పిరి జో ఏలువ కెరుక మెలె, అమ్క ఎద్దరి ఇష్టుమ్ నాయ్' మెల అంచ విరోదుమ్ సుదల్క కిచ్చొ కెరుక? జోక ఇన్నె కడ ఆన, చి అంచి మొక్కె కండ గెల మెన రానొ నంగిలన్" మెన యేసు *టాలి నంగిలన్.

యేసు గాడ్డె పిల్లతె వెగ యెరూసలేమ్ పట్టుమ్క అయ్లిసి
(మత్త 21:1-11; మార్కు 11:1-11; యోహా 12:12-19)

28 యేసు ఈంజ టాలి నంగ కిడవ కెర, యెరూసలేమ్తె గెచ్చుక మెన జోచ సిస్సుల్చి వురె గెలన్.

29 జలె, బేత్సగి చి బేతనియ మెల గవ్వొక పాసిచి † ఒలివ మెంతి మెట్టయ్ పావెలి పొది, యేసు జోచ సిస్సుల్తె దొగులక పాసి బుకారా కెర,

30 "తుమ్చి మొక్కె తిలి గవ్వొ తుమ్ పెన, చి గవ్వొ పెసిలదు మెలె, బంద తిలి ఏక్ గాడ్డె పిల్ల బేగి తుమ్క డీసిదె. జాచి ఉప్పిరి అస్సె ఎద కో కి వెగుక నేతయ్. జాక యిప కెర ఉడడ ఆన.

31 అన్నె, 'కిచ్చొక యిపితసు?' మెన తుమ్క కో జవున్ పుసిలె, తుమ్ కిచ్చొ మెన మెలె, 'ఇన్నెతెన్ ప్రబుక కామ్ అస్సె' " మెన నంగ, మెన యేసు జేవ్ దొగుల సిస్సుల్క సంగ జా గవ్వొ తెద్రయ్లన్.

32 జలె, జో తెద్రయ్ల దొగుల గెచ్చొ కెర, యేసు నంగిల్ రితి జలి మెన దెకిలె.

33 జేవ్ జా గాడ్డె పిల్లక యిపుక దెర్దికయ్, "గాడ్డె పిల్లక కిచ్చొక యిపితసు?" మెన జేవ్చ సాపుకర్లు పుసిలె.

34 పుసితికయ్, "ఇన్నెతెన్ ప్రబుక కామ్ అస్సె" మెలె.

35 జలె, జేవ్ సిస్సుల్ జా గాడ్డె పిల్లక యేసుతె ఉడడ ఆన కెర, జోవయిం చ దుప్పట్లు గాడ్డెచి ఉప్పిరి గల దా, యేసుక వెగడ్డె,

36 అన్నె, యెరూసలేమ్తె జో గెతె తతికయ్, జో గెతి వట్టె ‡ జనాబ్ జోవయిం చ పాలల్ అంతిర్ల.

37 అన్నె, యేసు జా ఒలివ మెట్టచి కొన్న జీన యెరూసలేమ్ పట్టుమ్ పక్క. ఉత్త పాసి పావెలి పొది, జోక నంవజలె వ్రెజల్ ఎత్తిజన్ నర్దనంతోసుమ్ జా గట్టిజ అవాడ్ కెరన్,

§ 19:26 19:26 మత్తయి 25:29 దెక. ఇన్నెచి అర్దుమ్ కిచ్చొ మెలె 'ఇదిల్ జవున్ బుద్ది తిలోసాక అన్నె బుద్ది సికడుక జయెదె, గని బుద్ది నెంజిలోసాతె తెంతో జో సిక తిలిసి కి కడ గెలుక జయెదె'. * 19:27 19:27 ఈంజ టాలితె రానొ కో మెలె, యేసు. జోవయిం చ విరోదుమ్ సుదల్ కో మెలె, యూరులచి వెట్టిల మాస్సుల్. గొత్తి సుదల్ మెలె. జోక నంవజలె. డబ్బుల్ వాడిక కెర్లెన్ మెలె, జో దిలి కామ్. డబ్బుల్ మెలె, జో దిల సిక్కివ్. † 19:29 19:29 'ఒలివ మెట్ట' మెన కిచ్చొక నావ్ తియ అస్సి మెలె. ఒత్త ఒలివ చంట్లు రూకల్ తిల. ‡ 19:36 19:36 మత్తయి 21:8, చి మార్కు 11:8 దెక.

38 “దేముడుచి నావ్ తెన్ జెతో రానొక జోబర, జోబర! పరలోకుమతె సేంతుమ్, చి ఎత్తిచి ఉప్పిర్ టాన్తె తిలొసొక జోబర!” మెన కేకుల్ గల, యేసుచి అత్తి కెర్ల జేవ్ దెకల కమెచి రిసా దేముడుచి గవురుమ్ సంగితె తిల.

39 తెదొడి జేవ్ జనాబ్తె బెద తిల సగుమ్జిన్ పరిసయ్యుల్ యేసుక “గురుబాబు, తుచ సిస్సుల్ తుక్కె తతి రితి సంగు” మెలె,

40 గని యేసు జేవ్ కిచ్చొ సంగిలన్ మెలె, “తుమ్క ఆవ్ కిచ్చొ మెంతసి మెలె, ఈంజేవ్ తుక్కె తత్త జలె, ఈంజేవ్ పత్తల్ కేక గలుల” మెలన్.

యెరూసలేమ్ పట్టుమ్క జెంక తిల అల్లరచి రిసా యేసు ఏడ్డిసి

41 యేసు యెరూసలేమ్ పట్టుమ్క అన్నె పాసి జా జాక దెక కెర, జాచి రిసా ఏడ్డన్.

42 కిచ్చొ మెన ఏడ్డన్ మెలె, “ఓ యెరూసలేమ్, దేముడు తెన్ కిసి సేంతుమ్ జంక తుయి ఆజి జాన్తతి జలె, చెంగిల్ తత్తి! గని నాయ్, అప్పె జా అర్దుమ్ ఎత్తి, తుమ్క లుంకిల్ రితి అన్నె.

43 ఓ యెరూసలేమ్ పట్టుమ్, తుయి ఒగ్గర్ సైముల్ సేడ్డి ఏక్ కాలుమ్ జెతయ్. జేవ్ దీసల్ క తుక కిచ్చొ జయెదె మెలె, తుచ విరోదుమ్ సుదల్ తుచి సుట్టునంత మత్తి డిబ్బల్ వెగడ, తుచి సుట్టునంత బెర జా, ఎత్తి, పక్కల్ తెంతో వెల జెప్పల.

44 తుచ కోటల్, తుచ గెరల్ పూర్తి సేడవ గెల కెర, తుచి తెడి తిల మాన్సుల్ ఎత్తిజిన్ క జేవ్ మారుల, చి తుచితె పత్తురచి ఉప్పిరి పత్తురు తతి రితి ములితి నాయ్. కిచ్చొక మెలె, దేముడు తుక రచ్చించువ కెర్తె వాటు ఆవ్ దెకయలయ్, గని చినున్ నాయ్” మెన యేసు యెరూసలేమ్చి రిసా ఏడ గెలన్.

వెల్లెల మాన్సుల్ యేసుక మారుక మెన రకితె తిలిసి

(మత్త 21:12-17; మార్కు 11:15-19; యోహా 2:13-22)

45 యేసు పట్టుమ్తె పావ కెర, దేముడుచి గుడితె పెన కెర, ఒత్త * సామన్ వికితనక ఉదడ గెలుక దెర,

46 జోవయింక, “ అంచి గేరు ప్రార్దన కెర్తె గేరు, జా దన్నె తప్పన్” మెన దేముడుచి కొడెతె రెగ్గవ అన్నె, గని తూమ్ చోర్లు జెతో రితి గేరు జతి రితి జాక మార్పుప కెర అప్పన్.” మెన సంగిలన్.

47 జలె, జా దొరతి యేసు రోజుక దేముడుచి గుడితె బోదన కెర్తె తిలన్, అన్నె వెల్లెల పూజర్లు, మోసే తెన్ దేముడు దిలి అగ్గుల్ సికడ్డన చి, యూదుల్చ వెల్లెల మాన్సుల్ జోక మారుక వాబ్ చజెతె తిల, గని

48 ప్రెజల్ ఎత్తి, రోజుక జెతె తా జోవయింక కొడె ఒగ్గర్ సర్ద తెన్ సూన్తె తిల, చి నెత్తిర్.

20

వెల్లెల సుదల్ యేసుక పరిచ్చ కెర్తిసి

(మత్త 21:23-27; మార్కు 11:27-33)

1 తెదొడి ఏక్ దీసి, యేసు దేముడుచి గుడితె ప్రెజల్ క బోదన కెర్తె తా సుబుమ్ కబుర్ సంగితె తతికయ్, వెల్లెల పూజర్లు, మోసే తెన్ దేముడు దిలి అగ్గుల్ సికడ్డన చి అన్నె సగుమ్జిన్ వెల్లెల మాన్సుల్ జోతె జాక కెర్.

2 “తుయి కెర్ల కమె కెరుక, తుయి బోదన కెరుక, తుక కిచ్చొ అదికారుమ్ అన్నె? కొన్నొ తుక అదికారుమ్ దిలన్?” మెన జోక గోల కెర్ల.

3 యేసు జోవయింక కిచ్చొ జబాబ్ దిలన్ మెలె, “ఆవ్ కి తుమ్కయ్ ఏక్ కోడు పుసిందె. జలె, అంక తుమ్ సంగ.

4 యోహాను బాప్తిసుమ్ దెతె తిలిన్చి అదికారుమ్ కేనె తెంతో చి? పరలోకుమ్ తెంతో చి గే, మాన్సు తెంతో చి గే, తుమ్ సంగ” మెన వెల్లెల మాన్సుల్ క యేసు పుసిలన్.

§ 19:44 19:44 యేసు జెర్ల ముప్పయ్ తిన్ని వెర్దుల్ క మొర అన్నె జలన్, చి యేసు జెర్ల డబ్బయ్ వెర్దుల్ క రోమ్ దేసేవ చ నయన్యుమ్ సుదల్ యెరూసలేమ్ పట్టుమ్క, దేముడుచి గుడిక పాడ్ కెర్ల. జా పట్టుమ్ దన్నె జా జా పట్టుమ్చ మాన్సుల్ జా సిచ్చ జులె మెంతి గుర్తక యేసు ఇసి సంగిలన్. * 19:45 19:45 మత్తయి 21:12-13, చి మార్కు 11:15-17 చి యోహాను 12:12-19 దెక.

5 దస్సి పునీతికయ్, జేవ్ వెల్లెల మాన్యుల్ కీసి జల మెలె, ఎక్కిలో తెన్ ఎక్కిలో బమ్మ తెన్ లట్టబన, ఇసి మెంతె తిల, “పరలోకుమ్ తెంతో చి మెన అమ్ సంగిలెగిన, ‘దస్సి జలె, తుమ్ కిచ్చొక జోక నంప కెర్పు నాయ్?’ మెన ఈంజో అమ్క సంగెదె.

6 గని, ‘మాన్యు తెంతో చి’ మెన సంగిలె, జనాబ్ అమ్క పత్తల్ తెన్ పెట మారుల. యోహానుక ‘అమ్చొ దేముడుచు కబుర్లు సంగితోసొ కచితుమ్ తిలో’ మెన జేవ్ జనాబ్క నముకుమ్.”

7 జాకయ్ జేవ్ యేసుక కిచ్చొ జబాబ్ దిలి మెలె, “జా అదికారుమ్ కేనె తెంతో గే నేనుమ్” మెలె.

8 జేవ్ దస్సి సంగితికయ్, యేసు జోవయింక, “దస్సి జలె, కేన్ అదికారుమ్క ఆవ్ అంచ కమ్మె కెర్తసి గే, ఆవ్ తుమ్క సంగి నాయ్” మెన సంగ జేవ్క ముడ్డొ కెర్తన్.

ద్రాచ తోటచొ ఎజోమానిచొ పుత్తునక మార్దినచి టాలి యేసు సంగిలిసి
(మత్త 21:33-46; మార్కు 12:1-12)

9 తెదొడి యేసు పైజల్క ఈంజి ఏక్ *టాలి సంగుక దెర్లన్. “ఏక్ మాన్యు ద్రాచ తోట లోవడ కెర, రకితనక నిసాన, జేవ్క జా తోట గుత్త దా, ఇదిల్ ఒగ్గర్ దీసల్ వేర దేసిమి గచ్చ తంక మెన, ఉట్ట గెలన్.

10 జలె, పంటొ పికిలి పొది, ‘సమయుమ్ జా అయోలి’ మెన, జేవ్ గుత్త నజీలసతె జా తోటచి పంటొ ఏక్ వాట నజ ఆన్తి రిసా, గొత్తి సుదొ ఎక్కిలోక ఎజోమాని తెద్రయలన్. గని జో గొత్తి సుదొ ఒత్త పా-ఎతికయ్, గుత్త నజీల జేవ్ రకిత మాన్యుల్ జోక పెట గెల కెర, కిచ్చొ నే దెతె ఉదడ్డె.

11 “ఒత్త తెంతో, అన్నెక్లో గొత్తి సుదొక జో ఎజోమాని తెద్రయలన్, గని జేవ్ రకితన జోక కి పెట కెర జోచి మరియాద కడ, జోక కి కిచ్చొ నే దెతె ఉదడ గెల.

12 ఒత్త తెంతో అన్నెక్లో గొత్తి సుదొక ఎజోమాని తెద్రయలన్ చి, ఇన్నెక కి బలె అల్లర్ కెర గంటివొ గాయిమ్లు కెర దా ఉదడ గెల.

13 “తెదొడి జా ద్రాచ తోటచొ ఎజోమాని, ‘ఆవ్ కిచ్చొ కెర్లె జయెదె? నాయ్, గెద, ఇసి కెరిందె. అంచొ ప్రేమ తిలో’ పుత్తుక తెద్రయిందె. జోకయ్ మరియాద దెకుల, కిచ్చొగే’ మెన ఆకర్క జోకయ్ తెద్రయలన్.

14 జేవ్ తోట గుత్త నజీలన జోక దెక కెర, ‘ఇన్నెకయ్ అబ్బొనచి దనుమ్ కలుగు జయెదె. అల్లె, ఇన్నెక మారుమ, చి ఇన్నెక కలుగు జతి వాట అమ్కయ్ దొర్కు జయెదె’ మెన జోవయింక జెచ్చొ లట్టబన,

15 జో ఎజోమానిచొ పుత్తునక దెర కెర, జోక తోట తెంతో వెలవ న కెర, †బయలె మార గెల. జలె, జేవ్ ఎజోమానిచొ పుత్తునక దస్సి కెర్లె రిసా, జా తోటచొ ఎజోమాని జోవయింక కిచ్చొ కెరెదె?

16 కిచ్చొ కెరెదె మెలె, జా కెర, జేవ్ గుత్త నజీలనక మురవ కెర, జా తోట వేర మాన్యుల్క గుత్త దెయెదె” మెన యేసు సంగిలన్. ప్రజలె జాక సూన కెర, దస్సి కెయెక జగ్గు జంక జయె నాయ్! మెలె.

17 గని యేసు జోవయిందె పక్క పనుల దెక, “జలె, దేముడు దేముడుచు కొడొతె రెద్దయలి ఏక్ కోడు సంగిందె, జాచి అర్దుమ్ కిచ్చొ గే తుమ్ ఉచర.

‘కామ్క నెంజె’ మెన గేరు బందిలన జా ఏక్ పత్తురు పిట్టవుక మెన ఉచర్లె కి, జయ్యి పత్తురు గేరుక బోడిపత్తుర్ జలన్. మెన రెగిడ్ల కొడు.

18 ఈంజో పత్తుర్చి ఉప్పిరి కో సేడుల గే, జేవ్ బద్దల్ జా గెచ్చుల, గని కచి ఉప్పిరి ఈంజో పత్తుర్ సేడెదె గే, జోక బీడవ గెలెదె.” మెన యేసు[‡] సంగిలన్.

* 20:9 20:9 ఈంజి టాలితె, ‘గుత్త నజ తోట రకితన’ కొన్న మెలె, ముక్కిమ్క యూదుల్క ఎత్తి అదికారుమ్ తిలో దేముడు దెకయలి వాల్ సెకడ్ల వెల్లెల మాన్యుల్, మోసె తెన్ దేముడు దిలి అగ్గల్ సెకడ్లన, పరిసయ్యల్, పూజర్లు. ‘ఎజోమాని’ మెలె, ఎత్తి అదికారుమ్ తిలో దేముడు. ‘ఎజోమాని తెద్రయల గొత్తి సుదొ’ మెలె, జోవయింక కబుర్లు సంగిలన. ‘ఎజోమానిచొ పుత్తున’ మెలె, యేసు. ‘ద్రాచ తోట’ మెలె, యూదుల్, చి ఎత్తి అదికారుమ్ తిలో దేముడుచి బక్తి కెర్లె అన్నె మాన్యుల్. † 20:15 20:15 యేసుక కి పడ్డొ యెరూసలేమ్ పట్టుమ్ తెంతో బయలె కడన పూర్: సెలవతె. లూకా 23:26-33. ‡ 20:18 20:18 ఈంజి టాలితె ‘దేముడుచి గుడి’ మెలె, ఎత్తి అదికారుమ్ తిలో దేముడుచి రాజుమ్, యేసుక నంపజా జోవయింక నిదానుమ్ జలన మొత్తుమ్ జన్. † బోడిపత్తుర్ మెలె, యేసు. ‘బోడిపత్తుర్ నెసెల’ మెలె, ముక్కిమ్క యూదుల్క వెల్లెల మాన్యుల్. ‘పత్తురు జోవయిందె ఉప్పిరి సేడ బీడయెతిసి’ మెలె, జేవ్ పూర్తి నంపనెజలిన్ నెసెలిచి ది సిచ్చ.

19 పంటో నబుక గెలసక మార్ల సంగిలన మెన అమచి రిసా యేసు సంగితయ్ మెన మోసే తెన్ దేముడు దిలి అగ్గల్ సికడ్డన చి వెల్లెల పూజర్లు చినన కోపుమ్ జా, జోక జయ్యి గడియయ్ దెరుక ఉచర్ల, గని 'ప్రజల్ కోపుమ్ జా అల్లర్ కెరుల' మెన, జోవయింక బియ్ కెర, తుక్లె తిల.

సిస్టు డబ్బుల్ దెతిసిచి రిసా యేసుక పరిచ్చ కెరయ్ లిసి
(మత్త 22:15-22; మార్కు 12:13-17)

20 జలె, 'వాట్ అయెలె యేసుక దెరుమదె' మెన మోసే తెన్ దేముడు దిలి అగ్గల్ సికడ్డన చి వెల్లెల పూజర్లు దెకితె తిల చి, సగుమ్ జిన్ క లంచుమ్ దా కెర, "తుమ్ సత్తిమ్ క పుసిల్ రితి డీస" మెన, జేవ్ మాస్సుల్ యేసుక ఏక్ కోడు పుసితి రితి తెద్రయ్ల. జోవయింది ఉద్దెసుమ్ కిచ్చొ మెలె, 'యేసు కిచ్చొ జవున్ తప్పు సంగిలె, జోక దెర, రోమ్ దేసిమ్చొ అదికారితె సార్ప కెర దెంక జయెదె చి, యేసుచి రిసా సూన, సిచ్చ దెయెదె' మెన కోర్పె జతతి.

21 జలె, జేవ్ మాస్సుల్ యేసుతె జా కెర, "గురుబాబు, తుయి సత్తిమ్ లట్టబ, సత్తిమ్ బోదన కెర్తసి మెన. తుయి మొకమాటుమ్ నే దెకితె, వెల్లెల మాస్సుల్ కిచ్చొ ఉచరుల గే నే బితి, దేముడు దెకయ్ లి వాట్చి రిసా సత్తిమ్ తెన్ బోదన కెర్తసి మెన జానుమ్" మెన పులయ్ తి రితి సంగ,

22 అన్యె, "రోమ్ దేసిమ్చి ప్రబుతుమ్చొ కైసర్ రానొక అమ్ సిస్టు దెంక నాయిమ్ గే నాయ్ గె?" మెన పుసిల.

23 గని యేసు జోవయింది కి ఉచరన్ల, జోవయింది ఉప్రమెన్సు చిన కెర,

24 "ఏక్ వెండి *కాసు అంక దెకవ" మెలన్, చి జేవ్ అన దెకయ్ తికయ్, "ఇన్యెతె కచి బొమ్మ కడ అస్సి? కచి నావ్ డీస్యయ్?" మెన పుసిలన్ చి, "కైసర్ రానొచి" మెన జనాబ్ సంగిల.

25 యేసు జోవయింక, "దస్సి జలె, కైసర్ క దెతిసి కైసర్ క, దేముడుక దెతిసి దేముడుకయ్ తుమ్ దాన." మెన, జోవయింక జనాబ్ దిలన్.

26 దస్సి, జో సంగిలన్ తెత తప్పు నాయ్ చి, ప్రజల్చి మొక్కె జో కిచ్చొ తప్పు సంగితిన్ చి రుజ్జు దెకవుక నెత్తిర్, చి దెరుక నెత్తిర్. గని జో దిలి జనాబ్చి తెల్విక ఆచారిమ్ జా, తుక్లె జలె.

సద్దాకయ్యులు మెల పండితుల్ యేసుచి తెలివి పరిచ్చ కెరుక
(మత్త 22:23-33; మార్కు 12:18-27)

27 పడ్డె, 'మొర గెలెగిన అన్యె జివ్ జంక నెంజె, అన్యెక్ లోకుమతె గెచ్చుక నెంజె' మెన ప్రజల్ క సికయ్ త సద్దాకయ్యులు సగుమ్ జిన్ యేసుతె జా కెర,

28 "గురుబాబు, ఈందె, 'ఎక్కిలోచొ అన్యెసి పెండ్లి జా బోదల్ నెంతె మొర గెలెగిన, జో బావోసి అన్యెన్ చి తేర్లిక ఆనన, అన్యెన్ చి నావ్ తెన్ బోదల్ పాయిక అస్సె' మెన, మోసే పూర్గుమ్చొ అమ్ యూదుల్చి రిసా రెర్ల అస్సె.

29 జలె, సత్తుజిన్ బాపుడ్లు తిల. జోవయింతె తొల్పుర్ తెర్ని ఆనన, బోదల్ నెంతె మొర గెలన్.

30 జో మాస్సుచి పట్టి జెర్మిలోసా కి జాక ఆనన, బోదల్ నెంతె మొర గెలన్.

31 జోచి పట్టిచొ, జోచి పట్టిచొ, దస్సి వర్చు తెన్ సత్తుజిన్ మొత్తుమ్ జా తెన్ పెండ్లి జా సంతానుమ్ నెంతె మొర గెల.

32 ఆకర్ క జా తేర్ బోద కి మొర గెలి.

33 జాకయ్, మొర గెలన అన్యె జివ్ జతి పొదిక, జా తేర్ బోద జోవయింతె కక్క తేర్ని జా తయెదె? జేవ్ సత్తుజిన్ వర్చు తెన్ జా తెన్ పెండ్లి జలె, గెద" మెన యేసుక పుసిల.

34 ఇసి జతికయ్, యేసు జేవ్ సద్దాకయ్యుల్ క, "ఈంజయ్ కాలుమచ పూస్సుల్ పెండ్లి జా పుత్తర్పుల్ క పెండ్లిచొ కెర్తతి,

§ 20:23 20:23 జోవయింది కిచ్చొ ఉచర్ల మెలె, 'అమ్ క ఆక్రమించువ కెర్లె రోమ్ దేసిమ్చి ప్రబుతుమ్ కిస్టు దెంక నెంజె' మెన ఏక్ వేల జో సంగిలె, జా ప్రబుతుమ్చి మొక్కె జోవయింక నేరిమ్ వయడ సిచ్చ కెరవుక జయెదె. గని 'జా సిస్టు దెంక సంగిల్' మెన జో సంగిలె మాములుమ్ ప్రజల్ కోపుమ్ జవుల. మెలె, జా వేర దేసిమ్చి ప్రబుతుమ్ కిస్టు దెంక అగ్గ తిల కి, జేవ్ యూదుల్ నెసితి. * 20:24 20:24 యెరూసలేమ్ తె దొస్సి గల్ కాలల్ తవుల. ఏక్ గరుమ్ దేముడుచి గుడితె దెతిసి, ఏక్ గరుమ్ ప్రబుతుమ్ క దెతిసి, మాములుమ్ బియ్యార్లు వాడిక కెర్తసి.

35 గని 'అన్నె జీవ్ జా పరలోకుమతె జా కాలుమ్ క జతు' మెన కక్క, దేముడు విలువ దెకెద గే, ఒత్త పెండ్లివో నెంతె దన్నీ తవుల.

36 కిచ్చొక మెలె, ఒత్త గెలె దూతల్ కీసి మొర్తి నాయ్ గే, దన్నీ, ఈజేవ్ కి కెయ్ క కి అన్నె మొర్తి నాయ్. అన్నె, జేవ్ మొర గెచ్చ అన్నె జీవ్ జలి రిసా, జేవ్ దేముడుచ పుత్తర్లు జా అన్నె.

37 "జలె, 'మొర గెలన అన్నె జీవ్ జవుల' మెన †రూకు తెడి జా ఆగి లగితె తిలినచి రిసా జో రెగిడ్డినతె అమ్చో మోసే పూర్గుమ్చో కి దెకయ్ తయ్. కేన్ కోడుతె మెలె, దేముడుచి రిసా 'అబ్రాహామ్చో దేముడు, ఇస్సాకుచో దేముడు, చి యాకోబుచో దేముడు' మెన ఏకతె సంగితయ్, గెద.

38 జలె జేవ్ మొర్ల పూర్గుల్ క మోసేచి కాలుమ్ ఎద కి జో దేముడు తా కామ్ క అయ్ లిన్ తెన్ జేవ్ అన్నెక లోకుమ్తె గెచ్చ జివ్వి అస్తి మెన రుజ్జు జతయ్. రితి మొర గెలనక నాయ్, గని జీవ్ తిలనకయ్ జో దేముడు తయెదె. కో దేముడుచి రిసా జయ్ మొర అన్నె గే, జోవయిచి రిసా జతతి" మెన యేసు సంగిలన్.

39 జలె, మోసే తెన్ దేముడు దిలి ఆగ్గుల్ సికడ్డన కి ఒత్త తిల. జేవ్, జలె, పరిసయ్యుల్ తెన్ బెదితన జవుల చి, మొర్లె జీవ్ జంక జయెదె, అన్నెక లోకుమ్తె గెచ్చుక జయెదె మెన నంప కెర్తతిచి రిసా "గురుబాబు, తుయి చెంగిల్ జబాబ్ దిలది!" మెన సంగిల.

40 ఒత్త తెంతో జోవయింతె అన్నె కో కి యేసుక కిచ్చొ పుసుక కి దయిరిమ్ జతి నాయ్.

దేముడు తెద్రయ్లో క్రీస్తు
(మత్త 22:41-46; మార్కు 12:35-37)

41 తెదొడి యేసు జోవయింక ఇసి మెలన్. " దేముడు తెద్రయ్లో రచ్చించుప కెర్తొసా జతో క్రీస్తు అమ్చో దావీదు రాసెచి నెకుమ్తె జెర్పు జోక పుత్తసి జయెదె' మెన కీసి సంగుక జతయ్?" మెన, అన్నె,

42-43 కీర్తనల్తె దావీదు,

‡ "తువ విరోదుమ్ సుదల్ తయె సుదితి పొద్రొ జతి రితి ఆవ్

కెర్తి ఎది ఎద

తుయి అంచి ఉజెతో పక్కయ్ వెన తా

అంచి తెన్ ఏలుప కెరు, మెన

ప్రబు అంచో ప్రబుక సంగిలన్

మెన రెగిడ్డన్.

44 దన్నీ, దావీదు రాసె క్రీస్తుక 'ప్రబు' మెన సంగితయ్ జలె, జో క్రీస్తు కీసి జోక కిపుత్తసి జయెదె? తుమ్ ఉచర" మెన ఒత్త తిలనక యేసు సంగిలన్.

దేముడుచి కొడె సికడ్డనచి రిసా ప్రెజల్ క యేసు జాగర్త సంగిలిసి
(మత్త 23:1-36; మార్కు 12:38-40; లూకా 11:37-54)

45 ప్రెజల్ ఎత్తి, సూన్తె తతికయ్, యేసు జోచ సిస్సుల్ క ఇసి మెలన్.

46 "దిగిల సూటివ పాలల్ గలన బులిత గవురుమ్ ఉచరంత అమ్చ మోసే తెన్ దేముడు దిలి ఆగ్గుల్ సికడ్డనచి రిసా తుమ్ జాగర్త తెన్ తా. జేవ్ సంతవీదులె టీచ మ్మాస్సుల్ ఎత్తి, అమ్క జోకర్లు మెన కోర్చవ జతతి. నబ గెరలె ముక్కిమ్చ ట్లాస్సుతె, విందుల్తె ముక్కిమ్చ ట్లాస్సుతె వెసుక కోర్చవ జతతి.

47 జేవ్ మోసిమ్లులె కెర రండెల్ మ్మాస్సుల్చ గెరల్ విక కతతి, అన్నె ఉప్రమెస్సుక దిగిల ప్రార్దనల్ కెర్తతి. దన్నీ, జోవయిచి పాపుమ్ ఒగ్గరి, చి వెల్లి సెచ్చ నేడుల" మెన యేసు సంగిలన్.

† 20:37 20:37 నిర్ణయకాండమ్ 3:1-6. ‡ 20:42-43 20:42-43 కీర్తన 110:1. § 20:44 20:44 కీసి మెలె, యేసు ఎత్తి అదికారుమ్ తిలో దేముడుచో పుత్తన్ జయె దేముడి జతయ్. గని మ్మాస్సు జా దావీదు రాసెచి నెకుమ్తె జెర్పు జోవయింక పుత్తన్ రితి జతయ్. నగుమ్జన్ ప్రెజల్ జా కోడు ఒప్పన్; మత్తయి 9:27, 21:9. 'మ్మాస్సు జా జెర్పున్ అయ్లోసా' మెలె జో యేసు సంగిల్ నావ్తె కి జా అర్దుమ్ ఇదిల్ లుంకీల్ రితి అన్నె.

21

బీద జలి రండెల్ మాన్సు ఎక్కి జాక కలుగు జలిసి ఎత్తి దేముడుక దిలిసి
(మార్కు 12:41-44)

1 దేముడుచి గుడితె డబ్బుల్ దెతి కానుక వెఱి ఏక్ తయెదె. దేముడుచి కామ్క మెన మాన్సుల్ ఒత్త డబ్బుల్ గలుల. జలె, యేసు జా పక్కు అంకి గల, సామ్మార్లు జోవయింది డబ్బుల్ జా పెట్టెతె గల్లె తిలిసి దెకిలన్.

2 తెదొడి ఎద్దరె నెంజిలి రండెల్ మాన్సు జా డబ్బుల్ దెతి కానుక వెట్టెతె దొన్ని ఇదుల రాగి కాసుల్ గలిలిసి యేసు దెకిలన్.

3 జా దెక కెర, యేసు, “నిజుచి తుమ్క ఆవ్ కిచ్చొ మెంతసి మెలె, జేవ్ సామ్మార్లు ఎత్తిజిన్ మొత్తుమ్ దిలిన్చి కంట ఈంజ ఎద్దరె నెంజిలి రండెల్ మాన్సు ఒగ్గర్ దా అన్సె.

4 జోవయింది ఎదివాట్ సామ్మార్లుమ్ తెంతో సేసిలిసి జేవ్ దా అన్సి. ఇన్సెక, మాత్తమ్, కిచ్చొ నెంజిలె కి, కలుగు జలిసి ఎత్తి దాయి గెల అన్సె” మెన యేసు సంగిల్.

దేముడుచి గుడి పాడ్ జంక తిలిన్చి రిసా సంగిలిసి

5 దేముడుచి గుడి “చెంగిల్ పత్తల్ తెన్ కెద్ది నూటి తెయార్ కెర అన్సి, *కెద్ది తమ్మన వన్సువల్క నూటి కెర అన్సి!” మెన †సిన్సుల్ యేసుక దెకయ్ల.

6 యేసు, “తుమ్ దెకితిసి ఎత్తి జలె, నగుమ్ దీసల్ గెల కిసి జయెదె మెలె, అప్పె పత్తుర్చి ఉప్పిరి పత్తురు దొంత్రల్ తిలె కి, ఎక్కి జలెకు నే టీచితె గలి జతి ‡దీసి జెయెదె” మెన సంగిలన్.

ఉగుమ్ మార్కుప జతిన్చి రిసా యేసు సంగిలిసి

7 తెదొడి యేసుక, జోవ బారజన్ సిన్సుల్ “గురుబాబు, తుయి సంగిలిసి కెయెక జర్గు జయెదె? ఈంజ జర్గు జతి పొది అయ్లి మెలె, అమ్ చినితి రిసా కిచ్చొ గుర్తు తయెదె?” మెన పుసిల.

8 జో జోవయింక, “కొన్సె జలెకు తుమ్క అంచి రిసా మోసిమ్ నే కెర్తి రితి తుమ్ జాగర్ల దెకన. కిచ్చొక మెలె, ‘అచ్చొ క్రిస్తు’ మెనన జలెకు. క్రిస్తు జెతి సమయిమ్ జా అయ్లి మెన జలెకు, కో కో మాన్సుల్ బార్ జవుల. జోవయింది పట్టి తుమ్ గెచ్చు నాయ్.

9 అన్సె, దేసిమ్చి ఉప్పిరి దేసిమ్ యుద్దుమ్ కెర్తినచి రిసా జలెకు, ఏక్ దేసిమ్చ జోవయింది ఉప్పిరి జెచ్చొ యుద్దుమ్ కెర్తినచి రిసా జలెకు తుమ్ నూన్లె, తుమ్ బమ్మ జా నాయ్. దనచ ఎత్తి జర్గు జంక అన్సె, గని ఈంజ ఉగుమ్ తెద్ది బేగి పూర్తి జయె నాయ్” మెన సంగ కెర

10 జోవయింక అన్సె, దేసిమ్చి ఉప్పిరి దేసిమ్, రాజిమ్చి ఉప్పిరి రాజిమ్ యుద్దుమ్క టీవ్ల.

11 వేర వేరతె బూకంపల్ కరువుల్ చి, కిచ్చొ కిచ్చొ కన్సల్ నన్సల్ జర్గు జవుల చి, ఆగాసుమ్ తెంతో జెత ఒగ్గర్ బయిమ్ దెత వెల్లో గుర్తులు జెవుల.

12 “గని ఈంజ ఎత్తి జర్గు నే జతె అగ్గె, మాన్సుల్ తుమ్క దెర, జోవయింది కోవుమ్క తుమ్క కిచ్చొ కిచ్చొ అల్లర్ కెర, ‘అదికారుల్ జోవయింక సిచ్చు కెర్తొ’ మెన అమ్క యూదుల్చ నబ గెరెల్ జోవయింది అత్తి సార్చు కెర దెవుల, చి తుమ్క జేలెతె గల దెవుల. అంచి సేవ తుమ్ కెర్తనుచి రిసా, రాసల్చి మొక్కె అదికార్లుచి మొక్కె తుమ్ తీర్పు జతి రిసా సిచ్చల్ జతి రిసా తుమ్క టీచడుల.

13 జేవ్ దస్సి కెర్తి పొదిక, అంచి రిసా తుమ్ సాచి సంగితె

14 తుమ్ అప్పె మెన్సుతె కిచ్చొ బుద్ది దెరన మెలె, మాన్సుల్చి మొక్కె తుమ్ పరిచ్చు జంక జలె, జా నే జతె అగ్గె, జేవ్ పరిచ్చు కెర్తి కిచ్చొ జబాబుల్ దెమ్దె?, మెన తుమ్ ఉచరంతె తా నాయ్.

15 కిచ్చొక మెలె, తుమ్క చోడి దెయిందె, తుమ్క దొర్కు జలి బుద్ది గ్యానుమ్ దెయిందె. తుమ్చ జబాబుల్చి తెల్విచి ఉప్పిరి జేవ్ అల్లర్ కెర్తనుతె వెల్లెల మాన్సుల్తె కో జీసుక నెతిర్తి, తుమ్క కిచ్చొ జబాబ్ సంగుక నెతిర్తి.

* 21:5 21:5 ఇన్సుమ్ తిల సామ్మార్లు బజార్ వన్సువల్ ఎత్తి అదికారుమ్ తిల్ దేముడుక దెతికయ్, దనచ దేముడుచి గుడి నూటి కెర తిల. † 21:5 21:5 మార్కు 13:1, మత్తుల 24:1 దెక. ‡ 21:6 21:6 యేసు జెర్కు డబ్బుయ్ వెర్చుల్ గెతికయ్, రోమ్ దేసిమ్చ నయన్సుమ్ పాడ్ కెర్ల.

16 “అధికారులచే అత్తి తుమ్మక సార్లు కెర దెతనతె సగుమ్జిన కొన్న జవుల మెలె, తుమ్మచ అయ్యదింసి, అన్నోబావొదింసి, తుమ్మచ బందుగులు, తుమ్మచ నినేతులు. అన్నె, తుమ్మతె సగుమ్జినక మాన్సుల్ మారుల.

17 అన్నె, తుమ్మ అంచి నావ్ తెన్ బులితె తత్తెచి రిసా, ఎతివాటిజన్ తుమ్మక విరోదుమ్ జవుల.

18 గని, కిపరలోకుమతె తుమ్మ జెతినక ఉచర్లె, తుమ్మచ నెండివాడల్తె ఎక్కి కి నానినుమ్ జా గెచ్చె నాయ్, ఈంజ లోకుమతె ఈంజ అగ్గెక మార్లె కి, తుమ్మ పరలోకుమతె గెతిసి అడ్డు కెరుక నెతిర్చి.

19 తుమ్మ ఎక్కి నిదానుమ్ ఓర్పువ జా, చి పరలోకుమతె గెతి రితి తుమ్మచి జివు దొర్పు కెరన తా.

యెరూసలేమ్ పట్టుమ్ పాడ్ జంక తిలిన్చి రిసా యేసు సంగిలిసి
(మత్త 24:15-21; మార్కు 13:14-19)

20 “గని యెరూసలేమ్ పట్టుమ్క సయ్యన్యుమ్ ఒండి సుట్టునంత బెర తతిసి తుమ్మ కెయక దెకితె గే, ‘పట్టుమ్ పాడ్ జంక తిలి సమయమ్ పావ జా అన్నె’ మెన చినితె.

21 జా గుర్తు దెకిలె, తుమ్మచితి కో ఈంజ యూదయ ప్రదేసిమి తవుల గే, చట్కున డొంగ్రలె ఉట్ట నిగుతు చి, పట్టుమ్చి తెడి తిలన బార్ జా ఉట్ట గెతు, చి పట్టుమ్ ఒత్తల్తోచి బయలె గెచ్చెలె జవున్ కో తవుల గే, పట్టుమ్తె అన్నె పెనుత నాయ్.

22 కిచ్చొక మెలె, జోవయంక పచ్చెల్ రితి ఇండిల జోవయంక అమ్చ యూదుల్క దేముడు సిచ్చ దెత దీనల్ జవుల, జేవ్. జో అగ్గె రెగిడ్డిసి దస్సి జర్గు జా పూర్తి జంక అన్నె.

23 “అయ్యె! జేవ్ దీనల్క వయ తిల తేరబోదల్, బోదల్ వడ్డివొ ఉట్ట నిగుక నెత్త ఒగ్గర్ సైమల్ జవుల! ఈంజ దేసిమి ఒగ్గర్ కస్టల్ సిచ్చల్ జవుల!

24 అమ్చ యూదుల్తె సగుమ్జినక కండ్ గెలుల, సగుమ్జినక దెర వేర దేసిములుతె కడ్ నెవుల. అన్నె యూదుల్ నెంజెలన ఈంజ యెరూసలేమ్ పట్టుమ్చి ఉప్పిరి, ఈంజ దేముడుచి గుడిచి ఉప్పిరి ఏలువ కెర్తె కాలుమ్ కేడ్డె ఎదక జేవ్ ఈంజ ఎత్తి. నుంద గెలుల.

దేముడుచి రాజిమ్ ఎదార్దుమ్ ఏలువ కెరుక దెర్చిసి చి రిసా యేసు సంగిలిసి
(మత్త 24:29-35; మార్కు 13:24-31)

25 “పడ్డొక, పొద్దుతె, జోనుతె, చి సుక్కల్తె కిచ్చొ కిచ్చొ గుర్తుల్ డీసుల చి, తుపాన్ కెర్లె సముద్దుమ్చ కెర్లల్ ఎదిలి డొంకక జా, బుయ్యె ఉట్ట జా గెరల్ గుడ్డ దెర గెలె, జా అల్లర్ జా అవాడ్ కీన్ తయెదె గే, దస్సి జయెదె చి, దనచచి రిసా ఒండి లోకుమతె వేర వేర దేసిములుచ మాన్సుల్ సైమల్ సేడుల చి, కిచ్చొ ఉచరుక గే నేన గెచ్చుల.

26 ఈంజ లోకుమతె జెంక తిల అల్లర్చి రిసాచి జోవయంచి బయమ్క మాన్సుల్చి మొకొమ్ గుంజు నేడుల. కిచ్చొక మెలె, అగాసుమతె నెక్కి తిలిసి ఎత్తి అడ్డర్ జా గెచ్చెదె.

27 తెదొడక, ఎదివాట్ అధికారుమ్ తెన్, పరలోకుమచి ఉజడి తెన్ అచ్ మాన్సు జా జెర్కున్ అయ్లోసా మబ్బుతె పరలోకుమ్ తెంతో ఉత్త జెతిసి * ఎత్తిజన్ దెకుల.

28 “జలె, ఈంజ ఎత్తి జర్గు జంక దెర్లె పొది, అమ్చి రచ్చన పాసి జా జెతయ్ మెనన, తుమ్మ సోగ టీచ దయిరిమ్క ఉప్పిరి దెక, సర్లసంతోసుమ్ జా” మెన యేసు సంగిలన్.

29 తెదొడి యేసు జోవయంక అన్నె కిచ్చొ టాలి సంగిలన్ మెలె, “అంజూరుమ్ రూకుక చి అన్నె రగల్ రూకుల్క ఉచరుమ్.

30 జేవ్ పలోయిలె బేగి, ‘వేసెగు అప్పె పావ జెయెదె’ మెన తుమ్మ చినితను, జాన్పు.

§ 21:18 21:18 నెంజెలె, ‘ఎత్తి అధికారుమ్ తిల దేముడుచి నెలవ్ నెంతె తుమ్మచ నెండివాడల్తె ఎక్కి కి నానినుమ్ జా గెచ్చె నాయ్’.
 * 21:27 21:27 మత్తయి 24:30.

31 దస్సి, ఆవ్ సంగిల గుర్తుల జర్గు జతిసి తుమ్ దెకిలె, † దేముడుచి రాజిమ్ పావ జా అస్సె చి జెయెదె’ మెన జాన్తె.

32 “తుమ్క ఆవ్ కిచ్చొ కచితుమ్ సంగితసి మెలె, ఆవ్ సంగిల సైమల్ గుర్తుల్ పూర్తి జర్గు జతి ఎద ఈంజ ఉగుమ్ అంతుమ్ జయె నాయ్.

33 ఆగాసుమ్ బుయి నాసినుమ్ జా గెచ్చుల, గని అంచ కొడొ † ఎద్దరె పిట్టితి నాయ్.

‘తెలివి తా పాపుమ్తె దెర్పు నే సిడ్డి రిసా ప్రార్తన కెర్తె తా’

34 “తుమ్ మెన్పుతె కిచ్చొ బుద్ది ఇండితె గే తుమ్ జాగర్త దెకన! నెంజెలి, తుమ్ ఓడువ జతి రితి ఒగ్గర్ సూరు పియ మచ్చితిన్ గట్ట, దస్సి మచ్చితిన్క వెర్రి రితి ఇండితిన్ గట్ట చి, ఈంజ లోకుమ్చ రోజుకచ బాదల్ చి రిసా ఉచర్తిసి తుమ్క వెల గెలెదె. తుమ్ దనచతె అలవాట్ జా తిలె, ఈంజ ఉగుమ్చి జా ఆకర్ దీసి అయెలె, బోనుక ‘అస్సె’ మెన జంతు నేన్లె కిసి చట్టున దెర్పు నేడుక జయెదె గే, దస్సి తుమ్ చట్టున లాజ్ బెట్టుక జయెదె.

35 కిచ్చొక మెలె, బూలోకుమ్ తిలస ఎత్తిజిన్క జా దీసి లయెదె.

36 ఈంజేవ్ సైమల్తె జా దీసి జెతికయ్ గుర్తుచ అల్లర్ ఎత్తితె తుమ్ ఓర్పువ జా జిన్తి రితిచి, జిన్ ఆవ్ మాన్పు జా జెర్మన్ అయెలోసా ఏలువ కెరుక మెన అన్నె జెతి పొదిక అంచి మొక్కె తుమ్ బీవేతి రితి, తుమ్ జాగర్త దెకన, జా ఎత్తిక దొర్పు జలి సెక్తి తుమ్క తవున్ మెన తుమ్ ప్రార్తన కెర్తె తా” మెన యేసు సిస్సుల్క సంగిలన్.

37 జలె, జా దొరతి యేసు రోజుక మెద్దెన్ పొది దేముడుచి గుడితె గెచ్చ బోదన కెర్తె తయెదె చి, రోజుక సంజె పట్టుమ్ తెంతో బార్ జా † బిలీవ మెట్టయ్ నిర్త తయెదె.

38 రోజుక వెందల్ పొది ప్రెజల్ ఎత్తి బే బేగి బార్ జా జోచి బోదన సూనుక మెన దేముడుచి గుడితె గెచ్చుల.

22

జా దేసిమ్చ వెల్లెల మాన్సుల్ యేసుక దెర మారుక మెన కుట్ట కెర్తిసి (మత్త 26:1-5, 14-16; మార్కు 14:1-2, 10-11; యోహా 11:45-53)

1 * పన్కా వండుగు, జలె నే పులయెల పొడియె కతి వండుగు పాసి జా అయెలె.

2 తెదొడి “కెయెక కిసి ప్రెజల్క బమ్మ నే కెర్తె యేసుక మారుమ?” మెన వెల్లెల పూజర్గు చి మోసి తెన్ దేముడు దిలి ఆగ్గుల్ సికడ్డన కుట్ట ఉచర్తె తిల. కిచ్చొక మెలె, ప్రెజల్క † బితి తిల.

యాదా యేసుక దెర దెంక ఒప్పున్సిసి

3 తెదొడి, యేసుచ బారజిన్ సిస్సుల్తె తిలో † ఇన్కరియోతు మెలో యూదాక నయెతాన్ దెర్గన్.

4 యూదా వెల్లెల పూజర్గుతె చి దేముడుచి గుడిచ జమాన్పు సుదల్చ అదికారల్తె గెచ్చ కెర, “యేసుక తుమ్చి అత్తి ఆవ్ దెర దెయిందె. కిన్ కెరుమ?” మెన జోపయింతెన్ లట్టజ్జ,

† 21:31 21:31 మత్తయి 24:33 అన్నె మార్కు 13:29 తె యేసు అన్నె ఉత్త జెతిన్ రిసాచి కోడు అస్సె. మెలె, జో అన్నె ఉత్త జెతిసి తెన్సి ఎత్తి అదికారుమ్ తిలో దేముడుచి రాజిమ్ ఎదార్పుమ్ ఏలువ కెరుక దెరెదె. జా రాజిమ్ ఏలువ కెర్తెనెతె యేసుయి రానో జయెదె, చి ఎత్తిచి ఉప్పిరి జిన్లె మెలె, దేముడు అబ్బెన్చి అత్తి జో ఎత్తి సార్పు కెర దెయెదె, చి అబ్బెన్సి కెయెక తెయెక ఎత్తిచి ఉప్పిరి పూర్తి ఏలువ కెరెదె. ఇన్కెక కొందెయిల్క పవులు రెగిడ్డి ఏక్ నంబర్ ఉత్తమ్ 15:24-28 నదు కెర. యేసు ఏలువ కెర్తె పొదిక, జోపయింబి తెడి జోపయింక నంబజా జోపయింబయ్ జల మాన్సుల్ కి ఏలువ కెరల. ఇన్కెక డీనయెలిసి 5:10 నదు కెర. † 21:33 21:33 నెంజెలి ‘నెరవెర్పువ జంక ఎద్దరె పిట్టితి నాయ్’. § 21:37 21:37 మార్కు 11:11-12, చి 19-20 తె దెకిలె, ‘ఒలివ మెట్టయ్’ మెన నాయ్, గని ‘బేతనియ గచ్చెన్’. బేతనియ గావ్ ఒలివ మెట్టయ్ పాసి తయెదె. * 22:1 22:1 ‘ఇన్ దస్సి వండుగు కెర’ మెన ఎత్తి అదికారుమ్ తిలో దేముడు

సంగిలిసి కేనె నదు కెరుక జయెదె మెలె, నిర్దువకాండుమ్ 12 అద్యయిమ్తె. † 22:2 22:2 ‘ప్రెజల్క బితి తిల’ మెలె, దొస్సిచి రిసా ఉచరుక జయెదె. యోహాను 11:48 తె దెకిలె, ‘యేసుక కిచ్చొ నే కెర్తె దస్సి బోదన కెర్తె తయెదె, చి ప్రెజల్ పూర్తి జోపయింక నంబజా గెచ్చుల, చి రోమ్ దేసిమ్చ నయెన్పుమ్ అమ్చి దేముడుచి గుడి పొడి కెరుల, అమ్చి అదికారుమ్ కుర్తె గెచ్చువుల’, మెన బితి తిల. జా ఏక్, గని అన్నె కిచ్చొ మెలె, మత్తయి 26:5 చి మార్కు 14:2 తె దెకిలె, వండుగు పొది జోపయింక మారుక పోసి, నెంజెలి వండుగక బెర అయెలె ప్రెజల్ అల్లర్ దెవుల మెన జేవ్ వెల్లెల మాన్సుల్ బితి తా అల్లర్ జలిన్చి రిసా సంగితయ్. † 22:3 22:3 జోపయింక ‘ఇన్కరియోతు’ మెన కిచ్చొక జోపయింక నాన్ తిలి మెలె, జో ‘ఇన్కరియోతు గచ్చెన్చొ’ మాన్పు జయెదె.

5 జేవ్ నర్ల జా “తుక డబ్బల్ దెమ్దె” మెన ఒప్పన్ల.

6 జో కి ఒప్పన్లొది, జనాబ్ నెంజలిన్తె యేసుక దెర దెంక మెన వాట్ వజితె తిలో.

పస్కా వండుగ్చి అన్నిమ్ యేసుచ సిస్సుల్ తెయార్ కెర్రిసి
(మత్త 26:17-25; మార్కు 14:12-21; యోహా 13:21-30)

7 తెదొడి నే పులయల పోడియె కతి దీసి అయిలి. జా దీసి పస్కా వండుగ్చి రిసాచి కి మెండప్పిల్ల కండ అర్చితుమ్ దెవుల.

8 జాకయి యేసు పేతురుక చి యోహానుక “తుమ్ గెచ్చ, చి పస్కా వండుగు అన్నిమ్ అమ్ కతి రిసా దొర్చు జలిసి తెయార్ కెర” మెలన్.

9 “అమ్ కేనె తెయార్ కెరుక తుచి ఆన?” మెన జేవ్ పుసిల.

10 జోవయింక, “ఈందె, పట్టుమచి తెడి పెసిలదు మెలె, పాని వయితోసా ఎక్కిలో తుమ్క దన్నుల్ జయెది. జోచి వట్టి తుమ్ గెచ్చ చి, కేన్ గెరి జో పెనెది గే,

11 జో గేరీచో ఎజోమానిక తుమ్ కిచ్చో మెన మెలె, ‘అంచ సిస్సుల్ తెన్ ఆవ్ పస్కా అన్నిమ్ కతి గది కేన్ మెన అమ్చో గురుబాబు నంగితయ్’ మెన తుమ్ సంగ,

12 సామన్ తెయార్ కెర్లె వెల్లి అంతస్తు గది ఏక్ తుమ్క జా దెకయెది. ఒత్తయ్ అమ్చి రిసా పస్కా అన్నిమ్ తుమ్ తెయార్ కెర తా” మెన యేసు సంగిలన్.

13 జేవ్ గెచ్చ కెర, ‘జో సంగిల్ రితి ఎత్తి జర్లు జా అన్సె’ మెన దెక కెర, జా పస్కా అన్నిమ్క దొర్చు జలిసి ఎత్తి తెయార్ కెర్లె.

యేసు సిస్సుల్ తెన్ వండుగ్ అన్నిమ్ కంక
(మత్త 26:16-30; మార్కు 14:22-26; 1 కొరి 11:23-25)

14 వండుగ్ అన్నిమ్ కెర్లి సమయమ్ పావ జెతికయ్, యేసు సిస్సుల్ తెన్ జా అన్నిమ్ కంక మెన వెసిల.

15 తెదొడి యేసు జోవయింక, ఆవ్ సేడుక తిల సైమల్ నే జితె అగ్గ తుమ్చి తెన్ ఈంజ పస్కా అన్నిమ్ కంక మెన ఆవ్ ఒగ్గర్ ఆన జలయ్.

16 కిచ్చొక మెలె, దేముడు ఎదార్డుమ్ ఏలువ కెరుక అయిలె పొదిక, జోచి రాజిమితె ఈంజ పస్కా వండుగు గుర్తు జతి రచ్చనచి ముక్కిమచి అర్దుమచి కామ్ పూర్తి జర్లు కెర్లె ఎదక ఈంజ మదెనె, ఈంజ వండుగ్ అన్నిమ్ ఆవ్ అన్సె కయె నాయ్ మెన తుమ్క ఆవ్ సంగితసి.

17 జా వండుగ్ అన్నిమ్ పితి డొమ్మద్రాచ రన్నుమ్ యేసు తెదొడి దెర కెర, ‘ఈంజ తుమ్ దా దయ కెర్లెది’ మెన దేముడు అబ్బొన్క సంగ కెర, సిస్సుల్క “ఉంద, ఇన్నె తిలిసి తుమ్ వర్చ తెన్ పియి వంటన.

18 కిచ్చొక మెలె, దేముడుచి రాజిమ్ ఎదార్డుమ్ ఏలువ కెర్లి రితి జెతె ఎదక ఈంజ మదెనె ఆవ్ ద్రాచ రన్నుమ్ పియి నాయ్ మెన తుమ్క ఆవ్ సంగితసి” మెన యేసు సంగ కెర,

19 పోడి వెంట “తుమ్ ఈంజ దయ కెర్లెది” మెన దేముడు అబ్బొన్క సంగ కెర, జా పోడి మోడ కెర, సిస్సుల్క దా “ఉంద, ఈంజ అంచి ఆగ్. † అంక తుమ్ ఏద కెర్లి గుర్తుక తుమ్ ఇసి కంక అలవాట్ జా. ఉంద కా,” మెన దిలన్.

20 దస్సి, జా అన్నిమ్ కా కేడయిలి పొది ‡ గలన్ అన్నె దెర, “ఈంజ గలన్ ద్రాచ రన్నుమ్, ఆవ్ దెతి నొచి ప్రమానుమ్. తుమ్చి పాపుమ్ గెచ్చయితె రిసా నువ దెతి అంక లోయి. జా లోయిచి గుర్తు ఈంజ ద్రాచ రన్నుమ్.

§ 22:7 22:7 యేసు కి జయె వండుగు కెర్లి పొది అర్చితుమ్ జలన్. జో, జతి, కెయెక తెయెక సరిపుచువ జతి అర్చితుమ్ జలన్.

జోయ్య అర్చితుమ్ జలిసి తెంతో అన్సె అర్చితల్ నాయ్. ఎబ్రియల్ 9:28, 10:10. * 22:16 22:16 పస్కా వండుగు మెన

మాములుమ్ యూదుల్ కిచ్చొక కెరల మెలె, పూర్ణమ్ పొది జేవ్ ఐగుప్తు దేసిమ్ తా గొతిమాస్సుల్ జలిసి తెంతో ఎత్తి అదికారుమ్ తిలో దేముడు జోవయింక రచ్చుచువ కెర్లిసి ఏద కెరుక. నిర్ణమకాండుమ్ 3 అద్యయమ్ తెంతో యెహోసువ ఎద ఈంజ మత్తెలి పూర్తి తయెది.

ముక్కిమ్క అన్నె నిర్ణమకాండుమ్ 12, 13 అద్యయల్ దెకితె సగుమ్ అర్దుమ్ జెయెది. గని ‘పస్కా వండుగ్చి గుర్తు జతి ముక్కిమచి రచ్చన్’ మెలె, పాపుమ్ తెంతో, పాపుమచి ఉగుమ్ తెంతో, పాపుమచి లోకుమ్ తెంతో మాస్సుల్ రచ్చుచువ జా పరలోకుమచి రాజిమితె బెదితసి, పరలోకుమచి గెతిసి. † 22:19 22:19 ఈంజ ఎత్తి తోలితో రెగిడ్ల సగుమ్ పున్నకల్తె ‘తుమ్చి’ తెంతో 20 నంబర్చి కోడు పూర్తి తెన్ చ

కోడె తయె నాయ్. ‡ 22:20 22:20 దన వండుగ్ అన్నిమ్తె బెర్లె, చెత్తర్ నుట్లు ద్రాచ రన్నుమ్ పిపుల.

21 “ఈంది, అంక దెర, సార్పు కెర దెతోసా ఈంజ బల్లతె వెన అంచి తెన్ అన్నిమ్ కెర్తయ్. జోచి ఆతు అంచి ఆతు తెన్ ఈంజ బల్లచి ఉప్పిరి అన్యె.

22 కిచ్చొక మెలె, ‘జర్గు జంక అన్యె’ మెన దేముడు అగ్గె తెంతో రెగెడ్డి రితి ఆవ్ మాన్సు జా జెర్కున్ అయ్లోసా కిగచ్చుక అన్యె, గని అయ్యె! కేన్ మాన్సు అంక దెర విరోదుమ్ నుదల్చి అత్తి సార్పు కెర దెయెద గే, జో మాన్సు జతి సిచ్చ కెడ్డి!” మెన సంగిలన్.

23 జో దస్సి సంగితికయ్, ‘ఆవ్ గె? ఆవ్ గె?’ మెన ఎక్కిలో తెన్ ఎక్కిలో లట్టబుక దెర్ల.*

ఎక్కిలోక ఎక్కిలో సేవ కెర్తె బుద్ది తెన్ తతిసి చి కోడు

24 జలె, జోవయింతె కొన్సొ వెల్లో జయెదె గే సిస్సుల్ లట్టబనుక దెర్ల.

25 జేవ్ దస్సి జతికయ్, యేసు జోవయింక, “యూదుల్ నెంజల వేర రానల్ సొంత గవురుమ్ ఉచరన ప్రెజల్క జాడ్లు వయడ్తె తిలి రిత జోవయింక పోటి తెన్ ఏలువ కెర్తతి, అన్యె ప్రెజల్చి ఉప్పిరిచ అదికారుల్ ‘దర్ముమ్ కెర్తన’ మెనంతతి.

26 గని తుమ్చి తెన్ దస్సి తంక జయె నాయ్. తుమ్చి తెన్ వెల్లో జతోసా ఎత్కిచి కంట దకిలో రితో జవున్ చి, తుమ్క ఏలువ కెర్తెసా సేవ కెర్తెసా రితో జవున్.

27 మాములుమ్ ఈంజ లోకుమ్చి రగగుమ్ ఉచరై, కొన్సొ వెల్లో జయెదె? అన్నిమ్క బల్లతె వెసితోసా గే జోవయించి అన్నిమ్ వంట దెతో గెత్తి నుదె గె? బల్లతె వెసితోసా వెల్లో జయెదె, గెద. జలె, ఆవ్ తుమ్చి నెడిమి తా వంట దెతో గెత్తి నుదెచో రితో జతసి. ఈంజ అర్దుమ్ కిచ్చొ జయెదె గే తుమ్ ఉచర.

28 †తుమ్ అంచ సిస్సుల్ ఆవ్ సేడ్ల బాదల్ ఎత్కితె బెద నిదానుమ్ తా అన్యెన్,

29 అన్యె, జోచి రాజిమ్చి ఉప్పిరి ఆవ్ ఏలువ కెర్తె రిసా కిసి అంచో దేముడు అబ్బొ అంక అదికారుమ్ దా అన్యె గే, దస్సి

30 తుమ్ అంచి రాజిమ్తె అంచి బల్లతె వెన కంక పింక చి, కితుమ్ బారజన్ బార సిజాననల్తె వెన, ఇస్రాయేలుల్చ బార సెకుమ్లుచక అంచి తెడి ఏలువ కెరుక మెన తుమ్క ఆవ్ నిసాన అన్యె” మెన యేసు జోచ సిస్సుల్క సంగిలన్.

పేతురుక “ ‘జోక నేని’ మెన అంచి రిసా తుయి తివ్వెరి సంగితె”

(మత్త 26:31-35; మార్కు 14:27-31; యోహా 13:36-38)

31 పడ్డొ, పేతురుచి అగ్గెచి నావ్ దెర, “సిమోను, సిమోను, ఈంది, తేర్బోద కిసి తందుడు పూన నినెదె గే, దస్సి తుమ్క నినితి రితి అల్లర్చి పరిచ్చు కెరుక మెన నయ్తాన్ నెలవ్ నజన అన్యె.

32 గని తుచి నముకుమ్ పాడ్ జా గెస్సు నాయ్ మెన ఆవ్ ప్రార్దన కెర అన్యె, అన్యె, తుమ్ అన్నె బుద్ది జా అంచి వచ్చెన అన్యె జెతి రితి తుమ్ మార్పువ జలదు మెలె, తుమ్చ బాపుడ్లు జల అంక నంపజల అన్యె మాన్సుల్చి నముకుమ్ తుమ్ డిట్టుమ్ కెర” మెన యేసు పేతురుక చి, అన్నె సిస్సుల్క సంగిలన్.

33 తెదొడి పేతురు “ప్రబు, తుయి జేల్తె జేలి తంక జలెకి, మెరుక జలెకి, తుచి తెన్ బెద జేలి జయిందె జవున్, మెరిందె జవున్, అంక బి నాయ్” మెలన్.

34 జలె, పేతురు దస్సి సంగితికయ్, యేసు జోక, “ఓ పేతురు, తుక ఆవ్ కిచ్చొ మెంతసి మెలె, జోక ఆవ్ నేని మెన, తుయి తివ్వెరి అంచి రిసా సంగితె ఎదక కుకుడొ వా:నె నాయ్”.

డబ్బుల్, సామన్చి కడ్డుమ్చి రిసా యేసు సంగిలిసి

35 తెదొడి యేసు సిస్సుల్క అన్యె, “జా నుట్టు దేముడుచి రాజిమ్ పాసి జా అయ్లినచి రిసాచి నుబుమ్ కబర్ సంగ సంగ మాన్సుల్క చెంగిల్ కెర కెర తుమ్ బుల” మెన తుమ్క ఆవ్ తెర్తయ్లి పొది “నెంచె

§ 22:22 22:22 మెలె, ‘మెరుక అన్యె’. * 22:23 22:23 ఒత్త తెంతో యేసుక దెర దెతో యూదా బార్ జా అదికారుల్తె గెల్. యోహాను 13:30. † 22:27 22:27 యోహాను 13:2-16. ‡ 22:28 22:28 యూదా జోవయింతె నాయ్. 23నంబర్ కోడుచి ఎట్టచి కోడు దెక. § 22:30 22:30 ‘తుమ్ బారజన్’ మెలె, జో యూదా పిట్టె, గెద-యేసుక విరోదుమ్ నుదల్చి అత్తి సార్పు కెర దెలోచి రిసా. గని యేసు జివ్ జా పరలోకుమతె వెగ గెలి పడ్డొ, తిల సిస్సుల్ ప్రార్దన కెర అన్యెక్కెక, మెలె మత్రియ మెలోసాక నిసాన బెదవచ్చ, చి అన్యె బారజన్ జా గెల. బారికుల్ 1:15-26.

నెంతె, డబ్బుల్ నెంచె నెంతె, చి జోడ్డు నెంతె గెచ్చు మెన *సంగిలయ్ గెద. జలె, దసచ నెంతె గెతికయ్, తుమ్క కిచ్చొ జలెకు కొత్తు, తిలి గె? మెన పుసిలన్, చి “కిచ్చొయ్ కొత్తు, నాయ్” మెల.

36 † దస్సి జబాబ్ దెతికయ్, జోవయింక అన్యె, “అమ్మె జలె, కక్క నెంచె గే డబ్బుల్ నెంచె గే అన్యె గే, దెర తంక, చి కక్క, కండా తయె నాయ్ గే, జోవయించి కోటు విక కండా గెననుక.

37 కిచ్చొక మెలె, తుమ్క ఆవ్ కిచ్చొ సంగితసి మెలె,

‡ కి నేరిమ్ కెల్లొసా మెన తీర్పు కెరు

మెన దేముడుచి కొడెతె రెగ్గయ్లి కోడు అంచితె పూర్తి జర్గు జంక అన్యె. కిచ్చొక మెలె, అంచి రిసా రెగిడ్డిసి ఎత్తి, కచితుమ్ జర్గు జయెదె” మెలన్.

38 † తెదొడి సిస్సుల్, “ఈందె, ప్రబు, అమ్చితె దొన్ని కడ్డుమలు అన్యె” మెల, చి “సాలు” మెలన్.

యేసు మొరుక తిలిన్చి రిసా జో ప్రార్దన కెర్లెసి

(మత్త 26:36-46; మార్కు 14:32-42)

39 యేసు ఒలీవ మెట్టయ్ గెచ్చుక అలవాలీ తిలి చి, తెదొడి బార్ జా ఒత్తయ్ గెలన్. జోచ సిస్సుల్ కి జో తెన్ బెద గెల.

40 జలె, ‘గెత్తేమునే’ మెంతి జో గెతి ఒత్తచి తోటతె పాచె కెర, సిస్సుల్క యేసు, “అమ్మె జెత అల్లర్ తుమ్క ఏక పరిచ్చ రితి జయెదె. ఈంజ ఎత్కితె తుమ్ పాపుమ్ నే కెర్తి రిసా ప్రార్దన కెర్తె తా” మెన యేసు సంగ కెర,

41 వత్తురు గల్లి ఎదిలి దూరి గెచ్చు కెర, మొగ్రల్ టొక,

42 “ఓ బ, తుక ఇస్టుమ్ తిలె, ఈంజ గిచ్చుచి ఆవ్ నే పితి రితి అంక పిట్టవు, గని అంచి ఇస్టుమ్ పోని. తుచి ఇస్టుమ్ జర్గు జవున్” మెన దేముడు అబ్బొన్క ప్రార్దన కెర్లెన్.

43 * పరలోకుమ్ తెంతో దూత ఎక్కిలొ డీస జోక డిట్టుమ్ కెర్లెన్.

44 † తెదొడి జోచి పెట్టి ఒగ్గర్ బాద దుకుమ్ నేడ, అన్న ఒగ్గర్ ఆస తెన్ ప్రార్దన కెర్లెన్ చి, జోచి గాము కిసి పుట్టిలి మెలె, నుక్కల్ లోయి జా బు:య్యె నేడ గెలన్.

45 జలె, యేసు ప్రార్దన కెరుక ముల ఉట్ట కెర సిస్సుల్ తిలిన్తె అయ్లె, జేవ్ ఒగ్గర్ దుకుమ్క అల్పు జా నిజ గెల అన్యె.

46 అన్యె, జోవయింక “తుమ్ కిచ్చొక నిజాక? ఉట్ట, చి ఈంజ జెతి అల్లర్ చి పరిచ్చతె తుమ్ పాపుమ్ నే కెర్తి రితి ప్రార్దన కెర్తె తా” మెలన్.

యేసుక దెరుక మెన యూదా చి జనాబ్ జట్టు తెన్ అయ్లిసి

(మత్త 26:47-56; మార్కు 14:43-50; యోహా 18:3-11)

47 యేసు జా కోడు సంగితె తతికయ్, ఒగ్గర్జిన్ జనాబ్ మాన్సుల్ జట్టు తెన్ అయ్లె, చి కో జోక పుర్తి గెచ్చు వాట్ దెకయ్తె తిలన్ మెలె, యేసుచ బారజిన్ సిస్సుల్తె తిలొ ఇస్సరియోతు యూదా. జో యూదా, జలె, యేసుక చుంబుక మెన జుంచి పాసి అయ్లెన్,

48 గని యేసు జోక, “ఓ యూదా, ఆవ్ మాన్సు జా జెర్మన్ అయ్లొసొక దెర దెతి పొది ఉప్రమెన్సుక చుంబ దెతె గె?” మెన జోక పుసిలన్.

49 జలె, ‘జోక దెరుల’ మెన యేసు తెన్ తిల జోచ సిస్సుల్ దెక కెర, “ప్రబు, అమ్చ కడ్డుమలు తెన్ జోవయింక కండుమ గె?” మెన పుసిల.

* 22:35 22:35 లూకా 10:4, 9:3. † 22:36 22:36 ఈంజ 36నంబర్చి కోడు కిచ్చొక సంగితయ్, బెర్తి, ‘అల్లర్ జెవుల చి తుమ్ డిట్టుమ్ తతి రిసా తెయార్ జా’ మెలి అర్దుమ్కయ్. గని ‘మాములుమ్ అయ్దలకె యుద్దుమ్ కెరుక తెయార్ జా’ మెలి అర్దుమ్క యేసు సంగె నాయ్. వట్టె పేతురు జో మాన్సుచి కంగొ కండా తెన్ సిందితికయ్ యేసు గేల కెర్లెన్. మత్తెయ 26:52, యోహాను 18:11, లూకా 22:51.

‡ 22:37 22:37 యెసయా 53:12. § 22:38 22:38 నెంజెలి కడ్డుమలుచి రిసాచి బాలి సిస్సుల్ అర్దుమ్ నే కెర్లెన్ రిసా ‘ఈందె ప్రబు, అమ్చితె దొన్ని కడ్డుమలు అన్యె’ మెల, చి “సాలు, అన్న దస్సి లట్టబా నాయ్” మెలన్. * 22:43 22:43 ఈంజ ఎత్కి రెగిడ్డ నగుమ్ పున్కల్తె 43 చి 44నంబర్లచ కొడె తయె నాయ్. † 22:44 22:44 ఈంజ ఎత్కి రెగిడ్డ నగుమ్ పున్కల్తె 43 చి 44నంబర్లచ కొడె తయె నాయ్.

50 జోవయింతె †ఎక్కిలో కిచ్చొ కెర్లొ మెలె, కీఎత్తిక వెల్లొ పూజరిచొ గొత్తి సుదొక కండుక గెచ్చు, జోవొ ఉజిలో కంట్టొ నీంద గెలన్.

51 జలె యేసు “అన్నె దన కమె పోన” మెన నంగ కెర, జో గొత్తి సుదొచొ కంట్టొ చెంగిల్ కెర్లన్.

52 తెదొడి జోక దెరుక మెన బారొ జా అయిల వెల్లెల పూజర్లుక, దేముడుచి గుడిచ సయన్యుమ్ సుదల్చ అదికారుల్క చి వెల్లెల సుదల్క యేసు, “అవ్ కిచ్చొ చొర్లయ గే, చి కత్తులు *డండల్ దెరన తుమ్ అయిలదు?

53 అవ్ రోజుక దేముడుచి గుడితె గెతె తిలె కి, తెదొడి తుమ్ అంక దెర్లద నాయ్. గని తుమ్చి కామ్ తుమ్ జర్లు కెర్లె గడియ ఈంజ, అందర్ లోకుమ్చి సెక్తి ఏలువ కెర్లె గడియ ఈంజ” మెన సంగిలన్.

యేసుచి రిసా ‘జోక నేని’ మెన పేతురు తివ్వెరి సంగిలిసి

(మత్త 26:57-58,69-75; మార్కు 14:53-54,66-72; యోహా 18:12-18,25-27)

54 తెదొడి యేసుక దెర ఎత్తిక వెల్లొ పూజరిచి మేడతె కడ నిల. కడ నెతె తిలి పొది పేతురు, జలె, దూరి దూరి యేసుచి పట్టి గెతె తిలన్, అన్నె,

55 ఎత్తిక వెల్లొ పూజరిచి మేడచి వీదిచి నెడిమి సగుమ్జిన్ చల్లిక ఆగి లావ తప్పుక మెన వెన తతికయ్, పేతురు జోవయింతెన్ వెసిలన్.

56 పేతురు దస్సి ఆగిచి ఉజిడతె వెన తతికయ్, తేరబొద గొత్తి సుదొ ఎక్కి జోక దెక కెర, చెంగిల్ దెక కెర, “ఈంజొ మాన్సు యేసు తెన్ బుల్లె తిలొ” మెలి.

57 గని పేతురు “అమ్మ, జోక అవ్ నేని” మెన సంగిలన్.

58 పడ్డె అన్నె గడియ గెతికయ్, అన్నెడ్లొ పేతురుక దెక కెర, “తుయి కి జో తెన్ తిలొసా” మెలన్, గని “బాబు, అవ్ నెంజి” మెన పేతురు సంగిలన్.

59 అన్నెక్ గంట గెతికయ్, అన్నె అన్నెడ్లొ పేతురుచి రిసా “నిజమి, ఈంజొ మాన్సు కచితుమ్ జో యేసు తెన్ తిలన్. ఈంజొ కి †గలిలయు సుదొ గెద!” మెలన్.

60 పేతురు “బాబు, తుయి సంగితిన్చి అర్దుమ్ అవ్ నేని” మెలన్, జో అన్నె లట్టట్తె తతికయ్, బేగి కుకుడొ వాసిలన్.

61 తెదొడి యేసుప్రబు పసుల పేతురుక చెంగిల్ దెకిలన్ చి, “కుకుడొ ఆజి నే వానితె అగ్గె తుయి తివ్వెరి అంచి రిసా ‘జోక నేని’ మెంతె” మెన యేసుప్రబు సంగిలిసి పేతురు ఏదస్ట కెర్లను, చి

62 జా వీదె తెంతొ బారొ జా బయిలె గెచ్చొ కొక్క కొక్క ఏడ్లన్.

యేసుక రకితె తిలన జోక కొంకడ పెట్టిసి

(మత్త 26:59-68; మార్కు 14:55-65; యోహా 18:19-24)

63 తెదొడి యేసుక రకితె తిల మాన్సుల్ యేసుక కొంకడ కెర దెబ్బల్ పెట్ట చి,

64 జోచ అంకివొతె కచ్చెల్ బంద కెర, “తుక కో పెట్ట గే †తుయ్ క్రీస్తు గద, అమ్క నంగు!” మెల, అన్నె

65 జోక దూసువ కెర్ల అన్నె ఒగ్గర్ కొడొ సంగిల.

66 రాత్ పాయితికయ్, యూదుల్చ వెల్లెల సుదల్, జోవయించ వెల్లెల పూజర్లు చి, మోసీ తెన్ దేముడు దిలి ఆగ్గల్ సికడ్డన తగు కెరుక మెన వెసిల చి, జా తగు కెర్లెన్తె యేసుక కడ ఆస్స.

67 “ †తెర్లయిందె” మెన దేముడు సంగిలొ క్రీస్తు రచ్చింఛువ కెర్లొసా తుయి గే?” మెన అగ్గెతె వెసిలన పుసిల. యేసు కిచ్చొ సంగిలన్ మెలె, “అవ్ తుమ్క సంగిలె, అంక నంప కెర్లు నాయ్,

68 అన్నె, తుమ్క అవ్ ఏక్ కోడు పుసిలె, అంక జబాబ్ దేసు నాయ్,

69 గని ఇన్నెచి పడ్డె అవ్ మాన్సు జా జెర్లున్ అయిలొసా ఎత్తి సెక్తి అదికారుమ్ తిలొ అమ్చొ దేముడుచి ఉజెతో పక్క వెన తతిసి దెకితె” మెలన్.

† 22:50 22:50 కొన్నె మెలె, పేతురు. యోహాను 18:10 దెక.

§ 22:50 22:50 ‘ఎత్తిక వెల్లొ పూజరి’ మెలె, మొత్తము వెల్లెల పూజర్లుకె ఎక్కిలొ ‘ఎత్తిక వెల్లొ పూజరి’ జయెదె. దేముడుచి గుడిచ సగుమ్ కమె జో ‘ఎక్కిలొయ కెరెదె. జివ్ ఎత్తిక జో వెల్లొ జయెదె.

* 22:52 22:52 నెంజిలె ‘జెడ్డివొ’. † 22:59 22:59 యేసు యూదయ ప్రదేసిమ్చి యెరూసలేమ్ పట్టుమ్తె జెర్లిలికి గలిలయ ప్రాతుమ్తె వడ్డిలన్. ‡ 22:64 22:64 మత్తయి 26:68 దెక.

70 “దన్ని జలె, అమ్చో దేముడుచొ పుత్తుసి తుయి గె?” మెన పుసిల, చి జో జోవయింక “తుమ్ సొంత సంగిల్ రితి జొయ్యి ఆవ్” మెలన్.

71 యేసు దన్ని సంగితికయ్, ‘దేముడుచొ పుత్తుసి ఆవ్’ మెన యేసు ఒప్పున్సి జో దేముడు తెన్ నమ్ముందుమ్ సంగిన్ రితి జతయ్. జా తప్పు మెన ఉచర, “అమ్క అన్నె సాచి అవ్నరుమ్ నాయ్. జో సొంత సంగితికయ్ నూన్మమ్.”

23

పిలాతు అదికారిచి మొక్కె యేసుక నింద సంగిలిసి

(మత్త 27:1-2,11-14; మార్కు 15:1-5; యోహా 18:28-38)

1 తెదొడి తగుతె వెసిల వెల్లెల నుదల్ ఎత్తి ఉట్ట యేసుక పిలాతు * అదికారితె కడ నిల చి,

2 జోచి మొక్కె జోక బీచడ కెర, కిచ్చొ నేరిమ్ సంగిల మెలె, “క్వెసర్ రానోచి అమ్క ఏలుప కెర్తొ ప్రబుతుమ్క సిస్తు దాన నాయ్” మెన. “ఆవ్ క్రిస్తు, ఆవ్ రానో మెనన, ఈంజొ మాన్సు అమ్చ ప్రజెల్క వెర్రి సికడ్డయ్”.

3 పిలాతు అదికారి యేసుక కిచ్చొ పుసిలన్ మెలె, “తుయి యూదుల్చొ రానొ గె?”. “తుయి సంగిల్ రితి మెన”, యేసు జబాబ్ దిలన్.

4 తెదొడి వెల్లెల పూజర్లక చి జనాబ్క “ఈంజొ మాన్సు కిచ్చొ నేరిమ్ నే కెర్లె రితి అంక డీస్తయ్” మెన పిలాతు అదికారి తీర్పు సంగిలన్.

5 జేవ్ కిచ్చొ మెల మెలె, గలిలయతె మొదొల్ కెర ఈంజె యెరూసలేమ్ ఎద కి “అమ్చ యూదుల్ జితిన్ ఎత్తితె, ఈంజొ కిచ్చొ కిచ్చొ సికడ, ప్రబుతుమ్చి ఉప్పిర్ ప్రజెల్చి నెంతుమ్ పిట్టయతయ్” మెన యేసుచి రిసొ పిలాతుక బియడకు ఉచర అబద్దుమ్ సంగిల.

హేరోదుతె పిలాతు యేసుక తెద్రయ్లిసి

6 గలిలయచి కోడు పిలాతు అదికారి నూన కెర, యేసుచి రిసొ “దన్ని జలె, ఈంజొ మాన్సు గలిలయడు గె?” మెన పుసిలన్

7 ‘హేరోదు ఏలుప కెర్లె గలిలయతె తెంతొ యేసు బార్ జలొ’ మెన నూన కెర, జోక జో హేరోదు రానొతె తెద్రయ్లన్. జా పొది హేరోదు యెరూసలేమ్తె జా తిలన్.

8 జలె, హేరోదు యేసుక దెక కెర, సర్లసంతొసుమ్ జలొ. కిచ్చొక మెలె, జోచి రిసొ అగ్గయ్ తెంతొ నూన తిలొ చి, ‘జో కెర్తి కిచ్చొ జవున్ వెల్లి కామ్ దెకిన్దె’ మెన హేరోదు జోక దెకుక ఒగ్గర్ ఆన జా తిలొ.

9 జాకయ్, యేసుక జేవ్ మాన్సుల్ బత్త కడ నెతికయ్, హేరోదు ఒగ్గర్ కొణొల్ జోక పుసిలన్, గని యేసు ఎక్కి కోడు కి జబాబ్ దెయె నాయ్.

10 తెదొడి వెల్లెల పూజర్ల చి మోసి తెన్ దేముడు దిలి ఆగ్గుల్ సికడ్డన పురె బీచ కెర, ఒగ్గర్ విస్సుమ్ తెన్ యేసుచి ఉప్పిరి నేరిమ్లు వయడుక దెర్ల.

11 అన్నె హేరోదు అదికారి జోచి సయన్యమ్ తెన్ జోక నిస్కారుమ్ దెకిత్ రితి మార్కువ జా, కొంకడ్ల చి, చెంగిల పాలల్ జోక గల దా, పిలాతుతె అన్నె తెద్రయ్లన్.

12 చి హేరోదు చి పిలాతు అగ్గె తెంతొ ఎక్కిలోక ఎక్కిలో విరోదుమ్ జా తిలె కి, జయ్యి దీసి తెంతొ సినేతుమ్ బందిల.

పిలాతు యేసుక జోవయించి అత్తి సొర్పు కెర్లెసి

(మత్త 27:15-26; మార్కు 15:6-15; యోహా 18:39-19:16)

13 తెదొడి పిలాతు వెల్లెల పూజర్లక చి యూదుల్చ అదికారుల్ ఎత్తిక బుకారొ కెర,

* 23:1 23:1 పిలాతు అదికారి రోమ్ దేసిమ్చి నాన్ తెన్ యూదయ ప్రదేసిమ్చి ఉప్పిరి చి సమరయ ప్రదేసిమ్చి ఉప్పిరి ఏలుప కెర్లె తిలన్.

† 23:2 23:2 క్వెసర్ రానో రోమ్ దేసిమ్చి ఉప్పిరి జేవ్ ఆక్రమించువ కెర్లె దేసిమ్లుచి ఉప్పిరి వెల్లి రానొ జా తిలొ.

14 జోవయింక, “ ప్రజల్ ప్రబుతుమ్చి తెడి సేంతుమ్ నే తతి రితి ఈంజో సికడ్డయ్’ మెన సంగ తుమ్ ఈంజో మాన్సుక అంచితె కడ అన్నదు, అన్నె, తుమ్చి మొక్కె అవ్ పరిచ్చ కెర్లె, ఈందె, ఇన్నెక ఉప్పిరి తుమ్ సంగిల నేరిమ్లుతె కేన్ కి ‘కెర్లె’ మెన రుజ్జు డీసి నాయ్.

15 హేరోదు కి పరిచ్చ కెర్లె చి, జోక అమ్తె అన్నె తెద్రయ్లో, గెద. ఈందె, మొర్తి సిచ్చ జతి కిచ్చి నేరిమ్ కి కెరె నాయ్.

16 జాకయ్, ఇన్నెక ఇదిల్ బుద్ది సికడ్డి రితి అంచ నయ్స్యమ్లు కొర్తల్ తెన్ పెటుతు చి, ఇన్నెక విడ్డల్ కెరిందె” మెలన్.

17 కిచ్చొక మెలె, యూదుల్క సర్ల కెర్తి రితి వెర్ని వెర్ని జా పండుగు పొది జేలో జలో కేన్ జవున్ మాన్సుక విడ్డల్ కెరుక జో అదికారిక అలవాట్.

18 గని “జో మాన్సుక పోని. జోక మారు చి, బరబ్బుక ములు. జోకయ్ అమ్క కావలె” మెన ఎక్కి జట్టు జా కేక్ గల.

19 బరబ్బు, జలె, కొన్నె మెలె, యెరూసలేమ్ పట్టుమ్తె ప్రబుతుమ్చి ఉప్పిరి ప్రజల్ విరోదుమ్ కెర్తి రితి జో అల్లర్ కెర తిలి రిసాచి, నరు అత్య జో కెర తిలి రిసా జోక జేలి కెర జేల్తె గల తిల.

20 తెదొడి కిచ్చొ జలి మెలె, యేసుక విడ్డల్ కెరుక మెన తెదొడి ఎద పిలాతుక ఇస్టుమ్ తిలి రిసా, దస్సి మెన కేక్ గల బెర తిలసక అన్నెక్ సుట్టు సంగుక దెర్తెకయ్,

21 జేవ్ ఎత్తిజన్ “జోక కిలివతె గల టీచడ మొర్తి సిచ్చ కెరు! మొర్తి సిచ్చ కెరు!” మెన కేక్ గల.

22 తెదొడి అన్నెక్ సుట్టు, ఇన్నెతెన్ మొత్తుమ్ తివ్వరి జలి, పిలాతు “కిచ్చొక? ఈంజో కిచ్చొ నేరిమ్ కెర అన్నె? మొర్తి సిచ్చ జతి ఎదిలి కేన్ నేరిమ్ ఈంజో కెర్లెన్చి రుజ్జు అంక డీసి నాయ్. జాకయ్ ఇన్నెక కొర్తల్ తెన్ వెరు విడ్డి సికడ్డు చి, విడ్డల్ కెరిందె” మెలన్.

23 గని బెర తిల జనాబ్ “జోక సిలువ గెలు! మొర్తు!” మెన కేకుల్ గల గల, బలవంతుమ్ కెర జిన్.

24 జాకయ్ “జేవ్ బలవంతుమ్ కెర సంగిలి రితి జర్గు జవున్” మెన పిలాతు తీర్పు దిలన్,

25 అన్నె, ప్రబుతుమ్చి ఉప్పిరి ప్రజల్క విరోదుమ్ సికడ్డె నరు అత్య కెర తిలో బరబ్బుకయ్ ముల దిలన్; బెర తిల జనాబ్ బలవంతుమ్ కెర తిలి రిసా-చి “యేసుక కిచ్చొ కెర్లె గే కెర తుమ్చి ఇస్టుమ్ తుమ్చి పూచి” మెన, జోవయించి అత్తి జోక సార్పు కెర దిలన్.

యేసుక సిలువతె టీచడకు మెన కడ నిలిసి (మత్త 27:32-44; మార్కు 15:21-32; యోహా 19:17-19)

26 జలె, యేసుక పట్టుమ్ ఒత్తల్తేచి బయిలె కడ నెతె తా, ‘యేసుక టీచడ్డి సిలువ వయన జోవయించి పట్టి ఇండున్’ మెన, కేనే గే బయిలు దేసిమ్ తెంతో జా వాట్ జెతె తిలో సీమోసు మెలో కురేనియు ప్రాంతుమ్చొ మాన్సుక దెర కెర, జోక జా సిలువ వయడ్డ.

27 అన్నె, యేసుచి పట్టి ఒగ్గరిజిన్ జనాబ్ జెతె తిల, అన్నె జోవయంతెన్ ఒగ్గరిజిన్ తేరబోదల్ గుండెతె పెటుం ఏడుకుడు జతె తిల.

28 గని యేసు పసుల జోవయింక, “ఓ యెరూసలేమ్చె తేరబోదలు, అంక జెతి బాద చి రిసా తుమ్ ఏడ నాయ్, గని తుమ్ కిచ్చొచి రిసా ఏడుక మెలె, తుమ్క చి తుమ్చ బోదల్క రిసాయ్ ఏడ.

29 మెలె, ఈందె, ‘గొడ్డు జలసక, బోదల్ నే పాయిలసక, దూద నే పియడ్డసక చెంగిలి!’ మెన తుమ్ సంగిత దీసల్ జెవుల.

30 కిచ్చొక మెలె, జేవ్ దీసల్కచ సచ్చల్ దెక కెర, ‘అమ్చి ఉప్పిరి సీడ అమ్క డంక గెల’ మెన డొంగ్రల్క చి మెట్టల్క సంగుల.

31 * అమ్వి తిలి మట్టుక మాన్సుల్ ఇసి కెర్లె, సుకా గెలి మట్టుక కిచ్చొ కెరులగే?” మెన జేవ్క సంగిలన్.

32 యేసు తెన్ మొర్తి సిచ్చ జతి రిసా అన్నె దొగులక కి ఒత్త కడ నిల. జేవ్ నిజామి నేరిమ్లు కెర్లెన్.

† 23:17 23:17 ఈంజె ఎత్తి రెగిడ్డ తొలితొవ సగుమ్ పుస్తకల్తె 17నంబరిచి కోడు తయ్ నాయ్. § 23:21 23:21 ‘సిలువ’ మెలె, ఏక టీచెతి చి ఏక అధుమ్ జతి దొన్ను డండల్ బెదవుల. జా సిచ్చ జతో మాన్సుక జా సిలువతె ఎంగ్లవ కెర, జోవయించి అత్తొ చట్టొ చంపొ కెరవ, అత్తొచట్టొతె మేకుల్ పెట, సిలువ బుయ్యె టీచ లోవ కెర, దస్సి ములుల. జో సిచ్చ జతో మాన్సు దస్సి ఒబొయ్ జా మొరిదె. రోమ్ దేనిమ్చి అలవాట్ తెన్ చి సిచ్చ, జా. * 23:31 23:31 నెంజెలి, ‘అవ్ తిలో దారు జలోసాక మాన్సుల్ ఇసి కెర్లె, తుమ్ సుకా గెలి దారు జతసక కిచ్చొ కెరుల?’

యేసుక నిలువతె టీచడ్డిసి

33 జలె, 'గిడ్డి రితి పొలికచి మెట్ట' మెలిన్తె జేవ్ ఎత్తిజన్ గెచ్చు పాచ కెర, యేసుక జోచి నిలువతె టీచడ్డి చి, జో డెబ్రి పక్క ఎక్కిలోక చి ఉజెతో పక్క ఎక్కిలోక జేవ్ దొగుల నేరిమ్ కెర్లసక కి ఎక్కిన్ నిలువలతె టీచడ్డి.

34 † అన్నె, జోక దస్సి కెర్లసచి రిసా యేసు "ఓ బ, ఇన్నెక చెమించుప కెరు. కిచ్చొ కెర్తతి గే నేన్తి" మెన దేముడు అబ్బొన్క ప్రార్థన కెర్లన్.

జోక నిలువతె టీచడ్డి †జమాన్లు సుదల్ జోచ పాలల్ వంటనుక మెన చీటి గలిల.

35 ప్రెజల్ పాసి టీచ తా దెకితె తిల, "జో అన్నె మాన్సుల్క రచ్చించుప కెర్ల, గెద. దేముడు 'తెద్రయిందె' మెన సంగ తిలో రచ్చించుప కెర్లొనా క్రీస్తు జయెదె జలె, జోయ్యి నిసాన్లొనా జయెదె జలె, జోక జోయ్యి రచ్చించుప కెరస్సు!" మెన యూదుల్చ అదికారుల్ జోక ఆసిల.

36 జమాన్లు సుదల్ కి జోక కొకడ్డి. జోచి పాసి జా కెర, కీఅమడి తిలి ద్రాచ రస్సుమ్ చంపా కెర దా,

37 "తుయి యూదుల్చొ రానొ జలె, తుకయ్ తుయి రచ్చించుప కెరను!" మెన కొండె తిల.

38 పడ్డొ అన్నె కిచ్చొ కెర్ల మెలె, * "యూదుల్చొ రానొ ఈంజొ" మెన రెగిడ్డి దార్చిగండ యేసుచి బోడిచి ఉప్పిరి ఒడొయ్ల.

యేసు తెన్ నిలువలతె ఒడొయ్ జా తిల దొగుల చోర్లు

39 ఒత్త అన్నె నిలువలతె ఒడొయ్ జా తిల నేరిమ్ కెర్ల దొగులతె ఎక్కిలో, జలె, " 'తెద్రయిందె' మెన దేముడు సంగిలో క్రీస్తు రచ్చించుప కెర్లొనా నెంజన్ గె? జలె, తుకయ్ తుయి రచ్చించుప కెరను చి అమ్క కి రచ్చించుప కెరు!" మెన యేసుక దూసుప కెర సంగిలన్.

40 జలె, జో ఎక్కిలో దస్సి లట్టబ్బికయ్, అన్నెజొ జోక "ఇన్నెతెన్ తుయి ఎక్కి రితి సిచ్చు జలెకి, దేముడుక బిన్ని నాయ్ గె?

41 ఆమ్ జలె, అమ్ నేరిమెల కెర్లి రిసాయి నాయిమ్ తెన్ అమ్క సిచ్చు కెర అస్సి, అమ్ కెర్ల కమొక జెతి సిచ్చుతె అమ్క గల అస్సి. గని ఈంజొ మాన్సు కిచ్చొ ఇదిలిన్ తప్పు కి కెరె నాయ్" మెన ఈంజొ అన్నెజొ †చోరు తొల్లితోచొక గేల కెర.

42 జో యేసుక, "ఓ యేసుప్రబు, తుయి రానొ జా ఏలుప కెర్లె తుచి అదికారుమ్ తెన్ అన్నె జెతి పొదిక అంక ఉచర దయ్ దెకు" మెన సంగిలన్.

43 యేసు జోక, "తుక ఆవ్ కచితుమ్ సంగితసి మెలె, ఆజ కి చెంగిల్ తోట రితి †పరద్రెసుతె అంచి తెన్ తస్త" మెన సంగిలన్.

యేసు మొర గెలిసి

(మత్త 27:45-56; మార్కు 15:33-41; యోహా 19:28-30)

44 మెద్దెన, బార గంటల్ జలి పొది తెంతొ, జలె, తిన్ని గంటల్ ఎద, పొద్దు అందర్ జా గెలి చి, కీజా దేసిమి ఒండి అందర్ జా గెలి.

45 అన్నె కిచ్చొ జర్లు జలి మెలె, దేముడుచి గుడితె ఒడొవ తిలి *తెర ఉప్పిర్ తెంతొ ఎట్టొ ఎద చిరి జా దొన్ని గండల్ జా గెలి.

46 తెదొడి యేసు గట్టిజ అవాడ్ కెరన "ఓ బ, తుచి అత్తి అంచి జిచ్చు అవ్ సార్లు కెర దెతసి" మెన సంగ ప్రానుమ్ ముల దిలన్.

† 23:34 23:34 ఈంజ ఎత్తి తోలితె రెగిడ్డి గ్రీకు బాసచ సగుమ్ పుస్తకల్తె ఈంజ 'అన్నె' తెంతొ 'ప్రార్థన కెర్లన్' ఎదచి కోడు తయె నాయ్.

‡ 23:34 23:34 యోహాను 19:23. § 23:36 23:36 రాసల్, సామ్నార్లు నెంజల మాములుమ్ మాన్సుల్ పితి రగుమ్ అమ్డి తిలి ద్రాచ రస్సుమ్ * 23:38 23:38 యోహాను 19:20తె దెకితె, పిలాతు అదికారి జా దార్ గండ సొంత రెగ్ల తిలన్. తిన్ని బాసల్ తెన్ రెగ్ల తిల; గ్రీకు బాస తెన్, లోమ్ దేసిమచి లాటిన్ బాస తెన్, చి జేవ్ యూదుల్చి సొంత ఎత్తి బాస తెన్. † 23:41 23:41 మత్తయి 27:44.

‡ 23:43 23:43 నెంజలె 'పరలోకుమ్తె'. § 23:44 23:44 నెంజలె 'ఒండి బూలోకుమ్తె'. * 23:45 23:45 ఎక్కి ఎత్తిక వెల్లొ పూజిలె వెర్సికెక్ ఎక్కి సుట్టు మెన అర్చితుమ్ దెతి గదిక అడ్డు కెర్లి తెర, జా. జా చిరి జా దొన్ని గండల్ జలిన్చి అర్చుమ్ కిచ్చొ మెలె, యేసు మొర్లిన్ తెన్ ఎత్తి అదికారుమ్ తిలో దేముడుక చి మాన్సుల్క అడ్డు తిల పాపుమ్ జో యేసు గెచ్చయ్లిన్చి అర్చుమ్. ఏత్తియులుక రెగిడ్డి ఉత్తుమ్ 10:19, 20.

47 జలె, యేసుక దెకితె తిలో †పుంజెకీజీన్ జమాన్సుక వెల్లో, జర్గు జలిసి ఎత్తి దెక కెర, దేముడుక గవురుమ్ కెర్లొ చి, “ఈంజో మాన్సు కచితుమ్ వున్మిమ్చో!” మెన సంగిలన్.

48 అన్సె, కిచ్చొ జర్గు జయెదె గే దెకుమ మెన ఒత్త గెచ్చ తిల మాన్సుల్ ఎత్తిజని, జర్గు జలిసి దెక కెర, గుండెతె పెటన గెరి ఉట్టు గెల.

49 అన్సె యేసుచ గోతునుదల్, చి గలిలయ ప్రాంతుమ్ తెంతో జోచి పట్టి జా †నవ్రెచన కెర తిల తేర్బోదల్ కి సిలువల్క ఇదిల్ దూరి టీవ తా జర్గు జలిసి ఎత్తి దెకితె తిల.

యేసుచి పీనుమ్ ఎంగ్రవ దిలిసి

(మత్త 27:57-61; మార్కు 15:42-47; యోహా 19:38-42)

50 అరిమతయ్ మెంతి ఏక్ గవ్వివో యోసీపు మెలో ఎక్కిలో తిలో. యూదుల్చి వెల్లి తగుతె వెసితోసా జయెదె, జో, చెంగిలో సత్తిమ్చో మాన్సు జయెదె.

51 జేవ్ అన్సె వెల్లెల నుదల్ యేసుచి ఉప్పిరి కుట్ట కెర్లిన్తె జో బెదె నాయ్, జోక ఇస్టుమ్ నాయ్ చి, ‘ఎత్తి అదికారుమ్ తిలో దేముడుచి రాజిమ్ కెయక ఎదార్దుమ్ డీసెదె, జా రాజిమ్చో క్రిస్తు రాసే ఏలువ కెరెదె?’ మెన జో రకితె తిలన్.

52 ఈంజో మాన్సు, జలె, పీలాతు అదికారితె గెచ్చ కెర, “యేసుచి పీనుమ్ అంక దె” మెన జా ఉత్తవ వెంట గెల్లి రిసా సెలవ్ నజిలన్,

53 అన్సె, ఉత్తవ కెర, జోచి ఉప్పిరి చెంగిల్ ఏలువ కీబట్ట గండ పంగ్రవ కెర, కక్క అగ్గెనే రోవ తిలి సాప్రయ్ డొల్మి కెర్లి మెన్సున్తె రోవ దిలన్.

54 *కేన్ దీసి దస్సి కెర్లన్ మెలె, యూదుల్చి సెలవ్ కడన్సి దీసిక బోగి జయెదె.

55 యేసుక †నవ్రెచన కెరుక మెన అగ్గె గలిలయ ప్రాంతుమ్ తెంతో జో తెన్ బెదె జా తిల తేర్బోదల్ జలె, †యోసీపుచి పట్టి జా తిల, మెన్సున్ దెక, యేసుచి పీనుమ్ కిసి ఎంగ్రవ దిల గే దెకిల.

56 దెక కెర, జేవ్ తతా గెరలె గెచ్చ కెర, జోక వడ్డో గానుక మెన చెంగిల వాసెన తేల్లు తెయారొ కెర్ల. అన్సె దేముడు మోసే తెన్ దిలి అగ్గుల్తె రెగిడ్లి రితి సెలవ్ కడన్సి దీసి తుక్కె తిల.

24

యేసుక ‘జీవ్ జా అన్సె’ మెన రుజ్జు అయేలిసి

(మత్త 28:1-10; మార్కు 16:1-8; యోహా 20:1-10)

1 సెలవ్ కడన్సి దీసి రాత్ పాయితె తతికయ్, జేవ్ తేర్బోదల్ జేవ్ తెయారొ కెర్ల వాసెన తేల్లు దెరన మెన్సె గెల.

2 జలె, ఒత్త పావెలె, కిచ్చొ దెకిల మెలె, జా సాప్రయ్ డొల్మి కెర్లి మెన్సున్ పేసితి వాట్క డంక తిలో వెల్లొ పత్తురు ఒన్సుల్ జా అన్సె మెన దెకిల,

3 వెసిలె, యేసుచి పీనుమ్ జేవ్క డీసె నాయ్.

4 జలె, యేసుచి పీనుమ్ అప్పె నెంజిలిన్చి రిసా కిచ్చొ ఉచరుక గే జేవ్ నేన తతికయ్, ఈందె, దగదగాల్లు మెర్లుప జలె పాలల్ గలన్ల దొగుల ఉబెడల్ రిత దూతల్ జోవయించి పాసి టీవెల.

5 ఈంజేవ్ తేర్బోదల్ బియొ గెచ్చ బుయి పక్క దెకితె తతికయ్, జేవ్ దూతల్ జోవయింక కిచ్చొ మెలె మెలె, “జీవు తిలోసాక కిచ్చొక మెన్సె చజితను? జో ఇన్సె నాయ్. జో జీవ్ జా ఉట్టు అన్సె.

6 ఈందె, జో తెదొడి గలిలయతె తా ఒత్త తెంతో నే బార్ జతె అగ్గె తుమ్క సంగిలిసి తుమ్ ఏద కెర.”

† 23:47 23:47 తో రోమియదు జయెదె జలెకి. ‡ 23:49 23:49 లూకా 8:1-3 దెక. § 23:53 23:53 యూదుల్ తెన్ బట్టక దిగిల గండల్ కెర గుడియప్పల, పీనుమ్క. * 23:54 23:54 ‘సాంజె జలె అన్సెక్ దీసి మొదెల్ జా తయెదె-సెలవ్ దీసి; చి రిసా, తెదొడక వెంట గెలక నెంజె’ మెన జేవ్ యూదుల్చి రితి ఉచరు, సాంజె సరిగా నే జతె అగ్గె వెంట గెల. † 23:55 23:55 లూకా 8:1-3 దెక. ‡ 23:55 23:55 యోసీపు తెన్ సీకోదేమె మెలో బెదె వెంట గెల. యోహాను 19:39-40.

7 కిచ్చొ మెలె, “* ఆవ్ మాన్సు జా జెర్దున్ అయ్లోసాక విరోదుమ్ సుదల్ అన్నె పాపుమ్ సుదల్చి అత్తి సార్పు కెర దెంక అస్సె చి, జేవ్ అంక నిలువతె టీచడ మారుక అస్సె, చి తిర్రతక ఆవ్ అన్నె జీవ్ జా ఉట్టుక అస్సె, మెన సంగిలన్, గెద” మెన దూతల్ సంగిల.

8 జేవ్ తేరబోదల్ యేసుచ తెదొడచ కొడో ఏదన్త కెర్ల,

9 అన్నె, మెన్నె తెంతో పనుల ఉట్టు గెచ్చ, † ఎగరజిన్ యేసుచ సిన్సుల్క చి జోవయింక నంపజల అన్నె ఎత్తిజిన్క జా కబుర్ సంగిల.

10 జేవ్ ఎగరజిన్ యేసుచ ‡ బారికుల్క జో జీవ్ జా ఉట్టిన్చి రుజ్జు సంగిల జేవ్ తేరబోదల్ కొన్నె మెలె, మగ్గల గవ్విచి మరియ, యోహాన్సు, కీయాకోబుచి అయ్యసి మరియ, చి జోవయింతెన్ తిల * అన్నె తేరబోదల్.

11 జేవ్ సంగిలిన్క ‘వెర్రి కోడు’ మెన ఈంజేవ్ ఎగరజిన్ ఉచర నంప కెర్తి నాయ్.

12 † గని పేతురు ఉట్టు కెర, మెన్నున్తె నిగ గెలో, అన్నె ఒత్త పాచ వంపొ జా తెడి దెకిలె, యేసుచి పీనుమ్క అగ్గె వంగ్రవ తిలి బట్టయ్, గని పీనుమ్ నాయ్, కిచ్చొ నాయ్. జలె, జర్గు జలిన్క ఆచారిమ్ జా ఉచరన ఉచరన, గెరి ఉట్టు గెలన్.

ఎమ్మాయు గవ్వి దొగుల సిన్సుల్క యేసు దన్నుల్ జా బెద గెలిసి
(మార్కు 16:12-13)

13 జయ్యి దీసి, యేసుచ సిన్సుల్ జల దొగుల ఎమ్మాయు మెంతి గవ్వి గెతె తిల. జా గావ్ యెరూసలేమ్ పట్టుమ్క ఎగర కిలోమిటర్లు దూరి తయెదె.

14 జర్గు జలిన్ ఎత్తిచి రిసా జేవ్ దొగుల లట్టబై తిల,

15 జలె, జేవ్ దన్నె లట్టబై తతికయ్, యేసు సొంత జా వాట్ జా జోవయింతె పాచ కెర, జోవయింతెన్ బెద ఇండుక దెర్లన్.

16 జలె, జోక దెకిలెకి, జోక జేవ్ చినుక ‡ అడ్డు కెర్తె తిలన్, చి చినితి నాయ్.

17 తెదొడి యేసు జోవయింక “తుమ్ ఇండ ఇండ, కిచ్చొచి రిసా ఎక్కిలో తెన్ ఎక్కిలో లట్టబై అస్సెన్?” మెన పునిలన్ చి, జేవ్ ముసుర్లు జా ఇదిలిన్ మొకొమ్ కెరన అస్సె.

18 జోవయింతె ఎక్కిలో కైయెపా మెలోసా. జో, జలె, “ఈంజ మదెన్ యెరూసలేమ్తె జర్గు జలిసి ఒత్త అయ్లన ఎత్తిజిన్ జాన్తి. ఎక్కి తుయి నేన్సి గె?” మెన జోచి ఆచారిమ్ సంగిలో.

19 యేసు జోవయింక “కిచ్చొ జర్గు జలిసి?” మెలన్, చి జేవ్ జోక నజరేతు గవ్విచొ యేసుచి రిసా జర్గు జలిసి. జో దేముడుచ కబుర్లు సంగితోసా జా తిలో. జో కెర్ల బోదన, జో కెర్ల వెల్లెల కమె, దేముడు దిలన చి, జోచి బోదన జోచ కమొక ఎత్తిజిన్ ప్రెజల్ నంప కెర తిల.

20 గని అమ్చ వెల్లెల పూజర్లు చి అమ్చ అదికారుల్ ‘జో మొర్తి సిచ్చ జప్పన్ తుమ్ మొర్తి సిచ్చ తియ’ రోమ్ దేసిమ్చ అదికారుల్చి అత్తి సార్పు కెర దిల చి, సిలువతె టీచడ మార్ల.

21 అమ్, జలె, జోక “ అమ్చ ఇస్రాయేలుల్క కీరచ్చొంచువ కెరుక తిలోసా జొయ్యి’ మెన ఆన జా తిలమ్. అన్నె, అమ్ సంగిలిసి జర్గు జలి తెంతో, జో మొర్లి తెంతో, అన్నె తిర్రతి జా అస్సె.

* 24:7 24:7 లూకా 9:22, 24. † 24:9 24:9 యేసుక విరోదుమ్ సుదల్చి అత్తి దెర దిలో యూదా మదెన్ అత్త్య కెరన తిలో. మత్తయి 27:5, బారికుల్ 1:18. ‡ 24:10 24:10 బగ్గర్తె ‘సిన్సుల్’ మెన అస్సె. ‘బారికుల్’ మెలి పుస్తకమ్తె పూర్తి ‘బారికుల్’ మెంతె తయెదె.
§ 24:10 24:10 ఈంజ మరియ యేసుచి అయ్యసి జయెదె; మార్కు 6:3. * 24:10 24:10 జోవయింతె ఎక్కి ‘సలోమే’ మెలిసి; మార్కు 15:40. † 24:12 24:12 ఈంజ ఎత్తి తెలితో రెగ్గడ నగమ్ పుస్తకతె 12 నంబర్న్ కోడు తయె నాయ్. ‡ 24:16 24:16 ఎత్తి అదికారుమ్ తిలో దేముడుచి నెలవ్కయ్ జా అడ్డు తయెదె. మార్కు 16:12 దెకిలె, యేసుచి పొలిక ఇదల్ మార్చున జా తిలి.
§ 24:21 24:21 నెంజెల్ ‘అన్నె గెనన ఏడ్డల్ కెరుక తిలోసా’. మాములుమ్ యూదుల్ జోవయింప ఈంజ లోకుమ్చ బాదల్ తెంతో పడ్డో జోవయింక ఆక్రమించువ కెర్తి రోమ్ దేసిమ్చి ప్రబుతుమ్ తెంతో చి రచ్చనక ఉచర్తె తిల. బారికుల్ 1:6-8 కి దెక. ఈంజేవ్ సిన్సుల్ కి జా రగమ్ రచ్చనచి రిసా ఉచర్తె తిల, కిచ్చొగె. అప్పెచి మట్టుక ముక్కిమ్క పాపుమ్ తెంతో చి రచ్చన దొర్పు కెరుక యేసు అయ్లో, చి జాచి రిసా దొర్పు జలి అర్చితుమ్ జలె. లూకా 5:24 యోహాన్సు 3:16-18 దెక. ఎత్తి అదికారుమ్ తిలో దేముడు ఆకరయ్ ఆగనుమ్ బూలోకుమ్ మార్చున కెరెదె, చి తెదొడికయ్ యేసు చి బాదర్లుమ్ ఏలువ కెరెదె, చి ఈంజ లోకుమ్చ బాదల్ పూర్తి గిచ్చుల. డీసయ్లిన్ 21:3-5, కొరింధిల్క రెగ్గె ఏకీ నంబర్ ఉత్తమ్ 15:24-28.

22 అన్నె కిచ్చొ మెలె, అమ్చి తెన్ బెదిత సగుమ్జిన తేర్బోదల్ ఆజి అమ్క ఆచారిమ్చి కోడు సంగిల. రాత్ పాయితె తతికయ్. జేవ్ మెన్నె గెల చి,

23 ఒత్త యేసుచి పీనుమ్ డీని నాయ్, చి అమ్తె జా కెర అన్నె కిచ్చొ మెల మెలె, దూతల్ అమ్క డీసన్ సేడ్ల చి, యేసుక 'జీవ్ జా ఉట్ట అన్నె' మెన అమ్క సంగిల మెల.

24 అమ్చితె తిలస సగుమ్జిన మెన్నె గెచ్చ దెకిల చి, జేవ్ తేర్బోదల్ సంగిల్ రితి తిలి. గని యేసుక, దెకితి నాయ్" మెన జేవ్ దొగుల సంగిల.

25 యేసు జోవయింక, "కిచ్చొ గ్యనుమ్ నెంజిలస, తుమ్! దేముడుచ కబుర్లు సంగిల పూర్ణుల్చ కొడె అర్దుమ్ కెరనుక సంప కెరుక అల్లిమ్ కెర్తసు, కిచ్చొక?

26 క్రీస్తు రచ్చించుప కెర్తొనా దస బాదల్ సేడ జో గవురుమ్ జతిన్తె గెచ్చుక దొర్కు జలి, గెద" మెన,

27 మోసి చి అత్తి రెగిడ్ల దేముడుచ ఆగ్నల్, అన్నె దేముడుచ కబుర్లు సంగిల పూర్ణుల్చి అత్తి రెగిడ్ల, జోచి రిసాచ దేముడుచ కొడెతె రెగిడ్ల ఎత్తిచి అర్దుమ్ యేసు సంగిలన్.

28 జలె, జేవ్ గెతి గావ్ పాసి జా జెతికయ్, యేసు అన్నె దూరి గెచ్చుక మెలి రితి జల్లి,

29 గని, "సాంజ్ జలి. పొర్దు గతయ్. అమ్చి తెన్ ఇన్నె తుయి నిర్ద తా" మెన జోక బతిమాల్పా జా సంగిల, చి జేవ్ తతిన్తె బెద గెలన్.

30 జలె, జోవయింతెన్ అన్నెమ్ కంక మెన వెసిలో, అన్నె, ఏక్ పోడి అత్తి దెరస 'ఈంజ తుయి దా దయ కెర్దది' మెన దేముడు అబ్బొనక జోబర సంగ కెర, జా పోడి మోడ కెర, జోవయింక వంట దిలన్.

31 దస్సి కెర్తికయ్, జోవయింక అంకివో బేంట జల చి, అర్దుమ్ అయ్లి చి జోక చినిల. చినిలి బేగి, యేసు మాయ జా ఉట్ట గెలో.

32 దస్సి జర్లు జతికయ్. "నిజమి, అమ్ వట్ట జో తెన్ జెతె తిలి పొది, దేముడుచ కొడెచి అర్దుమ్ అమ్క జో దెకయ్తె తిలి పొది అమ్చి పెట్టి డడ్డిల్ రితి సర్ద తిలి, గెద" మెన లట్టబన్.

33 జోవయింకి ఒగ్గర్ సర్క బేగి ఉట్ట జయ్య గడియయ్ బార్ జా యెరూసలేమ్ పట్టుమ్తె అన్నె గెల. ఒత్త పావ కెర, ఎగరజిన యేసుచ సిస్సుల్క చి జోవయింతెన్ తిలసక చజిల చి,

34 జేవ్ ఈంజేవ్ దొగులక కిచ్చొ మెల మెలె, "ప్రబు నిజమి జీవ్ జా ఉట్ట అన్నె. *సిమానుక డీసిలన్!" మెన జేవ్ సంగితికయ్,

35 యేసు ఎమ్మాయున్తె గెతి వట్ట దస్సుల్ జలిసి అన్నె పోడి మోడ్డికయ్ ఈంజేవ్ జోక చినిలిసి ఈంజేవ్ జోవయింక సంగిల.

జోచ ఎగరజిన సిస్సుల్క యేసు డీసిలిసి (మత్త 28:16-20; మార్కు 16:14-18; యోహా 20:19-23; బారి కమ్మె 1:6-8)

36 జేవ్ దస్సి లట్టబంతె తతికయ్, యేసు డీని జోవయింకి నెడిమి బీచెలన్, అన్నె, † "తుమ్క సెంతుమ్ తప్పన్. తుమ్ బమ్మ జా నాయ్. ఆవ్వి, గెద" మెలన్.

37 గని జేవ్ బియె గెచ్చ బమ్మ జల. జోక 'డుంబొ' మెన ఉచర్ద.

38 జో, జలె, జోవయింక "తుమ్ కిచ్చొక బమ్మ జతను? తుమ్చి పెట్టి కిచ్చొక అన్యానుమ్ జతను?

39 అంక సిలువతె గలిలి పొది జేవ్ అంక అత్తిలె చట్టెల్ పెట్ట మేకుల్చ మచ్చల్ దెక అంక తుమ్ చిన. ఆవ్వి గెద. అంక చడ దెక. డుంబొక ఆగ్ తయె నాయ్ అడ్డె తయె నాయ్, గెద, గని అంక అన్నె."

40 ‡ మెన జోచ అత్తొ చట్టొ జోవయింక దెకయ్లన్.

41 జలె, జోవయింకి సర్దసంతోసుమ్, జోవయింకి ఆచారిమ్క జేవ్ తెదోడి ఎద సంప కెరుక ఇదిల్ అల్లర్ జలి రిసా, "ఇన్నె కిచ్చొ జలెకు కతిసి అన్నె గె?" మెన పుసిలన్.

42 మొస్సా గండ దిల,

43 జో డుంబొ నెంజిలిన్చి రుజ్జుక జో నజన జోవయింకి మొక్కె కయ్లన్.

* 24:34 24:34 'సిమాను' మెలె, పేతురు. † 24:36 24:36 "తుమ్క" తెంతె 36నంబర్ కోడుచి ఆకర్ కోడు 'మెలన్' ఎదచి కోడు ఈంజ ఎత్తి తొలితొ రెగిడ్ల సగుమ్ పుస్తకల్తె తయె నాయ్. ‡ 24:40 24:40 ఈంజ ఎత్తి తొలితొ రెగిడ్ల సగుమ్ పుస్తకల్తె 40నంబర్చి కోడు తయె నాయ్.

44 తెదొడి జోవయింక, “ఆవ్ తుమ్చి తెన్ తిలి పొది, ‘మోసే పూర్ణుమ్చొచి అత్తి దేముడు రెగ్డయల శిఆగ్గుల్తె అంచి రిసా మోసే పూర్ణుమ్చొచి అత్తి రెగిడ్లి దేముడుచ ఆగ్గుల్, దేముడుచ కబుర్లు సంగిల పూర్ణుమ్చచి కోడు, చి *కిర్చనల్తె †రెగిడ్లిసి ఎత్తి కచితుమ్ పూర్తి జర్గు జంక అస్సె’ మెన సంగిలయ్, గెద” మెన సంగ కెర,

45 దేముడుచ కొడొతె తిలిసి జేవ్ అర్దుమ్ కెరంతి రితి †అర్దుమ్ దెకయలన్.

46 జోవయింక కిచ్చొ మెలన్ మెలె, “దేముడుచి కోడొతె రెగ్డయలీసి కిచ్చొ మెలె, ‘దొర్కు జలో క్రీస్తు రచ్చించుప కెర్తొసా ఒగ్గర్ బాదల్ నేడ మొర తిర్రతక అస్సె జీవ్ జా ఉట్టుక అస్సె’ మెన శిఅస్సె. అస్సె, ‘కచితుమ్ జర్గు జయెదె’ మెన దేముడుచి అప్పెచి సెలవ్ కిచ్చొ మెలె,

47 మాన్సుల్ జేవ్ కెర్లె పాపల్ చినన జేవ్ పాపల్క దుకుమ్ జా ఒప్పున ములిలె, క్రీస్తు దొర్కు జలి అర్నితుమ్ జలిన్చి రిసా అప్పె జేవ్ కెర్లె పాపల్ చెమించుప జతి వాటు దొర్కు జా అస్సె మెన ఆవ్ క్రీస్తుచి నావ్ తెన్ తొలితొ యెరూసలేమతె పడ్డొ ఒండి లోకుమ్చ పైజల్ ఎత్తిచ మాన్సుల్తె తుమ్ బోదన కెరుక అస్సె.

48 ఈంజ ఎత్తిచి రిసా సాచుల్ జా అస్సున్, చి తుమ్ బుల సాచి సంగుక అస్సె.

49 ఈందె, అంచొ దేముడు అబ్బొ ‘జోవయించి పెట్టి *తెర్రయిందె’ మెన సంగ తిలి జోచి పరలోకుమ్చి దేముడుచి నుద్ది తిలి ఆత్మ తుమ్చి పెట్టి తెర్రయిందె, గని పరలోకుమ్ తెంతొ చి జా ఆత్మనెక్తి తుమ్చి పెట్టి జా తుమ్క తెయార్ కెర్తె ఎదక, ఈంజ మదెనె ఈంజ యెరూసలేమ్ పట్టుమతె తుమ్ రకితె తా” మెన యేసు జేవ్ ఎగరజెన్క చి ఒత్త తిల జోక నంపజల అస్సె మాన్సుల్క సంగిలన్.

యేసు పరలోకుమ్తె వెగ గెలిసి
(మార్కు 16:19-20; బారి కమ్మె 1:9-11)

50 తెదొడి యేసు జోవయింక సిన్సుల్క కడన, †బేతనియి గావ్ పక్క గెల చి, అత్తో ఉక్కుల జోవయింక దివెన దిలన్.

51 జో దస్సి జా దివెన దెతె తా, జోవయించి నెడిమి తెంతొ ముల ఉక్కిల్ జా పరలోకుమ్తె ఉట్ట గెలన్.

52 తెదొడి జేవ్ సెర్కు నేడ జోక బక్తి కెర తా ఒగ్గర్ సర్దసంతోసుమ్ తెన్ యెరూసలేమతె అస్సె గెల.

53 రోజుక దేముడుచి గుడితె గెచ్చొ, యేసుచి రిసా జో దేముడుచి గవురుమ్ సంగితె తిల.

§ 24:44 24:44 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్డయలీ ఆగ్గుల్ మెన ఆవ్ జానుమ్. ఈంజ కొడొ ఎత్తి బైబిల్తె అగేచి పావ్ పున్సుకుమతె రెగ్డయ్ జా అస్సె. ఈంజ దెకపుక మెన కుపియ్ జాంతె నొయి ప్రమానుమతె మోసే పూర్ణుమ్చొచి అత్తి రెగిడ్లి దేముడుచ ఆగ్గుల్ మెన రగ్లవ అస్సె. * 24:44 24:44 జేవ్ కిర్చనల్తె దాచీదు రాన్ జలో పూర్ణుమ్చొ ఒగ్గర్ రెగిడ్లిన్. † 24:44 24:44 లూకా 18:31, 22:37, కిర్చనలు 20:42. ‡ 24:45 24:45 నెంజెలె ‘సెక్తి తిలన్’. § 24:46 24:46 యెసయా 53:1-9 ఎద జో బాదల్ నేడ మొర్చిన్చి రిసాచి టాలి అస్సె, చి దెస్సు నంబర్ తెంతొ బార నంబర్ ఎద జో అస్సె గవురుమ్ జతిన్చి రిసాచి కోడొ అస్సె. జో తిర్రతకయ్ అస్సె జీవ్ జా ఉట్టిన్చి రిసా జా నే జతె అగ్గె అస్సె పూర్ణుమ్చి వాల్ దేముడుచి కొడొతె, ‘జా జర్గు జయెదె’ మెన కేనె టాలి డీస్యయ్ మెలె, యోనా పున్సుకుమతె. యోనాక వెల్డొ మొస్సా గేడ తిర్రతక జోవయింక ఒక్క విడ్డల్ కెర్లిసి. యేసు మొర తిర్రతక అస్సె జీవ్ జంక తిలిన్చి రిసాచి టాలి జా. * 24:49 24:49 యోవేలు 2:28, 29 దెక. † 24:50 24:50 బేతనియి గావ్ ఒలివ మెట్టయ్ అస్సె; ఎట్టొ పక్కయ్. బారికుల్ 1:6-12చి దెకిలె, జో పరలోకుమ్తె వెగ గెలిన్చి రిసా ఒత్తయ్ కి అస్సె.

యోహాను సుబుమ్ కబుర్

యోహాను రెగిడ్డి సుబుమ్ కబుర్

యేసుక్రీస్తు కొన్సొ

- 1 *ముదొల్ తెంతో కి దేముడుచి †కోడు తిలో. కిచ్చొ జెర్మున్ నెంజిలి పొది తెంతో కి జా కోడు దేముడు తెన్ తిలో. జా కోడుయి దేముడు జా తిలో.‡
- 2 జొయ్యి కిచ్చొ నెంజిలి జా పొది దేముడు తెన్ తిలో. ఎత్తి జోచి అత్తి కల్గువ జలి.
- 3 తిలిసి ఎత్తి జో నెంజితె జెర్మున్ జయె నాయ్.
- 4 జోచితె జీవు తిలి, జా జీవు మాన్సుల్క ఉజిడి జా అస్సె.
- 5 జా ఉజిడి అందర్తె ఉజిడి దెతె అస్సె గని అందర్ జా ఉజిడిక చినన్క నెత్తిర్తయ్.†
- 6 దేముడు తెర్తయ్తెకయ్, ఏక మాన్సు బార్ జలన్. జోవయించి నావ్ యోహాను.
- 7 జో సాచి సంగుక అయ్లన్. ఎత్తిజిన్ క్రీస్తుక నంపజా పాపుమ్ తెంతో రచ్చించువ జతు మెన్, 'దొర్కు జలి *ఉజిడి యేసుక్రీస్తుయ్' మెన్ సాచి సంగుక అయ్లన్.
- 8 యోహాను, జలె, జా ఉజిడి నెంజె, గని 'క్రీస్తుయి దొర్కు జలి జా ఉజిడి' మెన్ సాచి సంగుక అయ్లన్.
- 9 ఈంజ లోకుమ్తె జెర్మితె ఎత్తి మాన్సుక ఉజిడి దెతి నిజమ్ జలి ఉజిడి ఈంజ లోకుమ్తె జెతె అస్సె.
- 10 జలె, ఈంజ లోకుమ్తె జో తిలో. ఈంజ లోకుమ్ జోచి అత్తి జెర్మున్ జలి, గని ఈంజ లోకుమ్చ మాన్సుల్ జోక చినితి నాయ్.
- 11 జోచి సొంత గేర్చి మాన్సుల్తె జో అయ్లన్, గని జోచి సొంత మాన్సుల్ జోక ఒప్పన్తి నాయ్, నంపజతి నాయ్.
- 12 దస్సి జలి పొది సగుమ్జిన్ జోక ఒప్పన్ బెదవన్ నంపజా గెల. జోవయింకయి, జలె, 'తెదొడి తెంతో దేముడుచ బోదల్ తుమ్ జలదు' మెన్ సెలవ్ దిలన్.
- 13 జోచ బోదల్ జతి జెర్మున్, జలె, కేన్ సెకుమ్తె జెర్మిలి రిసా జగ్గు జలిసి నెంజె, కేన్ తేర్చి మున్సుసి ఆగేక ఆనచి రిసా జెర్మున్ జలిసి నెంజె. ఈంజ దేముడుచి దయచి రిసా జోచి ఆత్మనెక్తి దిలి రిసాచి జెర్మిలన్.
- 14 జలె, దేముడుచి కోడు ఈంజ లోకుమ్తె మాన్సు జా జెర్మున్ జా అమ్ మాన్సుల్ తెన్ బెద జలన్. పూర్చి దయ, పూర్చి సత్తిమ్ తా అమ్చి తెన్ జలన్, చి జోచి పరలోకుమ్చి ఉజిడి దెకిల్ రితి జలమ్, చి 'దేముడు తెంతో అయ్లో దేముడుచొ ఎక్కి పుత్తుసి ఈంజియి' మెన్ అమ్క నిజామి రుజ్జు అయ్లి.
- 15 జోచి రిసా " అంచి కంట పడ్డ జెతోసా అంచి కంట వెల్లో. కిచ్చొక మెలె, అంచి కంట జో అగ్గయ్ తిలోసా' మెన్ ఇన్నెచి రిసాయి సంగిలయ్" మెన్ యోహాను సాచి జా కేక గల సాట్టు కెర్తె తిలో.
- 16 జోచి ఎదివాట్ బెర్తుతె తిలి దయ తెంతో అమ్ ఎత్తిజిన్ దయ పడ్డ దయ పాయ్ అస్సుమ్.
- 17 మోసే పూర్తుమ్చొచి అత్తి దేముడుచ ఆగ్గుల్ అగ్గె తెంతో అమ్క దా అస్సె, గని దేముడుచి దయ, నిజామ్ యేసుక్రీస్తుచి అత్తి దొర్కు జలి.
- 18 కేన్ మాన్సుకి కెయ్యకి దేముడుక దెకిత్ నాయ్. మాన్సు జోక దస్సి దెకుక నెంజితయ్. జాకయ్, జోచి పక్కయ్ తిలో దేముడుచొ ఎక్కి పుత్తుసి, ఈంజ లోకుమ్తె జెర్మి అమ్చి తెన్ జెయ, అబ్బొసి కీసాచొ గే అమ్క దెకవ అస్సె, చి అబ్బొన్క దెకిల్ రితి జా అస్సుమ్.

* 1:11:1 నముర్తుమ్ బుయి లోకుముల్ కిచ్చొయ్ నెంజిలి పొది † 1:11:1 మెలె, ఎక్కిలోచి ఎట్టి తిలిసి జోవయించి కోడుతె కిసి చినుక జయెద గే, దస్సి, ఎత్తి, అదికారుమ్ తిలో దేముడు కిసి చినుక జలె, యేసుక్రీస్తుక దెకుక, పడ్డ, ఎత్తి, అదికారుమ్ తిలో దేముడుచి వెట్టి తిలిసి యేసుక్రీస్తుచి అత్తి జెర్మున్ జయెద. ‡ 1:11:1 'ప్రబు' మెలె కిచ్చొ అర్దుమ్ తయెదె మెలె, ఎత్తిక చిలువ కెర్తె దేముడు, ఎత్తి, అదికారుమ్ తిలో దేముడు. దేముడు అబ్బొన్క కి దేముడు పుత్తున్క కి 'ప్రబు' మెన్సుల. బయ్లిబిల్ తె ఈంజ వాటతె ముక్కిమ్క క్రీస్తుకయ్ 'ప్రబు' మెన్సుల. § 1:51:5 ఈంజ లోకుమ్చి పాపుమ్ అమన్ అందర్ రితి జలిక, ఉజిడిక అందర్ కిసి విజవుక నెత్తె గే, క్రీస్తుచి సత్తిమ్చి ఉప్పిరి పాపుమ్ జినుక నెత్తె. * 1:71:7 సత్తిమ్, నెక్తి.

బాప్తిసుమ్ దెతె తిలో యోహానుక పరిచ్చ కెర్తినీ
(నుత్త 3:1-12; మార్కు 1:1-8; లూకా 3:1-9,15-17)

19 †యెరూసలేమ్ పట్టుమచ పట్టుమచ †యూదులచ వెల్లెల మాన్యుల్ ‘తుయి కో?’ మెన పునీతి రిసా, జీవయించ పూజర్లుక చి దేముడుచి గుడిచి సేవ కెర్తి లేవీ పూర్ణమచొచి నెకుమచ మాన్యుల్ సగుమజినక బాప్తిసుమ్ దెతె తిలో యోహానుతె తెద్రయల.

20 జేవ్ జోక ‘తుయి కో’ మెన పునీతికయ, జో అబద్దుమ్ జయె నాయ్. జో కిసి సాచి జలో మెలె, “ఆవ్ క్రీస్తు నెంజి” మెన సత్తిమ్ ఒప్పున్.

21 దస్సి ఒప్పునీతికయ, “దస్సి జలె, దేముడుచ కబుర్లు సంగిలో ఏలీయా పూర్ణమచొ ఏక్ వేల జస్సె గే?” మెన పునీల. పునీలె, “నెంజి” మెన సంగిలన్, చి “దస్సి జలె, దేముడుచ కబుర్లు సంగుక జెంక తిలో జో అన్యెక్టో జస్సె గే?” మెన పునీల, గని అన్యె “నెంజి” మెన యోహాను సంగిలన్.

22 జోక జేవ్ అన్యె, “దస్సి జలె, తుయి కొన్సో? అమ్క తెద్రయల వెల్లెల మాన్యుల్క అమ్ సంగుక అన్యె. కొన్సో మెన తుయి సంగితసి?” మెన జో తెన్ పునీల.

23 జో జోవయంక, “యెసయా పూర్ణమచొచి అత్తి దేముడు రెగ్గయలీ
‘ప్రబు జెంక వాల్ సోగ కెర!’ మెన బయిలె ప్రదేసిమి కేక్ గల ప్రబుచి అవాడ్ ఆవ్.
మెన రెగ్గ అస్సె, గెద. ఆవ్ ఎక్కి జో” మెన యోహాను సంగిలన్.

24 పిమ్మట్ యోహానుక జేవ్ పరిచ్చ కెర్లన్, జలె, †పరిసయ్యుల్ తెంతో జా అస్సి,

25 “తుయి క్రీస్తు నెంజిలె, ఏలీయా నెంజిలె, దేముడుచ కబుర్లు సంగిలో అన్యెక్టో కి నెంజిలె, తుక కిచ్చి అదికారుమ్ తయెదె, చి *బాప్తిసుమ్ దెతసి?” మెన జేవ్ పునీల.

26 యోహాను, జలె, “ఆవ్ జలె, మాన్యుల్క పానితె బాప్తిసుమ్ దెతసి, గని తుమచి నెడిమి తుమ్ నేన్లొ ఎక్కిలో బీద అస్సె.

27 జో అంచి కంట పడ్డో జెంక తిలోసా. జో అంచి పడ్డో అయిలె కి, జో కెర్ది ముక్కిమచొ మెలె, జోచ జోడ్లుచ వాలివొ యిప్పుక అంక విలువ నాయ్!” మెన జేవ్క ఇసి సంగిలన్.

28 ఈంజ ఎత్తి యోహాను గాడుక తూర్పు పక్కచి ఒడ్డుతెచి బేతనియ మెలి ఏక్ టూన్తె జర్లు జలి.

ప్రెజలచి మొక్కి క్రీస్తుచి రిసా యోహాను సంగిలినీ

29 అన్యెక్ దీసి, యేసు పాసి తతికయ, యోహాను జోక దెక, “ఈంజ లోకుమచ చి పాపుమ్ వయ గెచ్చయతో అమ్చొ దేముడు దిలో మెండపిల్ల జలిసా ఓదె!” మెన సంగిలో. అన్యె,

30 “ఇన్యెచి రిసాయి ఆవ్ సంగిలి, ‘జో అంచి పడ్డో జెర్మిలెకి, అంచి కంట అగ్గయ తెంతో తిలోసా, చి రిసా అంచి కంట వెల్లొ జయెదె’ మెలయ్.

31 ఈంజొ కొన్సో గే ఆవ్ కి అగ్గ నేన్లయ, గని ఆవ్ అయిలినీ జోచి రిసాయి. †ఇస్రాయేలులు ఇన్యెక ‘అమ్చొ రచ్చించువ కెర్తొసా’ మెన చినుతు మెన, పాపుమ్ జో గెచ్చయతి రిసా పానితె మాన్యుల్క బాప్తిసుమ్ దెతసి.”

32 తెదొడి యోహాను అన్యె కిచ్చి సాచి సంగిలన్ మెలె, †“దేముడుచి సుద్ది తిలి అత్తు పార్వ పిట్టచి రితి జా, ఆగానుమ్ తెంతో ఉత్త జా, జోచి ఉపీర్ బీదెలిసి ఆవ్ దెకిలయ్.

33 ఆవ్ జోక ‘జొయ్యి’ మెన నేన్లయ. నేన్తయ, గని పానితెచి బాప్తిసుమ్ ఆవ్ దెంక మెన అంక తెద్రయలో జో అమ్చొ దేముడు కిచ్చి గుర్లు సంగ తిలో మెలె, ‘అంచి అత్తు ఉత్త జా ఎక్కిలోచి ఉప్పిర్

† 1:19 1:19 యెరూసలేమ్ పట్టుమచె ఎత్తి, అదికారుమ్ తిలో దేముడుచి ఎక్కి దేముడుచి గుడి తయెదె. యూదుల్క జయె పట్టుమ్ ముక్కిమ్ జయెదె. † 1:19 1:19 ‘యూదుల్’ మెలె, ‘అంచయ మాన్యుల్ జా అంకయ జోకర్లు’ మెన పూర్ణమ తెంతో ఎత్తి అదికారుమ్ తిలో దేముడు చిసాన్ ప్రెజెల్. § 1:24 1:24 పరిసయ్యుల్ మెల పండితుల్, సద్దాకయ్యులు మెల పండితుల్, మోసి తెన్ దేముడు చిలి

అగ్గల్ సికర్లచి చి వెల్లెల పూజర్లు యూదులచి వెల్లె సబతె మెసల. * 1:25 1:25 ‘బాప్తిసుమ్’ మెలె, ఎత్తి, అదికారుమ్ తిలో దేముడు మాన్యుచి పాపుమ్ చెమించువ కెర్తి గుర్లుక కెర్తినీ. కిసి ఎక్కిలో బాప్తిసుమ్ నజనుక మెలె, “ఆవ్ పాపుమ్ సుదె” మెన జో మాన్యు ఒప్పున, పాపుమ్ దోయ జా గెతి గుర్లుక పానితె దుజ తా, అన్యె బార్ జంక. ఉపదెసిమ్ దెతోసా బాప్తిసుమ్ దెంక. † 1:31 1:31 ‘ఇస్రాయేలులు’ మెలె, యూదుల్క అన్యెక్ నాన్ జయెదె. † 1:32 1:32 ఎత్తి, అదికారుమ్ తిలో దేముడుచి సుద్ది తిలి అత్తుక తెలుగు తెన్ సగుమతె ‘పరిశుద్ధాత్మ’ మెంతతి నెంజిలె ‘చెంగిల్ అత్తు’ మెంతతి.

టీవెదె, కచి ఉప్పిరి ఉత్త జా టీవెదె గే, అంచి పరలోకుమచి నుద్ది తిలి ఆత్మక జోక నంపజలనక జోయ్యి బాప్తిసుమ్ దా కెరెదె.'

34 జలె, జోక 'దేముడుచొ పుత్తుసి ఈంజోయ్' మెన ఆవ్ రుజ్జు దెక అస్సి, సాచి జా అస్సి" మెన ఒత్త తిలనక యోహాను సాచి నంగిలన్.

యోహానుచ సిస్సుల్తె దొగుల యేసుచి పట్టి గెలిసి

35 అన్నెక దీసి, యోహాను జోచి దొగుల సిస్సుల్ తెన్ టీవ తతికయ్,

36 యేసు జా వాట్ ఇండ గెతె తతికయ్, యోహాను జోక దెక, "పాపుమ్ గెచ్చయ్తో దొర్కు జలి దేముడుచి మెండపిల్ల, ఓదె!" మెన నంగిలన్.

37 యోహానుచ జేవ్ దొగుల సిస్సుల్, జలె, నూన కెర, యేసుచి పట్టి గెచ్చుక దెర్ల.

38 జలె, యేసు పస్స, జేవ్ పట్టి జెతె తిలిసి దెక కెర, జోవయింక "కిచ్చొ చజతను?" మెన పుసిలన్, చి జేవ్ 'గురుబాబు' మెలి అర్థమ్ తెన్ జోవయించి అరమయ్ బాస తెన్ "రబ్బీ" మెన నంగ, "కెనె బన జా అస్సిసి?" మెన జోక పుసిల.

39 జో "జొమ్మ. జా, దెక" మెన నంగిలన్, చి జేవ్ జో తెన్ గెచ్చ, జో బన జలి టాన్ దెకిల. జలె, పాసి పాసి చెత్తర్ గంటల్ సంజె జలి రిసా, జా దీసి జేవ్ దొగుల యేసుతె తా గెల.

అంద్రెయ పేతురు మెలో అన్యోనక యేసుతె బుకారా అన్నిసి

40 యోహానుచి జా కోడు నూన యేసుచి పట్టి గెల జేవ్ దొగులతె ఎక్కిలో అంద్రెయ మెలోసా జయెదె. జో కొన్సొ మెలె, సీమోను పేతురుచొ బావొసి.

41 జో జలె, అన్నెక దీసి పెందలె కిచ్చొ తోలితో కెర్లన్ మెలె, సీమోను మెలో జోచొ అన్యోనక చజ కెర, "మెస్సయక జలె క్రీస్తుక చజ దెక అస్సుమ్!" మెన నంగిలన్. కి'మెస్సయ' మెన జా బాస తెన్ నంగిలె, గ్రీకు బాస తెన్ 'క్రీస్తు' మెలి అర్థమ్ తయెదె.

42 దస్సి నంగ, సీమోనుక అంద్రెయ యేసుతె కడ అన్యో. కడ ఆనతికయ్, యేసు సీమోనుక చెంగిల్ దెక, "యోహాను మెలో ఎక్కిలోచొ సీమోను మెలో పుత్తుసి, తుయి. జలె, అప్పె తెంతో తుక 'కేపా' మెన నావ్ తితసి" మెన నంగిలన్. *'కేపా' మెన అరమయ్ బాస తెన్ నంగిలె, గ్రీకు బాస తెన్ 'పేతురు' జయెదె.

అన్నె దొగులక యేసు సిస్సుల్ కెరన్సిసి

43 అన్నెక దీసి, గలిలయ ప్రాంతముతె ఉట్ట గెచ్చిందె మెన యేసు ఉట్ట గెలన్. ఒత్త పావె కెర, పిలిప్ మెలో ఎక్కిలోక చజ కెర, "అంచి పట్టి జా అంచొ సిస్సుడు జా" మెన, యేసు జోక బుకార్లన్.

44 పిలిప్ బేత్సయిదా పట్టుమ్చొ. అంద్రెయ పేతురు కి జయ్యి పట్టుమ్చ.

45 జలె, నతనియేలు మెలో ఎక్కిలోక పిలిప్ చజ కెర, "అమ్చొ, మోసే పూర్ణుమ్చొచి అత్తి దేముడు రెర్లయేలి †అగ్గల్తె, క్రీస్తుచి రిసా రెగిడ్లొ, గెద. ‡అమ్చొ దేముడుచ కబుర్లు నంగిలె పూర్ణుమ్చ కి జోవయించి రిసా రెగిడ్లొ, గెద. జలె, జో క్రీస్తుక అమ్ చజ అస్సుమ్. జో కొన్సొ మెలె, నజరేతు గవ్వెచొ యోసేపుచొ యేసు మెలో పుత్తుసి. జోయ్యి" మెన నతనియేలుక నంగిలన్.

46 నంగిలె నతనియేలు అన్యోనుమ్ జా "నజరేతు గవ్వె తెంతో కిచ్చొ జలెకు చెంగిల్ తిలిసి బార్ జయెదె గే?" మెన పుసిలన్, గని పిలిప్ జోక "తుయి జా కెర, సొంత దెకు!" మెన జోక యేసుతె కడ అన్యో.

§ 1:41 1:41 'క్రీస్తు' మెలె, మెస్సయ మెలె, 'దొర్కు జలె రచ్చొంచువ కెర్లొక తెర్లయందె' మెన ఎత్తి అదికారుమ్ తిలో దేముడు పూర్ణుమ్ తెంతో నంగ తిలోసా. అన్నె కిచ్చొ అర్థమ్ తయెదె మెలె, 'రాస', 'ఎత్తి అదికారుమ్ తిలో దేముడు ఏలువ కెరయేలోసా' మెలి అర్థమ్.

* 1:42 1:42 'కేపా' మెలె, 'పేతురు' మెలె, 'పత్తర్' మెలి అర్థమ్ తయెదె. † 1:45 1:45 తెలుగు బైబిల్తె ధర్మశాస్త్రమ్ మెలె, మోసచి అత్తి దేముడు రెర్లయేలి అగ్గల్ మెన అమ్ జానుమ్. ఈంజె కొడొ ఎత్తి బైబిల్తె అగేచి పావ్ పుస్తకుముతె రెర్లయ జా అస్సి. ఈంజె దెకపుక మెన కుసియ బాసతె నొయ ప్రమానుముతె మోసే పూర్ణుమ్చొచి అత్తి రెగిడ్లొ దేముడుచ అగ్గల్ మెన రగ్గవ అస్సి. ‡ 1:45 1:45 'ఎత్తి అదికారుమ్ తిలో దేముడుచ కబుర్లు నంగిలె పూర్ణుమ్చ' మెలె, ఎత్తి అదికారుమ్ తిలో దేముడుచ నగమ్జెసిచి పెట్టి జోచి అత్త ద జోవ కబుర్లు నంగయేలో, చి రెర్లయేలో. మెలె, జోచి అత్త జోవయించి చొడి పుట్టవ జోవ కబుర్లు లట్టబడ్డె, చి జోవయించి మెస్సయె సికయతికయ రెగిడ్లొ.

47 జలె, నతనియేలు పాని జెతె తతికయ్, యేసు జోక దెక జోచి రిసా “ఈందె, సత్తిమ్ తిలో ఇస్రాయేలుడు, ఈంజో. ఇనాచితె కిచ్చో ఉప్రమెన్సు నాయ్!” మెన సంగిలన్.

48 దస్సి సంగితికయ్, నతనియేలు ఆచారిమ్ జా “తుయి కీసా మాన్సుచి అంచి బుద్ది చినిలది?” మెన యేసుక పునిలన్, చి యేసు జోక “పిలివ్ తుక నే బుకారై అగ్గె, తుయి జో రూక్ మొదొలె వెన తిలి పొది తుక ఇన్నె తెంతో దెకిలయ్” మెన జబాబ్ దిలన్, చి

49 నతనియేలు జోక “గురుబాబు, దేముడుచి పెట్టిచో దేముడు పుత్తుసి, తుయి! అమ్చ ఇస్రాయేలులుచో రానో, తుయి!” మెన సంగిలన్.

50 యేసు జోక “ ‘అవ్ తుక రూక్ మొదొలె దెకిలయ్’ మెన సంగిలి రిసా తుయి అంక నంప కెర్లది, గెద. ఇన్నెచి కంట అన్నె వెల్లెల కమొ దెకితె” మెన సంగ యేసు అన్నె.

51 “జలె, అవ్ తుక కిచ్చో నిజమి కచితుమ్ సంగితసి మెలె, పరలోకుమ్ ఉగ్గి జతిసి, చి అవ్ కీమాన్సు జా జెర్బున్ అయ్లోసాచి ఉప్పిలి దేముడుచి దూతల్ పరలోకుమతె వెగితిసి చి పరలోకుమ్ తెంతో ఉత్త జెతిసి దెకితె” మెన యేసు సంగిలన్.

2

పానిక యేసు ద్రాచ రస్సుమ్ కెర్లసి

1 దొరతి గెతికయ్, గలిలయ ప్రాంతుమతెచి కానా మెంతి గవ్వి ఏక పెండ్లి జలి. యేసుచి అయ్యసి ఒత్త జా పెండ్లితె అన్నె.

2 యేసుక, జోచ సిస్సుల్క కి పెండ్లితె బుకారా అస్సి.

3 జలె, పెండ్లి విందుతె అయలన పితి * ద్రాచ రస్సుమ్ ఎత్తి కేడ గెలి. యేసుచి అయ్యసి జోతె జా కెర, “విందుక అన్నె ద్రాచ రస్సుమ్ నాయ్” మెన సంగిలి.

4 యేసు జాక “అంచి తెన్ తుక కిచ్చో కామ్, అయ? అంచి నమయుమ్ అప్పెక కి జెంక నేతయ్” మెన అయ్యసక సంగిలన్.

5 తెదొడి అయ్యసి, జా గెరచ గొత్తి సుదల్క “తుమ్ కెరుక మెన ఈంజో కిచ్చో నంగెదె గే, జయ్యి కెర” మెన సంగిలి.

6 జలె, ఒత్త పాని దెర్ల పత్తుర బానల్ సాప్పు అస్సి. ఏక బానో, జలె, పుంజెక్ నెంజెలె పుంజెక్ యాబయ్ కాయల్ పాని దెరెదె. ఇన బానల్తె పాని కిచ్చొక ఒత్త తయెదె మెలె, యూదుల్ నుద్ది కెరంత అలవాట్లు చి రిసా.

7 యేసు, జలె, కిచ్చో కెర్లన్ మెలె, “తుమ్ ఈంజేవ్ బానల్తె బెర్తు పాని నుచ” మెన, కామ్ కెర్లనక సంగిలన్. సంగితికయ్, జేవ్ బానల్తె పాని బెరయ్ల.

8 తెదొడి జో “అప్పె, బానల్తె తిలిసి తుమ్ డుంబ కెర, విందు వంటితో మాన్సుతె నా దాన” మెన సంగిలన్, చి జోక నా దిల.

9 జలె, జా పాని ద్రాచ రస్సుమ్ మార్పుచ జా అన్నె. ద్రాచ రస్సుమ్ మార్పుచ జలి జా పానిచి రుసి జో విందు వంటితో మాన్సు చక దెకిలన్. జా ద్రాచ రస్సుమ్ కేనె తెంతో అయ్లె గే పాని డుంబిలనక ఎర్పె, గని విందు వంటితో మాన్సుక ఎర్పె నాయ్. తెదొడి జో, ఆచారిమ్ జా, † పెండ్లిబూలోక బుకారా కెర, జోక

10 “అమ్చి తెన్ ఇన విందుల్తె కో కి చెంగిలి రస్సుమ్ తొలితో వంట దెవుల. మాన్సుల్ ఒగ్గర్ పిలి పడ్డి, గర్చి రస్సుమ్ బార్ కెరుల. గని చెంగిల్చి ఆకర్క పితి రితి తుమ్ తియ తిలదు. కీసి?” మెన పునిలన్.

11 గలిలయ ప్రాంతుమతెచి కానా మెంతి గవ్వి, యేసు ఈంజ వెల్లి కామ్ జర్పు కెర్లె. జోపయించి అదికారుమ్ దెకయత వెల్లెల కమొ ఎత్తితె ఈంజయి తొలితో చి. జోచ సిస్సుల్ జోచి ఉప్పిలి నముకుమ్ తిల.

§ 1:51 1:51 ‘మాన్సు జా జెర్బున్ అయ్లోసా’ మెన బయబిల్తె రెర్ల తిలె, జేవ్చి అర్దుమ్ కిచ్చో మెలె, ‘ఎత్తి అదికారుమ్ తిలో దేముడు తెర్లయలో కీస్తు రచ్చెంపచ కెర్లెసా.’ పూర్ణమ్ తెంతో దస్సి మెన జోపయించి రిసా ప్రబుచ కబుర్లు సంగిలన రెగిడ్చితె ‘మాన్సు జా జెర్బున్ జెంక తిలోసా’ మెన రెర్ల తిలిన్చి అర్దుమ్ ఒగ్గర్ నదు కెర్ల యూదుల్ అర్దుమ్ కెరనుల, ఇస్సుమ్ తిలె. * 2:3 2:3 మాములుమ్ ద్రాచ రస్సుమ్ మెలె, ఒప్పు నే గలిలి ద్రాచ రస్సుమ్ జర్ల సూరుచి రితి తియన తయెదె. ఒగ్గర్ పిలెకయ్ మచ్చుక జయెదె. పెండ్లివెతె యూదుల్ దస్సిచి పివుల. † 2:9 2:9 పెండ్లి ఉబెబ్బె

12 ఒత్త తెంతో యేసు, జోచి అయ్యసి, జోచ బావుడ్పులు, సిస్సుల్, ఇదిల్ ఉత్తర వక్కచి కపెర్నహూమ్ పట్టుమేతె ఉట్ట గెచ్చ, ఒత్త నగుమ్ దీనల్ తా గెల.

దేముడుచి గుడితె సామున్ వికితనక యేసు ఉదడ్డిసి
(మత్త 21:12-13; మార్కు 11:15-17; లూకా 19:45-46)

13 యూదుల్చి †పస్కా వండుగు పాసి అయిల్. ఈంజ వండుగిచి రిసా యెరూసలేమ్ పట్టుమేతె యేసు ఉట్ట గెలన్.

14 జలె, దేముడుచి గుడితె పెన కిచ్చొ దెకిలన్ మెలె, ‘అర్పితల్క’ మెన, బెయిలల్, గొరెలు, పార్వ పిట్టల్, దనచ వికుక బెర తిల మాస్సుల్క దెకిలన్. శీడబ్బుల్ పల్లయేతనచి కామ్ కి దెకిలన్.

15 తెదొడి, వాలివో తెన్ కొర్త తెయార కెర, జేవ్ ఎత్తిజిన్క, సామ్ముల్క, గొరెల్క, ఎత్తి, దేముడుచి గుడి తెంతో ఉదడ గెలన్, అన్నె డబ్బుల్ పల్లయేతనచి డబ్బుల్ ఎత్తి, వింప గెల కెర, జోవయింప బల్లల్ సేడవ దిలన్.

16 దస్సి కెర, పార్వ పిట్టల్ వికితనక ఇసి మెన సంగిలన్: “ఈంజేవ్ ఎత్తి, బయిలె దెర గెచ్చ! అంచో దేముడు అబ్బొచో గేర్క బియ్యార్గొ కెర్తె సంత రితి కెరుక జయె నాయ్!” మెన గోల కెర్తెన్.

17 జో దస్సి కెర్తెయ్, దేముడు పూర్ణమ్ రెగ్గయేల్ ఏక కోడు యేసుచ సిస్సుల్ ఏదస్స కెర్తె. “తువ్ గేరు జతి దేముడుచి గుడి నుద్ది తా తుకయ్ తవును మెన అంచి జీవ్ డడ్డెదె” మెన దేముడు రెగ్గి కోడు.

18 తెదొడి, దేముడుచి గుడిచ అదికారుల్ జల యూదుల్చ వెల్లెల మాస్సుల్ యేసుతె జా కెర, “తుయి అప్పె కెర్తె రితి కెరుక తుక కిచ్చొ అదికారుమ్? తుక అదికారుమ్ తిలె, అమక రుజ్జు దెకయేతి రిసా కిచ్చొ వెల్లి కామ్ కెర్తె?” మెన కోపుమ్ తెన్ సంగిలన్.

19 యేసు, జలె, జోవయింక కిచ్చొ జబాబ్ దిలన్ మెలె, “ఈంజ దేముడుచి గుడి తుమ్ సేడవ గెల, చి తిర్తతి తెడి ఆవ్ అన్నె బందిందె” మెన సంగిలన్.

20 యూదుల్చ జేవ్ వెల్లెల మాస్సుల్ “అప్పెక ఈంజ దేముడుచి గుడి బందుక దొన్ని చిసా సాప్పు వెర్పుల్ దెర అస్స. సేడయేలిగిన, తుయి తిర్తతక బందుక కీసి? నెతిర్సి!” మెన ఆసెల.

21 గని, ‘దేముడుచి గుడి’ మెన జో కిచ్చొ అర్థమ్ తెన్ సంగిలన్ గే, జేవ్ వెల్లెల మాస్సుల్ నేన్. జోచి సొంత ఆగుచి రిసా సంగ తిల్.

22 జలె, పడ్డె, మెలె జో మొర గెచ్చ తిర్తతి తెడి అన్నె జీవ్ జలి పడ్డె, జో ఇసి సంగ తిల్ మెన జోచ సిస్సుల్ ఉచార కెరుల. ఉచార కెర్తె, క్రీస్తు “మొర అన్నె జీవ్ జా ఉట్టెదె” మెన దేముడు పూర్ణమ్ రెగ్గయేల్ కోడు, చి క్రీస్తు అప్పె సంగిల్ కోడు నంప కెరుల.

23 జా పస్కా వండుగు పొది, యేసు యెరూసలేమ్తె తా, కిచ్చొ కిచ్చొ వెల్లెల కమొ కెర్తె తిలన్, చి జేవ్ కమొ దెకితె తా, జోవయింక ‘క్రీస్తు జా తయెదె’ మెన ఒగ్గర్జిన్ మాస్సుల్ నంప కెర్తె.

24-25 గని మాస్సుచి పెట్టి తిలి ఉప్రమెస్సుక యేసు జానె. మాస్సుచి బుద్ది కీసి గే కో జోక సాచి సంగుక నాయ్, జానెచి రిసా, జోవయింక నంప కెరె నాయ్.

3

నికొదేము యేసుతె అందరె అయిలిసి

1 యూదుల్చో అదికారి ఎక్కిల్, జో పరిసయ్యుల్ మెంత పండితుల్తె ఎక్కిల్, జోచి నావ్ నీకొదేము.

† 2:13 2:13 పూర్ణమ్ పొది యూదుల్ ఇగుప్తు దేసిమి తా గొతిమాస్సు జలిన్ తెంతో ఎత్తి అదికారుమ్ తిల్ దేముడు రచ్చించువ కెర్తెసి ఏద కెర్తె వండుగు, ఈంజ. § 2:14 2:14 జోవయింక ఆక్రమించువ కెర్తె లోమ్ దేసిమ్చి ప్రబతుమ్చి డబ్బుల్ దేముడుచి గుడితె దెంక నెంజి. జేక, జోవయింప డబ్బుల్ దేముడుచి గుడితె కామక ఇతికయ్ రగుమ్ డబ్బుల్తె పల్లవన, వేర వేర తెంతో అయిల బక్తల్ ఆర్పితుమ్ దెత గొరెల్ పిట్టల్ గట్ట గెనసుల, నెంజిలె దేముడుచి గుడిక డబ్బుల్ దెవుల. జేవ్ డబ్బుల్ పల్లయేతన నాయిమ్ నెంజిలి ఎదిలి లాబుమ్ కి కెరసుల.

2 జో ఏక దీని అందరి యేనుత అయలన్, అన్నె, “గురుబాబు తుయి బోదన కెర్తి రిసా అమ్మో దేముడు తుక తెద్రవ అన్నె మెన జానుమ్. కిచ్చొక మెలె, దేముడు తోడు నెంజెలె, తుయి కెర్త వెల్లెల కము కెరుక కో కి నెత్తిర్తి” మెన యేనుక సంగిలన్.

3 యేను, జలె, జోక, “తుక ఆవ్ కిచ్చొ నిజామి కచితుమ్ సంగితసి మెలె, *నొవర్ నే జెర్మిలె దేముడుచి రాజిమ్ దెకుక నెత్తిర్తి.” మెన సంగిలన్.

4 ఇసి సంగితకయ్, నీకోదేము జోక “ముత్త్రో జలొ మాన్సు అన్నెక్ దప్ప జెర్మక కిసి? అన్నెక్ సుట్టు అయ్యున్చి పెట్టి పెన గెచ్చు జెర్మక జయెదె గె? నెంజె!” మెన సంగిలన్.

5 యేను జోక, “దేముడుచి రాజిమ్తె మాన్సు బెదుక జలె, †పానిక చి దేముడుచి సుద్ది తిలె అత్తుకచి జెర్మన్ జంకయ్. ఈంజ అత్తుతె జెర్మన్ కో జతి నాయ్ గే, దేముడుచి రాజిమ్తె జో బెదుక నెంజె.

6 ఈంజ లోకుమ్తె ఆగ్గేతె జెర్మన్ జలె, ఆగ్గేచి జెర్మన్ జయెదె. †దేముడుచి రాజిమ్తె బెదుక జలె, దేముడుచి సుద్ది తిలె అత్తుతె జెర్మన్ జంక అన్నె.

7 “ఇసి నొవర్ జెర్మక అన్నె” మెన తుక ఆవ్ సంగిలి రిసా తుయి బమ్మ జా నాయ్.

8 ఇసిచి రిసా వాదుక చి దేముడుచి సుద్ది తిలె అత్తుక టాలె కెరుమ. వాదు, జలె, ఇన్ముమ్ అయ్లొ పక్క వీర్తి రెతి జతయ్. వీరితి సప్పుడు మాన్సు సూనై కి, కేనె తెంతో జెతయ్ గే, కేనె గెతయ్ గే, మాన్సుల్ నేనీతి. జలె, కేనె మాన్సు దేముడుచి సుద్ది తిలె అత్తుచి జెర్మన్ జలె, దన్నె. జా కీసి జర్లు జతయ్ గే కేనీతి, గని జర్లు జా అన్నె మెన జో మాన్సుచ్చ కొడెతె కముతె రుజ్జు జతయ్.”

9 నీకోదేము, జలె, యేనుక అన్నె “తుయి సంగిలి జెర్మన్ కీసి జర్లు జంక జయెదె?” మెన పుసిలన్.

10 యేను జోక కిచ్చొ జబాబ్ దిలన్ మెలె, “ఇస్రాయేలులుక తుయి సికడ్డొనా జలెకి, ఇన్నెచి అర్దుమ్ కెరన్నె నాయ్ గె?

11 తుక ఆవ్ కిచ్చొ నిజామి కచితుమ్ సంగితసి మెలె, అమ్ జాన్తసి తుమ్క సంగితసుమ్, అమ్ దెకిలిసి తుమ్క సాచి సంగితసుమ్, గని అమ్చి సాచి తుమ్ వెల్లెల మాన్సుల్ నంప కెర్పు నాయ్.

12 మాములుమ్ ఈంజ లోకుమ్తె జర్లు జతిన్క తుమ్క సంగిలె కి తుమ్ నంప నే కెర్తె జలె, దన్నె, పరలోకుమ్చి రిసాచి తుమ్క సంగిలె కి, కీసి నంప కెర్తె!

13 కోమాన్సుయి పరలోకుమ్తె వెగ గెతి నాయ్, చి తుమ్క సికడుక నెత్తిర్తి, గని ఆవ్ మాన్సు జా జెర్మన్ అయ్లొసా ఒత్త తెంతో ఉత్త జా అన్నె, చి ఒత్తయ్ అన్నె వెగ గెచ్చొందె.

14 నూను, పూర్లుమ్ ‘అయివో చడితిన తెంతో ప్రెజల్ రచ్చొంచువ జా జితు’ మెన జా బయలు దేసిమి మోసి కంచుక తెయార్ కెర్తె *అయిచి బొమ్మక కీసి ఉక్కుల టీచడ్డన్ గే, దన్నె ఆవ్ మాన్సు జా జెర్మన్ అయ్లొసాక ఉక్కుల †టీచడ్డుక అన్నె.

15 కిచ్చొక మెలె, అంచి ఉప్పిరి కో, జోచి నముకుమ్ తివుల గే, †పరలోకుమ్చి రాజిమ్తె బెద, మొర్తె పరలోకుమ్తె గెచ్చు కెయెక తెయెక జివుల” మెన జోక యేను సంగిలన్.

* 3:3 3:3 నెంజెలె, ‘ఉప్పిర్ తెంతో చి జెర్మన్ జలెకయ్’. † 3:5 3:5 1. ‘పానిక’ మెలె, బాప్తిసుమ్చి కోడు మెన సగుమ్జన్ ఉచర్తతి. వరినయ్యలె యోహాను దెతె తిలె, కెర్త పావెల్ బమ్మన చెమెంచువ జతి గుర్తుచి బాప్తిసుమ్ నజనుక ఎడ్డెర నెసిలె. పానికచి బాప్తిసుమ్ జలె, సుద్ది జతిన్చి గుర్తుయ జయెదె. అత్తుచి కామ్ జలె, సుద్ది జతిన్ జయెదె. 2. ‘పానిక’ మెలె అన్నె సగుమ్జన్ కిచ్చొ అర్దుమ్ ఉచర్తతి మెలె, మాన్సు మాములుమ్ అయ్యున్చి పెట్టి జెర్మన్ జతిన్చి రిసా సంగితయ్ మెన ఉచర్తతి. ఈంజ అర్దుమ్ ఉచర్తె, దొన్నె రగల్ జెర్మన్ కావలొనువచి కోడు జయెదె, మెలె, ఆగ్గెచి కి అత్తుకచి కి. † 3:6 3:6 మత్తయ్ మెలొ సిన్సుడు రిగిడ్డి సుబుమ్ కంబుతె ఎత్తి, అదికారుమ్ తిలొ దేముడుచి రాజిమ్క ‘పరలోకుమ్చి రాజిమ్’ మెనెదె, మత్తయి 3:2, 13:24. ఎక్కిలొ పరలోకుమ్చి రాజిమ్తె నెదితిన కెయెక మెలె, జో మాన్సు నంపజా ప్రబుచి అత్తుక నొవర్ జెర్మన్ జలె గడియ తెంతో. § 3:7 3:7 నెంజెలె, ‘ఉప్పిర్ తెంతో చి జెర్మన్ జంక అన్నె’.

* 3:14 3:14 ప్రెజల్ ఒగ్గెర పావుమ్ కెర్తి రిసా, ఏక సిచ్చుక ప్రబు ఒగ్గెర అయివో తెద్రయలన్. చడితె, మొరుక జయెదె, గని ‘అంచి కోడు నంప కెర్తెన రచ్చొంచువ జత’ మెన ‘మోసి తెయార్ కెర్తి కెచ్చుచుచి అయిక కో దెకుల గే రచ్చొంచువ జా జివుల’ మెన ప్రబు సంగిలన్, చి జాక దెకిలెన వెగెల్ జా జలె. † 3:14 3:14 యేనుక కిసి టీచడ్డుక మెలె, జోవయింక సిలువతె గల టీచడ్డుక. కో జోవయింక నంపజలె, జోవయించి పావుమ్ గెచ్చయేతి రిసా. † 3:15 3:15 ఎక్కిలొ ఎత్తి అదికారుమ్ తిలొ దేముడుచి రాజిమ్తె బెదితిన కెయెక మెలె, జో మాన్సు నంపజా ప్రబుచి అత్తుక నొవర్ జెర్మన్ జలె గడియ తెంతో.

16 జలె, దేముడు ఈంజ లోకుమ్చక ఎదివాట్ ప్రేమ కెర్తి రిసా, జోచొ సొంత ఎక్కి పుత్తుసి ఈంజ లోకుమ్చ చి పాపుమ్ వయితి రితి జోవయింక తెద్రవ దిలన్. కిచ్చొక మెలె, కోయ జోక నంపజా గెచ్చుల గే, ఎత్తిక నానునుమ్ నే జతె, సిచ్చతె నే గెతె పరలోకుమ్తె గెచ్చు కెయింక తెయింక చెంగిల్ తా జివుల.

17 దేముడు జోచొ సొంత పుత్తున్క ఈంజ లోకుమ్తె తెద్రయిలిసి కిచ్చొక మెలె, లోకుమ్చక పాపుమ్ వయదె సిచ్చతె తెద్రయె నాయ్, గని జోచి ఎత్తి పాపుమ్ తెంతో జోవయింక రచ్చించువ కెర్తి రిసా తెద్రయిలో.

18 కో జోక నంపజా గెచ్చుల గే, జోవయించి పాపుమ్ జేవ్ వయింక నాయ్. గని కో జోవయింక నంపజతి నాయ్ గే, జోవయించి పాపుమ్ అప్పె కి వయ అస్తి, చి దేముడుచొ సొంత ఎక్కి దేముడు పుత్తున్క నంపజతి నాయ్ చి రిసాయి సిచ్చ జతి మొర్తుతె గెచ్చుల.

19 జేవ్ కిచ్చొక జోవయించి పాపుమ్ వయ సిచ్చతె గెచ్చుక మెలె, ఉజిడి ఈంజ లోకుమ్తె అయిల్ కి, గర్చ కమె కెరుక ఒగ్గరజిన్ అలవాట్ జా అస్తిచి రిసా, అందర్ రితి పాపుమ్తె ఇండుక ఆన జా, జా ఉజిడి నెసితి.

20 పాపుమ్ కెరుక ఓజ జల మాన్సుల్, జలె, జా ఉజిడి ఎద్దర నెన కెర, జోవయించ కమె బయిల్ దెకవనుక నెన కెర బియిం, జా ఉజిడితె జెతి నాయ్.

21 గని కో సత్తిమ్ ఇండుల గే, జా ఉజిడిక బింక నాయ్, చి జేవ్ కెర్త కమెక 'దేముడుచ కమె, జోచి అత్తున్కక సత్తిమ్క కెర్త కమె' మెన రుజ్జు జతి రితి, దయిరిమ్ తెన్ జోచి జా ఉజిడితె జెవుల.

క్రీస్తు వెల్లో జతిసి యోహాను దాక్ జతిన్చి కోడు

22 ఒత్త తెంతో, యేసు జోచ సిన్సుల్ తెన్ బార్ జా, యూదయ ప్రదేసిమ్చి బయిల్ ఉట్ట గెల. జా పొది యేసు జోచ సిన్సుల్ తెన్ తా, జోవయించి అత్తి మాన్సుల్క బాప్తిసుమ్ దెతె తిలో,

23 అన్సె, ఒత్త తెంతో ఇదిల్ దూరిక, సలీము మెలి గవ్వెచ్చి పాసి తిలి అయింకోను మెలి టాన్తె ఒగ్గర్ పాసి తతికయ, యోహాను కి బాప్తిసుమ్ దెతె తతికయ, మాన్సుల్ జోతె జా కెర బాప్తిసుమ్ నజన్తె తిల.

24 జా పొది యోహానుక హేరోడు రానో జేలి కెరుక నేతయ్.

25 జలె, యోహానుచ సిన్సుల్ నగుమ్జిన్, నుద్ది కెరంత అలవాట్లు చి రిసా యూదుల్చొ వెల్లో మాన్సు ఎక్కిలో తెన్ లట్టబుక దెర్ల.

26 తెదోడి జేవ్ యోహానుతె జా కెర, జోవయింక "గురుబాబు, ఈంజ యోహాను గాడు ఒత్తలోతే జా పొది తుచి తెన్ తిలోనా, తుయి సాచి సంగిలోసా, జో కి ఇన్నె తుచి రితి బాప్తిసుమ్ దెతయ, చి ఎత్తిజిన్ జోతె గెతతి" మెన సంగిల.

27 యోహాను జోవయింక కిచ్చొ జబాబ్ దిలన్ మెలె, "పరలోకుమ్చొ దేముడు జా దిలెకయ్ మాన్సుక జా అదికారుమ్ తయెది. జో కెర్తిసి తప్పు నెంజె.

28 తుమ్క అగ్గె సంగిలయ్, గెద. 'క్రీస్తు నెంజి, గని ఆవ్ జోచొ బారికి జా జో జెతిసి సాట్టు కెరుక మెన దేముడు అంక జోచి పురెతో తెద్రవ అస్స' మెన తుమ్క ఆవ్ తెదోడి సంగిలయ్. ఆవ్ దస్సి సంగిలిన్క తుమి సాచి జా అస్సున్.

29 జలె, కేన్ జలెకు వెండ్లితె, వెండ్లిబూలి వెండ్లిబూలికయ్ గెచ్చెది, గెద. బూలోచొ మింతుసి జోచి పచ్చెన జా అయిల్ కి, జో ఒత్త టీవ, బూలోక దెక, జోచి అవాడ్ నూన, సర్దసంతోసుమ్ జయెది. జలె, వెండ్లితె బూలోయి కీసి ముక్కిమ్ జయెది గే, దస్సి, క్రీస్తు ముక్కిమ్ జా అస్సె, చి అంక సర్దసంతోసుమ్.

30 జో వెల్లో జంక, ఆవ్ దాక్ జంక" మెన యోహాను సంగిలన్.

క్రీస్తుచి అదికారుమ్చి రిసా సంగిలిసి

31 పరలోకుమ్ తెంతో అయిలోసా ఎత్తిచి కంట వెల్లో. మాములుమ్ ఈంజ లోకుమ్చ మాన్సుల్, జలె, మాములుమ్ ఈంజ లోకుమ్చి రగుమ్ తా, మాములుమ్ ఈంజ లోకుమ్తె తిలిన్చి రిసా లట్టబుల. గని యేసుక్రీస్తు పరలోకుమ్ తెంతో అయిలోచి రిసా, జో ఎత్తిచి కంట వెల్లో.

32 ఒత్త దేముడు అబ్బొన్తె సొంత దెకిలిసి సొంత నూన్చిన్చి రిసా జో సాచి సంగిల్ కి, మాములుమ్ ఈంజ లోకుమ్చి బుద్ది తిల మాన్సుల్ కోయి జోచి సాచి నంప కెర్తి నాయ్.

33 గని, జోచి సాచి కో నూన నంప కెర్తతి గే, 'దేముడు సత్తిమచో' మెన పూర్తి దయిరిమ్ జా జోచి సాచి దెతతి.

34 దేముడు తెర్తయలోసా జా, జో దేముడుచ కబుర్లు నిదానుమ్ తెన్ సంగితయ్, అన్నె జోచి పెట్టి దేముడుచి నుద్ది తిలి ఆత్మ ఎదివాట్ దెతయ్.

35 జలె, దేముడు అబ్బిసి దేముడు పుత్తునక పూర్తి ప్రేమ అన్నె, చి అదికారుమ్ ఎత్తి జోచి అత్తి సార్లు కెర దాయె గెల అన్నె.

36 దేముడు పుత్తునక కో నంపజా గెచ్చుల గే, పరలోకుమచి రాజమతె కచితుమ్ బెద, మొర్తె ఒత్త గెచ్చు కెయక తెయక జివుల. గని, దేముడు పుత్తునచి కొడె రితి కో కెర్తె నాయ్ గే, జోచి జా పాపుమ్ వయ అస్తి, చి దేముడు దిలి సిచ్చ జోవయింక కెయ్యక కి పిట్టె నాయ్.

4

సమరయ ప్రదేసిమ్చి తేరబోదక యేసు బోదన కెర్తిసి

1 యోహానుచి కంట యేసు అప్పె ఒగ్గర్ సిస్సుల్ కెరన బాప్తిసుమ్ దెతయ్ మెన పరిసయ్యుల్ నూన్.

2 యేసు మాత్తుమ్ సొంత బాప్తిసుమ్ దెయె నాయ్, గని జోచి సిస్సుల్చి అత్తి దెతె తిలన్,

3 జలె, "బాప్తిసుమ్క ఎత్తిజన్ అంచితె జెతినచి రిసా పరిసయ్యుల్ నూన అస్తి" మెన యేసు చిన కెర, "జోవయించి కోపుమచి రిసా అప్పెచి మట్టుక ఇన్నె తంక బెదె నాయ్" మెన, యూదయ ప్రదేసిమ్ ముల దా, జో వడ్డిలి గలిలయ ప్రాంతుమతె గెచ్చుక మెన అన్నె బార్ జలన్.

4 అప్పె యేసుక సమరయ ప్రదేసిమ్చి వాట్ గెచ్చుక జంకయ్.

5 జలె, సిస్సుల్ తెన్ బార్ జా సమరయ ప్రదేసిమ్చి నుకారు మెంతి ఏక్ గావ్ సొడి అయిల. జా గావ్ కేనె మెలె, యాకోబు మెలో పూర్గుమ్చో జోచో యోసిపు మెలో పుత్తునక దిలి బుయి పాసి అన్నె.

6 ఊంటక యాకోబు కూనయిల కుండి ఒత్త అన్నె. జలె, యేసు ప్రయానుమచి రిసా అల్పు జా, జా కుండి సొడి వెసిన్. పాసి పాసి మెద్దెన్ జా అన్నె.

7 తెదొడి, అన్నిమ్ గెన అన్తి రిసా యేసుచ సిస్సుల్ జా గవ్వి పెన గెల. యేసు ఎక్కిలో ఒత్త వెన అన్నె

8 జా సమరయ ప్రదేసిమ్చి తేరబోద ఎక్లి పాని కడన్తి రిసా అయిల. యేసు జాక "పాని దె, పియిందె" మెన సంగిలన్.

9 జలె, యూదుల్ సమరయ నుదల్ తెన్ బెదితి నాయ్ చి రిసా, జా తేరబోద ఆచారిమ్ జా, "ఆవ్ ఈంజ సమరయతెచి తేరబోద, తుయి యూదుడు. జలె, 'పాని దె' మెన కిచ్చొక అంచి అత్తి తుయి సంగితసి?" మెన యేసుక సంగిలి.

10 యేసు జాక, "మాస్సుల్క దేముడు దిలి వరుమ్ తుయి చినితది జలె, అన్నె, 'పాని దె, పియిందె' మెన తుక సంగితోసా కొన్సి జయిందె గే తుయి చినితది జలె, 'జీవ్ దెతో పాని అంక దె' మెన తుయి అంకయ్ సంగితది." మెన యేసు జాక జబాబ్ దిలన్.

11 జలె, జా తేరబోద అర్దుమ్ కెరన నాయ్ చి రిసా, "బాబు, ఈంజ కుండి దీగ్ అన్నె. పాని కడన్తి సామన్ కిచ్చొ నాయ్, తుక. జీవ్ దెతో జో పాని కేనె తెంతో తుక దొర్కు జయెదె?

12 అమ్చో యాకోబు పూర్గుమ్చో, జోచి పుత్తర్లులు, జోచి సామ్ముల్ ఎత్తి ఈంజయ్ ఊంటచి పాని పితె తిల. జోయ్య అమ్క ఈంజ కుండి దిలన్. తుయి అమ్చో యాకోబు పూర్గుమ్చోచి కంట వెల్లో గే?" మెన సంగిలి.

13 జా తేరబోద దస్సి సంగితికయ్, యేసు జాక, "ఈందె, ఈంజ పాని కేనె మాస్సు పిలెకి, జోక అన్నె తాన్ కెరదె.

14 గని ఆవ్ దెత్తిసి * 'పాని' కో పివుల గే, జోక కెయక కి అన్నె తాన్ కెరె నాయ్. ఆవ్ దెతో పాని జోచి పెట్టి ఊంట పుట్టి రితి జతె తయెదె, చి † కెయక తెయక చెంగిల్ తతి జివుమ్ జోక దొర్కు జయెదె."

15 జలె, జా తేరబోద అర్దుమ్ కెరనుక నేతయచి రిసా, "అప్పె తెంతో అంక తాన్ నే కెర్తి రితి, పానిక ఆవ్ అన్నె ఇన్నె నే జెతె తతి రిసా, తుయి సంగిలో పాని అంక దె" మెలి.

* 4:14 4:14 ఇన్నె 'పాని' మెలె, జా టాలిచి అర్దుమ్ కిచ్చొ మెలె, పరలోకుమచి రాజమతె బెదితి అత్తుతె జెర్బున్ దెతి జోవయించి నుద్ది తిలి అత్తు. † 4:14 4:14 కెయక తెయక చెంగిల్ తతి జివుమ్ మెలె, పరలోకుమచి రాజమతె బెదితి, మొర్తె ఒత్త గెచ్చు జతి, సెక్తి.

16 యేసు జాక, “తుయి గెచ్చు, తుచొ మున్నుద్ద కడ ఆను” మెన సంగిలన్.

17 జా తేరబోద జోక “అంక మున్ను నాయ్” మెన సంగిలి, చి యేసు జాక “ ‘అంక మున్ను నాయ్’ మెన తుయి సంగిలి కోడు సత్తిమ్.

18 తుక అప్పె ఎద పాణజిన మున్నుర్లు అస్తి, చి అప్పె తిలోసా తుచొ మున్నుది నెంజె. సత్తిమ్ సంగిలది” మెన యేసు సంగిలన్.

19 యేసు ఇసి సంగితికయ్, జా తేరబోద, “బాబు, †దేముడు తుక కిచ్చొ కిచ్చొ దెకయ్తయ్ మెన అప్పె అవ్ చినితసి. జోయ్యి తెద్రయ్లో మాన్సు, తుయి.

20 అమచ పూర్లుమచ తెంతో అమ్ సమరయ సుదల్ ఈంజ అమ్చి మొక్కె తిలి డొంగురతె దేముడుక బక్తి కెర్లనుమ్, గని ‘యెరూసలేమ్తె దేముడుచి గుడితె జోక బక్తి కెరుక అస్సె’ మెన తుమ్ యూదుల్ సంగితను” మెన జా సంగిలి.

21 యేసు జాక, “అమ్మ, ఇదిల్ పడ్డొక, ‘దేముడు అబ్బొక బక్తి కెర్లి రిసా ఈంజ డొంగుర జవున్, యెరూసలేమ్ పట్టుమ్ జవున్ ముక్కిమ్ మెనుక నాయ్’ మెన మాన్సుల్క అర్దుమ్ జయెది.

22 తుమ్ సమరయ సుదల్, దేముడుక బక్తి కెర్లె కి, జోవయింక అప్పెక కీదూరి అస్సున్. అమ్ యూదుల్క మాత్తుమ్, జో నిసాన అస్సె. మాన్సుల్క దొర్కు జలో రచ్చించువ కెర్లొసా అమ్ యూదుల్తె జెర్కుక జోచి నెలవ్.

23 జలె, ఇదిల్ పడ్డొక, అప్పె రితి కి, జో దేముడు అబ్బొక నిజమి సంబజల మాన్సుల్ కో జవుల గే, జోవయింది అత్తుతె నిదానుమ్ జా జోవయింక సత్తిమ్ తిలి బక్తి కెరుల. దేముడు అబ్బొన్ దన్న మాన్సుచి రిసా రకితయ్.

24 దేముడు డీస్తాసా నెంజె, గెద. అత్తుయి, జో. జాకయ్, కో జోక బక్తి కెరుక ఉవరుల గే, జోవయింది అత్తుయి నిదానుమ్ తెన్ జోక సత్తిమ్ తిలి బక్తి కెరుక అస్సె” మెన యేసు జా తేరబోదక సంగిలన్.

25 జో ఇసి సంగితికయ్, జా తేరబోద, “ ‘దేముడు తెద్రయిందె’ మెన సంగ తిలో *‘మెస్సయ మెలో రచ్చించువ కెర్లొసా జెయెదె’ మెన జాని. జో అయ్లి పొది, జోయ్యి అమ్క ఎత్తి దెకయెదె” మెన సంగిలి†.

26 జలె, జా దస్సి సంగితికయ్, యేసు జాక “అవ్ తుచి తెన్ లట్టబ్బొసా జోయ్యి” మెన సంగిలన్.

27 యేసు ఇసి సంగిలి బేగి, జోచ సిస్సుల్ జా గవ్వి తెంతో బుల అయ్ల. తేరబోద తెన్ యేసు లట్టబ్తయ్ మెన దెక ఆచారిమ్ జలె, గని ‘తుక కిచ్చొ కావలె?’ జలెకు, ‘జాచి తెన్ కిచ్చొక లట్టబ్తసి?’ జలెకు మెన కో పుసితి నాయ్.

28 తెదెడి జా తేరబోద, జాచి గేడి ముల దా నిగ గెచ్చు, జా గావ్ తెడి పెన,

29 “తుమ్ బేగి జా ఎక్కిలోక దెక! ఈంజొ మాన్సు కక్క నే పుసితె, అవ్ అగ్గె కెర్లిసి ఎత్తి అంక సంగ దిలో. ఈంజొయి క్రీస్తు జయెది, కిచ్చొగె” మెన ప్రజల్క బుకార్లి,

30 చి జా తెన్ ఒగ్గరజిన యేసుతె జెంక బార్ జలె.

31 జా తేరబోద గవ్వి పెన ప్రజల్క బుకార్లి మెద్దెన, యేసుచ సిస్సుల్ జోక “గురుబాబు, అన్నిమ్ కెరు!” మెన బలవంతుమ్ కెర్లె.

32 గని జో “తుమ్ నేన్సి ఏక్ రగుమ్ అన్నిమ్ అంక అస్సె” మెన జబాబ్ దిలన్.

33 జో ఇసి సంగిలి రిసా, జోచ సిస్సుల్ “ఇన్నెక కో జలెకు కిచ్చొ జవున్ అన్నిమ్ ఆన దా అస్తి గే?” మెన ఎక్కిలో తెన్ ఎక్కిలో లట్టబుక దెర్లె.

34 జేవ్ దస్సి జెతికయ్, యేసు జోవయింక, “అంచి అన్నిమ్ కిచ్చొ మెలె, అంక తెద్రయ్లోసాచి ఇస్సుమ్ రితి కెరుకయ్. జోచి కామ్ పూర్లి జర్లు కెరుకయ్.

35 “ఈందె, ‘అన్నె చెత్తర్ జోన్సి గెలెకయ్ పంటో లాయ్ ఆనుక జయెదె’ మెన మొక్కల్ రోవెతి పొది సంగితను. జలె, అవ్ తుమ్క కిచ్చొ మెంతసి మెలె, ఆదె! అంకివొ ఉగుడ దెక! బట్టిలె పంటో అప్పె పిక తెయారొ జా రితి, అంక సంబజంక ఎతివాల్జిన మాన్సుల్ తెయారొ జలి రితి సమయుమ్ జా అస్సె.

† 4:19 4:19 నెంజె, “తుక ‘ఎత్తి అదికారుమ్ తిలో దేముడుచ కబుర్లు సంగితొసా ఎక్కిలో’ మెన అవ్ అప్పె చినితసి.” § 4:22

4:22 నెంజెలె, “నేన్సు. అమ్ యూదుల్ మాత్తుమ్, జోవయింక జానుమ్.” * 4:25 4:25 ‘మెస్సయ మెలె, ‘క్రీస్తు’ మెలె, అన్నె కిచ్చొ అర్దుమ్ తయెది మెలె, ‘రాసె’, ‘ఎత్తి అదికారుమ్ తిలో దేముడు ఏలువ కెరయ్లోసా’ మెలె అర్దుమ్. † 4:25 4:25 అరమయ్ జాన తెన్ ‘మెస్సయ’ మెలె, గ్రెకు బాన తెన్ ‘క్రీస్తు’ జయెది.

36 ప్రజల్లో దేముడుచి రాజీమతే బెదయతి ఈంజ ఆత్మపంటో లాయతితే కో లాయ ఆన్తన జవుల గే, జోవయింక ఆత్మజీతుమ్ దొర్పు జయెదె. జాచి రిసా, అంచి నుబుమ్ కబుర్ తిలి బి గలిలన కి, జా ఆత్మపంటో లాయ ఆన్తన కి, సర్లసంతోసుమ్ జవుల.

37 అంచి ఆత్మపంటోచి కామతే, జలె, 'ఎక్కిలో బి గలెదె, అన్నెక్లో పంటో లాయ ఆనెద' మెలి కోడు సత్తిమ్ జయెదె.

38 అల్లె, తుమ్ మొదొల్ నే కెర్లి ఈంజ కామతే బెదుక తుమ్క ఆవ్ తెద్రవ అస్సి. కో కో క్కుమ్ జా అగ్గె తెంతో ఈంజ కామ్ కెర తతికయ్, తుమ్ కి అప్పె ఈంజ కామతే బెద అస్సన్" మెన యేసు జోవ సిన్సుల్క సికయిలన్.

నమరయచ మాన్సుల్ ఒగ్గర్జిన్ యేసుక నంపజలిసి

39 జలె, 'అవ్ కెర్లిని ఎత్తి అంక సంగ దిలో' మెన యేసుచి రిసా జా తేర్బోద సంగిలి సాచి నూన కెర, జా గవ్విచ నమరయ సుదల్ ఒగ్గర్జిన్ యేసుక నంపజల.

40 జాకయ్, యేసుతే జా కెర, "అమ్చి గవ్వి జా తా" మెన జేవ్ నమరయ సుదల్ బతిమాల్పా జా సంగిల, చి దొరతి తా గెలన్.

41 జో సొంత బోదన కెర్లికయ్, అన్నె ఒగ్గర్జిన్ జోక నంపజల,

42 చి జా తేర్బోదతే జా కెర, "తుక 'జయ్యి సంగిలి రిసా నంపజలమ్' మెన అప్పె తెంతో 'సంగమ్ నాయ్. కిచ్చొక మెల, అమ్ అప్పె జోచి కొడ్ల సొంత నూన్లి రిసా, 'ఈంజ లోకుమ్చ ఎత్తిక దొర్పు జలో రచ్చించుప కెర్లొసా ఈంజొయి' మెన పూర్తి దయిరిమ్ జా అస్సుమ్" మెన సంగిల.

గలిలయచ మాన్సుల్ యేసుక మరియాద దెకిలిసి

(మత్త 8:5-13; లూకా 7:1-10)

43 జా దొరతి గెలి పడ్లి, యేసు జోవ సిన్సుల్ తెన్ ఒత్త బార్ జా గెచ్చ, గలిలయ ప్రాంతుమ్తే పావెల.

44 "దేముడుచ కబుర్లు సంగితొసా కో జలెక సొంత టాన్తే తిలె, సొంత టాన్చ మాన్సుల్ జోక గవ్వరుమ్ దెకితి నాయ్" మెన జాన కెర, యేసు సొంత సంగితే తిలన్. జాకయ్ యూదయ ప్రదేసిమ్ ముల తిలో.

45 గలిలయ ప్రాంతుమ్చ ప్రజల్ ఒగ్గర్జిన్, జలె, యెరూసలేమ్ వట్టుమ్తే పండుగక జేవ్ కి గెచ్చ తా అన్నె ఉట్ట జా అస్సి. జేవ్ యెరూసలేమ్తే తిలి పొది, యేసు కెర్ల కమొ ఎత్తి దెక తిల. జేవ్, జలె, జేవ్ గలిలయులు, సర్ల తెన్ జోక మరియాద కెర్ల.

46 జలె, జా గలిలయ ప్రాంతుమ్తేచి కానా మెంతి గవ్వి యేసు అన్నె ఉట్ట అయిలన్. జా సుట్టు, ఒత్తయ్ పానిక ద్రాచ రస్సుమ్ మార్పుప కెర తిలో. జలె, యేసు అప్పె కానాతే తతికయ్, ఇదిల్ దూరి తిలి కపెర్నహూమ్ మెంతి గవ్వి హేరోయ రానొచొ వెల్లో అదికారి ఎక్కిలోచొ పుత్తుని జొర్లొ నీడ అస్సి.

47 యేసు యూదయ ప్రదేసిమ్ ముల దా గలిలయ ప్రాంతుమ్తే జా అస్సి మెన జో వెల్లో మాన్సు నూన్లి బేగి, బార్ జా, యేసుతే అయిలన్. జోచొ పుత్తుని మెర గచ్చెది గే జయెదె గే, దస్సి జా అస్సిచి రిసా, "బేగి జా అమ్చొ పుత్తుక చెంగిల్ కెర" మెన యేసుక బతిమాల్పా జా సంగిలన్.

48 జలె, యేసు జోక, "దేముడు దిలి అదికారుమ్క రుజ్జు దెకయ్త కమొ నే దెకిలె, తుమ్ నంప కెర్పు నాయ్" మెన సంగిలన్.

49 యేసు ఇన్ సంగితికయ్, జో "బాబు, అమ్చొ బోబో నే మొర్లి రితి బేబేగి జె" మెన జో అన్నె బతిమాల్పా జా సంగిలన్.

50 తెబొడి యేసు జోక, "గో, తుచొ పుత్తుది జయెదె!" మెన సంగిలన్. యేసు సంగిలి కోడు జో మాన్సు నంప కెర, గెరి గెచ్చుక బార్ జలన్.

51 జో వట్టి గెతే తతికయ్, జోచొ గొత్తి సుదల్ జో తెన్ దస్సుల్ జల. "తుచొ పుత్తుది జలె!" మెన జోక సంగిల.

52 "కెత్తి గంటల్క చెంగిల్ జలె?" మెన జో పునిలన్, చి జేవ్ జోక "కాలి ఒంటి గంటక జొర్లొ గెలి!" మెన సంగిల.

53 జలె, "తుచొ పుత్తుది జయెదె" మెన యేసు సంగిలి గడియ జయ్యి మెన జొర్లొ నీడ్లొ నాడుచొ అబ్బొసి చివన్లొ. జాకయ్, జోచొ గెర్చ మాన్సుల్ ఎత్తిజిన్ యేసుక నంపజా గెల.

54 యూదయ ప్రదేశీయ ముల గలలయ ప్రాంతుమత తొలితో ఉట్టు అయలి జా నుట్టు తెంతో, ఈంజీ నాడుక చెంగిల్ కెర్లిసి తెన్ జోచి అదికారుమక రుజ్జు దెకయత కము దొన్ని జల.

5

యేసు యెరూసలేమ్ పట్టుమత ఉట్టు గెలిసి

1 ఈంజ జర్గు జలి పడ్డో, యూదుల్చి పండుగు అన్నెక్ అయలిచి రిసా దేముడుచి దేవులుమ్ తిలి యెరూసలేమ్ పట్టుమత యేసు ఉట్టు గెలన్.

2 జలి, జా పట్టుమత 'మెండల్ పిది' మెన్ ఏక్ టాన్ అస్సె. ఒత్త ఏక్ వెల్లో కుండి అస్సె. ఎబ్రీ బాస తెన్ జా కుండిచి నావ్ 'బెత్సెన్'. జా కుండిచి నుట్టునంత, పావ్ గుమ్మల్ తిలి టాన్ ఏక్ అస్సె.

3 ఒత్త రగరగాల్ రోగల్చ బెర అస్సి, గుడ్డి మాన్సుల్, సొట్ట మాన్సుల్, అత్తో చట్టో లంబ గెల మాన్సుల్, దసచ అస్సి.

4 *కిచ్చొక ఒత్త అస్సి మెలె, గడియ గడియక ఏక్ దూత జా గడ్డె ఉత్త జా కెర, పాని కదుల్ కెరెదె, చి జో పాని కదుల్ జలి బేగి కో జలికు రోగి తొలితో పానితె ఉత్తెదె గే, జోవయించి జబ్బు గెచ్చు, చెంగిల్ జయెదె.

5 జలి, ముప్పుయ్ అట్టు వెర్చుల్చి జబ్బు తిలో ఏక్ మాన్సు ఒత్త అస్సి.

6 యేసు జా వెల్లి కుండి తిలిన్తె గెచ్చు, జో రోగిక దెక, 'ఒత్త ఎత్తివాట్ దీసల్ తెంతో జోచి అంతుర్వొత్తె నిజ తా మాలజ్జా అస్సె' మెన్ చిన కెర, "తుకు నిజమి చెంగిల్ జంక ఇస్సుమ్ అస్సె గే?" మెన్ జోక పుసిలన్.

7 జో రోగి "బాబు, పాని కదుల్ జలి బేగి అంక పానితె ఉత్తయ్తోసా కో నాయ్, చి అవ్ ఉత్తిర్తె ఎద అస్సె కో గే అంచి కంట అగ్గె ఉత్తెదె" మెన్ సంగిలన్.

8 యేసు జోక "తుయి ఉట్టు, తుచి అంతుర్వొ వయన ఇండు!" మెన్ సంగిలన్.

9 సంగిలి బేగి, జో మాన్సు చెంగిల్ జా జోచి అంతుర్వొ వయన ఇండిలన్.

10 జా దీసి, యూదుల్చి బక్తి కెర్లి సెలవ్ కడన్ల దీసి. జలి, యూదుల్చి వెల్లెల మాన్సుల్ సగుమ్జన్ చెంగిల్ జలి జో మాన్సుక దెకిల. దెక, "ఈంజ సెలవ్ కడన్ల దీసి. తుచి అంతుర్వొ వయక గారు!" మెన్ సంగిల.

11 దస్సి సంగితికయ్, చెంగిల్ జలి జో మాన్సు "తుచి అంతుర్వొ వయన ఇండు" మెన్, అంక చెంగిల్ కెర్లిసా సంగిలన్, చి వయన ఇండిలయ్" మెన్ జోవయంక జబాబ్ దిలన్.

12 "తుచి అంతుర్వొ వయన ఇండు" మెలోసా కో?" మెన్ జేవ్ వెల్లెల మాన్సుల్ పుసిల.

13 జో కొన్సె జయెదె గే చెంగిల్ జలి జో మాన్సు నేనె. కిచ్చొక మెలె, ఒత్త ఒగ్గర్జిన్ జనాబ్ తతికయ్, యేసు, కో నే దెకితె, ఉట్టు గెచ్చు తిలో.

యేసు జో మాన్సు తెన్ అన్నె దస్సుల్ జా జాగర్ల సంగిలిసి

14 పడ్డో, చెంగిల్ జలిసొక యేసు దేముడుచి గుడితె చజ కెర, జోక "ఈందె, అప్పె తుయి చెంగిల్ అస్సిసి. అన్నె కిచ్చొ జవున్ వెల్లి బాద నే సిడ్డి రిసా అన్నె పొప్పుమ్ కెరు నాయ్" మెన్ జాగర్ల సంగిలన్.

15 జో మాన్సు ఒత్త తెంతో గెచ్చు, "అంక చెంగిల్ కెర్లిసా యేసుయి" మెన్ యూదుల్చి వెల్లెల మాన్సుల్చి సంగిలన్.

16 జలి, సెలవ్ కడన్ల దీసి యేసు ఈంజ కామ్ కెర్లి రిసా, యూదుల్చి వెల్లెల మాన్సుల్ జోక అల్లర్ కెరుక దెర్ల.

17 దస్సి జతికయ్, యేసు జోవయంక, "అగ్గె తెంతో ఎద కి అంచో దేముడు అబ్బొ కామ్ కెర్లె తత్తయ్. అవ్ కి జోచి కామ్ కెర్లె అస్సి" మెన్ సంగిలన్.

18 జలి, 'సెలవ్ కడన్ల దీసి పిట్టవన కామ్ కెర్లయ్' మెన్, అన్నె, దేముడు తెన్ సమ్మందుమ్ మెనల్లొ జోక 'అబ్బొ' మెన్ యేసు సంగిలిన్చి రిసా, యేసుక మారుక మెన్ అన్నె ఒగ్గర్ ఉచర జల.

యేసుచి అదికారుమ్ కేనె తెంతో జితయ్

* 5:4 5:4 గ్రీకు బాస తెన్ ఈంజ తొలితో రెగిళ్ల సగుమ్ పున్తకల్తె 4 నంబర్చి కోడు తయ్ నాయ్.

19 జలె, కోపుమ్ జల జేవ్ వెలైల మాన్సుల్ క యేను ఇసి మెన సంగిలన్. “ఆవ్ తుమ్ కిచ్చొ నిజమి కచితుమ్ సంగితసి మెలె, దేముడు అబ్బొ కెర్తిసి కేన జలెకి ఆవ్ పుత్తుని దెకిలె, జయ్యి దస్సి కెర్తె తయందె, వేరచి కిచ్చొ కెరుక నెంజె. అబ్బొ కిచ్చొ కెర్తె, ఆవ్ పుత్తుని జయ్యి కెర్తెన్.

20 ఆవ్ పుత్తునక దేముడు అబ్బొ ప్రేమ కెర్తయ్. దేముడు అబ్బొ కెర్తిసి ఎత్తి, ఆవ్ జోచొ పుత్తునక దెకయ్తె తత్తయ్. తుమ్ దెకిలె ఈంజేవ్ కమెచి కంట అన్నె జిన్ల కమె ఆవ్ పుత్తునక దేముడు అబ్బొ దెకయెదె. తుమ్ ఆచారిమ్ జన్నె.

21 కీన కమె మెలె, మొర గెలనక ఉట్టవ దేముడు అబ్బొ జోవయింక కీసి అన్నె జయ్తయ్ గే, దస్సి, కక్క, జయ్తయ్ సర్ల జయిందె గే, జోవయింక జయ్తయ్ చెంగిల్ కెరిందె.

22 వట్టొ, దేముడు అబ్బొ కక్క, సొంత తీర్పు కెరె నాయ్. తీర్పు కెర్తి అదికారుమ్ ఆవ్ జోచొ పుత్తునక సార్ల కెరె దా అన్నె.

23 దేముడు అబ్బొక మాన్సుల్ కీసి గపురుమ్ కెర్తతి గే, దస్సి ఎత్తి, జిన్ ఆవ్ జోచొ పుత్తునక కి గపురుమ్ కెర్తె మెన, జో సెలవ్ దా అన్నె. ఆవ్ పుత్తునక కో గపురుమ్ కెర్తి నాయ్ గే, అంక తెద్రయ్లో దేముడు అబ్బొక కి గపురుమ్ కెర్తి నాయ్.

24 “తుమ్ కిచ్చొ నిజమి కచితుమ్ ఆవ్ సంగితసి మెలె, అంక తెద్రయ్లో సొక నంప కెరె కో అంచి కోడు సూన కెరుల గే, పరలోకుమ్ చి రాజిమ్తె బెదితి వరుమ్ జోవయింక దొర్పు, జా అన్నె. పాపుమ్ చి రిసా జేవ్ మొర గెల రిత జా తిలె కి, జేవ్ కెర్తె పాపల్ చెమించుప జా సిచ్చుతె గతి నాయ్, గని జివ్వి జా అన్నె.

25 “తుమ్ కిచ్చొ నిజమి కచితుమ్ ఆవ్ కిచ్చొ సంగితసి మెలె, మొర గెలన ఆవ్ దేముడు పుత్తునచి అవాడ్ సూనతి సమయ్యుమ్ జెతయ్, అప్పె కి జా అన్నె, కో సూన నంపజవుల గే, నొవరీ జలి రితి జా, దేముడు చి రాజిమ్తె బెదుల.

26 జివ్ కెర్తి సెక్తి జో అబ్బొసి జలో దేముడు చి అత్తి అన్నె, జలె, దొర్పు, జలి జయ్యి సెక్తి ఆవ్ జోచొ అబ్బొ జలో దేముడు పుత్తునక దా అన్నె.

27 అన్నె, ఆవ్ మాన్సు జా జెర్మన్ అస్సి చి రిసా అంక మాన్సుల్ తీర్పు కెరె సిచ్చు కెరుక, చెమించుప కెరుక, అదికారుమ్ దా అన్నె.

28 ఇన్నె చి రిసా తుమ్ కిచ్చొ ఆచారిమ్ సేడ నాయ్, కిచ్చొక మెలె, మొర గెల మాన్సుల్, మెన్సునల్ తె తిలన ఎత్తి, అంచి అవాడ్ సూన బారీ జతి సమయ్యుమ్ జెయెదె.

29 తెద్రొక జేవ్ బారీ జా, సత్తిమ్ కెర్తెన అన్నె జివ్ జా ఉట్ట పరలోకుమ్తె గెచ్చు చెంగిల్ జితె తవుల, సత్తిమ్ నే కెర్తెన ఉట్ట, సిచ్చుతె గెచ్చుల.

30 “జలె, కిచ్చొ అచ్చొ కెరుక అంక అదికారుమ్ నాయ్, దేముడు అబ్బొతె ఆవ్ సూన్లి రితి ఆవ్ తీర్పు కెర్తెసి ఆవ్ కెర్తి తీర్పుతె కిచ్చొ తప్పు నాయ్. కిచ్చొక మెలె, ఆవ్ కిచ్చొ వేర ఉచరి నాయ్, గని అంక ఎక్కి ఆన. కిచ్చొ మెలె, అంక తెద్రయ్లో సొచి ఇస్సుమ్ తిలిసి పూర్తి జర్గు కెరుక.

యేసు చి రిసా సాచి

31 “అంచి రిసా ఆవ్ ఎక్కిలో సాచి సంగనై, అంచి సాచి సత్తిమ్ చి గే అబద్ధుమ్ చి గే రుజ్జు నాయ్.

32 అంచి రిసా సాచి సంగితోసా అన్నెజ్జొ అన్నె, జో అంచి రిసా సాచి సంగిలిసి సత్తిమ్ మెన జాని.

33 మెలె, యోహానుక ‘కిచ్చొ సాచి సంగిదె?’ మెన సూనతి రిసా తుమి జా సుట్టు సగుమ్ జిన్ చి అత్తి కబురీ తెద్రయ్లదు, చి ఆవ్ కొన్నె గే జో సాచి సంగిలన్.

34 అంచి రిసా చి ముక్కిమ్ జలి సాచి మాన్సు సంగిలిసి నెంజె, గని తుమ్ కిచ్చొ ‘నంపజా రచ్చించుప జతు’ మెన, యోహాను చి సాచి చి రిసా తుమ్ కిచ్చొ ఆవ్ ఉచరయ్తసి.

35 దొర్పు, జలిసి మాన్సు చినితి రిసా దీవు లగితె తిలె కీసి తప్పున ఉజిడ్ దెతయ్ గే, దస్సి, ఉజిడ్ రితొ జా, అంచి రిసా యోహాను సాచి సంగితె తిలొ. జో సంగిలి సాచి సూన, తూమ్ కిచ్చొ గడియయ్ సర్ల తెన్ తిలదు.

36 “గని, యోహాను చి సాచి చి కంట అంక జిన్లి సాచి అన్నె. ఆవ్ కెరుక మెన దేముడు అబ్బొ దిల కమె, ఈంజేవ్ ఆవ్ కెర్తె కమెయి దెకిలె, జోయ్యి అంక తెద్రయ్లో మెన ఈంజేవ్ కమెయి అంచి రిసా సాచి సంగితె.

37 “పడ్డో, అంక తెద్రయ్లో అబ్బొయి అంచి రిసా సొంత సాచి సంగిలన్. తూమ్ కెయ జోచి అవాడ్ నూన్సు నాయ్, జోచి రూపుమ్ తుమ్ కెయ దెకున్ నాయ్.

38 జోచి కోడు తుమ్చి పెట్టి నాయ్ మెన కిచ్చొ రుజ్జు తత్తయ్ మెలె, జో తెద్రయ్లోసాక తుమ్ నంప కెర్దు నాయ్.

39 దేముడుచి రాజీమతె బెద పరలోకుమతె గెతి రిసా దొర్కు జలి గ్యానుమ్ పున్నిమి దెతిసి దేముడుచ కొడెత తయెదె మెన దేముడుచ కొడె తుమ్ రోజుక దెకితను. జలె, జెవ్వి అంచి రిసా సాచి సంగితతి.

40 జేవ్ కొడె అంచి రిసా సాచి సంగిలే కి, అంచితె దొర్కు జతి పరలోకుమచి జీవ్ సంగితి రిసా తుమ్ అంచితె జెంక ఎద్దరె నెనును. అంక నంపజలె, తుమ్క దొర్కు జతి.

41 “మాన్సు దెతి గపురుమ్ అంక నాయ్.

42 గని దేముడుచి ప్రేమబుద్ధి తుమ్చి పెట్టి నాయ్ మెన జాని.

43 అంచొ అబ్బొసి జలో దేముడుచి నావ్ తెన్ ఈంజ లోకుమతె ఆవ్ జా అస్సి, గని తుమ్ అంక నంప కెర్దు నాయ్. గని, కో జలెకు వేర మాన్సు అవ్వి కెర అయ్లె, జోకయ్ నంప కెర్తె.

44 మాన్సు సంగితి గపురుమ్ ఎక్కిలోతె ఎక్కిలో తుమ్ సంగితను, గని ఎక్కిలో దేముడు దెతి గపురుమ్క తుమ్ కోరొప జను నాయ్. జాకయ్ తుమ్ కీసి నంప జస్సె, నెతుర్కు.

45 “జలె, అబ్బొసి జలో దేముడుచి మొక్కె తుమ్క నేరొమ్ వయడ్డెసా ఆవ్ మెన తుమ్ ఉచర నాయ్. ‘మోసచి అత్తి ప్రబు రెగిడ్డి ఆగ్గులే నంపజలమ్, చి జాకయ్ రచ్చొచువ జమ్దె.’ మెన, తుమ్క తుమి ఉచర్రను. గని జయ బోదన తుమ్క నేరొమ్ వయడ్డె అస్సె.

46 మోసే పూర్గుమ్చొచి అత్తి దేముడు రెగిడ్డిసి కోడు తుమ్ నంప కెర్తెదు జలె, అంకయ్ నంప కెర్తెదు! కిచ్చొక మెలె, అంచి రిసాయి జో రెగిడ్డె.

47 గని మోసే రెగిడ్డిసి తుమ్ నంప నే కెర్తె, ఆవ్ సంగిత కొడె కీసి నంప కెర్తె!” మెన జేవ్ వెల్లెల మాన్సులేక యెసు సంగిలన్.

6

పావ్ వెయిల్ జనీక యెసు అన్నిమ్ దిలిసి

(మత్త 14:13-21; మార్కు 6:30-44; లూకా 9:10-17)

1 ఇన్నెచి పడ్డో యెసు గలిలయ ప్రాంతమతె అన్నె గెచ్చు, జా గలిలయచి సముద్రుమ్ గాడు జీన ఒత్తల్తో గెలన్. జా గాడుక ‘తిబెరియ గాడు’ కి మెనుల.

2 జలె, జబ్బుల్క జో యెసు చెంగిల్ కెర్తె దేముడు అబ్బొసి దిలి అదికారుమ్క రుజ్జు దెకయ్త కమె జేవ్ దెక తిలి రిసా, ఒగ్గర్జీన్ జనాబ్ గాడుచి ఒడ్డువాట్ ఇండ యెసుచి వట్టి గెచ్చుక బార్ జల.

3 జలె, యెసు జోచి సిస్సుల్ తెన్ ఏక్ మెట్టయ్ వెగ, వెన అస్సి.

4 యూదుల్చి *పస్కా మెంతి పండుగు అన్నెక్ సుట్టు పాసి జెతయ్.

5 యెసు దెకిల్ పొది, ప్రెజల్ జట్లు జట్లు తెన్ జోతె జెతిసి దెక, పిలివ్ మెలో సిస్సుడుక “ఈంజేవ్ ప్రెజల్ కతి రిసా అమ్ కీసి అన్నిమ్ గెనుక?” మెన పునిలన్.

6 కిచ్చొ కెరుక గే యెసు జానె, గని, జోచి రిసా పిలివ్ కెర్తి దయిరిమ్ తెన్ నంపజతయ్ గే దెకితి రిసా దస్సి మెన యెసు పునిలన్.

7 జలె, పిలివ్ జోక, “ఈంజేవ్ మాన్సుల్ ఎత్కిజనీక ఇదిల్ ఇదిల్ జవున్ దెంక జలె, †వెయి వెండ్లుచ పోడియె జలెకు నే బెరె” మెన సంగిలన్.

8 గని సిమోను పేతురు మెలో సిస్సుడుచొ అంద్రెయ్ మెలో బావొసి జేవ్ సిస్సుల్తె అస్సె.

9 ఈంజో, జలె యెసుక “ఓదె, ఇన్నె తిలో ఇదిలోసా నాడు ఎక్కిలోక పావ్ పోడియె చి దొన్ని ఇదుద్ద మొస్సు అస్తి, గని ఎత్కిజనీక తెద్దిలి కీసి వంట దెంక జయెదె!” మెన సంగిలన్.

* 6:4 6:4 పూర్గుమ్ పొది యూదుల్ ఇగుప్పు దేనిమి ఆ గెతిమాన్సుల్ జలి తెంతొ ప్రబు రచ్చొచువ కెర్తిసి ఏద కెర్తె పండుగు, ఈంజ. జా పండుగుక నే పులయ్లె పోడియె రిత పోడియె కవుల. † 6:7 6:7 నెంజలె, దొన్ పుంజొజీన్ మాన్సుల్క ఏక్ దీన్చి కూలి డబ్బుల్ దెతి ఎదిలి డబ్బుల్.

10 యేసు “ఎత్తిజినక వెనవ దాన” మెన సిస్సుల్క సంగిలన్. జలె, ఒత్త చెంగిలి వెనితి రితి గర్చి చివ్వర్ తిలి టాన్ ఒగ్గర్ అస్సె, చి ఎత్తిజిన ప్రెజల్ వెనిల. ఎక్కి మున్నుబోదల్క లెక్క కెర్లె, జేవ్ మొత్తుమ్ పాసి పాన్ వెయిల్ జిన జల.

11 జలె, యేసు జేవ్ పోడియె నజన, “తూయి ఈంజ అన్నిమ్ దా దయ కెర్లది” మెన దేముడు అబ్బొన్క ఉచర, వెన తిలస ఎత్తిజినక పావెతి రితి వంట దిలన్. మొన్నతెన్ కి దస్సి కెర, జేవ్ పేట్ బెర్తు కతి రితి వంట దిలన్.

12 ఎత్తిజిన పేట్ బెర్తు కయ్ల పడ్డో, “ఆరి పాడ్ జవున్ నాయ్ మెన, సేంసిల గండల్ గుడ్డ ఆన” మెన సిస్సుల్క యేసు సంగిలన్.

13 జలె, ఎత్తిజిన కయ్ల జేవ్ పావ్ పోడియెచ సేంసిల గండల్ సిస్సుల్ గుడ్డిల. గుడ్డిలె, బార గంపల్ బెర్తు జల.

14 జలె, దేముడు అబ్బొని దిలి అదికారుమ్క రుజ్జు దెకయ్లి ఈంజ కామ్ ప్రెజల్ దెక కెర, “ఒహో, ‘అంచి కబుర్ సూనయ్తోసాక బూలోకుమ్తె బార్ కెరిందె’ మెన దేముడు సంగిలోసా ఈంజొయి” మెన సంగితె తిల.

15 తెదోడి, జోక రానొ కెర్లె రిసా దెరుక మెన ప్రెజల్ కోర్ప జల, గని జోవయించి ఉద్దెనుమ్ చిన కెర, యేసు జోవయింక ముల దా, ఎక్కిలో గెచ్చు, మెట్టయ్ అన్నె గెలన్.

యేసు పానిచి ఉప్పిరి ఇండితయ్

(మత్త 14:22-27; మార్కు 6:45-52)

16 సాంజ్ జతికయ్, అందర్ జంక దెర తిలి, చి యేసు జోవయింతె అన్నె ఉత్త జెంక నేతయ్చి రిసా సిస్సుల్ “గెరి గెచ్చుమ!” మెన గడ్డె గెచ్చు,

17 జోవయించి దోనితె వెగ, గాడు ఒత్తల్తో తిలి కపెర్నహూమ్ పట్టుమ్తె గెచ్చుక మెన, దోని జినవుక దెర్ల.

18 ఇదిల్ దూరి జినయ్లి పొది, వాదు ఒగ్గర్ కెర్లె, చి వెల్లెల కెర్లల్ కెరుక దెర్లె.

19 దస వెల్లెల కెర్లల్ కెర్లెన్తె జేవ్ పాసి పాసి దొన్ని కోసుల్ దూరిక దోని ఇండయ్తికయ్, యేసు పానిచి ఉప్పిరి ఇండ జా, దోనిక పాసి పావెలన్. జో దస్సి పాసి ఇండ జెత తతికయ్, సిస్సుల్ దెక, “డుంబో, కిచ్చి గే!” మెన, బియఁ గెల.

20 యేసు జోవయింక “తుమ్ బియఁ నాయ్. ఆవ్వు జెతసి” మెన దయ్రిమ్ సంగిలన్.

21 తెదోడి నర్ల తెన్ జోకయి దోనితె వెగయ్ల, చి బేగి జేవ్ గతి ఒడ్డుతె దోని పావ గెలి.

ప్రెజల్ యేసుక చజలిసి

22 జలె, జా గెలి దీసి పోడియె మొన్న కయ్ల ప్రెజల్ సగుమ్జిన, అన్నెక్ దీసి ఎద గాడు ఒత్తల్తో రకితె అస్సి. ‘గెలి దీసి ఎక్కి దోని తిలి’ మెన, ‘యేసు జోచ సిస్సుల్ తెన్ దోనితె వెగ నాయ్, చి జో నెంతె సిస్సుల్ ఉట్ట గెచ్చు తిల’ మెన, జేవ్ ప్రెజల్ ఉచార కెర అస్సి. జాకయ్, యేసుచి రిసా ‘మెట్టయ్ తెంతో ఉత్త జెంక నేతయ్. కిచ్చొగె’ మెన రకితె అస్సి.

23 రకితె తిలె, తిబెరియ పట్టుమ్ తెంతో, వేర దోనివొ అయ్ల. గెలి దీసి యేసు దేముడు అబ్బొన్క ఉచర వంట దిల పోడియె కయ్ల జేవ్ ప్రెజల్ తిలిన్తె, జలె, జేవ్ దోనివొ అయ్ల.

24 జెతికయ్, జోచ సిస్సుల్ కి యేసు కి ఇన్నె నాయ్ మెన ప్రెజల్ దెక, జేవ్ అప్పె అయ్ల దోనివొతె వెగ, యేసుక చజాక మెన, కపెర్నహూమ్ పట్టుమ్తె గెచ్చు పావెల.

పరలోకుమ్తె బెదితి నెక్తి దెతి పోడియె

25 ప్రెజల్ గాడు జిన, యేసుక చజ, జో తిలిసి జానన “గురుబాబు, కెయ్ ఉట్ట అయ్లది?” మెన పుసిల.

26 యేసు జోవయింక, “తుమ్ ఆవ్ నిజుమి కచితుమ్ కిచ్చొ మెంతసి మెలె, తుమ్ ఒత్త పేట్ బెర్తు పోడియె కా కెర సుకుమ్ జలి రిసా అంక చజాక అయ్లదు, గని అంచి అదికారుమ్క రుజ్జు దెకయ్లి జా కామ్చి గుర్తు అర్దుమ్ కెరల్లె రిసా నాయ్.

27 అగ్గ నుకుమ్ కెర్తి అన్నిమ్ గట్టచి రిసా తుమ్ ఉచర్తె తా నాయ్. జా ఎత్తి పొడ్ జతిసి. అన్నిమ్, మెన పరలోకుమతె బెదితి సెక్తి దెతిసక టాలి కెర్తె, జయ్యి అన్నిమ్క కోర్వ జా. జయ్యి అన్నిమ్, జలె, కెయ్క తెయ్క తా గెతిసి. జయ్యి అన్నిమ్. జలె, అవ్ మాన్సు జా జెర్సున్ అయ్లోసా తుమ్క దెయిందె. జయ్యి తుమ్క ముక్కిమ్. జా దెంక అంక అదికారుమ్ కిసి తంక మెలె, దేముడు అబ్బొ, దేముడు, అంచి అదికారుమ్చి రిసా సాచి సంగ జోచి ముద్ర దా అస్సె,” మెన ప్రజెల్క యేసు సంగిలన్.

28 తెదెడి జేవ్ ప్రజెల్ జోక “దేముడుచ కమె అమ్ కెరుక మెలె, అమ్ కిచ్చొ కెర్తె జయెదె?” మెన పుసిల.

29 యేసు జోవయింక “దేముడు తుమ్క కిచ్చొ వూచి తియార్తయ్ మెలె, అవ్ జో తెద్రయ్లోసాక తుమ్ పూర్తి నంపజంకయ్” మెన సంగిలన్.

30 సంగితికయ్, జేవ్ జోక “జలె, ‘జో తెద్రయ్లో రచ్చింఱుప కెర్తొసా తుయ్’ మెన అమ్ దయిరిమ్ తెన్ నంపజతి రిసా తుచి అదికారుమ్క కిచ్చొ గుర్తు అమ్క దెకయ్తె? కిచ్చొ వెల్లి కామ్ కెర అమ్క రుజ్జు దెకయ్తె?

31 అమ్చ పూర్ణమ్చ వెల్లి బయిలె బుల్లె తిలి పొది, † ‘మన్నా’ మెలి పొడియె రితిసి కతె తిల. జాకయ్, పరలోకుమతె తెంతో చి పొడియె రితిసి జోవయింక జో దిలో మెన దేముడుచ కొడెతె రెగ్గ అస్సె, గెద” మెన సంగిల.

32 ప్రజెల్ యేసుక దస్సి సంగితికయ్, జో జోవయింక, “తుమ్క కిచ్చొ నిజమి కచితుమ్ అవ్ సంగితసి మెలె, తుమ్చ పూర్ణుల్క పరలోకుమ్ తెంతో చి పొడియె మోసే దిలిసి నెంజె. దేముడు అబ్బొయి దిలిసి. జలె, తుమ్క నిజమ్ జలి పొడి రితి, నిజమ్ జలి పొడి దేముడు అబ్బొ అప్పొ పరలోకుమ్ తెంతో తెద్రవ దా తుమ్క దెతయ్.

33 దేముడు అబ్బొ దిలి జయ్యి పొడియె, కిచ్చొ జయెదె మెలె, పరలోకుమ్ తెంతో అప్పొ రితి ఉత్త అయ్లిసి. జయ్యి పొడి ఒండి లోకుమ్చక సరి జతి జీవ్ దెతిసి” మెన యేసు సంగిలన్.

34 యేసు దస్సి సంగితికయ్, “బాబు, జయ్యి పొడి అమ్క దెతె తా” మెన ప్రజెల్ సంగిల.

35 జలె, యేసు జోవయింక, “సరి జతి జీవ్ దెతి జా పొడి ఆవ్వె. కో అంక పూర్తి నంపజా కి అంచితె జెవుల గే, జోవయింక చూ, తాన్ కెయ్క అస్సె కెరె నాయ్.

36 గని, ‘అంక దెకిలెకి తుమ్ నంప కెర్పు నాయ్’ మెన తుమ్క అగ్గ తెంతో సంగితసి.

37 “ ‘నంపజా రచ్చింఱుప జతు’ మెన కక్క దేముడు అబ్బొ అంచితె తెద్రయెదె గే, జెవుల, చి కో అంక నంపజా జెవుల గే, జోవయింక కెయ్క కి ‘తుమ్క నెసి’ మెన ఉదడి నాయ్.

38 అవ్ పరలోకుమ్ తెంతో అయ్లిసి కిచ్చొక మెలె, అంచి సొంత ఇస్టుమ్ అయ్లి రితి కెరుక నాయ్, గని, అంక తెద్రయ్లోసా సంగిలిసి నెరవెర్పుప కెరుకయ్.

39 అంక నంపజతి రిసా కక్క జో అంచితె తెద్రయెదె గే, జోవయింక కక్క నే పిట్టయ్తె, వెల్లి తీర్పు కెర్తి జా ఆకర్ దీసిక, జోవయింక జయడ పరలోకుమ్తె బెదవుక అస్సె.

40 మెలె, అంచొ అబ్బొసి జలో దేముడుచి ఇస్టుమ్ కిచ్చొ మెలె, ‘దేముడు ప్రబుచొ ఎక్కి పుత్తుసి ఈంజొయి’, మెన ‘ఈంజొయి అమ్క దొర్పు. జలొ రచ్చింఱుప కెర్తొసా’ మెన, కో అంక చిన పూర్తి నంపజవుల గే, పరలోకుమ్తె బెదితి జీవ్ జోవయింక దొర్పు. జయెదె, చి వెల్లి తీర్పు కెర్తి జా ఆకర్ దీసిక జోవయింక జయడ పరలోకుమ్తె బెదయిందె. ఈంజయ్ అబ్బొసి జలొ దేముడుచి ఇస్టుమ్” మెన యేసు సంగిలన్.

యేసుచి రిసా యూదుల్ అన్యాయుమ్ జలిసి

41 ‘పరలోకుమ్ తెంతో ఉత్త అయ్లి పొడి ఆవ్వె’ మెన యేసు సంగిలి రిసా, ఒత్త తిల జేవ్ యూదుల్చ వెల్లెల మాన్సుల్ జోచి రిసా కోవుమ్ జా,

42 ఇసి మెన లట్టబ్బన్. “ఈంజొ యేసు యోసేపుచొ పుత్తుసి, గెద. జోచ అయ్యున్ అబ్బొన్క జానుమ్, గెద. దస్సి జలె, ‘పరలోకుమ్ తెంతో ఉత్త అయ్లిలయ్’ మెన కిచ్చొక సంగితయ్?” మెన ఆసిల.

† 6:31 6:31 జా బయిలె దేసిమ్ బుల్లె తిలి పొది కిచ్చొ కతిసి యూదుల్క నాయ్, చి వెల్లి అదికారుమ్ తిలో దేముడు లోజా ఆగానుమ్ తెంతో ‘మన్నా’ మెలిసి నువితె తిలన్. ఏక రగుమ్ పిట్టెకి సిడయ్తె తిలన్; ‘పొడకతు’ మెన. నిర్గమకాండుమ్ 16:1-36. § 6:35 6:35 మెలె ‘అంచి తెన్ బెదుల, అంచి రాజిమ్తె బెదుల’.

43 జేవ్ దన్నీ జతికయ్, యేసు జోవయింక కిచ్చొ జబాబ్ దిలన్ మెలె, “ఆవ్ సంగిలినీచి రిసా అన్యానుమ్ జా లట్టబన నాయ్.

44 అంక తెద్రయోలో దేముడు అబ్బొ మాన్సుచి పెట్టి జోవయింక సికడ బుకార్లెకయ్ జేవ్ అంక నంపజా జెవుల. అయిలె, వెల్లి తీర్పు కెర్తి జా ఆకర్ దీసిక జోవయింక జియడ పరలోకుమతె బెదయిందె.

45 పూర్లుచి అత్తి సంగిల దేముడుచ కబుర్లుచ కొడొతె రెడ్డ అస్సె.

దేముడు జేవ్ ఎత్కిజీనక సొంత సికడెదె”

మెన రెగిడ్డి కోడు. దేముడు అబ్బొ జోవయింక సంగిలినీ కో నూన సికుల గే, అంక నంపజా జెవుల.

46 “జోతె తెంతో అయిలోసాక పిట్టవ, కోయి దేముడు అబ్బొక కెయ దెకితి నాయ్. ఎక్కిలోయి జోక దెక అస్సె.

47 జలె, ఆవ్ తుమ్క కిచ్చొ నిజామి కచితుమ్ సంగితసి మెలె, అంక కో సత్తిమ్ తెన్ నంపజవుల గే, జేవ్ నంపజలి తెంతో, పరలోకుమచి రాజిమతె బెదయ్ అస్సె.

48 సరి జతి జివ్ దెతి పోడి, ఆవ్వి.

49 “తుమ్చ పూర్లుమచ జా వెల్లి బయిలె బుల్లె తిలి పొది ‘మన్నా’ మెలి జా పోడి కయ్లెకి, మాములుమ్ మొర్తి సమయిమ్ జా అయిలె పొది, మొర గెల.

50 ఆవ్ అప్పె సంగితిసి, జలె, పరలోకుమ్ తెంతో దొర్కు జతి ఈంజయ్ పోడి, జలె, కిచ్చొక ఉత్త్ర జా అస్సె మెలె, ఈంజయ్ పోడి, కో కవుల గే, మొర్తి పొది సిచ్చ తిలి మొర్కుతె గెతి నాయ్.

51 పరలోకుమ్ తెంతో ఉత్త్ర అయిలి జివ్ దెతి పోడి ఆవ్వి. ఈంజయ్ పోడి కో కవుల గే, పరలోకుమతె గెచ్చు కెయక తెయక చెంగిల్ జవుల. జలె, ‘జోవయిచి పాపుమచి సిచ్చ జతి మొర్కుతె గెతు నాయ్, గని అంచి వరుమ్ నజ రచ్చించువ జతు’ మెన ఆవ్ కిచ్చొ పోడి దెయిందె మెలె, అంచి *ఆగ్” మెన సంగిలన్.

52 యేసు జా సంగితికయ్, యూదుల్చ వెల్లెల మాన్సుల్ బమ్మ జా, “అమ్ కతి రిసా ఈంజో మాన్సు జోచి ఆగ్ అమ్క కిసి దెంక జయెదె?” మెన ఎక్కిలో తెన్ ఎక్కిలో లట్టల్లె తిల.

53 జాకయ్ యేసు జోవయింక, “తుమ్క ఆవ్ నిజామి కచితుమ్ కిచ్చొ సంగితసి మెలె, ఆవ్ మాన్సు జా జెర్కున్ అయిలోసాచి ఆగ్ తుమ్ నే కయ్లె, అంచి లోయి తుమ్ నే పిల్లె. తుమ్చి పెట్టి కిచ్చొ జివ్ తయె నాయ్.

54 అంచి ఆగ్ కో కవుల గే, అంచి లోయి కో పివుల గే, దేముడుచి రాజిమతె బెదితి జివ్ జోవయింక దొర్కు జా అస్సె, చి వెల్లి తీర్పు కెర్తి జా ఆకర్ దీసిక, జోవయింక జియడ, పరలోకుమతె బెదయిందె.

55 జాకయ్, అంచి ఆగ్ ముక్కిమ్ జలి అస్సిమ్, అంచి లోయి ముక్కిమ్ జలి పితిసి జయెదె.

56 కో అంచి ఆగ్ కతి రితి అంచి లోయి పితి రితి జతతి గే, జో అంచి పెట్టి తత్తతి, చి ఆవ్ జోచి పెట్టి తయిందె.

57 “జివ్ తిలో దేముడు అబ్బొ అంక ఈంజ లోకుమతె తెద్రయోలో. జోచి జివ్ అంచి పెట్టి అస్సె, చి జోచి జివ్కయ్ ఆవ్ జితసి. దన్నీ అంకయ్ కో కయ్లి రితి జా అంక జోచి పెట్టి తియసుల గే, అంచి జివ్చి రిసా జేవ్ కి జివుల.

58 పరలోకుమ్ తెంతో ఉత్త్ర అయిలి పోడి ఈంజయి. తుమ్చ పూర్లుమచ కయ్లి రగుమ్ నెంజె. గని, ఈంజయ్ పోడియె కో కవుల గే, పరలోకుమతె గెచ్చు కెయక తెయక జివుల” మెన యేసు సికడ్లన్.

59 యేసు కవెర్చహూమ్ పట్టుమచి జేవ్ యూదుల్చి సబ గెరి ఇసి మెన సికడ్లన్.

యేసు సంగిలి బోదనచి రిసా జో తెన్ బులుక ములిలిసి

60 యేసుక ఇదిల్ నంపజా సిస్సుల్ బంక దెర్ల మాన్సు, జలె, జో సంగిలినీ నూన కెర, జోవయింకె సగుమ్జినీ బమ్మ జా, “జా కోడు అల్లెరచి! జా కోడు కో నూనుల!” మెన సంగిల.

61 జో నిసాన్ల సిస్సుల్ కి అన్యానుమ్ లట్టబతతి మెన యేసు పెట్టి జానిలన్, చి “ఆవ్ అప్పె సంగిలినీచి రిసా తుమ్ అన్యానుమ్ జతను గే?

* **6:51 6:51** ఈంజ లోకుమచి పాపుమ్ గెచ్చయ్తి రిసా జో అర్పితుమ్ జంక తిలినచి రిసా ‘అంచి ఆగ్ దెయిందె’ మెన యేసు టాలి సంగితయ్.

62 జల, ఆవ్ మాన్సు జా జెర్యున్ అయ్లోసా ఆవ్ అగ్గె తిలిన్తె అన్నె వెగ గెతిసి తుమ్ దెకిలె, కీన్ జన్నె!

63 జీవ్ తిలకయ్ మాన్సు జెయెదె. జీవ్ నెంజెలి, అగ్గె కామ్క నెంజె. ముక్కిమ్ జలి ఆవ్ సంగిలి జీవ్ కిచ్చొతె మెలి, ఆవ్ తుమ్క సంగిల కొడొతెయ్ అన్నె.

64 గని తుమ్చితె సగ్గుమ్జిన్ నంపజతి నాయ్” మెన జోవయింక సంగిలన్. జోవయింతె కో నంపజతి నాయ్ గే, అన్నె పడ్డక జోక మార్తసచి అత్తి కో దెర దెయెదె గే, యేసు అగ్గె తెంతో జానె.

65 తెదొడి అన్నె, “జాకయ్ ‘దేముడు అబ్బొ జా సెక్కి దిలకయ్, నెంజెలి కో కి అంక నంపజంక, అంచితె జెంక నెత్తిర్’ మెన తెదొడి సంగిలయ్” మెన సంగిలన్.

66 జల, జా దీసి జో సంగిలిసి ఓర్పుప జంక నెత్త కెర, జోవయింపి పట్టి గెతె తిలసతె ఒగ్గరజిన్ సిస్సుల్ అన్యాయమ్ జా, ఒత్త తెంతో జో తెన్ బుల్లి నాయ్.

67 జేవ్ దస్సి జెతికయ్, జో నిసాన్ల బారజిన్ సిస్సుల్క యేసు, “తుమ్ కి అంక ముల దా ఉట్ట గెతె గే?” మెన పునిలన్.

68 “ప్రబు, అమ్ అన్నె కత్తెయ్ గెచ్చుమ్దే? దేముడుచి రాజిమతె బెదుక కిసి గే తుచయ్ కొడొతె సూనుక జతయ్, గని అన్నె కత్తెయ్ నాయ్.

69 జాకయ్ ‘దేముడుచి నుద్ది తిలోసా[†] క్రిస్తు తుయి’ మెన తుకయ్ అమ్ నంపజా అన్నుమ్, కచితుమ్ జానుమ్” మెన సీమోను పేతురు దయరిమ్ తెన్ సంగిలన్.

70 తెదొడి యేసు జేవ్ బారజిన్క కిచ్చొ జాగర్త సంగిలన్ మెలి, “తుమ్ బారజిన్ ఎత్తిక ఆవ్ నిసాన్లయ్, గెద. గని, తుమ్చితె కి సయ్తాన్చొ సేవ కెర్తెసా ఎక్కిలో అన్నె” మెన సంగిలన్.

71 కచి రిసా దస్సి సంగిలో మెలి, సీమోను ఇస్సురియోతు మెలో ఎక్కిలోచొ యూదా మెలో పుత్తున్చి రిసా. కిచ్చొక మెలి, పడ్డ, జేవ్ జోక మార్తి రిసా, విరోదుమ్ నుదల్చి అత్తి యూదా యేసుక దెర దెయెదె మెన తెదొడి కి యేసు జానె.

7

1 జా మదెనె, యూదుల్చ వెల్లెల మాన్సుల్ జోక మారుక కోరవ జా అన్నె మెన యేసు జానెచి రిసా జోవయింక ముక్కిమ్ తిలి యూదయ ప్రదేసిమతె గెచ్చా నాయ్, గని గలిలయ ప్రాంతమతె బుల్లి తిలో.

2 జలె, యూదుల్చి అన్నెక్ వండుగు పాసి జా అయ్లి. జాక ‘కుడియల్ వండుగు’ మెనుల.

3 జలె, యేసుచ బాపుడ్చివో జోక కిచ్చొ మెలి మెలి, “ఒత్త తిల తుచ సిస్సుల్ జల మాన్సుల్ దెకితి రిసా, ఈంజ డొంగుర్ దేసిమ్ ముల దా, * యూదయ ప్రదేసిమతె గెచ్చ, తుచ వెల్లెల కమె ఒత్తయ్ కెరు.

4 మెలి, ‘అంచి అదికారుమ్ మాన్సుల్ చినుతు’ మెన ఎక్కిలోచి అస జలె, జోవ కమె కో నెంజెల్తె కెరె నాయ్. ఒగ్గరజిన్ తిలిన్తె కెరెదె. తుయి వెల్లెల కమె కెర్తెసి జలె, ఎత్తిజిన్ దెకితి రితి ఒత్త కెరు” మెన సికడుక దెర్త.

5 జోచి అయ్యున్చి పెట్టి జెర్విల ఈంజేవ్ బాపుడ్చివో కి జోక ‘దేముడు తెద్రయ్లో క్రిస్తు రచ్చించువ కెర్తెసా’ మెన నంప కెర్తి నాయ్.

యేసు దిలి జబాబ్

6 జేవ్ దస్సి సంగితికయ్, యేసు జోవయింక, “ఆవ్ గవురుమ్ జతి నమయుమ్ జెంక నేతయ్. తూమ్, మాత్తుమ్, కెడ్డెడె తెదొడె గవురుమ్ జంక జతయ్.

7 జేవ్ కెర్తి రితి తూమ్ కి కెర్తెనుచి రిసా, ఈంజ లోకుమ్చ మాన్సుల్ తుమ్క విరోదుమ్ దెకుక నెత్తిర్, గని జోవయింక కమెక ‘గర్బ’ మెన ఆవ్ తీర్పు సంగితసిచి రిసా అంక విరోదుమ్ దెకితయి.

8 తుమె ఒత్త గెచ్చ వండుగు కెర. ఆవ్ అప్పెచి మట్టుక ఈంజ వండుగక గెచ్చి నాయ్. ఆవ్ గెతి నమయుమ్ పూర్తి జెంక నేతయ్” మెన సంగ,

9 యేసు గలిలయతె తా గెలో.

[†] 6:69 6:69 దేముడు తెద్రయ్లో రచ్చించువ కెర్తెసా జలోసా, * 7:3 7:3 ‘యూదయ ప్రదేసిమతె గో’ మెన కిచ్చొక సికడ్తె మెలి, యెరూసలేమ్ పట్టుమ్ చి దేముడుచి గుడి జయ ప్రదేసిమి తప్పల, చి వండుగక మాన్సుల్ ఒత్తయ్ దెర తప్పల.

కుడియల్ వండుగు కెర్లిన్తె యేసు గెలిసి

10 జలె, జోవయించ బావ్షుణ్ణి వండుగ్తె ఉట్ట గెలి ఇదిల్ వడ్డె, యేసు కి గెలన్. ఎత్తిజన్ దెకిత్ రితి నాయ్, గని కో నేన్లి రితి గెలన్.

11 జా మదెనె, వండుగ్తె గెల యూదుల్చ వెల్లెల మాన్సుల్ ‘యేసు కెతె?’ మెన జోక చజెత్ తిల.

12 ప్రెజల్ కి జోచి రిసా జోవయంతెన్ ఇనయింతెన్ లట్టబై తిల. “జో చెంగిలో మాన్సు” మెన నగుమ్జన్ నంగిత్ తిల, “నాయ్, ప్రెజల్క మోసిమ్ కెర్తయ్” మెన అన్నె నగుమ్జన్ నంగిత్ తిల.

13 గని వెల్లెల మాన్సుల్క బియె కెర, జోచి రిసా కో ఎదార్దుమ్ లట్టబై నాయ్.

దేముడుచి గుడితె యేసు బోదన కెర్లిసి

14 జలె, నగుమ్ వండుగ్ కేడ్డి పొది, యేసు దేముడుచి గుడితె గెచ్చ, తెడి పెన, బోదన కెరుక దెర్లన్.

15 జోచి బోదన నూన కెర, యూదుల్చ వెల్లెల మాన్సుల్ “అమ్చి తెన్ ఈంజొ మాన్సు కెయ నే నదు కెర్లి కి, బలే తెలిచి తెన్ బోదన కెర్తయ్, కిసి?” మెన ఆచారమ్ తెన్ లట్టబన్.

16 జాచి రిసా యేసు జోవయంక కిచ్చొ జబాబ్ దిలన్ మెలె, “ఆవ్ కెర్లి బోదన ఆవ్ ఉచర్లిసి నెంజె. ఈంజ అంక తెర్తయ్లోసాచి బోదన.

17 అంక తెర్తయ్లోసాచి ఇస్టుమ్ రితి కెరుక కో కోర్వ జవుల గే, జెవ్వి అంచి బోదన నూన్లె, జేవ్ ‘దేముడు సికడ్డిసి జయెదె గే, నాయ్ మెలె, ఆవ్ ఉచర్లిసి జయెదె గే’ జోవయించి పెట్టి చినుల.

18 గవురుమ్ ఆననుక ఆన జలన, జలె, జేవ్ జేవ్చి ఉచర్లిసి సికడుల. గని, జోక తెర్తయ్లోసాచి గవురుమ్ దెకవుక ఆన జలోసా జలె, సత్తిమ్చొ జయెదె, జోతె కిచ్చొ అబద్దుమ్ తయ్ నాయ్.

19 “మోసి పూర్లుమ్చొ దేముడుచ ఆగ్గుల్ తుమ్చి రిసా దేముడుచ ఆగ్గుల్ రెర్ల దిలన్. గని ఒత్త తిల ఆగ్గుల్ రితి తుమ్చితె కో కి నిదానుమ్ కెర్చు నాయ్. నెంజెలె, కిచ్చొక అంక మారుక కోర్వ జతను?” మెన నంగిలన్.

20 యేసు దస్సి నంగితికయ్, ప్రెజల్ తుక “బూతుమ్ దెర అస్సె, కిచ్చొగె, చి దస్సి నంగితసి! కో తుక మారుక కోర్వ జతతి?” మెన నంగిల.

21 జలె, యేసు జోవయంక, “ఆవ్ జా సెలవ్ కడన్లె దీసి జో రోగిక చెంగిల్ కెర్లి కామ్ కెర్తయ్, చి ‘కామ్ కెర సెలవ్ కడన్లె దీసిచి ఆగ్గు పిట్టయ్లో’ మెన తుమ్ ఎత్తిజన్ అంచి రిసా బమ్మ జతను.

22 తుమ్ ఉచర. ‘తుమ్ యూదుల్క మున్సుబోద జెర్లిలె, జోవయంక దేముడుచొ మాన్సు జవున్’ మెన సున్నతి కెరనుక, జో బోదక ఇదిలిన్ సుద్ది కెర మెన మోసి పూర్లుమ్చొ రెగిడ్డె, గెద. జా కారమ్, జలె, మోసి తెన్ మొదోల్ జలిసి నెంజె. జోచి కంట అగ్గచ పూర్లుల్ కి దస్సి కెర్తె తిల. గని సున్నతి కెర మెన ఆగ్గుల్తె రెగిడ్డన్. జాకయ్, ఏక్ నాడు జెర్త అట్ట పొదుల్ జలిసి సెలవ్ కడన్లె దీసి సేడ్డె, జా ఆగ్గు పిట్టన్ నాయ్ మెన, జయ్యి దీసి, సెలవ్ కడన్లె దీసి జలెకి, జా కామ్ కెర్తను.

23 జలె, ‘మోసి రెగిడ్డి దేముడుచి ఆగ్గుల్ తెన్, ఈంజ ఏక్ ఆగ్గు పిట్టన్ నాయ్’ మెన సెలవ్ కడన్లె దీసి కి ఏక్ మాన్సుకి సున్నతి కెరుక జయెదె జలె, సెలవ్ కడన్లె దీసి కి ఏక్ ఒండొయి మాన్సుచి అగ్గ చెంగిల్ కెరుక నెంజె గె?

24 జలె, కిచ్చొ జవున్ జర్లు జా తిలె, ఇసి గే దస్సి గే డీసిలి రిసా ‘ఆగ్గు పిట్టి’ జవున్, నాయ్ మెలె, ‘ఆగ్గు పిట్టి నాయ్’ రిత ఆగ్గుల్క నంపజా అన్నున్. దస్సి, అర్దుమ్ నెంతె, కన్కూరుమ్ నెంతె తిర్చు కెరుక పొన. ఆగ్గుచి అర్దుమ్, జర్లు జలిన్చి అర్దుమ్, సరిగా ఉచర తీర్చు కెర” మెన జేవ్ వెల్లెల మాన్సుల్క యేసు నంగిలన్.

యేసుచి రిసా ఈంజొయి క్రిస్తు గే

25 యేసు దస్సి బోదన కెర్లికయ్, యెరూసలేమ్ పట్టుమ్చ మూన్సుల్ నగుమ్జన్ “ ‘జోక మారుమ్’ మెన వెల్లెల మాన్సుల్ కోర్వ జలోసా ఈంజొయి, కిచ్చొగె.

26 గని, ఈందె, జోవయించి మొక్క దయిరిమ్ తెన్ బోదన కెర్తయ్, గని జోక 'పోని' కి మెంతి నాయ్. జలె, జోక 'తెద్రయిందె' మెన దేముడు సంగిలో 'దొర్కు జలె' రచ్చించుప కెర్తొసా జతో క్రీస్తు ఈంజోయి' మెన ఏక్ వేల అదికారుల్క రుజ్జు జా అస్సె గె?

27 నాయ్, కిచ్చొగి. మెలె, ఈంజో మాన్సు కేనె తెంతో అయ్లో గే †జానుమ్. గని క్రీస్తు అయ్లెగిన, కేనె తెంతో జెతయ్ గే కక్క నేనె జయె నాయ్" మెన ఉచర లట్టబన్సు.

28 జేవ్ ఉచర్లసి యేసు జాన్సి రిసా, దేముడుచి గుడితె బోదన కెర్తె తిలి పొది, ఇసి మెన కేక్ గలన్. " 'జోక జానుమ్! జో కేనె తెంతో అయ్లో గే అమ్ జానుమ్!' మెన, అంచి రిసా తుమ్ ఉచర్లసు జలె. గని నేన్సు. ఆవ్ అయ్యె జెంక నాయ్. అంక తెద్రయ్లోసా సత్తిమ్ తిలోసా. జోక తుమ్ నేన్సు.

29 ఆవ్ మాత్రమ్, జోక జాని. కిసి మెలె, ఆవ్ జోతె తెంతో ఉత్ర అయ్లయ్. జోయ్యె అంక తెద్రయ్లన్" మెన సంగిలన్.

30 యేసు దస్సి సంగితికయ్, జేవ్ వెల్లెల మాన్సుల్ "జోక జేలి కెరుమ్!" మెన ఉచర్ల, గని జోక కో దెర్తి నాయ్. కిచ్చొక మెలె, అబ్బొన్తె జో గతి సమయ్యుమ్ తెదొడి జెంక నేతయ్.

31 యేసుక వెల్లెల మాన్సుల్ దస్సి విరోదుమ్ జలెకి, మాములుమ్ ప్రెజల్, జలె, ఒగ్గరిజన్ జోక నంపజలె. "ఈంజో మాన్సు ఒగ్గరి ఒగ్గరి వెల్లెల కమె కెర్తయ్. క్రీస్తు మెలో అమ్చొ రచ్చించుప కెర్తొసా అయ్లె ఇసి తయెదె. అన్సె వెల్లెల కమె కెరుక కో తెరితి గే? ఈంజో జోయ్యె, కిచ్చొగి" మెన నంపజలె.

32 ప్రెజల్ యేసుక నంపజలి రితి జా ఎక్కిలో తెన్ ఎక్కిలో ఇసి తిరిమ్ లట్టబంతిసి పరిసయ్యుల్ నూన్లచి రిసా "జోక జేలి కెరుక దెర జా!" మెన దేముడుచి గుడితెచ జమాన్సుక వెల్లెల పూజర్లు చి పరిసయ్యుల్ తెద్రయ్లె.

33 జలె, జా మదెనె యేసు అన్సె బోదన కెర్తె తా, "అన్సె నగుమ్ దీసల్ తుమ్చి తెన్ తయిందె, చి తెదొడక అంక తెద్రయ్లోసాతె అన్సె ఉట్ట గెచ్చిందె.

34 ఆవ్ ఉట్ట గెలి వట్టె తుమ్ అంక చజతె, గని అంచితె పాచ్చుక నెతుర్పు. ఆవ్ కేనె తయిందె గే, తుమ్ ఒత్త జెంక నెతుర్పు" మెన సంగిలన్.

35 జాకయ్ యూదుల్చ వెల్లెల మాన్సుల్ ఎక్కిలోక ఎక్కిలో "అమ్ నే పావెతి రితి ఈంజో కేనె గెచ్చెదె? గ్రీకు దేసిమి తిల చెదుర్పు జలె అమ్చ చ యూదుల్తె గెచ్చె, గ్రీకు దేసుమ్చ సుదల్క బోదన కెరెదె గే?

36 నాయ్ మెలె, 'తుమ్ అంక చజతె కి అంచితె పాచ్చుక నెతుర్పు' మెన 'కేనె తయిందె గే, తుమ్ ఒత్త జెంక నెతుర్పు' మెన కిచ్చొక సంగిలన్?" మెన లట్టబనుక దెర్ల.

37 జా పండుగలి అకర్ దీసి అయ్లి. జాక 'వెల్లో దీసి' మెనులె. జా దీసి, ఎత్కిజన్ బెర తిలిన్తె యేసు టీచ జా, ఇసి మెన కేక్ గలన్. "కక్క జలెకు తాన్ కెర్తె, అంచితె జా పిపసు.

38 కో అంక పూర్తి నంపజవుల గే, దేముడుచి కొడొతె రెగ్గయ్లి రితి, జోచి వెట్టి తెడి ఊంట పుట్టి రితి జా, జీవ్ దెతో పాని జోచి అత్త్య చెంగిల్ కెర్తె తయెదె" మెన, ఎత్కిజన్ నూన్తి రితి యేసు సంగిలన్.

39 'జీవ్ దెతో పాని' మెన కిచ్చొచి గుర్తుక సంగిలన్ మెలె, దేముడుచి సుద్ది తిలి ఆత్తుచి గుర్తుకయ్. యేసు మెర దేముడు అబ్బొన్తె అన్సె గెలె, జోక కో నంపజా తవుల గే, జోచి జా ఆత్త్య జోవయించి వెట్టి జెయెదె. జలె, యేసు తెదొడి అబ్బొన్తె అన్సె గెచ్చుక, గవురుమ్ జంక, నేతయ్చి రిసా, జో సంగిలి జా ఆత్త్య తిలిసి తెదొడి జర్లు జంక నేతయ్.

40 యేసు దస్సి బోదన కెర్తెకయ్, నూన కెర జోచి రిసా ప్రెజల్ సగుమ్జన్ కిచ్చొ మెలె మెలె, " 'తెద్రయిందె' మెన దేముడు సంగిలో జోచ కబుర్లు సంగుక జెంక తిలోసా ఈంజో నిజమ్ జా తయెదె" మెన సంగిలె.

41 గని అన్సె సగుమ్జన్ "తెద్రయిందె మెన దేముడు సంగిలో క్రీస్తు రచ్చించుప కెర్తొసా జా తయెదె" మెలె, గని "నెంజె. ఈంజో గలిలయ ప్రాంతుమ్చొ మాన్సు. క్రీస్తు, జలె, గలిలయతె జెర్కుక నెంజె.

† 7:27 7:27 'నబరేతు గవ్వి తెంతో అయ్లో' మెన ఉచర్లతి. నేన కెర 'జానుమ్' మెంతతి గని పరలోకుమ్ తెంతో అయ్లో గెద.

42 ఈందె, దేముడుచి కొడొతె రెగిడ్లి రితి, అమ్చొ రానొ జలో దావీదు పూర్ణుమచొచి సెకుమతె క్రీస్తు జెర్పొదె. దావీదుచి గావ్ బేత్లెహేమ్. ఒత్తయ్ జో జెర్కుక అస్సె. దస్సి జలె ఈంజో క్రీస్తు జయె సీనాయ్” మెన సంగిల.

43 దస్సి జతికయ్, జోచి రిసా ప్రెజల్ దొస్సి మెన్సు జల.

44 జోవయింతెన్ సగుమజిన్ “జోక జేలి కెర్దు!” మెన కోర్వ జల. గని జోక దెరుక మెన కో చడితి కి *నాయ్.

దేముడుచి గుడిచ అదికారుల్ కోపుమ్ జలిసి

45 తెదొడి, జోక దెర్తి రిసా గెచ్చ తిల జమాన్లు వెల్లెల పూజర్లు చి పరిసయ్యుల్ తిలిన్తె అన్నె అయ్ల. జెతికయ్, జేవ్ పరిసయ్యుల్, పూజర్లు, “కిచ్చొక జోక దెర ఆస్సు నాయ్?” మెన గోల కెర్ల.

46 గోల కెర్తికయ్, జేవ్ జమాన్లు, “కేన్ మాన్సు కెయ్ తెద్ది చెంగిల్చి బోదన సంగి నాయ్” మెన సాచి సంగిల.

47 పరిసయ్యుల్ కోపుమ్ జా జోవయింక కిచ్చొ జబాబ్ దిల మెలె, “తూమ్ కి జోచ కొడొక మోసిమ్ జలదు గే?

48 అమ్ పరిసయ్యుల్తె జవున్, అమ్చవ అదికారుల్తె జవున్ కో జలెకు జోక నంపజా అస్సుమ్ గే? నాయ్, గెద. దస్సి జలె, తూమ్ కిచ్చొక జోక నంప కెరుక?

49 మాములుమ్ ఈంజేవ్ ప్రెజల్ నంప కెర అస్తి, గని మోసి తెన్ దేముడు దిలి ఆగ్గుల్ నేన్తి జేవ్క కిచ్చొ పున్నిమ్ నాయ్, దేముడుక నేన్తి” మెన ప్రెజల్ నంపజలిన్క వెల్లెల మాన్సుల్ నిస్కారుమ్ సంగిల.

50 యేసుతె అగ్గె రాతి లుంకవోరు కిచ్చొగె పుసుక గెచ్చ తిలొ నీకొదేమె మెలొ పరిసయ్యుడు, జలె, జో వెల్లెల మాన్సుల్తె అస్సె.

51 అన్నె తిల జేవ్ వెల్లెల మాన్సుల్క జో, జలె, “కేన్ జలెకు మాన్సుక నేరిమ్ వయడ తిలె, దేముడు మోసి తెన్ దిలి ఆగ్గుల్తె రెగ్గయ్లి రితి జో మాన్సు సంగన్తి సాచి నే నూన్తె అగ్గె, జో కిచ్చొ కెర్లొ గే నాయ్ గే, రుజ్జు నే దెకయ్తె అగ్గె జోక తీర్పు కెర సిచ్చ కెరుక అమ్చి తెన్ నాయిమ్ గే? నాయ్, గెద” మెన జాగర్ల సంగిలన్.

52 జేవ్ అన్నె పండితుల్ నీకొదేమొక కిచ్చొ జబాబ్ దిల మెలె, “తూయి కి గలిలయ్చొ గే, చి జోచి పచ్చెనచి కోడు తుయ సంగితన్? దేముడుచి కొడొ సరిగా నదు కెరు, చి దేముడుచ కబుర్లు సంగితన్ కో కి గలిలయ్తె జెర్పొతి నాయ్ మెన దెకితె” మెన సంగిల.

53 తెదొడి ఎత్తిజిన్ జోవయించ గెరలె ఉట్ట గెల.

8

వెల్లెల మాన్సుల్ తేర్బోదక దెర యేసుతె కడ ఆస్సిసి

1 *యేసు, దేముడుచి గుడి తెంతో బార్ జా, జేవ్చి మొక్క తిలి †బలివ మెట్టయ్ ఎక్కొలో గెలన్.

2 చి రాత్ పాయితికయ్, దేముడుచి గుడితె అన్నె ఉట్ట అయ్లొ. అయ్లె, ఒగ్గర్జిన్ జనాబ్ అయ్ల, చి జో వెన కెర, జోవయింక బోదన కెరుక దెర్లన్.

3 యేసు బోదన కెర్తె తతికయ్, మోసి తెన్ దేముడు దిలి ఆగ్గుల్ సికడ్డన, పరిసయ్యుల్, బెద జా, ఏక తేర్బోదక కడ ఆన్ల. జా తేర్బోద లంజె జతె తతికయ్, దెర తిల. జలె, బెర తిల మాన్సుల్చి నెడిమి జాక టేవడ్ల.

4 యేసుక కిచ్చొ మెల మెలె, “గురుబాబు ఈంజ తేర్బోద లంజె జతె తతికయ్, దెర్ల.

§ 7:42 7:42 నిజమి బేత్లెహేమ్తె, దావీదు రానొచి సెకుమతె జెర్పొలన్; మత్తయి 1:1, 2:1; గని నెన కెర దస్సి మెల. * 7:44 7:44

జో అబ్బొన్తె అన్నె గెతి సమయమ్ జంక నేతయ్చి రిసా దెరుక నెతిర్ల. అన్నె సగుమ్ సుట్టు కి వెల్లెల మాన్సుల్ అల్లర్ కెరుక ఉచర్లె కి, నెతిర్ల; లూకా 4:29-30, యోహాను 7:30, 8:20. జోవయించి సమయమ్ జా అయ్లె పొది జేవ్ దెరుక జో ఒప్పున్లొ; మత్తయి 26:53-54, మార్కు 14:41, యోహాను 18:4, 6. † 7:52 7:52 గని గలిలయ్తె జెర్పొ నాయ్, యాదయ్ ప్రదేసిమచి బేత్లెహేమ్ పట్టుమ్తె జెర్పొలన్, గెద.

* 8:1 8:1 యోహానుచి సాచి రెగిడ్ల గ్రీకు బాన తెన్ తొలితో రెగిడ్ల సగుమ్ పున్కల్తె ఈంజ మత్తెలి తయ్ నాయ్. నెంజెలె, వేరతె తయెదె. సగుమ్తె యోహాను 2:25చి వడ్డె తయెదె. † 8:1 8:1 ఒత్త బలివ పండ్లు రూకల్ తవుల, చి ఇసి నాన్ తయెదె.

5 'ఇన లంజె జలసక పత్రల్ తెన్ పెట మారుక అస్సె' మెన అమ్చో మోసే పూర్ణమచోచి అత్తి రెగిడ్లి దేముడుచి అగ్గుల్తె అమ్క అగ్గు దిలన్. జలె, ఈంజ తేర్బోదచి రిసా తూయి కిచ్చో తీర్పు సంగితె?" మెన యేసుక పుసిల.

6 కిచ్చొక దస్సి పుసిల మెలె, జో కిచ్చో జవున్ తప్పు సంగిలె, నేరిమ్ వయడుమ! మెన దస్సి కెర్ల. యేసు మాత్రుమ్, వంపొ జా, బుయ్యె ఊంటి తెన్ కిచ్చొగి రెగిడ్లన్.

7 జేవ్ జోక పుసుక ములితి నాయ్ చి రిసా యేసు టీద, జోవయింక, "తుమ్చితె కో కిచ్చో పాపుమ్ నే కెర తయెదె గే, జొయ్యె తొలితొ చి పత్తురు జాక గలుక జయెదె" మెన సంగిలన్.

8 చి అన్నె వంపొ జా, బుయ్యె అన్నె కిచ్చొగి రెగిడ్లన్.

9 జలె, జో సంగిలిసి ఎత్తిజన్ సూన అర్దుమ్ కెరన, తొలితొ వెల్లెల మాన్సుల్, వడ్డో ఎత్తిజన్ ఎక్కిలోచి పట్టి ఎక్కిలో వర్చు తెన్ బార్ జా, ఉట్ట గెల, చి టీద తిలి జా తేర్బోదక పిట్టవ, యేసు ఎక్కిలో ఒత్త తిలో.

10 జలె, యేసు అన్నె ఉప్పిరి దెక, జా తేర్బోదక, "అమ్మ, కేత జేవ్ ఎత్తిజన్? కో తుక నేరిమ్ వయడ్లి నాయ్?" మెన సంగితికయ్,

11 జా తేర్బోద యేసుక, "బాబు, కోయ నాయ్!" మెన సంగిలి. తెవొడి యేసు జాక, "ఆవ్ కి తుక నేరిమ్ వయడి నాయ్. తుయి గో, చి అప్పె తెంతో పాపుమ్ నే కెర్లె జ!" మెన సంగ తెద్రవ దిలన్.

"ఈంజ లోకుమ్చక దొర్కు జలి ఉజడి ఆవ్యె"

12 అన్నెక్ నుట్టు యేసు బోదన కెర్లె తత్తికయ్ కిచ్చో మెన సంగిలన్ మెలె, "ఈంజ లోకుమ్చక దొర్కు జలి ఉజడి ఆవ్యె. కో అంచి పట్టి ఇండుల గే, అందరతె తిలి రితి అందరబుద్ది ఇండితి నాయ్, గని జేవ్ దెతి ఉజడి జోవయింక దొర్కు జా జోవయింది పెట్టి తయెదె" మెన సంగిలన్.

13 జో దస్సి సంగితికయ్, పరిసయ్యుల్ జోక, "తుచి రిసా తుయి సాచి సంగితసి; తుచి సాచి సత్తిమ్చి నెంజె" మెన సంగిల.

14 జలె, యేసు జోవయింక, "ఆవ్ సొంత సాచి సంగిల్లె కి, అంచి సాచి సత్తిమి. కిచ్చొక మెలె, ఆవ్ కేనె తెంతో అయలయ్ గే, కేనె అన్నె గతసి గే, ఆవ్ జాని గని కేనె తెంతో ఆవ్ అయలయ్ గే, కేనె గతసి గే, తూమ్ నేన్సు.

15 తూమ్ అవ్యె కెర మాన్సు ఉచర్తి రగుమ్ తీర్పు కెర్చును, గని ఆవ్ అప్పెచి మట్టుక కక్క తీర్పు కెరె నాయ్.

16 గని ఆవ్ తీర్పు కెరుక జలె, అంచి తీర్పు సత్తిమ్ జయెదె. కిచ్చొక మెలె, ఆవ్ అవ్యె కెర కి ఎక్కిలో కి తీర్పు కెరె నాయ్. ఆవ్, అంక తెద్రయ్లోసా తెన్ని తీర్పు కెరుమ్దె.

17 " 'కో దొగుల ఎత్తి రితి సాచి సంగుల గే, జా సాచి సత్తిమ్చి జయెదె' మెన తుమ్చి మోసే పూర్ణమచోచి అత్తి దేముడు రెగ్గయ్ల †అగ్గుల్తె రెగ్లె అస్సె.

18 జలె, ఆవ్ సొంత సాచి సంగితసి, చి అంక తెద్రయ్లో అబ్బొకి అంచి రితి ఎక్కి రితి సాచి సంగితయ్" మెన వెల్లెల మాన్సుల్క యేసు జబాబ్ దిలన్.

19 జేవ్ జోక, "అబ్బొది కేతె?" మెన పుసిల. పుసితికయ్, యేసు జోవయింక, "తుమ్ అంక నేన్సు. అంచో అబ్బొక కి నేన్సు. అంకయ్ జాన్తదు జలె, అబ్బొక కి జాన్తదు" మెన సంగిలన్.

20 బోదన కెర కెర ఇసి సంగిలి పొది యేసు కేనె తిలన్ మెలె, దేముడుచి గుడితెచి డబ్బుల్ పెట్టల్ తిలి గదితె తిలన్. గని జోక జేలి కెర్తి నాయ్. కిచ్చొక మెలె, జో దేముడు అబ్బొనెతె గెతి సమయ్యమ్ జంక నేతయ్.

21 జేవ్ వెల్లెల మాన్సుల్క యేసు అన్నె, "ఆవ్ ఉట్ట గెచ్చింది. ఉట్ట గెలె, తుమ్ అంక చజలె కి, తుమ్చ పాపల్ తెన్ని మొర గెతె. మొర గెలె, ఆవ్ గెతినెతె తుమ్ జెంక నెతుర్చు" మెన సంగిలన్.

22 యూదుల్చ జేవ్ వెల్లెల మాన్సుల్ ఎక్కిలో తెన్ ఎక్కిలో కిచ్చో మెలె మెలె, " 'ఆవ్ గెతినెతె తుమ్ జెంక నెతుర్చు' మెన జో సంగిలిసి కిచ్చొక? జో అత్త్య కెరన ఎట్టో గెచ్చెదె గే?" మెన లట్టబల్లన్,

† 8:17 8:17 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయ్ల అగ్గుల్ మెన అమ్ జానుమ్. ఈంజ కోడో ఎత్తి బైబిల్తె అగేచి పావ్ పుస్తకుమ్తె రెగ్గయ్ల జా అస్సె. ఈంజ దెకపుక మెన కుపియ్ బాసతె నొయ ప్రమానుమ్తె మోసే పూర్ణమచోచి అత్తి రెగిడ్లి దేముడుచి అగ్గుల్ మెన రెగ్లె అస్సె.

23 జలె, యేసు జోవయింక, “తుమి ఎట్టొచ మాన్సుల్, ఆవ్ ఉప్పిర్ తెంతొచో మాన్సు. తూమ్ ఈంజ లోకుమ్చ కమె కెర్తన, ఆవ్ ఈంజ లోకుమ్చో మాన్సు నెంజి.

24 “తుమ్చ పాపల్ తెన్ని మొర గెతె” మెలయ్. కిచ్చొక మెలె ‘దేముడు తెద్రయ్లో క్రిస్తు, రచ్చించుచ కెర్తొసా, ఈంజొయి’ మెన అంక తుమ్ నే నంపజలె, నిజమి తుమ్చ పాపల్ తెన్ మొర గెతె, పాపుమ్తె గెతె” మెన సంగిలన్.

25 జోక, జేవ్ వెల్లెల మాన్సుల్ యేసుక “తుయి కొన్సొ?” మెన పునిల. యేసు జోవయింక, “ఆవ్ కొన్సొ జయిందె గే ఆవ్ తుమ్క అగ్గె తెంతొ సంగితసి గెద, జొయ్యి ఆవ్.

26 తుమ్చి రిసా, తుమ్ కెర్త కమెచి రిసా ఆవ్ ఒగ్గర్ ఒగ్గర్ తీర్పు సంగుక జయెదె. గని అంక తెద్రయ్లోసా సత్తిమ్చో, చి లోకుమ్చక ఆవ్ నూనయ్తినీ కిచ్చొ మెలె, అంక తెద్రయ్లోసాతెయి ఆవ్ నూన్సి” మెన సంగిలన్.

27 గని, ‘తెద్రయ్లోసా’ మెన దేముడు అబ్బొనచి రిసా సంగితయ్ మెన వెల్లెల మాన్సుల్ అర్దుమ్ కెరంతి నాయ్, చి రిసా

28 యేసు అన్సె, “ఆవ్ మాన్సు జా జెర్కున్ అయ్లోసాక తుమ్ టీచవడ్డె. టీచవడ్డె, అంక ‘జొయ్యి’ మెన పడ్డొక చినితె. తెదొడక అంక ‘జో అచ్చొ కెర్తినీ కిచ్చొయ్ నాయ్, గని దేముడు అబ్బొనీ సికడ్డి రితి కెర్తె తత్తయ్” మెన అంచి రిసా అర్దుమ్ కెరంతె.

29 అంక తెద్రయ్లోసా అంక తోడ అన్సె, అంచి తెన్ అన్సె. జో కెయ్ అంక ములె నాయ్. కిచ్చొక మెలె, ఆవ్ కెయ్క తెయ్క జోచి ఇస్టుమ్ రితి కెర్తినీ” మెన సంగిలన్.

30 జో దస్సి సంగితె తతికయ్, ఒత్త తిలనతె ఒగ్గర్జెన్ జోవయింక నంపజా గెల.

జోక నంప కెరుక దెర్లనక యేసు బోదన కెర్తినీ

31 జోక నంపజంక దెర్ల వెల్లెల మాన్సుల్క యేసు తెదొడి, “ఆవ్ సంగిలి రితి ఇండితె తస్సె జలె, నిజమి అంచ సిన్సుల్ జస్సె.

32 చి సత్తిమ్ జాన్తె, చి జా సత్తిమ్ తుమ్క విడ్డల్ కెరెదె” మెన సంగిలన్.

33 గని, విడ్డల్ జతిసిక మాములుమ్ ఈంజ లోకుమ్తె జతిన్చి అర్దుమ్ జేవ్ కెరన, జోక “అమ్ అబ్రాహామ్ పూర్ణుమ్చొచి సేకుమ్తెచ మాన్సుల్చి రిసా, కక్క, కి కెయ్ కి గొతిమాన్సుల్ జమమ నాయ్. జాకయ్ ‘విడ్డల్ జస్సె’ మెన తుయి కిచ్చొక అమ్క సంగిలదె?” మెన బమ్మ జా పునిల.

34 యేసు జోవయింక, “తుమ్క ఆవ్ నిజమి కచితుమ్ కిచ్చొ సంగితసి మెలె, కో కిచ్చొ పాపుమ్ కెరుల గే, పాపుమ్క గొతిమాన్సుల్ జా అన్సె.

35 గొతిమాన్సుల్, జలె, సావుకరిచొ గేరు కెయ్క తెయ్క తంక జోవయింక సెలవ్ నాయ్. గని, సావుకరిచొ సొంత పుత్తుని జలె, కెయ్క తెయ్క అబ్బొనచి గెరి తయెదె.

36 తుమ్ కెర్త పాపల్క తుమ్ దెర్ను సేడ్డిని తెంతొ దేముడుచొ పుత్తుని తుమ్క విడ్డల్ కెర్తెగిన, నిజమి విడ్డల్ జస్సె.

37 “అబ్రాహామ్ పూర్ణుమ్చొచి సెకుమ్తె తుమ్ జెర్కు అన్సున్ మెన జాని, గని జోచి సెకుమ్తె తుమ్ జెర్కులెకి, అంచి కొడొ తుమ్చి పెట్టి తియసుక నెనునచి రిసా, అంక మారుక కోర్వ జా అన్సున్.

38 అంచొ అబ్బొతె ఆవ్ దెకిలిన్క ఆవ్ సాచి సంగితసి. తూమ్ మాత్రుమ్, తుమ్చొయ్ అబ్బొది సంగిలినీ కెర్తను” మెన వెల్లెల మాన్సుల్క యేసు సంగిలన్.

39 యేసు ఇని సంగితకయ్, జేవ్ వెల్లెల మాన్సుల్ జోక, “అబ్రాహామ్ అమ్చొ అబ్బొ!” మెన సంగిలచి రిసా యేసు జోవయింక అన్సె, “తుమ్ అబ్రాహామ్చ బోదల్ జతదు జలె, అబ్రాహామ్ కెర్త కమె తూమ్ కి కెర్తదు.

40 దేముడుతె ఆవ్ నూన్సి సత్తిమ్ తుమ్క ఆవ్ సంగ అన్సె, గని అప్పె అంక మారుక తుమ్ కోర్వ జా అన్సున్. అబ్రాహామ్ దస్సి కెరె నాయ్.

41 గని తుమ్చొ సొంత అబ్బొది కెర్త కమె తుమ్ కెర్తను” మెన సంగిలన్. జేవ్ జోక “అమ్ లంజెపెట్టి జెర్కులన నెంజుమ్. అమ్క ఎక్కిలో అబ్బొ జయెదె, మెలె, దేముడు” మెన సంగిల.

42 యేసు జోవయింక, “దేముడు తుమ్చో అబ్బొది జతో జలె, తుమ్ అంకయ్ ప్రేమ కెర్తదు. కిచ్చొక మెలె, ఆవ్ జోచి పెట్టి తా జోతె తెంతో బార్ జా ఉట్ట అయ్లయ్. ఆవ్ అచ్చి జెంక నాయ్, జోయ్యి అంక తెర్తయ్లో”.

43 ఆవ్ సంగితిసి తుమ్ కిచ్చొక అర్దుమ్ కెరన్ను నాయ్? కిచ్చొక మెలె, అంచ కొడోతెచి సత్తిమ్ తుమ్క అల్లర్ కెర్తయ్, చి నూనుక ఓర్పువ జంక నెతుర్పు.

44 తుమ్చో అబ్బొది నయ్తాన్. తుమ్ జోచ మాన్సుల్ జా, జో కీసాచో గే, తుమ్ కి దన్నుచ. తుమ్చో అబ్బొద్చ ఆసల్ తీర్పువ కెరుక తుమ్ కోర్వ జా అన్నున్. మొదోల్ తెంతో జో కూని కెర్తొసా. సత్తిమ్, జోతె, ఎదిలి కి బెదితి నాయ్. జోతె కిచ్చొ సత్తిమ్ కి నాయ్. జో అబద్దుమ్ సంగుక, జోచి సొంత అబద్దుమ్ జోయ్యి లట్టబెదె. జో పూర్తి అబద్దుమ్చో. జో అబ్బుదల్క అబ్బొసి.

45 జాకయ్, ఆవ్ సత్తిమ్ సంగితసిచి రిసా, ఆవ్ సంగితిసి తుమ్ సంప కెర్పు నాయ్.

46 ఆవ్ కెయ్యు కేన్ పాపుమ్ కెర్తయ్ గే, చి తుమ్తెకో అంక ‘అబద్దుమ్చో’ మెన సాచి సంగుక జయెదె? కెయ్ కేన్ పాపుమ్ కెరి నాయ్, చి కో కి దన్ను సాచి సంగుక నెతుర్పు. జలె, ఆవ్ సత్తిమ్ సంగితసి జలె, తుమ్ అంక కిచ్చొక సంప కెర్పు నాయ్? తుమ్ ఉచర.

47 దేముడుచ మాన్సుల్ కో జవుల గే, జో దేముడుచ కొడో సూనుల. తుమ్ కిచ్చొక జోవయింక కొడో సూన్సు నాయ్ మెలె. తుమ్ జోవయింక మాన్సుల్ నెంజుసు” మెన వెల్లెల మాన్సుల్క యేసు సంగిలన్.

వెల్లెల మాన్సుల్ యేసుక పత్రల్ గల మారుక ఉచర్చిసి

48 యూదుల్చ జేవ్ వెల్లెల మాన్సుల్, జలె, జోక “సీసమరయ సుదో జన్సె, చి తుక బూతుమ్ దెర అస్సె మెన అమ్ ఉచర్చిసి సత్తిమ్, కిచ్చొగి” మెన సంగిల.

49 జేవ్ దస్సి సంగితికయ్, యేసు జోవయింక కిచ్చొ జబాబ్ దిలన్ మెలె, “అంక బూతుమ్ దెరె నాయ్. ఆవ్, మాత్రుమ్, దేముడు అబ్బొక గవురుమ్ కెర్తసి, గని తుమ్ అంకయ్ గవురుమ్ కెర్పు నాయ్.

50 అంచి రిసా అంక గవురుమ్ నాయ్. గని అంక గవురుమ్ కెర్తో ఎక్కిలో అస్సె. జోయ్యి అంచి రిసా తుమ్చి రిసా తీర్పు కెర సత్తిమ్క రుజ్జు దెకయెదె.

51 “జలె, తుమ్క ఆవ్ నిజమి కచితుమ్ కిచ్చొ సంగితసి మెలె, అంచ కొడో కో నిదానుమ్ కెరుల గే, కెయ్క కి *మొర్చి నాయ్” మెన సంగిలన్.

52 దస్సి సంగితికయ్, జేవ్ వెల్లెల మాన్సుల్ జోక కిచ్చొ మెల మెలె, “అప్పె రుజ్జు అయ్లి. నిజమి తుక బూతుమ్ దెర అస్సె. అబ్రాహామ్ మొర గెలన్. దేముడుచ కబుర్లు సంగిల పూర్గుమ్చ కి మొర గెల, గని ‘అంచ కొడో కో నిదానుమ్ కెరుల గే, కెయ్క కి †మొర్చి నాయ్’ మెన తుయి సంగితసి!

53 అమ్చో పూర్గుమ్చో అబ్రాహామ్చి కంట తుయి వెల్లొ గే? జో మొర గెలో. దేముడుచ కబుర్లు సంగిలన కి మొర గెల. తుయి కొస్సొ మెన సంగితసి? సంగు!” మెన యేసుక పునిల.

54 జలె, యేసు జోవయింక, “ఆవ్ సొంత గవురుమ్ సంగన్లెగిన, అంచి గవురుమ్ ఆరిచి. జలె, ‘అమ్చో దేముడు’ మెన అంచో అబ్బొచి రిసా తుమ్ సంగితను. జోయ్యి అంక గవురుమ్ కెర్తయ్.

55 గని జోక తుమ్ అగ్రి తెంతో నేన్పు. ఆవ్, మాత్రుమ్, జోక జాని. ‘జోక నేని’ మెన ఆవ్ ఏక్ వేల సంగితయ్ జలె, తుమ్చి రితి అబద్దుమ్చో జతయ్. గని, నిజమి జోక జాని, చి జోచి కోడు నిదానుమ్ కెర్తసి.

56 ఆవ్ ఈంజ లోకుమ్తె జెర్పు తతి దీసి దెకుక మెన తుమ్చో పూర్గుమ్చో అబ్రాహామ్, జలె, ఆస తెన్ తిలన్. జలె, అబ్బొసి జలో దేముడుచి సెలవ్ తెన్ ‡దెకిలన్, చి సర్దసంతోసుమ్ జలన్” మెన యేసు సంగిలన్.

§ 8:48 8:48 యూదుల్ తెన్ ఎక్కిలోక ‘సమరయ సుదో’ మెలె, ‘సూస్’ మెలె రితి నిస్సారుమ్ కోడు జయెదె. సమరయ సుదో మెలె సమరయ ప్రదేసిమ్చో మాన్పు. * 8:51 8:51 నెంజెల్ ‘మొర్చు దెకితి నాయ్’. † 8:52 8:52 నెంజెల్ ‘మొర్చు చకితి నాయ్’.

‡ 8:56 8:56 ఎత్తి అదికారుమ్ తిలో దేముడు దెకయ్లి సివ్వుతె దెకిలన్, కిచ్చొగి.

57 యూదుల్చ జేవ్ వెల్లెల మాన్సుల్ జోక, “తుక యాబయ్ వెర్సుల్ జంక నేతయ్. దస్సి జలె, తుయి పూర్ముచొ అబ్రాహామ్ కిసి దెక తన్నె! కి నెంజెలె జో తుక దెక తయె దె గే? బెదె నాయ్!” మెన సంగిల,

58 చి యేసు, “తుమక ఆవ్ కిచ్చొ నిజమి కచితుమ సంగితసి మెలె, అబ్రాహామ్ నే జెర్మితె అగ్గె తెంతో ఆవ్వె తిలయ్, అస్సి” మెన సంగిలన్.

59 జో దస్సి సంగితకయ్, “దేముడు తెన్ సమ్మందుమ్ సంగితయ్, జా వెల్లె పాపుమ్ మెన ఉచర, యేసుక పత్రల్ తెన్ పెట మారుక మెన, వెల్లెల మాన్సుల్ పత్రల్ వెంట్ల, గని యేసు నే దెకయ్ జతె, దేముడుచి గుడి తెంతో బార్ జా, ఉట్ట గెలన్.

9

గుడ్డి జా జెర్మిలోసాక యేసు చెంగిల్ కెర్లెసి

1 వడ్డొ యేసు జోచ సిస్సుల్ తెన్ వట్ట గెతె తిలి పొది, జెర్మన్ తెన్ గుడ్డి మాన్సు ఎక్కిలోక దెకిల.

2 జోక దెక కెర, యేసుచ సిస్సుల్ కిచ్చొ పుసిల మెలె, “గురుబాబు, ఈంజొ మాన్సు గుడ్డి జెర్మిలోసి జోచి పాపుమ్ చి రిసా గే, అయ్యున్ అబ్బొన్ చి పాపుమ్ చి రిసా గే?” మెన పుసిల.

3 యేసు జోవయింక, “ఈంజొ పాపుమ్ కెర్లెసి నెంజె, అయ్యున్ అబ్బొన్ పాపుమ్ కెర్లెసి కి నెంజె. జలె, ఇన్నెక చెంగిల్ కెర్లెసి తెన్ దేముడుచి గపురుమ్ జోచితె దెకయ్ జతి రిసాయి దస్సి జెర్మిలోన్.

4 మెద్దెన్ తిలి రితి మదెనె, అంక తెర్మయ్ లోసాచ కమె ఆమ్ కెర్తె తంకయ్. కిచ్చొక ‘మెద్దెన్’ మెలయ్ మెలె, అందర్ అయ్లె, కో కి కామ్ కెరుక నెంజె.

5 ఆవ్ ఈంజ లోకుమ్ తె ఇసి బుల్తె తిలి మదెనె ఈంజ లోకుమ్ చక దొర్కు జలి ఉజడి ఆవ్వె జతసి” మెన యేసు బోదన కెర్లెన్.

6 యేసు దస్సి సంగితె తా కిచ్చొ గుర్తు కెర్లెన్ మెలె, బుయ్యె తుంక బుర్ద కెర, జా బుర్ద జో మాన్సుచ అంకివొతె గాఁన దా,

7 జోక “తుయి గెచ్చ సిలోయమ్ మెంతి వెల్లొ కుండితె దోవను” మెన సంగిలన్. జా సిలోయమ్ మెంతి నావ్ చి అర్దుమ్ కిచ్చొ మెలె, ‘తెర్మయ్ లిసి’. జలె, యేసు సంగిలి రితి జో మాన్సు ఒత్త గెచ్చ, దోవన కెర, అంకివొ దెకయ్ జా, ఉట్ట అయ్లన్.

8 జో దస్సి చెంగిల్ జా ఉట్ట జెతికయ్, జోచి గెవ్వెచ మాన్సుల్, జో అగ్గె బిచ్చిమ్ నజితె తిలిసి దెక తిల అన్నె సగుమ్ జెన్ కిచ్చొ మెన లట్టబ్ల మెలె, “ఈంజొయి అగ్గె బిచ్చిమ్ నజ నజ రోజాక వట్ట వెన తిలోసా, కిచ్చొగె” మెన లట్టబంతె తిల.

9 సగుమ్ జెన్ “జొయ్యె” మెన సంగిల. అన్నె సగుమ్ జెన్ “నెంజె, గని జోచి పోలికవొ మాన్సు” మెన సంగిల. గని జో “ఆవ్ జొయ్యె!” మెన సంగిలన్.

10 జేవ్ వ్రెజల్, జలె, జో మాన్సుక, “జలె, కిసి జా అప్పె దెకితసి?” మెన ఆచారమ్ జా పుసిల.

11 జో మాన్సు జోవయింక, “యేసు మెంతో జో మాన్సు బుర్ద కెర అంచ అంకివొతె గాఁన దా, తుయి గెచ్చ సిలోయమ్ వెల్లొ కుండితె దోవను! మెన అంక సంగిలన్. ఆవ్ గెచ్చ దోవన్లయ్, చి అంకివొ డిసిల!” మెన సాచి సంగిలె.

12 “జో అప్పె కేతె?” మెన జేవ్ జోక పుసిల, చి “ఆవ్ నేని” మెన జో సంగిలన్.

పండితుల్ గుడ్డి మాన్సుక పరిచ్చ కెర్లెసి

13 జో గుడ్డి జా జెర్మిలోసాక పైజల్ పరిసయ్యుల్ తె కడ నిల.

14 జలె, యేసు బుర్ద కెర జోచ అంకివొతె గాఁన చెంగిల్ కెర్లె దిసి కేన్ దిసి మెలె, జోవయించి బక్తి కెర్లె నిలవ్ కడన్ల దిసి.

15 జాకయ్, పరిసయ్యుల్ కి “తుక అంకివొ డిసయ్ లిసి కిసి జర్గు జలి?” మెన పరిచ్చ కెర్లె. చి జో మాన్సు జోవయింక, “జో బుర్ద అంచ అంకివొతె గాఁనలన్, చి ఆవ్ దోవన్లయ్, చి అప్పె దెకితసి” మెన సంగిలన్.

16 పరిసయ్యుల్తె సగుమ్జిన్ “జో మాన్సు దేముడుతె తెంతో అయ్లోసా నెంజె. కిచ్చొక మెలె, సెలవ్ కడన్లి దీసి పిట్టవన్తయ్” మెన యేసుచి రిసా తీర్పు సంగిల. గని అన్నె సగుమ్జిన్ “పాపుమ్ కెర్తొ మాన్సు, జలె, దేముడుచి అదికారుమ్ దెకయత గుర్తుల్ కెరుక నెత్తిర్తొ” మెల, చి దొన్సి జటుల్ జలె.

17 జాకయ్, జో గుడ్డి మాన్సుక కిచ్చొ మెన అన్నె పరిచ్చ కెర్ల మెలె, “జో తుక అంకివో డీసయ్లి రిసా, తుయి జోచి రిసా కిచ్చొ ఉడర్తసి?” మెన పుసిల. జో జోవయింక “దేముడుచ కబుర్లు సంగితో ఎక్కిలో జయెదె” మెన జబాబ్ దిలన్.

18 జో “నిజుమ్ అగ్గె గుడ్డి తిలో, చి చెంగిల్ జలె” మెన, యూదుల్చ జేవ్ వెల్లెల మాన్సుల్ మొదొల్త సంప కెర్తి నాయ్ చి రిసా జోచ అయ్యన్అబ్బొన్క బుకార్ల.

19 బుకారా కెర, జోవయింక “ఈంజొ తుమ్చొ పుత్తుది గే? జెర్తిల్ తెంతో గుడ్డి తిలో గే? దస్సి జలె, కిసి జా అప్పె దెకితయ్?” మెన పుసిల.

20 అయ్యన్ అబ్బొసి కిచ్చొ జబాబ్ దిల మెలె, “ఈంజొ అమ్చొ పుత్తు” మెన, ‘ఈంజొ గుడ్డి జా జెర్తిలన్’ మెన జానుమ్.

21 గని అంకివో అప్పె డీసిలిసి కిసి జర్లు జలి గే, కో జోచ అంకివో చెంగిల్ కెర్లన్ గే, నేనుమ్. జోక తుమ్ పున దెక. జో ఉబెడొబోద గెద? జోయ్యి సంగెదె” మెన జబాబ్ దిల.

22 అయ్యన్ అబ్బొసి కిచ్చొక దస్సి మెల మెలె, వెల్లొ మాన్సుక బితె తిల. కిచ్చొక మెలె, యేసుక ‘దేముడు తెద్రయ్లో క్రీస్తు రచ్చించుచు కెర్లొసా’ మెన కో జలెకు ఒప్పనై, జోవయింక సబగేర్ తెంతో ఉడడ గెలుక అస్సి, చి అన్నె కెయ్క కి పెనడుక జయె నాయ్ మెన వెల్లెల మాన్సుల్ అగ్గె తెంతో ఉడచ అస్సి.

23 జాకయ్, “జో ఉబెడొబోద. జోకయ్ పున!” మెన అయ్యన్ అబ్బొసి సంగ తిల.

24 జాకయ్ తెదొడి, గుడ్డి జా జెర్తి తిలో జో మాన్సుక జేవ్ వెల్లెల మాన్సుల్ అన్నెక్ సుట్టు బుకారా కెర జోక కిచ్చొ మెల మెలె, “జో యేసు పాపుమ్ కెర్లొసా మెన ఆమ్ జానుమ్. జాకయ్, తుయి చెంగిల్ జలిన్చి రిసా దేముడుక గవురుమ్ కెరు, గని జో యేసుక షొని” మెన ఆటంకుమ్ కెర్ల.

25 గని జేవ్ దస్సి సంగిలే కి, జో జోవయింక, “జో పాపుమ్ కెర్లొసా గే నెంజె గే ఆవ్ నేని, గని కిచ్చొ కచితుమ్ జాని మెలె, ఆవ్ అగ్గె గుడ్డి జా తిలె కి, అప్పె దెకితసి” మెన సాచి సంగిలన్.

26 దస్సి సంగితికయ్, జేవ్ జోక “తుక జో కెర్లిసి కిచ్చొ? తుచ అంకివో కిసి చెంగిల్ కెర్లన్?” మెన అన్నెక్ సుట్టు పుసిల.

27 చి జో అన్నె జోవయింక, “ఆవ్ తెదొడి సంగిలయ్, గని తుమ్ సూన్సు నాయ్. కిచ్చొక అన్నెక్ సుట్టు సూనుక కోర్ప జతసు? తూమ్ కి ఏక్ వేల జోచ సిస్సుల్ జంక కోర్ప జతసు గే?” మెన పుసిలన్.

28 జో దస్సి పుసితికయ్, జేవ్ “తూయి జోచొ సిస్సుడు. తుచి ఇస్సుమ్! ఆమ్, మాత్రుమ్, మోసా పూర్ముచొచ సిస్సుల్!

29 మోసాచి అత్తి ఎత్తి అదికారుమ్ తిలో దేముడు జోచ కబుర్లు సంగ అస్సె మెన జానుమ్. జో యేసు జలె, కేనె తెంతో అయ్లో గే, నేనుమ్” మెన సంగిల.

30 జాకయ్, చెంగిల్ జలె జో మాన్సు జోవయింక అన్నె కిచ్చొ జబాబ్ దిలన్ మెలె, “అబ్బొవోమ్! అంచ అంకివో జో అన్నె డీసయ్లెకి, కేనె తెంతో అయ్లో గే తుమ్ నేస్సు గే?”

31 “కో పాపుమ్ కెర్లొసా జవుల గే, దేముడు జోక దెక నాయ్ గని, కో జలెకు జోవయింక సత్తిమ్ కెరెదె గే, జోకయ్ జో ప్రబు దెకెదె” మెన ఎత్తిజిన్ జానుమ్.

32 లోకుమ్ జెర్తయ్లి తెంతో, కేనె జెర్తయ్ గుడ్డి జా తిలో మాన్సుక కో చెంగిల్ కెర్లిసి కో సూనుక నాయ్.

33 దేముడు తెంతో ఈంజొ మాన్సు జెతో నాయ్ జలె, అంచి బాద గెప్పవుక ఎద్దెర నెత్తిర్తొ” మెన వెల్లెల మాన్సుల్క బుద్ది సంగిలన్.

34 జో దస్సి సంగితికయ్, జేవ్ వెల్లెల మాన్సుల్ జోక కిచ్చొ జబాబ్ దిలన్ మెలె, “నిజుమి రితి పాపుమ్ తెన్ జెర్తిలోసా, తుయి అమ్క సికడుక జయె నాయ్” మెన, జో కెయ్క కి అన్నెనే జెతి రితి సబగేర్ తెంతో జోక ఉడడ గెల.

చెంగిల్ జలె మాన్సుక యేసు దయిరిమ్ కెర్లిసి

35 జో మాన్సుక వెల్లెల మాన్సుల్ ఉదడ్డి సిచ్చ కెర్రినచి రిసా యేసు సూన కెర, జోక చజ దెక, “మాన్సు జా జెర్సున్ అయ్లోసాక తుయి నంపజా అస్సిసి గే?” మెన పుసిలన్.

36 జో మాన్సు యేసుక “బాబు, ఆవ్ జోక నంపజంక ఇస్టుమ్ జా అస్సి. జో కేతె?” మెన పుసిలన్, చి

37 యేసు జోక, “తుయి జోక దెక అస్సిసి. తుచి తెన్ అప్పె లట్టబ్బొసా జోయ్యి.” మెలన్.

38 జో మాన్సు “ప్రబు, ఆవ్ నంపజతసి” మెన జోకర బజ్జి కెర్లె.

39 తెదొడి యేసు ఒత్త తిల మాన్సుల్క, “ఆవ్ ఈంజ లోకుమ్తె అయ్లిసి లోకుమ్చక తీర్పు కెర్రి రితి జతయ్. కిచ్చొక మెలె, ఆవ్ జెతికయ్, గుడ్డి జల మాన్సుల్ దెకితతి, చి గుడ్డి నెంజిల మాన్సుల్ గుడ్డి రితి జతతి” మెన సంగిలన్.

40 జలె, జోచి పాసి తిల పరిసయ్యుల్ సగుమ్జిన్ ఈంజ కోడు సూన కెర “అమ్క కి ‘గుడ్డి మాన్సుల్’ మెన తుయి సంగితసి గే?” మెన యేసుక పుసిల.

41 యేసు జోవయింక, “తుమ్ నిజమి గుడ్డి జా తత్తదు జలె, తుమ్క కిచ్చొ పాపుమ్ తత్తి నాయ్. గని ‘అమ్ దెకితనుమ్’ మెన తుమ్ సంగితనుచి రిసా తుమ్చి పాపుమ్ గెప్పె నాయ్.

10

మెండల్సాడు అన్నె గొవుడు రకితిసి

1 “తుమ్క కచితుమ్ నిజమి ఆవ్ కిచ్చొ సంగితసి మెలె, మెండల్సాడు ఏక తిలె, ఎక్కిలో జా కెర గుమ్ముమ్ వాట్ నే గెతె, కూడ డేవ పెసిలె, జో చోరు జయెదె.

2 గని గుమ్ముమ్ వాట్ కో పెనెదె దే, జోయ్యి గొవుడు జయెదె.

3 జా సాడుక గుమ్ముమ్ రకితోసా ఎక్కిలో తిలె, గొవుడుక వాట్ తయెదె. జో గొవుడుచి అవాడ్ జో రకిత మెండల్ కి చినుల, చి జో రకిత మెండల్క జో నవ్వొ తియె తయెదె, చి జోవయింక జో రోజుక బార్ కెరెదె.

4 జోయ్యి సొంత రకిత మెండల్క బార్ కెర్లె, జో కేనె ఉదడెదె గే, జేవ్ గెచ్చులె. కిచ్చొక మెలె, జేవ్ నంపజలో గొవుడుచి అవాడ్ జేవ్ చినితతి.

5 వేర మాన్సు అయ్లె, జోవయించి అవాడ్ నేనతి, చి నంపజతి నాయ్, చి ఉట్ట నిగుల” మెన యేసు సంగిలన్.

6 జలె, యేసు జా సంగిలే కి, జేవ్ వెల్లెల మాన్సుల్ అర్దుమ్ కెరంతి నాయ్.

పరలోకుమచి రాజిమ్క దొర్పు జలి గుమ్ముమ్ ఆవ్

7 జాకయ్ యేసు జేవ్క అన్నె, “ఆవ్ తుమ్క నిజమి కచితుమ్ కిచ్చొ సంగితసి మెలె, ఆవ్ సంగిలి మెండల్సాడె పెసితి గుమ్ముమ్ ఆవ్వె.

8 అంచి కంట అగ్గె అయ్ల గొవుడ్లు ఎత్తిజిన్ చోర్లు, చోర్లస జలె. మెండల్ జోవయింక అవాడ్ సూన్తి నాయ్.

9 దొర్పు జలి గుమ్ముమ్ ఆవ్వె. ఆవ్ తిలి గుమ్ముమ్ వాట్ కో పెసుల గే, రచ్చించుప జవుల, చి జా సాడు జోవయించి సొంత టాన్ జయెదె, చి పెసుక బార్ జంక జతె తవుల, చి చెంగిల్ అన్నిమ్ జోవయింక దొర్పు జతె తయెదె.

10 చోరు, జలె, ఆరి మెండల్క చోరుక, కండ గెలుక, పాడ్ కెరుక జయెదె. ఆవ్, మాత్రుమ్, కిచ్చొక అయ్లయ్ మెలె, అంచ మెండల్ జల మాన్సుల్క ‘జతు, ఎదిలి చెంగిల్ †జివ్ జోవయింక దొర్పు జవున్’ మెనయ్ అయ్లయ్.

11 “ఆవ్వె చెంగిలో గొవుడు జయెదె. గొవుడు చెంగిలోచొ జలె, మెండల్ కిచ్చొ ప్రమాదుమ్ జతి రితి జలె, జోవయింక ‘మెర్తు నాయ్. జితు’ మెన జోయ్యి అడ్డు జా, జోవయింక రచ్చించుప కెర్రి రిసా జోచి జివ్ దా మెరెదె. ఆవ్ కి దస్సి జయెదె.

12 ఎక్కిలో జవున్ నిజమ్ తిలో గొవుడు నెంజితె, ఆరి డబ్బుల్క జవున్ మంద రకిలె, జేవ్ మెండల్ జోవ సొంత మెండల్ నెంజిలి రిసా, మెండల్క మారితో కిచ్చొ జవున్ జంతు అయ్లె, కూలిక రకితో జో

* 10:6 10:6 జేవ్ వెల్లె మాన్సుల్కయ్ ‘చోర్లు’ వేర మాన్సుల్ మెనతయ్. జోకయ్ ‘గొవుడు’ మెనతయ్. † 10:10 10:10 ‘చెంగిల్ జివ్’ మెలె, పరలోకుమతె దెదితి జివు. యోహాను 3:15.

మాన్యు ఉట్ట నిగ, మెండల్ నస్టుమ్ జతి రితి ముల దెయెదెచి. ఉట్ట నిగిలె, జో జంతు కేన్ మెండక దెర, తిల మెండల్క చెదుర్పు కెరెదె.

13 జో వేర మాన్యు కిచ్చొక దస్సి ఉట్ట నిగ మెండల్క మాఅజ్ కెర ములెదె మెలె, ఆరి డబ్బల్కయ్ రకితయ్చి రిసా. జోచ సొంత మెండల్ నెంజితి, చి మొరై కి జెలి కి, జోక బాద నాయ్.

14 “ఆవ్ జలె, చెంగిలో గొవుడు.

15 అంచొ అబ్బొ అంక జానె, ప్రేమ కెర్తయ్. ఆవ్ కి అబ్బొక జాని ప్రేమ కెర్తసి. దస్సి, అంచ మెండల్క ఆవ్ జాని, ప్రేమ కెర్తసి. జేవ్ కి అంక జాన్తి, ప్రేమ కెర్తతి. అన్నె, జేవ్ అంచ మెండల్ జల మాన్యుల్క ‘మొర్తు నాయ్, గని జతు’ మెన ఆవ్ మొర గెచ్చిందె.

16 “అన్నె, వేర దేసిమలుచ వేర ప్రెజల్చ మాన్యుల్ అంక నంపజా అంచ మెండల్ జవుల. జోవయింక కి అంచి మందయ్ బెదవనుక అస్సె. జేవ్ కి అమ్చి అవాడ్ నూన జెవుల. అయ్లె, జేవ్ కి ఈంజేవ్ కి ఎక్కి మంద జవుల, చి జేవ్ ఎత్తిక ఆవ్ ఎక్కిలో గొవుడు జయిందె.

17 జలె, అంచ మెండల్ జలనక రచ్చించుప కెర్తి రిసా మొర గెచ్చిందె చి రిసా అబ్బొ అంక ఒగ్గర్ ప్రేమ దెకితయ్, చి మొర గెలె కి, అన్నె జీవ్ జా ఉట్టిందె.

18 మాన్యుల్ అంక మార గెలె కి, ఆవ్ నే ఒప్పిలె నెత్తిర్తి. గని, అంచి ఇస్టుమ్కయ్ మొరిందె. అంచి ఇస్టుమ్క మొరుక అదికారుమ్ అస్సె, అన్నె, అన్నె జీవ్ జా ఉట్టుక కి అంక అదికారుమ్ అస్సె. జా ఎత్తి. ఆవ్ నెరవెర్పుప కెరుక మెన అంచొ అబ్బొ త్రియార్లి కామ్” మెన యేసు బోదన కెర్లన్.

యేసుచి రిసా వెల్లెల మాన్యుల్ అన్నె దొన్ని జట్టు జలిసి

19 యేసుచ ఈంజేవ్ కొడెలి రిసా యూదుల్చ ఒత్తచ వెల్లెల మాన్యుల్ అన్నె దొన్ని జట్టు జల.

20 జోవయింతె ఒగ్గర్జన్, “జోక బూతుమ్ దెర్లి రిసా వెర్రి జా అస్సె. జోచ కొడె అమ్ కిచ్చొక నూనుక?” మెన సంగిల.

21 అన్నె నగమ్జన్ “ఇన కొడె బూతుమ్ దెర్లి కొడె నెంజితి. అన్నె, గుడ్డి జల మాన్యుల్క చెంగిల్ కెరుక బూతల్ దెర్లనక సెక్తి తయెదె గే? నాయ్, గద?” మెన సంగిల.

22 ఇదిల్ పడ్డొ, అన్నెక పండుగు అయ్లె. ‘ఎక్కి దేముడుకయ్ తవున్’ మెన పూర్లమ్ పొది దేముడుచి గుడి సుద్ది కెర్లి ఏక్ కామ్చి గుర్తుచి పండుగు, జా.

23 చల్లి పొది జా, జలె, దేముడుచి గుడితెచి రానొ జలో సాలోమాను పూర్లమ్చొచి నావ్ తిలి వెల్లిపేడితె యేసు బులై తతికయ్,

24 యూదుల్చ వెల్లెల మాన్యుల్ జోచి సుట్టునంత బెర జా, జోక అన్నె పరిచ్చ కెరుక దెర్ల. కిచ్చొ మెన పునీల మెలె, “అన్నె కెత్తి దీసల్ అమ్ నేన తతి రితి కెర్తె? తుయి రచ్చించుప కెర్తొసా జతో క్రీస్తు జలె, అమ్క సొస్టుమ్ సంగు!” మెన సంగిల.

25 జలె, యేసు జోవయింక, “తుమ్క అగ్గ సంగిలయ్, గని తుమ్ నంప కెర్పు నాయ్. అబ్బొసి జలో దేముడుచి నావ్ తెన్ ఆవ్ కెర్త కమె కి అంచి రిసా ‘జోయ్య’ మెన సాచి సంగితతి.

26 గని, అంచి మెండల్ మందతెచ తుమ్ నెంజున్చి రిసా తుమ్ నంపజంక నెతుర్పు.

27 అంచ మెండల్ జలె, అంచి అవాడ్ నూన్తతి. ఆవ్ జోవయింక జాని, స్రెమ కెర్తసి, చి అంచి పట్టి జెతతి.

28 దేముడుచి రాజిమతె బెదితి, మొరై పరలోకుమతె గెచ్చ కెయెక తెయెక జతి వరుమ్ జోవయింక ఆవ్ దెతసిచి రిసా, జేవ్ కెయెక కి సిచ్చ జతి మొర్తుతె గెతి నాయ్, అన్నె, కో కి జోవయింక అంచి అత్తి తెంతొ ఉర్లక నెత్తిర్తి.

29 అంచొ దేముడు అబ్బొ జోవయింక అంచి అత్తి సార్పు కెర దిలన్. జోయ్యె ఎత్తిచి కంట వెల్లిచి రిసా, జో అంచొ అబ్బొసి జలో దేముడుచి అత్తి తెంతొ జోవయింక కో కి ఉర్లక నెత్తిర్తి.

30 ఆవ్ అంచొ అబ్బొ ఎక్కి, ‘మెన యేసు వెల్లెల మాన్యుల్క సంగిలన్.

31 యేసు ఇని సంగితికయ్, ‘జోక పత్రల్ తెన్ వెట మార గెలుమ’ మెన, జా దీన్చి రితి వెల్లెల మాన్యుల్ పత్రల్ వెంట్ల.

32 యేసు జోవయింక, “దేముడు అబ్బొ కెరయల చెంగిల్ కమె ఒగ్గరి తుమ్క దెకవ అస్సి. జేవ్ కమొతె కేన్ కామ్క ‘గల్చొ’ మెన తుమ్ అంక పత్తల్ గల మారుక ఉచర్తసు?” మెన పుసిలన్, చి

33 వెల్లెల మాన్సుల్ జోక, “కిచ్చొ చెంగిల్ కామ్ కెర్లి రిసా పత్తల్ గల మారుమ్ నాయ్, గని తుయి రితొయి మాన్సు దేముడు తెన్ నమ్మందుమ్ నంగుక, జోచి విలువ కడ్డి రిసాయి, జా వెల్లి తప్పకుయ్” మెన నంగిల.

34-35 జాకయ్ యేసు జోవయింక ఇసి మెన జబాబ్ నంగిలన్, “తుమ్క ‘దేముడు జస్సె’ మెన నంగిలయ్

మెన జోవయించ కబుర్లు నూన సికడ్ల మాన్సుల్చి రిసా తుమ్చి *మోసా పూర్ముచొచి అత్తి దేముడు రెగ్గయల ఆగ్గుల్తె రెగ్గయలో, గెద? జో దేముడు రెగ్గయలిసి కో మాన్సు పిట్టవుక నెత్తిర్లి, గెద.

36 జలె, జో దేముడు అబ్బొ అంక జోవయించి కామ్కయ్ నిసాన అదికారుమ్ దా అంక ఈంజ లోకుమ్తె తెర్తయలో. తెర్తయలో జలె, ‘ఆవ్ దేముడుచొ పుత్తుసి’ మెన ఆవ్ నంగిలి రిసా ‘జోచి విలువ కడ్డయ్’ మెన తుమ్ కిసి నంగుక జయెదె!

37 ఆవ్ దేముడు అబ్బొచ కమె కెర్తసి నాయ్ జలె, అంక నంపజంక పోన.

38 గని దేముడు అబ్బొచ కమె ఆవ్ కెర్తసి జలె, అంకయ్ తుమ్ నే నంప కెర్లె కి, జేవ్ కమె దెక జేవ్ కమొకయ్ నంపజా. జేవ్ కమొక నంపజలె, దేముడు అబ్బొ అంచి పెట్టి తిలిసి, ఆవ్ జో అబ్బొచి పెట్టి తిలిసి చినితె, చి తుమ్క అర్దుమ్ జెయెదె” మెన యేసు నంగిలన్.

39 యేసు దస్సి నంగితికయ్, జేవ్ వెల్లెల మాన్సుల్ జోక దెరుక దెకిల, గని జోవయించి అత్తి దెర్ను నే సిడ్డె బార్ జా ఉట్ట గెలన్.

40 యేసు ఉట్ట గెచ్చ, యోర్దాను గాడు ఒత్తల్తో గెచ్చ, అగ్గె యోహాను బాప్తిసమ్ దెతె తిలిన్తె టాన్తె నగుమ్ దీనల్ ఒత్త తిలన్.

41 ఒత్త తితికయ్, మాన్సుల్ ఒగ్గర్జిన్ జోతె జా కెర, కిచ్చొ మెన నంగితె తిల మెలె, “దేముడుచి అదికారుమ్క గుర్తు దెకయ్తె కమె కేన్ కి యోహాను కెరె నాయ్, గని ఈంజో యేసుచి రిసా జో నంగిలిసి ఎత్తి నత్తిమ్!”

42 ఒత్త తిలన బలేగ జీన యేసుక ఒత్త తెన్ నంపజల.

11

లాజర్ మెలో మాన్సు మొర గెలిసి

1 లాజర్ మెలో ఎక్కిలో జొర్జొ సేడ్లన్. జో కేన్ గచ్చొవొ మెలె, మరియ మార్త మెల దొగుల బేన్సివొ చి బేతనియ గచ్చొవొ.

2 వడ్డ తేర్బోద ఎక్లి యేసుక తేల్ గాఁన, జాచి సిండి తెన్ జోచ చట్టొ పుంచెదె. జయ్యి ఈంజ మరియ జయెదె. జొర్జొ సేడ్లసా జేవ్చొ అన్నొసి జయెదె.

3 జలె, లాజర్చ బేన్సివొ “ప్రబువ, తుయి ప్రేమ కెర్తొసా జబ్బు సేడ అస్సె” మెన యేసుతె కబుర్ తెర్తయల.

4 గని యేసు ఈంజ కబుర్ నూన, “ఈంజ జబ్బు సేడ్లిసి జో మొర్లి రిసాయి నాయ్, గని దేముడుచి నావ్ గవురుమ్ జతి రిసాయి, ఆవ్ జోచొ పుత్తుసిచి అదికారుమ్ దెకయ్తె రిసాయి” మెన, సిస్సుల్క నంగిలన్.

5 మార్తక, జాచి బేన్సిక, లాజర్క, యేసు బలే ప్రేమ తిలో,

6 గని లాజర్ ‘జబ్బు తెన్ అస్సె’ మెన నూన్లె కి, జో తిలి టాన్తె యేసు అన్నె దొరతి తాఁ గెలో.

7 జా దొరతి గతికయ్, జోచ సిస్సుల్క, “యూదయ ప్రదేసిమి అన్నె గెచ్చుమ్!” మెన యేసు నంగిలన్.

8 జేవ్ సిస్సుల్ జోవయింక “గురుబాబు, ఈంజ మదెనె యూదుల్చ వెల్లెల మాన్సుల్ తుక పత్తల్ గల మారుక ఉచర్తె తిలె కి, తుయి అన్నె ‘ఒత్త గెచ్చొందె’ మెన ఉచర్తసి గే?” మెన బియఁ గెచ్చ జోక నంగిల.

* 10:34-35 10:34-35 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రెగ్గయలి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పుస్తకమ్తె రెగ్గయ్ జా అస్సె. ఈంజ దెకవుక మెన కుపియ బాన్తె నొయి ప్రమానుమ్తె మోసా పూర్ముచొచి అత్తి రెగ్గి దేముడుచ ఆగ్గుల్ మెన రర్చవ అస్సె.

9 యేసు జోవయింక, “ఒండి మెద్దెని పాసి పాసి బార గంటల్చి ఉజిడి తయెదె, గెద? దస్సి జలె, జా బార గంటల్చి ఉజిడి తిలె పొది మాన్సు ఇండిలె, ఈంజ లోకుమ్చి ఉజిడిచి రిసా జోక వాట్ డీస్తయ్, చి నీడె నాయ్.

10 గని, జేవ్ అందరె ఇండిలె, ఉజిడి నెంజిలి రిసా జేవ్ నేడుల” మెన సంగిలన్.

11 యేసు జోవయింక దస్సి సంగ అస్సె, “ఆవ్ ప్రేమ కెర్లొ లాజర్ నిజ అస్సె, గని జోవయింక ఉట్టవుక గెతన్” మెలన్, చి

12 సిస్సుల్ “దస్సి జలె, ప్రబు, జో నిజ తిలెగిన, చెంగిల్ జయెదె. కిచ్చొ బాద నాయ్” మెలె.

13 జలె, ‘నిజ అస్సె’ మెన జో మొర్లిన్చి రిసా యేసు సంగ తిలన్. గని, ‘మాములుమ్ నిజ తతినచి రిసా సంగితయ్’ మెన సిస్సుల్ ఉచర్తతి.

14 తెడెడి “లాజర్ మొర గెచ్చు అస్సె” మెన యేసు జోవయింక సొస్టుమ్ సంగ,

15 అస్సె, “జో మొర గెలి పొది ఆవ్ ఒత్త నెంజిలిసి చెంగిలి. కిచ్చొక మెలె, తుమ్చి రిసాయి. మెలె, అంచి రిసా తుమ్ దయిరిమ్ తెన్ నంపజతి రిసా ఈంజ ఎత్కి జర్గు జతయ్. అల్లె, జోతె గెచ్చుము!” మెన సంగిలన్.

16 ‘కల్వల్ జెర్మిలోసా’ మెలి అసిమ్ నావ్ తిలో తోమా మెలో సిస్సుడు, జలె, తిల సిస్సుల్క, “జోమ్మ, ఆమ్ ఇన్వెతెన్ మొర గెచ్చుక గెచ్చుము!” మెన సంగిలన్, చి జేవ్ బార్ జలె.

యేసు లాజర్చ బేస్సివో తెన్ సంగిలిసి

17 జేవ్ బేతనియ గెచ్చి పాసి అయెలె, యేసు కిచ్చొ కబుర్ నూన్లొ మెలె, ‘లాజర్క మెస్సె లోవ చెత్తర్ పొదుల్ జా అస్సె’ మెన నూన్లన్.

18 జలె, జా గావ్ యెరూసలేమ్ వట్టుమ్ తెంతో పాసి పాసి ఎక్కి దొన్ని మయిలు దూరి అస్సె. ఒగ్గర్ దూరి నాయ్.

19 చి జేవ్చి అస్సెని మొర్లి రిసా మార్తక చి మరియక బురియవుక మెన, యెరూసలేమ్చ యూదుల్ ఒగ్గర్జన్ జా అస్సి.

20 జలె, యేసు జెతయ్ మెన మార్త నూన కెర, జోక దస్సుల్ జంక మెన వాట్ ఎదక అయెలి, గని మరియ గెరి తా గెలి.

21 మార్త జోక దస్సుల్ జా జోకర, యేసుక, “ప్రబు, తుయి ఇన్వె తత్తది జలె, అంచొ అన్వె మొర్లొ నాయ్.

22 గని అస్సె కి తుయి దేముడుతె కిచ్చొ సంగిలే కి తుక దెయెదె మెన జాని” మెన సంగిలి.

23 యేసు జాక, “తుచొ అన్వెది అన్వె జీవ్ జా ఉట్టెదె” మెలన్.

24 మార్త జలె, జోక “ఈంజ లోకుమ్ ఇసి తతినచి ఆకర్ దీసిక, ఈంజ లోకుమ్చ మూస్సుల్ ఎత్కిజన్ అన్వె జీవ్ జా ఉట్టితి దీసిక, అన్వె అన్వె ఉట్టెదె మెన జాని” మెన సంగిలి.

25 చి యేసు జాక, “మొర గెలసక ఉట్టయ్లోసా, దొర్కు జలి జీవ్ దెతొసా అచ్చి. అంక కో నంపజా గెచ్చుల గే జోవయింక ఆగ్ మొర గెలి కి, జివుల.

26 చి, కో అంక నంప తెన్ జితతి గే, సిచ్చ జతి మొర్కుతె కెయెక కి గెతి నాయ్. అమ్మ, ఈంజ కోడు తుయి నంపజతన్ గే?” మెన పుసిలన్.

27 మార్త యేసుక “నంపజా అస్సె ప్రబు. ఈంజ లోకుమ్తె జెంక తిలో రచ్చించువ కెర్లొసా జతో క్రిస్తు తుయి మెన, దేముడుచొ పుత్తుసి తుయి మెన నంప తెన్ అస్సె” మెన ఒప్పున సంగిలి.

28 జలె, మార్త ఇసి సంగిలి బేగి, యేసుక ఒత్త ముల దా గెరి గెచ్చ, “గురుబాబు జా అస్సె. తుక బుక్కార్తయ్” మెన బేస్సి జలి మరియక తిరిమ్ సంగిలన్.

29 మరియ ఈంజ కోడు నూన, చట్కున ఉట్ట, యేసుతె గెచ్చుక బార్ జలి.

30 ఈంజ మదెనె, యేసు కేనె అస్సె మెలె, మార్త జోక దస్సుల్ జా ముల దిలి టాన్తె రక అస్సె. గచ్చి జెంక నేతయ్.

31 మరియ చట్కున బార్ జతికయ్, జాతె జా తా జాక బురియయ్తె తిల యూదుల్ దెక, “మెస్సె ఏడుక గెతయ్, కిచ్చొగె” మెన ఉచర, జాచి వట్టి గెల.

32 జలె, యేసు తిలిన్తె మరియ పావ కెర, జోక దెక జోచి చట్టె సెర్కు నీడ, “ప్రబు, తుయి ఇన్వె తత్తది జలె, అంచొ అన్వె మొర గెతో నాయ్” మెన సంగిలి.

33 జా ఏడ్డిసి, జేవ్ తెన్ అయ్ల యూదుల్ ఏడ్డిసి దెక, యేసు కన్యారుమ్ జా జోవ్ అత్తుతె బాద నేడ,

34 “జోక కేనె రోవెలదు?” మెన పునిలన్, చి జేవ్ జోక “జా దెకు, ప్రబు!” మెన సంగిల.

35 యేసు ఆసుమ్ గేడవ ఏడ్డన్.

36 జో ఏడ్డిసి దెక, ఒత్త తిల యూదుల్ సగుమ్జెన్ “ఆదె, జోవయింక కెర్ది ప్రేమ తిలో, ఈజో!” మెన దెకయ్ల.

37 జోవయింతె అన్నె సగుమ్జెన్, మాత్తుమ్, “జో గుడ్డి మాన్సుచ అంకివో డీనయ్లో, గెద. జలె, లాజర్ నే మొర్ది రితి కెర్తో జలె”, మెన సంగిల.

యేసు లాజర్ క జియడ్డిసి

38 తెదోడి యేసు జోవ్ అత్తుతె అన్నె ఒగ్గర్ ఒగ్గర్ కన్యారుమ్ జా, మెన్ను పాచిలన్. ఈంజ మెన్నున్ కీసిచి మెలె, మెట్లయ్ తిలె సాప్రయ్ డోల్లి కెర్లి గది. జా డోల్లి కెర్లిన్క డంక తిలెసి వెల్లో వత్తురు.

39 యేసు, “వత్తురు కడ గెల!” మెలన్. దస్సి మెంతికయ్, మొర గెలోసాచి మార్త మెలి బేస్సి జోక “ప్రబు, జో మొర గెచ్చు చెత్తర్ పొదుల్ జలె! పీనుమ్ వాసిన వెట్టె తయెదె!” మెన సంగిలి.

40 యేసు జాక “ఆవ్ తుక కిచ్చో సంగిలయ్ గే, తుయి నంప తెన్ తిలెగిన, దేముడుచి గవురుమ్ సెక్తిచి రుజ్జు దెకితె.” మెన ఇదిల్ గోల కెర్లన్.

41 జలె, వత్తురు కడ గెల, చి యేసు ఆగాసుమ్ వక్క దెక “ఓ బ, తుయి అంచి ఆస సూన్లది మెన అంక సర్ల.

42 తుచి తెన్ ఆవ్ లట్టబ్బిసి తుయి కెయెక తెయెక సూన్తసి మెన ఆవ్ పూర్తి జాని, గని తుయి అంక తెద్రయ్లెన్చి రుజ్జు దెక నంపజతు మెన, ఇన్నె టీవ తిలె ప్రెజలెచి రిసా ఇసి చోడి పుట్టవ సంగితసి” మెన సంగ, గట్టిజ ఒర్పు,

43 “లాజర్, బార్ జా!” మెన బుకార్లన్.

44 చి జో మొర గెలోసా, జోవ్ అత్తో చట్టో బందున్ తెన్ తతె, జోవ్ మొక్కె తువ్వల్ గుడియవ తతె, బార్ జా అయ్లో, చి తిలె మాన్సుల్క యేసు “కట్టు యివ, జోక విడ్డల్ కెర!” మెన సంగిలన్.

యేసుక మారుక మెన యూదుల్ అన్నె కుత్త కెర్లిసి

(మత్త 26:1-5; మార్కు 14:1-2; లూకా 22:1-2)

45 మరియ తెన్ జా తిలె యూదుల్తె ఒగ్గర్జెన్ జలె, యేసు కెర్లిసి దెక, జోక నంపజలె.

46 గని జోవయింతె అన్నె సగుమ్జెన్, పరిసయ్యుల్తె గెచ్చు, యేసు కెర్లిసి జోవయింక సంగిలె.

47 వెల్లెల పూజ్జుల్ పరిసయ్యుల్ నబ కెర్తనక వెనవ దా, “అమ్ కిచ్చో కెర్లె జయెదె? ఈంజో మాన్సు ఒగ్గర్ ఒగ్గర్ వెల్లెల కమె కెర్తయ్, చి

48 అమ్ జోక నే ములయ్లె, ప్రెజలె ఎత్తిజెన్ జోక నంపజా గెచ్చుల. చి రోమ్ దేసిమ్చ సయ్న్యమ్ జా కెర, అమ్చి దేముడుచి గుడి కి అమ్చి ఒండి దేసిమ్ కి పాడ్ కెరుల” మెన సంగిలె.

49 జలె, జేవ్ వెల్లెల మాన్సుల్తె కయవ మెలో ఎక్కిలో తిలో. జా వెర్ని జోయ్యి ఎత్తిక వెల్లో పూజరి జా తిలో. సబతె తిలెనక జో కిచ్చో మెన సంగిలన్ మెలె, “తుమ్ కిచ్చోయ్ నేన్సు.

50 ఏక్ కోడు తుమ్ ఉచర. అమ్చ యూదుల్ అమ్చి దేసిమ్ పాడ్ నే జతి రితి ఎక్కిలో మొర్లె తుమ్క చెంగిలి” మెన సంగిలో.

51 జలె, జోక జోయ్యి ఈంజ కోడు సంగె నాయ్. గని జా వెర్ని జో ఎత్తిక వెల్లో పూజరి జా తిలె రిసా, దేముడు జోచి చోడి పుట్టవ సంగయ్లో. జా కబుర్చి అర్దుమ్ కిచ్చో మెలె, యూదుల్తెచ మాన్సుల్క పాపుమ్ తెంతో రచ్చించువ కెర్లి రిసా యేసు మొరుక తిలె.

52 ఎక్కి యూదుల్తెచ మాన్సుల్క నాయ్. గని జోవయింక బోదల్ జలె జోక నంపజలె మాన్సుల్ ఎత్తిక, జేవ్ కేన్ దేసిమ్చ జలెకి, జేవ్క ఎక్కితె జోవయించి బెదవంతి రిసాయి మొరుక తిలె.

53 జలె జా దీసి తెంతో, ‘యేసుక కీసి మారుమ’ మెన, వెల్లెల మాన్సుల్ కుత్త ఉచర్లె తిలె.

54 జల, జో మొద్ది నమయమ్ జెంక నేతయేచి రిసా యేసు, యూదుల్చ వెల్లెల మాన్సుల్ తిలిన్తె నే బులై, ఒత్త తెంతో వెల్లె బయిలు పక్క, ఎప్రాయిమ్ మెంతి గవ్వె ఉట్ట గెచ్చ, జా మదెనె జోవయించ సిన్సుల్ తెన్ ఒత్త తా గెల.

55 యూదుల్చి జా వెర్చిచి *పస్కా పండుగు పాసి జా అయేలి. జా పండుగు నే జెతె అగ్గె, నుద్ది కెరనుక మెన, యూదుల్ ఎత్తిజెన్ జోవయించ జోవయించ గవ్వెలె తెంతో యెరూసలేమ్తె జా అస్సి.

56 దేముడుచి గుడితె గెలన యేసుక రకితె అస్సి. ఒత్త రకితె తా కిచ్చొ మెన లట్టబంతె అస్సి మెలె, “తుమ్ కిచ్చొ ఉచర్తను? ఏక్ వేల పండుగక జెయె నాయ్ గే?” మెన లట్టబంతె అస్సి.

57 కిచ్చొక మెలె, జా మదెనె వెల్లెల పూజర్లు చి పరిసయ్యుల్ జోక జేలి కెరుక మెన ఉచర “జో కేనె తయెదె గే కో జాన్లె, అమక సంగ!” మెన ప్రెజల్క ఆడ్ర దా అస్సి.

12

యేసుక వాసెన తేల్ గాన దిలిసి
(మత్త 26:6-13; మార్కు 14:3-9)

1 *పస్కా పండుగక సొప్పు పొదుల్ అగ్గె, యేసు బేతనియ గవ్వె అన్నె ఉట్ట అయేలన్. జా గవ్వె యేసు జెయణ్ణో లాజర్ అస్సి.

2 జలె, యేసు ఒత్త తతికయ్, జోచి రిసా విందు దిల. మార్త జోగిడ్డి, చి యేసు తెన్ అన్నిమ్ కయలనతె లాజర్ తిలన్.

3 జేమ్ ఎత్తిజెన్ వెన తిలిన్తె, జలె, మరియ ఒగ్గర్ విలువ తిలి ఏక్ ఎదిలి చెంగిల్ వాసెన తేల్ ఆనలి. ఆన, యేసుచ చణ్ణోతె గాన, జాచి సెండి తెన్ పుంచలి, చి ఒండి గెరి జా తేల్చి వాసెన బెర్రి.

4 జలె, ఇన్సురియోతు యూదా మెలో యేసుచ సిన్సుల్తె తా, జో కి ఒత్త అస్సి. కొన్సొ మెలె, జో పడ్డొ విరోదుమ్ సుదల్తె యేసుక దెర దెయెదె. జలె, యేసుక మరియ జా తేల్ గాన్సికయ్, జో యూదా జాక,

5 “ఈంజ తేల్ సొప్పు పుంజో వెండ్లుక ఏక గెల్చి జలె, బీద సుదల్క జా డబ్బుల్ దర్ముమ్ దెంక జతి!” మెన గోల కెర్తన్.

6 గని ఆరిక సంగిలో, బీద సుదల్చి ఉప్పిర్చి కన్యార్ముక నాయ్. కిచ్చొక మెలె, జో చోరు. సిన్సుల్చి డబ్బుల్ వెట్టి జోచి అత్తి తిలి, చి జా డబ్బుల్ జో చోర కంక అలవాట్ జా తిలో.

7 జలె, యూదా జా కోడు సంగితికయ్, యేసు జోక, “జాక గోల కెరు నాయ్. అంక †రోవెతి దీసికచి కామ్క ఈంజ గుర్తు తతి రితి జా, జా తేల్ తియ దా తిలి. తప్పను.

8 బీద సుదల్ కెయెక తెయెక తుమ్చి తెన్ తప్పల చి రిసా ఇన్సుమ్ అయేలి పొది జోవయించ దర్ముమ్ దెంక జయెదె. ఆమ్, మాత్రుమ్, కెయెక తెయెక తుమ్చి తెన్ ఇని తయె నాయ్” మెన సంగిలన్.

9 యెరూసలేమ్తె ‡పండుగక బెర తిల యూదుల్, జలె, యేసుచి రిసా, జో ‘బేతనితె లాజర్తె అస్సి’ మెన నూన కెర, యేసుక దెకుక మెన, చి జో జెయణ్ణో లాజర్క దెకుక మెన ఒత్త ఉట్ట అయేల.

10-11 జాకయ్, ‘లాజర్క జయణ్ణిని రుజ్జు దెక ఒగ్గర్జెన్ అమచి ఆచారిమ్ ముల దా యేసుక సంపజతతి’ మెన వెల్లెల పూజర్లు బియె కెర, లాజర్క కి మారుక ఉచర్ల.

యేసు యెరూసలేమ్తె ఉట్ట అయేలో
(మత్త 21:1-11; మార్కు 11:1-11; లూకా 19:28-40)

12 ‘యేసు యెరూసలేమ్తె జెతయ్’ మెన పండుగక బెర తిల మాన్సుల్ అన్యెక్ దీసి నూన కెర,

13 ‘జో తెన్ దస్సుల్ జమదె’ మెన, పట్టుమ్ తెంతో బార్ జా కజురుమ్ రూకుల్చ మట్టల్ మోడ దెరన వట్టె జా తా, యేసు పాసి అయేలి పొది “అమచొ ప్రబుచి నామ్ తెన్ జెతో రచ్చొంచువ కెర్టొసాక జోబర, జోబర! అమచి ఇస్రాయేల్చ ప్రెజెల్చొ రానొక ఓనన్సు, ఓనన్సు!” మెన జోచి రిసా కేకుల్ గల్తె తిల.

* 11:55 11:55 పస్కా పండుగచి రిసా 2:13చి ఎట్టచి కోడు దెక. * 12:1 12:1 పస్కా పండుగచి రిసా 2:13చి ఎట్టచి కోడు దెక.

† 12:7 12:7 పస్కా పండుగక కిసి మెండ్పెల్లక అర్చితుమ్ దెవుల గే, దస్సి, ఈంజ జెతె తిలి పస్కా పండుగక యేసుయి పావెల్ గెచ్చయేతి అర్చితుమ్ జయెదె. ‡ 12:9 12:9 2:13చి ఎట్టచి కోడుక దెక.

14-15 జల, 'జర్గు జయెదె' మొన దేముడుచి కొణ్ణతె పూర్ము దేముడు రెగ్గయేలి తిలిసి జర్గు జలి. కీసి మెలె, యేసు ఏక గాడ్డె పిల్ల దొర్గు కెరన, వెగ, పట్టుమతె అయేలో.

"ఓ కీసిమోసుచి దువినసి, తుయి అన్నె బి నాయ్!

గాడ్డె పిల్లతె వెగ, తుమ్చో రానొ జెతయ్!"

మొన రెగిడ్డి కోడు.

16 ఈంజ ఎత్తి జర్గు జతె తిలి పొది యేసుచ సెస్సుల్ కి అర్దుమ్ కెరంతి నాయ్. గని యేసు దేముడు అబ్బొనతె అన్నె వెగ గలి పడ్డె, యేసుక ఇసి జలి, చి జోచి రిసా దేముడు అబ్బొనసి జా కోడు రెగ్గవ తిలన్ మొన ఉచార కెర్ల.

17 జలె, యేసు జో లాజర్క మెస్సున్ తెంతో బుకారా జయడ తిలిన్తె బెర తిల మాస్సుల్ జేవ్ జా ఇసి సొంత దెకిలిన్క అప్పె సాచి సంగితె తిల.

18 యెరూసలేమ్తెచ ప్రజలె కిచ్చొక యేసు తెన్ దస్సుల్ జంక బార్ జా తిల మెలె, లాజర్క యేసు జయడ జోచి అదికారుమ్క రుజ్జా దెకయేలిన్చి రిసా నూన తిల.

19 ప్రజలె యేసుక సంపజతె మొన పరిసయ్యుల్ దెక, "అయ్యె, జోవయంక పిట్టయేతిసి అమ్ అన్నె కిచ్చొ కెరక కామ్క నెంజె. ఆదె, లోకుమ్ ఎత్తిచ మాస్సుల్ జోచి పట్టి గెచ్చ అస్తి" మొన ఎక్కిలో తెన్ ఎక్కిలో లట్టబన్ల.

20 పండుగు పొది బక్తి కెరక అయేలనతె సగుమ్జెన్ గ్రీసు దేసిమ్చ మాస్సుల్ ఒత్త అయేల.

21 జేవ్ జలె, గలిలయతె తిలి బేత్సయదా గచ్చెచో పిలివ్ మెంతో యేసుచో సిస్సుడు ఎక్కిలోక చజ కెర జోక "బాబు, యేసు తెన్ లట్టబుక మొన అయేలమ్" మొన సంగిల.

22 చి పిలివ్ అంద్రెయ మెలో సిస్సుడుక సంగ, జేవ్ దొగుల యేసుతె జా, జోక సంగిల.

యేసు మొర గెచ్చుక తిలిన్చి రిసా సంగిలిసి

23 యేసుక జేవ్ దొగుల సిస్సుల్ జా కబుర్ సంగితికయ్, జో జోవయంక, "అవ్ మాన్సు జా జెర్మున్ అయేలోసా గవురుమ్ జతి సమయ్యుమ్ జా అస్సె.

24 తుమ్క అవ్ కిచ్చొ నిజుమి కచితుమ్ సంగితసి మెలె, గోదుమ్ గిడ్డ జవున్ పంటో దెరుక జలె, బుయ్యె సేద చొప్పొ కుసుడ గెలెకయ్ జయెదె. దస్సి తోలితో మొర్లి రితి నే జలెగిన, ఎక్కి గిడ్డయ్ తాఁ గెచ్చెదె. గని దస్సి మొర్లి రితి జలె, ఒగ్గర్ పంటో దెరెదె.

25 "జోచి జివుక జో కో ప్రేమ కెర రచ్చించువ కెరసుక ఉచరుల గే, జోచి ప్రాసుమ్ పాడ్ జా గెచ్చెదె, గని ఈంజ లోకుమ్తె కో జోచి సొంత జివుక విలువ నే దెకితె దేముడుక నిదానుమ్ కెరుల గే, జోచి జివు జోక దొర్గు జా, పరలోకుమ్తె గెచ్చ కెయెక తెయెక ఒత్త జివుల.

26 అంచి సేవ కో కెరుల గే, అంచి పట్టి అయేలి రితి అవ్ కెర్లి రితి కెరుక, చి అవ్ కేనె తయిందె గే, అంచో సేవ కెర్టొసా ఒత్తయ్ తంక. కో అంచి సేవ కెరుల గే, జోక కచితుమ్ దేముడు అబ్బొ గవురుమ్ కెరెదె.

27 "ఓ బ, అప్పె అంచి వెట్టి ఒగ్గర్ బాద జతసి. అవ్ తుక కిచ్చొ సంగుక? 'ఓ బ, ఈంజ సమయ్యుమ్చి కామ్ అంక పిట్టవు' మొన సంగుక గే? నాయ్, నెంజె. ఈంజ కామ్చి రిసాయి, సమయ్యుమ్చి రిసాయి ఈంజ లోకుమ్తె అవ్ అయేలయ్, గెద?

28 ఓ బ, తుచి నావ్క గవురుమ్ కెరను" మొన దేముడు అబ్బొనక ప్రార్థన కెర్లన్, చి బేగి, అగానుమ్ తెంతో జో దేముడు జోచి అవాడ్ నూనయేలన్. కిచ్చొ మొన నూనయేలన్ మెలె, "అంచి నావ్క గవురుమ్ కెర అస్సి, చి అన్నె గవురుమ్ కెరనిందె" మొన సంగిలన్.

29 పాసి బీదె తిల జనాబ్ నూస్స, చి "ఉర్తుల్ కెర్లి" మొన జోవయంతె సగుమ్జెన్ సంగిల. అన్నె సగుమ్జెన్, మాత్తుమ్, "దేముడుచి దూత ఎక్కిలో జో తెన్ లట్టబన్ల" మొన సంగిల.

30 యేసు జోవయంక, "ఈంజ అవాడ్ నూనయేలిసి అంక దయిరిమ్ కెర్లి రిసా నాయ్, అంక దయిరిమ్ అస్సె. గని తుమ్కయ్ 'నంపజతు' మొన నూనయేలన్.

31 కిచ్చొక మెలె, అప్పె జగ్గు జంక తిలిన్చి రిసా ఈంజ లోకుమచ తీర్పు జవుల. అప్పె జగ్గు జంక తిలిన్చి రిసా, ఈంజ లోకుమక అప్పెచి మట్టుక ఏలువ కెర్తొ నయతానుక బార్ కెర పెలవ దెయెదె.

32 అన్నె, మాన్పుల్ అంక బుయె తెంతో ఉక్కుల టీచడ్డి పొదిక దేసిమెలు ఎత్తి, తెంతోచ మాన్పుల్క అంచితె బుకారా అనిందె” మెన ఒత్త తిలసక యేసు సంగిలన్.

33 ‘ఉక్కుల టీచడ్డి పొదిక’ మెలి కోడుతె కిచ్చొ అర్దుమ మెలె, ఏక్ *సిలువతె మాన్పుల్ యేసుక టీచడ్డి, మొరెదె. జో సంగిలిన్తె జయ్యె అర్దుమ్.

34 జలె, యేసు జా కోడు సంగితికయ్, జనాబతెచ మాన్పుల్ ఆచారిమ్ జా కిచ్చొ మెల మెలె, “రచ్చించువ కెర్తొసా జతో క్రీస్తు నే మొరె కెయెక తెయెక తా గెచ్చెదె” మెన †మోసి పూర్గుమచొచి అత్తి దేముడు రెగ్గయల ఆగ్గులతె తిలిసి నూస అన్పుమ్. గని తూయి జలె, ‘అవ్ మాన్పు జా జెర్మున్ అయ్లోసొక ఉక్కుల టీచడ్డుక అన్పు’ మెన తుయి సంగితన్. దస్సి జలె మాన్పు జా జెర్మున్ అయ్లోసొ క్రీస్తు జయెదె గే, నెంజె గే?” మెన అన్మానుమ్ జలె.

35 జేవ్ దస్సి జతికయ్, యేసు జోవయింక, “అన్నె సగుమ్ దీసల్ అంచి ఉజడి తుమచి తెన్ తయెదె. తుమ్ అందర్బుద్దిక దెర్పు నే సీడ్డి రిసా, ఈంజ ఉజడి తతె తుమ్ ఈంజ ఉజడితె ఇండ. కిచ్చొక మెలె, అందర్తె కో ఇండుల గే, కెనె గెతతి గే నేన్తె.

36 తుమ్ ఉజడిచ పుత్తర్పు జతి రిసా, ఈంజ ఉజడి తుమతె తతె ఎద ఈంజ ఉజడిక పూర్తి నంపజంక దెర” మెన బోదన కెర్తన్. యేసు ఇని సంగ కేడయ్లి వడ్డె, ఒత్త తెంతో బార్ జా, యూదుల్ నే చజతి రితి లుంకిల్ రితి తిలో.

యూదుల్ నే నంపజలిన్చి రిసాచి కోడు

37 యేసు జోవయించి మొక్కె జోచి అదికారుమక రుజ్జు దెకయత ఎత్తివాట్ కమొ కెర తిలె కి, జోక జేవ్ నంపజతి నాయ్.

38 జేవ్ నే నంపజతిసి కిచ్చొక మెలె, యెనయా పూర్గుమచొచి అత్తి దేముడు రెగిడ్డి కోడు నెరవెర్పువ జతి రిసాయి.

“ఓప్రబువ, అవ్ సంగిలి తుచి కబుర్ నూన్లె కి, కో నంపజా అన్తి? కోయి నాయ్. తుచి అదికారుమక రుజ్జు దెకయత కమొ దెకిలెకి, జోవయించి జా సెక్తి కో చిన అన్తి? కోయి నాయ్”

మెన రెగిడ్డి కోడు.

39 జాకయ్ యేసుక నంపజంక నెతిర్.

40 వడ్డె జోవయించి సిప్పచి రిసా యెనయా పూర్గుమచొచి అత్తి జో ప్రబు రెగ్గియ్లిసి అన్నెక్తె కి జయ్యె అర్దుమ్.

“జోవయించ అంకివొ గుడ్డి కెర్లి రితి కెర, జోవయించి పెట్టి బేడు బందిలి రితి దేముడు కెర అన్పు.

‡‘జోవయించ అంకివొ దెకుత్ నాయ్, జోవయించి పెట్టి అర్దుమ్ కెరంతు నాయ్, అవ్ దెతి వరుమ్ నజనుక బుల జెతు నాయ్’ మెన అంచి సెలవ్”
మెన ప్రబు రెగ్గయ్లి కోడు.

41 యెనయా పూర్గుమచొ కిసి ఇని మెలన్ మెలె, దేముడు దెకయ్లి సిప్పతె యేసుచి గవురుమచి గుర్తు దెక తిలో, చి జోచి రిసా రెగిడ్డన్.

* 12:33 12:33 ‘సిలువ’ కిసి తయెదె మెలె, ఏక్ టీవేతి చి ఏక్ అర్దుమ్ జతి దొన్ని డేడివొ రిత డండల్ బెదవుల జా సిచ్చ జతో మాన్పుక జా సిలువతె ఎంగ్గవ కెర, జోవయించ అత్తి చట్టో చంపొ కెరవ, అత్తిచట్టోతె మేకుల్ ఏపి, నెంజెలి వాలివొ తెన్ బంద దా, సిలువ బుయ్యె టీచ రొవ కెర దస్సి ములుల. జో సిచ్చ జతోసొ దస్సి ఒడోయ్ జా మొరెదె. రొమ్ దేసిమచి అలవాట్ తెన్ చి సిచ్చ, జా. † 12:34 12:34 తెలగ గుల్లిలతె దర్తుశాస్త్రమ్ మెలె, మోసిచి అత్తి దేముడు రగ్గయ్లి ఆగ్గల్ మెన అమ్ జానుమ్. ఈంజ కొడొ ఎత్తి, బైబిలతె అగేచి పాచ వుస్తకుమతె రెగ్గయ్ జా అన్పు. ఈంజ దెకప్పక మెన కుపెయ బానతె నొయి ప్రమానుమతె మోసి పూర్గుమచొచి అత్తి రెగిడ్డి దేముడుచ అగ్గల్ మెన రగ్గవ అన్పు. ‡ 12:40 12:40 నెంజెలి. “నెంజెలి జోవయించ అంకివొ దెకిత, జోవయించి పెట్టి అర్దుమ్ కెరంత, చి అవ్ చెంగిల్ కెర్లి వరుమ్ నజనుక వసుల జెత్”.

42 యూదులతె ఒగ్గర్జిన్ యేసుక నే నంపజలెకి, జోవయింతె ఒగ్గర్జిన్ వెల్లెల మాన్సుల్ కి నంపజల. గని మాన్సుల్చి మొక్కె ఒప్పన్తె నాయ్. కిచ్చొక మెలె, 'పరిసయ్యుల్ నూన్లె, అమ్క సబ గెరలె అన్నె పెనయితి నాయ్' మెన బిల.

43 కిచ్చొక దస్సి బిల మెలె, దేముడు దెతి గవురుమచి కంట, మాన్సు దెతి గవురుమకయ్ ఆన జా తిల.

44 జలె, ఎత్కిజిన్ సూన్తి రితి కేక గల యేసు కిచ్చొ మెన బోదన కెర్లన్ మెలె, "కో అంకయ్ నంపజతతి గే, ఎక్కి అంకయ్ నాయ్, గని అంక తెద్రయ్లోసొక నంపజతతి.

45 అంకయ్ కో దెకితతి గే, అంక తెద్రయ్లోసొక దెకితతి.

46 "ఈంజ లోకుమ్తె కిచ్చొక అయలయ్ మెలె, అందరబుద్ది ఇండిత ఈంజ లోకుమ్చ మాన్సుల్క 'దస్సి తత్తు నాయ్, గని అంక నంపజా రచ్చించుప జతు' మెన దొర్కు జలి ఉజిడి తా ఈంజ లోకుమ్తె అయలయ్.

47 అంచ కొడొ కో సూన్తతి గని కెర్తి నాయ్ గే, జోవయింక ఆవ్ తీర్పు కెరి నాయ్. కిచ్చొక మెలె, ఆవ్ ఈంజ లోకుమ్తె అయలెసి ఈంజ లోకుమ్చక తీర్పు కెరి సిచ్చొ కెర్తి రిసొ నాయ్, గని జోవయింక రచ్చించుప కెర్తి రిసొయి అయలయ్.

48 "గని జాగర్త తా. కిచ్చొక మెలె, కో అంక నంప కెర్తి నాయ్, చి అంచ కొడొ సూన కెరుక నెసితి గే, జోవయింక తీర్పు కెరి సిచ్చొతె తెద్రయ్తిసి అస్సె. మెలె, ఈంజ లోకుమ్చక తీర్పు కెర్తి జా ఆకర్ దీసిక, ఆవ్ అప్పె సంగిల కొడొ జోవయింక కచితుమ్ తీర్పు కెరి సిచ్చొతె తెద్రవుల.

49 కిచ్చొక మెలె, అయ్యె కెరి ఆవ్ కిచ్చొ సంగి నాయ్. ఆవ్ కిచ్చొ మెన లట్టబుక గే, కిచ్చొ సంగుక గే, అంక తెద్రయ్లో దేముడు అబ్బొయి అంక ఆడ్ర దా అస్సె.

50 అన్నె కేనె నాయ్, గని జోచి కొడు కెర్తినెయ్ పరలోకుమ్తె బెదితి కెయ్క తెయ్క చెంగిల్ తతి నెక్తి అస్సె మెన కచితుమ్ జాని. జాకయ్ ఆవ్ కిచ్చొ సంగితసి గే, దేముడు అబ్బొయి సంగిల్ రితి ఆవ్ సంగితసి."

13

యేసు జోచ సిన్సుల్క చట్టో దోవెలిసి

1 ఈంజ లోకుమ్ ముల దా దేముడు అబ్బొన్తె అన్నె ఉట్ట గెతి సమయము అయ్లి మెన యేసు జానె.

జో ఈంజ లోకుమ్తె నిసాన్ బారజన్ సిన్సుల్క అగ్గె తెంతో ప్రేమ కెర్తయ్, గని అప్పె, *పస్కా చండుగక ఏక దీసి అగ్గె, ఆకర్ ఎదచి జోచి ఎదివాట్ ప్రేమ సొస్టుమ్ దెకయ్లో.

2 జా నంజె, యేసు జోవయింక బారజన్ సిన్సుల్ తెన్ ఎక్కితె అన్నిమ్ కెర్తతి. ఇన్కరియోతు సీమోనుచొ యూదా మెలో పుత్తుసి జోవయింతె అస్సె. జలె, యేసుక విరోదుమ్ సుదలచి అత్తి దెర దెంక మెన సయ్తాన్ యూదాక సికడ అస్సె.

3 గని, 'దేముడు అబ్బొ అంచ అత్తి ఎత్కి. సార్ప కెర దా అస్సె, చి దేముడు అబ్బొ తెంతో ఉత్ర అయలయ్, చి దేముడు అబ్బొతెయి ఆవ్ అన్నె ఉట్ట గెతస్' మెన యేసు జానె.

4 జలె, అన్నిమ్ కెర్తి తిలి పొది యేసు ఉట్ట, జో గలన తిలి దిగిల్ సొక్క రితిసి తియ దా, జోవయింక సిన్సుల్క, జో గొత్తి సుదో జతి రితి గుర్తుక, ఏక తువ్వల్ కెరంటి బందన్లన్.

5 తెదెడి తప్పెలయ్ పాని సువ కెర, సిన్సుల్చ చట్టో దోవ జో బందన్ల తువ్వల్ తెన్ పుంచుక దెర్లన్. సగుమ్జిన్చ చట్టో దోవ పుంచ తా,

6 సీమోను పేతురుచ చట్టో దోవుక మెన జోతె పాచిలన్. గని పేతురు జోక, "ప్రబు, తుయి అంచ చట్టో దోవుక గే? పోని!" మెన బమ్మ తెన్ సంగిలన్.

7 'పోని' మెన సంగితికయ్, యేసు జోక "ఆవ్ అప్పె కెర్తిసి తుక అప్పె అర్దుమ్ నాయ్. గని పట్టొక అర్దుమ్ కెరంతె" మెన సంగిలన్.

* 13:1 13:1 వస్కా చండుగక కిసి మెండపిల్లక అర్పితుమ్ దెవుల గే, దస్సి, ఈంజయ్ చండుగు దీసి యేసుయి పావల్ గెచ్చయ్తి అర్పితుమ్ జయెదె.

8 పేతురు జోక అన్నె, “ప్రబు, తుయి అంచయ్ చట్టో కెయడ కి దోవుక ఆవ్ ఒప్పి నాయ్” మెన ఒగ్గర్ జా సంగిలన్. యేసు జోక, “ఆవ్ తుక † సుబ్రుమ్ నే కెర్లె, అంచి రాజమేత తుక కిచ్చొ వాట తయె నాయ్” మెన సంగిలన్.

9 పేతురు జోక, “ప్రబు, దస్సి జలె, అంచ చట్టో అత్తో బోడి కి, ఎత్తి దోవ గెలు!” మెన సంగిలన్.

10 తెదొడి యేసు జోక, “కో పాని నాయ తవుల గే, జోచ చట్టోక పిట్టవ, పూర్తి సుబ్రుమ్ జా తవుల. దస్సి, ఎక్కిలోక పిట్టవ, తుమ్ ఎత్తిజిన్ సుబ్రుమ్ జా అస్సున్” మెలన్.

11 యేసు కిచ్చొక దస్సి మెలన్ మెలె, కో జోక విరోదుమ్ సుదల్తె దెర దెయెదె గే జో జానె. జాకయ్ ‘ఎక్కిలోక పిట్టవ తుమ్ ఎత్తిజిన్ సుబ్రుమ్ జా అస్సున్’ మెన సంగ తిలో.

12 సిస్సుల్చ చట్టో దోవ కేడయ్లి పడ్డె, జోచ పాలల్ అన్నె గలన, అన్నె అన్నిమ్తె వెన, యేసు జోవయింక, “ఆవ్ తుమ్క కెర్లె గుర్తుచి రిసా తుమ్క అర్దుమ్ జలి గే నాయ్ గే?

13 అలై, అంక ‘గురు’, ‘ప్రబు’ మెన తుమ్ సంగితను. బాద నాయ్. ఆవ్ నిజమి తుమ్చో గురు, తుమ్చో ప్రబు.

14 ఆవ్ జలె, తుమ్చో ప్రబు తుమ్చో గురు జలెకి, తుమ్క నేవ కెర్లి ఏక్ గుర్తుక తుమ్చ చట్టో దోవితసి జలె, తుమ్ జా గుర్తుచి అర్దుమ్ కెరన తుమ్ కి ఎక్కిలోచ చట్టో ఎక్కిలో దోవలి రితి జా, ఎక్కిలోక ఎక్కిలో నేవ కెర్లె తంక.

15 ఆవ్ అప్పె కెర్లిసి జా గుర్తుకయ్, తుమ్క ఆవ్ కెర్లి రితి తుమ్ ఎక్కిలోక ప్రేమ కెర్లె తంకయ్.

16 తుమ్క నిజమి కచితుమ్ ఆవ్ కిచ్చొ సంగితసి మెలె, నేవ కెర్లెసా జోచో ఎజోమానిచి కంట వెల్లొ నెంజె. దస్సి, తెద్రయ్ జలోసా, జలె, జోక తెద్రయ్లోసాచి కంట వెల్లొ నెంజె.

17 జలె, ఈంజ ఎత్తిచి అర్దుమ్ కెరన్లదు మెలె, జా బుద్ది ఇండితె తిలె తుమ్క చెంగిలి.

విరోదుమ్ సుదల్తె దెర దెయెదె

(మత్త 26:20-25; మార్కు 14:17-21; లూకా 22:21-23)

18 “గని, ఆవ్ అప్పె సంగిలి బుద్ది తుమ్ ఎత్తిజిన్ జసు నాయ్. కిచ్చొక మెలె, ఆవ్ నిసాన్లనచి బుద్ది ఆవ్ జాని. అప్పె జర్గు జతిసి కిచ్చొక జయెదె మెలె,

అంచి తెన్ అన్నిమ్ కెర్లె ఎక్కిలో అంక తావ్ దిలి రితి కెరెదె

మెన రెగిడ్లి కోడు అప్పె నెరవెర్చువ జంకయ్.

19 ఈంజ ఎత్తి జర్గు నే జతె అగ్గి ఆవ్ తుమ్క కిచ్చొక సంగితసి మెలె, జా జర్గు జలి మెలె, జా రుజ్జు దెక, ‘నిజమి దేముడు తెద్రయ్లో క్రీస్తు రచ్చించువ కెర్లెసా’ మెన అంచి రిసా తుమ్ పూర్తి దయిరిమ్ తెన్ నంప జస్సె.

20 తుమ్క అన్నె కిచ్చొ నిజమి కచితుమ్ ఆవ్ సంగితసి మెలె, ఆవ్ తెద్రయ్త మాన్సుల్క కో నంపజా మరియాద కెరుల గే, అంకయ్ నంపజా మరియాద కెర్లి రితి జయెదె. అంకయ్ నంపజా కో మరియాద కెరుల గే, అంక తెద్రయ్లోసాక నంపజా మరియాద కెర్లి రితి జయెదె” మెన సంగిలన్.

21 ఈంజేవ కొడొ సంగ కెర, యేసు జోచి మెన్సుతె బాద నేడ, సిస్సుల్క కిచ్చొ సాచి సంగిలన్ మెలె, “తుమ్క కిచ్చొ నిజమి కచితుమ్ ఆవ్ సంగితసి మెలె, తుమ్చితె ఎక్కిలో అంక విరోదుమ్ సుదల్చి అత్తి సార్పు కెర దెయెదె” మెన సంగిలన్.

22 జలె, కిచ్చొ రిసా సంగితయ్ గే నేన్తి, చి ఎక్కిలోక ఎక్కిలో అన్యూమ్ తెన్ దెక దుకుమ్ జలె.

23 గని యేసు ఒగ్గర్ ప్రేమ కెర్లె సిస్సుడు ఎక్కిలో యేసుచి † గుండెచి ఉప్పిరి వెల వెన అస్సు.

24 జాకయ్, సీమోను పేతురు జో సిస్సుడుక నయ్న కెర, “కచి రిసా సంగితయ్ గే, నూన అమ్క సంగు” మెన సంగిలన్.

25 జాకయ్, యేసుచి గుండెచి ఉప్పిరి వెల తిలో జో సిస్సుడు “ప్రబు, కచి రిసా దస్సి సంగిలది?” మెన పునిలన్, చి

† 13:8 13:8 13:11 ఎత్తిచి కోడు దెక. ‡ 13:23 13:23 జోవయింక విందుల్ రిత అన్నిమ్తె బల్లచి సుట్టునంత బెంచిచి చి ఉప్పిరి ఇదిల్ ఎంర్ తిలి రితి బర్గు జా అన్నిమ్ కెరుల.

26 యేసు పోడి గండ దెర, “ఈంజ పోడి గండ రోన్తె బుడ్డవ కక్క దెయిందె గే, జొయ్యి” మెన సంగిలన్. సంగ, జా గండ బుడ్డవ కెర, ఇస్కరియోతు సీమోనుచొ వుత్తున్ జలో యూదాక దిలో.

27 యూదా జా గండ నజన్లి బేగి, సయతాన్ జోక దెర్లన్. యేసు జాన, చి “తుయ కెరుక తిలిసి బే బేగి జర్లు కెరు!” మెన యూదాక సంగిలన్.

28 యేసు యూదాక కిచ్చొక దస్సి సంగిలన్ గే జా అన్నిమ్ కెర్తె తిలసతె కోయి నేన్తి.

29 గని జోచి డబ్బుల్ వెటె యూదాచి అత్తి తిలి, చి ‘పండుగు అన్నిమ్క దొర్కు జలిసి గెన ఆను’ జలెకు, ‘బీద సుదల్క కిచ్చొ జవున్ దర్కుమ్ దేసు’ మెన యేసు జా కోడు సంగ తయెదె మెన సగుమ్జన్ ఉచర్ల.

30 జలె, జా గండ నజన, యూదా చట్టున బార్ జా ఉట్ట గెలన్. తెదొడి అందర్ జా తిలి.

ఎక్కిలోక ఎక్కిలో ప్రేమ కెర్తె తా

31 యూదా బార్ జతికయ్, తిల సిస్సుల్క యేసు, “అప్పెయి జర్లు జతిసి తెన్ ఆవ్ మాన్సు జా జెర్కున్ అయ్లోసాచి గవురుమ్ డీసెదె, చి అంక జర్లు జతిన్చి రిసా దేముడు ప్రబుచి గవురుమ్ డీసెదె.

32 అంచితె జర్లు జతిన్తె దేముడుక గవురుమ్ జెయెదె, చి జా కామెతె అంక కి జో గవురుమ్ కెరెదె. బేగి గవురుమ్ కెరెదె.

33 “ఓ పుత్తర్లు, అప్పె ఏక గడియయ్ తుమ్చి తెన్ ఇసి తయిందె, చి ఉట్ట గెచ్చిందె. ఆవ్ గెలె, అంక చజితె, గని యూదుల్క ఆవ్ సంగిలి రితి, ఆవ్ కేనె గెచ్చిందె గే, తుమ్ అప్పె ఒత్త జెంక నెతుర్కు.

34 “జలె, తుమ్క ఏక నొచి ఆగ్గు దెతసి. కిచ్చొ ఆగ్గు మెలె, తుమ్ ఎక్కిలోక ఎక్కిలో ప్రేమ కెర్తె తా. ఆవ్ తుమ్క కెర్తె ప్రేమ దెకవ అస్సి గే, దస్సి తూమ్ కి ఎక్కిలోక ఎక్కిలో ప్రేమ కెర్తె తా. ఆవ్ తుమ్చితె ఎక్కిలోక ఎక్కిలో దస్సి ప్రేమ కెర్తె తిలె, తుమ్క ‘అమ్చ సిస్సుల్’ మెన ప్రెజల్ ఎత్తి చినుల.

35 తుమ్చితె ఎక్కిలోక ఎక్కిలో దస్సి ప్రేమ కెర్తె తిలె, తుమ్క ‘అమ్చ సిస్సుల్’ మెన ప్రెజల్ ఎత్తి చినుల. జయ్యి జోవయింక రుజ్జా తయెదె” మెన బోడన కెర్లన్.

36 తెదొడి సీమోను పేతురు “ప్రబు, కేనె గెతి రిసా తుయి సంగితసి?” మెన యేసుక పుసిలన్, చి యేసు జోక, “ఆవ్ కేనె గతసి గే, తుయి అప్పె అంచి పట్టి జెంక నెతిర్పి, గని పడ్డొక జెస్తె” మెన సంగిలన్.

37 జాకయ్ పేతురు జోక, “ప్రబు, ఆవ్ కిచ్చొక అప్పె తుచి పట్టి జెంక నెతిరి? తుచి రిసా ఆవ్ మొర కి గెచ్చిందె!” మెన సంగిలన్.

38 యేసు జోక, “అంచి రిసా తుయి మొర గెచ్చుక దయిరిమ్ గే? తుక కిచ్చొ నిజమి కచితుమ్ ఆవ్ సంగితసి మెలె. ఆజి రాతిక, కుకుడో నే వాస్తె అగ్గె, ‘జోక నేని’ మెన తుయి తివ్వెరి అంచి రిసా సంగితె” మెన సంగిలన్.

14

యేసు సిస్సుల్క దయిరిమ్ సంగిలిసి

1 తెదొడి యేసు సిస్సుల్క, “ఆవ్ ఉట్ట గెలె, తుమ్చ పట్టి చింత గలన నాయ్. దేముడుక నంపజా దయిరిమ్ తెన్ తా. అంక కి నంప తెన్ తా.

2 జో అంచొ అబ్బిసి జలో దేముడుచి గెరి ఒగ్గర్ గదివొ అస్తి. తుమ్క కి ఒత్త టాన్ అస్సి. నెంజలె తుమ్క సంగితయ్. తుమ్క జా టాన్ తెయారొ కెరుకయ్ ఆవ్ గెతసి.

3 ఆవ్ గెచ్చు తుమ్ తటి టాన్ తెయారొ కెర్లయ్ మెలె, తూమ్ కి అంచి తెన్ తంక మెన, అంచితె కడ నెతి రిసా అన్నె జెయిందె.

4 ఆవ్ గెతి టాన్చి వాట్ తుమ్ జాన్సు” మెన సంగిలన్.

5 జాకయ్ తోమా మెలొ సిస్సుడు జోక, “ప్రబు, తుయి కేనె గెతసి గే నేనుమ్. జా వాట్ అమ్ కిసి జానుక జయెదె?” మెన పుసిలన్,

6 చి యేసు జోవయింక, “ఒత్త గెతి వాట్ ఆవ్వి. ఒత్త గెతి రిసా దొర్కు జలి సత్తిమ్ ఆవ్వి. ఒత్త గెతి రిసా దొర్కు జలి జివు ఆవ్వి. అంక నంపజలెకయ్ మాన్సు దేముడు అబ్బితె జెంక జయెదె. నెంజలె కో జెంక నెతిర్తి. కేన్ వేర వాట్ నాయ్.

7 అంక తుమ్ నిజమి జాన్తను జలె, అంచొ దేముడు అబ్బొకయ్ జాన్తను. అప్పె తెంతొ తుమ్ జోక జాన్సు, జోక దెక అస్సున్” మెన సంగిలన్.

8 జలె, పిలివ్క అర్దుమ్ నాయ్ చి రిసా, “ప్రబు, దేముడు అబ్బొద్క అమ్క దెకవు, చి అమ్క అన్నె కిచ్చొ నాయ్” మెన సంగిలన్.

9 యేసు జోక, “ఓ పిలివ్, తుమ్చి తెన్ ఆవ్ ఎత్తి దీసల్ తిలె కి, అప్పెక అంక చినిన్ నాయ్ గే? కో అంకయ్ దెక అస్సి గే, దేముడు అబ్బొద్క కి దెక అస్సి. జాకయ్, దేముడు అబ్బొద్క అమ్క దెకవు మెన తుయి కిచ్చొక పుసుక?

10 ఆవ్, అబ్బొసి జలో దేముడుచి పెట్టి తిలిసి, దేముడు అబ్బొ అంచి పెట్టి తిలిసి, తుయి నంప కెర్సి నాయ్ గే? తుమ్క ఆవ్ సంగితిసి సికడ్డిసి ఆవ్ అచ్చొ ఉచర్లసి నెంజె. అంచి పెట్టి తిలో దేముడు అబ్బొ అంచి అత్తి జోచ కమె కెర్తయ్.

11 ఆవ్ అబ్బొసి జలో దేముడుచి పెట్టి అస్సి, దేముడు అబ్బొ అంచి పెట్టి అస్సి. ఈంజ కోడు నంప కెరు. నెంజెలి, ఆవ్ సంగిలి రిసా నే నంప కెర్తె, అంచి అత్తి జర్గు జత కమెక ఉచర్ నంప కెరు.

12 తుమ్క నిజామి కచితుమ్ ఆవ్ కిచ్చొ సంగితసి మెలె, అంక కో నంపజవుల గే, ఆవ్ కెర్తె కమె జేవ్ కి కెరుల. ఆవ్ కెర్తెనచి కంట జిన్గన కెరుల. కిచ్చొక మెలె, ఆవ్ దేముడు అబ్బొతె ఉట్టు గెతసి.

13 అంచి నావ్ తెన్ తుమ్ కిచ్చొ నజేత గే, ఆవ్ పుత్తుసి కెర్తెనతె అబ్బొసి జలో దేముడుచి గవురుమ్ డీసున్ మెనయ్, జయి ఆవ్ జర్గు కెరిందె.

14 అంచి నావ్ తెన్ తుమ్ కిచ్చొ జలెకి నజేలె కి, జర్గు కెర దెయిందె.

దేముడుచి నుద్ది తిలి అత్తు తెద్రవుక తిలిన్చి యేసు సంగిలిసి

15 “తుమ్ అంచి ఉప్పిరి ప్రేమ తెన్ తిలె, అంచ *కొడొ రితి ఇండితె తస్సె.

16 తుమ్ దస్సి జలె, దేముడు అబ్బొద్క సంగిమదె, చి అన్నెక్తోడు కెర్తొసాక తుమ్తె తెద్రయెదె. జో తుమ్చి పెట్టి తా, కెయ్క తెయ్క తుమ్క తోడు తయెదె.

17 జో కొస్సా మెలె, పరలోకుమ్చి సత్తిమ్ తిలి సత్తిమ్ దెకయ్తి అత్తు. ఈంజ లోకుమ్చి బుద్ది తిల మాన్సుల్ జోక నంపజంక నెత్తిర్. కిచ్చొక మెలె, జో డీస్సానా నెంజె, చి జోక చినితి నాయ్, నేనతి. తూమ్ మాత్తుమ్, జోక జాన్సు. కిచ్చొక మెలె, జో తుమ్చి తెన్ తత్తయ్, † చి పడ్డొక తుమ్చి పెట్టి తయెదె.

18 “తుమ్క ములిలె, తుమ్ పొరబోదల్ తతి రితి కెరి నాయ్. తుమ్తె జెయిందె.

19 గడియయ్ తిలె, మాములుమ్ ఈంజ లోకుమ్చ మాన్సుల్ అంక అన్నె దెకితి నాయ్, గని తూమ్ అంక అన్నె దెకితె. మెలె, ఆవ్ జితసిచి రిసా తూమ్ కి జస్సె.

20 ఆవ్ అబ్బొసి జలో దేముడుచి పెట్టి తిలిసి, తూమ్ అంచి పెట్టి తిలిసి, చి ఆవ్ తుమ్చి పెట్టి తిలిసి, తెదొడ్కయ్ తుమ్క అర్దుమ్ జెయెదె.

21 అంచ †కొడొ కో సూన కెరుల గే, జెచ్చొ అంక ప్రేమ కెర్తెనయ్. కో అంకయ్ ప్రేమ కెర్తెతి గే, అంచో దేముడు అబ్బొ జోవయింకయ్ ప్రేమ కెరెదె. ఆవ్ కి జోక ప్రేమ కెర, అంచి సత్తిమ్చి రిసా జోక రుజ్జుల్ దెకయిందె, జోక ఆవ్ సొస్టుమ్ సొంత డీసిలి రితి” మెన యేసు సంగిలన్.

22 తెదొడి యూదా మెలో ఎక్కిలో, ఇస్కరియోతు యూదా నెంజె, వేరచో జో, జలె, యేసుక “కిచ్చొక ఈంజ లోకుమ్చ మాములుమ్ మాన్సుల్క నాయ్, గని ఎక్కి అమ్కయ్ డీస్సె, తుచ రుజ్జుల్ దెకయ్తె?” మెన పునీలో.

23 పునీలె యేసు జోక, “అంచి ఉప్పిరి కో ప్రేమ తెన్ తవుల గే, అంచి కొడొ రితి కెరుల, దస్సి జలెనకయ్ దేముడు అబ్బొ ప్రేమ కెరెదె. దస్సి జలెనతెయ్ దేముడు అబ్బొ ఆవ్ జెమ్మదె, చి జోచి తెన్ బన జా జో తెన్ తా గెచ్చుమ్దె.

24 అంచి ఉప్పిరి కో ప్రేమ తెన్ తతి నాయ్ గే, జెచ్చొ అంచ కొడొ రితి కెర్సి నాయ్. తుమ్ సూనతి ఈంజ కోడు, జలె, కచి మెలె, ఆవ్ అచ్చొ ఉచర్లసి నెంజె. అంక తెద్రయ్లో అబ్బొసి జలో దేముడుచి కోడు.

25 “జలె, ఆవ్ తుమ్చి తెన్ ఈంజ లోకుమ్తె తతె, అచ్చొ ఈంజ బోదన ఎత్తి తుమ్క సూనవ అస్సి.

* 14:15 14:15 నెంజెలి, ‘అంచ ఆగ్నల్ రితి ఇండితె తస్సె’. † 14:17 14:17 నెంజెలి, “చి తుమ్చి పెట్టి అస్సి”. ‡ 14:21 14:21 నెంజెలి ‘ఆగ్నల్’.

26 గని, ఆవ్ దేముడు అబ్బితె గెలె, దేముడు అబ్బి అంచి నావ్ తెన్ తుమ్క తోడు తతోసొక తెర్రయెదె. జో తోడు తతోసొ కొన్సొ మెలె, దేముడుచి నుద్ది తిలె అబ్బిసి జలో దేముడుచి నుద్ది తిలె ఆత్తయి. జో అమ్చి ఆత్తయి తతోసొ తుమ్క ఎత్తి, సికడెదె. ఆవ్ తుమ్క సంగిలసి ఎత్తి, తుమ్క ఉచార కెరయెదె.

27 “జలె, ఆవ్ తుమ్క సేంతుమ్ దా కెర ఉట్ట గతసి. అంచి సేంతుమ్ తుమ్క దతసి. ఈంజ లోకుమ్చ దెతి రగుమ్చి నెంజె. జాకయ్ కిచ్చొ బాదల్ అల్లర్ అయ్లె కి, తుమ్చ పెట్టి చింత గలన నాయ్, బయమ్ తియన నాయ్.

28 ‘ఆవ్ ఉట్ట గెలె కి, తుమ్తె అన్నె జెయిందె’ మెన సంగిలసి నూన్లదు. తుమ్ అంచి ఉప్పిరి పూర్తి ప్రేమ తత్తదు జలె, ఆవ్ దేముడు అబ్బితె గెతినచి రిసా సర్ల జతదు. కిచ్చొక మెలె, దేముడు అబ్బి అంచి కంట వెల్లో. ఒత్త గెలె, ఇన్నె తతి కంట అంక చెంగిలి, తుమ్క చెంగిలి.

29 జలె, జా ఎత్తి, జర్గు నే జతె అగ్గె తుమ్క కిచ్చొక సంగితసి మెలె, తుమ్క ‘జా జర్గు జతి పొదిక, పూర్తి నంప తెన్ తా, బమ్మ నెంతె దయిరిమ్ తత్తు’ మెనయ్ అంచి ఆస.

30 ‘తుమ్చి తెన్ అన్నె ఒగ్గర్ లట్టబుక సమయమ్ నాయ్. కిచ్చొక మెలె, ఈంజ లోకుమ్ ఈంజ మదెనె ఏలువ కెర్తొసొ, నయ్తాన్ జెతయ్. అంచి ఉప్పిరి జోక కిచ్చొ అదికొరుమ్ నాయ్,

31 గని దేముడు అబ్బి అంక తియర్లా కావ్ ఆవ్ కెరుక అన్నె. జో సంగిలి రితి ఆవ్ కెర్లె, అంక ‘నిజామి, దేముడు అబ్బినక ప్రేమ కెర్తయ్’ మెన లోకుమ్ ఎత్తిచ చినుల. అల్లె, జొమ్మ, గెచ్చుమ!” మెన సంగిలన్.

15

ద్రాచ రూకచి టాలి

1 తెడిడి యేను ఇసి మెన టాలి సంగిలన్. “ఆవ్ నిజామ్ జలో ద్రాచ రూకు జయిందె. అంచొ దేముడు అబ్బి రూకుక పోస్తొసొ జయెదె.

2 జలె, అంచ కొన్నల్తె కేన్ కొన్నతె పంటొ దెరి నాయ్ గే, ఈంజొ రూకు పోస్తొ దేముడు అబ్బి జా కొన్న గెచ్చువ గెలెదె. గని కేన్ కొన్నతె పంటొ దెరిదె గే, ‘అన్నె ఒగ్గర్ పంటొ దెర్లు’ మెన, కొన్నల్ కుట్టవ గెలెదె.

3 “తుమ్క ఆవ్ నూనయ్లి కొడె నూన్లదుచి రిసా, తుమ్ నుద్ది జా అన్నున్.

4 జలె, ఆత్తక అంచి తెన్ బెద తా అంచి తెడి తుమ్ జియ అంచి సెక్తిక ఇండ, అంచి పెట్టి తా. ఆవ్ కి తుమ్చి పెట్టి తయిందె. తీగె కొన్న అజ జలె, ఒత్త కిచ్చొ పంటొ దెరుక నెత్తె. తీగె తెన్ ఎక్కి తిలెకయ్ ఒత్త పంటొ దెరిదె. దస్సి, తుమ్ ఆత్తక అంక ముల అజ జలె, తుమ్తె కిచ్చొ* పంటొ దెర్లి రితి జంక నెతుర్లు. అంచి తెన్ ఎక్కి తిలెకయ్ †పంటొ తుమ్తె దెరిదె.

5 “ద్రాచ రూకు అద్వి, రూకచి జివు అంచి పెట్టి అన్నె. తూమ్ అంచ కొన్నల్. ఆత్తక అంచి తెన్ బెద తా అంచి తెడి జియ అంచి సెక్తిక కో ఇండ అంచి పెట్టి తవుల గే, జోచి పెట్టి ఆవ్ తయిందె, చి జో తెన్ ఒగ్గర్ ‡పంటొ దెర్లి తయెదె. ఆవ్ నెంజిలె, తుమ్ కిచ్చొ కెరుక నెతుర్లు.

6 కో ఆత్తక అంచి తెన్ బెద నే తతె అంచి తెడి నే తతె అంచి సెక్తిక నే ఇండితె అంచి పెట్టి తతి నాయ్ గే, కామ్క నెంజిలి కొన్న కుట్టవ వెంట గెలి రితి జయెదె, కొమ్మ జా మొర గెచ్చెదె. కొన్నల్ దస్సి జలె, జోవయింక గుడ్డ కెర అగితె గల డయిల. కో ఆత్తక అంచి తెన్ బెద నే తతె అంచి తెడి నే తతె అంచి సెక్తిక నే ఇండితె అంచి పెట్టి తతి నాయ్ గే, దస్సి జవుల.

7 గని ఆత్తక అంచి తెన్ బెద తా అంచి తెడి జియ అంచి సెక్తిక తుమ్ ఇండ అంచి పెట్టి తా అంచి కోడు రితి తుమ్ కెర్లె తిలె, తుమ్ అంచితె కిచ్చొ నజితె గే, తుమ్చి రిసా జర్గు జయెదె.

8 తుమ్ దస్సి జా చెంగిల్ †పంటొ ఒగ్గర్ తుమ్తె దెర్లె, చి దేముడు అంచొ అబ్బినక మాన్నుల్ గప్పురుమ్ కెరుల. జయ్యొ పంటొ జోవయింక గప్పురుమ్ అనెదె, అంచ సిన్నుల్ తుమ్ కచితుమ్ జలిన్క రుణ్ణు డీనెదె.

9 “దేముడు అంచొ అబ్బి అంకయ్ కిసి ప్రేమ కెర్తయ్ గే, ఆవ్ కి తుమ్క దస్సి ప్రేమ కెర అన్నె. అంచి ప్రేమ తెడి తుమ్ తా.

* 15:4 15:4 ‘పంటొ’ నెంజిలె ‘ఆత్తపంటొ’. † 15:4 15:4 ‘పంటొ’ నెంజిలె ‘ఆత్తపంటొ’. ‡ 15:5 15:5 ‘పంటొ’ నెంజిలె ‘ఆత్తపంటొ’. § 15:8 15:8 ‘పంటొ’ నెంజిలె ‘ఆత్తపంటొ’.

10 దేముడు అంచో అబ్బొద *కొడో ఆవ్ కెర్తె తా జోచి ప్రేమచి తెడి తా జోచి ప్రేమ తెన్ ఇండితసి. దస్సి, అంచయ్ కొడో తూమ్ కెర్తె తిలె, అంచి ప్రేమచి తెడి తుమ్ తా అంచి ప్రేమ ఇండితె.

11 'అంచి సంతోసుమ్ తుమ్చి పెట్టి తప్పన్' మెన, తుమ్క 'పూర్తి సంతోసుమ్ జా తత్తు' మెనయ్, ఈంజేవ్ కొడో ఎత్తి ఆవ్ సంగ అస్సి.

12 "ఆవ్ తుమ్కయ్ కిసి ప్రేమ కెర అస్సి గే, తూమ్ కి ఎక్కిలోక ఎక్కిలో ప్రేమ కెర్తె తా, మెన తుమ్క ఆవ్ సంగితసి. ఈంజయి తుమ్క అగ్గు జా అస్సి.

13 'జతు' మెన, జోవయించ మింతర్పుల్చి రిసా కో జలెకు మొర్తి కంట, కిచ్చొ జిన్ని ప్రేమ నాయ్.

14 ఆవ్ తుమ్క సంగిల్ రితి తుమ్ కెర్తె, అంచ గోతుసుదల్ జా తస్సి.

15 తుమ్క 'గొత్తి సుదల్' రితి అప్పె తెంతో దెకి నాయ్. కిచ్చొక మెలె, జోవయించో ఎజోమాని కిచ్చొ కెర్తె తయెదె గే గొత్తి సుదల్ నేనీతి. ఆవ్, మాత్తుమ్, అంచో అబ్బొనతె సూన్సిని ఎత్తి తుమ్క సంగ అస్సి. జాచి రిసా తుమ్క 'గోతుసుదల్' రితి దెకితసి.

16 "తూమ్ అంకయ్ నిసాస్సు నాయ్. ఆవ్ తుమ్కయ్ నిసాస్లయ్. ఆవ్ తుమ్క కిచ్చొక నిసాన అంచి కామ్ తియార్ అస్సి మెలె, తుమ్ ఈంజ లోకుమ్తె బార్ జతు, చి అంచి అత్తపంటో జోవయింతె దెర్తె తప్పన్ మెన 'జోవయింతె దెర్తి ఈంజ పంటో కెయ్క తెయ్క చెంగిల్ తా కామ్క జెతె తప్పన్'. తుమ్ అంక నిదాసుమ్ తిలిగిన, అంచి నావ్ తెన్ దేముడు అంచో అబ్బొతె తుమ్ కిచ్చొ నజెలి కి, తుమ్క దెయెదె.

17 తుమ్క కిచ్చొ అగ్గు దెతసి మెలె, ఎక్కిలోక ఎక్కిలో తుమ్ ప్రేమ కెర్తె తంకయ్.

నంపజలనక ఈంజ లోకుమ్ విరోదుమ్ జవుల

18 "ఈంజ లోకుమ్చ మూస్సుల్ తుమ్క విరోదుమ్ జతతి జలె, అంక కి అగ్గె తెంతో విరోదుమ్ జా అస్సి.

19 ఈంజ లోకుమ్చ కమె కెర్తెన తుమ్ జతదు జలె, ఈంజ లోకుమ్చ మూస్సుల్ తుమ్క ప్రేమ కెర్తె. గని, ఈంజ లోకుమ్చ తెంతో తుమ్క ఆవ్ నిసాస్లయ్, చి ఈంజ లోకుమ్చ కమె తుమ్ కెర్నూ నాయ్ చి రిసా ఈంజ లోకుమ్చ తుమ్క విరోదుమ్ జా అస్సి.

20 "జలె, ఆవ్ తుమ్క సంగిలి కోడు తుమ్ పచ్చు నాయ్. కేన్ కోడు మెలె, 'సేవ కెర్తొసా జోచో ఎజోమానిచి కంట వెల్లో నెంజె' మెలెసి. ఈంజ లోకుమ్చ మూస్సుల్ అంకయి అల్లర్ కెర అస్సి జలె, తుమ్క కి అల్లర్ కెరుల. జేవ్ అంచయ్ కొడో రితి కెర్తెతి జలె, తుమ్చయ్ కొడో సూన కెరుల.

21 అంచి రిసాయి తుమ్క అల్లర్ కెరుల మెలె, కిచ్చొక మెలె అంక తెర్తయ్లో దేముడు జేవ్ నేనీతి.

22 "ఆవ్ జెతయ్ నాయ్ జలె, జోవయింక సుబుమ్ కబుర్ సంగితయ్ నాయ్ జలె, జా పాపుమ్ జేవ్ వయత నాయ్. గని, అయ్లయ్, సంగిలయ్, చి అప్పె, 'సేన కెర దస్సి కెర్లమ్' మెన జేవ్ సంగుక నెతిర్తి. జా పాపుమ్ వయ అస్సి.

23 మెలె అంకయ్ కో విరోదుమ్ జవుల గే, దేముడు అబ్బొనక విరోదుమ్ జా అస్సి.

24 అస్సె, కేన్ మాస్సుకి కెయ్ కి నీ కెర్తె కమె ఆవ్ జోవయించి మొక్కె కెర్తయ్ నాయ్ జలె, జా పాపుమ్ వయత నాయ్. గని అంక దెకయ్ అంక విరోదుమ్ జా అస్సి. జేవ్ అంకయ్ దెక విరోదుమ్ జలెసి జలె, అబ్బొక దెక విరోదుమ్ జలెసి జయెదె. దస్సి జా, అబ్బొనక కి విరోదుమ్ జా అస్సి.

25 జోవయించి †మోసే పూర్ణుమ్చొచి అత్తి దేముడు రెగ్గయ్ల అగ్గెతె పూర్ణుమ్ దేముడు అబ్బొ రెగ్గయ్లని నెరవెర్పువ జంకయ్ ఇసి జా అస్సి. కేన్ కోడు మెలె, 'ఆరిక అంక విరోదుమ్ జలె.'

26 "దేముడు అంచో అబ్బొతె తెంతో ఆవ్ సంగిలో తోడ్ కెర్తొసాక తుమ్ సిస్సుల్తె తెర్తయిందె. జో అబ్బొచి వెట్టి తెంతో బార్ జా జెతోసా. నిజమ్ జలి అత్త, జో. జో తుమ్తె జా కెర, అంచి రిసాయి సాచి సంగిదె.

27 తూమ్ కి అంచి రిసా సాచుల్ జా అస్సున్. కిచ్చొక మెలె, అంచ కమె మొదొల్ కెర్తి తెంతో అంచి తెన్ని అస్సున్."

* 15:10 15:10 నెంజెలి 'అగ్గల్' నెంజెలి 'అద్దల్'. † 15:25 15:25 తెలుగు బైబిల్తె ధర్మశాస్త్రమ్ మెలె, మోసేని అత్తి దేముడు ర్గయ్ల అగ్గల్ మెన అమ్ జాసుమ్. ఈంజ కొడో ఎత్తి బైబిల్తె అగేచి పావ్ పున్కుమ్తె రెగ్గయ్ జా అస్సి. ఈంజ దెకపుక మెన కుపియ్ బాసతె నొయ ప్రమాసుమ్తె మోసే పూర్ణుమ్చొచి అత్తి రెగ్గి దేముడుచ అగ్గల్ మెన ర్గవ అస్సి.

16

1 “ఆవ్ కిచ్చొక తుమ్క ఈంజ ఎత్తి, సంగ అన్నె మెలె, తుమ్క ‘తెదొడక బమ్మ జా అన్యానుమ్ జతు నాయ్’ మెన జేవ్ అల్లర్ నే జతె అగ్గ తుమ్క ఆవ్ సంగితసి.

2 జేవ్ దీసల్క తుమ్క జోవయించ నబ గెరల్ తెంతో ఉదడ అన్నె పెనయతి నాయ్. అన్నె, ‘ఇన్నెక మార్లె చెంగిలి, మార్లె దేముడుచి సేప కెర తమదె’ మెన సగుమ్జెని ఉచర తుమ్క మారుల.

3 కిచ్చొక దస్సి కెరుల మెలె, జేవ్ అంక నేనతి.

4 జా నే జతె అగ్గ తుమ్క ఆవ్ కిచ్చొక సంగ అన్నె మెలె, జా సమయుమ్ జా అయ్లె, ‘ఇసి జయెదె మెన సంగిలొ’ మెన తుమ్ ఉచార కెరై. జలె, తుమ్ అంచ సిస్సుల్ జలి మొదొల్ తెంతోయ్ ఈంజ ఎత్తి, తుమ్క ఆవ్ కిచ్చొక సంగుక నాయ్ మెలె, తుమ్చి తెన్ తిలయ్, చి సంగుక నాయ్.

తుమ్క తోడ తతి రిసా అమ్చి ఆత్మ తుమ్చితె తెద్రయిందె

5 “అప్పె, అంక తెద్రయ్లోసాతె ఆవ్ అన్నె గెతసి. గని ‘కెసె గెతసి?’ మెన అప్పె తుమ్చితె కో అంక పుసున్ నాయ్.

6 ఆవ్ ఈంజ ఎత్తి, తుమ్క సంగిలి రిసా దుకుమ్ జా అస్సున్.

7 జలెకి, తుమ్క కిచ్చొ సత్తిమ్ సంగితసి మెలె, ఆవ్ గెలెకయ్ తుమ్క చెంగిలి. కిచ్చొక మెలె, ఆవ్ నే గెలె, అమ్చి ఆత్మ జతో ఆవ్ సంగిలొ తోడ కెర్లెసా తుమ్క తోడ జెయ్ నాయ్. గని ఆవ్ గెలె, తుమ్తె జోక తెద్రయిందె.

8 “జో అయ్లొ మెలె, పాపుమ్చి రిసా, సత్తిమ్చి రిసా, తీర్పు కెర్తిసిచి రిసా ఈంజ లోకుమ్చ మాన్సుల్క రుజ్జుల్ దెకయెదె.

9 లోకుమ్ అంక నంపజయె నాయ్ చి రిసా పాపుమ్ వయ్ అస్తి మెన అంక నంపనెంజెలసక రుజ్జు దెకయెదె.

10 అంచొ దేముడు అబ్బొనతె ఆవ్ ఉట్ట గెచ్చిందె, అంక అన్నె తూమ్ ఇసి దెకున్ నాయ్. అంచి పున్నిమ్చి రిసా ఈంజ లోకుమ్చక జో రుజ్జు దెకయెదె.

11 జాచి రిసా ఈంజ లోకుమ్క అప్పెచి మట్టుక ఏలుప కెర్లె నయ్తాన్ తీర్పు జా, జోచి పాపుమ్ వయ్ సిచ్చతె గెచ్చొక అన్నె మెన రుజ్జు దెకయెదె.

12 “ఆవ్ తుమ్క సంగితసి కెత్తిగే అన్నె. గని, అప్పె సంగిలొ తుమ్ ఓర్పుప జంక నెతుర్పు.

13 జలె జో, సత్తిమ్ జలి ఆత్మ జలొసా తుమ్చి పెట్టి అయ్లె, జొయ్య సత్తిమ్తె తుమ్క ఇండయెదె. జోక, జొయ్య కిచ్చొ సంగె నాయ్. జో ఒత్త అమ్తె కిచ్చొ సూనెదె గే, జయ్య తుమ్క సంగెదె.

14 జో అంచితె తిలిసియి కడన తుమ్క సూనెదె. జాచి రిసాయి అంక గవురుమ్ కెరెదె.

15 అబ్బొసి జలొ దేముడుచి ఎత్తి. అంచి, జాకయ్ ‘జో తుమ్క సంగితసి ఎత్తి. అంచి’ మెన తుమ్క సంగిలయ్.

పడ్డొక తుమ్క సంతోసుమ్ జెయెదె

16 “ఇదిల్ కాలుమ్ గెలి పడ్డొ అంక తుమ్ దెకుక నెతుర్పు, అన్నె, ఇదిల్ కాలుమ్తె అంక దెకితె మెన సంగిలన్.

17 జోవ సిస్సుల్తె సగుమ్జెని ఎక్కిలొ తెన్ ఎక్కిలొ లట్టబ, గడియ గెలె, అంక దెకున్ నాయ్. ఒత్త తెంతో అన్నె గడియ గెలె, అంక అన్నె దెకితె మెన కిచ్చొక సంగిలన్. ఆవ్ ‘దేముడు అబ్బొతె ఉట్ట గెచ్చిందె’ మెన కిచ్చొక సంగిలన్?” మెన సంగితె తిల.

18 “గడియ గెలె మెన కిచ్చొ అర్దుమ్ తెన్ సంగితయ్? జో కిచ్చొచి రిసా సంగితయ్ గే నేనుమ్” మెన లట్టబన్.

19 జేవ్ జొయ్య పునితతి మెన, నా యేసు జానయ్ జేవ్చి తెన్ ఇసి సంగిలొ. అన్నె గడియ గెలె, తుమ్ అంక దెకున్ నాయ్. ఒత్త తెంతో. అన్నె గడియ గెలె, తుమ్ అంక అన్నె దెకితె మెన ఆవ్ సంగిలయ్, గెద. ఇన్నెచి రిసా ఎక్కిలొ తెన్ ఎక్కిలొ లట్టబన్, నాయ్ గే?

20 తూమ్ దుకుమ్ జా ఏడ్డె. గని, లోకుమ్చ సర్ల జవుల తుమ్చి దుకుమ్ సర్లతెను తయెదె మెన తుమ్క కచితుమ్ సంగితసి.

21 అడెన్ జతి తేరబోడ, జలె, జాచి కంట్లు పాడ జా అయిలె మెలె, ఏడెదె, గెద. గని, అడెన్ జలి మెలె, ఈంజ లోకుమతె ఏక 'బోడ జెర్మిలో' మెన జాచి నర్లక బేగి దుకుమ్ ఎత్తి పచ్చ గెలెదె.

22 దస్సి, ఆవ్ అప్పె గెలె, తుమ్క గడియ దుకుమ్ తయెదె. గని, ఆవ్ తుమ్చి తెన్ అన్నె దస్సుల్ జయిందె, చి తుమ్చి వెట్టి సంతోసుమ్ జా గెతె, చి కో కి తుమ్చితె తిలి సంతోసుమ్ కడుక నెత్తిర్తి.

23 జేవ్ దీసల్తె అంక తుమ్ కిచ్చో కి పునితిసి నాయ్. తుమ్ దేముడు అబ్బోతె కిచ్చో సంగిలె కి, అంచి నావ్ తెన్ దొర్లు జయెదె మెన తుమ్క కచితుమ్ సంగితసి.

24 అప్పె ఎద అంచి నావ్ తెన్ తుమ్ కిచ్చో నజుక నాయ్. తుమ్చి సంతోసుమ్ పూర్తి జతి లెక నజ, దొర్లు జయెదె.

25 “ఈంజ సంగతి ఒండి కి అర్దుమ్ లుంకయ్ జలి రితి సంగ అస్సి. జలె ఆవ్ కెయ్యుక జలెకి అర్దుమ్ లుంకయ్ జలి రితి తుమ్చి తెన్ నే లట్టబ్బె, అబ్బోనచి రిసా తుమ్క సొస్టుమ్ గ నూనయ్తి గడియ జెతయ్.

26 జా దీసల్ అయిలి పొది అంచి నావ్ తెన్, తుమ్ నజెతె. గని, దేముడుక తుమ్చి తెన్ ఆవ్ నెడిమి జా ప్రార్దన కెర్తిసి నెంజె మెన సంగుక నాయ్.

27 కిచ్చొక మెలె అబ్బో తుమ్క ప్రేమించుప కెర్తయ్. తూమ్ అంక ప్రేమించుప కెర, అంక అబ్బో జలి దేముడు తెంతో బార్ జా అయిలన్ మెన నంపజలదు.

28 దేముడు అబ్బో తెంతో ఆవ్ బార్ జా ఈంజ లోకుమతె అయిలయ్. అన్నె, అప్పె ఈంజ లోకుమ్ ముల దా, ఒత్త జోతె అన్నె గెతసి” మెన సంగిలన్.

29 జోవ్ సిస్సుల్, జలె, “ఈందె, అర్దుమ్ లుంకయ్ జలి రితి కిచ్చో కి నే సంగితె సొస్టుమ్ గ లట్టబ్బసి.

30 తుయి ఎత్తి జాస్సి, చి అమ్ నే పునిలెకి, అమ్చి మెన్ను తిలిసి తుయి జాస్సి మెన అప్పె జానుమ్. దేముడుతె తెంతో తూయి బార్ జా అయిలదు మెన నంపజా సంగితి కాయ్.

31 యేసు జోవయింక దెక, అప్పె తూమ్ నంపజతను గే?

32 ఈందె తుమ్చితె ఒండిజినక కి కచి గెరి జొయ్యె నెదురం జా అంక ఎక్కిలోయి ముల దెతి గడియ జెతయ్, జా అస్సి. జలె అబ్బో అంచితె అస్సి చి రిసా ఆవ్ ఎక్కిలోయి నెంజె.

33 “ఈంజ ఎత్తి కిచ్చొక తుమ్క సంగ అస్సి మెలె, ‘అంచి తెడి తుమ్క సేంతుమ్ తప్పన్’ మెనయ్. కిచ్చొక మెలె, ఈంజ లోకుమతె అల్లర్ నెడ్డె, గని దయిరిమ్ తెన్ తా. ఈంజ లోకుమతెచె అల్లర్చి ఉప్పిరి ఆవ్ జిన అస్సి” మెన సంగిలన్.

17

యేసు ప్రార్దన కెర్తిసి

1 యేసు ఈంజ ఎత్తి సంగ కేడవ, ఆగానుమ్ పక్క దెక, పరలోకుమ్ తిలో దేముడు అబ్బొనక ప్రార్దన కెర్తన్.

“ఓ బ, అంచి నమయుమ్ జా అయిలె మెన జాని. ఆవ్ తుచో పుత్తుది తుచి గప్పురుమ్ దెకయ్తి రితి, ఆవ్ పుత్తున్ తా గప్పురుమ్ కెరు.

2 ఈంజ లోకుమ్ ఎత్తిచ మాన్సుల్చి ఉప్పిరి ఆవ్ పుత్తుక తుయి అదికారుమ్ దా అస్సిన్. కో అంక నంపజంక తుయి సెలవ్ దా అస్సిన్ గే, జెవ్వి తుచి రాజిమ్తె బెదితి, మొర్లె పరలోకుమతె గెచ్చు కెయ్తె తెయ్తె జతి రితి ఆవ్ దెంక మెన, తుయి అంచి అత్తి సార్పు కెర దా అస్సిన్.

3 తుయి ఎక్కిలోయి నిజుమ్ జలో దేముడు తుక, తుయి తెద్దయ్లో అంక, జేవ్ నంపజతిసి, అమ్క జేవ్ జానీతిసి, ఆవ్ యేసు తుయి తెద్దయ్లో రచ్చించుప కెర్తొసా జతో క్రిస్తు.

4 తుయి అంక తియార్లొ కామ్ ఆవ్ పూర్తి నెరవెర్చువ కెర, ఈంజ లోకుమతె తుక గప్పురుమ్ ఆన అస్సి.

5 ఓ బ, ఈంజ లోకుమ్ నే జెర్మన్ జతె అగ్గె తెంతో తుచి తెన్ ఆవ్ ఒత్త తతె అంక కిసి గప్పురుమ్ తిలి గే, అప్పె తుచితె పరలోకుమతె అన్నె దస్సి గప్పురుమ్ జతి రితి కెరు.

6 “అంచ సిస్సుల్ జతి రితి, ఈంజ లోకుమచ మాన్సుల్తె నగుమ్జినక తుయి నిసాన, అంచి అత్తి సార్పు కెర దా అస్సిన్. తుయి కిసాచో గే ఈంజేవ్ దెకిత్ రితి ఆవ్ ఈంజ లోకుమతె జియ అస్సి. తుచయ్

మాన్యుల కంజేవ్, చి ఇన్నక అంచి అత్తి తుయి సార్పు కెర దిలది, చి తుచి కోడు రితి కంజేవ్ నిదానుమ్ ఇండ అస్సి.

7 తుయి అంక దిలిసి ఎత్తిచి రిసా 'వేరచి నెంజె, గని తుయి దిలిసి' మెన అప్పె జాన్తి. అంక తుయి తెద్రయ్లోసా నిజుమ్ మెన చినిల.

8 'సంగు' మెన తుయి సంగిలి కోడె ఎత్తి ఇన్నెయింక ఆవ్ సంగ అస్సి, చి కంజేవ్ సూన, నంపజా, ఆవ్ తుచితె తెంతో ఉట్ట అయ్లిన్క 'నిజుమ్' మెన జాన్తి. తుయి అంక తెద్రవ అస్సిన్ మెన నంపజా అస్సి.

9 "ఇన్నెచి రిసాయి ఆవ్ అప్పె ప్రార్దన కెర్తసి. ఈంజ లోకుమ్చ ఎత్తిజన్చి రిసా ఇని మెన ప్రార్దన కెరి నాయ్, గని కంజేవ్ తుయి అంచి అత్తి సార్పు కెర దిలనయ్చి రిసా ప్రార్దన కెర్తసి. కంజేవ్ తుచయ్ మాన్యుల్.

10 అంచి ఒండి తుచయ్, తుచి ఒండి అంచయ్, చి కంజేవ్ నిదానుమ్ జలిన్ తెన్ అంక గవురుమ్ జెతయ్.

11 "ఆవ్ తుచితె అప్పె అన్నె జెతసి చి అప్పె తెంతో ఆవ్ ఈంజ లోకుమ్తె తయ్ నాయ్. గని కంజేవ్, మాత్తుమ్ తవుల. సుద్ది తిలో ఓ బ, కంజేవ్ చెంగిల్ తతి రితి, * తుయి అంక దిలి తుచి నావ్చి సెక్కిక ఇన్నెక రక్కు, చి ఆవ్ తుయి కిసి † ఎక్కి జా అన్నుమ్ గే కంజేవ్ కి ఎక్కి జా తంక తుచి నావ్ తెన్ ఇనయ్ంక దెకు.

12 ‡ ఆవ్ ఇనయ్ంతెన్ బుల్తె తిలి పొది, తుయి అంక దిలి తుచి నావ్ తెన్ ఇన్నెక రకితె తిలయ్. ఆవ్ జేవ్క జాగరితె తెన్ రకిలయ్ చి, ఇనయ్ంక కో నాసెనుమ్ జతి నాయ్. నాసెనుమ్తె గెతో జో ఎక్కిలో పిట్టవ, జలె, తుయి పూర్గుమ్ రెగ్గయ్లి రితి నాసెనుమ్ జా అన్న, దేముడుచి కోడెతె తిలి జా కోడు అప్పె నెరవెర్చువ జతి రిసా.

13 "అప్పె, జలె, ఆవ్ తుచితె జెతసిచి రిసా, 'అంచి సంతోసుమ్ ఇన్నెచి పెట్టి నెరవెర్చువ జా కామ్ కెర్చు' మెన ఈంజ ఎత్తి, అప్పె ఈంజ లోకుమ్తె ఆవ్ తతె, ఇన్నెచి మొక్కె తుక సూనయ్తసి.

14 " 'సంగు' మెన తుయి సంగిలిసి ఎత్తి ఇన్నెయింక ఆవ్ సంగ అస్సి. ఆవ్ ఈంజ లోకుమ్చో నెంజె, చి అంచ సిన్యుల్ కంజేవ్ జలి తెంతో, కంజేవ్ కి ఈంజ లోకుమ్చ నెంజెతిచి రిసా, ఈంజ లోకుమ్చ ప్రెజల్ ఇన్నెయింక విరోదుమ్ దెకితతి.

15 జలె, తుక 'ఈంజ లోకుమ్తె తెంతో ఇన్నెయింక కడ నెవుసు' మెన అంచి ఆన నాయ్, గని 'ఈంజ లోకుమ్తె కంజేవ్ తా గెలె, నయ్తానక, జోచి సేవక, కంజేవ్ దెర్చు నే సెడ్డి రితి రక్కు' మెన తుక ప్రార్దన కెర్తసి.

16 "ఆవ్ కిసి ఈంజ లోకుమ్చో నెంజె గే, అంక నంపజలి తెంతో కంజేవ్ కి ఈంజ లోకుమ్చ నెంజెతి.

17 కంజేవ్ పూర్తి తుచయ్ జా తుచి సేవ నిదానుమ్ కెర్తె తతి రితి, తుచి సత్తిమ్తె ఇన్నెక సుద్ది కెరు. తుచి కోడు సత్తిమ్.

18 తుయి కిసి అంకయ్ ఈంజ లోకుమ్తె తెద్రయ్లది గే, మాన్యుల్క కంజేవ్ సత్తిమ్ వాట్ దెకయ్తి రితి, ఆవ్ ఇన్నెక తెద్రవ దా అస్సి.

19 కంజేవ్ కి తుచి సత్తిమ్తె తుచయ్ జా, తుచి సుద్ది జా తుక నిదానుమ్ తత్తు మెనయ్, అంచి జీవ్ తుచి అత్తి ఆవ్ సార్పు కెర దెతసి.

20 "ఎక్కి కంజేవ్ అంచ సిన్యుల్చి రిసా ఇని ప్రార్దన కెరి నాయ్. కంజేవ్ అంచి రిసా సాచి సంగిలె, ఇన్నెయింక కోడు సూన అన్నె కో అంక నంపజా గెచ్చుల గే, జోవయింక రిసా కి ఆవ్ ప్రార్దన కెర్తసి.

21 ఓ బ, తుయి కిసి అంచి పెట్టి అస్సిన్ గే, చి ఆవ్ కిసి తుచి పెట్టి అస్సి గే, దస్సి కంజేవ్ కి, జేవ్ కి, అమ్చి పెట్టి తా ‡ ఎక్కి జతు, చి దస్సి ఎక్కి జల మెలె, ఈంజ లోకుమ్చ అన్నె మాన్యుల్ దెకిలె, తుయి అంక తెద్రయ్లిసి జేవ్ కి నంపజవుల.

* 17:11 17:11 నెంజెలె, 'తుయి అంచి అత్తి సార్పు కెర దిల ఈంజేవ్ సిన్యుల్క తుచి నావ్చి సెక్కిక రక్కు'. † 17:11 17:11 నెంజెలె, 'ఎక్కి ప్రేమయ్ అన్నుమ్ గే, కంజేవ్ కి ఎక్కిలో తెన్ ఎక్కిలో ఎక్కి ప్రేమయ్ తెన్ తవుల'. ‡ 17:12 17:12 నెంజెలె, తుయి అంచి అత్తి సార్పు కెర దిల ఈంజేవ్ సిన్యుల్ తెన్ ఆవ్ బుల్తె తిలి పొది తుచి నావ్ తెన్ ఇన్నెక రకితె తిలయ్.... § 17:21 17:21 ఎక్కి ఉడ్డిసుమ్ ఎక్కి ప్రేమచి కోడు. 11 నంబర్ కోడుచి ఎట్టెచి కోడు దెక.

22 తువి గవురుమ్తె అంక కీసి తుయి టీఁడడ అస్సిన గే, అంది గవురుమ్తె ఆవ్ ఇన్నెయింక టీఁడడ అస్సి, చి ఆవ్, తూయి, కీసి ఎక్కి జా అస్సుమ్ గే, ఈంజేవ్ కి * ఎక్కి జతు మెనయ్ అంది ఆన.

23 దస్సి, ఆవ్ ఇన్నెయింది పెట్టి, తుయి అంది పెట్టి తమ్దె, చి ఈంజేవ్ పూర్తి † ఎక్కి జవుల. దస్సి జలె, ఈంజ లోకుమ్ద మాన్సుల్ కిచ్చొ దొస్సి చినుల మెలె, అంక తెద్రయ్లోసా తుయి మెన చినుల, చి తుయి అంకయ్ కెద్ది ప్రేమ కెర అస్సిన గే, ఇన్నెయింక కి తుయి తెద్ది ప్రేమ కెర్తసి మెన చినుల.

24 “ఈంజ లోకుమ్ నే జెర్మున్ కెరె అగ్గె తెంతో అంది ఉప్పిరిచి తువి ఎదివాట్ ప్రేమక అంక ఒగ్గర్ గవురుమ్ దా అస్సిన. జలె, ఓ బ, తుయి అంక దిల సిన్సుల్ కి ‡ ఆవ్ తిలిన్తె అంది తెన్ తత్తు, చి తుయి అంక దిలి గవురుమ్ దెకుతు, మెన అంది ఆన.

25 పున్సుమ్ తిలో ఓ బ, ఈంజ లోకుమ్ద తుక నేన తిలె కి, ఆవ్ తుక జాని, చి కచితుమ్ తుయి అంక తెద్రయ్లోసి ఈంజేవ్ సిన్సుల్ జాన్తి.

26 తుయి అంక ప్రేమ కెర్తె ప్రేమ ఇన్నెయింది పెట్టి తవున్ మెన, ఆవ్ ఇన్నెయింది పెట్టి తంక మెన, తుయి కీసాచొ జా అస్సిన గే, ఇన్నెయింక ఆవ్ దెకవ అస్సి, దెకయ్తె తయిందె” మెన దేముడు అబ్బొన్క యేసు ప్రార్దన కెర్తన్.

18

యేసుక విరోదుమ్ సుదల్ దెర్రిసి

(మత్త 26:47-56; మార్కు 14:43-50; లూకా 22:47-53)

1 యేసు ఈంజేవ్ కొడొ సంగ కేడవ, జోవ సిన్సుల్ తెన్ బార్ జా, కెర్తొను మెంతి లోయ ఒత్తల్తోచి ఒడ్డుతె జీన గచ్చ, సిన్సుల్ తెన్ ఒత్త తిలి తోటతె పెసిల.

2 పుండితి రిసా యేసు జోవ సిన్సుల్ తెన్ ఒత్త గెచ్చుక అలవాట్చి రిసా, అప్పె ఒత్త గెచ్చ తవుల మెన, జోక విరోదుమ్ సుదల్తె దెర దెంక గెలో యూదాక అజ్జ.

3 జో యూదా జలె, వెల్లెల పూజర్లుతె చి పరినయ్యుల్తె గెచ్చ, జోవ జమాన్లు సగుమ్జిన్క, నయ్మయ్యమ్ సుదల్ సగుమ్జిన్క కడ ఆన, జేవ్, లాంతర్లు దివ్వొ, అయ్దల్ దెరన, యేసు తిలిన్తె ఉట్ట అయ్ల.

4 జోక జర్లు జంక తిలిసి ఎత్తి యేసు జానె చి, జేవ్ దెర్తన ఒత్త పావ జెతికయ్, జో పురెజొ జా, “కక్క చజితను?” మెన జోవయింక పుసిలన్.

5 జేవ్ జోక, “నజరేతు గెవ్వొచొ యేసుక చజితనుమ్” మెన జబాబ్ దిల, చి యేసు జోవయింక “అవ్వొ జో!” మెలన్. జోవయింది అత్తి జోవయింక దెర దెంక ఒప్పన్లొ యూదా జోవయింతెన్ ఒత్త టీఁడ అస్సి.

6 జలె, “అవ్వొ జో” మెన యేసు సంగితికయ్, జోక దెరుక మెన అయ్ల జనాబ్ పడ్డొ గుంచ బుయ్యె సేడ గెల.

7 పడ్డొ, “కక్క చజితను?” మెన యేసు జోవయింక అన్నెక్ నుట్టు పుసిలన్, చి “నజరేతు గెవ్వొచొ యేసుక” మెన అన్నెక్ నుట్టు సంగిల.

8 సంగిలె, యేసు జోవయింక “ అవ్వొ జో” మెన తుమ్క సంగిలయ్, గెద. అంకయ్ చజితను జలె, అంకయ్ దెర, గని అంది తెన్ తిలనక పొన” మెన జబాబ్ దిలన్.

9 చి యేసు అగ్గె సంగ తిలి ఏక్ కోడు ఇన్నెయింతెన్ * ఏక్ రగుమ్క నెరవెర్చువ జలి.

“తుయి అంది అత్తి సార్దు కెర దిలనతె కో నానినుమ్ జతి నాయ్”

మెన దేముడు అబ్బొన్క తెదొడి సంగ తిలి కోడు.

10 జలె, సీమోను పేతురుక ఏక్ కండా తిలి. జో పేతురు జా కండా కడన, ఎత్తిక వెల్లొ పూజరిచొ గొతిమాన్సు ఎక్కిలోక కుంద, జోచి ఉజల్ కండ్లొ సింద గెలన్. జో గొతిమాన్సుచి నావ్ ‘మెల్కు’.

* 17:22 17:22 ఎక్కి ఉడ్డెనుమ్ ఎక్కి ప్రేమచి కోడు. 11 నంబర్ కోడుచి ఎట్టెచి కోడు దెక. † 17:23 17:23 ఎక్కి ఉడ్డెనుమ్ ఎక్కి ప్రేమచి కోడు. 11 నంబర్ కోడుచి ఎట్టెచి కోడు దెక. ‡ 17:24 17:24 నంజలె ‘అవ్ గెతిన్తె జా, అంది తెన్ తత్తు’. * 18:9 18:9 17:12చి కోడు దెక. అస్సి కిచ్చొ రగుమ్క నానినుమ్ జతి నాయ్ మెలె, జేవ్ మెరె వదక యేసుక నిదానుమ్ తా గెల.

11 పేతురు దన్నీ కెర్తెకయ్, “కండా తియ దేస్! దేముడు అబ్బొ అంక తియార్తి కామ్ దుకుమ్ స్రెమల్ జతిసి జలెకి, ఆవ్ జా కామ్ కెరుకయ్, జా దుకుమ్, జా స్రెమ ఓర్పుప జంకయ్” మెన పేతురుక యేసు నంగిలన్.

12 జలె, జేవ్ జమాన్లు, జోవయింఱో అదికారి చి దేముడుచి గుడిచ నయ్యన్యుమ్ సుదల్ యేసుక దెర, బంద గెల.

13 తోలితో †‘అన్నా’ మెలోసాతె కడ నిల. జో కొన్నో మెలె, కయప మెలో జా వెర్సిచో ఎత్తిక వెల్లో పూజరిచో మామెసి. ‡

14 ‘అమ్చ యూదుల్ నస్టుమ్ నే జతి రిసా ఎక్కిలో మొర్లె చెంగిలి’ మెన యూదుల్చ వెల్లెల మాన్సుల్క, ఎత్తిక వెల్లో పూజరి కి అగ్గె నంగ తిలో. ఈంజో కయప జో ఎత్తిక వెల్లో పూజరి.

జోచో సిస్సుడు నెంజి మెన పేతురు నంగిలిసి

(మత్త 26:69-70; మార్కు 14:66-68; లూకా 22:55-57)

15 యేసుక జేవ్ మాన్సుల్ దెర ఎత్తిక వెల్లో పూజరితె కడ నెతె తిలి పొది, సిమోను పేతురు, అన్నెక్టో సిస్సుడు, దొగుల, జేవ్ దెర్లనచి పట్టి గెల. ఎత్తిక వెల్లో పూజరి జో అన్నెక్టో సిస్సుడుక జానె, చి జో సిస్సుడు కి యేసు తెన్ ఎత్తిక వెల్లో పూజరిచి గెరి తెడి పెసిలన్.

16 గని, పేతురు గుమ్ముమ్ పాసి, బయలె బీచ జా తిలో. జలె, ఎత్తిక వెల్లో పూజరి జాన్లొ జో అన్నెక్టో సిస్సుడు అన్నె బార్ జా, గుమ్ముమ్ రకితి తేరబోద గొత్తి సుదోక నంగ, పేతురుక తెడి కడ అస్సన్.

17 జా తేరబోద గొత్తి సుదో పేతురుక దెక, “తుయి కి జో మాన్సుచో సిస్సుడు, కిచ్చొగి” మెలన్, గని “నెంజి” మెన పేతురు నంగిలన్.

18 జలె, ‘చల్లి’ మెన, ఎత్తిక వెల్లో పూజరిచ గొత్తి సుదల్ దేముడుచి గుడిచ నయ్యన్యుమ్ సుదల్ తెన్ మెసి బొగుల్చి ఆగి లాప తపితె తిల. పేతురు కి, తప్పక మెన గెచ్చ, ఒత్త జోవయింతెన్ అస్సె.

ఎత్తిక వెల్లో పూజరి యేసుక పరిచ్చ కెర్తెసి

(మత్త 26:59-66; మార్కు 14:55-64; లూకా 22:66-71)

19 మదెన్ ఎత్తిక వెల్లో పూజరి యేసుక పరిచ్చ కెర్లన్. జోచి సిస్సుల్చి రిసా, జోచి బోదనచి రిసా పరిచ్చ కెర్లన్.

20 యేసు జోక కిచ్చొ జబాబ్ దిలన్ మెలె, “అంచి బోదన, జలె, ఈంజ లోకుమ్చ ఎత్తిజిన్ నూన్తి రితి ఎదార్తుమ్ నంగ అస్సి. అమ్చ యూదుల్చ నబ గెరలె బోదన కెర్లె తిలయ్, చి దూరి పాసి తెంతో ఎత్తిజిన్ యూదుల్ బెర జెతికయ్ అమ్చి దేముడుచి గుడితె కి బోదన కెర్లె తిలయ్. ఆవ్ కెయ్య కి, కిచ్చొ కి లుంకచోరు నంగి నాయ్.

21 జాకయ్, కిచ్చొక అంకయ్ పునుక? కిచ్చొ కిచ్చొ నంగ అస్సి గే, అంక నూన్లనకయ్ పున” మెన యేసు జబాబ్ దిలన్.

22 యేసు దన్నీ నంగితికయ్, పాసి బీచ తిలో నయ్యన్యుమ్ సుదో ఎక్కిలో యేసుక పెట, “ఎత్తిక వెల్లో పూజరికె తుయి దన్నీ జబాబ్ దెంక బెదెదె గే? పోని!” మెన గేల కెర్లన్.

23 యేసు జోక కిచ్చొ జబాబ్ దిలన్ మెలె, “ఆవ్ నంగిలిసి తప్పు తిలిగిన, రుజ్జు దెకప సాచి నంగ, గని, ఆవ్ నంగిలిసి నత్తిమ్ జతయ్. జాక, కిచ్చొక అంక పెటుక?” మెన నంగిలన్.

24 *తెదొడి అన్నా, యేసుక బందున్ తెన్ ఎత్తిక వెల్లో పూజరి జలె కయపతె తెర్తయలన్.

యేసుచో సిస్సుడు నెంజి మెన పేతురు అన్నె నంగిలిసి

(మత్త 26:71-75; మార్కు 14:69-72; లూకా 22:58-62)

25 సిమోను పేతురు ఒత్త ఆగి తపితె అస్సె, జలె, ఒత్త తిల మాన్సుల్ జోక “తుయి కి యేసుచో సిస్సుడు, నెంజిన్ గే?” మెంతికయ్, జో “ఆవ్ నెంజి” మెలన్.

† 18:13 18:13 ‘అన్నా’ అగ్గె ఎత్తి వెల్లో పూజరి జా తిలో. ‡ 18:13 18:13 13-14 ఈంజ మత్తెలి తోలితో రిగిడ్ల వున్కలతె వ్క్ వున్కమతె 13 నంబర్చి కోడు కేడ్లి బేగి 24 నంబర్చి కోడు గల అస్సె; 14 నంబర్చి కోడుచి కంట అగ్గె. § 18:14 18:14 11:50చి కోడు దెక. * 18:24 18:24 13 నంబర్చి కోడుచి ఎట్టెచి కోడుక దెక.

26 గని ఎత్తిక వెల్లో పూజరిచొ గొతిమాన్సుచి కండో పేతురు అగ్గె సింద తిలో. జలె, జో మాన్సుచొ సొంత మాన్సు ఎక్కిలో ఒత్త తిలో. జో, జలె, పేతురుక “అప్పె తూయి జోవయింతెన్ తోటతె తిలది. తుక దెకిలయ్, గెద?” మెలన్.

27 గని, “నాయ్, జో మాన్సుక నేని!” మెన పేతురు సంగిలన్, చి జో సంగిల్ బేగి కుకుడో వాసిలన్.

రోమ అదికారి యేసుక పరిచ్చ కెర్రిసి

(మత్త 27:1-2, 11-31; మార్కు 15:1-20; లూకా 23:1-25)

28 తెదొడి, యేసుక కయప మెలో జో ఎత్తిక వెల్లో పూజరి పున కెర కేడయ్ తికయ్, జా రోమ దేసిమ్ తెంతోచొ అదికారిచి మేడతె జోక వెల్లెల మాన్సుల్ కడ నిల. గని, జోక కడ నిలన జా మేడ తెడి పెసితి నాయ్. కిచ్చొక మెలె, జేవ్ యూదుల్ జవుల, చి పస్కా మెలి జోవయిచి పండుగు తిలి, చి ‘యూదుల్ నెంజిల మాన్సుల్ చ గెరలె పెసిలె గార్ జమదె, చి గార్ జలె పండుగి అన్నిమ్ కంక గారు. పండుగు పిట్టెదె’ మెంతి.

29 జాకయ్, పిలాతు మెలో జో అదికారి బార్ జా, జోవయింతెన్ జా కెర “కిచ్చొ నేరిమ్ కెర్లె మెన ఈంజో మాన్సుచి రిసా తుమ్ సంగితను?” మెన యూదుల్ చ జేవ్ వెల్లెల మాన్సుల్ క పుసిలన్.

30 జేవ్ జోక “ఈంజో నేరిమ్ కెర్లె నాయ్ జలె, ఇన్నెక తుచితె సార్ప కెరక మెన కడ ఆన్ తమ్ గే? నాయ్” మెన జబాబ్ దిల.

31 దస్సి సంగితికయ్, పిలాతు జోవయింక, “తుమ్ ఇన్నెక కడన, తుమి, దేముడు మోసె తెన్ దిలి తుమ్ చ సొంత అగ్గుల్ రితి ఇన్నెక తీర్పు కెర!” మెలన్. దస్సి మెంతికయ్ జేవ్ జోక “అమ్ కెర్లి రితి పత్తల్ గల మార్చి సిచ్చ కెరక జలె, ‘నాయిమ్ నాయ్’ మెన, తుమ్ రోమియిలు ఒప్పున్ నాయ్” మెన జబాబ్ దిల.

32 జేవ్ దస్సి జబాబ్ దిలి తెంతో ‘నిలువతె మొర గెచ్చిందె’ మెలి అర్దుమ్ తెన్, జో మొర్రిసి కిచ్చొ రగుమ్ జర్గు జతినచి రిసా యేసు అగ్గె సంగ తిలి కోడు నెరవెర్చువ జలి.

33 పద్దె పిలాతు, మేడచి తెడి అన్నె పెన, యేసుక బుకార్లన్. యేసుచి రిసా చ కొడో నూన తిలో, చి “తుయ యూదుల్చొ రాన్ గే?” మెన జోక పుసిలన్.

34 ఇసి పున పరిచ్చ కెర్రికయ్, యేసు జోక, “తుయి అజ్జ కెర అంక దస్సి సంగితసి గే? నాయ్ మెలె, కో జలెకు వేర మాన్సు తుక † దస్సి మెన అంచి రిసా సంగ అస్తి గే?” మెన పుసిలన్.

35 జాచి రిసా, పిలాతు జోక “అవ్ యూదుడు గే, చి దస్సి మెనిందె? నెంజె, తువ సొంత యూదుల్ చ వెల్లెల మాన్సుల్, వెల్లెల పూజర్లు, తుక అంచితె సార్ప కెర అస్తి. కిచ్చొ కెర అస్సిన్, చి తుక దస్సి కెర్తతి?” మెన పిలాతు పుసిలన్.

36 యేసు, జలె, కిచ్చొ జబాబ్ దిలన్ మెలె, “అంచి రాజిమ్ ఈంజ లోకుమచి నెంజె. అంచి రాజిమ్ ఈంజ లోకుమచి జతి జలె, యూదుల్ చ వెల్లెల మాన్సుల్ చి అత్తి అవ్ దెర్పు నే నీడ్డి రితి అంచ గొత్తి నుదల్ యుద్దుమ్ కెర్లె. గని అంచి రాజిమ్ ఈంజ లోకుమచి నెంజె” మెన జబాబ్ దిలన్.

37 యేసు దస్సి సంగితికయ్, పిలాతు జోక “దస్సి జలె, ‘రాన్’ మెన తుయి నిజమ్ సంగితసి గే?” మెన అన్నె పరిచ్చ కెర్లెన్, చి యేసు జోక, “‘రాన్’ మెన తుయి అంక సంగితసి. అవ్ కిచ్చొక జెర్రిలయ్, కిచ్చొక ఈంజ లోకుమతె అయలయ్ మెలె, సత్తిమ్ దెకవుక, సత్తిమ్ చి రిసా సాచి సంగుక అయలయ్. జయ్యి అంచి కామ్. కో సత్తిమ్తె బెదితన జవుల గే, అంక నంపజవుల” మెన సంగిలన్.

38 యేసు దస్సి సంగితికయ్, పిలాతు మెలో జో అదికారి, “కేతె, సత్తిమ్?” మెన సంగిలో.

పిలాతు దస్సి సంగ కెర, మేడ తెంతో బార్ జా, యూదుల్ చ వెల్లెల మాన్సుల్ తిలిన్తె అన్నె గెచ్చ, “ఈంజో కిచ్చొ నేరిమ్ నే కెర్లి రితి అంక డీస్తయ్.

† 18:32 18:32 12:32, 33క దెక. ‘సిలువ’ కిసి తయదె మెలె, ఏక టీవతి చి ఏక అడ్డుమ్ జతి దొస్సి డేడివొ రిత డండల్ బెదవుల. జా సిచ్చ జతె మాన్సుక జా సిలువతె ఎంగ్లవ కెర, జోవయింక అత్తో చట్టో చంపొ కెరవ, అత్తోచట్టోతె మేకుల్ పెట, నెంజెలె వాలివొ తెన్ బంద దా, సిలువ బుయ్యో టీవ రొవ కెర, దస్సి ములుల. జో సిచ్చ జతెనా దస్సి ఒడయ్ జా మొరెదె. రోమ్ దేసిమ్చి అలనాల్ తెన్ చి సిచ్చ, జా. ‡ 18:34 18:34 యూదుల్చొ రాన్ మెనంతయ్ మెన యేసుచి రిసా పిలాతుక సంగిలి, అంచి రోమ్ దేసిమ్చి అదికారుమ్ యేసు పిట్టెవుక ఉచర్చయ్ మెన పిలాతు కోఫమ్ జా మొర్రి సిచ్చ దెయెదె మెన యూదుల్ చ వెల్లెల మాన్సుల్ కుత్త కెర తిల. లూకా 23:2.

39 తుమ్మది ఏపస్కా, పండుగక మాత్రమ్, జేల్తె తిలో కేన్ జవున్ జేలి జలొసాక తుమ్మది రిసా ఆవ్ విడ్డల్ కెరుక అంక అలవాట్. జలె, కక్క ఆవ్ ముల దెంక? తుమ్మచ యూదుల్చో ఈంజో రానొక ముల దెంక?" మెన పిలాతు వుసెలన్.

40 గని జేవ్ కిసి జల మెలె, "ఈంజో మాన్సుక పోని! బరబ్బక ములు!" మెన ఒర్పు దిల. బరబ్బు, జలె, మాన్సుక మొరయ్తెసా.

19

యేసుక సిలువ గల్లి రిసా సిచ్చ కెర్లిసి

1 జలె, పిలాతు తెదొడి కిచ్చొ కెర్లన్ మెలె, * 'వెట్లె సాలు కిచ్చొగె' మెన ఉచర, కొర్లల్ తెన్ పెటయిలన్.

2 ఒత్త తెంతో, నయన్సుమ్ సుదల్ సగుమ్జిన్, యేసుక 'మేడచి తెడి కడ నా కెర, ఆరి కొంకడ్లి రితి 'రాన్' మెన కంటకంపల్ తెన్ ఏక కిరీటుమ్ గంచ, జోచి బోడితె గల, † ఉడ రంగుచొ పాలుమ్ జోక గల దా తెయార్ కెర,

3 పాసి జా జొకర, "యూదుల్చొ రానొ, తుక జెయ్య!" మెన మొక్కె పెట్ట.

4 తెదొడి, యూదుల్చ వెల్లెల మాన్సుల్ తిలిన్తె పిలాతు అన్నె బార్ జా, జోవయింక "ఓదె, జో కిచ్చొ నేరిమ్ నే కెర్లి రితి అంక డీస్తయ, చి జెయ గుర్తుక, తుమ్మక రుజ్జు దెకయ్తి రితి, తుమ్మ తిలిన్తె ఆవ్ జోక బార్ కెర్లిసి" మెన సంగితికయ్,

5 కంట కంపల్చి కిరీటుమ్ జోచి బోడి తతె, ఎరన పాలుమ్ జో గలన తతె, యేసుక బార్ కెర్లి, చి "ఈందె జో మాన్సు!" మెన, పిలాతు దెకయ్లన్.

6 యేసుక దెకిల్ బేగి, వెల్లెల పూజర్లు చి దేముడుచి గుడిచ నయన్సుమ్ సుదల్ కిసి జల మెలె, "జోక సిలువతె గల మొర్తి సిచ్చ కెరు! సిలువతె గలు!" మెన ఒర్పుల. జేవ్ దస్సి జతికయ్, "తుమి కడన సిలువతె గల! ఈంజో కిచ్చొ నేరిమ్ నే కెర్లి రితి అంక డీస్తయ. జా పూచి నెసి!" మెన పిలాతు సంగిలన్.

7 యూదుల్చ వెల్లెల మాన్సుల్ జోక కిచ్చొ జబాబ్ దిల మెలె, "అమ్క దేముడు మోసి తెన్ దిలి ఆగ్గుల్ అస్సె. జా ఆగ్గు కిసిచి మెలె, అమ్చ దేముడు తెన్ కో జలెకు సమ్మందుమ్ సంగన్లె, 'వెల్లి పాపుమ్ కెర అస్సె' మెన, జో మాన్సు మొర్తి సిచ్చ జంక అస్సె. ఈంజో, జలె, 'దేముడుచొ పుత్తుసి ఆవ్' మెనన, జయ్యి పాపుమ్ కెర అస్సె, చి మొర్తి సిచ్చ జో జంక అస్సె!" మెన వెల్లెల మాన్సుల్ సంగిల.

పిలాతు యేసుక అన్నె పరిచ్చ కెర్లిసి

8 పిలాతు, జలె, జేవ్ కొజొ సూన, బలె ఏబియం గెచ్చ, యేసుక అన్నె కడన,

9 జా మేడచి తెడి అన్నె పెన, జోక, "తుయి కేన్ తెంతో అయ్లది?" మెన వుసెలన్. గని యేసు తుక్లె తా జబాబ్ దెయె నాయ్.

10 తుక్లె తతికయ్, పిలాతు జోక, "తుయి కిచ్చొక అంచి తెన్ లట్టబ్బి నాయ్? తుక విడ్డల్ కెరుక జవున్, నెంజిలె మొర్తి సిచ్చ దా సిలువతె గలుక జవున్, అంక అదికారుమ్ అస్సె మెన తుయి నేన్సి గే?" మెన సంగిలన్.

11 జో దస్సి సంగితికయ్, యేసు జోక కిచ్చొ జబాబ్ దిలన్ మెలె, "జా అదికారుమ్, జలె, దేముడు తుక దెతో నాయ్, జలె, అంచి ఉప్పిరి తుక కిచ్చొ అదికారుమ్ తత్తి నాయ్. గని, తుయి ఇన్నె ఏలువ కెరుక నాయిమ్. జాకయ్, తుయి అప్పె కెర్లిన్చి పాపుమ్ తొక్కి. తుచి అత్తి అంక సొర్పు కెర్లనచి పాపుమ్ ఒగ్గరి!" మెన పిలాతుక యేసు సంగిలన్.

యూదుల్చ అత్తి పిలాతు యేసుక సొర్పు కెర్లిసి

§ 18:39 18:39 పూర్ణమ్ పొది యూదుల్ ఇగుప్పు దేసిమి తా గొతిమాన్సుల్ జలిన్ తెంతో ఎత్తి అదికారుమ్ తిలో దేముడు విడ్డల్ కెర్లిసి ఏద కెర్లి రిసా యూదుల్ ఈంజ పస్కా పండుగు కెరల. ఈంజయి వెర్సి యేసు పాపల్ తెంతో విడ్డల్ కెర్లిసా జయెదె మెన నేన్తి. * 19:1 19:1 లూకా 23:16, 22క దెక. † 19:2 19:2 మత్తయి 27:27, మార్కు 15:16. ‡ 19:2 19:2 ఎరన చి సిలిమ్ రంగు జెదయెలె, ఉడ రంగు జయెదె. సార్ రంగు, § 19:8 19:8 పిలాతుచొ అదికారి జలొ రోమ్ దేసిమ్చొ కైన్ రాన్, జలె, ఎత్తి, అదికారుమ్ తిలో దేముడుక సమ్మందుమ్ సంగితయ్ కి, చి 'జేక అమ్చి రోమ్చి అదికారుమ్చి ఉప్పిరి అన్నె విరోదుమ్ దెకవుల' మెన, 'అంక కి జా విరోదుమ్ దెకవుల' మెన జో పిలాతు బియె తయెదె.

12 తెదోడి, యేసుక విడ్డల్ కెరుక మెన పిలాతు ఇస్టుమ్ జా, యూదుల్చ వెల్లెల మాన్సుల్ తిలిన్తె అన్నె బార్ జా, జోవయింక సంగిలన్, గని జేవ్ పిలాతుక కిచ్చొ మెన బియడ్ల మెలె, “ఎక్కిలో ‘రానో’ మెనన్లె, జో తువో అదికారి జలో రోమ్ దేసిమ్చొ *కైసర్ రానోక యుద్దుమ్ కెర్లె రితి జయెదె, చి దసా మాన్సుక తుయి విడ్డల్ కెర్లె, కైసర్క విరోదుమ్ జలో” మెన తుచి రిసా కి నేరిమ్ వయడుక జయెదె” మెన పిలాతుక బియడ్ల.

13 జేవ్ కొడో సంగ పిలాతుక దస్సి బియడ్డికయ్, ఒత్త జేవ్ తిలిన్తె పిలాతు యేసుక అన్నె బార్ కెరవ, మేడచి పురెచి నద్రె తిలి తీర్పు కెర్లె టాన్తె వెసిలన్. నద్దుర్క ‘గబ్బుతా’ మెన యూదుల్చి ఎబ్రి బాస తెన్ సంగుల.

14 ఈంజ కెయ్ జర్గు జలి మెలె, యూదుల్చి పస్కా వండుగకచి సెలవ్ కడన్లె తెయారొ కెర్లె అగ్గె దీసి, పాసి పాసి మెద్దెన్. పిలాతు, జలె, యేసుక అన్నె దెకవ, “అల్లె, తుమ్చొ రానో, ఈంజో!” మెన యూదుల్చ వల్లెల మాన్సుల్క సంగిలన్.

15 జేవ్, “జోక అమ్చొ రానో మెంతసి గె? జో గెన్ను! మొర్పు! సిలువతె గలు!” మెన ఒర్పిల. జేవ్ దస్సి జతికయ్, పిలాతు జోవయింక అన్నె, “తుమ్చొ రానోక ఆవ్ సిలువతె గల మారుక గే?” మెన జోవయింక కొంకడ్లన్. చి వెల్లెల పూజర్లు కిచ్చొ మెల మెలె, “ఎక్కి కైసర్ అమ్క రానో. అన్నె కో నాయ్!” మెన సంగిల.

16 జేవ్ దస్సి సంగితికయ్, యేసుక సిలువతె గల మొర్పి సిచ్చ కెర్లె సెలవ్ దా, జోక జోవయింక అత్తి పిలాతు సార్పు కెర దిలన్. తెదోడి జమాన్సు యేసుక దెర నిల.

యేసుక సిలువతె గల మార్పిసి

(మత్త 27:32-44; మార్కు 15:21-32; లూకా 23:26-43)

17 తెదోడి, సిలువతె గల మారుక మెన, యేసుక దెర్ల, చి జోక గల్లి సిలువ జోయ్యి వయన బార్ జా, ‘గల్లోతా’ మెలి మెట్టయ్ ఉట్టు గెల. ఎబ్రి బాస తెన్ జా నావ్చి అర్దుమ్ కిచ్చొ మెలె, ‘గిడ్డి పోలికచి టాన్’.

18 ఒత్త, జా †సిలువతె జోక గల, జోచి ‡అత్తొవట్టొతె మేకుల్ పెట, సిలువతె టీవడ రోవిల. యేసుచి సిలువ నెడిమి రోవ, జోచి డెబ్రి పక్క ఎక్కిలోక, ఉజెతో పక్క అన్నెక్కోక, దోగుల చోర్లక కి దన ఎక్కెక్ సిలువల్తె గల, దస్సి టీవడ.

19 ‘యేసుచి సిలువచి బోడి గల’ మెన పిలాతు ఏక్ దార్పిగండతె రెగ్గయిలన్. కిచ్చొ రెగ్గయిలన్ మెలె, “నజరేతు గచ్చ్యెచొ యేసు, ఈంజో యూదుల్చొ రానో జయెదె” మెన రెగ్గయిలన్.

20 యేసుక సిలువతె గలిలి టాన్, జలె, యెరూసలేమ్ పట్టుమ్చి పాసిచి రిసా, యూదుల్ ఒగ్గర్జిన్ జా వాట్ గెచ్చుక జెంక జతె తిల, చి జా దార్పిగండతె కొడో నదు కెర్లె. తిన్నీ బాసల్ తెన్ కి పిలాతు జా దార్పిగండతె రెగ్గవ తిలో, జోవయింక సొంత ఎబ్రి బాస తెన్ కి, రోమ్ దేసిమ్చి లాటిన్ బాస తెన్ కి, పడ్డొ ఒగ్గర్ బియ్యారి కెర్లె గ్రీకు దేసిమ్చి గ్రీకు బాస తెన్ కి, రెగ్గవ తిలన్. దస్సి తిలె, కో అయెలె కి అర్దుమ్ కెరనుల, గెద్.

21 చి ‘జా దార్పిగండ దెకితన అమ్క ఆఁసుల’ మెన యూదుల్చ వల్లెల మాన్సుల్క లాజు, కోప్పమ్, చి రిసా, జోవయింక వెల్లెల పూజర్లు పిలాతుతె గెచ్చొ, “ ‘యూదుల్చొ రానో జయెదె’ మెన రెగ్గడుక కిచ్చొక? జా పోసి, గని ‘యూదుల్చొ రానో ఆవ్ మెన ఈంజో మాన్సు సంగణ్’ మెన రెగ్గడు!” మెన పిలాతుక సంగిల.

22 గని పిలాతు, “ఆవ్ రెగ్గయిలిసి ఆవ్ రెగ్గవ అస్సి. దస్సి తవుసు” మెన, మార్పుప కెరె నాయ్.

యేసువ పాలల్ సయ్యమ్ సుదల్ వంటన్నిసి

23 సయ్యమ్ సుదల్, జలె, యేసుక సిలువతె గల టీవడ్డి పడ్డొ, జోచ పాలల్క చెత్తర్ వాటల్ కెర, వంటన్ల. జోచి దిగిల్ సొక్క కి తిలి, గని కుటు నెంతె వీంస్ పాలుమ్ జా, చి దస్సి వంటుక నెంజిలి.

* 19:12 19:12 ‘కైసర్’ నెంజిలి ‘వెల్లో రానో’ మెనుల. ‘సిజరు’ మెలె, ఇంగ్లీస్ తెన్ బెదితి కోడు, ‘కైసర్’ మెలె, గ్రీకు బాస తెన్ బెదితి కోడు, ‘వెల్లో రానో’ మెలె, తెలుగు తెన్ బెదితి కోడు. † 19:18 19:18 ‘సిలువ’ కిసి తయెదె మెలె, ఏక్ టీవెతి చి ఏక్ అర్దుమ్ జతి దొన్నె డేడివె రితె డండల్ బెదవుల. జా సిచ్చ జతొ మాన్సుక జా సిలువతె ఎంగ్లవ కెర, జోవయింక అత్తొ వట్టొ చంపా కెరవ అత్తొవట్టొ మేకుల్ పెట, నెంజిలి వాలివె తెన్ బంద, సిలువ బుయ్యె టీవ రోవ కెర, దస్సి ములుల. జో సిచ్చ జతొసా దస్సి ఒడొయ్ జా మొరెదె. ‡ 19:18 19:18 యోహాను 20:20, 25. లూకా 24:39.

24 జాక, “జా పాలుమ్ చిరుక పోని. చీటి గలుమ, చి కక్క సేడెదె గే, దెకుమ” మెన చీటి గలిల. కిచ్చొక ఇసి జర్గు జలి మెలె, దేముడు పూర్ణుమ్ రెగ్గయేలి కోడు నెరవెర్పువ జంకయ్ ఇసి జలి. “అంచ పాలల్ వంటనుల, చి అంచొ ఏక్ పాలుమ్క చీటి గలుల” మెన రెగిడ్డి కోడు.

25 నయన్యుమ్ సుదల్, జలె, యేసుచ పాలల్క ఆన జా దస్సి కెర్ల, గని యేసుచి అయ్యుసి, వడ్డొ క్కోవ మెలో ఎక్కిలోచి తేర్పి మరియ, యేసుచి అయ్యునచి అప్పుసి జయెదె, యేసుక పెద్దయసి జయెదె, వడ్డొ మగ్గల పట్టుమ్చి మరియ కి, జేవ్ తేరిబోదల్ యేసుచి సిలువచి పాసి టీవఁ అన్సి.

26 జలె, యేసు అయ్యునక దెకిలన్, చి జో ఒగ్గర్ ప్రేమ కెర్లొ సిస్సుడు కి బత్త టీవ అన్సి మెన దెకిలన్, చి జో సిస్సుడుక దెకవ అయ్యునక “ఓదె, తుచొ పుత్తుది!” మెన నంగ,

27 అయ్యునక దెకవ, జో సిస్సుడుక “ఈందె, తుచి అయ్యుది!” మెన నంగిలన్. జాక జయి గడియ తెంతో జో సిస్సుడు దెకిత్ తంక మెన, సార్ప కెర దిలో, చి జయి గడియ తెంతో జో సిస్సుడు జాక గెరి కడన, ‘అయ్య’ మెన జాక పోసిలో.

యేసు మొర గెలిసి

(మత్త 27:45-56; మార్కు 15:33-41; లూకా 23:44-49)

28 తెదొడి ‘అంచి కామ్ ఎత్తి కేడ గెలి’ మెన యేసు జానన, “అంక తాన్ కెర్లయ” మెన నంగిలన్. ఇన్నెతెన్ కి, దేముడు పూర్ణుమ్ రెగ్గయేలి కోడు నెరవెర్పువ జలి.

29 జలె, బత్త ఏక్ తప్పలయ్ అమ్డి ద్రాచ రస్సుమ తిలి, చి ఏక్ బూంజ రితిసి జా రస్సుమ్తె బుడ్డవ కెర, ఏక్ రివ్వతె దెరవ కెర, యేసు చుప్పిర్ రితి బత్తవ నయన్యుమ్ సుదల్ చంపొ కెర్ల.

30 జలె, యేసు జా రస్సుమ్ చుప్త కెర, “⁵అంచి కామ్ పూర్తి జలి” మెన నంగ, బోడి వంపొ కెర, జోచి ప్రానుమ్ దేముడు అబ్బొనచి అత్తి సార్ప కెర దా, మొర గెలన్.

31 జా దీసి తెయార్ జతి దీసి. అన్నెక్ దీసి, సెలవ్ కడన్లి దీసి, ‘మొర్ పీనుములు సిలువల్తె తా గెలె గారు’ మెన, ‘బేగి మొర్తి చి అగ్గయ్ ఉత్తవ వెంట గెలుక జయెదె’ మెన, యూదుల్వ వెల్లెల మాన్సుల్ పిలాతుతె గెచ్చ కెర, “సిలువల్తె గెలిలనవ చట్టో బగయ్తు, చి పీనుమ్లక ఉత్తవ దా బేగి వెంట గెల్తు” మెన సెలవ్ నజీల, చి పిలాతు సెలవ్ దిలన్.

32 జాకయ్, నయన్యుమ్ సుదల్ గెచ్చ కెర, తోలితో ఎక్కిలోచి వడ్డొ అన్నెక్కిచ, యేసు తెన్ బెద సిలువల్తె గలిల దొగుల చోర్లుచ చట్టో బగవ గెల.

33 గని, యేసుతె అయ్లె, ‘నాయ్, అగ్గయ మొర గెచ్చ అస్సె’ మెన దెక, జోక చట్టో బగయితి నాయ్.

34 గని, జోవయింతె ఎక్కిలో యేసుక ఈంటె తెన్ వక్కయ్ బూసిలన్. బూసిల్ బేగి, లోయి కి పాసి కి నూయి జలి.

35 తుమ్ ఈంజ నదు కెర్లన కి నూనీతన కి, తుమ్క ‘జేవ్ కి పూర్తి నంపజతు’ మెనయ్ జా ఎత్తి. * దెకిలోనా జోచి సాచి నంగ అస్సె. జో నంగిలి సాచి సత్తిమ్, చి ‘సత్తిమ్’ మెన జో కచితుమ్ జానె.

36 ఈంజ కిచ్చొక ఇసి జర్గు జలి మెలె, ఇన్నెతెన్ దేముడు పూర్ణుమ్ రెగ్గయేలి కోడు నెరవెర్పువ జలి.

“జో అర్పితుమ్ జలొనాతె కేన్ ఆడు కి బగయితి నాయ్”

మెన రెగిడ్డి కోడు, చి

37 “జేవ్ బూసిలోసాక జేవ్ దెక ఉచరుల”

మెన అన్నెక్ కోడు అస్సె.

యేసుచి పీనుమ్ మెన్సునతె ఎంగ్గవ దిలిసి

38 యూదుల్వ వెల్లెల మాన్సుల్తె ఎక్కిలో, అరిమతయ్ మెలి గెచ్చొచొ యోసిపు మెలోసా, జో, జలె, యేసుచ సిస్సుడు, గని అన్నె వెల్లెల మాన్సుల్క బియఁ కెర, ఎదార్దుమ్ ఒప్పన నాయ్. లుంకచోర్ యేసుక

§ 19:30 19:30 జో ఈంజ లోకుమ్తె బల బల దేముడు అబ్బొనచి ప్రేమ అదికారుమ్ దెకుయేన్చి కామ్ ఇన్నెతెన్ కేడ్డి, గని అన్నె కిచ్చొ ముక్కిమ్చి జోవయింతె కామ్ ఇన్నెతెన్ కేడ్డి మెలె, జో పావల్ గెచ్చయేతి దొర్పు జలి అర్పితుమ్ జలిసి, వస్సా వండుగవో మెండప్పిల్లె జలిసి.

* 19:35 19:35 ‘జా ఎత్తి దెకిలోనా’ మెన ఏక్ వేల ఈంజ పుస్సుకుమ్ రెగిడ్డి యోహాను సొంతచి రిసా నంగితయ్.

సిస్సుడ రితో జా అస్సె. జో, జలె, అస్సె వురై జా పిలాతుతె గెచ్చు కెర, “యేసుచి పీనుమ్ కావలె. దెర గెచ్చుమదే” మెన నంగితికయ్, పిలాతు నెలవ్ దిలో, చి పీనుమ్ దెర గెచ్చుక మెన, నిలువ తిలిన్తె అయ్లో.

³⁹ అన్వెక్టో కి అయ్లో. కొన్నె మెలె, నీకొదేమొ మెలో పరిసయ్యుడు. యేసుచి బోదన నూనుక మెన, ఒగ్గర్ అగ్గెయ్ రాతి, లుంకవోరు యేసుతె జా తిలోసా జోయ్యి. జో, జలె, అస్సె ఒగ్గర్ విలువ తిలి వాసెన సామన్ దెరన అయ్లో. జా వాసెన సామన్ కెడ్డి జాడుచి మెలె, పాసి పాసి యాబయ్ కెజిల్ చి జాడు.

⁴⁰ జేవ్ దొగుల, జలె, యూదుల్ కెర్రి అలవాట్ కెర, వెల్లో గండల్ విలువ బట్టు తెన్ జా వాసెన సామన్ బెదవ బెదవ, పీనుమ్క గుడియవ బందిల. పీనుమ్క దస్సి తెయార్ కెర మెస్సె వయ్ నిల.

⁴¹ యేసుక నిలువతె గలిలి టాన్చి పాసి, జలె, ఏక్ తోట అస్సె. జా తోటతె సాప్రయ్ డొల్మి కెర్రి గది తిలి రితి నొవి మెస్సెన్ అస్సె. కక్క, నే రోవెలిసి.

⁴² నెలవ్ కడస్సి దీసిక చి పండుగు దీసిక జా దీసి తెయార్ జతి దీసి రిసా ‘దూరి వయ్యుక గారు’ మెన యూదుల్ నంగులచి రిసా, జా మెస్సెన్ పాసి తతికయ్, యేసుచి పీనుమ్ ఒత్తయ్ తెడి ఎండ్లవ దిల.

20

మెస్సెన్ డంపితి పత్తురు ఒస్సుల్ జా తిలిసి
(మత్త 28:1-10; మార్కు 16:1-8; లూకా 24:1-12)

¹ యేసుక విరోదుమ్ సుదల్ మార తిర్తత్క, * అయ్తర్ దీసి పెందలె, మగ్గల పట్టుమచి మరియ మెస్సె అయ్లి. అయ్లె, కిచ్చి దెకిలి మెలె, సాప్రయ్ డొల్మి కెర్రి మెస్సెన్క డంక తిలో పత్తురు కీసి గే ఒస్సుల్ జా అస్సె.

² ఇసి జా అస్సె మెన దెక, బమ్మ జా, సీమోను పేతురు చి యేసు ఒగ్గర్ ప్రేమ కెర్రి జో అన్వెక్టో సిస్సుడు దొగుల ఎక్కితె తిలిన్తె మరియ నిగ గెచ్చు, “యేసు ప్రబుచో పీనుమ్ మెస్సెన్ తెంతో ఉక్లన అస్సి, చి జోక కేనె అన్నె ముల దా అస్సి గే నేనుమ్” మెన జోపయ్యుక నంగిలి.

యేసు జీవ్ జా ఉట్టెన్చి రుజ్జు అయ్లిసి

³ జా మరియ దస్సి నంగితికయ్, పేతురు, జో అన్వెక్టో సిస్సుడు మెస్సె గెచ్చుక మెన బార్ జలె.

⁴ జేవ్ దొగుల నిగ గెలె, జో అన్వెక్టో సిస్సుడు బేగి నిగ, పేతురుచి కంట తొలితో మెస్సె పావెలన్.

⁵ ఈంజొ తొలితో పాచ, వంపొ జా తెడి ఒయర దెకిలె, రితయ్ బట్టు గండల్ ఒత్త నేడ అస్సి మెన దెకిలన్, గని తెడి పెనె నాయ్.

⁶ తెదొడి, జోవయింబి పడ్డి సీమోను పేతురు నిగ జా పావెలన్, చి మెస్సెన్ తెడిక పెసెలన్. రితయ్ బట్టు గండల్ ఒత్త నేడ అస్సె.

⁷ చి జేవ్ గండల్క ఇదిల్ దూరిక, యేసుచి బోడి బంద తిలి బట్టు గండ, గుడియయ్ జలి రితి జా, అజ నేడ అస్సె.

⁸ తెదొడి, జో అన్వెక్టో సిస్సుడు కి, మెలె, మెస్సె తొలితో పావెలొసా, మెస్సెన్ తెడి పెన దెక, యేసుక ‘జీవ్ జా ఉట్టె అస్సె’ మెన, నంపజలన్.

⁹ యేసుక “మొర జీవ్ జా ఉట్టుక అస్సె” మెన అగ్గెయ్ తెంతో దేముడు రెద్దవ తిలిసి సిస్సుల్ తెదొడి ఉచార అర్దుమ్ కెరనుక నేతయ్.

¹⁰ జలె, దెక కెర, యేసుక ‘జీవ్ జా ఉట్టె అస్సె’ మెన నంపజా, జేవ్ దొగుల సిస్సుల్ జోపయ్యువ గెరలె ఉట్టె గెలె.

మగ్గల పట్టుమచి మరియక యేసు డీసిలిసి
(మార్కు 16:9-11)

¹¹ మదెనె మగ్గల పట్టుమచి మరియ, ఏడ ఏడ మెస్సెచి బయిలె టీచ అస్సె. తెదొడి, ఏడ ఏడ, మెస్సెచి తెడి ఒయర్చి రిసా వంపొ జలి.

* 20:1 20:1 నత్తు పొదుల్తె అగేచి దీసి

12 ఒయ్యరై, కిచ్చొ దెకిలి మెలె, చొక్కెల పాలల్ గలన తిల దొగుల దూతల్ యేనుచి పీనుమ్ అగ్గె ఎంగ్గ తిలిన్తె దెకిలి. యేనుచి బోడి అగ్గె తిలిన్తె ఎక్కిలో, చట్టొ అగ్గె తిలిన్తె ఎక్కిలో వెన అన్సి.

13 ఈంజేవ్ జాక “అమ్మ, కిచ్చొక ఏడ్డసి?” మెన సంగిల. చి జా జోవయింక “అంచొ ప్రబుక దెర గెచ్చు అన్సి, చి జోక కేనే అన్నె ముల దా అన్సి గే నేని” మెన సంగిలి.

14 దస్సి మెన సంగ, కీసిగె వడ్డొ పసిలి, చి యేను ఒత్తయ్ బీవ్ తిలిసి దెకిలి. గని ‘జొయ్యి’ మెన చినుక నెత్త గెలి.

15 యేను జలె, జాక “అమ్మ, కిచ్చొక ఏడ్డసి? కక్క చజితసి?” మెన సంగిలన్. జా, జోక ‘తోట రూకుల్ పొస్తాసా’ మెన ఉచర, జోక “బాబు, తూయి జలెకు జోక ఉక్కుల వేరతె నిలది జలె, జోక కేనే ముల దా అన్సిన్ గే, అంక సంగు, చి అవ్ జోచి పీనుమ్ దెర గెచ్చు రోవిందె” మెన సంగిలి. సంగితికయ్,

16 యేను జాక “మరియి!” మెన, ఎక్కి జాచి నావ్ సంగిలన్. సంగిల్ బేగి జా, జోక చిన పసుల, “రబ్బీసి!” మెన సంగిలి. అరమయ్ బాసతె ‘రబ్బీసి’ మెలె, ‘గురు’ మెలి అద్దుమ్ తయెదె.

17 యేను, జలె, జాక, “అంక చడు నాయ్. అవ్ అన్నె దేముడు అబ్బొతె వెగ గెచ్చుక నేతయ్. గని, తుయి కిచ్చొ కెరుక జయెదె మెలె, అంచ బాపుడ్డు జల అంచ సిస్సుల్తె గో, చి పరలోకుమ్ తిలో తుమ్చొ దేముడు తుమ్చొ అబ్బొది జలొ అంచొ దేముడు అంచొ అబ్బొతె అవ్ ఉట్ట గెతసి మెన యేనుప్రబు సంగిలన్ మెన సంగు” మెన, జాచి అత్తి జోచ సిస్సుల్తె కబుర్ తెద్రయ్లన్.

18 జాకయ్, మగ్గల పట్టుమ్చి జా మరియి, యేనుచ సిస్సుల్తె గెచ్చు, “యేనుప్రబుక దెక అన్సి!” మెన సంగ, జో సంగిలి కబుర్ ఎత్తి జోవయింక సంగిలి.

యేను జోచ సిస్సుల్తె డీసిలిసి

19 జా దీసి నంజె, సత్తరెక్క తొల్లి దీసి, మెలె యేను జివ్ జలి జా †అయితర దీసి నంజె, సిస్సుల్తె ఎక్కితె బెర తిల. గని యూదుల్చ వెల్లెల మాన్సుల్క బియఁ కెర, కెప్పొ డంపన లుంకిల్ రితి తిల. జేవ్ దస్సి బిలి రితి జా ఒత్త కెప్పొ డంపన తతికయ్, యేను జా కెర, జోవయించి నెడిమి బీవ, “తుమ్క సేంతుమ్ తవును!” మెన ఉంక్రయ్లన్.

20 దస్సి ఉంక్రవ కెర, ‘అచ్చొ’ మెన దెకయ్తి రిసా, సిలువతె గలిలి పొది మేకుల్ అత్తితె పెట్టినచి మచ్చల్, పక్కయ్ బూసిలిన్చి మచ్చు, జోవయింక దెకయ్లన్, చి జేవ్, ‘యేనుప్రబు’ మెన జోక చిన, సద్దసంతోసుమ్ జల.

21 యేను, జలె, జోవయింక అన్నె, “అంచి సేంతుమ్ తుమ్చి పెట్టి తవును. పరలోకుమ్ తిలో దేముడు అబ్బొ ఈంజ లోకుమ్తె అంక కీసి తెద్రయ్లన్ గే, దస్సి ఈంజ లోకుమ్చ మాన్సుల్తె తుమ్క అవ్ తెద్రయ్తసి” మెన సంగిలన్.

22 ఇసి సంగ కెర, జోవయించి ఉప్పిరి పుజ దా, “దేముడుచి సుద్ది తిలి అత్త తుమ్క అవ్ దెతసి. నజనా.

23 కవ పాపల్ తుమ్ చెమించువ కెరై గే, చెమించువ జా అన్సి. కవ పాపల్ చెమించువ నే జతి రితి తుమ్ కెరై గే, జా పాపుమ్ జోవయింక తయెదె” మెన సంగ యేను ఉట్ట గెలన్.

24 యేను జా సుట్టు సిస్సుల్తె డీసిలిసి, జలె, ‘కల్వొతె జెర్లిలోసా’ మెన అసిమ్ నావ్ తిలో తోమా మెలోసా ఒత్త నాయ్.

25 చి జో తెన్ దస్సుల్ జలి పొది “యేనుప్రబుక దెకిలమ్!” మెన తిల సిస్సుల్తె సంగిల. గని, తోమా జోవయింక, “జో జివ్ జా తిలె, అంక రుజ్జు దెకాయితు. జోచ అత్తితె దెకిలె, ఒత్త మేకుల్ పెట్ట మచ్చల్ తిలెకయ్, జేవ్ మచ్చల్ అవ్ చడ దెకిలెకయ్, పడ్డొ జేవ్ జోక పక్కయ్ బూసిలిన్ తెడి అవ్ సొంత ఆతు గల దెకిలెకయ్, ‘జొయ్యి’ మెన నంపజయిందె” మెలన్.

26 జలె, ఒత్త తెంతో అన్నె అట్టు పొదుల్ గెతికయ్, యేనుచ సిస్సుల్తె జా గెరి అన్నె అన్సి. గని, ఈంజ సుటు తోమా కి జోవయింతెన్ అన్సి. జా సుట్టుచి రితి జేవ్ కెప్పొ డంపన తిలె కి, యేను జా జోవయించి నెడిమి బీవ, జోవయింక “తుమ్క సేంతుమ్ తవును!” మెన ఉంక్రయ్లన్.

27 తెదొడి, తోమాక దెక, “తుచి ఊంటి చంప కెర, అంచ అత్తో చడ దెకు! తుచి ఆతు చంప కెర, అంచి పక్కయ్ బూనిలినిచి తెడి గల దెకు! అన్యాయమ్ జా నాయ్. నంపజా దయిరిమ్ జా!” మెన, యేసు జోక సంగిలన్.

28 తోమా సర్దసంతోసుమ్ జా, “అంచొ ప్రబు, అంచొ దేముడు!” మెన పూర్తి నముకుమ్ జా సంగిలన్.

29 జాకయ్ యేసు జోక, “అంక దెకిలి రిసా తుయి నంపజలది. అంక నే దెకిలికి కో అంక నంపజవుల గే, జోక చెంగిలి!” మెన సంగిలన్.

30 ఇన్నె రెగిడ్లసచి కంట, జోచి అదికారుమ్ దెకయ్త వెల్లెల కమె ఒగ్గరి యేసు జోచ సిస్సుల్చి మొక్కె కెర్లన్, గని మొత్తుమ్తె ఎత్లయి రెగ్ల అస్సి.

31 ఈంజేవ్, జలె, కిచ్చొక రెగ్ల అస్సి మెలె, యేసుక ‘నిజామి దేముడు తెద్రయ్లో రచ్చించుప కెర్తొసా క్రిస్తు జో’ మెన తుమ్క ‘నంపజతు’ మెనయ్ రెగ్ల అస్సి. తూమ్ కి నదు కెర్లన సూన్తన నంపజలె, తూమ్ కి యేసుప్రబుచి దయచి రిసా జోచి జీవ్క జియ, పరలోకుమ్చి రాజిమ్తె బెదితె.

21

యేసు సిస్సుల్క అన్నె డీసిలిసి

1 యేసు సిస్సుల్క డీస అన్నె సగుమ్ దీసల్ గెలి పడ్డె, తిబెరియ సముద్రుమ్తె, మెలె గలిలయతెచి సముద్రుమ్ రితి గడ్డె, జోచి సిస్సుల్ సగుమ్జెన్ తతికయ్, యేసు జోవయింక అన్నె డీస జో జీవ్ జలిన్క జోచి అదికారుమ్క రుజ్జు దెకయ్లన్. ఇసి జర్గు జలి.

2 ఏక్ దీసి, సీమోసు పేతురు, ‘కల్వల్తె జెర్మిలోసా’ మెన ఆసిమ్ నావ్ తిలో తోమా, జా గలిలయ ప్రాంతుమ్చి కానా గవ్విచొ సతనియేలు, జెబెదయి మెలోసాచ దొగుల పుత్తర్పుల్, చి అన్నె దొగుల సిస్సుల్, మొత్తుమ్ సత్తుజిన్, ఎక్కితె తిల, చి

3 “ఆవ్ మొస్సు దెరుక గెతసి” మెన సీమోసు పేతురు సంగ బార్ జంక దెర్తికయ్, తిల సిస్సుల్ “ఆవ్ కి బెద జెమ్దె!” మెన సంగిల. జేవ్ ఎత్తిజిన్ బార్ జా, జోవయింబి దోనితె వెగ, మొస్సు దెరుక గెల. గని జయి రాతి ఎక్కి మొస్సా కి దెర్తి నాయ్.

4 గని, రాత్ పయితె తతికయ్, ఒత్త ఒడ్డుతె యేసు బీడ అస్సి. గని ‘యేసు’ మెన సిస్సుల్ చినితి నాయ్.

5 జో, జలె, జోవయింక కేక్ గల, “ఒ గోతుసుదల్, మొస్సు దెర అస్సున్ గి?” మెన పుసిలన్. చి “నాయ్, బాబు, కిచ్చొయ్ నాయ్!” మెన జబాబ్ దా కేక్ గల.

6 యేసు, జలె, జోవయింక కిచ్చొ సంగిలన్ మెలె, “దోనిచి ఉజెతో పక్కయ్ వల గల, చి దొర్పు జవుల!” మెన కేక్ గలన్, చి జో సంగిల్ రితి జయ్యి పక్క వల గలిల. గలిలె, ఎత్తివాల్ మొస్సు బెర తిలి రిసా వల కడుక నెత్తిర్.

7 దస్సి జతికయ్, యేసు ఒగ్గరి ప్రేమ కెర్తొ సిస్సుడు జోక చిన కెర, “అమ్చొ యేసుప్రబు, జో!” మెన పేతురుక సంగిలన్. జోక ‘అమ్చొ యేసుప్రబు’ మెన సీమోసు పేతురు స్సూన్ల బేగి, కావచి రిసా జో కడ తిలి సొక్క అన్నె గలన, సముద్రుమ్తె డేవ, యేసుతె గెలన్.

8 గని, తిల సిస్సుల్ దోనితె తా, మొస్సు బెర తిలి వల ఒగ్గోడ ఆన, పడ్డె అయిల. ఒగ్గరి దూరి జెంక నాయ్. ఒడ్డు తెంతో పాసి పాసి ఎక్కి పుంజెక్ గజాలు దూరి తిల.

9 జలె, ఒడ్డుతె అయిలె కిచ్చొ దెకిల మెలె, ఒత్త మెసి బొగుల్చి ఆగి తిలి, చి ఆగితె మొస్సు సిజెతె తిల. పోడియె కి తిల.

10 తెదొడి యేసు జోవయింక “తుమ్ అప్పె దెర్ల మొస్సు సగుమ్ ఆన” మెలన్,

11 చి సీమోసు పేతురు దోనితె అన్నె వెగ, వల ఒడ్డుతె ఒగ్గోడ అస్సన్. అన్నె వెల్లెల మొస్సు బెరయ్ అస్సి. కెత్తి మెలె, పుంజెక్ యాబయ్ తిన్నె వెల్లెల మొస్సు. గని, ఎత్తివాల్ తిలె కి, వల చిరి జయె నాయ్.

12 “అల్లె, కంక జా,” మెన యేసు సిస్సుల్క బుకార్లన్. జేవ్ సిస్సుల్తె జలె, “తుయి కో?” మెన కో కి జోక పుసుక దయిరిమ్ నాయ్. జోక ‘యేసుప్రబు’ మెన జాన్తి.

13 జేవ్ దస్సి ఇదిల్ బితె తతికయ్, యేసు పురె జా, పోడియె వెంట, వంట దిలన్. దస్సి మొస్స కి వెంట, వంట దిలన్.

14 యేసు మొర జీవ్ జా ఉట్ట సిస్సుల్ క డీసిలిసి ఇన్నెతెన్ తివ్వెర్ జలి.

పేతురుక యేసు చెమించుప కెర్లిసి

15 జేవ్ * అన్నిమ్ కెర కేడయ్లి పడ్డె, సిమాసు పేతురుక యేసు బుకారా, ఇదిల్ దూరి కడన, జోక ఇసి మెలన్. “ఓ సిమాసు, యోహానుచో పుత్తుసి, ఇన్నెచి కంట అంక తుయి ఒగ్గర్ ప్రేమ కెర్లిసి గే?” మెన పుసిలన్. పుసిలె, పేతురు “ఒయ్యి, ప్రబు, ఆవ్ తుక ప్రేమ కెర్లిసి తుయి జాన్సి” మెలన్. యేసు జోక “దస్సి జలె, విలువ జల మెండ పిల్లల్ క చెంగిల్ అన్నిమ్ గొపుడు దొర్కు కెర్తె తతి రితి తా!” మెన సంగిలన్.

16 పడ్డె అన్నెక్ సుట్టు, “ఓ సిమాసు, యోహానుచో పుత్తుసి, అంక ప్రేమ కెర్లిసి గే?” మెన పుసిలన్. పుసిలె, పేతురు జోక అన్నె, “ఒయ్యి, ప్రబు, ఆవ్ తుక ప్రేమ కెర్లిసి తుయి జాన్సి” మెన సంగిలన్. యేసు జోక అన్నె, “దస్సి జలె, విలువ జల మెండల్ క చెంగిల్ రకిత్ రితి తుయి దెకిత్ తా!” మెన సంగిలన్.

17 తెదొడి అన్నెక్ సుట్టు కి, పేతురుక యేసు పుసిలన్. “ఓ సిమాసు, యోహానుచో పుత్తుసి, అంక ప్రేమ కెర్లిసి గే?” మెన అన్నె పుసితికయ్, “అంక ప్రేమ కెర్లిసి గే?” మెన యేసు పుసిలిసి అప్పె తివ్వెర్ జలి రిసా, పేతురు మెస్స ఒగ్గర్ దుకుమ్ జలన్, చి “ప్రబు, తుయి ఎత్తి జాన్సి. ఆవ్ తుక ప్రేమ కెర్లిసి తుయి దెకిత్సి!” మెన అన్నె సంగిలన్, చి యేసు జోక “విలువ జల మెండల్ క సరి జతి అన్నిమ్ దొర్కు కెర్లి రితి తుయి తా.”

18 “తుక ఆవ్ అన్నె కిచ్చొ కచితుమ్ సంగితసి మెలె, తుయి ఉబెడోబోద తిలి పొది, తుకయ్ తూయి తెయార్ కెరన, ఇస్టుమ్ అయ్లి రితి బుల్లి తిలది, గని తుయి మంత్రో జలె పొది కిసి జస్సె మెలె, తుచ అత్తో చంపొ కెర్తె, చి వేర సుదో తుక తెయార్ కెరెది. చి తుయి ఇస్టుమ్ నెంజిలిన్తె తుక వయ్ నెయెదె” మెన పేతురుక యేసు సంగిలన్.

19 కిచ్చొక దస్సి సంగిలన్ మెలె, పేతురు మంత్రో జలె పొది, విరోదుమ్ సుదల్ జోక † మారుల. దస్సి జయెదె మెలి గుర్తుకయ్ యేసు దస్సి మెలన్. జలె, ఒత్త తెంతో యేసు పేతురుక, † “అచి పట్టి జే!” మెలన్.

20 తెదొడి పేతురు పస్స, యేసు ఒగ్గర్ ప్రేమ కెర్లి సిస్సుడు జోచి పట్టి జెతిసి దెకిలన్. కక్క మెలె, యేసు సిస్సుల్ తెన్ ఆకర్ అన్నిమ్ కెర్లి పొది, యేసుచి గుండెతె వెల వెన తిలో సిస్సుడు. జొయ్యి, జా సుట్టు ‘తుక విరోదుమ్ సుదల్తె దెర దెతొసా కొన్నో’ మెన యేసుక పున దిలన్.

21 పేతురు, జలె, జో సిస్సుడుక దెక కెర, “ప్రబు, ఈంజొ మాస్సుక కిచ్చొ జయెదె?” మెన పుసిలన్.

22 పుసితికయ్, యేసు జోక, “ఆవ్ దేముడు అబ్బొతె పరలోకుమ్తె గెచ్చె ఈంజ లోకుమ్తె అన్నె జెతె ఎదక ఈంజొ తా గెచ్చుక అంచి ఇస్టుమ్ జలె, తుక కిచ్చొ బాద? అంచి పూచి, జా. తుచి పూచి కిచ్చొ మెలె, ఆవ్ తియార్లి కామ్ కెరుక. అంచి పట్టి జే!” మెలన్.

23 జో అన్నెక్లి సిస్సుడుచి రిసా యేసు సంగిలి జా కోడుచి రిసా సగుమ్ జన్ పడ్డె కిచ్చొ సంగితె తిల మెలె, ‘ఈంజొ అన్నెక్లి సిస్సుడు మొరె నాయ్’ మెంతె తిల. గని జో ‘మొరె నాయ్’ మెన యేసు సంగి నాయ్. ఎక్కి “ఆవ్ అన్నె జెతె ఎదక ఈంజొ తా గెచ్చుక అంచి ఇస్టుమ్ జలె, తుకయ్ కిచ్చొ బాద?” మెనయ్ సంగ తిలో.

24 ఈంజ ఎత్తిచి రిసా సాచి జలొసా, ఈంజ ఎత్తిచి రిసా రెగిడ్లొసా కొన్నొ మెలె, జొయ్యి సిస్సుడు. యేసు ఒగ్గర్ ప్రేమ కెర్లిసా. జోచి సాచి సత్తిమ్ మెన జానుమ్.

25 యేసు కెర్ల కమె అన్నె ఒగ్గర్ అస్సి. జేవ్ కమె ఎత్తిచి రిసా రెగుడుక జలె, జేవ్ కమె ఎత్తివాల్ జవులచి రిసా జోవయించి రిసా రెగిడ్లొ పుస్తకల్ ఈంజ బూలోకుమ్ దెరుక నెత్తె. తెద్దిలి.

* 21:15 21:15 యూదుల్ చివొ కతి నాయ్. ముక్కిమ్ క పోడియె కవుల. † 21:19 21:19 వేర పుస్తకల్తె కిచ్చొ అన్నె మెలె, పడ్డె పేతురుక కిసి మార్ల మెలె, జోవయింక బోడి ఎట్టొ చట్టొ ఉప్పిరి ఒడెవ సిలువతె మార్ల. ‡ 21:19 21:19 క్రిస్తుచి రితి నిదాసుమ్ ఇండితినచి కోడు, పడ్డె సిలువతె జో కి ముర్చినచి అర్దుమ్ కి ఇన్నె తయెది.

బారికుల్ కెర్ల కమొ యేసుక్రీస్తుచ బారికుల్ కెర్ల కమొ

యేసు సుద్ది తిలి ఆత్మ దెతి రిసా సంగిలిసి

1 ఓ దెయొపిలా, ఆవ్ తొలితొ రెగిడ్లి *పుస్తకుమతె కిచ్చొచి రిసా రెగిడ్లయ్ గే జాన్సి. యేసు కెర్ల కమొ, యేసు కెర సికడ్లిసి రిసా రెగిడ్లిసి.

2 మొదొల్ తెంతొ, యేసు పరలోకుమతె తిలో దేముడు జలో అబ్బొనెత అన్నె వెగ గెలి ఎదకచి రిసా ఎత్తి జా పుస్తకుమతె రెగిడ్లయ్. పడ్డొ, జో దేముడు అబ్బొనెత అన్నె వెగ నే గెతె అగ్గె, దేముడుచి సుద్ది తిలి ఆత్మ తెన్, జో అగ్గె నిసాన్ల సిస్సుల్క ఆడ్ర దా, జోచి †సుబుమ్ కబుర్ కామ్ జేవ్ కెర్లి రిసా, జో ఆగ్గు దా తిలో.

3 జో మొర గెచ్చ అన్నె జీవ్ జలి పడ్డొ, జా అన్నెక్ దొన్ని విసా పొదుల్చి తెడి, జో జోవయింక సగుమ్ సుట్లు డీసయ్ జా, జో అన్నె జీవ్ జలిన్క జోవయింక ఒగ్గర్ రుజ్జుల్ దెకవ, ‡దేముడుచి రాజమచి రిసా జోవయింక అన్నె సికడ్లి తిలో.

4 జేవ్ దొన్ని విసా పొదుల్చి తెడి ఏక్ సుట్లు, జోవయింతెన్ అన్నిమ్ కత్తె తా, జేవ్క కిచ్చొ ఆడ్ర దిలన్ మెలె, “తుమ్ కిచ్చొక రకుక మెలె, తుమ్ ఈంజ యెరూసలేమ్ పట్టుమ్ తెంతొ నే గెతె, ఇన్నె తా. అంచి రిసా సూన్లిసి, అబ్బొ జలో దేముడు తుమ్క దెయొందె మెన అగ్గె తెంతొ కోడు దిలిసి దొర్కు. జతి ఎద రకితె తా.

5 యోహూసు జలె, అగ్గె పానితె మాన్సుల్క బాప్తిసుమ్ దెతె తిలో, గని తుమ్క అప్పొ కిచ్చొ జర్గు జయెదె మెలె, అన్నె ఒగ్గర్ దీసల్ నే గెతె అగ్గె, జా అమ్చి దేముడుచి సుద్ది తిలి ఆత్మతె తుమ్క బాప్తిసుమ్ దొర్కు. జయెదె” మెన యేసు †జోచ సిస్సుల్క సంగిలన్.

6 యేసు సిస్సుల్ తెన్ బెద తిలి పాది, జేవ్ జోక, “*ప్రబువ, అప్పె జలె, తుచి తెడి అమ్క ఆవి ఏలువ కెరంతి రితి కెర, అమ్చి ఇస్రాయేల్ దేసిమ్క జోవయింక అన్నె దెన్తెగె?” మెన పుసిల.

7 పుసితికయ్, జోక సిస్సుల్క, “కేన్ కాలుమ్క, కేన్ సమయమ్క, కిచ్చొ జర్గు జుంక అస్సె గే, మెన ఎత్తిచి ఉప్పిరి తిలో దేముడు అబ్బొక అదికారుమతె తియ అస్సె.

8 దేముడుచి సుద్ది తిలి ఆత్మ తుమ్చి పెట్టి అయేలి మెలె, తుమ్ సెక్తి జెన్తె, అంచి రిసా సాచి జతి రితి, తుమ్ యెరూసలేమ్ పట్టుమతె, ఈంజ ఒండి యూదయ ప్రదేసిమ్తె, పడ్డొ సమరయ ప్రదేసిమ్తె, పడ్డొ ఒండి లోకుమ్చ దూరి దేసిమ్లుతె కి సాచి దెకయ్తె” మెన సంగిలన్.

యేసు పరలోకుమతె వెగ గెలిసి

9 యేసు ఇసి సంగ కేడయేలి పడ్డొ, జేవ్ సిస్సుల్ దెకితె తతికయ్, జో పరలోకుమతె అన్నె గెచ్చుక మెన ఉక్కిల్ జలో. జో వెగ గెతె తతికయ్, ఏక్ మబ్బు జోక లుంకడ్లి, చి సిస్సుల్ జోక అన్నె దెకుక నెత్తిర్.

10 జో పరలోకుమతె వెగ గెతె తతికయ్, సిస్సుల్ ఆగాసుమ్ పక్క ఆచారిమ్ తెన్ దెకితె తతికయ్, ఆదె, చొక్కిల పాలల్ గలన తిల దేముడుచ దూతల్ దొగల జోవయించి నెడిమి ఉత్త్ర జా టీవోజ జలె,

* 1:1 1:1 'లూకా', మెలె యేసుక్రీస్తుచ రిసా లూకా రెగిడ్లి సాచిచి పుస్తకుమ్. † 1:2 1:2 'సుబుమ్ కబుర్' మెలె, ఎత్తి అదికారుమ్ తిలో దేముడు దొర్కు కెర్ల రచ్చనచి కోడు. జో పాపల్ వెమింఱువ కెర్లిన్చి రిసాచి కబుర్. యేసుయి దొర్కు జలో రచ్చింఱువ కెర్లిసా జలిన్చి కబుర్. జో అర్చితుమ్ జా పాపల్ గెచ్చయేలి రిసా మాన్సుల్ పరలోకుమచి రాజమతె బెదితి అవోకాసుమ్ దొర్కు జలిన్చి కబుర్. 'సుబుమ్ కబుర్ కామ్' మెలె, ఈంజ సుబుమ్ కబుర్ ఎత్తిచి రిసా సాచి జా జుల్లిసి, నెంజెలి సాంతె టాన్తె కి సాచి సంగితె తతిసి. ‡ 1:3 1:3 'ఎత్తి అదికారుమ్ తిలో దేముడుచి రాజమ్' మెలె, 1 జోవయింక నంపజల మాన్సుల్చి పెట్టి జో ఏలువ కెర్లిసి, 2 జోవయించి ఆత్మసెక్తి ఈంజ లోకుమ్తె కామ్ కెర్లిసి, 3 ఈంజ ఉగుమ్ మార్చువ జలె జో ఎదార్లమ్ ఈంజ లోకుమతె ఏలువ కెర్లిసి, చి 4 పరలోకుమతె జో ఏలువ కెర్లిసి.

§ 1:5 1:5 యూదా అత్త్య కెరన మొర తిలన్ గెద. * 1:6 1:6 'ప్రబు' మెలె కిచ్చొ అర్లమ్ తయెదె మెలె, ఎత్తిచి కంఠ వెళ్లి తిలోసా, ఎత్తిక ఏలువ కెర్లిసా. ఒగ్గర్ సుట్లు యేసుకయ్ 'ప్రబు' మెనలె, గని ఎత్తి అదికారుమ్ తిలో దేముడు అబ్బొనెక క 'ప్రబు' మెనలె.

11 “ఓ గెలలయ ప్రాంతుమచ మాన్సుల్, కిచ్చొక దస్సి ఆగానుమ్ పక్క దెక దెక టీవోజ జా అన్సున్? తుమచి నెడిమి తెంతో ఉక్కీల్ జా పరలోకుమతె వెగ గెలో ఈంజో యేను, వడ్డొక అన్నె ఉత్త జెయెదె. జో కిసి పరలోకుమతె వెగ గెలో గే దెకిల్ రితి, దస్సెయి అన్నె ఉత్త జెయెదె” మెన జేవేక సంగిల.

సిస్సుల్ యెరూసలేమ్తె ప్రార్దన కెర్తెసి

12 తెదెడి జేవే జా †బలీవ మెట్ట తెంతో ఉత్త జా, యేసుచ సిస్సుల్ యెరూసలేమ్ పట్టుమ్తె ఉట్ట అయ్ల. మెట్టక పట్టుమ్ పాసి తయెదె. కెర్ది దూరి మెలె, †సెలవ్ కడన్లి దీసి యూదుల్ ఇండితి ఎదిలి దూరి.

13 పట్టుమ్తె పావ కేనె గెల మెలె, జేవే సంగ తిలో ఒత్తచో గేరుచి అంతస్సుమ్తెచి గదితె గెల. కొన్న మెలె, పేతురు, యోహాను, యాకోబు, అంద్రెయ, పిలిప్, తోమా, బల్థోలముయ, మత్తయి, అల్ఫయిచో యాకోబు మెలో పుత్తున్, వడ్డొ సొంత దేసిమ్ ఏలువ కెరంతి ఆన తిలి మందతె తిలో సీమోను, వడ్డొ యాకోబు మెలో ఎక్కిలోచో పుత్తున్ మెలో యూదా; మొత్తుమ్ ఎగరజన్ సిస్సుల్.

14 జో గెరి తా కిచ్చొ ఎక్కి నిదానుమ్ కెర్తె తిల మెలె, ప్రార్దన కెర్తె తిల. ప్రార్దన కెరుక మెన జోవయింతెన్ అన్నె కో కో జేవే పొదుల్ బెదితె తిల మెలె, యేసుచి అయ్యసి మరియ తెన్, జోక బాపుడ్చివో, జోవయింక అన్నె నంపజల తేర్బోదల్ తిల.

15 జేవే దస్సి ప్రార్దన కెర్తె తిల పొదులె, ఏక్ దీసి, రమారమి కీసాపు విస్సాజన్ మాన్సుల్ ఒత్త బెర తతికయ్, జేవే వ్రజుక నంపజలసచి నెడిమి పేతురు టీవోజ జా, ఇసి మెన సంగిలన్.

16 “ఓ బాపుడ్చు, అమ్చో యేసుక జేలి కెర్క దెరవ దిలో యూదాచి రిసా, దేముడుచి నుద్ది తిలి ఆత్మ సికయ్తికయ్, దావీదు మెలో పూర్దుమ్చోచి అత్తి సంగిలిసి కోడు జా, కచితుమ్ నెరవెర్చువ జంక అన్నె. జాకయ్, యూదాచి రిసా సంగిల్ రితి నెరవెర్చువ జలి.

17 మెలె, యూదా అమ్చి తెన్ యేసు నిస్సాసా జలో, చి అమ్ కెర్తి సేవతె జో బెదుక వ్రబు సెలవ్ దా తిలో.”

18 ముదెనె యూదాక కిచ్చొ జర్గు జలి మెలె, జో యేసుక విక పాపుమ్ కెర్తి డబ్బుల్ తెన్ బుయి గెన్ల. జా బుయి తిలిసెతె నీడ గెలన్, చి పెట్టి బద్దల్ జతికయ్, పెట్టిచి అంతున్ ఎత్తి నూయి జా గెలి.

19 యెరూసలేమ్ పట్టుమ్చ మాన్సుల్ ఎత్తిజన్ జాన్లి దీసి తెంతో, జా బుయింక ‘అకెల్దాము’ మెన జోవయించి అరమయి బాస తెన్ సంగితతి. జా నావ్చి అర్దుమ్ కిచ్చొ మెలె, ‘లోయి నూయి జా తిలి బుయి*’.

20 జాకయ్ యూదాక జర్గు జలిసి తెన్, కిర్తన పుస్తకుమ్తె రెగిడ్లి కోడు నెరవెర్చువ జలి.

“జోవయించి టాన్ పాడ్ జలి బయిలు రితి జవున్, చి ఒత్త తెంతో కో ఒత్త జితు నాయ్”
 మెన రెగ్ల అన్నె. అన్నెక్ కోడు కి రెగ్ల అన్నె. కేన్ కోడు మెలె,
 “జోవయింక దా తిలి టాన్ జోవయింక పెట్టున్,
 చి వేర మాన్సుక దొర్కు జవున్.”

మెన రెగిడ్లిసి మెన, బెర తిలసక పేతురు సంగిలన్.

21-22 అన్నె కిచ్చొ మెలన్ మెలె, “జా కోడుచి రిసా, యేసువ్రబు అన్నె జీవ్ జా ఉట్టిన్క అమ్చి తెన్ సాచి జా జోచి గవురుమ్ దెకయ్తి రిసా, అన్నెక్ అమ్చి తెన్ బెదుక అన్నె. కొన్న మెలె, యోహాను బాప్తిసుమ్ దెతె తిలి, యేసువ్రబు అమ్చి తెన్ ఈంజ లోకుమతె బుల్లె తిలి మొదోల్ తెంతో, యేసు పరలోకుమతె వెగ గెలి ఎదక అమ్చి తెన్ బుల్లె తిలోసా ఎక్కిలో అమ్చి తెన్ బెదుక అన్నె” మెన పేతురు సంగిలన్.

23 సంగితికయ్, జేవేతె తిల దొగులక టీవోజ కెల. జేవే దొగుల కొన్న మెలె, ‘బర్చబా’ మెన ఆసిమ్ నావ్ తిలో యోసేపు మెలో యూస్తు మెలో ఎక్కిలో, చి మత్తీయ మెలో అన్నెక్.

† 1:12 1:12 ‘బలీవ మెట్ట’ మెలె, బలీవ వండ్లు రూకల్ జా మెట్టయ్ తవుల చి జా నావ్ తయెదె. † 1:12 1:12 రమారమి తిన్ని పావ్ కిలోమిటర్లు దూరి జయెదె § 1:15 1:15 జలి పుంజుక్ చిన్సెజన్ * 1:19 1:19 నెంజెలి ‘లోయిచి బాటి’.

24 జేవ్ దొగులతె ప్రబు కక్క నిసానదె గే, జానుక జతి రిసా, సిస్సుల్ ప్రార్దన కెర్ల. “ఓ ప్రబు, మాన్సుచి పెట్టి తిలి బుద్ది ఎత్తి, తుయ్ జాన్సి.

25 తుయి దిలి సేవ, తుచొ బారికి జతి తుయి దిలి టాన్, యూదా నిస్సారుమ్ కెర్లి రితి జా నెన కెర, జోచి టాన్తె జో గెచ్చ అస్సె. జోక తుయి దా తిలి కామ్ కెర్లి రిసా, ఈంజేవ్ దొగులతె కక్క నిసాన అస్సిన్ గే, దయ కెర అమ్క రుజ్జా దెకవు” మెన ప్రార్దన కెర్ల.

26 ప్రార్దన కెర, చీటి గల్లిక మత్తీయచి నావ్ నేడ్డి. జారుజ్జా జతికయ్, ‘అమ్చి తెన్ ప్రబుచొ బారికి జవున్’ మెన, ప్రబుచి నుబుమ్ కబుర్ నూనయ్త ఎగరజన్ †బారికుల్ జో మత్తీయక బెదవల్ల, చి బారజన్ అస్సె జా గెల.

2

నంపజలనచి పెట్టి దేముడు జోచొ ఆత్మ దిలిసి

1 యేసు మొర అస్సె జీవ్ జా ఉట్టు సత్తు సంతల్ గెతికయ్, ‘పెంతెకొస్తు’ మెన యూదుల్చి పండుగు దీసి, యేసుక నంపజలన ఎత్తిజన్ ఎక్కితె బెద అయ్ల.

2 జేవ్ ఒత్త ఎక్కితె బెద తతికయ్, ఆగానుమ్ పక్క తెంతొ, వెల్లో వాదు గట్టిజ వీర్తి రితి వెల్లి అవాడ్ అయ్లి, చి గేర్ ఒండి జా అవాడ్ సప్పుడు బెర్లి.

3 తెదోడి, కిచ్చొ దెకిల మెలె, ఆగి లగితి రితిసి డీన ఉత్త జా చెదుర్పు జా, జోవయింక ఎక్కెక్క బోడివొచి ఉప్పిరి ఆగివొ లగిల్ రితి జలి. జోవయింతె కక్క నే పిట్ట దస్సి జలి.

4 దస్సి జతికయ్, కక్క నే పిట్ట, దేముడుచి సుద్ది తిలి ఆత్మనెక్కి జోవయించి పెట్టి బెర అయ్లి, చి జోవయించి ఆత్మచి నెక్కి తెన్ దొర్పు జలి ఎదిలి, వేర వేర అగ్గ నేన్ల బాసల్ తెన్ జేవ్ లట్టబుక దెర్ల.

5 జేవ్ పొదులె, ఒగ్గర్ ఒగ్గర్ దేసిమ్లుతె చెదుర్పు జా తిల దేముడుక నిదానుమ్ తెన్ జోకర్త యూదుల్ అస్సె ఉట్ట జా* యెరూసలేమ్ పట్టుమ్తె జితె తిల.

6 జలి, యేసుక నంపజలనచి పెట్టి అబ్బొనచి జోచి ఆత్మ బెర్లి జా అవాడ్ నూన, కేనె కేనె తెంతొ నిగ జా, ఒగ్గర్జన్ జేవ్ యూదుల్ జా గెరి అయ్ల. అయ్లె, ఆచారిమ్ జల. కిచ్చొక మెలె, జోవయించ సొంత వేర వేర బాసల్ తెన్ యేసుచ సిస్సుల్ లట్టబై తిల; జేవ్ బాసల్ కెయ నే సిక తిలె కి,

7 ఆచారిమ్ జా ఎక్కిలోక ఎక్కిలో, “వేర వేర అమ్చ సొంత బాసల్ తెన్ ఈంజేవ్ లట్టబ్బన గలిలయులు జవుల గెద?

8 అమ్చ బాసల్ నేనీతి దస్సి జలె, కిసి జా అమ్చ బాసల్ తెన్ లట్టబ్తతతి” మెన జేవ్ ఆచారిమ్ సంగితె తిల.

9 “అమ్ పొర్తి దేసిమ్చ, మాదీయులు, ఏలామియుల్, పడ్డో మెసాపొతమియ తెంతొ చి, యూదయ తెంతొచ, కప్పదొకియ తెంతొచ, పొంతు తెంతొచ, ఆసియా తెంతొచ,

10 పుగియ తెంతొచ, పంపులియా తెంతొచ, ఐగుప్తు దేసిమ్చ, పడ్డో కురేనియు పట్టుమ్చి సుట్టునంత తిలి లిబియ దేసిమ్ తెంతొచ. పడ్డో అస్సె కి అమ్తె సగుమ్జన్ రోమ్ దేసిమ్ తెంతొ ఆజి కాలి ఉట్ట జా అస్సి. జోవయింతె సగుమ్జన్ యూదుల్ జెర్లిలన. సగుమ్జన్ అగ్గ యూదుల్ నెంజిలె కి, దేముడుక నంపజా మార్పుప కెరన్లన కి అస్సి.

11 పడ్డో, క్రైతు దేసిమ్చ, అరేబియ దేసిమ్చ కి ఇస్సె అస్సి. అమ్ ఎత్తివాట్ దేసిమ్లు తెంతొ ఉట్ట అయ్లె కి, అమ్చ సొంత బాసల్ తెన్ ఈంజేవ్ లట్టబ, ఈంజేవు దేముడుచ ఆచారిమ్చ కమొ అమ్క నూనయ్తతతి!”

12 జోవయించి ఆచారిమ్చి రిసా అస్సె కిచ్చొ మెన ఎక్కిలోక ఎక్కిలో సంగితె తిల మెలె, “అప్పె జర్గు జలిన్చి అర్దుమ్ కిచ్చొ?” మెన పుసుక దెర్ల.

† 1:26 1:26 మత్తు, మార్పు, లాకా, యోహాను రెగిడ్ల అగ్గెచ పుస్కల్తె జేవ్ బారజన్ ‘సిస్సుల్’ మెన రెగ్గ తిల, గని యేసు జోవయించి ఆత్మనెక్కి దా ఆదికారుమ్ దిలి తెంతొ జోవయించి రిసా రెగిడ్లన ‘బారికుల్’ మెంతతి. * 2:5 2:5 ఒండి లోకుమ్క ఎక్కి జా యెరూసలేమ్ పట్టుమ్తె ఎత్తి ఆదికారుమ్ తిలో దేముడుచి గుడి తిలిచి రిసా ఒత్త గెచ్చ తిల.

13 గని ఒత్త బెర అయిలసతె అన్నానుమ్ జల మాన్పుల్ సగుమ్జెన్ కి తిల, జేవ్ కిచ్చి మెల మెలె, “ఈంజేవ్ మచ్చ అస్తి” మెన జేవ్చి రిసా ఆన్తె తిల.

పేతురు లట్టబ్బిసి

14 జలె తెదొడి పేతురు, ఎగరజెన్ సిన్పుల్చి నెడిమి బీవోజ జా, బెద తిల మాన్పుల్క సూన్తు మెన, గట్టిజ అవాడ్ కెరన, సంగుక దెర్తన్. జో ఇసి మెన సంగిలన్, “ఓ అమచ యూదుల్, ఈంజ యెరూసలేమ్ పట్టుమ్ తిలన ఎత్తిజిసి, ఆవ్ అప్పె సంగితిసి సరిగా సూన, అర్దుమ్ కెరన.

15 ఈంజేవ్ తుమ్ దెకిల మాన్పుల్క ‘మచ్చ అస్తి’ మెన తుమ్ మెన్పుతె ఉచర్చి రిసా మచ్చితి నాయ్. అప్పె పెందలె నొప్పు గంటల్ జా అస్సి!

16 అప్పె జర్గు జలిన్చి రిసా దేముడు పూర్ము †జోచ కబుర్లు సంగిలో యోవేలు మెలోసాచి అత్తి సంగిలన్.

17 దేముడు కిచ్చి సంగితయ్ మెలె, ‘ఆకర దీసల్క దేసిమెలు ఎత్తితె తిల మాన్పుల్చి పెట్టి అంచి ఆత్మ సువ దెయిందె. తుమ్చ పుత్తర్లు, దువిద్దుచి అత్తి అంచ కబుర్లు సంగిమదె. పడ్డో తుమ్చ ఉబెడ్డు, జలె, ఆవ్ దెకయ్త సిప్పల్ దెకుల, తుమ్చ మంత్రమాన్పుల్ కి ఆవ్ దెకయ్త సిప్పల్ దెకుల.

18 కచితుమ్, మున్పుబోదల్ జలెకి, తేరబోదల్ జలెకి, అంచ సేవ కెర్తన ఎత్తిజెన్చి పెట్టి అంచి ఆత్మ సువ దెయిందె, చి అంచ కబుర్లు సంగితె తవుల.

19 ఆగానుమ్తె కి, బూలోకుమ్తె కి, వెల్లెల వెల్లెల కమె కెర, అంచి అదికారుమ్క రుజుల్ దెకయిందె. లోయి సూఁయి జతిసి, ఆగి లగితిసి, చి దుమ్మె జతిసి.

20 ప్రబు అన్యె ఉత్త జతి జా వెల్లి దీసి నే జెతి అగ్గె పొద్దు అందర జయెదె, జోను లోయి రంగు జయెదె.

21 గని, తూయి నిజమి †పరలోకుమ్చో దేముడు, తుక నంపజతసి, అంక రచ్చించువ కెరు! మెన జోవయిచి పెట్టి కో అంక ఎక్కి నిదానుమ్ నంపజవుల గే, జోవయిచి పాపుమ్ చెమించువ కెర, జోవయింక రచ్చించువ కెరిందె.’ ”

22 “దస్సు ఉచర కెర, ఒత్త బెద తిల యూదుల్క పేతురు అన్నె కిచ్చి మెలన్ మెలె, ఓ ఇస్రాయేలులు మెంత అమచ యూదుల్, ఏక్ కోడు తుమ్ సూన. నజరేతు గెవ్విచో యేసు కిసి తిలో గే, తుమ్ జాన్సు. ‘జోక దేముడు దిలి అదికారుమ్ రుజు జవున్’ మెన, దేముడు జోచి అత్తి తుమ్చి మొక్క వెల్లెల వెల్లెల కమె కెరవ, రుజుల్ డీసయ్లో.

23 జలె, ‘జర్గు జతిన్, జర్గు జవున్’ మెన దేముడు అగ్గెయి తెంతో రెగిడ్లి రితి, జో యేసుక మూర్కుడ్లుచి అత్తి తుమ్ సార్పు కెర దా, కీసిలువతె గలవ మార్దదు.

24 జోక తుమ్ మార్చె కి, జో మొర్ము తెంతో విడ్డల్ జా, దేముడు జోక అన్నె జయడ్డో; యేసుచి ఉప్పిరి మొర్ముక అదికారుమ్ నాయ్.

25 “యేసు అగ్గె తెంతో జానన్లిన కిచ్చి మెలె అమచో దావీదు పూర్ముచోచి అత్తి దేముడు రెగ్గయ్లో మెలె;

*దేముడు కెర్చొడి తెదొడి అంక తోడు అస్సి మెన దెకిలయ్. కిచ్చి కి అంక బమ్మ నే కెర్తె, జో అంచి ఉజెతో పక్క తా తోడు తత్తయ్ మెన దెకిలయ్ చి ఆవ్ కదుల్ నే జయి.

26 జాక, సర్లసంతోసుమ్ జలయ్, చి జో ప్రబుచి గవురుమచి రిసా గనుమ్ గాయ్తోన్ జలయ్. జాకయ్, అన్యె, కిచ్చి జర్గు జలెకి, అంచి పెట్టి అంచి ఆగ్ కి ఆన తెన్ తయెదె.

27 ఆవ్ మొర్లె కి, ఆవ్ మొర్ముతె గెలె కి, జో అంక ఒత్త ములె నాయ్, తుచి సుద్ది తిలనచి ఆగ్ కువెతి రితి నే ఒప్పన్తె.

† 2:16 2:16 పూర్ము పొచి ఎత్తి, అదికారుమ్ తిలో దేముడు కక్క గే నిసాన, “ఈంజ జా కబుర్ సంగు” మెన జోవయిచి అత్తెన్కి జో మాన్పుచి పెట్టి దా లట్టబెదె. ‡ 2:21 2:21 ‘పరలోకుమ్చో దేముడు’ మెన అన్నె రెగిడ్లిన్క గ్రీకు జానతె తొలితో రెగిడ్ల పుస్తకతె ‘ప్రబు’ మెలె అర్దుమచి కోడు అస్సి. ‘ప్రబు’ మెలె, యేసుచి రిసా ఒగ్గర సంగతతి, గని దేముడు అబ్బొన్క కి ‘ప్రబు’ మెన సంగల జా అర్దుమ్ కిచ్చి మెలె ఎత్తి, ఏలువ కెర్లొసా జో దేముడు అబ్బొన్చి నావ్ ‘యెహోవ’ జయెదె, గని జా నావ్ దెరుక యూదుల్ బియె కెర ‘ప్రబు’ మెనుల.

§ 2:23 2:23 మార్కు 15:24చి ఎట్టెచి కోడు దెక. * 2:25 2:25 నెజెతి ‘ప్రబు’.

28 జతి సక్తి అంక దా అస్సిన, చి తుచితె పరలోకుమతె తియ తా, తుచితె అవ్ తతినక అంక పూర్తి సర్లసంతోసుమ్ కెర్తె.”†

పేతురు జేవ్ బెర తిల యూదుల్క ఏద కెరవ, అన్నె కిచ్చొ మెన బోదన కెర్లన్ మెలె,

29 “ఓ బాపుడ్లు, అమ్చొ దావీదు పూర్లుమచొచి రిసా కిచ్చొ మెన కచితుమ్ అవ్ సంగితసి మెలె, జో మాములుమ్ మాన్సు జా మొర గెలన్, చి జోక మెన్నె రోప చి అప్పెక మెన్సున్ దన్నె అన్నె.

30 గని మాములుమ్ మాన్సు జలెకి, దేముడు ఒట్టు గలన్ కిచ్చొ మెన నే పిట్టి కచితుమ్ కోడు పూర్లుల్క నూనయలిసి కబుర్లు జో జాన అన్నె. దేముడు జోపయింక కిచ్చొ సంగిలన్ మెలె;

తుమ్చి వమ్సుమ్చొ ఎక్కిలోక తుచి సింగాసనుమ్తె వెనడిందె”

31 జాకయ్, జో దేముడు సికయ్తెకయ్, కిచ్చొ అగ్గె తెంతో దెకిలి రెతి జా దావీదు రెర్లె అన్నె మెలె;

“క్రీస్తు మొర్లె కి, మొర్లుతె నే తయెదె, జోచి అగ్గె నే కువితె, అన్నె జీవ్ జా ఉట్టెదె.”

32 “జలె, ఈంజొ యేసుకయ్ దేముడు అన్నె జయడ్లొ మెన అమ్ ఇన్నె బెర్లస ఎత్కిజన్ సాచి జా అన్నుమ్.

33 జో, జలె, అన్నె జీవ్ జా ఉట్టు దేముడు అబ్బొన్తె పరలోకుమతె వెగ గెచ్చె గవురుమ్ జా, జోచి ఉజెతో పక్క వెన అన్నె. చి జో దేముడు అబ్బొసి అగ్గె సంగ తిలి రెతి, జోచి సుద్ది తిలి ఆత్మ వంట దెతిసి, పూర్తి జో తుమ్ అప్పె దెకిలిసి నూన్సిని జర్లు కెర అన్నె.

34 “దావీదు, జలె, పరలోకుమతె వెగ గెచ్చె నాయ్, గని జో సంగిలన్.

దేముడు ప్రబు అంచొ ప్రబుక సంగిలన్.

35 ‘తుక విరోదుమ్ జలస తుచి చాటు సుదితి పొర్లొ జతి రెతి కెర్తె ఎదక, తుయి అంచి ఉజెతో పక్క వెన తా.’

36 “జాకయ్, తుమ్ ఇస్రాయేలులు మెల అమ్చ యూదుల్ ఎత్కిజన్క అవ్ కిచ్చొ కచితుమ్ సంగితసి మెలె, తుమ్ నిలువ గల మార్లొ యేసు అమ్క దొర్కు జలొ రచ్చించువ కెర్లొసా జతొ క్రీస్తు జా, ఎత్కిక ఏలువ కెర్లొ ప్రబు జవున్” ఇసి పేతురు రుజ్జు కెర్లన్.

37 ఈంజ ఎత్కి నూన కెర, ఒత్త బెర తిల యూదుల్, “నిజమి దేముడుచొ పుత్తున్క మార పాపుమ్ కెర్లమ్ మెన జోవయించి పెట్టి దుకుమ్ తెన్ ఒప్పున, బియఁ గెచ్చె, ఓ బాపుడ్లు, అమ్చి పాపుమ్ గెన్ను మెన అమ్ అప్పె కిచ్చొ కెర్లె జయెదె?” మెన పేతురుక చి జోవయింతెన్ తిల యేసుచ అన్నె బారికుల్క పుసిల.

38 జేవ్క, పేతురు, “తుమ్ కెర్లె పాపల్చి రిసా దుకుమ్ జా పాపుమ్ ముల్లి బుద్ది జా యేసుక్రీస్తుక నంపజా, తుమ్చి పాపుమ్ గెచ్చయ్తి గుర్తుక జోచి నావ్ తెన్ బాప్తిసుమ్ కడన్కు. దస్సి కెర్లమ్ మెలె, దేముడుచి సుద్ది తిలి ఆత్మ తుమ్క దొర్కు జయెదె.

39 జోచి కక్క ప్రబు జలొ అమ్చొ దేముడు నిసాన్దె గే, ‘జోవయించి పెట్టి అమ్చి సుద్ది తిలి ఆత్మ దెయెదె’ మెన, తుమ్చి రిసా కి, తుమ్చ బోదల్చి రిసా కి, వడ్డొవ మాన్సుల్క కి, వడ్డొ దూరి దేసిమ్లుచ మాన్సుల్చి రిసా కి సంగ అన్నె” ఇసి పేతురు జేవ్క సంగిలన్.

40 వడ్డొ అన్నె సాచుల్ రుజ్జుల్ బెదవ, జోవయింక కిచ్చొ మెన బతిమాల్లు జా సంగిలన్ మెలె, “పాపుమ్బుద్ది తిల ఈంజ ఉగొమ్చ మాన్సుల్చి బుద్ది ముల, విడ్డల్ కెరన, రచ్చించువ జా” మెన సంగిలన్.

41 జోచి కోడు నూన నంపజలస, జలె, బాప్తిసుమ్ నజన్ల. చి జా దీసి రమారమి తిన్ని వెయిల్జన్ మాన్సుల్ అగ్గె నంపజల సిన్సుల్ తెన్ బెదిల.

42 జా దీసి తెంతో, నిదానుమ్ తెన్ యేసుచ బారికుల్చి బోదన నూన్తె తా, సిన్సుల్ తెన్ సర్ల తెన్ బెద, మాన్సుల్చి పాపుమ్ గెచ్చయ్తినక యేసు బలి జలొచి జా గుర్తు దెకయ్తి పోడియె, ద్రాచ రస్సుమ్ కంక పింక అలవాల్ జల, జోవయింతెన్ నిదానుమ్ తెన్ ప్రార్లస కెర్లె తిల.

43 ఎత్కిజన్ ఉచర ఉచర ఆచారిమ్ తెన్ తిల, చి జేవ్ బారికుల్చి అత్తి ప్రబు ఒగ్గర్ వెల్లెల కమె జర్లు జలి.

† 2:28 2:28 యేసుక దేముడు అబ్బొసి అన్నె జయడెదె మెలిన్చి రిసాచి కోడు ఈంజ. యేసు దేముడు అబ్బొన్ తెన్ లట్టల్లి రెతి కోడు.

44 పడ్డొ, నంవజలన ఎత్తిజన్ సర్ద తెన్ ఎక్కి మెన్పు తెన్ తిల, చి బీద సుదల్, సామూర్లు, కోయి మున్పు నే జతె, ఎక్కిలోక ఎక్కిలో తోడు దెతె తిల.

45 ఆన్సి తిల మాన్పుల్ జోవయించి వికన, నెంజల మాన్పుల్క తోడు దెతె తిల. ఎక్కిలోక కొత్తు తిలెగిన, అన్యెళ్లొ జోక తోడు దెంక.

46 దేముడుచి గుడితె బెద, ప్రబుక ఉచరుక మెన రోజుక గెతె తిల, చి జోవయించి గెరలె, ఎక్కిలోక ఎక్కిలో అన్సిమక బుకారా, జా పోడియెం కా, జా ద్రాచ రస్సుమ్ పియె, సర్దనంతోసుమ్ తెన్ కట్టు తెన్ తిల.

47 దేముడుచి గవురుమ్ సంగితె తిల, చి ఎత్తిజన్ జోవయింక మెన్సిత్ తిల, చి ప్రబు రోజుక కక్క కక్క నోవ మాన్పుల్క నిసాన రచ్చించువ కెర నంవజలన మొత్తుమ్చి సంగుమ్తె బెదయెతె తిలన్.

3

జెర్మిల్ తెంతో సొట్టో జలోసా చెంగిల్ జలిసి

1 ఏక దీసి, ప్రార్దన కెరుక బెదుక మెన, పేతురు చి యోహాను దేముడుచి గుడితె గెతె తిల. తెదొడి తిన్ని గంటల్ జా తిలి.

2 దేముడుచి గుడిక పాసి అయెలె పొది, జెర్మిల్ తెంతో సొట్టో జలో ఎక్కిలోక మాన్పుల్ వయ నెతె తిల. రోజుక జోక వయన దేముడుచి గుడిచి కోటచి 'నూటి' మెన నావ్ తిలి గుమ్ముమ్ సొడి వెసడ్లె, గుమ్ముమ్ వెసిత్ తతె జో మాన్పు దర్ముమ్ నజీతె తిలొ.

3 పేతురు చి యోహాను దేముడుచి గుడి తెడి పెసుక దెర్రిసి, జో దెక, "డబ్బుల్ దా" మెన, దెక నే దెకిల్ రితి జా సంగిలన్.

4 సంగిలె, పేతురు యోహాను జోక చెంగిల్ దెకిల. అన్యె పేతురు జోక, "అమ్క సరిగా దెకు" మెలన్.

5 దస్సి మెంతికయ్, 'కిచ్చొ జవున్ దెవుల' మెన ఉచర, జో మాన్పు జోవయింక సరిగా దెకిలన్.

6 గని పేతురు జోక, "అంక వెండి కాసుల్ నాయ్, బజార్ కాసుల్ నాయ్, గని అంక తిలిసి తుక దెయెందె. నజరీతుచొ యేసుక్రీస్తుచి నావ్ తెన్ ఉట్ట ఇండు" మెన సంగిలన్.

7 సంగ, జోచి ఉజల్ అతు పేతురు దెర, జోక ఉట్టవ టీవొ కెలన్. బేగి, జోచ చట్టొ, ఆగ్ అడ్డొ డిట్టుమ్ జల.

8 డిట్టుమ్ జతికయ్, జో చట్టున ఉట్ట అద్దుర్ నెంతె టీవొ ఇండుక దెర, సర్దక నచ్చ నచ్చ, దేముడుచి గవురుమ్ సంగ సంగ, దేముడుచి గుడితె వెసిలొ.

పేతురు యూదుల్క బోదన కెర్రిసి

9 జో మాన్పు ఇండితె తిలిసి, దేముడుచి గవురుమ్ సర్ద తెన్ సంగితె తిలిసి ఒత్త బెర్లె వ్రెజల్ ఎత్తి దెక కెర,

10 "ఒరె, ఈంజొయి రోజుక దేముడుచి గుడిచి గుమ్ముమ్ దర్ముమ్ నజ వెన తతోసా, గని చెంగిల్ జా ఇండితయ్" మెన, బమ్మ జా ఆచారిమ్ తెన్ ఎక్కిలోక ఎక్కిలో సంగితె తిల.

11 జో మాన్పు, జలె, పేతురుక చి యోహానుక ములుక నెత్తిర్రిసి జా జనాబ్ దెక, ఆచారిమ్ జా, జేవ్ తీర్గ దేముడుచి గుడిచి వెల్లి పేడె గెచ్చొ తతికయ్, ఈంజెచ్చు జనాబ్ బెద నిగ గెచ్చొ, సొలోమోసాన రానెచి నావ్ తిలి పేడెక జోచి సుట్టునంత బెర గెల.

12 జేవ్ జనాబ్ దస్సి బెర అయెలిసి దెక, పేతురు జోవయింక ఇసి మెన బోదన కెరుక దెర్లన్. "ఓ ఇస్రాయేలులు మెల అమ్చ యూదుల్, ఈంజొ మాన్పుచి రిసా తుమ్ కిచ్చొక ఆచారిమ్ జతను? అమ్క కిచ్చొక దస్సి ఆచారిమ్ తెన్ దెకితను? అమ్చి సొంత సెక్తి తెన్, సొంత పున్నిమ్చి రిసా జోక చెంగిల్ కెర ఇండయెల మెన తుమ్ ఉచర్దను గె?

13 "అమ్చ పూర్లల్ జల అబ్రాహామీక, ఇస్సాకుక చి యాకోబుక దేముడు, జోచొ సేవ కెర్లొసా యేసుకయ్ అన్యె జియడ గవురుమ్ కెర దా అన్యె. తుమ్ యేసుక దెర పిలాతు అదికారిచి అత్తి సార్పు దిలదు, చి జో పిలాతు 'జోక విడ్డల్ కెరిందె, జో కేన్ తప్పు కెర నాయ్' మెన తీర్పు సంగిల్ కి, తూమ్ నే ఒప్పున్తె యేసుచి విలువ కడ్డదు.

14 తుమ్ దస్సి కెర, సుద్ది చి పున్నిమ్ తిలో క్రీస్తు రచ్చించుప కెర్తొసాచి మరియాద కడ్లదు. అత్య కెర్ల బరబ్బుక విడ్డల్ కెరు, జోకయ కావలె మెన, తుమ్ కోర్ప జా పిలాతుక సంగ.

15 ఎత్తి జీవుల్క జీవు దెతోసా, ఎత్తిక ఆదారుమ్ జలో యేసుక తుమ్ మార గెలదు. గని దేముడు జలో అబ్బిసి జోక అన్నె జయడ్లొ మెన అమ్ దెక, సాచి జా అన్నుమ్.

16 జోచి అదికారుమ్చి రిసా జొయ్యి ఈంజొ సొట్టొ మెన తుమ్ అగ్గె తెంతొ జాన్లొ మాన్సుక చెంగిల్ కెర అన్నె. యేసుకయ నంజా జోచి నావ్ తెన్, ఉట్ట ఇండు మెన ఇన్నెక అమ్ సంగితికయ, యేసుయ ఇన్నెక చెంగిల్ కెర్లన్. తుమ్చి మొక్కె ఈంజొ మాన్సు పూర్తి చెంగిల్ జలిసి కిసి జర్గు జలి మెలె, యేసుయ దయిరిమ్ కెర, నంప కెరవ, చెంగిల్ కెర్లన్.

17 “జలె, అమ్చ బావుడ్లు, ఉచర, తూమ్, తుమ్చ అదికారుల్, నేన కెర దస్సి కెర్లదు మెన జాని.

18 గని, దేముడు పూర్ణమ్ జో కబుర తెద్రయలన చి అత్తి సంగ తెద్రయలిసి, జో ఎలువ కెరయతో క్రీస్తు సేడుక తిల సైమల్ ఎత్తిచి రిసా పూర్ణమ్ కబుర సంగ తెద్రయలిసి. యేసుక తుమ్ మార్సి తెన్ జో దేముడు నెరవెర్చుప కెర అన్నె.

19 జలె, అమ్ కెర్ల పాపల్ పుంచి జతు మెన తుమ్ కోర్ప జలె, తుమ్ కెర్ల పాపల్చి రిసా పెట్టి పూర్తి దుకుమ్ జా, ఆజి తెంతొ ప్రబుచి ఇన్సుమ్ రితి కెరుక పూర్తి కోర్ప జా మార్చుప జా, చి దేముడు తుమ్క పాసి కెరన, తుమ్క సెలవ్ కడన్లొ పొది దిలి రితి, తుమ్చి అత్యల్క చెంగిల్ కెరెదె,

20 చి తుమ్క పూర్ణమ్ తెంతొ సంగ తిలో రచ్చించుప కెర్తొసా జతో క్రీస్తుక తుమ్తె తెద్రయెదె. క్రీస్తు కొన్నొ మెలె, యేసు.

21 జో క్రీస్తుయి పరలోకుమ్తె తంక. కెయ్య ఎద జో ఒత్త తంక అన్నె మెలె, పూర్ణమ్ దేముడుచి కబుర సంగిలనచి అత్తి సంగిలిసి ఎత్తి నెరవెర్చుప జతె ఎద.

22 “మోసే పూర్ణమ్చొచి అత్తి దేముడు రెగ్గయలి కోడు ఏక్ చొ మెలె;

అంచ కబుర్లు సంగు మెన పరలోకుమ్చొ ప్రబు జలో దేముడు అంకయ కిసి తెద్రయలో గే, దస్సి, తుమ్ యూదుల్తె జెర్మితొ ఏక్కిలోక కబుర తెద్రయెదె. తుమ్క జో కిన్నొ ఆడ్ర దెయెదె గే, జయ్య తుమ్ కెర్లె.

23 జో కబుర జెతోసాక కో సూన్తి నాయ గె. ‘అవ్ నిసాన్ల ప్రజల్తె తుమ్ బెదుక విలువ నాయ’ మెన జోవయింక దేముడు నానుమ్ కెరెదె.

24 పడ్డొ, నమూయెలు పూర్ణమ్చొ తెంతొ అన్నెచి కాలమ్ ఎద దేముడు కబుర తెద్రయలనతె కక్క నే పిట్టి, జేవ్ ఎత్తిజిన్ ఈంజి కాలమ్ జర్గు జతిసి, ఆజి జర్గు జతిన్చి రిసా అగ్గె తెంతొ సంగ అన్సి.

25 జలె, దేముడుచి కబుర సంగ తిల జేవ్ పూర్ణల్చ పుత్తర్లులా తూమ్. పడ్డొ తుమ్చి సెకుమ్తె పడ్డొక ఏక్కిలో జెర్మెదె. జోచి రిసా ఈంజి లోకుమ్చ కుటుంబల్ ఎత్తిక దీవెన దొర్కు జయెదె. జోచి అత్తి అంచి వరుమ్ దెయెదె మెన దేముడు తుమ్చొ అబ్రాహామ్ పూర్ణమ్చొచి అత్తి తుమ్చ పూర్ణల్క నే పిట్టి ప్రమానుమ్ కెర సంగిలన్. జా కోడుచి రిసాచి పుత్తర్లు కి తూమ్ జన్తె.

26 జలె, ‘దొర్కు జలో రచ్చించుప కెర్తొసా’ మెన ప్రబు జోచొ సేవ కెర్తొసా జలో యేసుక టీవడ. జో మొర్తికయ అన్నె జయడ, కత్తె తోలితో తెద్రవ అన్నె మెలె, తూమ్ యూదుల్తెయ. కిచ్చొక మెలె, తుమ్క ‘తుమ్చి పాపుమ్బుద్ది ముల చెంగిల్ జతు’ మెన తుమ్కయ తోలితో చి తెద్రవ అన్నె” మెన పేతురు ప్రజల్క బోదన కెర్లన్.

4

పేతురుక యోహానులుక జేల్తె గలిలిసి

1 పేతురు చి యోహాను ప్రజల్క దస్సి బోదన కెర్లె తతికయ, యూదుల్చ పూజర్లు, దేముడుచి గుడిచొ ఎజొమాని, పడ్డొ నడ్డాకయ్యలు మెన పండితుల్ జోవయంతె ఉట్ట అయ్యె.

2 యేసు ‘మొర అన్నె జీవ్ జలె’ మెన ప్రజల్క పేతురు చి యోహాను సికయతె తిలి రిసా, జేవ్ వెల్లొ సుదల్ కోపుమ్ జా అన్సి.

3 జోవయింక దెర్ల, గని సాంజ్ జలి రిసా ‘కలిక తీర్పు కెరుమ్’ మెన దస్సి జేల్తె గలిల.

4 జేవ్ వెల్లో నుదల్ దస్సి కెర్లె కి, జేవ్ దొగుల కెర్లె బోదన నూన్లన ఒగ్గరజిన్ యేనుక సంపజయి గెల. ఇన్నెతెన్, సంపజలన కెత్తిజిన్ జల మెలె, తేర్బోదల్, బాలబోదల్క పిట్టవ, రమారమి పావ్ వెయిల్జిన్ మున్నుబోదల్ తిల.

పేతురుక యోహానులుక పరిచ్చ కెర్లెసి

5 అన్నెక్ దీసి కిచ్చొ జర్ల జలి మెలె, సబ కెరుక మెన యూదుల్వ అదికారుల్, వెల్లెల మాన్సుల్, మోసే తెన్ దేముడు దిలి అగ్గుల్ సీకడ్డన ఎత్తిజిన్ యెరూసలేమ్ పట్టుమ్తె బెర జా అన్సి.

6 జోవయంతె కో కో ముక్కిమ్ జా సబ కెర్లె రిసా జా అన్సి మెలె, అగ్గె ఎత్తిక వెల్లో పూజరి జా తిలో అన్నోన్చి జావోసి జలో తెదోడిచో ఎత్తిక వెల్లో పూజరి కయవ, ఎత్తిక వెల్లెల పూజర్లు జతనచ కుటుంబల్వ మున్నుబోదల్ ఎత్తిజిని. ఇనయింతె దొగుల కొన్న మెలె, యోహానుసి అలెక్కంద్రు.

7 సబ కెరుక దెర్లి ణాది, యోహానుక చి పేతురుక కడ ఆన నెడిమి టీవో కెరన, జేవ్ చెంగిల్ కెర్లె అగ్గె సొట్టో జా తిలో మాన్సుక కి టీవో కెర, జేవ్ దొగులక పరిచ్చ కెరుక దెర్లె. “ఈంజో మాన్సుక కిసి ఇండయెలదు? తుమ్చి సొంత నెక్తిక నెతుర్లు! కచి నెక్తి, కచి నావ్ తెన్ ఈంజ కామ్ కెర్లదు?” మెన కోవుమ్ తెన్ పరిచ్చ కెర్లె.

పేతురు జబాబ్ దిలిసి

8 తెదోడి పేతురు దేముడుచి నుద్ది తిలి ఆత్మనెక్తి జోచి పెట్టి బెర నెక్తి దెతికయ్, దయిరిమ్ జా, జేవ్ వెల్లెల మాన్సుల్క ఇసి మెన జబాబ్ దిలన; “యూదుల్వ అదికారుల్, వెల్లెల మాన్సుల్, తుమ్క అమ్ కిచ్చొ నంగుక?”

9 అమ్ సొట్టో మాన్సు ఎక్కిలోక చెంగిల్ కెర్లె రిసా ఆజి తుమ్ అమ్క పరిచ్చ కెర్లెను జలె,

10 నజరేతు గెచ్చొచో యేసుక్రీస్తుచి నావ్ తెన్నె తుమ్చి నెడిమి టీవో జలో ఈంజో మాన్సు చెంగిల్ జా అన్సి. జో యేసుక్రీస్తు తుమి సీలివ గల మార్లదు, గని దేముడు జోక అన్నె జయడ్లన్, చి జోయ్యి ఈంజో మాన్సుక చెంగిల్ కెర అన్సి మెన తుమ్క చి అమ్చి ఇస్రాయేలులు ఎత్తిజిన్క అవ్ కచితుమ్ సంగితసి.

11 “గేరు బంద మాన్సుల్ నెన కెర ములిల పత్తుర్, గేర్ బందత బోడిపత్తుర్ జయెదె. తుమ్ జోక నెసిలె కి, పరలోకుమ్చి రాజిమ్క జోయ్యి వెల్లో జా అన్సి.

12 పావుమ్ తెంతో విడ్డల్ జా పరలోకుమతె గెతి రచ్చన కచితె దొర్లు జతయ్ మెలె, యేసుతెయి అన్నె కత్తెయ్ నాయ్. కిచ్చొక మెలె, ఈంజ ఒండి లోకుమతె అన్నె కచి నావ్ తెన్ రచ్చించువ జంక కో కి నెతిర్లి” మెన పేతురు సంగిలన్.

13 పేతురుక చి యోహానుక, “ఈంజేవ్ ఒగ్గర సదు కెర్లె మాన్సుల్ నెంజితి రిత జాలర్లు ఈంజేవ్, వెల్లెల మాన్సుల్ నెంజితి, గని తెద్ది దయిరిమ్ తెన్ అమ్క బుద్ది సంగితతి” మెన, జేవ్ వెల్లెల మాన్సుల్ ఆచారిమ్ జల. అన్నె, యేసు తెన్ జేవ్ బుత్తి తిలి రిసాయ్ ఇసి తెలివి తెన్ దయిరిమ్ జా అన్సి మెన వెల్లెల మాన్సుల్ చినిల.

14 పడ్డొ, అగ్గె సొట్టో జా తిలో మాన్సు అప్పె చెంగిల్ జా జోవయించి నెడిమి టీవోజ అన్సి మెన దెక కెర, జేవ్ అన్నె కిచ్చొ నింద సంగుక నెతిర్లె.

15 అన్నె కిచ్చొ సంగుక నెత్తె కెర, యోహానుక చి పేతురుక సబ తెంతో బార్ కెర, వెల్లెల మాన్సుల్ లట్టబన్ల.

16 “ఈంజేవ్ దొగుల మాన్సుల్చి రిసా అమ్ కిచ్చొ కెర్లె జయెదె? కిచ్చొ సిచ్చ కెరుక నెత్తుమ్, కిచ్చొగి. కిచ్చొక మెలె, తెద్ది వెల్లె కామ్ ఇన్నెచి అత్తి జర్ల జా అన్సి మెన ఈంజ యెరూసలేమ్తెవ మాన్సుల్ ఎత్తిజిన్ జానతి. అమ్ కి దెక అన్నుమ్, చి కిచ్చొ వేర సంగుక నెంజె.

17 గని, ఈంజ ఎత్తిచి రిసా అన్నె కో నూనత నాయ్ మెన, ఈంజేవ్ దొగుల జోచి నావ్ తెన్ అన్నె కక్క కిచ్చొ నే సంగితే రితి బియడె ఆడ్ర దెము” మెన తీర్లు సంగిల.

18 తెదోడి, జేవ్ దొగులక అన్నె బుకారా కెర, “తుమ్ జో యేసుచి నావ్ దెరుక నాయ్. జోచి నావ్ తెన్ అన్నె కక్క బోదన కెరుక నాయ్” మెన పేతురుకచి యోహానులుక ఆడ్ర దిల.

పేతురు చి యోహానులు దిలి జబాబ్

19 జేవ్ వెల్లెల మాన్సుల్ దస్సి సంగిలక, పేతురు, యోహాను, నే బితె దయిరిమ్ తెన్ కిచ్చొ సంగిల మెలె, “దేముడు సంగిలి కోడు అమ్ కెర్లె చెంగిల్ గే, తుమ్ మాన్సుల్ సంగిలి కోడు అమ్ కెర్లె చెంగిల్ గే, తూమ్ సరిగా ఉచర. జేవ్ దొన్సిచి రిసా జో దేముడు సొంత కిచ్చొ మెనెదె గే ఉచర.

20 అమ్ దెకిలిసి సూన్సిసి, అమ్ మాన్సుల్క నే సంగితె తంక నెత్తమ్, నేన” మెన జేవ్ దొగుల యేసుచ బారికుల్ సంగిల.

21 “యేసుచి అదికారుమ్చి తెడి జో సొట్టో మాన్సు చెంగిల్ జలో” మెన ప్రజల్ ఎత్కిజన్ దేముడుచి గవురుమ్ సంగితె తిల. జేవ్చి రిసా, ‘జేవ్ దొగులక అమ్ సిచ్చొ కెర్లె ప్రజల్ అమ్క అల్లర్ కెరుల’ మెన కిచ్చొ సిచ్చొ కెరుక నెత్త కెర, ఎక్కి కోడకయ్ జోవయింక అన్నె బిరుయడ కెర, వెల్లెల మాన్సుల్ జోవయింక విడల్ కెర్లె.

22 ప్రజల్ కిచ్చొక దేముడుచి గవురుమ్ ఒగ్గర్ నముకుమ్ తెన్ సంగితె తిల మెలె, జోవయించి గవురుమ్క రుజ్జు దెకయేలి జా వెల్లె కామ్ జర్లు కెర్లిసి కక్క చెంగిల్ కెర్లిసి జయెదె మెలె, దొన్సిచి సా వెర్చల్ జలో సొట్టో జెర్లిలో మాన్సుక.

23 పేతురుక యోహానుక వెల్లెల మాన్సుల్ ముల్లికయ్, జోవయించ గోతుసుదల్తె జేవ్ దొగుల గెచ్చ, ఎత్కిక వెల్లెల పూజర్లు చి వెల్లెల మాన్సుల్ జోవయింక సంగిలిసి ఎత్కి సంగ దిల.

24 జేవ్ సూన కెర, జేవ్ ఎత్కిజన్ ఎక్కి మెన్సు తెన్ బెద దేముడుక ఇసి మెన గట్టిజ అవాడ తెన్ ప్రార్దన కెరుక దెర్ల: “ఎత్కిచి కంల వెల్లె తిలో అమ్చో దేముడు ప్రబువ, పరలోకుమ్ బూలోకుమ్, నముద్రుమ్, జేవ్ ఎత్కితె తతిసి కిచ్చొ నే పిట్టె జెర్లయేలోసా తూయి.

25 తుమ్చి సుద్ది తిలి ఆత్మ లట్టబ్బికయ్, తుచో సేవ కెర్లొసా జలో అమ్చో పూర్ణమ్చి దావీదుచి చోడివాట్ తూయి సంగిలిసి కిచ్చొ మెలె, దేముడుక నేన్ల దేసిమలుచ మాన్సుల్ కిచ్చొక జోవయింక నిస్కారుమ్ ఉచర వెల్లెల మాన్సుల్ మెనన్ల? అమ్చయ్ ప్రజల్ కి జోవయింక నేన్ల రిత జా, కిచ్చొక కామ్క నెంజిల కుట్రల్ జోవయించి రిసా ఉచర్ల?

26 ఒండి లోకుమ్చ రానలు, అదికారుల్, కుట్ర కెర్లి రితి ఎక్కితె బెద, దేముడుక కి, జో ఏలువ కెరయ్తో క్రిస్తక కి యుద్దుమ్ కెర్లి రితి జల మెన దావీదుచి అత్తి రెర్ల అస్సె.

27 నిజమి, ఈంజయి పట్టుమ్తె హేరోదు రానో, పొంతి పిలాతు అదికారి, యూదుల్ నెంజిలస ఇస్రాయేలులు మెల అమ్చయ్ యూదుల్, ఎత్కిజని, దేముడుచి సుద్ది తిలో తూయి ఏలువ కెరయ్లో సేవ కెర్లొసా జలో యేసుక కుట్ర కెర, జోవయించి ఉప్పిరి యుద్దుమ్ కెర్లి రితి జల.

28 ‘జర్లు జవున్’ మెన తూయి అగ్గె తెంతో తుచి అదికారుమ్క సెలవ్ దా తిలిసి ఎత్కి, జోవయించి పెట్టిచి విన్సుమ్క జేవ్ జర్లు కెర్లె.

29 అప్పె కి, ప్రబువ, ఈంజేవ్ తుచ సేవ కెర్లెక బియడ్తె. గని ఇన్నెక కన్యారుమ్ దెక,

30 జొర్ణో తిల మాన్సుల్క ఇన్సిచి అత్తి చెంగిల్ కెర్లె తా, సుద్ది తిలో తుచో సేవ కెర్లొసా యేసుచి నావ్ తెన్ జోచి అదికారుమ్క గుర్తు జత వెల్లె కమొ కెరవ కెరవ, ఈంజేవ్ పూర్తి దయిరిమ్ తెన్ తుచి సుబుమ్ కబుర్ సంగిలి రితి ఇన్నెక తోడు తా, మెన ప్రార్దన కెర్లెనుమ్” మెన, బెర తిలస ఎత్కిజన్ ఎక్కి మెన్సు తెన్ ప్రార్దన కెర్లె.

31 దస్సి ప్రార్దన కెర కేడయేలి బేగి, కిచ్చొ జర్లు జలి మెలె, జేవ్ సబ కెర్లె తిలి గేరు కదుల్ జంక దెర్లి, చి దేముడుచి సుద్ది తిలి ఆత్మ జోవయించి పెట్టి బెర పూర్తి సెక్తి దెతికయ్, పూర్తి దయిరిమ్ తెన్ దేముడు దిలి బోదన కెర్లిసి ఎత్కి సంగుక దెర్ల.

యేసుక నంపజలన కట్టు తెన్ తిలిసి

32 జేవ్ పొదులె, యేసుప్రబుక నంపతిలస ఎత్కిజని, ఎక్కి ఆత్మ, మెన్సు, ప్రేమ తెన్ తిల. “అంచయ్” మెన, జోవయింక కలుగు జల అస్సెల్చి రిసా జోవయింతె కో కి పోటి సంగితి నాయ్, గని జోవయింక కలుగు జలిన్క ‘అమ్ ఎత్కిజన్చి’ మెన, సర్ల తెన్ ఎక్కిలోక ఎక్కిలో తోడు కెర్లె తిల.

33 పడ్డా, దేముడు యేసుచి అత్యున్నక్తి జోవయించి పెట్టి తిలి రిసా, జేవ్ బారజిన్ జోవయించ బారికుల్ పూర్తి దయరిమ్ తెన్ యేసుప్రబు మొర అన్నె జలిసిచి రిసా సాచి సంగితె తిల. జో ప్రబుచి దయచి ప్రేమ జేవ్ సంపజలన ఎత్తిజిచి పెట్టి బెర కామ్ కెర్తె తిలి.

34 జోవయంతె కక్క కి కొత్తు నాయ్. కిచ్చొక మెలె. జోవయంతె కక్క ఒగ్గర్ బుయి గే గెరల్ గే తయెదె గే, జో విక గెలెదె, చి జా వికిలి డబ్బిల్ అన కెర,

35 యేసుచ బారికుల్చి చట్ట తివుల. 'నెంజలనక దొర్పు జవున్' మెన, నెంజలనక వంట దెవుల. జాచి రిసా కక్క కి కొత్తు జయె నాయ్.

సత్తిమ్ జలో బర్నబా

36 యోసేపు మెలొ ఎక్కిలో జోవయంతె తిలో. 'దయరిమ్ కెర్తెసా' మెలి అర్దుమ్ తెన్ జోక 'బర్నబా' మెన, బారజిన్ బారికుల్ అసిమ్ నావ్ తియ తిల. జో, యూదుడు జలో లేవీ మెలొ పూర్ణుమ్చొచి సెకుమ్చొ జయెదె. జో జెర్మిలి దేసిమ్ కేన్ మెలె, కుప్ర మెలి దీవి దేసిమ్.

37 జో కిచ్చొ కెర్లె మెలె, జోక కలుగు జలి ఏక్ బాటి జో విక కెర, జా వికిలి డబ్బిల్ దెరన, జేవ్ బారజిన్ బారికుల్చి చటె తిలన్.

5

అననీయని సప్పీరా

1 అననీయ మెలొ ఎక్కిలో, మాన్సు, సప్పీరా మెలి తేర్చి తెన్, దొగుల బెద జోవయించి బుయి ఏక్ విక కెర,

2 తేర్చి కి జాన్తె, జా బుయి వికిలి డబ్బిల్ సగుమ్ తియన కెర, ఎక్కి వాట యేసుచ బారికుల్తె అననీయ అన దిలన్.

3 అన్తికయ్, పేతురు జోక, "సయ్తాన్ తుచి పెట్టి నీకడ అన్నె, చి దేముడుచి సుద్ది తిలి అత్తచి మొక్కె తుయి అబద్దుమ్ జా, జా బుయి వికిలి డబ్బిల్చి ఏక్ వాట తియన కెర, కిచ్చొక సయ్తానుక సూన జా పాపుమ్ కెర్లెది?

4 జా బుయి నే వికితె అగ్గె, జా పూర్తి తుచి అస్తి జా తిలి. జా వికిలి పడ్డా కి, జా డబ్బిల్చి సత్తిమ్ కెరుక పూర్తి తుచి పూచి. తుయి అప్పె ఉచర్లి మోసిమ్ కిచ్చొక? తుయి కెర్లెన్చి అర్దుమ్ పూర్తి ఉచరు. తుయి కెర్లెన్ మాన్సుక అబద్దుమ్ సంగిలిసి, గని అన్నె ముక్కిమ్క కిచ్చొ పాపుమ్ జలది మెలె, తుయి దస్సి కెర, దేముడుకయ్ అబద్దుమ్ సంగ అస్సిసి" మెన, అననీయక పేతురు తీర్పు సంగిలన్.

5 ఈంజేవ్ కొడొ సూన్సి బేగి, అననీయ బుయ్యె సేడ మొర గెలన్. జో తప్పు కెర మొర్లెన్చి రిసా సూన్లన ఎత్తిజిన్ బియఁ గెల.

6 తెదొడి ఒత్త తిల ఉబెడల్ బట్ట తెన్ జోచి పీనుమ్ డంక, ఉక్కుల వయన, మెన్నె రోవ గెల.

7 రమారమి తిన్నె గంటల్ గెతికయ్, అననీయచి తేర్చి జేవ్ బారికుల్ తిలిన్తె అయ్లి. మున్సున్క జర్గు జలిసి జా నేనె.

8 జెతికయ్, పేతురు జాక వసుల, జా బుయి వికిలి డబ్బిల్చి రిసా జాక పుసిలన్. అననీయ దిలి ఎదిలి డబ్బిల్చి రిసా సంగ, "తెద్దిలకయ్ జా బుయి వికిలదు గె?" మెన పుసితికయ్, జా "తెద్దిలకయ్" మెన సంగిలి.

9 పేతురు జాక, "తుమ్ దొగుతెర కుట్ట కెర అబద్దుమ్ సంగిలిసి, ప్రబుచి అత్తుక కొకడ్డి రితి జతయ్ మెన బిస్సు నాయ్ గె? అదె! సూసు! తుచొ మున్సుద్క రోవిలన అన్నె ఉట్ట జెతికయ్ అవాడ్ జెతయ్. అయ్లె, తుచి పీనుమ్ ఉక్కుల వయన తుక కి మెన్నె రోవుక గెచ్చుల" మెన సంగిలన్.

10 సంగిల్ బేగి, జా కి జోచి చట్ట సేడ మొర గెలి. ఉబెడల్ గేర్ తెడి జా కెర, జాక, 'జా కి మొర అన్నె' మెన దెక కెర, జాక ఉక్కుల వయన మెన్నె గెచ్చు, మున్సున్చి సొడి జాక రోవిల.

11 జా దీసి జర్గు జలిన్చి రిసా, యేసుక సంపజలనచి సంగుమ్చ ఎత్తిజిసి, సూన్ల అన్నె మాన్సుల్ ఎత్తిజిసి, దేముడు యేసుచి అత్యున్నక్తిచి రిసా బియఁ గెల.

12 జేవ్ బారజన్ జోవ బారికుల్చి అత్తి ప్రబు ఒగ్గర్ ఒగ్గర్ వెల్లెల కమొ జర్గు కెరయ్లన్. జేవ్ పొదులె, జేవ్ రోజుక దేముడుచి గుడితె పూర్ముచొచి సొలోమోను నావ్ తిలి పేడె సబ కెరుక అలవాబ్ జా తిల.

13 వేర మాన్సుల్ జోవయింతెన్ ఒత్త బెదుక బియః గెల, గని ప్రెజల్ ఎత్తిజిన్ జోవయింక ఒగ్గర్ గవురుమ్ దెకిత్ తిల.

14 అగ్గెచి కంబ, అన్నె మున్సుబోదల్ ఒగ్గర్జిన్, తేరబోదల్ ఒగ్గర్జిన్, ఒగ్గర్జిన్ మాన్సుల్ ప్రబుక పూర్తి సంపజా గెల.

15 ప్రెజల్ అన్నె కిచ్చొ కెర్ల మెలె, పేతురు జోవయింక వాటు జవున్ అయ్లె, “ఎక్కి జోవయింక నీడ అమ్క సగుమ్జిన్క లయన్, జవున్” మెన, జొర్ణొ తిల జోవయింక మాన్సుల్క వయన్, మంచల్తె జవున్, అంతుర్పొతె జవున్, వాటులె నిజవ దిల.

16 యెరూసలేమ్ పట్టుముచి సుట్టునంతచ గవ్వెలె తెంతొ కి ఒగ్గర్జిన్ జా కెర, జోవయింక జొర్ణొ తిల మాన్సుల్క, బూతుమ్ దెర్ల మాన్సుల్క, కడ ఆన్ల, చి జేవ్ ఎత్తిజిన్ కి చెంగిల్ జల.

బారికుల్క దెర జేల్తె గలిలిసి

17 ఎత్తిక వెల్లొ పూజరి, మాత్రుమ్, జోవయింతెన్ తిలన ఎత్తిజిని, సద్దూకయ్యులు మెల పండితుల్; యేసుచ బారికుల్చి ఉప్పిరి పూర్తి గోన జా బార్ జా,

18 జోవయింక దెర, మాములుమ్ జేల్తె గలిల.

19 గని, జా రాతి, ప్రబుచొ దూత ఎక్కిలో జేల్తెచ కెప్తివొ ఉగుడ కెర, బారికుల్క విడ్డల్ కెర బార్ కెర్లన్. చి జోవయింక,

20 “తుమ్ దేముడుచి గుడితె గెచ్చు పెన, నెడిమి టీవోజ, ప్రబుతె దొర్పు, జతి వరలోకుమ్తె బెదితి అత్తుతె జెర్మున్ జా జతి రచ్చనచి రిసాచి సుబుమ్ కబుర్ ప్రెజల్క పూర్తి బోదన కెర” మెన, దేముడుచ దూత ఆడ్ర దా సంగిలన్.

21 దూతచి కోడు సూన కెర, జేవ్ పెందలె ఉజిడి జలి పొది, దేముడుచి గుడితె పెన, బోదన కెరుక దెర్ల. దేముడుచి గుడితె బారికుల్ పెన బోదన కెర్లె తిలి మదెనె, ఎత్తిక వెల్లొ పూజరి, జోవయింతెన్ బెదిలన్, జోవయింక ‘విడ్డల్ జా అస్తి’ మెన నేన కెర, ‘సబ కెరుమ్’ మెన ఇస్రాయేలుల సబతె వెసితన ఎత్తిజిన్క బుకారా కెర, బారికుల్క కడ అనెతి రిసా, జోవయింక జమాన్సుక జేల్తె తెద్రయిల.

22 జేవ్ జేలితె పాచెలె, కెప్తివొ ఉగిడ్లె, జేవ్ బారికుల్ ఒత్త నాయ్, చి వెల్లెల మాన్సుల్తె అన్నె బుల జా సంగిల.

23 “అమ్ జేల్తె గెలమ్, చి ఒత్త పాచెలె, జేల్తెచ కెప్తివొ సంజె తెంతొ డిట్టుమ్ డంక అస్తి. చి అమ్చ జమాన్సు కెప్తివొ సరిగా రకితె తిల, గని అమ్ కెప్తివొ ఉగిడ్లె, తెడి కోయి నాయ్” మెన సంగిల.

24 సంగిలె, దేముడుచి గుడిచొ ఎజొమానిచి వెల్లెల పూజర్లు సూన, పూర్తి ఆచారిమ్ జా, “ఇన్నెచి అర్దుమ్ కిచ్చొ? అప్పె అన్నె కిచ్చొ జర్గు జయెదె?” మెన, బమ్మ జల.

25 తెదొడి కో గే జేవ్ వెల్లొ మాన్సుల్తె జా కెర, “తుమ్ జేల్తె గలిలన దేముడుచి గుడితె టీవోజ ప్రెజల్క సికడతె” మెన సంగిల.

26 సంగితికయ్, దేముడుచి గుడిచ జమాన్సుచ ఎజొమాని, జోవయింక జమాన్సు తెన్ గెచ్చు, బారికుల్క దేముడుచి గుడి తెంతొ బార్ కెర్ల. గని జోవయింక కిచ్చొ దెబ్బల్ పెట్టి నాయ్, అల్లర్ కెరుక మెన చడిత్ కి నాయ్. కిచ్చొక మెలె, ‘జోవయింక అల్లర్ కెర్లె ప్రెజల్ అమ్క పత్రల్ గల మార గెలుల’ మెన బియః గెల.

27 జలె, బారికుల్క దేముడుచి గుడి తెంతొ బార్ కెర, జోవయింక సబ కెర్లె గేరతె కడన, సబ కెర్లెచి మెయ్లె టీవో కెలచి ఎత్తిక వెల్లొ పూజరి జేవ్క పరిచ్చు కెర్లొ.

28 “ఈంజ జోచి నావ్ తెన్ తుమ్ ప్రెజల్క సికడుక జయె నాయ్, మెన తుమ్క ఆడ్ర దిలమ్, గని ఒండి ఈంజ యెరూసలేమ్తెచ మాన్సుల్ ఎత్తిజిన్క తుమ్ సికడ అస్సున్. అన్నె, అమ్క, ‘తుమి జోవయింక మార్లదు’ మెన, జో మాన్సుచి రిసా అమ్కయ్ నింద కెర, అమ్కయి జా పాపుమ్ వయడుక ఉచర్లసు” మెన బారికుల్క తీర్పు సంగిల.

29 పేతురు, బారికుల్ ఎత్తిచి రిసా కిచ్చొ జబాబ్ దిలన్ మెలె, అమ్ కచి కోడు ముక్కిమ్క సూన కెరుక మెలె, మాన్సుచి కోడు నాయ్, గని దేముడుచి కోడు.

30 తూమ్ యేసుక నిలువతె టీవడ మార్దదు, గని అమ్చ దేముడు ప్రబు జోక అన్నె జియడ్డె.

31 “జెలె, యేసుక అన్నె జయడ, అమ్చో దేముడు కిచ్చొ కెర్లొ మెలె, జోక జోచి ఉజెజెత్ పక్క వెనడ, ఇస్రాయేలుల్ మెల యూదుల్క, ‘జేవ్ కెర్లె పాపల్క పెట్టి దుకుమ్ జా ముల జోక నంపజా, జోవయించి పాపుమ్ పుంచి జప్పన్’ మెన, యేసుక, రచ్చించుప కెర్లొసా, ఏలుప కెర్లు మెన, జోక గవురుమ్ కెర అన్నె.

32 ఈంజ ఎత్తిచి రిసా ఆమ్ సాచుల్ జా అన్నమ్. జోచి కోడు రితి కెర్లొనక దేముడు దిలి జోచి సుద్ది తిలి ఆత్మ కి సాచి జతయ్.” మెన పేతురు సంగిలన్.

33 జేవ్ వెల్లెల మాన్సుల్ నూన ఒగ్గర్ కోపుమ్ జా, జేవ్ బారికుల్క మారుక కోర్ప జల.

గమలీయేల్ సంగిలి కొణ్ణ

34 గమలీయేల్ మెలో పరిసయ్యుడు ఎక్కిలో ఒత్త జేవ్ వెల్లెల మాన్సుల్తె తిలో. జో మోసి తెన్ దేముడు దిలి ఆగ్గల్ సికణ్ణసా జయెదె. జోక ఎత్తిజని, ‘చెంగిల్ మాన్సు’ మెన గవురుమ్ కెరుల. జో మాన్సు టీవ, దేముడుచి గుడిచ జమాన్సుక, ‘ఈంజేవ్ మాన్సుల్క గడియ బార్ కెర తా’ మెన ఆడ్ర దిలన్.

35 బారికుల్క బార్ కెరవ, బెర తిల వెల్లెల మాన్సుల్క గమలీయేల్ ఇని మెన సంగిలన్: “అమ్చ ఇస్రాయేలులుచ ఓ తుమ్ వెల్లెల మాన్సుల్, జేవ్ మాన్సుల్క తుమ్ కిచ్చొ కెరుక ఉచ్చర్ గే, జాగర్ల తా.

36 జా సుట్టు జర్లు జలిన్చి రిసా ఏద కెర. జేవ్ పొదులె దూదా మెలో ఎక్కిలో ‘ఆవ్ వెల్లొ’ మెన సొంత గవురుమ్ సంగుక బుల్లె తిలో, చి రమారమి చెత్తర్ పుంజోజిన్ మాన్సుల్ జోవయంతెన్ బెదిల. గని మాన్సు జోక మార్కియ్, జోచ సిస్సుల్ చెదుర్లు జల, చి జా ఎత్తి ఆరి పాడ్ జా గెలి.

37 జాచి వట్లె, ప్రెజల్ లెక్క కెర్లె తిల పొదులె, గలిలయ ప్రాంతుమ్చో యూదా మెలో ఎక్కిలో కి వెల్లొ మెనన, సగుమ్జిన్క సికడ సిస్సుల్ కెర్లొ. గని జో కి మొర గెలో, చి జోచ సిస్సుల్ కి చెదుర్లు జా గెల.

38 “జాకయ్, తుమ్ అప్పె దెర్ల మాన్సుల్చ రిసా ఆవ్ కిచ్చొ మెంతసి మెలె, ఈంజేవ్ మాన్సుల్క ముల. తుక్లె తా. కిచ్చొక మెలె, ఈంజేవ్ కెర్లెసి, మాన్సుల్ ఉచర్లెసి రిత జలె, జాచి ఇస్సుమ్క పాడ్ జయెదె, చి ఆమ్ పిట్టవుక మెన కిచ్చొ కెరుక నాయ్.

39 గని ఏక వేల ఈంజేవ్ కెర్లెసి, దేముడు తియార్లెసి జలె, తుమ్ కెర్లె సిచ్చ కెర్లె కి, పిట్టవుక నెతుర్లు. జాగర్ల తా. ఈంజేవ్ కెర్లెసి దేముడు తియార్లెసి జలె, తూమ్ అల్లర్ కెర్లె, జో దేముడుక విరోదుమ్ సుదల్ కి జస్సె” మెన, జాగర్ల సంగిలన్.

సిస్సుల్ విడ్డల్ జలిసి

40 జో గమలీయేల్ దస్సి సంగితికయ్, వెల్లెల మాన్సుల్ సూన్ల, చి బారికుల్క అన్నె బుకారా కెర, కొర్లల్ తెన్ పెట, “తుమ్ యేసుచి నావ్ తెన్ కక్క కిచ్చొ సికడుక జయె నాయ్” మెన ఆడ్ర దా, విడ్డల్ కెర్లె.

41 బారికుల్, జెలె, కిచ్చొ బుద్ది తెన్ జా సబ కెర్లెన్ తెంతో బార్ జలె మెలె, ‘యేసుప్రబుచి నావ్క గవురుమ్ కెర్లె రిసా జోచి గవురుమ్ దెకయేలి రిసా, అమ్ నిస్కారుమ్ జంక జలెకి, జొయ్య అమ్క నిసాన విలువ రితి దెక అన్నె మెన అమ్క పూర్తి సర్ల’ మెన, సర్ల సేంతుమ్ తెన్ తిల.

42 అన్నె, దేముడుచి గుడితె కి, గెరి కి, యేసుక, ‘జొయ్య దొర్లు జలో క్రిస్తు రచ్చించుప కెర్లొసా’ మెన, ప్రెజల్క రోజాక సికడుక ములితి నాయ్.

6

నిసాన్ల సత్తుజిన్ సత్తిమ్ తిల మాన్సుల్

1 జా పొదులె, ఒగ్గర్జిన్ మాన్సుల్ యేసుక నంపజా, జోచ సిస్సుల్ జా గెతె తిల. జోవయంతె తిల బీద సుదల్ ఎత్తిజిన్క అన్నిమ్, కిచ్చొ కిచ్చొ తోడు దెంక ఇస్సుమ్ జలెకి, ఎతివాట్జిన్ జా తిల, చి దొర్లు జలిసి ఎత్తిజిన్క వంతుక నెతిర్ల, చి “ఎత్తి బాన లట్టబై రండెల్ మాన్సుల్క సరిపుచువ జతిసి దెతతి గని అమ్చక నాయ్” మెన, గ్రీకు బాన లట్టబ్లన గోన కెర్లె.

2 జాకయ్, తెదొడి జేవ్ బారజిన్ యేసుచ బారికుల్ కిచ్చొ కెర్ల మెలె, యేసుక నిదానుమ్ సంపజలన ఎత్తిజిన్క బుకారా కెర, “అము కెడ్దొడి తెదొడి బీద సుదల్క అన్నిమ్ వంటితె తంక జలె, *ప్రబుచి నుబుమ్ కబుర్ బోదన కెర్సి పిట్ట గెచ్చెదె. పిట్టె చెంగిల్ నాయ్.

3 జాక కిచ్చొ కెరుక మెలె, ‘బీద సుదల్క దెకుత్’ మెన, తుమ్చి తెంతొ నత్తుజిన్క నిసాన, కీస మాన్సుల్ జేవ్ నత్తుజిన్ తంక మెలె, ‘సరిగా మాన్సుల్ జేవ్’ మెన, ఎత్తిజిన్క జాన్సన జా తంక, చి ప్రబుచి ఆత్తు జోవయింది పెట్టి జేవ్చి కామ్ పూర్తి కెర్తి బుద్ది తిలస జేవ్ తంక; బుద్ది సుదల్ జేవ్ తంక. దస్స మాన్సుల్క తుమ్ నిసాన, చి జా సేవచి రిసా అమ్ జోవయింక అదికారుమ్ దేమదె.

4 “అమ్, కిచ్చొ కెరుక అన్న మెలె, అము ప్రార్దన కెర్తె తంక, ప్రబుచి నుబుమ్ కబుర్ బోదన కెర్తె తంక” మెన బారజిన్ సంగితకయ్,

5 మొత్తుమ్ సంపజల మాన్సుల్ జా కోడుక సర్ల జలె, చి బీద సుదల్క దెకుక మెన కక్క. నిసాన్ల మెలె, సైపను మెలో ఎక్కిలోక; జో బలె నముకుమ్చో, జోచి పెట్టి దేముడుచి సుద్ది తిలి ఆత్తు పూర్తి కామ్ కెర్తి బుద్ది జోక తయెదె. అన్నె దస మాన్సుల్క తక్క. నిసాన్ల మెలె, పిలివ్, ప్రాకొరుక, నీకానోరుక, తీమోనుక, పర్మోనాన్క, నీకానోరు, జలె, జెర్మన్క యూదుడు నెంజె, గని దేముడుక సంపజా, యూదుల్చి అలవాట్తె బెద మాన్సుల కెరన తిలో. జో దూరి తిలి అంతియింకయ పట్టుమ్చో మాన్సు.

6 ప్రెజల్ జేవ్ నత్తుజిన్క నిసాన బారికుల్క కడ ఆన్తికయ్, జేవ్ ప్రార్దన కెర జోవయింక బోడివో చడ అదికారుమ్ దిల.

స్వపనుక విరోదుమ్ సుదల్ గోస కెర్తిసి

7 జేవ్ పొదులె, ఒగ్గర్ ఒగ్గర్జిన్ మాన్సుల్ దేముడు దిలి యేసుచి రిసాచి నుబుమ్ కబుర్ నూన సంపజల. జా యెరూసలేమ్ పట్టుమ్తె ప్రెజల్ ఒగ్గర్జిన్ సంపజల, చి దేముడుచ పూజర్లు కి ఒగ్గర్జిన్ సంపజా నిదానుమ్ జలె.

8 పడ్డొ స్వపను, ప్రబుచి ఆత్తు జోచి పెట్టి తిలి ఒగ్గర్ ప్రేమ సెక్తిచి రిసా, ప్రెజల్ తిలిన్తె యేసుచి అదికారుమ్ దెకయ్తి గుర్తుచ ఒగ్గర్ ఒగ్గర్ వెల్లో కమొ కెర్లన్.

9 గని యూదుల్కతెచ సగుమ్జిన్ ‘విడ్డల్ జలస’ మెన నావ్ తియన్లి గుంపుచ జవుల. జోవయింక సొంత సబగిర్ తయెదె. జేవ్, పడ్డొ లిబియ దేసిమ్చి కురెనియు పట్టుమ్చ, బగుప్తు దేసిమ్చి అలెక్సంద్రియ పట్టుమ్చ, కిలికియ ప్రదేసిమ్చ, ఆనియా ప్రదేసిమ్చ తెన్, కోపుమ్ జా, “తుచి బోదన తప్పుచి కిచ్చొగి” మెన, స్వపనుక ఆరి నింద కెర్ల.

10 గని ప్రబుచి ఆత్తు స్వపనుచి పెట్టి సికడ్డికయ్, జో బోదన కెర్తెనె బుద్ది గ్యానుమ్ ఒగ్గరి. చి జేవ్ కోపుమ్ జలస జీనుక నెత్త లాజీ జలె.

11 జాకయ్ జేవ్ జోవయింది లాజీచి రిసాచి గోసక గుట్టు తెన్ కిచ్చొ కెర్ల మెలె, వేర మాన్సుల్క తోడు దెరన, “ ‘మోసే పూర్తుమ్చోచి అత్తి దేముడు దిలి ఆగ్గుల్చి రిసా, చి దేముడుచి రిసా ప్రెజల్క కిచ్చొ కిచ్చొ సికడ, ఈంజొ స్వపను మోసేక, దేముడుక, దూసుచ కెర అన్నె. అమ్ సొంత నూన్సమ్’ మెన తుమ్ సంగ” మెన జేవ్ తోడు దెరన్ల మాన్సుల్క అబద్దుమ్ సాచి సికడ్ల.

12 జేవ్ కోపుమ్చ మాన్సుల్ దస్సి ప్రెజల్క, వెల్లెల మాన్సుల్క, మోసే తెన్ దేముడు దిలి ఆగ్గుల్ సికడ్డొనా సికడ్డన, సికడ్డికయ్, జేవ్ స్వపనుతె జా కెర, జోక దెర, నబ వెసితనతె కడ ఆన,

13 అబద్దుమ్ సాచి సంగితసక టీవో కెలె. “ఈంజొ మాన్సు కెర్తొడె తెదొడి ఈంజ దేముడుచి గుడిచి రిసా, మోసే పూర్తుమ్చో రెగెడ్డి ఆగ్గుల్చి రిసా, అబద్దుమ్ సికడ్డె తత్తయ్.

14 ఈంజొ సంగిలన్ కిచ్చొ అవ్ నూన అన్నుమ్ మెలె, ‘నజరేతు గెచ్చొచో యేసు, ఈంజ దేముడుచి గుడిక పాడె కెర, మోసేచి అత్తి దిల అమ్చ అలవాట్లు మార్పుచ కెరు’ మెన ఈంజొ సంగితె తత్తయ్” మెన జేవ్ మాన్సుల్ అబద్దుమ్ సాచి సంగిలె.

* 6:2 6:2 నెంజెలి ‘ఎత్తి అదికారుమ్ తిలో దేముడు దిలి నుబుమ్ కబుర్’. ‘నుబుమ్ కబుర్’ మెలె, ఎత్తి అదికారుమ్ తిలో దేముడు దొర్లు కెర్ల రచ్చనచి కోడు. జో పావల్ చెమించుచ కెర్తెని రిసాచి కబుర్. యేసు దొర్లు జలో రచ్చించుచ కెర్తెనా జలిన్చి కబుర్. జో అర్చితుమ్ జా పావల్ గెచ్చయలి రిసా మాన్సుల్ పరలోకుమ్చి రాజమతె బెదితి అవ్కానుమ్ దొర్లు జలిన్చి కబుర్.

15 గని ఒత్త నబతె వెసిలన ఎత్త్రిజన్ సైపనుక చెంగిల్ దెకిలె, జోచి మొకొమ్ కీసి జా అస్సె మెలె, పరలోకుమ్చో దూతచి మొకొమ్చి రితి డీసిలి.

7

సైపను సంగిలి బోదన

- 1 తెదోడి, "జేవ్ సంగిలి సాచి సత్తిమ్ గె?" మెన ఎత్త్రిక వెల్లో పూజరి సైపనుక పుసిలన్.
- 2 సైపను కిచ్చో జబాబ్ దిలన్ మెలె, "ఓ బావుడ్లు, ఓ వెల్లెల మాన్సుల్, అంచి సాచి తుమ్ నూన. పూర్ణుమ్, అమ్చో అబ్రాహామ్ పూర్ణుమ్చో హారానుతె నే ఉట్ట గెతె అగ్గె, జో మెసాపాతమియతె జెతె తిలి పొది, గవుర్నుమ్ తిలో అమ్చో దేముడు జోక డీన కెర,
- 3 'తుయి ఈంజ తుచి దేసిమ్ ముల, తుమ్చ సొంత మాన్సుల్క ముల, వేర దేసిమి ఉట్ట గో. * జా దేసిమి పాచెతె ఎదక వాటు దెకయ్తె తయిందే' మెన సంగితికయ్,
- 4 అమ్చో అబ్రాహామ్ మెసాపాతమియ తిలి జా కల్లియుచి దేసిమ్ ముల దా ఉట్ట గెచ్చు, హారాను దేసిమి గెచ్చు జెతె తిలో. జో అబ్రాహామ్చో అబ్బొసి మొర గెతికయ్, దేముడు జోక ఒత్త తెంతో తెద్రయ్తికయ్, తూమ్ అప్పె జెతి దేసిమి ఉట్ట అయ్లో.†

5 గని జో ఇస్సె జెతె తిలి పొది, ఏక్ అడుగుచి ఎదిలి టాన్క సొంత మెనంతి రితి, జోక ప్రబు సెలవ్ దెయె నాయ్. గని, అబ్రాహామ్క ‡సంతానుమ్ తెదోడి నెంజెలి కి, దేముడు జోక, పడ్డొక ఈంజ దేసిమ్చి బుయి తుచి సొంత అస్సె తుకయ్ దా గెలిందె. తుకయ్, చి తుచి పెట్టె జెర్మితనక; తుచి సెకుమ్చక; కెయెక తెయెక తతి రితి దా గెలిందె మెన జో ప్రబు సంగిలన్.

6 "దేముడు జోవయింక అస్సె కిచ్చో సంగిలన్ మెలె, తుమ్చి సెకుమ్తె పడ్డొక జెర్మితన ఏక్ కాలుమ్క, చెత్తర్ పుంజో వెర్గులు వేర దేసిమి సైమ తెన్ జెతె తవుల, ఒత్త గెతిమాన్సుల్ జా జివుల.

7 గని జా కాలుమ్క జేవ్క ఏలువ కెర్తె దేసిమ్చక అవ్ సిచ్చ కెరిందె. చి సిచ్చ కెర్తె, తుమ్చి సెకుమ్చక ఒత్త తెంతో ఏడ్డల్ జా, బార్ జా ఇత్తల్ ఉట్ట జా, జెయ అంక ఒక్కి కెర్తె తవుల మెన ప్రబు వరుమ్ దా,§

8 అబ్రాహామ్చి సెకుమ్చ మున్నబోదల్ ఎత్త్రిజన్ జో దేముడుచ మాన్సుల్ జెతి గుర్తుచి సున్నతి కెరనుక మెన అన్నెక్ * ప్రమానుమ్ దిలో.† జాకయ్, అబ్రాహామ్ ఇస్సాకు జెర్మి అట్టు పొదుల్క జా గుర్తు కెర్తె సున్నతి కెర దిలో. పడ్డొ ఇస్సాకు యాకోబుక ‡పాయిలన్, చి యాకోబు §పుత్తర్నుల్క పాయిలన్. జేవ్ బారజన్ జెలె, అమ్చి సెకుమ్క తోలితోచ వెల్లెల మాన్సుల్ జలె.

సైపను సంగిలి యోసేవుచి కత

9 "జలె, జేవ్ బారజన్తె దెన్నుజన్ అన్నసింసి యోసేవు మెలొ జోవయించో బావొన్క గోన జా, జా వాట్ అయ్లచి ఐగుప్తు దేసిమ్చో మాన్సు ఎక్కిలోతె * ఏక గెల. గని దేముడు జోక తోడు తా,

10 జో సేడ్డె సైమల్ ఎత్త్రి తెంతో రచ్చించుప కెర్లన్. చి ఐగుప్తు దేసిమ్చో పరో రాన్, యోసేవుక దెక, చెంగిలో మాన్సు, బుద్ది తిలోసా ఈంజె" మెన, జోక మెన్సిలన్, చి జోచి గెర్తె ఎత్త్రిచి ఉప్పిరి, ఒండి రాజిమ్చి ఉప్పిరి కి, 'ఏలువ కెర్చు' మెన జోక వెల్లో కెర్లొ. ఒత్త రానొక పిట్టవ యోసేవుక కో వెల్లో జతి నాయ్.

11 "జలె, †యోసేవు ఒత్త ఏలువ కెర్తె తతికయ్, ఒండి ఐగుప్తు దేసిమి, జోచ అన్నసింసి తిలి కనాను దేసిమి కి కరు అయ్లి. చి ఎత్త్రిజన్ గొప్ప సైమల్ జలె, చి అమ్చ పూర్ణుల్క కతిసి కేన్ కి దొర్చు జయె నాయ్.

12 గని, 'ఒత్త ఐగుప్తు దేసిమి దాన్ తియె అస్తి' మెన అమ్చో యాకోబు పూర్ణుమ్చో నూన తా, దాన్ గెన్న అన్తు మెన, పుత్తర్లు జలె అమ్చ పూర్ణుల్క ఒత్త తెద్రయ్లన్.

* 7:37:3 ఆదికాడుమ్ 11:31, 12:1-3. † 7:47:4 ఆదికాడుమ్ 12:4-8. ‡ 7:57:5 ఆదికాడుమ్ 15:5, 7, 18, 17:8, 16-19. § 7:77:7 ఆదికాడుమ్ 15:13-14. * 7:87:8 అత్త † 7:87:8 ఆదికాడుమ్ 17:10-14. ‡ 7:87:8 ఆదికాడుమ్ 25:26. § 7:87:8 ఆదికాడుమ్ 35:22-26. * 7:97:9 ఆదికాడుమ్ 37 అద్యయమ్. † 7:117:11 ఆదికాడుమ్ 41-50 అద్యయల్.

13 దొయ్యెరి తెద్రయ్ తికయ్, ఆవ్ తుమ్చా బాబొది మెన యోసాపు జోవయింక సంగిలన్. చి జా దీసి తెంతో యోసాపుచి కుటుంబుమ్చ మూన్సుల్ రాసో జలో పరో రాసో తెన్ అలవాట్ జల,

14 చి అబ్బొసి జలో యాకోబుక, జోచి కుటుంబుమ్చ ఎత్తిక, గెర్చ ఎత్తిక, 'ఇత్తల్ జా కతు. జితు!' మెన, యోసాపు సంగ తెద్రయ్ లన్. యాకోబుచి కుటుంబుమ్చ, గెర్చ, కెత్తిజన్ జవుల మెలె, డబ్బయ్ పాచ్ జిన్.

15 జలె, *యాకోబు జోచ మూన్సుల్ ఎత్తిజిన్ తెన్ ఐగుప్తు దేసిమి ఉట్ట గెల. యాకోబు ఒత్త జియ, ఒత్త మొర్లన్. జోచ పుత్తర్లు కి ఒత్త జియ మొర్ల, చి

16 జోవయింతె కో మొర్ల, కనాను దేసిమ్చి 'సెకెము' మెలి జేవ్ అగ్గె జితె తిలి బయిలు దేసిమ్తె పీనుమ్ వయన, రోవెల. కేన్ మెన్సు రోవెల మెలె, జా నుట్టు వెండి కాసుల్క 'హమారు' మెలో ఒత్తచో మూన్సుతె అబ్రాహామ్ మెన్సున్ గెన తిలో. జయ్యి మెన్సు రోవెల.

మోసాచి మత్తెలి సైపను సంగిలిసి

17 "జలె, జేవ్ ఐగుప్తు దేసిమి బన జా రమారమి చెత్తర్ పుంజో వెర్సుల్ జలి పొది, 'ఐగుప్తుతెకి జేవ్ నే ఉట్ట గెతె అగ్గె అబ్రాహామ్ క సంగ తిలి దేసిమి అన్నె ఉట్ట గెతి సమయమ్ జా అస్స' మెన దేముడు దెకిలన్. జా సమయమ్ జా అయ్లి పొది, అమ్చి సెకుమ్చ జేవ్ బారజన్ పుత్తర్సుల్చ మూన్సుల్ కెత్తిజన్ జా తిల మెలె, ఒగ్గెజన్ జా జెర్త అస్తి.

18 జేవ్ దస్సి ఒగ్గె ఒగ్గెజన్ జా గెతికయ్, అగ్గెచ పరో మెల రానల్ మొర్తికయ్, నోవో పరో ఏలువ కెర్తయ్. జో యోసాపుక నేస్టాసా, జోచ మూన్సుల్క విరోదుమ్ జలొసా.

19 జో అమ్చ పూర్తుల్క మోసిమ్ కెర్లన్. కీసి మెలె, 'జేవ్ జలె ఒగ్గెజన్ జా అమ్క జినుల' మెన, ఎత్తిక మారుక మెన, జోవయింక నోవర్ జెర్లిల బోదల్క 'దెర్ను సేడ్డు' మెన, అబ్బదింసిచి అత్తి పరో సైమ కెర దిలన్.

20 "జేవ్ పొదులె *మోసి జెర్లిలన్. దేముడు జోక ఒగ్గెర ప్రేమ దెకిలన్, చి తిన్నె జొన్నె ఎద జోవయింక అబ్బదింసి కీసి గే గెరి లుంకడ పోసిల.

21 గని వడ్డో, జోక అన్నె లుంకడుక నెత్త కెర, అబ్బదింసి బార్ కెర్తికయ్, పరోచి దువెసి జోక ఉక్కుల గెరి నా, 'సొంత పూత్తు' మెలి రితి దెక, జోక పోసిలి.

22 జా పోస, ఐగుప్తు దేసిమ్చ గ్యానుమ్ ఎత్తి పండితుల్చి అత్తి సికడ్డి, చి వడ్డిలె, జో ఒగ్గెర తెలిచి తెన్ లట్టబెదె, కేన్ కామ్ కెర్లె కి, తెలిచి నిదానుమ్ కెరెదె.

***మోసా తప్పు కెర బయిలు దేసిమి ఉట్ట నిగిలిసి**

23 "జలె, మోసిక దొన్ని విసా వెర్సుల్ జలి పొది, 'అంచ బాపుడ్లు జల అమ్చ ఇస్రాయేలుల్తె గెచ్చ దెకిన్దె' మెన ఉచర్లన్.

24 జో గెలన్, అన్నె, జోవయింతె ఎక్కిలోక ఐగుప్తు దేసిమ్చో ఎక్కిలో పెట్టిసి దెకిలన్. దెక, జో దెబ్బల్ కయ్లోసాక తోడు గెచ్చ, దెబ్బల్ పెట్టోసాక పెట మార్లన్.

25 దస్సి కెర కిచ్చొ ఉచర్లొ మెలె, అంక లోకుమ్ కెర్లొ అమ్చో దేముడు జోచి అత్తి అమ్క రచ్చింఛువ కెరెదె" మెన అమ్చ ఇస్రాయేలులు అర్దుమ్ కెరనుల, మెన ఉచర్లొ, గని దస్సి ఉచర్లొ నాయ్.

26 అన్నెక్ దీసి, మోసి జా వాటు అయ్లె, ఇస్రాయేలులు దొగుల పెట్టపుట్టి జా అస్తి మెన దెక కెర, "సొంతుమ్ కెరయిందె" మెన ఉచర పోసి జా, కిచ్చొ మెలో మెలె, "బాపుడ్లు, తుమ్ ఎక్కి సెకుమ్చ మూన్సుల్, తుమ్ కిచ్చొక ఎక్కిలో తెన్ ఎక్కిలో జిట్టి జా అస్సన్?" మెన పుసిలన్.

27 పుసితికయ్, తప్పు కెర్లొసా మోసిక సాడి వెలవ దా కిచ్చొ మెలన్ మెలె, తుయి కొన్నో? అమ్చి ఉప్పిరి తుక అదికారుమ్ నాయ్, అమ్క తీర్పు కెరుక తుక సెక్తి నాయ్.

28 కాలి జో ఐగుప్తుచో మూన్సుక తుయి పెట మార్ల దెబ్బల్ అంకయ్ ఆజి పెట్టి గె? మెన గగ్గల్ జలో.

† 7:15 7:15 ఆదికాండమ్ 46 అధ్యాయమ్. § 7:17 7:17 17వి ఉప్పిర్చి తత్తి టాన్: నిర్ణయకాండమ్, లేవీయకాండమ్ సంక్యాకాండమ్, ద్వితియోపదేశ కాండమ్ (నిర్ 1). * 7:20 7:20 నిర్ణయకాండమ్ 2:1-10. † 7:22 7:23 23వి ఉప్పిర్చి తత్తి టాన్: నిర్ణయకాండమ్ 2:11-22.

29 దన్ని సంగతికయ్, 'అంక మారుల' మెన, జా ఐగుప్తు దేసిమి తంక బియ్యం కెర, మోసే ఉట్ట నిగ, దూరి తిలి బయిలు తిలి మిద్యాను మెలి దేసిమి ఉట్ట గెచ్చ, ఒత్త జితె తిలన్. ఒత్త తా, పెండ్లి జా దొగుల పుత్తర్పుల్క పాయిలన్.

‡దేముడు మోసేక డీసిలిసి

30 "అన్నెక్ దొన్ని విసా వెర్పుల్ గెతికయ్, ఏక దీసి, మోసే జా బయిలు టాన్చి సీనాయి డొగ్రె తతికయ్, ఒత్త మాములుమ్ కంబో రూకు అస్స, రుక్మి అగి లగుక దెద్ది. అగి లగితో జా రూకు తెడి, దేముడుచ దూత రితో జా మోసేక డీసిలన్.

31 మోసే దెక, ఆచారిమ్ జలో. సరిగా దెకుక మెన ఇదిల్ పాసి గెచ్చుక దెద్ది, కిచ్చి సూన్లో మెలి,

32 'ఆవ్ తుచ పూర్పుల్చో దేముడు. ఆవ్, అబ్రాహామ్చి, ఇస్సాకుచి, పడ్డో యాకోబుచి, దేముడు.' మెన సంగ, దేముడుచి అవాడ్ అయిలి. దన్ని జతికయ్, మోసే బియ్యం, అద్దుర్ జా, దెకుక దయిరిమ్ జలో నాయ్.

33 తెదొడి, ప్రబు జోక, 'తుచ జోడ్లు కడను. తుయి టీవో జలి టాన్ ఒగ్గర్ సుద్ది అస్స.

34 జేవ్ ఐగుప్తు దేసిమ్చ అంచ ప్రెజల్క కెర్త అల్లర్ సైమల్ ఆవ్ దెక అస్స. జేవ్ ఏడ్డిసి సూస అస్సి, చి జోవయింక విడ్డల్ కెర బార్ కెరయిందె మెన, ఆవ్ ఉత్త జా అస్సి. అప్పె, జే! జా కామ్చి రిసా ఐగుప్తు దేసిమి తుక అన్నె తెద్రయిందె.' మెన ప్రబు జలో దేముడు మోసేక సంగిలన్.

35 "జో కిమోసేక జోవయింక మాన్పుల్, 'అమ్చి ఉప్పిరి తుక అదికారుమ్ నాయ్. అమ్క తిర్పు కెరుక తుక సెక్తి నాయ్' మెన అగ్గె సంగ తిల, గెద. గని జోవయింక విలుప కెరుక కి, జోవయింక విడ్డల్ కెర బార్ కెరుక కి మెన, రూక్తె డీసిలో దూత పోలిక జలోసాచి అత్తి దేముడు జోకయి ఆడ్ర దా తెద్రయిలో.

36 ప్రబుచి అదికారుమ్ తెడి జోవయింక విడ్డల్ కెర, బార్ కెర, వాల్ దెకయ్తె తిలి పొది, ప్రబుచి సెక్తి తెన్ ప్రబు సంగిల కిచ్చి కిచ్చి వెల్లో కమె మోసే కర్తన్. ఐగుప్తు దేసిమ్క నే ముల్తె అగ్గె కి, పడ్డో 'ఎరన్' సముద్రుమ్తె, పడ్డో జేవ్ ప్రెజల్ ఎత్తిజిన్ తెన్ జేవ్ దొన్ని విసా వెర్పుల్ జా బయిలు దేసిమి బుల్తె తిలి పొది కి.

37 "జలె, దేముడు అంకయ్ కిసి తెద్రయిలన్ గే, జోచ కబుర్లు సూసయ్తి రిసా, జోచి కామ్ జర్లు కెర్తి రిసా, తుమ్చ ఇస్రాయేలుల్తెచో అన్నెక్లొక పడ్డొక తెద్రవ టీవో కెరెదె" మెన అమ్చ పూర్పుల్క సంగ తిలోసా జో మోసేయి.

38 అమ్చ పూర్పుల్ జల ప్రెజల్ ఎత్తి జట్టు తెన్ జా బయిలు దేసిమి బుల్తె తిలి పొది, దేముడుచో దూత *సీనాయి డొగ్రె అన్నె డీస, మోసే తెన్ లట్టల్లన్. చి దూతక చి అమ్చ పూర్పుల్క జో మోసే మదెనె జా, అమ్క దెంక మెన దేముడు సాంత రెగిడ్ల ఆగ్గుల్, జివ్ దెత ఆగ్గుల్, జోతె నజ్సన్.

39 "గని అమ్చ పూర్పుమ్చ, జో సంగిలి కోడల సూనుక నెన కెర, జోక దూరి కెర్తి రితి జా, జేవ్ ముల దిలి †ఐగుప్తు దేసిమి తిలిన్క అన్నె కోర్వ జల,

40 అన్నె, మోసే డొగ్రె తెంతో నే ఉత్త జెతె అగ్గె, అహరోసు మెలో మోసేచో అన్నెన్తె గెచ్చ కెర, అమ్క దేముడ్లు జా అమ్చి పుల్తె గెచ్చ అమ్క వాటు దెకయ్తి రిసా, అమ్క బొమ్మల్ తెయార్ కెరు. అమ్క ఐగుప్తు తెంతో కడ ఆన్లో జో మోసే కేనె ఉట్ట గెచ్చ అస్స గే, అమ్ నేనుమ్ మెన ప్రెజల్ సంగిల.

41 జేవ్ పొదులె కిచ్చి కెర్త మెలి, వసాని పిల్లిచి రితిచి బొమ్మ ఏక తెయార్ కెర, జా బొమ్మక జోకర బలి దిల, చి జేవ్ కెర్తినచి రిసా సర్ద కెర్తన్.

42 జాచి రిసా, జేవ్ పొద్దుక, జోనుక, సుక్కల్క జోకర్తి ఇస్టుమ్ తిలె, దన్నుచక జోకర్తు! మెన దేముడు జోవయింక ముల, సిచ్చ దిలన్. దన్ని జలిన్చి రిసా, జోవయింక కబుర్లు రెగిడ్లి దేముడుచి కొడెత రెగ్గవ అస్స.

ఓ ఇస్రాయేలుచి సెకుమ్చ, తుమ్ బయిలు దేసిమి బుల్తె తిలి పొది, అంకయి గొరెల్ గట్ట కండ బలి దెతె తిలదు గె?

‡ 7:29 7:30 30చ ఉప్పిరచి తత్తి టాన్: నిర్ణమకాండుమ్ 2:23, 3 అద్యయిమ్ ఎద. § 7:35 7:35 నిర్ణమకాండుమ్ 5-14 అద్యయల్. * 7:38 7:38 నిర్ణమకాండుమ్ 19, 20 అద్యయల్, 24:12, 31:18. † 7:39 7:39 నిర్ణమకాండుమ్ 32 అద్యయిమ్.

43 నాయ్. 'దేముడ్డు' మెన వేరచక జొకరుక కోర్ప జా, 'మొల్లోక' దేముడు మెన, గుడి బండ జొకర్లదు. సుక్కో గుర్తు తిలో రొంపాయను మెలోసొక దేముడు మెన జొకర్లదు. దన్నచచ బొమ్మల్ కెర జొకర్లదు. తుమ్ దన్న కెర్లి రిసా, బబులోను దేసిమి ఒత్తల్తో తుమ్ సర్ద నెంతె తతి రితి, తుమ్క ఒత్తచ మాన్సల్ ఏలువ కెర్తు మెన, జేవ్ కడ నెత్తు, మెన సిచ్చ దెయిందె" మెన దేముడు రెగ్గ సిచ్చ దిలన్.

44 "జలె, జా బయలు దేసిమి అమ్చ పూర్ణమ్చ బుల్లె తిలి పొది ఇదిలిసి దేముడుచి గుడి తిలి రితి, టంబుగుడ్డక తెయార కెర్లి దేముడుచి †గుడి ముక్కిమ్క జోవయింతెన్ తిలి. ఇసి తెయార కెర" మెన దేముడు మోసిక కిచ్చి సంగిలన్ గే, జో సంగిలి పొలిక, జో సంగిల సామన్లుక తెయార కెర్ల.

45 ఒత్త తెంతో, మోసి కీమెర యెహోసువ మెలోసొ వెల్లో జలి పొది, అమ్చ పూర్ణమ్చ బయలు దేసిమ్క జీన ఈంజ దేసిమి ఉట్ట అయిల. *దేముడు తోడు తతికయ్, ఒత్త జితె తిల వేర వేర సెకుమ్లుచ మాన్సల్క అమ్చ పూర్ణమ్చ యుద్దుమ్ కెర ఉదడ గెల. తెదొడి కి, అమ్చ పూర్ణమ్చ జా గుడి వయ అన్ల. †ఒత్త తెంతో, అమ్చ పూర్ణమ్చ దావీదు రానో తిలి ఎదక కి జయ్యి గుడితె దేముడుక బక్తి కెర్లె తిల.

46 జో దావీదుక దేముడు ప్రబు ప్రేమ తిలో, చి యాకోబు బక్తి కెర్లె తిలో దేముడు ప్రబు కెయిలక తెయిలక తతి రితి దేముడుచి గుడి అవ్ జప్పన్ బందిందె మెన దావీదు అన జా ఉచర తిలో.

47 దసాచో బందుక మెన జో ప్రబు సెలవ్ దెయి నాయ్, చి దావీదుచో పుత్తుసి †సొలోమోను రానో జలి పొది, జొయ్యి బందిలో.

48 "గని, ఎత్తిచి కంట వెల్లో తిలో అమ్చో దేముడు ప్రబు కేనె జితయ్ మెలె, మాన్సు తెయార కెర్ల గుడితె తయె నాయ్. జోచి కబుర్లు సంగిలో పూర్ణమ్చచి అత్తి రెగిడ్లి రితి;

49 పరలోకుమ్ అంచి సిజాననుమ్. బూలోకుమ్ అంచ చట్టో నుదితి పొద్దొ. జాకయ్, అంచి విలువచి దేముడుచి గుడి తూమ్ కిసి బందితె? అంచి రిసా గేర బందిలె, ఎక్కి ఒత్త తయిందె గి?

50 పరలోకుమ్ బూలోకుమ్ ఎత్తి అచ్చె జెర్తయ్లయ్, మెన, ఎత్తిచి కంట వెల్లో తిలో అమ్చో ప్రబు రెగ్గ అన్ల." మెన జోవయింక పరిచ్చ కెర్ల వెల్లెల మాన్సల్క సైపను బుద్ది సంగిలన్.

51 "పడ్డొ జోక పరిచ్చ కెర్ల జేవ్ వెల్లెల మాన్సల్క సైపను, తుమ్ రాడ్ జివ్చ మాన్సల్, దేముడు సంగిలి సుద్ది గుర్తుచి సున్మతి అమ్ కెరన అన్సమ్ మెన తుమ్ సంగితను, గని జా ఎత్తి తుమ్క కామ్క నెంజె. కిచ్చిక మెలె, తుమ్చి పెట్టి సుద్ది జను నాయ్, తుమ్చ కానో నూనుక నెసితి, చి దేముడుచి సుద్ది తిలి అత్తు సికడ్డిసి తుమ్ ఒప్పున్ నాయ్. తుమ్చ పూర్ణమ్చ కిసి పాపుమ్ కెర్ల గే, తూమ్ కి దన్నె.

52 జేవ్ పొదులె, దేముడు కచి కచి అత్తి కబుర్లు తెర్తయ్లె, తుమ్చ పూర్ణమ్చ జోవయింక ఆల్లర్ కెరుక, జో తెర్తయ్లంతె కక్క నే పిట్టి. పడ్డొ, 'పరలోకుమ్చి పున్మిమ్ తిలో క్రిస్తు రచ్చించువ కెర్లొసా జెంక అన్ల' మెన జోవయింతె కో సంగిల గే, జేవ్ తుమ్చ పూర్ణమ్చ జోక మారుక. దన్నె కి, జో క్రిస్తు జెతికయ్, తుమ్ జోక నెన, గోస కెర, జోక మార గెలదు.

53 "ప్రజల్క సికడ్డు" మెన దేముడు దూతల్చి అత్తి తుమ్కయ్ జోచ అగ్గల్ దిలన్, గని జోచ అగ్గల్ రితి తుమ్ ఇండుక నెన, దన్నె కెర్లదు" మెన అన్నె సంగిలన్.

సైపనుక పత్తల్ గల మార్గిసి

54 జేవ్ వెల్లెల మాన్సల్ ఈంజేవ్ కొడొ నూన, సైపనుచి ఉప్పిరచి జేవ్చి కోపుమ్క రకుక నెత్త కెర, దంతో చప్పన్.

55 జో, మాత్రుమ్, జోచి పెట్టి దేముడుచి సుద్ది తిలి అత్తు బెర తతికయ్, ఆగానుమ్ పక్క చెంగిల్ దెక, కిచ్చొ దెకిలన్ మెలె, దేముడుచి ఉజడి దెకిలన్, చి జో దేముడుచి ఉజెతో పక్క యేను టీవొజ దెకిలన్.

† 7:44 7:44 నిర్ణయకాండుమ్ 24:10-31 అద్యయమ్ ఎద. § 7:45 7:45 ద్విత్వియాపదేశ 34 అద్యయమ్. * 7:45 7:45 యెహోసువ 1-6 అద్యయల్. † 7:45 7:45 నమూయేలు దొన్నిచి పుస్తకమ్ 7:1-17. ‡ 7:47 7:47 రానల్ మొదెల్ పుస్తకమ్ 6 అద్యయమ్.

56 జా దెక సైపను, “అదె, పరలోకుమ్ ఉగ్గి జలి రితి దెకితసి మెలె, మాన్సు జా జెర్నన్ అయ్లో క్రీస్తు రచ్చించువ కెర్తొసా దేముడుచి ఉజెతో పక్క టీవోజ అస్సె.” మెన సంగిలన్.

57 జో దస్సి సంగితికయ్, జోవయిచి కోపుమచి ఒర్న దా, జేవ్చి కంగ్గో డంకన, జట్టు తెన్ జోచి ఉప్పిరి నిగ జా జోక దెర్ల.

58 జోక పట్టుమ్ తెంతో పెలవ దా బార్ కెర, జోక పత్రల్ గల మారుక దెర్ల. సాచి సంగ తిలన జోక పత్రల్ గలిలినతె బెదిల. పత్రల్ గలుక మెన, జేవ్చి ఉప్పిర్చ పాలల్ కడన కెర, సాపులు మెలో ఉబెజ్జె ఎక్కిలోచి చట్ట తిల.

59 జేవ్ మాన్సుల్ పత్రల్ గల మార్తె తతికయ్, సైపను ఇసి మెన ప్రార్దన కెర్తన్. “ప్రబు జలో ఓ యేను, అచి జీవు తూయి తుచితె కడ నే” మెన కెర,

60 మొగ్రల్ టెక, గట్టజ అవాడ్ తెన్ ఒర్న దా అస్సె, “ప్రబువ, ఈంజేవ్ అప్పె కెర్తి పాపుమ్ ఇన్నెయింక చెమించువ కెరు!” మెన ప్రార్దన కెర మొర గెలన్.

8

1 సైపను మొర్లిన్తె సాపులు తిలన్. ‘మొర్న’ మెన జో కి ఒప్పన తిలో.

నంపజలన చెదుర్న జా వేరతె ఉట్ట గెలిసి

జలె, జా దీసి తెంతో, యెరూసలేమ్ పట్టుమ్తె యేసుక నంపజలన మొత్తుమ్క నంపనెంజిల యూదుల్ ఒగ్గర్ ఒగ్గర్ అల్లర్ కెరుక దెర్ల. అల్లర్ కెర జోవయింక ఉడడ్డికయ్, నంపజలనతె ఒగ్గర్జిన్ చెదుర్న జల. చెదుర్న జా ఒండి యూదయ ప్రదేసిమి చి నమరయ ప్రదేసిమి గెల. యేసుచ బారికుల్, మాత్రుమ్, యెరూసలేమ్తె తాఁ గెల.

2 జా మదెనె, ప్రబుక సత్తిమ్ తిల యూదుల్ నగుమ్జిన్ సైపనుక రోవిల, ఏడుకులు జా ఒగ్గర్ దుకుమ్ తెన్ రోవిల.

నంపజలనక సాపులు ఒగ్గర్ ఒగ్గర్ అల్లర్ కెర్తె తిలిసి

3 సాపులు, మాత్రుమ్, యెరూసలేమ్తె క్రీస్తుక నంపజలనచి నంగుమ్క పాడ్ కెరుక ఉచర, జోవయింక ఒగ్గర్ ఒగ్గర్ అల్లర్ కెరుక దెర్లన్. జోవయింక గెరల్ ఎత్తితె గెచ్చ, పెన, జోవయింక మున్సుబోదల్క తేరబోదల్క, ఎత్తిక దెర, జేల్తె గలయలన్.

4 చెదుర్న జల యేసుప్రబుక నంపజలన, జలె, కిచ్చొ కెర్తె తిల మెలె, జోచి రిసాచి సుబుమ్ కబుర్ సూనయ్తె తా బుల్తె తిల.

5 తెదొడి బారజిన్ బారికుల్తె తిలో పిలివ్ మెలోసా, నమరయ ప్రదేసిమ్చి పట్టుమ్ ఏకతె గెచ్చ, యేసుక్రీస్తు, ‘దొర్న జలో రచ్చించువ కెర్తొసా జొయ్య’ మెన ప్రెజల్క బోదన కెర్తె తిలన్.

6 ఒత్తవ ప్రెజల్ జోచి బోదన సూన్, అస్సె, జోచి అత్తి జర్గు జల యేసుప్రబుచి నావ్ తెన్ వెల్లో కమొ దెక, ఒగ్గర్జిన్ ప్రెజల్ ఎక్కి ప్రేమ జా, జో సంగిలి బోదనక నంప కెర, యేసుక నంపజా గెల.

7 కీన కమొ పిలివ్చి అత్తి జర్గు జల మెలె, బూతల్క ప్రబుచి నావ్ తెన్ ఉడడ్డె, జేవ్ బూతల్ ఓర్నువ జంక నెత్త కెర, గట్టజ ఒర్న దా, పూర్తి ఉట్ట గెల. పడ్డె ఉట్టక నెత్తిర్ మాన్సుల్, సొట్ట మాన్సుల్, చెంగిల్ జల.

8 జాకయ్ జా ఒండి పట్టుమ్తె ఎత్తిజిన్ సర్ల జల.

9 ఏక పట్టుమ్తె సీమాను నావ్ తిలో మాన్సు జా. జో అగ్గ, జా పట్టుమ్తె, మంత్రుమ్ కెర్తన కిచ్చొ కిచ్చొ మాయచ గారెడ్లు కెర్తె తిలన్. కిచ్చొ కిచ్చొ వెల్లో కమొ కెర, ‘ఆవ్ వెల్లో’ మెనన, నమరయ ప్రదేసిమ్చి ఎత్తిజిన్క ఆచారిమ్ కెరెదె.

10 జోచ కమొ దెక, “దేముడుచి వెల్లి నెక్తి తిలోసా ఈంజొ” మెన, బాల వెల్లో జా ప్రాంతుమ్చి ఎత్తిజిన్ జోక నంపజా తిల.

11 కిచ్చొక జోక దస్సి నంపజా మోసిమ్ జా తిల మెలె, జో ఒగ్గర్ వెర్నులు సయ్తాన్చ దన కమొ కెర కెర జోవయింక ఆచారిమ్ కెర్తె తిలన్.

12 గని, దేముడుచి *రాజిమచి రిసా, యేసుక్రీస్తుచి †అదికారుమచి రిసా, పిలిప్ ప్రజల్ క బోదన కెర్తె తతికయ్, జోచ కొడొక నంపజా గెచ్చ కెర, తేరబోదల్ కి మున్నుబోదల్ కి, బాప్తిసుమ్ నజన్.

13 నయతానచ కమొ కెర్తె జో సీమోను కి నంపజా, బాప్తిసుమ్ నజన్, పిలిప్ చి వట్టి బులుక దెర్తన్, అన్నె, యేసుప్రబుచి అదికారుమ్ తెన్ కెర్తె వెల్లో కమొ, జొర్జొల్ బాదల్ జల మాన్సల్ చెంగిల్ జలిసి దెక దెక, జో కి బలే ఆచారిమ్ జలో.

పేతురు యోహానులుక సమరయతె తెద్రయ్ లిసి

14 జలె, సమరయచ మాన్సల్ దేముడు దిలి యేసుప్రబుచి రిసాచి సుబుమ్ కబుర్ నూన నంపజా అస్తి మెన యెరూసలేమతెచ బారజిన్ బారికుల్ నూన కెర, 'జోవయింతె గెచ్చ దెకుత్' మెన, పేతురుక చి యోహానుక తెద్రయ్ లె.

15 జేవ్ దొగుల ఒత్త పావ కెర, నంపజలనక 'దేముడుచి నుద్ది తిలి ఆత్మ జేవ్ చి పెట్టి దొర్కు జవున్' మెన ప్రార్తన కెర్తె.

16 కిచ్చొక మెలె, తెదొడి ఎద ఎక్కి, యేసుప్రబుచి నావ్ తెన్ పానితె బాప్తిసుమ్ నజన్ తిల. జోచి ఆత్మచి నావ్ తెన్ నేతయ్, చి ఆత్మనెక్కి జేవ్ క దొర్కు జంక నేతయ్.

17 జలె, తెదొడి పేతురు చి యోహాను జేవ్ నంపజల ప్రజల్ ఎత్తిజిన్ ఎక్కెక బోడి చడిల, చి దేముడుచి నుద్ది తిలి ఆత్మనెక్కి జోవయింక దొర్కు జలి.

18 జలె, 'యేసుచ బారికుల్ బోడి చడ్లెగిన, నంపజల మాన్సల్ క దేముడుచి నుద్ది తిలి ఆత్మ దొర్కు జతయ్' మెన మంత్రమ్ కెర్తె తిలి సీమోను దెక కెర,

19 "అంక కి జా నెక్కి దా, డబ్బుల్ దెయిం దె. ఆవ్ కి కక్క బోడి చడిం దె గే, జోక కి దేముడుచి నుద్ది తిలి ఆత్మనెక్కి దొర్కు జలి రితి, జా నెక్కి అంక దా" మెన పేతురుక చి యోహానుక సీమోను నంగిలన్.

20 నంగితికయ్, పేతురు, జోక " డబ్బుల్ దిలె దేముడు దెతి జోచి నుద్ది తిలి ఆత్మనెక్కి వరుమ్ గెనుక జయెద' మెన తుయి ఉచర్లి రిసా, తుచి డబ్బుల్ తుచి తెన్ నాసెనుమతె గెస్సు!

21 తుచి పెట్టి దేముడు తెన్ సత్తిమ్ జంక నాయ్, చి జోచి ఈంజ కామ్తె తుయి బెదుక జయె నాయ్.

22 తుయి ఉచర్లి వెల్లి ఈంజ పాపుమ్ చెయెంచువ జంక తుయి కోర్వ జతసి జలె, జోచి దయ తిలె తుక రచ్చించువ కెర్సు మెన, తుయి కెర్లి గార్ కామ్ ముల దా, పెట్టి పూర్తి దుకుమ్ జా జోక ప్రార్తన కెర నంగు. జో కిచ్చొ కెరెదె గే జోచి దయ.

23 నయతానచ పాపుమ్బుద్ది అప్పెక తుచి పెట్టి ఏలువ కెర్తయ్, అప్పెక తుచి పెట్టి ఆనల్ గోనల్ అస్తి మెన ఆవ్ దెకితసి" మెన పేతురు సీమోనుక నంగిలన్.

24 జలె, సీమోను బియె: గెచ్చొ కిచ్చొ మెన బతిమాల్పా జా నంగిలన్ మెలె, "తుయి నంగిలి సిచ్చు అంచి ఉప్పిర్ నే జెతు మెన తుమి ప్రబుక ప్రార్తన కెర." మెన నంగిలన్.

25 పేతురు, యోహాను, జలె, యేసుప్రబుచి రిసా సాచి నంగ, జోచి సుబుమ్ కబుర్ నూనవ కెర, ఒత్త తెంతో అన్నె బార్ జా, సమరయచ ఒగ్గర్ ఒగ్గర్ గెచ్చొలె గెచ్చొ, బుల బుల, ప్రబుచి సుబుమ్ కబుర్ నంగ బోదన కెర్తె తా, యెరూసలేమతె అన్నె పావ అయ్ లె.

పిలిప్ ఐతియొపీయి దేసిమ్చొ మాన్సుక బోదన కెర్లిసి

26 మదెనె, ప్రబుచొ దూత ఎక్కిలో పిలిప్తె జా కెర, "తుయి ఉట్ట ఇన్నె తెంతో బార్ జా, దచ్చెన వక్కచి వట్టె, మెలె యెరూసలేమ్ తెంతో గాజా పట్టుమ్ ఎద పాచితి వట్టె గో" మెన నంగిలన్.

27 పిలిప్ నూన, బార్ జా, జా వట్టె గెలన్. జా వట్టె గెతె తతికయ్, ఐతియొపీయి దేసిమ్చొ ఆండెరో జా వాల్ జెతె అన్నె. జో ఐతియొపీయి దేసిమ్చి 'కందాకె' మెలి రానిచొ అదికారి, డబ్బుల్ దెకితో అదికారి జా అన్నె. దేముడుక బక్తి కెరుక మెన, జో యెరూసలేమతె జా తిలో.

* **8:12 8:12** 'ఎత్తి అదికారుమ్ తిలో దేముడుచి రాజిమ్' మెలె, **1** జోవయింక నంపజల మాన్సల్ చి పెట్టి జో ఏలువ కెర్లిసి, **2** జోవయించి ఆత్మనెక్కి ఈంజ లోకుమ్తె కామ్ కెర్లిసి, **3** ఈంజ ఉగుమ్ మార్కువ జలె జో ఎదార్దుమ్ ఈంజ లోకుమ్తె ఏలువ కెర్లిసి, **చి 4** వరలోకుమ్తె జో ఏలువ కెర్లిసి. † **8:12 8:12** నెంజెలె 'నావ్'.

28 అమ్మె అన్నె జోచి సొంత దేసిమి ఉట్ట గెతె అన్నె. జోచి రదుమ్తె వెన తా, దేముడుచ కబుర్లు సంగిలో యెసయా పూర్ణుమచొచి అత్తి రెగిడ్డి పుస్తకుమ సదు కెర్తె అన్నె.

29 జలె, ప్రబుచి అత్తు పిలివచి అత్తుతె, “తుయి దెకితి రదుమ్క పాసి గెచ్చు దెకు” మెన సంగితికయ్,

30 పిలివ్ జా రదుమ్తెచొచి నిగ గెచ్చు, యెసయా పూర్ణుమచొచి అత్తి రెగిడ్డిసి పుస్తకుమ జో సదు కెర్తిసి నూన కెర, జోక, “తుయి సదు కెర్తిసి తుక అర్దుమ్ జెతయ్ గె?” మెన పుసిలన్.

31 “కో జవున్ అంక అర్దుమ్ సంగిలెకయ్ అంక కీన్ అర్దుమ్ జయెదె?” మెన జో సంగిలన్, చి ‘అర్దుమ్ సంగున్’ మెన, రదుమ్తె పిలివ్క వెగడ వెనడ్డన్.

32 దేముడుచి కేన్ కోడు జో సదు కెర్తె తిలొ మెలె, “మెండక కండ బలి కెర్తె రిసా ఉడడ నెత్తి రితి జోక ఆన్ల, నెంజెలె రోమల్ కత్రయ్తి మొక్కె మెండపిల్ల కిసి జమన్ తయెదె గె దన్నె ఈంజో కి చోడి డంకన తుక్లె తయెదె.

33 ఇన్నెచి విలుచ కడ్ల, చి ఇన్నెచి రిసా సరిగా తీర్పు జతి రితి ఒప్పితి నాయ్. ఇన్నెక ‘బోదల్ పాయ్లన్’ మెన కిసి సంగుక జయెదె? ఇన్నెక ఈంజ బూలోకుమ్తె జేవ్ మార్ల!”

34 జో ఆండెరో, పిలివ్క కిచ్చొ మెన పుసిలన్ మెలె, “దేముడు ప్రబుచ కబుర్లు సంగిలో జో పూర్ణుమచొ కచి రిసా ఇసి సంగితయ్? జోచి సొంతచి రిసా గే, కేన్ జవున్ వేర మాన్పుచి రిసా గె?” మెన పుసితికయ్,

35 పిలివ్ చోడి పుట్టవ, జో ఆండెరో సదు కెర్తె తిలి కోడుచి అర్దుమ్ తోలితో సంగ, యేసుచి రిసాచి సుబుమ్ కబుర్ ఎత్తి జోక బోదన కెర్లన్.

ఆండెరో బాప్తిసుమ్ నజున్సి

36 తెదెడి, జేవ్ దొగుల వట్ట గెతె తా పాని గాడు ఏక దెకిల. దెక, “ఆదె, పాని! ఆవ్ బాప్తిసుమ్ నజునుక కిచ్చొ అడ్డు కిచ్చొగె, నాయ్ గడ?” మెన జో ఆండెరో సర్ల జా సంగిలన్.

37 “పిలివ్ జోక “తుయి యేసుప్రబుక పెట్టి పూర్తి సంపజలది మెలె, బాప్తిసుమ్ నజునుక జయెదె.” మెన సంగితికయ్, “యేసుక్రీస్తు దేముడు ప్రబుచొ పుట్టసి, సిజలొ దొర్పు జలొ రచ్చింఛుచ కెర్తెసా జయెదె మెన ఆవ్ సంపజతన్.” మెన ఆండెరో సంగిలన్.

38 తెదెడి రదుమ్క జో టీవో కెర, పిలివ్ ఆండెరో దొగుల ఉత్త పానితె ఉత్తిర్ల, చి జో ఆండెరోక పిలివ్ బాప్తిసుమ్ దిలన్.

39 తెదెడి, జేవ్ పానితె తెంతొ అన్నె బార్ జతికయ్, *ప్రబుచి అత్తు పిలివ్క దెర నిలన్, చి ఆండెరో జోక అన్నె నే దెకిలన్. జో ఒగ్గర్ సర్లసంతోసుమ్ తెన్ సొంత దేసిమి ఉట్ట గెలన్.

40 పిలివ్ ఒత్త తెంతొ అజోతు మెలి పట్టుమ్తె డిసిలన్. ఒత్త డీన కెర బార్ జా, ఉత్తర పక్క గెతి వట్ట గెచ్చు గెచ్చు, ఎత్తి పట్టులె గెవ్వెల ప్రబుచి సుబుమ్ కబుర్ నూనచ నూనచ, కైసరియ పట్టుమ్తె పావెలన్.

9

యేసుక సంపజలసక సావులు అల్లర్ కెర్తె తిలిసి

1 సైపనుక మార్గిన్తె తెదెడి బెద తిలొ సావులు, ఈంజ మదెనె కిచ్చొ కెర్తె తిలొ మెలె, యేసుప్రబుక సంపజా జోవయించ *సిస్సుల్ జలసక ‘మారిందె’ మెన బియడె తిలొ. జలె, కిచ్చొ కెర్లొ మెలె, యెరూసలేమ్తె ఎత్తిక వెల్లొ పూజరితె గెచ్చు కెర,

2 “దమన్ను పట్టుమ్తెచ అమ్చ యూదుల్చ సబ గెరల్చ అదికారుల్క ఆవ్ దెకయ్తి రిసా అంక ఉత్తల్ దె, చి ఆవ్ ఒత్త గెచ్చు, ‘రచ్చన వాటు యేసుయి’ మెన జోవయింక సంపజలసక చజెలె, జేవ్

† 8:37 8:37 గ్రీకు బాన తెన్ ఈంజ మత్తెలి తొలితో రిగిడ్ల సగుమ్ పుస్తకల్తె 37 నంబర్చి కోడు తయె నాయ్. § 8:37 8:37 జలొ...రచ్చింఛుచ కెర్తెసాచి కోడు దన్నె తయె నాయ్, గని జా అర్దుమ్ ఒత్త తయెదె. * 8:39 8:39 ‘ప్రబుచి అత్తు పిలివ్క దెర నిలన్’ నెంజెలె జో మంత్రిచి పెట్టి ప్రబుచి అత్తు బెర్తికయ్, జో దెతి సెక్రెయింజు జోవయింక దొర్పు జలె, చి ప్రబుచి దూత పిలివ్క కడ నిలన్, చి... * 9:1 9:1 మత్తయ, మార్కు, లూకా చి యోహానుతె ‘సిస్సుల్’ మెన ఒగ్గర్ సుట్టు సంగిలి యేసుచ బారజన్ సిసల్కయ సంగితె, గని ఈంజ కోడుతెచి రితి, కో జోవయింక సంపజా జోవయింక నిదానుమ్ ఇండుల గే, జేవ్ ఎత్తిజన్క ‘జోవయించ సిస్సుల్’ మెనుక జయెదె.

తేరబోదల్ జలెకి, మున్నుబోదల్ జలెకి, జోవయింక దెర బంద, ఇత్తల్ అమ్చి యెరూసలేమ్తె సిచ్చ కెరుక మెన కడ అనిందె” మెన సెలవ్ సంగిలన్.

3 జలె, సావులు ప్రయాసుమ్ గెతె తా దమన్ను పట్టుమ్క పాసి అయ్లి పొది, ఓదె, అగాసుమ్ తెంతో అంకి అందర్ కెర ఉజిడి జోచి సుట్టునంత జా అడ్డు కెర్లి.

4 చి జో బుయ్యో నేడ నిజ తిలి పొది ఏక అవాడ్, “ఓ సావులు, సావులు, అంక కిచ్చొక సిచ్చల్ అల్లర్ కెర్తసి?” మెన సంగిలిసి సూన్లన్.

5 బియ్యం గెచ్చ, “తుయి కో, ప్రబు?” మెన జో పుసిలన్, చి “తుయి గోస కెర్తొ యేసు, ఆవ్.

6 అల్లె, తుయ్ ఉట్ట కంజ పట్టుమ్తె గెచ్చ పెను, చి ఒత్త తెంతో తుయి కిచ్చొ కెరుక అస్సె గే, తుక సూనయిందె” మెన యేసు సంగిలన్.

7 సావుల్ తెన్ బెద ప్రయాసుమ్ కెర్తె తిల మాన్సుల్, జలె, జా అవాడ్ సూన్ల, గని కక్క నే దెక, కిచ్చొ మెనుక నెత్త కెర, టక్కున జా తిల.

8 సావులు, మాత్రమ్, బుయి తెంతో ఉట్ట, బీవోజ, అంకివో ఉగిడ్లె, కిచ్చొ దెకుక నెత్తిల్లొ. జాకయ్ జేవ్ జోక ఆతు దెర, దమన్ను పట్టుమ్ తెడి ఇండవ నిల.

9 ఒత్త తిర్రతి, కిచ్చొ నే కతె, కిచ్చొ నే పితె చువ్వె తా గుడ్డి జా తిలో.

అననీయక ప్రబు సావుల్తె తెర్రయ్లిసి

10 జలె, జా దమన్ను పట్టుమ్తె యేసుక సంపజలో నిదాసుమ్ తిలో సిన్నుడు ఎక్కిలో తిలో. జోచి నావ్ అననీయ. జలె, యేసు సివ్వుతె జోక డీన కెర, జోచి నావ్ దెర్తికయ్, జో “అస్సి, ప్రబు” మెన జబాబ్ దిలన్,

11 ప్రబు జోక, “తుయి ఉట్ట, సోగ మెలి వీది గో, చి యూదా మెలో ఎక్కిలోచి గెరి గెచ్చ, ‘తార్పు పట్టుమ్తె జెర్మిలో సావులు మెలోసా తెన్ దన్నుల్ జయిందె’ మెన సంగు. జో జా గెరి తా ప్రార్దన కెర్తె అస్సె.

12 జో ప్రార్దన కెర్తె తతికయ్, జోక కిచ్చొ సివ్వు దెకవ అస్సి మెలె, అననీయ మెలో ఎక్కిలో జో సావులు తిలి గెరి జా కెర, పెన, జోక ‘అన్యె దెకున్’ మెన జోచి బోడి చడెదె మెన, ఆవ్ సావుల్క సివ్వు దెకవ అస్సి” మెన ప్రబు జో అననీయక సంగిలన్.

13 గని అననీయ బియ్యం కెర, “జో మాన్సుచి రిసా ఒగ్గరజిన్ సంగ అస్సి, యెరూసలేమ్తె తిల తుచయ్ సుద్ది తిల మాన్సుల్క జో ఎదివాల్ అల్లర్ కెర అస్సె.

14 జో ఇత్తల్ అయ్లి, తుచి నావ్ దెర్తన ఎత్తిక దెర, బందుక మెన ఎత్తిక వెల్లెల పూజర్లు జోక సెలవ్ దా అస్సి” మెన సంగిలన్.

15 గని ప్రబు జోక, “ఒత్త గో, ‘యూదుల్ నెంజిల వేర దేసిమ్చ మాన్సుల్క, రాసల్క, ఇస్రాయేలుల్క కి, అంచి నావ్ తెన్ అంచి రిసా సాచి జవున్’ మెన ఆవ్ జోక నిసాన అస్సి.

16 జో కి అంచి నావ్ అంచి కామ్చి రిసా ఎత్తివాట్ అల్లర్ బాదల్ నేడెదె. జోక జా ఎత్తి దెకయిందె” మెన ప్రబు జబాబ్ దిలన్.

17 ప్రబు దస్సి సంగితికయ్, అననీయ బారో జా గెచ్చ, ప్రబు సంగిలో గెరి పెన, సావుల్క బోడి చడ, “ఓ సావులు బావో, తుయి వట్టె జెతె తతికయ్ తుక డీసిలో యేసు తుక ‘దెకున్’ మెన, దేముడుచి సుద్ది తిలి ఆత్మ తుచి పెట్టి తతి వరుమ్ తుక దొర్కు జవున్ మెన అంక ఇన్నె తెర్రవ అస్సి” మెన అననీయ సంగిలన్.

18 సంగిల్ బేగి, సావుల్చ అంకివో తెంతో పొరల్ రితన కునిడ్ల, చి జోచ అంకివో అన్నె డీసిల. తెదోడి జో ఉట్ట, బాప్తిసుమ్ నజన,

19 అన్నిమ్ కెర, అన్నె నత్తు జలో.

ఒత్త తెంతో, సావులు జా దమన్ను పట్టుమ్తె యేసుక సంపజల సిన్నుల్ తెన్ సగుమ్ దీసల్ తా గెలో,

20 చి బేగి జోవయింక సబ గెరలె యేసుచి రిసా కిచ్చొ సాచి సంగితి తిలన్ మెలె, “నిజామి, అమ్చో దేముడుచో ఎక్కిలో పుత్తున్ దొర్కు జలో రచ్చించువ కెర్తొసా, జో” మెన సాచి సంగిత్ తిలన్.

21 సావులుక, ‘జో ఇసి సాచి సంగితయ్’ మెన సూన, ఎత్తిజిన్ ఆచారిమ్ జా, “యెరూసలేమ్ పట్టుమ్తె ప్రబుచి నావ్ దెర్తన ఎత్తిజిన్క అగ్గె అల్లర్ కెర్తె తిలోసా ఈంజో, నెంజె గే? ఇన్నెచ నంపజలసక

ఎత్తిక వెల్లెల పూజధుచి తీర్పు కెర సిచ్చ కెరవుక మెన దెర బందుక ఉచర, ఇత్తల్ అయ్లో” మెన కిచ్చి ఉచరుక గే నేన గెల.

22 జలె, సావుల్క రోజుక ప్రబు అన్నె సెక్కి దిలో, చి దమన్కుతె జితె తిల యూదుల్చ నబతె జో బోదన కెర కెర, యేసుక, ‘నిజమి దొర్ను జలో క్రిస్తు రచ్చించువ కెర్లొసా జో” మెన తెలివి తెన్ రుజుల్ బెదయతె తిలో, చి నంవనెజిల యూదుల్ కిచ్చి జబాబ్ దెంక గే నేన గెల.

సావుల్క మారుక మెన యూదుల్ కుట్ర ఉచర్ల

23 ఒగ్గర్ దీనల్ గెతికయ్, సావుల్క మారుక మెన యూదుల్చ వెల్లెల మాన్సుల్ కుట్ర ఉచర్ల,

24 గని జేవ్ కుట్ర ఉచర్లించి రిసా సావులు నూన్లొ. జోక మారుక మెన రోజుక అందర మెద్దెన్ పట్టుమ్చ గుమ్మలె మాన్సుల్ రకితె తవుల, చి రిసా,

25 జోచ సిన్సుల్ కిచ్చి కెర్ల మెలె, ఏక్ దీని అందర జోక బోడొవ దా, పట్టుమ్చి డోక్ తిలి కోటతెచి గదితె వెగడ దా, ఏక్ గంపతె వెనడ దా, కిట్కివాట్ వాలివొ తెన్ కోట ఒత్తల్తో ఉత్తవ దిల, చి ఉట్టు నిగిలో.

26 జలె, సావులు, యెరూసలేమ్ పట్టుమ్తె పావ జా, ప్రబుచ ఒత్తచ సిన్సుల్ తెన్ బెదుక ఉచర్లొ, గని జోపయింక “నిజమి, మార్పువ జా ప్రబుచొ సిన్సుడు జా అస్సె” మెన సంప కెర్లె నాయ్, చి బియ: గెల.

27 గని బర్లుబా మెలొసా సావుల్క తోడొ జా, బారికుల్క తెకడ ఆన కెర, సావులు వట్ట గెతె తిలి పొది ప్రబుక దెకిలిసి, ప్రబు జో తెన్ లట్టల్లిసి, పట్టొ దమన్కుతె సావులు దయిరిమ్ తెన్ యేసుచి నావ్ తెన్ బోదన కెర్లెసి ఎత్తిచి రిసా బర్లుబా బారికుల్క సాచి సంగిలన్.

28 జాకయ్ జా దీని తెంతొ యెరూసలేమ్తెచ ప్రబుచ జేవ్ బారికుల్ జోక సర్ల తెన్ బెదవన్ల, చి జోపయింతెన్ తా, రోజుక

29 ప్రబుచి నావ్ తెన్ దయిరిమ్ తెన్ బోదన కెర్లె తిలన్. పట్టొ, యేసుక నే నంపజల గ్రీకు బాన లట్టల్లి యూదుల్క ప్రబుచి సాచి సావులు సంగితె తిలన్. రుజుల్ బెదయతె తిలన్, గని జేవ్ జోక మారుక కోర్ప జా తిల.

30 జోక జేవ్ మారుక కోర్ప జలిన్చి రిసా సిన్సుల్ మెన కెర, జోక కైసరియ పట్టుమ్ ఎదక బోడొవ దా: కెర, ఓడతె వెగడ, జో జెర్మిలి తార్పు పట్టుమ్తె తెర్లవ దిల.

31 జలె, సావులు నంపజా మార్పువ జలిన్చి రిసా, జేవ్ పొదులె, ఒండి యూదయ ప్రదేసిమి, గలిలయ ప్రాంతుమ్తె చి నమరయ ప్రదేసిమ్తె యేసుక నంపజలసక కో అల్లర్ కెర్లె నాయ్, చి అన్నె డిట్టుమ్ జల. ప్రబుక బియ: సత్తిమ్ ఇండితె తిల, చి దేముడుచి సుద్ది తిలి అత్తు జోపయింక దయిరిమ్ కెర్లె తిలి, చి అన్నె ఒగ్గర్జిన్ నంపజా, జోపయింతెన్ బెదిల.

32 జేవ్ పొదులె, పేతురు ఒండి బుల్లె తా, నంపజలన ఎత్తిజిన్క దెకితె తిలో, చి లుద్ద మెలి ఏక్ పట్టుమ్తె ప్రబుచయ్ జల మాన్సుల్ జితె తిలిన్తె జో తెన్ అయ్లో.

33 ఐనెయ్ మెలొ ఏక్కిలో అస్సె. జో ఉట్టుక, కదుల్ జంక నెత్త కెర, అట్టు వెర్సుల్ అంతుర్నొ తె ఎంగ్ల అస్సె.

34 పేతురు, జలె, జోక దెక, “ఓ ఐనెయ్, యేసుక్రిస్తు తుక చెంగిల్ కెర్లయ్. ఉట్ట, తుచి అంతుర్నొ చెంగిల్ కెరను” మెన సంగిలన్. సంగిలి బేగి, జో చెంగిల్ జా ఉట్టొ.

35 జో చెంగిల్ జలిసి, లుద్ద పట్టుమ్చ జా సారోను ప్రాంతుమ్చ ఎత్తిజిన్ దెక, జోపయింతె ఒగ్గర్జిన్ ప్రబుక నంపజా మార్పువ జల.

36 జలె, యొప్పే మెలి పట్టుమ్తె తబితా, నెంజిలె దొర్నా మెలి నావ్చి తేర్బోద యేసుక సిన్సుడ్లి జా అస్సె. జా కిసి మాన్సు మెలె, మాన్సుల్క ఒగ్గర్ ప్రేమ దెకితె తయెదె, బీద సుదల్క ఒగ్గర్ తోడు కెర్లె తయెదె.

37 ఏక్ దీని, జొర్డొ సేడ మొర గెలి. జాక దోవ కెర సుబ్బుమ్ కెర, గెర్చి అంతస్తుమ్చి గదితె పీనుమ్ నిజుడ దిల.

38 యొప్పే మెలి జా మాన్సు మొర్లి పట్టుమ్క పేతురు తిలి లుద్ద పట్టుమ్ దూరి నాయ్, చి పేతురుక ‘ఒత్త అస్సె’ మెన సిన్సుల్ సూన తా, “బే బేగి జె” మెన దొగులచి అత్తి సంగ తెర్లయ్ల.

39 పేతురు బేగి ఉట్ట, జోవయింతెన్ గెలన్. జా గెరి జో పాఁచిలె, జోక జా ఉప్పిరిచి గదితె బొడొవ దిల. ఒత్త జా పట్టుమ్ద రండెల్ మాన్సుల్ బెర అస్సి. జేవ్ పేతురుచి నుట్టునంత టీవ ఏడ ఏడ, జా మొర గెలి దొర్కా చెంగిల్ తిలి పొది ‘బీద నుదల్’ మెన, జోవయింక తున తిల పాలల్ ఎత్తి పేతురుక దెకయల.

40 పేతురు, జలె, జేవ్ ఎత్తిజినక బార్ కెరవ దా, మొగ్రల్ టక ప్రబుక ప్రార్దన కెర్దన్. తెదొడి, పీనుమ్క దెకిత్ రితి వసుల, “ఓ తబితా, ఉట్టు!” మెన జాక సంగిలన్. సంగితికయ్, అంకివొ ఉగిడ్లి, చి పేతురుక దెక, వెసిలి.

41 పేతురు జాక ఆతు దెర బీఁవడ్లి, చి రండెల్ మాన్సుల్క చి ప్రబుచయ్ జల ఒత్త తిల అన్నె మాన్సుల్క బుకారా కెర, ‘జీవ్ జా అస్సె’ మెన దెకయలన్.

42 జా ఒండి యొప్పే ప్రాంతుమ్తెచ మాన్సుల్ జేవ్చి రిసా నూన్ల, చి జోవయింతె ఒగ్గర్జిన్ ప్రబుక సంపజల.

43 పడ్లి పేతురు ఒత్త చమొ పికయ్తో సీమోను మెలో ఎక్కిలోచి గెరి ఒగ్గర్ దీనల్ తా గెలన్.

10

కొర్నేలిక ప్రబు సివ్వుతె కబుర్ తెద్రయ్లిసి

1 కైసరియ పట్టుమ్తె కొర్నేలి మెలో మాన్సు ఎక్కిలో తిలో. రోమ్ దేసిమ్చి జమాన్లుతెచి ఇటలీ మెలి జటుచొ* పుంజెకజీన్ జమాన్సుక వెల్లి, జో.

2 కిసా మాన్సు మెలె, జో యూదుడు నెంజెలె కి, దేముడుక బియఁ, నిదానుమ్ తెన్ ఎక్కి. జోకయి బక్తి కెర్తె తిలో. జోకయి ప్రార్దన కెర్తె తిలో చి యూదుల్చ బీద నుదల్క చెంగిల్ దెక దర్ముమ్ దెతె తయెదె. జోచి గెరచ మాన్సుల్ ఎత్తిజిన కి దస్సి తిల.

3 ఏక్ దీసి, రహారమి తిన్సి గంటల్ మెద్దెనె, ప్రబు దెకయ్లి సివ్వు ఏక్ దెకిలన్. కిచ్చొ మెన జా సివ్వుతె సొన్సుమ్ దెకిలన్ మెలె, దేముడుచొ దూత ఎక్కిలో జా గెరి పెన, జోక, “ఓ కొర్నేలి” మెన బుకార్తికయ్,

4 కొర్నేలి అద్దుర్ జా దెక, “ప్రబువ, ఈంజి కిచ్చొ?” మెన పుసిలన్, చి దూత జోక “తుచ ప్రార్దనల్ నూన, బీద నుదల్క తుయి దర్ముమ్ దిలిన్ దేముడు దెక, నర్ద జా అస్సె.

5 తుయి అప్పె కిచ్చొ కెరుక అస్సె మెలె, యొప్పే పట్టుమ్తె మాన్సుల్క కబుర్ తెద్రవు, చి పేతురు మెలో సీమోనుక ఇత్తల్ కడ ఆను.

6 జోక ఒత్త కేనె చజుక మెలె, చమొ పికయ్తో సీమోను మెలో ఎక్కిలోతె తయెదె. జోచొ గేరు సముద్రుమ్ సొడి తయెదె” మెన దూత సంగ ఉట్టు గెలన్.

7 కబుర్ సంగిలో జో దూత ఉట్ట గెతికయ్, కొర్నేలి దొగుల జోచ గోతు మాన్సుల్క, చి దేముడుక నిదానుమ్చొ జోచి తెడి తిలో జమాను నుదొ ఎక్కిలోక బుకారా కెర,

8 దూత డీసిలిసి సంగిలిసి ఎత్తి. జోవయింక సంగ కెర, యొప్పేతె జోవయింక కబుర్ తెద్రయ్లిన్.

పేతురుక ప్రబు దెకయ్లి సివ్వు

9 అన్యెక్ దీసి, జేవ్ మాన్సుల్ కొర్నేలి తెంతొ ప్రయానుమ్ జెతె తా యొప్పిక పాసి జా గెతికయ్, పేతురు ఒత్త గెరి తా, ప్రార్దన కెరుక మెన, రహారమి మెద్దెనె ఒర్పె వెగిలో.

10 ఒత్త ప్రార్దన కెర్తె తిలె, జోక చూ కెర్లి. ‘కిచ్చొగె కతిసి కావల’ మెన కబుర్ తెద్రయ్తికయ్, ఎట్టొచ మాన్సుల్ తెయార్ కెర్తె తతికయ్, ప్రబుతె పేతురుచి మెన్సు హూర్ తా, ప్రబు దెకయ్లి సివ్వు ఏక్ పేతురు దెకిలన్.

11 కిచ్చొ దెకిలో మెలె, పరలోకుమ్ ఉగ్గి జలి, చి ఏక్ వెల్లి తెర జాచ చెత్తర్ కోనల్తె దెరయ్ జా, బుయ్యె ఉత్త జెతె అస్సె.

12 జా తెరచి ఉప్పిరి కిచ్చొ బెర అస్సె మెలె, బూలోకుమ్చ ఎత్తి. రకల్ జంతువుల్, సొమ్ముల్, అయివొ, ఆగానుమ్చ పిట్టలు.

13 అస్సె, “ఓ పేతురు, ఉట్ట, కండ, పోడు కా” మెన ఏక్ అవాడె అయ్లిసి పేతురు నూన్లొ.

* 10:1 10:1 పుంజెక నయ్నుమ్ మాన్సుల్క అదికారి

14 గని జో, “నాయ్, ప్రబు. నెంజె. ఆవ్ జెర్మిల్ తెంతో కిచ్చో గార్చి ఆవ్ కెయ్య కయి నాయ్” మెన ప్రబుక సంగిలన్,

15 జలె, అన్నెక్ సుట్టు ప్రబుచి జా అవాడచి జోచి తెన్ ఉంక్యలన్. కిచ్చో మెన సంగిలన్ మెలె, “ సుద్ది అస్సె. కంక జయెదె’ మెన కిచ్చోచి రిసా దేముడు సంగ అస్సె గే, జాక తూయి ‘ గారు’ మెన సంగు నాయ్” మెన సంగిలన్.

16 తివ్వెరి ఇసి జలి, చి పరలోకుమతె జా ఎత్తి అన్నె ఉక్కిల్ జలి.

17 జలె, “ఆవ్ దెకిలి సివ్చిచి అర్దుమ్ కిచ్చో?” మెన, పేతురు కిచ్చో. ఉచరుక గే నేన తతికయ్, ఏదె, కొర్నేలీ తెద్రయల మాస్సుల్, “సీమోనుచో గేరు కేన్ గేరు?” మెన పున సూన తా, ఒత్త గుమ్ముమె టీవోజ తిల.

18 “పేతురు మెలో సీమోను ఇన్నె జితె అస్సె గె?” మెన కేక్ గల.

19 పేతురు, జలె, ‘సివ్చిచి అర్దుమ్ కిచ్చో?’ మెన ఉచరె తతికయ్, ప్రబుచి అత్తు జోక, “ఈందె, తీగ్ల మాస్సుల్ తుక చజితతి.

20 తుయి ఉట్ట ఉత్త గో, చి తుక కేనె కడ నెవుల గే, అన్యూనుమ్ నెంతె జోవయింతెన్ బెద గో. ఆవ్వి జోవయింక తెద్రవ అస్సి” మెన సంగిలన్.

21 జాకయ్ పేతురు జేవ్ మాస్సుల్తె ఉత్త జా, “తుమ్ చజితోసా అవ్వి. కిచ్చోక జా అస్సున్?” మెన పుసిలన్.

22 జేవ్, “కొర్నేలీ మెలో పుంజెక్జీన్ జమాస్సుక వెల్లో మాస్సు అమక తెద్రవ అస్సె. జో దేముడుక బితోసా, సత్తిమ్ తిలోసా. తుమ్చ యూదుల్ ఎత్తిజిన్ జోక, చెంగిలో మాస్సు జో, మెన సంగితతి. జోక, జలె, దేముడుచో దూత ఎక్కిలో డీన కెర, పేతురుక బుకారవన్, చి జో కిచ్చో సంగెదె గే తుయి సూను, మెన సంగితకయ్, తుక కడ నెతి రిసా అమక జో తెద్రవ అస్సి” మెన జేవ్ తీగ్ల పేతురుక సంగిల. తెవోడి “అన్యూమ్ కా కెర, అజిక్ ఇన్నె నిద్ర తా” మెన పేతురు గెరి బుకారా, జేవ్క మరియాద కెర్లన్.

పేతురు కొర్నేలీతె గెలిసి

23 అన్నెక్ దీసి పెందలె ఉట్ట, పేతురు, జేవ్ తీగ్ల తెన్, చి యెప్పేతెచ ప్రబుక సంపజల అన్నె సావ్యుజిన్ తెన్, కొర్నేలీతె గెచ్చుక బార్ జలె.

24 అన్నెక్ దీసి కైసరియ పట్టుమతె పావ, పట్టుమతె పెసిలె, కొర్నేలీ జోవయింక రకితె తా. ‘పేతురు కిచ్చో మెనెదె గే సూన్తు’ మెన, జోవయించ మాస్సుల్క, జోచ గోతుల్ ఎత్తిక బుకారా కెర తెయారా జా అస్సి.

25 జలె, పేతురు జోచి గెరి పావితికయ్, కొర్నేలీ దస్సుల్ జా జోచి చట్టె నెర్చు సేడ జోకర్లన్.

26 గని పేతురు జోక ఉట్టవ కెర, “తుయి టీవోజ, ఆవ్ కి తుచి రితో మాస్సు” మెన, జో తెన్ అన్నె లట్టెత్త తా,

27 గేర్ తెడి పెసిలె, ఒగ్గరజిన్ జనాబ్ ఒత్త బెర అస్సి.

28 జలె, పేతురు జోవయింక తెవోడి, “ఆమ్ యూదుల్, జలె, యూదుల్ నెంజిలనచ గెరలె పెనుక జలె, యూదుల్ నెంజిలన తెన్ బెదుక జలె, అమక గారు మెన తుమ్ జాస్సు. గని, ఆవ్ కిచ్చో గారు మెనుక జయె నాయ్, కక్క నిస్కారుమ్ దెకుక జయె నాయ్, మెన దేముడు అంక అప్ప దెకవ అస్సి.

29 జాక, తుమ్ సంగ తెద్రయతికయ్, కిచ్చో అన్యూనుమ్ నెంతె అయలయ్. జలె, కిచ్చోచి రిసా అంక బుకారా అస్సున్?” మెన పుసిలన్.

30 కొర్నేలీ కిచ్చో జబాబ్ దిలన్ మెలె, “ఎదిలి వేలయ్, అప్పెచెత్తర్ పొదుల్ జయెదె, ఆవ్ తిన్ని గంటల్ మెద్దెనె గెరి ప్రార్దన కెరె తతికయ్, చొక్కిల ఉజెడ్ తిల పాలల్ గలన తిలో ఎక్కిలో అంచి పురె టీవోజ, అంక,

31 ‘ఓ కొర్నేలీ, తుయి ప్రార్దన కెరె తతిసి దేముడు సూన అస్సి. తుయి బీద సుదల్క దర్చుమ్ దెతె తతిసి దెక అస్సి.

32 జాకయ్, యెప్పే పట్టుమతె, చమె పికయ్తో సీమోను మెలో ఎక్కిలో సముద్రుమ్ సాడి జితయ్. జోచి గెరి గెచ్చ, ఒత్త తిలో పేతురు మెలో సీమోనుచి రిసా పుసుతు మెన మాస్సుల్క కబుర్ తెద్రవు.’ మెన అంక జో దేముడుచో దూత సంగిలన్.

33 సంగిల్ బేగి, తుచితె కబుర్ తెద్రయలయం, చి తుయి తుచి దయక అయలది. అల్లె, నంగు మెన ప్రబు తుక కిచ్చో ఆడ్ర దా అస్సె గే, జా నూనుక మెన అమ్ ఎత్తిజిన దేముడుచి నావ్ తెన్ బెర అస్సుమ్”.

34 పేతురు చోండి పుట్టవ కిచ్చో మెన తెదొడి బోదన కెర్లన్ మెలె, “దేముడు తేడల్ దెకె నాయ్ మెన ఆవ్ అప్పె సిక అస్సి.

35 కేన్ దేసిమి కో జోక బితతి, జోచి కోడ్ రితి కెర్తతి గే, జోవయంక తేడల్ నే దెకితె, జో ‘అంచయ్ మాస్సుల్’ మెన చెంగిల్ దెకితయ్ మెన అప్పె దెక అస్సి.

36 “జలె, ఇస్సాయేలులు మెల ఆమ్ యూదుల్తె దేముడు తెద్రయ్ లి కబుర్ తుమ్ జాస్సు. యేసుక్రీస్తుచి తెడి పాపుమ్ గెతి వాటు దొర్కు జలి, చి దేముడుక మాస్సుల్క అడ్డు నాయ్ గే, చి సేంతుమ్ దొర్కు జలి మెలి కబుర్ జా, జో యేసుయి ఎత్తిక † ప్రబుయి.

37 జలె, తుమ్ కెర్ల పావల్క పెట్టి దుకుమ్ జా బాప్తిసుమ్ నజన, మెన యోహాను బోదన కెర కెర పాపుమ్ గెతి గుర్తుక బాప్తిసుమ్ దెతె తిలి తెంతో, గెలిలయ ప్రాంతుమ్తె మొదోల్ జా అమ్ యూదుల్చి ఒండి యూదయ ప్రదేసిమి జా నుబుమ్ కబుర్ నూనయ్ జా అస్సె.

38 మెలె, నజబేతు గెవ్వి వడ్డ తిలో యేసుక ‘ఈంజోయి అమ్చో ప్రేమ తిలో పుత్తు, ఈంజోయి దొర్కు జలో రచ్చొంచువ కెర్తెసా’ మెన దేముడు జోచి సుద్ది తిలి ఆత్మచి గుర్తు దెకవ నెక్తి అదికారుమ్ దిలిసి జాస్సు. పడ్డో, దేముడు జోవయంచి పెట్టి తిలి రిసా, మాస్సుల్క చెంగిల్ దెకితె తా, నయ్తాన్ అల్లర్ కెర్లన ఎత్తిజినక చెంగిల్ కెర్తె తా యేసు బుల్లె తిలిసి తుమ్ జాస్సు.

39 “అమ్ యూదుల్చి ఒండి దేసిమ్ కి, అమ్చి యెరూసలేమ్ పట్టుమ్తె కి, జో యేసు కెర్లెసి ఎత్తిక అమ్ సాచి జా అస్సుమ్. గని జోక సిలువతె † టీవో కెర మార్ల.

40 దేముడు అబ్బోసి తిర్తక జోక అస్సె జయడ, జో అస్సె జలిన్క మాస్సుల్ రుజ్జు దెకితె రితి డీసయలన్.

41 కక్క డీసిలో మెలె, ఎత్తిజిన ప్రజల్క నాయ్, గని జో దేముడు నిసాల్ల అమ్ † సాచుల్కయి డీసిలన్. జో జీవ్ జా ఉట్టి పడ్డో, జో తెన్ నగుమ్ సుట్లు అస్సిమ్ కయలమ్.

42 జలె, అమ్క డీస కెర, ప్రజల్ ఎత్తిక అంచి రిసా బోదన కెర, జితనక మొర్లనక ఆకర్ దీసిక అవ్వి తిర్పు కెరుక మెన దేముడు అబ్బో అదికారుమ్ దా అస్సె. నంగ మెన, జోచి రిసా అమ్ సాచి జంక మెన, జో యేసుయి అమ్క ఆడ్ర దా అస్సె.

43 జోచి రిసా కో జోక సంబజవుల గే, జోచి నావ్ తెన్ జోవయంచ పాపల్ కచితుమ్ చెమించువ జవుల మెన కబుర్ తెద్రయలన ఎత్తిజిన సాచి జతతి” మెన పేతురు బోదన కెర్లన్.

44 పేతురు దస్సి బోదన కెర్తె తతికయ్, దేముడుచి సుద్ది తిలి ఆత్మ జా కోడు నూన్లన ఎత్తిజినచి పెట్టి బెర్లి.

45 పడ్డో యూదుల్చి గుర్తు తిలి సున్నతి కెరంతి ఆగ్గు నంవ కెర్ల, పేతురు తెన్ జా తిల, ప్రబుక నంబజల మాస్సుల్ ఆచారిమ్ జలె. యూదుల్ నెంజిల జేవ్ అస్సె మాస్సుల్చి పెట్టి కి దేముడుచి సుద్ది తిలి ఆత్మ ప్రబు సువ దిలిన్చి రిసా.

46 జా సువ దిలిన్క కిచ్చో గుర్తు దెకిల మెలె, జేవ్ మాస్సుల్ జేవ్ నే సికిల బాసల్ తెన్ లట్టబ, దేముడుచి గవురుమ్ నంగితె తిల. దస్సి జతికయ్, పేతురు,

47 “అమ్క జా సుట్టు జగ్గు జలి రితి, ఇన్నెచి పెట్టి కి దేముడుచి సుద్ది తిలి ఆత్మ దొర్కు జా అస్సె. జాకయ్ ఇన్నెక అమ్ బాప్తిసుమ్ దెంక కిచ్చో అడ్డు నాయ్. కో ‘పోసి’ మెనుక బెదె నాయ్” మెన నంగ,

48 “జేవ్ ఎత్తిజిన యేసుక్రీస్తుచి నావ్ తెన్ బాప్తిసుమ్ నజనతు” మెన ఆడ్ర దిలన్. ఒత్త తెంతో “నగుమ్ దీసల్ ఇన్నె తా” మెన పేతురుక బతిమాలా జా సంగిల.

11

యూదుల్ నెంజిల సుదల్ రచ్చొంచువ జలిన్

† 10:36 10:36 ఎత్తిచి ఉప్పొలి వెళ్లొ తిలోసా, ఎత్తిక ఏలువ కెర్తెసా. † 10:39 10:39 మత్తయి 27:32. § 10:41 10:41 మత్తయి 28, మార్కు 16, లూకా 24, యోహాను 20, 21 అద్యయల్.

1 యూదుల్ నెంజిల మాన్సుల్ కి *యేసుచి రిసాచి నుబుమ్ కబుర్ నూన నంపజా మార్పుప జా అన్సి మెన, సిన్సుల్ తెన్ యూదుయ ప్రదేసిమ్చి నంపజలన ఎత్తిజన్ నూన్.

2 జలె, సగుమ్ దీసల్ గెతికయ్, పేతురు యెరూసలేమ్తె ఉట్ట అయలన్. యేసుక నంపజల ఒత్తచ మాన్సుల్, యూదుల్ పేతురుక జేవ్ గోల కెర్ల.

3 “అమ్ యూదుల్చి గుర్చుచి నున్సుతి నే కెరన్లనచ గెరలె కిచ్చొక గెలది? జోవయింతెన్ కిచ్చొక అన్సిమ్ కయలది?” మెన గోల కెర్ల.

4 గోల కెర్లికయ్, జర్గు జలిసి ఎత్తి వర్గు తెన్ పేతురు సంగిలన్.

5 “అవ్ యొప్పే పట్టుమ్తె తా ప్రార్దన కెర్తె తిలయ్. ప్రార్దన కెర్తె తా, ప్రబుతె అంచి మెన్సు పూర్తి తతికయ్, ప్రబు దెకయ్లి సిన్సు ఏక్ దెకిలయ్. జా సిన్సుతె, వెల్లి తెర రితిసి జేవ్చ చెత్తర్ కోనల్తె దెరయ్ జా, పరలోకుమ్ తెంతో ఉత్త జెతె అన్సి. అంచి పాసి ఉత్త అయ్లి.

6 అవ్ సరిగా దెకిలయ్, పోస్త మంద, డొంగుర్చ జంతువుల్, అయివో గట్ట, ఆగాసుమ్చ పిట్టల్ జా తెరచి ఉప్పిరి అన్సి.

7 “పట్టె ఏక్ అవాడ్ సంగిలిసి నూన్యయ్, ‘ఓ పేతురు, ఉట్ట, కండ పోడ కా.’ మెన సంగిలిసి నూన్యయ్.

8 గని, ‘నెంజె, ప్రబు. అవ్ జెర్లిలి తెంతో కిచ్చొ గార్చి అవ్ కెయ్యొ కయ నాయ్’ మెన సంగిలయ్.

9 సంగితికయ్, పరలోకుమ్ తెంతో జా అవాడ్ అన్యెక్ సుట్టు లట్టబు, కిచ్చొ మెన జబాబ్ దిలన్ మెలె, ‘నుద్ది అన్సి. కంక జయదె’ మెన, కిచ్చొచి రిసా దేముడు సంగెదె గే, జాక తూయి గారు మెనుక జయ నాయ్ మెన సంగిలన్.

10 తివ్వెర్ల జసి జలి, చి పరలోకుమ్తె జా ఎత్తి అన్సి ఉక్కీల్ జలి.

11 ఉక్కీల్ జలి బేగి, కైసరియ పట్టుమ్ తెంతో అయల మున్సుబోదల్ తీర్గ అమ్ తిలి గెరి పాచ అయల.

12 “జోవయింతెన్ బెద గో మెన ప్రబుచి ఆత్మ అంక ఆడ్ర దెతికయ్, జోవయింక తేడ నే దెకితె, బెద గెలయ్. అమ్చి తెన్ బెద అయల సాప్పుజిన్ ప్రబుక నంపజలన కి, అంచి తెన్ గెల, చి యూదుడు నెంజిలో జో కొర్పేల్చొ గెరి పెసిలమ్.

13 ప్రబుచొ దూత జా దీసి జోచి గెరి బీచ సంగ తిలిసి అమ్క కొర్పేల్ సంగిలన్. దూత సంగ తిలిసి కిచ్చొ మెలె, ‘జెవుసు’ మెన సిమోను పేతురుక కబుర్ తెద్రవు. జో యొప్పేతె అన్సి.

14 జో అయలె, అంచి ఏక్ కబుర్ తుమ్క నూనవది. జా కోడు నూన నంపజలె, తూయి, తుమ్చి గేర్చ మాన్సుల్, సేవ కెర్లన, ఎత్తిజన్, పాపుమ్ తెంతో రచ్చించువ జన్సి, మెన జోక దూత సంగ తిలన్.

15 “ప్రబుచి నుబుమ్ కబుర్ అవ్ సంగుక దెర్లికయ్, అమ్ సిన్సుల్క చి అమ్చి తెన్ నంపజల యూదుల్క జా సుట్టు జర్గు జలి రితి, జా గేర్చక కి జర్గు జలి. దేముడుచి నుద్ది తిలి ఆత్మ జోవయించి పెట్టి అయ్లి.

16 దస్సి జర్గు జతికయ్, ప్రబు అగ్గె సంగ తిలి ఏక్ కోడు ఏదన్ల కెర్లయ్. ‘యోహాను, పాని తెన్ బాప్తిసుమ్ దెతె తిలి, గని వడ్డొక దేముడుచి నుద్ది తిలి ఆత్మ తెన్ తుమ్క బాప్తిసుమ్ దెమ్దె’ † మెన యేసు సంగిలిసి ఏద కెర, ‘ఒహో, ఇన్సెన్ నెరవెర్చువ జలి’ మెన చినిలయ్.

17 “జలె, అమ్ యేసు † క్రీస్తు ప్రబుక నంపజతికయ్ దేముడు అమ్చి పెట్టి జోచి ఆత్మ తతి వరుమ్ కిసి దిలన్ గే, జో అన్సి జేవ్ యూదుల్ నెంజిలనక కి దస్సి వరుమ్ దిలన్ మెలె, అవ్ మాన్సు, ప్రబుక, తుచి ఇన్సుమ్ పాని మెనుక బెదెదె గె? బెదె నాయ్!” మెన పేతురు సాచి సంగిలన్.

18 ఈంజ సాచి నూన తా జేవ్ గోల కెర తిల బారికుల్, చి ప్రబుక అన్సి నంపజలన, అన్యూసుమ్ తంక నెతిర్ల, చి “దస్సి జలె, యూదుల్ నెంజిల మాన్సుల్ కి పాపుమ్బుద్ది ముల దా ప్రబుక నంపజలె, జేవ్ కి జోచి నావ్ తెన్ రచ్చించువ జవుల” మెన నర్ల తెన్ దేముడుక గవురుమ్ కెర్ల.

యూదుల్ నెంజిల మాన్సుల్ ప్రబుక నంపజా మార్పుప జలిసి

* 11:1 11:1 మెలె, ‘ఎత్తి అదికారుమ్ తిలి’ దేముడు దిలి నుబుమ్ కబుర్. 6:7, 8:14 దెక. † 11:16 11:16 యోహాను 1:5.

‡ 11:17 11:17 ‘క్రీస్తు’ మెలె, ఎత్తి అదికారుమ్ తిలి’ దేముడు పూర్ణమ్ తెంతో ‘తెద్రయింద’ మెన బీచవడ్డొ ధెర్చు జలొ రచ్చించువ కెర్లెనా.

19 నైవను బోదన కెర్తె తిలి తెంతో గోన జల మాన్సుల్ అల్లర్ కెర్తె రిసా చెదుర్చు జా తిల యేసుక సంపజలన, ఈంజ మదెనె, ఉత్తర పక్క, గెచ్చు, నముద్రుమ్చి పాసి తిలి పేసీకే ప్రాంతము ఎద పడ్డో నముద్రుమ్ ఒత్తల్తోచి కుప్త, డిబ్బ దేసిమ్ ఎద, పడ్డో సిరియ ప్రదేసిమ్చి అంతియొకయ పట్టుమ్ పక్క బుల బుల, తెదోడి ఎద ఎక్కి యూదుల్కయ ప్రబుచి సీసుబుమ్ కబుర్ సికడ్డ తిల.

20 గని అన్నె సగుమ్జెన్, కుప్త డిబ్బ దేసిమ్చ, అన్నె జాక దచ్చెన పక్క, తిలి నముద్రుమ్ ఒత్తల్తో తిలి కురేనియ పట్టుమ్చ, జా అంతియొకయ పట్టుమ్తె జా కెర, గ్రీకు బాస లబ్బై యూదుల్ నెంజలనక కి యేసుప్రబుచి రిసాచి సుబుమ్ కబుర్ బోదన కెర్తె.

21 జేవ్ బోదన కెర్తెనక ప్రబు తోడు తతికయ, జేవ్ గ్రీసు దేసిమ్చ సుదల్తె ఒగ్గరజెన్ ప్రబుక సంపజా మార్పువ జల.

బర్షబాక అంతియొకయతె తెద్రయేలిసి

22 ‘ఒత్తవ యూదుల్ నెంజలన కి ప్రబుక సంపజా మార్పువ జా అన్నె’ మెన యెరూసలేమ్ పట్టుమ్చి సంగుమ్చ సంపజల యూదుల్ నూన కెర, బర్షబాక ఒత్త జా సిరియ ప్రదేసిమ్చి అంతియొకయతె తెద్రయేల.

23 జో ఒత్త పాచ కెర, ‘జోచి దయచి రిసా దేముడు జేవ్ యూదుల్ నెంజలనక వరుమ్ దా ఈంజ ఎత్తి జర్గు కెర అన్నె’ మెన రుజ్జల్ దెక, సద్ద జలో, అన్నె, “తుమ్ ప్రబుక ఏక మెన్ను నిదానుమ్ తా” మెన జోవయింక దయిరిమ్ సంగ బోదన కెర్తెన్.

24 జో బర్షబా చెంగిలో మాన్సు. జోచి పెట్టి దేముడుచి నుద్ది తిలి అత్త పూర్తి కామ్ కెర్తి బుద్ది, ప్రబుచి ఉప్పిరచి నముకుమ్, బెర తిలి. బర్షబా సగుమ్ దీసల్ ఒత్త తా బోదన కెర్తెకయ, అన్నె ఒగ్గరజెన్ మాన్సుల్ ప్రబుక సంపజా మార్పువ జల.

బర్షబా సాపుల్క ఒత్త కడ నిలిసి

25 ‘జోడు జెప్పన్’ మెన సాపుల్క సంగుక మెన, బర్షబా తార్పు పట్టుమ్తె ఉట్ట గెలన్.

26 జోక అంతియొకయ పట్టుమ్తె కడ ఆన్లన్, చి వెర్చెక్ పూర్తి ఒత్త తా, ప్రబుక సంపజలనచి ఒత్తచి సంగుమ్తె బెదితె తా, ఒగ్గర ఒగ్గరజెన్ మాన్సుల్క సరిగా బోదన కెర్తె. ఒత్త, యేసుక సంపజా సిన్సుల్ జలనక తోలితో అంతియొకయతెయ ‘సంపజలన’ మెన సంగయ జల.

27 జేవ్ పొదులె, అన్నె కిచ్చో జర్గు జలి మెలె, ప్రబుచ †కబుర్లు సంగిత సంపజలన సగుమ్జెన్ అంతియొకయతె అయేల.

28 జోవయింతె ఎక్కిలో, అగబు. జో జలె, నబతె టీవ, ప్రబుచి నెక్కిచి రిసా ప్రబుచి కిచ్చో కబుర్ సంగిలన్ మెలె, ‘పలాన్ సమయిమ్క ఒంఠి లోకుమ్తె ఒగ్గర్ కరువు జెయదె’ మెన కబుర్ సంగిలన్. కేన్ కాలుమ్ జో సంగిలి కరువు జర్గు జలి మెలె, క్షోదియ రానో ఏలువ కెర్తె తిల పొదులె జర్గు జలి.

29 అంతియొకయతె తిల ప్రబుచ †సిన్సుల్, జలె, జా కరుచి రిసా నూన కెర, నబ కెర కిచ్చో ఉచర్ల మెలె, “కచి నెక్కి తిలి ఎది, జేవ్ డబ్బల్ ఉక్కుల్మ, చి యూదయ ప్రదేసిమి తిల అమ్చ సంపజలన బావుడ్డుక తోడు తెద్రవుమ్చె” మెన,

30 డబ్బల్ ఉక్కుల, యెరూసలేమ్చి సంగుమ్చ వెల్లెల మాన్సుల్క అంట దెత్త మెన, బర్షబా చి సాపుల్చి అత్తి ఒత్త యెరూసలేమ్తె తెద్రయేల.

12

హేరోదు రానో సంపజలనక అల్లర్ కెర్తెక

§ 11:19 11:19 ‘సుబుమ్ కబుర్’ మెలె, ఎత్తి అదికారుమ్ తిలో దేముడు దొర్చు కెర్తె రచ్చనచి కోడు. జో పావల్ చెయించువ కెర్తెనచి రిసాచి కబుర్. యేసుయ దొర్చు జలో రచ్చించువ కెర్తెనా జెత్తినచి కబుర్. జో అర్చితము జా పావల్ గెచ్చయేలి రిసా మాన్సుల్ వరలోకుమ్చి రాజుమ్తె బెదితి అవకాసుమ్ దొర్చు జలిన్చి కబుర్. * 11:27 11:27 యేసుప్రబు దేముడు అబ్బినచి ఉత్తె పక్క వెన జోవయింతెన్ ఏలువ కెర్తెయ; ఎల్లియల్ 1:13. జాచి రిసా ‘ప్రబుచ కబుర్లు’ మెలె, అబ్బినచ యేసుచ కి జవుల. † 11:27 11:27 ‘ప్రబుచ కబుర్లు సంగితన్’ మెలె, జోచి అత్తి జోవయించి చొడి పుట్టయేలి, జోచ కబుర్లు జేవ్ సంగుల. ‡ 11:29 11:29 బారికూల్ 9:1 చి ఎట్టచి కోడు దెక.

1 జాకరవు నే జిత అగ్గె, *హేరోదు రానో యెరూసలేమ్ పట్టుమచి సంగుమ్చ నంపజలన సగుమ్జిన్క అల్లర్ కెరుక దెర్లన్.

2 జోవయింతె ఏక్ దీసి జేవ్ యేసుచ బారికుల్తె ఎక్కిలోక కండ మార్లన్. యోహానుచో యాకోబు మెలో అస్సోన్క.

3 “యాకోబుక మార్లి రిసా మాములుమ్ యూదుల్చ వెల్లెల మాన్సుల్ నర్ల జల’ మెన రానో దెక, “పేతురుక కి మారిందె” మెన ఉచర, జోక కి జేలి కెర్లె. గని, నే పులయల పోడియె కతి యూదుల్చి పస్సా పండుగు జా తిలి రిసా ‘అప్పె మారుక నెంజె’ మెన,

4 పేతురుక దెర జేలి కెర, ‘పండుగు కేడ్లె, ప్రెజల్ సాచి జతి రితి సబ కెర మారిందె’ మెన, ఉచర, ‘ఎక్కి దడి చెత్తర్జిన్ జమాన్లు జోక రకుత్’ మెన సోడ జిన్ జమాన్లుక నిసాన్లన్. చెత్తర్జిన్ సావ్వు గంటల్ రకిలె అన్యెక్ చెత్తర్జిని సావ్వు గంటల్ రకుక.

5 దస్సి పేతురుక జేల్తె రకితె తిల, గని జా యెరూసలేమ్తెచి సంగుమ్ సుదల్ పేతురుచి రిసా దేముడుక ప్రార్లన కెరుక ములితి నాయ్. జేవ్ దస్సి ప్రార్లన కెర్లె తతికయ్,

6 కలిక జోవయింక బార్ కెర తీర్పు కెర మారిందె, మెన పండుగు కేడ్లికయ్ హేరోదు ఉచర్లన్. మదెనె పేతురుక కీసి అస్సె మెలె, జా రాతి, జోక ఏక్ పక్కయ్ ఎక్కిలోక, అన్యెక్ పక్కయ్ ఎక్కిలోక తా, దస్సి దొగుల జమాన్లుచి నెడిమి జో నిజయి అస్సె. పేతురుచ అత్తిలె గొల్పుల్ బందయ్ తిల. పడ్డె జేల్ చి కెర్లితె దొగుల జమాన్లు రకితె అస్సి.

7 జలె, పేతురు దస్సి జేలితె తతికయ్, ప్రబుచో దూత ఎక్కిలో జాక కెర, జోచి పాసి టీవో జలన్, చి జా ఒండి గదితె వెల్లె ఉజడి లగిలి. తెదేడి పేతురుక పక్కయ్ పెట, ఉట్టమ, “బేగి ఉట్టు” మెన సంగిలన్. బేగి, జోచ అత్తిచ గొల్పుల్ కున్ల గెల.

8 పడ్డె, “తెయార్ జా జోడ్లు గలన” మెన దూత సంగిలన్. జో సంగిలి రితి పేతురు కెర్లన్, చి “తుచి డుప్పటి పంగురచి అంచె పట్టి జె” మెన దూత సంగితికయ్, సంగిల్ రితి పేతురు కెర్లన్.

9 దూతచి పట్టి ఇండ బార్ జా గెలన్, గని దూతచి అత్తి జర్లు జలిన్క “నిజమి జర్లు జతయ్” మెన నేనె. ‘ఈంజ సివ్వు దెకితసి’ మెన జో ఉచర్లయ్.

10 జలె, రకితెసా ఎక్కిలోక ఒత్తల్తో జిన్, అన్యెక్ ఒత్తల్తో కి జిన్, పట్టుమతె ఉత్తిర్తి గుమ్ముమ్చి ఇనుముచి టట్టతె పాచ అయ్లె, కిచ్చొ జర్లు జలి మెలె, జాచి ఇన్సుమ్క జా ఇనుము టట్ట ఉగ్గి జలి, చి పేతురు దూతతెన్ బార్ జా ఏక్ వీది జిన్లె, బేగి దూత జోక ములిలన్.

11 “సివ్వు నెంజె, నిజమి జర్లు జలి” మెన పేతురు అప్పె పూర్తి అర్దుమ్ కెరన్లన్, చి “హేరోదు జేలి కెర్లిసి తెంతో, గోన జల యూదుల్ ఉచర్లసి ఎత్తి తెంతో, ఆవ్ విడ్డల్ జతి రిసా ప్రబు జోచో దూతక తెద్రయ్లో మెన, అప్పె కచితుమ్ జాని” మెన చెంగిల్ ఉచర.

12 ఉచర, పట్టి గెచ్చ, మార్కు మెన అన్యెక్ నావ్ తిలొ యోహాను మెలోసాచి అయ్యోన్ మరియచి గెరి పాచిలన్. ఒత్త ఒగ్గర్జిన్ మాన్సుల్ బెర, జోచి రిసా ప్రార్లన కెర్లె అస్సి.

13 గుమ్ముమ్చి కెర్లితె జో పెట అవాడ్ కెర్లె, రొదే మెలి తేర్బోద దాక్ నాడి కెర్లి ఉగుడుక అయ్లి.

14 పేతురుచి అవాడ్ నూన, జాచి ఒగ్గర్ నర్ల సంతోసుమ్క ఉగుడుక పప్పె కెర, గెరి నిగ గెచ్చ, పేతురు కెర్లి పాసి టీచిలిసి మెన సంగిలి.

15 “తుయి వెర్లి జా అస్సిన్” మెన, ఎత్తిజిన్ జాక సంగిల. గని, “నాయ్, నిజమి, జో జాక అస్సె” మెన, జా దయిరిమ్ తెన్ సంగితికయ్, “జోచో దూత కిచ్చొగె జా తయెదె” మెల.

16 గని పేతురు కెవ్డిక పెట అవాడ్ కెరుక ములె నాయ్, చి నూన, ఉగుడ, జోక దెక ఆచారిమ్ జలె.

17 జో, జలె, ‘తుక్లె తా’ మెల సయగ కెర, జో జేలితె తిలె, జేల్తె తెంతో ప్రబు విడ్డల్ కెర్లిసి ఎత్తి కీసి జర్లు జలి గే పూర్తి సంగ కెర, “యేసుచో బాచోసి జలొ యాకోబుక చి బాపుడ్లు జల నంపజలన ఎత్తిక ఈంజ ఎత్తి తుమ్ నూనచ” మెన సంగ, పేతురు వేరతె ఉట్ట గెలన్.

* 12:1 12:1 హేరోదు రానో రోమ్ దేసిమచి ప్రబుతుమ్చి తెడి విలువ కెర్లె తిలన్. † 12:15 12:15 యూదుల్ తెన్ సగుమ్జిన్ కిచ్చొ ఉచర్ల మెలె, ఎత్తి మాన్సుక పరలోకుమ్తె ఏక్ దూత తయెదె.

అదికారుల్ పేతురుక నే డీసిలి రిసా జర్గు జలిసి

18 వెందలి, పేతురుక 'విడ్డల్ జా: అస్సె' మెన జాన్ తికయ్, జమాన్లు బమ్మ జా ఒగ్గర్ అల్లర్ జల.

19 "పేతురుక జేల్ తె తెంతో బార్ కెర ఆనీతు" మెన హేరోడు అడ్డ దిలన్, గని 'డిసి నాయ్' మెన నూన, రకితనక పరిచ్చ కెర, జోవయింక మొర్రి సిచ్చ దా, జా యూదయ ప్రదేసిమచి యెరూసలేమ్ పట్టుమ్ ముల దా సముద్రమ్ పక్కచి జా ప్రదేసిమచి కైసరియ పట్టుమ్ తె గెచ్చ, ఒత్త తెంతో ఏలుప కెర్రి తిలో.

20 ఉత్తర పక్కచ తూరు పట్టుమ్చ, సీదోను పట్టుమ్చచి రిసా హేరోడు ఒగ్గర్ పెట్టపెట్టి జలో. జాకయ్ జేవ్ పట్టుమ్చ ఒగ్గర్ జిన బెద జా, హేరోడుచి మేడతె జా: కెర, రానోచో గేర్ క దెకితో మంత్రి జలో బ్లాన్టు మెలోసా తెన్ సినేతుమ్ కెరన, 'రాన్ అమ్క సేతుమ్ దెకున్' మెన జోవయింకి అత్తి సంగ తెద్రయ్ల. జోవయింకి పేసికే ప్రాంతుమ్ తె కరువు తతికయ్, జో రానో ఏలుప కెర్రి గలిలయ ప్రాంతుమ్ తెచ దాన్ జేవ్ కా కా జతతి. జేవ్ జా కంక జో రానో నే ఒప్పిలెగిన, చూక మొరుల.

21 జాకయ్, జో సంగిలి ఏక దీసి, హేరోడు, రానో జలి గుర్పు దెకయ్ తె జోవయింక చెంగిల పాలల్ ఎత్తి గలన, సింగాననుమ్ తె వెన, జోవయింక జొయ్యి గప్పురుమ్ ఆననతి రితి, బెర తిల జేవ్ మాన్సుల్ క తెలివి తెన్ బోదన కెర్రిన్.

22 దస్సి జతికయ్, ప్రెజల్, "ఇన్యెక మాన్సు మెలమ్, గని మాన్సు నెంజె. ఈంజో లట్టబ్బె, దేముడు లట్టబ్బె రితి జతయ్!" మెన కేకుల్ గల పులయ్ల.

23 'దేముడు' మెన పులయ్లె, జో 'నెంజి' మెనె నాయ్, 'జొయ్యి దేముడు' మెన దేముడుక గప్పురుమ్ కెరె నాయ్, చి బేగి, దేముడుదూత ఎక్కిలోచి అత్తి జోక మొర్రి సిచ్చ దిలన్, చి జో జతె తన్సు, కిన్యో జోచి ఆగ్ గా: గెల, చి మొర గెలన్.

24 గని ప్రబుచ సిన్సుల్ జోచి సుబుమ్ కబుర్ బోదన కెర్రి తిల, చి అన్యె ఒగ్గర్ జిన ప్రబుక నంపజా మార్పుప జల.

25 హేరోడు రానో మొర గెచ్చ సగుమ్ దీనల్ గెలి వడ్డో, క్షోవుదియ రానో ఏలుప కెర్రి తిల పొదులె, బర్బూ సాపులు యెరూసలేమ్ తె గెచ్చ, 'కరువుక అల్లర్ జల మాన్సుల్ క దెంక' మెన, అంతియొకయ్ తెచ నంపజాలోన ఉక్కిలి డబ్బుల్ న దా జోవయింకి కామ్ కేడవ కెర, బర్బూచో నల్లొసి జలో మార్పు మెలో యోహానుక దెరన, యెరూసలేమ్ తెంతో ఉట్ట అయ్ల.

13

ప్రబు బర్బూక చి సాపుల్ క తెద్రయ్ లిసి

1 అంతియొకయ్ తెచ సంగుమ్ తె ప్రబుచ కబుర్లు సంగితన సగుమ్ జిన్ చి, ప్రబుచి రిసా బోదన కెర్రిన్ సగుమ్ జిన్ తిల. జోవయింక, బర్బూ, వడ్డో 'సిడ్డొ' మెలో సుమెయోను, వడ్డో కురేనియ్యు పట్టుమ్చో లూకియ, చెత్తర్ ప్రాంతుమ్ లిల ఏలుప కెర్రి హేరోడు మెలో రానోచి జతతె వడ్డిలో మనయ్ను, వడ్డో సాపులు.

2 ఏక దీసి జేవ్ ఎత్తి జిన్ ఎక్కితె తా చువ్వె తా ప్రబుక ప్రార్దన కెర్రి తతికయ్, జోవయింక దేముడుచి సుద్ది తిలి ఆత్మ ఇసి సంగిలన్, " అంచి ఏక వెల్లి కామ్ కెర్రి" మెన, బర్బూక చి సాపుల్ క ఆవ్ నిసాన అస్సి. జా కామ్ చి రిసా అంచి అత్తి ఇన్యెక తుమ్ సార్పు కెర దెతి గుర్పు కెర" మెన సంగిలన్, చి

3 అన్యె చువ్వె తా ప్రార్దన కెర జేవ్ దొగులక బోడి చడ తెద్రవ దిల.

4 దేముడుచి సుద్ది తిలి ఆత్మ దస్సి తెద్రయ్ తికయ్, బర్బూ చి సాపులు, సముద్రమ్ చి ఒడ్డుతెచి సెలూకయ పట్టుమ్ తె ఉట్ట గెచ్చ, ఒడతె వెగ, సముద్రమ్ జిన, నయ్ ప్రన్ కుప్ర దేసిమి ఉట్ట అయ్ల.

5 తొలితో జా దేసిమచి నలమి పట్టుమ్ తె గెచ్చ, యూదుల్ చ నబ గెరలె *యేసుచి రిసాచి సుబుమ్ కబుర్ నూనవ, సాచి సంగిల. మార్పు మెలో యోహాను జోవయింకెన్ తోడు అయ్లో.

6 ఒత్త తెంతో జా నయ్ ప్రన్ దేసిమచి ఒత్తల్ తో పక్కచి పాపు మెలి వెల్లి పట్టుమ్ తె గెలి, దీసరి జా గార్ డేల్ మాయల్ కెర్రి ఎక్కిలో అస్సి. 'యేసుచో పుత్తసి' మెలి అర్దుమ్ తెన్, 'బరయేసు' మెలి నావ్ జో తియన

* 13:5 13:5 మెలి, 'ఎత్తి అదికారుమ్ తిలో దేముడు దిలి సుబుమ్ కబుర్'.

అన్నె. జో యూడుడు జెర్మిలోసా, గని ఆరిక, 'దేముడుచి కబుర్ ఈంజ' మెన, నయతాన్ సికడ్డి కోడు జో సంగెదె.

7 జా దేసిమి ఏలువ కెర్లొ అదికారితె తయెదె. జో అదికారిచి నావ్ కిచ్చొ మెలె, 'సెర్గి పవులు'. జో తెలిచి మాన్సు జయెదె. జో కిచ్చొ కెర్లొ మెలె, దేముడు చిలి 'సుబుమ్ కబుర్ సూనుక ఇస్సుమ్ జా, బర్షబాక చి సావుల్క బుకార్లన్.

8 జలె, ఎలుమ మెన నావ్ తియ్లొ దీసరిక సంగుల. జా నావ్చి అర్దుమ్, దీసరి. జో అప్పె, 'అదికారి క్రిస్టుక నంపజా మార్పువ జవున్ నాయ్' మెన, సావుల్క చి బర్షబాక అర్దు కెరుక గెల్.

9 రోమ దేసిమిచి బాస తెన్ 'పవులు' మెన అన్యెక్ నావ్ తిలొ జో సావులు, దేముడుచి సుద్ది తిలి ఆత్మచి సెక్తి జోవయింబి పెట్టి బెర్రికయ్, జో ఎలుమక చెంగిల్ దెక,

10 "నయతాన్చొ పుత్తుసి జస్తె, తుయి. తుచి పెట్టి మాయబుద్ది, ఒగ్గర్ గారచి, పావుమ్ తెన్ అస్సిన్. సత్తిమ్ ఎత్తిక విరోదుమ్ జస్తె, తుయి, సోగ తిల ప్రబుచ వట్టో వంకడ కెర్లొ మాయల్ కెయక ములితె?

11 ఈందె, ప్రబు తుక అప్పె నిచ్చ దెతయ్. తుయి గుడ్డి జా అప్పెచి మట్టుక పొద్దుక కి దెకిన్ నాయ్" పవులు సంగిలన్. సంగిల్ బేగి, జో మాన్సుక అంకివొతె గాండు డంకిలి రితి జా, పూర్తి గుడ్డి జలొ, చి జోక ఎత్తి అందర్ జలి. ఒత్త తెంతొ, అంక ఆతు దెర కో జలెకు అంక వాటు దెకయతు ఎక్కిలొ ఇండుక నెత్త కెర బతిమాల్పా జా ఏడ్తె తిలన్.

12 అదికారి, మాత్రుమ్, జర్గు జలిసి దెక కెర, ప్రబుచి చి సెక్తిచి రిసా జలె ఆచారిమ్ జా ప్రబుక నంపజలన్.

పవులు పిసిదియ ప్రాంతుమ్చి అంతియొకయతె బోదన కెర్లిన్

13 తెదొడి పవులు, జోవయింతెన్ తిలస, పావు పట్టుమ్ ముల దా, ఓడత వెగ సముద్రుమ్ జీన, అన్నె ఇండ గెచ్చ, పంపూలియొ ప్రదేసిమిచి పెర్గె పట్టుమ్తె అయిల. జేవ్ ఒత్త తిలి పొది, మార్కు మెలొ యోహాను జోవయింక ముల దా, యెరూసలేమ్తె అన్నె ఉట్ట గెలన్.

14 పావులీసి, మాత్రుమ్, ఇండ గెచ్చ పెర్గెక జీన, గలతీయ ప్రదేసిమిచి పిసిదియ ప్రాంతుమ్చి అంతియొకయ మెలి పట్టుమ్తె పాచిల. బక్తి కెర్లొ సెలవ్ కడన్ల దీసి, యూదుల్చి సబగేరి పెస, వెసిల.

15 *మోసే పూర్ణుమ్చొచి అత్తి దేముడు రెగ్గయల ఆగ్గల్ జలెకు, పూర్ణుల్చి అత్తి సంగిల దేముడుచ కబుర్లుచి ఏక వాట కో గే వెల్లొ మాన్సు సదు కెర్రికయ్, "ఓ బావుడ్లు, ప్రజెల్క కిచ్చొ బోదన సంగితె గే సంగ" మెన పావులీసిక జా సబగేరిచ అదికారుల్ పురె బుకార్ల.

16 జాకయ్, పవులు ఉట్ట, ప్రజెల్క 'సూన్తు' మెలి గుర్తుక ఆతు తెన్ సయన్ కెర, "ఓ ఇస్రాయేలులు మెల అమ్చ యూదుల్, వడ్డొ అమ్చొ దేముడుక బిత తుమ్ యూదుల్ నెంజిలస, నూన.

17 ఇస్రాయేలులు మెల అమ్చ పూర్ణుల్క 'అంచయి మాన్సుల్ జతు' మెన పరలోకుమ్ తిలొ అమ్చొ దేముడు కిసిసాన్లన్. సగుమ్ దీసల్ గెతికయ్, జేవ్ *వగుపు దేసిమి ఉట్ట గెచ్చ ఒత్త అల్లర్ తెన్ తతికయ్, జోవయింక చెంగిల్ దెక, జో ప్రబు, జోవయింబి సెక్తిక, జోవయింక ఒత్త తెంతొ †విడ్డల్ కెర బారొ కెర్లన్.

18 జేవ్ ‡దొన్ని చిసా వెర్సులు బయలు దేసిమి బులై తిలి పొది, జోవయింప సిద్దు ఓర్పువ జా, జోవయింక నిదానుమ్ దెకితె తిలన్.

19 ఒత్త తెంతొ, కికనాను దేసిమిచె సత్తు జాతివొచ మాన్సుల్క యుద్దుమ్తె అమ్చ పూర్ణుమ్చ జీన్తి రితి జో జర్గు కెర, 'ఈంజ దేసిమి ఈంజేవ్ జతు, ఇన్నెచి సొంత టూన్ జవున్' మెన జోవయింక దొర్కు కెర్లన్.

† 13:7 13:7 యేసుచి రిసాచి సుబుమ్ కబుర్. ‡ 13:15 13:15 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయలి ఆగ్గల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాచే పుస్తకమ్తె రెగ్గయ్ జా అన్నె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్ణుమ్చొచి అత్తి రెగిడ్డి దేముడుచ ఆగ్గల్ మెన రగ్గవ అన్నె. § 13:17 13:17 అదికాండుమ్ 12 అద్యయమ్ తెంతొ. * 13:17 13:17 అదికాండుమ్ 46 అద్యయమ్. † 13:17 13:17 నిర్ణమకాండుమ్ 1 అద్యయమ్ తెంతొ. ‡ 13:18 13:18 నిర్ణమకాండుమ్, లేచియకాండుమ్, సన్యాకాండుము, ద్వితియోపదేశ కాండుము. § 13:19 13:19 యెహోసువ.

20 “పడ్డా, రమారమి చెత్తర్ వుంజో యాబయ్ వెర్చుల్ గెతికయ్, జోవయించ కబుర్లు సంగితో సమూయేలు మెలో పూర్ణమచోది కాలుమ్ ఎద, ‘ఇన్నెక ఏలువ కెర్తు’ మెన, నాయిమ్ వాట్ దెకయత ఎక్కిలోచి పడ్డా అన్నెక్టో* తిర్పు కెర్తన రితనక జో దేముడు అదికారుమ్ దిలన్.

21 “పడ్డా, † ‘అమక రానో కావలె’ మెన అమచ పూర్ణమచ బతిమాల్పా జా సంగితకయ్, రానోక జో ప్రబు టీషడ్డన్. కొన్నో తోలితో జోవయించ రానో జలో గే తుమ్ జాన్సు. బెన్యామీసు చి వంసుమచో కీపు మెలోసాచో సావులు మెలో పుత్తుసి అమచో తోలితోచో రానో జలో. జో దొన్ని విసా వెర్చుల్ ఏలువ కెర్తన్.

22 “పడ్డా సావుల్ క దూర్ కెర కెర, ‘రానో జవున్’ మెన ‡ దావీదుక నిసాన జో ప్రబు అదికారుమ్ దిలన్. జో దావీదుచి రిసా ఇసి సంగిలన్ ‘యెస్సుయచో పుత్తున్ దావీదుక ఆవ్ నిసాన అస్సె. జోచి రిసా అంక సర్ద, అంచి పెట్టిచి ఇస్టుమ్ రితి జో నిదానుమ్ కెరెదె.’

23 “ ‘అమచ ఇస్టాయేలులుత జెర్ల పావుమ్ గెచ్చయ్తో రచ్చించువ కెర్తొసా జవున్’ మెన పూర్ణమ తెంతో ప్రమానుమ్ సంగిల్ రితి జర్గు కెర, జో అమచో దేముడు ఈంజో దావీదుచి సెకుమ్తె యేసుకయ్ జెర్లవ టీషడ అస్సె.

24 జో నే బార్ జతె అగ్గె, అమచి ఒండి ఇస్టాయేలు ప్రెజల్ క, ‘తుమ్ కెర్ల పావల్ క పెట్టి పూర్తి దుకుమ్ జా బుద్ది జా, జా గుర్తుక బాప్తిసుమ్ నజన’ మెన బోదన కెర యోహాను బుల్తె తిలన్.

25 యోహాను జోచి కామ్ కెర కేడయ్తె తిల పొదులె, జోక ‘ఈంజోయి ఏక్ వేల అమచో దేముడు పూర్ణమ సంగ తిలో రచ్చించువ కెర్తొసా జయెదె’ మెన సగుమ్జెన్ మాన్సుల్ ఉచర్తికయ్, అంక కో మెన ఉచర్తసు? దొర్కు జలో జో రచ్చించువ కెర్తొసా ఆవ్ నెంజె. గని అంచి పడ్డా ఎక్కిలో జెయెదె. జో గలన్ల జోడ్డుచ వాలివో యివ కడుక కి అంక విలువ నాయ్, మెన యేసుచి రిసా § యోహాను సాచి సంగిలన్” మెన పవులు సంగిలన్.

26 పడ్డా పవులు అన్నె ఇసి సంగిలన్, “ఓ అమచో పూర్ణమచో అబ్రాహామచి సెకుమ్చ అమచ బావుడ్లు, అమచో దేముడుక బిత తుమ్ అన్నె మాన్సుల్, ఈంజె రచ్చనచి రిసా ¶ దొర్కు జలి’ మెన జో అమక కబుర్ తెద్రవ అస్సె.

27 యేసుక ‘దేముడు తెద్రయ్లో రచ్చించువ కెర్తొసా జోయ్య’ మెన యెరూసలేమ్తెవ యూదుల్, జోవయించ అదికారుల్ తెన్ చినితి నాయ్. జోవయించి రిసా పూర్ణమ దేముడు సంగ రెగ్గయల కొడె అమచ యూదుల్ ఎత్తి, నిలవ కడన్సి దీసి నదు కెర్తతి, గని అద్దమ్ నే కెరన, ‘జోక మొర్తి సిచ్చ దెమ’ మెన తీర్పు కెర, జా దేముడుచ కొడెతె రెగిడ్డిసి నెరవెర్చువ కెర్ల.

28 మొర్తి సిచ్చ జతి కేన్ తప్పు జో నే కెర తిలె కి, జోవయించ జేవ్ పావుమ్ వయడుక నెత్తికె కి, ‘మొర్చు’ మెన * పిలాతు అదికారిక బలవంతుమ్ కెర, మొరవ.

29 జోచి రిసా పూర్ణమ రెగిడ్డిసి ఎత్తి. జేవ్ నెరవెర్చువ కెర, నిలువ తెంతో జోచి పీనుమ్ ఉత్రవ కెర, మెస్సె ఎంగ్రవ దిల.

30 జేవ్ దస్సి మార్తె కి, అమచో దేముడు జోక అన్నె జియడ్డో.

31 జలె, యేసు నే మొర్తి అగ్గె, గలిలయ ప్రాంతుమ్ తెంతో యెరూసలేమ్ ఎద జోచ సిన్సుల్ జో తెన్ బెద జా తిల. జో † జీవ్ జా ఉట్ట, ఒగ్గర్ దీనల్ జోక డీసె తిలో. జాకయ్ జేవ్ సిన్సుల్ జోచి రిసా ప్రెజల్ ఎత్తిక సూనయత సాచుల్ జా అస్సె.

32 ఆము కి, ‘దేముడు అమచ పూర్ణల్ క ప్రమానుమ్ సంగిలిసి జెయిమ్ జా అస్సె’, సుబుమ్ కబుర్ సూనయతి రిసా ఇత్తల్ జా: అస్సుమ్.

33 జో ప్రబు పూర్ణమ ప్రమానుమ్ సంగిలిసి అమచ పూర్ణల్ క బోదల్ జల ఆమ్ యూదుల్ క వరుమ్ దెతి రితి జో కీసి జర్గు కెర అస్సె మెలె, యేసుక అన్నె జియడ అస్సె. దొన్ని కీర్తనుమ్తె అమచో జో ప్రబు కిచ్చో మెన యేసుచి రిసా రెగ్గయ్లో, ‘తూయ అంచో పుత్తు, తుకయ్ ఆజె పాయిలయ్.’, మెన రెగ్గయలన్.

* 13:20 13:20 న్యాయాదివతులు. † 13:21 13:21 సమూయేలు మొదోల్ పున్కుమ్ 8, 9 అద్యయల్ తెంతో. ‡ 13:22 13:22 సమూయేలు మొదోల్ పున్కుమ్ 16 అద్యయమ్ తెంతో. § 13:25 13:25 మత్తయి 3 అద్యయమ్. * 13:28 13:28 మత్తయి 27 అద్యయమ్. † 13:31 13:31 మత్తయి 28, లూకా 24, యోహాను 20, 21 అద్యయల్.

34 ‘క్రీస్తుక మారుల, గని మొర్నుతె తయె నాయ్. జియడిందె. మొర్నుతె అన్నె గెచ్చె నాయ్’ మెలి అర్దుమ్ తెన్ జో అన్నె కిచ్చొ సంగ రెడ్డయలన్ మెలె, దావీదక అవ్ నజిలి రితి, తుక కచితుమ్ జేవ్ సుద్ది తిలి పరల్ దెయిందె” మెన సంగిలన్.

35 జాకయ్, అన్నె కిచ్చొ సుమ్తె రెగిడ్డి రితి, పరలోకుమచి సుద్ది తిలో అవ్ పుత్తుచి మొర్నుతె తతి రితి అంచి ఆగు కువుక తుయి ఒప్పిసి నాయ్, మెన దావీదు రెగిడ్డన్.

36 “దావీదు, జలె, జోచి కాలుమ్ దేముడు జోక దిలి కామ్ కెర కేడవ మొర్తికయ్, జోక పూర్గుల్క రోవెలి రితి జోక కి రోవెలి, చి మొర్నుతె తాఁ గెలన్.

37 గని, దేముడు అన్నె జయణ్ణోసా, జలె, ఎద్దరె నే కువితె, మొర్నుతె తత్తి రితి గెచ్చె నాయ్.

38 “జాకయ్, బావుడ్లు, తుమ్క కిచ్చొ మెన అవ్ కచితుమ్ సూనయ్తసి మెలె, పాపుమ్ చెమించుప కెర్తి రచ్చన కత్తయ్ దొర్లు జతయ్ మెలె, మాన్సు జలో యేసుతెయి.

39 అగ్గె తెంతో అప్పె ఎద, ‘అమచి పాపుమ్ గెన్సు’ మెన, మోసీ పూర్గుమ్చొచి అత్తి రెగిడ్డి దేముడుచ ఆగ్గుల్ రితి కెర, జో సికడ్ల ఆగ్గుల్ బియఁ అమచ యూదుల్ కెర్తి రితి తుమ్ కెర్తెసు. గని కెర్తి కెర్తి కి, పాపుమ్ గెచ్చె నాయ్, గని యేసుక కో పూర్తి నంపజా తత్తి గే, పాపుమ్ తెంతో విడ్డల్ తతి వరుమ్ జోవయింకయి దొర్లు జా అన్నె.

40 జాకయ్, తుమ్ జాగర్త తా, నెంజలె, పూర్గులచి అత్తి అమచొ దేముడు సంగిలి కబుర్ తిలిసి తుమ్క లయెది.

41 ఆది, తుమ్ నంప నెంజ ఆధ్సన తా, తుమ్ దెక బమ్మ జా తుమ్చి పాపుమ్ తెన్ని మొర. తుమ్చి కాలుమ్క ఏక్ వెల్లి కామ్ అవ్ జగ్గు కెరిందె. కెర్తి కి, సాచుల్ తుమ్క జా సంగతి సూనయ్లె కి, తుమ్ కెయ్క కి నంప కెర్ను నాయ్, మెన రెగిడ్డిసి” మెన పవులు బోదన కెర కేడయలన్.

42 పవులుచి బర్గుబా ఒత్త తెంతో బార్ జతె తతికయ్, అన్నెక సెలవ్ కడన్లి దీసి అమ్క ఇసి బోదన సంగ మెన ప్రెజల్ బతిమాల్పా జా సంగిల.

43 జా సబ కుట్టితికయ్, ఒగ్గరజిన్ యూదుల్, పడ్డో దేముడుక నంపజా మార్పుప కెరన నిదానుమ్ తిల జోవయించ అన్నె బక్టల్ కి, పవులుచి బర్గుబాచి పట్టి గెల. జేవ్ దొగుల జలె, దేముడు కెర్తి దయచి తెడి తా, మెన బతిమాల్పా జా బోదన కెర్ల.

44 అన్నెక సెలవ్ కడన్లి దీసి అయ్లి, జలె, †యేసుచి రిసాచి సుబుమ్ కబుర్ పావులీంచి అత్తి సూనుక మెన, ఒండి పట్టుమ్చ పవతె బెర అయ్ల.

45 జలె ఒత్త బెర అయ్ల జనాబ్క దెక, యూదుల్చ వెల్లెల మాన్సుల్ ఒగ్గర కోపుమ్ తెన్ గోన జా, పవులు సంగిలీన్ ఎత్తిక ‘అబద్దుమ్’ మెన వేర సంగ, జోక దూసుప కెర్ల.

46 తెదొడి పవులు బర్గుబా తెన్ దయిరిమ్ తెన్ ఇసి సంగిలన్, “దేముడు దిలి సుబుమ్ కబుర్ తుమ్ యూదుల్కయ్ తొల్లితో సూనవుక తిలి, గని ‘సత్తిమ్’ మెన తుమ్ ఒప్పునుక నెన కెర వెంట గెలి రితి కెర ‘దేముడుచి రాజిమ్తె బెద పరలోకుమ్తె గెతి జివ్ దెతి వరుమ్ అమ్ నజనుక విలువ నాయ్’ మెలి రితి తుమ్ పిట్టవన్తినక రుణ్ణు జతయ్, చి రిసా యూదుల్ నెంజలసక సుబుమ్ కబుర్ సూనవుక దెర్తెసుమ్.

47 ప్రబు అమ్క కిచ్చొ మెన ఆడ్ర దా అన్నె మెలె,

ఒండి లోకుమ్చక ‘రచ్చించుప జతు’ మెన, అమ్చి ఉజిడి దెకయ్తి రితి జతి రితి, యూదుల్ నెంజల మాన్సుల్క సుబుమ్ కబుర్ సూనయ్తి రిసా తుమ్క తెద్రవ అన్నె, మెన ప్రబు సంగ అన్నె”.

48 యూదుల్ నెంజలన, జలె, ఈంజ కోడు సూన, సర్ల జా, దేముడు దిలి జా సుబుమ్ కబుర్క గవురుమ్ కెర్ల, చి ‘పరలోకుమ్చి రాజిమ్తె బెదుత్’ మెన జోవయింతె కక్క ప్రబు నిసాన తిలో గే, జెవ్వె నంపజల.

49 జా ఒండి ప్రాంతుమ్తె కి ప్రబుచి సుబుమ్ కబుర్ సూనయ్ జలె.

50 యూదుల్చ వెల్లెల మాన్సుల్, పట్టుమ్చ వెల్లెల తెరబోదల్తె మున్సుబోదల్తె గెచ్చొ సికడ, జోవయించి అత్తి పవులక చి బర్గుబాక అల్లర్ కెర, జా పిసిదియ ప్రాంతుమ్ తెంతో ఉదడ గెల.

† 13:44 13:44 మెలె, ‘ఎత్తి, అదికారుమ్ తిలో దేముడు దిలి సుబుమ్ కబుర్’.

51 జేవ్ దొగుల, 'ప్రబుచి సుబుమ్ కబుర్ నూనుక, జేవ్ యూదుల్ అవ్కాసుమ్ పిట్టవన అస్తి' మెలి గుర్తుక, జేవ్చ చట్టోతెచి దూడి పంష్ట గెల కెర, ఒత్త తెంతో తూర్పు పక్క తిలి ఈకొనియ పట్టుమ్తె ఉట్ట గెల.

52 జా అంతియొకయ పట్టుమ్తెచ ప్రబుక నంపజా జోవయించ సిస్సుల్ జలస మాలజ్ జతి నాయ్. దేముడుచి సుద్ది తిలి అత్తొ జోవయించి పెట్టి బెర తతికయ, సద్దసంతోసుమ్ జా, నిదాసుమ్తె తిల.

14

పవులు బర్నబా ఈకొనియతె బోదన కెర్లసి

1 ఈకొనియతె పవులు బర్నబా తా కెర, జా అన్నెక్ పట్టుమ్తె కెర్ల రితి, యూదుల్చి సబగెరి పెన, బోదన కెర్ల ప్రబుచి అత్తొనెక్తి తెన్ బోదన కెర్లకయ, ఒగ్గర్ ఒగ్గర్జెన్, యూదుల్ కి, గ్రీసు దేసిమ్చ కి, నంపజల.

2 గని నంప నే కెర్ల యూదుల్చ వెల్లెల మాన్సుల్, నంపజల బావుడ్చుచి రిసా యూదుల్ నెంజలసక గోస సికడ అల్లర్ కెరయల.

3 దస్సు అల్లర్ తిల కి, దయిరిమ్ తెన్ ప్రబుచి సుబుమ్ కబుర్ నూనవ, పావులీంసి ఒగ్గర్ దీసల్ ఒత్త తా గెల, ప్రబు జేవ్చి అత్తి వెల్లెల అద్దుతుమ్ కమె కెర, జోచి దయచి రచ్చనచి రిసా సుబుమ్ కబుర్క 'సత్తిమ్' మెలి గుర్తుక రుజ్జుల్ దెకయలన్.

4 గని జా ఈకొనియ పట్టుమ్చ మాన్సుల్ దొన్ని జట్టు జల. జోవయింతె సగుమ్జెన్ యూదుల్చ వెల్లొ మాన్సుల్చి పచ్చెన జల, సగుమ్జెన్ పవులుచి బర్నబాచి పచ్చెన జల.

5 యూదుల్ నెంజలస సగుమ్జెన్, యూదుల్ జలస సగుమ్జెన్, జోవయించ వెల్లెల మాన్సుల్ కి, 'జోవయిక దెర, పత్తల్ గెల మారుమ్' మెన కుట్ట ఉచర్ల.

6 గని దస్సు కుట్ట ఉచర అస్తి మెన జేవ్ దొగుల జాన్లె పొదిక, బే బేగి ఉట్ట గెచ్చ లుకయొనియ ప్రాంతుమ్చి లుస్త, పడ్డొ దెర్చొ మెంత పట్టలె, చి సుట్టునంతచ గవ్యెలె గెచ్చ,

7 ఒత్తయ సుబుమ్ కబుర్ నూనయతె తిల.

లుస్తతె ఎక్కిలోక చెంగిల్ కెర్లసి

8 జలె, పవులు లుస్తతె ఏక్ సుట్టు బోదన కెర్ల తతికయ, చట్టొ కదుల్ కెరుక నెతిర్లొ మాన్సు ఎక్కిలో వెన తిలో. జెర్లిల్ తెంతో సొట్టొ జా అస్సె. చట్టొ లంబ అస్తి.

9 పవులు బోదన కెర్లసి జో నూన్తె తతికయ, పవులు జోక చెంగిల్ దెక, 'చెంగిల్ జతి నముకుమ్ జోక అస్సె' మెన చిన కెర,

10 అవాడ్ కెరన, "తుయి ఉట్ట సోగ జా టీవొజ" మెన సంగితికయ, చట్టున ఉట్ట ఇండుక దెర్లొ.

11 పవులుచి అత్తి కెర్లసి జనాబ్ దెక కెర, జా లుకయొనియ ప్రాంతుమ్చి బాస తెన్, "దేముడ్లు మాన్సుల్చి రితి జా అమ్తె ఉత్త జా అస్తి" మెన కేకుల్ గెల.

12 బర్నబాక "ద్యుపతి జయెదె" మెన సంగిల, అన్నె జేవ్ దొగులతె పవులు ఒగ్గర్ సంగితయచి రిసా, జోక "హార్చొ జయెదె" మెన సంగిల.

13 ద్యుపతి, జలె, పట్టుమ్చి పురెత్తో గుడి తయెదె. జో పూజరి, జలె, పోతుల్క ఉడడ ఆన, పుల్లొ బంతివొ దెరన, పట్టుమ్చి గుమ్ముమె జా కెర, ప్రెజల్ తెన్ జేవ్ దొగులక బలి దెంక ఉచర్ల.

14 దస్సు ఉచర అస్తి మెన ప్రబుచ బారికుల్ జల బర్నబా చి పవులు నూన కెర, దుకుమ్క సొక్కల్ చిరన, జనాబ్ తిలీన్తె సిగ జా.

15 "తుమ్ మాన్సుల్ కిచ్చొక ఇసి జతను? అమ్ కి తుమ్చ రితయ మాన్సులి. తుమ్క 'ఇన వెర్రి కమె ముల పరలోకుమ్ బూలోకుమ్ నముద్దుమ్, జాతె తిలీసి ఎత్తి జెర్యొలొ, జీవ్ తిలో దేముడుకయ నంపజా చెంగిల్ జతు' మెనయ, సుబుమ్ కబుర్ నూనవుక అయలమ్" మెన పవులుచి బర్నబా కేక్ గెల.

16 "అగ్గెచ ఉగుమ్తె తిల మాన్సుల్ ఇస్సుమ్ అయల రితి కెర జింక జో పరలోకుమ్చొ ప్రబు నెలవ్ దా తిలె కి,

17 జోచి అధికారుడవ, జోచి ప్రేమచ గుర్తులు దెకవుక జో ములె నాయ్. మెలె, చెంగిల కమె కెర్తె తిలన్, కెర్తె తత్తయ్. కీసచ మెలె, తుమ్క 'సరిపుచువ జతి అన్నిమ్ దొర్పు, జవున్, తుమ్క పెట్టితె నర్త తెన్ జితు కతు' మెన, అగాసుమ్ తెంతో పాని పెటవ, బుయిచి పలితుమ్ దెరయ్తయ్" మెన సికడ్ల.

18 గని ఇని బోదన కెర్తె కి, జేవ్ మాన్సుల్ బలి దెంక ఉచర్తిసి కన్వనె పిట్టుయల.

ప్రెజల్ పవులుక వత్తల్ గల మార్క దెకిల

19 తెదొడి పినిదియ ప్రాంతుమ్చ అంతియొకయ చి ఈకొనియ పట్టల్ తెంతో యూదుల్ సగుమ్జన్ జా కెర, ప్రెజల్క సికడ్లకయ, పవులుక వత్తల్ గల మార్ల మొర గెలన్ మెన కెర, జోక 'మొరయ అన్సె' మెన ఉచర, పట్టుమ్ తెంతో ఒగ్గొడ నా ములిల.

20 గని ప్రబుచ సిస్సుల్ జలన్ * అయల అన్సె, జోచి సుట్టునంత బెర్తికయ, జో చెంగిల్ జా ఉట్ట పట్టుమ్ తెడి అన్సె పెసిలన్. అన్సెక్ దీసి బర్దుబా తెన్ బార్ జా, దెర్చె పట్టుమ్తె ఉట్ట గెల.

21 జా పట్టుమ్తె గెచ్చ సుబుమ్ కబుర్ సూనయ్తికయ, ఒగ్గర్జన్ మాన్సుల్ నంపజా ప్రబుచ సిస్సుల్ జల, చి ఈంజేవ్ దొగుల బుల జా లుస్తతె, ఈకొనియతె, చి అంతియొకయతె

22 అన్సె బోదన కెర, "తుమ్ నిదానుమ్ తా. దేముడుచి రాజిమ్తె బెదితి వరుమ్ ప్రబు తుమ్క అమ్క దిలెకి, కన్వల్ నెంతె పాచ్చుమ్ నాయ్. కన్వల్ సిడ్డ తమ్దె, గని దయిరిమ్ తెన్ తా" మెన, ప్రబుక నంపజల సిస్సుల్ జలనచి అత్త డిట్టుమ్ కెర్ల.

23 పడ్డె చువ్వె తా ప్రార్దన కెర, సికడ్ల తత్తు మెన, ఎత్తి, సంగుమ్క దెకిత వెల్లెల మాన్సుల్ జితు మెన మాన్సుల్క నిసాన, జేవ్ నంపజలొ యేనుప్రబుచి కామ్ జేవ్ కెర్తి రితి జేవ్చి అత్తి సార్పు కెర్ల.

24 అన్సె ఒత్త తెంతో పావులింసి పినిదియ ప్రదేసిమ్ వాట్ గెచ్చ, పంపూలియా ప్రదేసిమ్తె జా: కెర,

25 పెర్చె పట్టుమ్తె సుబుమ్ కబుర్ సూనవ, అత్తాలియ పట్టుమ్తె పాచ కెర,

26 ఒత్త తెంతో ఒడతె వెగ, సముద్రుమ్ జీన, సిరియ ప్రదేసిమ్చి అంతియొకయతె అయల. ఒత్త అగ్గె, చువ్వె తా ప్రార్దన కెర, ప్రబుచి సుబుమ్ కబుర్ కామ్ ఈంజేవ్ దొగుల కెర్తి రిసా ఇన్నెక దేముడుచి అత్తి సార్పు కెర దా బార్ కెర తిల. జా కామ్ అప్పె జెయిమ్ జా అన్సె మెన రుజ్జా దెకయ్తి రిసా,

27 అప్పె ఉట్ట జా ఒత్త పాచ కెర, ఎత్తిజిన్క ఎక్కితె బుకారా కెర, దేముడు జోపయిచి అత్తి జగ్గు కెర్తిసి ఎత్తిచి రిసా, పడ్డె యూదుల్ నెంజిలన కి నంపజా రచ్చించువ జతి కోడు ప్రబు దిలిన్చి రిసా సాచి సంగిల.

28 ఒత్త తెంతో, ప్రబుచ ఒత్తచ సిస్సుల్ తెన్ ఒగ్గర్ దీసల్ తా గెల.

15

1 పవులు బర్దుబా దస్సి సిరియ ప్రదేసిమ్చి అంతియొకయతె తిలి పొది, యెరూసలేమ్ పట్టుమ్ తిలి యూదయ ప్రదేసిమ్ తెంతో సగుమ్జన్ నంపజల యూదుల్ జా కెర, యూదుల్ నెంజిలసా, "అమ్చొ మోసా పూర్తుమ్చొచి అలవాట్ కెర యూదుల్ జతి గుర్తుచి సున్నతి కెరన్లెకయ పరలోకుమ్తె గెతి రచ్చన తుమ్క దొర్పు జయెదె" మెన సికడ్ల.

2 "జేవ్ నంపజలి పొది కీసి జా సున్నతి నెంతె తిల, దస్సి తత్తు జా సున్నతి నెంతె కి రచ్చించువ జవుల" మెన, పవులుచి బర్దుబా జేవ్ మాన్సుల్క జబాబ్ దిల. జేవ్ మాన్సుల్ సికడ్లనిచి రిసా సగుమ్ దీసల్ బాద నీడ లట్టబై తిల కి, జా తగు కుట్టె నాయ్. ప్రబుక నంపజలన "బారికుల్తె చి ఒత్తచి అమ్చి సంగుమ్చ అన్సె వెల్లెల మాన్సుల్తె గెచ్చ, ఈంజ తగుచి రిసా చున సూన్తు" మెన, పవులుక చి బర్దుబాక చి జేవ్ నిసాన అన్సె సగుమ్జన్క యెరూసలేమ్తె తెద్రయల.

3 జా కామ్చి రిసా జా అంతియొకయ పట్టుమ్చి సంగుమ్తెచ మాన్సుల్ పావులింసిక ప్రబుచి అత్తి సార్పు కెర దా తెద్రయ్తికయ, పేనేకే ప్రదేసిమ్ వాట్ చి సమరయ ప్రదేసిమ్ వాట్ గెచ్చ గెచ్చ, యూదుల్ నెంజిలన యేసుక నంపజా మార్పువ జలిన్చి రిసా సూనయ్తె తిల చి, ఒత్తచ నంపజలన ఎత్తిజిన్ ఒగ్గర్ నర్తనంతోసుమ్ జల.

* 14:20 14:20 ఏక్ వేల అంతియొకయ తెంతో జా తిల.

యెరూసలేమ్‌తె అగ్గె నబ కెర్లెసి

4 జేవ్ యెరూసలేమ్‌తె ఉట్ట జా పావిలి పొది, ఎత్తిజన్ జోవయింప వెల్లెల మాన్సుల్ తెన్ చి, బారికూల్ తెన్, దన్నుల్ జా జోవయింక మరియాద కెల చి, దేముడు జోవయింపి అత్తి జర్గు కెర్లెసి, జోవయింక తోడు దిలిసి ఎత్తి నంగిలిసి.

5 గని యేసుప్రబుక నంపజల ఒత్తచ మాన్సుల్ సగుమ్‌జిన్, అగ్గె తెంతో పరినయుల్ మెంత పండితుల్‌చి జట్టుతె అస్సి, “యూదుల్ నెంజిల జేవ్ మాన్సుల్‌క అమ్‌చి గుర్తుచి సున్నతి కెరుక అస్సె చి, అమ్‌చో మోసి పూర్ణమచోచి అత్తి దేముడు దిల ఆగ్గుల్ రితి జేవ్ కెరుక అస్సె” మెన, బలవంతుమ్ కెర్లె.

6 ఈంజ తగుచి రిసా సరిగా లట్టబ తీర్పు కెరుక మెన, బారికూల్, వెల్లెల మాన్సుల్ తెన్ వెసిల.

7 జా తగు సరిగా నూన ఉచర కేడయేలి పొది, పేతురు టీవోజ, ఇసి మెన జోవయింక సంగిలన్. “ఓ బాపుడ్లు, అమ్‌క ప్రబు జోచి అత్తనక్తి దిలి తోలితో చి దొరతి, ‘యూదుల్ నెంజిలన కి నబుమ్ కబుర్ నూన నంపజతు’ మెన, అంచి అత్తి నూనయ్యేతి రిసా తుమ్ అమ్‌చో దేముడు అంకయి నిసాన్లన్, మెన తుమ్ జాస్సు.

8 జలి, మాన్సుచి పెట్టి తిలిసి జాన్లో దేముడు మెన. నిజుమి, జేవ్ కి నంపజా రచ్చించువ జా అస్సి మెన సాచి జా రుజ్జు దెకవ అస్సె. అమ్‌చి పెట్టి దిలి రితి, జోవయింపి పెట్టి కి జోచి సుద్ది తిలి అత్తు దిలన్.

9 అమ్‌క జోవయింక తేడ నే దెకితె, జోవయింపి నముకుమ్‌చి రిసా, జోవయింపి పెట్టి జోవయింక కి సుద్ది కెర్లెన్.

10 జలి, దేముడుక సికడుక ఉచర్లను గే, జోచి సిన్సుల్ రిత జల జేవ్ యూదుల్ నెంజిల మాన్సుల్‌క దస్సి జాడు వయడుక మెన కిచ్చొక ఉచర్లను? జేవ్ ఆగ్గుల్ వయితి వూచి అమ్‌చ పూర్లుల్ కి, అమ్ కి, ఓర్పువ జంక, నెరవెర్పువ కెరుక, నెతిర్లమ్.

11 ‘ఎక్కి అమ్‌చో ప్రబు యేసుచి దయచి రిసా జేవ్ కి అమ్ కి రచ్చించువ జా పరలోకుమ్‌తె గెచ్చుమ్‌దే’ మెన అమ్ నంపజా దయిరిమ్ జా అస్సుమ్” మెన, పేతురు సంగిలన్.

12 పేతురు దస్సి సంగితికయ్, బెర తిల ప్రెజల్ తుకై తా, యూదుల్ నెంజిలనతె పావులీసి గెతికయ్ జేవ్ యూదుల్ నెంజిలనచి రిసా ప్రబు జోవయింపి అత్తి కెర్లె వెల్లెల అద్దుతుమ్ కమి గుర్తులు ఎత్తిచి రిసా బర్బుబా చి పవులు సాచి సంగిలిసి సూన్.

13 జేవ్ సాచి సంగ కేడయేలి పడ్డె, యాకోబు, జేవ్ సబ వెన ఉచర్లెసి బెదవ తీర్పు సంగిలన్. “ఓ బాపుడ్లు, నూన,

14 దేముడు యూదుల్ నెంజిలనక ప్రేమ దెక ‘అంచి నావచి గప్పురుమ్ దెకయేతి రితి, అమ్‌చ ప్రెజల్ జేవ్ కి జతు’ మెన జేవ్‌చి తెంతో సగుమ్‌జిన్‌క నిసానుక దెర్లెన్‌చి రిసా, సిమాసు పేతురు సాచి సంగ అస్సె.

15 దేముడు ప్రబువ కబుర్లు పూర్ణమ్ రెగిడ్లనచ కొడొ కి జా సాచి తెన్ బెదితయ్.

16 ‘పడ్డొక ఆవ్ అస్సె జెయిందె, చి దావీదు పూర్ణమచోచి నీడ తిలి టంబుగేరు అస్సె బందిందె. జా పాడ జలిసి అస్సె నొవర్ కెర బందిందె.

17 లోకుమ్‌చ అస్సె మాన్సుల్, అస్సె, యూదుల్ నెంజిలనతె కో అంచి నావ్ తెడి తవుల గే, ప్రబుక చజ నంపజతు’ మెన,

18 పూర్ణమ్ తెంతో ఈంజ కబుర్ నూనయ్‌లో దేముడు సంగ అస్సె”

19 జాకయ్ ఆవ్ కిచ్చొ తీర్పు సంగితని మెలి, దేముడుక నంపజా మార్పువ జల, అమ్‌చ యూదుల్ నెంజిలనక అమ్ బాద నీడవుక బెదె నాయ్.

20 గని అమ్ కిచ్చొ కెర్లె చెంగిల్ మెన ఆవ్ ఉచర్లని మెలి, ‘దేముడు’ మెన బొమ్మల్ గట్టక దిలిసి కతు నాయ్, లంజెకమె కెర్లు నాయ్, టోట్రో మోడ మార్లి సిద్ద కతు నాయ్, లోయి: కతు నాయ్ మెన ఉత్తమ్ రెగ్లవ తెద్దవుమ.

21 కేన్ పట్టుమ్‌తె కి, అగ్గెయి తెంతో మోసి పూర్ణమచోచి అత్తి రెగిడ్డి దేముడుచ ఆగ్గుల్ నూనయేతతి, ఎత్తి సెలవ కడన్సి దీసి అమ్‌చ నబ గెరలె నదు కెర్లెతి, చి ఈంజేవ్ ఆగ్గుల్‌చి రిసా నూన తవుల.

ఉత్తమ్ రెగ్ల అంతియొకయతె తెర్లయేలిసి

22 తెదొడి, బారికుల్ క చి యెరూసలేమ్ పట్టుమచ నంగుమచ అన్నె వెల్లెల మాన్సుల్ క, జా నంగుమచ మొత్తమక కిచ్చొ అజ్జ అయిలె మెలె, 'పవులు చి బర్హబా తెన్ అమ్తె నగుమ్జిన్ అంతియొకయతె గెలె చెంగిలె' మెన, బర్హబా మెలొ యూదాక చి సీలయుక నిసాన. ఒత్తచ నంపజల నుదల్తె ఈంజెచ్చు ముక్కిమ్ మాన్సుల్ జవుల.

23 ఇన్నెచి అత్తి తెద్రయతి ఉత్తమతె ఇసి రెగిడ్ల.

"అంతియొకయతె, జా ఒండి సిరియ ప్రదేసిమి, చి కిలికియ ప్రదేసిమతె తిల యూదుల్ నెంజల నంపజలన్ క, బారికుల్, యెరూసలేమ్ చి నంగుమచ వెల్లెల మాన్సుల్ జల తుమచ బావుడ్లు రెగిడ్ల ఉత్తమ. తుమక 'చెంగిల్ తంక' మెన ప్రబుక రోజుక ఉచర్తనుమ్.

24 కిచ్చొచి రిసా ఈంజ ఉత్తమ రెగిడ్లనుమ్ మెలె, అమ్చితె తెంతొ నగుమ్జిన్ బార్ జా తుమతె గచ్చు కొడె సంగ తుమక మెన్సుతె బాద నేడవ, సిక్కు కెర అన్సి మెన నూన అన్సుమ్, అమ్చి నెలవ నెంతె దస్సి కెర అన్సి.

25 జాకయ్ అమ్ నబ కెర్లమ్, అన్నె ఎక్కి కట్టు తెన్ ఉచర్లె, 'చెంగిల్' మెన అమ్క కిచ్చొ అజ్జ అయిలె మెలె, 'అమ్చ ప్రేమ్ తిల బర్హబాచి పవులు తెన్ కబుర్ గెతు' మెన నగుమ్జిన్ క నిసాన తుమతె తెద్రయలె చెంగిలె మెన అజ్జ అయిలె.

26 యేసుక్రీస్తు ప్రబుచి నుబుమ్ కబుర్ నూనయతి రిసా ఈంజేవ్ దొగుల ఎదివాట్ స్రమల్ నేడ అన్సి.

27 యూదాక చి సీలయుక ఇనయింతెన్ తెద్రవ అన్సుమ్. ఇన్నె రెగిడ్లి రితి జేవ్ సొంత నంగుల.

28 "దేముడుచి నుద్ది తిలి ఆత్మ అమ్క కిచ్చొ బుద్ది సంగితయ్ మెలె, అమ్క కి కిచ్చొ చెంగిల్ డీస్తయ్ మెలె, తుమక, 'కిచ్చొ కిచ్చొ అమ్చ ఆగ్గుల్ అలవాట్ కెర్తు' మెన అమ్ జాడు వయడ్లి రితి కెరుక బెదె నాయ్. 'ఎక్కి ముక్కిమ్క కెర్తు' మెన తుమక ఉచర్తనుమ్.

29 బొమ్మల్ క గట్ట దిలిసి కా నాయ్, లోయి కా నాయ్, టొట్రొ మాడ లోయి నే గెచ్చయిలి సిద్ద కా నాయ్, చి లంజెకమె కెర నాయ్. ఈంజేవ్ అలవాట్ కెర్లదు మెలె, తుమక చెంగిలి. చెంగిల్ తెన్ తా", మెన రెర్ల తెద్రయలె.

30 జేవ్ తెద్రయతికయ్, జేవ్ అంతియొకయతె ఉట్ట గెల, ఒత్త పాచ కెర, నంపజలన్ క ఎక్కితె బుకారా కెర, జా ఉత్తమ దిల.

31 జేవ్ యూదుల్ నెంజలన సదు కెర, బుద్ది సంగితి దయిరిమ్ కెర్తి జా కబుర్చి రిసా సర్తసంతోనుమ్ జల.

32 యూదా చి సీలయు, జలి, ప్రబుచి ఆత్మ సికయ్త కబుర్లు సంగితన జవుల, చి ఒత్తచ నంపజలన్ క ఒగ్గర్ బోదన కెర, బుద్ది సంగ, దయిరిమ్ కెర్ల.

33 నగుమ్ దీసల్ ఒత్త తా, ప్రబుచ కొడె సంగ సంగ, దయిరిమ్ కెర కెర, జోవయింబి ఒత్తచి కామ్ కేడయ్తికయ్, 'జోవయింక తెద్రయలనతె అన్నె ఉట్ట గెతు' మెన, జా పట్టుమచ జోవయింక "సెంతుమ్ తెన్ గెచ్చ" మెన, సర్ల తెన్ యెరూసలేమ్తె అన్నె తెద్రయలె.

34 *సీలయు మాత్తమ్, ఒత్త తంక చెంగిల్ మెన ఉచర్లొ.

35 మదెనె, పవులు చి బర్హబా అంతియొకయతె తా, అన్నె ఒగ్గర్జిన్ తెన్ కి, ప్రబుచి నుబుమ్ కబుర్ నూనయ్తె తిల.

బర్హబా, పవులు వేర వేరతె ఉట్ట గెలిసి

36 నగుమ్ దీసల్ గెలి పడ్లి, "జొమ్మ ప్రబుచి నుబుమ్ కబుర్ సంగ అమ్ అగ్గ బోదన కెర్ల ఎత్తి పట్టులె అన్నె గెచ్చ, నంపజలన్ తె గెచ్చ, జోవయింక 'కిసి అన్సి గే' దెకుమ" మెన, పవులు బర్హబాక సంగిలన్.

37 బర్హబా, మాత్తమ్, "మార్కు మెలొ యోహానుక జేవ్చి తెన్ కడ నెమ్" మెన ఇస్టుమ్ జలన్.

38 గని, జా అగ్గెచి నుట్టు మార్కు జేవ్చి తెన్ బార్ జా తిలె కి, జా కామ్తె సరిగా నే బెదితె, జోక †ముల దా అన్నె ఉట్ట గెచ్చ తిలెన్, చి 'అప్పు కడ నిలె, దస్సి అన్నె ములె దిలె కిసి' మెన, పవులు సంగిలొ.

* 15:34 15:34 గ్రీకు బాన తెన్ ఈంజ మత్తిలె తొలి రెగిడ్ల నగుమ్ వున్కల్తె 34 నంబర్చి కోడు తయె నాయ్. † 15:38 15:38 బారికుల్ 13:13.

39 జాచి రిసా దొంగల దొన్ని మెన్సుల్ జా జట్టి జల చి, దొంగల దొన్ని వక్కల ఉట్ట గెల. బర్నబా మార్కుక కడన, ఓడతె వెగ, సముద్రుమ్ జీన, కుప్ర, డిబ్బ దేసిమి ఉట్ట గెల.

40 గని 'అంచి తెన్ ఈంజో జెవున్' మెన, వవులు సీలక నిసాన్లన్. అన్నె, ఒత్తవ నంపజలన ప్రార్దన కెర, చి కామచి రిసా జోవయింక ప్రబుచి అత్తి సార్పు కెర దెతికయ్, జేవ్ ఉట్ట గెల.

41 ఒండి సిరియ ప్రదేసిమి, చి ఒండి కిలికియ ప్రదేసిమత గెచ్చ కేనె సంపజలనచ సంగుమ్లుతె గెచ్చ బోదన కెర డిట్టుమ్ కెర్తె తిల.

16

తిమోతి వవులు బోదన కెర్తెసి

1 ఒత్త తెంతో, గలతీయ ప్రదేసిమచ లున్చ చి దెర్నే మెల పట్టుమ్లుతె వవులు చి సీలయు గెల. తిమోతి మెలో సిన్సుడు తిలన్. జో యూదుడుయ జలి అయ్యన్ తెన్, జోచి పట్టుమ్లుతె వవులు అగ్గ జా తిలిసి తెంతో ప్రబుక సంపజా అస్తి. తిమోతిచో అబ్బోసి, మాత్రుమ్, యూదుడు నెంజె, గ్రీకు దేసిమచో, జో.

2 జో తిమోతి చి రిసా, "నిదానుమ్ తిలోసా" మెన లున్చ చి ఈకొనియ పట్టల్తెచ బాపుట్టు ఎత్తిజన్ సంగితె తిల.

3 జాకయ్, "జో కి అమచి తెన్ చి కామతె బెదున్" మెన వవులు సంగిలో. జో నాడుచో అబ్బోన్ 'యూదుడు నెంజె! గ్రీకు దేసిమచో మాన్సు జయెదె' మెన, జో 'పుత్తనక యూదుల్చి గుర్తుచి సున్నతి కెర తయె నాయ్' మెన, ఎత్తిజన్ జాన్తి రిసా 'జా సున్నతి తిమోతి నే కెరన తిల, ఆమ్ గెతిన్తెచ యూదుల్ నిస్కారుమ్ దెకుల' మెన, జోక వవులు జా సున్నతి కెర దిలన్.

4 జలి, ఒత్తవ పట్టల్ ఎత్తికె గెచ్చ గెచ్చ, యెరూసలేమ్తెచ బారికల్చి ఒత్తచి సంగుమ్చ వెల్లెల మాన్సుల్ ఎత్తి సంగిలి తీర్పు నెరవెర్పువ కెర, మెన జేవ్ తీగ్ల నూనయ్ల.

5 జా ఒండి ప్రాంతుమ్తెచ సంగుమ్లుచ సుదల్ జలి, ప్రబుచి ఉప్పిరిచి నముకుమ్క అన్నె డిట్టుమ్ జల, చి రోజుక అన్నె మాన్సుల్ ప్రబుక సంపజా మార్పువ జా జోవయింతెన్ బెదిల.

వవులు మాసిదోనియ ప్రదేసిమతె తెద్రయ్లిసి

6 ఒత్త తెంతో వవులు సీలయు చి తిమోతి, గలతీయ ప్రదేసిమ్ వాట్ చి పుగియ ప్రాంతుమ్ వాట్ గెల. "ఆసియా ప్రదేసిమ్తె సుబుమ్ కబుర్ నూనపుక పొన" మెన దేముడుచి సుద్ది తిలి ఆత్మ సంగ తిలన్,

7 చి ఉత్తర వక్కచి వాటు గెచ్చ, మునియ ప్రాంతుమ్తె పాచిలె, బితునియ ప్రదేసిమి గెచ్చుక ఉచర్ల, గని జేవ్ ఒత్త గెచ్చుక కి యేసుచి ఆత్మ ఒప్పె నాయ్.

8 జాకయ్, మునియ ప్రాంతుమ్ జీన, సముద్రుమ్ సాడిచి త్రోయ పట్టుమ్లుతె అయ్ల.

9 జేవ్ త్రోయతె నిద్ర తిలె, అందరి, ప్రబు దెకయ్లి సిన్న వవులు దెకిలన్. మాసిదోనియ ప్రదేసిమచో మాన్సు ఎక్కిలో టీవోజె, "అమచి మాసిదోనియ దేసిమి ఉట్ట జే, చి అమక రచ్చింబువ కెర్" మెన బతిమాల్ల జా బుకార్లన్.

10 వవులు జా సిన్న దెకిల్ బేగి, జేవ్తె జర్గు జలిసి * అమక సంగితికయ్, ఒత్తవ మాన్సుల్క సుబుమ్ కబుర్ నూనయ్లి రిసా ప్రబు అమక మాసిదోనియతె తెద్రయ్తయ్ మెన అమ్ చిన కెర, బేగి పెందలి మాసిదోనియతె గెచ్చుక బార్ జలమ్.

11 జా పెందలి, త్రోయతె ఓడతె వెగ సముద్రుమ్ జీన, సమొత్తాక మెలి డిబ్బ దేసిమి పాచ నిద్ర తా, అన్నెక దీసి సముద్రుమ్ అన్నె జీన, మాసిదోనియ ప్రదేసిమచి నెయపాలి రేపుతె పాచ ఉత్తిర్లమ్.

12 ఒత్త తెంతో మాసిదోనియక వెల్లి పట్టుమ్ జలి పిలిప్పితె ఇండ గెచ్చ, ఒత్త సగుమ్ దీసల్ తా గెలమ్. ముక్కిమ్క రోమ దేసిమచి ఒగ్గర్జిన్ తతె తిల.

* 16:10 16:10 ఇన్నె తెంతో లూకా మెలో ఈంజ 'బారికల్' చి పున్సుకుమ్ రిగ్గెసా పాపులీంసి తెన్ సగుమ్ సుట్టు బులితె తిలో.

13 జలె, †యూదుల్చి నెలవ్ కడన్సి దీసి, ‘ఒత్త ప్రార్దన కెర్తతి’ మెన, పట్టుమ్చి గుమ్ముమ్ ఒత్తల్తో బార్ జా, గాడు సాడి తిలిన్తె గెలమ్. గెలె, ప్రార్దన కెరుక మెన, తేర్బోదల్ నగుమ్జిన్ జా అస్తి. జేవ్ తిలిన్తె వెన, బోదన కెరుక దెర్లమ్.

లూదియ మెలి తేర్బోద ప్రబుక నంపజా మార్పువ జలిసి

14 ప్రార్దన కెరుక గెల జేవ్ తేర్బోదల్తె లూదియ మెలి ఎక్కి తిలి. జా సుది బట్టల్ గట్టచి రిసాచి ఊద రంగుచి బియ్యారి కెరెదె. ఆసియా ప్రదేశీనుచి తుయత్తెర పట్టుమ్చి తేర్బోద, జా. జా అగ్గె తెంతో దేముడుక నిదానుమ్ జా జోక బక్తి కెర్తసి. నూన్తి బుద్ది తిలిన్చి పెట్టి ప్రబు దెతికయ్, పవులు సంగిలి బోదన నూన, జా నంపజలి.

15 నంపజా, జేవ్చి గెరచ ఎత్తిజిన్ తెన్ బాప్తిసుమ్ నజన్. “అంక ‘ప్రబుక నిజమి నిదానుమ్ జా అస్సె’ తుమ్క రుజ్జు అయ్లి జలె, ఇస్సె బోదన కెర్తె తిలె ఎదిలి సేంపుక అమతె తా” మెన అమ్క బలవంతుమ్ కెర్తి.

గుర్తయ్ని జలి రితి తేర్బోద ఎక్కిచి రిసా జర్లు జలిసి

16 జలె, ఏక్ దీసి, ప్రార్దన కెర్తెసితె అమ్ గెతె తతికయ్, గొతిమాన్సు జతి ఉబెడి ఎక్కి దన్సుల్ జలి. జా గుర్తయ్ని జా సివ్వల్ జంక అలవాట్ జలిన్. జాచి జా బుద్దిచి రిసా, జాచ ఎజిమాన్సుక ఒగ్గర్ డబ్బుల్ లాబుమ్ దొర్కు జతె తయెదె.

17 జా పవులీసిచి పట్టి జెంక దెర, కిచ్చొ మెన కేకుల్ గల, జా తేర్బోద కిచ్చొ మెన సంగిలి మెలె, “ఈంజేవ్, ఎత్తిచి కంఠ వెల్లి దేముడుచ సేవ కెర్తన. పరలోకుమతె గెతి రచ్చన దొర్కు జతి వాట్చి రిసా తుమ్క నూనపుక జా అస్సి” మెన కేకుల్ గల్తె తిలి.

18 ఒగ్గర్ దీనల్ దస్సి పట్టి జా కేకుల్ గల్తె తతికయ్, పవులు, జోచి పెట్టి ఒగ్గర్ దుకుమ్ జా, జాచి పక్కు పసుల, జాక దెర్లి బూతుమ్ తెన్, “ఇస్సెచి పెట్టి తెంతో బార్ జా, ఇస్సెక ములు, యేసుక్రీస్తుచి నావ్ తెన్ తుక సంగితన్” మెన పవులు జా బూతుమ్క ఉదడ గెలన్. చి జయ్యి తెదెడి బూతుమ్ బార్ జా ముల దా గెలన్.

పవులుక చి సీలయ్యక జేల్తె గలిసి

19 ‘జా తేర్బోద గుర్తయ్ని జతి తిలి పొది అమ్ దొర్కు కెరంతి డబ్బుల్ లాబుమ్ అప్పె తెంతో నాయ్’ మెన జాచి ఎజిమాన్సు దెక కెర, పవులుక చి సీలక దెర, సంతవీది వెసిత పట్టుమ్చ అదికారుల్తె ఒగ్గడ నిల.

20 “ఈంజేవ్ మాన్సుల్, యూదుల్, అమ్చి పట్టుమ్తె జా కెర ఒగ్గర్ అల్లర్ కెర్తతి.

21 అమ్ రోమియల్ జా అలవాట్ కెరుక కమె నాయిమ్ నాయ్ మెలె కి, జోవయించ రితిచ అలవాట్ సికడత్తి” మెన ఆరిచి నింద గలిల.

22 జనాబ్ ఎత్తి, పవులీసిచి ఉప్పిరి కోపుమ్ జలె, చి అదికారుల్ జేవ్ దొగులచ పాలల్ దెర కడ, జమాన్సు సుదల్ జోవయంక డండల్ తెన్ పెటుక మెన ఆడ్ర దిల.

23 జోవయంక దస్సి ఒగ్గర్ దెబ్బుల్ పెత్తికయ్, అదికారుల్ జేల్తె గల, “జేవ్క జాగర్త దెక” మెన, రకితనక ఆడ్ర దిల.

24 రకితన జోవయంక తెడిచి గదితె గల కెర, జేవ్ నే విడ్డల్ జతి రితి, జోవయించ చట్టోక జాడు తిల బల్లల్క బెదితె డిట్టుమ్ బందిల.

25 జలె నెడుమ్ అందరి, పవులు చి సీలయ్య ప్రార్దన కెర కెర, దేముడుక గనుమ్ గాయితె తతికయ్, అస్సె జేలి జలన ఎత్తిజిన్ నూన్తె తిల.

26 తెదొడి బుఁయి కదుల్ జలి, చి పునాది తెంతో ఒండి జేల్ కదుల్ జలి. బేగి కెప్పివో ఎత్తి ఉగ్గి జలె, చి జేలి తిలన ఎత్తిజిన్క బందిల గొల్పల్లల్ యివి జలె.

27 రకితోనా, జలె, చెప్పోయ్ జా, కెప్పివో ఉగ్గి జలిసి దెక కెర, ‘జేలి జలన ఎత్తిజిన్ ఉట్ట నిగ గెచ్చ తవుల’ మెన బియఁ కెర, జోచి కత్తి కడన, జోక జొయ్యి అత్య కెరన్క తయార జలి’.

† 16:13 16:13 ఈంజ పున్కుమ్ రెగిల్లో లూకా యూదుడు నెంజె.

28 గని “తుయి తుక కిచ్చొ అల్లర్ కెరను నాయ్. ఆమ్ ఎత్తిజిన్ ఇన్నె అన్నుమ్” మెన, పవులు కేక్ గల్లికయ్,

29 జో రకితోసా, దిచ్చొ లంబడ అన కెర, బమ్మ తెన్ జేవ్ తిలి గదితె పెన, బియ్యం అద్దుర్ జా, పవులుచి సీలచి చట్టె నెర్పు నేడ, జోకర,

30 తిల జేలి తిలనక అన్నె డిట్టుమ్ బండ, పవులుక చి సీలక బార్ కెర, “బాబు ఇసి, ఆవ్ రచ్చించుప జా జతి రిసా ఆవ్ కిచ్చొ కెరుక?” మెన బతిమాల్పా జా వుసిలన్.

31 తెదొడి పావులీని, “ప్రబు జలో యేసుక్రీస్తుచి ఉప్పిరి తూయి నముకుమ్ తియ, తుయి తుచి గేర్చ ఎత్తిజిని, రచ్చించుప జన్నె” మెన,

32 ప్రబుచి నుబుమ్ కబుర్ జోవయింక బోదన కెర్త. జోవయింక, పడ్డొ ఒండి జోవయించి గేర్చక సంగిలన్.

33 జేవ్ దొగులక జయి తెదొడి కడన, దెబ్బల్ పెట్టినచ గావ్చొ ఎత్తి దోవ నుబ్రుమ్ కెర్లి బేగి, జో, జోచి గేర్చ ఎత్తిజిన్ బాప్తిసుమ్ నజన్.

34 జోచి గెరి కడన, జోవయింక అన్నిమ్ దా కెర, జేవ్ ఎత్తిజిని, దేముడుచి ఉప్పిరి నముకుమ్ తిల చి ఒగ్గర్ సర్దసంతోసుమ్ జల.

పవులు చి సీలయు విడ్డల్ జా: పట్టుమ్ ములిలిసి

35 అన్నెక్ దిసి పెందలె, “జేవ్ మాన్సుల్క విడ్డల్ కెర” మెన, దెబ్బల్ పెట్ల జమాన్సుక సంగ, అదికారుల్ జేల్తె తెద్రయ్ల.

36 అదికారుల్ సంగిలిసి సూన, “తుమ్క ‘విడ్డల్ జా గెతు’ మెన అదికారుల్ సంగ తెద్రవ అస్తి. జాకయ్, బార్ జా, అల్లర్ నెంతె సేంతుమ్ తెన్ గెచ్చ”, రకితోసా పవులుక సంగిలన్.

37 గని పవులు జమాన్సుక, “ఎత్తిజినిచి మొక్కె, రుజ్జుల్ నే నూనె, తీర్పు నే సంగితె, అమ్క పెట, జేల్తె గల అస్తి. ఆమ్ కి రోమియుల్ జా అన్నుమ్చి రిసా అమ్క దస్సి, తీర్పు నే కెర్తె, సిచ్చ కెరుక నాయిమ్ నాయ్. అప్పె, కోయి సాచి నే జతె అమ్క విడ్డల్ కెరుక ఉచ్చర్దను, నెంజె. జేవ్ అదికారుల్ పూచి తెన్ సొంత జా కెర విడ్డల్ కెర బార్ కెర్త” మెన, పవులు జబాబ్ దిలన్.

38 జమాన్సు, జలె, అదికారుల్తె అన్నె గెచ్చ, ఈంజేవ్ కొడొ ఎత్తి సంగ దిల, చి జేవ్ దొగులక, ‘జేవ్ కి రోమియుల్ జవుల’ మెన సూన కెర, “తప్పు కెర్లమ్” మెన బియ్యం గెచ్చ,

39 అదికారుల్ జేల్తె జా: కెర, తప్పు ఒప్పన, జోవయింక బార్ కెర, “అమ్చి పట్టుమ్ ముల ఉట్ట గెచ్చ” మెన బతిమాల్పా జా సంగిల.

40 జేవ్ పవులుచి సీలయు, జలె, జేల్ తెంతో బార్ జా, లూదియచి గెరి గెచ్చ, బెర తిల బావుడ్డుక దస్సుల్ జా, బుద్దిచి దయిరిమ్ సంగ కెర, ఉట్ట గెల.

17

పవులు చి సీలయు దెస్సలోనీక పట్టుమ్తె గెలిసి

1 పవులు, సీలయు, అంపిపొలి పట్టుమ్ వాట్ గెచ్చ, అపొల్లోనియ పట్టుమ్తె గెచ్చ, అన్నె బార్ జా, ఒండి మాసిదోనియ ప్రదేసిమ్క వెల్లి జలి దెస్సలోనీక పట్టుమ్తె ఉట్ట అయ్ల. ఒత్త, యూదుల్చి నబగేరు ఏక్ అస్సె.

2 పవులు, కేన్ పట్టుమ్తె అయ్లె, యూదుల్చి నబగేరి గెచ్చుక అలవాట్ కెరన అస్సె. చి ఒత్త కి, తిన్ని సెలవ్ కడన్లి దీసల్ వర్ష తెన్ నబతె గెచ్చ, దేముడుచి కొడొతె తిలిసి రుజువు దెకవ దెకవ బోదన కెర్లన్.

3 కిచ్చొ ముక్కిమ్క బెదయ్లన్ మెలె, “దొర్పు జలో రచ్చించుప కెర్టెసా జతొ క్రీస్తుక దేముడు తెద్రయెదె. తెద్రయ్లె, జో మొర అన్నె జిఠ అస్సె” దేముడుచి కొడొ తెన్ పూర్ణమ్ రెగ్గిలిసి సంగ, “ ‘యేసుయి, దేముడు సంగిలో క్రీస్తు మెన’ తుమ్క ఆవ్ సంగితసి” మెన పవులు సంగిలన్.

4 సగుమ్జిన్ నంపజా, పవులు చి సీలయు తెన్ బెదిల. దేముడుక నంపజా నిదానుమ్ తిల గ్రీసు దేనుమ్చ బగ్గర్జిన్, పట్టో ఒత్తచ వెల్లో సుదల్ తేర్బోదల్ కి బగ్గర్జిన్ నంపజల.

5 యూదుల్చ వెల్లెల మాన్సుల్, మాత్తుమ్, గోస జా, పట్టుమ్చ మూర్కుడ్లు సగుమ్జిన్క దెర, జనాబ్ బగ్గర్జిన్క సికడ, జా ఒండి పట్టుమ్తె గగ్గోల్ కెరయల. పావులీని కచితె జితె తిల మెలె, యాసోను మెలో ఎక్కిలాతె. తెదొడి, “పావులీనిక దెర బార్ కెర ఎత్తిజిన్చి మొక్కె తీర్పు కెరుమ” మెన, జేవ్ వెల్లో సుదల్, జనాబ్, జోచి గెరి గెచ్చ, అల్లర్ కెర్ల,

6 గని పవులీని డీస్తి నాయ్, చి యాసోనుక చి అన్నె బావుడ్లు సగుమ్జిన్క దెర, పట్టుమ్చ అదికారుల్తె ఒగ్గోడ నిల. “ఒండి బూలోకుమ్క మార్పువ కెర్ల జేవ్ దోగుల ఇన్నె కి జా కెర, అమ్కయ్ కి మార్పువ కెరుక ఉచర్తతి.

7 ఈంజో యాసోను జోవయింతె బెద, జోవయింక టాన్ దా అన్నె. ‘అన్నెక్కో రానో జా అన్నె’, ‘యేసు జో’ మెన ప్రజల్క సికడ, అమ్చో *కైసర్ రానోచి విలువ కడ, కైసర్ సంగిల అగ్గోల్క నే బెదిత రకుమ్లు సికడ్తతి” మెన, కేకుల్ గల.

8 ప్రజల్ ఎత్తి, పట్టుమ్చ అదికారుల్ కి, జా కొడో నూన, బమ్మ జా,

9 “జేవ్ దోగుల అన్నె అల్లర్ నే కెర్తి రితి తుయి పూచి జా,” మెన, యాసోనుక బలవంతుమ్ కెర, విడ్డల్ కెర్ల.

బెరయ పట్టుమ్తె పవులు సీలయు బోదన కెర్లసి

10 తెదొడి, అందర్ జెతికయ్ బావుడ్లు బేగి పవులుక చి సీలయుక ఒత్త తెంతో ఇదిల్ దచ్చెన పక్కచి బెరయ పట్టుమ్తె వట్టె తెద్రయల. జేవ్ ఒత్త పాచ, యూదుల్చి సబగేరి గెల.

11 ఒత్తచ యూదుల్చ వెల్లెల మాన్సుల్, జలె, దెస్సలోనికతెచ యూదుల్చి కంబ అమ్మయికుమ్ మాన్సుల్ జవుల. చి నద్ద తెన్ సుబుమ్ కబుర్ నూన, రోజుక, సత్తిమ్బుద్ది తెన్, ‘పావులీని సంగితిసి దేముడుచి కొడోతె తిలిన్ తెన్ దన్ను అన్నె గే నాయ్ గె?’ మెన, రుజ్జా కెరంతి రిసా, దేముడుచి కొడు నిదానుమ్ పరిచ్చు కెర్తె తిల.

12 దస్సి కెర, ‘నిజామ్’ మెన, జోవయింతె బగ్గర్జిన్ యూదులు యేసుక నంపజల. నంపజలన గ్రీకుదేసిమ్చ వెల్లెల సుదల్ చి తేర్బోదల్ సగుమ్జిన్, చి మున్నుబోదల్ కి బగ్గర్జిన్ నంపజల.

13 గని, దెస్సలోనిక మెలి పవులీని అగ్గె గచ్చు తిలి పట్టుమ్చ కోవుమ్ జల యూదుల్, పవులుక, ‘ఒత్త బెరయ పట్టుమ్తె కి ‘సుబుమ్ కబుర్ నూనయ్తయ్’ మెన నూన తా, బెరయతె ఉట్ట జా, జోవయించి సొంత పట్టుమ్తె కెర్తి రితి, ప్రజల్చి జనాబ్క సికడ అల్లర్ కెరవుక ములితి నాయ్.

14 ‘అల్లర్ సేడ్డు నాయ్’ మెన, “సముద్రుమ్ పక్క ఉట్ట గో” మెన పవులుక బావుడ్లు తెద్రయల. సీలయు, తిమోతి తెన్ జా పట్టుమ్తె తా గెలో.

15 మదెన, పవులుక బోడోవ దెతన జోవయింక సముద్రుమ్ సాడిచి ఏదెన్ను మెలి పట్టుమ్ ఎద కడ నిల, చి ఒత్త పాచ, “బే బేగి అంచితె ఉట్ట జా” మెన, పవులు సీలయుక చి తిమోతిక కబుర్ రెగిడ్డికయ్, “న దెమ్దె” మెన జోవయింక బోడోవ దా తిలన జా ఉత్తమ్ నజ, జోవయించి దెస్సలోనిక పట్టుమ్తె బుల గెల.

ఏదెన్ను పట్టుమ్తె పవులు కెర్ల బోదన

16 పవులు ఏదెన్ను తా, సీలయుక చి తిమోతిక రకితె తా, ‘దేముడ్లుచ బొమ్మల్ ఇన్నె బగ్గర్ అస్తి’ మెన దెక తా, ‘తప్పు కెర్తతి’ మెన, వెట్టి బగ్గర్ దుకుమ్ జా,

17 యూదుల్చి ఎత్తి, సబగేరి గెచ్చ యూదుల్ తెన్ చి దేముడుక నిదానుమ్ తిల వేర మాన్సుల్ తెన్ లట్టబ లట్టబ బోదన కెర్తె తా. అయ్తర్ తెంతో సుక్కర్ ఎద, రోజుక పట్టుమ్చి సంతవీదె గెచ్చ, ఒత్త దెస్సల్ జల సుదల్ తెన్ లట్టబ లట్టబ బోదన కెర్తె తిలన్.

* 17:7 17:7 ‘కైసర్ రానో’ ‘నిజుల రా’ కి ‘వెల్లో రానో’ కి మెనుల; ‘కైసర్’ మెలి గ్రీకు బాన తెన్ బెదితయ్, ‘నిజుల’ మెలి ఇంగ్లీస్ తెన్ బెదితయ్, ‘వెల్లో రానో’ మెలి తెలుగు తెన్ బెదితయ్. † 17:13 17:13 నెంజెలి ‘ఎత్తి అదికారుమ్ తిలో’ దేముడు దిలి సుబుమ్ కబుర్’.

18 ఒత్త సంతవీది ఏక్ దీసి, ఎవికూరియు చి స్త్రాయిక్ మెల అలవాట్చ పండితుల్ సగుమ్జిన్ జో తెన్ దస్సుల్ జల. జోవయంతె సగుమ్జిన్ కిచ్చొ మెల మెలె “ఈంజు బుల్లోసా కిచ్చొ తెల్విది సంగది గే నాయ్ గే దెకుమ” మెన ఉచర్ల. అన్నె సగుమ్జిన్, “వేర దేసిమ్చ దేముడ్లు చి రిసా సికడ్డయ్” మెల. జేవ్ కిచ్చొక ఇసి మెల మెలె, పవులు యేసుచి రిసా, జో మొర అన్నె జివ్ జలిన్చి రిసా సికడ్డ తిలో.

19 తెదొడి పవులు దెర, ‘అరేయొపాగు’ మెలి జోవయించి సబ కెర్తి టాన్తె జోవయింక కడన కెర, “తుయ కెర్తి బోదనచి రిసా అమ్క పూర్తి అర్దుమ్ సంగు.

20 అమ్ నేన్ల కొడొ అమ్క సూనయ్తసి, చి జా అర్దుమ్ సూనుక ఇస్తుమ్ జతసుమ్” మెన సంగిల.

21 జా ఏదెన్ను పట్టుమ్చ, చి ఒత్త గోతు జెతనచి అలవాట్ కిచ్చొ మెలె, నొవ కొడొ, నొవ కబుర్లు సంగుక జవున్, సూన్తె తంక జవున్, జోవయింక ఆన. ఎత్తి ములుల, గని జయ్యి అలవాట్ జోవయింక ముక్కిమి.

‘అరేయొపాగు’ సబతె పవులు కెర్తి బోదన

22 పవులు ‘అరేయొపాగు’ మెలి కెర్తి టాన్తె నెడిమి టీవోజ, “ఓ ఏదెన్ను పట్టుమ్చ మాన్సుల్, దేముడ్లు మెలనచి రిసా తుమ్ ఒగ్గర ఉచర్లను మెన, ఆవ్ దెకితసి.

23 ఆవ్ జెతికయ్ వట్టె తుమ్ జోకర్ల గుడివో గల్ల దెకిలయ్. ఎత్తివాట్ అస్సి. జేవ్ గుడివో మొత్తుమ్తె కేన్ దేముడుక పూజ కెర్తి టాన్ తిలిసి ఏక్ దెకిలయ్ మెలె, ‘అమ్ నేన్ల దేముడుచి పూజ కెర్తి టాన్ ఈంజు’ మెన ఏక్తె రెర్ల అస్సున్. తుమ్ అర్దుమ్ నేన్తె జోకర్ల జో దేముడుచి రిసా తుమ్క సూనయిందె.

24 “జో దేముడు కేన్ దేముడు మెలె, ఈంజ లోకుమ్ జెర్లవ కెర, లోకుమ్తె తిలిసి ఎత్తి కి జెర్లయిలోసా. జో పరలోకుమ్క బూలోకుమ్క వెల్లొ, ప్రబు, చి మాన్సుల్ తెయార్ కెర్ల గుడివోతె జో తయె నాయ్.

25 అమ్ మాన్సుల్ జోక కిచ్చొ తెయార్ కెర్లె జోక లాబుమ్ నాయ్. జోక కిచ్చొ కొత్తు నాయ్. ఎత్తిక జేవ్ దెతోసా, ఎత్తిక జయడ్డెసా జో, దొర్లు జతిసి ఎత్తి దొర్లు కెర్లొసా జోయ్యి.

26 ఎత్తి దేసిమ్లుచ మాన్సుల్క ఎక్కి రితి, ఎక్కి మొదోల్ తెంతో జో జెర్లవ అస్సె. జో ఉచర, వేర వేర కాలుమ్లు దా, ‘ఈంజేవ్ మాన్సుల్ ఇన్నె జితు, జేవ్ మాన్సుల్ ఒత్త జితు’ మెన, ఈంజ బూలోకుమ్తె ఎత్తిజిన్క జితి టాన్, జోయ్యి దా అస్సె.

27 ఎత్తిజిన్క ‘అంక ఆన జా చజతు, అంచి తెన్ బెదుతు’ మెన జో పరలోకుమ్చొ ఎత్తి జెర్లవ కెర్లె దేముడు అవ్కాసుమ్ దా అస్సె. గని ఎత్తి మాన్సుక జో పాసి అస్సె, జేవ్ నేన్లె కి, జాన్లె కి.

28 అమ్ జతి సెక్తి, అమ్ ఇండితి సెక్తి, అమ్ జెర్తితి సెక్తి, కచితె మెలె, జో తెయి.

‘అమ్ నిజమి జోవయించి బోదల్’ మెన తుమ్చ సొంత పండితుల్ సగుమ్జిన్ కి కెర్లె అస్సి.

29 “పరలోకుమ్చొ ఎత్తి జెర్లయిలో దేముడుచ బోదల్ జమదె జలె, జో కిసి బజార్ పోలిక గే, వెండి పోలిక గే, పత్తురు పోలిక గే, మాన్సు కెర్లె కేన్ పోలిక గే, మాన్సు తెయార్ కెర్లె కేన్ పోలిక గే, జయెదె? జయె నాయ్.

30 “అగ్గె మాన్సు నేన్లె పొది దన తప్పుల్ కెర్లెన్చి పాపుమ్ జో దేముడు వయడె నాయ్. గని ‘ఒండి లోకుమ్చ మాన్సుల్ అస్సె జోవయించి పాపుమ్ ఒప్పున, జేవ్ కెర్లె పాపల్క పెట్టి దుకుమ్ జా మార్పువ జతు’ మెన జో ఆడ్ర దా అస్సె.

31 కిచ్చొక మెలె దేముడు టీవో కెర్లె మాన్సుచి అత్తి ఒండి లోకుమ్చ ఎత్తిక ‘సత్తిమ్ జా అస్సి గే పాపుమ్ తెన్ని అస్సి గే’ మెన జో సత్తిమ్ తెన్ తీర్పు కెరుక ఏక్ దీన్క నిసాన అస్సె. మొర్ల మాన్సు తెంతో జోక ఉట్టయ్లి రిసా జా నంపజంక మెన అమ్క రుజువు దా అస్సె.”

32 ఎక్కిలోక ‘మొర్లె కి అన్నె జయె అస్సె’ మెన సూన, సగుమ్జిన్ ఆఱిల. గని అన్నె సగుమ్జిన్, “అన్నెక్ సుట్టు ఇన్నెచి రిసా అమ్క బోదన కెర్లె జలె, సూనుమ్ది” మెల.

33 తెదొడి పవులు జేవ్చి నెడ్మె తెంతో ఉట్ట గెలన్.

34 గని సగుమ్జిన్ జోచి పట్టి గెచ్చు ప్రబుక నంపజల. జోవయంతె అరేయొపాగిగు మెలి ఒత్తచి సబతె వెన్తో దియొసూసియు, పడ్డె, నంపజలి ఎక్కి కొన్ని మెలె, దాపరి మెలిసి. జోవయంతెన్ అన్నె సగుమ్జిన్ కి నంపజల.

18

కొరిండ్ పట్టుమీత పవులు కెర్తి బోదన

1 ఒత్త తెంతో ఏదెన్ను పట్టుమ్ తెంతో బార్ జా, పవులు కొరిండ్ పట్టుమ్తె అన్నె ఉట్ట గెలన్.

2 ఒత్త పాచ, అకుల మెలో యూదుడు ఎక్కిలో తెన్ దన్నుల్ జలో. జో పొంతు ప్రదేసిమి జెర్మిలోసా. జో, ప్రిన్సిల్ల మెలి తేర్తి తెన్, దొగుతెర జా దొరతి ఇటలీ దేసిమచి రోమ పట్టుమ్ తెంతో ఉట్ట జా అస్తి. యూదుల్ ఎత్తిజిన్ అమచి రోమ పట్టుమ్ ముల ఉట్ట గెతు, ఒత్త ఏలుప కెర్తో క్షోదియ రాసో ఆడ్ర దా అస్సి. పవులు జేవ్ దొగుతెరచి గెరి గెలన్, చి జోవయింతెన్ లట్టల్లన్.

3 పవులు, అకుల ఎక్కి కామ్ కెర్తన జవుల, చి రిసా, పవులు జోవయింతెన్ బన జలో, చి జేవ్ బెద కామ్ కెర్తె తిల. జేవ్ టంబుగుడ్డల్ తున తెయార్ కెర్తిసి.

4 జా పొదుల్, ఎత్తి సెలవ్ కడన్లి దీసి, పవులు యూదుల్చి సబగేరి గెచ్చు, దేముడుచి కొడతె తిలిసి రుజు దెకవ యేసుక్రీస్తుచి రిసా యూదుల్క కి గ్రీసు దేసుమచ సుదల్క కి బోదన కెర్తె తిలో.

5 సీలయు చి తిమోతి మాసిదోనియ తెంతో ఉట్ట అయేలి పొది, పవులు కిచ్చొ కెర్తె తిలో మెలి, “దేముడు ‘తెర్తయిందే’ మెన సంగిలో రచ్చించుప కెర్తోసా జతో క్రీస్తు, యేసుయి.” మెన సాచి జా రుజుల్ బెదవ దన్నె యూదుల్క బోదన కెర్తె తిలో.

6 యూదుల్, మాత్రుమ్, జా బోదన సూనుక నెన కెర, ఒప్పితి నాయ్, చి జోక దూసుప కెర్తె. జేవ్ దన్నె జతికయ్, “తుమ్ నానుమతె గెలి తుమ్చి వూచి. తుమ్క సుబుమ్ కబుర్ సూనవుక అంచి వూచి, కుట్టవన అస్సి అంచి వూచి నాయ్. అప్పె తెంతో యూదుల్ నెంజలనకె గెచ్చ సుబుమ్ కబుర్ సూనయిందే” మెన, ‘ఇన్నెచి దూడి కి లంబున్ నాయ్’ మెలి గుర్తుక, జోచ పాలల్ వంట్ల కెర,

7 సబగేర్ ముల బార్ జా “ఇన్నెయ బోదన కెర్తె తయిందే” మెన, సబగేర్ సాడిచి గెరి గెలన్. జా గేర్, తీతియు యూస్తు మెలో యూదుడు నెంజలో రోమియూడుచో గేరు. గని దేముడుక జో నంపజా జోకయ్ బక్తి కెర్తయ్.

8 జా పొదులి, యూదుల్చి సబగేర్చో ఎజోమాని జలో క్రిస్తు యేసుప్రబుక నంపజలో. జో, జోవయింది గేరచ ఎత్తిజిని, ప్రబుక నంపజల జా కొరిండ్ పట్టుమ్చ యూదుల్ నెంజల మాన్యుల్ ఒగ్గరజిన్ కి, నంపజా, బాప్టిసమ్ నజన్.

9 ఏక్ రాతి, ప్రబు సిప్ప తెన్ పవులుక, “తుయి బి నాయ్. అంచి సుబుమ్ కబుర్ తుయి సూనయ్తె తా. తుక్లె తంక నాయ్.

10 అవ్ తుక తోడ్ అస్సి, చి కో తుక కిచ్చొ ప్రమాదుమ్ కెర్తి నాయ్. ఈంజ పట్టుమ్చ మాన్యుల్ ఒగ్గరజిన్ అంచి రిసా సూన నంపజంక అస్సి” పవులుక ప్రబు సంగిలన్.

11 ఒత్త తెంతో వెర్నెక్ ఆదు ఎద పవులు జా కొరిండ్ పట్టుమ్తె తా, దేముడు దిలి యేసుచి రిసాచి సుబుమ్ కబుర్ తిలిసి ఎత్తి ప్రెజల్క సికయ్తె తిలన్.

12 జా ఒండి అకయ ప్రదేసిమ్క గల్లియోసు మెలోసా అదికారి జా తతికయ్. యూదుల్ ఎక్కి గోనతెన్ పవులుక దెర, అదికారిచి గెరి అన్,

13 “అమచో దేముడు మోసా తెన్ దిలి ఆగ్గుల్తె తిలి రితి దేముడుక బక్తి కెర్తెనె నాయిమి నెంజిలి అలవాల్ బెదయ్తి ప్రెజల్క ఈంజో సికయ్తయ్” మెన, నింద కెర్తె.

14 పవులు జబాబ్ దెంక ఉచర్తో, గని బేగి గల్లియోసు యూదుల్క, “ఈంజో మాన్యు కిచ్చొ జవున్ నేరిమ్ కెర్తె జలి, తుమ్ యూదుల్ సంగితి తీర్పు సూనుక బెదితి,

15 గని, ఈంజ కిచ్చొ నేరిమ్చి నెంజె. తుమ్ యూదుల్చో దేముడుక జోకర్తి అలవాట్చి రిసాచి తగు ఈంజ, రిత కొడెచ అర్దల్చి తగు. ఇన తగుల్ అవ్ సూనుక నెసె” మెన,

16 తీర్పు కెర్తి టాన్ తెంతో జోవయింక ఉదడ్డన్.

17 ఒత్త బెర తిల జనాబ్ యూదుల్చి సబక అదికారి జలో సొస్టనేసుక దెర, తీర్పు కెర్తి టాన్చి పుర్తెతో జోక దెబ్బల్ వెట్ట. గని గల్లియోసు అదికారి తుక్లె తిలో.

ప్రిన్సిల్ల చి అకుల తెన్ పవులు ఎవెసు పట్టుమ్ ఎద గెలిసి

18 పవులు అన్నె ఒగ్గర్ దీనల్ ఒత్త తా, బావుడ్లుతె నెలవ్ నజన, సిరియ ప్రదేసిమి గెచ్చుక మెన బార్ జలో. జో తెన్ ప్రిన్సిల్ల చి అకుల, దొగుతెర, గెల. వట్టె గెచ్చు, కెంకైయ పట్టుమ్తె పవులు నెండి ఉత్తవల్లో, దేముడుక ఆతు ఉక్కుల గడియ నెండి ముల తిలన్చి రిసా.

19 జలె, కెంకైయతె ఓడతె వెగ, నముద్రుమ్ జీన, ఎపెనుచి రేవుతె పాచ, ప్రిన్సిల్లక చి అకులక ముల దిలన్. జో యూదుల్చి సబ గెరి గెచ్చు, యూదుల్ తెన్ లట్టబ యేనుచి రిసా 'జోయ్యి దేముడు తెద్రయలో క్రిస్తు రచ్చించుప కెర్తొసా' మెన రుజ్జుల్ దెకవ సికడ్లె.

20 "అన్నె నగుమ్ దీనల్ అమ్చి తెన్ తా", మెన, జోక బలవంతుమ్ కెర్ల గని "దన్నె నే జయె." మెలన్.

21 గని, బార్ జలి పొది, "దేముడుచి నెలవ్ తిలె, కెయ్యుక జవున్ తుమ్తె అన్నె జెయిందె" మెన సంగ, ఓడతె అన్నె వెగ, ఎపెను పట్టుమ్ ముల ఉట్ట గెలో.

22 వెల్లె నముద్రుమ్ జీన, యూదుయ ప్రదేసిమ్చి కైనరియ రేవుతె బుల జా, ఓడ తెంతో ఉత్త జా యెరూసలేమ్ పట్టుమ్తె ఇండె గెచ్చు, ఒత్తవ బావుడ్లు తెన్ దన్నుల్ జా, బుల జా, ఓడతె అన్నె వెగ, సిరియ ప్రదేసిమ్చి అంతియొకయ పట్టుమ్తె ఉట్ట గెలో.

23 ఒత్త నగుమ్ దీనల్ తా, అన్నె బార్ జా, దూరి దూరి బుల వేర వేర పట్టుమ్లుతె గెచ్చు, జో అగ్గె గెచ్చు తిలి గలతీయ ప్రదేసిమి చి ప్రుగియ ప్రాంతుమ్లుతె గెచ్చు, సిన్నుల్క అన్నె సికడ సికడ బోదన కెర్తికయ, జేవ్ అన్నె నిదాసుమ్ దయిరిమ్ జలె.

అపొల్లో ఎపెనుతె బోదన కెర్లిసి

24 మదెన, ఐగుప్తు దేసిమ్చి అలెక్కంద్రియ పట్టుమ్చొ అపొల్లో మెలో యూదుడు ఎక్కిలో, ఆసియా ప్రదేసిమ్చి ఎపెను పట్టుమ్తె ఉట్ట జా అన్నె. బోదన కెరుక, జలె, కొడొ చెంగిల్ బెదవెదె, చి దేముడుచి కొడొతె తిలిసి చెంగిల్ జానె.

25 అగ్గె తెంతో, యేను ప్రబుతె రచ్చన జతినచి బోదన సూన నంపజా అన్నె, చి 'వేర మాన్నుల్క సూనయిందె' మెన, ఒగ్గర్ ఆన జా అన్నె. యేనుచి రిసా దేముడుచి కొడొతె సంగిలిసి చెంగిలి సరిగా బోదన కెరెదె. గని బాప్తిసుమ్చి కోడ, జలె, ఎక్కి యోహాను పానితె బాప్తిసుమ్ దెతె తిలి అలవాట్ జో జానె, గని యేనుక్రిస్తుచి నావ్ తెన్ చి జోచి ఆత్మ తెన్ చి బాప్తిసుమ్చి రిసా, కో జోవయింక సంగుక నేతయె.

26 జో, యూదుల్చి సబగేరి దయిరిమ్ తెన్, యేనుచి రిసా 'దొర్లు జలో రచ్చించుప కెర్తొసా జలో క్రిస్తు జయెదె' మెన బోదన కెరుక దెర్లన్. గని ప్రిన్సిల్ల చి అకుల సూన కెర, జోవయింక గెరి కడన కెర దేముడు దొర్లు కెర్లి రచ్చన వాటుచి రిసాచి సుబుమ్ కబుర్తె జో నేన్సిని ఎత్తి, సాష్టుమ్గ సికడ్లె.

27 జో అకయ ప్రదేసిమ్తె గెచ్చుక ఇస్టుమ్ జలన్, చి 'చెంగిలి' మెన, ఎపెనుచ బావుడ్లు ఒప్పున, "గో" మెన సంగ, "ఇన్నెక బెదవన" మెన అకయతెచి సిన్నుల్క ఉత్తుమ్ రెర్ల, జోచి అత్తి తెద్రయెల. వడ్డె, జో నముద్రుమ్ జీన ఒత్త పాచ, దేముడుచి దయచి రిసా యేనుక నంపజలనక జో ఒగ్గర్ తోడు కెర్లన్.

28 యూదుల్ వేర సంగిలే కి, ఎత్తిజిన్ సూనతి రితి, దేముడుచి కొడొతెచి తిలిసి కొడొ వెంట కెర, "యేనుయ దేముడు తెద్రయలో దొర్లు జలో రచ్చించుప కెర్తొసా" మెన రుజ్జుల్ దెకయలో.

19

పవులు ఎపెనుతె ఉట్ట అయ్యేలిసి

1 అపొల్లో ఒత్త అకయ ప్రదేసిమ్చి కొరింది పట్టుమ్తె తతికయ పవులు, డొంగుర్ దేసిమ్ వాట్ ఉట్ట జా, ఎపెను పట్టుమ్తె అయ్యలన్. నగుమ్జిన్ సిన్నుల్ తెన్ పవులు దన్నుల్ జలన్,

2 అన్నె, జోవయింక, "తుమ్ నంపజలి పొది, దేముడుచి సుద్ది తిలి ఆత్మ తుమ్చి పెట్టి జెతికయ నజన్లదు గె?" మెన పునిలన్. జేవ్, "నాయ్. జో ఆత్మ 'అన్నె, మాన్నుక దొర్లు జయెదె' మెన అమ్ కెయ్య సూనుమ్ నాయ్" మెన సంగిలె.

3 జలె పవులు, "దస్సి జలె, కేన్ బాప్తిసుమ్ నజన్లదు?" మెన పునిలన్.

4 "యోహాను బోదన కెర్లి బాప్తిసుమ్" మెన, జబాబ్ దిల. జాకయ, పవులు జోవయింక, "యోహాను బాప్తిసుమ్ కెర్లిసి కిచ్చొచి రిసా మెలె, తుమ్ కెర్ల పావల్చి రిసా పెట్టి దుకుమ్ జా, అంచె వడ్డె జెతొసాక

నంపజా బోదన కెరె తిలన్. జా బుద్ది మార్పున జతి గుర్తుకయ్ బాప్తిసుమ్ దెతె తిలన్. కవి రిసా 'అంచి పడ్డో జెతోసా' సంగితె తిలో మెలె, యేసుచి రిసాయి" మెన పవులు సంగిలన్.

5 జేవ్ సిస్సుల్ నూన, యేసుప్రబుచి నావ్ తెన్ బాప్తిసుమ్ నజన్.

6 పడ్డో పవులు జోవయింక ఎక్కెక్క బోడి చడ ప్రార్దన కెర్తన్, చి దేముడుచి నుద్ది తిలి ఆత్మ జోవయించి పెట్టి ఆయోలిచి రిసా, జేవ్ అగ్గె నేన్ల వేర వేర బాసల్ తెన్ లట్టబ్బ, చి చోడి పుట్టవ, ప్రబుచి ఆత్మ సికడ్ల కబుర్లు సంగుక దెర్ల.

7 జేవ్ రమారమి బారజన్ తిల.

8 పడ్డో పవులు యూదుల్చి సబగేరి గెచ్చుక దెర, తిన్ జొన్సొ ఎద దేముడుచి రాజిమతె బెదితిన్చి రిసాచి నుబుమ్ కబుర్ సబతె బోదన కెర కెర, దేముడుచి కొడోతెవ కొడో రుజ్జుల్క బెదవ, దయిరిమ్ తెన్ బోదన కెరె తిలన్.

9 యూదుల్తె సగుమ్జిన్ రాడ్ జివ్చ తిల, చి సత్తిమ్ నూసుక నెన కెర, పట్టుమ్చ పైజల్చి మొక్కె 'యేసుక్రీస్తు దొర్కు జలి రచ్చన వాట్ జలొ' మెన ఒప్పన్తిచి రిసా 'అబద్దుమ్' మెన, సికడ్ల తిల. జాకయ్ యూదుల్క సికడుక ముల దా, యేసుక నంపజత సిస్సుల్క అజయి కడన, తూరన్ను మెలో ఎక్కిలోచి వెల్లి గేరుతె రోజుక గెచ్చ, దేముడుచి కోడు బెదవ బెదవ, పవులు బోదన కెరె తిలన్.

10 దొన్ని వెర్సుల్ ఎద, పవులు ఒత్త ఎపెసుతె సికడ్ల తిలో, చి జా ఒండి ఆసియా ప్రదేసిమ్చ మాన్సుల్, ఇస్టుమ్ తిల యూదుల్ కి, గ్రీసు దేసిమ్చక కి, ప్రబుచి నుబుమ్ కబుర్ నూన్.

11 పడ్డో, పవులుచి అత్తి దేముడు అద్దుతుమ్చ వెల్లెల కమె జర్గు కెరె తిలన్.

12 మాన్సుక జొర్లో తిల, కో గే పవులు దెర తిల రుమాలు జలెకు, కచ్చెలివో జలెకు, జేవ్ జొర్లో తిల మాన్సుల్క నా దిలె, జొర్లో తిల గెచ్చెద, బూతుమ్ దెర తిలె, ములెద.

13 జా పొదొలె బుల బుల, బూతల్ ఉదడ్ల యూదుల్ సగుమ్జిన్ అచ్చి కెర యేసుప్రబుచి నావ్ దెరుక దెర, "పవులు బోదన కెరె యేసుచి నావ్ తెన్ బార్ జా గో!" మెన బూతల్క ఉదడుక దెర్ల.

14 జోవయింతె సగుమ్జిన్, స్కవ మెలో యూదుడు ఎక్కిలోచొ సత్తుజిన్ పుత్తర్పులు. స్కవ, ఎత్కిక వెల్లో వూజరి జయెద.

15 జేవ్ సత్తుజిన్ జోవయింప పుత్తర్పులు, దస్సి యేసుచి నావ్ దెర ఏక్ బూతుమ్ ఉదడుక దెర్లె, బూతుమ్ జబాబ్ దా జోవయింక, "యేసుక జాని, పవులుక జాని గని తూమ్ కొన్న?" మెలన్.

16 చి బూతుమ్ దెర్లొ జో మాన్సు జేవ్ ఉదడుక ఉచర్దనచి ఉప్పిరి నిగ జా, నెడవ, జిన్లన్, చి జేవ్ సత్తుజిన్ దెబ్బల్క, జో గేర్ తెంతో డుమ్డయ్ నిగ గెల.

17 జా ఎపెసు పట్టుమ్చ ఎత్తిజిన్ యూదుల్క, గ్రీసు దేసిమ్చక, జా జర్గు జలిసి జాన్సి, చి 'యేసుచి నావ్ వెల్లి, ఆరి దెరుక నెంజె' మెన చిన, బియె గెల.

18 పడ్డో, జోవయింతె నొవర్ నంపజలన ఒగ్గరజిన్ జా కెర, జేవ్ కెర్ల పాపల్ ఎదార్దుమ్ ఒప్పన్.

19 జోవయింతె ఒగ్గరజిన్ అగ్గె తెంతో నయతాన్చ మాయకమె కెర్తన జా తిల. జేవ్ అప్పె జోవయింప పుస్తకములు గట్ల ఆన కుడవన, ఎత్తిజిన్చి మొక్కె డయ గెల. జేవ్ డయ గెల పుస్తకల్ మొత్తుమ్చి విలువ లెక్క కెర్ల, కెర్తిన జల మెలె, యాబయె వెయిలు వెండి బిల్లల్ చి విలువ జల.

20 దస్సి, ఒండి జా ప్రాంతుమ్తె నుబుమ్ కబుర్ నూనయ్ జలి, చి ఒగ్గర ఒగ్గరజిన్ మాన్సుల్ ప్రబుక నంపజా మార్పున జల.

21 ఈంజ ఎత్తి జర్గు జలి పడ్డో, ప్రబుచి ఆత్మ జోవయించి పెట్టి సికడ్డికయ్, "మాసిదోనియచి వాటు, పడ్డో అకయ వాటు గెచ్చ యెరూసలేమ్తె గెచ్చిందె, చి ఒత్త గెలె, రోమ్తె కి ఆవ్ గెచ్చుక అన్న" మెన పవులు ఒప్పన్.

22 జా పొదులె, పవులుచి కామ్తె బెదితె తిల తిమోతి చి ఎరస్టు జత మాన్సుల్క జోక అగ్గె మాసిదోనియతె తెద్రవ, పవులు ఆసియా ప్రదేసిమ్చి జా ఎపెసు పట్టుమ్తె అన్నె గడియ తా గెలో.

క్రీస్తుక నంపజతి రిసా అరైమి దేవిక జోకర్తన అల్లర్ జలిసి

23 జా పొదులె, యేసుక్రీస్తుక సంపజా రచ్చన జతి *వాటువి రిసా తగు జలి.

24 కిచ్చొక మెలె, సరాబు జలో దేమేత్తి మెలోసా అరైమి దేవిక జొక్కర్ బొమ్మలె వెండి సామనక తెయారె కెర్తయ్, చి జోవయింక, జోవయింబి కామతె బెదితి సరాబుల్క లాబుమ్ ఒగ్గర్ దొర్పు. జతె తయెది.

25 జో ఏక్ దీసి జోతె కామ్ కెర్తసక ఎక్కితె బుకారా కెర, అన్నె సరాబుల్క బుకారా, జోవయింక, “ఈంజ అమవి కామవి రిసా అమక లాబుమ్ చెంగిల్ దొర్పు. జతయ్, చి చెంగిల్ జతనుమ్.

26 గని అమవి ఎపెసుతె కి అమవి ఒండి ఆసియా దేసిమి కి, మాన్సులె తెయారె కెర్త దేముడ్లు బొమ్మలె దేముడ్లు నెంజితి, మెన, ఈంజొ పవులు సికడ అస్సె, చి అమవి అలవాట్ ఒగ్గర్ ఒగ్గర్జన్ ముల్లి రితి జో మార్పుప కెర అస్సె మెన తుమ్ దెకితను, నూన్తను.

27 జలె, ఈంజ అల్లర్ నే పిట్టయెలె, అమవి కామ్ నిస్టోరుమ్ జయెది. జా, దస్సి అన్నె, అమవి వెల్లి అరైమి దేవిక ఒండి ఈంజ ఆసియా దేసిమచ, ఒండి లోకుమచ జొక్కర్తతి. ఇన్నెచి గుడి ఆరి పాడ్ జలె, ఇన్నెచి విలువ గెచ్చాదె” మెన సికడ్జన్.

28 జేవ్ సరాబుల్ నూన, ఒగ్గర్ కోపుమ్ జా, “అమవి ఎపెసుచి వెల్లి అరైమి దేవిక జెయ్యి, జెయ్యి!” మెన, కేకుల్ గలిలె.

29 దస్సి, ఒండి పట్టుమ్ గగ్గల్ జా గలి. జా పట్టుమ్క నచ్చగావెతె టాన్ మెన, వెల్లి నబ తిలి. గాయియు చి అరిస్తార్కుక మాసిదోనియచ మాన్సులె, జలె, పవులు తెన్ ఉట్ట జా తిల. జలె, సరాబుల్చి పచ్చెన గెల జా పట్టుమ్చి జనాబ్ జేవ్క దెర, జా నచ్చగావెతె టాన్ తెడిక ఒగ్గడ నిల.

30 “జేవ్క తోడ్ గెచ్చిందె” మెన, పవులు నచ్చగావెతె టాన్ జనాబ్ తిలిసెతె పెనుక ఉచ్చర్జన్, గని ఒత్తచ సిస్సులె ఒప్పితి నాయ్.

31 పడ్డె, పవులుచ గోతుల్ జల జా ఆసియా ప్రదేసిమచ అదికారుల్ సగుమ్జిన్, “పోని, జా నచ్చగావెతె టాన్తె పెను నాయ్, ప్రమాదుమ్” మెన, బతిమాల్పు జా కబుర్ తెద్దయెల.

32 జా ఒండి బెర తిల జనాబ్తెచ, జలె, సగుమ్జిన్ ఏక్ కోడు, సగుమ్జిన్ వేర కోడు, కేకుల్ గల్లె తిల. జోవయింక ఎక్కి ఉద్దెసుమ్ నాయ్, సిక్కు జా అస్సి. జేవ్ బెర అయెలిసి కిచ్చొక గే, జోవయింక ఒగ్గర్జన్ నేన్తి.

33 యూదుల్ జలె, అలెక్కండ్రు మెలో జోవయింబొ మాన్సు ఎక్కిలోక పురై తెద్దయెల, చి జనాబ్తె అన్నె సగుమ్జిన్ కి జోవయింక సికడ్కయ్, జో పురై జా, ‘నూన’ మెన సయన్ కెర, దెర్ను సేడ్డె జేవ్ దొగులచి పచ్చెనచి తీర్పు సంగితో.

34 గని ‘యూదుడుయి జో’ మెన అరైమిక జొక్కర్తన చిన కెర, ఎక్కి అవాడ్ కెరన, దొన్ని గంటల్ పూర్తి, “అమవి వెల్లి దేవిక జెయ్యి, జెయ్యి!” మెన, కేక్ గలుక ములితి నాయ్.

35 పట్టుమ్క అదికారి, కన్సెనె జనాబ్క ముడ్డొ కెర, “అమవి ఎపెసు పట్టుమ్చ పైజల్, తూమ్ నూన. వెల్లి అరైమి దేవిచి గుడి అమవి ఎపెసుతె అస్సె మెన ఒండి లోకుమచ జాన్తి. పడ్డె, ఆగానుమ్ తెంతో సేడ్డి బొమ్మపత్తుర్ ఇన్నెయి అస్సె మెన ఎత్తిజిన్ జాన్తి. జేవ్ దొన్ని అమ్మి రకితనుమ్.

36 జలె, ఈంజ సత్తిమ్క కో ‘అబద్దుమ్’ మెనుక నెతిర్చిచి రిసా తుమ్ కిచ్చొక గగ్గల్ జతను? బుద్ది నెంజిలితె కిచ్చొ బమ్మ కామ్ తుమ్ కెర నాయ్. సెంతుమ్ కెరన.

37 ఈందె తుమ్ కడ ఆన్ల ఈంజేవ్ మాన్సులె అమవి గుడిచి కిచ్చొ చడితి నాయ్, పాడ్ కెర్తి నాయ్, చి అమవి దేవిక దూసుప కెర్తి నాయ్.

38 “జలె, కచి రిసా గే ఈంజొ దేమేత్తి, జోవయింకెన్ తిల సరాబుల్ ‘దావ దెమ్దె’ మెన ఉచ్చర్తతి, అదికారిచి సబతె నూనవుక జయెదె, అమక తీర్పు కెర్తన అస్సి. ఎక్కిలోచి ఉప్పిరి ఎక్కిలో నాయిమ్ తెన్నె తగు కెర్త, జలె,

39 గని, అన్నె వేర బాదల్ అస్సి మెలె, మాములుమ్ తీర్పు కెర్తనతెన్, అమవి పట్టుమ్చి సబతె తగు నూనవయ్ తీర్పు కెరుక అస్సె.

* 19:23 19:23 మెలె యేసుక సంపజలెకయ్ పరలోకుమ్తె గెచ్చుక జయెది మెలె బోదన.

40 “జాగ్రత్త! ఆజి జర్గు జలిన్చి రిసా, ఎపెసు పట్టుమ్చ ప్రజెల్ ఇసి గగ్గల్ జా ప్రబుతుమ్చి మరియాద కడ్ల, మెన, తుమ్చి రిసా నేరిమ్ వయిడుక జయెదె. అమ్క విలువ కెర్తన అమ్క పుసిలె, ఆజిచి తగు కిచ్చి బెదితిసి సంగుక నెత్తమ్” మెన, పట్టుమ్చో అదికారి జనాబ్క సంగిలన్.

41 నంగ, బెర తిల జనాబ్ ఎత్తిక గెరి తెర్తయలన్.

20

పవులు గ్రీకు దేసిమ్తె కెర్లి ప్రబుచి కమె

1 జా పట్టుమ్చి గగ్గల్ కేడ్డికయ్, ఒత్తచ సిస్సుల్క బుకారా, జోవయింక “దయిరిమ్ తా నిదాసుమ్ తెన్ తా” మెన సంగ కెర, పవులు జోవయింతె సెలవ్ నజన, మాసిదోనియ ప్రదేసిమి గెచ్చుక, ఓడతె వెగిలన్.

2 నముద్రుమ్ జీన, మాసిదోనియతె పాచ, జా ప్రదేసిమి బుల బుల, ఎత్తిజిన్క బోదన కెర, దయిరిమ్ సంగ, జా ప్రదేసిమ్ ఒత్తల్తో జీన గ్రీకు మెన అన్నెక్ నావ్ తిలి అకయ ప్రదేసిమి పావెలన్.

3 ఒత్త తిన్ జోన్నె తా కెర, “ఓడతె వెగ సిరియ ప్రదేసిమి అన్నె ఉట్ట గెచ్చిందె” మెన సంగిలె, యూదుల్ జోక అల్లర్ కెరుక కుట్ట కెర అస్తి మెన జో నూన తా, జా వాటు గెచ్చుక ముల, అన్నె మాసిదోనియ వాట్ బుల గెలన్.

4 జోచి తెన్ అన్నె, బెరయ పట్టుమ్చో పుర్రుచో పుత్తుసి సోపత్తు, వడ్డె దెస్సులోసిక పట్టుమ్చ, అరిస్సార్కుక, చి సెకుండు. పడ్డె గలతీయ ప్రదేసిమ్చి దెర్చే పట్టుమ్చ, గాయయి చి తిమోతి, పడ్డె ఆసియా ప్రాంతుమ్చ తుకికు, చి త్రోపిము ఈంజెవ్ కి గెల.

5 జేవ్, అమ్క అగ్గె గెచ్చ నముద్రుమ్ జీన, ఆసియా ప్రదేసిమ్చి త్రోయ రేవుతె గెచ్చ, * అమ్చి రిసా రకీతె తిల.

6 గని మాసిదోనియచి పిలిప్పి పట్టుమ్తె అమ్ పాచ, నే పులయల పోడియె కతి పండుగు కేడ్డికయ్, ఓడతె వెగ, పాచ్ పొదుల్ ప్రయాసుమ్ కెర, త్రోయ రేవుతె ఉత్త, సత్తు పొదుల్ ఒత్త జా పట్టుమ్తె తా గెలమ్.

7 జా †అయ్తర్ దీసి, సంజె సంగుమ్ సుదల్ ఎక్కిలోక ఎక్కిలో ప్రేమ తతి గుర్తుచి అన్నిమ్ బెద కా యేసుచి ఆగ్ బలి జలి గుర్తుచి పోడియె కా, జా రస్సుమ్ పింక మెన, తిన్ని మెట్టుచి ఏక్ గేరుచి ఉప్పిరచి మెట్టుచి గదితె బెద తిలమ్, చి ‘కలిక ఉట్ట గెచ్చిందె’ మెన తా, ఒత్త బెర తిలనక పవులు బోదన కెర కెర, సొక్కు ఎద సికడ్డె తిలన్.

8 అమ్ బెర తిలి జా గదితె, ఒగ్గర్ దివ్వో లగితె తిల.

9 ఐతుకు మెలో ఉబెడో ఎక్కిలో కిట్టి ఉప్పిర్ వెన తిలన్. ఒత్త వెసిలె, పవులు అన్నె ఒగ్గర్ సేవు బోదన కెర్తె తతికయ్, జో ఉబెడో జుమ కెర, పూర్తి నిజ గెలన్. వెనుక నెత్త కెర, జా ఉప్పిర్ తిలి మెట్టుచి కిట్టివాట్ ఎట్టో సేడ్లన్, చి జోక ఉక్కుల్క గెలె, మొర గెచ్చ అన్నె.

10 పవులు, ఉత్త గెచ్చ, వంపొ జా అత్తో తెన్ అమ్డ కెర ఉబెడోక గుండెతె వెలన, తిల మాస్సుల్క దెక, “తుమ్ బియ్ నాయ్. జోచి జీవు జోచి వెట్టి అన్నె” మెన దయిరిమ్ సంగిలన్.

11 తెదెడి పవులు, తిల మాస్సుల్ తెన్ జా గదితె అన్నె వెగ, జా పోడియె కా జా రస్సుమ్ పియ, జా ప్రేమ అన్నిమ్ కెర తా, కుకుడో వాసినె ఎద బోదన కెర్లన్, చి వెందలి ఉట్ట గెలన్.

12 జో ఉబెడో, మాత్తుమ్, చెంగల్ జలన్, ‘మొర గెలోసా జీవ్ జలన్’ మెన, ఒగ్గర్ సర్దనంతోసుమ్ తెన్ జోక గెరి నిల.

ఎపెసుతెచ సుదల్తె సెలవ్ కడన్లసి

13 అస్సు రేవు ఎద గెచ్చుక మెన, బార్ జలమ్. పవులు, మాత్తుమ్, “ఇండ గెచ్చిందె” మెంతికయ్, ‘ఒత్త అస్సుతె ఓడతె వెగడుమ్దె’ మెన, అమ్ ఓడతె వెగిలమ్.

14 పవులు ఇండ జా అమ్చి తెన్ అస్సుతె దస్సుల్ జతికయ్, జోవయింక ఓడతె వెగడ, మితులేనే మెలి వెల్లి డిబ్బుతె అయ్లమ్.

* 20:5 20:5 ‘అంక మెలి, ఈంజ ‘బారికుల్’ పుస్తకము రెగ్గె లూకా. ఇన్నె తెంతో పవులు తెన్ జో అన్నె బులుక దెరెదె. † 20:7 20:7 సత్తు పొదుల్తె అగేచి దీసి

15 ఒత్త తెంతో ఓడతె అన్నె బార్ జా, అన్నెక్ దీసి, కీయిసు మెలి డిబ్బ ఒత్తలతో పాచ, అన్నెక్ దీసి అసియా ప్రదేసిమచి మిలేతు రేవుతె ఉత్తర్లమ్.

16 ఎవెసుతె గెచ్చుమ్ నాయ్, పవులు నెసిలన్. ఒత్త గెలి, జా అసియా ప్రదేసిమి సగుమ్ దీసల్ తంక జలె, యెరూసలేమెతె పాచుక వాయిద జయెదె. తెర్లె, పెంతెకొస్తు పండుగు దీసి యెరూసలేమెతె పాచ తయిందె మెన, పవులు ఆస జా అన్నె.

17 జాకయ్, మిలేతుతె తా, 'ఎవెసు పట్టుమ్చ సంగుమ్చ వెల్లెల మాన్సుల్ ఇత్తల్ జెతు' మెన, కబుర్ తెద్రయలన్.

18 జేవ్ జోచి పురె జెతికయ్ పవులు జోవయింక ఇసి మెలన్. "ఆవ్ తోలితో అసియాతె ఉట్ట అయ్లిసి తుమ్ ఏద కెర్లె. జా కెర, తుమ్చి తెన్ జెతి తా గెలయ్.

19 ఒత్త తా, కిచ్చొ బడాయ్ నే ఉచరంతె, 'ప్రబుక నంపజతు' మెలి ఆసక ఏడ ఏడ, యూదుల్చ కుట్టల్చి రిసా సైమల్ సేడ సేడ ప్రబుచి సేవ కెర్లె తిలిసి తుమ్ జాన్సు.

20 గని దస బాదల్ సేడ్లె కి, కామ్క జెతికయ్ కిచ్చొ జలెకి, నే ముల్లె నిదానుమ్ తెన్ తుమ్క సికడ్లె తిలయ్, చి నబగిరి ఎదార్దుమ్ కి, గెరల్ గెరల్ బుల కి, బోదస కెర్లె తిలయ్.

21 దస్సి, యూదుల్చ కి గ్రీసు దేసిమచ సుదల్చ కి, 'తుమ్ కెర్లె పాపల్చి రిసా పెట్టి దుకుమ్ జా, దేముడుక నిదానుమ్ జంక, చి ప్రబు జలొ యేసుక్రీస్తుక నంపజంక ముక్కిమ్' సాచి సంగితె తిలయ్.

22 "అప్పె, ఒత్త కీసి జయిందె గే నేని, గని ప్రబుచి ఆత్మ అంక పెట్టి కచితుమ్ సంగిల్ రిసా, ఆవ్ యెరూసలేమెతె ఉట్ట గెతసి.

23 గని కిచ్చొ జాని మెలి, ఒత్త గెలి, జేలి జతిసి, సైమల్, అంక పిట్టె నాయ్ మెన, ఆవ్ కేన్ పట్టుమ్తె గెలి కి, దేముడుచి సుద్ది తిలి ఆత్మ అంక సికయ్తయ్.

24 గని, ఆవ్ జలి కి మొర్లె కి బాద నాయ్. అంచి జివుక విలువ దెకి నాయ్. ముక్కిమ్క అంక కిచ్చొ ఆస మెలి, దేముడు కెర్లె దయచి రిసాచి చి సాచి సంగితె తా మెన" యేసుప్రబు అంక కామ్ దా అన్నె. జలె, కెల్క కెల్లెనెతె జినుక మాన్సుక కీసి పూర్తి ఆస తయెదె గే, దస్సి జో ప్రబు దిలి కామ్ పూర్తి నిదానుమ్ కెర కేడవుక అంచి ఆస.

25 "పడ్లె, ఈందె, తుమ్ ఎత్తిజన్ ఆవ్ పరలోకుమ్చి రాజిమచి రిసాచి సుబుమ్ కబుర్ సూనయ్లస అప్పె తెంతో అంక అన్నె దెకున్ నాయ్ మెన ఆవ్ జాని.

26 జాకయ్, తుమ్ ఎత్తిజన్చి మొక్కె, తుమ్ ఎత్తిజన్ సాచి జతి రితి, తుమ్క ఆవ్ కిచ్చొ మెన సాచి సంగితసి మెలి, తుమ్చి రచ్చనచి రిసా అంక అన్నె కిచ్చొ పూచి నాయ్. అంచి జా పూచి కుట్టవన అన్నె.

27 దేముడు అంక సికడ్లెసి ఎత్తి తుమ్క బోదస కెర అన్నె, కేన్ కి ఆవ్ లుకడన్క నాయ్.

28 "తుమ్చి పూచి కిచ్చొ మెలి, ప్రబుచి ఇస్టుమ్ తెన్ జాగర్ల ఇండ, తుమ్ చెంగెల గొప్పుడ్లు జా, జోచి మంద జల, యేసుక నంపజలన ఎత్తిజన్క చెంగిల్ దెకితె తా, సికడ్లె తంక. జోచొ సొంత పుత్తనచి లోయి సువడ, జోవయింక కి ప్రబు గెనన అన్నె. తూమ్ జోక దెకితి రిసా, జోచి సుద్ది తిలి ఆత్మ తుమ్చి పెట్టి జో దా అన్నె.

29 ఆవ్ ఉట్ట గెలి, క్రూరుమ్చ డుర్కొ జత రిత మాయమాన్సుల్ తుమ్చి నెడమె జా కెర, ప్రబుచి మంద జల, జోక నిదానుమ్ తిలసక అల్లర్ కెరుక పిట్టితి నాయ్.

30 "యేసుచ సిస్సుల్ అమచి పట్టి జా జోవయింక పచ్చుత్' మెన, తుమ్చితె తెంతోచ సగుమ్జన్ కి సత్తిమ్ మార్పుప కెర్లె కొడ్లె సంగ సంగ సికడుల.

31 జాకయ్, జేవ్చి రిసా తుమ్ జాగర్ల తెన్ తా. అవి్వె కీసి జలయ్? కస్టుమ్ సేడ సేడ తిన్ని వెర్చుల్ పూర్తి, రాతి మెద్దెన, రోజుక నే పిట్టి, తుమ్క జోవయింక సికడ్లె తిలయ్. జా తుమ్ పచ్చు నాయ్.

32 అప్పె దేముడుచి అత్తి తుమ్క ఆవ్ సార్చ కెర దెతసి. జో దయ కెర్లెసి ఎత్తిచ కొడ్లె ఉచరుక ముల నాయ్. జయ్యి నిదానుమ్ పెట్టి తియన్లదు మెలి, తుమ్క అన్నె డిట్టుమ్ కెరెదె, చి జోచ సొంత మాన్సుల్ జంక జో నిసాన్లక దిలి వాటచ తుమ్క పిట్టి నాయ్.

33 "ఆవ్ ఇన్నె బుల్లె తిలి పొది, కచి వెండి కచి బజరి, కచి పాలల్క ఆస జయి నాయ్.

34 ఆవ్ అంచ సొంత అత్తో తెన్ కామ్ కెర కెర, అంచి రిసా, అంచి తెన్ కామ్ కెర్లనచి రిసా కి సరిపుచువ జతిసి దొర్కు కెరన జితె తిలయ, మెన తుమ్ జాన్సు.

35 నజీతి కంట, దెంక చెంగిల్ మెన, యేనుప్రబు సంగిలి కోడు నే పచ్చితై, దస్సి, సొంత అత్తో తెన్ కామ్ కెరయి, నెత్తిర్లనక తోడు కెర్ల తా, 'దస్సి కెర్ల చెంగిల్' తుమ్క వాట్ దెకయలయ", పవులు బోదన కెర్లన.

36 ఇసి సంగ కేడవ, పవులు మొర్రల్ టెక సెర్కు సేడ, జేవ్ ఎత్తిజిన్ తెన్ ప్రార్లన కెర్లన.

37 జేవ్ ఎత్తిజిన్ దుకుమ్ జల. అంకివొతె ఆసునో నూయి జలి, చి జోవయించి గుండెతె ఎక్కెళ్ల వెలన గివెడె దెర అమ్డ చుంబ,

38 కిచ్చొక ఒగ్గర్ దుకుమ్ జల మెలె, "తుమ్ అంక అన్నె దెకున్ నాయ్" మెన జో తెదోడి సంగిలి కోడుచి రిసా, తెదోడి బార్ జా ఓడతె పావెతి ఎద, జోక వట్ట బోడెవ దిల.

21

1 జేవ్ మాన్సుల్తె సెలవ్ నజన, ఓడతె వెగ, ఓడ సోగ జినవ, కోసు మెలి డిబ్బితె పాచ నిద్ర తా, అన్నెక్ దీసి రోడెన్ డిబ్బితె పాచ, ఒత్త తెంతె సముద్రుమ్ జిన, వతర రేవుతె పాచిలమ్.

2 ఒత్త వతరతె ఉత్త, పేనీకే ప్రదేసిమ్తె గెతి ఓడ దొర్కు జతికయ, వెగ బార్ జలమ్.

3 జా ఓడతె పాచ్ పాదుల్ గెచ్చు గెచ్చు, కుప్ర డిబ్బితె అమ్చి డెల్లి పక్కయ్ తతి రితి జిన, సిరియ ప్రదేసిమ్ పక్క పాచ, తూరు రేవుతె ఉత్తిర్లమ్. ఓడతె సావుకర్లు దువార్ల సామన్ ఒత్త ఉత్తవుక తిలి.

4 ఒత్తచ నంపజల సిస్సుల్క చజ, సత్తరెక్ జోవయింతె తా గెలమ్. జేవ్, జర్లు జంక తిలిసి ప్రబుచి ఆత్మనిక్కిక చిన కెర, పవులుక, "యెరూసలేమ్తె గెలె తుక ప్రమాదుమ్, పోసి" మెన సంగిల.

5 జలె, సత్తు పాదుల్ గెతికయ, అన్నె బార్ జంక దెర్లమ్. జా తూరు పట్టుమ్చ నంపజలన్ ఎత్తిజిని, తేర్నివొతెన్ బోదల్ తెన్, పట్టుమ్చ గుమ్మల్ ఇత్తల్తో అమ్క బోడెవ దా, సముద్రుమ్చి ఒడ్డుతె పాచడ్ల, చి అమ్ ఎత్తిజిన్ ఒత్త మొర్రల్ టెక సెర్కు సేడ ప్రార్లన కెర, ఉట్ట, అమ్తె జోవయింతెన్ సెలవ్ నజన,

6 అమ్ ఓడతె వెగిలమ్, జేవ్ గెరి ఉట్ట గెల.

కైసరియ పట్టుమ్తె పాచిలిసి

7 తూరు పట్టుమ్క ముల అన్నె ప్రయానుమ్ కెర, తోలెమాయి రేవుతె ఉత్త, ఒత్తవ బావుడ్లు తెన్ దస్సుల్ జా జోవయింతె ఎక్కి దీసి తా,

8 అన్నెక్ దీసి ఓడతె గెచ్చు, యూదయ ప్రదేసిమ్చి కైసరియ పట్టుమ్చి రేవుతె ఉత్త, నుబుమ్ కబుర్ నూనయ్తో పిలిపచి గెరి గెలమ్. 'బీద సుదల్క దెకుత్' మెన అగ్గయి యెరూసలేమ్తెచ యేనుచ బారికుల్ సత్తుజిన్క నిసాన తిల. పిలిప్, జేవ్ సత్తుజిన్తె ఎక్కిలో. జోచి గెరి, నగుమ్ దీనల్ తా గెలమ్.

9 పిలిప్పుక చెత్తరజిన్ పెండ్లి నే జల దువినీవొ తిల. ప్రబుచి ఆత్మ జోవయించి పెట్టి కిచ్చొ సికడెదె గే, జా కోడు ఈంజేవ్ ఉచెడివొ సంగుల.

10 పడ్డె, అమ్ ఒత్త తిల పాదుల్, ప్రబుచి ఆత్మ సికడ్ల కబుర్లు సంగితో అగబు మెలో యూదయచి అన్నెక్ పక్క తెంతో కైసరియ పట్టుమ్తె ఉట్ట అయ్లో.

11 జో అమ్తె జా కెర, పవులుచి కెరాంటి బందంతి వాలి నజ, గుర్తుక జోవ సొంత అత్తో చట్టో బందన, "దేముడుచి సుద్ది తిలి ఆత్మ కిచ్చొ కోడు సంగితయ్ మెలె, ఆవ్ కిసి అప్పె బందన అస్సి గే, దస్సి, ఈంజ వాలిచొ మాన్సుక యెరూసలేమ్ పట్టుమ్చ యూదుల్ బంద, యూదుల్ నెంజిల అదికారుల్తె సార్చు కెర దెవుల" మెన ప్రబుచి కబుర్ సంగిలన్.

12 జా కోడు నూన, జా పట్టుమ్చ నంపజలన, అమ్ కి, "యెరూసలేమ్తెచయ, తుయి గో నాయ్!" మెన బతిమాల్చా జా సంగిలమ్.

13 జలె పవులు జోవయింక, "కిచ్చొక దస్సి ఏడ అంక పెట్టితె దుకుమ్ కెరయ్తను? అంక బందిలె బందుత్, జేలి కెర్లు, అన్నె, ఆవ్ మొర్లె యేనుప్రబుక గప్పురుమ్ జెయెదె మెలె, మొరిందె కి" మెన సంగిలన్.

14 "అమ్ కెడ్లి సంగిలే కి, జోక జయి మెన్సు" మెన, అమ్ చిన, "దస్సి జలె, ప్రబుచి ఇష్టుమ్ జర్లు జవున్!" మెన, తుక్కె జలమ్.

యెరూసలేమ్‌తె ఉట్ట గెలిసి

15 జా పడ్డో, జేవ్ పొదుల్ గెతికయ్, అమ్చి సామన్ సర్దు కెర, దెర, యెరూసలేమ్‌తె గెచ్చుక బార్ జలమ్.

16 అమ్చి తెన్, కైసరియ పట్టుమ్చ సిస్సుల్ జల నంపజలన సగుమ్జెన్. అగ్గెయి తెంతో సిస్సుడు జలో కుప్త డిబ్బు దేసిమ్చో మ్మాసానుచి గెరి నిద్ర తతి రిసా ఒత్త అమ్క కడ నిల.

17 అమ్ యెరూసలేమ్‌తె పావెతికయ్, బావుడ్డు సర్దు తెన్ అమ్క బెదవన్.

18 అన్యెక్ దీసి, పవులు అమ్చి తెన్ యాకోబుతె గెలమ్. ఒత్త సంగుమ్చ వెల్లెల మాస్సుల్ ఎత్కిజన్ ఒత్త బెర తిల.

19 జోవయింతెన్ దస్సుల్ జా, యూదుల్ నెంజలనతె జో బుల్తై తిలి పొది జోవయింతెన్ దేముడు జోచి అత్తి జర్గు కెర్లిసి ఎత్కి, వర్చు తెన్, పవులు సాచి సంగిలన్.

20 జేవ్, సూన కెర సర్దు జా, “దేముడు జా ఎత్కి జర్గు కెర అస్సె” మెన, జో దేముడుచి గవ్చురుమ్ సంగిల, గని పవులుక కిచ్చొ మెల మెలె, “ఓ, బావో, ఇన్సె, అమ్చ యూదుల్‌తెయి, లచ్చుల్‌జీన్ ప్రబుక నంపజా అస్సి మెన తుయి దెకితసి. మోసేచి అత్తి పూర్ణమ్ దిల ఆగ్గుల్ రితి నిదానుమ్ కెర్తై.

21 తుచి రిసా కిచ్చొ మెన సూన అస్సి మెలె, తుయి యూదుల్ నెంజలనచ దేసిమ్‌లుతె గెచ్చు, ‘మోసే పూర్ణమ్‌చొచి అత్తి దేముడు దిలిసి ఆగ్గుల్ తుమ్ పచ్చు, తుమ్చ పుత్తర్ణుక అమ్చి గుర్చుచి సున్చుతి కెరుక ముల, జా అలవాల్ ఏడ్తల్ ముల’, తుయి అమ్చ యూదుల్‌క సికడ్డసి.

22 జాకయ్, అమ్క కిచ్చొ బాద మెలె, తుక ‘ఉట్ట జా అస్సె’ మెన కచితుమ్ సూనుల.

23 జాకయ్, తుయి కిచ్చొ కెర్లె చెంగిల్ మెన తుక అమ్ కిచ్చొ సంగితనుమ్ మెలె, అమ్తె చెత్తర్‌జెన్ ‘నెండి ఉత్తవుమ్‌దె’ మెన, దేముడుక ఆతు ఉక్కుల అస్సి.

24 జలె, జేవ్ చెత్తర్‌జెన్ తెన్ తుయి సుద్ది కెరన, దేముడుచి గుడితె గెచ్చు, జేవ్ నెండి ఉత్తయ్‌తి కర్చు ఎత్కి తూయి దేసు. తుయి దస్సి కెర్లది మెలె, తుచి రిసా జేవ్ సూస్సిన్‌క తప్పు మెన చిన, జో కి అమ్చ ఆగ్గుల్ రితి సత్తిమ్ ఇండితయ్ మెన నంపజలన అమ్చ యూదుల్ ఎత్కిజన్ దెకుల.

25 గని, యేసుక నంపజల యూదుల్ నెంజలనక బాద నాయ్. జోవయిచి రిసా జోవయింక కిచ్చొ తీర్చు రెగ్గ తెర్చయలమ్ మెలె, బొమ్మల్‌క దిలిసి తుమ్ కా నాయ్, లోయి కా నాయ్, టోట్రో మోడ లోయి నే గెచ్చయ్‌లి సిద్ద కా నాయ్, చి లంజెకమె కెర నాయ్, మెన, జా ఎక్కి ఆడ్ర దిలమ్” మెన పవులుక యెరూసలేమ్‌చ సంగుమ్ వెల్లెల మాస్సుల్ సంగిల.

26 జాకయ్, అన్యెక్ దీసి, పవులు జేవ్ సంగిల చెత్తర్‌జెన్ తెన్ సుద్ది మెన యూదుల్ సంగితి జా కామ్ కెరన, జోవయింక దేముడుచి గుడితె కడన, “నత్తు పొదుల్ గెలె, అమ్చి సుద్ది జతి కామ్ కేడ్లె, దొర్చు జలి అర్చితుమ్ దెమ్‌దె” మెన, ఒప్పన్.

27 జా కామ్‌చి జేవ్ ఒప్పన్ నత్తు పొదుల్ కుట్టిసి పాసి జా, పూర్తి నే జతె అగ్గె, ఆసియా ప్రదేసిమ్‌చ యూదుల్‌చ వెల్లెల సుదల్ జా కెర, పవులుక దేవులుమ్‌తె తిలిసి దెక కెర, ప్రజల్ ఎత్కిక సికడ్డ, చి జోక దెర్ల.

28 “ఓ అమ్చ ఇస్రాయేలుల్ ఎత్కిజని, తోడు జా, ఈంజో మాస్సు కేనె గెలె కి, అమ్ యూదుల్‌చి రిసా, అమ్చ ఆగ్గుల్‌చి రితి, ఈంజ దేముడుచి గుడిచి రిసా, విరోదుమ్ సికడ్డయి. అన్యెక్ కిచ్చొ తప్పు కెర అస్సె మెలె, ఈంజ దేముడుచి గుడి తెడి గ్రిసు దేసిమ్‌చ సుదల్‌క కడ ఆన, ఈంజ సుద్ది తిలి టాన్ గార్ కెర అస్సె” మెన ప్రజల్‌క సికడ్డ.

29 కిచ్చొక ఈంజ ఆకర్‌చి కోడు సంగిల మెలె, అగ్గె ఏక్ సుట్టు, ఎపెసు పట్టుమ్‌చొ యూదుడు నెంజిల్ త్రోపిము మెలోసా తెన్ పవులు పట్టుమ్‌తె బుల్తై తిలిసి దెక తిల, చి పవులుక, ‘జోవయింక దేముడుచి గుడి తెడి కడ నిలొ, కిచ్చొగె’ మెన ఉచర తిల.

30 ఆసియా ప్రదేసిమ్‌చ యూదుల్‌చ జేవ్ వెల్లెల సుదల్, ప్రజల్‌క దస్సి సికడ్డికయ్, పట్టుమ్‌చ యూదుల్ ఎత్కిజన్ కోవుమ్ జా, నిగ జా, పవులుక దెర, దేముడుచి గుడి తెంతో ఒర్గొడ నిల. చి బేగి అదికారుల్ దేముడుచి గుడిచ కెచ్చివో డంకిల.

31 పవులుక బార్ కెర, మార గెల్ల, గని ఏలువ కెర్లె రోమ్ దేసిమచి జమాన్ సుదల్చి గెరి దేముడుచి గుడిక పాసి తిలి, చి 'ఒండి యెరూసలేమ్ పట్టుమ్చ జనాబ్ గగ్గోల్ జతతి' మెన జమాన్చో అదికారి దెక కెర,

32 సగుమ్జిన్ జమాన్లుక చి జోవయించ పుంజెక జిన్క వెల్లొక కడ ఆన, జేవ్ జనాబ్ బెర తిలిన్తె నిగ గెల. జేవ్ జనాబ్, బెలె, జమాన్లుక చి జోవయించో అదికారిక దెక కెర, పవులుక పెటుక ముల దిల.

33 తెదోడి జమాన్లుచో అదికారి పాసి జా, పవులుక దెర, దొన్ని గొల్పుల్ తెన్ జోక బందయలన్. "ఈంజొ కొన్నో? కిచ్చొ కెర అస్సె?" మెన పుసిలన్.

34 జనాబ్చ సగుమ్జిన్ ఏక కోడు అస్సె, సగుమ్జిన్ వేర కోడు సంగ, కేకుల్ గల్లె తిల, చి జా గగ్గోల్క జో అదికారి కిచ్చొ రుజ్జు సూసుక నెత్త కెర, "అమచి గెరితె ఇన్నెక కడన్" మెన జమాన్లుక ఆడ్ర దిలన్.

35 పవులుక దెరన జా గెరిచి మేడచి గుమ్ముమె పావిత పీనెల్తె జమాన్లు వెగుక దెల్లె, జనాబ్ ఒగ్గర్ కొప్పమ్ జా, జోచి ఉప్పిరి పెలపెలి జతె తిల చి రిసా, జమాన్లు పవులుక ఉక్కుల వయల.

36 జనాబ్ ఒగ్గర్ కొప్పమ్ తెన్ పట్టి జా, "జోక మొరవ, మొరవ" మెన కేకుల్ గల్లె తిల.

పవులు ప్రెజల్ తెన్ కొడో జలిసి

37 పవులుక జమాన్లు జోవయించి మేడతెక కడ నెతె తా, పీనెల్ వెగ గుమ్ముమ్ పాసి పావెలి పొది, "తుక ఆవ్ ఏక కోడు సంగుక సెలవ్ దెస్సె గే?" మెన గ్రీకు బాస తెన్ జోవయించో అదికారిక పవులు పుసిలన్. "గ్రీకు బాస జాన్సి గే?"

38 జా పాదులె, ఐగుప్తు దేసిమ్చో ఎక్కిలో ఈంజ దేసిమి జా కెర, ఈంజ దేసిమ్చక ఆక్రమించువ కెరుక ఉచర, చెత్తర్ వెయిల్జిన్ కత్తివో దెరన్త మాన్యుల్క ప్రబుతుమచి ఉప్పిరి విరోదుమ్ సికడ, బయిలు దేసిమ్ పట్టి కడన్ తిల, తూయి జో, కిచ్చొగ" మెన అదికారి సంగిలన్.

39 పవులు జోవయింక జబాబ్ దిలన్, "ఆవ్ యూదుడుయి, కిలికియ ప్రదేసిమచి తార్పు పట్టుమ్తె జెర్పిలయ్, చి నాయిమ్క *వెల్లి పట్టుమ్చో జయిందె, ఆవ్ ప్రెజల్క ఏక కోడు సంగుక దయ కెర అంక సెలవ్ దె" మెన అదికారిక సంగిలన్.

40 జో అదికారి సెలవ్ దిలన్, చి పవులు, పీనెల్చి ఉప్పిరి టీవో జా కెర, ప్రెజల్క నయన్ కెర్లన్. జేవ్ పూర్తి తుక్లె జతికయ్, జోవయించి ఎల్లి బాస తెన్ సంగుక దెర్లన్.

22

గగ్గోల్ జల యూదుల్క పవులు సంగిలిసి

1 కిచ్చొ మెన యూదుల్చి ఎల్లి బాస తెన్ పవులు యూదుల్క సంగిలన్ మెలె, "బావుడ్లు, వెల్లొ సుదల్, తుమ్ కెర్లె నిందక జబాబ్ సంగిందె. నూన" మెన,

2 ఎల్లి బాస తెన్ సంగిలన్. 'ఆమ్ యూదుల్చి బాస' మెన నూన, అస్సె తుక్లె జల. జాకయ్ జోచి జబాబ్ జో సంగుక దెర్లన్.

3 ఆవ్ యూదుడుయి, కిలికియ ప్రదేసిమచి తార్పు పట్టుమ్తె జెర్పిలయ్, గని, ఈంజయి యెరూసలేమ్ పట్టుమ్తె వడ్ల, వెల్లొ జలొ అమ్చో గమలీయేల్తె సదు కెర్లయ్. జో కియతికయ్, అమ్చ పూర్గుల్చ ఆగ్గల్ రెతి నిదానుమ్ సిక కెర్లె తిలయ్, చి తూమ్ అప్పెక కిసి అస్సెన్ గే, ఆవ్ కి దేముడుచి సేవ నిదానుమ్ తెన్ కెర్లె తిలయ్.

4 జాకయ్, యేసుతె రచ్చున జతి ఈంజ వాట్క నంపజలసక పూర్తి విరోదుమ్ జా, దెర బంద, మున్నబోదల్క, తేర్బోదల్క జేల్తె గలయలయ్. సగుమ్జిన్క *మార్షిన్తె బెదిలయ్.

5 జా కోడుక ఎత్తిక వెల్లొ పూజరి కి, సబతె వెనిత వెల్లెల మాన్యుల్ ఎత్తిజిన్ కి సాచి జా అస్సి. 'యేసుక నంపజల ఒత్తవ మాన్యుల్క దెర, బంద, సిచ్చొ కెరవుక' మెన సెలవ్ నజన, దమస్కు, పట్టుమ్తెచ వెల్లెల మాన్యుల్క దేకయతి రిసా, ఇన్నెచ ఎత్తిక వెల్లొ పూజరితె ఉత్తల్ నజిలయ్.

* 21:39 21:39 'వెల్లి పట్టుమ్' మెలె, రోమ్ పట్టుమ్క సంగ తయెది.

* 22:4 22:4 బారికూల్ 8:1, 9 అద్యయిమ్ తెంతె.

6 “ప్రయానుమ్ గెతె తా, దమస్కుక పాసి అయ్లి పొది, రమారమి మెద్దెనె, పరలోకుమ్ తెంతో చి వెల్లి ఉజిడి అంచి సుట్టునంత డీసిలి.

7 ఆవ్ బుయ్యో నెర్పు నీడ. ఏక్ అవాడ్ అంక సంగిలిసి ఆవ్ సూన్లయ్, ‘సావులు, సావులు, అంక కిచ్చొక అల్లర్ కెర్తసి?’ మెన సంగిలన్.

8 ‘తుయి కొన్సో, ప్రబు?’ మెన జబాబ్ దిలయ్, చి జో అంక, ‘తుయి అల్లర్ కెర్తొ నజరేతు గెప్పిచొ యేసు ఆవ్’, మెన అంక సంగిలన్.

9 “అంచి తెన్ తిలస, జలె, జా ఉజిడి దెకిల, గని అంచి తెన్ లట్టణ్ణోసాచి అవాడ్ సూన్తి నాయ్.

10 తెదొడి, ‘ఆవ్ కిచ్చొ కెరుక, ప్రబు?’ మెన, ప్రబుక పుసిలయ్, జో అంక, ‘తుయి ఉట్ట, దమస్కు పట్టుమతె గో, చి తుయి కిచ్చొ కెరుక అస్సె గే తుక ఒత్త సూనయిందె’, మెన, అంక సంగిలన్.

11 జలె అంకి అందర్ ఉజిడిచి రిసా, ఆవ్ గుడ్డి జతికయ్, అంచి తెన్ అయ్లన అంక ఆతు దెర, అంక వాట్ దెకయ్ల, చి దమస్కు పట్టుమతె పావెలయ్.

12 “ఒత్త, అననీయ మెలో ఎక్కిలో తిలో. కీసా మాన్సు మెలె, అమ్చొ దేముడుచ అగ్గరే రితి నిదానుమ్ కెరెదె, ఒత్తచ యూదుల్ ఎత్తిజిన్ జోక ‘చెంగిల్ మాన్సు’ మెనుల.

13 జో, అంచితె జా కెర, అంచి పాసి టీవోజ, ‘సావులు, బావో, తుచ అంకివో డీసుల’ మెన సంగిలన్, తెదొడి అంకివో చెంగిల్ జా జోక దెకిలయ్.

14 తెదొడి, జో, ‘అంచి ఇస్టుమ్ జో సికున్, పరలోకుమచి పున్నిమ్ తిలో క్రీస్తుక దెకున్, జోచి అవాడ్ సూన్సు.’ మెన, అమ్చ ద్హార్లలోచొ దేముడు తుకయ్ నిసాన అస్సె.

15 చి తుయి దెకిలిన్, తుయి సూన్సిచి రిసా, జోచి రిసా, ఎత్తిజిన్ మాన్సుల్క సాచి సంగెదె.

16 అల్లె, కిచ్చొక రకితసి? ఉట్ట జోచి నావ్ దెర బాప్తిసుమ్ నజన, తుయి కెర్ల పావల్ దోయ జా గెతి రిసా, జోచి రచ్చన నజను., మెన అననీయ అంక సంగిలన్.

17 “ఆవ్ యెరూసలేమ్తె అన్నె బుల అయ్లి పొది, ఏక్ దీసి, దేవులుమతె గెచ్చ ప్రార్దన కెర్తె తిలె, ప్రబుతె అంచి మెన్సు పూర్తి తా,

18 ‘బే బేగి యెరూసలేమ్ ముల ఉట్ట గో. ఇన్నె అంచి రిసాచి తుయి సంగితి సాచి నంప కెర్తి నాయ్.’, మెన ప్రబు అంక సంగిలన్.

19 ఆవ్ జోక, ప్రబువ, అవ్ అగ్గె అమ్చ యూదుల్చి కేన్ నబగేరి గెలె కి, తుక నంపజలనక చజ, జేల్తె గలియ్, పెటయ్లయ్.

20 పడ్డె, తుచి సాచి జలో నైపనుక మార్లిన్తె అవ్ కి పాసి టీవోజ, ‘చెంగిల్’ మెంతె తిలయ్, జోక మార్లనచ సొక్కల్ గట్ట దెర తిలయ్. ఈంజ ఎత్తి జేవ్ అదికారుల్ కి జాన్తి. ఆవ్ ఇన్నె తాఁ గెలె చెంగిల్ కిచ్చొగె మెన, ప్రబుక ఆవ్ సంగిలయ్.

21 జలె, అంక జో కిచ్చొ మెలన్, మెలె, ఉట్ట, గో. కిచ్చొక మెలె, తుయి దూరి గెచ్చు యూదుల్ నెంజిలనక సుబుమ్ కబర్ సూనవుక మెన, ఆవ్ తెద్రయ్తసి మెన, ప్రబు అంక సంగిలన్.”, మెన పవులు జేవ్ యూదుల్క సంగిలన్.

పవులు సంగితికయ్ జనాబ్ కోపుమ్ జలిసి

22 జా కోడు సంగితె ఎద తుక్లె తా, జోవయంక జేవ్ యూదుల్ సూన్తె తిల. గని, యూదుల్ నెంజిలనచి రిసాచి కోడు సూన, కోపుమ్క గట్టిజ ఒర్పు, కిచ్చొ మెన కేకుల్ గల మెలె, “కీసా మాన్సు, ఈంజో! ఈంజ లోకుమతె ఈంజో కిచ్చొక జింక! ఇన్నెక మార గెల!” మెన జేవ్ కేకుల్ గల.

23 జోవయించి ఒగ్గర్ కోపుమ్క, జోవయించ సొక్కల్ గట్ట కడన దెర పట్టి రితి సయ్న కెర, మత్తి కి వెంట కెర గత్తె తతికయ్,

24 జమాన్సుచొ అదికారి కిచ్చొ కెరుక నేన కెర, “జోక కమె కెర్తి గేరతె కడన కొర్తల్ తెన్ పెట పరిచ్చు కెర, కిచ్చొ నేరిమ్ జోక వయడ్తతి గే చి జోచి రిసా కిచ్చొక దస్సి మెన ఒర్పు దిల గే జానుక” మెన, జమాన్సుక ఆద్ర దిలన్.

పవులు రోమియుడు మెన జాన్సుప జలిసి

25 గని జేవ్ జోవయింక కొర్లల్ తెన్ పెటుక మెన బందితికయ్, పాసి టీవోజ తిలో పుంజెక్జీన్ జమాన్లుక వెల్లోక పవులు ఏక్ కోడు సంగిలన్. “నాచి నే నూన్తె, నే తీర్పు జలో రోమియుడుక పెట్టి సిచ్చ దెంక నాయిమ్ గే?” మెన పుసిలన్.

26 జా కోడు పుసితికయ్, జో పుంజెక్జీన్ జమాన్లుక వెల్లో నూన, వెయి జమాన్లుక వెల్లోతె గెచ్చ, “అమ్ కిచ్చొ కెరుక గే? ఈంజో మాన్సు రోమియుడు” మెన సంగితికయ్,

27 జో అదికారి పవులుతె జా కెర, “తుయి రోమియుడు గే?” మెంతికయ్, “ఆవ్ రోమియుడుయి” మెన పవులు సంగిలన్.

28 జాకయ్, జో అదికారి, “రోమియుడు జతి రిసా ఆవ్ ఒగ్గర్ డబ్బుల్ దిలయ్” మెన పుంజెక్జీన్ జమాన్లుక వెల్లో సంగిలన్. “గని ఆవ్ రోమియుడు జా ‘జెర్మిలయ్” మెన, పవులు జబాబ్ సంగిలన్.

29 బేగి, జోవయింక పెట పరిచ్చ కెరుక ఉచర్లన బియః కెర బారో జల, చి పవులుక, జో రోమియుడు మెన, చి రుజ్జు నే నూన్తె రోమియుల్క సిచ్చ కెరుక, బందుక, నాయిమ్ నాయ్ మెన, ‘తప్పు కెర్లయ్’ మెన పుంజెక్జీన్ జమాన్లుక వెల్లో బియః గెలన్.

యూదుల్చ అదికారుల్క సబ వెనయ్లిసి

30 అన్సెక్ దీసి, వెందలి, “యూదుల్ కిచ్చొక జోక నింద కెర అస్తి గే సత్తిమ్ నూనిందె” మెన, జోక బందిల గొల్పుల్ యిప కెర, “వెల్లెల పూజర్లు, యూదుల్చి సబతె వెసితన ఎత్కిజిన్ జెతు, చి సబ వెనయిందె” మెన పుంజెక్జీన్ జమాన్లుక వెల్లో ఆడ్ర దిలన్. జేవ్ యూదుల్ జెతికయ్, పవులుక ఎల్లోతో జోవయింతె కడ ఆన, జోవయించి మొక్కె టీవో కెలన్.

23

1 పవులు, జలె, నే బితె సబ వెసిలనక దెక, “ఓ బావుడ్లు, అజి ఎద అమ్చొ దేముడుక సత్తిమ్ ఆవ్ ఇండితసి.”, మెన, మొదొల్ సంగిలన్.

2 అనసీయ మెలో ఎత్కిక వెల్లో పూజరి, “జోక చోడి పెట” మెన పవులుక పాసి తిలనక ఆడ్ర దిలన్.

3 తెదోడి, పవులు జోవయింక, “చున్నమ్ దెరవ ముర్కి లుంకడ్లి కూడు జలో రిత్ తుయి మాయమాన్లుక దేముడు తుకయ్ పెటెదె! దేముడు మోసి తెన్ దిలి ఆగ్గుల్చి నాయిమ్ తెన్ అంచి రిసాచ రుజ్జుల్ నూన్తి రిసా సబతె వెన అస్సన్, గని నాయిమ్ నెంతె అంక పెటయ్తసి. తుక కిచ్చొ సత్తిమ్?!” మెన, సంగిలన్.

4 పాసి తిలన, “దేముడుచొ ఎత్కిక వెల్లో పూజరిక దస్సి దూసుప కెరుక జయె నాయ్.” మెన సంగిల,

5 చి, “బావుడ్లు, జోక ‘ఎత్కిక వెల్లో పూజరి జయెదె’ మెన ఆవ్ నేని. జాన్తయ్, జలె, దస్సి లక్కుబ్తయ్ నాయ్. ‘తుమ్చ అదికారుల్క దూసుప కెరుక జయె నాయ్’ మెన, దేముడుచి కొడెతె రెడ్ల అస్స” మెన పవులు జబాబ్ దిలన్.

6 పడ్డి, ‘సబ వెసితనతె సద్దూకయ్యులు చి పరిసయ్యుల్ మెల పండితుల్ ఇన్నె అస్సి’ మెన పవులు దెక కెర, సబతె కిచ్చొ మెన కేక్ గలో మెలె, “ఓ బావుడ్లు, ఆవ్ పరిసయ్యుడుయి. అంప పూర్లల్ కి పరిసయ్యుల్, ‘మొర్లె అన్నె జీవ్ జా ఉట్టుమదె’ మెన ఆవ్ పరిసయ్యుడు దయెరిమ్ తెన్ అస్సిచి రిసా, అంక నింద కెర పరిచ్చ కెరయ్తతి.”, మెన సంగిలన్.

7 జో దస్సి సంగిల్ రిసా. పరిసయ్యుల్ చి *సద్దూకయ్యులు గగ్గొల్ జలె.

8 మాన్సుల్ మొర్లె అన్నె జతి నాయ్, దూతల్ తతి నాయ్, ఆత్తుల్ బూతల్ డుంబల్ గట్ర తతి నాయ్ మెన సద్దూకయ్యులు సికడ్తతి. పరిసయ్యుల్, ‘మొర్లె జిమదె, దూతల్, ఆత్తుల్ బూతల్, డుంబల్ గట్ర అస్సి’ మెన ఒప్పునతతి, చి రిసా, దొన్ని జట్టు జా ఒగ్గర్ గగ్గొల్ జలె.

9 తెదోడి, పరిసయ్యుల్ చి జట్టుతెప సగుమ్జిన్ మోసి తెన్ దేముడు దిలి ఆగ్గుల్ సికడ్తన టీవ్ కెర, “ఈంజో మాన్సుతె కిచ్చొ తప్పు డీన్ నాయ్. ఏక్ వేల కేన్ జవున్ ఆత్తు జవున్, దూత జవున్ ఇన్నెతెన్ లట్టణ్” మెన సంగిల.

† 22:28 22:28 పవులు యూదుల్చి నెకుమ్చొ జతికి, అబ్బదింసిచి కాలమ్ తెంతో ‘రోమియులు ఈంజేవ్’ మెన నాయిమ్ తెన్ రుజ్జుల్ దెకయ్తె కార్లల్ జోవయించి కుటుంబుమచక తిల. * 23:7 23:7 మాన్సుల్ మొర్లె అన్నె జతి నాయ్, దూతల్ తతి నాయ్, ఆత్తుల్ బూతల్ డుంబల్ గట్ర తతి నాయ్ మెన సద్దూకయ్యులు సికడ్తతి

10 జా కోడు సూన కెర సద్దూకయ్యులు ఒగ్గర్ కోపుమ్ జల, చి జేవొజ జట్టు జలన అన్నె ఒగ్గర్ గగ్గోల్ జతికయ్, జమాన్లుచొ అదికారి, 'యూదుల్ పవులుక ఎక్కె దడి దొన్ని పక్కలె దెర చిర మారుల' మెన బియకెర "తుమ్ జోవయంతె ఉత్త గెచ్చ, జోక జోవయంచి నెడిమి తెంతో ఉర్ల కడ దెర జా అమ్చి జమాన్లు గెరిచి మేడతె ఆన జోక రక" మెన, జమాన్లుక ఆడ్ర దిలన్.

పవులుక ప్రబు దయిరిమ్ సంగిలిసి

11 జా రాతి, యేసుప్రబు పవులుచి పాసి టీవొజ కెర, "తుయి బి నాయ్. ఈంజ యెరూసలేమ్తె తుయి కీసి అంచి రిసా సాచి సంగ అస్సెన్ గే, దస్సి, తుమ్క ఏలుప కెర్తి రోమ పట్టుమ్తె కి అంచి రిసా సాచి సంగితె" మెన ప్రబు జోక సంగిలన్.

పవులుక మారుక మెన యూదుల్ కుత్త కెర్తిసి

12 అన్నెక్ దీసి పెందలె, యూదుల్ కుత్త కెర, "పవులుక మార్తె ఎదక చువ్వె తన్నె తమ్దె" మెన ఆతు ఉక్కెల.

13 కెత్తిజన్ జా కుత్త కెర్ల మెలె, దొన్ని విసాజిన్చి కంట అన్నె ఒగ్గర్జిన్.

14 జేవ్ వెల్లెల పూజర్లు చి సబచ వెల్లెల మాన్లుల్తె గెచ్చ, ఇసి మెల, " 'పవులుక అమ్ మార్తె ఎదక చువ్వె తన్నె తమ్దె' మెన ఆతు ఉక్కుల అస్సుమ్.

15 జాకయ్, తూమ్, సబ వెసితన ఎత్తిజిన్ తెన్, రోమచ జమాన్లుచొ అదికారితె అప్పె గెచ్చ, 'పవులుక అన్నె సరిగా పరిచ్చ కెర తీర్పు సంగుమ్దె. జోక కడ ఆను' మెన జో అదికారిక సంగ. జో కడ ఆన్లె, జో పవులు తీర్పు కెర్తి గెరి పాసి నే జెతె అగ్గె, మారుమ్దె" మెన, కుత్త కెర్ల.

16 జలె, పవులుక వట్ట దెర మార్తి కుత్తచి రిసా పవులుచి బేన్చిచొ పుత్తుసి సూన తా, జమాన్లు తతిన్తె గెచ్చ, తెడి పెన, పవులుక సంగిలన్.

17 పవులు పుంజెకజిన్ జమాన్లుక వెల్లో ఎక్కిలోక బుకారా కెర, "జమాన్లుచొ అదికారితె ఈంజో నాడుక కడ నే. ఏక కబుర్ ఈంజో ఆన అస్సె" మెన సంగితికయ్,

18 అదికారితె కడన కెర, "జేలి జలో పవులు అంక బుకారా కెర, అదికారితె ఈంజో నాడుక కడ నే. జోక కబుర్ ఆన అస్సె, మెన తెద్రయ్లన్", మెన, పుంజెకజిన్ జమాన్లుక వెల్లో సంగితికయ్,

19 అదికారి జో నాడుచి ఆతు దెర, జో తెన్ గెరిచి తెడి పెన గెచ్చ, కో నే సూన్తె, "అంక తుయి సంగితి కబుర్ కిచ్చొ?" మెన పుసిలన్.

20 "యూదుల్ కుత్త కెర అస్సి. ఆరిక, పవులుక అన్నె సరిగా పరిచ్చ కెర తీర్పు కెర్తి రితి జా, తుక, 'కలిక సబతె కడ ఆన్లు' మెన తుక కబుర్ తెద్రవుక ఉచర అస్సి.

21 గని పోని. పవులుక వట్ట దెర మారుమ మెన, దొన్ని విసాజిన్చి కంట అన్నె ఒగ్గర్జిన్ రకితతి. జోక మార్తె ఎదక చువ్వె తన్నె తమ్దె మెన జేవ్ ఆతు ఉక్కుల అస్సి. తుక 'అమ్ ఉచర్లి ఆడ్ర దెవున్' మెన, రకితె అస్సి", పవులుచొ బేన్చిచొ పుత్తుసి జమాన్లుచొ అదికారిక సంగిలన్.

22 జాక జో అదికారి, "అంక తుయి ఈంజ కబుర్ సంగిలిసి కక్క సంగు నాయ్" మెన నాడుక ఆడ్ర దిలన్.

23 తెదోడి జమాన్లుచొ అదికారి, దొగుల పుంజెకజిన్ జమాన్లుక వెల్లోక బుకారా కెర, "దొన్ పుంజెకజిన్ మాములుమ్ జమాన్లుక, గోడలతె వెగిత డబ్బయ్జిన్ జమాన్లుక, దొన్ పుంజెకజిన్ ఈంటిల్ దెర్ల జమాన్లుక ఆడ్ర దేను. నొవ్వు గంటల్ రాతిక తెయార జా తత్తు. కైసరియ పట్టుమ్ ఎదక జేవ్క తెద్రయిందె.

24 పడ్రె, పవులు వెగ గెతి రిసా, గోడలు దొర్కు కెరు. జో కిచ్చొ ప్రమాదుమ్ నే జతె పేలికైతె తుమ్ జోక బొడొవ దాస" మెన, జేవ్ దొగుల పుంజెకజిన్ జమాన్లుక వెల్లోక ఆడ్ర దిలన్.

25 పేలిక్స క దతి ఉత్తుమ్ రెగిడ్లె.

26 "వెల్లో అదికారి జలో పేలిక్స ఆవ్ క్షెదియ లూసియ తెద్రయ్తి ఉత్తుమ్.

27 తుచితె ఆవ్ తెద్రయ్తో ఈంజో మాన్లుక యూదుల్ దెర, మారిత, గని ఆవ్, అంచ జమాన్లు తెన్ జా కెర, దెక, జోక 'రోమియుడు' మెన సూన, రచ్చించుప కెర్లయ్.

28 జోక 'కిచ్చొ నేరిమ్ వయడ్తతి గే సూనిందె' మెన, జోవయింది సబతె టీవొ కెలయ్,

29 'మొర్తి సిచ్చ జవున్, జేల్తె గల్లి సిచ్చ జవున్ ఆనన్తి కిచ్చి నేరిమ్ కెరె నాయ్, గని ఎక్కి జోవయించి దేముడుచి నముకుమ్క బెదెతిసి, మోసే తెన్ దేముడు దిలి ఆగ్గుల్చి అలవాట్ పిట్టయ్తయ్ జోక నింద కెర్తతి' మెన, అంక రుజ్జు అయ్లి.

30 తెదొడి, 'జోక మారుక కుట్ట కెర అస్తి' మెన, సూన్లయ్, బేగి తుచితె తెర్తయ్తసి, జోక నింద కెర్తనక, 'జేవ్ కి తుచి తీర్పు కెర్ల టాన్తె గెచ్చ, జేవ్ వయడ్డి నేరిమ్చి రిసా తుచి మొక్కె జెచ్చి సాచి సంగుత్' మెన ఆడ్ర దా అస్సి" పేలిక్స్ అదికారిక జమాన్లుచొ అదికారి ఉత్తమ్ రెగిడ్లన్.

31 జాకయ్, జమాన్లుచొ అదికారి సంగిల్ రెతి, జమాన్లు జా రాతి అంతిపత్తి మెలి పట్టుమ్ ఎద పవులుక బొడొవ దా కెర,

32 అన్నెక్ దీసి పెందలె 'జోక కైసరియ పట్టుమ్ ఎద బొడొవ దెతు' ఎక్కి గోడల్తె వెగిల జమానుక ముల, తిల జమాన్లు యెరూసలేమ్తె అన్నె బుల గెల.

33 పవులుక బొడొవ దిలన, జోవయింతెన్ కైసరియతె పాచ కెర, అదికారిక ఉత్తమ్ దా కెర, పవులుక జోచి పుర్రె బీచొ కెలన్.

34 తెదొడి అదికారి, జా ఉత్తమ్ నదు కెర, "తుయి కేన్ ప్రదేసిమ్చొ మాన్సు?" మెన పవులుక పుసెలన్. "కిలికియ ప్రదేసిమ్చొ ఆవ్" మెన పవులు జబాబ్ దిలొ.

35 "దస్సి జలె, తుక నింద కెర్తన ఇన్నె పాచ అయ్లె, తుచి తగు సూనిందె" మెన సంగ కెర, "హెరోదు రానొచి మేడతె ఇన్నెక కడన రకుత్" మెన పేలిక్స్ అదికారి ఆడ్ర దిలన్.

24

1 పాచ్ పొదుల్ గెతికయ్, ఎత్తిక వెల్లొ పూజరి అననీయ, నబతెవ వెల్లెల నుదల్ తెన్, పవులు కెర్తి నింద వయడ్డికయ్ తెర్తుల్లు మెలొ ఎక్కిలో తెన్, ఉట్ట అయ్ల. అదికారిచి గెరితె జా కెర, పవులుచి రిసా జేవ్ సంగిలి నింద వయడ్ల.

2 తెదొడి, అదికారి పవులుక కడ ఆనయ్తికయ్, జో కెర్తి నిందచి తగు సంగుక మెన, తెర్తుల్లు సంగిలన్. "తూయి ఏలువ కెర్తికయ్, వెల్లొ పేలిక్స్ అమ్చి ఒండి ప్రదేసిమ్క సేంతుమ్, చి తుచి దయచి రిసా, అమ్చి దేసిమ్చ కస్టల్ నస్టల్ మార్పువ జా అస్సి.

3 జాకయ్, తుచి ఎదివాట్ తోడుచి రిసా, అమ్చి సర్దసంతోసుమ్ తుక సూనయ్తసుమ్.

4 తుక ఒగ్గర్ కామ్ తయెదె, చి తుక ఒగ్గర్ కొడొ సూనవ అల్లర్ కెరుక నెసుమ్, గని దయ కెర దొన్నె కొడొ జవున్ సూసు.

5 ఈంజొ మాన్సు బలె అల్లర్ కెర్తయ్. ఒండి లోకుమ్చ అమ్చ వయదుల్తె గెచ్చ, ప్రబుతుమ్చి ఉప్పిరి విరోదుమ్ కెర్తి రెతి సికడ్తయ్. పడ్డొ నజరేతు గెచ్చెచొ యేసుచి అలవాట్ కెర మార్పువ జలనచి జట్టుతె జో ముక్కిమ్.

6 ఈంజ నెంతె అన్నె అమ్చి దేముడుచి గుడిక గార్ కెరుక ఉచల్లొ, గని జోక దెర పిట్టయ్లమ్. *అమ్చ ఆగ్గుల్ రెతిచి అలవాట్తె కెర్తి రెతి జోక తీర్పు కెర్తమ్,

7 గని జమాన్లుచొ అదికారి జలొ లూసీయ జా కెర, అమ్చి అత్తి తెంతొ జోక ఉర్ల కడన కెర, నేరిమ్ వయడ్లన పేలిక్స్ అదికారిచి తీర్పు కెర్ల టాన్తె గెతు., మెన ఆడ్ర దిలన్.

8 తూయి సొంత జో మాన్సుక పరిచ్చ కెర్లె, అమ్ వయడ్డి నేరిమ్ ఎత్తిచి రిసా తూయి సూన, రుజ్జుల్ దెకితె".

9 యూదుల్ ఎత్తిజన్ "సరిగా" మెన, జోచి సాచి బెదవ జేవ్ నేరిమ్లు వయడ్ల.

పవులు జబాబ్ దిలిసి

10 తెదొడి, 'తుయి జబాబ్ దేసు' మెన, పవులుక అదికారి సయన్ కెర్లన్, పవులు సంగిలన్. "తుయి ఒగ్గర్ వెర్పులు ఈంజ దేసిమి ఏలువ కెర్లె అస్సిన్చి రిసా దయ్రిమ్ తెన్ ఆవ్ జబాబ్ దెతసి.

* 24:6 24:6 గ్రీకు బాస తెన్ ఈంజ మత్తిలి తొలి రెగిడ్ల నగుమ్ పుస్తకల్తె 6 నంబర్ది ఆకర్ కోడుచి 7 నంబర్ది కోడు తయ్ నాయ్; మెలె, 'అమ్చ తెంతొ దిలన్' ఎద.

11 అప్పుక బార పొదుల్ జంక నేతయ్, దేముడుచి గుడితె బక్తి కెరుక మెన, ఆవ్ యెరూసలేముతె గెలయ్. తుక రుణ్ణు కావలె మెలె, సాచుల్ అన్తి.

12 “ఆవ్ ఒత్త తా, దేముడుచి గుడితె జవున్, నబ గెరలె జవున్, పట్టుముతె జవున్, ఆవ్ కిచ్చొ వేర కోడు సికడ్డిసి దెక అన్తి గె? ఆవ్ ప్రజెల్క అల్లర్ కమె సికడ్డిసి దెక అన్తి గె? నాయ్!

13 వడ్డొ, అంచి రిసా జేవ్ అప్పె నింద కెర్లినక కిచ్చొ రుణ్ణు దెకవుక నెతిర్.

14 గని తుచి మెక్కె ఆవ్ కిచ్చొ ఒప్పున్తసి మెలె, ‘తప్పు’ మెన జేవ్ సంగితి ‘యేసుక్రీస్తు దొర్పు. జలి రచ్చన వాల్’ మెన ఒప్పున్తి నాయ్. సుబుమ్ కబుర్క నంపజా ఆవ్ ఇండ, అమచ †మోసే పూర్ణుమచొచి అత్తి దేముడు రెగ్గయలె అగ్గల్ బెలెకు, పూర్ణులచి అత్తి సంగిల దేముడుచ కబుర్లుతె తిలిసి ఎత్తి, జో దేముడుచ కబుర్లు రెగ్గిసి ఎత్తి, ఆవ్ నంప కెర్లసి.

15 ఈంజేవ్ ఒప్పున్తిసి ఆవ్ కి దయిరిమ్ తెన్ పూర్తి నంప కెర్లసి, నత్తిమ్ ఇండిల న అబద్దుమ్ ఇండిలసికి మొర్లె కి, జీవ్ జా ఉట్ట గెచ్చులె.

16 జాకయ్, దేముడుక కి, మాన్సుల్క కి కిచ్చొ పాపుమ్ నే కెర్లి రిసా, ఆవ్ జాగర్ల దెకన్తసి.

17 “ఒగ్గర్ వెర్పుల్ గెతికయ్, యూదుల్చ బీద సుదల్క తోడు దెంక మెన, ఒత్తచ మాన్సుల్ దిలి డబ్బుల్ దెరన అయ్లయ్, చి అమచొ దేముడుక కాసుక దెంక మెన, దేముడుచి గుడితె గెలయ్.

18 సుద్ది జతి కారిమ్ కెరన ఆవ్ దేముడుచి గుడితె దస్సి బక్తి కెర్తె తతికయ్, అసియా ప్రదేసిమ్చ అమచ యూదుల్చ వల్లెల మాన్సుల్ అంక దెకిల. గని కేన్ జనాబ్ గగ్గల్ గుగ్గల్ జలిసి కిచ్చొయ్ నాయ్.

19 అంచి రిసా అసియాచ యూదుల్ కిచ్చొ నేరిమ్ వయడుక ఇస్టమ్ జతతి, జెవ్వి అప్పె ఇన్నె తుచి మెక్కె సాచి జంక జలె చెంగిల్ తత్తి.

20 గని జేవ్ నాయ్, చి ఈంజేవ్ యెరూసలేముచ మాన్సుల్ నబ కెర్లినెతె ఆవ్ నింద జలి పొది, ఆవ్ కిచ్చొ తప్పు కెర్లినచి రుణ్ణు దెకిల గే, సూన్ల గే, సంగుతు.

21 ఎక్కి కోడుచి రిసా జేవ్ సంగుక జయెదె. జోవయింబి నెడిమి ఆవ్ టీవోజ తా, ‘మొర్లె కి జీవ్ జా ఉట్టుమ్దె’ మెన ఆవ్ సంగితసిచి రిసా అంక ఆజ నింద కెర్తెత్తి.” దస్సి పవులు అదికారిక సంగిలన్.

పవులుక తీర్పు నే జతె జేల్తె రకితె తిలిసి

22 అదికారి జలో పేలిక్స్, యేసుక నంపజతి చి రిసా ఇదిల్ ఒగ్గర్ జానె, చి తీర్పు వాయిద కెర్లి రితి, “జమాన్సుచొ అదికారి జలో లూసియ ఇత్తల్ ఉట్ట అయ్లె, తుక వయడ్డి నేరిమ్చి తగు సూనిందె” మెన, పవులుక సంగిలన్.

23 వడ్డొ, ఒత్త తిలో పుంజెక్జిసి జమాన్సుక వెల్లోక, “ఈంజో మాన్సుక జేలి కెర, గని బంద గట్ట నాయ్, గదితె డంక నాయ్, చి జోచ గోతుసుదల్తె కో గోత్ అయ్లె కి, జోక దొర్పు. జలిసి కిచ్చొ ఆన్లెకి, అడ్డు కెర నాయ్” మెన పేలిక్స్ ఆడ్ర దిలన్.

24 సగుమ్ దీసల్ గెలి వడ్డొ, పేలిక్స్ అదికారి యూదుడుయ జలి ద్రుసిల్ల మెలి తేర్నిక కడ ఆన, పవులు జేలి తిలిన్తె అయ్లె. పవులుక “జెవున్” మెన పేలిక్స్ సంగ తెద్రయ్తికయ్, అయ్లో. యేసుక్రీస్తుచి ఉప్పిరి నముకుమ్ తిలిన్చి బోదన సూన్ల.

25 పవులు బోదన కెర కెర, కిచ్చొచి రిసా సంగుక దెర్లన్ మెలె, పున్నిమ్చి రిసా, ఆన కెరంతి రిసా, చి ఆకర్ దీసిక లోకుమ్చ మాన్సుల్క యేసుప్రబు పరిచ్చు కెర †తీర్పు కెరుక తిలిన్చి రిసా సంగిలన్, చి పేలిక్స్, సొంత కెర్తె తప్పుల్క ఉచర లాజ్ జా బియె కెర, “అప్పెచి మట్టుక ఉట్ట గెచ్చ తా. అంక అవ్కాసుమ్ తిలె, తుక కెయెక గే అన్నె బుకారిందె” మెన జోక తెద్రయ్లన్.

26 వడ్డొ, పేలిక్స్ అన్నె కిచ్చొచి రిసా ఉచరె తిలో మెలె, ‘విడ్డల్ జతి రిసా ఏక్ వేల పవులు లంచుమ్ దెయెదె’ మెన ఆన జా తిలో. జాకయ్ ఒగ్గర్ సుట్టు జోక బుకారా బుకారా, జో తెన్ లట్టణ్ణె.

† 24:14 24:14 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్లె అగ్గల్ మెన అమ్ జానుమ్. ఈంజె కోడొ ఎత్తి, బైబిల్తె అగెచి పావ్ పుస్తకుమతె రెగ్గయ్ జా అన్తి. ఈంజె దెకవుక మెన కుపియ జానతె నొయ ప్రమానుమతె మోసే పూర్ణుమచొచి అత్తి రెగ్గి దేముడుచ అగ్గల్ మెన రగ్గవ అన్తి. † 24:25 24:25 కిచ్చొ తీర్పు మెలె, జోవయింక నంపజా నత్తిమ్ జలసక పరలోకుమతె కడ నెతిసి, గని నంప నెంజె అబద్దుమతె తా గెలసక సిచ్చతె గత్తిసి.

27 గని పవులుక ఒత్త జేలి కెర దొన్నె వెర్పుల్ గెతికయ్, పేలిక్స్ అదికారి వేరతె మార్పుప జలో, చి పొర్నియన్ పెస్టున్ అదికారి జలో. మార్పుప జలి పొది, యూదుల్క పులవుక మెన పవులు జేల్తె దన్నె తతి రితి పేలిక్స్ ముల దిలో.

25

పవులుచి రిసా యూదుల్ అన్నె అల్లర్ ఉచర్లసి

1 ఏలుప కెరుక మెన, పెస్టున్ యూదుయ ప్రదేసిమి ఉట్ట జా తిర్పతి గెలి పడ్డె, జోవయించి మేడ తిలి కైసరియ తెంతో బార్ జా, యెరూసలేమ్తె గెలో.

2 వెల్లెల పూజర్లుచి యూదుల్చ అన్నె వెల్లెల మాన్సుల్ జోతె జా కెర, పవులుచి రిసా సంగిల.

3 అన్నె, “దయ కెర పవులుక యెరూసలేమ్తె తెద్రవు” మెన, బతిమాల్పా జా సంగిల. జో అయిలె, వట్టెలుక దెర మారుక మెన ఉచర్తతి.

4 పెస్టున్, “పవులు ఒత్త కైసరియతె జేల్తె అన్నె, చి ఒగ్గర దీసల్ నే గెతె అవ్ ఒత్త అన్నె గెచ్చిందె” మెన సంగ.

5 “అవ్ ఒత్త గెచ్చుక బార్ జలె, తుమ్చ అదికారుల్ అంచి తెన్ బెద జెతు, చి జో మాన్సు కిచ్చొ నేరిమ్ కెర తిలె, రుజ్జు దెకవుతు!” మెన సంగిలన్.

పెస్టున్ పవులుచి తగు అన్నె సూన్లసి

6 పెస్టున్ ఏక్కి అట్టు గె దెస్సు గె పొదుల్ ఒత్త యెరూసలేమ్తె తా కెర, కైసరియతె అన్నె ఉట్ట అయిలన్, చి అన్నెకీ దీసి పవులుచి తగుచ రుజ్జుల్ సూనుక వెన, పవులుక “జెవున్” మెన అద్ర దిలో.

7 పవులు యెరూసలేమ్ తెంతో అయిల. యూదుల్ జోవయించి సుట్టుసంత టీవోజె కెర, కిచ్చొ కిచ్చొ వెల్లెల నేరిమ్లు ఒగ్గర్ సంగిల, గని రుజ్జుల్ దెకవుక నెతిర్ల.

8 తెదొడి పవులు “యూదుల్చ అగ్గల్ రితి కెర్లిసిచి అలవాట్ ఉచర్లె కి, కిచ్చొ నేరిమ్ కెరి నాయ్, దేముడుచి గుడిచి రిసా కి కిచ్చొ నేరిమ్ కెరి నాయ్, చి అమ్క ఏలుప కెర్లొ కైసరిచి రాజెమ్క కి కిచ్చొయ్ ఇదిలిసి నేరిమ్ కి కెరి నాయ్” మెన, జబాబ్ దిలన్.

9 పెస్టున్, మాత్తుమ్, యూదుల్క పులవుక మెన, పవులుక, “యెరూసలేమ్తె గెచ్చొ ఈంజేవ్ అంక సూనయిల నేరిమ్లుచి రిసా తీర్పు కెరపనుక ఇస్టుమ్ జతసి గే?” మెన పుసిలన్.

10 గని పవులు జబాబ్ దిలన్, “కైసరి వెల్లొ రానొ ఏలుప కెర్లి రితిచి గెతె తీర్పు జంక మెన ఇన్నె అవ్ టీవోజె అన్నె. ఇన్నెయి అంచి తగు తీర్పు సరిగా జంక. యూదుల్క అవ్ కిచ్చొ తప్పొ కెరి నాయ్. తుయి కి జా కోడు జాన్సి.

11 అవ్ తప్పొ కెర్లయ్ జలె, మొర్తి సిచ్చుచి ఎదిలి నేరిమ్ కెర్లయ్ జలె, అవ్ మొర్తి కి బాద నాయ్. గని ఈంజేవ్ వయడ్ల నేరిమ్లు అరిచ జలె, అంక యూదుల్చి రితి తీర్పు కెర సిచ్చొ కెరుక మెన ఇన్నెచి అత్తి అంక కో సార్పు కెర దెంక నాయిమ్ నాయ్. కైసరి వెల్లొ రానొ సొంత అంచి తగు సూన తీర్పు కెర్వు” మెన, సంగిలన్.

12 తెదొడి, పెస్టున్, జోవయించి సబచ అదికారుల్ తెన్ వెన లట్టల్లు, చి పవులు, “ కైసరి సొంత అంచి తగు సూన తీర్పు కెర్వు” మెన ఇస్టుమ్ జలది. ఈంజ తగు జా సెలవె దెతయ్. కైసరుచి గెరి గో” మెన తీర్పు సంగిలన్.

పెస్టున్ పవులుచి రిసా పెస్టున్ అగ్రిప్పు రానొక సంగిలిసి

13 నగుమ్ దీసల్ గెతికయ్, ‘పెస్టున్ నొవర్ ఏలుప కెర్లయ్’ మెన, ఇదిల్ ఉత్తర పక్కవొ రానొ జలో అగ్రిప్పు, బేన్సి జలి బెర్లికే తెన్, కైసరియతె గోత్ అయిల.

14 ఒగ్గర్ దీసల్ ఒత్త తతికయ్, పవులుచి తగుచి రిసా పెస్టున్ జో రానొక సంగిలన్. పేలిక్స్ ఏలుప కెర్లి తెంతో జేలి జలో ఏక్కిలో ఇన్నె అన్నె.

* 25:8 25:8 వెల్లొ రానొచి, రానొచి. † 25:10 25:10 సీజరు వెల్లొ రానొ, మెలి వెల్లొ రానొ, రోమ్ పట్టుమ్తె తా ఈంజ ‘బారికుల్’ చి పునకుమ్తె సంగిల ప్రదేసిమ్లు ఎత్తిచి ఉప్పిరి ఏలుప కెర్లయ్. రోమ్ దేసిమ్చి ప్రబుతుమ్క వెల్లొ, జో.

15 జలె, ఆవ్ యెరూసలేమ్తె గెచ్చు తిలి పొది, ఇన దన నేరిమ్మలు కెర అస్సె, మెన వెల్లెల వూజర్లు చి యూదుల్చ అస్సె వెల్లెల మాస్సుల్ సంగ, తీర్పు కెర సిచ్చ కెరు మెన, అంక సంగిల.

16 “జేవ్ యూదుల్ దస్సి సంగితికయ్. నేరిమ్ వయడ్లన నేరిమ్ వయిలోసా ఎక్కితె తీర్పు కెర్లె టాన్తె జా తగు సూనవుక నే టీవోజతె అగ్గె, నేరిమ్ వయిలోసా జేవ్ నింద కెర్తినక జబాబ్ సంగుక అవ్కాసుమ్ నే దెతె అగ్గె, అమ్చ రోమియల్చి అలవాట్ తెన్ జోక కచి అత్తి సార్చు దెంక జయె నాయ్, మెన, జబాబ్ దిలయ్.

17 జాకయ్, జేవ్ ఇత్తల్ ఉట్ట అయ్లి బేగి, వాయిద నే కెర్తె, అన్నెక్ దీసి తగు సూనవుక మెన తీర్పు కెర్తినతె వెస, జోక జెవున్ మెన, కడ ఆనయ్లయ్.

18 నేరిమ్ వయడ్లన టీవో జలి పొది, కిచ్చి విలువచ నేరిమ్మలు వయడ్డి నాయ్.

19 జేవ్ కిచ్చిచ నిందల్ జోక సంగితె తిల మెలె, జోవయింవో దేముడుచి అలవాట్చి కమొచి రిసా, పడ్డో యేసు మెలో ఎక్కిలోక ‘మొర అస్సె జిలో’ మెన పవులు సంగిలిన్క గగ్గోల్ జతె తిల.

20 జాకయ్, దస్సు తగులు తీర్పు కెరుక నేన కెర, ఈజేవ్ సంగిత నిందల్చి రిసా యెరూసలేమ్తె గెచ్చు తగు సూనవ తీర్పు కెరవనుక ఇస్టుమ్ జతసి గె? మెన పుసిలయ్.

21 గని, వెల్లో రానో జలో కైసరు సొంత తీర్పు కెర్పు, మెన మదెనె ఇన్నె జేలి తయిందె మెన పవులు ఇస్టుమ్ జతికయ్, కైసరతె ఆవ్ తెద్రయ్తి ఎదక జోక రకితె తత్తు మెన, జేలితె అన్నె గలిలయ్,” మెన పెస్సున్ సంగిలన్.

22 జాకయ్ అగ్రిప్పు రానో, ఆవ్ సొంత జోచి తగు సూనుక అంక ఇస్టుమ్, మెన సంగిలన్, చి “దస్సి జలె, కలిక జోక సూన్తె” మెన, పెస్సున్ సంగిలన్.

అగ్రిప్పు రానో పవులుచి తగు సూన్లసి

23 జలె, అన్నెక్ దీసి, అగ్రిప్పు రానో, బెర్లికే మెలి బేస్సి తెన్ బార్ జా, జమాన్లుచ అదికారుల్ తెన్, చి పట్టుమ్చ వెల్లో సుదల్ తెన్, గెరితె ఒగ్గర్ గవురుమ్ తెన్ జా కెర, వెసిల. పవులుక కడ ఆన మెన పెస్సున్ ఆడ్ర దెతికయ్, కడ ఆన్ల.

24 తెదెడి, బెర తిలసక పెస్సున్ “ఓ రానో జలో అగ్రిప్పు, ఇన్నె అయ్లన ఎత్తిజన, ఈజో మాస్సుక తుమ్ దెకితను. ఇన్నెచి రిసా జా సుట్టు యూదుల్ ఎత్తిజని, యెరూసలేమ్తె కి ఇన్నె కి, అంక బలవంతుమ్ కెర, జో అన్నె జంక కిచ్చొక? మొర్పు! మెన, కేకుల్ గల్లె తిల.

25 గని, ‘మొర్పి సిచ్చ జతి కేన్ నేరిమ్ కెర నాయ్’ మెన అంక డీసిలి, చి ఈజో, కైసరు వెల్లో రానో సొంత అంచి తగు, సూన తీర్పు కెర్పు, మెన కోర్ప జతికయ్, దస్సి జలె, జో తెయి రోమ్తె తుక తెద్రయిందె మెన, ఇన్నెక ఒప్పన్లయ్.

26 గని, ఇన్నెచి రిసా అంచో కైసరు ప్రబుక దెతి రిసా కిచ్చి నేరిమ్ రెగుడుక నేన అస్సి; కిచ్చి నేరిమ్ వయడ్డిసి నాయ్ చి రిసా ఎత్తిచి మొక్కె, ముక్కిమ్క తుచి మొక్కె, ఓ అగ్రిప్పు రానో, జోక టీవో కెర అస్సి. కిచ్చి మెన మెలె, ‘జేవ్ జోచి కొడె సూన్ల, అమ్ ఇన్నెక పరిచ్చ కెర్లె, ఇన్నెచి రిసా కిచ్చి జవున్ రుజ్జు అమ్చో వెల్లో రానో కైసరుక రెగుడుక జయెదె’.

27 జలె, జేలి జలో కేన్ మాస్సుక ఆది, కిచ్చి నేరిమ్ వయడుక నేన్తె తెద్రవుక బెదితయ్ నాయ్, మెన ఆవ్ ఉచర్లసి” మెన ఇసి సంగిలన్.

26

అగ్రిప్పు రానోచి మొక్కె పవులు సాచి సంగిలిసి

1 తెదెడి, అగ్రిప్పు రానో పవులుక, “తుయి సొంత జబాబ్ దెంక తుక సెలవ్ దెతసి” మెలన్, చి పవులు ఆతు తెన్ నయన్ కెర, ఇసి మెన జబాబ్ దిలన్.

2 “ఓ అగ్రిప్పు రానో, యూదుల్ కెర్లె నిందల్ ఎత్తిచి రిసా తుచి మొక్కె ఆవ్ జబాబ్ దెంక సెలవ్ దొర్కు జలిచి రిసా అంక సర్ల.

3 యూదుల్ కెర్త రకల్ ఎత్తి, యూదుల్చ తగుల్ ఎత్తి, తుయి జాన్సి, జాకయ్, తుయి 'బమ్మ నెంతె అంచి సాచి సరిగా నూసుక' మెన, ఆవ్ తుక జొకర్తసి.

4 ఆవ్ బాల తతె తెంతో, అమచ సొంత మాన్సుల్తె కి ఈంజ యెరూసలేమ్ పట్నుమెతె కి, ఆవ్ కిసి జలయ్ గే యూదుల్ ఎత్తిజిన్ జాన్తి.

5 అమచి మొత్తుమచ ఆగ్గుల్ ఎత్తిజిన్చి కంట నిదానుమ్ కెర్త అమ్ పరిసయ్యుల్ బక్తి కెర్తి రితి ఆవ్ ఇండిలిసి మెన జేవ్ అగ్గయ్ తెంతో జాన్తి. జేవ్ సత్తిమ్ సాచి సంగుక ఇస్సుమ్ ఒత్త జలె, ఇసి సంగిత.

6 అప్పె, జలె, కిచ్చొక అంక తగు కెర అస్సి మెలె, అమచ పూర్లుమచక అమచొ దేముడు సంగిలి కోడు ఆవ్ నంపజా దయిరిమ్ తెన్ తిలి రిసాయి.

7 జా కోడె సంగిలిసక 'అమ్క జెయిమ్ జప్పన్!' మెన, అమచ బార సెకుమలుచ యూదుల్ రోజుక అందరె మెద్దెనె నిదానుమ్ తెన్ బక్తి కెర్తెతి. జేవ్ కోర్ప జతినచి అసచి రిసా మెన ఆవ్ నంపజతసిచి రిసా, ఓ రానో, అంక నింద కెర్తెతి.

8 'మొర్తసక దేముడు జయిడ్తయ్' మెన సంగిలె, కిచ్చొక తుమ్ ఎత్తిజిన్ నంప కెరుక నెత్తెను?

9 "అగ్గయ, జలె, నజరేతు గవ్విచొ యేసుక 'జ్యోయ్య దొర్కు జలో రచ్చించుప కెర్తొసా' మెన మాన్సుల్ సంగిలె, 'అబద్దుమ్' మెన, మెన్సు నిదానుమ్ ఉచర, ఆవ్ అగ్గె నంపజలెసక జలె అల్లర కెర్తె తిలయ్.

10 యెరూసలేమ్తె జోవయింక *అల్లర కెర్తయ్. కిసి మెలె, వెల్లెల పూజర్లుచి నెలవ్ నజన, ప్రబుచయ్ జల మాన్సుల్క జేల్తె గలిలయ్, చి 'మెర్తి సిచ్చ జతు' మెన, ఆవ్ ఒప్పన్తయ్.

11 ఎత్తి, నబగెరి గెచ్చ జోవయింక సిచ్చల్ కెర్తె తిలయ్, చి 'యేసుక రచ్చించుప కెర్తొసా జతో క్రిస్తు నెంజె మెన సంగ జోవయింక దూసుప కెర్తు' మెన, జోవయింక అల్లర కెర్తయ్. జోవయించి రిసా అంక వెర్తి కోపుమచి రిసా, వేర దేసిమ్లుచ పట్టల్తె గెచ్చ కి, జోవయింక అల్లర కెర్తె తిలయ్.

12 "దస్సి, ఏక్ సుట్టు, 'నంపజలెసక అల్లర కెరిందె' మెన, వెల్లెల పూజర్లుచి నెలవ్ తెన్ జోవయించి అదికారుమ్ తెన్ ఏక్ దీసి దమన్సు, పట్టుమతె గెతి పట్టి గెతె తతికయ్,

13 ఓ రానో, మెద్దెనె, పరలోకుమ్ తెంతో చి ఏక్ వెల్లి ఉజిడి దెకిలయ్. పొద్దుచి ఉజిడిచి కంట వెల్లి ఉజిడి. అంచి సుట్టునంత, అంచి తెన్ ప్రయానుమ్ కెర్తె తిలసచి సుట్టునంత దీస లగిలి.

14 జా దెక, ఆమ్ ఎత్తిజిన్ ఎట్టో సేడ్డికయ్, అమచి ఎట్టి బాస తెన్ ఏక్ అవాడ్ సంగిలిసి నూన్తయ్, 'సావులు, సావులు, అంక కిచ్చొక అల్లర కెర్తెసి? ఆవ్ సికడ్డిసి తుయి నెన కెర, తుకయి తూయి నొప్పి కెరంతసి?', మెన సంగిలన్.

15 'తుయి కొన్సో, ప్రబు?' మెన పుసిలయ్, 'తుయి అల్లర కెర్తొ యేసు అఎవ్వి.

16 తుయి ఉట్ట, టీవోజ. కిచ్చొక తుక అప్పె డీస అస్సి మెలె, అంచ కమె కిచ్చొ దెక అస్సిన్ గే అన్నె కిచ్చొ అంచ కమె తుయి దెకితె గే, జా ఎత్తిచి రిసా తుయి సాచి సంగుక మెన, తుక ఆవ్ నిసాన తెర్తయ్తసి.

17 యూదుల్చి అత్తి కి, యూదుల్ నెంజలసచి అత్తి కి, తుయి అల్లర సేడ్డి కి, ఆవ్ తుక రచ్చించుప కెరిందె. యూదుల్ నెంజలసతె తుక తెర్తయ్తసి.

18 జేవ్ గుడ్డి జలె రితె జా తిలె కి, దెక, అందర్బుద్ది ముల, ఉజిడ్ బుద్ది జా, నయ్తానచి సేప కెరుక ముల, దేముడుచి సేప కెర్తు' మెన, 'జేవ్ కెర్లె పాపల్ పుంచి జతు చి అంక నంపజా సుద్ది జలె అన్నె మాన్సుల్ తెన్, జోవయింక కి టాన్ దొర్కు జప్పన్' మెన తుక 'జ్యోయ్య అంచి సాచి సంగున్' మెన, తుకయ్ ఆవ్ తెర్తయ్తసి.", మెన అంక ప్రబు తెదెడి సంగిలన్.

19 "జాక, ఓ అగ్రిప్ప రానో, పరలోకుమ్చొ ప్రబు జా దీసి దెకయ్లిసక నూనయ్లిసక నే పిట్టయ్తె నిదానుమ్ కెర,

20 తోలితో దమన్సుతె, పడ్డె యెరూసలేమ్తె, పడ్డె ఒండి యూదయ ప్రదేసిమి, పడ్డె యూదుల్ నెంజలసచి దేసిమ్లుతె గెచ్చ, ఒత్త కి, తుమ్ కెర్లె పాపల్చి రిసా పెట్టి దుకుమ్ జా ముల, దేముడుక తుమ్ నంపజా మార్కుప జలెసక రుజ్జు జతి రితి సత్తిమ్ ఇండ మెన, బోదన కెర్తె తిలయ్.

21 జాకయ్, యూదుల్ దేముడుచి గుడితె అంక దెర, అంక మారుక కుత్త కెర్తె.

* 26:10 26:10 బారికూల్ 9 అద్యయిమ్.

22 “అజి ఎదక కి, దేముడు అంక తోడు తత్తయచి రిసా, బాల వెల్లో ఎత్తిజిన్చి మొక్కె ఈంజ సాచి అవ్ సంగితసి. ‘జర్లు జయెదె’ మెన దేముడుచ కబుర్లు సంగిలన సంగిలిసి తెన్ మోని పూర్లుమచొచి అత్తి దేముడు సంగిలిన్తెన్ బెదితి సాచి అవ్ సంగితసి. కిచ్చొ వేరచి నెంజె.

23 జేవ్ కిచ్చొ సంగిలిన్చి రిసా అవ్ సంగితసి మెలె, సైముల్ నీడ క్రిస్తు మొరుక అస్సె, చి అస్సె జివ్ జా ఉట్టితనక జో మొదోల్ సుదో జయెదె, చి అమచ యూదుల్ కి, యూదుల్ నెంజలనక కి జోచి ఉజిడి జో దెకయెదె, మెన, పూర్లుల్ సంగిలి కోడు” మెన వవులు సాచి సంగిలన్.

పెస్సున్, పవులు, అగ్రిప్పు లట్టల్లిసి

24 పవులు దస్సి సాచి సంగితె తతికయ్, పెస్సున్ గట్టిజ అవాడ్ కెరన, “పవులు, తుయి వెరె జా అస్సిన్. తుయి ఒగ్గల్ నదు కెర్లిసి తుక వెరె కెర మార్చువ కెర్తయ్” మెన సంగిలన్.

25 “తుక జోబర, వెల్లో పేస్సున్. అవ్ వెరె నెంజి! అవ్ సంగితిసి సత్తిమ్.

26 రానొక పుసు. ఈంజ ఎత్తి జోక ఎర్కె, చి దయిరిమ్ తెన్ జోపయింబి మొక్కె అవ్ సంగితసి. ఈంజ ఎత్తి కిచ్చొ గుట్టుచి నెంజె. జో కి ఈంజ ఎత్తి కచితుమ్ సూన తయెదె” మెన, పవులు సంగ,

27 రానొచి పక్క పస్స, “రానొ జలో ఓ అగ్రిప్పు, ‘జర్లు జయెదె’ మెన అమచొ దేముడుచి కబుర్లు సంగితన పూర్లుమ్ రెగ్గయల కొడె తుయి నంపజతసి గే? తుయి ‘నంపజతయ్’ మెన జాని” మెన, పవులు సంగిలన్.

28 అగ్రిప్పు పవులుక, “అంక బే బేగి మార్చువ జా నంప జవున్, మెన తుయి ఉచర్తసి గే?” మెన పులిన్,

29 పవులు, “బే బేగి జవున్, ఆల్నిమ్ జవున్, గని ఎక్కి తుకయి మెని నాయ్. అజి అంచి కోడు సూన్తన ఎత్తిజిన్ కి ‘ఈంజేవ్ గొల్పుల్ క పిట్టవ, అంచి రితి జా మార్చువ జతు!’ మెన ఆన తెన్ దేముడుక అవ్ ప్రార్దన కెర్తసి” మెన, పవులు రానొక సంగిలన్.

30 తెదొడి రానొ, పేలిక్స్, బెర్సికే, చి జోవయింతెన్ వెన తిలన ఎత్తిజిన్ ఉట్ట, కెర,

31 బార్ జా, ఎక్కిలోక ఎక్కిలో కిచ్చొ మెల మెలె, “ఈంజొ మాన్సు కిచ్చొ మొర్తి సిచ్చుచి ఎదిలి తప్పు జవున్, జేలి జతిన్చి ఎదిలి తప్పు జవున్, కిచ్చొయ్ కెరె నాయ్” మెన సంగిల.

32 చి పెస్సున్క అగ్రిప్పు రానొ, “కైసరు వెల్లో రానొ సొంత అంచి తగు సూన్సు మెన ఈంజొ మాన్సు సంగితో నాయ్ జలె, ఇన్నెక విడ్డల్ కెరుక జతి!” మెన సంగిలన్.

27

రోమ పట్టుమతె పాపులీసి ప్రయాసుమ్ గెచ్చుక దెర్లిసి

1 అమ్ ఇటలీ దేసిమి ప్రయాసుమ్ గెచ్చుక మెన అదికారుల్ సంగితకయ్, పవులుక చి అన్నె జేలి తిలనక, బెగుస్తు వెల్లో రానొచి మెలి జమాన్లుతె, పుంజెక్జిన్ జమాన్లుక వెల్లో యూలి మెలో ఎక్కిలోచి అత్తి సార్చు కెర్.

2 తెదొడి, వేర దేసిమచి అర్దముత్తియ పట్టుమచి ఓడ ఆసియా ప్రదేసిమచ రేపుల్ వాల్ గెచ్చెదె మెన, జా ఓడతె వెగ బార్ జలమ్. అన్నె మాసిదోనియ ప్రదేసిమచి దెస్సలొనీక పట్టుమచొ అరిస్తార్కు అమ్చి తెన్ తిలో.

3 ఉత్తర పక్క గెచ్చు గెచ్చు, అన్నెక్ దీసి సీదోను రేపుతె ఉత్తిర్లమ్, చి యూలి, పవులుక చెంగిల్ దెక, జోచ ఒత్తచ గోతుసుదల్తె జో గోత గెచ్చు ఇదిల్ పుండ సుక్కుమ్ జంక మెన, సెలవ్ దిలన్.

4 పుండ, ఓడతె అన్నె వెగ, ఒత్త తెంతో అన్నె ఉత్తర పక్క గెచ్చు, తెదొడి పడమర పక్క గెచ్చు, కుప్ర డిబ్బుక జిన్లమ్. కుప్రక వేర పక్క గతమ్, జలె, వాదు అల్లర్ కెర్.

5 ఒత్త తెంతో, కిలికియచి పంపూలియ ప్రదేసిమలు సాడి ఓడ తెన్ గెచ్చు గెచ్చు, లుకియ ప్రదేసిమచి మూర రేపుతె ఉత్తిర్లమ్.

6 ఇటలీతె గెతి అలెక్సంద్రియ పట్టుమ్ తెంతో చి ఓడ ఒత్త తతికయ్, జా ఓడతె వెగ గెచ్చుక జయెదె మెన పుంజెక్జిన్ జమాన్లుక వెల్లో జాన కెర, అమ్క వెగయలన్.

7 సగుమ్ దీసల్ తిరిమ్ తిరిమ్ ఓడ తెన్ గెలమ్, గని తెదొడి వాడు అల్లర్ కెర్తి, చి క్షీదు రేపు పాసి అయ్లీ పొది, అన్నె వడమర పక్క, గెచ్చుక ఉచర్లె వాడు పూర్తి అడ్డు కెర్తికయ్, దచ్చెన పక్క, క్రేతు డిబ్బచి నల్గినే మెలి కొన్నక కన్నన జీన,

8 క్రేతుచి లాసేయ పట్టుమ్చి పాసి తిలి 'సూటి రేవుల్' మెలి టాసితె పావెలమ్.

వెల్లి వాడు అల్లర్ కెర్తిసి

9 ఒత్త సగుమ్ దీసల్ తిలమ్, చి చువ్వె తతి అమ్చి పండగు కేడ్డికయ్, చల్లి పొది పాసి జెతయ్, చి జా పొదిచి వాడుక ఒత్త ఓడతె గెచ్చుక ప్రమాదుమ్చి రిసా,

10 "గోతుసుదల్, అమ్ అప్పె బార్ జలి, ఓడక, సామనక, చి అమ్క ప్రమాదుమ్, ఒగ్గర్ నస్టుమ్ జమ్దె మెన దెకితన్" మెన, పవులు జాగర్ల సంగిలన్.

11 గని పవులు సంగిలినక పుంజెకజీన్ జమాన్లుక వెల్లి విలువ నే దెకితె, ఓడ ఇండయ్తనచొ ఎజోమాని, అన్నె ఓడచొ ఎజోమాని దొంగలచి కోడు సూన్లన్, చి

12 "ఈంజ రేవుతె వాడు సరిగా అడ్డు జయె నాయ్ చి రిసా ప్రమాదుమ్" మెన ఓడతె తిల మాన్పుల్ ఎత్తిజిన్ సంగ, "ఏక్ వేల క్రేతు డిబ్బచి పీనిక్స్ మెలి అన్నె రేవుతె పావెలి, ఇదిల్ వేర దిక్కుక మొక్క జతయ్ మెలె, నైరుతి దిక్కుకచి వాయవ దిక్కుకచి చల్లి పొది ఒత్త రకిలె చెంగిల్ కిచ్చొగ" మెన సంగిల.

13 తెదొడి, దచ్చెన పక్క, తెంతో ఉల్లుపల్లుల్లు వాడు కెర్తికయ్, 'అప్పె బార్ జలి చెంగిల్ కిచ్చొగ' మెన, ఓడక టీచొ కెర్తి లంగరు మెలి ఇనుము సామన్ సముద్రుమ్ తెంతో కడ కెర, ఇండవుక దెర, క్రేతు డిబ్బచి గట్టుక పాసి గెచ్చ తా, ఇండయ్తె తిల.

14 గని ఈసాన్యమూల పక్క తెంతో జెతికయ్ వెల్లి వాడు బుయి పక్క తెంతో వీరుక దెర్లి,

15 చి జా వాడుక నెత్త కెర, ఓడ పనుల, వాడు గెతి దిక్కుతె పెల్లి జలి.

16 తెదొడి, కిసి గే, కెద మెలి ఇదిలిసి డిబ్బచి గట్టుతె జా కెర, ఓడ పడ్డ కడ దోనిక కన్నన ఓడతె వెగడ్లమ్.

17 డిట్టుమ్ జవున్ మెన, డిట్టుమ్ వాలిచొ తెన్ ఒండి ఓడక బందిల. తెదొడి, సూర్తి మెలి ఇన్న డిబ్బతె ఓడ పెల్లి జలి టక్కున దెరన గెలిదె మెన బియె కెర, ఓడ తిరిమ్ ఉట్ట గెన్ను మెన, జేవ్చ వెల్లెల మాన్పుల్ తెరల్ గట్ట ఉత్తయ్ల.

18 గని, వాడు కెర్లల్ ఒగ్గర్ కెర, ఓడక ఒగ్గర్ అల్లర్ కెర్తికయ్, అన్నెక్ దీసి, ఓడతె దువార్తె తిలి సామన్ సముద్రుమ్తె గలుక దెర్ల, ఓడ సుల్గున జవున్ మెన.

19 గని వాడు తగుప జయె నాయ్, చి తిర్తెక ఎత్తిజిని, బాల వెల్లి, సొంతయ్ బెద, ఓడ ఇండయ్తె సామన్ కి ఉక్కుల సముద్రుమ్తె గలిలమ్.

20 ఒత్త తెంతో, వాడు పాని గట్టిజ జతికయ్, ఒగ్గర్ దీసల్ జలి పొద్దు డీని నాయ్, సుక్కల్ డిస్తి నాయ్, చి రచ్చించుప జతి దయిరిమ్ ఎత్తిజినక పూర్తి గెలి.

21 జేవ్ మాన్పుల్ ఒగ్గర్ దీసల్ చువ్వె తతికయ్, పవులు జోవయిచి నెడిమి పురె జా, "ఆవ్ తెదొడి సంగిలిసి సూన్తద్ జలి, క్రేతు తెంతో బార్ జతద్ నాయ్, ఈంజ నస్టుమ్ కన్నుమ్ నీడ్డద్ నాయ్.

22 ఈంజ ఓడ పాడ్ జా గెచ్చెదె, గని కేన్ మాన్పు మొర్పు నాయ్, అప్పె తుమ్ దయిరిమ్ తెన్ తా మెన ఆవ్ తుమ్క సంగితన్.

23 కిసి జాని మెలి, ఆజ రాతి, ఆవ్ నంపజిలో దేముడుచి దూత ఎక్కెలో జా కెర, అంచి పాసి టీచ,

24 అంక, 'పవులు, తుయి బి నాయ్. తుయి కచితుమ్ *కైసర్చి పాసి టీచ జా జోక్ తుచి తగు సూనయ్తె. పడ్డె, ఈందె తుచి తెన్ ఓడతె గతన కి తుచి తెన్ రచ్చించుప జతు దేముడు తుక వరుమ్ దా అస్సె మెన,' దూత అంక సంగిలన్.

25 జాకయ్, గోతుసుదల్, తుమ్ దయిరిమ్ తా. అంక కబుర్ సంగిల్ రితి కచితుమ్ జర్గు జయెదె మెన ఆవ్ నంపజతన్.

26 గని మదెనె, కేన్ జవున్ డిబ్బతె ఓడ పెల్లి జంక అస్సె" ఇసి పవులు సంగిలన్.

ఓడ డిబ్బచి గట్టుతె పెల్లి జలిసి

* 27:24 27:24 వెల్లి రాసెచి.

27 చొప్ప పొదుల్ గెతికయ్, అందరె, అద్రియ సముద్రుమ్తె అమ్చి ఓడ ఇండ నే ఇండిలి రితి జా తిరిమి గెతె తతికయ్, 'అమ్ బుయిక్ పాసి జెతసుమ్ కిచ్చొగే' మెన, ఇండయ్తనక అజ్జ అయ్లి.

28 చి 'సముద్రుమ్ కెద్ది దీగ్ అన్న గే దెకుమ' మెన కొల్ల దెకిలె, పుంజెక్ విస్సుక్ అడుగుల్ దీగ్ అన్నె. అన్నె ఇదిల్ దూరి గెచ్చ కొల్ల దెకిలె, తొంబయ్ అడుగుల్ దీగ్ జా అన్నె.

29 తెదొడి, "పత్తలె తెప్పె జలె అల్లర్ జమ్దె" మెన బియె కెర, 'ఓడ టీవొ కెర' మెన, ఓడచి వడ్డె పక్క తెంతొ చెత్తర్ లంగర్లు సముద్రుమ్తె బుడ్డవ తా, "కెదొడెక్ రాతి పాయదె." మెన ప్రార్లు కెర్తె తిల.

30 మదెనె, 'ఓడక ముల దొనితె వెగ బయిలె బార్ జమ్' మెన ఓడ ఇండయ్తన, ఆరిక "ఓడచి పుర్రెతోచ లంగర్లు బుడ్డయ్తనుమ్" మెన సంగ, లుంకచొరు ఓడచి దొని ఉత్తవ దిల.

31 జా పవులు దెక కెర, పుంజెక్జీన్ జమాన్లుక వెల్లొక చి జమాన్లుక, "ఈంజేవ్ మాన్సుల్ ఓడతె తిలెకయ్ రచ్చొంచువ జస్తె" మెన సంగిలన్.

32 చి దొనిచ వాలివొ జమాన్లు సుదల్ సింద, దొని ములయ్ల.

33 కుకుడొ వానెనె, "అన్నె చొప్ప పొదుల్ జయెదె, తుమ్ ఎత్తిజీన్ బియె తా చువ్వె అస్సన్.

34 జాకయ్, అన్నిమ్ కా నత్తు జా. తుమ్ కిచ్చొయ్ నస్టుమ్ నే జస్తె రచ్చొంచువ జస్తె, చి తుమ్క సెక్తి తయెదె. జేవ్క కి పవులు బలవంతుమ్ కెర,

35 పొడియె దెర, ఈంజ అన్నిమ్ దా దయె కెర్లచి" మెన, దేముడుక జొకర కెర, ఏక్ గండ మోడ కంక దెర్లన్.

36 జేవ్ దెక, దయిరిమ్ జా, జేవ్ కి కంక దెర్ల.

37 జా ఓడతె మొత్తుమ్ దొన్ పుంజొ డబ్బయ్ సొవ్వె జీన తిల.

38 జలె, ఎత్తిజీన్ సరిపుచువ జలిసి కయ్లి వడ్డె, ఓడక 'అన్నె సుల్కన జప్పన్' మెన, సేంసిలి గోదుమ్ ఎత్తి సముద్రుమ్తె గలిల.

39 †పార్లు బార్ జతికయ్, 'ఈంజ కేన్ దేసిమ్చి బుయి గె?' మెన చినితి నాయ్, గని ఏక్ రేపు తిలిసిచి ఇన్న తిలి సదూనుమ్చి బుడ్డు దెకిలె, అన్నె, "ఒత్త పాచెలి, ఓడ బుడ్డుతె ఒగొడె నెంక జయెదె" మెన, ఉచర్ల.

40 జాకయ్, జేవ్ బుడ్డవ తిల లంగర్లుచ వాలివొ యిప సముద్రుమ్తె ముల, దిక్కు దెకయ్త చట్టుచ వాలివొ బొడుగ కెర, ఓడక పుర్రె తతి ఇదిలిసి తెర వెగడ, బుడ్డు పక్క గెచ్చుక దెర్లమ్.

41 సముద్రుమ్ తెడిచి ఏక్ డిబ్బుతె ఓడ వెల్లి జా, దెరన గెలి. పుర్రెతో పక్క టక్కున డిబ్బుతె వెన గెలి, వడ్డె పక్క కెర్లల్ పెట్టికయ్, ఓడ బద్దల్ జా గెలి.

42 "ఏక్ వేల ఒడ్డుతె పుంగ్ర ఉట్ట నిగుల" మెన, జేలి తిలచి రిసా జమాన్లు సుదల్ ఉచర, మారుక ఉచర్ల, గని,

43 'పవులుక మొరుక జయె నాయ్' మెన, పుంజెక్జీన్ జమాన్లుక వెల్లొ అడ్డు కెర్లొ. "పుంగ్రితన, సముద్రుమ్తె డేచ ఒడ్డుతె పుంగ్ర, చి

44 పుంగ్రుక నేన్లన ఓడచ దండల్ బల్లలు దెర, ఒడ్డుతె పాచ" మెన ఆడ్ర దిలన్, చి కో నే పిట్టి, ఎత్తిజీన్ ప్రమాదుమ్ తెంతొ ఒడ్డుతె జిన్లమ్.

28

పవులుక అయి చడ్డెకి చెంగిల్ తిలిసి

- 1 అమ్ ఎత్తిజీన్ ప్రమాదుమ్ నెంతె బుయ్యె పాచెలి, జా డిబ్బుక మెలితే డిబ్బు మెన చినిలమ్.
- 2 మెలితే డిబ్బుచ మాన్సుల్, జలె, అమ్క ఎత్తిజీన్క చెంగిల్ మరియూద కెర, 'పాని జా చల్లి కెర్తికయ్', అమ్క ఆగి లావ దిల.
- 3 జా ఆగిచి రిసా పవులు దొన్ని దారు కుడవ ఆగితె గల్తె తతికయ్, ఒగ్గర్ విస్సుమ్ దెతి అయి వేడిక బార్ జా, పవులుచి అత్తి చడ టక్కున జలి.

† 27:39 27:39 రాతి పాయితికయ్

4 జోచి అతు తెంతో అయి ఒడోయ్ జా అన్య మెన జేవ్ మెలితే డిబ్బుచ మాన్సుల్ దెక కెర, “ఒహో, ఈంజో మాన్సు అత్తొ కెర్లోనా జా తయెదె. నముద్రుమ్తె నే మొర్లె కి, ఇన్నెచి పాపుమ్క మొరుక అన్సె, కిచ్చొగె” మెన సంగిల.

5 పవులు, మాత్రుమ్, అతు వీర దెతికయ్, అయి ఆగితె సేడ్డి, చి పవులు కిచ్చొ ప్రమాదుమ్ జయె నాయ్.

6 “ఈంజో పుల గెచ్చు టక్కున జా సేడ మొర గెచ్చెదె” మెన ఉచర్ల, గని ఒగ్గర్ సేంపు రకిలెకి, కిచ్చొ జయె నాయ్ మెన దెక కెర, “ఒహో, ఈంజో దేముడు జా తయెదె” మెన ఉచర్ల.

7 ఒత్త అమ్ తిలిన్క పాసి, జా డిబ్బు దేసిమ్క వెల్లో జలో పొప్లి మెలోసాక బుయి తిలి. జో పొప్లి తెన్ దన్నుల్ జతికయ్, అమ్క తిర్రతి ఒగ్గర్ మరియాద కెర్లన్.

8 జోచొ అబ్బొన్క జోర్ణొ, చి పెట్టి దెర తిలిచి రిసా పవులు జోతె గెచ్చ ప్రార్లన కెర జోక బోడి చడితికయ్, జో చెంగిల్ జలన్.

9 దన్నొ జర్లు జతికయ్, జా డిబ్బు దేసిమ్క జోర్ణొ తిల మాన్సుల్ ఎత్తిజన్ పవులుతె జా కెర, చెంగిల్ జల.

10 జాకయ్ అమ్క ఒగ్గర్ గవరుమ్ కెర్ల, చి తిన్నొ జొన్నొ గెలి, అమ్ అన్నె ఓడతె బార్ జంక దెర్లి పొది, అమ్క దొర్కు జలిసి ఎత్తి ఓడతె బెరయ్ల.

రోమ్ పట్టుమ్తె పాపులీని పావిలిసి

11 జా తిన్నొ జొన్నొ గెతికయ్, ఒండి చల్లి పొది జా డిబ్బుతె తిలి ఏక ఓడతె వెగ, బార్ జలమ్. జా ఓడ అలెక్కంద్రియ పట్టుమ్ చి. జా ఓడచి బోడితె ‘కల్గుల్ దేవతల్’ మెన బొమ్మల్ తిల.

12 జలె, జా ఓడతె సురకూసు రేవు ఎద ఉత్త, తిర్రతి తిలమ్.

13 ఒత్త తెంతో ఇదిల్ వంకిడి వాబు బుల, రేగియు మెలి రేవుతె పావిలమ్. ఏక దీన్ గెతికయ్, దచ్చెన పక్క తెంతో చి వాదు కెర్లి, చి అన్నెక్ దీసి పొతియొలీ రేవుతె పావిలమ్.

14 ఒత్త ఉత్తిర్లె, సంపజల బావుడ్లు తిల, చి “సత్తు పొదుల్ అమ్చి తెన్ తా” మెన బుకార్ల. జా సత్తు పొదుల్ గెతికయ్, బార్ జా, రోమ్ పట్టుమ్తె గెలమ్.

15 ఒత్త రోమ్క పాసి అయ్లె, సంపజల బావుడ్లు అమ్క “జా అన్సె” మెన సూన తా, దన్నుల్ జంక మెన, రోమ్క రమారమి దొన్నొ చిసా తిన్నొ మయిలు దూరి తిలి అప్పియా మెలి ఏక సంవేది ఎదక, సగుమ్జన్ అయ్ల. అన్నె సగుమ్జన్ తిన్నొ నిజతి గేర్లు మెలి రోమ్క ముప్పుయ్ పావ్ మయిలు దూరి తిలి గవ్వి ఎదక అయ్ల. జోవయింక దెక కెర, పవులు అమ్చొ దేముడుక జోచి సర్ల సంగిలన్, చి దయిరిమ్ జలన్.

16 తెదోడి, ఆమ్ రోమ్తె పావిలి పొది, పవులుక జేల్తె గల్లి నాయ్, గని ఇస్టుమ్ అయ్లిన్తె జో జంక నెలవ్ దా, జమాన్ ఎక్కిలోక రకయ్ల.

17 తిర్రతి గెతికయ్, పవులు ఒత్తచ యూదుల్చ వెల్లో సుదల్క, అదికారుల్క జోతె బుకార్లొ. జేవ్ ఒత్త ఎక్కితె బెదితికయ్, పవులు జోవయింక, “ఓ బావుడ్లు, అమ్చ యూదుల్క కిచ్చొ అల్లర్ కెరి నాయ్, అమ్చ పూర్గుల్చ విదల్ పిట్టుక మెన ఆవ్ కిచ్చొ కెరి నాయ్, గని యెరూసలేమ్తె అంక జేలి కెర, రోమియుల్చి అత్తి అంక సొర్కు కెర దిల.

18 రోమియులు అంక పరిచ్చ కెర, అంచి తగు సూన, ‘కిచ్చొ మొర్లి సిచ్చ అనన్తి తప్పు కెరి నాయ్’ మెన, జోవయింక రుజ్జు అయ్లిచి రిసా, అంక విడ్డల్ కెరుక ఇస్టుమ్ జల.

19 గని ఒత్తచ యూదుల్ ఒగ్గర్ జతికయ్, అంక అన్నె కిచ్చొ వాబు నాయ్, చి కైసరు వెల్లో రానో సొంత అంచి తగు సూన తీర్పు కెర్లు మెన, ఆవ్ కోర్ప జలయ్. గని అమ్చ యూదుల్చి రిసా అంచి పెట్టి కిచ్చొ విస్సుమ్ నాయ్.

20 “తుమ్క ఆజి కిచ్చొక ఇన్నె బుకార్లయ్ మెలె, తుమ్చి తెన్ దన్నుల్ జంక, చి ఈంజేవ్ గొల్లుల్ తెన్ కిచ్చొక అంక బంద అన్సి మెలె, తెద్రయిందె మెన దేముడు ఆమ్ ఇస్రాయేలుల్క సంగిలో రచ్చించువ కెర్లోసాక, ఆవ్ సంపజా జోవయింది రిసా సాచి సంగిల్, రిసాయి.” మెన సంగిలన్.

21 జలె, జేవ్, “యూదయ తెంతో తుచి రిసా కేన్ ఉత్తల్ జెతి నాయ్, చి ఇత్తల్ అయ్ల అమ్చ యూదుల్ కోయి కి, తుచి రిసా కిచ్చొయ్ అల్లర్ సంగితి నాయ్,

22 గని, తుయి ఉచర్తిసి అమ్ నూసుక ఇస్తుమ్ జతసుమ్. తుయి బెదితి జట్టుచి రిసా ఎత్తిజిన్ 'తప్పు' మెన సంగితతి" మెన, పవులుక ఒత్తచ యూదుల్చ వెల్లో సుదల్ సంగిల.

23 జాకయ్, జేవ్ సంగిలి దీసి, జో తిలి గెరి ఒగ్గర్ ఒగ్గర్జిన్ యూదుల్ అయ్ల, చి పెందలె తెంతో సాంజ్ ఎద, దేముడుచి రాజిమతె మాన్సుల్ బెదుక అవ్కాసుమ్ దొర్కు జలి చి సాచి సంగ, * మోసే పూర్ముచొచి అత్తి రెగిడ్డి దేముడుచ ఆగ్గుల్చ కొడె, పడ్డా మోసే పూర్ముచొచి అత్తి దేముడు రెగ్గయల ఆగ్గుల్, అన్నె పూర్ముచొచి అత్తి సంగిల దేముడుచ కబుర్లుచ కొడె బెదవ, యేసుక 'జోయ్యి దేముడు సంగ తిలో రచ్చించువ కెర్తొసా' మెన, బోదన కెర్తె తిలన్.

24 జోవయంతె సగుమ్జిన్ జో సంగిలిసి నంప కెర్ల, సగుమ్జిన్ నంప కెర్తి నాయ్.

25 జేవ్ దొన్ని జట్టు జా, ఎక్కి మెన్సు నే జతె ఉట్ట గెల. గని నే గెతె అగ్గెయి, పవులు ఇసి సంగిలన్. "యెసయా పూర్ముచొచి అత్తి దేముడుచి సుద్ది తిలి ఆత్మ తుమ్చ మాన్సుల్క సంగిలి కోడు సరిగా అన్నె.

26 'అమ్చ యూదుల్తె గెచ్చ ఇసి మెన సంగ. తుమ్ నూన్తె, గని కచితుమ్ అర్దుమ్ కెరన్ను నాయ్. తూమ్ దెకితె, గని కచితుమ్ నంప కెర్చు నాయ్! మెన సంగు.

27 ఈజివ్ అమ్చ మాన్సుల్చి పెట్టి బేడు బంద అన్నె, జోవయించ కంగ్గో బోయ్ర జా అన్సి, జోవయించ అంకివో జేవ్ డంకన అన్సి. నెంజిలె, అంకివో దెకిత, కంగ్గో నూన్త, పెట్టి అర్దుమ్ కెరంత, చి అవ్ జోవయించ చెంగిల్ కెర్తి రితి అచింతె జెత.' మెన సంగిలి కోడు.

28 "జాకయ్, తుమ్క, అమ్చొ దేముడు దిలి రచ్చన యూదుల్ నెంజిలసక జో దా అన్నె. జెవ్వియ నూసుల" మెన, పవులు సంగిలన్.

29 † పవులు ఇసి సంగితికయ్, యూదుల్, ఎక్కి మెన్సు నే జతె, దొన్ని జట్టు జా, ఉట్ట గెల.

30 పవులు, సొంత గేరు నజన అద్దె దా దొన్ని వెర్సుల్ ఒత్త జతె తా, కో అయ్లె కి మరియాద కెర,

31 దేముడుచి రాజిమచి రిసా, ప్రబు జలో యేసుక్రీస్తుచి రిసా, కో అడ్డు నే కెర్తె, ఎదార్దుమ్ సుబుమ్ కబుర్ బోదన కెర్తె తిలన్.

* 28:23 28:23 తెలుగు బైబిల్తె ధర్మశాస్త్రమ్ మెరి, మోసేచి అత్తి దేముడు రగ్గయ్ల ఆగ్గుల్ మెన అమ్ జానుమ్. ఈంజ కొడె ఎత్తి బైబిల్తె అగేచి పావ్ పుస్తకుమతె రెగ్గయ్ జా అన్నె. ఈంజ దెకపుక మెన కుపియ బాసతె నొయి ప్రమానుమతె మోసే పూర్ముచొచి అత్తి రెగిడ్డి దేముడుచ ఆగ్గుల్ మెన రగ్గవ అన్నె. † 28:29 28:29 గ్రీకు బాస తెన్ 'బారికల్' చి మత్తెలి తొలితో రెగిడ్డ సగుమ్ పుస్తకతె 29 నంబర్చి కోడు తయె నాయ్.

రోమియుల్ క రెగిడ్లి ఉత్త్రమ్.

బారిక్ జలో పవులు రోమ్ పట్టుమ్చ సంగుమ్చక రెగిడ్లి ఉత్త్రమ్

మొదోల్ కోడు

1 రోమ్ పట్టుమ్తెచ దేముడు ప్రేమ కెర్ల జోచి సుద్ది జా జోచయ్ జంక మెన, జో నిసాన బుక్కార్ల మాన్సుల్క, యేసుక్రీస్తుక *గొత్తి నుదో జలో పవులు రెగిడ్లి ఉత్త్రమ్. దేముడు దిలి నుబుమ్ కబుర్ నూనయ్తి రిసా ఆవ్ జోచో బారికి జంక మెన, యేసుక్రీస్తు అంక నిసాన బుక్కారా అస్సె. ఈంజయి కామ్ అంక సార్ప దా అస్సె.

2 ఈంజ నుబుమ్ కబుర్ తెద్రవుక మెన అగ్గెయి తెంతో జోచ కబుర్లు సంగిలసచి అత్తి, జో రెడ్డయ్లి జో దిలి దేముడుచి కొడోతె ప్రమాసుమ్ సంగ తిలన్.

3 నుబుమ్ కబుర్ మెలె, జో దేముడుచో ఎక్కి పుత్తున్చి రిసాచి కబుర్. జో పుత్తున్క 'మాన్సు' మెన దెకిలె, అమ్ యూదుల్చో దావీదు పూర్గుమ్చోచి సెకుమ్తె జెర్మిలన్.

4 అమ్చో ప్రబు జలో యేసుక్రీస్తు, జో మొర గెచ్చు అన్నె జీవ్ జా ఉట్టిన్ రిసా దేముడుచి పూత్తు మెన దేముడుచి సుద్ది తిలి ఆత్తుచి ఒగ్గర్ సెక్కి తెన్ రుజు కెరన్.

5 జలె, ఎత్తి దేసిమి జోక సంపజా జోచి కోడు నిదాసుమ్ కెర జోచి నావ్ గవురుమ్ కెర్తె మెన మాన్సుల్క నుబుమ్ కబుర్ నూనయ్త జోచ బారికుల్ అమ్ జంక మెన, జో ప్రబు జోచి దయ అమ్క దా అస్సె.

6 యేసుక్రీస్తుచ సొంత మాన్సుల్ తూమ్ కి జంక మెన, జీవ్ తెన్ బెదుక మెన వేర వేర దేసిమిలుతె తుమ్క కి దేముడు బుక్కారా అస్సె.

7 అమ్క అబ్బి జలో దేముడుచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

రోమియుల్ క దెకుక మెన పవులుచి ఆస

8 తొలితో కిచ్చొ మెలె, తుమ్ ఎత్తిజిన్చి రిసా † యేసుక్రీస్తుచి నావ్ దెర అంచో దేముడుక అంచి సర్ల ఆవ్ సంగితసి. ప్రబుచి ఉప్పిరి తుమ్ రోమియుల్ తుమ్చి నముకుమ్ తిలిన్చి రిసా ఒండి లోకుమ్చ మాన్సుల్ నూన అస్సి.

9 జోచో పుత్తున్చి రిసాచి నుబుమ్ కబుర్ నూనవ నూనవ ఆవ్ సేవ కెర్తొ దేముడు అంచి రిసా సాచి జతయ్. ఆవ్ ప్రార్లన కెర్తె పొది, కెయెక తెయెక నే పిట్టె తుమ్చి రిసా జోక ఆవ్ సంగితసి.

10 తుమ్చి రిసా ఆవ్ ప్రార్లన కెర్తెన్తె ఏక్ కిచ్చొ మెలె, జోచి దయ తిలె, కిసి గే తుమ్తె ఆవ్ అప్పె జెంక వాట్ దెవున్ మెనయ్ ఆవ్ ప్రార్లన కెర్తెసి.

11 తుమ్చి అత్తుక డిట్టుమ్ కెర్తె రితి తుమ్క కిచ్చొ జవున్ అత్తున్కె దొర్కు కెర్తె రితి కిచ్చొ జవున్ కామ్క జెతిసి కెరుక మెన, తుమ్క దెకుక తుమ్తె గెచ్చుక అంక ఒగ్గర్ ఆస.

12 తుమ్చి అత్తుక డిట్టుమ్ కెరుక మెన సంగిలె, తూమ్ కి ఆవ్ కి, ఎక్కిలోక ఎక్కిలో నముకుమ్ దెకిలె అన్నె సర్ల దయిరిమ్ జమదె.

13 ఓ బాపుడ్లు, తుమ్ కిచ్చొ జానుక అంచి ఇస్టుమ్ మెలె, యూదుల్ నెంజలె అన్నె ఒగ్గర్జిన్తె ఆవ్ కిసి గెచ్చు ప్రబు దిలి పంటో జోవయింతె లాయ్ అస్సి గే, తుమ్తె గెచ్చు, తుమ్తె కి దస్సి పంటో లాయిక మెన ఆవ్ ఒగ్గర్ సుట్టు ఉచర అస్సి, గని అప్పెక అంక వాటు అడ్డు తా అస్సి.

* 1:11:1 నెంజలె 'గొత్తి జలో తొ', నెంజలె 'సేవ కెర్తొనా'. † 1:8:18 మెలె, యేసుక్రీస్తు జోవయింక సంపజలసచి పాపుమ్ వయ గెచ్చయ్లి రిసా 'జొయ్కు మదెన జెతియ్ ఎత్తి అదికారమ్ తిలో దేముడు అబ్బిసి అమ్చ ప్రార్లనల్ నూనెదె' మెనయ్, జయి దయిరిమ్క యేసుక్రీస్తుచి నావ్ దెర పవులు దేముడుక ప్రార్లన కెర్తయ్, అమ్ కి జోవయింక ప్రార్లన కెరుక జతయ్.

14 *గ్రీసు దేనిమచక కి, గ్రీసు దేనిమచ నెంజలనక కి, ఒగ్గర సదు కెర్లనక కి, సదు నేన్ల మాన్సుల్క కి ఆవ్ నుబుమ్ కబుర్ నూనవుక మెన, ప్రబు అంక పూచి తియార అస్సె.

15 జాకయ్, తుమ్ రోమ్ పట్టుమ్చక కి నుబుమ్ కబుర్ బోదన కెరుక మెన అంక ఒగ్గర్ ఇస్టుమ్ అస్సె.

నముకుమ్ వాట్కయ్ రచ్చన దొర్కు జతయ్

16 సుబుమ్ కబుర్చి రిసా అంక కిచ్చొ లాజ్ నాయ్. సుబుమ్ కబుర్చి ఉప్పిరి అంక పూర్తి దయిర్మ్. సింపజతో ఎత్తి మాన్సు పాపుమ్ తెంతో రచ్చించువ కెర్తి రిసా దేముడుచి నెక్కి సుబుమ్ కబుర్ తెయి అస్సె. జా రచ్చన క్రీస్తుక సంపజతన ఎత్తిజిన్క, *తోలితో యూదుల్క, వడ్డొ యూదుల్ నెంజలనక.

17 దేముడుచి పున్నిమ్ సుబుమ్ కబుర్ తెయి డీస్తయ్, దొర్కు జతయ్†. జో దెతి జా పున్నిమ్, జా రచ్చన, అమ్క కీసి దొర్కు జతయ్ మెలె, *పూర్తి నముకుమ్ వాటు. దేముడుచి కొడెతె జో సొంత రెగ్గయిల్ రితి, “ప్రబుచి ఉప్పిర్చి నముకుమ్క కో పున్నిమ్‡ జవుల గే జెవ్వి జవుల”.

దేముడుచి పున్నిమ్ నెసిలనచి రిసాచి తీర్పు

18 దేముడుక విరోదుమ్ జా మాన్సుల్క పాపుమ్ కెర కెర జోవయిచి పెట్టిచి పాపుమ్తె సత్తిమ్క లుకడ్డొ, దస్సి ఎత్తి మాన్సుచి ఉప్పిర్ జోచి కోపుమ్ జో దేముడు పరలోకుమ్ తెంతో సుచ దా దెకయెదె, లయడెదె మెన రుజ్జు *డీన అస్సె.

19 దేముడుక జేవ్ విరోదుమ్ జలిసిచి అన్నె మాన్సుల్క జేవ్ కెర్ల పాపల్క ‘జోవయిచి పాపుమ్’ మెన కీసి సంగుక జయెదె మెలె, జో దేముడుచి రిసా జేవ్ జానుక జతిసి ఎత్తి జోవయిచి పెట్టి జాన్తి. కీసి మెలె, జొయ్యి సొంత జోవయింక దెకవ అస్సె.

20 కీసి మెలె, జో నే డీస్సాసా కీసా అస్సె గే, మెలె జోవయింక ‘కెయక తెయక తా గెతి నెక్కి అదికారుమ్ జోకయ్ అస్సె. జొయ్యి దేముడు’ మెలి రుజ్జు లోకుమ్ జెర్మయిల్ తెంతో, జో తెయార కెర్లిన ఎత్తితె సొస్తుమ్ డీస్తయ్, చి తెదెడి తెంతో మాన్సుల్ పూర్తి చిన అస్సి. జాకయ్, ప్రబుచి మొక్కె “నేనుమ్” మెనుక నెతిరి.

21 దస్సి, జోవయింక ‘జొయ్యి దేముడు’ మెన జేవ్ జాన్లె కి ఒప్పన్తి నాయ్, జోక గవురుమ్ దెకితి నాయ్, జో దిలిన్క ‘తుయ దిలది’ మెన ఒప్పన్తి నాయ్, జోక సర్ద సంగితి నాయ్, గని వెర్తి బుద్ది జల, చి బుద్ది నెంజల జోవయింక పెట్టి అందర్ జా గెల.

22 ‘జాన్ల మాన్సుల్ అమ్’ మెననయ జేవ్ బుద్ది నెంజలన జా గెల.

23 అన్నె, నే మొర్తో కెయక తెయక జీవ్ తతో దేముడుక ముల దా, మాములుమ్ మొర్త మాన్సుల్చి రూపుమ్చ, పిట్టల్ రూపుమ్చ, జంతువుల్ రూపుమ్చ, అయివో రూపుమ్చ బొమ్మల్క ఇస్టుమ్ జా, దనచకయ్ జోకరుక దెర్.

24 జాకయ్ దేముడు జోవయింక కిచ్చొ సిచ్చు దిలన్ మెలె, “జోవయిచి పెట్టిచ ఆసల్ రితి ఇండ లంజె కమొతె పూర్తి గెచ్చ, ఎక్కిలోక ఎక్కిలో జోవయింక ఆగ్గక సిస్సారుమ్ కెరన, జోవయింక జెడ్వి మరియాద కడన్తి సిచ్చ సేడ్డు, కతు” మెనయ్, దస్సితెయ్ జో జోవయింక సార్పు కెర దిలన్.

25 దేముడుచి రిసాచి సత్తిమ్ గ్యానుమ్ జేవ్ నెన కెర అబర్దుమ్క ఇస్టుమ్ జల, చి జో ఎత్తి జెర్మయిలోనిచి సేవ కెరుక ముల కెర, జో తెయార కెర్లినకయ్ జోకరుక దెర, దనచచి సేవ కెర్తతి. గని జెర్మయిలోసాకయ్ కెయక కి జెయ్యి! ఆమేన్.

‡ 1:14 1:14 గ్రీసు దేనిమచ మాన్సుల్క మెనక జతయ్, గని పవులు తంజ ఉత్తుమ్ రెగ్గె పాదులె, యూదుల్ నెంజల ఎత్తిజిన్క కి ‘గ్రీసు దేనిమచ’ మెనుక ఏక అలవాల్ తిలి. § 1:16 1:16 మెలె, క్రీస్తుకయ్ సంపజతో ఎత్తి మాన్సు. యోహాను 1:12, 3:16, 18, 36.

* 1:16 1:16 తొలితో యూదుల్క అవకాసుమ్ తంక చి వడ్డొకయ్ యూదుల్ నెంజలనక అవకాసుమ్ తంక మెన ఎత్తి అదికారుమ్ తిలో దేముడుచి నెలమ్. లూకా 24:47, బారెకుల్ 1:8, 13:46. † 1:17 1:17 జీచి సత్తిమ్ పున్నిమ్ జోవయింక సంపజలనక దొర్కు కెరన్తికయ్ అమ్క అన్నె బెదవంతయ్. ‡ 1:17 1:17 నెంజలి ‘చి జా సత్తిమ్ పున్నిమ్ అమ్క దొర్కు జలి, అన్నె నముకుమ్ పలోయతయ్’. § 1:17 1:17 నెంజలి “ప్రబు దెతి పున్నిమ్ జలన జోవయిచి ఉప్పిర్చి నముకుమ్కయ్ ఇండుక” హబక్కూకు 2:4 దెక.

* 1:18 1:18 నెలవతె యేసు మాన్సుచి పాపుమ్ వయ గెచ్చయిల్నితె నయ్తానుక మొర్తక జిన పాడె కెర అస్సె; ఎత్తియల్ 2:14. నయ్తానుక జిన పాడె కెర్లిన తెన్ నయ్తాను చి సేవ కెర్లిన ఎత్తిచి ఉప్పిరి కి యేసు జిన పాడె కెర అస్సె.

26 జల, 'జెర్మయిలో' సాక ముల కెర తయార్ జలిన్ కయ్ జేవ్ కోర్ప జలి రిసాయి, జోవయింబి ఆగ్రించి పాపుమచ ఆసల్ క దెర్ను నీడయ్ తత్తు' మెన, దసి తె జో దేముడు సార్పు కెర దిలన్. దస్సి, మాములుమ్ తెర్నిమున్ను జతిన్ ముల దా, జోవయింబ తేర్బోదల్ తెన్ లంజె జంక దెర్ల.

27 జోవయింబ మున్నుబోదల్ కి దస్సి, తెర్ని తెన్ చెంగిల్ జతిసి ముల దా, ఎక్కిలోక ఎక్కిలో పూర్తి వెర్రి ఆన జా, ఎక్కిలో తెన్ ఎక్కిలో లంజె వెట్యారుమ్ జా, జోవయింబ ఆగ్రితె ఆత్మల్ తె జోవయింబి జా పాపుమ్ కెలచి, పాడ్ జల.

28 అన్నె, దేముడుక 'అన్నె. జోయ్యి దేముడు' మెన జేవ్ ఒప్పునుక నెన కెర జోక వచ్చిల్ రిసా, కామ్క నెంజలి బుద్ధితె, పొరపాట్ ఇండితిన్ తె జోవయింబ జో సార్పు కెర దిలన్.

29 జోవయింబి పెట్టి కిచ్చొ బెర్లి మెలె, ఎత్తి రగల్ పాపుమ్ బుద్ధి, పాపుమ్ కమె, అన్నె మాన్సుల్ చి ఆస్తిక ఆన జతిసి. కున్సిదుమ్ కి బెర్లి. జోవయింబి పెట్టి బెర్లు గోసల్, అత్యల్ కెర్రి బుద్ధి, కొడొ జాజవ జట్టి జతిసి, మోసిమ్ కెర్రిసి, కున్సిదుమ్ ఉచర్రిసి, దన బుద్ధుల్ జల. జేవ్ అన్నె కీనచక జల మెలె, సొండల్ జలన,

30 మాన్సుల్క ఆరివ నిందల్ సంగ, జోవయింబి నావ్ పాడ్ కెర్తన, పరలోకుమ్ చొ దేముడుక విరోదుమ్ కెర్తన, అన్నె మాన్సుల్క నిస్కారుమ్ కెర్తన, గవురుమ్ ఉచరంతన, 'అన్నె కిచ్చొ కిచ్చొ గర్లు కమె కెరుము' మెన ఉచర్ల కుట్టల్ కెర్తన, అయ్యన్ అబ్బొన్ చి కోడు నే నూనతన జల.

31 జేవ్ బుద్ధి నెంజలన, జేవ్ ఒప్పున్సి కామ్ నే కెర్తన, ప్రేమ నేన్లన, కన్కారుమ్ నేన్లన.

32 "దన కమె కెర్తన, మొర్రి సిచ్చక విలువ జతతి" మెన దేముడు తీర్పు కెర అన్నె మెన జేవ్ జాన్లె కి, దన కమె ఇండితతి. చి దన కమె అన్నె మాన్సుల్ ఇండిలె, మెన్సుతతి, 'చెంగిల్' మెంతతి.

2

దేముడుచి పున్నిమ్ చి తీర్పు

1 జాకయ్, ఓ మాన్సు కొన్సొ జలెకి, తుమ్ ఎక్కిలోక ఎక్కిలో 'గర్లు' మెన తీర్పు నంగిలె, తుమ్ చ సొంత పాపల్ చి రిసా తుమ్ కి జా తీర్పు లయితయ్. మెలె, అన్నె కొక 'గర్లు' మెన తీర్పు నంగిలె, తుమ్ క తుమ్ పాపుమ్ వరుడ్లను. తుమ్ తీర్పు నంగిలో మాన్సు కొన్సొ జలెకి, జో కెర్త తప్పల్ తె తుమ్ కి ఇండితను.

2 ఆవ్ అగ్గె రెగిడ్డి జాబిత తప్పు కమె కో కెరుల గే, దేముడు జోవయింబ తీర్పు కెర, సిచ్చ కెరుక ఒప్పున అన్నె మెన జానుమ్. అన్నె, జో సత్తిమ్ చొ జతయ్ చి రిసా జో కెర్రి తీర్పు నరిగచి మెన జానుమ్.

3 ఓ మాన్సు కో జలెకి, దన కమె కెర్తనక జోవయింబి పాపుమ్ చి తీర్పు తుమ్ నంగిలె, తుమ్ కి దన కమె కెర్రి, దేముడు దెతి సిచ్చ తుమ్ కయ్ పిట్టె దె మెన ఏక్ వేల ఉచరంతను గే?

4 నెంజలె, 'అమ్ కిచ్చొ కెర్రి కి జోచి ఎదివాట్ దయ్ అమ్ చి ఉప్పిరి అన్నె, చి ఓర్లువ జా అమ్క చెమించువ కెరెదె' మెన తుమ్ క తుమ్ ఉచరంతను గే? తుమ్ క 'జోవయింబ పాపల్ ఒప్పున ముల్తు' మెనయ్ జో దేముడు జోచి దయ్ దెకయ్ తయ్ మెన నేన్సు గే?

5 తుమ్ చి రాడ్ జివుక తుమ్ చ పాపల్ ములుక నెన కెర, జో దేముడు దెతి సిచ్చ తుమ్ క తుమ్ ఆననతను. జా సిచ్చ కెయ్ క లయెదె మెలె, ఎత్తి జిన్ క తీర్పు కెర సిచ్చ గే, బవుమానుమ్ గే దెతి జోచి సత్తిమ్ క రుణ్ణు దెకయ్ తి వెల్లి దీసికయ్.

6 జోవయింబి జివితుమ్ క కేన్ మాన్సు కీన కమె కెర్రి తప్పల గే, జయ్యి దీసిక దనచక సరిజతిసి తీర్పుల్ జో జర్లు కెరెదె.

7 జా దీసి నే జతె అగ్గె చి మదెనె నగుమ్ జిన్ పరలోకుమ్ చి ఉజిడతె బెదితి, ప్రబు గవురుమ్ జతిన్ తె బెదితి ఆన జా, జో దెతి సత్తిమ్ క నిదానుమ్ ఇండుల. "జేవ్ పరలోకుమ్ తె అంచి తెన్ కెయ్ క తెయ్ క జతి జేవ్, జో దయెదె.

8 గని నగుమ్ జిన్ జోవయింబి ఇస్టుమ్ అయ్ లి రితి ఇండుక ఆన జా, సత్తిమ్ ఇండితిసి ముల కెర, పాపుమ్ ఇండితతి. జోవయింబి ఉప్పిరి, జో దేముడు చి కోపుమ్ తయెదె, చి జో దెతి సిచ్చ కచితుమ్ జోవయింబి లయెదె.

9 దేముడు జా సిచ్చ జర్లు కెర్రి, ముక్కిమ్ క తోలితో యూదుల్ తె, వడ్డో * గ్రిసు దేసిమ్ చ తె కి, పాపుమ్

* 2:9 2:9 'గ్రిసు దేసిమ్ చ' మెన ఇన్నె నంగిలె, యూదుల్ నెంజలనక నంగితయ్.

ఇండితో ఎత్తి మాన్సుక బాదల్ దుకుమ్ పిట్టె నాయ్,

10 తొలితో యూదుల్తె, పడ్డొ గ్రీసు దేసిమ్చ మాన్సుల్తె కి, సత్తిమ్ ఇండితో ఎత్తి మాన్సుక 'బవుమానుమ్' మెన దేముడు జోవయింక జోచి పరలోకుమచి ఉజిడతె బెదవ గవురుమ్ దా, సేంతుమ్ దెయెదె."

11 దేముడు తేడల్ దెకె నాయ్.

12 అమ్ యూదుల్తె జో దిల ఆగ్గుల్ నేన్తె యూదుల్ నెంజలసతె కో పాపుమ్ కెర తవుల గే, జేవ్ ఆగ్గుల్ నెంతె తీర్పు జా నానినుమ్తె గెప్పుల, అన్నె, అమ్ యూదుల్ జేవ్ ఆగ్గుల్ జానుమ్. జేవ్ ఆగ్గుల్ జాన్లె అమ్ యూదుల్తె కో పాపుమ్ కెర తవుల గే, ఆగ్గుల్చి తెడి అన్చిచి జేవ్ ఆగ్గుల్ జోవయింక ఉప్పిరి సాచి జవుల, చి జోవయింక పాపుమచి సిచ్చ జేవ్ వయుల.

13 మోసేచి అత్తి దేముడు దిల ఆగ్గుల్ ఎక్కి నూన్తనయ్ నాయ్, గని జేవ్ ఆగ్గుల్తె బెదితి బుద్ది ఇండితనయ్ కో జలె, జోవయింకయ్ దేముడు జోవయింక పాపుమ్ నే వయడ్డె జోవయింక దయకయ్ 'జోవయింక దొర్పు జలి పున్చిమ్ అస్సె' మెన దెకెదె. దెక జోవయింక సిచ్చ పిట్టెయెదె.

14 పడ్డొ, యూదుల్ నెంజలస, మోసే తెన్ దేముడు దిలి ఆగ్గుల్ నెంతె తిలి కి, ఒత్తచ ఆగ్గుల్ జేవ్ నేన తిలి కి, నేన జాన్లె రిత జా జేవ్ ఆగ్గుల్ తెన్ బెదితి బుద్ది జేవ్ ఇండిలె, జేవ్ ఆగ్గుల్ జేవ్ కెయ్ నే నూన్డె కి సదు నే కెర్లె కి, జేవ్ ఆగ్గుల్ జోవయింక పెట్టి కామ్ కెర్లె రితి జతయ్.

15 దొర్పు జలి ఇండడి దెకయ్త ఆగ్గుల్ దేముడు కిసి మోసే తెన్ దిలి ఆగ్గుల్తె రెగ్గవ అస్సె గే, 'దస్సి ఇండుతు' మెన జేవ్ మాన్సుల్చి పెట్టి జో రెగ్గ అస్సె మెన రుజ్జు జతయ్, అన్నె, 'సత్తిమ్' మెన జేవ్ సత్తిమ్ చినితినతె, 'పాపుమ్' మెన జేవ్ పాపుమ్ చినితినతె కి రుజ్జు జతయ్. అన్నె, జోవయింక జెచ్చి పరిచ్చ కెరన నిందల్ వయడ్డె రితి, నెంజలి చెమెంచువ కెర్లె రితి, జోవయింక సొంత కమె 'చెంగిల్' గే 'గార్' గే జెచ్చి చినన ఒప్పునుల.

16 అమ్ నూనయ్లి సుబుమ్ కబుర్తె కిచ్చొ ఏక్ బెదితయ్ మెలె, జేవ్ ఇసి తీర్పు కెరంతిసి కెయ్లె పూర్తి జర్గు జయెదె మెలె, క్రీస్తు జలొ యేనుచి అత్తి దేముడు మాన్సుల్చి పెట్టిచ గుట్టుల్ తిలిసి ఎత్తి తీర్పు కెర్లె జా వెల్లి దీసికయ్, తెదొడకయ్ పూర్తి రుజ్జు జయెదె.

యూదుల్తె మోసే తెన్ దేముడు దిలి ఆగ్గుల్

17 గని ఒత్తచ తుమ్ యూదుల్, 'యూదుల్ ఆము' మెనన, 'ఆగ్గుల్ రితి దేముడు అమ్కయ్ దా అస్సెచి రచ్చన జమ్దె' మెన ఆగ్గుల్కయ్ నంప కెర్లెను జలె, 'అమ్ యూదులి దేముడు తెన్ బెద అస్సుమ్' మెన గవురుమ్ ఉచరంతసు జలె,

18 మోసే తెన్ దేముడు దిలి ఆగ్గుల్తె తిలిసి ఎత్తి వెల్లెల మాన్సుల్ తుమ్క సికడ అన్చి రిసా, దేముడుచి ఇస్టుమ్ కిచ్చొ కిచ్చొ జతయ్ గే తుమ్ జాన్సు. జలె, చెంగిల్ తిలిన్తె గార్ తిలిసి నిస చెంగిల్చి మెన్చితసు జలె,

19 పడ్డొ 'గుడ్డి జలసక వాల్ దెకయ్తన ఆము' మెన, 'అందర్ బుద్దితె తిలసక ఉజిడి దెకయ్తన ఆము' మెన,

20 'బుద్ది నెంజలసక సికడ్డన ఆము' మెన, 'బాలబోదల్క సికడ్డెసా జలమ్ ఆము' మెన, 'గ్యాసుమ్ ఎత్తి సత్తిమ్ ఎత్తి మోసే తెన్ దేముడు దిలి ఆగ్గుల్తె అమ్తెయ్, అమ్చ ఆగ్గుల్తెయి అన్చిచి దేముడు జా పూచి ఎత్తి అమ్కయ్ తియార అస్సె' మెన తుమ్ నిజమి ఉచరెల్లె,

21 వేర మాన్సుల్క తుమ్ సికడ్డన తుమ్కయ్ తూమ్ కిచ్చొక సికడన్సు నాయ్! 'చోరుక నాయ్' మెన తుమ్ బోదన కెర్లె కి, చోర్పు నాయ్ గే?

22 'లంజెకమె కెర నాయ్' మెన సంగిలే కి లంజెకమె కెర్లెను గే? 'బొమ్మల్క జోకరుక నాయ్, వెట్కారుమ్!' మెన ఒప్పున్లె కి, గుడివొతచ బొమ్మల్ తుమ్ చోర దెర గెతసు గే? తుమ్ ఉచర.

23 'దేముడు మోసేచి అత్తి అమ్ యూదుల్కయ్ జోచ ఆగ్గుల్ దా అస్సె' మెన తుమ్ గవురుమ్ ఉచరెన్లెకి, ఆగ్గుల్క నిదానుమ్ నే కెర్లె దేముడుచి మరియోద కడ ఇండితసు గే?

24 తుమ్ అమచ యూదుల్ కి దస పాపల్ కెర్తసు. దేముడువి కొడొతె పూర్ణమ్ తెంతో రెగిడ్లి రితి, **†**“తుమ్ యూదుల్చ కమొది రిసా, యూదుల్ నెంజిల మాన్సుల్ దేముడుచి నావ్ దూసుప కెర్తతి”.

25 దేముడు దిల ఆగ్గుల్ రితి పూర్తి తప్పు నెంతె ఇండిలెకయ్ తుమ్ యూదుల్ జోచయ్ మాన్సుల్ జతి గుర్తుచి సున్నతిక విలువ తయెదె. గని జో దిల ఆగ్గుల్ ఇండితిసి తుమ్ పిట్టవన్లె, జోచయ్ మాన్సుల్ జతి గుర్తు దెకయ్తి జా సున్నతి తుమ్ కెరన తిల కి, నే కెరన్లి రితి జయెదె.

26 జలె, జోచి అగి జా సున్నతి నే కెరన్లొ మాన్సు కో జలెకు దేముడుచ ఆగ్గుల్ తెన్ బెదితి బుద్ది ఇండ ఆగ్గుల్తె సంగిలి దొర్కు జలి సత్తిమ్ నెరవెర్పువ కెర్లి రితి జలె, జో జా సున్నతి నే కెరన్లెకి, ఆత్మకయ్ జో జా సున్నతి కెరన్లి రితి జా అస్సె మెన జో దేముడు దెకె నాయ్ గే? దెకెదె.

27 దస్సి జలె, యూదుల్ నెంజిల మాన్సుల్ జోవయింది అగి జా సున్నతి నే కెరన్లెకి, జోవయింతె సగుమ్జిన్ దేముడుచ ఆగ్గుల్ తెన్ బెదితి బుద్ది ఇండితతి. అస్సె, తుమ్ యూదుల్క మోసే తెన్ జోచ ఆగ్గుల్ దా తిల కి, తుమ్చితె సగుమ్జిన్ ఆగ్గుల్చి కోడు నే కెర్లె పిట్టయ్తసు. జలె, లోకుమ్చ ఎత్తిజిన్క ప్రబు పరిచ్చ కెర్లి వెల్లి దీసి అయ్తె, ఈంజ మదెనె ప్రబుచి బుద్ది ఇండిల జేవ్ యూదుల్ నెంజిలన తుమ్క నేరిమ్ వయడ్డ సాచుల్ జవుల. మెలె, జోవయింక తుమ్క ప్రబు తీర్పు కెర్లె, తుమి తీర్పు నీడ పాపుమ్ వయతె.

28 మెలె, యూదుడు జెర్లె ఎక్కి ఆగి కెరన్లి గుర్తు తిలోసాక ‘నిజామ్చో యూదుడు’ మెనుక నెంజె. వడ్డొ ముక్కిమ్క కలుసుచ జలి సున్నతి అగి కెరంతిసి నెంజె.

29 దస్సి జలె **†**“కో నిజామ్చ యూదుల్ జవుల?” మెన పుసిలె, ఆత్మకయ్ సుద్ది జలో ఎత్తి మాన్సు. సత్తిమ్ దెతి సున్నతి కిచ్చొ మెలె, రెగ్గయ్లి ఆగ్గుల్చి రిసా ఆగి కెరంతిసి నెంజె, గని మాన్సుచి పెట్టి దేముడుచి సుద్ది తిలి ఆత్మ జగ్గు కెర్లిసి. జోవయింది ఆత్మతె కో సుద్ది జా జోచయ్ మాన్సుల్ జా తవుల గే, జెచ్చొ నిజామ్చ యూదుల్ జవుల. జోచయ్ జల మాన్సుల్క కిచ్చొ ముక్కిమ్ మెలె, మాన్సుల్ దెతి గవురుమ్ నాయ్, గని దేముడు దెతి గవురుమ్.

3

దేముడుచి సత్తిమ్ గెచ్చె నాయ్

1 జలె, వేర మాన్సుల్క చి కంట అమ్ యూదుల్క కిచ్చొ జిన్లి వరుమ్ అస్సె గే? నెంజిలె, అమ్ యూదుల్ జలి చిననతి సున్నతి కెరంతింతె కిచ్చొ లాబుమ్, కిచ్చొ చిలువ అస్సె గే?

2 అమ్ యూదుల్క లాబుమి, దేముడు తోలి సంగిల ప్రమానల్ దేముడుచ కొడొ అమ్ యూదుల్చి అత్తి జో సార్లు కెర దా అస్సె, జాక అమ్ చెంగిల్ దెకుక మెన, ఒత్త తిలిన్క అమ్ సాచి నూనవుక మెన.

3 దస్సి జలె, అమ్ యూదుల్తె సగుమ్జిన్ నముకుమ్ నెంజిలె కిచ్చొ జయెదె? జేవ్ నముకుమ్ నెంజిలిన్చి రిసా జోవయించో అమ్చో దేముడుక ‘నిదాసుమ్చో నెంజె’ మెనుక జయెదె గే?

4 ఎత్తి మాన్సు అబద్దుమ్ జలెకి, దేముడు సత్తిమ్ తయెదె. దేముడుచి కొడొతె పూర్ణమ్ జోవయింది రిసా జొయ్యి రెగ్గయ్లి రితి;

†“తుచ కొడొ నెరవెర్పువ జతిన్తె తుచి సత్తిమ్ రుజ్జు జయెదె, చి మాన్సుల్ తుక పరిచ్చ కెర్లె తుయి జీన్తె”.

5 గని అమ్ యూదుల్చి పాపుమిచి రిసా అమ్ వెట్కారుమ్ నిస్కారుమ్ జా అస్సుమ్. జో దేముడుచి సత్తిమ్, మాత్రమ్, జోక గవురుమ్ ఆన్తయ్. జలె, అమ్చి పాపుమ్క దెకిలె, జోచ సత్తిమ్క దెకిలె, జా తేడ డిస్ట్రీన్తె జోకయ్ గవురుమ్ జెతయ్ జలె, అమ్ కిచ్చొ ఉచరుక? ‘అమ్ పాపుమ్ కెర్లిన్ చి జో సత్తిమ్ కెర్లిన్చి తేడ దెకిలె జోచి గవురుమ్ డిస్ట్రీన్చి రిసా అమ్చి పాపుమ్తె జోకయ్ లాబుమ్’ మెన, జవున్, ‘అమ్చి పాపుమిచి రిసా జో అమ్క సిచ్చొ కెరుక బెదె నాయ్’ మెన అమ్ ఉచరుక గే? మాన్సుల్చి పాపుమ్ బుద్దికయ్ మాన్సు ఇసి ఉచరుక జయెదె.

† 2:24 2:24 యెనయా వున్నకుమ్ 52:5, యెహెజ్కేలు 36:22. * 3:4 3:4 కీర్తనలు 51:4

6 దస్సి ఉచరుక నాయ్. 'ఒండి లోకుమ్చ మాన్సుల్క ఆకర్క పరిచ్చ కెర తీర్పు కెర సిచ్చల్ దెయిందె, బవుమానల్ దెయిందె' మెన జో ఒప్పున అస్సె. జలె, అమ్ యూదుల్చి పాపుమ్క 'కిచ్చో నెంజె' మెలి రితి జో దెకితో జలె, ఒండి లోకుమ్చ మాన్సుల్క కో కీసి సత్తిమ్చి తీర్పు కెరుక జయెదె! బెదె నాయ్.

7 'దస్సి మెను నాయ్' మెంతె. 'అంచి అబద్దుమ్చి రిసా దేముడుచి సత్తిమ్ సొమ్ముమ్ డీన జోచి గవురుమ్ దెకయ్తయ్ జలె, అంచి పాపుమ్చి సిచ్చ ఆవ్ కిచ్చొక వయుక?' మెంతె, ఓ మాన్సు.

8 'చెంగిల్చి జర్లు జవున్ మెనయ్ పాపుమ్ కెరుమ' మెంతె సగుమ్జెన్. అమ్క "జేవ్ కి దస్సి సంగితతి" మెన, అమ్చి మరియాద కడన్తి రితి సగుమ్ జిని అమ్క నింద సంగితతి మెన తుమ్ జాన్సు. జలె, జేవ్ దస్సి సంగితన జోవయింది జా పాపుమ్చి సిచ్చ కి కతి రితి దేముడు లయడెదె. జోచి తీర్పు సరిగా అస్సె.

లోకుమ్ ఎత్తిచ మాన్సుల్ పాపుమ్ కెర్లన

9 జలె, కిచ్చో ఉచరుక జయెదె? వేర మాన్సుల్చి కంట అమ్ యూదుల్క దేముడుచి సిచ్చ పిట్టయ్తిసి కిచ్చో జలెకు తయెదె గే? నాయ్, గెద! ఆవ్ జేవ్చి కంట గొప్పు సుదల్ గే, నెంజుమ్ గెద, ఆవ్ ఉప్పిరి రుజ్జు రెగ్గ దెకయ్లి రితి, ఎత్తి మాన్సు. యూదుల్ జలెకి, గ్రీసు దేసిమ్చ జలెకి, కో జలెకి, పాపుమ్క దెర్పు సేడ పాపుమ్ సుదల్ జా అస్సుమ్

10 దేముడుచి కొడెతె వూర్లుమ్ రెగ్గవ తిలి రితి,

† "సత్తిమ్చో మాన్సు కేనె కి నాయ్. ఎక్కిలో కి నాయ్.

11 కోయి బుద్ధి తతోసా నాయ్,

జీవ్ తిలో దేముడుక చజితోసా కోయి నాయ్.

12 ఎత్తి మాన్సు సత్తిమ్ ముల, కామ్క నెంజితిన్తె సేడ గెచ్చ అస్సి.

కోయి సత్తిమ్ కెర్తి నాయ్, ఎక్కిలో కి నాయ్."

13 † "జోవయించి డొంగొ ఉగిళ్ల మెస్సున్, జోవయించ కొడె గని.

మోసిమ్ కెర్తి రిసాయి జీబు చోండి బులయ్ తతి.

అయివొచి విస్సుమ్ జోవయించ ఒట్టోతెయి అస్సె."

14 † "జోవయించి చోండి బెర్లు సాపెనల్ మూర్కుమ్ విస్సుమ్ అస్సె.

15 * జోవయించ చట్టో లోయి దెకుక మెన బే బేగి నిగుల.

16 నాసెనుమ్ కస్సుమ్ జోవయించి ఇండితి వట్టె అస్సె.

17 సెంతుమ్ వాల్ ఇండుక ఎద్గెరె నేన్తి.

18 † దేముడుక ఎదిలి కి బితి నాయ్."

19 మోసే తెన్ దేముడు దిలి ఆగ్గుల్తె కిచ్చో కోడు తిలె కి, కక్క, సంగితయ్ మెలె, జా ఆగ్గుల్చి రితి తెడిచ మాన్సుల్కయ్. కిచ్చొక మెలె, జోవయంతె కోయి దేముడుక జబాబ్ దెక నెత్తిర్తి రితి ఎత్తి, చోండి ముద్దో జంక, చి యూదుల్ కి నే పిట్టి, ఒండి లోకుమ్చ ఎత్తి మాన్సు దేముడుచి సిచ్చక జలిలెక జవుల, దేముడుచి పరిచ్చ జోవయించి తీర్పు జంక.

20 మెలె, దేముడు మోసే తెన్ దిలి ఆగ్గుల్చి రితి ఇండితి వాటు దేముడుచి మొక్కె ఈంజ లోకుమ్చో కేన్ మాన్సుచి పాపుమ్ పుంచె నాయ్, చి ఆగ్గుల్ రితి మాన్సుల్క తీర్పు కెర్లె, జో కక్కయ్ 'పున్నిమ్చో' మెనుక బెదె నాయ్. ఆగ్గుల్ అమ్చి పాపుమ్ పుంచితె నాయ్. అమ్చి పాపుమ్ దెకయ్తతి. జేవ్ ఆగ్గుల్తె తిలిన్చి రిసా అమ్చి పాపుమ్ చినితనుమ్.

యేసుక్రీస్తుక నంపజలె పున్నిమ్

† 3:10 3:10 10-12 కీర్తనలు 14:2, 3 వి 53:3. ‡ 3:13 3:13 కీర్తనలు 5:10, చి 139:4. § 3:14 3:14 కీర్తనలు 10:7.
* 3:15 3:15 15-17: యెసయా 59:7-8. † 3:18 3:18 కీర్తనలు 36:2.

21 ఆగ్రుల్తె నాయ్. గని వేరతెయ్ దేముడు జోవయించి పున్నిమ్ మాన్సుల్క దొర్కు కెర అస్సె. జాకయ్ మోసా హార్ముచొచి అత్తి దేముడు రెగ్గయల ఆగ్రుల్, అన్నె పూర్తుల్చి అత్తి సంగిల దేముడుచ కబుర్లు కి అగ్గె తెంతో జా రుజ్జు డీస్తయ్. జలె, జా పున్నిమ్ ఆగ్రుల్ రితి నాయ్, గని వేరతెయ్ దొర్కు జలిసి అప్పెయి మాన్సుల్క జానయ్ జా అస్సె.

22 జా పున్నిమ్ యేనుక్కిస్తుచి ఉప్పిరి కో జోచి నముకుమ్ తివుల గే, జేవ్ ఎత్తిజినకయ్ 'పున్నిమ్' మెలి రితి దేముడు దెకెదె, జేవ్ కొన్న జలెకి జోచి పున్నిమ్తె జోవయింక వాట దెయెదె.

మాన్సుల్తె జో తేడల్ దెకె నాయ్.

23 మెలె, కో కి పాపుమ్ కెర దేముడు దెకయ్లి సత్తిమ్ ఇండుక నెత్త కెర, జోచి మొక్కె ఓడువ జా అస్సి.

24 జాకయ్, జో కిచ్చొ వాటు మాన్సుల్చి పాపుమ్ పుండ అస్సె మెలె, జోచి దయకయ్ ఆరి అమ్క నీత్తిసుదల్ కెర అస్సె. కిసి మెలె, క్రిస్తు జలొ యేసు అమ్చి పాపుమ్ వయలిన్క జో దేముడు అమ్క నయ్తానీచి రాజిమ్ తెంతో నెత్తవ గెల అస్సె.

25 అమ్ కెర్ల పాపల్క అమ్ జెతికయ్ సిచ్చ పిట్టయ్తి బలి జో బంక జోచి లోయి సూపుక మెన దేముడు అబ్బొసి జోవయింక టీచడ్లన్. జా రచ్చన వరుమ్ అమ్ మాన్సుల్క కి, క్రిస్తుచి ఉప్పిరి అమ్ అమ్చి నముకుమ్ తింక. జో అబ్బొసి జా బలి దిలిసి ఏక రుజ్జు దెకయ్తయ్. పాపుమ్క 'పాపుమ్'. జా పాపుమ్ గెలెకయ్ మాన్సుల్క అంచి తెన్ అన్నె బెదవనుక జయెదె' మెన జో సత్తిమ్చి తీర్పు కెర్లెచి రుజ్జు దెకయ్తయ్. కిచ్చొక మెలె, జోచి పరలోకుమ్చి కన్కారుమ్ బుద్దిక అమ్చి అగ్గెద పాపల్ సిచ్చ కెరకు వాయిద కెర తిలన్.

26 జో సత్తిమ్చి తీర్పుల్ కెర్లొనా జలిన్చి జా రుజ్జు ఈంజయి కాలుమ్క దెకవుక మెనయ్ వాయిద కెర్లెన్. అన్నె కిచ్చొక మెలె, 'కో యేసుకయ్ నంపజవుల గే, జోవయించి పాపుమ్ పుంచి జయెదె, జోవయింకయి పున్నిమ్ దెకిన్దె' మెనయ్ రుజ్జు దెకయ్తి రిసాయి వాయిద కెర్లెన్.

27 జాకయ్, 'అమ్ యూదుల్కయ్ దేముడు మోసా తెన్ దిలి ఆగ్రుల్తె పున్నిమ్' మెన అమ్ కిసి గవురుమ్ ఆననుక జయెదె! నెంజె. కిచ్చొచి రిసా, దేముడు మోసా తెన్ దిలి ఆగ్రుల్చి రితి అమ్ మాన్సుల్ కెర్ల కమొ కామ్క నెంజిలిన్చి రిసా నాయ్, కామ్క అయ్లి రిసా నాయ్, గని నముకుమ్ వాటు అమ్క రచ్చన దొర్కు జతయ్.

28 నిజమి, కిచ్చొ ఒప్పన్తనుమ్ మెలె, కేన్ ఆగ్రుల్ రితి ఇండితినెత్తి పున్నిమ్ నాయ్, జా నేన్లెచి రిసాయి కో సానామ్తె గెతి నాయ్, గని, ప్రబుచి ఉప్పిరి నముకుమ్ తిలెకయ్ మాన్సుచి పాపుమ్ పుంచి జయెదె, చి దేముడు జో మాన్సుక పున్నిమ్ మెలి రితి దెకెదె మెన ఒప్పన్తనుమ్. జా రచ్చన రితి నముకుమ్ వాటు దొర్కు జతిసి.

29 నెంజెలె, దేముడు ఎక్కి యూదుల్కయ్ దేముడు జయెదె మెంతె గే? యూదుల్ నెంజెలనక కి జో దేముడు జయె నాయ్ గే? నిజమి, యూదుల్ నెంజెలనక కి జోయ్యి దేముడు.

30 కిచ్చొక మెలె, ఎత్తిక జో దేముడు, జో ఎక్కిలో. ఎక్కిలోతె ఏక రగుమ్ అన్నెక్లెతె అన్నెక్ రగుమ్ జతొసా నెంజెచి రిసా వేర వేర రచ్చన కెరె నాయ్, గని యూదుల్ జతి గుర్తుచి సున్నతి కెరన్లనక క్రిస్తుక నంపజా గెలె, జేవ్ నంపజలి రిసాయి జోవయించి పాపుమ్ జో పుంచెదె చి జోవయింక 'పున్నిమ్' మెలి రితి దెకెదె. అన్నె, జా సున్నతి నే కెరన్లన జోవయింక నంపజా గెలె, జోవయించి నముకుమ్చి రిసాయి జోవయించి పాపుమ్ కి, జో పుండ జోక కి 'పున్నిమ్' మెలి రితి దెకెదె.

31 దస్సి జలె, ఎక్కి, జోచి ఉప్పిర్చి అమ్చి నముకుమ్చి రిసాయి అమ్క 'పున్నిమ్ జల' మెలి రితి జో దెకెదె మెలె, జో దిల ఆగ్రుల్ అమ్ వెంట గెలుక గే? నెంజె. అమ్చి నముకుమ్చి రిసాయి జో దిల ఆగ్రుల్ తెన్ బెదితి సత్తిమ్ అమ్ ఇండుకయ్. దస్సి, జేవ్ ఆగ్రుల్తె తిలిసి నెరవెర్చువ కెరుమ్దే.

† 3:21 3:21 తెలుగు బైబిల్తె ధర్మశాస్త్రమ్ మెలె, మోసా అత్తి దేముడు రెగ్గయలి ఆగ్రుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పుస్తకుమ్తె రెగ్గయ జా అస్సె. ఈంజ దెకవుక మెన కుపియ బానతె నయి ప్రమానుమ్తె మోసా హార్ముచొచి అత్తి రెగ్గె దేముడుచ ఆగ్రుల్ మెన రచ్చన అస్సె.

4

నముకుమ్ వాట్, దేముడుచి దయ వాటు రచ్చన

1 జలె, అమ్ యూదులీచొ పూర్ణుమ్చొ అబ్రాహామ్చి రిసా కిచ్చొ మెనును? ఆగ్ రగుమ్చి అమ్చి జెర్మున్చి రిసా ఉచర్లె, అమ్ యూదులీచి సెకుమ్క జో అబ్బొ జయెదె.

2 జలె, ఏక్ వేల జోప కముచి రిసాయి అబ్రాహామ్క పున్న్చిమ్ కలుగు జతి జలె, జో అబ్రాహామ్ గవురుమ్ ఉచరసుక జతి, గని జోవయింప కముచి రిసాయి జోవయింక పున్న్చిమ్ మెన మాన్సుల్ ఉచర్లె కి, దేముడు దస్సి దెకె నాయ్.

3* "అబ్రాహామ్ దేముడు సంగిలి కోడు నంప కెర్లి రిసాయి 'జోక పున్న్చిమ్' మెలి రితి జో ప్రబు దెకిలో" మెన దేముడుచ కొడొతె రెగ్ల అస్సె.

4 జలె, కో జలెకు కామ్ కెర్లె 'కామ్ కెర్లొ' మెన దెతి కూలి దానుమ్ నెంజె, జా, చి అబ్రాహామ్ "నంప కెర్లి రిసాయి 'జోక పున్న్చిమ్' మెలి రితి ప్రబు దెకిలో" మెన దేముడుచి కోడు తెన్ రెగ్లప అస్సె.

5 దస్సి, అబ్రాహామ్ తెన్ కీసి జర్గు జలి గే, అన్నె మాన్సుల్ తెన్ కి దస్సి జయెదె. మెలె, కిచ్చొ కామ్క జెతికయ్ కామ్ జేవ్ నే కెర్లె కి, కిచ్చొ కామ్ కి కామ్క నెంజిలె కి, పాపుమ్ కెర్లసక జోచి దయకయ్, జోవయింపి పాపుమ్ పుంచితో దేముడుకయ్ కో నంప కెర్లె, జోవయింపి నముకుమ్చి రిసాయి 'అంచి పున్న్చిమ్ జోవయింక దా అస్సె' మెలి రితి జో పాపుమ్ పుంచితో దేముడు దెకెదె.

6 దస్సి, "జోవయింప కముచి రిసా నాయ్, గని జోచి దయచి రిసా దేముడు కక్క కక్క 'జోవయింక పున్న్చిమ్' మెలి రితి దెకెదె, జోవయింకయ్ చెంగిలి" మెన దాచీదు పూర్ణుమ్చొ ఏక్ కోడు రెగ్ల అస్సె.

7† "కిచ్చొ తప్పల్ చెమించుప జా అస్సి గే, కచ పాపల్ పుంచి జా అస్సి గే,

జోవయింకయ్ చెంగిలి.

8 కేన్ మాన్సుచి పాపుమ్ ప్రబు జోవయింక వయడె నాయ్ గే, జోకయ్ చెంగిలి" మెన రెగ్ల అస్సె.

9 జలె, ఈంజ చెంగిల్ వరుమ్ కక్క దొర్కు జతయ్? ఎక్కి యూదుల్ జతి గుర్చుచి సున్నతి కెరన్లసకయ్ దొర్కు జతయ్ గే జా సున్నతి నే కెరన్లసక కి దొర్కు జతయ్ గే? అబ్రాహామ్ నంపజలిన్కయ్ 'జోక పున్న్చిమ్' మెలి రితి ప్రబు జోచి దయక దెకిలన్ మెంతనుమ్.

10 జలె, ప్రబు జోక 'జోవయింక పున్న్చిమ్' మెలి రితి దెకిలిని కెయ్ తెంతో? జా సున్నతి జో నే కెరంతె అగ్లె తెంతో గేర్ కెరన్ల పడ్డె గే? పడ్డె తెంతో నాయ్. అగ్లెయ్ తెంతో.

11 జా సున్నతి నే కెరంతె అగ్లె తెంతో జో నంపజలిన్చి రుజ్జు దెకయ్తి గుర్తుకయ్ పడ్డె జో జా సున్నతి కెరన్లొ. దస్సి, జా సున్నతి నే కెరంతె కో నంపజా ప్రబు ఆరి దెతి పున్న్చిమ్ జా తవుల గే, జోవయింకయ్ అబ్రాహామ్ అబ్బొసి జయెదె. దస్సికయ్, జా సున్నతి నే కెరంతె అగ్లె కి ప్రబు 'జోవయింక పున్న్చిమ్' మెలి రితి అబ్రాహామ్క దెకిలో.

12 అస్సె, దస్సి కి, కో జా సున్నతి కెరన తిలె కి, జా సున్నతి నే కెరంతె అగ్లె తెంతో దేముడుచి కోడు నంప కెర్లొ అబ్రాహామ్చి రితి జవుల గే, మెలె, జోచి రితి నంపజవుల గే, జోవయింకయ్ కి అబ్రాహామ్ అబ్బొసి జయెదె.

13 దస్సి, "ఈంజ లోకుమ్ ఏలుప కెర్లి వాట తుమ్క దొర్కు కెరిందె" మెన అబ్రాహామ్క చి 'జోచి సెకుమ్తె పడ్డె జెర్కుక తిలసక' మెలి కోడు, దేముడు సంగిలి ప్రమానుమ్ కేన్ వాట్ అయ్లి మెలె, ఆగ్గుల్ రితి వాట్ నాయ్, గని జో దేముడుచి కోడు జో నంపయ్ కెర్లన్చి రిసా 'జోవయింక పున్న్చిమ్' మెలి రితి జో దెకిలన్.

14 ఏక్ వేల దేముడు మోసి తెన్ దిలి ఆగ్గుల్ రితి కెర్లస, జేవ్ జా ఆగ్గుల్ రితి కెర్లి రిసాయి అబ్రాహామ్చి పుత్తర్లు జా ఏలుప కెరుక తత్తి జలె, దేముడు సంగిలి ప్రమానుమ్ కామ్క నెంజిలె, జా ప్రమానుమ్చి ఉప్పిర్చి నముకుమ్ కామ్క నెంజిలి.

* 4:3 4:3 అదికాడుమ్ 15:6. † 4:7 4:7 కీర్తనలు 32:1-2.

15 అమ్ ఆగ్నల్ తిలసచి ఉప్పిరచి తీర్పు కిచ్చొ మెలె, 'పున్నిమ్ జా అస్సి' మెన కచి రిసా ఆగ్నల్ సాచి జతి నాయ్. ఆగ్నల్ తిలె, అమ్చ కమొక 'పాపుమ్చయ్' మెన రుజ్జు దెకవయ్ అమ్చి పాపుమ్చి రిసాచి సిచ్చ అన్తతి. అస్సెక్ కిచ్చొ మెలె, ఆగ్నల్ నెంజిలిన్తె, ఆగ్నల్ నేన్లనతె కో పాపుమ్ కెర అస్సి గే, నెంజిలె ఏక్ వేల పున్నిమ్ కెరుక జతి జలె 'పున్నిమ్ కెర అస్సి' గే ఆగ్నల్ వాల్ రుజ్జు కెరుక నెంజె.

16 జేవ్ దొన్సి అల్లరచి రిసా మాన్సుచి రచ్చనక దేముడు కిచ్చొ దిలో మెలె, జొయ్యి ఆదారుమ్ కెర్లిసి కిచ్చొ మెలె, కమె నెంజె, గని రితి నముకుమ్ తెన్. కిచ్చొక మెలె, కమె నాయ్, గని నముకుమ్ ఆదారుమ్ జలె, జా ప్రమానుమ్ జెయిమ్ జతిన్క దేముడుచి దయయ్ సాలు, అన్నె, జా ప్రమానుమ్ జోచి దయచి రిసా జెయిమ్ జయెదె జలె, అబ్రాహామ్చ పుత్తర్లు జలన ఎత్తిజిన్కయ్ జా ప్రమానుమ్ జెయిమ్ జయెదె. అబ్రాహామ్చ పుత్తర్లు యూదులి, అమ్చి దేముడు మోసే తెన్ దిలి ఆగ్నల్ అమ్చ తిలనయ్ గని అన్నె కోయి నాయ్ మెన నాయ్, పడ్డె 'అమ్ యూదుల్ ఎత్తిజిని' మెన నాయ్. గని అబ్రాహామ్చి రితి దేముడుచి 'కోడు నంప కెర్తన ఎత్తిజిని, జేవ్ యూదుల్ జలెకి నెంజిలె కి జోచ పుత్తర్లు జవుల. జోచి రితి నముకుమ్ తిల ఎత్తిజిన్క జో అబ్రాహామ్ అబ్బొ జయెదె.

17 దేముడుచ కొడతె రెగ్గయలి రితి,

సి "ఒగ్గర్ దేసిమ్లుచ సెకుమ్లుచ మాన్సుల్క తూయి అబ్బొసి జతి రితి ఆవ్ సంగ అస్సి." మెన అబ్రాహామ్క జో సంగిలన్. దస్సి, మొర్తనక జయడ్డె, అగ్గె నెంజిలిన్క తిలిసి రిత బుకార్టో దేముడుక అబ్రాహామ్ నంప కెర్లె, దేముడుచి మొక్కె అమ్ జో దేముడుచి కోడు నంప కెర్తన ఎత్తిజిన్క అబ్రాహామ్ అబ్బొ జా అస్సె.

18 ఒగ్గర్ దేసిమ్లుచ సెకుమ్లుచక జో అబ్బొ జతిసి జెయిమ్ జతిసి జో అబ్రాహామ్క రుజ్జు నే డీసిలెకి, జో జా ఆన తెన్ తిలన్, అన్నె,

* "అగానుమ్చ సుక్కల్ కిసి ఎత్తివాల్ అస్సి గే, దస్సి తుమ్చి సెకుమ్తె పడ్డె జెర్లితన ఎత్తివాల్జిన్ జవుల" మెన జో దేముడు ప్రమానుమ్ సంగిలిసి జో నంప కెర్తన్.

19 అగ్రుక జో మంత్రో జా పుంజెక్ వెర్పుల్ జా తా మొర్తి వయసు జా తిలె కి, తేర్పి జలి సారా గొడ్డు జా తిలె కి, జో అన్యానుమ్ జయె నాయ్.

20 కేన్ సుట్టు జా ప్రమానుమ్చి ఉప్పిరి అన్యానుమ్ జయె నాయ్, గని దేముడుక 'జా జెయిమ్ కెరెదె' మెన నముకుమ్ తా జోక గవురుమ్ దెతె తిలన్, చి జోచి నముకుమ్ అన్నె డిట్టుమ్ జలి.

21 'జో సంగిలి రితి దేముడు కెరుక తెరె' మెన పూర్తి నముకుమ్ తెన్ తిలె.

22 జాకయ్, 'జోచి నముకుమ్, జోక పున్నిమ్ జలి రితి జతయ్' మెన దేముడు తీర్పు కెర్లె.

23 గని 'జోచి నముకుమ్, జోక పున్నిమ్ జలి రితి జతయ్' మెలె కోడు ఎక్కి జోచి రిసా నాయ్,

24 గని అమ్చి రిసా కి. అమ్చొ ప్రబు జలో యేసుక అన్నె జయడ్డె దేముడు అబ్బొన్చి ప్రమానుమ్ అమ్ నంప కెర్లె, అన్నె మాన్సుల్క కి 'జోచి నముకుమ్ జోక పున్నిమ్ మెలి రితి జతయ్' మెంతి తీర్పు జోచి దయక కెరెదె.

25 అమ్చయ్ పాపల్ వయతి రిసా ప్రబు జలో యేసు అమ్క జెతి సిచ్చ సేడ్డన్. జా సిచ్చ అమ్క లయతిసి పిట్టవుక మెన. అన్నె, అమ్చి పాపుమ్ దస్సి † పుచి జలిసి రుజ్జు జవున్ మెనయ్ దేముడు అబ్బొసి జోక అన్నె జయడ్డన్.

5

యేసుక్రీస్తుచి అత్తి అమ్క సేంతుమ్ జలిసి

† 4:16:16 'అబ్రాహామ్క ఎత్తి అదికారుమ్ తిలో దేముడు సంగిలి కోడు' మెలె, జోవయిచి సెకుమ్తె పడ్డె జెర్లితన పడ్డెక ఏలుచ కెర్తెచి రిసాచి కోడు. జేవ్ పడ్డె ఏలుచ కెర్తెన్క యేసుక్రీస్తు ముక్కిమ్చొ జయెదె, చి జోవయితెన్ ఏలుచ కెరుల. పడ్డె జో ఎత్తి అదికారుమ్ తిలో దేముడుచ కొడె ఎత్తి నంప కెరుక ముక్కిమ్, గని ముక్కిమ్క 'జోవయిచి కోడు' మెలె, యేసుయ్; యోహాను 1:1-2, 14; చి యేసుచి రిసాచి సుబుమ్ కమర్, జోవయిచి రిసా దేముడు మోసే తెన్ దిలి ఆగ్నల్ సంగిలిసి ఎత్తి. § 4:17:17 అదికారుడుమ్ 17:5. * 4:18 4:18 అదికారుడుమ్ 15:5. † 4:25 4:25 చి ఒత్త తెంతో అమ్క జో 'పున్నిమ్' మెలి రితి దెకిలిసి.

1 జలె, నముకుమ్ వాట్ అమ్చి పాపుమ్ పుంచి జా అస్సె, అమ్చొ ప్రబు జలో యేసు అమ్చి పాపుమ్ పుంచిలి బలి జలి రిసా దేముడు తెన్ అమ్క సేంతుమ్ జలి.

2 దేముడుచి దయచి రిసా నముకుమ్ తెన్, జో అమ్క రచ్చన దొర్కు కెర అస్సె, ఈంజ రచ్చన అమ్క కేన్ వాట్ దొర్కు జా అస్సె మెలె, జో యేసుప్రబు అమ్చి పాపుమ్ పుందితి బలి జలి వాటు, అస్సె జా రచ్చన అమ్క దొర్కు జలి తెంతో, దేముడుచి పరలోకుమ్చి ఉజ్జడతె అమ్ బెదుమ్చి మెలి ఆన అమ్క దొర్కు జా అస్సె, చి అమ్క ఒగ్గర్ సర్దనంతోనుమ్ జతనుమ్.

3 అస్సె కిచ్చొ మెలె, నుబుమ్ కబుర్ నూనయేతి ప్రబు అమ్క దిలి కామ్చి రిసా, అమ్ బాదల్ సేడ్డిన్చి రిసా కి అమ్క సర్దనంతోనుమ్. బాదల్ సేడ్డె ఓర్పువ జా, నిదానుమ్ సికుక జయెదె.

4 జేమ్ బాదల్ సేడ్డిసి అమ్క ఏక్ పరిచ్చ కెర్రి రితి జయెదె, చి అమ్ ఒర్పువ జా నిదానుమ్ సికి అమ్క “పరిచ్చతె జిన్” మెన దేముడు జోచి సర్ద దెకవ అమ్చి పెట్టి అమ్క అస్సె ఆన దెయెదె, అమ్క అస్సె దిట్టుమ్ కెరెదె, చి

5 జా ఆనచి రిసా అమ్ నంపజలిసి జెయిమ్ జయెదె, లాజు జము నాయ్. దేముడు అమ్క దిలి దేముడుచి నుద్ది తిలి అత్తు తెన్ జోచి ప్రేమ అమ్చి పెట్టి నువ బెరవయ్ దా అస్సె. జయి అమ్క రుజ్జు.

6 అమ్క కిచ్చొ నెక్కి నెంప కెర్రి పొది, ‘చెంగిల్ సమయుమ్’ మెన అమ్ పాపుమ్ సుదల్క నయతాన్చి రాజిమ్ తెంతో రచ్చింఱువ కెర్రి రిసా యి క్రీస్తు మెర అమ్చి రిసాచి అర్పితుమ్ జలన్.

7 జలె, పొన్ముమ్ డీస్తా కేన్ జపున్ మాన్సుక కిచ్చొ జపున్ బాద తెంతో రచ్చింఱువ కెరుక మెన కో మాన్సుల్ సాత జిపు దెవుల గె? దెతి నాయ్. కేన్ గె ఏక్ సుట్టు కో జపున్ చెంగిలో మాన్సుక రచ్చింఱువ కెరుక మెన కో జలెకు మాన్సు దయిరిమ్ జా మెరెదె.

8 గని, దేముడుచి ప్రేమ అమ్క కీసి రుజ్జు జతయ్ మెలె, అమ్ పాపుమ్ కెర్లన జా తతికయ్, అమ్క రచ్చింఱువ కెర్రి రిసా క్రీస్తు జోచి జిపు దిలన్.

9 జలె, దొర్కు జలి అర్పితుమ్ జో దిలిన్చి లోయిచి రిసా అమ్చి పాపుమ్ అప్పె పుంచి జా అస్సెచి రిసా, అస్సె, దేముడు అమ్క దెంక తిలి సిచ్చ అమ్క నే లయితి రితి, జో యేసుయి పిట్టవ అస్సె. జా సిచ్చ అమ్ సేడుక నాయ్.

10 మెలె, దేముడుక అమ్ విరోదుమ్ సుదల్ జా తిలి పొది, అమ్చి పాపుమ్ గెచ్చయేతి రిసా జోచొ పుత్తుసి మెర్రిసి, అమ్క జోతె అస్సె బెదవ దిలన్. కెయ మెలె, జోక అమ్ విరోదుమ్ జా తిలి పొది. జలె, అస్సె, అమ్ అప్పె జో తెన్ అస్సె బెదయ్ అస్సుమ్ జలె, జో అస్సె జిమ్ జా, జిమ్ తతిన్చి రిసా నాననుమ్తె నే గెతె, పరలోకుమ్తె జోతె గెతి రచ్చన కచితుమ్ జమదె.

11 జో, పడ్డొ అస్సె కిచ్చొ మెలె, అమ్చొ ప్రబు జలో యేసుక్రీస్తు జర్పు కెర్రిన్చి రిసా దేముడు అమ్క అస్సె బెదవన్చి రిసా, జో దేముడుచి తెడి అమ్ అప్పె అస్సుమ్చి రిసా, జోచి ఉప్పిరి అమ్క సర్దనంతోనుమ్ జతనుమ్.

ఆదామ్ తెంతో మొర్పు యేసు తెంతో జివుమ్

12 ఎక్కిలో మాన్సు, తోలితోచొ మాన్సు జలో ఆదాము, పాపుమ్తె సేడ్డిన్ తెన్ ఒండి లోకుమ్తె పాపుమ్ అయ్లి, అస్సె పాపుమ్చి రిసా మొర్పు అయ్లి. జాకయ్ ఒత్త తెంతో ఎత్తి. మాన్సు పాపుమ్ కెర అస్సె, కెర్రితి, చి ఎత్తిజిన్క మొర్పు అయ్లి.

13 దస్సి, కచితుమ్, దేముడు ఆగ్నల్ రితి నే దిలి ఆగ్గయి తెంతో ఈంజ లోకుమ్తె పాపుమ్ అస్సె. ‘గని ఆగ్నల్ రితి నెంజిలిన్తె జా పాపుమ్చి రుజ్జు సరిగా డీసె నాయ్, చి తిర్పు కెర సిచ్చ కెరుక నెంజె’.

14 జలెకి, ఆగ్నల్ దిలిన్క *మదెనె జలో మోసే నే జెతె అగ్గె కి, తోలితోచొ ఆదాము తెంతో కి మాన్సుల్క మొర్పు ఏలువ కెర్రి తిలన్. †వేర పాపల్ జేచ్ కెర్రి కి, దేముడుచి కోడు పిట్టవన్లొ ఆదాము కెర్రి రగమ్ పాపుమ్ నే కెర్లనచి ఉప్పిరి కి మొర్పుయి ఏలువ కెర్రి తిలన్. జలెకి, పడ్డొ జెంక తిలో యేసుక ‡తోలితోచొ ఆదాము అమ్క టాలె జతయ్. ఆదాము ఏక్ కాలుమ్క మొదోల్చొ, §పాపుమ్చి మొర్పు ఏలువ కెర్రి

* 5:14 5:14 నిర్ణయకాండము 19, 20 అధ్యాయల్. † 5:14 5:14 ఆదాము తెన్ ఎత్తి అదికారుమ్ తిలో దేముడు సాత లట్టబ ఏక్ కోడు తిన్సగ నంగ తిలన్. తిన్సగ నంగిలి జా అద్ర ఆదాము పిట్టయలన్. అదికారుమ్ 2:15-17 చి 3 అధ్యాయమ్. ‡ 5:14 5:14 1 కొరింధల్ 15:22, 45 § 5:14 5:14 అదికారుమ్ 3 అధ్యాయమ్.

కాలుమ్. పడ్డో యేసు అన్నెక్ కాలుమ్క మొదోల్చో, పాపుమ్ గెచ్చవ పరలోకుమ్చి రాజిమ్ ఏలువ కెర్రి కాలుమ్.

15 పాపుమతె సేడ్లన్క చి రచ్చన దిలిన్క తేడ. మెలె, ఎక్కిలో మాన్సు పాపుమ్ కెర్లినచి రిసా ఒగ్గర్జిన్ మొర్లమ్. గని దేముడుచి దయచి రిసా జో అన్నెక్లొ మాన్సు జలో యేసుక్రీస్తు జోచి ప్రేమక ఆరి దిలి రచ్చనచి ఒగ్గర్జిన్క జో దేముడు నెతోవ కెరయ అస్సె.

16 అన్నె, జోచి దయక దేముడు దిలి వరుమ్క జగ్గు జతిన్క చి జో ఎక్కిలో కెర్రి పాపుమ్క జగ్గు జలిన్క ఒగ్గర్ తేడ. జా ఎక్కి పాపుమచి రిసాచి తీర్పు కిచ్చి అనలి మెలె, దేముడు దెతి సిచ్చ. గని, పడ్డో, అమ్ ఎత్తిజిన్ మాన్సుల్ ఒగ్గర్ పాపుమ్ కెర కెర అమ్ కెర్ల పాపల్ ఒగ్గర్ నిల్లు జా గెలి పొది, జో దేముడు జోచి దయక దిలి రచ్చన కిచ్చి అనలి మెలె, అమ్చి పాపుమ్ పుంచ దిలిసి.

17 దేముడు సంగిలి *కోడు జో ఎక్కిలో పిట్టవ పాపుమతె సేడ్లినె తెంతో జా పాపుమచి సిచ్చ, మెలె మొర్పుయి, ఏలువ కెర్లయ. జలెకి, అన్నె కిచ్చి ముక్కిమ్క జగ్గు జయెదె మెలె, జో అన్నెక్లొ జలో యేసుక్రీస్తుచి అత్తి దేముడుచి దయచి రిసాచి, జో ఆరి దిలి పున్నిమ్ కక్క కక్క దొర్కు జయెదె గే, జతిన్కతె, మెలె పరలోకుమ్చి రాజిమ్తె, జేవ్ †ఏలువ కెరుల.

18 దస్సి జలె, ఎక్కిలో పాపుమ్ కెర్లినె కీసి ఎత్తిజిన్క సిచ్చతె సేడయలి గే, దస్సి, జో అన్నెక్లొ పున్నిమ్ కెర్లినె ‡జీక నంపజల ఎత్తిజిన్చి పాపుమ్ పుంచ జోవయింక జియడ్డయ.

19 మెలె, ఎక్కిలో మాన్సు దేముడు సంగిలి కోడు నే కెర్లినచి రిసా †ఎత్తిజిన్ పాపుమ్ సుదల్ జా గెలమ్. దస్సి, జో అన్నెక్లొ, దేముడు అబ్బినచి కోడు సూన కెర్లినచి రిసా *ఒగ్గర్జిన్క 'జేవ్ పున్నిమ్ జలె రిత జా అస్సి' మెన జో దేముడు కచితుమ్ దెకెదె.

20 ఆగ్గల్ రెతి మదెనె అయలి, గని కిచ్చోక మెలె, మాన్సుల్ పాపుమ్ ఇండితినచి రుజ్జు సొస్తుమ్ డీసున్ మెనయ దేముడు జా ఆగ్గల్ రెతి మదెనె దిలన్. గని మాన్సుచి పాపుమ్ దస్సి సొస్తుమ్ రుజ్జు జలెకి, అమ్క కిచ్చి రుజ్జు అయలి మెలె, దేముడుచి దయ జా పాపుమచి జా ఆగ్గల్ రెతి జిన అన్నెయ కామ్ కెర్రి.

21 మెలె, పాపుమ్ మొర్పు అన, జా పాపుమ్ మొర్పు వాట్ కీసి ఏలువ కెర్రి తిలి గే, దస్సి, అమ్చో ప్రబు జలో యేసుక్రీస్తు మొర అమ్చి పాపుమ్ పుంచ, జోచి పున్నిమ్ అమ్క ఆరి దిలిన్కయ జోచి దయ ఏలువ కెర్పు మెనయ, దేముడుచి దయయ జిన అస్సె. అమ్క 'పరలోకుమ్చి రాజిమ్తె బెద పరలోకుమ్చి జిచ్చక కెయక తెయక జెయ ఆకర్కయ ఒత్తయ గెతు' మెనయ జా వరుమ్ దిలన్.

6

నంపజా పాపుమ్ ముల సత్తిమ్ ఇండుక

1 జలె, కిచ్చో మెనను? 'అమ్చి పాపుమ్ దేముడు చెమించువ కెర్లినెతె జోచి దయ ఒగ్గర్ డీసుక, ఒగ్గర్ అవ్కానుమ్ దెమ్' మెన అమ్ పాపుమ్ ఇండితె తంక గే?

2 దస్సి ఉచరుక నాయ. పాపుమ్ ముల అమ్చి సొంత అత్తక మొర్ల రిత జలమ్ మెలె, పాపుమతె కీసి అన్నె ఇండుమ్దె?

3 యేసుక్రీస్తుచి నావ్ తెన్ బాప్తిసుమ్ జలె అమ్ ఎత్తిజిని, జలె, జో మొర పాపుమ్ గెచ్చయలిన్చి గుర్తు జతి బాప్తిసుమ్ కడన్లినెతె జో మొర్లినె తెన్ బెదిల్ రెతి, జా మొర్ల రిత జలమ్ మెన నేస్సు గే?

4 జో యేసుచి ఆగ్గ మొర్లినెతె అమ్ బెద, అమ్చి అత్తక మొర జో తెన్ రొయి జలి గుర్తుకయ అమ్ బాప్తిసుమ్ నజన్లమ్. దస్సి, అబ్బిన జలో దేముడుచి సెక్కిక్రీస్తు కీసి మొర్పు తెంతో అన్నె జిమ్ జా ఉట్లన్ గే, దస్సి, అమ్ కఱంబ బత్తుకయ నొవర్ జెర్మన్ జోచి అత్తక జెర్మన్ జా సత్తిమ్ ఇండుకయ మెన, జో దేముడు అమ్క జియడ అస్సె.

* 5:17 5:17 14 నంబర్ కోడుచి ఎట్టచి. 17 నంబర్ కోడు దెక. † 5:17 5:17 తిమోతిక రిగ్లె 2 నంబర్ ఉత్తమ్ 2:12. డీసుయలిసి 5:10, 20:4, 6 చి 22:5. ‡ 5:18 5:18 నంబరి 'పాపుమ్ పుంచ జతి అవ్కానుమ్, జోవయింక రాజిమ్తె జతి అవ్కానుమ్, ఎత్తిజిన్క దొర్కు కెర్లయ'. గని దొర్కు కెర్రి కి, జా నజిలెకయ. కీసి నజుక మెలె, యేసుక్రీస్తుకయ నంప కెరుకయ. యోహాను 3:18, 1:12. § 5:19 5:19 3:10-12, 23 దెక. * 5:19 5:19 18 నంబర్ కోడు దెక.

5 జలె, జో మొర్రిన్తె అత్తుక బెద జో తెన్ అంటుప జలి రితి జలమ్ మెలె, జో అన్య జీవ్ జా ఉట్టి జీవుక కచితుమ్ అమ్ కి జీమదె, చి మదెనె ఆగ్గక అమ్ మొర్లె, అకరక జోచి రితి అమ్ కి జీవ్ జా ఉట్టుమదె.

6 అమ్చి ఆగుతె ఏలుప కెర్తె తిలి అగ్గచి పాపుమ్బుద్ది పూర్తి గెన్ను మెనయ్, పాపుమ్చి సేవ అమ్ అప్పె తెంతో కెరుక నాయ్ మెనయ్, పాపుమ్ అమ్చి అగ్గచి అత్తు జో తెన్ సిలువతె గలి జా మొర్లి మెన జానుమ్.

7 అమ్చి పాపుమ్చి అత్తు మొర తిలె, పాపుమ్ అమ్క ఏలుప కెర్తిన్ తెంతో విడ్డల్ జా అన్నుమ్.

8 గని అన్యె, క్రీస్తు తెన్ మొర్లమ్ మెలె, 'జో తెన్ జీమదె' మెన కి అమ్క దయిరిమ్ అన్యె.

9 కిచ్చొక మెలె, క్రీస్తు మొర తా అబ్బొన్ అన్యె జయడ్లెసా జా కెయక అన్నె మొరె నాయ్ మెన జానుమ్. అప్పె జోచి ఉప్పిరి మొర్లుక కిచ్చొయ్ అదికారుమ్ నాయ్.

10 జో మొర్రిన్, జలె, మాన్యులచి పాపుమ్ గెచ్చయ్తి బలి జలిసి. జా కామ్, జలె, ఎక్కి నుట్టుక పూర్తి జెయిమ్ జలిసి, కేడ్లిసి. గని జో అప్పె జతిసి, జలె, దేముడుచి గవురుమ్ కెయక తెయక దెకయ్తి రితి జో జతయ్. జో మొర్రిన్ ఎక్కి నుట్టుచి కామ్, జోచొ అబ్బొన్చి గవురుమ్ దెకయ్తిసి కెయక తెయక చి కామ్, కేడ్లిసి నెంజె.

11 జాకయ్ తూమ్ కి కిసి దెకనుక మెలె, 'అమ్చి పాపుమ్ గెలి. అమ్చి పాపుమ్చి అత్తు మొర్లి' మెనయ్, క్రీస్తు జలొ యేసుచి జీవుకయ్ సొరం జెయ అన్నుమ్, చి దేముడుచి గవురుమ్ దెకయ్తి రితి అమ్ ఇండితె తంకయ్ మెన అర్దుమ్ కెరన దస్సి ఇండుక.

12 జాకయ్, మొర్త తుమ్చ ఆగ్గెతె పాపుమ్ ఏలుప కెర్పు నాయ్, నెంజిలి తుమ్చి ఆగ్గెచ ఆసల్ జర్గు కెర్తె, పోన.

13 పాపుమ్ కమొ కెర్తె అయ్దల్ జేవ్ జతి రితి, పాపుమ్తె తుమ్చ ఆగ్గెచ వాటల్ తుమ్ బెదప నాయ్. గని, 'మొర్లు తెంతో జో అమ్క నెత్తవ కెర జో తెన్ బెదవన దేముడు అమ్క జయడయ్ అన్యె, అమ్క జివ్వి కెర అన్యె' మెనయ్, జోచి అత్తి తుమ్చి అత్తు సొర్పు కెర దా, జోచి సత్త్రిమ్ దెకయ్త కమొచి రిసాచ అయ్దల్ జేవ్ జతి రితి, తుమ్చ ఆగ్గెచ వాటల్ జోచి అత్తి సొర్పు కెర దాన.

14 జోచి అత్తి సొర్పు కెర దిలదు మెలె తుమ్చి ఉప్పిరి పాపుమ్ ఏలుప కెరె నాయ్. కిచ్చొక మెలె, తుమ్ అగ్గులచి రితి తెడి నాయ్, గని జో దేముడుచి దయచి తెడి అన్నున్.

15 జలె, 'అప్పె ఆగ్గుల్ రితి తెడి అమ్ నాయ్. జోవయిం చి దయక దేముడు అమ్క చెంగిల్ దెకితయ్, చి అమ్ పాపుమ్ కెర్తె బాద నాయ్' మెంతను గె? దస్సి ఉచరుక నాయ్.

16 జోచి సేవ కెరుక మెన కచి అత్తి తుమ్క తుమ్ ఒప్పన కెరన తన్నె గే, జోచయ్ గొతిమాన్యుల్ జా అన్నున్ మెన నేన్ను గే? పాపుమ్తె సొర్పు కెరన్లె, పాపుమ్చి గొతిమాన్యుల్ జెన్నె, చి మొర్లుతె గెతె. దేముడుచి కోడు కెర్తిన్తె ఒప్పన కెరంతె జలె, జో దెతి పున్మిమ్ జెన్నె.

17 దేముడుక జెయ్యు! పాపుమ్చి సేవ కెర పాపుమ్చి గొతిమాన్యుల్ తుమ్ అగ్గె జా తిలదు, గని తుమ్క అప్పె సికడ్లి తుమ్క అప్పె దిలి కోడి రితి ఇండుక తుమ్చి పెట్టి కోరవ జా అన్నున్.

18 అన్యె, పాపుమ్ ఏలుప కెర్తిన్ తెంతో దేముడు తుమ్క విడ్డల్ కెర, సత్త్రిమ్ ఇండితిన్క తుమ్ గొతిమాన్యుల్ జతి రితి కెర అన్యె.

19 మాన్యుల్ రోజుక అర్దల్ సంగితి రితి, టాలికయ్ 'గొతిమాన్యుల్' మెంతసి. కిచ్చొక మెలె, అత్తుకమొచి రిసాచ కొడె అర్దుమ్ కెరనుక తుమ్క ఇదెలి బాద, చి 'అర్దుమ్ కెరంతు' మెనయ్ ఇసి టాలి తెన్ సంగితసి. జా అర్దుమ్ కిచ్చొ మెలె, లంజె వెట్యారుమ్చ కమొతె, పాపుమ్చి ఉప్పిరి పాపుమ్చి కమొతె తుమ్చ ఆగ్గెచ వాటల్ అగ్గె బెదవంతె తిలదు, గని అప్పె తెంతో తుమ్ కిచ్చొ కెరుక మెలె, దేముడు తుమ్క దిలి సుద్ది పూర్తి నెరవెర్పుయ్ జతి రితి, సత్త్రిమ్ కమొక ఇండితిన్తెయ్, తుమ్చ ఆగ్గెచ వాటల్ తుమ్ సొర్పు కెర దాన.

20 పాపుమ్చి సేవ కెర్తె పాపుమ్చి గొతిమాన్యుల్ తుమ్ తిలి పొది సత్త్రిమ్ ఇండితి ముద్దెతెను నాయ్, 'అమ్ సత్త్రిమ్ ఇండుక నాయ్' మెన ఇస్సుమ్ అయ్లి రితి ఇండితె తిలదు.

21 గని జా పొదిచ తుమ్చ కమొచి రిసా అప్పె ఉచరై తుమ్క లాజు. జేవ్ కమొ తుమ్క కిచ్చో లాబుమ్ ఆన్స? కిచ్చో పలితుమ్ దెర్ల? లాబుమ్ నాయ్, కిచ్చో చెంగిల్ పలితుమ్ నాయ్. దస్స కమొ మాన్సుక కేనె నెతతి మెలె, నానినుమ్తె, మొర్పుతెయ్.

22 గని, పాపుమ్ ఏలుచ కెర్లిన్ తెంతో విడ్డల్ జా దేముడుచ గొతిమాన్సుల్ తుమ్ జలి తెంతో, అప్పె కిచ్చో పలితుమ్ దెర్లయ్ మెలె, జో దెతి సుద్ది జా, తుమ్ సుద్ది రితి ఇండితను, చి జో దెతి సుద్ది తుమ్క పరలోకుమ్తె బెదయ్తయ్, తుమ్క కెయ్క తెయ్క జయ్కయ్.

23 జలె, పాపుమ్ జేవ్చి సేవ కెర్తనక బట్వాడి మొర్పుయి. గని, దేముడు జోవయ్చి సర్తక అమ్క ఆరి దిలి వరుమ్, అమ్చో ప్రబు జలో యేసుక్రీస్తుచి తెడి పరలోకుమ్తె గెచ్చు కెయ్క తెయ్క జతిసి.

7

ఆగ్గుల్ తెంతో విడ్డల్ జా క్రీస్తుచి తెడి తిలిన్

1 జలె, దేముడు మోన్ తెన్ దిలి ఆగ్గుల్ జాన్ల బాపుడ్లు, మాన్సు మొర తిలె నాయ్, గని జివ్వి తిలె పొదికయ్ జోచి ఉప్పిరి ఆగ్గుల్క అదికారుమ్ తయెదె మెన నేన్ను గే?

2 గని, కేన్ జవున్ తేర్బోదచో మున్సుని జివ్వి తిలి ఎదిలి, ఆగ్గుల్చి రిసా జోచి తెడి జా తయెదె, జా ఆగ్గు పిట్టపుక నెంజె. గని మున్సున్ మొర గెలె, తెర్పిమున్సు చెంగిల్ తతి జా ఆగ్గు జేవ్చి ఉప్పిరి తయె నాయ్.

3 జాకయ్, మున్సుని జేవ్ తిలె పొది జా తేర్బోద అన్నెక్కోక గెలె, జాక 'లంజె' మెనుల, గని మున్సుని మొర గెలె, జా ఆగ్గు ముద్దొ కెర్లిన్ తెంతో జా పిట్టవ జా అస్సె, చి అన్నెక్కోక పెండ్లి జలె లంజె నెంజె.

4 దస్సి, బాపుడ్లు, క్రీస్తుక నంప కెర జో తెన్ తుమ్ బెదిలి రిసా, జో యేసుక్రీస్తుచి ఆగ్ మొర్లిన్ తెన్ తూమ్ కి మొర అస్సున్, చి రిసా తుమ్చి ఉప్పిరి ఆగ్గుల్క అదికారుమ్ నాయ్. దస్సి, తుమ్ అప్పె ఆగ్గుల్చి తెడి నాయ్ చి రిసా తుమ్ అన్నెక్కోచి అదికారుమ్చి తెడి తంక వాట్ తవున్ మెనయ్ దేముడు ఇని జర్గు కెర్తన్. జో దేముడుచి గపురుమ్ దెకయ్తి రితి అమ్ ఆత్మపలితుమ్ దెరుక మెనయ్, మొర జేవ్ జా ఉక్లో జో క్రీస్తుచి తెడి అమ్ తంకయ్ మెనయ్ ఇని జర్గు కెర్తన్.

5 ఈంజ ఆగ్చ అమ్చి పాపుమ్చ ఆనల్క అమ్ జతె తిలి పొది ఆగ్గుల్ అమ్చి పెట్టిచ ఆనల్క 'పాపుమ్చయ్' మెన దెకయ్తె తిలె, చి జేవ్ ఆగ్గుల్ 'దస కమొ పోస్' మెన సంగితికయ్, జేవ్ పావల్ కెర్తి ఆన ఒగ్గర్ జా గెలి. పాపుమ్ కెర్తి జా ఆన ఒగ్గర్ జా అమ్చి ఆగ్చ వాటల్తె బార్ జా జేవ్చి కామ్ కెర్తె తా మొర్పు ఆనతి పలితుమ్ దెర్లె తిలి.

6 గని అప్పె, క్రీస్తు తెన్ బెద అమ్ 'మొర్లి' తెంతో, ఆగ్గుల్ తెంతో పిట్టవ జా అస్సుమ్. అమ్క దెర బంద తిలి జా ఆగ్గుల్క అమ్చి ఉప్పిరి అదికారుమ్ నాయ్ చి రిసా రెగిడ్ల ఆగ్గుల్చి తెడి నాయ్ గని దేముడుచి సుద్ది తిలి ఆత్మకయ్ నొవర్ జెర్మున్ జా, జయ్యు సెక్తికయ్ జోచి సేవ కెర్తనుమ్.

ఆగ్గుల్తె పాపుమ్ వాట్ చజ ఒగ్గర్ జా గెతిన్

7 జలె, కిచ్చో మెనుమ? 'ఆగ్గులీ పాపుమ్' మెనుక జయెదె గే? నెంజె. దస్సి మెనుక జయె నాయ్. గని ఆగ్గుల్ తత్త నాయ్ జలె, 'ఆవ్' మెనుమ, 'ఆవ్ పాపుమ్ కెర్లిసా' మెన ఆవ్ సరిగా చినంతయ్ నాయ్. "అన్నె మాన్సుల్చి ఆస్తిక ఆన జా నాయ్" మెన ఆగ్గుల్తె తత్తి నాయ్ జలె, అన్నెక్కోచి ఆస్తిక ఆన జతిన్క 'పాపుమ్' మెన నేన్తయ్, ఆవ్ కి దస్సి పాపుమ్ కెర్లిసి చినంతయ్ నాయ్.

8 గని, పాపుమ్బుద్ది అంచి పెట్టి అగ్ తెంతో తిలన్, చి "అన్నె మాన్సుల్చి ఆస్తిక ఆన జా నాయ్" మెన ఆగ్గుల్తె తతికయ్, అంచి పెట్టిచి పాపుమ్ బుద్దికయ్ "దస్సి జలె, అన్నె మాన్సుల్చి ఆస్తిక ఆన జయెదె" మెనయ్ ఆన జలయ్, చి అన్నె ఒగ్గర్ ఆనల్, కిచ్చో కిచ్చోచ ఆనల్ ఎత్తి జలయ్. ఆగ్గుల్ నేన్లె, అమ్చి పాపుమ్ నిజల్ రితి, జీవ్ నెంజల్ రితి తా కామ్ కెరె నాయ్.

9 'ఆవ్' మెనుమ, అగ్గెయ్ ఆగ్గుల్చి తెడి నే తస్సె, అంచి పాపుమ్క 'అస్సె' మెన నేన్ కెర, అంచి ఇష్టుమ్ అయ్లి రితి సర్త తెన్ జతె తిలయ్, గని జా ఆగ్గు నూన్లె తెంతో పాపుమ్ అంచి పెట్టి అన్నె జీవ్ జలన్, చి ఆవ్ మొర్లయ్.

10 దస్సి, 'జీవ్ దెతి వాట్ దెకయెద' మెన ఆవ్ నంప కెర్లి ఆగ్గు అంక మొర్లి సిచ్చ అన్లన్.

11 కీసి మెలె, పాపుమ్ బుద్ది అంక మోసిమ్ కెర, 'చెంగిల్' మెన ఆవ్ నంప కెర్లి ఆగ్గు వాటీ బార్ జలన్.

12 మెలె, దేముడు మోసే తెన్ దిలి ఆగ్గుల్ సుద్ది అస్తి, ఒత్తది ఎత్తి. ఆగ్గు సుద్ది అస్సె, సత్తిమచ తీర్పుల్ దెకయ్తయ్, చెంగిల్ అస్సె.

13 దస్సి జలె, 'ఆవ్' మెనుసు, చెంగిల్చి అంక మార్లన్ గే? నాయ్. ఆగ్గుల్ చెంగిల, గని జా చెంగిల్ తిలిన్చి ఆగ్గు పిట్టవ పిట్టవ, పాపుమీ అంచి పెట్టి జేవ్చి కామ్ కెర కెరయి మార్లి. దేముడుచి సెలవ్ కిచ్చొ మెలె, ఆగ్గుల్ వాట్ పాపుమ్ జేవ్చి కామ్ కెర్లి తత్తిన్తెయి పాపుమక, పాపుమీ మెన మాన్సుల్ చినుత్ మెనయ్, పాపుమ్ ఆగ్గుల్ వాట్ పుల పుల కెర్లి మూర్కుమ్ జా గెతయ్ గే చినుక నెంజెలిన్చి జేవ్చి కామ్ పూర్తి డీసుకయ్ మెన, దేముడు సెలవ్ దిలన్.

14 జలె, దేముడు మోసే తెన్ దిలి ఆగ్గుల్ దేముడుచి సుద్ది తిలి ఆత్తుకయ్ దిలన, జోచి ఆత్తుతెయ్ బెదితన, మెన ఆమ్ జానుమ్, గని ఆవ్ మాన్సుక మాములుమ్ మాన్సుచి అఱి, మాములుమ్ మాన్సుచి బుద్ది అస్సె, చి ఈంజ అఱెత ఆవ్ తతి ఎదిలి సేంపు పాపుమ్ అంక నేన్చి రితి అస్సె. పాపుమచి గొతిమాన్సు ఆవ్.

15 ఆవ్ సొంత ఇండితిసి ఆవ్ అర్దుమ్ కెరనుక నెతిరతసి. 'సత్తిమ్ కెరింద' మెలె కి నెత్త తా, 'గర్చి' మెన ఆవ్ నెసితిసి ఆవ్ జర్గు కెర గెల సిక్కు జా గెతసి.

16 జలె, 'పాపుమ్' మెన ఆవ్ నెసితిసి ఆవ్ కెర్లసి జలె, జా పాపుమ్ నెసిలిసి తెన్ 'దేముడు దిల ఆగ్గుల్ చెంగిల్' మెన ఒప్పున్చి రితి జతయ్.

17 తెడిక తెడి దేముడుక ప్రేమ కెర్లి అఱివి జా పాపుమ్ కెర్లెసొ నెంజె, గని ఆవ్ మాన్సుచి అఱి తిలి పాపుమీ జా కామ్ కెర్లయ్.

18 మెలె, అంచి సొంత నెక్కిక, అంచి అఱి, అంక కిచ్చొ సత్తిమ్ నాయ్ మెన జాని. 'చెంగిల్చి కెరింద' మెన ఉచరెందె, గని మాన్సుచి అంచి నెక్కిక జర్గు కెరుక నెతిరి.

19 నెత్త, 'చెంగిల్' మెన ఆవ్ ఇస్టుమ్ జలిసి జర్గు నే కెర్లి, నెసిలి పాపుమ్ జర్గు కెరయ్ గెల్లసి.

20 జలె, 'పాపుమ్' మెన ఆవ్ నెసితిసి ఆవ్ కెర్లసి జలె, దేముడుక ప్రేమ కెర్లి అఱివి జర్గు కెర్లిసి నెంజె, గని అంచి అఱి జేవ్చి ఇస్టుమ్ కెర, పాపుమీ జర్గు కెర్లయ్.

21 దస్సి, కిచ్చొ ఆగ్గు డీస్టయ్ మెలె, 'సత్తిమ్ కెరింద' మెన ఆవ్ ఉచర్లె పొది, పాపుమ్ పాసి రకితె అస్సె.

22 మెలె, అంచి పేట్ తెడి దేముడు మోసే తెన్ దిలి ఆగ్గుల్ రిసా ఇస్టుమ్ కెరుక ప్రేమయ్ అస్సి,

23 గని అంచి అఱి కిచ్చొ ఆగ్గు జర్గు జతిసి ఆవ్ చినితసి మెలె, అంచి మెన్సుతె తిలిన్చి ఉప్పిరి జా వేరచి యుద్దుమ్ కెర, అంచి అఱిచ వాటల్ తెన్ నెరవెర్లువ జతి పాపుమతె అంక దెర్చు సేడయ్తయ్.

24 అయ్యెళ్లి! కెర్లి బాద సేడ్తసి, జా ఎత్తి రిసా! మొర్చు ఆన్తి ఈంజ పాపుమచి అఱి తెంతో కో అంక రచ్చించువ కెరుల?

25 అమచొ ప్రమ జలొ యేనుక్రీస్తుచి రిసా దేముడుక జోబర! జోయ్యి రచ్చించువ కెరెద! జోయ్యి అమక జీనవ అస్సె! జలె, అప్పెచి మట్టుక అంచి మెన్సుక, జో తిలి ఆత్తుక, దేముడు మోసే తెన్ దిలి ఆగ్గుల్చి రిసా దేముడుచి సేవ ఆవ్ కెర్లసి, గని అంచి అఱిగక పాపుమచి సేవ కెర్లసి.

8

యేసు అమక పాపుమ్ తెంతో మొర్చు తెంతో పిట్టవ కెర్లిసి

1 జలె, క్రీస్తు జలొ యేసుచి తెడిచ మాన్సుల్క జో జోచి పాపుమ్ పుంచ అస్సెచి రిసా లోకుమచ ఎత్తిక జో తీర్పు కెర్లి పొది జేవ్చి కిచ్చొ సిచ్చ జంక నాయ్. నాసినుమతె జేవ్ గెచ్చుక నాయ్.

2 కిచ్చొక మెలె, అమక ఏలువ కెర్లి పాపుమ చి మొర్చుచి ప్రమానుమచి సెక్తి తెంతో జీవ్ దెతి దేముడుచి సుద్ది తిలి ఆత్తుచి ఆగ్గుతె అమక పిట్టవ కెరయ్ అస్సె. జో యేసుచి అత్తి, యేసుతె జర్గు జలి కామ్వాట్ విడ్డల్ కెరయ్ అస్సె.

3 మెలె, మాన్సుచి ఆగి పాపుమ్ ఏలుప కెర్తయ్. అమచి ఆగి ఏలుప కెర, ఆగ్గుల్ నెరవెర్చుప కెరుక తిలిసి పాపుమ్ పిట్టయలి. జాకయ్ ఆగ్గుల్ అమచి పాపుమ్ గెచ్చువుక అమక చెంగిల్ కెరుక నెత్తి. జలె, దేముడు అమచి పాపుమ్ గెచ్చువ అమక సుద్ది కెరుక మెన మాన్సుచి ఈంజ పాపుమ్చి ఆగ్ రూపుమ్ జోచో సొంత పుత్తునక ఈంజ లోకుమతె త్రెర్తయలన్. దస్సి పాపుమ్ పుంచిత బలి జో జతి రిసా అమచి ఆగి కామ్ కెర్తి పాపుమ్ జాక జెతికయ్, జో యేసుచి ఆగ్ వాబ్ పాపుమ్క సిచ్చి కెర గెల తీర్పు కెర్లన్*.

4 కిచ్చొక పాపుమ్క తీర్పు కెర్లన్ మెలె, ఆగ్గులెత్ సంగిలి దొర్పు, జలి పున్నిమ్ అమచితె నెరవెర్చుప జవున్ మెనయ్. కచితె మెలె, అమచి ఆగ్చ అసల్క నాయ్ గని దేముడుచి సుద్ది తిలి ఆత్మచి సెక్తికయ్ కో ఇండుమ్దె గే, అచ్చి.

5 మాములుమ్ మాన్సుచి బుద్దిక, ఈంజ ఆగ్చ అమచి పాపుమ్చ అసల్క కో జతతి గే, ఈంజయ్ లోకుమ్తె తిలన్ ఎత్తిక, ఈంజ ఆగ్చ అసల్ తిలన్ ఎత్తికయ్ కోర్ప జతతి, ఉచర్తె తత్తతి. గని దేముడుచి సుద్ది తిలి ఆత్మచి సెక్తిక కో జతతి గే, జా ఆత్మయ్ సెక్తికయ్ కోర్ప జతతి, ఉచర్తె తత్తతి.

6 ఈంజయ్ లోకుమ్చి, అమచి ఆగ్చ అసల్ జర్గు కెర్తినక కోర్ప జతిసి మాన్సుక మొర్పుతె నెయెదె, గని దేముడుచి సుద్ది తిలి ఆత్మక కోర్ప జతిసి అమక జీపు దెతిసి, సేంతుమ్ దెతిసి జా: అస్సె.

7 మెలె, ఈంజ లోకుమ్చ, అమచి ఆగ్చ అసల్ జర్గు కెర్తినక కో కోర్ప జతతి గే, జో ఎత్తి, అదివారుమ్ తిలో దేముడుక విరోదుమ్ జా అస్సి, విరోదుమ్ కెర్తతి. దస్సి పాపుమ్చి ఆత్మ తిలన దేముడుచి ఆగ్గుల్ నూనతి నాయ్, కెర్తి నాయ్. నెత్తి.

8 మాములుమ్ మాన్సుచి జోచి సొంత బుద్దిక, జోచి ఆగ్చ అసల్క ఇస్టుమ్ అయ్లి రితి ఇండితన, దేముడుచి ఇస్టుమ్ కెరుక నెత్తి, జోక సర్ద కెరుక నెత్తి.

9 తుమ్, మాత్తుమ్, మాములుమ్ మాన్సుచి పాపుమ్బుద్దిచ నెంజున్, ఈంజ ఆగ్చ అసల్క జతన నెంజును, నాయ్ గెద? దేముడుచి సుద్ది తిలి ఆత్మ తుమ్చి పెట్టి అస్సె జలె, జోచి ఆత్మకయ్ జతను. కేన్ మాన్సుచి పెట్టి క్రిస్తుచి ఈంజ ఆత్మ తయ్ నాయ్ గే, జో మాన్సు క్రిస్తుచో నెంజె.

10 తుమ్చి పాపుమ్చి రిసా తుమ్చ ఆగ్ మొర్ల రిత జా అస్సి, గని క్రిస్తు తుమ్చి పెట్టి అస్సె జలె, క్రిస్తుచి పున్నిమ్చి రిసా జోచి ఆత్మక తుమ్ జిచ్చి అస్సున్.

11 జో యేసుక అన్నె జయ్లో దేముడు అబ్బొన్చి ఆత్మ తుమ్చి పెట్టి జతయ్ జలె, క్రిస్తు జలె జో యేసుక మొర్పు తెంతో విడ్డల్ కెర జయ్లో జో అబ్బొన్చి, మొర్ల తుమ్చయ్ ఆగ్చ కి జయ్డెదె. తుమ్చి పెట్టి జతి జోచి ఆత్మవాటు, తుమ్చి పెట్టి జో దెతి జోచి ఆత్మకయ్ జయ్డెదె.

యేసు తెన్ అమ్ అబ్బొన్చ పుత్తర్లు

12 జాకయ్, బాచ్చుడ్లు, అమ్ పూచి జా అస్సుమ్. జా పూచి అమ్ కీసి కుట్టువుక? మాములుమ్ మాన్సుచి బుద్దిక నాయ్, అమచి ఆగ్చ అసల్ జర్గు కెర్తినక నాయ్. జా ఎత్తి, పొన్.

13 కిచ్చొక మెలె, మాములుమ్ మాన్సుచి బుద్దిక, తుమ్చి ఆగ్చ అసల్క, తుమ్ జతను జలె, ఆత్మక మొర్లె. గని దేముడుచి సుద్ది తిలి ఆత్మచి సెక్తిక ఈంజ ఆగ్చుచ కమ్మె గెచ్చువనయ్ గెల్లె జలె, మార్తె జలె, ఆత్మక జస్సె.

14 కిచ్చొక మెలె, దేముడుచి సుద్ది తిలి ఆత్మసెక్తిక ఇండితో ఎత్తి, మాన్సు, జో దేముడుచి పుత్తర్లు జవుల.

15 మెలె, జోచి ఆత్మ తుమ్చి పెట్టి అయ్లిసి తుమ్క గొతిమాన్సుల్ కెర బియ్డిసి నెంజె. తుమ్చి అగ్గెచి బుద్దిచి రిసాచి బిడ్డి, తెన్ తుమ్ అప్పె తంక నాయ్. జోచి ఆత్మ తుమ్చి పెట్టి అయ్లిసి తుమ్క జోవయింప పుత్తర్లులి కెర్తిసి. అప్పె “అంప పుత్తర్లు తుమ్” మెన జో అమక దెకితయ్, చి “ఓ బ, ఓ బ” మెన జోక అమ్ ఉంక్రయ్లె, కిచ్చొ సెక్తిక ఉంక్రయ్తనుమ్ మెలె,

16 జోచ బోదల్ అమ్ జలిన్చి రిసా, జోచి సొంత ఆత్మ అమచి ఆత్మతె జోచ బోదల్ మెన సాచి దెతయ్చి, దస్సి ఉంక్రయ్తనుమ్.

* 8:3 8:3 యోహాను 12:31-33 దెక, కొలోస్సియల్ 2:15 దెక.

17 అన్నె, జోవయించ బోదల్ జలమ్ మెలె, జోచి పుత్తున్ జలొ క్రిస్తు తెన్ జో దేముడుక తిలిన్తె అమ్క వాట జెయెది. జా వాట అమ్క కిసి సేడెది మెలె, జో యేసు సిడ్ల బాదల్తె అమ్ బెద ఓర్పువ జా జీన్లె, జోచి పరలోకుమతెచి ఉజ్జెడతె జో గవురుమ్ జతినతె కి బెదుమెది.

18 జలె, బాదల్ సేడ్డిన్చి రిసా, చి యేసు తెన్ అమ్ గవురుమ్ జతినచి రిసా కిచ్చొ మెంతసి మెలె, దేముడు జా ఆకర్ దీసిక అమ్క కెర్తి గవురుమ్చి రిసా ఉచర్లె, ఈంజ ఉగుమ్చ బాదల్ కెత్తి జలెకి కిచ్చొ నెంజె.

19 జో దేముడుచ పుత్తుర్లు అమ్ జలిసి, జా దీసిక అమ్ గవురుమ్ జతినతె పూర్తి రుజ్జు జతె ఎదక జెర్మయలిన్ ఎత్తి ఆన తెన్ రకితె అన్సె.

20 కిచ్చొక మెలె, తయార్ జలిన్ ఎత్తి అగ్గె తెంతో కిచ్చొ కిచ్చొ అల్లర్ సేడ సిక్కు జా అన్సె. జాచి ఇస్టుమ్క నాయ్, గని “కచితుమ్ సమయుమ్ జా అయిలి మెలె చెంగిల్ కెరిందె” మెన దేముడుచి సెలవ్ నెరవెర్పువ జతినకయ్ ‘కచితుమ్ జర్గు జయెద’ మెలి రితి దయిరిమ్ తెన్ తిలి రితి రకితయ్.

21 మెలె, దేముడుచ బోదల్ పూర్తి విడ్డల్ జా గవురుమ్ జతి పొదిక జెర్మయలిసి ఎత్తి కి జా వాడ్ జతినతె నాసినుమ్ జతినతె సేడ్డిన్ తెంతో విడ్డల్ జయెది.

22 తేర్బోద లడెన్ జంక మెన కంట్లు పాచవ జా అయిలి పొది కిసి కన్టల్ నొప్పుల్ జా టింకితయ్ గే, దస్సి, జెర్మన్ జలిన్ ఎత్తి మొత్తుమ్ అప్పె ఎద కన్టల్ నొప్పుల్ తెన్ టింకయ్తయ్ మెన జానుమ్.

23 తెద్దిలి నాయ్ అమ్క జెతికయ్ దేముడుచి సుద్ది తిలి ఆత్మచి మొదోల్చి పంటో అమ్చి పెట్టి అన్సె. జలె, “అమ్చవ ఆగేక, ఈంజ లోకుమ్చ బాదల్ ఎత్తి తెంతో, దేముడు అన్నె గెనస్లిసి, అమ్ జోచి పుత్తుర్లు జలిసి, కెయక పూర్తి డీసెదె? అమ్ అన్నె కెర్తి రకుక?” మెన అమ్ అమ్చి పెట్టి టింక టింకయ్ రకితనుమ్.

24 ‘అమ్చవ ఆగేక మార్పువ కెర్తిన్ జో జర్గు కెర్తిన్కయ్ జో అమ్క రచ్చొంచువ కెర అన్సె’ మెనయ్ ఆన తెన్ రకితనుమ్. జలె, ఉచరుమ్, దెకిలిసి జర్గు జలిన్కయ్ ‘ఆన తెన్ రకితనుమ్’ మెనుక బెదె నాయ్. దెకిలిసి జర్గు జలిన్కయ్ కో ఆన తెన్ రకితి నాయ్.

25 గని అప్పెక నే దెకిలిన్క ‘కచితుమ్ జర్గు జయెద’ మెన అమ్క ఆన తిలె, నిదానుమ్ తెన్ రకుమెది.

అమ్చవ ప్రార్దనల్తె కి దేముడుచి సుద్ది తిలి ఆత్మ అమ్క తోడ్ తతిన

26 దేముడుచి సుద్ది తిలి ఆత్మ అమ్క సెక్తి నెంజలిన్ ఎత్తితె కి అమ్క తోడు తత్తయ్. ప్రార్దన కెరుక జలె, కిసి ప్రార్దన కెర్లగే సేనుమ్, గని దేముడుచి సుద్ది తిలి ఆత్మ సొంత అమ్చి పెట్టి అమ్చవ ప్రార్దనల్తె బెద అమ్ లట్టబుక నేస్లిన్, నంగుక నెతిర్లిన్క తోడు తత్తయ్, అమ్క సికడ్డయ్, చి అమ్ నంగుక నెతిర్లిన్క లట్టబుక నేస్లిన్క అమ్చి పెట్టి అమ్ టింకితినచి అర్దుమ్ బెదయ్తయ్.

27 జలె, జోచి సుద్ది తిలి ఆత్మ అమ్ జోవయ్ జలె అమ్చవ ప్రార్దనల్తె తోడు తా, దేముడుచి ఇస్టుమ్ తిలిసి ఒత్త బెదయ్తయ్. జోచి ఆత్మ కిచ్చొ అర్దుమ్ బెదయ్తయ్ గే జోయ్యి జానె. దస్సి, అమ్చి పెట్టి తిలిన్ ఎత్తి పరిచ్చ కెర్తొసాచి ఆత్మ సొంతయ్ అమ్చవ ప్రార్దనల్తె అమ్క తోడ్ తత్తయ్, బెదితయ్.

దేముడు అమ్క జిన్యొతిసి డిట్టుమ్ కెర్తిసి

28 అన్నె కిచ్చొ దయిరిమ్ జతనుమ్ మెలె, దేముడుక ప్రేమ కెర్పనక, మెలె జోవయ్ జంక మెన దేముడు జోచి ఇస్టుమ్క బుకార్దనక కిచ్చొ బాదల్ అయిలె కి, జేవ్ బాదల్తె కి చెంగిల్ పలితుమ్ దెర్తి రితి జా ఎత్తి చెంగిల్క బెదిత్ రితి జో నెరవెర్పువ కెర్తయ్ మెన జానుమ్.

29 కో యేసుక్రిస్తుక నంపజా జో దెతి రచ్చున నజనుక గే జో దేముడు అగ్గె తెంతో జానె. జలె, జోచొ సొంత పుత్తున్ యేసుచ రిత అమ్ జంక మెన అమ్కయ్ జో నిసాన, జా జర్గు కెరుక ఒప్పన్లన్. దస్సి, అమ్ ఒగ్గర్ ఒగ్గర్ బాపుడ్చొ బలనక యేసు తొల్పూర్ బలన్.

30 జలె, ‘యేసుచ రిత జతు’ మెన జో కక్క కక్క నిసాన్ల గే, జోవయింక బుకార్దన్. కక్క కక్క బుకార్దన్ గే, జోవయించి పాపుమ్ పుంచ ‘అప్పె తెంతో పున్నిమ్ జా అన్సి’ మెలి రితి దెకిలన్, చి కచి కచి పాపుమ్ పుంచ ‘పున్నిమ్ జా అన్సి’ మెలి రితి దెకిలన్ గే, “జోవయింక పరలోకుమతె కడ నెయిందె, అంచి ఉజ్జెడతె అంచి గవురుమ్తె బెదయిందె” మెనయ్ ఒప్పన్లన్, చి జర్గు కెరెది.

31 జలె, ఈంజ ఎత్తి బెదవ కిచ్చె మెనుమ? దేముడు అమ్క తోడు అస్సె జలె, కో అమ్క పాడ్ కెరుక తెరితి! నెతిర్రి!

32 జోచో సొంత పుత్తునక బాదల్ నే పిట్టయ్తె, అమ్ ఎత్తిజినక పాపుమ్ తెంతో రచ్చించువ కెర్రి రిసా జోక బలి కెర మొర్పుతె సార్పు కెర దిలో. అమ్చి ఉప్పిరి జోవయింక తెద్ది ప్రేమ తిలి జలె, జో పుత్తునక దెతిసి ఎత్తితె అమ్క కి పాట దెయె నాయ్ గే? దెయెదె.

33 దేముడు నిసాన్చది ఉప్పిరి కో కిచ్చెయ్ నింద వయడుక తెరితి గే? కోయి నెతిర్రి! జో దేముడు సొంతయ్ అమ్చి పాపుమ్ పుంవ అస్సె. అమ్క 'పున్నిమ్' మెలి రితి దెకితయ్.

34 అమ్ జో నిసాన్చసక కో తీర్పు కెర, నాసెనుమ్తె తెద్రవుక తెరితి గే? కో నెతిర్రి! మొర అన్నె ముక్కిమ్క అన్నె జీవ్ జా ఉట్టిలో క్రీస్తు జలె యేసు అబ్బిన్ దేముడుచి ఉజెతో వక్క వెన అస్సె. జోయ్యి అమ్క సిచ్చ దెయెదె గే? నాయ్. జో సొంత అమ్చి వచ్చెనచి తీర్పు సంగితయ్.

35 జలె, క్రీస్తుచి ప్రేమ తెంతో కో జలెకి కిచ్చె జలెకి అమ్క పిట్టవ కెరుక తెరితి గే? జోవయింక అమ్క వీడువ కెరుక బాదల్ జవున్ తెర్తి గే? ఇర్కుల్ జవున్ తెర్తి గే? మాన్సుల్ కెర్ల గోనల్ అల్లర్ తెరితి గే? చువ్వె తతిసి జవున్ తెరె గే? పాలల్ నెంజిలిన జవున్ తెరె గే? ప్రమాదల్ జవున్ తెరితి గే? మొర్రి సిచ్చ జవున్ తెరె గే? కిచ్చెయ్ అమ్క జోక వీడువ కెరుక నెతిర్రి!

36 దేముడుచ కొడొతె పూర్ణమ్ రెగ్గయ్లి రితి,
 †“తుచి నావ్చి రిసా ఒండి మెద్దెన అమ్క మార్తతి,
 'కండ కత మెండల్ జేవ్' మెలి రితి అమ్క దెకితతి”
 మెన రెగ్గ అస్సె.

37 జో అమ్క ప్రేమ కెర అమ్చి పాపుమ్ వయిలోసాచి సెక్కిక ఇన బాదల్ ఎత్తితె అమ్ పూర్తి జిన అస్సుమ్, జీనుమ్దె.

38 అమ్క కిచ్చె పూర్తి దయిరిమ్ మెలె, మొర్పు జవున్, జీవ్ తతిసి జవున్, కేన్ లోకుమ్చ దూతల్ జవున్, బూతల్ జవున్, అప్పె జర్గు జతిసి జవున్, వడ్డొక జర్గు జతిసి జవున్, కేన్ లోకుమ్చ సెక్కివ జవున్,

39 ఈంజ లోకుమ్క ఉప్పిరి తిలిసి జవున్ ఎట్టో తిలిసి జవున్, జెర్కున్ జలిసి అన్నె కిచ్చె జలెకి, అమ్చో ప్రబు జలె క్రీస్తుయేసు అమ్క దొర్కు కెర్ల దేముడుచి ప్రేమ తెంతో వీడువ కెరుక నెత్తె మెన అంక పూర్తి దయిరిమ్ అస్సె.

9

దేముడు పూర్ణమ్ నిసాన్చ యూదుల్

1-2 అంచి పెట్టి ఒగ్గర్ దుకుమ్ బాద కెద్దొడ తెదొడ తా గెతయ్. నిజుచి, క్రీస్తుచో మాన్సు అవ్ నత్తిమ్ సుగితసి. జా దుకుమ్చి రిసా అంచి ఆత్మతె దేముడుచి సుద్ది తిలి ఆత్మ అంక సాచి జతయ్.

3 అంచి దుకుమ్ కిచ్చొక మెలె, జయ్యి సెకుమ్తె అవ్ జెర్లిలి రిసా జేవ్ అంచ సొంత మాన్సుల్ అంచ బావుడ్లు జవుల, చి జోవయింక 'యేసుక్రీస్తుక సంవజతు' మెన అంక కెద్ది ఆన మెలె, అవ్ క్రీస్తు తెంతో పిట్టవ జా నాసెనుమ్తె గెలె జోచి రచ్చన జోవయింక దొర్కు జతి జలె, జోచి ఉప్పిరిచి అంచి ప్రేమక జోవయింతె తెంతో విడ్డల్ జతయ్.

4 జోవయింది రిసా కిచ్చొక అంక తెద్ది ఆన అస్సె మెలె, 'అంచయ్ మాన్సుల్ జా అంకయ్ బక్తి కెర్తు, అంచి గవురుమ్ దెకయ్తు' మెన దేముడు పూర్ణమ్ నిసాన * ఇస్రాయేలులు జోచ పుత్తర్పులు జతి జోచి †ఉజడి, జోవయింది నెడిమి తతి వరుమ్ పూర్ణమ్ తెంతో దేముడు జోవయింక జోచి ‡ప్రమానుమ్ కోడు దిలన్, జోచి §ఆగ్నల్ దిలన్, జోచి * బక్తి కెర్రి ఆగ్న దిలన్, † రచ్చించువ కెర్లెసా జెంక దిలిన్చి రిసాచ ప్రమానల్ దిలన్.

† 8:36 8:36 క్రీస్తునలు 44:22. * 9:4 9:4 'ఇస్రాయేలులు' మెలె, తోలితో యాకోబు పూర్ణమ్చొక ఎత్తి, అదికారుమ్ తిలో దేముడు జా నావ్ తిలో, ఆదికాండుమ్ 32:28. పడ్డొ జోవయింది సెకుమ్ మొత్తుమ్క 'ఇస్రాయేలులు' మెన నావ్ తిలన్. † 9:4 9:4 నిర్ణమకాండుమ్ 33:18-23. ‡ 9:4 9:4 ఆదికాండుమ్ 15:18, 17:1-21, 28:13, నిర్ణమకాండుమ్ 2:24, 6:2-8, 19:5, 34:10-27, నమూయేలు దొన్నచి పుస్తకమ్ 23:5. § 9:4 9:4 నిర్ణమకాండుమ్ 20:1-17, ద్వితీయోపదేశ కాండుము 5:1-22, 10:1-5. * 9:4 9:4 నిర్ణమకాండుమ్ 25-31 ఆద్యయల్. † 9:4 9:4 యెనయా 53 ఆద్యయమ్, యర్కీయా 23:5-6.

5 అబ్రాహామ్, ఇస్సాకు, యాకోబు జోవయించయ్ పూర్ణమవచ. అన్నె, జో మాన్సు జలిన్చి జెర్మన్క దెకిలె, జోవయించి సెకుమ్తె రచ్చించువ కెర్తొసా జలో క్రీస్తుయి జెర్మిలన్. *ఎత్తిచి ఉప్పిరి అదికారుమ్ తిలో దేముడుక జోబర! కెయక తెయక జోవయింక గవురుమ్ తప్పన్! ఆమేన్.

6 గని యూదుల్ బగ్గరిజన్ అన్మానుమ్ జలిసి దెకిలె 'దేముడు పూర్ణమ సంగిలి ప్రమానుమ్ కోడుక పిట్టి' మెన తుమ్ ఉచర నాయ్. పిట్టె నాయ్. కిచ్చొక ఇసి మెంతసి మెలె, సీఇస్రాయెలుచి సెకుమ్తె జెర్మిలనతె సగుమ్జిన్క 'ఇస్రాయేలులు' మెనుక నెంజె,

7 *అబ్రాహామ్చి సెకుమ్తె జెర్మిలన సగుమ్జిన్క 'జోవయించ బోదల్ జవుల' మెనుక నెంజె. అబ్రాహామ్చి పెట్టిచ సగుమ్జిన్ జోవ నిజామ్చ బోదల్ నెంజిలిన్చి అర్దుమ్ కిచ్చొ మెలె, పూర్ణమ దేముడు అబ్రాహామ్క,

†“తుచి సెకుమ్చ ఎత్తితె ఎక్కి ఇస్సాకుచి తెడి జెర్మిలనకయ్ 'తుచయ్' మెనిందె”
మెన ప్రమానుమ్ సంగిలన్.

8 ఈంజ టాలిచి అర్దుమ్ కిచ్చొ మెలె, మాములుమ్ *అగ్గె జెర్మన్క జోచి సెకుమ్తె జెర్మిలన నాయ్, గని దేముడుచి సీప్రమానుమ్కయ్ జెర్మిలనక 'అబ్రాహామ్చి సెకుమ్చ' మెనుక జయెదె.

9 జా ప్రమానుమ్ సంగిలి పొది దేముడు అబ్రాహామ్క,
*“సంగిలి సమయుమ్ జా అయ్లి మెలె, ఆవ్ అన్నె జెయిందె,
చి సారాక వుత్తుది జెర్మెదె”
మెన ప్రమానుమ్ సంగిలన్.

10 జా ఏక్, అన్నె, అమ్చొ పూర్ణమచొ ఇస్సాకుచి తేర్పొ రిబ్బా జో ఎక్కి మున్సున్ తెన్ కల్వల్క అంగి జలి పొది.

11 జేవే కల్వల్ ఇన్నె నే జెర్మిలె అగ్గె, జోవయింతె కో సత్తిమ్ కో పాపుమ్ కెరుక నేతయ్ జలెకి, 'కచ కమెచి రిసా నాయ్, గని కక్క నిసాన్ల అంచి ఇస్తుమ్ తయెదె గే, జోవయింకయ్ నిసాన' మెన మాన్సుల్క నిసాన బుకార్తె జోచి ఇస్తుమ్ జెయిమ్ జంక మెనయ్,

12 రిబ్బాక దేముడు,
†“దకిలొచి సేవ వెల్లొ కెరెదె”
మెన సంగిలన్.

13 అన్నె, అన్నెక్తె జో,
*“దకిలొ జలో యాకోబుక ప్రేమ కెర్లయ్,
గని వెల్లొ జలో ఏసాపుక చిరోదుమ్ జలయ్”
మెన రెగ్గయలన్.

14 జలె, అమ్ కిచ్చొ మెనుక? ఎత్తి అదికారుమ్ తిలో దేముడు కెర్లిన్క 'నాయిమ్ నాయ్, సత్తిమ్ నాయ్' మెనుక జయెదె గే? జయె నాయ్. దస్సి మెనుక నాయ్.

15 కిచ్చొక మెలె, మోసేక జో,
*“కచి ఉప్పిరి దయ తియిదె గే, తియిదె.
కక్క కన్మారుమ్ దెకిన్దె గే, దెకిన్దె”

‡ 9:5 9:5 నెంజెలి, *ఎత్తిచి ఉప్పిరి అదికారుమ్ తిలో దేముడు జోయ్య. జోవయింక జెయ్య!...! § 9:6 9:6 మెలె 'యాకోబుచి'.

* 9:7 9:7 యాకోబుక అబ్రాహామ్ మంత్రొ అన్నెసి; అబ్బొన్చొ అబ్బొన్ జయెదె. † 9:7 9:7 అదికాండుమ్ 21:12. అబ్రాహామ్చి తేర్పొ సారా బోదల్ నెంజితికయ్, "అంచి గొతిమాన్సు జలి హాగరు తెన్ అంచి నావ్ తెన్ బోద పాయి" మెన సారా సంగితికయ్, అబ్రాహామ్ దస్సి కెర్లన్, చి 'ఇస్సాయేల్' మెన పుత్తు పాయిలన్. అదికాండుమ్ 16 అద్యయమ్. ‡ 9:8 9:8 తేర్పొ సారాచి గొతిమాన్సు హాగరు తెన్ అబ్రాహామ్ పాయిల్ పుత్తున్ ఇస్సాయేల్ అగ్గెతె జెర్మన్ జలోసా జయెదె. మాన్సుచి ఇస్తుమ్కయ్ పాయిలోసా జోచి రిసా మాములుమ్ అబ్రాహామ్చి సెకుమ్తె జెర్మిలనక ఇస్సాయేల్చి పెట్టి జెర్మిలన, ఇస్సాయేల్చి సెకుమ్చ టాలి జయెదె. § 9:8 9:8 ఇస్సాకు ఎత్తి అదికారుమ్ తిలో దేముడుచి ప్రమానుమ్కయ్ జెర్మిలనాచి రిసా ఎత్తి అదికారుమ్ తిలో దేముడుచి ప్రమానుమ్ నంప కెర్లనక, మెలె యెసుక్రీస్తుక నంప కెర్లనకయ్ ఇస్సాకుచి పెట్టి జెర్మిలన ఇస్సాకుచి సెకుమ్చ టాలి జయెదె. * 9:9 9:9 అదికాండుమ్ 17:19-21, 18:10, 14. † 9:12 9:12 అదికాండుమ్ 25:23. ‡ 9:13 9:13 మలాక్ 1:2-3. § 9:15 9:15 నిర్దుపకాండుమ్ 33:19.

మెన సంగిలన్.

16 కేన్ మాన్సుచి ఇష్టుమతె నాయ్, కేన్ మాన్సుచ కమెతె నాయ్, గని దేముడుచి దయతె.

17 అన్నె, దేముడుచ కొడొతె రెగిడ్లి రితి, వడ్డొ ఇస్రాయేలుల్క అల్లర్ కెర్లె తిలో ఐగుప్తు దేసిమ్చో రాడ్ జివ్ తిలో పరో రానొక దేముడు,

*“ఒండి లోకుమతె అంచి నావ్ సాడుప జవున్ మెన, తుచితె జర్గు జతి కామతె అంచి సెక్తి దెకయ్తి రిసాయి

తుక ఆవ్ టీవడ అస్సి”

మెన సంగ తెద్రయ్లన్.

18 కచి ఉప్పిరి జోచి దయ తియెదె గే, జోచి ఇష్టుమ్. కచి జివ్ రాడ్ కెరెదె గే, జోచి ఇష్టుమ్!

19 దస్సి సంగిలె, “దస్సి జలె, దేముడుచి ఇష్టుమ్క జో కెర్రిసి జోచి పూచి. జాకయ్, జో కీసి కక్క పాపుమ్ వయడుక జయెదె! అమ్ రచ్చించువ జంక జోచి నెలవ్ నెంజిలె, కీసి అమ్చి పూచి జయెదె! జా పాపుమ్ వయక కీసి అమ్చి పూచి జయెదె!” మెంతె,

20 గని, ఓ మాన్సు, తుయ కొస్సె, చి దేముడుచి కోడుక జబాబ్ అన్నె దెతె. మత్తిక తెయార్ కెర్లె గేడి జాక తెయార్ కెర్లొ కుమ్మరోక †“కిచ్చొక ఈంజయి రూపుమ్ అంక దిలది?”

మెన వునెదె గే?

21 నాయ్. జా మత్తిచి ఉప్పిరి కుమ్మరోక పూర్తి అదికారుమ్. జయ్యి మత్తిబెండక నూటిచి గవురుమ్చి కెరెదె గే, గవురుమ్ నెంజిలి కామ్చి రిసాచి కెరెదె గే, జోచి ఇష్టుమ్.

22-23 జలె, పాపుమ్చి ఉప్పిరిచి జోవయించి కోపుమ్ దెకవుక మెన, జోచి సెక్తిచి రుజ్జు దెకవుక మెన దేముడుక ఇష్టుమ్ జలెకి, జోచి పరలోకుమ్చి ఉజిడితె, గవురుమ్తె వడ్డొక బెదవనుక మెన జో అగ్గె తెంతో నిసాన్ గేడివొక జో కెర్లె ఎదివాల్ దయ జానతి ఎదక జోవయించి సిచ్చ జత నానినమ్తె గత, గేడివొ ఒండి పాపుమ్ జో మదెనె ఒగ్గర్ సేంపు ఒరుప్ప జా రకితె తిలె, జోచి దయ!

24 జో ఎదివాల్ దయ కెర్లె నిసాన్ గేడివొ కొన్న మెలె, ఆము. అమ్ కొన్న మెలె, యూదుల్ తెంతో అమ్ సగుమ్జిన్క జో బుకారా అస్సి, గని యూదుల్ నెంజిలన తెంతో కి అన్నె మాన్సుల్క బుకారా అస్సి.

25 జోచ కబుర్లు పూర్ణమ్ సంగితె తిలో హోసెయ అత్తి దేముడుచ కొడొతె రెగిడ్లి రితి,

‡“ ‘అంచయ్ మాన్సుల్’ మెన ఆవ్ అగ్గె నే సంగిలనక

తెదొడ్క ‘అంచయ్’ మెనిందె.

ఆవ్ అగ్గె ప్రేమ నెంజిలిన్క ‘ఆవ్ ప్రేమ కెర్లెసి’

మెనిందె.”

26 †“అన్నె, ‘తూమ్ అంచ మాన్సుల్ నెంజును’ మెన అగ్గె జో సంగిలి టాన్తె

తెదొడ్క ‘జీవ్ తిలో, జీవ్ దెతో దేముడుచ పుత్తర్లు జీవ్’ మెన మాన్సుల్ సంగుల.”

27 అన్నె, ఇస్రాయేలులు మెల అమ్చ యూదుల్చి రిసా దేముడుచ కబుర్లు సంగితె తిలో యెసయా పూర్ణమ్చో కిచ్చొ సాడువ కెర్లె రితి జలన్ మెలె,

*“సముద్రమ్చి ఒడ్డుచి ఇన్సుచ గిడ్డల్ కెత్తి జవుల గే,

ఇస్రాయేలుచ పుత్తర్లు జల యూదుల్ దస్సి ఎత్తివాల్ జిన్ జవుల,

గని జోవయింతె సేంసెల రితె ఎక్కి దొన్ని రితె రచ్చించువ జవుల.

28 కిచ్చొక మెలె, ఈంజ లోకుమ్చ మాన్సుల్చి ఉప్పిరి కిచ్చొ సిచ్చచి

తీర్పు ప్రబు ఉచరెదె గే,

సత్తు తెన్ తంద్రతెన్ జో జర్గు కెరెదె.”

మెన రెడ్ల అస్సి.

29 అన్నె జా నే జతె అగ్గె తెంతో జో యెసయాచి అత్తి జో దేముడు ప్రబు రెడ్లయ్లి రితి జర్గు జా అస్సి. కిచ్చొ మెన మెలె,

* 9:17 9:17 నిర్ణయకాంక్షమ్ 9:13-16. † 9:20 9:20 యెసయా 29:16, 45:9. ‡ 9:25 9:25 హోసెయ 2:23. § 9:26

9:26 హోసెయ 1:10. * 9:27 9:27 యెసయా 10:22, 23.

† “అమృక సిచ్చ నే జత బోదల్ సగుమ్జన్ నేన్ఱి రితి పరలోకుమ్చ ఎత్తి అదికారుమ్ తిలో దేముడు ప్రబు నెలవ్ దెతో నాయ్ జలె, ‡ సాదొమ్ అన్ఱె గొమొరా పట్నల్చి రితి సిచ్చ జా కుడై నానిసుమ్ జతమ్” మెన రెగిడ్డి కోడు.

30 జలె, కిచ్చొ మెనుమ? ఈంజయి. సత్తిమ్ వాట్ నే చజల యూదుల్ నెంజలన దేముడు దెతి పున్నిమ్ జా అన్ఱి. కీసి మెలె, నముకుమ్ వాట్. యేసుక్రీస్తుక నంపజలి వాటు.

31 గని అగ్గుల్ వాట్ పున్నిమ్ జంక ఉచర్ల అమచ ఇస్రాయేలుల్ మెల యూదుల్ అగ్గుల్చ కమ్మొవాట్ పున్నిమ్ ఇండుక నెత్త అగ్గుల్ తిలిసి నెరవెర్చువ నే కెర, ఓడువ జలె.

32 నముకుమ్ వాట్ నాయ్ గని కమొ వాటీ రచ్చన దొర్కు కెరనుక ఉచర్ల. వట్టవొ వత్తె పిన్ఱి సేడ్ల రిత జాఁ ఓడువ జా అన్ఱి.

33 వట్టచొ పత్తురు మెలె, యేసుక్రీస్తు. యేసుక్రీస్తుచి ఉప్పిరి నంపజతిసి నే జతిన్చి రిసా అన్ఱెక్ కోడుతె తిలి రితి. కేన్ కోడు మెలె,

§ “ఈందె, ‘సీయోసు’ మెల అమచ యూదుల్చి వట్ట ఏక్ పత్తురు ఆవ్ గల్తసి.

జేవ్ నంప నెంజ జో పత్తె, జో సాప్రయ్ పిసిర సేడుల.

గని జోచి ఉప్పిరి కో జో నముకుమ్ తివుల గే,

జెన్ఱి కచితుమ్ లాజ్ జతి నాయ్, ఓడువ జతి నాయ్”

మెన రెగ్గ అన్ఱె.

10

యేసుక్రీస్తుకయ్ నంపజలికయ్ రచ్చించువ జంక జతిన్

1 బాపుడ్లు, నంపనెంజల అమచ యూదుల్చి రిసా “జేవ్ కి నంపజా రచ్చించువ జతమ్” మెన అంక జివు డడ్ల దేముడుక ఆవ్ ప్రార్థన కెరై తత్తసి.

2 నిజాచి దేముడుచి సేవ కెరుక యూదుల్ ఆన తెన్ అన్ఱి మెన ఆవ్ సాచి జతసి, గని జో దెతి రచ్చన కీసిచి గే అర్దుమ్ నే కెరన పొరపాట్ జా గెచ్చ అన్ఱి.

3 మెలె, దేముడు దెతి పున్నిమ్ కేన్ వాటు దొర్కు జతయ్ గే, అర్దుమ్ నే కెరంతె జోవయింబి సొంత సెక్తిక పున్నిమ్ జంక ఉచర. దేముడు పున్నిమ్ దెతి వరుమ్ నజన్తి రితి దాక్ కెరంతి నాయ్.

4 మెలె, ఎక్కిక్రీస్తుచి, తెడి అగ్గుల్ సేకడ్డి పున్నిమ్ దొర్కు జతయ్, అగ్గుల్తె కోర్వ జా జలిసి కుట్టయ్తోసా నెరవెర్చువ కెరొసా జొయ్యి, చి జోచి ఉప్పిరి కో జోవయింబి నముకుమ్ తివుల గే, జోవయింబి పాపుమ్ జో పుంచెదె.

5 మోసిచి అత్తి రెగిడ్డిసి ఏక్ కిచ్చొ అన్ఱె మెలె,

* “అగ్గుల్తెచి పున్నిమ్ కో పూర్తి నిదానుమ్ ఇండుల గే,

జేవ్చి తెన్ జివుల”

మెన రెగ్గ అన్ఱె.

6 † గని నముకుమ్ వాట్ పున్నిమ్ జతిన్చి రిసాచి ఏక్ కోడు ఉచరుమ. “పరలోకుమతె కో వెగ గెచ్చుల? ‘క్రీస్తుక ఉత్తవ కడ ఆన్తి రిసా’ మెనుమ.”

7 నెంజిలె, “బూలోకుమక ఎట్టొ లోకుమ్తె కో ఉత్త గెచ్చుల?”; ‘క్రీస్తుక మొర్కు తెంతొ వెగవ కడ ఆనుక’ మెనుమ. నాయ్, దస్సి మెన నాయ్.

8 నముకుమ్ వాట్ చి రచ్చనచి కోడు కేనె గెతిసి నెంజె, కిచ్చొ కామ్ కెర్తిసి నెంజె. రచ్చన దూరి నాయ్. రచ్చనచి కోడు పాసి అన్ఱె. తుమ్చి చొండితె, తుమ్చి పెట్టి అన్ఱె. మెలె, క్రీస్తుచి ఉప్పిర్చి నముకుమ్చి రిసా అమ్ నుబుమ్ కబుర్ బోదన కెర్తనుమ్. జయ్యి కోడు.

† 9:29 9:29 యెసయా 1:9. ‡ 9:29 9:29 అదికాండుమ్ 13:13, 18:20, 19:24-25. § 9:33 9:33 యెసయా 8:14, 28:16, యోవేలు 2:32. * 10:5 10:5 లేవీయకాండుమ్ 18:5. † 10:6 10:6 6-7 ద్వితీయోపదేశ కాండుమ్ 30:12-14చి కోడు పవులు ఇన్ఱె బెదయతయ్.

9 మెలె, యేసుక 'పరలోకుమచొ ప్రబు జొయ్యి' మెన మాన్సుచి మొక్కె కో నంగ ఒప్పున, 'మొర్పు తెంతో దేముడు అబ్బొసి జోక విడ్డల్ కెర అన్నె జయడ్లన్' మెన పెట్టి నిదాసుమ్ నంపజవుల గే, జెవ్వి రచ్చించువ జవుల.

10 కిచ్చొక మెలె, †మాన్సు జోచి పెట్టి నంపజలె, జోచి పాపుమ్ వుంచి జయెదె. జోచి చోడి ఒప్పునై, జో రచ్చించువ జయెదె.

11 దేముడుచ కొడతె రెగ్గయ్లిన్ ఉప్పిరి ఏక్ దెకిలమ్. కిచ్చొ మెలె,

‡“జోచి ఉప్పిరి జోచి నముకుమ్ తిలో కేన్ మాన్సుకి కచితుమ్ లాజ్ జతి నాయ్ ఓడువ జతి నాయ్” మెన రెగ్గ అస్సె.

12 కొన్సు మెలె, యూదుల్క గ్రీసు దేసిమ్చ సుదల్క కక్కయ్ దేముడు తేడ దెకె నాయ్. జొయ్యి ప్రబు ఎత్తికయ్ ప్రబు, చి జోక నంపజా, జో దెతి రచ్చన నజితో ఎత్తి మాన్సుక జోచి వరుమ్ జో దెయెదె.

13 దేముడుచి కొడతె రెగ్గయ్లి రితి;

*“ప్రబుచి రచ్చన నజనితో ఎత్తి మాన్సు తుచితెయి రచ్చన అస్సె మెన ఒప్పున రచ్చించువ జయెదె” మెన అస్సె.

సుబుమ్ కబుర్ సూనయ్లితె వూచిచి రిసాచి కోడు

14 జలె, మాన్సుల్ క్రీస్తుక నంప నే జలె, జోవయిచి రచ్చన కిసి నజుల! జోచి రిసా నే సూన తిలె, జోక కిసి నంపజవుల! కో బోదన కెరుక నే గెలె, కిసి జోచి రిసా సూనుల!

15 అన్నె దేముడు నే తెర్రయ్లె, మాన్సుల్ కిసి జోచి బోదన కెరుల! దేముడుచి కొడతె రెగ్గయ్లి రితి;

†“సుబుమ్ కబుర్ కో బోదన కెరుల గే, జోవయించ చట్టొ కెద్ది సూటి!” మెన అస్సె.

16 గని సూన్ల అమ్చ ఇస్రాయేలుల్ ఎత్తిజిన నంపజా అస్తి మెన ఉచర నాయ్. యెనయాచి అత్తి దేముడు అన్నె రెగ్గయ్లి రితి;

‡“ప్రబు, అమ్ సూనయ్లిసి కో నంపజా అస్తి?” మెన రెగిడ్డి కోడు.

17 జలె, కొడొ సూనయ్లెకయ్ మాన్సుల్ నంపజవుల. జేవ్ కిచ్చొ సూనుక మెలె, క్రీస్తుచి రిసాచి సుబుమ్ కబుర్ సూనవ బోదన కెర్తిసి.

యూదుల్ ఒగ్గర్జిన సూనుక నెసిలిన్

18 జలె, అమ్చ యూదుల్క 'సుబుమ్ కబుర్ సూన తతి నాయ్ గే?' మెన ఆవ్ పుసితసి. సూనయ్ అస్తి. జా ఒండి లోకుమతె సూనయ్ జలిన్చి రిసా దేముడుచి కొడతె రెగ్గయ్లి ఏక్ కోడు బెదితయ్.

‡“జోవయించి అవాడ్ ఒండి లోకుమతె సూనయి జా అస్సె, ఎత్తి దిక్కుతె కెద్ది దూరి జలెకి, జోవయించ కొడొ సూనయ్ జా అస్తి” మెన రెగ్గ అస్సె.

19 జలె, ఆవ్ అన్నె పుసితసి; 'ఇస్రాయేలు ప్రెజల్ అర్దుమ్ కెరంతి నాయ్ గే?' మెన పుసితసి జలె, మోసేచి అత్తి దేముడు,

*“అంచ యూదుల్ నెంజిలసక తుమ్ యూదుల్ గోస జతి రితి కెరిందె, బుద్ది నెంజిలి దేసిమ్చచి ఉప్పిరి తుమ్క కోపుమ్ జెతి రితి ఏక్ కామ్ జర్గు కెరిందె”

‡ 10:10 10:10 నెంజిలె, మాన్సు జోవయించి పెట్టి నంపజా జోవయించి చోడి ఒప్పునై, జోవయించి పాపుమ్ వుంచి జయెదె, జో రచ్చించువ జయెదె. § 10:11 10:11 యోవేలు 2:32, రోమయిల్ 9:33. * 10:13 10:13 యోవేలు 2:32. † 10:15 10:15 యెనయా 52:7. ‡ 10:16 10:16 యెనయా 53:1. § 10:18 10:18 క్రిస్తలు 19:4. * 10:19 10:19 ద్విత్తియోపదేశ కాండుము 32.21.

మెన యూదుల్ నెంజలన నంపజలిన్చి రిసా యూదుల్ గోస జలిన్చి రిసా రెగిడ్లి కోడు.

20 పడ్డో, యూదుల్ నెంజలన క్రిస్తుక నంపజా దేముడు తెన్ బెదితిన్చి రిసా అన్నె సొస్తుమ్చి కోడు దేముడు యెసయాచి అత్తి రెగ్గ అస్సె.

†“అంక చజుక నే ఉచర్తన, అంక చజ అస్సి.

అంచి రిసా నే వుసిలనక, ఆవ్ డీస అస్సి”

మెన రెగిడ్లి కోడు.

21 గని అమ్చ ఇస్రాయేలుల్చి రిసా జోచి అత్తి కిచ్చో రెగ్గ అస్సె మెలె,

‡“కోడు నే నూనత ఇస్తుమ్ అయ్లి రితి బుల్ల ప్రైజల్క

బండి మెద్దెనె అత్తో చంపొ కెర బుక్కార్తె తిలయ్,

గని ఆవ్ దెతి వరుమ్ నెసిల”

మెన రెగ్గ అస్సె.

11

యూదుల్క దేముడు వూర్తి నే ములిలిన్

1 అప్పె కిచ్చో వుసితసి? జోవయింప యూదుల్క దేముడు వూర్తి ముల అస్సె గే? నాయ్! ఆవ్ సొంత కి ఇస్రాయేలుడు, అబ్రాహామ్చి సెకుమ్తె జెర్మిలోసా, బెన్యామీను చి తెగతె జెర్మిలోసా.

2 జో దెతి రచ్చన తంక మెన జో అగ్గె తెంతో జాన్ల నిసాన మాన్సుల్క దేముడు ములె నాయ్. జా పొదిచ ఇస్రాయేలుల్చి రిసా కిచ్చో మెన దేముడుచి మొక్కె ఏలియా వూర్లుమ్చొ ఏడ తిర్పు నంగిలన్ గే దేముడుచి కొడెతె అస్సె.

3*“ప్రబు, తుచ కబుర్లు నంగితనక మార అస్సి.

తుచి నావ్ తెన్ బందిల గుడివొ బోసుడవ అస్సి.

అప్పె ఆవ్ ఎక్కిలోయి తుచ కబుర్లు నంగితోసా అస్సి,

చి అంక కి మారుక కోర్ప జతతి”

మెన ఏలియా ఏడ్లన్.

4 గని దేముడు జోక

†“ ‘బయలు దేముడు’ మెలోసాక నే జోకర్తె అంకయ్ నిదానుమ్ తత్తు మెన సత్తు వెయిల్జిన్ యూదుల్ జా పాపుమ్తె నే నేడ్లి రితి పిట్టవ అస్సి”

మెన నంగిలన్.

5 అప్పె కి దేముడుచి దయక జో నిసాన సేసిల యూదుల్ అస్సి.

6 గని జోవయింప రచ్చన కమ్మెవాట్ నాయ్, గని జోచి దయ వాటు జోవయింక దొర్కు జా అస్సె. కమ్మెవాట్ నాయ్, నెంజిల దయ మెన నంగితిక, దయ జయె నాయ్.

7 జలె, కిచ్చో రుణ్ణు డీస్సయ్ మెలె, జేవ్ చజుక ఉచర్తినీ అమ్చ ఇస్రాయేలుల్క పిట్ట అస్సె. జోవయింతె కక్క దేముడు నిసాన్లన్ గే, జోవయింక దొర్కు జా అస్సె, గని తిలనక జోవయింప జీవ్ రాడ్ జా గెచ్చ, జా రచ్చన జేవ్ నజనుక నాయ్.

8 దేముడుచి కొడెతె రెగ్గయ్లి రితి;

‡“అప్పె ఎద కి ‘దెకుత్ నాయ్, నూనతు నాయ్’ మెనయ్,

జేవ్ గుడ్డి బోయ్లొ తతి రితి, జుమితన తతి రితి,

దేముడు జర్గు కెర అస్సె”

మెన రెగిడ్లి కోడు.

9 పడ్డో, దాపిదు వూర్లుమ్చొచి అత్తి రెగిడ్లి రితి కి;

§“జోవయింపి విందు అన్నిమ్ జోవయింక బోసు జలి రితి జా,

† 10:20 10:20 యెసయా 65:1. ‡ 10:21 10:21 యెసయా 65:2. * 11:3 11:3 రానల్ మొదొల్ పుస్తకుమ్ 19:10, 14.

† 11:4 11:4 రానల్ మొదొల్ పుస్తకుమ్ 19:18. ‡ 11:8 11:8 ద్విత్వీయావదేశ కాంధము 29:4, యెసయా 29:10. § 11:9 11:9 కిర్తనలు 69:22, 23.

జోవయింక దెర్పు నీడవను, సిచ్చ ఆన్పు.

10 జేవ్ గుడ్డి జా దెకుత్ నాయ్, చి

జోవయించి పాటి కుబ్బి జలి రితి జా,

జోవయించి పాపుమచి జాడు కెయిడ తెయిడ వయుతు”
మెన రెగిడ్డి కోడు.

11 జలె, జేవ్ ఇస్రాయేలుల్ పిసిర్దిసి జలె, ‘వూర్తి నీడయ్ గెతు’ మెలి ఉద్దెసుమ్కయ్ దేముడు జర్గు కెర్లన్ గే? మెన ఆవ్ వునితసి. నాయ్! గని జేవ్ ఇస్రాయేలుల్ నంప నెంజి పొరపాట్ జతికయ్, రచ్చన దొర్పు జతి వాటు యూదుల్ నెంజిలనక దొర్పు జా అన్సె. ‘జేవ్ యూదుల్ నెంజిలన రచ్చించువ జతిసి అమ్చ ఇస్రాయేలుల్ దెక గోన జా బుద్ది ఉచరంతు’ మెనయ్ దేముడు దస్సి జర్గు కెర అన్సె.

12 జలె, జేవ్ ఇస్రాయేలుల్ పొరపాట్ జలిసి ఒండి లోకుమ్చక దేముడు దెతి సామ్మారుమ్ దొర్పు కెర అన్సె జలె, జేవ్ ఇస్రాయేలుల్ ఒడువ జలిసి యూదుల్ నెంజిలనక సామ్మారుమ్ కెర అన్సె జలె, జేవ్ యూదుల్ జల ఇస్రాయేలుల్ ఎత్తిజిన వడ్డొక రచ్చించువ జలె, లోకుమ్క అన్సె కెర్ది సామ్మారుమ్ జయెదె!

13 అన్సె, జలె, ఒత్త తిల తుమ్ యూదుల్ నెంజిలనక, జలె, ఆవ్ కిచ్చొ నంగితసి మెలె, తుమ్కయ్ సుబుమ్ కబుర్ సూనవుక మెన ప్రబు అంక జోచో బారికి కెర తెద్రవ అన్సె. ఈంజ కామచి రిసా ఆవ్ ఒగ్గర్ నర్ల జతసి.

14 తూమ్ రచ్చించువ జతిసి అమ్చ యూదుల్ దెకిలె, ఇదిల్ జవున్ గోన జా, జోవయితె నగుమ్జిన్ ప్రబుచి రిసాచి సుబుమ్ కబుర్క ఇన్సామ్ జవుల, చి జో దొర్పు కెర్ది రచ్చన నజనుల. దస్సి జలె, జేవ్ కి రచ్చించువ జతి కామతె ఆవ్ ఇదిల్ బెద తయిందె.

15 ఈంజ కిచ్చొక అంచి ఆన మెలె, దేముడు అమ్చ యూదుల్క గడియ ములయ్లి రిసా, ఒండి లోకుమ్చ అన్సె మాన్సుల్ కి జోవయితెన్ బెదుక వాటు అయిలె. దస్సి కి దేముడు అమ్చ యూదుల్కయ్ అన్సె బెదవన్సె, మొర్పు తెంతో పిట్టవ జా జేవ్ కి నోవర్ జివుల.

రూక్తె కొమ్మల్ అంటువ కెర్లిన్

16 ‘నావో’ మెన తొలితో బలి దిలి పాకుమ్ దేముడుక దిలి రిసా సుద్ది జా అన్సె జలె, జా ఒండి పాకుమ్ సుద్ది జలి రితి జతయ్. అన్సె, రూక్చి చేరు సుద్ది జలె, కొమ్మల్ కి సుద్ది జవుల.

17 జలె, దేముడు నిసాన్ల ఇస్రాయేలుల్క ‘ఒలివ రూకు’ మెనుము. తుమ్ యూదుల్ నెంజిలనక ‘వెర్రి ఒలివ రూక్చి కొమ్మల్’ మెనుము. జలె, జో చెంగిలో ఒలివ చెట్టచ కొమ్మల్ నగుమ్ కండి జా సీడ అస్తి మెనుము, అన్సె జా రూక్చి కొమ్మల్ గెలిన్తె తూమ్ యూదుల్ నెంజిల జా వెర్రి ఒలివ రూక్చి కొమ్మల్ అంటువ జలదు, జో చెంగిలో రూక్చి చేరు దెతి నెక్తి బెద తుమ్ చెంగిల్ జతి రిసాయి, జేవ్చి జివుక తుమ్ జితి రిసాయి.

18 దస్సికయ్, ‘జో చెంగిలో రూక్చి కొమ్మల్ జలమ్ ఆము’ మెన తుమ్ గవురుమ్ ఉచరన నాయ్. గవురుమ్ ఉచరనుక దెర్లె, తుమ్ కిచ్చొ ఉచార కెర మెలె, తుమ్చి సెక్తి చేరు జయె నాయ్, గని చేరుచి సెక్తియ్ తుమ్ జయె అన్సెన్.

19 తూమ్ కిచ్చొ ఉచర్తె మెలె, “అము అంటువ జతి రిసాయి ఎజిహూని కొమ్మల్ సీడయ్లన్”.

20 జా కోడు కి నిజమ్, గని జేవ్ జోవయించి అన్యాయుమచి రిసా సీడయ్ జలె. గని తుమ్ నముకుమ్ వాటు అంచువ జా టీవెతిసి. జేవ్క ఉప్పిర్ తుమ్చి రిసా తుమ్ గవురుమ్ ఉచరన నాయ్, గని దేముడుచి దయక తుమ్ బియ్.

21 కిచ్చొక మెలె, జో రూక్చి సొంత కొమ్మల్ అన్యాయుమ్ జలిన్క జో జోవయింక సిచ్చతె గలిలన్ మెలె, తూమ్ దస్సి అన్యాయుమ్ జలె, తుమ్క కి కండ వెంట గెలెదె.

22 దేముడుచి దయచి రిసా కి, జో దెతి సిచ్చచి సెక్తిచి రిసా కి, తుమ్ చెంగిల్ ఉచర. పొరపాట్ జా సేడ్లనక జేవ్ విలువ జలి సిచ్చ జో దెయెదె, గని జోచి దయచి తెడి తుమ్ తా నముకుమ్ వాట్ ఇండితె తిలె, జోవయించి దయ తుమ్చి ఉప్పిర్ తయెదె. తుమ్ జా నముకుమ్ వాట్ నే ఇండిలె, తుమ్క కి కండ వెంట గెలెదె.

23 జేవ్ కి, జోవయించి అన్యాయుమ్ ములిలె, జా రూక్తె అన్నె అంటుప జవుల. కిచ్చొక మెలె, జోవయింక అన్నె అంటుప కెర్తి నెక్తి దేముడుచి అత్తి అస్సె.

24 తూమ్ జలె, వెర్రి ఒలీప రూక్చ కొమ్మల్ కండి జా తుమ్ మాములుమ్ నే బెదితో తోట ఒలీప రూక్తె అంటుప జా అస్సెన జలె, అన్నె సొంత జెర్మన్క తోట రూక్తె తా కండి జా తిల కొమ్మల్క జో ఒత్త అన్నె అంటుప కెరుక జయెదె!

25 తుమ్ సొంత గవురుమ్ నే ఉచరంతి రిసా, జో దేముడు బార్ కెర్తి ఈంజ గుట్టు సరిగా అర్దుమ్ కెరన, బావుడ్లు. కిచ్చొ మెలె, 'నంపజంక' మెన జో కెత్తిజన్ యూదుల్ నెంజలనక నిసాన్ల గే, జేవ్ ఎత్తిజన్ ప్రబుతె జెతె ఎదక, ఏక్ వెల్లి వాట ఇస్రాయేలుల్ రాడ్ జీవ్ జా అస్తి.

26 గని యూదుల్ నెంజలనతె కక్క కక్క జో నిసాన అస్సె గే, జేవ్ ఎత్తిజన్ నంపజల మెలె, ఇస్రాయేలుల్ ఎత్తిజన్ రచ్చించుప జవుల. దేముడుచి కొడొతె,

* "నీయొసుతె రచ్చించుప కెర్తొసొ జెర్మెదె.

'యాకోబు' మెన నావ్ తిల అమ్చ యూదుల్ తెంతో పాపుమ్బుద్ది జో ఉదడెదె"

అన్నె,

27 † "జోవయించి పాపల్ ఆవ్ కెయచ గెచ్చవ గెలిందె గే, తెదొడక అంచి ఈంజ నే పిట్టి ప్రమానుమ్ కోడు నెరవెర్చుప జయెదె" మెన రెగ్ల అస్సె.

28 తుమ్కయ్ 'నంపజా రచ్చించుప జతు' మెన, అప్పెచి మట్టుక నుబుమ్ కబురచి రిసా దేముడుక జేవ్ యూదుల్ విరోదుమ్ సుదల్ జా అస్తి. గని జో జోవయింక నిసాన దెకిలె, జోవయించ వూర్గుల్క జో సంగిలి ప్రమానుమ్ కోడుచి రిసా, జో జోవయింక ప్రేమయ్ అస్సె.

29 కిచ్చొక మెలె, దేముడు దెతి వరుమ్, జో కక్క కక్క నిసాన బుకార్లెసి, జో మార్చుప కెరె నాయ్. జో దసాచొ నెంజె.

30 తుమ్ అగ్గ దేముడుచ కొడొ నే నూన్తె పాపుమ్ తెన్ తిలదు, గని జేవ్ యూదుల్ జోచి కోడు ములిలి రిసా, జో తుమ్చి ఉప్పిరి దయ తియ తుమ్చి పాపుమ్ వుచ అస్సె.

31 దస్సి జేవ్ అప్పె జోచి కోడు నే నూన్తె పాపుమ్ తెన్ అస్తి. కిచ్చొక మెలె, తుమ్క జో దేముడు రచ్చించుప కెర్తి వాట్కయ్ జేవ్ కి రచ్చించుప జతి రిసాయి.

32 యూదుడు జలెకి, యూదుడు నెంజిలె కి, ఎత్తి మాన్సుక జోచి దయ దెకవుక మెనయ్, ఎత్తిజన్ ఎక్కి రితి జోచి కోడు నే నూన్లె పాపుమ్తె దెర్చు నేడుక మెనయ్ జో నెలవ్ దా అస్సె.

దేముడుచి గవురుమ్

33 దేముడుచి దయచి సొహ్వారుమ్, జోచి బుద్ది, జోచి గ్యోనుమ్ కెద్ది తమ్మనచి! జోచ తీర్పుల్ కెద్ది తెల్విన! కెద్ది తెలివి మెలె, అమ్ మాన్సుల్ కోయి అర్దుమ్ కెరనుక నెత్తుమ్, మెనుక నెత్తుమ్! జోచ కమె అమ్ కోయి పరిచ్చ కెరుక నెత్తుమ్!

34 దేముడుచి కొడొతె,

§ "ప్రబుచి వెట్టి తిలిసి కో కెయ జాన అస్తి?

జోక కో బుద్ది సంగుక జయెదె? కోయి నాయ్"

మెన అన్నె,

35 * "జో రునుమ్ జతి రితి కో కెయ జోక కిచ్చొ దా అస్తి?

కోయి నాయ్, కెయ నాయ్, కిచ్చొయ్ నాయ్"

మెన రెగ్ల అస్సె.

36 కిచ్చొక మెలె, ఎత్తి జోతె తెంతో జెతయ్, జో జెర్మయ్లో. ఎత్తి జోచి తెడి అస్సె, చి జోచి గవురుమ్ దెకయ్తి రిసాయి అస్సె. కెయచ తెయచ జోవయింక జోబర! ఆమేన్.

* 11:26 11:26 యెనయా 59:20, 21. † 11:26 11:26 'నీయొసుతె' మెలె, యూదుల్తె, ఇస్రాయేలుల్తె. ‡ 11:27 11:27 యెర్మీయా 31:34, యెనయా 27:9. § 11:34 11:34 యెనయా 40:13, యెర్మీయా 23:18. * 11:35 11:35 యోబు 41:11.

12

ప్రబుచి ఆత్మసెక్తిక జియ

1 దేముడు దెతి రచ్చన జోచి దయకయ్ తుమ్క దొర్కు జలి రిసా, బావుడ్లు, ఆవ్ బతిమాల్య జా తుమ్క కిచ్చి సంగితసి మెలె, జేవ్ జోచయ్ తతి రితి, దేముడుక నర్ల కెర్తి రితి, జోక తుమ్చ ఆగ్ జివ్ తిలి బలి దిలి రితి తుమ్ బుద్ది ఇండ. ఈంజ సేవ తుమ్క సరి జలిసి.

2 'ఎత్తిజిన్ ఇన దన కమె కెర్తతి, అమ్ కి కెరుమ' మెలి రితి ఈంజ కాలమ్చ కమె రితి తుమ్ ఇండ నాయ్. తుమ్చి ఆత్మతె నోవ మాన్సుల్ జా, చి ప్రబుచి ఇస్టుమ్ కిచ్చొ కిచ్చొ గే పూర్తి అజ్జ జస్సె. జోచి ఇస్టుమ్ కిచ్చొ మెలె, చెంగిల్ తిలిసి ఎత్తి, జోక నర్ల కెర్తిసి ఎత్తి, కిచ్చొ పొరపాట్ నెంజిలిన్ ఎత్తి మెన పూర్తి తుమ్ అజ్జ జస్సె.

3 మెలె, దేముడు అంక దిలి దయ తెన్ తుమ్క ఆవ్ కిచ్చొ బతిమాల్య జా సంగితసి మెలె, తుమ్ కో గవురుమ్ ఉచరన నాయ్, గని తుమ్ ఎత్తి మాన్సు జాగర్ల తెన్ సరిగా పరిచ్చ కెరన, నముకుమచి రిసా దేముడు కక్క కిచ్చొ సెక్తివరుమ్ దా అస్సె గే, తుమ్చితె ఎత్తి మాన్సు చినన, తుమ్క దిలి సెక్తి వాడిక కెర.

4 మెలె, ఎక్కి ఆగ్తె ఒగ్గర్ వాటల్ తవుల, అన్నె ఎత్తి వాటల్క ఎక్కి రితి కామ్ తయె నాయ్, గని ఏక వాటక ఏక కామ్, అన్నెక్ వాటక అన్నెక్ కామ్ తయెదె.

5 దస్సి, అమ్ ఒగ్గర్ జిలెకి, క్రీస్తుచి తెడి ఎక్కి ఆగ్ జా అస్సుమ్, చి ఎక్కిలోక ఎక్కిలో అమ్ తోడు తంక అమ్చి పూచి,

6 జాకయ్, అమ్చితె కక్క ప్రబు కిచ్చొ సెక్తివరుమ్ దా అస్సె గే, అమ్ ఎత్తి మాన్సు బుద్ది తెన్ జా సెక్తి వాడిక కెరుక. ప్రబుచ కబుర్లు సంగితి సెక్తి తిలోసా జలె, ప్రబు దిలి నముకుమ్ తెన్ సంగున్.

7 ప్రబు దిలి కిచ్చొ సేవ కెర్తొసా జలె, జా సేవ కెర్కు. ప్రబుచి బోదన కెర్తి సెక్తి తతోసా జలె, బోదన కెరుక.

8 ప్రబు దిలి సెక్తి మాన్సుల్క జాగర్లల్ సంగితొ దిట్టుమ్ దయిరిమ్ కెర్తొసా జలె, జాగర్లల్ సంగుక, దయిరిమ్ సంగుక. మాన్సుల్క తోడు దెంక సెక్తి తిలోసా జలె, దర్ముమ్ తెన్ దెవును. సంగుమ్క ఏలువ కెర్తి సెక్తి తిలోసా జలె, జోచయింబి జా కామ్ నిదానుమ్ దెకన్సు. బాదల్ సేడ కన్యూరుమ్ జలసక దెకితి సెక్తి తిలోసా జలె, నర్లబుద్ది తెన్ దెకున్.

నర్లబుద్ది ప్రేమబుద్ది తెన్ తా

9 ఎక్కి మెన్సు మాయ నెంతె మాన్సుల్క తుమ్ ప్రేమ దెకితె తా. గర్చి ఎత్తి దూరి కెర, చెంగిల్ తిలిసి దెరన.

10 బాబేన్క దెకితి సత్తిమ్ తెన్ ఎక్కిలోక ఎక్కిలో ప్రేమ దెకితె తా. దాకు కెరన ఎక్కిలోక ఎక్కిలో వెల్లో మెలి రితి దెక.

11 కెయ్క బద్దుకుమ్ జా నాయ్, గని దేముడుచి సుద్ది తిలి ఆత్మ తుమ్చి ఆత్మతె దీవు లగిల్ రిత తా, కెట్టెడి కి ప్రబుచి సేవ కెర్తినతె తుమ్చి ఆత్మ పూర్తి బెదవ.

12 పరలోకుమతె తుమ్ బెదితి రచ్చన కచితుమ్ నెరవెర్చువ జంక తిలిన్చి దయిరిమ్క నర్లసంతోసుమ్ తా, బాదల్ ఒర్చువ జా, ప్రార్దన కెర్తె తా,

13 అన్నె నంపజలసక కొత్తుల్ తిలె, తుమ్క తిలిన్క తోడు దాస, చి అన్నె మాన్సుల్క గెరి బుకారా మరియాద దెక.

14 "జోక చెంగిల్ దెకు" మెన, తుమ్క అల్లర్ కెర్తనచి రిసా ప్రబుక తుమ్ ప్రార్దన కెర. "జోక ప్రబు సిచ్చ కెర్కు" మెన తుమ్ ఉచర నాయ్. జా పొన, గని 'జోక చెంగిల్ దెకున్' మెనయ్ తుమ్ కోరవ జా.

15 అన్నె, నర్ల తెన్ తిలన తెన్ సంతోసుమ్ జా, ఏడ్డన తెన్ ఏడ్డి రితి తోడు తా.

16 ఎక్కిలో తెన్ ఎక్కిలో ఎక్కి మెన్సు తెన్ జయ్. *గవురుమ్ జిత్సిన్క ఆస నే జతె, బడామ్ నెంజిలిన్తె బెద, కిచ్చొ గవురుమ్ ఉచరన నాయ్. తుమ్క తుమ్ బుద్ది తిలన మెన ఉచర నాయ్.

17 కో తుమ్క కిచ్చొ నస్టుమ్ కెర తిలె, జోక తుమ్ కిచ్చొ నస్టుమ్ అన్నె కెర నాయ్. † గని కో తుమ్క నింద కెరుక నెతిరి రితి, ఎత్తిజిన్ చినితి రితి సత్తిమ్ ఇండ.

* 12:16 12:16 సామెతల్ 3:7. † 12:17 12:17 సామెతల్ 3:4.

18 ఎత్కిజిన్ తెన్ సేంతుమ్ తెన్ తంక ఆన జా. దస్సి, ఎక్కి మెన్సు తెన్ తతిసి తుమ్ పిట్టవ నాయ్. జేవ్ పిట్టయలె, జోవయించి పూచి, గని తూమ్ పిట్టవ నాయ్.

19 ప్రేమ తిల బావుణ్ణు, మాన్సుల్ తుమ్క అల్లర్ కెరై, జోవయింకయ్ తుమ్ అల్లర్ కెర నాయ్. పోన, దేముడు సిచ్చ కెరై, కెర్న, గని తుమి తుళ్లె తా. దేముడుచి కొడెతె,

‡“సిచ్చ కెరై సెక్తి అంచి. ఏ జేవ్ అల్లర్ కెరైసక ఆవ్వీ సిచ్చ కెరిందె మెన ప్రబు సంగితయ్”
మెన రెగ్ల అస్సె.

20 §“తుమ్చొ విరోదుమ్ సుదొక చూ తిలె, జోక అన్నిమ్ దాన.

జోక తాన్ తిలె, పితిసి దాన.

తుమ్ దస్సి కెరైదు మెలె,

జోచి బోడి ఆగి సువ దిలి రితి జయెదె, చి

జో పూర్తి లాజ్ జా తప్పు చినంతిసి జోవయింక నొప్పి దెయెదె.”

మెన దేముడుచ కొడెతె రెగ్ల అస్సె.

21 అన్యెక్ల తుమ్క కెరై గార్ తుమ్క జిన్తి రితి తుమ్ కోవుమ్ జా నాయ్, గని జో కెరై గార్ ఓడువ జా ప్రేమయ్ జిన్తి రితి, తుమ్చ విరోదుమ్ సుదల్క తుమ్ ప్రేమయ్ దెక.

13

అధికారుల్క బియఁకెర ఇండ

1 దేసిమ్క ఏలువ కెరై అధికారుల్క ఎత్కి మాన్సు బితు. కిచ్చొక మెలె, దేముడు సెలవ్ దెతో నాయ్ జలె, అధికారుల్ జా తత్త నాయ్, అన్యె, తిల అధికారుల్ ఏలువ కెరుక జో దేముడుచి ఇస్టుమ్.

2 జాకయ్, అధికారుల్చి కోడుక కో విరోదుమ్ కెరైతి గే, దేముడు దిలిసచి ఉప్పిరి విరోదుమ్ కెరైతి, అన్యె, కో జోచి సెలవ్చి ఉప్పిరి విరోదుమ్ కెరైతి గే, జోవయింక జొయ్యి జెతి సిచ్చ కవుల.

3 అన్యెయ్ కిచ్చొక అధికారుల్క మరియాద దెకుక మెలె, చెంగిల్ బుద్ది ఇండితసక నాయ్, గని గర్బకము కెరైసకయ్ సిచ్చ కెరుల. అధికారి జలొ కేన్ మాన్సుక ‘సిచ్చ కెరెదె’ మెలె బయమ్ నెంతె జింక ఇస్టుమ్ జతసు జలె, సత్తిమ్ కెర, చి తుమ్క చెంగిల్ దెకెదె.

4 తుమ్క ‘చెంగిల్ తత్తు’ మెనయ్ దేముడు జోవయింక జా సేవ దా అస్సె. గని తుమ్ నేరిమ్లు కెరై జలె, తుమ్ బియఁ. కిచ్చొక మెలె, సిచ్చ కెరుక జోక అధికారుమ్ అస్సె. ‘నేరిమ్ కో కెరుల గే, సిచ్చ కెర్న’ మెనయ్ దేముడు జోవయించి అధికారుమ్ జోవయింక దా అస్సె.

5 జాకయ్, సిచ్చ నే సెక్తి రిసా కి, గని అన్యెయ్ ‘దేముడుచి మొక్కె అమ్ అధికారుల్క దస్సి దెకుక మెనయ్, అమ్చి పెట్టి సేంతుమ్ తంక జలె, దస్సి కెరుక అస్సె’ మెనయ్ కి, అధికారుల్చి కోడు అమ్ బింక అస్సె.

6 ఇన్యెచి రిసా కి సిస్టు గట్ట దెతసు. కిచ్చొక మెలె, సిస్టు నజిత సుంకర్లు చి అన్యె అధికారుల్ ఏలువ కెరై తుమ్క దెకుక మెన, జోవయించి కామ్ దేముడు జోవయింక దా అస్సె.

7 జేవ్ ఎత్కిజిన్క దెతిసి జోవయింక దాన. సిస్టు నజుక అధికారుమ్ తిలసక సిస్టుచి డబ్బుల్ దాన, ప్రబుతుమ్క దెతిసి ప్రబుతుమ్క దాన. గవరుమ్క విలువ తిలసక గవరుమ్ దెక, చి మరియాదక విలువ తిలసక మరియాద దెక. దస్సి ఎత్కిజిన్క జేవ్చి జేవ్చి మరియాద కెరుక.

ఎక్కిలోక ఎక్కిలో ప్రేమ కెరై తతిసి

8 ప్రేమ కెరుకయ్, గని వేర రునుమ్ కత్తయ్ జా నాయ్. కిచ్చొక మెలె, అన్యె మాన్సుల్క కో ప్రేమ ఇండితయ్ గే, ఆగ్గుల్ ఎత్కితె దొర్కు జలిసి నెరవెర్నవ కెరైయ్.

‡ 12:19 12:19 ద్వితియాపదేశ కాండుము 32:35 § 12:20 12:20 సామెతల్ 25:21, 22.

9* “లంజికమొకర నాయ్” మెలిన్ జలెకు, ‘నరు అత్య కెర నాయ్’ మెలిన్ జలెకు, ‘చోర నాయ్’ మెలిన్ జలెకు, ‘అన్య మాన్యుల్ చి అస్తిక అస జా నాయ్’ మెలిసి జలెకు, దేముడుచ అగ్గల్ ఎత్తితె తిలిసి కి ఎక్కి ఒడుగుతె బెదితయ్. కేన్ ఒడుగుతె మెలె,

† “తుక తూయి కెద్ది ప్రేమ కెరంతసి గే, తుచి పాసిచో మాన్యుక తెద్ది ప్రేమ తుయి కెరుక” మెన దేముడుచ కొడతె రెద్దవ అస్సె.

10 అమ్చి పెట్టి ప్రేమ తిలె, పాసిచో మాన్యుక కిచ్చొ అల్లర్ కెరుక నెనుమ్. జాకయ్, ప్రేమతెయి అగ్గల్ ఎత్తి నెరవెర్చువ జతయ్.

ప్రబు అన్నె ఉత్త జెతి వెల్లి దీసి పాసి జెతయ్

11 అన్నె, ప్రబు సంగిలి సమయుమ్ పాసి జా అస్సె మెన జాన్సు. మెలె, అగ్గ నిజ తిలె కి, అప్ప ఉట్ట తెలివి జా తంకయ్ అస్సె. సమయుమ్ జా గెచ్చ అస్సె. అమ్ తొలితె నంపజలి కంట, అమ్చి రచ్చన పాసి జా అస్సె.

12 రాత్ పాయితి రితి, ఉజిడ జయెదె. జాకయ్ అందర్బుద్దివ కమె వెంట గెల కెర, ఉజిడ బుద్దివ అయ్దల్ గలనుమ్.

13 మెద్దెనెచి ఉజిడతె బెదిత కమెతె ఇండుమ్. మెలె, ‘సర్ద కెర్లసుమ్’ మెన వెట్కారుమ్ జతిసి, మచ్చితిసి పోన. లంజికమొ, అగ్చి అస ముద్దొ నే కెరంతిసి పోన. కొడె జుజవ జట్టి జతిసి, గోనల్ కెర్లసి, పోన.

14 గని ప్రబు జలో యేసుక్రీస్తుచి బుద్ది గలన, మాన్యుచి అగ్చి తుమ్చ అసల్ నెరవెర్చువ నే కెరంతి రితి జాగర్త తా, దనచక కిచ్చొ వాటు దాన నాయ్.

14

ఇసి కెర్లె గారు దస్సి కెర్లె చెంగిలి

1 నంపజలన కీసి ఇండుక గే ఇదిల్ నేన్దొ కేన్ నంపజలనక బెదవన, గని ముక్కిమ్ నెంజిలిన్చి రిసా జోవయింతెన్ కామ్క నెంజిల కొడె జుజవుక పోన.

2 ఏక్చె రిసా ఉచరుమ్. “కిచ్చొ కి కంక జయెదె” మెన, దయిరిమ్ తిలోసా ఉచరెదె, గని “ఈంజ జా గారు” మెంతి అలవాల్ తెంతొ పూర్తి విడ్డల్ నే జలోసా కో జలెకు ముక్కల్ గల్ల కయె నాయ్.

3 జలె, తుమ్చితె నే కతోసాక, కతోసా నిస్కారుమ్ దెకున్ నాయ్, చి కతోసాక, నే కతోసా నిస్కారుమ్ దెకున్ నాయ్. కిచ్చొక మెలె, దేముడు ఇన్నెక కి జోవయింక కి బెదవన అస్సె.

4 అన్నెక్లొచో సేవ కెర్లెనెచి రిసా తుమ్చితె కో తీర్పు కెరుక కొన్సు? జోవయింక ‘చెంగిల్’ మెనుక గే ‘గార్’ మెనుక గే కచి సెక్తి మెలె, జోచో సొంత ఎజోమానిచి సెక్తి, అన్నె కచి నాయ్. జో నిజామి నంపజలోన్ జలె, కో వేర ఉచర్లె కి, జో టీవెదె. కిచ్చొక మెలె, జోక టీవెడుక ప్రబుక సెక్తి అస్సె.

5 పడ్డె, ఏక్ దీసిచి కంట అన్నెక్ దీసిక ‘ఎల్లకాలుమ్చి రిసా ముక్కిమ్చి’ మెన ఎక్కిలో ఉచరెదె, గని అన్నెక్లొ జలె, ఎత్తి దినాల్క ఎక్కి రితి దెకితయ్. ఎత్తి మాన్యు ఈంజెమ్ దొన్నెతె కేన్ రగుమ్ ఉచర్లెను గే, సరిగా ఉచర తా. ఎత్తి మెన్సు నిదానుమ్ ఇండ.

6 దీసిక, “ప్రబుచి గవురుమ్ దెకుంతి రిసా ఈంజ జా కామ్ పలాన దీసి కెర్లె చెంగిల్” మెన కో ఉచర్లయ్ గే, ప్రబుచి గవురుమ్ ఉచర్లయ్. దస్సి, ‘తుయి దిలిసి’ మెన దేముడుక ఉచరయ్ కో ముక్కల్ కతయ్ గే, ప్రబుక గవురుమ్ దెతయ్. దస్సి కి, ముక్కల్ నే కతోసా కో జలె, జో కతిన్క ‘తుయి దిలిసి’ మెన దేముడుక ఉచర్లె, జో కి ప్రబుక గవురుమ్ దెతయ్.

7 అమ్చి రిసా అమ్మి జిము నాయ్, మొరుమ్ నాయ్.

8 అమ్ జలె, ప్రబుచి సేవచి రిసాయి జతనుమ్. అమ్ మొర్లె, జా కి జిచి సేవ. జాకయ్, అమ్ జలె కి మొర్లె కి, జోచయ్ మాన్యుల్ అమ్. జొయ్యి అమ్చో ఎజోమాని.

* 13:9 13:9 నిర్ణయకాండుమ్ 20:13-15, 17. ద్విత్వియాపదేశ కాండుము 5:17-19, 21. † 13:9 13:9 లెవీయకాండుమ్ 19:18.

9 ఇనీకయ్ క్రీస్తు మొర్లన్ చి అన్నె జలన్. మెలె, మొర్లుక జీన కెర, మొర్లనక కి, జితనక కి జో ప్రబు జా, ఎజోమాని జా, ఏలువ కెరుకయ్.

10 తుమ్ క బావుడ్లు జల అన్నె నంపజలన్ చి రిసా తుమ్ కిచ్చొక అల్లర్ చ తీర్పుల్ ఉచర్తను, నిస్కారుమ్ ఉచర్తను? లోకుమచక జో పరిచ్చ కెర్తి వెల్లి దీనిక అమ్ ఎత్కిజిన్ ప్రబుచి మొక్కె టీవ, జోచి అత్తి తీర్పు జమ్మదె.

11 దేముడుచి కొడతె,
 “అవ్ కచితుమ్ జివ్వి అస్సి. దస్సి, కచితుమ్,
 అంచి చట్టె ఎత్కి మాన్సు మొగ్రల్ టెక సెర్పు నేడుల, చి
 ‘తుయి దేముడు. తీర్పు కెరుక తుచి అత్తి అస్స’
 మెన ఎత్కి చోడి ఒప్పునుల మెన ప్రబు సంగితయ్”
 మెన రెగ్గవ అస్సె.

12 జలె, ఈంజ లోకుమతె అమ్ ఇండిలి బుద్దిచి రిసా దేముడు సొంతచి మొక్కె తెదోడక అమ్ ఎత్కి మాన్సు సాచి నజనుక తయెదె.

13 జాకయ్, అప్పె తెంతో ఎక్కిలోచి ఉప్పిరి ఎక్కిలో తీర్పుల్ కెరుమ నాయ్, గని కేన్ బాచొ ఆత్మక నే పిసిర్తి రితి, కేన్ పారపాట్ నే జతి రితి, జో ఆత్మక డిట్టుమ్ జతిసి నే పిట్టి రితి, ఎక్కి మెన్సు తెన్ ఇండుక అమ్చి వెట్టి ఒప్పునుమ.

14 ప్రబుచి తెడి తా కిచ్చొ జాని, కిచ్చొ పూర్తి దయిరిమ్ తెన్ అస్సి మెలె, జేవ్చి సొంత సెక్కిక కిచ్చొ వస్తువచి రిసా ‘గార్’ మెనుక నెంజె. గని జాక ‘గార్’ మెన కో దెకితయ్ గే, జోకయ్ జా గారు జయెదె.

15 జాకయ్, తుమ్ కేన్ జవున్ రగుమ్ కతిసి అన్నెక్కిచి ఆత్మతె జోవయింక అల్లర్ కెరెదె మెన తుమ్ జాన జానయ్ కయలె, తుమ్ ప్రేమయ్ ఇండుక ముల తస్సె. తుమ్ కేన్ జవున్ రగుమ్ కయలె ప్రబు మొర రచ్చించువ కెర్లొ అన్నెక్కిచి ఆత్మతె జోక పాడ్ కెరెదె జలె, జా కంక పోన.

16 జాకయ్, ‘చెంగిల్’ మెన కేన్ అలవాట్చి రిసా తుమ్ జాన్సు జలెక, వేర మాన్సుల్చి మొక్కె జా కామ్చి రిసా ప్రబుచి నావ్ నిస్కారుమ్ జయెదె జలె, జా నే కయలె చెంగిలి.

17 కిచ్చొక మెలె, దేముడుచి రాజిమతె బెదితినక కతిసి పితిసి ముక్కిమ్ నాయ్, గని దేముడుచి నుద్ది తిలి ఆత్మ దెతి సత్తిమ్ సేంతుమ్ అన్నె సంతోసుమ్, జేవ్ ముక్కిమ్.

18 ఈంజేవ్ వరుమ్ ఇండితి రితి కో క్రీస్తుచి సేవ కెరుల గే, ‘చెంగిల్’ మెన దేముడు కి మాన్సుల్ కి దెకుల.

19 జాకయ్, ఎక్కి మెన్సు తెన్ తతిన్చి రిసా, ప్రబుచి ఉప్పిరిచి అన్నె మాన్సుల్చి నముకుమ్ డిట్టుమ్ కెర్తినచి రిసా కిచ్చొ కిచ్చొ కామ్క జయెదె గే, జయ్యి ముక్కిమ్ ఉచర్తె తమ.

20 ఎక్కి కతిసి నే కతిన్చి రిసా మాన్సుచి వెట్టి దేముడు కెర్తి కామ్ తుమ్ పాడ్ కెర నాయ్. నిజమి ఎత్కిక కి ‘కంక జయెదె’ మెనుక జయెదె, నుద్ది అస్సె, గని ఆమ్ కతిన్చి రిసా, అన్నెక్కి జోచి ఆత్మతె తప్పు జలి రితి జయెదె జలె, అమ్చి తప్పు.

21 తుమ్ ముక్కల్ కతిసి జవున్, కేన్ రగుమ్ పితిసి జవున్, కిచ్చొ కామ్ కెర్తిసి జవున్, తుమ్చొ బాచొ జతో కేన్ నంపజలనచి ఆత్మతె జోవయింక పాడ్ కెరెదె జలె, జా కామ్ తుమ్ ములిలె చెంగిలి.

22 జలె, ‘ఇని దస్సి కెర్తి చెంగిల్’ మెన తుమ్చి వెట్టి కిచ్చొ నముకుమ్ అన్సున్ గే, తుమ్చి వెట్టి దేముడుకయ్ ఒప్పున. ‘అవ్ కయలె తప్పు నెంజె’ మెన కక్క దయిరిమ్ తయెదె చి ‘అవ్ కయలె కచి ఆత్మతె జోవయింక పాడ్ కెరె నాయ్’ మెన జో జాన్సె, జో మాన్సుక చెంగిలి.

23 గని ‘కయలె తప్పు’ మెన కో ఉచరయ్ కయలె, ప్రబుచి సిచ్చ అననతయ్. కిచ్చొక మెలె, జో కయలిసి జోచి వెట్టి జో ఉచర్తిన తెన్, జోవయించి నముకుమ్ తెన్, బెదె నాయ్. ‘పలాన కామ్ కెర్తి చెంగిల్’ మెలి దయిరిమ్ అమ్చి వెట్టి నెంజిలె, జా కామ్ అమ్ కెర్తి పాపుమ్ జతనుమ.

15

దేముడుచి గవురుమ్ దెకవుక

1 అమ్ అత్తుక డిట్టుమ్ తిలన జలె, డిట్టుమ్ నెంజిలనచి జాడు వయిలి రితి జోవయించ అన్యానల్ బిర్లువ జా అమ్చి ఇస్టుమ్ గడియ ములిలె చెంగిలి.

2 అన్నె మాన్సుల్క 'అత్తుక డిట్టుమ్ జా చెంగిల్ జతు' మెన, జోవయించి ఇస్టుమ్ తిలిన్క మరియాద్ దెకుము.

3 కిచ్చొక మెలె, క్రీస్తు ఎక్కి జోచి సొంతయ్ ఇస్టుమ్క కిచ్చొ కెరె నాయ్, గని దేముడుచి కొడొతె రెగిడ్డిసి జోయ్యి సంగిలి

* "దేముడు ఓ బ, తుక మాన్సుల్ కెర్ల నిందల్ అంకయ్ లయ అస్తి" మెన జో సంగిల్ రితి అస్తి.

4 జలె, పూర్లుమ్ రెగిడ్డిసి కిచ్చొక రెగ్ల అస్సి మెలె, అమ్కయ్ 'సిక్కుత్' మెనయ్ రెగ్ల అస్సి. దస్సి, దేముడుచి కొడొతె రెగ్లయిలిసి అమ్క నిదానుమ్ దయిరిమ్ సికడ్లె, అమ్ దయిరిమ్ డిట్టుమ్ జమదె.

5 యేసుయి జో ఇండిలిన్క తుమ్క వాట్ దెకయిలి రితి తుమ్ ఎక్కిలో తెన్ ఎక్కిలో దస్సి ఎక్కి మెన్సు తెన్ జతి రితి, నిదానుమ్ దెతో దయిరిమ్ దేముడు తుమ్క సెక్తి దెవును,

6 చి తుమ్ ఎక్కి మెన్సు తెన్ ఎక్కి అవాడ్ రితి జా, అమ్చొ ప్రమ జలో యేసుక్రీస్తుచొ అబ్బొన్ జలో దేముడుచి గపురుమ్ దెకయెతె తస్సె.

7 జాకయ్, క్రీస్తు తుమ్కయ్ బెదవన్లి సర్ల తెన్, దేముడుచి గపురుమ్ దెకయెతి రిసా తూమ్ కి ఎక్కిలోక ఎక్కిలో బెదవన.

8 కిచ్చొక మెలె, తుమ్క ఆవ్ కిచ్చొ మెంతసి మెలె, క్రీస్తు † యూదుల్క సేవ కెర్లొసా రితో జలో. కిచ్చొక మెలె, దేముడుచి సత్తిమ్ దెకవుక. కిసి మెలె, జోవయించ పూర్లుల్క దేముడు దిల ప్రమానల్ నెరవెర్లువ కెర్లి రిసా.

9 అన్నె కిచ్చొచి రిసా మెలె, యూదుల్ నెంజిలనక కి జో దెతి రచ్చన జో దొర్కు కెర్లె, జోవయించి దయ కన్యారుమ్చి రిసా జేవ్ కి దేముడుక గపురుమ్ దెతు మెనయ్. దేముడుచి కొడొతె దాచీదు పూర్లుమ్చొ;

‡ "జేవ్ కి, యూదుల్ నెంజిలన తెన్ కి సర్ల జా, గాయ గాయ తుచి నావ్ గపురుమ్ కెరుమ్దే" మెన రెగ్ల అస్సి.

10 పడ్డొ దేముడుచి కొడొతె,

§ "జోవయించ సొంత మాన్సుల్ తెన్ తూమ్ కి, యూదుల్ నెంజిలన, సర్లంతోసుమ్ జా" మెన మోసేచి అత్తి రెగ్ల అస్సి.

11 పడ్డొ దాచీదుచి అత్తి అన్నె రెగిడ్డిసి,

* "యూదుల్ నెంజిల ఎత్తి దేసిమ్చ, ఒండి లోకుమ్చ మాన్సుల్, ప్రబుచి గపురుమ్ గాయ" మెన రెగ్ల అస్సి.

12 పడ్డొ అన్నె, యెసయాచి అత్తి దేముడుచి కొడొతె,

† "యెస్సయిచి సెకుమ్తె ఎక్కిలో జెర్దెదె. జోయ్యి ఉట్ట, యూదుల్ నెంజిలనక ఏలువ కెరెదె, చి జోచి ఉప్పిరి నముకుమ్ తియ, జేవ్ యూదుల్ నెంజిలన రచ్చనచి దయిరిమ్ తెన్ తవుల" మెన రెగిడ్డి కోడు.

* 15:3 15:3 క్రీస్తునలు 69:9. † 15:8 15:8 ఈంజ ఉత్తుమ్ తొలితో రెగిడ్ల కార్లతె కిచ్చొ అస్సి మెలె, 'యూదుల్ జతి గుర్తుచి సున్నతి కెర్లనక సేవ కెర్లొసా...' ‡ 15:9 15:9 నమూయేలు దొన్చిచి పున్కుమ్ 22:50, క్రీస్తునలు 18:49. § 15:10 15:10 ద్వితియాపదేశ కాండుము 32:43. * 15:11 15:11 క్రీస్తునలు 117:1. † 15:12 15:12 యెసయా 11:10.

13 జలె, రచ్చన జతి దయిరిమ్ దెతో దేముడు సొంత తుమ్చి పెట్టి జోచి నముకుమ్చి సర్ల సేంతుమ్ దెవును, చి దేముడుచి సుద్ది తిలి ఆత్మచి నెక్తి తుమ్చి ఆత్మతె తా, తుమ్చి ఆత్మ పూర్తి డిట్టుమ్ దయిరిమ్ జా గెచ్చెదె.

యూదుల్ నెంజిలసతె పవులు ప్రబుచి కామ్ కెర్లెసి

14 ఆచ్, బావుడ్లు, తుమ్చి రిసా కిచ్చి దయిరిమ్ తెన్ అస్సి మెలె, తుమ్చి పెట్టి ప్రబుచి సత్తిమ్ అస్సె. జో దెతి గాగ్గునుమ్ అస్సె, చి ఎక్కిలోక ఎక్కిలో బుద్ది సంగుక తుమ్క నెక్తి అస్సె. జా ఎత్తిచి రిసా అంక దయిరిమ్.

15 గని, సగుమ్ కమెచి రిసా తుమ్క ఇదిల్ గట్టిజ సంగిల్ రితి రెగ్ల అస్సి, తుమ్క పచ్చుత్ నాయ్ మెన. దేముడు అంక దిలి అదికారుమ్ వరుమ్చి రిసా ఆచ్ జా రెగుడుక జయెదె.

16 జో దిలి అదికారుమ్ వరుమ్ మెలె, యేసుక్రీస్తుచి రిసాచి జోచి సుబుమ్ కబుర్ సూనవ సూనవ, జో దేముడుచి సేవ కెర్తొ పూజరి మెలి రితో ఆచ్ జంక మెన జో నిసాన కామ్ తియార్లి వరుమ్. మెలె, యూదుల్ నెంజిలసక క్రీస్తుక సంపజా దేముడుచి సుద్ది తిలి ఆత్మచి నెక్తిక జేచ్ జోచయ్ జా, సుద్ది జా దేముడుక సరి జలి బలి జతి రితి, జోచి అత్తి ఆచ్ సార్పు కెర దెంక.

17 జలె, దేముడుచి సేవ ఆచ్ కెర్లెచి రిసా 'చెంగిల్చి' మెన క్రీస్తు జలో యేసుచి తెడి అంక దయిరిమ్.

18 మెలె, యూదుల్ నెంజిలస జోవయింబి ఉప్పిరిచి నముకుమ్ ఇండితి రితి క్రీస్తుయి అంబి అత్తి జర్గు కెర్లెచి రిసాయి ఆచ్ సంగితసి. జో ప్రబు కిసి ఈంజ కామ్ అంబి అత్తి జర్గు కెర్లెన్ మెలె, ఆచ్ బోదన కెర్లెతె, ఆచ్ ఇండిలి బుద్దితె,

19 జో అంబి అత్తి కెర్లె జోచి గుర్తుచ వెల్లిో కమెతె, జో దిలి దేముడుచి సుద్ది తిలి ఆత్మచి నెక్తికయ్ జర్గు కెర్లెన్. దస్సి, జోచి నెక్తికయ్, యెరూసలేమ్ పట్టుమ్ తెంతో తుమ్క సముద్రుమ్ ఒత్తల్తోచి ఇల్లూరికు ప్రదేసిమ్చి ఎదిలి దూరిక క్రీస్తుచి సుబుమ్ కబుర్ జా ఎత్తితె ఆచ్ సూనవ అస్సి.

20 దస్సి, అంబి ఆన కిచ్చొ మెలె, వేర మాన్సు పునాది కెర్లి ఉప్పిరి బందుక నెన, క్రీస్తుక మాన్సుల్ సంపజా తిలిన్తె నాయ్, గని వేరతెయ్, మాన్సుల్ జోక నేన్లిన్తెయ్ సుబుమ్ కబుర్ సూనవుక అంబి ఆన.

21 దేముడుచి కొణాతె;

‡ "జోచి రిసా కో అగ్గె నే సూనయ్లన సూన, జేచ్ గుడ్డి మెలి రితి జలిసి గెచ్చ, దెకుల. జోచి రిసా కెయ్చ నే సూన్లన అర్దుమ్ కెరసుల" మెన రెగ్లయ్లి కోడె.

రోమ్ పట్టుమ్చ గెచ్చుక మెన పవులు ఉచర్లెసి

22 జలె, సుబుమ్ కబుర్ నే సూన్ల టాన్లుతె గెచ్చ సూనవుక అంబి కామ్ తిలి రిసా, అప్పొక తుమ్తె జెంక అంక వాటు తయ్ నాయ్.

23 గని అప్పొ, ఈంజేచ్ ప్రాంతుమ్లుతె అంక అన్నె కామ్ నాయ్ మెన, ఒగ్గర్ వెర్పుల్ తెంతో తుమ్తె జెంక అంబి ఆనచి రిసా,

24 స్సెయిను దేసిమి ఆచ్ గెతి పొదిక, వట్టె తుమ్తె గోత్ జా తుమ్క దెకుక ఉచర్లెసి. సర్ల తెన్ గడియ తుమ్చి తెన్ తా పుండిలయ్ మెలె, తుమి అంక బార్ కెర వట్టె తెద్రయ్తె.

25 గని అప్పొ యెరూసలేమ్తె ఉట్ట గెతసి; ఒత్తచ సంపజలన్క తోడు న దెంక.

26 మాసిదోనియచ చి అకయచ సంపజలన్క యెరూసలేమ్చ యూదుల్చ బీద జల సంపజలన్క తోడు ఉక్కుల తెద్రవుక ఇస్టుమ్ జల.

27 ఈంజేచ్ ఇస్టుమ్ జల, గని అన్నె జేచ్ యెరూసలేమ్చ సంపజలన్కె రునుమ్ జలి రితి జా అస్సి. మెలె, యూదుల్కయ్ దేముడు దిల ఆత్మవరల్తె ఈంజేచ్ యూదుల్ నెంజిలసక వాట అయ్లి రిసా రునుమ్ జలి రితి జా అస్సి, చి జేచ్ యూదుల్క కిచ్చొ జవున్ ఈంజ లోకుమ్తె కామ్క జెతికయ్ తోడు ఈంజేచ్ యూదుల్ నెంజిలస దిలె, చెంగిలి.

‡ 15:21 15:21 యెనయా 52:15.

28 జాకయ్, ఈంజేవ్ ఉక్కిలి తోడు నా దెతి కామ్ కుట్టయలయ్ మెలె, స్పయిన్తె గెతి వట్టె తుమ్తె జెయిందె,

29 చి తుమ్తె పాచ అయ్లె, క్రీస్తు దెతి అత్తునక్కి అంచి పెట్టి బెర తా జా సెక్కి తెన్ని జెయిందె మెన జాని.

రోమియుల్ పవులుచి రిసా ప్రార్థన కెరుక

30 బావుడ్లు, 'అమ్చొ ప్రబు జలో యేసుక్రీస్తుచి నావ్ తెన్ చి దేముడుచి సుద్ది తిలి అత్తుచి ప్రేమక, అంచి రిసా దేముడుక తుమ్ ప్రార్థన కెర కెర అంక తోడు తా' మెన తుమ్క ఆవ్ బతిమాల్పా జా సంగితసి.

31 కిచ్చొచి రిసా మెలె, ఆవ్ అప్పె గెతి యూదయ ప్రదేసీమచ యేసుచి రిసా అన్యానుమ్ తిలసతె ఆవ్ దెర్పు నే సేడ్డి రిసా, పడ్డొ ఒత్తచి యెరూసలేమ్ పట్టుమ్చ నంపజలనచి రిసాచి అంచి నేప జోవయింక చెంగిల్ నేడ్పు మెనయ్ తుమ్ ప్రార్థన కెర.

32 దస్సి జెయిమ్ జలి మెలె, సర్దనంతోసుమ్ తెన్ ఆవ్ తుమ్తె జెంక జయెదె, చి తుమ్చి తెన్ తా సర్ద తెన్ వుండుక జయెదె.

33 సెంతుమ్ దెతో దేముడు సొంత తుమ్చి తెన్ తవున్! ఆమేన్.

16

సర్ద తెన్ సంగుమ్తె బెదవనుక

1 క్రీస్తుచి తెడి అమ్క అప్పు జలి పీబే, కెంక్రేయ పట్టుమ్చి సంగుమ్తె వెల్లో తేరబోద జా ప్రబుచి నేప కెర్తయ్. జాక 'సత్తిమ్చి' మెన ఆవ్ సాచి జతసి.

2 తుమ్తె జా అయ్లె, ప్రబుచయ్ జల మాన్సుల్క దెకితి మరియాద తెన్ జాక బెదవన, చి కిచ్చొ కామ్తె జేవ్ కి తోడు కావలె మెలె, తోడు తా. కిచ్చొక మెలె, అగ్గె తెంతో ఒగ్గరజిన్ నంపజలనక జా తోడు కెర అన్నె, అంక కి.

3 యేసుక్రీస్తుచి కామ్ అంచి తెన్ బెద కెర్లె స్పిస్కిల్లక చి అకులక అంచి ప్రేమ సంగ.

4 అంక 'మొర్పు నాయ్' మెన జా సుట్టు జెప్ప్యె ప్రమాదుమ్ జల. ఎక్కి ఆవ్ మెన నాయ్, గని యూదుల్ నెంజల బావుడ్లుచ సంగుమ్లు ఎత్తి జేవ్ దొగులచి కామ్చి రిసా అంచి తెన్ జోవయిం చి సర్ద కి సంగితనుమ్.

5 జోచి గెరి సబ కెర్తి సంగుమ్చ ఎత్తిజిన్క అంచి ప్రేమ సంగ. ప్రేమ తిలో ఎపైనెటుక అంచి ప్రేమ సంగ. ఒండి ఆసియా ప్రదేసీమతె జొయ్యి తోలితో ప్రబుక నంపజా మార్పుచ జలో.

6 తుమ్చితె నిదానుమ్ కామ్ కెర్లి మరియక కి సంగ,

7 పడ్డొ అంచ బందుగుల్ జత అండ్రోనిక చి యూనియక కి. అంచి తెన్ జేవ్ జేలి జా తిల. ప్రబుచి సుబుమ్ కబుర్ సంగిత బారికుల్తె జోవయింక గవురుమ్ దెకితతి, చి అంచి కంల అగ్గెయి క్రీస్తుచ మాన్సుల్ జల.

8 పడ్డొ, ప్రబుచి తెడి ఆవ్ ప్రేమ తిలో అంప్లియతునక అంచి ప్రేమ సంగ.

9 పడ్డొ క్రీస్తుచి కామ్తె అమ్చి తెన్ బెదిలో ఊర్బానుక, చి ప్రేమ తిలో స్థాకునక అంచి ప్రేమ సంగ.

10 క్రీస్తుక సత్తిమ్ తిలో అపెల్లెక చి అరిస్టాబూలుచి కుటుంబుమ్చ ఎత్తిజిన్క సంగ.

11 అన్నె, అంక బందుగుడు జతో హెరోదియోనుక చి నార్కిస్సు చి కుటుంబుమ్తె ప్రబుక నంపజలనక సంగ.

12 పడ్డొ, ప్రబుచి కామ్ కెర్లె త్రుప్సెనా చి త్రొపోసా మెల తేరబోదల్క జోబర సంగ. పడ్డొ ప్రబుచి కామ్ నిదానుమ్ కెర్లొ ప్రేమ తిలో పెర్సెనుక జోబర సంగ.

13 పడ్డొ ప్రబుచి తెడి ఒగ్గర్ బుద్ది సుదో జలో రూపుక చి అంక అయ్య మెలి రెతి జలి జోచి అయ్యన్క అంచి ముద్దుచి జోబర సంగ.

14 పడ్డొ అనుంక్తితుక, ఫ్లెగోసుక, హెర్మీకుక, పత్రోబక, హెర్మాకుక చి జోవయింతెన్ తిల బావుడ్లు ఎత్తిక అంచి ప్రేమ జోబర సంగ.

15 పడ్డొ పిలోలోగుక, యూలియాక, నేరియక, జోవయిం చి బేనిక, ఒలుంపాకుక, చి జోవయింతెన్ తిల బావుడ్లు ఎత్తిజిన్క అంచి ప్రేమ సంగ.

16 ఎక్కిలోక ఎక్కిలో తుమ్చి ప్రేమ దెకయ్తె రితి ప్రబుచి నావ్ తెన్ ఎక్కిలోక ఎక్కిలో సుద్ది తిలి ముద్దు తెన్ జోకర. ప్రబుచ సంగుమ్లు ఎత్తి, తుమ్క జోవయింబి ప్రేమ సంగ తెద్రయ్తతి.

17 జలె, బాపుడ్లు, తుమ్క కిచ్చో బతిమాల్ప జా సంగితసి మెలె, తుమ్క సికడ్లి బోదన నాయ్, గని వేరచి సికడ జట్టు కెర్త అన్యానల్ కెర్తస కొన్నగె చిన కెర, జోవయింక తుమ్ సూన నాయ్. దూరి కెర.

18 దస మాన్సుల్ అమ్చో ప్రబు జలో క్రీస్తుక నాయ్, గని జోవయింక సొంత ఆసల్కయ్ సేవ కెర్తతి, అన్యె, తేలిక లట్టబ మాన్సుల్క పులవ, ఒగ్గర్ తెలివి నెంజిల మాన్సుల్క మోసిమ్ కెర్తతి.

19 ప్రబుచి కోడు తుమ్ సొంత నిదానుమ్ కెర్తిసి ఎత్తిజిన్ జాన్తి, చి తుమ్చి రిసా అంక నర్ద, గని తుమ్క 'చెంగిల్చితె తెలివి తత్తు, గని గర్చి నేన్తు' మెనయ్, తుమ్చి రిసా అంక ఆన.

20 దస్సి జలదు మెలె, తుమ్చ చట్టో నయ్తాన్క సుద బీడవ జిన్తి రితి, సెంతుమ్ దెతో దేముడు జిసెదె. అమ్చో ప్రబు జలో యేసుక్రీస్తుచి దయ తుమ్చి తెన్ తవున్!

21 అంచి తెన్ ప్రబుచి కామ్ కెర్తొ తిమోతి తుమ్క జోచి ప్రేమ సంగ తెద్రయ్తయ్. దస్సి కి లూకియ, యాసోను చి సోసిపత్తు, అంచ బందుగులు.

22 వవులు సంగితి ఈంజ ఉత్త్రమ్ రెగిడ్డో తెర్తియ మెలో ఆవ్ ప్రబుచి తెడి అంచి ప్రేమ సంగ తెద్రయ్తసి.

23 ఆవ్ ఈంజ ఉత్త్రమ్ సంగ రెగ్డయ్తో వవులుక టాన్ దిలో, ఒండి సంగుమ్క టాన్ దెతో గాయియు తుమ్క జోవయింబి ప్రేమ సంగ తెద్రయ్తయ్. దస్సి కి ఈంజ పట్టుమ్చ కముచి ఉబ్బుల్ దెకితో ఎరస్తును, చి అమ్చో బావో జలో క్షర్తును జోవయింబి ప్రేమ సంగ తెద్రయ్తయ్.

24* అమ్చో ప్రబు జలో యేసుక్రీస్తుచి దయ తుమ్ ఎత్తిజిన్ తెన్ తవున్! ఆమేన్.

25 జలె, 'సూనవు' మెన అంక దిలి సుబుమ్ కబుర్ వాటు యేసుక్రీస్తుచి రిసా బోదన కెర్తి వాటు తుమ్క డిట్టుమ్ కెర్తొ దేముడుక జోబర! జా సుబుమ్ కబుర్తె బెదితి గుట్టు జో అప్పె బార్ కెర అస్సె. మదెనె, అగ్గె తెంతో లుంకడ తిలో.

26 జలె, యూదుల్ నెంజిలసక కి జోవయింబి రచ్చన దొర్కు జలి రిసాచి, ఈంజ గుట్టు జో అప్పె బార్ కెర అస్సె, చి జోవయింక కబుర్లు పూర్ణమ్ సంగిలస రెగిడ్లిసి సూనయ్ జతిన్తె ఒండి లోకుమ్తె ఎత్తి దేసిమ్చక జాన్సున్ మెన కెయక తెయక తా గెతో దేముడుచి ఆత్ర, ఒండి లోకుమ్తె మాన్సుల్ నంపజా జోచి కోడ్ రితి ఇండుత్ మెనయ్.

27 జలె, యేసుక్రీస్తుచి అత్తి జర్గు జలి కామ్చి రిసా ఎత్తి. గ్యానుమ్ తిలో ఎక్కిలో దేముడుక కెయక తెయక జోబర!

* 16:24 16:24 ఈంజ ఉత్త్రమ్ రెగిడ్ల తోలితోవ పుస్తకుమ్ సగుమ్తె 24నంబర్చి కోడు తయె నాయ్.

కొరింధియులక రెగిడ్లి మొదొల్చి ఉత్త్రుమ్ బారిక్ జలో పవులు కొరింధ్ పట్టుమ్చి సంగుమ్చక రెగిడ్లి మొదొల్చి ఉత్త్రుమ్

మొదొల్ కోడు

1 యేసుక్రీస్తుచి తెడి సుద్ది జా దేముడచయ్ మాన్సుల్ జల కొరింధి పట్టుమ్చి సంగుమ్ సుదల్క పావులు అమ్చొ బావుడు జలో సాస్తానేసు తెన్ రెగిడ్లి ఉత్త్రుమ్.

2 క్రీస్తు జలో యేసుచి రిసా సుబుమ్ కబుర్ నూనయ్తో జోచొ బారికి అవ్ జంక మెనయ్ దేముడు జోచి ఇన్జుమ్క అంక నిసాన అస్సె. అమ్చొ ప్రబు జోచొ ప్రబు జలో యేసుక్రీస్తుత 'తుచితెయ్ రచ్చన అస్సె. తుయి ప్రబు' మెన జోచి నావ్ దెరన్తన ఎత్తిజిన్ తెన్ తుమ్క కి 'అంచి సుద్ది జా అంచయ్ మాన్సుల్ జతు' మెనయ్, దేముడు బుకార అస్సె.

3 జలె, అమ్క తుమ్క అబ్బొ జలో దేముడుచి ప్రబు జలో యేసుక్రీస్తుచి దయ సెంతుమ్ తుమ్చి ఉప్పిరి తప్పన్!

4 తుమ్చి రిసా ఎత్తి అదికారుమ్ తిలో దేముడుక రోజుక ప్రార్దన కెర అంచి సర్ల జోక నూనయ్తసి. కిచ్చొచి రిసా మెలె, యేసుక్రీస్తుక తుమ్ నంపజా అప్పె జోచి తెడి తిలి రిసా జోచి దయక దేముడు తుమ్క దిలి రచ్చనచి రిసాయి.

5 మెలె, జా రచ్చన దిలి తెంతొ క్రీస్తుచి తెడి గ్యాసుమ్ ఎత్తి, జా గ్యాసుమ్ బోదన కెర్తి సెక్తి ఎత్తి, తుమ్క కలుగు జలి రిసా పూర్తి ఎత్తితె సామ్సారుమ్ జా అస్సెన్.

6 దస్సి, క్రీస్తుచి రిసా అమ్ సంగిలి సాచి తుమ్చి పెట్టి రుజ్జు జా అస్సె.

7 జాకయ్, అమ్చొ ప్రబు జలో యేసుక్రీస్తు జోచి గప్పురుమ్ తెన్ అస్సె ఉత్త్ర జెతినక తుమ్ రకితె ఎద, అవ్సురుమ్ జలి కిచ్చొ అత్తసెక్తి కి తుమ్క పిట్ట నాయ్.

8 ఆకర్ దీసల్క లోకుమ్చక ప్రబు జలో క్రీస్తు వెల్లి పరిచ్చ, వెల్లి తీర్పు కెర్తె ఎదక, తుమ్ పొరపాట్ నే జతి రితి జొయ్యి తుమ్క జా సెక్తి దెతె తయెద.

9 పుత్తున్ జలో అమ్చొ ప్రబు జలో యేసుక్రీస్తు తెన్ తుమ్ బెదితి రిసా తుమ్క బుకార్లో దేముడు నిదానుమ్చొ, జో సంగిల్ రితి కెరెదె, జో సంగిలిసి జర్గు కెరెదె.

గోసల్ పోన మెన పావులు గోల కెర్తిసి

10 ఓ బావుడ్లు, అమ్చొ ప్రబు జలో యేసుక్రీస్తుచి నావ్ తెన్ కిచ్చొ మెన అవ్ తుమ్క బతిమాల్పు జా సంగితసి మెలె, తుమ్ జట్టి నే జతె, ఎక్కి మెన్సు జా, ఎక్కి కట్టు జా, తుమ్ ఎక్కి బుద్ది ఎక్కి మెన్సు జా చెంగిల్ జా.

11 బావుడ్లు, కిచ్చొక ఇసి మెంతసి మెలె, తుమ్తె సగుమ్జిన్ జట్టి జా అస్తి మెన క్లోయచ గెర్చ సుదల్ అంక సంగ అస్తి.

12 మెలె, "అవ్ పావుల్చొ సుదొ" జవున్, "అవ్ అపొల్లోచొ సుదొ" జవున్, "అవ్ కేపాచొ సుదొ" జవున్, నెంజెలి "అవ్ క్రీస్తుచొ సుదొ" జవున్ మెన తుమ్ ఎత్తిజిన్ తేడల్ ఉచరన సంగనతసు మెన అవ్ జాని.

13 క్రీస్తుచి ఆగ్గి సింద వాటల్ కెర అస్సెన్ గే? తుమ్చి పాపుమ్ గెచ్చయ్తి రిసా అవ్ పావులు నిలువతె మొర్లయ్ గే? అవ్ పావులుచి నావ్ తెన్ బాప్తిసుమ్ నజన్లదు గే?

14 నాయ్. క్రీస్తుక చి గాయియుక పిట్టవ అవ్ కక్క బాప్తిసుమ్ నే దిలి రిసా అంక చెంగిలి.

15 కక్క కక్క బాప్తిసుమ్ దెతయ్ జలె, 'పావుల్చి నావ్ తెన్ బాప్తిసుమ్ సంగిలయ్' మెన ఏక్ వేల తుమ్తె సగుమ్జిన్ సంగిత.

16 స్వేపనుచి గేర్చక బాప్తిసును దిలయ్, గని అన్నె కక్క బాప్తిసును దిలయ్ గే నాయ్ గే పచ్చు అస్సి. నాయ్, కిచ్చొగి.

17 క్రీస్తు అంక తెద్రయ్లిసి బాప్తిసును దెతి రిసా నాయ్, గని సుబుమ్ కబుర్ నూనవ అవ్ బోదన కెర్తి రిసాయి. పడ్డో, ఒగ్గర్ తెల్వివ కొడొచి ఉప్పిరి కొడొ బెదయ్తి రితి అవ్ బోదన కెర్తి రితి తెద్రయ్ నాయ్. దస్సి బోదన కెర్తయ్ జలె, క్రీస్తు సిలువతె మొర మాన్సుల్క పాపుమ్ తెంతొ రచ్చించువ కెర్లిన ముక్కిమ్ జలిన్క లుంకడ్లి రితి జతి. రచ్చించువ కెర్తి సెక్తి జో మొర అర్పితుమ్ జలిన్తెయి అస్సి.

క్రీస్తు దేముడుచి సెక్తి గ్యానుమ్

18 మొర పాపుమ్తె గెతన, జలె, ప్రబు సిలువతె మొర అర్పితుమ్ జలిన్చి కోడు నూనె, నాసెనుమ్ జతనక కి వెర్తి గని అమ్ రచ్చించువ జతనక, జలె, దేముడుచి సెక్తి మెన జానుమ్.

19 కిచ్చొక మెలె, దేముడుచి కొడొతె,

*“పండితుల్చి గ్యానుమ్క పాడ కెరిందె,

తెలివి మాన్సుల్చి తెలివి పిట్టయిందె”

మెన రెగ్గవ అస్సి.

20 ఒగ్గర్ బుద్ది తిల సుదొ కేతె? మోసే తెన్ దేముడు దిలి అగ్గల్ సికడ్డన కేతె? ఈంజ ఉగుమ్తె తెలివి తెన్ కొడొ బెదవ రుజ్జుల్ దెకయ్తన కేతె? ఈంజ లోకుమచి గ్యానుమ్క ‘గ్యానుమ్ నెంజె’ మెన, దేముడు దెకవ అస్సి.

21 కీసి మెలె, కెర్తి గ్యానుమ్ కలుగు జలెకి, ఈంజ లోకుమచ మాన్సుల్ దేముడుక నేన్. ‘మాన్సుచి సొంత గ్యానుమ్ జోవయింబి సొంత సెక్తిక జేవ్ నెతిర్లెకయ్ చెంగిలి’ మెన, జోచి పెట్టిచి గ్యానుమ్క దేముడు జానయ్ దస్సి ఒగ్గు కెర్లన్. జాకయ్, అమ్ బోదన కెర్తి సుబుమ్ కబుర్ ‘గ్యానుమ్ నెంజె’ మెన జోవయింబి సొంత సెక్తి మాన్సుల్ ఉచర్తి కి, జా సుబుమ్ కబుర్ తెయి మాన్సుల్క రచ్చించువ కెరుక జో దేముడు సర్ద జలో. గని సుబుమ్ కబుర్ నంప కెర్లినక ‘తెలివి నాయ్’ మెన మాన్సుల్ సంగితతి.

22 మెలె, ‘జోచి సత్తిమక రుజ్జు దెకయ్త వెల్లెల కమె దెకయ్లెకయ్ నంపజమదె, నెంజెలి నాయ్’ మెన యూదుల్ సంగిల. ‘కొడొ తెలివి తెన్ బెదయ్లెకయ్ జా బోదనక విలువ దెకుక జయెదె’ మెన గ్రీకుల్ సంగిల.

23 గని “క్రీస్తు సిలువతె మొర అర్పితుమ్ జలిన్తెయి మాన్సుచి రచ్చన” మెన అమ్ బోదన కెర్తసుమ్. ఇసి బోదనక అడ్డు మెన యూదుల్ సంగితతి, ‘తెలివి నాయ్’ మెన యూదుల్ నెంజెలన సంగితతి.

24 గని దేముడు నిసాన బుకార్లనక, జేవ్ యూదుల్ జలెకి, †గ్రీకుల్ జలెకి, జో దేముడుచి సెక్తి కి గ్యానుమ్ కి క్రీస్తుతెయ్ అస్సి. క్రీస్తు దేముడుచి సెక్తి, జోయ్యి జోచి గ్యానుమ్.

25 దేముడు కెర్లినక ‘బుద్దిచి నెంజె’ మెన మాన్సుల్ ఉచర్తి కి, జా కేన్ మాన్సుచి గ్యానుమ్చి కంట వెల్లి. జో దేముడుచి అప్పు కేన్ మాన్సుచి సెక్తిచి కంట ఒగ్గర్ సెక్తిచి.

26 బాపుడ్డు, ప్రబు తుమ్కయ్ నిసాన బుకార్లొ. జలె, తుమ్తె తొక్కిజిన్క ఈంజ లోకుమచి గ్యానుమ్ ఒగ్గర్ కలువ జా అస్సి. తుమ్తె తొక్కిజిని వెల్లెల మాన్సుల్ జా అస్సన్. తుమ్తె తొక్కిజిని వెల్లెల కుట్టంబల్తె జెర్పిలదు.

27 గని దేముడు, ఈంజ లోకుమతె తెలివి నెంజెలనకయ్ నిసాన్లన్. కిచ్చొక మెలె, తెలివి తిలనక కి లాజ్ కెరుక మెన. సెక్తి తిలనక కి లాజ్ కెరుక మెన ఈంజ లోకుమతె సెక్తి నెంజెలనక దేముడు నిసాన్లన్.

28 పడ్డో ఈంజ లోకుమతె విలువ జలిన్క ‘కిచ్చొ నెంజె’ మెన రుజ్జు తంక ఈంజ లోకుమతె విలువ నెంజెలనక, నిసూరుమ్ జలనక, కిచ్చొ నెంజెలనక జో దేముడు నిసాన్లన్.

29 కిచ్చొక మెలె, దేముడుచి మొక్కె కేన్ మాన్సు గవురుమ్ ఉచరనక బెదె నాయ్ మెన రుజ్జు దెకవుక.

30 యేసుక్రీస్తుచి తెడి తుమ్క జయెడ్డో దేముడు జోయ్యి, అమ్చి గ్యానుమ్, అమ్చి పున్నిమ్, అమ్చి సుద్ది, అమ్చి రచ్చన క్రీస్తుతెయ్ మెన దేముడు అబ్బొసి జోకయ్ అమ్చి రిసా టీవొ కెలన్.

* 1:19 1:19 మెనయ 29:14. † 1:24 1:24 ఇన్నె ‘గ్రీకుల్’ మెలె, యూదుల్ నెంజెలన మొత్తుమక సంగితయ్.

31 జాక దేముడుచి కొడతె,
 †“మాన్యుల్ గవురుమ్ సంగుక ఇస్సుమ్ జలె,
 కచి రిసా సంగుత్ మెలె, ప్రబుచి రిసాయి”
 మెన రెగ్గవ అస్సె.

2

1 ఓ బావుడ్లు, అవ్ తుమ్తె తెదొడి జా కెర దేముడుచి చి సాచి నూనయ్లి పొది ఒగ్గర తెలివి గ్యానుమ్ కొడొ బెదవయ్ బోదన కెరి నాయ్.

2 అవ్, ‘యేసుక్రీస్తుచి రిసాయి మెలె, సిలువతె మొర జుర్లు కెర్లి యేసుక్రీస్తుచి రిసా నెంజిలె, అన్నె కిచ్చొ కి తుమ్చి మదెనె అన్నె కిచ్చొ నేని మెన వేరచి బెదవుక నెంజి’ మెనయ్ దస్సి కెర్లయ్.

3 వడ్డె తుమ్చితె తిలి పొది, ‘సొంత నెక్కిక కిచ్చొ కెరుక నెతిరి’ మెన బయిమ్ తెన్ బలె అద్దుర్ తెన్ తిలయ్.

4 తుమ్చి నముకుమ్ మాన్యుల్చి గ్యానుమ్ తెన్ నే జతె, గని దేముడుచి నెక్కి తెన్ ఆదారుమ్ కెరన తంక మెన,

5 అవ్ లట్టబ్లి కి చి సాచి నూనయ్లి కె, తెలివి గ్యానుమ్చ తియాన కొడొ నే బెదయ్తె, నుద్ది తిలి ఆత్తుచి దేముడుచి నెక్కి దెకయ్తి రిసాయి మెన సంగితసి మెనయ్ ఇసి జుర్లు జంక మెన జోచి నెలవ్.

ఆత్తుతె వడ్డెలనక ప్రబుచి గ్యానుమ్ సికడ్డిసి

6 ఆత్తుతె వడ్డెలనక గ్యానుమ్ తెన్ సికడ్డసుమ్, జా గ్యానుమ్ కేడయ్ గెతి చి జా ఈంజ ఉగుమ్చి గ్యానుమ్ నెంజె, ఈంజ ఉగుమ్తె ఏలువ కెర్లనచి గ్యానుమ్ నెంజె.

7 అవ్ సికడ్డి గ్యానుమ్ దేముడుచి గుట్టు తెన్ తిలి లుంకడ్డి గ్యానుమ్; ఈంజ గ్యానుమ్ గుట్టు తెన్ లుంకడ తయ్ నాయ్. ఉగల్ ఎత్తిచి కంట అగ్గెయి దేముడు అవ్చి రిసా ‘వరలోకుమ్చి ఉజిడతె బెదుతు’ మెన ఉచర జుర్లు కెర్లి గ్యానుమ్.

8 ఈంజ ఉగుమ్చ అదికారుల్ కోయి ఈంజ గ్యానుమ్క అర్దుమ్ కెరంతి నాయ్; జా అర్దుమ్ జోక జతి జలె గొప్పు ఉజిడచొ రువుమచొ గవురుమ్ తిలో ప్రబుక సిలువ గల మారిత నాయ్.

9 గని దేముడుచి కొడతె,
 “ఇన్నెచి రిసా దేముడు తెయార్ కెర అస్సె”
 జోక ప్రేమ కెర్లనక కిచ్చొ దెంక మెన తెయార్ కెర్లిసి

*“జా కేన్ అంకితె డీసె నాయ్,
 కేన్ కంగ్గతె సుని జయె నాయ్,
 కేన్ మాన్యు జోచి పెట్టి ఉచరుక నెతిర్లిసి”
 మెన రెగ్గవ అస్సె.

10 అవ్క జలె దేముడు ఎత్తి జోచి ఆత్తు తెద్రవ రుజ్జు దెకవ అస్సె; జా ఆత్తు ఒండిక, దేముడు గుట్టుల్చి రుజ్జుల్ కి జోచి ఆత్తు రుజ్జు దెకయెదె.

11 ఏక మాన్యుచి ఉద్దెసుమ్ జోచితె తిలి మాన్యుచి సొంత ఆత్తుక పిట్టవ, జో మాన్యుచి పెట్టి తిలిసి కో జాన్తి గే? దస్సి, దేముడుచి ఉద్దెసుమ్లు దేముడుచి నుద్ది తిలి ఆత్తుక ముల, జోచి ఉద్దెసుమ్ అన్నె కోయి నేనీతి.

12 దేముడు అవ్క దిల ఆత్తు కిసిని గే అవ్ అర్దుమ్ కెరనుక. అవ్ ఈంజ లోకుమ్చి ఆత్తు నెంజె, గని దేముడు తెంతో చి జతి నుద్ది తిలి ఆత్తుయి అవ్ పాయ అస్సెమ్.

13 మాన్యుచి గ్యానుమ్ సికడ్డ కొడొ తెన్ నాయ్, ఆత్తు సమ్మందుమ్ జలి కారిమ్చి కామ్ ఆత్తు సమ్మందుమ్ జలి కారిమ్చి కామ్ సరి కెరన, ఆత్తు సికడ్డి కొడొ తెన్ ఈంజ నుద్ది తిలి ఆత్తు అవ్క సికడ్డిసి, అవ్ సికడ్డసుమ్.

14 లోకుమచొ నమ్మందుమ్ జల మాన్సు దేముడుచి నుద్ది తిలి ఆత్మచ కబుర్లు నెనె, దనచ జోక వెర్రిలెక అస్సె, జో అర్దుమ్ కెరనుక నెత్తె. దనచక ఆత్మతె జెర్మున్ తిలెకయి అర్దుమ్ కెరనుక జయెదె గని జోవయింక జా ఆత్మ నాయ్ చి నెత్తిర్తి.

15 ఆత్మ సమ్మందుమ్ జలోసా మాన్సుల్క ఒండి అర్దుమ్ కెరనెదె, గని జోక కేన్ మాన్సు తీర్పు కెరుక నెత్తిర్తి.

16 † “ప్రబుచి పెట్టి తిలిసి జాన జోక సికడుక తెరిలన కో? అమ్క జలె క్రిస్తుచి మెన్సు అస్సె.”

3

ఆత్మక వడ్డీలన నెంజాన్

1 బావుడ్లు, తుమ్చి తెన్ ‘ఆత్మక వడ్డీల మాన్సుల్ తెన్ కొడొ జలి రితి అవ్ కొడొ జంక నెత్తిర్లయి. ఈంజ లోకుమచ ఆగ్చ నమ్మందుమ్చ మాన్సుల్ మెనయ్, క్రిస్తుతె బాలబోదలీ’ మెన, తుమ్చి తెన్ కొడొ జంక తిలి.

2 అగ్గె తుమ్క సత్తు నాయ్ చి రిసా రితి దూదు పియడ్లయ్, చి పోసిలయ్ గని చింబొ కవడ తుమ్క పోసి నాయ్. తుమ్ అప్పెక కి ఆగ్చి నమ్మందుమ్చ రిత జా అస్సున్చి రిసా అప్పెక కి తుమ్ వడితన్ నాయ్.

3 తుమ్చితె కుసిదుమ్, గోసల్ తిలె, తుమ్ ఆగ్చి నమ్మందుమ్చ మాన్సుల్చి రితి ఇండితన నెంజాన్ గే?

4 ఎక్కెలో అవ్ పాపుల్చొ నుదొ, అన్సెక్కో అవ్ అపొల్లోచొ నుదొ, మెన సంగిలె పొది తుమ్ లోకుమచ నమ్మందుమ్ జల మాన్సుల్ నెంజాన్ గే?

5 అపొల్లో కొస్సె? పపులు కొస్సె? నేవ కెర్తనయ్ గెద. ఎక్కెక్క ప్రబు దిలిసి తెన్ జేవ్చి తెంతోయ్ తుమ్ నంపజలదు

6 అవ్ రోవిలయ్, అపొల్లో పాని నువిలన్, జియడ వడ్డయ్లోసా దేముడి.

7 జాకయ్, జియడ వడ్డయ్లో దేముడుతెయి గని, రోవిలోసాతె జలెకి, పాని నువిలోసాతె జలెకి కిప్పి కి నాయ్.

8 రోవిలోసాక పాని నూవిలోసాక ఎక్కె ఉద్దెనుమ్. ఎత్తి జీన జేవ్ కెర్ల కామ్చి కస్టుమ్కయ్ జీతుమ్ నజనుల.

9 అమ్ దేముడు తెన్ బెద కామ్ కెర్తనుమ్; తుమ్ దేముడుచి పంటొ పికయ్లి బుంయి, దేముడుచి గేరు జా అస్సున్.

ప్రబుచి ఆత్మగేర్చి టాలి

10 దేముడుచి దయక జో అంక దిలి ఇదిలి సెక్కిక, గేర్ బండుక చెంగిల్ జాన్లొ బందితోసాచొ రితొ జా, అవ్ పునాది తెయార్ కెర్లయ్, చి జేవ్చి ఉప్పిరి అన్సెక్కో గేర్ బందితయ్. జా పునాదిచి ఉప్పిరి తుమ్ ఎత్తిజన్ తుమ్చి వాట కిసి బందితె గే జాగర్ల తా.

11 ఎక్కె పునాదిచి ఉప్పిరి జా గేర్ బందిలెకయ్ జా గేర్ తయెదె; మెలె, యేనుక్రిస్తు జలి పునాదిచి ఉప్పిరి బందిలెకయ్. వేర పునాది తెయార్ కెరుక కో నెత్తిర్తి.

12 జలె, జా పునాదితె కో బజార్ తెన్, కో వొండి తెన్, కో వజ్రమానికల్తె తెన్, కో దారు తెన్, కో పెయ్యడి తెన్, కో పీరి తెన్ గేర్ బందిలె,

13 జేవ్ ఎక్కెక్ల బందిలిన్క ‘తయెదె గే నాయ్ గే’ ఆకరకయ్ డీసెదె. ప్రబు సంగిలి వెల్లి దీసికయ్ డీసెదె. కిసి మెలె, ఆగిచి పరిచ్చుతె డీసెదె. ఎక్కెక్లచ కమొ కీసచగె ఆగితె పరిచ్చు జలి రితి జా డీసెదె.

14 జో పునాది కెలోసాతె బందిలి కేన్ మాన్సుచి కామ్ జా పరిచ్చుతె జీన్లె, జో మాన్సుక బవుమాసుమ్ దొర్కు జయెదె.

15 జో పునాదితె బందిలో కేన్ మాన్సుచి కామ్ ఉడ్డ గెచ్చెదె గే, జోక నస్టుమ్ తయెదె, గని జోయ్యి రచ్చించుప జయెదె. గని ఆగి తెంతొ కిసి గే ఉర్లి జలి రితి జా జో రచ్చించుప జయెదె.

నంపజలన ప్రబుచి దేముడుచి గుడి జవుల

16 దేముడుచి గుడి తుమ్ జన్మ మెన నేన్ను గే? జోచి ఆత్మ తుమ్చి పెట్టి అస్సె మెన నేన్ను గే?

17 జలె, దేముడుచి గుడి కో పాడ కెరెదె గే, జోక, జో దేముడుయి పాడ కెరెదె. కిచ్చొక మెలె, దేముడుచి గుడి జోకయ్ నుద్ది తంక అస్సె. జా దేముడుచి గుడి తుమ్చి జా అస్సెన్.

18 తుమ్క తుమ్ మోసిమ్ కెర నాయ్. 'ఈంజ ఉగుమ్చి గ్యానుమ్క అవ్ తెలివి' మెన కో ఉచరనెదె గే, పరలోకుమ్చి గ్యానుమ్ జో దొర్పు కెరంతి రితి ఈంజయ్ ఉగుమ్చి గ్యానుమ్క గవురుమ్ కెరుక ముల నేస్టె రితి జవున్.

19 కిచ్చొక మెలె, ఈంజయ్ లోకుమ్చి గ్యానుమ్ దేముడుచి మొక్కె గ్యానుమ్ నెంజె. జో రెగ్డయ్లి కేన్ కోడుతె ఈంజ సత్తిమ్ డీస్తయ్ మెలె,

*"తెలివి తిల జోవయింప మోసిమ్లుతెయి దేముడు జేవ్ తెలివి మాన్సుల్క దెర జేవ్ ఉచర్చిసి పిట్టయ్తయ్" మెన రెగిడ్డి కోడు.

20 జోచి అన్నెక్ దస్సి కోడు కిచ్చొ మెలె,

†"ఈంజ లోకుమ్చి గ్యానుమ్క సంపజలనచి పెట్టి ఉచర్చనక కామ్క నే జయె మెన ప్రబు జానె" మెన రెగిడ్డి కోడు.

21 జాకయ్, కేన్ మాన్సుక 'జోయ్యె వెల్లో' మెలి రితి మాన్సుక గవురుమ్ కెర నాయ్. ఎత్తి తుమ్చి జా అస్సె.

22 పవులు కి, అపొల్లో కి, కేపా కి, అమ్ సికడ్డన తుమ్ ఎత్తిజినక దొర్పు జా అస్సెమ్. ఈంజ లోకుమ్ కి, జీవు కి, మొర్పు కి, ఈంజ ఉగుమ్ కి, జెతి ఉగుమ్ కి, ఎత్తి తుమ్చి జా అస్సె.

23 పడ్డె, తుమ్ క్రీస్తుచి తెడి అస్సెన్, తుమ్క జోయ్యె ఏలుప కెర్తయ్; చి క్రీస్తు దేముడు అబ్బొన్చి తెడి అస్సె.

4

అపొల్లోక చి పవులుక కిసి దెకుక

1 తుమ్ అమ్క కిసి దెకుక మెలె, యేసుక్రీస్తుచ నేవ కెర్తన ఆము. తుమ్ 'పాడ జంక నాయ్' మెన దేముడుచ గుట్టుల్ రకితన ఆమ్. అమ్ దస్సి జలిన్క తుమ్ మరియాద దెకుక తుమ్చి పూచి,

2 అన్నె, కేన్ జవున్ ఎజోమానిచి అస్సిక రకితోసా, జలె, నిదానుమ్ తెన్ నముకుమ్ జతోసా తంక జోచి పూచి. జాక, అమ్ దస్సి నిదానుమ్ తెన్ నముకుమ్ జతన జంక అమ్చి పూచి.

3 గని తుమ్ జవున్, మాన్సుచి కేన్ తీర్పు కెర్తి గేర్ జవున్, అంక పరిచ్చ కెర తీర్పు కెర్లె, అంక బాద నాయ్. ఆవ్ కి సొంత తీర్పు కెరని నాయ్.

4 దేముడుచి మొక్కె పూచి తెన్ జోచి కామ్ ఆవ్ కెర అస్సె. జా కామ్ కెర్లింతె ఆవ్ కిచ్చొ పొరపాట్ కెర్లిసి ఆవ్ నేని. గని అంక 'తప్పు జో నెంజె' మెన ఎక్కి అంచి సొంత కోడు రుజ్జు దెకవ నాయ్. జో ప్రబుయి అంక తీర్పు కెర్లెసా.

5 జాకయ్, జా సమయమ్ నే జెతె అగ్గె, మెలె, ప్రబు అన్నె నే జెతె అగ్గె, తుమ్ అంక తీర్పు కెర నాయ్. మాన్సుల్క దస్సి తీర్పు కెర్లిసి తుమ్ ముల. అందర్తె లుంకిల్ రితి తిలిసి ఎత్తి, మాన్సుచి పెట్టిచ ఉద్దెనుమ్లు ఎత్తి జోయ్యె జోచి ఉజెడతె పరిచ్చ కెర తీర్పు కెరెదె. తెదోడెకయ్ దేముడు సొంత ఎత్తిజినక జేవ్చ కెర్ల కము తీర్పుల్ నంగెదె.

6 అంచి రిసాచి అపొల్లోచి రిసా ఆవ్ ఇన టాలివొ కిచ్చొక సంగ అస్సి మెలె, తుమ్చి రిసా, బావుడ్లు, తుమ్క 'సిక్యూత్' మెనయ్, దేముడు రెగ్డయ్లిన్చి కంట కిచ్చొ వేరచి అమ్ దొగుల కిచ్చొ బెదవమ్ నాయ్, దస్సి తుమ్ కి వేరచి జా బోదనతె బెదవ నాయ్. ఆవ్ అపొల్లో, జలె, అమ్ దొగుల నుబుమ్ కబుర్తె కిచ్చొ

వేరచి బెదవుమీ నాయ్, చి అమీతె కక్క, 'వెల్లో' మెన తుమ్ సంగుక నాయ్. 'ఆవ్ వెల్లో' మెన జవున్ ఆవ్ సంగి నాయ్, జో సంగి నాయ్. దస్సి తుమ్చితె కో కిచ్చొ వేరచి నే బెదయలె, తుమ్చితె కి 'ఆవ్ వెల్లో, జో దాక్' మెన తేడల్ దెకన బులుక బెదె నాయ్.

7 జలె, తుమ్క దెకిలె, కక్క 'వెల్లో' కక్క 'దాకు' మెనుక జతయ్ గే? దేముడు దిలి కంట తుమ్క కిచ్చొ అస్సె గే? దేముడు తెంతో పయలిసి జలె, జా జొయ్యి నే దిలి రితి కిచ్చొక తుమ్ గవురుమ్ సంగితను!

8 'ఎత్తితె సొమ్మారుమ్ జా అస్సుమ్' మెన తుమ్ ఉచరంతను. అమ్క పడ్డె ముల తుమ్ రాసల్ జా అస్సున్, జలె! తుమ్ నిజమి విలువ కెర్తదు జలె, ఆమ్ కి తుమ్చి తెన్ విలువ కెరుక జతి! సర్ద జతమీ!

పావులీంసి నిస్సారుమ్ జలిన్

9 అమ్ క్రీస్తుచి సుబుమ్ కబుర్ సూనయత బారికుల్క మాన్సుల్ ఎత్తిచి కంట అమి నిస్సారుమ్ డీస్తనుమ్, *మొర్రి సిచ్చ కలుగు జలె మూర్కుడ్లు రిత డీస్తనుమ్, మెన దేముడు సెలవ్ దిలి రితి అంక డీస్తయ్. అస్సె మాన్సుల్ జోవయంక దెక ఆన్వతి గే, అమ్ యేసుచ బారికుల్క కి లోకుమ్ ఎత్తిచ, జేవ్ దూతల్ జలెకి మాన్సుల్ జలెకి, ఆనిల్ రితి జతతి.

10 'క్రీస్తుచి సుబుమ్ కబుర్ సూనపుక ముక్కిమ్' మెనయ్, అమ్ నేస్త మాన్సుల్ రిత డీస్తనుమ్. తూమ్ మాత్రుమ్, క్రీస్తుచి తెడి బుద్ది సుదల్ జా అస్సున్, కిచ్చొ గే! తుమ్క 'దస్సి ఉచరంతతి' మెలి రితి డీస్తయ్, ఆమ్, జలె, సెక్కి నెంజిల్ రితి డీస్తనుమ్. అమ్కయ్ సెక్కి అస్సె మెన తుమ్క తుమి ఉచర్తను. నిజమి, మాన్సుల్ తుమ్కయ్ గవురుమ్ దెకితతి, అమ్కయ్ నిస్సారుమ్ దెకితతి.

11 అప్పె ఎద ఆమ్ చువ్వె తన్నె అస్సుమ్. అమ్క సరిపుచుప జత పాలల్ నాయ్, మాన్సుల్ అమ్క పెట్టి తతి, అమ్క గెరల్ నాయ్.

12 సొంత అత్తి తెన్ కామ్ కెర జితనుమ్. మాన్సుల్ అమ్క దూసుప కెర్లె, చెంగిల్ తత్తు మెన అమ్ ప్రార్దన కెర్తనుమ్. జేవ్ అమ్క అల్లర్ కెర్లె, ఓర్పుప జతనుమ్.

13 అమ్చి నావ్ జేవ్ కడ్లె, సేంతుమ్ కెర్తనుమ్. మాన్సుచి మొక్కి ఒండి లోకుమ్చి తొక్కు ఉస్సా జా అస్సుమ్.

14 ఇసి మెన ఆవ్ తుమ్క కిచ్చొక రెగిడ్లసి మెలె, తుమ్క లాజ్ కెర్తి రిసా నాయ్, గని తుమ్ అంప బోదల్ రిత జత, చి తుమ్క 'బుద్ది తిలి' మెనయ్ ఇసి రెగ్గితసి.

15 కిచ్చొక మెలె, క్రీస్తుచి తెడి తుమ్క సికడ్లన ఒగ్గరజన్ తిలె కి, జోవయించి తెడి ఒగ్గరజన్ 'అబ్బొ' మెనుక నెతుర్పు. సుబుమ్ కబుర్ అచ్చి తొలితొ సూనయలి రిసా, క్రీస్తు జలో యేసుచి తెడి అచ్చి తుమ్క అబ్బొది జా అస్సి.

16 జాకయ్, 'అంకయ్ దెక సిక అంచి రితి ఇండ' మెన తుమ్క ఆవ్ బతిమ్మాలు జతిసి.

17 జాకయ్ ప్రేమ తిలో నిదానుమ్ తిలో ప్రబుచి తెడి అంక పూత్తు జలో తిమోతిక తుమ్తె ఆవ్ తెద్రవ అస్సి. కిచ్చొక మెలె, ఆవ్ క్రీస్తుచి తెడి కీసి ఇండితసి గే, సంగుమ్లు ఎత్తితె కిచ్చొ బోదన కెర్తసి గే, తుమ్క జో ఉచార కెరయతి రిసా, తుమ్క 'ఉచార కెర బుద్ది తత్తు' మెనయ్.

18 ఆవ్ 'అమ్తె అస్సె జెయె నాయ్' మెన తుమ్చితె సగుమ్జన్ ఉచార పులె అస్సున్.

19 గని ప్రబు సెలవ్ దిలె, తుమ్తె బే బేగి జెయిందె, చి జేవ్ పులిల మాన్సుల్చ కొడెచి రిసా రుజ్జుల్ సూసుక నెసి, గని జోవయించి సెక్కివ రుజ్జుల్ పరిచ్చ కెరిందె.

20 కిచ్చొక మెలె, దేముడుచి రాజిమ్ మాన్సుచి పెట్టి తిలిన్క కిచ్చొ రుజ్జు జయెదె మెలె, మాన్సుచ కొడె నాయ్, గని ప్రబుచి ఆత్మసెక్కి మాన్సు ఇండితి బుద్దితెయి డీసెదె, జయ్యె రుజ్జు జయెదె.

21 జలె, తుమ్చి ఇస్టుమ్ కిచ్చొ ఆవ్ అయలె, సిచ్చ కెర్తి డండో దెరన్సి రితి జెంక గే, ప్రేమ ముద్దు తెన్ జెంక గే? ప్రేమ ముద్దు తెన్ ఆవ్ అయలె సర్ద జస్తె, జలె, తుమ్ బుద్ది ఇండ.

* 4:9 4:9 మొర్రి సిచ్చ కలుగు జలె మాన్సుల్ జోవయించి జా సిచ్చతె పడ్డె గెతె తిలె పొది కీసి అస్సె మాన్సుల్ జోవయంక దెక ఆన్వతి గే, అమ్ యేసుచ బారికుల్క కి లోకుమ్ ఎత్తిచ, జేవ్ దూతల్ జలెకి మాన్సుల్ జలెకి, ఆనిల్ రితి జతతి.

5

లంజె జలో ఎక్కిలోచి రిసా పవులు తీర్పు సంగిలసి

1 తుమ్చితె ఎక్కిలోక, అన్నెక్కిచి ఉపిరి జలె, 'లంజె వంసుమ్చో జా జితయ్' మెన సంగితతి. అన్నె, జొయ్యి జతి రగుమ్, జలె, ప్రబుక నేన్ల మాన్పుల్ కి తెడ్డి పాపుమ్ తెన్ జతి నాయ్! కీసి లంజె జా అన్నె మెలె, అబ్బిన్చి తెర్పె తెన్ లంజె జితయ్!

2 జలెకి, తుమ్ లాజు జసు నాయ్, పుల అన్నున్! కీసి! జా పాపుమ్చి రిసా తుమ్ విసారుమ్ జతదు జలె, జతి! జా పాపుమ్ కెర్లొసాక తుమ్ దూరి కెర తుమ్చి తెన్ అన్నె బెదవన నాయ్.

3 అగ్రుక, జలె, అవ్ తుమ్చి తెన్ నెంజిలె కి, ఆత్మక తుమ్చి తెన్ అన్నె. తుమ్చి తెన్ అవ్ పూర్తి తిలి రితి అన్నె.

4 జలె, దస్సి పాపుమ్ కెర్లొజో మాన్పుది రిసా అవ్ అప్పె కి తీర్పు ఉచర అన్నె. తుమ్ సంగుమ్తె బెదిలె పొది, ఆత్మక అవ్ కి తుమ్చి తెన్ బెదిల్ రితి జయిందె, చి యేసుక్రీస్తుచి సెక్తి తుమ్చి తెన్ తా,

5 జో మాన్పుది అగ్ పాడే జతి రితి జోక సయ్తాన్చి అత్తి తుమ్ సార్పు కెర దాస; సిచ్చ జో జలె, ప్రబు జలో యేసు లోకుమ్చక తీర్పు కెర్తె జా ఆకర్ దీసిక జో మాన్పుది ఆత్మయి రచ్చించుప జతయి.

అన్నె బుద్ధుల్ చి రిసా తీర్పు సంగిలసి

6 దస్సి పాపుమ్ కెర్లొన్చి రిసా 'అమ్చి సెక్తిక అమ్ ఇండితసుమ్' మెన తుమ్ పులిలిసి చెంగిల్ నాయ్. పోడియి కెర్తె పాకుమ్తె పులయ్తి పీట్ ఇదిలిదిల్ తిలె కి, ఒండి పాకుమ్ పులెదె మెన నేన్పు గే?

7 అగ్గెచి పాపుమ్ కెర్లొ బుద్దిచి తుమ్ గెచ్చవన గెల; తుమ్ సుద్ది జతి రిసా, *పాపుమ్ గెచ్చయ్లి గుర్తుచి పస్కా పండుగు మెండపిల్ల రిత, క్రీస్తు అమ్చి పాపుమ్ గెచ్చయ్తి అర్పితుమ్ జలి తెంతో తుమ్క 'సుద్ది జల' మెన దెకితయ్.

8 జాకయ్, జా వండుగు కెర్లి రితి జా, జో అమ్క సుద్ది కెర్లొన్చి రుజ్జు డీస్తి రితి ఇండుమ. అమ్చి ఆత్మక పాడే కెర్తి అగ్గెచి బుద్ది, మెలె మూర్కుమ్ బుద్ది, పాపుమ్బుద్ది, అమ్క గార్ కెరెదె, చి జా పోన. జా పులయ్తి పీట్ నెంజిలి పాకుమ్తె బెదితి నిదానుమ్ సత్తిమ్ జా సుద్ది జమ.

9 'లంజెచ మాన్పుల్ తెన్ బెద నాయ్' మెన అగ్గెచి ఉత్తుమ్తె తుమ్క రెగిల్లయ్.

10 మాములుమ్ ప్రబుక నేన్ల ఈంజ లోకుమ్చ లంజె జలస, ఆసల్ జలస, చోర్లు, బొమ్మల్క జోకర్తసచి రిసా సంగి నాయ్. దస మాన్పుల్ తెన్ ఎద్దర నే బెదుక జలె, ఈంజ లోకుమ్క పూర్తి ములయ్ తయెదె.

11 కిచ్చొ అర్దుమ్ తెన్ దస్సి రెగిల్లయ్ మెలె, కో జలెకు 'నంపజలస' మెనల్లొసా లంజె జతోసా, ఆసల్ జతోసా, బొమ్మల్క జోకర్లొసా జలె, మాన్పుక దూసెనల్ కెర్లొసా జలె, మత్తిసా జలె, చోరు జలె, దసాచొక తుమ్ బెదవన నాయ్. జోవయింతెన్ అన్నిమ్ కి కెర నాయ్.

12 జలె, నంపజలస నెంజిలసక తీర్పు కెరుక అంచి కామ్ నెంజె. గని ప్రబుచి సంగుమ్తె బెదిలసకయ్ తీర్పు కెరుక, మాత్తుమ్, సంగుమ్చ తుమ్ నంపజలసచి పూచి.

13 సంగుమ్తె నే బెదిలసక తీర్పు కెర్లొసా దేముడు, గని

† "తుమ్చి తెన్ బెదిలో కొన్నొ జలెకు పాపుమ్ కెర్లొసా జలె,

తుమ్తె తెంతో ఉడడ గెల"

మెన ప్రబు జోవయ్ జల మాన్పుల్చి రిసా పూర్గుమ్ రెగ్గయ్లి తీర్పుకోడు అన్నె.

6

నంపజలస తీర్పు కెర్తె గేర్చ తగు కెరుక పోన

1 తుమ్చితె ఎక్కిలోక ఎక్కిలో జుట్టి జా తిలె, నంపజలసచి ముక్కె నే గెతె, కిచ్చొక ప్రబుక నంప నెంజిలసతె జోవయిచి తీర్పు కెర్తె గేర్తె తగు కెర్తెను? జా తప్పు.

* 5:7 5:7 పస్కా వండుగు దీసి యేసు అమ్చి పాపుమ్ గెచ్చయ్తి అర్పితుమ్ జలస. † 5:13 5:13 ద్విత్వీయాపదేశ కాడుము 17:7, 19:19, 22:21, 24 చి 24:7.

2 నంపజలన ఒండి లోకుమ్చక తీర్పు కెరుల మెన నేన్ను గే? ఒండి లోకుమ్చక తుమ్ తీర్పు కెరుక అస్సె జలె, ఇన ఇదుద్ద తగుల్ తుమ్ సంగుమ్తె నూనుక నెతుర్పు గే?

3 దూతల్క కి అమ్ తీర్పు కెరుక అస్సె మెన కి నేన్ను గే? దస్సి కెరుమదే జలె, ఈంజయ్ లోకుమ్చ తగుల్ నూనుక అమ్క అన్నెయ్ అదికారుమ్ అస్సె.

4 జలె, తుమ్క ఈంజ లోకుమ్తె తగుల్ తిలె, కిచ్చొక ప్రబుచి సంగుమ్క కామ్క జెత మాన్సుల్చి మొక్కె నే నూనయ్తె వేర మాన్సుల్చ తగుల్తె కుట్టయ్తను?

5 తుమ్క రాజ్ నాయ్ గే? ప్రబుక నంపజల తుమ్ బాపుడ్డుతె కో బుద్ది మాన్సు తయె నాయ్ గే, చి జోచి మొక్కె నూనయ్లె జో తగు కుట్టవుక నెంజె గే?

6 జలె, తుమ్ నంపజలన బావొక బావొ తగుల్ కెర్తను, చి ప్రబుక నంపనెంజలనక వెనడ్డును!

7 అన్నె కిచ్చొ మెంతసి మెలె, ఎక్కిలోక ఎక్కిలో తుమ్ తగు కెర్తె, నంపనెంజల మాన్సుల్ దెకిలె తుమ్క అనుల. తుమ్ నంపజలనచి నావ్ దెదెది. దన తగుల్ జతి కంట మాన్సుల్ తుమ్క కెర్తె తప్పుల్ ఓర్పువ జంక చెంగిలి, మోసిమ్ జంక చెంగిలి.

8 తుమ్చ సొంత బాపుడ్డుక కి తుమ్, ఎక్కిలోక ఎక్కిలో పాపుమ్ కెర మోసిమ్ కెర్తను.

సుద్ది నెంజలన దేముడుచి రాజిమ్తె బెదుక నెంజె

9 సుద్ది నెంజల మాన్సుల్ దేముడుచి రాజిమ్తె బెదుక నెంజె మెన నేన్ను గే? తుమ్ మోసిమ్ జా నాయ్. పెండ్లి నే జతన, జలన లంజెకమొ కెర్తను, బొమ్మల్క జొకర్తన జలెకు, మున్సుబోదల్ తెన్ మున్సుబోదల్, తేర్బోదల్ తెన్ తేర్బోదల్ లంజె జతన జలెకు,

10 చొర్లు జలెకు, డబ్బుల్క ఒగ్గర్ ఆన జతన జలెకు, మత్నాలల్ జలెకు, మాన్సుల్క దూనువ కెర్తన జలెకు, మాన్సుల్క బియడ లాబుమ్ కెరంతన జలెకు, దేముడుచి రాజిమ్తె బెదుక నెత్తిర్.

11 తుమ్ అగ్గెయి దన మాన్సుల్ జా తిలదు, గని ప్రబు జలో యేనుక్కిస్తుచి నావ్ తెన్, చి దేముడుచి సుద్ది తిలి ఆత్మతె తుమ్ దోయి జా, ప్రబుచయ్ జా, పాపుమ్ నే కెర తిలి రితి సుద్ది జలదు, చి తుమ్క 'పున్నిమ్ జల' మాన్సుల్ జా అస్సె.

12 జలె, "అంక ఇస్టుమ్ జలిసి కేన్ కి కెరుక అంక అక్కు అస్సె, గని సగుమ్ కమొ కెర్తె చెంగిల్ నాయ్. అంక ఇస్టుమ్ జలిసి కేన్ కి కెరుక అంక అక్కు అస్సె, గని కిచ్చొ అలవాట్క గొతిమాన్సు రితో అవ్ జా తయింది.

13 "అన్నిమ్ మాన్సుచి పేట్కయ్, పేట్ అన్నిమ్కయ్" మెన సంగితనుమ్, చి ఆకర్క దొన్ని కి ప్రబుయి గెచ్చువ గెలె. గని, మాన్సుచి అగ్ లంజె జతి రిసా నెంజె గని ప్రబుచి రిసాయి, దస్సి ప్రబు అగ్చి రిసాయి.

14 అన్నె, యేనుప్రబుక దేముడు అబ్బొసి అన్నె జియడ్డె, చి జోచి నెక్తి అమ్క కి జియడెది.

15 క్రీస్తుచి అగ్క తుమ్చ అగ్ వాటల్ జవుల మెన తుమ్ నేన్ను గే? జేవ్ దస్సి జలె, క్రీస్తుచ వాటల్ కడ గెల కెర సానిక బెదవుక బెదెది గే? నెంజె!

16 సాని తెన్ కో బెదెది గే, జా తెన్ ఎక్కి అగ్ జతయ్ మెన నేన్ను గే? కిచ్చొక మెలె,

*"జేవ్ దొగుల ఎక్కి అగ్ జా తవుల"

మెన దేముడుచి కొడొతె రెగ్గులయ్ అస్సె.

17 గని, ప్రబు తెన్ కో బెద అస్సి గే, జో తెన్ ఎక్కి అత్మయి జా తవుల.

18 జాకయ్, లంజెకమొ దూరి కెరన. దసితె ఎద్దెర బెద నాయ్. మాన్సుల్ కెర్తె అన్నె ఎత్తి పాపుమ్, జలె, జోచి అగ్క దూరి అస్సె, జోచి అగ్క బయలె అస్సె, గని కో లంజె జయెది గే, జోచి సొంత అగ్కు పాపుమ్ కెర పాడ్ కెర్తయ్.

19 తుమ్చి అగ్, తుమ్చి పెట్టి తిలి దేముడు దిలి జోచి సుద్ది తిలి ఆత్మక గుడి జా అస్సె మెన తుమ్ నేన్ను గే? తుమ్క తుమ్చి ఇస్టుమ్ అయ్లి రితి ఏలువ కెరనుక తుమ్క అదికారుమ్ నాయ్.

20 దేముడు ఒగ్గర్ కరెద్క తుమ్క గని అస్సె. జాక, తుమ్చి అగ్ తెన్ జోక గవురుమ్ కెర్తె రితి తుమ్ సుద్ది తెన్ ఇండ.

* 6:16 6:16 అదికారుమ్ 2:24. † 6:20 6:20 మెలె, జోవయిచి లోయి సువ జోవయిచి పాపుమ్ పుంచ నయ్తాచి రాజిమ్ తెంతో జోవయింక నెత్వన అస్సె.

7

పెండ్లి జతిన చినే జతిన

1 జలె, తుమ్ రెడ్ల పుసిలిన్క జబాబుల్ రెగిడిందె. పెండ్లి నే జా తిలొ మున్నుబోద, జలె, తేరబోదక నే చడ్లె చెంగిలి.

2 గని జో మాన్ను పెండ్లి నే జా తిలె, నయతాన్ ఉచర్చిసి రితి లంజెకము నే కెరవుక మెన, ఎత్తి, మున్నుబోదక సొంత తెర్చి తిలె, ఎత్తి, తేరబోదక సొంత మున్నుసి తిలె చెంగిలి.

3 మున్నుసి తేర్చిక జోచి పూచి తిలిసి దెంక, తేర్చి మున్నున్క జేవ్చి పూచి తిలిసి దెంక.

4 కిచ్చొక మెలె, జాచి సొంత ఆగ్క ఇస్టుమ్ అయ్లి రితి ఏలువ కెరుక తేర్చిక అదికారుమ్ నాయ్; మున్నుసి ఏలువ కెర్తయ్. దస్సి, జోచి సొంత ఆగ్క ఇస్టుమ్ అయ్లి రితి ఏలువ కెరుక మున్నున్క అదికారుమ్ నాయ్; తేర్చి ఏలువ కెర్తయ్.

5 తుమ్తె కేన్ జవున్ దొగుతెర ఎక్కి ఉద్దెనుమ్ ఉచర ప్రార్తన నిదానుమ్ కెర్చి రిసాయి గడియకయ్ ఎక్కిలోక ఎక్కిలో దూర్ జా తంక జయెదె, నెంజిలె పోన. గని ప్రార్తన కెర్చి జా కామ్ కెర కేడయలదు మెలె, అన్నె మాములుమ్ బెద, నెంజిలె తుమ్ *ఆగ్క ఆసక ముద్దొ కెర నెతిర్లె, నయతాన్ తుమ్క పాపుమ్ కెరవుక ఉచరెదె.

6 ప్రార్తనలచి రిసా గడియ అంక తంక జయెదె మెన కిచ్చొక సంగితసి మెలె, ఆడ్ర నెంజె, గని దస్సి కెరుక చెంగిల్ జయెదె.

7 అన్నె, తుమ్ ఎత్తిజిన్ అంచి రితి పెండ్లి నెంతె తత్తదు జలె, 'చెంగిలి' మెన్తయ్, గని ఎత్తి, మాన్నుక దేముడు దిలి వరుమ్ జోకయ్ తయెదె; ఎక్కిలోక ఏక్ వరుమ్, అన్నెక్లొక అన్నెక్ వరుమ్ దా అన్నె.

8 పెండ్లి నే జలెనక చి రండెల్ మాన్నుల్క ఆవ్ కిచ్చొ మెంతసి మెలె, 'అంచి రితి జేవ్ దస్సి తిలె జోవయంక చెంగిలి'.

9 గని, జేవ్ ఓర్పువ జంక నెతిర్లె, పెండ్లి జతు. కిచ్చొక మెలె, ఒగ్గర్ ఆగ్ ఆసక వడ్డితి కంటు పెండ్లి జంక చెంగిలి.

10 పెండ్లి జలెనక కిచ్చొ ఆడ్ర దెతసి మెలె; అవ్ నాయ్, గని ప్రబుచి ఆడ్ర ఈంజ; తేర్చి మున్నున్క ములుక నెంజె.

11 గని ఏక్ వేల ముల దిలె, దస్సి తవున్, నెంజిలె మున్నున్ తెన్ అన్నె బెదున్. పడ్డొ మున్నుసి తేర్చిక ములవుక పోని.

12 తుమ్తె అన్నె సగుమ్జిన్క కిచ్చొ మెంతసి మెలె; ప్రబు సంగిలిసి నెంజె, గని అచ్చి సంగితసి. ప్రబుక నంపజలొ కేన్ బావొచి తేర్చి ప్రబుక నంపనెంజిలిసి జయెదె గే, జా 'జో తెన్ జయిందె' మెన్తయ్ జలె, జో జాక ములుక నెంజె.

13 దస్సి, కేన్ నంపజలి తేరబోదచొ మున్నుసి నంపనెంజిలొసొ జలె, 'జా తెన్ జయిందె' మెన జో సంగిలె, జా కి జోక ములుక నెంజె.

14 కిచ్చొక మెలె, నంపజలి తేర్చిచి సుద్దిచి రిసొ, నంపనెంజిలొ మున్నుసి కి సుద్ది జయెదె, చి నంపజలొ మున్నుచి సుద్దిచి రిసొ నంపనెంజిలి తేర్చి కి సుద్ది జయెదె. నెంజిలె, తుమ్చి తె దస్సి జలె కుటుంబల్చ బోదల్ సుద్ది జత నాయ్. గని అప్పె సుద్ది జా అస్సి.

15 గని జేవ్ దొగుతెరతె నంపనెంజిలొ మున్నుసి జలెకు నంపనెంజిలి తేర్చి జలెకు ములుక కోరప జతయ్ జలె, ములును. దస్సి జా తిలె, నంపతిలొసొ జవున్ నంపతిలిసి జవున్ మున్నున్ తెన్ గే తెర్చి తెన్ గే తంక పూచి నాయ్. కిచ్చొక మెలె, 'నెంతుమ్ తెన్ జతు' మెన్తయ్ ప్రబు అమ్క బుకారా అస్సి.

16 నంపనెంజిలొ మున్నుసి తుచి తెన్ తత్తొ జలె, మున్నుది ప్రబుక నంపజా రచ్చింఛువ జతి రితి తుయి జోక సికడుక తెరితది గే నెతిర్చిదె గే నేస్సి. దస్సి, నంపనెంజిలి తేర్చి, మున్నుబోద తుచి తెన్ తత్తి జలె, జా నంపజా రచ్చింఛువ జతి రితి సికడుక తెరితది గే నెతిర్చిదె గే, నెసి. జాకయ్ తుమ్ సిచ్చు కెరన నాయ్.

ప్రబు బుకార్చి పొది కిసి తిలె, దస్సి తంక

17 ప్రబుచ నంగుమ్లు ఎత్తిచి రిసొ కిచ్చొ ఆడ్ర కెర అస్సి మెలె, కేన్ మాన్నుక ప్రబు కిచ్చొ వరుమ్ దా అన్నె గే, జో మాన్ను జయ్యి వరుమ్ రితి జంక. కిసి జంక మెన దేముడు జోక బుకారా అన్నె గే, దస్సి జంక.

* 7:5 7:5 ఆగ్క ఆసక ఓర్పువ జంక నెతిర్లె

18 ప్రబు బుక్కార్ల పొది కో యూదులచి గుర్తుచి సున్నతి కెరన తిల గే, జా గుర్తుచ మచ్చల్ గెచ్చువుక పోన. ప్రబు బుక్కార్ల పొది కో జా గుర్తు కెరన తతి నాయ్ గే, కెరనుక ఉచర్తు నాయ్.

19 కిచ్చొక మెలె, దేముడుచ కొడో రితి ఇండుకయ్ ముక్కిమ్.

20 ప్రబు బుక్కార్ల పొది కీసి తిల గే, ఎత్తి మాన్సు దస్సి తంక.

21 ప్రబు బుక్కార్ల పొది గొతిమాన్సుల్ జా తిలదు గే, బాద నాయ్. విడ్డల్ జంక వాటు తిలె, విడ్డల్ జా. కీసి తిలె కి, బాద నాయ్.

22 కిచ్చొక మెలె, గొతిమాన్సు తిలి పొది ప్రబు బుక్కార్లొసా జలె, ప్రబుచి తెడి †విడ్డల్ జలోసా జతయ్. దస్సి కి, విడ్డల్ తిలి పొది కక్క. ప్రబు బుక్కారా అస్సె గే, జో క్రీస్తుచొ గొతిమాన్సు జతయ్.

23 క్రీస్తుచి లొయి తెన్ దేముడు ‡తుమ్క గెన అస్సె. జాక, మాన్సుచి ఇస్తుమ్ రితి తుమ్ ఇండుక నాయ్.

24 జాకయ్, బావుడ్లు, ప్రబు బుక్కార్ల పొది కీసి ఎత్తి మాన్సు తిలదు గే, దేముడుచి తెడి దస్సి తత్తు.

పెండ్లి నే జలనచి జలనచి రిసా సంగిలినీ

25 పెండ్లి నే జలనచి రిసా, జలె, ప్రబు అంక కిచ్చొ ఆడ్ర దెయె నాయ్, గని ప్రబు అంక నంప అస్సె, జోవయించి దయ అంచి ఉప్పిరి అస్సెచి రిసా నిదానుమ్ అస్సె, చి ఆవ్ ఉచర్తినీ ఆవ్ నంగింది.

26 కిచ్చొ ఆవ్ ఉచర్తినీ మెలె, అప్పె జత అల్లర్చి రిసా దస్సి తంక చెంగిలి.

27 కేన్ మున్సుబోద తెర్చి ఆన తిలె, విడ్డల్ జంక ఉచర్తు నాయ్. తెర్చి నే ఆన తిలె, పెండ్లి జంక ఆన జవున్ నాయ్.

28 గని ఏక్ వేల పెండ్లి కెరన్లె పాపుమ్ నెంజె. దస్సి తేర్బోద కి పెండ్లి కెరన్లె పాపుమ్ నెంజె. గని పెండ్లి జలనక ఈంజ లోకుమ్చ బాదల్ తయెదె. దస బాదల్ తుమ్ సేడుక అంక ఇస్తుమ్ నాయ్.

29 బావుడ్లు, కిచ్చొక ఇసి మెన ఆవ్ సంగితనీ మెలె, అప్పె తెంతో ఆకర్ దీసి ఎద తొక్కి సమయమ్ అస్సె. జాకయ్, తెర్చి అన్లన అప్పె తెంతో తెర్చి నే ఆనీలి రితి ప్రబుచి కామ్కయ్ నిదానుమ్ జితు.

30 'కిచ్చొ జలెకి, ప్రబుచి కామ్ ముక్కిమ్' మెనయ్, ఏడ్డన నే ఏడ్డిసి రితి జితు, సర్ల తెన్ తిలన సర్ల నెంజిల్ రితి జితు. అస్తి గెన్లన కీసి జంక మెలె, కిచ్చొ నెంజిలి రితి జితు.

31 అస్సె, ఈంజ లోకుమ్తె తిలినీ వాడిక కెర్తన కీసి జంక మెలె, దస్సిచిక దెర్చు నే సేడ్డి రితి జితు. అప్పె సంగిలినీ ఎత్తి కిచ్చొక మెలె, ఈంజ లోకుమ్చి రితి తిలినీ ఎత్తి పూర్తి పాడ్ జా గెతినీ.

32 'తుమ్చి మెన్సుతె ఈంజ లోకుమ్చ బాదల్ తత్తు నాయ్' మెనయ్ తుమ్చి రిసా అంచి ఆన. పెండ్లి నే జలో మున్సుబోద, జలె, ప్రబుచ కమెచి రిసా మెన్సు దెతయ్, ప్రబుచ ఆసల్ కెరుక ఆన జతయ్.

33 పెండ్లి జలో మున్సుబోద ఈంజయ్ లోకుమ్చ కమెచి రిసాచి తేర్చిచ ఆసల్ జర్ల కెరుక అల్లర్ జతయ్.

34 చి జోవయింక దొన్ని మెన్సుల్ తత్తుయ్. దస్సి, పెండ్లి నే జలి తేర్బోద గే, ఉబెడి గే జలె, ప్రబుచ కమెచి రిసా మెన్సు దెతయ్, ఆగుక కి ఆత్మక కి సుద్ది తంక, ప్రబుక ఎక్కి, నిదానుమ్ తంక ఆన జతయ్. గని పెండ్లి జలి తేర్బోద, జలె, ఈంజ లోకుమ్చ కమెచి రిసా కి, మున్సున్చ ఆసల్ జర్ల కెరుక కి అల్లర్ జతయ్.

35 ఈంజ ఎత్తి తుమ్క కిచ్చొక ఆవ్ సంగితనీ మెలె, తుమ్క 'చెంగిల్ తత్తు' మెనయ్ సంగితనీ. తుమ్క జాడు వయడ్లి రిసా నాయ్, గని బుద్దివాటు దెకయ్తి రిసాయి. తుమ్క 'ప్రబుక ఎక్కి మెన్సు నిదానుమ్ జతు' మెన అంచి ఆన.

36 జోక దెంక సంగ తిలి నాడిక ఎక్కిలో నే అన్లె, ఆసక ఓర్చుప జంక నెత్తిర్లె, రకనుక నెత్తిర్లె, పెండ్లి జతి జోచి ఇస్తుమ్ కెరన్సు. పెండ్లి జంక పాపుమ్ నెంజె.

37 గని, కక్క మెన్సు డిట్టుమ్ తిలె, జో ఓర్చుప జంక తెర జోచి ఆన రకనుక తెర్లె, జా దుయిన్క మింతున్ జా, నే ఆనుక దయిరిమ్ తిలె, దస్సి తా గెలె, చెంగిలి.

38 జాక, జో సంగ తిలి దుయిన్క కో పెండ్లి జలె చెంగిలి, గని కో పెండ్లి జయె నాయ్ గే, జోక ఒగ్గర్ చెంగిలి.

† 7:22 7:22 నయ్తాన్చి రాజమ్ తెంతో విడ్డల్ జలోసా. ‡ 7:23 7:23 నెంజె, 'నయ్తాన్చి రాజమ్ తెంతో తుమ్క నెత్వన అస్సె'.

39 మున్నుని జీవు తిల ఎద, తేర్చి జోకయ్ తంక. గని మున్నుని మొర గెలె, జా ఇన్జుమ్ జలొసాక పెండ్లి జంక జయెదె; గని ప్రబుది సెలవ్ రితి జలెకయ్.

40 జా దస్సి తా గెలె, జాకయ్ చెంగిలి, మెన ఆవ్ ఉచర్తసి. దేముడుచి నుద్ది తిలి ఆత్మ కి దస్సి మెన అంచి పెట్టి సికడ్తయ్ మెన ఆవ్ ఉచర్తసి.

8

బొమ్మల్ క దిలిసి కతిన్ చి రిసాచి కోడు

1 జలె, బొమ్మల్ క దిలి అన్నిమ్ చి రిసా ఉచరుమ. తుమ్ తుమ్ చి ఉత్తమతె రెగిడ్లి రితి 'అమ్ ఎత్తిజిన్ క గ్యానుమ్ అస్సె' మెన జానుమ్. గని 'గ్యానుమ్ మాన్సుక పులయతయ్' మెన కి జానుమ్. ప్రేమయ్, మాత్తమ్, మాన్సుక డిట్టుమ్ కెర్తయ్.

2 "అంక గ్యానుమ్ అస్సె" మెన కో ఉచరంతయ్ గే, జో జానుక ముక్కిమ్ తిలిసి జో అప్పెక నేనె.

3 గని, దేముడుక కో ప్రేమ కెర్తయ్ గే, జో దేముడు జోకయ్ జానె.

4 జాకయ్, బొమ్మల్ క అన్నిమ్ దిలిన్ చి రిసా ఉచర్లె, ఈంజ లోకుమ్ చ 'బొమ్మల్ క కిచ్చొ జీవు నాయ్' మెన జానుమ్, అస్సె, 'జీవ్ తిలొ దేముడు ఎక్కిలొయి అస్సె. అస్సె కోయి నాయ్' మెన కి జానుమ్.

5 మెలె, అస్సెక్ లోకుమ్ తె కి బాలోకుమ్ తె కి ఒగ్గర్ వేర వేర వస్తువల్ క 'దేముడు జతతి' మెన మాన్సుల్ సంగితతి. నిజమి మాన్సుల్ క కిచ్చొ కిచ్చొ 'దేముడు' 'ప్రబులు' ఒగ్గర్ జతతి.

6 మాన్సుల్ దస్సి సంగిలె కి, అమ్ క ఎక్కిలొయి దేముడు. కొన్నె మెలె, ఎత్తికయ్ అబ్బొ జలొ దేముడు. జో ఎత్తి జెర్తయిలొసా, చి జోచి రిసాయి అమ్ ఎత్తిజిన్ జితనుమ్. పడ్డె అమ్ క ఎక్కిలొ ప్రబు. కొన్నె మెలె, యేసుక్రీస్తు. *జోచి అత్తి ఎత్తి జెర్తయ్ జలి, జోయ్యి అంక జెర్తయలన్ చి రిసా అమ్ జితనుమ్.

7 జలెకి, 'బొమ్మల్ క సెక్తి నాయ్' మెన సగుమ్ జిన్ అప్పెక నేనెతి; జా గ్యానుమ్ జేవ్ క నాయ్. సగుమ్ జిన్ అగ్గె తెంతో బొమ్మల్ క జోకరుక అలవాట్ జా తిల, చి 'బొమ్మల్ క దిలిసి అమ్ సంజలన కయలె అమ్ క పాడ్ కెరెదె' మెన బితతి, చి జోచియంచి మెన్సుతె బమ్మ జవుల. కయలె, 'గార్ జలమ్, పారపాట్ జలమ్' మెన 'మెన్సుక పాడ్ జలమ్' మెన నిస్కారుమ్ దెకనుల.

8 అమ్ కతిసి, జలె, దేముడుక పాసి ఆనె నాయ్, దూరి కెరె నాయ్. నే కయలె నస్టుమ్ నాయ్ కయలె లాబుమ్ నాయ్.

9 గని, కిచ్చొచి రిసా తుమ్ జాగర్త తంక మెలె, 'కంక జయెదె' మెన తుమ్ ఇన్జుమ్ అయలె రితి కెర్లె, ఏక్ వేల †మెన్సు డిట్టుమ్ నెంజిలొ అస్సెక్లొ సంజలన తుక దెక, జో కి పడ్డె కయలె, 'తప్పు కెర్తయ్' మెన ఉచరన ఉన్సుర్ జయెదె, చి జోచి మెన్సుతె జో పారపాట్ కెర్లె రితి జయెదె.

10 దస్సి తుమ్ చి తె కో జలెకు కేన్ జవున్ బొమ్మచి గుడితె వెన బలి దిలిసి కయలె, ఆత్మక డిట్టుమ్ నెంజిలొ సంజలన కో జలెకు జోక ఒత్త దెకిలె, 'జో గ్యానుమ్ తిలొసా కతయ్, ఆవ్ కి కయలె బాద నాయ్, కిచ్చొగి' మెన దయిరిమ్ నెంజ, దయిరిమ్ జా జో కి కయలె, 'వేర దేముడుక దిలిసి కయలయ్. క్రీస్తుక ములిల్ రితి జతయ్' మెన జో పడ్డె బమ్మ జయెదె.

11 దస్సి జలె, జో మాన్సుక 'పాపుమ్ తెంతొ రచ్చొంచువ జవున్' మెనయ్ క్రీస్తు మొర తిలె కి, తుమ్ చి 'గ్యానుమ్' చి రిసాయి ఆత్మక డిట్టుమ్ నెంజిలొ జో మాన్సు జోచి ఆత్మతె పాడ్ జలి రితి జయెదె.

12 దస్సి, జేవ్ ఆత్మక డిట్టుమ్ నెంజలనచి ఆత్మ పాడ్ కెరె తుమ్ పాపుమ్ కెరె, క్రీస్తుక కి పాపుమ్ కెర్లె రితి జతను.

13 జాకయ్, ఆవ్ ముక్కల్ జవున్ కతిసి జలెకు బావొ జలొ కేన్ జవున్ సంజలనక †పాపుమ్ కెరయెదె జలె, ఆవ్ ముక్కల్ కయ నాయ్!

9

ప్రబు నిసాన్ లొచి రిసా పవులు రుజ్జు జలిన్

* 8:6-8 యోహాను 1:1-4 దెక. † 8:9-9 రోమయల్ 14 అద్యయమ్, ముక్కిమ్ క 14:13-23 దెక. ‡ 8:13 8:13 8:9 దెక, చి రోమయల్ 14:23.

1 అంక పరిచ్ఛ కెర్తను జలె, క్రీస్తుచి తెడి ఆవ్ విడ్డల్ జలొసా నెంజి గే? జోచి చి రిసా జోచొ బారికి ఆవ్ జయి నాయ్ గే? అమ్చొ ప్రబు జలొ యేసుక ఆవ్ సొంత దెకుక నాయ్ గే? తుమీ ప్రబుచి తెడి ఆవ్ మార్పువ కెర్తనచి పలితుమ్ తుమ్ నెంజున్ గే?

2 ఆవ్, 'ప్రబుచొ బారికి నెంజె' మెన వేర మాన్సుల్ అంచి రిసా ఉచరై కి, దసాచొ ఆవ్ తిలిన్క తుమి సాచుల్ జన్సు. ప్రబుచి బారికి కామ్క జో అంక నిసాస్సిసి. కిచ్చొతె రుజ్జా జతయ్ మెలె, తుమ్ ప్రబుచి తెడి తిలిసి, అంచి అత్తి జోచి రిసా నూన నంపజలదు, అంక జో దిలి కామ్ తుమ్చితెయ్ జెయిమ్ జలి.

3 అంక పరిచ్ఛ కెర్తనక అంచి జబాబ్ ఈంజయి.

4 ప్రబుచి ఈంజ కామ్ కెర్తన, కంక పింక విలువ నాయ్ గే, నాయమ్ నాయ్ గే, బెదె నాయ్ గే?

5 ప్రబుచ బావుడ్చొచి చి *కేపా చి ప్రబుచ అన్నె బారికుల్చి రితి అమ్ తెర్ని ఆన అమ్చి పట్టి కడ నెంక అమ్క విలువ నాయ్ గే?

6 ప్రబుచ బారికుల్ మొత్తుమ్తె ఎక్కి బర్లుబా చి ఆవ్, జలె, అత్తో తెన్ కామ్ కెర కెరయ్ జింక ములుక విలువ నాయ్ గే? ఎక్కి అమ్మి కామ్ కెర కెరయ్ జింక ములుక విలువ నాయ్ గే?

7 జమాను సుదొ సొంత గెర్చి డబ్బుల్ ఆనన జమాన్లుచ కామ్ కెరెదె గే? కో ధ్రానతోబ గల కెర ఒత్తచ కాదుల్ జో కంక నెంజి గే? మంద రకితో గొవుడు మందచి దూదు నే పితె కో తవుల?

8 ఆవ్ మాన్సు అచ్చి కెరయ్ ఇసి సంగితసి గే? దేముడుచ †మోసే పూర్ణుమ్చొచి అత్తి రెగ్గయల దేముడుచ ఆగ్గుల్ కి ఇసి సంగితతి.

9 ‡: "గిడ్డల్ కెల్ని సుదయ్తె పొది సుదయ్తె బెయిలుచి మూంతి బందుక పోన" మెన మోసే పూర్ణుమ్చొచి అత్తి రెగిడ్డి దేముడుచి ఆగ్గుల్తె ఇసి రెగ్గవ అస్సె. జలె, ఎక్కి బెయిలల్ చి రిసా జో ఉచరయ్ గే?

10 కచితుమ్ అమ్చి రిసాయ్ ఈంజ కోడు సంగితయ్ మెన ఆవ్ నంపజతసి. కిచ్చొక మెలె, కేస్త్రాసా కేసిలె, పంటొ లాయితోసా పంటొ లాయిలె, జో కి ఈంజొ కి 'పంటొచి వాట నజనుక జయెదె' మెన ఆన తెన్ తవుల, నజనుక విలువ జవుల.

11 ఆమ్, జలె, తుమ్చితె అత్తచి బిం గల అస్సుమ్ మెలె, అమ్క తుమ్ కిచ్చొ జవున్ దెంక నెంజి గే? అమ్క కిచ్చొ జవున్ వాట జెంక బెదె నాయ్ గే?.

12 ప్రబుచి కామ్ కెర్ల వేర మాన్సుల్ తుమ్చితె వాట నజనుక విలువ తిలె, అమ్ అన్నె విలువ జము నాయ్ గే? అమ్మి తొలితొ తుమ్క సుబుమ్ కబుర్ సూనయ్లమ్, గెద. జలె, జా నజనుక అమ్ విలువ జలెకి, జా అమ్ నజనుక నాయమ్ తిలె కి, అమ్క జెతిసి నజనుమ్ నాయ్. ప్రబుచి సుబుమ్ కబుర్ తుమ్ సూనతిన్క కిచ్చొ అడ్డు కెరుక నెన కెర, కిచ్చొ కళ్ళుమ్ కి ఓర్పువ జమదె.

13 దేముడుచి గుడిచి కామ్ కెర్ల సేవ కెర్తన, జలె, దేముడుచి గుడిచి జేవ్చి వాట నజ కతతి. బలిచి కామ్ కెర్ల సేవ కెర్తన జా బలి దిలి టాన్తె దెతిసి జోవయిం చి వాట నజ కతతి మెన నేన్ను గే?

14 దస్సి, "సుబుమ్ కబుర్ సూనయ్తన జోవయిం చి జా కామ్చి రిసాచి వాటక జతకు తుమ్" మెన ప్రబు అడ్డ దిలన్.

15 జలెకి దస్సి ఆవ్ కిచ్చొ జలెకి నజనుక నాయమ్ తిలె కి, ఆవ్ నజనుక నాయ్. చి 'దస్సి తోడు దొర్కు కెరనుక ఉచరయ్ ఉత్తల్ రెగిడ్డయ్' మెన తుమ్ అంచి రిసా ఉచర నాయ్. కిచ్చొక మెలె, 'ఆవ్ నజి నాయ్' మెన ఆవ్ గవురుమ్ సంగితిన్క కో అడ్డు కెర్తి కంబ మొరుక కి సర్ల జయిందె.

16 సుబుమ్ కబుర్ సూనయ్తి రిసా కిచ్చొ గవురుమ్ నజనుక బెదె నాయ్. కిచ్చొక మెలె, జా సుబుమ్ కబుర్ నే సూనయ్లె నెంజె, అయ్యె! ఆవ్ సుబుమ్ కబుర్ నే సూనయ్లె, అంక నస్సుమ్!

17 ఎక్కి అంచి సొంత ఇస్టుమ్కయ్ ఈంజ కామ్ కెర్తయ్ జలె, 'జో కెర్తి రిసా జోవయింక బవుమానుమ్ దెంక అస్సె' మెనుక జతి. గసి ఆవ్ ఈంజ కామ్ కెర్తిసి ఎక్కి ఆవ్ ఇస్టుమ్ జలిసి నెంజె. ఆవ్ ఈంజ కామ్ కెరుక మెన ప్రబు అంక పూచి కెర అస్సె. కిచ్చొ దొర్కు జలెకి, నే దొర్కు జలెకి, ఈంజ కామ్ కెరుకయ్ అంచి పూచి.

* 9:5 9:5 మెలె, 'పేతురు'. † 9:8 9:8 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రెగ్గయ్లె ఆగ్గుల్ మెన అమ్ జానుమ్. ఈంజ కొడె ఎక్కి బైబిల్తె అగేది పావ్ పుస్తకమ్తె రెగ్గయ్ జా అస్సె. ఈంజ దెకపుక మెన కుసియ్ లాసెతె నొయ ప్రమానుమ్తె మోసి పూర్ణుమ్చొచి అత్తి రెగిడ్డి దేముడుచ ఆగ్గుల్ మెన రగ్గవ అస్సె. ‡ 9:9 9:9 ద్విత్వీయోపదేశ కాడుము 25:4.

18 జలె, అంది బవుమానుమ్ కిచ్చొ మెలె, నుబుమ్ కబుర్ నూనయ్తి రిసా ఆవ్ నజనుక విలువ తిలిన్క ఆవ్ ఆన నే జతె, 'తుమ్క ఆరి దొర్కు జవున్' మెనయ్ ఆవ్ కిచ్చొ నే నజితె, తుమ్క జాడు వయడుక నెన కెర, డబ్బుల్ గట్ట నే నజితె ఆరి బోదన కెర్తసి.

ఎత్తి రగల్ మాన్సుల్క సుబుమ్ కబుర్ నూనవుక

19 దస్సి, ఆవ్ కేన్ మాన్సుచొ గొతిమాన్సు నెంజిలి కి, ఒగ్గర్జిన్క 'ప్రబుక నంపజా రచ్చించువ జతు' మెనయ్ అంది సర్దక ఎత్తిజిన్క గొతిమాన్సు రితొ జా; అస్సి.

20 'యూదుల్ నంపజతు' మెన, యూదుడు రితొ జలయ్. మెలె, పూర్గుమ్ మోసేచి అత్తి దేముడు దిల ఆగ్గుల్క బితకనక 'నంపజతు' మెనయ్, దేముడు మోసే తెన్ దిలి ఆగ్గుల్క బితొసా రితొ జలయ్. ఆవ్ జా అలవాల్ తంతొ అత్తుక విడ్డల్ జా తిలి కి.

21 దేముడు మోసే తెన్ దిలి ఆగ్గుల్ రితొ నే కెర్తసక, మెలె యూదుల్ నెంజిలసక, జలె, 'జేవ్ కి ప్రబుక నంపజా రచ్చించువ జతు' మెనయ్, యూదుడు నెంజిలో రితొ జలయ్. మెలె, దేముడుక నిదానుమ్ తా, జోచి కోడ్ రితి నిదానుమ్ ఇండితె తిలయ్, గని క్రిస్తు సంగిలి ఆగ్గుల్చి రితి, 'సీ' ప్రేమయ్ ముక్కిమ్' మెనయ్, జోచి ప్రేమ తెడి అమ్చ యూదుల్చ ముక్కిమ్ నెంజిల దేముడు మోసే తెన్ దిలి ఆగ్గుల్చి జాడు యూదుల్ నెంజిలసక వయడి నాయ్.

22 అత్తుక డిట్టుమ్ నెంజిలసక 'జేవ్ కి ప్రబుక నంపజా రచ్చించువ జతు' మెనయ్, 'బమ్మ కెర్లె అన్యానుమ్ జవుల' మెనయ్, జోవయింక బమ్మ నే కెర్తి రిసా జోవయించొ రితొ జలయ్. 'కీసి జలె నగుమ్జిన్కయ్ జవున్ రచ్చించువ కెరిందె' మెనయ్ జోవయింవ విడ్డల్క, అత్తుల్క నిస్కారుమ్ నే దెకితె, ఎత్తిజిన్క మరియాద దెక అస్సి.

23 'ఎత్తిజిన్ సుబుమ్ కబుర్ నూనతు, నంపజా రచ్చించువ జతి అవ్కానుమ్ నజన్తు' మెనయ్, పడ్డొ, 'నంపజలన ఎత్తిజిన్ తెన్ ఆవ్ కి సుబుమ్ కబుర్ తెచ వరల్తె బెదిందె' మెనయ్.

వరలోకుమ్చి బవుమానుమ్

24 కేన్ జవున్ నిగితి కెల్తెతె ఒగ్గర్ జిని నిగుల, గని ఎత్తిచి కంబ బే బేగి నిగితొసా ఎత్తిలో జిన్దె, చి జోకయ్ బవుమానుమ్ దొర్కు జయెదె మెన తుమ్ నెను గే. వరలోకుమ్చి బవుమానుమ్ దొర్కు కెరంతి రిసా తుమ్చితె ఎత్తి మాన్సుకి నిదానుమ్ నిగ జిన.

25 నిగత కెర్తయ్తె బెదితన, జలె, జోవయించి ఆగ్ గొట్టుమ్ జతి రితి, ఆగ్గుక ఎత్తి రగల్ కచితుమ్ ముడ్డొ కెరుక సికనుల. జేవ్ దస్సి సిచ్చు రితి కెరంతిసి కిచ్చొక మెలె, ఆరి పాడ్ జతి ఈంజయ్ లోకుమ్తె బెదితి బవుమానుమ్ దొర్కు కెరనుక. ఆమ్, మాత్తుమ్, కిచ్చొక కచితుమ్ ముడ్డొ కెరంతనుమ్ మెలె, పాడ్ నే జతి వరలోకుమ్చి బవుమానుమ్కయ్.

26 ఆవ్ కేనె గెతన్ గే పాప్పొల్ రితి నిగి నాయ్. వాదు తెన్ పొరాటుమ్ జలి రితి నే జయి, దెబ్బ కేనె నే లయితి రితి కెల్లి నాయ్.

27 అంచి ఆగ్గుక ఆవ్ ముడ్డొచి బుద్ది సికయ్తసి కెర్తసి, అంచ అనల్క ముడ్డొ కెరంతసి. నెంజిలె, తొలితొ వేర మాన్సుల్క బోద కెర సికడ తిలె కి, ఏక్ వేల అవ్వొ ఓడువ జలె, కెడ్డె తప్పు జయిందె. అంక జెతికయ్ జా బవుమానుమ్ నజన్తి అవ్కానుమ్ అవ్వొ పిట్టవనై, కెడ్డె పాపుమ్!

10

యూదుల్చి రితి పొరపాట్ జతిన్తె తుమ్ కెరుక నాయ్

1 తుమ్ కిచ్చొక జాగర్త తెన్ తంక మెలె, బావుడ్డు, అమ్చ పూర్గుమ్చ కీసి జల గే, ఉవరుమ. తుమ్ పచ్చు నాయ్. ఉచర్లె, కామ్క జెయెదె. దేముడు జోవయించి పురె ఇండయ్లి *మబ్బుచి ఎట్టొ జేవ్ ఎత్తిజిన్ వెల్లి బయిలె బుల్లె తిల, †నముర్దుమ్చి బుయి వాట్ జేవ్ ఎత్తిజిన్ నముర్దుమ్తె ఇండ గెల.

2 దస్సి, మబ్బుచి వట్టి ఇండ, నముర్దుమ్ దస్సి డేవ, మోసే తెన్ బాప్తినుమ్ నజన్తి రితి జలె.

§ 9:21 9:21 మత్తయి 22:37-40, యోహాను 13:34-35, 15:12, 17.

* 10:1 10:1 నిర్గమకాండమ్ 13:21, 14:19.

† 10:1 10:1 నిర్గమకాండమ్ 14:16.

3 ఎత్తి, ఎక్కి, †అత్తు అన్నిమ్ కయల,

4 బండిజిన †అత్తు సమ్మందుమ్ జలి పాని పిల. అత్తు సమ్మందుమ్ జలి రంగ్ని తెంతో నుది జలిసి పాని జేవ్ పిల. జో అత్తు రెంగ్ని కొన్సొ మెలె, *క్రిస్తు.

5 దస్సె జలెకి, జోవయింతె ఒగ్గర్ జినచి ఇండిలిసి రిసా అమ్చో దేముడుక సర్ద తయె నాయ్. అస్సె, జా వెల్లి బయలె జేవ్ †పాపుమతె గెతికయ్, దేముడు సంగ తిలి దేసిమి జేవ్ నే పావితె మొరుక మెన జో సిచ్చ దిలన్.

6 జలె, జేవ్ ఆన జలి రితి అమ్ ఆన జంక నాయ్ మెల, అమ్క బుద్ది సికితి రితి జా ఎత్తి అమ్క కిచ్చొ కామ్క జెయెదె మెలె, అమ్క జాగర్ద దెకయ్తయ్.

7 †“ప్రజల్ కంక పింక వెన, నచుక ఉట్టిల”

మెన జేవ్ సగుమ్జిన పాపుమ్ జా బొమ్మక జొకర్తినచి రిసా దేముడుచి కొడెతె రెద్దవ అస్సె. జా పాపుమ్ తుమ్ కెరుక పోన.

8 పడ్డె, జోవయింతె †ఒగ్గర్ జిన లంజె జా ఎక్కి దిసి విస్సెక్ తిన్ని వెయిల్ జని మొర గెల. అమ్ నంపజలన్ జా పాపుమ్ కెరుక నాయ్.

9 పడ్డె, జోవయింతె సగుమ్జిన దేముడు ప్రబుక కొంకడ్డి రితి పాపుమ్ కెర్ల, చి జో* అయివో తెర్లయ్తికయ్, చడ్డె, చి జయ్యె సిచ్చ జల. ప్రబుక అమ్ నంపజలన్ పరిచ్చ కెర్లి రితి కొంకడుక నాయ్.

10 పడ్డె, జో దేముడు ప్రబు తోడు తిలె కి, జోవయింది రిసా కోపుమ్ జతె తిల, చి మొరయ్తోసా దేముడుదూతచి అత్తి జేవ్ మొర గెల.

11 జోవయింతెచ మాస్సుల్క జేవ్ సిచ్చల్ కిచ్చొక కామ్క అయిలి మెలె, జోవయింక ‘జాగర్ద తెన్ తత్తు’ మెన రుజ్జుల్ దెకయ్లి. పడ్డె, జో దేముడు కిచ్చొక జా ఎత్తిచి రిసా దేముడుచి కొడెతె రెద్దయ్లో మెలె, అమ్ ఉగుమ్చి ఆకరతె జతె మాస్సుల్క ‘సిక్కుతు’ మెనయ్ రెద్దవ అస్సె.

12 జాకయ్ కో ‘అవ్ చెంగిల్ అస్సి’ మెన ఉచరంతయ్ గే, పాపుమతె దెర్పు నే నీడ్డి రితి జాగర్ద దెకస్సు.

13 తుమ్క దెరుక జెత పాపల్ అగ్గెయ్ తెంతో మాస్సుల్క దెర్పతి, కిచ్చొ నొవచ నెంజితి, గని దనచతె తుమ్ దెర్పు నే నీడ్డి రితి తుమ్ కిచ్చొ దయిరిమ్ తంక జయెదె మెలె, దేముడు నిదానుమ్ తతోసా, చి సత్తిమ్ ఇండుక తుమ్క ఇస్సుమ్ తిలె, సయ్తాన్ తుమ్క పాపుమ్ కెరయ్తి రితి దేముడు సెలవ్ దెయె నాయ్. తుమ్ జా పాపుమ్ నే కెర్లి రితి తుమ్క దొర్పు జలి సెక్తి దెయెదె, కేన్ సమయ్ముక సయ్తాన్ దస్సె అల్లర్ కెరుక జెయెదె గే, తుమ్ ఓర్పువ జా జినుక తెరితి రిసా విడ్డల్ జతి వాబు జో దేముడు దెకయెదె.

బొమ్మల్క జొకర్తినచి రిసా జాగర్ద సంగిలిసి

14 ప్రేమ తిల బావుడ్డు, బొమ్మల్క జొకర్తినక దూరి తా, దసితె బెద నాయ్.

15 తుమ్క ‘బుద్ది తిలస’ మెన అవ్ తుమ్క ఇసి సంగితసి. అవ్ అప్సె సంగితిన్చి రిసా తుమ్ సొంత చెంగిల్ ఉచర.

16 ‘తుయి దిలిసి ఈంజ’ మెన ప్రబుచి నావ్ తెన్ అమ్ జోబర కెర ద్రాచ రస్సుమ్ పిలె, జోచి నూయి జలి లోయిచి రిసా దొర్పు జలి రచ్చనతె అమ్ బెదిలిన్చి గుర్పు జయెదె. జోచి నావ్ తెన్ అమ్ పోడి గండల్ కెర కయ్లె, జోచి అగ్గె మొర అమ్చి పాపుమ్ జో వయ్లిన్తె అమ్ బెదిలి గుర్పు జతయ్.

17 జా ఎక్కి పోడి కతి ఎక్కి గుర్పు అమ్ ఎత్తిజిన నంపజలన్క తనుమ్చి రిసా, అమ్ ఒగ్గర్ జిన జలెకి, జా ఎక్కి పోడి కయ్లి రిసా, అమ్ క్రీస్తు తెన్, ఎక్కిలో తెన్ ఎక్కిలో ఎక్కి అగ్గె జా అస్సుమ్.

18 పూర్ణుమ్చి రితి దేముడుక బలి దెత అమ్చ ఇస్సాయెలల్చి రిసా ఉచర. జా బలి దిలిసి కయ్లె, జా కతన ఎత్తిజిన జా బలి దిలిన్తె బెదిలి గుర్పు జతయ్.

19 జలె, బొమ్మక దిలి కిచ్చొ బలిక కిచ్చొ సెక్తి అస్సె గే? బొమ్మక కిచ్చొ సెక్తి తయెదె గే? కిచ్చొ నాయ్.

† 10:3 10:3 నిర్ణయకాండుమ్ 16 అద్యయిమ్. యోహాను 4:10-14.

§ 10:4 10:4 నిర్ణయకాండుమ్ 15:22-25, 17:5-6.

* 10:4 10:4

† 10:5 10:5 నిర్ణయకాండుమ్ 14:20-24, 28-35, ద్విలియోచదేశ కాండుము 1:34-40.

‡ 10:7 10:7

నిర్ణయకాండుమ్ 32 అద్యయిమ్. ముక్కిమ్క 32:2-6.

§ 10:8 10:8 సంక్యాకాండుము 25:1-9.

* 10:9 10:9 సంక్యాకాండుము

21:4-9.

20 కిచ్చొ మెంతసి మెలె, దేముడుక నేస్త మాన్సుల్ బలి దెతిసి కక్క, దెతతి మెలె, దేముడుక నాయ్, గని బూతల్కయ్. తూమ్ బూతల్క జొకర, జోవయింతెన్ బెదుక అంక ఇస్టుమ్ నాయ్!

21 కిచ్చొక మెలె, ప్రబు తెన్ బెద పిలి పడ్డె, బూతల్ తెన్ బెద పింక ఎద్దరె బెదె నాయ్. ప్రబుచి అన్నిమ్ చి బూతల్చి అన్నిమ్ ఎక్కిల్ మాన్సు కో జలెకు కంక బెదె నాయ్. దొన్ని బెదితి నాయ్.

22 దన్ని జలె, ప్రబుక అమ్ కొంకడ కోపుమ్ కెరుక జయెదె గే? నెంజె, గెద. జోచి కంట అమ్క సెక్తి గే? నాయ్ గెద.

నంపజలనక అక్కు

23 జలె, “కిచ్చొచి రిసా కి ‘గార్’ మెనుక నెంజె” మెన సంగితనుమ్. జా నిజామ్, గని అమ్ సగుమ్ కమె కెర్లె, అన్నె మాన్సుల్క చెంగిల్ తయె నాయ్. “కిచ్చొచి రిసా కి ‘గార్’ మెనుక నెంజె” మెన అమ్ నంపజలన సంగితనుమ్ గని సగుమ్ కమె కెర్లె, మాన్సుచి నముకుమ్క చెంగిల్ కెరె నాయ్.

24 కో నంపజలన సొంత లాబుమ్క ఆన జతు నాయ్, గని అన్నె మాన్సుల్కయ్ ‘చెంగిల్ జతు’ మెనయ్, ఆన తెన్ తంక.

25 తుమ్చి మెన్సు నే కెరతె, నే పునితె కటికి సుదొతెచి ముక్కల్ గెనుక జలె, ‘బలి దిలిసి జయెదె గే నెంజె గే?’ మెన నే బితె, లాజ్ నెంతె గెన్సు కంక జయెదె.

26 కిచ్చొక మెలె, దేముడుచి కొడతె రెద్దయిలి రితి, “లోకుమ్ కి, లోకుమ్తె తిలిసి కి, ఎత్తి ప్రబుచి” మెన రెగిడ్డిసి సత్తిమ్.

27 పడ్డె, ప్రబుక నంపనెంజెలో కేన్ మాన్సు తుమ్క అన్నిమ్క బుకార్లె, ఇస్టుమ్ తిలె, గెచ్చు, చి కిచ్చొ లాజ్ నెంతె కిచ్చొ నే పునితె, జో కిచ్చొ దెయెదె గే, కా.

28 గని “ఈంజ బొమ్మక బలి దిలిసి” మెన తుమ్క కో జాకు సంగిలె, ‘జేవ్ జా కయ్లె జోక పాపుమ్ కెరవ తయిందె చి అంక పాపుమ్ లయెదె’ మెనయ్ జో మాన్సు సత్తిమ్క తుమ్క జాగర్ల సంగిలిన్చి, సత్తిమ్ జోక పిట్టున్ నాయ్ మెన, జో అన్మానుమ్ నే జతి రిసా జా కా నాయ్.

29 తుమ్చి పెట్టిచి సత్తిమ్ తతి రిసా నాయ్, గని సత్తిమ్కయ్ జో మాన్సు తుమ్క సంగ తయెదె, చి జో అన్మానుమ్ నే జతి రిసాయి తుమ్ కా నాయ్. ‘కంక నెంజె’ మెన వేర మాన్సుల్చి మెన్సు తెన్ అంక కిచ్చొక తీర్పు జర్లు జయెదె.

30 ‘ప్రబు దిలె’ మెన ఆవ్ సర్ల తెన్ జా కయ్లె, కో మాన్సుల్ అంక నింద కెరుక తెరితి గే? నెతిర్తి. ప్రబుచి నావ్ తెన్ జోబర సంగ కెర ఆవ్ కయ్లె, జాచి రిసా అంక కో నింద కెరుల?

31 గని కంక జలెకి, పింక జలెకి, కిచ్చొ కామ్ కెరుక జలెకి, దేముడుచి గపురుమ్ దెకయ్తి రితి కెర.

32 యూదుల్ జవున్, గ్రీసు దేనిమ్చ జవున్, దేముడుచి ఆగే జతి సంగుమ్ జత నంపజలన్ పొరపాట్ నే జతి రితి తుమ్ కిచ్చొ అడ్డు కెర నాయ్.

33 అంచి సొంత లాబుమ్ పొని, గని ఎత్తిజన్క ‘జేవ్ రచ్చించువ జా చెంగిల్ జతు’ మెనయ్, కిచ్చొ కామ్ తిలె కి ఆవ్ ఎత్తిజన్క మరియాద కెర్తి రితి ఇండితసి.

11

సంగుమ్లుతె కిన్ తంక గే

1 ఆవ్ క్రీస్తుక దెక కిసి ఇండితసి గే, తుమ్ కి అంక దెక దన్ని ఇండ.

2 అంక తుమ్ కెర్లెడి తెదొడి ఉచార కెర్లెను, చి రిసా బావుడ్లు, ఆవ్ నూనయ్లి రితి, అమ్ నంపజలనక దిలిసి తుమ్ కెర్లెను, చి రిసా అంక సర్ల.

3 అమ్చ మున్సుబోదల్ ఎత్తిజన్క * బోడి కొన్సొ మెలె, క్రీస్తు. పడ్డె, ఎత్తి తేరబోదక బోడి కొన్సొ మెలె, మున్సుసి. పడ్డె క్రీస్తుక బోడి కొన్సొ మెలె, దేముడు మెన తుమ్ జాననుక అస్సె.

4 కేన్ మున్సుబోద బోడి డంకనయ్ ప్రార్దన కెర్లె జవున్, దేముడుచి కబుర్లు సంగిలె జవున్, జోచి బోడిక నిస్కారుమ్ కెరంతయ్.

* 11:3 11:3 ఎవెను 1:22-23, 4:15-16, 5:23. కొలోస్సియుల్ 1:18, 2:10.

5 కేన తేరబోద బోడి నే డంకింతె ప్రార్థన కెర్తె జవున్ దేముడుచ కబుర్లు సంగిలె జవున్, జాచి బోడి నిస్కారుమ్ కెరంతయ్; జాచి బోడి బోడన్సి రితి జతయ్.

6 కిసి మెలె, తేరబోద బోడి డంకనుక నెసిలె, జాచి నెండి కత్రవనైకయ్ చెంగిలె, గని నెండి బోడనుక జవున్ కత్రవనుక జవున్ నెంజె మెలె, బోడి డంకనయ్ తంక.

7 కిచ్చొక ఇసి సంగితసి మెలె, మున్నుబోడక జెర్మయ్లె పొది, “అంచి పోలిక అంచి గవురుమ్ ఇన్నెతె డీసున్” మెన, దేముడు జెర్మయ్లె. గని తేరబోద జలె మున్నుబోడచి గవురుమ్ దెకయ్తయ్.

8 కిచ్చొక మెలె, మొదోల్క మున్నుబోడ తేరబోద తెంతో జెర్మన్ జయె నాయ్. మున్నుబోడ తెంతో తేరబోద జెర్మన్ జలి.

9 తేరబోడక తోడు తతి రిసా మున్నుబోడ జెర్మయ్ జయె నాయ్, గని మున్నుబోడక తేరబోడ తోడ తతి రిసాయి తేరబోడక జెర్మవ అస్సె.

10 జాకయ్, దూతల్ కి దెకితతి రిసా, తేరబోడచి ఉప్పిర్చో మున్నున్చి అదికారుమ్చి గుర్తు దెకయ్తి రిసాయి జా తేరబోడ బోడి డంకనుక అస్సె.

11 జలె ప్రబుతె మున్నున్క అంగ తేరబోడ నాయ్, తేరబోడక అంగ మున్నుబోడ నాయ్. క్రిస్తుచి తెడి తేర్పిక మున్నుసి తోడు, మున్నున్క తేర్పి తోడు అస్సి.

12 తొలితొ తేరబోడ మున్నుబోడచి తెంతో జెర్మన్ జలెకి, అప్పె తేరబోడచి వెట్టి మున్నుబోడ జెర్మితయ్. మున్నుబోడల్ కి, తేరబోడల్ కి, ఈంజ లోకుమ్తె తిలిసి ఎత్కి కి దేముడు జెర్మయ్లో. ఎత్కిచి మొదోల్ దేముడు.

13 తుమ్ సొంత తీర్పు ఉచర. బోడి నే డంకింతె తేరబోడ దేముడుక ప్రార్థన కెరుక నూటి గే?

14 ఒండి లోకుమ్క దెకిలె, ‘మున్నుబోడచి నెండి దీగు జా తిలె నూటి నాయ్’ మెన నేనుమ్ గే?

15 ‘తేరబోడక నెండి దీగు తిలె జాక గవురుమ్’ మెన నేనుమ్ గే? కిచ్చొక మెలె, జాక మరియోద తెన్ డంకితయ్. దస్సికయ్ దేముడు జాక దిగిల్ నెండి దా అస్సె.

16 ఈంజ కోడుచి రిసా కో జలెకు వేర సికడుక ఉచర్తయ్ గే, తుమ్ కిచ్చొ జానుక మెలె, కిచ్చొ వేర రిత కెరుక నెంజె మెన ఒప్పన్, వర్తొ ప్రబుచ సంగుమ్లు ఎత్కితె ఇసి కెర్తెతి.

ప్రబుచి ఆగ్చి లోయిచి గుర్తు తిలి పోడి, ద్రాచ రన్నుమ్

17 వేరచి రిసా తుమ్క మెన్నుక జతయ్ జలెకి, ఏక కోడుచి రిసా అంచి విసారుమ్ ఆవ్ సంగుక అస్సె. కిచ్చొచి రిసా మెలె, ప్రబుచి నావ్ తెన్ తుమ్ సంగుమ్తె నబ కెరుక బెదిలె, కామ్క జెతికయ్ బుద్ది తెన్ నాయ్, గని కామ్క నెంజెలి బుద్ది తెన్ బెదితసు.

18 కిచ్చొ బుద్దిచి రిసా ఆవ్ సంగితసి మెలె, ఎక్కి, ‘సంగుమ్’ మెన తుమ్ బెదితి పొది ఎక్కి మెన్ను తెన్ నాయ్. జట్టు జలి రితి జతసు, మెన తుమ్చి రిసా ఆవ్ నూన అస్సి. జా కోడు ఇదిల్ నంప కెరుక జతయ్.

19 తుమ్తె కో సత్తిమ్ అస్సి గే, కో నాయ్ గే చినితి రిసా దన జట్టు తంకయ్ మెన ఏక వేల తుమ్ ఉచర్తసు గే? దస్సి ఉచరుక పట్టె నాయ్.

20 తుమ్ బెద నబ కెర్తె పొది పోడి చి ద్రాచ రన్నుమ్ కయ్లె పిల్లె, ‘యేసుప్రబు దిలి అన్నిమ్ ఈంజ’ మెన తుమ్ సంగిల్ కి, దస్సి మెనుక నెంజె.

21 కిచ్చొక మెలె, తుమ్ సొంత అన్నిసి కక్క నే దెతె, సొంత జాయి గెతసు, చి సగుమ్జెన్క నెంజె తా జోవయింక పెట్టి బెరె నాయ్. చి సగుమ్జెన్ మచ్చ గెతతి!

22 అబ్బువోమ్మ! తుమ్క గెరల్ నాయ్ గే, చి నే జెతె అగ్గె చూ తాన్ గెచ్చవంతి రితి గెరి కంక పింక నెంజె గే? నెంజెలి, ప్రబుచి సంగుమ్తె బెదిలక నిస్కారుమ్ ఉచర, జోవయింతె నెంజెలక నిస్కారుమ్ కెరుకయ్ మెన దస్సి కెర్తెసు గే? తుమ్క ఆవ్ కిచ్చొ సంగిలె జయెదె? దస్సి కామ్చి రిసా తుమ్క ‘చెంగిల్ కెర్తెతి’ మెన ఆవ్ సంగుక బెదెదె గే? నాయ్, గెద, బెదె నాయ్! నెంజె!

23 ప్రబుతె అంక దొర్పు జలిన్చి రిసా, ఆవ్ తుమ్కయ్ సార్పు కెర దిలిసి కిచ్చొ మెలె, జోక విరోదుమ్ సుదల్చి అత్తి సార్పు కెర దిలి జా రాతి, యేసుప్రబు పోడి దెర,

24 దేముడు అబ్బొనీక జోబర సంగ ప్రార్థన కెర, మోడ కెర, “ఈంజ, తుమ్ ది రిసా †బలి జతి అంది ఆగుక గుర్తు. ఈంజ కెర అంక ఉచార కెర కెయఁక కంక, అంది రిసాయి ఉచర్తె తా” మెన ప్రబు సిస్సుల్క దిలన్.

25 జా అన్నిమ్ కయలి పడ్డె, ద్రాచ రస్సుమ్ చి గలన్ దెర ప్రార్థన కెర, “ఈంజ గలన్ చి రస్సుమ్ కిచ్చొ గుర్తుచి రిసా మెలె, అంక సంబజతనచి పాపుమ్ వుంచితె అంది లోయిచి గుర్తు ఈంజ. ఈంజ, అంది నోచి ప్రమానుమ్ జగ్గు జతినచి గుర్తు. ఈంజ కెర అంక ఉచార కెర కెయఁక పిలెకి, అంది రిసాయి ఉచర్తె తా” మెన సంగ పియడ్లన్.

26 కిచ్చొక మెలె, జా పోడియె కెయఁక కయలె, జా ద్రాచ రస్సుమ్ కెయఁక పిలె, ప్రబు మొర ఆర్పితుమ్ జలిన్ చి గుర్తు దెకయతను, సాడువ కెర్లె రితి జతను. జో ఈంజ లోకుమతె అన్నె జతె ఎదక జయ్యు గుర్తు దెకయతె తా.

27 జలె, కిచ్చొ వేర బుద్ది తెన్ కో జా పోడియె కయలె, జా ద్రాచ రస్సుమ్ పిలె, ప్రబుచి ఆగుక జోచి లోయిక దూసువ కెర్లె రితి, విలువ నే దిలి రితి, పాపుమ్ వయుల.

28 జాకయ, కేన్ మాన్సు జా పోడి కయెదె గే, జా లోయి పియెదె గే, తొలితో జోక జొయ్యు పరిచ్చ కెరన, సిలువతె ప్రబు జగ్గు కెర్లె కామ్ ఉచరయ కవున్ పివును.

29 కిచ్చొక మెలె, ‘ప్రబుచి ఆగుచి గుర్తు, జోచి లోయిచి గుర్తు ఈంజ’ మెన సరిగా నే ఒప్పన్తె కో ఈంజ కవుల గే, పివుల గే, జో సిచ్చకయ జాక పియ జా పాపుమ్ వయునుల.

30 దస్సికయ తుమ్చితె ఒగ్గరిజన్ చెంగిల్ నెంతె జబ్బుల్ జా అస్సున్, చి నగుమజన్ కి మొర గెచ్చు అస్సి.

31 అమ్ సొంత పరిచ్చ కెరన బుద్ది కెరంతె తత్తమ్ జలె, ఇన సిచ్చల్ జతె తత్తమ్ నాయ్.

32 గని ప్రబు అమ్క అప్పె సిచ్చ కెర్లె, కిచ్చొక జా సిచ్చ కెర్తయ మెలె, అమ్క “అప్పె సిక్కుత్, చి ఈంజ లోకుమ్చి రితి కెర్తనక లయతి జా ఆకర్ దీసిచి జా వెల్లి సిచ్చ జతు నాయ్.” మెనయ్, ప్రబు అమ్క రచ్చుంచువ కెర్తయ్.

33 జాకయ, బావుడ్లు, జా పోడి కంక, జా రస్సుమ్ పింక తుమ్ బెదిలె, బమ్మ నే జతె ఎక్కిలోక ఎక్కిలో రక.

34 నెంజిలె, కిచ్చొ ఆన బుద్ది తెన్ కయలె పిల్లె, తీర్పు జా ప్రబుచి సిచ్చ జస్తె. కక్క చూ తిలె, గెరి అన్నిమ్ కెర్పు. వేర ఇన ఆడ్రల్, జలె, తుమ్చితె అయలె సంగిమ్దె.

12

ప్రబు దెత సెక్తివరల్

1 అన్నె మాన్సుల్చి పెట్టి ప్రబు దిల జోచి ఆత్మ దా సెక్తి వరల్చి రిసా తుమ్ నేన తంక, అంక ఇస్టుమ్ నాయ్.

2 తుమ్ ప్రబుక నేన్లి పొది మోసిమ్ జా, నయతాన్ ఉదడ్లి రితి ఇత్తల్ ఒత్తల్ గెతె తా, జీవ్ నెంజిల బొమ్మల్క జోకర్తె తిలదు.

3 తుమ్ అన్నె దస్సి మోసిమ్ నే జతి రిసా తుమ్ కిచ్చొ అర్దుమ్ కెరసుక అంది ఆన మెలె, దేముడుచి నుద్ది తిలి ఆత్మ కచి పెట్టి తిలె, జో మాన్సు యేసుక దూసువ కెర్త జోచి పెట్టి తయె నాయ్. జోక సాపెనచి కోడు జో సంగుక నెత్తె. పడ్డె, జో ప్రబుచి ఆత్మ మాన్సుచి పెట్టి తిలెకయ్ “యేసు దేముడు ప్రబుయ” మెన జో మాన్సు ఒప్పనుక తెరె.

4 దేముడుచి నుద్ది తిలి ఆత్మ ఎక్కిలోయి, వేర వేర సెక్తివరల్ దెయెదె. వేర వేర సెక్తివరల్, వేర వేర మాన్సుల్క జో దిలెకి, జో ఎక్కిలోచి ఆత్మయి జేవ్ ఎత్తి సెక్తివరల్ దెతోనా.

5 దేముడు జోచి ఆత్మవాళు వేర వేర సెవల్ వేర వేర మాన్సుల్క జో దెయెదె, గని జా సేవ ఎక్కిలో ప్రబుచి రిసాయి.

6 దేముడు రగల్ రగల్ కమొ కెరెదె, ఎక్కిలో ఇసి కెరెదె, అన్నెక్టో దస్సి కెరెదె, గని జేవ్ కమొ కెర్త సెక్తివరల్ ఎత్తి దెతోసా ఎక్కి దేముడు.

† 11:24 11:24 నెంజిలె, ‘గండల్ జలి’ బలి జలి

7 దేముడు ఎత్తి, మాన్యుక జోచి ఆత్మసెక్తి వరుమ్ దా అస్సె, ఈంజ అమ్ దెకితనుమ్, జోక సంపజల మాన్యుల్ మొత్తుమ్ 'చెంగిల్ తత్తు' మెన, ఎత్తి, మాన్యుక ఆత్మసెక్తి వరుమ్ దేముడు దెయెదె.

8 కిచ్చొ మెలె, సుద్ది తిలి జోచి ఆత్మ ఎక్కిలొచి పెట్టి తా, జో మాన్యు ఒగ్గర్ బుద్ది తెన్ ప్రబుచి బోదన కెరుక జో సెక్తి దెతయ్. అన్యెక్కిచి పెట్టి ప్రబుచి జయ్యి ఆత్మ తా, ఆత్మతె గ్యానుమ్ జో మాన్యు సంగుక ప్రబు సెక్తివరుమ్ దెతయ్.

9 అన్యెక్కిచి పెట్టి జయ్యి ఆత్మ తా నముకుమ్, సెక్తివరుమ్ దెతయ్. అన్యెక్కిచి అత్తి వేర వేర జబ్బుల్ తిల మాన్యుల్క చెంగిల్ కమె జర్గు జతు మెన ఒగ్గర్ కెర్త సెక్తివో జో దెతయ్.

10 అన్యెక్కిక జోపయించి అదికారుమ్ దెకయ్త రకుమ్లు అద్దుతుమ్ కమె కెర్తి సెక్తి, అన్యెక్కిచి చోండి పుట్టవ ప్రబు జోచ కబుర్లు సంగదె, అన్యెక్కిక వేర వేర బుద్దివోక 'ప్రబు సికళ్లన గే నెంజిలి గే' చినితి సెక్తివరుమ్ దెయెదె. అన్యెక్కి వేర రగల్ జో అగ్గె నే సికిల బాసల్ తెన్ లట్టుబుక సెక్తివరుమ్ దెతయ్. అన్యెక్కిక బాసల్చి అర్దుమ్ సంగుక సెక్తివరుమ్ దా అస్సె.

11 ఈంజేవ్ సెక్తివరల్ ఎత్తి, కేనె తెంతో జెతయ్ మెలె, ప్రబుచి ఎక్కి, ఆత్మయ్, జేవ్ ఎత్తిజిన్చి పెట్టి జేవ్ వేర వేర కమె కెర్తయ్. కేన్ మాన్యుక కేన్ సెక్తివరుమ్ జో దెయెదె గే, జోచి ఇస్టుమ్.

ఎక్కి ఆగ్ ఒగ్గర్ వాటల్

12 కేన్ జవున్ ఆగ్క కీసి ఒగ్గర్ వాటల్ తవుల గే, జేవ్ వాటల్ ఒగ్గర్ జలెకి బెద ఎక్కి ఆగ్ కీసి జయెదె గే, దస్సి, క్రిస్తుచి ఎక్కి ఆగ్ జా సంపజలన మొత్తుమ్ బెదిలిసి.

13 అమ్ యూదుల్ జలెకి, *గ్రిసు దేసిమ్చ జలెకి, గొత్తి మాన్యుల్ జలెకి, గొత్తి మాన్యుల్ నెంజిలి కి, ఎక్కి ఆగ్తె ఎక్కి ఆత్మతె అమ్ సంపజలన జా బాప్తిసుమ్తె బెదిలమ్; అమ్ ఎత్తిజిన్చి ప్రబు జోచి ఎక్కి ఆత్మతెయ్ పియడ్లన జలమ్, అమ్క ఒండిక ఎక్కి ఆత్మయ్ దా అస్సె.

14 అమ్చి ఆగ్క ఎక్కి వాట తయ్ నాయ్. అమ్చి ఆగ్తె ఒగ్గర్ వాటల్ తవుల.

15 "ఏక్ వేల చాటు ఆవ్ ఆతు నెంజి, జలె ఆవ్ ఈంజ ఆగ్క వాట నెంజి" మెన సంగిలె కి, ఆగ్క జా చాటు కచితుమ్ ఏక్ వాట జా తత్తయ్.

16 "ఆవ్ అంకి నెంజిచి రిసా ఆగ్క వాట నెంజి" మెన కండ్లొ జవున్ ఏక్ వేల సంగిలె కి, జా ఆగ్క జా కండ్లొ కచితుమ్ వాట జా తత్తయ్.

17 జలె ఆగ్ ఒండి అంకి జలె, కీసి నూనుక జతి? ఆగ్ ఒండి కండ్లొ జలె, కీసి జుంగుక జతి!

18 ప్రబు జాన జానయ్ ఆగ్తె కిచ్చొ కిచ్చొ వాటల్ జో ఉచర్లి రితి బెదవ అస్సె.

19 జేవ్ ఎత్తి, ఎక్కి, వాట జత జలె, ఆగ్ ఒండి కేనె తత్తి?

20 నిజమి ఆగ్ ఒగ్గర్ వాటల్ తిలె కి ఎక్కి ఆగ్ జతతి.

21 జాకయ్, "తుయ్ తంక అంక నాయ్" మెన ఆతుక అంకి సంగుక బెదె నాయ్. "తుయ్ తంక అంక నాయ్" మెన చట్టొక బోడి సంగుక బెదె నాయ్.

22 జలె, నాయ్, ఆగ్తెవ అప్పు, డీస్త వాటల్ నెంజిలె, జింక నెంజె,

23 చి ఆగ్తె గవురుమ్ నెంజిల వాటల్క 'డీసిలె లాజు' మెన, గవురుమ్ కెర్త వాలల్ గలంతనుమ్. దెకుక సూటి నెంజిల అమ్చి ఆగ్తె వాటల్ ఒగ్గర్ సూటి దెకయ్త.

24 'డీసుక సూటి' మెన, తిల వాటల్క లుంకడుక నాయ్.

25 జలె దేముడు, ఒండి ఆగ్ ఎక్కి నెంతుమ్ తతి రితి, ఆగ్చి వాటల్ ఎత్తి, అస్సె ఆగ్ వాటల్క గవురుమ్ దెకిత్ రితి, తొక్కి గవురుమ్చ ఆగ్ వాటల్క ప్రబు ఒగ్గర్ గవురుమ్ దెతి రితి బెదవ అస్సె.

26 ఒండి ఆగ్చి ఏక్ వాటక నొప్పి అయ్లె, తిల వాటల్ ఎత్తిక బాద. ఒండి ఆగ్తెచి ఏక్ వాటక గవురుమ్ అయ్లె, తిలి ఎత్తి, వాటల్క సర్ద.

27 జలె, తుమ్ జోక సంపజలన మొత్తుమ్ క్రిస్తుచి ఆగ్ జా అస్సున్, చి తుమ్చితెచొ ఎత్తి, మాన్యు క్రిస్తుచి ఆగ్క వాట జయెదె.

* 12:13 12:13 గ్రిసు దేసిమ్చ మాన్యుల్క సంగుల, గని ఇన్వ 'గ్రిసు దేసిమ్చ' మెన సంగిలె, యూదుల్ నెంజిలన మొత్తుమ్కయ్ సంగితయ్.

28 పడ్డో, దేముడు మొత్తమ్ సంగుమ్తె వేర కమొచి రిసా, ప్రబు వేర వేర మాన్సుల్క నిసాన అస్సె. తొలితో జోచి నావ్ తెన్ బుల బుల సుబుమ్ కబుర్ నూనయత బారికుల్, పడ్డో జోచ కబుర్లు సంగితనక, పడ్డో బోదన కెర్తన, పడ్డో జోచి సెక్కిక జోచి అదికారుమ్ దెకయత వెల్లెల కమొ కెర్తన, పడ్డో జబ్బు తెన్ తిల మాన్సుల్క చెంగిల్ కెర్తన, పడ్డో బాదల్ తిల మాన్సుల్క తోడు కెర్తన, పడ్డో సంగుమ్చ కిచ్చొ కిచ్చొ కమొక విలువ కెర్తన, పడ్డో వేర వేర బాసల్ తెన్ ప్రబుచ కొడొ సంగితనక తిలన్.

29 ఎత్కిజిన్ ప్రబుచ బారికుల్ జవుల గే? ఎత్కిజిన్ జోచ కబుర్లు సంగితన జవుల గే? ఎత్కిజిన్ బోదన కెర్తన జవుల గే? ఎత్కిజిన్ వెల్లెల వెల్లెల కమొ కెర్తన జవుల గే?

30 ఒండి జబ్బుల్ తిల మాన్సుల్క చెంగిల్ కెర్తి సెక్కి ఎత్కిజిన్క తయొదె గే? వేర వేర బాసల్ తెన్ ప్రబుచ కొడొ సంగితి వరుమ్ ఎత్కిజిన్క తయొదె గే? జేవ్ వేర బాసల్ తెన్ కొడొచ అర్తల్ సంగుక ఎత్కిజిన్క సెక్కి తయొదె గే?

31 జలె తుమ్చి పెట్టి ముక్కిమ్చయ్ అత్తవరల్క తుమ్ ఆన జా. ఈంజయ నెంజ, అన్నె చెంగిలి వాటు దెకయిందె.

13

ఎత్కిచి కంట ప్రేమయ్ ముక్కిమ్

1 మాన్సుల్చ బాసల్ తెన్ కి, దూతల్చ బాసల్ తెన్ కి ఆవ్ లట్టబ్బె కి, అంచి పెట్టి ప్రేమ నెంజెలి, రితి టమ్ము జవున్, కంచు గంటొ బజయిలి అవాడ్ రితి జతయ్.

2 పడ్డో, ఏక్ వేల ప్రబుచ కబుర్లు సంగుక అంక సెక్కి తిలె కి, ప్రబుచ గుట్టుల్ ఎత్కి జోచి రిసాచి గ్యానుమ్ ఎత్కి ఆవ్ జాన్లె కి, డొంగ్రల్ ఉట్టువ ఎదిలి నముకుమ్ అంక తిలె కి, అంచి పెట్టి ప్రేమ నెంజెలి, కామ్క నెంజెలిసా జయిందె.

3 అంక కలుగు జలిసి ఎత్కి ఏక్ వేల బీద సుదల్క పూర్తి వంట దెలికి, 'పున్నిమ్' మెన బలి జతి రితి ఆవ్ ఏక్ వేల అంచి అగ్ అగితె డయాడ్లెకి. అంచి పెట్టి ప్రేమ నెంజెలి, అంక ఎర్గరె కామ్క నెంజె.

4 ప్రేమ, జలె, అమ్చి పెట్టి తిలె, బాదల్ ఓర్పువ జా జినుమ్దె. మెత్తన తా మాన్సుల్క కన్యారుమ్ దెకుమ్దె. ప్రేమ అమ్చి పెట్టి తిలె, గోసల్ జము నాయ్. అమ్చి సొంత గవురుమ్ సంగనుమ్ నాయ్. సొంత గవురుమ్ ఉచరనుమ్ నాయ్.

5 అన్నె మాన్సుల్చి మరియాద కడుమ్ నాయ్. ప్రేమ అమ్చి పెట్టి తిలె, అమ్చి సొంత ఇస్తుమ్ జర్గువ కెరుక ఆన జము నాయ్. కోపుమ్ దెకవుమ్ నాయ్. పెట్టి కోపుమ్ తియనుమ్ నాయ్.

6 అమ్చి పెట్టి ప్రేమ తిలె, పాపుమ్ దెకిలె సర్ల జము నాయ్, గని సత్తిమ్ తిలి కిచ్చొ జవున్ కామ్ దెకిలె, సర్లయ్ జమ్దె.

7 అమ్చి పెట్టి ప్రేమ తిలె, అన్నె మాన్సుల్చ తప్పుల్క ఓర్పువ జమ్దె. నముకుమ్ తెన్ తమ్దె. 'ఎత్కి చెంగిల్ జయిందె' మెన దయిరిమ్ తెన్ తమ్దె. ఎత్కి బాదల్ ఓర్పువ జా నిదానుమ్ తమ్దె.

8 ప్రేమ, జలె, కెయక కి కేడె నాయ్. గని ప్రబుచ కబుర్లు సంగితి కాలుమ్, మాత్తుమ్, కేడెదె. వేర వేర బాసల్ తెన్ ప్రబుచ కొడొ లట్టబ్బెసి కి కేడెదె. గ్యానుమ్ సికడ్డిసి కేడెదె.

9 కిచ్చొక మెలె, అప్పె ఆవ్ గ్యానుమ్ ఇదిలిన్ జానుమ్. ప్రబుచ కబుర్లు సంగితిసి కి ఇదిలిదెల్ సంగితనుమ్.

10 గని పూర్తి జతిన్చి కాలుమ్ అయ్లె, అమ్ ఇదిలిదెల్ జాన్సి కేడెదె.

11 ఆవ్ బాల తిలి పొది బాలబోదచి రితి లట్టబ్బె తిలయ్, బాలబోదచి బుద్ధి తెన్ తిలయ్, బాలబోదచి రితి ఉచర్తె తిలయ్. గని వడ్డిలి తెంతొ, బాలబోదచి రితి ఇండుక ములిలయ్.

12 అప్పెచి మట్టుక ప్రబుచి ఎత్కి కిసి చినితనుమ్ మెలె, గాండు డంకిల్ రితి సొస్తుమ్ డీసె నాయ్; అర్దుమ్తె దెకిలి రితి. గని తెదొడ్కయ్, కిచ్చొ అడ్డు నెంతె, సొస్తుమ్ దెకుమ్దె, అర్దుమ్ కెరనుమ్దె. ఆవ్, జలె, అప్పె ఇదిలిదెల్ జాని. తెదొడ్కయ్ పూర్తి అర్దుమ్ జయెదె. ప్రబు అప్పె కి అగ్గె తెంతొ అంకయ్ కిసి పూర్తి జాన్ గే, దస్సి, తెదొడ్కయ్ జోక ఆవ్ పూర్తి జానిందె, అంక పూర్తి అర్దుమ్ జయెదె.

13 జలె, తిన్ని పాడే నే జతె కెయక తెయక తాఁ గెచ్చుల. కిచ్చో కిచ్చో మెలె, ప్రబుచి రిసాచి నముకుమ్, పడ్డో ప్రబుచి తెడిచి ఆస, పడ్డో ప్రబు దెతి ప్రేమయి. గని, జేవే తిన్నితె ప్రబు దెతి ప్రేమయి గొప్పచి.

14

ఎత్తిజిన్ జాన్లి బాస తెన్ ప్రబుచ కబుర్లు సంగితిసి

1 ప్రబుచి ప్రేమ తెన్ తంక తుమ్ ఆస జా, పడ్డో, జోవయించి ఆత్మచ సెక్తివరల్త ఆస జా. జేవే వరల్తె ముక్కిమ్క దేముడుచ కబుర్లు సంగితి సెక్తివరుమ్కయ్ ఆస జా.

2 కిచ్చోక మెలె, కేన్ జవున్ వేర బాస తెన్ ఎక్కిలో లట్టబ్బె, ప్రబు తెన్ని లట్టబ్తయ్, గని మాన్సు తెన్ నాయ్. మెలె, దేముడుచి సుద్ది తిలి ఆత్మచి తెడి ప్రబుచ గుట్టల్ జో మాన్సు సంగితయ్, గని సూన్తో కేన్ మాన్సుక అర్దుమ్ జెయి నాయ్.

3 గని, తిలస ఎత్తిజిన్ జాన్తి బాస తెన్ ప్రబుచ కబుర్లు కో సంగిలె, సూన్తసక జోవయించి ఆత్మతె డిట్టుమ్ కెరెదె. జేవే నేన్లిసి జేవే సికుక జయెదె, చి నెతిర్లిన్క దయిరిమ్ జంక జయెదె.

4 తిలస నేన్లి బాస తెన్ కో లట్టబ్బె, జో లట్టబ్బోసాకయ్ లాబుమ్, గని తిలస జాన్లి బాస తెన్ ప్రబుచ కబుర్లు కో సంగిలె, నంపజల సంగుమ్ మొత్తుమ్కయ్ లాబుమ్.

5 జలె, తుమ్ ఎత్తిజిన్ ప్రబు దెత వేర బాసల్ తెన్ లట్టబ్బె అంక సర్ల, గని అన్నె కిచ్చో ఆస జతసి మెలె, తుమ్క 'మాన్సుల్ అర్దుమ్ కెరంతి రితి ప్రబుచ కబుర్లు సంగుతు' మెనయ్ అంచి ఇస్తుమ్. సంగుమ్చ మాన్సుల్ అర్దుమ్ కెరంతి రితి సొంత బాస తెన్ కో జలెకు అర్దుమ్ సంగిలెకయ్, సూన్తసక లాబుమ్, ఆత్మతె వడ్డల తిలస నేన్లి బాస తెన్ ప్రబుచి కిచ్చో జవున్ కోడు సంగితి కంట, తిలస జాన్లి బాస తెన్ ప్రబుచి కబుర్ సంగిలె చెంగిలి.

6 బావుడ్డు, అవే తుమ్చితె జా కెర తుమ్ నేన్లి బాస తెన్ లట్టబ్బె, తుమ్ అర్దుమ్ కెరంతి రితి ప్రబు దెకయ్లిసి కిచ్చో జలెకు నే సంగిలె తుమ్క కిచ్చో లాబుమ్? అవే తుమ్చి పాసి జా దేముడుచి నత్తిమ్ సూనవుక నెంజిలె, దేముడుచి రిసా తుమ్క నొవి గ్యాసుమ్చి సికడ్లె జలెకు, జో సంగిలి కబుర్ నే సూనయ్లె జలెకు, జోచి బోద నే సంగిలె జలెకు, అవే దస్సి నే కెర్లె తుమ్క కిచ్చో లాబుమ్! కిచ్చో లాబుమ్ నాయ్.

7 మూరి జలెకు, వీన జలెకు జీవ నెంజిలె రితయ్ బజింత్రుల, కి అవాడ జయెదె. బజినక ఉదరెల్లె సొస్తుమ్ నే బజిలె, మాన్సుల్ రాగుమ్ కిసి చినుల?

8 పడ్డో, జమాన్లుచి నప్పిరమూరి జవున్ సొస్తుమ్ నే బజిలె, యుద్దుమ్ కెరుక మెన జేవే జమాన్లుతె కో తెయార్ జవుల?

9 తుమ్చి తెన్ కి దస్సి, తుమ్ సొస్తుమ్ అర్దుమ్ కెరంతి రితి తుమ్చి జీబ్ తెన్ నే లట్టబ్బె, లట్టబ్బె బాస తెన్ తుమ్ కిచ్చో సంగిలిసి కిసి జానసుమ్చి? తుమ్ మాన్సుల్క నాయ్, గని ఆరి వాదు తెన్ లట్టబ్బె రితి తస్సె.

10 నిజామి, ఈంజ లోకుమ్తె ఒగ్గర్ ఒగ్గర్ బాసల్ తవుల, చి జేవే బాసల్ ఎత్తితె అర్దుమ్ నెంజిలె కొడె తయ్ నాయ్.

11 గని, కేన్ బాస అవే నేన్లె, జా బాస తెన్ ఎక్కిలో లట్టబ్బె, జో అంక వేరయ్ దేసిమ్చ మాన్సు జయెదె, అవే కి జోక వేరయ్ దేసిమ్చ మాన్సు జయెదె.

12 తుమ్చి తెన్ కి దస్సి. ప్రబుచ ఆత్మవరల్త తుమ్క ఆస అన్నెచి రిసా, ముక్కిమ్క నంపజలస మొత్తుమ్ ఆత్మక వడ్డితి రితి ప్రబు దిల వరల్ బుద్ది తెన్, నిదాసుమ్ తెన్ దెరసుక అన్నె.

వేర బాస తెన్ లట్టబ్బె కిన్ తంక

13 ఎత్తిజిన్క కామ్క జెతి, ప్రబుచి కోడు కో వేర బాస తెన్ లట్టబ్బె, 'జా అర్దుమ్ సంగితి సెక్తి దొర్కు జవున్' మెనయ్ తుమ్ ప్రార్దన కెర.

14 అమ్ నేన్లి బాస తెన్ అవే జవున్ ప్రార్దన కెర్లె, అంచి ఆత్మయి ప్రార్దన కెర్తయ్, గని అర్దుమ్ నెంజిలి రిసా అంచి బుద్దితె వలితుమ్ దెరి నాయ్.

15 జాకయ్, ఆవ్ కిచ్చొ కెరుక? అత్తు తెన్ కి ప్రార్దన కెరిందె, మెన్సు తెన్ కి ప్రార్దన కెరిందె. ప్రబుచ గనుమలు అత్తు తెన్ గాయిందె, చి మెన్సుతె అర్దుమ్ తెన్ కి గాయిందె.

16 నెంజిలె, ఏక్ అత్తు తెన్చి తుమ్చితె ఎక్కిలో ప్రబుక కిచ్చొ జవున్ సర్ద తెన్ జోబర సంగిలె, జా నెక్తివరుమ్ నెంజిలన జో సంగిలిన్చి కోడుచి అర్దుమ్ నేన కెర, జో మాన్సుచి సర్దచి జా ప్రార్దనతె కిసి జోచి మెన్సు బెదచ *తెద్దిలి* మెన ఒప్పునుల? నెత్తిరి!

17 నిజమి జో మాన్సు జోచి సర్ద సంగ తయెదె, గని నూన్తో మాన్సుక కిచ్చొ లాబుమ్ నాయ్.

18 తుమ్ ఎత్కిజిన్చి కంట ఆవ్ వేర బాసల్ తెన్ ఒగ్గర్ లట్టబ్బసిచి రిసా ప్రబుక అంచి సర్ద ఆవ్ సంగితసి.

19 గని, సంగుమ్తె ఆవ్ తిలి పొది అన్నెక్తో అర్దుమ్ నే కెరంతి, జేవ్ నేన్చి బాస తెన్ దెన్సు వెయిలు కొడొ లట్టబ్బి కంట, జేవ్ అర్దుమ్ కెరంత బాసచ పాచ్ కొడొ జోవయింక బోదన కెర్రి రితి లట్టబుక అంక ఇస్సుమ్.

నంపజలన అత్తుక వడ్డిత రితి సంగుమ్తె కిచ్చొ కెరుక

20 బావుడ్డు, బాలబోదల్చి బుద్ది తెన్ తుమ్ తా నాయ్. పాపుమచి కామ్క జలె, నేన్ బాలబోదల్ రిత తా, గని బుద్దిచి కామ్క జలె వడ్డిల రిత జా.

21 † మోసి పూర్గుమ్చొచి అత్తి దేముడు రెగ్గయల ఆగ్గల్తె రెగ్గయలి కోడు కిచ్చొ మెలె,

‡ “వేర బాసల్ తెన్ వేర దేసిమ్లుచ మాన్సుల్చి చొడివాల్

ఈంజి దేసిమ్చక బోద కెరిందె.

కెర్రి కి, నూన్తి నాయ్ మెన

ప్రబు సిచ్చుచి తీర్పు సంగితయ్.”

22 జా కోడు నదు కెర్రి, నంపతిలసక నాయ్, గని నంపనెంజిలనకయ్ జేవ్క అన్యానుమచి పాపుమ్ లయితి గుర్చుకయ్ జేవ్ నేన్ బాసల్ తెన్ లట్టబ్బిన్క ప్రబు సెలవ్ దెతయ్. జాన్చి బాస తెన్ ప్రబుచ కబుర్లు సంగితిసి, మాత్రుమ్, నంపనెంజిలనచి రిసా నాయ్, గని నంపజతనకయ్ ‘అర్దుమ్ కెరంతు’ మెనయ్ ప్రబు సెలవ్ దెతయ్.

23 జలె, నంపజలన మొత్తుమ్ సంగుమ్తె బెదితి పొది ఎత్కిజిన్ జేవ్ వేర వేర బాసల్ తెన్ లట్టబ్బి తిలె, వేర మాన్సుల్ జలెకు, ఎగ్గర్ నంప నెంజిలన జలెకు తెడి అయెలె, తుమ్ ఎత్కిజిన్క ‘వెర్రి జా అన్చి’ మెనుల.

24 జాన్చి బాస తెన్ ప్రబుచ కబుర్లు ఎత్కిజిన్ సంగిలె, నంపనెంజిలోసా జవున్, వేర మాన్సు జవున్ తెడి అయెలె, ఎత్కిజిన్ సంగితిసి నూన, జోవయించి పాపుమ్ చినన, జేవ్ ఎత్కిజిన్చి అత్తి సంగిలిన్క జో మాన్సు పరిచ్చు జలి రితి జతయ్. దేముడు దెత్తి తీర్పుల్ నూన్తయ్, చి

25 జోవయించి పెట్టి తిల గుట్టుల్ జోవయింక సొస్టుమ్ డీసుల, చి జోవయించి మొక్కె సెర్చు సేడ, ప్రబుక బక్తి కెరెదె, చి దేముడు తుమ్చి తెన్ తిలిసి జో ఒప్పనెదె.

26 జలె, అన్చొ కిచ్చొ తుమ్క సంగుక, బావుడ్డు? తుమ్ సంగుమ్తె బెదె వెసితి పొది తుమ్చితె ఎత్కి మాన్సుక కిచ్చొ జవున్ అత్తునెక్తి తయెదె. ఎక్కిలో ఏక్ గనుమ్ గయిందె మెన తయెదె, అన్నెక్తో కిచ్చొ జవున్ బోదన కెరుక మెన తయెదె, అన్నెక్తో ప్రబు కిచ్చొ జవున్ దెకవ తిలిసి సంగుక మెన తయెదె, అన్నెక్తో కేన్ జవున్ అత్తుబాస తెన్ కిచ్చొ జవున్ సంగెదె మెన తయెదె, అన్నెక్తో జా కోడుచి అర్దుమ్ సంగెదె మెన తయెదె. సంగుమ్తె కిచ్చొ కెర్రి కి ఎత్కిజిన్క కామ్క జితి రితి తుమ్ కెర.

27 కో అత్తుబాసల్ తెన్ లట్టబ్బన తిలె, ఎక్కి, దొగుల గే తీగ్ల వర్చు తెన్ జేవ్ బాసల్ తెన్ లట్టబ్బు, చి ఎక్కిలో జా అర్దుమ్ సంగును.

28 గని, అర్దుమ్ సంగితోసా ఒత్త నెంజిలె, వేర వేర బాసల్ తెన్ లట్టబ్బొసా సంగుమ్తె తుక్లె తా. జోక జోయ్యి బాసల్ ప్రబు తెన్ లట్టబుక, గని కో నూన్తి రితి నాయ్.

* 14:16 14:16 తెద్దిలి మెలె అవేన్. † 14:21 14:21 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రెగ్గయలి ఆగ్గల్ మెన అమ్ జానుమ్. ఈంజి కొడొ ఎత్కి బైబిల్తె అగేది పాచ్ పున్కుమతె రెగ్గయి జా అన్చొ. ఈంజి దెకపుక మెన కుమయ్ బాసతె నొయి ప్రమానుమతె మోసి పూర్గుమ్చొచి అత్తి రెగ్గిడ్డి దేముడుచ ఆగ్గల్ మెన రగ్లవ అన్చొ. ‡ 14:21 14:21 మెనయ్ 28:11-12, ద్వితీయావదేశ కాండుము 28:49.

29 పడ్డో, ప్రబుచ కబుర్లు సంగితన దొగుల తీగ్ల జోచ కబుర్లు సంగుతు, చి తిల మాన్సుల్ జేవ్ సంగితిన్చి అర్దుమ్ ఉచరంతు.

30 అన్యెక్కోక ఒత్త వెస తిలోసాక ప్రబు కిచ్చొ దెకయ్లె, అగ్గెచొ తుక్లె తంక.

31 కిచ్చొక మెలె, ఎత్తిజన్ వర్స తన్నె ఎక్కిలోచి పడ్డో అన్యెక్కో ప్రబుచ కబుర్లు సంగుక జయెదె. దస్సి వర్స తెన్ లట్టజ్జె, ఎత్తి మాన్సు కిచ్చొ జవున్ సికుక జయెదె, ఎత్తి మాన్సు కిచ్చొ జవున్ అర్దుమ్ నూనుక జయెదె; జాగర్ల సంగితిన్ జలెకి, దయిరిమ్ సంగితిన్ జలెకి.

32 ప్రబుచి కబుర్ జో సంగితి సెక్కిక ముద్దొ కెర్తి సెక్కి జోచి అత్తి అన్యె. తుక్లె తంక నూటి తిలె, తెరె.

33 దేముడు జోచి సంగుమ్తె సేంతుమ్ దెతోసా గని జో అల్లరలు కెర్తొసా నెంజె.

34 ప్రబుచ మాన్సుల్చ సంగుమ్తుల ఎత్తితె కెర్తి రితి, ఒత్తచి సంగుమ్తె కి తేర్బోదల్ తుక్లె తంక. జేవ్ లట్టబుక సెలవ నాయ్, దేముడు మోసి తెన్ దిలి అగ్గుల్తె రెగిడ్డి రితి మున్సుర్పుల్చి తెడి జేవ్ తంక.

35 జేవ్ కిచ్చొ జవున్ పుగుక మెలె, మున్సుర్పుల్చ గెరి పున తంక. తేర్బోద సంగుమ్తె లట్టబుక చెంగిల్ నాయ్.

36 తుమ్ వేర ఉచర్తసు జలె, దేముడుచి కోడు తుమ్చితెయ్ మొదోల్ జలి గే? నెంజలె, ఎక్కి తుమ్ నూన అస్సున్ గే?

37 'ప్రబుచ కబుర్లు సంగితొసా ఆవ్' మెన అన్నె కో ఉచర్లె, 'ప్రబుచి ఆత్మసెక్కి తతోసా ఆవ్' మెన అన్నె కో ఉచర్లె, ఆవ్ తుమ్క రెగిడ్డిన్క 'ప్రబుయి దిలిసి ఆడ్ర' మెన జో ఒప్పునుక.

38 జో ఈంజ ఒప్పునె నాయ్ గే, జో మాన్సుక 'ప్రబుచి ఆత్మసెక్కి తిలోసా' మెన ఆమ్ ఒప్పునుమ్ నాయ్.

39 జలె, బావుడ్లు, ప్రబుచ కబుర్లు సంగిమదె మెన తుమ్ ఆన జా, చి జోచి ఆత్మసెక్కిక వేర బాసల్ తెన్ లట్టబ్బిన్క అడ్డు కెర నాయ్,

40 గని కిచ్చొ కెర్లె కి, బుద్ది తెన్ మరియాద్ తెన్ సేంతుమ్ తెన్ కెరన.

15

యేసుక్రీస్తు మొర కచితుమ్ అన్నె జివ్ జలిన్

1 జలె, అప్పె బావుడ్లు, సుబుమ్ కబుర్ సంగితి రిసాచి తుమ్క ఉచార కెరయిందె. ఈంజ సుబుమ్ కబుర్ తుమ్క నూనయ్లె పొది కిచ్చొ కిచ్చొ సంగిలమ్ గే, తుమ్ ఉచర. జా ఎత్తి తుమ్ నూన నంపజలదు.

2 ఆవ్ సంగిలి సుబుమ్ కబుర్చి తుమ్ నే పచ్చితె నిదానుమ్ జా అస్సున్ జలె, జాచి రిసా రచ్చించుప జతె అస్సున్. గని నంపజలన తెన్ తుమ్ బెదిలిసి ఆరిచి జలె, తుమ్క నముకుమ్ నాయ్.

3 జలె, అంక దిలిన్క 'ఎత్తిచి కంట ముక్కిమ్చి, జా' మెనయ్ తుమ్క ఆవ్ అన్నె తిలయ్. కిచ్చొ కోడు మెలె, 'జర్లు జయెదె' మెన పూర్లుమ్ దేముడుచి కొడతె రెగ్గయ్లి రితి, అమ్చ పాపల్ గెచ్చయ్తి బలి జతి రిసా క్రీస్తు మొర,

4 రోయి జా, 'జర్లు జయెదె' మెన దేముడుచి కొడతె అగ్గె రెగిడ్డి రితి తిర్తతక అబ్బొసి జోక అన్నె జియద ఉట్టయ్లన్.

5 *కేపాక, పడ్డో బారజన్ సిస్సుల్ మొత్తుమ్క డీసిలన్.

6 పడ్డో పాచ్ పుంజొ జిన్చి కంట ఒగ్గర్జిన్ నంపజలనక ఎక్కి సుటు డీసిలన్. జోవయింతె అప్పెక ఒగ్గర్జిన్ జివ్వె అస్సి, గని సగుమ్జిన్ మొర గెల.

7 పడ్డో, యాకోబుక డీసిలన్. పడ్డో సుబుమ్ కబుర్ నూనపుక మెన జో నిసాన్ల బారికుల్ ఎత్తిజిన్క డీసిలన్.

8 పడ్డో, ఆవ్ అగ్గె జోచొ సిస్సుడు నెంజ తా, ఆవ్ సరి జతి సమయుమ్క నే జెర్మిలోసా జలి కి, ఆకర్క అంక కి డీసిలన్.

9 జోచ బారికుల్ ఎత్తిచి కంట ఆవ్ దాక్ జయిందె. 'జోచొ బారికి' మెననుక ఆవ్ విలువ కి నాయ్. కిచ్చొక మెలె, జో దేముడుచ బక్తల్ జల నంపజలన్క ఆవ్ అగ్గె † అల్లర్ కెర్తె తిలయ్.

* 15:5 15:5 మెలె 'పేతురు'. † 15:9 15:9 బారికుల్ 9:1-3.

10 గని జో దేముడుచి దయచి రిసా *రచ్చించువ జా జోచొ బారికి ఆవ్ జా అన్నీ, చి అంక కెర్లి దయ ఆరిచి నెంజె. జేవ్ ఎత్తిజినిచి కంట ఆవ్ ఒగ్గర్ కామ్ కెర అన్నీ, జా అంచి సొంత నెక్తి తెన్ నాయ్, గని అంచి పెట్టి తిలి దేముడుచి దయయ్ అన్నె ఈంజ కామ్ కెరవ అన్నె.

11 ఆవ్ నుబుమ్ కబుర్ నూనయ్ లె కి, జేవ్ నూనయ్ లె కి, అమ్ ఒండి ఈంజయ్ ఎక్కి నుబుమ్ కబుర్ బోదన కెర్లనుమ్చి, తుమ్ నంపజలదు.

క్రీస్తు అన్నె జీవ్ జా ఉట్టిసి మాన్సుల్ అన్నె జీవ్ జా ఉట్టుక

12 జలె, క్రీస్తు 'మొర్తికయ్, దేముడు జోక అన్నె జియడ ఉట్టయ్ లన్' మెన నుబుమ్ కబుర్ తిలె, 'మొర్లన అన్నె జీవ్ జా ఉట్టితి నాయ్' మెన తుమ్చితె సగుమ్ జిన్ కీసి సంగుక జయెదె?

13 మొర, అన్నె జీవ్ జా ఉట్టుక నెంజె మెలె, క్రీస్తు కి 'జీవ్ జా ఉట్టి నాయ్' మెనుక జయెదె.

14 క్రీస్తు అన్నె జీవ్ జా ఉట్టి నాయ్ జలె, ఆవ్ బోద కెర్లిసి, తుమ్చి నముకుమ్ ఎత్తి, ఆరి.

15 అన్నె దస్సి తిలె, దేముడుచి రిసాచి అమ్చి సాచి అబద్దుమ్చి జా తయెదె. కిచ్చొక మెలె, జోక 'క్రీస్తుక అన్నె జీవ్ కెర ఉట్టయ్ లన్' మెన సాచి సంగిలమ్. గని 'మొర్లన జీవ్ జా ఉట్టితి నాయ్' మెలిన్ ఏక వేల నిజుమ్ జలె, యేసుక కి జో దేముడు జియడ ఉట్టవ తయె నాయ్.

16 కిచ్చొక మెలె, మొర్లన అన్నె జీవ్ జా ఉట్టితి నాయ్ మెలె, 'క్రీస్తు కి అన్నె జీవ్ జా ఉట్టి నాయ్.'

17 క్రీస్తు అన్నె జీవ్ జా ఉట్టి నాయ్ మెలె, తుమ్చి నముకుమ్ ఆరి అన్నె మెనుక జతి, చి ఎప్పెక తుమ్చ పాపల్ తెన్ని అస్సున్ మెనుక జయెదె.

18 జా నిజుమ్ జలె, క్రీస్తుక నంపజలన మొర్లన కి నాసెనుమ్తె గెచ్చ తవుల.

19 ఎక్కి ఈంజ లోకుమ్తెచి అమ్చి జీవితుమ్చి రిసా క్రీస్తు అమ్క కామ్క జయెదె మెన అమ్చి నముకుమ్ తిలె, ఈంజ లోకుమ్చ మాన్సుల్ ఎత్తిచి కంట, అమ్మి నిస్కారుమ్ తిలన జమ్దె.

20 గని నిజుచి క్రీస్తు మొర్లు తెంతో జీవ్ జా ఉట్టి కెర, మొర అన్నె జీవ్ జా ఉట్టుక తిలనకతె తొల్పర్ జా అన్నె.

21 సీతొలితొచొ మాన్సు ఆదాము పాపుమ్ కెర్లిన్చి రిసా మొర్లు మొదొల్ జా అయ్లి. గని మొర్లు తెంతో అన్నె జీవ్ జా ఉట్టుక అన్నెక్లో మాన్సు తెంతో అయ్లి.

22 ఆదాముచి తెడి ఈంజ లోకుమ్చ ఎత్తిజిన్ మొర గెతతి, దస్సి క్రీస్తుచి తెడి తిలన ఎత్తిజిన్ అన్నె జీవ్ జా ఉట్టుల.

23 గని ఎత్తిజిన్ సరిగా వర్ల తెన్ అన్నె జీవ్ జా ఉట్టుక అన్నె. తొలితొ తొల్పర్ జలొ క్రీస్తు అన్నె జీవ్ జా ఉట్టి అన్నె. వడ్డె, జో ఈంజ లోకుమ్తె అన్నె ఉత్త జెతి దీసిక జోచయ్ జల మాన్సుల్ కి జీవ్ జా ఉట్టుల.

24 జా జర్ల జలి వడ్డెక, ఆకర్క, * అదికారుమ్ తిలిన్ ఎత్తిచి ఉప్పిరి, † అదికారుమ్ ఎత్తిచి ఉప్పిరి, ‡ నెక్తివొ ఎత్తిచి ఉప్పిరి జో జీన గెచ్చ కెర, యేసు జోచి రాజుమ్ దేముడు అబ్బొన్చి అత్తి అన్నె సార్ల కెర దెయెదె. తెదొడి ఆకర్ జయెదె.

25 మదెనె, జోచ విరోదుమ్ నుదల్ ఎత్తిక, జో జిన్తె ఎదక, క్రీస్తు సొంత ఏలువ కెరుక అన్నె.

26 జా ఆకర్క నాసెనుమ్ జలి విరోది, మొర్లు.

27 సీ"జో ఏలువ కెర్లి రిసా, దేముడు

ఎత్తి జోచి అత్తి సార్ల కెర దా అన్నె"

మెన రెగ్ల అన్నె. మదెనె క్రీస్తుచి అత్తి ఎత్తి సార్ల కెర దిలోసా అబ్బొసి. జో అబ్బొన్కయ్ పిట్టవ, ఎత్తి క్రీస్తుచి అదికారుమ్ తెంతో అన్నె.

‡ 15:10 15:10 బారికల్ 9:4-6. § 15:21 15:21 రోమెయ్ 5:14-21, అదికాండుమ్ 3 అద్యయమ్. * 15:24 15:24 ఎవెను 1:21 దెక. జేవ్ పాదులె ఈంజేవ్ తిన్ని కొడొ నంగిలె, దూతల్ బూతల్ గట్టచి రిసా సంగితె తిల. కొలోస్సియూల్ 1:16 కి దెక.

† 15:24 15:24 ఎవెను 1:21 దెక. జేవ్ పాదులె ఈంజేవ్ తిన్ని కొడొ నంగిలె, దూతల్ బూతల్ గట్టచి రిసా సంగితె తిల. కొలోస్సియూల్ 1:16 కి దెక. ‡ 15:24 15:24 ఎవెను 1:21 దెక. జేవ్ పాదులె ఈంజేవ్ తిన్ని కొడొ నంగిలె, దూతల్ బూతల్ గట్టచి రిసా సంగితె తిల. కొలోస్సియూల్ 1:16 కి దెక.

§ 15:27 15:27 కిర్చనలు 8:6.

28 క్రీస్తు ఎత్తికొని జీన కేడయాలె, ఈంజ మదెనె జోచి అత్తి జా ఎత్తి, సార్ప కెర తిలో అబ్బోనచి అత్తి తెదొడకయ్ జోయ్యి అన్నె సార్ప కెర దా, జోయ్యి అబ్బోనచి తెడి కి తయెదె. దస్సి దేముడు అబ్బోనచి ఎత్తికొనూర్తి సొంత వలువ కెరెదె.

అన్నె జీవ్ జా ఉట్టుమదెచి రిసా బుద్ది ఇండ

29 మొర్లస అన్నె జీవ్ జా ఉట్టితి నాయ్ మెలె, సగుమ్జన్ కిచ్చొక మొర్లసచి రిసా బాప్తిసుమ్ నజన్తతి? మొర్లస ఎద్దెర అన్నె జీవ్ జా ఉట్టితి నాయ్ జలె, జోవయించి రిసా సగుమ్జన్ కిచ్చొక బాప్తిసుమ్ నజన్తతి?

30 మొర్లస అన్నె జీవ్ జా ఉట్టితి నాయ్ జలె, 'మొర్లిసి జీవ్ జా ఉట్టుల' మెన ఆవ్ కిచ్చొక కెడ్డొడ తెదొడ మొర్తి ప్రమాదుమ్ ఆనయ్తసి? జీవ్ జా ఉట్టుక నెంజె మెలె, ఇసి జత తత్తయ్ గే?*

31 నాయ్, బావ్పుడు, తుమ్ నంపజలి రిసా ఆవ్ ప్రబుచి తెడి కెడ్డి గవురుమ్ ఉవరంతసి గే, తెడ్డి కచితుమ్ ఆవ్ కిచ్చొ సంగితసి మెలె, రోజుక ఆవ్ మొర్లసి.

32 ఎవెసు పట్టుమతె, జేవ్ కెల్త కెల్లి రితి ఆవ్ జంతువుల్ తెన్ జుజ్జల్ రితి జలయ్. ఆవ్ దస్సి జతినతె ఈంజయ్ లోకుమతె అంక కిచ్చొ లాబుమ్! కిచ్చొయ్ లాబుమ్ నాయ్. మొర్లస అన్నె జీవ్ జా ఉట్టితి నాయ్ జలె, ప్రబుచి రిసా కిచ్చొ అల్లర్ నేడ్డె కక్క లాబుమ్ నాయ్, చి

† "కలిక ఆవ్ మొరిందె చి రిసా

ఆజి కంక, పియ కెర, ఎదిల్ నర్ద కెరుమ్!"

మెనుక జతి.

33 తుమ్ మోసిమ్ జా నాయ్! "పాపుమ్బుద్దిచ మాన్పుల్ తెన్ బెదిలె, వెంగిల్ బుద్ది తిలోసా కి పాడ్ జయెదె" మెన సంగితి కోడు నిజుమ్.

34 అలె, ఉట్టు! బుద్ది జా పాపుమ్ ముల! సగుమ్జన్ దేముడుక ఎద్దెర నేనీతి, చి జోవయించ రుజ్జుల్ దెకవుక అన్నె! తుమ్క 'లాజ్ జా జతు' మెనయ్ ఆవ్ ఇసి సంగితసి.

మొర, నొవి పొలిక జా పరలోకుమతె జెర్తితిన్

35 గని తుమ్చితె కో గే కిచ్చొ పునెదె మెలె, "మొర గెలస కీసి జా అన్నె జీవ్ జా ఉట్టుల? ఉట్టి, కిచ్చొ రగుమ్ ఆగ్ తెన్ తవుల?" మెన పునెదె.

36 ఓ బుద్ది నెంజోలోసా, తుక వెర్రి! కిచ్చొ జవున్ బి గలిలె, ఉప్పిరచి చామ్ మొర్లెకయ్ జయె మొక్క జయెదె!

37 బీ గలితొసా గోదుమ్ గే, కిచ్చొ జవున్ వేర గిడ్డల్ గే పంటో జంక జలె, జేవ్చి రూపుమ్ జా గలిలి బీక వేర జతయ్. జా గలిలి బి ఎత్తి గిడ్డయ్, జా ఉట్టితిసి మొక్కయ్.

38 గని జా బి జీవ్ జా ఉట్టు గజ్జల్ జంక జలె, జో నిన్నా రూపుమ్ దేముడు దెయెదె. ఏక్ రగుమ్ గిడ్డల్చ మొక్కల్చ ఏక్ రూపుమ్, అన్నెక్ రగుమ్ గిడ్డల్చ మొక్కల్చ అన్నెక్ రూపుమ్ జో దెయెదె.

39 ఆగ్ తిలసక జలె, వేర వేర రగల్ రూపుములు తవుల. మాన్పుల్చ ఏక్ రగుమ్, జంతువుల్చ అన్నెక్ రగుమ్, పిట్టల్చ అన్నెక్ రగుమ్, మొన్నక అన్నెక్ రగుమ్.

40 పడ్డొ వేర లోకుమ్చ జివుల్చ ఏక్ రగుమ్ రూపుములు తవుల, గని ఈంజ లోకుమ్చ జివుల్చ వేర రగుమ్ రూపుములు తవుల. వేర లోకుమ్తె తిలిన్చి ఉజిడి ఏక్ రగుమ్ డీనెదె, ఈంజ లోకుమ్తె తిలిన్చి ఉజిడి అన్నెక్ రగుమ్ డీనెదె.

41 పొద్దుక ఏక్ రగుమ్ ఉజిడి తయెదె, సుక్కల్చ ఏక్ రగుమ్ ఉజిడి తయెదె, జోసుక అన్నెక్ రగుమ్ ఉజిడి తయెదె. అన్నె ఏక్ సుక్కొచి ఉజిడి ఏక్ రగుమ్, అన్నెక్ సుక్కొచి ఉజిడి అన్నెక్ రగుమ్ తవుల.

42 మొర్లస అన్నె జీవ్ జా ఉట్టితిన్ తెన్ కి దస్సి. బి గలిలి ఈంజ ఆగ్ జలె, మొర్లిసి. అన్నె జీవ్ జా ఉట్టితిన్, జలె, మొర్లిసి నెంజె.

* 15:30 15:30 మెలె, జో దస్సి మెన సుబుమ్ కబుర్ నూనయ్తె తత్తయ్, చి జా కోడు సూక నెలస కోవుమ్ జా జోవయింక మారుక ఉచర కిచ్చొ కిచ్చొ సిచ్చల్ కెర్తతి. † 15:32 15:32 యెనయా 22:13.

43 బి గలిలి ఈంజ ఆగ్గేక గవురుమ్ నాయ్. అన్నె జీవ్ జా ఉట్టి మాత్రుమ్, అమ్మిది అగ్గే పరలోకుమ్మిది ఉజ్జడే తెన్ గవురుమ్ తెన్ తయెదె. బి గలిలి ఈంజ ఆగ్గేక నెక్తి నాయ్, గని అన్నె జీవ్ జా ఉట్టి, అమ్మిది అగ్గే పరలోకుమ్మిది నెక్తి తెన్ తయెదె.

44 బి గలిలి ఈంజ అగ్గే ఈంజ లోకుమ్మిది అగుచి జయెదె, గని అన్నె జీవ్ జా ఉట్టి, పరలోకుమ్మిది అగ్గే రగుమ్ తయెదె. ఈంజ లోకుమ్మిది అగ్గే రగుమ్చ అగ్గేచ అన్ని జలె, పరలోకుమ్మిది అగ్గేచ రగుమ్చ అగ్గేలు కి తవుల.

45 దేముడుచి కొడొతె రెగ్గయ్లి రితి;

‡“దేముడు తొలితో జెర్వయిలో మాన్సు అదాము జీవ్ తిలి ప్రానుమ్ జలన్”

క్రిస్తు జలొ ఆకర్చొ అదాము, మాత్రుమ్, జీవ్ దెతో ఆత్మయి జలన్.

46 ఆత్మతె జెర్వన్ జలని తొలితో జెయి నాయ్. తొలితో అగ్గేకయ్ జెర్వన్ జయెదె. పడ్డొకయ్ ఆత్మతె జెర్వన్ జయెదె.

47 తొలితోచొ మాన్సు బుయిచి మత్తి తెంతొ జెర్వొలోసా జలన్. పడ్డొచొ మాన్సు, మాత్రుమ్, పరలోకుమ్ తెంతొ జెర్వొలన్.

48 మత్తి తిలోసా కీసా తిలో గే, జోచి పడ్డొ జెర్వొల మత్తి తెన్ తిలన ఎత్తిజన్ దన్నయ్. పరలోకుమ్ తిలోసా కీసా గే, పరలోకుమ్మిది జెర్వన్ జలన ఎత్తిజన్ కి దన్నయ్ జవుల.

49 అప్పె మత్తితె తిలోసాచి పోలికతెన్ అన్నుమ్. దన్న, పరలోకుమ్ తిలోసాచి పోలిక కి జమ్దె.

50 బావుడ్లు, ముక్కిమ్క తుమ్క ఆవ్ కిచ్చొ సంగితని మెలె, ఈంజ లోకుమ్మిది అగ్గే ఈంజ లోకుమ్మిది లోయ దేముడుచి రాజిమ్తె బెదుక నెత్తె. మొర్తిసి నే మొర్తిన్తె గెచ్చుక నెత్తె. మొర్తిన్క ఒత్తయ్ వాట తయె నాయ్. జాకయ్, ఒత్తయ్ గెచ్చుక జలె, మొర్తిన్ జతిక నే మొర్తిన్క పాయె నాయ్.

51 ఈందె, దేముడు దెకయ్లి గుట్టు తుమ్క సంగితని. ఆమ్ ఎత్తిజన్ మొరుమ్ నాయ్, అమ్ నంపజలన ఎత్తిజన్ మార్పుప జమ్దె.

52 ఈంజ ఉగుమ్మిది అకర్క ప్రబు నప్పిర్మూరి పుజెలె, అంకి రెప్ప నే పెడ్డె బేగి మార్పు జమ్దె. జో నప్పిర్మూరి పుజెలె, మొర్లన్ పరలోకుమ్తె బెదితి నే మొర్తి పోలిక జా అన్నె జీవ్ జా ఉట్టుల కి, జీవ్ తిలనయ్ కి దన్న పోలిక జా మార్పుప జవుల.

53 కిచ్చొక మెలె, పాడ్ జతి ఈంజ అగ్గే పాడ్ నే జతి రగుమ్ జా మార్పుప జంక అన్నె. మొర్తి ఈంజ అగ్గే నే మొర్తి రగుమ్ జా మార్పుప జంక అన్నె.

54 పాడ్ జతిసి పాడ్ నే జతిసి జా మార్పుప జలి మెలె, దేముడుచి కొడొతె రెగ్గయ్లి కోడు తెదొడకయ్ నెరవెర్పుప జయెదె.

‡“మొర్చుక పాడ్ కెర గెల కెర,

పరలోకుమ్చొ దేముడు జీన అన్నె”

మెన ఏక్, పడ్డొ,

55 *“ఓ మొర్చు, కేతె జిన్దది?

ఓ మొర్చు, కేతె తుచి విన్నుమ్?!”

మెన అన్నెక్ కోడు నెరవెర్పుప జయెదె.

56 జలె, మొర్చుచి విన్నుమ్ కేతె మెలె, పాపుమ్తె. †దేముడు తొలితో దా తిలి అగ్గొల్ పాపుమ్మిది నెక్తి.

57 గని, జో దేముడుక జెయ్యి! అమ్చొ ప్రబు జలొ యేసుక్రిస్తుచి అత్తి జో అమ్క జీనవ అన్నె!

58 జాకయ్, ప్రేమ తిల బావుడ్లు, డిట్టుమ్ తా అన్మానుమ్ నే జతె, ప్రబుచి తెడి తుమ్ స్రమ నేడె కెర్తె కామ్ ఆరి కామ్క నెంజెలిసి నెంజె మెన జానయ్, జోచి కామ్ తుమ్ నిదానుమ్ తెన్ కెర్తె తా.

16

బీదల్చిది రిసా డబ్బుల్ ఉక్కుల్క

1 జలె, యెరూసలేమ్తెచ యూదుల్తెచ బీద జల సంపజలసచి రిసా డబ్బుల్ ఉక్తతిలిన్చి రిసా కిచ్చొ మెంతసి మెలె, గలతీయ ప్రాంతుమ్చ సంగుమ్లక అవ్ సంగిలి రితి, తుమ్కయ్ కి “దస్సి కెర” మెన అవ్ సంగితసి.

2 మెలె, ఎత్తి అయ్తరి తుమ్చితె ఎత్తి మాన్పు, గెలి సత్తరెక్క ప్రబు కెడ్డి లాబుమ్ జోవయింక దొర్కు కెర తయెదె గే జేవ్ దెక, జాక ఏక వాట తియ తంక, చి సత్తరెక్క సత్తరెక్క సర్దు కెర్లె, ఒగ్గర్ జా తయెదె. చి అవ్ జెతి పొదిక ఉక్కుల్క తుమ్ బమ్మ జంక నాయ్.

3 పడ్డె, అవ్ అయ్లె, ‘నిదానుమ్ కెరుల’ మెన తుమ్ కక్క కక్క నిసాన్తె గే, జా గుర్తుక అవ్ ఉత్తల్ రెగ్గ దెయిందె, చి తుమ్ ఉక్కుల దెతి డబ్బుల్ యెరూసలేమ్ పట్టుమ్తె జోవయింక అత్తి తెద్రయిందె.

4 అవ్ కి గెలె చెంగిల్ మెన డీసిలె, అంచె తెన్ జేవ్ జెవుల.

కొరింధీల్తె పవులు గోత్ గెచ్చుక ఉచర్లెన్

5 అవ్ మాసిదోనియ వాల్ గెచ్చుక ఉచర అస్సి, చి ఒత్త గెలయ్ మెలె, తుమ్తె గోత్ జెయిందె,

6 చి ఏక వేల ఇదిల్ ఒగ్గర్ సేంపు తుమ్చి తెన్ తయిందె, నెంజెలి ఒండి చల్లి పొది కి ఒత్త తంక జయెదె, చి ఒత్త తెంతో అవ్ కేన్ ప్రయానుమ్ గెలె కి, తుమి అంక బార్ కెర తెద్రవుక జయెదె.

7 అవ్ అప్పె వాల్ గెతి పొది తుమ్క గడియ దెక ఉట్ట గెచ్చుక నెసి, గని ప్రబు సెలవ్ దిలె, పడ్డె గెలె, తుమ్చి తెన్ సగుమ్ సేంపు తా గెచ్చుక జయెదె. జయ్యి అంచె ఆస.

8 గని మదెనె, పెంతెకొస్టు పండుగు ఎద ఇన్నె ఎపెనుతె తయిందె.

9 కిచ్చొక మెలె, అప్పె ఇన్నె నుబుమ్ కబుర్ కామ్ ఒగ్గర్ కెరుక అంక వాటు దొర్కు జా అస్సి. గని విరోదుమ్ సుదల్ ఒగ్గర్జెన్ పిట్టవుక ఉచర అస్సి, చి అవ్ తిలెకయ్ చెంగిలి.

తిమోతి కొరింధీల్తె గెచ్చుక తిలిసి

10 తిమోతి తుమ్తె అయ్లె, తుమ్ సర్ల తెన్ బెదవన. అవ్ కెర్తి రితి, జో కి ప్రబుచి కామ్ కెర్తయ్.

11 జాకయ్, జో దాకు జలెకి కో జోక నిస్కారుమ్ దెక నాయ్. జో అంచెతె అన్నె ఉట్ట జెంక మెన బార్ జతి పొదిక సర్ల తెన్ తుమ్ జోక అన్నె తెద్రవ. అవ్ తెద్రయల అన్నె బావుడ్లు తెన్ జో ఉట్ట జెతినక అవ్ రకితసి.

12 అన్నె బావుడ్లు తెన్ తుమ్తె గోత్ గెస్సు మెన, అమ్చొ బావొ జలో అపొల్లోక బలవంతుమ్ కెర్తయ్, గని అప్పె గెచ్చుక జోక సెలవ్ నాయ్. జోక వాటు తిలె, పడ్డెకయ్ తుమ్తె జెయెదె.

13 తుమ్ తెలివి తెన్ జాగర్ల తెన్ తా, తుమ్చి నముకుమ్ డిట్టుమ్ దెరన, దయిరిమ్ తెన్ ఇండ, డిట్టుమ్ తా.

14 తుమ్ కిచ్చొ కెరుక జలెకి, ప్రేమయ్ తెన్ కెర.

15 జలె, బావుడ్లు, ఒండి అకయ ప్రాంతుమ్తె సైవనుచి గెర్వ తోలితో ప్రబుక సంపజల, చి ఎక్కి నిదానుమ్ తెన్ సంపజలన్క దెక తోడు తా అస్సి.

16 దస మాన్సుల్క చి అమ్చి తెన్ సైమ సేడ ప్రబుచి కామ్ నిదానుమ్ కెర్త ఎత్తిజెన్క తుమ్ మరియాద దెక.

17 సైవను, పొర్మానాతు, చి అకయక ఇన్నె ఉట్ట అయ్లిన్చి రిసా అంక ఒగ్గర్ సర్ల. కిచ్చొక మెలె, తుమ్ ఇన్నె నెంజెలి కి, జేవ్ అయ్లిన్ తెన్ తుమ్ అంచె తెన్ తిలి రితి జతయ్.

18 తుమ్చి ఆత్మక జేవ్ కిసి అన్నె డిట్టుమ్ కెర్ల గే, దస్సి అంకయ్ కి సర్ల కెర అస్సి. దస మాన్సుల్క తుమ్ మరియాద దెక.

కచి కచి ముద్దు సంగ తెద్రయ్లిసి

19 ఆసియా ప్రదేసిమ్చ సంగుమ్లు ఎత్తి తుమ్క జోవయింక ప్రేమ సంగ తెద్రయ్తతి. పడ్డె అకుల ప్రిస్కిల్ల జోవయింకె గెరి సబ కెర్తి సంగుమ్చ ఎత్తిజెన్ తెన్ ప్రబుచి నావ్ తెన్ చి జోవయింక ప్రేమ కి సంగ తెద్రయ్తతి.

20 సంపజల ఇన్నెచ బావుడ్లు ఎత్తిజెన్ జోవయింక ప్రేమ సంగ తెద్రయ్తతి. ఎక్కిలోక ఎక్కిలో తుమ్చి ప్రేమ దెకయ్తి రితి ప్రబుచి నావ్ తెన్ సుద్ది తిలి ముద్దు తెన్ జొకర.

ఆకర్ కోడు

- 21 ఆదీ పవులు సొంత ఆతు తెన్ ఈంజ ఆకర్ కోడు రెగిడ్డిసి. ఆదీ రెగ్లయ్లిసి తుమ్ జాస్సు.
- 22 తుమ్చితె కో ప్రబుక ప్రేమ కెరె నాయ్ గే, ప్రబు జోక సిచ్చతె తెద్రవున్. అమ్చొ ప్రబు, తుయి జె!
- 23 ప్రబుచి దయ తుమ్చి తెన్ తవున్.
- 24 యేసుక్రీస్తుచి తెడి అమ్చి ప్రేమ కి తుమ్చి తెన్ తవున్. *తెద్దిలి.

* 16:24 16:24 తెద్దిలి మెలె ఆమేన్.

కొరింథియుల్క రెగిడ్లి దొన్నిచి ఉత్తుమ్ బారిక్ జలో పవులు కొరింథ్ పట్టుమ్చ సంగుమ్చక రెగిడ్లి దొన్నిచి ఉత్తుమ్

మొదొల్ కోడు

1 దేముడుచి నెలవ్చి రిసా, క్రీస్తు జలో యేసుచి రిసా సుబుమ్ కబుర్ నూనయ్తో జోచొ బారికి జా అస్సి పవులు రెగిడ్లిసి. కొరింథ్ పట్టుమ్తెచి దేముడుచ సంగుమ్చక, చి ఒండి అకయ ప్రదేసిమ్తెచ జోచయ్ జల అన్నె మాన్సుల్క ఆవ్ పవులు తిమోతి తెన్ రెగిడ్లి ఉత్తుమ్.

2 అమ్క అబ్బొ జలో దేముడుచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్.

3 ఎత్తి దయక అబ్బొ జలో, అమ్చి అత్తతె అమ్క డిట్టుమ్ దయిరిమ్ కెర్తొ దేముడు జలో, అమ్చొ ప్రబు జలో యేసుచొ దేముడు అబ్బొనకయ్ జోబర.

4 అమ్చ బాదల్ ఎత్తితె జో అమ్క డిట్టుమ్ దయిరిమ్ కెర్తయ్, చి జో అమ్కయ్ కెర్తి డిట్టుమ్ దయిరిమ్చి రిసా, అన్నె కీన బాదల్ సేడ్లనక ఆమ్ కి డిట్టుమ్ దయిరిమ్ కెరుక జతయ్.

5 కీసి మెలె, క్రీస్తు సేడ్ల సైమల్తె ఆమ్ కీసి బెదితనుమ్ గే, దస్సి, జోచి తెడి తా, జో దెతి డిట్టుమ్తె దయిరిమ్తె కి అమ్ బెదితనుమ్.

6 తుమ్క 'డిట్టుమ్ దయిరిమ్ జతు, రచ్చించుప జతు' మెనయ్ అమ్ సైమల్ సేడ్లనుమ్. తుమ్కయ్ 'డిట్టుమ్ దయిరిమ్ జతు' మెనయ్ ప్రబుయి అమ్కయ్ డిట్టుమ్ దయిరిమ్ కెర్తయ్. ఆమ్ సేడ్ల అల్లర్ తూమ్ కి సేడ బమ్మ నే జతె ఓర్పుప జలె, జోచి డిట్టుమ్ దయిరిమ్ తూమ్ కి జస్సె.

7 తుమ్చి రిసాచి అమ్చి నముకుమ్ పిట్టె నాయ్. కిచ్చొక మెలె, ఆమ్ సేడ్ల సైమల్ తూమ్ కి సేడ్లె, అమ్కయ్ దొర్కు జతి డిట్టుమ్ ఆన దయిరిమ్ తుమ్కయ్ కి దొర్కు జయెదె.

8 ఓ బావుడ్లు, అసియా ప్రదేసిమ్తె అమ్ సేడ్లి బాద కెర్తి గే తుమ్ నే జానతి రితి జలె, చెంగిల్ నాయ్ మెన అమ్ ఉచర్తనుమ్. జా బాద కెర్తి మెలె, అమ్క కెర్తి పెల్లితె తిలి మెలె, 'ఓర్పుప జంక నెత్తుమ్ ఒగ్గర్ మొరుమదె గే కిచ్చొగే' మెలి రితి అన్యూనుమ్ అమ్క పెలిత్ తిలి.

9 నిజామి, మొర్తి సిచ్చ అమ్ వయిలి రితి అమ్క పెట్టి డీసిలి; తెడ్లి బాద తిలి. గని అమ్ తెడ్లి బాద సేడుక ప్రబు కిచ్చొక నెలవ్ దిలన్ మెలె, అమ్చి సొంత సెక్తిక అమ్ నే నంప కెర్తి, మొర్తనక అన్నె జియడ్లి దేముడుకయ్ అమ్ నంప కెరుకయ్ అస్సుచి రిసాయి జో జా నెలవ్ దిలన్. సొంత సెక్తిక కిచ్చొ నెత్తుమ్.

10 తెడ్లి ప్రమాదుమ్ తెంతో జో అమ్క రచ్చించుప కెర్తన్, చి అన్నె దస్సి అల్లర్ సేడ్లె, అన్నె అమ్క రచ్చించుప కెరెదె మెన అమ్క దయిరిమ్. 'జొయ్యి అమ్క అన్నె రచ్చించుప కెరెదె' మెన, జోచి ఉప్పిరి అమ్ పూర్తి నముకుమ్ తియె అస్సుమ్.

11 అమ్చి రిసా తూమ్ కి ప్రార్తన కెర కెర అమ్క తోడు తా, చి ఒగ్గర్జిన్ ప్రార్తన కెర్తి రిసా ప్రబు అమ్క రచ్చించుప కెర్తొ మెనయ్, ఒగ్గర్జిన్ జోచి సర్ల సంగుల.

కొరింథిల్క పవులు నిదానుమ్ కెర్తిసి

12 జలె, సర్ల తెన్ కిచ్చొ సాచి సంగతనుమ్ మెలె, ప్రబుచి సుద్ది తెన్ జోచి ఎక్కి నిదానుమ్ తెన్ ఈంజ లోకుమ్తె, ముక్కిమ్క తుమ్చితెయ్ ఇండ అస్సుమ్; మాన్సుచి సెక్తి గ్యూనుమ్క నాయ్, గని దేముడుచి దయచి సెక్తిక.

13 దస్సి, కిచ్చొ లుంకడ్లి రితి నాయ్, గని ఎత్తి తుమ్ సొస్టుమ్ అర్దుమ్ కెరంతి రితి జయ్యి అర్దుమ్ అమ్ రెగ్లితనుమ్.

14 ప్రబు జలో యేసు ఈంజ లోకుమ్చక తీర్పు కెర్తి వెల్లి దీసిక 'చెంగిల్ అస్సి' మెన తుమ్చి రిసా ఆమ్ కీసి సర్ల జుమదె గే, అమ్చి రిసా తుమ్క దస్సి సర్ల తంక జయెదె మెన తుమ్ అప్పె ఇదిల్ అర్దుమ్ కెరన అస్సున్. తుమ్క 'జా కోడు పూర్తి అర్దుమ్ కెరంతు' మెనయ్ అంచి ఆన.

15 అంది ఈంజ దయిరిమిచి రిసా తుమ్తె తొలితో జెంక ఉచర తిలయ్. గెచ్చుక జతి జలె, తుమ్క దొవ్వెర్ దెకితయ్, తివ్వెర్ సర్ద జతయ్.

16 తొలితో మాసిదోనియ ప్రదేసిమి గెతె తిలి వట్టె తుమ్తె గోత్ గెచ్చుక చి జా మాసిదోనియ ప్రదేసిమ్ తెంతో అన్నె వట్టె ఉట్టె అయిలె పొది కి తుమ్తె జెంక ఉచర తిలయ్. దస్సి, అవ్ అన్నె యూదయ్ ప్రదేసిమ్తె గెచ్చుక బార్ జలె పొది తుమి అంక బార్ కెర తెర్దయ్తడయ్.

17 జలె, దొన్ని మెన్నుల్ తా 'జెయిందె' మెలయ్ గె? మాములుమ్ ఈంజ లోకుమ్చి బుద్ది తెన్ 'జెయిందె' జవున్ మెన దొన్ని మెన్నుల్ తా ఆరి సంగిమదె గె? జెంక ఉద్దెనుమ్ నెంజిలె 'జెయిందె' మెనిందె గె?

18 అవ్ దసా మాన్ను నెంజె. కచితుమ్ దేముడు నముకుమ్చో, జాకయ్ అమ్ తుమ్క సంగితి దేముడుచి కొడో ఆరి నెంజె గని కెయ్యళక కి నిజమి.

19 దేముడుచో పుత్తుసి జలె యేసుక్రీస్తు; *నిల్యాను తిమోతి చి అవ్ తుమ్తె బోదన కెర్తొ క్రీస్తు; దసాచో నెంజె. సంగిల్ రితి జో కెరెదె. అమ్ కి దస్సి.

20 దేముడు అబ్బోసి సంగ తిలి ఎత్తి కొడు, ఎత్తి ప్రమానుమ్ క్రీస్తుతెయ్ కచితుమ్ నెరవెర్చువ జతయ్. దస్సికయ్, క్రీస్తుచి నావ్ తెన్ని †తెద్దిలి మెన సంగితనుమ్. ఇని ఒప్పుణ్ణ, దేముడుక గవురుమ్ దెతనుమ్; 'క్రీస్తుతెయ్ ఎత్తి నెరవెర్చువ కెర్తయ్' మెనయ్.

21 అన్నె, దేముడు అబ్బోసి సొంత అమ్క తుమ్క క్రీస్తుచి తెడి డిట్టుమ్ కెర్తయ్, చి జోచి కామ్ కెరుక మెన అమ్క నిసాన అదికారుమ్ దా అన్నె.

22 జొయ్యి అమ్క 'అంచయ్ మాన్నుల్' మెన జోచి ముద్ద గల అన్నె, చి జోతె అమ్క దొర్బు జతి పాటక 'కచితుమ్ దెయిందె' మెన అమ్క అప్పె కి రుజ్జు తతి రిసా, అమ్చి పెట్టి జోచి అత్తు దా అన్నె.

కొరింథిల్క పవులు దుకుమ్ కెరుక నెసిలిన్చి కొడు

23 గని దేముడు అంది రిసా సాచి జవున్! తుమ్తె కొరింథ్తె అవ్ కిచ్చొక అన్నె జెంక నేతయ్ మెలె, తుమ్క సిచ్చ కెరుక నెసి.

24 తుమ్చి నముకుమ్చి ఉప్పిరి ముద్దొ కెరుక అమ్క అదికారుమ్ నాయ్, తుమ్క ఏలువ కెరుక అమ్క ఇస్టుమ్ నాయ్. నముకుమ్క జలె, డిట్టుమ్ అన్నున్. గని, తుమ్క 'సర్దంతోనుమ్ తెన్ తత్తు' మెనయ్, తుమ్క తోడ్ తంకయ్ అమ్చి ఉద్దెనుమ్.

2

1 జాకయ్, జా సుట్టుచి రితి అవ్ తుమ్తె జా తుమ్క దుకుమ్ కెరుక నెసి.

2 అవ్ తుమ్క దుకుమ్ కెర్తె, తుమ్చి దుకుమ్క అవ్ దుకుమ్ జతిసి అన్నెకో అంక సర్ద కెర్తొసా తయెదె? తూమ్ కి దుకుమ్ జా తన్నె, అవ్ కి దుకుమ్ జా తయిందె.

3 జా ఉత్తుమ్తె కిచ్చొక జా ఏక్ కొడు రెగిడ్డయ్ మెలె, అవ్ తుమ్తె దస్సి అయిలె తుమ్ అంక సర్ద తెన్ బెదవంతన అంక దుకుమ్ కెర్తెదు. జా ఒర్బువ జంక నెతిర్తయ్. అగ్గె తెంతో తుమ్క అవ్ నంప కెర తిలయ్, చి 'అంక సర్ద తిలి తుమ్కయ్ కి సర్ద తయెదె' మెన ఉచర తిలయ్.

4 జా సుట్టు తుమ్క ఉత్తుమ్ రెగిడ్డిసి, జలె, తుమ్క దుకుమ్ కెరయ్తి ఇస్టుమ్ తెన్ రెగ్గి నాయ్, గని తుమ్క అంచి ఒగ్గర్ ప్రేమ దెకయ్తి రిసాయి దస్సి రెగిడ్డయ్. పెట్టి ఒగ్గర్ బాద నీడ ఏడ, ఏడయ్ రెగిడ్డయ్.

5 జో మాన్ను అంక దుకుమ్ కెరయ్లిసి, జలె, ఎక్కి అంకయ్ దుకుమ్ కెరయ్లిసి నెంజె. దస్సి కెర తుమ్ ఎత్తిజిన్క కి ఇదిల్ జవున్ దుకుమ్ కెర తయెదె. గని జోక జా పూచి ఒగ్గర్ వయ్డుక నెసి.

6 ఎత్తిజిన్ జోక సిచ్చ రితి కెర్లిసి సరి జలి.

7 జాకయ్, ఒగ్గర్ దుకుమ్క జో పాడ్ నే జతి రిసా తుమ్ అప్పె జోక చెమించువ కెర బెదవన డిట్టుమ్ దయిరిమ్ కెర.

8 'జోచి రిసాచి తుమ్చి ప్రేమ జోక దెకవ' మెన అవ్ బతిమాలూ జా సంగితసి.

* 1:19 1:19 జోవయిచి అన్నెక్ నావ్ నీలయ్. బారికుల్ 15:27. † 1:20 1:20 గ్రీకు జాన తెన్ 'అమెన్' మెనుల.

9 అంది కోడు నూన కెరుల గే నాయ్ గె మెన రుజ్జు దెకుక 'జోక తుమ్ సిచ్చ కెర' మెన జా తుమ్క ఉత్త్రుమ్తె రెగిడ్లయ్.

10 తుమ్ కక్క, చెమించుప కెరై, అవ్ కి జోక చెమించుప కెరైసి. అవ్ కిచ్చొ చెమించుప కెరుక తిలి మెలె, తుమ్చి రిసాయి చెమించుప కెరైయ్ మెలె, క్రీస్తుచి మొక్కై అవ్ సంగితసి.

11 కిచ్చొక మెలె, సయ్తాన్ అమ్చి ప్రేమ పిట్టవుక ఉచరెదె. జోచి కుత్తల జానుమ్చి రిసా 'జో అమ్చి ఉప్పి రి జీసున్ నాయ్' మెనయ్ అవ్ ఇసి తీర్పు కెర అస్సి.

పవులు మాసిదోనియ ప్రదేసిమ్తె గెలిన్

12 జలె, క్రీస్తుచి సుబుమ్ కబుర్ కామ్చి రిసా అవ్ త్రోయ పట్టుమ్తె గెచ్చ పావెలయ్. సుబుమ్ కబుర్ అవ్ నూనయ్తి రిసా ప్రబు అగ్గెచి అవ్కాసుమ్ దిలన్.

13 గని, బావొ జలో తీతు తుమ్చి తె తెంతో ఒత్తు బుల జెంక నేతయ్చి రిసా బాద నెడ జా పట్టుమ్చతె సెలవ్ నజన, అన్నె బార్ జా సముద్దుమ్ జీన, మాసిదోనియ ప్రదేసిమి ఉట్ట గెలయ్.

సుబుమ్ కబుర్ కామ్చి రిసాచి సర్ల

14 గని దేముడుక జోబర, సయ్తాన్ అల్లర్ కెరై కి, క్రీస్తుచి తెడి జో దేముడు అమ్క జీనయ్తయ్, చి జీన్లొ క్రీస్తుచి వట్టి అమ్ కేనె గెలె కి, కెయ్క తెయ్క జోక జాన్తిన్చి వాసెన అమ్చి అత్తి జో ఒండి దెకయ్తయ్.

15 కీసి మెలె, రచ్చన జతనక కి, నానెనుమ్ జతనక కి దేముడు అబ్బొన్క డయిలి దూపుమ్ వాసెన రితి క్రీస్తుచి వాసెన అమ్.

16 జా వాసెనక దెక, జలె, నానెనుమ్ జతనక కి అమ్ మొర్పుచి వాసెన, గని రచ్చించుప జతనక కి జీవుమ్చి వాసెన జెక అస్సుమ్. దస్సి జలె, ఇసి ప్రబుచి కామ్ కెరుక కేన్ మాస్సు విలువ జవుల?

17 అమ్, జలె, జేవ్ వేర మాస్సుల్చి రితి లాబుమ్క ప్రబుచి కోడు సికయ్తన నెంజమ్. అమ్ విలువ నెంజలె కి, ఎక్కి నదానుమ్ తెన్ తిలిసి తిలి రితి, నెంజలిసి నే తిలి రితి దేముడుచి మొక్కై జోచి అదికారుమ్ తెన్ క్రీస్తుచి తెడి తా జోచి కోడు నూనయ్తనుమ్.

3

అమ్చి సత్తిమ్చి రుజ్జుక ప్రబు సాచి

1 అమ్ అన్నె అమ్చి సొంత గప్పురుమ్ నజనుక దెర అస్సుమ్ గే? నెంజలె, అమ్చి సత్తిమ్చి రుజ్జుక తుమ్తె సాచి ఉత్తల్ నజనుమ్దె గే? సగుమ్జిన్క దస సాచి రుజ్జుల్ తంక, గని అమ్క నాయ్.

2 తుమ్కయ్ దెకిలె, అమ్చి సత్తిమ్క రుజ్జు దెకయ్తి ఉత్త్రుమ్ రితి తుమి జతను; తుమ్చి పెట్టి రెగిడ్లి జా ఉత్త్రుమ్ ఎత్తిజిన్ నదు కెర అర్దుమ్ కెరనుక జయ్దె.

3 వడ్లి, అన్నె కిచ్చొ సొస్సుమ్ డీస్టయ్ మెలె, క్రీస్తు సొంత రెగిడ్లి అమ్చి అత్తి వేర మాస్సుల్తె తెద్రయ్లి ఉత్త్రుమ్, తుమ్ జస్సె మెన డీస్టయ్. సిర్ల తెన్ రెగిడ్లిసి నెంజె, గని జీవ్ తిలో దేముడుచి నుద్ది తిలి అత్తయ్ రెగిడ్లిసి జా, వత్తె రెగిడ్లిసి నెంజె, గని మాస్సుచి పెట్టి రెగిడ్లిసి.

4 క్రీస్తుచి తెడి, దేముడు అబ్బొన్చి మొక్కై దస్సి మెన అమ్క దయిరిమ్.

దేముడు దిలి అగ్గెచి ప్రమానుమ్

5 అమ్చి సొంత సెక్తిక కిచ్చొ కెరుక తెరుమ్ మెన ఉచరుమ్ నాయ్, నెత్తుమ్. అమ్చి సెక్తి కేన్ తెంతో జెతయ్ మెలె, దేముడు తెంతోయ్.

6 యేసుక నంపజత మాస్సుల్క జో దిలి నొవి ప్రమానుమ్చి రిసా అమ్ నూనవుక మెన జొయ్యి అమ్క సెక్తి దా అస్సు. ఈంజ నొవి ప్రమానుమ్ తిలిసి కిచ్చొ పత్తె గే, పుస్తకుమ్తె గే రెగిడ్లి కిచ్చొ కిచ్చొ ఆగ్గుల్చి నెంజె, గని జో దేముడుచి నుద్ది తిలి అత్తు మాస్సుచి పెట్టి రెగిడ్లిసి. *వత్తల్తె జవున్, కాగ్గుల్తె జవున్,

* 3:6 3:6 రోమియల్ 7:5, 8-11, నిర్గమకాండుమ్ 24:12, 31:18.

రెగిష్ట్ర ఆగ్నల్ అమ్ మాన్యుల్చి పాపుమ్ దెకవయ్ అమ్క నింద కెర మార్త, గని మాన్యుచి పెట్టి దేముడుచి నుద్ది తిలి ఆత్మ రెగిష్ట్రీని మాన్యుక 'జయడ్డయ్.

7 జలె, పత్రె రెగిష్ట్రీ ఆగ్నల్చి మాన్యుల్క మార్తి నేవ దేముడు మోసే పూర్ణుమ్చొచి అత్తి దిలి పొది, జో దేముడుచి పరలోకుమ్చి ఒగ్గర్ ఉజుడి తెన్ గవురుమ్ తెన్ దొర్కు. జలి. కెద్ది ఉజుడి కెద్ది గవురుమ్ మెలె, దేముడు తెన్ జో దన్నుల్ జా తిలిన్చి ఉజుడక గవురుమ్క ఇస్సాయెలు ప్రెజల్ మోసేచి మొక్కె దెకుక నెత్తిర్ల. పూర్ణుమ్చి జా ఆగ్నల్ తెన్ చి ప్రమానుమ్చి ఉజుడి గవురుమ్, మాత్తమ్, తొక్కె జా జా, కేడ గెలి.

8 దస్సి కేడయ్ గెతి గవురుమ్ ఉజుడిచి కంట, దేముడుచి నుద్ది తిలి ఆత్మచి నెక్కిచి నేవచి గవురుమ్ ఉజుడి ఒగ్గర్ జయె నాయ్ గె? జయెదె.

9 కిచ్చొక మెలె, మాన్యుక నింద కెద్ది ఆగ్నల్ నేవచి గవురుమ్ ఉజుడి ఒగ్గర్ తిలె, మాన్యుచి పాపుమ్ పుంచ జోవయింక పున్సిమ్ దెతి నేవక అన్నె ఒగ్గర్ గవురుమ్ ఒగ్గర్ విలువ తయెదె.

10 ఇన్చెచి రిసా కిచ్చొ మెనుక జయెదె మెలె, జాచి కంట జిన్ని గవురుమ్ జిన్ని విలువ తిలిన్చి రిసా, అగ్గయ్ గవురుమ్చి విలువ తిలిన్క అప్పొయి కిచ్చొ గవురుమ్ కిచ్చొ విలువ నాయ్.

11 కేడయ్ గెలిన్క గవురుమ్ విలువ తిలి జలె, కెద్దొడ తెదొడ తాఁ గెలిన్క అన్నె ఒగ్గర్ గవురుమ్ ఒగ్గర్ విలువ తయెదె.

12 ఇని మెన అమ్క దయిరిమ్చి రిసా, దయిరిమ్ తెన్ ఈంజ నొచి ప్రమానుమ్చి రిసాచి సత్తిమ్ నూనయ్తనుమ్.

13 మోసేచి రెతి అమ్ జము నాయ్. జో, జలె, 'కేడ గెతి జా ఉజుడి కేడ గెతిని ఇస్సాయెలుల్ మెలె అమ్చ ప్రిజల్ దెకుత్ నాయ్,' మెనయ్, దేముడుతె తెంతో ఉట్ట అయ్లి పొది లాజ్ జా మొక్కొమ్ డంకన్లొ.

14 జలె, జేవ్ ఇస్సాయెలుల్ కీన జలె, జోవయించి పెట్టి బేడు బందిల్ రెతి జలె, చి ఆజి ఎద కి అగ్గెచి ప్రమానుమ్చి వాట జేవ్ నదు కెద్ది పొది, మొక్కొమ్ డంకన తతి రెతి పెట్టి సత్తిమ్ చినితి నాయ్. కిచ్చొక మెలె, క్రీస్తుచి తెడి మాన్యు తిలెకయ్ జా డంకిలిసి దేముడు కడ వెంట గెలెదె.

15 నిజుమి, అజి ఎద మోసేచి అత్తి రెగిష్ట్రీని దేముడుచ కొడొ జేవ్ కెయ్యు నదు కెద్ది కి, జోవయించి పెట్టి యేనుక్రీస్తుచి రిసాచి సత్తిమ్ చినుక నెత్తిర్లె.

16 గని, మాన్యు మార్పువ జా ప్రబుతె అయ్లె, జా డంక అడ్డు జలిసి కడి జతయ్, చి జో ప్రబుచి సత్తిమ్ చినుల.

17 అన్నె, ప్రబు ఆత్మయ జయెదె, చి దేముడుచి నుద్ది తిలి ఆత్మ కేన తయెదె గే, ఒత్తయ్ రచ్చున తయెదె. ప్రబుచి ఆత్మ అమ్చి పెట్టి తిలె, ఆగ్నల్చి నేవచ గొతిమాన్యుల్ తము నాయ్, విడ్డల్ జా తమ్దె.

18 అన్నె, దేముడుచి నుద్ది తిలి ఆత్మతె జెర్చున్ జలె అమ్ ఎత్తిజిని, కిచ్చొ డంకిలిసి అడ్డు నెంతె ప్రబుచి ఉజుడి జోచి గవురుమ్ దెకితె తా, జోచి ఉజుడతె గవురుమ్తె బెద, జోచి పొలిక జతి రెతి తిరిమ్ తిరిమ్ మార్పువ జతె అన్నుమ్, చి జోచి ఉజుడి జోచి గవురుమ్ తిరిమ్ తిరిమ్ అగ్గెచి కంట అమ్ ఇండితినెతె అన్నె డీస్తయ్. ఈంజ ఉజుడి ఈంజ గవురుమ్ దేముడుచి నుద్ది తిలి ఆత్మయ జలొ ప్రబు తెంతయ్ జెతయ్. జొయ్య జా కామ్ జగ్గు కెర్తయ్.

4

సుబుమ్ కబుర్ కామ్ నిదానుమ్ తెన్ కెర

1 జలె, దేముడుచి దయక చి నేవ అమ్క జో సొంత తియార్ అన్నెచి రిసా, అమ్చి నిదానుమ్ దయిరిమ్ పిట్టి నాయ్.

2 కిచ్చొ పాపుమ్ తెన్ మాయ తెన్ బోదన కెరుక నెనిలమ్, నెనుమ్. కిచ్చొ మోసిమ్ కెరుమ్ నాయ్, ప్రబుచి సుబుమ్ కబుర్తె కిచ్చొ వేరచ బెదవుమ్ నాయ్, గని సొస్తుమ్ సత్తిమ్ సంగితనుమ్. దస్సికయ్ కో నూన్లొ కి 'సత్తిమ్' మెన అమ్చి రిసా ఒప్పునుక జయెదె. 'సత్తిమ్' మెన దేముడు కి ఒప్పునెదె.

3 అమ్ బోదన కెర్తెన్ సుబుమ్ కబుర్చి అర్దుమ్ ఇదిల్ లుంకిల్ రెతి జలె, కక్కయ్ లుంక తయెదె మెలె, నాసెనుమ్ జతనకయ్.

4 జోవయింకయ్, జలె, జేవ్ నంప నే జతసకయ్, ఈంజ లోకుమ్క ఏలుప కెర్తొ నయ్తాన్; నాసెనుమ్ జతస జోక 'దేముడు' మెనుల; జొయ్యి జోవయింబి మెన్సుక గుడ్డి కెర అస్సె. కిచ్చొక మెలె, 'దేముడుచి పోలిక పూర్తి తిలొ క్రీస్తుచి గవురుమ్ దెకయ్తి నుముమ్ కబుర్చి ఉజడ జతి సత్తిమ్ దెకుత్ నాయ్' మెనయ్ జేవ్ మాన్సుల్క జో నయ్తాన్ జోవయింబి మెన్సుతె గుడ్డి కెర అస్సె.

5 అమ్ బోదన కెర్తసి, జలె, అమ్చి రిసాచి నెంజె, గని యేసుక్రీస్తుక 'ఎత్తిక ఏలుప కెర్తు' మెన దేముడు అబ్బొసి జోక ప్రబు కెరయ్ అస్సె మెనయ్ అమ్ బోదన కెర్తసుమ్. జో యేసుచి సేవ చి ప్రేమచి రిసా తుమ్చ *సేవ కెర్తస రిత జా అస్సుమ్.

6 కిచ్చొక మెలె,

†“అందర్ తెంతో ఉజడ జవున్”

మెన సంగిలొ దేముడు అమ్చి పెట్టి జోచి ఉజడి దా అస్సె. కిచ్చొక మెలె, క్రీస్తుచి మొక్కె డీస్తి ఆవ్ దేముడుచి గ్యానుమ్ ఉజడి మాన్సుల్ దెక చిన అంక జాన్తు అంచి ఉజడతె జతు మెనయ్, జో దేముడు ఈంజ సేవతె అమ్క బెదవ అస్సె.

ప్రబుచ కామ్ జోచి అత్తి జో జోచి సెక్తి తెన్ కెర్తయ్

7 దేముడు జోచి ఈంజ ఉజడ సామ్సారుమ్ రితయ్ గేడివొతె బెరవ అస్సె. కిచ్చొక మెలె, అమ్ గేడివొక సెక్తి నాయ్, ఏలుప నాయ్ చి రిసా అమ్ సెక్తి నెంజలనచి అత్తి జో జోచి కామ్ కెర్తె, 'దేముడుచియి, మాన్సుచి నెంజె' మెన జా సెక్తిక మాన్సు చినుక జయెదె.

8 రగరగాల్చ బాదల్ అమ్క పెలిలెకి, పెల్లి జా బీడ గెచ్చుమ్ నాయ్; జోచి సెక్తిచి రిసా, నగుమ్ బాదల్ కిచ్చొక సేడ్డునుమ్ గే అమ్ అద్దుమ్ కెరనుక నెత్తిరై కి, జో దిలి కామ్చి రిసా ఆస నెంజలన జము నాయ్.

9 విరోదుమ్ సుదల్చి అత్తి అమ్ అల్లర్ జలెకి ప్రబు అమ్క ములె నాయ్. అమ్చ విరోదుమ్ సుదల్ అమ్క బూసిల్ రితి కెర్తె కి, మొరుమ్ నాయ్.

10 యేసు కీసి మొర్చి రితి జతె తా బాదల్ సేడ్డె తిలన్ గే, ఆమ్ కి ఈంజ జీవితముక మొర్తె తతి రితి అస్సుమ్. గని ఆమ్ మొర్చి రితి జా సెక్తి నెంజలినతెయి యేసుచి సెక్తి డీస్తయ్. యేసు అన్నె జీవ్ జా పరలోకుమ్తె ఏలుప కెర్తి సెక్తి, అమ్ సెక్తి నెంజలన రచ్చన జతినతె డీస్తయ్.

11 కిచ్చొక మెలె, యేసుచి జీవ్ అమ్చి మొర్చి ఆగ్తె డీసున్ మెనయ్, అమ్చి ఈంజ జీవితముతె యేసుక్రీస్తుచి నావ్చి రిసా అమ్ మొర్చుక దెర్చు సేడ్డునుమ్.

12 జలె, అమ్ మొర్చునుమ్, తూమ్ జతను!

13 గని

‡“నంప జలయ్ చి సంగిలయ్”

మెన పూర్గుమ్ సంగిలొ రితి ఆమ్ కి నంపజా అస్సుమ్చి రిసా ఆమ్ కి అమ్చి నముకుమ్ తిలిసి సంగితనుమ్.

14 ఇసి దయిరిమ్ తెన్ అమ్ నంపజలిసి కిచ్చొక సంగితె తత్తనుమ్ మెలె, ప్రబు జలొ యేసుక అన్నె జియడ ఉట్టయ్లొసా జోవయింబి నావ్ తెన్ అమ్కయ్ కి అన్నె జియడ ఉట్టవ, తుమ్క అమ్క జోతె కడ నెయెదె మెన జానుమ్.

15 కిచ్చొ కిచ్చొ బాదల్ కిచ్చొక ఓర్చుప జతనుమ్ మెలె, తుమ్చి రిసాయి. మెలె, ప్రబుచి రచ్చన అన్నె ఒగ్గర్జిన్క పావెలె, ప్రబుచి దయచి రిసా అన్నె ఒగ్గర్జిన్ జోక జోచి సర్త తెన్ జోబర సంగ జోక గవురుమ్ కెరలె.

16 జాకయ్ అమ్చి దయిరిమ్ పిట్టె నాయ్. అమ్చి ఈంజ లోకుమ్చి ఆగ్ పాడె జతె తిలె కి కువెతె తిలె కి, రోజాక అమ్చి అత్తి అన్నె నొవర్ జెర్చిల్ రితి జా సెక్తి జతయ్.

17 ఈంజ మదెనె చి ఇదిదిల్ అల్లర్ కిచ్చొ కామ్క జతయ్ మెలె, పరలోకుమ్తెచి నే కేడ్డి ఒగ్గర్ ఉజడతె గవురుమ్తె అమ్ బెదితి రిసా అమ్క దొర్చు జయెదె.

18 అప్పె డీస్తిన్చి ఉప్పిరి నముకుమ్ తిము నాయ్; పరలోకుమ్తెచి నే డీస్తిన్కయ్ నంప కెర్తసుమ్. కిచ్చొక మెలె, డీస్తిసి పాడె జతిసి, నే డీస్తిసి పరలోకుమ్తెచి జలె, తా: గెచ్చెదె.

* 4:5 4:5 నెంజెలె, 'గొత్తమాన్సుల్, గొత్త మాన్సుల్'. † 4:6 4:6 అదికాండుమ్ 1:3. ‡ 4:13 4:13 క్రీస్తునలు 116:10.

5

పరలోకుమతే అమ్ తతిసి

1 అన్నె కిచ్చొ జానుమ్ మెలె, ఈంజ లోకుమతే అమ్ జతి కుడియ జతి అమ్చి అగ్గి పాడ్ జలెకి, పరలోకుమతే అమ్క కెయక తెయక తా గెతి గేర్ అమ్చొ దేముడు అమ్క దా అస్సె. కేన్ మాస్సు తెయార్ కెర్లిసి నెంజె, దేముడు తెయార్ కెర్లిసి, జా.

2 నిజామి, ఈంజ లోకుమతే తిలె పొది దుకుమ్ జతసుమ్, చి పరలోకుమచి అమ్చి గేర్ నజనుక ఆన జతసుమ్.

3 జా గేర్ మెలిసి నజ్జె, పాలుమ్ గలన్లి రితి జయెదె, చి అమ్ డుమ్డి తయె నాయ్.

4 ఈంజ అప్పచి కుడియతే అమ్ తతి పొది, అమ్చ బాదల్ చి రిసా దుకుమ్ తెన్ అస్సుమ్. ఈంజ కుడియ, ఈంజయ్ పాలుమ్, గెస్సు మేనుమ్ నాయ్, గని అన్నె చెంగిల్ గేర్ చెంగిల్ పాలుమ్ గలన్తి రిసా, పరలోకుమచి జా గేర్ జయి పాలుమ్ గలన్లమ్ మెలె, అమ్చి ఈంజ లోకుమచి మొర్చుక పరలోకుమచి నే కేడ్డి జివు తతిసి జిన గెచ్చెదె.

5 పరలోకుమతే జతి రిసా అమ్క తెయార్ కెర్లిసా దేముడుయి, చి 'జర్గు జయెదె' మెన అమ్క కిచ్చొ గుర్తు జో దా అస్సె మెలె, దేముడుచి సుద్ది తిలి ఆత్మ అమ్చి పెట్టి జో దా అస్సె.

6 జాకయ్, కిచ్చొ జలెకి అమ్క దయిరిమ్. ఈంజయ్ అగ్గితే, ఈంజయ్ లోకుమతే అమ్ జతి పొది, ప్రబుక దూరి అస్సుమ్ మెన జానుమ్.

7 పరలోకుమతేచి ప్రబు అమ్క దిలి అప్పె దస్సే డీసి నాయ్, గని జాక 'అస్సె' మెలి నముకుమ్ తెన్ని ఇండితసుమ్.

8 'అమ్ పరలోకుమతే గెచ్చుమ్దే' మెన దయిరిమ్ తెన్ అస్సుమ్, చి 'ఈంజ అగ్గుక ముల ప్రబుతె గెచ్చె జలె చెంగిలి' మెన జానుమ్.

ప్రబుచి ఇస్సుమ్ రితి కెర్లి ప్రేమ

9 జలె, ఇస్సె ఈంజ అగ్గి అమ్ జింక తిలె కి, ఒత్త పరలోకుమతే గెచ్చుక తిలె కి, అమ్చి ఆన కిచ్చొ మెలె, ప్రబుక సర్ద కెర్ జోచి ఇస్సుమ్ రితి కెరుకయ్.

10 ఈంజ లోకుమతే ఈంజ అగ్గి తిలె పొది అమ్చితె కో సత్తిమతే ఇండిల గే పాపుమతే ఇండిల గే, క్రీస్తుచి అత్తి అమ్ తీర్పు జంక, అమ్ జోచి మొక్కె టీవో జతి జా దీసిక జలె, ఈంజ జివితుమతే కో సత్తిమ్ ఇండ తవుల గే, జోక బవుమానుమ్, కో పాపుమతే ఇండ తవుల గే, జోవయంకయ్ సిచ్చ ప్రబు దెయెదె.

11 ప్రబు లోకుమచక పరిచ్చ కెర్ తీర్పు కెరెదె మెన జానయ్, జా బయమ్ తెన్ మాస్సుల్క సికడ్డసుమ్. అమ్చి సత్తిమ్ జో దేముడు జానె, చి తుమ్చి పెట్టి తామ్ కి చినితసు, కిచ్చొగె. తుమ్క 'చినుత్' మెనయ్ అమ్చి ఆన.

12 తుమ్తే అమ్క గవురుమ్ దొర్చు జెయెదె మెన తుమ్ ఉచర నాయ్. గని, మాస్సుచి పెట్టి తిలిసి నే చినితె మాస్సు ముక్కిమ్చొ రితో డీసిలెకయ్ గవురుమ్ కెర్తస సగుమ్జన్ అమ్చి రిసా తుమ్క అన్మానుమ్ సికడ్డతి. తుమ్క 'జేవ్ అన్మానుమ్ సికడ్డనక కీసి జబాబ్ దెంక గే జాన్తు' మెనయ్ అమ్ ఇసి సొంతచి రిసాచి సాచి రెగడ్డసుమ్. అమ్చి సత్తిమ్ జాన్లె, తుమ్ జబాబ్ దెంక జాన్తె, జాకయ్ తుమ్క సంగితసుమ్. గవురుమ్ ఆననుక ఉచర కిచ్చొయ్ కెరుమ్ నాయ్.

13 జలె, అమ్క 'వెర్లి జల' మెన తుమ్ తీర్పు ఉచర్లె జలె, 'అమ్ వెర్లి రితి డీస్టన్తే దేముడుక లాబుమ్ తిలె దస్సే డీసుమ్' మెంతసుమ్. జోచి కామ్ కెర్లి ఆనకయ్ ఇసి జతసుమ్. నాయ్ మెలె, 'బుద్ధికయ్ దస్సె సంగితతి' మెన అమ్చి రిసా తుమ్ ఒప్పున్లె, చెంగిలి. తుమ్కయ్ 'చెంగిల్ జతు' మెనయ్ ఇసి జతసుమ్.

14 క్రీస్తు ప్రేమచి రిసా అమ్ తుక్లె తంక నెత్తుమ్. అమ్క జోచి ప్రేమ వెలయ్తయ్. క్రీస్తు ఎక్కిలో అమ్ ఎత్తిజన్చి పాపుమ్ గెచ్చయ్తి రిసా మొర్లన్ మెన అమ్ దెకితసుమ్. జో మొర్లన్ తెన్ అమ్ ఎత్తిజన్ మొర్లి రిత జా జోక సంబజలి తెంతో సొంత ఇస్సుమ్ జర్గు కెర్లి రితి ఇండుమ్ నాయ్.

15 కిచ్చొక మొర్లన్ మెలె, అమ్ జితన ఎత్తిజన్క 'సొంత ఇస్సుమ్ అయిలి రితి నాయ్, గని జోచి రిసా మొర అన్నె జితోసాక గవురుమ్ కెర్లి రితి జతు' మెనయ్ జో మొర్లన్.

క్రీస్తుచి తెడి నొవ మాన్యుల్

16 అప్పె తెంతో మాములుమ్ జోచి ఈంజ లోకుమ్చి జెర్మున్క కక్కయ్ దెకుమ్ నాయ్. అగ్గెయ్ క్రీస్తుచి మాములుమ్ ఈంజయ్ లోకుమ్చి జెర్మున్కయి కీసి తిలో గే, దస్సి జోక దెకిత్ తిలమ్, గని అప్పెయి జోక దస్సి దెకుమ్ నాయ్. జో దేముడు జలిన్ రుజ్జు జలిన్కయ్ జోక దెకితసుమ్.

17 గని, కో క్రీస్తుచి తెడి తవుల గే, జోచి అగ్గెచి జెర్మున్క మొర్రి రితి జా జోచి అత్తతె జెర్మున్ జా నొవర్ రగమ్ జా అస్సి. నొవర్ జెర్మున్ జలి రితి జా అస్సి. అగ్గెచి గెచ్చు, నొవెచి బార్ జా అస్సి, చి నొవెచికయ్ దెకితసుమ్.

18 మాన్యు నొవర్ జతి ఈంజ వరుమ్ కేనె తెంతో జెతయ్ మెలె, దేముడు తెంతో. జో క్రీస్తుచి నావ్ తెన్ అమ్చి పాపుమ్ వుంచ కెర అమ్క జోక అడ్డు తిలి పాపుమ్ గెచ్చువ గెల కెర అమ్క అన్నె బెదవన్లన్, చి 'వేర మాన్యుల్ కి అమ్చో క్రీస్తుక నంపజలె జోవయింక కి దస్సి అన్నె బెదవనింద' మెనయ్ జోచి నుబుమ్ కబుర్ సూనయ్తి సేవ జో దేముడు అమ్క తియార అస్సి.

19 మెలె, క్రీస్తు బలి జలిన్ తెన్ జోవయింబి పాపుమ్ వుంచ నే వయడై, దేముడు లోకుమ్చక బెదవంతె అస్సి, చి జో బెదవంతింబి కబుర్ సూనయ్తిసి అమ్చి అత్తి జో సార్పు కెర దా అస్సి.

20 జాకయ్, క్రీస్తుచ బాంకలె జా అస్సుమ్. 'క్రీస్తుక నంపజతు' మెనయ్ దేముడు అబ్బొసి అమ్చి అత్తి మాన్యుల్క బుకార్తయ్. జాకయ్, 'దేముడు తెన్ బెదితి వరుమ్ తుమ్ నజనా' మెనయ్, క్రీస్తుచి నావ్ తెన్ తుమ్క అమ్ బతిమాలా జా సంగితసుమ్.

21 అమ్క 'అంబి పున్మిమ్ జతు' మెనయ్ పాపుమ్ నెంజిలో పాపుమ్ నేన్ల జోచో వుత్తసి అమ్చి పాపుమ్ రితి దేముడు అబ్బొసి జోక టీచడై.

6

రచ్చన నజన్తి సమయుమ్ నిజుమి జా అస్సి

1 జలె, "దేముడుచి రచ్చన నజనా" మెన సంగితసుమ్, గని జోచి నావ్ తెన్ అన్నె కిచ్చొ మెంతసుమ్ మెలె, జోచి దయ ఆరి నజన తా నాయ్.

2 కిచ్చొక మెలె,

*"చెంగిల్ సమయుమ్క తుమ్చ ప్రార్దన సూన అస్సి, చి

ఆవ్ రచ్చన కెర్తి కాలుమ్క తుమ్క తోడు జా అస్సి"

మెన పూర్తుమ్ తెంతో దేముడుచి కొడెతె రెగ్గవ అస్సి. అల్లె! 'చెంగిల్' మెలి జా సమయుమ్ అప్పెయి. రచ్చన జతి జా కాలుమ్ అప్పెయి.

నుబుమ్ కబుర్ రిసా వవులు అల్లర్ జలిసి

3 అమ్ ప్రబుచి సేవ కెర్తినె కేన్ నింద నే జెతె, కో కిచ్చొ సంగుక నెత్తిర్ రితి, కచి నముకుమ్ పిట్టయ్తి కిచ్చొయ్ అడ్డు కెరుమ్ నాయ్.

4 ప్రబుచి సేవ పూర్తి నిదానుమ్ కెర్తనుమ్ మెన సాచి సంగన్తసుమ్. ఇన్నెచి రుజ్జు కిచ్చొ మెలె, కిచ్చొ కిచ్చొ ఒగ్గర్ అల్లర్ ఓర్పువ జా నిదానుమ్ తెన్ అస్సుమ్. కిచ్చొ అల్లర్ మెలె, బాదల్, సైమల్, కస్టల్, ఇర్కులు,

5 కొర్తల్వ దెబ్బలు, జేలి జలిసి, జిట్టు తెన్ నిగ జా మాన్యుల్ అమ్క అల్లర్ కెర్తినె, ఒగ్గర్ కామ్ కెర టక్కిలీన్, గూన్ నెంజిలిసి అందర్లు, చువ్వె తిలిసి; దనచ ఎత్తి నిదానుమ్ తెన్ ఓర్పువ జా అస్సుమ్.

6 వడ్డె జోచి సేవచి అమ్చి నిదానుమ్ అమ్ ఇండిలి బుద్దితె కి డీస్తయ్. వేర బుద్దుల్ అమ్ నే జలిన్తె, ప్రబుచి ఎత్తి, అమ్ జాన్తిన్తె, మాన్యుల్వ తప్పల్ అమ్ ఓర్పువ జతిన్తె, మాన్యుల్క అమ్ మరియాద దెకితినె, దేముడుచి సుద్ది తిలి అత్తు అమ్చి పెట్టి తిలిన్తె, మాయ నెంజిలి అమ్చి ప్రేమతె.

* 6:2 6:2 మెనయా 49:8.

7 సత్తిమచి బోదన అమ్ కెర్తెనెతె, దేముడుచి నెక్తి అమచ కమెతె డీస్తిన్తె, ఈంజ ఎత్తితె అమచి నిదానుమ్ డీస్తయ్. డెబ్రి పక్క కి, ఉజెతో పక్క కి, కామ్క జెత పున్నిమచి అయదల్ వాడిక కెరన నిదానుమ్ తత్తసుమ్.

8 జాకయ్, గవురుమ్ జలెకి, నిస్సారుమ్ జలెకి, మాస్సుల్ అమక 'వెంగిల్చ' మెలె కి, 'గార్పు' మెలె కి, నిదానుమ్ తత్తసుమ్. సగుమ్జెన్ అమక 'మాయచ' మెంతతి, గని సత్తిమ కెర్తెసుమ్.

9 సగుమ్జెన్ అమక విలువ దెకిత్ నాయ్, గని సగుమ్జెన్ విలువ దెకిత్తి. 'బే బేగి మొరుల' మెన అమక సగుమ్జెన్ ఉచర్తతి, గని జెతసుమ్. దెబ్బల కతసుమ్ గని మొరుమ్ నాయ్.

10 అమచ బాదల్క దుకుమ్ జంక జతయ్, గని సర్తసంతోసుమ్ తెన్ అస్సుమ్. ఈంజ లోకుమచి ఆస్తిక ఉచర్త బిద అస్సుమ్, గని ఒగ్గరజెన్క సొమ్మారుమ్ కెర్తెసుమ్. అమక కిచ్చొ నెంజెలె కి, ఎత్తి కలుగు జలి రితి జా అస్సుమ్.

అమక కి తుమ్ ఎదిలి ప్రేమ కెర

11 ఓ తుమ్ కొరిందిలు, కిచ్చొ నే లుంకడె ఈంజ ఎత్తి. తుమ్క ఎదార్దుమ్ సొమ్మమ్ సంగ అస్సుమ్. అమచి పెట్టితె తుమ్క ఒగ్గర్ ప్రేమయ్ అస్సుమ్.

12 అమచి రిసాచి తుమ్చి ప్రేమక ఆమి కిచ్చొ ఇర్కు కెరుమ్ నాయ్. తుమ్చి సొంత పెట్టి తుమి ఇర్కు కెరంతసు.

13 అంచ బోదల్ జల రిత ఓ తుమ్ కొరిందిల్, తుమ్క ఆవ్ కిచ్చొ మెంతసి మెలె, అమ్ తుమ్కయ్ కీసి ప్రేమ అస్సుమ్ గే, తూమ్ కి దస్సి అమకయ్ ప్రేమ కెర మెన ఆవ్ బతిమూల్పు జా సంగితసి.

14 ప్రబుక నంప నెంజెలన తెన్ తుమ్ లంకె జా నాయ్. పాపుమెతె పున్నిమ్ తిలిసి కీసి బెదెదె?! నెంజెలె, అందరబుద్ది తెన్ ఉజెడ్ బుద్ది కీసి బెదెదె? బెదె నాయ్!

15 "బెలియాల్" మెలో నయతాన్ తెన్ క్రీస్తు కీసి బెదెదె? బెదె నాయ్! నంపనెంజెలొసా తెన్ నంపజెలొసాక కీసి వాట తియిదె? తయె నాయ్!

16 దేముడుచి గుడి, జలె, బొమ్మల్క జొకర్తెన్ తెన్ కీసి బెదెదె? నెంజె! కిచ్చొక ఆవ్ ఇసి సంగితసి మెలె, జీవ్ తిలో దేముడుచి గుడి ఆము. పూర్ణమ్ దేముడుచి కొడెతె రెగ్గయిలి రితి,

† "జోచి పెట్టి ఆవ్ జయిందె,

జోచి తెన్ ఆవ్ బులిందె,
ఆవ్ జోవయించొ దేముడు జయిందె.

జెచ్చొ అంచ ప్రెజెల్ జవుల"

మెన అస్సె,

17 † "జాకయ్ 'అంక నంప నెంజెలన తెంతో తుమ్ బార్ జా' మెన 'సుద్ది నెంజెలిసి తుమ్ చడ నాయ్.

దస్సి ఎక్కి నిదానుమ్ జలదు మెలె,
తుమ్క బెదవనిందె' మెన ప్రబు సంగితయ్"
మెన అస్సె,

18 † "అంచ బోదల్ మెనయ్ తుమ్కయ్ అబ్బొది జయిందె,

చి అంక 'అబ్బొ మెనయ్ అంచ పుత్తర్లు దువొ జస్సె'
మెన ఎత్తి సెక్తి అదికారుమ్ తిలో ప్రబు సంగితయ్."
మెన రెగ్గ అస్సె.

7

సుద్ది జతీన్

† 6:16 6:16 లేవీయకాండుమ్ 26:12, యిర్మీయా 32:38, యెహెజ్కేలు 37:27. † 6:17 6:17 యెసయా 52:11, యెహెజ్కేలు 20:34, 41. § 6:18 6:18 సమూయేలు దొన్నిచి పుస్తకమ్ 7:14, 7:8.

1 జాకాయ్, ప్రేమ తిల బావుడ్లు, దేముడు అమ్మక ఈజేప్ ప్రమానల్ సంగ అన్నెచి రిసా, అమ్మచి ఆగ్గక, అమ్మచి ఆత్మక కిచ్చొ గార్ కెరెదె గె, జా గెచ్చవన గెల కెరయ్, దేముడు ప్రబుక బియ్య కెర, అమ్ సుద్ది జంక *దెర్లిసి పూర్తి జతి రితి జోచి సుద్ది ఆనసుమ.

2 అమ్మక తుమ్మచి పెట్టితె బెదవన. అమ్ కక్క తప్పు కెరయ్ నాయ్, కక్కయ్ పాడె కెరయ్ నాయ్, కక్కయ్ మోసిమ్ కెర లాబుమ్ కెరసుమ్ నాయ్.

3 తుమ్మక నింద కెర్తి రిసా ఇసి సంగి నాయ్, అగ్గె కిచ్చొ మెన రెగిడ్లయ్ మెలె, 'అమ్మచ జీవుతె తుమ్మచి రిసా ప్రేమయ్ అస్సుమ్' బెద మొరుమ్దె, బెద జిమ్దె.

4 తుమ్మచి రిసా అంక నముకుమ్ ఒగ్గర్ అస్సె, తుమ్ అంచి అత్తి సూన నంపజలదు చి రిసా ఆవ్ గవురుమ్ సంగితసి, తుమ్మచి రిసా అంచి పెట్టి పూర్తి దయిరిమ్ అస్సె. అమ్మచ బాదల్ ఒగ్గర్ జితికి, అంచి పెట్టి సంతోసుమ్ బెరయ్ అస్సె.

5 †మాసిదోనియ ప్రదేసిమి అమ్ ఉట్టు అయ్లె పొది అమ్మచి ఆగ్గక సుక్కుమ్ నాయ్, గని ఎత్తి రగల్ బాదల్ సేడ్డెయ్ తిలమ్; విరోదుమ్ సుదల్ కెర్ల అల్లర్చి రిసా కి, అమ్మచి పెట్టిచి బయిమ్మచి రిసా కి,

6 గని ముసర్సు జలసక డిట్టుమ్ దయిరిమ్ కెర్తొ దేముడు, జలె, తీతుక అమ్మతె తెద్రవ అమ్మక దయిరిమ్ కెర్తొ.

7 ఎక్కి తీతు అయ్లెసి తెన్ దయిరిమ్ జము నాయ్, గని తుమ్మచి నిదాసుమ్ దెక జోయ్య దయిరిమ్ జలిన్క అమ్మకయ్ కి జో దయిరిమ్ కెర్తొ. మెలె, అంక అన్నె దస్సుల్ జంక చి తుమ్మచి ఆన, అంక తుమ్ దుకుమ్ కెర తిలిన్చి రిసాచి తుమ్మచి దుకుమ్, అంచి రిసాచి తుమ్మచి ప్రేమ నిదాసుమ్చి రిసా అమ్మక సంగిలన్, చి అన్నె ఒగ్గర్ సర్ల జలయ్.

8 అంచి ఉత్తుమ్తె ఆవ్ రెగిడ్లిన్ తెన్ తుమ్మక ఆవ్ దుకుమ్ కెర్తొ కి, ఆవ్ ఉచర్క నాయ్. విసారుమ్ జా తిలయ్, గని తప్పు కెరె నాయ్ మెన జాని. జా ఉత్తుమ్ తుమ్మక దుకుమ్ కెర్తి, గని గడియకయ్ మెన ఆవ్ దెకితసి.

9 జలె, అంక సర్ల. తుమ్మక దుకుమ్ కెర్తి రిసా నాయ్, గని తుమ్ దుకుమ్ జా తప్పు ఒప్పున చెంగిల్ జలదు చి రిసాయి. మెలె, తుమ్మచి దుకుమ్ ప్రబుచి సత్తిమ్ తుమ్మక ఉచరపడ్డిన్చి రిసాయి తుమ్మక అమ్ కెర్లిసి కిచ్చొ సంతోసుమ్ కెరె నాయ్.

10 కిచ్చొక మెలె, ప్రబు ఉచర్లిసి దుకుమ్ అమ్ మాస్సుల్చి పెట్టి అయ్లె, అమ్ కెర్లె పాపల్ ఒప్పున బుద్ది జంక ఇస్సుమ్ జమ్దె, చి ప్రబుచి రచ్చన నజనుమ్దె. జా రచ్చనచి రిసా 'చెంగిల్ జలమ్' మెనయ్, అన్నె దుకుమ్ తయ్ నాయ్. గని ఈంజయ్ లోకుమ్చి బుద్దిచి దుకుమ్ అమ్ పెట్టి తియ్లె, అమ్మక మొర్సు జెయ్దె.

11 ఈందె, దేముడు తెద్రయ్లె దుకుమ్ తుమ్మచి పెట్టి కెర్తి నిదాసుమ్ ఉట్టువ అస్సె! నిజమ్, తుమ్మచి సత్తిమ్ దెకయ్తి ఆన ఉట్టువ అస్సె! జా తప్పుచి రిసా లాజ్ జా తుమ్మచి ఉప్పెరి తుమ్మి కోపుమ్ జలదు, దేముడుచి తీర్పుక బిలదు, అమ్మచి తెన్ అన్నె బెదుక ఆన జలదు, సత్తిమ్ జంక ఆన జలదు. జా తప్పుచి రిసా సరిగా తీర్పు కెర్లదు. జా ఎత్తితెయి తుమ్మ అప్పు సత్తిమ్ జలిసి డీస్యయ్.

12 జాకాయ్, ఆవ్ తుమ్మక రెగిడ్లిసి దుకుమ్చి తిలె కి, ఒత్త కిచ్చొ లాబుమ్ మెలె, ముక్కిమ్మక తప్పు కెర్లెసాక ఉచరి నాయ్, ముక్కిమ్మక అల్లర్ సేడ్డెసాక ఉచరి నాయ్, గని జా ఉత్తుమ్చి రిసా ముక్కిమ్మక కిచ్చొచి రిసా ఉచర్లిసి మెలె, అమ్మచి రిసాచి తుమ్మచి ఒగ్గర్ ఆన, ప్రబుచి మొక్కె తుమ్మ అప్పు చినన అస్సున్.

13 తుమ్మ చెంగిల్ జలిన్చి రిసా అమ్మక సర్ల, అమ్మక అన్నె డిట్టుమ్ దయిరిమ్ కెర్తొ. అమ్ సొంత సర్ల జలిన్చి కంబ కిచ్చొక అన్నెయ్ సంతోసుమ్ జా అస్సుమ్ మెలె, తీతు తుమ్మతె జా దెకిలి తెంతో, తుమ్మచి రిసాచి జోచి అగ్గెచి అన్యాసుమ్ నాయ్, చి సర్లసంతోసుమ్ జో జా అస్సె.

14 తుమ్మచి రిసా అంచి సర్ల, ఆవ్ గవురుమ్ ఉచరంతిసి, జోక అగ్గె తెంతో సంగితె తిలయ్, చి జో తుమ్మతె గెలి పొది జోచి మొక్కె కిచ్చొ తప్పుల్ కెర అంక లాజ్ కెరయ్సు నాయ్, అంచి మరియాద కడ్సు

* 7:17:1 కొరింథిల్ రెగిడ్లి దొన్న సంబర్ ఉత్తుమ్ 3:18, దెస్సులోనికుల్ రెగిడ్లి ఏక సంబర్ ఉత్తుమ్ 5:23. † 7:5:7 జిమ్ కొరింథిల్ తిలె అకయ ప్రదేసిమ్మక మాసిదోనియ ప్రదేసిమ్ ఉత్తర పక్క అస్సె.

నాయ్. అమ్ తుమ్కయ్ సంగిలినీ ఎత్తిమి నత్తిమ్ కీసి రుజ్జు జలి గే, దస్సి తుమ్చి రిసా ఆమ్ తీతుక సంగిలినీ నిజుమ్ జలి.

15 అప్పె జో తుమ్క అగ్గిచి కంట ఒగ్గర్ ప్రేమ ఉచర్తయ్. ప్రబుచి ఇస్టుమ్ తుమ్ ఎత్తిజిన్ కెర్లినీచి రిసా కి, తుమ్ ఎత్తిజిన్ బియ్యం అడ్డర్ తెన్ జోక బెదవన్లినీచి రిసా కి జో ఉచార్ కెర్తయ్.

16 జలె, తుమ్చి రిసా ఆవ్ పూర్తి దయిరిమ్ జా అస్సిచి రిసా అంక ఒగ్గర్ సర్దసంతోసుమ్.

8

యెరూసలేమ్చి సంగుమ్చ తోడు దెతినీచి రిసా

1 అప్పె, బావుడ్లు, తుమ్క కిచ్చో సంగితసుమ్ మెలె, మాసిదోనియ ప్రదేసిమ్చ ప్రబుచ సంగుమ్లుచ మాన్సుల్చి పెట్టి దేముడు ప్రేమ సికడ్లసి రుజ్జు జా అస్సె.

2 కీసి మెలె, జోవయించి నిదానుమ్ పరిచ్చ జలి రితి జా జేవ్ ఒగ్గర్ కన్తల్ సేడ్డె తిలె కి, జేవ్ ఒగ్గర్ బీద జలెకి, ప్రబుచి, జోవయించి ఎదివాల్ సర్దచి రిసా ఒగ్గర్ దర్ముమ్ తెన్ అన్నె జేవ్క తోడు దా అస్సి.

3 జేవ్చి రిసా ఆవ్ కిచ్చో సాచి సంగితసి మెలె, జోవయించి నెక్తి తిలి ఎదిలి, నాయ్, గని జోవయించి సొంత ఇస్టుమ్క తెర్లి ఎదిలి కంటయ్ అన్నె జేవ్ ఒగ్గర్ దా అస్సి.

4 'యెరూసలేమ్చ సంపజలసక తోడు దెతినీతె ఆమ్ కి బెదుమ్ద' మెనయ్ అమ్క బలవంతుమ్ కెర్ల.

5 'ఇసి దస్సి కెరుల' మెన మాములుమ్ అమ్ ఉచర్లి రితి నాయ్, గని 'అమ్చి అత్తి ప్రబు జోవయించి ఇస్టుమ్ పూర్తి కెర్లు' మెన, తొలితొ ప్రబుచి అత్తి జోవయించి జీవ్ సార్చ కెర, వడ్డె జోవయించి తెడి అమ్చి అత్తి దిల.

6 జాకయ్ తుమ్ కొరిందిల్చి రిసా కి అమ్ ఉచర్తయ్, చి బీద సుదల్క దెతి దర్ముమ్ తుమ్ ఉక్కిల్తినీ, తీతు మొదోల్ కెర్లినీక 'పూర్తి జర్లు జవున్' మెన, తీతుక బలవంతుమ్ కెర అస్సుమ్.

7 జలె, నముకుమ్క, ప్రబుచి గ్యాగుమ్క, జోచి గ్యాగుమ్ సొమ్ముమ్ బోదన కెర్లినీక, నిదానుమ్క, చి అమ్చి ఉప్పిర్చి తుమ్చి ప్రేమక, దస్సిచి ఎత్తిక తుమ్ కీసి నిదానుమ్ జా అస్సున్ గే, దస్సి ఈంజ దర్ముమ్ దెతినీక కి దయ ఒగ్గర్ జతి రితి తుమ్ దెకన.

8 ఆవ్ ఇసి సంగితసి ఆర్డె దెతినీ నెంజె, గని మాసిదోనియ ప్రదేసిమ్చ జేవ్ అన్నె మాన్సుల్ తోడు దా సత్తిమ్ కెర్లినీక తూమ్ దెక తుమి పరిచ్చ కెరన్లె, బీద సుదల్క తోడు కెర్లె తుమ్చి ఉడ్డెసుమ్క 'నిజుమ్చి' మెన తుమ్ రుజ్జు దెకయ్తి అవ్కాసుమ్ తుమ్క దొర్లు జవున్ మెనయ్ ఆవ్ తుమ్క ఉచరయ్తసి.

9 ప్రబు జలె యొసుక్కిస్సు సొంత కి జోచి దయక కిచ్చో కెర్లన్ గే జానుమ్. మెలె, పరలోకుమ్చి సొమ్మారుమ్ జోక తిలె కి, తుమ్చి రిసా బీద కెరన్లె; తుమ్క సొమ్మారుమ్ కెరుక మెనయ్ జో బీద జలన్.

10 జలె, ఈంజ డబ్బుల్ ఉక్కిల్లి కామ్చి రిసా కిచ్చో ఉచర తుమ్క ఆవ్ సంగితసి మెలె, వెర్సెక్ అగ్గె తుమ్ ఇస్టుమ్ జా మొదోల్ కెర్లినీ తుమ్ అప్పె పూర్తి జర్లు కెర్లె చెంగిలి.

11 తుమ్క జా ఇస్టుమ్ అస్సె. జలె, జా జర్లు కెర్లెకయ్ జా ఇస్టుమ్ నెరవెర్లుప జయెదె. తుమ్ తెర్లి ఎదిలికయ్ జర్లు కెర.

12 ఎక్కిలో దెంక మెన తెయార్ మెన్ను తెన్ తిలె, జాక సెక్తిక జిస్లినీ నెంజె గని తిలిస్తయ్ సర్ద తెన్ దిలె ఇస్టుమ్ జయెదె. నెత్తిని నే కెర్లె, మాన్సుక నింద నాయ్.

13 వేర మాన్సుల్క జేవ్చి పూచి వయడ నాయ్, తుమ్కయ్ జా జాడు ఎత్తి వయ్యతు మెని నాయ్,

14 గని, 'ఎత్తిక సమాసుమ్ జతిన్ తవున్' మెన జోవయంక నెంజెలిసి రిసా తుమ్చి సొమ్మారుమ్క తుమ్ అప్పె దాన. ఏక్ వేల వడ్డెక తుమ్కయ్ కొత్తు తిలె, జేవ్ తుమ్కయ్ తోడు కెరుక జయెదె, చి ఎత్తిజిన్క సమాసుమ్ జతిన్ తయెదె.

15 పూర్లుమ్ దేముడుచి కొడోతె రెగ్గయ్లి ఏక్ కోడుచి అర్దుమ్ తుమ్ ఉచర.

§ "ఒగ్గర్ కుడవన్లెసాక కిచ్చో సేసె నాయ్,

* 8:2 8:2 రోమియల్ 15:25-27. † 8:4 8:4 యెరూసలేమ్ వట్టుమ్చి యూదయ ప్రదేసిమ్ కారు జా తతికయ్, వేర తెంతొవ సంపజలన తోడు తెర్తయల. బారికుల్ 1:28-30. ‡ 8:6 8:6 కొరిందిల్క రెగ్గి ఏక్ సంబర్ ఉత్తుమ్ 16:1-4. § 8:15 8:15 నిర్దుమకాడుమ్ 16:18.

గని తొక్కి కుడవనొసాక కిచ్చొ కొత్తు తయె నాయ్”
మెన రెగిడ్డి కోడు.

తీతుక కొరింథ్ పట్టుమ్తె అన్నె తెద్రయలి

16 దేముడుక జోబర! తుమ్చి రిసా జో తీతుచి పెట్టి కి జోవయించి ప్రేమ దా అన్నె.

17 “కొరింథెత ఈంజ కామ్క గే” మెన అమ్ బతిమాల్పు జా సంగితికయ్, “గెచ్చెదె” మెలన్. గని ఎక్కి అమి సంగిల్ రిసా నాయ్, గని అన్నయ్, తుమ్చి రిసాచి జోచి ప్రేమకయ్ జోచి సొంత ఇష్టుమ్కయ్ జెతయ్.

18 జో తెన్ అన్నె కక్క తెద్రయ్తనుమ్ మెలె, జో సుబుమ్ కబుర్ నూనయ్తనచి రిసా ఎత్తి సంగుమ్లుతె, ఎత్తిజిన్ మెస్సితో బావొక తెద్రయ్తనుమ్.

19 పడ్డె, ‘ప్రబుచి గవురుమ్ దెకయ్తి అమ్చి ప్రేమ దెకయ్తి ఈంజ తోడు దెతి కామ్తె అమ్చి తెన్ బులున్’ మెనయ్ సంగుమ్లుచ జోక నిసాన అస్తి. జో, జలె, తీతు తెన్ గెతయ్.

20 అమ్ డబ్బుల్ ఉక్కుల వంట దెతి ఈంజ దర్ముమ్చి సేవచి రిసా కో అమ్క నింద నే కెర్తి రెతి, ఈంజ కామ్తె కిచ్చొ పొరపాట్ బెదవుమ్ నాయ్, కిచ్చొ పొరపాట్ బెదయ్లి రెతి డీనుక కి నెనుమ్,

21 చి ప్రబుచి మొక్కె కి, మాన్పుచి మొక్కె కి, కీసి సత్తిమ్ కెరుక గే సరిగా ఉచర అన్నుమ్. జాకయ్, సంగుమ్లుచ నిసాన మాన్పుక కి అమ్చి తెన్ ఈంజ తోడు దెతిన్తె బెదవన అన్నుమ్.

22 అన్నె, జేవ్ దొగుల తెన్ అన్నెక్టో బావొక తెద్రయ్తనుమ్. ఇన్నెక అగ్గె తెంతో కిచ్చొ కిచ్చొ కమె దా అన్నుమ్ చి కిచ్చొ కామ్తె కి నిదానుమ్ కెర్తయ్ మెన రుజుల్ దెక అన్నుమ్. తుమ్చి రిసాచి జోవయించి ఒగ్గర్ నముకుమ్చి రిసా, వేర కమెచి కంట తుమ్తెయ్ గెచ్చుక అన్నె ఒగ్గర్ ప్రేమ ఈంజో జా అన్నె.

23 తీతు, జలె, తుమ్చి రిసాచి అంచి సేవతె జో అంచి తెన్ ఎక్కి రెతి బెద అన్నె. జేవ్ అన్నె దొగుల బావుడ్లు, జలె, సంగుమ్లుచి నావ్ తెన్ జోవయించ బారికుల్ జల రెతి జా గెతతి, క్రీస్తుచి గవురుమ్ దెకయ్తతి.

24 జాకయ్, తుమ్చి ప్రేమక, చి ఈంజేవ్క అవ్ తుమ్చి రిసా నముకుమ్ సంగిలిన్క, ‘నిజుమి జో సంగిల్ రెతి జా అస్తి’ మెనయ్ సంగుమ్లుచ రుజు దెకిత్ రెతి కెర.

9

దర్ముమ్ ఉక్కుల దెతిన్చి రిసా అన్నె సంగిలిసి

1 జలె, *యెరూసలేమ్తెచ నంపజలసక దెతి తుమ్ ఉక్కిల్లి డబ్బుల్చి రిసా అమ్ అన్నె రెగుడుక కిచ్చొక?

2 జా ఉక్కుల దెక తుమ్ కోర్ప జలిసి అవ్ జాని, చి మాసిదోనియ ప్రదేసిమ్చ నంపజలసక తుమ్చి రిసా అవ్ సంగితిసి. కిచ్చొ సంగితసి మెలె, “అకయ ప్రదేసిమ్చ నంపజలస పూర్ము తెంతో జోవయించి డబ్బుల్ దెక తెయార్ జా అస్తి” మెన అవ్ సంగితసి. జా దర్ముమ్ ఉక్కుల దెతి తుమ్చి సర్దచి రిసా నూన్చి రిసాయి జేవ్ మాసిదోనియచ ఒగ్గర్ జిని జా కామ్తె బెదుక కోర్ప జా అస్తి.

3 జలె, ఈంజేవ్ బావుడ్లుక కిచ్చొక తుమ్తె తెద్రయ్తసి మెలె, ‘జా డబ్బుల్ ఉక్కుల తెయార్ జా అస్తి’ మెన తుమ్చి రిసా అమ్ సర్ద సంగిలిసి అబద్దుమ్ నే జతి రెతి తుమ్క ‘నిజుమి తెయార్ జా తత్తు’ మెన ‘తుమ్ దెక’ మెనయ్ అవ్ జేవ్క తెద్రయ్తసి.

4 నెజలె, పడ్డె అంచి తెన్ ఈంజ మాసిదోనియచ నంపజలస సంగుమ్జిన్ తుమ్తె అయ్లె, తుమ్ తెయార్ నే జా తిలె, అమ్చి మరియద గెచ్చెదె; అమ్చి కి తుమ్చి కి. ‘సత్తిమ్ కెరుల’ మెన అమ్ దయిరెమ్క సంగిలిసి పిట్ట తయెదె చి రిసా.

* 9:1 9:1 క్రీస్తు యెరూసలేమ్తె మొర జిన్ జలన్, గెద, చి తొలితో ఒత్తయ్ మాన్పుల్, క్రీస్తుచ సిన్పుల్ తెన్, జోవయించ నంపజల. యెరూసలేమ్ పట్టుమ్చి యూదయ ప్రదేసిమి కారు జా తతికయ్, వేర తెంతోచ నంపజలస తోడు తెద్రయ్ల; అకయ ప్రదేసిమ్చ కి మాసిదోనియ ప్రదేసిమ్చ కి; బారికుల్ 1:28-30. † 9:2 9:2 అజ కాలి అకయ ప్రదేసిమ్చ చి మాసిదోనియ ప్రదేసిమ్క ‘గ్రెకు ప్రదేసిమ్’ మెంతతి.

5 జాకయ్, 'అంచి కంట జేవ్ అగ్గ గెచ్చు తుమ్ సంగిలి దర్ముమ్ దెతినకయ్ తుమ్క తెయార్ కెర తత్తు' మెనయ్ జేవ్క బలవంతుమ్ కెర్లయ్. దస్సి, తుమ్ అగ్గయి జా డబ్బుల్ తెయార్ కెర తిలె, సర్ద తెన్ దెతె, ఆరి ఇస్టుమ్ నెంజిల్ రితి నాయ్.

ముస్సి బుద్దిచి రిసాచి దర్ముమ్ బుద్దిచి రిసాచి కోడ

6 ఆవ్ కిచ్చో మెంతసి మెలె, కో ముస్సి తెన్ బి గలెదె గే, తొక్కి పలితుమ్చి పంటో లాయెదె. కో దర్ముమ్ తెన్ బి గలెదె గే, ఒగ్గర్ పంటో లాయెదె.

7 ఎత్తి మాన్సు సరిగా ఉచర, 'దెంక చెంగిలి' మెన కెదిలిచి రిసా ఉచరై గే, తెద్దిలి దెంకయె. గని కో బలవంతుమ్ కెర్లె రితి దుకుమ్ తెన్ పొన, సర్ద తెన్ని. సర్ద తెన్ దెతోసొక దేముడు ప్రేమయ్ దెకెదె.

8 చెంగిల్ తిలిసి ఎత్తి దయ తుమ్క మొచ్చు తెన్ దెంక దేముడుచి అత్తి అస్సె, చి తుమ్క సరిపుచుప జతిసి కి, పడ్డో కిచ్చో కిచ్చో చెంగిల్ కముక తుమ్ మొచ్చు తెన్ దెంక తెరితి రిసా కి, సరిపుచుప జతిసి తుమ్క దెంక జోచి ఇస్టుమ్.

9 దేముడుచ కొడతె పూర్ము రెగ్గయ్లి అస్సె.

‡“జోవయింక తిలిసి జో పంట దెతయ్,
బీద సుదల్క జో దర్ముమ్ తెన్ దెతయ్,
జోవయించి జా సత్తిమ్ కెయక తెయక తాఁ గెచ్చెదె.”

10 తుమ్ బి గల్లి రిసా బి దెతో ప్రబు, తుమ్ కతి రిసా అన్నిమ్ దెతో ప్రబు, సరిపుచుప జతిసి తుమ్క దెయెదె, పలితుమ్ దెయెదె, చి తూమ్ దర్ముమ్ తెన్ బెదయ్తిన చి సత్తిమ్చి పలితుమ్ జో ఒగ్గర్ తయెదె.

11 తుమ్ దర్ముమ్ తెన్ దెతి రిసా ఎత్తితె సొమ్మారుమ్ రితి జస్సె. అమ్చి అత్తి తుమ్ జా దిలె, అమ్ బీద సుదల్క దెమ్దె, చి దేముడుక జేవ్ జోచి సర్ద దెకవ జోక గవురుమ్ కెరుల.

12 దస్సి, ఈంజ దర్ముమ్చి సేప కెర్లె, బీద జల నంపజలనక కామ్క జెతిసి దొర్కు జలిసి దా తస్సె, పడ్డో అస్సె, “దేముడు దొర్కు కెరయ్లె” మెన జోక జోకర జేవ్ ఒగ్గర్ గవురుమ్ కెరుల.

13 ఈంజ కామ్ తుమ్క ఏక పరిచ్చ రితి జయెదె. ఈంజ సేప తుమ్ చెంగిల్ కెర్లె, తుమ్చి సత్తిమ్క రుజ్జు జయెదె. చి క్రీస్తుచి సుబుమ్ కబుర్ ఒచ్చున జోక బియఁ తుమ్ ఈంజ సత్తిమ్ కెర్లెచి రిసా, దేముడుక గవురుమ్ జయెదె. పడ్డో, జేవ్ బీద జల నంపజలనక చి అన్నె బావుడ్లు ఎత్తిక తుమ్ కోడ దిలిన్చి దర్ముమ్చి రిసా గే దేముడుక గవురుమ్ జెయెదె.

14 అస్సె, తుమ్చి వెట్టి దేముడు జోచి దయక దర్ముమ్ బుద్ది దిలి రిసా జేవ్ మాన్సుల్ తుమ్క ఒగ్గర్ ప్రేమ జా, తుమ్క దెకుక మెన ఆన తెన్, తుమ్చి రిసా కి జేవ్ ప్రార్దన కెరుల.

15 క్రీస్తుచి అత్తి దేముడు అమ్క దిలి వరుమ్ కెర్లె గే కో సంగుక నెత్తిర్. జోచి ఎదివాట్ దర్ముమ్చి రిసా జోక జోబర.

10

బుద్ది నే జా తిలె సిచ్చ కెరుక తయెదె

1 క్రీస్తు కిసి మెత్తన తా మాన్సుల్క కన్యారుమ్ దెకితె తిలెన్ గే తుమ్ జాన్సు. జలె, ఆవ్ పవులు, క్రీస్తుచి కన్యారుమ్ దెకితి దస్సి బుద్ది తెన్ సొంత తుమ్క బతిమాల్లా జతిసి. అమ్చి రిసా సగుమ్జన్ మాన్సుల్ సంగితిన్ కిచ్చో మెలె, తుమ్చి మొక్కి మెత్తన అస్సి, గని ఉడ్లె గిలె పడ్డో దయిరిమ్ తెన్ ఆవ్ గోల కెర్లెన్, బెర్రె!

2 జలె, కిచ్చో అప్పె బతిమాల్లా జా ఆవ్ సంగితసి మెలె, ఆవ్ తుమ్తె అన్నె అయిలె పొదిక ఆవ్ ఇసి దయిరిమ్ తెన్ గోల కెరుక నెంజితి రితి, జేవ్ అల్లరిచ మాన్సుల్ బుద్ది జా తత్తు, నెంజితి అప్పె కిసి డీస్తయ్ మెలె, అయిలె కచితుమ్ జోవయింక గోల కెరుక తయెదె. అమ్క 'మాములుమ్ ఈంజయ్ లోకుమ్చ ఆసల్ ఇండితతి' మెన జేవ్ మాన్సుల్ అమ్క సింద కెర్లెతి, గెద.

3 జలె, అమ్మ ఈంజయ్ లోకుమ్తె జలె కి, అమ్మ కెర్తి యుద్దుమ్ ఈంజయ్ లోకుమ్చి రగుమ్చి యుద్దుమ్ నెంజె. ఆత్మయుద్దుమ్ ఈంజ.

4 పావుమ్చి ఉప్పిరి యుద్దుమ్ కెర్తె అమ్చ అయ్దల్ ఈంజయ్ లోకుమ్చ నెంజెతి. అమ్చయ్ అయ్దల్ దేముడుచి నెక్కిత అయ్దల్, చి నయ్తానచి నెక్కి తిలిన ఎత్కిచి ఉప్పిరి; కేనీ ఒగ్గర నెక్కిచి జలెకి; ఈంజేవ్ అయ్దల్ జీనుల.

5 దేముడు దిల ఆత్మాయ్దల్ తెన్ని జోవయిచి ఉప్పిరి విరోదుమ్ జత కొడెచి ఉప్పిరి జినీతనుమ్, జోవయిచ మాన్సుల్ జానీతినక పిట్టయ్తి బడాయ్ తిల కొడె ఎత్కిచి ఉప్పిరి జినీతనుమ్, చి మాన్సుచి మెన్సు తిలి ఎత్కి ఉచరన మార్పువ జా క్రీస్తుక బితి రితి, జోవయిచ జేవ్ ఉచరన మార్పువ కెర్తనుమ్.

6 అన్నె, దేముడుచి ఇస్తుమ్ రితి ఇండితి రితి తుమ్ కొరిందిల్ బుద్ది జలదు మెలె, అమ్ అయ్లె కో సేంసిల మాన్సుల్ బుద్ది నే జా తిలె, జోవయిచ తప్పుల్క ప్రబుచ అయ్దల్ తెన్ సిచ్చ కెరుక బిము నాయ్.

7 తుమ్చి మొక్కె తిలినకయ్ తుమ్ దెకితె తత్తును. 'క్రీస్తుచ ఆము' మెన తుమ్చితె కో ఉచరంతతి గే, జేవ్ కిని క్రీస్తుచ జా అన్సి గే, అమ్క 'జేవ్ కి క్రీస్తుచ' మెనయ్ ఒప్పనతు.

8 తుమ్క పాడె కెరుక నాయ్ గని క్రీస్తుచి తెడి డిట్టుమ్ కెరుకయ్ మెనయ్ జోవయిచి కామ్చి రిసా ప్రబు అంక అదికారుమ్ దా అన్నె. జా అదికారుమ్చి రిసా ఆవ్ ఏక్ వేల ఇదిల్ ఒగ్గర సంగెలి కి, అంచి మరియాద గెచ్చుక జో నెలవ్ దెయ్ నాయ్.

9 ఆరి బియడ్డి రిసా ఇన ఉత్తల్ రెగ్గి నాయ్. దస్సి ఉచర నాయ్.

10 "జోవయిచ ఉత్తల్తె డిట్టుమ్ డీస్యయ్, గట్టిజ సంగితయ్, గని ఇన్నె తిలె పొది జో బియె కెర జా కిచ్చొ గట్టిజ సంగె నాయ్" మెన అంచి ఉప్పిరి గోన జలన సంగితతి.

11 జలె, జేవ్ మాన్సుల్ కిచ్చొ అర్దుమ్ కెరంతు మెలె, అమ్ నెంజెలి పొది ఉత్తుమ్తె కిచ్చొ రెగుడుమ్ద గే, అయ్లె పొది కచితుమ్ జర్గు కెరుమ్దే.

12 జోవయిచి సొంత గవురుమ్ సంగనత జేవ్ సగుమ్జినక దెకిలె, 'జోవయింతెన్ సమ్మందుమ్ జలన ఆము' మెననుక నెనుమ్, జోవయిచ దెక పరిచ్చ కెరనుక నెనుమ్. బెదె నాయ్. జేవ్ ఎక్కిలోక ఎక్కిలో దెక దన తీర్పుల్ కెరంతిని వెల్లో మెనంతిని సూటి నాయ్. దస్సి జా జా, బుద్ది నెంజెలి రిత జతతి.

పావులీంసి సొంత గవురుమ్ సంగన్సి రితి జలిన్

13 సత్తిమ్ జతి కంట అన్నె గవురుమ్ సంగనుమ్ నాయ్. గని దేముడు అమ్క వంట దిలి ఎదిలి గవురుమ్ సంగనుమ్దె; సుబుమ్ కబుర్ తెన్ తుమ్చి ఎదె అమ్ పావుక మెన జో అమ్క దా అన్నె. చి జాచి రిసా సంగనుమ్దె.

14 తుమ్తెయ్ గెతి రితి అమ్క దిలి సేవ పాచితి నాయ్ జలె, అమ్ తుమ్కయ్ కిచ్చొ సంగుక బెదితి నాయ్. గని దూరి జలెకి, క్రీస్తుచి సుబుమ్ కబుర్ సూనయ్తి రిసాయి ఎత్కిచి కంట అమి తోలితో తుమ్తె అయ్లమ్.

15 సత్తిమ్చి కంట అన్నెయ్ గవురుమ్ సంగనుమ్ నాయ్. వేర మాన్సు నైమల్ సేడ కామ్ కెర్తినక 'ఆమ్ కెర్తమ్' మేనుమ్ నాయ్. గని అమ్చి ఆస కిచ్చొ మెలె, తుమ్చి నముకుమ్ వడ్డిలె, తుమ్చి ప్రాంతుమ్తె అన్నె ఒగ్గర గవ్వెలె ప్రబుచి కామ్ అమ్ కెర్తి వాట్ దొర్కు జయెదె,

16 చి తుమ్చి ఒత్తల్తోవ ప్రాంతుమ్లెతె కి అమ్ సుబుమ్ కబుర్ సూనవుక జయెదె; వేర మాన్సుల్ కెర్తినక 'ఆమ్ కెర్తమ్' మెన నే సంగెతి.

17 జలె,

*"కో కచి గవురుమ్ సంగుక జలె,

ప్రబుచి గవురుమ్ సంగుతు"

మెన దేముడుచి కొడెతె రెగ్గె అన్నె, గెదె.

18 కిచ్చొక మెలె, సొంత గవురుమ్ సంగన్సి కిచ్చొ గవురుమ్ నెంజె, గని ప్రబు కక్కయ్ గవురుమ్ కెరెదె గే, జో మాన్సు నిజామి గవురుమ్ జయెదె.

11

తప్పుచి బోధ నూన మోసిమ్ జతు నాయ్

1 ఆవ్ అప్పె ఇదిల్ తెలివి నెంజిల్ రితి లట్టబ్బె, దయ కెర ఓర్పువ జా! అంచి రిసా కీసి జలెకి తుమ్ దస్సి కెర్తసు.

2 తుమ్క 'ప్రబుతె పూర్తి నిదానుమ్ జతు' మెనయ్ అంక ఆస. ఎక్కి మున్నున్క నిదానుమ్ తిలి తేర్చి తుమ్ జతి రితి, పెండ్లిక క్రీస్తుక తుమ్క నావ్ కెర సార్పు దిలయ్.

3 గని పూర్ణమ్ అయి రూపుమ్ జా తిలో సయ్తాన్ జోచి మాయక కీసి *హవ్వక మోసిమ్ కెర్తె గే, దస్సి తుమ్క 'క్రీస్తుక ఎక్కి మెన్ను నిదానుమ్ తత్తు నాయ్' మెన, తుమ్చి చెంగిల్ బుద్ది జో సయ్తాన్ మార్పువ కెరెదె మెన అమ్క బయిమ్.

4 ఆవ్ కిచ్చొక ఇసి ఉచర్తసి మెలె, కో జలెకు తుమ్తె జా కెర, యేసుచి రిసా అమ్ బోధన కెర్తెసి నాయ్, గని వేరచి సికణ్ణె, తుమ్ బే బేగి జో మాన్సుక సంప కెర్తసు. నెంజిలె, తుమ్క దిలి దేముడుచి సుద్ది తిలి ఆత్మ నాయ్ గని వేరయ్ ఆత్మ తుమ్క దోర్పు జలె, నెంజిలె తుమ్ సంపజిలె సుబుమ్ కబుర్ నాయ్ గని వేరయ్ కోడు సూన్య, తుమ్ జా వేరచిక సంపజా తుమ్ బే బేగి మార్పువ జతను.

5 వేర సికణ్ణ 'ఒగ్గర్ వెల్లో బారికుల్' మెన తుమ్ సంగిత జేవ్ వేర మాన్సుల్చి కంట ఆవ్ ఎద్దికి దాక్ జయి నాయ్ మెన ఆవ్ జాని.

6 లట్టబుక ఆవ్ తెలివి నెంజిలెకి, ప్రబుచి గ్యానుమ్ అంక అస్సె. కెయ్క కి కీసి జలె కి ఈంజ గ్యానుమ్ తుమ్క సొస్టుమ్ జానవ అస్సి.

7 తుమ్క 'చెంగిల్ జతు' మెన, తుమ్తె కిచ్చొ తోడు నే నజితె దాక్ కెరనయి దేముడుచి సుబుమ్ కబుర్ ఆవ్ సికణ్ణిని పాపుమ్ గే?

8 వేర సంగుమలుచి డబ్బుల్ ఆవ్ నజన చోర్తి రితి జా అస్సి. ప్రబుచి నావ్ తెన్ తుమ్కయ్ సేవ కెర్తి అంచి ఆనచి రిసా జా డబ్బుల్ జోవయింతె నజిలయ్.

9 పడ్డె, తుమ్చి తెన్ ఆవ్ తిలి పొది అంక కొత్తు తిలె, తుమ్చితె కక్కయ్ కి జా జాడు వయడి నాయ్. మాసిదోనియ ప్రదేసిమ్ తెంతో అయిల బాపుడ్లు అంక కొత్తు తిలిసి ఎత్తి దిల. జాకయ్ తెదేడి తుమ్క జా జాడు వయడి నాయ్, చి అప్పె తెంతో కిచ్చొ జాడు కి తుమ్క వయడుక నెసి.

10 క్రీస్తుచి నత్తిమ్ అంచి పెట్టి కీసి అస్సె గే, ఈంజ ఒండి అకయ ప్రదేసిమ్తె ఆవ్ డబ్బుల్ గట్ట నే నజితెనిచి రిసా కో వేరయ్ సంగుత్ నాయ్. జేవ్ వేర సంగుక వాట్ దెయి నాయ్. ఆవ్ అప్పెక కెర్తి రితి దస్సి కెర్తె తయిందె.

11 కిచ్చొక? తుమ్క ప్రేమ కెరి నాయ్ గే? తుమ్క ఆవ్ ప్రేమ కెర్తిసి 'నిజమి' మెన దేముడు జానె.

మోసిమ్ కెర్తె బారికుల్

12 'సుబుమ్ కబుర్ కామ్చి రిసా డబ్బుల్ నజనయ్ అమ్చి రితి జేవ్ కి కెర్తెతి' మెన, డబ్బుల్ ఆసక సుబుమ్ కబుర్ నూనయ్త జేవ్ అస్సె మాన్సుల్ అమ్చి రిసా సంగితతి. ఈంజ కామ్ జేవ్ కెరక అదికారుమ్ నాయ్. పడ్డె, జోవయింది రితి అమ్ నే కెర్తెన్క రుజ్జు తతి రితి, ఆవ్ అప్పె ఎద డబ్బుల్ గట్ట నే నజితె సుబుమ్ కబుర్ కామ్ ఆరి కెర్తె తయిందె.

13 దన మాన్సుల్ అబద్దుమ్కయ్ "ప్రబు అమ్క ఈంజ కామ్ తియార అస్సె. జోచ బారికుల్ అమ్" మెనన ఆరి సంగితతి. మోసిమ్ కెర్తెన, జేవ్. ఆరిక క్రీస్తుచ బారికుల్ అమ్ మెనంతతి.

14 దస్సి కెర్తెతి మెన తుమ్ ఆచారిమ్ జంక నాయ్. సయ్తాన్ కి మోసిమ్ కెర పరలోకుమ్చి ఉజిడ్చొ దూత రితో డీసుక జానె.

15 జాకయ్ జోచ సేవ కెర్తెన కి 'పరలోకుమ్చి నత్తిమ్చ సేవ కెర్తెన అమ్' మెన ఆరి సంగనుల ఆచారిమ్ నెంజె. గని జేవ్ కెర్తె కమె కొల్లి ఆకర్క సిచ్చయ్ జవుల.

16 జలె, అస్సెక్ సుట్టు ఆవ్ సంగితసి. కిచ్చొ మెలె, అంక వెర్తి మెన కో ఉచర నాయ్. గని 'వెర్తి' మెన ఉచర్లె, అంక బెదవన జా, చి అంక ఇదిల్ జప్పన్ గప్పరుమ్ తయెదె.

* 11:3 11:3 ఆదికాడుమ్ 3:1-7.

17 అవే అప్పె సంగితిసి ప్రబు సంగిలిసి మెన నెంజె, గని దయిరిమ్ తెన్ ఇసి గవురుమ్ సంగుక తెలివి నెంజెల్ రితో జతసి.

18 ఒగ్గర్జిన్ ఈంజ లోకుమ్చ కమొచి రిసా గవురుమ్ సంగనుల. అవే కి గవురుమ్ సంగనిందె.

19 తుమ్క బుద్ది అస్సెచి రిసా బుద్ది నెంజెలసక సర్ద తెన్ ఓర్పువ జతసు!

20 మెలె, ఎక్కిలో తుమ్క దెర్దు సేడయెలె, నెంజెలె మోసిమ్ కెర తుమ్చి అత్తి లాబుమ్ కెరన్జె, నెంజెలె బడాయ్ జా వెల్లో మెనన్జె, నెంజెలె తుమ్క మొక్క పెట్టె, తుమ్ ఓర్పువ జతసు!

21 దస అల్లర్ కమొ కెరుక అమ్ నెతిర్లమ్ మెన లాజ్ తెన్ అవే ఒప్పునుక, ఏక్! గని జోవయింతె కో కిచ్చొచి రిసా గవురుమ్ సంగన్జె; అవే అప్పె తెలివి నెంజెల్ రితి లట్టబ్బసి; అవే కి దస్సిచి రిసా గవురుమ్ నజనుక దయిరిమ్ అస్సె, అవే తెలివి నెంజెల్ రితి కొడొ జతసి.

22 జేవ్ ఎల్లియుల్ జవుల గే? అవే కి ఎల్లియుడు! జేవ్ ఇస్రాయేలుల్ జవుల గే? అవే కి ఇస్రాయేలుడు. జేవ్ అబ్రాహామ్చి సెకుమ్తె జెర్లిల గే? అవే కి జోవి సెకుమ్తె జెర్లిలయ్.

23 జేవ్ క్రిస్తుచ సేవ కెర్తస గే? జలె, జోవయింది కంట అవే చెంగిల్చి. అవే అప్పె వెర్రి రితి లట్టబ్బె తుమ్ చెమించువ కెర. జోవయింది కంట అవే కిసి చెంగిల్చి జోవో సేవ కెర్తొసా జయిందె మెలె, జోచి సుబుమ్ కబుర్ నూనయ్తి రిసా జోవయింది కంట అవే అస్సె ఒగ్గర్ కామ్ కెర అస్సి, ఈంజ కామ్చి రిసా అస్సె ఒగ్గర్ సుట్టు జేలి జా అస్సి, ఒగ్గర్ సుట్టు దెబ్బల్క సిచ్చు జా అస్సి, ఒగ్గర్ సుట్టు మొర్ది రితి జా తిలయ్.

24 యూదుల్చ వెల్లెల మాస్సుల్ పాచ్ సుట్టు కొర్ద తెన్ ముప్పుయ్ నొప్పు దెబ్బల్చి సిచ్చు అంక పెట అస్సి.

25 తివ్వెరి డండల్ తెన్ అంక పెట అస్సి, ఏక్ సుట్టు పత్తల్ గల అంక మారిత, తివ్వెరి ఓడతె గెలి పొది ఓడ పత్తె లయితయిక్ డుజ గెతయ్, ఏక్ సుట్టు ఒండి మెద్దెన ఒండి సరారాతి సముద్రుమ్తె సేడ తిలయ్.

26 ఒగ్గర్ సుట్టు దూరి ప్రయాసుమ్ గెచ్చు అస్సి. దసితె గడ్డొ జీన్తి ప్రమాదుమ్, చోర్చుచి రిసాచి ప్రమాదుమ్, అంచి సొంత దేసిమ్చ మాస్సుల్చి రిసాచి ప్రమాదుమ్, యూదుల్ నెంజెలసచి అత్తి ప్రమాదుమ్ కి జా అస్సి. పట్టుతె, బయిలు దేసిమ్లుతె, సముద్రుమ్తె కి ప్రమాదల్ జా అస్సి. మోసిమ్క 'నంపజలస అమ్' మెనన్జెనచి అత్తి కి ప్రమాదల్ జా అస్సి.

27 ఒగ్గర్ కామ్ కెర కెర సైమల్ సేడ అస్సి. ఒగ్గర్ రాతివో నిజె నాయ్, ఒగ్గర్ సుట్టు చువ్వె తన్నె తా అస్సి, ఒగ్గర్ సుట్టు అంక అన్నిమ్ దొర్కు జయె నాయ్, ఒగ్గర్ సుట్టు చల్లిక, పాలల్ నెంజెలిన్క బాద సేడ అస్సి.

28 జేవే అవే సేడ్డ బాదల్ ఎత్కిక పిట్టవ అస్సె కిచ్చొ మెలె, ప్రబుచ సంగుమ్లు ఎత్కిక 'చెంగిల్ తత్తు' మెనయ్ ఉచర్తె తతిసి అంక వెల్లితయ్, కామ్ రితి జతయ్.

29 కో డిట్టుమ్ నెంజెలె, అవే కి డిట్టుమ్ నెంజెలి రితి దుకుమ్ జతసి; జోవయింది జాడు వయిలి రితి. కో పాపుమ్తె దెర్దు సేడ్డె, అంక ఒగ్గర్ దుకుమ్ తయె నాయ్ గే? ఒగ్గర్ దుకుమ్ జతసి.

30 జలె, అవే గవురుమ్ నజనుక జలె, కిచ్చొచి రిసా గవురుమ్ సంగనిందె మెలె, అవే అప్పు తిలిన్చి రిసాయ గవురుమ్ సంగనిందె.

31 అవే సంగిలిన్ ఎత్కిక 'అబ్దుమ్ నెంజె' మెన ప్రబు జలో యేసుక అబ్బిన్ జలో కెయెక తెయెక మెచువ జతొసా మెన దేముడు జానె.

32 పడ్డె, అస్సె ఏక్ బాద అవే సేడ్డెనచి రిసా గవురుమ్ నజనుక పచ్చు గెలయ్. కిచ్చొచి మెలె, దముస్సు పట్టుమ్తె అంక 'దెర్దు' మెన జా సుట్టు అరెత రానొచి తెడిచొ అదికారి జా పట్టుమ్చ సయ్స్యుమ్ సుదల్క రకడ్డెన్,

33 గని నంపజలస అంక గవత వెనడ పట్టుమ్చి కోటచి ఉప్పెర్చి గదితె వెగడ డా, కిట్టివాల్ వాలివ్ తెన్ కోటచి ఒత్తల్తో ఉత్తవ దిల, చి జో అదికారితె దెర్దు నే సేడ్డె ఉట్ట అయలయ్.

12

పవులు చి సిచ్చు

1 జలె, ఆవ్ గవురుమ్ నజనుక అస్సె. గవురుమ్ సంగన్నె అంక లాబుమ్ నాయ్, గని ప్రబు దెకయ్ల నివ్వల్చి రిసా, జో దెకయ్ల రుజ్జుల్చి రిసా ఆవ్ సంగిందె.

2 క్రీస్తుచొ మాన్సు ఎక్కిలోక జాని. అప్పె చొవ్ల వెర్సుల్ జలి, ఈంజొ మాన్సు పరలోకుమతె ప్రబు తిలిన్తె ఉక్కిల్ జలో. ఈంజొ మాన్సు ఇన్నెచి అగ్గె తెన్నె ఒత్త ఉక్కిల్ జలో గే ఎక్కి ఇన్నెచి అత్తుయి ఉక్కిల్ జలి గే నేని, దేముడు జానె.

3 గని పరలోకుమచి ఒత్తచి పరదీసుతె నిజుమ్ ఉక్కిల్ జలో మెన జాని. ఇన్నెచి అగ్గె తెన్నె ఒత్త ఉక్కిల్ జలో గే ఎక్కి ఇన్నెచి అత్తుయి ఒత్త గెలి గే నేని, గని దేముడు జానె.

4 ఒత్త కిచ్చొ సూన్లొ గే కేన్ మాన్సుకి అన్నె సంగుక నెత్తె, సంగుక నెంజె.

5 ఈంజొ మాన్సుచి రిసా ఆవ్ గవురుమ్ సంగిందె, గని అంచి నావ్ తెన్, జలె, ఎక్కి ఆవ్ అప్పు తిలిన్చి రిసాయి సంగనిందె. గని వేరచి రిసా, జలె, గవురుమ్ సంగి నాయ్.

6 ఆవ్ గవురుమ్ నజనుక ఉచర్లె, అంక వెరి మెనుక, బుద్ది నెంజెలోసా మెనుక నెంజె. కిచ్చొక మెలె, ఆవ్ సంగితిసి సత్తిమ్ గని అంచితె దెకితి కంట నూన్తి కంట కో అంక అన్నె గవురుమ్ ఉచరుక అంక ఆస నాయ్ చి రిసా తుక్కె తయిందె.

7 వడ్డె, ప్రబు అంక ఒగ్గర్ రుజ్జుల్ దెకయ్లిన్చి రిసా ఆవ్ నే పులితి రితి, అంక ఏక బాద తంక జో నెలవ్ దా అస్సె. కిచ్చొ మెలె, నయ్తాన్ అంక అల్లర్ కెర్రి రితి అంచి అగ్గె కంబొ బూస్తి రితి ఏక బాద దా అస్సె; అంక 'పులున్ నాయ్' మెన.

8 జలె, 'ఈంజ బాద అంక ములున్' మెన, తివ్వెరి ప్రబుక బతిమాల్పు జా ప్రార్దన కెర్లయ్,

9 గని జో అంక, "అంచి దయ్ తుక సరిపుచువ జయిందె. తుయి అప్పు తిలె, తుచి అత్తి ఆవ్ కెర్రిన్తె అంచి సెక్తి పూర్తి డీసెందె" మెనయ్, ప్రబు సంగిలన్. జాకయ్ ఆవ్ అప్పు తిలిసి అన్నె సర్ల తెన్ ఒప్పనిందె, చి క్రీస్తుచి సెక్తి అంచితె కామ్ కెరెదె.

10 జాకయ్, క్రీస్తు గవురుమ్ జతి రిసా ఆవ్ అప్పు తిలె, మాన్సుల్ అంక నిస్సారుమ్ కెర్లె, ఆవ్ సైమల్ సేడ్లె, విరోదుమ్ సుదల్ అంక అల్లర్ కెర్లె. ఆవ్ కన్లల్ సేడ్లె, అంక సర్ల. కిచ్చొక మెలె, ఆవ్ అప్పు తిలె పొది, ఆవ్ అప్పు తిలిన్తె ప్రబుచి సెక్తి బార్ జా జోచి గవురుమ్ దెకయ్తయ్.

సత్తిమ్ నెంజెల 'బారికుల్'

11 ఆవ్ ఈంజ ఎత్తి సంగిలిసి తెలివి నెంజెల్ రితి, గని ఆవ్ సంగిత్ రితి తుమి వెలయ్లదు. తుమి అంచి రిసా 'సత్తిమ్చొ' మెన సాచి సంగితదు జలె, జతి. కిచ్చొక మెలె, జేవ్ వేరయ్ మాన్సుల్; 'ఒగ్గర్ వెల్లొ బారికుల్' మెన తూమ్ సంగితస; కిచ్చొ నెంజెలి కి ఆవ్ జోవయింది కంట ఇద్దికి దాక్ నెంజె.

12 క్రీస్తుక సత్తిమ్చొ బారికి ఆవ్ జలిన్క రుజ్జుల్ దెకయ్త కమె తుమ్చి మొక్కె జర్గు జలె. మెలె, ఒగ్గర్ బాదల్ సెంతుమ్ తెన్ ఓర్చువ జలయ్, చి ప్రబు జోవయింది సెక్తివ రుజ్జుల్ దెకయ్లో, ఈంజ లోకుమతె నెంజెల కమె దెకయ్లో, వెల్లెల వెల్లెల కమె జర్గు కెర్లొ.

13 జలె, ప్రబుచ అన్నె సంగుమ్లుచి కంట తుమ్క కిచ్చొ పిట్టి? ఎక్కి పిట్టి మెలె, ఆవ్ జతి డబ్బుల్ తుమ్తె నజీ నాయ్. ఈంజ తప్ప అంక చెమించువ కెరె, 'తప్ప' మెంతసు జలె!

అమ్తె లాబుమ్ కెరెన్లది, అమ్క మోసిమ్ కెర్లది

14 ఈందె, అన్నెక్ సుట్టు తుమ్తె జెంక తెయార్ జా అస్సి. ఇన్నెతెన్ ఆవ్ అయ్లిసి తివ్వెరి జయెదె. అయ్లె, తుమ్క కిచ్చొ జాడు వయడి నాయ్. కిచ్చొక మెలె, తుమ్చి అస్సి ఆవ్ నెని, గని తుమ్చి ప్రేమకయ్ అంచి ఆస. * అయ్యున్క అబ్బొన్క పొస్తి రితి బోదలి కుడవ్క కెరెనుక పూచి నాయ్, గని జోవయింద బోదల్క పొస్తి రిసా అయ్యున్ అబ్బొన్ కుడవ్క కెరె అస్సి.

15 తుమ్చ అత్తల్క 'చెంగిల్ జతు' మెన ఆవ్ సర్ల తెన్ నస్టుమ్ జయిందె, అంచి జీవు దెయిందె. ఆవ్ తుమ్క ఒగ్గర్ ప్రేమ కెర్లె, తుమి అంక తొక్కి ప్రేమ కెర్లె చెంగిల్ గే? తుమ్ ఉచరె.

* 12:14 12:14 వపులు జేవ్ కొరింథిల్క అయ్యున్ అబ్బొన్ రితి జయెదె, గద. జొయ్యు జోవయింక తొలితో సుబుమ్ కబుర్ నూనయ్లో, గెద.

16 నాయ్, ఆవ్ జితినీవి జాడు తుమ్క వయడి నాయ్, గని 'జో మోసిమ్చో, తెలివి తెన్ అమ్క మోసిమ్ కెల్లో' మెన తుమ్ అంక సంగితను.

17 జలె, తుమ్తె ఆవ్ తెద్రయలన చి అత్తి తుమ్తె కెయ కిచ్చో లాబుమ్ కెరన్లయ్ గె? నాయ్, గెద.

18 'గో' మెన తీతుక బలవంతుమ్ కెరన్లయ్, చి జో తెన్ జో అన్నెక్ బావొక తెద్రయలయ్. తీతు జవున్ తుమ్క మోసిమ్ కెల్లో గె? నాయ్, గెద. ఆమ్ కి జోచి బుద్ది తెన్ ఇండుమ్ నాయ్ గె? ఆమ్ కి జోచి రితి జము నాయ్ గె?

తుమ్తె జెతి పొదిక తుమ్ సత్తిమ్ జా తా

19 అమ్చి సత్తిమ్ సంగితిన్క 'ఎక్కి జోవయించి సొంత నావ్ తతి రిసాయి అమ్చి మొక్క సంగితతి' మెన ఉచరై తిలరు గె? నాయ్, అమ్చి ఉద్దెనుమ్ దస్సి నాయ్. క్రీస్తుచి తెడి దేముడుచి మొక్క సంగిలమ్, సంగితనుమ్.

20 కిచ్చొక మెలె, ఆవ్ తుమ్తె తిలె, తుమ్ వేర మార్పువ జా తన్తె మెన, పడ్డో తుమ్ అంకయ్ దెకిలె, 'జో దస్సి అస్సె, చి అమ్క ఇస్టుమ్ నాయ్' మెన తుమ్ సంగితె మెనయ్ అంక బయమ్. అన్నె కిచ్చొ మెలె, తుమ్ జట్టు తెన్, గోసల్ తెన్, కోపల్ తెన్, 'అన్నె మాన్సుల్ కీన్ జలె జతు గని అమ్మి చెంగిల్ కెరనుమ్' మెలి రితి బుద్ది తెన్ ఏక్ వేల తన్తె. ఎక్కిలోచి రిసా ఎక్కిలో ఆరిచ నిందల్, సొండల్ కొణొ సంగితె తన్తె, పుల తన్తె, ముడ్డో నెంతె తన్తె మెన ఆవ్ బితసి.

21 అన్నె కిచ్చొచి రిసా ఆవ్ బితసి మెలె, ఆవ్ తుమ్తె అన్నె అయ్లె, తుమ్చి రిసా దేముడుచి మొక్క లాజ్ జయిందె, చి తుమ్చి తెచ పాపుమ్ కెర అప్పక పాపుమ్ నే బప్పున్సచి రిసా ఆవ్ ఏడుక తయెదె. కేన్ పాపల్ మెలె, లంజెబుద్ది, లంజెకమొ, ఆగేచ ఆసల్ ముడ్డో నే కెరంతిసి, దనచ జేవ్ ఇండితిసి.

13

ప్రబుచి సెక్కి తెన్ తీర్పు కెరుక తయెదె

1 ఆవ్ తుమ్తె అన్నె అయ్లె ఇన్నె తెన్ తెన్వెరి జయెదె. అయ్లె, కక్క తీర్పు కెరుక జలె, దొగుల తీర్గ సాచుల్చి సాచి బెద, రుజ్జు జంక.

2 అగ్గ పాపుమ్ కెరన్లక చి జేవ్ అన్నె ఎత్తిజిన్క అగ్గ జాగర్ల సంగిలయ్; సిచ్చ కెరుక జయెదె, మెన. ఆవ్ అప్పె ఒత్త నెంజిలె కి, జా సుట్టు ఆవ్ ఒత్త గెచ్చ తిలి పొది; తెదొడి ఆవ్ తెన్వెరి తుమ్తె జా తిలయ్, గెద. జలె, తెదొడి సంగిలి రితి, అప్పె కి కిచ్చొ సంగితసి మెలె, ఆవ్ అయ్లె పొది జేవ్ చెంగిల్ నే జా తిలె, కచితుమ్ తీర్పు కెర సిచ్చ దెయిందె.

3 "తుయి సంగితిన్క 'క్రీస్తు సంగిలిసి' మెన అమ్ చినితి రిసా రుజ్జు దెకవు" మెన అంక తుమ్ కొంకడ్డను. ఆవ్ అయ్లె, రుజ్జు దెకిలె. తుమ్చి రిసా క్రీస్తు అప్పు జయె నాయ్. తుమ్తె జోచి సెక్కి దెకయ్తయ్!

4 నిజామి, జో మాన్సు జెర్మన్ జలిన్క అప్పు తతికయ్, సిలువతె జోక మార్ల, గని దేముడుచి సెక్కి జో జీవ్ జా ఉట్ట జితయ్. అన్నె, జో తెన్ ఆమ్ కి అప్పు అన్నుమ్, గని తుమ్క 'చెంగిల్ జతు' మెనయ్ అమ్ తుమ్క బుద్ది సంగుక సిచ్చ కెరుక మెలె, యేసుక జయణ్ణో దేముడుచి సెక్కికయ్ జర్గు కెరుమ్దె. క్రీస్తు తెన్ జయి సెక్కిక జితనుమ్.

5 తుమ్, తుచి నముకుమ్తె నిదానుమ్ జా అన్నున్ గే నాయ్ గే, తుమ్క తుమి పరిచ్చ కెరన. రుజ్జుల్ దెకన. యేసుక్రీస్తు తుమ్చి వెట్టి అన్న మెన తుమ్క తుమి నేన్సు గె? గని ఏక్ వేల జో తుమ్చి వెట్టి నాయ్ జలె, చి పరిచ్చతె తుమ్ ఓడువ జా అన్నున్.

6 జా పరిచ్చతె ఆమ్, జలె, ఓడువ నే జలిసి తుమ్క రుజ్జు డీసున్ మెన అంచి ఆన.

7 అమ్చి సత్తిమ్ రుజ్జు జతి రిసా నాయ్, గని ఆమ్ ఓడువ జలి రితి డీసిలెకి నే డీసిలెకి, 'చెంగిల్ తిలిన్ కెర్లు' మెన, 'పాపుమ్ కెర్లు నాయ్' మెన, తుమ్చి రిసా దేముడుక అమ్ ప్రార్దన కెర్లునుమ్.

8 సత్తిమ్ పిట్టపుక నెత్తుమ్, సత్తిమ్ పిట్టపుక అమ్క ఇస్టుమ్ నాయ్. సత్తిమ్ కెర్లె రిసాయి అమ్చి ఆన.

9 అమ్ అప్పు తిలె, తూమ్ డిట్టుమ్ తిలె, అమ్క సర్ల. అమ్ కిచ్చొచి రిసా ప్రార్దన కెర్లునుమ్ మెలె, తుమ్క 'అప్పెచి కంబ ఆత్మక అన్నె చెంగిల్ జతు' మెనయ్ ప్రార్దన కెర్లునుమ్.

10 తుమ్క ఆవ్ దూరి తిలి పొది ఆవ్ కిచ్చొక ఇసి రెగిడ్డసి మెలె, ఆవ్ అయ్లె పొదిక ప్రబు దిలి అంచి అదికారుమ్క తుమ్క సిచ్చ కెరుక నెంజిలె, అంక సర్దయ్ తయెదె. జా అదికారుమ్ ముక్కిమ్క అంక కిచ్చొక ప్రబు దా అస్సె మెలె, నంపజలసక పాడ్ కెరుక నాయ్, గని జోవయించి ఆత్మక డిట్టుమ్ కెరుకయ్ దా అస్సె.

ఆకర్ కోడు

11 జలె, బాపుడ్లు, తుమ్ చెంగిల్ తా, పూర్తి బుద్ది తెన్ ఇండుక ఆస జా మార్పుప కెరన మెన ఆవ్ బతిమాల్పా జా సంగిలిసి దెరస, ఎక్కిలో తెన్ ఎక్కిలో ప్రేమ తెన్ తా. సేంతుమ్ తెన్ బెద కట్టు తెన్ జియ, చి ప్రేమ తిలో సేంతుమ్ తిలో దేముడు తుమ్చి తెన్ తయెదె.

12 ఎక్కిలోక ఎక్కిలో తుమ్చి ప్రేమ దెకయ్తి రితి ప్రబుచి నావ్ తెన్ సుద్ది తిలి ముద్దు తెన్ జొకర.

13 ఇన్నెచ నంపజల బాపుడ్లు ఎత్తిజిన్ తుమ్క జోవయించి ప్రేమ సంగ తెర్రయ్తతి.

14 ప్రబు జలో యేసుక్రీస్తుచి దయ, దేముడుచి ప్రేమ, అన్నె జోచి సుద్ది తిలి ఆత్మ దెతి కట్టు తుమ్ ఎత్తిజిన్చి పెట్టి తవున్, తుమ్చి నెడిమి తవున్.

గలతీయుల్ క రెగిడ్లి ఉత్త్రుమ్

బారిక్ జలో పవులు గలతీయు పట్టుమ్ చ నంగుమ్ చక రెగిడ్లి ఉత్త్రుమ్

మొదొల్ కోడు

1-2 కేన్ మాన్సు నిసాన తెద్రయలిసి నెంజె, కేన్ మాన్సు తెంతో జలిసి నెంజె, యేసుక్రీస్తు, జోక అన్నె జయడ్లె దేముడు అబ్బొసి తెన్సి, సొంత అంక నిసాన 'అమచొ బారికి' మెన యేసుక్రీస్తుచి నుబుమ్ కబుర్ కామ్ కెర్తి రిసా జో దిలి అదికారుమ్ తెన్ బులితో జోక బారికి జలో పవులు, చి అంచి తెన్ తిల బావుడ్లు, గలతీయ ప్రదేసిమ్ చ నంగుమ్ లక రెగిడ్లి ఉత్త్రుమ్.

3 దేముడు అబ్బొన్ చి అమచొ ప్రబు జలో యేసుక్రీస్తుచి దయ సెంతుమ్ తుమ్ చి ఉప్పిరి తప్పన్!

4 అమ్ చ పాపల్ వయన గెచ్చయతి రిసా, ఈంజ పాపుమ్ చి ఉగమ్ చి నయతాన్ చి తెంతో అమ్ క ములవుక మెన మెనయ, అమచొ అబ్బొ జలో దేముడుచి ఇస్టుమ్ క, జో క్రీస్తు జోచి సొంత జీవు దా మొర గెలన్.

5 జా కామ్ చి రిసా కెయక తెయక దేముడు అమచొ అబ్బొక జోబర! * అమేన్.

సత్తిమ్ బోద నంగిత్తన్ చి రిసాచి కోడు

6 'అంచ మాన్సుల్ జతు' మెన క్రీస్తు కెర్లి దయ వాట్ తుమ్ క బుకాల్లో దేముడుక తుమ్ గడియ నంపజలిన్ తెంతో, తెద్ది బే బేగి ముల 'నుబుమ్ కబుర్' మెన వేర మాన్సుల్ సికడ్లిసి తుమ్ నూనతనుచి రిసా అంక ఆచారిమ్!

7 జా వేర కోడుక 'నుబుమ్ కబుర్' మెనుక నెంజె, గని నగుమ్ జన్ క్రీస్తుచి రిసాచి నుబుమ్ కబుర్ † మార్పుప కెరుక ఇస్టుమ్ జా, తుమ్ క సిక్కు కెర్తతి.

8 జలె, అమ్ కి, పరలోకుమ్ చొ కేన్ జవున్ దూత కి, అమ్ నూనయలి కంట వేరచి 'నుబుమ్ కబుర్' కో సికడ్లి, జోచి సిచ్చ వయన నానినుమ్ తె గెతు.

9 అమ్ అగ్గె సంగిల్ రితి, అప్పె అవ్ అన్నె దస్సి సంగితసి. తుమ్ తెదొడి నంపజలి చి కంట 'నుబుమ్ కబుర్' మెన కో తుమ్ క కిచ్చొ వేరచి సికడ్లి, దేముడు దెతి జోచి సిచ్చ వయన నానినుమ్ తె గెతు!

నుబుమ్ కబుర్ క్రీస్తుతెయ సికిలిసి

10 జలె, 'వేరచి పొన. అవ్ సికడ్లిసి దె' మెన, మాన్సుతె జవున్, దేముడుతె జవున్ గవురుమ్ ఆనన్ తి రిసాయి అవ్ సంగితసి గే? మాన్సుల్ క మెన్సు వడంతి రిసా ఇసి జతసి గే? నాయ్, మాన్సుల్ క మెన్సు వడనుక అప్పెక అంక ఆన తత్తి జలె, క్రీస్తుక ‡ గొత్తి నుదొ రితో జతయ్ నాయ్.

11 ముక్కిమ్ క తుమ్ కిచ్చొ జానుక అన్నె మెలె, అంచి అత్తి సికడ్లి నుబుమ్ కబుర్ మాన్సు అవ్వి ఉచర్లిసి నెంజె.

12 'అమ్ క దిలిసి' మెన కేన్ మాన్సు సంగిలి బోదన నూన్లి వాట్ నాయ్, కేన్ మాన్సు అంక సికడ్లి వాట్ నాయ్, గని నుబుమ్ కబుర్ అంక కేన్ వాట్ అయలి మెలె, యేసుక్రీస్తు సొంతయ్ అంక డీన దెకయలన్.

13 అమ్ చ యూదుల్ చి రితి అవ్ అగ్గె కెర్తె తిలిసి, నంగుమ్ లు ఎత్తిక అవ్ అగ్గె కిగట్టిజ సిచ్చల్ కెర్తె తిలిసి నూన అన్నె. దేముడుచ జేవ్ నంగుమ్ లు మొత్తుమ్ క పూర్తి పాడె కెరుక అవ్ ఉచర్తె తిలయ్.

14 అన్నె, అమ్ చ పూర్ణుమ్ చ దిలి రితి నెరవెర్పుప కెరుకయ్ మెన అంక ఒగ్గర్ ఒగ్గర్ ఆన తిలి, చి అమ్ యూదుల్ చి గ్యానుమ్ అమ్ యూదుల్ చ అలవాట్ క దెకిలె, అమ్ చ ప్రజెత్తె అంచి జతచ ఉబెడల్ తె అవ్వి ఒగ్గర్ సిక తిలయ్.

15 గని కిచ్చొ జలి మెలె, అవ్ నే జెర్తితె అగ్గె తెంతో అంక నిసాన్లొ జోచి దయక అంక బుకాల్లో దేముడు

* 1:5 1:5 తద్దిల మెన అమేన్ † 1:7 1:7 బారికల్ 15:1, 5, 24 'అమచొ మోసి పూర్ణుమ్ చొ రితి కెర యూదుల్ జతి గుర్చి నున్నతి కెర్లకయ్ పరలోకుమ్ తె గెతి రచ్చన తుమ్ క దొర్లు జయెద' మెన సిరియ ప్రదేసిమ్ చి అంతియకయతె కిసి సికడ తిల గే గలతీయుల్ కి మాన్సుల్ దస్సి సికడ తిల. ‡ 1:10 1:10 నెంజెలె 'గొతిమాన్సు రితో' నెంజెలె 'గొతి జలి రితి'. § 1:13 1:13 బారికల్ 9:1-2.

16 అంక జోచొ దేముడు పుత్తునక *డినయలన్; యూదుల్ నెంజలనతె అవ్ గెచ్చ జో యేసుచి రిసా నూనయ్తి రిసాయి మెన, జో అంక బుక్కార్తయ్, మాన్సుక పుని నాయ్.

17 అన్నె, అంచి కంట అగ్గె యేసు ప్రబుచ బారికుల్ జలనక పుసుక మెన యెరూసలేమ్తె గెచ్చి నాయ్, గని అరేబియ దేసిమ్చి బయిలు దేసిమి †ఉట్ట గెలయ్, చి ‡పడ్డొ దమస్కు పట్టుమ్తె అన్నె ఉట్ట అయ్లయ్.

యెరూసలేమ్తె పవులు గెచ్చ తిలన్

18 ఒత్త తెంతో, అగ్గె నాయ్, గని తిన్ని వెర్పుల్ గెతికయ్, ప్రబుక బారికి జలో కీపేతురు తెన్ దస్సుల్ జంక మెన, * యెరూసలేమ్తె గెలయ్, చి జో తెన్ పనర పొదుల్ తిలయ్.

19 గని ఒత్త తిలి పొది ప్రబుక బావొన్ జలో యాకోబుక దెకిలయ్, గని ప్రబుచ అన్నె బారికుల్ తెన్ తెదొడి దస్సుల్ జయ్యి నాయ్.

20 ఈంజేవ్ అవ్ రెగిడ్డ కొడొక 'కిచ్చొ అబద్దుమ్ నెంజితి' మెన, దేముడు సాచి జతయ్.

21 ఒత్త తెంతో కేన్ గెలయ్ మెలె, సిరియ చి †కిలికియ ప్రాంతుమ్లతె గెలయ్.

22 తెదొడి ఎద కి యెరూసలేమ్తె నాయ్, గని ‡యూదయ ప్రదేసిమ్తెచ అన్నె నంగుమ్లుచ నంపజలనక అంక దెకిలె, అంక 'జొయ్యి' మెన నేనీతి.

23 తెదొడి ఎద అంక జేవ్ దెకుక నేతయ్, గని 'అమ్క అగ్గె అల్లర్ కెరె తిలొసా జో. అగ్గె పాడ్ కెరుక జో ఆన తిలి ప్రబుచి ఉప్పీర్చి నముకుమ్ జొయ్యి ఆజి బోదన కెర్తయ్' మెన అంచి రిసా నూన్,

24 అన్నె, అంచి రిసా దేముడుక గప్పురుమ్ సంగితె తిల.

2

యూదుల్ జతి గుర్చుచి తగు

1 ఒత్త తెంతో అన్నెక్ చొడ్డ వెర్పుల్ గెతికయ్, అవ్ తీతుక కడన బర్బుబా తెన్ *యెరూసలేమ్తె అన్నె గెలమ్.

2 †గో మెన ప్రబుయి అంక జోచి ఇస్తుమ్ దెకయ్తికయ్ గెలయ్, చి 'సుబుమ్ కబుర్' మెన యూదుల్ నెంజలనతె అవ్ కిచ్చొ ఎత్తి బోదన కెరె తత్తసి గే, యెరూసలేమ్తెచ నగుమ్జిన్ వెల్లొ మాన్సుల్చి మొక్క 'సాచి సంగిలయ్. కచి కచి మొక్క మెలె, 'సత్తిమ్చ' మెన తుమ్ నంపజలన జాన్తనచి మొక్క. కిచ్చొక జోవయించి మొక్క సంగిలయ్ మెలె, అవ్ నూనయ్తి సుబుమ్ కబుర్క 'తప్పు నెంజి' మెన జేవ్ రుజ్జు సంగుత్ మెన. నెంజిలె, జేవ్ రుజ్జు నే సంగిలె, సగుమ్జిన్ ఏక వేల అన్యూనమ్ తెన్ తత్త. చి అంచి కామ్ పాడ్ కెరుక ఉచర్త.

3 జలె, అంచి తెన్ తీతు ఒత్త తిలొ. గని, జో గ్రీసు దేసిమ్చొ జలెకి, యూదుడు జతి గుర్చుచి సున్నతి జో కెరసుక మెన జేవ్ సత్తిమ్చ వెల్లెల మాన్సుల్ బలవంతుమ్ కెరె నాయ్.

4 సత్తిమ్ నెంజల నంపజలనక మాత్తుమ్, కో గే లుంకచోరు ఒత్త కడ ఆన తిల. జేవ్ కిచ్చొక ఒత్త పెసిల మెలె, అమ్చ యూదుల్చ పూర్ణల్చ అగ్గుల్చి జా సున్నతి కెరంతి జాడమ్ అమ్ నంపజలన నే వయితిసి దెకిలె, జేవ్ ‡జాడ్లు అమ్ వయితి రితి అమ్క సికడుక మెన ఉచర తిల. జెవ్వి అమ్క అల్లర్ కెరె.

* 1:16 1:16 దమస్కు పట్టుమ్తె పవులు గెతె తిలి వట్టి డీనయలన్. బారికుల్ 9:3-9. † 1:17 1:17 ఏక వేల ప్రార్జన కెరుక చి జో మార్చున జలిన్చి రిసా చెంగిల్ ఉచరక మెన ఒత్త గెలన్. 'బారికుల్' పుస్తకుమ్తె జో ఒత్త గెలిన్చి రిసా సంగి నాయ్. ‡ 1:17

1:17 బారికుల్ 9:22, 23 మెదిల్. § 1:18 1:18 నెంజిలె 'కేపా' మెన, పేతురుక అరమయ్ బాన్ తెన్ నంగుల. ఈంక ఉత్తుమ్ రెగిడ్డ తొలితొచ పుస్తకుమ్ నగుమ్తె 'కేపా' మెన రెగ్గ అన్సి. * 1:18 1:18 బారికుల్ 9:26-29. † 1:21 1:21 జో జెర్మిలి పట్టుమ్ తార్చు కిలికియ ప్రదేసిమ్ తిలి. తార్చుతె గెలిన్క బారికుల్ 9:30 దెక. జా ప్రాంతుమ్ జేవ్ అన్నె బారికుల్ తిలి యెరూసలేమ్క ఒగ్గర్ దూరి తయచి.

‡ 1:22 1:22 యెరూసలేమ్ యూదయ ప్రదేసిమ్తె అన్నె. * 2:1 2:1 బారికుల్ 15:1-4. † 2:2 2:2 బారికుల్ 15:4, 12. ముక్కిమ్క పేతురుచి మొక్క చి యాకోబుచి మొక్క సంగిలన్. బారికుల్ 15:7, 13. ‡ 2:4 2:4 యూదుల్ జతి గుర్చుచి సున్నతిచి రిసాచి కోడు. బారికుల్ 15:1, 5 దెక. జా సున్నతి కెరెన్, యూదుల్చ అగ్గుల్ ఎత్తి, కి జేవ్ నిదానమ్ కెరుక మెన బలవంతుమ్ కెరుక ఉచరుల.

5 గని, దేముడుచి దయచి రిసాచి క్రీస్తుచి తెడిచి రచ్చనచి రిసాచి సుబుమ్ కబురతె కిచ్చొ కారిమ్లు, యూదుల్చ ఆగ్గుల్చి నే బెదయతె తుమ్క దన్నీ దొర్కు జస్సు తవున్ మెనయ, ఎక్కి నిమ్ముమ్ కి జేవ్ సంగిలి కోడుక బియ, అమ్ సంగిలి సుబుమ్ కబుర్ మార్పువ కెరుమ్ నాయ్.

6 వట్టి 'వెల్లెల మాన్సుల్' మెన ఎత్కిజన్ సంగితన కి అవ్ సంగితి సుబుమ్ కబురతె కిచ్చొ వేరచి బెదయతి నాయ్. జేవ్ వెల్లెల మాన్సుల్ జలకి నెంజిలె కి అంక తేడ నాయ్; దేముడు తేడల్ దెకి నాయ్. జేవ్ వెల్లెల మాన్సుల్ మెలనతె కిచ్చొ నొవిచి సిక్కి నాయ్.

7 కియూదుల్తె జో గెచ్చుక సుబుమ్ కబుర్ సొట్టు కెరుక మెన ప్రబు పేతురుక కీసి అదికారుమ్ దా అస్సె గే, దస్సి, *యూదుల్ నెంజిలనతె అవ్ గెచ్చుక మెనయ, ప్రబు తెద్రవ అస్సె మెన జేవ్ యెరూసలేమ్తెచ వెల్లెల మాన్సుల్ దెక ఒప్పున్.

8 కియూదుల్ జలనతె పేతురుక తెద్రవ జోచి అత్తి కామ్ కెర్తొ ప్రబు, అంచి అత్తి యూదుల్ నెంజిలనతె కామ్ కెర్తయ్.

9 జలె, జోచొ బారికి జతి ప్రబు అంక దిలి వరుమ్ జేవ్ వెల్లెల మాన్సుల్ చిన కెర, యూదుల్చ నంపజలన్క ముక్కిమ్ జలొ యాకోబు, †పేతురు అస్సె యోహాను కిచ్చొ కెర్ల మెలె, †బర్నబాక చి అంక ప్రేమ తెన్ ఆతు దెర జోకర, యూదుల్ నెంజిలనతె అమ్ గెచ్చుక మెన, *యూదుల్తె జేవ్ గెచ్చుక మెన, ఒప్పున్.

10 అమ్క ఎక్కి కామ్చి రిసా బలవంతుమ్ కెర్ల. కిచ్చొ మెలె, యూదుల్తెచ బీద జల నంపజలన్క ఆము చి యూదుల్ నెంజిల నంపజలన్క నే వచ్చితె తోడు దెంక. జా కోడు, సర్ల తెన్ ఒప్పున్యయ్, దస్సి కెర్తసుమ్.

పేతురు తెన్ తేడల్ దెకిలిన్

11 గని 'పేతురు జా సుట్టు అంతియొకయతె ఉట్టు అయ్లి పొది, జోక అడ్డు నెంతె ఎదార్దుమ్ తీర్పు సంగిలయ్. కిచ్చొక మెలె, జో పొరపాట్ జా తిలన్.

12 కీసి మెలె, 'సున్నతి కెరనుక ముక్కిమ్' మెంతన సగుమ్జిన్ యాకోబు తెంతో నే ఉట్టు జెతె అగ్గె, యూదుల్ నెంజిలనతె జో పేతురు కంక అలవాట్ జా తిలన్. గని జేవ్ జెతికయ్, 'యూదుల్ జతి గుర్తుచి సున్నతి కెరన్లెకయ్ రచ్చించువ జంక జయెదె' మెంతి కోడు బియ: కెర, గుంచ యూదుల్ నెంజిలనతె కంక ములిలన్.

13 ఒత్తవ యూదుల్ జల నంపజల ఎత్కిజన్ కి జో తెన్ దస్సి గుంచ దొన్ని మెన్సుల్ ఇండెల, చి బర్నబా కి జోవయించి ఉప్రమెన్సుతె ఇదిల్ బెదిల్ రితి జలొ.

14 దస్సి కెర, 'దేముడుచి దయకయ్ యేసుక్రీస్తు పాపుమ్ గెచ్చయ్లిన్చి రిసాయి రచ్చించువ జమ్దె' మెన జోవయించి పెట్టి జాన్లె కి, 'యూదుల్చ ఆగ్గు కారిమ్లు ముక్కిమ్చి' రితి జేవ్ ఇండెలె, సుబుమ్ కబురతె ముక్కిమ్ తిలిన్క అడ్డు కెర్లి రితి జతయ్. దస్సి జతతి మెన దెక కెర, జేవ్ ఎత్కిజన్చి మొక్కి †పేతురుక కిచ్చొ మెలయ్ మెలె, "తుయి యూదుడు జెర్ల యూదుడు నెంజిలొ రితి జయె ఎత్కిజన్ తెన్ బెదితసి జలె, యూదుల్ జతి రితి జేవ్ జంక మెన యూదుల్ నెంజిలన్క తుయి కిచ్చొక బలవంతుమ్ కెర్తసు!" మెన గోల కెర్తయ్.

యేసుకయ్ నంపజలిన్తెయ అమ్చి రచ్చన

15 జెర్మన్తె యూదుల్ జల అమ్, ఆగ్గుల్ నేన్ల పాపుమ్ కెర్లన జల యూదుల్ నెంజిలన నెంజిలె కి, 16 యేసుక్రీస్తుక నంపజలెకయ్ అమ్చి పాపుమ్ పుంచి 'జయెదె' మెన జానుమ్. 'పున్నిమ్ జా అస్సి' మెలి రితి ప్రబు దెకితె వరుమ్ ఆగ్గుల్ రితి ఇండెతిన్తె కక్కయ్ దొర్కు జయె నాయ్ మెన అమ్ జాన్,

§ 2:7 2:7 నెంజిలె, 'యూదుల్ జతి గుర్తుచి సున్నతి కెరన్లనతె'. * 2:7 2:7 'యూదుల్ జతి గుర్తుచి సున్నతి నే కెరన్లనతె'. † 2:8 2:8 నెంజిలె, 'యూదుల్ జతి గుర్తుచి సున్నతి కెరన్లనతె'. ‡ 2:9 2:9 సగుమ్తె 'కేపా' మెన అరమయ్ జాన్ తెన్ చి జోవయించి నాన్ రెర్ల అస్సె. § 2:9 2:9 బారికల్ 15:22-35. * 2:9 2:9 నెంజిలె 'యూదుల్ జతి గుర్తుచి సున్నతి కెరన్లనతె'. † 2:11 2:11 సగుమ్తె పేతురుక 'కేపా' మెన జోవయించి అస్సెక నాన్ రెర్ల అస్సె. ‡ 2:14 2:14 సగుమ్తె పేతురుక 'కేపా' మెన జోచి అస్సెక నాన్ రెర్ల అస్సె.

ఆగ్నేయం ఉన్నది నముకుమ నే తితి, క్రీస్తుకయ్ అమ్ నంపజలి అమ్చి పాపుమ్ వుం అమ్క 'పున్నిమ్ జా అస్సి' మెలి రితి దేముడు దెకెదె మెన జానయ్, అమ్ కి క్రీస్తు జలో యేసుక నంపజా అన్నుమ్.

17 యూదుల్ నెంజలనక 'అమ్చి ఆగ్నేయ రితి కెర్తి నాయ్ చి పాపుమ్ కెర్తన, జేవ్' మెన అమ్చ యూదుల్ సంగితతి, గెద. జలి, ఎక్కి క్రీస్తుకయ్ అమ్ నంపజలి అమ్చి పాపుమ్ వుం అమ్క 'పున్నిమ్ జా అస్సి' మెలి రితి దేముడు దెకెదె, మెలి అమ్ యూదుల్చ నంపజలన ఆగ్నేయ రితి ములిలి రిసా యూదుల్ నెంజలన తెన్ అమ్ కి పాపుమ్ కెర్తన జతసుమ్ మెనుక జలి, క్రీస్తుక 'జోయ్యి పాపుమ్ కెరయ్లో' మెనుక జతి. దస్సి మెన జోచి విలువ కడ్డిసి ఉచరుక పోన!

18 జలి, నేడ గెలిసి అన్నె అవ్ బందిలి అంక అవ్ పాపుమ్ కెర్తనా జయిందె గెద?

19 కిచ్చొక మెలి, అవ్ ఆగ్నేయ రితి అగ్గె ఇండ తా, 'రచ్చునక కామ్క నెంజె' మెన, ఆగ్నేయ నంప కెర్తి రితిచి తెడి జింక ములిలయ్. కిచ్చొక మెలి, దేముడుచి రిసా జితసుమ్.

20 క్రీస్తు సిలువతె మొర్తినతె అవ్ బెద మొర అస్సి. కిచ్చొ అంచి సొంత జివు జయి నాయ్. క్రీస్తుచి రిసా అవ్ జితసి, అన్నె, ఈంజ అగి అవ్ అప్పె జితిసి కిచ్చొ నెక్కిచి మెలి, అంక ప్రేమ్ కెర అంచి రిసా జోక జోయ్యి అర్పితుమ్ జా జోచి జివు దా రచ్చించువ కెర్త దేముడు పుత్తునిచి ఉప్పిర్చి నముకుమ్కయ్ అవ్ జితసి.

21 దేముడు దయ కెర్తినక 'నరిపుచువ జయె నాయ్' మెలి రితి ఇండి నాయ్. కిచ్చొక మెలి, ఆగ్నేయ వాట్ తుమ్చి పాపుమ్ వుంచి జా పున్నిమ్ జంక జతి జలి, క్రీస్తు ఆరికయ్ మొర గెలన్.

3

యేసుక్రీస్తుచి ఉప్పిర్చి నముకుమ్ సాలు

1 బుద్ది పిట్టవన్న ఒ తుమ్ గలతీయల్, తుమ్క కో ఇసి మోసిమ్ కెర అస్సి? యేసుక్రీస్తు సిలువతె మొర్తిన తుమ్ సొంత దెకెల్ రితి జతి రితి తుమ్క సొస్టుమ్ దెకవ తిలయ్. మదెన్ కీసి జా మోసిమ్ జలదు!

2 తుమ్క ఎక్కి పునిందె; దేముడుచి యేసుచి అత్తు తుమ్చి పెట్టి అయ్లిసి కిచ్చొచి రిసా? ఆగ్నేయ కమొచి రిసా గే, యేసుక్రీస్తుచి రిసాచి నుబుమ్ కబుర్ నూన జోక నంపజలిన్చి రిసాయి గే? నుబుమ్ కబుర్ నూన నంపజలిన్చి రిసాయి గెద.

3 తుమ్క ఎదిలి బుద్ది కి నాయ్ గే? ప్రబుచి అత్తుకయ్ చెంగిల్ జంక దెర, మాన్పుచి నెక్కివ కమొ తెన్ పూర్తి కెరనుక ఉచర్చున గే?

4 ప్రబు తుమ్చితె జర్గు కెర్తినె ఎత్తి ఆరి గే? ఏక్ వేల జా ఆరి జర్గు జంక జతి జలి.

5 జోచి అత్తు దా తుమ్తె జోచి అదికారుమ్ దెకయ్త వెల్లో కమొ కెర్తనా, జలి, ఆగ్నేయ రిసా జెయిమ్ కెర్తయ్ గే, మాన్పుల్ జోవయింబి నుబుమ్ కబుర్ నూన నంప కెర్తి రిసాయి జర్గు కెర్తయ్ గే, తుమ్ చెంగిల్ ఉచర. జోవయింబి నుబుమ్ కబుర్ మాన్పు నూన నంప కెర్తి రిసాయి.

నముకుమ్ తితనకయ్ దేముడు 'పున్నిమ్' మెన దెకితయ్

6 దస్సి అమ్చొ పూర్ణుమ్చొ అబ్రాహామ్చి రిసా రెగ్గ అస్సి. కిచ్చొ మెన మెలి, "దేముడు ప్రబుచి కోడు జో నంప కెర్తనచి రిసా జోక 'పున్నిమ్ జా అస్సి' మెలి రితి జోచి దయక జో దెకిలా" మెన రెగిడ్డిసి.

7 జా కోడుతె కిచ్చొ రుజ్జు డీన్యయ్ మెలి, ప్రబుక నంపజతనయ్ అబ్రాహామ్చ పుత్తర్లు జప్పల.

8 దస్సికయ్, జోవయింబి నముకుమ్చి రిసా యూదుల్ నెంజలనక దేముడు జోక 'పున్నిమ్ జా అస్సి' మెలి రితి దెకెదె మెనయ్ *మోసి పూర్ణుమ్చొచి అత్తి రెగిడ్డి దేముడుచ ఆగ్నేయతె అగ్గె తెంతో రెగ్గ అస్సి. అగ్గెయ తెంతో అబ్రాహామ్క నుబుమ్ కబుర్ సంగిలి కోడుతె,

† "తుచి వంసుమ్ వాట్ దేసిమ్లు ఎత్తిక చెంగిల్ వరుమ్ దొర్కు కెరిందె"

§ 2:20 2:20 నెంజె, 'అప్పె అచ్చొ జయి నాయ్, గెని క్రీస్తుయి అంచి పెట్టి జతయ్చి రిసా అవ్ జతసి', అన్నె... * 3:8 3:8 తెలుగు బైబిల్ తె దృశ్యాత్వమ్ మెలి, మోసిచి అత్తి దేముడు ర్గయ్లి ఆగ్నేయ మెన అమ్ జానుమ్. ఈంజ కోడె ఎత్తి బైబిల్ తె అగేచి పావ్ పుస్తకుమ్తె రెగ్గయ్ జా అస్సి. ఈంజ దెకవుక మెన కుపెయ్ బాంతె నొయ ప్రమానుమ్తె మోసి పూర్ణుమ్చొచి అత్తి రెగిడ్డి దేముడుచ ఆగ్నేయ మెన ర్గవ అస్సి. † 3:8 3:8 అదికాండుమ్ 12:3, 18:18, 22:18.

మెన జో దేముడు రెగిడ్డి కోడు.

9 జలె, ఇస్సైతెన్ కిచ్చొ రుజ్జు జతయ్ మెలె, ప్రబుచి ఉప్పిరి నముకుమ్ తితన కో జవుల గే, ప్రబుచి ఉప్పిరి నముకుమ్ తిలో అబ్రాహామ్ తెన్ జోవయింక కి ప్రబుచి దీవెన దొర్పు జతయ్.

క్రీస్తు జా సిచ్చ తెంతో అమ్క విడ్డల్ కెర అస్సె

10 'ఆగ్గుల్ రితితె అమ్చి రచ్చన' మెన ఉచరంతన జలె, నాసెనుమ్ జతి, సిచ్చుచి సాపెనతె దెర్ను సేడ అస్సి. కిచ్చొక మెలె, మోసే పూర్ముచొచి అత్తి దేముడు రెగ్గయల ఆగ్గుల్ రెగిడ్డి రితి,
 †"మోసే పూర్ముచొచి అత్తి దేముడు రెగ్గయల ఆగ్గుల్తె రెగ్గయలి ఎత్తి ఆగ్గు కో పూర్తి నిదానుమ్ నే కెర్లె, నాసెనుమ్ జతి ఆవ్ దిలి సిచ్చతె గెచ్చుల"

మెన సెలవ్ రెగ్గ అస్సె.

11 జలె, కిచ్చొ రుజ్జు డిస్తుయ్ మెలె, ఆగ్గుల్ రితి కెర్తిసి జో దేముడుచి మొక్క కేన్ మాన్సుచి పాపుమ్ వుంచె నాయ్, జోవయింక పున్నిమ్ దెయె నాయ్. కిచ్చొక మెలె, దేముడుచి కొడెతె కిఅస్సైకతె కిచ్చొ రెగ్గ అస్సె మెలె,

*"కో పున్నిమ్ మాన్సుల్ జవుల గే, జెవ్వి నముకుమ్ జా జవుల"

మెన రెగ్గ అస్సె.

12 దేముడు మోసే తెన్ దిలి ఆగ్గుల్ తెన్ తిలి నముకుమ్చి రిసా నాయ్, గని జా ఆగ్గుల్చి కో ఇండుల గే జేవ్ జవుల.

†"జా ఆగ్గుల్ రితి కో జలె పూర్తి నిదానుమ్ కెరుల గే, జెవ్వి జేవ్ ఆగ్గుల్చి సెక్తిక జవుల"

మెన రెగ్గ అస్సె. గని కోయి పూర్తి నిదానుమ్ కెరుక నెత్తిర్తి.

13 జలె, క్రీస్తు అమ్చి పాపుమ్చి రిసాచి సిచ్చ వయన, ఆగ్గుల్ రితిచి జా సిచ్చుచి సాపెన తెంతో అమ్క నెతోవ కెర విడ్డల్ కెర అస్సె. అమ్చి పాపుమ్ జో వయిలి కోడుక కిచ్చొ రుజ్జు మెలె,

†"సిలువతె ఒడోయ్ జా మొర్తి సిచ్చ జతో ఎత్తి మాన్సుచి సాపెన వయెదె"

మెన దేముడుచి కొడెతె రెగ్గ అస్సె.

14 జో అమ్చి పాపుమ్ కిచ్చొక వయిలన్ మెలె, అమ్చొ అబ్రాహామ్ పూర్ముచొక దిలి రచ్చన వరుమ్ జో క్రీస్తు జలె యేసుచి తెడి నముకుమ్ తెన్ యూదుల్ నెంజలసక కి దొర్కు జవున్ మెన, దేముడు సంగిలి ప్రమానుమ్ నెరవెర్చువ జవున్ మెనయ్.

ఆగ్గుల్ వాట్ నాయ్, గని దేముడుచి ప్రమానుమ్ వాట్ రచ్చన

15 ఓ బావుడ్డు, మాముల్ మాన్సుల్ తెన్ జర్గు జతిన్చి ఏక్ టాలి ఉచరుమ. కేన్ జవున్ మాన్సుచి అత్తి దెతిసి క్రీప్మానుమ్, సాచుల్చి మొక్కె జలి పిమ్మటి, కోయి వేర మాన్సు జా మార్పువ కెరుక జయె నాయ్. 'కామ్క నెంజె' మెనుక జయె నాయ్, కిచ్చొ వేరచి బెదవుక జయె నాయ్.

16 జలె, అబ్రాహామ్క చి జోచి సెకుమ్తె పడ్డొ జెర్ముక తిలోసాకయ్ దేముడు ప్రమానుమ్ కెర సంగిలన్. ఒగ్గరజన్క సంగితి రితి, "తుచి సెకుమ్తె జెర్ముక తిలసక" మెన జో రెగిడ్డినతె నాయ్. ఎక్కిలోయిచి రిసా సంగితి రితి; "తుచి సెకుమ్తె జెర్ముక తిలోసాక" మెన రెగ్గ అస్సె. కచి రిసా మెలె, క్రీస్తుచి రిసాయి.

17 జలె, ఆవ్ సంగితి అర్దుమ్ కిచ్చొ మెలె, అగ్గె అబ్రాహామ్చి మొక్కె దేముడు జేవ్ ప్రమానుల్చి కోడు సంగ ముద్ర దిలన్. ఒత్త తెంతో, చెత్తర్ పుంజొ ముప్పుయ్ వెర్పుల్ గెలెకయ్ జో ఆగ్గుల్ రితి దిలన్. జో అగ్గె సంగ తిలి ప్రమానుమ్క, కామ్క నెంజె రితి పడ్డొ అయల ఆగ్గుల్ మార్పువ కెరుక నెత్తిర్తి.

18 జలె, దేముడు దెతి వాట్ దొర్కు జతి వరుమ్ ఆగ్గుల్ వాట్ జెతి జలె, జోచి ప్రమానుమ్ కామ్క నెంజెతి, గని ప్రమానుమ్ వాట్కయ్ అబ్రాహామ్క జోచి దయ తెన్ వరుమ్ దిలన్.

† 3:10 3:10 ద్వితియావదేశ కాంధము 27:26. § 3:11 3:11 హబక్కుకు 2:4. * 3:11 3:11 ఈంజ కోడుచి అర్దుమ్ దిగు తెన్ సంగిలి, ఇని జయెదె: ప్రబుచి ఉప్పిరి కో నముకుమ్ తివుల గే, జోవయింక నముకుమ్చి రిసా జోవయింక పాపుమ్ వుంచ జోవయింకయ్ 'పున్నిమ్' మెలె రితి జో దెకెదె, చి రచ్చింపువ జా జవుల. † 3:12 3:12 లేవీయకాండుమ్ 18:5. ‡ 3:13 3:13 ద్వితియావదేశ కాండుము 21:23. § 3:15 3:15 అప్ప

19 దస్సి జలె, ఆగ్గల్ రితి కిచ్చొ కామ్క జెతయ్? కిచ్చొ మెలె, రచ్చన వరుమ్చి దేముడు సంగిలి ప్రమానుమ్ నెరవెర్చువ కెర్తొ జెర్చుక తిలోసా నే అయ్లి మదెనె కామ్క అయ్లి; మాన్సుల్చి బుద్దిక 'పాపుమ్చి' మెన రుజ్జుల్ దెకయ్తె తతి రిసా అయ్లి. వడ్డొ, మదెనె జతో మాన్సు జలో మోసేచి అత్తి దూతల్ జేవ్ ఆగ్గల్ దిల.

20 జలె, ఆగ్గల్ దిలిన్తె దూతల్, మోసే, మదెనె జలె, గని అగ్గె తెంతో చి ప్రమానుమ్ సంగిలిసి జలె, దేముడు, సొంత, కోయి మదెనె నే జతె జా ప్రమానుమ్ దిలో, దేముడు ఎక్కిలో.

21 జలె, దేముడుచ ప్రమానల్క జో దిల జేవ్ ఆగ్గల్ విరోదుమ్ అస్తి గే? నాయ్. *పరలోకుమ్తె అమ్ బెదితి రచ్చన దెతి సెక్కిచి ఆగ్గు జో దెతో జలె, అమ్ పున్సిమ్ జతి రచ్చన నిజమి ఆగ్గల్ వాటి దొర్కు జతి.

22 గని దేముడుచి కొడో సదు కెర్తొ కిచ్చొ రుజ్జు డీస్తయ్ మెలె, ఎత్తి కి పాపుమ్తె దెర్చు సేడయి అస్తి; జేలి జలి రితి; చి ఎత్తి జోవయిచి సిచ్చ వయుక అస్సి. కో యేసుక్రీస్తుక సంపజవుల గే, జా పాపుమ్ జా సిచ్చ తెంతో జెవ్వి రచ్చించువ జా మెన దేముడు ప్రమానుమ్ సంగ తిలో.

23 జలె, యేసుక సంపజతి వాటు నే జెతె అగ్గె, ఆగ్గులీ అమ్క ముద్దొ కెర్తొ తిల. యేసుక సంపజా రచ్చించువ జతి జా వాట్ డీసిల్ ఎదక ఆగ్గులీ అమ్క జేలి కెర తిల.

24 దస్సి, క్రీస్తు అయ్లి సమయమ్ ఎద ఆగ్గుల్ అమ్క ఇండయ్తోసా జలి రితి జా, అమ్క ముద్దొ కెర్తొ తిల; జో అయ్లె, జోచి ఉప్పిరి అమ్చి నముకుమ్ తిలె, దేముడుచి ఆసచి రిసా జా నముకుమ్ వాట్కయ్ అమ్క పున్సిమ్ దొర్కు జప్పన్.

25 గని, యేసుచి ఉప్పిర్చి నముకుమ్ వాటు దొర్కు జలి తెంతో, జా ఇండయ్తోసా జతి ఆగ్గుల్చి ముద్దొతె అమ్ నాయ్.

26 కిచ్చొక మెలె, †క్రీస్తు జలో యేసుచి ఉప్పిర్చి తుమ్చి నముకుమ్చి రిసాయి, జోవయిచి తెడి తుమ్ ఎత్తిజన్ దేముడుచ పుత్తర్చులు జలదు.

27 మెలె, క్రీస్తుచ సొంత మాన్సుల్ జతి గుర్తుక తుమ్తె కో బాప్తిసుమ్ నజన అస్సున్ గే, నొవ పాలల్ గలన్లి రితి క్రీస్తుక గలన అస్సున్.

28 దస్సికయ్, తుమ్చితె 'యూదుడు' మెన, 'గ్రీసుడు' మెన, 'గతిమాన్సు' మెన, 'గతి నెంజిలో మాన్సు' మెన, 'మున్సుబోద' మెన, 'తేరబోద' మెన, తేడల్ నాయ్. కిచ్చొక మెలె, తుమ్ ఎత్తిజన్ క్రీస్తు జలో యేసుచి తెడి ఎక్కి జా అస్సున్.

29 తుమ్ క్రీస్తుచ మాన్సుల్ జలదు మెలె, 'బగ్గరజన్ తుచ పుత్తర్లు రిత జవుల' మెన దేముడు అబ్రాహామ్క సంగిలన తూమ్ జా అస్సున్, జో అబ్రాహామ్చి వాట తుమ్కయ్ కి సిడ్డయ్.

4

దేముడుచి దయచి రిసా జోచ పుత్తర్లు

1 జలె, ఆవ్ కిచ్చొ మెంతసి మెలె, ఎజోమానిచొ పుత్తుసి బాల తతె, గతిమాన్సుచి రితి దాకు జా అబ్బొన్చి తెడి తయెదె; అబ్బొన్చి ఆస్తి ఎత్తి జోచి ఆస్తి జయెదె మెలె కి.

2 జా మదెనె, అబ్బొని అగ్గె తెంతో రెగిడ్లి దీసి ఎద, జో ఉబెడొ జోక దెకిత వెల్లెల మాన్సుల్చి, ఇండయ్తోసాచి, ముద్దొచి తెడి తయెదె.

3 అమ్చి తెన్ కి దస్సి, ఆత్తుక అమ్ బాలబోదల్ రిత తిలె పొది, మాములుమ్ ఈంజ లోకుమ్చి, బాలబోదల్ అర్దుమ్ కెరంతి ఎదిలి గ్యానుమ్క గతిమాన్సుల్ రిత జా తిలమ్.

4 గని కాలుమ్ బెర్చు జా అయ్లి పొది, దేముడు జోచొ సొంత పుత్తున్క తేరబోదచి పెట్టి జెర్చయ్లి రితి, ఆగ్గుల్ రిత యూదుల్తె జెర్చయ్లి రితి ఈంజ లోకుమ్తె తెద్రయ్లన్.

* 3:21 3:21 నెంజిలె జివు దెతి సెక్కిచి ఆగ్గు... † 3:26 3:26 'క్రీస్తు' మెలె, హుర్లుమ్ తెంతో 'తెద్రయిందె' మెన ఎత్తి అదికారుమ్ తిలో దేముడు సంగిలో దొర్కు జలో రచ్చించువ కెర్తొసా.

5 కిచ్చొక మెలె, అగ్గులేచి తెడి అమ్ తిలసక జా అగ్గులే రితి పాపుమ్ వయడ్డిసి తెంతో నెతోవ గెల ములయలో మెనయ్, అమ్ ఎత్తిజన్ నంవజలసక 'అంచ పుత్తర్లు జతు' మెనయ్, జో దేముడు అబ్బొసి జోచొ పుత్తునక తెద్రయలన్.

6 వడ్డి తుమ్క 'జేవ్ కి నిజామి జోవయంచ పుత్తర్లు జల' మెన అమ్ జాన్సి రిసా, దేముడు జోచొ పుత్తునచి అత్తు అమ్చి పెట్టి తెద్రవ అస్సె, చి జా కోడు ఒప్పనతి సర్లక 'ఓ బ, ఓ బ' మెన అమ్ జోక ఉంక్రయతనుమ్.

7 దస్సి, దేముడుచి దయచి రిసా, తుమ్ అప్పె తెంతో అగ్గెచి రితి గొతిమాన్సుల్ నెంజుసు. జోచ పుత్తర్లు జా అస్సున్, చి జోచ పుత్తర్లు జలదు మెలె, జోచి రాజిమ్తె తుమ్క వాట అస్సె.

గలతియల్క జాగర్లు సంగిలిసి

8 అగ్గయ, దేముడుక తుమ్ నేన్లి పొది, 'దేముడ్లు' మెన దేముడ్లు నెంజిలసక గొతిమాన్సుల్ రిత జా తిలదు.

9 గని, అప్పె, తుమ్ దేముడు తెన్ బెదిలి తెంతో, మెలె, జో తుమ్క కి బెదవన్లి తెంతో, తుమ్ జోచ గొతిమాన్సుల్ రిత అన్నె జంక ఇస్సుమ్ జలి రితి జా, కిచ్చొక దస ఎద్దెరి నెక్కి నెంజిల కమెతె అన్నె బెదిల్ రితి జంక దెర్లసు?

10 దీసిక, జోనుక, కాలుమ్క, వెర్లుక కిచ్చొ కారిమ్లు కెర్లె కామ్క జెయెదె మెన * జాడ్లు వయడ్డ అగ్గులేతె తుమ్ అన్నె దెర్లు సేడ్డును!

11 జాకయ్, 'దస అల్లర్ తెంతో విడ్డల్ జతు' మెన తుమ్చి రిసా ఆవ్ నెము సేడ్డిసి ఎత్తి ఆరి పాడ్ జా గతయ్ మెన ఆవ్ బితసి.

పవులుచి రిసా గలతియల్ అన్మానుమ్

12 ఓ బాపుడ్లు, తుమ్క ఆవ్ కిచ్చొ బతిమాల్లా జా సంగితసి మెలె, తూమ్ అంచి రితి జా. ఆవ్ కి తుమ్చొ రితో జా అస్సి.†

ఆవ్ తుమ్చి తెన్ తిలి పొది, తుమ్ అంక కిచ్చొ పొరపాట్ కెర్లు నాయ్.

13 అంచి అగి ఏక బాద తిలి రిసాయ్, తుమ్తె తెదోడి తా నుబుమ్ కబుర్ నూనపుక అంక వాట్ అయ్లి మెన జాన్సు.

14 తెదోడి అంచి బాద తుమ్క అల్లర్ కెర్లె కి, అంక ఆనున్ నాయ్, నిస్కారుమ్ దెకున్ నాయ్, గని దేముడుచొ దూత ఎక్కిలో జో, నెంజిల 'క్రీస్తుయేను రితో' మెలి రితి అంక దెక, మరియూద కెర్లదు.

15 జలె, అంచి రిసాచి తుమ్చి తెదోడిచి సర్ల అప్పె కేతె? తెదోడి అంచి బాద చి రిసా, తెర్లె తుమ్చ సొంత అంకివొ కడ కెర అంక దెతదు మెన ఆవ్ సాచి సంగితసి.

16 దస్సి జలె, మదెనె "అగ్గులే వయడ్డి జాడు వయ్తినతె తుమ్ అన్నె గెచ్చ పొరపాట్ జతసు" మెన తుమ్క ఆవ్ సత్తిమ్ సంగిలి రిసా 'తుమ్క విరోదుమ్ జా అస్సె' మెన అంచి రిసా ఉచర్లసు గే?

17 అగ్గులేక నంవజా బలవంతుమ్ కెర్లసు, జలె, తుమ్క పులయ్తతి; గని బుద్ది నెంజిలి కామ్ ఉచరయ్ దస్సి కెర్లతి. మెలె, జోవయింకయ్ తుమ్ వెల్లొ మెన దెకుక జోవయించి అస, చి అంక తుమ్క దూరి కెరుక ఉచర అస్సి.

18 చెంగిల్ కామ్క, జలె, మాన్సు అమ్క మెన్సిలె చెంగిలి. అంక, జలె, ఎక్కి ఆవ్ తుమ్చి తెన్ తిలె పొది నాయ్, గని ఆవ్ ఉట్ట అయ్లి పొది కి సర్ల తెన్ దెకితదు, జలె, సర్ల జతయ్.

19 ఓ పుత్తర్లు, క్రీస్తు తుమ్ ఇండితి రితితె సరిగా డీస్సె ఎదక అన్నె అంక బోద పాయితి తేర్బోదచి రితి నొప్పి!

20 తుమ్చి తెన్ ఆవ్ అప్పె తంక జతి, జలె, తుమ్క 'నాయ్, నిదానుమ్ అస్సి' మెన ఆవ్ రుజ్జు దెకుక జతి, జలె, సర్ల జతయ్. మదెనె, తుమ్చి రిసా కిచ్చొ కెరుక గే ఆవ్ నేన గెచ్చ అస్సి.

* **4:10 4:10** జేవ్ యూదుల్ నెంజిలనచ సిస్టల్తె దస అగ్గులే తవుల, యూదుల్చి అలవాట్లె కి దస అగ్గులే తిల మెనుక జయెదె. జేక, జేవ్ గలతియల్చ నంవజలన యూదుల్ జతి గుర్తుచి సున్పతి కెరంపిసి గట్టచ అగ్గులేక బిలె, జోవయించి అగ్గెచి రితచ అగ్గులేతె, మెలె, కంబ జా కెర్లె గార్ మెంత కంబ జా కెర్లె పున్సుమ్ మెంత అగ్గులేతె అన్నె దెర్లు సిడ్డి రితి జతయ్. † **4:12 4:12** జో యూదుడు జెర్లిరికి, జోవయింకెన్ బెద జోవయించి రితి జా తిలన్. జేక, జేవ్ జోవయింక దెక జోతె ఇదిల్ సికుక జయెదె.

గొతిమాన్సు గొతి నెంజిల్ మాన్సు

21 దేముడు మోసే తెన్ దిలి అగ్గుల్చి రితిచి తెడి తంక తుమ్ ఇష్టుమ్ జలస అంక జబాబ్ సంగ. దేముడు మోసే తెన్ దిలి అగ్గుల్చె తిలిసి నూన్సు నాయ్ గే?

22 ఒత్త రెగ్గిసి ఏక్ కిచ్చొ మెలె, అబ్రాహామ్ క దొగు పుత్తర్లు తిల. ఎక్కిలో హాగరు మెలి గొతిమాన్సుచి పెట్టి జెర్మిలన్. అన్యెక్కో, జలె, తేర్పి జలి సారాచి పెట్టి జెర్మిలన్.

23 జా గొతిమాన్సు జలి హాగరు చి పెట్టి జెర్మిలొసా, జలె, *మాన్సుచి ఇష్టుమ్ కయ్ జెర్మిలన్. గని, తేర్పి జలి సారాచి పెట్టి జెర్మిలొసా, జలె, దేముడు సంగిలి కీప్రమానుమ్ చి రిసా జెర్మిలన్.

24 ఈంజ మత్తెలి, జలె, అమ్ క టాలి దెకయ్ తయ్. ఈంజేవ్ దొగుల తేర్ బోదల్ క దెకిలె, దేముడు సంగిల దొన్నె ప్రమానుమ్ చి రితి జతయ్. ఏక్ ప్రమానుమ్ జో సినాయి డొంగుర్తె అగ్గుల్ దిలిన్ చి ప్రమానుమ్. అన్యెక్ ప్రమానుమ్, హాగరు మెలి జా గొతిమాన్సుచి రితి జా, గొతి జత మాన్సుల్ పాయి తయ్.

25 అరేబియ దేసిమ్ చి సినాయి డొంగుర్తె దిలి అగ్గుల్ క టాలి జతయ్. జలె, అప్పె ఈంజ లోకుమ్ చి యెరూసలేమ్ పట్టుమ్ కి టాలి జయెదె. కిసి మెలె, యెరూసలేమ్ పట్టుమ్, యూదుల్ జల జేవ్ చ బోదల్ తెన్, అగ్గుల్ క గొతి జా అన్యె.

26 గని సారా టాలి జలి పరలోకుమ్ తిలి యెరూసలేమ్ పట్టుమ్, జలె, గొతి జలిసి నెంజె. యెసుప్రబుక సంపజలసక జయ్యి అయ్యె.

27 సారాక చి హాగరుక జర్లు జలిన్ చి రిసా దేముడుచి కొడెతె రెగ్గి తితి,

*“గొడ్డు జలి తేర్ బోద, తుయి సర్ద జా!

*నొప్పుల్ నే జలి తేర్ బోద, తుచి సర్ద కేక్ గలు!

కిచ్చొక మెలె, కీమున్సున్ తెన్ అగ్గె తెంతో బోద పాయిలి గొతిమాన్సుచి కంట,

జా గొతిమాన్సు నిస్కారుమ్ దెకిలి అగ్గె బోదల్ నెంజిలి *తేర్ బోదక

అన్యె ఒగ్గర్ జిన్ ‘పుత్తర్లులు జెర్మ అన్యె.’”

28 అబ్రాహామ్ చి తేర్పి జతి సారాక “తుచి పెట్టి అబ్రాహామ్ క సంతానుమ్ దెయిందె” మెన దేముడు సంగ తిలన్. జా ప్రమానుమ్ క జెర్మిలొసా ఇస్సాకు. జలె, బావుడ్లు, ఇస్సాకుచి రితి, అమ్ యెసుక సంపజలస ప్రమానుమ్ చి రిసాచ బోదల్ జలమ్.

29 జలె, జా పొది, దేముడుచి సుద్ది తిలి అత్తుచి ఇష్టుమ్ క జో జెర్మయ్ లో ఇస్సాకుక, మాన్సుచి ఇష్టుమ్ క జెర్మిలొ హాగరు చి పెట్టిచో ఇస్సాయ్ లో అల్లర్ కెర్తె తిలన్. అప్పె కి, అగ్గుల్ రితి గొతి జలి రితి జా అగ్గుల్ చి రితి సేవ కెర్తెన జా గొతి ప్రమానుమ్ తెంతో విడ్డల్ జల సంపజలసక అల్లర్ కెర్తెతి.

30 గని, దేముడుచి కొడెతె రెగ్గయ్ లిసి కిచ్చొ మెలె,

*“గొతిమాన్సుక చి జేవ్ తెన్ జేవ్ చో పుత్తున్ క ఉడడ గెలు.

కిచ్చొక మెలె, గొతి నెంజిలి మాన్సుచో కీపుత్తున్ క దొర్కు జతి వరుమ్ తె

గొతి తిలి మాన్సుచో *పుత్తున్ క వాట నాయ్”

మెన రెగ్గి కోడు.

31 జలె, బావుడ్లు, అమ్ యెసుచి ఉప్పిరి నముకుమ్ తిలస గొతిమాన్సుల్ చ బోదల్ నెంజామ్. గొతి నెంజిలి మాన్సుల్ చ ఆము.

‡ 4:23 4:23 ఆదికాండుమ్ 16:1-5. సంతానుమ్ నెంజితికయ్, ‘అచి గొతిమాన్సు హాగరు తెన్ సంతానుమ్ పాయి’ మెన సారా మున్సున్ జలె అబ్రాహామ్ క సికడ్డన్, చి హాగరు పుత్తు పాయ సారా నిస్కారుమ్ దెకుక దెర్డన్. § 4:23 4:23 ఆదికాండుమ్ 17:15-19.

* 4:27 4:27 యెసుయా పున్సుకుమ్ 54:1. † 4:27 4:27 సారా. ‡ 4:27 4:27 సారా. § 4:27 4:27 హాగరు. * 4:27 4:27 సారా. † 4:27 4:27 యెసుక్రీస్తుక సంపజలె ఎత్తి మాన్సు అత్తుక అబ్రాహామ్ చి గొతి నెంజిలి సంతానుమ్ జప్పల. జోవయిందె రిసా ‘ఒగ్గర్ జిన్ పుత్తర్లులు’ మెన పప్పలు ఇన్సంగి తయ్. ‡ 4:30 4:30 ఆదికాండుమ్ 21:10. § 4:30 4:30 యెసుచి ఉప్పిరి నముకుమ్ తిలసకచి టాలి. * 4:30 4:30 అగ్గుల్ చి ఉప్పిరి నముకుమ్ తియ అగ్గుల్ క గొతిమాన్సుల్ చి టాలి.

5

యూదుల్ జతి గుర్తుచి సున్నతి రిసా పవులు తీర్పు సంగిలిసి

1 అమ్క 'ఆగ్గుల్ ప్రమాసుమ్చి గొతి సేవ తెంతొ విడ్డల్ జలి రితి ఇండుత్' మెనయ్, క్రీస్తు అమ్క విడ్డల్ కెర అస్సె, జాకయ్, తుమ్ జోవయించి తెడి డిట్టుమ్ తా, ఆగ్గుల్క గొతిమాస్సుల్ రిత జతిన్తె అన్నె దెర్పు సేడ నాయ్.

2 జలె, ఆవ్ పవులు తుమ్క కిచ్చొ మెంతసి మెలె, యూదుల్ జతి గుర్తుచి జా సున్నతి తుమ్ కెరన్లె, క్రీస్తుక విరోదుమ్ జలి రితి, చి క్రీస్తు ఆరి దొర్కు కెర్లి రచ్చన తుమ్ నే విలువ దిలి రితి జయెదె.

3 జా సున్నతి కెరనుక ఉచర్తొ ఎత్తి మాన్సుక ఆవ్ కిచ్చొ రుజ్జు సంగితసి మెలె, యూదుల్చ ఆగ్గుల్చి ఎత్తి కోడు జో మాన్సు నిదాసుమ్ కెరుక అస్సె, కెరుక ఒప్పున అస్సె.

4 'యూదుల్చ ఆగ్గుల్ వాల్ అమ్క పున్నిమ్ దొర్కు జయెదె, అమ్చి పాపుమ్ గెచ్చెదె' మెన కో ఉచర్తను జలె, తుమ్ క్రీస్తుక విరోదుమ్ జలి రితి జా ముల అస్సున్. మెలె, జోచి దయ వాటు దొర్కు జలి రచ్చనచి తెడి తెంతొ ఎట్టొ సేడ అస్సున్.

5 అమ్ ఎక్కి ప్రబుచి ఉప్పిరి నముకుమ్ తియ, అమ్చి పెట్టి దిలి జోచి ఆత్మ తెన్, జొయ్యి అమ్చి పాపుమ్ పుంచ అస్సె, చి జోచి పున్నిమ్చి రిసా దయిరిమ్ తెన్ రకితనుమ్.

6 క్రీస్తుచి తెడి తిలె, యూదుల్చి గుర్తుచి సున్నతి కెరన తిలె లాబుమ్ నాయ్, నే కెరన్లె న్నుమ్ నాయ్. జా కెరంతినె నే కెరంతినె కిచ్చొ నాయ్. గని కిచ్చొ కామ్క జెతయ్ మెలె, ఎక్కి క్రీస్తుకయ్ నంపజతిసి, చి ప్రేమ ఇండితినె జా నముకుమ్ దెకయ్తిసి.

7 తుమ్ అగ్గెయి నముకుమ్తె ఇండితె తిలదు. ప్రబుచి దయ వాటుచి రచ్చనచి సత్తిమ్ తెన్ బెదితి రితి తుమ్ ఇండితిసి కో అడ్డు కెర్త?

8 జా సున్నతి కెరంతొ ఆగ్గుల్చి రితి అప్పె ఉచర్తి కామ్ తుమ్క బుకార్లొ క్రీస్తు సికడ్లిసి నెంజె.

9 జాగర్త, పాకుమ్తె ఇదిలిదిల్ పులయ్తి పీట్ సేడ తిలె, ఒండి పాకుమ్ పుల గెచ్చెదె, గెద.

10 జలె, తుమ్క 'అంచి కంట వేర ఉచర్తి నాయ్' మెన, ప్రబుచి తెడి అంక దయిరిమ్. అస్సె, తుమ్క సిక్కు కెర్తొసా, జో కొన్సొ జలెకి, జోచి పాపుమ్చి సిచ్చ జో వయెదె.

11 బావుడ్లు, ఆవ్ అప్పక 'యూదుల్చి గుర్తుచి సున్నతితె, యూదుల్ జతిన్తె రచ్చన' మెన సికడ్లొసా ఆవ్ జతయ్ జలె, కిచ్చొక జేవ్ అంక అల్లర్ కెర్తతి? ఆవ్ అప్పక దస్సి సికడ్లయ్ జలె, 'యేసు సిలువతె మొర్లిసి అమ్చి పాపుమ్ గెచ్చయ్తినెక సాలు' మెన ఆవ్ సంగుక నెంజితి, చి జోవయింక నొప్పి దెతయ్ నాయ్.

12 జలె, తుమ్క సిక్కు కెర్తన జోవయింక జెప్పి ఒండి కుటవన గారొ కెరంతు, మెన అవ్ ఉచర్తసి!

యేసుక నంపజలన ప్రబుచి ఆత్మక ప్రేమతె ఇండుక

13 'ఆగ్గుల్చి ప్రమాసుమ్క గొతి సేవ తెంతొ విడ్డల్ జలి రితి ఇండుత్' మెన ప్రబు తుమ్క బుకార్లన్, బావుడ్లు. గని 'ఆగ్గుల్చి గొతిమాస్సుల్ నెంజుమ్, చి ఆగ్గెక ఇస్సుమ్ అయ్లి రితి ఇండుక జయెదె' మెన తుమ్ ఉచర నాయ్, గని ప్రబుచి ప్రేమ తెన్ తా, ఎక్కిలోక ఎక్కిలో సేవ కెర్తె తా.

14 కిచ్చొక మెలె, దేముడు మోసె తెన్ దిలి ఆగ్గుల్ ఎత్తి ఎక్కి ఈంజ కోడుతె బెదితయ్. కేన్ కోడుతె మెలె,

*"తుమ్కయ్ తూమ్ కెర్లి ప్రేమ కెరంతను గే, పక్కయ్చొక తుమ్ తెర్ది ప్రేమ కెరుకయ్" మెన రెగిడ్లి కోడు.

15 గని తుమ్ కున్సిదుమ్ తెన్ తా ఎక్కిలోక ఎక్కిలో చప్ల చుప్లి రితి జతను జలె, తుమ్ ఎత్తిజన్ ఎక్కిలోచి అత్తి ఎక్కిలో ఆత్మక నాసెనుమ్ నే జతి రితి జాగర్త తెన్ తా.

16 జలె, ఆవ్ కిచ్చొ సంగితసి మెలె, దేముడుచి నుద్ది తిలి ఆత్మచి సెక్తిక ఇండ, తుమ్చి ఆగ్గెచ ఆసల్ జర్గు కెర్తి రితి ఇండుక షోన.

* 5:14 5:14 లేవీయకాండుమ్ 19:18, మత్తయి 19:19.

17 కిచ్చొక మెలె, అమ్ మాన్సుల్చి అఱగుచ ఆసల్, దేముడుచి సుద్ది తిలి ఆత్మక విరోదుమ్ జతయ్, అన్నె, మాన్సుచి అఱగుచ ఆసల్క జోచి ఆత్మచి ఇస్తుమ్క విరోదుమ్ జతయ్, చి రిసా జేవ్ దొన్ని యుద్దుమ్ రితి కెరంతినె తుమ్ నెడిమి నేడ, తుమ్ ఇస్తుమ్ జలిసి జర్గు కెరుక నెతుర్పు.

18 గని తుమ్ దేముడుచి సుద్ది తిలి ఆత్మచి సెక్కిక ఇండితసు జలె, దేముడు మోసి తెన్ దిలి ఆగ్గుల్ తెడిచ మాన్సుల్ నెంజన్.

19 జలె, మాన్సుచి అఱగుచ ఆసల్ రితి ఇండితినెతె ఇనచ తయెదె మెన కిచ్చొ కిచ్చొచి రిసా ఎత్తిజన్ చినుక జయెదె మెలె, లంజెకమె, లంజెబుద్ది, అఱగిచి ఆస ముద్దొ నే కెరంతిసి,

20 బొమ్మల్క జొకర్దసి. అన్నెక కిచ్చొ మెలె, మెంగిర్దిసి, దోసుమ్ గట్ర కెర్దిసి, గుర్చయ్ గట్ర వెసితిసి, దస్సిచి. పడ్డొ, విరోదుమ్, కొడొ జుజవ ఎక్కిలోక ఎక్కిలో గగ్గొల్ జతిసి, గోసబుద్ది, కోపుమ్, గార్ ఆసల్, జట్టు జతిసి, ఎక్కిలో ఉచర్దిసిచి ఉప్పిరి అన్నెక్లొ నిస్కారుమ్ ఉచర్దిసి,

21 గోసల్ కెర్దిసి, మచ్చితిసి, 'సర్ల కెర్దసుమ్' మెన వెట్కారుమ్ జతిసి, దస్సు కమె. దసచ పోస. ఆవ్ అగ్గె తెంతొ జాగర్ద సంగిల్ రితి, అప్పె కి తుమ్క కిచ్చొ జాగర్ద సంగితస్ మెలె, దస కమె కెర్దస జలె, దేముడుచి రాజిమ్తె జోవయింక కిచ్చొ వాట తయె నాయ్.

ప్రబుచి ఆత్మపలితుమ్ దెర్ల కమె

22 గని, దేముడుచి సుద్ది తిలి ఆత్మ అమ్చి పెట్టి తిలె, కిచ్చొ పలితుమ్ దెరెదె మెలె, ప్రేమ, సంతోసుమ్, సేతుమ్, ఒగ్గర్ సేతుమ్, దయ దర్ముమ్, చెంగిల్ బుద్ది, నముకుమ్, ఓర్చుప జా మెత్తన తతిబుద్ది, దర్ముమ్ నిదాసుమ్ బుద్ది,

23 గవురుమ్ నే దెకనెతె అన్నె మాన్సుల్క మరియాద దెకితిసి, ముద్దొ కెరంతిసి. ఇనచక కేన్ ఆగ్గు కి పోస మెనె నాయ్.

24 అన్నె, క్రీస్తు జలొ యేసుక నంపజా సొంత జల మాన్సుల్, జోవయింక అఱగుచ పాపుమ్చి బుద్దిచి సొంత ఆసల్ క్రీస్తు మొర్ది సిలువతె గల ముల దా అస్సి.

25 దేముడుచి సుద్ది తిలి ఆత్మ తెన్ జీవ్ జా అన్నుమ్ జలె, జోచి ఆత్మసెక్కిక దస్సి ఇండుమ.

26 దస్సి, అమ్చి పెట్టి కిచ్చొ గవురుమ్ ఉచరసుక పోస. ఎక్కిలోక ఎక్కిలో కోవల్ కెరవుక పోస, ఎక్కిలోచి ఉప్పిరి ఎక్కిలో గోసల్ జంక పోస.

6

ఎత్తిక చెంగిల్ కెర్దెన్చి

1 బాపుడ్లు, తుమ్తె కేన్ మాన్సు కిచ్చొ పాపుమ్తె దెర్పు నేడ అన్నె జలె, జో అన్నె బుద్ది జతి రితి, తుమ్ ఆత్మ వడ్డిలన జోవయింక బమ్మ నే కెర్తె బుద్ది తెన్ జోవయింక చెంగిల్ వాట దెకవ. పడ్డొ, తుమ్ సొంత పాపుమ్ నే నేడ్డి రితి, జాగర్ద దెకన.

2 ఎక్కిలోచ జాడ్లు అన్నెక్లొ వయితి రితి, ఎక్కిలోక ఎక్కిలో తోడు తా. దస్సి కెర్లె ప్రేమచి రిసాచి క్రీస్తు దిలి *ముక్కిమ్ అగ్గు నెరవెర్చుప కెర్లె.

3 కిచ్చొక మెలె, కో జలెకు అరిచొ తా, జోక జొయ్యి నిసాన్లొ మాన్సు మెన ఉచరంతయ్ గే, జోక జొయ్యి మోసిమ్ కెరంతయ్.

4 జాకయ్, ఎత్తి మాన్సు జోవయింక సొంత కామ్ పరిచ్చ కెరన్సు, చి అన్నె మాన్సుల్చ కమెచి రిసా తీర్పు నే కెర్లె, సొంతయ్ కామ్ దెకన జాక 'చెంగిల్' గే 'గార్' గే చినసుక జయెదె, చి 'చెంగిల్' మెలె, జో సర్ల జంక జయెదె.

5 కిచ్చొక మెలె, సొంత కామ్చి రిసా ఎత్తి మాన్సుక జోచి పూచి.

6 ప్రబుచి కోడు సంగితొపోక సికితన, జోక తిలిచి ఎత్తితె సికడ్డనక చెంగిల్ వాట దెంక అన్నె.

7 తుమ్ మోసిమ్ కెరన నాయ్. దేముడుక కొంకడ్లి రితి కెర్లె జినుక నెంజె. కిచ్చొక మెలె, ఎత్తి మాన్సు కిచ్చొ రగుమ్ బి గలెదె గే, దస్సిచి పంట్ లాయెదె.

* 6:2 మత్తయి 22:37-40, మార్కు 12:28-31.

8 సొంత అగ్గిచ ఆనల్ జర్గు కెరంతి రితి బి కో గలుల గే, జా దెర్ది పంటో కిచ్చొ లాయిల మెలె, జోవయించి సొంత నానుమ. గని, దేముడుచి సుద్ది తిలి ఆత్మక చి బి కో గలుల గే, జా దెర్ది పంటో కిచ్చొ లాయిల మెలె, పరలోకుమతె బెద కెయక తెయక చెంగిల్ జితిసి.

9 అన్నె, చెంగిల్ కమె కెరుక బద్దుకుమ జమ నాయ్. కిచ్చొక మెలె, చెంగిల్ కమె కెరుక మదెనె అమచి మెన్ను నే బగిలె, జా చెంగిల్ పంటో లాయుమ్దె.

10 జాకయ్, కేన్ వాటు అయలె, ఎత్తిజిన్ మాన్సుల్క చెంగిల్చి కెరుమ, తోడు కెర్తె తమ; ముక్కిమక, ప్రబుచి ఉప్పిరి నముకుమ తిలి రిసా జోవయించి కుటుంబుమ్ జలసకయ్.

సున్నతిచి రిసా బలవంతుమ్ కెర్తెసిచి రిసా

11 కెర్ది వెల్లో అలవాట్లు తెన్ ఆవ్ సొంత ఆతు తెన్ తుమ్క రెగిడ్డసి గే చిన.

12 'యూదుల్ జితి గుర్చుచి సున్నతి తుమ్ కెరన' మెన తుమ్క బలవంతుమ్ కెర్తన కిచ్చొక దస్సి జతతి మెలె, జేచి గపురుమ్కయ్ కెర్తతి. 'ఎక్కి క్రిస్తు సిలువతె మొర్లిన్తెయ అమచి రచ్చన' మెన ఒప్పల్లెగిన, అన్నె మాన్సుల్ జేచి అల్లర్ కెరుల మెనయ్ బియకెర, జేవ్ దస్సి కెర్తతి.

13 పడ్డొ, జేవ్ జా సున్నతి కెరన్లయ్ కి యూదుల్చ ఆగ్గుల్క నిదానుమ్ కెర్ది నాయ్, గని 'జోవయింక కి అమ్మి మార్చువ కెర్లమ్' మెన గపురుమ్ ఆనసుక ఉచరయ్, తుమ్క 'సున్నతి కెరంతు' మెన బలవంతుమ్ కెర్తతి.

14 ఆవ్, జలె, ఎక్కిక పిట్టవ, కిచ్చొ వేరచిచి ఉప్పిరి గపురుమ్ ఉచరసుక నెసి. ఎక్కి అమచొ ప్రబు జలో క్రిస్తు సిలువతె మొర్లిన్కయ్ గపురుమ్ ఉచర్తసి. జో మొర అంక పాపుమ్ తెంతొ రచ్చించుప కెర్ది రిసా, ఈంజ లోకుమతె తిలిసి ఎత్తి అంక మొర్లి రితి జా అస్సె. ఆవ్ కి ఈంజ లోకుమతె తిలిన్కయ్ సిలువ గెలన అస్సి, చి అంచి ఉప్పిరి జా ఎత్తిక కిచ్చొ సెక్తి నాయ్, దస్సిచిక అంక ఆన నాయ్.

15 యూదుల్చి గుర్చుచి సున్నతి కెరన తిలె కి లాబుమ్ నాయ్. నే కెరన తిలె కి నమ్మమ్ నాయ్. కిచ్చొ ముక్కిమ్ మెలె, దేముడుచి సుద్ది తిలి ఆత్మ తెన్ నోవర్ జెర్తిలిసి.

16 యేసుక నంపజా నిజుమ్చ ఇస్రాయేలులు జల దేముడు నిసాన్ల జోవయ్ మాన్సుల్క, జోచి ఆత్మక జెర్తె జోచి ఆత్మ నే సెక్తిక ఇండిత మాన్సుల్కయ్ జో సేంతుమ్, కన్యారుమ్ దెకున్.

17 జలె, ఈంజ తగుచి రిసా అప్పె తెంతొ అన్నెకో అంక అల్లర్ కెర్తు నాయ్. అంచి సత్తిమ్క రుజ్జు కావలె మెలె, యేసుచి నావ్చి రిసా ఆవ్ నైమల్ సేడ్ల మచ్చల్ అంచి అగి అస్సి.

18 తుమ్చి ఆత్మ తెన్ ప్రబు జలో అమచొ యేసుక్రిస్తుచి దయ తా తుమ్క తోడు తవును, బావుడ్లు. ఆమేన్†.

ఎవెసియుల్క రెగిడ్లి ఉత్త్రుమ్ బారిక్ జలో పవులు ఎవెసు పట్టుమ్చ సంగుమ్చక రెగిడ్లి ఉత్త్రుమ్.

మొదొల్ కోడు

1 దేముడుచి సెలవ్చి రిసా క్రీస్తు రచ్చించుప కెర్తొసా జలో యేసుచి సుబుమ్ కబుర్ కామ్ కెర్తి రిసా, జో దిలి అదికారుమ్ తెన్ జోక బారికి జలో ఆవ్ పవులు, *ఎవెసు పట్టుమ్తెచ †క్రీస్తు జలో యేసుక సంపజా, సుద్ది జా జోచయ్ మాస్సుల్ జా, జోచి తెడి తా నిదాసుమ్ జలసక, రెగిడ్లి ఉత్త్రుమ్.

అగ్గె తెంతో దేముడు ఉచర్లి రచ్చన

2 అమ్క అబ్బొ జలో దేముడుచి ప్రబు జలో యేసుక్రీస్తుచి దయ, సేంతుమ్, తుమ్చి ఉప్పిరి తవున్!

3 అమ్చొ ప్రబు జలో యేసుక్రీస్తుక దేముడు జలో అబ్బొన్ జలో దేముడుక జెయ్య! క్రీస్తుచి అత్తి జో అమ్క దయ కెర, †జోచి రాజిమ్తె అమ్క బెదవ, ఆత్మవరల్ ఎత్తి అమ్క జో దా అస్సె.

4 దస్సి, అమ్క, 'క్రీస్తుచి తెడి జోచి పరలోకుమ్చి సుద్ది జా అంచి మొక్కె పున్యిమ్ జతు' మెన, లోకుమ్ నే జెర్మితె అగ్గె తెంతో జో అమ్క నిసాస్లన్.

5 అగ్గె తెంతో, జోచి ప్రేమక ఉచర, జోచి సొంత ఇస్టుమ్క, 'అంచొ పుత్తు జలో యేసుక్రీస్తుచి తెడి జేవ్ కి అంచ పుత్తర్లు జవుల' మెన, అమ్క వరుమ్ దిలన్.

6 పూర్తి ప్రేమ జలో పుత్తున్చి అత్తి గవురుమ్ జలి జోచి ఎదివాల్ 5 దయ అమ్చి ఉప్పిరి జో తిలన్; జోచి నావ్ గవురుమ్ జవున్!

7 జో యేసుయి సెలవతె జోచి లోయి గేడవ అమ్చి పాపుమ్ వుంచ, అమ్ కెర్ల పాపల్ చెమించుప కెర, అమ్క *నెతోవ గెల అస్సె;

8 జోచి ఎదివాల్ దయ అమ్చి ఉప్పిరి దేముడు అబ్బొసి తిలి రిసా అమ్క †నెతోవ గెల అస్సె.

9 ఎత్తి అర్లుమ్ చినుత్ బుద్ది తెన్ జో దేముడు అబ్బొసి అగ్గె తెంతో ఉచర్లిసి మదెన్ గుట్టు తిలి రితి జా తిలి కి, అమ్ సూన్ రితి, జో అప్పె బార్ కెర అస్సె.

10 మెలె, క్రీస్తు జలో రచ్చించుప కెర్తొసాక తెద్రవుక మెన, దేముడు ఉచర్ల దీనల్ బెర్తి కాలుమ్క జెయిమ్ కెరిందె మెన జో అగ్గె తెంతో ఉచర్లిసి. కిచ్చొక క్రీస్తు జలో రచ్చించుప కెర్తొసాక జో తెద్రవుక తిలి మెలె, పరలోకుమ్తె తిలిసి ఎత్తి కి, బూలోకుమ్తె తిలిసి ఎత్తి కి ఎత్తి కి జో క్రీస్తుచి తెడి ఎక్కి కట్టు జతి రితి బెదవుక.

11 జోచి సొంత ఇస్టుమ్క ఎత్తి జర్గు కెర్తొ దేముడు 'చెంగిల్' మెన కిచ్చొ ఉచర్లయ్ గే, జా ఎత్తి కచితుమ్ జర్గు యెదె. 'జర్గు జవున్' మెన అమ్చి రిసా జో ఉచర్లిసి కి జో క్రీస్తుచి అత్తి జర్గు జలి.

12 కిచ్చొ మెలె, జో దేముడుచి గవురుమ్ ఈంజ లోకుమ్తె డీస్తి రితి అమ్ ఇండుక మెన, క్రీస్తుక సంపజా జోచయింది తెడి దయిరిమ్ జలసక అగ్గెయి తెంతో జోచయింది సెలవ్, అగ్గెయి తెంతో జా వరుమ్ దా అమ్క జోయ్య నిసాన్ అస్సె.

13 సత్తిమ్ తిలి †కోడు, మెలె తుమ్ యూదుల్ నెంజెలస కి రచ్చించుప జతి వరుమ్ దొర్కు జతి సుబుమ్ కబుర్ తూమ్ కి సూన సంపజా అయిలి రిసా, 'జా వరుమ్ దిలి రుజ్జుక అంచ మాస్సుల్చి పెట్టి అంచి ఆత్మ దెయిందె' మెన దేముడు ప్రమాసుమ్ కెర తిలి జోచి సుద్ది తిలి ఆత్మ తుమ్చి పెట్టి కి దా తుమ్క 'అంచయ్' మెన జోచి ముద్ర దా అస్సె.

* 1:1 1:1 బయిలిల్ తొలితో రెగిడ్ల సగుమ్ పుస్తకల్తె ఈంజ కోడుతె ఎవెసు పట్టుమ్తెచి కోడు తయె నాయ్. † 1:1 1:1 'క్రీస్తు' మెలె 'తెద్రయిందె' మెన పూర్ణమ్ ఎత్తి అదికారుమ్ తిలో దేముడు యూదుల్క సంగిలో దొర్కు జలో రచ్చించుప కెర్తొసా. ‡ 1:3 1:3 పరలోకుమ్తె అమ్క బెదిత్తి కోడు, ఈంజ. § 1:6 1:6 అమ్క ఎద్దె పున్యిమ్ నెంజెలి కి జోచి ఎదివాల్ దయ, ఆరి, అమ్క దిలన్;

1:7 1:7 నెంజెలి 'విడ్డల్ కెర అస్సె', నెంజెలి 'రచ్చించుప కెర అస్సె'. † 1:8 1:8 నెంజెలి 'విడ్డల్ కెర అస్సె', నెంజెలి 'రచ్చించుప కెర అస్సె'. ‡ 1:13 1:13 నెంజెలి 'కబుర్'.

14 అమ్ నంపజలసక కీనెతొవ గెల అస్సి, చి పరలోకుమతె బెదితి వాట తుమ్క కచితుమ్ దొర్పు కెర అస్సి మెనయ్ జో ప్రమానుమ్ కెర్లిసి పూర్తి జర్గు జతె ఎదక ఈంజ బజాన్ జయెదె. ఈంజ ఎత్తిచి రిసా జోచి గపురుమ్ డీసెదె.

పవులు ప్రార్థన కెర్లిసి

15 ఈంజ తుమ్క జోచి నుద్ది తిలి ఆత్మ దిలి వరుమచి రిసా, ప్రబు జలో యేనుచి ఉప్పిరి తుమ్ నముకుమ్ తిలి రిసా, పడ్డె జోచయ్ జల మాన్సుల్ ఎత్తిజిన్ తుమ్ ప్రెమ కెర్లిన్చి రిసా అమ్ నూన్లి రిసా,

16 అవ్ ప్రార్థన కెర్తె పొది తుమ్చి రిసా అమ్చో దేముడుక అంచి సర్ద సంగుక ములి నాయ్.

17 తుమ్చి రిసా అవ్ కిచ్చో ఆన జా ప్రార్థన కెర్లిసి మెలె, అమ్చో ప్రబు జలో యేనుక్రీస్తుక దేముడు జలో, పరలోకుమచి ఉజిడె జలో అబ్బొన్ జలో, గపురుమ్ తిలో దేముడు, తుమ్చి పెట్టి జోచి ఆత్మతా కామ్ కెర కెర, జోక తుమ్ పూర్తి జాన్తి రితి తుమ్క బుద్ది గాళునుమ్ దెవును, దొర్పు జలిన్ దెకవును.

18 తుమ్చ ఆత్మ అంకివో దస్సి వెంగిల్ దెకిత్ రితి జలె, తుమ్ *కిచ్చో దయిరిమ్ జతి రితి జో తుమ్క నిసాన్, దేముడుక నంపజలన తెన్ 'తుమ్క దెయిందె' మెన జో ప్రమానుమ్ కెర్లి పరలోకుమచి ఎదివాట్ సామూరుమ్ వాట కీసిచి గే, కెర్ది విలువచి గే,

19 పడ్డె, అమ్ నంపజలనచి పెట్టి జోచి కామ్ కెర్తి ఆత్మనెక్తి కెర్ది సెక్తి గే, జా ఎత్తి తుమ్ సికితె, జయ్యి అంచి ఆన.

యేనుక దేముడు అబ్బొసి అదికారుమ్ దిలిన్

20 క్రీస్తుతెయ్ జోచి జా ఎదివాట్ సెక్తి తిలిసి ముక్కిమ్క కత్తె నెరవెర్చుప కెర్లన్. జోచి సెక్తిచి రిసాచి జా కామ్ ఎత్తి కీసి ముక్కిమ్క జెయిమ్ కెర్లన్ మెలె, క్రీస్తుక అన్నె జయడ ఉట్టవ, పరలోకుమతె కడ నా, ఒత్త జోచి సొంత ఉజిల్ పక్కయ్ గపురుమ్ తెన్ వెనవాన అస్సె.

21 ఒత్త జోక అబ్బొసి కెర్ది గపురుమ్ దిలన్ మెలె, *కిచ్చో అదికారుమ్ తిలిసి ఎత్తిచి ఉప్పిరి, ఎత్తి*అదికారులచి ఉప్పిరి, కీన్క్రిస్తిచి ఉప్పిరి, *ఏలువ కెర్తి ఎత్తి సెక్తి అదికారుమ్ తిలనచి ఉప్పిరి, జేవ్ మాయలోకుమచ జలెకి, కేన్ లోకుమచ జలెకి, కిచ్చో నావ్ తిలిసి నే పిట్టె ఎత్తిచి ఉప్పిరి, ఈంజ ఉగుమతె జర్గు జతినచి ఉప్పిరి కి, జెతి ఉగుమతె జర్గు జతినచి ఉప్పిరి కి, జోక అబ్బొసి ఎత్తిచి ఉప్పిరి వెల్లో కెర అస్సె.

22 జెర్మయ్లి ఎత్తి క్రీస్తుచి చట్టె అబ్బొసి తియ, నంపజలసక కిచ్చో కామ్చి రిసా జలె కి, క్రీస్తు బోడి జతి రితి జో కెర అస్సె.

23 నంపజలన మొత్తుమ్క 'క్రీస్తుచి ఆగ్' మెనుక జయెదె. జోచి ఆగ్ పూర్తి జంక ఎత్తి పూర్తి కెర్తెసా జోయ్యి.

2

దేముడుచి దయకయ్ క్రీస్తు తెన్ ఏలువ కెర్లిసి

1 తుమ్ కెర్తె తప్పుల్ పాపల్చి రిసా తుమ్ మొర తతికయ్, తుమ్క జో, క్రీస్తు తెన్ జివ్ కెర దిలన్.

2 అగ్ పాపుమ్ ఇండితె తా, ఈంజ లోకుమచి బుద్దిచ, ఈంజ ఉగుమచ కమెతె తుమ్ గెతె తిలదు. పాడె జల ఆత్మల్ బూతల్ గట్టె ఎత్తిక ఏలువ కెర్తె నయ్తాన్చి పట్టి గెతె తిలదు. దేముడుచి కోడు కెరుక నెసితె ఎత్తిజిన్చి పెట్టి జో నయ్తాన్చి ఆత్మ జోవయిం చి కామ్ కెర్తెయ్.

3 దేముడుచి కోడు కెరుక నెసితె ఎత్తిజిన్చి రితి అమ్ కి అగ్ మొర తా, పాపుమచ ఆసల్ జెతె తా, అమ్చి ఆగ్చి ఆసల్, అమ్చ సొంత వేర వేర బుద్దుల్చ ఆసల్ రితి ఇండితె తిలమచి రిసా, లోకుమచ

§ 1:14 1:14 7 నంబర్చి ఎట్టచి కోడు దెక. * 1:18 1:18 రోమియులు 8:18-25, కొలోస్సియుల్ 1:5 దెక. † 1:21 1:21 జేవ్ పొదుల ఈంజివ్ చెత్తర్ కొడె ఎత్తి నగుమ్ నుట్ట దూతల్, బూతల్ ఆత్మల్ గట్టెక నంగుల. ‡ 1:21 1:21 జేవ్ పొదుల ఈంజివ్ చెత్తర్ కొడె ఎత్తి నగుమ్ నుట్ట దూతల్, బూతల్ ఆత్మల్ గట్టెక నంగుల. § 1:21 1:21 జేవ్ పొదుల ఈంజివ్ చెత్తర్ కొడె ఎత్తి నగుమ్ నుట్ట దూతల్, బూతల్ ఆత్మల్ గట్టెక నంగుల. * 1:21 1:21 జేవ్ పొదుల ఈంజివ్ చెత్తర్ కొడె ఎత్తి నగుమ్ నుట్ట దూతల్, బూతల్ ఆత్మల్ గట్టెక నంగుల.

మాములుమ్ ఎత్తిజన్ కిసి సొంత నెక్కిక దేముడు దెతి సిచ్చతె గెతి జెర్కున్ తెన్ అస్సి గే, అమ్ కి దస్సి తిలమ్.

4 గని, దేముడు ఎదివాల్ కన్యారుమ్ దెకితోసాచి రిసా, జోచి ఎదివాల్ ప్రేమ అమ్చి ఉప్పిరి తియ,

5 అమ్ కెర్ల పాపల్చి రిసా, అమ్ అత్తక మొర్లన బలికి, క్రీస్తు అన్నె జలిన్ తెన్ అమ్క జియడ్లన్. పూర్తి జోచి దయచి రిసా తుమ్ *రచ్చించుప బలదు.

6 బలె, దేముడు అబ్బిసి క్రీస్తు యేసుక జియడ్డిన్ తెన్ అమ్క జియడ, జోచి పరలోకుమచి రాజిమతె కిసి వెగడ ఒత్త వెనడ్లన్. అమ్ జోచయ బలి రిసా, అమ్క కి జా రాజిమతె వెగడ, అమ్క కి ఒత్త వెనడ్డి రితి కెర అస్సి. మెలె, అమ్ కి జో తెన్ జోచి †రాజిమతె ఏలుప కెర్లనుమ్.

7 జో దేముడు కిచ్చొక అమ్క దస్సి దయ కెర అస్సి మెలె, యేసుక్రీస్తు కెర్లిన్ ఎత్తి తెన్ జో అమ్క ఎదివాలు దయ కెర్లిసి. పడ్డొ జెత ఉగల్తె పలితుమ్ దెర, జోవయించి దయ కెర్లి మొచ్చుచి గే రుజ్జు దెకయెదె. జోచి దయ కెర్లి గే కో మీసుక నెత్తిరి.

8 ముక్కిమ్క కిచ్చొ అర్దుమ్ తుమ్ కెరన మెలె, తుమ్ నయతానచి రాజిమ్ తెంతో రచ్చించుప బలిసి తుమ్ కిచ్చొ కెర్లిన్చి రిసాచి నెంజె; పూర్తి దేముడుచి దయచి రిసాచి కామ్ జా. పడ్డొ, జో దయ కెర్లిసి తుమ్ నంపజా నజనతికయ, తుమ్క దొర్కు బలి.

9 కేన్ మాన్సు కెర్ల కిచ్చొ కమొచి నెక్కిక జో మాన్సు రచ్చించుప జంక నెత్త. నెంజెలె, జోవయించ సొంత కమొచి నెక్కిక రచ్చించుప జంక జతి బలె, మాన్సుల్ పులుక జతి. గని జోవయించి సొంత నెక్కిక కో నెత్తిరి, చి పులుక నెంజె.

10 అమ్ అత్తక జలిసి జొయ్యి అమ్క నొవర్ జెర్కుయలిసి. యేసుక్రీస్తుచి అత్తి దేముడు అత్తక అమ్క కిచ్చొక నొవర్ జెర్కుయలో మెలె, అమ్క 'సత్తిమ్ ఇండుతు' మెన, జో అగ్గ తెంతో ఉచర్ల కమొ అమ్ నిదానుమ్ కెరుకయ మెనయ దస్సి కెర్లొ.

యూదుల్ నెంజిలన అప్పె పాసి జా అస్సి

11 జాకయ, తుమ్ పచ్చ నాయ. కిచ్చొ మెలె, అగకు దెకిలె తుమ్ యూదుల్ నెంజిలన జస్సి. తుమ్ యూదుల్ నెంజిలనక యూదుల్ తిలన అగ్గ, 'దేముడు దిలి అమ్చి గుర్తుచి సున్నతి కెరంతి నాయ, చి అత్తక సుద్ది జతి నాయ' మెన, రితి అగి మాన్సులి కెర్లె జా గుర్తు కెర్నూ నాయ చి రిసా తుమ్క నిస్కారుమ్ దెకిత తిల.

12 జలె, తుమ్ కిచ్చొ పచ్చ నాయ. మెలె, జా పొది క్రీస్తుక దూరి తిలదు, పడ్డొ 'అమ్చి ఇస్రాయేల్చ పైజల్' మెలి దేముడుచి రాజిమతె తుమ్ బెదుక నెంజిలిసి, అన్నె, జో దేముడు ప్రమానుమ్ కెర్ల తెదొడచ నే పెడ్ల సరిగచి కోడచ వరల్తె తుమ్క వాట తిలి నాయ, చి జోచి రచ్చన తుమ్క నే దొర్కు బలి రిసా, ఈంజ లోకుమతె దేముడు నెంజిలన జా తిల.

13 గని అప్పె, యేసుక్రీస్తు ఈంజ లోకుమచ చి పాపుమ్ వయ జోచి లోయ సువ దా జా పాపుమ్ పుంచలిన్చి రిసా, తుమ్ అగ్గ జోవయంక దూరి తిలనక దేముడుక జో యేసు పాసి కెర అస్సి.

యూదుల్క యూదుల్ నెంజిలనక కి ఎక్కి రాజిమతె బెదయలిసి

14 'అమ్ యూదులి' మెన, 'తుమ్ యూదుల్ నెంజిలన' మెన, అమ్ యూదుల్చి దేముడుచి గుడితె అమ్క తుమ్క †అడ్డు కెర్లె అగ్గల్ తయెదె. బలె, క్రీస్తుయ మొర అమ్ దొన్ని జట్టుచక మదెనె జా అమ్క దొర్కు బలి సెంతుమ్ జొయ్యి జా, అమ్క తుమ్క అడ్డు తిలి విరోదుమ్ జొయ్యి సేడవ అస్సి. బలె, జో దస్సి సెంతుమ్ కెరవ, అము తూమ్ ఎక్కి జట్టుచ బతి రితి కెర అస్సి.

15 కిసి మెలె, పూర్ణమచ అగ్గుల్క ఆడ్రల్క నంప కెర్లి రితి పొన, అప్పె తెంతో కామ్క నెంజిలి, అగ్గ దొన్ని జట్టు బల అమ్ మాన్సుల్క సెంతుమ్ కెరయ్లి రితి, 'అంచె తెడి ఎక్కి జట్టు బతు' మెన, ఈంజ లోకుమచ చి పాపుమ్ జొయ్యి జోచి అగి వయన, అర్పితుమ్ బలన్.

* 2:5 2:5 నెంజెలె, పాపుమ్ తెంతో, తుమ్చి పాపుమ్చి రిసాచి సిచ్చ తెంతో, అత్తమొర్కు తెంతో. † 2:6 2:6 అకరక పరలోకుమతె జోవయంతెన్ ఏలుప కెర్లయదె. పరలోకుమ్ జోవయించి అత్తరాజిమ్, చి జా రాజిమతె అమ్ బెదయ బలి రితి జా బెద అస్సుమ్, చి అప్పె తెంతో కి జోవయంతెన్ ఏలుప కెరుక దెర అస్సుమ్ మెనక జయెదె. డీనయలిసి 5:10, 20:6 కి దెక. ‡ 2:14 2:14 యూదుల్చి దేముడుచి గుడితె నిజమ దస్సి అడ్డు కెర్లె కోట తిల.

16 'జేవ్ దొన్నె జట్టు తెంతొచ మాన్యుల్ అంక సంపజా ఎక్కి ఆగ్ జతి రితి దేముడు అబ్బొ తెన్ అన్నె బెదయ్ జతు' మెన యేసు సిలువతె మొర్రి కామ్ తెన్ అమ్చి తుమ్చి అగ్గెచి విరోదుమ్ గెచ్చవ గలన్.

17 అన్నె, తుమ్ దేముడుక దూరి తిలసక కి, దేముడుక పాసి రిత జల అమ్ యూదుల్క కి, జో సింతుమ్ దెతినచి రిసా బోదన కెరుక కి అయిల్.

18 మెలె, యేసుచి అత్తి తుమ్క కి అమ్క కి జోచి అబ్బొచి ఎక్కి ఆత్మ దొర్కు జా అన్నెచి రిసా, తూమ్ కి అమ్ కి దేముడు అబ్బొన్ తెన్ బెద ఎక్కి జట్టు జంక వాట్ అయిలి.

19 జలె, ఈంజ ఎత్తిచి రిసా తుమ్ అప్పె వేర మాన్యుల్ నెంజన్. తూమ్ కి దేముడుచి గేరతె బెద, అమ్ సంపజలన్ తెన్ జోచయ్ మాన్యుల్ జా, తూమ్ కి దేముడుచి రాజిమ్చ జా అన్నెన్.

20 జోచి గేరక పునాది కిచ్చొ జయెదె మెలె, సుబుమ్ కబుర్ సంగిత జోచ బారికుల్, చి జోచి ఆత్మసెక్కిక జోచ కబుర్లు సంగితన్. జా కెర ఎత్తిక బోడివత్తుర్ కొన్నొ మెలె, యేసుక్రీస్తు.

21 జా గేరు మొత్తుమ్ జోచి సెక్కిక బెద, ప్రబు తెన్ టీచ, దేముడుచి సుద్ది తిలి గుడి జతి రితి వడ్డితయ్.

22 దేముడు జతి జా దేముడుచి సుద్ది తిలి ఆత్మ గుడి జతిన్త తూమ్ కి క్రీస్తుచి తెడి తా వాటల్ జా బెద బందుక అన్నెన్.

3

యూదుల్ నెంజలసతె సుబుమ్ కబుర్ సూనవుక ప్రబు పవులుక తెద్రయిలిసి

1 జలె, తుమ్ యూదుల్ నెంజలసకయ్ సుబుమ్ కబుర్ అవ్ సూనవుక మెన యేసుక్రీస్తు అంక తెద్రయిల్. తుమ్క సూనయిలి రిసా, అంక, అమ్చ యూదుల్ *జేలి కెరన అన్నె.

2 తుమ్కయ్ 'సుబుమ్ కబుర్ సూన సంపజా అంచి ఆత్మగేరతె జేవ్ కి బెదుత్' మెనయ్. దేముడు జోచి దయచి రిసా అంచి అత్తి జా సుబుమ్ కబుర్ సూనయ్తి కామ్ సార్ప కెర్రిచి రిసా తుమ్ సూన అన్నెన్.

3 వడ్డి, జోచి జా గుట్టు జా తిలిసి ప్రబు సొంతయ్ అంక †దెకయిల్ మెన కి, సూన అన్నెన్. ‡ఈంజ గుట్టుచి రిసా ఇదిల్ కొట్టు సంగ ఈంజ ఉత్తమతె అగ్గె రెగ్గ అన్నె.

4 ఈంజ తుమ్ నదు కెర్లె, క్రీస్తుచి గుట్టు తిలిసిచి రిసా అవ్ జాన్లిసి తుమ్ అర్దుమ్ కెరంతె.

5 జా గుట్టు, జలె, అగ్గెచ ఉగల్తె ఈంజ లోకుమ్చ మాన్యుల్క జాన్తి నాయ్. గని జోచి సుద్ది తిలి ఆత్ తెన్ దేముడుచి సుద్ది జల కబుర్లు సంగితసక, జోచి రిసాచ బారికుల్క, క్రీస్తు జా గుట్టు అప్పె జానవ అన్నె.

6 జా గుట్టు కిచ్చొ మెలె, క్రీస్తుక సంపజల యూదుల్ నెంజలస కి అమ్చి తెన్ దేముడు దెతి రచ్చన వాట నజన్తి వాట అయిలిసి. సుబుమ్ కబుర్ సూనయిలి తెంతొ, జేవ్ కి క్రీస్తుక సంపజా దేముడుచ వుత్తర్లు జా క్రీస్తుచి †ఆగ్ జతిన్తె బెద, క్రీస్తు జలొ యేసుచి తెడి జేవ్ తిలి రిసా, దేముడు ప్రమానుమ్ కెర్రిసి ఎత్తికె జోవయింక కి వాట దొర్కు జా అన్నె.

7 అంచి వెట్టి కము కెర్లె జోచి ఆత్మసెక్కిచి రిసా, దేముడు అంక దిలి జోచి దయక వరుమ్చి రిసా అవ్ ఈంజయ్ సుబుమ్ కబుర్ సూనయ్తో సివ కెర్రిసా జలయ్.

8 జోచయ్ జల మాన్యుల్ మొత్తుమ్తె తొక్కి విలువచచి కంట అవ్ అన్నె తొక్కి విలువచొ జలకి, జోచి దయక జో అంకయ్ దిలన్. క్రీస్తుతె దొర్కు జతి పరలోకుమ్చ సొమ్మూరుమ్ కెర్లె గే, కేన్ మాన్యు పూర్తి అర్దుమ్ జంక నెతిర్లె కి, తుమ్ యూదుల్ నెంజలసక అవ్ బోదన కెరుక మెనయ్, జో అంక నిసాన్లన్.

9 అన్నె, తుమ్ యూదుల్ నెంజలసక కి జో రచ్చన దొర్కు కెర్రిచి రిసాచి ఎత్తి జెర్మయిల్ దేముడు అగ్గెచ ఉగల్తె అంకడ్డి గుట్టు ఈంజ లోకుమ్ ఎత్తిచ అర్దుమ్ కెరంతి రితి అవ్ సూనవుక నిసాన్లన్.

* 3:1 3:1 రోమ్ పట్టుమ్తె జో జేలి జా తిలి పొది ఈంజ ఉత్తమ వవులు రెగిడ్లొ, మెన ఒగ్గెజన్ ఉచర్లె. బారికుల్ 28:16, 30, 31 దెక. కైసరియతె కి జేలి జా తిలి; బారికుల్ 23:25, పిలిప్పైతె కి; బారికుల్ 16:23, చి యెరూసలేమ్తె కి; బారికుల్ 21:33 జేలి జా తిలి. ఎవెస్తె కి మెన నగమజన్ ఉచర్లె, గని రుజ్జా నాయ్. పిలిప్పైతె చి యెరూసలేమ్తె జేలి జలిసి తొక్కి దీనల్చి. † 3:3 3:3 బారికుల్ 9:3-6, 15, గలతియల్ 2:9 దెక. ‡ 3:3 3:3 1:9, 10 చి 2:11-22 దెక. § 3:6 3:6 రోమయిల్ 12:4, 5, కొరిందిల్ 1 నంబర్ ఉత్తమ 12 అధ్యయిమ్, ముక్కిమ్క 12:12, చి ఎవెస్ 1:23 దెక.

10 కేన్ లోకుమ్చ * అత్తుల్ దూతల్ బూతల్, ఎత్తి, కి, యేసుప్రబుక సంపజలన బెదిలిసి మొత్తుమ్క దెకిలె, దేముడుచి ఎదివాల్ నత్తిమ్ కెద్ది గే, కిసి నెరవెర్చువ జతయ్ గే, చినుతు మెనయ్, జొయ్యి అంక ఈంజ కామ్ దా అస్సె.

11 తుమ్ యూదుల్ నెంజల సంపజలన కి జోచి ఆత్తుగేరతె బెదితినక 'జర్గు కెరిందె' మెన దేముడు అగ్గెయి తెంతో ఉచర్చిసి అమ్చొ ప్రబు జలో యేసుక్రీస్తుచి అత్తి † జర్గు కెర్లె.

12 'ఈంజొ యేసుక్రీస్తు అమ్చి పాపుమ్ గెచ్చయతి అర్చితుమ్ జలి రిసా, అమ్ జోక సంపజలి రిసా, లాజ్ నెంజతె దేముడుతె గెచ్చుమ్దే' మెన అమ్క పూర్తి దయిరిమ్ అస్సె.

13 జాకయ్, తుమ్క ఆవ్ సుబుమ్ కబుర్ సూనయ్లి రిసా ఆవ్ అప్పె జేలి జా సైమల్ నీడ్చినచి రిసా తుమ్ బమ్మ జా అన్మానుమ్ జా నాయ్. తుమ్ యూదుల్ నెంజలనకయ్ 'చెంగిల్ జతు' మెనయ్ ఇసి జలయ్. జాకయ్ తుమ్ సర్ద తెన్ తా.

పవులు ప్రార్థన కెర్చిసి

14 జలె, పరలోకుమ్తె కి బూలోకుమ్తె కి కేన్ కుటుంబుమ్చవ జలెకి, దేముడు అబ్బొన్చి రిసాయి జేవ్ ఎత్తిక నావ్ అస్సె.

15 ముగ్గల్ టెక జోవయింక ఆవ్ కిచ్చొ మెన ప్రార్థన కెర్చిసి మెలె,

16 జోచి † ఎదివాల్ నత్తిమ్క, తుమ్చవ అత్తుల్తె జోచి అత్తు తా, తుమ్క పూర్తి డిట్టుమ్ కెర్చు మెన,

17 అన్జె, తుమ్చి నముకుమ్ తెన్ చి జోచి అత్తు తెన్ తుమ్చి పెట్టి క్రీస్తు జివున్ మెన, ఆవ్ ప్రార్థన కెర్చిసి. దస్సి, జోచి ప్రేమతె చెర్లొ గలిల్ రితి జస్సె, జోచి ప్రేమతె తుమ్ డిట్టుమ్ జస్సె,

18 చి ప్రబుచొ సుద్ది జలన ఎత్తిజిన్ తెన్ తుమ్క కిచ్చొ సెక్తి జెయిందె మెలె, జోచి ప్రేమ కెద్ది రూందు కెద్ది దీగు గే, తుమ్క అర్దుమ్ జెయిందె.

19 జలె కో జానుక నెతిరి క్రీస్తుచి ఎదివాల్ ప్రేమ తుమ్ జాన్తె, చి దేముడు తుమ్చి పెట్టి బెర, తుమ్క పూర్తి కెరెదె. జయ్యి ఎత్తి అంచి ఆన.

20 అప్పె, జలె, అమ్చొ దేముడుక ఒగ్గర్ ఒగ్గర్ గవురుమ్ కలుగు జవున్! అమ్ నజీల్ కంట, అమ్ ఉచర్చి కంట, ఒగ్గర్ చెంగిల్ కెరుక తెరితోసా జో. కిసి మెలె, జోవయిం చి అత్తుసెక్తి అమ్చి పెట్టి కామ్ కెర కెరయ్ అమ్క చెంగిల్ కెరెదె!

21 జాక, ఉగుమ్చి ఉప్పెరి ఉగుమ్క, కెయక తెయక నే పిట్టె, క్రీస్తు జలో యేసుతె, చి జోచి ఆగ్ జల జోక సంపజలన మొత్తుమ్ ఇండితినతె దేముడుచి గవురుమ్ డిస్తె తవును! ఆమేన్.

4

తుమ్ ఎక్కి ప్రేమతె ఇండ

1 జలె, ఆవ్ పవులు, ప్రబుచి సుబుమ్ కబుర్ సూనయ్లి రిసా * జేలి జలోసా, తుమ్క కిచ్చొ బలవతుమ్ జా సంగితసి మెలె, ప్రబు తుమ్క నిసాన తుమ్ జోచయ్ జా నత్తిమ్ ఇండితి రిసా తుమ్క బుకారా అస్సె. జో తుమ్క బుకార్లి వరుమ్క విలువ దెకితి ఎదిలి నత్తిమ్తె తుమ్ జిచ.

2 కిసి మెలె, తుమ్క తూమ్ గవురుమ్ నే ఉచరంతె మెత్తన తా, సేంతుమ్ తెన్ అల్లర్ ఒర్చువ జా, ఎక్కిలోక ఎక్కిలో ప్రేమ తెన్ తుమ్ జోవయింక ఒర్చువ జా,

3 ఎక్కి ఆత్తు, ప్రబుచి అత్తు తా, కట్టు తెన్ తతి ఆన తెన్ తా, దస్సి కట్టు తెన్ తతి రితి తుమ్ దెకన. ప్రబుచి సేంతుమ్ తుమ్చి పెట్టి తిలె, దస్సి ఎక్కి కట్టు తెన్ తన్.

* **3:10 3:10** నెంజలె, 'అదికారుమ్ తిలన, అదికారుల్ ఎత్తి. కి'. ఇన్జె 'అదికారుమ్ తిలన', 'అదికారుల్' మెలె, అత్తుల్ దూతల్ బూతల్ చి అర్దుమ్ కెరనుక జెయిందె. 1:21 దెక చి 1:21 చి ఎట్టొచి కోడు దెక. † **3:11 3:11** మెలె, యేసు అమ్చి పాపుమ్ వయ గెచ్చవ జివ్ జా జోవయిం చి అత్తు దొర్చు కెర్చిన్ తెన్సి జర్గు కెర్లె. ‡ **3:16 3:16** నెంజలె 'ఎదివాల్ సామ్మారుమ్క'. § **3:21 3:21** 1:1 చి ఎట్టొచి కోడు దెక. * **4:1 4:1** 3:1 చి ఎట్టొచి కోడు దెక.

4 కిచ్చొక మెలె, ప్రబుక నంపజల అమ్ ఎత్తిజిన్ జోచి ఎక్కి అగ్ జా అన్సుమ్, అమ్ ఎత్తిజిన్చి పెట్టి జోచి ఎక్కి ఆత్మ అస్సె, చి అమ్చి తెన్ పరలోకుమతె గెతి వరుమ్ తుమ్క దొర్పు జవున్ మెన దేముడు తుమ్క బుకార్లి రిసా అమ్ ఎత్తిక ఎక్కి ఆన.

5 పడ్డో, అమ్ నంపజలన ఎత్తిజిన్క అన్నె కిచ్చొ మెలె, అమ్క ఎక్కిలో ప్రబు, ఎక్కి నముకుమ్, ఎక్కి బాప్తిసుమ్.

6 అమ్ ఎత్తిజిన్క ఎక్కిలో దేముడు, ఎక్కిలో అబ్బి. ఎత్తిచి కంబ వెల్లో జలోసా, జో. జో ఎత్తితెయి అస్సె, జోచ ప్రెజల్ ఎత్తిజిన్చి పెట్టి జో జితయ్.

ప్రబుచి ఆత్మ జోచ మాన్సుల్చి పెట్టి తా

7 పడ్డో క్రిస్తుచి దయచి రిసా జో అమ్ ఎత్తిజిన్ ఎక్కెక్క జోచి ఆత్మసెక్తి వరుమ్ దా అస్సె. కెద్ది సెక్తి దెయెదె గే, కిసి సెక్తి దెయెదె గే, జోచి దయ.

8 జాకయ్, పూర్గుమ్ దేముడుచి కొణతె రెగ్గయ్లి రితి,

+ “జోవయించ విరోదుమ్ సుదల్క జిన జేలి కెర్లి రితి జా,

జో పరలోకుమతె గెచ్చ

జోవయించ మాన్సుల్క ఆత్మవరల్ దిలన్”

మెన అస్సె.

9 జోక ‘ఒత్త వెగ గెలన్’ మెలె, కిచ్చొ అర్దుమ్ మెలె, జో తోలితో జోచి గవురుమ్ ముల పరలోకుమ్ తెంతో ఉత్త జా, బూలోకుమచి కంబ ఎట్టోక మెలి రితి ఉట్ట జా అయ్లో.

10 ఉత్త జా అయ్లోసా అన్నె ఎత్తిచి కంబ ఉప్పిర్ వెగెల్ రితి జా, పరలోకుమతె అన్నె వెగ గెలన్; జో తిలిన్క జోచి సెక్తిక ఎత్తిక పూర్లి కెర్లి రిసా.

11 జో దిల ఆత్మసెక్తి వరల్ కిచ్చొ కిచ్చొ మెలె, జోచ మాన్సుల్ సగుమ్జిన్ బారికుల్ జంక మెన జో నిసాన, పడ్డో †జోచి ఆత్మసెక్తిక జోచి కబుర్లు సూన సంగితి రిసా అన్నె సగుమ్జిన్క నిసాన్లన్. పడ్డో జోక నేన్ల మాన్సుల్క జోచి రిసా సికడ్డి రిసా, అన్నె సగుమ్జిన్క నిసాన్లన్. పడ్డో, జోక నంపజలనక గొవుడు జా సికడ్డి రిసా అన్నె సగుమ్జిన్క నిసాన్లన్.

12 జేవ్ వేర వేర సెక్తివో జోచయ్ జల మాన్సుల్క కిచ్చొక జో దా అస్సె మెలె, జోచి జేవ్ కెర్లి సేవక సెక్తి తంక, పడ్డో, క్రిస్తుచి అగ్ పూర్లి జతి రితి నంపజలన మొత్తుమ్ బెదితిసి పూర్లి జంక, చి

13 అమ్ ఎత్తిజిన్ ఎక్కి నముకుమ్ జా దేముడు పుత్తున్చి రిసా ఎక్కి రితి జాన, అమ్ పూర్లి ఆత్మపలితుమ్ దెర్లి రితి ఆత్మక పూర్లి వడ్డెల్ రితి జా, క్రిస్తు కిసి సత్తిముక పూర్లి జా అస్సె గే, అమ్ కి దస్సి పూర్లి జంక.

14 ఆత్మక దస్సి వడ్డిలమ్ మెలె, బాలబోదల్చి రితి అమ్ పొరపాట్ జతె తంక నాయ్. కో నోవి కోడు సంగిలె నంప కెర, కో వేర కోడు సంగిలె నంప కెరుక జతె తా, మాన్సుల్ అచ్చి ఉచర్ల మోసిమ్ కొణో సూన్తె తా, జోవయించ మూయకముక నంపజా, వారుక ఇత్తల్ ఒత్తల్ గెతె కెర్లల్ రితి జంక నాయ్. గని, ప్రబుచి తెడి ఆత్మక పూర్లి వడ్డిలమ్ మెలె, ఇత్తల్ ఒత్తల్ గెతె తము నాయ్, గని ఎక్కి నిదాసుమ్ తెన్ తమ్దె.

15 అమ్ దస్సి ఇత్తల్ ఒత్తల్ నే గెతి రితి జంక మెలె, పూర్లి జంక మెలె, పూర్లి ప్రేమ తెన్ ఎక్కిలోక ఎక్కిలో ఎక్కి సత్తిమ్ సంగితె తంక, చి బోడి జలో క్రిస్తుచి ఆత్మతె బెద, ఎత్తితె బుద్ది జతి రితి ఆత్మక అమ్ వడ్డుక.

16 క్రిస్తు అమ్క బోడి జయెదె, చి జోచి అగ్చ వాటల్ కిచ్చొ జవుల మెలె, అమ్ జోచి అగ్చ వాటల్ మొత్తుమ్ జోచి తెడి తా జోచి సెక్తి తెన్ చెంగిల్ కట్టు తెన్ తా అమ్ ఎక్ఎక్ల వాట, అమ్క దిల కము నిదాసుమ్ కెర్లి తిలె, ఈంజ అగ్ ప్రేమ తెన్ వడ్డ తా, పూర్లి డిట్టుమ్ జయెదె.

అగ్చ బుద్దివో తుమ్ పూర్లి ముల

† 4:8 4:8 కిర్నలు పున్కుమ్ 68:18. ‡ 4:11 4:11 జోవయించి ఆత్మ జోవయించి చోడి పుట్టయ్లి జోవయించ కబుర్లు సంగుల.

17 జలె, ప్రబుది కీనావ్ తెన్ ఆవ్ తుమ్ కిచ్చొ ముక్కిమ్ క బలవంతుమ్ కెర సంగితసి మెలె, దేముడుక నేన్ యూదుల్ నెంజిలన కీసి జోవయింది మెన్సు చి వెర్రి ఉద్దెసుమ్ లక ఇండితతి గే, తుమ్ దస్సి ఇండ నాయ్.

18 జేవ్ చి ఆత్మతె గుడ్డి జా జోవయింది పెట్టి బుద్ది నెంజిలి రిసా దేముడుచి సుద్ది తిలి ఆత్మజీవ్ జతినక దూరి అస్సి, జోవయింక వేరయ్ మాన్సుల్ జా అస్సి. కిచ్చొక మెలె, జోవయింది సత్తిమ్ జేవ్ నెన, రాడ్ జీవ్ చ జా అస్సి.

19 రాడ్ జీవ్ చ జా, కన్యారుమ్ పచ్చు, ఎద్దెర ముద్దో నే కెరంతె లంజె ఆసల్ చ కమెతె పూర్తి గెచ్చు, గర్చు కము ఎత్తితె ఆస జా గెచ్చు అస్సి.

20 తుమ్ క్రీస్తుచి తెడి సికిలిసి దస్సి నాయ్;

21 తుమ్ జోచి కోడు సూన్లదు మెలె, జోచి తెడి తా జోతెయ్ సికిలదు మెలె. నాయ్, గెద, యేసుతె సత్తిమ్ అస్సి.

22 జలె, జోచి కోడు సూన్లదు మెలె, జోతె సికిలదు మెలె, ఈంజ లోకుమ్ చ మాన్సుల్ చి బుద్ది తుమ్ అగ్గె ఇండితె తిలిసి పోన. ముర్కి పాలుమ్ తుమ్ కడ వెంట గెలి రితి జా, అగ్గెచి బుద్ది ముల. జా ఎత్తి బెర్చు ఆసల్ చ మోసిమ్ లు జా, పూర్తి నానెనుమ్ కెర్తిసి.

23 జా గర్చి ఎత్తి ముల, తుమ్ చి పెట్టి తుమ్ చి ఆత్మ తుమ్ చి మెన్సుతె నోవర జా బుద్ది జా.

24 దేముడు దెతి నోవర ఆత్మతె జెర్మన్ గలన జయ్యి రితి ఇండ. జో ఆత్మతె జెర్మన్ మెలె, దేముడుచి రితి జతి రితి జోచి సత్తిమ్ క జోచి సుద్దిక తుమ్ చి ఆత్మతె నోవర జెర్మన్ జలి రితి జతినసి.

కీన బుద్దివో ముల, కీసి బుద్ది జంక

25 తుమ్ సత్తిమ్ జంక మెన జో తుమ్ క నోవర జెర్మయ్ లో, తుమ్ అబద్దుమ్ ముల ఎత్తిజిన్ ఎక్కిలో తెన్ ఎక్కిలో సత్తిమ్ కొడొ జా. కిచ్చొక మెలె, అమ్ ఎత్తిజిన్ యేసుప్రబుది ఎక్కి ఆగ్గెక వాటల్ జా అస్సుమ్.

26 తుమ్ కోపుమ్ జంక జలె, పాపుమ్ జతి రితి నెరవెర్చుప కెర నాయ్. కోపుమ్ జలె, పొద్దు నే గెతె నెంతుమ్ జా,

27 నెంజిలె తుమ్ చి కోపుమ్ నెరవెర్చుప కెర తుమ్ క పాపుమ్ కెరయ్ తి రితి సయ్ తానుక వాట్ దా తస్సె, పోన.

28 అగ్గె చొర్తి తిలన అప్పె తెంతో చొర్తి నాయ్, గని బాద సేడ్లనక తోడు నెంజిలనక తోడు దెతి రిసా, జోచ అత్తో సత్తిమ్ కము కెర కెర, మాములుమ్ కామ్ కెర కెర జయ్ కతు.

29 తుమ్ లట్టబ్బినె కిచ్చొ గర్చి బెదవ నాయ్, గని కిచ్చొ కామ్ తిలె, ఒత్త చెంగిల్ క కామ్ క జెతినసి కిచ్చొ జలె జయ్యి లట్టబ, చి తుమ్ లట్టబ్బినె సూన్తనతె బుద్ది పలితుమ్ దెరెదె.

30 పడ్డొ, 'సయ్ తాన్ దె రాజిమ్ తెంతో తుమ్ క ఆవ్ నెతోవ గెలిసి కచితుమ్ జెయిమ్ జయెదె' మెన జా రుజ్జుక దేముడు తుమ్ చి పెట్టి జోచి సుద్ది తిలి ఆత్మ దా జోవయింది ముద్ద దా అస్సి. జాకయ్, జా ఆరి తిలి రితి దేముడుచి సుద్ది తిలి ఆత్మక దుకుమ్ కెర నాయ్.

31 పెట్టి విస్సుమ్ తతినసి, కోపుమ్ దెకయ్ తినసి, కోపుమ్ దెరెనెతినసి, గగ్గల్, దూసెనల్, కున్సిదుమ్ ఎత్తి తుమ్ క దూరి కెర.

32 చి ఎక్కిలోక ఎక్కిలో మెత్తన తా, కన్యారుమ్ దెక, యేసుక్రీస్తుచి అత్తి దేముడు అబ్బొనె తుమ్ క కీసి చెమించుప కెర అస్సి గే, తుమ్ కి దస్సి ఎక్కిలోక ఎక్కిలో చెమించుప కెర.

5

ప్రబుది ప్రేమతె తుమ్ ఇండ

1 దేముడుచ ప్రేమ తిల బోదల్ తుమ్ అప్పె జలి రిసా, జో కీసి కెర్తయ్ గే దెక, తుమ్ కి దస్సి కెర,

2 చి క్రీస్తు కీసి అమ్ క ప్రేమ తా దేముడు అబ్బొనెక దెతి దొర్కు జలి చెంగిల్ వాసెన తిలి అర్చితుమ్ జా, అమ్ చి పాపుమ్ పుంచితి రిసా జోచి సాంత జీవ్ దా మొర గెలన్ గే, తుమ్ కి దస్సి ప్రేమతె ఇండ.

§ 4:17 4:17 నెంజిలె 'ప్రబుది తెడి తా'.

3 లంజెకమొవి రిసాచ కొడో జలెకు, లంజెబుద్దిచి రిసాచ కొడో జలెకు, అన్నె మాన్సుల్చి ఆస్తిక ఆన జత కమొవి రిసాచ కొడో జలెకు తుమ్ లట్టబా కి నాయ్. దనచచి రిసా ప్రబుచ నుద్ది జల మాన్సుల్ లట్టబుక కి బెదె నాయ్.

4 తుమ్ లట్టబ్బినతె వెట్కారుమ్చ కొడో పోన, కామ్క నెంజిత కొడో పోన, వెర్రి కొడో పోన; దనచ నూటి నాయ్. దనచ ఎత్కి పోన, గని దేముడు కెర్రి దయచి రిసా జోక తుమ్చి సర్ల సంగిత కొడోయ్ లట్టబ.

5 కేన్ కొడు ఏక్ తుమ్ కచితుమ్ దెరన మెలె, కేన్ లంజె ఇండితొసా, లంజెబుద్ది సికడొసా, అన్నె మాన్సుల్చి అస్తిచి అసక జితొసా కో జలెకు, జోవయిచి అస జోవయింక దేముడు రితి జా, దేముడుక 'జో అమ్క నాయ్' మెలి రితి విరోదుమ్ కెర్రి రితి జతయ్, గెద; కో దన బుద్దివోచ జలె, క్రీస్తుచి దేముడు అబ్బినచి రాజిమ్తె జోవయింక కేన్ వాట కి దొర్కు జయె నాయ్.

ఉజిడ్బుద్దితె తుమ్ ఇండ

6 కామ్క నెంజిత కొడో లట్టబ దన పాపుమ్ కమొవి రిసా కో తుమ్క మోసిమ్ కెర్రి రితి తుమ్ దెర్కు సేడ నాయ్. దన పాపల్చి రిసా జోచి కోడు నే నూన్త మాన్సుల్క దేముడు జోచి కోపుమ్చి సిచ్చ దెయెదె.

7 జాకయ్ దన కమొతె తుమ్ బెదె నాయ్.

8 కిచ్చొక మెలె, తుమ్ అగ్గె అందర్బుద్దితె ఇండిలదు, గని అప్పె *ప్రబుచి తెడి ఉజిడ్ జా అస్సున్. ఉజిడ్చ బోదల్ రితి ఇండ.

9 కిచ్చొక మెలె, ఉజిడ్చి పలితుమ్ దెర్రిసి కిచ్చొతె చినుక జయెదె మెలె, చెంగిల్ తిలిసి ఎత్కితె, పారపాల్ నెంతె తిలిన్ ఎత్కితె, సత్తిమ్ తిలిన్ ఎత్కితె.

10 పడ్డె, కిచ్చొ ఎత్కిక చెంగిల్ మెన ప్రబు మెనెదె గే, తుమ్ అజ్జ కెరన.

11 అందర్బుద్దిచ కమొతె తుమ్ ఎద్దెరె బెదె నాయ్. దస్సు కమొ కిచ్చొ చెంగిల్ పలితుమ్ దెర్రి నాయ్. అన్నె మాన్సుల్ దస్సుపతె దెర్కు నే సేడ్డి రితి, ఉజిడ్చి పాసిక దస్సు కమొ ఆన, జోవయింక 'పాపుమ్చ' మెన రుజ్జుల్ దెకవ.

12 జేవ్ మాన్సుల్ గుట్టు తెన్ కెర్రి కమొచి రిసా సంగుక కి లాజా.

13 గని, కిచ్చొ జలెకు అందర్ తిలిసి ఉజిడ్క పాసి అయ్లె, జాక 'జా పాపుమ్చి' మెన, రుజ్జు డీస్తయ్. కిచ్చొక మెలె, జా ఉజిడి ఒత్తయ్ దెకయ్ జా దెకయ్తయ్.

14 అమ్ ఒప్పనతి కొడు ఏక్ ఇన్నె బెదితయ్. కేన్ కొడు మెలె, "ఓ నిజిలోసా, తెలివి జా ఉట్టు! మొర తిలోసా, జీవ్ జా ఉట్టు, చి క్రీస్తు తుక జోచి ఉజిడి దెకయెదె" మెలిసి.

15 తుమ్ కిసి ఇండితె గే చెంగిల్ ఉచర, జాగర్ల తెన్ తా. బుద్ది నెంజిలనచి రితి తుమ్ ఇండ నాయ్, గని చెంగిల్ బుద్దితె ఇండ.

16 కిచ్చొ కిచ్చొ చెంగిల కమొ కెరుక వాట్ అయ్లె, తెలివి తెన్, జా వాట్ అడ్డు నే కెర్రి రితి, నే పిట్టయ్తె, చెంగిల్ పలితుమ్ దెర్రి రితి జేవ్ కమొ తుమ్ కెర. కిచ్చొక మెలె, ఈంజ కాలమ్ ఒగ్గర్ పాపుమ్చి, చి చెంగిల కమొక కెర్రి సమయమ్ తయెదె గే, నేనుమ్.

17 జాకయ్, బుద్ది నేన్ల మాన్సుల్ రిత తుమ్ జా నాయ్, గని కిచ్చొ బుద్ది తుమ్ ఇండుక ప్రబుచి ఇష్టుమ్ అస్సె గే, తుమ్ అర్దుమ్ కెరన.

18 తుమ్ నూరు పియ మచ్చు నాయ్. కిచ్చొక మెలె, జా చెంగిల్చిక పాడ్ కెర నాసినుమ్ కెర్రిసి. గని దేముడుచి నుద్ది తిలి అత్తు తుమ్చి పెట్టి వేర జతయ్.

19 ఎక్కిలో తెన్ ఎక్కిలో ప్రబుచి గప్పురుమ్ సంగిత కిచ్చొ కిచ్చొ రగల్ గనుమ్లు గాయతె తా. జేవ్ గనుమ్లుతె కిచ్చొ ఏక్ రగుమ్ తుమ్ గాయ మెలె, కిర్తనలు. తుమ్చి పెట్టి పూర్తి సర్ల తెన్ ప్రబుచి గప్పురుమ్ సంగిత గనుమ్లు, బజెన తెన్ కి గాయతె తా,

* 5:8 5:8 నెంజిలి ప్రబుచి తెడి అస్సున్ చి జోవయిచి ఉజిడి జా అస్సున్.

20 కెయక కి, కిచ్చొ జలి కి, కిచ్చొది రిసా కి 'జొయ్యి దిలో' మెన, అమ్చొ ప్రబు జలో యేనుక్రీస్తుచి నావ్ తెన్ అబ్బొన్ జలో దేముడుక తుమ్చి సర్ద తుమ్ సంగితె తా.

తెర్రిమున్ను ప్రేమ దెకితిన్

21 క్రీస్తుక మరియాద దెకితి రితి, తుమ్ ఎక్కిలోక ఎక్కిలో పోటి నే కెరై, ఎక్కిలోతె ఎక్కిలో దాక్ కెరన, ఎక్కిలోక ఎక్కిలో నేవ కెరై తా.

22 తుమ్ తేరిబోదల్ తుమ్చ మున్నురలుచి తెడి తా, దాక్ కెరన జోవయించి కోడు సూన, ప్రబుకయ్ గప్పురుమ్ కెర్లి రితి అంపొ జా తంక.

23 కిచ్చొక మెలె, క్రీస్తుక నంపజలన మొత్తుమ్ జోచి †ఆగ్ జతసుమ్. జా ఆగ్ జో క్రీస్తు బోడి. జా ఆగ్ జో జో సొంత రచ్చించువ కెర్లొసా జయెద. దస్సి కి, తేర్లిక మున్నుసి బోడి జయెద.

24 జోచి ఆగ్ జత నంపజలన మొత్తుమ్ క్రీస్తుచి తెడి అన్నుమ్, గెద. దస్సి, ఎత్తిచి రిసా తేర్లి మున్నున్చి తెడి అన్ను, జోవయించి కోడు సూనుక అన్ను.

25 తుమ్ మున్నుబోదల్ తుమ్చ తెర్లివొక ప్రేమ కెరై తా. కిచ్చొక మెలె, క్రీస్తుచి ఆగ్ జత నంపజలన నంగుమ్క 'చెంగిల్ జతు' మెన, బోడి జలో క్రీస్తు జోచి జీవ్ దిలన్.

26 కిచ్చొక మెలె, †పాని సువ నుద్ది కెర్లి రితి, జా ఆగ్ జోచి కోడు తెన్ దేవెతి రితి కెర, జా ఆగ్ జోచి జా గెతి రితి, పూర్తి నుద్ది కెర్లి రిసా దస్సి కెర్లన్.

27 కిచ్చొక మెలె, జోచి ఆగ్ జత అమ్, నంపజలన మొత్తుమ్ జోక పూర్తి నూటి తిలి తెర్లి జతి రితి, జొయ్యి గప్పురుమ్ తెన్ ఆనన్తి రిసా, జా పూర్తి నూటి జతిసి కిసి మెలె, కిచ్చొ ఆత్మ మచ్చల్ సర్దల్, దస్సచ కిచ్చొయ్ నెంతె, జా పూర్తి ప్రబుచి, పూర్తి పొరవోట్ నెంజ, నుద్ది నూటి జతిసి.

28 జలె, జోచి ఆగ్ జల నంపజలన నంగుమ్క ప్రబు కిసి ప్రేమ కెర నుద్ది కెర్లయ్ గే, మున్నుసి కిసి జోవయించి ఆగ్ జొయ్యి కిసి ప్రేమ కెరెదె గే, జో దస్సి జోవయించి తేర్లిక ప్రేమ దెకుకయ్. కో తేర్లిక ప్రేమ కెర్లయ్ గే, జోకయ్ జొయ్యి ప్రేమ కెరన్లి రితి జతయ్.

29 కేన్ మాన్నుల్ కి జోచి సొంత ఆగ్క కెయ విరోదుమ్ జతి నాయ్. నాయ్, గెద. పోసనుల, చెంగిల్ దెకనుల. దస్సి, క్రీస్తు జోచి ఆగ్ జత నంపజలన మొత్తుమ్ బెదిలిన్క పొస్తయ్, దెకితయ్.

30 అమ్ జోచి సొంత ఆగ్ జలి రిసా.

31 దేముడుచి కోడుతె రెగ్గయ్లిన్ కిసి అన్ను మెలె,

§ "జాకయ్, మున్నుబోద, అయ్యెన్ అబ్బొన్ క ముల, తెర్లి ఆన, జా తెన్ ఎక్కి నిదానుమ్ జయెదె, చి జేవ్ దొగుతెర ఎక్కి ఆగ్ జా గెచ్చుల" మెన రెగ్గ అన్ను.

32 క్రీస్తుక నంపజలన మొత్తుమ్ బెద జోచి ఆగ్ జతిన్క పెండ్లి జా చెంగిల్ దెకితి ఈంజ టాలిచి అర్దుమ్ వెల్లి.

33 గని మాములుమ్ తెర్లిమున్ను చి అర్దుమ్ కి ఉచరుక జయెదె. మెలె, తుమ్చి తెచ మున్నుబోదల్ కో జలెకి, తేర్లివొక ప్రేమ దెకుత్. పడ్డె, తేర్లి మున్నున్క మరియాద దెకుక అన్ను.

6

బోదల్ అయ్యెన్ అబ్బొన్

1 తుమ్ బాలబోదలు, *ప్రబుచి తెడి అయ్యెన్ అబ్బొన్చి కోడు సూన. ఈంజ ప్రబుచి ఇస్టుమ్.

2 పూర్లుమ్ దేముడు రెగ్గయ్లి జా కోడు కిచ్చొ మెలె,

† "అయ్యెన్ అబ్బొన్ క గప్పురుమ్ కెర. ప్రమానుమ్ తెన్ ఆగ్గల్ క ఈంజ తొలితో చి.

† 5:23 5:23 1:23, 4:4 దెక. ‡ 5:26 5:26 నెంజలె, 'బాప్తిసుమ్క చి జోవయించి కోడుక జేక పూర్తి నుద్ది కెర జా జోచి జా గెతి రితి కెర్లి రిసా'. § 5:31 5:31 ఆదికాండుమ్ 2:24. * 6:1 6:1 మెలె 'ప్రబుచి తెడి అన్నుచి జోవయించి ప్రేమబుద్ధి తుమ్చి పెట్టి తిలె జోవయించి ప్రేమకయ్ అయ్యెన్ అబ్బొన్చి కోడు సూన్తె'. † 6:2 6:2 ద్విగతీయోపదేశ కాండుము 5:16.

3 మెలె, అయ్యోదాఅబ్బొద్ద గవురుమ్ కెర్తె, తుమ్క చెంగిల్ తయెదె, చి ఈంజ లోకుమ్తె ఒగ్గర్ దీనల్ జస్తె” మెన రెగ్గ అస్సె.

4 తుమ్ అబ్బుదింసి, జలె, ఆరి తుమ్చ బోదల్క కోపుమ్ కెరవ నాయ్, గని ప్రబు దెతి బుద్ది తెన్ జోవయింక ముద్దో కెర, ప్రబుచి ఎత్తి సికడ పోన.

సేవ కెర్తన ఎజొమాన్లు

5 కో గొతిమాన్సుల్ జలె, క్రీస్తుక గవురుమ్ కెర్తి రితి తుమ్చ పెట్టితె ఎజొమాన్లుక బియె, ఎక్కి నిదానుమ్ తా, జోవయింకి కోడు రితి కెర.

6 మాములుమ్ మాన్సుల్చి గవురుమ్ ఆనన్తి బుద్ది తిలి రితి, ఆరి డీసుకయ్ నిదానుమ్ తిలి రితి తుమ్ జా నాయ్. గని దేముడుచి ఇన్సుమ్ రితి కెర్తి రిసాయి తుమ్ క్రీస్తుచ సేవ కెర్తన తిలి రిసా, తుమ్చి పెట్టిచి ప్రేమ తెన్ కెర.

7 మెలె, మాన్సుల్క మెన్సు వడంతి రిసా నాయ్, గని ప్రబుక సర్త తెన్ సేవ కెర్తి రితి, తుమ్చ ఎజొమాన్లుచి సేవ తుమ్ సర్త తెన్ కెర.

8 కేన్ మాన్సు, గొతిమాన్సు జలెకి నెంజలె కి, కిచ్చొ చెంగిల్చి కెర్తె కి, ప్రబు జోవయింక చెంగిల్ దెక బవుమానుమ్ దెయెదె మెన జాన్సు.

9 తుమ్ ఎజొమాన్సు, తుమ్చ గొతిమాన్సుల్క దస్సి ప్రేమ దెక, జోవయింక బియెడ నాయ్. జోవయింక తుమ్క ఎజొమాని జతో దేముడు పరలోకుమ్తె అస్సె, చి జో కక్క మొకమాటుమ్ దెకి నాయ్.

సయ్తానుక జీన్తి రిసా ఆత్మ డిట్టుమ్ కెరసుక అస్సె

10 జలె, ఆకర్క కిచ్చొ మెన ఆమ్ రెగిడ్డిసి మెలె, ప్రబుచి తెడి డిట్టుమ్ తా, జోచి ఆత్మనెక్కి దెరన ఇండ.

11 సయ్తానుక తుమ్ జీన్తి రితి, దేముడు దెతి కిచ్చొ నే లయితి ఇనుము సొక్క తుమ్ గలన.

12 కిచ్చొక మెలె, మాన్సుల్క మాన్సుల్ కెర్తి యుద్దుమ్ నెంజె, ఈంజ, గని కోకో యుద్దుమ్ కెర్తనచి ఉప్పిరి అమ్ జీనుక అస్సె మెలె, కీవిలువ కెర్త గర్లు ఆత్మల్చి ఉప్పిరి, * జోవయింకి తెడి ఏలువ కెర్త ఆత్మల్చి ఉప్పిరి, ఈంజ ఉగుమ్చి అందర్ తిలి సయ్తాన్చి రాజిమ్తె ఏలువ కెర్త ఒగ్గర్ గారెచి నెక్కిచి ఉప్పిరి, మాన్సుల్క పాడ్ కెర్త బూతల్చి ఉప్పిరి, మాయలోకుమ్చ నెక్కివో ఎత్తిచి ఉప్పిరి అమ్ జీనుక అస్సె.

13 జాకయ్, కేన్ సమయుమ్క సయ్తాన్చ జేవ్ నెక్కివో అల్లర్ కెరుక ఉచరుల గే, దేముడు జా యుద్దుమ్క దిలి కిచ్చొ నే లయితి ‘ఇనుము సొక్క’ మెన టాలిక సంగితిన్ ఎత్తి తుమ్ గలన తెయారె జా తా, చి జా యుద్దుమ్క టీవ్క తుమ్క నెక్కి తయెదె, చి జీన టీవ్తె.

14 కిచ్చొ నే లయితి జా కిచ్చొ కిచ్చొ తుమ్ గలన మెలె, సత్తిమ్ తుమ్క పట్ట రితి జయెదె. ప్రబు దిలి పున్సిమ్ తుమ్క ఇనుము సొక్క జయెదె,

15 మాన్సుల్క దేముడు తెన్ బెదయెతి నేంతుమ్ దెతిన్చి రిసాచి సుబుమ్ కబుర్ నూనయెతి రిసా తెయారె జతిసి తుమ్క డిట్టుమ్చ జోడ్లు జయెదె.

16 పడ్డో అస్సె, ప్రబుచి ఉప్పిరిచి నముకుమ్ తుమ్క డాలు జయెదె. జో గలన్లె, ఆగి లగిత సయ్తాన్ విందిత కండో నే లయితి రితి నెతోవ విజయ్తె.

17 పడ్డో, ప్రబు దెతి రచ్చన తుమ్చి బోడిక ఇనుము బోవి జయెదె. పడ్డో ఎత్తి అదికారుమ్ తిలో దేముడు రెగ్గయెల కొడ్డో జోచి ఆత్మచి కండా దస్సి తుమ్ గలన.

18 అస్సె, దేముడుచి సుద్ది తిలి ఆత్మనెక్కి తుమ్చి పెట్టి తోడు తా, కెర్టోడ్ కి ప్రార్తన కెర, ప్రబుచి తోడు నజన్తె తా. ప్రార్తన కెర్తె తతి రిసా తెలిచి తెన్ తా, ఎక్కి నిదానుమ్ తా, దేముడుచి సుద్ది సుదల్ ఎత్తిచి రిసా ‘చెంగిల్ తత్తు’ మెన తుమ్ ప్రార్తన కెర.

‡ 6:6 6:6 నెంజెలి ‘క్రీస్తుక గొత్తి మాన్సుల్ రిత తిలి రిసా’, నెంజెలి ‘క్రీస్తుక గొత్తి రితి జలి రిసా’. § 6:12 6:12 నెంజెలి, ‘అదికారుమ్ తిలిసి ఎత్తిచ ఉప్పిరి’. * 6:12 6:12 నెంజెలి, ‘అదికారుల్ ఎత్తిచి ఉప్పిరి’.

19 పడ్డో, †చి గుట్టు ఆవ్ దయిరిమ్ తెన్ సుబుమ్ కబుర్ నూనయ్తి రితి ప్రబు అంక సెక్తి దెవున్ మెన, అంచి రిసా కి తుమ్ ప్రార్థన కెర్తె తా.

20 జా సుబుమ్ కబుర్ నూనయ్లి రిసా ప్రబుచి అదికారుమ్ తెన్ తిలో బారికి రితో జా ఆవ్ ఇసి జేల్తె తా గొల్లుల్ తెన్ బందయ్ జా అస్సి. జలెకి, ప్రబుచి ఇస్టుమ్ కీసి తిలె ఆవ్ దయిరిమ్ తెన్ ఈంజ సుబుమ్ కబుర్ నూనయ్తి రితి జో ప్రబు సెక్తి దెవున్ మెన, అంచి రిసా తుమ్ ప్రార్థన కెర.

21 జలె, ఆవ్ కీసి అస్సి గే కిచ్చొ కెర్తసి గే తుమ్ జాన్తి రిసా, ప్రేమ జలో అమ్క బావో జతో, ప్రబుచి తెడి అంక తుమ్క సేవ నిదాసుమ్ కెర్తె తుకికు తుమ్క సంగెదె.

22 జాకయ్ జోక ఆవ్ తెద్రవ అస్సి. అమ్ కీసి సంతోసుమ్ గే తుమ్క జానవుక మెన, తుమ్చి పెట్టి తుమ్ దయిరిమ్ జతి రితి జో తుమ్క దయిరిమ్ సంగెదె.

ఆకర్ కోడు

23 దేముడు అబ్బొసి దెతి ప్రబు జలో యేసుక్రీస్తు దెతి సేంతుమ్, ప్రేమ, నముకుమ్ ప్రబుచి తెడి తిల ఒత్తచ బాపుడ్లు ఎత్తిక కలుగు జవున్!

24 అమ్చొ ప్రబు జలో యేసుక్రీస్తుక కో పూర్తి నే మొర్తి ప్రేమ కెర్తసు గే, జోచి దయ తుమ్చి ఉప్పిరి తవును!

† 6:19 6:19 చి రిసాయి 'చి గుట్టు' మెన సంగితయ్, నెంజిలె, యూదుల్ నెంజిలన కి పావుమ్ తెంతో రచ్చించువ జతి, ఎత్తి అదికారుమ్ తిలో దేముడు తెన్ జేవ్ బెదితి వాటు అయలన్చి రిసా సంగితయ్. 1:9-10, 3:1-6.

పిలిప్పియుల్క రెగిడ్లి ఉత్త్రుమ్ బారిక్ జలో పవులు పిలిప్పి పట్టుమ్చ సంగుమ్చక రెగిడ్లి ఉత్త్రుమ్

మొదోల్ కోడు

1 పిలిప్పి పట్టుముతెచ *క్రీస్తు జలో యేసుక సంపజా జోచి సుద్ది జా జోచయ్ జా, జోచి తెడి తిల మాన్సుల్క, పడ్డో తుమ్చ సేవ కెర్తొనక చి జోచి తెడి సంగుమ్చి సేవ కెర్తొ అన్నె వెల్లెల మాన్సుల్క, యేసుక్రీస్తుచి సేవ కెర్తొ జోచి †గొత్తి మాన్సుల్ జల పవులు, అన్నె తిమోతి రెగిడ్లి ఉత్త్రుమ్.

2 అమ్క అబ్బో జలో దేముడు అన్నె ప్రబు జలో యేసుక్రీస్తుచి దయ సేతుమ్ తుమ్చి ఉప్పిరి తప్పన్!

పిలిప్పియుల్చి రిసా పవులుచి సర్ద

3 తుమ్చి రిసా ఆవ్ కెయక ఉచర్తొ కి, తుమ్చి రిసా అంచి సర్ద ఆవ్ దేముడుక సంగితసి.

4 తుమ్చి రిసాచి ఎత్తి అంచి ప్రార్దన పూర్తి సర్ద తెన్ కెర్తొసి.

5 కిచ్చొక ఒగ్గర్ సర్ద జతసి మెలె, తుమ్ సంపజలి *మొదోల్ తెంతో, అప్పె ఎద కి తుమ్ అంచి తెన్ బెద, సుబుమ్ కబుర్ సూనయ్తినతె అంక రీతోడు అస్సున్.

6 దేముడు తుమ్చి పెట్టి మొదోల్ కెర్తొ చెంగిల్ కామ్, యేసుక్రీస్తు ఈంజ లోకుమ్తె అన్నె ఉత్త్ర జెతి దీసి ఎదక, జో దేముడు అబ్బోసి జా కామ్ సొంత పూర్తి జర్గు కెరెదె మెన, అంక దయిరిమ్ అస్సె.

7 తుమ్ ఎత్తిజిన్చి రిసా ఆవ్ ఇసి ఉచరుక చెంగిల్. కిచ్చొక మెలె, తుమ్చి రిసా అంక ఒగ్గర్ ప్రేమ, అంక దిలి దేముడుచి దయ తెన్ అంచి తెన్ తూమ్ బెద అస్సున్. సుబుమ్ కబుర్చి రిసా ఆవ్ *జేలి జలి స్రెమతె కి, చి రిసా జబాబుల్ దెతినతె కి, రుజుల్ దెకయ్తినతె కి, తుమ్ ఎత్తిజిన్ ఆత్మతె అంచి తెన్ బెద తోడు అస్సున్.

8 క్రీస్తు జలో యేసు అమ్క కెర్తొ ప్రేమ దెకితయ్ గే, దస్సి ప్రేమ తెన్ తుమ్క ఆవ్ తెడ్డి ఉచర్తొ తత్తసి మెన, దేముడు సాచి అస్సె.

9 తుమ్చి అప్పెచి ప్రేమ అన్నె ఒగ్గర్ జప్పన్ మెన అంచి ప్రార్దన. ప్రబుచి రిసాచి గ్యానుమ్చి కిచ్చొ కిచ్చొ ఎత్తి అర్దుమ్ కెరంతి కిచ్చొ కిచ్చొ ఎత్తి చినితి బుద్ది జా ప్రేమతె ఒగ్గర్ జప్పన్ మెన ప్రార్దన కెర్తొసి.

10 ఆత్మక దస్సి వడ్డిలదు మెలె, చెంగిల్ తిలిన్క గార్ తిలిన్క నినుక జాన, చెంగిలిచి మెన ఇస్తుమ్ జస్సె, చి క్రీస్తు అన్నె ఉత్త్ర జా తీర్పు కెర్తొ జా వెల్లి దీసి ఎదక తుమ్ ఎత్తిజిన్ ఎక్కి మెన్ను నిదానుమ్ జస్సె, చి తుమ్క 'పొరపాల్ జల' మెన కో సంగుక నెత్తిర్.

11 తుమ్ దస్సి ప్రేమ, ఆత్మచి గ్యానుమ్ జలె, యేసుక్రీస్తుతె దొర్పు జతి ప్పున్మచి పూర్తి పలితుమ్ తుమ్చి పెట్టి దెర్తొ తయెదె, చి దేముడుచి నావ్, జోచి గవరుమ్ టీవెదె.

పవులు జేలి జా చెంగిల్ పలితుమ్ దిలిసి

12 బాపర్డు, తుమ్ కిచ్చొ జానసుక మెన అవ్ ఆన జతసి మెలె, అంక జర్గు జలి క్షమ్మమ్ ఆరి తయె నాయ్, గని సుబుమ్ కబుర్ సూనయ్తినక కామ్క జా అస్సె.

13 క్రీసి మెలె, క్రీస్తుక ఆవ్ నిదానుమ్ తిలి రిసాయి ఆవ్ జేలి జలిసి మెన వెల్లో అదికారిచి గేర్ జలి అదికారుల్క, అన్నె ఎత్తిజిన్ జాన అస్సి.

* 1:1 1:1 'క్రీస్తు' మెలె, 'తెర్తయిందె' మెన పూర్గుమ్ ఎత్తి అదికారుమ్ తిలో దేముడు యూదుల్క సంగ తిలో దొర్పు జలో రచ్చంచువ కెర్తొనా. † 1:1:1 నెంజెలి 'గొతిమాన్సుల్ రిత'. ‡ 1:5 1:5 బారికుల్ 16:12-40. § 1:5 1:5 పిలిప్పియుల్ 1:19 ప్రార్దన కెర తిల. 2:25-30 ఎవప్రాదితుక పవులుతె తోడు తెర్తవ తిల, చి 4:10-11 చి 14-18 దబ్బుల్ తెర్తవ తిల. * 1:7 1:7 పవులు రోమ్తె జేలి జలి పొది ఈంజ ఉత్త్రుమ్ రెగిడ్లి మెన ఒగ్గర్జిన్ ఉచర్తొ. బారికుల్ 28:16, 30, 31 దెక. పిలిప్పియుల్ 4:22 దెక. కైసర్ రాసో రోమ్ పట్టుమ్తె తయెదె. పిలిప్పియుల్ 1:13 దెక. ప్రోటోయచ అదికార్తొ కి రోమ్తె తప్పల. కైసరియ పట్టుమ్తె కి పవులు జేలి జా తిలో; బారికుల్ 23:23-24:27. పిలిప్పి తె కి; బారికుల్ 16:23, అన్నె యెరూసలేమ్తె; బారికుల్ 21:33..., గని పిలిప్పి తె చి యెరూసలేమ్తె ఒగ్గర్ దీసల్ జేలి తయె నాయ్. ఎవెమతె కి జేలి జా తిలన్ మెన సగుమ్జిన్ ఉచర్తొ, గని రుజుల్ నాయ్.

14 వడ్డో అన్నె, ఆవ్ జేలి జలి తెంతో ఇన్నెద నంపజలన †ప్రబుచి తెడి ఒగ్గర్ దయిరిమ్ జా, బయమ్ నెంతె దేముడుచి †కోడు ఒగ్గర్ దయిరిమ్ తెన్ సూనయ్తతి.

15 సగుమ్జన్ జోవయింది పెట్టిచి అంచి ఉప్పిరిచి గోసక, కున్సిదుమ్ ఉచర సుబుమ్ కబుర్ సూనయ్తతి, గని అన్నె సగుమ్జన్ అమ్చి తెన్ సర్ద తెన్ తా సూనయ్తతి.

16 ఈంజేవ్ జలె, ప్రేమకయి సూనయ్తతి. చి నత్తిమ్ ఆవ్ రుజ్జు దెకయ్తతి రిసాయి ఆవ్ ఇన్నె జేలి తెన్ తంక దేముడుచి సెలవ్ మెన ఈంజేవ్ జాన్తి.

17 జేవ్ గోసచ, జలె, వెల్లో కెరనుక ఉచర గార్ ఆస తెన్ సుబుమ్ కబుర్ సూనయ్తతి. జోవయింది పెట్టి నిదానుమ్ తతి నాయ్, గని ఆవ్ జేలి జలొసొక అంక నొప్పి దెక ఉచరయ్ సూనయ్తతి.

18 జలె, కిచ్చొ? జోవయింది పెట్టిచి బుద్ది మాయచి జలెకి, నత్తిమ్చి జలెకి, క్రీస్తుచి రిసాయి జేవ్ సాడుప కెర్తతి. జాచి రిసా అంక ఒగ్గర్ సర్ద.

మొర్లె చెంగిల్ గే జలె చెంగిల్ గే

19 వడ్డో, అన్నె కిచ్చొ సర్ద కచితుమ్ జయిందె మెలె, తుమ్ ప్రార్దన కెర్రి రిసా, యేసుక్రీస్తుచి ఆత్మ అంక తోడు తిలి రిసా, ఈంజేవ్ బాదల్ ఎత్తితె రచ్చించుప జయిందె మెన జాని.

20 కీని మెలె, ఆవ్ ఓడుప జయి నాయ్, గని ఆవ్ పూర్తి దయిరిమ్ తయిందె, చి అప్పె కి కెయ్క కి, ఆవ్ జలె కి మొర్లె కి, అంచి అగి క్రీస్తుచి గవురుమ్ డీసెదె మెన అంచి ఆస, అంచి దయిరిమ్.

21 కిచ్చొక మెలె, ఈంజ అగి ఆవ్ జలె, క్రీస్తుచి రిసాయి జతసి, జోచి కామ్ కెర్రి రిసాయి జతసి. ఆవ్ మొర్లె, జోతె గెచ్చిందె, చి అంకయ్ లాబుమ్.

22 ఆవ్ ఈంజయ్ అగి జింక జలె, క్రీస్తుచి కామ్క జెయిందె. గని జతినతె మొర్లెనతె కేన్ నిసానదె గే, నేని.

23 ఈంజేవ్ దొన్సి మెన్సుల్ తా ఆవ్ అల్లర్ జతసి. అంచి సొంత ఇన్సుమ్ కేన్ మెలె, మొర క్రీస్తుతెయ్ గెచ్చొక; ఈంజ లోకుమ్తె ఆవ్ తతి కంట అంక జయ్యి లాబుమ్.

24 గని తుమ్చి రిసా ఆవ్ ఈంజ అగి జలె చెంగిలి. జాకయ్ జయ్యి ముక్కిమ్.

25 ఈంజ కోడు నిజుమ్ మెనయ్, తుమ్ ఆత్మక అన్నె వడ్డితి రితి క్రీస్తుచి తెడి నముకుమ్ తెన్ తుమ్ సర్దనంతోనుమ్ తతి రితి, ఇసి తా తుమ్చి తెన్ తయిందె మెన ఆవ్ కచితుమ్ జాని.

26 దస్సి, తుమ్చితె ఆవ్ అన్నె అయ్లె, యేసుక్రీస్తుచి తెడి అంచి రిసా తుమ్క ఒగ్గర్ సర్ద జస్తె.

క్రీస్తుచి తెడి ఎక్కి, నిదానుమ్ తా

27 క్రీస్తుచి సుబుమ్ కబుర్క గవురుమ్ కెర్రి రితి ముక్కిమ్క బుద్ది ఇండ, చి తుమ్క సొంత దెకిత్ రితి ఆవ్ తుమ్తె అయ్లె కి, నాయ్ మెలె నెత్త వేరతె తిలి కి, తుమ్క 'ఎక్కి, ఆత్మ నిదానుమ్ తా డిట్టుమ్ టీచ, సుబుమ్ కబుర్చి నత్తిమ్ వేర మాన్సు నంప కెర్రి రితి ఎక్కి మెన్సు, ఎక్కి కట్టు తెన్ బెద,

28 కిచ్చొచి రిసా కి విరోదుమ్ సుదల్క నే బితె క్రీస్తుచి పచ్చెనచి కామ్ కెర్తతి' మెన తుమ్చి రిసా సూనిందె. తుమ్చి నిదానుమ్ తుమ్చి విరోదుమ్ సుదల్క కిచ్చొ రుజ్జు దెకయెదె మెలె, జేవ్ నాననుమ్ జతసి, అన్నె తుమ్ రచ్చన జతసి. కిచ్చొక మెలె, దేముడు సొంత ఇసి జగ్గు కెర్తయ్.

29 మెలె, క్రీస్తుచి నావ్ గవురుమ్ జతి రిసా తుమ్ జోక నంప కెరుక మెన, గని అన్నె కిచ్చొ మెలె, అల్లర్ నేడ ఓర్పుప జా జీనుక మెన, దేముడు తుమ్క వరుమ్ దా అన్నె.

30 కిచ్చొక మెలె, తుమ్ అంచితె దెకిలి రితి, అంక తిలిసి మెన అప్పె తుమ్ సూన్సి రితి అల్లర్ తుమ్క కి అన్నె.

2

క్రీస్తుచి రితి, దాక్ కెరన

† 1:14 1:14 మెలె, 'వవులు జేలి జలెకి ప్రబు జోవయింక తోడు అన్నె మెన రుజ్జుల్ దెక దయిరిమ్ జా...' ‡ 1:14 1:14 నెంజిలె 'సుబుమ్ కబుర్', నెంజిలె 'కబుర్'.

1 జలె, క్రీస్తుతె తిలి పొది తుమ్క దయిరిమ్ దొర్కు జతయ్ మెలె, ప్రేమ తుమ్క పెల్లితయ్ మెలె, దేముడుచి నుద్ది తిలి అత్తు తుమ్చి పెట్టి అస్సె మెలె, తుమ్చి పెట్టి ముద్దుచి కన్యారుమ్ అస్సె జలె,

2 ఎక్కి ఉద్దెసుమ్ తెన్, ఎక్కి ప్రేమ తెన్, హూర్తి ఎక్కి కట్టు తెన్, ఎక్కి మెన్ను తా, చి అంక హూర్తి సర్లసంతోసుమ్ కెర్తె.

3 సొంత గార్ ఆనక, సొంత గపురుమ్క, తుమ్ కిచ్చొ కెర నాయ్, గని దాక్ కెరన, ఎక్కిలోక ఎక్కిలో జోచి కంటి వేర మాన్సుల్క గపురుమ్ దెకిత్ తా.

4 తుమ్తె ఎత్తి మాన్సు ఎక్కి సొంత దెకన నాయ్, గని, ఎక్కిలోచి రిసా ఎక్కిలో 'చెంగిల్ జతు' మెన తుమ్ వేర మాన్సుల్క కి చెంగిల్ దెక.

5 క్రీస్తుక తిలి జోచి తెడి దొర్కు జతి బుద్ది తుమ్చి పెట్టి తుమ్ తియన.

6 కిచ్చొ నే జెర్తయ్లి అగ్గె తెంతో కి

దేముడు తెన్ జో ఎక్కి జలెకి,

'దేముడు' మెనన గపురుమ్ ఆనసుక ఉచరె నాయ్,

7 గని, జొయ్యి దాకు కెరన, మాన్సు జా జెర్తున్ జా,

గొత్తి నుదొ రిత్ జలన్.

8 దస్సి, మాన్సు జా జెర్తున్ జా జో జోకయి దాకు కెరన

దేముడు అబ్బొన్చి సెలవ్ కోడు జర్లు కెర,

మాన్సు సేడ్డి మొర్తుతె సేడ్లన్;

సిలువతె మొర గెల్.

జలె,

9 దేముడు అబ్బొన్చి సెలవ్ కోడు జర్లు కెర జో మొర్లి రిసా,

దేముడు అబ్బొన్చి జోక ఎత్తిచి కంట వెల్లో కెర

జోక ఎత్తి నవ్వుచి కంట వెల్లి నావ్ తియ అస్సె.

10 'జో యేసుచి నావ్ నూన ఎత్తి మాన్సు

మొగ్రల్ టిక జోవయింక జోకర' మెనయ్.

జేవ్ పరలోకుమ్తె తిలె కి, బూలోకుమ్తె తిలె కి,

పాతలలోకుమ్తె తిలె కి, కేనె తిలె కి

జోక జోకర్లు మెనయ్

దస్సి కెర అస్సె;

11 చి 'యేసుక్రీస్తు ప్రబుయి' మెన

ఎత్తి చోడి తెనె ఒప్పన్తు మెనయ్, చి

జోకయ్ గపురుమ్ జప్పన్

దేముడు అబ్బొన్చయ్

గపురుమ్ జెయెదె, దస్సి కెర అస్సె.

బుద్ది ఇండితిన్తె ప్రబుచి సత్తిమ్చి రుజ్జు తుమ్ దెకవ

12 జలె, బావుడ్లు, అగ్గె తెంతో ఆవ్ తుమ్చి తెన్ తిలి పొది అంచి కోడు నూన్లు. దస్సి అప్పె, ఆవ్ నెంజిలి పొది ఒగ్గర్ బియె దేముడు దిలి * రచ్చన తెన్ బెదితి బుద్ది తుమ్ ఇండితె తా.

13 కిచ్చొక మెలె, జోచి ఇస్టుమ్ రితి కెర్తినక తుమ్ ఏక ఇస్టుమి జతి రితి నాయ్, గని తుమ్ జర్లు కెరుకయ్ మెన, తుమ్చి పెట్టి జో కామ్ కెర తుమ్క దేముడు సెక్కి దెతయ్.

14 తుమ్ మూర్కుమ్ జల వంక్లొ జల మాన్సుచి నెడ్మె పాపుమ్ నెంజిలన రిత, మచ్చల్ నెంజిలన, అన్నె నింద నే గల్లి రితి దేముడుచి పుత్తర్లు జతి రితి తంక, ఆగాసుమ్తె జోచి ఉజిడి దెకయ్త సుక్కల్ రిత తుమ్ జస్సె.

* 2:12 2:12 'రచ్చన', 'రచ్చించువ జతిన్' మెన ఇస్సు నంగిలి, పాపుమ్ తెంతో చి రచ్చనక నంగితనుమ్. అమ్ కెర్ల పాపల్చి రిసా లయితి సచ్చ తెంతో నయ్తాన్చి రాజిమ్ తెంతో అమక ఎత్తి అదికారుమ్ తిలో దేముడు యేసుచి అత్తి రచ్చించువ కెర్తెసి.

15 కిచ్చొ కామ్ తిలె కి, తెడి తెడి నే బాద సేడ, నే అన్యానల్ జా ఎత్తి, కమొ తుమ్ కెర.

16 పడ్డో, జిప్ప దెతి సుబుమ్ కబుర్ తుమ్ †డిట్టుమ్ దెరన, చి క్రీస్తు అన్నె ఉత్త్ర జా ఈంజ లోకుమ్చక తిర్పు కెర్లె వొల్లె దీసిక, 'అంచి నైమ, అంచి కామ్ ఆరి కామ్క జెతిసి నెంజ' మెన దెక కెర, ఆవ్ సర్ల జయిందె.

17 తుమ్క క్రీస్తు ప్రబుక సంబజా నిదానుమ్ తెన్ జోచి సేవ కెర్లెసి చి రిసా ఆవ్ ఏక వేల సుచ దిలి బలి జతి రితి జంక జలెకి, తుమ్ ఎత్తిజనచి సర్లతె ఆవ్ బెదితసి.

18 తూమ్ కి ఇసి సర్ల తెన్ తా, అంచి సర్లతె బెద.

తిమోతిక జోవయింతె తెద్రవుక

19 తుమ్చి రిసాచి కబుర్ సూన్లె సర్ల జయిందె మెన, ప్రబు జలో యేసు సెలవ్ దిలె తిమోతిక తుమ్తె బే బేగి తెద్రవుక మెన అవ్ ఆస జతసి.

20 తిమోతిక ముల అన్నెకో దన మాన్సుల్ అంక తోడు నాయ్. తుమ్క చెంగిల్ జతు మెన జొయ్యి పూర్తి నిదానుమ్ తయిందె.

21 జేవ్ తిల మాన్సుల్ జలె, యేసుక్రీస్తుచి కామ్ కెరుక పచ్చితె తా, ఎత్తిజన జోవయించి సొంతయ్ లాబుమ్ దెకన్తతి.

22 గని తిమోతి చి నిదానుమ్ జాన్సు. అంక జో అబ్బొ మెన దెకిల్ రితి జా, పుత్తు రితి జా, సుబుమ్ కబుర్చి రిసా అంచి తెడి జో ప్రబుచి సేవ కెర్లెసి జాన్సు.

23 జాకయ్, ఆవ్ కిసి †జయిందె గే తుమ్ సూన్లె, బేగి జోక తుమ్తె తెద్రయిందె.

24 అన్నె, క్రీప్రబుచి తెడి అంక కిచ్చొ నముకుమ్ మెలె, జో సెలవ్ దిలె, ఆవ్ కి సొంత జంక వాల్ తయెది మెన అవ్ ఉచర్లసి.

ఎపస్త్రోదితుక జోతె తెద్రయ్ లినచి

25 ఎపస్త్రోదితుక తుమ్తె తెద్రయ్ లె చెంగిలి మెన ఆవ్ తెద్రయ్ తసి. అంక జో బావో జా అన్నె, అంచి తెన్ బెద సుబుమ్ కబుర్ కామ్ కెర అన్నె, అంచి తెన్ జా కామ్చి రిసా బాదల్ ఓర్పువ జా అన్నె, తూమ్ జోచి అత్తి అంక తోడు కెర్లి రితి, తుమ్చి తెంతో కబుర్ జా అంక తోడు కెర అన్నె.

26 కిచ్చొక జోవయింక తుమ్తె అన్నె తెద్రయ్ తసి మెలె, ఒగ్గర్ దీనల్ జలి తుమ్క దెకె నాయ్ చి ఒగ్గర్ ఉచర్లయ్. పడ్డో, జో జొట్టో సేడ్లిన్చి రిసా తుమ్ సూన్లెచి రిసా చింత గలన తవుల మెన జో దుకుమ్ సేడ అన్నె.

27 నిజుమి, జో మొర్తి రితి జలె, గని దేముడు జోక కన్యారుమ్ రచ్చించువ కెర్లెన్. జోకయ్ నాయ్ అంక దుకుమ్చి ఉప్పిరి దుకుమ్ నే కలుగు జతి రితి కన్యారుమ్ దెకయ్ లో.

28 జాకయ్, జోక అన్నె దెక తుమ్ సర్ల జతి రిసా, జోక తుమ్తె బే బేగి తెద్రవుక ఆవ్ ఆస జా అన్ని. దస్సి, గెలో మెలె తుమ్చి రిసా ఆవ్ ఇసి బాద సేడుక నాయ్.

29 జాకయ్, *ప్రబుచి తెడి ఒగ్గర్ సర్ల తెన్ జోక తుమ్ అన్నె బెదవన. అన్నె దన మాన్సుల్ ఎత్తిజనక తుమ్ గప్పురుమ్ దెక.

30 కిచ్చొక మెలె, అంచి రిసా తుమ్ ఉచర కెరుక నెతిర్లి తోడు పూర్తి జప్పు కెరుకయ్ మెన, క్రీస్తుచి కామ్చి రిసా తెదెడి జో మొర గెతో.

3

ప్రబుచి తెడి సర్ల తతిన్

1 అన్నె, ముక్కిమ్క బావుడ్డు, *ప్రబుచి తెడి తుమ్ సర్లనంతోనుమ్ తా. తుమ్క ఈంజ ఎత్తి అన్నె రెగుడుక అంక బాద నాయ్, చి అత్తుక తుమ్క చెంగిల్ జర్గు జయెదె.

† 2:16 2:16 నెంజె 'సూనయ్ తా'. ‡ 2:23 2:23 ఏక వేల జో జేలి జలిన్క రకుమ్ల జతిన్క ఉచర్లయ్. § 2:24 2:24 మెలె 'ప్రబుచి తెడి ఆవ్ తిలి రిసా' అన్నె 'ప్రబుచి ఒగ్గర్ నెక్తి రిసా'. * 2:29 2:29 మెలె, 'ప్రబుచి తెడి తుమ్ తిలి రిసా, అన్నె ప్రబు సొంత జోవయింక బెదవన అన్నెచి రిసా పూర్తి....' * 3:1 3:1 మెలె, 'తుమ్ జోవయించి తెడి అన్నెచి చి జో తెయ్ సర్లనంతోనుమ్ అన్నెచి రిసా, సర్ల...'

2 నూనర్లు రిత ప్రబుక విరోదుమ్ జలనచి, చెంగిల్ కెర్లసుమ్ మెన, గార్ కెర్లతి రిసా తుమ్ జాగర్ల తేన్ తా. మాన్చుచి అగి చి జోవయించి గుర్తుచి †నున్నతిచి రిసా జేవ్ బలవంతుమ్ కెర్లనచి రిసా తుమ్ జాగర్ల తేన్ తా.

3 ముక్కిమక ప్రబుకయి కెర్ల సున్నతి కెర్లన కొన్న మెలె, ఆము. కీసి మెలె, దేముడుచి సుద్ది తిలి ఆత్మచి సెక్తిక జోచి నేవ కెర్ల తా, అగరుక కమెచి నంప నే కెర్ల, రచ్చించువ జంక జలె క్రీస్తుయి సాలా మెనయ్ ఎక్కి క్రీస్తు జలొ యేనుచి ఉప్పిరి అమ్చి నముకుమ్ తియ, జోచి రిసాయి దయిరిమ్ తేన్ నర్ల తేన్ అన్నుమ్.

4 అగరుక నంప కెర్లనచి రిసా ఉచర్ల జలె, దస్సిచిక నంప కెరుక కామక జెతి జలె, అచ్చె పవుల ఒగ్గర్ దయిరిమ్ తంక జతి. 'అగి జగ్గ కెర్లనచి రిసా అంక చెంగిలి' మెన కో ఉచరంతతి గే, జోవయించి కంట అంకయ్ చెంగిల్ మెనుక జతి.

5 మెలె, యూదుల్వ అగ్గల్ రితికయ్, అవ్ జెర్ల అట్టు పొదుల్క అంక జా గుర్తుచి సున్నతి కెర్ల. అవ్ †ఇరాయేలుడు, బెనూమీను చి సెకుమ్తె జెర్లియ, †ఎబ్రియుల్తె జెర్ల ఎబ్రియుడు జా జయి అస్సి. యూదుల్వ అగ్గల్ రితి కెర్లనక దెకిలె, *పరినయ్యుడు జయిందె. అమ్ పరినయ్యుల్ చి నిదానుమ్ రితి అవ్ కెర్ల తిలయ్.

6 జా రితి అంచి ఒగ్గర్ నిదానుమ్ అవ్ కీసి నెరవెర్లువ కెర్ల తిలయ్ మెలె, నంపజలనక సిచ్చల్ కెర్ల తిలయ్. చి అమ్వ అగ్గల్చి పున్నిమ్చి రితి అవ్ కెర్ల తిలిన్క దెకిలె. పొరపాల్ నెంత తిలయ్.

7 గని, జా ఎత్తితె అంక కిచ్చొ లాబుమ్ తిలి గే, క్రీస్తుకయ్ పూర్తి నిదానుమ్ జంక మెన, ఎక్కి జోచి ఉప్పిరి అంచి నముకుమ్ పూర్తి తింక మెనయ్, జా వేరచి ఎత్తిక 'నంతోసుమ్' మెన దెక, ముల అస్సి.

8 నిజామి 'అంచొ ప్రబు జలొ రచ్చించువ కెర్లొసా జలొ క్రీస్తు జలొ యేనుక జాన జో తేన్ ఇండితసి ఎత్తిచి కంట చెంగిలి' మెనయ్, వేరచి ఎత్తిక నస్టుమ్ మెన దెకితసి, క్రీస్తుచి రిసాచి అంచి ప్రేమచి రిసా వేరచి ఎత్తి పిట్టవన అస్సి, వేరచి ఎత్తిక ఉస్టా మెన దెకితసి. కిచ్చొక మెలె, ముక్కిమక క్రీస్తుయి అంక కావలె, జోయ్యి అంక లాబుమ్,

9 చి జోచి తెడి తా, అంచి సొంత సెక్తిచి పున్నిమ్, మెలె అగ్గల్ రితి కెర్ల పున్నిమ్ తేన్ తయె నాయ్; కక్క దస్సిచి పున్నిమ్ దెయె నాయ్, గని అంక కిచ్చొ పున్నిమ్ తయెదె మెలె, క్రీస్తుక నంపజలి వాట్క దొర్లు జతి పున్నిమ్. మెలె, జోక కో నంపజా గెలె, 'అంచొ క్రీస్తుచి పున్నిమ్ జోక' మెన దేముడు జోచి నర్లక అమ్క దెకితయ్.

10 వేరచి ఎత్తి ముల అవ్ అన్నె కిచ్చొ ఆన జతసి మెలె, జోవయింక జానయ్ జో అన్నె జీవ్ జలి సెక్తిచి వరుమ్ నజన, జా సెక్తిక జోవయింతెన్ ఇండుక పూర్తి అలవాట్ జా, జో సేడ్ల నైమల్తె బెద, జో ముర్లి పొది కీసి తిలొ గే, అవ్ కి దస్సి బుద్ది జంక,

11 చి దేముడు అబ్బొన్చి దయ తిలె, అవ్ ముర్లె, పరలోకుమతె గెచ్చిందె.

ప్రబు దెతి బవుమానుమ్ నజనతి రితి నిదానుమ్ నిగుక మెలి టాలి

12 'ప్రబు దెతి బవుమానుమ్ నజనతి రితి జీన్యయ్' మెని నాయ్, 'అవ్ పూర్తి పున్నిమ్ జా అస్సి' మెని నాయ్, గని జోచొ సొంత మాన్చు జంక మెన క్రీస్తుయేసు అంక బెదవన అస్సి చి రిసా, జా బవుమానుమ్ నజనుక మెన అవ్ ఒగ్గర్ సెక్తి తేన్ నిగితసి.

13 బావుడ్లు, అంచి సెక్తికయ్ జిన అస్సి మెని నాయ్, గని ఎక్కి కిచ్చొ కెర్లసి మెలె, అగ్గెచి ఎత్తి పచ్చు గెల కెర, పుర్లెతో తిలి గురితె దొర్లు జతిసి నజనుక మెన ఎక్కి ఆన జా,

14 యేనుక్రీస్తుచి నావ్ తేన్ దేముడు దెతి బవుమానుమ్ నజనుక మెన, గురి దెక నిగితసి.

† 3:2 3:2 నగుమ్జెన్ నంపజలన జల యూదుల్, చి యూదుల్ నెంజల నంపజలనకె తెత తా, జోవయించి సున్నతిచి రిసా బలవంతుమ్ కెర్ల తిల; జా సున్నతి కెర్లకయ్ పావుమ్ తెంతొ రచ్చించువ జంక జయిందె, పరలోకుమతె గెచ్చుక జయిందె; మెన సిక్కి రితి. † 3:5 3:5 'ఇరాయేలుడు' మెలె, యూదుడు, 'ఎబ్రియుల్' మెలె 'యూదుల్'. § 3:5 3:5 'ఇరాయేలుడు' మెలె, యూదుడు, 'ఎబ్రియుల్' మెలె 'యూదుల్'. * 3:5 3:5 'పరినయ్యుడు' మెలె, యూదుల్తె పరినయ్యుల్కయ్ ఒగ్గర్ గాస్టుమ్ తయెదె, యూదుల్వ అగ్గల్ జెచ్చొ ఒగ్గర్ నిదానుమ్ కెరుల, జీవ్ అగ్గల్చి రిసా బలవంతుమ్ కెరుల, చి దూతల్, బూతల్, డుంబల్, ఆత్మల్క 'అస్సి' మెన నంప కెరుల, చి 'ముర్లి అన్నె లోకుమతె గెచ్చుమ్దె' మెన నంప కెరుల.

15 అమతె అత్తుక కో వడ్డ అస్తి జలె, ఇని బుద్ది తెన్ తమ. ‘పూర్తి పున్నిమ్ జలమ్’ మెన జవున్, ‘జా గురితె నిగితి ఆస రితిసి నాయ్’ మెన జవున్ తుమ్చితె కో ఏక్ వేల వేర ఉచర్లె, తుమ్క దేముడు దెకవ సికడెదె.

16 గని ముక్కిమ్క అప్పొక కిచ్చొ బుద్ది జో అమ్క సికడ అస్సె గే, జయ్యి నిదానుమ్ ఇండుమ.

17 బావుడ్లు, ఆవ్ కిసి ఇండితసి గే దెక తూమ్ కి ఇసి ఇండ, చి అమ్ ఇండితి రితి కో ఇండితతి గే దెక.

18 కిచ్చొ జాగర్ల ఆవ్ సంగితసి మెలె, ఆవ్ అగ్గె తెంతో తుమ్క సగుమ్జినిచి రిసా ఒగ్గర్ సంగ అస్సి, చి అప్పొ కి ఏడ ఏడయ్ సంగితసి. కిచ్చొక మెలె, ‘పరలోకుమచి సుద్ది జా, జా సుద్ది రితి ఇండుతు’ మెనయ్, క్రీస్తు సిలువతె మొర జోవయింక రచ్చించువ కెర్లన్, గని జాచి ఉప్పిరి విరోదుమ్ కెర్లె రితి జేవ్ ఒగ్గర్జిన్ తప్పు బుద్దితె ఇండితతి.

19 జేవ్ నాసనుమతె గెచ్చుల, జోవయింక పెట్టి జోవయింక దేముడు, జోవయింక పాపుమ్చి రిసా జోవయింక సర్ల, ఈంజయ్ లోకుమతె తతిసి ఎత్తికయ్ జోవయింక ఆస.

20 గని, అమ్ జతి రాజిమ్ పరలోకుమీ, చి ఒత్త తెంతో అన్నె జెతో రచ్చించువ కెర్లెసొక, ప్రబు జలో యేసుక్రీస్తుకయ్ అమ్ రకితసుమ్.

21 కిసి మెలె, ఎత్తి జోచి తెడి తియ ఏలువ కెర్లె జోచి సెక్తికయ్ జో అమ్చి ఈంజ మాములుమ్ ఆగ్ మార్చువ కెర, పరలోకుమచి ఉజ్జడె తెన్ చి జోచి ఆగ్ ఈంజ జతి రితి తెవోడెక మార్చువ కెరెదె.

4

ప్రబుచి తెడి తుమ్ డిట్టుమ్ టీచ

1 అంక, ప్రేమ తిల బావుడ్లు, * ప్రబుచి తెడి తుమ్ డిట్టుమ్ టీచ. తుమ్క ఆవ్ ప్రేమ అస్సి, తుమ్తె గెచ్చుక ఒగ్గర్ ఇస్టుమ్ జా అస్సి. తుమీ అంచి సర్ల, అంచి బవుమానుమ్.

2 తుమ్ జట్టి జలిసి ముల † ప్రబుచి తెడి ఎక్కి కట్టు తా మెన, యువోదియక చి సుంటుకేక ఆవ్ బతిమాల్య జా మెన సంగితసి.

3 పడ్డో తూయి, అంచి తెన్ ప్రబుచి కామతె బెద అంక సత్తిమ్ కెర్లొ బావొ, ఈంజేవ్ తేరబోదల్క సేంతుమ్ కెరవు. అగ్గె తెంతో అంచి తెన్ బెద ప్రబుచి సుబుమ్ కబురచి కామ్ కెరుక మెన సైమల్ సిడ అస్తి. అన్నె కచి తెన్ మెలె, క్లెమెంతు తెన్, చి ‘పరలోకుమతె గెచ్చుల’ మెన దేముడు కవ కవ నవ్వొ రెగిడ్డి జోచి పుస్తకుమ్తె నవ్వొ తిల మాన్సుల్ ఎత్తిజిన్ తెన్ కి తోడు కెరవు.

కెర్లెడి కి సర్లసంతోసుమ్ తెన్ ప్రార్లన కెర

4 కెర్లెడె తెదోడె ‡ ప్రబుచి తెడి తుమ్ సర్లసంతోసుమ్ తా. అన్నె సంగితసి. ‘సర్లసంతోసుమ్ తా’ మెంతసి.

5 తుమ్ ఇని మెత్తన తతిసి ఎత్తిజిన్ దెక చినితి రితి తుమ్ ఇండ. ప్రబు కిపాసి జా అస్సి.

6 కిచ్చొచి రిసా కి తుమ్ చింత గలన నాయ్, గని కిచ్చొచి రిసా కి ప్రార్లన కెర్లె తా తుమ్క కోరవ జలిసి సంగ, జో దిలిసి ఎత్తిచ రిసా తుమ్చి సర్ల సంగ, తుమ్చ ఆసల్ దేముడుకయ్ తుమ్ సంగ.

7 దస్సి, అమ్ మాన్సుల్* మీనుక నెత్తిరె దేముడుచి ఎదివాల్ సేంతుమ్, చి క్రీస్తు జలో యేసుచి తెడి తా, జా సేంతుమ్ తుమ్చి పెట్టి తుమ్చి మెన్సుతె రకితె తయెదె.

8 ఆకర్క, బావుడ్లు, కిచ్చొ మెంతసి మెలె, సత్తిమ్ తిలిసి ఎత్తి, మరియాద తిల కమొ ఎత్తి, నాయిమ్ తిలిసి ఎత్తి, సుద్ది తిలిసి ఎత్తి, నూటి తిలిసి ఎత్తి, ‘చెంగిల్’ మెన ఎత్తిజిన్ సర్ల జతిసి ఎత్తి, కిచ్చొ జలెకి చెంగిల్చి, ‘చెంగిల్’ మెన దేముడు ఒప్పన్తిసి ఎత్తి, దసచయ్ ఎత్తిక ఉచర్లె తా, దస్సయ్ కమొ తుమ్ కెర్లె తా.

* 4:1 4:1 మెలె, ప్రబుచి తెడి తా, జోచి డిట్టుమ్క తుమ్ డిట్టుమ్ టీచ. † 4:2 4:2 మెలె, ‘జోవయింక తెడి అస్సెన్, చి జో కట్టు దెతొన. జాచి రిసా తుమ్క కి జా కట్టు బుద్ది తంకయ్’. ‡ 4:4 4:4 మెలె, ప్రబుచి తెడి అస్సెన్. జో సర్లసంతోసుమ్ దెతొన. జేక, జోవయింక సర్లసంతోసుమ్ నజన జోవయింక సర్లసంతోసుమ్ తెంతో! జోవయింక తెడి తిలె, దస్సి బుద్ది తంక తయెదె. § 4:5 4:5 నెంజెలి, ‘అన్నె జెతిసి పాసి జా అస్సి’. * 4:7 4:7 నెంజెలి ‘అర్దుమ్ కెరనుక నెత్తిర్ల..’

9 అందితె తుమ్ నీకిలిసి, దెకిలిసి, నూన్సిసి, 'సత్తిమ్' మెన ఒప్పున్సిసి, జా ఎత్తి కెర, చి నేంతుమ్ దెతో అమ్చో దేముడు తుమ్చి తెన్ తయెదె.

తిలె కి నెంజిలె కి ప్రబు నేంతుమ్ దెతిసి

10 తుమ్ అప్పె అన్నెక్ సుట్టు అంది రిసా ఉచర్తసు మెన నూన తా ప్రబుచి తెడి ఒగ్గర్ సర్ల తెన్ అస్సి. అగ్గె తెంతో కి అంది రిసా ఉచర్లె తిలదు, గని అంక తోడు దెంక తుమ్క అగ్గె వాటు తయె నాయ్.

11 అంక నెంజిలెన్చి రిసా ఏడుక మెన సంగి నాయ్. కిచ్చొక మెలె, ఆవ్ కిసి జలెకి, అంక కిచ్చొ జలెకి, చింత నే గలంతె నేంతుమ్ తెన్ ఓర్పువ జంక మెన నీక అస్సి.

12 ఎక్కెక్ సుట్టు కొత్తుచి రిసా బాదల్ నేడ అస్సి, ఇదిల్ ఒగ్గర్ తిలెన్చి రిసా కి సర్ల జా అస్సి. దొన్సి కి జాని. కిచ్చొచి రిసా కి, కిచ్చొ జలెకి, తిలె కంక నెంజిలె చువ్వె తంక, సామ్నారుమ్ తిలె కి, కొత్తు తిలె కి, కిసి ఓర్పువ జంక గే ఆవ్ నీక అస్సి.

13 మెలె, క్రీస్తు అంక నెక్తి దెతె తత్తయ్చి రిసా కిచ్చొ జలెకి కెరుక తెరి.

14 జలెకి, అంది అప్పెచి బాదతె తుమ్ బెద తోడు దిలిసి చెంగిలి.

15 ఆవ్ సుబుమ్ కబుర్ సూనవుక దెర్లి మొదోల్క, ఆవ్ తుమ్చి మాసిదోనియ ప్రదేసిమ్ ములిలి పొది, ఎక్కి తుమి గని వేర సంగుమలుతె ఎక్కి కి తోడ దెతి నాయ్, ఎక్కిలోక ఎక్కిలో తోడ దెతిన్తె అమ్చి తెన్ ఎక్కి తుమి బెదిలదు.

16 ఆవ్ దెస్సలోనీక పట్టుమ్తె తిలి పొది కి అన్నె అన్నె తోడు తెద్రయ్లదు.

17 జలె, తోడుకయ్ అంక ఆస నాయ్, గని అంది ఆస కిచ్చొ మెలె, కిచ్చొచి రిసా ఆవ్ సర్ల జతసి మెలె, తుమ్ తోడు దిలిసి తుమ్కయ్ లాబుమ్ దెతయ్.

18 నాయ్, గెద, అంక పూర్తి తోడు దా అస్సున్. నాయ్, దొర్కు జలి కంట అన్నెయ్ తోడు ఈంజ. తుమ్ తెద్రయ్లి తోడు ఎత్తి ఎవప్రాదితు అంక దా అస్సి. జా తోడు దిలిసి కిసి జయెదె మెలె, దేముడుక చెంగిల్ దూపుమ్ డయిలి రితి, బలి దిలి రితి, జోక సర్ల కెరెదె.

19 జలె, తుమ్క కిచ్చొ కొత్తు గే, బాద గే అయ్లె కి, జోచి పరలోకుమచి సామ్నారుమ్క దేముడు కవలుసువ జలిసి ఎత్తి క్రీస్తు జలో యేసుచి తెడి తుమ్క దొర్కు కెరెదె.

20 ఉగుమచి ఉప్పిరి ఉగుమ్క అమ్చో దేముడు అమ్చో అబ్బొక జెయ్యి! †ఆమేన్.

21 క్రీస్తు జలో యేసుచి తెడి తిలో జోవయింది సుద్ది జలో ఒత్తచో ఎత్తి మాన్సుక తుమ్ అంది ప్రేమ సంగ. అంది తెన్ తిల బావుడ్లు కి తుమ్క జోవయింది ప్రేమ సంగ తెద్రయ్తతి.

22 జో ప్రబుచి సుద్ది జా జోవయ్ జల మాన్సుల్ ఎత్తి తుమ్ పిలిప్పి పట్టుమ్చక జోవయింది ప్రేమ సంగ తెద్రయ్తతి. ముక్కిమ్క కొన్న మెలె, శిక్వెనర్ రానోతె కామ్ కెర్ల నంపజలసక సంగ.

23 ప్రబు జలో యేసుక్రీస్తుచి దయ తుమ్చి ఆత్మ తెన్ తవున్.

† 4:19 4:19 యేసుచి తెడి జేవ్ నంపజలన అస్సిచి రిసా, చి జోవయింప వరల్ ఎత్తి యేసుచి అత్తి దెతయ్చి రిసా 'యేసుచి తెడి' మెన రెగ్గ అస్సి. ‡ 4:20 4:20 ఈంజేవ్ పుస్తకుమ్ తొలితొ రెగిడ్లి గ్రీకు బాన తెన్ 'తెద్దిలి' మెలిన్క 'ఆమేన్' మెనుల. § 4:22 4:22 నెంజిలె 'వెల్లొ రానోతె'.

కొలోస్సియులక రెగిడ్లి ఉత్త్రమ్ బారిక్ జలో పవులు కొలోస్సి పట్టుమ్చ సంగుమ్చక పవులు రెగిడ్లి ఉత్త్రమ్

మొదోల్ కోడు

1 కొలోస్సి పట్టుమ్తెచ క్రీస్తుక సంపజా జోచి నుద్ది జా జోచయ్ జల జోచి తెడి తా నిదానుమ్ జల బావుడ్డుక,

2 దేముడుచి సెలవచి రిసా *క్రీస్తు జలో యేసుచి రిసాచి నుబుమ్ కబుర్ కామ్ కెర్తి రిసా జో దిలి అదికారుమ్ తెన్ జోచో బారిక్ జలో ఆవ్ పవులు, బావో జలో తిమోతి తెన్, రెగిడ్లి ఉత్త్రమ్.

అమ్క అబ్బో జలో దేముడుచి దయ సేంతుమ్ తుమ్చి ఉప్పిరి తవును!

జేవ్ కొలోస్సి పట్టుమ్చచి రిసా పవులు జోపయించి సర్ల సంగ ప్రార్లన కెర్తి తిలిన్చి కోడు

3 తుమ్చి రిసా కెయ ప్రార్లన కెర్తి కి, అమ్చో ప్రబు జలో యేసుక్రీస్తుచో అబ్బోన్ జలో దేముడుక తుమ్చి రిసా అమ్చి సర్ల సంగితనుమ్.

4 కిచ్చొక మెలె, జో క్రీస్తు యేసుచి ఉప్పిరి తుమ్ సంపతిలిన్చి రిసా, పడ్డో జోచయ్ జల సంపజలన ఎత్తిజినక తుమ్ ప్రేమ కెర్తిన్చి రిసా, అమ్ నూన అన్నుమ్.

5 పరలోకుమ్తె తుమ్చి రిసా తియ: తిలిసి ఆసతె దెకితె తిలి రిసా, తుమ్క పెట్టి తిలి నముకుమ్చి ప్రేమచి, రిసా తుమ్ ఇసి జా అన్నున్. జా ఆసతె దెకితె తిలిన్చి రిసా తుమ్ సత్తిమ్చి †కబుర్తె, మెలె నుబుమ్ కబుర్తె, అగ్గె నూన్లదు.

6 నుబుమ్ కబుర్ తుమ్క దొర్కు జా అయ్లి తెంతో, ఎక్కి తుమ్కయ్ దొర్కు జలి మెన నాయ్. ఒండి లోకుమ్తె నూనయ్ జతయ్, చి కేసే నూనయ్ జలెకి, ఆత్మపలితుమ్ జతయ్. దస్సి, తుమ్ తోలితో నూన ప్రబుచి దయచి పరుమ్చి రిసా పూర్తి అర్దుమ్ కెరన్చి దిసి తెంతో, తుమ్తె కి నుబుమ్ కబుర్ ఆత్మపలితుమ్ జతయ్.

7 ప్రేమ జలో అమ్చి తెన్ ప్రబుచో సేవ కెర్తొసా జలో ఎవప్రా, జలె, ప్రబుచి ఈంజ నుబుమ్ కబుర్ సరిగా, కిచ్చొ వేరచి నే బెదయ్తె సికడ్డికయ్, పూర్తి అర్దుమ్ కెరన్లదు. అమ్ ఒత్త గెచ్చుక నెత్తిర్లి రిసా జోయ్యి అమ్చి నావ్ తెన్ మెలి రితి, క్రీస్తుక నిదానుమ్ తిలో సేవ కెర్తొసా జా ఒత్త తుమ్క నుబుమ్ కబుర్ నూనవ సికడ అస్సె.

8 పడ్డో, ప్రబుచి ఆత్మ తుమ్చి పెట్టి దెతి తుమ్చి ప్రేమచి రిసా జో ఎవప్రా అమ్క సంగ అస్సె.

9 జాకయ్, తుమ్చి నముకుమ్చి అస్సె సంపజలనక చి ఉప్పిరిచి తుమ్చి ప్రేమచి రిసా, అమ్ నూన్చి దిసి తెంతో, తుమ్చి రిసా ప్రార్లన కెరుక ములుమ్ నాయ్. ఆత్మచి బుద్ధి, ఆత్మతె గ్యానుమ్ ఎత్తి దేముడు తుమ్చి పెట్టి బెరవును, చి అమ్ జోచ మాన్యుల్ జా ఇండుక మెన జోచి ఇస్సుమ్ కిచ్చొ కిచ్చొ జతయ్ గే, తుమ్ పూర్తి జాన్తు మెనయ్ తుమ్చి రిసా ప్రార్లన కెర్లనుమ్.

10 జోచి ఇస్సుమ్ జాన్సె, జోచి బుద్ధి గ్యానుమ్ తెన్ తిలె, ప్రబుచి విలువ దెకయ్తి రితి తుమ్ ఇండితె. దస్సి, చెంగిల్ కమె ఎత్తితె ఇండ పలితుమ్ దెర దెర, అగ్గెచి కంల దేముడుక రోజుక ఒగ్గర్ జాన జాన, జోచి ఇస్సుమ్ రితి ఇండ ఇండ, జోక పూర్తి సర్లసంతోసుమ్ కెర్తి.

11 అస్సె కిచ్చొ మెన అమ్ ప్రార్లన కెర్లనుమ్ మెలె, జోచి పరలోకుమ్చి సెక్తిక తుమ్చి పెట్టి జోచి సెక్తి బెరవ డిట్టుమ్ కెర్పు, చి తుమ్చి పెట్టి జో దెతి సంతోసుమ్క తుమ్ ఎత్తి బాదల్ సేంతుమ్ తెన్ ఓర్పువ జా నిదానుమ్ తా.

* 1:2 1:2 'క్రీస్తు' మెలె, 'తెద్రయించె' మెన ఎత్తి అదికారుమ్ తిలో దేముడు పూర్ణుమ్ సంగిలో దొర్కు జలో రచ్చించువ కెర్తొసా. † 1:5 1:5 నెంజెలి 'కోడుతె'.

12 ఎత్తిక అబ్బొ జలో దేముడుక తుమ్చి నర్ల సంగితె. కిచ్చొక మెలె, జోచయ్ సుద్ది జల మాన్సులె ఎత్తిజన్ తెన్ జోచి ఉజిడ రాజిమతెచి సామ్సారుమతె అమ్క వాట నీడ్డి రితి జోవయించి దయక అమ్క విలువ దెక అస్సె.

13 మెలె, నయ్తాన్ ఏలుప కెర్రి అందర్రాజిమ్ తెంతో అమ్క విడ్డల్ కెర, ప్రేమ తిలో జోచో సొంత పుత్తునచి రాజిమతె అమ్క జో అబ్బొన్ బెదవ అస్సె.

14 మెలె, జో పుత్తునతెయి అమ్చి రచ్చన. *అమ్ కెర్రి పావల్ జోయ్యి చెమించుప కెర, నెత్వ గెల అస్సె.

ఎత్తిక ఆదారుమ్ జలోసా యేసుయి

15 యేసుతె అమ్, నే డీస్తా దేముడుచి పోలిక డీస్తయ్. కిజెర్మున్ ఎత్తిక జో తొల్పుర్, జో వెల్లో.

16 కిచ్చొక మెలె, ఎత్తి కి యేసు తెన్ జెర్మున్ జలి. కేనె తిలె కి, పరలోకుమతె తిలె కి, బూలోకుమతె తిలె కి, కేన్ లోకుమతె తిలె కి, నే డీస్సిని జలెకి, డీస్సిని జలెకి, కేన్ లోకుమచె నిజాననల్తె తిలెనకి, ఏలుప కెర్రి సెక్తి అదికారుమ్ తిలెన కి, అదికారుమ్ తిలెనె ఎత్తి, అదికారుల్ ఎత్తి, పరలోకుమచె జలెకి, బూలోకుమచె జలెకి, ఎత్తి కి జోచి అత్తి జెర్మయ్ జలి. జోచి రిసాయి జెర్మయ్ జలి.

17 *ఎత్తిచి కంట తొలితో తిలో సుదో జోయ్యి, ఎత్తిక ఆదారుమ్ జలోసా జోయ్యి. జో నెంజిలె, జేవ్ తత్త నాయ్.

18 పడ్డె, జోచి †ఆగ్ జల సంపజలన బెదితిన మొత్తుమ్క జో బోడి, జో మొదోల్. మొర్ముక జీన జితనక జో తొల్పుర్. కిచ్చొక మెలె, కిచ్చొచి రిసా కి జో వెల్లో తంక.

19 క్రీస్తుచి పెట్టి పూర్తి తంక మెన, దేముడుచి ఇస్టుమ్ జలి.

20 పడ్డె యేసుక్రీస్తు సిలువతె అర్పితుమ్ జా జోచి లోయి సుచిలి వాటు పాపుమ్ పుంచితినచి నెక్తిక †బూలోకుమతె తిలెనె ఎత్తి, పరలోకుమతె తిలెనె ఎత్తి, కేన్ లోకుమతె తిలెనె ఎత్తి క్రీస్తుచి తెడి జేవ్ ఎత్తి జో తెన్ కీసేంతుమ్ జతి రితి అన్నె బెదవనుక మెన దేముడుచి నర్ల జలి.

యేసుచి అత్తి దేముడు బెదవన్లన

21 తుమ్ కొలోస్సియిల్ కి అగ్ జోక వేరయ్ మాన్సుల్ జా, తుమ్చె ఆత్మల్తె జోక విరోదుమ్ జా తిలి రిసా వెర్రి వెర్రి కమె కెర్రి తిలెదు.

22 గనె, జోచి ఆగ్ మొర్దిన తెన్ తుమ్చి పాపుమ్ వయ తుమ్క కి జో బెదవన అస్సె. కిచ్చొక మెలె, తుమ్ జోచి సుద్ది జా, జోచయ్ జా, తప్ప నెంతె, కిచ్చొ గర్చికి నెంతె జా, దేముడు అబ్బొనచి మొక్కె జో తుమ్క టీవో కెరెదె.

23 గనె జా జర్గు జంక మెలె, తుమ్ అత్తుక డిట్టుమ్ జా జోయ్యి పునాది జతినతె టీచ, *‘పరలోకుమతె గెతి వాటు అమ్క దొర్కు జలి’ మెంతి దయిరిమ్ దెతి తుమ్ సూన్లి సుబుమ్ కబుర్ నే ముల్తె అన్మానుమ్ నే జతె, వేరతె నే గెతె, ప్రబుచి ఉప్పొరచి నముకుమ్ తుమ్ నిదానుమ్ తంక. జెర్మయిలినె ఎత్తిక ఈంజ సుబుమ్ కబుర్ ఈంజ ఒండి లోకుమతె నూనయ్ జా అస్సె. ఆవ్ వపులు కి ఈంజ సుబుమ్ కబుర్ నూనయ్ తిలె రిసా, ప్రబుమ్ నావ కెర్రిసా జా అస్సె.

24 ఆవ్ జలె, ‘తుమ్క లొబయ్ దొర్కు జవున్’ మెన ఆవ్ †అల్లర్ సేడ్డె కి, అంక నర్ల. కిచ్చొక మెలె, ఆవ్ ఇన అల్లర్ సేడ్డిసి కీసి జతయ్ మెలె, క్రీస్తు సేడ్డె అల్లర్తె ఆవ్ బెద ఒత్త సేంలిసి ఆవ్ ఒర్పువ జా కుట్టయిలి రితి జతయ్. కిచ్చొక మెలె, జోచి ఆగ్ జల జోచయ్ సంగుమ్క ‘జోచి కబుర్ నూన్తు’ మెనయ్, ఆవ్ ఈంజేవ్ నైమల్ సేడ్డిసి.

25 జోచయ్ జల మాన్సులె మొత్తుమ్క ఆవ్ ఈంజ †సేవ కెర్రి రిసా ప్రబు అంక తెద్రవ అస్సె. దస్సి, తుమ్చి రిసా కి, అంచి కోడు పూర్తి తుమ్ జానుక మెనయ్, జోయ్యి అంక తెద్రవ అస్సె.

† 1:14 1:14 ఈంజ ఉత్తమ్ తొలితో రెగ్గెన గమమ్ పున్తకల్తె కిచ్చొ అస్సె మెలె, జోచి లోయి సువ, అమ్క నతోవ గెల అస్సె, మెలె, అమ్చి పాపుమ్ చెమించుప కెర అస్సె. § 1:15 1:15 నెంజిలె, ‘జెర్మయిలినె ఎత్తిక’. గనె జెర్మయిలినె జయె నాయ్, జో. దేముడి జా జో ఎత్తిచి కంట అగ్గయ్ తిలో. యోహాను 1:1-2, 14. * 1:17 1:17 ‘తొలితో’ మెలె, జో ‘తొలితో’ తెంతో అస్సె, చి జోయ్యి ముక్కిమ్చో.

† 1:18 1:18 ఎవెసు 1:22-23, 4:16. † 1:20 1:20 రోమియల్ 8:20-23. § 1:20 1:20 ఎవెసు 1:9-10. * 1:23 1:23 27వ కోడు, చి 1:5వ కోడు దెక. † 1:24 1:24 జో జేలి జా తిలెన్. 4:3, 10 దెక. † 1:25 1:25 ఎవెసు 3:1-13.

26 జా కోడు కిచ్చొ జయెదె మెలె, ఉగల్చి ఉప్పిరి ఉగల్చ మాన్సుల్ నే నూన్తి రితి జో కీలుండ తిలి గుట్టు. జా అగ్గె లుండ తిలి కి, అప్పాయి జోక నంపజల జోచయ్ జల మాన్సుల్క జో నూనవ అన్సె.

27 తుమ్తె తెద్రయందె మెన యూదుల్క దేముడు నంగ తిలొ దొర్కు జలొ రచ్చించుప కెర్తెనా జలొ క్రీస్తు, ఉజడ తిలి గవురుమచి ఆన తుమ్ యూదుల్ నెంజలనచి పెట్టి కి అన్సె. పరలోకుమతె గెతి వరుమ్చి దయిరిమ్ తుమ్కయ్ కి దొర్కు కెర అన్సె. జయ్యి కోడు జోచి గుట్టు జా తిలి. జా రచ్చన కెత్తిజన్ యూదుల్ నెంజలనక కెద్ది సామ్మారుమ్ కెర్తయ్! కెద్ది వెల్లి కోడు, ఈంజ. జయ్యి గుట్టు జోచయ్ జల మాన్సుల్కయ్ జో జానవుక ఇస్టుమ్ జలొ!

28 జలె, ఆకర్క తీర్పు జంక మెన ఎత్తిజన్ దేముడుచి మొక్కె టీవో కెరుక మెన, క్రీస్తుక నంపజల మాన్సుల్ అత్తు తెన్ పూర్తి వడ్డీల మెలె, జోవయింతె ఎత్తి మాన్సు పూర్తి జా జోవయించి మొక్కె టీవో జలె, అమ్ జోవయింక బవుమానుమ్ దిలి రితి జయెదె. జాకయ్, * 'అత్తు తెన్ పూర్తి వడ్డుతు' మెనయ్, క్రీస్తుచి రిసా బాల వెల్లొ ఎత్తిజన్క అమ్ నూనయ్తె తా, వేర బుద్దివొచి రిసా జాగర్ల సంగితనుమ్, జోచి రిసాచి గ్యానుమ్ ఎత్తి జోవయింక సికడ్సుమ్.

29 జోక అత్తుక పూర్తి వడ్డుతు! మెనయ్, అంచి పెట్టి జో మొచ్చు తెన్ దెతి జోచి ఎదివాట్ సిక్కి ఎత్తి తెన్సి, పూర్తి మెన్సు దా, జోచి కామ్ ఆవ్ కెర్తె తత్తసి.

2

1 తుమ్చి రిసా కి, లవోదికయ్ వట్టుమ్చ నంపజలనచి రిసా కి, అన్సె, అంక నే దెకిల అన్సె నంపజలనక ఎత్తిజన్చి రిసా కి, 'అత్తుతె వడ్డుతు' మెన ఆవ్ కెద్ది ఆన తెన్ ఉచర్తసి గే ప్రార్తన కెర్తసి గే తుమ్ జానుక మెన అంచి ఆన.

2 తుమ్ జేవ్ ఎత్తిజన్చి రిసా ఆవ్ కిచ్చొ మెన ఆన జతసి మెలె, జేవ్ ఎత్తిజన్ మొత్తుమ్ ఎక్కి ప్రేమ్ ఎక్కి కట్టు జా జోవయించి పెట్టి దయిరిమ్ డిట్టుమ్ జతు, చి జోవయింక పూర్తి అర్దుమ్ జయెదె, చి క్రీస్తుచి తెడి అన్సుమ్చి చెంగిల్ తమదె మెన పూర్తి దయిరిమ్ జవుల, చి దేముడుచి గుట్టు జానుల, మెలె క్రీస్తుకయ్ జానుల మెన తుమ్చి రిసా ఆవ్ ఆన జతసి.

3 జో క్రీస్తుచి పెట్టి బుద్ది గ్యానుమ్చి సామ్మారుమ్ ఎత్తి ఒత్తయ్ లుంకిల్ రితి అన్సె.

4 తుమ్క కిచ్చొక ఆవ్ ఇసి సంగితసి మెలె, నూటి డీన్స తెలిచి కొడొ తెన్ కా తుమ్క మోసిమ్ నే కెర్తి రితి తుమ్ జాగర్ల తా.

5 అగ్గెక మెలె, ఆవ్ తుమ్క దూరి అన్సె, గని అత్తుక తుమ్చి పాసి తా, తుమ్ అప్పొ సుద్ది ఇండెతిసి, క్రీస్తుచి ఉప్పిరిచి తుమ్చి నముకుమ్ డిట్టుమ్ తిలిన్చి రిసా ఆవ్ నూన్లి రిసా, సర్ల తెన్ అన్సె.

6 జలె, ప్రబు జలొ క్రీస్తు యేసుక తుమ్ నంపజా తిలదు.

7 జలె, జోచితె * చెర్లొ గల డిట్టుమ్ టీవో జా తిలి రితి, చెంగిల్ గేర్ జా తంక మెన కీసి డిట్టుమ్ పునాదితె జా తంక ముక్కిమ్ మెలె, దస్సి, జో క్రీస్తు పునాది జతినచి ఉప్పిరి తుమ్ టీవో డిట్టుమ్ జా, చి జోచి తెడి అత్తుతె వడ్డ, క్రీస్తుచి ఉప్పిరిచి నముకుమ్చి రిసా ఎవప్రా తుమ్క సికడ్డిసి ఎత్తి దెరన, అన్సె డిట్టుమ్ జతె తా. జో ప్రబు కెర్తి దయ్ ఎత్తిచి రిసా జోక తుమ్చి సర్ల దెకయ్తె తా, జోచి తెడి జియ్ జో దెతి బుద్దితె తుమ్ ఇండ.

8 తెలివి తెన్ కొడొ బెదవ వేర బోదన కెర్తిసి తెన్ రితయ్ కొడొ తెన్ మాన్సుల్ అవ్వె ఉచర్ల అలవాట్ కమొ, † ఆగ్గుల్క, అత్తుల్క, దూతల్క బూతల్క, బిత అలవాట్ కమొ మాన్సుల్ సికడ తుమ్క మోసిమ్ కెరుక ఉచరుల. దసితె తుమ్ దెర్ను నే నేడ్డి రితి తుమ్ జాగర్ల తా. జా క్రీస్తు సికడ్డిసి నెంజి ఈంజ లోకుమతె బెదితిసి.

9 దేముడు కిచ్చొ నే పిట్టె, జొయ్యి పూర్తి అగ్గె రూపుమ్ తెన్ క్రీస్తుచి పెట్టి జితయ్.

10 చి *అదికారుమ్ తిలిన ఎత్తిచి ఉప్పిరి, కిఅదికారుల్ ఎత్తిచి ఉప్పిరి తిలో క్రీస్తుచి తెడి తుమ్ ఆత్మక పూరి దా అన్నున్.

11 పూర్ణుమచి అలవాట్ తెన్ అమచ యూదుల్ 'దేముడుచ మాన్యుల్ ఆము' మెనన, జోచి సుద్ది కారిమచి సున్నతి కెరసుల. జా, జలె, ఎక్కి అగి జర్లు జతిసి. తూమ్, మాత్తుమ్, అప్పె క్రీస్తుచి తెడి కిసి జా అన్నున్ మెలె, క్రీస్తుచి తెడి సుద్ది కెర్రి సున్నతి కెరన్లి రితి జా అన్నున్. మాన్యు అగి కెరన్లి సున్నతి నెంజె, గని ఈంజ ఆగ్చ అసల్ బుద్దుల్ సింద వెంట గెలిసి.

12 క్రీస్తు మొర్రిన్ తెన్ తుమ్చి ఈంజ ఆగ్చ అసల్చి జీవ్ మొర గెలన్, ఈంజ ఆత్మజీవ్ తుమ్క కిసి దొర్లు జలి మెలె, క్రీస్తుక మొర్లన్ తెంతో జయణ్ణె దేముడుక నెక్కిక తుమ్ నంపజలదు. చి జో అన్నె జీవ్ జా ఉట్టన్ తెన్ జోచి ఆత్మక తుమ్ ఆత్మజీవ్ జా ఉట్టదు. ఇన్నెచి గుర్తుక బాప్తిసుమ్ నజన్లదు.

13 పణ్ణె, తుమ్ పాపుమ్ కెర్రి తా అగ్గె ఆత్మక మొర్లన్యం జా తిలదు, ఆగ్చ యూదుల్చి సుద్ది సున్నతి నెంతె తిలదు, తుమ్ దస్సి మొర్లన్యం జా తతికయ్, దేముడు అబ్బొసి క్రీస్తుక అన్నె జయడ, జో తెన్ కి తుమ్క జయణ్ణన్. కిసి మెలె, జోక నంపజల ఎత్తిజన్చ పాపల్ ఎత్తి అమక చెమించుచ కెర్లన్.

14 మెలె, పూర్ణుమ్ తెంతోచ ఆగ్గల్ అమచి ఉప్పిరి దాప రెగిణ్ణి రితి జతయ్. గని, జా ఆగ్గల్చ నిందల్ ఎత్తి జో దేముడు అబ్బొసి పుంచ గెలన్. కిసి మెలె, క్రీస్తు మొర్రి సిలువతె జా ఆగ్గల్క మేకుల్ తెన్ పెట ముల దిలి రితి పుంచ గెలన్.

15 దస్సి కెర, దన ఆగ్గల్చ నిందల్చ కోణ్ణ వయణ్ణ అమక పాపుమ్ సికణ్ణ ఆత్మల్, దూతల్, బూతల్, గట్టచి నెక్కి పాడ్ కెర గెల కెర, ఎత్తిచి మొక్కె జీవయింక లాజ్ కెరప, క్రీస్తు జీవయించి ఉప్పిరి జిన్లన్. అమ్ క్రీస్తుక నంపజలనచి ఉప్పిరి దనచక కి కిచ్చొ నెక్కి నాయ్.

16 జాకయ్, కతిసిచి రిసా పితిసిచి రిసా 'ఈంజ గార్, జా గార్' మెన జవున్, నెంజెలి, 'పండుగు దీసి, ఆమన్ దీన్చి రిసా, నెంజెలి బక్తి కెర్రి సెలవ్ కడన్ల దీసి రిసా, కిచ్చొ కిచ్చొ కెర్రి గార్' మెన తుమ్క కో సంగుత అవ్కాసుమ్ దాన నాయ్, సికణ్ణ సూన నాయ్.

17 పణ్ణె జర్లు జతిన్క దనచ ఎత్తి ఎక్కి నీడ. జా నీడ గల్తొసా క్రీస్తు.

18 జాకయ్, "చువ్వె తా దూతల్ గట్టక తుమ్ జోకర" మెన కో సికణ్ణ, తుమ్ దెర్లు నీడ నాయ్. "దనచక నే జోకర్రి కిచ్చొగి పిట్టె" మెన బియణ్ణక తుమ్ బియఁ నాయ్. దన కమె సికణ్ణసా కో జలెకు కిచ్చొక నంప కెర్లయ్ మెలె, రిత సిప్పల్క, దస్సి జోచి సొంత మెన్యు తిలిన్క 'వెల్లిచి' మెన పుల.

19 క్రీస్తుక, మెలె బోడిక, జో మాన్యు అజ జా ముల అస్సు. జో బోడి తెన్ బెద తిలెకయ్ ఆగ్చ పుస్తి తా, అత్తుల్ నరల్ ఎత్తి తమ్మన కట్టు తెన్ తా, దేముడు దెతి జిప్పకయ్ పణ్ణె తెయదె.

20 క్రీస్తు తెన్ తుమ్ బెద, జో మొర్రిన్ తెన్ బెదిల్ రితి జా, తుమ్చి ఈంజ లోకుమచి పాపుమచి మొర్రి ఆత్మ మొర, *మాయలోకుమచ బూతల్, దూతల్, ఆత్మల్, గట్టచి సేవ కెరుక ముల విడ్డల్ జలదు జలె, కిచ్చొక జా పాపుమచి అత్తు తెన్ అప్పక తిలి రితి ఇండితను?

21 మెలె, మాన్యుల్ వాడిక కెర కేడయ్త రిత ఆగ్గల్చి రిసా, అలవాట్చ కమెచి రిసా 'దెరుక గారు, కంక గారు' నెంజెలి, 'చడుక గారు' మెల వెర్రి ఆగ్గల్క కిచ్చొక బితను?

22 దనచ బండి మాన్యుల్ ఆరి ఉచర సికయ్లిసి.

23 మాన్యుల్ అప్పె కెర్రి దన జాణ్ణు రిత వయణ్ణ, సిచ్చల్ కెరన్లె, ఆగ్చ సిచ్చల్ కెరన్లె, గ్యాసుమ్ రితి పున్ముమ్ రితి డీసెదె, గని అమచి పట్టిచి పాపుమ్బుద్దిచ అసల్క దన ఆగ్గల్ ముద్దొ కెరుక నెతిరి, గెచ్చవుక నెత్తిర్రి.

3

వరలోకుమ్ తిలిన్క ఆన జంక

† 2:10 2:10 ఆత్మల్, దూతల్, బూతల్చి అర్థుమ్ కి ఈంజివ్ కొడెతె ఉచరుక జయెదె. కొలోస్సియుల్ క్రీస్తుక నే నంపజతె అగ్గె, ఆత్మల్ దూతల్ బూతల్ ఎత్తిక బితె తిల. § 2:10 2:10 ఆత్మల్, దూతల్, బూతల్చి అర్థుమ్ కి ఈంజివ్ కొడెతె ఉచరుక జయెదె. కొలోస్సియుల్ క్రీస్తుక నే నంపజతె అగ్గె, ఆత్మల్ దూతల్ బూతల్ ఎత్తిక బితె తిల. * 2:20 2:20 నెంజెలి, 'బాలబోదల్చి ఎదిలి గ్యాసుమ్చి అలవాట్ ముల....'

1 క్రీస్తు తెన తుమ్ బెద జో తెన జీవ్ జా ఉట్ట, జోచి అత్తుతె తుమ్ జీవ్ జలదు. జలె, జో జీవ్ జా ఉట్ట, ఉప్పిరి, దేముడు అబ్బొనచి ఉజెతో పక్క పరలోకుమతె వెన అస్సె. జాకాయ్, జో ఉప్పిర్ వెన తిలినతెచి ఎత్కిక తుమ్ ఆన జా.

2 ఈంజ లోకుమతె తిలినక ఆన జా నాయ్. పరలోకుమచిక ఆన జా.

3 కిచ్చొక మెలె, ఈంజ లోకుమతె తుమ్ మొరయి అస్సెన, చి దేముడుచి తెడి క్రీస్తుతెయ్ తుమ్చి జీవు క్రీస్తుతె దేముడుచి తెడి లుంకడ అస్సె.

4 అమ్చి జీవు తిలొ క్రీస్తు కెయ్చ అన్నె ఉత్త జా డీసెదె గే, తుమ్ కి తెదొడ్క జో తెన్ పరలోకుమచి గవురుమ్ తెన్ జతినతె డీస్తె.

5 జాకాయ్, తుమ్చి పెట్టి ఈంజ లోకుమచి బుద్దిచి కిచ్చొ జలెకు తయెదె గే, జాక తుమ్ గెచ్చవ గెల; జాక మార. కీన బుద్దివొ మెలె, లంజెకమొ, లంజెబుద్ది, ఆగేచి ఆన ముద్దొ నే కెరంతిసి, గార్చిచి ఉప్పిర్చి ఆన, పడ్డొ అన్నె మాన్సులచి అన్తి దొర్పు కెరంతి ఆన; ఇసిచి జలె, సత్తిమ్ తిలొ దేముడుక ముల వేర దేముడ్డు మెలొసొక ప్రేమ కెర్లి రితి జతయ్, జాక 'దేముడు' మెలొ రితి కెర్లి బొమ్మక జొబర కెర్లి రితి జతయ్.

6 దన కమొచి రిసా *జొచి కోడు రితి కెరుక నెసిల మాన్సులక దేముడుచి కోపుమచి సిచ్చ లయెదె.

7 అగ్గె తుమ్ జేవ్చి నెడమె జతి పొది దనచ ఎత్కి కెర ఇండితె తిలదు.

8 గని అప్పె దనచ ఎత్కి కి తుమ్క దూరి కెర. కీనచ మెలె, కోపుమ్ దెకయ్తిసి, కోపుమ్ దెరన్తిసి, కున్సిదుమ్, దూసెనల్, వెట్కారుమ్చ కొడొ.

9 పడ్డొ, ఎక్కిలొక ఎక్కిలొ అబద్దుమ్ సంగ నాయ్, కెర నాయ్. కిచ్చొక మెలె ఈంజ లోకుమచి పాడొ జలి ఆగేచి జెర్చున్ ఇండితిసి కడ వెంట గెల కెర,

10 తుమ్ జేవ్క ముల, నొవి మాన్సుక గలన అస్సెన. ఈంజ గ్యానుమ్ తెన్ జా జెర్చుయ్లో దేముడుచి రూపుమ్ తెన్ నొవి బుద్ది దెరన అస్సెన.

11 ఈంజ నొవి అత్తుతె జెర్చున్ జల మాన్సులతె కిచ్చొ తేడల్ నాయ్. 'గ్రీసు దేసిమచ' మెన దేముడు సంగ నాయ్, 'యూదుల్' మెన నాయ్. 'యూదుల్చి గుర్తుచి సున్నతిచ' మెన నాయ్, 'జా సున్నతిచ గుర్తు నెంజలస' మెన నాయ్, 'నేస్త మాన్సుల్' మెన నాయ్, 'డొంగుర్ దేసిమచ' మెన నాయ్, 'గొతిమాన్సుల్' మెన నాయ్, 'గొతి నెంజలస' మెన నాయ్. జోచి మొక్కె దన తేడల్ నాయ్, గని ఎత్కిజినక క్రీస్తుయి ముక్కిమ్, అన్నె కేన్ రగమ్చ మాన్సుల్ జలెకి, జోచ మాన్సుల్ ఎత్కిజినచి పెట్టి జో అస్సె.

12 జలె, దేముడు నిసాన్త తుమ్ జోచయ్ సుద్ది జల జో ప్రేమ కెర్లన, తుమ్ ఎత్కిజిన కిచ్చొ కిచ్చొ బుద్దివొ గలన మెలె, కన్కారుమ్ దెకితిసి, మెత్తన తతిసి, గవురుమ్ నే ఉచరంతె, అన్నె మాన్సులక మరియాద దెకితిసి, సేంతుమ్ తెన్ బాదల్ ఓర్పుప జా

13 ఎక్కిలొక ఎక్కిలొ ఓర్పుప జతిసి. పడ్డొ, కిచ్చొ జవున్ తప్పుచి రిసా ఎక్కిలొ అన్నెక్కోక నింద కెరుక జతి జలె, చెమించుప కెర. ప్రబు తుమ్క కీసి చెమించుప కెర అస్సె గే, తూమ్ కి ఎక్కిలొక ఎక్కిలొ చెమించుప కెరుక అస్సె.

14 ఎత్కిచి కంట ముక్కిమ్క తుమ్ కిచ్చొ బుద్ది గలన మెలె, ప్రేమయ్. కిచ్చొక మెలె, ఎత్కి ఎక్కి కట్టు తెన్ తతి రిసా ప్రేమ ఆదారుమ్ జతయ్, జయ్యి బెదవెదె.

15 పడ్డొ, క్రీస్తు దెతి సేంతుమ్ తుమ్చి పెట్టి ఏలుప కెర్లి రిసా వాట్ దాన. ఎక్కిలొ తెన్ ఎక్కిలొ సేంతుమ్ తత్తి రిసాయి జోచి ఎక్కి ఆగేతె తుమ్ బెదుక మెన జో బుకార్లన్. పడ్డొ, జో కెర్లి దయచి రిసా జోక తుమ్చి సర్ల తుమ్ దెకవ.

16 పడ్డొ, క్రీస్తుచ కొడొ తుమ్చి పెట్టి బన జా కామ్ కెరె తతి రితి తుమ్ టాన్ దాన, చి జో దెతి బుద్ది తెన్ నిదానుమ్ తెన్ ఎక్కిలొక ఎక్కిలొ జోచి సత్తిమ్ సికడె తా. తుమ్తె కో పొరపాట్ నే జతి రితి బుద్ది సంగ జాగర్ల సంగితె తా, చి దేముడు కెర్లి దయ ఎత్కిచి రిసా తుమ్చి సర్ల జోక దెకయ్తి రితి, జోచి గవురుమ్ సంగిత గనుమ్లు గాయితె తా. జేవ్ గనుమ్లుతె కిచ్చొ ఏక రగమ్ తుమ్ గాయ మెలె, కిర్తనల్ గట్టె.

* 3:6 3:6 'జోవయిచి' తెంతొ 'మాన్సులక' ఎదచి కోడు ఈంజ ఉత్తమ్ తొలితొ రెగిళ్ల సగుమ్ పుస్తకల్తె తయె నాయ్.

17 తుమ్ కిచ్చొ లట్టబుక జలెకి, కిచ్చొ కెరుక జలెకి, ప్రబు జలో యేసుచి నావ్ తెడి లట్టబు జవున్, జర్గు కెర జవున్, చి జోచి నావ్ తెన్ దేముడు జలో జోచొ అబ్బొన్క తుమ్చి నర్ద తుమ్ సంగ.

కేన్ గేరుచ జలెకి ఎక్కిలోక ఎక్కిలో దెకితినీ

18 తేర్బోదలు, జలె, తుమ్చ వ మున్నరలుచి తెడి దాక్ కెరన, జోవయించి కోడు సూన్తె తా. ప్రబుచి తెడి అన్నునచి ఇసి కెర్లె సూటి,†

19 మున్నర్లులు, జలె, తెర్రివొక ప్రేమ కెర, జోవయింక కున్నుదుమ్ దెక నాయ్.

20 బోదల్ జలె, కేన్ కామచి రిసా జలెకి, అయ్యున్అబ్బొన్చి కోడు సూన. 'దస్సి కెర్లెకయ్ తుమ్క చెంగిలి' మెన ప్రబుచి కోడు.

21 తుమ్ అబ్బుదింసి ఆరి తుమ్చ బోదల్క కోవుమ్ కెరవ నాయ్, నెంజిలె అన్మానుమ్ జా సిక్కు జవుల.

22 గొతిమాన్సుల్ జలె, కేన్ కామచి రిసా కి, ఈంజ లోకుమచ తుమ్చ ఎజొమాన్సుచి కోడు సూన, జేవ్ సంగిల్ రితి కెర. ఆరి డీసుక, మాన్సుల్క మెన్సు వడంతి రిసా నాయ్, గని ఎక్కి మెన్సు ప్రబుకయ్ గవురుమ్ కెర్రి రితి తుమ్చ ఎజొమాన్సుక నిదానుమ్ సేవ కెర.

23 కేన్ కామ కెరుక మెలె కి, ఎక్కి మాన్సుచి సేవ కెర్రి రితి పోన, గని ప్రబుచి సేవ కెర్రి బుద్ది తెన్సి, నర్ద తెన్ కెర.

24 కిచ్చొక మెలె, తుమ్ నిదానుమ్ కెర్రి రిసాచి బావుమానుమ్క ప్రబు సొంత జోచి రాజిమ్తె వాటల్ తుమ్క దెయెదె మెన జాన్సు, గెద. దస్సి నిదానుమ్ కెర్రిసి జలె, ప్రబు జలో క్రిస్తుచి సేవ కెర్రిసి జయెదె.

25 కో పాపుమ్ కెర్రి, జోచి సిచ్చ జోక లయెదె. జో దాక్ జలెకి, వెల్లి జలెకి, అన్సి, సిచ్చ దెతిన్తె కి దేముడు కక్క మొకమాటుమ్ దెకె నాయ్, ఎజొమాన్సుక చి గొతిమాన్సుల్క జవున్ తేడల్ దెకె నాయ్.

4

'ప్రార్దన కెర్లె తా'

1 ఎజొమాన్సు, తుమ్చ గొతిమాన్సుల్క సరిగా చెంగిల్ దెకితె తా, జోవయింక దెతిసి దాన. తుమ్క కి పరలోకుమ్తె ఎజొమాని అన్సి.

2 నిదానుమ్ తెన్ బద్దుకుమ్ నే జతె దేముడుచి దయ ఎత్తిచి రిసా జోవయింక తుమ్చి నర్ద సంగ ప్రార్దన కెర్లె తా.

3 అమ్చి రిసా కి ప్రార్దన కెర. కిచ్చొక మెలె, అమ్ కిసి గే జోవయించి నుబుమ్ కబుర్ కోడు, మెలె క్రిస్తుచి రిసాచి * గుట్టు, అమ్ సూనయ్తె తతి రిసా, జో అమ్క వాట్ దెవును మెన ప్రార్దన కెర. జా నుబుమ్ కబుర్ జా గుట్టు అవ్ సూనయ్లి రిసా అవ్ 'జేలి జా అన్సి.

4 జా నుబుమ్ కబుర్ జా గుట్టు అన్సి సూనవుక అన్సి, చి అవ్ కిసి సంగిలి సొస్టుమ్ జయెదె గే జో అంక సికడ్పు మెన తుమ్ ప్రార్దన కెర.

మరియాద తెన్ ఇండ, లట్టబా

5 తుమ్క దిలి నమయ్యుమ్ పాడ్ నే కెరంతి రితి, దేముడుచి క్రిస్తుచి గవురుమ్ దెకయ్తె అవ్కానుమ్ గెనస్లి రితి, వేర మాన్సుల్క తుమ్ మరియాద దెకితె తా.

6 తుమ్ లట్టబ్బినీ సూటి తవున్. బమ్మ తెన్ లట్టబా నాయ్, గని సరిగా ఉచర, చెంగిల్ బెదవ, కామ్క జెతిసి లట్టబ, చి కక్క కిచ్చొ జబాబ్ దెంక గే, అజ్జ తయెదె.

† 3:18:3:18 మెలె, ప్రబుచి తెడి అన్సి, చి మున్నర్లుల్క గవురుమ్ దెకితె, ప్రబుక గవురుమ్ దెకిల్ రితి జయెదె. కొరిందిల్క రిగిడ్డి ఏక్ నంబర్ ఉత్తమ్ 11:3, ఎవెను 5:22-24. * 4:3 4:3 'క్రిస్తుచి రిసాచి గుట్టు' మెన సంగిలి, క్రిస్తు రచ్చింపవ కెర్రిసా జలిన్చి రిసా సంగితయ్, కొలోస్సెయులు 2:2. నెంజిలె క్రిస్తుతెచి రచ్చన యూదుల్ నెంజిలనక కి దొర్పు జలిన్చి రిసా సంగితయ్, కొలోస్సెయులు 1:26-27, ఎవెను 3:3-6. నెంజిలె ఎత్తి కి క్రిస్తుచి తెడి ఎత్తి అదికారుమ్ తిలో దేముడు బెదవంతిన్చి రిసా, ఎవెను 1:9-10. † 4:3 4:3 రోమ్ పట్టుమ్తె జో జేలి జా తిలి పొది ఈంజ ఉత్తమ్ వవులు రిగిడ్డి, మెన ఓగ్గరజిన్ ఉచర్రతి. బారికుల్ 28:16, 30, 31 దెక. కైసరియ్తె కి జేలి జా తిలో; బారికుల్ 23:25, పిలిప్పితె కి; బారికుల్ 16:23, చి యెరూసలేమ్తె; బారికుల్ 21:33. ఎవెనుతె కి మెన నగ్రుమ్జిన్ ఉచర్రతి, గని రుజ్జు నాయ్. పిలిప్పితె చి యెరూసలేమ్తె జేలి జలిన్ తొక్కి దీనల్చి.

7 అవ్ ఇన్నెక్విన్ అస్సి గే, తుకికు తుమ్క జానయెదె. ప్రబుచి తెడి అమ్క జో ప్రేమ జలో బావో జయెదె, చి నిదానుమ్ సేవ కర్తొసా జా, అమ్చి తెన్ ప్రబుచో గొతిమాన్సు రితో జో జయెదె.

8 తుమ్తె అవ్ జోక కిచ్చొక తెద్రవ అస్సి మెలె, ఇన్నె అమ్ కిసి అన్నుమ్ గే తుమ్క జో ఒత్త సంగితి రిసా, చి తుమ్క మెన్సుతె జో దయిర్మ్ కెర్తి రిసా,

9 పడ్డో, నిదానుమ్ తిలో ప్రేమ తిలో బావో జలో తుమ్చో సొంత మాన్సు ఒనేసిముక కి తెద్రయ్తసి. ఇన్నె జర్లు జలిసి ఎత్తి తుమ్క జేవ్ దొగుల సంగుల.

పవులు తెన్ తిలసచి ప్రేమ సంగ తెద్రయ్లిసి

10 ఇన్నె కో కో తుమ్క జోవయించి ప్రేమ సంగ తెద్రయ్తతి మెలె, అంచి తెన్ †జేలితె తిలో అరిస్తార్కుక, పడ్డో బర్లుబాచో సల్లొసి మార్కు ఇన్నెచి రిసా అగ్గె తుమ్క కబుర్ తెద్రవ అస్సి. జో తుమ్తె అయ్లె, టాన్ దాస.

11 పడ్డో యూన్సు మెన అన్నెక్ నావ్ తిలో యేసు మెలొసా కి జోచి ప్రేమ తుమ్క సంగ తెద్రయ్తయ్. దేముడుచి రాజిమ్చి రిసాచి సుబుమ్ కబుర్ కామ్ అవ్ కెర్తొన్తె, ఎక్కి ఈంజేవ్ తీగ్లయ్ యూదుల్ బెద అస్సి. ఈంజేవ్ అంక ఒగ్గర్ తోడు జా అస్సి.

12 పడ్డో, క్రిస్టు జలో కీయేసుక సేవ కర్తొసా జలో తుమ్చో సొంత మాన్సు ఎపప్రా కి తుమ్క జోచి ప్రేమ సంగ తెద్రయ్తయ్. తుమ్క ‘అత్తుక పూర్తి పడ్డ డిట్టుమ్ టీచ, పూర్తి దయిర్మ్ తెన్ ప్రబుచి ఇస్టుమ్ రితి ఇండితె తత్తు’ మెన, తుమ్చి రిసా కెర్టొడ్ తెదొడి జో ప్రార్దన కెర్తె తత్తయ్.

13 జోచి రిసా అవ్ కిచ్చొ సాచి సంగితసి మెలె, తుమ్చి రిసా కి, లవొదికయ్ పట్టుమ్చచి రిసా కి, చి హియోరాపొలి పట్టుమ్చచి రిసా కి, జో ఒగ్గర్ కామ్ కెర్తయ్.

14 పడ్డో, ప్రేమ జలో డాక్టర్ జలో లూకా చి దేమా తుమ్క జోవయించి ప్రేమ సంగ తెద్రయ్తతి.

15 లవొదికయ్ పట్టుమ్తెచ బావుడ్లు జల సంపజలసక చి నుమ్పాక, చి జేవ్చి గెరి సబ కెర్తి సంగుమ్చక అంచి ప్రేమ సంగ.

16 పడ్డో, తుమ్తె ఈంజ ఉత్తుమ్ సదు కెర నూనయ్లదు మెలె, లవొదికయ్ పట్టుమ్తెచ సంగుమ్తె కి సదు కెరప నూనవ. పడ్డో, జా లవొదికయ్ పట్టుమ్తె సంగుమ్తె అవ్ తెద్రయ్లి ఉత్తుమ్ తూమ్ కి సదు కెర.

17 పడ్డో, ‘ప్రబు తుక దిలి కామ్ తుయి నిదానుమ్ తెన్ పూర్తి కెర కుట్టువ’ మెన అర్కొప్పుక కి తుమ్ సంగ.

18 అవ్ పవులు సొంత అతు తెన్ ఈంజ ముడ్లు సంగితి ఆకర్ కోడు రెగ్గితసి. అవ్ జేలి జలిన్చి రిసా తుమ్ ప్రార్దన కెరుక పచ్చ నాయ్. ప్రబుచి దయ తుమ్చి తెన్ తవును!

† 4:10 4:10 జో అరిస్తార్కుక నిజుమి జేలి జా తిలో గే ఎక్కి జో పవులు తెన్ బెద జా బాద ఒర్లువ జలి రిసా దస్సి మెన్తయ్ గే నేనుమ్.

§ 4:12 4:12 నెంజెలి ‘యేసుక గొత్తి నుచొ రితో జలో’, నెంజెలి ‘యేసుక గొత్తి రితో జలో’.

దెస్సలొనీయుల్క రెగిడ్లి మొదొల్చి ఉత్తమ్ బారిక్ జలో పవులు దెస్సలొనీక పట్టుమ్చ సంగుమ్చక రెగిడ్లి మొదొల్చి ఉత్తమ్

మొదొల్ కోడు

1 దేముడు అబ్బొనక చి ప్రబు జలో యేసుక్రీస్తుక సంపజా జోచి తెడి తిల దెస్సలొనీక పట్టుమ్చి సంగుమ్చక *నిల్వానన్ చి తిమోతి, పవులు రెగిడ్లి ఉత్తమ్.

†దేముడు అబ్బొనచి యేసుచి దయ సేంతుమ్ తుమ్చి ఉప్పిరి తవున్.

జేవ్ దెస్సలొనీకుల్ చి రిసాచి సర్ల

2 అమ్ కెయ ప్రార్దన కెర్లె కి, కెయక తెయక దెస్సలొనీకచ తుమ్ ఎత్తిజినచి రిసా దేముడుక అమ్చి సర్ల అమ్ సంగితసుమ్.

3 జో అమ్క అబ్బొ జలో దేముడుక అమ్చి సర్ల సూనయతె తత్తసుమ్. ప్రబు జలో అమ్చో యేసుక్రీస్తుచి ఉప్పిర్చి తుమ్చి నముకుమ్, తుమ్చ కమొతె బార్ జతయచి రిసా; స్రెమల్ నేడుక జలెకి, జోవయించి ఉప్పిర్చి తుమ్చి ప్రేమచి రిసా తుమ్ ఒగ్గర్ కామ్ కెర్లెను; పడ్డొ, †జోవయించి ఉప్పిర్చి తుమ్చి దయిరిమ్చి రిసా తుమ్ ఎత్తి బాదల్ ఓర్గుప జా నిదానుమ్ తత్తసు. ఈంజేవ్ రిసా అమ్చి సర్ల జోవయింక సంగితసుమ్.

దెస్సలొనీకచ దేముడు నిసాన్లిన్చి రుజ్జు

4 జలె, దేముడు ప్రేమ కెర్లె ఒ బావుడ్లు, జోవయించి నేవ తుమ్. కెర్లె రిసా తుమ్క జో నిసాన అస్సె మెన జానుమ్.

5 అమ్చి అత్తి తుమ్తె అయలి సుబుమ్ కబుర్ రిత కొడొయ్ సూనయలిసి నెంజె. నాయ్, గెద, దేముడుచి సుద్ది తిలి అత్తుచి నెక్తి జా సుబుమ్ కబుర్తె నీతతికయ్, 'పలితుమ్ దెరెదె' మెన అమ్చి పెట్టి దయిరిమ్ తిలి, అస్సె, ప్రబుచి జా అత్తు తుమ్చి పెట్టి సికడ్డికయ్ తుమ్చి పెట్టి ఈంజ చి సత్తిమ్ తుమ్ చిన, పూర్తి దయిరిమ్ జా సంపజలదు. తుమ్చి తెన్ అమ్ తిలి పొది, తుమ్క 'ప్రబుచి సత్తిమ్ దెకుత్' మెన కిచ్చొ బుద్ది ఇండితె తిలమ్ గే తుమ్ దెక అమ్చి సత్తిమ్ రుజ్జుల్ దెకిలదు గెద.

6 దస్సె, అమ్క దెక సిక తుమ్ అమ్చి రితి జలదు, ప్రబుచి బుద్ది దెరల్లదు. మెలె, సుబుమ్ కబుర్ తుమ్ సర్ల తెన్ సూనతికయ్ మాస్సుల్ *పిట్టవుక ఉచర అల్లర్ కెర్లె కి, దేముడుచి సుద్ది తిలి అత్తు తుమ్చి పెట్టి సికడ్డికయ్, జో దెతి సర్ల తెన్ తుమ్ సంపజలదు.

7 దస్సె, తుమ్ సంపజలి సర్ల నిదానుమ్ దెకయ్, తుమ్చి ఒండి †మాసిదోనియ ప్రదేసిమ్తె కి, †అమ్ అప్పె తతి ఒండి అకయ ప్రదేసిమ్తె కి, ప్రబుక సంపజలన సికితతి.

8 ప్రబుచి సుబుమ్ కబుర్ మొదొల్క తుమ్తె, పడ్డొ తుమ్చి ఒండి మాసిదోనియతె కి ఈంజ ఒండి అకయతె కి సూనయ్ జా అస్సె, అస్సె దూరితె కి. గని అస్సెయ్ కిచ్చొ సర్ల జతసుమ్ మెలె, ప్రబుక తుమ్ సంపజలిసి కేన్ పక్క కి జాస్సుప జా అస్సె, చి తుమ్క సంపజా అస్సె మెన అమ్ కక్కయ్ సాచి సంగుక నాయ్.

* 1:1:1:1 నెంజెలి, నిల్వానన్క 'నిలయ' కి మెనుల. † 1:1:1:1 'ఎత్తి...యేసుచి' ఎదచి కోడు ఒత్తు తయె నాయ్, గని జా అర్థమ్ తయెదె. † 1:3:1:3 10 నంబరిచి కోడుతె దెకిలె, యేసుక్రీస్తు ఈంజ లోకుమ్తె అస్సె ఉత్తెజెయిదె మెనయ్ దయిరిమ్ తెన్ అస్సె, జోవయింక రకితతి. § 1:5:1:5 రోమయిల్ 1:16 దెక. * 1:6:1:6 బారికుల్ 17:1-8 దెక. † 1:7:1:7 అజ కాలి ఈంజేవ్ దెస్సె ప్రదేసిమ్లె మొత్తమ్క 'గ్రేకు దేసిమ్' మెనుల. † 1:7:1:7 పావులింసి అకయ ప్రదేసిమ్చి కొరింద్ పట్టుమ్తె తిలి పొది దెర్లె ఈంజ ఉత్తమ్ రెగిడ్లె.

9 ఎత్తిజన్ రుజ్జుల్ దెక తా జెచ్చి అమకయ్ సాచి సంగితతి. కిచ్చొ సాచి మెలె, అమ్ తుమ్తె గెలిసి తుమ్తె పలితుమ్ దెద్దిసి సంగితతి. మెలె, బొమ్మల్క జొకరుక ముల, నిజమ్ తిలొ జీవ్ తిలొ దేముడుచి నెవ కెరుమ్దె మెన తుమ్ మార్పువ జలదు.

10 జో దేముడుచొ వుత్తసి యేసు అమ్ మాన్యులచి పాపుమ్ వయన నిలువతె మొర, అమ్చి పాపుమ్చి రిసా అమ్ ఆకర్ దీసి జంక తిలి సిచ్చ అమక పిట్టయిలన్. జో యేసుక దేముడు అబ్బొసి అన్నె జయడ్లన్. చి జో పరలోకుమ్తె గెలిన్ తెంతొ బూలోకుమ్తె అన్నె ఉత్త జెంక అన్నె. జో అన్నె ఉత్త జెతిన్క తుమ్ దెస్సలొనీకుల్ నిదానుమ్ తెన్ రకితిన్చి రిసా కి జేవ్ ఎత్తిజన్ సాచి సంగితతి.

2

* 'అమ్ సుబుమ్ కబుర్ నూనయ్లిసి కిచ్చొ వేర బుద్దిక కెర్లిసి నెంజె' మెన పవులు జబాబ్ దిలి రితి సంగిలిసి.

1 బాపుడ్లు, అమ్ తుమ్తె గెలిన్క 'అరిచి నెంజె' మెన తుమ్ సొంత కి జాన్సు.

2 అమ్ తుమ్చి దెస్సలొనీకతె నే గెతె అగ్గె పిలిప్పి పట్టుమ్తె ప్రబుచి సుబుమ్ కబుర్ నెతికయ్. అమక ఒత్తవ మాన్యుల్ కెర్లి అల్లర్ కెర తిలి, కెర్లి నిస్కారుమ్ కెర తిల, తుమ్ జాన్సు. ఒత్త దన అల్లర్ జలెకి, 'దేముడు అమక తోడు తయెద' మెన దయిరిమ్ తా, తుమ్తె గెచ్చ జో తెప్రయిలి సుబుమ్ కబుర్ నూనయ్లమ్, ఒత్త కి † మాన్యుల్ పిట్టవుక ఉచర అల్లర్ కెర్లి కి.

3 అమ్ బోదన కెర్లిసి తప్పుచి నెంజె, కిచ్చొ లంజెబుద్ది ఉచర బోదన కెర్లిన్ నెంజె, చి కక్క మోసిమ్ కెరుక ఉచర్లిన్ నెంజె.

4 దేముడు అమక నంప కెర, జోచి సుబుమ్ కబుర్ అమ్ జాన్సువ కెర్లి రిసా అమక నిసాన బులయ్తయ్చి రిసా, 'సికడ' మెన జో అమక కిచ్చొ సికడెదె, జయ్యి అమ్ బోదన కెర్లనుమ్. మాన్యుల్క మెన్సు వడనుక అమ్చి ఆన నాయ్. దేముడు సొంత తియ్యొ కామ్ కెరుకయ్ అమ్చి ఆన. అమ్చి పెట్టిచి బుద్ది జోకయ్ ఎర్చె.

5 కెయ్ కిచ్చొ పులయ్త కొడొ లట్టుబుమ్ నాయ్. పడ్డొ డబ్బుల్ ఆనక కి, కిచ్చొయ్ ఆనక కి, కిచ్చొయ్ మాయ్ కెరుమ్ కి నాయ్, తుమ్ జాన్సు. దేముడు కి అమ్చి నత్తిమక సాచి జతయ్.

6 పడ్డొ, తుమ్తె కి కత్తె కి మాన్యుల్తె గప్పురుమ్ ఆననుక ఉచరుమ్ నాయ్. క్రీస్తుచ బారికుల్ జా అన్నుమ్చి రిసాచి అమ్చి అదికారుమ్చి రిసా తుమ్ అమక విలువ దెకుక కి బెదెదె, గని అమక జా ఆన కి నాయ్.

తుమ్క బాద నే సేడయ్తి రితి మెత్తన తా సొంత కామ్ కెర కెరయ్ జిలమ్

7 తుమ్తె గెచ్చ తా తుమ్క మెత్తన తిలమ్, బోదల్క అయ్యసి కిసి ముద్దు కెర్లి తా పొసిదె గే, ఆము తుమ్కయ్ దెస్సి దెకితె తిలమ్.

8 అన్నె, తుమ్క దెస్సి ముద్దు తా, 'జేవ్ కి దేముడుచి సుబుమ్ కబుర్ నూన † రచ్చించువ జతు' మెన ఆన జా సుబుమ్ కబుర్ నూనయ్లమ్. గని, తుమ్క 'జతు' మెనయ్ అమ్చి జిచ్చు కి దెతమ్; తుమ్క తెద్ది ప్రేమ జా తిలమ్.

9 అమ్ ఒత్త క్లుమ్ సేడ సేడ కిటంబుగుడ్డల్ తెయార్ కెర కెరయ్ జితె తిలిసి తుమ్ ఏద కెర్లి. రాతి మెద్దెనె జా * కామ్ కెర్లి తిలమ్. కిచ్చొక మెలె, దేముడుచి సుబుమ్ కబుర్ బోదన కెర్లి రిసా తుమ్తె తిలి పొచి అమక పొన్సి రిసా కక్క సైమ సేడవుక నెన కెర, దెస్సి కామ్ కెర కెరయ్ జితె తిలమ్.

పవులొనీ అబ్బుదిసి రితె జా బోదన కెర్లి తిలిచి

10 తుమ్తె అమ్ సుద్ది ఇండిలిసి, నత్తిమ్ ఇండిలిసి, వేర వాల్ నెంతె సరిగా ఇండిలిసి తుమ్ ప్రబుక నంపజలన దెక సాచుల్ జా అన్నున్. దేముడు కి సొంత సాచి అన్నె.

* 2: 2:1 నగుమ్జన్ విరోదుమ్ సుదల్ బెర్లి, 'కిచ్చొగ మాయకాయ్ బోదన కెర్లయ్' మెన గోన సికడ తిల. † 2:2 2:2 బారికుల్ 7:1-8 దెక. ‡ 2:8 2:8 మెలె, పాపుమ్ తెంతొ, నయ్తానచి రాజుమ్ తెంతొ. § 2:9 2:9 బారికుల్ 18:3 దెక. * 2:9 2:9 కిచ్చొగె రాబుమ్ దెర్చు కెరంతి రిసా సుబుమ్ కబుర్క కెర్లయ్ మెన విరోదుమ్ సుదల్ గోనక సంగ తిల.

11 బోదలక అబ్బొసి కో జలెకు దొర్పు, జలిసి ఎత్తి, కిసి ప్రేమ తెన్ జోవయింక సికడెడె, దస్సి తుమ్క ఎక్కెక్క కి కిసి నిదానుమ్ ఇండుక గే సికడ సికడ దయిరిమ్ సంగితె తిలమ్.

12 అన్నె, జోవయింది సొంత రాజుమతె తుమ్ బెదితి రితి జోవయింతెన్ తుమ్ గవురుమ్ జతి రితి జోవయింది దయక దేముడు తుమ్క నిసాన అన్నె. 'జోవయింక గవురుమ్ కెర్తి రితి తుమ్ ఇండ' మెన బతిమాల్పు జా సంగితె తిలమ్, తుమ్ జాన్పు.

సుబుమ్ కబురక దెస్సులోనికల్ నంపజలిసిది

13 జలె, అన్నె కిచ్చొచి రిసా దేముడుక రోజుక అమ్చి సర్ల సంగితసుమ్ మెలె, జోవయింది అమ్ సూనయేలి సుబుమ్ కబుర తుమ్ సూన, జాక 'మాన్పు కచి ఉచర్లిసి నెంజె, గని దేముడు సొంతయచి కోడు ఈంజ' మెన తుమ్ సత్రిమ్ చిన నంపజలదు. జయ్యి సుబుమ్ కబుర అప్పె తుమ్ నంపజలచి చి వెట్టి కామ్ కెర్తయ్.

14 క్రీస్తు జలొ యేసుక నంపజల దేముడుచి తెడిచ యూదయ ప్రదేసిమ్చ సంగుమ్లచక కిసి జలె గే, తుమ్ కి, బావుడ్లు, దస్సి జలదు. మెలె, తుమ్ తుమ్చి దేసిమ్చచి అత్తి సిడ్ల అల్లర్లు జేవ్ కి జోవయింక సొంత యూదులచి అత్తి జేవ్ సిడ్ల.

15 జేవ్ యూదులచ వెల్లె మాన్సుల్ అన్నె అగ్గె ప్రబు జలొ యేసుక మార్ల, చి అన్నె అగ్గె, దేముడు అబ్బొచి చ కబుర్లు సంగల పూర్లలక కి మార్ల. అమ్కయ్ కి జేవ్ అల్లర్ కెర † ఉచర్ల.

16 యూదుల్ నెంజలనక 'ప్రబుక నంపజా † రచ్చించువ జతు' మెన అమ్ బోదన కెరుమ్దే మెలె, జేవ్ అడ్లు కెరుక ఉచర్తె. దస్సి కెర, దేముడుక కి ఈంజ లోకుమ్చ మాన్సుల్ ఎత్తిక కి విరోదుమ్ సుదల్ రిత జతతి. దస్సి కెర, జోవయింది పావుమ్ పూర్తి బెరవంతతి. గని దేముడు దెతి సిచ్చ కచితుమ్ జోవయింక ఎదిలి కి పిట్టి నాయ్. మొదోల్ జా అన్నె.

దెస్సులోనికతె గెచ్చుక పవులు ఆన జలిసి

17 ఓ బావుడ్లు, తుమ్చి తెన్ అమ్ అప్పె సగుమ్ దీసల్ నెంజల్ రిసా, పొరబోదల్ రిత అమ్ జా అన్నుమ్. గని అప్పె దూరి జా తిలె కి, అత్తక పాసి అన్నుమ్ మెలి కోడు. తుమ్తె అన్నె బే బేగి గెచ్చ తుమ్క సొంత అన్నె దెకుక జలె ఆన తెన్ అన్నుమ్.

18 గతమ్, ఆవ్ పవులు సర్ల తెన్ 'బార జా గెచ్చిందె' మెన ఒగ్గర నుట్లు ఉచర్లయ్, గని సయ్తాన్ అమ్క పిట్టయ్లో.

19 తుమ్ అన్మానుమ్ జా నాయ్. అమ్చి దయిరిమ్, అమ్చి సర్ల, అమ్చి గవురుమ్ కిచ్చొ మెలె, ప్రబు జలొ అమ్చొ యేసు ఈంజ లోకుమ్తె అన్నె ఉత్త జెతికయ్ దీసిక అమ్ జోవయింది మొక్కే టీదెలె, తుమ్ కి అమ్చి తెన్ ఒత్త టీదెతె.

20 తుమ్ అమ్చి బవుమానుమ్ జలి రితి జా అన్నున్, తుమ్ అమ్చి సర్ల.

3

తిమోతిక దెస్సులోనికతె తెర్తయ్లిసిది

1 జలె, తుమ్క అమ్ దూరి తిలిసి అమ్ అన్నె ఓర్పువ జంక నెత్త కెర, 'అమ్ * ఏదెన్నుతె మాలజ్ జా తంక జలె తమ, గని తిమోతిక జవున్ దెస్సులోనికతెచ బావుడ్లుతె తెర్తయ్మ' మెన,

2 జోవయింక తుమ్తె తెర్తయ్లమ్. జో బావొ కి క్రీస్తుచి రిసాచి సుబుమ్ కబుర సూనయ్తి రిసా దేముడుచొ సేవ కెర్తొసా జా అన్నె, చి ప్రబుచి ఉప్పొరచి తుమ్చి నముకుమ్ అన్నె డిట్టుమ్ కెర్పు, చి

† 2:15 2:15 బారికల్ 17:1-13. ‡ 2:16 2:16 మెలె పావుమ్ తెంతో, సయ్తాన్చి రాజుమ్ తెంతో. * 3:1 3:1 పవులు ఎక్కిలో ఏదెన్నుతె గెలన్; బారికల్ 17:14-15. గని ఒత్త తెంతో తిమోతి ఉట్ల అయ్లో కిచ్చొగె, చి ఒత్త తెంతో పవులు జోవయింక దెస్సులోనికతె అన్నె తెర్తయ్లన్. ఒత్త తెంతో పవులు కొరింద్ పట్టుమ్తె గెలన్; బారికల్ 18:1. జో కొరింద్ తెలి పాది; బారికల్ 18:5; తిమోతి ఉట్ల అయ్లన్, చి తెదోడి, జెతె, పవులు ఈంజ ఉత్తుమ్ రెగ్గెన్; తిమోతి చి నిల్వొన్ తెన్.

కిచ్చోయ్ అల్లర్ తుమ్తె కచి నిదానుమ్ పిట్టయ్తు నాయ్ మెన తుమ్క బుద్ది దయిరిమ్ సంగున్ మెనయ్ తెద్రయ్లమ్.

³ తుమ్చి నముకుమ్చి రిసా కో కో తుమ్క అల్లర్ కెర్తతి. అమ్ ప్రబుక నంపజలన దన సైమల్ నేడుక అస్సె మెన తూమ్ కి జాన్సు.

⁴ తుమ్చి తెన్ అమ్ తిలి పొది కి “అమ్ ఇన సైమల్ నేడుక అస్సె” మెన సంగితె తిలమ్, దస్సి జర్లు జలి జాన్సు.

⁵ జలె, తుమ్క అమ్ దూరి తిలె, తుమ్క ‘కిసి జా అస్సి గే’ నేస్సిన్కచి దుకుమ్ ఒర్పువ జంక నెత్తిర్లయ్చి రిసా ‘ఏక్ వేల నయ్తాన్ కిసిగె జోవయింక అల్లర్ కెర, జోవయింది నిదానుమ్ పిట్టవ తయెదె. పిట్టవ తిలె, ఆరి ఒత్త సైమ నేడ తమ్దె’ మెన, ‘నంప తెన్ అస్సి గే నాయ్ గే నూనిందె’ మెనయ్, తిమోతిక తుమ్తె తెద్రయ్లయ్.

తిమోతి అన్నె ఉట్ట జా సర్ల కోడు సంగిలిసి

⁶ దస్సి అన్నె తుమ్తె తెంతో తిమోతి అమ్తె అన్నె ఉట్ట జా, ప్రబుచి ఉప్పిరచి తుమ్చి నముకుమ్చి రిసా, తుమ్చి ప్రేమచి రిసా, సర్లచి కోడు ఆన అస్సె. పడ్డె, అప్పక అమ్క ప్రేమ తిలిసి, అమ్క నే పచ్చ తిలిసి, ఆము తుమ్కయ్ దెకుక కెద్ది ఆన తెన్ అస్సుమ్ గే తూమ్ అమ్కయ్ దెకుక తెద్ది ఆన తెన్ అస్సున్ మెనయ్ జో అన్నె అమ్క సంగ అస్సె.

⁷ బావుడ్లు, ఈంజ మదెనె అమ్ ఒగ్గర్ సైమల్ బాదల్ సిడ్డె తిలె కి, తుమ్క నిదానుమ్ అస్సి మెన తుమ్చి నముకుమ్చి రిసాచి కోడు అమ్ సూన్లి రిసా, అన్నె దయిరిమ్ జా అస్సుమ్.

⁸ తుమ్ ప్రబుచి తెడి నిదానుమ్ తిలె, అమ్క సరి జతయ్. జా కోడు సూన అన్నె జలి రితి జా అస్సుమ్.

⁹ తుమ్చి రిసా దేముడు అమ్చి పెట్టి దిలి సర్ల సంతోసుమ్చి రిసా, అమ్చి సర్ల జోవయింక దెకయ్తి రిసా జోవయింక కిచ్చో దిలె జయెదె?

¹⁰ తుమ్తె గెచ్చ తుమ్క సొంత దెకుక కి, అన్నె, తుమ్ పూర్తి సికితినె కిచ్చో జలెకు నముకుమ్తె ఇదిల్ పెట తిలె జా చెంగిల్ కెరుక కి, బలే ఆన జా అస్సుమ్ చి రాతి మెద్దెనె ప్రార్దన కెర్తె తత్తసుమ్.

దెస్సలోనికుల్క పవులు ప్రార్దన కెర్తిసి

¹¹ అమ్ తుమ్తె జెతికయ్ రితి అమ్క అబ్బో జలో అమ్చో దేముడు సొంత, అన్నె పుత్తున్ జలో ప్రబు జలో అమ్చో యేసు అమ్క వాల్ దెకయ్ దె.

¹² పడ్డె, ఆము తుమ్కయ్ కిసి ప్రేమ అస్సుమ్ గే, దస్సి ఎక్కిలోక ఎక్కిలో, అన్నె ఎత్తిజన్క, తూమ్ రోజుక అన్నె ఒగ్గర్ ప్రేమ కెర్తి రితి తుమ్చి పెట్టి ప్రబు సికడ్లు.

¹³ అన్నె, తుమ్చి పెట్టి పూర్తి నిదానుమ్ దెవుసు, చి ప్రబు జలో అమ్చో యేసు పరలోకుమ్ తెంతో జోవయించయ్ జలన ఎత్తిజన్ తెన్ ఈంజ లోకుమ్తె అన్నె ఉత్త జెతికయ్ దీసిక, తుమ్క ‘పొరపాల్ నెంతె పూర్తి సుద్ది జా, అంచయ్ జా అస్సి’ మెన, అమ్క అబ్బో జలో అమ్చో దేముడు ఒప్పుకుక జయెదె.

4

తుమ్ దేముడుక సర్ల కెర్తి రితి ఇండ

¹ జలె, తుమ్క అన్నె కిచ్చో సంగుక మెలె, బావుడ్లు, దేముడుక సర్ల కెర్తి రిసా కిచ్చో బుద్ది రితి ఇండుక గే అమ్తె తుమ్ సికిలయ్. దస్సి సత్తిమ్ ఇండుక దెర అస్సున్చి రిసా అమ్క సర్ల, జలె. “సత్తిమ్ ఇండుక అన్నె రోజుక సికితె తా” మెన అమ్క ప్రబు జలో యేసు దిలి అదికారుమ్క అమ్ తుమ్క ముక్కిమ్క బతిమాల్య జా సంగితసుమ్.

² ప్రబు జలో యేసుచి నావ్ తెన్ తుమ్క కిచ్చో కిచ్చో ఆడ్రల్ దిలమ్ గే జాన్సు, గెద.

³ దేముడుచి ఇస్సుమ్ ఏక్ కిచ్చో మెలె, తుమ్ అగ్గెచ బుద్దుల్ ముల, జోచి సుద్ది జా పూర్తి జోవయ్ మాన్సుల్ తుమ్ జా గెచ్చుక.

జలె, దస్సి పూర్తి చెంగిల్ సుదల్ జంకయ్ జా కెర, కిచ్చో మెలె, లంజె కమెతె నే కెర్తె. పూర్తి దన బుద్దుల్ ములుక ఈంజ దేముడ్చి ఉద్దెసుమ్.

4 లంజె పాపుమ్ నే జతి రితి, తుమ్ ఎత్కిజిన్ తుమ్చి ఆగ్చద ఆసల్ ముద్దో కెరన, సుద్ది తెన్ తా మురియాద తెన్ తా, చి పెండ్లి జలె, తెర్చిమున్ను జా నత్తిమ్ తా.

5 దేముడుక నేన్ల మాన్సుల్, జలె, జోవయించి ఆగ్చది ఆసల్ జోవయింక ఇండయెదె, తుమ్ దస్సి జా నాయ్.

6 తుమ్చితె కో కి కక్క కి దస్సి పాపుమ్ కెర నాయ్, దస్సి మోసిమ్ తుమ్చి బాపుడ్డి కి కెర నాయ్. దస్సి పాపుమ్ కెర్లడు మెలె, ప్రబు పచ్చు నాయ్. కచితుమ్ సిచ్చ దెయెదె. అగ్గె తుమ్క గట్టిజ సంగిలమ్.

7 దేముడు కిచ్చొచి రిసా అమ్క నిసాన అస్సె మెలె, అమ్క 'లంజె జతు' మెన నాయ్, గని అమ్ జోవయించి పరలోకుమ్చి సుద్ది జా జోవయ్ జతి రిసాయి.

8 దస్సి రిసా, లంజె నే జతినిచి ఈంజ ఆగ్గు తుమ్తె కో పిట్టయెలె, మాన్సుచి మురియాద కడ్డయ్. గని అన్సె, ముక్కిమ్క, దేముడుచి మురియాద కడ్డి రితి జతయ్. తుమ్క 'సుద్ది జతు' మెనయ్ దేముడు జోచి సుద్ది తిలి ఆత్తు తుమ్చి పెట్టి దెతయ్.*

ఎక్కిలోక ఎక్కిలో ప్రేమ దెకితిసి

9 ఎక్కిలోక ఎక్కిలో ప్రేమ కెర్చిన చి రిసా తుమ్ కో కిచ్చొ కబుర్ రెగుడుక నాయ్. ఎక్కిలోక ఎక్కిలో ప్రేమ కెర్చిన దేముడు సొంతయ్ తుమ్చి పెట్టి సికడ అస్సె.

10 అన్సె, 'ఓండి మానిదోనియ ప్రదేసిమ్తెచ బాపుడ్డుక ప్రేమ కెర్తతి' మెన, నిజమి తుమ్చి రిసా సంగుక జతయ్. గని, 'రోజుక అన్సెయ్ ప్రేమ కెరుక తుమ్ సిక్క, బాపుడ్డు' మెన, తుమ్క బతిమాల్పా జా సంగితసుమ్.

11 పడ్డో బమ్మ నెంతె జింక ఆస జా, అన్సె మాన్సుల్క పోటి నే కెర్తె, సొంత కామ్ తుమ్ దెకన్తె తా, అన్సె, అమ్ అగ్గె ఆత్త దిలి రితి, బద్దుకుమ్ నే జతె తుమ్ జతి కామ్ నిదాసుమ్ కెర కెర కతె జతె తా.

12 దస్సి సొంత కామ్ కెర కెర జతె తిలె, తుమ్ కత్తె కత్తె నజీత్ తంక నాయ్, చి అన్సె మాన్సుల్చి మొక్కి నిస్సార్చుమ్ జసు నాయ్, గని తుమ్క 'సత్తిమ్ మాన్సుల్' మెన గవురుమ్ దెకుల.

ప్రబు ఉత్త జెతిసి

13 ప్రబుక నంపజా మొర గెలసచి రిసా, బాపుడ్డు, తుమ్ †అన్సానుమ్ జా నాయ్. కీసి జవుల గే తుమ్ నేన తంక అమ్క ఇస్సుమ్ నాయ్.

యేసుప్రబుక నేన్లనచ మాన్సుల్ కో జలె మొర్తె, ఒగ్గర్ దుకుమ్ జా ఏడుకుడు జవుల, 'యేసుప్రబుక నంపజలె పరలోకుమ్తె గెతి వాటు తయెదె' మెన నేన్తి చి రిసా జోవయించి ఉస్పిర్చి నముకుమ్చి దయిరిమ్ జోవయింక నాయ్. జలె, తుమ్ దస్సి దుకుమ్ జంక నాయ్.

14 కిచ్చొక మెలె, యేసు మొర అన్సె జీవ్ జా ఉట్టన్ మెన అమ్ నంపజతసుమ్. దస్సి, యేసుక నంపజా మొర్ల మాన్సుల్ జోవయించి తెడి అస్సిచి రిసా, దేముడు యేసుక ఈంజ లోకుమ్తె అన్సె తెర్తయెతి పొదిక, జోవయింతెన్ జోవయింకయ్ కి కడ అనెదె.

15 ప్రబు సొంత జాన కెర ఏక కోడు కిచ్చొ మెన తుమ్క అమ్ సంగితసుమ్ మెలె, యేసుప్రబు అన్సె ఉత్త జెతి ఎద ఈంజ లోకుమ్తె కో నంపజలన జతె తమ్దె గే, నంపజా మొర్లనచి కంట అగ్గె జము నాయ్, జోవయించి కంట తొలితో జోవయింతెన్ బెదుమ్ నాయ్.

16 తెదోడక కిచ్చొ జర్లు జయెదె మెలె, పరలోకుమ్చ చూతల్తె చొ, వెల్లొ దూత ఎక్కిలో కేక్ గల సాడుప కెర్తె, పరలోకుమ్చి బజెన చి దేముడు బజన నప్పిర్మూరి అవార్డె తెన్, చి యేసుప్రబు అదికారుమ్ తెన్ పరలోకుమ్ తెంతో ఉత్త జెయెదె. నంపజా మొర్లన తొలితో జీవ్ జా ఉట్టుల.

17 పడ్డో, ఆగాసుమ్తె ప్రబు తెన్ దస్సుల్ జతి రిసాయి అమ్ ఈంజ లోకుమ్తె జితన కి, జేవ్ మొర జీవ్ జా అన్సె ఉట్టన్ తెన్ మబ్బుత్తె ఎక్కిల్తె ఉక్కిల్తె జమ్దె. ఒత్త తెంతో కెయ్క తెయ్క జో తెన్ తమ్దె.

* 4:8 4:8 కొరిందీలె రెగిడ్డి ఏక నంబర్ ఉత్తమ్ 6:15-20 దెక. అమ్చి ఆగ్ ప్రబుచి దేముడుచి గుడి. జోవయించి దేముడుచి గుడి లంజెతె బెదయెలె, జోచి మురియాద కడ్డి రితి జతయ్. † 4:13 4:13 'ప్రబు జే బెగి అన్సె ఉత్త జెయెదె, చి అమ్క జోతె కడ నయెదె' మెలె రితి నూన తిల, కిచ్చొగె, చి మదెన్ జోవయింతె తిలన సగుమ్జెన్ మూర తిల కిచ్చొగె, చి 'జీవ్ కీసి జవుల గే?' మెన దియె తిల. కిచ్చొగె.

18 జాకయ్, ప్రబుక నంపజా తుమ్చితె కవగె మాన్సుల్ మొర తిలె, తుమ్ ఎక్కిలోక ఎక్కిలో ఈంజేవ్ కొడో ఉచరవడ దయిరిమ్ సంగితె తా.

5

ప్రబు కెయక అన్నె జెయెదె గే కో మాన్సు నేస్సిసిచి

1 గని, బావుడ్లు, ప్రబు కెయక కీసి కాలుమ్క అన్నె జెయెదె గే, జా, జాచి రిసా తుమ్క అమ్ కో అన్నె కిచ్చొ రెగ్గ సికడుక నాయ్.

2 ప్రబు అన్నె ఉత్ర జా ఈంజ లోకుమ్చక పరిచ్చ కెర తీర్పు కెర్తి జా వెల్లి దీసి చోరు అందరె అయ్లి రితి జెయెదె. కో నేస్సె పొది జెయెదె.

3 జేవ్ దినాల్క, ఈంజ లోకుమ్చ మాన్సుల్ కీసి జతె తవుల మెలె, “ఈంజ లోకుమ్క బాదల్ నాయ్, సెంతుమ్ సుక్కుమ్ తెన్ అన్నుమ్” మెన జేవ్ ఉచరన ప్రబుక చచ్చు తిలె పొది జా దీసిచి జేవ్ నే ఉచర్తి వెల్లి సిచ్చు, నానసుమ్ జతిసి, జోవయింక చట్టున లయెదె. తేర్బోదక కంట్లు పావ అయ్లె పొది జేవ్ నొప్పుల్ కీసి పిట్టవనుక నెంజె గే, దస్సి. జా సిచ్చు అయ్లె, పిట్టవనుక నెతిరి.

ప్రబుక నంపజలసక దయిరిమ్ జాగర్త సంగ రెగిడ్డిసి

4 తూమ్, బావుడ్లు, నంపజలస, అందరబుద్దిచ నయ్తాన్చి రాజిమ్చ మాన్సుల్ నెంజున్చి రిసా, జా దీసి కెయక జెయెదె గే అమ్ నేస్సె కి, అయ్లె, చోరు అయ్లి రితి తుమ్క జా బచ్చు కెరుక నాయ్.

5 కిచ్చొక మెలె, తూమ్ అము ప్రబుక నంపజలస ఎత్తిజిన్ జోచి ఉజడ తిలి అత్తుక నొవర్ జెర్పిలన జా, మెద్దెన్చి తెలిచి తిలి రితి జోవయింక రకుక అన్నె. జోచి ఇష్టుమ్ రితి ఇండుక అన్నె. అందరబుద్దిచ, నయ్తాన్చి రాజిమ్చ నెంజుమ్.

6 జాకయ్, నిదానుమ్ నెంజిల జుమ్ నిజల్ రిత జల జేవ్ వేర మాన్సుల్చ రిత అమ్ జంక పోన్. అము, నే జుమిల రిత తా, నే మచ్చిల రిత తా, బుద్ది తంక.

7 కిచ్చొక మెలె, నిజతిసి, జలె, అందరతె బెదితిసి. మచ్చితిసి అందరతె బెదితిసి.

8 గని జోచి ఉజడచి అత్తు తెన్ అమ్ జెర్మ అన్నుమ్చి రిసా అమ్చి అత్తు నే మచ్చిల్ రితి తా అమ్ బుద్ది తంక అన్నె. ప్రబుచి ఉప్పిరి పూర్తి నముకుమ్ తియ, తుమ్ ఎక్కిలోక ఎక్కిలో ప్రేమ కెర్తె తా. యుద్దుమ్తె గుండెచి పుర్తితో ఇనుము డాలు దెర తిలె కీసి ఈంటి గల్లె లయె నాయ్, దస్సి ప్రబుచి ఉప్పిరిచి నముకుమ్చి ఎక్కిలోక ఎక్కిలో ప్రేమ కెర్తిసి అందరబుద్దిచి ఉప్పిరిచి యుద్దుమ్తె అమ్క కామ్క జెయెదె. పడ్డో, యేసుప్రబు తుమ్క తుమ్చి పాపుమ్చి సిచ్చు తెంతో రచ్చించుప కెర్తయ్చి రిసాచి దయిరిమ్ తెన్ తా. అందరబుద్దిచి ఉప్పిరిచి యుద్దుమ్తె అమ్క బోడి కిచ్చొనే లయతి రిసా గలంతి ఇనుము బోపిచి రితి జా దయిరిమ్ జెయెదె.

9 కిచ్చొక మెలె, ప్రబుక నంపనెంజిల మాన్సుల్ సిచ్చు జతిసి అమ్ సేడుక దేముడు సెలవ్ దెయె నాయ్. గని ప్రబు జలో అమ్చో యేసుక్రీస్తుక అమ్ నంప కెర్తికయ్, అమ్చి పాపుమ్చి రిసాచి సిచ్చు అమ్క నే లయతి రితి జో యేసుచి అత్తి అమ్ రచ్చించుప జంక మెనయ్ జోచి సెలవ్.

10 జో యేసు అన్నె ఉత్ర జెతికయ్ పొదిక, అమ్ జివ్ తిలె కి మొర తిలె కి, జోవయింతెన్ అమ్ బెద జతి రిసాయి జో యేసు మొర అమ్చి పాపుమ్ గెచ్చయ్లిసి.

11 ఈంజేవ్ కొడోచి రిసా తుమ్ ఎక్కిలోక ఎక్కిలో దయిరిమ్ కెరంతసు. అన్నె, తుమ్ ఎత్తిజిన్ పూర్తి కిచ్చొయ్ అన్మానుమ్ నెంతె డిట్టుమ్ జతి రితి, ఈంజ ఎత్తిచి రిసా ఎక్కిలోక ఎక్కిలో దయిరిమ్ కెర్తె తా.

బుద్ది ఇండితన్చి రిసా ఆకర్ కొడో

12 ఆకర్చి, బావుడ్లు, తుమ్క అన్నె కిచ్చొ ముక్కిమ్క బతిమాల్పా జా సంగితసుమ్ మెలె, ప్రబుచి కామ్ తుమ్తె కెర్తె తా జోచి అదికారుమ్చి తెడి తుమ్క దెకిత బుద్ది సికడ్డసక తుమ్ మరియాద దెకితె తా.

* 5:2 5:2 మత్తయ 24:42-44చి కొడో దెకితె, యేసు సాంత కి ఇసి సంగిలన్. † 5:3 5:3 అన్నె ఒగ్గర్ పూర్ము రెగిడ్డిసి ఏక దెక. యుర్షియా 6:14-15, 8:11-12.

13 జోవయించి కామచి రిసా జోవయింక ఒగ్గర్ ప్రేమ గవురుమ్ దెకితె తా. పడ్డొ, ఎక్కిలో తెన్ ఎక్కిలో తుమ్ కట్టు తెన్ తా.

14 పడ్డొ అన్నె కిచ్చొ బుద్ది సంగితసుమ్ మెలె, బావుడ్లు, బద్దుకుమ్ జలసక బుద్ది సికడ, దయిరిమ్ నెంజలసక దయిరిమ్ కెర, ఆత్తుక తొక్కి నెక్కి తిలసక తోడు తా, చి జోవయింతె కక్క జోవయించ తప్పుల్క కోపుమ్ నే దెకయెతె, జేవ్ సికితిసి, డిట్టుమ్ జతిసి పాడ నే కెర్తి రితి ఒర్పువ జా.

15 కో తుమ్క అల్లర్ కెర్తె, జోవయింక తుమి అల్లర్ కెర నాయ్. తుమ్ దస్సి తప్పు నే జతి రితి జాగర్త దెకన. కెట్టెడి కి ఎక్కిలోక ఎక్కిలో కామ్క జెతికయ్ రితి తోడు కెర్తె తంక ఆన జా. ఎక్కి ప్రబుక నంపజలసకయ్ మెన నాయ్, కక్కయ్ కి.

16 కిచ్చొ జర్లు జలెకి, సర్త తెన్ తా.

17 బద్దుకుమ్ నే జెతె ప్రార్దన కెర్తె తా.

18 కిచ్చొ జర్లు జలెకి 'ఈంజ జర్లు జంక తుయి సెలవ్ దిలది' మెన, దేముడుక సర్త తెన్ని ఒప్పున, సర్త తెన్ తా. †క్రీస్తు జలో యేసుచి తెడి అస్సునచి రిసా కిచ్చొ జలెకి తుమ్ దస్సి బుద్ది తంక దేముడుచి ఇస్టుమ్.

19 దేముడుచి సుద్ది తిలి ఆత్తు జర్లు కెర్తిసి పిట్టవుక పోన.

20 మాన్సుచి అత్తి ప్రబుచ కబుర్లు సంగితిసక నిస్కారుమ్ కెర నాయ్.

21 గని, 'ప్రబుచి కబుర్ ఈంజ' మెన కో జవున్ కిచ్చొ జవున్ కోడు సంగిలె, 'ప్రబు సికడ్డిన్ తెన్ బెదితయ్ గే నాయ్ గే' మెన అజ్జ కెరంతి రిసా జా కోడు తుమ్ పరిచ్చ కెర. ప్రబు సికడ్డిన్ తెన్ బెదితయ్ మెలె, దెరన.

22 గని బెది నాయ్ జలె, 'గర్చి' మెన దూరి కెర; కిచ్చొ గర్చి కామ్ జలెకి.

23 తుమ్ జోచయ్ జా పూర్తి సుద్ది జతి రితి, మాన్సుల్క సేంతుమ్ ఆన్తో దేముడు సొంత తుమ్క మార్పువ కెర్తె తవును, చి ప్రబు జలో అమ్చో యేసుక్రీస్తు ఈంజ లోకుమ్తె అన్నె ఉత్త్ర జెతికయ్ ఎద తుమ్ ఎత్తిజిసక తుమ్చి అత్తు జివు ఆగ్ పూర్తి పొరపాట్ నెంతె తవును.

24 తుమ్క బుకార్లో కెర్తె అమ్చో దేముడు నముకుమ్ జలోసా. ఈంజ ఎత్తి జోయింక జర్లు కెరెదె.

25 బావుడ్లు, అమ్చి రిసా తుమ్ ప్రార్దన కెర్తె తా.

26 ప్రబుచి ప్రేమచి రిసాచి అమ్చి ముద్దు ఒత్త నంపజల బావుడ్లు ఎత్తిజిసక దెకయ్లి రితి తుమ్ జోవయింక సుద్ది తిలి ముద్దు తెన్ జోకర.

27 ఒత్త నంపజలన ఎత్తిజిస నూన్తి రితి ఈంజ ఉత్తుమ్ తుమ్ సదు కెర మెన ప్రబుచి నాన్ తెన్ తుమ్క ఆవ్ సంగితసి.

28 ప్రబు జలో అమ్చో యేసుచి దయ తుమ్చి తెన్ తవున్!

† 5:18 5:18 నెంజలె, కిచ్చొ జలెకి తుమ్ దస్సి బుద్ది తంక మెన ఎత్తి అదికారుమ్ తిలో దేముడుచి ఇస్టుమ్, క్రీస్తుచి అత్తి అమ్క జో దెకయ్లి రితి.

దెస్సలొనీయుల్ క రెగిడ్లి దొన్నిచి ఉత్త్రుమ్ బారిక్ జలో పవులు దెస్సలొనీక పట్టుమ్చ సంగుమ్చక రెగిడ్లి దొన్నిచి ఉత్త్రుమ్

మొదొల్ కోడు

1 అమ్క అబ్బొ జలో దేముడుక చి ప్రబు జలో యేసుక్రీస్తుక నంపజా జోచి తెడి తిల దెస్సలొనీక పట్టుమ్చ సంగుమ్చక *సిల్వానన్ చి తిమోతి, పవులు రెగిడ్లి ఉత్త్రుమ్.

2 దేముడు అబ్బొనీచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పొరి తవున్!

3 తుమ్చి నముకుమ్ అన్నె ఒగ్గర్ జా గతయ్, చి తుమ్ ఎత్తిజన్ ఎక్కిలోక ఎక్కిలో రోజుక అన్నె ఒగ్గర్ ప్రేమ కెర్తనుచి రిసా, దేముడుక అమ్చి నర్ద నే సంగిలె నెంజె. తుమ్చి రిసా రోజుక అమ్చి నర్ద జోవయింక సంగితనుమ్.

4 అన్నె ప్రబుక విరోదుమ్ బలస, తుమ్క ఒగ్గర్ అల్లర్ కెర్తె తిలె కి, తుమ్ కిచ్చొ కిచ్చొ ఒగ్గర్ బాదల్ సేడ్తె తిలె కి, తుమ్ నిదానుమ్ తా ఒర్పువ జతసు, చి తుమ్చి నముకుమ్ పిట్టె నాయ్. జాకయ్ దేముడుచ కేన్ సంగుములుతె గెలె జవున్, కబుర్ తెద్యులె జవున్, తుమ్చి రిసాయి దయిరమ్ తెన్ అమ్చి నర్ద అన్నె నంపజలసక అమ్ సంగితనుమ్.

5 జోచి రాజిమతె తుమ్ బెదిల్ రిసా తుమ్ †అల్లర్ సేడుక మెన దేముడు తుమ్క విలువ మెలి రెతి దెక అన్నె. 'దస్సె తీర్పు కెర అన్నె' మెన, అన్నె జా తీర్పుక 'సత్తిమిచి' మెన కిచ్చొతె రుజ్జు జతయ్ మెలె, తుమ్ ఈంజేవ్ బాదల్ ఒర్పువ జా నిదానుమ్ తిలినతెయ్ రుజ్జు జతయ్; ‡జోచి రాజిమతె తుమ్ బెదిల్ రిసా తుమ్ జేవ్ అల్లర్ సేడ్తెను.

6 దేముడు సత్తిమ్ తీర్పు కెర్తెసా బలినిచి రుజ్జు కిచ్చొతె డిస్తయ్ మెలె, తుమ్క అల్లర్ కెర్తెనక జో సిచ్చు కెరెదె.

7 చి జోచి కామ్క బాదల్ సేడ అమ్ ఎత్తిజన్క జో సుక్కుమ్ దెతి పొదిక తుమ్ కి దస బాదల్ సేడ్లసక కి జా సుక్కుమ్ దెయెదె. కెయ్క మెలె, ప్రబు జలో యేసు †జోచి అదికారుమ్ దెకయ్త పరలోకుమ్చ దూతల్ తెన్, సుట్టునంత ఆగి లగితి రెతి జా జో ఉత్త్ర జా జోవయించి గవురుమ్ రుజ్జు జతి పొదిక ఈంజె ఎత్తి జర్గు జయెదె.

8 చి దేముడుక నేన్లసక, ప్రబు జలో అమ్చొ యేసుచి సుబుమ్ కబుర్ రెతి నే కెర్తెనక సిచ్చు కెరెదె.

9 జోవయించి సిచ్చు కిచ్చొ మెలె, *నాసెనుమ్తె గచ్చు నాసెనుమ్తెయి కెయ్క తెయ్క తాఁ గెచ్చుల, చి ప్రబుతె జేవ్ గెచ్చుక నెత్తిర్తి, జోవయించి ఒగ్గర్ సెక్తిచి రిసాచి జోచి ఒగ్గర్ ఉజడిచి రిసా జేవ్ జోవయింక దెకుక నెత్తిర్తి.

10 జా కెయ్క జర్గు జయెదె మెలె, జో అన్నె ఉత్త్ర జెతికయ్ దీసిక. జో జెతిసి కిచ్చొచి రిసా మెలె, జోక నంపజా జోచి సుద్ది జా జోవయ్ బలస జో తెన్ బెద గవురుమ్ జతిన్తె గవురుమ్ జతి రిసా, చి జేవ్ జోక దెక ఆచారిమ్ చి నర్ద జతి రిసా. జోచి రిసా అమ్ తుమ్క సంగిలె సాచి తుమ్ నంపజలదు, చి తుమ్ కి ఒత్త బెదితె.

దెస్సలొనీక పవులొని ప్రార్దన కెర్లిసి

* 1:1 1:1 నెంజెలి 'సీలయ్' బారికుల్ 15:22, 16:19, 17:4, వడ్డొ కొందిల్క రెగిడ్లి 2 నంబర్ ఉత్త్రుమ్ 1:19, చి పేతురు రెగిడ్లి 1 నంబర్ ఉత్త్రుమ్ 5:12 దెక. † 1:5 1:5 బారికుల్ 5:41క దెకిలె, జోవయించి నాన్ జోవయించి కామ్చి రిసా, అమ్ అల్లర్ బాదల్ సేడుక జో సెంవ్ దిలె కిచ్చొ రుజ్జు దెకయ్తయ్ మెలె, జోవయింకెన్ బెదుక జో అమ్క విలువ మెలి రెతి దెకిలె. ‡ 1:5 1:5 నెంజెలి, 'అన్నె తుమ్ పరలోకుమ్తె గెత్తిచి రిసా మదెన ఈంజేవ్ బాదల్ వాల్ తుమ్క ఆత్మక డిట్టుమ్ పూర్తి కెర్తెయార్ కెర్తయ్.' యాకోబు 1:2-4 దెక. § 1:7

1:7 నెంజెలి 'జోవయింక ఒగ్గర్ సెక్తి పరలోకుమ్చ దూతల్ తెన్ ఉత్త్ర జా....' * 1:9 1:9 నెంజెలి, 'మొర్తుతె'. మెలె, ఆత్మమొర్తుతె, ఆకర్చి మొర్తుతె. డిసయ్లెసి 2:11, 20:6, 20:14, 21:8.

11 జింక తుమ్చి రిసా రోజుక ప్రార్థన కెర్తనుమ్. కిచ్చొ మెన మెలె, తుమ్ జోచయ్ జా, జోచి పరలోకుమ్చి రాజిమతె తుమ్ బెదుక మెన దేముడు తుమ్క బుకార అస్సె, చి జో తుమ్క బుకార్చి కెర్లిన్క తుమ్ చిలువ జతి రితి కెర్చు. తుమ్ ఉచర్చి కేన్ చెంగిల్ కామ్ కి, తుమ్చి నముకుమ్చి రిసాచి ఎత్తి కామ్ కి జోవయిచి అత్తున్కొక జెయ్యిమి కెర్చు.

12 తుమ్ ఇండితినతె అమ్చొ ప్రబు జలో యేసుచి నావ్ గవురుమ్ జయెదె, జోవయిచి తెడి తుమ్ కి గవురుమ్ జన్తె. దేముడుచి ప్రబు జలో యేసుక్రీస్తుచి దయయ్ ఈంజ ఎత్తి జర్చు జతి రిసా ప్రార్థన కెర్తనుమ్.

2

1 బావుడ్లు, అమ్చొ ప్రబు జలో యేసుక్రీస్తు అన్నె ఉత్ర జెతినచి రిసా, జోక నంపజలన ఎత్తిజిన్ జోతె గెచ్చు జో తెన్ ఎక్కితె బెదితినచి రిసా, తుమ్క అచ్ కిచ్చొ మెన అప్పె బతిమాల్చు జా సంగితసి మెలె,

2 జా దీసి నే జెతె అగ్గె, అబద్దుమ్క, “దీసి పాచ అయిలి గె. సిచ్చొ దెకిలయ్, ప్రబుచి కోడు, ఈంజ” మెన కో జవున్ కిచ్చొ జవున్ అత్తుచి సెక్కిక సంగిలె, నెంజిలె “దీసి పాచ అయిలి గె” మెన కేన్ జవున్ మాన్సు సొంత సెక్కిక ఉచర సంగిలె, నెంజిలె “దీసి పాచ అయిలి మెన అమ్చి తెన్ ఉత్రమతె అయిలి” మెన కో జవున్ సంగిలె, తుమ్చి మెన్సు తుమ్ బమ్మ జా నాయ్, నంప కెర నాయ్.

3 కోయి దన కొడొ సంగిలె, తుమ్ మోసిమ్ నేడ నాయ్. కిచ్చొక మెలె, ప్రబు అన్నె జెతికయ్ జా దీసి నే జతె అగ్గె, తొలితొ, ఒండి లోకుమ్చ ఎతివాట్జిన్ మాన్సుల్ దేముడుక విరోదుమ్ జతి వెల్లి బాద జర్చు జంక అస్సె. దేముడు సంగిలీన్ ఎత్తిక విరోదుమ్ జలో *పూర్తి వెల్లి మూర్కుమ్ బుద్ది జలోసా ఈంజ లోకుమ్తె బారొ జంక అస్సె, జో పూర్తి నానెనుమ్ జా గెతోసా.

4 జో వెల్లి మూర్కుడు కీసి జయెదె మెలె, కేన్ దేముడు మెలోసొక కి కేన్ జొకర్తి వస్తువక కి జో విరోదుమ్ కెర, “అచ్ వెల్లి” మెనన, దేముడుచి గుడితెచి ముక్కిమ్ జలి టాన్తె వెన కెర, “అచ్ దేముడు” మెనన సంగెదె.

5 తుమ్చి తెన్ అచ్ తిలి పొది కి తుమ్క ఈంజ ఎత్తి సంగిలయ్. ఏద కెర్చు నాయ్ గె?

6 జలె, దేముడు సెలవ్ దిలి కాలుమ్కయ్ జో మూర్కుడు బారొ జంక జయెదె. గని అప్పె నే బారొ జంక కిచ్చొ అడ్డు తయెదె గే తుమ్ జాన్చు.

7 మదెన్ జో మూర్కుడుచి బుద్ది ఈంజ లోకుమ్తె జేవ్చి పాపుమ్ లుంక, చోరు తిరిమ్ తిరిమ్ కెర్తయ్, గని జోక అడ్డు కెర్చొసా అడ్డు కెరుక ములిలెకయ్, జా బాద ఎదార్తుమ్ జా పూర్తి అల్లర్ కెరెదె.

8 తెదెడెకయ్ జో మూర్కుడు బారొ జా జోవయిచి కామ్ ఎదార్తుమ్ కెరెదె. గని ప్రబు జలో యేసు అన్నె ఉత్ర జా డిస్ట్రీన్కయ్ జొయ్యి జో మూర్కుడుచి సెక్కి గెచ్చవయ్ గెలెదె. చి రితి జోచి చొండి తెంతొ జెతికయ్ †వాడుకయ్ జోవయింక మారయ్ గెలెదె.

9 జో మూర్కుడు జలిసా కేన్ తెంతొ జా తయెదె మెలె, నయ్తాన్చి సెక్కి తెంతొ బారొ జా తయెదె. అయిలె, జో నయ్తాన్చి బగ్గర్ సెక్కి తెన్ అబద్దుమ్చ ‡మాయల్ జత వెల్లి వెల్లి కమ్మ గట్టిజ కెర కెర,

10 నానెనుమ్తె గెచ్చుక తిలసక మోసిమ్ కెరెదె. కిచ్చొక మెలె, సత్తిమ్ తిలిసి జేవ్ ప్రేమ కెరుక సెసిలచి రిసా రచ్చున జతి నాయ్.

11 సత్తిమ్ జేవ్ నెసిలి రిసా, ‘అబద్దుమ్, జలె, నంప కెర్తు’ మెన, ‘జేవ్ అత్తు గుడ్డి జతి రితి జా మోసిమ్తె దెర్చు నేడ్డు’ మెన దేముడు సార్చు కెర తయెదె.

12 దన్సి, కో సత్తిమ్ నంప కెర్తి నాయ్, గని పాపుమ్క ఆస జవుల గే, సిచ్చుతె గెచ్చులె.

ప్రబుక నంపజలన రచ్చునతె గెతినచి

* 2:3 2:3 డిస్ట్రీన్చి పుస్తకుమ్తె దసా మాన్సుచి రిసాచ కొడొతె ‘జంతు’ మెన టాలె తెన్ సంగితయ్. డిస్ట్రీన్చి 12:9, చి 13 అద్యయమ్ తెంతొ 17 అద్యయమ్ ఎద, చి 19, 20 అద్యయల్ దెక. † 2:8 2:8 నెంజిలె ‘కోడుక’. డిస్ట్రీన్చి 19:21తె నయ్తాన్చి సేవ కెర్తి తిలసచ నయ్తాన్సుమల్క ప్రబు జోవయిచి చొండితెచి కథుమ్క మారెదె. జా కండా జోవయిచి కోడుకయ్ టాలె జతయ్. ఇన్నె కోడుక అద్దుమ్ కి ఉచరుక జయెదె. ‡ 2:9 2:9 డిస్ట్రీన్చి 12:9, చి 13 అద్యయమ్ దెక. 13:13తె మాయచ వెల్లి వెల్లి కమ్మెచి కోడు అస్సె.

13 ప్రబు ప్రేమ కెర్త ఓ బావుడ్లు, తుమ్చి రిసా దేముడుక అమ్చి సర్త నే సంగిలె నెంజె. రోజుక తుమ్చి రిసా జోవయింక అమ్చి సర్త సంగితసుమ్. కిచ్చొక మెలె, సీతుమ్ *రచ్చించుప జంక మెన మొదోల్ తెంతో జో నిసాన్లన్. కీసి రచ్చించుప జంక మెలె, తుమ్ జోవయించయ్ జతి రితి జోవయించి సుద్ది తిలి ఆత్మ తుమ్క సుద్ది కెర్తె వాటు, చి సత్తిమ్ తుమ్ సంప కెర్తె వాటు.

14 ప్రబు జలో అమ్చో యేసుచి గవరుమతె తుమ్ బెదితి రిసా, తుమ్ ఇసి సుద్ది జంక సత్తిమ్ సంప కెరుక మెన దేముడు తుమ్క బుకార్లన్. కేన్ వాటు బుకార్లన్ మెలె, అమ్ సుబుమ్ కబుర్ నూనయ్లి వాటు.

15 జాకయ్, బావుడ్లు, తుమ్ డిట్టుమ్ టీచ, చి అమ్చి అత్తి దిలిసి ఎత్తి, మెలె, అమ్ ఒత్త తిలి పొది సికడ్లసి కి ఇన్నె తెంతో ఉత్తుమ్ రెడ్ల సికడ్లసి కి, తుమ్ డిట్టుమ్ దెరన, జయి రితి ఇండ.

దెస్సలాసికచ రిసా పవులీని ప్రార్తన

16 ప్రబు జలో అమ్చో యేసుక్రీస్తు, అన్నె అమ్క అబ్బో జలో దేముడు జోవయించి దయక అమ్క ప్రేమ తా, కెయ్క తెయ్క తిలి దయిర్మ్ దెతి పరలోకుమతె గెచ్చ జతి దయిర్మ్ కి అమ్ ఎత్తిజినక దా అన్సి.

17 జలె, 'తుమ్చి పెట్టి తుమ్క జోవయించి అత్తుకచి దయిర్మ్ కెర్తె తా తుమ్ కెయ్క తెయ్క సత్తిమ్ ఇండితి రితి సత్తిమ్ లట్టబ్బి రితి తుమ్క డిట్టుమ్ నిదానుమ్ కెర్తె తప్ప' మెన అమ్ ప్రార్తన కెర్తెనుమ్.

3

అమ్చి రిసా కి ప్రార్తన కెర

1 పడ్డో అన్నె కిచ్చొ మెలె, బావుడ్లు. ప్రబుచి సుబుమ్ కబుర్ తుమ్తె నూనయ్లికయ్ జా కీసి తుమ్తె పలితుమ్ దెర్లి గే, అమ్ ఇన్నె సుబుమ్ కబుర్ నూనయ్లిసి కి అడ్డు నెంత జిన పలితుమ్ దెర్లి తప్పన్ మెన అమ్చి రిసా తుమ్ ప్రార్తన కెర.

2 బుద్ది నెంజెల కున్సిదుమ్చ మాన్సుల్ కెర్తె అల్లర్ తెంతో అమ్ రచ్చించుప జతి రితి తుమ్ ప్రార్తన కెర. నగుమ్జిన ప్రబుక సంప కెర్తె నాయ్, గెద.

3 ప్రబు, నముకుమ్ జలోసా, చి తుమ్ ఆత్మక డిట్టుమ్ తతి రితి జో సెక్తి దెయెదె, చి నయ్తాన్ కెరయ్త అల్లర్ తుమ్క నే లయ్తి రితి జోయ్యి అడ్డు దెయెదె.

4 తుమ్చి రిసా 'అమ్ సంగిలె రితి నిదానుమ్ కెర్తెతి, నిదానుమ్ కెర్తె తప్పల' మెన ప్రబుచి తెడి దయిర్మ్ తెన్ అన్నుమ్.

5 జోవయించి ఇస్టుమ్ రితి తుమ్ కెర్తె రితి, దేముడుచి ప్రేమ క్రీస్తు పుత్తున్చి నిదానుమ్, తుమ్చి పెట్టి ప్రబు దెప్పను.

కామ్ కెర కెర జతిన్చి రిసా

6 బావుడ్లు, ప్రబు జలో అమ్చో యేసుక్రీస్తుచి నావ్ తెన్ తుమ్క కిచ్చొ ఆడ్ర దెతసుమ్ మెలె, ప్రబుక సంపజుల్ కేన్ బావో కిచ్చొ కామ్ నే కెర్తె బద్దుకుమ్ జా జితయ్ గే, 'నిదానుమ్ తెన్ కామ్ కెర కెర జయ' మెన అమ్ సంగిలెసి పిట్టవన్తయ్. దసాచొక తుమ్ దూరి తా.

7 అమ్ కెర్తె రితి తుమ్ దెక సికిలె చెంగిలి మెన తుమ్ సొంత జాన్సు. తుమ్చి తెన్ అమ్ తిలి పొది బద్దుకుమ్ జము నాయ్.

8 చి డబ్బుల్ నే దెతె కచి అన్నిమ్ కము నాయ్, గని కక్క బోద నే కెర్తె రిసా, సైమ సేడ సేడ రాతి మెద్దెనె *సొంత కామ్ కెర కెరయ్ జితె తిలమ్.

9 జతిన్ గెట్ట తుమ్తె ఆరి నజుక జతి, చి అమ్చి కామ్చి రిసా, గని 'అమ్క దెక జేవ్ కి బుద్ది సిక్కుత్' మెన, దస్సి సొంత కామ్ కెర కెరయ్ జలమ్.

10 కిచ్చొక మెలె, "కో కామ్ కెరె నాయ్ గే, కప్పన్ కి నాయ్" మెన ఆడ్ర దిలమ్.

§ 2:13 2:13 నెంజెలె, ప్రబుక సంపజతన మొత్తుమ్తె తుమ్ నోవో జతి రితి తోలితో సంపజంక మెనయ్ జో నిసాన్లన్ మెన ఈంజ ఎత్తి తోలితో రిగిడ్ల నగుమ్ పున్కల్తె అన్సి. * 2:13 2:13 మెలె, పాపుమ్తె తెంతో, జేవ్ కెర్తె పాపల్చి సిచ్చ తెంతో, చి నయ్తాన్చి రాజుమ్ తెంతో రచ్చించుప జంక. * 3:8 3:8 పవులు టంబుగుడ్డల్ తున తెయోర్ కెరెదె.

11 తుమ్మక కిచ్చొక సంగితనుమ్ మెలె, తుమ్మతె సగుమ్జిన్ బద్దుకుమ్ జా కామ్ నే కెరై, ఆరి బుల బుల వేర మాన్సులచి కామ్ పిట్టయ్తతి మెన నూన అస్సుమ్.

12 దస మాన్సులచి రిసొ ప్రబు జలో యేసుక్రీస్తుచి నావ్ తెన్ కిచ్చొ ఆడ్ర దెతనుమ్, కిచ్చొ బతిమాల్పా జా సంగితనుమ్ మెలె, “బమ్మ నెంతె పూచి తెన్ తుమ్ సొంత కామ్ కెరనయి జయ” మెంతనుమ్.

13 బావుడ్లు, చెంగిల్ కామ్క జెతిసి ఎత్తి కెరుక తుమ్ బద్దుకుమ్ జా నాయ్.

14 ఈంజ ఉత్తమతె అమ్ సంగిల్ రితి కో కెరె నాయ్ గే, ‘జోవయింక బుద్ది జెతికయ్ రితి గడియ లాజ్ జవున్’ మెన, జో కొన్సొ గే తుమ్ దెక చి జోవయింక జా మదెనె తుమ్తె బెదవన నాయ్.

15 జోవయింక విరోదుమ్ దెక నాయ్, గని జోవయింక ‘క్రీస్తుచి తెడి బావొ జయెదె’ మెన, జోవయింక బుద్ది జెతె ఎదక జోవయించి పూచి జో కెర్తి రితి జోవయింక సికడ.

ఆకర్చి ప్రార్థన

16 సేంతుమ్ దెతో ప్రబు సొంత తుమ్చి పెట్టి జోవయించి సేంతుమ్ పూర్తి దెతె తవున్. తుమ్ ఎత్తిజిన్క ప్రబు తోడు తవున్.

17 ఆవ్ పవులు సొంత ఆతు తెన్ ఈంజ ఆకర్ కోడు రెగిడ్డిసి. అంచి ఎత్తి ఉత్తమక ‘అంచి’ మెన ఆవ్ ఇసి రెగిడ్డిసి గుర్తు జవున్. అంచి రెగ్గుక ఇసి తయెదె.

18 అమ్వొ ప్రబు జలో యేసుక్రీస్తుచి దయ తుమ్క ఎత్తిజిన్ తెన్ తవున్!

తిమోతిక రెగిడ్లి మొదోల్చి ఉత్త్రుమ్ బారిక్ జలో పవులు తిమోతిక రెగిడ్లి మొదోల్చి ఉత్త్రుమ్

మొదోల్ కోడు

1-2 యేసుక్రీస్తుచి రిసా అంచితె సిక నంపజా నిదానుమ్ జా అంచో పుత్తు జలో రితో ప్రేమ తిలో తిమోతిక జో *క్రీస్తు జలో యేసుచి రిసాచి సుబుమ్ కబుర్ కామ్ కెర్తి రిసా జోచో బారికి జలో ఆచ్ పవులు రెగిడ్లి ఉత్త్రుమ్.

†సుబుమ్ కబుర్ సూనయతి రిసా ఆచ్ బులుక మెన అమ్చో రచ్చించువ కెర్తొసా జలో †దేముడు, పరలోకుమతె అమ్ బెదితి దయిర్మ్ దిలో క్రీస్తు జలో యేసు ఆడ్ర దా అస్సి.

§అబ్బిస్ జలో దేముడుచి అమ్చో ప్రబు జలో క్రీస్తుచి దయ కన్కారుమ్ సేంతుమ్ తుమ్చి ఉప్పిరి తవున్!

సగుమ్జన్ వేర కోడు సికడ్డించి రిసా

3 ఆచ్ మాసిదోనియ ప్రదేసిమి గెతె తిలి పొది తుక ఆచ్ బలవంతుమ్ కెర్తిసి కిచ్చొగె జాన్ని. జా కోడు తుయు నిదానుమ్ కెరు. కిచ్చొ మెలె, “ఒత్తవ అమ్చ నంపజలనతెవ జేవ్ సగుమ్జన్ వేర కోడు నే సికయతి రితి తుయు ఎవెసు పట్టుమతె తా జోవయింక ఆడ్ర దా కెరు” మెలయ్. ఆచ్ అన్నెదస్సి సంగితసి.

4 మాన్సుల్ కచి ఉచర్ల రితయ్ మత్తెలివో, ఉగల్చి ఉప్పిరి ఉగల్చ, పూర్గులచ సెకుమలుతె జెర్మిలనచి రిసాచ మత్తెలివోచ, కొడొచ ఉప్పిరి కొడొచ తగులు ఉచర్తె తత్తతి. జా కామ్క నెంజె. దసచచి రిసా ఉచర్తె తిలె, ఆరి సత్తిమ్ నెంజిలిన్ కి ఒత్త బెద తయెదె, చి ఆరి లట్టబై తవుల, చి ముక్కిమ్క దేముడు దిలి కామ్క అడ్డు కెరెదె. జోవయించి కామ్ జర్గు కెర్తినక కిచ్చొ ముక్కిమ్ మెలె, యేసుక్రీస్తుచి ఉప్పిరిచి నముకుమీ.

5 ఈంజ ఆడ్ర అమ్ కిచ్చొక దెతసుమ్ మెలె, జేవ్ మాన్సుల్ కెర్తి రితి తగుల్ కెరయతి రితి నాయ్, గని తుమ్చి ఉప్పిరిచి ప్రేమయచి రిసా. ఈంజ అమ్చి ప్రేమ కిచ్చొ మాయచి నెంజె. అంచి పెట్టిచి సత్తిమ్కయ్, ‘సత్తిమ్ కెర్తసుమ్’ మెన జానతి దయిర్మ్ జయి, చి కిచ్చొ మాయ నెంజిలి అమ్చి నముకుమ్కయచి ప్రేమయ్ ఈంజ.

6 సగుమ్జన్ మాన్సుల్, వేర బుద్ధులతె బెదిత కామ్క నెంజల కొడొ లట్టబ్బినతె అలవాట్ జా దసితె గెచ్చు మార్పువ జా అస్సి.

7 దేముడుచ ఆగ్గుల్ సికడ్డన అమ్’ మెనంతతి, గని జేవ్ సొంత సంగితిన్చి అర్దుమ్ నేన్తి, చి ‘ఈంజేవ్ జేవ్ కొడొచ ఆగ్గుల్చ అర్దల్ ఇసి దస్సి’ మెన జేవ్ సంగిల్ కి, జేవ్ అర్దల్ జేవ్ కి నేన్తి.

8 దేముడు మోసే తెన్ దిలి ఆగ్గుల్చి అర్దుమ్ సరిగా నాయిమ్ తెన్ సికడ్డె తిలె చెంగిలి మెన అమ్ జానుమ్.

9 గని తుమ్ ముక్కిమ్క కిచ్చొ ఉచర మెలె, సత్తిమ్ ఇండిత మాన్సుల్చి రిసా నాయ్, గని దేముడు పూర్గుమ్ తెంతో ఆగ్గుల్ దా అస్సి మెలె, ఆగ్గుల్ తెన్ బెదితి బుద్ది నెంజల చి సొంత ఇస్సుమ్ అయిల్ రితి ఇండితనచి రిసా, దేముడుక విరోదమ్ జలి రితి ఇండితన చి పాపుమ్ సుదల్చి రిసా, దేముడుచి సుద్ది బుద్ది నెంజలన చి జోవయింక అన్యనచి రిసా ఆగ్గుల్ దా అస్సి. అస్సి కచి రిసా మెలె, అబ్బుదింసిక జవున్, అయ్యుఅబ్బి అత్య కెర్తనచి రిసా, కేన్ మాన్సుక జవున్ అత్య కెర్తనచి రిసా,

* **1:1-2 1:1-2** ‘క్రీస్తు’ మెలె, ‘దొర్పు జలో రచ్చించువ కెర్తొసాక తెర్తయందె చి అంచయ్ జల మాన్సుల్క జో ఏలువ కెరెదె’ మెన ఎత్తి, అదికారుమ్ తిలో దేముడు పూర్గుమ్ తెంతో సంగ తిలో. జలె, యాదుల్ తెన్ ‘క్రీస్తు’ మెలె, జో రచ్చించువ కెర్తొసాచి అర్దుమ్ తయెదె.
 † **1:1-2 1:1-2** ‘సుబుమ్ కబుర్’ మెలె, యేసుక్రీస్తు ఈంజ లోకుమతె జా అమ్చి పాపుమ్ వయ అమ్క నయతాన్చి రాజుమ్ తెంతో విడ్డల్ కెర పరలోకుమచి రాజుమతె బెదయలిన్చి రిసాచి కబుర్. † **1:1-2 1:1-2** నెంజెలి, ‘దేముడు, పరలోకుమతె అమ్ బెదితి వాఱు జలో క్రీస్తుయేను; యోహాను 14:4, 6; ఆడ్ర దా అస్సి. పరలోకుమతె అమ్ బెదితి వాఱు క్రీస్తుచి రిసా జోచి ఉప్పిరి అమ్చి దయిర్మ్ అస్సి, జొయ్య అమ్క దొర్పు జలి దయిర్మ్.’ § **1:1-2 1:1-2** నెంజెలి ‘అమ్క అబ్బి జలో....’

10 లంజెబుద్ది ఇండితనచి రిసా, మున్నుబోదల్ తెన్ మున్నుబోదలీ లంజెకము కెర్తనచి రిసా, మాన్సుల్క దెర లాబుమ్ కెరంతనచి రిసా కి, అబద్దుమ్బుద్ది ఇండితన చి అబద్దుమ్ సాచి సంగితనచి రిసా కి, మెనయ్ దేముడు అగ్గల్ దా అస్సె. అస్సె, జో దేముడు సికడ్డిన్ తె కిచ్చో బుద్ది జలెకి బెదె నాయ్ గే, జా ఎత్తిచి రిసా జో అగ్గల్ దా అస్సె.

11 దేముడు సికడ్డిని కేనె ముక్కిమ్మక డీస్తయ్ మెలె, అంక 'సూనవు' మెన పరలోకుమ్ చి సంతోసుమ్ తిలో దేముడుచి పరలోకుమ్ చి ఉజిడి పరలోకుమ్ చి గవురుమ్ చి రిసాచి సుబుమ్ కబుర్ తెయి డీస్తయ్.

దేముడు పవులు దయ కెర్లన్

12 ఈంజ సుబుమ్ కబుర్ కామ్ తె అంక బుకార్లో అమ్చో ప్రబు జలో యేసుక్రీస్తుక అంచి సర్ల ఆవ్ సంగితని. అంక 'నిదానుమ్ కెరెదె' మెన అంక నంప కెర్లి రితి, ఆవ్ జోవయింది సేప కెరుక ఆవ్ విలువ తిలి రితి జో దెక, అంక నిసాన ఈంజ సేవక దొర్లు జలి సెక్తి ఎత్తి జో దా అస్సె.

13 అగ్గె, జలె, జోవయింక 'దేముడు నెంజె' మెన ఆవ్ దూసుప కెర్లె తిలయ్, జోవయింక విరోదుమ్ జా జోవయించ మాన్సుల్క అల్లర్ కెర్లె తిలయ్, జోవయింక నిస్కారుమ్ దెకితె తిలయ్. గని ఆవ్ సేన కెర అన్యూనుమ్ జా దస్సి కెర్లయ్, చి జోవయించి దయక జో అంక చెమించుప కెర్లన్,

14 అస్సె, అమ్చో దేముడు ప్రబుచి ఎదివాల్ దయక యేసుక్రీస్తుక నంపజతనకయ్ దొర్లు జతి నముకుమ్ ప్రేమయ్ అంచి పెట్టి జెర్లయలన్.

15 కేన్ కోడుచి సత్తిమ్ కచితుమ్ జో దస్సి కెర్లిని దెకయ్తయ్ మెలె, 'పాపుమ్ సుదలీకయ్ రచ్చించుప కెర్లి రిసాయి యేసుక్రీస్తు ఈంజ లోకుమ్ తె బార్ జలన్' మెలిసి. ఆవ్ కి పూర్తి పాపుమ్చో, ఎత్తిజిన్చి కంటు ఆవ్ బగ్గర్ పాపుమ్చో.

16 గని జో దేముడు కిచ్చోచి రిసా అంచి ఉప్పిరి జోవయించి దయ తిలన్ మెలె, ఆవ్ పూర్తి పాపుమ్చో కెర్లె అల్లర్ జో ఓర్పుప జా చెమించుప కెర్లిన్ తెన్ జోవయించి ప్రేమ పూర్తి రుజ్జు జంకయ్. దస్సి, జో నిసాన్లనతె కో అంక దెకిలె, ఆమ్ కి రచ్చించుప జా పరలోకుమ్ తె గెచ్చుమ్దే మెన దయిరిమ్ జా నంపజవుల.

17 ఎత్తి ఉగలు విలువ కెర్లొ రాన్ జలో నే మొర్లొ, నే డీస్తొ ఎక్కి దేముడుక ఉగల్చి ఉప్పిరి ఉగల్క పరలోకుమ్ చి గవురుమ్, మరియాద కలుగు జవున్! ఆమేన్.

తిమోతిక పవులు దిలిసి ఆడ్ర

18 తిమోతి, అంచో పుత్తున్, కిచ్చొ ఆడ్ర తుక దెతని మెలె, కిచ్చొ కామ్ తుచి అత్తి సార్ల కెర దెతని మెలె, తుక 'అంచి సుబుమ్ కబుర్ కామ్ చి రిసా బుల్లు' మెన జా దీని జోవయించ కబుర్లు సంగితనచి అత్తి దేముడు సంగిలిసి తుయి జర్లు కెరు. పాపుమ్ చి ఉప్పిర్చి ఆత్మయుద్ధుమ్ తె జా దీన్ చ జో సంగిల కొడె తుక ఆత్మాయ్దల్ జతు; జోవయించి సుబుమ్ కబుర్ వేర బుద్దుల్ చి ఉప్పిరి జీన్తి రితి

19 చి సత్తిమ్క నిదానుమ్ తా, పాపుమ్ నే ఇండితె, 'చెంగిల్' మెన తుయి జాన్సిని పూర్తి మెన్సు నిదానుమ్ కెరయ్ దయిరిమ్ తెన్ ప్రబుచి కామ్ కెరు. నగుమ్ జన్, జలె, 'చెంగిల్' మెన జేవ్ జాన్సిని నెన ముల కెర, జేవ్ అగ్గె ఒప్పున తిలి నముకుమ్ జెవ్వి పాడ్ కెరన గెల అస్సి.

20 జోవయింతె కొన్సు మెలె, హుమెనైయును చి అలెక్సండ్రు. దస్సి కెర, దేముడుచి మరియాద కడ అస్సి. 'దస్సి పాపుమ్ ముల సిక్కుతు' మెనయ్, జేవ్ సిచ్చు జతి రితి జోవయింక క్రీస్తుచి నావ్ తెన్ నయ్తాన్చి అత్తి ఆవ్ సార్ల కెర దా అస్సి.

2

దాక్ వెల్లో చి రిసా సంగుమ్ చ ప్రార్లన కెర్లిన్ చి రిసాచి కోడు

1 తొలితో తుక ఆవ్ కిచ్చొ మెంతని మెలె, తుమ్ ప్రార్లన కెర్లిన్ చి రిసా కిచ్చొ ఏక్ కోడు ఆవ్ బతిమాల్లు జా సంగితని మెలె, దాకువెల్లో ఎత్తిజిన్చి రిసా, జోవయింక కామ్క జెతిని దొర్లు జతి రితి తుమ్ ప్రార్లనల్ కెర. జోవయింక ప్రబు తోడు తతి రితి ప్రార్లనల్ కెర, చి ప్రబు కెర్ల దయ కమెచి రిసా కి జోవయింక తుమ్ చి సర్ల సంగ.

2 అన్నీ కిచ్చి మెలె, దేనిమక ఏలప కెర్త అదికారుల్ ఎత్తిజన్చి రిసా అమక చెంగిల్ దెకుత్ మెనయ్ తుమ్ ప్రార్దన కెర. అమ్ ఎత్తిజన్ అల్లర్ నెంతె సేంతుమ్ తెన్ జంక జయెదె, అడ్డు నెంతె ప్రబుక బక్తి కెరుక జయెదె, చి మరియాద తెన్ జిమ్ దె.

ఎత్తిజన్ నంపజా రచ్చించుప జతు మెన ప్రబుచి ఉద్దెనుమ్

3 దస్సి ప్రార్దన కెర్లె చెంగిలి, అన్నె 'చెంగిలి' మెన అమ్చొ రచ్చించుప కెర్తొసా జలో దేముడు ఒప్పన్ తయ్.

4 కిచ్చిక మెలె, 'సత్తిమ్ జాన్ తు! రచ్చించుప జతు' మెనయ్ మాన్సుల్ ఎత్తిజన్చి రిసా జోపయించి ఉద్దెనుమ్.

5 కిచ్చి సత్తిమ్ జాన్ తు మెన ఇస్టుమ్ జతయ్ మెలె, జో ఎక్కిలొయి దేముడు జలిసి, చి జోపయింక చి మాన్సుల్ క మదెన జతొసా ఎక్కిలొయి తిలిసి, మాన్సు జా జెర్మున్ అయ్ లో రచ్చించుప కెర్తొసా జలో క్రిస్తు జలో యేసుయి. అన్నయ్ కిచ్చి సత్తిమ్ జేవ్ జానుక జోపయించి ఇస్టుమ్ మెలె,

6 జో కెర్లి ముక్కిమ్ కామ్. మెలె, 'సయ్ తాన్ చి రాజిమ్ తెంతొ రచ్చించుప జతి వరుమ్ ఒండి లోకుమ్ చ మాన్సుల్ సంగితి అవకాసుమ్ తప్పన్' మెనయ్ జోపయించి సొంత జివ్ దా మొర గెచ్చ, అమక నయ్ తాన్ తెంతొ జో నెత్తవ గెలిసి. ఈంజయ్ కోడుచి సత్తిమ్ సరిగా సమయమ్ దేముడు అమక రుజ్జు దెకయ్ లో.

7 దస్సి, "తుయి అంచొ బారికి జా అంచి అదికారుమ్ తెన్ యూదుల్ నెంజిల ఎత్తిజన్చిక, మాన్సుల్ తె గో, చి జోపయింక సుబుమ్ కబుర్ నూనవ బోదన కెరు" మెనయ్ ప్రబు అదికారుమ్ దా అంక తెద్రవ అన్నె. కో జప్పన్ వేర సంగిలె, తుమ్ నంప కెర నాయ్. ఆవ్ సత్తిమ్ సంగితన్.

ప్రబుక కీసి మరియాద దెంక గే

8 ప్రార్దన లచి రిసా జలె, అంచి ఇస్టుమ్ కిచ్చి మెలె, తుమ్ కేన్ బెద జెతి పొది మున్సుబోదల్ ప్రార్దన కెర్తె. దేముడుక పూర్తి సత్తిమ్ తా, పెట్టి కిచ్చి కోపుమ్ నెంతె, కిచ్చి జట్టి జెతిసి నెంతె. నుద్ది తిలి అత్తొ ఉక్కుల ప్రార్దన కెర్తె.

9 దస్సి, కి, తేర్ బోదలు కక్కయ్ లాజ్ నే కెర్లి రితి, బుద్ది తెన్ బడాయ్ నెంతె, చెంగిల్ బందన తంక. నెండి తెన్ బడాయ్ చి పొని. బజార్ గే వెండి గే ముత్యల్ గే తియనుక పొని. బడాయ్ చ పాలల్ కి పొని. మరియాద తెన్ని తంక.

10 దేముడుక బక్తి కెర్లి కేన్ తేర్ బోదక కి సూటి కెర్లిన్ కిచ్చి ముక్కిమ్ మెలె, మాన్సుల్ క కన్యారుమ్ దెకిత జేవ్ చ కమె.

11 తేర్ బోదల్, జలె, ప్రార్దనక బెద జెతన, తుక్లె తా వెన కిచ్చి గవురుమ్ నే ఉచరంతె, నూన నూన సికితె తత్తు.

12 ప్రార్దనక బెద జెతన కేన్ తేర్ బోద కి బోదన కెరుక ఆవ్ ఒప్పి నాయ్, మున్సుబోదల్ చి ఉప్పిరి అదికారుమ్ జేవ్ ఆననుక ఆవ్ ఒప్పి నాయ్, తుక్లె తంకయ్.

13 ఆదాము మెలొ మున్సుబోదక దేముడు తొలితొ జెర్మయ్ లన్. పడ్డొకయ్ తేర్చి జలి హవ్వక జెర్మయ్ లన్.

14 పడ్డొ, సయ్ తాన్ చి అత్తి తొలితొ మోసిమ్ జలొసా ఆదాము నెంజె, హవ్వ మెలి జా తేర్ బోద సయ్ తాన్ చి కోడు సూన పూర్తి మోసిమ్ జా గెచ్చ, దేముడుచి నెలవకోడు పిట్టవ తొలితొ పొరపాట్ జలి.

15 ఒత్త తెంతొ, కన్సల్ నొప్పుల్ తెన్ తేర్ బోదల్, బోదల్ పాయిక మెన దేముడు దా అన్నె. గని జేవ్ కన్సల్ జలికి, కేన్ తేర్ బోద ప్రబుక నంపజా నిదానుమ్ తా ప్రేమ తెన్ ఇండ, వేర బుద్దుల్ నెంతె, ప్రబుచి నుద్ది తెన్ సత్తిమ్ తెన్ ఇండెదె, జయ్యి రచ్చించుప జయెదె.

3

కిసా మాన్సు సంగుమ్ చొ పాస్టర్ జంక

1 'ప్రబుచి కోడు' మెన ఏక కిచ్చి కచితుమ్ తుమ్ దెరనుక మెలె, సంగుమ్ క పాస్టర్ జంక కో ఉచర్తయ్, చెంగిల్ కామ్ ఉచర్తయ్.

2 జలె, పాస్టర్ జతొసా కీసా మాన్సు తంక మెలె, జోవయింక 'సత్తిమచొ మాన్సు' మెన ఎత్తిజన్ చినితి రితి జో తంక. జోవయింక ఎక్కిలి తేర్తి తంక, *కిచ్చొతె కి నిదానుమ్ బుద్ది ఇండితొసా జో తంక, బుద్ది సుద్దొ జో జంక, †జో ఇండితొనక వేర మాన్సుల్చి మరియాద నే కడ్డొసా, వేర తెంతొ జెత మాన్సుల్క మరియాద కెర్తొసా జా, జోవయింక అన్నిమ్ గే టాన్ గే దెంక, చి తెలివి తెన్ బోదన కెర్తొసా జో తంక.

3 నూర్ పితొసా, బేగి కోపుమ్ జతొసా పొని, మెత్తన మాన్సు కావలె. గగ్గల్ జతొసా పొని, డబ్బుల్ ఆన జతొసా పొని.

4 జోవయింక సొంత గేరుక జో బుద్ది తెన్ ఏలుప కెరుక, చి జో సంగిలి కోడు జేవ్ నూన్తి రితి, జోవయింక అన్నె మాన్సుల్క జేవ్ మరియాద దెకిత్ రితి, జోవయింక బోదల్క జో సికడుక.

5 కిచ్చొక మెలె, జోవయింక సొంత గేర్క బుద్ది తెన్ ఏలుప కెరుక జో నేన్సె, దేముడుచి సంగుమ్చ మాన్సుల్క కీసి దెకెదె!

6 నోవర్క సంజలొసా పాస్టర్ జంక బెదె నాయ్. దస్సి అదికారుమ్ నోవర్క సంజలొసాక దిలె, గపురుమ్క పులెదె. †నయ్తాన్ మొదొల్క దస్సి పులిలన్, చి జో సిచ్చ జంక అన్సె. జలె, జో మాన్సు దస్సి పులిలె, జో కి జా సిచ్చ సేడుక జయెదె.

7 పాస్టర్ జతొసాక వేర మాన్సుల్ 'సత్తిమచొ మాన్సు' మెన చినితి రితి జో ఇండుక. నెంజలె, కిజోవయింక మరియాద గెలె, 'జిన్లయ్' మెన నయ్తాన్ సర్ద జయెదె.

సంగుమ్చి వెల్లెల మాన్సుల్ కీన్ తంక

8 సంగుమ్చి సేవ కెర్తె అన్నె వెల్లొ జతన కి దస్సి మరియాద ఆనన్తి సుద్ది ఇండితన తంక. కిచ్చొ మాయబుద్ది నెంజలన జేవ్ తంక. మాయకొడొ లట్టబ్బన పొని. నూర్ నే పితొసా, డబ్బుల్ ఆన తిలన పొని.

9 జోవయింక పెట్టి కిచ్చొ మాయ నెంతె ప్రబు సికడ్డిసి, చి ప్రబుక సంప కెర్తె ఎత్తిజన్క రచ్చన దొర్కు జతయ్చి రినొచి జో బార్ కెర్లి గుట్టు, పూర్తి నిదానుమ్ జేవ్ సంపజా తంక.

10 జా సేవక జోవయింక నే నిసాన్సె, జా కామ్ నే దెతె అగ్గె, జేవ్ సంపజా నిదానుమ్ తతిసి జేవ్ ఇండితొసి సరిగా పరిచ్చొ జా రుజ్జు డీసుక. జోవయింక 'నిజామి సంపజా సత్తిమ ఇండితొతి' మెన రుజ్జు అయ్లె, జా సేవతె బెదప్పక జయెదె.

11 దస్సి కి, దస్సి కామ్తె బెదిత తేర్బోదలు కి మరియాద ఆనన్తి సుద్ది ఇండితన తంక. సొండెలివొ పొని. కిచ్చొతె కి నిదానుమ్ కెరన బుద్ది ఇండుతు. కిచ్చొ రగమ్ కామ్ జేవ్ కెర్తె కి, నముకుమ్ జల మాన్సుల్ జతు.

12 జలె, జా సేవ కెర్తె మున్సుబోదల్ అన్నె కీన్ మాన్సుల్ తంక మెలె, ఎక్కి తెర్పి తెన్ తంక, వడ్డొ జోవయింక బోదల్క జోవయింక గేర్క చెంగిల్ ఏలుప కెర్తన జా తత్తు.

13 కిచ్చొక మెలె, కో దస్సి వెల్లెల మాన్సుల్ రిత జా సంగుమ్చి సేవ నముకుమ్ తెన్ నిదానుమ్ కెరుల గే, మాన్సుల్ జోవయింక గపురుమ్ దెకుల, అన్నె యేసుక్రీస్తుచి సుబుమ్ కబూర్ కామ్ జేవ్ లాజ్ నెంతె కెరుక ఒగ్గర్ దయిరిమ్ జవుల, అన్నె, జా సుబుమ్ కబూర్క 'సత్తిమ' మెన మాన్సుల్ దయిరిమ్ జవుల.

ప్రార్థనక బెద జెతి పొది కీసి తంక

14-15 తుమ్చితె బే బేగి గెచ్చుక అంక ఇస్టుమ్, గని 'ఏక్ వేల ఆవ్ అల్నిమ్ జా గెలె, ప్రబుచి కుటుంబుమ్ జల రిత సంగుమ్చి కీసి ఇండుక గే, సంగుమ్తె కీసి నిదానుమ్ తెన్ తంక గే మదెనె సిక తత్తు' మెనయ్ ఈంజేవ్ కొడొ ఆవ్ రెగిడ్డిసి. ప్రబుక సంపజలన మొత్తుమ్ జేవ్ తిలొ ఎక్కిలొ దేముడుకయ్ కుటుంబుమ్ రితి గేర్ రితి జయెదె. జా కుటుంబుమ్క గేర్క దెకిలె, దేముడుచి బోదనచి సత్తిమక డిట్టుమ్ టీవడ్డి స్తంబుమ్ రితి జయెదె.

16 దేముడుచి గుట్టు కో అగ్గె నేన్సె కి, అప్పె జానయ్ జా గుట్టు కెద్ది ముక్కిమ్చి మెలె,

* 3:2 3:2 గ్రీకు బాన చి జా కోడుతె నూరు గట్టి పతిన్ ముద్దొ కెరంతిన్చి అర్దుమ్ కి, వేర కెమ్మె ఎత్తితె ముద్దొ కెరంతిన్చి అర్దుమ్ కి, తయెదె.

† 3:2 3:2 నెంజలె 'ప్రబుచి గపురుమ్ దెకుయ్ సుద్ది తెన్ తతొసా తంక'. ‡ 3:6 3:6 తొలితె నయ్తాన్ దూత జా తిలన్. § 3:7 3:7 అన్యాయ్ సంగుమ్చి మరియాద కి గెచ్చెదె, ఎత్తి అదికారుమ్ తిలొ దేముడుచి మరియాద కి గెలి రితి డీసెదె.

“జో ఈంజ లోకుమతె మాన్సు జా జెర్మన్ అయ్లన్, చి జోవయింక ‘అస్సె’ మెన మాన్సుల్క రుజ్జు అయ్లి. జోవయించి అత్తసెక్కిక ‘నిజుమి దేముడుచొ’ పుత్తుసి జయెదె’ మెనయ్ రుజ్జు అయ్లి. పరలోకుమచ దూతల్ కి జోవయింక దెకితె తిల. ఒండి లోకుమచ దేసిమలుతె జోవయించి రిసా నూనయ్ జతయ్. ఈంజ లోకుమతెచ మాన్సుల్ ఒగ్గర్జిన్ జోవయింక నంపజయి అస్సి. ఉక్కిల్ జా పరలోకుమతె వెగ గెచ్చ గవురుమ్ జయి అస్సె” మెన ఒప్పన అస్సుమ్ గెద. జా నిజుమ్.

4

తిమోతిక దెతి బోదన

1 దేముడుచి నుద్ది తిలి అత్తు కిచ్చొ ఏక్ కోడు కచితుమ్ సంగితయ్ మెలె, పడ్డొక సగుమ్జిన్ క్రీస్తుచి ఉప్పిరిచి నముకుమ్ పిట్టవన, మోసిమ్ కెర్తె అత్తుల్క చి బూతల్ సికడ్డన్క నూనుల.

2 క్రీసి దస్సి మోసిమ్ జవుల మెలె, కిచ్చొ చెంగిల్ గే పాపుమ్ గే చినితి సెక్కి పిట్టవన్ల మాన్సుల్ ‘సత్తిమ్’ మెన జోవయింక అబద్దుమ్ సంగుల.

3 “పెండ్లి జంక గారు” మెనుల, అస్సె, కిచ్చొ కిచ్చొచి రిసా ‘జా కంక గారు’ మెన దన అబద్దుమ్చ మాన్సుల్ సికడుల; ‘సర్ల తెన్ కతు’ మెనయ్ ఎత్తి. అదికారుమ్ తిలో దేముడు జెర్మవ జోవయింక నంపజా సత్తిమ్ జాన్తనక జేవ్ వస్తువల్ దా తిలె కి.

4 నాయ్, గెద, దేముడు జెర్మయ్లిసి ఎత్తి చెంగిలి, చి “తుయి దిలది” మెన సర్ల తెన్ జోవయింక ఒప్పనై, కిచ్చొయ్ కి కంక జయెదె.

5 కిచ్చొక మెలె, “కంక జయెదె” మెన దేముడు సంగిలి కోడుచి రిసా గే, పడ్డొ కతోసా జోవయింక ప్రార్దన కెర్లి రిసా కి జా వస్తువ నుద్ది అస్సె.

6 జలె, ఒత్తవ నంపజలనక తుయి ఈంజ ఎత్తి సికడ్డె, క్రీస్తు జతో యేసుక చెంగిలో సేవ కెర్లిసా జస్సె. అస్సె, క్రీస్తుచి ఉప్పిరిచి నముకుమ్చి బోదన, సరిగచి బోదన, తుయి అప్పెక నిదానుమ్ ఇండిలి సత్తిమి తుచి పెట్టి పలితుమ్ దెరెదె.

7 మాన్సుల్ అచ్చె ఉచ్చర్లి దేముడుక విరోదుమ్ జతిసి చి మంతిరివొచ వెర్లి వెర్లి కొడొ చి జోవయించ మత్తెలివొక తుక దూరి కెరు.

ప్రబుచి సేవ ఎక్కి నిదానుమ్ కెరుక పూచి తెన్ అలవాట్ కెరను.

8 కిచ్చొక మెలె, కామ్ కెర కెర ఆగ్ డిట్టుమ్ కెరంతి అలవాట్ చెంగిలి, గని ప్రబుచి సేవ కెర్లితె * అత్తుక నిదానుమ్ కెరనై, అత్తుకయ్ డిట్టుమ్ జలె, మాన్సుక ఒగ్గర్ చెంగిలి. కిచ్చొక మెలె, ఈంజ లోకుమతె కి కామ్క జెతయ్, పరలోకుమతె గెలె కి కామ్క జయెదె.

9 “ప్రబుచి కోడు, ఈంజ” మెన కచితుమ్ దెరను.

10 కిచ్చొక మెలె, అమ్ అత్తుక ప్రబుక పూర్తి నిదానుమ్ జా అత్తుక డిట్టుమ్ జతి రిసా కిచ్చొక బద్దుకుమ్ నే జతె సైవల్ కెరన్లి రితి ఒత్త అస్సుమ్ మెలె, జీవ్ తిలో ఎక్కిలో దేముడుచి ఉప్పిరి అమ్చి దయిరిమ్ తియి అస్సుమ్. జొయ్యి ఎత్తిజిన్క రచ్చించువ కెర్లిసా, అస్సె ముక్కిమ్క జోవయింక నంపజలనకయ్.

11 ఈంజ బోదన ఎత్తిచ కొడొ తుయి అదికారుమ్ తెన్ సికడ్డె తా.

12 తుయి ఉబెడొ రిత్ దాక్ జలెకి, తుక జేవ్ నిస్కారుమ్ నే దెకితె తుక దెక సికిత్ రితి తుయి ప్రేమ తా, ప్రబుచి ఉప్పిరిచి నముకుమ్క డిట్టుమ్ నిదానుమ్ తా, ప్రబుచి నుద్ది తా, చెంగిల్ లట్టబ్బె తా, సత్తిమ్ ఇండితె తా. తుయి దస్సి జలె, తుక దెక జేవ్ కి సికుల.

13 ఆవ్ జెతె ఎదక సంగుమ్తె దేముడుచి కొడొ నదు కెర్తె తా, బుద్ది సికడ్డె తా, చి బోదన కెర్తె తా.

14 పడ్డొ, జా నుట్టు, ప్రబుచి సంగుమ్చ వెల్లి మాన్సుల్చి నబతె తిలన తుక †బోడి చడ ప్రార్దన కెర్లికయ్,

* 4:8-8 కొరిందిల్క రెగిడ్లి ఏక్ నంబర్ ఉత్తమ్ 9:24-27 డక. † 4:14:14 1:8, చి తిమోతిక రెగిడ్లి 2 నంబర్ ఉత్తమ్ 1:6 డక.

జోవయించ కబుర్లు సంగితో ఎక్కిలోచి అత్తి దేముడు తుచి రిసా కోడు సంగిలన్. జో దేముడు తెదోడి దిలి వరుమ్ తుయి పాడ కెరు నాయ్; నిదానుమ్ వాడిక కెర్తె తా.

15 జలె, తుచి పూచి తిలి ఈంజ ఎత్తి తుయి ఎక్కి మెన్సు నిదానుమ్ కెర్తె తా, చి తుక 'అత్తుక వడ్డ అస్సె, డిట్టుమ్ అస్సె, జోవయింక సంప కెరుక జయెదె' మెన ఎత్తిజిన్ చినుల.

16 తుయి జాగర్త దెకను. తుయి కిచ్చొ సికడై గే సరిగా ఉచర, సిక్కడు. జా బోదన సరిగా నిదానుమ్ సికడై తా. కిచ్చొక మెలె, జా సుబుమ్ కబుర్ తెయి తుచి రచ్చున కి, సూన్తనచి రచ్చున కి.

5

వేర వేర మాన్సుల్క కీసి దెకుక గే సంగిలిసి

1 కేన్ జవున్ మంత్రో మాన్సుల్క కిచ్చొ జవున్ కెర తిలె సరి కెర గని, జోవయింక గోల కెర నాయ్. గని అబ్బొద్క కీసి మరియాద తెన్ సంగుక జయెదె, ప్రేమ తెన్ జో మాన్సుల్క సంగు. ఉబెడల్క 'అన్నోబావో' మెలి రితి దెక.

2 మంత్రివో తేరబోదల్క 'అయ్య' మెలి రితి దెక, ఉబెడివోక 'బేని' మెలి రితి పూర్తి సుద్ది తిలి మెన్సు తెన్ దెక.

3 మాలజ్ జా నిజుమ్ రండెల్ జల తెరబోదల్క గవురుమ్ దెక తోడ కెర చెంగిల్ దెకితె తా.

4 గని, కేన్ రండెల్ మాన్సుక పుత్తర్లు జవున్, దువిసివో జవున్, నత్తుర్నివో జవున్, నత్తిన్నివో జవున్ అస్సి జలె, జెవ్వి ముక్కిమ్క జోవయించి సొంత మాన్సుల్క దెకితి పూచి కెరనుక సిక్కుతు, అయ్యసిని పాయిలి సైమ నెతోయిలి రితి. 'దస్సి కెరుక చెంగిలి' మెన దేముడు సంగితయ్.

5 గని కో నిజుమ్ రండెలి జా, జాక కోయ్ మాన్సు తోడు నెంజలె, దేముడుక 'జేయ్యి రచ్చించువ కెర్పు' మెన, జా మాన్సు రాతి మెద్దెన్ జోవయించ ప్రార్దన కెర్తె తయెదె. జో తెన్ తోడ నజీతె తయెదె.

6 గని వేర బుద్దల్ చి జలె, జేవ్చి అసల్కయ్ సుకుమ్ తెన్ జలె కి, దస్సి జలె జతె పొది అత్తుక మొర్లి రితి జా తయెదె.

7 జలె, రండెల్ మాన్సుల్చి మరియాద నే గెతి రితి జేవ్ జతి రిసా, ఇసి అడ్డ దేను.

8 కో జలెకు జోవయించ సొంత మాన్సుల్క, అన్నె ముక్కిమ్క సొంత కుటుంబుమ్క చెంగిల్ దెకె నాయ్ గే, పొసి నాయ్ గే, జో మాన్సు ప్రబుక నే సంపజలి రితి జా, సంపనెంజిలోసిచి కంట పాపుమ్చో జయెదె.

9 కేన్ రండెల్ మాన్సుచి వయసు అరవయ్ వెర్చుల్క తొక్కి నెంజలె, జా ఎక్కిలోక పెండ్లి జా తిలిసి జలె, సంగుమ్చి సేవ కెర్తనతె జాక టీవడుక జయెదె.

10 గని జాక కీసి మాన్సు మెన ఎత్తిజిన్ జానుక మెలె, కన్యారుమ్ దెకితి మాన్సు జా తంక, జేవ్చిచి బోదల్క చెంగిల్ పొస తంక, వేర తెంతో అయల మాన్సుల్క మరియాద కెర తతె తంక, గేత్ అయల నముకుమ్ జల వెల్లెల మాన్సుల్క చట్టో దోవ తంక, బాదల్ తిలసక తోడు కెర తంక. కిచ్చొ జలెకి చెంగిల కమె కెర్తె మాన్సు జా తంక.

11 గని తొక్కి వయసుచ రండెల్ మాన్సుల్క సంగుమ్చి సేవతె తుమ్ టీవడ నాయ్. వేర అసల్ జా ప్రబుక పచ్చిల్ రితి జలె, అన్నె పెండ్లి జంక అస జవుల.

12 జేవ్ "ప్రబుచి సేవ కెర్తె తయిందె, అన్నె పెండ్లి జంక నెసి" మెన తోలితో సంగ తా, జా సేవతె బెదిలె పడ్డో అన్నె పెండ్లి జా ములిలె, అబద్దుమ్ జలి నింద సేడుల.

13 పడ్డో, రండెల్ జల ఉబెడిటె రితసక ఎత్తి తోడు దిలె, బద్దుకుమ్ జా పేడివో పేడివో బుల బుల, సొండెల్ కొడె సికుల. వేర మాన్సుల్చి కామ్చి నెడిమి జా జోవయించి కామ్ పిట్టవుల, నెంజలె కొడె లట్టబుల.

14 జాకయ్, తొక్కి వయసుచ రండెలివో అన్నె పెండ్లి బోదల్ పాయ జోవయించి గేర్ తిలిసి ఎత్తి చెంగిల్ దెకుత, చి జోవయించ రిసా అమ్ కో నయ్తాన్చ మాన్సుల్ అమ్క నింద కెరుక వాట్ తయె నాయ్.

15 రండెల్ జల ఉబెడిటె సగుమ్జిన్ ప్రబుచి సేవ ముల దా నయ్తాన్ సికడ్డి బుద్దితె గెచ్చు అస్సి.

రండెల్ మాన్సుల్క కో దెకుక

16 జలె, ప్రబుక నంపజలి కేన్ మాన్సుచ మాన్సుల్తె రండెల్ మాన్సుల్ అస్తి జలె, జా నంపజలి మాన్సు జోవయింక దెకితె తవున్. జేవ్చయ్ రండెలివొక సంగుమ్ పోసుక పోసి. చి ఎద్దరె తోడె నెంజల రండెలివొక తోడు కెర్తి డబ్బుల్ సేంనడ జోవయింకయ్ తోడె దెతె.

17 ప్రబుచి సంగుమ్చి సేవ కెర్త వెల్లో మాన్సుతె కో చెంగిల్ ఎలువ కెర్తతి, ముక్కిమ్క జోవయింతె కో నిదానుమ్ బోదన కెర్తతి బుద్ది సికడ్తతి, వేర వెల్లో మాన్సుల్క చి కంట జోవయింక ప్రెజల్ ఒగ్గర్ విలువ దెక అన్యాయ్ తోడు దెతు.

18 కిచ్చొక మెలె, దేముడుచి కోడు మోసేచి అత్తి రెగిడ్డిన్తె కిచ్చొ మెన ఏక్ టాలి ఉచరుక జయెదె మెలె, * “కెల్లి గిడ్డల్ దాన్ సుదయ్తె పొది సుదయ్తె బెయిలల్క మూంతి బందుక నెంజె. పోన” పడ్డె, † “కామ్ కెర్తొసా జోవయింక జతమ్ నజనుక నాయిమ్” మెన సంగిలి కోడుచి అర్దుమ్ తుమ్ కెరన.

19 సంగుమ్చ వెల్లెల మాన్సుల్తె కక్క జవున్ కో జలెకు కిచ్చొ జవున్ నింద కెర తిలె, దొగుల తీర్గ సాచుల్చి సాచి సూన్లెకయ్, జా సాచి బెదిలెకయ్, జా నింద సూన్తి రితి విలువ దెకు.

20 గని కో సంగుమ్చ వెల్లెల మాన్సుల్ పొరపాట్ జస్తి తత్తతి గే, సంగుమ్చ ఎత్తిజిన్చి మొక్కె జోవయింక తీర్పు సంగు, చి దెక తా తిల మాన్సుల్ దన తప్పుల్ కెరుక బియుల.

21 దేముడుచి మొక్కె, యేసుక్రీస్తుచి మొక్కె, పరలోకుమ్చ దూతల్చి మొక్కె, తుక అవ్ ముక్కిమ్క సంగితసి మెలె, రుజ్జుల్ సరిగా నే సూన్తె తీర్పుల్ కెరు నాయ్ అన్నె కక్క మొకమాటుమ్ నే దెకితె తీర్పు కెరు.

22 పడ్డె, బమ్మ తెన్ కక్క బోడి చడ ప్రబుచి కామ్క అదికారుమ్ దేసు నాయ్. చెంగిలో నెంజిలో మాన్సుక దస్సి అదికారుమ్ దిలె, జోవయింక పాపుమ్తె తుయి బెదిల్ రితి జయెదె. అన్నె మాన్సుల్చి పాపుమ్తె తుయి బెదు నాయ్. దసితె దెర్పు నే సేడ్డె, ప్రబుచి సుద్ది తెన్ తా.

23 పడ్డె, సుద్ది కాపలె మెన తుయి రితి పాని పితసి, కిచ్చొగె. గని అప్పె తెంతో తుచి వెట్టిచి బాద చి తుచి అగ్గచ అన్నె బాదల్ చి రిసా ఓస్తు మెన ఇదిల్ ద్రాచ రస్సుమ్ పి.

24 జలె, తీర్పు కెర్తినచి రిసా అన్నె కిచ్చొ మెలె, బమ్మ తెన్ తీర్పు కెరు నాయ్. సంగుమ్జిన్ పాపుమ్ కెర్తినె సొస్తుమ్ డీస్టయ్, చి రుజ్జు కెరుక జతయ్. గని అన్నె సంగుమ్జిన్ కెర్తి పాపుమ్ లుంక తా, ఎక్కి పడ్డెకయ్ డీసెదె.

25 దస్సి కి, నత్తిమ్ కమె సొస్తుమ్ డీసుల, గని మొదొల్కయ్ నే డీసెలెకి, ఎల్లకాలుమ్ లుంకడుక నెంజె.

6

ఎజొమాన్సుక గొతిమాన్సుల్, గొతిమాన్సుల్క ఎజొమాన్సు కిసి దెకుక గే సంగిలిసి

1 కో నంపజల గొతిమాన్సుల్ జా అస్తి గే, జోవయింక ఎజొమాన్సుక గవురుమ్ దెకితె తత్తు, చి జేవ్ ఇండితి బుద్దిచి రిసా ప్రబుచి నావ్క జవున్ జోవయింక సుబుమ్ కబుర్ జవున్ కో నిస్కారుమ్ ఉచరుక నాయ్.

2 జేవ్ గొతి మాన్సుల్తె కచ ఎజొమాన్సు నంపజల జవుల గే, * అమ్చ ఎజొమాన్సు అము ఎక్కి రిత జలమ్ గే మెన ఉచరుక జలెకి, జేవ్ గొతిమాన్సుల్ జోవయింక ఎజొమాన్సుక గవురుమ్ దెకుక ముల్లు నాయ్. ‘జేవ్ ఎజొమాన్సు కి ప్రబుక నంపజలన’ మెనయ్ జయి ప్రేమకయ్ అగ్గెచి కంట అన్నె నిదానుమ్ జోవయింక సేవ కెరుక. ఇన నిదానుమ్ బుద్ధుల్ తుయి సికడు.

డబ్బుల్ ఆనక వేర బుద్ధుల్ చి రిసా సంగిలిసి

3 జలె, ప్రబు జలొ యేసుక్రీస్తుచ చెంగిల్ కెర్త బుద్ది కొడొక చి జోవయింతెన్ బెదితి సుద్దిబోదనక కో నెన కెర వేర సికడ్డె,

4 గవురుమ్క జాని మెన్సు కి, జో కిచ్చొయ్ నేనె. ప్రబుచి నర్తబుద్ది జోవయింక పెట్టి నెంజిలి రిసా, ఆరిచ కొడొచి ఉప్పిరి కొడొ తెలిచి తెన్ బెదవ జుజయ్తి ఆనయ్ తెన్ జో మాన్సు తయెదె. కొడొ తెన్ దస్సి

జాజయితిని, చి దస్సిచిక జట్టు జతిని, జలె, కిచ్చో పలితుమ్ దెర్తయ్ మెలె, గోసల్, టంటల్లు, దూసినల్, ఎక్కిలోచి ఉప్పిరి అన్నెక్కో అన్యాలల్ జతిని,

5 నే కుట్టిత తగులు, దనయ్ బాదల్. దనయ్ బుద్ధల్ జత మాన్యుల్చ ఆత్మల్ పాడ్ జా అస్సి, జోవయించి పెట్టి కిచ్చోయ్ సత్తిమ్ నాయ్. 'దేముడుచి కామ్ కెర్తి రితి అమ్ డీనిలె, డబ్బుల్ లాబుమ్ జయెద' మెన ఉచర నాయ్ దేముడుచి రిసా దన తెలివి కొడో మాన్యుల్క సికడ్తతి.

6 నిజుమి దేముడుచి కామ్ కెర్తి లాబుమ్ తయెది. గని డబ్బుల్చి లాబుమ్ నెంజె, అన్నె 'జో దిలిసి సాలు' మెలి రితి సేంతుమ్ అమ్చి పెట్టి తిలెకయ్ అమ్క జా లాబుమ్, ఆత్మయ్ రగమ్ లాబుమ్ తయెది.

7 'జో దిలిసి సాలు' మెలి బుద్ది తెన్ అమ్ కిచ్చొక తంక మెలె, అమ్ జెర్మి ఈంజ లోకుమ్తె కిచ్చో ఆనుమ్ నాయ్, చి మొర్లై కచితుమ్ ఈంజ లోకుమ్ తెంతో కిచ్చోయ్ నెము నాయ్.

8 గని అమ్క కతిసి గలంతిసి తిలె, సాలు.

9 గని ఈంజ లోకుమ్చి సొమ్మారుమ్ జంక ఆన జలస సయ్తాన్చ కమొ కెరయ్తినతె దెర్ను సేడ్తతి, బోనుతె సేడ్తి రితి. దస్సి ఆన తిల మాన్యుల్ బుద్ది నెంజల పాడ్ కెర్తి ఆసల్తె దెర్ను సేడ్తతి. దన ఆసల్ మాన్యుల్క పూర్తి పాడ్ కెర నాసనుమ్ కెర్తతి.

10 కిచ్చొక మెలె, పాపల్ ఎత్తిక డబ్బుల్ ఆన చేరు రితి జా ఆదారుమ్ జయెది. దస్సి ఆన జలి రిసా, సగుమ్జిన్ నంపజల ప్రబుక ముల, ఒగ్గర్ బాదల్ జా జోవయించి పాపుమ్ కతతి.

నిదానుమ్ తా మెన తిమోతిక పవులు రెగిడ్డిసి

11 తుయి, మాత్రుమ్, దేముడుచో మాన్యు. దస్సి పాపుమ్చి ఎత్తిక తుయి దూరి తా. కిచ్చోచి రిసా తుయి ఆన జంక మెలె, సత్తిమ్ ఇండితిసి, ప్రబుక పూర్తి నిదానుమ్ తతిసి. నముకుమ్ తతిసి, ప్రేమ, బాదల్ ఒర్పుజ జతి సెక్కి, గగ్గోలే నే జతి సేంతుమ్ బుద్ది మెత్తన బుద్ది తతిసి, దసచయ్ తుయి ఆన జా.

12 తుచి నముకుమ్చి బంపమానుమ్ దొర్కు. జతె ఎదక తుయి పూర్తి నిదానుమ్ ప్రబుచి కామ్ కెర్తి తా. ఒగ్గర్జిన్ సాచుల్చి మొక్కై ప్రబుక తుయి నంపజలిసి తుయి ఒప్పన్లు తెంతో, పరలోకుమ్తె గచ్చు కెయ్చ తెయ్చ తా గతి చి జోవయింతెన్ అప్పె ఇండితి పరుమ్ తుక ప్రబు దిలన్, గెద. జా పరుమ్ దెరను.

13 యేసుక్రీస్తు † పాంతి పిలాతు అదికారిచి మొక్కై సాచి సంగ ఒప్పన్లొ, గెద. జలె, ఎత్తిక జీవ్ దెతో జీవ్ తిలో దేముడుచి మొక్కై పడ్డో జో క్రీస్తుచి మొక్కై

14 తుక కిచ్చో ఆడ్ర అవ్ దెతసి మెలె, ప్రబు జలో అమ్చో యేసుక్రీస్తు ఈంజ లోకుమ్తె అన్నె ఉత్త జెతి ఎదక, ప్రబుచి సుద్దిచి రుజ్జు తతి రితి, జోవయించి గవురుమ్ నే కడ్డ రిసా, ప్రబు తుక తియార్లొ కామ్ తుక దిల ఆడ్రల్ ఎత్తి. తుయి నిదానుమ్ కెర్తి తా.

15 యేసుప్రబు కెయ్చ అన్నె ఉత్త జెయెది మెలె, దేముడు అబ్బోసి కెయ్చ జర్గు కెరెద గే, తెదోడకయ్. జో దేముడు అబ్బోసి ఎత్తిచి కంట వెల్లో తిలో ఎక్కిలో దేముడు, రాసల్క రానో జలో, ఎజోమాన్లుక ఎజోమాని జలోసా.

16 జో దేముడు అబ్బోసి ఎక్కిలో నే మొర్లై ఎల్లకాలుమ్ తతోసా. జో జతి పరలోకుమ్చి ఉజిడి కెర్తి మెలె, కోయి ఇదిల్ పాసి కి గెచ్చుక నెతిరి. కో మాన్యు కెయ్యుకి జోవయింక దెకితి నాయ్, దెకుక నెతిర్తి. జోవయింక గవురుమ్ అదికారుమ్ కెయ్చ తెయ్చ తవున్! ఆమేన్.

సామ్సార్లుక సంగిలి కొడో

17 జలె, ఈంజ లోకుమ్చి అస్సి కలుగు జల సామ్సార్లు జల నంపజలన్క తుయి కిచ్చో ఆడ్ర దేను మెలె, గవురుమ్ ఉచరంతు నాయ్, పడ్డో, సామ్సారుమ్క నంప కెర్తు నాయ్. జా ఎత్తి పాడ్ జతిసి. గని దేముడుచి ఉప్పిరి జోవయించి నముకుమ్ పూర్తి తిత్తు. అమ్ మాన్యుల్ సంతోసుమ్ తెన్ వాడిక కెర్తి రితి అమ్క దొర్కు. జలిసి ఎత్తి దెతోసా జోయ్యు, గెద.

18 జేవ్ సామ్సార్లు, జలె, కిసి తంక మెలె, అన్నె మాన్యుల్క కన్యారుమ్ దెకిత ఒగ్గర్ కమొ కెర్తు. దస్సి తిలె, ఆత్మక సామ్సారుమ్ జవుల. జేవ్ మున్యు నే జతె, నెంజలసక సర్ద తెన్ దర్నుమ్ తెన్ దెతు.

19 దస్సి ఇండిలె, జోవయింక కలుగు జతి అత్మ సాహ్యారుమ్ పడ్డొక కి జోవయింక కామ్క జయెదె, మొరై పరలోకుమ్తె గెచ్చ కెయెక తెయెక చెంగిల్ జతి వరుమ్ ప్రబు దిలిసి జోవయింక జయిమ్ జయెదె.

ఆకర్ కోడు

20 ఓ తిమోతి, ప్రబు తుచి అత్తి సార్పు కెర దిలి, జోవయించి కామ్ తుయి కెర్తి వరుమ్ దెర నాయ్, జోవయించి సత్తిమ్ సికడై తా. సుద్ది నెంజల ఆరిక ఆరిచ కొడొ, దేముడుక దస కొడొ విరోదుమ్ జతతి, గెద, దస కొడొక, చి 'గ్యానుమ్' మెన గ్యానుమ్ నెంజలిన్క, చి మాస్సుల్ కొడొ జాజయ్తిన్క తుయి దూరి కెరు.

21 కిచ్చొక మెలె, 'గ్యానుమ్' మెన గ్యానుమ్ నెంజలిన్క 'జయ్యి సత్తిమ్' మెన సగుమ్జిన్ సంగ సికడ, నంపజల సుబుమ్ కబుర్తె ముక్కిమ్ తిలిసి పిట్టవన, పొరపాట్ జా అస్తి.

ప్రబుచి దయ తుమ్చి తెన్ తవున్.

తిమోతిక రెగిడ్లి దొన్నిచి ఉత్త్రమ్ బారిక్ జలో పవులు తిమోతిక రెగిడ్లి దొన్నిచి ఉత్త్రమ్

మొదోల్ కోడు

1-2 ప్రేమ తిలో అంక పుత్తు జలో రితో తిమోతిక, దేముడుచి సెలవచి రిసా యేసుక్రీస్తుచి రిసా నుబుమ్ కబుర్ కామ్ కెర్తె రిసా జోచో బారికి జలో ఆవ్ పవులు రెగిడ్లి ఉత్త్రమ్.

“అంచ పుత్తు జలో యేసుక్రీస్తుక కో నంపజవుల గే, జేవ్ పరలోకుమ్చి రాజిమ్తె బెద, మొర్లె అంచి తెన్ జింక ఆవ్ వరుమ్ దెతసి” మెన ప్రమాసుమ్ కెలో దేముడు అంక జోవయించి కామ్క నిసాన అదికారుమ్ దా అస్సె.

జలె, దేముడు అబ్బోనచి అమ్క ప్రబు జలో క్రీస్తు జలో యేసుచి దయ కన్యారుమ్ సేంతుమ్ తుచి ఉప్పిరి తవున్!

తిమోతి చి నముకుమ్చి రిసా పవులు సర్ల జలిసి

3 దేముడుచి సేవ పొరపాట్ నెంతె సత్తిమ్ తెన్ ఆవ్ కెర్తెసి మెన అంక దయిరిమ్. అంచ పూర్ణుమ్చ కి జోకయ్ జొకర్తె తిల. ఆవ్ కెయ్య ప్రార్దన కెర్లె కి, తుక నే పచ్చితె, తుచి రిసా జో దేముడుక అంచి సర్ల ఆవ్ సంగితసి.

4 తుక అన్నె దెకుక కోరప జా, రాతి మెద్దెన ఉచర్తె తత్తసి. తుక అన్నె దెకిలె, పూర్తి సర్ల జయిందె. తుయి ఏడ్లిసి ఆవ్ ఏద కెర్తెసి,

5 చి మాయ నెంజిలి తుచి నిదానుమ్చి నముకుమ్చి రిసా ఉచర్తె, మంతిరఅప్పుది జలి లోయి చి అయ్యది జలి యునికె చి అగ్గె తెంతో చి నముకుమ్ తిలిసి ఆవ్ ఏద కెర్తెసి. జోవయించి ఎదిలి నముకుమ్ తుచి పెట్టి కి తయెదె.

6 జాకయ్ తుక ఆవ్ అప్పె కిచ్చి ఉచరవడ్డసి మెలె, జా సుట్టు ఆవ్ తుక బోడి చడ ప్రార్దన కెర్లెసి తెన్ దేముడు తుచి పెట్టి దిలి వరుమ్ అన్నె ఒగ్గర్ పలితుమ్ దెర్తి రితి తుయి వాడిక కెర్తె తా.

7 కిచ్చొక మెలె, జోవయించి ఆత్మ అమ్చి పెట్టి దిలిసి అమ్క బియ్యార్ల తత్తు మెన నాయ్, గని “అంచి పరలోకుమ్చి ఆత్మనక్కి, అంచి ప్రేమ, అంచి తిరించి బుద్ధి జోవయించి పెట్టి కామ్ కెర్తె తా పలితుమ్ దెర్పు”.

8 జాకయ్, పూర్తి దయిరిమ్ తెన్ తా, అమ్చో యేసుప్రబుచి రిసాచి సాచి సంగుక తుయి లాజ్ జా నాయ్, గని తుచి పెట్టి తిలి దేముడుచి సెక్కిక నుబుమ్ కబుర్ నూనయ్తి రిసాచి అల్లర్ తుయి కి ఓర్పుప జా. పడ్డో, జోవయించి రిసా ఆవ్ జేల్తె తిలిసక లాజ్ జా నాయ్.

9 ఈంజో దేముడు అమ్క నిసాన నయ్తానచి రాజిమ్ తెంతో రచ్చించుప కెర, జోవయించి నుద్ది అమ్ ఇండిత రితి అమ్క బుకారా అస్సె. అమ్క కిచ్చి పున్నిమ్ అమ్ కెర్లెసిచి రిసా నాయ్, గని “క్రీస్తు రచ్చించుప కెర్లెసా జతో యేసుచి అత్తి జోవయించి ఉప్పిరి అంచి దయ తియెదె” మెనయ్, కిచ్చి నే జెర్మయ్లి అగ్గె తెంతో సొంత * ఇష్టుమ్ జా అమ్క జా వరుమ్ దిలన్.

10 అమ్చో రచ్చించుప కెర్లెసా జలో యేసుక్రీస్తు ఈంజ లోకుమ్తె బార్ జలిసి తెన్ ఈంజ జో దిలి వరుమ్ రుజ్జు జా అస్సె. యేసుప్రబు మొర్పుచి ఉప్పిరి జీన పాడ్ కెర గెల కెర, పరలోకుమ్తె గతి జీవ్, ‘పరలోకుమ్తె గతి అమ్కానుమ్ దొర్పు జయెదె’, ‘నానినుమ్తె గెచ్చుక పిట్టుక జయెదె’ మెన రుజ్జు దెకవ, జా రుజ్జు జలిసచి రిసాచి నుబుమ్ కబుర్ అమ్క దొర్పు కెర అస్సె.

11 జలె, ఈంజ నుబుమ్ కబుర్ ఆవ్ నూనవ బోదన కెర్తె రిసా జోవయించి బారికి జా బులుక మెన, ప్రబు అంక నిసాన అదికారుమ్ దిలన్.

12 ఈంజయి కామ్ ఆవ్ కెర్లి రిసా ఆవ్ ఇన సైమల్ సేడ్డసి. గని అంక లాజ్ నాయ్. కిచ్చొక మెలె, ఆవ్ నంపజలోసాక జాని, చి *జోచి అత్తి ఆవ్ సార్పు కెర్లెసి కిచ్చో పాడ్ నే జతి రితి, లోకుమ్చ మాన్సుల్క తీర్పు

* 1:9 1:9 రోమయల్ 8:29-30, ఎఫెసు1:5. † 1:12 1:12 నెంజెలె, ‘అంచి అత్తి జో సార్పు కెర్లెసి కిచ్చో...’

కెర ఎలువ కెరుక మెన ప్రబు గవురుమ్ తెన్ అన్నె జెతికయ్ జా వెల్లి దీసి ఎదక జో దెకుక జోక సెక్తి అన్నె మెన అంక పూర్తి దయిరిమ్ అన్నె.

13 జలె, అంచెతె తుయి సూన్ బోదన కొణొ రితి యేసుక్రీస్తుచి తెడిచి నముకుమచి ప్రేమ తెన్ తుయి నంపజలెన్క సెకడుక ములు నాయ్.

14 దేముడుచి సుద్ది తిలి అత్త అమచి వెట్టి సెకణ్ణొ ప్రబు తుచి అత్తి సార్పు కెర దిలి సత్తిమ్ కిచ్చొ పాడే నే జతి రితి తుయి జాగర్ల దెకితె తా.

15 ఆసియా ప్రదేసీమ్ ప ఎత్తిజెన్ అంక ములెల మెన జాన్సి. జోవయింతె పుగిల్లు చి హెర్బొగెనే, గెద.

16 గని ఒసేసిపారుక, జలె, జోవయించి గెరచ ఎత్తిజెన్క ప్రబు కన్యారుమ్ దెకితె తవున్. జో ఒగ్గర్ సుట్టు అంక ప్రేమ దెకవయ్ దయిరిమ్ కెర్లన్. ఆవ్ జేతె తిలిన్చి రిసా జో లాజ్ జయె నాయ్.

17 జో ఇత్తల్ ఈంజ రోమ్ పట్టుమతె జా, సర్ల తెన్ అంక చజ జా తోడ దిలన్.

18 'యేసుప్రబు అన్నె ఉత్త జా లోకుమచక తీర్పు కెర్తి జా వెల్లి దీసి ఒసేసిపారుచి ఉప్పిరి జో కన్యారుమ్ తితి రితి దేముడు వరుమ్ దెవున్' మెనయ్ అంచి ప్రార్లన ఎవెసుతె జో తోడ కెర్లిన్ ఎత్తి తుయి పూర్తి జాన్సి.

2

తిమోతిక పవులు అన్నె నిదానుమ్ సంగిలిసి

1 అంచొ పుత్తు, క్రీస్తు జలొ యేసుచి దయక తుక జో దిలి సెక్తిక తుయి డిట్టుమ్ తా.

2 చి ఒగ్గర్ సాచుల్చి మెక్కి తుయి అంచెతె సూన్సి ఎత్తి జేవ్ కి అన్నె మాన్సుల్క సెకడ్డి రితి, నిదానుమ్ తిల అన్నె మాన్సుల్క తుయి సెకడు.

3 పడ్డె, చెంగిలో తిలొ కేన్ జమాను కిసి బాదల్ ఒర్పువ జా నిదానుమ్ కెరెదె గే, తుయి కి ప్రబుచి కామ్చి రిసా బాదల్ సేడ్డిసి తుయి కి ఒర్పువ జా నిదానుమ్ తా.

4 పడ్డె, జమాన్లుతె బెదితోసా చెంగిలోచొ జలె, కామ్తె తిలె, వేర మాములుమ్ మాన్సుల్చ కమొతె జో బెదె నాయ్, నెంజిలె వేరచితె బెదిలె, సిక్కు జా జోవయింక దిలి కామ్ పిట్టయెదె. జోచొ ఎజోమాని మెన్సితి రితి జో తియార్లి కామ్ చెంగిల్ కుట్టపుక మెన మెన్సు దా ఎక్కి నిదానుమ్ కెరెదె.

5 పడ్డె, నిగితి కెల్క జవున్ బెదితోసా జలె, జేవ్ కెర్లయెచి బెదితి రితి కెర్లెకయ్ జో జీన గురి నజనుక జయెదె.

6 పడ్డె, పంబొ లాయిలె పొది, కో తొలితో జోవయించి వాట నజనుక విలువ మెలె, నిదానుమ్ కామ్ కెర్లొ తిలొసి విలువ, బద్దుకుమచొ నాయ్, గని నిదానుమ్ కెర్లొసా.

7 ఆవ్ ఇన్నె రెగిడ్ల టాలివొచి రిసా చెంగిల్ ఉచరు. తుయి పూర్తి అర్దుమ్ కెరంతి రితి ప్రబు తుక సెకడెదె.

చి సెక్తి

8 యేసుక్రీస్తు దావీదు పూర్వుమ్చొచి సెకుమతె జెర్మ మొర అన్నె జిలిసి ముక్కిమ్క తుయి ఉచార కెరంతె తా. జోచి రిసా ముక్కిమ్క ఆవ్ సుబుమ్ కబుర్ బోదన కెరుక మెన ప్రబు అంచి అత్తి కామ్ సార్పు కెర దా అన్నె, గెద.

9 జయ్యి సుబుమ్ కబుర్ ఆవ్ సూనయ్తె తిలి రిసా ఇన స్రెమల్ సేడ అన్నె, కిచ్చొ జవున్ నేరిమ్ కెర్లొసా మెన దెకిల్ రితి అంక ఈంజేవ్ గొల్పుల్ బంద అస్తి. గని అంక కిచ్చొ దయిరిమ్ మెలె, దేముడుచి సుబుమ్ కబుర్ కోడు బందుక నెత్తిరి.

10 జాకయ్ దేముడు నిసాన్లనక 'సూన నంపజా క్రీస్తు జలొ యేసుచి నావ్ తెన్ పాపుమ్ తెంతొ రచ్చించువ జా పరలోకుమతె గెచ్చ కెయడ తెయడ చెంగిల్ తత్తు' మెనయ్, కిచ్చొ స్రెమల్ జలెకి ఆవ్ ఒర్పువ జతసి.

11 'దేముడుచి కోడు ఈంజ' మెన ఏక కిచ్చొ కచితుమ్ దెరన్తనుమ్ మెలె,

“జోవయింతెన్ మొర్లమ్ మెలె,

కచితుమ్ జోవయింతెన్ జిమ్దె.

12 జోవయించి నావ్చి రిసా బాదల్ ఒర్పువ జలమ్ మెలె,

కచితుమ్ జోవయింతెన్ * ఏలువ కెరుమ్దే.

‘జోవయింక నేనుమ్’ మెలి రితి ఇండిల,
జో కి అమ్క ‘జోవయింకయ్ నేని’ మెన జో అమ్క తియనె నాయ్.

13 అమ్ నిదానుమ్ నెంజిల క్కి,
జో ఎక్కి నిదానుమ్ తా గెతయ్.”

జోవయింది సత్తిమచి రిసా జో అబద్దుమ్ కెరుక నెత్తె, జోవయింది కోడు పిట్టపుక నెత్తె.

కామ్క నెంజిత కొడొ జుజయ్తినిచి రిసా జాగర్ల సంగిలినీ

14 ఈంజ ఉప్పిరచి కోడుచి రిసా ఒత్తవ నంపజలన్క తుయి ఏద కెరవు, చి ‘కామ్క నెంజిల రితయ్ కొడొ జుజయ్తిని ముల’ మెన ప్రబుచి నావ్ తెన్ జోవయింక జాగర్ల సంగు.

15 తుచి కామ్క ‘చెంగిల్ కెర్లయ్’ మెన దేముడు ఒప్పున్తి రితి జోవయింక ఎక్కి నిదానుమ్ జంక తుయి ఎక్కి ఆన జా, డొంగ్రి సోగ వాటు గగ్గడ్డి రితి, నూన్తన పూర్తి అర్దుమ్ కెరంతి రితి, దేముడుచి సుబుమ్ కబుర్ సరిగా సిక్కుడు. దస్సి నిదానుమ్ తిల, తుక జో దిలి కామ్క ‘నిదానుమ్ కెర్లయ్’ మెనయ్ తుయి లాజ్ జంక నాయ్.

16 జలె, దేముడుచి మరియాద కడ రితి కామ్క నెంజిల కొడొ లట్టబ్బినీ, కొడొ జుజయ్తినిక దూరి తా. దన కొడొతె బెదిలె, మాన్సుల్ అన్సి ఒగ్గర్ పాడ్ జతి రితి దేముడుక జోవయింక దూరి కెర్రి రితి జయెదె.

17 కిచ్చొ జలి గావు ఒగ్గర్ జలె, ఒండొయి మాన్సుక కా గెల కిసి పాడ్ కెరెదె గే, దస్సి, దన కామ్క నెంజిల కొడొ లట్టబ్బినీ మాన్సుచి అత్తుక పాడ్ కెరెదె. దస్సి జల మాన్సుల్, హుమెన్యెనును చి పిల్తెతును.

18 జేవ్ కిచ్చొ ఏక్ తప్పొ సికడ్డతి మెలె, “మొర్ల మాన్సుల్క దేముడు జయడెదె మెలిని పడ్డొకయ్ జర్లు జయెదె మెలిసి అబద్దుమ్. అగ్గెయి తెంతో అత్తు రగుమ్క జర్లు జా అన్సి. అగ్గె రగుమ్క జర్లు జంక నెంజె” మెన జేవ్ సికడ, సగుమ్జనిచి నముకుమ్ పాడ్ కెర్తతి.

19 గని దేముడుచి రాజుమ్క ‘గేరు’ మెన దెకిలె, జా గేరుచి పునాదితె కిచ్చొ రెర్ల అన్సి మెలె,
† “కో జోవయింక నిదానుమ్ తా జోచయ్ జా అన్సి గే ప్రబు జానె” పడ్డొ, “ప్రబుచి నావ్ కో దెర్తతి గే, పాపుమ్తె బెదుత్ నాయ్, గని ముల దెతు!” మెన రెర్ల అన్సి.

20 జలె, కేన్ జవున్ వెల్లో గెరి ఎత్తి రగల్ గెరిచి కామ్చ సాముష్లు తవుల. సగుమ్ బజరీచ, సగుమ్ వెండిచ, గని దారు తెన్ కి మత్తి తెన్ తెయార్ కెర్లన కి తవుల. జేవ్ సాముష్లుతె సగుమ్, జలె, మాములుమ్ మరియాదచ కమొక వాడిక కెర్లన. సగుమ్, జలె, నిస్కారుమ్ కమొక వాడిక కెర్లన.

21 జలె కేన్ మాన్సు అత్తు నిస్కారుమ్ కెర్రి పాపుమ్ గెచ్చువన గెలె, జలె, మరియాద కామ్ కెర్రి సామనచి రితి జయెదె. జో దస్సి సుద్ది జలె, కేన్ చెంగిల్ కామ్చి రిసా కి జో గేరీచో ఎజొమానిక జో కామ్క జయెదె. ప్రబుచి కామ్క తుయి దస్సి సుద్ది తిలి కామ్క జెతికయ్ వస్తు జా.

22 జాకయ్, బుద్ది నెంజిల ఉబెడల్ జత ఆసల్క తుయి దూరి తా, సుద్ది అత్తు తెన్ ప్రబుక ఎక్కి నిదానుమ్ తా జోవయింది నావ్ దెర్లన ఎత్తిజన్ తెన్, సత్తిమ్బుద్ది, నిదానుమ్చి నముకుమ్, ప్రేమ, సెంతుమ్కయ్, జేవ్ తుయి కోరీవ జతె తా.

23 బుద్ది నెంజిల కామ్క నెంజిల కొడొ జుజయ్తినిక దూరి తా. దనచతె బెదిలె మాన్సుల్ ఎక్కిలోక ఎక్కిలో గగ్గోల్ జా జట్టి జతతి.

24 పడ్డొ, ప్రబుచి సేవ కెర్రి కేన్ మాన్సు జలెకి, గగ్గోల్ జతోసా జంక జయె నాయ్. జో కీసా తంక మెలె, మెత్తన తా ఎత్తిజన్క చెంగిల్ దెకితోసా, తెలివి తెన్ చెంగిల్ బోదన కెర్రిసా, కుస్సిదుమ్ నే జతె బాదల్ ఓర్పువ జతోసా జంక.

25 పడ్డొ, చి బోదనక వేరయ్ సంగిత మాన్సుల్చి ఉప్పిరి గగ్గోల్ నే జతె జో మాన్సు మరియాద తెన్ సరిగా అర్దుమ్ సంగుక సికుక. దస్సి మరియాద తెన్, ‘జో మాన్సు తప్పొ ఒప్పున విసారుమ్ జా సత్తిమ్ దెరన్సు’ మెన ఏక్ వేల దేముడు సెలవ్ దెయెదె,

26 చి నయ్తాన్తె దెర్వు సేడ్డిన్ తెంతో, జోవయింది ఇస్టుమ్ రితి కెర్రి తిలిన్తె తెంతో జో మాన్సు విడ్డల్ జయెదె, చి బుద్ది జా ప్రబుచి ఇస్టుమ్ రితి కెరుక దెరెదె.

* 2:12 2:12 కొరిందల్క రెగిడ్డి 1 నంబర్ ఉత్తమ 4:8, డీసయ్లిసి 5:10, 20:4, 6 వి 22:5. † 2:19 2:19 నన్యకాండుము 16:5, 26.

3

ఆకర్ దినాల్ క మాన్యుల్ చ బుద్ధి

1 అప్పె, మాత్రుమ్, కిచ్చొ మెన తుయి చిను మెలె, ఈంజ ఉగుమ్ చ ఆకర్ దినాల్ క నెంజిల బాదల్ జెవుల.

2 తెదోడ్ క మాన్యుల్ కిసి జవుల మెలె, వేర మాన్యుల్ చ బాదల్ క నే ఉచర్తె, 'అమ్మి చెంగిల్ తమ' మెనయ్ ఎక్కి జోవయింకయ్ జెచ్చి ఉచరంతె తవుల, డబ్బుల్ ఆన జయి గెచ్చుల, సొంత గవురుమ్ సంగితె తవుల, బడాయ్ జతె తవుల, మాన్యుల్ క చి దేముడుక దూసుప కెర్తె తవుల, అయ్యునిసిచి కోడు నే నూనె, జేవ్ పాయ్ పొసిలి సైమ సెక్లిన్ నేన్లి రితి జేవ్ అయ్యునిసిక తోడ్ కెరుక ములుల, దేముడుచి సుద్ది నెంజిలన జవుల,

3 కన్యారుమ్ నేనెతె తవుల, మాన్యుల్ కట్టు తెన్ తంక నెనుల, కుస్సిదుమ్ క అన్నె మాన్యుల్ చి ఉప్పిరి ఆరిచ నిందల్ సంగితె తవుల, నే నెన్లన జవుల, మాన్యుల్ క బియడ్డన జవుల, చెంగిల్ తిలిసి ఎత్తిక విరోదుమ్ సుదల్ జవుల,

4 ఉప్రమెన్పు తెన్ తవుల, 'వేర మాన్యుల్ క బాద కెర్తసుమ్' మెన నే దెకితె ఇస్టుమ్ అయ్లి రితి కెరుల, పుల తా బులుల, దేముడుక వచ్చ ఇస్టుమ్ అయ్లి సర్ద కెరంతె తవుల,

5 చి 'దేముడుక జోకర్తసుమ్' మెనన మాన్యుల్ చి మొక్క కిచ్చొ కిచ్చొ కమొ కెర్తె కి, జేవ్ ఇండితిసి దెకిలె, జోవయింక అత్తసెక్తిక జతి నాయ్, చి జేవ్ సంగితిన్ తెన్ జేవ్ ఇండితిసి బెదె నాయ్, జోవయింక సెక్తిచి రుజ్జు దెకయ్తి నాయ్. దన మాన్యుల్ క తుమ్ బెదవన నాయ్, జోవయింక దూరి తా.

6 ఉప్రమెన్పుక "దేముడుచి కామ్ కెర్తసుమ్" మెన, దన మున్పుబోదల్తె సగుమ్ జిన్ కిచ్చొ కెర్తె మెలె, కచ కచ గెరెలె సినేతుమ్ కెరన, తకు బుద్దిచ తేరబోదల్ క దెర్పు సేడవ, ఇస్టుమ్ అయ్లి రితి సికడ్డతి. దన తేరబోదల్ తవుల. జేవ్ కిచ్చొ కిచ్చొ పాపల్ కెర కెర పాపుమ్ వయన తా విడ్డల్ జంక నెత్త కిచ్చొ కిచ్చొ ఆసల్ క దెర్పు సేడ.

7 కేన్ వెరి కోడు సికడ్డెకి నూన, సత్తిమ్ చినుక ఎగ్గర నెత్తిర్తి.

8 పూర్లుమ్, మోసిచి కోడు ఒప్పునుక యన్సేన్ చి యంబ్రే నెన కెర కిసి వేరయ్ సికడ్డ గే, దస్సి ఈంజేవ్ అప్పెచ మాన్యుల్ సత్తిమ్ నెన కెర, వేరయ్ సికడ్డతి. ఈంజేవ్ అత్తక పాడ్ జలన, సత్తిమ్ చి నముకుమ్ నెంజిలన.

9 గని జేనుక నెత్తిర్తి. కిచ్చొక మెలె, జేవ్ పూర్లుమ్ చ దొగులచి పొరపాల్ బుద్ది కిసి రుజ్జు జలి గే, దస్సి ఈంజేవ్ అప్పెచ మాన్యుల్ చి బుద్దిక కి 'పాపుమ్ చి' మెన ఎత్తిజిన్ చినుల.

పవులు తిమోతిక సికడ్డిసి

10 అప్పె, మాత్రుమ్, తుక కిచ్చొ రెగిడ్డిసి మెలె, అంచి బోదన, ఆవ్ ఇండితి బుద్ది, ప్రబుచి కామ్ కెర్తె ఆన తెన్ ఆవ్ జితిసి, అంచి నముకుమ్, బాదల్ ఓర్పువ జా ఆవ్ సేంతుమ్ తతిసి, అంచి ప్రేమ, అంచి నిదానుమ్,

11 మాన్యుల్ అంక కెర్ల అల్లరలు, ఆవ్ సేడ్డ బాదల్, వడ్డె * అంతియొకయ్ పట్టుమ్తె ఈకోనియ్ పట్టుమ్తె, చి లున్త పట్టుమ్తె విరోదుమ్ సుదల్ కెర్ల అల్లర్ ఓర్పువ జలయ్ గే, తుయి దెక అస్సెన్. గని జేవ్ కెత్తి అల్లర్ కెర్తె కి, ఎత్తి తెంతో ప్రబు అంక రచ్చించుప కెర్లె.

12 గని ఆవ్వి మెను నాయ్. కో జలెకి యేసుక్రీస్తుచి తెడి సత్తిమ్ ఇండుక మెన్పు దా అస్సి గే, కచితుమ్ విరోదుమ్ సుదల్ చి అత్తి సైమల్ సేడుల.

13 పాపుమ్ ఇండితన, ఉప్రమెన్పుచి మాన్యుల్, మాత్రుమ్, వేర మాన్యుల్ క మోసిమ్ కెర్తె తా, జెచ్చి కి మోసిమ్తె దెర్పు సేడ అన్నె అన్నెయ్ పాడ్ జతె తవుల.

14 తుయి, మాత్రుమ్, తుయి సికిలిసి తుయి దయిరిమ్ జా డిట్టుమ్ నంపజలిసి ఎగ్గర నే ములితె, పూర్తి నిదానుమ్ తా. కత్తె కత్తె తోలితో సికిలచి గే వచ్చు నాయ్.

* 3:11 3:11 బారికల్ 13:50-14:20 దెక.

15 పడ్డో, దేముడుచి కొడొతె రెగ్గయల కొడొ బాల తెంతో పూర్తి అలవాట్ జా అస్సి. క్రీస్తు జలో యేసుక సంపజా రచ్చించువ జతిసి జేవ్ కొడొతెయ జానయ్ జతయ్.

16 దేముడుచి కొడొ ఎత్తి జోచి అత్తు మాన్సుల్చి అత్తి రెగ్గయలో. ఇసి రెగ్గయలి కొడొ ఎత్తి, జో సికడ్డిసి అమ్ ఒత్తయ్ సికుక జయదె. పాపుమచి రిసా జాగర్ల సంగితిసి ఒత్తయ్ తయదె, పాపుమ ముల కిసి బుద్ది జంక గే సికడ్డిసి ఒత్తయ్ తయదె, చి సత్తిమ్ ఇండుక సికయ్తిసి ఎత్తి ఒత్తయ్ తయదె.

17 దేముడుచి సేవ కర్తొ కేన మాన్సుక్ జేవ్ కొడొ పెట్టి నిదానుమ్ తియనై, జా కామ్ నిదానుమ్ కెర్తి రితి దొర్కు జలి గ్యానుమ్ ఎత్తి సెక్తి ఎత్తి దేముడుచి కోడు సదు కెర్తినతయ్ దొర్కు జయదె.

4

పవులు తిమోతిక నిదానుమ్ సంగిలిసి

1 మొదలక జతనక 'సంపజల గే నాయ గే' మెన బవుమానల్ గే సిచ్చల్ గే దెంక మెన క్రీస్తు ఆకర్ దీసిక పరిచ్చ కెర తీర్పు కెరుక అస్సి. పడ్డో జో తెదొడక అన్నె ఉత్త జా అయలె, జోవయించి అదికారుమ్ నజన ఏవుల కెరుక అస్సి. జలె, దేముడుచి మొక్కె, క్రీస్తు జలో యేసుచి మొక్కె, జోవయించి నావ్ తెన్ తుక ఆవ్ జాగర్ల సంగితసి మెలె,

2 క్రీస్తుచి రిసా తుయి సుబుమ్ కబుర్ నూనయ్తె తా. కెయలక కి, ఇస్టమ్ తిలె కి నెంజిలె కి, కెడ్డొడ తెదొడ నిదానుమ్ తెన్ జా సుబుమ్ కబుర్ నూనయ్తె తా. పాపుమచి రిసా తీర్పుల్ సంగు, పాపుమ్ కెర్తినచి రిసా జాగర్లల్ సంగు, బుద్ది సికడ సంపజలన్క డిట్టుమ్ కెరు, చి అల్లర్ జలెకి, బద్దుకుమ్ నే జతె, బమ్మ నే జతె, బోదన కెర్తె తా.

3 ఏక కాలుమ్ జతయ్. జా కాలుమ్క ఒగ్గర్జిన్ మాన్సుల్ కీసి జవుల మెలె, బుద్ది కొడొ నూనుక నెన కెర, జోవయించ కంగ్గల్క కజ్జర్ తిలి రితి కిచ్చొ కిచ్చొ వేర వేర నొవ కొడొ నూనుక అన జా, కో జేవ్ నూనుక ఇస్టమ్ జలిసి సికడుల గే, దన మాన్సుల్క ఎక్కిలోచి పడ్డో అన్నెక్కొక అనవ.

4 సత్తిమ్ నూనుక ముల, మాన్సుల్ జెచ్చె ఉచర్ల మత్తెలివో సంప కెరుల.

5 తుయి, మాత్రుమ్, మచ్చిల్ రితి బుద్ది నే జతె, తెలిచి నిదానుమ్ తెన్ తా, బమ్మ నే జతె బాదల్ ఓర్పుప జా, క్రీస్తుచి రిసాచి దేముడు సుబుమ్ కబుర్ నూనయ్తె తా, జో దేముడు తియార్తి కామ్ పూర్తి కెరు.

6 ఆవ్, జలె, *ప్రబుచి అత్తి అంచి ప్రానుమ్ ఆవ్ సార్ప కెర్తి నమయ్యమ్, ఆవ్ ఉట్ట గెతి పొది, పాసి జా అస్సి.

7 చెంగిలో జమాను యుద్దుమ్తె కీసి నిదానుమ్ కెరెదె గే, కెర్లయ్తె నిగితోసా కీసి ఎక్కి మెన్ను తెన్ నిగెదె గే, ఆవ్ దస్సి నముకుమ్తె నిదానుమ్ కెర అస్సి.

8 జాకయ్, ఆవ్ సత్తిమ్ కెర్తినచి బవుమానుమ్ అంక రకితయ్. కేన బవుమానుమ్ మెలె, సత్తిమ్ తీర్పు కెర్తొ తీర్పు కెర్తొసా జతో ప్రబుయి ఉత్త జా జో తీర్పు కెర్తి వెల్లి దీసిక దెతిసి. ఎక్కి అంకయ్ బవుమానుమ్ తయదె మెన నాయ్, గని జేవ్ ఎత్తిజిన్కయ్ కో జో అన్నె ఉత్త జెతినక రక నిదానుమ్ కెర తవుల గే.

పవులు మాలజ్ జా తిమోతిక బుకార్తిసి

9 తెర్తె, అంచితె బే బేగి జే.

10 కిచ్చొక మెలె, దేమా, జలె, ఈంజ లోకుమ్తె తతినక ప్రేమ తా, అంక మోసిమ్ కెర ముల దా దెస్సులోనిక పట్టుమ్తె ఉట్ట గెచ్చు అస్సి. క్రేస్సె, జలె, గలతీయ ప్రదేసిమ్తె, తీతు, జలె, దల్మతియ ప్రదేసిమ్తె ఉట్ట గెచ్చు అస్సి.

11 ఎక్కి లూకా అంచి తెన్ అస్సి. తుయి జెతి పొది మార్కుక కడ అను. జో అంచి కామ్తె అంక జలె తోడ తయదె, చెంగిల్ సేవ కెరెదె. అగ్గె తెంతో దస్సి అస్సి.

12 తుకికుక ఎవెనుతె తెద్రవ అస్సి.

* 4:6 4:6 నెంజిలె, 'ఆవ్ బలి జతి నమయ్యమ్...'. జో నిజుమి బలి జయె నాయ్, గని జో మెరుక తిలిచి టాలియ దస్సి సంగితయ్.

13 తుయి జెతి పొది, త్రోయ పట్టుమ్తె కర్చుచి గెరి ఆవ్ ములిలి గొగ్గెల, వడ్డో అంచ వుస్తకల్, చి ముక్కిమక ఆవ్ రెగిడ్ల వుస్తకుమ్ అను.

14 సరాబు జలో అలెక్సంద్రు, జెలి, అంక ఒగ్గర్ సైమ నేడయ్లో. ప్రబుయి తీర్పు కెర జోవయించ కమొచి రిసాచి సిచ్చ జోవయింక దెయెదె.

15 తుయి, మాత్రుమ్, జోవయించి రిసా జాగర్త తా. కిచ్చొక మెలె, అమ్ సంగిలి చి ఉప్పిరి జో బలే విరోదుమ్ కెర్లొ.

16 † అదికారుల్చి మొక్కె అంక తోలితో పరిచ్చ కెర్లిన్తె కోయి అంక తోడు సంగితి నాయ్. మాయబుద్ది తిలి రితి జేవ్ ఎత్తిజిన్ తుక్లె తా అంక ములిల రితి జల. జోవయించి జా పాపుమ్ జేవ్ నే వయితి రితి ప్రబు చెమించుప కెర్చు!

17 గని తెదొడి జా అదికారుల్చి మొక్కె ప్రబుయి అంక తోడు తా, ఒత్త బెర తిల యూదుల్ నెంజిలన సూనతి రితి సుబుమ్ కబుర్ పూర్తి ఆవ్ సూనయ్తి రితి అంక సెక్తి దిలన్. చి జొయ్యి తోడు తతికయ్, ప్రమాదుమ్ నే జతి రితి రచ్చించుప జలయ్*, వాగుచి చొండి తెంతో రచ్చించుప జలి రితి.

18 కచితుమ్, సయ్తాన్ కెరయ్త ప్రమాదల్ ఎత్తి తెంతో ప్రబు అంక రచ్చించుప కెర, పరలోకుమ్తె అంక తియనెదె. జోవయింక కెయ్త తెయ్త ఉగల్చి ఉప్పిరి ఉగల్చ గపూరుమ్ కెర్తె తత్తు! ఆమేన్.

ఆకర్ కోడు

19 ప్రిన్సిల్లక చి అకులక పడ్డో ఒనేసిపారుచి గెర్చ ఎత్తిజిన్క అంచి ముద్దు సంగు.

20 ఎరస్తును కొరింది పట్టుమ్తె తా గెలో. త్రోపిముక, జోక జివ్ చెంగిల్ నాయ్ చి రిసా మిలేతు పట్టుమ్తె ముల దిలయ్.

21 తెర్లె, చల్లి పొది నే జెతె జే. యుబూలన్, పుదెన్స్, లీను, క్లొదియ చి ఇన్నెచ నంపజల బావుడ్లు జల రితె ఎత్తిజిన్ తుక జోవయించి ప్రేమ సంగ తెద్రయ్తతి.

22 ప్రబు తుచి ఆత్మ తెన్ తవున్! జోవయించి దయ తుమ్ ఎత్తిజిన్చి ఉప్పిరి తవున్!

† 4:16 4:16 ఈంజ ఉత్తుమ్ రెగిడ్లి పొది పవులు రోమ్తె జేలి జా తిలో, బెర్లె. బారికుల్ 28:16-31 దొన్ని వెర్సుల్ ఒత్త ఒగ్గర్ అల్లర్ నెంతె తిలన్, చి వడ్డో, బెర్లె, జోవయించి తగు నూళ్లు. † 4:17 4:17 జా సుట్టు పవులుచి తగు నూన్లిసి విడ్డల్ కెర్లె, బెర్లె, గని పడ్డో అన్నెక్ సుట్టు దెర, తగు కెర, బోడి గండల్ కెర మార్ల మెన సగుమ్జిన్ ఉచర్తతి.

తీతుక రెగిడ్లి ఉత్త్రుమ్ బారిక్ జలో పవులు తీతుక రెగిడ్లి ఉత్త్రుమ్

నుబుమ్ కబుర్ కామ్ కెర్రి రిసా పవులుక ప్రబు నిసాస్లిసి

1 దేముడు నిసాస్లసచి నముకుమ్చి రిసా,

2 నే మొర్రి కెయక తెయక జతి బత్తుచి రిసా, ఆస తెన్ బక్కిక మూలమ్ జతి నిజమ్తి రిసా, “పరలోకుమ్తె మాన్సుల్ బెదితి వాటు ఆఁవ్ దొర్కు కెరిందె” మెన, అబద్దుమ్ కెయ్య నే జతో దేముడు కిచ్చో నే జెర్తయతె అగ్గె తెంతో ప్రమానుమ్ సంగ దిలో. జోయ్య జా ప్రమానుమ్ సంగిలి రిసా అమ్క పూర్తి దయిరిమ్.

3 “పరలోకుమ్తె మాన్సుల్ బెదితి రచ్చనచి వాటు ఆఁవ్ దొర్కు కెర్లిన్చి కోడు వలాన్ నమయుమ్క బార్ కెరిందె” మెన జో అమ్చో రచ్చించుప కెర్తొసా జలో దేముడు అగ్గె తెంతో ఉచరయ్ తిలన్, చి “తుయి నూనప్ప” మెన ఆడ్ర దా అంచి అత్తి సొర్పు కెర దిలి నుబుమ్ కబుర్ ఆఁవ్ నూనయ్లిన్ తెన్ అప్పె జా కోడు బార్ కెర అన్నె.

4 సొంత పుత్తు జలో రితో తీతుక, అమ్చి ఎక్కి నముకుమ్చి రిసా అబ్బొసి జలో రితో ఆఁవ్ పవులు రెగిడ్లి ఉత్త్రుమ్. దేముడు అబ్బొన్చి అమ్చో రచ్చించుప కెర్తొసా జలో *క్రీస్తు యేసుచి దయ సేంతుమ్ తుచి తెన్ తప్పన్.

5 ఒత్త క్రేతు డిబ్బుతె తుక కిచ్చొక ములిలయ్ మెలి, ఒత్తచ సంగుమ్లతె కిచ్చొ కిచ్చొ పిట్ట అన్నె గే, తుయి చెంగిల్ నెరవెర్చుప కెర్రి రిసా. జేవ్ కమెతె కిచ్చొ ఏకచి రిసా సంగిలయ్ మెలి, జాన్సి, గెద. “ఒత్తచ ఎత్తి పట్టుమ్తెచ సంగుమ్లక జేవ్ దెకిత్ రిసా †వెల్లెల మాన్సుల్క నిసాస్లో, చి జోపయింక అదికారుమ్ దేసు” మెలయ్. దస్సి కెరు.

6 కీన మాన్సుల్క జా అదికారుమ్ దెంక మెలి, ‘జేవ్ పొరపాట్ ఇండితన నెంజితి’ మెన ఎత్తిజన్ జానుక. ఎక్కి తెర్రితెన్చో మాన్సు, చి జోచ బోదల్, యేసుప్రబుక నంపజా తా, ఆరి సొంత ఇస్టుమ్ కెర్రి రితి డబ్బుల్ గట్ర పాడే నే కెర్తన జా తంక, చి జోపయించ ‡అయ్యన్ అబ్బొన్చి కోడు నూన్తన జేవ్ బోదల్ తంక.

7 కిచ్చొక మెలి, సంగుమ్క పాస్టర్ జతో కేన్ వెల్లో మాన్సు దేముడుచి గేర్చి కామ్ దెకితోసా జయెదె. జాకయ్ జో సత్తిమ్ ఇండితోసా తంక, పొరపాట్ ఇండితోసా తంక నాయ్. అన్నె మాన్సుల్క నే నూన్తె సొంత ఇస్టుమ్ అయ్లి రితి కెర్తొసా జో తంక నాయ్, బేగి కోప్పమ్ సేడ్డొసా నే జా జంక, మత్తిలోన్ జప్పన్, పెట్టొసా బియడ్డొసా జప్పన్, గార్ వాట్తె డబ్బుల్ ఆస జతోసా జప్పన్ జో తంక నాయ్.

8 వేర తెంతో అయ్లనక మరియాద దెకితోసా, చెంగిల్ తిలిన్ ఎత్తిక ప్రేమ కెర్తొసా, చెంగిల్ బుద్ది నుదే, నుద్ది తెన్ సత్తిమ్ నాయమ్ ఇండితోసా, ప్రబుచి సెవ ఎక్కి సత్తిమ్ తెన్ కెర్తొసా, ముద్దొ కెరంతోసా జా తంక.

9 పడ్డ, దేముడు అమ్క దిలి జోచి నిదానుమ్ తెన్ చి యేసుచి రిసాచి చి బోదన అమ్ జోచ బారికుల్క సికడ అస్సుమ్. జయ్య బోదన జో ఎక్కి నిదానుమ్ దెరనుక అన్నె. కల్తి నెంజిలిన్ సరి జతి బోద కెరుక జోక సెక్తి తయెదె, చి జా నుబుమ్ కబుర్ నెన వేర సికడ్డనక సరిగా జబాబ్ దెంక జోక సెక్తి తయెదె.

10 సరిగా జబాబ్ దెంక పాస్టర్క సెక్తి తంక ముక్కిమ్. కిచ్చొక మెలి, కోడు నే నూన్త బుద్ది నెసిత మాన్సుల్ ఒగ్గర్జన్ అన్నె. ఆరిచ కొడో జేవ్ లట్టబై తవుల. మోసిమ్చి బోదన కెర్రి తవుల. దస్సి కెర కో కో ఒగ్గర్ ఆల్లర్ కెర్రితి మెలి, ‘యూదుల్చి నుద్ది గుర్తుచి నున్నుతి నే కెరన్లె సత్తిమ్ నాయ్’ మెన సికడ్డన.

* 1:4 1:4 ‘క్రీస్తు’ మెలి, దొర్కు జలో రచ్చించుప కెర్తొసాక వడ్డొక తెద్రయిందె; మెన పూర్ణమ్ తెంతో ఎత్తి అదికారుమ్ తిలో దేముడు యూదుల్క ప్రమానుమ్ సంగ తిలో. గ్రీకు బాస తెన్ జో రచ్చించుప కెర్తొసాక ‘క్రీస్తు’ మెనుల, ఎత్తి బాస తెన్ జోపయింక ‘మస్సీయన్’ మెనుల.
† 1:5 1:5 జేవ్ వెల్లెల మాన్సుల్ జతిసిత వయసు ముక్కిమ్ నాయ్, గని ప్రబుచి బుద్ది జోపయింక తిలిన్ ముక్కిమ్.
‡ 1:6 1:6 జా బుద్ది తిలి, అన్నె వెల్లెల మాన్సుల్చి కోడు కి నూనయ, గెద.

11 జోవయింక ముద్దొ కెరుక అస్సె. కిచ్చొక మెలె, జేవ్ సికడుక నాయిమ్ నెంజలి అబద్దుమ్ జేవ్ లాబుమ్ ఆనసుక ఉచర సికడ, పూర్తి సగుమ్ కుటుంబల్క సిక్కు కెర, జోవయించి నీనముకుమ్ పాడ్ కెర్తతి. జెచ్చొ వోడి డంకవుక అస్సె.

12 జేవ్ మోసిమ్ కెర్తనతెచొ సొంత ఎక్కిలో సొంత కిచ్చొ ఏక మెన అస్సె మెలె, “అమచ *క్రైతీయులు అగ్గె తెంతో అబద్దుమ్చి, మూర్కుడ్లు, బద్దుకుమ్చ, జోవయించి పెట్టి బెరవంతి ఆనక జితనయ్” మెన సంగ అస్సె.

13 జా సాచి నత్తిమ్. జాకయ్, జోవయించి తప్పు జేవ్ పూర్తి అర్దుమ్ జతి రితి సొస్తుమ్ గట్టిజ సంగు, చి

14 అమచ యూదుల్చ పూర్గుల్ తెంతోచ మాస్సుల్ అచ్చొ ఉచర్ల మత్తెలివొ కి, నత్తిమ్ నెసిత మాస్సుల్ సికడ్డ †కొడొ కి బింక పిట్టవన, యేసుప్రబుచి ఉప్పిరచి నముకుమ్ తెన్ బెదితి బోచ జేవ్ ఎక్కి. నిదానుమ్ నంప కెర, ఆత్మక చెంగిల్ జంక జయెదె.

15 ఆత్మక సుద్ది జలన, జలె, కతిసి పితిసి చడితిసి చెంగిల్ మెనుల. కిచ్చొ వస్తువ కి జోక ‡సుద్ది తయెదె. గని, జోవయించి పాపుమ్క ఆత్మ పాడ్ జా ప్రబుచి ఉప్పిరి అన్మానుమ్ జలన, జలె, జోవయింక కిచ్చొ వస్తువ సుద్ది తయె నాయ్. జోవయించి సొంత మెస్సు కి పూర్తి గార్ జా అస్సి, చి కిచ్చొ కెర్లె చెంగిల్ మెన జాన్లె కి, చెంగిల్ ఇండుక పిట్టవన, జోవయించి బుద్ది గార్ జా జోవయించి ఆత్మ పాడ్ కెరన అస్సి.

16 “దేముడుక జానుమ్” మెనంతతి, గని జోవయించ కమొక దెకిలె, ‘దేముడుక నేనీతి’ మెన పూర్తి రుజ్జు జతయ్. జేవ్* వెక్కూరుమ్ జా అస్సి, ప్రబుచి కొడు నూనీతి నాయ్, జేవ్చి కిచ్చొ చెంగిల్ కామ్క నెంజితన.

2

తీతు కిచ్చొ కిచ్చొ బుద్దుల్ సికడుక గే వవులు రెగిడ్డిసి

1 తుయి, మాత్రమ్, తీతు, ముక్కిమ్క తుయి కిచ్చొ కెరుక మెలె, సరి జతి బోచనత బెదితిసి ఎత్తి. సికడ్డె తా

2 మంత్రమాస్సుల్క తుయి కిచ్చొ బుద్ది సికడు మెలె, కిచ్చొతె కి *ముద్దొ కెరన బుద్ది ఇండుతు, మరియాద బుద్ది ఇండుతు, బుద్ది సుదల్ తత్తు, చి ప్రబుచి ఉప్పిరచి నముకుమ్క, ప్రేమక, చి నిదానుమ్క జోవయించి ఆత్మతె చెంగిల్ దెరసుక జా తత్తు.

3 పడ్డొ మంతిర్ మాస్సుల్క కిచ్చొ సిక్కుడు మెలె, జేవ్ కి దేముడుక గపురుమ్ దెతి రితి జోచి సుద్ది మరియాద ఇండుతు, †సొండెల్ జతి నాయ్, చి సూరు గట్టక దెర్ను సేడ్డు నాయ్. జేవ్ కిచ్చొ ముక్కిమ్క కెరుక మెలె, చెంగిల్ తిలిసి ఎత్తి. సికడ.

4 జోవయించ ఉబెడివొక బుద్ది ఆనవుక. కీన బుద్దుల్ జోవయింక జేవ్ సికడుక మెలె, జోవయించ ముస్సర్పుల్క చి బోచల్క జేవ్ ప్రేమ దెకితె తంక,

5 జేవ్ బమ్మబుద్ది ముద్దొ కెరన బుద్ది ఇండుక, లంజె కెర్తినెత ఉచర్తినెత ఎగ్గర నే బెదుక, గెరచి కామ్ చెంగిల్ నిదానుమ్ కెరుక, మాస్సుల్క చెంగిల్ దెకితె తంక, చి జోవయించ ముస్సర్పుల్చి తెడి తా దాక్ కెరన, జోవయించి కొడు నూనుక. సంగుమ్చ తోరబోచల్ కిచ్చొక ఇన బుద్దుల్ ఇండుక మెలె, ఇసి ఇండిలె, ‘నాయ్ గెద, పొరపాల్ జతి నాయ్’ మెన దెక, దేముడు దిలి తుమ్ నూనయీతి యేసుచి రిసాచి సుబుమ్ కబుర్క ఒత్తచ కేన్ మాస్సుల్ నిస్కూరుమ్ ఉచరుక నెతిర్తి.

6 దస్సి, ఉబెడెల్క కిచ్చొ సిక్కుడు మెలె, “ఆసల్ రకన తుమ్ బుద్ది ఇండ” మెన తుయి బలవంతుమ్ కెరు.

§ 1:11 1:11 మెలె, ఎత్తి అదికారుమ్ తిలో దేముడుచి దయ వాటు, యేసుక్రీస్తుక నంపజతి వాటుయి రచ్చించువ జంక జయెదె చి నముకుమ్. రోమయుల్ 3:23, 24, 28, 30, చి 4 అధ్యాయమ్, చి గలతీయుల్ 2:16. * 1:12 1:12 మెలె, ‘కైతు డిల్లవ మాస్సుల్’.

† 1:14 1:14 తిమోతిక రెగిడ్డి ఏక నంబర్ ఉత్తమ్ 4:3-4. ‡ 1:15 1:15 తిమోతిక రెగిడ్డి ఏక నంబర్ ఉత్తమ్ 1:4-5. § 1:15

1:15 తిమోతిక రెగిడ్డి ఏక నంబర్ ఉత్తమ్ 4:2. * 1:16 1:16 ప్రబుచి మొక్కె చి మాస్సుల్చి మొక్కె. * 2:2 2:2 గ్రీకు జాన చి జా కొడుతె సూర్పు గట్ట పితిసి ముద్దొ కెరంతినెచి అర్దుమ్ కి వేర కమొ ఎత్తితె ముద్దొ కెరంతినెచి అర్దుమ్ కి తయెదె. † 2:3 2:3 నంజెలె, ‘జట్టి కెరమెత ఆరివ నిండల్ కెర్తె నాయ్’.

7 అన్నె, జేవ్ తుచ కమె దెక సికిత్ రితి చెంగిల కమె కిచ్చొ జలకి నిదానుమ్ కెరై తా. అన్నె, తుయి బోదన కెర్తినైత సత్తిమ్బుద్ది చి మరియాద దెకవు.

8 అన్నె, జా బోదనతె కీస కొణ్ణొ కావలె మెలె, నిజుమ్తె వడితె కొణ్ణొయ్, ‘తప్పు’ మెన కో సంగుక నెతిర కొణ్ణొయ్. దస్సి తిలె, కో వేర సంగితోసా జలె, కిచ్చొ తప్పుచి రిసా అమ్క సంగుక నెత్ర, లాజ్ జా, జోచి తప్పు చినెదె.

9 పడ్డొ గొతిమాన్సుల్క తుయి కిచ్చొ బుద్ది సిక్కడు మెలె, †‘అమ్ కి సంపజలన జా అన్నుమ్ చి వెల్లొ జలమ్’ మెన నే ఉచరంతె పోటి నే కెరై జోవయింప ఎజొమాన్సుచి తెడితా జోవయింపి కోడు సూన, కిచ్చొ కామ్చి రిసా జలెకి, జోవయింప సత్తిమ్ కెరై తత్తు. జా కామ్ జేవ్ కీసి కెరుక ఎజొమానిచి ఇన్సుమ్ తయెదె గే, దస్సి కెరుక. పడ్డొ, జోవయింప ఎజొమాన్సుచి కోడు నెతోవుక నాయ్.

10 పడ్డొ చోరుక నాయ్. గని పూర్తి సత్తిమ్ నిదానుమ్ తత్తు. కిచ్చొక మెలె, దస్సి సత్తిమ్ ఇండిలె, దేముడు అమ్చొ రచ్చించుప కెరైసా దిలి చి బోదనచి సత్తిమ్ జేవ్ ఇండితినైతె రుజ్జు డీనెదె, చి జాకయ్ ‘సత్తిమ్’ మెన అన్నె మాన్సుల్ దెక ఒప్పునుల.

11 దస్సి, ‘బూలోకుమ్చ కి కేన్ రగుమ్చ మాన్సుల్క కి రచ్చించుప జతి వాటు దొర్కు కెరిందె’ మెన దేముడు కెర్తి దయ అన్నె, డీన అన్నె.

12 జా దయ అమ్క కిచ్చొ సికడ్డయ్ మెలె, దేముడుక విరోదుమ్ జల వెర్రి కమె వెర్రి అనల్ ముల మార్పుప జా, బుద్ది జా, సత్తిమ్ ఇండ, జో దేముడుచి గవురుమ్ రుజ్జు జతి రితి ఈంజ లోకుమ్తె జెయ్.

13 ‘జర్జు జయెదె’ మెన అమ్ పూర్తి దయిరిమ్ నముకుమ్ తిలి జో దెతి నర్జవరుమ్ జెయిమ్ జతినక అమ్ నిదానుమ్ రకితె తంక. మెలె, ఎత్తిచి కంట వెల్లొ జలొ పరలోకుమ్చొ దేముడు అమ్చొ రచ్చించుప కెరైసా జలొ యేనుక్కిన్సు ఉత్ర జెతినక చి జో అన్నె ఉత్ర జెతిన తెన్ పరలోకుమ్చి గవురుమ్ డీస్సినక అమ్ ప్రేమ తెన్ రకితె తంక.

14 పాపుమ్ ఎత్తి తెంతో అమ్క †నెతోచితి రిసా, చి ‘అంచ సొంత మాన్సుల్ జా సత్తిమ్ కమె కెర్తి అన తెన్ ఇండుత్’ మెన అమ్క సుద్ది కెర్తి రిసా, అమ్చి రిసా యేను జోచి జీవ్ దా మొర గెలన్.

15 జలె, తీతు, ఈంజ ఎత్తి తుయి సికడ్డె తా. ఒత్తచ సంపజలన సత్తిమ్ ఇండుక అన్నె నిదానుమ్ సికిత్ రితి, ప్రబు తుక దిలి అదికారుమ్ తెన్ జోవయింప తప్పుల్ జోవయింప దెకవు, చి జేవ్ బుద్ది జతి రితి జోవయింప సత్తిమ్ దెకవ దయిరిమ్ నిదానుమ్ సంగు. జా ఎత్తితె తుక కో నిస్కూరుమ్ నే దెకిత్ రితి గని తుక మరియాద దెకిత్ రితి తుచి కామ్ కెరు ఇండు.

3

చెంగిల్ కమె కెరుక

1 ఒత్తచ సంపజలనక తుయి కిచ్చొ ఉచార కెరవు మెలె, దేసిమ్ ఏలుప కెర్తనచి అదికారుల్చి కోడు సూన, జోవయింప మరియాద కెరుక. ప్రబుతుమ్చ అడ్డచి రితి జేవ్ ఇండుక. †కేన్ చెంగిల్ కామ్ అయ్లె కి, తోడు కెర్తి బుద్ది తెన్ జా కామ్ కెర్తి.

2 పడ్డొ, కక్క దూసుప కెర్తి నాయ్, చి జట్టు జతిసి దూరి కెరంత, మెత్తన తత్తు, కేన్ మాన్సుల్క కి పూర్తి మరియాద కెర్తి తత్తు.

3 అమ్ కి సొంత అగ్గి బుద్ది నెంతె తిలమ్, కోడు నే సూనతన తిలమ్, మోసిమ్ జా పాపుమ్తె గెతె తిలమ్, వేర వేర అనల్ ఊసిల్క దెర్పు సిడ తిలమ్, కుస్సిదుమ్ తెన్ గోనల్ తెన్ జతె తిలమ్, అమ్ ఇండిత్ తిలి బుద్ది దెకిలె అన్నె మాన్సుల్ అమ్క ‘వెట్కూరుమ్చ’ మెంతె తిల, చి ఎక్కిలోక ఎక్కిలో విరోదుమ్ కెర్తి తిలమ్.

4 గని దేముడు అమ్చొ రచ్చించుప కెర్తొసాచి దయ ప్రేమ †రుజ్జు జా అమ్క డీసిల్ తెంతో,

† 2:9 2:9 తిమాతిక రెగిడ్లి ఏక్ నంబర ఉత్తము 6:1-2 దెక. § 2:11 2:11 మెలె, మున్సుబోదల్క, తేరబోదల్క జాల వల్లెక, గొతిమాన్సుల్క, గొతి నెంజల మాన్సుల్క, ఎత్తి జాతుల్చక, దేసిములు ఎత్తిక, బానల్ ఎత్తిక. కొరిందిల్క రెగిడ్లి ఏక్ నంబర ఉత్తము 12:13, గలతియల్ 3:28, కొలోస్సియల్ 3:11, డీనయ్లిసి 5:9. * 2:14 2:14 నెంజలె ‘అమ్క అన్నె గెనన విడ్డల్ కెర్తి రిసా....’ * 3:1 3:1 నెంజలె, ‘దేసిమ్క తోడు కెర్తి కేన్ కామ్....’ † 3:4 3:4 యేను అయ్లిన్ తెన్, జో అమ్చి పాపుమ్ గెచ్చయతి అర్చితుమ్ జలిన్ తెన్.

5 జో అమక రచ్చించువ కెర్లొ, అమ్ కిచ్చొ పున్నిమ్ కెర్లి రిసా నాయ్, గని పూర్తి జోచి పెట్టిచి కన్కారుమ్చి రిసా అమక నొవర్ జెర్మయలి రితి కెర, జోచి సుద్ది తిలి ఆత్మక అమ్చి పెట్టి దా అమక దోవ, సుద్ది కెర, అమక మార్పువ కెర్లన్.

6 దేముడుచి సుద్ది తిలి ఆత్మ జోవయించి ఎదివాట్ దర్ముమ్ తెన్ అమ్చి ఉప్పిరి సుచ దిలన్. అమ్చొ రచ్చించువ కెర్లొసా జలొ *యేసుక్రీస్తుచి అత్తి సుచ దిలన్.

7 కిచ్చొ దొన్నిచి రిసా మెలె, అమ్ అగ్గె తెంతొ పూర్తి పాపుమ్ సుదల్ జలెకి అమ్ పున్నిమ్ జలి రితి జో దెకుక జోచి నర్ల. జోచి దయ వాటు అమ్ జోచ పుత్తర్లు జా వరలోకుమ్చి రాజమ్తె బెదితి వరుమ్ దొర్కు జలి దయిరిమ్ అమక తంక మెనయ్ ఈంజ ఎత్తి జర్లు కెర్లన్.

8 "ప్రబుచి కోడు ఈంజ" మెన కచితుమ్ దెరను. అమ్చొ దేముడుక సంవజలన బుద్ది జా సెంగెల కమొ నిదానుమ్ ఇండుక ఎక్కి ఆన జంక సిక్కుత్ మెన ఈంజేవ్ కొడొ తుయి దయిరిమ్ తెన్ గట్టిజ సంగితె తా మెన అంచి ఆన. చెంగెల కమొ ఇండిలె, ఎత్తిజిన్క కామ్క జెయెదె.

9 గని తెలివి డీడు ఉచర సగుమ్జిన్ కిచ్చొ కిచ్చొ కొడొ పునితె తత్తతి. దన బుద్ది నెంజల తగుల్ పొన, పూర్లుల్చ సెకుమలుతె జెర్మిలసచి రిసాచ ఆరిచ మత్తెలివొ పొన, కొడొ జుజవ జట్టి జతిసి పొన, అమ్ యూదుల్చ ఆగ్గుల్చి రిసాచ కొడొచ తగుల్ పొన. దనచతె లాబుమ్ నాయ్, కామ్క నెంజలి, కిచ్చొ చెంగెల్ దెర్లి నాయ్ చి రిసా దనచ దూరి కెరు.

10 కేన్ మాన్సు జలెకు కొడొ జుజయ్తిన్ గట్టక ఒత్తచ సంవజలనక జట్లు జట్లు కెరయ్తి రితి జలె, తొలితొ చి సుట్టు జవున్, తివ్వెరి జవున్, జోక జాగర్ల సంగ తా, చి ఒత్త తెంతొ జో అన్నె అల్లర్ కెర్లొ, జో తెన్ బెద నాయ్.

11 దసా మాన్సు మార్పువ జా గార్ జా అస్సె, పాపుమ్ జా అస్సె మెన తుయి జాన్సి. జోచి పాపుమ్ జోచ కమొతె రుజ్జు జతయ్. జోచి పాపుమ్ జో వయ జోచి సొంత సిచ్చొ ఆనన అస్సె.

తీతుక పవులు బుక్కార్లిసి

12 అర్దెవాక గే, తుకికుక గే తుచితె ఆవ్ తెద్రయ్లె, నికోపాలి పట్టుమతె అంచితె బే బేగి జెంక చజు. చల్లి పొది ఒత్తయ్ తంక ఉచర అస్సి.

13 పడ్డొ, ఆగ్గుల్చ తీర్పుల్ రుజ్జుల్ సంగితొ జేనాను చి అపొల్లో ప్రయానుమ్క అన్నె బార్ జతి పొదిక ప్రయానుమ్క జోక కిచ్చొ కొత్కు నే తతి రితి, కామ్క జెతిసి ఎత్తి దొర్కు కెరు.

14 పడ్డొ, అమ్చ చ సంవజలోనక ఆరి పలితుమ్ నే దెర్లి రితి కామ్క నెంజలి రితి నే జితె, బాద తిల తోడు నెంజల మాన్సుల్చ తోడు దెతి రిసా *చెంగెల్ కమొతె బెద కమొతె నిదానుమ్ కెరుక జేవ్ అలవాట్ జతు.

15 అంచి తెన్ తిలన ఎత్తిజిన్ తుక జోవయించి ప్రేమ సంగ తెద్రయ్తతి. అమ్చి తెన్ ప్రబుచి ఉప్పిరిచి ఎక్కి నముకుమ్ తా ఒత్త తిల అమక ప్రేమ కెర్లనక అమ్చి ప్రేమ సంగ.

తుమ్ ఒత్త తిలన ఎత్తిజిన్చి ఉప్పిరి ప్రబుచి దయ తవున్!

† 3:6 3:6 జో మొర వరలోకుమతె ఉట్టు గెలిన్క చి జో ప్రార్లన కెర్లిన్క యేను అబ్బొన్చి జోవయించి సుద్ది తిలి ఆత్మ జెతికయ్ వాటు దొర్కు కెర్లన్. యోహాను 14:16, 16:17. § 3:8 3:8 నెంజలె 'చెంగెల్ కామ్ దొర్కు కెరనుక దెకనుక సిక్కుత్' మెన.... * 3:14 3:14 నెంజలె 'చెంగెల్ కామ్ దొర్కు కెరనుక దెకనుక సిక్కుత్'.

పిలేమోసుక రెగిడ్లి ఉత్త్రమ్ బారిక్ జలో పవులు పిలేమోసుక రెగిడ్లి ఉత్త్రమ్

మొదొల్ కోడు

1-2 ప్రేమ తిలో అమ్చి తెన్ ప్రబుచి కామ్తె బెదిలో *పిలేమోసుక, పడ్డో అమ్చి బేని జలి అప్పియక, చి అమ్చి తెన్ చి కామ్ కెర్టో †అర్కిప్పుక కి, పడ్డో తుచి గెరి సబ కెర్తి సంగుమ్చ ఎత్తిక, క్రీస్తు జలో యేసుచి సుబుమ్ కబుర్ ఆవ్ సూనయలీ రిసా ఆవ్ ‡జేలి జలో పవులు అమ్చొ బావొ జలో తిమోతి తెన్ రెగిడ్లి ఉత్త్రమ్.

3 అమ్క అబ్బొ జలో దేముడుచి, ప్రబు జలో యేసుక్రీస్తుచి దయ సేతుమ్ తుమ్చి ఉప్పిరి తప్పన్!

పిలేమోసుచి రిసా పవులు సర్ద రెగిడ్లిసి

4 ఓ పిలేమోసు, ప్రార్దన కెర్తె పొది తుక కెయియక ఉచర్లె కి, అంచొ దేముడుక తుచి రిసా అంచి సర్ద ఆవ్ సంగితసి.

5 కిచ్చొక మెలె, ప్రబు జలో యేసుక తుయి సంపజలిన్చి రిసా, చి జోవయింక సంపజా నుద్ది జా జోచయ్ జల మాన్సుల్ ఎత్తిజిన్క తుయి ప్రేమ కెర్తె తతినచి రిసా ఆవ్ సూన్తె తత్తసి.

6 అన్నె మాన్సుల్ క్రీస్తుక సంపజతి రితి, జోచి ఉప్పిర్చి తుచి సముక్కుమెతె తుయి జోవయింక బెదవంతసి. తుయి దస్సు జతిసి పలితుమ్ దెర్పు చి క్రీస్తుచి తెడి అమ్క దొర్పు, జతి చెంగిల్ తిలిసి ఎత్తిచి రిసా అర్దుమ్ కెరన జేవ్ అన్నె మాన్సుల్ కి దెరన్తు మెన కి ఆవ్ ప్రార్దన కెర్తెన్.

7 అన్నె కిచ్చొచి రిసా ఆవ్ ప్రార్దన కెర్తింకె అంచి సర్ద సంగితసి మెలె, బావొ, తుచి ప్రేమచి రిసా అంక ఒగ్గర్ సర్దసంతోసుమ్ జా అన్నె. కిచ్చొక మెలె తుచి ప్రేమచి రిసా ప్రబుచయ్ జల మాన్సుల్ ఎత్తిజిన్చి పెట్టిచి దయిరిమ్ తుయి అన్నె జయడ్లి రితి కెర అస్సిసి.

ఒనేసిముక పిలేమోసుతె అన్నె తెర్తయలీసి

8 జాకయ్, ఏక్ కామ్చి రిసా తుక సంగుక అంక దయిరిమ్. జా కామ్ తుయి జర్పు కెరుక ముక్కిమ్చి రిసా తుక ఆర్త దెంక కి క్రీస్తుచి తెడి అంక దయిరిమ్ అన్నె,

9 గని అంచి ప్రేమక తుక ఆర్త దెయ నాయ్, గని ఆవ్, మంత్రొ మాన్సు, క్రీస్తు జలో యేసుచి సుబుమ్ కబుర్ సూనయలీ రిసా జేలి జలో పవులు, తుక ఆవ్ ప్రార్దన కెర్తి రితి బతిమాల్పు జా

10 కిచ్చొ నజితసి మెలె, అన్నె పుత్తు రితొ జలో ఒనేసిముచి రిసా తుక ఆవ్ బతిమాల్పు జతసి. ఆవ్ జేలి జలి తెంతొ జోవయింక కి అబ్బొసి రితొ జా అన్నె.

11 అగ్గె, మాత్త్రమ్, జో * ఒనేసిము తుక గొతిమాన్సు జలెకి, తుక †కామ్క నెంజిలో. గని అప్పొ, జలె, తుక కి అంక కి కచితుమ్ కామ్క జెయిదె.

12 జలె, అంచి సూంత జీవు తెర్తయలీ రితి; తుచితె జోవయింక ఆవ్ అన్నె తెర్తయతసి.

13 సుబుమ్ కబుర్ ఆవ్ సూనయలీ రిసా ఆవ్ జేలి జలిన్తె జో అంక అన్నె తోడు తతి రితి, జోచి అత్తి తుయి అంక తోడు దిలి రితి, జోక ఇన్నె అన్నె సేంపు తియంతయ్,

* 1:1-2 1:1-2 జో సామ్మారి జా తిలో, కిచ్చొగె, జోవయింక గొతిమాన్సు తిలో; 10-16చి కొడె. అన్నె, మాన్సుల్ గోత్ అయిలె, జేవ్ తతా గదివో జోవయింక గెరి తిల, బెర్తె; 22చి కోడు దెక. † 1:1-2 1:1-2 కొల్స్సియల్ 4:17 దెక. కొల్స్సియచి సంగుమ్తె జో అర్కిప్పుక కి ప్రబుచి కామ్ కెర్చె, కిచ్చొగె. ‡ 1:1-2 1:1-2 రోమ్ పట్టుమెతె జో జేలి జా తిలి పొది ఈంక ఉత్త్రమ్ రెగిడ్లి, మెన ఒగ్గర్ జిన్ ఉచర్తతి. బారికుల్ 28:16 దెక. నెంజిలె, కైసరియ పట్టుమెతె, బారికుల్ 23:23-24:27, నెంజిలె ఎపెసు పట్టుమెతె, గని ఎపెసుతె జో జేలి జలిన్క రుజ్జు నాయ్. పిలిప్పితె; బారికుల్ 16:23; చి యెరుసలేమెతె; బారికుల్ 21:33; కి జేలి జా తిలన్, గని ఒగ్గర్ దీసల్ నాయ్. § 1:10 1:10 పవులు జోవయింక సెకత్తిచయ్, కిచ్చొగె, జో ఒనేసిము క్రీస్తుక సంపజలో, చి దస్సుకయ్, చి జోవయింక ప్రేమకయ్, దస్సు సంగితయ్.

* 1:11 1:11 కొల్స్సి పట్టుమెచొ మాన్సు జయెదె. కొల్స్సియల్ 4:8-9 దెక. † 1:11 1:11 'ఒనేసిము' మెలి నావ్ కిచ్చొ అర్దుమ్ తయెదె మెలె, 'కామ్క జితొసా'. ఒగ్గర్ జిన్ గొతిమాన్సుల్క, బెర్తె, జా నావ్ తిలి. జో అగ్గె కిచ్చొక కామ్క నెంజిలో మెలె, జో ఉట్టనిగ తిలి రిసా; 15చి కోడు, చి ఏక్ వేల చొర తిలో, 18-19చి కోడు.

14 గని, తుచి సెలవ్ నెంతె అన్నె తియంతయ్ జలె, తుక బలవంతుమ్ కెర్లె రితి జయెదె మెన, నెసిలయ్. తుచి ఇస్టుమ్క తుయి సొంత తెద్రయ్లె జలె, బాద తయ్ నాయ్.

15 తుచితె తెంతో జో ఉట్ట నిగ గడియ వేరతె తిలిసి కిచ్చొక గే జర్లు జలి మెన ఆవ్ ఉచర్లిసి కిచ్చొ మెలె, జో అప్పె తెంతో అగ్గెచి బుద్ది నెంతె తుక నిదానుమ్ తా ఒగ్గర్ దీనల్చి చెంగిల్ సేవ కెర్లి రిసాయి ఇసి జర్లు జలక ప్రబు సెలవ్ దిలన్.

16 అప్పె తెంతో జో తుక రితోయి గొతిమాన్లు నెంజె. †అంక తుక జో గొతిమాన్లు జయెదె, గని అన్నె జో స్త్రబుక నంపజా, బుద్ది మార్పువ జా అత్తుక తుక ప్రేమ తిలొ బావొ కి జా అన్నెచి, పూర్తి నిదానుమ్ తయెదె. ఇన్నె అంక దస్సి నిదానుమ్ తిలొ. అన్నె తుకయ్ కి దస్సి నిదానుమ్ తయెదె.

17 జాకయ్, 'ప్రబుచి సుబుమ్ కబుర్ కావతె జో అంచి తెన్ బెద అన్నె' మెన తుయి అంక ప్రేమ అస్సిన్ జలె, తుయి అంకయ్ కిసి బెదవంతె గే, జో ఒనేసిముక కి దస్సి బెదవను.

18 జో తుక కిచ్చొ నస్తుమ్ కెర తయెదె గే, జో తుక కిచ్చొ రునుమ్ జా అన్నె మెలె, ఆవ్వి పూచి జా తుక దెయిందె.

19 ఆవ్ పవులు, సొంత ఆతు తెన్ ఇసి మెన రెగిడ్లసి. ఆవ్ సొంత పూచి జా, ఒనేసిము తుక దెంక తిలిసి ఆవ్వి దా గెలిందె. తూయి, మాత్రుమ్, తుచి అత్తు తెన్ జెర్మున్చి రిసా అంకయ్ రునుమ్ జలి రితి జా అస్సిసి, గని తుక నంగుక నెసి.

20 గని, బావొ, †ప్రబుచి తెడి అంక ఇదిల్ జవున్ లాబుమ్ తుచితె దొర్కు, జతి రితి, దయ కెర, అంచి పెట్టి ఆవ్ నర్ల జతి రితి, ప్రేమచి రిసా జో మాన్లుక తుయి చెమించువ కెరు.

21 'సంగిలి కోడు సూనెదె. నాయ్, అన్నెయ్ చెంగిల్ కెరెదె' మెన తుచి రిసా అంక దయిరిమ్చి రిసా, ఆవ్ ఇసి మెన తుక కబుర్ రెగిడ్లసి.

22 మదెనె, అంచి రిసా ఒత్త వక్ గది తెయార్ కెర. అంక 'విడ్డల్ జా అవ్తె గోత్ జెవున్' మెన అంచి రిసా ప్రార్థన కెర్లను. జలె, తుమ్చ ప్రార్థనల్చి రిసా ప్రబు అంక వాట్ దెవున్ మెన అంచి ఆస.

ఆకర్ కోడు

23 క్రిస్తు జలొ యేసుచి తెడి అంచి తెన్ †జేలి రితో జలొ †ఎవప్రా తుక జోచి ప్రేమ నంగ తెద్రయ్తయ్.

24 అన్నె కొన్న మెలె, అంచి తెన్ ప్రబుచి కామ్ కెర్లన మార్కు, అరిస్తూర్కు, దేమా, చి లూకా, జోపయింది ప్రేమ కి నంగ తెద్రయ్తతి.

25 ప్రబు జలొ యేసుక్రిస్తుచి దయ తిలిసి ఎత్తి తుమ్చి అత్తుతె తవున్.

† 1:16 1:16 నెంజెలి 'తుయి కి జో కి కొల్స్సయిల్చి రిసా ఆగ్గక తుక బావొ జయెదె, గని అన్నె....' § 1:16 1:16 నెంజెలి 'ప్రబుచి తెడి తుక ప్రేమ తిలొ....' * 1:20 1:20 నెంజెలి 'ప్రబుచి తెడి తుయి కి ఆవ్ కి అన్నెమ్, చి....' † 1:23 1:23 జో ఎవప్రా నిజుచి జేలి జా తిలొ గే ఎక్కి జో పవులు తెన్ బెద జా బాద ఒర్పువ జలి రిసా దస్సి మెన్తయ్ గే నేనుమ్. ‡ 1:23 1:23 జో ఎవప్రా కి కొల్స్సయిలుడు; కొల్స్సయిల్ 4:12; చి కొల్స్సితెచి నంగుమ్ మొదొల్ కెర తిలొ; కొల్స్సయిల్ 1:7.

ఎబ్రియల్ క రెగిడ్లి ఉత్త్రమ్* ఎబ్రియల్ క రెగిడ్లి ఉత్త్రమ్

యేసుక్రీస్తు ఒగ్గర్ ముక్కిమ్

1 ఒగ్గర్ వేర వేర రగల్ తెన జోచ †కబుర్లు సంగిలనచి అత్తి దేముడు అమ్చ వూర్లుల్క జా పొది జోచ కొడో లట్టబ్బన్.

2 గని, ఈంజ ఉగుమ్చి ఆకరచ పొదులె, జోచొ సొంత పుత్తున్చి అత్తి అమ్క జోచి †కోడు లట్టబ అస్సె. 'జోచి ఈంజ ఎత్తి' మెనయ్, ఎత్తి కి జోక అక్కునుదొ మెనయ్, దేముడు జో పుత్తున్క నిసాన అదికారుమ్ దా అస్సె. జో పుత్తున్చి అత్తి ఎత్తి లోకుమ్క జెర్యులన్.

3 జో పుత్తున్తె దేముడుచి పరలోకుమ్చి ఉజిడి గవురుమ్ పూర్తి డిస్తయ్, చి నిజమ్ దేముడు కీసా అస్సె గే, పుత్తుని కిచ్చొ నే పిట్టె కిదసాయి అస్సె. జో పుత్తుని జోచి నెక్కి కోడుకయ్ లోకుమ్లు ఎత్తి కి జోయ్యి ఏలుచ కెర్తయ్. అస్సె, పాపల్ పుంచి జతి మాన్సుల్ నుద్ది జతి మాట జో తెయార కెర తా, పరలోకుమ్తె దేముడుచి ఉజెతో పక్క వెసిలన్.

4 జో ఒత్త నే వెసితె అగ్గె, దూతల్చి కంట జోచి విలువ ఒగ్గర్ తిలిన్చి రుజ్జు అయిలి. జోచి నావ్ జోవయించి నావ్చి కంట కెద్ది విలువ జతయ్ గే, తెద్ది వెల్లో జో జా అస్సె.

5 కిచ్చొక జో ఇదిలి వెల్లో జా అస్సె మెన జానుమ్ మెలె, దేముడుచి కోడత రెద్దయిలి రితి, కేన్ దూతక;

*"తుయి అంచొ సొంత పుత్తు,

తుక ఆజి అవ్ జెర్యులయ్ అస్సి."

మెన దేముడు కెయ్య సంగిలనె గె? నాయ్ గెద, కేన్ దూతక జో దస్సి సంగె నాయ్. నెంజిలె,

†"జోక అబ్బొసి జయిందె, చి

జో అంక పుత్తు జయెదె"

మెన కేన్ దూతక కెయ్య సంగిలనె గె? జోవయింక దస్సి సంగె నాయ్.

6 పడ్డొ, అస్సె, జో తొల్పూర్ జతొ క్రీస్తుక ఈంజ లోకుమ్తె దేముడు జెర్యులి పొది,

‡"అవ్ దేముడుచ దూతల్ ఎత్తి

జోకయ్ బక్తి కెర్తు!"

మెలన్.

7 పడ్డొ దూతల్చి రిసా కిచ్చొ మెన్తయ్ మెలె,

‡"జో జోచ దూతల్క వాదుల్ రిత,

జోచ సేవ కెర్తనక ఆగివొ లగితి రిత

జో జర్తు కెర్తయ్."

మెన సంగితయ్.

* : 1:0 ఈంజ ఉత్త్రమ్ రెగిడ్లిసా ఈంజ ఉత్త్రమ్తె కిచ్చొ ముక్కిమ్ దెకయ్తయ్ మెలె, ఈంజయ్ లోకుమ్చి యూదుల్చి దేముడుచి గుడి, పరలోకుమ్క, మెలె ఎత్తి అదికారుమ్ తిలో దేముడు తతి టాన్క ఎక్కి టాలి జతయ్, నీడయ్ జతయ్. దస్సి, యూదుల్ కెర్తి రితి సేవ కెర్త వెల్లెల పూజర్లుచి కామ్ యేసు పరలోకుమ్తె కెర్తి సేవక ఎక్కి టాలి జతయ్, నీడయ్ జతయ్. 'యేసు జోవయింక నంపజలనచి పాపుమ్ గెప్పవ, పరలోకుమ్తె దేముడు అబ్బొన్చి మొక్కి అమ్క తోడు తతి తెంతొ జా అగ్గెచి రితి నాయ్' మెన ఈంజ ఉత్త్రమ్తె రెగిడ్లిసి రుజ్జు దెకయ్తయ్. † 1:1 1:1 దేముడుచ కబుర్లు సంగిలన మెలె, జా కామ్క కక్క జో నిసాన తయెదె గే, జోవయించి అత్తక జోవయించి చోడి పుత్తు జోవయించ కబుర్లు సంగెదె. జోవయంతె సగుమ్జిన్చి అత్తి కి జోవయించ కొడో రెర్యులన్, పూర్లుమ్ పొది. ‡ 1:2 1:2 క్రీస్తు సంగిలసి, జో బోదన కెర్తిన, జో కెర్త కమె, జో ఇండిలి బుద్ది, జో మొర అస్సె జలిసి, జా ఎత్తితయ్ ఎత్తి అదికారుమ్ తిలో దేముడు జోవయించి అత్తి అమ్క జోవయించి కోడు సంగల్ రితి జతయ్; జో ఎత్తి అదికారుమ్ తిలో దేముడుచి కోడు జో యేసుక్రీస్తుయ, మెలి రితి.

యోహాను 1:1-4, 14 దెక. § 1:3 1:3 కొలోస్సయ్యల్ 1:15-17, 19, చి 2:19 దెక. * 1:5 1:5 కిర్తనలు 2:7 † 1:5 1:5 సమూయేలు దొస్సుచి పుస్తకుమ్ 7:14. ‡ 1:6 1:6 ద్వితియోపదేశ కాండుము 32:43, కిర్తనలు 97:7. § 1:7 1:7 కిర్తనలు 104:4.

8 గని జోచో సొంత పుత్తుసి రిసా కిచ్చొ మెన్తయ్ మెలె,

*“ఓ దేముడు, తుచి నిజాననుమ్ కెయ్తె తెయ్తె తతిసి, నీతి మెలో రానొచి డంణొ తెన్ తుయి విలువ కెర్తసి.

9 నీతిచి ఉప్పిరి ప్రేమ తా, గని అబద్దుమ్ ఎద్దరె నెన అస్సిన్.

జాకయ్ తుయి అన్నె తుచి తెన్ తిలి ఎత్తి జీవుల్చి కంట వెల్లో జంక మెన

దేముడు, తుచో దేముడు,
తుచి ఉప్పిరి పూర్తి సర్దసంతోసుమ్ జా

తుక నిసాన అదికారుమ్ దా,
తుచి బోడితె జోచి తేల్ సువ దా అస్సె.”

10 దేముడు అన్నె కిచ్చొ మెన్తయ్ మెలె,

†“తుయి, ప్రబు, కిచ్చొ నెంజిలి పొది బూలోకుమ్ జెర్తయ్లది, చి

ఆగాసుమ్ తిలిసి ఎత్తి, తుచి అత్తిచి కమె.

11 బూలోకుమ్ ఆగాసుమ్ జలె, పాడ్ జయెదె

గని తుయి తియెఁ జా తస్సె.

పాలల్చ రిత జేవ్ పోర్న జా పాడ్ జవుల,

12 చి డుప్పటిక కీసి మడ్డ కెరుక జయెదె గే,
దస్సి జాక తుయి మడ్డ కెర్తె, చి మార్పువ జయెదె.

గని తుయి కీసి అస్సిన్ గే, దస్సి తాఁ జస్సె,

కెయ్తె తెయ్తె తాఁ జస్సె”

మెన దేముడు పుత్తున్క సంగితయ్, గని,

13 ‡“జలె తుచ విరోదుమ్ సుదల్క

తుచి సుఁదితి పొద్రొ జేవ్ జతి రితి ఆవ్ జర్గు కెర్తె ఎదక,

అంచి ఉజల్ పక్క తుయి వెన తా” మెన

కేన్ దూతక కెయ్యె జవుకు సంగిలయ్ గె?

14 జేవ్ దూతల్ కిచ్చొ జవుల మెలె, రచ్చన దొర్ను జత ప్రబుచ మాన్యుల్క ‘చెంగిల్ తత్తు’ మెనయ్ జోవయింక దెకిత దేముడుచి సేవ కెర్త జీవుల్ మెన దేముడు జోవయింక జా సేవ దా అస్సె. జేవ్ జోచి సేవ కెర్తనయ్.

2

యేసు మాన్యుల్చి పాపుమ్ గెచ్చయ్లిసి

1 జలె, అమ్ జేవ్చి నత్తిమ్ నే వచ్చెత్తి రితి, నే ముల్తి రితి అమ్ పెట నే దెర గెతె నూన్సిన్చి చి రిసా చెంగిల్ ఉచర, అమ్ ఏదాస్ట కెరుక.

2 మెలె పూర్ణమచి * ఆగ్గుల్చి ప్రమానుమచి రిసా దూతల్ జానవ కెర ఎత్తి కోడు నిజామ్చి జలె, అన్నె, మాన్యుల్ ఆగ్గుల్చి కోడు పిట్టయ్లె, దేముడుచి కేన్ జవున్ కోడు నే కెర్తె, కీసి జేవ్ దూతల్చి అత్తి జో సంగిలి ఎదిలి సరిగా సిచ్చ జవుల జలె,

3 అప్పెచి ప్రబు దెతి ఈంజ వెల్లి రచ్చనక అమ్ విలువ నే దెకితె, విలువ నే కెర్తె, అమ్చి సిచ్చ కీసి పిట్టెదె? పిట్టె నాయ్. ఈంజ రచ్చన, జలె, యేసుప్రబు తొలితో సొంతయ్ జానయ్లి రిసా, జోక తొలితో నూన్లస అమ్కయ్ సాచి సంగిల.

4 పడ్డొ, అన్నె, జో యేసుక్రీస్తుచి అత్తి జో దెతి రచ్చనచి రిసా దేముడు సొంత వేర వేరతె రుజ్జుల్ దెకయ్లన్. కిచ్చొ కిచ్చొతె జా రచ్చనచ రుజ్జుల్ దెకయ్లన్ మెలె, జోచి అదికారుమ్ దెకయ్త వెల్లో కమె

* 1:8 1:8 కీర్తనలు 45:6-7. † 1:10 1:10 కీర్తనలు 102:25-27. ‡ 1:13 1:13 కీర్తనలు 110:1, మత్తయి 22:44, ఎబ్రియూల్ 10:13. * 2:2 2:2 నిర్గమకాండుమ్ 20 అద్యయిమ్, 31:18 చి ద్వితీయాపదేశ కాండుము 5:6 దెక.

కెర్నెనె, చి దేముడుచి సుద్ది తిలి జోచి అత్తువరల్ జోచి ఇన్సుముక కక్క కక్క వంట దిలిన్తెయి ఈంజ రచ్చనచి రిసా జోచి సాచి దా అస్సె.

5 అమ్ నంగతి †జెతికయ లోకుమ్ ఏలువ కెరుక దూతల్చి అత్తి దేముడు సార్పు కెర దెయె నాయ్.

6 కెనె గే రెగిడ్డి ఇసి సాచి అస్సె, ఇసి మెలిసి;

‡“మాన్సుక తుయి ఉచరన్క జో కిచ్చో ఏలువసా?

నెంజెలె, మాన్సు జా జెర్మున్ అయ్లోసాక కిచ్చొక తుయి ఏలువ దెకితసి?

7 దూతల్చి కంట జోక ఇదిలి దాక్ తతి రితి తుయి జర్గు కెర్లది,

గని అప్పె జోక గవురుమ్ కెర అదికారుమ్ దా,

జోక ఏలువ కెరవ అస్సిసి.

8 జోచి చాటు సుఁదితి రితి ఎత్తి జోచి అత్తి

తుయి సార్పు కెర దా అస్సిసి”

మెన రెగ్గ అస్సె. జలె, దేముడు ఎత్తి జోచి అత్తి సార్పు కెర దా అస్సెచి రిసా జో ఏలువ నే కెర్సి కిచ్చొ కి నాయ్. ఎత్తి జోచి అత్తి తతిన్చి రుజ్జు అప్పెచి మట్టుక అమ్క సరిగా డీసి నాయ్.

9 గని ఇన్నె ‘మాన్సు జా జెర్మున్ అయ్లోసా’ మెన యేసుకయ్ నంగితసుమ్. యేసుకయ్ దెకితసుమ్. జో గడియయ్ దూతల్చి కంట దాకు జలో, గని దేముడు అబ్బొన్చి దయచి రిసా ఎత్తి మాన్సుచి నావ్ తెన్ అమ్చి సిచ్చ వయంతి రిసా జో బాదల్ సేడ మొర్లెన్చి రిసా జో అప్పె ఎత్తి అదికారుమ్ గవురుమ్ జా కిరిటుమ్ గలన ఏలువ కెర్లది.

10 కిచ్చొక ఇసి జర్గు జలి మెలె, ఒగ్గర్జెన్ మాన్సుల్క జోచి పరలోకుమ్చి ఉజ్జెతె గవురుమ్తె బెదవంతి రిసా మాన్సుల్క రచ్చన దొర్పు కెర్లొసా †బాదల్ ఓర్పువ జతి వాటుయి జిన సరి జలో రచ్చించువ కెర్లొసా పూర్తి జంక ఎత్తిక ఆదారుమ్ తిలో, ఎత్తి ఏలువ కెర్లొ దేముడు జర్గు కెర్లెన్ చెంగిలి, పూర్తి బెదితయ్.

11 నిజుమి, సుద్ది కెర్లొ యేసుక చి జో యేసు సుద్ది కెర్లొనక ఎక్కి మొదోల్; దేముడు అబ్బొసి. జాకయ్, జోవయింక ‘అంచ బావుడ్లు’ మెనుక యేసుక లాజ్ నాయ్.

12 *“అంచ బావుడ్లుతె తుచి నావ్ తుచి గవురుమ్ సూనయిందె,

సంగుమ్చి నెడెమె తుచి గవురుమ్ గాయిందె”

మెలి కోడుతె, అస్సె,

13 †“జోచి ఉప్పిరి అంచ నముకుమ్ తియిందె”

చి అస్సె,

‡“ఇన్నె ఆవ్ అస్సి, చి దేముడు

అంక దిల జోచ బోదల్ అంచ తెన్ అస్సి”

మెన యేసు నంగిల్ రితి రెగిడ్ల కోడుతె ఇసి ఒప్పణ్ణో.

14 జలె, ఎక్కి ఆగ్, ఎక్కి లోయ బోదల్ ఎత్తిక తయెదె చి రిసా, సొంత కి ఈంజయ్ అమ్ మాన్సుల్చి ఆఁగుతె, ఈంజయ్ లోయతె జో యేసు మాన్సు జా జెర్మున్ జా బెదిలన్. కిచ్చొక మెలె, మాన్సు సేడ్డి మొర్పు జో సేడ జిన, మొర్పుచి ఉప్పిరి అదికారుమ్ తిలో నయ్తాన్చి ఉప్పిరి జీసుక మెనయ్ అమ్చి అఁగు అమ్చి లోయ జో దెరన్లన్.

15 జోవయింక ఒండి జీవితముక మొర్పుచి ఉప్పిర్చి బయిముక దెర్పు సేడ్ల ఎత్తిజిన్క విడ్డల్ కెరుక మెనయ్ దస్సి జా జీసుక ఒప్పన, దస్సి జా జిన్లన్.

16 కీసి మెలె, ఈంజ ఎత్తి కక్కయ్ రచ్చించువ కెరుక మెలె, దూతల్క రచ్చించువ కెరుక నాయ్ గని †అబ్రాహామ్చి సెకుమ్తె జెర్మిలనక ‘రచ్చించువ జతు’ మెనయ్.

† 2:5 2:5 యెనయా 65:17, 66:22, లూకా 21:33, డీనయ్లిసి 5:10, 21:1, తిమోతిక రెగిడ్డి 2 నంబర్ ఉత్తమ 2:12. ‡ 2:6 2:6 కిర్నెనె 8:4-6. § 2:10 2:10 18వూ కోడు దెక. * 2:12 2:12 కిర్నెనె 22:22. † 2:13 2:13 యెనయా 8:17. ‡ 2:13 2:13 యెనయా 8:18. § 2:16 2:16 గలతీయల్ 3:6-9, చి రోమీయల్ 4 అద్దయ్యమ్ దెక. ‘అత్తుక అబ్రాహామ్చి సెకుమ్తె జెర్మిలన్’ మెలె, అబ్రాహామ్చి రితి నముకుమ్ తిలన.

17 జాకాయ్, దేముడుచి నేవ కర్తె కన్యారుమ్ దెకితో నిదానుమ్చొ పూజరి జా, ప్రజల్చ పాపల్ వుంచ దా జోవయింక దేముడు తెన్ అన్నె బెదయతి రితిచి అర్చితుమ్ జతి రిసాయి, ఎత్తి రగల్క ఎత్తి బాదల్తె ప్రజల్ జల జోవయించ బావుడ్చుచి రితి జో జంక తిలి. జో మాన్యుల్చి రితి జా జోవయింక జెత రగల్ బాదల్ జో ఓర్పువ జలెకయ్ జో చెంగిలో పూజరి జా కన్యారుమ్ దెకెదె మెనయ్.

18 దస్సి, జో సొంత బాదల్ నేడ పరిచ్చు జా జిన్ని రిసా, జేవ్ బాదల్ నేడ పరిచ్చు జత అన్నె మాన్యుల్క జో తోడు తంక తెరె.

3

మోసే కంట దేముడుచొ పుత్తుసి వెల్లో

1 జాకాయ్, ప్రబుచి సుద్ది జా జోచయ్ జల ఓ బావుడ్చు, పరలోకుమతె బెదుక తుమ్ నిసాన జా జో బుకార్లన, దేముడుచొ బారికి జలో, చి జోచొ ఎత్తిక వెల్లో పూజరి జలో మెన యేసుచి రిసా అమ్ ఒప్పున అన్నుమ్. జలె, జోచి రిసా ఉచరుమ్.

2 దేముడుచి గేర్ జల యూదుల్తె తా మోసే కిసి జో దేముడుచి కామ్ నిదానుమ్ కెరె తిలో గే, దస్సి ఈంజ బారికి జతి రితి కామ్ ఎత్తిక వెల్లో పూజరి కెరె రితి, కామ్క నిసాన్లో దేముడుక యేసుయి నిదానుమ్ తిలన్.

3 గని గేరుచి కంట అన్నె గేర్ బందిలోసాక కిసి ఒగ్గర్ విలువ తయెదె గే, దస్సి, దేముడుచి గేర్చతె తిలో మోసేచి కంట యేసుయి జా గేర్ బందితోసా జా తా, అన్నె ఒగ్గర్ గవురుమ్క విలువ జతయ్.

4 ఎత్తి గేరు, కచి అత్తి గే బందిలిసి, గని ఎత్తి బందితోసా దేముడుయ్.

5 జలె, దేముడు వడ్డిక సంగిత కొడెచి రిసా సాచి గుర్తు సంగితి రిసా, జో దేముడుచి గేర్ ఎత్తికె మోసే నిదానుమ్చొ నేవ కర్తెసా జలో.

6 గని క్రిస్తు ఈంజ లోకుమతె జా కెర, జో పుత్తుసి జలి రిసా, దేముడుచి గేరు నిదానుమ్ ఏలువ కెరె తిలన్. ఆకర్ ఎద జోచి ఉప్పిరచి అమ్చి డిట్టుమ్ దెరన్లె, జో రచ్చన దా అమ్క పరలోకుమతె బెదయలిన్చి అమ్చి దయిరిమ్, ఆస అమ్ దెరన్లె, జోచి గేర్చయ్ అము జా అన్నుమ్.

యేసు దెతి విస్తాంతి రచ్చన తుమ్ పిట్టవన నాయ్

7 "జాకాయ్, దేముడుచి సుద్ది తిలి ఆత్మ సంగిలి రితి;

* జేవ్ అగ్గెచ ప్రజల్చి పెట్టి బేడు బందిల్ రితి జా,

జోచి కోడు నే సూన్సి రితి జల.

తుమ్, జలె, ఆజి జోచి అవాడ్ తుమ్ సూన్లె,

దస్సి నే జతి రితి, జాగర్ల దెకన.

8 పూర్ణుమ్, †జోచి కోడు సూనుక నెన

జా బయిలు దేసిమి బుల్లె తిలి పొది

ప్రజల్ జోక పరిచ్చు కెరె రితి, రాడ్ జివు జతె తిల.

9 జో దేముడు సంగిలి రితి;

అంచి ఉప్పిరి అన్యాయుమ్ జా పరిచ్చు కెరె రితి జా

జేవ్ జా దొన్ని విస్తాన్ వెర్నల్ అంచ కము దెకిలెకి కిసి జల గే,

తుమ్ దస్సి జా నాయ్.

10 జేవ్ దస్సి అన్యాయుమ్ జతికయ్, జా ఉగుమ్చచి రిసా ఆవ్ కోపుమ్ జా,

జోవయింక పెట్టి, కెయ్క తెయ్క అంచి వాటు ముల పిట గెతతి.

అంచి ఇష్టుమ్ నేన్సి రితి ఇండితతి మెలయ్, చి

* 3:7 3:7 క్రిస్తులు 95:7-11. † 3:8 3:8 నిర్ణయకాండుమ్ 13-40 అధ్యాయల్, లేవీయకాండుమ్, సంక్యాకాండుమ్, ద్విత్వీయాచదేశ కాండుమ్. ముక్కిమ్క నిర్ణయకాండుమ్ 32 అధ్యాయమ్, చి సంక్యాకాండుమ్ 14 అధ్యాయమ్ దెక.

11 'అంచి †సుక్కుమతె జేవ్ కెయఁక బెదుక ఆవ్ ఒప్పి నాయ్' మెన ఒట్టు గలన అంచి కోపుమక ఒప్పన్లయ్" మెన, సంగితయ్.

12 జలె, బాపుడ్లు, జీవ్ తిలొ జీవ్ దెతో దేముడుక తుమ్ దూరి నే జతి రితి, తుమ్తె కిచ్చి పెట్టి గర్చి జోచి ఉప్పిర్ అన్యానుమచి అత్త నే తతి రితి, తుమ్ జాగర్డ దెకన.

13 గని 'అజ' మెన ఈంజ కాలుమక కెత్తి పొదుల్ సేసతయ్ గే, రోజుక తుమ్ ఎక్కిలోక ఎక్కిలో జాగర్డ సంగ, దయిరిమ్ సంగ; పాపుమచి మోసిమక తుమ్తె కో దెర్చు నే సేడ్డి రితి, తుమ్చి పెట్టి బేడు నే బందితి రితి,

14 అమ్ సంవజలి మొదొల్ తెంతో చి జోవయించి రిసాచి దయిరిమ్ అమ్ ఆకర్ ఎద దెరన్లెకయ్ క్రిస్తు తెన్ వాట నజన తమదె.

15 †"అజి, జోచి అవాడ్ తుమ్ సూనె, జోచి కోడు నెసిల జేవ్ అగ్గెచ ప్రజెల్చి రితి జా నాయ్. తుమ్చి పెట్టి జోచి రితి బేడు నే బందిత్ రితి జాగర్డ దెకన్." మెన రెగిడ్డిసి తుమ్ వచ్చు నాయ్.

16 జలె, జేవ్ సూన నెసిలన కొన్పు మెలె, మోసే పూర్గుమ్చోచి తెడి ఐగన్పు దేసిమ్ తెంతో, జేవ్ గొతిమాన్పుల్ జలిన్ తెంతో, బార్ జా ముల విడ్డల్ జల అమ్చ యూదుల్ ఎత్కిజిని.

17 అన్యె, జేవ్ దొన్ని విస్సా వెర్చుల్ పూర్తి కచి రిసా దేముడు కోపుమ్ జలొ మెలె, * పాపుమ్ కెర్లనచి రిసా జా బయిలు దేసిమి జేవ్ మొర్చి రితి జో దేముడు సిచ్చు దిలన్.

18 వడ్డొ, జోచి సుక్కుమతె నే బెదుక మెన కచి రిసా జో ఒట్టు గలన్లొ మెలె, జోచి కోడు నే కెర్లనచి రిసాయి గెద?

19 జాకయ్ కిచ్చి అమక జానుక జతయ్ మెలె, జోవయించి అన్యానుమచి రిసా జా సుక్కుమతె జేవ్ బెదుక వాటు నే దిలొ.

4

ప్రబుచయ్ జల మాన్పుల్క దొర్చు జతి విస్రాంతి

1 జలె, జో ప్రమానుమ్ సంగిలి రితి, జోచి *సుక్కుమతె బెదితి వాల్ తతె ఎద, తుమ్తె కో జా సుక్కుమతె పాఁవుక నే పిట్టవనతి రితి జిమ.

2 కిచ్చొక మెలె, పూర్గుమ్చ మాన్పుల్కయ్ కెయఁక కి తత్తిసి సుక్కుమచి అవ్కాసుమచి రిసాచి సుబుమ్ కబుర్ దొర్చు జలి. దస్సి, అమక కి సుక్కుమచి అవ్కాసుమచి రిసాచి సుబుమ్ కబుర్ దొర్చు జా అస్సె. గని జేవ్ సూన్లి జా కోడు జోవయింక కామక నెంజిలి. కిచ్చొక మెలె, నిజుమ్కయ్ సూన్లనచి పెట్టిచి రితిచి నముకుమ్ తిల తెన్ బెదిత్ నాయ్. జాకయ్ సూన్లి కొడొ జోవయింక కామక నెంజిల్ రితి జలి.

3 అమ్ యేసుక్రిస్తు ప్రబుక సంవజలన, మాత్రుమ్, జా సుక్కుమతె బెదితనుమ్. జేవ్ పూర్గుమ్చచి పాపుమచి రిసా దేముడు సంగిలి తీర్పు అగ్గె రెగిడ్లయ్.†

‡"అంచి సుక్కుమతె జేవ్ కెయఁక బెదుక ఆవ్ ఒప్పి నాయ్, మెన ఒట్టు గలన అంచి కోపుమక ఒప్పన్లయ్"

మెన రెగిడ్డి కోడు. జో దేముడు, మాత్రుమ్, లోకుమ్ జెర్చయ్లి పొది జో సొంత జోచయ్ కెమ్మ కేడవన జో తెదొడి సెలవ్ కడన తిలె కి, జోవయింక దస్సి మెన ఒప్పన్లన్.

† 3:11 3:11 తెదొడిది జో దెంక ఉచర తిలి విస్రాంతి కిచ్చొ మెలె, కనాను దేసిమ్ జోవయించి తా గెతి రితి దెతిసి. జా దేసిమ్ అప్పె వరలోకుమకయ్, జా విస్రాంతి వరలోకుమచి విస్రాంతికయ్, టాలె జయెదె. § 3:15 3:15 కిర్తనలు 95:7-8. * 3:17 3:17

నిర్వచనాండుమ్ 32 అద్దయిమ్, సంకాకాండుమ్ 14, ముక్కిమక 14:27-30. * 4:1 4:1 పూర్గుమ్చ యూదుల్క జలె, తెదొడిది ప్రమానుమక చెంగిలి ఈంజయ్ లోకుమచి కనాను దేసిమి జేవ్ గెచ్చుక అవ్కాసుమ్ తిలి, గని పిట్టవన్లొ అమక, జలె, అప్పెచి అవ్కాసుమ్ కిచ్చొ మెలె, ఎత్కి అదికారుమ్ తిలొ దేముడుచి సెంతుమ్తె బెదితిసి చి వరలోకుమతె గెతిసి. † 4:3 4:3 3:11 దెక ‡ 4:3 4:3 కిర్తనలు 95:11.

4 'సెలవ్ కడన్లన్' మెన సంగిలె, కీసావ్వు పొదుల్ ఆగాసుమ్, బూలోకుమ్, లోకుమ్తె తిలిసి ఎత్తి, జెర్మయలి పడ్డె, అన్నెక్ దీసి *'సెలవ్ కడన్ల దీసి' మెనయ్ జోచి జా సెలవ్ కడన్ల దీసిచి రిసా కేనె గే కిచ్చి సంగ అస్సె మెలె,

†“అంచ కమె సావ్వు పొదుల్ కెర కేడవ, అన్నెక్ దీసి సెలవ్ కడన్లయ్” మెన సంగ అస్సె.

5 జేవ్ పూర్లల్, జలె, అమ్ అగ్గె రెగిడ్డి రితి:

‡“అంచి సుక్కుమ్తె జేవ్ కెయక బెదుక అవ్ ఒప్పి నాయ్”

మెన జోవయించి రిసా జో సంగ అస్సె.

6 జలె, అన్నె నగమ్జెన్ దేముడుచి సుక్కుమ్తె బెదుక జలస బెదుక నేతయ్. జా ఏక్, పడ్డె అన్నెక్ కిచ్చి మెలె, జా సుక్కుమ్చి రిసాచి నుబుమ్ కబుర్ అగ్గె నూన్లన జో దేముడుచి కోడు కెరుక నెసిలి రిసా జోచి జా సుక్కుమ్తె బెదితి నాయ్.

7 అన్నెక్ దీసి మెలె కోడు జో నిసాన, జోచి సుక్కుమ్తె బెదుక అమ్క అన్నెక్ అవ్కాసుమ్ దా కెర, ఈంజ అవ్కాసుమ్క 'అజ' మెన, అమ్ అగ్గె రెగిడ్డినతె సంగిల్ రితి,

§“అజ జోచి అవాడ్ తుమ్ నూనె, తుమ్చి వెట్టి బేడు నే బందిల్ రితి

తుమ్ జాగర్ల దెకన”

మెన్తయ్.

8 మెలె, దేముడు సంగిలి కనాను దేసిమి జేవ్ పాడ వెసితి రితి యెహోసువ కడ నిలన్, గని జా తెన్ జా కోడు పూర్తి నెరవెర్చుప జతి జలె, అన్నెక్ దీసిచి రిసా 'తెదోడకయ్ సుక్కుమ్ దొర్కు కెరిందె' మెన దేముడు సంగితో నాయ్, సంగుక జతి నాయ్.

9 జాకయ్, దేముడుచి సెలవ్ కడన్ల దీసితె బెదితి వాటు మాన్సుల్క అప్పొక దొర్కు జతయ్.

10 మెలె, దేముడు జోచి కామ్ కేడవ కీసి సెలవ్ కడన్ల గే, దస్సి జో దెతి సుక్కుమ్తె కో బెదిదె గే, జో మాన్సుకి జోచి కామ్ కెర కేడవ సెలవ్ కడన్లె.

11 జాకయ్, జా సుక్కుమ్తె అమ్ కి బెదితి రితి నిదానుమ్ కెరుమ; జేవ్ పూర్లల్చి రితి జోచి కోడు నెన అమ్తె కో దస్సి పాపుమ్తె నే నేడ్డి రితి.

12 కిచ్చొక మెలె, దేముడుచి కోడు దొన్ని పక్కలె వాండి తిలి ఎత్తి కత్తిచి కంబ *లగన్ అస్సె, చి జా కోడు జిచ్చి తా కామ్ కెర కెరయ్ మాన్సుచి ఆత్తు చి జిచ్చి అత్తు జతిన్తె, అత్తుల్ చి ఆడుచి ములువ బెదితిన్తె బెర, మాన్సుల్చి పెట్టె ఉడ్డెసుమ్లు పరిచ్చ కెర, జోవయింక 'చెంగిల్ అస్తి' గే నాయ్ గే మెన తీర్పు కెర్తయ్.

13 అన్నె, జెర్మయలిన్ ఎత్తి, కి జోచి మొక్కె లుంకుక నెత్తె, గని అమ్క పరిచ్చ కెర్తొసాచి మొక్కె ఎత్తి. డుమ్డి తా ఎదార్లమ్ డీస్తయ్; అమ్చ ఉడ్డెసుమ్లు కి ఆకర్కయ్ జోచి మొక్కె అమ్ ఎత్తిజెన్ సాచి నజనుక తయెదె.

యేసు అమ్చి రిసా ఎత్తిక వెల్లో పూజరి జా అస్సె

14 జలె, యేసు దేముడుచొ సొంత పుత్తుసి జా తా, పరలోకుమ్తె తెడిక తెడి దేముడు అబ్బొన్తెయ్ పెన గెచ్చ తా, అమ్చి రిసాచొ వెల్లో †ఎత్తిక వెల్లో పూజరి జా అస్సెచి రిసా, జోచి రిసా అమ్ ఒప్పన్తిసి డిట్టుమ్ పోననుమ.

15 కిచ్చొక మెలె, అమ్చొ ఎత్తిక వెల్లో పూజరి జతో జో యేసు అమ్చి నెక్తి నెంజలిసి నేన్లొసా అమ్చి నెక్తి నెంజలిన్చి ఉప్పిర్చి కన్యాయ్మ నేన్లొసా నెంజె, గని అమ్చ బాదల్ ఎత్తి జొయ్యికి సేడ, అమ్చి రితి పరిచ్చ జా అస్సె. గని జో పాపుమ్ నే కెర్తె జిన అస్సె.

§ 4:4 4:4 అదికాండుమ్ 1 అద్యయమ్. * 4:4 4:4 అదికాండుమ్ 2:1-3. † 4:4 4:4 అదికాండుమ్ 2:2. ‡ 4:5 4:5 కిర్తనలు 95:11. § 4:7 4:7 3:7-8 దెక. * 4:12 4:12 డీనయ్లిసి 1:16. † 4:14 4:14 మాములుమ్ ఈంజయ్ లోకుమ్చి దేముడుచి గుడితె జర్మ జతిన్ ఉచర్లె, యూదుల్క ఎక్కిలోయ్ యెరుగనలేమ్చి జోవయించి ఎక్కి, దేముడుచి గుడితె తెడిక తెడిచి గదితె గిచ్చ అర్చితుమ్ దెంక జయెదె. వెర్కొక ఎక్కి, నుట్టు జా గదిక అడ్డు కెర్తె తెరక జిన ఒత్త వెన జా కామ్ కెరిదె. జొయ్యి మాన్సుక 'ఎత్తిక వెల్లో పూజరి' మెనుల. ఎబ్రియల్ 9:1-7 దెక. ఈంజయ్ లోకుమ్చి దేముడుచి గుడితె జర్మ జతిన్, జలె, యేసు పరలోకుమ్తె జర్మ కెర్తెన్క టాలి జతయ్.

16 జల, కామిక జెతికయ్ సమయుమ్క జోచి తోడు తతి రితి జో అమ్క కన్యారుమ్ దెకితి వరుమ్ అమ్ నజనుక, జోచి దయ అమ్ చజనుక మెన, దయిరిమ్ తెన్ జోచి దయ దెతి సిజాసనుమ్క పాసి జెమ.

5

1 మాన్పుల్ తెంతో దేముడు నిసాన ఎత్తి ఎత్తిక వెల్లో పూజరిచి కామ్ కిచ్చొ మెలె, 'మాన్పుల్చి పాపుమ్ గెన్పు' మెనయ్ దేముడుచి మొక్కె జేవ్ మాన్పుల్చి నావ్ తెన్ బలివో దెంక అన్పు.

2 జో పూజరికి మాములుమ్ మాన్పు జా సొంత సెక్తి నెంజిలోసాచి రిసా నేన్సనక చి తప్పు జలనక మెత్తన దెకెదె.

3 జోవయిచి సొంత సెక్తి నెంజిల్చి రిసా, ఎక్కి అన్నె మాన్పుల్చ పాపల్చి రిసా నాయ్, గని సొంత పాపల్చి రిసా కి జో బలివో దెంక అన్పు.

4 అన్నె, ఎత్తిక వెల్లో పూజరి ఎక్కిలో జతిసి జో మాన్పుచి సొంత ఇస్తుమ్క జర్గు జతిన్ నెంజె. 'ఆవ్ పూజరి' మెన జో మాన్పు సొంత ఇస్తుమ్క టీవ్క నాయ్. దేముడు సొంత నిసాన జో ఎత్తిక వెల్లో పూజరి జంక జోక అదికారుమ్ తయెదె. దేముడు టీవ్కయ్, యూదుల్చో పూర్ముచో తొలితొచో ఎత్తిక వెల్లో పూజరి జలో అహలోనుక కిసి దేముడు బుకార్లో గే, దస్సి, జో దేముడు సొంత జో మాన్పుక బుకారుక.

5 దస్సి కి క్రీస్తు ఎత్తిక వెల్లో పూజరి జతిసి సొంత ఇస్తుమ్క గపురుమ్ కెరన్లసి నెంజె, గని జోచి రిసా:

*"తుయి అంచో సొంత వుత్తు, ఆజి తుక పాయ అస్సి"

మెన సంగిలో దేముడు సొంత జోక నిసాన అదికారుమ్ దిలన్.

6 దేముడు అన్నెకతె సంగ రెగ్లయ్లి రితి;

†"మెల్లిసెదెక్ కిసా పూజరి తిలో గే,

తుయి దసా పూజరి జా కెయ్క తెయ్క తా జా కామ్ కెరె"

మెన జోచి రిసా రెగ్ల అన్పు.

7 యేను మాన్పు జా జెర్మున్ జా ఈంజ లోకుమ్తె బుల్లె తిలి పొది, జలె, గట్టిజ కేకుల్ గల ఏడ ఏడ, జోక మొర్పు తెంతో పిట్టవుక సెక్తి తిలో దేముడుక ప్రార్దనల్ కెరె తిలన్, చి దేముడు అబ్బొనక జో బిలోసాచి రిసా, జో దేముడు అబ్బొసి జోచ ఆసల్ నూన్తె తిలన్.

8 జలె, జో జోచో వుత్తున్ జలెకి, దేముడుచి కోడు పూర్తి నిదానుమ్ కెరె కిసి తయెదె గే, కిచ్చొ సైమల్ దుకుమ్ నొప్పల్ జంక జయెదె గే, జొయ్యి దస్సి పూర్తి ఓర్పుప జా అజ్జయ్ జలో, చి జో జేవ్ బాదల్ ఓర్పుప జలిన్ తెన్ జో దేముడు అబ్బొసి చి కోడు పూర్తి కెరెన్చి రుజ్జు అయ్లి.

9 అన్నె, జేవ్ బాదల్ నేడ ఓర్పుప జలిన్తె జోచి సెక్తి జోచి సత్తిమ్ పూర్తి రుజ్జు జతికయ్, పరలోకుమ్తె బెద కెయ్క తెయ్క తతి రచ్చున జోచి కోడు నూన కెరె ఎత్తి మాన్పుకయ్ జొయ్యి దొర్పు కెరెన్.

10 కిసి మెలె, 'మెల్లిసెదెక్ రితి జో జంక' మెన దేముడు జోక 'ఎత్తిక వెల్లో పూజరి' మెనయ్ నావ్ తిలి.

ఆత్మక నే వడ్డితె నేన్ల బాలబోదల్ రిత తా

11 ఈంజ ఎత్తిచి రిసా అమ్ ఒగ్గర్ సంగుక జతి, గని తుమ్చ కంగ్గల్ బొయెర జల రిత జలి రిసా జా అర్దుమ్ సంగుక అల్లర్ జతనుమ్.

12 కిచ్చొక మెలె, తుమ్ ఎదిలి ఎద అన్నె మాన్పుల్క సికడ్డన జంక జతి, గని దేముడుచి కోడుతె ముక్కిమ్ తిలిసి ఎత్తి మొదొల్ తెంతో తుమ్క సికడుక అవ్సురుమ్ జలి. తుమ్క అప్పెక కి దూదు అవ్సురుమ్, మాములుమ్ అన్సిమ్ కతి రితి తుమ్ వడ్డుక నేతయ్.

13 కో రితి దూదుక జతయ్ గే, బాలబోదల్ రితో తా, సత్తిమ్చి రిసాచి బోదన అర్దుమ్ కెరనుక నెత్తె, సత్తిమ్ ఇండితినచి రిసాచి బోదన నెరవెర్పుప కెరుక నెత్తె.

* 5:5 5:5 కీర్తనలు 2:7. † 5:6 5:6 కీర్తనలు 110.4, చి ఎప్రియల్ 7:7 దెక. ‡ 5:6 5:6 జో మెల్లిసెదెక్ లావో కి పూజరి కి జా తిలో. ఆదికారుమ్ 14:18. జో యెరూసలేమ్తె ఏలుప కెరె తిలో, ఒగ్గర్ పూర్ము పొది, యూదుల్ ఒత్త నే బన జతె అగ్గె. క్రీస్తు ఈంజ లోకుమ్తె బుల్లె తిలి పొది, యూదుల్చి దేముడుచి గుడి యెరూసలేమ్తె తిలి. 7:1-3 కి దెక.

14 గని మాములుమ్ సెక్కిది అన్నిమ్ కక్క కవడుక జయెదె మెలె, కిచ్చొ కిచ్చొక 'గర్బ' గే 'చెంగిల్చి' గే నిసితి రితి అలవాట్ కెరన సత్త్రిమ్ ఇండితి వాట్ సిక కెర అగ్గె ఇండితనకయ్.

6

ప్రబుక సంప కెర పడ్డొ అన్నె ముల్లిన్చి రిసా

1 జాకయ్, క్రీస్తుచి రిసా మొదొల్క ఇదిదిదెల్ సికితినెత నే టీవు తతె, ఆత్మతె వడ్డుము. ఎక్కి మొదొల్ తెంతో చి ఇదిలి నముకుమతె తంక నాయ్. కీసచతె మెలె, కామక నెంజిత కమొక దుకుమ్ జా ముల దేముడుక సంపజంక దెర్రిసి,

2 సుద్ది కెరంతి * దొవన్తినచి రిసాచి బోదన, బోడిలె చడితినచి రిసాచి బోదన, మొర్లన అన్నె జీవ్ జంక తిలిన్చి రిసాచి బోదన, ఆకర్ దీసిక చి వెల్లి పరిచ్చు చి జేవ్చ తీర్పుల్చి రిసాచి బోదన.

3 ఇని దనచ ఎత్తి కి మొదొల్, చి ప్రబు సెలవ్ దిలె, ఎక్కి దనచక ఉచరుక ముల దా, ఆత్మతె వడ్డుమదె.

4 కిచ్చొక మెలె, కేన్ జవున్ మాన్సు తోలితో సంపజా ప్రబుచి ఉజిడతె జా, పరలోకుమచి రచ్చన వరుమ్ చక దెక, దేముడుచి సుద్ది తిలి ఆత్మతె వాట దొర్కు జలి,

5 దేముడుచి కోడుచి రుసి చక తా, జెతికయ్ ఉగుమచి సెక్కి చక తిలె, పట్టొ జేవ్ పొరపాట్ జా క్రీస్తుక ములిలె, జోవయిచి పాపుమచి రిసా జేవ్ దుకుమ్ జతి రితి జేవ్క చెంగిల్ వాట్తె అన్నె కడ అనుక నెంజె. కో నెత్తిర్రి.

6 కిచ్చొక మెలె, జేవ్ జోక ములిలిసి జేవ్ సొంత, దేముడుచి పుత్తుక అన్నె సిలువతె గల మార్రి రితి జతయ్, చి అన్నె మాన్సుల్ జోక నిస్కారుమ్ కెర జోకర్ల రితి జోచి నావ్ కడ్డి రితి జతయ్.

7 కీసి మెలె, జేవ్తె ఒగ్గర్ సుట్లు పెట్టి పాని కేన్ బుయి పియ తా, జా బుయ్యె పంటొ పికడ్డనక చెంగిల్ కామక జెతికయ్ పంటొ దిలె, దేముడు తెంతో జేవ్చి వాటచి వరుమ్ జా బుయి నజన్తయ్.

8 గని, జా బుయి రితయ్ కంట రూకుల్ గట్ట దిలె, కామక నెంజిలిసి, చి జాక సాపెనల్ దెంక జయెదె. ఆకర్క జేవ్క డయ గెలుకయ్ తయెదె.

దయిరిమ్ కొణ్డొ సంగిలిసి

9 అమ్ ఇని జాగర్ల సంగిలే కి, తుమచి రిసా, బావుడ్డు, కిచ్చొ ఉచర్లనుమ్ మెలె, ఈంజ రచ్చనతె బెదిత అన్నె చెంగిలి వరల్ తుమక దొర్కు జవున్ మెన అమ్క దయిరిమ్.

10 కిచ్చొక మెలె, దేముడుచి రిసాచి తుమచి కామ్, అగ్గె కి అప్పె కి జోచయ్ జల మాన్సుల్క తుమ్ తోడు కెర, జోచి ఉప్పిర్చి తుమచి ప్రేమ దెకయ్లిసి జో పచ్చె నాయ్ మెన, దస్సి పొరపాట్ తీర్పుచొ నెంజె మెన, అమ్క దయిరిమ్.

11 తుమచి రిసా అన్నె కిచ్చొ ఆన జా అన్నుమ్ మెలె 'జర్లు జయెదె' మెన తుమ్ సంపజలిసి పూర్తి నెరవెర్లుప జతి రితి తుమ్ ఎక్కి నిదానుమ్ ఎక్కి ఆన తంక.

12 తుమ్ దస్సి నిదానుమ్ తా గెలె, బద్దుకుమ్ నే జతె, దేముడు ప్రమానుమ్ సంగిలిన్చి వాట జోవయిచి నముకుమచి జోవయిచి నిదానుమచి రిసా కలుగు జత అన్నె మాన్సుల్చి రితి తుమ్ ఇండితె, జయ్యె అమచి ఆన.

అబ్రాహామ్ సంపజా నిదానుమ్ తతికయ్ జెయిమ్ జలిన్

13 అబ్రాహామ్ పూర్లుమచొక దేముడు ప్రమానుమ్ సంగిలి పొది, జో దేముడు సొంతచి కంట కెయ్ కో వెల్లి తతి నాయ్ చి రిసా, అన్నె వెల్లి నుదెచి నావ్ దెర ఒట్టు గలుక అవ్కానుమ్ నాయ్ చి రిసా, జోచి సొంతయ్ నావ్ తెన్ ఒట్టు గలన,

14 కిచ్చొ ప్రమానుమ్ సంగిలన్ మెలె,

† "తుక కచితుమ్ దీవెన దా జెయిమ్ కెర తుమచి సెకుమ్చ ఒగ్గర్జన్ జతి రితి జర్లు కెరెదె"

15 దస్సికయ్, అబ్రాహామ్ నిదానుమ్ తా ఎత్తి ఒర్కుప జతికయ్, జా ప్రమానుమ్ తిలిసి జోక దొర్కు జలి.

* 6:2 6:2 నెంజె 'బాప్తిసుమ్ నజన్తినచి రిసాచి....' † 6:14 6:14 అదికాండుమ్ 22:17.

16 మాన్యుల్, జోవయింది కంట కేన్ జవున్ వెల్లో సుదోచి నావ్ దెర ఒట్టు గల్తతి, చి జోవయింద తగుల్ ఎత్కితె ఒట్టు గలిలె, 'నిజుమ్' మెంతతి.

17 దస్సి జో సంగిలి ప్రమానుమతె వాట నజన్తనక జోచి కోడు పిట్టె నాయ్ మెన, జోచి ప్రమానుమచి సత్తిమచి రుజ్జు దెకవుక మెన, జో ప్రమానుమ కెర్లిన్క 'నిజుమ్ జర్గు జయెదె' మెలి గుర్తుక దేముడు ఒట్టు గల్తన్.

18 దస్సి, దొన్ని నే పిట్ట కమెచి రిసా, మెలె ప్రమానుమచి రిసా కి జో ఒట్టు గల్తన్చి రిసా కి, జో దేముడు అబద్దుమ్ జంక నెత్తెచి రిసా, అమ్ పరలోకుమతె పావెతి వరుమచి ప్రమానుమచి ఉప్పిర్చి దయిర్మి, అమ్ డిట్టుమ్ దెరనతి రితి, అమ్ జోచి రచ్చనతె నిగ అయిలన దయిర్మి తంక జయెదె.

19 కేన్ జవున్ దొన్ని, జలె, వేరతె నే గెతి రితి లంగరు కిసి జాక డిట్టుమ్ బీచడదె గే, దస్సి, పరలోకుమతె జో అమ్క పావడ్డి వరుమచి ఈంజ అమ్చి దయిర్మి అమ్చి అత్తక అమ్క డిట్టుమ్ బీచడ్డయ్. అమ్క జో దిలి ఈంజ వరుమ్, జలె, అమ్క అడ్డు తిలి తెర ఒత్తల్తో అమ్ జిన్ తెడిక తెడిచి గదితె పెసెతి రితి, పరలోకుమతెయి పావడ జిన్యత్యం.

20 ఒత్త జా †తెర ఒత్తల్తో మెలి కోడు యేసు అమ్చి నావ్ తెన్, అమ్క రచ్చన దొర్లు కెర్తి రిసాయి పురైతో నిగ గెచ్చ పావ అస్సె గెద, చి రాన్ జలో మెల్కీనెదెక్చో రితో ఎత్కిక వెల్లో పూజరి జో జా, కెయిడ తెయిడ అమ్క దేముడు అబ్సిన్చి మొక్కె తోడు తయెదె.

7

మెల్కీనెదెకు కెయిడ తెయిడ పూజరి

1 ఈంజో మెల్కీనెదెకు, జలె, ఒగ్గర్ పూర్ణమ్ పొది సాలేమక రానో జలోసా, ఎత్కిచి ఉప్పిరి వెల్లో జలో దేముడుచి సేవ కెర్తొ పూజరి జలోసా, జలె. రాన్లక జిన్ మార్లిన్ తెంతో * అబ్రాహామ్ పూర్ణమ్చో బుల జెతె తిలి పొది, జో మెల్కీనెదెక్ జోవయింక దస్సుల్ జా జోక చెంగిల్ వరుమ్ దిలన్.

2 వరుమ్ దెతికయ్, జో మెల్కీనెదెక్ మరియాద కెర్తి రితి అబ్రాహామ్ జోక కలుగు జలిసి ఎత్కితె దెస్సు వాటల్క ఏక వాట దిలన్. జో మెల్కీనెదెక్, జలె, ముక్కీమ్క జోచి నావ్చి అర్దుమ్ తిలి రితి †పున్సిమ్క రానో జలోసా, వడ్డొ సాలేమ్ పట్టుమ్క కి జో రాన్. ‡సాలేమ్క జో రాన్ జయెదె మెలె, సాంతిక సేంతుమ్క జో రానో జయెదె.

3 జోవయింక కేన్ అబ్సిన్ అయ్యన్ పాయితి నాయ్, జో కేన్ సెకుమ్చో నెంజె, చి జోచి జీవతుమ్క 'మొదోల జలి' జవున్ 'కేడ గలి' జవున్ మెనుక నెంజె. దనచ జోక నాయ్, చి దేముడుచో పుత్తన్ రితో జా, కెయిడ తెయిడ జోచో పూజరి జా తత్తయ్.

4 జో మెల్కీనెదెక్ కెర్తొ వెల్లో సుదో జయెదె గే, అప్పె ఆవ్ రెగిడ్డ కోడొతె తుమ్ అర్దుమ్ కెరన. అమ్చో పూర్ణమ్చో జలో అబ్రాహామ్ కి జోక కలుగు జలిసి ఎత్కితె దెస్సు వాటల్క ఏక వాట దా గెలన్. జో దస్సి కెర్లిన్ తెన్ మెల్కీనెదెక్ 'ఒగ్గర్ వెల్లో' మెన ముక్కీమ్చో అమ్చో పూర్ణమ్చో అబ్రాహామ్ ఒప్పన్ మెన రుజ్జు జతయ్.

5 అహారోసుచి తెడి పైజల్ ఎత్కిక శీలేవీ పూర్ణమ్చోచి తెగచ మున్సుబోదల్ పూజర్లు జా, దేముడుచి కొడొతె రెగిడ్డి రితి, పైజల్ ఎత్కిక కలుగు జలిసిచి దెస్సు వాటల్తె ఏక వాట నజనుక దేముడుచి అగ్గు జా అస్సె. కత్తయ్ జేవ్ సంగుక మెలె, జోచ బావుడ్డు జలె అబ్రాహామ్చి సెకుమ్చ అన్నె తెగల్చతె; జేవ్ కి అబ్రాహామ్చి సెకుమ్చ జలెకి.

‡ 6:20 6:20 యూదుల్చి దేముడుచి గుడితె తెడిక తెడిచి గదితె ఎక్కి ఎత్కిక వెల్లో పూజరి గని అన్నె లోయి నే గెతి రితి తెర అడ్డు తయెదె. పరలోకుమతెచో ఎత్కిక వెల్లో పూజరి, జలె, యేసుయి. జోయ్యి ఒత్త అడ్డు తిలన్క జిన్ అస్సె, చి జోవయింక సంపజలనకయ్ కి జిన్యత్యం. యేసు మెర్లిన్ తెన్నె యెరూసలేమ్తె యూదుల్చి దేముడుచి గుడితెచి తెర ఉప్పిర్ తెంతో ఎట్టో ఎద పూర్తి చిరి జా గండల్ జలి. దస్సి జర్గు జలిసి టాలె జా అమ్క కిచ్చొ రుజ్జు దెకయత్యం మెలె, జో మెర్లిన్ తెన్నె అమ్క చి ఎత్కి, అదికారుమ్ తిలో దేముడుక అడ్డు తిలి పాపుమ్ గెచ్చయిలన్. మత్తయి 27:51, మార్కు 15:38, లూకా 23:45, ఎబ్రియల్ 9:1-3, 10:19-20. * 7:17:1 అదికారుమ్ 14:17-20. † 7:2 7:2 జోవయింది నావ్చి అర్దుమ్ కిచ్చొ మెలె, 'పున్సిమ్ అంచో రాన్'. ‡ 7:2 7:2 'సాలేమ్' మెలి నావ్చి అర్దుమ్ కిచ్చొ మెలె, 'సేంతుమ్' 'సాంతి'. § 7:5 7:5 నిర్దహకారుమ్ 32:25-29, 38:21.

6 పడ్డో, కేన్ నెకుమ్ నెంజిలో ఈంజో మాన్సు జలో మెల్మీసెదెక్, మాత్తుమ్, అబ్రాహామ్ చి అత్తి దెన్సు వాటల్తె ఏక్ వాట నజల్లో. పడ్డో, దేముడు ప్రమానల్ దిలో జో అబ్రాహామ్ క మెల్మీసెదెకు చెంగిల్ వరుమ్ దిలన్.

7 దాకు నుదొక వెల్లో నుదో దీవెన కెరెదె మెన ఎత్తిజన్ జాన వేర నంగితి నాయ్.

8 పడ్డో, ఈంజ లోకుమ్తె దెన్సు వాటల్తె ఏక్ వాట నజీన్తన మొర్తయ్ మాన్సుల్ జవుల, గని పరలోకుమ్తె నజన్తోసా, జలె, జోవయంక 'జివ్వి అస్సె' మెన దేముడుచి కొడొతె పూర్తి రుజ్జు జా అస్సె.

9 పడ్డో అస్సె కిచ్చొ మెనుక జయెదె మెలె, దెన్సు వాటల్తె ఏక్ వాట నజితె తిలో లేవీ పూర్ణుమ్చో, జోచి నెకుమ్తె జెర్మిల పడ్డోచ పూజర్లు తెన్ సొంత అబ్రాహామ్ చి అత్తి మెల్మీసెదెక్ దెతి వాట దిలన్, దెతతి, మెనుక జయెదె.

10 కీసి మెలె, అబ్రాహామ్ తెన్ మెల్మీసెదెక్ దెన్సుల్ జలి పొది, జో *లేవీ తెదొడి కి అబ్రాహామ్ చి పెట్టి తిలన్ మెనుక జయెదె. అబ్రాహామ్ చి నెకుమ్తె పడ్డో జెర్మిలన్.

మెల్మీసెదెక్ జలో రితో క్రిస్తు పూజరి

11 పడ్డో, 'లేవీచి తెగతె జెర్మిలన పూజర్లు జేవ్ కెర్తి కెమెతె మాన్సుల్ చి పాపుమ్ జా వాల్ గెలి చి పున్మి పూర్తి జా అస్తి' మెనుక జతి జలె; జయ్యి ప్రమానుమ్ చి తెడి ప్రజల్ కె ఆగ్గుల్ దొర్కు జలి, గెద; జలె, ఒత్త నుద్ది జతిసి పూర్తి జతిసి దొర్కు జతి జలె, అహారోనుచి రితి, మెలె, లేవీయల్ చి రితి ముల, 'మెల్మీసెదెక్ చో రితో పూజరి జంక' మెన కిచ్చొక యేనుక దేముడు బీవో కెలాన్?

12 వేర రగమ్ పూజరి జతి రితి మార్పున కెర్తె, వేర రగమ్ ఆగ్గుల్ కి మార్పున జతయ్.

13 ఈంజేవ్ కొడొ కచి రిసా గే, జో అగ్గెచ పూజర్లు జెర్మిలి తెగచో నెంజె. ఇన్నెచి తెగతెచ కోయి అగ్గె పూజర్లు జతి నాయ్.

14 మెలె, లేవీచి తెగతె నాయ్, గని యూదాచి తెగతెయి అమ్చో యేనుప్రబు జెర్మిలన్ మెన ఎత్తిజన్ జాన్ల, చి ఈంజ తెగచి రిసా పూజర్లు జతి కేన్ కోడు కి అమ్క ఆగ్గుల్ దిలో మోసే పూర్ణుమ్చో నంగె నాయ్.

15 అగ్గెచి ప్రమానుమ్ చి, అప్పెచి ప్రమానుమ్ చి తేడ కీసి అన్నె సొస్టుమ్ డీస్తయ్ మెలె, మెల్మీసెదెక్ చో రితోచో ఈంజో అన్నెక్లో పూజరి అయ్లీన్ తెన్ని డీస్తయ్.

16 మెలె, ఈంజో పూజరి జలిసి కీసిచి మెలె, ఆగ్గుల్ చి మొక్క నాయిమ్ తిలి రితి కేన్ జవున్ తెగతె జెర్మిలి రిసా ఎక్కీలో పూజరి జతిన్ చి రితి నెంజె, గని కెయెక తెయెక నే మొర్తె చెంగిల్ తతి జివ్వి జో యేను తిలిన్ చి సెక్తికయ్ జో పూజరి జా అస్సె.

17 మెలె జోచి రిసా దేముడుచి కోడు సాచి నంగిలి రితి;

† "మెల్మీసెదెక్ కీసా పూజరి జా తిలో గే, తుయ దసా పూజరి జా కెయెక తెయెక తా జా కామ్ కెర్తె" మెన రెగిడ్డిసి.

18 జలె, అగ్గెచ ఆగ్గుల్ క దెకిలె, జేవ్ చి సెక్తి నెంజిలిన్ చి రిసా జా కామ్క నెంజిలి రిసా "జా పోని" మెన దేముడు నంగితయ్.

19 † కిచ్చొయ్ పూర్తి జతి రితి జా ఆగ్గు రితి కో జర్గుచ కెరుక నెతిర్తి. గని నొచి కోడు బారో జలి తెంతో, అన్నె వెల్లి వరుమ్ చి రిసాచి దయిరిమ్ అమ్క దొర్కు జా అస్సె. మెలె, ఈంజ వరుమ్ చి రిసా, ఈంజయ్ వరుమ్ చి ఉప్పిర్ చి దయిరిమ్ చి రిసా, అమ్ దేముడుక పాసి జా జతనుమ్.

20 అన్నె, యేను పూజరి జతి ఈంజ నొచి వరుమ్ ఒట్టు నెంజిలిసి నెంజె. ఒట్టు తెన్ చి జతయ్, చి అన్నె విలువ అస్సె.

21 అగ్గెచి ప్రమానుమ్క పూజర్లు జలన, జలె, ఒట్టు నెంతె పూజర్లు జల, గని ఈంజ నొచి వరుమ్ జలె, ఒట్టు గలిలిసి. కిచ్చొ ఒట్టు గలిలిన్ మెలె, † "తుయ కెయెక తెయెక తతో పూజరి, మెన

* 7:10 7:10 లేవీచి నెకుమ్తె పూజర్లు పడ్డో జెర్మిల. జయ్యి నెకుమ్తె జెర్మిల. † 7:17 7:17 కిర్చనలు 110:4 చి ఎత్రియల్ 5:6 దెక.

‡ 7:19 7:19 రోమియల్ 3:20-22, 8:3-4. § 7:21 7:21 కిర్చనలు 110:4.

ఆవ్ దేముడు ఒట్టు గలన అన్సి, చి
అంచి మెన్ను ఆవ్ మార్పుప కెరనీ నాయ్”

మెన దేముడు యేసుచి రిసా ఒట్టు గలన అన్సి.

22 దన్సి, అగ్గెచి ప్రమానుమ్ కోడుచి కంట యేసు మదెనె జతి ప్రమానుమ్ కోడు కచితుమ్ జెయిమ్ జతిసి
మెనయ్ ఈంజ కోడుతె రుజ్జు జతయ్.

23 అగ్గెచి పూజర్లు ఒగ్గెరజన్ జల. కిచ్చొక మెలె, జేవ్ మొర్తనయ్ జవులచి రిసా కెయలక తెయలక
పూజర్లు జా తంక నెతిర్తి. ఎక్కిలో మొర్లె, *అన్నెక్లో పూజరి జంక, మెలి రితి జతతి.

24 గని ఈంజో యేసు కెయలక తెయలక తాఁ గెతోనొ జా అన్సిచి రిసా ఈంజోయి పూజరి జలిసి కెయలక
తెయలక తాఁ గెతీసి.

25 జాకయ్, ఇన్నెచి తెడి కో ఎద్దికి అదికారుమ్ తిలో దేముడుక పాసి మెలి రితి జతతి గే, జేవ్ కెయలక
తెయలక రచ్చనతెయి తతి రితి పూర్తి రచ్చన దెంక ఈంజోయి తెరె; దేముడుక చి అమ్క ఈంజోయ్ మదెనె
జా అమ్ నంపజల మాన్సుల్చి రిసా దేముడుచి మొక్కె టీచ ప్రార్దనల్ కెర్తతి రితి కెయలక తెయలక జెవ్వి
అన్సి.

26 పరలోకుమ్చి నుద్ది తిలో కిచ్చొ పొరపాట్ నెంజిలో, కిచ్చొ గర్వి నెంజిలో, ఎద్దరె పాపుమ్ నెంజిలో,
ఆగానుమ్చి ఉప్పిరి వెగ వెల్లో పూజరి అమ్క దొర్కు, జంక దొర్కు జలో.

27 జేవ్ అన్నె ఎత్తిక వెల్లెల పూజర్లుచి రితి జో రోజుక అర్చితల్ దెంక నాయ్. జెవ్వి పూజర్లు, జలె,
తోలితో జోవయించ సొంత పాపల్చి రిసా, పడ్డో ప్రజల్చ పాపల్చి రిసా, అర్చితల్ దెతతి. జో, జలె,
పాపుమ్ నుదె నెంజె, చి సొంతచి రిసా అర్చితుమ్ దెంక, నాయ్, చి ప్రజల్చి రిసా ఎక్కి, నుట్టు జోచి సొంత
జీవ్ దా, కెయలక తెయలక కామ్క జెతిన జలి అర్చితుమ్ జలన్.

28 దన్సి, కిచ్చొ దెకితనుమ్ మెలె, నెక్కి నెంజిల మాన్సుల్ పూజర్లు జతిసి ఆగ్గుచి ప్రమానుమ్తె తయెదె,
గని ఆగ్గుచి కంట పడ్డో అయిలో జో ఒట్టు గలన్సి కోడుకయ్ దేముడు కిచ్చొ నెలవ్ దిలో మెలె, పూర్తి జలో
జోచొ పుత్తనకయ్ కెయలక తెయలక తతో పూజరి జవున్ మెనయ్ జో దేముడు జోక టీచడ అన్సి.

8

యేసు పరలోకుమ్తె అబ్బొనచి ఉజెతో పక్క వెన అన్సి

1 జలె, అమ్ నంగితిన్చి అర్దుమ్ కిచ్చొ మెలె, దసా కెయలక తెయలక తతో పూజరి అమ్క అన్సి. జో
పరలోకుమ్చొ వెల్లో రానొ జలో దేముడు అబ్బొనచి ఉజెతో పక్క వెన తా,

2 మాన్సుచి అత్తి నాయ్ గని దేముడు ప్రబుచి అత్తి తెయార్ జలి పరలోకుమ్చి నిజామ్ జలి
టంబుగుడితె, పరలోకుమ్చి ఒగ్గెర నుద్దిచి, తెడిక తెడిచి గదితె, జోచి నెవ కెర్తయ్.

3 జలె, బలివో అర్చితల్ దెంక మెన ఎత్తి పూజరి నిసాన అన్సి. జాకయ్, ఈంజో పూజరి కి కిచ్చొగె బలి
దెంక జోచి అత్తి కిచ్చొ జకు తంక అన్సి.

4 జలె, బూలోకుమ్తె అప్పె తత్తో జలె, ఈంజో పూజరి జా తత్తో నాయ్. కిచ్చొక మెలె, ఆగ్గల్ రితి తెన్
బలివో దెత పూజర్లు లేవీచి నెకుమ్చ అన్సి. ఈంజో, మాత్రుమ్, జా నెకుమ్చొ నెంజె.

5 అమ్ యూదుల్చ ఈంజోయ్ లోకుమ్చ జేవ్ పూజర్లు, జలె, జోవయించి కామ్ కిసిచి మెలె,
పరలోకుమ్చి దేముడుచి గుడితె జర్లు జతినక టాలి రితి నీడ రితి జా, ఒత్తచి టంబుగుడ్డ ఒత్తచి
దేముడుచి గుడితె జర్లు జతినక ఇదెలి అర్దుమ్ జవున్ దెకయతయ్. కిసి మెలె, జా టంబుగుడ్డ పూర్ణమ్
మోసె బందవుక దేముడు నంగిలి పొది, జో దేముడు ప్రబు కిచ్చొ మెన జోక ఆడ్ర దిలన్ మెలె, *“జా
డొంగురుతె తుక ఆవ్ దెకయిలో రూపుమ్కయ్ ఎత్తి తెయార్ కెరుక దెకన. జయ్యి రూపుమ్చి బందవు”
మెలన్.

నొచి ప్రమానుమ్చి రిసాచి కోడు

* 7:23 7:23 ఎక్కి దడి మొత్తుమ్ వినెక్ చెత్తరజన్ మాములుమ్ పూజర్లు తవుల, పడ్డో ఎత్తిక వెల్లో పూజరి కి తయెదె.
నిగ్గమాకాండుమ్ 25:40.

* 8:5 8:5

6 ఈజో యేసు అన్నె అన్నె ఒగ్గర్ ప్రమానల్ కి నిసాన జా, అన్నె ఒగ్గర్ ఆగ్గుల్ క నెడిమిచో జా తంక మెన, అన్నె ఎత్తిక వెల్లో కామ్ కెర్తసా జలో. కిచ్చొక మెలె, అన్నె ఈజ చంగిల్ ప్రమానల్ జగ్గు జతిసి.

7 తొలితో చి ప్రమానుమ్ కిచ్చొ పిట్టిన్ నెంజిలిసి జతి, జలె, అన్నెక్ ప్రమానుమ్ దొర్కు జతి నాయ్.

8 జా ప్రమానుమ్ దొర్కు జలనక 'జా ప్రమానుమతె పిట్ల, పిట్లవన్ల' మెన ఎత్తి అదికారుమ్ తిలో దేముడు ఒప్పన్ తిసి కిచ్చొ కోడుతె రుజ్జు జతయ్ మెలె,

† "ఇస్రాయేలుచి గేర్చక చి సీయూదాచి గేర్చక ఆవ్ నొవి ప్రమానుమ్ దెత దీనల్ జెవుల"

మెన ప్రబు సంగితయ్.

9 "జా నొవి ప్రమానుమ్, జలె,

జోవయించ పూర్తుల్ క ఆవ్ దిలి ప్రమానుమచి రితిచి నెంజె.

జోవయించి అతు దెర జోవయింక ఐగుపు దేసిమ్ తెంతో విడ్డల్ కెర

కడ దెర నిలి దీసి జా ప్రమానుమ్ దిలయ్.

గని, అంచి జా ప్రమానుమ్ క సత్తిమ్ కెర్తి నాయ్,

సత్తిమ్ ఇండితి నాయ్ చి రిసా ఆవ్ పనుల

జోవయింక ములిల్ రితి జా దెకి నాయ్,

మెన ప్రబు సంగితయ్."

మెన జో దేముడు రెగ్గయ్లి కోడు అన్నె. గని ఒత్త తెంతో కిచ్చొ దయిరిమ్ దెతి కోడు సంగితయ్ మెలె,

*

10 "గని, అమచ ఇస్రాయేలుల్ మెలి గేర్చక పడ్డెవ దీసల్ క

నొవి ప్రమానుమ్ దెయిందె మెన

ప్రబు కిచ్చొ సంగితయ్ మెలె,

జోవయించ ఆత్మల్ తె అంచ ఆగ్గుల్ ఆవ్ తియిదె,

జోవయించి పెట్టి అంచ ఆగ్గుల్ రెగిడిందె, చి

ఆవ్ జోవయించో దేముడు జయిందె, చి

జేవ్ అంచయ్ వైజల్ జా తవుల.

11 అన్నె, జేవ్ దీసల్ క జేవ్ ఎక్కిలోక ఎక్కిలో బుద్ది సికడుక తయె నాయ్.

జోవయించ బాపుడ్డివొక ప్రబు తెన్ తుమ్ బెద, మెన

ఎత్తి మాన్సు సికడుక తయె నాయ్.

కిచ్చొక మెలె,

జేవ్ దీసల్ క జేవ్ బాల వెల్లో కి ఎత్తిజిన్ అంక జానుల.

12 కిచ్చొక మెలె,

జోవయించ పాపల్ ఆవ్ చెమించుప కెరిందె,

జోవయించ తప్పుల్ ఆవ్ పప్పు గేలిందె"

మెన దేముడు ప్రబు సంగితయ్.

13 దస్సి నొవి ప్రమానుమచి రిసా సంగ, అగ్గెచిక 'కామ్ క నెంజె' మెన ఒప్పన్ తయ్. అన్నె, కామ్ క నెంజిలి

రితి జతిసి పొర్ని జా పూర్తి కేడయ్ గెచ్చెదె.

9

దేముడుచి గుడితె కిచ్చొ కిచ్చొ తిలిసి

1 జలె, అగ్గెచి ప్రమానుమతె కీసి బక్తి కెరుక గే ఆగ్గుల్ తిలి, చి ఈజ లోకుమచి రగుమ్చి ప్రబుక బక్తి కెర్తి టాన్ తిలి.

† 8:8:8 యిర్మీయా 31:31-32. ‡ 8:8:8 యూదుల్ క 'ఇస్రాయేలుచి గేర్చ' మెనుల కి. § 8:8:8 'యూదా' మెలె, ఇస్రాయేల్ మెలో యాకోబుచొ పుత్తన్ జలో యూదా. * 8:9:8:9 యిర్మీయా 31:33-34.

2 మెలె, టంబుగుడ్డ తెయార్ కెర్ల, చి యూదుల్ చ ప్రెజల్ ఎత్కిజిన్ పెసితి పుర్రెతోచి టంబుగుడ్డ గదితె దీవుకుంబుమ్ చి పోడియో బలి దెతి బల్ల తిల. జా గదిక దేముడుక సుద్ది తతి టాన్ మెనుల.

3 పడ్డో, జా వెల్లి గదిచి గుమ్ముమె తెర ఒడోవ తిల, అన్నె తెడిక, జా గది జిన్నె, అన్నెక్ టంబుగుడ్డ గది తిలి. జాక 'దేముడుక ఒగ్గర్ సుద్ది తతి టాన్' మెనుల. జాక అన్నెక్ తెర గూడు తిలి.

4 జా తెడిక తెడిచి గదితె దూపుమ్ డయతి బజర్ చి పీటుమ్ తిలి, చి దేముడుచి తెదోడెచి ప్రమానుమ్ క గుర్తు జతి పెట్టె తిలి. జా పెట్టె తె ఎత్కి పక్కలె ఉప్పిరి బజార్ పుజడ తిల. జా పెట్టెచి తెడి *మన్నా మెన పరలోకుమ్ తెంతో దేముడు పూర్గుమ్ సుచ తిలి అన్నిమ్ ఇదిల్ దెర్లి బజర్ చి మర్రముంత తిలి. పడ్డో అన్నె అగ్గె బగుప్పు దేసిమి జేవ్ అమ్ చ యూదుల్ తిలి పొది గజ్జల్ జా తిలి అహరోసుచి † టెన్నో డండో, పడ్డో జా పొర్ని ప్రమానుమ్ చ అగ్గల్ రెగిడ్డ ‡ చత్రల్ తిల.

5 జా పెట్టెచి ఉప్పిరి, మెలె, దేముడు పాపల్ చెమించుప కెర్తి గుర్తుచి జా పెట్టెచి ఉప్పిరి దొన్నె బజర్ చ దూతల్ చ బొమ్మల్ టీచ, జా పెట్టెక దెకిల్ రితి వంపా జా తిల. ఈంజ ఎత్కిచి రిసా అన్నె ఒగ్గర్ సంగుక నెత్తుమ్.

6 జా ఎత్కి తెయార్ జలి తెంతో, జా టంబుగుడ్డచి పుర్రెతోచి గదితె పూజర్లు గెచ్చుక జెంక జతె తా జోవయించి సేవ చ నీతికమె కెర్తె తత్తతి.

7 గని తెడిక తెడిచి గదితె ఎత్కి, ఎత్కిక వెల్లో పూజరి, వెర్సెక్ ఎత్కి సుట్టు గెతయ్. గెలె, లోయి నెంజతె బెరుక నాయ్. నే జానీతి రితి కెర్ల జోవ పాపల్ చి రిసాచి, ప్రెజల్ చ పాపల్ చి రిసా బలి దెతి లోయ్ తెన్ బెరుక అన్నె.

8 ఈంజ టాలి దెక చ దేముడుచి సుద్ది తిలి ఆత్మ కిచ్చో అర్దుమ్ దెకయ్ తయ్ మెలె, జా పుర్రెతోచి గదిచి తెడిచి తెర అడ్డు టీవెతి ఎదిలి సేంపు, దేముడుక ఒగ్గర్ సుద్ది తిలి తెడిక తెడిచి గదితె పెనుక మాన్సుల్ క వాటు నాయ్.

9 జా పుర్రెతోచి గదితె ఒడోయ్ జలి జేవ్ చి జా తెర కిచ్చోచి రిసా టాలి జయెదె మెలె, ఈంజయి ఉగుమ్ కయ్ టాలి జతయ్. దేముడుక ఈంజ ఉగుమ్ తెకో నంపజా గెచ్చుల గే, ఉగుమ్ కేడ్డె జోతె గెచ్చుక అడ్డు తయ్ నాయ్. జా రితితె, జలె, బక్కి కెర్లొసాచి ఆత్మక సుద్ది కెరుక నెత్తెర బలివో అర్పితల్ దెతతి.

10 దస చ రితి అన్నిమ్, పితిసి, ఆగ్ దొవనీతిసి, ఎత్కి ఆగ్ కయ్ కామ్ క జెత అగ్గల్ జతతి. నెవి అగ్గల్, నెవి వరుమ్ జర్లు నే జతె అగ్గె రకితె తిలిసి, జా.

క్రీస్తు పూజరి జా అర్పితమ్ జలిసి

11 గని చెంగిల్ ప్రమానుమ్ అయ్ లిన్ క్రీస్తు ఎత్కిక వెల్లో పూజరి జా అయ్ లిన్ తెన్, మాన్సు తెయార్ నే కెర్లి, ఈంజయి రగుమ్ జెర్లున్ నే జలి, అన్నె వెల్లి అన్నె పూర్తి జలి రగుమ్ చి టంబుగుడ్డతె, మెలె పరలోకుమ్ తె దేముడు అబ్బొన్ తిలిన్ తెయి పెన,

12 దేముడుక ఒగ్గర్ సుద్ది తతి టాన్ తె కెయ్ క తెయ్ క కామ్ క జెతికయ్, ఎత్కి సుట్టుయి యేసు పెసిలన్. పెన, గొర్రెల్ చి, వసాన్ పిల్లల్ చి లోయి నాయ్, గని జోచి సొంత లోయి దా కెర, అమ్ అన్నె కెయ్ క విడ్డల్ నే జతి రితి అమ్ క అన్నె నెతోవన అమ్ క జత బెదయ్ లన్.

13 మెలె, గార్ జల మాన్సుల్ చి ఉప్పిరి గొర్రెల్ చి జవున్, వసాన్ పిల్లల్ చి జవున్ లోయి చించితిసి, నెంజిలె వస్సి పిల్లక డయిల్ చి సార్ చించితిసి, ఎత్కి జోవయించి ఆగెచి కీడు గెచ్చయ్ తి రితి జతయ్.

14 గని అమ్ చి పాపుమ్ గెచ్చయ్ తి అర్పితమ్ జంక మెనయ్ క్రీస్తు జోచి పరలోకుమ్ చి తా గెతి ఆత్మనెక్కిక జోచి జీవ్ దా మొర్లన్. జా అగ్గెచి ప్రమానుమ్ చ ఆర్పితమ్ లు మాన్సుచి ఆగెచి సుద్ది కెర్తయ్ జలె, జోవయించి ఆత్మక యేసు దిలి సొంత లోయి అన్నె కెర్లి కామ్ కెరెదె! జాకయ్, జీవ్ తిలో జీవ్ దెతి దేముడుచి సేవ అమ్ కెర్లి రితి, కామ్ క నెంజిలె మొర్లి రిత అమ్ చ కమె జో పుంచ గెల కెర, అమ్ లాజ్ జంక నెంజితి రితి, అమ్ చి ఆత్మ జో సుద్ది కెరెదె,

* 9:4 9:4 నిర్ణయకాండుమ్ 16:1-35. † 9:4 9:4 నిర్ణయకాండుమ్ 7:8-13. ‡ 9:4 9:4 నిర్ణయకాండుమ్ 32:15-16.

15 దస్సి, ఈంజ నొవి ప్రమానుమక ఈంజొయి దేముడు అబ్బొనక చి అమ్క మదెనె జతోసా జా అస్సె. దస్సి, ఈంజొ మొర దొర్కు జలి అర్పితుమ్ జలిన్ తెన్ అగ్గెచి ప్రమానుమచ కొడొ అమ్ పిట్టవన పాపుమ్ జలిన్చి సిచ్చ తెంతొ అమ్క విడ్డల్ కెర నెతోవ గెల అస్సె. కిచ్చొక ఇసి జర్గు కెర అస్సె మెలె, కక్క జో బుకారా తయెదె గే, ప్రమానుమ్ జలి కెయెక తెయెక చెంగిల్ తతి వాల్ జోవయింక దొర్కు కెరుక మెనయ్.

16 అస్సె కిచ్చొ ఉచరుక జయెదె మెలె, 'అవ్ మొరై అంచి అస్సి ఇసి దస్సి వంట దెతు' మెన మాన్సు ఏక్ కాగ్గుమ్ రెగ్గ తిలె, జేవ్ వాటల్ వంట దెంక జలె, తొలితో జో మాన్సు మొర్లిన్చి రిసా రుజ్జు జంక.

17 కిచ్చొక మెలె, మాన్సు మొరైకయ్ జో రెగ్గి దస్సి కాగ్గుమ్ కామ్క జెయెదె, గని జా రెగ్గయ్లోసా జివ్ తిలి పొది కామ్క జెయె నాయ్. దస్సికయ్ జోచి అస్తిచి వాట జోచ మాన్సుల్క దొర్కు జవున్ మెనయ్ యేసు మొర గెలన్.

18 ఇసి, తొలితో చి ప్రమానుమ్ కి లోయి నూయి జలిన్చి జలి.

19 మెలె, ప్రజల్ ఎత్తిక దేముడుచ అగ్గుల్చి ఎత్తి అగ్గు మోసీ పూర్గుమ్చొ నూనవ కేడయ్లి వడ్డొ వస్సా పిల్లల్క చి, గొరెల్క కండ్ జోవయించి లోయి దెరన, పాని, ఎరన ఊలు, హిసొప్పివ మొక్కవ రొడ్డల్ తెన్ జేవ్ అగ్గుల్ రెగ్గిన్చి ఉప్పిరి కి, ప్రజల్ ఎత్తిచి ఉప్పిరి కి చించ దా,

20 "ఇసి కెర మెన దేముడు తుమ్క ఆడ్ర దిలి ప్రమానుమ్చి గుర్తుచి లోయి ఈంజ" మెన సంగెలన్.

21 దస్సి కి, జా టంబుగుడ్డతెచి బక్తి కెర్లిన్తె వాడిక కెర్లి సామన్ ఎత్తితె జా లోయి చించ దిలన్.

22 నిజమి, అగ్గుల్ రితి తెన్, కేన్ గి ఏకక ముల, ఎత్తి వస్తువక లోయింకయ్ సుద్ది కెరుల, చి లోయి నే నూయి జలె, పావల్ చెమించువ జయె నాయ్.

యేసు అమ్చి పాపుమ్ వుంచ దా

23 దస్సి పరలోకుమ్తె జతిన్క టాలి జతిసి ఎత్తి లోయి నూయి జతిన్ తెన్ దన కమొకయ్ సుద్ది జంక అగ్గెయి దొర్కు జా తిలి, గని పరలోకుమ్తె బెదితిసి ఎత్తి అస్సె చెంగిలి బలి జతిన్కయ్ సుద్ది జంక దొర్కు జలి. మెలె, క్రీస్తు బలి జలిన్కయ్.

24 మెలె, దేముడుక సుద్ది తతి టాన్తె క్రీస్తు పెన అస్సె. జా టాన్ మాన్సు తెయారొ కెర్లిన్ నెంజె, గని పరలోకుమ్, చి దేముడుచి సొంతచి మొక్కె క్రీస్తు టీవ అమ్చి వచ్చున జతయ్.

25 వడ్డొ అస్సె, జోచి సొంత నెంజలి లోయి దెరన, మాములుమ్ ఎత్తిక వెల్లో పూజరి కో జెలెకు వెర్నెక్క ఏక్ సుట్టు ఈంజయ్ లోకుమ్తె తిలి దేముడుచి గుడితెచి, ఒగ్గర్ సుద్ది తిలి టాన్తె పెనుక జతయ్. గని ఒగ్గర్ సుట్టు క్రీస్తు అర్పితుమ్ జంక నాయ్, కెయెక తెయెక అర్పితుమ్ జత తంక నాయ్.

26 దస్సి జతి జలె, లోకుమ్ జెర్తయ్ జలి మొదొల్ తెంతొ ఒగ్గర్ సుట్టు జో జా స్రెమ నేడుక తత్తి. గని, ఉగుమ్చి ఆకర్ పొది జోచి సొంత జీవ దా, మాన్సుల్చి పాపుమ్ గెచ్చయ్తి అర్పితుమ్ జా, పాపుమ్ గెచ్చవుక మెన ఎక్కి సుట్టు జో టీవెలిన్ సరి జా అస్సె.

27 అస్సె, మాన్సుల్ కీసి ఎక్కి సుట్టు మొరుక అస్సె గే, చి వడ్డొ దేముడుచి పరిచ్చ జవుల గే,

28 దస్సి, క్రీస్తు, ఒగ్గర్జిన్చ పావల్ వయన గెచ్చవ గెలుక మెన సరిపుచువ జతి జా, ఎక్కి సుట్టు మొర గెలన్. చి అస్సెక్ సుట్టు డీసెదె; పాపుమ్ గెచ్చయ్తి రిసా నాయ్ గని సర్త తెన్ జోవయింక రకితన రచ్చన జతిసి పూర్తి నెరవెర్పువ జతి రితి జర్గు కెరుకయ్ మెన జో అస్సె డీసెదె.

10

యేసు ఎక్కి సుట్టు మొర్లిన్కయ్ అమ్ సుద్ది జలిన్

1 జలె, వెర్నెక్క వెర్నెక్క దేముడుక బలివొ దెతతి అస్సె 'ఇసి కెర్ల దేముడుక పాసి జెమ్దె' మెన ఉచర్తతి, గని వెర్నెక్క వెర్నెక్క, జేవ్ బలివొ దిలెకి జోవయించి పాపుమ్ గెచ్చె నాయ్. జేవ్ బలివొ దెతి అగ్గుల్ రితి సొంతయ్ రచ్చన దొర్కు కెర్లిన్ నెంజె, గని జా రచ్చన జర్గు జతిన్క ఎక్కి టాలి ఎక్కి నీడయ్ జతయ్.

2 జేవ్ బలివొ పాపుమ్ గెచ్చవుక తెరితి జలె, 'జెయిమ్ జలి' మెన అమ్చ వయారుల్ దనవ ములిత. నాయ్ గె? మెలె, బక్తి కెర్లన ఎక్కి సుట్టుకయ్ సుద్ది జత జలె, బలి దిలి వడ్డొ 'పాపుమ్ తెన్ అస్సుమ్' మెన అస్సె ఉచర్త నాయ్.

3 గని ఈంజేవ్ బలివో దెతిన్ తెన్ వెర్నెక్ కె వెర్నెక్ మాన్సుల్ జోవయించి పాపుమచి రిసా ఉచరుక జతయ్. అమక ఏదాన్సు కెరయతయ్.

4 కిచ్చొక మెలె. వస్సా పిల్లలచి గొరెలచి లోయి అమచి పాపుమ్బుద్ది గెచ్చువుక ఎద్దరె నెత్తె.

5 జాకయ్, క్రీస్తు ఈంజ లోకుమతె అయిలె పొది దేముడు అబ్రియూల్ తెన్ జో లట్టుల్లి రితి కిచ్చొ అస్సె మెలె,

* “బలివో అర్పితల్ తుయి నెసిలది, గని

‘దొర్కు జలి బలి’ మెన అంక

తుయి ఆగ్ తెయార్ కెర అస్సిసి.

6 డయిత అర్పితల్చి రిసా, పాపల్ గెచ్చయతి గుర్తుచ అప్పెకచ అర్పితల్చి రిసా

తుక కిచ్చొ ఇస్టుమ్ నాయ్.

7 తెదొడి,

దేముడుచి కొడెతె అంచి రిసా తుయి రెగ్గయలి రితి,

ఆవ్ కిచ్చొ మెలయ్ మెలె,

ఈందె, దేముడు ఓ బా,

తుచి ఇస్టుమ్ జెయిమ్ కెరుక మెన

ఆవ్ జా అస్సి” మెలయ్.

8 జలె, జా కోడు దెకిలె, “బలివో, అర్పితల్, డయిల బలివో, అప్పెకచ పాపుమ్ గెచ్చయతి గుర్తుచ బలివోచి రిసా తుక కిచ్చొ ఇస్టుమ్ నాయ్, దనచ నెసిలది” మెన జో నంగ కెర; ఆగ్గుల్ రితి దనచ దెతతి, జలె, జో దస్సి నంగ కెర

9 అస్సె కిచ్చొ కోడు ఒత్త బెదయ్లో మెలె, “ఈందె తుచి ఇస్టుమ్ జెయిమ్ కెరుక మెనయ్ ఆవ్ జా అస్సి” మెలన్. జో దస్సి సంగిలిన్ తెన్ పొర్ని ప్రమానుమక ‘జా పోన. కామ్క నెంజె’ మెనతయ్. ‘నావిచి ప్రమానుమ్ అవ్సురుమ్. ఈంజయి దొర్కు జలిసి’ మెన నావిచి టీచడ్డి రిసా పొర్నిచి ముల దిల.

10 జోచి ఈంజయ్ సెలవ్క, యేసుక్రీస్తుచి ఆగ్ జా ఎక్కి, సుట్టు మొర్లిన్కయ్, కెయచ తెయచ చెంగెల్ తతి రితి జోచి సుద్ది అమ్ జా జోవయ్ జా అస్సుమ్.

11 పడ్డొ యూదుల్చొ ఎత్తి పూజరి రోజుక జో సేవ కెర్తినతె టీచ ఏక్చి ఉప్పిరి అస్సెక్, జాచి ఉప్పిరి అస్సెక్ ఒగ్గర బలివో దెతె తత్తయ్; పాపుమ్ గెచ్చువుక నెత్తిర్ బలివో దెతె తత్తయ్.

12 గని ఈంజొ క్రీస్తు, కెయచ తెయచ కామ్క జెతి రితి ఎక్కి, సుట్టు పాపుమ్ గెచ్చయతి దొర్కు జలి అర్పితుమ్ దా కెర, దేముడుచి ఉజెతో చక్క వెసిలన్.

13 ఒత్త వెన తా జోక విరోదుమ్ సుదల్ జలన జోచ చట్టొ సుదితి పొద్దొ జతె ఎదక రకితయ్.

14 దస్సి ఎక్కి, సుట్టు జో సొంత అర్పితుమ్ జా, సుద్ది జా, జోవయ్ జల మాన్సుల్క పూర్తి కెర్తసి కెయచ తెయచ కామ్క జెతి రితి జో జగ్గు కెర అస్సె.

15 అమ్క జో పూర్తి కెర్తినచి రిసా దేముడుచి సుద్ది తిలి ఆత్మ ఇసి మెన సాచి నంగ అస్సె.

16 † “ప్రబు సంగితిసి కిచ్చొ మెలె,

జేవ్ దీసల్కచి పడ్డొక జోవయింక కిచ్చొ ప్రమానుమ్ దెయిందె మెలె,

జోవయించి పెట్టి అంచ ఆగ్గుల్ తియిందె,

జోవయించ ఆత్మల్తె అంచ ఆగ్గుల్ రెగిడిందె”

మెన నంగ అస్సె కిచ్చొ మెనతయ్ మెలె,

17 ‡ “తెదొడ్ తెంతె జోవయించ పాపల్, జోవయించ తప్పుల్

ఆవ్ ఏదాన్సు నే కెర్తె వచ్చయ్ గెలిందె”

మెన దేముడు సంగితయ్.

18 జలె, పాపల్ చెమించుచ జా అస్సి మెలె, పాపుమ్ గెచ్చయత అస్సె అర్పితల్ నాయ్.

దేముడుక పాసి గెచ్చ సత్తిమ్ ఇండుమ

* 10:5 10:5 కిర్వనలు 40:6-8. † 10:16 10:16 యర్షియా 31:33. ‡ 10:17 10:17 యర్షియా 31:34.

19 జాకయ్, బాపుడ్లు, అమచి పాపుమ్ గెచ్చయతి రిసా యేసుక్రీస్తు జోచి లోయి సువ దిలి రిసా, దేముడుచి పరలోకుమచి జోచి గుడితె, జోచి సుద్ది టాన్తె అమ్ పెనుక అమ్క దయిరిమ్చి రిసా,

20 మెలె, జోవయింది దేముడుచి గుడి అగ్గ డంక తిలి తెరచి తెడి పెసితి నోవి, జీవ్ తిలి జీవ్ దెతి వాటు, మెలె, కీజోచి ఆగ్ వాట్ గెచ్చుక మెలి కోడుచి దయిరిమ్ దా అస్సె.

21 అస్సె, దేముడుచి గెరి అమ్క వెల్లో పూజరి జో జా కెర తోడు అస్సె.

22 అమచి పెట్టి నిదానుమ్ తా జోవయింది ఉప్పిరచి నముకుమచి రిసా పూర్తి దయిరిమ్ తా, అమచి ఆత్మతె 'అమ్క పాపుమ్ నాయ్, జో అమ్క సుద్ది కెర అస్సె' మెలి దయిరిమ్ అమ్ జతి రితి, అమచి ఆత్మక సుద్ది కెర్తి పానిక జో అమ్క చించ దిలి రితి కెర అస్సె, అమచి ఆగ్ *దోవిలి రితి కెర అస్సె మెన, జోక పాసి జెము.

23 అమచి దయిరిమ్ ఒప్పునీతిసి అన్యానుమ్ నే జతె దెరనుము. కిచ్చొక మెలె, 'అమ్ దెతి రచ్చున వరుమ్ కో నజనుల గే, కచితుమ్ రచ్చించువ జవుల' మెన అమ్క ప్రమానుమ్ సంగిలోసా నిదానుమ్చో.

24 అస్సె, ప్రేమ కెరయతి రితి, చెంగిల కమె కెరయతి రితి, ఎక్కిలోక ఎక్కిలో కీసి చెంగిల్ కెరుక గే, ప్రేమ దెకవుక గే ఉచర్తె తమ.

25 సంగుమచ నబతె బెదుక నే పిట్టె, సగుమ్జిన్ జెంక ములితతి గెద, జలె, నబతె బెదుక నే పిట్టె ఎక్కిలోక ఎక్కిలో డిట్టుమ్ దయిరిమ్ కెర్తి తమ. ముక్కిమ్క కిచ్చొక ఇసి జమ మెలె, ప్రబుచి వెల్లి దీసి పాసి జా జెతయ్.

సత్తిమ్ జాన జానయ్ ముల్లిన్చి రిసా జాగర్త

26 జలె, సత్తిమ్ చిన నంప కెర్తమ్ మెలె, జాచి వడ్డె జాన జానయ్ పాపుమ్ ఇండితె తిలె, పాపల్ గెచ్చయతి రిసా జో అర్పితుమ్ జలిసి అమ్క అస్సె బలివో నాయ్.

27 దస్సి జలె అమ్క కిచ్చొ రకితయ్ మెలె, ప్రబు పరిచ్చ కెర సిచ్చ కెర్తిసి, చి జోక విరోదుమ్ సుదల్ జలన ఎత్తిక గల్లి వెల్లి ఆగి గోయతె గలి జతిసి.

28 మోసా పూర్ణుమ్చోచి అత్తి దేముడు దిల ఆగ్గల్ కో పిట్టవ తప్పు కెర్తతి గే, జోవయింక పరిచ్చ కెర్తినతె 'జో నిజమ్ తప్పు కెర్తొ' మెన దొగుల తీగ్చిచి సాచి రుజ్జు దెకయ్లె, కన్కారుమ్ నెంతె జోక మొర్తి సిచ్చ దెవుల.

29 జలె, దేముడుచో పుత్తనక నంప కెరుక నిదానుమ్ కెరుక నెన, సుద్ది కెర్తి జా నోచి ప్రమానుమచి రిసా సువ దిలి యేసుచి లోయి దూసువ కెర, ప్రబుచి దయ కెర్తి జోచి రచ్చున దెతి జోచి పరలోకుమచి ఆత్మక కో కోవుమ్ కెరవ తవుల గే, జోక అన్నెయ్ కెర్తి సిచ్చ లయెదె.

30 కిచ్చొక మెలె,

† "సిచ్చ కెర్తి కామ్ అంచి.

దెంక తిలి సిచ్చ ఆమ్ కచితుమ్ దెయిందె"

మెన సంగిలో దేముడుక జానుమ్. వడ్డె, జో అస్సె సంగిలిసి కిచ్చొ జానుమ్ మెలె,

‡ "జోచ పైజల్క ప్రబు తీర్పు కెర సిచ్చల్ గే, బవుమానల్ గే దెయెదె"

మెలిసి.

31 సిచ్చ జంక మెన జీవ్ తిలో జీవ్ దెతో దేముడుచి అత్తి మాస్సు దెర్పు సేడ్లె బింకయ్ జయెదె!

ప్రబు అస్సె ఉత్త జెజిన్క రకితె తా

32 గని, అగ్గెచ దీనల్ తుమ్ ఏదాస్సు కెర. తెదోడి క్రీస్తుచి రిసాచి సత్తిమ్ తుమ్ తోలితో సూన చినిలి పొది ఒగ్గర్ సైమల్ బాదల్ సేడ్లె కి ఓర్పువ జలదు.

33 సగుమ్ సుట్టు కి ఏదార్డుమ్ ఎత్తిజిన్చి మొక్కె దూసువ జలదు, కన్వల్ సేడ్లె, చి అస్సె దన బాదల్ సేడ్లెచి జాడు బెద వయిలి రితి జలదు.

§ 10:20 10:20 మెలె, జోవయింది ఆగ్ మొర అర్పితుమ్ జలి రిసా పరలోకుమతె బెదితి వాటు అయ్లె. * 10:22 10:22 బాప్తిసుమచి రిసా సంగితయ్ మెన సగుమ్జిన్ సంగితతి. † 10:30 10:30 ద్వితియోపదేశ కాండుము 32:35. ‡ 10:30 10:30 ద్వితియోపదేశ కాండుము 32:36, కీర్తనలు 135:14.

34 కిసి మెలె, జేలి జలసక కన్యారుమ్ జలో, చి విరోదుమ్ సుదల్ తుమ్చి అన్సి దెర గెతికయ్, పరలోకుమతె అన్సె చెంగిల్చి, అన్సె తా అన్సి గెతిసి దొర్కు, జా అన్సె మెన జాన కెర, సర్ల తెన్ తిలదు.

35 జాకయ్, తుమ్చి డిట్టుమ్ తుమ్చి దయిరిమ్ తుమ్ వెంట గెల నాయ్. జేవ్తె వెల్లి బవుమానుమ్ దొర్కు జతయ్.

36 జాకయ్, దేముడుచి ఇస్తుమ్చి రితి ఇండ. జో ప్రమానుమ్ సంగిలిసి తుమ్ నజన్తి రిసా తుమ్క బగ్గర్ నిదానుమ్ తంక.

37 కిచ్చొక మెలె, జో సంగిలిసి కిచ్చొ మెలె,
 8“అన్సె గడియయ్ గెలె జెతె తిలోసా జెయెదె,
 ఆల్నిమ్ నే కెరై జయెదె.

38 గని, ఆవ్ దిలి రచ్చన అంచి పున్నిమ్ కో జా తవుల గే,
 జోవయించి నముకుమ్చి నిదానుమ్క జివుల,
 గని జోవయింతె కో పడ్డొ గుంచెలె,
 జోవయించి రిసా అంక ఆత్మతె కిచ్చొ సర్ల తయె నాయ్”
 మెన దేముడు సంగితయ్.

39 గని జలె ఆమ్ పడ్డొ గుంచ నానినుమ్తె గెతన నెంజుమ్. నిదానుమ్ నముకుమ్ తా అమ్చి ఆత్మ చెంగిల్ తతి రితి దెకన్తన ఆము.

11

పూర్ణుమచ నముకుమ్ తెన్ డిట్టుమ్ తిలిసి

1 జలె, నముకుమ్ కిచ్చొ మెలె, అమ్ ఆస జలి కిచ్చొ జవున్ కామ్క ‘కచితుమ్ జర్లు జయెదె’ మెలి ఆస, నే డిసిలిన్క ‘అస్సె’ మెన అమ్చి పెట్టి కచితుమ్ జాన్తిసి.

2 జా నముకుమ్ కామ్క జెతయ్ మెన కిసి జానుమ్ మెలె, జోవయించి నముకుమ్చి రిసాయి అమ్చ క్కో కో పూర్లులేచి రిసా దేముడు సర్ల జా ‘జేవ్ అంచయ్ మాన్సుల్’ మెన ఒప్పున్.

3 అన్సె, దేముడుచి *కోడుకయ్ లోకుమ్ జెర్మిలి మెన నముకుమ్కయ్ ఆమ్ చినితనుమ్. దన్సి, ఈంజ డిస్సి లోకుమ్, డిస్సిన్ తెనె నే తెయార జలి మెన ఆమ్ నముకుమ్ తెన్ జాన అస్సుమ్.

4 హాబెలు †జోచి నముకుమ్చి రిసా అస్సెన్ జలో కయానుచి కంట చెంగిల్ అర్పితుమ్ దిలిసి దేముడు మెన్సెలన్. జోచి జా నముకుమ్చి రిసాయి ‘జోక పున్నిమ్’ మెలి రితి దేముడు హాబెలుక దెకిలో. కిసి జానుమ్ మెలె, జో హాబెలు దిలిసి రిసా దేముడు సర్ల తెన్ సంగిలో మెన ఆమ్ జానుమ్. జో హాబెలు, జలె, మెర్లన్, గని జోచి నముకుమ్ అప్పక అమ్క లట్టబితయ్.

5 జోచి నముకుమ్చి రిసా ‡హానోకు నే మొరై పరలోకుమతె ఉక్కిల్ జలన్. అన్సె, దేముడు సొంతయ్ జోక కడ నిలి రిసా ఒత్త తెంతొ కో జోక చజాక నెత్తిర్ల. జో నే గెతె అగ్గె కి ‘ఆవ్ మెన్సెతోసా’ మెన దేముడు రుజ్జుల్ దెకవ తిలో.

6 నముకుమ్ నెంజిలె, దేముడుక సర్ల కెరుక నెత్తుమ్. మెలె, కో దేముడుక పాసి జెంక ఇస్తుమ్ జలె, దేముడు ‘అస్సె’ మెన, చి ‘జోక ఇస్తుమ్ జా చజితనక దెకితయ్’ మెన జో మాన్సుక నముకుమ్ తంకయ్.

7 తెదొడి అన్సె, నే జర్లు జలిన్క ‘జర్లు జయెదె’ మెన దేముడు §నోవహుక సంగితికయ్, జోచి నముకుమ్చి రిసాయి ‘నిజుమ్ జర్లు జయెదె’ మెన దేముడుక బియః నోవహు దయిరిమ్ జా దేముడు సంగిలి రితి కెర, జోచి కుటుంబుమ్చక ఉగుమ్ గెడ్డుప కెర్లెన్ తెంతొ రచ్చించువ కెర్లి రిసా, జా వెల్లి ఓడ రితిసి బందిలో. దన్సి కెర, లోకుమచ ఎత్తి నంవనెంజిలసక జోవయించి పాపుమచి సిచ్చుచి రుజ్జు దెకయ్లో, చి నముకుమ్ వాట్ జెతికయ్ పున్నిమ్తె జొయ్యి వాట నజ్లొ.

§ 10:37 10:37 హాబెక్కుక 2:3-4. * 11:3 11:3 ఆదికాండుమ్ 1:1-2. † 11:4 11:4 ఆదికాండుమ్ 4:1-7. ‡ 11:5 11:5 ఆదికాండుమ్ 5:24. § 11:7 11:7 ఆదికాండుమ్ 6:5-8:22.

8 'జోక వడ్డె ఆవ్ దొర్పు కెరుక తిలి కానాను దేసిమ్తె గెన్ను' మెన, "బార్ జా" మెన దేముడు *అబ్రాహామ్ క బుకార్తికయ్, జో కేనె గెచ్చెదె గే వాట్ నేన్లె కి, జోచి నముకుమచి రిసా అబ్రాహామ్ నూన కెర బార్ జలన్;

9 దస్సి, జోచి నముకుమచి రిసా, జా జోచి సొంత దేసిమ్ నెంజిలె కి, "తుక చి తుచి సెకుమచక దెయిందె" మెన దేముడు ప్రమానుమ కెర తిలి కానాను దేసిమి బుల్లి తిలొ, అన్నె జో, జా ప్రమానుమతె జో తెన్ వాట నజిత జోచి పెట్టిచొ ఇస్సాకు కి, ఇస్సాకుచి పెట్టిచొ యాకోబు కి టంబుగుడ్డలతె జియ బుల్లి తిల.

10 కిచ్చొక మెలె, చెంగిల్ పునాది తిలి †పట్టుమ్క 'జెయెదె' మెన అబ్రాహామ్ నంప తెన్ తిలన్. కేన్ పట్టుమ్ మెలె, దేముడు సొంత బందితిసి, జెర్బయలి పట్టుమ్.

11 దస్సి, జాచి నముకుమచి రిసా అబ్రాహామ్చి తేర్పొ ‡సారా, జా మంతిరి జా గెచ్చ, బోదల్ పాయితి వయసు జీన తిలె కి, జా ప్రమానుమ సంగిలొ దేముడుక 'జో సంగిల్ రితి జర్గు కెరెదె' మెన నంపజలి రిసా, అంగి జతి సెక్కి జాక దొర్బు జలి.

12 జలె, ఎక్కిలొ మాన్సు అబ్రాహామ్చి పెట్టి జో మొర్తొ రితొ మంత్రొ జా తిలె కి, ఆగాసుమచ సుక్కల్చ రిత, సముద్దుమ్చి ఒడ్డుచి ఇస్కచ గిడ్డల్ రిత, కీసి కో లెక్క కెరుక నెతిర్తి, దస్సి ఎతివాట్జీన్ మాన్సుల్ జోచి సెకుమతె జెర్బున్ జల.

ఈంజ బూలోకుమ్తె టాన్ నెంజిలన ఆము

13 అమ్ ఉప్పిరి సంగిల మాన్సుల్ ఎత్తిజిసి, జోవయింక ప్రమానుమ్ సంగిలిసి జర్గు నే జతె అగ్గె, జాకయ్ 'కచితుమ్ జర్గు జయెదె' మెన నముకుమ్ తెన్ని మొర గెల. దూరి తెంతొ దెకిల్ రితి జా, జా ప్రమానుమ్ సంగిలిసి నజిన్ రితి జాయె మొర్ల. 'ఈంజ బూలోకుమ్తె టాన్ నెంజిలన ఆము, అమ్క ముక్కిమ్ జలి లోకుమ్ వేరచె' మెన చిన కెర మొర్ల.

14 జలె, ఇసి లట్టల్లె, జేవ్ సొంత దేసిమ్ చజితత్ మెన రుజ్జు దెకయలి రితి జతయ్.

15 జేవ్ ముల దా బార్ జలి దేసిమ్క అన్నె గెచ్చుక మెన ఆన తిలి పొది, జేవ్ ఒత్త అన్నె గెచ్చుక వాటు తత్తి.

16 అన్నె చెంగిలి దేసిమ్క ఆన జా అస్సి; కేన్ మెలె, పరలోకుమ్చి. జో జేవ్చొ దేముడు జా తంక దేముడు లాజె జయెక నాయ్. జోవయింక ఏక పట్టుమ్ జో తెయారొ కెర్తెన్ తెన్ రుజ్జు జతయ్.

17 అబ్రాహామ్ దేముడుచి అత్తి పరిచ్చ జలి పొది, 'తుక సంతానుమ్ దెయిందె' మెన ప్రమానుమ్ సంగ తిలొ దేముడుక జోచొ ఎక్కిలొ పుత్తున్ ఇస్సాకుక నముకుమ్ తెన్ కి అర్పితుమ్ దెంక కి తెయారొ జలన్.

18 మెలె, జో పుత్తున్చి రిసా

*"ఇస్సాకుచి తెడి తుచి సెకుమతె ఒగ్గర్జిన్ జెర్బుల"

మెన దేముడు సంగ తిలె కి.

19 దస్సి 'మొర గెలనక దేముడు జియడుక తెరె' మెన కి అబ్రాహామ్ నముకుమ్ తెన్ తిలొ. జాకయ్, జో మొరుక తిలొ ఇస్సాకుక అన్నె జియడ, దేముడు జోక అబ్రాహామ్ అబ్బొన్క అన్నె దొర్బు కెర్లన్.

20 దేముడుక 'చెంగిల్ వరల్ దెతొసా జో' మెనయ్, జోచి నముకుమచి రిసా, †ఇస్సాకు జోచ పుత్తర్లు జల యాకోబుక చి ఏసావుక దయిరిమ్ తెన్ చెంగిల్ వరుమ్లు సంగిలన్.

21 దస్సి కి, జోవయించి నముకుమచి రిసా ‡యాకోబు, జోచి మొర్బు పురె జా అయలి పొది, జోచి టెక్సి డండొచి ఉప్పిరి బోడి వంపా కెర దేముడుక ఉచర, జోచొ పుత్తుసి యోసిపుచ దొగుల పుత్తర్లు ఎక్కిక్క చెంగిల్ వరల్ సంగిలన్.

22 జోచి నముకుమచి రిసా §యోసిపు, జో మొర్తి నమయుమ్ జా అయలి పొది, జోచ ఇస్సాయెలుల్ పడ్డొక ఐగుప్తు దేసిమ్ తెంతొ బార్ జంక తిలినచి రిసా, చోడి పుట్టవ సంగ కెర, జోచి పీనుమ్ ఐగుప్తు తెంతొ దెర గెచ్చ జేవ్ కేనె నా రొవుక గే సంగిలన్.

* 11:8 11:8 అదికాండుమ్ 11:31-12:9. † 11:10 11:10 వరలోకుమ్క, వరలోకుమచి 'నవి యెరునలేమ్' మెలిన్క టాలి జయెదె. డిసయలిసి 21:2 దెక. ‡ 11:11 11:11 అదికాండుమ్ 18:1-15. § 11:17 11:17 అదికాండుమ్ 22:1-18.

* 11:18 11:18 అదికాండుమ్ 21:12. † 11:20 11:20 అదికాండుమ్ 27:1-41. ‡ 11:21 11:21 అదికాండుమ్ 48:8-20.

§ 11:22 11:22 అదికాండుమ్ 50:24-25.

23* మోసే జెర్రిలి పొది, జోక 'నూటివో' మెన దెక కెర, జోచి నముకుమచి రిసా 'జోచి మార్తనతె జో దెర్నూ నేడ్డు నాయ్' మెనయ్, అయ్యన్ అబ్బిన్ తిన్ని జొన్నొ పూర్తి జోక లుంకడ తిల; జో రానొ "ఇదుద్ల నాడ్లు ఎత్తి మొరుక" మెన ఆత్త దిలిన్క నే బితె.

24 పల్లొ, జో మోసే వెల్లొ మాన్సు జలి పొది, జోచి నముకుమచి రిసా †మోసే జో రానొచి దునిన్చి పుత్తున్ నే బుకారవన్క.

25 జా రాజిమ్చితె నే బెదితె, దనచి సర్దల్ నెన పిట్టవన, దేముడుచ జోవయ్ మాన్సుల్చ కస్త్రుల్తె బెదుక సర్ద జలో.

26 జలె, 'దేముడు అబ్బిన్చి ఇస్టుమ్ తిలిన్ జర్గు కెరుకయ్ ముక్కిమ్' మెన యేసుక్రీస్తుచి రిసా కీసి సైమల్ సేడ్లె, 'బగుప్పు దేసిమ్చి సొమ్మారుమ్ కలుగు కెరంతి కంట దేముడుచి కామ్ జర్గు కెరుకయ్ ముక్కిమ్' మెనయ్ ఒప్పల్లొ. కిచ్చొక మెలె, 'దేముడు దెతి బపుమానుమ్ ముక్కిమ్' మెన దెకితె తిలన్.

27 జోచి నముకుమక, జో పలో రానొచి కోపుమ్క నే బితె బగుప్పు దేసిమ్ ముల దిలో. కీసి మెలె, నే డీస్తా దేముడుక దెకితె తిలి రితి జా, నిదానుమ్ తెన్ ఎత్తి ఓర్పుప జలన్.

28 జోచి నముకుమచి రిసా, †బగుప్పు దేసిమ్చ తొల్పూర్ బోదల్క మార్తో దేముడుచి దూత జోవయింబ ఇస్రాయేలుల్చ బోదల్క నే చడితి రితి, 'పస్కా వండుగు' మెన దేముడు సంగిలి రితి మొదొల్ కెర్లన్, చి జేవ్ ఇస్రాయేలుల్చ గెరల్ ఎత్తిచ దారబంద్రల్తె మెండపిల్లచి లోయి చింబ దిల.

29 "తుమ్క బగుప్పు దేసిమ్ తెంతొ రచ్చించువ కెరిందె" మెన దేముడు సంగిలిన్చి ఉప్పిర్చి జోచి నముకుమచి రిసా, మాములు వాల్ ఇండిలి రితి జా, కి'ఎరన' మెలి నముద్రుమ్ ఇస్రాయేలుల్చ ప్రెజల్ ఇండ జిన్ల. గని బగుప్పు దేసిమ్చ "అమ్ కి దస్సి జినుమ్దె" మెన ఉచర కెర్లె పొది బుడ్ల గెల.

30 'దేముడు అమ్క తోడు తయెదె' మెన జోవయింబి నముకుమచి రిసా జేవ్ పూర్ణుమ్చ ఇస్రాయేలులు సత్తు పొదుల్ రోజుక *యెరికో పట్టుమ్చి వెల్లి కోటచి సుట్టునంత ఇండ బుల్లికయ్, జా కోట నేడయ్ గెలి.

31 లంజె జయి తిలి †రాహాబు, అమ్ యూదుల్క వేరయ్ మాన్సు జలెకి, దేముడుక 'జోయ్యి వెల్లొ, జోయ్యి పరలోకుమచొ దేముడు' మెలి జాచి నముకుమచి రిసా, దేముడుక సంపనెంజిల జా పట్టుమ్చ అన్నె మాన్సుల్ తెన్ తెదొడి మొరి నాయ్. కిచ్చొక మెలె, దేముడుచి నావ్ తెన్ లుంకచొ పట్టుమ్ దెకుక అయిల ఇస్రాయేలుల్క మరియాద కెర తిలి.

నముకుమచి రిసా దేముడు జర్గు కెర్లెసి

32 అన్నె కిచ్చొ మెనుమ? గిద్యోను, బారాకు, సమ్మోను, యెష్టా, దాబీదు, సమూయేలు, దేముడుచ కబుర్లు సంగిల మాన్సుల్ ఎత్తిచి రిసా సంగుక సమయుమ్ నాయ్.

33 జోవయింబి నముకుమచి రిసా రాజిమ్లుక జిన్ల, సత్తిమ్చ తీర్పుల్చ రుజ్జుల్ దెకవ, తప్పల్ కెర్లన్క సిచ్చ దా, ప్రెజల్క బుద్ది సీకడ్ల, దేముడు జోక ప్రమానల్ దా జెయిమ్ కెర్లికయ్ సర్ద జల. సింపుమెలు జేవ్క కంక మెన మొక్కె అయిలి పొది జేయ్చి చొడివొ డంకిల.

34 వెల్లొ ఆగివొ విజయిల, యుద్దుమ్తె కత్తివొ తెనె కండితీన్ పిట్టవన్ల, అప్పు తిలి పొది సెక్తి జల, యుద్దుమ్తె జోవయింబ విరోదుమ్ సుదల్చి ఉప్పిరి జీన ఉదడ్ల.

35 జేవ్తె మొర్లన్క దేముడు అన్నె జయిడ్లికయ్, జోవయింబ తేరబోదల్క అన్నె దొర్కు జల. దేముడుక నిదానుమ్ తిల అన్నె సగుమ్జిన్, 'అన్నె చెంగిలి లోకుమ్తె పడ్డొక అన్నె జిమ్ జా ఉట్టుమ్దె' మెనయ్, సిచ్చల్ తెంతొ విడ్డల్ నే కెరంతె, జేవ్ సిచ్చల్తె మొర్ల.

36 అన్నె, విరోదుమ్ సుదల్ దూసువ కెర్లిసి, కొర్డల్చ దెబ్బల్ అదికారుల్ పెట్టిసి, గొల్పుల్ తెన్ బందితిసి, జేల్తె గల్లిసి అన్నె సగుమ్జిన్ ఓర్పుప జల.

* 11:23 11:23 నిర్ణయకాండమ్ 1:22-2:2. † 11:24 11:24 నిర్ణయకాండమ్ 2:11-16. ‡ 11:28 11:28 నిర్ణయకాండమ్ 12:1-36. § 11:29 11:29 నిర్ణయకాండమ్ 14:1-31. * 11:30 11:30 యెహోసువ 2:1-24. † 11:31 11:31 యెహోసువ 6:1-25.

37 సగుమ్జిన్ మాన్యుల్ క పత్రల్ తెన్ పెట మార్గ, సగుమ్జిన్ మాన్యుల్ క రంపుమ్ తెన్ సింద దొన్నె గండల్ కెర గెల. సగుమ్జిన్ కత్తిచ దెబ్బల్ క మొర్ల, సగుమ్జిన్ మెండల్ చ గొర్రెల్ చ చము గలన బులిల, మాలజ్ జా, సైమల్ సేడ, మాన్యుల్ చి అత్తి నిస్కారుమ్ జల.

38 బయిలె, డొంగ్రెలె, వత్రాలె పారతె, బుయి గొయితె నిద్ర తా బుల్లె తిల. జేవ్ చెంగిల మాన్యుల్ ఈంజ లోకుమ్తె తంక ఈంజ పాపుమ్ చి లోకుమ్ క జేవ్ విలువ కెర్లె నాయ్.

39 అన్యె, జేవ్ ఎత్తిజిన్ జోవయిచి నముకుమ్ డిట్టుమ్ తిలిన్ చి రిసా దేముడు జోవయిచి రిసా చెంగిల్ సాచి దెకయ్ లెకి రుజ్జుల్ దెకయ్ లెకి, జో దేముడు ప్రమానుమ్ సంగిలిసి జోవయిచయ్ పొదులె జర్లు జంక నాయ్.

40 కిచ్చొక మెలె, అమ్ కయ్ కి జోవయితెన్ బెదవనుక మెనయ్ జో దేముడు అన్యె చెంగిల్ చి జర్లు కెరుక ఉచర తిలొ. మెలె, అమ్ నెంతె జేవ్ కి పూర్తి నే జతి రితి జా జో సంగిలి ప్రమానుమ్ జర్లు కెర్లిసి వాయద కెర్లన్; అమ్ పడ్డె జెర్లిలన కి జోవయితెన్ జా ప్రమానుమ్తె బెదుకయ్ మెన వాయద కెర్లన్.

12

క్రీస్తుచి రితి ఆమ్ కి బాదల్ ఓర్పువ జంక

1 జాకయ్ పూర్ణమ్ తెంతొ దేముడుచి ఉప్పిరచి నముకుమ్తె ఇండిలన ఈంజేవ్ ఎతివాల్జిన్ సాచి జతన మబ్బుల్ రితి అమ్ చి నుట్టునంత తా, అమ్ క వాల్ దెకయ్ లె రితి జా అస్తిచి రిసా, అమ్ క అడ్డు కెర్లె ఎత్తి, జాడు, అమ్ క లంబితి ఎత్తి, పాపుమ్ ముల దా, ప్రబు అమ్ క నిగయ్ తిల పందెమ్తె నిగమ.

2 కిచ్చొ సెక్తిక అమ్ నిగుక మెలె, అమ్ చి నముకుమ్ మొదొల్ కెర్లొ చి పూర్తి కెర్లొ యేసుక దెక, దెకయ్ నిగుమ. జో, జలె, జోక తియ తిలి సర్ల సంతోసుమ్ క ఉచర, సిలువతె గల్లి సిచ్చ ఓర్పువ కెర్లన్. దస్సి నిస్కారుమ్ జతిసి నే బితె, చి అప్పె దేముడు అబ్బొన్ చి సిజాననుమచి ఉజెతో పక్కయ్ జో వెన అస్సె.

3 తుమ్ అల్లువ నే జతి రిసా అన్యాయమ్ నే జతి రిసా, జలె, పాపుమ్ కెర్లనచి అత్తి, జోచి ఉప్పిరచి విరోదుమచి రిసాచ సిచ్చల్ ఓర్పువ జలొ, జోకెర్లె బాద సేడ్లె కి నిదానుమ్ తిలొ యేసుచి రిసా తుమ్ ఉచర.

4 తూమ్, జలె, పాపుమ్ చి ఉప్పిరచి ఈంజ యుద్దుమ్ కెర్లెన్తె, తుమ్ జోచి నావచి రిసా అల్లర్ సేడ అస్సెన్, గని అప్పెక తుమ్ చి లోయి సూయి జతి రితి, మెలె, మొర్లి రితి ఎదిలి స్రమ తుమ్ సేడుక నేతయ్. తుమ్ అన్యాయమ్ నే జతె ఎత్తి. ఓర్పువ జా.

కక్కయ్ దేముడు ప్రేమ తయెదె గే, జోకయ్ సిచ్చల్ దా సికడెది

5 అన్యె, తుమ్ జోచ పుత్తర్లు జలిన్ చి రుజ్జు దెకయ్ తి తీర్పు దేముడుచి కొడెతె రెద్దయ్ లిసి తుమ్ పచ్చ గెలదు గె? కిచ్చొ తీర్పు సంగిలిసి మెలె,

*“ఓ అంచొ పూత్తు, దేముడు తుక బుద్ది సికడ్లె సిచ్చల్ క

‘కిచ్చొ నెంజితి’ మెలి రితి తుయి ఉచరు నాయ్.

అన్యె, జో తుక దస్సి సిచ్చ కెర్లె,

తుయి దయిరమ్ పిట్టవన అన్యాయమ్ జా నాయ్.

6 కిచ్చొక మెలె,

కక్క జో ప్రేమ తయెదె గే, ‘సిక్కుత్’ మెనయ్

జోకయ్ సిచ్చ కెరెదె, చి

జో బెదవన్లొ ఎత్తి పుత్తున్ క

‘బుద్ది జవున్’ మెనయ్ సిచ్చల్ దెయెదె”

మెన సంగ రెద్దవ అస్సె.

7 జలె, ఇన బాదల్ తుమ్ ఓర్పువ జంక తిలిసి కిచ్చొక మెలె, తుమ్ దేముడు అబ్బొన్తె సిక డిట్టుమ్ జతి రిసాయి జో దేముడు తుమ్ క “అంచ పుత్తర్లుయి” మెన దెకితయ్. మెలె, కేన్ పుత్తున్ క అబ్బొన్ కిచ్చొ సిచ్చ దా సికడె నాయ్ గె? మాన్యువొ అబ్బొన్ జలె, సిచ్చ దా సికడెది.

* 12:5 12:5 సామెతల్ 3:11-12.

8 అబ్బుదినించి అత్తి ఎత్తిజిన్ జత బుద్ది సికడ్డ కిచ్చొ సిచ్చల్ తుమ్ నే జలె, లంజెవెట్టి జెర్రిల రిత జా, జో ప్రబుచ సొంత వుత్తర్లు నెంజిల రిత జతదు.

9 అన్నె, ఈంజ లోకుమ్చ అమ్ ఎత్తిజిన్చ అబ్బుసింసి అమ్క సిచ్చల్ దా బుద్ది సికడ అస్సి, చి జాకయ్ జేవ్క మురియాద దెక అస్సుమ్. దని జలె, అమ్చ ఆత్మల్క అబ్బొ జతో దేముడుచి తెడి తా, జోచి కోడు సూన అమ్ బుద్ది జలె, ఆత్మక జిమ్దె, అన్నె చెంగిల్ జిమ్దె.

10 అమ్చ ఈంజ లోకుమ్చ అబ్బుసింసి గడియ జోవయించి ఇష్టుమ్ అయ్లి రితి సిచ్చల్ దిల, గని అమ్క 'చెంగిల్ జతు. అంచి సుద్దితె బెదుతు' మెనయ్ అమ్క బుద్ది సికడ్డ సిచ్చల్ దేముడు అమ్చొ అబ్బొయి దెతయ్.

11 జా సిచ్చ జతి గడియయ్ ఎత్తి సిచ్చ సర్ల నే దెయె, గని నొప్పి దెతయ్. జలె పడ్డో జేవ్చి రిసాచి ముద్దొ జలనక జా సిచ్చ పాయితి రిసా కిచ్చొ లాబుమ్, మెలె, జో దెతి పున్నిమ్ అన్నె సేంతుమ్ దొర్కు జయెదె.

దేముడు దిలి వరుమ్ కెద్దిచి గే ఏదాన్లు కెరన డిట్టుమ్ జా

12 జాకయ్, కొర్పు జల తుమ్చ అత్తో, నెక్తి నెంజిల తుమ్చ మొగ్రల్ తుమ్ నే ముచ్చిల్తె దెకన.

13 ఇదిల్ సొట్టి జలిసి అన్నె సొట్టి నే జతె పూర్తి చెంగిల్ జతి రిసా తుమ్చ చట్టొ చెంగిల్ ఇండిత్ రితి, సోగ వాటు తుమ్ తెయారొ కెర.

14 అన్నె, ఎత్తిజిన్ మాన్సుల్ తెన్ సేంతుమ్ కట్టు తెన్ తతి రితి తుమ్ దెకన. అన్నె, ప్రబు దెతి సుద్ది జంక తుమ్ ఆన జా. జయ్యి సుద్ది నెంజిలె, కో కి దేముడుక దెకుక నెత్తిర్.

15 తుమ్చితె కక్క కి ప్రబుచి రచ్చన నే ఏట్టి రితి తుమ్ దెకన. కోడ్ దెతి కేన్ చెరో తుమ్చితె నే ఉట్టితి రితి తుమ్ దెకన. దన్నె కోడ్చి చేరొ కేన్ జలెకి ఉట్టె, జాచి రిసా గలిబిలి జా కెర ఒగ్గర్జిన్ ఆత్మక పాడ్ జంక జయెదె, జా పోన.

16 పడ్డొక, తుమ్చితె కో లంజె నే జతి రితి దెకన. పడ్డొ[†] ఏసావు పూర్గుమ్చొ జలి రితి తుమ్ జా నాయ్. జో ఎక్కి పూటచి అన్నిమ్ దొర్కు కెరంతి ఆనకయ్ అబ్బొన్ దెంక తిలి జో తొల్పర్ జెర్రిలిన్చి రిసాచి దొర్కు జతి అక్క బావొనెతి ఏక గెలో.

17 పడ్డొ జా వాట దొర్కు జతి అక్క నజనుక ఉచర్లొ, గని అబ్బొసి నే దిలో, చి జో కెద్ది ఏడ్లెకి, జో జర్గు కెరన్లసి మార్పుచ జంక వాటు తిలి నాయ్.

18 తుమ్ పాచ అయ్లి టాన్, సీయోసు డొంగ్రు నెంజె. జా డొంగ్రు ఈంజయ్ లోకుమ్చి. చడితిసి, జా. పూర్గుమ్చ అమ్చ ఇస్రాయేలులు జా డొంగ్రుతె జా కెర కిచ్చొ దెకిల సూన్ల మెలె, *వెల్లి ఆగి, అందర్, చిమ్మున జలిసి, తుప్పాన్ జతిసి.

19 నప్పిరమూరి బజితిన్చి అవాడ్, బింక జతి వెల్లి[§] అవాడ్. తెదొడి పూర్గుమ్ జా వెల్లి అవాడ్క బియె కెర, "అప్పె తెంతో జా వెల్లి అవాడ్ జలోసా అమ్క కోడ్ లట్టబ కబుర్లు సంగుక నాయ్" మెన ప్రెజల్ బతిమాల్పు జా సంగ తిల.

20 కిచ్చొక మెలె,

*"కేన్ జంతు కి ఈంజ డొంగుర్ చడిలె,

జాక పత్తల్ గల మారుక అస్సె"

మెన దేముడుచి జా అవాడ్ ఆడ్ర దిలన్. జా ఆడ్ర సంగిలిసి ఓర్పుచ జంక అమ్చ ఇస్రాయేలుల్ నెత్తిర్.

21 అన్నె, తెదొడి జర్గు జలిసి దెకుక కి కెద్ది బయమ్చి మెలె, జేవ్ ప్రెజల్క ఏలుచ కెర్తె తిలో వాట్ దెకయ్తె తిలో మోసే కి "బియె అద్దుర్ జా గెలో" మెన సంగిలన్.

† 12:16 12:16 ఆదికాండుమ్ 25:27-34. ‡ 12:18 12:18 నిర్గమకాండుమ్ 19:16-19, 20:18-21. § 12:19 12:19 నిర్గమకాండుమ్ 19:8-9. * 12:20 12:20 నిర్గమకాండుమ్ 19:12, 13.

22 జేవ్ పూర్ణమచ తెదొడి పాచిలి సీయోసు డొంగ్రు, జలె, †బయిమచి, గని తూమ్ కేనె పాచ అస్సున్ మెలె, పరలోకుమచి †సీయోసు డొంగ్రుతె, జేవ్ తిలో, జేవ్ దెతో దేముడుచి పట్టుముతె, †పరలోకుమచి యెరూసలేమ్ పట్టుముతె, వడ్డో కో లెక్క కెరుక నెతిర్ల ఎతివాల్జెన్ దూతల్ వండుగు కెర్తి రితి నర్ల తిల బెర్లిన్తె, జా అస్సున్.

23 అన్నె కిచ్చొతె జా అస్సున్ బెద అస్సున్ మెలె, *తోల్పుర్ జెర్పిల రిత పరలోకుమతె బెదిలనచి †పదుతె తిలనతె, అన్నె, ఎత్తిచి ఉప్పిరి దేముడు జలో మాన్సుల్ ఎత్తిక పరిచ్చ కెర తీర్పు కెర్తొనా* తిలిన్తె, అన్నె, దేముడుక సత్తిమ్ ఇండిల ప్రబుచి నుద్ది జా పూర్తి జల మాన్సుల్చ అత్తల్ తిలిన్తె జా అస్సున్,

24 అన్నె ముక్కిమ్క కత్తె మెలె, దేముడు దిలి నొచి ప్రమాసుమ్క, జోక చి మాన్సుల్క నెడమె జతో యేసుతె, చి పూర్ణమచో †హేబెలు చి లోయిచి కంట చెంగిల్ లట్టబ్బి, చించ గెలి యేసుచి లోయితె పాచ జా అస్సున్.

25 తుమ్చి తెన్ లట్టబ్బో దేముడుక తుమ్ నే నూన్తి రితి, నంప నే జతి రితి తంక నాయ్ మెన తుమ్ జాగర్ల దెకన. కిచ్చొక మెలె, ఈంజ బూలోకుమతె తిలో మోసి పూర్ణమచో జోక జాగర్ల సంగిలిసి జేవ్ నే నూన్లి రిసా జేవ్ పూర్ణమచ సిచ్చ పిట్టవనుక నెతిర్ల. జలె, పరలోకుమ తెంతో అమ్క జాగర్ల సంగితో దేముడుక అమ్ నే నూనె, అన్నె కిసి సిచ్చ పిట్టవనుక జయెదె?! జయె నాయ్!

26 *జా దీసి జోచి అవాడ్ ఒండి బూలోకుమక కదుల్ కెర్లి. గని అన్నె 'కచితుమ్ జర్గు కెరిందె' మెన కిచ్చొ ప్రమాసుమ్ జో సంగ అన్నె మెలె, †"అన్నెక్ సుట్టుక ఎక్కి బూలోకుమకయ్ నాయ్, గని అన్నె, ఆగాసుమ్క కి కదుల్ కెరిందె" మెన్తయ్.

27 'అన్నె అన్నెక్ సుట్టుక' మెన సంగిలిసి అమ్క కిచ్చొ అర్దుమ్ దెకయ్తయ్ మెలె, జెర్తయ్ జలిన్ కదుల్ కెర్లిన్క జాక గెచ్చువ గెల్లి నమయుమ్. జయి గెచ్చువుక కిచ్చొక మెలె, కదుల్ కెర్లి కి పాడ్ జంక నెతిర్లిన్క 'తా గెస్సు' మెనయ్.

28 జాకయ్, కో కదుల్ కెర పాడ్ కెరుక నెతిరి పరలోకుమచి రాజిమ్ అమ్క దొర్పు జా అన్నెచి రిసా, దేముడు దిలి జా వరుమచి ఉప్పిరి నర్ల జా, సరి జతి బక్తి కెర జోక మరియాద కెర, బియె ఇండుమ.

29 కిచ్చొక మెలె, అమ్చో దేముడు డయితో ఆగిచో రితో అన్నె.

13

ప్రేమ, సత్తిమ్, సేంతుమ్ తెన్ ఇండుక

- 1 'అమ్చ బాబుడ్లు' మెన దెకిల్ రితి తుమ్ నంపజలసక ఎక్కిలోక ఎక్కిలో ప్రేమ కెర్తె తా.
- 2 వేర తెంతో జెత మాన్సుల్క మరియాద దెకుక తుమ్ పచ్చ నాయ్. కిచ్చొక మెలె, 'దూతల్' మెన నేన్లె కి, గోత్ అయెల దూతల్క కి సగుమ్జెన్ మరియాద కెర అస్సి.
- 3 జేలితె గలిలసక కన్నూరుమ్ ఉచర దెక, జోవయింతెన్ తుమ్ జేలితె తిలి రితి ఉచరన, జోవయిందె జాడు వయన. పడ్డో, తుమ్ జోవయింతెన్ ఎక్కి ఆగెత బెదిలన మెన, అన్నె మాన్సుల్చి అత్తి వేర వేర అల్లెరలు నేడ్ల నంపజలసక దస్సి తోడు తా.

† 12:22 12:22 'బయిమచి' మెలె, ఒత్త 'సీనాయి' డొంగ్రుతె ఎత్తి అదికారుమ్ తిలో దేముడు మోసిక అగ్గల్ దిలన్. జేవ్ అగ్గల్ తెన్ సిచ్చల్ కి దిలన్, పడ్డో తెదొడి ప్రెజల్ జో ఎత్తి అదికారుమ్ తిలో దేముడుక పాసి గెచ్చుక ప్రమాదుమ్. గని ఈంజ 22 నంబర్చి కోడతె సంగితి 'సీయోసు' డొంగ్రుతె, మెలె పరలోకుమతె, దస్సి బయిమ్ తంక నాయ్. యేసుక నంపజల మాన్సుల్చి పాపుమ్ గెలి రిసా అడ్డు నెంతె బయిమ్ నెంతె జోత గెచ్చుక జయెదె. జా తేడ ఇన్నె దెకయ్తయ్. † 12:22 12:22 డీనయ్లిసి 14:1 దెక. § 12:22 12:22 డీనయ్లిసి 21:2. * 12:23 12:23 రోమియుల్ 8:29, కొలోస్సియుల్ 1:15, 18, డీనయ్లిసి 1:5, చి ఎబ్రియల్ 2:11-14 దెక. † 12:23 12:23 లూకా 10:20, పిలిప్పియుల్ 4:3, డీనయ్లిసి 13:18, 17:8, 20:15, 21:27 దెక. † 12:23 12:23 అదికాండుమ్ 18:5, ఎబ్రియల్ 4:13, 10:30. § 12:24 12:24 అదికాండుమ్ 4:2-16, ముక్కిమ్క 4:10. హేబెలు చి లోయి 'సిచ్చ దేన్, సిచ్చ దేను!' మెలి రితి కేక గల్తయ్. యేసుచి లోయి 'చెమెంచువ కెరు, చెమెంచువ కెరు!' మెన కేక గల్తయ్. * 12:26 12:26 నిర్లమకాండుమ్ 19:18. † 12:26 12:26 హగ్గయ 2:6.

4 పెండ్లి మెలిన్ క చెంగిలి మెన ఎత్తి విలువ దెక గవురుమ్ కెరుక అస్సె, పెండ్లితె తెర్పిమున్ను చి నెడేమె సత్తిమ్ తంక మెన తుమ్తె కో లంజె జా నాయ్. లంజె ఉచర్తనక చి లంజె జతసక దేముడు తీర్పు కెర సిచ్చ దెయెదె.

5 తుమ్చి జీవితముతె డబ్బుల్ ఆస దూరి కెరన, తుమ్క తిలిన్ క 'జయెదె' మెన సేంతుమ్ తెన్ జయె.

* "తుమ్క కెయెడ కి ములి నాయ్, పవేసి నాయ్."

మెన దేముడు ప్రమానుమ్ కెర సంగ అస్సె.

6 జాకయ్,

† "ప్రబు అమ్క తోడు అస్సె, ఆవ్ బియె నాయ్.

అంక పాడ కెర్తి రితి మాన్సుల్ అంక కిచ్చొ కెరుక నెత్తిర్తి"

మెన అమ్ దయిరిమ్ తెన్ సంగుక జతయ్.

తుమ్క దెకయ్ల వెల్లో సుదల్ క నే పవ్రితె, చెంగిల్ ఇంఢ

7 దేముడుచి సుబుమ్ కబుర్ తుమ్క సూనయ్ల, తుమ్క వాల్ దెకయ్లనక తుమ్ పచ్చ నాయ్. జేవ్ జోవయిం చి జీవితముక ఇండిలిన్ క కిచ్చొ పలితుమ్ దెర్ల గే తుమ్ ఉచర. జోవయిం చి నముకుమ్చి ఎదిలి నముకుమ్ తుమ్ జోవయిం చి పట్టి ఇంఢ.

8 యేసుక్రీస్తు కాలి కిసా తిలో గే, ఆజి కి దస్సాయి తా, కెయెడ తెయెడ కి దస్సాయి తయెదె.

9 వేర వేర నముకుమ్చి బోదన సూన తుమ్ మోసిమ్ జా సత్తిమ్ తిలిసి తుమ్ ముల నాయ్. మెలె, జేవ్ చ కముచ పండుగ అన్నిమ్ జవున్, కిచ్చొ కిచ్చొ కతిన్ నే కతిసి జవున్, జోవయిం క నంప కెర్ల మాన్సుల్ క చెంగిల్ కెర నాయ్. ముక్కిమ్క ప్రబుచి దయ జో అమ్క దెతిన్ కయ్ అమ్చి వెట్టిచి ఆత్మ డిట్టుమ్ జంక అస్సె.

10 అమ్ నంపజలసక వేర బలి దెతి టాన్ మెలి కోడు దొర్పు జా అస్సె. యేసు మొర్రిసి. ఈంజయ్ బలి దెతి టాన్తె దిలి బలి అగ్గెచి రితిచి టంబుగుడ్డచి సేవ కెర్త, ఆగ్నల్ క నంప కెర్తి రితిచి ఉప్పిరి నముకుమ్ తితన కంక నాయిమ్ నాయ్.

11 జయ్యి రితి ఎత్తిక వెల్లెల పూజర్లు గొర్లల్ దేముడుచి గుడితె ఆన 'ప్రజల్చి పాపుమ్ గెన్ను' మెన గొర్లల్చి లోయ తెడిచి ఒగ్గర్ సుద్ది తిలి గదితె ఆన, సువ తా, జేవ్ గొర్లల్ చ పీనుమ్లుక బయిలె కడన కెర, జా బయిలె డయ గెల్తె.

12 కిచ్చొక మెలె, దస్సి, దేముడు అబ్బొన్తె అన్నె బెదవుక మెన, జోచి సొంత లోయ తెన్ ప్రజల్ క సుద్ది కెరుక మెన, యేసు కి † పట్టుమ్చి కోట ఒత్తల్తోచి బయిలె మొర్లన్.

యేసు స్రెమల్ సేడ్లిన్తె అమ్ కి బెదుమ

13 జాకయ్, అమ్ కి, గావ్ ఒత్తల్తోచి బయిలె జోతె గెచ్చ, జో సేడ్ల స్రెమల్ అమ్ కి సేడుమ.

14 కిచ్చొక మెలె, కెయెడ తెయెడ తా గెతి పట్టుమ్ ఇన్నె అమ్క నాయ్, గని దస్సిచి తిలి కి చెంగిల్ పట్టుమ్చి రిసా రకితసుమ్.

15 రోజుక దేముడుక బలి దిలి రితి, జో అమ్క దిలి ఆత్మనెక్తిక జోక గవురుమ్ కెరుమ. కిసి బలి మెలె, జోచి నావ్చి విలువ ఒప్పున గవురుమ్ సంగితిసి.

16 అన్నె, మాన్సుల్ క చెంగిల్ దెకుక, చి తుమ్క కలుగు జలిన్ క అన్నె మాన్సుల్ క తోడు దెంక ముల నాయ్. కిచ్చొక మెలె, దసచక 'బలివొ' మెనయ్ దేముడుక సర్ప్.*

తుమ్క సికడ్లనక మరియాద కెర

17 తుమ్క సికడ్లనచి కోడు తుమ్ సూన, దాక్ కెరన, తుమ్చి సొంత ఇస్టుమ్ కెరుక ముల దా, జోవయిం చి కోడుక మరియాద కెర. కిచ్చొక మెలె, తుమ్చి ఆత్మల్ క 'చెంగిల్ తత్తు' మెనయ్ సికడ్లతి, అన్నె, క్రీస్తు ఈంజ లోకుమ్తె అన్నె ఉత్త జా ఎత్తిజిన్ క పరిచ్చొ కెర్తి దీసి జెయెదె. అయ్లె, "దేముడు

* 13:5 13:5 ద్వితీయాపదేశ కాండము 31:6. † 13:6 13:6 కీర్తనలు 118:6 ‡ 13:12 13:12 యెరూసలేమ్ ఒత్తల్తో. లూకా 23:32-33, యోహాను 19:17-18, మార్కు 15:20-22, మత్తయి 27:31-33. § 13:14 13:14 మెలె, పరలోకుమ్. డీనయ్లిసి 21:2

డెక. * 13:16 13:16 కొరింధిల్ క రెగిడ్లి ఏక్ నంబర్ ఉత్తమ్ 10:31 డెక.

అమక దిలి కామక 'చెంగిల్ కెర్లమ్' గే 'గార్ కెర్లమ్' గే జో దేముడుచి మొక్కె అమ్ సాచి నజనుక తయెదె" మెన జానయ్ తుమక జేవ్ సికడ్తతి, దెకితతి. జేవ్ తుమక సికడ్తన దుకుమ్ నెంతె సర్ల తెన్ ఏలుప కెర్రి రితి తుమ్ జోవయింది తెడి తా. జోవయింక అల్లర్ కెర్రి, దుకుమ్ జవుల చి తుమక లాబుమ్ తయె నాయ్.

అమ్చి రిసా ప్రార్దన కెర

18 అమ్చి రిసా తుమ్ ప్రార్దన కెర్రి తా. 'అమ్ పొరపాట్ జము నాయ్ గని ఎత్తిక సత్తిమ్ కెరుక ఆస తెన్ అస్సుమ్' మెన అమ్చి పెట్టి అమ్ జానుమ్.

19 అన్నె కిచ్చిక 'ప్రార్దన కెర్రి తా' మెన తుమక ఆవ్ బతిమాల్లు జా సంగితసి మెలె, ఆవ్ అన్నె బే బేగి తుమ్తె అన్నె జెంక దేముడు వాటు దెవున్ మెనయ్ తుమ్ ప్రార్దన కెర.

20 జలె, జోచ మెండల్ జల అమ్ నంపజలనక ముక్కిమ్ జలో గొవుడు జలో అమ్చో ప్రబు జలో యేసుక అన్నె జియడ్డో సేతుమ్ దెతో దేముడు, కెయక తెయక కామక జెతికయ్ జోచి ప్రమానుమ్చి రిసాచి నూయి జలి లోయిచి సెక్తి తుమక తోడు తవున్.

21 జోచి ఇస్సుమ్ రితి తుమ్ ఇండితి రితి తుమక దొర్కు జలిసి ఎత్తి దెవున్, చి జో మెన్సితి బుద్ది తుమ్చి పెట్టి తతి రితి తుమ్చి పెట్టి కామ్ కెర్రి తవున్. యేసుక్రీస్తుచి అత్తి ఈంజ ఎత్తి జర్లు కెరెదె. జోక కెయక తెయక పరలోకుమ్చి గప్పురుమ్ తవును! ఆమేన్.

ఆకర్ కోడు

22 జలె, బావుడ్డు, ఇదిల్ కొట్టు తెన్ ఆవ్ రెగిడ్డి ఈంజ జాగర్ల సంగితి దయిరిమ్ సంగితి ఉత్తమ్ తుమ్ ఓర్పువ జా.

23 అమ్చో బావో జలో తిమోతిక †విడ్డల్ కెర అస్తి మెన తుమ్ జాన్క మెన ఆవ్ ఆస జతసి. జో బే బేగి ఉట్ట అయలె, అంచి తెన్ జో జెయెదె, చి బెద తుమ్తె జా తుమక దెకుమ్దె.

24 తుమక బోదన కెర్రి ఎత్తిజిన్క చి ప్రబుచయ్ జల అన్నె ఎత్తిజిన్క అమ్చి ప్రేమ తుమ్ సంగ. ఇటలీ దేసిమ్ తెంతొచ నంపజలన్ ఎత్తిజిన్ తుమక జోవయింది ప్రేమ సంగ తెర్తయ్తతి.

25 తుమ్ ఎత్తిజిన్ తెన్ ఎత్తి అదికారుమ్ తిలో దేముడుచి దయ తవున్! ఆమేన్‡.

† 13:23 13:23 జెయిల్తె తెంతొ, కిచ్చిగె. ‡ 13:25 13:25 తెద్దిలి

యాకోబు రెగిడ్లి ఉత్త్రమ్ బారిక్ జలో యాకోబు రెగిడ్లి ఉత్త్రమ్

1 దేముడుచి, ప్రబు జలో యేసుక్రీస్తుచి సేవ కర్తా జోవో * గత్తి సుదో జలో † యాకోబు, వేర వేర దేసిమ్లుతె చెతుర్పు జల ‡ బార తెగల్చ యూదుల్క, జోబర సంగ కెర రెగిడ్లి ఉత్త్రమ్.

అల్లర్ సేడ్డిన్చి రిసా దయిరిమ్ కోడు

2 బావుడ్లు, తుమ్ వేర వేర అల్లర్ సేడ పరిచ్చ రితి జలె, 'చెంగిల్' మెన పూర్తి సర్ల తెన్ తా

3 కిచ్చొక మెలె, తుమ్చి నముకుమ్ అల్లర్లు వాట్ పరిచ్చ జలె, జీన్లె, తుమ్చి పెట్టి పూర్తి నిదానుమ్ జస్సె.

4 ప్రబుచి ఆత్మక తుమ్ పూర్తి జతి రితి, తప్పు నే జతి రితి, తుమ్చి ఆత్మకె కిచ్చొ చెంగిల్చి నే పిట్టి రితి, జేవ్చి కామ్ పూర్తి జర్లు కెర్తి రితి తుమ్ నిదానుమ్ కెరన.

5 ఇన అల్లర్ పరిచ్చల్తె కీసి ఇండుక గే తుమ్తె కో జలెకు నేన్లెగిన, దేముడుక పున. కో పుసిలె, నే గోల కెర్తె. దర్ముమ్ తెన్ జో బుద్ది తయెదె.

6 గని ముక్కిమ్క ఎక్కి నముకుమ్ తెన్, కిచ్చొ అన్యానుమ్ నెంతె, పున. కిచ్చొక మెలె, కక్క అన్యానుమ్ తయెదె గే, గట్టిజ వాదు వీర్లె నముదుమ్చ కెర్లల్ కీసి ఇత్తల్ ఒత్తల్ లయెదె గే, జో మాన్సు దస్సి జయెదె.

7 నిజుచి, దసా మాన్సుక దొన్ని మెన్సుల్ తయెదె. కిచ్చొ కామ్తె కి జోక ఎక్కి నిదానుమ్ తయె నాయ్.

8 దసా మాన్సు, జలె, కీసి ప్రబుతె నజన్లె కి కిచ్చొ కి దొర్కు జయెదె మెన ఉచరుక జయె నాయ్!

అల్లర్ సేడ్డిసి ఓర్పువ జతినచి కొడె

9 సికెన్ జవున్ బావో దాక్ జలె, బీద సుదో జలె, దేముడు జోక గవురుమ్ రితి కెర అస్సె, జోక ఆత్మ సామ్నారుమ్ కెర అస్సెచి రిసా సర్ల జవున్.

10 దస్సి, సామ్నారి జలో బావో కో జలెకు ప్రబుచి తెడి దాక్ జంక జలెకి, ఏక్ వేల బీద జంక జలెకి, జో కి జోచి పెట్టి సర్ల తియస్సు. కిచ్చొక మెలె, బయలుచి చివ్వర్చ పుల్లొ కీసి పోర్లొ జా సుకులగె, జో మాన్సుకి ఆకర్క మొరెదె.

11 బయలుచి చివ్వర్ జలె, పొద్దు బార్ జా గట్టిజ వాదు ఒప్పుడ్ కెర్తె, జేవ్చ పుల్లొ సుకిల్ రితి పాడ్ కెర్తయ్. దస్సి సుకా గెచ్చ గెన్ గెతతి. జోవయిచి నూటి గెతయ్. దస్సి, జోవ కమొ కెర్తె కెర్తె సామ్నారి కి మొరెదె.

12 ప్రబుచి రిసా కో నిదానుమ్ తెన్ కిచ్చొ కిచ్చొ అల్లర్ ఓర్పువ జవుల గే, జోక చెంగిలి. కిచ్చొక మెలె, పాపుమ్తె దెర్లు నే సేడ్లె జేవ్ అల్లర్ సేడ్లి పరిచ్చతె జీన్లె, దేముడు దెతి పరలోకుమ్తె జేవ్ గెతి కిరీటుమ్ జోక దొర్కు జయెదె. దేముడు ప్రమానుమ్ కెర్లె కోడు 'కో అంక ప్రేమ కెర్తి రితి ఇండుల గే, జోవయింకయ్ బెదవనిందె'.

13 గని అల్లర్ సేడ్లి పరిచ్చల్ జతె పొది, కో పాపుమ్ కెరుక ఉచర్లె జవున్, పాపుమ్ కెరుక దెర్లె జవున్, "దేముడు అంక పాపుమ్ కెరయ్తయ్" మెనున్ నాయ్. కిచ్చొక మెలె, దేముడు పాపుమ్తె బెదితోసా నెంజె, పాపుమ్తె ఎద్దరె బెది నాయ్, కో కి, కిచ్చొ కి జోక పాపుమ్ కెరవుక నెతిర్తి, చి 'పాపుమ్ కెర్లు' మెన కిచ్చొ రిసా ఉచరె నాయ్, కేన్ పాపుమ్ కెరె నాయ్.

14 మాన్సుక పాపుమ్ సికయ్తినీ కిచ్చొ మెలె, జోచి సాంత * పెట్టివ గార్ ఆసలి జోక సికయ్తయ్, పెలయ్తయ్.

* 1:1 1:1 నెంజెలి 'గతిమాన్సు' నెంజెలి 'సేవ కర్తాసా'. † 1:1 1:1 ఈంజి 'యాకోబు యేసుచో బావోన జా తిలో, బెర్తె. మరియ చి యోసేచి పెట్టివ. యెరూసలేమ్వ నంబలెనచి నబక వెల్లొ తిలో. బారికల్ 15:6-29, 21:18, గలతి 1:19, 2:9, 12. ‡ 1:1 1:1 'బార తెగల్' మెలె, ఒగ్గర్ పూర్ణుమ్ తెంతో, యాకోబువ బార పుత్తర్లు తెంతో యూదుల్తె బార తెగల్ అస్సి. ఎత్తి పుత్తన్ తెంతో ఏక్ తెగ.

15 మాన్సుచి పెట్టి అన మొదోల్ జా జెర్న, గజ్జల్ జా వడ్డ, పాపుమ్ వీరయతయ్. ఒత్త తెంతో, జా పాపుమ్ వడ్డ వడ్డ పూర్తి జా, మొర్ను వీరయతయ్.

చెంగిల్ తిలిసి ఎత్తి దేముడు తెంతో జెతిసి

16 నాయ్, బావుడ్లు, తుమ్ మోసిమ్ సిడ నాయ్.

17 చెంగిల్ తిలిన్ ఎత్తి, సత్తిమ్ తిలిన్ ఎత్తి, పరలోకుమ్ తెంతో జెతయ్. ఉజిడ్ ఎత్తిక అబ్బిసి జలో దేముడు తెంతో జెతయ్. జో మార్పువ జతోసా నెంజె, జోచి ఉజిడ్ కెయ్యి నీడ జయ్ నాయ్.

18 జోచి సొంత ఇస్టుమ్క, జోచి సత్తిమ్ కోడుచి సెక్కియ్ అమ్క జో జెర్నయలన్. కిచ్చిక మెలె, జో జెర్నయలన కెర్లన ఎత్తితె అమ్ జోక దిలి † నొవో జతి రితి అమ్క నొవర్ జెర్నయలన్.

19 ప్రేమ తిల బావుడ్లు, ముక్కిమ్క తుమ్ కిచ్చి దెరన మెలె, తుమ్తె ఎత్తి, మాన్సు బుద్ది కోడె సరిగా సూన్తన జా, బమ్మ తెన్ లట్టబ్బన నే జతె, బే బేగి కోపుమ్ జా నాయ్.

20 కిచ్చిక మెలె, మాన్సుచి కోపుమ్ దేముడుచి పున్నిమ్క వాటె దయె నాయ్, జోచ పున్నిమ్ కమొ జర్లు కెరె నాయ్.

21 జాకయ్, మర్కుటుమ్ బుద్ది ఎత్తి, తుమ్చి పెట్టి గుడియయ్ జలి కుస్సిదుమ్ ఎత్తి, తుమ్చి పెట్టి తెంతో వెంట గెల కెర, దాకి కెరన, కోపుమ్ నే జతె, దేముడు తుమ్చి పెట్టి రోవలి జోచి కోడు సెంతుమ్ తెన్ తుమ్ సూన సూన జాక పోసన. జా కోడు తుమ్చ అత్మల్క రచ్చుంచువ కెరుక తెరె.

22 గని దేముడుచి కోడు ఎత్తి, సూన్తనయ్ తుమ్ జా నాయ్. ఎత్తి సూన్తనయ్ గని జోచి కోడు నే కెర్లన జలె, తుమ్ మోసిమ్ కెరన తస్సె. జోచి కోడ్ రితి ఇండ, చి తుమ్చి అత్మతె పలితుమ్ దెరెదె.

23 జోచి కోడు ఎత్తి, సూనయ్ కో దస్సి ఇండె నాయ్ గే, కిసి జతయ్ మెలె, అద్దుమ్తె మాములుమ్ మొక్కొమ్ దెకనెతోసాచి రితి జతయ్.

24 జో మాన్సు అద్దుమ్తె దెకన పస్ల ఉట్ట గెచ్చ, కిసి డిసిలో గే బేగి వచ్చ గెల్లయ్.

25 గని, ఎత్తిక † అదారుమ్ తిలి ఆగ్గు కో చెంగిల్ అద్దుమ్ కెరన పోసన జా ఆగ్గుచి ఉప్పిరి నిదానుమ్ జయెదె గే, జోచి రితి సూన పవ్నెతోసా నే జతె, జా ఆగ్గు కెర్తోసాయి జయెదె, చి జా ఆగ్గు రితి జో ఇండితిసి పాపల్, తప్పుల్, ఇండితిన్ తెంతో జో మాన్సుక విడ్డల్ కెరెదె, చి జా ఆగ్గు రితి ఇండితిన్తె జోక చెంగిల్ జయెదె, అత్మపలితుమ్ దెరెదె.

దేముడుచి నిజుమ్చి బక్తి

26 “దేముడుచి బక్తి అవ్ కెర్లసి” మెన కో ఉచరంతయ్ గే, జోచి చోడి తెన్ ఇస్టుమ్ అయ్లి రితి లట్టబ్తయ్ గే, జోవయించి పెట్టి జోక జొయ్యి మోసిమ్ కెరంతయ్. జోవయించి బక్తి ఆరి జతయ్.

27 అమ్క అబ్బి జలో దేముడుచి మొక్కె మాన్సు కెర్తి కిచ్చి బక్తి సత్తిమ్చి నిజుమ్చి జయెదె మెలె, అమ్ జోచి సేవ కెర్లినక ‘సత్తిమ్చి నిజుమ్చి’ మెన కీన కమొ రుజ్జు దెకపుల మెలె, పోర బోదలచ, రండెల్ మాన్సుల్చ బాదల్ దెక అమ్ తోడ్ కెర్లసి, పడ్డో ఈంజ లోకుమ్చ పాపుమ్ కమొతె అమ్ నే బెదితె అత్మ సుద్ది తతిసి.

2

సామ్నార్లుక బీద సుదల్క తేడల్ నే దెకుత్

1 బావుడ్లు, పరలోకుమ్చి ఉజిడి తిలో అమ్చో ప్రబు జలో యేసుక్రీస్తుక తుమ్ నంపజలి రిసా, తిలనక నెంజలనక తేడల్ దెక నాయ్.

2 మెలె, దోగుల సబతె అయ్లె, ఎక్కిలో జలె, బజరచ ముద్దివో ఉంగారల్ తియన చెంగిల్ పాలల్ గలన అయ్లె, గని అన్నెక్తో బీద తా పోర్లు పాలల్ గలన తా జో కి అయ్లె,

3 చెంగిల పాలల్ తిలోసాక తుమ్ చెంగిల్ దెక, “ఈందె, ఇన్నె చెంగిల్తె వెను” మెన పురె బుకార్లె, గని బీద సుదొక “ఒత్త టీచ” జవున్, “అంచి చట్టె వెను” మెన జవున్ సంగిలె,

† 1:18 1:18 సయ్య 15:19-21, ద్వితి 18:3-4, రోమి 11:16. ‡ 1:25 1:25 2:18 దెక.

4 తుమ్ దొన్ని మెన్గుల్ జా తప్పుచ తీర్పుల్ కెర్తన జా తన్న.

5 తుమ్ నూన, ప్రేమ తిల బావుడ్లు. ఈంజ లోకుమ్చి దనుమ్క దెకిలె, ఒగ్గరజన్ బీద నుదల్ అస్సి. జలె, *జీపయంతె ఒగ్గరజన్క దేముడు నిసాన, జీచి నముకుమ్ జతు మెనయ్, జోక ప్రేమ కెర్తనక జో దెతి వాటతె బెదుత్ మెనయ్, మెలె, పరలోకుమ్తె బెదుత్ మెనయ్.

6 తూమ్, బీద నుదల్క నిస్సారుమ్ దెక అస్సున్. తుమ్క కో నస్టల్చ మోసిమిలు కెర్తతి గే తుమ్ ఉచర. బీద నుదల్ నాయ్, గని సొమ్మార్లుయ దస్సి కెర్తతి. జెవ్వి తుమ్క తీర్పు కెర్తి గెరితె వెలన తగుల్ కెర్తతి.

7 వడ్డె, తుమ్ క్రీస్తుక నంప కెర్తికయ్, జోచి నావ్ తెన్ బాప్తిసుమ్ నజన్దరు, గెద. జలె, జోచి నావ్, గవురుమ్చి నావ్, కో దూసుప కెర్తతి మెలె, బీద నుదల్ నాయ్, గని సొమ్మార్లుయ.

8 దేముడుచి కొడతె రెగిడ్డి రితి,

+“తుమ్క తూమ్ కెర్తి ప్రేమ కెరంతసు గే,

తుచి పాసిచో మాన్సుక కి తెద్ది ప్రేమ కెర్తె తా”

మెన పరలోకుమ్చో రాసో జలో దేముడు దిలి ముక్కిమ్చి ఆగ్న తుమ్ ఇండితినె నెరవెర్చుప కెర్తె, తుమ్క చెంగిలి.

9 గని, జా ఆగ్న నెరవెర్చుప నే కెర్తి రితి తుమ్ తేడల్ దెకిలె, పాపుమ్ ఇండితను, చి ఆగ్నల్చి మొక్కపాపుమ్ నుదల్చి సిచ్చక విలువ జా అస్సున్.

10 కిచ్చొక మెలె, ఆగ్నల్ ఎత్తి నిదూనుమ్ కో కెర్తె, గని మొత్తుమిలె ఎక్కి జవున్ పిట్టుయలె, మొత్తుమి పిట్టుయలోసా జతయ్, చి మొత్తుమ్చి సిచ్చక జో మాన్సు విలువ జా అస్సు.

11 కిచ్చొక మెలె,

‡“లంజెకమొ కెర నాయ్”

మెన సంగిలోసా,

§“నరు అత్య కెర నాయ్”

మెన సంగిలోసా ఎక్కిలోయి. జలె, తుమ్ లంజెకమొ నే కెర్తె కి నరు అత్య కెర్తిగిన, జో దేముడు దిల ఆగ్నల్ మొత్తుమ్చి మొక్కపాపుమ్ కెర్తన జా అస్సున్.

12 జలె, అమ్చ పాపుమ్చ ఆసల్, తప్పుల్ తెంతో అమ్క విడ్డల్ కెర్తి *మాన్సుల్క ప్రేమ కెర్తి కన్యారుమ్ దెకితి ఆగ్నక దెకయ్ దేముడు తుమ్క తీర్పు కెర్తెదె. అమ్క ‘జయ్యి ఆగ్న రితి ఇండిల గే నాయ్ గే’ మెన జో తీర్పు కెర్తెదె. జయి కోడు నే వచ్చితె తుమ్ లట్టబా, ఇండ.

13 కిచ్చొక మెలె, కో అన్నె మాన్సుల్క కన్యారుమ్ దెకె నాయ్ గే, దేముడు జోకయ్ తీర్పు కెర్తినె జోకయ్ కన్యారుమ్ దెకుక బెదె నాయ్. గని, కో అన్నె మాన్సుల్క కన్యారుమ్ దెకితయ్ గే, జోక తీర్పు కెర్తి పాదిక జో ప్రబు జోకయ్ కన్యారుమ్ దెకెదె.

14 బావుడ్లు, “ప్రబుక నంప కెర్తసి” మెన ఎక్కిలో సంగిలే కి, జో బుల్లి బుద్ది దస్సి నముకుమ్ తెన్ నే బెదిలె, కిచ్చొయ్ లాబుమ్! ‘నముకుమ్’ మెన జో మాన్సు రితి సంగితిసి జోక రచ్చించుప కెరుక తెరె గే? తుమ్ ఉచర.

15 నంపజలోనె కేన్ జవున్ బావోక గే, బేనిక గే, సరిపుచుప జత పాలల్ నెంజిలె జవున్, సరిపుచుప జతి రోజుకచి అన్నిమ్ దొర్కు కెరంతి నెక్కి జవున్ నెంజిలె,

16 కో జలెకు జోక “చెంగిల్ తా. తుమ్క పాలల్ చి అన్నిమ్ దొర్కు జవున్” మెన సంగిలె, గని సరి జతి తోడు నే దిలె, కిచ్చొ లాబుమ్! కామ్క నెంజె.

17 దస్సి, రితి నముకుమ్ సంగన్జె, గని కామ్క జెతికయ్ కామ్ నే కెర్తె, జా నముకుమ్ ఆరిచి.

18 “తుకయ్ నముకుమ్, గని అంకయ్ కమొ” మెన కో జలెకు అన్నెక్కోక సంగిలె, జో అన్నెక్కోక ఆఁవ్ కిచ్చొ జబాబ్ దెయిందె మెలె, “తుచ కమొ నెంతె తుచి నముకుమ్ అంక రుజ్జు జయె నాయ్. కేన్ జవున్ కామ్

* 2:5 2:5 కొరిదిల్క రెగిడ్డి 2 నంబర ఉత్తమ 1:27-29. † 2:8 2:8 లేవీయకాండుమ్ 19:18 మత్తయి 22:39, చి యోహాను 13:34 దెక. ‡ 2:11 2:11 నిర్గమకాండుమ్ 20:14, ద్వితీయోపదేశ కాండుము 5:18. § 2:11 2:11 నిర్గమకాండుమ్ 20:13, ద్వితీయోపదేశ కాండుము 5:17.

* 2:12 2:12 1:25, చి 2:8 అన్నె దెక.

కెల్లెకయ్ నముకుమ్ చినుక జయెదె. అవ్, జలె, అంచ కమొకయ్ అంచి నముకుమ్ దెకయిందె” మెనయ్ జబాబ్ దెయిందె.

19 “ఎక్కిలో దేముడు ఎక్కిలోయి అస్సె” మెన తుమ్ నంప కెర్తసు. జా సరిగా, గని దస్సి మెన బూతల్ కి ఒప్పునతతి. గని ఒప్పున జేవ్ జంక బియఁ అద్దుర్ జా గెతతి.

20 చెంగిలి నే ఉచర్తొ ఓ మాన్సు, తుయి కో జలెకు, కమొతె నే రుణ్ణు జతి నముకుమ్క ‘ఆరిచి’ మెన, అవ్ తుక రుణ్ణు దెకవుక తుక కావలె గే?

21 జలె, † “ ‘బలి’ మెన పుత్తుదిక కండ దె” మెన దేముడు సంగిలి రితి పుత్తున్ జలొ ఇస్సాకుక అబ్రాహామ్ బలి దెతి టాన్తె బంద తెయార్ కెర్లిన్ తెన్, జో కెర్లి జా కామ్చి రిసాయి, “నిజుమి అన్నె పూర్తి నంప కెర్తయ్, సత్తిమ్ తెన్ అస్సె” మెన, దేముడు ‘జోక పున్నిమ్’ మెలి రితి అబ్రాహామ్క తీర్పు దెకె నాయ్ గే?

22 మెలె, జో అబ్రాహామ్చ కమొతె జోచి నముకుమ్ బెద కామ్ కెర్తె తిలి, చి జోపయింప కమొతె జోచి నముకుమ్ బార్ జా నెరవెర్పుప జలి.

23 దస్సి, జా కామ్తె జోచి నముకుమ్ రుణ్ణు జలి రిసా,

“అబ్రాహామ్ దేముడు సంగిలి కోడు నంప కెర్లి రిసాయి ‘జోక పున్నిమ్’ మెలి రితి ప్రబు దెకిలన్”

మెన రెగిడ్డినక ‘నిజుమ్’ జతయ్. * ‘దేముడుచొ మింతున్’ మెన కి అబ్రాహామ్చి రిసా దేముడుచి కొణ్ణె తె రెర్ల అస్సె.

24 దస్సి, ఎక్కి సంగన్లి నముకుమ్చి రిసా నాయ్, గని జా నముకుమ్ జోచి కమొతె బార్ జా రుణ్ణు జలి రిసాయి, దసా మాన్సుక ‘సత్తిమ్చొ’ పున్నిమ్చొ’ మెలి రితి దేముడు దెకితయ్.

25 అగ్గె లంజె జియ తిలి రాహూబు తెన్ కి దస్సి. జేవ్చి † ఏక్ కామ్చి రిసా, మెలె, జా సుట్టు కబుర్ అయ్ల పూర్లక జా మరియాద కెర, జోచ విరోదుమ్ సుదల్తె జేవ్ దెర్ను నే నీడ్డి రితి లుంకడ, వేర వాట్ తెర్తవ దిలి రిసా, ‘జాక పున్నిమ్’ మెలి రితి దేముడు దెకిలన్.

26 జలె, జీవ్ నెంజిలె ఆగ్ గిసి మొర తయెదె గే, దస్సి, మాన్సు ఇండిత కమొతె నే బార్ జలె, జో సంగితి నముకుమ్ కామ్క నెంజె, మొర అస్సె.

3

కొణ్ణె లట్టబ్బిన్తె జాగర్ల దెకనక

1 బావుడ్డు, తుమ్తె ఒగ్గర్జున్ బోదన కెర్తన జతు నాయ్. కిచ్చొక మెలె, అమ్ బోదన కెర్తనచి పూచి ఒగ్గెలి, చి ఆకర్ దీసల్క ప్రబు అమ్క పరిచ్చ కెర తీర్పు కెర్తి పొదిక, అమ్క జో తియార్లె జా కామ్చి రిసా ముక్కిమ్క అమ్కయ్ తీర్పు కెరెదె.

2 అమ్తె కో కి తప్పల్లె సంగుక జయెదె, చి కొణ్ణె లట్టబ్బిన్తె కో కిచ్చొ తప్పల్లె నే సంగుక తెర్లె, జో మాన్సుక ‘జోచి ఆగుచి ఉప్పిరి జో పూర్తి ఏలుప కెర్తయ్, జో మాన్సుతె కిచ్చొయ్ పొరపాట్ నాయ్’ మెనుక జతయ్.

3 జేవ్ కేన్ దిక్కు ఇండుక అమ్చి ఇస్టుమ్ తయెదె గే, ఒత్తయ్ ఇండుత్ మెన, గోడల్చ చొండిలె కలెమ్ చప్లయ్లె జోచి ఒండి ఆగుక బులవుక జయెదె.

4 ఓడల్ తెన్ కి దస్సి. ఓడ వెల్లి జలెకి, దిక్కు దెకయ్తి జాచి చట్టు జాచి కంట ఇదిలిసి జయెదె. జలె, జా ఓడక గట్టిజ వాదు పెలిలెకి, ఓడచి కంటొ దిక్కు దెకయ్తి జా చట్టు ఇదిలిసి జలెకి, ఇండయ్తోసా జా చట్టు బుడ్డవ కేన్ పక్క దెకయెదె గే, జయ్యి పక్క ఓడ గెచ్చెదె.

5 దస్సి, ఒండి ఆగుక జీబు ఇదిలిసి జలెకి, లట్టబ్బె జాక కెర్తి నెక్కి! అస్సె, కెర్తి డొంగురచ రూకుల్క ఏక్ ఇదిలిసి ఆగి డయ్ గెలెదె!

† 2:19 2:19 గలతీయల్ 3:20, రోమీయల్ 3:30, మార్కు 12:29. ‡ 2:21 2:21 అదికాండుమ్ 22:1-18. § 2:23 2:23 అదికాండుమ్ 15:6, రోమీయల్ 4:3, 5, 9. * 2:23 2:23 2 దిన: 20:7. † 2:25 2:25 యెహోసూవ 2:1-24, 6:1-25.

6 దస్సి, జీబు ఆగివి రితి జయెదె. అమచి ఒండి ఆగుతె జీబు కెడ్డి పాపుమ్ కెరయెదె! అమచి ఒండి ఆగుక గార్ కెరెదె. అమ్ జెర్లితె తెంతో మొర్తె ఎదక ఈంజ లోకుమతెచి అమచి బత్తుతె జర్లు జతిసి ఎత్తిక జీబు ఏలుప కెర్తయె. మాన్సు జాగర్త నెంజెలి, అమచి చోడితె వెల్లి ఆగి సేడ్డి రితి జయెదె.

7 మెలె, ఎత్తి, రగుమ్ జంతువుల్క, పిట్టల్క, అయివో గత్తక, మొన్సు గత్తక మాన్సు ముద్దో కెరుక జయెదె. జేవ్క మాన్సుల్ ముద్దో కెర అస్సి, గని

8 జీబుక కేన్ మాన్సు ముద్దో కెరుక నెతిర్తి. జీబు తుక్లె తంక నెత్త, ఒగ్గర్ ప్రమాదుమ్ దెకయతయ, జాచితె మొర్తి విన్సుమ్ బెర్లు తయెదె.

9 జీబు తెన్ అబ్బో జలో దేముడు ప్రబుక గవురుమ్ సంగితనుమ్, గని మాన్సుల్క దూసుప కెర్తనుమ్, జోచి పొలిక జేవ్ జెర్లున్ జలెకి. దస్సి, కెడ్డి తప్పు కెర్తనుమ్!

10 ఎక్కి చోడి తెంతో గవురుమ్ సంగితిసి, దూసుప కెర్తెసి బార్ జతయ. బాపుడ్లు, ఈంజ తప్పు. ఇసిచి పోస.

11 ఎక్కి గొయి తెంతో ఊంట పుట్టి, చెంగిలో పానిచి కారు జలి గర్చి పాని దెయెదె గే? నాయ్ గెద.

12 పడ్డో, బాపుడ్లు, * అంజూరుమ్ రూక్తె ఒలీవ పండ్లు దెరుల గే? నెంజెలి, ద్రాచ చెట్ల బొడ్డ పండ్లు దెరుల గే? నాయ్, గెద. దస్సి, కారు జలి పానిచి ఊంట చెంగిలో పాని దెయె నాయ్.

పరలోకుమ్ తెంతో చి గ్యానుమ్ కిసి తయెదె

13 తుమతె కక్కయ్ బుద్ది గ్యానుమ్? 'అంకయ్ గ్యానుమ్' మెన కో ఉచరన్లె, జా గ్యానుమ్తె బెదితి బుద్ది తెన్, గవురుమ్ నే ఉచరంతె, జా గ్యానుమ్తె బెదిత కమొ ఇంఠ రుజ్జు దెకవును.

14 గని తుమచి పెట్టి గోసచి విన్సుమ్ తిలె, సొంత గవురుమ్ ఆననతి ఆస తిలె, 'అమ్ సత్తిమచ' మెన తుమ్ ఉచరన నాయ్, అబద్దుమ్ జన్స.

15 తుమచి పెట్టి దస్సి బుద్ధల్ తిలె, తుమచి గ్యానుమ్ కేనె తెంతో జెతయ్ మెలె, పరలోకుమ్ తెంతో నాయ్, గని ఈంజయ్ లోకుమచి తెంతోయ్, మాములుమ్ †ఆగ్ రగుమ్, బూతల్ తెంతో చి రగుమ్ జతయ్.

16 గోసలు, సొంత గవురుమ్ ఆననత ఆసల్ కేనె తవుల గే, ఒత్తయ్ కిచ్చో ముద్దో తయె నాయ్, గొడ్డల్ తయెదె, చి మాన్సుల్ ఎత్తి పాపుమ్ ఇండుక అలవాట్ జవుల.

17 గని పరలోకుమ్ తెంతో అయిలి గ్యానుమ్, ప్రబుచి నుద్ది తెన్, సేంతుమ్ బుద్ది తెన్, మెత్తన బుద్ది తెన్, సొంత ఇస్టుమ్ జర్లు కెరుక ఒగ్గర్ నే తతె, వేర మాన్సుల్చి కోడు మరియాద తెన్ సూనతి బుద్ది తెన్ తా, కిచ్చోయ్ ఉప్రమెన్సు నెంతె తయెదె.

18 అన్నె, పున్నిమ్ కేనె పలితుమ్ దెరెదె మెలె, సేంతుమ్ కెరయత మాన్సుల్చి అత్తి సేంతుమచి బీ గలిలిసెతయ్ పలితుమ్ దెరెదె.

4

దేముడు సంగిలి రితి ఇండుక

1 తుమచితె తగుల్ జతిసి, జట్టి జతిసి కేనె తెంతో జెతయ్ గే తుమ్ ఉచర. కేనె తెంతో మెలె, తుమచి ఆగుతె జట్టి జత ఆసల్ తెంతోయ్.

2 కిచ్చో జలెకి ఆస జతను, చి జా దొర్కు నే జలె, అన్నెక్కోక మార్తను. దస గోసల్ తెన్ తత్తను, గని తుమ్ ఆస జలిసి దొర్కు నెంజె, చి గొడ్డల్ తగుల్ జతె తత్తను. కిచ్చోక తుమ్క దొర్కు జలిసి దొర్కు నెంజె మెలె, దేముడుక పునుసి నాయ్.

3 నెంజెలి, పుసెలికి, దొర్కు నెంజె. కిచ్చోక మెలె, గర్చి బుద్ది తెన్ పునితను. మెలె, తుమచి పెట్టిచ ఆసల్ జర్లు కెరనకయ్ ఉచర పునితను.

4 కేన్ జవున్ తేరబోద మున్సున్క ముల దా లంజె జలి రితి, తుమ్ దేముడుక ముల, ఈంజయ్ లోకుమచి బుద్దితె గెచ్చు అస్సున్! ఈంజయ్ లోకుమచి దనుమ్క ఆస జతిసి దేముడుక విరోదుమ్ జతయ్ మెన నేన్సు గే? జాకయ్, ఈంజయ్ లోకుమచి వచ్చెన కో గెతయ్ గే, దేముడుక విరోదుమ్ నుదో జతయ్.

* 3:12 3:12 అంజూరుమ్ రూకు బొడ్డ రూకు రితి తయెదె. † 3:15 3:15 1:14 దెక.

5* “అమ్ మాన్యులచి పెట్టి జో దిలి ఆత్మ జోకయ్

నిదానుమ్ తవున్ మెన జోచి ఆన”

మెన అగ్గె తెంతో దేముడుచి కొడొతె రెగ్గ అస్సె. జా కోడు ఆరి ఒత్త అస్సె మెన ఉచర్తసు గే?

6 అస్సె, అమ్ వేర ఆసల్ నే జతి రితి ప్రబు అమక దయ కెర దొర్కు జలి తోడు తయెదె. జాకయ్, దేముడుచి కొడొతె అన్నె కిచ్చొ రెగ్గ అస్సె మెలె,

† “గవురుమ్ ఉచరంతసక దేముడు

దూరి కెర్తయ్,

గని కో దాక్ కెరనుల గే,

జోవయింకయ్ జోచి దయచి తోడు దెయెదె”

మెన రెగ్గ అస్సె.

7 జాకయ్, దేముడుచి తెడి జా, దాక్ కెరన జోవయింబి ఇస్టుమ్ రితి ఇండుక తుమ్ కోర్ప జా. దస్సి జలదు మెలె, సయ్తాన్ పాసి అయ్లి రితి జా జోచి బుద్ది సికడుక జవున్ కిచ్చొ వేర అల్లర్ కెరుక జవున్ ఉచర్లె, జోక “ఉట్ట గో!” మెలె, జో ఉట్ట నిగెదె.

8 దేముడుక పాసి జా, చి జో తుమ్కయ్ పాసి జెయెదె. తుమ్ పాపుమ్ కెర్లన తుమ్చి ఆత్మచ అత్తో సుద్ది కెరన. తుమ్ దొన్నె మెన్యుల్ తిలస, తుమ్చి పెట్టి ఎక్కి ప్రబుచయ్ జా జోచి సుద్ది జా, జోక ఎక్కి నిదానుమ్ జా.

9 తుమ్చ కమెచి పాపుమ్ ఉచరన పెట్టి బాద నేడ, లాజ్ జా దుకుమ్ జా ఏడ, దన కమె ముల. పాపుమ్ కమెచి ఆసుక ముల్లి బుద్ది జా తుమ్ ఏడ. పాపుమ్ కమెచి సర్ల ముల్లి బుద్ది జా తుమ్ దుకుమ్ జా.

10 దేముడుచి మొక్కె దాక్ కెరన, చి జో తుమ్క టీచడెదె. ‡

మాన్యులక తీర్పు నే కెరుక

11 బావుడ్లు, ఎక్కిలోచి రిసా అన్నెక్లో దూసుప కెర్త తీర్పు కొడొ లట్టబా నాయ్. అన్నెక్లోచి రిసా దూసుప కెర్త తీర్పు కొడొ కో లట్టబుల గే, దేముడు దిలి † ఆగ్గుక కి దూసుప కెర తీర్పు కెర్తయ్. దేముడుచి ఆగ్గుచి ఉప్పిరి తుమ్ తీర్పు కెర్తసు జలి, జోచి ఆగ్గు రితి ఇండున్ నాయ్, గని జోచి ఆగ్గుచి కంట వెల్లో కెరనుక ఉచర్లి రితి జతస్సు.

12* మోసా పూర్ణుమ్చోచి అత్తి ఆగ్గుల్ దెతోసా తీర్పు కెర్తోసా ఎక్కిలోయి. అన్నె కోయి నాయ్. రచ్చించుప కెరుక నానెనుమ్ కెరుక అదికారుమ్ తిలోసా. ఎక్కిలోక అన్నెక్లో తీర్పు కెరుక తూమ్ కొన్న!

అమ్చి బత్తు దేముడుచి అత్తి అస్సె

13 అల్లె, “ఆజి గే కలిక గే పలాన్ పట్టుమ్తె గెచ్చ వెర్నెక్క రోజాక బియ్యార్ కెర కెర లామమ్ కెరనుమ్దె” మెన జవున్ తుమ్ దయిరిమ్ ఉచర్తన జాగర్ల ఉచర.

14 కలిక కిచ్చొ జగ్గు జయెదె గే నేస్సు. తుమ్చి బత్తు కీసిచి? తుమ్ కిసి జస్సె మెలె, గాందుచి రితి జా, కెయ్ గే డీన, గడియయ్ తా, అన్నె డీనున్ నాయ్.

15 నాయ్, సొంత సెక్కిక దస్సి దయిరిమ్ నే జతె, తుమ్ కిచ్చొ ఉచరుక చెంగిల్ మెలె, “ప్రబు సెలవ్ దిలె జిమ్దె, చి ఈంజ జా కామ్ కెరుమ్దె” మెన.

16 అప్పె తుమ్ కీసి జతసు మెలె, తుమ్చి సొంత సెక్కిక సంజా, దయిరిమ్ గవురుమ్ ఉచరంతసు. దస్సి సొంత సెక్కిక దయిరిమ్ గవురుమ్ ఉచరంతిసి తప్పు.

17 జలి, కిచ్చొ కెర్లె కీసి ఇండిల చెంగిల్ గే కో జాన జానయ్ దస్సి నే కెర్లె నే ఇండిల, జో మాన్యుక జా తప్పు పాపుమ్ జతయ్.

* 4:5-4:5 నిర్ణయం: 20:5-6. † 4:6 4:6 సామెతల్ 3:34. ‡ 4:10 4:10 పేతురు రెగిడ్డి ఏక్ నంబర్ ఉత్తమ్ 5:5-10.

§ 4:11 4:11 ముక్కిమ్ జలి ఆగ్గు జలి, ఎత్తి అదికారుమ్ తిలో దేముడుక చి అస్సె మాన్యులక ప్రేమయ్ కెర్తెసి. మత్తయి 22:37-40, మార్కు 12:30, 31, 33 చి లూకా 10:27. యాకోబు 2:8 కి దెక. * 4:12 4:12 తెలుగు బైబిల్తె ధర్మశాస్త్రమ్ మెలె, మోసాచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాన్ వున్నకుమ్తె రెగ్గయ్ జా అస్సె. ఈంజ దెకపుక మెన కుమియ్ జాంతె నొయ ప్రమానుమ్తె మోసా పూర్ణుమ్చోచి అత్తి రెగిడ్డి దేముడుచ ఆగ్గుల్ మెన రగ్గప అస్సె.

5

మాన్యుల్ క మోసిమ్ కెర్లిన్ చి రిసా తీర్పు

- 1 అలై, తుమ్ సామ్మార్లు కో జలెకు, పాసి జెత తుమ్ క లాయిత కన్వల్ చి రిసా తుమ్ ఏడుక దెర.
- 2 తుమ్ చి సామ్మార్లుమ్ కువ గెచ్చ అస్సె, తుమ్ చి పాలల్ క నుస్సి కా గెల అస్సె,
- 3 తుమ్ చి బజార్ సామన్, వెండి సామన్ క చెద్ద కా గెల అస్సె. తుమ్ కి పాడ్ జతిన్ క ఈంజ సామన్ ఎత్తి కువెలిసి చెద్ద కా గెలిసి రుజ్జు జయెదె. కిచ్చో రుజ్జు మెలె, ఈంజ నానుమ్ ఆగి డడ్డిల్ రితి తుమ్ చి ఆగెన్ కి కా గెలెదె. దస్సి, ఆకర్ దీనల్ చి రిసా ఈంజ సిచ్చ నంపాదన కెరన అస్సెన్. ఆకర్ క దస్సి సిచ్చ జస్సె.
- 4 ఆదె, తుమ్ చి బుయి చి పంటో లాయిల కూలి మాన్యుల్ చి కూలి డబ్బుల్ తుమ్ మోసిమ్ కెర తియన్ దు. జా కూలి డబ్బుల్ కేక్ గల తుమ్ క నింద సంగితయ్. జా పంటో లాయిలన చి ఏడుక ఎత్తిక ఏలువ కెర్టో పరలోకుమ్ చో ప్రబు నూన అస్సె.
- 5 ఈంజయ్ లోకుమ్ తె సుక్కుమ్ తెన్ తుమ్ చి పెట్టి ఇస్టుమ్ అయ్ లి రితి జియ్ అస్సెన్. 'కండుక' మెన తుమ్ బెయిలల్ గెరెల్ గట్టక కీసి బలుమ్ కెర్లసు గే, దస్సి, మొర్తి సిచ్చ కతి రిసా తుమ్ క తుమ్ బలుమ్ కెరన అస్సెన్!
- 6 పాపుమ్, సత్తిమ్ చ మాన్యుల్ క నిందల్ కెర మార అస్సెన్. తుమ్ క జేవ్ జబాబ్ నే దెతె తుక్లె అస్సి.

యేసు అన్నె జెతె ఎదక నిదానుమ్ తెన్ రకుక

- 7 జలె, బాపుడ్లు, ప్రబు అన్నె జెతె ఎదక తుమ్ నిదానుమ్ తా రక. ఈందె, రయ్ తు బి గల తిలె, తోలి పాసి ఆకర్ పాసి పెట పంటో పికిత్ ఎదక, ఈంజ లోకుమ్ చి జా విలువ చి పంటో లాయితి నమయమ్ జెతె ఎదక బమ్మె సంతె, జో రయ్ తు రకెదె.
- 8 తుమ్ కి దస్సి నిదానుమ్ తెన్ రక. నిజమి, తుమ్ చి ఆత్మతె డిట్టుమ్ జా. కిచ్చో మెలె, ప్రబు అన్నె జెతికయ్ నమయమ్ పాసి జా అస్సె.
- 9 ఎక్కిలో చి రిసా అన్నెక్లో నిందల్ ఉచర నాయ్, చి ప్రబు తుమ్ కయ్ నిందల్ కెరుక తయె నాయ్. ఓదె, ఈంజ లోకుమ్ చి గుమ్ముమ్ ఒత్తల్ తో మెలి రితి తీర్పు కెర్టోసా జతె జో ప్రబు టీవ, మాన్యుల్ క పరిచ్చ కెర తీర్పు కెరుక మెనయ్ రకితయ్.
- 10 బాపుడ్లు, బాదల్ ఓర్పువ జతిన్ చి నిదానుమ్ చి రిసా తుమ్ క రుజ్జు తంక మెలె, దేముడు ప్రబు చి నావ్ తెన్ జోచ కబుర్లు నూనయ్ ల పూర్లుల్ చి రిసా తుమ్ ఉచర. జోవయిం చి నిదానుమ్ దెక, తుమ్ కి దస్సి నిదానుమ్ జా.
- 11 ఈందె, జోవయింతె కో నిదానుమ్ తా గెల గే, 'జోవయింకయ్ చెంగిలి' మెన సంగితసుమ్. *యోబు పూర్లుమ్ చో ఒగ్గర్ ఒగ్గర్ అల్లర్ సిడ్డె కి, జో నిదానుమ్ తా గెలిన్ చి రిసా నూన అస్సెన్. జో యోబు నిదానుమ్ తతికయ్, దేముడు జర్లు కెర్లిసి, కన్కారుమ్ దెకిలిసి, రచ్చించువ కెర్లిన్ చి రిసా నూన అస్సెన్, గెద. దస్సి, తుమ్ కి దేముడు చి దయ దెక అస్సెన్.

ఒట్టు నే గలనుక

- 12 ముక్కిమ్ క, బావో, పరలోకుమ్ చి సాచి జవున్, బుయి చి సాచి జవున్, కిచ్చో చి సాచి జలెకి ఒట్టు గలన నాయ్. 'నాయ్' మెనుక జలె, 'నాయ్' మెన. 'ఎం ఎం' మెనుక జలె, 'ఎం ఎం' మెన. దస్సి, ఒట్టు నే గలంతె రితి సత్తిమి సంగ.
- 13 తుమ్ తె కో కిచ్చో జవున్ అల్లర్ సేడ అస్సె జలె, ప్రార్లన కెర్లు. తుమ్ చి తె కక్క. సర్ల అస్సె గే, ప్రబు చి గవురుమ్ గాయును.
- 14 తుమ్ చి తె కక్క. జోర్టో గే జబ్బు గే అస్సె జలె, ప్రబు క నంబలన చి సంగుమ్ చ వెల్లెల మాన్యుల్ క బుకార్లు, చి జేవ్, ప్రబు చి నావ్ తెన్, జా బాద తిలోసాచి తేల్ నువ, జోచి రిసా ప్రార్లన కెర్లు.

* 5:11 5:11 యోబు పుస్తకుమ్ దెక.

15 ప్రబుచి ఉప్పిర్చి నముకుమ్ తిలి ప్రార్థన, జా బాద తిలోసాక రచ్చించుప కెరెదె, చి ప్రబు జోక చెంగిల్ కెరెదె. అన్నె, జో బాద నేడ్డిసి కిచ్చొ జవున్ జో కెర్లి పాపుమ్చి రిసాచి జలె, జా పాపుమ్ కి జోక చెమించుప జయెదె.

16 జాకయ్, తుమ్ కెర్ల పాపల్ ఎక్కిలోచి మొక్కె అన్నెక్కో బవున్, ఎక్కిలోచి రిసా అన్నెక్కో ప్రార్థన కెర, తుమ్చ బాదల్ ప్రబు చెంగిల్ కెర్లి రితి, తుమ్క జో చెంగిల్ దెతి రితి. ప్రబుక సత్తిమ్ నిదానుమ్ తిలో మాన్సు ప్రార్థన కెర్లె, జా ప్రార్థన జలె కామ్ కెర్తయ్.

17 † ఏలీయా పూర్ణుమ్చో జలె, అమ్చో రితో మాములుమ్ మాన్సు, చి “పాని పెటున్ నాయ్” మెన జా సుట్టు ఎక్కి మెన్సు తేన్ ప్రార్థన కెర్లికయ్, తిన్ని వెర్చుల్ సొప్పు జోన్నొ పూర్తి జా దేసిమి పాని పెటె నాయ్.

18 తెదోడి అన్నె ప్రార్థన కెర్లన్, చి ఆగానుమ్ తెంతో పాని పెట్టి, చి ఈజ బూలోకుమ్తె పలితుమ్ అన్నె దెర్లి.

19 బావుడ్లు, సత్తిమ్ ముల కో జలెకు పాపుమ్త ఉట్ట గెచ్చ తయెదె జలె, జోక కో సత్తిమ్ వాట్ అన్నె దెకవ ఆనుల గే,

20 జో కిచ్చొ జానున్ మెలె, జో పాపుమ్ కెర్లొసా పాపుమ్ వాటు అన్నె నే గెతి రితి జోక కో సత్తిమ్తె అన్నె కడ ఆనుల గే, మొర్చుతె జో మాన్సు నే గెతి రితి జోక రచ్చించుప కెర తమ్దె, చి జోచ బగ్గర్ పాపల్ చెమించుప జతి రితి అవ్కానుమ్ దొర్చు కెర తయెదె.

† 5:17 5:17 లానల్ మొదోల్ పుస్తకుమ్ 17:1, 18:41-45.

పేతురు రెగిడ్డి మొదొల్చి ఉత్త్రమ్ బారిక్ జలో పేతురు రెగిడ్డి మొదొల్చి ఉత్త్రమ్

1 యేసుక్రీస్తు బారికి జలో పేతురు, పొంతు, గలతీయ, కచ్చుదొకియ, ఆసియా చి బితునియ ప్రదేసిమ్లుతె సొంత టాన్ నెంజల వేర వేరతెచ తిల నంపజలన్క, రెగిడ్డి ఉత్త్రమ్.

2 యేసుక్రీస్తుచి ఇన్స్టమ్ రితి తుమ్ ఇండుక మెన, జోచి నుచి జలి లోయిక తుమ్చి పాపుమ్ వుంచి జంక మెన, అబ్బొని జలో దేముడు * అగ్గె తెంతో ఉచర తుమ్క నిసాన అస్సె, చి దస్సి జతి సెక్తి తుమ్క తంక మెన, తుమ్ జోచయ్ మాన్సుల్ జంక మెన, తుమ్క దేముడుచి నుద్ది తిలి ఆత్మ సుద్ది కెర అస్సె. జలె, ప్రబుచి దయ, జోచి సేంతుమ్ తుమ్క కొత్తు నెంజితె తప్పన్.

దేముడు దిలి రచ్చనచి రిసాచి దయిరిమ్

3 అమ్చొ ప్రబు జలో యేసుక్రీస్తుచొ దేముడు అబ్బొన్క జోబర! జోచి ఎదివాట్ దయక, అమ్క నొవర్ జెర్తవ అస్సె. యేసుక్రీస్తు మొర్ను తెంతో అస్సె జీవ్ జా ఉట్టిన్చి రిసా ఆమ్ కి అస్సె జీవ్ జా ఉట్టు పరలోకుమ్తె గెచ్చుమ్దే మెన

4 జిమ్మ తెన్ బెద తిలి ఆనతె అమ్క నొచి జెర్తున్చి రిసా, నే గార్ జతి, కల్లి నెంజిలిసి పరలోకుమ్తె తుమ్క దేముడు దిలి వాట్ తుమ్క రకితయ్.

5 ఆకర్ దీసల్క పూర్తి డీసుక తెయార్ తిలి రచ్చన తుమ్క నే పిట్టుక మెన, దేముడు ప్రబు జోచి సెక్తిక తుమ్చి నముకుమ్ వాట్ తుమ్క తోడ్ అస్సె.

6 ఆకర్ దీసల్చి రచ్చనచి రిసా తుమ్ సర్ల తెన్ జతను. గని రకుమ్ రకుమ్చ కష్టుమ్ తెన్ అప్పె ఇదిల్ కాలుమ్క తుమ్క దుకుమ్ జయెది.

7 జేవ్ అర్ల సెక్టిన్కె కిచ్చొ లాబుమ్ మెలె, తుమ్చి నముకుమ్క సత్తిమ్చి గే నెంజె గి తుమ్ జేవ్ అర్ల సెక్టిన్కె డీసెద. బజర్క 'సత్తిమ్చి గే నెంజె గే' మెన రుజ్జు తంక మెలె, జేవ్క అగితె పరిచ్చ కెరుల. బజార్ జలె, విలువ బలెకి పాడ్ జతి వస్సువ. జలె, తుమ్చి నముకుమ్ బజర్చి కంట్ ఒగ్గర్ విలువ, చి జా పరిచ్చ జలె, జిన్జె, యేసుక్రీస్తుచి పరలోకుమ్చి ఉజిడి గవురుమ్ పూర్తి డీస్తి ఆకర్ దీస్క జా తుమ్చి నముకుమ్క 'సత్తిమ్చి' మెన, జోచి పరలోకుమ్చి ఉజిడితె గవురుమ్తె తుమ్క జో వాట్ దెయెది.

8 జోక తుమ్ సొంత అంకివొ తెన్ నే దెకిలెకి, జోక ప్రేమయ్ అస్సెన్. జోక అప్పె దెకుక నెంజిలె కి, జోక నంపజా అస్సెన్, చి మాన్సు అర్దుమ్ కెరుక నెత్తి పరలోకుమ్చి ఎదివాట్ సర్లంతోసుమ్ తుమ్చి పెట్టి బెరయ్ అస్సె.

9 తుమ్చి జా నముకుమ్చి రిసా, తుమ్చ ప్రానుమ్క రచ్చన తుమ్క దొర్కు జా అస్సె.

10 తుమ్క దొర్కు జతి ఈంజ రచ్చనచి రిసాచ దేముడుచ కబుర్లు పూర్లుమ్ సంగిలన, ఈంజయి రచ్చనచి రిసా ఒగ్గర్ పుసితె తిల.

11 కిచ్చొ పుసెల మెలె, "అమ్చి పెట్టి క్రీస్తుచి ఆత్మ సంగిల జో సేడుక తిల బాదల్ జో పడ్డొక గవురుమ్ జంక తిలిసి కేన్ సమయుమ్క జర్లు జంక, కీసి సమయుమ్క జర్లు జంక అస్సె?" మెన పుసెల.

12 దేముడు జోవయింక దెకయ్లన్. కిచ్చొ దెకయ్లన్ మెలె, జేవ్ జా కబుర్ సంగితి సేవ కెర్తె జోవయించి రిసా నాయ్, గని తుమ్చి రిసాయి మెన దేముడు జోక దెకయ్లన్†. జా నుబుమ్ కబుర్ తుమ్ రచ్చించువ జతిన్చి రిసా, పరలోకుమ్ తెంతో తెద్రయ్లి దేముడుచి నుద్ది తిలి ఆత్మచి తెడి, తుమ్క నుబుమ్ కబుర్ బోదన్ కెర్ల మాన్సుల్చి అత్తి జానయ్తెయ్. జా నుబుమ్ కబుర్తె తిలిసి ఎత్తి పూర్తి అర్దుమ్ కెరనుక పరలోకుమ్చ దూతల్ కి ఒగ్గర్ ఆన తెన్ అస్సె.

* 1:2 1:2 రోమయిల్ 8:29-30, ఎవెను 1:5, 11-12 చి తీతు 1:1 డెక. † 1:12 1:12 మెలె, జేవ్ పూర్తుచి కాలుమ్ నాయ్, గని పడ్డొ అయ్లెన కాలుమ్ యేసు బార్ జంక తిలి, చి ఎత్తి యూదుల్ నాయ్, గని యూదుల్ నెంజలన్ కి యేసుచి తెడిచి రచ్చన నజనుక ఈంజయి కాలుమ్ అవ్కానుమ్ దొర్కు జలి. రోమయిల్ 11:11, 25, గలతియిల్ 3:8, 9, 14, ఎవెను 3:6, చి పేతురు రెగిడ్డి ఏక్ నంబర్ ఉత్త్రమ్ 1:20 డెక.

దేముడుచి సుద్ధిచి రితి ఇండ

13 జలె, ప్రబు జలొ యేనుతెచి రచ్చన తుమ్కయ్ దొర్కు జలి రిసొ, తుమ్చ మెన్సు తుమ్ డిట్టుమ్ కెరన, నే మచ్చిల్ రితి, ముద్దొ కెరన, తెలివి తా, జో అన్యె ఉత్ర జా జోచి పరలోకుమ్చి ఉజడి గవురుమ్ పూర్తి డిస్తి ఆకర్ దీసిచి రిసొ ఆన తా, తుమ్క దెతి దయచి రిసొ ఉచర, జా రచ్చన కచితుమ్ దొర్కు జతి రితి పూర్తి దయిరిమ్ జా, జయ్యి నముకుమ్ పూర్తి డిట్టుమ్ దెరన.

14 జో ప్రబుచి ఇస్టుమ్ నిదానుమ్ కెర్త బోదల్ జా, తుమ్ అగ్గే నేన్లి పొదిచ తిల ఆగ్చి గార్ ఆనల్ రితి తుమ్ ఇండ నాయ్.

15 తుమ్క నిసాన బుకార్లొసొ కీసి పూర్తి సుద్ధి అన్యె గే, తూమ్ కి కిచ్చొ కామ్తె కి కెయ్క తెయ్క దస్సి సుద్ధి తెన్ ఇండ.

16 దేముడుచి కొడొతె,

‡“అవ్ కీసి సుద్ధి అస్సి గే, తూమ్ కి ఇసి సుద్ధి తంకయ్” మెన రెగిడ్లన్.

17 కక్కయ్ మొకమాటుమ్ నే దెకితో, ఎత్తి మాన్సుక జేవ్ కెర్ల కమొ కొల్లి తీర్పు కెర ‘చెంగిల్’ గే ‘గార్’ గే సంగిలోసొక ‘అబ్బి’ మెన ఉంక్రయ్తసు జలె, ఈంజ తుమ్చి సీసొంత టాన్ నెంజిలిన్తె తుమ్ గడియ జతె పొది జోవయింబి మరియాద దెకయ్తి రితి జాగర్త తెన్ నిదానుమ్ ఇండ.

18 తుమ్చ పూర్తుల్ దిలి అగ్గె కామ్క నెంజిలి ఇండుక తెంతో, తుమ్ విడ్డల్ జంక మెనయ్ దేముడు ప్రబు తుమ్క నెతోవన్లొ మెన జాన్సు. కీసి నెతోవన్లొ మెలె, వెండి గే బజర్ గే దన పాడ్ జత పస్సవల్ దా గెన నాయ్,

19 గని కిచ్చొ గార్ నెంజిలి కిచ్చొ మచ్చల్ సర్తల్ నెంజిలి గొరెక బలి దిలి రితి జోచొ పుత్తున్ జలొ క్రీస్తుచి లొయి *సుచ దిలన్.

20 ఈంజ లోకుమ్ జెర్మిన్ నే జతె అగ్గె తెంతో దేముడు అబ్బొసి “క్రీస్తు రచ్చించువ కెర్తొసొక తెద్రయిందె” మెన నిసొల్ల తిలన్, గని కెయ్ క్రీస్తు బార్ జలన్ మెలె, తుమ్చి రిసొయ్ ‘రచ్చించువ జతు’ మెనయ్ ఈంజ ఆకర్ సమయ్యుమ్తెయ్ బార్ జలన్.

21 క్రీస్తుచి రచ్చన సజన తా జోచి తెడి దేముడుచి ఉప్పిరి తుమ్చి నముకుమ్ తియ్ అస్సున్. “జో రచ్చించువ కెరెదె” మెన, జోచి ఉప్పిరి దయిరిమ్ జా అస్సున్. మెలె, క్రీస్తుక జో మొర్కు తెంతో జయడ గవురుమ్ కెర్తొచి రిసొ, తుమ్చి నముకుమ్ తుమ్చి దయిరిమ్ దేముడుచి ఉప్పిరి అస్సు.

22 జలె, దేముడుచి సత్తిమ్ కోడు దెరన జా కోడ్ రితి ఇండుక బచ్చన తుమ్చి ఆత్మక సుద్ధి కెరన అస్సున్, చి దస్సి జా తిలె, కిచ్చొ మాయ నెంతె తుమ్ ఏక్ బావొక అన్వెక్లొ ప్రేమ కెరుక జయెదె. జాకయ్, తుమ్చి పెట్టి పూర్తి నిదానుమ్ ఎక్కిలోక ఎక్కిలో ప్రేమయ్ కెర.

23 తుమ్ నొవర్ జెర్మ అస్సున్. జా నొవర్ జెర్మన్ జలిసి నానెనుమ్ జతి బి గలిలిసి నెంజె, గని జీవ్ తిలి, కెయ్క కి తా గెతి దేముడుచి కోడు తెన్ ఈంజ జెర్మన్ తుమ్ జెర్మన్ జలదు.

24 దేముడుచి కోడుతె జో రెగ్గవ తిలి రితి,

†“ఈంజ లోకుమ్చ మాన్సుల్ ఎత్తి చివ్వరిచి రితి జతతి, జోవయింబి గవురుమ్ చివ్వరిచ పుల్లొచి రితి జతయ్.

జా చివ్వర్ వాడువ జతయ్, జేవ్చ పుల్లొ సుకా గెచ్చ గెన్ గెతతి.

25 దేముడుచి కోడు, మాత్తుమ్,

‡ 1:16 1:16 లేవీయకాండమ్ 11:44-45, 19:2, 20:7. § 1:17 1:17 జేవ్ నంపజలన వేర వేరతె నంపజలన నెంజిలనతె జతె తిల, పట్టొ సొంత టాన్ నెంజిలిన్ మెలన్క అన్యె కిచ్చొ అభ్యుమ్ తయెదె మెలె, పరలోకుమ్ నంపజలనచి సొంత టాన్ జయెదె, చి రిసొ బూలోకుమ్క ‘అవ్చి సొంత టాన్ నెంజె’ మెనక జయెదె. కొందిల్క పవులు రెగిడ్లొ దొన్సు నంబర్ ఉత్తమ్ 5:1-2, వీలిప్పియల్ 3:20, ఎట్రియల్ 11:9, 10, 13. * 1:19 1:19 యోహాను 19:17-37, ముక్కిమ్క 34, 37. లూకా 22:44, మత్తయ్ 26:28, లూకా 22:30, యోహాను 6:53-56. † 1:24 1:24 యెనయా 40:6-8.

కెయింక తెయింక తా గెచ్చెదె”

జలె, జీవ్ దెతి తా గెతి జోవయించి కోడు కిచ్చొ మెలె, తుమ్క బోదన కెర్లి నుబుమ్ కబుర్.

2

1 జాకయ్, దేముడు చెంగిల్ నుదొ మెన తుమ్ చక దెక తిలె, కున్సిదుమ్ ఎత్తి, మోసిమ్బుద్ది ఎత్తి, మాయబుద్ది ఎత్తి, గోస జుజిసి ఎత్తి, దూసుప కెర్లిసి, గోస లట్టుబ్బిసి ఎత్తి. తుమ్తె తెంతో వెంట గెల.

2 తుమ్చి రచ్చనతె వడ్డితి రిసా, నోవర్ జెర్లిల బోదల్ రిత జా, కిప్పొ వేరచి నే బెదిలి నత్తిమ్ తిలి దేముడుచి కోడు జలి ఆత్మయి దూదుక తుమ్ ఆన జా తంక.

3 జాకయ్, జా దయచి రచ్చనతె తుమ్ డిట్టుమ్ జా తా.

4 మాన్సల్ నెసిలో గని దేముడుచి మొక్కె గవురుమ్ తిలో విలువ జలో జీవ్ తిలో, జీవ్ దెతో* పత్తె తుమ్ జా.

5 జోతె అయ్లె, తామ్ కి జీవ్ తిల పత్తల్ రిత జా, ప్రబుచి ఆత్మతె గేర్ బెద బందితి రితి నుద్ది తిల పూజర్లు జా, దేముడుచి నేవతె బెద, జో యేసుక్రీస్తుచి తెడివ దేముడు మెన్సితె ఆత్మ బలుల్ దెతన జస్సె.

6 దేముడుచి కొడతె

† “ఈంధె, సీయోసు డొంగ్రుతె, ఏక్ పత్తుర్క టీవడ్డసి.

అంచి గేరుక బోడిపత్తుర్ జో జా, ఎత్తిక ఆదారుమ్ జయెదె.

జో ఆవ్ నిసాన్లొ గవురుమ్ కెర్లొ, అంక ఒగ్గర్ విలువ జలోసా జయెదె.

జోవయింక కో నంపజవుల గే,
కచితుమ్ జేవ్ అంచి మొక్కె లాజ్ జంక నాయ్”

మెన రెగ్గె అస్సె.

7 జాకయ్, తుమ్ నంపజలసక జో విలువ జతయ్. గని నంపనెంజలసక జో కీసి జతయ్ మెలె, దేముడుచి అన్సెక్ కోడుతె అస్సె. కేన్ కోడు మెలె,

‡ “కామ్క నెంజె” మెన కీబందిలన
జో ఏక్ పత్తురు పిట్టవుక మెన ఉచర్లె కి,

జోయ్యి పత్తురు బోడిపత్తుర్ జయె అస్సె”

మెన రెగ్గెడిసి.

8 అన్సెక్ కి,

* “నంప నెంజలన పిసిర్లొ పత్తురు జో జయెదె,

జోవయింక సేడయ్తో సాప్త జో జయెదె”

మెన రెగ్గెడిసి. ఈంజు కోడు కీసి నెరవెర్పువ జతయ్ మెలె, ‘జర్లు జయెదె’ మెన అగ్గె తెంతో దేముడు నంగిలి రితి, జోవయించి కోడు నే నూన్లి రిసా జేవ్ నే కెర్లి రిసా వాల్ పిట్టవనతతి. జయె జోవయించి తీర్పు.

9 గని తుమ్క, దేముడు కీసి దెకితయ్ మెలె, ‘ఆవ్ నిసాన్లి సెకుమ్చ’ మెన, ‘అంచి రాజిమ్చ † పూజర్లు’ మెన, ‘అంచి నుద్ది తిల జాతి’ మెన, ‘అంచ సొంత ప్రెజల్’ మెనయ్ జో దెకితయ్. అందర్ తెంతో తుమ్క బుకారా కెర, జోచి పరలోకుమ్చి ఉజెడతె గవురుమ్తె బెదయ్లో యేసు ప్రబుచ ఒగ్గర్ వెల్లొ కమెచి రిసా తుమ్ సాచి నూనవుక మెనయ్ తుమ్క దస్సి నిసాన అస్సె.

10 అగ్గె తుమ్ ‘దేముడుచ మూన్సల్ ఆము’ మెననుక నెతిర్లదు, గని అప్పె దేముడుచ ప్రెజల్ జా అస్సెన్. అగ్గెయి తుమ్క కన్యారుమ్ దొర్కు జయె నాయ్, గని అప్పె దేముడు తుమ్క కన్యారుమ్ దెక రచ్చించువ కెర అస్సె.

* 2:4 2:4 యేసుక్రీస్తుచి రిసా నంగితయ్. లూకా 20:17-18, మత్తయి 21:42-44, మార్కు 12:10, రోమీయల్ 9:32-33. † 2:6

2:6 యోనయా 28:16. ‡ 2:7 2:7 క్రీస్తల 118:22. § 2:7 2:7 ‘దేముడుచి గుడి బందిలన’ మెలె, జోవయింక నంప నే కెర్లె యూదుల్చ వెల్లెల మూన్సల్. ఎత్తి అదికారుమ్ తిలో దేముడుక బక్తి కెర్లె యూదుల్చ కనుడన, జేవ్, గని యేసుక ‘జోయ్యి ఎత్తి అదికారుమ్ తిలో’ దేముడు తెర్లయ్లో క్రీస్తు రచ్చించువ కెర్లొసా’ మెన ఒప్పనుక నెసిల, మార్కు. మత్తయి 21:42-46 దెక. * 2:8 2:8 యోనయా 8:14.

† 2:9 2:9 డీనయ్లిసి 1:6 దెక.

11 ప్రేమ తిల బాపుడ్లు, తుమ్మక ఆవ్ కిచ్చొ బతిమాల్పా జా సంగితసి మెలె, తుమ్ గడియ తుమ్చి సొంత టాన్ నెంజిలిన్తె అన్నస. జలె, ఈంజ తుమ్చి సొంత టాన్ నెంజిలిన్తె తుమ్ జెతె తా, తుమ్చి ఆత్మచి ఉప్పిరి యుద్దుమ్ కెర్త ఈంజ లోకుమ్చి ఆగచ ఆసల్ జర్గు నే కెర్తె రితి, తుమ్ ముద్దొ కెరస.

12 దేముడుక నేన్ల యూదుల్ నెంజల ఒత్తచ మాన్సుల్తె తా తుమ్ చెంగిల్ బుద్దొ తెన్ ఇండ, చి జోవయింతె ఏక వేల కో గే తుమ్క 'తప్పల్ కెర్తస' మెన దూసువ కెర్తె, తుమ్ సత్తిమ్ ఇండితిన్చి రుజ్జు జేవ్ దెకిలె, ప్రబు తీర్పు కెరుక జెతి దీసిక తుమ్చి రిసా దేముడుక గప్పురుమ్ కెరుల.

అధికారులక మరయ్యాద దెకుత్

13 ప్రబుచి మరయ్యాద టీవడ్డి రిసా, ఈంజ లోకుమ్చొ ఎత్తి అధికారిక తుమ్ మరయ్యాద దెక. దేసిమ్క వెల్దొ జా ఏలువ కెర్తొసాక కి,

14 'నేరిమ్ కెర్తసక సిచ్చ కెర్త' మెన జవున్ 'చెంగిల్ కెర్త మాన్సుల్క బవుమానుమ్ దెతు' మెన జవున్ దేసిమ్క ఏలువ కెర్తొసా తెద్రయల అధికారులక కి తుమ్ మరయ్యాద దెక.

15 కిచ్చొక మెలె, తుమ్ సత్తిమ్ ఇండితిన్ తెన్, నేన్ల మాన్సుల్చి వెరిక, తప్ప మెన తుమ్ రుజ్జు దెకవ ముద్దొ కెరుక దేముడుచి ఇస్తుమ్.

16 ఆగ్గుల్క గొతిమాన్సుల్ జల రిత తుమ్ జియ నాయ్. దసచ నెంజున్. గని 'ఆగ్గుల్చ గొతిమాన్సుల్ నెంజుమ్, చి ఇస్తుమ్ అయిల్ రితి జింక జయదె' మెన తుమ్ ఉచర నాయ్, దస్సి పాపుమ్తె గచ్చ నాయ్. గని, దేముడుచ కామ్ కెర్తస, జోవయ్ గొతిమాన్సుల్ రిత జా, జోచి ఇస్తుమ్ రితి తుమ్ ఇండ.

17 ఎత్తిజిన్ మాన్సుల్క తుమ్ మరయ్యాద దెక. బాపుడ్లు జల నంవజలన్క ప్రేమ దెక. దేముడుక తుమ్ బియ. దేసిమ్క వెల్దొ రానొక గప్పురుమ్ కెర.

18 గొతిమాన్సుల్ కి జలెకి, తుమ్చ వజొమాన్సుక మరయ్యాద దెక. *మెత్తన తా కన్యారుమ్ దెకిత ఎజొమాన్సు జేవ్ జలెకి, కన్యారుమ్ నేన్లన జేవ్ జలెకి జేవ్ సంగిలి కోడు కెర.

19 కిచ్చొక మెలె, తప్ప నే కెర్తె కి, కచి గే అత్తి తుమ్చితె కో అర్గ సేడ దేముడుచి గప్పురుమ్ టీవడ్డి రితి ఓర్పువ జలె, జో దేముడు జో మాన్సుక 'చెంగిలోసా చొ' మెనెదె.

20 తుమ్ తప్ప కెర్తె రిసా దెబ్బల్ కయలె పొది సెంతుమ్ తెన్ ఓర్పువ జలె, కిచ్చొ పున్నిమ్ నాయ్! గని, తుమ్ సత్తిమ్ కెర్తె కి సిచ్చ సేడ్డె సెంతుమ్ తెన్ ఓర్పువ జలె, దేముడు తుమ్క 'చెంగిలచ' మెన్తయ్.

21 దస్సి సెంతుమ్ తెన్ తుమ్ తంక మెనయ్ దేముడు తుమ్క బుకారయ్ అస్సె. కిచ్చొక మెలె, తుమ్చి పాపుమ్ గెస్సు మెనయ్ క్రిస్టు బాదల్ ఓర్పువ జా, తూమ్ కి జోవ అజ్జుల్తె ఇండుక మెలి కోడు తుమ్క జో వాట్ దెకవ అస్సె.

22 జో, జలె, కెయ్య కిచ్చొయ్ పాపుమ్ కెరె నాయ్. కిచ్చొయ్ మోసిమ్ కోడు లట్టబె నాయ్.

23 మాన్సుల్ జోక దూసువ కెర్తె, జోవయంక జో దూసువ నే కెర్తె తుక్లె తిల్. జోక జేవ్ అర్ల కెర్తె కి, జోవయంక జో బియడె నాయ్, గని సత్తిమ్ తీర్పు కెర్తె దేముడు అబ్బిన్చి అత్తి జోచి జివ్ జో సార్త కెర దిలన్.

24 జో యేసు సొంత అమ్ కెర్తె పాపల్ జోచి ఆగి వయన, సిలువతె మొర్లన్. పాపుమ్ ముల అమ్చి సొంత ఆత్మక మొర్ల రిత జా సత్తిమ్ ఇండితి రితి అమ్ జింక మెనయ్. జో యేసు కయల దెబ్బలు తుమ్క చెంగిల్ కెర అస్సె.

25 తుమ్ అగ్గెయి వాట్ పిట్టవన చెదుర్పు జల మెండల్చ రిత జా తిలదు, గని అప్పె తుమ్చ ఆత్మల్ రకితో చెంగిల్ గొప్పడుతె అన్నె బుల జా అస్సున్.

† 2:11 2:11 జేవ్ నంవజలన వేర వేరతె నంవజలన నెంజలనతె జెతె తిల, వడ్డొ 'సొంత టాన్ నెంజిలిన్' మెలిన్క అస్సె కిచ్చొ అర్దుమ్ తయెదె మెలె, వరలోకుమ్ నంవజలనచి సొంత టాన్ జయెదె, చి రిసా బాలోకుమ్క 'అమ్చి సొంత టాన్ నెంజె' మెనుక జయెదె. కొందిల్క వవులు రెగిడ్డి 2:నంబర్ ఉత్తమ్ 5:1-2, వీలిప్పయల్ 3:20, ఎత్తియల్ 11:9, 10, 13. § 2:16 2:16 గలతియల్ 5:1. * 2:18 2:18 ఎవెను 6:5-10, కొల్పోయల్ 3:22-4:1.

3

తేరబోదల్ బుద్ధి ఇండుక

1 తుమ్ తేరబోదల్ కి, దాక కెరన తుమ్చ మున్నురలచి అదికారుమ్క మరియాద దెక. తుమ్ దస్సి ఇండిలె, జోవయింతె నగమ్జిన్ అప్పెచి ఎదక ప్రబుచి కొడో రితి నే ఇండిలెకి, జోవయింత తుమ్ తేర్పివ్ ప్రబుచి కొడు నే సికడ్లెకి,

2 తుమ్చి నత్తిమ్చి ఇండుక, మరియాదచి ఇండుక, జేవ్ దెక దెక, ప్రబుక సంపజా, మార్పుప జవుల.

3 తుమ్ తేరబోదలు “*సూటి కెరనుమ్దె” మెలె, మాములుమ్ డిస్సిన్క ముక్కిమ్ నే ఉచరై, సెండి సూటి కెరంతిన జవున్, బజార గల్ల తియంతిన జవున్, చెంగిల చెంగిల పాలల్ బందంతిసి గలంతిసి జవున్ తుమ్ విలువ దెక నాయ్.

4 గని, తుమ్క కిచ్చి సూటి కెరపు మెలె, దేముడుచి మొక్కె ఒగ్గర్ విలువ జతి, కెయింక నాసెనుమ్ నే జతి పేట్చి తెడిచో మాన్పు ప్రబుచి మెత్తన బుద్ధి, సేంతుమ్ బుద్ధి జా తుమ్చి వెట్టి తవున్.

5 అగ్గవ పొదులె దేముడుచి ఉప్పిరి నముకుమ్ తిల తేరబోదల్ జోవయింతె సుద్ది తిలి ఆత్మచి సూటిక తెయార్ జా మున్నుర్పులచి అదికారుమ్క మరియాద దెకితె తిల.

6 పూర్ణుమ్చి సారా దస్సి మున్నున్ జలో అబ్రాహామ్క ‘ఎజోమాని’ మెన, జోచి అదికారుమ్క మరియాద దెకితె తిలి. జోచి కొడు సూన్తె తిలి. తుమ్ కి నత్తిమ్ ఇండిలె, తుమ్ కిచ్చొక కి బమ్మ జంక నాయ్, చి జా సారాచ బోదల్ రిత జస్సె.

మున్నుబోదల్ తేర్పివొక కిసి దెకుక

7 దస్సి, తుమ్ మున్నుబోదల్, తుమ్చ తేర్పివొక బమ్మ నే కెర్రి బుద్ధి తెన్ పోస. జోవయింతెన్ జియ తేరబోదక తొక్కి నెక్కి తయెదె మెన చిన, తుమ్తె ఎత్తి, మున్నుబోద తేర్పిక మరియాద్ దెక. జోవయింక జాకయ్ కిచ్చొక దొగుతెర ఇసి ప్రేమ దెకుక మెలె, తుమ్ ఎత్తి, దొగుతెరకయ్ దేముడు జోవయింక దయక జోవయింక రచ్చన వరుమ్చి వాట దా అస్సె. తుమ్ మున్నుబోదల్ తుమ్చ తేర్పివొక ఇసి ప్రేమ దెకిలె, అడ్డు నెంతె దేముడు తుమ్చ ప్రార్దనల్ నూనెదె. తుమ్చ ప్రార్దనల్క అడ్డు నే జతి రితి జోవయింక ఇసి ప్రేమ దెకుత్.

ఎక్కిలోక ఎక్కిలో ప్రేమ తెన్ తంక

8 జిలె, తుమ్ ఎత్తిజిన్ ఎక్కి ప్రేమయ్ తా, ఎక్కిలోక ఎక్కిలో కన్యారుమ్ దెక, సంపజలన ఎత్తిజిన్క బాబేన్ దెకితి ప్రేమ దెక, ముద్దు కెర, సొంత గవురుమ్ నే ఉచరంతె, ఎక్కి మెన్ను తెన్ తా.

9 ఎక్కిలోక అన్నెక్లొ అర్ల కెర తిలె, జో అర్ల సేడ్లొసా అర్ల కెర్లొసాక అన్నె అర్ల కెరుక పోసి. ఎక్కిలోక అన్నెక్లొ దూసుప కెర తిలి, దూసుప జలొసా, దూసుప కెర్లొసాక అన్నె దూసుప కెరుక పోసి. జో ఎక్కిలోక జో అన్నెక్లొ ‘చెంగిల్ తవున్’ మెన దెకున్. తుమ్క దేముడుచి దయ దొర్కు జవున్ మెనయ్ తుమ్ ఇసి ప్రేమయ్ ఇండుక మెనయ్, తుమ్క జో నిసాన అస్సె.

10 పూర్ణుమ్ దేముడుచి కొడోతె రెగ్గయ్లి రితి,

† “నర్ల తెన్ జింక చి చెంగిలి నమయుమ్ దెకుక మెన

కో జలెకు ఇస్టుమ్ జయెదె గే,

జోవయింక చోడి కిచ్చొ గర్చి నే లట్టబ్బి రితి,

జోవయింక ఒట్టొ కిచ్చొ మోసిమ్ నే లట్టబ్బి రితి దెకన్పు.

11 దసా మాన్పు పాపుమ్ దూరి కెరన నత్తిమ్ ఇండుసు,

సేంతుమ్ చజ సేంతుమ్ ఇండుసు.

12 కిచ్చొక మెలె, పున్నిమ్ ఇండితనక ప్రబు దెకెదె,

జోవయింక ప్రార్దనల్ జో నూనెదె,

గని పాపుమ్ ఇండితనక జో దెకె నాయ్, నూనె నాయ్.”

13 చెంగిల్ కమ్మె కెర ఇండితి అస రితి తుమ్ ఇండిలె తుమ్క కో అర్ల కెరుల? కోయి నాయ్!

* 3:3 3:3 ఎవెసు 6:5-10, కొలోస్సియల్ 3:22-4:1. † 3:10 3:10 క్విరనలు 34:12-16.

14 గని, సత్తిమ్ తుమ్ ఇండిలి రిసా ఏక్ వేల కో జలెకు అర్ధ కెర్లె, దేముడు తుమ్ 'చెంగిల్' మెనెదె. దన అర్ధ కెర్లెనక తుమ్ బియఁ నాయ్. జోవయించి రిసా బమ్మ నే జతె,

15 'పరలోకుమచొ ప్రబుయి జో' మెన, తుమ్చి పెట్టి నిదానుమ్ క్రీస్తుక దెతి గవరుమ్ దాన. జో ప్రబుచి రిసాచి తుమ్చి పెట్టిచి దయిరిమ్చి రిసా కో "జేవ్చి సత్తిమ్క తుమ్ రుజ్జు దెకవ" మెన కెయఁ జప్పన్ తుమ్క పుసిలె, సరి జతి జబాబ్ దెంక తెయార్ జా తా. గని, †జబాబ్ దెంక జలె, బడాయ్ నెంతె మరియాద తెన్ లట్టబా.

16 అన్నె, 'సత్తిమ్' మెన తుమ్చి పెట్టి జాన్తిసి జర్గు కెర్లి రితి తుమ్ ఇండ, చి క్రీస్తుచి తెడి తుమ్ సత్తిమ్ ఇండితినచి రిసా తుమ్క బియడ్డన దూసువ కెర్లె, జేవ్ కెర్లె నిందల్క 'అరిచ' మెన జేవ్ చినన, లాజ్ జప్పల.

17 తప్పి కెర్లి రిసా సిచ్చ జతి కంట, సత్తిమ్ కెర్లి రిసా సిచ్చ జంక చెంగిలి. తుమ్ సత్తిమ్ కెర్లి రిసా సిచ్చ జంక ఏక్ వేల దేముడుచి నెలవ తయెదె.

18 మెలె, క్రీస్తుక దెకిలె, క్రీస్తు కి దస్సి, జో పూర్తి సత్తిమ్ తిలె కి, పాపుమ్ జలొనక 'జోవయించి పాపుమ్ గెస్సు' మెన జో మొర్లిన్ తెన్ అమ్చి పాపుమ్ పూర్తి గెచ్చవయ్ గెలన్. జా కి ఎక్కి సుట్టు జో బలి జలిసి సరిపుచ్చువ జెయెదె. అమ్క దేముడు అబ్బొన్తె అన్నె కడ ఆన్తి రిసా మొర అమ్చి పాపుమ్ గెచ్చయలన్. ఈంజ లోకుమ్చి ఆగ్ గుమ్క జోక మార్ల, గని జోచి ఆత్మక దేముడు అబ్బొసి జోక అన్నె * జియడ్డన్.

19 జో మొర్లి పొది యేసు కేనే గెలన్ మెలె, బూలోకుమ్క ఎట్టో లోకుమ్తె జేలి జలె, ఆకర్ దీసిచి పరిచ్చక సిచ్చక రకిత అత్తల్ తిలిన్తె జోవయించి ఆత్మక జో ఉత్త గెచ్చ, దేముడు అబ్బొన్చి కోడు సాడువ కెర్లన్.

20 అగ్గెయ, పూర్గుమ్ పొది, † నోవహుచి కాలమ్తె "అంక నంపజా రచ్చించువ జత" మెన దేముడు సిచ్చ వాయిద కెర రకిలికె, జో నోవహు, జా ఓడ బందితె తిలి పొది జోచి కోడు సూసుక నెసిలనచ ఆత్మల్క సుబుమ్ కబుర్ కోడు సాడువ కెర్లన్. జలె, జా ఓడతె తోక్కిజిని, మెలె, ఎక్కి అట్టు జిన్ మాన్సుల్ పానితె రచ్చించువ జలె.

21 జా సమయమ్తె జేవ్ దస్సి పానితె రచ్చించువ జలిసి, జలె, బాప్తిసుమ్క టాలి జతయ్. మెలె, పానితె బాప్తిసుమ్ జతిసి తుమ్క రచ్చించువ కెర్లి గుర్తు జతయ్. కిసి మెలె, తుమ్చి ఆగెచి ముర్కి, దొవన్తిన్చి రిసా నాయ్, గని యేసుక్రీస్తు అన్నె జేవ్ జా ఉట్టి రిసా దేముడుచి మొక్క తుమ్చి పాపుమ్ గెలి గుర్తుయి బాప్తిసుమ్ దెకయ్తయ్. ప్రబుక నంపజలన జోవయించి బుద్ది మార్గువ జా ప్రబుకయ్ గవరుమ్ కెర్లి రితి ఇండుక ఇస్టుమ్ జలిన్చి గుర్తు బాప్తిసుమ్తెయి దెకయ్తతి.

22 జలె, జో క్రీస్తు జేవ్ జా ఉట్టు కెర పరలోకుమ్తె వెగ గెచ్చ, దేముడు అబ్బొన్చి ఉజెతో పక్క వెన తా, † దూతల్చి ఉప్పిరి, అదికారుల్చి ఉప్పిరి, సక్తుల్ ఎత్తిచి ఉప్పిరి ఏలువ కెర్లయ్.

4

ఆగ్క బాదల్ సేడ్లె బుద్ది చెంగిల్ జతిన్చి కోడు

1-2 క్రీస్తు, జలె, మాన్సుచి జోచి ఆగెతె బాదల్ సేడ్లెన్. జాకయ్, * 'అమ్ కి జోచి రితి బాదల్ సేడ ఓర్పువ జమ' మెన తుమ్ డిట్టుమ్ కెరన. కిచ్చొక మెలె, జో తెన్ మెలి రితి ఆగెక కో బాదల్ సేడ తయెదె గే, ఒత్త తెంతో ఈంజ అగి జతె ఎదిలి సేంపుక మాన్సువ ఆసల్ రితి నాయ్, గని దేముడుచి ఇస్టుమ్ కిసి అన్నె గే, దస్సి ఇండుక మెన, జో మాన్సు పాపుమ్ ముల అన్నె.

3 దేముడుక నేన్లనచి రితిచి తుమ్చి అగ్గెచి ఇండుక అగ్గెయ్చి మెన, తుమ్ దసితె అన్నె గెచ్చ నాయ్. దేముడుక నేన్లన జోవయించి ఆగ్చి ఆస ముద్దో నె కెరంతి రితి, ఆసల్ రితి, మచ్చితి రితి, 'సర్ల కెర్లసుమ్'

† 3:15 3:15 మత్తయి 10:19, మార్కు 13:11, లూకా 12:12. § 3:18 3:18 రోమియల్ 6:10, ఎబ్రియల్ 7:27, 9:12, 28 చి 10:10 దెక. * 3:18 3:18 లూకా 24:39 దెక. అత్త రగుమ్చి ఆగ్ తెన్ యేసు అన్నె జలెన్. కొరిదిల్క పవులు రెగిడ్లి ఏక్ నంబర్ ఉత్తమ్ 15:44, వెలిప్పియల్ 3:21. చి ఎబ్రియల్ 10:5 దెక. † 3:20 3:20 అదికాండుమ్ 6-9 అద్దయల్. ‡ 3:22 3:22 ఎపెసు 1:21, 6:12, కొలోస్సియల్ 1:16, 2:10, 15, చి తీతు 3:1 దెక. * 4:1-2 4:1-2 రోమియల్ 8:17, వెలిప్పియల్ 1:29-30, తిమోతిక పవులు రెగిడ్లి 2 నంబర్ ఉత్తమ్ 2:12.

మెన వెట్కారుమ్ జతి రితి, 'సర్ద కెర్తనుమ్' మెన నూర్లు పితి రితి, వెట్కారుమ్ జా బోమ్మల్క జొక్కర్తి రితి జితతి.

4 తుమ్ అప్పె జోవయింతెన్ దన బుద్ది నెంజల అలవాట్లతె బెదున్ నాయ్ చి రిసా జేవ్ ఆచారిమ్ జా తుమ్క దూసుప కెర్తతి.

5 గని ఆకర్క, మొర్లనక జీవ్ తిలనక తీర్పు కెరుక తెయార్ జలో ప్రబుచి మొక్కె జేవ్ జోవయించి పాపుమ్ బప్పున సిచ్చ జంక అన్సి.

6 దస్సికయ్, † మొర్లనక కి నుబుమ్ కబుర్ నూనయ్లో కిచ్చొక మెల, మాన్సుచి జోవయించి ఆగ్గెక మాన్సుల్ నేడ్డి జోవయించి పాపుమ్చి సిచ్చ జేవ్ జలెకి, దేముడు జోవయించి ఆత్మక కీసి జితయ్ గే, జేవ్ కి దస్సి జంక అవ్కాసుమ్ తంక.

7 ఈంజ ఎత్తిక అకర్ దీసి పాసి జా జెతయ్. జాకయ్, ప్రార్దనల్ కెర్తె తతి రిసా తుమ్ మచ్చిల్ రితి నే జతె తెలిచి తా ముద్దొ కెరన, బుద్ది ఇండుక జాగర్త తా.

8 ముక్కిమ్క, ఎక్కిలోక ఎక్కిలో పూర్తి ప్రేమయ్ ఇండ దెకితె తా. దస్సి ప్రేమ దెరన. కిచ్చొక మెల, † ఒగ్గర్ తప్పుల్క ప్రేమయ్ ఓర్పుప జా చెమించుప కెర్తయ్.

9 అన్నె, తుమ్చితె ఎక్కిలోతె అన్నెక్లో అయ్లె, కోపుమ్ నెంతె గడ్డు నెంతె, సర్ద తెన్ జోవయింక మురయూద కెర.

10 దేముడు తుమ్క కిచ్చొ నెక్తి దా తిలె, జోచి దయచ, జో దెత వేర వేర కిన్కెవరల్ పొరపాట్ నెంతె జోచి బుద్ది రితి, అన్నె మాన్సుల్ చెంగిల్ తతి రితి తుమ్ వాడిక కెర దానా.

11 దస్సి, బోదన కెర్తెసా జలె, దేముడుచి తెడి తా జొయ్యి దిల కొడె లట్టబ్బు. దస్సి కి, కో అన్నె మాన్సుల్క తోడె కెర్తెసా జలె, దేముడు దెతి నెక్తికయ్ జో జా తోడె కామ్ కెర్పు. తుమ్ దస్సి ఇండిలెగిన, యేసుక్రీస్తుచి రిసా దేముడుచి గవురుమ్ ఎత్తితె రుజ్జు డీసెదె. కెయ్క తెయ్క జోవయింక గవురుమ్ అదికారుమ్ తవును!

జెత బాదల్ చి రిసా దయిరిమ్ నంగితిసి, జాగర్త నంగితిసి

12 అన్నె ప్రేమ తిల బావుడ్లు, తుమ్క అప్పె జెతికయ్ ఆగి మెలి రితిచి పరిచ్చుచి రిసా తుమ్ ఆచారిమ్ జా నాయ్. 'అమ్క దస్సిచి కిచ్చొక లయిక్?' మెన తుమ్ ఉచ్చెర్, జా జర్లు జతిసి కిచ్చొ ఆచారిమ్చి నెంజె. కిచ్చొక తుమ్క జర్లు జతయ్ మెలె, తుమ్చి నిదానుమ్ పరిచ్చ జా రుజ్జు జంక.

13 'క్రీస్తు సేడ్ల బాదల్తె ఆమ్ కి బెదితనుమ్' మెన తుమ్ సర్దనంతోసుమ్ జా, చి జోచి గవురుమ్ పూర్తి డీస్తి దీసిక ఒత్తయ్ కి జో తెన్ సర్దనంతోసుమ్ జస్తె.

14 "అమ్ నంపజలన" మెన తుమ్ ఒప్పున్లి రిసా మాన్సుల్ తుమ్క దూసుప కెర్తె, తుమ్క చెంగిలి. కిచ్చొక మెలె, దేముడుచి ఉజడెచి ఆత్మ తుమ్చి తెన్ తా గెచ్చ తుమ్క తోడు తా నెక్తి దెతె తత్తయ్.

15 గని, మార్టోస్ జలెకి, 'చోర్టోస్' జలెకి, 'నేరిమ్ కెర్తెసా' జలెకి, 'వేర మాన్సుల్చి కామ్చి నెడిమి జా పోటి కెర్తెసా' జలెకి, మెన తుమ్చితె కక్క కో నింద కెర్తి రితి వాల్ దాన నాయ్. దన కమె కెర బాద సేడ్ల తుమ్క చెంగిల్ నాయ్.

16 గని, 'నంపజలన' మెన తుమ్ ఒప్పున్లి రిసాయి తుమ్చితె కో కచి అత్తి బాదల్ సేడ్లె, లాజ్ జంక నాయ్. 'నంపజలన' మెన జా నావ్ దెరస్సిచి చెంగిల్ మెన, జో నంపజలన దేముడుక గవురుమ్ దెవును!

17 కిచ్చొక మెలె, దేముడు మాన్సుల్క పరిచ్చ కెర్తి సిచ్చ కెర్తి సమయమ్ పాసి జా అన్సి. జలె, జో పరిచ్చ కెర్తిసి తీర్పు కెర్తిసి అమ్ నంపజలనతెయ్ మొదోల్ జతయ్ జలె, దేముడుచి నుబుమ్ కబుర్ రితి ఇండుక నెసిత మాన్సుల్ ఆకర్క కెర్తి సిచ్చ జవుల!

18 జో దేముడు పూర్ణమ్ రెగ్గయ్లి రితి;

* "సత్తిమ్ జలో మాన్సు † కన్సనె రచ్చించుప జతయ్ జలె,

† 4:6 4:6 3:19 దెక. ‡ 4:8 4:8 ఎత్తి అదికారుమ్ తిలో దేముడు అమ్క ఒగ్గర్ తప్పుల్ జోవయించి ప్రేమయ్చి రిసా ఓర్పుప జా చెమించుప కెర్తయ్. దస్సి ప్రేమ అమ్చి పెత్తి తా, అమ్ కి దస్సి అన్నె మాన్సుల్క తప్పుల్ ఓర్పుప జా చెమించుప కెరుక. వడ్డో, అమ్ దస్సి ప్రేమ కెర్తి, జుయి కి జో దెక అమ్క కన్కారుమ్ దెకెదె. మత్తయ్ 6:12, 14, 15 దెక. § 4:10 4:10 రోమయల్ 12:6-8 దెక. * 4:18

4:18 సామెతల్ 11:31. † 4:18 4:18 కన్సనె మెలె, రచ్చించుప నే జతి రితి జా కీసి రచ్చించుప జతయ్.

దేముడుక నే బితన, పాపుమ్ కెర్లన,

కిసి రచ్చించువ జవుల! రచ్చించువ జంక నెత్తిరి!”

19 జాకయ్, దేముడుక నిదానుమ్ తా జోవయింది నెలవ్ కో ఈంజ లోకుమ్తె సిచ్చల్ అర్ల సేడ్డతి గే, ఎత్తిక జెర్లున్ కెర్ల నిదానుమ్ తిలో జో దేముడుచి అత్తి జోవయింది అత్తల్ సార్పు కెర దా, చెంగిల్ కమె కెర్తె తత్తు!

5

సంగుమ్చ వెల్లెల మాన్సుల్ కిసి ఇండుక

1 తుమ్చి తెచ సంగుమ్చ వెల్లెల మాన్సుల్క, జలె, ఆవ్ ఏక్ కోడు సంగిదె. తుమ్చి తెన్ కి నంపజలసక ఆవ్ వెల్లొ జలొసా తా, క్రీస్తు సేడ్డ బాదల్ సొంత దెకిలోసా జా, పడ్డొ తెదొడ్క రుజ్జు జా డీసుక తిలి పరలోకుమ్చి ఉజ్జెతె గవురుమ్తె బెదితోసా జా, ఆవ్ తుమ్తెచ వెల్లొ మాన్సుక కిచ్చొ బతిమాల్య జా సంగితసి మెలి,

2 తుమ్ దెకితి వాట దేముడుచ మెండల్ జల నంపజలసక తుమ్ నిదానుమ్ దెకితె తా, తుమ్క కో బలవంతుమ్ కెర్తి రెత్తి నాయ్, గని దేముడుచి ఇస్టుమ్ రితి పూర్తి మెన్సు దా జోవయింక నర్ల తెన్ దెకితె తా. డబ్బల్ ఆసక నాయ్, గని సర్లబుద్ది తెన్ కెర్తె తా.

3 పడ్డొ, జా మందతెచ మాన్సుల్క బియడ్డి రగుమ్ ఏలువ కెర నాయ్, గని జేవ్ కిసి సత్తిమ్ ఇండుక గే దెకితె రితి తుమ్ దస్సి సత్తిమ్ ఇండ దెచవ.

4 తుమ్ దస్సి ఇండ వాట్ దెకయలదు మెలి, ఎత్తిచి కంట వెల్లొ గొవుడు జతో క్రీస్తు ఆకర్ దీసిక ఎత్తిజెన్క డీస్తి పొదిక ప్రబుచి గవురుమ్ నే గెతి బవుమానుమ్ తుమ్ ఎత్తిజెన్క దొర్కు జయెదె.

5 పడ్డొ, సంగుమ్క దెకిత వెల్లెల మాన్సుల్చి తెడి తుమ్ అన్నె నంపజలన దాక్ కెరన, జేవ్ వెల్లెల మాన్సుల్చి కోడుక మరియాద కెర. తుమ్ ఎత్తిజెన్ సొంత గవురుమ్ నే ఉచరంతె, ఎక్కిలోచి మొక్కె ఎక్కిలో దాక్ కెరన, ఎక్కిలోచి సేవ ఎక్కిలో కెర. పూర్లుమ్ దేముడుచి కొడొతె రెర్లయ్లి రితి,

*“సొంత గవురుమ్ ఉచరంతనక దేముడు దూరి కెర్తయ్,

గని కో దాక్ కెరసుల గే,
జోవయింకయ్ జోచి దయచి తోడు జో దెయెదె”
మెన రెగిడ్డి కోడు.

6 జాకయ్, ఎత్తిచి కంట సెక్తి తిలో దేముడుచి అత్తి తుమ్చి బత్తు సార్పు కెర దా జోచి తెడి దాక్ కెరన, చి జో ఒప్పన్సి నమయ్యుమ్క గవురుమ్ తెన్ తుమ్క టీచడెదె.

7 బాదల్ సేడ్డి తుమ్చి బయిమ్ ఎత్తి జో వయితి రితి తుమ్ సార్పు కెర దాన. కిచ్చొక మెలి, తుమ్క ‘చెంగిల్ తత్తు’ మెన, తుమ్చ బాదల్ వయిక జో ఇస్టుమ్ జతయ్.

8 మచ్చిల్ రితి బుద్ది నే జతె తుమ్ ముద్దొ కెరన, తెలివి తా జాగర్ల తా. కిచ్చొక మెలి, తుమ్క నేరిమ్ వయడుక ఇస్టుమ్ జలొ నయ్తాన్ కక్క జలెకు గీడుక కోర్వ జా, ఒర్నొతో సింపుమ్చి రితి బులితె తత్తయ్.

9 ఒండెలోకుమ్చ బావుడ్లు జల నంపజలసక కి ఇన బాదల్ సేడుక అన్య మెన జాన, తుమ్చి నముకుమ్ డిట్టుమ్ తా జో నయ్తాన్చి ఉప్పిరి జీనుక తుమ్ టీచ.

10 అన్నె, గడియ బాదల్ సేడ ఒర్లువ జలదు మెలి, క్రీస్తుచి నావ్ తెన్ తుమ్ జోచి కెయ్క తెయ్క తెయ్క తతి పరలోకుమ్చి ఉజ్జెతె గవురుమ్తె బెదుక మెన తుమ్క నిసాన బుకార్లొ ఎత్తి దయ కెర్తె దేముడు సొంత తుమ్క పూర్తి కెర, డిట్టుమ్ కెర, జీనెతి సెక్తి దెయెదె.

11 జో కెయ్క తెయ్క ఏలువ కెర్లు! ఏలువ కెరెదె. జోక జోఒర! ఆమేన్.

అకర్ కోడు

12 ‘ఈంజ నుబుమ్ కబుర్ నిజుమి దేముడు దిలిసి’ మెన సొచి సంగ తుమ్క డిట్టుమ్ కెరుక మెన, జోక ‘నిదానుమ్ తిలో బావొ’ మెన సిల్వానసన్క నంపజా జోచి అత్తి తుమ్క ఈంజ ఉత్తుమ్ రెర్లవ అన్సి. ప్రబు దిలి ఈంజ నిజుమ్ జలి దయతె తుమ్ డిట్టుమ్ టీచ.

* 5:5 సామెతల్ 3:34, యాకోబు 4:6.

13 దేముడు అమ్మక తుమ్మక కిసి నిసాస అస్సె గే, దస్సి 'అంచయ్ మాస్సుల్ జతు' మెనయ్ ఈంజ †బబులోను వట్టుమ్తె కి మాస్సుల్క నిసాస అస్సె. జో నిస్సాస్సిసి ఈంజ సంగుమ్చ కి తుమ్మక జోవయిచి జోబర సంగితతి. అంక పుత్తు జలో రిత్తో మార్కు జోచి జోబర సంగితయ్.

14 ప్రబుచి ప్రేమక తుమ్ ఎక్కిలోక ఎక్కిలో జోకర.

క్రీస్తుచి తెడిచ తుమ్ ఎత్తిజిన్క జోచి సేంతుమ్ తవున్!

† 5:13 5:13 'బబులోను' మెలె, ఏకవేల రోమ్ వట్టుమ్క టాలి జతయ్. డీనయలిసి 17 అద్యయిమ్చి జా అద్యయిమ్తెచ కొడెచ ఎత్తొచ కొడె దెక.

పేతురు రెగిడ్లి దొన్నిచి ఉత్త్రమ్ బారిక్ జలో పేతురు రెగిడ్లి దొన్నిచి ఉత్త్రమ్

మొదోల్ కోడు

1 అమ్చో దేముడు అమ్క రచ్చించుప కెర్తొసా జలో యేసుక్రీస్తుచి పున్నిమచి రిసా, జోచి దయక అమ్ సంపజలన తెన్ ఎక్కి విలువచి నముకుమ్ తిల సంపజలనక, యేసుక్రీస్తుక *సేవ కెర్తొసా జా జోచి బారికి జలో †సీమోను పేత్రు రెగిడ్లి ఉత్త్రమ్.

2 దేముడుచి ప్రబు జలో అమ్చో యేసుక్రీస్తుచి ఉప్పిరచి గ్యాసుమ్ తుమ్చి పెట్టి జాన్పువ జా, జోక తుమ్ రోజుక అన్వాయ్ జాన్తినచి రిసా తుమ్క జోచి దయ జోచి సేంతుమ్ అన్వ ఒగ్గర్ జవున్!

3 దేముడు జోచి పరలోకుమ్చి సెక్తి అదికారుమ్కయ్ తెన్, జోచి సొంత పరలోకుమ్చి గవురుమ్చి ఉజ్జడతె, జోచి చెంగిలచి రిసా అమ్క నిసాన బుకర్తొసాక అమ్ జాన్తి వాటు పరలోకుమ్తె బెదితి జీవ్, పరలోకుమ్చి సత్తిమ్ సుద్ది ఇండితి సెక్తి అమ్క దొర్పు జతి రితి, ఎత్తి అమ్క దా అన్వ.

4 దస్సి, ఎత్తిచి కంట విలువ తిల జోచ ప్రమానల్ అమ్క దా అన్వ. కిచ్చొక మెలె, జేవ్ ప్రమానల్చి సెక్తిక ఈంజ ఆగ్చ గార్ ఆనల్చి రిసాచి ఈంజ లోకుమ్చి పాపుమ్ తెంతో తుమ్ పిటవనక, చి అన్వ, జోచి ఆత్మ తుమ్చి పెట్టి జా, దేముడుచి రితి తుమ్ మార్పువ జా జోచి తెన్ పాపుక మెన తుమ్క దా అన్వ.

5 జాకయ్, తుమ్ నిదానుమ్ చజ దెరన తుమ్చి నముకుమ్తె చెంగిల్ గునుమ్ బెదవుక అన్వ. జా చెంగిల్ గునుమ్తె గ్యాసుమ్,

6 జా గ్యాసుమ్తె ఆన ముద్దొ కెరంతిసి బెదవ, ఆన ముద్దొ కెరంతిన్తె నిదానుమ్ బెదవ, జా నిదానుమ్తె దేముడుక బితిసి బెదన,

7 జా దేముడుక బితిసి తెన్ సంపజలనక ముద్దు కెర్తి ప్రేమయ్ బెదవ, చి ప్రేమయ్ తెన్ కన్యారుమ్ బెదవ తంక.

8 ఇన బుద్దుల్ తుమ్ ఇండుక దెర అన్వె అలవాట్ జలె, అమ్చో ప్రబు జలో యేసుక్రీస్తుక జాన్తినతె తుమ్ కామ్క నే అయిలన్ నే జన్వ, జోచి రిసా పలితుమ్ దెర్తె.

9 ఇన బుద్దుల్ కక్కు తయె నాయ్ గే, జో మాన్పు గుడ్డి జలి రితి జా, జోచ ఆత్మ అంకివో సరిగా డిస్సి నాయ్, జోక దూరి తిలిసి నే డిసిల్ రితి జతయ్, చి జో అగై పాపుమ్ ఇండిలిన్తె జో అన్వె నే ఇండిత్ రితి దేముడు జోక విడ్డల్ కెర్లిసి, చెమించుప కెర్లిసి, జో పచ్చ అన్వ.

10 జాకయ్, బాపుడ్డు, తుమ్క దేముడు నిసాన బుకార్తి వాట్ ఇండుక ఆన జా అన్వె నిదానుమ్ జతి రితి తుమ్ దెకన. తుమ్ ఇసి నిదానుమ్ జలె, వెర్తి బుద్దితె అన్వె నేడ్పు నాయ్.

11 దస్సి కి అమ్చో ప్రబు అమ్చ రచ్చించుప కెర్తొసా జలో యేసుక్రీస్తుచి పరలోకుమ్చి రాజిమ్తె తుమ్ బెదుక మెన జో పూర్తి సర్వ తెన్ తుమ్క వాట్ దెయెదె.

12 తుమ్క దిలి సత్తిమ్తె తుమ్ డిట్టుమ్ జలెకి, ఈంజ ఎత్తి తుమ్ జాన్వె కి, కెయెక కి తుమ్క ఆవ్ ఉచార కెరయ్తె తయెదె.

13 ఆవ్ ఈంజ †కుడియ్ జలి రితి మొర్తి ఆగ్తె తతి ఎద తుమ్క ఉచార కెరవుక అంచి పూచి మెన జాని.

14 అమ్చో ప్రబు జలో యేసుక్రీస్తు అంక †దెకయ్లి రితి, ఆవ్ ఈంజ కుడియ్ జలి రితి మొర్తి ఆగ్ ముల్లి సమయుమ్ పాసి జెతయ్ మెన జాని.

15 జాకయ్, అన్వె, ఆవ్ ఉట్ట గెలి వడ్డొ కి ఈంజ ఎత్తి తుమ్ ఉచార కెర్తి రితి *దెకిన్దె.

* 1:11:1 నెంజిలె, 'గొత్తిమాన్పు', నెంజిలె 'గొత్తి ముద'. † 1:11:1 నెంజిలె 'సీమోను'. జోవయిది అన్వెక్ నావ్ 'పేతురు'. బారికుల్ 15:7, 14 దెక. ‡ 1:13 1:13 కొరిందిల్క వచ్చులు రెగిడ్లి 2 నంబర్ ఉత్త్రమ్ 5:1, 4 దెక. § 1:14 1:14 యోహాను 21:18-19 దెక.

* 1:15 1:15 పేతురు బోదవ కెర కెర సంగిలన్ ఎత్తి మార్పు రెర్చ చి రిసాచి జోవయిది సాచి రెగిడ్లన్, మెన మాన్పుల్ సంగితె. జేక, ఇన్వె జా మార్పుచి రిసా ఏక్ వేల సంగితయ్ మెన సగుమ్జన్ ఉచర్తె.

16 అమ్మచో ప్రబు జలో యేసుక్రీస్తుచి నెక్కి తిలిసచి రిసాచి జో అన్నె ఉత్ర జెతిసచి రిసా తుమ్క అమ్ జానవ కెర, కో తెలిచి మాన్సు అచ్చి ఉచర్చిసి నెంజె. జోచి †పరలోకుమ్చి గవురుమ్ తిలి ఉజడి జో జెతిసి అమ్ సొంత దెక అన్నుమ్.

17 కెయ మెలె, కిసి మెలె, దేముడు అబ్బొసి జోక గవురుమ్ ఉజడి కెర్చితె, చి

‡“ఈందె, ఈంజొయి అంచో ప్రేమ తిలో వూత్తు.

ఇన్నెచి రిసా అంక ఒగ్గర్ నర్తనంతోసుమ్”

మెన పరలోకుమ్చో దేముడు అబ్బొసి జోచి అవాడ్ సూనయలి పొది,

18 పరలోకుమ్ తెంతో చి జా అవాడ్ అమ్ సొంత సూన్లమ్. కిసి మెలె, అమ్ కి సొంత జో తెన్ జా సుద్ది తిలి డొంగై తిలమ్.

19 పూర్ణమ్ దేముడు జోచ కబుర్లు సంగిలనచి అత్తి సంగిలిసి ఎత్తి కచితుమ్ జర్లు జయెదె, మెన అమ్ తెదోడి దెకిలిసచి రిసా అమ్క రుజ్జు అయిలి. జాకయ్, దేముడు సంగిలి ఈంజ కబుర్ తుమ్ డిట్టుమ్ దెరన, రాత్ పాయితి పెందాలె దీస్తి సుక్కో తుమ్చి పెట్టి ఉజడి జతి రితి ప్రబు అన్నె జెతికయ్ జా వెల్లి దీసి జెతె ఎదక అందరతె ఉజడి దీస్తి దీవు రగుమ్ జా అన్నె. జాకయ్ తుమ్ జాగర్త తెన్ దెకనలె తుమ్క చెంగిల్ తయెదె.

20 ముక్కిమ్క తుమ్ కిచ్చి అర్దుమ్ కెరన మెలె, దేముడుచి కోడుతె రెర్దుయిలిసతె జోచి కేన్ కోడు కి కిసి అర్దుమ్ కెరనుక జలె, మాన్సు సొంత జొయ్యి అర్దుమ్ ఉచరన్తి రితి జయె నాయ్. జో దేముడు సొంత దిలి అర్దుమ్ అమ్ కెరనుక అన్నె.

21 కిచ్చిక మెలె, దన కబుర్లుతె కేన్ కి కెయక కి మాన్సుచి సొంత పెట్టిచి ఉచరన్తతి తెంతో చి నెంజె. గని దేముడుచి సుద్ది తిలి అత్తి కేన్ కేన్ మాన్సుల్క దెర్లి గే, దేముడుచి సొంత కొడొ జేవ్ మాన్సుల్ లట్టుల్ల, రెగ్గె. జేవ్ జోచయ్ కొడొ.

2

అబద్ధమ్క సంగితన సికడ్డి రిసా

1 “దేముడుచ కబుర్లు సంగితనుమ్” మెన అగ్గెచ పొదులె, పూర్ణమ్, అబద్ధమ్క కి అమ్చ ప్రజెతె, అమ్చ ఇస్రాయేలుతె, సగుమ్జిన్ బార్ జలె. దస్సి, తుమ్తె కి అబద్ధమ్చి బోదన కెర్తన తవుల. జేవ్ మాన్సుల్ కిచ్చి కెరుల మెలె, నాసెనుమ్ కెర్ ఇస్టుమ్ అయిల జోవయింప అబద్ధమ్ తిరిమ్ తిరిమ్ సికడ, ‘పాపుమ్ తెంతో రచ్చించుప జతు’ మెన జోచి జివ్ దా జోవయింక గెనన్లొ *ప్రబుక ‘దేముడు నెంజె’ మెన సంగిల్ రితి జా, జోచి మరియాద కడ్డి రితి ఇండుల. జేవ్ దస్సి కెర, జోవయింక జెచ్చి చట్టున పూర్తి నాసెనుమ్ ఆనసుల.

2 జేవ్ లాజ్ నెంతె కెర్ పాపల్ దెక దెక, అన్నె ఒగ్గర్జిన్ జోవయింపి పట్టి గెచ్చుల, చి “ఒహో, సత్తిమ్ తిలో దేముడుక జొకర్తతి, గని దనయ్ కెమ్ కెర్తతి” మెన, అన్నె మాన్సుల్ నిస్కారుమ్ సంగుల, చి జోవయింపి ఇండుకతె ప్రబుచి సత్తిమ్ వాటు నిస్కారుమ్ డీసెదె.

3 జోవయింపి పెట్టిచ ఆసల్క తెలివి కొడొ బెదవ బెదవ, తుమ్ కి అబద్ధమ్ నంపజతి రితి తుమ్క మోసిమ్ కెర లాబుమ్ కెరనుల. జలె, అగ్గె తెంతో జోవయింపి సిచ్చి దేముడు సంగ అన్నె, జోవయింపి సిచ్చి రకితె అన్నె, చి జోవయింపి నాసెనుమ్ కచితుమ్ జోవయింక లయెదె.

4 అగ్గెయి పరలోకుమ్చ దూతల్ సగుమ్జిన్ †పాపుమ్ కెర పాపుమెత్ నెక్కి రిసా, దేముడు జోవయింక సిచ్చి కెరుక నే పిట్టయెతె, వెల్లి ఆగిచి గొయిచితె ఎత్తిచి కంల ఎట్టో తిలిసతె జోవయింక గల దా, ఎత్తిక తీర్పు కెర్రి ఆకర్ దీసిచి వెల్లి సిచ్చి జతె ఎదక జేవ్ రకితి రిసా, జోవయింక ఎత్తిచి కంల ‡అందర్ తిల బోన్లతె గలయ్ అన్నె.

† 1:16 1:16 మత్తుయ 17:1-5, మార్కు 9:2-7, లూకా 9:28-35 దెక. ‡ 1:17 1:17 మత్తుయ 17:5. * 2:1 2:1 యూదా, వెత్తర్ నంబర్ కి డెక. † 2:4 2:4 అదికాండుమ్ 6:1-7. ‡ 2:4 2:4 నెంజెలె, ‘గొల్లుల్ తెన్ బంప అన్నె, గెద’. యూదాతె 6 నంబర్ కి డెక.

5 పడ్డో, పూర్ణమచ మాన్యుల్చి రిసా ఉచదై, జోవయించి పాపుమచి సిచ్చ జోవయింక నే ప్పిట్టయితె, జేవ్ పొదులె సత్తిమ్ సాడుప కెర్తె తిలొ ఎక్కి నోవహుక చి జో తెన్ అన్నె సత్తుజన్ జోచి కుటుంబుమచ మాన్యుల్క రచ్చించుప కెర, ఒండి లోకుమచ పాపుమచ మాన్యుల్ ఎత్కిజన్ మొర్తి రితి, దేముడు వెల్లో పాని పెటవ బూరుమతె డుజడ గెలన్.

6 పడ్డో, పూర్ణమ పొదిచ * సాదోమ చి, గొమొరా మెల పట్టల్ సార్ జతి రితి దేముడు సిచ్చ దా, కిచ్చొ జివ్ నే తతి రితి పూర్తి నానుమ కెర వుంచ దా, పడ్డొక పాపుమ ఇండిత మాన్యుల్క 'పాపుమతె గెలె, సిచ్చ జంక అన్నె' మెన రుజ్జు తతి రితి దేముడు జర్లు కెర్తె.

7 గని, ఒత్తచ పాపుమ సుదల్ ముద్దో నే కెరంతిసి, జోవయించ ఆనల్చ కమొ దెక దెక బాద సిడ్డో సత్తిమ్ ఇండిలొ †లోతుక రచ్చించుప కెర్తె.

8 జో సత్తిమ్చొ మాన్యు జేవ్ పాపుమచ మాన్యుల్తె జితె తా దెకిలిన్ నూన్సిచి రిసా, జేవ్ కెర్తె తిల జోవయించ ఆనల్ ముద్దో నే కెరంత పాపల్చి రిసా, రోజుక జోచి పెట్టి దుకుమ సేడ్డె తిలొ.

9 జలె, ఈంజ ఎత్కి బెదయలె కిచ్చొ దెకితసుమ్ మెలె, జోవయింక నిదానుమ్ తిలసక బాదల్ తెంతో రచ్చించుప కెరుక కి, పడ్డొ వెల్లె తీర్పు కెర్తె ఆకర్ దీసిచి సిచ్చ జితె ఎదక సత్తిమ్ నెంజిలసక సిచ్చతె రకుక కి దేముడు జానె.

10 *ముక్కిమక కక్క సిచ్చ దెంక మెలె, మరియాద గెత ఆనల్ రితి ఇండితనక చి అదికారుమక నే బితనక. జోవయించ వెట్టూరుమచ ఆనల్క ఇండిత, అదికారుమక నే బిత మాన్యుల్, జలె, సొంత నెక్కిక నంపజా తా దయ్రిమ్ తెన్ ఇస్సుమ్ అయ్లి రితి ఇండితన జా, దేముడు కబుర్ తెర్తయ్త వరలోకుమచి ఉజిడెచి గవురుమ్ తిల దూతల్ గల్లక †దూసుప కెరుక కి బితి నాయ్.

11 *పరలోకుమచ దూతల్, మాత్రుమ్, జేవ్ మాన్యుల్చి కంట జోవయింక ఒగ్గర్ నెక్కి అదికారుమ్ తిలె కి, ప్రబుచి మొక్కె జేవ్ తిలె కి, జేవ్ మాన్యుల్క దూసుప కెర్తె తీర్పు నే సంగితె తుక్లె తత్తతి.

12 †జేవ్ మాన్యుల్, మాత్రుమ్, కీస జతతి మెలె, జంతువుల్చ రిత, జంతువుల్ రిత గునుమ్ తా, జోవయించి పెట్టి అయ్లిసి అర్దుమ్ నెంతె దన్నె జర్లు కెర్తెతి, చి బోసుతె దెర్పు సేడ మొర్తి రిసాయి జెర్లు తవుల. జలె, జేవ్ మాన్యుల్, దన్నె, జేవ్ నేన్సిచి రిసా దూసుప కెర్తె తీర్పుల్ సంగ సంగ, జంతువుల్చి రితి జోవయించి నానుమ జెవ్వి జవుల.

13 జోవయించి పాపుమ్ జెవ్వి కవుల. కీస కమొతె జేవ్ మాన్యుల్ సర్ల జతతి మెలె, లాజ్ నెంతె మెద్దెనచి ఉజిడెతె కి ఇస్సుమ్ అయ్లె కమొ కెర్తెతి. *ముర్కిచ మర్కుల్ రిత జా, ప్రబుచి ప్రేమ దెకయ్త తుమ్చ అన్నిమ్తె బెద కతె తా, జా నుద్దిచిక వెట్టూరుమ్ కెర్తె రితి, జోవయింక ఇస్సుమ్ అయ్లె జోవయించి పెట్టిచ ఆనల్ లాజ్ నెంతె లాగ్ల కెరంతతి.

14 జోవయించ అంకిచొ బెర్దు లంజె దెకుక. జేవ్ జా పాపుమ్ కెరుక కెయ్లక ముల్లి నాయ్. డిట్టుమ్ నెంజిల నంపజలసక సికడ పాపుమ్ కెరయ్తతి. ఆనచి అలవాట్ కెరనయ అన్సి, రితి పాపుమచ బోదల్, జేవ్.

15 సత్తిమ్చి వాటూ ముల దా, ఇస్సుమ్ అయ్లి వేర వాట్ బుల, బెయోరుచొ పుత్తున్ †బిలామచి పట్టి గెచ్చ, జో గెలి వాట్ గెచ్చ అన్సి. పాపుమతె లాబుమ్ కెరసుక జోవయించి అలవాట్, జోచి సర్ల!

§ 2:5 2:5 అదికారుడు 6, 7 అద్యయల్. * 2:6 2:6 అదికారుడు 18:20-29. యూదాత 7 నంబర్చి కోడు కి దెక. † 2:7 2:7

అదికారుడు 19:12. ‡ 2:10 2:10 యూదా 8 నంబర్చి కోడు దెక. § 2:10 2:10 పూర్ణమ, ఎత్కి అదికారుమ్ తిలొ దేముడు దెతి సిచ్చ జర్లు కెరుక మెన మాన్యు రూపుమ్ జల దొగల దూతల్ ఏక్ సుట్టు సాదోమ పట్టుమతె గెతికయ్, జా పట్టుమచ మున్నుబోదల్ జేవ్ దూతల్క లంజె కెర జోవయించి మరియాద కడుక ఉచర్ల. ఎత్కి అదికారుమ్ తిలొ దేముడు జోవయింక అర్దు కెర గుడ్డి కెర్తెన్. అదికారుడు 18:20, 22, చి 19:1-11. వేతురు ఈంజ ఉత్తుమ్ రెగిడ్డి పొదులె కి ప్రబుచ కబుర్లు సంగిల మాన్యుల్క పాపుమచ మాన్యుల్ దూసుప కెర్తె తిల. చి అగ్గెచి ఇస్సెక టాలె జతయ్. * 2:11 2:11 యూదా 9 నంబర్చి కోడు దెక. † 2:12 2:12 యూదా 10 నంబర్చి కోడు దెక.

‡ 2:13 2:13 యూదా 12 నంబర్చి కోడు దెక. § 2:15 2:15 యూదా 11 నంబర్చి కోడు దెక.

16 జో* బిలామిచి సొంత పాపుమచి రిసా, దేముడు జోక తీర్పు కెర్తన్. మెలె, నే లట్టబ్బి గాడ్డె మాన్సుచి అవాడక లట్టబ, బిలామిక కోడు సంగ, జో ఉచర్లి వెర్రి కామ్ అడ్డు కెర్రి.

17 జలె, పాపుమచ జేవ్ మాన్సుల్ కీస జతతి మెలె, పాని నెంజల ఊటల్చి రిత, †వాదు పెట్టనిలి పాని నెంజల్ మబ్బుల్చ రిత జా అనున్. ఆకర్ దీసిచి రిసా కిచ్చొ వాట జోవయింక రకితయ్ మెలె, అందర్చి ఉప్పిరి అందర్.

18 కిచ్చొక మెలె, వెర్రి కమెచి రిసా గవురుమ్ లట్టబన, పాపుమ్ తెంతో నోవర్ విడ్డల్ జల నోవ సంబజలసక సికడ సికడ, ఆగిచ అసల్ జర్గు కెరంతినెతె జోవయింక అలవాట్ కెర్తతి.

19 ‡“అగ్గుల్చ గొతిమాన్సుల్ నెంజన్, అగ్గుల్ తెంతో విడ్డల్ జా అన్సున్. తుమ్ కిచ్చొ కెర్రి కి బాద నాయ్” మెన సికడ, వేర అర్దుమ్ బెదవ పాపుమ్ సికయతతి. గని జేవ్ దస్సి సికడ్డన కిచ్చొచ గొతిమాన్సుల్ జా అస్తి మెలె, మొర్పు దెత అసల్చ గొతిమాన్సుల్ జా అస్తి. కిచ్చొక మెలె, కేన్ అలవాట్ మాన్సుక ఏలువ కెర్తయ్ గే, జా అలవాట్తె జో మాన్సు గొతిమాన్సు జా అస్సు.

20 దస్సి అమ్చొ ప్రబు అమ్చొ రచ్చించువ కెర్రిసా జలో యేసుక్రీస్తుక జాన్సి సెక్కిక ఈంజయ్ లోకుమ్చి పాపుమ్ ఇండుక తెంతో విడ్డల్ జా తా, జేవ్ జా పాపుమ్ వాట్ అన్నె గిచ్చొ సిక్కు జా దెర్పు సేడ్లె, జేవ్ అగ్గెయ్ తిలి పాపుమచి కంట అన్నెయ్ నాసినుమ్ జా గిచ్చొ అస్సి.

21 దేముడు దిలి పరలోకుమచి సుద్ది సెలవ్ జేవ్ జాన జానయ్ ములిలి కంట, జా సత్తిమ్ వాట్ జేవ్ కెయ్యు నే జాన్లె చెంగిల్ తత్తి.

22 సత్తిమ్ తిలి టాలెత సంగిల్ రితి, జోవయింక జర్గు జా అస్సు. మెలె, సొంత ఒక్కస్లిసి అన్నె కతయ్ నూనో, చి అండ్రి దోయ్ జా తిలె, బుర్తతె ఎంగ్ల జా అన్నె ముర్రి కలోయ్ జతయ్.

3

క్రీస్తు ప్రబు అన్నె ఉత్త జెతి దీసి

1 ఈది తుమ్క ఆవ్ రెగ్లిలి దొన్నిచి ఉత్తమ్. ప్రేమ తిల బాపుడ్లు, చి దొన్నితె కి అంచి ఉడ్డెనుమ్ కిచ్చొ మెలె, సత్తిమచి నిదానుమచి తుమ్చి మెన్సుత తుమ్క ఏక్ కోడు ఉచర్చసి రిసా, తుమ్క ఆత్మ డిట్టుమ్ కెర్రి రిసా.

2 కిచ్చొ కోడు మెలె, *‘జర్గు జయెదె’ మెన దేముడుచ కబుర్లు సంగిలన సంగిలిసి ఎత్తి, వడ్డె ప్రబు జలో రచ్చించువ కెర్రిసా జోవయింక బారికుల్చి అత్తి తుమ్క సంగిల సెలవ్ కోడె ఎత్తి. తుమ్ కెర మెనయ్ ఈంజ ఉత్తమ్ రెగ్గిన్.

3 తొలితొ ముక్కిమ్క కిచ్చొ అర్దుమ్ తుమ్ కెరనుక మెలె, ఆకర్ దీసల్చ † అన్మానల్చ మాన్సుల్ సత్తిమచి ఉప్పిరి ఆన్సన జా కెర, జోవయింక పెట్టిచి పాపుమచ ఆసల్ రితి ఇండ.

4 కీస కొడె లట్టబుల మెలె. ‡‘అన్నె జెయిందె, మెన జో క్రీస్తు సంగిలిసి కేతె జర్గు జలి? అమ్చ పూర్గుమ్చ జియె మొర్లి తెంతో కి, అన్నె అగ్గె తెంతో, లోకుమ్ జెర్మన్ జలి తెంతో కి, ఎత్తి. మాములుమ్ అగ్గెచి రితి జర్గు జతయ్.” మెన సంగుల.

5 దస్సి సంగితన జాన జానయ్ కిచ్చొ కోడు ఉచరుక నెసితి మెలె, ఒగ్గర్ ఒగ్గర్ అగ్గెయ్ తెంతో ‘జర్గు కెరిందె’ మెన దేముడు ఒప్పనతికయ్, ఆగానుమ్ అస్సు, చి † పాని తెంతో, పానితె జర్గు జలిన్చి రిసా, బూలోకుమ్ జెర్మన్ జలి.

6 అన్నె, బూలోకుమ్ తెడిడి తిలిసి వెల్లొ పానిచి * బూరుమ్క సిచ్చొ జా నాసినుమ్ జలి.

* 2:16 2:16 యూదా 11 నంబర్చి కోడు కి దెక. బిలామ్ ఎత్తి అదికారుమ్ తిలో దేముడుచ కబుర్లు సంగితోనా జలికి, చెత్తర్ తప్పుల్ కెర్రి. ఎత్తి అదికారుమ్ తిలో దేముడుచి కోడు మార్చువ కెరక ఉచర్లొ ఎత్తి అదికారుమ్ తిలో దేముడుచ విరోరుమ్ తిల మాన్సుల్ “డబ్బుల్ దెమెదె” మెంజిలయ్. జా డబ్బుల్ ఆసకయ్ ఎత్తి అదికారుమ్ తిలో దేముడుచి కోడు పిట్టపుక ఉచర్లొ, సంక్యాకాండుము 22:2-35, 31:16. వడ్డె, బొప్పల్చ బలి దిలిసి ప్రజల్ కంక సికడ్లె, చి ప్రజల్ లంజె జతి రితి సికడ్లె, డీసయ్లిలి 2:14. † 2:17 2:17 యూదా 12, 13 నంబర్చి కోడు దెక. ‡ 2:19 2:19 యూదా 4 నంబర్చి కోడు దెక. * 3:2 3:2 యూదా 17 నంబర్చి కోడు దెక. † 3:3 3:3 యూదా 18 నంబర్చి కోడు దెక. ‡ 3:4 3:4 యోహాను 14:3, 28 దెక. § 3:5 3:5 అదికారుమ్ 1:2, 6, 7. * 3:6 3:6 అదికారుమ్ 6-8 అడ్డయల్.

7 జలె, దేముడుచి దస్సి సెలవ్ కి, జోచి కోడుకయ్, అప్పెచి ఈంజయ్ బూలోకుమ్ ఈంజయ్ ఆగాసుమ్ కి డడ్డ గెతి నమయుమ్క రకితె అస్సె. జో వెల్లి తీర్పు కెర్తి, జోక నెన పాపుమ్ ఇండిల మాన్సుల్క నానినుమ్ కెర్తి దీసి ఎదక దేముడు రకితె అస్సె.

8 గని, ప్రేమ తిల బాపుడ్లు, ఏక్ కోడు తుమ్ వచ్చు నాయ్. కిచ్చొ మెలె, ప్రబుచి మొక్కె ఎక్కి దీసి వెయి వెర్సుల్చి రితి జతయ్, చి వెయి వెర్సులు ఎక్కి దీసిచి రితి జతయ్.

9 ప్రబు సంగిలి ప్రమానుమ్ జో నెరవెర్పువ కెరుక అల్పమ్ కెర్తయ్ మెన సగుమ్జిన్ ఉచర్లె కి, జో ఆరి ఆల్పమ్ కెరె నాయ్. కిచ్చొక మెలె, “జోవయింతెన్ కోయి నాసెనుమ్తె గెతు నాయ్, గని జేవ్ ఎత్తిజిన్ జోవయిచి పాపుమ్ చినన ముల్లు” మెన, తుమ్చి రిసాయి జో ఆల్పమ్ కెర్తయ్.

10 గని, జా వెల్లి దీసి జెతిసి కీసి తయెదె మెలె, కో నేనై పొది చోరు అయ్లి రితి జెయెదె. తెదోడక వెల్లి అవాడ్ వీర్లి రితి కెరె, ఆగాసుమ్తె తిలిసి డడ్డ గెచ్చు ఆగాసుమ్ కేడయ్ గెచ్చెదె, చి ఈంజ బూలోకుమ్ జేవ్చ కమె తెన్సి †డడ్డయ్ గెచ్చెదె.

11 అప్పె తిలిసి ఎత్తి దస్సి జా గెచ్చుక అస్సె. జలె, కీన మాన్సుల్ జా తుమ్ ఇండుక మెలె, మాన్సుల్చి మొక్కె సుద్ది తెన్ ఇండ, దేముడు తెన్ బెద నిదానుమ్ ఇండ,

12 జోచి వెల్లి దీసి జెతె ఎదక ఎక్కి ఆన నిదానుమ్ †రకితె తా, జో కీబే బేగి జెతిన్కయ్ రితి ప్రార్తన కెరె, సత్తిమ్ ఇండ. జా దీసిచి కామ్క ఆగాసుమ్ డడ్డ గెచ్చు కేడెదె, చి జా ఆగిక ఒత్త తిలిసి ఎత్తి జూర గెచ్చెదె.

13 జలెకి, జో ప్రమానుమ్ సంగిలిన్క రకితనుమ్. కిచ్చొక మెలె, * నోచి ఆగాసుమ్క, చి సత్తిమ్ బెర్లి నోచి బూలోకుమ్క రకితనుమ్.

14 జాకయ్, ప్రేమ తిల బాపుడ్లు, ఇన్నెక తుమ్ రకితను చి రిసా, ప్రబు జా కెరె తుమ్క చజలె, కిచ్చొ ముర్కి నెంతె కిచ్చొ పొరపాల్ నెంతె, జోచి సేంతుమ్ తుమ్చి పెట్టి కామ్ కెర్తె తా, సుద్ది తంక తుమ్ దెకన.

15 అస్సె, అమ్చో ప్రబు అల్పమ్ కెర్తిన్క ఉచర్లె, తుమ్ కిచ్చొ చిన మెలె, జో వాయిద కెర్తిన్తె అన్నె మాన్సుల్ రచ్చించువ జంక జో అవ్కాసుమ్ దెతయ్. ప్రబు జోక దిలి గ్యాసుమ్చి రిసా పవులు కి ఇన్నెచి రిసా ఇసి సంగ రెగిడ్లన్†

16 జోచ ఉత్తల్ ఎత్తితె రెగిడ్లి రితి. జోచ ఉత్తల్తె తిలిసి సగుమ్ అర్దుమ్ కెరెనుక ఇదిల్ అల్లర్ జంక జతయ్. జేవ్ కొడె సగుమ్జిన్ నేన్ల మాన్సుల్, దొన్ని మెన్సుల్ తిల మాన్సుల్, జోవయిచి సొంతయ్ ఇన్సుమ్ అయ్లి రితి మార్పువ కెరె, వేరయ్ అర్దుమ్ సికడ్డతి. దేముడుచి కొడెతెవ అన్నె కొడె కి దస్సి మార్పువ కెర్తతి. జలె, జోవయింక జెవ్వె నానినుమ్ కెరంతతి.

17 జలె, ప్రేమ తిల బాపుడ్లు, ఈంజ ఎత్తి జర్లు నే జతె అగ్గె నూన జాన్సుచి రిసా, దేముడుచి కోడు నే నూన్త మాన్సుల్చి పట్టె తుమ్ నే గెతి రితి, తుమ్చి సొంత నిదానుమ్ తుమ్ నే పిట్టవన్తి రితి, తుమ్ జాగర్ల తెన్ తా.

18 అమ్చో ప్రబు, అమ్చో రచ్చించువ కెర్తెసా జలె యేసుక్రీస్తుచి దయతె ఇండ, జోచి గ్యాసుమ్ పోసన, ఆత్మక తుమ్ వడ్డె, అప్పె, కి, జా ఆకర్ దీసి ఎద కి కెయ్క తెయ్క కి జోక జోబర! ఆమేన్.

† 3:10 3:10 దీనయ్లిసి 8:7, 21:1, మత్తయ్ 5:18, 24:35, మార్కు 13:31, లూకా 21:33, యోహాను రెగిడ్లి ఏక్ నంబర్ ఉత్తమ్ 2:17. ‡ 3:12 3:12 దెన్సొలోనికలక రెగిడ్లి 1 నంబర్ ఉత్తమ్ 1:10, రోమియల్ 8:19-25, కొరింథిల్క రెగిడ్లి 1 నంబర్ ఉత్తమ్ 1:7, గలతీయల్ 5:5, పిలిప్పీయల్ 3:20, ఎఫ్సియల్ 9:28. § 3:12 3:12 “జెవన్” మెన ప్రార్తన కెరుక జయెదె, మత్తయ్ 6:10, చి

‘ఒండి లోకుమ్తె నుబుమ్ కబుర్ నూనయ్ జలె జా దీసి జెయెదె’ మెన కేనె డీన్యయ్ మెలె, మత్తయ్ 24:14తె. * 3:13 3:13 దీనయ్లిసి 21:1. † 3:15 3:15 నంబర్ కోడుచి ఎట్టెచి కోడు దెక. రోమియల్ 2:4, చి దీనయ్లిసి 2:21 కి దెక.

యోహాను రెగిడ్లి మొదొల్చి ఉత్త్రుమ్ బారిక్ జలో యోహాను రెగిడ్లి మొదొల్చి ఉత్త్రుమ్

1 మొదొల్ తెంతో తిలిసి, అమ్ సూన్లిసి, అమ్చ సొంత అంకివో దెకిలిసి, దెక సొంత అత్తో చడ్లిసి చి రిసా తుమ్క నూనయతనుమ్, రెగిత్తునుమ్.* మెలె, †ఎత్తిక దొర్కు జలి జీవ్ జలిసి, దొర్కు జలి జీవ్ జోతె దొర్కు జతినచి రిసాచి దేముడుచి కోడు జలి జీవ్ దెతి దేముడుచి కోడుతె తిలిన్చి రిసా రెగిత్తునుమ్.

2 క్రీస్తు జలో దెకయ జలి జీవుక †ఈంజ లోకుమతె జో జెర్మున్ జా అయలిన జలిన్ తెన్ అమ్క రుజ్జు జా అస్సె. అమ్ దెకిలమ్, సాచి జా సంగితనుమ్, చి జో 'ఎత్తిచి కంట అగ్గె తెంతో దేముడు తెన్ తిలి కెయిడ తెయిడ తాఁ గెతి జిప్ప, చి జో ఈంజ లోకుమతె జెర్మున్ జా అమ్క డీన అస్సె' మెన ఒప్పన, తుమ్క నూనయతనుమ్.

3 అమ్ దెకిలిసి, అమ్ సూన్లిసి కిచ్చొక తుమ్కయ నూనయతనుమ్ రెగిత్తునుమ్ మెలె, తుమ్క ప్రబు దెతి రచ్చన, జో దెతి నర్చచి వాటతె అమ్చి తెన్ బెదుత్. అమ్చి తెన్ తుమ్చి తెన్ బెదితినచి కట్టు దేముడు అబ్బాన్ తెన్ చి జోచొ పుత్తున్ జలో యేసుక్రీస్తు తెన్ అమ్క బెదవ అస్సె.

4 అమ్చి నర్చసంతోనుమ్ పూర్తి జప్పన మెనయ ఈంజ ఉత్త్రుమ్ రెగిడ్తునుమ్.

దేముడుచి ఉజిడతె ఇండ

5 ప్రబుతె నూన తుమ్కయ అమ్ నూనయతి కబుర్ కిచ్చొ మెలె, దేముడు †ఉజిడి జా అస్సె, చి జోతె కిచ్చొ అందర్ నాయ్.

6 జో తెన్ బెద జో తెన్ ఇండితనుమ్ మెనంతనుమ్, గని * అందర్బుద్ది తెన్ ఇండితనుమ్ జలె, అబ్దుమ్చ జా సత్తిమ్ ఇండుమ్ నాయ్.

7 గని, జో కిసి ఉజిడి అస్సె గే, అమ్ కి దస్సి †ఉజిడ్ బుద్ది తెన్ ఇండితనుమ్ జలె, ఎక్కిలో తెన్ ఎక్కిలో బెద ఎక్కి కట్టు తెన్ ఇండితనుమ్, చి జోచొ పుత్తున్ యేసు †నిలువతె జో మొర అర్పితుమ్ జలిన్చి జోచి నూఁయ జలి లోయి అమ్చి పాపుమ్ ఎత్తి పుంచ అమ్క నుద్ది కెర్తె అస్సె.

పాపుమ్ ఒప్పనతినచి రిసా

8 'అమ్క పాపుమ్ నాయ్' మెన అమ్ ఏక్ వేల సంగనై, అమ్క ఆవి మోసిమ్ కెరంతనుమ్, సత్తిమ్ అమ్చి పెట్టి నాయ్.

9 గని అమ్ కెర్లె పాపల్ దేముడుచి మొక్కి అమ్ ఒప్పనై, జో నిదానుమ్ సత్తిమ్ కెర్తెసా, చి అమ్చి పాపుమ్ చెమించుప కెర అమ్ పాపుమ్ తెన్ నే తతి రెతి జో అమ్క నుబ్దుమ్ కెరెద.

10 అమ్ కెర్లె పాపుమ్క 'పాపుమ్ కెరమ్ నాయ్' మెన అమ్ సంగిలె, జోకయ 'అబ్దుమ్చొ' మెన సంగిల్ రెతి జతనుమ్, చి జోచొ కోడు అమ్చి పెట్టి నాయ్, 'పాపుమ్ నుదల్' మెన జో అమ్క సంగిల్ కికోడు ఒప్పనుమ్ నాయ్.

2

పాపుమ్ కెరుక పోన

* 1:1 1:1 నెంజలె, 'మెలె, దొర్కు జలో జీవ్ తిలి దొర్కు జలి జీవ్ దెతి కోడు జలో యేసుక్రీస్తుచి రిసా రెగిడ్తునుమ్'. యోహాను 1:1-4, 14 దెక. † 1:1 1:1 యోహాను 1:4, బారికుల్ 5:20 దెక. ‡ 1:2 1:2 యోహాను 1:14. § 1:5 1:5 యోహాను 1:4, 5, 9, 14, 8:12, 9:5, 12:46, యాకోబు 1:17 దెక. * 1:6 1:6 యోహాను 3:19, 20, 11:9-10, 12:35, కొరింథిల్ రెగిడ్లి 2 నంబర్ ఉత్త్రుమ్ 6:14. † 1:7 1:7 మత్తయి 5:14, 16, యోహాను 3:21, 12:36, బారికుల్ 13:47, రోమయల్ 13:12, ఎవెను 5:8, దెస్సలొనీకుల్ రెగిడ్లి 1 నంబర్ ఉత్త్రుమ్ 5:5 దెక. ‡ 1:7 1:7 కొలోస్సియల్ 1:20, 2:14, పేతురుక రెగిడ్లి 1 నంబర్ ఉత్త్రుమ్ 2:24, మత్తయి 27:32-54, మార్కు 15:21-39, లూకా 23:26-48, యోహాను 19:17-37 దెక. § 1:10 1:10 రోమయల్ 3:10, 23, 5:12.

1 అంచ ప్రేమ తిల పుత్రులు, తుమ్క 'పాపుమ్ కెర్లు నాయ్' మెనయ్ తుమ్క ఆవ్ ఈంజ రెగిడ్డసి. గని ఏక వేల అమ్ కో పాపుమ్ కెర్లె, ఎత్తిక అబ్బొ జలో దేముడు లోకుమ్ ఎత్తిచ మాన్యుల్ తీర్పు కెర్లెనె, అమ్క ఎక్కిలో తోడే సంగితోసా అస్సె. పూర్తి పున్నిమ్ తిలో యేనుక్కిన్.

2 అమ్ కెర్లె పాపల్ గెచ్చయతి *బలి జో జా అస్సె. ఎక్కి అమ్మి కెర్లె పాపల్ మెన నాయ్, గని ఒండి లోకుమ్చ మాన్యుల్ కెర్లె పాపల్ గెచ్చయతోసా జో జా అస్సె.

3 'జోక అమ్ జానుమ్' మెన అమ్ కిసి జాన దయిరిమ్ తంక జయెదె మెలె, జోచ ఆగ్నల్ రితి ఇండితనుమ్ జలెకయ్.

4 'జోక జాని' మెన కో జలెకు సంగితయ్ గని జోచ ఆగ్నల్ నే నూన్సి రితి జా కెర్లయ్ నాయ్ జలె, జో మాన్యు అబద్దుమ్చో, చి జోచి పెట్టి సత్తిమ్ నాయ్.

5 గని, ప్రబుచి కోడు కో కెర్లయ్ గే, జోచి పెట్టి దేముడుచి ఉప్పిరచి ప్రేమ పూర్తి జా అస్సె. జలె, 'దేముడుచి రచ్చనచి తెడి అస్సుమ్' మెన అమ్ కిసి పూర్తి దయిరిమ్ జంక జయెదె మెలె,

6 'జోచి తెడి అస్సుమ్. జో తెన్ బెద అస్సుమ్. జోచి జీవక జితనుమ్' మెన సంగనై, యేనుక్కిన్యూ ఇండిలి రితి అమ్ కి ఇండుకయ్.

ఎక్కిలోక ఎక్కిలో ప్రేమ కెర

7 ప్రేమ తిల గోతునుదల్, తుమ్క ఆవ్ రెగిడ్డిసి నోచి ఆగ్న నెంజె, గని మొదోల్ తెంతో తుమ్క దోర్కు జలి ఆగ్న. అగ్గె తెంతో చి జా ఆగ్న తుమ్ నూన్సి కోడు.

8 జలెకి, యేనుక్కిన్యూ దిలి †నోచి ఆగ్న తుమ్క ఆవ్ రెగిడ్డిసి. తుమ్ ఎక్కిలోక ఎక్కిలో ప్రేమ కెరకయ్. ఈంజ ఆగ్న జో యేనుక్కిన్యూచి తెడి నెరవెర్పువ జతయ్, తుమ్చి తెడి కి నెరవెర్పువ జతయ్. కిసి మెలె, అందర్ కేడ గెతె అస్సె, చి నిజమ్చి ఉజడి అప్పె కి లగుక దెర అస్సె.

9 'ఉజడిచి తెడి అస్సె' మెన కో సంగనై కి జోచో కేన్ బావోక జో విరోదుమ్ అస్సె జలె, జో అప్పెక అందర్చి తెడి అస్సె.

10 జోవయించ బాపుడ్లు జలె రిత అన్నె మాన్యుల్ కో ప్రేమ కెర్లయ్ గే, జోయ్యి ఉజడిచి తెడి జితయ్, చి ఈంజ ఉజడితె కక్క తప్పి కెరయ్ తిసి కిచ్చో కి తయ్ నాయ్.

11 గని, బావో జలో అన్నె కేన్ మాన్యుక కో విరోదుమ్ కెర్లయ్ గే, అందర్చి తెడి అస్సె. అందర్చి తెడి ఇండితయ్, చి జో కేన్ గెతయ్ గే జో నేనె. కిచ్చొక మెలె, అందర్ జోక గుడ్డి కెర అస్సె.

12 ప్రేమ తిల బోదల్, తుమ్క కిచ్చొక రెగిడ్డిసి మెలె, జో యేనుక్కిన్యూచి నావ్చి రిసా జోచి నావ్చి తెడి తుమ్ కెర్లె పాపల్ చెమించువ జా అస్సె.

13 తుమ్ అబ్బుదింసి మొదోల్ తెంతో జోక తుమ్ జాన్యుచి రిసా తుమ్క రెగిత్తసి. తుమ్ ఉబెడల్, పాపుమ్ కెరయ్తో సయ్తానచి ఉప్పిరి తుమ్ జీన అస్సున్చి రిసా తుమ్క రెగిత్తసి. తుమ్ బాలబోదల్, ఎత్తిక అబ్బొ జలో దేముడుక తుమ్ జాన్యుచి రిసా తుమ్క రెగిత్తసి.

14 అబ్బుదింసిక, తుమ్ మొదోల్ తెంతోచొక తుమ్ జోక జాన్యుచి రిసా తుమ్క రెగిత్తసి. ఉబెడల్, తుమ్ ఆత్తుతె డిట్టుమ్ జా అస్సున్, చి దేముడుచి కోడు తుమ్చి పెట్టి అస్సె, తుమ్చి పెట్టి కామ్ కెర్లయ్, చి సయ్తానుక తుమ్ జీన అస్సున్చి రిసా తుమ్క రెగిత్తసి.

15 ఈంజ లోకుమ్క చి ఈంజ లోకుమ్చి కిచ్చొ కి తుమ్ ప్రేమ జా నాయ్. ఈంజ లోకుమ్చి కో ప్రేమ అస్సి గే, ఎత్తిక అబ్బొ జలో దేముడుచి ఉప్పిరచి ప్రేమ జోచి పెట్టి నాయ్.

16 కిచ్చొక మెలె, ఈంజ లోకుమ్తె తిలిన్ ఎత్తి, ఆగ్ ఆన జతిసి, అంకివో ఆన జతిసి, ఆన్సిచి గవురుమ్ కి, ఎత్తిక అబ్బొ జలో దేముడుచి తెంతో చి బుద్ది నెంజె, గని ఈంజయ్ లోకుమ్చి బుద్దిచి, జా.

17 అస్సె, ఈంజ లోకుమ్, ఈంజ లోకుమ్చి ఆన్సిచి ఉప్పిరి ఆన జతిసి ఎత్తి కేడయ్ గెతిసి, గని దేముడుచి ఇస్టుమ్ రితి కో ఇండుల గే, జెచ్చి కెయ్చ తేయ్చ తా గెచ్చుల.

క్రిస్తుక విరోదుమ్ తిలోసా

* 2:22:2 1:7 చి ఎట్టెచి చి కోడు దెక. † 2:6:2 యోహాను 15:3-10 దెక. ‡ 2:8:2 యోహాను 13:34 చి మత్తయి 22:37-40.

18 ప్రేమ తిల పుత్రర్లు, ఆకర్చి గడియ, ఈంజ. క్రీస్తుచి ఉప్పిరి విరోదుమ్ తిలోసా బార్ జయదె మెన నూన అన్నుగ, గెద. దస్సి, అప్పె క్రీస్తుచి ఉప్పిరి విరోదుమ్ జలన ఒగ్గరజన్ బార్ జా అస్తి. జాకయ్, ఇన్నెక 'ఆకర్చి గడియ ఈంజ' మెన జానుమ్.

19 'జోచి ఉప్పిరి జేవ్ విరోదుమ్ జలన అమచితె తెంతో బార్ జా గెల' మెనుక జయదె, గని జోవయింక 'అమచి తెన్ ఎక్కి జా తిల' మెనుక నెంజె. కిచ్చొక మెలె, అమచి తెన్ ఎక్కి జత జలె, అమచి తెన్ తా గెత. గని నాయ్, బార్ జా ముల దిల, చి అమచి తెన్ ఎక్కి నెంజెతి మెన రుజ్జు డీస్తయ్. జేవ్ ముల్లిన్ తెన్ జా రుజ్జు డీసుక మెన నెలవ్ తిలి.

20 తూమ్, మాత్తుమ్, పరలోకుమచి సుద్ది తిలోసా జోచి ఆత్మక తుమ్క బోడి ఉప్పిర్ సువిల్ రితి జా, 'అంచయ్' మెలి రితి తుమ్క జోచి గుర్తు కెర అస్సె. జాకయ్, తుమ్ జోచయ్ జలన ఎత్కిజన్ సత్తిమ్ జాన్సు.

21 జలె, తుమ్క 'సత్తిమ్ నేన్తి' మెన రెగ్గి నాయ్, గని సత్తిమ్ జాన్సుచి రిసాయి రెగిడ్తసి. కేన్ అబద్దుమ్ తిలె, సత్తిమ్ తెంతో జయె నాయ్ మెన కి జాన్సు.

22 జలె, కొన్నో జో అబద్దుమ్ జతోసా జయదె మెలె, యేసుక 'జోచి రాజిమతె మాన్సుల్క బెదయ్తో రచ్చించువ కెర్తొసా జతి దేముడు తెద్రయ్లో క్రీస్తు జో నెంజె' మెన సంగితోసా సికడ్తసా. క్రీస్తుచో దేముడు అబ్బొనక 'అబ్బొన నెంజె', క్రీస్తు పుత్తునక 'దేముడుచో పుత్తున నెంజె' మెన కో సంగితయ్ సికడ్తయ్ గే, జోయ్యి క్రీస్తుచి విరోదుమ్ జలోసా.

23 క్రీస్తు పుత్తునక 'దేముడుచో పుత్తున నెంజె' మెన కో సంగితయ్ సికడ్తయ్, జోక ఎత్కిక అబ్బొ జలో జో దేముడుచో మాన్సు నెంజె, జో మాన్సుచి వెట్టి నాయ్. క్రీస్తు పుత్తునక 'దేముడుచో పుత్తున నిజుమి జోయ్యి జయదె' మెన కో * ఒప్పన్తయ్ గే, దేముడు అబ్బొనచో మాన్సుకి జో జా అస్సె, జోవయించి వెట్టి ఎత్కిక అబ్బొ జలో దేముడు అస్సె.

24 క్రీస్తుచి రిసా తుమ్ మొదొల్ తెంతో సూన్లిసి తుమ్చి పెట్టి తా గెన్సు. తుమ్ మొదొల్ తెంతో సూన్లిసి తుమ్చి పెట్టి తా గెలె, కామ్ కెర్తె తిలె జలె, దేముడు పుత్తునచి తెడి కి దేముడు అబ్బొనచి తెడి కి తా గెతె, జోచి తెన్ † ఇండితె తస్సె. ‡

25 జోచి రాజిమతె అప్పె కి బెదితి, పరలోకుమతె కెయక తెయక జతి చెంగిల్ తతి వాట అమ్క తుమ్క జో ప్రమానుమ్ సంగిలిసి కోడు.

26 తుమ్క మోసిమ్ కెరుక ఉచర్తనచి రిసా తుమ్క ఈంజ రెగ్గిత్తసి.

27 గని ప్రబు జోచి ఆత్మ తేల్ తుమ్క బోడి ఉప్పిర్ సువిల్ రితి జలి గుర్తు తుమ్చి పెట్టి తత్తయ్ కామ్ కెర్తయ్. మెలె, జోచి ఆత్మ తుమ్చి పెట్టి తత్తయ్ తుమ్క సికడ్తయ్, చి తుమ్క కో మాన్సు సికడుక నాయ్. జలె, జోచి ఆత్మ తుమ్క కీసి ఎత్కిచి రిసా సికడ్తయ్ గే, చి జోచి ఆత్మ కీసి సత్తిమ్ తా కిచ్చొ అబద్దుమ్ జయె నాయ్ గే, జా ఆత్మ తుమ్క సికడ్డి రిసా, యేసుప్రబుచి తెడి తుమ్ తా జోచి జివ్క జోచి ఆత్మనిక్కిక జో తెన్ ఇండితె.

28 అస్సె, అప్పె, ప్రేమ తిల పుత్రర్లు, 'యేసుప్రబుచి తెడి తుమ్ తా. జోచి జివ్కయ్ జోచి ఆత్మనెక్కిక జయె జో తెన్ ఇండ' మెన అస్సె సంగితసి. ఇసి తా గెలమ్ మెలె, జో అస్సె జతి పొదిక, అన్నె డీస్సి పొదిక అమ్ లాజ్ నే బెట్టి, నే గుంచితె, దయిరిమ్ తెన్ తమ్దె.

29 జో 'పున్నిమచో' మెన జాన్సు జలె, అస్సె కో సత్తిమ్ ఇండితతి గే, జేవ్ కి జోచి ఆత్మ తెన్ జెర్యన్ జా అస్సి మెన తుమ్ జాన.

3

1 ఎత్కిక అబ్బొ జలో దేముడు అమ్క * "అంచయ్ బోదల్, తూమ్" మెన అమ్క నావ్ తియ అమ్క కెర్తి ప్రేమ కెర అస్సె గే తుమ్ ఉచర! జో దస్సి కెర్తికయ్, నిజుమి జోచ బోదల్ జలమ్! దస్సి మెన ఈంజయ్

§ 2:23 2:23 3:23, 4:15, 5:1, 5, 13, 20 దెక. * 2:23 2:23 మత్తయి 10:32-33 చి రోమియల్ 10:9-10 దెక. † 2:24 2:24 2:6 దెక. ‡ 2:24 2:24 యోహాను 15:4-10. * 3:1 3:1 యోహాను 1:12-13.

లోకుమచి బుద్ధిచ మాన్యుల్ కిచ్చొక తుమక చినితి నాయ్ మెలె, †జోకయ్ నేన్తి.

2 ప్రేమ జల గోతుసుదల్, అమ్ అప్పె కి దేముడుచ బోదల్ జా అప్పుమ్. అమ్ తెదొడక కిసి జమ్దె గే అప్పె డిసి నాయ్, గని కిచ్చొ జానుమ్ మెలె, యేసుప్రబు అన్నె డిసిలె, †జోచి రితి పూర్తి జమ్దె. జో కిసి అస్సె గే, తెదొడకయ్ కిచ్చొ అడ్డు నెంతె జోక సొస్టుమ్ దెకుమదె.

3 అన్నె, మదెనె, జోచి ఉప్పిరి కో ఇని దయ్రిమ్ తత్తచి జోక రకితతి గే, జో కిసి సుద్ది అస్సె గే, జేవ్ కి జోచి రితి సుద్ది కెరంతి రితి దెకన్తె తవుల.

4 పాపుమ్ కెర్తొ ఎత్తి మాన్యు అగ్గల్ పిట్టయ్తయ్. అగ్గల్ పిట్టయ్తిసి ఎక్కి పాపుమ్.

5 పాపల్ గెచ్చువుక మెన యేసుప్రబు బార్ జలో మెనయ్, పడ్డె జోతె కిచ్చయ్ పాపుమ్ కి నాయ్ మెనయ్, తుమ్ జాన్సు.

6 †జోచి తెడి తతో కేన్ మాన్యు పాపుమ్ ఇండె నాయ్. కో పాపుమ్ ఇండితయ్ గే, ప్రబుక * దెకిలోసా నెంజె, జోక జాన్లోసా నెంజె.

7 ప్రేమ తిల పుత్తర్లు, తుమక కో మోసిమతె నెడవుక తుమ్ వాల్ దాన నాయ్. మెలె, కో సత్తిమ్ ఇండితయ్ గే, జో యేసుచి రితి జోచి తెన్ పున్నిమ్చో జతయ్.

8 కో పాపుమతె ఇండితయ్ గే, నయ్తాన్చో జయెదె. మొదొల్ తెంతో నయ్తాన్ పాపుమ్ కెర్తొసా. నయ్తాన్చ కమొ గెచ్చువ గెలుకయ్ దేముడుచో పుత్తుసి ఈంజ లోకుమతె బార్ జలో.

9 దేముడుచి సుద్ది తిలి అత్తుతె జెర్మన్ జలో కేన్ మాన్యు పాపుమ్ ఇండె నాయ్. దేముడుచి సుద్ది తిలి అత్తు జోచి పెట్టి అస్సె, చి జో జా అత్తుక జెర్మిలి రిసా జో మాన్యు పాపుమ్ ఇండుక నెత్తె.

10 ఇనికయ్ కో దేముడుచ బోదల్ జవుల గే, కో నయ్తాన్చ బోదల్ జవుల గే, చినుక జయెదె. కో సత్తిమ్ ఇండె నాయ్ గే, పడ్డె †జోచ బాపుడ్లు జల అన్నె మాన్యుల్క ప్రేమ దెకి నాయ్ గే, జో దేముడుచి సుద్ది తిలి అత్తు జెర్మన్చో మాన్యు నెంజె.

ఎక్కిలోక ఎక్కిలో ప్రేమ కెరుక

11 తుమ్ మొదొల్ తెంతో సూన్లి కబుర్ ఈంజ, అమ్ ఎక్కిలోక ఎక్కిలో †ప్రేమయ్ తంక.

12 బావొన్క మార్లొ, ఎత్తిక పాపుమ్ సికడ్డె నయ్తాన్ తెన్ బెదిలో కయూనుచి రితి తంక నాయ్. అన్నె, జో కిచ్చొక బావొన్క మార్లొ మెలె, జోచ సొంత కమొ పాపుమ్చ, బావొన్చ కమొ పున్నిమ్చచి రిసా దెకుక నెత్త గొనక మార్లొ.

13 బాపుడ్లు, ఈంజ లోకుమచ మాన్యుల్ తుమచి విరోదుమ్ జలిన్క తుమ్ ఆచారిమ్ జా నాయ్.

14 మొర్కుక ముల జీవ్ జతిన్తె పాచ జా అప్పుమ్ మెన జానుమ్. నంపజల బాపుడ్లుక ప్రేమ కెర్తొనుమచి రిసా జానుమ్. కో ప్రేమ తెన్ తయె నాయ్ గే, మొర్కుతెయ్ అస్సె మెన జానుమ్.

15 జోచో కేన్ బావొచి ఉప్పిరి కో విరోదుమ్ తత్తయ్ గే, అత్తు కెర్తొసా జతయ్, చి అన్నె కిచ్చొ జానుమ్ మెలె, అత్తు కెర్తొ కేన్ మాన్యుచి పెట్టి పరలోకుమతె బెదితి కెయ్క తెయ్క చెంగిల్ తతి జీవ్ నాయ్.

16 కిచ్చొతె సత్తిమచి ప్రేమ చినుక సికిలమ్ మెలె, 'పాపుమ్ తెంతో రచ్చించువ జతు' మెనయ్ యేసుప్రబు అమ్చి రిసా జోచి జీవ్ దా మొర్లన్. అన్నె, అమ్చ బాపుడ్లుక 'చెంగిల్ జతు' మెనయ్ అమ్ కి అమ్చి జీవ్ దిలె, చెంగిలి.

17 గని కక్క, ఈంజయ్ లోకుమచి అస్సి తత్తయ్ గే, చి జోచో కేన్ బాపుడ్డిక కొత్తు, అస్సె మెన దెకిలె, గని జోక కనూర్దుమ్ దెకి నాయ్ గే, దేముడుచి ప్రేమ జో మాన్యుచి పెట్టి అస్సె మెన కిసి సంగుక జయెదె! బెదె నాయ్.

18 ప్రేమ తిల పుత్తర్లు, రిత కొడొకయ్ అమ్ ప్రేమ కెరుక పోన, గని సత్తిమచి ప్రేమ అమ్చి పెట్టి తా, అమ్చ కమొతెయ్ అమ్చి ప్రేమ దెకవుమ, అమ్చ కమొతెయ్ నెరవెర్పువ జవున్!

† 3:1 3:1 యోహాను 1:10-11, 8:54-55, 14:7, 17, 16:2-3, 17:25. ‡ 3:2 3:2 రోమయల్ 8:19, 29, కొరింధిల్క రెగిడ్డి 2 నంబర్ ఉత్తమ 3:18, వెలిప్పయల్ 3:21, కొరింధిల్క రెగిడ్డి 1 నంబర్ ఉత్తమ 15:49-50. § 3:6 3:6 2:6, 24, 27, 28 డక, చి 3:24, 4:13, 16 డక. * 3:6 3:6 యోహాను రెగిడ్డి 3 నంబర్ ఉత్తమ 11 నంబర్ కోడు డక. † 3:10 3:10 2:9, 10 డక. ‡ 3:11 3:11 2:7-11 డక.

19 ఇని, అమచి ప్రేమ అన్నె మాన్యుల్ క తోడె కెర్త కమెతెయి బార్ కెర్తకయ్ 'సత్తిమ్ జలమ్' మెన చినుమదె, చి కెయడ జవున్ కి 'సత్తిమ్ నెంజమ్ సిచ్చ క విలువ జలన అము' మెన లాజ్ జా అమచి పెట్టి బాద సేడ్లె, 'జో దిలి ప్రేమ అమచ కమెతె నెరవెర్చుప కెర్తనుమ్' మెన ఉచార కెరన.

20 ప్రబుచి మొక్కె అన్నె దయిరిమ్ జమదె, 'లాజ్ నెంతె జోచి మొక్కె టీడెక జయెదె' మెన అమచి పెట్టి అన్నె దయిరిమ్ జమదె. కిచ్చొక మెలె, * అమచి పెట్టి తిలిసి చి కంట జో వెల్లొ, చి జో ఎత్తి జానె.

21 జలె, ప్రేమ తిల గోతునుదల్, అమచ కమెచి రిసా అమచి పెట్టి అమ్ లాజ్ జంక నాయ్ జలె, దేముడుచి మొక్కె అమక దయిరిమ్ తయెదె.

22 అన్నె, జోవయిచి మొక్కె అమ్ లాజ్ జంక నాయ్ జలె, జోచి ఇష్టుమ్ రితి ఇండితనుమ్చి రిసా జో మెన్చిత్తి కెర్తనుమ్చి రిసా, జోతె అమ్ కిచ్చొ సంగిలె, జో అమక దొర్కు కెర్తయ్.

23 ఈంజయి జోచి అగ్గు. జోచొ పుత్తున్ జలొ యేసుక్రీస్తుచి నావచి ఉప్పిరి అమక నముకుమ్ తంక, యేసుక † నిజమి దేముడుచొ పుత్తున్, నిజమి జోచొ పుత్తున్ జా జోచి అదికారుమ్ తిలొ తెర్తయిందె మెన జో సంగ తిలొ క్రీస్తు రచ్చించువ కెర్తొసా జొయ్యి మెనయ్ జోచి ఉప్పిరి అమ్ అమచి నముకుమ్ తింక, చి జో క్రీస్తు ప్రబు అమక అడ దిలి రితి, ఎక్కిలొక ఎక్కిలొ అమ్ ప్రేమయ్ కెరక.

24 జోచి అగ్గుల్ రితి ఇండితన ఎత్తిజిన్ † జోచి తెడి తత్తతి, జోచి జీవక జోచి అత్తునెక్కిక జితతి, చి జోవయిచి పెట్టి జొయ్యి తత్తయ్, జోవయింక జొయ్యి తోడు తత్తయ్, అన్నె, అమచి పెట్టి జో తతిసి జో అమక తోడె తతిసి అమ్ కిసి జానుమ్ మెలె, అమచి పెట్టి జో దిలి జోచి అత్తు తతికయ్ జానుమ్.

4

అత్తుల్ కిసి చినుక జయెదె

1 ప్రేమ తిల గోతునుదల్, ఎత్తి అత్తు సంగితిన్క 'దేముడుచి కోడు ఈంజ' మెన నే పరిచ్చ కెరె తుమ్ నంప కెర నాయ్. గని నిజమి దేముడుచ జతతి గే నాయ్ గే, తుమ్క కిచ్చొ కిచ్చొ సికడ్డనచ అత్తుల్ తుమ్ పరిచ్చ కెర. కిచ్చొక మెలె, 'దేముడుచ కబుర్లు అమ్మి సంగితనుమ్' మెన అబద్ధుమ్క ఒగ్గరజిన్ ఈంజ లొకుమెతె బార్ జా అన్నె.

2 దేముడుచి నుద్ది తిలి అత్తు తెంతొ తిలిసి కిసి చినుక జయెదె మెలె, యేసుక 'జో నిజమి క్రీస్తు జలొ దొర్కు జలొ రచ్చించువ కెర్తొసా, నిజమి దేముడుచొ పుత్తున్ జా, జో మాన్యు జా జెర్మన్ జా బార్ జలన్' మెన కేన్ అత్తు ఒప్పునుల గే, జో అత్తు దేముడు తెంతొచ మెనయ్ చినుక జయెదె,

3 అన్నె, యేసుక 'జొయ్యి' మెన కేన్ అత్తుల్ ఒప్పున్తి నాయ్ గే, జేవ్ దేముడు తెంతొచ అత్తుల్ నెంజితి. 'బార్ జయెదె' మెన తుమ్ సూన్లి అత్తు, మెలె, క్రీస్తుచి ఉప్పిరి చిరోదుమ్ జలొసాచి అత్తు, అప్పాయి కి ఈంజ లొకుమెతె బార్ జయె అన్నె.

4 ప్రేమ తిల పుత్తర్లు, తుమ్ దేముడుచ మాన్యుల్ జా అన్నె, జోచి అత్తుతె జెర్మన్ జా అన్నె, చి జేవ్ అబద్ధుమ్చి ఉప్పిరి తుమ్ జిన్ అన్నె. కిసి మెలె, ఈంజ లొకుమెతె తతొసాచి కంట తుమ్చి పెట్టి తతొసా వెల్లొ.

5 జేవ్ అబద్ధుమ్చి అత్తుల్చ మాన్యుల్ ఈంజయి లొకుమ్చ జప్పలచి రిసా, జేవ్ సంగితిసి ఈంజయ్ లొకుమ్చి బుద్దిచ, చి జోచి కోడు ఈంజయి లొకుమ్చ మాన్యుల్ నూన్తతి.

§ 3:19 3:19 డీసయిలి 12:9-11 దెకిలె, నయతాన్ అమక 'ఇసి దన్నె కెర్త' మెన ఎత్తి అదికారుమ్ తిలొ దేముడుచి మొక్కె అమక నేరిమలు వయడుక ఉచర్తయ్, గని క్రీస్తు అమచి పొచ్చయ్ వయ గెచ్చయిలి రిసా ఎత్తి అదికారుమ్ తిలొ దేముడు అమక జా నేరిమ్ వయడె నాయ్, చి నయతాన్ ఒడువ జతయ్.

* 3:20 3:20 కిచ్చొ జవున్ అమ్ కెర్త కామక 'తప్పు కెర్తమ్' నెంజె, 'ఏక్ వేల తప్పు కెర్తమ్. లాజా' మెన అమచి పెట్టి బాద సేడ్లె, జా కామక 'తప్పు గే నెంజె గే' జొయ్యి జానె, చి కిచ్చొక దన్నె కెర్తమ్ గే జొయ్యి జానె, చి తప్పు కెర్త కి జో చెమించువ కెరక జోవయింక సెక్తి అన్నె. చి అమచి ఉప్పిరిచి అమచి అన్యాయుమ్ జో గెచ్చొక తెర. † 3:23 3:23 2:23, 4:15, 5:1, 5, 13 చి 5:20 దెక. ‡ 3:24 3:24 2:6, 24, 27, 28, 4:13, 16, చి యోహాను 15:3-10 దెక.

6 అమ్, మాత్రుమ్, దేముడుచ మాన్సుల్ జా అన్సుమ్, జోచి అత్తు తెన్ జెర్మున్ జా అన్సుమ్, చి జో దేముడుక కో జాన్తి గే, అమ్చి కోడు సూన్తతి, చి కో దేముడుచ మాన్సుల్ జతి నాయ్ గే, అమ్చి కోడు జేవ్ సూన్తి నాయ్. ఇని, జల కేన్ అత్తు నత్తిమ్చి గే కేన్ అత్తు తప్పుచి గే చినుక జయెదె.

దేముడు ప్రేమయ్

7 ప్రేమ తిల గోతుసుదల్, ఎక్కిలోక ఎక్కిలో ప్రేమ కెరుమ్! ప్రేమ దేముడు తెంతో చి, చి కో ప్రేమ ఇండితయ్ గే, జో దేముడుచి సుద్ది తిలి అత్తు తెన్ జెర్మున్ జా అన్సె, చి దేముడుక జో జానె.

8 గని కో ప్రేమ ఇండితి నాయ్ గే, దేముడుక నేన్తి. కిచ్చొక మెలె, దేముడు ప్రేమయి జా అన్సె.

9 కిచ్చొతె దేముడుచి ప్రేమ డీన అమ్క రుజ్జు జలి మెలె, జో దేముడు జోచో సొంత పుత్తున్క ఈంజ లోకుమ్తె తెద్రయ్లన్. జో బలి జలిన్క అమ్చి పాపుమ్ గెచ్చువ పరలోకుమ్తె బెదితి జేవ్ అమ్క దెతి రిసా.

10 ప్రేమ ముక్కిమ్క కిచ్చొతె డీన్యయ్ మెలె, అమ్ దేముడుక కిచ్చొ ప్రేమ కెర్లెన్తె నాయ్, మాన్సుల్చి అమ్చి ప్రేమ కిచ్చొ నెంజె, గని జోయ్యి అమ్క ప్రేమ కెర, అమ్ కెర్లె పాపల్ పుంచెతి అర్పితుమ్ జో జతి రిసా, జోచో పుత్తున్క ఈంజ లోకుమ్తె తెద్రయ్లో.

11 జలె, ప్రేమ తిల గోతుసుదల్, ఎక్కి అదికారుమ్ తిలో దేముడు అమ్క తెద్ది ప్రేమ కెర్లె జలె, అమ్ కి ఎక్కిలోక ఎక్కిలో తెద్ది ప్రేమ కెరుక.

12 కేన్ మాన్సు కెయ్ దేముడుక దెకుక నాయ్. గని అమ్ ఎక్కిలోక ఎక్కిలో ప్రేమ కెర్లెనుమ్ మెలె, దేముడు అమ్చి పెట్టి తత్తయ్, చి అమ్చి తె జోచి ప్రేమ పూర్తి జా నెరవెర్పువ జతయ్, రుజ్జు జతయ్. జోచి ప్రేమక జయ్యి రుజ్జు మాన్సుల్ దెకుక జతయ్.

13* ప్రబుచి తెడి తత్తునుమ్, జోచి జీవ్క జతనుమ్, చి జో అమ్చి పెట్టి తత్తయ్ మెన కీసి జానుమ్ మెలె, జోచి సొంత అత్తు అమ్చి పెట్టి జో దిలిన్చి రిసా.

14 ఈంజ లోకుమ్చ మాన్సుల్క దొర్కు జలో రచ్చించువ కెర్లెసా జో జంక మెన, జోచో పుత్తున్క ఎత్కిక అబ్బొ జలో దేముడు తెద్రవ అన్సె మెన అమ్ దెక కెర సాచి సంగితనుమ్.

15 యేసుక †దేముడుచో పుత్తుసి మెన కో ‡బవునుల గే, జోవయించి పెట్టి దేముడు తత్తయ్, చి జేవ్ దేముడుచి తెడి అన్సి, జోచి జీవ్క జతతి.

16 దస్సి, దేముడు అమ్చి ఉప్పిరి ప్రేమ తిలిసి, అమ్చి ఉప్పిర్చి జోచి ప్రేమ, జానుమ్ నంపజా అన్సుమ్. దేముడు ప్రేమయి, చి కో ప్రేమయ్చి తెడి తత్తయ్ ప్రేమ ఇండితయ్ గే, దేముడుచి తెడి తత్తయ్, జోచి జీవ్కయ్ జతయ్, చి దేముడు జో మాన్సుచి పెట్టి తత్తయ్.

17 కిచ్చొక దేముడుచి ప్రేమ అమ్చి తెన్ కిపూర్తి జా నెరవెర్పువ జంక జోచి నెలవ్ మెలె, అమ్క ఎత్కిజన్క పరిచ్చ కెర్లె వెల్లి దీసికయ్ 'సత్తిమ్ కెర్లెమ్' మెన దయిరిమ్ తత్తు మెనయ్ జో జా నెలవ్ దెతయ్. జా దయిరిమ్ అమ్ కిచ్చొక జంక జయెదె మెలె, జో కీన్ జా అన్సె గే, అమ్ ఈంజయ్ లోకుమ్తె దనయ్ అనుమ్. జోయ్యి కీసి ప్రేమ అన్సె గే, అమ్ కి జోచి ప్రేమక మాన్సుల్క ప్రేమయ్ కెర్లెనుమ్.

18 ప్రేమచి తెడి అమ్ తిలె, ప్రేమ అమ్ ఇండిలె, అమ్చి పెట్టి కిచ్చొ బయిమ్ తయ్ నాయ్. గని ప్రేమ పూర్తి తిలె, జా ప్రేమ బయిమ్ గెచ్చువ గెల్తయ్. బయిమ్ సిచ్చ జతిన్ తెన్ బెదితిసి, 'సిచ్చ జమదె' మెన అమ్ ఉచరె బిందె, చి కో బితయ్ గే, జోచి పెట్టి ప్రేమ పూర్తి జంక నెరవెర్పువ జంక నేతయ్ మెన రుజ్జు జతయ్.

19 దేముడు తొలితో అమ్కయ్ ప్రేమ కెర్లెచి రిసాయి అమ్ జోక ప్రేమ కెర్లెనుమ్.

20 జలె, దేముడుక అవ్ ప్రేమ కెర్లెన్ మెన కో సంగితయ్ గే, జో జోచి బాపుడ్డిక ప్రేమ కెరె నాయ్ గే, జో అబద్దుమ్చో. కిచ్చొక మెలె, కేన్ జవున్ దెకిలో బావొక కో ప్రేమ కెర్లెయ్ నాయ్ గే, జో నే దెకిలో దేముడుక కీసి ప్రేమ కెరెదె! నెత్తి!

* 4:13 4:13 2:6, 24, 27, 28 చి 3:6, 24 చి 4:16 దెక. † 4:15 4:15 2:23, 3:23, 5:1, 5, 13 చి 5:20 దెక. ‡ 4:15 4:15 మత్తయ్ 10:32-33 చి రోమియల్ 10:9-10 దెక. § 4:17 4:17 12 నెంబర్ కోడు దెక.

21 అన్నె, జో కిచ్చొ ఆగ్గు అమ్క దా అన్నె మెలె, కో దేముడుక ప్రేమ అన్తి గే, జోచ బాపుడ్నివొక ప్రేమ కెరుకయ్.

5

క్రీస్తుచి ఉప్పిరచి నముకుమచి ప్రేమ

1 యేసుక *తెద్రయిందె మెన దేముడు పూర్గుమ్ సంగిలో దొర్కు జలో రచ్చించుప కెర్తొసా జలో క్రీస్తు జొయ్యి మెన సంప కెర్తొ ఎత్తి. మాన్సు దేముడుచొ బోద జయెదె, అన్నె, కో అబ్బొన్క ప్రేమ కెర్తయ్ గే, జో అబ్బొన్చ అన్నె బోదల్క కి ప్రేమయ్ కెర్తయ్.

2 దేముడుచ బోదల్క అమ్ ప్రేమ కెర్తొసి కిచ్చొ రుజ్జుతె డీస్తయ్ మెలె, దేముడుకయ్ అమ్ ప్రేమ తా, అమ్ జోచి ఆగ్గుల్ రితి † ఇండితిన్తె,

3 దేముడుచి ప్రేమ అమ్చి పెట్టి తిలె, జోచ ఆగ్గుల్ రితి ఇండుమదె. అన్నె, జోచ ఆగ్గుల్ జాడు వయడ్డన నెంజితి.

4 కిచ్చొక మెలె, దేముడుచి సుద్ది తిలి ఆత్మతె జెర్కున్ కో జా తవుల గే, ఈంజ లోకుమ్చ ‡బుద్దివొచి ఉప్పిరి జీన్తతి. ఈంజయ్ లోకుమ్చ బుద్దివొచి ఉప్పిరి జీన్తినె కిచ్చొ మెలె, యేసుచి ఉప్పిరచి అమ్చి నముకుమ్.

5 మెలె, కో ఈంజ లోకుమ్చ బుద్దివొచి ఉప్పిరి జీన్తతి మెలె, యేసుకయ్ 'జొయ్యి దేముడుచొ పుత్తుసి' మెన కో సంపజా అన్తి గే, జెఱ్యె.

6 పాని వాట్ లొయి వాట్ గెచ్చు అన్నె బార్ జా జో దేముడుచొ పుత్తున్ జలిన్ రుజ్జు జలోసా, జో రచ్చించుప కెర్తొసా జలో, యేసుక్రీస్తు. జో ఎక్కి పాని వాట్ గెచ్చు బార్ జయె నాయ్ గని పాని తెన్ లొయి తెన్ బార్ జా అన్నె. అన్నె ఈంజ చి రిసా దేముడుచి సుద్ది తిలి ఆత్మ సాచి సంగితయ్, కిచ్చొక మెలె దేముడుచి సుద్ది తిలి ఆత్మ సత్తిమ్ జా అన్నె.

7 అన్నె, యేసుక 'దేముడుచొ పుత్తున్ జొయ్యి', 'దేముడు తెద్రయ్లో రచ్చించుప కెర్తొసా జలో క్రీస్తు జొయ్యి' మెన పానితెచి సాచిచి జోవయించి నూయి జలి లొయిచి సాచి తెన్ బెదితి సాచి సంగితొసా కొన్నె మెలె, దేముడుచి సుద్ది తిలి ఆత్మయి. జోవయించి ఆత్మచి సాచి ముక్కిమ్. కిచ్చొక మెలె, జోవయించి ఆత్మ సత్తిమ్చి.

8 జోక, †దొర్కు జల తిన్ని సాచుల్ అన్నె, చి జోవయించి సాచి బెదితయ్, కిచ్చొ కిచ్చొ సాచుల్ మెలె, జా పాని, జా లొయి, చి దేముడుచి సుద్ది తిలి ఆత్మ.

9 అమ్ మాన్సుల్చి సాచి సంప కెర్తొనుమ్ జలె, దేముడుచి సాచి అన్నెయ్ సంపజతిసి. అన్నె, దేముడుచి సాచి కిచ్చొ మెలె, యేసుక 'ఈంజొయి అంచొ పుత్తు' మెన జొయ్యి సాచి సంగ అన్నె.

10 పడ్డొ, దేముడుచొ పుత్తున్కయ్ 'నిజమి జోచొ పుత్తున్' మెన కో సంపజవుల గే, జోవయించి పెట్టి దేముడుచి సాచి అన్నె. 'ఈంజొ అంచొ పుత్తు' మెన దేముడు సాచి సంగిలినచ ఉప్పిరి కో నముకుమ్ తితి నాయ్ గే, జోచి కోడు సంపజతి నాయ్ చి రిసా, జోక 'అబద్దుమచొ' మెన సంగిల్ రితి జతయ్.

11 జలె, సత్తిమ్చి సాచి కిచ్చొ మెలె, వరలోకుమ్చి రాజొమ్తె జతి వాట, జాక దొర్కు జలి జివు, దేముడు అమ్క దా అన్నె, చి ఈంజ జివ్ కచి తెడి అన్నె, కత్తెయ్ దొర్కు జతయ్ మెలె, జోచొ పుత్తున్చి తెడి అన్నె, జో తెయి దొర్కు జతయ్.

12 కచి పెట్టి దేముడుచొ పుత్తున్ అన్నె గే, జోకయ్ జా జివు. దేముడుచొ పుత్తున్ కచి పెట్టి తయ్ నాయ్ గే, వరలోకుమ్తె గతి వాట, జాక దొర్కు జలి జివు, జోకయ్ దొర్కు జయె నాయ్.

13 దేముడుచొ పుత్తున్చి నావ్క 'జయ్యి. జొయ్యి క్రీస్తు రచ్చించుప కెర్తొసా' మెన తుమ్ జోక సంపజలసక 'వరలోకుమ్తె గతి కెయ్క తెయ్క తాఁ గతి వాటచి జాక దొర్కు జలి జివు దొర్కు జలిన్చి రిసా తుమ్క దయ్రిమ్ తప్పన్' మెనయ్ ఈంజ ఆఁవ్ రెగిడ్డన్.

* 5:1 5:1:2,23, 3:23, 4:15, 5:5, 13, 20 దెక. † 5:2 5:2 మెలె, అమ్ కీన కీన మాన్సుల్క ప్రేమ దెకవుక గే జోవయించి ఆగ్గుల్తె, యేసుక్రీస్తుచ కొడతె, మెన తెన్ దేముడు దిలి ఆగ్గుల్ ఎత్తితె జో దెకవ అన్నె. ‡ 5:4 5:4 కీన బుద్దివొ మెలె, గొగల్, అసల్, చొరబుద్ది, కోపుమ్బుద్ది, దసచ ఎత్తి. § 5:8 5:8 యాదుల్చ ఆగ్గుల్ తెన్ 'దొగల తీగ్గ సాచుల్ సంగిలిన బెదిత సత్తిమ్' మెంకతి.

14 అన్నె, జోచి తెడి అమ్మక అన్నెయ్ కిచ్చొ దయిరిమ్ మెలె, జోచి ఇస్టుమ్ తెన్ బెదితిసి కిచ్చొ జవున్ జోతె అమ్ నజిలె, జో నూన్తయ్.

15 అన్నె, 'అమ్ కిచ్చొ నజిలె జో నూన్తయ్' మెన జానుమ్ జలె, జోతె అమ్ సంగిలిన్క 'దొర్కు జలి' మెన ఒప్పన్లి రితి, 'కచితుమ్ దొర్కు జయెదె' మెన జానుమ్.

16 సంపజలో కేన్ జవున్ బావొ మొర్నొ ఆన్తి పాపుమ్ కెర్లెగిన, అన్నెక్టొ బావొన్ దెకిలె, జా పాపుమ్ జోక మొర్లి సిచ్చ నే ఆన్తి రిత, "జోక చెమించుప కెరు మెన" జో అన్నెక్టొ దేముడుక ప్రార్దన కెర్లె, చి కచి పాపుమ్ మొర్లి సిచ్చ ఆన్తిన్ నెంజె జలె, జో అన్నెక్టొ ప్రార్దన కెర్లి రిసా, జో పాపుమ్ కెర్లొసాక దేముడు జీవ్ దెయెదె. గని మొర్లి సిచ్చ ఆన్తి పాపుమ్ కి తయెదె. కో దస్సి పాపుమ్ కెర్లె, జోచి రిసా ప్రార్దన కెర మెని నాయ్.

17 గార్చి కిచ్చొ జలెకి పాపుమీ, గని సగుమ్ రగల్ పాపుమ్ మొర్లి సిచ్చ ఆన్తన నెంజెతి.

18 'కో దేముడుచి తెన్ జెర్మున్ జా అస్తి గే, పాపుమ్తె ఇండితి నాయ్' మెన జానుమ్. దేముడుచి పెట్టిచొ క్రిస్తు దన మాన్సుల్క రకితయ్చి రిసా, పాపుమ్ సికడ్టొ సయ్తాన్ జెవ్వి మాన్సుల్క చడె నాయ్.

19 అమ్మి జలె, 'దేముడుచ బోదల్ జా అస్సుమ్' మెన జానుమ్, అన్నె, అప్పక ఒండి లోకుమ్ జో పాపుమ్ కెరయ్తో సయ్తాన్చి అత్తి అస్సు మెన కి జానుమ్.

20 అన్నెయ్ కిచ్చొ జానుమ్ మెలె, నిజుమ్చొ దేముడుక అమ్ జాన్తి రితి జో దేముడుచొ సొంత పుత్తుసి బార్ జా కెర, జోక చినితి జోక జాన్తి సెక్తి అమ్క దా అస్సె మెన జానుమ్. అన్నె, సత్తిమ్ తిలో దేముడుచి తెడి, జోచొ పుత్తున్ యేసుక్రిస్తుచి తెడి అస్సుమ్. ఈంజొయి నిజుమ్ తిలో ఎక్కిలో దేముడు. పరలోకుమ్తె బెదితి కెయ్చె తెయ్చె చెంగిల్ తతి వాట యేసుక్రిస్తుతెయ్ దొర్కు జతయ్, జోక దొర్కు జలి జీవ్ జొయ్యి.

21 ప్రేమ తిల పుత్తర్లు, బొమ్మల్క జోకర్చిన్క తుమ్ దూరి తా.

యోహాను రెగిడ్డి దొన్నిచి ఉత్త్రమ్ బారిక్ జలో యోహాను రెగిడ్డి దొన్నిచి ఉత్త్రమ్

1 దేముడు నిన్నాన్ని * అమ్మక చి ఆవ్ చి నత్తిమ్ జానతన ఎత్తిజిన నిజామి ప్రేమ కెర్త తుచ బోదల్క ఆవ్ వెల్లో జలోసా రెగిడ్డి ఉత్త్రమ్.

2 కిచ్చొక ఇసి ప్రేమ తెన్ అప్పుమ్ మెలె, దొర్పు జలి †నత్తిమ్ అమ్చి పెట్టి అస్సె, చి కెయిఁక తెఁయిఁక అమ్చి తెన్ తాఁ గెచ్చెది.

3 ఎత్తిక అబ్బొ జలో దేముడు తెంతో చి జో అబ్బొనవొ పుత్తన జలో యేసుక్రీస్తు తెంతో జోచి దయ జోచి కన్యారుమ్ జోచి సేంతుమ్ అమ్చి తుమ్చి తెన్ తయెదె, చి జోచి నత్తిమ్ జోచి ప్రేమ తెన్ తమ్దె.

4 ఎత్తిక అబ్బొ జలో దేముడు దిలి అగ్గు రితి తుచ బోదల్ జల సంబజలనతె నగుమ్జిన నుబుమ్ కబురతె తిలినచి నత్తిమ్ ఎత్తి నదానుమ్ నంప తా, జా నుబుమ్ కబురతె తిలిన తెన్ బెదితి నత్తిమ్ ఇండితతి మెన నూన ఒగ్గర్ నర్త జలయ్.

5 అన్నె, అప్పె, అమ్మ, తుమ్క ఏక్ కోడు బతిమాల్పు జా రెగిడ్డిసి. తుమ్క నొచి అగ్గు రెగిడ్డిసి నెంజె, గని మొదోల్ తెంతో చి అగ్గు ఈంజ. కిచ్చొ మెలె, అమ్ ఎక్కిలోక ఎక్కిలో *ప్రేమయ్ కెరుక.

6 అన్నె, ప్రేమ కిచ్చొ జతయ్ మెలె, ఎత్తిక అబ్బొ జలో దేముడుచ అగ్గుల్ రితి అమ్ ఇండుక. మొదోల్ తెంతో తుమ్ నూన్ అగ్గు కిచ్చొ మెలె, తుమ్ ప్రేమయ్ ఇండుక.

మోసిమ్ బోదచి రిసా జాగర్

7 అన్నె, ఒగ్గర్జిన మోసిమ్ సంగితన ఈంజ లోకుమ్తె బారొ జా బుల్తతి, యేసుక కి'దేముడుచొ పుత్తసి జో, జో దొర్పు జలో రచ్చించువ కర్తొసా జలో క్రీస్తు జా, మాన్పు జా జెర్మన్ జా అస్సె' మెన ఒప్పునుక నెసితన. దన మాన్పుల్ మోసిమ్చ, క్రీస్తుచి ఉప్పిరి విరోదుమ్ జలన.

8 జలె, తుమ్ నెమ నీడ దొర్పు కెర్నన్ బవుమానుమ్ నీ పిట్టవనతి రితి, గని తుమ్చి బవుమానుమ్ పూర్తి దొర్పు కెరంతి రితి జినతి రితి, తుమ్ దెకన.

9 కో పురె గెతి రితి వెల్లో మెనన క్రీస్తుచి బోదనక నిదానుమ్ తయె నాయ్ గే, జో మాన్పు *దేముడుచొ నెంజె. దేముడు అబ్బొన కి జోచి పెట్టి నాయ్. గని, క్రీస్తుచి బోదనకయ్ కో నిదానుమ్ అస్సి గే, అబ్బొన జలో దేముడుచ కి పుత్తన జలో యేసుచ కి జా అస్సి. అబ్బొన కి పుత్తన కి జోచి పెట్టి అస్సె.

10 ఈంజయ్ బోదన నే ఆనతె కో తుమ్తె అయ్లె, గెరి టాన్ దాన నాయ్, జోక జోకర నాయ్.

11 కిచ్చొక మెలె, కో జోక జోకర్తయ్ బెదవంతయ్ గే, జో మాన్పుచి తప్పు కామతె బెదిల్ రితి జతయ్.

12 తుమ్క అన్నె ఒగ్గర్ రెగుడుక జతి, గని క్రామ్మక సిర్రక రెగుడుక నెసి. తుమ్క అమ్క పూర్తి నర్తనంతోనుమ్ కెర్తి రితి తుమ్తె సొంత జా దెకయ లట్టబుక ఇస్టుమ్ జతన.

13 దేముడు నిన్నాన్ని తుచి ఇన్నెచి †బయ్దిచ †బోదల్ రిత జలన తుమ్క జోచి జొబర సంగితతి.

* 1:11:1 'అమ్మ' ఇన్నె సంగిలి, కేన్ జవుని సంగుమ్క టాలి జతయ్ మెన, చి 'తుచ బోదల్' మెన సంగిలి, జా సంగుమ్తెచ మాన్పుల్కయ్ టాలి జతయ్ మెన సంగుమ్జిన్ ఉచ్చర్తతి. † 1:2 1:2 యోహాను 14:6, 16-17 దెకిలి, యేసుయ దొర్పు జలి నత్తిమి, చి జోవయింది పరలోకుమ్చి నుద్ది నత్తిమ్ తిలి ఆత్మ అమ్చి పెట్టి జో దా అస్సె. యోహాను 8:32, 36 కి దెక. పడ్డె, యేసు సంగిలిసి, దేముడు అబ్బొన సంగిలిసి, జోవయింది నుబుమ్ కబుర నత్తిమి; యోహాను 8:45-47, చి యోహాను రెగిడ్డి ఈంజ 2 నంబర్ ఉత్త్రమ్ 9-10, గలతీయల్ 2:5. కొలోస్సియల్ 1:5 కి దెక. ‡ 1:5 1:5 యోహాను రెగిడ్డి 1 నంబర్ ఉత్త్రమ్ 2:8 దెక, చి యోహాను 13:34, చి మత్తయ 22:37-40.

§ 1:7 1:7 యోహాను రెగిడ్డి 1 నంబర్ ఉత్త్రమ్ 2:23, 3:23, 4:15, 5:1, 5, 13, 20 దెక. * 1:9 1:9 యోహాను రెగిడ్డి 1 నంబర్ ఉత్త్రమ్ 2:23, 5:12 దెక. † 1:13 1:13 1 నంబర్ కోడుతె తిలి రితి, 'బేనెద' మెలిన్ ఏక్ వేల అన్నెక్ సంగుమ్క టాలి జతయ్. చి 'బేనెదవ బోదల్' మెన సంగిలి, జా అన్నెక్ సంగుమ్తెచ మాన్పుల్కయ్ టాలి సంగితయ్. ‡ 1:13 1:13 1 నంబర్ కోడుతె తిలి రితి, 'బేనెద' మెలిన్ ఏక్ వేల అన్నెక్ సంగుమ్క టాలి జతయ్. చి 'బేనెదవ బోదల్' మెన సంగిలి, జా అన్నెక్ సంగుమ్తెచ మాన్పుల్కయ్ టాలి సంగితయ్.

యోహాను రెగిడ్లి తిన్నిచి ఉత్త్రమ్ బారిక్ జలో యోహాను రెగిడ్లి తిన్నిచి ఉత్త్రమ్

1 సత్తిమ్క ఆవ్ ప్రేమ తిలో గాయుక ఆవ్ వెల్లో జలోసా రెగిడ్లి ఉత్త్రమ్.

2 ప్రేమ తిలో మింత, తుక చెంగిల్ తవున్, మెన ఆవ్ ప్రార్దన కెర్తసి. తుచి ఆత్మత చెంగిల్ అస్సిన మెన జాని.

3 క్రీసి మెలె, బావుడ్లు జల సగుమ్జన్ అయ్లి పొది, తుయి సత్తిమ్ ఇండితినచి రిసా సాచి సంగిల, చి ఒగ్గర్ సర్దసంతోసుమ్ జలయ్.

4 ఎత్తిచి కంట అంక కిచ్చొ కోడు ఒగ్గర్ సర్ద కెర్తయ్ మెలె, అంచ బోదల్ సత్తిమ్ ఇండితిన ఆవ్ నూన్లె, జయ్యి అంక ఒగ్గర్ సర్దసంతోసుమ్ కెర్తయ్. జాచి కంట అంక జిన్ని సర్ద నాయ్.

5 ప్రేమ తిలో మింత, బావుడ్లుక తుయి కిచ్చొ తోడు కెర్లె, నిదానుమచి కామ్, జా, ముక్కిమ్క వేర తెంతో అయ్లనక, జలె,

6 ఇన్నెచి సంగుమ్చి మొక్క తుచి ప్రేమచి రిసా, ఇన్నె అయ్ల బావుడ్లు సంగ అస్సి. దేముడుచి సేవక బెదితి ప్రేమ తెన్ దన మాన్సుల్క మరియాద దెక జేవ్ గెతి వాటిక సరి జతి తోడ దాయి అన్నె తెర్తయ్లె, చెంగిలి. దస్సి కెర్లె తా.

7 కిచ్చొక మెలె, 'ప్రబుచి సేవకయ్' మెన జేవ్ బార్ జా అస్సి, చి ఎత్తి అదికారుమ్ దేముడుక నంప నే జలసతె కిచ్చొయ్ తోడు నజీతి నాయ్.

8 జాకయ్, అమ్ నంపజలనక కి దన మాన్సుల్క తోడు దెంక చెంగిలి. దస్సి కెర్లె, సత్తిమ్చి రిసాచి జోవయింబి సేవతె అమ్ కి జోవయింతెన్ బెద తమ్దె.

9 తుమ్తెచి సంగుమ్క కిచ్చొగె రెగ్గి అస్సి గని దియెత్తెపె సొంత గవురుమ్ ఉచరన వెల్లో మెనన, అంచి అదికారుమ్క 'అస్సె' మెన ఒప్పనె నాయ్.

10 జాకయ్, ఆవ్ తుమ్తె అయ్లె, జో అంచి రిసా గర్బ కొణ్ణె, ఆరిచ నిందల్చ కొణ్ణె సంగితె తతినచి రిసాచి తీర్పు సంగుమ్దె. జా తప్పుచి కంట అన్నె కిచ్చొ తప్పు జో కెర్తయ్ మెలె, సత్తిమ్చ వేర తెంతోచ బావుడ్లుక మరియాద దెకె నాయ్, చి 'మరియాద దెకుమ్దె' మెన ఇన్లుమ్ జత అన్నె మాన్సుల్క పిట్టవ, సంగుమ్ తెంతో ములయ్తయ్.

11 ప్రేమ తిలో మింత, గర్బిక దెక తుయి సిక్కు నాయ్, గని చెంగిల్చిక దెక దస్సి ఇండు. కో సత్తిమ్ ఇండితయ్ గే, దేముడుచొ మాన్సు జతయ్. కో గర్బి బుద్ది ఇండితయ్ గే, దేముడుక *నే దెకిలోసా మెలి రితి జతయ్.

12 దేమేత్తిచి రిసా ఎత్తిజన్ 'చెంగిలోసా' మెన సాచి సంగితతి, జోచి సత్తిమ్ కి జోచి రిసా సాచి జతయ్. ఆవ్ కి జోచి రిసా 'చెంగిలోసా' మెన సాచి సంగితసి, అన్నె, అంచి సాచిక 'సత్తిమ్చి' మెన తుయి జాన్సి.

13 తుక అన్నె ఒగ్గర్ రెగుడుక జతి, గని పున్తకుమ్చి సిర్త తెన్ రెగుడుక నెసి.

14 బో బేగి తుమ్తె జెంక ఉచర్తసి, చి అయ్లె, ఆవ్ తూయి ఎక్కిలోక ఎక్కిలో దెక సొంత లట్టబుమ్దె.

15 తుక సేంతుమ్ తవున్. తుచ అమ్చ గోతుసుదల్ తుక జోవయింబి జోబర సంగితతి. ఒత్తచ గోతుసుదల్ ఎత్తిజన్క అంచి జోబర సంగు.

* 1:11 1:11 యోహాను రెగిడ్లి 1 నంబర్ ఉత్త్రమ్ 3:6 దెక.

యూదా రెగిడ్లి ఉత్త్రమ్ బారిక్ జలో యూదా రెగిడ్లి ఉత్త్రమ్

1 దేముడు అబ్బొనచి తెడి ప్రేమ తిల, *యేసుక్రీస్తుచి రచ్చనచి తెడి తిల, జేవ్ నిసాన బుక్కార్లనక యేసుక్రీస్తుక †సేవ కెర్తొసా జలో, యాకోబుచో బావొన్ జలో, యూదా రెగిడ్లి ఉత్త్రమ్.

2 ప్రబుచి కన్కారుమ్, సేంతుమ్చి ప్రేమ అన్నె తుమ్క బగ్గర్ కలుగు జప్పన్!

దేముడుక విరోదుమ్ జలినచి రిసా జాగర్ల తత్తి కోడు

3 ప్రేమ తిల బావుడ్లు, అంచి తుమ్చి రచ్చనచి రిసా తుమ్క ఉత్త్రమ్ రెగుడుక ఒగ్గర్ ఇస్టుమ్ జలయ్. గని, కిచ్చొచి రిసా ముక్కిమ్క అప్పాయి రెగుడుక మెన అంక జానయ్ జలి మెలె, ఆము తూమ్ ప్రబుచి సుద్ది జా జోచయ్ జల మాన్సుల్క ముక్కిమ్క దిలి సుబుమ్ కబుర్ మొత్తుమ్చి నముకుమ్ పాడ్ నే జతి రితి తుమ్ దెక, వేర మాన్సుల్ వేర సికడ్లె ప్రబు అమ్క దిలి జా బోదచి రిసా చెంగిల జబాబుల్ తుమ్ దాన.

4 కిచ్చొక మెలె, “ఈంజ బోదనక జేవ్ నిదానుమ్ నెంజలి రిసా సిచ్చ జతు” మెన దేముడు ఒగ్గర్ అగ్గె తెంతో రెగిడ్లన సగుమ్జన్ తుమ్చి సంగుమ్తె ఉప్రమెన్నుక లుంకవోరు †బెద అన్తి. దేముడుక నేన్ల జోవయింబి ఉప్పిరి విరోదుమ్ జల జేవ్ మాన్సుల్ కిచ్చొ కెర్తతి మెలె, †దేముడు అమ్క అగ్గుల్ రితి తెంతో విడ్డల్ కెర అన్సె, చి ఆమ్ కిసి ఇండిలెకి బాద నాయ్. అమ్ కిచ్చొ కెర్లె కి, జోచి దయక అమ్క రచ్చించువ కెరెదె మెన సంగ, దేముడుచి కోడు మార్పువ కెర్తతి, చి జోవయింబి అగ్గెవ అసల్ ముద్దొ నే కెరంతె “దస్సి ముద్దొ కెరనుక నాయ్” మెన అన్నె మాన్సుల్క కి సికడ్లె, చి అమ్చో ఎత్తి. ఎజ్జిమాని, ఎక్కి ప్రబు జలో యేసుక్రీస్తుక *దేముడు నెంజె మెన సంగిల్ రితి జా, జోచి మరియద కడ్డి రితి ఇండితతి.

5 జలి, తుమ్క “కెయెక పచ్చుత్ నాయ్” మెన తుమ్క అమ్ అగ్గె పూర్తి నూనయలమ్. తెదొడి నూనతదు జలె, జతి. గని తుమ్క అన్నె ఉచార కెరయిందె. ఐగుప్తు దేసిమ్ తెంతో అమ్చ ప్రజల్ జల ఇస్రాయేలుల్క రచ్చించువ కెర్లొ దేముడు పడ్డొ జేవ్ ప్రజల్తెవ జోవయింక నంపనెంజలనక †మొర్తి సిచ్చ దిలన్.

6 అన్నె, జోవయింక దిలి కామ్, జోవయింక దిలి టాన్ ములిల †దేముడుచి దూతల్క దేముడు కిచ్చొ సిచ్చ దా అన్నె మెలె, ఎత్తిక తీర్పు కెర్లె ఆకర్ దీన్క, ముక్కిమ్ జలి దీన్క జేవ్ సిచ్చ జతె ఎదక, ఎట్టొచి కంట ఎట్టొ తిలినచి అందర్తె జేవ్ రకితి రితి, కో కెయెక యిప్పుక నెతిర గొల్పుల్ తెన్ జో బంద దా అన్నె.

7 దస్సియి కి, అమ్క అన్నెక్ కామ్ జాగర్ల దెకయ్తయ్. కేన్ మెలె, †సాదోమ చి గొమొరా పట్టల్ చి జోవయింబి సుట్టునంతచ పట్టల్చ మాన్సుల్ కి దేముడు సెలవ్ నే దిలి రితి వేరయ్ అసల్ జా, మున్సుబోదల్ తెన్ మున్సుబోదల్ సాని జతె తిల. అమ్క జాగర్ల దెకయ్తి రిసా జోవయింబి సిచ్చ కిచ్చొ మెలె, అగితె సిచ్చ జలె, చి కెయెక నే విజతి అగితె జేవ్ సిచ్చ జవులె.

* 1:1 1:1 నెంజలి, యేసుక్రీస్తుచి సేవ కెర్తొ మెన తుమ్ నాననుమ్ నే జతి రితి ఎత్తి, అదికారుమ్ తిలో దేముడు దెక తిల,.... † 1:1 1:1 నెంజలి గొతిమాన్సు నెంజలి గొత్తి సుదొ. † 1:4 1:4 పేతురు రెగిడ్లి 2 నంబర్ ఉత్త్రమ్ 2:1 చి కోడుతె ‘దస్సి జప్పు జయెదె’ మెన సంగిలన్. ఇన్నె, యూదా రెగిడ్లిన్తె ‘జప్పు జలె’ మెన దెకితనుమ్. § 1:4 1:4 పేతురు రెగిడ్లి 2 నంబర్ ఉత్త్రమ్ 2:19 దెక. * 1:4 1:4 పేతురు రెగిడ్లి 2 నంబర్ ఉత్త్రమ్ 2:1 దెక. † 1:5 1:5 నిర్దుమకాండుమ్ 32:1-28, 35, సంతాకాండుమ్ 11:1, 14:29, 30, 35. † 1:6 1:6 అదికాండుమ్ 6:1-7, పేతురు రెగిడ్లి 2 నంబర్ ఉత్త్రమ్ 2:4. జేవ్ దూతల్ మాన్సుల్చ తేర్బోదల్ తెన్ లంజె జలె. § 1:7 1:7 అదికాండుమ్ 18:20-29 చి పేతురు రెగిడ్లి 2 నంబర్ ఉత్త్రమ్ 2:6 దెక.

8 దస్సి, * తుమ్చి నంగుమ్తె బెదిల ఉప్రమెన్సుచి ఈంజేవ్ మాన్సుల్ కి, వెర్రి సివ్వుల్ దెకిల్ రిత జా, లంజెకమె కెర జోవయించి అగ్ గార్ కెరంతతి, దేముడుచి అదికారుమ్క బితి నాయ్, చి జో దేముడు కబుర్ తెద్రయల పరలోకుమ్చి గప్పురుమ్చి ఉజ్జిడచ దేముడుచ దూతల్క దూసుప కెర్తతి.

9 †గని మోసి పూర్ణుమ్చో కి మొర్లిన్తె జోచి అగ్చి రిసా వెల్లో దూత జలొ మికాయేలుచి ఉప్పిరి సయ్తాన్ వాదన కెర్రి పొది, మికాయేలు సయ్తానుక దూసుప కెర్రి తీర్పు సంగుక అదికారుమ్ ఉచరనె నాయ్, గని ఎక్కి ఈంజ, “ప్రబుయి తుక తుచి తప్పుచి తీర్పు సంగున్” మెలన్.

10 * అమ్ అప్పు సంగిత ఉప్రమెన్సుచ మాన్సుల్, మాత్రుమ్, జేవ్ అర్దుమ్ నే కెరన్సిసి కిచ్చి జలెకి జేవ్క దూసుప కెర్తతి, అన్నె, జంతువుల్ రిత అర్దుమ్ నెంతె జోవయించి అగ్చిచ అసల్ కిసి దస్సి జర్గు కెరంతతి గే మెన జేవ్ కి దస్సి, బుద్ది నెంతె, జోవయించి అగ్చిచ అసల్ కెర కెర పాడ్ కెరంతతి. జా ఆస జర్గు కెరంతిసి జోవయింక సొంత పాడ్ కెర్దుల.

11 అయ్యె! జోవయించి సిచ్చ కెద్ది సిచ్చ! కిచ్చొక మెలె, †బాబోన్క మార్లో కయూసు పూర్ణుమ్చో గెలి వాట్ ఇండీతతి, చి కిచ్చొ కిచ్చొ డబ్బుల్ లాబుమ్క ఆస జా, †బిలామ్ పూర్ణుమ్చో కెర్రి తప్పుతె జేవ్ కి జోవయించి బుద్ది వికంతతి, చి కికోరహు పూర్ణుమ్చో కిసి మోసిచి దేముడు దిలి అదికారుమ్ పాడ్ కెరుక ఉచర్లో గి, జేవ్ కి దస్సి, దేముడుచి కామ్ జోచి అదికారుమ్ పిట్టవుక ఉచర్తతి, చి కోరహు చి జోచి పచ్చెన గెల మాన్సుల్చి రితి నానెనుమ్చి సిచ్చ జా * మొరుల.

12 పడ్డో, ప్రబుచి తెడిచి తుమ్చి ప్రేమ దెకయ్తి గుర్చుచి †అన్నిమ్ కెర్రిన్తె జేవ్ ఉప్రమెన్సుచ మాన్సుల్ బెద, అన్నె మాన్సుల్క నాయ్, గని జోవయింక జెవ్వి దెకన, ఇన్సుమ్ అయ్లి రితి గమ్మతె తెన్ కతిన్క, జేవ్ మరియాద నెంజిలిన్క ముర్కి మర్కల్ రిత జా, జా ప్రేమ దెకయ్తి గుర్చుచి అన్నిమ్చి విలువ కడ్డతి. అన్నె జేవ్, †నూరు కెర్రి మబ్బు తిలె కి పాని నే జెతె కిసి ఉడ్డ గెతయ్, గే, జేవ్ కి దస్సి. జేవ్ కి జా మబ్బుచి రితి కామ్క నెంజితి. అన్నె, అంజూరుమ్ రూకు చెంగిల్ తిలె, చల్లి పొది పాని అయ్లి పొది రూకతె వండ్లు దెరుల, గని పంటో లాయ్తి పొది పాని అయ్లి కి, జేవ్ మాన్సుల్ కామ్క నెంజిత్ రూకు రిత జా, చి కిదోవ్గెర్ మొర్రి రిత జతతి.

13 అన్నె జేవ్, సముద్రుమ్తెచ వెర్రి కెర్దుల్చ రిత జా, జోవయించి సొంత పాపుమ్చి పొగ్గర్ ఉడ్డిత రితి కెర్తతి. అన్నె కిసి జతతి మెలె, ఎక్కితె సొంత టాన్తె వాట్ పిట బులై తిల సుక్కల్చ రిత తవుల, చి దేముడు దిలి జోవయించి సిచ్చ కిచ్చొ మెలె, * ఎత్తిచి కంట అందర్ తిలిన్తె గెచ్చుల.

14 తొలితోవ్ మాన్సు అదాము ఎక్కిల్ తొతో హనోకు ఎద వర్చ తెన్ సత్తు కుటుంబల్ జలి. హనోకు దేముడుచి సుద్ది తిలి అత్తు తెన్ ఇనాయంచి రిసా ఇనెయ మెన సంగిలన్.

“అది, జోవయించ పరలోకుమ్చి ఎతివాల్జిన్ దూతల్ ఎత్తి తెన్

15 ‘ఎత్తిక తీర్పు కెరుక, చి దేముడుక నేన్చన

* 1:8 1:8 పేతురు రెగిడ్లి 2 నంబర్ ఉత్తమ్ 2:10 దెక. † 1:8 1:8 పూర్ణుమ్ ‘దేముడు దెలి సిచ్చ జర్గు కెరుక’ మెన మాన్సు రూపుమ్ జల దొగుల దూతల్ ఏక్ సుట్టు సొదొమ్ పట్టుమ్తె గెతికయ్, జా పట్టుమ్చ మున్సుదోరల్ జేవ్ దూతల్క లంజె కెర జోవయించి మరియాద కడక ఉచర్. ఎత్తి అదికారుమ్ తిలో దేముడు జోవయింక అడ్డు కెర గుడ్డి కెర్న్. అదికారుమ్ 18:20, 22, చి 19:1-11. యాదా ఈంజ ఉత్తమ్ రెగిడ్లి పొదులె కి ప్రబుచ కబుర్ల సంగెల మాన్సుల్క పాపుమ్చ మాన్సుల్ దూసుప కెర్ తిల, చి అగ్చి ఇచ్చెక టాలి జతయ్. † 1:9

1:9 పేతురు రెగిడ్లి 2 నంబర్ ఉత్తమ్ 2:11 దెక. § 1:9 1:9 ద్వితీయాపదేశ కాండుము 34:1-8. * 1:10 1:10 పేతురు రెగిడ్లి 2 నంబర్ ఉత్తమ్ 2:12. † 1:11 1:11 అదికారుమ్ 4:1-16. † 1:11 1:11 పేతురు రెగిడ్లి 2 నంబర్ ఉత్తమ్ 2:15 దెక. బిలామ్ ఎత్తి అదికారుమ్ తిలో దేముడుచ కబుర్లు సగితోసా జలికి, చెత్తర్ తప్పుల్ కెర్తె. ఎత్తి అదికారుమ్ తిలో దేముడుచి కోడు మార్చుప కెరుక ఉచర్, ఎత్తి అదికారుమ్ తిలో దేముడుక విరోదుమ్ తిల మాన్సుల్ “డబ్బుల్ దెమ్చె” మెంతియ్, జా డబ్బుల్ ఆసకయ్ ఎత్తి అదికారుమ్ తిలో దేముడుచి కోడు పిట్టవుక ఉచర్, సంక్యాకాండుము 22:2-35, 31:16. పడ్డో, బొమ్మల్క బలి దిలిసి ప్రజెల్ కంక సికడ్డో, చి ప్రజెల్ లంజె జతి రితి సికడ్డో, డిసయ్లిసి 2:14. § 1:11 1:11 సంక్యాకాండుము 16:1-35. * 1:11 1:11 కోరహుక చి జోవయించ సగమ్జిన్ మాన్సుల్క బుయ గిడ గెల, చి జోవయించ అన్నె సగమ్జిన్ మాన్సుల్ అగిక డడ్డుయ గెల. † 1:12 1:12 పేతురు రెగిడ్లి 2 నంబర్ ఉత్తమ్ 2:13. † 1:12 1:12 పేతురు రెగిడ్లి 2 నంబర్ ఉత్తమ్ 2:17 దెక. § 1:12 1:12 మాములుమ్ మొర్చు కి తయెచె, ఆకర్చి మొర్చు కి తయెచె. ఆకర్చి మొర్చు మెలె, ప్రబుక విరోదుమ్ జలన వెల్లి అగి గొయెతె సిచ్చ జతిసి, ఈంజ. డిసయ్లిసి 2:11, 20:6, 14 చి 21:8 దెక. మెలె, మొర్లి రూకు రిత జా, పలితుమ్ దెర్రి నాయ్, చి జేవ్ పలితుమ్ దెర్రిచి రుజ్జు డిలిచి పడ్డొక ఉట్టి. జా పూర్ మొరుల.

* 1:13 1:13 పేతురు రెగిడ్లి 2 నంబర్ ఉత్తమ్ 2:17.

నెసిలన ఎత్తిక,

జోచి మరియాద కడ్డ జేవ్ కెర్ల పాపుమ్ కమొచి రిసా

జోవయించి నేరిమ్ వయడుక,

చి జోవయించి రిసా జేవ్ పాపుములు సంగిల ఎత్తి కోపుమ్ కోడుచి నేరిమ్ వయడుక' మెన

ప్రబు ఉత్త్ర అయలన్."

16 ఉప్రమెన్సుచి అమ్ సంగిల మాన్సుల్ నిజామి తిరీమ్ తిరీమ్ గోసల్ లట్టబ్బన, దేముడుచి ఉప్పిరి సేంతుమ్ నెంజ వేర వేరచి ఒగ్గరక ఆస జతన, జోవయించ ఆసల్ రితి ఇస్సుమ్ అయిల్ రితి ఇండితన, బడాయ్ లట్టబ్బన, లాబుమ్క అన్నె మాన్సుల్క పులయతన జవుల.

సత్తిమ్చ నంపజలనక అన్నె జాగర్ల సంగిలీసి

17 తూమ్, ప్రేమ తిల బావుడ్లు, తుమ్ కిచ్చొ ఉచార కెర మెలె, †అమ్చొ ప్రబు జలో యేసుక్రీస్తుచ బారికుల్ జోచి నెక్కిక సంగిలీసి.

18 జేవ్ జోవయించ బారికుల్ తుమ్క,

‡"ఆకర్ దినాల్క సత్తిమ్చి ఉప్పిరి ఆన్స్తన బార్ జవుల.

దేముడుక విరోదుమ్ జల జోవయించి

పాపుమ్చ ఆసల్ రితి ఇండుల"

మెన తుమ్క సంగిల.

19 జేవ్ సంగిల్ రితి ఈంజేవ్వి మాన్సుల్ నంపజలనతె జట్టు కెరయతతి, దేముడుచి సుద్ది జోవయించి పెట్టి తయె నాయ్, చి జోవయించి సొంత ఆగుచ ఆసల్ రితి ఇండితతి.

20 గని తూమ్, ప్రేమ తిల బావుడ్లు, ప్రబుచి సత్తిమ్చి చి తుమ్చి నముకుమ్తె డిట్టుమ్ కెరన. దేముడుచి సుద్ది తిలి అత్తనెక్కిక ప్రార్లన కెర.

21 దేముడుచి ప్రేమ ఇండుక దెకన. పరలోకుమ్తె బెద కెయళ తెయళ జితి వరుమ్ అమ్చొ ప్రబు జలో యేసుక్రీస్తు జర్లు కెర్తె ఎదక, జాక నిదానుమ్ రక.

22 పడ్డె, సగుమ్జిన్ అన్యాయమ్ జా అస్తి. జోవయించి ఉప్పిరి కన్యారుమ్ జా, సత్తిమ్ దెకవ.

23 సగుమ్జిన్క ఆగి తెంతొ ఉల్లల్ రితి సయతాన్చి తెంతొ రచ్చించుప కెర, పడ్డె, సగుమ్జిన్క, జోవయించి పాపుమ్తె నే బెదితి రితి జాగర్ల తా, బియః జోవయింక కన్యారుమ్ దెక.

ఆకర్ కోడు

24 జెల, తుమ్ పాపుమ్తె అన్నె నే నేడ్డి రితి తుమ్క రకుక తెర్లొ, జోవయించి పరలోకుమ్చి ఉజిడతె తుమ్ పొరపాల్ నెంతె సర్ల తెన్ జోచి మొక్కె బీవేతి రితి దొర్కు జలిసి జెయిమ్ కెరుక తెర్లొ

25 ఎక్కిలో దేముడు జలో, అమ్చొ ప్రబు జలో యేసుక్రీస్తుచి అత్తి అమ్క రచ్చించుప కెర్లొసా జలో దేముడుక పరలోకుమ్చి ఉజిడి, గపురుమ్, అదికారుమ్, నెక్కి, కిచ్చొ నెంజిలి అగ్గె తెంతొ తా, అప్పె కి, కెయళ తెయళ కి నే పిట్టి తవున్! ఆమేన్!

† 1:17 1:17 పేతురు రెగిడ్లి 2 నంబర్ ఉత్త్రమ్ 3:2 దెక. ‡ 1:18 1:18 పేతురు రెగిడ్లి 2 నంబర్ ఉత్త్రమ్ 3:3 దెక.

ప్రకటన పుస్తకము జర్లు జంక తిలిసి దేముడు బారిక్ జలో యోహానుక డీసయ్లీసి

మొదోల్ కోడు

1 యేసుక్రీస్తు, జోచ సేవ కెర్తనక దెకవుక మెన బే బేగి జర్లు జంక తిలిసి దేముడు అబ్బొసి జోక దిలన్. బే బేగి జర్లు జంక తిలిసి జా ఎత్తి, జోచో సేవ కెర్తనా యోహానుక జోచో దూతవి అత్తి డీసవ దిలయ్.

2 జలె, దేముడుచి ఈంజ కబుర్చి రిసా, యేసుక్రీస్తు దెకయ్లి ఈంజ సాచిచి రిసా, జా ఎత్తి దెకిలిన్చి రిసా యోహాను ఇన్నె సాచి రెగిడ్డన్.

3 జర్లు జంక తిలిన్చి ఈంజ కబుర్ అన్నె కో నదు కెరుల గే, ఇన్నెక కో నూన ఇన్నె సంగిల్ రెతి కెరుల గే, జోక చెంగిలి. కిచ్చొక మెలె, ఈంజ జర్లు జంక దెర్రి నమయ్ము మె పాసి జా జెతయ్.

4 ఆసియా ప్రదేసిమ్చ *సత్తు †సంగుమ్లచక ఆవ్ యోహాను కిచ్చొ కబుర్ రెగిడ్డన్ మెలె, కెయ్చ తెయ్చ తిలోసా, తతోసా, జెంక తిలోసా తెంతో, వడ్డో జోచి సంగాననుమ్చి పుర్తె తతా ‡సత్తు ఆత్తుల్ తెంతో,

5 వడ్డో నంపజతి సాచి నిదానుమ్తె ఇండ, మొర అన్నె జీవ్ జతనక తొల్పుర్ జతో, ఒండి లోకుమ్చ రానల్క ఏలుప కెర్తె యేసుక్రీస్తు తెంతో దయ, నెంతుమ్, తుమ్చి ఉప్పిరి తవున్. యేసుక్రీస్తు అమ్క ప్రేమ కెర, జోచి మొర్చిచి అర్చితుమ్ జలి సాంత లోయి నువడ కెర, అమ్చ పాపల్చి సిచ్చ తెంతో అమ్క విడ్డల్ కెర్లన్.

6 జో అమ్క జోచో దేముడు జలో జోచో అబ్బొన్చి రాజిమ్, పూజర్లు జతి రెతి, సేవ కెరుక మెన జో జర్లు కెర అస్సె. జా ఎత్తిచి రిసా జో యేసుక్రీస్తుక కెయ్చ తెయ్చ గవరుమ్ అదికారుమ్ తవున్! §ఆమేన్!

7 ఈందె, మబ్బుల్ తెన్ జో పరలోకుమ్ తెంతో అన్నె ఉత్త జెయెదె, చి ఎత్తి అంకివో జోక దెకుల. జోక మార్లన ఎత్తిజన్ కి. అన్నె జోక అగ్గె మార తిలన్ జలె 'బలె తవు కెర్లమ్' మెన ఒండి లోకుమ్చ నెకుమ్లుచ మాన్సుల్ ఏడుకుడు జవుల. దస్సి జర్లు జవున్! *ఆమేన్!

8 కెయ్చ తెయ్చ తిలోసా, తతోసా, జెంక తిలోసా, ఎత్తి అదికారుమ్ తిలో ప్రబు జలో దేముడు, జోయ్యి మొదోల్ జోయ్యి అకర్ మెన అర్దుమ్ జలి, "ఆవ్ అల్పా, ఆవ్ ఓమెగ" మెన సంగితయ్.

పత్తాన్ డిబ్బుతె యోహాను తిలి పొది యేసుప్రబు డీసిలిసి

9 ఆవ్ తుమ్చో బావో జలో యోహాను, జలె, యేసుచి తెడి తుమ్చి తెన్ ఈంజ కాలుమ్చ బాదల్ నీడ తుమ్చి తెన్ ఓర్పుప జతనుమ్. తుమ్చి తెన్ యేసుచి తెడి జోచి రాజిమ్తె, బెద ఏలుప కెర్లనుమ్. జలె, ఆవ్ యోహాను, దేముడు దిలి నుబుమ్ కబుర్, యేసుచి రిసాచి సాచి, నూనయ్తె తిలి రిసా జేలి జా పత్తాన్ డిబ్బుతె తిలయ్.

10 ఒత్త తిలె, ప్రబుచి బక్తి కెర్తి సెలవ్ కడన్చి దీసి, దేముడుచి జో యేసుప్రబుచి ఆత్తుతె అంచి ఆత్తు తెన్ ఆవ్ బెరవ తిలి పొది, అంచి వడ్డో, నస్పిర్మూరిచి అవాడ్ కిసి గట్టిజ జయెదె గే, దస్సి ఏక్ బగ్గర్ అవాడ్ నూన్లయ్.

* 1:4 1:4 యూదుల్ తెన్, 'సత్తు' మెలి సంబర్క కిచ్చొ అర్దుమ్ మెలె, పూర్తి తిలిసి ఇన్నె దొన్చి తిన్ని సంబర్లు అద్యయల్తె ఏక్ సత్తు సంగుమ్లుచ నవ్చొ దెర జోవయింక ఎత్తిక కబుర్లు సంగెదె, గని ఏక్ వేల ఈంజ 'సత్తు' సంబర్ ఒండి లోకుమ్చ నంపజలచ నంగుమ్లు మొత్తుమ్క కి ఏక్ టాలి జయెదె. † 1:4 1:4 'సంగుమ్' మెలె, ఏక్తెచ నంపజలం మొత్తుమ్క 'సంగుమ్' మెనుక జతయ్. ‡ 1:4 1:4 సత్తు ఆత్తుల్ మెలె, ఎత్తి అదికారుమ్ తిలో దేముడుచి నుద్ది తిలి ఆత్తుక సంగితయ్. ఇన్నె సత్తు మెలె, పూర్తి తిలిన్చి అర్దుమ్ కి, పూర్తి సత్తిమ్ తిలిన్చి అర్దుమ్ కి తయెదె. పూర్తి నక్తి తిలిన్చి అర్దుమ్ కి ఉచరుక జయెదె. వడ్డో ఒండి లోకుమ్తె తిలిసి ప్రబుచి ఆత్తు దెకిలిన్చి అర్దుమ్ కి ఉచరుక జయెదె; జెకర్కా 4:10. § 1:6 1:6 ఎత్తి బాన తెన్ ఇన్నె 'ఆమేన్' మెనుల. జా కోడుచి అర్దుమ్ కిచ్చొ మెలె, 'తెర్లిలి'. 'జర్లు జవున్!' * 1:7 1:7 ఎత్తి బాన తెన్ 'ఆమేన్' మెనుల. కుపియ బాన తెన్ తెదిలి మెన సవుల

11 “తుయి అప్పె కిచ్చొ దెకితె గే, ఏక్ పుస్తకుమతె రెగ్గ, నంబజలనచ ఆవ్ సంగిత సత్తు సంగుమ్లుతె తెద్రవు. ఎవెసు, స్మూర్చ, పెర్లము, తుయత్తెర, సార్దీన్, పిలదెల్పియ, అన్నె లవొదికయ పట్టుమతెచి సత్తు సంగుమ్లుతె తెద్రవు” మెన జా అవాడ్ అంక సంగిలన్.

డీనన్ సేడ్డిసి

12 తెదొడి అంక జా కోడు సంగిలి అవాడ్ తిలోసాక దెకుక మెన, ఆవ్ పనిల్లె, సత్తు దివ్వొ తిత బజర్ క తెయార్ కెర్ల తంబల్ దెకిలయ్.

13 జేవ్ తంబల్చి నెడిమె ఎక్కిలో టీవోజ తిలో. జో కీసా తిలో మెలె, †మాన్సు జా జెర్మిలో రితో డీన, చట్టె పాచితి దిగిల్ లాల్చి గలన తా, గుండె బజర్చి పట్టె ⁵బందన తిలో.

14 జోచి *బోడిచి నెడి, పూర్తి చొక్కిలి ఊలుచి ఎదిలి, మంచుచి ఎదిలి చొకు తయెదె. జోచ అంకివో, అగివో లగిలి రితి తిల.

15 జోచ చట్టో, అగితె డడ్డ దగదగాల్ప మెర్చుప జతి కంచుచి రితి తిల. జోచి అవాడ్, వెల్లి బూరుమచి పాని నూయ జతి అవాడ్చి రితి బడబడాల్ప జయెదె.

16 జోచో ఉజల్ అత్తి సత్తు సుక్కల దెర తిలన్, చి జోచి చోడి తెంతో దొన్లు పక్కలె వాండి తిలి కండా బార్ జతె తిలి, చి జోచి మొకొమ్, పొడ్డు పూర్తి సత్తు తెన్ ఉజడి లగితె పొది కీసి తయెదె గే, దస్సి జలె.

17 జోక దెకిల్ బేగి, మొర్లొ రితో జా జోచి చట్టె నెడ గెలయ్. గని జోచో ఉజల్ ఆతు తెన్ అంక చడ, అంక కిచ్చొ మెలన్ మెలె, “తుయ్ బి నాయ్. ఆవ్ తోలితోచొ కి ఆకర్చొ కి.

18 ఆవ్ జీవ్ తిలోసా జీవ్ దెతోసా. ఆవ్ మొర్లయ్, గని అన్నె జీవ్ జా కెయ్:క తెయ్:క జివ్వొ తయెందె, అన్నె మొర్చుక చి మొర్లన్ క రకితి టాన్కచి †తాలమ్ అంచె అత్తి అన్నె.

19 జాకయ్ తుయి కిచ్చొ అప్పె దెకితసి గే, రెగుడు. అప్పెచి కి పడ్డొక జర్లు జంక తిలిసి కి.

20 పడ్డొ అంచో ఉజల్ అత్తి తిల సత్తు సుక్కల్, చి బజర్ క తెయార్ కెర్ల సత్తు దీవుకంబల్చి అర్లుమ్, సత్తు సుక్కల్ సత్తు సంగుమ్లుచ దూతల్ జవుల, చి సత్తు దీవుకంబల్, జేవ్ సత్తు సంగుమ్లుయ జవుల” మెలన్.

2

ఎవెసు పట్టుమతెచ సంగుమ్చక చి ఉత్త్రమ్

1 “ఎవెసు పట్టుమచ సంగుమ్చో దూతక ఇని మెన రెగుడు. *సత్తు సుక్కల్ జోచి ఉజల్ అత్తి దెరితో, దివ్వొ తిత సత్తు బజర్ చ తంబల్చి నెడిమె బులితోసా తుమ్క సంగిలిన్ కిచ్చొ మెలె,

2 †తుచి కమె కీనచ గే, తుయి అంచె కామ్ కెర కెర ఓర్చుప జా నిదానుమ్ తతిసి ఆవ్ జాని. మెలె, పాపుమ్తె ఇండిత మాన్సుల్క తుయి సంగుమ్తె నే బెదవంతె, ‘క్రీస్తుచ బారికుల్ ఆమ్’ మెన అబద్దుమ్క సంగిత గార్ మాన్సుల్క పరిచ్చ కెర, ‘క్రీస్తుచ నెంజితి’ మెన తుమ్ రుజ్జు కెర్లిసి కి ఆవ్ జాని.

3 అంచె నావ్చి రిసా తుమ్ ఒగ్గర్ నిదానుమ్ తెన్ ఓర్చుప జా అన్యానుమ్ నే జలిసి ఆవ్ జాని.

4 “గని తుచి ఏక్ తప్పుచి రిసా అంక కిచ్చొ బాద అన్నె మెలె, కిచ్చొ తీర్పు సంగుక అన్నె మెలె, అంచె రిసాచి తుచితె తిలి తోలితోచి ప్రేమ పచ్చ ముల దిలదు.

† 1:11 1:11 నెంజిలె ‘వెల్లి పుస్తకుమ్’. జేవ్ పొరులె ఏక్ వెల్లి పుస్తకుమతె రెగ్గ, నదు కెర తియ తతి పొది, నుట్టువ కెర తియ తవుల.

‡ 1:13 1:13 దానియేలు 7:13, 14. § 1:13 1:13 యూదుల్చె అలవాట్ తెన్ దసా దిగిల్ పాలుమ్ చి బజార్ రగుమ్ పట్టె ఎత్తి అదికాయమ్ తిలో దేముడుక ఎత్తిక వెల్లి పూజరి జలో కేన్ జవున్ మాన్సు గలన బందన తయెదె. ఇన్నె, యేసుక ‘జో ముక్కిమ్ జలో పూజరి’ మెన ఈంజ టాలి రుజ్జు దెకయ్తయ్. * 1:14 1:14 దానియేలు 7:9. † 1:18 1:18 మెలె, మాన్సు ఒత్త తంక, నెంజిలె విడ్డల్

జా పరలోకుమతె నెంజిలె అగి గొయితె గెచ్చుక సెలవ్ దెతి నెక్కి కచి మెలె, యేనుచి. * 2:1 2:1 1:20 దెక. † 2:2 2:2 దొన్చి తిన్నె నంబర్లు అద్యయల్తె ‘సత్తు సంగుమ్లుచ దూతల్క’ మెన ఎక్కెక్ కబుర్లు జోవయింక రెగ్గ అన్నె, ఎత్తి, సంగుమ్చో దూతక ఏక్ కబుర్. గ్రీకు బాన తెన్ ఈంజ ‘డీనయేలిన్’ మెలి పుస్తకుమతె ఈంజివ్ సత్తు కబుర్లు రెగిడ్డినె తె ఎత్తి కబుర్తె ‘తుయ’, ‘తుచి’, ‘తుక’ మెల కొడొ రెగ్గ అన్నె. గని ఎత్తి, సంగుమ్చో దూత జోవయించి సగుమ్చ మాన్సుల్ మొత్తుమ్క టాలి రితి జయెదె మెన, తుక తుమ్, తుచి తుమ్చి, తుకక ‘తుమ్క’ మెన రెగ్గ అన్నెమ్. దస్సి 2:2 కొడుతె తుచ కమొక ‘తుమ్చ కమొ’ మెన, 2:3 నంబర్ కొడుతె తుయ ఒగ్గర్ తెన్ నిదానుమ్ ఓర్చుప జా అన్యానుమ్ నే జలిన్క తుమ్ ఒగ్గర్ తెన్ నిదానుమ్ ఓర్చుప జా అన్యానుమ్ నే జలిసి మెన రెగ్గ అన్నెమ్. దొన్చి తిన్నె నంబర్లు అద్యయల్ మొత్తుమతె ఈంజ సొమ్మమ్ కెర అన్నెమ్.

5 జాకబు, అగ్నే కిసి అంక ఒగ్గర్ ప్రేమ కెరై తిలదు, అప్పె కిసి అస్సున్ గే ఉడర. అప్పెచి తప్పు బప్పున పెట్టి దుకుమ్ జా, తుమ్ తొలితో సంబజలి పొది ఇండిలి ప్రేమ కమె అప్పె తెంతో అన్నె ఇండ. నెంజిలె, జా తప్పు బప్పున చెంగిల్ జతి రితి తుమ్ మార్పువ నే జలె, తుమ్తె అడే జా కెర, తుమ్చి దీవుకంబుమ్ ఉర్ల వెంట గెలింది.

6 జలె తుమ్తె చెంగిల్ కామ్ ఏక్ అప్పెక అస్సె, కిచ్చొ మెలె, జేవ్ * 'నీకోలాయితులు' మెలసచ కమె దూర కెర్తసు. అడే కి ఏద్దరె నెసిక కమె తుమ్ కి నెసితసు.

7 "జలె, సంగుమ్లక కిదేముడుచి సుద్ది తిలి ఆత్మ ఇన్నెతెన్ కిచ్చొ సంగితయ్ గే, కంగ్గొ తిలోసా సూన్తు. కో అంచి పరిచ్చతె జినుల గే, దేముడుచి పరలోకుమ్చి తోటతె తిలి జివ్ దెతి రూక్చ పండ్లు కంక దెయింది.

స్వర్గు పట్టుమ్చ సంగుమ్చక చి ఉత్తమ్

8 "పడ్డొ స్వర్గు పట్టుమ్చ సంగుమ్చొ దూతక ఇసి మెన రెగుడు.

"తొలితో తిలో, ఆకరక తిలో మొర అన్నె జివ్ జలోసా తుమ్క సంగిలిన్ కిచ్చొ మెలె,

9 తుమ్ సేడ్డ అల్లర, తుమ్ బీద తిలిసి అడే జాని. బీద జలె కి, ఆత్మక సామ్మారుమ్ జా అస్సున్. పడ్డొ 'యూదుల్ అమ్' మెనన సత్తిమ్చ యూదుల్ నెంజిలస; నయ్తాన్చి సంగుమ్తె బెదితన జేవ్; జలె, తుమ్క దూసుచ కెర్తసి అడే జాని.

10 తుమ్ అప్పె సేడుక తిల అల్లరిచి రిసా తుమ్ బియెఁ నాయ్. ఈందె, తుమ్తె సంగుమ్జన్ పరిచ్చ జతి రితి, నయ్తాన్ జోక జేతె గలిది, చి దెస్సు పొదుల్క అల్లర తెన్ తస్సె. మొరుక జలెకి తుమ్ నిదానుమ్ తా, చి తుమ్ జిన్ పరలోకుమ్తె తుమ్ కెయెక తెయెక జింక మెన బప్పమానుమ్ దెయింది.

11 "సంగుమ్లక అమ్చి దేముడుచి సుద్ది తిలి ఆత్మ ఇన్నెతెన్ కిచ్చొ సంగితయ్ గే, కంగ్గొ తిలోసా సూన్తు. ఈంజ లోకుమ్తెచ అల్లరెతె కో అంచి ఆత్మసెక్తిక జినుల గే, జా అన్నెక్ మొర్పు, నయ్తాన్తె సిచ్చ జతి మొర్పు, జోవయింక తయె నాయ్.

పెర్లము పట్టుమ్చ సంగుమ్చక చి ఉత్తమ్

12 "పడ్డొ పెర్లము పట్టుమ్తెచ సంగుమ్చొ దూతక ఇసి మెన రెగుడు.

"దొస్సొ పక్కలె వాండి కెర్లి కండా దెర్లొసా తుమ్క సంగిలిన్ కిచ్చొ మెలె,

13 తుమ్ జతిసి కేనె గే జాని. కేనె మెలె, నయ్తాన్చి సింగాసనుమ్ తిలిన్తెయి. అంచి నావ్ డిట్టుమ్ దెరన్తను, పడ్డొ అంక నిదానుమ్ నముకుమ్ తిలో అంచి సాచి సంగితె తిలో అంతిపయను బులై తిలి పొది కి, తుమ్చి నెడిమి నయ్తాన్ జితిన్తె జో అంతిపయను జేవ్ మార్గె కి, అంచి రిసాచి తుమ్చి నముకుమ్ ఒప్పునుక ములున్ నాయ్.

14 గని, తుమ్ కెర్ల సగుమ్ తప్పుల్చి రిసా అంక బాద, తీర్పు సంగుక అస్సె. కిచ్చొ మెలె, తుమ్చి తెన్ బెదిలస సంగుమ్జన్ బిలామ్ సికడ్డిసి సిక 'చెంగిలి' మెంతతి. అమ్చ ఇస్రాయేలులు దేముడుక సత్తిమ్ ఇండితెసి పిట్టయెతి రితి, బొమ్మల్క దిలిసి కంక చి లంజె కమెతె బెదుక బాలాకుక * బిలామ్ సికడ్డన్.

15 దస్సి, 'నీకోలాయితులు' మెలస సికడ్డిసి సంప కెర్తన సంగుమ్జన్ తుమ్తె అస్సి.

16 జాకబు, తుమ్ తప్పు జలిసి ఒప్పున, పెట్టి దుకుమ్ జా, జా తప్పుల్ ముల. నెంజిలె, బే బేగి తుమ్తె జా కెర, అంచి చోడి తెంతో బార్ జలి * కండా తెన్ జేవ్ మాస్సుల్చి ఉప్పిరి యుద్దుమ్ కెరింది.

17 "సంగుమ్లక దేముడుచి సుద్ది తిలి ఆత్మ ఇన్నెతెన్ కిచ్చొ సంగితయ్ గే, కంగ్గొ తిలోసా సూన్తు. ఈంజ లోకుమ్ సికడ్డిన్చి ఉప్పిరి కో జినుల గే, లుంకిల్ రితి తిలి పరలోకుమ్ తెంతో అడే సువితి 'మన్నా' మెలి అన్నిమ్ జోక దెయింది, చి అన్నె కిచ్చొ దెయింది మెలె, జోక ఎక్కెక్క చొక్కెల పత్రల్ దెయింది. జోతె ఎత్తి మాస్సుక జోచి పత్రె, జోక నొచి నావ్ రెర్లె దెయింది. కేనె నావ్ కక్క దెయింది గే, ఎక్కి జోకయ్ సొంత ఎర్కె జయెది, గని అన్నె కక్కయ్ నాయ్.

‡ 2:6 2:6 ఏక్ వేల బిలామ్ సికడ్డిసి; మెలె, బొమ్మల్క దిలిసి కతిన్చి లంజె కమెతె బెదితసి; జేవ్ నీకోలాయితులు సికడ్డ. 2:14, 15 దెక.
 § 2:7 2:7 మెలె, దేముడు అబ్బొన్చి యేసుచి ఆత్మ. * 2:14 2:14 సక్యాయాదుమ్ 22:1-35, 25:1-2, 31:16. † 2:16 2:16 'యేసుచి చోడి దెర్లి కడ్డుమ్' మెలె, జో తీర్పు కెర్లొడు. ఎత్రియల్ 4:12.

తుయత్తైర పట్టుమేతచ సంగుమ్చక చి ఉత్త్రుమ్

18 “పడ్డై తుయత్తైర పట్టుమేచ సంగుమ్చో దూతక ఇసి మెన రెగుడు.

“ఆగి లగిత రిత అంకివో తిలో, దగదగాల్వ మెర్పువ జతి కంచు డీస్త రిత చట్టో తిలో, దేముడుచో పుత్తసి తుమ్క సంగ తెద్రయత కొడో ఈంజేవ్.

19 “తుమ్ కెర్త కమె, తుమ్చి ప్రేమ, తుమ్చి నిదానుమ్చి నముకుమ్, తుమ్చి నేవ, బాదల్ ఒర్పువ జతి తుమ్చి నిదానుమ్, పడ్డై తుమ్ తోలితో నంపజలి కంట, తుమ్ అప్పె అన్నె ఒగ్గర్ చెంగిల కమెతె ఇండితిసి ఆవ్ జాని.

20 గని తుమ్చి రిసా అంక కిచ్చో బాద, కిచ్చో తీర్పు సంగుక అస్సె మెలె, ‘దేముడుచ కబుర్లు సంగితిసి ఆవ్’ మెన ఆరి సంగుమ్తె తేర్బోద యెజెబెలు అంచ నేవ కెర్తసక పాపుమ్ సికడ్డెకి, తుమ్ తీర్పు నే సంగితె తుక్కె తత్తసు. అమ్చ నేవ కెర్తస లంజెతె గెతి రితి, బొమ్మల్క దిలిసి కతి రితి, జా సికడ్డయ్.

21 జాక తప్పు ఒప్పున పెట్టి దుకుమ్ జా, జా పాపుమ్ ముల్పు’ మెన అగ్గెయ్ తెంతో జాక అవ్కాసుమ్ దా అస్సి, గని జాచి లంజెచి రిసా వినారుమ్ కి జయె నాయ్.

22 ఈందె, జాక జబ్బు తెద్రయిందె, చి జాచి తెన్ లంజె జతన ఎత్తిజిన్క గొప్ప అల్లర్ సేడయిందె. జాచ కమె, జా కెర్లిన్చి రిసా, జాచి దుకుమ్ జా నే ములిలెగిన,

23 పడ్డై, జాచ బోదల్ జల జాచ కోడు సూన్లసక మొర్పు లయడిందె. దస్సి సిచ్చు కెర్లె, ఎత్తి సంగుమ్చ కిచ్చో చినుల మెలె, ఎత్తి మాన్సుచి బుద్ది, ఎత్తి మాన్సుచి పెట్టి తిలిసి ఆవ్ దెకితిసి సికుల, చి తుమ్తె ఎత్తి మాన్సుచ కమె ఎద తుమ్క తీర్పు జర్గు కెరిందె మెన చినుల.

24 “గని, తుమ్ తుయత్తైరచి నంపజలనతె కో జా వెర్రి సికితినతె బెదున్ నాయ్, అన్నె ‘నయ్తాన్చి గుట్టు’ మెన జేవ్ సగుమ్జిన్ సికయ్తిసి కో సికున్ నాయ్. తుమ్కయ్ కిచ్చో మెంతసి మెలె, తుమ్క కిచ్చో వేర జాడు వయ్డుక నెసి.

25 గని ఆవ్ అన్నె జెతె ఎదక తుమ్క తిలి ప్రేమ నిదానుమ్, ఆవ్ తుమ్క దిలి కిచ్చో ఆస్తి జలెకి డిట్టుమ్ దెరన.

26 కో జీన ఆకర్ ఎద అంచ కమె నిదానుమ్ ఇండుల గే, అంక నేన్ల మాన్సుల్చి ఉప్పిరి జోవయింక అదికారుమ్ దెయిందె.

27 జో నిదానుమ్ తిలన గొవుడుచి ఇనుముడండ్డో దెర్లని రితి గేడిసి పుట్టయిలి రితి కెర, అంక నేన్లసచి నెక్కి పాడె కెర్లి రితి కెర, జోవయింక ఏలువ కెరుల. దేముడు అబ్బో కిసి అంకయ్ అదికారుమ్ దా అస్సి గే, దస్సి జో నిదానుమ్ తిలనకయ్ ఆవ్ అదికారుమ్ దెయిందె,

28 చి ముక్కిమ్ జలి పెందలెచి ఒగ్గర్ ఉజడి దిలి †సుక్కో జోక దెయిందె.

29 “సంగుమ్లక అమ్చి దేముడుచి సుద్ది తిలి ఆత్మ కిచ్చో సంగితయ్ గే, కంగ్గో తిలోసా సూన్తు.

3

సార్దీన్ పట్టుమేచ సంగుమ్చక చి ఉత్త్రుమ్

1 “సార్దీన్ పట్టుమేచ సంగుమ్చో దూతక ఇసి మెన రెగుడు.

“దేముడుచ *నత్తు ఆత్మల్ తిలో †నత్తు సుక్కల్ దెల్లొసా తుమ్క సంగిలిన్ కిచ్చో మెలె, తుమ్చ కమె ఆవ్ జాని. తుమ్క ‘జిచ్చి అస్సి’ మెన మాన్సుల్ ఉచర్తతి, గని తుమ్ మొరయ్ అస్సున్.

2 తుమ్ చెద్దయ్ జా, చి మొర్లి రితి నే మొర ఇదిలిదిల్ నేఱిలితె డిట్టుమ్ కెరన. కిచ్చొక మెలె, తుమ్చ కమె ‘అంక దేముడుచి మొక్క పూర్తి చెంగిల్చ నెంజిలి’ మెన దెక అస్సి.

3 “జాకయ్, తుమ్క అగ్గె దిలిసి, తుమ్ సూన నంపజలిసి, గుర్తు కెరన, పోసన, తుమ్చి తప్పు ఒప్పున పెట్టి దుకుమ్ జా తప్పు ముల. తుమ్ ఇసి చెద్దయ్ నే తిలె, జలె, అవ్ చోర్ రితి జా జెయిందె, చి కేన్ గడియక తుమ్తె జెయిందె గే, తుమ్ నేన్సు.

‡ 2:28 2:28 దీనయ్లిసి 22:16 దెక. * 3:13:1 1:4 చి ఎట్టాచి కోడు దెక. † 3:13:1 1:20చి ఎట్టాచి కోడు దెక.

4 “జలె, ఒత్త సార్దీన్తె తుమ్తె, జోవయించ పాలల్ ముర్కి, నే కెరన్లన సగుమ్జన్ అప్పెక కి అన్తి. జేవ్, జలె, అంచి పరలోకుమ్చి ఉజ్జడతె బెదుక జేవ్ విలువ మెలి రితి అవ్ దెకితసి, చి చొక్కెల పాలల్ గలన అంచి తెన్ ఇండుల.

5 కో దస్సి జీనుల గే, దస్సి జోక చొక్కెల పాలల్ దెయిందె, చి గలనుల, చి పరలోకుమ్తె బెదితనచ నవ్వి అవ్ రెగిడ్డి పుస్తకుమ్తె జోచి నావ్ అవ్ పుంచి నాయ్. అంచో అబ్బొ జలొ దేముడుచి మొక్కె కి జోచ దూతల్చి మొక్కె కి ‘జోచి నావ్ అస్స’ మెన ఒప్పన్దె.

6 “సంగుమ్లక్ దేముడుచి సుద్ది తిలి అత్తు ఇన్నెతెన్ కిచ్చొ సంగితయ్ గే, కంగ్గొ తిలోసా నూనతు.

పిలదెల్పియ పట్టుమ్చ సంగుమ్చక చి ఉత్తుమ్

7 “పిలదెల్పియ పట్టుమ్చ సంగుమ్చొ దూతక ఇసి మెన రెగుడు. పరలోకుమ్చి సుద్ది తిలో, సత్తిమ్ తిలో, దాచిదు రానొచి తాలల్ దెరితో, జో ఉగిడ్డెకో డంకుక నెత్తిర్తి, జో డంకిలె కో ఉగుడుక నెత్తిర్తి. జో తుమ్క సంగిలిన్ కిచ్చొ మెలె,

8 తుమ్చ కమె అవ్ జాని. ఈందె, తుమ్క ‘పెనుత’ మెన ఉగ్గి జలి కెప్పె తుమ్చి మొక్కె ఉగ్గ దా అస్సి. కో జాక డంకుక నెత్తిర్తి. తుమ్క సెక్కి ఒగ్గర్ నాయ్ మెన అవ్ జాని. జలెకి, అంచి కోడు నిదానుమ్తె ఇండ అస్సున్, చి అంచి నావ్చి మరియాద్ కడ్డి రితి కెర్పు నాయ్.

9 ఈందె, ‘యూదుల్ అమ్’ మెన అబద్దుమ్క సంగిత, నిజమ్చ యూదుల్ నెంజెల, నయ్తాన్చి సంగుమ్తె బెదితనక కిచ్చొ కెరిందె మెలె, తుమ్చి చట్టె జేవ్ సెర్పు సేడ్డి రితి జర్గు కెరిందె, చి తుమ్క అవ్ ప్రేమ అస్సి మెన జేవ్ జొన్లి రితి కెరిందె.

10 “అవ్ సంగిలి రితి తుమ్ నిదానుమ్క ఎత్తి ఒర్పువ జా అస్సున్చి రెసా, బూలోకుమ్తె జిత మాన్పుల్ ఎత్తిజిన్క పరిచ్చ కెర్తి కాలుమ్చి బాద తుమ్క పట్టుయిందె.

11 అవ్ బే బేగి అన్నె జెయిందె. తుమ్క తిలిన్ నిదానుమ్ తెన్, డిట్టుమ్ దెరన; తుమ్చి బవుమానుమ్ కో కి నే ఉర్తిరి రితి తా.

12 కో జీనుల గే, అంచొ దేముడుచి పరలోకుమ్చి గుడితచ టీవె కెల స్టంబుమ్ జేవ్ జతి రితి కెరిందె. జోచి జా దేముడుచి గుడిక జేవ్ కెయ్ ములితి నాయ్. అంచొ దేముడుచి నావ్, పడ్డె జో అంచొ దేముడుచి పట్టుమ్చి నావ్; మెలె, అంచొ దేముడు తెంతో పరలోకుమ్ తెంతో ఉత్త జెతికయ్ నొచి యెరూసలేమ్ పట్టుమ్చి నావ్; పడ్డె అంచి సొంత నొచి నావ్, జేవ్ జన్తనచి ఉప్పిర్ రెగిడిందె.

13 “సంగుమ్లక్ అమ్చి దేముడుచి సుద్ది తిలి అత్తు కిచ్చొ సంగితయ్ గే, కంగ్గొ తిలోసా నూనతు.

లవొదికయ పట్టుమ్చ సంగుమ్చక చి ఉత్తుమ్

14 “లవొదికయ పట్టుమ్చొ సంగుమ్చొ దూతక ఇసి మెన రెగుడు.

“అమేన్’ మెలొ, నిదానుమ్ తిలొ, సత్తిమ్ సాచి జలొసా, దేముడు జెర్మయ్లిసి ఎత్తిక ఆదారుమ్ తిలొసా తుమ్క సంగిలిన్ కిచ్చొ మెలె,

15 “తుమ్చ కమె అవ్ జాని. తుమ్ ఉసుమ్ రితి నాయ్, సీడొ రితి నాయ్! తుమ్ ఉసుమ్ తంక అంచి ఆన. నాయ్ మెలె, సీడొ జలె, సీడొ మెనుక జతి.

16 జలె, తుమ్క ఉసుమ్ మెనుక నెంజె, సీడొ మెనుక నెంజె, గని దొన్చిచి నెడిమి తా, ‘చెంగిల్ అస్సుమ్’ మెన దస్సె తత్తసుచి రెసా తుమ్క అంచి చొడి తెంతో తుంక గెలిందె.

17 కిచ్చొక మెలె, ‘సాహ్యూరుమ్ జా అస్సుమ్, చెంగిల్ జా అస్సుమ్, చి అమ్క కిచ్చొ కొత్తు నాయ్’ మెన తుమ్ ఉచరన్లెకి, ఆత్తుక దెకిలె, తుమ్ బాద తెన్, నిస్కారుమ్ జా, బీద జా, గుడ్డి జా, డుమ్డయ్ జా అస్సున్ మెన నెన్పు.

18 “జాకయ్, తుమ్క అవ్ కిచ్చొ బుద్ది సంగితసి మెలె, తుమ్ సాహ్యూరుమ్ జతి రితి, అంచి ఆగితె డయ్ పూర్తి చెంగిల్ కెర్లి బజరి గెనన. తుమ్ డుమ్డయ్ తతిసి నే డిస్సి రితి గలనుక మెన అవ్ దెత చొక్కెల పాలల్ గెనన, చి తుమ్చ అంకివొ చెంగిల్ జా డిస్సి రితి, కాటిక అంచితె గెనన.

19 అవే కక్క ప్రేమ అన్నీ గే, జోచి తప్పులచి రుజ్జు దెకవ, 'సమయుమ్ తెన్ని బుద్ది జతు' మెనయ్ సిచ్చ దెతసి. జాకయ్, చెంగిల్ జంక ఆన జా, తుమ్చ తప్పుల్ ఒప్పున, పెట్టి దుకుమ్ జా, జా తప్పుల్ ముల.

20 ఈందె, తుమ్చి కెప్పి ఇత్తల్తో అవే టీవోజ పెట్టసి. తుమ్తె కో అంచి అవాడ్ సూన కెప్పి ఉగుడుల గే, జోచి తెడి జా పెన జెయిందె, చి జో తెన్ అన్నిమ్ కయిందె, చి జో అంచి తెన్ అన్నిమ్ కయెదె.

21 కో జినుల గే, అవే కిసి జిన కెర అంచో అబ్బొ జలో దేముడుచి సింగాసనుమ్తె జో తెన్ బెద వెన అన్నీ గే, దన్నీ, జేవ్ అంచి తెన్ అంచి సింగాసనుమ్తె వెసుక మెన, వరుమ్ దెయిందె.

22 "సంగుమ్లక్ అవచి దేముడుచి నుద్ది తిలి అత్తు కిచ్చొ నంగితయ్ గే, కంగ్గొ తిలోసా సూన్తు."

4

పరలోకుమ్తె సిజాసనుమ్

1 ఇన్నెచి పడ్డో అవే దెకిలయ్, పరలోకుమ్తె వెసితి కెప్పి ఉగ్గి జా అన్నె! అన్నె, అగ్గె తోలితో అవే సూన్సి * అవాడ్ నెప్పిర్మూరిచి అవాడచి రితి ఎక్కిలోచి అవాడ్, అంక, "ఇత్తల్ వెగ జే, చి ఇన్నెచి పడ్డొక కిచ్చొ జర్గు జంక అన్నె గే, తుక దెకయిందె" మెన సంగిలన్.

2 సంగిల్ బేగి, దేముడుచి యేసుచి అత్తునెక్కిక బత్త పరలోకుమ్తె తిలయ్, ఒత్త ఏక సిజాసనుమ్ అన్నె, చి సింగాసనుమ్తె ఎక్కిలో వెన అన్నె!

3 జో ఒత్త వెసిలోసా కిసి డీసిలన్ మెలె, వజ్రమ్చి రితి చొకు, చి రితి ఎరన ఉజడి లగిలన్, చి సిజాసనుమ్చి నుట్టునంత పచ్చన రంగుచి దూన్చి ఉజడి లగితె తిలి.

4 జా సింగాసనుమ్చి నుట్టునంత అన్నె విస్సెక్ చెత్తర్ సిజాసనల్ తిల, చి జేవ్ సిజాసనల్ ఎక్కెక్తె విస్సెక్ చెత్తర్జెన్ చొక్కిల పాలల్ గలన్ల, బోడి బజర్చ కిరీటల్ గలన్ల, విస్సెక్ చెత్తర్జెన్ వెల్లెల మాన్సుల్ వెన అన్నె.

5 జా సిజాసనుమ్ తెంతో బిజిలి మొల్కితయ్, చి అవాడ్చి ఉర్చుల్చి అవాడ్ జెతయ్. సింగాసనుమ్చి పురైతో వత్తివొచ నత్త దివ్నొ లగితతి. జేవ్ దివ్నొ దేముడుచి †నత్తు అత్తుల్.

6 పడ్డో సిజాసనుమ్చి పురైతో గాజుచి రితి బేంటచి నముద్దుమ్ తిలి. పడ్డో సింగాసనుమ్చి నుట్టునంత, జేవ్చ చెత్తర్ పక్కల, చెత్తర్ జివుల్ తిల. ఏక పక్క ఏక జివు. జోవయింతె బెర్దు అంకివో, ముకోమ్ పక్క పడ్డో పక్క కీ తిల.

7 తోలితోచో జివు కిసాచో మెలె, సింపుమ్చో రితో. అన్నెక్ జివు వన్నా పిల్లచో రితో, అన్నెక్ జివుక మాన్సుచి మొకోమ్ చి, అన్నెక్ జివు ఉడ్డితో గిద్దుచో రితో డీసిలన్.

8 జేవ్ చెత్తర్ జివుల్ ఎత్కిక, ఏక ఏక జివుక సాపు రెప్పల్ తిల, అన్నె, ఉప్పిరి కి, జోవయిం చి రెప్పల్ తెడి కి బెర్దు అంకివో తిల, చి రాతి మెద్దెనె కిచ్చొ గనుమ్ గాయుక ముల్చి నాయ్ మెలె,

"ఎత్కిచి ఉప్పిరి అదికారుమ్ తిలో దేముడు, అగ్గె తిలోసా, అప్పె తతోసా, కెయ్చ తెయ్చ తంక తిలోసా, ఎత్కి నుద్ది తిలోసా, ఎత్కి నుద్ది తిలోసా!" మెన గాయితె తత్తతి.

9 పడ్డో, సింగాసనుమ్తె వెసిలో కెయ్చ తెయ్చ జెతోసాక జేవ్ చెత్తర్ జివుల్ కెయ్చ గవురుమ్, మరియాద దెతతి, కెయ్చ జో కెర్లి దయక జోచి నర్ల సంగితె తతి పొది,

10 విస్సెక్ చెత్తర్జెన్ జేవ్ వెల్లెల మాన్సుల్ సింగాసనుమ్తె వెసిలోసాచి చట్టె నెర్పు నేడ, జేవ్ కెయ్చ తెయ్చ జెతోసాక జొక్కరతి. సిజాసనుమ్చి పురైతో జోవయిం కిరీటల్ తియ్ దా గనుమ్ గాయితతి.

11 "తుయి అమ్చో ప్రబు, అమ్చో దేముడు విలువతిలోసా గవురుమ్, మరియాద, అదికారుమ్ తుక కలుగు జంక. కిచ్చొక మెలె, ఎత్కిక కి తూయి జెర్చుయ్లది, చి ఇసి జర్గు జంక తుచి ఇన్దుమ్ జా, జేవ్చ జెర్చుయ్లది."

* 4:1 4:1 1:10 దెక † 4:5 4:5 ఎత్కి అదికారుమ్ తిలో దేముడుచి నుద్ది తిలి అత్తుక ఈంజ టాలి జతయ్. 1:4చి ఎట్టెచి చి కోడ్ దెక.

మొన గాయితె తత్తతి.

5

సుట్టుప కెర్లి పుస్తకుమ్ మెండపిల్ల నదు కెర్లిసి

1 వణ్ణొ కిచ్చొ దెకిలయ్ మెలె, సిజాననుమ్తె వెన తిలోసాచొ ఉజిల్ అత్తి సుట్టుప కెర్లి పుస్తకుమ్ దెకిలయ్. జా పుస్తకుమచి తెడి, ఉప్పిరి కి రెగిడ్డిన్ తిలి. చి కో ఇస్తుమ్ అయిలి రితి జా సుట్టుప కెర్లి పుస్తకుమ్ నే ఉగుడుక మెన, సత్తు ముద్దల్ తెన్ ముద్ద గెల తిల.

2 తెదొడి కిచ్చొ దెకిలయ్ మెలె, డిట్టుమ్చొ దూత ఎక్కిలో గట్టిజ అవాడ్ కెరన కిచ్చొ మెన సాడుప కెర్లన్ మెలె, “ఈంజ సుట్టుప కెర్లి పుస్తకుమ్చ ముద్ద కడ ఉగుడుక తగుప జలోసా కో?” మెన కేక్ గల్లొ.

3 గని సుట్టుప కెర్లి జా పుస్తకుమ్ ఉగుడుక జలెకు, ఒత్త తిలిసి దెకుక జలెకు, బూలోకుమ్తె కి పరలోకుమ్తె కి, బూలోకుమ్క ఎట్టొ లోకుమ్తె కి తగుప జలోసా కో కి డీసె నాయ్ చి రిసా,

4 అవ్ ఏడ గెలయ్; జా సుట్టుప కెర్లి పుస్తకుమ్ ఉగుడుక కి ఒత్త తిలిసి దెకుక కి కో తగుప జలోసా డీసె నాయ్ చి రిసా.

5 తెదొడి, ఒత్తవ వెల్లెల మాన్సుల్తె ఎక్కిలో అంక, “ఏడు నాయ్. ఈందె, యూదా పూర్గుమ్చొచి సెకుమ్తె జెర్లిలో వెల్లొ సింపుమ్ జలో రితిసా, దావీదుచి సెకుమ్తెచి చేరుతె బార్ జలోసా, జీన అస్సె, చి సుట్టుప కెర్లి జా పుస్తకుమ్ ఉగుడుక, చి జేవ్ సత్తు ముద్దల్ కడుక జో తగుప జా తిలోసా” మెన సంగిలన్.

6 తెదొడి, జా సింగాననుమ్క చి జేవ్ *చెత్తర్ జివుల్క చి జేవ్ విస్సెక్ చెత్తర్జిన్ వెల్లెల మాన్సుల్చి నెడమె ఏక్ *మెండపిల్ల టీవోజ తిలిన్ దెకిలయ్. కీసా తిలో మెలె, అర్పితుమ్క కండయ్ జలి రితి జా తిలన్, చి జోక సత్తు కొమ్ముల్ చి సత్తు అంకివొ తిల. ఈంజేవ్ కిచ్చొ జవుల మెలె, దేముడు ఒండి బూలోకుమ్తె తెద్రయిల జోచ *సత్తు అత్తల్.

7 జా మెండపిల్ల, జలి, పురె జా, జా సింగాననుమ్తె వెన తిలోసాచి ఉజిల్ అత్తి తెంతొ సుట్టుప జలి జా పుస్తకుమ్ నజిలన్.

8 సుట్టుప జలి జా పుస్తకుమ్ నజితికయ్, జేవ్ చెత్తర్ జివుల్, జేవ్ విస్సెక్ చెత్తర్జిన్ వెల్లెల మాన్సుల్, జా మెండపిల్లచి మొక్కె నిర్పు సేడ్ల. జేవ్ ఎత్తిజిన్తె ఎత్తి సుదల్ కిచ్చొ దెర తిలో మెలె, ఎక్కిక్ వీనల్, చి బజర్చ గిన్నలు. జేవ్ గిన్నల్తె కిచ్చొ తిలి మెలె, బెర్లు దూపుమ్ తిలి. జా దూపుమ్చి అర్దుమ్ కిచ్చొ మెలె, ప్రబుచ సొంత జల మాన్సుల్చ ప్రార్దనల్.

9 తెదొడి జేవ్ ఏక్ నొచి గనుమ్ గాయిల.

“ఈంజ సుట్టుప జలి జా పుస్తకుమ్ నజ, జేవ్చి ముద్ద కడుక తూయి తగుప జలోసా!

కిచ్చొక మెలె, తూయి అర్పితుమ్ జా మొర,

దేముడుచ జా గెతు మెన

తుచి నూయె జలి లోయె తెన్ మాన్సుల్క అన్నె గెనన్దది.

జేవ్ మాన్సుల్క ఎత్తి సెకుమ్ తెంతొ, ఎత్తి బానల్ తెంతొ,

ఎత్తి ప్రైజల్ తెంతొ, ఎత్తి రాజిమ్ తెంతొ గెనన, జోవయింక

10 ‘అమ్చొ దేముడుచి రాజిమ్తెచ రానల్ జేవ్ జా

జోవయింక పూజర్లు జతు’ మెన, జర్గు కెర అస్సిసి,

చి బూలోకుమచి ఉప్పిరి జేవ్ ఏలుప కెరుల.”

మెన గనుమ్ గాయిల.

11 వణ్ణొ అన్నె దెకిలయ్, చి సింగాననుమ్చి, జేవ్ జివుల్చి, వెల్లొ మాన్సుల్చి సుట్టునంత కిచ్చొ నూన్యయ్ మెలె, ఒగ్గర్ ఒగ్గర్ దూతల్చ, వెయిలుచి ఉప్పిరి వెయిలు, కోట్టుచి ఉప్పిరి కోట్టుచ దూతల్చ అవాడ్లు నూన్యయ్.

12 గట్టిజ అవాడ్ కెరన కిచ్చొ మెన కేక్ గెల్లె తిల మెలె,

“అర్పితుమ్ జలో ఈంజొ మెండపిల్ల జతిసా జలె,

అదికారుమ్, సొమ్నారుమ్, గ్యానుమ్, సెక్తి,
మరియాద, గవురుమ్, చి మాన్సుల్ జోచి గవురుమ్ గాయితిసి
జోకయ్ కలుగు జంక జొయ్యి తగువ జలొసా!”

మెన కేకుల్ గల్లె తిల.

13 వడ్డొ పరలోకుమతెచ, బూలోకుమతెచ, చి బూలోకుమక ఎట్టొ లోకుమతెచ, చి నముద్రుమతెచ, జేవ్
చెత్తర్తెచ ఎత్తి. జీవు ఎత్తి. వస్తువ కేక్ గలిసి కిచ్చొ మెన సూన్లయ్ మెలె,

“సింగాసనుమతె వెసిలోసాచి, చి మెండపిల్లచి గవురుమ్ ఎత్తి.

కెయ్చ తెయ్చ గాయ్తు!

మరియాద గవురుమ్, అదికారుమ్ ఎత్తి. జోక కలుగు జవున్,

జోక కెయ్చ తెయ్చ తవున్!”

మెన కేక్ గల్లె తిలిసి సూన్లయ్.

14 తెదొడి, “శిఅమేన్!” మెన జేవ్ చెత్తర్ జీవుల్ సంగిల, చి వెల్లెల మాన్సుల్ నెర్ను నేడ సింగాసనుమతె
వెసిలోసాక చి మెండపిల్లక జోకర్ల.

6

నుట్టువ కెర్లి పుస్తకుమచ నత్తు ముద్దల్

1 తెదొడి కిచ్చొ దెకిలయ్ మెలె, మెండపిల్ల జేవ్ నత్తు ముద్దల్తె తొలితో చి కడ్డన్, చి జేవ్ *చెత్తర్
జీవుల్తె ఎక్కిలో, ఉర్పుల్చి రితి అవాడ్ కెరన్ “ఇన్నె జే!” మెలన్.

2 ఆవ్ దెకిలె, ఆదె! చొక్కిలో గోడొ డీసిలి, చి జా గోడొతె వెగిలోసాక దూన్ తిలి, చి జోక ఏక్ కిరీటుమ్
†దిల, చి బార్ జా, యుద్దుమ్ కెర జీన్, ఒండి జీనుక మెన గెలో.

3 జెలి, మెండపిల్ల దొన్నిచి ముద్ద కడ్డికయ్, కిచ్చొ సూన్లయ్ మెలె, జేవ్ చెత్తర్ జీవుల్తె అన్నెక్ జీవు
“ఇన్నె జే!” మెన కేక్ గలన్, చి

4 అన్నెక్ గోడొ; ఒగ్గర్ ఎరనచొ; బార్ జలన్. జా గోడొతె వెగిలోసాక కిచ్చొ సెలవ్ తిలి మెలె, ఒండి
బూలోకుమతెచి సేంతుమ్ పిట్టవుక; మాన్సుల్ ఎక్కిలోక ఎక్కిలో మూర్తి రితి; చి వెల్లి కండా జోక ‡దిల.

5 జెలి మెండపిల్ల తిన్నిచి ముద్ద కడ్డికయ్, తిన్నిచొ జీవు “ఇన్నె జే!” మెన కేక్ గలిసి సూన్లయ్. ఆవ్
దెకిలె, ఆదె! నిడొ గోడొ, చి జాతె వెగిలోసాచి అత్తి తక్కిడి అస్సె.

6 అన్నె, జేవ్ చెత్తర్ జీవుల్చి నెడ్మె తెంతొ ఏక్ అవాడ్ కిచ్చొ సంగిలిసి సూన్లయ్ మెలె, “ఏక్ దీసిచి
కూలిచి ఎదిలి డబ్బుల్క ఎక్కి. పాత్రెక్ గోదుమ్, చి ఏక్ దీసిచి కూలిచి ఎదిలి డబ్బుల్క తిని పొర్ని [§]బార్లి
దాన్ దొర్ను. జయెదె. గని తేలుక ది ద్రాచ రస్సుమక గార్ కెరుక నాయ్!” మెన జా అవాడ్ కేక్ గలన్.

7 మెండపిల్ల చెత్తర్చి ముద్ద కడ్డికయ్, “ఇన్నె జే!” మెన చెత్తర్చొ జీవు కేక్ గలిలిసి సూన్లయ్.

8 అన్నె దెకిలయ్, చి ఆదె! కిచ్చొ రంగుగి సంగుక నే బెదిలిసి రిత్తొ ఏక్ గోడొ. జాతె వెసిలోసాచి నావ్,
‘మొర్పు’, చి మొర్లన్క రకితి లోకుమ్ జోచి పట్టి గెతయ్. అన్నె, ‘మొర్పు’ మెలోసాక చి మొర్లన్ రకితి
లోకుమ్క కిచ్చొ సెలవ్ తిలి మెలె, యుద్దుమ్ వాట్, కకుర్తి వాట్, జబ్బుల్ వాట్ చి డొంగైవ జంతువుల్ గెతి
వాట్ మాన్సుల్క మూర్తి సెలవ్ తిలి. ఒండి లోకుమ్క చెత్తర్ వాటల్ తిలి, జేవ్ చెత్తర్ వాటల్తె ఏక్ వాటతె
మాన్సుల్క దస్సి మారుక సెలవ్ జా తిలి.

§ 5:14 5:14 ఎల్లి బాస తెన్ ‘అమేన్’ మెనుల. * 6:1 6:1 4:6-8 దెక. † 6:2 6:2 జా కిరీటుమ్ ఎత్తి. అదికారుమ్ తిలో
దేముడు సొంత జో గోడొతె వెగిలోసాక దిలన్ గే మెండపిల్ల జలొ యేను దిలన్ గే, కదిగె అత్తి జోవయింక దావడ్ల గే, గని జా జర్లు జంక ఎత్తి,
అదికారుమ్ తిలో దేముడు కచితుమ్ సెలవ్ దా తిలన్, నెంజెలి జర్లు జతి నాయ్. ఈజేవ్ కమె ఎత్తి. జొయ్యి జర్లు కెర్లయ్, గెద. ‡ 6:4
6:4 కో దిల గే నేనుమ్. § 6:6 6:6 ఈంజ దేసిమి కిసి ముక్కిమ్క చింబొ కవుల గే, జా దేసిమ్చ ముక్కిమ్క గోరుమ్క కెర్లి పొడియెం గే
పొడియెం గే రంద దనచక అన్నిమ్ కెరల. గని కారు తిలి, ఎత్తి. కరీది జా గెలి, ఈంజ దేసిమి కిసి తండుడిచి కంబ డెటొ తొక్కి కరీది జయెదె,
చి చింబొ నెంజెలి కులర్ కవుల గే, దస్సి జా దేసిమి గారు తిలి, బార్లి దాన్క అన్నిమ్ రండుల; గెనుక నవుక ఒత్తచి రిసా.

9 మెండపిల్ల పాచేచి ముద్ద కడ్డికయ్, పరలోకుమతేచి బలి దెతి టాన్చి తెడి కిచ్చొ దెకిలయ్ మెలె, విరోదుమ్ మాన్సుల్ మార్లసచ జీవుల్ క దెకిలయ్. దేముడుచి నుబుమ్ కబుర్ జేవ్ నూనయ్లి రిసా, చి యేసుచి రిసా జేవ్ సాచి నంగిలి రిసా, జేవ్ విరోదుమ్ మాన్సుల్ జోపయింక మార తిల.

10 జేవ్ దస్సి మొర్లసచ జీవుల్ గట్టిజ అవాడ కెరన కిచ్చొ మెన కేక గల మెలె, “ఎత్తిచి ఉప్పిరి అదికారుమ్ తిలో ప్రబువ, తుయి ఎత్తి నుద్ది తిలోసా, నిజామ్ తిలోసా, బూలోకుమతే జతన అమక మార అమచి లోయ నువెలి రిసా కెయ్చ జోపయింక సిచ్చ కెర్తె గే?” మెన కేక గలిల.

11 తెదొడి జోపయంతె ఎత్తి మాన్సుల్క చొక్కిలో పాలల్ *దా, కిచ్చొ మెల మెలె, “అన్నె ఇదిల్ రక. మాన్సుల్ తుమ్కయ్ కిసి మార్ల గే, దస్సి, తుమ్చ బావుడ్లు జత ప్రబువ అన్నె సేవ కెర్లసక మారుల. జేవ్ దస్సి మొర్లస ఎత్తిజిన్చి లెక్క బెర్తె ఎదక రక, చి తుమ్క, జోపయింక మార్లసక సిచ్చ దెయెదె” మెన జబాబ్ దిలన్.

12 మెండపిల్ల సావుచ్చి ముద్ద కడ్డికయ్, ఆదె! వెల్లి బూకంపుమ్ జలి. పడ్డొ పొద్దు నీడిచి కంట నీడి జా గెలి, చి ఒండి జోసు లోయి రంగు జా గెలి.

13 ఆగాసుమ్చ నుక్కలు బూలోకుమతే సేడ్ల. వెల్లి వాదు కెర్తె †అంజూరుమ్ రూక్చ చల్లి పొదిచ కాయల్ కిసి జేడ గెప్పుల గే, దస్సి జేవ్ నుక్కల్ జేడ గెల.

14 పడ్డొ, కేన్ జవున్ పున్లకుమ్ ముద్దొ కెర్తె కిసి జయెదె గే, దస్సి, ఆగాసుమ్ ముద్దొ జా డీసె నాయ్, చి జోపయింక జోపయింక టాన్సు తెంతో ఎత్తి డొంగ్రల్, ఎత్తి డిబ్బు ఒత్త తెంతో గెలి.

15 తెదొడి బూలోకుమచ రాసలు, ముక్కిమ్చ వెల్లెల మాన్సుల్, జమాన్లుచ అదికారుల్, సామాన్లు, బలుమ్ నెక్తిచ మాన్సుల్, ఎత్తి మాన్సు, గొతిమాన్సు జలెకి, గొతి నెంజలస జలెకి, డొంగ్రెచ పరోతె, రంగ్ని బొరల్తె లుంక తవుల.

16 జేవ్ డొంగ్రల్, జేవ్ రంగ్ని పత్తల్క కిచ్చొ మెన కేకుల్ గలిల మెలె, “సింగాననుమతె వెసిలోసా అమక నే దెకిత్ రితి, అమచి ఉప్పిరి సేడ. మెండపిల్లచి కోపుమ్చి సిచ్చ అమక నే లయతి రితి అమక లుంకడ.

17 జోచి కోపుమ్చి సిచ్చచి వెల్లి దీసి జా అస్సె, చి జా సిచ్చచి నెక్తిక అమ్ టీవ్క నెత్తుమ్” మెన కేక గల నంగిల.

7

దేముడుచ సేవ కెర్లసక తోడు తతి ముద్ద

1 ఇన్నెచి పడ్డొ కిచ్చొ దెకిలయ్ మెలె, బూలోకుమచ చెత్తర్ పక్కల చెత్తర్ దూతల్ టీవొజ తా, చెత్తర్ దిక్కుల్చి వాదు దెర, కేన్ వాదు బుయ్యె కి నముదుమ్తె కి, కేన్ రూక్తె కి నే వీర్తి రితి అడ్డు కెర్తెతి.

2 తెదొడి, పొద్దు బార్ జతి పక్క తెంతో అన్నెక్ దూత, ఉప్పిర్ జెంక, జీవ్ తతో జీవ్ దెతో దేముడుచి ముద్ద గల్లి బిల దెర తా వెగ గెతిసి దెకిలయ్. గట్టిజ అవాడ కెరన, బూలోకుమక నముదుమ్క అల్లర్ కెరుక మెన నెలవ తిల జేవ్ చెత్తర్ దిక్కుల్చి వాదు దెర్త చెత్తర్ దూతల్క,

3 “అమ్చే దేముడుచ సేవ కెర్లస ఎత్తిజిన్చ నెర్తెలె జోచి ముద్ద గల్తె ఎదక, బుయింక, నముదుమ్క, రుకాలె కిచ్చొ అల్లర్ కెర నాయ్!” మెన కేక గల్తో.

4 పడ్డొ, జీవ్ తిలో జీవ్ దెతో దేముడుచి ముద్ద జోపయింక నెర్తెలె గలంతన కెత్తిజిన్ జవుల గే, నూన్లయ్. కెత్తిజిన్ మెలె, పుంజెక్ దొన్ని వినా చెత్తర్ వెయిల్ జిన్ జోచి ముద్ద గలంతన జవుల. కేనె కేనెచ మెలె, అమ్చ *ఇస్రాయేలులుచ ఎత్తి సెకుమ్లతె బెదిలన.

5 యూదాచి సెకుమ్తె బార వెయిల్ జిన్క, రూబేనుచి సెకుమ్తె బార వెయిల్ జిన్క, గాదుచి సెకుమ్తె బార వెయిల్ జిన్క,

* 6:11 6:11 పాలల్ కో దిల గే, కో ‘రక’ మెల గే నేనుమ్, గని ఎత్తి అదికారుమ్ తిలో దేముడు జుర్ల కెరచ తయెది మెన జానుమ్.

† 6:13 6:13 అంజూరుమ్ పండ్లు బొడ్డు పండ్లుచ రిత కాయల్ జవుల. * 7:4 7:4 బయిల్తె ‘ఇస్రాయేలులు’ మెలె, మాములుమ్ యూదుల్చి రిసా ‘ఇస్రాయేలులు’ మెనల, పడ్డొ యూదుల్ నెంజలనతె కో యెసుక నంపజతతి గే, జోపయింక కి ‘అమ్చ ఇస్రాయేలులు’ మెన ఎత్తి అదికారుమ్ తిలో దేముడు దెకితయ్. జేక ఇన్నె ‘ఇస్రాయేలులు’ మెలె, ప్రబుక నంపజలన మొత్తుమ్క టాలి జతయ్. ‘పుంజెక్ దొన్ని వినా చెత్తర్ వెయిల్ జిన్’ మెలి నంబరచి అర్దుమ్ కిచ్చొ మెలె, ‘పూర్తి జలిసి’, ‘మొత్తుమ్ నంపజలనచి లెక్క పూర్తి జలిసి’; టాలి జతయ్.

6 ఆసీరు సెకుమతె బార వెయిల్ జిన్క, నష్టాలిచి సెకుమతె బార వెయిల్ జిన్క, మనస్సేచి సెకుమతె బార వెయిల్ జిన్క,

7 సిమ్యానుచి సెకుమతె బార వెయిల్ జిన్క, లేపీచి సెకుమతె బార వెయిల్ జిన్క, ఇస్కారు సెకుమతె బార వెయిల్ జిన్క,

8 క్షిబులూనుచి సెకుమతె బార వెయిల్ జిన్క, యోసేపుచి సెకుమతె బార వెయిల్ జిన్క, చి బెన్యామీను చి సెకుమతె బార వెయిల్ జిన్క జోజోచి ముద్ద గల తయెదె.

ప్రబుచయ్ జల మాన్సుల్ జోచి గవురుమ్ సంగిలిసి

9 ఇన్నెచి వడ్డో అన్నె దెకితె తిలె, ఆదె! కేన్ మాన్సు లెక్క కెరుక నెతిరి జనాబ్ ఒత్త తిలె. ఎత్తి రాజిమ్ తెంతో, ఎత్తి సెకుమ్ తెంతో, ఎత్తి ప్రెజల్ తెంతో, ఎత్తి బాసల్ తెంతోచ జా తా, సింగాసనుమ్చి పుర్రెత్తి, చి మెండపిల్లచి పుర్రెత్తి టీవోజ తా, చొక్కెల పాలల్ గలన అస్తి, చి జోవయించ అత్తిలె కజారుమ్ రూక్చ మట్టల్ దెరన తా,

10 గట్టిజ అవాడ్ కెరన, “మాన్సుచి రచ్చన దేముడుతెయి చి మెండ పిల్లతెయి అస్సి!” మెన కేక్ గల్లె.

11 అన్నె, సింగాసనుమ్చి సుట్టునంత, విస్సెక్ చెత్తర్జిన్ వెల్లెల మాన్సుల్చి సుట్టునంత, †చెత్తర్ జివుల్చి సుట్టునంత దూతల్ ఎత్తి టీవోజ తా, జోచి మొక్కె సెర్పు సేడ కిచ్చి మెన సంగ దేముడుక జొక్కర్ల మెలె,

12 “అమేన్!‡

మాన్సుల్ జోచి గవురుమ్ గాయితిసి, గవురుమ్, గ్యానుమ్,

జోచి దయచి రిసా, మాన్సుల్ జోచి సర్ద సంగితిసి,

మరియాద దెకితిసి, సెక్తి అన్నె అదికారుమ్ ఎత్తి.

అమ్చో దేముడుక కలుగు జవున్

కెయి:క తెయి:క నే పిట్టె జోక తవున్!

అమేన్!”

మెన కేక్ గల్లె.

ఒగ్గర్ బాదల్తె ప్రబుచయ్ జల మాన్సుల్ జిన్సి

13 తెదొడి వెల్లెల మాన్సుల్తె ఎక్కోలో అంక పుసెలన్. “ఈంజేవ్ చొక్కెల పాలల్ గలన తిలస కొన్న? కేనె తెంతో జా అస్సి?”

14 జాకయ్ కిచ్చి మెలయ్ మెలె, “బాబు, తుయి జాన్సి” మెలయ్, చి జేవ్, “ఒగ్గర్ అల్లర్ జంక తిలి జా వెల్లి బాదతె తెంతో జీన అయలన. ఈంజేవ్, మెండపిల్లచి లోయితె జోవయించ పాలల్ కేడన చొక్క కెరన అస్సి.

15 జాకయ్,

జేవ్ దేముడుచి సింగాసనుమ్చి మొక్కె అస్తి, చి

రాతి మెద్దెనె జోచి దేవులుమ్తె జోచి సేవ కెరె తత్తతి.

అన్నె, సింగాసనుమ్తె వెసిలోసా జోవయింక జోతె రక రక,

జేవ్ కిచ్చి అల్లర్ నే జతి రితి జోచి నీడతె డంకెదె,

16 జోవయింక అప్పె తెంతో కెయి:క కి చూ కెరె నాయ్. తాన్ కెరె నాయ్.

ఒప్పుడక సుసా గెతి నాయ్, కేనెచి ఒగ్గర్ తాత్ లయె నాయ్.

17 కిచ్చి మెలె, సింగాసనుమ్చి నెడిమి తెంతో

మెండపిల్ల జోవయింక గొప్పుడు జా రకెదె,

చి జీవ్ దెత పానివో దెకవ పియడెదె.

అన్నె, జోవయింక అంకివోతె ఆసునో పూర్తి పుంచ గెలెదె.”

మెన జో వెల్లొ మాన్సు సంగిలన్.

8

సుట్టువ కెల్లి పున్నకుమ్చి ఆకరచి ముద్ర మెండపిల్ల కడ్డిసి

1 మెండపిల్ల నత్తుచి ముద్ర కడ్డికయ్, రమారమి అర గంట ఎద పరలోకుమ్తె కిచ్చి అవాడ్ నాయ్.

2 వడ్డో, దేముడుచి మొక్కె టీవోజ తిల నత్తు దూతల్క దెకిలయ్. జోవయింక ఎక్కెక నప్పిరమూరివో *దిల.

3 తెదొడి అన్నెక్రో దూత జా కెర, బజరచి గిన్న దెరన బలి దెతి టాన్చి పురై టీవో జలన్. చి 'ప్రబుచయ్ జల మాన్సుల్చ ప్రార్దనల్ తెన్ బెదున్' మెన, సింగాసనుమ్చి పురైతోచి బలి దెతి టాన్చి జేవ్చి దుమ్మొ ఉడ్డితి రిసా జో దూత డయింక మెన, జోక ఒగ్గర దూపుమ్ †దిల.

4 చి దేముడుచి మొక్కె పావెతి రితి, జోవయించయ్ జల మాన్సుల్చ ప్రార్దనల్ తెన్ జా దూపుమ్చి దుమ్మొ బెద, జో దూతచి అత్తి తెంతో ఉడ్డ దేముడుచి మొక్కె గెలి.

5 తెదొడి జో దూత జా దూపుమ్ డయితి గిన్న దెరన, బలి దెతి టాన్చి ఉప్పిర్చి ఆగి ఇంగుడ్లు సగుమ్ ఒత్త బెరవ కెర, బూలోకుమ్చి ఉప్పిరి గల దిలన్, చి ఉర్తుల్ కెర్రి, అవాడ్లుచి అవాడ్ అయ్చి, బిజిలి మొల్లి, చి బూకంపుమ్ జలి.

నత్తు నప్పిరమూరివోతె ఏక చెత్తర్ వర్చు తెన్ పుజిలిసి

6 తెదొడి నత్తు నప్పిరమూరివో దెర్ల నత్తుజన్ దూతల్ జేవ్ నప్పిరమూరివో పుజుక తెయార్ జల.

7 త్రితోచో దూత జోచి నప్పిరమూరి పుజిలన్, చి కిచ్చి తెదొడి బార్ జలి మెలి, లోయి తెన్ కలోయ్ జలి కరపత్తల్ చి ఆగి నేడ, బుయ్యో నూయి జలి, చి ఒండి బూలోకుమ్తెచి తిన్ని వాటల్తె ఏక వాట పూర్తి డడ్డ గెలి, చి రూక్చి తిన్ని వాటల్తె ఏక వాట పూర్తి డడ్డ గెల, చి చివ్వర్ ఎత్తి డడ్డ గెలి.

8 తెదొడి దొన్నిచో దూత జోచి నప్పిరమూరి పుజిలన్, చి వెల్లి డొంగ్రు జతి రితిసి, ఆగిక డడ్డ కెర, నముద్రుమ్తె గలి జలి.

9 అన్నె, ఒండి నముద్రుమ్చి తిన్ని వాటల్తె ఏక వాట లోయి జాఁ గెలి. నముద్రుమ్తెచి జివుల్చ తిన్ని వాటల్క ఏక వాట మొర గెల, చి ఒడల్ మొత్తుమ్చ తిన్ని వాటల్తె ఏక వాట నాసెనుమ్ జాఁ గెల.

10 తెదొడి తిన్నిచో దూత జోచి నప్పిరమూరి పుజిలన్, చి పరలోకుమ్ తెంతో వెల్లో సుక్కో నేడ, వత్తిచి దివు లగిలి రితి జా, ఒండి బూలోకుమ్చ గడ్డెచ తిన్ని వాటల్తె ఏక వాట గడ్డెతె చి ఉజుల్తె నేడ్డన్.

11 జో సుక్కోచి నావ్ 'కోడు పానన్', చి ఒండి బూలోకుమ్చ పానివోక తిన్ని వాటల్తె ఏక వాట కోడె జా గెల. జా కోడు తిలో పాని పిలి రిసా, ఒగ్గరజన్ మాన్సుల్ మొర గెల.

12 తెదొడి చెత్తర్చో దూత జోచి నప్పిరమూరి పుజిలన్, చి పొద్దుక తిన్ని వాటల్తె ఏక వాటక, జోసుచ తిన్ని వాటల్తె ఏక వాటక, చి సుక్కల్చ తిన్ని వాటల్తె ఏక వాటక దెబ్బ లయిలి. జోవయించి ఉజుడి అందర్ జా గెలి. ఒండి మెద్దెన్చ తిన్ని వాటల్తె ఏక వాటక పొద్దుచి ఉజుడి లగి నాయ్, చి ఒండి రాతిచ తిన్ని వాటల్తె ఏక వాటక జోసుచి సుక్కల్చి ఉజుడి లగి నాయ్.

13 తెదొడి అవ్ అన్నె దెకిలయ్, చి కిచ్చి సూన్లయ్ మెలి, పొద్దు ఆగాసుమ్చి మదెన్ ఏక ఏక గిడ్డు ఉడ్డితె తా గట్టిజ ఒర్చు దా కిచ్చి మెన ఒర్చితె తిలి మెలి, "అయ్యో! అయ్యో! అయ్యో! అన్నెక్ తిన్ని దూతల్ వర్చు తెన్ జోవయింక నప్పిరమూరివో అప్పె పుజుక తిలిన్క బూలోకుమ్తె జతస ఎత్తిజన్క కెర్రి కస్తుమ్ కెర్రి నస్తుమ్!" మెన సంగ గిడ్డు ఉడ్డితె తిలన్.

9

పాంచో దూత జోచి నప్పిరమూరి పుజిలిసి

* 8:2 8:2 ఎత్తి అదికారుమ్ తిలో దేముడు దిలన్ గే, మెండపిల్ల జలో యేసు దిలన్ గే, కచిగి అత్తి జోవయింక దొవడ్ల గే, గని జేవ్ నప్పిర్ల జోవయింక తంక కచితుమ్ ఎత్తి అదికారుమ్ తిలో దేముడుచి నెలవ్ జా తయెద. † 8:3 8:3 కో దిల గే నేనుమ్. ‡ 8:11 8:11 జా సుక్కోక మాచిపత్తి మెన నావ్. జాచి అద్దుమ్ విసస్సుమ్ అన్నె కోడు కి అన్నె మాన్సుల్ కో కయ్లె మొర గిచ్చుల.

1 తెదొడి పాంచో దూత జోచి నప్పిర్మూరి పుజీలన్, చి కిచ్చొ దెకిలయ్ మెలె, పరలోకుమ్ తెంతో బూలోకుమ్ ఎద ఏక్ సుక్కొ సేడ్లన్, చి జో సుక్కొ జతోసాక ఏక్ తాలుమ్ *దిల. మట్టు నెంజలి దిగిలి గొయితె సేడ్లి వాట్ ఉగిడ్లి తాలుమ్.

2 మట్టు నెంజలి జా గొయితె సేడ్లి వాట్ ఉగిడ్లన్, తెదొడి వెల్లి జా గొయి తెంతో వెల్లి ఆగి గొయిచి రితిచి ఆగిచి దుమ్మొ బార్ జలన్, చి జా గొయి తెంతో బార్ జతి దుమ్మొక పొద్దు కి ఆగాసుమ్ కి గొందు డంకిలి రితి జా అందర్ జల.

3 పడ్డె, జా దుమ్మొ తెంతో చిట్టల్ బూలోకుమ్తె బార్ జా బెర్ల, చి విస్సుమ్ కుర్చుచి ఎదిలి సెక్కి జోవయింక †దిల.

4 జోవయింక కిచ్చొ ఆడ్ర దిలి మెలె, బుయ్యోచి చివ్వర్ గే కిచ్చొ మొక్కల్ గే, కేన్ రూకుక గే పాడ్ కెరుక జయె నాయ్. గని, కేన్ మాన్సుల్క దేముడుచి ముద్ర జోచి నిర్దె తయె నాయ్ గే, జోకయ్ సిచ్చ కెరుక.

5 పాంచో జొన్సొ ఎద జోవయింక సిచ్చువ నొప్పుల్ కెరుక మెన జేవ్ చిట్టల్క సెలవ్ తిలి. గని కక్క మారుక సెలవ్ నాయ్. జేవ్ సొప్పి దెతిసి కిసిచి మెలె, మాన్సుక విస్సుమ్ కుర్చు చప్పిల్ తిసి నొప్పి కెరెదె గే, తెడ్డి నొప్పి జల.

6 జా పొదులె కిసి తయెది మెలె, 'మొర్చు జెవున్' మెన మాన్సుల్ కోర్ప జవుల, గని మొరుక నెతిరి. మొరుక ఆనయి జవుల, గని మొర్చు జోవయింక కొకడ ఉట్ట నిగెదె.

7 డిసుక జలె, జేవ్ చిట్టల్ కీన తిల మెలె, యుద్దుమ్క తెయార్ జల గోడల్చ రిత తిల. జోవయింక బోడిలి బజర్చ కిరిటల్ రిత తిల. జోవయింక మొక్కోమలు మాన్సుల్చ మొక్కోమలు రిత తిల.

8 జోవయింక రోమల్ తెర్బోదల్చి సెండిచి రితి, జోవయింక దంతో సింపుమ్లచి దంతో రిత తిల.

9 ఇనుము డొల్లు రిత డిస్త పొరల్ జోవయింక చామ్తె తవుల, చి ఉడ్డిలి జోవయింక రెప్పల్ కదుల్ జతి అవాడ్ కిసి మెలె, గోడలు జమాన్లుచి రదుమ్ కడన యుద్దుమ్తె నిగ గెతి రితి అవాడ్ జతె తవుల.

10 జోవయింక తోకల్ కీన మెలె, విస్సుమ్ కుర్చుచి తోకల్చి రితి బూసుల. జోవయింక తోకల్తె పాంచో జొన్సొ ఎద మాన్సుల్క నొప్పి దెలి సెక్కి తయెదె.

11 జోవయింక ఉప్పిర్చో రాసో కొన్సొ జయెదె మెలె, మట్టు నెంజలి గొయి రకితో దూత. ఎబ్రీ బాస తెన్ జో దూతచి నావ్ 'అబద్దొసు', చి జా నావ్క అర్దుమ్ 'నాసెనుమ్ కెర్టొసా'. గ్రీకు బాస తెన్ జా నావ్ 'అపొల్లయొసు' మెనుల.

12 జా సిచ్చుచి గండిమ్ తొలితో చి. ఒత్త తెంతో దన సిచ్చల్ అన్నె దొన్ని జర్గు జంక జయెదె.

సొప్పువో దూత జోవయింక నప్పిర్మూరి పుజీలిసి

13 తెదొడి సొప్పువో దూత జోచి నప్పిర్మూరి పుజీలన్, చి దేముడుచి మొక్కెచి బలి దెతి బజార్ టాన్చ చెత్తర్ కొమ్మల్ తెంతో ఏక్ అవాడ్ అయెలిసి సూన్లయ్.

14 జా అవాడ్ సొప్పుచి నప్పిర్మూరి దెరితో ఈంజో దూతక, "యూప్రటీసు మెలి వెల్లి గడ్డె బంద తిల చెత్తర్ దూతల్క విడ్డల్ కెరు" మెన జా అవాడ్ సంగిలన్.

15 జాకయ్ జేవ్ చెత్తర్ దూతల్క బందిలిసి ఈంజో దూత డిసిలన్. జేవ్ జయ్యి గడియ, జయ్యి దీసి, జయ్యి జొన్సొ, జయ్యి వెర్రి విడ్డల్ జా బండ్ లోకుమ్చ ప్రజల్క తిన్ని వాటల్తె ఏక్ వాట జిన్క మార్చి రిసా రకితి రితి తెయార్ జా తిల.

16 జేవ్ దూతల్చి తెడి జా సిచ్చు జర్గు కెర్ గోడల్తె వెగిల సయ్యుమ్ములు కెత్తిజన్ జవుల మెలె, విస్సెక్ కోట్లు జీన, జా లెక్క అవ్ సూన్లయ్.

17 జలె, జా డిసిల్ సిచ్చుతె జేవ్ సయ్యుమ్ వెగిల గోడలు అంక కీన డిసిల మెలె, జోవయింతె వెగిలనక గుండె ఆగి రంగు, నీలిమ్ రంగు చి ఎడ్డి రంగు బెదిల. ఎక్కెక్ డాలు జత రిత ఇనుము సొక్కల్ గలన తిల,

* 9:19:1 జా తాలల్ దేముడు సొంత జో సుక్కొ జతోసాక దిలన్ గే మెండప్పిల్ జలో యేసు దిలన్ గే కచిగి అత్తి జోవయింక దావడ్ల గే, గని జా జర్గు జంక ఎత్తి అదికారుమ్ తిలో దేముడు కచితుమ్ సెలవ్ దా తిలన్, నెంజలి జర్గు జతి నాయ్. † 9:3 9:3 జా తాలల్ దేముడు సొంత జో సుక్కొ జతోసాక దిలన్ గే మెండప్పిల్ జలో యేసు దిలన్ గే కచిగి అత్తి జోవయింక దావడ్ల గే, గని జా జర్గు జంక ఎత్తి అదికారుమ్ తిలో దేముడు కచితుమ్ సెలవ్ దా తిలన్, నెంజలి జర్గు జతి నాయ్.

చి జేవ్ గోడల్చ బోడివొ కీన తిల మెలె, సింపుమ్లుచ బోడివొ రిత డీసిల, చి జోవయించి చోడి తెంతో ఆగి, దుమ్మె, చి ఎడ్డి రిత దుమ్మె బార్ జతె తిల.

18 జోవయించి చోడి తెంతో బార్ జతి ఆగి, దుమ్మె, ఎడ్డి దుమ్మె బార్ జతె తిలినక ఒండి బూలోకుమ్చ మాన్సుల్చ తిన్ని వాటలతె ఏక వాటజన్ మొర్ల.

19 కిచ్చొక మెలె, జేవ్ గోడలు అల్లర్ కెర్లె సెక్కి కిచ్చొతె మెలె, జోవయించి చోడితె చి జోవయించ తోకల్తె తిల. జోవయించ తోకల్ కీన మెలె, అయివొచ రిత జా బోడివొ తెన్ తవుల, చి జోవయించ తోకల్కయ్ మాన్సుల్క గాయిమ్ కెరుల.

20 జలె, జా డీసిలినతె అన్నె కిచ్చొ జలి మెలె, ఈంజేవ్ సిచ్చల్ నే మూర్ల సేనిల మాన్సుల్ కీసి జలె మెలె, జేవ్ కెర్ల కముక వినారుమ్ జతి నాయ్, ములితి నాయ్, చి బూతల్క, చి బజర్క, వెండిక, కంచుక, పత్తుర్క, దారుక తెయార్ కెర్ల బొమ్మల్క జోకరుక ములితి నాయ్. దన్న బొమ్మల్ దెకుక గే నూసుక గే ఇండుక గే నెతిర్లె కి.

21 అన్నె, జేవ్ మాన్సుల్ కెర్ల హత్యలు, మెంగుర్ కమ్మె, లంజెకమ్మె, చోర్ కమ్మెక, వినారుమ్ జతి నాయ్, ములితి నాయ్.

10

ఒగ్గర్ సత్తుచొ అన్నెక్ దూత

1 వడ్డె, ఒగ్గర్ సత్తుచొ అన్నెక్ దూత పరలోకుమ్ తెంతో ఉత్త జెక దెకిలయ్. జో మబ్బు గలన్ని రితె జా, మబ్బుచి తెడి తా, జోచి బోడిచి ఉప్పిరి పచ్చన వయ్డూరుమ్ రంగుచి దూని లగిల్ రితె జా, జోచి మొకొమ్ పొర్లుచి రితె ఉజిడి తా, జోచి చట్టో ఆగి రిత తంబల్ రితె తా.

2 ఏక ఇదిలిన పుస్తకుమ్ జోచి అత్తి తిలి. అగ్గె సుట్టువ జా తిలి, గని అప్పె ఉగ్గి జా అన్నె. జలె, జోచొ ఉజిల్ చాటు నముద్దుమ్తె తియ్, డెబ్బి చాటు బుయ్యె తియ్ సుద,

3 సొంపుమ్చి అవాడ్ రితె గట్టిజ అవాడ్ కెరన, ఒర్పిలన్. ఒర్పితకయ్, సత్తు ఉర్కుల్ కెర జబాబ్ దిల.

4 సత్తు ఉర్కుల్ కెర్లయ్, అవ్ జేవ్ సంగిలిసి రెగిడ్లయ్, గని పరలోకుమ్ తెంతో అయిలి ఏక అవాడ్ సూన్లయ్. అంక కిచ్చొ సంగిలన్ మెలె, “జేవ్ సత్తు ఉర్కుల్ సంగితిసి గుట్టు తతి రితె కెరు, రెగిడ్ నాయ్” మెన ఆడ్ల దిలన్.

5 తెదొడి నముద్దుమ్తె బుయ్యె టీవొజ, అవ్ దెకిలొ దూత జోచొ ఉజిల్ అతు పరలోకుమ్ పక్క ఉక్కుల.

6 “కెయక తెయక నే పిట్టె జితో, పరలోకుమ్ చి ఒత్త తిలిసి ఎత్తి, బూలోకుమ్చి ఒత్త తిలిసి ఎత్తి, అన్నె నముద్దుమ్చి ఒత్త తిలిసి ఎత్తి జెర్కున్ కెర్లొసా సాచి” మెన ఒట్టు గలన, కిచ్చొ సాడుప కెర్లన్ మెలె, “సమయుమ్ జా అయిలి. అన్నె వాయిద కెరుక నంజె.

7 గని, సత్తు దూతలతె ఆకర్చొ దూత జోచి నప్పిరమూరి పుజుక తిల దినాల్క, దేముడు జోచి సేవ కెర్లన్ జలె, జోచి కబుర్లు సంగిల పూర్తుల్క సంగిలి రితె, జోచి గుట్టు తిలిసి నెరవెర్కువ జంక అన్నె” మెన జో దూత ఒట్టు గలన సాడుప కెర్లన్.

8 అవ్ అగ్గె సూన్ల పరలోకుమ్ తెంతో చి అవాడ్ అంక అన్నె సంగిలిసి కిచ్చొ సూన్లయ్ మెలె, “అల్లె, తుయి గో! చి నముద్దుమ్తె బుయ్యె టీవొజ దూతచి అత్తి తిలి పుస్తకుమ్ నజు” మెలన్.

9 జో దూతతె అవ్ గెచ్చ, “అంక జా ఇదిలిన పుస్తకుమ్ దె” మెన సంగిలయ్, చి జో అంక, “నజన * కా, ఈంజె తుచి పెట్టి తుక కోడు జయెదె, గని తుచి చోడితె ఒండల్ తేల్చి రితె తియనయ్ తయెదె.” మెలన్.

10 జాకయ్ జా ఇదిలిన పుస్తకుమ్ జో దూతచి అత్తి తెంతో నజన కయలయ్. అంచి చోడితె ఒండల్ తేల్చి రితె తియన తిలి, గని, జా కతికయ్, అంచి పెట్టి కోడు జలి.

11 తెదొడి అంక ఆడ్ల దిలిసి కిచ్చొ మెలె, “ఒగ్గర్ ప్రజల్చి రిసా, ఒగ్గర్ రాజిమ్లుచి రిసా, ఒగ్గర్ బానల్చి రిసా, ఒగ్గర్ రానల్చి రిసా అవ్ తుక అన్నె దెకయ్తిసి రెగ్గ మాన్సుల్క జానవుక” మెన అంక ఆడ్ల అయిలి.

* 10:9 10:9 యెహెష్యెలు 3:1-3.

11

దొంగల సాచుల్

1 తెదొడి కట్టెడి ఏక డండో అంక *దిల, చి అంక కిచ్చొ ఆడ్ర అయ్యలి మెలె, “ఉట్ట, దేముడుచి గుడిచి బలి దెతి టాన్చి ఒత్త బక్తి కెర్తనక కట్టుడ దెకు.

2 గని దేముడుచి గుడి ఒత్తలతోచి బయ్యలెచి డర్తుక నే కట్టడతె ములు. కిచ్చొక మెలె, దేముడుక నేన్ల మాన్సుల్చి అత్తి జా టాన్ అప్పెచి మట్టుక తంక నెలవ్ అన్సె. †దొన్ని విస్సా దొన్ని జొన్సె పూర్తి ఈంజ సుద్ది జలి పట్టుమ్ జేవ్ సుడ గెల అల్లర్ కెరుల.

3 అన్సె, †బార పుంజో తిన్ని విస్సా పొదులు అంచ దొంగల సాచులు †బర్తబట్టల్ గలన అంచ కబర్లు సాడువ కెరుక మెన నెక్తి దెయిందె” మెన అంక ఆడ్ర అయ్యలి.

4 ఈంజేవ్ దొంగల సాచుల్ కొన్సె జవుల మెలె, బూలోకుమ్ ఏలువ కెర్తో ప్రబుచి మొక్కె టీవొజె తిల, దొన్ని ఒలివ రూక్లు చి దొన్ని దీవుకంబల్, మెన *టాలి జయెదె.

5 అన్సె, కో ఇన్సెయింక కిచ్చొ అల్లర్ కెరుల గే, ఇన్సెయింక చీండి తోతో ఆగి బార్ జా, ఇన్సెయింక విరోదుమ్ జలనక లయ గెలెదె. కో ఈంజేవ్ దొంగలక అల్లర్ కెరుల గే, జేవ్ ఇసి మొరుకయ్.

6 ఈంజేవ్ దొంగల సాచుల్క అన్సె కిచ్చొ నెక్తి మెలె, దేముడుచ కబర్లు ఈంజేవ్ సంగితె ఎద పాని †నే పెట్టె రితి అడ్డు కెరుక. పడ్డె అన్సె, †లోయ జతి రితి పానివొక మార్పువ కెరుక, చి కెట్టి సుట్టు ఇన్సెయింక ఇన్సెమ్ అయ్యలె, ఎత్తి రగుమ్, అల్లర్క బూలోకుమ్చక సిప్పల్ కెరుక నెక్తి అన్సె.

7 పడ్డె, ఇన్సెయింక సాచి సంగ కేడయ్యలె పడ్డె, మట్టు నెంజలి జా వెల్లి గొయ తోతో వెగ జెతో జెంతు ఇన్సెయింక ఉప్పిరి యుద్దుమ్ కెర జిన కెర, ఇన్సెయింక మారెదె.

8 ప్రబుక సిలువతె టీవొ కెర మార్తి వెల్లి పట్టుమ్తె ఇన్సెయింక పీనుమ్లు సేడ తవుల. జా పట్టుమ్క టాలిక †‘సాదొమ’ చి ‘ఐగుప్తు’ మెన సంగుక జయెదె.

9 తిన్ని నర పొదుల్ పూర్తి ఎత్తి ప్రెజల్ తోతో, ఎత్తి నెకుమ్ తోతో, ఎత్తి బాన తోతో, ఎత్తి రాజమ్ తోతోచ మాన్సుల్ ఇన్సెయింక పీనుమ్లుక దెక దెక, ఇన్సెయింక మెన్సె రోపుక నెలవ్ నే దెతి.

10 ఈంజేవ్ దొంగల సాచుల్ సంగ తిల కబర్లు, ఈంజేవ్ కెర్త కెమె బూలోకుమ్తె జేవ్ జతనక అల్లర్ కెర్తి రిసా; లాజ్ కెరయ్యలి రిసా, బూలోకుమ్తె జతన ఈంజేవ్ మొర్లిన్చి రిసా వెర్తి సర్ద జా, సర్ద కెరన, జోవయింక వెర్తి సర్దచి గుర్తుక ఎక్కిలోక ఎక్కిలో బవుమానల్ దెతె తవుల.

11 జెల, జేవ్ తిన్ని నర పొదుల్ గెలె, దేముడు పుజిలి అత్తు ఈంజేవ్ సాచుల్చి పెట్టి పెన జయడ్లన్, చి ఉట్ట సోగ టీవొ జల, చి ఇన్సెయింక దెకిలన పూర్తి బియఁ గెల.

12 తెదొడి, ఈంజేవ్ జీవ్ జల సాచుల్ పరలోకుమ్ తోతో చి ఏక అవాడ్ నూన్ల. కిచ్చొ మెన జా అవాడ్ సంగిలన్ మెలె, “ఇత్తల్ వెగ జా!” మెలన్, చి ఇన్సెయింక విరోదుమ్ జలనచి మొక్కె మబ్బు తెన్ పరలోకుమ్తె వెగ గెల.

13 జయ్యి గడియయ్ వెల్లి బూకంపుమ్ జలి. జా పట్టుమ్చ దెన్సు వాటల్తె ఏక వాట నాసెనుమ్ జా గెలి. జా బూకంపుమ్తె సత్తు వెయ్యలిజన్ మాన్సుల్ మొర గెల. సేసెల మాన్సుల్ బియఁ కెర, పరలోకుమ్తె తిలో దేముడుక గప్పురుమ్ దిల.

* 11:1 11:1 ఎత్తి అదికారుమ్ తిలో దేముడు దిలన్ గే మెండప్పిల్ల జలో యేను దిలన్ గే అన్సె కచిగి అత్తి జోవయింక దాపడ్డ గే, గని ఎత్తి అదికారుమ్ తిలో దేముడుచి నెలన్ నెంజలి, జోవయింక దొర్లు జతి నాయ్. 3 నంబర్ కోడుక దెకిలి, ఎత్తి అదికారుమ్ తిలో దేముడు, నెంజలి మెండప్పిల్ల జలో యేను లట్టితయ్ మెన ఉచరుక జయెదె. గని గ్రీకు బాన తెన్ ఈంజ ‘డినయ్యలిసి’ తొలితె రిగిడ్ల నగుమ్ పుస్తకల్తె అడ్ర దిలోసాక ‘దూత్’ మెన. నంబర్ కోడుతె అన్సె. సగుమ్తె దస్సి సంగి నాయ్. † 11:2 11:2 దొన్ని కి రమారమి తిన్ని నర వెర్తుల్ జయెదె.

† 11:3 11:3 దొన్ని కి రమారమి తిన్ని నర వెర్తుల్ జయెదె. § 11:3 11:3 కిచ్చొ గుర్తు దెకపుక మెన యూదుల్ తెన్ బన్బట్టల్ గలవ బులుల మెలె, జోవయింక పెట్టిచి దుకుమ్ దెకపుక. * 11:4 11:4 జెకర్తా 4 అర్దుయ్యమ్తె ఇసి టాలి అన్సె. † 11:6 11:6 ఏలియా పూర్తుమ్చొ దస్సి కెర తిలన్. రానల్ మొదొల్ పుస్తకుమ్ 17:1. † 11:6 11:6 మోసి పూర్తుమ్చొ దస్సి కెర తిలన్. నిర్లమాండుమ్ 7:14-18. § 11:8 11:8 సాదొమ పట్టుమ్చ మాన్సుల్చి ఐగుప్తు దేసిమ్చ మాన్సుల్ ఎత్తి అదికారుమ్ తిలో దేముడుక చి జోవయింక మాన్సుల్క పూర్తుమ్ విరోదుమ్ కెర తిలన్. దస్సి, యెరూసలీమ్ పట్టుమ్చ మాన్సుల్ యేనుక విరోదుమ్ కెర మార్చ, చి ఈంజేవ్ సాచుల్చ పీనుమ్లు ఒత్తుయ్ నెడ్ల.

14 సిచ్చల్చ గండిమ్లు, కస్తుమ్లు ఇన్నెతెన్ దొన్ని జా గలి. మొత్తుమ్ తిన్ని సిచ్చల్ జతి రితి అన్నెక్ దస్సి సిచ్చ కచితుమ్ జర్గు జంక అన్నె.

సత్తుజన్ దూతల్తె ఆకర్చొ జోచి నప్పిర్మూరి వుజీలిసి

15 సత్తుచొ దూత జోచి నప్పిర్మూరి వుజీలన్, చి కిచ్చొ జలి మెలె, పరలోకుమతె గట్టిజ అవాడచ అవాడ్లు కిచ్చొ మెల మెలె, “బూలోకుమచి రాజమ్ అమ్చొ ప్రబుచి చి జోచొ క్రిస్తు వుత్తున్చి రాజమ్ జా మార్పున జా అన్నె. కెయడ తెయడ జో ఏలువ కెరెదె” మెన సంగిల.

16 తెదొడి దేముడుచి వురైతొ జోచ సిజాసనల్తె వెసిత విన్నక చెత్తర్జన్ వెల్లెల మాన్సుల్ దేముడుచి మొక్కె సెర్పు నేడ, జోక కిచ్చొ మెన బక్తి కెర్త మెలె,

17 “ఎత్తి సెక్తి అదికారుమ్ తిలో ఎత్తిక ఏలువ కెర్తొ దేముడు ప్రబువ, తుయి అప్పె తతోసొ, అగ్గె తెంతొ తిలోసొ, తుయి తుచి సెక్తి అదికారుమ్ దెరన, ఏలువ కెరుక దెర అస్సిసి మెన, తుక అమ్చి సర్ల సంగితనుమ్.

18 తుక నేన్ మాన్సుల్ మొత్తుమ్ తుచి ఉప్పిరి కోపుమ్ దెకయల, గని తుచి కోపుమ్ తుయి దెకవ జోవయింక సిచ్చ కెర్లది.

మొర్లనక పరిచ్చ కెర తుచ నేవ కెర్లన జల తుచ కబుర్లు సంగితనక

చి తుచ సొంత జల అన్నె మాన్సుల్క, తుక బిత ఎత్తిజిన్క,

జేవ్ బాల వెల్లొ జలె కి, జోవయింక బవుమానుమ్ దెంక,

పడ్డొ బూలోకుమచక నాసెనుమ్ కెర్లనక నాసెనుమ్ కెరుక మెన,

నమయుమ్ జా అయ్లి.”

మెన జో దేముడుచి మొక్కె ఒప్పున్.

19 తెదొడి పరలోకుమచి దేముడుచి గుడిచి కెప్పి ఉర్గి జలి, చి జోచి జా దేముడుచి గుడిచి తెడిక తెడిచి గదితె జోచి నే పిట్టి ప్రమానుమచి గుర్చుచి *పెటె డీసిలి. అన్నె, బిజలి మొల్కిలి, అవాడ్లు అయ్లి, ఉర్కుల్ కెర్లి, చి బూకంపుమ్ కెర్లి, చి వెల్లెల కరపత్రల్ పెట్టె.

12

తేర్బోదచి వెల్లి అయిచి టాలి

1 తెదొడి ఆచారిమ్చి వెల్లి ఏక గుర్తు ఆగానుమతె డీసిలన్. కిచ్చొ మెలె, పాలుమ్ మెలి రితి పొద్దు గలన్చి రితి జలి తేర్బోద. జాచి చట్టె జోను, జాచి బోడి *బార సుక్కల్ తిలి కిరీటుమ్.

2 జా అంగి జా తిలి, చి జాచి కంట్టు పాచ అయ్లి నొప్పుల్క, లడెన్ జంక మెన, ఒచ్చితె తిలి.

3 తెదొడి, ఆగానుమతె అన్నెక్ వెల్లి గుర్తు డీసిలి. ఆదె! వెల్లొ అయి రితొ ఆగి రితొ ఎరన జంతు. జోక సత్తు బోడియె చి దెన్ను కొమ్ముల్, చి జోచ సత్తు బోడివోత † సత్తు కిరీటల్ తిల.

* **11:19 11:19** తెదొడక ఎద, ఎత్తి అదికారుమ్ తిలో దేముడుచి గుడితె జా పెటె తిలి తెడిక తెడిచి గదితె ఎక్కి ఎత్తిక వెల్లొ పూజరి, గని అన్నెకోయ నాయ గిచ్చుక జయెద, అన్నె వెర్కెకక ఎక్కి సుట్టు జో ఒత్త వెనుక జయెద. ఇన్నె సంగిల్ రితి జా పెటె డీసిలి, కిచ్చొ అర్దుమ్ తయెద మెలె, జా డీసిలి తెంతొ ఎత్తిజన్ ఎత్తి అదికారుమ్ తిలో దేముడుచి గవురుమ్, జో కిసొ అన్నె గే, పూర్తి దెకుక జయెద. * **12:1 12:1** యూదుల్తె బార సెకుమ్లు తిల, గెద. యూదుల్క ‘ఇస్రాయేలులు’ మెనుల కి, పడ్డొ యేసుక సంబజలనక ‘అమ్చ ప్రతిమ్చ ఇస్రాయేలులు’ మెన ఎత్తి అదికారుమ్ తిలో దేముడు దెకతయ్. జేవ్ యూదుల్ జలెకి నే జలెకి. జేక జేవ్ బార సుక్కల్ తిలి కిరీటుమ్క ‘ప్రబుచయ్ జలన మొత్తుమ్’ మెన అర్దుమ్ కెరనక జయెద. యూదుల్ తెంతొ క్రిస్తు రచ్చించువ కెర్లొసొ జిర్తిలో. నయ్తాన్ జోవయింక అల్లర్ కెర్లొ, గని జినె నాయ్. జా తేర్బోదక ఏక రగమ్ ఉచర్లె, ‘యేసుచి అయ్యని మరియ’ మెన ఉచరుక జయెద. గని అన్నెక్ రగమ్ ఉచర్లె, సంబజలన మొత్తుమ్చి అత్తు సంగమ్ మెనుక జయెద. జా అత్తు సంగమ్చ బోదల్ జల క్రిస్తుచ బావడ్లు జల సంబజలనక కి నయ్తాన్ అల్లర్ కెర్లయె, 12:17, గని ఆకర్జ జినె నాయ్. 12:12 దెక. † **12:3 12:3** సత్తు బోడివో, దెన్ను కొమ్ముల్, చి సత్తు కిరీటల్చి అర్దుమ్ కిచ్చొ మెలి, అప్పెచి మట్టుక జో బూలోకుమతె ఏలువ కెరుక పూర్తి అదికారుమ్ తిలిసి. పడ్డొక ఓడువ జయెద, గెద. సత్తు సంబరక ‘పూర్తి’ మెలిన్చి అర్దుమ్, గెద.

4 జోచి తోక తెన అగాసుమచ సుక్కల్ మొత్తుమచ తిన్ని వాటల్తె ఏక్ పాటక కడ, బూలోకుమచి ఉప్పిరి సేడవ దిలన్. తెదొడి, జా తేరబోద లడెన్ జతికయ్, జా లడెన్ జతో బోదక గీడ గెలుక మెన ఉచర, జాచి పుర్రె జో వెల్లో అయి టీవోజ తిలన్.

5 జలె, జా పూత్తుక లడెన్ జలి. కీసా పూత్తు మెలె, గపూరుమచి ఇనుముడండొ రితిసి దెరన దేముడుక నేన్ల మాన్సుల్ ఎత్తిజినిక విలువ కెరుక దిలోసా. గని జో అయితె దెర్ను నే సేడ్తె జో బోద దేముడుతె జోచి సింగాసనుమతె ఉక్కీల్ జలో.

6 బయిలు దేసిమి జా తేరబోద ఉట్ట నిగిలి. ఒత్త 'జాక' మెన దేముడు ఏక్ టాన్ తెయార కెర తిలన్. ఏక్ *వెయి దొన్ని పుంజో అరవయ్ పొదుల్ ఒత్త జా కంక జింక అన్యె.

సయతానచి ఉప్పిరి యుద్దుమ్ కెర జిన్నిసి

7 తెదొడి పరలోకుమతె యుద్దుమ్ జలి. ఒత్త మికాయేలు మెలో వెల్లో దూత ఎక్కిలో, జోచి తెడిచ దూతల్ తెన్, జో వెల్లో అయి రితోసాచి ఉప్పిరి యుద్దుమ్ కెర్ల. జో అయిచి జాచి తెడిచ దూతల్ కి యుద్దుమ్ కెర్ల.

8 గని ఓడుప జలె, చి ఒత్త తెంతో పరలోకుమతె జోక అన్యె టాన్ నాయ్.

9 జో వెల్లో అయి, జో పూర్తుమచో అయి; జోక 'సయతాన్' మెనుల, ఒండి లోకుమచక మోసిమ్ కెర్లెసా, బూలోకుమతె జేడ సేడ గెలో, చి జో తెన్, జోచి దూతల్ ఎట్టో జేడ సేడ గెల.

సయతాన్ ఓడుప జలిసి

10 తెదొడి పరలోకుమతెచి గట్టిజ ఏక్ వెల్లి అవాడ సూన్లయ్. కిచ్చొ మెలి మెలె, "అమ్చో దేముడు దెతి రచ్చన, జోచి నెక్కి, జోచి రాజిమ్, పడ్డె జోచొ క్రీస్తుచి అదికారుమ్, అప్పె నెరవెర్లుప జా పాచా జా అన్యె. కిచ్చొక మెలె, అమ్చ బావుడ్లుక నిండల్ సంగితె తిలోసా ఎట్టో జేడ సేడ అన్యె. అగ్గ అమ్చ బావుడ్లుక రోజుక రాతి మెద్దెనె దేముడుచి మొక్కె జో నిండల్ సంగితె తిలో."

11 గని జేవ్ అప్పె మెండపిల్లచి నూయి జలి కిలోయిచి నెక్కిక, పడ్డె జేవ్ సాచి సంగిలిసచి నిదాసుమ్క, జేవ్ దొన్చిచి రిసా, జో సయతానచి ఉప్పిరి జేవ్ జిన అన్యె. 'జేవ్ సాచి సంగిలిసచి నిదాసుమ్' మెలె, జోవయిచి సొంత జిప్పుక విలువ నే దెకనతె, జా మెండపిల్లచి నావ్క విలువ దెక, జోచి రిసాచి సాచి జేవ్ సంగిలి రిసా మాన్సుల్ మొర్ల.

12 జలె, సయతాసుక జిన అన్యె. జాకయ్, ఓ పరలోకుమ్, ఒత్త జితన ఎత్తిజిని, సర్లసంతోసుమ్ జా! గని, ఓ బూలోకుమ్, ఓ నముద్దుమ్, అయ్యె! తుమ్క ఒగ్గర్ కస్తుమ్ నస్తుమ్! కిచ్చొక మెలె, సయతాన్ ఒగ్గర్ కోపుమ్ తెన తుమ్తె ఉత్త జా అన్యె. జోచి ఒగ్గర్ కోపుమ్ కిచ్చొక మెలె, జోక అప్పె ఒగ్గర్ సమయమ్ సేసి నాయ్ మెన జో జాన అన్యె!" మెన పరలోకుమచి జా అవాడ సంగిలి.

13 'అంక ఒగ్గర్ సమయమ్ నాయ్' మెన జో వెల్లో అయి దెక కెర, జో మున్సుబోదక లడెన్ జలి జా తేరబోదక చజ అల్లర్ కెరుక మెన గెలన్.

14 గని జా తేరబోదక దేముడు వెల్లి గిద్దురానొచ దొన్ని రెప్పల్ దిలన్. జా అయితె జా దెర్ను నే సేడ్తె బయిలు దేసిమి జా ఉడ్డ గెచ్చుక మెన, జా దొన్ని రెప్పల్ దిలన్. జా కేనె ఉడ్డ గెచ్చుక మెలె, *తిన్ని వెర్పుల్ నర కతె జితె చెంగిల్ తంక తిలి టాన్తె జా ఉడ్డ గెచ్చుక.

15 జలె, 'బూరుమ్ జాక గుడ్డ దెర గెన్సు' మెన, జా తేరబోదచి పట్టి జో అయి జోచి చోడి తెంతో గాడు రితి పాని సువ దిలన్.

16 గని జా తేరబోదక బుయి తోడు తా జాచి చోడి పాడ, జోచి చోడి తెంతో వెల్లో జో అయి సువ దిలి గాడుక బుయి గీడ గెలి.

† 12:6 12:6 మెలె, తిన్ని నర వెర్పుల్. § 12:11 12:11 మెలె, జో అర్చితుమ్ జలిచి నెక్కిక. * 12:14 12:14 "ఏక్ కాలమ్, దొన్ని కాలమ్లె చి ఏక్ అర కాలమ్" మెన రెగ్గ అన్యె, తిన్ని నర వెర్పుల్చి అర్దుమ్ జా కోడుక తయెది. 11:2 దెక.

17 తెదొడి జో వెల్లో అయి జా తేరబోదచి ఉప్పిరి ఒగ్గర్ కోప్పుమ్ జా, జాచ అన్నె బోదల్చి ఉప్పిరి యుద్దుమ్ కెరుక మెన ఉట్టు గెలన్. దేముడుచ కొడొ నిదాసుమ్ ఇండ యేసుచి రిసా సాచి జతనయ్చి ఉప్పిరి యుద్దుమ్ కెరుక మెన గెలన్.

సముద్రుమ్ తెంతో నయ్తాన్చి నేవ కెర్తొ వెర్రి జంతు బార్ జలిసి

18 తెదొడి సముద్రుమ్చి ఒడ్డుచి ఇన్నుతె జో వెల్లో అయి టీవో జలన్.

13

1 తెదొడి కిచ్చొ దెకిలయ్ మెలె, సముద్రుమ్ తెంతో ఏక్ వెర్రి జంతు బార్ జతె తిలసిని దెకిలయ్. జోక దెస్సు కొమ్ముల్ చి నత్తు బోడివో. జోచ ఎక్కాక కొమ్ముల్తె ఎక్కాక కిరిటల్, చి జోచి ఎత్తి బోడివోతె దేముడుక దూసుప కెర్తి ఏక్ నావోల్ తిల.

2 ఆవె దెకిలె జో జంతు కిసా డీసిలో మెలె, డుర్పో వాగు రగుకమ్, చి జోచ చట్టో వెలుగుచ చట్టో రిత, జోచి మూతి సింపుమ్చి మూతిచి రితి తిల. జో జంతుకయ్ జో వెల్లో అయి జోచి నెక్కి, జోచి సిజాననుమ్, ఒగ్గర్ అదికారుమ్ దిలన్.

3 జో జంతుచి నత్తు బోడివోతె ఏక్ బోడి మొర్తి రితి గాయిమ్ జా తిలి రితి తిలి. గని మొర్తి జా గాయిమ్ అన్నె చెంగిల్ జా తిలి, చి ఆచారిమ్ జా ఒండి బూలోకుమ్చ మూస్సుల్ జో జంతుచి పట్టి గెతె తిల.

4 జో వెల్లో అయి జోచి అదికారుమ్ జో జంతుక దిలి రిసా, మూస్సుల్ జో అయిక గప్పరుమ్ కెర జోకర్తె తిల. “జో జంతువో రితి కోయి నాయ్. జో జంతుతె యుద్దుమ్ కెర జోచి ఉప్పిరి కో జీనుక నెత్తి” మెన జంతుక గప్పరుమ్ కెర జోకర్తె తిల.

5 జో జంతుక కిసి చోండి తిలి మెలె, గప్పరుమ్ సంగనత కొడొ, దేముడుక దూసుప కెర్తొ కొడొ సంగితి చోండి తిలి. * దొన్ని విసా దొన్ని జొన్నో జో ఏలుప కెర్తి రితి జోక నెలవ తిలన్.

6 దేముడుక, చి జోచి నావ్క, చి జోచి టాన్క దూసుప కెర కెర చోండి పుట్టుయ్తె తిలన్. దేముడుచి టాన్ మెలె, జోచి పరలోకుమ్తె జతన.

7 పడ్డో అన్నె, జోక కిచ్చొ నెలవ తిలి మెలె, యేసు ప్రబుచయ్ జల మూస్సుల్చి ఉప్పిరి యుద్దుమ్ కెర జీనుక మెన నెలవ తిలి. జా పొది ఎత్తి సెకుమ్చి ఉప్పిరి, ఎత్తి ప్రెజల్చి ఉప్పిరి, ఎత్తి బానల్చి ఉప్పిరి, ఎత్తి రాజుమ్చి ఉప్పిరి, జా జంతుక అదికారుమ్ తంక నెలవ తిలి.

8 జా పొది ఒండి బూలోకుమ్తె జతన ఎత్తిజన్ జోక బక్తి కెరుల. లోకుమ్ నే జెర్మయ్తె అగ్గె తెంతో తిలో విరోదుమ్ సుదల్ మార్ల మెండపిల్లచి పుస్తకుమ్తె, కచ నవ్వి తతి నాయ్ గే, జెవ్వి జో జంతుక బక్తి కెరుల.

9 కంగ్గొ తిలోసా నూన్తు. కిచ్చొ మెలె,

10 “కక్క దెర గెచ్చుక మెన తిలె, జేవ్క దెర గెచ్చుక జయెదె.

కో జలె కండాతె మొరవుక మెన తిలె, జేవ్ కండా తెన్ మొరవుక జయెదె.”

మెన రెగిడ్లి కోడు. ఈంజ కొడుతె కిచ్చొ జాగర్ల బెదితయ్ మెలె, ప్రబుచయ్ జల మూస్సుల్ నిదాసుమ్ తా బాదల్ ఒర్పుప జా నముకుమ్ తెన్ తంకయ్.

బుయి తెంతో వెర్రి జంతు బార్ జలిసి

11 తెదొడి అన్నెక వెర్రి జంతు బుయి తెంతో బార్ జలిసి దెకిలయ్. మెండపిల్లచి రితి జోక దొన్ని కొమ్ముల్ తిల, గని వెల్లి అయిచి రితి జో లట్టబ్బో.

12 జో †తోలితోచో జంతుచి నావ్ తెన్ జోచి కామ్ ఈంజోయ్ జర్లు కెర్తయ్, చి మొర్తి గాయిమ్ చెంగిల్ జా తిలో జో తోలితోచో జంతుక ఒండి లోకుమ్, ఒండి లోకుమ్చ మూస్సుల్ జోకర్తె రితి, ఈంజోయ్ జంతు జేవ్క నికడ్డయ్.

13 ఆచారిమ్చ వెల్లెల వెల్లెల కమొ ఈంజో జర్లు కెర్తయ్. కిచ్చొ మెలె, ‘మూస్సుల్ దెకుత్’ మెన జోచి మొక్కె ఆగాసుమ్ పక్క తెంతో బుయిచి ఉప్పిరి ఆగి నూయి జతి రితి కెర్తయ్.

* 13:5 13:5 మెలె, తిన్ని నర వెర్నల్. 11:2, 3. 12:6, 14 దెక. † 13:12 13:12 సముద్రుమ్ తెంతో బార్ జలిసా.

14 అన్నె, జో తొలితోవో జంతుచి మొక్కె ఈంజో జర్గు కెరుక సెలవ్ తిల ఆచారిమవ వెల్లెల కమంచి సెక్కిక బూలోకుమతె జతనక ఈంజో మోసిమ్ కెర్తయ్. దస్సి, కిచ్చొ ఏక్ మోసిమ్ కెర్తయ్ మెలె, కళ్ళముక మొర్తి సెక్కిచి గాయమ్ జలెకి జీవ్ తిల జో అన్నెక్ జంతుచి రిసా ఏక్ బొమ్మ జేవ్ తెయార కెర జోకరుక మెన, ఈంజో జంతు బూలోకుమతె జతనక సెక్కిడయ్.

15 జో తొలితోవో జంతుచి బొమ్మ లట్టల్లి రితి జీవ్ దెంక కి ఈంజో జంతుక సెలవ్ తిలి, చి జో జంతుచి బొమ్మక నే జోకర్తనక మొరవుక కి ఈంజో, జంతుక సెలవ్ తిలి.

16 పడ్డొ అన్నె కిచ్చొ ఏక్ అల్లర్ ఈంజో అన్నెక్ జంతు, బుయి తెంతో బార్ జలో జంతు, కెర్తయ్ మెలె, ఎత్తిజెని, బాల, వెల్లో, సామాసరి, బీద సుదో, గొతి నెంజిలో మాన్సు. గొతి జలో మాన్సు, ఉజెల్ అత్తి నెంజిలె నిర్దె ఏక్ గుర్తు కెరవంతి రితి ఈంజో వెలయ్తయ్.

17 అన్నె, జా గుర్తు నే కెరవంతెకో కిచ్చొ గెనుక గే వికుక గే సెలవ్ తయె నాయ్. జా గుర్తుతె కిచ్చొ తయెదె మెలె, జంతుచి నావ్, నెంజిలె జోచి నావ్ చి గుర్తుచి అంకె.

18 ఇన్నెచి అర్దుమ్ కెరనుక జలె, ముక్కిమ్చి గ్యానుమ్ అవ్సురుమ్. కక్క దస్సి గ్యానుమ్ అస్సె మెలె, జో జంతుచి అంకె లెక్క కెర్త. †జేవ్చి అంకె ఏక్ మాన్సుచి నావ్ తెన్ బెదితి అంకె. జా అంకె కిచ్చొ మెలె, సాప్సు పుంజో తిన్ని విసా సాప్సు (666).

14

మెండపిల్ల తెన్ జోచయ్ జల మాన్సుల్ టీవెలిసి

1 తెదోడి అన్నె దెకిలయ్, ఈంజె! *సియాను డొగ్రె జో †మెండపిల్ల టీవ తా, జో తెన్ అన్నె కొన్న టీవోజె తిల మెలె, †పుంజెక్ దొన్ని విసా చెత్తర్ వెయిల్జెన్ జోవయింబి నావ్, దేముడుచి నావ్ జోవయింబి నిర్దెలె రెర్లవన్ల మాన్సుల్ తిల.

2 అన్నె, ఒగ్గర్ పానివో సూయి జతి అవాడ్ రితిచి, ఉర్తుల్ కెర్లె వెల్లి అవాడ్ రితిచి, పరలోకుమ్ తెంతో చి, ఏక్ అవాడ్ సూన్లయ్. ఆవ్ సూన్సి అవాడ్ అన్నె కిసి తిలి మెలె, వీనెల్తె బజయ్తి అవాడ్చి రితి తిలి.

3 జలె, జేవ్ ఎతివాట్జెన్ మాన్సుల్ సింగాసనుమ్చి మొక్కె, సిజాసనుమ్చి సుట్టునంత టీవోజె తా కిచెత్తర్ జిపుల్చి మొక్కె, చి *విన్నెక్ చెత్తర్జెన్ వెల్లెల మాన్సుల్చి మొక్కె, నొవి గనుమ్ గాయితె తిల. ఈంజె బూలోకుమ్చి రాజిమ్ తెంతో గెనన్ల, ఈంజేవ్ పుంజెక్ దొన్ని విసా చెత్తర్ వెయిల్జెన్ మాన్సుల్క పిట్టవ, జా గనుమ్ అన్నె కో సెక్కిక నెత్తి.

4 ఈంజేవ్ మాన్సుల్ కిస మాన్సుల్ మెలె, సుద్ది తా, తేర్బోదల్ తెన్ నే బెదిల సుదల్, లంజె నే జలన. ఈంజేవ్ దేముడుక, మెండపిల్లక ముల్లి నాయ్, వేర్ 'దేముడ్లు' మెలనచి పట్టి గెతి నాయ్. ఈంజేవ్, జలె, మెండపిల్ల కేనె గెలె కి, జోచి పట్టి గెతతి. ఒండి లోకుమ్చి మాన్సుల్ తెంతో దేముడుచి మెండపిల్లక దిలి తొలి వండ్లు జతి రితి ఇన్నెయింక మెండపిల్ల అన్నె †గెననయ్ అస్సె.

5 జోచి పున్మమ్ ఇన్నెయింకయ్ జొయ్యి దా అస్సెచి రిసా, ఇన్నెచి చోడితె కిచ్చొ అబర్దుమ్ తయె నాయ్.

నుబుమ్ కబుర్ సూనయ్తో దూత ఉడ్డితె తిలిసి

‡ 13:18 13:18 గ్రీకు బాస చి ఎల్లి బాస రెగిడ్ల రితితె ఎత్తి అప్రమక ఏక్ విలవ తయెదె. జేక, ఏక్ మాన్సుచి నావ్చ అలవాట్లు చి లెక్క బెదవుక జయెదె. 'సిరో కైనల్' మెలో రోమ్ దేసిమ్చె అగ్గె వెల్లి రాస జలోసా ఎక్కిలొచి నావ్క సాప్సు పుంజో అరచయ్ సాప్సు సంబర్చి లెక్క బెదవుక జయెదె, చి యోహాను ఈంజె పుస్తకుమ్ రెగిడ్ల దినాల్క ఇదిల్ అగ్గె, జో సిరో కైనల్ సంజలనక అల్లర్ కెర్తె తిల. గని వడ్డొ ఆయల సంజలనక అల్లర్ కెర్తె, మాన్సుల్చి నవ్వొక కి జయె లెక్క తయెదె. జేక, కచి రిసా సంగితయ్ గే నేనుమ్. * 14:1 14:1 'సియాను డొగ్రె' చి 'యెరూసలేమ్ పట్టుమ్' మెలె, ఎత్తి అదికారుమ్ తిల దేముడు జతి టాన్క, మెలె పరలోకుమ్క, టాలొచి నవ్వొ జవుల. † 14:1 14:1 మెలె యేనుప్రబు. ‡ 14:1 14:1 ఈంజె సంబర్చి అర్దుమ్ కిచ్చొ మెలె, 'పూర్లె జలిసి', 'ఒగ్గర్ జలిసి', చి ఇన్నె, 'యేనుక సంజలన మొత్తమ్చి లెక్క పూర్లె జలిసి'. ఈంజె సంబర్ జయె టాలొకచి సంబర్. ఎక్కి జయె సంబర్చి ఎత్తయి జవుల మేనుమ్ నాయ్, గని 'జోవయింక సంజలన ఒగ్గర్ ఒగ్గర్జెన్ జవుల' మెలె అర్దుమ్ ఇన్నెతెన్ కెరనుమ్చి. పూర్దుమ్ తెంతో యూదల్తె బాక సెకుమ్లె తిల, చి యేనుక బాకజెన్ సిన్సుల్ తిల. వడ్డొ జోవయింక బాకజెన్ సిన్సుల్ జోవయింక బాకజెన్ బాకికల్ జలె. 144,000 మెలె, బాక బాక వెయిలు. మెలె 12వెయిలు x 12వెయిలు x 1000 = 144,000. § 14:3 14:3 4:6-8. * 14:3 14:3 4:4. † 14:4 14:4 నెంజిలె 'నెతోవ అస్సె'. 3 సంబర్తె కి అన్నె గెనన్లక గెనన్లక నెతోవలన మెనుక జయెదె.

6 తెదొడి, అన్నెక్ దూతక దెకిలయ్. పొద్దు ఆగానుమచి మదెనె జో ఉడ్డితె తిలో. కిచ్చొక మెలె, బూలోకుమతె జితనీక, ఎత్తి, రాజిమచక, ఎత్తి, సెకుమచక, ఎత్తి, బాసచక, కెయిలక తెయిలక తతి పాడె నే జతి సుబుమ్ కబుర ఎత్తి, ప్రెజల్క సూనవుక మెన, జా సుబుమ్ కబుర దెరన గెతె తిలో.

7 అన్నె, జో గట్టిజ అవాడె కెరన కిచ్చొ మెన కేక గలన్లొ మెలె, “దేముడుక బియి కెర జోక గవురుమ్ కెర! కిచ్చొక మెలె, జో ఎత్తి, మాన్సుల్క పరిచ్చ కెర సిచ్చ కెరుక, బవుమానుమ్ దెతి గడియ పాచ జా అస్సె. అన్నె పరలోకుమ్, బూలోకుమ్, సముద్రుమ్, పానిచ ఊంటలు జెర్మయిలో జోకయ్ నంపజా బక్తి కెర!” మెన సాడుప కెర్తన్.

8 అన్నెక్ దూత, జలె, ఇన్నెతెన్ దొన్నిచొ, జో అగ్గెచొ చి పట్టి ఉడ్డ గెచ్చు, కిచ్చొ మెలన్ మెలె, †“వెల్లి బబులోను పట్టుమ్ సేడ అస్సె. ఎత్తి, ప్రెజల్క జాచి లంజె ఆన, రగుమచి ద్రాచ రస్సుమ్ పియడ్డిసి జా.” మెన సాడుప కెర్తన్.

9 పడ్డొ అన్నెక్ దూత, ఇన్నెతెన్ తిన్నిచొ; జేవ్ దొన్ని దూతల్చి పట్టి ఉడ్డితె తా కిచ్చొ మెన సంగిలన్ మెలె, “కో జో జంతుక చి జోచి బొమ్మక బక్తి కెరుల గే, జోచి గుర్తు కచి నిర్లె గే అత్తి గే, గలవనుల గే,

10 జోవయిచి తప్పుక దేముడుచి కోపుమచి సిచ్చుచి ద్రాచ రస్సుమ్ కచితుమ్ కిచ్చొ పాని గట్ట నే బెదయ్తె, జోచి ఒగ్గర కోపుమచి గిన్నతె పివులచి పరలోకుమచి సుద్దిచ జోచ దూతల్చి మొక్కె, చి మెండపిల్లచి మొక్కె, ఎరన జతి ఎడ్డి జతి ఆగి లగితి వెల్లి ఆగి గొయ్తెచ బాదల్ సేడుల.

11 జేవ్చి జా సిచ్చుచి దుమ్మొ కెయిలక తెయిలక బార్ జతె తా వెగ గెతయ్. జో జంతుక చి జోచి బొమ్మక జోకర్తనక చి జోచి గుర్తు గలవన్సక, రాతి మెద్దెనె కిచ్చొ నే పుండితె తవుల.” మెన దూత సాడుప కెర్తన్.

12 ఈంజ కోడతె కిచ్చొ జాగర్త బెదితయ్ మెలె, యేసు ప్రబుచయ్ జల మాన్సుల్, మెలె దేముడుచి కోడు రితి ఇండితన, యేసుచి ఉప్పిరచి నముకుమతె ఇండితన, జేవ్ బాదల్ ఒర్సువు జా నిదానుమతె తంకయ్.

ప్రబుచి తెడిచి విస్తాంతిచి రిసా పరలోకుమ్ తెంతో అవాడె

13 తెదొడి పరలోకుమ్ తెంతో చి ఏక్ అవాడె సంగిలిసి కిచ్చొ స్సూన్య మెలె, “ఏక్ కోడు రెగుడు. అప్పె తెంతో యేసుప్రబుచి తెడి తా కో మొరుల గే, జోవయింకయ్ చెంగిలి. మెలె, దేముడుచి సుద్ది తిలి ఆత్మ కిచ్చొ మెన్తయ్ మెలె, కిచ్చొక జోవయింక చెంగిలి మెలె, జేవ్ ఇండితి బుద్ది జోవయింతెన్ బెదయ్ జితయ్, చి జోవయింక కమె కెర కేడయ్ లిన్క అప్పె నలవ్ తెన్ తవుల.” మెన సంగితయ్ మెన పరలోకుమ్ తెంతో చి జా అవాడె సంగిలన్.

బూలోకుమచి పంటో

14 అన్నె ఆవ్ దెకితికయ్, అదె! కిచ్చొ మెలె, చొక్కిలి మబ్బు, చి జా మబ్బుతె కో వెన అస్సె మెలె, మాన్సు జా జెర్మన్ అయిలి రగుమచొ ఎక్కిలో వెన అస్సె. జోచి బోడితె బజరచి కిరీటుమ్, జోచి అత్తి వాండి కెర్లి కొడ్వొలి అస్సె.

15 తెదొడి అన్నెక్ దూత దేముడుచి గుడి తెంతో బార్ జా, గట్టిజ అవాడె కెరన, జా మబ్బుతె వెసిలోసొక కిచ్చొ మెన కేక గలన్లొ మెలె, “బూలోకుమచి పంటో పూర్తి పిక అస్సెచి రిసా, లాయితి నమయిమ్ జా అయిలి. జాకయ్, తుచి కొడ్వొలి దెరన లాయి!” మెన కేక గలో.

16 తెదొడి మబ్బుతె వెసిలోసా బూలోకుమచి పంటో పూర్తి జోచి కొడ్వొలి తెన్ కీసవు కెర కేడయ్లన్.

బూలోకుమచి పంటో దూత లాయిలిసి

17 తెదొడి అన్నెక్ దూత పరలోకుమచి దేముడుచి గుడి తెంతో బార్ జలన్. జో వాండి కెర్లి కొడ్వొలి దెరన అస్సె.

18 తెదొడి, అన్నె, ఒత్తచి బలి దెతి టాన్ తెంతో అన్నెక్ దూత బార్ జలన్. ఈంజో దూతక ఆగిచి ఉప్పిరి అదికారుమ్ తిలి. వాండిచి కొడ్వొలి దెర్లొ దూతక కేక గల కిచ్చొ మెన గట్టిజ అవాడె కెరన ఆగిచి ఉప్పిరి

† 14:8 14:8 టాలిక్ లోమ్ పట్టుమ్ ‘బబులోను’ మెంతతి, ఈంజ ‘డిసయిన్’ చి వున్సకుమతె. § 14:16 14:16 మత్తయి 13:24-30 దెక. చెంగిల్చి తియ్ తయెదె, వెర్చి డయ్ గెలిదె. మత్తయి 13:36-43 దెక. జోవయిచి వున్సుమ్ జలనక పరలోకుమతె తియ్ తయెదె, పాపుమ్ తెన్ తా గెలనక వెల్లి ఆగి గొయ్తె గలెదె.

అధికారుమ్ తిలో దూత సంగిలన్ మెలె, “తుచి కొడ్వెలి దెరన, ద్రాచ గెలల్చ, గొచ్చల్చ వండ్లుచి వంటో లాయి! జా వండ్లు పిక అస్తి!” మెన సంగిలన్.

19 జాకర్య, జో దూత బూలోకుమతె జోచి కొడ్వెలి తెన్ బూలోకుమ్ ఎత్తిచి ద్రాచ వంటో లాయిలన్, చి దేముడుచి కోపుమచి సిచ్చ జతి జోచి గన్నతె గల దిలన్.

20 పట్టుమచి కోట ఒత్తల్తొచి జా రన్నుమ్ గెచ్చయ్తి గన్నతె వండ్లు సుదిల, చి జా సుదిలిన్చి గన్న తెంతో లోయి నూఁయి జా గెలి. కెద్దిచి మెలె, ఏక్ గోడొక చ్చప్పుయతి కలమ్చి ఎదిలి డొంకుతె జా లోయి బెర కెద్ది దూరిక పాఁచిలి మెలె, దొన్ పుంజో మయిలుచి ఎదిలి దూరి పాఁచిలి.

15

ఆకర్క దెత సత్తు సిచ్చల్

1 పడ్డా, పరలోకుమతె అన్నెక్ వెల్లి గుర్తు దెకిలయ్. జా వెల్లిచి, ఆచారిమ్చి గుర్తు కిచ్చొ మెలె, దేముడుచ సత్తు సిచ్చల్ అత్తి దెర తిల సత్తు దూతల్క దెకిలయ్. ఈంజ ఆకర్చ సచ్చల్ జవుల. కిచ్చొక మెలె, ఇన్నెయింతెన్ దేముడుచి కోపుమచ సచ్చల్ కుటుల.

2 తెదొడి కిచ్చొ దెకిలయ్ మెలె, సీన రితి టోటచి గాడు తెన్ ఆగి బెదిల్ రితి తిలిసి. అన్నె, జా సీన రితి టోట తిలి గాడు సాడి, దేముడు దిల వీనెలు దెరన, జో జంతుక జీన, జోచి బొమ్మచి ఉప్పిరి చి జోచి నావ్చి ఉప్పిరి జీన్ల మాస్సుల్ టీవోజ తిలిన్ దెకిలయ్.

3 జేవ్ దేముడుచొ సేవ కెర్తొసా జలో మోసేచి గనుమ్ చి మెండప్పిల్లిచి గనుమ్ గాయితె తిల,

“ఎత్తి సెక్తి అధికారుమ్ తిలో దేముడు ప్రబు,

తుచ కమె వెల్లెల, అన్నె ఆచారిమ్చ!

ఎత్తి ఉగఉగల్క ఏలుచ కెర్తొ వెల్లొ రానొ,

తుచ కమె సరి జతిక, సత్తిమ్చ!

4 ఓ ప్రబువ, తుచి నావ్ కో కి బియ: కెర, గవురుమ్ కెరుక!

తుయి ఎక్కిలోయి పరలోకుమచి సుద్ది తిలోసా,

ఎత్తి రాజిమలుచ జా కెర, తుక బక్తి కెరుక జా అస్తి;

తుచ తీర్పుల్క, తుచ సచ్చల్క ‘సత్తిమ్చ’ నాయిమ్చ మెన

రుజ్జు అయ్లి రిసా”

మెన, గనుమ్ గాయిల.

5 ఇన్నెచి పడ్డా అన్నె ఆవ్ దెకితికయ్, పరలోకుమతె దేముడుచి గుడి జలి* టంబుగుడ్డతెచి అగ్గుల్ తిలి తెడిక తెడిచి గది ఉద్ది జలి.

6 జా దేవులుమచి తెడిక తెడిచి గది తెంతో† సత్తు సిచ్చల్ దెర్ల సత్తు దూతల్ బార్ జల. కిచ్చొ గలన బార్ జల మెలె, ‡ ఉజడిచ పూర్తి సుబ్రుమచ బట్టల్చ పాలల్, చి జోవయిం చ గుండెల్తె ఎక్కెక బజార్ రగనుమ్ పట్టల్ బందన తిల.

7 తెదొడి, † చెత్తర్ జివుల్తె ఏక్ జివ్, జేవ్ సత్తు దూతల్క ఎక్కెక్ సత్తు బజర్చ గిన్నల్ దిలన్. జేవ్ గిన్నల్తె కిచ్చొ బెర తిలి మెలె, కెయ:క తెయ:క జతో దేముడుచి కోపుమచి సిచ్చ.

8 జా దేముడుచి గుడిచి తెడిక తెడిచి గదితె దేముడుచి ఉజడి తెంతో చి జోచి సెక్తి తెంతో చి దుమ్మె బెర తిలి, చి జేవ్ సత్తు దూతల్ దెర్ల సత్తు సిచ్చల్ కుట్టితె ఎదక, కోయి జా దేముడుచి గుడిచి తెడిక తెడిచి గదితె పెనుక నెతిర్తి.

* 15:5 15:5 పూర్ణమ్, యూదుల్ బయలు దేసిమి దొన్నె వీసా వెర్గుల్ బుల్లి తిలి పొది, ‘ఎత్తి అధికారుమ్ తిలో దేముడుచి గుడి’ మెన జోవయిం జో తెయార్ కెరయ్లి టంబుగుడ్డ తిలి. జేవ్చి తెడిక తెడిచి గదితె జో అగ్గుల్ రెగిడ్ల పత్తల్ తిలి వెడి తిలి. పడ్డా చెంగెల్ గేర్ బంద ‘దేముడుచి గుడి’ మెన ఒత్తల్ తెడిక తెడిచి గదితె జా అగ్గుల్ తిలి వెడి తిలి. † 15:6 15:6 15:1. ‡ 15:6 15:6 ఎత్తి అధికారుమ్ తిలో దేముడుచి గుడితె పూజ్జు దన పాలల్ గలన దన పట్టల్ బందన తవుల. § 15:7 15:7 4:6-8.

16

సత్తు సిచ్చల్ సత్తు దూతల్ బూలోకుమ్తె సువ దిలిసి

1 అన్నె కిచ్చొ సూన్లయ్ మెలె, ఏక్ వెల్లి అవాడ్ పరలోకుమ్తెచి జా దేముడుచి గుడి తెంతో సత్తు దూతల్క, “తుమ్ గెచ్చ, దేముడుచ సత్తు గిన్నల్చి కోపుమ్చి సిచ్చ బూలోకుమ్తె సువ గెల.” మెన సంగిలన్.

2 జాకయ్, తోలితోచో దూత గెచ్చ, బుయిచి ఉప్పిరి జోచి గిన్నచి సిచ్చ సువ దిలన్. జో జంతుచి గుర్తు కెరవన జోచి బొమ్మక జోకర్ల ఎత్తి, మాన్సుచి అగి ఒగ్గర్ అల్లర్చ గవ్వో జల.

3 దొన్నిచో దూత జోచి గిన్నచి సిచ్చ సముద్రుమ్తె సువ దిలన్, చి మొర్లో మాన్సుచి లోయిచి రితి జలి, చి సముద్రుమ్తెచి ఎత్తి జీవుల్ మొర్ల.

4 తిన్నిచో దూత జోచి గిన్నచి సిచ్చ గడ్డోచి ఉప్పిరి, ఊటల్చి ఉప్పిరి సువ దిలన్, చి లోయి జా గెల.

5 పితి పాని లోయి జతి సిచ్చచో జో దూత కిచ్చొ సంగిలిసి సూన్లయ్ మెలె,

“తుయి అగ్గె తిలోసా, అప్పె తతోసా, పరలోకుమ్చి సుద్ది తిలోసా,

తుచ తీర్పులు సిచ్చలు ఎత్తి. సరిగా అస్తి.

6 కిచ్చొక మెలె, తుచయ్ జల మాన్సుల్చి లోయి, చి తుచ కబుర్లు సంగిల మాన్సుల్చి లోయి

విరోదుమ్ జల మాన్సుల్ సుచితికయ్,

జేవ్ తుచ మాన్సుల్చి లోయి సుచిలనయ్ పింక మెన

జోవయింకయ్ లోయి దా అస్సిసి.

జోవయింక జెతి బట్వాడ్, జా!

జోవయించి పాపుమ్ జెప్పొ కతతి!”

మెన జో దూత సంగిలన్.

7 తెదొడి బలి దెతి టాని కిచ్చొ మెన కేక్ గల్లిన్ సూన్లయ్ మెలె,

“నిజుమి, ఎత్తి సెక్తి అదికారుమ్ తిలో దేముడు ప్రబు,

తుచ తీర్పులు సిచ్చలు సరిగచ, సత్తిమ్చ!”

మెన సంగితి సూన్లయ్.

8 తెదొడి, చెత్తర్చో దూత పొద్దుచి ఉప్పిరి జోచి గిన్నచి సిచ్చ సువ దిలన్, చి జాచి అగి మాన్సుల్క డయింక మెన, పొద్దుక సెలవ్ అయ్లి.

9 జేవ్చి ఒగ్గరి వేడిక మాన్సుల్ డడ్డిల, చి దేముడుచి నావ్ దూసుచ కెర్ల. కిచ్చొక మెలె, ఈంజేవ్ సిచ్చల్చి ఉప్పిరి జోక అదికారుమ్ అస్స, చి ఈంజేవ్ సిచ్చల్ జో దిలన్చి రిసా. అన్నె, జేవ్ కెర్ల పాపల్క విసారుమ్ జతి నాయ్, ముల్లి నాయ్, చి జోక గపురుమ్ దెతి నాయ్.

10 పావ్చో దూత జోచి గిన్నచి సిచ్చ, జో వెర్రి జంతుచి సిజానసుమ్చి ఉప్పిరి సుచిలన్, చి జంతుచి రాజిమ్ అందర్ జా గెలి. మాన్సుల్, జలె, జేవ్క అయ్లి సైమల్చి రిసా, జోవయించ జీబుల్ చప్పన్తె తిల.

11 జోవయించి నొప్పి జోవయించ గావ్వోచి రిసా పరలోకుమ్ తిలో దేముడుక సాపెనల్ సంగిల, గని జేవ్ కెర్ల కమొక విసారుమ్ జతి నాయ్, ములిత్ నాయ్.

సావ్వొచో దూత సువ దిలి సిచ్చ

12 సావ్వొచో దూత జోచి గిన్నచి సిచ్చ * యూప్రటీసు మెలి వెల్లి గాడుచి ఉప్పిరి సుచ దిలన్, చి తూర్పు పక్క తెంతో జెత రానల్ జెతికయ్ వాటు తెయార్ జతి రిసా జాచి పాని అబ్బ గెలి.

13 వడ్డో † వెల్లి జో అయిచి చోండి తెంతో, *వెర్రి జో జంతుచి చోండి తెంతో అన్నె ‡ దేముడుచ కబుర్లు సంగిలోసా అవ్ మెన అబద్దుమ్క సంగితోసాచి చోండి తెంతో మండుకుల్చ రిత తిన్ని బూతల్ బార్ జలిసి దెకిలయ్.

* 16:12 16:12 యూరుల్చి దేనిమ్క జా గాడు తూర్పు పక్కయ్ తయెదె. ఇదిల్ దూరి తయెదె. † 16:13 16:13 సయ్తాన్ జయెదె. 12:3, 9. ‡ 16:13 16:13 13:1 దెక. § 16:13 16:13 బుయి తెంతోచో జంతు; 13:14, 19:20.

14 జేవ్, నయతానచి సేవ కెర్త బూతల్ జవుల, చి వెల్లెల వెల్లెల కము కెర కెర, ఒండి లోకుమ్ చ రాసల్తె గెతతి. కిచ్చొక మెలె, ఎత్తి, నెక్కి అదికారుమ్ తిలో దేముడు జోచి నెక్కి అదికారుమ్ దెకయతి వెల్లి సిచ్చ కెర్తి దీసిచి యుద్దుమ్క తెయార్ జతి రిసా, జేవ్ రాసల్క ఎక్కితె కుడవుక.

15 జలె, ఎల్లి బాస తెన్ *హార్మెగిడ్డోసు' మెలి టాన్తె జేవ్ రాసల్క జేవ్ బూతల్ కుడయలె.

16 యేసుప్రబు సంగిలిసి ఏక్ కిచ్చొ మెలె, "ఈందె, మాన్సులె నే ఉచర్లె పొది కిసి చోరు జెయెది గే, దస్సి ఆవ్ జెయిందె. అయలె, కో తెలివి తా, డుమ్డోయ్ నే జతె లాజ్ నే బెట్టిత్ రితి జోవయిందె పాలల్ సుద్ది తతి రితి దెకనుల గే, జోవయిందె చెంగిలి" మెన ప్రబు సంగితయ్.

17 నత్తుచో దూత జోచి గిన్నుచి సిచ్చ ఆగాసుమ్చి వాదుచి ఉప్పిరి సువ దిలన్, చి పరలోకుమ్చి దేముడుచి గుడి తెంతో, సిజాసనుమ్ తెంతో, గట్టిజ అవాడ్ తెన్ కిచ్చొ సంగిలన్ మెలె, "జర్లు జలి!" మెలన్,

18 చి బిజలి మెల్లిలి, అవాడ్ అయలి, ఉర్తుల్ కెర్తి, చి ఒగ్గర్ వెల్లి బూకంపుమ్ అయలి. కెర్తి వెల్లిచి మెలె, మాన్సుల్ బూలోకుమ్తె తోలితో తిలిసి తెంతో కెయ్యై నే జర్లు జలి ఎదిలి బూకంపుమ్ అయలి.

19 జా బూకంపుమ్ జతికయ్, వెల్లి పట్టుమ్ తిన్ని వాటల్ జా గెలి, చి దేముడుక నేన్ల మాన్సుల్చ రాజిమల్చ పట్టల్ పాడ్ జలె. చి జోచి ఎదివాట్ కోపుమ్చి సిచ్చుచి గిన్నయ్ తిలిసి జా †వెల్లి బబులోసు పట్టుమ్చ మాన్సుల్ పూర్తి పియ గెల్లి రితి, దేముడు నే పచ్చితె జర్లు కెర్లన్.

20 పడ్డె ఎత్తి డిబ్బి ఉట్ట నిగిల్ రితి జా డిస్తి నాయ్, చి కేన్ డొంగురులు డిస్తి నాయ్.

21 అన్నె, వెల్లి వెల్లెల కరపత్తల్ ఆగాసుమ్ తెంతో మాన్సుల్చి ఉప్పిరి సేడ్డ. ఏక్ ఏక్ కరపత్తర్ దొన్నె విసా దెసు కేజిల్ చి ఎదిలి జాడు తవుల, చి జా సిచ్చ కెర్తి అల్లర్ కెర్తి మెలె, ఒగ్గర్ ఒగ్గర్ అల్లర్చి రిసా, జా సిచ్చుచ దెబ్బల్క మాన్సుల్ దేముడుక సాపెనల్ కెర్ల.

17

వెల్లి లంజెచి తేర్బోద మెన వెల్లి బబులోసు

1 తెదొడి, నత్తు గిన్నల్ దెర తిల నత్తు దూతల్తె ఏక్ దూత అంచె జా కెర కిచ్చొ సంగిలన్ మెలె, "తుయ ఇన్నె వెగ జే! ఒగ్గర్ పానివెచి ఉప్పిరి వెన తిలి వెల్లి లంజె జలి తేర్బోద సిచ్చ జతిసి దెకయిందె.

2 జాచి తెన్ బూలోకుమ్చ రాసల్ లంజె జా అస్తి, చి జాచి లంజెచి ద్రాచ రన్నుమ్ పియ పియ, బూలోకుమ్తె జితన మచ్చుయ అస్తి" మెన సంగిలన్.

3 తెదొడి జో దూత అంక ఏక్ బయలె కడ నిలన్, చి దేముడుచి సుద్ది తిలి అత్తునెక్కిక కిచ్చొ దెకిలయ్ మెలె, ఒగ్గర్ ఎరన తిలి జంతుతె ఏక్ తేర్బోద వెన తిలి. జా జంతు కిసా తిలో మెలె, జాచి ఆగ్ ఎత్తిచి ఉప్పిరి దేముడుక దూసువ కెర్ల నవ్వి, కొదొయ్ని గలన తిలన్. జాక నత్తు బోడివో, దెన్ను కొమ్మల్ తిల.

4 జా తేర్బోద *ఊద రంగు చి ఎరన రంగుచ పాలల్ గలన తా, బబరి, రత్తాలు, ముత్త్యల్, తియన తిలి. జాచి అత్తి కిచ్చొ తిలి మెలె, జాచి లంజెచ వెట్కూరులు కిడ్లు దెర తిలి బబర్చి గిన్న దెర తిలి.

5 పడ్డె జాచి నిర్తి గుట్టుచి ఏక్ నావ్ రెర్లె తిలి. †వెల్లి బబులోసు పట్టుమ్, లంజె జలె తేర్బోదల్క అయ్యైసి, బూలోకుమ్చ వెట్కూర్లక అయ్యైసి' మెలి నావ్ రెర్లె తిలి.

6 అన్నె, జా తేర్బోద కిసి తిలిసి దెకిలయ్ మెలె, దేముడుచ జలె మాన్సుల్చి లోయిక, చి యేసుచి నావ్చి రిసా విరోదుమ్ సుదల్ మార్ల మాన్సుల్చి లోయిక, జా తేర్బోద మచ్చ తిలి. జా తేర్బోదక దెక, బలే ఆచారిమ్ జలయ్.

* 16:15 16:15 'హార్మెగిడ్డోసు' ఏక్ వేల యూదుల్చి దేసిమ్క ఉత్తర పక్కచి 'హార్మెగిడ్డోసు' మెలి టాన్ జెయిందె. జేవ్ రాసలు సుకా గెలి యూప్రటీసు గాడ్ వాట్ జెవుల, గెద. జా యూప్రటీసు వెల్లి గాడు యూదుల్చి దేసిమ్క తూర్పు పక్క జెయిందె. † 16:19 16:19 ఈంజ 'డినయ్లిన్' చి పుస్తకుమ్తె కేన్ సుట్టు 'బబులోసు పట్టుమ్' మెలె, రోమ్ పట్టుమ్క టాలి జతయ్, బెర్తె. గని పడ్డె తిల అన్నె దన అల్లర్చ పట్టుల్ రాజిమలుచి రిసా కి ఉచరుక జెయెదె. * 17:4 17:4 ఊద రంగు మెలె, ఎరన చి నిలిమ్ రంగు జెదయ్లె ఊద రంగు జెయెదె. † 17:5 17:5 'వెల్లి బబులోసు' మెలె, రోమ్ పట్టుమ్క టాలి జతయ్. జా పట్టుమ్ జా రాజిమ్చ రాసల్ నంపజలనక జేవ్ పొరులె ఒగ్గర్ అల్లర్ కెర్తి తిల. ఒత్త తెంతో ఒగ్గర్ రాజిమలుచ కి దన అల్లర్ కెర అస్తి.

7 గని దూత అంక, “కిచ్చిక ఆచారిమ్ జతసి? జా తేరబోదచి రిసా, చి సత్తు బోడివో దెస్సు కొమ్ముల్ తిలి, జా వెసిలో జంతుచి రిసాచి గుట్టుచి అర్దుమ్ తుక సంగిందె.

8 జలె, తుయి దెకిలో †జంతు అగ్గి తిలన్, గని అప్పె నాయ్, చి సీమట్టు నెంజిలి జా వెల్లి గొయి తెంతో జో వెగ జా, నాసెనుమ్ జా గెచ్చుక అస్సె. జలె, ‘పరలోకుమతె జా జితు’ మెన లోకుమ్ నే జెర్దుయలి అగ్గె తెంతో మెండపిల్ల జలొ యేను ఏక్ *పుస్తకుమతె జోక నంపజతసచ నావ్వి రెగ్గ అస్సె. జలె, బూలోకుమతె జతసతె కచ నవ్వి జా పుస్తకుమతె తయె నాయ్ గే, జో జంతుక దెకుకయ్ ఆచారిమ్ జవుల. జో తిలో, అప్పె నాయ్, గని పడ్డొక అన్నె బార్ జయెదె.

9 “ఈంజ ఎత్తి అర్దుమ్ కెరనుక జలె, బుద్ది గ్యానుమ్ అవ్సురుమ్. జంతుచ సత్తు బోడివో కిచ్చొ జవుల మెలె, జా తేరబోద వెన తిల †సత్తు మెట్టల్.

10 అన్నె, సత్తు రానల్ జేవ్ జవుల. జేవ్ రానల్తె పాచేజన్ కేడ అస్సి, ఎక్కిలో అప్పె అస్సె, చి అన్నెక్లో జెంక నేతయ్, అన్నె, జో అయ్లె, ఎక్కి గడియకయ్ తయెదె.

11 అగ్గె తిలో అప్పె నెంజిలో జో జంతు, జలె, జో అట్టుచో రానో జయెదె, గని జేవ్ అన్నె సత్తుజన్తె బెదితోసా జయెదె, చి జో నాసెనుమ్ జా గెచ్చుక అస్సె.

12 “పడ్డొ తుయి దెకిల దెస్సు కొమ్ముల్ కిచ్చొ జవుల మెలె, ఏలుచ కెర్తి అదికారుమ్ నేతయ్ గని అదికారుమ్ దొర్కు జా దెస్సుజన్ రానల్ జవుల. జేవ్చి సమయమ్ జా అయ్లె, జో జంతు తెన్ ఎక్కి గడియకయ్ రానల్ జా ఏలుచ కెర్తి సెక్తి జేవ్చే దొర్కు జయెదె.

13 ఈంజేవ్ ఎక్కి ఉద్దెనుమ్ తా, జో జంతుచి అత్తి జోవయించి సెక్తి జోవయించి అదికారుమ్ సార్చు కెర దా, జోవయించి కామ్ జర్గు కెర దెవుల.

14 ఈంజేవ్ జో మెండపిల్లచి ఉప్పిరి యుద్దుమ్ కెరుల, చి †మెండపిల్ల జోవయించి ఉప్పిరి జినెదె. కిచ్చొక మెలె, ప్రబుల్క ప్రబు, రానల్క రానో జో, చి జో తెన్ తిలనక కిచ్చొ మెనుక జయెదె మెలె, జో నిసాన బుకార్లన్, జోక నిదానుమ్ తిలన మెన జో దూత అంక అర్దుమ్ సంగిలన్.

15 “తెదొడి అన్నె, జా తేరబోద వెన తిలి టాన్ తుయి దెకిల పానివో కిచ్చొ జవుల మెలె, ప్రెజల్, జనాబ్, రాజిమలు అన్నె బానల్ కొడ్డె జతసక.

16 పడ్డొ, తుయి దెకిల దెస్సు కొమ్ముల్ జల రానల్, జలె, జంతు తెన్ బెద, లంజె జా తిలి తేరబోదక జేవ్ ఒగ్గర్ విరోదుమ్ జవుల. జేవ్ జాక సీపాడ్ కెర, డుమ్డి కెర, జాచి అగ్గెచి సిద్ర కా కెర, జాక అగితె డయ గెలుల.

17 కిచ్చొక మెలె, దేముడు సంగిల కొడెచి కామ్ పూర్తి నెరవెర్చుప జతె ఎదక, జేవ్ ఎక్కి, మెస్సు తా జోవయించి ఇస్టుమ్ జర్గు కెరుక మెన, జో జంతుచి అత్తి జోవయించి రానల్చి సెక్తి అదికారుమ్ జేవ్ సార్చు కెర దా, జోచి కామ్ జర్గు కెరుక మెన, దేముడుయి జర్గు కెర అస్సె.

18 అన్నె, తుయి దెకిలి తేరబోద కొన్నె మెలె, బూలోకుమచ రానల్చి ఉప్పిరి అదికారుమ్ తిలి *వెల్లి పట్టుమ్ జయెదె,” మెన దూత అంక సంగిలన్.

18

బబులోసు చి తీర్పు

1 ఇన్నెచి పడ్డొ కిచ్చొ దెకిలయ్ మెలె, అన్నెక్ దూత పరలోకుమ్ తెంతో ఉత్త అయలిసి దెకిలయ్. జోక ఒగ్గర్ అదికారుమ్ తిలి. జోచి ఒగ్గర్ ఉజ్జడిక ఒండి బూలోకుమ్ ఉజ్జె జా గెలి.

2 పడ్డొ గట్టిజ అవాడ్ కెరన కిచ్చొ మెన ఒర్చు దిలో మెలె,

‡ 17:8 17:8 ఏక్ వేల రోమ్ దేనిమ్చ నీరో క్షెనర్ రానొక; మెలె వెల్లి రానొక; ‘జంతు’ మెన సంగితయ్ మెన సగుమ్జన్ ఉచర్తతి. జో నీరో నంపజలనక ఒగ్గర్ అల్లర్ కెర తా అత్తొ కెరన్, గని జోవయించి బుద్ది తిలో దొమితియన్ మెలొసా సగుమ్ వెర్చుల్ గెలి పడ్డొ క్షెనర్ రానొ జలన్, చి జో కి నీరోచి రెతి నంపజలనక ఒగ్గర్ అల్లర్ కెర్చన్. జో కి ‘అవ్ ఎత్తి అదికారుమ్ తిలో దేముడు’ మెన సంగితె తిలన్. అన్నె దన అల్లర్ కెర్చన్ పడ్డొ తిల. § 17:8 17:8 11:7 దక. * 17:8 17:8 3:5, 13:8 దక. † 17:9 17:9 రోమ్ పట్టుమ్ సత్తు మెట్టల్చి ఉప్పిరి తిలి. ‡ 17:14 17:14 యేనుప్రబు, గెద. § 17:16 17:16 పడ్డొ రోమ్ పట్టుమ్చి రాజిమ్ దన అల్లర్ జలి. * 17:18 17:18 జేవ్ పారులె రోమ్ పట్టుమ్చ దస్సి సెక్తి తిలి. పడ్డొ అన్నె సగుమ్ దేనిమ్ల దన అల్లర్ కెర తిలి.

“వెళ్లి బబులోను నేడ గెచ్చు అన్నె, నేడ గెచ్చు అన్నె.

జా బూతల్ జితి టాన్ జా అన్నె;

ఎత్తి, వెట్కారుమచి బూతుమ్ రకితి టాన్,

ఎత్తి, గర్చి పిట్ట రకితి టాన్ జా అన్నె.

³ కిచ్చొక మెలె, జేవచి లంజె ఆసచి రన్నుమ్ పియ

రాజిమలు ఎత్తిచ మాన్సుల్ మచ్చు గెచ్చు అన్నె, చి

జేవ తెన్ ఈంజ లోకుమచ రానలు లంజె జా అన్నె,

చి జేవచి పాపుమ్చ ఆసలచి సామ్మారుమ్క

ఈంజ లోకుమచ సావుకర్లు సామ్మారుమ్ జా అన్నె.”

మెన జో దూత సంగిలన్.

⁴ తెవెడి, పదలోకుమ్ తెంతో చి అన్నెక్ అవాడ్ కిచ్చొ సంగిలిసి సూళ్లయ మెలె,

“జాచ పాపల్తె తూమ్ నే బెదితి రిసా,

జాచ సిచ్చల్చ దెబ్బల్ తుమ్క నే జెతి రిసా

అంచ వైజల్, జాచి తెంతో తుమ్ బార్ జా.

⁵ జా కెర్ల పాపల్ కెత్తి మెలె,

ఆగాసుమ్ ఎద పాచిత్ రితి కొట్టు జతతి,

చి జా కెర్ల జాచ పాపల్

దేముడు నే పచ్చితె ఏదన్ల కెర్లయ్.

⁶ జా దిలి ఎదిలి జాక దా,

జా కెర్ల కముచి కంట అన్నె జాక దొన్ని వాటల్ కెర,

జా కయ్లి గిన్నుచి విన్నుమ్చి జా పితి రితి

అన్నె దొన్ని వాటల్ కలోచ దాస.

⁷ జాక జయ్యి కిసి గవురుమ్ ఉచరస పోకిరి కెర్లొ కొల్లి

జయ్యి నొప్పి జా ఏడ్డి రితి, సిచ్చ దాస.

‘ఆవ్ రాని జా వెస అన్నె,

రండెల్ మాన్సు నెంజి,

ఆవ్ కెయ్క ఏడుకుడు జంక నాయ్’

మెన జాచి పెట్టి ఉచరంతయ్.

⁸ జాక, ఎక్కి దీసి, జాక సిచ్చల్చ దెబ్బల్ లయ్యుల.

కిచ్చొ సిచ్చల్ మెలె, మొర్లు, దుకుమ్, చి కరు జతిసి, చి ఆగితె డడ్డ గెచ్చెదె.

కిచ్చొక మెలె, జాక తీర్పు కెర సిచ్చ దెతో ప్రబు జలో దేముడు సత్తుచొ”

మెన జా అవాడ్ సంగిలన్.

వెళ్లి బబులోనుక సంపజల మాన్సుల్

⁹ చిన్నె, వెళ్లి బబులోను తెన్ లంజె జా పోకిరి జల బూలోకుమ్చ రానల్ జా డడ్డితి సిచ్చచి దుమ్మొ దెక, జాచి రిసా ఏడుకుడు జవుల.

¹⁰ జా సిచ్చ జత బాదల్క బియ్ కెర, దూరి టీవోజె తా కిచ్చొ మెన ఏడుల మెలె,

“అయ్యె! అయ్యె! తుయి వెళ్లి పట్టుమ్, తుయి వెళ్లి బబులోను పట్టుమ్!

ఎక్కి గడియయ్ తుచి సిచ్చ జర్లు జలి!”

మెన ఏడుల.

¹¹ అన్నె, బూలోకుమ్చ సావుకర్లు జాచి రిసా ఏడుకుడు జవుల. జా గెలె, జాచి సామన్ అన్నె కోయి గెంతి నాయ్ చి రిసా ఏడుకుడు జవుల.

¹² కీస సామన్లు మెలె, బజార్ సామన్, వెండి సామన్, రత్నాలు, ముత్యల్, చెంగిలి బట్ట, బట్టతె దెరయ్తి ఊద రంగు, సిల్కు బట్ట, ఎరన బట్ట, ఎత్తి రగల్ వాసనచి దారు, ఏనుగు కోరల్క తెయార్

కెర్ల వస్తుల్, ఒగ్గర్ విలువచి దారుక తెయార్ కెర్ల వస్తుల్, కంచు సామన్, ఇనుము సామన్, నూటి రగల్ పత్రల్ కెర్ల సామన్,

13 * దాల్చిమ్ చెక్కల్, బోడి గాఁసంతి చెంగిల్ వాసిన తేలు, దూపుమ్, † అత్తర తేలు, గండుమ్, ద్రావ రన్నుమ్, ‡ మాములుమ్ తేలు, మెత్తన పీట్టు, గోదుము, సామ్మూల్, మెండల్, గోడలు, రదుములు, గొతిమాన్సుల్; మెలె మాన్సుల్ చ జివుల్.

14 ఇన్నెతెన్ కిచ్చొ ఏక్ కొడు బెదితయ్ మెలె,
“తుయి పెట్టి ఆన జలి పంటో తుక ముల దా అన్నె, అన్నె
తుక కెయక అన్నె నే దొర్కు జతి రితి,
తుచి సుక్కుమ్ తుచి బడాయ్ జలిన్ పూర్తి గెలి.”

15 జా లంజెచి పట్టుమ్తె జోవయించి సామన్ దొర్కు కెరన ఇన పుస్తకల్ ఏకిల సావుకర్లు కి దూరి టీవోజ, జాచి సిచ్చుచ బాదల్ క బియక కెర, ఇసి మెన ఎదార్దుమ్ ఏడుకుడు జవుల.

16 “అయ్యో! అయ్యో! చెంగిల చెంగిల బట్టల్,
ఊద రంగుచ, ఎరన రంగుచ పాలల్ గలన,
బజరి, రత్నాలు, ముత్యల్ తియన్లె వెల్లి పట్టుమ్
కెర్లె నస్తుమ్ జా అన్నె!

17 ఎక్కి గడియయ్ జాచి సామ్నారుమ్ పూర్తి పాడ జా అన్నె!”

మెన ఏడుకుడు జవుల.

పడ్డో, ఓడల్ ఇండయత ఎజొమాన్లు, సముద్రుమ్తె గెతన, ఓడల్తె కూలి కామ్ కెర్లన, చి సముద్రుమ్ జీన బియ్యారి కెర్ల ఎత్తిజిన్ దూరి టీవోజ,

18 జా లంజెచి పట్టుమ్ డడ్డితిన్చి దుమ్మొ దెక, కిచ్చొ మెన ఒర్చిల మెలె,

“ఈంజ పట్టుమ్చి ఎదిలి కేన్ పట్టుమ్ అన్నె?”

మెన దుకుమ్ కేక్ గెల.

19 జోవయించ బోడిల దూడి వించన ఏడుకుడు జా కిచ్చొ మెన అన్నె కేక్ గల మెలె,

“అయ్యో! అయ్యో! సముద్రుమ్తె గెత ఓడల్ తిలన ఎత్తిజిన్ జేవేచి

సామ్నారుమ్క సామ్నారుమ్ జలి వెల్లి పట్టుమ్

కెర్లె నస్తుమ్ జా అన్నె!

ఎక్కి గడియయ్ పూర్తి నాసెనుమ్ జా గెచ్చు అన్నె!

20 ఓ పరలోకుమ్, దేముడుచ ఓ మాన్సుల్,

జోచ బారికుల్ జలన, జోచ కబుర్లు సంగిలన,

జాచి రిసా సర్ల జా!

కిచ్చొక మెలె,

జా తుమ్క అల్లర్ కెర్లె రిసా,

దేముడు జాక తీర్పు కెర,

సిచ్చు కెర అన్నె.”

మెన కేక్ గల్ల.

21 తెదోడి, సత్తుచొ ఏక్ దూత ఎక్కిలో తిర్వొలిచి ఎదిలి జాడుచి ఏక్ పత్తురు ఉక్కుల, సముద్రుమ్తె గల కిచ్చొ మెన సంగిలన్ మెలె,

“ఓ బబులోను వెల్లి పట్టుమ్,

తుయి ఇసి డీన గలి జా అన్నె కెయ్యక కి డీసె నాయ్.

22 అన్నె వీన బజాయ్తి అవాడ్, ఎత్తి బజెన బజాయ్తిసి,

మూరి పుజితిసి, నప్పిర్మూరి పుజితిసి,

* 18:13 18:13 తియన వస్తువల్తె రోసుల్తె గలుక జయెదె.

† 18:13 18:13 ఏక్ రగుల చెంగిల్ వాసిన తేలు.

‡ 18:13

18:13 జా దస్సి ఒలివ పండ్లచి తేలు వాడిక కెరుల.

అప్పు తెంతో కెయఁక కి తుచితె కో సూనతి నాయ్.

అన్నె, కిచ్చొ రగుమ్ కామ్ కెర్తన కి
తుచితె కెయఁక అన్నె తతి నాయ్.

అన్నె, తిర్వేలి బులితి అవాడ్
తుచితె కెయఁక అన్నె కోయి సూనతి నాయ్.

23 అన్నె, తుచితె కేన్ దీవుచి ఉజిడి

అన్నె కెయఁక లగె నాయ్.

అన్నె, పెండ్లి ఉబెడో పెండ్లి ఉబేడేచి అవాడ్లు
తుచితె అన్నె కెయఁక కో సూనతి నాయ్.

కిచ్చొక మెలె, తుచ సొపుకర్లు ఒండి లోకుమ్క వెల్లో జా తిల,
చి తుచి మెంగుర్ కామ్క ఎత్తి రాజిమ్లుచ మాన్సుల్ మోసిమ్ జా గెల.

24 అన్నె, జేవతెయి దేముడుచ కబుర్లు సంగితసచి,

జోవయించయ్ జల మాన్సుల్ ఎత్తిజిన్చి,
అన్నె బూలోకుమ్తె మాన్సు మాల్దన ఎత్తిజిన్చి
లోయి జా పట్టుమ్తె డీసిలిచి సిచ్చ జలి”

మెన సత్తుచో జో దూత సంగ సముద్దుమ్తె వెల్లో పత్తురు గలిలన్.

19

జా లంజెచి పట్టుమ్క ప్రబు సిచ్చ కెర్తిసి

1 ఇన్నెచి పడ్డో, పరలోకుమ్తెచ ఒగ్గర్జిన్ జనాబ్ జట్టు తెన్ కేక్ గలిన్చ అవాడ్లు సూన్యమ్. కిచ్చొ మెన
కేక్ గల మెలె,

“*దేముడుక జెయ్యి!

రచ్చన, గవురుమ్, సెక్తి, అమ్చో దేముడుతెయి అస్సె!

2 “జోచ తీర్పులు సిచ్చలు సత్తిమ్చ, సరిగచ.

జేవచ లంజె కమొక ఒండి లోకుమ్క నాసెనుమ్ కెర్తి జా వెల్లి లంజెక

జో తీర్పు కెర సిచ్చతె గల అస్సె,

చి జోచ సేవ కెర్తనచి లోయి జా సువ దిలి రిసొచి సిచ్చ

జో నెరవెర్లుప కెర అస్సె.”

మెన కేక్ గల,

3 అస్సెక్ సుట్టు ఇసి మెన కేక్ గల,

“దేముడుక జెయ్యి!

జా లంజె జలి వెల్లి పట్టుమ్ డడ్డ గెలి దుమ్మొ

నే కుట్టితె కెయఁక తెయఁక వెగె గెతయ్!”

మెన కేక్ గలిల.

4 తెటొడి †విస్సిక్ చెత్తర్జిన్ వెల్లెల మాన్సుల్, చి †సింగాసనుమ్చి సుట్టునంత టీవోజ తా చెత్తర్ జివుల్
సెర్ను సేడ, సింగాసనుమ్తె వెన తిలో దేముడుక,

“అమేన్! దేముడుక జోఒర!”

మెన సంగ బక్తి కెర్త.

5 అన్నె, కిచ్చొ మెన సంగ సిజాసనుమ్ తెంతో ఏక్ అవాడ్ అయిల మెలె,

“తుమ్ జోచ సేవ కెర్తన, తుమ్ జోక బితన, బాల వెల్లో ఎత్తిజిని,

అమ్చో దేముడుచి గవురుమ్ గాయ్!”

* 19:1 19:1 జోవయించి జాన తెన్ ‘హల్లిలాయా’ మెన కేక్ గలుల, ‘ఎత్తి అదికారుమ్ తిలో దేముడుక జెయ్యి!’ మెలి అర్దుమ్ తెన్
† 19:4 19:4 4:4 దెక. ‡ 19:4 19:4 4:6-8 దెక.

మొన అవాడ అయ్యితి.

మొండపిల్లచి పెండ్లి

6 తెదొడి ఒగ్గర పానివో నూయి జతి అవాడ అయ్యితి రితి, ఒగ్గర ఉర్వుల కెర్లినచి అవాడ అయ్యితి రితి, ఒగ్గరజిన జనాబచ అవాడ్లు రితి నూన్లయ. కిచ్చి మొన కేక గల్ల మెలె,

“ఎత్తి నెక్కి అదికారుమ్ తిలో దేముడుక జోబర!

ప్రబు జలో అమ్చో దేముడు ఏలువ కెర్తయ్!

7 మొండపిల్లచి పెండ్లి జతి సమయమ్ జా అయ్యితి, చి

9 పెండ్లి ఉబేడ తెయార కెరన అస్సెచి రిసా

ఆవ్ సర్దనంతోనుమ్ జా, జోక గప్పురుమ్ కెరుచు!

8 పెండ్లి ఉబేడ చొక్కెలచి పూర్తి నుద్దిచి చెంగిలి బట్ట గలనుక మొన

జాక దిల!”

మొన కేక గల్ల. జా చెంగిల్ బట్టక కిచ్చి అర్దుమ్ మెలె, * ఎత్తి అదికారుమ్ తిలో దేముడుచ జల మాన్పుల్చ పున్నిమ్చ కమొ జవుల.

9 అన్నె జో దూత అంక కిచ్చి సంగిలన్ మెలె, “ఇసి రెగుడు, ‘మొండపిల్లచి పెండ్లి విందుతె బుకార్లనక చెంగిలి’ మొన రెగుడు” మెలన్, చి అంక అన్నె, “ఈంజ కొడో దేముడుచి సత్తిమ్చ కొడోయ” మెలన్.

10 తెదొడి, బక్కి కెరుక మొన, జో దూతచి చట్టె సెర్పు సేడ్లయ్, గని అంక జో, “దన్సి కెరుక నాయ్. తుచి రితి, యేనుక నంప కెర్ల తుచ బావుడ్లుచి రితి జయిందె. మెలె, దేముడుక సేవ కెర్తొసా జయిందె. అంక పోసి, గని దేముడుకయ్ జోకరు.” మెలన్. కిచ్చిక మెలె, యేను సంగిలి జో దెకయ్యలి సాచి, దేముడు సంగిలో కబుర్లు ఎక్కి ఆత్మ తెంతొచ.

చొక్కెలో గోడతె వెగ జెతొసా

11 తెదొడి కిచ్చి దెకిలయ్ మెలె, పరలోకుమ్ ఉగ్గి జా తిలన్ దెకిలయ్, చి అదె! చొక్కెలో గోడ! జోతె వెసిలోసాచి నావ్ కిచ్చి మెలె, ‘నిదానుమ్చో, సత్తిమ్చో’. చి సత్తిమ్చ తీర్పుల్ కెర, ‘దేముడుచి సత్తిమ్ జీనున్’ మొన, యుద్దుమ్ కెర్తయ్.

12 జోచ అంకివో కీస మెలె, ఆగి లగిల్ రితి, చి జోచి బోడితె ఒగ్గర కిరీటల్ అస్తి. జోచి అగి రెగిడ్లి నావ్ ఏక అస్సి. గని కిచ్చి నావ్ గే ఎక్కి జోకయ్ ఎర్కె, గని అన్నె కక్కయ్ నాయ్.

13 లోయితె బుడ్ల తిలో పాలుమ్ జో గలన అస్సి, చి జోక తిలి నావ్ కిచ్చి మెలె, ‘దేముడుచి †కోడు’ మెలి నావ్ తిలన్.

14 అన్నె, పరలోకుమ్చ నయన్యుములు కి, నుద్ది తిలి చొక్కెలి చెంగిలి బట్టచ పాలల్ గలన, చొక్కెల గోడల్తె జేవ్ కి వెగ, జోచి పట్టి గెతతి.

15 ఎత్తి అదికారుమ్ తిలో దేముడుక †నేన్ల మాన్పుల్క మూర్తి వాండి తిలి కండా జోచి చోడి తెంతొ బార జతయ్. గొవుడుచి ఇనుముడండో తెన్ జోపయింక ఏలువ కెరెదె. ఎత్తి నెక్కి అదికారుమ్ తిలో దేముడుచి సిచ్చుచి కోపుమ్చి గిన్నతె జో నుచ, జేవ్ మాన్పుల్క కెర్తి సిచ్చు జో జర్గు కెరెదె.

16 జోచి పాలుమ్తె చి జోచి జంగయ్ చి ఉప్పిరి ఏక నావ్ అస్సి. ‘రానల్క రానొ, ప్రబుల్క ప్రబు’ మెలి నావ్.

ఆకరచి యుద్దుమ్

17 తెదొడి కిచ్చి దెకిలయ్ మెలె, పొద్దుచి ఉజడితె టీవోజె తా ఏక దూత గట్టిజ అవాడ కెరన, పొద్దు ఆగానుమ్చి మదెనె టీవోజె, పక్కయ్ ఉడ్డితె ఎత్తి పిట్టల్క కిచ్చి మొన కేక గలో మెలె, “తుమ్ జా! చి దేముడు దొర్కు కెర్తి వెల్లి విందుక తెయార జా తా.

§ 19:7 19:7 ‘మొండపిల్లక గెతి బాలి’ మెలి కిచ్చి అర్దుమ్ తయెదె మెలె, యేనుక్కిచ్చుక నంపజలన మొత్తమ్, నంపజలన మొత్తమ్చి నంగుమ్, ఎవను కచి ఉత్తమ్ 5:31-32, యిర్షియా 2:1-3, యెసయా 49:18, 69:10. పడ్డో జేవ్ నంపజలన గెచ్చ జంక తిలి నొచి యెరూసలేమ్, మెలి పరలోకుమ్చి పట్టుకుక కి ‘మొండపిల్లచి బాలి’ మెనుల. 21:9, 10. * 19:8 19:8 నెంజెలి ‘ప్రబుచయ్ జల మాన్పుల్’ మొనక జయెదె. † 19:13 19:13 యోహాను 1:1. ‡ 19:15 19:15 నెంజెలి ‘నెసిల మాన్పుల్క’ మొనక జయెదె.

18 రానల్చి సిద్ద, వెయి జమాన్సుక వెల్లోచి సిద్ద, ఒగ్గర్ సెక్కిబలుమ్ మాన్సుల్చి సిద్ద, గోడల్చి సిద్ద, జోవయింతె వెగినచి సిద్ద, ఎత్తి రగల్ మాన్సుల్చి సిద్ద; జేవ్ గొతి నెంజిలన జలెకి, గొతిమాన్సుల్ జలెకి; బాల వెల్లోచి సిద్ద కన్నె” మెన, దూత పిట్టల్క సంగిలన్.

19 తెదొడి కిచ్చొ దెకిలయ్ మెలె, జో పాపుమ్చొ జంతు, చి ఒండి లోకుమ్చ రానలు, జోచ నయన్సుముల్ తెన్ ఎక్కితె బెర్త. కిచ్చొక మెలె, జో గోడతె వెసిలోసాచి ఉప్పిరిచి జోచ నయన్సుముల్చి ఉప్పిరి యుద్దుమ్ కెరుక మెన బెర్త.

20 తెదొడి కిజంతు దెర్ను సేడ్డె, చి జో తెన్, జోచి నావ్ తెన్ వెల్లో మాయకమొ కెర్లొ అన్నెక్ * జంతు కి దెర్ను సేడ్డె. జో అబద్దుమ్క దేముడుచ కబుర్లు సంగితోసా ఆవ్ మెన అగ్గె సంగ తిలన్. అన్నె, జో జంతుచి గుర్లు కెరవన, జోచి బొమ్మక బక్తి కెర తిలనక మోసిమ్ కెర తిలో. జో కి దెర్ను సేడ్డె. జలె, జేవ్ దొగులక జేవ్ తత్తె, ఎడ్డి రంగు లగితి వెల్లో ఆగి గొయ్చి గడ్డె గల దిల.

21 తెదొడి, గోడతె వెసిలోసా జోచి కండా తెన్ రానల్చకచి జేవ్ నయన్సుములు ఎత్తిక మారయ్ గెలన్. జోచి చొండి తెంతో బార్ జతి కండా తెన్ అన్నె, ఎత్తి పిట్టల్ జేవ్ మొల్లన ఎత్తిజనచి సిద్ద కా గెల కెర, పేట్ బెర్త కయ్ల.

20

నయ్తాన్ మట్టు నెంజిలి గొయితె వెయి వెర్పుల్ తతి సిచ్చ జతిసి

1 అన్నె కిచ్చొ దెకిలయ్ మెలె, వరలోకుమ్ తెంతో దూత ఎక్కిలో ఉత్త జెతె తిలిసి దెకిలయ్. జోచి అత్తి మట్టు నెంజిలి జా * వెల్లి గొయిచి తాలుమ్ కడి, చి జాడు తిలి ఏక ఇనుము గొల్పు తిల.

2 తెదొడి వెల్లోచొ జో అయిక, జలె పూర్ణమ్ తెంతొచొ అయిక, మెలె, నయ్తాన్ జలో నయ్తానుక దూత దెర కెర, వెయి వెర్పుల్ జో దస్సి తతి రితి జోక బంద గెల కెర,

3 మట్టు నెంజిలి జా గొయితె గల దా, వెయి వెర్పుల్ గెతె ఎదక దేముడుక నేన్ల మాన్సుల్క జో అయి అన్నె నే మోసిమ్ కెర్లె రిసా, జోచి ఉప్పిరి డంక దిలన్. జా వెయి వెర్పుల్ గెలె, జోక గడియ విడ్డల్ కెరుక.

క్రీస్తు తెన్ వెయి వెర్పులు ఏలువ కెరుక

4 తెదొడి కిచ్చొ దెకిలయ్ మెలె, సిజాసనల్, చి జోవయిం చి ఉప్పిరి కో వెన తిల మెలె, బూలోకుమ్చ దేసిమ్లు ఎత్తిక ఏలువ కెర్లె రిసా దేముడు సెలవ్ దిలన. కొన్నె మెలె, యేసుచి రిసా జేవ్ సాచి సంగ తిలి రిసా, చి దేముడుచి కోడు జేవ్ దెరన్ల రిసా, బోడి గండల్ జలన, చి అన్నె కొన్నె మెలె, జో పాపుమ్చొ జంతుక చి జోచి బొమ్మక బక్తి నే కెర్లన, జోచి నిర్దెలె అత్తిలె జోచి గుర్లు నే కెరవన్లన. జేవ్ జలె, జేవ్ జా ఉట్టిల, చి వెయి వెర్పులు క్రీస్తు తెన్ ఏలువ కెర్ల.

5 ఈంజయ్ జేవ్ జా ఉట్టిన్క ‘తోలితో చి’ మెనుక జయెదె. తోలితోచి ఈంజ జేవ్ జా ఉట్టిన్తె బెదితనక చెంగిలి. ఎత్తి అదికారుమ్ దేముడుచ జేవ్ జవుల! కిచ్చొక మెలె, జోవయిం చి ఉప్పిరి †వడ్డొకచి మొర్నుక కిచ్చొ అదికారుమ్ తయె నాయ్.

6 తోలితో చి జేవ్ జా ఉట్టిసి జతన దేముడుక చి క్రీస్తుక పూజర్లు రిత జవుల, చి వెయి వెర్పుల్ పూర్తి జో తెన్ ఏలువ కెరుల.

నయ్తాన్ అన్నె విడ్డల్ జా యుద్దుమ్ కెర్లెసి

7 జేవ్ వెయి వెర్పుల్ కెడ్డె, జో జేలి జలిసి తెంతో నయ్తాన్ విడ్డల్ జా,

8 ‘గోగు’ ‘మాగోగు’ మెన బూలోకుమ్చ చెత్తర్ పక్కలెచ దేముడుక నేన్ల మాన్సుల్ యుద్దుమ్క తెయార్ జతి రితి, జో నయ్తాన్ జోవయంక మోసిమ్ కెరెదె. జేవ్ మాన్సుల్చి లెక్క కెర్లె మెలె, నముద్దుమ్తెచి ఇన్నగిడ్డల్ కెత్తి జా లెక్క కెరుక నెంజి గే, తెదివాట్ జన్ జవుల.

§ 19:20 19:20 నముద్దుమ్ తెంతో బార్ జలోసా 13:1. * 19:20 19:20 బుయి తెంతో బార్ జలోసా 13:11. * 20:1 20:1 9:1 దెక. † 20:5 20:5 మెలె, వెల్లో ఆగి గొయ్చి సిచ్చతె గెతిసి. 20:14.

9 తెదోడి జేవ్ బూలోకుమచి రుందిలి టాన్తె వెగ జా, దేముడుచ బల మాన్సుల్చి నుట్టునంత, చి జోఁస్త్రేమ తిలి వట్టుమచి నుట్టునంత బెర అయిల. గని పరలోకుమ తెంతో దేముడు తెంతో ఆగి నూఁయి జా జోవయింక డయ గెలి.

10 జోవయింక మోసిమ్ కెర్లొ నయతాన్ సిచ్చ జతె తంక ఎడ్డి అగి లగితి వెల్లి అగి గోయ్తె కిగలి జలో. జో పాపుమచొ జంతు, అన్నె అబద్దుమక 'దేముడుచ కబుర్లు సంగితోసా అవ్' మెనన్లొసా కి ఒత్తయ్ గలి జా అన్సి. జేవ్ రాతి మెద్దెని కెయక తెయక నే పిట్టె, ఒత్త సిచ్చల్ బాదల్ జతె తవుల.

మొర్లనక ఆకర్చి తీర్పు జతిసి

11 అన్నె కిచ్చొ దెకిలయ్ మెలె, వెల్లి చొక్కొలి సిజాసనుమ్, చి జాచి ఉప్పిరె వెసిలోసాక దెకిలయ్. జోతె తెంతో బూలోకుమ ఆగానుమ్ నిగ గెల, చి జేవ్క అన్నె కేన్ టాన్ నాయ్.

12 తెదోడి కిచ్చొ దెకిలయ్ మెలె, బాల వెల్లి మొర్లన ఎత్తిజన్ సింగాసనుమచి పురె బీచ తతికయ్, పుస్తకల్ * ఉగిడ్ల. వడ్లొ అన్నెక పుస్తకుమ్ ఉగిడ్ల; పరలోకుమతె జింక సెలవ్ తిలనచ నవ్వొ రెగిడ్లి పుస్తకుమ్. జలె, మొర్లన జేవ్ కెర్ల కమెచి రిసా జేవ్ పుస్తకతె రెగ్ల తిలి రితి తీర్పు జలె.

13 తెదోడి, జేవ్తె మొర్లనక నముద్దుమ్ సార్పు కెర దిలి, అన్నె మొర్పు చి మొర్లన రకితి టాన్ ఒత్త తెంతో తిలనక సార్పు కెర దిల, చి నముద్దుమ్తె మొర్లన, చి మొర మొర్లన, రకితి టాన్తె తిలన ఎత్తిజన్ జీవ్ జా, సింగాసనుమచి పురె బీచ, జేవ్జా, జేవ్క కమెచి రిసా తీర్పు జవుల.

14 తెదోడి మొర్పు చి మొర్లన రకితి టాన్ వెల్లి ఆగి గోయ్చి గడ్ల * గలి జలె. వెల్లి అగి గోయ్తె గల్లిసి దొన్నెచి మొర్పు జయెది.

15 అన్నె, పరలోకుమతె జింక సెలవ్ తిలనచ నవ్వొ రెగిడ్లి పుస్తకుమతె కచి నావ్ తయె నాయ్ గే, జెఁవ్వి వెల్లి అగి గోయ్తె * గలి జలె.

21

నొవి ఆగానుమ్, నొవి బుఁయి

1 తెదోడి అవ్ కిచ్చొ దెకిలయ్ మెలె, నొవి ఆగానుమ్, నొవి బుఁయి. అగ్గెచి ఆగానుమ్ అగ్గెచి బుఁయి కేడ తిలి, చి నముద్దుమ్ కి నాయ్.

2 వడ్లొ, పరలోకుమచి నుద్దిచి పట్టుమ్, నొవి యెరూసలేమ్ పరలోకుమ్ తెంతో దేముడు తెంతో, మున్సుక జెతికయ్ పెండ్లి ఉబేడి రితి తెయార జా తా, ఉత్త జెతిసి దెకిలయ్.

3 అన్నె, సింగాసనుమ్ తెంతో చి గట్టిజ అవాడ్చి అవాడ్ కిచ్చొ సంగిలిసి నూన్లయ్ మెలె, "ఈందె, దేముడు జతి టాన్ మాన్సుల్తెయి అన్నె. జోవయింతెన్ జో జయెది. జేవ్ జోచయ్ ప్రెజల్ జా తవుల, చి జో సొంతయ్ జేవ్ తెన్ తయెది, జేవ్క దేముడు జా తయెది.

4 జోవయించ అంకివొతె ఆఁసునొ కెయక అన్నె నే జెతి రితి, జోవయించ ఆఁసునొ జొయ్యి పుంచ గెలెది, చి అన్నె తెంతో కిచ్చొ మొర్పు తయె నాయ్. ఏడుకుడు జతిసి, ఏడ్డిసి, నొప్పి కి తయె నాయ్. కిచ్చొక మెలె, పొర్చిచి ఎత్తి ఉట్ట గెల." మెన జా అవాడ్ సంగిలన్.

5 తెదోడి, సింగాసనుమతె వెసిలోసా, "ఈందె, ఎత్తి నొవి తెయార కెర్లసి" మెన, అన్నె, "ఈంజ ఎత్తి రెగుడు. ఈంజేవ్ కొడొ సత్తిమచ, నంపజతన" మెన జో సంగిలన్.

6 తెదోడి అంక, "పూర్తి జర్లు జలి, 'అల్పా, ఓమెగ' మెన అవ్ మొదొల్చొ, ఆకర్చొ. కక్క తాన్ కెర్లె, డబ్బుల్ నే దెతె, జీవ్ దెతో పాని అంచి ఊంతు తెంతో ఆరి దెయింది.

7 కో జీసుల గే, అంచి రాజిమచి ఈంజ వాట జోక దెయింది, చి అవ్ జోవొ దేముడు జయింది, జో అంక పూత్త జా తయెది.

† 20:9 20:9 దొన్నె అర్లత ఉచరుక జయెది. ఏక్ మెలె, మాములుమ్ యెరూసలేమ్ పట్టుమ్. అన్నెక మెలె, కేన్ ప్రబుచయ్ మాన్సుల్ తవుల గే, ఒత్తయ్ మెన ఉచరుక జయెది. § 20:10 20:10 ఎత్తి అదికారుమ్ తిలో దేముడు ఒత్త గలయ్లో, గెద. * 20:12 20:12 కో ఉగిడ్ల గే సంగె నాయ్. † 20:14 20:14 ఎత్తి అదికారుమ్ తిలో దేముడు ఒత్త గలయ్లో, గెద. ‡ 20:15 20:15 ఎత్తి అదికారుమ్ తిలో దేముడు ఒత్త గలయ్లో, గెద.

8 గని అంది సాచి జంక బితన, నముకుమ్ నెంజిలన, నిదానుమ్ నెంజిలన, హత్య కెర్తన, లంజి జతన, మెంగ మాన్సుల్, బొమ్మల్ జొక్కర్తన, అబద్దుమ్ జతన, అబద్దుమ్ కెర్తన, సయతాన్చి వెట్టూరుమ్ జలన, జేవ్క సిచ్చ, గండకము తెన్ ఆగి లగితి వెల్లి ఆగి గొయ్తె గలుల. ఈంజ దొన్నిచి మొర్చు.”

మెండపిల్లక తేర్చి జతిసి నొవి యెరుసలేమ్

9 తెదొడి సత్తు ఆకరచ సిచ్చల్ బెర్ల సత్తు గిన్నల్ అగ్గ దెర సువ తిల సత్తు * దూతల్తె ఎక్కిలో అంచితె జా కెర కిచ్చొ మెన అంక సంగిలన్ మెలె, “జో మెండపిల్లక తేర్చి జతి పెండ్లి ఉబేడక తుక దెకయిందె” మెలన్.

10 తెదొడి దేముడుచి యేసుచి ఆత్మసెక్కిక జో దూత అంక ఒగ్గర్ డొంక తిలి డొంగ్రుతె కడ నిలన్, చి జో అంక దెకయ్తెకయ్, ప్రబుచి జా ఆత్మసెక్కిక కిచ్చొ దెకిలయ్ మెలె, జోచి † సుద్ది తిలి యెరుసలేమ్ పట్టుమ్ దెకిలయ్.

11 జా పట్టుమ్చి ఉజిడి కిసి తిలి మెలె, దేముడుచి ఉజిడ్ తెన్ తా, ఒగ్గర్ విలువచి రత్తుమ్చి రితి ఉజిడి లగిలి, వజ్రమ్చి రితి సీసచి రితి బేంటుచి ఉజిడి లగిలి.

12 జా పట్టుమ్క వెల్లి కోట ఒగ్గర్ డొంక తిలి. జా కోటతె బార గుమ్మల్ తిల. జేవ్ బార గుమ్మల్తె ఎక్ ఎక్ దేముడుచొ దూత తిలి. జేవ్ బార గుమ్మల్తె ‡ ఇస్రాయేలుచ బారజిన్ పుత్తర్చుల్చ నెకుమ్లుచ ఎక్కెక్ నవ్వొ, ఎక్కెక్ గుమ్మలె రెగ్గ తిల.

13 తూర్పు పక్క తిన్ని గుమ్ముమ్లు, ఉత్తర పక్క తిన్ని గుమ్ముమ్లు, దచ్చైన పక్క తిన్ని గుమ్ముమ్లు, చి పడమర పక్క తిన్ని గుమ్ముమ్లు తిల.

14 పడ్డొ పట్టుమ్చి కోటక బార పునార్లు, చి జేవ్ పునార్లుతె మెండపిల్లచి చి రిసాచ బారజిన్ బారికుల్చ నవ్వొ ఎక్కెక్ రెగ్గ తిల.

15 అంచి తెన్ లట్టణ్ణో జో దూతక, జా పట్టుమ్కచి జేవ్చ గుమ్ముమ్ల్కచి కోటక † కటార్తి రిసా, బజర్క తెయార్ కెర్తి కటార్తి డండొ తిలి.

16 పట్టుమ్క చెత్తర్ కోనల్, చి జేవ్చ పక్కల్చ కొల్లల్ సమానుమ్ అన్సి, జేవ్చ కోనల్చ కొల్లల్ సమానుమ్ అన్సి. తెదొడి జోచి డండొ తెన్ పట్టుమ్క కటార్లన్. * దొన్ని వెయిల్ దొన్ని పుంజో కిలోమీటర్లు దూరి జేవ్చి కొల్ల. చెత్తర్ పక్కల్ కి సమానుమ్; కెర్ది దీగు జయెదె గే, తెద్ది రూండు, తెద్ది డొంకు కి జయెదె.

17 జేవ్చి కోట కి కటార్లన్. † అరవయ్ చెత్తర్ మీటర్లు డొంకు, మాన్సు కటార్తి రితి, మెలె జో దూత కటార్లన్.

18 జా కోట వజ్రమ్చి వస్తుతె తెయార్ కెర్తిసి, చి పట్టుమ్ రితి బజరి తిలి, చి జేవ్చి ఉజిడి కిసి మెలె, అద్దుమ్ రితి బేంటు లగిలి.

19 జా పట్టుమ్చి కోటచ పునార్లుతె ఎత్తి రగల్ రత్నాలు లగిల. తొలితో చి వజ్రమ్, చొక్కెల్ లగిలి. అన్నెక్ రత్తుమ్ నీలిమ్ రగుమ్ లగిలి, అన్నెక్ రత్తుమ్ ‘యమునా’ మెంతిసి ఎరన లగిలి, అన్నెక్ రత్తుమ్ పచ్చన లగిలి.

20 అన్నెక్ రత్తుమ్ నారింజ రంగు లగిలి, అన్నెక్ రత్తుమ్ అన్నెక్ ఎరన రగుమ్ లగిలి, అన్నెక్ రత్తుమ్ తామర పూల్చి ఎడ్డి రంగు లగిలి, అన్నెక్ రత్తుమ్ సముద్రుమ్చి పచ్చన రంగు లగిలి, అన్నెక్ రత్తుమ్ అన్నెక్ రగుమ్ ఎడ్డి రంగు లగిలి, అన్నెక్ రత్తుమ్ చీంచ్ ఆక్టల్ నొవర్ పలోయ్లి రంగు లగిలి, అన్నెక్ రత్తుమ్ గులాబ్ రంగు లగిలి, అన్నెక్ రత్తుమ్ ఊద రంగు లగిలి.

21 పడ్డొ బార గుమ్మల్చ టట్టల్ కిచ్చొ వస్తుతె తెయార్ జా తిల మెలె, బార ముత్తల్క. ఎత్తి టట్ట ఎక్ ముత్తల్క తెయార్ జలిసి, అన్నె, పట్టుమ్చి వీది రితి బజరి తా, అద్దుమ్చి ఎదిలి కేంటు లగిలి.

* 21:9 21:9 15, 16 అద్యయల్. † 21:10 21:10 19:8 దెక. ‡ 21:12 21:12 జోవయింక అన్నెక్ నాన్ యాకోమ్. ‘ఇస్రాయేలు’ మెలె, జో యాకోబుక అన్నెక్ నాన్ జయెదె, చి టాలిక్ ‘యూదుల్’, నెంజిలె ‘నవంజలన మొత్తుమ్’ చి అర్దుమ్ కెరనక జయెదె. § 21:15 21:15 మీంతి * 21:16 21:16 రహారమ 1,400 నైలు † 21:17 21:17 అరవయ్ చెత్తర్ మీటర్లు మెలె, డచ్చయ్ దొన్ని గణాలు జయెదె, మెలె పుంజిక్ దొన్ని విసా చెత్తర్. పుంజిక్ దొన్ని విసా చెత్తర్ మెలె, బార బారలు, మెలె 144 = 12 x 12. బార నెకుమ్లుచ యూదుల్ తిల, యేసుక బార బారికుల్ కి తిల. జేక ఈంజ నంబర్ ఏక్ టాలి జయెదె.

22 అన్నె, జా పట్టుమీతె కిచ్చొ దేముడుచి గుడి డీసె నాయ్. కిచ్చొక మెలె, ప్రబు జలో ఎత్తి, నెక్కి అదికారుమ్ తిలో దేముడు అన్నె మెండపిల్ల సొంత జా పట్టుమీక దేముడుచి గుడి జవుల.

23 అన్నె, జా పట్టుమీక ఉజిడి దెంక పొద్దు గే జోసు గే నాయ్. కిచ్చొక మెలె, దేముడుచి ఉజిడి జాక దొర్కు జలి ఉజిడి, చి మెండపిల్ల జాక దీవు.

24 జాచి ఉజిడిక ప్రెజల్ ఇండుల, చి ఒత్త కిచ్చొయ్ అందర్ తయె నాయ్.

25 అన్నె, రాతి మెద్దెని కెయల కి జా పట్టుమీచ గుమ్మల్ డంకితి నాయ్, అన్నె, ఈంజ నొవి బూలోకుమ్చ రానలు ఒత్త జోవయించి గవురుమ్, జోవయింక గవురుమ్ దెతిసి ఎత్తి ఒత్త ఆనుల.

26 ఎత్తి ప్రెజల్క దొర్కు జలి గవురుమ్, ఎత్తి ప్రెజల్క దొర్కు జలి సొమ్నూరుమ్ ఒత్త ఆనుల.

27 గని కిచ్చొ పొపుమీచి ఒత్త వెసె నాయ్, చి మర్కటుమ్ గే, అబద్దుమ్ గే ఇండితన ఒత్త వెసితి నాయ్. కో ఒత్త వెసుల మెలె, 'పరలోకుమీతె బెదుతు' మెన మెండపిల్లచి పుస్తకుమీతె కచ నవ్వొ తవుల గే జెవ్వి వెసుల.

22

జీవ్ దెతో పొసిచి గాడు జీవ్ దెతి పలుమీచో రూకు

1 అన్నె జో దూత అంక కిచ్చొ దెకయలన్ మెలె, పరలోకుమీచి జీవ్ దెతో పొసిచి గాడు. కీసి తిలి మెలె, అద్దుమీచి ఎదిలి టేంట తా, దేముడుచి అన్నె మెండపిల్లచి సింగాననుమ్ తెంతో బార్ జా,

2 పట్టుమీచి వీదిచి నెడిమి ఉట్ట గెతయ్. పడ్డో అన్నె కిచ్చొ మెలె, పరలోకుమీచి జీవ్ దెతో రగుమ్ *రూకుల జా గాడుచ దొన్ని పక్కలె అన్సి. జీవ్ రుకాలె బార రగల్ పండ్లు, చి ఎత్తి, జొన్ని పండ్లు పిక తత్తతి. జో రూక్చ అక్కల్ కిచ్చొక కామక జెతతి మెలె, ఒండి ప్రెజల్చక చెంగిల్ కెర్తయ్.

3 ఒత్త తెంతో, కిచ్చొచి రిసా గారచి సాపెనల్ తిలిసి తయె నాయ్. దన్సిచి కిచ్చొ కి తయె నాయ్, గని జా పట్టుమీతె దేముడుచి జో మెండపిల్లచి సింగాననుమ్ తయెదె, చి జోచ సేవ కెర్తన జోక బక్తి కెర్తె తవుల.

4 జోచి మొకొమ్ జీవ్ దెకుల, చి జోవయించి నిర్దె జోచి నావ్ తయెదె.

5 పడ్డో, ఒత్త తెంతో అందర్ తయె నాయ్, చి ఒత్త తిలసక దీవుచి జవున్ పొద్దుచి జవున్ ఉజిడి నాయ్. కిచ్చొక మెలె, ప్రబు జలో దేముడుచి ఉజిడి తయెదె, చి జీవ్ కెయలక తెయలక ఏలుప కెరుల.

6 అన్నె, "ఈంజీవ్ కొడె నత్తిమచ, నంపజతన. అన్నె, ప్రబు జలో, జోచ కబుర్లు సంగితనచి ఆత్మతె సికడ్డో దేముడు జోచో దూతక తెద్రవ అన్నె; జర్లు జంక తిలిసి జోచ సేవ కెర్తనక దెకవుక మెన," అంక జో దూత సంగిలన్.

యేసుప్రబు బే బేగి అన్నె జెయిందె

7 "ఈందె, ఆవ్ బే బేగి అన్నె జెయిందె" మెన యేసు సంగితయ్. ఈంజ పుస్తకుమీతె తిలి కబుర్చ కొడోకో దెరనుల గే, జోవయింక చెంగిలి.

8 ఆవ్ యోహాను ఈంజ ఎత్తి, సూన్లొసా దెకిలోసా. అన్నె, ఈంజ ఎత్తి, సూన దెకిల్ బేగి, అంక ఈంజ ఎత్తి, దెకయలో దూతచి చట్ట నిర్దు సేడ జోక బక్తి కెర్తయ్,

9 గని జో అంక, "తుయ దన్సి కెరుక నాయ్! ఆవ్ తుచో రితో, దేముడుచ కబుర్లు సంగిత తుచ బావొదెవొ తెన్ కి, తుచి రితో సేవ కెర్తొసా జయిందె. దేముడుకయ్ జోకరు!" మెలన్.

10 తెదెడి జో అంక, "ఈంజ పుస్తకుమీచి కబుర్చ కొడో ముద్ర కెరు నాయ్, లుంకడు నాయ్; కిచ్చొక మెలె సమయమ్ పొసి జా అన్నె.

11 పొపుమీతె ఇండితన అన్నె కి పొపుమీతె ఇండితె తత్తు, మర్కటుమ్చ అన్నె మర్కటుమ్ ఇండుతు, పున్సిమ్ జలన అన్నె పున్సిమ్తె ఇండితె తత్తు, సుద్దిచ అన్నె సుద్ది ఇండితె తత్తు." మెన దూత సంగిలన్.

12 యేసుప్రబు సంగిలిసి అన్నె కిచ్చొ మెలె, "ఈందె, ఆవ్ బే బేగి జెయిందె. అయలె, ఎత్తి మాన్సు కెర్ల కమొ కొల్లి జోవయించి కూలి దెయిందె.

13 'అల్ఫా' 'ఓమెగ' మెన, †తోలితోచొ, కర్వడెచొ, మొదొల్చొ ఆకర్చొ ఆవ్వి" మెన యేసు సంగిలన్.

* 22:2 22:2 యెహెశ్చెలు 47:12. † 22:13 22:13 నెంజితి "తోలితో మొదొల్ తెంతో ఆకర్చొ ఎదచొ ఆవ్వి" మెన యేసు సంగిలన్.

14 పరలోకుమచి జీవ్ దెతో చెట్టచ వండ్లు కంక సెలవ్ దొర్కు కెరంతి రిసా, చి పరలోకుమచి గుమ్ముమ్ వాట్ పెనుక సెలవ్ దొర్కు కెరంతి రిసా, కో †జోవయించ పాలల్ కేడన తవుల గే, జోవయింకయ్ చెంగిలి.

15 గని గుమ్ముమ్ ఒత్తల్తోచి బయిలె కో అస్తి మెలె, నూనర్లు రిత మాన్సుల్, మెంగ్ర మాన్సుల్, అంజె జతన, అత్య కెర్తన, బొమ్మల్క జోకర్తన, చి అబద్దుమ్క ప్రేమ తా, అబద్దుమ్ కెర్తన ఒండి అస్తి.

16 యేసు, “ ‘అంక నంవజలనచ సంగుమ్లు నూన్తు’ మెన, ఈంజ సాచి త్తుక దెకయ్తి రిసా యేసు మెలో ఆవ్ అంచొ దూతక తెద్దవ అస్సి. దాచిదు పూర్ణుమ్చొ జలో రానొచి సెకుమ్క ఆవ్ చేరు జలోసా, జోచి సెకుమ్తె జెర్మిలోసా, దేముడుచి రాజిమ్చి నొచి దీసిక దొర్కు జలి ఉజిడి దెతో సుక్కో ఆవ్” మెన సంగిలన్.

నంవజా మెన మాన్సుల్క బుకార్దీసి

17 “తుమ్ జా” మెన దేముడుచి నుద్ది తిలి అత్తు అన్నె యేసుచి ⁵తేర్చి జతిసి సంగితతి. అన్నె, ఈంజ కోడు కో నూనుల గే, జేవ్ కి జా మెన అన్నె మాన్సుల్క బుకార్డు. అన్నె, కక్క తాన్ తిలె, జో జెవున్, చి కో ఇన్దుమ్ జవుల గే, డబ్బుల్ నే దెతె ఆరి పరలోకుమచి జీవ్ దెతో పాని నజ పితు.

18 ఈంజ పుస్తకుమచి కబుర్చ కొడొ నూన్త ఎత్తిజిన్క ఆవ్ కిచ్చొ జాగర్త సంగితసి మెలె, ఈంజేవ్ కొడొతె అన్నె కిచ్చొ వేరచి బెదయ్లె, ఈంజ పుస్తకుమ్తె సంగ దెకయ్లె సిచ్చల్ జో మాన్సు నేడ్డి రితి దేముడు సిచ్చ కెరెదె.

19 అన్నె, ఈంజ జోచి కబుర్చి పుస్తకుమ్చ కొడొతె కో కిచ్చొ కడ గెలె, ఈంజ పుస్తకుమ్తె రెగ్ల దెకయ్లి జో జీవ్ దెతి రూకచి, చి జోచి పరలోకుమచి నుద్దిచి పట్టుమ్తెచి జోచి వాట, ఎత్తి అదికారుమ్ తిలో దేముడు కడ గెలెదె.

20 “కచితుమ్, ఆవ్ బే బేగి జెయిందె” మెన ఈంజ ఎత్తిక సాచి జతోసా సంగితయ్. * ఆమేన్, జే, ప్రబు యేసు!

21 జోచయ్ జల మాన్సుల్ ఎత్తిజిన్చి ఉప్పిరి ప్రబు జలో యేసుచి దయ తవున్. ఆమేన్.

† 22:14 22:14 నంజలి ‘ప్రబుచ కొడొ రితి ఇండితతి గె’. § 22:17 22:17 19:7-8, 21:2. యేసుచి తేర్చి మెలె, నంవజలన మొత్తుమ్ గెతి జోవయించి నుద్ది పట్టుమ్, చి జా పట్టుమ్తె బెదితన, నంవజలనయ్ మొత్తుమ్. యెనయా 49:18, 61:10, యిర్మీయా 2:1-3, ఎవెసు కచి ఉత్తమ్ 5:31-32. * 22:20 22:20 తెద్దిలి